



The Holy Bible: Haitian Creole

by

Anonymous

About The Holy Bible: Haitian Creole

Title: The Holy Bible: Haitian Creole
URL: <http://www.ccel.org/ccel/bible/hc.html>
Author(s): Anonymous
Publisher: Grand Rapids, MI: Christian Classics Ethereal Library
Description: This Bible translation was converted automatically from data files made available by the Unbound Bible project. Book names, introductions, titles, paragraphs, and the like were not available, so standard English names have been used. Therefore this file would benefit from additional work by someone who has access to a print edition.
Source: The Unbound Bible
Language: hc
Rights: Public Domain
Date Created: 2002-12-31
CCEL Subjects: All; Bible

Table of Contents

<i>About This Book</i>	p. ii
Title Page	p. 1
Old Testament	p. 2
Genesis	p. 2
Genesis 1	p. 2
Genesis 2	p. 3
Genesis 3	p. 4
Genesis 4	p. 6
Genesis 5	p. 7
Genesis 6	p. 8
Genesis 7	p. 9
Genesis 8	p. 10
Genesis 9	p. 12
Genesis 10	p. 13
Genesis 11	p. 14
Genesis 12	p. 15
Genesis 13	p. 16
Genesis 14	p. 17
Genesis 15	p. 19
Genesis 16	p. 20
Genesis 17	p. 21
Genesis 18	p. 22
Genesis 19	p. 24
Genesis 20	p. 26
Genesis 21	p. 27
Genesis 22	p. 28
Genesis 23	p. 29
Genesis 24	p. 30
Genesis 25	p. 34
Genesis 26	p. 35
Genesis 27	p. 37
Genesis 28	p. 39
Genesis 29	p. 40
Genesis 30	p. 42
Genesis 31	p. 44

Genesis 32.	p. 47
Genesis 33.	p. 49
Genesis 34.	p. 50
Genesis 35.	p. 51
Genesis 36.	p. 53
Genesis 37.	p. 54
Genesis 38.	p. 56
Genesis 39.	p. 58
Genesis 40.	p. 59
Genesis 41.	p. 60
Genesis 42.	p. 63
Genesis 43.	p. 64
Genesis 44.	p. 66
Genesis 45.	p. 68
Genesis 46.	p. 69
Genesis 47.	p. 71
Genesis 48.	p. 73
Genesis 49.	p. 74
Genesis 50.	p. 76
Exodus.	p. 77
Exodus 1.	p. 77
Exodus 2.	p. 78
Exodus 3.	p. 79
Exodus 4.	p. 81
Exodus 5.	p. 82
Exodus 6.	p. 84
Exodus 7.	p. 85
Exodus 8.	p. 87
Exodus 9.	p. 88
Exodus 10.	p. 90
Exodus 11.	p. 92
Exodus 12.	p. 92
Exodus 13.	p. 95
Exodus 14.	p. 96
Exodus 15.	p. 98
Exodus 16.	p. 100
Exodus 17.	p. 102
Exodus 18.	p. 103
Exodus 19.	p. 104
Exodus 20.	p. 105

Exodus 21.	p. 107
Exodus 22.	p. 108
Exodus 23.	p. 110
Exodus 24.	p. 112
Exodus 25.	p. 113
Exodus 26.	p. 115
Exodus 27.	p. 116
Exodus 28.	p. 117
Exodus 29.	p. 119
Exodus 30.	p. 122
Exodus 31.	p. 124
Exodus 32.	p. 125
Exodus 33.	p. 127
Exodus 34.	p. 128
Exodus 35.	p. 130
Exodus 36.	p. 132
Exodus 37.	p. 134
Exodus 38.	p. 135
Exodus 39.	p. 137
Exodus 40.	p. 139
Leviticus.	p. 141
Leviticus 1.	p. 141
Leviticus 2.	p. 142
Leviticus 3.	p. 143
Leviticus 4.	p. 144
Leviticus 5.	p. 145
Leviticus 6.	p. 147
Leviticus 7.	p. 148
Leviticus 8.	p. 150
Leviticus 9.	p. 152
Leviticus 10.	p. 154
Leviticus 11.	p. 155
Leviticus 12.	p. 157
Leviticus 13.	p. 158
Leviticus 14.	p. 161
Leviticus 15.	p. 165
Leviticus 16.	p. 166
Leviticus 17.	p. 169
Leviticus 18.	p. 170
Leviticus 19.	p. 171

Leviticus 20.	p. 173
Leviticus 21.	p. 175
Leviticus 22.	p. 176
Leviticus 23.	p. 178
Leviticus 24.	p. 180
Leviticus 25.	p. 182
Leviticus 26.	p. 185
Leviticus 27.	p. 187
Numbers.	p. 189
Numbers 1.	p. 189
Numbers 2.	p. 191
Numbers 3.	p. 193
Numbers 4.	p. 195
Numbers 5.	p. 198
Numbers 6.	p. 199
Numbers 7.	p. 201
Numbers 8.	p. 204
Numbers 9.	p. 205
Numbers 10.	p. 206
Numbers 11.	p. 208
Numbers 12.	p. 210
Numbers 13.	p. 211
Numbers 14.	p. 213
Numbers 15.	p. 215
Numbers 16.	p. 217
Numbers 17.	p. 220
Numbers 18.	p. 221
Numbers 19.	p. 223
Numbers 20.	p. 225
Numbers 21.	p. 226
Numbers 22.	p. 228
Numbers 23.	p. 231
Numbers 24.	p. 232
Numbers 25.	p. 234
Numbers 26.	p. 235
Numbers 27.	p. 238
Numbers 28.	p. 239
Numbers 29.	p. 241
Numbers 30.	p. 243
Numbers 31.	p. 244

Numbers 32.	p. 246
Numbers 33.	p. 248
Numbers 34.	p. 250
Numbers 35.	p. 252
Numbers 36.	p. 254
Deuteronomy.	p. 254
Deuteronomy 1.	p. 254
Deuteronomy 2.	p. 257
Deuteronomy 3.	p. 259
Deuteronomy 4.	p. 261
Deuteronomy 5.	p. 264
Deuteronomy 6.	p. 265
Deuteronomy 7.	p. 267
Deuteronomy 8.	p. 268
Deuteronomy 9.	p. 269
Deuteronomy 10.	p. 271
Deuteronomy 11.	p. 273
Deuteronomy 12.	p. 274
Deuteronomy 13.	p. 276
Deuteronomy 14.	p. 278
Deuteronomy 15.	p. 279
Deuteronomy 16.	p. 280
Deuteronomy 17.	p. 282
Deuteronomy 18.	p. 283
Deuteronomy 19.	p. 284
Deuteronomy 20.	p. 286
Deuteronomy 21.	p. 287
Deuteronomy 22.	p. 288
Deuteronomy 23.	p. 290
Deuteronomy 24.	p. 291
Deuteronomy 25.	p. 293
Deuteronomy 26.	p. 294
Deuteronomy 27.	p. 295
Deuteronomy 28.	p. 296
Deuteronomy 29.	p. 300
Deuteronomy 30.	p. 302
Deuteronomy 31.	p. 303
Deuteronomy 32.	p. 305
Deuteronomy 33.	p. 308
Deuteronomy 34.	p. 309

Joshua	p. 310
Joshua 1.	p. 310
Joshua 2.	p. 311
Joshua 3.	p. 313
Joshua 4.	p. 314
Joshua 5.	p. 315
Joshua 6.	p. 316
Joshua 7.	p. 318
Joshua 8.	p. 319
Joshua 9.	p. 321
Joshua 10.	p. 323
Joshua 11.	p. 325
Joshua 12.	p. 327
Joshua 13.	p. 328
Joshua 14.	p. 330
Joshua 15.	p. 331
Joshua 16.	p. 333
Joshua 17.	p. 333
Joshua 18.	p. 335
Joshua 19.	p. 336
Joshua 20.	p. 338
Joshua 21.	p. 339
Joshua 22.	p. 341
Joshua 23.	p. 344
Joshua 24.	p. 345
Judges	p. 347
Judges 1.	p. 347
Judges 2.	p. 349
Judges 3.	p. 350
Judges 4.	p. 352
Judges 5.	p. 353
Judges 6.	p. 355
Judges 7.	p. 357
Judges 8.	p. 359
Judges 9.	p. 361
Judges 10.	p. 364
Judges 11.	p. 365
Judges 12.	p. 367
Judges 13.	p. 368
Judges 14.	p. 370

Judges 15.	p. 371
Judges 16.	p. 372
Judges 17.	p. 374
Judges 18.	p. 375
Judges 19.	p. 377
Judges 20.	p. 379
Judges 21.	p. 381
Ruth.	p. 383
Ruth 1.	p. 383
Ruth 2.	p. 384
Ruth 3.	p. 386
Ruth 4.	p. 387
1 Samuel.	p. 388
1 Samuel 1.	p. 388
1 Samuel 2.	p. 390
1 Samuel 3.	p. 392
1 Samuel 4.	p. 393
1 Samuel 5.	p. 394
1 Samuel 6.	p. 395
1 Samuel 7.	p. 396
1 Samuel 8.	p. 397
1 Samuel 9.	p. 399
1 Samuel 10.	p. 400
1 Samuel 11.	p. 402
1 Samuel 12.	p. 403
1 Samuel 13.	p. 404
1 Samuel 14.	p. 406
1 Samuel 15.	p. 409
1 Samuel 16.	p. 411
1 Samuel 17.	p. 412
1 Samuel 18.	p. 415
1 Samuel 19.	p. 417
1 Samuel 20.	p. 418
1 Samuel 21.	p. 421
1 Samuel 22.	p. 422
1 Samuel 23.	p. 423
1 Samuel 24.	p. 425
1 Samuel 25.	p. 426
1 Samuel 26.	p. 428
1 Samuel 27.	p. 430

1 Samuel 28.	p. 431
1 Samuel 29.	p. 432
1 Samuel 30.	p. 433
1 Samuel 31.	p. 435
2 Samuel.	p. 436
2 Samuel 1.	p. 436
2 Samuel 2.	p. 437
2 Samuel 3.	p. 439
2 Samuel 4.	p. 441
2 Samuel 5.	p. 442
2 Samuel 6.	p. 443
2 Samuel 7.	p. 445
2 Samuel 8.	p. 446
2 Samuel 9.	p. 447
2 Samuel 10.	p. 448
2 Samuel 11.	p. 450
2 Samuel 12.	p. 451
2 Samuel 13.	p. 453
2 Samuel 14.	p. 455
2 Samuel 15.	p. 457
2 Samuel 16.	p. 459
2 Samuel 17.	p. 460
2 Samuel 18.	p. 462
2 Samuel 19.	p. 464
2 Samuel 20.	p. 466
2 Samuel 21.	p. 468
2 Samuel 22.	p. 470
2 Samuel 23.	p. 472
2 Samuel 24.	p. 474
1 Kings.	p. 475
1 Kings 1.	p. 475
1 Kings 2.	p. 478
1 Kings 3.	p. 481
1 Kings 4.	p. 482
1 Kings 5.	p. 484
1 Kings 6.	p. 485
1 Kings 7.	p. 487
1 Kings 8.	p. 489
1 Kings 9.	p. 493
1 Kings 10.	p. 494

1 Kings 11.	p. 496
1 Kings 12.	p. 499
1 Kings 13.	p. 500
1 Kings 14.	p. 502
1 Kings 15.	p. 504
1 Kings 16.	p. 506
1 Kings 17.	p. 508
1 Kings 18.	p. 509
1 Kings 19.	p. 511
1 Kings 20.	p. 513
1 Kings 21.	p. 516
1 Kings 22.	p. 517
2 Kings.	p. 520
2 Kings 1.	p. 520
2 Kings 2.	p. 521
2 Kings 3.	p. 523
2 Kings 4.	p. 524
2 Kings 5.	p. 527
2 Kings 6.	p. 528
2 Kings 7.	p. 530
2 Kings 8.	p. 532
2 Kings 9.	p. 533
2 Kings 10.	p. 535
2 Kings 11.	p. 538
2 Kings 12.	p. 539
2 Kings 13.	p. 540
2 Kings 14.	p. 542
2 Kings 15.	p. 543
2 Kings 16.	p. 545
2 Kings 17.	p. 547
2 Kings 18.	p. 549
2 Kings 19.	p. 551
2 Kings 20.	p. 553
2 Kings 21.	p. 555
2 Kings 22.	p. 556
2 Kings 23.	p. 557
2 Kings 24.	p. 560
2 Kings 25.	p. 561
1 Chronicles.	p. 562
1 Chronicles 1.	p. 562

1 Chronicles 2.	p. 564
1 Chronicles 3.	p. 566
1 Chronicles 4.	p. 567
1 Chronicles 5.	p. 569
1 Chronicles 6.	p. 571
1 Chronicles 7.	p. 574
1 Chronicles 8.	p. 576
1 Chronicles 9.	p. 577
1 Chronicles 10.	p. 579
1 Chronicles 11.	p. 580
1 Chronicles 12.	p. 582
1 Chronicles 13.	p. 584
1 Chronicles 14.	p. 585
1 Chronicles 15.	p. 586
1 Chronicles 16.	p. 587
1 Chronicles 17.	p. 589
1 Chronicles 18.	p. 591
1 Chronicles 19.	p. 592
1 Chronicles 20.	p. 593
1 Chronicles 21.	p. 593
1 Chronicles 22.	p. 595
1 Chronicles 23.	p. 596
1 Chronicles 24.	p. 598
1 Chronicles 25.	p. 599
1 Chronicles 26.	p. 600
1 Chronicles 27.	p. 602
1 Chronicles 28.	p. 604
1 Chronicles 29.	p. 605
2 Chronicles.	p. 607
2 Chronicles 1.	p. 607
2 Chronicles 2.	p. 608
2 Chronicles 3.	p. 609
2 Chronicles 4.	p. 610
2 Chronicles 5.	p. 611
2 Chronicles 6.	p. 612
2 Chronicles 7.	p. 615
2 Chronicles 8.	p. 616
2 Chronicles 9.	p. 617
2 Chronicles 10.	p. 619
2 Chronicles 11.	p. 620

2 Chronicles 12.	p. 621
2 Chronicles 13.	p. 622
2 Chronicles 14.	p. 623
2 Chronicles 15.	p. 625
2 Chronicles 16.	p. 626
2 Chronicles 17.	p. 627
2 Chronicles 18.	p. 628
2 Chronicles 19.	p. 630
2 Chronicles 20.	p. 630
2 Chronicles 21.	p. 633
2 Chronicles 22.	p. 634
2 Chronicles 23.	p. 635
2 Chronicles 24.	p. 636
2 Chronicles 25.	p. 638
2 Chronicles 26.	p. 640
2 Chronicles 27.	p. 641
2 Chronicles 28.	p. 642
2 Chronicles 29.	p. 643
2 Chronicles 30.	p. 646
2 Chronicles 31.	p. 647
2 Chronicles 32.	p. 649
2 Chronicles 33.	p. 651
2 Chronicles 34.	p. 652
2 Chronicles 35.	p. 654
2 Chronicles 36.	p. 656
Ezra.	p. 658
Ezra 1.	p. 658
Ezra 2.	p. 659
Ezra 3.	p. 661
Ezra 4.	p. 662
Ezra 5.	p. 664
Ezra 6.	p. 665
Ezra 7.	p. 666
Ezra 8.	p. 668
Ezra 9.	p. 670
Ezra 10.	p. 671
Nehemiah.	p. 674
Nehemiah 1.	p. 674
Nehemiah 2.	p. 674
Nehemiah 3.	p. 676

Nehemiah 4.	p. 678
Nehemiah 5.	p. 679
Nehemiah 6.	p. 681
Nehemiah 7.	p. 682
Nehemiah 8.	p. 685
Nehemiah 9.	p. 686
Nehemiah 10.	p. 689
Nehemiah 11.	p. 690
Nehemiah 12.	p. 692
Nehemiah 13.	p. 694
Esther.	p. 697
Esther 1.	p. 697
Esther 2.	p. 698
Esther 3.	p. 699
Esther 4.	p. 700
Esther 5.	p. 701
Esther 6.	p. 702
Esther 7.	p. 703
Esther 8.	p. 704
Esther 9.	p. 705
Esther 10.	p. 707
Job.	p. 707
Job 1.	p. 707
Job 2.	p. 709
Job 3.	p. 709
Job 4.	p. 710
Job 5.	p. 711
Job 6.	p. 713
Job 7.	p. 714
Job 8.	p. 715
Job 9.	p. 716
Job 10.	p. 717
Job 11.	p. 718
Job 12.	p. 719
Job 13.	p. 720
Job 14.	p. 721
Job 15.	p. 722
Job 16.	p. 723
Job 17.	p. 724
Job 18.	p. 725

Job 19.	p. 726
Job 20.	p. 727
Job 21.	p. 728
Job 22.	p. 730
Job 23.	p. 731
Job 24.	p. 732
Job 25.	p. 733
Job 26.	p. 733
Job 27.	p. 734
Job 28.	p. 735
Job 29.	p. 736
Job 30.	p. 737
Job 31.	p. 738
Job 32.	p. 740
Job 33.	p. 741
Job 34.	p. 742
Job 35.	p. 744
Job 36.	p. 744
Job 37.	p. 745
Job 38.	p. 746
Job 39.	p. 748
Job 40.	p. 749
Job 41.	p. 750
Job 42.	p. 751
Psalms.	p. 752
Psalm 1.	p. 752
Psalm 2.	p. 753
Psalm 3.	p. 753
Psalm 4.	p. 754
Psalm 5.	p. 754
Psalm 6.	p. 755
Psalm 7.	p. 755
Psalm 8.	p. 756
Psalm 9.	p. 757
Psalm 10.	p. 758
Psalm 11.	p. 758
Psalm 12.	p. 759
Psalm 13.	p. 759
Psalm 14.	p. 760
Psalm 15.	p. 760

Psalm 16.	p. 760
Psalm 17.	p. 761
Psalm 18.	p. 762
Psalm 19.	p. 764
Psalm 20.	p. 765
Psalm 21.	p. 765
Psalm 22.	p. 766
Psalm 23.	p. 767
Psalm 24.	p. 768
Psalm 25.	p. 768
Psalm 26.	p. 769
Psalm 27.	p. 770
Psalm 28.	p. 770
Psalm 29.	p. 771
Psalm 30.	p. 771
Psalm 31.	p. 772
Psalm 32.	p. 773
Psalm 33.	p. 774
Psalm 34.	p. 775
Psalm 35.	p. 776
Psalm 36.	p. 777
Psalm 37.	p. 778
Psalm 38.	p. 780
Psalm 39.	p. 780
Psalm 40.	p. 781
Psalm 41.	p. 782
Psalm 42.	p. 783
Psalm 43.	p. 784
Psalm 44.	p. 784
Psalm 45.	p. 785
Psalm 46.	p. 786
Psalm 47.	p. 787
Psalm 48.	p. 787
Psalm 49.	p. 788
Psalm 50.	p. 789
Psalm 51.	p. 790
Psalm 52.	p. 791
Psalm 53.	p. 792
Psalm 54.	p. 792
Psalm 55.	p. 793

Psalm 56.	p. 794
Psalm 57.	p. 794
Psalm 58.	p. 795
Psalm 59.	p. 796
Psalm 60.	p. 797
Psalm 61.	p. 797
Psalm 62.	p. 798
Psalm 63.	p. 799
Psalm 64.	p. 799
Psalm 65.	p. 800
Psalm 66.	p. 800
Psalm 67.	p. 801
Psalm 68.	p. 802
Psalm 69.	p. 803
Psalm 70.	p. 805
Psalm 71.	p. 806
Psalm 72.	p. 807
Psalm 73.	p. 808
Psalm 74.	p. 809
Psalm 75.	p. 810
Psalm 76.	p. 810
Psalm 77.	p. 811
Psalm 78.	p. 812
Psalm 79.	p. 815
Psalm 80.	p. 815
Psalm 81.	p. 816
Psalm 82.	p. 817
Psalm 83.	p. 818
Psalm 84.	p. 818
Psalm 85.	p. 819
Psalm 86.	p. 820
Psalm 87.	p. 821
Psalm 88.	p. 821
Psalm 89.	p. 822
Psalm 90.	p. 824
Psalm 91.	p. 825
Psalm 92.	p. 826
Psalm 93.	p. 826
Psalm 94.	p. 827
Psalm 95.	p. 828

Psalm 96.	p. 828
Psalm 97.	p. 829
Psalm 98.	p. 829
Psalm 99.	p. 830
Psalm 100.	p. 830
Psalm 101.	p. 831
Psalm 102.	p. 831
Psalm 103.	p. 832
Psalm 104.	p. 833
Psalm 105.	p. 835
Psalm 106.	p. 836
Psalm 107.	p. 838
Psalm 108.	p. 840
Psalm 109.	p. 840
Psalm 110.	p. 842
Psalm 111.	p. 842
Psalm 112.	p. 843
Psalm 113.	p. 843
Psalm 114.	p. 844
Psalm 115.	p. 844
Psalm 116.	p. 845
Psalm 117.	p. 846
Psalm 118.	p. 846
Psalm 119.	p. 847
Psalm 120.	p. 853
Psalm 121.	p. 853
Psalm 122.	p. 854
Psalm 123.	p. 854
Psalm 124.	p. 855
Psalm 125.	p. 855
Psalm 126.	p. 855
Psalm 127.	p. 856
Psalm 128.	p. 856
Psalm 129.	p. 857
Psalm 130.	p. 857
Psalm 131.	p. 857
Psalm 132.	p. 858
Psalm 133.	p. 858
Psalm 134.	p. 859
Psalm 135.	p. 859

Psalm 136.	p. 860
Psalm 137.	p. 861
Psalm 138.	p. 861
Psalm 139.	p. 862
Psalm 140.	p. 863
Psalm 141.	p. 863
Psalm 142.	p. 864
Psalm 143.	p. 864
Psalm 144.	p. 865
Psalm 145.	p. 866
Psalm 146.	p. 867
Psalm 147.	p. 867
Psalm 148.	p. 868
Psalm 149.	p. 869
Psalm 150.	p. 869
Proverbs.	p. 870
Proverbs 1.	p. 870
Proverbs 2.	p. 871
Proverbs 3.	p. 872
Proverbs 4.	p. 873
Proverbs 5.	p. 875
Proverbs 6.	p. 875
Proverbs 7.	p. 877
Proverbs 8.	p. 878
Proverbs 9.	p. 880
Proverbs 10.	p. 880
Proverbs 11.	p. 882
Proverbs 12.	p. 883
Proverbs 13.	p. 885
Proverbs 14.	p. 886
Proverbs 15.	p. 887
Proverbs 16.	p. 889
Proverbs 17.	p. 890
Proverbs 18.	p. 891
Proverbs 19.	p. 893
Proverbs 20.	p. 894
Proverbs 21.	p. 895
Proverbs 22.	p. 896
Proverbs 23.	p. 898
Proverbs 24.	p. 899

Proverbs 25.	p. 900
Proverbs 26.	p. 902
Proverbs 27.	p. 903
Proverbs 28.	p. 904
Proverbs 29.	p. 905
Proverbs 30.	p. 907
Proverbs 31.	p. 908
Ecclesiastes.	p. 909
Ecclesiastes 1.	p. 909
Ecclesiastes 2.	p. 910
Ecclesiastes 3.	p. 912
Ecclesiastes 4.	p. 913
Ecclesiastes 5.	p. 913
Ecclesiastes 6.	p. 915
Ecclesiastes 7.	p. 915
Ecclesiastes 8.	p. 917
Ecclesiastes 9.	p. 918
Ecclesiastes 10.	p. 919
Ecclesiastes 11.	p. 920
Ecclesiastes 12.	p. 921
Song of Solomon.	p. 921
Song of Solomon 1.	p. 921
Song of Solomon 2.	p. 922
Song of Solomon 3.	p. 923
Song of Solomon 4.	p. 924
Song of Solomon 5.	p. 925
Song of Solomon 6.	p. 926
Song of Solomon 7.	p. 926
Song of Solomon 8.	p. 927
Isaiah.	p. 928
Isaiah 1.	p. 928
Isaiah 2.	p. 930
Isaiah 3.	p. 931
Isaiah 4.	p. 932
Isaiah 5.	p. 933
Isaiah 6.	p. 935
Isaiah 7.	p. 936
Isaiah 8.	p. 937
Isaiah 9.	p. 938
Isaiah 10.	p. 940

Isaiah 11.	p. 942
Isaiah 12.	p. 943
Isaiah 13.	p. 943
Isaiah 14.	p. 944
Isaiah 15.	p. 946
Isaiah 16.	p. 947
Isaiah 17.	p. 948
Isaiah 18.	p. 949
Isaiah 19.	p. 949
Isaiah 20.	p. 951
Isaiah 21.	p. 951
Isaiah 22.	p. 952
Isaiah 23.	p. 954
Isaiah 24.	p. 955
Isaiah 25.	p. 956
Isaiah 26.	p. 957
Isaiah 27.	p. 958
Isaiah 28.	p. 959
Isaiah 29.	p. 961
Isaiah 30.	p. 962
Isaiah 31.	p. 964
Isaiah 32.	p. 965
Isaiah 33.	p. 966
Isaiah 34.	p. 967
Isaiah 35.	p. 968
Isaiah 36.	p. 969
Isaiah 37.	p. 970
Isaiah 38.	p. 972
Isaiah 39.	p. 973
Isaiah 40.	p. 974
Isaiah 41.	p. 976
Isaiah 42.	p. 978
Isaiah 43.	p. 979
Isaiah 44.	p. 981
Isaiah 45.	p. 983
Isaiah 46.	p. 984
Isaiah 47.	p. 985
Isaiah 48.	p. 986
Isaiah 49.	p. 987
Isaiah 50.	p. 989

Isaiah 51.	p. 990
Isaiah 52.	p. 992
Isaiah 53.	p. 993
Isaiah 54.	p. 993
Isaiah 55.	p. 995
Isaiah 56.	p. 995
Isaiah 57.	p. 996
Isaiah 58.	p. 998
Isaiah 59.	p. 999
Isaiah 60.	p. 1000
Isaiah 61.	p. 1001
Isaiah 62.	p. 1002
Isaiah 63.	p. 1003
Isaiah 64.	p. 1004
Isaiah 65.	p. 1005
Isaiah 66.	p. 1007
Jeremiah.	p. 1008
Jeremiah 1.	p. 1008
Jeremiah 2.	p. 1010
Jeremiah 3.	p. 1012
Jeremiah 4.	p. 1013
Jeremiah 5.	p. 1015
Jeremiah 6.	p. 1017
Jeremiah 7.	p. 1019
Jeremiah 8.	p. 1021
Jeremiah 9.	p. 1022
Jeremiah 10.	p. 1024
Jeremiah 11.	p. 1025
Jeremiah 12.	p. 1027
Jeremiah 13.	p. 1028
Jeremiah 14.	p. 1029
Jeremiah 15.	p. 1031
Jeremiah 16.	p. 1032
Jeremiah 17.	p. 1033
Jeremiah 18.	p. 1035
Jeremiah 19.	p. 1036
Jeremiah 20.	p. 1037
Jeremiah 21.	p. 1038
Jeremiah 22.	p. 1039
Jeremiah 23.	p. 1041

Jeremiah 24.	p. 1043
Jeremiah 25.	p. 1044
Jeremiah 26.	p. 1046
Jeremiah 27.	p. 1048
Jeremiah 28.	p. 1049
Jeremiah 29.	p. 1050
Jeremiah 30.	p. 1052
Jeremiah 31.	p. 1053
Jeremiah 32.	p. 1056
Jeremiah 33.	p. 1058
Jeremiah 34.	p. 1060
Jeremiah 35.	p. 1061
Jeremiah 36.	p. 1062
Jeremiah 37.	p. 1064
Jeremiah 38.	p. 1066
Jeremiah 39.	p. 1067
Jeremiah 40.	p. 1068
Jeremiah 41.	p. 1069
Jeremiah 42.	p. 1070
Jeremiah 43.	p. 1072
Jeremiah 44.	p. 1073
Jeremiah 45.	p. 1075
Jeremiah 46.	p. 1075
Jeremiah 47.	p. 1077
Jeremiah 48.	p. 1077
Jeremiah 49.	p. 1080
Jeremiah 50.	p. 1082
Jeremiah 51.	p. 1085
Jeremiah 52.	p. 1089
Lamentations.	p. 1091
Lamentations 1.	p. 1091
Lamentations 2.	p. 1092
Lamentations 3.	p. 1094
Lamentations 4.	p. 1096
Lamentations 5.	p. 1097
Ezekiel.	p. 1098
Ezekiel 1.	p. 1098
Ezekiel 2.	p. 1099
Ezekiel 3.	p. 1100
Ezekiel 4.	p. 1101

Ezekiel 5.	p. 1102
Ezekiel 6.	p. 1104
Ezekiel 7.	p. 1105
Ezekiel 8.	p. 1106
Ezekiel 9.	p. 1107
Ezekiel 10.	p. 1108
Ezekiel 11.	p. 1109
Ezekiel 12.	p. 1111
Ezekiel 13.	p. 1112
Ezekiel 14.	p. 1114
Ezekiel 15.	p. 1115
Ezekiel 16.	p. 1115
Ezekiel 17.	p. 1119
Ezekiel 18.	p. 1120
Ezekiel 19.	p. 1122
Ezekiel 20.	p. 1123
Ezekiel 21.	p. 1126
Ezekiel 22.	p. 1128
Ezekiel 23.	p. 1130
Ezekiel 24.	p. 1132
Ezekiel 25.	p. 1134
Ezekiel 26.	p. 1135
Ezekiel 27.	p. 1136
Ezekiel 28.	p. 1138
Ezekiel 29.	p. 1139
Ezekiel 30.	p. 1141
Ezekiel 31.	p. 1142
Ezekiel 32.	p. 1143
Ezekiel 33.	p. 1145
Ezekiel 34.	p. 1147
Ezekiel 35.	p. 1149
Ezekiel 36.	p. 1150
Ezekiel 37.	p. 1153
Ezekiel 38.	p. 1154
Ezekiel 39.	p. 1156
Ezekiel 40.	p. 1158
Ezekiel 41.	p. 1160
Ezekiel 42.	p. 1162
Ezekiel 43.	p. 1163
Ezekiel 44.	p. 1165

Ezekiel 45.	p. 1167
Ezekiel 46.	p. 1169
Ezekiel 47.	p. 1170
Ezekiel 48.	p. 1172
Daniel.	p. 1174
Daniel 1.	p. 1174
Daniel 2.	p. 1175
Daniel 3.	p. 1178
Daniel 4.	p. 1179
Daniel 5.	p. 1182
Daniel 6.	p. 1183
Daniel 7.	p. 1185
Daniel 8.	p. 1187
Daniel 9.	p. 1189
Daniel 10.	p. 1190
Daniel 11.	p. 1192
Daniel 12.	p. 1194
Hosea.	p. 1195
Hosea 1.	p. 1195
Hosea 2.	p. 1196
Hosea 3.	p. 1197
Hosea 4.	p. 1198
Hosea 5.	p. 1199
Hosea 6.	p. 1200
Hosea 7.	p. 1201
Hosea 8.	p. 1202
Hosea 9.	p. 1203
Hosea 10.	p. 1204
Hosea 11.	p. 1205
Hosea 12.	p. 1206
Hosea 13.	p. 1207
Hosea 14.	p. 1208
Joel.	p. 1208
Joel 1.	p. 1208
Joel 2.	p. 1209
Joel 3.	p. 1211
Amos.	p. 1213
Amos 1.	p. 1213
Amos 2.	p. 1214
Amos 3.	p. 1215

Amos 4.	p. 1215
Amos 5.	p. 1216
Amos 6.	p. 1218
Amos 7.	p. 1219
Amos 8.	p. 1220
Amos 9.	p. 1221
Obadiah.	p. 1222
Obadiah 1.	p. 1222
Jonah.	p. 1223
Jonah 1.	p. 1223
Jonah 2.	p. 1224
Jonah 3.	p. 1225
Jonah 4.	p. 1226
Micah.	p. 1226
Micah 1.	p. 1226
Micah 2.	p. 1227
Micah 3.	p. 1228
Micah 4.	p. 1229
Micah 5.	p. 1230
Micah 6.	p. 1231
Micah 7.	p. 1232
Nahum.	p. 1233
Nahum 1.	p. 1233
Nahum 2.	p. 1234
Nahum 3.	p. 1235
Habakkuk.	p. 1236
Habakkuk 1.	p. 1236
Habakkuk 2.	p. 1237
Habakkuk 3.	p. 1239
Zephaniah.	p. 1240
Zephaniah 1.	p. 1240
Zephaniah 2.	p. 1241
Zephaniah 3.	p. 1242
Haggai.	p. 1243
Haggai 1.	p. 1243
Haggai 2.	p. 1244
Zechariah.	p. 1246
Zechariah 1.	p. 1246
Zechariah 2.	p. 1247
Zechariah 3.	p. 1248

Zechariah 4.	p. 1248
Zechariah 5.	p. 1249
Zechariah 6.	p. 1250
Zechariah 7.	p. 1251
Zechariah 8.	p. 1252
Zechariah 9.	p. 1253
Zechariah 10.	p. 1254
Zechariah 11.	p. 1255
Zechariah 12.	p. 1256
Zechariah 13.	p. 1257
Zechariah 14.	p. 1258
Malachi.	p. 1259
Malachi 1.	p. 1259
Malachi 2.	p. 1260
Malachi 3.	p. 1261
Malachi 4.	p. 1263
New Testament.	p. 1264
Matthew.	p. 1264
Matthew 1.	p. 1264
Matthew 2.	p. 1265
Matthew 3.	p. 1266
Matthew 4.	p. 1267
Matthew 5.	p. 1268
Matthew 6.	p. 1271
Matthew 7.	p. 1272
Matthew 8.	p. 1274
Matthew 9.	p. 1275
Matthew 10.	p. 1277
Matthew 11.	p. 1279
Matthew 12.	p. 1281
Matthew 13.	p. 1283
Matthew 14.	p. 1286
Matthew 15.	p. 1288
Matthew 16.	p. 1289
Matthew 17.	p. 1291
Matthew 18.	p. 1292
Matthew 19.	p. 1294
Matthew 20.	p. 1295
Matthew 21.	p. 1297
Matthew 22.	p. 1299

Matthew 23.	p. 1301
Matthew 24.	p. 1303
Matthew 25.	p. 1306
Matthew 26.	p. 1308
Matthew 27.	p. 1311
Matthew 28.	p. 1314
Mark.	p. 1315
Mark 1.	p. 1315
Mark 2.	p. 1317
Mark 3.	p. 1318
Mark 4.	p. 1320
Mark 5.	p. 1322
Mark 6.	p. 1324
Mark 7.	p. 1326
Mark 8.	p. 1328
Mark 9.	p. 1330
Mark 10.	p. 1332
Mark 11.	p. 1335
Mark 12.	p. 1336
Mark 13.	p. 1339
Mark 14.	p. 1341
Mark 15.	p. 1344
Mark 16.	p. 1346
Luke.	p. 1347
Luke 1.	p. 1347
Luke 2.	p. 1350
Luke 3.	p. 1352
Luke 4.	p. 1354
Luke 5.	p. 1356
Luke 6.	p. 1358
Luke 7.	p. 1360
Luke 8.	p. 1363
Luke 9.	p. 1366
Luke 10.	p. 1369
Luke 11.	p. 1371
Luke 12.	p. 1373
Luke 13.	p. 1376
Luke 14.	p. 1378
Luke 15.	p. 1380
Luke 16.	p. 1381

Luke 17.	p. 1383
Luke 18.	p. 1385
Luke 19.	p. 1387
Luke 20.	p. 1389
Luke 21.	p. 1391
Luke 22.	p. 1392
Luke 23.	p. 1395
Luke 24.	p. 1398
John.	p. 1400
John 1.	p. 1400
John 2.	p. 1402
John 3.	p. 1403
John 4.	p. 1405
John 5.	p. 1407
John 6.	p. 1409
John 7.	p. 1412
John 8.	p. 1415
John 9.	p. 1417
John 10.	p. 1419
John 11.	p. 1421
John 12.	p. 1423
John 13.	p. 1426
John 14.	p. 1427
John 15.	p. 1429
John 16.	p. 1430
John 17.	p. 1432
John 18.	p. 1433
John 19.	p. 1435
John 20.	p. 1437
John 21.	p. 1439
Acts.	p. 1440
Acts 1.	p. 1440
Acts 2.	p. 1442
Acts 3.	p. 1444
Acts 4.	p. 1445
Acts 5.	p. 1447
Acts 6.	p. 1449
Acts 7.	p. 1450
Acts 8.	p. 1453
Acts 9.	p. 1455

Acts 10.	p. 1457
Acts 11.	p. 1460
Acts 12.	p. 1461
Acts 13.	p. 1462
Acts 14.	p. 1465
Acts 15.	p. 1466
Acts 16.	p. 1468
Acts 17.	p. 1470
Acts 18.	p. 1472
Acts 19.	p. 1474
Acts 20.	p. 1476
Acts 21.	p. 1478
Acts 22.	p. 1480
Acts 23.	p. 1482
Acts 24.	p. 1483
Acts 25.	p. 1485
Acts 26.	p. 1486
Acts 27.	p. 1488
Acts 28.	p. 1490
Romans.	p. 1492
Romans 1.	p. 1492
Romans 2.	p. 1494
Romans 3.	p. 1495
Romans 4.	p. 1497
Romans 5.	p. 1498
Romans 6.	p. 1500
Romans 7.	p. 1501
Romans 8.	p. 1502
Romans 9.	p. 1504
Romans 10.	p. 1506
Romans 11.	p. 1507
Romans 12.	p. 1510
Romans 13.	p. 1511
Romans 14.	p. 1512
Romans 15.	p. 1513
Romans 16.	p. 1515
1 Corinthians.	p. 1516
1 Corinthians 1.	p. 1516
1 Corinthians 2.	p. 1518
1 Corinthians 3.	p. 1519

1 Corinthians 4.	p. 1520
1 Corinthians 5.	p. 1522
1 Corinthians 6.	p. 1523
1 Corinthians 7.	p. 1524
1 Corinthians 8.	p. 1526
1 Corinthians 9.	p. 1527
1 Corinthians 10.	p. 1528
1 Corinthians 11.	p. 1530
1 Corinthians 12.	p. 1532
1 Corinthians 13.	p. 1533
1 Corinthians 14.	p. 1534
1 Corinthians 15.	p. 1536
1 Corinthians 16.	p. 1539
2 Corinthians.	p. 1541
2 Corinthians 1.	p. 1541
2 Corinthians 2.	p. 1542
2 Corinthians 3.	p. 1543
2 Corinthians 4.	p. 1544
2 Corinthians 5.	p. 1545
2 Corinthians 6.	p. 1547
2 Corinthians 7.	p. 1548
2 Corinthians 8.	p. 1549
2 Corinthians 9.	p. 1550
2 Corinthians 10.	p. 1551
2 Corinthians 11.	p. 1552
2 Corinthians 12.	p. 1554
2 Corinthians 13.	p. 1556
Galatians.	p. 1557
Galatians 1.	p. 1557
Galatians 2.	p. 1558
Galatians 3.	p. 1559
Galatians 4.	p. 1561
Galatians 5.	p. 1562
Galatians 6.	p. 1564
Ephesians.	p. 1565
Ephesians 1.	p. 1565
Ephesians 2.	p. 1566
Ephesians 3.	p. 1567
Ephesians 4.	p. 1569
Ephesians 5.	p. 1570

Ephesians 6.	p. 1572
Philippians.	p. 1573
Philippians 1.	p. 1573
Philippians 2.	p. 1575
Philippians 3.	p. 1576
Philippians 4.	p. 1578
Colossians.	p. 1579
Colossians 1.	p. 1579
Colossians 2.	p. 1581
Colossians 3.	p. 1582
Colossians 4.	p. 1583
1 Thessalonians.	p. 1584
1 Thessalonians 1.	p. 1584
1 Thessalonians 2.	p. 1585
1 Thessalonians 3.	p. 1586
1 Thessalonians 4.	p. 1587
1 Thessalonians 5.	p. 1588
2 Thessalonians.	p. 1590
2 Thessalonians 1.	p. 1590
2 Thessalonians 2.	p. 1590
2 Thessalonians 3.	p. 1591
1 Timothy.	p. 1592
1 Timothy 1.	p. 1592
1 Timothy 2.	p. 1594
1 Timothy 3.	p. 1595
1 Timothy 4.	p. 1595
1 Timothy 5.	p. 1596
1 Timothy 6.	p. 1598
2 Timothy.	p. 1599
2 Timothy 1.	p. 1599
2 Timothy 2.	p. 1600
2 Timothy 3.	p. 1601
2 Timothy 4.	p. 1602
Titus.	p. 1604
Titus 1.	p. 1604
Titus 2.	p. 1605
Titus 3.	p. 1606
Philemon.	p. 1606
Philemon 1.	p. 1606
Hebrews.	p. 1608

Hebrews 1.	p. 1608
Hebrews 2.	p. 1609
Hebrews 3.	p. 1610
Hebrews 4.	p. 1611
Hebrews 5.	p. 1612
Hebrews 6.	p. 1613
Hebrews 7.	p. 1614
Hebrews 8.	p. 1615
Hebrews 9.	p. 1616
Hebrews 10.	p. 1618
Hebrews 11.	p. 1620
Hebrews 12.	p. 1623
Hebrews 13.	p. 1624
James.	p. 1626
James 1.	p. 1626
James 2.	p. 1627
James 3.	p. 1629
James 4.	p. 1630
James 5.	p. 1631
1 Peter.	p. 1632
1 Peter 1.	p. 1632
1 Peter 2.	p. 1633
1 Peter 3.	p. 1635
1 Peter 4.	p. 1636
1 Peter 5.	p. 1637
2 Peter.	p. 1638
2 Peter 1.	p. 1638
2 Peter 2.	p. 1639
2 Peter 3.	p. 1641
1 John.	p. 1642
1 John 1.	p. 1642
1 John 2.	p. 1643
1 John 3.	p. 1644
1 John 4.	p. 1646
1 John 5.	p. 1647
2 John.	p. 1648
2 John 1.	p. 1648
3 John.	p. 1649
3 John 1.	p. 1649
Jude.	p. 1650

Jude 1.	p. 1650
Revelation.	p. 1651
Revelation 1.	p. 1651
Revelation 2.	p. 1653
Revelation 3.	p. 1654
Revelation 4.	p. 1656
Revelation 5.	p. 1657
Revelation 6.	p. 1658
Revelation 7.	p. 1659
Revelation 8.	p. 1660
Revelation 9.	p. 1660
Revelation 10.	p. 1662
Revelation 11.	p. 1662
Revelation 12.	p. 1664
Revelation 13.	p. 1665
Revelation 14.	p. 1666
Revelation 15.	p. 1667
Revelation 16.	p. 1668
Revelation 17.	p. 1669
Revelation 18.	p. 1670
Revelation 19.	p. 1672
Revelation 20.	p. 1673
Revelation 21.	p. 1674
Revelation 22.	p. 1675

Holy Bible

Haitian Creole

Old Testament

Genesis

Chapter 1

¹ ¶ Nan konmansman, Bondye kreye syèl la ak latè a. ² Men latè pa t' gen fòm, li pa t' gen anyen sou li. Fènwa te kouvri toupatou. Lespri Bondye t'ap plane sou dlo ki te kouvri tout latè. ³ ¶ Bondye di. Se pou limyè fèt. Epi limyè te fèt. ⁴ Bondye wè limyè a te bon. Bondye mete limyè a yon bò, li mete fènwa a yon lòt bò. ⁵ Bondye rele limyè a lajounen, li rele fènwa a lannwit. Yon lannwit pase, yon maten rive. Se te premye jou a. ⁶ ¶ Bondye di ankò. Se pou gen yon vout nan mitan dlo a pou separe dlo a an de. ⁷ Bondye fè vout la separe dlo a an de, yon pati anwo vout la, yon lòt pati anba l'. Se konsa sa te pase. ⁸ Bondye rele vout la syèl. Yon lannwit pase, yon maten rive. Se te dezyèm jou a. ⁹ ¶ Bondye di ankò. Se pou dlo ki anba syèl la sanble yon sèl kote pou kote ki sèk la ka parèt. Se konsa sa te pase. ¹⁰ Bondye rele kote ki sèk la tè. Li rele pil dlo a lanmè. Bondye gade sa l' te fè a, li wè l' bon. ¹¹ Bondye di. Se pou tè a pouse tout kalite plant: zèb, plant ki bay grenn, pyebwa ki bay fwi ak tout grenn yo. Se konsa sa te pase. ¹² Tè a pouse tout kalite plant: zèb, plant ki bay grenn, pyebwa ki bay fwi ak tout grenn yo. Bondye gade sa l' te fè a, li wè l' bon. ¹³ Yon lannwit pase, yon maten rive. Se te twazyèm jou a. ¹⁴ ¶ Bondye di ankò. Se pou limyè parèt nan syèl la pou separe lajounen ak lannwit. Y'a sèvi pou make jou yo, lanne yo ak sezon yo. ¹⁵ Y'a sèvi limyè nan syèl la pou klere tout latè a. Se konsa sa te pase. ¹⁶ Bondye fè de gwo limyè, pi gwo a pou kòmande sou lajounen, pi piti a pou kòmande sou lannwit. Li fè zetwal yo tou. ¹⁷ Li mete yo nan syèl la pou klere latè a, ¹⁸ pou kòmande sou lajounen ak sou lannwit, pou separe limyè ak fènwa. Bondye gade sa l' te fè a, li wè l' bon. ¹⁹ Yon lannwit pase, yon maten rive. Se te katyèm jou a. ²⁰ ¶ Bondye di ankò. Se pou dlo yo kale anpil anpil bèt vivan. Se pou zwazo vole nan syèl la anwo tè a. Se konsa sa te pase. ²¹ Bondye kreye gwo bèt lanmè yo, tout kalite bèt vivan k'ap

naje nan dlo ansanm ak tout kalite zwazo. Bondye gade sa l' te fè a, li wè l' bon.²² Bondye beni yo, li di. Fè pitit, fè anpil anpil pitit, plen dlo lanmè a. Se pou zwazo yo fè anpil anpil pitit tout sou tèt a.²³ Yon lannwit pase, yon maten rive. Se te senkyèm jou a.²⁴ ¶ Bondye di ankò. Se pou tèt a kale tout kalite bèt vivan, bèt yo gade, bèt ki trennen sou vant, bèt nan bwa. Se konsa sa te pase.²⁵ Bondye fè tout kalite bèt, bèt nan bwa, bèt yo gade, bèt ki trennen sou vant. Li gade sa l' te fè a, li wè l' bon.²⁶ ¶ Bondye di ankò. Ann fè moun. N'ap fè l' pòtre ak nou, pou li sanble ak nou. La gen pouvwa sou pwason ki nan lanmè yo, sou zwazo ki nan syèl la, sou tout bèt yo gade, sou tout latè, sou tout bèt nan bwa, sou tout bèt ki trennen sou vant sou tèt a.²⁷ Bondye kreye moun. Li fè l' pòtre ak li. Li kreye yo gason ak fi.²⁸ Li ba yo benediksyon, li di. Fè pitit, fè anpil anpil pitit mete sou tèt a. Donte tèt a. Mwen ban nou pouvwa sou pwason ki nan lanmè, sou zwazo ki nan syèl la, ak sou tout bèt vivan k'ap mache sou tèt a.²⁹ ¶ Bondye di. Gade. Mwen ban nou tout kalite plant ki bay grenn ak tout kalite pyebwa ki bay fwi ak grenn pou nou manje.³⁰ Men, tout bèt ki sou tèt a, tout zwazo ki nan syèl la, tout bèt ki trennen sou vant, wi tout bèt vivan, m'ap ba yo zèb vèt pou yo manje. Se konsa sa te pase.³¹ ¶ Bondye gade sa l' te fè a, li wè l' bon nèt. Yon lannwit pase, yon maten rive. Se te sizyèm jou a.

Chapter 2

¶¹ Konsa, Bondye te fin fè syèl la, latè a ansanm ak tout sa ki ladan yo.² Sou sis jou, Bondye te fin fè tout sa l' t'ap fè a. Setyèm jou a, li sispann travay.³ Li beni setyèm jou a, li mete l' apa pou li, paske se jou sa a li te sispann travay apre li te fin kreye tout sa l' t'ap kreye a.⁴ ¶ Se konsa sa te pase lè Bondye t'ap kreye syèl la ak latè a. Lè Seyè a, Bondye a, t'ap fè latè ansanm ak tou sa ki nan syèl la,⁵ pa t' gen yon ti pyebwa sou tèt a. Ankenn zèb pa t' ankò pouse nan jaden, paske Bondye pa t' voye lapli tonbe sou tèt a. Lèfini, pa t' gen moun pou travay latè.⁶ Men, yon vapè dlo leve soti nan tèt a, li wouze tout tèt a.⁷ Lè sa a, Seyè a, Bondye a, pran pousyè tèt, li fè yon nonm. Li soufle nan twou nen nonm lan pou l' ba li lavi. Epi nonm lan vin vivan.⁸ ¶ Seyè a, Bondye a, plante yon jaden yon kote yo rele Edenn, bò kote solèy leve a. Se la li mete nonm li te fè a.⁹ Seyè a, Bondye a, te fè tout kalite pyebwa leve nan jaden an, bèl pyebwa ki donnen fwi ki bon pou manje. Nan mitan jaden an te gen de gwo pyebwa. Yonn se te pyebwa ki bay lavi a, lòt la se te pyebwa ki fè

¹⁰ moun konnen sa ki byen ak sa ki mal la. Yon gwo larivyè soti nan peyi Edenn, li wouze jaden
¹¹ an. Larivyè a te fè kat branch. Premye branch lan te rele Pichon. Se larivyè sa a ki wouze tout
¹² peyi Avila a, peyi kote yo jwenn anpil lò a. Se nan peyi sa a yo jwenn pi bon lò ansanm ak
¹³ pyebwa gonm arabik ak yon pyè wouj ki koute chè yo rele oniks. Dezyèm larivyè a rele Giyon.
¹⁴ Se li ki wouze tout peyi Kouch la. Twazyèm larivyè a rele Tig. Se li ki pase nan peyi Lasiri, sou
¹⁵ bò solèy leve a. Katriyèm larivyè a se Lefrat. Seyè a, Bondye a, pran nonm lan, li mete l' nan
¹⁶ jaden Edenn lan pou l' travay li, pou l' pran swen l'. ¶ Seyè a, Bondye a, bay nonm lan lòd sa a.
¹⁷ Ou mèt manje donn tout pyebwa ki nan jaden an. Men, piga ou manje donn pyebwa ki fè moun
¹⁸ konnen sa ki byen ak sa ki mal la. Paske, jou ou manje l', w'ap mouri. ¶ Seyè a, Bondye a, di
¹⁹ ankò. Sa pa bon pou nonm lan rete pou kont li. M'ap fè yon lòt moun sanble avè l' pou ede l'. Se
²⁰ konsa, Seyè a, Bondye a, pran pousyè tè, li fè tout kalite zannimo ki nan savann ak tout kalite zwazo
²¹ k'ap vole nan syèl la. Lè l' fini, li mennen yo bay nonm lan pou wè ki non li tapral ba yo. Se non li
²² te ba yo a ki rete pou yo nè. Se konsa, nonm lan bay tout bèt yo gade, tout bèt nan bwa ak tout
²³ zwazo ki nan syèl la non yo. Men, pa t' gen yonn ki te sanble avè l', ki ta ka ede l'. ¶ Lè sa a,
²⁴ Seyè a, Bondye a, fè dòmi pran nonm lan. Msye dòmi nè ale. Pandan l'ap dòmi an, Bondye louvri
²⁵ bò kòt li, li wete yon zo kòt. Apre sa, li fèmen twou a byen fèmen. Avèk zo kòt li te wete nan
²⁶ nonm lan, li fè yon fanm, li mennen l' ba li. Lè nonm lan wè l', li di. Aa! Fwa sa a, men yonn ki
²⁷ menm jan avè m'! Zo l' se zo mwen. Chè l' se chè mwen. Y'a rele l' fanm, paske se nan gason li
²⁸ soti. Se poutèt sa, gason an va kite papa l' ak manman l' pou l' mete tèt li ansanm ak madanm li,
²⁹ pou tout de fè yon sèl. Nonm lan ak madanm li te toutouni. Men, yo pa t' wont rete konsa.

Chapter 3

¹ ¶ Sèpan se bèt ki te pi rize nan tout bèt raje Seyè a, Bondye a, te krewe. Li di fanm lan konsa.
² Eske Bondye te janm di piga nou manje donn tout pyebwa ki nan jaden an? Fanm lan reponn
³ sèpan an. Nou gen dwa manje donn tout pyebwa ki nan jaden an. Men, kanta pou pyebwa ki nan
⁴ mitan jaden an, Bondye di. Piga nou manje ladan l', piga nou manyen l' menm. Sinon, n'ap mouri.

⁴ Lè sa a, sèpan an di fanm lan. Se pa vre. Nou p'ap mouri kras. ⁵ Bondye di nou sa paske li konnen jou nou manje ladan l', je nou va louvri. n'a vin tankou Bondye, n'a konn sa ki byen ak sa ki mal.

⁶ ¶ Fanm lan gade, li wè jan pyebwa a te bèl, jan fwi yo sanble yo ta bon nan bouch. Li santi li ta manje ladan l' pou je l' ka louvri. Li keyi kèk fwi. Li manje, li pote bay mari l' ki manje tou. ⁷ Manje yo fin manje, je yo louvri, lè sa a, yo vin konnen yo toutouni. Yo pran kèk fèy figfrans, yo koud yo ansanm, yo fè tanga mete sou yo. ⁸ Jou sa a, solèy te fèk fin kouche lè nonm lan ak madanm li tande vwa Seyè a, Bondye a, ki t'ap pwonmennen nan jaden an. Y' al kache nan mitan pyebwa ki nan jaden an pou Seyè a, Bondye a, pa wè yo. ⁹ ¶ Men, Seyè a, Bondye a, rele nonm lan, li di l'.

¹⁰ Kote ou ye? Nonm lan reponn li. Mwen tande vwa ou nan jaden an, mwen pè. M al kache pou ou, paske mwen toutouni. ¹¹ ¶ Seyè a, Bondye a, di l'. Ki moun ki di ou te toutouni? Eske ou te manje fwi pyebwa mwen te di ou pa manje a? ¹² Nonm lan reponn. Fanm ou te ban mwen an, se li menm ki ban mwen fwi pyebwa a pou m' manje, epi mwen manje l'. ¹³ Seyè a, Bondye a, mande fanm lan. Poukisa ou fè sa? Fanm lan reponn li. Se pa mwen non! Se sèpan an wi ki pran tèt mwen ki fè m' manje l'. ¹⁴ ¶ Seyè a, Bondye a, di sèpan an konsa. Poutèt sa ou fè a, ou madichonnen nan mitan tout bèt jaden ak tout bèt nan bwa. W'a rale sou vant ou. W'a manje pousyè tè jouk jou ou mouri. ¹⁵ Ou menm ak fanm lan, m'ap fè nou lènmi yonn ak lòt. Pitit pitit pa l' ak pitit pitit pa ou ap lènmi tou. Pitit pitit li ap kraze tèt ou, epi ou menm w'ap mòde l' nan talon pye l'. ¹⁶ ¶ Li di fanm lan. Lè w'ap fè pitit, m'ap fè soufrans ou vin pi rèd. Wa gen pou soufri anpil lè w'ap akouche. W'ap toujou anvi mari ou. Men, se mari ou ki va chèf ou. ¹⁷ ¶ Apre sa li di Adan. Ou koute pawòl madanm ou, pa vre! Ou manje fwi pyebwa mwen te ba ou lòd pa manje a. Poutèt sa ou fè a, m'ap madichonnen tè a. W'a gen pou travay di toutan pou fè tè a bay sa ou bezwen pou viv. ¹⁸ Tè a va kale tout kalite pikan ak pengwen ba ou. W'a manje fèy ki pouse nan raje. ¹⁹ Se swe kouraj ou ki pou fè ou mete yon moso pen nan bouch ou jouk lè wa tounen nan tè kote ou soti a. Paske, se pousyè ou ye, ou gen pou tounen pousyè ankò. ²⁰ ¶ Adan bay madanm li non, li rele l' Ev, paske se li menm ki manman tout moun k'ap viv sou tè a. ²¹ ¶ Lè sa a, Seyè a, Bondye a, pran po bèt, li fè rad pou Adan ansanm ak madanm li, li biye yo. ²² ¶ Apre sa, Seyè a, Bondye a, di. Koulye a, Adan vin konnen sa ki byen ak sa ki mal tankou yonn nan nou. Nou p'ap kite l' lonje men l' keyi fwi pyebwa ki bay lavi a pou l' manje l', pou l' pa viv pou tout tan. ²³ Se konsa, Seyè a, Bondye a, mete Adan deyò nan jaden Edenn lan. Li voye l' al travay tè, menm tè Bondye te pran pou fè l' la. ²⁴ Se konsa, li te

mete Adan deyò. Sou bò kote solèy leve nan jaden an, li mete kèk zanj cheriben ak yon manchèt klere kou dife nan men yo. Yo t'ap dragonnen nan tout direksyon pou anpeche moun pwoche bò pyebwa ki bay lavi a.

Chapter 4

¹ ¶ Lè sa a, Adan kouche ak Ev, madanm li. Madanm li vin ansent. Li fè yon pitit gason, li rele l' Kayen, epi li di. Avèk konkou Bondye, mwen gen yon gason. ² Apre sa, li fè Abèl, frè Kayen. Abèl te gadò mouton, Kayen menm te travay latè. ³ ¶ Kèk tan apre sa, Kayen pran nan rekòt li, li ofri bay Seye a. ⁴ Abèl menm, bò pa l', pran sa ki pi gra nan premye pitit mouton l' yo, li ofri bay Seyè a. Seyè a te kontan ofrann Abèl la. ⁵ Men, li pa t' asepte ofrann Kayen an. Lè Kayen wè sa, li te move anpil. Li move, li mare figi l' byen mare. ⁶ ¶ Lè sa a, Seyè a di Kayen. Poukisa ou move konsa? Poukisa ou mare figi ou konsa? ⁷ Si sa ou te fè a te byen, ou pa ta rive nan sitiyasyon sa a. Men, paske ou fè sa ki mal, peche kouche nan papòt ou. L'ap tann konsa lè pou l' pran tèt ou. Men, ou menm, se pou ou kenbe tèt ak li. ⁸ ¶ Yon jou, Kayen di Abèl, frè li. Ann al nan jaden. Vwala, antan yo nan jaden an, Kayen vire sou frè li, li touye li. ⁹ ¶ Seyè a mande Kayen. Kote Abèl, frè ou la? Kayen reponn. Mwen pa konnen. Eske ou te mete m' veye l'? ¹⁰ Bondye di l' konsa. Kisa ou fè konsa? San Abèl, frè ou, ki koule atè a, ap rele tankou yon vwa moun. Li rive jouk nan zòrèy mwen. L'ap mande revanj. ¹¹ Koulye a, tè ki te louvri bouch li pou l' te bwè san frè ou ou te fè koule a, menm tè sa a ap tounen yon madichon pou ou. ¹² Lè w'a travay latè, li p'ap ba ou sa l' te dwe ba ou. W'ap tounen yon vakabon k'ap plede mache toupatou sou latè san rete. ¹³ ¶ Kayen di Seyè a: Chatiman an twòp pou mwen. Mwen p'ap ka sipòte l'. ¹⁴ Men ou mete m' deyò sou tè sa a koulye a, se kache pou m' al kache pou ou pa wè m'. M'ap tounen yon vakabon k'ap plede mache toupatou sou latè san rete. Nenpòt moun ki jwenn mwen va touye m'. ¹⁵ Seyè a di: Non. Paske, si yon moun touye Kayen, y'ap fè l' peye sa sèt fwa. Se konsa, li mete yon siy sou Kayen pou moun pa touye l' si yo jwenn li. ¹⁶ ¶ Apre sa, Kayen wete kò l' devan Seyè a, li al rete nan yon peyi yo rele Nòd, lòt bò jaden Edenn lan, sou kote solèy leve a. ¹⁷ Kayen kouche avèk madanm li. Madanm li vin ansent, li fè yon ti gason yo rele Enòk. Apre sa, Kayen bati yon vil, li rele l' Enòk. Li ba l'

¹⁸ menm non ak pitit gason l' lan. Enòk te fè yon pitit gason yo rele Irad. Se Irad sa a ki te papa
 Meoujaèl. Meoujaèl te papa Metouchaèl. Se Metouchaèl ki te papa Lemèk. ¹⁹ ¶ Lemèk te gen de
 madanm. Yonn te rele Ada, lòt la te rele Zila. ²⁰ Se Ada ki manman Jabal. Jabal sa a, se li menm
 ki zansèt tout moun sa yo ki rete anba tant epi ki gade bèt. ²¹ Frè menm manman ak li a te rele
 Joubal. Se li menm ki zansèt tout moun sa yo k'ap jwe gita ak fif. ²² Zila menm bò pa l' te manman
 Toubal Kayen, yon bòs fòjon ki te konn travay kwiv ak fè. Toubal Kayen te gen yon sè menm
 manman ak li ki te rele Naama. ²³ ¶ Yon jou Lemèk di madanm li yo: Ada ak Zila, koute sa m'ap
 di nou! Madanm mwen yo, tandè byen sa m'ap di nou! Mwen touye yon moun paske li leve men
 li sou mwen. Mwen touye yon jenn gason paske li mete san m' deyò. ²⁴ Si yon moun touye Kayen
 y'ap fè l' peye sa sèt fwa. Men, si yon moun touye m', mwen menm Lemèk, y'ap fè l' peye sa
 swasanndisèt fwa. ²⁵ ¶ Adan te kouche ak madanm li ankò. Madanm li fè yon ti gason. Madanm
 lan di: Bondye ban m' yon lòt gason pou ranplase Abèl Kayen te touye a. Li rele l' Sèt. ²⁶ Sèt, pou
 tèt pa l', vin gen yon pitit gason, li rele l' Enòk. Se lè sa a moun konmanse fè sèvis pou Seyè a.

Chapter 5

¹ ¶ Men lis non pitit pitit Adan yo: Lè Bondye kreye moun, li te fè yo pòtre avè l'. ² Li kreye
 yo gason ak fi. Li beni yo. Jou li kreye yo a, li rele yo moun. ³ Adan te gen santrantan (130 an) lè
 li vin gen yon pitit gason ki te sanble avè l' tèt koupe, li rele l' Sèt. ⁴ Apre nesans Sèt, Adan viv
 witsanzan (800 an). Li te vin gen anpil lòt pitit gason ak pitit fi. ⁵ Lè Adan mouri li te gen
 nèfsantrantan (930 an). ⁶ ¶ Sèt te gen sansenkan (105 an) lè li vin gen yon pitit gason yo te rele
 Enòk. ⁷ Apre nesans Enòk, Sèt viv witsansetan (807 an). Li te vin gen anpil lòt pitit gason ak pitit
 fi. ⁸ Lè Sèt mouri, li te gen nèfsandouzan (912 an). ⁹ Enòk te gen katrevendizan lè li vin gen yon
 pitit gason yo rele Kenan. ¹⁰ Apre nesans Kenan, Enòk viv witsankenzenan (815 an). Li te vin gen
 anpil lòt pitit gason ak pitit fi. ¹¹ Lè Enòk mouri, li te gen nèfsansenkan (905 an). ¹² Kenan te gen
 swasanndizan lè li vin gen yon pitit gason yo rele Malaleyèl. ¹³ Apre nesans Malaleyèl, Kenan viv
 witsankarantan (840 an). Li te vin gen anpil lòt pitit gason ak pitit fi. ¹⁴ Lè Kenan mouri, li te gen

¹⁵ nèsandizan (910 an). Malaleyèl te gen swasanssenkan lè li vin gen yon pitit gason yo rele Jerèd.
¹⁶ Apre nesans Jerèd, Malaleyèl viv witsantrantan (830 an). Li te vin gen anpil lòt pitit gason ak
¹⁷ pitit fi. Lè Malaleyèl mouri, li te gen witsankatrevenkenzan (895 an). ¹⁸ Jerèd te gen
¹⁹ sanswanndezan (162 an) lè li vin gen yon pitit gason yo rele Enòk. Apre nesans Enòk, Jerèd viv
²⁰ witsanzan (800 an). Li te vin gen anpil lòt pitit gason ak pitit fi. Lè Jerèd mouri, li te gen
²¹ nèsanswasanndezan (962 an). ¶ Enòk te gen swasanssenkan lè li vin gen yon pitit gason yo
²² rele Metouchela. Apre nesans Metouchela, Enòk te mache byen ak Bondye pandan twasanzan
²³ (300 an). Li te vin gen anpil lòt pitit gason ak pitit fi. - ²⁴ Enòk te pase tout vi l' ap mache byen
²⁵ ak Bondye. Li te gen twasanswasanssenkan (365 an) lè l' disparèt, paske Bondye te pran l' avè l'.
²⁶ ¶ Metouchela te gen sankatrevensètan (187 an) lè li vin gen yon pitit gason yo rele Lemèk.
²⁷ Apre nesans Lemèk, Metouchela viv sètsankatrevendezan (782 an). Li te vin gen anpil lòt pitit
²⁸ gason ak pitit fi. Lè Metouchela mouri, li te gen nèsanswantnevan (969 an). ¶ Lemèk te gen
²⁹ sankatrevendezan (182 an) lè li vin gen yon pitit gason. Li rele l' Noe. Li di konsa: Pitit sa a va
³⁰ soulaje nou anba tout travay di n'ap fè, anba gwo travay nou blije fè avèk men nou paske Seyè a
³¹ te madichonnen tè a. Apre nesans Noe, Lemèk viv senksankatrevenkenzan (595 an). Li te vin
³² gen anpil lòt pitit gason ak pitit fi. Lè Lemèk mouri, li te gen sètsanswasanndisetan (777 an).
³² Noe te gen senksanzan (500 an) lè li vin gen twa pitit gason: Sèm, Kam ak Jafè.

Chapter 6

¹ ¶ Lè sa a, moun te konmanse ap fè anpil anpil pitit sou latè. Yo te vin gen anpil pitit fi. ² Pitit
³ gason Bondye yo te wè jan pitit fi lèzòm yo te bèl. Se konsa, nan fi yo te renmen yo, yo pran ladan
⁴ yo pou madanm yo. ¶ Lè Seyè a wè sa, li di: Mwen p'ap kite lèzòm viv pou tout tan, paske se
⁵ moun ase yo ye. Se sanventan (120 an) sèlman pou yo viv. ¶ Lè sa a, epi pandan lontan apre sa,
⁶ te vin gen sou latè yon ras moun wo anpil: se te pitit pitit fi lèzòm yo te fè pou pitit gason bondye
⁶ yo. Se yo ki te vanyan gason nan tan lontan yo, kifè tout moun t'ap nonmen non yo. Seyè a wè
⁶ jan lèzòm te mechan toupatou sou latè, ki jan tout lajounen se move lide ase ki te nan tèt yo. ¶

Li vin règrèt li te fè moun sou latè. Kè l' vin sere ak lapenn. ⁷ Seyè a di: Mwen pral disparèt tout moun mwen te kreye yo, san kite yonn. Epi m'ap detwi ansanm ak yo tout tou bèt kat pat, tout bèt ki trennen sou vant ak tout zwazo k'ap vole nan syèl, paske mwen règrèt anpil dèske mwen te fè yo. ⁸ ¶ Men, Noe te fè Bondye plezi. ⁹ Men pitit pitit Noe yo. Nan tout moun ki t'ap viv lè sa a, Noe te sèl moun ki t'ap mache dwat devan Bondye, ki pa t' nan anyen ki mal. Li t'ap mache byen ak Bondye. ¹⁰ Li te gen twa pitit gason: Sèm, Kam ak Jafè. ¹¹ ¶ Men, tout lòt moun yo te fin pouri devan Bondye. Toupatou sou latè se te mechanste sou mechanste. ¹² Bondye gade latè, li wè l' te fin pouri, paske tout moun sou latè te fin pèvèti. ¹³ ¶ Lè sa a, Bondye di Noe konsa: Mwen deside pou m' fini ak tout moun, paske se yo ki lakòz toupatou sou latè se mechanste ase. Wi, mwen pral detwi yo nèt ansanm ak tout sa ki sou latè. ¹⁴ Fè yon gwo batiman pou ou ak bwa pichpen. W'a fè anpil ti chanm ladan l'. W'a badijonnen l' byen badijonnen anndan kou deyò avèk goudwon. ¹⁵ Men ki jan pou ou fè l': Batiman an va gen katsansenkant (450) pye longè, swasannkenz pye lajè, ak karannsenk pye wotè. ¹⁶ W'a mete yon twati sou batiman an. W'a kite yon espas dizwit pous ant twati a ak rebò a. W'a louvri yon sèl pòt sou kote batiman an. W'a mete yon etaj anba, yon etaj nan mitan, yon etaj anwo. ¹⁷ Mwen pral voye yon gwo inondasyon dlo sou latè pou detwi tout sa k'ap viv anba syèl la. tout sa ki sou latè pral peri. ¹⁸ Men, m'ap fè yon kontra avè ou. W'a antre nan batiman an, ou menm, pitit gason ou yo, madanm ou ansanm ak madanm pitit ou yo. ¹⁹ W'a pran avèk ou tout yon pè nan tout kalite bèt, yon mal ak yon femmèl. Wa fè yo antre nan batiman an ansanm ak ou pou yo pa mouri. ²⁰ Konsa, nan tout kalite zwazo, nan tout kalite bèt domestik, nan tout kalite bèt ki trennen sou vant yo, gen yon pè nan chak kalite ki va vin jwenn ou pou yo pa mouri. ²¹ Ou menm bò pa ou, ranmase tout kalite manje, mezi ou kapab. Fè yon bèl pwovizyon mete la pou ou ka jwenn manje pou ou manje ansanm ak tout bèt yo tou. ²² ¶ Se konsa Noe fè tout sa Bondye te ba li lòd fè a. Wi, se sa menm li te fè.

Chapter 7

¹ ¶ Seyè a di Noe: Antre nan gwo batiman an, ou menm ansanm ak tout fanmi ou, paske, nan tout moun k'ap viv koulye la a, se ou menm sèl mwen wè k'ap mache dwat devan mwen. ² Nan tout bèt ki bon pou moun manje, w'a pran sèt mal ak sèt femmèl nan chak kalite. Nan tout bèt ki pa

bon pou moun manje, w'a pran yon mal ak yon fenmèl nan chak kalite. ³ Konsa tou, pou zwazo
 k'ap vole nan syèl la, w'a pran sèt mal ak sèt fenmèl nan chak kalite, pou ras la pa disparèt sou latè.
⁴ Paske, nan sèt jou ankò, m'ap fè yon sèl lapli tonbe sou latè pandan karant jou karant nwit. M'ap
 disparèt tout moun ak tout bèt mwen te fè mete sou latè. ⁵ ¶ Noe fè tout sa Seyè a te ba li lòd fè a.
⁶ Noe te gen sisanzan (600 an) lè inondasyon an te fèt sou latè. ⁷ Li antre nan batiman an, li menm,
 pitit gason li yo, madanm li ansanm ak madanm pitit li yo pou yo te ka chape anba inondasyon an.
⁸ tout kalite bèt, kit sa ki bon pou moun manje, kit sa ki pa bon pou moun manje, tout zwazo, tout
 bèt ki trennen sou vant, ⁹ yo tout yo vin jwenn Noe nan batiman an, de pa de, mal ak fenmèl, jan
 Bondye te bay Noe lòd la. ¹⁰ Sou sèt jou vre, dlo kouvri tout latè. ¹¹ ¶ Jou ki fè Noe sisanzan (600
 an), yon mwa, disèt jou, tout sous nan fon lanmè a pete. Syèl la menm louvri, li konmanse vide dlo
 sou tè a. ¹² Lapli tonbe san rete pandan karant jou karant nwit. ¹³ ¶ Menm jou sa a, Noe, madanm
 li, pitit gason l' yo, Sèm, Kam ak Jafè, ansanm ak madanm yo antre nan batiman an, ¹⁴ ansanm ak
 tout kalite bèt domestik, tout kalite bèt ki trennen sou vant ak tout kalite zwazo, tout kalite ti zwazo,
 tout kalite bèt ki gen zèl. ¹⁵ Yo tout yo te vin jwenn Noe nan batiman an, de grenn nan chak kalite
 bèt vivan ki sou latè. ¹⁶ Se konsa, yon mal ak yon fenmèl nan chak kalite bèt vivan antre nan
 batiman an, jan Bondye te bay lòd la. Epi Bondye fèmen pòt la dèyè Noe. ¹⁷ ¶ Pandan karant jou,
 dlo kouvri tout tè a. Dlo yo gonfle, yo fè batiman an pèdi tè. ¹⁸ Dlo yo ranfòse, yo gonfle pi rèd
 sou tè a jouk batiman an t'ap flote nèt sou dlo a. ¹⁹ Dlo a moute pi rèd toujou anwo tè a, li kouvri
 tèt tout gwo mòn ki anba syèl la. ²⁰ Dlo a moute vennsenk pye depase tèt mòn yo. ²¹ ¶ Lè sa a,
 tout bèt sou latè mouri: zwazo, bèt domestik, zannimo, tout bèt ki trennen sou vant yo, ansanm ak
 tout moun. ²² tout bèt vivan ak tout moun sou latè mouri. ²³ Se konsa, Seyè a detwi tout bèt, tout
 sa ki te sou latè, depi ou tande se moun jouk zannimo domestik, bèt ki trennen sou vant ak zwazo
 k'ap vole nan syèl la. Yo tout yo disparèt sou latè. Sèl moun ki te rete se te Noe avèk lòt moun ki
 te nan batiman an ansanm ak li yo. ²⁴ Apre sa, dlo a rete anwo tè a pandan sansenkant (150) jou.

Chapter 8

¹ ¶ Men, Bondye vin chonje Noe ansanm ak tout bèt bwa ak zannimo domestik ki te avè l' nan batiman an. Bondye fè yon van soufle sou latè, epi dlo yo konmanse bese. ² Sous dlo ki nan fon lanmè a te sispann bay dlo. Syèl la sispann bay dlo tou. Lapli sispann tonbe. ³ Dlo yo menm t'ap bese, yo t'ap bese piti piti. Se sou sansenkant (150) jou dlo yo te konmanse bese. ⁴ ¶ Sou sis mwa disèt jou, batiman an fè tè sou tèt mòn Arara yo. ⁵ Dlo yo t'ap bese toujou jouk sou dizyèm mwa a. Sou premye jou dizyèm mwa a, tèt mòn yo parèt. ⁶ ¶ Karant jou apre sa, Noe louvri fennèt li te fè nan batiman an. ⁷ Li lage yon kònèy. Kònèy la soti. li ale vini, li ale vini jouk dlo a te fin cheche nèt sou latè. ⁸ Apre sa, li lage yon pijon, pou l' wè si dlo a te fin bese sou tè a. ⁹ Men, pijon an pa t' jwenn kote pou l' poze. Li tounen vin jwenn Noe nan batiman an, paske te gen dlo sou tout latè toujou. Noe lonje men l', li pran pijon an, li fè l' antre nan batiman an ankò. ¹⁰ Li tann sèt jou pase. Apre sa, li lage pijon an yon dezyèm fwa, li fè l' soti nan batiman an. ¹¹ Vè aswè konsa, pijon an tounen vin jwenn li. Men, fwa sa a, li te gen yon fèy oliv tout vèt nan bèk li. Konsa, Noe vin konnen dlo a te bese sou tout latè. ¹² Li tann sèt jou pase anvan li lage pijon an ankò. Fwa sa a menm pijon an pa t' tounen vin jwenn li ankò. ¹³ ¶ Se konsa, lè Noe te gen sisan ennan (601 an), nan premye jou premye mwa lanne jwif yo, dlo a te fin bese nèt sou latè. Noe dekouvri batiman an, li voye je l' gade, li wè tout tè a te chèch. ¹⁴ Sou vennsityèm jou dezyèm mwa a, tè a te fin chèch nèt. ¹⁵ ¶ Lè sa a, Bondye di Noe: ¹⁶ -Soti nan batiman an, ou menm, madanm ou, pitit ou yo ansanm ak madanm pitit ou yo. ¹⁷ Fè tout bèt yo soti tout ansanm avèk ou, zwazo yo, zannimo domestik yo, tout bèt k'ap trennen sou vant yo. Se pou yo fè pitit, fè anpil pitit pou mete sou tè a ankò. ¹⁸ Se konsa Noe soti nan batiman an ansanm ak madanm li, pitit li yo ak madanm pitit li yo. ¹⁹ tout bèt bwa yo, tout zannimo domestik yo, tout bèt k'ap trennen sou vant yo, tout zwazo yo, yo tout yo soti nan batiman an tou. ²⁰ ¶ Noe bati yon lotèl. Li pran yonn nan chak kalite bèt ak zwazo ki bon pou moun manje, li touye yo, li boule yo nèt sou lotèl la. ²¹ Lè Bondye pran bon sant lan, sa te fè l' plezi. Li di nan kè l' -Mwen p'ap janm bay tè a madichon ankò poutèt sa lèzòm fè, paske depi yo jenn, se move lide ase ki nan kè yo. Mwen p'ap janm detwi tout bèt vivan yo ankò, jan mwen sot fè l' la. ²² Toutotan latè a la, va gen yon lè pou plante, yon lè pou rekòlte, va gen sezon fredri ak sezon chalè, va gen sezon sèk, ak sezon lapli, va gen lajounen, va gen lannwit. Wi, toutotan latè a la, bagay sa yo p'ap janm sispann.

Chapter 9

¹ ¶ Bondye beni Noe ak pitit li yo, li di yo. Fè pitit, fè anpil anpil pitit mete sou tè a. ² Se pou tout zannimo sou latè, tout zwazo ki nan syèl la, tout bèt vivan ki sou latè, tout pwason ki nan lanmè bese tèt devan nou. Se pou yo pè nou. Mwen ban nou pouvwa sou yo tout. ³ Koulye a, nou gen dwa manje tout kalite bèt vivan k'ap mache, tout kalite fèy vèt. Mwen ban nou tout pou manje. ⁴ Tansèlman, se pa pou n' manje vyann ak tout san ladan l', paske san yon bèt se nanm li. ⁵ Konprann sa byen: si yon moun touye nou, m'ap fè l' rann mwen kont. M'ap fè tout bèt ki touye nou rann mwen kont. tout moun ki touye moun parèy yo gen pou rann mwen kont. ⁶ Si yon moun touye yon moun, yon lòt moun gen pou touye l' tou, paske Bondye kreye moun pòtre ak li. ⁷ Nou menm, se pou nou fè pitit, anpil pitit. Gaye kò nou toupatou sou latè, pou pitit nou yo toujou fè anpil pitit tou. ⁸ ¶ Bondye pale ankò ak Noe ansanm ak pitit li yo, li di yo: ⁹ -Men m'ap pase yon kontra ak nou tout ansanm ak tout pitit pitit k'ap vin apre nou yo. ¹⁰ M'ap pase kontra a ak tout bèt vivan ki la avèk nou yo, zwazo, zannimo domestik, bèt nan bwa, avèk tout sa ki soti nan batiman an pou peple sou latè ankò. ¹¹ Wi, m'ap pase kontra mwen ak nou: mwen pwomèt pou m' pa janm voye gwo inondasyon ankò pou detwi tout moun ak tout bèt vivan yo. Konsa, p'ap janm gen gwo inondasyon ankò pou ravaje latè. ¹² ¶ Bondye di ankò-Kontra m'ap pase avèk nou ansanm ak tout bèt vivan ki la avèk nou yo, se yon kontra k'ap la pou tout tan. M'ap ban nou yon siy pou li. ¹³ M'ap mete lakansyèl mwen nan syèl la. Men siy m'ap ban nou pou kontra mwen pase ak latè a. ¹⁴ Chak fwa m'a fè nwaj yo konmanse sanble, lakansyèl la va parèt nan syèl la. ¹⁵ Lè sa a, m'a chonje kontra mwen te fè avèk nou ansanm avèk tout kalite bèt vivan yo. p'ap janm gen gwo inondasyon ankò ki pou detwi tout moun ak tout bèt k'ap viv sou latè. ¹⁶ Lè lakansyèl la va parèt nan syèl la, m'a wè l', m'a chonje kontra mwen te pase pou tout tan ak tout moun ansanm ak tout kalite bèt k'ap viv sou latè. ¹⁷ Sa se siy kontra mwen pase ak tout moun ansanm ak tout bèt k'ap viv sou latè. Se konsa Bondye te pale ak Noe. ¹⁸ ¶ Men non pitit Noe yo ki te soti nan batiman an: Sèm, Kam ak Jafè. Kam se te papa Kanaran. ¹⁹ Se twa pitit Noe sa yo ki peple mete moun sou tout latè. ²⁰ Noe se premye moun ki travay latè. Li plante yon jaden rezen. ²¹ Yon jou, apre li te fin bwè diven, li sou. Li wete tout rad sou li, li kouche toutouni anba tant li. ²² Lè Kam, papa Kanaran, wè papa l' toutouni, li ale di de frè l' yo sa. ²³ Men, Sèm ak Jafè pran yon gwo rad, yo chak pran yon bout, yo pase l'

dèyè do yo, yo kenbe l' anwo zepòl yo. Yo mache pa do, yo antre, yo kouvri papa yo san yo pa janm vire tèt yo gade dèyè. Konsa yo pa wè papa yo toutouni. ¶ Lè Noe soti anba toudisman diven l' lan, yo di l' sa dezyèm pitit gason l' lan te fè l'. Li di. Madichon pou Kanaran! Se pou l' tounen dènnye klas esklav frè l' yo. Li di ankò. Lwanj pou Seyè a, Bondye Sèm lan. Se pou Kanaran tounen esklav Sèm. Se pou Bondye mete sou byen Jafè yo. Se pou pitit pitit Jafè yo viv byen ak pitit Sèm yo. Se pou Kanaran tounen esklav yo. ¶ Apre gwo inondasyon an, Noe viv twasansenkantan (350 an). Lè l' mouri, li te gen nèfsansenkantan (950 an).

Chapter 10

¶ Apre gwo inondasyon an, pitit Noe yo, Sèm, Kam ak Jafè, te fè pitit. Men non pitit gason yo te fè. Men pitit gason Jafè yo: Se te Gomè, Magòg, Madayi, Javan, Toubal, Mechèk ak Tiras. Gomè te fè twa pitit gason. Achkenaz, Rifat ak Togama. Se Javan ki te papa Elisha, Tasis, Kitim ak Wodanim. Se tout pitit ak pitit pitit Jafè yo sa ki zansèt tout moun k'ap viv nan zile yo, yo chak sou tè pa yo, yo chak ak lang pa yo. Yo t'ap viv ansanm, fanmi ak fanmi, nasyon ak nasyon. ¶ Men pitit gason Kam yo. Se te Kouch, Mizrayim, Pout ak Kanaran. Kouch te fè senk pitit gason: Seba, Avila, Sabta, Rama ak Sabteka. Rama menm te gen de pitit gason: Seba ak Dedan. Kouch te gen yon lòt pitit gason yo te rele: Nimwòd. Nimwòd sa a, se premye moun ki te gwo chèf sou latè. Se te yon gwo chasè devan Seyè a. Se poutèt sa yo di. Gwo chasè devan Bondye tankou Nimwòd. Nan peyi kote li t'ap gouvènen an te gen lavil sa yo: Babèl, Erèk, Akad, Kalne nan peyi Chenea. Apre sa, li kite peyi a, li ale lavil Asou. Men lavil li bati yo: Neniv, Reobòt-Ir, Kalak. Lèfini, li bati lavil Rezèm ant Neniv ak Kalak. Kalak sa a te yon gwo lavil. Mizrayim fè pitit. Se yo ki zansèt moun peyi Lidi, peyi Anan, peyi Leyab ak peyi Naftou, peyi Patwous, peyi Kaslou ak peyi Kaftò. Se nan peyi Kaslou sa a moun Filisti yo soti. ¶ Premye pitit Kanaran se te Sidon. Apre sa vin Et. Se Kanaran tout ki papa Jebis, Amori, Gigach, Evi, Aka, Seni, Avad, Zema, Amat. Apre sa tout fanmi Kanaran yo gaye. Lizyè tè moun Kanaran yo pati depi lavil Sidon, li mete tèt sou Gera jouk li rive Gaza. Apre sa, li vire sou Sodòm ak Gomò, Adma ak

²⁰ Seboyim jouk li rive Lecha. ²¹ Se tout pitit ak pitit pitit Kam yo sa, yo chak sou tè pa yo, yo chak ak lang yo. Yo t'ap viv ansanm, fanmi ak fanmi, nasyon ak nasyon. ¶ ²² Sèm te gran frè Jafè. Li te gen anpil pitit tou. Se li ki te zansèt tout pitit Ebè yo. ²³ Men pitit gason Sèm yo. Se te Elam, Asou, Apachad, Lidi ak Aram. ²⁴ Men pitit Aram yo. Se te Ouz, Oul, Getè ak Mach. ²⁵ Se Apachad ki te papa Chelak. Chelak menm te papa Ebè. ²⁶ Ebè te gen de pitit gason. Yonn te rele Pelèg, paske se nan tan li moun sou latè te divize yonn ak lòt. Yo te rele frè l' la Joktan. ²⁷ Joktan te papa Almodad, Chelèf, Azmavèt, Jerak, ²⁸ Adoram, Ouzal, Dikla, ²⁹ Obal, Abimayèl, Seba, ³⁰ Ofi, Avila ak Jobab. Yo tout se pitit Joktan yo te ye. ³¹ Tè kote yo t'ap viv la te pran depi lavil Mecha, li moute kote lavil Sefa, jouk mòn ki bò kote solèy leve a. ³² Se tout pitit ak pitit pitit Sèm yo sa, yo chak sou tè pa yo, yo chak ak lang pa yo. Yo t'ap viv ansanm, fanmi ak fanmi, nasyon ak nasyon. tout moun sa yo se branch fanmi pitit Noe yo, dapre zansèt yo, nasyon pa nasyon. Apre gwo inondasyon an, tout nasyon ki sou latè soti nan pitit Noe yo.

Chapter 11

¹ ¶ Nan konmansman, tout moun sou latè te pale yon sèl lang, yonn te konprann lòt. ² Apre yo pati soti kote solèy leve a, yo rive nan yon plenn nan peyi Chenea. Yo moute kay yo la, yo rete. ³ Lè sa a, yonn di lòt. Mezanmi, vini non! Ann fè brik. Ann kwit yo nan dife. Se konsa, yo pran brik sèvi wòch pou bati kay, yo pran asfat sèvi mòtye. ⁴ Apre sa, yo di. Annou wè! Ann bati yon gwo lavil pou nou rete ak yon gwo gwo kay tout won byen wo ki rive jouk nan syèl la. Konsa tout moun va respekte nou, yo p'ap ka gaye nou toupatou sou latè. ⁵ ¶ Seyè a desann pou l' wè lavil la ansanm ak gwo kay won moun yo t'ap bati a. ⁶ Epi li di. Koulye a, gade! Yo tout fè yon sèl pèp. Yo tout yo pale yon sèl lang. Gade sa yo konmanse ap fè. Talè konsa y'ap pare pou yo fè sa yo vle. ⁷ Bon. N'ap desann, n'ap mele lang yo. Konsa, yonn p'ap ka konprann sa lòt ap di. ⁸ Se konsa Seyè a gaye yo toupatou sou latè. Yo sispann bati lavil la. ⁹ Se poutèt sa yo rele lavil la Babèl, paske se la Seyè a te mele lang tout moun ki rete sou latè, li fè yo pati, li gaye yo toupatou sou latè. ¹⁰ ¶ Men pitit pitit Sèm yo. Dezan apre inondasyon an, Sèm te gen santan (100 an) lè li fè yon pitit gason yo rele Apachad. ¹¹ Apre sa, li viv senksanzan (500 an) ankò. Li te fè lòt pitit gason ak pitit

¹² fi. Apachad te gen trannsenkan lè li te fè yon pitit gason yo rele Chela. ¹³ Apre sa, li viv
katsantwazan (403 an) ankò. Li te fè lòt pitit gason ak pitit fi. ¹⁴ Chela te gen trantan lè li fè yon
pitit gason yo rele Ebè. ¹⁵ Apre sa, li viv katsantwazan (403 an) ankò. Li te fè lòt pitit gason ak
pitit fi. ¹⁶ Ebè te gen tranakatran lè li fè yon pitit gason yo rele Pelèg. ¹⁷ Apre sa, li viv kasantrantan
(430 an). Li te fè lòt pitit gason ak pitit fi. ¹⁸ Pelèg te gen trantan lè li fè yon pitit gason yo rele
Reou. ¹⁹ Apre sa, li viv desannevan (209 an) ankò. Li te fè lòt pitit gason ak pitit fi. ²⁰ Reou te
gen tranndezan lè li fè yon pitit gason yo rele Sewoug. ²¹ Apre sa, li viv desansetan (207 an) ankò.
Li fè lòt pitit gason ak pitit fi. ²² Sewoug te gen trantan lè li fè yon pitit gason yo rele Nakò. ²³ Apre
sa, li viv desanzan (200 an) ankò. Li te fè lòt pitit gason ak pitit fi. ²⁴ Nakò te gen ventnevan lè li
fè yon pitit gason yo rele Terak. ²⁵ Apre sa, li viv sandiznevan (119 an) ankò. Li te fè lòt pitit gason
ak pitit fi. ²⁶ Terak te gen swasannizan lè li fè twa pitit gason yo rele Abram, Nakò ak Aran. ²⁷ ¶
Men pitit ak pitit pitit Terak yo: Terak te papa Abram, Nakò ak Aran. Aran te papa Lòt. ²⁸ Aran
mouri anvan papa l'. Li mouri lavil Our nan peyi Kalde kote l' te fèt la. ²⁹ Abram ak Nakò te fè
pozisyon. Abram marye ak Sarayi, Nakò marye ak Milka, pitit fi Aran. Aran te gen yon lòt pitit
ankò yo te rele Jiska. ³⁰ Sarayi pa t' gen pitit, li pa t' ka fè pitit. ³¹ Terak pran pitit li, Abram, pitit
pitit li, Lòt, ki te pitit Aran, ansanm ak bèlfi li Sarayi ki te madanm Abram, pitit li. Li pati ak yo,
li kite lavil Our nan peyi Kalde pou li ale nan peyi Kanaran. Men lè yo rive lavil Karan, yo te rete
³² la. Se la Terak mouri. Li te gen desansenkan (205 an).

Chapter 12

¹ ¶ Seyè a di Abram konsa. Pati, kite peyi ou la. Kite tout fanmi ou. Kite kay papa ou, ale nan
peyi m'a moutre ou la. ² M'ap ba ou anpil pitit pitit. Y'a tounen yon gwo nasyon. m'a beni ou. Y'a
nonmen non ou toupatou; w'a sèvi yon benediksyon pou tout moun. ³ M'ap voye benediksyon
mwen sou tout moun ki va mande benediksyon pou ou. Men, m'ap madichonnen tout moun ki va
ba ou madichon. Gremesi ou, tout nasyon sou latè va jwenn benediksyon. ⁴ ¶ Abram pati jan Seyè
a te di l' la. Lòt pati ansanm avè l' tou. Abram te gen swasannkenzan lè li kite Karan. ⁵ Abram pran

Sarayi, madanm li, Lòt, pitit frè li a, ansanm ak tout byen li te genyen ak tout domestik li te gen avè l' nan lavil Karan, yo tout yo pati pou Kanaran. Yo rive nan peyi a. ¶ Abram mache nan tout peyi a, jouk li rive kote yo rele Sichèm, bò pye bwadchenn More a. Lè sa a se moun Kanaran yo ki te rete nan peyi a. ¶ Abram fè yon vizyon, li wè Seyè a ki di l'. Men peyi m'ap bay pitit pitit ou yo a. Se la Abram bati yon lotèl pou Seyè a ki te parèt devan li nan vizyon an. ¶ Apre sa, li pati ankò, li ale nan mòn ki toupre lavil Betèl, sou bò solèy leve. Li moute tant li la. Betèl te sou bò lanmè, Ayi te sou bò solèy leve. Abram bati yon lotèl pou Seyè a la tou, epi li fè sèvis pou li. ¶ Li vwayaje toujou, li desann nan direksyon sid, bout pou bout jouk li rive nan rejyon Negèv la. ¶ Men, grangou tonbe sou peyi a, pa t' gen manje menm. Se poutèt sa Abram te desann nan peyi Lejip. Li rete la yon bon bout tan. ¶ Li te prèt pou antre nan peyi Lejip lè li di Sarayi, madanm li. Koute non. Ou se yon bèl fanm. ¶ Lè gason nan peyi Lejip yo wè ou, yo pral di: Se madanm li wi! Epi y'a touye m' pou yo sa pran ou nan men m'. ¶ Tanpri, di yo se sè mwen ou ye pou yo pa touye m', pou yo ka aji byen avè m' poutèt ou. ¶ Se konsa, rive Abram rive nan peyi Lejip, mesye yo gen tan wè jan Sarayi te yon bèl fanm. ¶ Kèk grannèg nan gouvènman an wè sa tou, y al di farawon an jan li te bèl. Epi yo mennen Sarayi nan palè a. ¶ Poutèt Sarayi, farawon an te aji byen ak Abram. Li ba li kantite mouton, kabrit, bèf, bourik, chamo, san konte esklav, fanm kou gason, pou sèvi l'. ¶ Men, paske farawon an te pran Sarayi, madanm Abram, pou madanm li, Seyè a voye yon bann move maladi sou li ak sou moun ki te nan palè a. ¶ Lè sa a, farawon an fè rele Abram, li di li. Kisa ou fè m' konsa? Poukisa ou pa t' di m' se madanm ou Sarayi ye? ¶ Poukisa ou te di m' se sè ou li ye? Mwen pa ta janm pran l' pou madanm mwen. Monchè, men madanm ou. Pran l', al fè wout ou. ¶ Farawon an pase moun li yo lòd pou fè Abram pati kite peyi a, li menm ansanm ak madanm li avèk tout sa ki te pou li.

Chapter 13

¶ Abram kite peyi Lejip, li moute nan nò, li tounen nan rejyon Negèv la, ansanm ak madanm li avèk tout sa li genyen. Lòt, neve l' la, te avèk li tou. ¶ Abram te rich anpil, li te gen anpil mouton, anpil kabrit ak anpil bèf, li te gen anpil lajan ak anpil lò. ¶ Li vwayaje toujou jouk li kite Negèv la

dèyè. Bout pou bout li rive bò Betèl, kote li te moute tant li anvan an, ant lavil Betèl ak lavil Ayi.
⁴ Li tounen kote li te moute yon lotèl premye fwa a. Li fè sèvis pou Bondye ankò. ⁵ ¶ Lèt menm, neve ki t'ap vwayaje ansanm avèk Abram lan, te gen mouton ak bèf pa l' tou. Li te gen moun tout avèk li. ⁶ Peyi a te vin twò piti pou yo de a rete ansanm, paske yo te gen twòp zannimo pou bay manje. ⁷ Se konsa, te vin gen yon kabouyay ant gadò mouton Abram yo ak gadò mouton Lèt yo. Lè sa a, se moun Kanaran yo ak moun Ferezi yo ki te rete nan peyi a. ⁸ Abram di Lèt konsa. Monchè, se fanmi nou ye. Pa gen rezon pou nou gen kont yonn ak lòt, ni pou gadò ou yo gen kont ak gadò pa m' yo. ⁹ Men tout peyi a devan nou! Ann separe. Si ou fè bò dwat, m'ap fè bò gòch. Si ou fè bò gòch, m'ap fè bò dwat. ¹⁰ ¶ Lèt voye je l' toupatou, li gade plenn Jouden an byen gade. tout plenn lan, rive jouk Zoa, te wouze nèt ale. Jaden yo te tankou jaden Seyè a, tankou nan peyi Lejip. (Lè sa a, Seyè a pa t' ankò disparèt lavil Sodòm ak Gomò.) ¹¹ Lèt chwazi plenn Jouden an pou li. Li pati nan direksyon solèy leve. Se konsa de mesye yo te separe. ¹² Abram rete nan peyi Kanaran. Lèt menm al moute kay li nan mitan lavil yo ki te nan plenn lan. Li moute kay li bò lavil Sodòm. ¹³ Moun Sodòm yo te move moun anpil. Yo t'ap fè anpil peche kont Seyè a. ¹⁴ ¶ Lè Lèt fin ale, Seyè a di Abram konsa. Kanpe kote ou ye a, voye je ou toupatou, nan tout direksyon: nò, sid, lès, lwès, ¹⁵ paske mwen pral ba ou tout tè ou wè a pou ou ak pou pitit pitit ou yo pou tout tan. ¹⁶ Mapral ba ou anpil pitit pitit. Si yon moun ka konte tout grenn pousyè ki sou latè, la rive konte pitit pitit ou yo tou. ¹⁷ Bon. Koulye a, ou mèt pwonmennen mache nan tout peyi a, paske se ou menm mwen pral bay li. ¹⁸ Se konsa, Abram ranmase tout zafè l', li vin rete bò pye bwadchenn Manmre yo, toupre Ebron. Se la li bati yon lotèl pou Seyè a.

Chapter 14

¹ ¶ Lè sa a, Anmrafèl te wa Chenea, Ajòk te wa Elaza, Kedòlaòmè te wa Elam, Tideal te wa lòt nasyon yo. ² Yo kat yo leve, y al fè lagè ak senk lòt wa. Bera ki te wa Sodòm, Bicha ki te wa Gomò, Cheneab ki te wa Adma, Chemebè ki te wa zeboyim yo, ak wa peyi Bela a. Peyi sa a te rele Zoa tou. ³ Senk wa sa yo mete tè yo ansanm, yo reyini nan Fon Sidim lan kote lanmè Sèl la ye a. ⁴ Pandan douzan, senk wa sa yo te soumèt devan Kedòlaòmè. Lanne ki fè yo trèzan an, yo revòlte. ⁵ Lanne apre sa, ki pou ta fè yo katòzan nan pozisyon sa a, Kedòlaòmè ansanm ak twa wa ki te mete

tèt ansanm ak li yo vin rive. Yo bat refayim yo nan lavil Astawòt-Kanayim, yo bat zouzim yo nan lavil Am, yo bat emim yo nan laplenn Chave-Kiryatayim. ⁶ Yo bat orit yo sou mòn Seyi, jouk bò kote pye bwadchenn Paran an, ki toupre dezè a. ⁷ Apre sa, yo kase tèt tounen, yo rive bò Sous jijman an, yo bat tout chèf moun Amelèk yo, yo pran tout bèt yo. Yo bat moun Amori yo tout ki rete Azazon-Tama, yo bat yo byen bat. ⁸ Lè sa a, wa Sodòm, wa Gomò, wa Adma, wa zeboyim ansanm ak wa Bela a, yo soti, yo pran pozisyon nan Fon Sidim lan pou yo goumen ⁹ kont Kedòlaòmè, wa Elam, Tideal, wa lòt nasyon yo, Anmrafèl, wa Chenea ak Ajòch, wa Elaza. Sa te fè kat wa kont senk wa. ¹⁰ Nan Fon Sidim lan te gen anpil twou byen fon ki te plen asfat. Pandan batay la, wa Sodòm ak wa Gomò yo pran kouri pou lènmi yo, yo te vle wete kò yo nan batay la, yo tonbe nan twou asfat yo. Lòt wa yo menm kouri al kache nan mòn. ¹¹ Kat wa yo pran tout sa yo jwenn nan Sodòm ak Gomò, ata pwovizyon manje, epi y al fè wout yo. ¹² Yo pase men yo yo pran Lòt, pitit frè Abram lan, ansanm ak tout byen l' yo, paske se Sodòm Lòt te rete. ¹³ ¶ Men, yonn nan mesye ki te chape nan batay la vin di Abram sa. Lè sa a, Abram te rete toupre pye bwadchenn Manmre a. Manmre sa a, se te yon moun Amori. Se te frè Echklòl ak Ane. tout de mesye sa yo te pase kontra avèk Abram. ¹⁴ Lè Abram vin konnen yo te fè neve l' la prizonye, li sanble tout domestik ki te fèt lakay li yo epi ki te konn goumen. Li pran twasandizwit (318) antou. Epi li file dèyè wa yo jouk lavil Dann. ¹⁵ La, yon jou lannwit, li separe mesye li yo, li fè yo fè de gwoup, epi li atake lènmi yo. Li bat yo byen bat, li kouri dèyè yo jouk yo rive Oba, ki sou bò nò lavil Damas. ¹⁶ Li reprann tout byen yo te pran yo, li mennen Lòt, neve li a, tounen lakay li ansanm ak tout byen l' yo, tout medam yo ak tout pèp la. ¹⁷ ¶ Apre Abram te fin kraze Kedòlaòmè ansanm ak tout lòt wa ki te fè tèt ansanm ak Kedòlaòmè yo, li t'ap tounen lakay li. Wa Sodòm lan vin rankontre l' nan Fon Chave a ki rele Fon Wa a tou. ¹⁸ Mèlkisedèk menm ki te wa peyi Salèm fè pote pen ak diven vini. Se yon prèt ki t'ap sèvi Bondye ki anwo nan syèl la li te ye. ¹⁹ Li beni Abram, li di. Se pou Bondye ki anwo nan syèl la, li menm ki fè syèl la ak latè a, beni Abram. ²⁰ Lwanj pou Bondye ki anwo nan syèl la. Se li menm ki te lage lènmi ou yo nan men ou. Apre sa, Abram ba li yon dizyèm nan tout sa li te pran. ²¹ ¶ Lèfini, wa Sodòm lan di Abram. Ou mèt gade tout byen yo pou ou. Men ban mwen moun yo sèlman. ²² Abram reponn wa Sodòm lan, li di l'. Mwen fè sèman devan Seyè a, Bondye ki anwo nan syèl la, li menm ki fè syèl la ak latè a, ²³ mwen p'ap pran anyen nan sa ki pou ou, li te mèt yon ti moso fil, yon kòd sapat. Konsa, ou p'ap janm ka di se ou menm ki fè Abram rich. ²⁴ Mwen pa bezwen anyen pou tèt pa m'. Men, m'ap asepte sa moun mwen yo te manje,

ansanm ak pòsyon ki pou moun ki te mache avè m' yo. Wi, se pou Ane, Echkòl ak Mamre pran sa ki vin pou yo a.

Chapter 15

¹ ¶ Apre bagay sa yo, Abram fè yon vizyon. Li wè Seyè a ki t'ap pale avè l'. Seyè a di l' konsa. Abram, ou pa bezwen pè anyen. Se mwen menm k'ap pwoteje ou. M' sere yon gwo gwo rekonpans pou ou.

² ¶ Abram di. Seyè, Bondye, kisa ou vle ban mwen? Mwen tout fin mouri, mwen pa gen pitit. Sèl moun lakay mwen ki pral eritye m', se Elyezè, moun peyi Damas la.

³ Abram di ankò. Gade! Ou pa ban m' pitit. Se yonn nan domestik mwen yo ki pral eritye m'.

⁴ Lè sa a, li tandè Seyè a ki di l' konsa. Non, se pa li menm ki pral eritye ou. Se pwòp pitit zantray ou ki pral eritye ou.

⁵ Seyè a fè Abram soti deyò, li di l' konsa Leve je ou, gade syèl la byen. Konte zetwal yo si ou kapab. Apre sa, li di. Pitit pitit ou yo va anpil tankou zetwal nan syèl la.

⁶ Abram mete konfyans li nan Seyè a, se konsa Seyè a fè l' gras.

⁷ ¶ Seyè a di. Se mwen menm, Seyè a, ki te fè ou soti lavil Our nan peyi Kalde a, pou m' te ka ba ou peyi sa a pou ou.

⁸ Abram di. Seyè, Bondye, kijan pou m' fè konnen peyi sa a pou mwen vre?

⁹ Seyè a di l'. Pran yon ti gazèl bèf twazan, yon fenmèl kabrit twazan, yon belye twazan, yon toutrèl ak yon jenn pijon.

¹⁰ Abram al pran tout bèt sa yo, li koupe yo mitan pou mitan, li mete moso yo yonn anfas lòt. Men, li pa koupe zwazo yo an de.

¹¹ Chak fwa malfini karanklou vin pou desann sou vyann bèt yo, Abram pouse yo ale.

¹² ¶ Solèy tapral kouche lè dòmi vòlè Abram. Li dòmi nèt ale. Epi yon sèl lapèz pran l' nan dòmi an. Kote l' te ye a vin fè tout nwa.

¹³ Seyè a di l'. Konnen sa byen: Pitit pitit ou yo pral viv tankou etranje nan yon peyi ki pa pou yo. Y'ap fè yo tounen esklav, y'ap peze yo pandan katsanzan (400 an).

¹⁴ Men, apre sa, m'ap pini nasyon ki va pran yo fè esklav la. Konsa, lè lè a va rive pou yo kite peyi sa a, y'a soti avèk anpil anpil richès.

¹⁵ Kanta ou menm, ou pral mouri ak kè poze, ou pral jwenn zansèt ou yo ki mouri deja. Wi, anvan ou antre anba tè, wa viv lontan san ankenn pwoblèm.

¹⁶ Apre kat jenerasyon, pitit pitit ou yo va tounen isit la, paske se pou nou tann moun Amori yo rive nan dènye bout mechanste yo.

¹⁷ ¶ Apre solèy fin kouche, te fè nwa anpil. Epi men li, yon recho ki t'ap fè lafimen ansanm ak yon gwo bwa dife tout limen parèt. Yo pase nan mitan moso vyann bèt yo.

¹⁸ Se jou sa a Seyè a te pase kontra avèk Abram. Li di l' konsa M'ap bay pitit pitit ou yo tout peyi

sa a, depi larivyè Lejip, rive jouk larivyè Lefrat la. ¹⁹ Sa vle di tout peyi kote moun Keni yo, moun
 Kenizi yo, moun Kadmon yo, ²⁰ moun Et yo, moun Ferezi yo, moun refayim yo, ²¹ moun Amori
 yo, moun Kanaran yo, moun Gigach yo ak moun Jebis yo rete.

Chapter 16

¹ ¶ Sarayi, madanm Abram, pa t' janm fè pitit. Sarayi te gen yon sèvant, moun peyi Lejip, yo
 te rele Aga. ² Sarayi di Abram konsa. Gade! Seyè a pa kite mwen fè pitit. Al kouche ak sèvant
 mwen an non. Ou pa janm konnen, li ka fè pitit pou mwen. Abram tonbe dakò ak sa Sarayi te di l'
 la. ³ Se konsa, Sarayi, madanm Abram, pran sèvant li a, Aga ki te moun peyi Lejip, li bay Abram
 li pou madanm. Lè sa a, Abram te gen tan gen dizan nan peyi Kanaran. ⁴ ¶ Abram kouche ak Aga.
 Aga vin ansent. Lè Aga wè li ansent, lògèy vire tèt li, li pa gade Sarayi, metrès li, pou anyen ankò.
⁵ Lè sa a, Sarayi di Abram. Se fòt ou wi si m'ap sibi tout wont sa a. Se mwen menm ki te ba ou
 sèvant mwen an pou madanm. Men, depi li wè li ansent lan, li pa gade m' pou anyen ankò. Se Seyè
 a ki pou jije m' avè ou. ⁶ Abram reponn Sarayi, li di l'. Sèvant ou pou ou. Li sou zòd ou. Ou gen
 dwa fè sa ou vle avè l'. Se konsa, Sarayi pran maltrete Aga sitèlman, Aga blije sove kite kay la pou
 li. ⁷ ¶ Zanj Seyè a kontre Aga bò yon sous dlo nan dezè a sou wout ki mennen nan peyi Chour la.
⁸ Li di l' konsa. Aga, sèvant Sarayi, kote ou soti la a? Kote ou prale? Aga reponn. M'ap kouri pou
 Sarayi, metrès mwen. ⁹ Zanj Seyè a di l'. Tounen lakay metrès ou, soumèt ou devan li. ¹⁰ ¶ Zanj
 lan di l' ankò. M'ap ba ou anpil anpil pitit pitit. Moun p'ap ka konte yo. ¹¹ Zanj lan di l' ankò. Gade!
 Ou ansent. Ou pral fè yon ti gason. Wa rele l' Izmayèl, paske Seyè a tandè rèl ou nan tray w'ap pase
 a. ¹² Pitit gason ou lan va tankou yon bourik mawon. L'ap chache tout moun kont. tout moun va
 chache l' kont. Li p'ap mele ak tout frè l' yo. L'ap viv pou kont li. ¹³ Aga di nan kè l'. Ou kwè se
 vre se mwen ki wè moun ki wè m' lan? Se konsa li bay Seyè a yon non, li rele l': Ou se Bondye ki
 wè m' lan. ¹⁴ Se poutèt sa, yo rele pi dlo ki ant Kadès ak Barèd la: Pi moun vivan ki wè m' lan.
¹⁵ ¶ Aga fè yon pitit gason pou Abram. Abram rele pitit la Izmayèl. ¹⁶ Abram te gen katrevensizan
 lè Aga te fè Izmayèl.

Chapter 17

¹ ¶ Le Abram rive sou katrevendisnevan laj, Seyè a parèt devan l', li di l' konsa. Mwen se Bondye ki gen tout pouvwa a. Se pou ou toujou fè sa m' di ou fè. Se pou ou mennen yon vi san repwòch.

² M'ap pase yon kontra avè ou, m'ap ba ou anpil anpil pitit pitit. ³ Lè sa a, Abram mete ajenou, li bese tèt li jouk atè. Bondye pale avè l' ankò, li di l'. ⁴ ¶ -Men kontra m'ap pase avè ou la. W'ap zansèt moun anpil nasyon. ⁵ Yo p'ap rele ou Abram ankò. Men y'a rele ou Abraram, paske m'ap fè ou tounen zansèt moun anpil nasyon. ⁶ M'ap ba ou anpil anpil pitit pitit. Y'ap tounen kantite nasyon. Anpil wa ap soti nan ras ou. ⁷ ¶ M'ap kenbe kontra m' lan avè ou, avèk tout ras ou. De pitit an pitit, se va yon kontra k'ap la pou tout tan. Se mwen k'ap Bondye ou, se mwen k'ap Bondye pitit pitit ou yo tou. ⁸ Ou wè tè kote ou rete tankou moun vini koulye a? Mwen gen pou m' ba ou l' ansanm ak tout pitit pitit ou yo. tout peyi Kanaran an ap rele ou pa ou pou tout tan. Wi, se mwen menm k'ap Bondye yo tout. ⁹ Bondye di Abraram. Men ou menm ansanm ak tout ras ou, de pitit an pitit, se pou nou dakò pou nou kenbe kontra a avèk mwen. ¹⁰ Men sa pou ou menm ansanm ak tout pitit ou yo pou nou dakò fè: se pou tout gason nan mitan nou sikonsi. ¹¹ Depi koulye a, se pou nou sikonsi tout gason. Se pou sa sèvi yon siy pou moutre gen yon kontra ki pase ant nou menm avè m'. ¹² Se pou nou sikonsi tout gason wit jou apre yo fèt, li te mèt pitit moun lakay la, osinon pitit moun lòt nasyon ou pran pou travay lakay ou. ¹³ Wi, se pou yo tout yo sikonsi, kit yo fèt lakay ou, kit yo fèt nan peyi etranje. Se va yon mak nan kò nou pou fè wè kontra mwen pase avèk nou an, se yon kontra ki la pou tout tan. ¹⁴ Si yon gason pa sikonsi, se pou yo disparèt li nan ras la, paske li pa t' kenbe kontra mwen fè ak nou an. ¹⁵ ¶ Apre sa, Bondye di Abraram. Sarayi, madanm ou, p'ap rele Sarayi ankò. Men depi jòdi a y'a rele l' Sara. ¹⁶ M'ap beni madanm ou, m'ap fè l' ba ou yon pitit gason. M'ap beni l', m'ap fè l' tounen manman moun anpil nasyon. Anpil nan pitit pitit li yo va wa. ¹⁷ Abraram mete ajenou, li bese tèt li jouk atè. Men, li tonbe ri lè l' chonje jan l' fin granmoun. Li t'ap di nan kè l'. Eske yon nonm ki gen santan ka fè pitit ankò? Eske Sara, yon fanm ki gen katrevendizan, ka vin ansent? ¹⁸ Li di Bondye. Tanpri, beni Izmayèl. Pa kite l' mouri! ¹⁹ Men Bondye di l'. Non, se Sara madanm ou, ki gen pou fè yon pitit gason pou ou. W'a rele l' Izarak. M'ap kenbe kontra mwen avèk li, ansanm ak pitit pitit li yo. Pa bliye. Se va yon kontra k'ap la pou tout tan. ²⁰ Ou mande m' pou m' pwoteje Izmayèl pou ou! M'ap fè l' pou ou! M'ap beni l',

m'ap ba li anpil pitit ak anpil pitit pitit. Gen douz chèf k'ap soti nan fanmi li. M'ap fè pitit li yo
²¹ tounen yon gwo nasyon. Men, m'ap kenbe kontra mwen an avèk Izarak, pitit gason Sara pral fè
²² pou ou a. L'ap fèt lanne k'ap vini an, lè konsa. Lè Bondye fin pale avèk Abraram, li kite l', li
²³ moute nan syèl. ¶ Jou sa a Abraram pran Izmayèl, pitit gason li an, ak tout gason ki t'ap travay
lakay li, kit yo te fèt nan kay la, kit se moun lòt nasyon li te pran pou sèvi l', li sikonsi yo tout menm
²⁴ jou a, jan Bondye te pase l' lòd la. Abraram poutèt pa l' te gen katrevendiznèvan lè l' te sikonsi.
²⁵ Izmayèl, pitit gason l' lan, te gen trèzan lè l' te sikonsi. ²⁶ Yo tout de, yo sikonsi yo menm jou
²⁷ ansanm ak tout domestik ki te lakay li, kit yo te fèt la, kit se achte li te achte yo nan men moun
lòt nasyon yo.

Chapter 18

¹ ¶ Seyè a parèt devan Abraram bò pye bwadchenn Manmre yo. Abraram te chita nan papòt
kay li, lè ki te fè pi cho nan lajounen an. ² Abraram leve je l', li rete konsa li wè twa mesye kanpe
devan li toupre pyebwa yo. Wè li wè yo, li leve nan papòt la, li kouri al jwenn yo, li bese tèt li jouk
³ atè pou l' di yo bonjou. Li di. Mèt, tanpri. Pa pase devan lakay mwen san ou pa fè yon ti rete. Se
⁴ sèvitè ou mwen ye. Kite m' mande yo pote ti gout dlo pou lave pye ou. Lèfini, w'a pran yon ti
⁵ repo anba pyebwa sa a. 'a pote yon ti manje pou ou soutni kè ou pou ou reprann fòs pou ou ka
kontinye vwayaj ou. Ou rive lakay mwen, mwen la pou m' sèvi ou. Yo reponn li: -Dakò. Ou mèt
⁶ fè jan ou di a. Abraram kouri lakay li, li ale jwenn Sara. Li di l' konsa. Fè vit. Pran trant liv farin
⁷ bon kalite, mouye l', fè pen. Apre sa, Abraram kouri al nan bann bèt li yo, li pran yon jenn ti bèf
⁸ byen gra, li bay yonn nan domestik li yo li pou li prese al kòche l'. Apre sa, li pran fwomaj, li
pran lèt fre, li mete yo ansanm ak vyann yo te pare a, li sèvi mesye yo. Pandan yo t'ap manje,
⁹ Abraram te kanpe bò kote yo anba pyebwa a. ¶ Lèfini, yo mande l'. Kote Sara, madanm ou? Li
¹⁰ reponn. Li la wi, anndan kay la. Yonn nan vizitè yo di l'. Mwen gen pou m' tounen isit la, lè
konsa lanne k'ap vini an. Lè sa a, Sara, madanm ou, ap gen tan gen yon pitit gason. Sara menm te
¹¹ kanpe nan papòt la dèyè Abraram, li t'ap koute. Abraram ak Sara te fin vye granmoun. Yo te
¹² antre nan laj. Sara te sispann gen lalen li. Sara tonbe ri nan kè l', li t'ap di. Koulye a, kalite jan

m' fin vye a, ou kwè lide m' ta sou gason toujou! Epitou, mari mwen, mèt mwen, fin granmoun!
13

Seyè a di Abraram. Sa ki gen la a pou Sara ri konsa, pou l'ap di nan kè l'. Eske mwen kapab fè
14 pitit ankò, jan m' fin vye a? Bon. Eske gen kichòy ki twòp la a pou Mèt la fè? Sou dat mwen

fikse a, m'a tounen pase wè ou ankò. Lè sa a, Sara va gen yon pitit gason. 15 Sara te pè, li t'ap plede,

li t'ap di. Mwen pa t' ri non! Men Seyè a di l'. Men wi, machè, ou te ri. 16 ¶ Mesye yo leve, yo pati,
yo mete tèt sou Sodòm. Yo rive kote yo te ka voye je yo gade anba pou wè Sodòm. Abraram menm

t'ap mache ak yo. Li t'ap kondi yo mete pi devan sou wout la. 17 Seyè a di nan kè l'. Mwen pa kapab

kache Abraram sa m' pral fè a. 18 Pitit pitit li yo pral tounen yon gwo nasyon ki va gen pouvwa.

19 Gremesi Abraram, tout nasyon sou latè pral jwenn benediksyon. Mwen te chwazi l' pou l' te
pase pitit li yo ak tout rès fanmi l' k'ap vin apre li yo lòd pou yo mache nan chemen Seyè a met
devan yo, pou yo fè sa ki kòrèk ak sa ki dwat devan Bondye. Se konsa m'a fè pou li tout sa mwen

te pwomèt li a. 20 Apre sa, Seyè a di. Se pa ti kras bagay y'ap di sou moun Sodòm ak moun Gomò,

paske peche moun sa yo lou anpil. 21 M'ap desann pou m' wè ak je mwen si sa y'ap di sou yo a se

vre. Si se pa vre, m'a konnen. 22 Mesye yo pati, yo mete tèt sou Sodòm. Men, Seyè a te rete ak

Abraram. 23 ¶ Abraram pwoche bò kote Seyè a, li mande l'. Eske se vre ou pral touye inonsan yo

ansanm ak koupab yo? 24 Si gen senkant moun inonsan nan lavil la, èske w'ap detwi tout lavil la?

Eske ou p'ap fè pa lavil la poutèt senkant inonsan sa yo? 25 Aa! Pou di w'ap fè inonsan peri ak
koupab? Se pa posib. Ou pa ka fè sa. Se lenjistis pou inonsan gen menm sò ak koupab. Non, sa pa

ka fèt. Bondye k'ap jije tout moun sou tè a pa ka nan fè lenjistis. 26 Seyè a reponn. Si mwen jwenn

senkant inonsan nan lavil Sodòm, m'ap fè pa tout lavil la, poutèt senkant inonsan sa yo. 27 Abraram

pale ankò, li di. Eskize m' wi! Seyè, si m' penmèt mwen pale ankò. Se moun ase mwen ye, mwen

pa gen dwa di ou anyen. 28 Men, si se karanssenk moun inonsan sèlman ou jwenn, èske ou pral
detwi tout lavil la paske manke senk pou fè senkant lan? Seyè a reponn. Si mwen jwenn karanssenk

inonsan sèlman, mwen p'ap detwi lavil la. 29 Abraram pale ankò, li di. Ou pa janm konnen, ka gen

karant inonsan ase? Seyè a reponn. Si gen karant inonsan, mwen p'ap detwi lavil la. 30 Abraram

di. Tanpri, Seyè, pa fache sou mwen non. M'ap di ou yon ti mo ankò. Ou pa janm konnen, ou ka
jwenn trant inonsan ase nan lavil la. Seyè a reponn. Si mwen jwenn trant, m'ap fè pa lavil la.

31 Abraram di. Eskize m' wi, Seyè, si m' penmèt mwen pale toujou. Men, sipoze ou jwenn vin

inonsan sèlman? Seyè a reponn li. Si mwen jwenn vin inonsan, m'ap fè pa lavil la. 32 Abraram di

ankò. Tanpri, Seyè, pa fache sou mwen non. M'ap di yon dènye mo. Si ou jwenn dis inonsan ase?
 Seyè a reponn li. Si mwen jwenn dis inonsan, m'ap fè pa lavil la. ³³ Apre li fin pale ak Abraram,
 Seyè a al fè wout li. Abraram menm tounen lakay li.

Chapter 19

¹ ¶ De zanj Bondye yo rive Sodòm nan aswè. Lèt te chita bò pòtay lavil la. Wè li wè yo, li leve,
 li al kontre yo. Li bese tèt li jouk atè pou l' di yo bonjou. ² Li di. Mesye, mwen la pou m' sèvi nou.
 Tanpri, vin lakay mwen. n'a ka lave pye nou, n'a pase nwit la la. Denmen maten, n'a leve, n'a reprann
 wout nou. Mesye yo reponn. Non. Nou pral pase nwit la sou laplas. ³ Men Lèt te fòse yo sitèlman,
 y' al lakay li avè l'. Lèt pare yon bon manje pou yo, li fè pen san ledven. Epi yo manje. ⁴ ¶ Yo pa
 t' ankò kouche, lè mesye lavil Sodòm yo, jenn gason kou vye tonton, sènen kay la. tout gason nan
 lavil la te kouri vini. ⁵ Yo rele Lèt, yo di l' konsa. Kote mesye ki vin pase nwit lakay ou aswè a?
 Fè yo soti vin jwenn nou pou nou kouche ak yo? ⁶ Lèt soti al jwenn yo nan papòt la. Li fèmen pòt
 la dèyè do l', ⁷ li di yo konsa Tanpri, mezanmi. Pa fè bagay sal sa a. ⁸ Gade, mwen gen de pitit fi
 ki tifi toujou, m'ap mennen yo ban nou. Nou mèt fè sa nou vle avèk yo. Men, pa fè mesye sa yo
 anyen, paske mwen resevwa yo lakay mwen, mwen fèt pou m' pwoteje yo. ⁹ Men, yo di. Wete kò
 ou la. Se moun vini ou ye! Kisa ou ye atò pou ou vin di nou sa pou nou fè. Sispann fè radòt la a,
 anvan nou pa fè ou pi mal pase yo. Sa ou tande a, yo bourade Lèt, epi yo pwoche pou yo defonse
 pòt la. ¹⁰ Men, de mesye yo ki te anndan an lonje men yo, yo rale Lèt antre anndan, epi yo fèmen
 pòt la. ¹¹ Lèfini, yo vegle tout mesye ki te devan pòt kay la, depi pi piti a jouk pi gran an. Se konsa
 mesye yo t'ap vire tounen adwat agoch, yo pa t' kapab jwenn kote pòt kay la te ye. ¹² ¶ De mesye
 yo pale ak Lèt, yo di l' konsa. Ki moun ankò ou gen nan lavil la? Pran bofi ou yo, pitit gason ou
 yo, ak pitit fi ou yo ansanm ak tout bagay ou gen nan lavil la, mete kò ou deyò. ¹³ Nou pral detwi
 tout bò isit la. Seyè a te tande tout sa yo t'ap di sou moun lavil sa a. Li voye nou detwi l'. ¹⁴ Lèt
 soti, li al jwenn mari pitit fi li yo, li di yo. Leve non, fè vit, ann met deyò. Seyè a pral detwi lavil
 la. Men bofi li yo te kwè se jwe li t'ap jwe. ¹⁵ ¶ Kou jou pral kase, zanj Bondye yo leve Lèt pou l'
 fè vit. Yo di l'. Fè vit non, monchè! Pran madanm ou ak de pitit fi ou yo, met deyò. Si se pa sa, n'ap
 mouri tout lè Bondye ap pini lavil la. ¹⁶ Lè yo wè Lèt t'ap kalbende, yo pran men li, yo pran men
 madanm li ansanm ak de pitit fi li yo, yo mennen yo andeyò lavil la, yo lage yo. Yo te fè sa, paske

¹⁷ Seyè a te gen pitye pou Lèt. Apre zanj yo te fin fè yo soti nan lavil la, yo di l'. Sove poul ou, si ou pa vle mouri. Pa gad dèyè. Pa rete menm nan plenn lan. Kouri al nan mòn yo pou ou pa pase

¹⁸ tou. Men, Lèt reponn li. O! Non, Mèt. Tanpri, pa mande m' tout sa. ¹⁹ Gade, ou deja fè m' yon gwo favè. Ou moutre m' jan ou gen pitye anpil pou mwen. Ou sove lavi m'. Men, mòn lan twò

²⁰ lwen. m'a mouri anvan m' rive, malè a va gen tan rive sou mwen. Gade: ou wè ti bouk sa a? Li toupre. m'a gen tan rive la pou m' cache kò mwen. Tanpri, kite m' ale la. Ou wè se yon ti kote ki

²¹ tout piti. Konsa m'a sove lavi m'. Zanj lan di l'. Dakò, Mwen fè ou favè sa a ankò: mwen p'ap

²² detwi ti bouk w'ap pale m' lan. Kouri vit ale. Mwen p'ap ka fè anyen toutotan ou poko rive la.

²³ Se poutèt sa yo rele ti bouk la Zoa. Solèy te fèk ap leve lè Lèt rive Zoa. ²⁴ ¶ Lè sa a, Seyè a fè yon sèl lapli souf ak dife soti nan syèl la tonbe sou Sodòm ak Gomò. Wi, se Seyè a menm ki te fè

²⁵ sa. Li detwi de lavil sa yo ak tout plenn lan ansanm ak tout moun ki te rete nan lavil yo ak tout

²⁶ plant ki t'ap pouse nan tè a. ¶ Men, madan Lèt vire gade dèyè. Lamenm li tounen yon gwo estati

²⁷ sèl. ¶ Nan granmaten, Abraram leve, li ale kote li te kanpe ap pale ak Seyè a. ²⁸ Li voye je l' bò Sodòm ak Gomò, li wè tout plenn lan. Epi li rete konsa li wè gwo lafimen ap moute soti nan tè a

²⁹ tankou lafimen k'ap leve nan yon gwo founo dife. Se konsa, lè Bondye t'ap detwi lavil yo nan plenn lan, li chonje Abraram. Li fè Lèt chape anba malè li tapral lage sou lavil kote li te rete a.

³⁰ ¶ Men Lèt te pè rete nan bouk Zoa a. Se konsa, li menm ak de pitit li yo, yo soti Zoa, yo moute,

³¹ y al rete nan mòn yo. Yo fè kay yo nan yon gwo twou wòch. Pi gran fi a di pi piti a. Papa nou ap fin granmoun. Pa gen gason nan peyi a pou marye ak nou pou nou ka fè pitit jan sa fèt toupatou.

³² Vini non. Annou fè papa bwè diven jouk li sou. Apre sa, n'a kouche avè l'. Konsa, n'a fè pitit

³³ pou papa nou. Menm jou sa a, lè aswè rive, yo fè papa yo bwè diven jouk li sou. Pi gran fi a

³⁴ kouche ak papa l'. Men, papa a te sitèlman sou, li pa t' konn anyen. Nan denmen, pi gran an di pi piti a. Yèswa, mwen te kouche ak papa m'. Aswè a se tout pa ou: N'ap fè l' bwè diven ankò jouk

³⁵ li sou. Epi w'a al kouche avè l', pou nou de nou kapab fè pitit pou papa nou. Se konsa, lè aswè rive, yo fè papa a bwè diven ankò jouk li sou. Epi pi piti a kouche avè l'. Men, fwa sa a ankò, Lèt

³⁶ pa t' konnen anyen. Se konsa de pitit fi Lèt yo vin ansent pou papa yo. ³⁷ Pi gran an fè yon pitit

³⁸ gason, li rele l' Moab. Se li menm ki zansèt moun Moab yo ki la jouk koulye a. Pi piti a tout fè yon pitit gason. Li rele l' Bennami. Se li menm ki zansèt moun Amon yo ki la jouk jòdi a.

Chapter 20

¹ ¶ Abraram kite Manmre, li pati, li ale Negèv, li rete ant Kadès ak Chour kote li moute kay li. Pandan tout tan li t'ap viv nan peyi Gera a, ² li t'ap di se sè li Sara te ye. Se konsa, Abimelèk, wa peyi Gera a, fè yo mennen Sara ba li. ³ ¶ Men pandan lannwit, Abimelèk fè yon rèv, li wè Bondye parèt devan li. Bondye di l'. Gade non, monchè. Ou pral mouri tandè, paske Sara se yon madan marye. ⁴ Men, Abimelèk pa t' gen tan kouche avè Sara. Li di. Mèt, èske w'ap kite yon pèp inonsan peri? ⁵ Se Abraram ki di m' se sè li Sara ye. Sara pou tèt pa l' di m' se frè li Abraram ye. Mwen fè sa m' fè a san ankenn move lide. Mwen konnen mwen pa fè anyen ki mal. ⁶ Bondye reponn li nan rèv la. Wi. Mwen konnen ou fè sa ou fè a san ankenn move lide dèyè tèt ou. Se poutèt sa mwen pa kite ou fè peche sa a kont mwen. Mwen pa kite ou fè madanm lan anyen. ⁷ Men sa pou ou fè: renmèt nonm lan madanm li. Se yon pwofèt Bondye li ye. La lapriyè pou ou pou ou pa mouri. Men, si ou pa renmèt li, mwen tout di ou nou pral mouri, ou menm ansanm ak tout fanmi ou. ⁸ ¶ Nan maten, bonè bonè, Abimelèk rele tout domestik li yo, li rakonte yo tout bagay. Yo tout yo te pè anpil. ⁹ Lèfini, Abimelèk rele Abraram, li di l'. Kisa ou fè nou konsa? Kisa m' fè ou pou ou ta lakòz yon gwo malè konsa tonbe sou mwen ak sou peyi a? Sa ou fè nou la a, se bagay moun pa gen dwa fè. ¹⁰ Abimelèk di Abraram ankò. Poukisa ou fè sa ou fè a? ¹¹ Abraram reponn li. Mwen te di nan kè m' pa gen moun ki gen krentif pou Bondye bò isit la. Mwen tè kwè yo ta ka touye m' poutèt madanm mwen. ¹² Men, se vre wi, se sè m' li ye. Nou menm papa, men nou pa menm manman. Epi se madanm mwen li ye tou. ¹³ Se konsa, lè Bondye fè m' kite lakay papa m' pou m' al nan peyi etranje yo, mwen di Sara: m'ap mande ou pou rann mwen yon sèvis? Si ou renmen m' vre, tanpri, kote ou pase, se pou di se frè ou mwen ye. ¹⁴ ¶ Lè sa a, Abimelèk renmèt Sara bay Abraram. Anmenmtan li ba li mouton, bèf ak domestik, fanm kou gason, pou sèvi l'. ¹⁵ Li di Abraram. Gade! tout peyi m' lan devan ou. Rete kote ki fè ou plezi. ¹⁶ Epi li di Sara. Mwen bay frè ou la mil (1.000) pyès lajan. Se pou sa ka fè moun ki la avè ou yo bliye sak te rive ou. Konsa, tout moun va konnen ou pa t' fè anyen ki mal. ¹⁷ ¹⁸ - Poutèt sa ki te rive Sara, madanm Abraram lan, Seyè a te fè tout fanm lakay Abimelèk pa t' kapab fè pitit. Abraram lapriyè pou Abimelèk, epi Bondye geri li. Bondye geri madanm li tout ansanm ak medam k'ap travay lakay li pou yo kapab fè pitit ankò.

Chapter 21

¹ ¶ Seyè a fè Sara favè, jan l' te di l' la. Li fè sa l' te pwomèt li a rive vre. ² Sara vin ansent. Atout
 li te fin vye granmoun lan, li fè yon pitit gason pou Abraram, nan dat Bondye te di l' la. ³ Abraram
 rele pitit gason Sara te fè pou li a Izarak. ⁴ Ti gason an te gen wit jou lè Abraram sikonsi l', jan
 Bondye te ba li lòd la. ⁵ Abraram te gen santan sou tèt li lè Izarak, pitit li a, te fèt. ⁶ Sara di konsa.
 Bondye fè m' bagay ki fè m' ri. tout moun ki tande sa pral ri avè m' tou. ⁷ Apre sa, li di ankò: -Ki
 moun ki ta di Abraram yon jou Sara gen pou bay timoun tete? Men, atout li fin vye a, mwen fè yon
 pitit gason pou li. ⁸ Ti gason an grandi, li sevre. Jou yo sevre l' la, Abraram fè yon gwo fèt. ⁹ ¶ Yon
 jou Izmayèl, pitit Aga, fanm peyi Lejip la te fè pou Abraram lan t'ap jwe ak Izarak, pitit Sara a.
¹⁰ Sara wè sa. Li di Abraram konsa: -Mete sèvant la deyò ansanm ak tout pitit li a, paske pitit
 sèvant sa a pa gen dwa eritye ak Izarak, pitit mwen an. ¹¹ Pawòl sa a te fè Abraram lapenn anpil,
¹² paske Izmayèl te pitit li tou. Men, Bondye di Abraram konsa-Ou pa bezwen pran lapenn pou ti
 gason an ak pou Aga, sèvant ou a. Ou mèt fè tout sa Sara di ou fè a, paske se Izarak ki pral ba ou
¹³ pitit pitit mwen pwomèt ou yo. M'ap bay pitit sèvant lan anpil pitit pitit. M'ap fè l' tounen yon
¹⁴ nasyon, paske se pitit ou li ye tou. ¶ Nan denmen Abraram leve bonè, li pran pen ak yon sak an
 po bèt plen dlo, li bay Aga. Li ede l' mete yo sou tèt li. Li ba li pitit la, li fè l' ale kite kay la. Aga
¹⁵ pati, li mache, li mache, jouk li pèdi nan dezè Bècheba a. Lè dlo nan sak la fini, li kite pitit la
¹⁶ anba yon touf raje. li ale, li chita pi devan, yon bon ti distans, li di nan kè l' -Mwen pa ka rete
¹⁷ ap gade pitit mwen an ap mouri konsa. Pandan li chita konsa, pitit la pran rele. Bondye tande
 rèl pitit la. Zanj Bondye a rete nan syèl la, li pale ak Aga, li di l' konsa-Sa ou genyen, Aga? Ou pa
¹⁸ bezwen pè. Kote Bondye ye a, li tande rèl ti pitit la. Leve non, pran ti pitit la, kenbe l'. M'ap fè
¹⁹ pitit pitit li yo tounen yon gwo nasyon. Bondye louvri je Aga. Aga wè yon pi. li ale, li plen sak
²⁰ an po a dlo. Li bay ti pitit la bwè dlo kont kò l'. Bondye te avèk ti pitit la. Li grandi, li rete nan
²¹ dezè a. Li te rive konn tire flèch nan banza ak anpil ladrès. Se nan dezè Paran li te rete. Manman
²² l' te chwazi yon madanm pou li nan jenn fi peyi Lejip yo. ¶ Lè sa a, Abimelèk ale ansanm avek
 Pikòl, kòmandan lame li a, li pale ak Abraram. Li di l' konsa-Bondye avè ou nan tout sa w'ap fè.
²³ Koulye a, fè sèman, isit la menm, devan Bondye, ou p'ap janm twonpe ni mwen menm, ni pitit

mwen yo, ni pitit pitit mwen yo. Mwen te aji byen avè ou. Pwomèt w'ap aji byen avè m' tou, epi
 w'ap sèvi byen ak tout moun nan peyi kote ou rete a. ²⁴ Abraram reponn. -M' fè sèman. ²⁵ Men
 Abraram te fè Abimelèk repwòch pou yon pi li domestik Abimelèk yo te pran pa fòs. ²⁶ Abimelèk
 di l' -Mwen pa konnen ki moun ki fè sa. Ni tou, ou pa t' janm di m' anyen sou sa. Se koulye a m'ap
 tande koze a. ²⁷ Abraram pran kèk mouton ak kèk bèf li bay Abimelèk. Konsa, yo pase kontra
 yonn ak lòt. ²⁸ Abraram pran sèt mouton nan bann mouton l' yo, li mete yo sou kote. ²⁹ Abimelèk
 mande l' -Poukisa ou mete sèt mouton sa yo sou kote. ³⁰ Abraram reponn li-Asepte sèt mouton sa
 yo. Si ou asepte yo, sa vle di ou rekonèt devan tout moun se mwen menm ki te fouye pi a. ³¹ Se
 poutèt sa yo rele anplasman an Bècheba, paske se la menm yo te sèmante yonn bay lòt. ³² Se
 Bècheba yo te pase kontra yonn ak lòt. Apre sa, Abimelèk leve, li tounen nan peyi moun Filisti yo,
 ansanm ak Pikòl, kòmandan lame li a. ³³ ¶ Se la Bècheba Abraram plante yon pye tonmaren. Lèfini
 li fè sèvis pou Seyè a, Bondye ki la pou tout tan an. ³⁴ Apre sa, Abraram rete kèk lanne ankò nan
 peyi Filisti a.

Chapter 22

¹ ¶ Apre tout bagay sa yo, Bondye sonde Abraram pou wè sou ki pye li ye avè l'. Bondye rele
 l' -Abraram! Abraram! Abraram reponn-Men mwen wi! ² Bondye di l': -Pran Izarak, pitit ou a, sèl
 pitit gason ou genyen an, pitit ou renmen anpil la. Ale nan peyi Morija, w'a moute sou tèt mòn
 mwen pral moutre ou la. Lè w'a rive la, w'a touye l'. Apre sa, w'a boule l' nèt pou mwen. ³ ¶ Nan
 denmen maten, bonè bonè, Abraram leve, li sele bourik li, li pran Izarak ansanm ak de nan domestik
 li yo. Li fann kèk moso bwa pou l' fè dife pou boule vyann bèt l'ap ofri a. Epi li pati nan direksyon
 kote Bondye te di l' la. ⁴ Sou twa jou, Abraram gade, li wè kote a yon bon ti bout devan l'. ⁵ Abraram
 di domestik li yo. -Nou menm, mesye, rete isit la ak bourik la. Mwen menm ak ti gason an, nou
 pral jouk lòt bò a, pou nou fè sèvis pou Bondye. Apre sa, n'a tounen vin jwenn nou. ⁶ Abraram
 pran bwa pou fè dife a, li bay Izarak pote li. Li menm, li pote bagay pou limen dife a ansanm ak
 yon kouto nan men l'. Yo tout de pati ansanm. ⁷ Pandan y'ap mache konsa, Izarak di Abraram:
 -Papa! Abraram reponn: -Wi, pitit mwen! Izarak mande l': -Mwen wè ou gen dife ak bwa. Men,
 kote mouton pou boule a? ⁸ Abraram reponn: -Pitit mwen, se sou kont Bondye sa ye. Yo toude t'ap

kontinye mache ansanm. ⁹ Lè yo rive kote Bondye te di l' la, Abraram moute yon lotèl, li ranje
 bwa yo sou li. Li mare Izarak, pitit gason l' lan, li mete l' sou lotèl la, anwo bwa yo. ¹⁰ Apre sa, li
 lonje men l', li pran kouto a pou l' koupe kou ti gason an. ¹¹ ¶ Men, zanj Bondye a rete nan syèl
 la, li rele l': -Abraram! Abraram! Abraram reponn. -Men mwen wi! ¹² Zanj lan di l' -Pa leve men
 ou sou ti gason an. Pa fè l' anyen. Koulye a mwen konnen ou gen krentif pou Bondye vre, paske
 ou pa t' derefize touye sèl pitit gason ou lan pou mwen. ¹³ Abraram voye je l', li wè yon belye
 mouton ki te gen kòn li yo makònen nan yon lyann. li ale, li pran mouton an, li touye l', li boule li
 nèt sou lotèl la pou Bondye nan plas pitit li a. ¹⁴ Abraram rele kote sa a: Se sou kont Seyè a sa ye.
 Se poutèt sa, jouk jòdi a, moun ap repete: Sou mòn Seyè a, tout bagay sou kont li. ¹⁵ ¶ Zanj Bondye
 a rete nan syèl la, li pale ak Abraram yon dezyèm fwa, li di l' konsa: ¹⁶ -Mwen sèmante sou tèt
 mwen. Se mwen menm Seyè a ki di sa. Mwen gen pou m' beni ou anpil poutèt sa ou fè a. Ou pa t'
 refize ban mwen pitit ou a, sèl pitit gason ou genyen an. ¹⁷ Mwen pwomèt pou m' ba ou anpil pitit
 pitit. Y'ap tankou zetwal nan syèl la, tankou grenn sab bò lanmè. Y'a bat tout lènmi yo. ¹⁸ Gremesi
 tout pitit pitit ou yo, tout nasyon sou latè pral jwenn benediksyon. Wi, yo tout, paske ou te fè sa m'
 te mande ou fè a. ¹⁹ Abraram tounen bò kote domestik li yo, domestik yo pati ansanm avè l' pou
 peyi Bècheba, kote Abraram te rete a. ²⁰ ¶ Apre tout bagay sa yo, yo vin di Abraram konsa: -Tande
 non. Milka fè pitit tout wi pou Nak, frè ou la. ²¹ Premye pitit la rele Ouz. Apre li, vini Bouz,
 Kemwèl, papa Aram, ²² Kesèd, Azò, Pildach, Jidlaf ak Betwèl. ²³ Se Betwèl ki papa Rebeka. Se
 wit gason sa yo Milka te fè pou Nakò, frè Abraram lan. ²⁴ Reouma, fanm kay Nakò a te fè pitit
 tout pou li: se te Tebak, Gam, Tach ak Maka.

Chapter 23

¹ ¶ Sara viv sanvenntetan (127 an). ² Li mouri yon kote yo rele Kiriyaat Aba osinon Ebwon nan
 peyi Kanaran. Abraram pran lapenn pou lanmò Sara, li plenn sò li. ³ ¶ Abraram leve bò kote kadav
 la, li ale pale ak moun Et yo. Li di yo konsa: ⁴ -Se etranje mwen ye, se depasaj mwen ye nan mitan
 nou. Vann mwen yon anplasan pou m' ka antere madanm mwen, konsa m'a wete kadav la devan
 je m'. ⁵ Moun Et yo reponn Abraram, yo di l' konsa: ⁶ -Mèt, koute sa n'ap di ou. Ou se yon gwonèg

Bondye voye nan mitan nou. Chwazi yonn nan pi bon kavo nou yo pou antere madanm ou. Pa gen
 yonn nan nou ki pou ta refize ba ou kavo li pou antere madanm ou. ⁷ Abraram kanpe. Pa respè pou
 moun Et yo, li bese tèt li byen ba devan yo. ⁸ Li di yo: -Si nou dakò pou m' antere madanm mwen
 isit la, pou m' wete kadav li devan je m', koute sa m'ap di nou. Nou konnen Efwon, pitit gason Zoka
 a? Pale avè l' pou mwen. ⁹ Mande l' pou l' vann mwen twou wòch Makpela a ki pou li nan bout
 jaden l' lan. Mande l' pou l' vann mwen li pou pri li vo, pou sa ka sèvi m' simityè isit la. ¹⁰ Efwon
 te chita la avèk lòt moun Et yo, bò pòtay lavil la, kote moun yo konn reyini an. Devan moun Et yo,
 devan tout moun ki t'ap pase bò pòtay la, Efwon reponn Abraram. Li di li: ¹¹ -Non, mèt! Koute sa
 m'ap di ou: Mwen fè ou kado jaden an ak tout twou wòch ki ladan l' lan. Mwen fè ou kado l' devan
 tout moun peyi m' yo. M'ap ba ou l' pou ou ka antere madanm ou. ¹² Men, Abraram bese tèt li byen
 ba devan moun Et yo. ¹³ Li pale ak Efwon pou tout moun ka tandè. Li di l': -Koute sa m'ap di ou:
 M'ap achte tout jaden an nan men ou pou pri li vo. Tanpri, asepte lajan m'ap ba ou pou li a. Se lè
 sa a m'a antere madanm mwen ladan l'. ¹⁴ Efwon reponn Abraram: -Mèt, tanpri koute sa m'ap di
 ou: ¹⁵ Yon moso tè ki vo katsan (400) pyès lò, pa gen rezon pou n'ap diskite pou sa. Antere madanm
 ou sou li non! ¹⁶ ¶ Abraram dakò ak sa Efwon di l' la. Li peze lajan an, li bay Efwon li devan tout
 moun Et yo. Wi, li ba li katsan (400) pyès lò dapre jan kòmèsan yo te sèvi nan peyi a. ¹⁷ Se konsa,
 moso tè Efwon te gen Makpela a, anfas peyi Manmre a, ansanm ak tout twou wòch la ak tout
 pyebwa ki nan jaden an, jouk sou lizyè li, ¹⁸ yo vin pou Abraram, devan tout moun Et yo, devan
 tout moun ki te bò pòtay la. ¹⁹ Apre sa, Abraram antere Sara, madanm li, nan twou wòch ki te nan
 jaden Makpela a, anfas Manmre yo rele Efwon an, nan peyi Kanaran. ²⁰ Se konsa, Abraram achte
 jaden an ak tout twou wòch ki te ladan l' lan, nan men moun Et yo, li fè l' sèvi simityè pou li.

Chapter 24

¹ ¶ Abraram te fin vye. Li te antre nan granmoun. Seyè a te beni Abraram nan tout bagay.
² Abraram te gen yon domestik ki te pi ansyen pase tout lòt yo. Se li menm ki te jeran reskonsab
 tout byen li yo. Abraram di l' konsa: -Men, mete men ou nan fant janm mwen, fè sèman. ³ Mwen
 vle pou ou fè sèman sou Seyè a, Bondye syèl la ak Bondye latè a, pou ou pa chwazi yon madanm

pou pitit gason m' lan nan medam k'ap viv nan peyi Kanaran kote m' rete a. ⁴ Men, se nan peyi pa
 m' pou ou ale, pou ou chwazi pami moun menm ras ak mwen yo yon madanm pou Izarak, pitit
 gason m' lan. ⁵ Domestik la mande l': -Kisa pou m' fè si fi a pa vle kite peyi l' pou l' vin avè m' nan
 peyi sa a? Eske se pou m' mennen pitit gason ou lan ale nan peyi kote ou te soti a? ⁶ Abraram
 reponn li: -Non, non, non! Pa janm mennen pitit mwen an laba a! ⁷ Seyè a, Bondye syèl la, te pran
 m' fè m' soti lakay papa m' ak nan peyi fanmi mwen. Li pale avè m'. Li fè m' sèman l'ap bay pitit
 pitit mwen yo peyi sa a. Enben, se li menm ki va fè zanj li pran devan ou, pou ou chwazi yon
 madanm nan moun laba yo pou pitit gason m' lan. ⁸ Si madanm lan pa vle vin avè ou, w'a konnen
 ou kit ak sèman ou te fè m' lan. Sèlman, nenpòt jan, pa mennen pitit gason m' lan laba a. ⁹ Domestik
 la mete men l' nan fant janm Abraram, mèt li, epi li sèman pou l' fè sa l' mande l' fè a. ¶ ¹⁰
 Domestik la pran dis chamo nan chamo mèt li yo. Li pran yon kantite bèl bagay ki koute chè, li
 chaje chamo yo. Li leve, li pati, li ale lavil kote Nakò rete a nan peyi Mezopotami. ¹¹ Lè aswè rive,
 li fè chamo yo kouche bò pi ki lòt bò pòtay lavil la. Se te lè ti medam yo tè konn vin tire dlo. ¹² Li
 lapriyè, li di: -Seyè, ou menm ki Bondye Abraram, mèt mwen, tanpri, fè m' jwenn jòdi a sa m'ap
 chache a. Moutre jan ou bon pou Abraram, mèt mwen. ¹³ Men mwen kanpe bò pi a, kote medam
 yo ap vin chache dlo. ¹⁴ Mwen mande ou pou jenn fi ki va reponn mwen l'ap ban m' bwè lèfini
 l'ap bay chamo m' yo bwè tou, lè m'a di l': Tanpri, bese krich ou a ban m' ti gout dlo pou m' bwè,
 fè se li menm ou chwazi pou Izarak, sèvitè ou la. Lè sa a, m'a konnen jan ou bon pou mèt mwen
 vre. ¹⁵ Li t'ap pale toujou lè Rebeka parèt avèk yon krich sou zepòl li. Rebeka te pitit Betwèl.
 Betwèl sa a te pitit gason Milka ki te marye ak Nakò, frè Abraram lan. ¹⁶ Se te yon jenn fi. Li te
 bèl anpil, li te tifi. Li desann nan sous la, li plen krich li. Epi li moute soti deyò. ¹⁷ Domestik la
 kouri al jwenn li, li di l' konsa: -Tanpri, ban m' ti gout dlo nan krich ou a non. ¹⁸ Rebeka reponn
 li: -Wi. Bwè non, msye. Li desann krich la soti sou zepòl li, li kenbe l' nan men l' pou fè nonm lan
 bwè. ¹⁹ Lè nonm lan fin bwè, jenn fi a di l': -Mwen pral pran dlo pou chamo ou yo, pou yo ka bwè
 kont yo tou. ²⁰ Li prese vide rèd dlo krich la nan yon ti basen pou chamo yo bwè, epi li kouri desann
 nan sous la al chache dlo jouk tout chamo yo fin bwè kont yo. ²¹ Nonm lan menm te sezi. Li t'ap
 gade fi a san l' pa di anyen, li t'ap tann pou l' wè si Seyè a pa t' fè l' vwayaje pou gremesi. ²² Lè
 chamo yo fin bwè, nonm lan pran yon bèl zanno lò ki peze sis gram, li pase l' nan nen Rebeka. Li
 pran de bèl braslè ki peze san gram, li mete yo nan bra li. ²³ Epi li mande l': -Pitit ki moun ou ye?

Tanpri, di m' non. Eske gen kote lakay papa ou pou m' pase nwit la avèk chamo m' yo? ²⁴ Jenn fi
 a reponn: -Mwen se pitit fi Betwèl, yonn nan pitit gason Milka ak Nakò. ²⁵ Li di l' anko: -Lakay
 nou, nou gen kont pay zèb pou chamo ou yo. Wa jwenn kote pou ou pase nwit la tou. ²⁶ Lè sa a,
 nonm lan tonbe ajenou, li bese tèt li jouk atè devan Seyè a. ²⁷ Li di: -Lwanj pou Seyè a, Bondye
 Abraram, mèt mwen an. Li gen pitye pou li, li kenbe pwomès li te fè l' la. Li mennen m' tout dwat
 lakay fanmi mèt mwen an. ²⁸ Jenn fi a kouri lakay manman l'. Li rakonte tout sa ki te rive. ²⁹ ¶
 Rebeka te gen yon frè yo rele Laban. Laban kouri deyò al jwenn nonm lan bò sous la. ³⁰ Li te wè
 zanno a nan nen sè li ak braslè yo nan bra l', li te tande l' ap rakonte sa nonm lan te di l'. Lamenn
 li al jwenn nonm lan ki te kanpe bò sous la ansanm ak chamo l' yo. ³¹ Laban di l': -Antre non. Ou
 se yon nonm Seyè a beni. Poukisa ou rete deyò a konsa? Mwen pare yon kote pou ou nan kay la.
 Gen plas pou chamo ou yo tou. ³² Nonm lan antre nan kay la. Laban desele chamo yo. Li fè ba yo
 pay ak zèb. Yo pare dlo pou nonm lan lave pye l', ansanm ak moun ki te avè l' yo. ³³ Lèfini, yo
 sèvi yo manje. Men nonm lan di: -Anvan m' manje, se pou m' di sa m' gen pou m' di a. Laban di l':
 -Bon. Pale non. ³⁴ Msye pran lapawòl, li di: -Mwen se domestik Abraram. ³⁵ Seyè a voye anpil
 benediksyon sou mèt mwen. Li fè l' vin grannèg. Li ba li mouton, bèf, lajan, lò, domestik, sèvant,
 chamo, bourik. ³⁶ Sara, madanm mèt mwen, te fin vye granmoun lè li te resi fè yon pitit gason pou
 li. Mèt mwen bay pitit sa a tout sa li genyen. ³⁷ Mèt mwen fè m' fè sèman, li di m' piga m' chwazi
 yon madanm pou pitit gason l' lan nan medam moun peyi Kanaran kote l' rete a. ³⁸ Men se pou m
 ale lakay papa l' pou mwen chwazi yon madanm nan ras li pou pitit gason l' lan. ³⁹ Lè sa a, mwen
 di mèt mwen: Bon, si fi a pa vle vini avè m', kisa pou m' fè? ⁴⁰ Li reponn mwen: Seyè a ki wè jan
 mwen toujou obeyi l' va voye zanj li avè ou. Li p'ap fè ou vwayaje pou gremesi. Ou va chwazi yon
 madanm nan fanmi papa m' pou gason m' lan. ⁴¹ Si ou fè sa, w'a kit ak sèman ou te fè m' lan. Konsa
 tou, si ou rive kay fanmi m', si yo menm yo refize, w'a kit ak sèman ou te fè m' lan tou. ⁴² Jòdi a,
 lè m' rive bò sous dlo a, mwen di: Seyè, Bondye Abraram, mèt mwen an, si sa fè ou plezi, fè m' pa
 vwayaje pou gremesi. ⁴³ Gade, m'ap rete kanpe bò sous dlo a. Lè m'a wè yon jenn fi k'ap vin chache
 dlo nan pi a, m'a va di l': Tanpri, ban m' ti gout dlo nan krich ou a pou m' bwè. Si li reponn mwen:
⁴⁴ Ou mèt bwè! Apre sa, m'a bay chamo ou yo bwè tou, tanpri fè se li menm ou chwazi pou madanm
 pitit mèt mwen an. ⁴⁵ Mwen pa t' menm fin di pawòl sa yo nan kè m', lè m' wè Rebeka rive ak
 krich li sou zepòl li. Li desann nan sous la, li pran dlo epi mwen di l': Tanpri, ban m' ti gout dlo

pou m' bwè.⁴⁶ Lamem, li desann krich la soti sou zepòl li, li di m': Bwè non. Apre sa, m'a bay
 chamo ou yo bwè tou. Mwen bwè, epi li bay chamo m' yo bwè tou.⁴⁷ Mwen mande l': Pitit ki
 moun ou ye? Li reponn mwen: Mwen se pitit fi Betwèl, pitit gason Milka ak Nakò. Lè sa a, mwen
 mete zanno a nan nen l', mwen mete braslè sa yo nan bra l'.⁴⁸ Mwen tonbe ajenou, mwen bese tèt
 mwen jouk atè devan Seyè a, mwen fè lwanj Seyè a, Bondye Abraram, mèt mwen an, paske li
 mennen m' tout dwat lakay frè mèt mwen an, kote mwen jwenn yon madanm pou pitit gason l' lan.
⁴⁹ Alèkile, si nou vle aji byen avè l', si nou vle fè l' konfyans, fè m' konnen. Si nou pa dakò, fè m'
 konnen tou, pou m' ka konnen sa pou m' fè.⁵⁰ Laban ak Betwèl reponn: -Bagay sa a se travay Seyè
 a, Bondye a. Nou pa gen anyen pou n' di nan sa.⁵¹ Men Rebeka devan ou, pran li, mennen l' ale
 pou l' vin madanm pitit gason mèt ou a, jan Bondye te di l' la.⁵² Lè domestik Abraram lan tande
 sa, li tonbe ajenou, li bese tèt li jouk atè devan Seyè a.⁵³ Apre sa, li pran rale bèl bijou fèt an ajan
 ak an lò ansanm ak rad, li bay Rebeka. Li te bay frè a ak manman an anpil bèl kado tou.⁵⁴ ¶ Apre
 sa, domestik Abraram lan manje ansanm ak moun ki te avè l' yo, yo bwè, yo dòmi. Nan maten, lè
 yo leve, domestik la di: -Kite m' tounen al jwenn mèt mwen.⁵⁵ Men, frè a avèk manman an di
 konsa: -Kite fi a pase dis jou ankò avèk nou non. Apre sa, n'a pati.⁵⁶ Li reponn yo: -Pa ban m'
 reta. Seyè a pa fè m' vwayaje pou gremesi. Tanpri, kite m' al jwenn mèt mwen.⁵⁷ Yo di l': -Bon.
 Ann rele fi a. Ann mande l' sa l' di nan sa.⁵⁸ Yo rele Rebeka, yo mande l': -Eske ou vle ale ak
 nonm sa a? Li reponn: -Wi, mwen vle ale.⁵⁹ Se konsa yo kite Rebeka, sè yo a, ansanm ak bòn ki
 te nouris li a pati avèk domestik Abraram lan, ansanm ak moun ki te vin avè l' yo.⁶⁰ Yo beni
 Rebeka, yo di l': -Rebeka, sè nou, nou mande Bondye pou ou fè anpil anpil pitit. Se pou pitit pitit
 ou yo bat tout lènmi yo.⁶¹ Apre sa, Rebeka avèk tout sèvant li yo leve, yo moute chamo yo, yo
 pati avèk nonm lan. Domestik la pran l', li pati ak li.⁶² ¶ Lè sa a, Izarak te vini nan dezè a, bò kote
 Pi moun vivan ki wè m' lan. Li te rete nan peyi Negèv.⁶³ Yon jou swa, Izarak t'ap pwonmennen
 deyò nan jaden li, li t'ap kalkile. Li leve je l', li gade, li wè kèk chamo ki t'ap vini.⁶⁴ Menm lè a
 tou, Rebeka leve je l', li wè Izarak. Li desann chamo a.⁶⁵ Li mande domestik la: -Ki msye sa a
 k'ap mache vin jwenn nou nan jaden an? Domestik la reponn li: -Se mèt mwen an wi. Rebeka pran
 yon vwal, li bouche figi l'.⁶⁶ Domestik la rakonte Izarak tout sa li te fè.⁶⁷ Izarak mennen Rebeka

lakay li, kay ki te pou Sara, manman l' lan. Li pran l' pou madanm li. Izarak te renmen Rebeka. Se konsa li te jwenn konsolasyon, apre li te fin pèdi manman l' lan.

Chapter 25

¹ ¶ Abraram te pran yon lòt fanm yo te rele Ketoura. ² Ketoura fè sis pitit pou li: Zimran, Joksan, Medan, Madyan, Jisbak ak Swak. ³ Joksan te papa Seba ak Dedan. Men pitit Dedan yo: Se te moun Achou yo, moun Letouch yo ak moun Lemou yo. ⁴ Men pitit Madyan yo: Se te Efa, Efe, Enòk, Abida ak Elda. Se tout moun sa yo ki te pitit ak pitit pitit Ketoura. ⁵ Abraram kite tout byen l' yo pou Izarak. ⁶ Men anvan l' mouri, li te bay pitit li te fè ak lòt fanm kay yo kèk kado. Apre sa, li fè yo pati, li voye yo byen lwen Izarak, pitit gason l' lan, li voye yo nan peyi kote solèy leve a. ⁷ Abraram te viv sanswasannkenzan (175 an). ⁸ Abraram te fin granmoun, li te wè kont jou l', li te pase vye jou l' yo san pwoblèm. Apre sa li mouri, li al jwenn moun li yo ki te mouri deja. ⁹ Izarak ak Izmayèl, pitit li yo, antere l' nan twou wòch Makpela a, nan jaden Efwon, pitit Zoka, yon moun Et, anfas Manmre. ¹⁰ Se jaden sa a Abraram te achte nan men mesye Et yo. Se la yo te antere Abraram ak Sara, madanm li. ¹¹ ¶ Apre Abraram mouri, Bondye te beni Izarak, pitit gason l' lan, ki te rete toupre Pi moun vivan ki wè m' lan. ¹² Men pitit pitit Izmayèl, pitit Abraram lan. Se Aga, moun peyi Lejip, sèvant Sara, ki te fè pitit sa a pou Abraram. ¹³ Men non pitit Izmayèl yo. N'ap konmanse ak pi gran an pou rive sou pi piti a. Nebajòt te premye pitit Izmayèl. Apre li vini Keda, Adbeyèl, Mibsam, ¹⁴ Michma, Douma, Masa, ¹⁵ Adad, Tema, Jetou, Nafich ak Kedma. ¹⁶ Se yo ki te pitit Izmayèl. Se konsa yo te rele yo ansanm ak tout katye kote yo te rete ak kote yo te moute tant yo. Sa te fè douz chèf, chak ak nasyon pa yo. ¹⁷ Izmayèl te gen santrannsetan (137 an) lè l' mouri. Y al antere l' menm kote ak moun li yo ki te mouri deja. ¹⁸ Pitit pitit Izmayèl yo te rete sou teritwa ki konmanse depi Avila rive jouk Chou, anfas peyi Lejip sou bò solèy leve a, anvan ou pran peyi Lasiri. Yo t'ap viv pou kont yo. Yo pa t' mele ak rès fanmi yo. ¹⁹ ¶ Men istwa Izarak, pitit Abraram. ²⁰ Abraram te papa Izarak. Izarak te gen karantan lè li marye ak Rebeka ki te pitit fi Betwèl, moun lavil Aram, ki te rete nan peyi Mezopotami an. Rebeka te sè Laban, moun lavil Aram. ²¹ Madanm Izarak pa t' ka fè pitit. Izarak lapriyè Seyè a pou li, Seyè a reponn li. Rebeka, madanm

²² li, vin ansent. De ti pitit yo t'ap plede goumen nan vant li. Rebeka di: -Si se konsa sa ye, mwen
 pa konprann anyen? li al lapriyè Seyè a. ²³ Seyè a reponn li: -Ou gen de nasyon nan vant ou. W'ap
 fè de pèp: chak ap pran bò pa yo. Yonn p'ap vle wè lòt. Yonn ap pi gwonèg pase lòt. Pi gran an
 pral sou zòd pi piti a. ²⁴ Lè jou pou Rebeka akouche a rive, li fè de marasa. ²⁵ Premye ki te fèt la
 te tout wouj. Li te kouvri ak pwal sou tout kò l'. Se poutèt sa yo te rele l' Ezaou. ²⁶ Lè dezyèm lan
 te fèt, men li te kenbe Ezaou nan talon pye l': se poutèt sa yo rele l' Jakòb. Izarak te gen swasantan
 sou tèt li lè yo te fèt. ²⁷ Timoun yo grandi. Ezaou te vin yon bon chasè, li te toujou nan bwa. Men
 Jakòb te yon nonm byen dousman, li te renmen rete lakay. ²⁸ Izarak te pito Ezaou, paske li te
 renmen manje vyann jibye, men Rebeka te pito Jakòb. ²⁹ ¶ Yon jou, Jakòb te fin kwit yon bon
 bouyon, Ezaou antre sot nan jaden, li te bouke anpil. ³⁰ Li di Jakòb konsa: -M'ap mouri grangou.
 Tanpri, ban m' ti gout nan bouyon pwa wouj ou a. Se poutèt sa yo te bay Ezaou yon lòt ti non. Yo
 te rele l' Edon. ³¹ Men Jakòb di l': -M'ap ba ou ti gout si ou vann mwen dwa ou kòm premye pitit.
³² Ezaou reponn: -Dakò. Mwen pral mouri. Kisa dwa kòm premye pitit la ap sèvi m'? ³³ Jakòb di
 li: -Fè m' sèman anvan. Ezaou fè sèman ba li, li vann li dwa l' kòm premye pitit. ³⁴ Lèfini, Jakòb
 ba li pen ak ti gout nan bouyon pwa a. Ezaou manje, li bwè. Li leve, li pati. Konsa, Ezaou te
 konsidere dwa li kòm premye pitit pou anyen.

Chapter 26

¹ ¶ Te vin gen yon lòt grangou nan peyi a, pi rèd pase sa ki te tonbe sou peyi a nan tan Abraram
 lan. Lè sa a, Izarak ale yon kote yo rele Gera kay Abimelèk, wa moun Filisti yo. ² Izarak fè yon
 vizyon, li wè Seyè a parèt devan l'. Seyè a di l': -Pa desann nan peyi Lejip, rete kote m'ap di ou rete
 a. ³ W'a pase kèk tan nan peyi sa a. M'ap avè ou, m'ap beni ou, paske mwen pral ba ou tout tè sa a
 pou ou menm ak pou tout ras ou. m'a kenbe sèman mwen te fè bay Abraram, papa ou. ⁴ M'ap ba
 ou anpil anpil pitit tankou zetwal nan syèl la. M'ap ba yo tout tè sa yo. Gremesi pitit pitit ou yo,
 tout nasyon sou latè pral jwenn benediksyon. ⁵ tout sa, paske Abraram te tandè m' lè m' te pale avè
 l', li te swiv tout lòd mwen yo ak tout kòmandman mwen yo. Li te fè tout sa mwen mande l', li te
 obeyi tout lwa mwen yo. ⁶ ¶ Se konsa Izarak rete kote yo rele Gera a. ⁷ Lè mesye ki te rete nan
 peyi a mande l' kisa madanm li ye pou li, li reponn yo se sè l' li ye, paske li te pè di se madanm li

8
 Rebeka te ye pou mesye yo pa t' touye l' pou yo te ka pran Rebeka ki te bèl anpil. Izarak te gen kèk tan depi l' te rete la. Yon jou, Abimelek, wa moun Filisti yo, t'ap gade nan fennèt li, li te wè

9
 Izarak ki t'ap pase men sou Rebeka, madanm li. Lè sa a, Abimelèk voye chache Izarak. Li di l' konsa: -Gade non, monchè, se madanm ou li ye! Poukisa ou di se sè ou li ye! Izarak reponn li:

10
 -Mwen te di sa paske mwen te kwè yo ta ka touye m', si m' te di se madanm mwen li ye. Abimelèk di l': -Kisa ou fè nou konsa? Yonn nan mesye nou yo ta ka byen rive kouche avèk madanm ou! Se

11
 ou ki ta lakòz nou fè peche sa a. Se konsa Abimelèk pase lòd sa a bay tout pèp la: -Si yon moun

12
 manyen nonm sa a, osinon madanm li, y'ap touye l'. ¶ Izarak fè jaden nan peyi a. Lè lanne a

13
 bout, li rekòlte san fwa valè sa l' te plante a, paske Seyè a te beni l'. Msye te vin rich. Li t'ap fè

14
 lajan toujou, jouk li rive vin rich anpil anpil. Li te gen kantite kabrit, mouton ak bèf, ak anpil

15
 moun ki t'ap sèvi l'. Sa te fè moun Filisti yo rayi sò li. Se konsa yo konble tout pi domestik

16
 Abraram yo te fouye sou tan Abraram, papa Izarak. Yo plen yo tè. Lèfini, Abimelèk di Izarak:

17
 -Pati, al fè wout ou! Ou pi grannèg pase nou. Se konsa Izarak pati kite kote l' te ye a, li ale nan

18
 Fon Gera a. Se la li moute kay li pou l' rete. Li fè refouye tout pi dlo yo te fouye sou tan Abraram, papa l'. Se pi sa yo moun Filisti yo te bouche apre lanmò Abraram. Izarak ba yo menm non papa

19
 l' te ba yo a. Domestik Izarak yo te fouye ankò nan fon an. Yo te jwenn yon sous dlo k'ap ponpe.

20
 Men, gadò mouton peyi Gera yo leve yon sèl kont avèk gadò mouton Izarak yo. Yo t'ap di: -Dlo sa a, se pou nou li ye. Se konsa Izarak rele pi a Pi dezagreman paske yo te chache l' dezagreman

21
 pou dlo a. Domestik Izarak yo fouye yon lòt pi ki te lakòz yo chache yo kont ankò. Se konsa

22
 Izarak rele pi a Pi ki fè lènmi. Lè l' wè sa, li wete kò l' kote l' te ye a, li fouye yon lòt pi pou sa

23
 pa t' fè kont. Se poutèt sa li rele pi a Pi ki pa nan kont. Li di: -Koulye a Seyè a ban nou kont espas

24
 nan peyi a pou nou pa nan kont. Se atò zafè nou pral mache nan peyi a. Izarak pati, li moute

25
 Bècheba. Menm jou sa a, nan mitan lannwit, Seyè a parèt nan yon vizyon, li di Izarak konsa: -Mwen se Bondye Abraram, papa ou. Ou pa bezwen pè anyen, paske mwen la avèk ou. M'ap beni

26
 ou, m'ap ba ou anpil pitit pitit, poutèt Abraram, sèvitè m' lan. Izarak bati yon lotèl la, li fè sèvis

27
 pou Seyè a. Li moute kay li la. Domestik li yo fouye yon lòt pi. ¶ Abimelèk soti Gera, li vin wè

Izarak. Li te gen avè l' Akouzat, yon bon zanmi l', ak Pikòl, kòmandan lame li a. Izarak mande yo: -Poukisa nou vin wè m' koulye a? Jan nou te rayi m' sa a jouk nou te rive mete m' deyò nan

peyi nou an!²⁸ Yo reponn li: -Koulye a nou konnen Seyè a avèk ou. Se poutèt sa nou di n'ap fè
 yon kontra avèk ou, n'ap sèmante yonn bay lòt.²⁹ W'ap sèmante ou p'ap janm fè nou anyen, menm
 jan nou pa t' janm fè ou anyen. W'ap sèmante nou te toujou aji byen avèk ou. Nou kite ou ale san
 bri san kont. Koulye a, ou gen benediksyon Bondye sou ou.³⁰ Izarak fè gwo fèt pou yo. Yo manje,
 yo bwè.³¹ Nan granmaten, yo leve, yo sèmante yonn bay lòt. Apre sa, moun Filisti yo di Izarak
 orevwa. Yo separe tankou de bon zanmi, epi y al fè wout yo.³² Menm jou sa a, domestik Izarak
 yo vin ba l' nouvèl pi yo t'ap fouye a. Yo di l': -Nou jwenn dlo.³³ Izarak rele pi a Chibeya. Se
 poutèt sa, jouk jòdi a, yo rele lavil la Bècheba.³⁴ ¶ Ezaou te gen karantan lè l' marye ak Jidit, pitit
 fi Beri, yon moun Et. Li te gen yon lòt madanm tout yo te rele Basmat, pitit fi Elon, yon moun Et
 tou.³⁵ Medam sa yo te rann Izarak ak Rebeka lavi minab.

Chapter 27

¹ ¶ Izarak te fin vye granmoun, je l' pa t' bon, li pa t' kapab wè ladan yo ankò. Li rele premye
 pitit li a, Ezaou, li di l' konsa: -Pitit mwen, Ezaou reponn li: -Men mwen wi, papa.² Izarak di l':
 -Ou wè jan m' fin vye. Mwen pa konn ki jou m'ap mouri.³ Tanpri, pran zam ou yo, flèch ou yo ak
 banza ou la. Ale nan bwa a, chase jibye pou mwen.⁴ Lèfini, pare vyann lan jan ou konnen mwen
 renmen l' lan, pote l' ban mwen. m'a manje. Epi m'a ba ou benediksyon mwen anvan m' mouri.
⁵ Rebeka menm t'ap tande sa Izarak t'ap di Ezaou, gason l' lan. Ezaou soti, li pati li al lachas pou
 papa l'.⁶ ¶ Lè sa a, Rebeka di Jakòb, pitit li a: -Men mwen fèk tande papa ou di Ezaou, frè ou la:
⁷ Al chase jibye pote pou mwen, kwit li, m'a manje. Apre sa, m'a beni ou devan Seyè a anvan m'
 mouri.⁸ Koulye a, pitit mwen, koute sa m'ap di ou: Fè sa m'ap mande ou la.⁹ Ale pran de jenn
 kabrit byen gra nan bann lan, pote yo ban mwen. m'a pare yo pou papa ou jan m' konnen li renmen
 l' lan.¹⁰ W'a pote l' bay papa ou, la manje, la beni ou anvan l' mouri.¹¹ Jakòb reponn manman l':
¹² -Men manman, Ezaou, frè mwen an, gen pwal sou tout kò li. Mwen menm, po pa m' lis. Si papa
 m' manyen m', la wè se twonpe m'ap twonpe l'. Lè sa a pase li ban mwen benediksyon, la ban m'
¹³ madichon pito. Men manman an reponn: -Madichon la ba ou a va tonbe sou mwen, pitit mwen.

14
 Ou menm, fè sa mwen di ou fè a, al chache kabrit yo mennen ban mwen. Jakòb ale chache bèt yo, li mennen yo bay manman l'. Manman l' pare yon manje jan li konnen papa a te renmen l' lan.

15
 Apre sa, Rebeka pran rad Ezaou, premye pitit li a, pi bèl rad Ezaou te gen lakay la, li mete yo anwo Jakòb, dezyèm pitit li a. 16 Avèk po ti kabrit yo, li kouvri bra ak kou Jakòb. 17 Apre sa, li

bay Jakòb manje a avèk pen li te fè. 18 ¶ Jakòb al jwenn papa l', li di: -Papa. Izarak reponn li: -Men

mwen, pitit mwen. Kilès nan nou ki la a? 19 Jakòb reponn: -Se mwen menm Ezaou, premye gason ou lan. Mwen fè sa ou te di m' fè a. Leve non, chita. Manje vyann mwen pote pou ou a. Apre sa,

wa ban mwen benediksyon. 20 Izarak di Jakòb: -Ki jan ou fè jwenn bèt la vit konsa, pitit mwen?

Jakòb reponn li: -Seyè a, Bondye ou la, ede m'. Li fè jibye a vin devan mwen. 21 Izarak di: -Pwoche non. Vini mwen manyen ou, pitit mwen, pou m' wè si wi ou non ou se Ezaou, pitit mwen an.

22 Jakòb pwoche bò kote Izarak, papa l', ki manyen l'. Epi Izarak di: -Vwa a se vwa Jakòb, men bra

a se bra Ezaou. 23 Li pa t' rekonèt Jakòb, paske bra li te plen pwal tankou bra Ezaou, frè li a. Izarak

beni l'. 24 Li di l': -Se vre, se Ezaou, pitit mwen, ou ye? Jakòb reponn li: -Se mwen wi. 25 Izarak di l': -Sèvi m' non. m'a manje vyann ou pote a. Apre sa, m'a beni ou. Jakòb sèvi l' manje a, li manje.

Lèfini, Jakòb ba li diven, li bwè. 26 Izarak, papa l', di l': -Pwoche non, pitit mwen. vin bo m'.

27 Jakòb pwoche, li bo papa l'. Papa a pran sant rad ki te sou li a, epi li ba li benediksyon l'. Li di

l': -Sant kò pitit mwen an tankou sant yon jaden Seyè a beni. 28 Se pou Bondye ba ou lawouze ki

soti nan syèl la. Se pou l' fè jaden ou donner anpil. Se pou l' ba ou bèl rekòt ble ak rezen. 29 Se pou kantite pèp soumèt devan ou. Se pou kantite nasyon bese tèt devan ou. Se ou menm ki pou mèt frè ou yo. Se pou pitit pitit manman ou yo bese tèt devan ou. Se pou tout moun ki ba ou madichon

jwenn madichon. Se pou tout moun ki beni ou jwenn benediksyon. 30 ¶ Izarak te fin beni Jakòb.

Jakòb te fèk kite papa li, Izarak, lè Ezaou, frè li a, antre soti lachas. 31 Li te pare yon bon plat manje, li pote l' bay papa l'. Li di l': -Leve chita non, papa. Manje vyann pitit ou pote pou ou a, pou ou ka

beni l'. 32 Izarak, papa l', mande: -Ki moun sa a? Li reponn: -Se mwen menm, Ezaou, premye pitit

gason ou lan. 33 Tande Izarak tande sa, li sezi, li pran tranble kou fèy bwa. Li di: -Kilès sa ki te pote ban m' manje jibye li sot chase a? Mwen fèk fin manje anvan ou rive la a. Mwen ba li

benediksyon m' lan ki pou li nèt. 34 Lè Ezaou tande sa, yon sèl kòlè moute l', li tonbe rele byen fò:

-Beni m' tout non, papa! 35 Izarak reponn li: -Frè ou la vini, li twonpe m'. Li pran benediksyon ki

³⁶
 te pou ou a. Ezaou di: -Sa fè dezyèm fwa li pran sak pou mwen. Eske se paske li rele Jakòb la kifè l'ap pase devan m' konsa? Premye fwa a, li te pran dwa m' kòm premye pitit. Men koulye a, li pran benediksyon ki te pou mwen an! Apre sa, li di: -Men papa, èske ou pa gen yon lòt benediksyon pou mwen?

³⁷
 Izzarak reponn Ezaou: -Mwen mete l' chèf sou ou. Mwen fè tout rès fanmi an tounen moun k'ap sèvi l'. Mwen ba li mezi pwovizyon l'. Kisa m' ka fè pou ou ankò, pitit mwen?

³⁸
 Ezaou di papa a: -Se sèl benediksyon sa a ou te genyen, papa? Tanpri, beni m' tout non, papa! Lè sa a,

³⁹
 Ezaou pete yon sèl rèl, li kriye byen fò. Se konsa Izzarak di l': -Latè p'ap ba ou sa l' te dwe ba ou.

⁴⁰
 p'ap gen lawouze ki soti nan syèl la pou wouze jaden ou. Se zam ou k'ap fè ou viv. W'ap sèvi

⁴¹
 frè ou la, se vre. Men, se pye poudre ou ye, w'a soti anba men l'. ¶ Ezaou te rayi Jakòb poutèt papa a te ba li benediksyon ki te pou li a. Li di nan kè l': Papa m' pa lwen mouri. Fini yo fini antere

⁴²
 l', m'ap touye Jakòb, frè mwen an. Yo vin rapòte bay Rebeka sa ki te soti nan bouch Ezaou, premye pitit gason l' lan. Li fè rele Jakòb, dezyèm pitit li a, li di l': -Koute! Ezaou, frè ou la, vle tire

⁴³
 revanj sou ou. Li vle touye ou. Koulye a, pitit mwen, koute sa m'ap di ou la. Leve, pati ale kay

⁴⁴
 Laban, frè mwen an ki rete nan peyi Karan. W'a rete kèk tan la avèk li, jouk tan kòlè frè ou la

⁴⁵
 va bese, jouk tan la sispann move sou ou, jouk li va bliye sa ou te fè l' la. Lè sa a, atò, m'a voye

⁴⁶
 chache ou, m'a fè ou tounen. Poukisa pou m' ta pèdi tou de pitit gason m' yo yon sèl jou a? Rebeka di Izzarak konsa: -Mwen degoute, mwen bouke ak bann fi Et sa yo. Pase pou m' ta wè Jakòb pran yonn nan moun sa yo, yonn nan bann fi Et sa yo k'ap viv nan peyi a pou madanm, pito m' mouri!

Chapter 28

¹
 ¶ Izzarak rele Jakòb, li beni l'. Apre sa, li ba li lòd sa a: -Piga ou pran fi peyi Kanaran an pou madanm ou.

²
 Leve non, ale Mezopotami lakay Betwèl, papa manman ou. W'a pran yonn nan piti fi Laban yo pou madanm. Laban, se frè manman ou.

³
 Mwen mande Bondye ki gen tout pouvwa

⁴
 a pou l' beni maryaj ou, pou l' ba ou anpil pitit, pou ou tounen zansèt anpil nasyon. Se pou l' beni ou, ou menm ansanm ak tout pitit pitit ou yo, menm jan li te beni Abraram, pou ou ka pran posesyon

⁵
 peyi kote w'ap viv koulye a, peyi li te deja bay Abraram lan. Se konsa Izzarak fè Jakòb pati. Jakòb ale nan Mezopotami lakay Laban, pitit Betwèl, moun peyi Aram lan. Laban se te frè Rebeka,

⁶
 manman Jakòb ak Ezaou. ¶ Ezaou vin konnen ki jan Izzarak te beni Jakòb, ki jan li te voye l'

Mezopotami al chache yon madanm. Li vin konnen tout lè Izarak t'ap beni Jakòb la, li te pase l' lòd sa a: Piga ou pran fi peyi Kanaran an pou madanm ou. ⁷ Ezaou te wè Jakob te obeyi papa l' ak manman l', li te pati pou Mezopotami. ⁸ Konsa, Ezaou vin wè Izarak papa l' pa t' renmen fi peyi Kanaran yo. ⁹ Li leve, li ale lakay Izmayèl, lòt pitit gason Abraram lan, li pran yon lòt madanm mete sou sa li te genyen deja yo. Li marye ak Maalat, yonn nan pitit fi Izmayèl yo. Maalat sa a, se te sè Nebajòt. ¹⁰ ¶ Jakòb kite Bècheba, li pati pou Karan. ¹¹ Li rive yon kote, li rete pase nwit la la, paske sòlèy te fin kouche. Li pran yon wòch sèvi l' zòrye, epi li kouche atè a konsa pou l' dòmi. ¹² Li fè yon rèv. Li reve li wè yon nechèl ki te kanpe de pye l' atè ak tèt li pèdi nan syèl la. Zanj Bondye yo t'ap moute desann sou nechèl la. ¹³ Epi li wè Seyè a kanpe anwo nechèl la. Seyè a t'ap di: -Se mwen menm, Seyè a, Bondye Abraram, zansèt ou, ak Bondye Izarak. Ou wè tè kote ou kouche a, m'ap ba ou l' pou ou menm ansanm ak tout pitit pitit ou yo. ¹⁴ Pitit pitit ou yo pral menm kantite ak grenn pousyè ki sou latè. Yo pral gaye nan tout direksyon, lès, lwès, nò, sid. Ou menm ak tout pitit pitit ou yo, nou pral tounen yon benediksyon pou tout moun ki sou latè. ¹⁵ Pa bliye, m'ap toujou la avèk ou, m'ap voye je sou ou kote ou pase. M'ap fè ou tounen nan peyi sa a, paske mwen p'ap lage ou san m' pa fè tout sa mwen sot di ou la a. ¹⁶ ¶ Jakòb leve nan dòmi an, li di: -Wè pa wè, Seyè a isit la, mwen pa t' konn sa. ¹⁷ Msye vin pè, li di: -Isit la se yon kote pou moun respekte! Se pa lòt bagay, isit la se kay Bondye ak pòt syèl la. ¹⁸ Jakòb leve byen bònè, li pran wòch li te fè sèvi l' zòrye a, li plante l' tankou yon bòn tè, li vide lwil sou li pou mete l' apa pou Bondye. ¹⁹ Li rele kote sa a Betèl. (Anvan sa, lavil la te rele Louz.) ²⁰ Jakòb fè yon pwomès bay Seyè a, li di: -Si Bondye toujou kanpe avèk mwen, si li voye je sou mwen nan tout vwayaj sa m'ap fè a, si li ban m' manje pou m' manje ak rad pou m' met sou mwen, ²¹ si l' fè m' tounen ak kè poze lakay papa m', Seyè a va Bondye m' vre. ²² Wòch sa a mwen plante nan tè tankou bòn lan va sèvi kay pou Bondye. m'a ba ou yon dizyèm nan tout sa ou va ban mwen.

Chapter 29

¹ ¶ Jakòb pran mache ankò, li ale nan direksyon peyi moun ki rete bò kote solèy leve a. ² Li rete konsa, li wè yon pi nan mitan savann lan. Te gen twa bann mouton ki te kouche bò pi a. Se nan pi sa a yo te konn pran dlo pou bay bèt yo bwè. Men te gen yon gwo wòch ki te bouche bouch ³ pi a. Lè tout bèt yo te sanble, gadò yo te met ansanm pou wete wòch la sou bouch pi a pou fè bèt

yo bwè. Apre sa, yo tounen met kouvèti a sou bouch pi a ankò. ⁴ Jakòb mande gadò mouton yo konsa: -Zanmi m' yo, moun ki bò nou ye? Yo reponn li: -Nou se moun Karan. ⁵ Li di yo: -Eske nou konnen Laban, pitit Nakò a? Yo reponn li: -Men wi, nou konnen l'. ⁶ Li mande yo: -Ban m' nouvèl li non. Li byen? Yo reponn li: -Li byen wi. Gade, men Rachèl, pitit fi li a, k'ap vini ak bann mouton li yo. ⁷ Jakòb di yo: -Men, solèy la byen wo toujou, se poko lè pou nou antre mouton yo. Sak fè nou pa bay yo bwè, epi nou ta tounen mete yo nan manje? ⁸ Yo reponn li: -Nou pa ka fè sa. Fòk nou tann tout bann mouton yo sanble. Atòkile, nou tout n'a met men ansanm pou n' woule wòch ki sou bouch pi a. Se lè sa a n'a bay mouton yo bwè. ⁹ ¶ Jakòb t'ap pale ak yo toujou lè Rachèl vin rive ak bann mouton papa l' yo. Se li menm ki te gade mouton l' yo pou li. ¹⁰ Kou Jakòb wè Rachèl, pitit fi Laban, frè manman l' lan, avèk bann mouton Laban yo, li pwoche, li woule wòch ki te sou bouch pi a, li bay bann mouton Laban yo bwè. ¹¹ Lè l' fini, li bo Rachèl. Apre sa, li pran kriye. ¹² Jakòb fè Rachèl konnen se ti fanmi Laban li ye, pitit Rebeka, sè Laban an. Rachèl kouri al di papa l' sa. ¹³ Lè Laban tande se pitit sè li a, li kouri al jwenn li. Li pran l', li pase men nan kou l', li bo l', epi li mennen l' lakay li. Rive yo rive Jakòb rakonte l' tout sak te pase. ¹⁴ Lè sa a, Laban di l': -Aa wi, se ras mwen ou ye vre. Jakòb rete pase yon mwa lakay Laban. ¹⁵ ¶ Laban mande Jakòb: -Ou se fanmi m', se vre. Men, sa pa vle di fòk ou sevi m' gratis pou sa. Di m' konbe pou m' peye ou? ¹⁶ Laban te gen de pitit fi. ¹⁷ Pi gran an te rele Leya, pi piti a te rele Rachèl. ¹⁸ Leya te gen je pichpich, men Rachèl te gen bèl fòm kò, li te bèl anpil. ¹⁹ Jakòb te renmen Rachèl. Li reponn Laban: M'ap sevi avè ou sèt lanne pou Rachèl, dezyèm pitit fi ou la. ²⁰ Laban di l': Pito se ou menm mwen bay li pase m' bay yon lòt moun li. Ou mèt rete lakay mwen. ²¹ Se konsa Jakòb pase sèt an ap travay kay Laban pou l' te ka marye ak Rachèl. Sèt lanne yo te pase tankou dlo, paske li te renmen ti fi a. ²² Lè lè a rive, Jakòb di Laban: -Bon. Li lè atò pou ou ban m' pitit fi ou la pou m' ka marye avè l'. ²³ Se konsa Laban fè yon gwo resepsyon nòs, li envite tout moun nan kanton an. ²⁴ Men aswè, li te pran Leya, pitit fi li a, li mennen l' bay Jakòb ki kouche avè l'. ²⁵ Laban te pran Zilpa, yonn nan sèvant li yo, li bay Leya pou sèvant pa li. ²⁶ Nan denmen maten, Jakòb vin wè se Leya yo te ba li. Li di Laban: -Kisa ou fè m' konsa? Eske se pa pou Rachèl mwen te sevi avèk ou? Poukisa ou ban m' koutba sa a? ²⁶ Laban di l': -Se pa koutim nou isit pou n' marye ti sè anvan gran sè.

27 Tann senmenn lan fin pase. Lè sa a, n'a fin fete nòs la. Apre sa, m'a ba ou Rachèl, si ou dakò pou sèvi avè m' pandan sèt lòt lanne ankò. 28 Jakòb tonbe dakò. Lè senmenn fèt la fin pase, Laban pran lòt pitit fi l' la, Rachèl, li bay Jakòb li pou madanm tou. 29 Laban pran Bila, yonn nan sèvant li yo, li bay Rachèl li pou sèvant li. 30 Jakòb kouche ak Rachèl. Li te renmen l' pi plis pase Leya. Li sèvi ak Laban pandan sèt lanne ankò. 31 ¶ Lè Seyè a wè jan Jakòb pa t' renmen Leya, li fè l' fè pitit. Men, Rachèl pa t' kapab fè pitit. 32 Leya vin ansent, li fè yon pitit gason, li di: -Seyè a wè jan m'ap souffri. Koulye a, mari m' va renmen m'. Se konsa li rele l' Woubenn. 33 Leya vin ansent ankò, li fè yon lòt gason. Li di: -Seyè a ban m' yon lòt gason ankò, paske li wè jan mari m' pa renmen m' menm. Se konsa li rele l' Simeyon. 34 Li vin ansent yon twazyèm fwa, li fè yon lòt pitit gason ankò. Li di: -Fwa sa a, mari m' pral rete avè m' nèt paske mwen fè twa pitit gason pou li. Se konsa li rele 35 l' Levi. Apre sa, li vin ansent ankò, li fè yon lòt pitit gason. Li di: -Fwa sa a, m'ap fè lwanj Seyè a. Se konsa li rele l' Jida. Apre sa, Leya sispann fè pitit.

Chapter 30

1 ¶ Lè Rachèl wè li pa t' kapab fè pitit pou Jakòb, li vin gen yon sèl jalouzi kont sè li a, li di Jakòb: -Fè m' fè pitit! Si se pa sa m'ap mouri sou kont ou! 2 Jakòb fè kòlè sou Rachèl, li di li: -Eske se mwen ki Bondye? Se li menm ki anpeche ou fè pitit. 3 Rachèl di li: -Bon. Men Bila, sèvant mwen an. Kouche avè l'. La fè yon pitit pou mwen. Konsa, gremesi Bila, m'a gen pitit tou. 4 Se konsa, Rachèl te pran sèvant li a, li bay Jakòb pou madanm. Jakòb kouche ak Bila. 5 Bila vin ansent, li fè yon ti gason pou Jakòb. 6 Lè sa a, Rachèl di: -Seyè a rann mwen jistis. Li tandè vwa mwen. Li ban m' yon gason. Se poutèt sa Rachèl te rele pitit la Dann. 7 Apre sa, Bila, sèvant Rachèl la, vin ansent ankò, li fè yon dezyèm gason pou Jakòb. 8 Rachèl di: -Mwen t'ap mennen yon gwo batay kont sè m' lan devan Bondye. Men se mwen ki genyen. Se konsa li rele pitit la Nèftali. 9 Lè Leya wè li te sispann fè pitit, li pran Zilpa, sèvant li a, bay Jakòb pou madanm tou. 10 Zilpa, sèvant Leya a, fè yon ti gason pou Jakòb. 11 Leya di: -Ala fanm gen chans se mwen menm! Se konsa li rele

12 pitit la Gad. Zilpa, sèvant Lea a, fè yon dezyèm pitit gason pou Jakòb. 13 Leya di konsa: -Ala benediksyon mwen jwenn! Koulye a medam yo pral di jan mwen se yon fanm ki beni. Se konsa li rele pitit la Asè.

14 ¶ Pandan rekòt ble a, Woubenn soti al nan jaden, li jwenn kèk mandragò. Li pote rasen yo bay Leya, manman li. Rachèl di Leya konsa: -Tanpri, ban m' kèk moso rasen mandragò pitit ou pote pou ou a.

15 Leya reponn li: -Atò ou pa fè m' ase? Ou fin pran mari m', koulye a ou vle pran mandragò pitit gason m' lan tou? Rachèl di l': -Enben, Jakòb va kouche avè ou aswè a pou mandragò pitit gason ou lan.

16 Nan aswè, lè Jakòb parèt sot nan jaden, Leya soti al kontre l', li di l' konsa: -Se pou ou vin kouche avè m' aswè a, paske mwen bay mandragò pitit gason m' lan pou sa. Se konsa, jou swa sa a, Jakòb kouche avèk Leya.

17 Bondye reponn lapriyè Leya a. Li vin ansent, epi li fè yon senkyèm pitit gason pou Jakòb.

18 Leya di: -Bondye ban m' sa m' merite a, paske mwen te bay mari m' sèvant mwen an pou madanm. Se konsa, Leya rele pitit gason an Isaka.

19 Leya vin ansent ankò, li fè yon sizyèm pitit gason pou Jakòb. 20 Leya di: -Bondye fè m' yon bèl kado. Fwa sa a, mari m' pral pou mwen nèt, paske mwen fè sis pitit gason pou li. Se konsa li rele pitit la Zabilon.

21 Apre sa, li fè yon pitit fi. Li rele l' Dena. 22 Lè sa a, Bondye vin chonje Rachèl, li reponn lapriyè li, li fè l' ka fè pitit.

23 Se konsa Rachèl vin ansent, li fè yon pitit gason. Li di: -Bondye fè yo sispann pase m' nan rizib.

24 Epi Rachèl rele pitit gason an Jozèf, paske li te di: -Se pou Seyè a ba m' yon lòt gason ankò.

25 ¶ Apre Rachèl te fè Jozèf, Jakòb di Laban konsa: -Kite m' pati pou m ale lakay mwen nan peyi mwen.

26 Ban mwen madanm mwen yo ansanm ak timoun yo pou m' ka ale, paske se pou yo mwen t'ap sèvi ak ou. Ou konnen tout kantite sèvis mwen rann ou.

27 Laban reponn li: -Fè m' plezi sa a: mwen rekonèt se poutèt ou Seyè a beni m' tout beni sa a.

28 Di m' sa pou m' peye ou, m'a ba ou li. 29 Jakòb di l': -Ou konnen jan mwen sèvi avè ou. Ou wè ki jan bann bèt ou yo peple depi yo nan men m'.

30 Ti sa ou te genyen anvan m' te vini an tounen yon kantite depi mwen mete pye m' isit la. Akòz mwen Seyè a pa manke beni ou. Alekile, li lè pou m' al travay pou tèt pa mwen.

31 Laban di l': -Kisa pou m' ba ou? Jakòb reponn li: -Ou pa bezwen peye m' pou sa. Men si ou dakò avèk sa mwen pral di ou la, m'a rete ankò pou okipe bèt ou yo.

32 Jòdi a, mwen pral pwonmennen mache nan mitan tout bèt ou yo. M'ap pran tout ti mouton nwa, ak tout ti kabrit ki takte osinon pentle yo, m'ap mete yo apa. Se sa ase w'a ban mwen pou sèvis mwen.

33 Lè w'a vin wè sa ou dakò ban mwen an, w'a konnen si m' te fè vis, wi ou non. Lè w'a vin kontwole sa ki pou mwen yo, si mwen gen yon mouton ki pa nwa, osinon yon kabrit ki pa takte ou ki pa pentle, ou mèt konnen se vòlè mwen vòlè ou.

34 Laban reponn li: -Dakò. n'a fè l' jan ou

³⁵
 di l' la. Men menm jou a, Laban wete tout bouk kabrit ki te gen pwal takte osinon ki te gen re sou tout kò yo, ak tout fenmèl kabrit ki te gen pwal takte osinon pentle, ou ankò ki te gen tach blan sou yo. Li wete tout mouton nwa yo, li pran tout bèt sa yo, li renmèt yo bay pitit gason l' yo. ³⁶ Apre sa, li pati byen lwen Jakòb avèk bann bèt li yo, li mache pandan twa jou epi li rete. Jakòb menm te pran swen rès mouton ak kabrit Laban yo. ³⁷ ¶ Jakòb koupe kèk branch vèt nan pye sikren, pye zanmann ak pye bwadòm, li wete kèk lèz nan kòs yo. Konsa branch yo te vin gen bann vèt, bann blan sou tout kò yo. ³⁸ Li pran yo, li mete yo tout kote yo bay bèt yo bwè dlo. Li te ranje branch bwa yo la, paske se lè bèt yo vin bwè dlo yo kwaze. ³⁹ Konsa, lè bèt yo kwaze devan branch bwa de koulè yo, yo fè pitit takte, pitit pentle, osinon ak re sou tout kò yo. ⁴⁰ Jakòb separe mouton yo, li pran tout mouton ki te takte osinon ki te nwa nan mouton Laban yo, li mete yo apa. Se konsa, li te vin gen yon bann bèt apa ki pa t' mele ak bèt Laban yo. ⁴¹ Lè bèt ki gra yo ap kwaze, Jakòb mete branch yo devan je yo kote y'ap bwè a. Konsa, yo kwaze devan branch yo. ⁴² Men, li pa mete branch yo lè se bèt mège yo k'ap kwaze. Se konsa, bèt mège yo vin pou Laban, epi bèt gra yo vin pou Jakòb. ⁴³ Jakòb vin rich anpil, Li te gen anpil bèt. Kanta pou sèvant, domestik, chamo ak bourik, li pa t' manke sa.

Chapter 31

¹
 ¶ Jakòb vin konnen jan pitit gason Laban yo t'ap di: -Jakòb fin pran tou sa ki te pou papa nou. Se byen papa nou li fin ranmase kifè li rich konsa. ² Jakòb vin wè tout Laban pa t' ba li menm karaktè li te konn ba li anvan an. ³ Lè sa a, Seyè a di l': -Tounen nan peyi kote ou te fèt la, al jwenn fanmi ou. M'ap toujou la avè ou. ⁴ Se konsa Jakòb fè chache Rachèl ak Leya. Li voye di yo rive kote l' nan savann kote bèt li yo ye a. ⁵ Li di yo: -Mwen wè karaktè papa nou pa menm jan avè m' ankò. Li chanje anpil, men Bondye papa m' lan toujou avè m'. ⁶ Nou tout de nou konnen jan mwen te sèvi ak papa nou ak tout kouraj mwen. ⁷ Men li menm, li toujou ap twonpe mwen. Li chanje lide dis fwa lè lè a rive pou li peye m'. Men, Bondye pa janm kite l' fè m' anyen. ⁸ Lè Laban di: ou mèt pran tout kabrit takte yo pou ou, tout bann bèt yo tonbe fè pitit takte. Lè li di: m'ap ba ou tout kabrit ki gen re sou tout kò yo, tout bann bèt yo tonbe fè pitit ak re sou tout kò yo. ⁹ Se Bondye menm ki

pran bann bèt papa nou yo, li ban mwen yo. ¹⁰ Lè bèt yo mande kwaze, mwen fè yon rèv, mwen
 wè tout bouk ki t'ap kwaze yo se bouk ki takte, ki pentle ak sa ki gen re sou tout kò yo. ¹¹ Zanj
 Bondye a pale avè m' nan rèv la, li di m': Jakòb. Mwen reponn li: Men mwen wi. ¹² Li di m' ankò:
 Leve je ou gade: tout bouk k'ap vole fenmèl yo se bouk ki takte ak sa ki gen re sou tout kò yo. Se
 mwen menm k'ap fè sa konsa, paske mwen wè tout sa Laban ap fè ou. ¹³ Mwen se Bondye ki te
 parèt devan ou lè ou te Betèl, kote ou te mete gwo wòch la apa pou mwen an. Ou chonje, lè sa a,
 ou te fè yon pwomès ban mwen. Koulye a, leve, kite peyi sa a. Tounen nan peyi kote ou te fèt la.
¹⁴ Rachèl ak Leya reponn Jakòb: -Nou pa gen anyen ankò pou n' eritye nan men papa nou. ¹⁵ Eske
 li pa konsidere nou tankou etranje? Li vann nou. Koulye a, li fin manje tout lajan yo te ba li pou
 nou an. ¹⁶ Tout richès Bondye wete nan men papa nou an, se pou nou ansanm ak pitit nou yo.
 Koulye a, se pou ou fè tout sa Bondye di ou fè. ¹⁷ ¶ Lè sa a, Jakòb leve, li mete pitit li yo ansanm
 ak madanm li yo sou chamo. ¹⁸ Li pran tout bèt li yo ansanm ak tout sa li te rive genyen pandan
 li te Mezopotami an, li mennen yo ale. Li pati, li al jwenn papa l', Izarak, nan peyi Kanaran. ¹⁹ Lè
 sa a, Laban t al taye lenn mouton l' yo. Pandan li pa t' la, Rachèl vòlè ti zidòl kay papa l' yo. ²⁰ Se
 konsa Jakòb twonpe Laban, moun lavil Aram lan, li pati san l' pa di l' sa. ²¹ Li pran tout sa li te
 genyen, li mete deyò, li ale, li travèse larivyè Lefrat, li pran chemen pou li al sou mòn Galarad.
²² Twa jou apre, Laban pran nouvèl Jakòb te pati. ²³ Msye pran moun pa li yo avè l', li pati dèyè
 Jakòb. Apre sèt jou, li jwenn li sou mòn Galarad. ²⁴ Men, pandan lannwit, Bondye parèt devan
 Laban, moun lavil Aram lan, nan yon rèv, li di l': -Piga ou di Jakòb anyen ni an byen, ni an mal.
²⁵ ¶ Se konsa, Laban jwenn Jakòb ki te moute tant li sou mòn lan. Laban te moute tant li tout sou
 mòn Galarad pou li menm ansanm ak moun pa l' yo. ²⁶ Laban di Jakòb: -Kisa ou fè konsa? Ou
 twonpe m', ou pran pitit fi mwen yo, ou mennen yo ale tankou prizonnye ou fè nan lagè. ²⁷ Poukisa
 ou twonpe m', ou leve ou pati an kachèt san ou pa avèti m'? Si ou te di m' sa, nou ta fè fèt, nou ta
 chante, nou ta bat tanbou, nou ta jwe gita anvan nou voye ou ale. ²⁸ Ou pa menm kite m' bo pitit
 pitit mwen yo ak pitit fi m' yo. Ou aji tankou moun fou, monchè! ²⁹ Mwen gen kont pouvwa anba
 men m' pou m' ta regle ou. Men yè swa, pandan lannwit lan Bondye papa ou la di m': Piga ou di
 Jakòb anyen ni an byen, ni an mal. ³⁰ Mwen konnen ou pati paske se pa ti anvi ou pa te anvi tounen
 lakay papa ou. Men, sa ou te bezwen vòlè ti zidòl kay mwen yo fè? ³¹ Jakòb reponn Laban, li di

32
l': -Mwen te pè, paske mwen te kwè ou ta ka reprann pitit fi ou yo nan menm. Men, kanta pou ti zidòl kay ou yo, si ou jwenn yo nan men yon moun isit la, se pou moun sa a mouri. Men, mwen pran tout moun sa yo pou temwen, si ou jwenn yon bagay lakay mwen ki pou ou, pran l' pote l' ale.

33
Jakòb pa t' konnen Rachèl te vòlè ti zidòl kay yo. Laban antre anba tant Jakòb la, li chache, li ale anba tant Leya a, apre sa anba tant de sèvant yo, li pa jwenn anyen. Li soti anba tant Leya a, li

34
antre anba tant Rachèl. la. Rachèl menm te pran ti zidòl kay yo, li te mete yo anba aparèy chamo

35
a, epi li chita sou yo. Laban menm chache tout anba tant lan, li pa jwenn anyen. Rachèl di papa l' konsa: -Si ou wè mwen pa ka leve kanpe devan ou, ou pa bezwen fache non. Se lalen mwen mwen

36
genyen. Se konsa Laban fouye toupato, li pa jwenn ti zidòl kay li yo. ¶ Lè sa a, Jakòb move sou Laban. Li pete yon kabouyay ak li, li di l': -Ki krim mwen fè? Kisa m' fè ki mal pou w'ap pousib

37
mwen konsa? Ou fin fouye tout zafè m' yo. Kisa ou jwenn ki pou ou? Mete l' la devan moun pa

38
ou yo ak moun pa m' yo, pou yo ka di ki moun ki gen rezon! Sa fè ventan depi m avè ou. Mouton ou yo ak kabrit ou yo pa janm manke fè pitit. Mwen pa janm manje yon ti bouk nan bèt ou yo.

39
Lè bèt nan bwa touye yon mouton, mwen pa janm pote l' ba ou. Mwen te pran pèt la sou kont

40
mwen. Ou te rann mwen reskonsab tout bèt yo vòlè, kit se lannwit, kit se lajounen. Lajounen,

41
chalè te fini avè m'. Lannwit, se te fredè, mwen pa t' kapab dòmi. Se konsa sa te ye pandan tout ventan mwen pase lakay ou yo. Mwen travay pandan katòzan pou de pitit fi ou yo. Apre sa, mwen fè sizan ankò ap travay pou bann bèt ou yo. Atousa, ou jwenn mwayen chanje pawòl dis fwa lè lè

42
a rive pou ou peye m'. Si Bondye papa m' lan, Bondye Abraram lan, Bondye Izarak respekte a, pa t' la avèk mwen, koulye a ou ta voye m' ale yon men devan yon men dèyè. Men Bondye wè tout

43
traka mwen bay tèt mwen, li wè travay mwen fè, se konsa yè swa li rann jijman li. ¶ Laban reponn Jakòb: -Fi sa yo se pitit mwen yo ye. Timoun sa yo, se pa m' yo ye. Bann bèt sa yo se pou mwen yo ye. tout sa ou wè la a, se pou mwen yo ye. Bon, kisa m' ka fè koulye a pou pitit fi mwen

44
yo ak pou pitit pitit mwen yo? Vini non. Annou pase yon kontra, mwen menm avè ou. Ann kite

45
yon mak ki va sèvi pou fè nou toujou chonje kontra a. Jakòb pran yon gwo wòch, li plante l' nan

46
tè a, li fè l' rete kanpe tankou yon bòn. Epi, li di moun li yo: -Ranmase wòch. Mesye yo ranmase

47
wòch, yo anpile yo fè yon gwo pil. Apre sa, yo chita bò pil wòch la, yo manje. Laban rele pil

48
wòch la Jega Saadouta nan lang pa l', men Jakòb te rele l' nan lang pa l' Galèd. Laban di: -Pil wòch sa a va sèvi pou fè nou tout de toujou chonje kontra a. Se poutèt sa yo rele kote sa a Galèd.

49
Laban di ankò: -Se pou Bondye voye je sou nou tout de lè nou fin separe. Se konsa yo rele kote

50
 sa a Mispà. Laban pale ankò, li di: -Si ou maltrete pitit fi mwen yo, si ou pran lòt fanm ankò sou yo, konnen ou p'ap annafè ak yon moun tankou nou tandè. Atansyon, men se ak Bondye menm, ki temwen sa nou sot fè a, w'ap annafè. 51
 Laban di Jakòb ankò: -Men pil wòch mwen mete pou separe nou an. Men bòn ou plante a la. 52
 Ni pil wòch yo ni bòn lan ap sèvi yon mak. Mwen pa gen dwa depase l' pou m' vin atake ou, ni ou pa gen dwa depase l' pou ou vin atake m'. 53
 Se pou Bondye Abraram lan, Bondye Nakò a, Bondye papa yo a, mete rezon nan mitan nou. Lè sa a, Jakòb sèmante nan non Bondye Izarak, papa l' respekte a. 54
 Apre sa, li touye yon bèt, li ofri l' bay Bondye sou mòn lan, epi li envite moun pa l' yo vin manje. Lè yo fin manje, yo pase nwit la sou mòn lan. 55
 Nan denmen maten byen bonè, Laban leve, li bo pitit pitit li yo ak pitit fi li yo. Li beni yo. Apre sa, li pati, li tounen lakay li.

Chapter 32

1 ¶ Jakòb menm ale chemen chemen l'. Li kontre kèk zanj Bondye sou wout li. 2 Lè li wè yo, li di: -Sa se lame Bondye a. Se konsa li rele kote a Manayim. 3 ¶ Jakòb voye kèk komisyonè devan al jwenn Ezaou, frè li a, nan peyi Seyi, kote Edon te rete a. 4 Men sa li ba yo lòd pou yo di: -Men sa n'a di Ezaou, mèt mwen: Jakòb, nèg pa ou la, voye di ou konsa, li te pase tout tan sa a lakay Laban. Se poutèt sa li te pran tout reta sa a pou l' tounen. 5 Li gen bèf, bourik, mouton, kabrit, domestik ak sèvant. Li voye di ou sa pou ou ka fè pa l'. 6 Lè mesajè yo tounen vin jwenn Jakòb, yo di l': -Nou t ale kote Ezaou, frè ou la. Koulye a li gen tan sou wout pou l' vin kontre ou. Li gen katsan (400) moun ak li. 7 Jakòb te pè anpil. Li te boulvèse. Li pran moun ki te avè l' yo, li fè yo fè de pòsyon. Li fè menm bagay la ak mouton, bèf, chamo li te genyen yo. 8 Li t'ap di nan kè l': -Si Ezaou vin atake yon pòsyon, lòt pòsyon an va gen tan chape. 9 ¶ Jakòb lapriyè, li di: -O Bondye Abraram granpapa m' lan, Bondye Izarak papa m' lan! O Seyè, ou menm ki te di m' tounen nan peyi m' kote m' te fèt la! W'a fè tout bagay mache byen pou mwen. 10 Mwen menm k'ap sèvi ou la, mwen pa wè poukisa ou fè m' tout favè sa yo, poukisa ou toujou kenbe pawòl ou avè m'. Lè m' t'ap travèse larivyè Jouden, se annik yon baton mwen te gen nan men m'. Koulye a m'ap tounen, mwen tèlman genyen, mwen ka separe yo fè de pòsyon. 11 Tanpri, delivre m' non anba men Ezaou, frè mwen an! Mwen pè pou l' pa vin atake nou, pou l' pa touye ata fanm yo ak timoun yo. 12 Chonje

sa ou te di m' lan: M'ap fè tout bagay mache byen pou ou. M'ap si tèlman ba ou pitit pitit, moun
 p'ap ka konte yo. Y'ap tankou grenn sab bò lanmè. ¹³ ¶ Jakòb rete pase nwit la kote l' te ye a. Apre
 sa, nan sa l' te gen avè l' yo, li chwazi ladan yo pou fè Ezaou, frè l' la, kado. ¹⁴ Li pran desan (200)
 fenmèl kabrit ak vin bouk, desan fenmèl mouton ak vin belye, ¹⁵ trant fenmèl chamo nouris ak
 tout ti chamo yo dèyè yo, karant manman bèf, dis towò, vin fenmèl bourik ak dis mal bourik. ¹⁶ Li
 pran bèt yo, li mete chak kalite apa, li renmèt chak kalite bay yonn nan domestik li yo. Li di yo
 konsa: -Pran devan mwen. Chak moun ap kite yon distans nan mitan bèt pa l' yo ak bèt ki devan l'
 yo. ¹⁷ Epi li pase premye a lòd sa a: -Lè Ezaou, frè m' lan, va kontre ou, l'ap mande ou: Kilès ki
 mèt ou? Kote ou prale? Pou ki moun bèt sa yo w'ap pouse devan ou konsa a? ¹⁸ W'a reponn li: Se
 pou Jakòb, nèg pa ou la. Se yon kado li voye bay Ezaou, mèt mwen an. Li menm, li dèyè, l'ap vini.
¹⁹ Li pase dezyèm lan, twazyèm lan ak tout lòt moun ki t'ap mache dèyè bèt yo menm lòd la. -Men
 sa nou gen pou n' di Ezaou, lè nou kontre l'. ²⁰ Se pou nou di: Wi, Jakòb, nèg pa ou la, ap vin dèyè
 nou pye pou pye. Jakòb t'ap di nan kè l'. Avèk tout kado m'ap voye devan m' lan, m'ap fè kè l'
 kontan. Konsa, lè n'a kontre, ou pa janm konnen, li ka fè pa m'. ²¹ Moun yo pran devan ak kado
 yo. Men Jakòb rete dèyè, li pase nwit la kote l' te ye a. ²² Menm jou lannwit sa a, Jakòb leve, li
 pran de madanm li yo, de sèvant li yo ak onz pitit gason li yo, li janbe lòt bò larivyè Jabòk, nan pas
 la. ²³ Apre li fin fè yo janbe larivyè a, li fè janbe tout sa li te genyen tou. ²⁴ ¶ Men li menm, li te
 rete pou kont li dèyè. Lè sa a, gen yon moun ki mare batay ak li, yo goumen jouk devanjou. ²⁵ Lè
 nonm lan wè li pa t' ka bat li, li bay Jakòb yon kou nan ren l'. Se konsa zo ren l' dejwente pandan
 yo t'ap goumen an. ²⁶ Nonm lan di l': -Kite m' ale, paske bajou pral kase. Jakòb reponn li: -Si ou
 pa beni mwen, mwen p'ap kite ou ale. ²⁷ Nonm lan di: -Ki jan ou rele? Li reponn: -Jakòb. ²⁸ Nonm
 lan di l': -Yo p'ap rele ou Jakòb ankò. Y'ap rele ou Izrayèl, paske ou goumen ak Bondye, ou goumen
 ak moun, se ou menm ki genyen batay la. ²⁹ Jakòb mande l': -Tanpri, di m' ki jan ou rele? Li reponn:
 -Poukisa w'ap mande m' ki jan mwen rele? Apre sa li beni Jakòb. ³⁰ Jakòb di konsa: -Mwen wè
 Bondye, mwen pa mouri. Se konsa, li rele kote l' te ye a Penyèl. ³¹ Solèy te gen tan ap leve lè Jakòb
 kite Penyèl, li t'ap bwete poutèt ren li. ³² Se poutèt sa, jouk jòdi a, pitit pitit Izrayèl yo pa manje
 venn ki kenbe zo ren an, paske se sou venn sa a Bondye te frape Jakòb.

Chapter 33

¹ ¶ Jakòb leve je l' gade, li wè Ezaou ki t'ap mache vin jwenn li avèk katsan moun dèyè li. Li pran timoun yo, li separe yo, li bay Leya pa l' yo, li bay Rachèl pa l' yo, li bay de sèvant yo pa yo.

² Li mete de sèvant yo devan nèt ak pitit yo, Leya ak pitit li yo nan mitan, Rachèl ak Jozèf dèyè nèt.

³ Li menm, li pran mache devan yo tout. Li bese tèt li jouk atè pandan sèt fwa, jouk li rive toupres Ezaou, frè li a.

⁴ Ezaou menm kouri al kontre l', li pase bra l' nan kou l', li bat do l', li bo li. Epi yo tout de yo pran kriye.

⁵ ¶ Lè Ezaou voye je l' gade, li wè medam yo ak timoun yo. Li di: -Ki moun sa yo ki avè ou la a? Jakòb reponn li: -tout se pitit Seyè a bay nèg pa ou la.

⁶ Lè sa a, sèvant yo pwoche ak timoun yo, yo bese tèt yo jouk atè devan Ezaou.

⁷ Apre sa, Leya pwoche ak timoun pa l' yo, yo bese tèt yo tout devan li. Andènye nèt, Jozèf ak Rachèl pwoche, yo bese tèt yo tout devan li.

⁸ Ezaou mande l': -Moun mwen kontre pi devan an, poukisa ou te voye yo? Jakòb reponn li: -Se pou m' te ka fè kè ou kontan.

⁹ Ezaou di l': -Frè mwen, mwen gen tout sa m' bezwen. Ou mèt kenbe tou sa ou genyen pou ou.

¹⁰ Jakòb reponn li: -Non. Si ou kontan wè m' tout bon, tanpri, asepte kado m'ap ba ou yo. Paske, lè mwen kontre ou, se tankou si m' te wè figi Bondye. Gade jan ou resevwa m' byen.

¹¹ Tanpri, asepte kado m'ap ba ou yo, paske Bondye te beni m' anpil. Mwen pa manke anyen. Jakòb fòse Ezaou sitèlman, bout pou bout, Ezaou asepte.

¹² Li di: -Bon. Ann pati. Ann ale. M'ap pran devan ou.

¹³ Men Jakòb reponn li: -Mèt mwen, ou konnen jan timoun yo fèb. Epi, fòk mwen pa bliye fenmèl mouton ak manman bèf yo ki nouris. Si m' fè yo mache twòp yon sèl jou, se kont pou yo tout mouri.

¹⁴ Tanpri, mèt mwen, ou mèt pran devan nèg pa ou la, mwen menm m'ap vin dèyè ti pa ti pa, jan bèt yo ak timoun yo ka mache, jouk m'a rive lakay ou nan peyi Seyi.

¹⁵ Ezaou di l': -Bon. m'a kite kèk moun nan moun pa m' yo avè ou? Jakòb reponn: -Se pa nesesè. Yon sèl bagay mwen mande, se pou mèt mwen bliye tout bagay.

¹⁶ ¶ Menm jou a, Ezaou pati tounen nan peyi Seyi.

¹⁷ Jakòb menm pati pou Soukòt. Lè li rive la, li bati yon kay pou li ak yon pak pou bèt li yo. Se sak fè yo rele kote sa a Soukòt.

¹⁸ Lè Jakòb tounen soti Mezopotami, li rive anbyen lavil Sichèm, nan peyi Kanaran. Li moute tant li sou moso tè ki anfas lavil la.

¹⁹ Li achte moso tè kote li te moute tant li a pou san (100) pyès lajan nan men pitit Amò yo. Se Amò sa a ki te papa Sichèm.

²⁰ Jakòb bati yon lotèl la tou. Li rele l': Bondye se Bondye Izrayèl la.

Chapter 34

¹ ¶ Dena, pitit fi Leya te fè pou Jakòb la, te soti al rann medam peyi a vizit. ² Lè sa a, Sichèm, pitit Amò, moun Evi a, te chèf nan kanton an. Lè li wè Dena, li mete men sou li, li fè kadejak sou li. ³ Men Sichèm te tonbe damou pou Dena, pitit fi Jakòb la. Li te pale dous ak tifi a, paske li te renmen l'. ⁴ Sichèm di Amò, papa l': -Al mande pou fi sa a pou mwen. ⁵ Jakòb vin konnen Sichèm te fè kadejak sou Dena, pitit fi li a. Men, paske pitit gason l' yo te nan savann ak bèt yo, li pa di anyen jouk lè yo tounen. ⁶ ¶ Amò, papa Sichèm, ale bò kot Jakòb pou fè yon pale sou sa avè l'. ⁷ Lè sa a, pitit gason Jakòb yo t'ap tounen soti nan savann. Lè yo pran nouvèl la, yo te move, yo te fache anpil, paske Sichèm te fè yon bagay grav: li te avili moun Izrayèl yo lè l' te fè kadejak sou pitit fi Jakòb la. Bagay konsa pa t' dwe fèt. ⁸ Amò di yo konsa: -Pitit gason m' lan, Sichèm, fin fou pou fi nou an. Tanpri, kite li marye avè l'. ⁹ Ann pase kontra yonn ak lòt pou nou zanmi. n'a ban nou nan pitit fi nou yo pou madanm pitit gason nou yo. n'a pran nan pitit fi nou yo pou madanm pitit gason nou yo. ¹⁰ Konsa n'a rete ansanm ak nou nan peyi a. n'a rete kote nou vle, n'a fè kòmès jan nou vle, n'a achte tè nou vle. ¹¹ Apre sa, Sichèm di papa ak frè Dena yo: -Fè m' favè sa a, tanpri. m'a ban nou tout sa nou vle. ¹² Di m' kisa pou m' fè nou kado. Nou mèt mande m' nenpòt ki gwo pri pou maryaj la. M'ap ban nou tout sa n'a mande m'. Men, se pou nou dakò. Kite m' marye ak fi a. ¹³ Men pitit gason Jakòb yo bay Sichèm ak Amò, papa li, yon repons pou woule yo. Paske Sichèm te avili sè yo a, yo t'ap pare yon move kou pou yo. ¹⁴ Yo di yo: -Nou pa ka kite sè nou an marye ak yon nonm ki pa sikonsi. Se va yon avilisman pou nou. ¹⁵ N'ap dakò nan yon sèl kondisyon. Se pou nou vin menm jan ak nou, se pou tout gason nan kanton an sikonsi tankou nou. ¹⁶ Lè sa a atò, n'a kite sè nou an marye avè ou. Nou menm tout n'a ka marye ak pitit fi ou yo. n'a rete nan peyi a ansanm ansanm, n'a tounen yon sèl pèp. ¹⁷ Men, si nou pa dakò ak kondisyon sa a, si nou pa vle pou yo sikonsi nou, n'ap pran sè nou an, epi nou pral fè wout nou. ¹⁸ ¶ Amò ak Sichèm, pitit gason l' lan, tonbe dakò ak yo pou kondisyon an. ¹⁹ Se konsa jenn gason an te prese fè sa yo te mande l' fè a, paske li te renmen pitit fi Jakòb la anpil. tout moun kay papa l' te konsidere l' anpil. ²⁰ Amò ak Sichèm, pitit gason l' lan, al nan pòtay lavil la, kote tout moun yo te konn reyini, yo pale ak moun peyi a. Yo di yo: ²¹ -Mesye sa yo, se pa moun ki vin pou kont. Ann kite yo rete nan peyi a. Ann kite yo fè trafik yo. Peyi a gen kont plas pou yo. Ann marye ak pitit fi yo, ann kite yo marye

ak pitit fi nou yo. ²² Mesye sa yo dakò pou yo rete ansanm ak nou, pou nou fè yon sèl pèp. Men yo pase yon kondisyon: se pou tout gason nan mitan nou sikonsi, menm jan yo menm yo sikonsi

²³ a. Konsa, tout bèt yo, tout byen yo, tout zannimo yo ap vin pou nou yon lè. Se asepte pou n' asepte kondisyon an pou yo ka rete viv ansanm ak nou. ²⁴ tout moun ki te reyini bò pòtay lavil la te tonbe dakò ak sa Amò ak Sichèm, pitit li a, te di yo. Se konsa yo sikonsi tout gason ki te la bò pòtay lavil la. ²⁵ ¶ Twa jou apre, mesye yo t'ap soufri ak sikonsizyon an toujou lè de nan pitit gason Jakòb yo, Simeyon ak Levi, frè menm manman ak Dena yo, pran nepe yo, yo antre nan lavil la san pesonn pa sispèk anyen, yo touye tout gason yo. ²⁶ Yo touye Amò ak Sichèm, pitit gason l' lan, yo pran Dena, yo fè l' kite kay Sichèm lan, y al fè wout yo avè l'. ²⁷ Lòt pitit Jakòb yo menm jete kò yo sou kadav yo, yo piye lavil la byen piye, paske moun lavil la te avili sè yo a. ²⁸ Apre sa, yo pran tout bèt, tout bèf, tout bourik ak tout sa ki te nan lavil la ak nan jaden yo. ²⁹ Yo pran tout richès ak tout sa ki te nan kay mesye yo pote ale, yo fè tout pitit yo ak tout medam yo prizonye.

³⁰ Apre sa, Jakòb rele Simeyon ak Levi, li di yo: -Gade nan ki traka nou mete m'. Koulye a, moun ki rete nan peyi a, moun Kanaran yo ak moun Perezi yo, pral rayi m'. Mwen pa gen anpil moun. Si yo mete ansanm sou do mwen pou atake m', y'ap touye m' ansanm ak tout moun lakay mwen.

³¹ Men Simeyon ak Levi reponn: -Atò, se pou nou te kite yo trete sè nou an tankou nenpòt jennès!

Chapter 35

¹ ¶ Bondye di Jakòb: -Leve non, moute al Betèl, epi rete la. Bati yon lotèl la pou Bondye ki te parèt devan ou lan, lè ou t'ap kouri pou Ezaou, frè ou la. ² Se konsa Jakòb rele fanmi l' yo ansanm ak tout lòt moun ki avè l' yo. li di yo: -Pran tout lòt bondye etranje n'ap sèvi yo, voye yo jete. Mete nou nan kondisyon pou sèvi Bondye. Mete rad nèt sou nou. ³ Nou pral kite kote nou ye a, nou pral Betèl, kote mwen pral bati yon lotèl pou Bondye ki te reponn lapriyè m' lè m' te anba tray la, pou Bondye ki te la avèk mwen kote m' pase nan vwayaj mwen te fè a. ⁴ Se konsa yo renmèt Jakòb tout bondye etranje yo te gen nan men yo ansanm ak tout zanno yo te gen nan zòrèy yo. Jakòb antere tout sa anba pye bwadchenn ki te toupre lavil Sichèm lan. ⁵ Apre sa, yo pati. tout moun ki te rete nan zòn lan te vin pè Bondye anpil. Yo yonn pa leve al rapouswiv pitit Jakòb yo. ⁶ ¶ Jakòb rive ansanm ak tout moun ki te avè l' yo lavil Louz, nan peyi Kanaran. Se lavil sa a yo rele Betèl

⁷ tou. Li bati yon lotèl la, li rele kote a Betèl, paske se la Bondye te parèt devan li lè li t'ap kouri
⁸ pou frè l' la. Lè sa a, Debora, bòn Rebeka a, mouri. Yo antere l' pi ba Betèl, anba pye bwadchenn
⁹ lan. Se konsa yo rele pye bwadchenn lan: chenn dlo nan je a. Lè Jakòb te tounen soti Mezopotami,
¹⁰ Bondye parèt ankò devan li, li beni li. Bondye di l' konsa: -Yo rele ou Jakòb pa sa? Men, yo
¹¹ p'ap rele ou Jakòb ankò, y'a rele ou Izrayèl. Depi lè sa a, se Izrayèl yo rele l' vre. Bondye di l'
¹² ankò: -Se mwen menm Bondye ki gen tout pouvwa a. W'ap gen anpil pitit ak pitit pitit. Gen ladan
¹³ yo k'ap wa. W'ap si tèlman gen anpil pitit pitit, y'a tounen yon kantite nasyon. Peyi mwen te bay
¹⁴ Abraram ak Izarak la, m'ap ba ou li tou. Apre sa, m'ap bay pitit pitit ou yo li. Apre sa, Bondye
¹⁵ kite l' kote li t'ap pale ak li a, li moute nan syèl. Jakòb pran yon gwo wòch, li plante l' pou l'
¹⁶ make kote Bondye te pale avèk li a. Li pran diven, li wouze wòch la, apre sa li vide lwil sou li.
¹⁷ Li rele kote Bondye te pale avè l' la Betèl. ¶ Apre sa, yo pati yo kite Betèl. Yo pa t' twò lwen
¹⁸ rive lavil Efrata lè lè a te rive pou Rachèl akouche. Li t'ap soufri anpil. Lè doulè a te pi rèd,
¹⁹ fanmchay la di l': -Ou pa bezwen pè. Ou fè yon pitit gason ankò. Rachèl tapral mouri, li t'ap
²⁰ rann dènye souf li lè li rele pitit la Bennoni. Men papa a rele l' Benjamen. Rachèl mouri, yo
²¹ antere l' sou wout lavil Efrata. Se lavil sa a yo rele Betleyèm lan tou. Jakòb make tonm lan ak
²² yon gwo wòch: yo rele l' Moniman tonm Rachèl la. Wòch la la jouk jòdi a. ¶ Apre sa, Izrayèl
²³ pati, li al moute tant li lòt bò Migdaledè. Antan Jakòb t'ap viv nan peyi sa a, Woubenn al kouche
²⁴ ak Bila, yonn nan fanm papa l' yo. Izrayèl vin konn sa, li te fache anpil. Jakòb te gen douz pitit
²⁵ gason. Men non pitit Leya te fè pou li yo: Woubenn, premye pitit gason l' lan, Simeyon, Levi,
²⁶ Jida, Isaka ak Zabilon. Men non pitit Rachèl te fè pou li yo: Jozèf ak Benjamen. Men non
²⁷ pitit Bila, sèvant Rachèl la, te fè pou li yo: Dann ak Nèftali. Men non pitit Zilpa, sèvant Leya
²⁸ a, te fè pou li yo: Gad ak Asè. Se tout pitit gason sa yo Jakòb te genyen antan li te nan peyi
²⁹ Mezopotami. Jakòb al wè papa l' Izarak, nan Manmre (yo rele kote sa a Kija aba tou, ou ankò
 Ebwon). Se la Abraram ak Izarak te pase tout lavi yo. Izarak te gen sankatreven lanne sou tèt li
 lè li mouri. Li te fin granmoun, li te wè kont jou li lè l' al jwenn moun li yo ki te mouri deja.
 Ezaou ak Jakòb, pitit gason l' yo, antere li.

Chapter 36

¹ ¶ Men pitit pitit Ezaou yo. Se Ezaou sa a yo te rele Edon. ² Ezaou te chwazi fi nan moun peyi Kanaran yo pou madanm. Yonn te rele Ada. Se te pitit fi Elon, yon moun Et. Yon lòt te rele Olibama, pitit fi Ana, ki li menm te pitit fi Zibeyon, yon moun Evi. ³ Li te marye tout ak Basmat, pitit fi Izmayèl la, sè Nebajòt. ⁴ Se Ada ki te fè Elifaz pou Ezaou. Basmat te fè Reouyèl, ⁵ Olibama menm te fè Jeouch, Jalam epi Kore. Se tout pitit sa yo Ezaou te fè antan li te nan peyi Kanaran. ⁶ Yon jou, Ezaou pran madanm li yo, pitit gason l' yo, pitit fi li yo, tout moun ki te lakay li, tout mouton l' yo, tout kabrit li yo ansanm ak tou sa li te genyen nan peyi Kanaran, li pati pou yon lòt peyi byen lwen Jakòb, frè li. ⁷ Li te fè sa paske tè kote li t'ap viv ansanm ak Jakòb, frè l' la, te vin twò piti pou yo. Yo te vin gen twòp bèt, yo pa t' kapab rete ansanm ankò menm kote a. ⁸ Se konsa Ezaou, yo rele Edon tou, al rete nan mòn Seyi. ⁹ ¶ Men pitit pitit Ezaou, papa moun Edon yo ki rete nan mòn Seyi a. ¹⁰ Men non pitit gason Ezaou yo: Se te Elifaz, pitit Ada, madanm Ezaou, ak Reouyèl, pitit Basmat, madanm Ezaou tou. ¹¹ Men non pitit gason Elifaz yo: Se te Teman, Oma, Zefo, Gayetan ak Kenaz. ¹² Elifaz, pitit Ezaou a, te gen yon fanm kay yo te rele Timna. Se li ki manman Amalèk. Sa yo se tout pitit pitit gason Ada, madanm Ezaou. ¹³ Men non pitit gason Reouyèl yo: Se te Naat, Zerak, Chanma ak Miza. Sa yo se pitit pitit gason Basmat, madanm Ezaou. ¹⁴ Men non pitit gason Olibama, madanm Ezaou, te fè pou li: Jeouch, Jalam ak Kore. Olibama te pitit fi Ana, pitit fi Zibeyon. ¹⁵ Men chèf branch fanmi pitit pitit Ezaou yo. Men non tout pitit gason Elifaz, premye pitit gason Ezaou a: Se te Teman, Oma, Zefo, Kenaz, ¹⁶ Kore, Gayetan ak Amalèk. Yo tout te chèf. Se pitit Elifaz sa yo ki te chèf nan peyi Edon an: Yo tout se pitit pitit Ada yo ye. ¹⁷ Men non pitit gason Reouyèl, pitit gason Ezaou a: Se te Naat, Zerak, Chanma ak Miza. Yo tout te chèf tou. Se pitit Reouyèl sa yo ki te chèf nan peyi Edon an. Yo tout se pitit pitit Basmat, madanm Ezaou, yo ye. ¹⁸ Men non tout pitit gason Olibama, madanm Ezaou: Se te Jeouch, Jalam ak Kore. Yo tout te chèf. Se chèf sa yo ki te pitit Olibama, madanm Ezaou. Olibama te pitit fi Ana. ¹⁹ Se te non tout pitit pitit Ezaou yo sa. Yo te rele Ezaou Edon tou. Se yo ki te chèf branch fanmi yo. ²⁰ ¶ Men non tout pitit gason Seyi, moun peyi Ori. Se yo menm ki rete nan peyi a depi lontan. Se Lotan, Chobal, Zibeyon, Ana, ²¹ Dichon, Ezè ak Dichan. Se chèf moun peyi Ori yo sa. Yo se pitit gason Seyi nan

22 peyi Edon. Men non pitit Lotan yo: Se te Ori ak Eman. Timna te sè Lotan. 23 Men non pitit
 Chobal yo: Se te Alvan, Manaat, Ebal, Chefo ak Anam. 24 Men non pitit Zibeyon yo: Se te Aja ak
 Ana. Se Ana sa a ki te jwenn sous dlo cho yo nan dezè a, lè l' t'ap gade bourik Zibeyon, papa l' yo.
 25 Men non pitit Ana yo: Se te Dichon, yon gason ak Olibama, yon fi. 26 Men non pitit gason
 Dichon yo: Se te Emdan, Echban, Jitran ak Keran. 27 Men non pitit gason Ezè yo: Se te Bilan,
 Zavan ak Akan. 28 Men non pitit gason Dichan yo: Ouz ak Aran. 29 Men non chèf moun peyi Ori
 yo: Se te Lotan, Chobal, Zibeyon, Ana, 30 Dichon, Ezè, Dichan. Se te tout chèf moun Ori yo sa.
 Se yo ki te chèf branch fanmi moun Ori yo nan peyi Seyi. 31 ¶ Men wa ki te gouvènen peyi Edon
 an, anvan te gen ankenn wa pou gouvènen pèp Izrayèl la. 32 Bela, gason Beyò a, t'ap gouvènen
 peyi Edon. Yo te rele lavil kote li te rete a Denaba. 33 Lè Bela mouri, se Jobab, gason Zerak la,
 moun lavil Bozra, ki te gouvènen nan plas li. 34 Lè Jobab mouri, se Oucham, moun peyi Teman,
 ki te gouvènen nan plas li. 35 Lè Oucham mouri, se Adad, pitit gason Bedad la, ki te gouvènen nan
 plas li. Se Adad sa a ki te bat moun peyi Madyan yo nan plenn Moab la. Yo te rele lavil kote li te
 rete a Avit. 36 Lè Adad mouri, se Samla, moun Masreka, ki te gouvènen nan plas li. 37 Lè Samla
 mouri, se Sayil, moun lavil Reyobòt bò gwo larivyè Lefrat la, ki te gouvènen nan plas li. 38 Lè
 Sayil mouri, se Baalanan, pitit gason Akbò a, ki te gouvènen nan plas li. 39 Lè Baalanan, pitit gason
 Akbò a, mouri, se Ada ki te gouvènen nan plas li. Yo te rele lavil kote li te rete a Paou. Madanm
 40 li te rele Metabèl. Se te pitit fi Matrèd ki poutèt pa l' tè pitit fi Mezarab. Men lis non tout pitit
 Ezaou yo ki te chèf ansanm ak non branch fanmi yo ak non kote yo te rete: Timna, Alva, Jetèt,
 41 Olibama, Ela, Penon, 42 Kenaz, Teman, Mibza, 43 Magdiyèl, Iram. Se non chèf Edon yo sa
 ansanm ak non kote yo te rete nan peyi a. Se Ezaou ki papa yo tout nan peyi Edon.

Chapter 37

1 ¶ Men Jakòb rete rete l' nan peyi Kanaran kote papa l' te pase tout lavi l'. 2 Men istwa fanmi
 Jakòb la. Jozèf te yon jenn gason disètan. Li t'ap gade mouton ak kabrit ansanm ak frè l' yo, pitit
 gason Bila ak Zilpa, fanm kay papa l' yo. Li te konn rapòte bay papa l' tout vye bagay yo t'ap fè.
 3 Izrayèl menm te renmen Jozèf plis pase tout lòt pitit li yo, paske li te fin granmoun lè Jozèf te fèt.

Li fè yon bèl varèz long ak manch pou li. ⁴ Lè frè l' yo wè jan papa yo te renmen Jozèf plis pase yo, yo pran rayi l'. Yo pa t' louvri bouch avè l' san yo pa joure l'. ⁵ ¶ Yon jou, Jozèf fè yon rèv. Li rakonte l' bay frè li yo. Sa te fè yo rayi l' pi plis toujou. ⁶ Li di yo: -Mesye, tandè yon rèv mwen fè.

⁷ Mwen wè nou tout nou te nan jaden, chak moun t'ap mare yon pakèt zèb. Pakèt mwen an rete konsa li kanpe tout dwat pou kont li, epi tout pakèt pa nou yo fè wonn li, yo vin bese tèt devan pa m' lan tankou moun y'ap salwe. ⁸ Frè l' yo di l': -Anhan! Ou vle di ou pral chèf nou, ou pral kòmande nou! Yo te vin rayi l' pi plis toujou poutèt rèv li te di yo li fè a. ⁹ Apre sa, Jozèf fè yon lòt rèv ankò. Li rakonte l' bay frè li yo. Li di yo: -Mwen fè yon lòt rèv. Mwen wè solèy la, lalen lan ansanm ak onz zetwal ki t'ap bese tèt devan mwen. ¹⁰ Li rakonte rèv la bay papa l' ansanm ak frè l' yo. Men papa a t'ap rale zòrèy li, li t'ap di l': -Ki kalite rèv w'ap fè konsa a? Koulye a, se pou mwen menm, manman ou ansanm ak onz frè ou yo, pou nou vin bese tèt devan ou? ¹¹ Frè Jozèf yo t'ap fè jalouzi, men papa l' t'ap kalkile tout bagay sa yo nan tèt li. ¹² ¶ Frè Jozèf yo leve, y ale jouk Sichèm ak bann bèt papa yo pou fè yo manje. ¹³ Izrayèl rele Jozèf, li di l' konsa: -Frè ou yo mennen bèt yo jouk Sichèm al manje. Vini non, m'ap voye ou bò kote yo pou mwen. Jozèf reponn: -Men mwen wi, papa. ¹⁴ Izrayèl di l' konsa: -Tanpri, ale we kouman frè ou yo ak bèt yo ye laba a. Apre sa, tounen vin pote nouvèl yo ban mwen. Konsa, se papa l' menm ki te fè l' pati kite Fon Ebwon an. Lè Jozèf rive Sichèm, ¹⁵ li pèdi wout li nan savann lan, li kontre ak yon nonm ki mande l': -Kisa w'ap chache konsa? ¹⁶ Jozèf reponn li: -M'ap chache frè m' yo. Tanpri, di m' ki kote yo mennen bèt yo al manje. ¹⁷ Nonm lan di l': -Yo te isit la wi, men yo pati deja. Mwen tandè yo t'ap di yo pral Dotan. Jozèf pati dèyè frè l' yo, li jwenn yo Dotan. ¹⁸ Men, anvan Jozèf te rive, yo te gen tan wè l' byen lwen ap vini. Yo fè konplo pou yo touye l'. ¹⁹ Yonn di lòt: -Men nonm ki renmen fè rèv la ap vini. ²⁰ Annou wè. N'ap touye l', n'ap jete kadav la nan yonn nan pi yo. Epi n'a di se bèt nan bwa ki touye l'. Konsa n'a wè si sa l' te wè nan rèv li yo va rive vre. ²¹ Woubenn t'ap koute yo, li t'ap chache yon jan pou sove Jozèf anba men yo. Li di yo: -Piga nou touye l'. ²² Pa fè san koule. Ann voye l' jete nan pi sa a ki nan dezè a. Men, pa leve men sou li. Li t'ap di yo sa paske li te fè lide sove l' anba men yo pou l' te voye l' tounen bay papa l'. ²³ ¶ Lè Jozèf rive bò kote frè l' yo, yo wete bèl varèz long ak manch ki te sou li a. ²⁴ Yo pran l', yo jete l' nan pi a. Pi a te vid, li pa t' gen

²⁵ dlo. Apre sa, yo chita pou yo manje. Pandan yo leve je yo, konsa yo wè yon kolonn moun Izmayèl ki t'ap vwayaje. Yo te soti Galarad. Chamo yo te chaje ak gonm bwa, lansan ak lami yo t'ap pote al vann nan peyi Lejip. ²⁶ Jida di frè l' yo konsa: -Sa sa ap rapòte nou pou nou touye frè nou an epi apre sa pou nou kache sa? ²⁷ Annou vann li ak moun Izmayèl yo. Konsa nou p'ap bezwen leve men nou sou li. Apre tou, se frè nou li ye, se menm san ak nou. Frè l' yo tonbe dakò. ²⁸ Lè machann Madyan yo vin ap pase, yo rale Jozèf moute sot nan pi a. Yo vann li ak moun Izmayèl yo pou vin pyès lajan. Moun Izmayèl yo menm mennen l' nan peyi Lejip. ²⁹ Lè Woubenn tounen nan pi a, li pa jwenn Jozèf ladan l'. Sa te fè l' lapenn anpil. Li chire rad ki te sou li a. ³⁰ Li tounen al jwenn frè li yo, li di yo: -Ti gason an pa nan pi a non! Kisa m' pral fè koulye a? ³¹ ¶ Yo touye yon bouk kabrit, yo pran bèl varèz Jozèf la, yo tranpe l' nan san an. ³² Yo voye varèz la bay papa yo ak komisyon sa a: -Men sa nou jwenn. Gade wè si se pa varèz pitit gason ou lan. ³³ Jakòb rekonèt rad la, li di: -Men wi, se varèz pitit gason m' lan. Se yon bèt nan bwa ki devore l'. Bèt la dechèpiye l' nèt. ³⁴ Sa ou tandè a, yon sèl lapenn pran Jakòb, li chire rad ki te sou li, li mare yon tanga sak nan ren li. Li pase kèk tan ap kriye pou pitit gason l' lan. ³⁵ tout lòt gason l' yo ansanm ak pitit fi l' yo te vin ba l' kouraj, men li te refize tandè sa yo t'ap di l'. Li t'ap plede repete: -M'ap kriye pou pitit gason m' lan jouk m al jwenn li lè m'a mouri. Se konsa li t'ap kriye pou pitit gason l' lan. ³⁶ Pandan tout tan sa a, moun Madyan yo te gen tan vann Jozèf nan peyi Lejip ak Potifa, yonn nan chèf lame farawon an. Se li menm ki te kòmandan gad palè yo.

Chapter 38

¹ ¶ Lè sa a, Jida kite frè l' yo, li al jwenn Ira, yon nonm lavil Adoulam. ² Antan li la, li wè yon fi. Papa fi a te yon moun peyi Kanaran yo te rele Chwa. Jida marye ak fi a, li kouche avè l'. ³ Madanm lan vin ansent, li fè yon pitit gason. Jida rele pitit la Er. ⁴ Madanm lan vin ansent ankò, li fè yon lòt pitit gason, yo rele l' Onan. ⁵ Li fè yon lòt pitit gason ankò, yo rele l' Chela. Jida te lavil Kezib lè madanm li fè Chela. ⁶ Jida chwazi yon fi yo rele Tama pou Er, premye pitit gason l' lan. ⁷ Men Er, premye pitit Jida a, pa t' fè Seyè a plezi paske li te twò mechan. Se konsa Seyè a te fè l' mouri. ⁸ Lè sa a, Jida di Onan: -Ale jwenn madanm frè ou la, kouche avè l'. Se devwa ou,

9
 paske ou se frè mari l' ki mouri. Konsa, w'a fè yon pitit pou frè ou pou non li pa pèdi. Men Onan te konnen pitit la pa t'ap pou li. Se konsa, chak fwa li kouche ak madanm frè li a, li voye atè pou

10
 li pa t' fè pitit pou frè li a. Sa l' t'ap fè a pa t' fè Seyè a plezi. Se konsa Seyè a fè l' mouri tou.

11
 Lè sa a, Jida di Tama, bèlfi li a: -Ou mèt tounen kay papa ou, rete vèv san marye jouk tan Chela, lòt gason m' lan, vin gran. Li te di l' sa paske li te pè pou Chela pa t' mouri tankou frè l' yo. Tama

12
 menm tounen rete kay papa l'. ¶ Kèk tan apre sa, madanm Jida, pitit fi Chwa a, mouri. Apre Jida te fin fè sa pou l' te fè pou lanmò a, li moute al Timna ansanm ak zanmi l' lan, Ira, moun Adoulam

13
 lan. Li tapral wè moun ki t'ap taye lenn mouton l' yo pou li. Yo fè Tama konn sa, yo di l': -Gade.

14
 Men bòpè ou ap moute al Timna, pou l' fè taye lenn mouton li yo. Se konsa, Tama wete rad vèv ki te sou li a, li kouvri tèt li ak yon vwal, li al chita bò pòtay lavil Enayim, sou chemen ki mennen

15
 Timna a. Li te wè Chela te fin gran, men Jida pa t' pran l' bay Chela pou madanm. Lè Jida wè

16
 l', li konprann se te yon jennès, paske figi l' te kouvri. li al jwenn li bò chemen an, li di l': -vin non. Kite m' kouche avè ou. Li pa t' konnen se bèlfi li li te ye. Tama di li: -Kisa w'ap ban mwen

17
 pou m' kite ou kouche avè m'. Jida reponn li: -m'a voye yon jenn kabrit ba ou nan bèt mwen yo.

18
 Tama di li: -Kisa w'a ban m' kenbe jouk ou voye l' ban mwen. Jida reponn li: -Kisa ou vle m' ba ou kenbe? Tama di li: -Letanp ou a ak tout kòd li, ansanm ak baton ki nan men ou lan. Jida ba

19
 li yo. Li kouche ak li. Tama vin ansent pou li. Apre sa Tama leve, li al fè wout li. Li wete vwal

20
 la, epi li mete rad vèv li sou li ankò. Jida voye zanmi l', moun lavil Adoulam lan, ak jenn kabrit la pou l' te ka reprann sa l' te bay fanm lan kenbe a. Men zanmi l' lan pa t' kapab jwenn fanm lan.

21
 Li mande mesye ki te la yo. Kote jennès ki te chita bò chemen an, sou pòtay lavil Enayim lan?

22
 Yo reponn li: -Pa janm gen ankenn jennès bò isit la. Li tounen al jwenn Jida, li di l': -Mwen pa

23
 jwenn li non. Mesye nan zòn lan di m' pa janm gen ankenn jennès bò la. Jida di l': -Pa fatigue kò ou chache reprann sak nan men l' lan. Moun va pase m' nan betiz twòp. Mwen voye kabrit la ba li,

24
 ou pa jwenn li. Kite sa! ¶ Sou twa mwa konsa, yo vin di Jida: -Tama, bèlfi ou la, lage kò l' nan jennès. Li gen tan ansent. Jida di yo: -Pran l', mennen l' deyò lavil la. Mete dife anwo l' jouk li

25
 mouri. Yo t'ap mennen Tama deyò lavil la lè li voye komisyon sa a bay bòpè li: -Se pou mèt bagay sa yo mwen ansent. Gade wè si ou rekonèt ki moun ki mèt letanp sa a ak tout kòd li ansanm

26
 ak baton sa a? Jida rekonèt yo, li di: -Li gen rezon. Se mwen menm ki antò. Mwen te dwe fè l'

27
 marye ak Chela, pitit gason m' lan. Jida pa t' kouche avè l' ankò. Lè lè a rive pou Tama akouche,

yo wè li te gen marasa nan vant li. ²⁸ Pandan li te gen tranche, yonn nan timoun yo lonje men l' deydò. Fanmchay la kenbe men an, li mare yon moso fil wouj ladan l'. Li di: -Sa a fèt anvan. ²⁹ Men pitit la rale men an antre, epi se lòt frè a ki soti anvan. Fanmchay la di: -Se konsa ou fè chemen pou ou pase! Se poutèt sa yo rele l' Perèz. ³⁰ Apre sa, frè li a soti ak fil wouj la mare nan men l'. Yo rele l' Zerak.

Chapter 39

¹ ¶ Moun Izmayèl yo te mennen Jozèf nan peyi Lejip. Rive la, Potifa, yon moun peyi Lejip ki te chèf nan gouvènman farawon an ak kòmandan gad palè yo, achte l' nan men yo. ² Seyè a te kanpe la avèk Jozèf. Li te fè tout bagay mache byen pou li. Jozèf te rete kay mèl li, moun peyi Lejip la. ³ Mèt li tout te wè Seyè a te avèk Jozèf. Seyè a te fè tout zafè l' mache byen. ⁴ Potifa te kontan ak Jozèf ak jan li t'ap sèvi li. Li mete l' reskonsab kay li, li renmèt li tout sa li te genyen. ⁵ Depi lè Potifa te renmèt kay li ansanm ak tout sa li te genyen bay Jozèf, Seyè a beni kay moun peyi Lejip la poutèt Jozèf. Seyè a beni tout sa li te gen lakay li ak nan jaden l'. ⁶ Potifa te lage tout zafè l' nan men Jozèf. Li pa t' okipe anyen ankò, se annik vin chita manje. Jozèf te vin yon bèl gason byen kanpe. ⁷ ¶ Se konsa madanm mèl li a vin tonbe pou li. Li di l': -vin kouche avè m' non! ⁸ Men Jozèf derefize, li di l': -Mèt mwen an pa okipe anyen k'ap pase nan kay li a, paske mwen la. Li lage tout bagay nan men m'. ⁹ Mwen gen menm otorite avè l' nan kay la, li pa defann mwen manyen anyen, esepite ou menm, paske se madanm li ou ye. Ki jan ou ta vle pou m' fè yon bagay konsa, pou m' fè peche sa a kont Bondye? ¹⁰ Se chak jou li te nan kò Jozèf. Men, Jozèf te toujou derefize kouche avè l'. ¹¹ Yon jou, Jozèf vin pou fè travay li nan kay la. Lè sa a pesonn pa t' la: ¹² Madanm lan kenbe rad Jozèf, li di l': -Jòdi a, se pou ou kouche avè m'. Lè Jozèf wè sa, li chape kò l' met deydò, li kite rad la nan men madanm lan. ¹³ ¶ Madanm lan menm, lè li wè Jozèf te kite rad la nan men l' pou l' kouri ale deydò, ¹⁴ li rele domestik li yo, li di yo: -Nou wè sa! Mari mwen mennen yon ebre nan kay la, men koulye a li soti pou avili m'. Li vini jwenn mwen jouk isit la, li vle pou m' kouche avè l'. Mwen pete rele. ¹⁵ Lè li tandè m' rele a, msye kouri, li met deydò, li kite rad li la bò kote m'. ¹⁶ Madanm lan kite rad la bò kote l', li tann mèl Jozèf la tounen lakay la. ¹⁷ Li rakonte l' menm bagay la, li di l': -Esklav ebre ou mennen lakay la vin jwenn mwen jouk isit la pou avili m'. ¹⁸ Men,

mwen pete yon rèl, li kouri met deyò, li kite rad li bò kote m'.¹⁹ ¶ Lè Potifa tande madanm li di l' sa domestik li a te fè l', li move sou Jozèf.²⁰ Li fè arete l', mete l' nan prizon kote yo fèmen tout prizonnye wa a. Se konsa Jozèf twouve l' nan prizon.²¹ Men Seyè a te kanpe la avèk Jozèf. Li moutre l' jan l' te renmen l', li fè chèf prizon an gen Jozèf konfyans.²² Li mete l' veye tout lòt prizonnye yo. Se li menm ki te reskonsab tout bagay nan prizon an.²³ Depi li te renmèt yon bagay nan men Jozèf, li pa t' bezwen okipe anyen ankò paske Seyè a te la avèk Jozèf. Seyè a te fè tout zafè l' mache byen.

Chapter 40

¹ ¶ Kèk tan apre sa, chèf kanbiz ak chèf boulanje wa Lejip la te fè mèt yo yon bagay.² Farawon an te move ni sou chèf kanbiz la ni sou chèf boulanje a.³ Se konsa li te mete yo lakay kòmandan gad palè a, kote yo te fèmen Jozèf nan prizon an.⁴ Kòmandan gad palè a mete yo sou kont Jozèf pou l' sèvi yo. Yo pase kèk tan nan prizon an.⁵ ¶ Yon jou lannwit, antan yo nan prizon an, chèf kanbiz ak chèf boulanje wa a te fè yo chak yon rèv. Chak rèv te gen sans pa yo.⁶ Lè Jozèf vin jwenn yo nan denmen maten, li jwenn yo boulvèse.⁷ Li mande yo: -Poukisa nou kagou konsa jòdi a?⁸ Yo reponn li: -Nou chak fè yon rèv, men pa gen pesonn isit la ki ka esplike nou rèv yo. Jozèf reponn yo: -Eske se pa Bondye sèl ki ka esplike bagay konsa? Rakonte m' rèv nou yo.⁹ Chèf kanbiz la rakonte Jozèf rèv li te fè a, li di l': -Nan rèv mwen an, mwen wè yon pye rezen devan m'.¹⁰ Li te gen twa branch. Branch yo pran boujonnen, yo fè flè, yo fè rezen, rezen yo mi.¹¹ Gwo gode farawon an te nan men mwen. Mwen pran rezen yo, mwen pije yo nan gode farawon an, lèfini mwen bay wa a li.¹² Jozèf di li: -Men sa rèv la vle di: Twa branch yo se twa jou.¹³ Nan twa jou, farawon an pral chonje ou, li pral mete ou nan pozisyon ou ankò. Ou pral bay farawon an diven jan ou te konn fè l' anvan lè ou te chèf kanbiz li a.¹⁴ Men, lè tout bagay va mache byen pou ou, pa bliye m'. Tanpri, rann mwen sèvis sa a, pale ak farawon an pou mwen. Fè m' soti nan prizon sa a.¹⁵ Ou wè: se vòlè yo te vòlè m' nan peyi Ebre yo. Isit la menm, mwen pa t' fè anyen pou yo te mete m' nan prizon.¹⁶ Lè chèf boulanje a wè bèl espikasyon Jozèf te bay lòt la, li di l': -Mwen

menm tout mwen fè yon rèv. Mwen wè te gen twa panyen pen sou tèt mwen. ¹⁷ Nan panyen ki te anwo nèt la, te gen tout kalite bagay yo konn kwit nan fou pou wa a. Men, zwazo t'ap manje yo nan panyen an sou tèt mwen. ¹⁸ Jozèf reponn li: -Men sa rèv la vle di: Twa panyen yo se twa jou. ¹⁹ Nan twa jou farawon an pral fè rele ou, l'ap fè yo pann ou nan yon pyebwa, kote zwazo ap vin dechèpiye ou. ²⁰ ¶ Sou twa jou vre, farawon an t'ap fè yon gwo resepsyon pou tout chèf ki t'ap sèvi avè l' yo, paske se te jou fèt li. Li fè rele chèf kanbiz la ak chèf boulanje a devan tout lòt chèf yo. ²¹ Li mete chèf kanbiz la nan plas li ankò pou sèvi l'. ²² Men, li fè pann chèf boulanje a, jan Jozèf te di yo a. ²³ Men, chèf kanbiz la pa dòmi reve Jozèf, li bliye l' nèt.

Chapter 41

¹ ¶ Dezan te fin pase. Farawon an fè yon rèv. Li wè li te kanpe bò larivyè Nil la. ² Li wè sèt bèl vach byen gra moute soti nan larivyè a, yo t'ap manje zèb bò dlo a. ³ Apre sa, sèt lòt vach tout lèd, tout mège, moute soti nan dlo a tou. Yo vin kanpe toupre lòt vach yo, bò dlo a. ⁴ Sèt vye vach mège yo manje sèt bèl vach gra yo. Epi je farawon an vin klè. ⁵ Dòmi pran l' ankò, li fè yon lòt rèv. Li wè sèt gwo grap ble ki t'ap pouse sou yon sèl pye ble. Yo te plen grenn, yo te mi. ⁶ Apre sa, sèt lòt grap vin parèt sou menm pye ble a. Yo te chèch, van nòde te fin boule yo. ⁷ Sèt grap chèch yo souse sèt bèl grap yo. Epi je farawon an vin klè ankò. Se rèv sa yo li te fè. ⁸ Nan maten, li te boulvèse anpil, li voye chache dènye divinò ak nèg save ki nan peyi Lejip la. Li rakonte yo rèv la, men yo yonn pa t' kapab esplike rèv la ba li. ⁹ ¶ Se lè sa a, chèf kanbiz la di farawon an: -Koulye a mwen chonje mwen te fè yon fèt. ¹⁰ Yon jou, monwa, ou te ankòlè sou sèvitè ou yo. Ou te fè mete yo nan prizon lakay kòmandan gad palè ou la. Se te mwen menm, chèf kanbiz ou a, ansanm ak chèf boulanje ou la. ¹¹ Yon jou lannwit, nou tout de nou reve. Chak moun te fè yon rèv diferan. Chak rèv te gen sans pa l'. ¹² Te gen yon jenn ebre avèk nou nan prizon an. Se te yon esklav kòmandan gad palè a. Nou rakonte l' rèv nou yo. Epi li esplike yo ban nou, li bay chak moun sans rèv li te fè a. ¹³ tout bagay pase jan li te di a: Sou twa jou vre, farawon an te mete m' nan plas mwen ankò. Pou chèf boulanje a menm, li te fè pann li. ¹⁴ Farawon an voye chache Jozèf. Yo fè l' soti byen vit

nan prizon an. Jozèf fè labab, li koupe cheve l', li chanje rad, epi li parèt devan farawon an.

15

Farawon an di Jozèf konsa: -Mwen fè yon rèv, pesonn pa ka di m' sa l' vle di. Men yo di m' depi yo rakonte ou yon rèv, ou ka esplike l'.

16

Jozèf reponn farawon an: -Se pa mwen menm non! Se

17

Bondye ki pral bay farawon an esplikasyon rèv la. ¶ Farawon an di: -Mwen reve mwen te kanpe

18

bò larivyè Nil la. Konsa, sèt bèl vach byen gra te moute soti nan larivyè a, yo t'ap manje zèb bò

19

dlo a. Apre sa, sèt lòt vach tout mèg, tout lèd, tout chèch te moute soti nan dlo a dèyè lòt yo.

20

Mwen poko janm wè vye vach lèd konsa nan tout peyi Lejip la. Vye vach mèg yo manje bèl

21

vach gra yo. Lè yo te fin vale yo, se tankou si yo pa t' janm manje. Yo te rete menm jan yo te

22

ye anvan an. Epi je m' vin klè. Apre sa, mwen fè yon lòt rèv. Mwen wè sèt grap ble byen plen,

23

byen mi ki t'ap pouse ansanm sou yon sèl pye ble a. Apre sa, sèt lòt grap parèt dèyè yo. Yo te

24

chèch, van nòde te fin boule yo. Grap mèg yo souse sèt bèl grap yo. Mwen rakonte rèv yo bay

25

divinò yo, men yo yonn pa t' kapab esplike yo ban mwen. Jozèf di farawon an: -tout de rèv yo

26

vle di menm bagay la: Bondye fè ou konnen sa li pral fè. Sèt vach gra yo, se sèt lanne. Sèt bèl

27

grap yo se sèt lanne tou. Yo vle di menm bagay. Sèt vach tout mèg, tout lèd ki vin apre lòt yo,

28

se sèt lanne. Sèt grap ble boule yo, se sèt lanne tou. Sa vle di pral gen sèt lanne grangou. Se jan

29

m' sot di farawon an: Bondye vle fè ou konnen sa li pral fè. Pandan sèt lanne pral gen bèl rekòt

30

nan tout peyi Lejip la. Apre sa, pral gen sèt lanne grangou. Lè sa a, moun pral bliye tout bèl

31

rekòt yo te fè nan peyi a. Grangou pral fini nèt ak peyi a. Grangou ki pral tonbe sou peyi a pral

32

rèd anpil. Moun p'ap wè tras rekòt ki te fèt nan peyi a. Si farawon an fè menm rèv la de fwa, sa

33

vle di Bondye gen tan fin fè plan l' nèt. Se yon bagay Bondye pral fè talè konsa. ¶ Koulye a, se pou farawon an chwazi yon moun ki gen lespri ak bon konprann pou l' mete l' chèf sou tout peyi

34

Lejip la. Se pou ou mete chèf toupatou nan peyi Lejip la, pou yo ranmase yon senkyèm nan tout

35

rekòt ki pral fèt pandan sèt bon lanne yo. Se pou yo ranmase pwovizyon pandan tout lanne ki pral vini yo. Se pou farawon an ba yo otorite pou yo anpile pwovizyon yo nan depo nan chak vil,

36

lèfini pou yo veye yo. Konsa, pwovizyon sa yo va sèvi yon rezèv pou peyi a pandan sèt lanne

37

grangou k'ap vin tonbe apre sa sou peyi Lejip, pou grangou pa fini ak peyi a. Farawon an ak

tout moun pa l' yo te tonbe dakò ak sa Jozèf te di a. ³⁸ Farawon an di moun pa l' yo: -Ki bò nou ka
 jwenn yon moun ki gen lespri Bondye sou li tankou nonm sa a? ³⁹ Farawon an di Jozèf: -Gade
 tout bagay Bondye fè ou konnen! Pa gen pesonn ki gen plis lespri, osinon plis bon konprann pase
⁴⁰
 ou. M'ap mete ou chèf sou tout peyi mwen an. Se pou tout moun nan peyi a obeyi ou. Se sèlman
⁴¹
 paske mwen wa kifè mwen menm m'a pi gwo chèf pase ou. Apre sa, farawon an di Jozèf: -Gade,
⁴²
 m'ap mete ou chèf pou gouvènènan tout peyi Lejip la. Li wete gwo bag ki te nan dwèt li a, li mete
 l' nan dwèt Jozèf. Li abiye l' ak yon rechanj fèt ak bèl twal fen. Li pase yon chenn an lò nan kou l'.
⁴³
 Li fè l' moute sou yon cha. Se te pi bèl cha nan tout peyi a apre cha wa a. Li bay gad onè ki t'ap
 mache devan Jozèf yo lòd pou yo di byen fè: Abrèk. Se konsa farawon an te mete Jozèf chèf sou
⁴⁴
 tout peyi Lejip la. Farawon an di Jozèf: -Se mwen menm farawon an k'ap pale avèk ou. Pesonn
⁴⁵
 pa gen dwa fè anyen ni al ankenn kote nan peyi Lejip san pèmision ou. Farawon an rele Jozèf
 Safna-Paneak. Li pran Asnat, pitit fi Potifera, yon prèt lavil On, li bay Jozèf li pou madanm. Jozèf
⁴⁶
 al vizite tout peyi Lejip la. ¶ Jozèf te gen trantan lè li te konmanse sèvi farawon an, wa peyi
⁴⁷
 Lejip la. Li pati, li vwayaje toupatou nan peyi Lejip la. Pandan sèt bon lanne yo, tè a te bay anpil
⁴⁸
 anpil rekòt. Jozèf ranmase pwovizyon pandan sèt lanne bon rekòt yo nan tout peyi a, li mete yo
⁴⁹
 nan depo nan lavil yo. Chak lavil te gen kont depo pou sere tout sa jaden alantou yo te bay. Li
 ranmase ble, li ranmase ble tankou ou ta di sab bò lanmè. Sitèlman te gen anpil ble, yo pa t' ka
⁵⁰
 konnen kantite ki te genyen. Anvan lanne grangou yo mete pye, Jozèf te gen tan gen de pitit ak
⁵¹
 Asnat, pitit fi Potifera, prèt lavil On an. Jozèf rele premye a Manase paske li t'ap di nan kè l':
⁵²
 Bondye fè m' bliye tout soufrans mwen ansanm ak moun lakay papa m' yo. Li rele dezyèm lan
⁵³
 Efrayim paske li t'ap di nan kè l': Bondye fè m' fè pitit nan peyi kote m'ap soufri a. Sèt bon lanne
⁵⁴
 rekòt yo te fin pase nan peyi Lejip la. Sèt lanne grangou yo te konmanse jan Jozèf te di a. Grangou
⁵⁵
 t'ap bat nan tout lòt peyi yo tou, men te gen manje toujou nan tout peyi Lejip la. Men, yon lè
 grangou konmanse mete pye nan peyi Lejip la tou. Pèp la menm pran rele nan zòrèy farawon an,
 y'ap mande manje. Farawon an di moun peyi Lejip yo: -Al jwenn Jozèf. Se li menm ki va di nou
⁵⁶
 sa pou nou fè. Lè grangou a te toupatou nan peyi Lejip la, Jozèf louvri tout depo yo. Li vann
⁵⁷
 moun peyi Lejip yo ble, paske grangou a te rès anpil nan peyi Lejip la. Moun soti toupatou nan
 tout lòt peyi yo vin achte ble nan men Jozèf nan peyi Lejip, paske grangou a te rès anpil toupatou
 sou latè.

Chapter 42

¹ ¶ Lè Jakòb vin konnen te gen ble pou vann nan peyi Lejip, li di pitit li yo: -Poukisa nou chita konsa yonn ap gade lòt, de bra kwaze? ² Mwen tandè y'ap vann ble nan peyi Lejip. Desann non, al achte ble pou nou ka viv pou nou pa mouri grangou. ³ Se konsa, dis nan frè Jozèf yo desann nan peyi Lejip, y al achte ble. ⁴ Men Jakòb pa t' voye Benjamen, lòt frè Jozèf menm manman avè l' la, avèk yo paske li te pè pou malè pa t' rive l'. ⁵ Grangou a te rèd nan peyi Kanaran an tou. Se konsa, pitit Izrayèl yo te vwayaje ansanm ak lòt moun ki tapral achte ble tou. ⁶ Se Jozèf ki t'ap gouvènen sou tout peyi Lejip la. Se nan men l' moun te konn soti toupatou vin achte manje. Frè Jozèf yo rive, yo bese tèt yo byen ba jouk atè pou di l' bonjou. ⁷ ¶ Lè Jozèf wè frè l' yo, li rekonèt yo. Men li pran pòz pa konnen yo. Li pale rèd ak yo. Li di: -Ki bò nou soti? Yo reponn: -Nou soti peyi Kanaran, nou vin achte manje. ⁸ Jozèf te rekonèt frè l' yo, men yo menm yo pa t' rekonèt li. ⁹ Le sa a Jozèf vin chonje rèv li te fè sou frè l' yo. Li di yo: -Nou se yon bann espyon. Nou vin isit la pou n' chache konnen pwen fèb peyi a. ¹⁰ Yo reponn li: -Non, mèt. Nou se moun pa ou, se manje nou vin achte isit la. ¹¹ Nou tout nou se pitit yon sèl papa. Nou p'ap ba ou manti, se pa espyon nou ye. ¹² Jozèf di yo: -Se pa vre. Nou vin isit la pou n' chache konnen pwen fèb peyi a. ¹³ Yo di l': -Nou se douz frè, pitit yon sèl papa nan peyi Kanaran. Dènye a rete ak papa nou. Gen yonn nan nou ki disparèt. ¹⁴ Jozèf reponn yo: -Nou wè mwen gen rezon lè m' di se yon bann espyon nou ye. ¹⁵ Men ki bò mwen pral kenbe nou: M'ap fè sèman sou tèt farawon an, nou p'ap soti isit la tout tan nou pa fè ti frè nou an vini isit la. ¹⁶ Voye yonn nan nou al chache l'. Lòt yo ap rete nan prizon. Se konsa, m'a wè nou pa t'ap bay manti. Si se pa sa, mwen fè sèman sou tèt farawon an, se espyon nou ye. ¹⁷ Li fè fèmèn yo tout nan prizon pandan twa jou. ¹⁸ Sou twazyèm jou a, Jozèf di yo: -Men sa pou n' fè, si nou vle sove lavi nou: Mwen menm mwen se moun ki respekte Bondye. ¹⁹ Si nou konnen nou p'ap bay manti se pou yonn nan nou rete fèmèn nan prizon kote yo te fèmèn nou an. Lòt yo mèt pote ble a ale pou fanmi nou yo ka manje. ²⁰ Men, ti frè nou an, sa ki pi piti a, se pou nou mennen l' ban mwen, pou nou ka moutre m' nou pa t' ban m' manti. Konsa, yo p'ap touye nou. Yo tonbe ²¹ dakò sou sa. ¶ Yonn t'ap di lòt: -Nou wè. Nou peye sa nou te fè frè nou an pase. Se vre wi. Nou te fè mal lè nou te fè frè nou an pase tout sa nou te fè l' la. Nou te wè ki jan sa te fè l' lapenn anpil, lè li t'ap mande nou fè l' gras. Men, nou pa t' vle koute l'. Se poutèt sa nou nan tout traka sa a.

22

Woubenn di yo: -Mwen te di nou pa fè tibway la anyen, men nou pa t' vle koute m'. Koulye a se

lanmò tibway la n'ap peye. ²³ Jozèf te konprann tout sa yo t'ap di a. Men yo pa t' konn sa paske te

gen yon moun ki t'ap tradwi pou yo lè yo t'ap pale avè l'. ²⁴ Jozèf soti kote yo te ye a, li al kriye.

Lèfini li tounen, li pale ak yo, li pran Simeyon, li fè yo mete l' nan chenn, la devan yo tout. ²⁵ Jozèf te bay lòd pou yo te plen sak yo avèk ble, pou yo te mete lajan yo chak nan sak yo ankò, lèfini pou

yo ba yo manje pou yo manje sou wout la. Se sa yo te fè vre. ²⁶ Frè yo menm chaje bourik yo ak

ble yo te achte a, yo pati. ²⁷ Lè yo rive kote yo t'ap pase nwit la a, yonn ladan yo louvri sak li pou

l' te ka bay bourik li manje. Li jwenn lajan li te bay la nan sak la. ²⁸ Li di frè l' yo. -Yo renmèt mwen lajan m' lan wi. Men li nan sak mwen an. Kè yo kase. Yo t'ap tranble kou fèy bwa tèlman

yo te pè. Yonn t'ap di lòt: -Kisa Bondye fè nou konsa? ²⁹ ¶ Lè yo rive kay Jakòb, papa yo, nan

peyi Kanaran, yo rakonte l' tout sa ki te pase. Yo di l': ³⁰ -Nèg k'ap gouvènè peyi a pale rèd ak

nou. Li pran nou pou espyon. ³¹ Nou di l' nou p'ap ba l' manti, se pa espyon nou ye. ³² Se douz frè nou ye, pitit yon sèl papa. Yonn nan nou disparèt, dènye a rete ak papa nou nan peyi Kanaran.

³³ Men chèf peyi a di nou: Men ki jan m'ap konnen si nou p'ap ban m' manti: Kite yonn nan frè nou yo isit la avèk mwen. Pran sa nou bezwen pou fanmi nou. Nou mèt ale. Mennen lòt ti frè nou an

ban mwen. ³⁴ Lè sa a, m'a konnen se pa espyon nou ye, nou pa t'ap ban m' manti. m'a renmèt nou

frè nou an. m'a kite nou trafike nan peyi a. ³⁵ Lè yo vide sak yo, chak moun jwenn ti sakit lajan li

te bay la nan bouch sak li ankò. Lè yo wè sa, yon sèl lapè pran yo ansanm ak papa yo. ³⁶ Lè sa a Jakòb, papa yo, di: -N'ap wete tout pitit mwen yo nan men m'. Jozèf disparèt, Simeyon pa la ankò.

Koulye a, nou vle pran m' Benjamen. Se mwen menm k'ap pote tout chaj la. ³⁷ Woubenn di papa l' konsa: -Papa, ou mèt touye de pitit gason m' yo, si m' pa mennen Benjamen tounen ba ou. Ou

mèt renmèt mwen li nan men, m'ap mennen l' tounen ba ou. ³⁸ Men Jakòb te di: -Pitit gason m' lan p'ap fè yon pa. Frè li a fin mouri. Se li menm sèl ki rete nan pitit manman l' yo. Si pou yon malè ta rive l' nan vwayaj nou pral fè a, m'a mouri. Mwen fin granmoun, lapenn sa a va twòp pou mwen, la fin pote m' ale.

Chapter 43

¹ ¶ Grangou t'ap bat pi rèd nan peyi Kanaran an. ² Lè fanmi Jakòb yo te fin manje ble yo te pote
soti nan peyi Lejip la, Jakòb di pitit li yo: -Tounen al chache manje pou nou ankò non. ³ Jida reponn
li: -Nonm lan te byen avèti nou pou nou pa parèt devan l' si nou pa vin ak ti frè nou an. ⁴ Si ou vle
kite ti frè nou an vin ak nou, nou v al achte manje pou ou. ⁵ Si ou pa vle kite l' ale, n'ap rete, paske
msye a te tout di nou: piga nou parèt devan l' ankò si nou pa vin ak ti frè nou an. ⁶ Izrayèl di: -Sa
nou te bezwen di l' nou te gen yon ti frè fè? Poukisa nou fè m' sa? ⁷ Yo reponn li: -Msye a t'ap poze
nou keksyon sou nou ak sou fanmi nou. Li mande nou si papa nou la toujou, si nou gen lòt frè, se
pou n' te reponn li. Kouman pou n' ta fè konnen li tapral mande nou pou nou mennen ti frè nou an
ba li? ⁸ Jida di Izrayèl, papa l', konsa: -Kite tibway la ale ak nou. Konsa n'a leve, n'a pati. Konsa
ni ou menm, ni nou menm, ni timoun nou yo p'ap mouri grangou. ⁹ Se nan men m' li ye, se mwen
menm ki pou rann ou kont pou li. Si m' pa mennen l' tounen ba ou, si m' pa tounen avè l' la devan
ou, se mwen menm k'ap pote fòt la devan ou jouk mwen mouri. ¹⁰ Si nou pa t' pran tout reta sa a,
koulye a nou ta gen tan ale nou tounen de fwa deja. ¹¹ ¶ Lè sa a, Izrayèl, papa yo, di: -Bon. Si se
konsa sa ye, men sa pou n' fè: n'ap pran pi bon danre ki gen nan peyi a, n'ap mete nan sak nou, n'ap
pote fè nonm lan kado: gonm santi bon, siwo myèl, lansan, lami, pistach ak nwa. ¹² Lèfini, n'a
pran de fwa valè lajan nou bezwen, paske fòk nou renmèt lajan yo te mete nan bouch sak ble yo
tou. Ou pa janm konnen, yo ka pa t' wè sa. ¹³ Pran frè nou an, tounen kote msye a. ¹⁴ M'ap mande
Bondye ki gen tout pouvwa a pou l' fè nonm lan aji byen ak nou, pou l' ka renmèt nou ni lòt frè nou
an, ni Benjamen. Pou mwen menm, si se pou m' pèdi pitit mwen yo, mwen mèt pèdi yo. ¹⁵ ¶ Se
konsa mesye yo pran kado yo, de fwa valè lajan yo te bezwen ansanm ak Benjamen, yo leve, yo
desann peyi Lejip kote yo parèt devan Jozèf. ¹⁶ Lè Jozèf wè Benjamen ak yo, li rele chèf domestik
li a, li di l': -Mennen mesye sa yo lakay mwen. Touye yon bèt, kwit li, paske mesye sa yo ap manje
avè m' midi a. ¹⁷ Chèf domestik la fè sa Jozèf te di l' fè a, li mennen mesye yo lakay li. ¹⁸ Men,
lè mesye yo wè yo t'ap mennen yo lakay Jozèf, yo te pè anpil. Yo t'ap di: -Se poutèt lajan nou te
jwenn nan sak nou yo dènye fwa a kifè y'ap mennen nou bò isit la. Yo pral kenbe nou, yo pral bat
nou, y'ap fè nou tounen esklav. Lèfini y'ap pran bourik nou yo. ¹⁹ Se konsa, antan yo rive nan papòt
kay la, yo pwoche bò chèf domestik la, ²⁰ yo di l': -Eskize nou wi, mèt. Nou te vin isit la yon fwa
deja pou n' te achte manje. ²¹ Lè n'ap tounen lakay nou, nou rive yon kote nou t'ap poze pou pase
nwit, nou louvri sak nou yo, nou jwenn tout lajan an nan bouch sak yo, byen konte. Nou pote l'
tounen wi. ²² Nou pote lòt lajan tout pou n' ka achte manje. Nou pa konnen ki moun ki te mete

lajan an nan sak nou yo ankò.²³ Domestik anchèf la di yo: -Pa okipe bagay konsa. Nou pa bezwen pè. Se Bondye nou an, Bondye papa nou an, ki mete richès sa a pou nou nan sak yo. Mwen te resevwa premye lajan an. Lèfini, li mennen Simeyon vin jwenn yo.²⁴ Chèf domestik la mennen mesye yo lakay Jozèf. Li ba yo dlo pou yo lave pye yo, li bay bourik yo manje.²⁵ Mesye yo menm pare kado yo pou lè Jozèf va vin jwenn yo midi, paske yo te vin konnen yo tapral manje avè l'.²⁶ ¶ Lè Jozèf antre lakay li, yo pote kado yo ba li, yo bese tèt yo jouk atè devan li.²⁷ Jozèf mande yo kouman yo ye. Apre sa, li di yo: -Granmoun nou te pale m' lan, papa nou an, ban m' nouvèl li non? Li la toujou? Li byen?²⁸ Yo reponn li: -Granmoun lan la wi, l'ap debat. Li byen mès. Yo tonbe ajenou, yo bese tèt yo jouk atè devan li.²⁹ Lè Jozèf fè sa li wè Benjamen, frè menm manman menm papa avè l' la, li di: -Eske se ti frè nou an sa, ti frè nou t'ap pale m' lan? Bondye beni ou, piti mwen.³⁰ Lè sa a, Jozèf kouri soti byen vit, paske kè l' t'ap fè l' mal pou frè l' yo. Dlo vin nan je l', li antre nan chanm li, li kriye kont li.³¹ Apre sa, li lave figi l', li soti, li kenbe pou li pa kriye ankò, epi li bay lòd sèvi manje a.³² Yo te sèvi yon tab apa pou Jozèf, yon tab apa pou frè l' yo ak yon lòt tab apa pou moun peyi Lejip ki t'ap manje ansanm ak yo tou, paske pou moun peyi Lejip yo, se ta yon wont pou yo chita manje sou menm tab ak ebre yo.³³ Frè Jozèf yo te chita anfas li. Yo te mete yo chita dapre laj yo, depi pi gran an jouk pi piti. Lè yo wè sa, yo te sezi, yonn gade lòt.³⁴ Jozèf te fè yo pran manje sou tab li pote ba yo. Benjamen te resevwa senk fwa plis pase lòt yo. Yo manje, yo bwè, yo fete ansanm avè l'.

Chapter 44

¶ Apre sa, Jozèf bay chèf domestik la lòd sa a: -Plen sak mesye yo manje mezi yo ka pote.¹ Mete lajan chak moun nan bouch sak yo.² W'a pran gwo gode m' lan, gode an ajan an, w'a mete l' nan bouch sak pi piti a ansanm ak tout lajan l' lan. Chèf domestik la fè sa Jozèf te di l' fè a.³ Nan denmen maten, byen bonè, yo voye mesye yo al fè wout yo ak tout bourik yo.⁴ Yo te fin kite lavil la dèyè, men yo pa t' pi lwen pase sa, lè Jozèf di domestik li a: -Leve, kouri dèyè mesye yo. Lè w'a trape yo, w'a di yo: Poukisa nou aji mal konsa ak moun ki fè nou byen?⁵ Poukisa nou pran gwo gode mèt mwen an? Se ladan l' li bwè, se ak li li sèvi pou l' konnen sa ki pral pase. Sa nou fè a pa bon menm.⁶ Lè domestik la trape yo, li repete tout sa mèt li a te di l'.⁷ Men yo reponn: -Men

msye, nou pa konprann sa w'ap di la a. pou n' ta fè bagay konsa? Mande Bondye padon! ⁸ Gade, lajan nou te jwenn premye fwa a nan bouch sak nou yo, nou pote l' tounen ba ou soti peyi Kanaran.

Ki jan ou vle wè pou nou ta vòlò ajan osinon lò kay mèl la? ⁹ Si ou jwenn gwo gode a nan men yonn nan nou, se pou moun sa a mouri. Nou menm lòt yo, se pou yo fè nou tounen esklav.

¹⁰ Domestik la di: -Dakò. Men, si yo jwenn gode a nan men yonn nan nou, se moun sa a m'ap pran pou sèvi m' esklav. Lòt yo lib, yo mèl ale. ¹¹ La menm, yo prese mete sak yo atè, chak moun louvri sak yo. ¹² Chèf domestik Jozèf la pran fouye sak yo yonn apre lòt. Li konmanse ak sak pi gran an pou l' fini ak sak pi piti a. Yo jwenn gode a nan sak Benjamen an. ¹³ Sa ou tandè a, yon sèl lapenn pran mesye yo, yo chire rad sou yo. Chak moun chaje bourik yo ankò, yo tounen lavil. ¹⁴ Lè Jida ak frè l' yo rive lakay Jozèf, Jozèf te la toujou. Yo bese tèt yo jouk atè devan li. ¹⁵ Jozèf di yo: -Kisa nou fè konsa? Eske nou pa konnen yon nonm tankou mwen gen pouvwa pou m' wè tout sa ki pral rive? ¹⁶ Jida reponn li: -Mèt, nou pa konn sa pou nou di. Nou pa ka pale. Pa gen savon pou lave nou devan ou. Se Bondye menm ki fè ou dekouvri nou. Mèt, se poutèt sa se pa sèlman moun ki te gen gode a nan men l' lan ki esklav ou, se nou tout ki esklav ou. ¹⁷ Men Jozèf di: -Mande Bondye padon! Mwen pa ka fè sa. Moun ki te gen gode a, se li menm sèlman k'ap rete pou sèvi m' esklav. Lòt yo mèl tounen lakay papa yo ak kè poze jan yo te vini an. ¹⁸ ¶ Lè sa a, Jida pwoche bò kote Jozèf, li di l' konsa: -Tanpri, mèl. Kite m' di ou yon ti pawòl. Ou pa bezwen fache sou mwen. Mwen konnen ki di ou menm di farawon an. ¹⁹ Mèt, ou te mande nou èske papa nou la, èske nou gen lòt frè. ²⁰ Nou te reponn ou: Wi, nou gen yon papa ki fin vye granmoun ak yon ti frè, pitit papa nou te fè nan vyeyès li. Ti bway la te gen yon lòt frè menm manman avè l'. Men, li mouri. Nan de pitit manman l' yo, se li menm ase ki rete. Lèfini papa nou renmen l' anpil. ²¹ Ou te mande nou pou nou mennen l' isit la pou ou te ka wè l'. ²² Nou te reponn ou, mèl, ti bway la pa t' ka kite papa l'. Si li kite l', chagren va touye papa a. ²³ Men, ou te kenbe pawòl ou pi rèd, ou te di nou si ti frè nou an pa vini ak nou, nou pa bezwen parèt devan ou. ²⁴ Lè nou tounen kay papa nou, nou rakonte l' tout sa ou te di nou. ²⁵ Apre sa, papa di nou: Tounen al achte manje pou mwen. ²⁶ Nou di l': Non, papa. Nou pa ka desann paske si ti frè nou an pa ale ak nou, nou p'ap ka parèt devan chèf la. Men, si ou dakò pou ti frè nou an ale ak nou, n'a desann. ²⁷ Lè sa a, papa nou di: Nou konnen madanm mwen te fè de sèl pitit gason pou mwen. ²⁸ Gen yonn ki pati kite m'. Mwen kwè se bèt

²⁹
 nan bwa ki dwe devore l', paske mwen pa janm wè l' jouk koulye a. Jòdi a, si nou pran sa a nan men m', si yon malè rive l', avèk tout laj sa ki sou tèt mwen an, mwen p'ap ka sipòte lapenn sa a, chagren va touye m'.
³⁰
 Koulye a atò, mèt, si mwen tounen al jwenn papa m' san pitit gason l' sa a, ki de je nan tèt li,
³¹
 kou la gade li wè pitit li a pa la, l'ap mouri. Se nou menm ki va lakòz lapenn sa a k'ap twòp pou granmoun lan. Papa nou va mouri sou kont nou.
³²
 Wi, se mwen menm ki te bay papa m' garanti m'ap tounen ak pitit la. Mwen te di l': Si m' pa mennen l' tounen ba li, se mwen menm k'ap pote fòt la devan l' jouk jou mwen mouri.
³³
 Se poutèt sa, mèt, tanpri, kite ti bway la ale avèk frè l' yo, kite m' pran plas li. Gade m' pou esklav ou.
³⁴
 Mwen pa konnen ki pye pou m' ta mete devan pou m' tounen kay papa m' san ti gason an pa avèk nou. Mwen pa ta vle wè lapenn sa a tonbe sou papa m'.

Chapter 45

¹
 ¶ Jozèf pa t' kapab kenbe ankò devan tout moun ki t'ap sèvi l' yo. Li di byen fò: -Fè tout moun soti. Se konsa, pesonn pa t' la avèk Jozèf lè li fè frè l' yo rekonèt li.
²
 Li te pran kriye byen fò, tèlman fò moun peyi Lejip yo te tande l'. Bri a te rive jouk lakay farawon an.
³
 Jozèf di frè l' yo: -Se mwen menm Jozèf. Eske papa m' vivan toujou? Men frè l' yo pa t' kapab reponn li paske yo te boulvèse lè yo wè l' devan yo.
⁴
 Jozèf di frè l' yo: -Pwoche vin pi pre m'. Yo pwoche, li di yo: -Se mwen menm Jozèf wi, frè nou an. Se mwen menm wi nou te vann bay moun ki tapral peyi Lejip la.
⁵
 Men koulye a, nou pa bezwen boulvèse. Nou pa bezwen règrèt nou te vann mwen pou yo mennen m' isit la. Se Bondye ki te voye m' devan pou m' te ka sove lavi nou.
⁶
 Sa fè dezan depi grangou tonbe sou peyi a. Men, p'ap gen mwayen travay latè ni fè rekòt pou senk lanne ankò.
⁷
 Bondye te voye m' vini devan pou ras nou an pa t' fini nan peyi a, pou m' te ka sove lavi nou, pou nou pa mouri.
⁸
 Nou wè. Se pa nou menm ki te voye m' isit la, men se Bondye. Se Bondye menm ki mete m' sèvi yon papa pou farawon an. Mwen se chèf nan tout kay li, se mwen k'ap gouvènen tout peyi Lejip la.
⁹
 Koulye a, prese tounen kay papa m'. Al di l': Men sa Jozèf, pitit gason l' lan, voye di l': Bondye mete m' chèf sou tout peyi Lejip la. Desann vin jwenn mwen. Pa mize.
¹⁰
 Ou pral rete nan peyi Gochenn. Konsa, w'a toupre m', ou menm ansanm ak pitit ou yo, pitit pitit ou yo, mouton ou yo, bèf ou yo ak tout sa ou genyen.
¹¹
 Lè wa Gochenn, m'a pran swen ou, paske grangou a la pou senk

¹² lanne ankò. Koulye a, nou wè, pa vre. Benjamen, frè m' lan, wè tout se mwen menm menm
¹³ Jozèf k'ap pale ak nou an. Fè papa m' konnen jan moun respekte m' isit nan peyi Lejip. Rakonte
¹⁴ l' tou sa nou wè. Prese mennen papa m' desann isit la. Epi li lage kò l' nan bra Benjamen, frè li
¹⁵ a, li konmanse kriye ankò. Benjamen tout t'ap kriye sou zepòl li. Apre sa, li bo tout frè li yo, li
¹⁶ t'ap kriye toujou. Lèfini, frè l' yo pran pale ak li. ¶ Lè moun lakay farawon yo vin konnen frè
¹⁷ Jozèf yo te vini, sa te fè farawon an ak chèf li yo kontan. Farawon an di Jozèf konsa: -Pale ak
¹⁸ frè ou yo. Di yo men sa pou yo fè: Chaje bèt yo, ale nan peyi Kanaran. Lè y'a rive, y'a pran papa
¹⁹ yo ak tout fanmi yo, y'a tounen vin jwenn mwen. m'a ba yo pi bon tè ki nan peyi Lejip la pou fè
²⁰ jaden. Y'a manje pi bon manje ki gen nan peyi a. Ou menm poutèt pa ou, w'a di yo sa pou yo
²¹ fè. Y'a pran kèk cha nan peyi Lejip la pou timoun yo ak madanm yo. Y'a mennen papa yo vini.
²² Yo pa bezwen règrèt kite anyen, paske se pi bon bagay nan tout peyi Lejip la m'ap ba yo. Se
²³ sa menm pitit Izrayèl yo te fè. Jozèf ba yo kèk cha jan farawon an te ba li lòd la. Li ba yo pwovizyon
²⁴ pou fè vwayaj la. Li ba yo chak yon rad tout nèf. Men, li bay Benjamen twasan (300) pyès lajan
²⁵ ak senk rad nèf. Apre sa, li pran dis mal bourik chaje ak pi bon bagay ki te nan peyi Lejip la,
²⁶ dis fennèl bourik chaje ak ble ak pen ak tout kalite lòt pwovizyon ankò, li voye bay papa l' pou l'
²⁷ ka fè vwayaj la. Lè l'ap voye frè l' yo pati, li di yo: -Piga nou chache kont yonn ak lòt nan chemen
²⁸ an, tandè. ¶ Yo kite peyi Lejip, yo rive Kanaran lakay Jakòb, papa yo. Yo di l': -Papa, Jozèf
²⁹ la toujou wi. Se li menm k'ap gouvènen peyi Lejip la wi. Men, Jakòb rete tout frèt, paske li pa t'
³⁰ kwè yo. Men, lè yo rakonte l' tout sa Jozèf te di yo, lè li wè cha Jozèf te voye pou l' te ka vwayaje
³¹ a, Jakòb gen yon sèl kontantman ki pran l'. Li di yo: -Se kont. Jozèf, pitit mwen an, vivan toujou.
³² Fòk m' ale pou m' ka wè l' anvan m' mouri.

Chapter 46

¹ ¶ Izrayèl pati avèk tout sa li te genyen. li al Bècheba, li touye bèt, li ofri yo bay Bondye Izarak,
² papa li. Jou lannwit sa a, Bondye pale ak Izrayèl nan rèv, li di l': -Jakòb! Jakòb! Jakòb reponn:
³ -Men mwen wi. Bondye di li: -Mwen se Bondye, Bondye papa ou la. Ou pa bezwen pè desann
⁴ ale nan peyi Lejip paske m'ap fè pitit pitit ou yo tounen yon gwo pèp laba a. M'ap desann avè ou

nan peyi Lejip, m'ap fè pitit pitit ou yo tounen isit la ankò. Se Jozèf ki va fèmen je ou lè wa mouri.

⁵ ¶ Jakòb pati, li kite Bècheba. Pitit Izrayèl yo pran Jakòb, papa yo, ansanm ak timoun yo ak madanm
yo, yo fè yo moute sou cha farawon an te voye pou yo vwayaje a. ⁶ Yo pran tout bèt ak tout byen
yo te fè nan peyi Kanaran an. Yo desann nan peyi Lejip. Yo mennen Jakòb desann nan peyi Lejip
ak tout pitit pitit li yo. ⁷ Jakòb pran pitit gason l' yo ak pitit fi l' yo, pitit pitit li yo, fi kou gason, li
desann nan peyi Lejip ak yo tout. ⁸ Men non pitit Izrayèl yo ansanm ak pitit pitit yo ki te desann
nan peyi Lejip: Jakòb ak pitit gason l' yo. Premye gason an te rele Woubenn. ⁹ Men non pitit
Woubenn yo: Enòk, Palou, Ezwon ak Kami. ¹⁰ Men non pitit Simeyon yo: Jemouyèl, Jamen, Orad,
Jaken, Zoka ak Sayil. Li te fè dènye sa a ak yon fanm peyi Kanaran. ¹¹ Men non pitit gason Levi
yo: Gèchon, Keyat ak Merari. ¹² Men non pitit gason Jida yo: Er, Onan, Chela, Perèz ak Zerak.
Men Er ak Onan te mouri nan peyi Kanaran. Perèz te gen de pitit gason: Ezwon ak Amoul. ¹³ Men
non pitit Isaka yo: Tola, Pouva, Jòb ak Chimwon. ¹⁴ Men non pitit Zabilon yo: Serèd, Elon ak
Jaleyèl. ¹⁵ Se pitit sa yo Leya te fè pou Jakòb lè yo te Mezopotami. Leya te fè yon fi tout yo te rele
Dena. Avèk pitit pitit yo, sa te fè antou tranntwa gason ak yon fi. ¹⁶ Men non pitit gason Gad yo:
Zifjon, Agi, Chouni, Ezbon, Eri, Awodi ak Areyèli. ¹⁷ Men non pitit gason Asè yo: Jimna, Jichva,
Jichvi epi Beria. Yo te gen yon sè ki te rele Serak. Beria te gen de pitit gason: Ebè ak Malkyèl.
¹⁸ Se pitit gason sa yo Zilpa te fè pou Jakòb. Zilpa sa a, se te sèvant Laban te bay Leya, pitit fi li
a. Avèk pitit pitit yo, sa te fè antou sèz moun. ¹⁹ Men non pitit gason Rachèl, madan Jakòb: Jozèf
ak Benjamen. ²⁰ Pandan Jozèf te nan peyi Lejip, Asnat, pitit fi Potifera, prèt lavil On an, te fè
Manase ak Efrayim pou li. ²¹ Men non pitit Benjamen yo: Bela, Bekè, Achbèl, Gera, Naaman, Ei,
Wòch, Moupen, Oupim epi Ad. ²² Se pitit gason sa yo Rachèl te fè pou Jakòb. Avèk pitit pitit yo,
sa te fè antou katòz moun. ²³ Men non pitit gason Dann lan: Ouchim. ²⁴ Men non pitit gason
Neftali yo: Jazeyèl, Gouni, Jezè epi Chilèm. ²⁵ Se pitit gason sa yo Bila te fè pou Jakòb. Bila sa
a, se te sèvant Laban te bay Rachèl, pitit fi li a. Avèk pitit pitit yo, sa te fè antou sèt moun. ²⁶ Antou
sa te fè swasansis moun, pitit ak pitit pitit ki te desann nan peyi Lejip ansanm ak Jakòb, san konte
madanm pitit li yo. ²⁷ Avèk Jozèf ki te gen tan fè de pitit nan peyi Lejip, sa te fè antou swasanndis
moun laras Jakòb ki te vin nan peyi Lejip. ²⁸ ¶ Izrayèl te voye Jida devan al mande Jozèf pou l'

vin jwenn li Gochenn. ²⁹ Jozèf fè pare cha li a, li moute, li al Gochenn, li al kontre papa l'. Rive ³⁰
 Jozèf rive devan papa l', li lage kò l' nan bra l', li pase yon bon tan ap kriye sou zepòl li. Izrayèl
 di Jozèf konsa: -Koulye a, mwen wè figi ou, mwen konnen ou vivan toujou, mwen mèt mouri.
³¹ Epi Jozèf di frè l' yo ak tout fanmi papa l' yo: -Mwen pral avèti wa a. Mwen pral di l': men frè
 m' yo ak tout fanmi papa m' yo ki t'ap viv nan peyi Kanaran vin jwenn mwen isit la. ³² Se gadò
 mouton yo ye. Se bèt yo konn gade. Yo mennen tout mouton yo ak tout bèt yo ansanm ak tout sa
 yo genyen. ³³ Lè farawon an va rele nou pou mande nou ki metye nou, ³⁴ n'a reponn li: Monwa,
 depi nou tout piti jouk koulye a, se bèt n'ap gade, tankou tout zansèt nou yo. Konsa, nou ka rete
 nan peyi Gochenn lan. Li te di yo sa paske moun peyi Lejip yo pa ka sipòte wè moun k'ap gade bèt
 viv nan mitan yo.

Chapter 47

¹ ¶ Apre sa, Jozèf al avèti farawon an li di l': -Men papa m' ak frè m' yo rive soti nan peyi
 Kanaran, yo vini ak mouton yo, bèt yo ak tout sa yo genyen. Koulye a menm yo Gochenn. ² Jozèf
 te pran senk nan frè l' yo avèk li, li prezante yo bay farawon an. ³ Farawon an di yo konsa: -Ki
 metye nou? Yo reponn li: -Metye nou se gade bèt tankou zansèt nou yo. ⁴ Apre sa, yo di farawon
 an: -Nou vin pou nou ka rete nan peyi a, paske pa gen manje ankò nan peyi nou pou bèt yo manje.
 Lèfini, grangou a rèd anpil nan peyi Kanaran. Tanpri, ban nou pèmisyon pou nou rete nan peyi
 Gochenn lan. ⁵ Farawon an di Jozèf: -Men papa ou ak frè ou yo vin jwenn ou isit la. ⁶ tout peyi
 Lejip la la devan ou. Chwazi pi bon tè nan peyi a, ba yo l' pou rete. Yo mèt rete sou tè Gochenn
 lan. Epi, si ou konnen gen nan mitan yo moun ki kapab pran swen bèt pa m' yo, ou mèt ba yo bèt
 mwen yo gade. ⁷ Apre sa, Jozèf fè papa l' vini, li prezante l' bay farawon an. Lè Jakòb fin di farawon
 an bonjou, ⁸ farawon an mande l': -Ki laj ou? ⁹ Jakòb reponn li: -Mwen gen santrantan (130 an)
 depi m'ap moute desann sou latè. Men, mwen poko prèt pou m' rive laj zansèt mwen yo te rive lè
 yo t'ap fè moute desann pa yo. Mwen pa gen anpil laj, se vre. Men, mwen pa manke bat mizè.
¹⁰ Jakòb di farawon an orevwa, epi li ale. ¹¹ Jozèf fè papa l' ak frè l' yo rete nan peyi Lejip. Li ba
 yo tè bò lavil Ranmsès, jan farawon an te mande l' la. Li ba yo yon bon tè nan peyi a. ¹² Jozèf te
 bay papa l', frè l' yo ak tout fanmi yo kantite manje yo te bezwen pou mezi timoun yo te genyen.
¹³ ¶ Grangou a te rèd anpil toupatou. pa t' gen manje ankò. Moun peyi Lejip ak moun peyi Kanaran

¹⁴
 yo t'ap fin deperi anba grangou a. Jozèf te fin ranmase dènye lajan moun peyi Lejip ak moun
¹⁵
 peyi Kanaran te genyen nan vann yo ble. Li pote tout lajan an lakay farawon an. Lè tout lajan
 moun yo fini nan peyi Lejip ak nan peyi Kanaran, tout moun peyi Lejip yo vin jwenn Jozèf, yo di
 l': -Ban nou manje non, souple. Pa kite nou mouri. Fè kichòy pou nou, nou pa gen lajan ankò.
¹⁶
 Jozèf di yo: -Si nou pa gen lajan, mennen bèt nou yo vini, n'a boukante yo pou manje. ¹⁷ Se
 konsa, yo mennen bèt yo bay Jozèf pou fè boukantay. Li ba yo manje, yo ba li chwal, bèf, mouton,
¹⁸
 bourik. Pandan tout lanne a, li boukante manje ak yo pou valè bèt yo te genyen. Apre lanne a
 fin pase, yo tounen bò kote Jozèf ankò. Yo di li: -Nou p'ap kapab kache ou sa, mèt. Lajan nou fini
 nèt. Nou deja ba ou tout bèt nou te genyen. Koulye a, mèt, se tè nou yo ak pwòp tèt nou ase ki rete
¹⁹
 pou n' ba ou. Pa kite nou mouri. Fè kichòy pou nou! Pa kite nou pèdi tè nou yo. Fè pri pou nou
 menm ansanm ak tout tè nou yo. N'ap tounen esklav farawon an. Tè nou yo va pou li tou. Men,
 ban nou plan pou nou simen nan jaden nou yo pou nou pa mouri, pou tè a pa fin tounen savann.
²⁰
 Se konsa Jozèf achte tout tè Lejip la pou farawon an. tout moun peyi Lejip yo te vann li tè yo
²¹
 paske grangou a t'ap fini ak yo. tout peyi a vini pou farawon an. Jozèf fè tout moun toupatou
²²
 nan peyi a tounen esklav farawon an. Se te prèt yo ase li pa t' manyen. Prèt yo pa t' bezwen tè
 pou yo manje, paske, dapre yon lwa ki gen nan peyi a, se farawon an menm ki te toujou peye yo.
²³
 Se ak lajan sa a yo te viv. Jozèf di pèp la: -Jòdi a, mwen achte nou ansanm ak tout tè nou yo
²⁴
 pou farawon an. Men grenn m'ap ban nou pou nou plante nan jaden nou yo. Lè sezon rekòt la
 va rive, n'a bay farawon an yon senkyèm (1/5) nan tou sa nou rekòlte. Rès la va pou nou, pou nou
 plante nan jaden nou yo, pou nou manje nou menm ansanm ak pitit nou yo ak tout moun ki lakay
²⁵
 nou. Yo reponn li: -Ou sove lavi nou! Sèl sa nou mande ou, se pou ou aji byen ak nou. N'ap rete
²⁶
 esklav farawon an. Se konsa, Jozèf te pase yon regleman pou tout peyi Lejip la: dapre regleman
 sa a ki la jouk koulye a toujou, se pou yo bay farawon an yon senkyèm sou chak rekòt. Se sèlman
²⁷
 tè prèt yo ki pa t' pou farawon an. ¶ Moun Izrayèl yo te rete nan peyi Lejip sou tè Gochenn lan.
²⁸
 Yo vin gen anpil byen. Yo te fè anpil anpil pitit. Yo t'ap fè toujou. Jakòb pase disèt lanne nan
²⁹
 peyi Lejip. Li te rive gen sankaransèt (147) lanne sou tèt li. Lè sa a, Izrayèl vin wè li pa t' gen
 lontan pou l' viv ankò. Li fè rele Jozèf, pitit li a, li di l' konsa: -Si ou renmen m' vre, tanpri, fè m'
 sèman. Mete men ou nan fant janm mwen, pwomèt mwen w'ap kenbe pawòl ou, ou p'ap janm trayi
³⁰
 m'. Tanpri, pa antere m' nan peyi Lejip. Mwen vle pou yo antere m' menm kote ak zansèt mwen
 yo, lè m aval jwenn fanmi mwen yo ki mouri deja a. Se pou ou pran kadav mwen, pote l' soti peyi
³¹
 Lejip, al antere l' nan kavo fanmi m' yo. Jozèf reponn li: -m'a fè jan ou mande m' lan. Men, Jakòb

di Jozèf konsa: -Fè m' sèman w'ap fè sa pou mwen! Jozèf sèmante ba li. Apre sa, Izrayèl bese kouche nan kabann li.

Chapter 48

¹ ¶ Kèk tan apre sa, yo vin fè Jozèf konnen papa l' malad. Jozèf pran Manase ak Efrayim, de pitit gason l' yo, ak li, li ale wè Jakòb. ² Yo vin di Jakòb: -Men Jozèf, pitit ou, vin wè ou. Izrayèl ranmase dènye ti rès fòs li te genyen an, li leve chita sou kabann lan. ³ Jakòb di Jozèf: -Bondye ki gen tout pouvwa a te parèt devan mwen yon kote yo rele Louz, nan peyi Kanaran. Li beni m'. ⁴ Li di m' konsa: M'ap ba ou anpil pitit ak pitit pitit. M'ap fè yo tounen anpil nasyon. Ou wè tè sa a? M'ap bay pitit pitit ou yo li pou li rele yo pa yo pou tout tan. ⁵ Bon. De pitit gason ou te fè nan peyi Lejip anvan m' te vin jwenn ou isit la a, se pitit mwen yo pral ye. Wi, Efrayim ak Manase ap pou mwen tankou Woubenn ak Simeyon. ⁶ Men, tout pitit ou va fè apre yo, se pitit ou y'ap ye. Y'a pote non gran frè yo pou yo ka jwenn pa yo nan byen m' yo. ⁷ Lè m' t'ap tounen soti nan peyi Mezopotami an, Rachèl, manman ou, te mouri nan men mwen. Li mouri sou wout pou ale peyi Kanaran, pa twò lwen lavil Efrata. Mwen antere l' la sou wout Efrata a. Se Efrata sa a yo rele Betleyèm lan tou. ⁸ ¶ Lè Izrayèl wè pitit Jozèf yo, li mande: -Ki timoun sa yo? ⁹ Jozèf reponn li: -Se pitit gason Bondye te ban mwen antan mwen isit la wi. Izrayèl di li: -Tanpri, fè yo pwoche pi pre m' pou m' ka beni yo. ¹⁰ Izrayèl te fin granmoun, je l' pa t' bon menm. Li pa t' kapab wè ankò. Jozèf fè pitit li yo pwoche bò kote papa l'. Jakòb pran yo, li bo yo, li pase bra l' nan kou yo. ¹¹ Izrayèl di Jozèf konsa: -Mwen pa t' gen espwa wè figi ou ankò, men Bondye fè m' wè ata pitit ou yo. ¹² Jozèf wete timoun yo sou jenou Izrayèl, epi li bese tèt li jouk atè devan papa l'. ¹³ Li pran timoun yo, Efrayim nan men dwat li ak Manase nan men gòch li. Konsa, Efrayim vin sou bò gòch Izrayèl, Manase menm sou bò dwat li. Li fè yo pwoche vin jwenn papa l'. ¹⁴ Men, Izrayèl kwaze men l' lè l'ap lonje yo, li mete men dwat li sou tèt Efrayim ki te pi piti a, li mete men gòch li sou tèt Manase ki te pi gran an. Izrayèl te konnen sa l' t'ap fè lè l' te fè sa. ¹⁵ Li beni Jozèf, li di l': -Se pou Bondye zansèt mwen yo, Bondye Abraram ak Izarak te sèvi tout lavi yo a, beni timoun sa yo. Se pou Bondye ki te pran swen mwen depi lè m' te fèt jouk jòdi a beni timoun yo. ¹⁶ Se pou zanj Bondye ki te delivre m' anba tout move pa beni timoun yo. Se pou yo pote non mwen ak non zansèt mwen yo, Abraram ak

17
 Izarak. Se pou yo fè anpil pitit pitit, se pou yo peple sou tè a. Men Jozèf pa t' kontan lè li wè papa l' te mete men dwat li sou tèt Efrayim. Li kenbe men papa l' pou l' wete l' sou tèt Efrayim pou l' mete l' pito sou tèt Manase.
 18
 Epi li di papa l': -Se pa konsa, papa. Men pi gran an bò isit. Mete men dwat ou sou tèt li.
 19
 Men, papa a derefize. Li di l': -Mwen konnen, pitit mwen, mwen konnen. Manase tout ap vin yon pèp. Li menm tout l'ap grannèg. Men, ti frè l' la pral pi grannèg pase l'. Pitit li yo pral vin anpil nasyon.
 20
 Jou sa a, li beni yo, li di: -Nan peyi pitit pitit Izrayèl yo, lè y'ap bay benediksyon, y'a nonmen non nou. y'a mande pou Bondye beni yon moun menm jan li te beni Efrayim ak Manase. Se konsa li te mete Efrayim anvan Manase.
 21
 Apre sa, Izrayèl di Jozèf: -Gade. Mwen pral mouri. Men Bondye ap la avèk ou. La fè ou tounen nan peyi zansèt ou yo.
 22
 Se pa pou lòt moun nan frè ou yo, se pou ou m'ap kite moso tè Sichèm lan. Se pòsyon tè sa a mwen te pran nan men moun Amori yo anba gwo goumen.

Chapter 49

1
 ¶ Jakòb fè rele pitit gason l' yo, li di yo: -Sanble non. M'ap fè nou konnen sa ki pral rive nou nan jou k'ap vini yo.
 2
 Sanble, vin koute non, pitit Jakòb yo! vin koute sa Izrayèl, papa nou, pral di nou.
 3
 Ou menm, Woubenn, premye pitit gason mwen, ou se fòs mwen, premye pitit mwen fè. Nan tout pitit mwen yo, se ou ki gen plis fòs, se ou ki pi gwonèg.
 4
 Ou tankou yon larivyè k'ap desann. Men, se pa ou k'ap alatèt, paske ou kouche ak yon madanm papa ou. Ou moute sou kabann mwen, ou fè sa ou pa t' dwe fè.
 5
 ¶ Simeyon ak Levi se menm moun, se pwason kraze nan bouyon! Yo sèvi ak zam yo pou fè mechanste.
 6
 Mwen p'ap patisipe nan konplo yo. Mwen p'ap la avèk yo nan reyinyon yo. Paske lè yo ankòlè, yo touye moun. Yo koupe jarèt towò bèf pou dan ri.
 7
 Madichon pou yo lè yo move paske yo san manman! M'ap fè yo rete toupatou nan peyi Jakòb la. M'ap gaye yo nan tout peyi Izrayèl la.
 8
 ¶ Ou menm, Jida, frè ou yo ap fè lwanj ou. W'ap kenbe lènmi ou yo dèyè kou. Pitit papa ou yo ap bese tèt devan ou.
 9
 Jida, se yon jenn ti lyon. Lè ou fin fè ravaj, pitit mwen, ou tounen tounen ou. Ou kwoupi, ou kache kò ou tankou yon jenn ti lyon, tankou yon femmèl lyon. Ki moun ki ka deranje ou?
 10
 Yo p'ap ka wete kòmandman an nan men Jida. Non. Baton kòmandman an p'ap soti nan mitan janm li, jouk tan moun tout pèp sou latè pral obeyi a va vini.
 11
 L'ap mare ti bourik li a nan yon pye rezen, l'ap mare pitit manman bourik li a nan pi bon pye

rezen an. L'ap lave rad li nan diven, l'ap lave varèz li nan diven wouj kou san. ¹² Je l' wouj ak
 diven. Dan l' blan ak lèt. ¹³ ¶ Zabilon pral rete bò lanmè. Batiman yo va jwenn bon pò sou rivaj li
 yo. Limit peyi l' la ap rive jouk Sidon. ¹⁴ Isaka, se yon bon bourik chay. Li kouche nan mitan de
 bò sakpay. ¹⁵ Li wè jan kote li poze kò l' la nan gou li, li wè jan peyi a bèl. Li pare do l' pou l' pote
 chay li. Li tounen esklav pou l' travay di. ¹⁶ Dann ap yon chèf pou pèp li, tankou yon branch nan
 fanmi Izrayèl. ¹⁷ Dann ap tankou yon sèpan bò gran chemen an, yon sèpan mechan sou bò wout
 la. L'ap mòde chwal yo nan talon pou l' fè kavalye yo tonbe sou tèt. ¹⁸ O Seyè, m'ap tann ou vin
 sove mwen! ¹⁹ Ou menm, Gad, yon bann vòlò ap vin tonbe sou ou. Men, w'ap kouri dèyè yo, se
 ou k'ap mete men sou yo. ²⁰ Peyi Asè a ap bay bon manje k'ap bay fòs. L'ap donnen manje ki gou
 nan bouch wa yo. ²¹ Neftali, se yon fenmèl kabrit ki lage. L'ap fè bèl ti pitit. ²² ¶ Jozèf se boujon
 yon pye rezen ki konn donnen, li soti nan yon pye rezen bò sous dlo ki donnen byen. Branch li yo
 moute sou tout miray la. ²³ Y'ap chache l' kont, y'ap voye wòch sou li. Moun k'ap voye flèch yo
 tounen yon pèsekisyon pou li. ²⁴ Men, banza pa li a rete fèm, ponyèt li pa febli, gremesi pouvwa
 Bondye Jakòb la, Bondye ki gadò pèp Izrayèl la. Se li ki tout pwoteksyon yo. ²⁵ Sa soti nan Bondye
 papa ou la k'ap ede ou, nan Bondye ki gen tout pouvwa a k'ap beni ou avèk benediksyon lapli ki
 soti anwo nan syèl la, avèk benediksyon sous dlo k'ap soti anba tè a, avèk benediksyon ki soti nan
 tete ak nan vant manman. ²⁶ Benediksyon papa ou yo pi plis pase benediksyon mòn ki la pou tout
 tan yo. Se pou benediksyon sa yo tonbe sou tèt Jozèf, sou tèt moun Bondye te chwazi nan mitan
 tout frè l' yo. ²⁷ Benjamen, se yon bèt nan bwa devoran. Nan maten, li manje bèt li kenbe a. Nan
 aswè, l'ap separe toujou sa l' te pran yo. ²⁸ ¶ Men douz branch fanmi Izrayèl yo. Men sa papa yo
 te di yo. Li beni yo, li bay chak moun benediksyon pa yo. ²⁹ Apre sa, Jakòb ba yo lòd sa a: -Mwen
 menm, mwen pral jwenn fanmi m' yo ki mouri deja. Antere m' menm kote ak zansèt mwen yo nan
 twou wòch ki nan jaden Efwon, moun Et la, ³⁰ nan twou wòch ki nan jaden Makpela a, anfas
 Manmre, nan peyi Kanaran. Se Abraram ki te achte twou wòch sa a ak tout jaden an nan men
 Efwon, moun Et la, pou sèvi l' simityè. ³¹ Se la yo te antere Abraram ak Sara, madanm li. Se la yo
 te antere Izarak ak Rebeka, madanm li. Se la tout mwen te antere Leya. ³² Se nan men mesye Et
 yo nou te achte jaden an ak tout twou wòch ki sou li a. ³³ Lè Jakòb fin pale konsa ak pitit gason l'
 yo, li lonje kò l' sou kabann lan, li mouri, li al jwenn fanmi li yo ki te mouri deja.

Chapter 50

¹ ¶ Jozèf lage kò l' sou papa l', li kriye kont li, li bo l' nan figi. ² Apre sa, Jozèf rele dòktè ki t'ap sèvi l' yo, li fè yo pare kadav la. Se sa menm dòktè yo fè. ³ Yo pran karant jou pou pare kadav la jan yo konn fè l' la. Apre sa, moun peyi Lejip yo pase swasanndi jou ap kriye pou li. ⁴ Lè tout swasanndi jou yo fin pase, jou pou antèman an rive. Jozèf pale ak moun lakay farawon yo, li di yo konsa: -Tanpri souple, rann mwen sèvis sa a. Pote komisyon sa a bay farawon an pou mwen. ⁵ Di l' pou mwen: Anvan papa m' te mouri li te fè m' sèmante pou m' te antere l' nan kavo li te fè pare pou li nan peyi Kanaran. Tanpri, kite m' moute al antere papa m'. Apre sa, m'a tounen. ⁶ Farawon an voye reponn li: -Ou mèt al antere papa ou, jan ou te sèmante ba li a. ⁷ ¶ Se konsa Jozèf moute al antere papa l'. tout moun lakay farawon yo, tout chèf ak tout notab peyi Lejip yo ale ak li, ⁸ ansanm ak tout fanmi Jozèf yo, frè l' yo, ak tout fanmi papa l' yo. Men yo te kite tout timoun piti yo Gochenn ansanm ak bèt yo, mouton, kabrit ak bèf. ⁹ Te gen anpil cha ak anpil kavalye sou chwal ki t ale avek li. Kifè pa t' manke moun nan lantèman an. ¹⁰ Lè yo rive nan glasi Atad ki lòt bò larivyè Jouden, kote sòlèy leve a, yo pran rele byen fò. Jozèf te fè yo fè sèvis la pandan sèt jou pou papa l'. ¹¹ Lè moun peyi Kanaran yo wè sèvis lantèman yo t'ap fè Atad la, yo di: -Ala yon grannèg ki mouri lakay moun peyi Lejip yo papa! Se poutèt sa yo rele glasi ki lòt bò larivyè Jouden an: ¹² Glasi lapenn moun peyi Lejip yo. ¹³ Konsa, pitit gason Jakòb yo te fè jan papa yo te ba yo lòd fè a. ¹⁴ Yo pote kadav li nan peyi Kanaran, yo antere l' nan twou wòch ki te nan jaden Makpela a, anfas Manmre. Se jaden sa a Abraram te achte nan men Efwon, moun Et la, pou sèvi l' simityè. ¹⁵ Apre Jozèf fin antere papa l', li tounen Lejip ansanm ak frè l' yo ak tout moun ki te moute avè l' pou lantèman papa l' la. ¹⁶ ¶ Apre lanmò papa yo, frè Jozèf yo di: -Ou pa janm konnen. Jozèf ka kenbe nou nan kè, li ka fè nou peye tout sa nou te fè l' yo. ¹⁷ Se konsa yo voye di Jozèf: -Men komisyon papa te ban nou pou ou anvan l' te mouri: ¹⁸ Men sa n'a di Jozèf pou mwen: Tanpri, padonnen krim frè ou yo te fè ou la. Padonnen peche yo paske yo te fè ou mal anpil. Koulye a atò, tanpri, padonnen mal nou te fè ou la, nou menm k'ap sèvi Bondye papa ou la. Lè Jozèf tande pawòl sa a, li pran kriye. ¹⁹ Apre sa, frè l' yo vini yo menm menm, yo bese tèt yo jouk atè devan li, yo di l' konsa: -Men nou pote tèt nou pou nou sèvi ou domestik. ²⁰ Jozèf di yo: -Nou pa bezwen pè. Mwen pa kapab pran plas Bondye. ²¹ Nou te moute konplo pou fè m' mal. Men Bondye fè sa

tounen yon byen, pou l' te fè sak rive jòdi a rive, pou l' te ka sove lavi tout kantite moun sa yo.
21

Non. Nou pa bezwen pè. M'ap okipe nou, nou menm ansanm ak tout pitit nou yo. Se konsa, Jozèf
22 te pale byen ak frè l' yo, li te di yo pawòl ki te touche kè yo, li remoute kouraj yo. ¶ Jozèf te rete
23 nan peyi Lejip ak tout fanmi papa l' yo. Li te gen sandizan (110 an) lè l' mourì. Li te gen tan wè
24 pitit ak pitit pitit Efrayim. Se nan men l' pitit Maki yo te fèt. Maki sa a te pitit Manase. Li di frè
l' yo konsa: -Mwen pral mourì. Men mwen sèten Bondye gen pou vin ede nou. L'ap fè nou kite
25 peyi sa a, l'ap fè nou tounen nan peyi li te sèmante l'ap bay Abraram, Izarak ak Jakòb la. Apre
sa, Jozèf fè pitit Izrayèl yo sèmante ba li, li di yo: -Wi, Bondye gen pou vin ede nou. Lè sa a, tanpri,
26 pote zosman m' yo moute ak nou. Lè Jozèf mourì li te gen sandizan (110 an). Yo benyen kadav
la, yo pare l' pou l' pa pouri. Yo mete l' nan yon sèkèy byen fèmen nan peyi Lejip.

Exodus

Chapter 1

1 ¶ Men non pitit Jakòb yo ki te desann avè l' nan peyi Lejip ansanm ak tout fanmi yo: 2 Se te
Woubenn, Simeyon, Levi epi Jida, 3 Isaka, Zabilon epi Benjamen, 4 Dann ak Nèftali, Gad ak Asè.
5 Sa te fè antou swasann dis moun nan ras Jakòb la. Jozèf menm te deja nan peyi Lejip la. 6 Apre
sa, Jozèf mourì, tout frè l' yo mourì tou ansanm ak tout moun menm laj ak yo. 7 Men pèp Izrayèl
la te fè anpil pitit, yo te peple. Yo te vin anpil. Yo te vin fò, yo te toupatou nan peyi a. 8 ¶ Te vin
9 gen yon lòt wa nan peyi Lejip la. Wa sa a pa t' konn anyen sou Jozèf. Li di pèp la konsa: -Gade.
10 Pèp Izrayèl la vin pi plis pase nou. Yo pi fò pase nou. Tande non! Fòk nou jwenn yon jan wi,
pou n' bat ak moun sa yo, pou yo pa vin plis toujou. Paske, si yon lagè pete la a, yo ka mete tèt
11 ansanm ak lènmi nou yo pou yo bat nou. Apre sa, y'a pati kite peyi a. Se konsa yo mete kèk chèf
sou pèp Izrayèl la pou kraze kouraj yo, pou fè yo fè kòve travo fòse san pran souf. Moun pèp Izrayèl
12 yo bati lavil Piton ak Ranmsès pou farawon an. Se nan lavil sa yo yo te fè depo manje. Men,
tank moun Lejip yo t'ap peze moun pèp Izrayèl yo, se tank yo t'ap fè pitit, se plis yo t'ap peple.
13 Moun Lejip yo vin rayi moun pèp Izrayèl yo. Se konsa, yo fè pèp Izrayèl la tounen esklav.

14 Yo rann yo lavi minab, yo fè yo travay rèd ap bat mòtye, ap fè brik, ap fè tout lòt kalite kòve nan jaden. Yo bat yo, yo fòse yo fè tout kalite travay sa yo. ¹⁵ ¶ Lè sa a, te gen de fanmchay ki te konn akouche medam ebre yo. Yonn te rele Chifra, lòt la te rele Pwa. Wa Lejip la rele yo, ¹⁶ li di yo: -Lè n'ap akouche medam ebre yo, lè yo sou choukèt, louvri je nou. Si pitit la se yon gason, touye l'. Men si se yon fi, kite l' viv. ¹⁷ Men, fanmchay yo te gen krentif pou Bondye. Yo pa t' fe sa wa Lejip la te ba yo lòd fè a. Yo te kite ti gason yo viv tou. ¹⁸ Lè sa a, wa a fè rele fanmchay yo, li mande yo: -Poukisa nou fè sa? Apa nou kite ti gason yo viv tou? ¹⁹ Medam yo reponn: -Fanm ebre sa yo pa tankou fanm Lejip yo non. Yo gen kouraj sou yo wi. Anvan fanmchay la rive, yo gen tan akouche. ²⁰ Bondye te beni fanmchay yo. Moun pèp Izrayèl yo menm t'ap vin pi plis toujou. Yo t'ap vin pi fò. ²¹ Paske fanmchay yo te gen krentif pou Bondye, Bondye te ba yo anpil pitit. ²² Lè sa a, farawon an bay pèp la lòd sa a: -Se pou nou jete tout ti gason ki fèt lakay moun ebre yo nan gwo larivyè a. Men, kite tout ti fi yo viv.

Chapter 2

¹ ¶ Yon nonm nan branch fanmi Levi a te marye ak yon fi nan menm branch fanmi an. ² Madanm li vin ansent, li fè yon pitit gason. Lè li wè jan ti pitit la te bèl, li kache l' pandan twa mwa. ³ Men, li pa t' kapab kache l' pi lontan pase sa. Se konsa, li pran yon panyen jon, li badijonnen l' byen badijonnen ak goudwon ansanm ak gonm bwapen. Li mete ti pitit la ladan l'. Lèfini, li mete panyen an ak tout pitit la ladan l' nan mitan yon touf wozo, sou bò gwo larivyè a. ⁴ Sè ti pitit la menm te rete kanpe yon ti distans pou l' wè sak tapral rive pitit la. ⁵ ¶ Pitit fi farawon an desann bò gwo larivyè a pou l' al benyen. Medam ki te avè l' yo t'ap mache bò larivyè a. Fi farawon an wè panyen an nan mitan touf wozo yo. Li voye sèvant li a al pran l'. ⁶ Li louvri panyen an, li wè ti pitit la: se te yon ti gason ki t'ap kriye. Kè l' fè l' mal pou li. Li di: -Se yonn nan timoun ebre yo. ⁷ Lè sa a, sè ti gason an pwoche, li di pitit fi farawon an: -Eske ou vle m al chache yon nouris pou ou nan mitan medam ebre yo pou bay ti pitit la tete pou ou? ⁸ Fi Farawon an di li: -Ale non. Ti fi a al chache manman ti pitit la. ⁹ Fi farawon an di manman an konsa: -Pran ti pitit sa a, mete l' nan tete pou mwen. m'a peye ou pou sa. Madanm lan pran ti pitit la, li ba l' tete. ¹⁰ Lè ti gason an vin gran ti

bway, li mennen l' bay fi farawon an ki adopte l' pou pitit li. Lè sa a, fi farawon an di: -Se nan dlo mwen wete l'. Se konsa, li rele l' Moyiz. ¹¹ ¶ Lè sa a, Moyiz te fin grandi. Yon jou, li soti pou l' al vizite moun pèp Izrayèl parèy li yo. Li wè jan yo t'ap fè yo travay di. Li wè yon moun peyi Lejip ¹² ki t'ap bimen yon ebre anba kou, yonn nan moun parèy li yo. Li voye je l' adwat, li voye je l' agoch, li pa wè pesonn. Li touye moun pèyi Lejip la, li fouye yon twou nan sab la, li kache kadav ¹³ la. Nan denmen, li soti ankò, li wè de ebre ki t'ap goumen. Li di sa ki te antò a: -Poukisa w'ap maltrete moun menm ras ak ou konsa? ¹⁴ Men, nonm lan reponn li: -Kilès ki mete ou chèf pou kòmande nou? Gen lè ou vle touye m' menm jan ou te touye moun peyi Lejip la? Moyiz vin pè, li ¹⁵ di nan kè l': -Aa! Gen moun ki konnen sa m' te fè a! Farawon an pran nouvel sak te pase. Li t'ap chache Moyiz pou touye l'. Men Moyiz chape kò l' anba men l', l' al rete nan peyi Madyan. Rive ¹⁶ la, li chita bò yon pi. ¶ Prèt peyi Madyan an te gen sèt pitit fi. Yo te vin tire dlo pou plen ganmèl ¹⁷ yo pou bay mouton papa yo bwè. Men, kèk lòt gadò mouton vin rive, yo kouri dèyè medam yo. Moyiz leve, li pran defans yo, epi li bay mouton medam yo bwè. ¹⁸ Lè medam yo tounen lakay ¹⁹ Reouyèl, papa yo, li mande yo: -Ki jan nou fè tounen vit konsa jòdi a? Yo reponn li: -Se yon moun peyi Lejip ki te delivre nou anba men gadò mouton yo. Apre sa, se li menm ankò ki tire dlo ²⁰ pou nou bay bèt yo bwè. Reouyèl mande pitit fi li yo: -Kote msye? Poukisa nou kite l' laba a? ²¹ Al rele l' pou l' vin pran kichòy ak nou. Moyiz te dakò pou l' te rete lakay nonm sa a. Reouyèl ²² bay Moyiz Sefora, yonn nan pitit fi li yo, pou madanm. Sefora fè yon ti gason. Lè sa a, Moyiz ²³ di: -Se moun vini mwen ye nan yon peyi etranje. Se konsa, li te rele pitit la Gèchon. ¶ Lontan ²⁴ apre sa, wa Lejip la mouri. Pèp Izrayèl la t'ap plenn pi rès anba esklavaj. Yo t'ap rele gras mizèrikòd. Bondye te tande jan yo t'ap rele, jan yo t'ap plenn anba esklavaj la. ²⁵ Bondye te rès yo, li vin ²⁵ chonje kontra li te pase ak Abraram ak Izarak epi ak Jakòb. Bondye te wè nan ki sitiyasyon moun pèp Izrayèl yo ye, li pran kòz yo nan men l'.

Chapter 3

¹ ¶ Moyiz t'ap gade mouton ak kabrit Jetwo, bòpè li, ki te yon prèt nan peyi Madyan. Moyiz ² mennen bèt yo lòt bò dezè a. Li rive sou mòn Orèb, mòn Bondye a. Zanj Seyè a parèt devan l' sou fòm yon flanm dife nan mitan yon ti touf bwa. Moyiz gade, li wè touf bwa a te tou wouj ak

dife, men li pa t'ap boule. ³ Lè sa a, Moyiz di nan kè l': -Kite m' pwoche pi pre pou m' wè bagay dwòl sa a. Kouman touf bwa a fè pa boule? ⁴ Lè Seyè a wè Moyiz t'ap pwoche pou l' gade, li rete nan mitan touf bwa a, li rele l', li di: -Moyiz! Moyiz! Moyiz reponn: -Men mwen wi. ⁵ Bondye di: -Rete kote ou ye a. Pa pwoche. Wete sapat nan pye ou, paske kote ou kanpe a se yon tè ki apa pou mwen. ⁶ Bondye di ankò: -Se mwen menm, Bondye zansèt ou yo, Bondye Abraram lan, Bondye Izarak la ak Bondye Jakòb la. Moyiz bouche figi l', paske li te pè gade Bondye. ⁷ ¶ Seyè a di: -Mwen wè tray pèp mwen an ap pase nan peyi Lejip. Mwen tandè jan y'ap rele anba men moun k'ap peze yo. Wi, mwen konnen jan y'ap soufri. ⁸ Mwen desann pou m' vin delivre yo anba men moun peyi Lejip yo, pou m' fè yo soti nan peyi Lejip la, pou m' mennen yo nan yon gwo peyi ki gen bon tè, yon peyi kote lèt ak siwo myèl koule tankou dlo. Se la moun Kanaran yo rete ansanm ak moun Et yo, moun Amori yo, moun Ferezi yo, moun Evi yo ak moun Jebis yo. ⁹ Bondye di ankò: -Koulye a menm, rèl pitit Izrayèl yo rive jouk nan zòrèy mwen. Mwen wè jan y'ap soufri anba moun peyi Lejip yo k'ap peze yo. ¹⁰ Koulye a, ale! Se mwen menm k'ap voye ou bò kote farawon an. Fè pèp mwen an soti nan peyi Lejip. Wi, fè pèp Izrayèl la soti kite peyi sa a. ¹¹ ¶ Moyiz di Bondye: -Ki moun mwen ye menm pou m' ta penmèt mwen ale bò kot farawon an pou m' fè pèp Izrayèl la soti kite peyi Lejip? ¹² Bondye di l': -M'ap kanpe la avè ou. Lèfini, pou fè konnen se mwen menm ki voye ou, men sa w'a fè: lè w'a fin fè pèp la soti kite peyi Lejip, n'a sèvi m' sou mòn sa a. ¹³ Moyiz di Bondye konsa: -Bon. Koulye a, mwen pral bò kote pèp Izrayèl la, mwen pral di yo: Bondye zansèt nou yo voye m' kote nou. Ou mèt sèten yo pral mande m': Ki jan li rele? Lè sa a, kisa pou m' reponn yo? ¹⁴ Bondye di Moyiz: -Sa m' ye a se sa m' ye. Apre sa li di ankò: -W'a pale ak moun pèp Izrayèl yo, w'a di yo konsa: Mwen menm ki rele sa m' ye a, se mwen menm ki voye ou bò kote yo. ¹⁵ Bondye di Moyiz ankò: -Men sa pou di moun pèp Izrayèl yo. Seyè a, Bondye zansèt nou yo, Bondye Abraram lan, Bondye Izarak la, Bondye Jakòb la, voye m' bò kote nou. Wi, se konsa mwen rele. Se konsa y'ap toujou rele m' sou latè de tit an tit. ¹⁶ ¶ Ale non. Reyini tout chèf fanmi pèp Izrayèl la, di yo: Seyè a, Bondye zansèt nou yo, Bondye Abraram lan, Bondye Izarak la, Bondye Jakòb la, te parèt devan mwen. Li mande m' pou m' di nou pou li: Mwen vin vizite nou, mwen wè sa moun peyi Lejip yo ap fè nou pase. ¹⁷ Se poutèt sa mwen di: M'ap fè nou soti kite peyi Lejip kote y'ap maltrete nou an. M'ap mennen nou nan peyi moun Kanaran yo, moun Et yo, moun Amori yo, moun Ferezi yo, moun Evi ak moun Jebis yo. Se yon peyi kote lèt ak siwo myèl koule tankou dlo. ¹⁸ Chèf fanmi yo va koute sa ou gen pou di yo. Apre sa, wava ale bò kote wa Lejip la ansanm ak chèf fanmi pèp Izrayèl yo, n'a di wa a: Seyè a, Bondye ebre yo, te parèt devan nou. Kite n al fè yon ti vwayaj nan dezè a. Lè n'a fin mache pandan twa jou, n'a rete pou n'

¹⁹ touye bèt n'ap ofri bay Seyè a, Bondye nou an. Mwen konnen wa peyi Lejip la p'ap kite nou ale,
²⁰ si yo pa fòse l'. Se poutèt sa, m'ap lonje men m', m'ap frape peyi Lejip. M'ap fè tout kalite mirak
²¹ nan peyi a. Apre sa, l'a kite nou ale. m'a fè mèvèy jouk tan moun peyi Lejip yo va aji byen ak
²² pèp mwen an. Konsa, lè n'a pare pou nou pati kite yo, nou p'ap soti san anyen nan men nou. Chak
 fanm va mande vwazin li pou yo ba li rad ak bijou an ajan ak bijou an lò. L'a fè menm bagay la ak
 fanm pèyi Lejip ki rete lakay li yo. Lèfini, n'a mete yo sou pitit gason ak pitit fi nou yo. Konsa, n'a
 pran tou sa moun peyi Lejip yo genyen.

Chapter 4

¹ ¶ Moyiz reponn li: -Men, moun yo ka refize kwè m', yo ka pa koute sa m' gen pou m' di yo a.
 Yo ka di m' se pa vre, Seyè a pa t' kras parèt devan mwen. ² Seyè a mande l': -Kisa ou gen nan men
 ou la a? Moyiz reponn li: -Yon baton. ³ Seyè a di l': -Jete l' atè. Moyiz jete baton an atè. Baton an
⁴ tounen yon koulèv. Lè Moyiz wè sa, li pran kouri. Seyè a di Moyiz: -Lonje men ou, bese pran
 koulèv la nan ke. Moyiz lonje men l', li pran koulèv la nan ke. Lamenm, koulèv la tounen baton
⁵ ankò nan men Moyiz. Seyè a di: -Men sa w'a fè pou yo ka kwè Seyè a, Bondye zansèt yo, Bondye
 Abraram lan, Bondye Izarak la, Bondye Jakòb la, te parèt devan ou. ⁶ Seyè a di l' ankò: -Foure
 men ou anndan chemiz ou, sou lestonmak ou. Moyiz fourre men li anndan chemiz li, sou lestonmak
⁷ li. Lè li wete men l', men l' te vin tou blan ak bouton. Li te kouvri ak lalèp. Seyè a di l': -Foure
 men ou anndan chemiz ou ankò, sou lestonmak ou. Moyiz fourre men li anndan chemiz li ankò. Lè
⁸ li wete l', men li te menm koulè ak rèz kò li. Seyè a di Moyiz: -Si apre ou fin fè premye mirak la,
⁹ ou wè yo pa vle kwè ou, yo pa vle koute ou, y'a kwè ou lè w'a fè dezyèm mirak sa a. Si apre ou
 fè de mirak sa yo, y'ap fè tèt di toujou, yo pa vle kwè ou toujou, yo pa vle koute sa w'ap di yo, w'a
¹⁰ pran ti gout dlo nan gwo larivyè a, w'a vide l' atè. Lamenm, dlo a va tounen san. ¶ Moyiz di
 Seyè a: -Eskize m' wi, Seyè. Men, mwen pa ka pale fasil. Se pa bagay jòdi a non. Menm koulye a,
¹¹ depi w'ap pale ak sèvitè ou la, anyen pa chanje. Bouch mwen lou, lang mwen mare. Seyè a di
 l': -Kilès ki bay moun bouch pou yo pale? Kilès ki fè moun sa a bèbè, moun sa a soudè? Kilès ki
¹² fè moun sa a wè, moun sa a avèg? Eske se pa mwen menm, Seyè a? Bon, ou mèt ale. m'a ede
¹³ ou lè ou gen pou ou pale, m'a moutre ou sa ou gen pou di. Moyiz di: -Eskize m' wi, Seyè! Men,

14 poukisa ou pa voye yon lòt moun pito? Lè sa a, Seyè a move sou Moyiz, li di l' konsa: -Gen Arawon, frè ou la, ki soti nan branch fanmi Levi a. Mwen konnen lang msye pa mare nan bouch

15 li. Men koulye a, li gen tan nan wout ap vin jwenn ou. L'a kontan anpil lè l'a wè ou. W'a pale avè l', w'a di l' sa pou l' di. m'a ede nou tou de lè n'a gen pou nou pale. m'a di nou sa pou nou fè.

16 L'a pale ak pèp la pou ou. Se tankou si se te ou menm ki t'ap pale. Ou menm, w'a tankou Bondye

17 k'ap di li sa pou li di. Kanta baton sa a, toujou kenbe l' nan men ou. Se avèk li w'a fè tout mirak

18 ou gen pou fè yo. ¶ Moyiz kite kote l' te ye a, li tounen lakay Jetwo, bòpè li. Li di li: -Tanpri, kite m' ale. Mwen pral jwenn frè mwen yo nan pèyi Lejip. Mwen pral wè si yo la toujou. Jetwo di

19 Moyiz: -Ale ak kè poze. Antan Moyiz nan peyi Madyan, Seyè a di l': -Koulye a, tounen nan

20 peyi Lejip, paske tout moun ki t'ap chache touye ou yo fin mouri. Moyiz pran madanm li ak pitit gason l' yo, li mete yo sou bourik, epi li tounen nan peyi Lejip. Moyiz te gen baton Bondye a

21 nan men l'. Seyè a di Moyiz konsa: -Koulye a, ou wè w'ap tounen nan peyi Lejip. Gade byen. Se pou ou fè devan farawon an tout mirak mwen ba ou pouvwa fè yo. Mwen menm, m'ap fè l' kenbe

22 tèt avèk ou, li p'ap vle kite pèp la ale. W'a di farawon an: Men sa Seyè a di: Izrayèl se pitit mwen,

23 se premye pitit mwen. Mwen di ou kite pitit mwen an ale fè wout li pou l' ka fè yon sèvis pou

24 mwen. Si ou refize kite l' ale, mwen menm m'ap touye premye pitit gason ou lan. ¶ Pandan vwayaj la, Moyiz rete pase lannwit yon kote. Seyè a vin atake Moyiz. Li t'ap chache touye l'.

25 Sefora pran yon moso ròch byen file, li koupe pwent po ti kòk pitit gason l' lan, li voye l' jete

26 nan pye Moyiz. Epi li di: -Se yon mari san ou ye pou mwen. Apre sa, Seyè a kite Moyiz. Lè sa

27 a, se poutèt sikonsizyon an Sefora te di ou se yon mari san pou mwen. Seyè a di Arawon: -Ale kontre Moyiz nan dezè a. Arawon pati, li kontre Moyiz sou mòn Bondye a. Li pase bra l' nan kou

28 l'. Moyiz di Arawon tou sa Seyè a te di l' anvan li te voye l' la. Li fè l' konnen tout mirak Seyè

29 a te ba li lòd fè. Moyiz ak Arawon pati ansanm, yo sanble tout chèf fanmi pèp Izrayèl la.

30 Arawon di yo tou sa Seyè a te di Moyiz. Moyiz menm fè tout mirak yo devan tout pèp la. Pèp

31 la vin kwè yo. Lè yo tande Seyè a te vin vizite yo, li te wè mizè y'ap pase a, yo tonbe ajenou, yo bese tèt yo jouk atè pou adore Bondye.

Chapter 5

1 ¶ Apre sa, Moyiz ak Arawon ale bò kote farawon an. Yo di l' konsa: -Men sa Seyè a, Bondye pèp Izrayèl la, voye di ou: Kite pèp mwen an ale pou yo ka fè yon fèt pou mwen nan dezè a.

2 Farawon an reponn: -Kilès ki Seyè a pou m' ta swiv lòd li, pou m' kite pèp Izrayèl la ale? Mwen pa konnen Seyè sa a. Mwen p'ap kite pèp Izrayèl la al ankenn kote. 3 ¶ Moyiz ak Arawon di l': -Bondye ebre yo te parèt devan nou. Tanpri, kite n al fè yon ti vwayaj nan dezè a. Lè n'a fin mache pandan twa jou, n'a rete pou n' touye bèt n'ap ofri bay Seyè a, Bondye nou an. Si nou pa fè sa, l'a voye move maladi sou nou, osinon l'a fè nou mouri nan lagè. 4 Wa Lejip la di Moyiz ak Arawon: -Poukisa nou vle fè pèp la kite travay li? Tounen nan travay nou! 5 Farawon an di ankò: -Gade. Nou wè jan pèp sa a vin pi plis pase moun peyi a. Koulye a atò, nou ta vle pou yo kite travay yo?

6 Menm jou sa a, farawon an rele moun peyi Lejip ki te chèf kòve yo ansanm ak moun pèp Izrayèl ki te fòmman yo, li ba yo lòd sa a: 7 -Pa janm bay moun sa yo pay ankò pou yo fè brik, jan nou te konn fè l' la. Se yo menm ki pou al ranmase pay yo bezwen. 8 Men, se pou yo founi menm valè brik yo te konn bay anvan an, san manke yonn. Se yon bann parese yo ye. Se poutèt sa y'ap kriye, y'ap di: O wi, ann al ofri bèt pou nou touye bay Bondye nou an. 9 Fè yo travay pi rèd. Pa kite yo poze menm. Konsa yo p'ap gen tan pou yo koute tout radòt moun ap vin di yo. 10 ¶ Chèf kòve yo ak fòmman yo vin di pèp la: -Men sa farawon an voye di nou: Li p'ap ban nou pay ankò. 11 Se nou menm ki pou al ranmase pay kote nou ka jwenn. Men, se toujou menm valè brik la pou nou bay.

12 Se konsa, pèp la gaye toupatou nan peyi Lejip ap chache zèb pou fè pay. 13 Chèf kòve yo te deyè yo tout tan, yo t'ap di yo: -Se pou nou fè menm valè brik chak jou menm jan ak lè yo te konn ban nou pay la. 14 Chèf kòve farawon yo te mete kèk moun pèp Izrayèl pou sèvi fòmman. Ata fòmman sa yo te anba makak tou. Chèf kòve yo t'ap mande yo: -Poukisa ni ayè ni jòdi a, nou pa t' bay menm valè brik nou te konn fè anvan an? 15 ¶ Lè sa a, fòmman yo ki te menm ras ak moun pèp Izrayèl yo t al plenyen bay farawon an. Yo di l': -Monwa, poukisa ou fè moun k'ap sèvi ou yo sa?

16 Yo pa ban nou pay ankò. Atousa, se tout tan y'ap mande nou pou nou fè brik. Lèfini, yo mete nou anba makak. Men, se moun pa ou yo ki antò wi, monwa. 17 Farawon an reponn yo: -Se yon bann parese nou ye. Se poutèt sa n'ap di: O wi, kite n al ofri bèt pou nou touye bay Seyè a. 18 Al nan pye travay nou, tandè! Yo p'ap ban nou pay ankò. Degaje nou bay menm kantite brik la.

19 Fòmman yo ki te menm ras ak moun pèp Izrayèl yo vin wè yo te nan yon move sitiyasyon lè yo mande yo pou yo fè menm valè brik yo te konn fè a chak jou, san manke yonn. 20 Antan y'ap soti

21
 kay farawon an, yo kontre Moyiz ak Arawon ki t'ap tann yo. Yo di yo: -Se pou Seyè a wè sa nou fè la a. Se pou l' pini nou. Paske se nou menm ki lakòz ni farawon an ni moun k'ap sèvi l' yo pa vle wè pèp Izrayèl la. Nou mete yon nepe nan men yo pou yo fini ak pèp la. 22
 Lè sa a, Moyiz tounen al jwenn Seyè a ankò, li di l': -Seyè, poukisa w'ap maltrete pèp la konsa? Poukisa ou te voye m'? 23
 Depi menm lè mwen t al bò kote farawon an pou m' pale avè l' pou ou a, se maltrete l'ap maltrete pèp ou a. Epi ou pa fè anyen pou delivre pèp la.

Chapter 6

1 ¶ Seyè a di Moyiz konsa: -Se koulye a ou pral wè sa m' pral fè farawon an. Mwen pral fè l' santi fòs ponyèt mwen. Vle pa vle, l'ap kite yo ale. Wi, m'ap fòse l' sitèlman, se mete l'ap mete yo deyò nan peyi l' a. 2
 Bondye pale ak Moyiz, li di l': -Se mwen menm ki Seyè a. 3
 Mwen te fè Abraram, Izarak ak Jakòb konnen m' sou non Bondye ki gen tout pouvwa a. Mwen pa t' fè yo konnen m' sou lòt non mwen an, ki vle di: Seyè a. 4
 Mwen te pase yon kontra ak yo, mwen te pwomèt pou m' te ba yo peyi Kanaran an, peyi kote yo te viv tankou etranje a. 5
 Koulye a, mwen tandè jan pèp Izrayèl la ap plenn. Moun peyi Lejip yo fè yo tounen esklav. Mwen vin chonje kontra mwen te pase ak yo a. 6
 Men sa ou pral di moun pèp Izrayèl yo: Se mwen menm menm ki Seyè a. M'ap ban nou libète nou, m'ap wete nou nan travay di moun peyi Lejip yo ap fòse nou fè a. M'ap delivre nou anba esklavaj kote yo mete nou an. M'ap lonje bra m' pou m' delivre nou, pou pini moun peyi Lejip yo byen pini. 7
 M'ap adopte nou pou pèp mwen, mwen menm m'a Bondye nou. N'a konnen se mwen menm Seyè a, Bondye nou an, ki ban nou libète nou, ki wete nou nan travay di moun peyi Lejip yo ap fòse nou fè a. 8
 Apre sa, m'ap mennen nou tounen nan peyi mwen te sèmante m'ap bay Abraram, Izarak ak Jakòb la. Se mwen menm Seyè a k'ap ban nou peyi sa a pou l' rele nou chèmèt. 9
 Moyiz di pèp Izrayèl la sa, men yo pa t' vle kwè l', paske yo te about. Esklavaj la te peze lou sou yo. 10
 ¶ Lè sa a, Seyè a di Moyiz konsa: 11
 -Ale bò kote farawon an, wa Lejip la. Di l' konsa pou l' kite pèp Izrayèl la soti kite peyi l' la. 12
 Men, Moyiz di Seyè a: -Ata pèp Izrayèl la pa t' koute m', atò se farawon an ki ta koute m'? Mwen tou pa konn pale. 13
 Seyè a pale ak Moyiz ansanm ak Arawon. Li ba yo lòd pale ak pèp Izrayèl la ansanm ak farawon an, wa Lejip la, pou fè yo konnen yo tou de te resevwa lòd fè pèp Izrayèl la soti kite peyi Lejip. 14
 ¶ Men non chèf fanmi pèp Izrayèl yo: Woubenn, premye pitit Izrayèl la. Se li ki papa Enòk, Palou, Ezwon ak Kami. Se

¹⁵
 tout fanmi Woubenn lan sa. Apre li vin Simeyon. Men non pitit Simeyon yo: Jemwèl, Jamen, Arad, Jaken, Taoska ak Sayil, yon pitit li te fè ak yon fanm moun peyi Kanaran. Se tout fanmi Simeyon yo sa.

¹⁶
 Apre li vin Levi. Men non pitit Levi yo ak tout pitit yo: Gèchon, Keyat ak Merari. Levi te viv santrannsetan (137 an).

¹⁷
 Men pitit Gèchon yo ak tout fanmi yo: Libni ak Chimeyi.

¹⁸
 Men pitit Keyat yo: Amram, Jizeya, Ebwon ak Ouzyèl. Keyat te viv antou santranntwazan (133 an).

¹⁹
 Men pitit Merari yo: Makli ak Mouchi. Se tout branch fanmi Levi yo sa ansanm ak pitit yo.

²⁰
 Amram te marye ak Jokebèd, ki matant li bò papa. Jokebèd te fè Arawon ak Moyiz pou li. Amram te viv antou santrannsetan (137 an).

²¹
 Men pitit Jizeya yo: Kore, Nefèg ak Zikri.

²²
 Men pitit Ouzyèl yo: Mikayèl, Elsafan ak Sitri.

²³
 Arawon te marye ak Elicheba, pitit fi Aminadab, sè Nakchon. Elicheba te fè Nadab, Abiyon, Eleaza ak Itama pou Arawon.

²⁴
 Men non pitit Kore yo: Asi, Elkana ak Abyazaf. Se tout fanmi Kore yo sa.

²⁵
 Eleaza, pitit Arawon an, te marye ak yonn nan pitit fi Poutyèl yo, ki te fè Fineas pou li. Men non tout chèf fanmi Levi yo ak tout moun pa yo.

²⁶
 Se menm Arawon sa a ansanm ak Moyiz Seyè a te di: Fè pitit Izrayèl yo soti kite peyi Lejip la, gwoup pa gwoup.

²⁷
 Se yo menm tou ki t al di farawon an, wa Lejip la, pou l' fè pèp Izrayèl la soti kite Lejip. Wi, se Arawon sa a avèk Moyiz sa a ki te fè tou sa.

²⁸
 Lè Seyè a te pale ak Moyiz nan peyi Lejip la, men sa li te di l':

²⁹
 -Se mwen menm ki Seyè a! Tou sa mwen di ou la a, se pou ou rapòte l' bay farawon an, wa Lejip la.

³⁰
 Men Moyiz koupe pawòl nan bouch Seyè a, li di l': -Pawòl pa vin nan bouch mwen fasil. Ou kwè farawon an pral chita tande m'?

Chapter 7

¹
 ¶ Seyè a di Moyiz konsa: -Gade! Mwen pral fè ou tounen Bondye pou farawon an. Arawon, frè ou la, pral pale avè l' pou ou tankou yon pwofèt.

²
 W'a di Arawon tou sa mwen te ba ou lòd di.

³
 Li menm, l'a repete l' bay farawon an pou farawon an voye pitit Izrayèl yo pati kite peyi a. Mwen menm menm, m'ap fè farawon an fè tèt di. Konsa, m'a fè plis mirak ak plis mèvèy toujou nan peyi Lejip la.

⁴
 Farawon an p'ap koute nou. Lè sa a, m'a frape peyi Lejip la. m'a pini l' byen pini. m'a pran pitit Izrayèl yo, sòlda mwen yo, pèp mwen an, m'ap fè yo soti kite peyi Lejip.

⁵
 Lè m'a frape

peyi Lejip, lè m'a fè pitit Izrayèl yo soti nan mitan yo, moun peyi Lejip yo va konnen se mwen
 menm menm ki Seyè a vre. ⁶ Moyiz ak Arawon te fè tou sa Seyè a te ba yo lòd fè. Wi, yo fè tou
 sa li te di yo fè a. ⁷ Moyiz te gen katrevenzan, Arawon te gen katrentwazan lè yo t al pale ak
 farawon an. ⁸ ¶ Seyè a di Moyiz ak Arawon konsa: ⁹ -Si farawon an mande nou fè yon mirak pou
 moutre ki moun nou ye, ou menm Moyiz w'a di Arawon pran baton l' lan, voye l' atè devan farawon
 an. ¹⁰ Baton an va tounen yon koulèv. Moyiz ak Arawon al bò kote farawon an. Yo fè sa Seyè a
 te ba yo lòd fè a. Arawon voye baton l' lan devan farawon an ak devan tout moun farawon yo. Baton
 an tounen yon koulèv. ¹¹ Men farawon an rele nèg save l' yo ak divinò l' yo. Yo menm tou, avèk
 maji yo, yo te rive fè menm bagay la tou. ¹² Yo voye baton pa yo atè, baton yo tounen koulèv tou.
 Men, baton Arawon an vale tout lòt baton yo. ¹³ Farawon an t'ap fè tèt di toujou. Li pa t' vle koute
 Moyiz ak Arawon, tankou Seyè a te di a. ¹⁴ ¶ Seyè a di Moyiz konsa: -Farawon an ap fè tèt di
 toujou. Li pa vle kite pèp la ale. ¹⁵ Ale bò kote farawon an denmen maten, lè li pral soti pou l' al
 bò gwo larivyè Nil la. Al tann li bò larivyè a. Baton ki te tounen koulèv la, w'a kenbe l' nan men
 ou. ¹⁶ W'a di farawon an: Seyè a, Bondye ebre yo, te voye m' di ou konsa kite pèp li a ale pou yo
 ka fè yon sèvis pou li nan dezè a. Men, jouk koulye a ou pa vle koute l'. ¹⁷ Jòdi a, men sa Seyè a
 di: mwen pral fè ou konnen se mwen menm ki Seyè a. Mwen pral frape dlo gwo larivyè a avèk
 baton ki nan men m' lan, dlo a pral tounen san. ¹⁸ Tout pwason yo pral mouri, dlo a pral santi move,
 moun peyi Lejip yo p'ap ka bwè dlo ladan li ankò. ¹⁹ Seyè a di Moyiz ankò: -Di Arawon pran baton
 l' lan, lonje l' sou tout dlo ki nan peyi Lejip la: larivyè, kannal, letan, m'a dlo, wi, sou tout dlo ki
 genyen. Dlo yo va tounen san. Konsa va gen san sou tout peyi a, menm nan ganmèl yo ak nan
 kannari yo. ²⁰ Moyiz ak Arawon fè sa Seyè a te ba yo lòd fè a. Arawon leve baton l' lan, li frape
 dlo gwo larivyè a devan farawon an ak devan tout moun farawon yo. Tout dlo gwo larivyè a tounen
 san. ²¹ Tout pwason nan larivyè a mouri. Dlo a vin santi move. Moun peyi Lejip yo pa t' kapab
 pran dlo ladan l' pou yo bwè ankò. Te gen san toupatou nan peyi a. ²² Men, majisyen peyi Lejip
 yo te rive fè menm bagay la tou avèk maji yo. Farawon an menm t'ap fè tèt di pi rèd. Li pa koute
 Moyiz ak Arawon, tankou Seyè a te di a. ²³ Farawon an vire do ba yo, l' al lakay li tankou si anyen
 pa t' rive. ²⁴ Moun peyi Lejip yo pran fouye twou sou bò gwo larivyè a pou yo te ka jwenn dlo
 pròp pou yo bwè, paske yo pa t' kapab bwè dlo gwo larivyè a. ²⁵ Apre Seyè a te fin frape gwo
 larivyè a, li kite sèt jou pase.

Chapter 8

¹ ¶ Apre sa, Seyè a di Moyiz konsa: -Ale kote farawon an. W'a di l': Men sa Seyè a di: Kite pèp mwen an ale pou l' kapab fè sèvis pou mwen. ² Koute byen. Si ou derefize kite yo ale, mwen pral lage krapo sou tout peyi a pou pini ou. ³ Gwo larivyè a pral plen krapo. Yo pral soti nan larivyè a, y'ap anvayi toupato, y'ap antre lakay ou, anndan chanm ou, y'ap moute jouk nan kabann ou. Y'ap antre lakay moun pa ou yo, lakay tout pèp ou a, nan fou kote yo fè pen, nan ganmèl kote yo pare pat. ⁴ Y'ap vole sou ou, sou pèp ou a, sou tout moun pa ou yo. ⁵ Seyè a di Moyiz: -Di Arawon lonje men li avèk baton l' lan sou larivyè yo, sou kannal yo ak sou m'a dlo yo. Fè krapo moute kouvri peyi Lejip la. ⁶ Arawon lonje men l' sou tout dlo nan peyi Lejip la. Epi krapo moute kouvri tout peyi a. ⁷ Men majisyen peyi Lejip yo, avèk maji yo, te rive fè menm bagay la tou. Yo fè krapo moute vin sou peyi Lejip la. ⁸ Farawon an rele Moyiz ak Arawon, li di yo: -Lapriyè Seyè a, mande l' pou l' chase krapo sa yo soti sou mwen ak sou pèp mwen an. Apre sa, m'a kite pèp ou a ale pou yo ka touye bèt y'ap ofri bay Seyè a. ⁹ Lè sa a Moyiz di farawon an: -Se ou menm, farawon, ki konnen kilè ou vle pou m' lapriyè Seyè a pou ou, pou moun pa ou yo ansanm ak pèp ou a. Wi, se ou ki pou di m' kilè ou vle pou Seyè a wete krapo sa yo lakay ou ak nan kay pèp ou a, pou yo rete nan larivyè a ase. ¹⁰ Farawon an reponn: -W'a fè sa denmen. Moyiz di li: -Sa va pase jan ou di l' la, pou ou sa konnen pa gen Bondye tankou Seyè a, Bondye nou an. ¹¹ Krapo yo pral soti lakay ou, y'a wete kò yo sou ou, sou moun pa ou yo ak sou pèp ou a. Se nan gwo larivyè a ase va gen krapo. ¹² Moyiz ak Arawon soti lakay farawon an. Moyiz lapriyè Seyè a ak tout kè l' pou krapo li te voye sou farawon yo. ¹³ Seyè a fè sa Moyiz te mande l' la: krapo yo mouri toupato, nan kay, nan lakou, nan jaden. ¹⁴ Moun peyi Lejip yo ranmase yo fè gwo pil. Toupato nan peyi a te santi move ak krapo mouri yo. ¹⁵ Lè farawon an wè yo te ba l' yon souf, li konmanse fè tèt di ankò. Li pa koute Moyiz ak Arawon, tankou Seyè a te di a. ¹⁶ ¶ Seyè a di Moyiz konsa: -Di Arawon lonje baton l' lan, frape pousyè tè a. Pousyè a va tounen vèmin nan tout peyi Lejip la. ¹⁷ Moyiz ak Arawon fè sa vre. Arawon lonje men li avèk baton an, li frape pousyè tè a. Pousyè a tounen vèmin sou tout moun ak sou tout bèt. Tout pousyè tè a tounen vèmin nan tout peyi Lejip la. ¹⁸ Majisyen yo vin ankò ak maji yo pou yo te fè menm bagay la tou. Men, fwa sa a, yo pa t' kapab. vèmin yo te sou tout moun ak sou tout bèt. ¹⁹ Majisyen yo di farawon an: -Sa se travay Bondye. Men farawon an

t'ap fè tèt di toujou. Li pa t' vle koute Moyiz ak Arawon, tankou Seyè a te di a. ¶ Seyè a di Moyiz ankò: -Leve granmaten, ale jwenn farawon an lè li pral larivyè a. W'a di l': men sa Seyè a di: Kite

20
pèp mwen an ale, pou yo ka fè sèvis pou mwen. 21 Si ou pa kite pèp mwen an ale, mwen pral voye mouchavè sou ou, sou moun pa ou yo, sou tout pèp ou a ak nan tout kay yo. Mouchavè pral plen

22
kay moun peyi Lejip yo, yo pral kouvri tout peyi a. Men jou sa a, m'a fè yon bagay pou peyi Gochenn kote pèp mwen an rete a. p'ap gen yon mouchavè la. Konsa, w'a konnen se mwen menm,

23
Seyè a, k'ap travay nan peyi a. m'a veye pou sa k'ap rive pèp ou a pa rive pèp mwen an. Se

24
denmen mwen pral fè mèvèy sa a. Seyè a fè sa vre jan l' te di l' la: yon kantite mouchavè desann sou kay farawon an, sou kay moun pa l' yo ak sou tout peyi a. Mouchavè t'ap devaste tout peyi

25
Lejip la. Lè sa a, farawon an fè rele Moyiz ak Arawon, li di yo: -Nou mèt al ofri bèt pou touye

26
pou Bondye nou an, men n'ap fè l' isit la nan peyi a. Moyiz reponn li: -Li p'ap bon pou nou fè l' konsa, paske moun peyi Lejip yo ka ofiske lè y'a wè ki kalite bèt nou touye pou ofri bay Seyè a, Bondye nou an. Si nou ofri bagay sa yo devan moun peyi Lejip yo, y'a ka touye nou ak kout ròch.

27
Se pou nou mache twa jou nan dezè a. Se la n'a touye bèt n'ap ofri bay Seyè a, Bondye nou an,

28
jan li te di nou an. Farawon an di li: -Bon! M'ap kite nou al touye bèt n'ap ofri bay Seyè a, Bondye

29
nou an, nan dezè a, men se pa pou nou al twò lwen. Lèfini, lapriyè pou mwen tou. Moyiz di l' konsa: -Kou m' soti isit la, mwen pral lapriyè Seyè a. Denmen mouchavè yo ap soti sou ou ansanm ak sou moun pa ou yo ak sou tout pèp la. Yo pral byen lwen. Men, piga ou twonpe nou ankò. Pa

30
refize kite pèp la al ofri bèt pou yo touye bay Seyè a. Moyiz soti lakay farawon an, l' al lapriyè

31
Seyè a. Seyè a fè sa Moyiz te mande l' la. Li fè mouchavè yo soti sou farawon an, sou tout moun

32
pa l' yo ansanm ak sou tout pèp la. Li fè yo ale byen lwen. Pa yon mouchavè pa t' rete. Men, menm jou sa a, farawon an fè tèt di ankò, li pa t' vle kite pèp la ale.

Chapter 9

1
¶ Seyè a di Moyiz konsa: -Ale bò kot farawon an, w'a di l': Men sa Seyè a, Bondye pèp ebre a, voye di ou: Kite pèp mwen an ale pou yo ka fè sèvis pou mwen. 2 Si ou derefize kite yo ale, si

3
ou kenbe yo toujou, men sak pral rive: M'ap leve men m' sou bèt ou gen nan jaden ou yo: chwal,

4
bourik, chamo, bèf, mouton, kabrit. Yon gwo maladi pral tonbe sou yo. Men m'a veye pou sa ki

rive bèt moun peyi Lejip yo pa rive bèt moun pèp Izrayèl yo, pou ankenn bèt moun pèp Izrayèl yo pa mouri. ⁵ Seyè a fikse jou pou l' fè bagay sa a. Li di se denmen l'ap fè sa nan tout peyi a. ⁶ Nan denmen vre, Seyè a fè sa l' te di li t'ap fè a: tout bèt moun peyi Lejip yo mouri. Men, pa yonn nan bèt moun Izrayèl yo pa t' mouri. ⁷ Farawon an voye pran nouvèl sak pase: li vin konnen pa t' gen yonn nan bèt moun Izrayèl yo ki te mouri. Men, farawon an t'ap fè tèt di toujou. Li pa t' vle kite pèp la ale. ⁸ ¶ Apre sa, Seyè a di Moyiz ak Arawon: -Plen de men nou ak sann dife. Se pou Moyiz voye sann lan jete anlè devan farawon an. ⁹ Sann lan pral gaye tankou pousyè pou l' kouvri tout peyi Lejip la. Toupatou li pral fè yon kantite bouton leve sou tout moun ak sou tout bèt nan peyi a. Lèfini, bouton yo ap pete, y'ap fè malenng. ¹⁰ Yo pran sann dife a, yo parèt devan farawon an. Moyiz voye sann lan jete anlè. Sann lan fè bouton leve sou tout moun ak sou tout bèt. Epi bouton yo pete fè malenng. ¹¹ Ata majisyen yo pa t' kapab parèt devan Moyiz, paske yo te kouvri ak malenng tou tankou tout moun peyi Lejip yo. ¹² Men Seyè a te fè farawon an fè tèt di pi rèd. Farawon an pa t' koute Moyiz ak Arawon, tankou Seyè a te di Moyiz la. ¹³ ¶ Seyè a di Moyiz konsa: -Leve granmaten, al parèt devan farawon an. W'a di l': Men sa Seyè a, Bondye pèp ebre a, voye di ou: Kite pèp mwen an ale pou yo ka al fè sèvis pou mwen. ¹⁴ Paske, fwa sa a, mwen pral voye tout kalite malè mwen konn fè yo sou ou menm menm, sou moun pa ou yo ak sou tout pèp ou a. Konsa, w'a konnen pa gen tankou m' sou tout latè. ¹⁵ Si mwen te lonje men m' pou m' te lage lanmò sou ou ansanm ak tout pèp ou a, nou tout nou te disparèt nèt sou latè. ¹⁶ Men, mwen kite nou viv pou nou kapab wè pouvwa mwen, pou moun ka nonmen non m' sou tout latè. ¹⁷ Men w'ap pran pòz awogan ou avèk pèp mwen an, ou pa vle kite yo ale. ¹⁸ Koute! Fwa sa a, denmen mwen pral fè lagrèl tonbe tankou lapli, bagay moun poko janm wè nan peyi Lejip, depi peyi a peyi jouk jounen jòdi a. ¹⁹ Koulye a, bay lòd pou yo pran tout bèt nou gen nan jaden ak tout lòt bagay nou gen deyò mete yo anndan kay pou pwoteje yo. Paske, yon gwo lagrèl pral tonbe sou tout moun ak sou tout bèt ki deyò. Yo pral mouri. ²⁰ Te gen kèk moun nan moun pa farawon yo ki te pè lè yo tandè sa Seyè a te di. Yo fè tout domestik yo ansanm ak tout bèt yo antre anba kay. ²¹ Men, gen lòt ki pa t' okipe sa Seyè a te di. Yo kite tout domestik yo ak tout bèt yo deyò. ²² ¶ Seyè a di Moyiz konsa: -Leve men ou anlè. Lagrèl pral tonbe sou tout peyi Lejip la, sou tout moun ki deyò, sou tout bèt ak sou tout plant ki nan jaden. ²³ Moyiz lonje baton l' lan anlè nan syèl la. Seyè a voye loraj, lagrèl ak zèklè. Loraj la tonbe anpil kote. Wi, Seyè a voye lagrèl sou tout peyi Lejip la. ²⁴ Lagrèl t'ap tonbe, zèklè t'ap fè yanyan nan syèl la. Se te pi gwo kout tan ki te tonbe sou peyi a depi peyi a

²⁵ peyi. Lagrèl tonbe toupatou nan peyi Lejip la. Li tonbe sou tou sa ki te deyò, sou tout moun ak
 sou tout bèt. Li tonbe sou tout plant ki nan jaden, li kraze tout pyebwa. ²⁶ Se sèl nan peyi Gochenn
 lan lagrèl la pa t' tonbe. Se la moun pèp Izrayèl yo te rete. ²⁷ Farawon an fè rele Moyiz ak Arawon,
 li di yo konsa: -Fwa sa a, mwen rekonèt tò mwen. Se Seyè a ki gen rezon. Se mwen menm ak pèp
 mwen an ki antò. ²⁸ Lapriyè Seyè a pou l' fè loraj la sispann, pou l' fè lagrèl la rete. Mwen pwomèt
 pou m' kite nou ale. Nou pa bezwen rete ankò. ²⁹ Moyiz di l' konsa: -Soti m' soti lavil la, mwen
 pral lapriyè nan pye Seyè a. Loraj la va sispann, p'ap gen lagrèl ankò. Konsa w'a konnen tè a se
 pou Seyè a li ye. ³⁰ Men mwen konnen ni ou menm, ni moun pa ou yo, nou poko ap respekte Seyè
 a, Bondye a. ³¹ Tout pye koton swa yo ak tout jaden lòj yo te boule. Lòj la te deja fè grap, koton
 yo t'ap fleri. ³² Men ble ak pitimi pa t' gate, paske yo toujou an reta sou lòt plant yo. ³³ Moyiz soti
 lakay farawon an, l' al andeyò lavil la. Li lapriyè nan pye Seyè a. Loraj la sispann, lagrèl la rete.
 pa t' gen lapli ankò. ³⁴ Lè farawon an wè lapli a, lagrèl la ak loraj la sispann, li kontinye fè peche
 toujou. Li fè tèt di, li menm ansanm ak tout moun pa l' yo. ³⁵ Nan fè tèt di sa a, li pa t' kite moun
 pèp Izrayèl yo ale, jan Seyè a te fè Moyiz al di l' la.

Chapter 10

¹ ¶ Seyè a di Moyiz ankò: -Ale bò kot farawon an. Se mwen menm ki fè l' gen tèt di, li menm
 ansanm ak moun pa l' yo, pou m' fè yo wè mèvèy mwen ka fè nan mitan yo. ² Konsa tou, n'a rakonte
 pitit nou yo ak pitit pitit nou yo sa mwen te fè moun peyi Lejip yo pase ak kalite mèvèy mwen te
 fè nan mitan yo. Lè sa a nou tout n'a konnen se mwen menm menm ki Seyè a. ³ Se konsa Moyiz
 ak Arawon ale bò kote farawon an. Yo di l': -Men sa Seyè a, Bondye pèp ebre a, voye di ou: Kilè
 w'a aprann soumèt tèt ou devan mwen? Kite pèp mwen an ale pou l' ka fè yon sèvis pou mwen.
⁴ Si ou refize kite pèp mwen an ale, men sa m' pral fè: Denmen, mwen pral voye krikèt vèt sou tout
 peyi a. ⁵ Yo pral kouvri tout tè a, jouk moun p'ap ka wè tè a ankò. Yo pral devore ti rèl lagrèl te
 kite pou nou an. y'a devore tout pyebwa ki nan jaden nou yo. ⁶ Y'ap anvayi tout kay ou yo, kay
 tout moun pa ou yo ak kay tout moun nan peyi a. Se bagay granpapa nou yo ak zansèt nou yo pa
 t' janm wè depi yo fèt jouk jounen jòdi a. Apre sa, Moyiz vire do l', li soti kay farawon an. ⁷ Moun
 pa farawon yo vin di l': -Kilè nonm sa a va sispann ban nou pwoblèm? Kite moun yo ale non. Kite

⁸
 yo al fè sèvis pou Bondye yo a. Ou pa wè jan peyi Lejip la ap fini! Se konsa yo fè Moyiz ak Arawon tounen vin kote farawon an. Farawon an di yo: -Nou mèt al fè sèvis pou Seyè a, Bondye

⁹
 nou an. Kilès ki prale? Moyiz reponn li: -Nou prale ak tout timoun yo, ak tout granmoun yo, ak tout pitit gason nou yo, ak tout pitit fi nou yo ansanm ak bèf, mouton ak kabrit nou yo, paske se

¹⁰
 yon gwo sèvis pou n' fè pou Seyè a. Farawon an di yo: -Gade jan nou gen move lide dèyè tèt nou! Mwen ta swete pou Seyè a ede nou vre! Men, mwen p'ap kite nou ale ansanm ak timoun yo.

¹¹
 Non. Sa p'ap pase konsa. Se nou menm gason yo ase ki mèt ale pou fè sèvis pou Seyè a. Se pa

¹²
 sa nou te mande? Lè l' fin di yo sa, li fè mete yo deyò lakay li. ¶ Seyè a di Moyiz: -Lonje men ou sou peyi Lejip la pou fè krikèt yo vini sou li. Y'ap vini, y'ap devore tout fèy bwa nan peyi a. Wi,

¹³
 y'a devore tou sa lagrèl te kite. Moyiz lonje baton l' lan sou peyi Lejip la. Seyè a fè yon van nòde soufle sou peyi a. Van an soufle tout yon jounen ak tout yon nwit. Nan maten, van an pote krikèt

¹⁴
 vèt yo vini. Krikèt yo tonbe sou peyi Lejip la, yo poze toupatou nan peyi a. Moun pa t' janm wè

¹⁵
 kantite krikèt konsa, epi se bagay yo p'ap janm wè ankò. Krikèt yo kouvri tè a nèt. Tè a vin tou nwa ak krikèt. Krikèt yo manje tou sak t'ap pouse nan peyi a, tout fwi ki te nan pyebwa yo, tou sa lagrèl te kite. pa t' rete yon ti fèy vèt nan pyebwa yo ankò nan tout peyi Lejip la. Tout jaden te pèdi

¹⁶
 nèt. Lè sa a, farawon an prese fè rele Moyiz ak Arawon, li di yo: -Mwen peche kont Seyè a,

¹⁷
 Bondye nou an, mwen peche kont nou menm tou. Tanpri, padonnen peche m' fwa sa a. Lapriyè Seyè a, Bondye nou an, ankò pou l' wete chatiman sa a sou mwen. Se touye chatiman sa a ap touye

¹⁸
 m'! Moyiz soti kay farawon an. Li lapriyè Seyè a.

¹⁹
 Seyè a fè yon gwo van lwès soufle fwa sa a. Van an pote tout krikèt yo al jete nan lanmè Wouj la. Pat rete yon sèl grenn krikèt nan tout peyi

²⁰
 Lejip la. Men Seyè a fè farawon an fè tèt di ankò. Farawon an pa kite moun pèp Izrayèl yo ale.

²¹
 ¶ Seyè a di Moyiz ankò: -Lonje men ou anlè pou fènwa kouvri peyi Lejip la, yon fènwa sitèlman

²²
 pwès moun ta ka santi li anba men yo. Moyiz leve men li anlè, epi yon fènwa byen pwès desann

²³
 kouvri tout peyi Lejip la pandan twa jou. Moun peyi Lejip yo fè twa jou yonn pa t' ka wè lòt,

²⁴
 pesonn pa mete tèt deyò. Men, te gen klète kote moun pèp Izrayèl yo te rete a. Farawon an fè rele Moyiz, li di l' konsa: -Nou mèt ale fè sèvis pou Seyè a. Nou mèt ale ak timoun nou yo. Men

²⁵
 mouton nou yo, kabrit nou yo ak bèf nou yo ap rete isit la. Moyiz reponn li: -Bon, lè sa a, se ou

²⁶
 menm ki pral ban nou bèt pou nou touye pou nou boule pou Seyè a, Bondye nou an? Tout bèt nou fèt pou ale ak nou. Nou p'ap kite yonn dèyè. Paske, se ladan yo pou nou pran sa nou bezwen pou fè sèvis pou Seyè a, Bondye nou an. Tout tan nou pa rive, nou poko konnen kisa nou pral

chwazi pou ofri bay Seyè a. ²⁷ Men Seyè a fè farawon an fè tèt di pi rèd toujou. Farawon an pa t' vle kite yo ale. ²⁸ Farawon an di Moyiz konsa: -Wete kò ou devan m'. Gade! Pa janm parèt devan m' ankò, paske jou ou ta parèt devan m' ankò, m'ap disparèt ou. ²⁹ Moyiz reponn li: -Jan ou vle! Mwen p'ap janm parèt devan ou ankò.

Chapter 11

¹ ¶ Seyè a di Moyiz: -Mwen pral voye yon lòt malè sou farawon an ak sou peyi Lejip la. Apre sa, l'ap kite nou ale. Wi, lè l'a pare pou l' kite nou ale a, se mete l'ap mete nou deyò. ² Pale ak pèp Izrayèl la. Se pou yo chak mande vwazen ak vwazen yo fè yo kado bagay yo genyen ki fèt an ajan osinon an lò. ³ Seyè a te fè moun peyi Lejip yo vin gen kè sansib pou moun pèp Izrayèl yo. Pou Moyiz menm, tout moun nan peyi a te gen gwo respè pou li. Moun farawon yo ansanm ak tout pèp la te respekte Moyiz anpil. ⁴ ¶ Moyiz di farawon an: -Men sa Seyè a di: Aswè a, nan mitan lannwit, m'ap pase kay moun peyi Lejip yo. ⁵ Tout premye pitit gason moun peyi Lejip yo pral mouri, depi premye pitit farawon an, ki chita sou fotèy la, jouk premye pitit gason dènye klas sèvant k'ap travay nan moulen. Premye pitit tout bèt pral mouri tou. ⁶ Pral gen yon sèl gwo rèl nan tout peyi a, rèl moun poko janm tandè, rèl moun p'ap janm tandè ankò. ⁷ Men, nan mitan pèp Izrayèl la, ou p'ap menm tandè yon chen wouke, paske ni moun ni bèt p'ap mouri la. Konsa, w'a konnen Seyè a fè ⁸ yon diferans ant pèp peyi Lejip la ak pèp Izrayèl la. Lè sa a, tout moun pa ou yo pral desann vin kote mwen. Y'ap bese tèt yo jouk atè devan mwen. y'a di m': Ale non, ou menm ansanm ak tou pèp ou a. Se lè sa a, m'a pati. Lèfini, Moyiz soti byen fache lakay farawon an. ⁹ Seyè a di Moyiz: -Farawon an p'ap koute ou. Konsa, m'a fè plis mèvèy toujou nan peyi Lejip. ¹⁰ Moyiz ak Arawon te fè tout mirak sa yo devan farawon an. Men farawon an pa t' vle kite moun pèp Izrayèl yo soti kite peyi a. Seyè a fè farawon an fè tèt di pi rèd toujou.

Chapter 12

¹ ¶ Antan Moyiz ak Arawon te nan peyi Lejip la, Seyè a di yo: ² -Se mwa sa a k'ap premye mwa pou nou nan lanne a. Se limenm k'ap anvan tout lòt mwa yo. ³ Pale tout moun pèp Izrayèl la. Di

yo: sou dizyèm jou mwa sa a, n'a pran yon ti mouton pou chak fanmi, tandè byen wi, yon ti mouton
 pou chak kay. ⁴ Si pa gen kont moun nan kay la pou manje tout ti mouton an, se pou yo mete tèt
 yo ansanm ak vwazinaj ki pi pre kay la. N'a kalkile kantite moun ki nesèsè pou manje mouton an,
 sa chak moun ka manje. ⁵ Se pou ti bèt nou chwazi a yon timal ki gen ennan, epi ki pa gen ankenn
 enfimite, li te mèt mouton, li te mèt kabrit. ⁶ N'a gade l' apa jouk sou katòzyèm jou mwa a. Jou sa
 a, nan aswè, tout moun Izrayèl yo va touye ti bèt la anvan li fin fè nwa. ⁷ N'a pran ti gout nan san
 bèt la, n'a pase l' sou de chanbrann pòt kay la ansanm ak sou travès lento pòt la, nan kay kote n'ap
 manje ti bèt la. ⁸ Menm nwit sa a, n'a boukannen vyann lan. Apre sa, n'a manje l' avèk pen ki fèt
 san ledven epi ak fèy lanman. ⁹ Piga nou manje vyann lan ni manke kwit ni bouyi. Se boukannen
 pou nou boukannen l' tout ankè ak tout tonbe a. ¹⁰ Pa kite anyen pou denmen maten. Si rete rès,
 se pou nou boule l' nan dife. ¹¹ Men ki jan pou nou ranje kò nou pou nou manje l': n'a mare ren
 nou, sapat nou nan pye nou, baton nou nan men nou. Se pou nou manje l' prese prese, paske se lè
 sa a Seyè a ap pase. ¹² Jou lannwit sa a, m'ap pase nan tout peyi Lejip la, m'ap touye tout premye
 pitit gason ak tout premye pitit bèt yo ki nan peyi a. M'ap regle tout bondye peyi Lejip yo. Se mwen
 menm ki Seyè a. ¹³ San nou pase sou pòt yo va make kay kote nou ye a. Lè m'a wè san an, m'a
 sote kay nou. Konsa, lè m'ap frape peyi Lejip la, chatiman an p'ap tonbe sou nou tou. ¹⁴ Jou sa a,
 se yon jou pou nou pa janm bliye. Se pou nou fete l' tankou yon fèt pou Seyè a, chak lè lè a va rive.
 Se pou nou pase yon lwa pou nou toujou fete fèt sa a, nou menm ak tout pitit pitit nou yo. ¹⁵ Pandan
 sèt jou, se pou nou manje pen ki fèt san ledven. Depi premye jou nan mwa a, n'a wete tout ledven
 anndan lakay nou, paske depi premye jou a, rive sou setyèm jou a, si yon moun gen malè manje
 pen ki gen ledven ladan l', se pou yo disparèt li nan mitan pèp Izrayèl la. ¹⁶ Sou premye jou a ak
 sou setyèm jou a, n'a reyini pou nou lapriyè. Jou sa yo, nou p'ap fè ankenn travay. Manje ase n'a
 fè pou tout moun manje. ¹⁷ N'a toujou fete fèt pen san ledven an, paske se jou sa a mwen te fè tout
 lame moun nou yo soti kite peyi Lejip. N'a toujou fete fèt sa a, de pitit an pitit tankou yon lwa ki
 la pou tout tan. ¹⁸ Nan premye mwa a, depi katòzyèm jou a nan aswè rive jouk sou venteyenyèm
 jou a nan aswè tou, se pen san ledven pou nou manje. ¹⁹ Pandan sèt jou sa yo, p'ap gen ledven
 lakay nou paske nenpòt moun ki va gen malè manje pen ki gen ledven, yo gen pou yo disparèt li
 nan mitan pèp Izrayèl la, kit se yon etranje, kit se yonn nan nou. ²⁰ Se pa pou nou manje pen ki
 gen ledven. Lakay nou, se pou tout moun manje pen san ledven. ²¹ ¶ Moyiz rele tout chèf fanmi
 pèp Izrayèl la, li di yo: -Se pou chak moun al chache yon ti mouton osinon yon ti kabrit pou yo

²²
 touye pou fèt delivrans lan pou fanmi nou. Apre sa, n'a pran yon branch izòp, n'a tranpe l' nan
 kivèt ki gen san bèt la. N'a pase l' sou de chanbrann pòt la ak sou travès lento a. Apre sa, piga pesonn
²³
 soti deyò lakay yo jouk li jou. Konsa, lè Seyè a va pase nan peyi Lejip la pou touye moun peyi
 Lejip yo, l'a wè san an sou chanbrann yo ak sou lento a, l'ap pase devan pòt la, li p'ap kite moun ki
²⁴
 reskonsab pou touye a antre lakay nou pou touye nou. N'a fè tout bagay sa yo sèvi tankou yon
²⁵
 lwa ki la pou tout tan, ni pou nou ni pou pitit nou yo. Lè n'a antre nan peyi Seyè a pral ban nou
²⁶
 an, jan l' te pwomèt la, se pou nou toujou fè seremoni sa a. Lè timoun nou yo va mande nou sa
²⁷
 seremoni sa a vle di, n'a reponn yo: Se fèt Delivrans lan n'ap fete pou Seyè a, paske li te sote
 kay moun pèp Izrayèl yo nan peyi Lejip, lè li t'ap touye moun peyi Lejip yo. Konsa li pa t' fè nou
 anyen. Apre tout pawòl sa yo, tout moun pèp Izrayèl yo met ajenou, yo bese tèt yo atè pou adore
²⁸
 Seyè a. Lèfini, yo leve, y' ale, yo fè tou sa Seyè a te bay Moyiz ak Arawon lòd fè a. Wi, yo fè
²⁹
 tout bagay jan li te bay lòd la. ¶ Nan mitan lannwit, Seyè a touye tout premye pitit gason moun
 peyi Lejip yo, depi premye pitit gason farawon an ki chita sou fotèy la, jouk premye pitit gason
³⁰
 prizonye ki te nan kacho. Tout premye pitit bèt yo tou te mouri. Jou lannwit sa a, farawon an
 leve, li menm, tout chèf li yo ansanm ak tout pèp peyi Lejip la. Yon gwo rèl pete toupato nan peyi
³¹
 Lejip, paske pa t' gen yon kay ki pa t' gen lanmò. Nan mitan lannwit lan, farawon an fè rele
 Moyiz ak Arawon, li di yo: -Leve, ale fè wout nou! Wete kò nou nan mitan pèp mwen an, nou
 menm ansanm ak moun pèp Izrayèl la. Ale, mwen di nou. Al fè sèvis pou Seyè a jan nou te di a.
³²
 Nou mèt pran mouton nou ak bèf nou yo, jan nou te di l' la. Epi mande Bondye pou l' beni mwen.
³³
 Moun peyi Lejip yo te cho cho dèyè moun pèp Izrayèl yo pou fè yo prese kite peyi a. Yo t'ap di:
³⁴
 -Si nou pa ale, nou tout ap mouri! Se konsa pèp Izrayèl la pran pa t' farin lan san yo pa t' ankò
 mete ledven ladan l'. Yo mete yo sou platin fou yo, yo vlope yo nan rad yo, yo mete yo sou zepòl
³⁵
 yo. Moun pèp Izrayèl yo te fè sa Moyiz te di yo a. Yo mande moun peyi Lejip yo bijou an ajan,
³⁶
 bijou an lò ansanm ak rad. Seyè a te fè moun peyi Lejip yo gen kè sansib pou pèp Izrayèl la. Yo
³⁷
 ba yo tou sa yo te mande. Se konsa pèp Izrayèl la pran tout bagay moun peyi Lejip yo. ¶ Moun
 pèp Izrayèl yo pati kite Ranmsès pou Soukòt. Te gen sisanmil (600,000) moun konsa, san konte
³⁸
 fanm ak timoun. Yo tout te apye. Te gen anpil moun lòt peyi tou ki te pati ansanm ak yo. Te
³⁹
 gen anpil mouton, kabrit ak bèf tou. Avèk pa t' farin yo te pote soti peyi Lejip la, yo fè pen. Pen
 yo te san ledven, paske yo te prese mete yo deyò nan peyi Lejip la. Yo pa t' menm gen tan fè
⁴⁰
 pwovizyon. Moun pèp Izrayèl yo te pase kasantrantan nan peyi Lejip la. ⁴¹
 Menm jou ki te fè

yo kasantrantan nan peyi a, jou pou jou, tout lame moun Seyè a soti kite peyi Lejip la. ⁴² Se te yon jou lannwit. Seyè a te pase tout nwit la ap veye pou fè yo soti kite peyi Lejip la. Se poutèt sa, se pou yo mete nwit sa a apa pou yo fè veye pou Seyè a. Se bagay pou yo toujou fè de pitit an pitit.

⁴³ ¶ Seyè a di Moyiz ak Arawon konsa: -Men ki jan pou yo fete fèt Delivrans lan. Pou konmanse, ankenn moun lòt nasyon pa gen dwa patisipe ladan l'. ⁴⁴ Domestik nou achte pou sèvis lakay nou, lè nou fin sikonsi yo, yo mèt patisipe. ⁴⁵ Men, ni moun lòt nasyon ki depasaj lakay nou, ni domestik k'ap travay pou lajan pa ka patisipe nan fèt la. ⁴⁶ Se pou nou manje manje Delivrans lan anndan kay. Vyann lan pa fèt pou soti deyò menm. Ni nou pa fèt pou kraze ankenn zo bèt nou touye yo.

⁴⁷ Se pou tout pèp Izrayèl la nèt fete fèt sa a. ⁴⁸ Si gen yon moun lòt nasyon ki rete nan peyi a epi ki ta vle fete fèt Delivrans lan pou Seyè a, men sa pou nou fè: Sè pou nou sikonsi tout gason lakay li anvan. Apre sa, l'a gen dwa fete fèt Delivrans lan. y'a konsidere l' tankou moun natif natal pèp Izrayèl la. Si yon gason pa sikonsi, li pa ka patisipe nan fèt la. ⁴⁹ Lòd sa a bon ni pou natif natal yo ni pou moun lòt nasyon ki rete nan peyi a nan mitan nou. ⁵⁰ Tout moun pèp Izrayèl yo te swiv lòd la, yo te fè sa Seyè a te bay Moyiz ak Arawon lòd fè a. ⁵¹ Se jou sa a Seyè a te fè tout lame moun Izrayèl yo soti kite peyi Lejip la.

Chapter 13

¹ ¶ Seyè a di Moyiz konsa: ² -Se pou nou mete tout premye pitit gason ak tout premye mal bèt yo apa pou mwen. Tout premye pitit gason moun pèp Izrayèl yo, tout premye mal bèt yo fè, se pou mwen yo ye. ³ Moyiz di pèp la: -Pa janm bliye jou sa a, jou nou te soti kite peyi Lejip kote yo te fè nou tounen esklav la, paske se Seyè a menm ki te fè nou soti ak fòs ponyèt li. Jou sa a, se pa pou nou manje pen ki gen ledven ladan l'. ⁴ Se jòdi a, se jou sa a, nan mwa Abib la, n'ap soti kite peyi Lejip. ⁵ Seyè a va fè nou antre nan peyi ki pou moun Kanaran yo, pou moun Et yo, pou moun Amori yo, pou moun Evi yo ak moun Jebis yo. Se yon peyi ki rich anpil, kote lèt ak siwo myèl koule tankou dlo. Se peyi sa a Seyè a te pwomèt l'ap bay zansèt nou yo. Lè l'a fè nou antre nan peyi sa a, n'a toujou fè sèvis sa a nan menm mwa a. ⁶ Pandan sèt jou, n'a manje pen ki fèt san ledven. Sou setyèm jou a, n'a fè yon fèt pou Seyè a. ⁷ Pandan sèt jou, n'a manje pen ki fèt san ledven. Yo pa dwe jwenn ni pen ki fèt ak ledven, ni ledven menm lakay nou, nan tout peyi a. ⁸ Jou sa a, men sa n'a di pitit gason nou yo: Nou fè tou sa pou Seyè a, lè nou chonje tou sa li te fè pou nou lè nou

⁹
 soti kite Lejip la. Sèvis sa a ap tankou yon mak nan men nou osinon yon bagay nou mete nan tèt nou pou nou pa bliye, pou nou ka toujou fè konnen lòd Seyè a. Paske, se avèk fòs ponyèt li li fè

¹⁰
 nou soti kite peyi Lejip la. Toujou fè sèvis sa a chak lanne, nan dat mwen te fikse a. ¶ Lè

¹¹
 Seyè a va fè nou antre nan peyi moun Kanaran yo, dapre pwomès li te fè nou an, nou menm ansanm

¹²
 ak zansèt nou yo, lè Seyè a va ban nou peyi sa a, n'a pran tout premye pitit gason nou yo, n'a mete yo apa pou Seyè a. Konsa tou, tout premye pitit bèt nou yo, depi se mal yo ye, se pou mwen

¹³
 yo ye. Nan plas tout premye pitit bourik nou yo, se pou nou ban mwen yon ti mouton. Si nou pa fè sa, se pou nou kase kou l'. Men, n'a ofri m' bagay pou achte lavi tout premye pitit gason nou

¹⁴
 yo nan men mwen. Denmen, lè pitit gason nou yo va mande nou poukisa nou fè sa, n'a di yo: Se paske se ak fòs ponyèt li Seyè a te fè nou soti kite peyi Lejip kote yo te fè nou tounen esklav la.

¹⁵
 Seyè a te touye depi premye pitit gason moun peyi Lejip yo rive jouk premye mal bèt yo fè, paske farawon an t'ap fè tèt di, li pa t' vle kite nou ale. Se poutèt sa nou ofri bay Seyè a tout premye mal bèt nou yo fe, epi nou ofri lòt bagay pou achte lavi tout premye pitit gason nou yo nan men l'.

¹⁶
 Sèvis sa a va tounen tankou yon mak sou men nou, tankou bando nou mare sou fwon nou, pou

¹⁷
 fè nou chonje se ak fòs ponyèt li Seyè a te fè nou soti kite peyi Lejip. ¶ Lè farawon an kite pèp Izrayèl la pati, Bondye pa mennen yo nan wout ki pase bò lanmè a pou ale nan peyi moun Filisti yo, atout se wout sa a ki te pi kout, paske Bondye te di: Mwen pa vle pou pèp la gen remò pou yo

¹⁸
 kase tèt tounen nan peyi Lejip la ankò, lè y'a wè batay yo gen pou yo fè. Se konsa, Bondye fè pèp la pran chemen dezè a nan direksyon lanmè Wouj la. Pèp Izrayèl la te soti kite peyi Lejip la

¹⁹
 tankou yon lame. Moyiz pran zosman Jozèf yo avèk li, paske Jozèf te fè moun pèp Izrayèl yo fè sèman. Li te di yo: Bondye gen pou vin ede nou. Lè sa a, se pou nou pati ak zosman mwen soti

²⁰
 isit la. Yo kite Soukòt, yo rive yon kote ki rele Etam, sou lizyè dezè a, yo pase kèk tan la.

²¹
 Lajounen, Seyè a t'ap mache devan yo nan yon gwo nwaj ki te gen fòm yon poto pou moutre yo chemen pou yo pran. Lannwit, li t'ap mache devan yo nan yon dife ki te tankou yon flanm ki t'ap

²²
 klere yo. Konsa, yo te ka vwayaje lajounen kou lannwit. Lajounen, nwaj la te toujou ap mache devan pèp la. Lannwit, se te dife a.

Chapter 14

¹ ¶ Bondye pale ak Moyiz, li di l': ² -Pale ak pèp Izrayèl la, di yo: Tounen dèyè, moute tant nou devan Pyakiròt, ant Migdòl ak lanmè a, anfas Baalsefon. N'a moute tant nou devan kote sa a, bò

lanmè a. ³ Farawon an pral mete nan tèt li pèp Izrayèl la pèdi nan peyi a, yo pa konn kote pou yo fè nan dezè a. ⁴ M'ap fè farawon an fè tèt di ankò, l'a rapouswiv nou. Men, m'ap bat ni farawon an ni tout lame li yo. Sa va sèvi yon lwanj pou mwen. Konsa, moun peyi Lejip yo va konnen se mwen menm ki Seyè a. Moun pèp Izrayèl yo fè jan Bondye te di yo a. ⁵ Farawon an, wa Lejip la, resevwa rapò. Yo vin di l' pèp la sove ale. Lè sa a, farawon an ak moun pa l' yo chanje lide. Yo di: -Sa nou fè la a? Nou kite yo ale? Yo sove kite travay yo t'ap fè pou nou an? ⁶ Farawon an fè pare cha lagè li. Li pran sòlda li yo ak li. ⁷ Li pran sisan (600) cha nan sa ki te pi bon yo. Tout lòt cha yo te ale tou. Yo tout te gen sòlda ame sou yo. ⁸ Seyè a te fèmen kè farawon an, wa Lejip la. Farawon an pran rapouswiv moun pèp Izrayèl yo ki te soti kite peyi a devan je tout moun san pesonn pa t' di yo anyen. ⁹ Men apre sa, moun peyi Lejip yo pran kouri dèyè yo ak tout chwal yo, tout cha lagè farawon yo, tout kavalye yo. Tout lame yo te dèyè pèp Izrayèl la. Yo jwenn yo kote yo te moute tant yo a, bò lanmè a, toupren Pyakiròt anfas Baalsefon. ¹⁰ ¶ Antan farawon an t'ap pwoche, moun Izrayèl yo leve je yo, yo wè moun peyi Lejip yo ki t'ap rapouswiv yo. Yo te pè anpil. Yo pran rele nan pye Seyè a. ¹¹ Yo di Moyiz konsa: -Eske se paske pa gen kote pou antere moun nan peyi Lejip la kifè ou mennen nou vin mouri isit la nan dezè a? Kisa ou fè nou konsa lè ou te fè nou soti kite Lejip la? ¹² Eske nou pa t' di ou sa lè nou te Lejip toujou? Nou te di ou: Kite nou travay pou moun peyi Lejip yo, pa vre! Pito nou travay pou moun peyi Lejip yo pase pou nou mouri nan dezè a. ¹³ Moyiz reponn pèp la: -Nou pa bezwen pè. Pran kouraj. Louvri je nou pou nou wè jan Seyè a pral delivre nou jòdi a. Moun peyi Lejip sa yo nou wè jòdi a, nou p'ap janm wè yo ankò. ¹⁴ Seyè a ap goumen pou nou. Nou menm, poze san nou. ¹⁵ ¶ Seyè a di Moyiz: -Poukisa w'ap rele konsa nan zòrèy mwen? Di moun pèp Izrayèl yo pou yo leve mache. ¹⁶ Ou menm, leve baton ou lan. Lonje men ou sou lanmè a, fann li de bò. Konsa, moun pèp Izrayèl yo va mache nan mitan lanmè a tankou sou tè sèk. ¹⁷ M'ap fè moun peyi Lejip yo fè tèt di pi rèd. Y'ap antre dèyè moun pèp Izrayèl yo nan mitan lanmè a. Mwen pral bat farawon an ansanm ak tout lame l' a, tout cha li yo ak tout kavalye l' yo. Sa va sèvi yon lwanj pou mwen. ¹⁸ Lè m'a bat farawon an ansanm ak tout cha li yo ak kavalye li yo, moun peyi Lejip yo va konnen se mwen menm ki Seyè a. ¹⁹ Zanj Bondye ki t'ap mache devan moun pèp Izrayèl yo chanje plas, li pase dèyè. Nwaj ki te devan yo a chanje plas tou, li pase dèyè yo. ²⁰ Li rete nan mitan ant moun peyi Lejip yo ak moun pèp Izrayèl yo. Nwaj la te tou nwa yon bò. Sou lòt bò a, li t'ap klere tout lannwit. Konsa, de lame yo pa t' ka pwoche yonn sou lòt pandan tout lannwit lan. ²¹ ¶ Moyiz lonje men l' sou lanmè a. Seyè a fè yon gwo van nòde soufle byen fò

pandan tout lannwit lan sou lanmè a. Li fè fon lanmè a tounen tè sèk, dlo a fann de bò. ²² Moun pèp Izrayèl yo antre sou tè sèk la, nan mitan lanmè a. Dlo a te kanpe de bò tankou yon miray sou bò dwat yo ak sou bò gòch yo. ²³ Moun peyi Lejip yo pran rapouswiv yo. Yo antre dèyè yo nan mitan lanmè a ak tout chwal farawon yo, tout cha li yo ak tout kavalye l' yo. ²⁴ Lè devanjou rive, Seyè a rete nan dife a ak nan nwaj la, li voye je l' sou lame peyi Lejip la, li lage yon sèl dezòd nan mitan yo. ²⁵ Li bloke wou cha yo. Sa te difisil anpil pou cha yo te vanse. Lè sa a, moun peyi Lejip yo di konsa: -Ann kouri kite moun Izrayèl yo an repo. Paske, Seyè a ap goumen pou yo kont nou. ²⁶ Lè sa a, Seyè a di Moyiz: -Lonje men ou sou lanmè a ankò. Dlo a ap tounen nan plas li, l'ap kouvri moun peyi Lejip yo ansanm ak tout cha yo ak kavalye yo. ²⁷ Se konsa, lè jou pral kase, Moyiz lonje men l' sou lanmè a, dlo a tounen nan plas li. Lè moun peyi Lejip yo wè dlo a ap vini sou yo, yo t'ap chache sove poul yo. Yo pran kouri. Men, Seyè a voye yo jete nan lanmè a. ²⁸ Dlo a tounen nan plas li, li kouvri cha yo, kavalye yo ak tout lame farawon an. Wi, li kouvri tout moun ki t'ap kouri dèyè moun pèp Izrayèl yo nan lanmè a. Pa gen yonn ki chape. ²⁹ Men, moun Izrayèl yo menm te mache nan mitan lanmè a tankou sou tè sèk. Dlo a te kanpe tankou yon miray sou bò dwat ak sou bò gòch yo. ³⁰ Sè jou sa a Seyè a te delivre pèp Izrayèl la anba men moun peyi Lejip yo. Moun pèp Izrayèl yo te wè kadav moun peyi Lejip yo sou tout bò lanmè a. ³¹ Yo wè sa Seyè a te fè moun peyi Lejip yo pase ak fòs ponyèt pa li. Pèp Izrayèl la vin gen krentif pou Seyè a. Yo mete konfyans yo nan Seyè a ak nan Moyiz, sèvitè l' la.

Chapter 15

¹ ¶ Lè sa a, Moyiz ak moun pèp Izrayèl yo chante yon chante pou Seyè a. Men sa chante a di: -M'ap chante pou Seyè a, paske li genyen batay la. Li voye chwal yo ak tout kavalye yo jete nan lanmè. ² Seyè a, se tout fòs mwen. Se pou li m'ap chante. Se li menm ki delivre m'. Se Bondye mwen li ye, m'ap fè lwanj li. Se Bondye zansèt mwen yo, m'ap di jan li gen pouvwa. ³ Seyè a, se yon vanyan sòlda. Se Seyè yo rele l'. ⁴ Li voye cha farawon yo ansanm ak tout lame l' a jete nan lanmè. Li fè pi bon sòlda li yo mouri neye nan lanmè Wouj la. ⁵ Lanm lanmè a kouvri yo. Yo fè fon tankou ròch. ⁶ Seyè, fòs bra dwat ou se kokenn zafè! Seyè, fòs bra dwat ou kraze lènmi an! ⁷ Jan ou gen anpil pouvwa sa a, Seyè! Ou kraze moun k'ap goumen avè ou yo. Ou fè yon sèl kòlè,

8
 ou boule yo tankou dife nan pay. Nan kolè ou, ou soufle. Souf ou fè dlo a ranmase kò l'. Lanm
 yo kanpe dwat tankou yon miray. Dlo a vin di nan mitan lanmè a. 9
 Lènmi an te di: M'ap kouri
 dèyè yo, m'ap pran yo. M'ap separe tout richès yo, m'ap pran tou sa m' vle. M'ap rale nepe mwen,
 avèk fòs ponyèt mwen, m'ap disparèt yo. 10
 Ou annik fè yon ti van leve, lanmè a kouvri yo. Lanmè
 a te move, yo desann nan fon tankou plon. 11
 Seyè, nan tout bondye yo, kilès ki tankou ou! Pouvwa
 ou fè yo respekte ou! Ou se Bondye ki apa nèt! Kilès ki tankou ou? Ou menm ki fè mirak, ou menm
 ki fè mèvèy pou fè moun pè! Kilès ki tankou ou? 12
 Ou annik lonje men dwat ou, tè a vale yo tou
 vivan. 13
 Paske ou gen bon kè, ou mennen pèp ou delivre a, avèk fòs ponyèt ou, ou mennen yo nan
 peyi ki apa pou ou a. 14
 Lòt pèp yo pran nouvel sa ki pase, yo pran tranble tèlman yo pè. Yon sèl
 vant fè mal pran moun Filisti yo. 15
 Ata chèf peyi Edon yo te pè anpil. Vanyan gason peyi Moab
 yo pran tranble. Tout moun nan peyi Kanaran pèdi kouraj. 16
 Yon sèl kè kase, yon sèl sezisman
 pran yo. Avèk fòs ponyèt ou, ou fè yo rete rèd san yo pa kapab fè anyen. Ou fè yo rete konsa jouk
 pèp ou a fin pase, Seyè, wi, jouk pèp ou delivre a fin pase! 17
 Wa mennen yo, w'a plante yo sou
 mòn ki pou ou a, Seyè, sou mòn kote ou pare pou kay ou a, kay ou bati pou ou a, Seyè. 18
 Seyè a
 ap gouvènen pou tout tan. 19
 Chwal farawon yo ansanm ak tout cha ak kavalye yo te tonbe nan
 lanmè. Seyè a fè dlo a tounen nan plas li. Dlo a kouvri yo tout. Men, moun pèp Izrayèl yo menm
 te mache nan fon lanmè a tankou sou tè sèk. 20
 Miryam, sè Arawon an, te yon pwofèt. Li pran yon
 tanbouren nan men l', tout medam yo t'ap mache dèyè l', yo t'ap bat tanbouren, yo t'ap danse.
 21
 Miryam t'ap chante pou yo, li t'ap di moun pèp Izrayèl yo: Annou chante pou Seyè a! Paske li
 genyen yon bèl batay! Li voye chwal yo jete nan fon lanmè ak tout kavalye yo sou yo. 22
 ¶ Moyiz
 fè moun Izrayèl yo pati kite bò lanmè Wouj la. Yo mete tèt yo sou bò dezè Chou a. Yo t'ap mache
 depi twa jou nan dezè a san yo pa jwenn gout dlo pou yo bwè. 23
 Yo rive yon kote ki rele Mara.
 Men, yo pa t' kapab bwè dlo ki te la a, paske li te twò anmè. Se poutèt sa yo rele kote a Mara.
 24
 Pèp la pran bougonnen sou do Moyiz nan dezè a. Yo mande l': -Atò, kisa pou nou bwè koulye
 a? 25
 Moyiz rele Seyè a, li lapriyè nan pye l'. Seyè a moutre l' yon kalite pyebwa. Moyiz lage branch
 bwa a nan dlo a, dlo a vin dous. Se la Seyè a te ba yo lòd ak regleman pou yo swiv. Se la li t'ap
 chache sonde yo. 26
 Li di yo: -Se mwen menm ki Seyè a, Bondye nou an. Si nou koute m' lè m'
 pale nou, si nou fè tout sa ki dwat devan mwen, si nou louvri zòrèy nou pou swiv kòmandman
 mwen yo, pou nou kenbe lòd mwen ban nou, mwen p'ap voye malè sou nou, jan mwen te fè moun

peyi Lejip yo. Se mwen menm, Seyè a, k'ap geri nou. ²⁷ Apre sa, yo rive Elim, yon kote ki te gen douz sous dlo ak swasann dis pye dat. Yo rete la, yo moute tant yo bò dlo a.

Chapter 16

¹ ¶ Apre sa, tout moun pèp Izrayèl yo pati kite Elim, yo rive nan dezè yo rele Sin lan, ant Elim ak mòn Sinayi. Lè yo rive la, yo te gen yon mwa kenz jou depi yo te pati kite Lejip. ² Yo tout pran bougonnen sou do Moyiz ak Arawon nan dezè a. ³ Yo t'ap di yo: -Poukisa Seyè a pa t' tou touye nou nan peyi Lejip la? Lè sa a, nou te konn chita devan bòl vyann nou, nou te konn manje pen plen vant nou. Men, ou menm ak Arawon, nou mennen nou nan dezè sa a pou fè tout kantite moun sa yo mouri grangou. ⁴ Seyè a di Moyiz konsa: -Mwen pral fè pen tonbe soti nan syèl la pou nou tankou grenn lapli. Pèp la va soti chak jou pou l' ranmase mezi li bezwen pou jounen an. Konsa, m'a gade pou m' wè si wi ou non yo vle mache sou lòd mwen vre. ⁵ Chak sizyèm jou nan senmenn lan, y'a ranmase de fwa lavalè sa yo konn ranmase lòt jou yo, y'a pare mete la. ⁶ Moyiz ak Arawon di tout moun pèp Izrayèl yo: -Aswè a n'a konnen se Seyè a ki te fè nou pati kite peyi Lejip. ⁷ Denmen maten, n'a wè ki kalite pouvwa Seyè a genyen. Li tandè jan n'ap bougonnen sou do li. Paske mwen menm ak Arawon, kisa nou ye pou se sou nou n'ap bougonnen konsa? Se sou Bondye n'ap bougonnen. ⁸ Apre sa, Moyiz di yo: -Se Seyè a k'ap ban nou vyann pou nou manje chak swa. Se li k'ap ban nou kantite pen nou bezwen chak maten, paske Seyè a tandè tout bougonnen n'ap bougonnen sou li a. Nou menm, kisa nou ye? Se pa sou nou n'ap bougonnen, men se sou Seyè a n'ap bougonnen. ⁹ Lè sa a Moyiz di Arawon: -Men sa pou ou di tout moun pèp Izrayèl yo: Pwoche vin devan Seyè a paske li tandè jan n'ap plenyen an. ¹⁰ Pandan Arawon t'ap pale ak tout moun pèp Izrayèl yo, yo vire tèt yo bò dezè a, yo wè pouvwa Bondye a parèt nan nwaj la. ¹¹ Seyè a di Moyiz: ¹² -Mwen tandè jan moun pèp Izrayèl yo ap plenyen. Men sa pou ou di yo: Aswè a, anvan li fin fè nwa, n'a gen vyann pou nou manje. Denmen maten, n'a gen pen kantite nou bezwen. Lè sa a, n'a konnen se mwen menm, Seyè a, ki Bondye nou. ¹³ ¶ Nan aswè, zòtolan vini, yo kouvri tout kote yo te moute tant yo a. Nan maten, te gen yon kouch lawouze toutalantou kote pèp la te moute tant yo a. ¹⁴ Lè lawouze a disparèt, li kite yon kwout tou blan atè nan dezè a. Kwout la te fen, li te plen ti grenn tankou sèl, li te kouvri tout atè a. ¹⁵ Lè moun pèp Izrayèl yo wè sa, yo pa t' konn sa l' te

ye. Yonn t'ap di lòt: -Sa sa ye sa? Moyiz di yo: -Sa a, se pen Seyè a ban nou pou nou manje. ¹⁶ Men lòd Seyè a ban nou: Se pou chak moun ranmase mezi yo bezwen pou kantite moun ki lakay yo.

N'a ranmase twa ti mamit edmi pou chak moun. ¹⁷ Moun pèp Izrayèl yo fè sa Moyiz te di yo fè a.

Gen moun ki te ranmase plis, gen lòt ki te ranmase pi piti. ¹⁸ Men, lè yo mezire, sa ki te ranmase plis yo pa t' gen twòp, sa ki te ranmase pi piti yo pa t' manke anyen. Konsa, chak moun te ranmase mezi yo te bezwen pou yo manje. ¹⁹ Moyiz di yo: -Piga pesonn sere anyen pou denmen. ²⁰ Men gen moun ki pa t' koute Moyiz. Yo sere ti gout pou denmen maten. Nan denmen yo jwenn li plen vè, li te gate. Moyiz te fache sou moun sa yo. ²¹ Chak maten yo ranmase mezi yo te bezwen pou yo manje. Men, kou solèy la konmanse cho, bagay la te fonn. ²² ¶ Sizyèm jou nan senmenn lan, yo te ranmase de fwa lavalè sa yo te konn ranmase chak jou a. Yo te ranmase sèt ti mamit pou chak moun. Tout chèf fanmi ki te alatèt pèp la vin di Moyiz sa. ²³ Moyiz reponn yo: -Men lòd Seyè a te bay: Denmen se jou repo, se jou repo ki apa pou Seyè a. Kwit sa nou gen pou nou kwit. Bouyi sa nou gen pou nou bouyi. N'a sere rèss la pou denmen. ²⁴ Jan Moyiz te ba yo lòd la, yo sere rèss la pou denmen. Li pa t' gate, vè pa t' tonbe ladan l'. ²⁵ Moyiz di yo: -Nou mèt manje rèss la jòdi a, paske jòdi a se jou repo yo mete apa pou Seyè a. Jòdi a nou p'ap jwenn anyen deyò a. ²⁶ Pandan sis premye jou senmenn lan n'a jwenn pou n' ranmase. Men setyèm jou a, jou repo a, nou p'ap jwenn anyen pou nou ranmase. ²⁷ Setyèm jou a, gen kek moun nan pèp la ki te soti al ranmase manje, men yo pa jwenn anyen. ²⁸ Lè sa a, Seyè a di Moyiz: -Kilè n'a sispann dezobeyi lòd ak kòmandman mwen yo? ²⁹ Konprann sa byen, se mwen menm, Seyè a, ki te ban nou jou repo sa a. Se poutèt sa, sou sizyèm jou nan senmenn lan, mwen ban nou manje valè pou de jou. Nan setyèm jou senmenn lan, se pou tout moun rete kote yo ye a. Piga pesonn mete tèt deyò. ³⁰ Se konsa, lè setyèm jou a rive, pèp la pa fè ankenn travay. ³¹ Pèp Izrayèl la rele manje a laman. Li te gen fòm grenn pitimi. Li te tou blan, li te gen menm gou ak gato ki fèt ak siwo myèl. ³² ¶ Moyiz di yo: -Men lòd Seyè a ban nou. Se pou nou sere twa ti mamit edmi plen laman pou pitit pitit nou yo. Konsa y'a wè ki kalite manje mwen te konn ban nou nan dezè a, lè mwen te fè nou soti kite peyi Lejip la. ³³ Apre sa Moyiz di Arawon: -Pran yon ti ja, mete twa ti mamit edmi laman ladan l'. Mete l' devan Seyè a pou l' ka rete pou pitit pitit nou yo. ³⁴ Arawon fè sa Seyè a te bay Moyiz lòd fè a. Li mete ti ja a devan Bwat Kontra a, li sere l' la. ³⁵ Moun pèp Izrayèl yo pase karantan ap manje laman, jouk jou yo rive

nan yon peyi kote yo jwenn moun rete. Kifè yo manje laman jouk yo rive sou fwontyè peyi Kanaran.

36

Twa ti mamit edmi, se valè twaka yon gwo mamit. Trannsenk ti mamit fè yon gwo bidon.

Chapter 17

1

¶ Tout moun pèp Izrayèl yo pati, yo kite dezè Sin lan, dapre lòd Seyè a te ba yo. Yo fè wout la moso pa moso, jouk yo rive Refidim kote yo moute tant yo. Men, pa t' gen dlo la pou pèp la te

bwè. ² Yo leve fè kont ak Moyiz. Yo di l': -Ban nou dlo pou nou bwè! Moyiz reponn yo: -Poukisa

n'ap chache m' kont konsa? Pouki n'ap sonde Seyè a konsa? ³ Men, pèp la te swaf dlo anpil, yo t'ap bougonnen sou do Moyiz. Yo di l': -Poukisa ou fè nou soti kite peyi Lejip la? Gen lè se pou te fè

nou vin mouri swaf dlo isit la, avèk pitit nou yo ansanm ak tout bèt nou yo? ⁴ Moyiz menm lapriyè nan pye Bondye. Li di l' konsa: -Kisa pou m' fè ak moun sa yo? Yo san lè touye m' ak kout ròch!

5

Seyè a di Moyiz: -Pran kèk chèf fanmi pèp Izrayèl la avèk ou, pase devan pèp la. Kenbe baton ou

te sèvi pou frape gwo la rivyè Nil lan nan men ou. Epi mache. ⁶ Mwen menm, m'ap kanpe laba a, dwat devan ou, sou tèt gwo ròch Orèb la. W'a frape ròch la, dlo va soti ladan l'. Pèp la va bwè. Se

sa menm Moyiz te fè devan chèf fanmi pèp Izrayèl la. ⁷ Yo rele kote sa a Masa ak Meriba, paske pèp Izrayèl la t'ap chache kont, yo t'ap sonde Seyè a lè yo te mande: Eske Seyè a nan mitan nou,

wi ou non? ⁸ ¶ Antan pèp Izrayèl la Refidim, moun Amalèk yo vin pou goumen ak yo. ⁹ Moyiz di Jozye konsa: -Chwazi kèk gason pou nou. Denmen w'a soti al goumen ak moun Amalèk yo. Mwen

menm, m'a moute sou tèt ti mòn lan avèk baton Bondye te ban mwen an nan men mwen. ¹⁰ Jozye fè tou sa Moyiz te di l' fè. Li soti al goumen ak moun Amalèk yo. Moyiz menm moute sou tèt ti

mòn lan ansanm ak Arawon ak Our. ¹¹ Tout tan Moyiz te kenbe men l' yo leve anlè, se moun

Izrayèl yo ki te pi fò. Men, kou Moyiz bese men l', se moun Amalèk yo ki te pi fò. ¹² Rive yon lè Moyiz te bouke, de bra l' t'ap fè l' mal. Arawon ak Our pran yon ròch, yo mete l' deyè Moyiz, yo fè Moyiz chita sou li. Yo chak pran yon bra Moyiz, yo kenbe yo anlè. Yo kenbe yo konsa jouk

solèy kouche. ¹³ Jozye menm te bat Amalèk ak moun li yo byen bat, li touye yo anba kout nepe.

14

Aprè sa, Seyè a di Moyiz: -Ekri sa nan liv rejis la pou moun yo pa janm bliye batay sa a. W'a di

Jozye konsa m'ap efase non Amalèk sou latè pou yo pa janm chonje l' ankò. ¹⁵ Moyiz bati yon

lòtèl, li rele l': Seyè a se drapo m'. ¹⁶ Aprè sa li di: -Men mwen leve men m' devan fotèy Seyè a, Seyè a p'ap janm sispann goumen ak moun Amalèk yo.

Chapter 18

¹ ¶ Jetwo te pran nouvèl tou sa Bondye te fè pou Moyiz ak pèp Izrayèl la, jan li te fè yo soti kite peyi Lejip. Jetwo sa a te prèt nan peyi Madyan. Se bòpè Moyiz li te ye. ² Anvan tout bagay sa yo te rive, Moyiz te voye Sefora, madanm li, al jwenn Jetwo, papa li. Koulye a, Jetwo mennen Sefora tounen bay Moyiz ³ ansanm ak Gèchon ak Elyezè, de pitit gason Moyiz yo. Lè timoun sa yo t'ap fèt Moyiz te di: Se moun vini mwen ye nan yon peyi etranje. Se konsa li te rele yonn Gèchon. ⁴ Moyiz te di tou: Se Bondye papa m' ki te pote m' sekou, ki te sove m' anba pèsekisyon farawon an. Se konsa li te rele lòt la Elyezè. ⁵ Jetwo, bòpè Moyiz la, pran madanm Moyiz ak de pitit gason l' yo, li vin wè Moyiz nan dezè kote l' te moute tant li a, sou mòn Bondye a. ⁶ Jetwo voye di Moyiz: -Se mwen menm, Jetwo, bòpè ou, k'ap vin wè ou ansanm ak madanm ou ak de pitit gason ou yo. ⁷ ¶ Moyiz soti al kontre bòpè li, li bese tèt li jouk atè devan l' pou di li bonjou, epi li bo l'. Yonn mande lòt ki jan yo ye, epi yo antre anba tant Moyiz la. ⁸ Moyiz rakonte bòpè l' tou sa Seyè a te fè farawon an ak moun peyi Lejip yo pase poutèt pitit Izrayèl yo. Li di l' tout tray yo te pase nan vwayaj la ak ki jan Seyè a te delivre yo. ⁹ Jetwo te kontan anpil lè l' tande tout bèl bagay Seyè a te fè pou pèp Izrayèl la, jan l' te delivre yo anba men moun peyi Lejip yo. ¹⁰ Jetwo di: -Lwanj pou Seyè a ki delivre ou anba men moun peyi Lejip yo ak anba men farawon an! Lwanj pou Seyè a ki wete pèp li a anba esklavaj moun peyi Lejip yo! ¹¹ Koulye a mwen konnen Seyè a gen plis pouvwa pase tout lòt bondye yo, paske gade jan Bondye delivre pèp Izrayèl la anba moun peyi Lejip yo ki pa t' vle wè yo! ¹² Apre sa, Jetwo, bòpè Moyiz la, ofri bèt pou yo touye pou di Bondye mèsi. Li ofri bèt pou yo boule nèt pou Seyè a. Arawon ansanm ak tout chèf fanmi pèp Izrayèl la te vin manje ak bòpè Moyiz la nan manje yo t'ap manje devan Bondye a. ¹³ ¶ Nan denmen, Moyiz te chita pou rann jijman sou tout bagay ki pase nan mitan pèp la. Depi maten jouk aswè, moun t'ap pase devan Moyiz. ¹⁴ Lè Jetwo, bòpè Moyiz la, wè kalite travay di sa a Moyiz t'ap fè pou kò l' pou pèp la, li di l' konsa: -Kisa w'ap fè konsa ak pèp la? Poukisa pou pèp la kanpe devan ou depi maten jouk aswè, epi se ou menm ki chita la pou kont ou ap rann jijman? ¹⁵ Moyiz reponn bòpè l' konsa: -Se sa pou m' fè paske pèp la vin kote m' pou yo ka konnen sa Bondye vle yo fè nan tout sikonstans. ¹⁶ Lè yo gen kont, yo vin jwenn mwen, mwen regle sa pou yo, mwen fè yo konnen volonte Bondye ak sa Bondye mande yo pou yo fè. ¹⁷ Bòpè Moyiz la di l' konsa: -Jan w'ap fè l' la pa bon. ¹⁸ W'ap fin kraze kouraj ou ansanm ak kouraj pèp la ki la avè ou. Paske chay la twòp pou ou. Ou pa ka pote

19 l' pou kont ou. Bon. Koute sa m'ap di ou: se yon konsèy m'ap ba ou pou Bondye ka ede ou. Se ou menm ki va prezante pou pèp la devan Bondye. W'a mete tout pwoblèm yo devan Bondye.

20 W'a moutre yo lòd Bondye, Seyè a, bay ansanm ak sa li mande yo pou yo fè. W'a fè yo konnen

21 jan pou yo viv ak sa yo dwe fè. Men, w'a chwazi nan mitan pèp la kèk moun ki kapab, moun ki gen krentif pou Bondye. Fòk se moun ou ka konte sou yo, moun ki p'ap kite lajan pran nanm yo. W'a mete yo chèf pou dirije pèp la, chèf sou mil moun, chèf sou san moun, chèf sou senkant moun

22 ak chèf sou dis moun. Moun sa yo va toujou la pou sèvi jij pou pèp la. Lè y'a gen gwo zafè, y'a pote yo devan ou. Men lòt ti zafè, y'a regle sa yo menm. Konsa, chay la va pi lejè pou ou, paske

23 y'a ede ou pote l'. Si ou fè sa, Bondye va dirije ou. W'a kapab fè travay ou, epitou, tout pèp la

24 va tounen lakay li ak kè poze. Moyiz koute konsèy bòpè l' la vre. Li fè tou sa Jetwo te di l' fè

25 yo. Moyiz chwazi nan mitan pèp Izrayèl la kèk nèg ki kapab dirije pèp la, li mete yo chèf sou

26 mil moun, chèf sou san moun, chèf sou senkant moun ak chèf sou dis moun. Yo te toujou la pou rann jistis pou pèp la. Yo te pote gwo zafè yo devan Moyiz. Men ti ka piti yo, yo te regle sa yo

27 menm. Apre sa, Moyiz kite bòpè l' la pati. Epi Jetwo tounen tounen l' nan peyi l'.

Chapter 19

1 ¶ Moun Izrayèl yo te gen de mwa depi yo te soti kite peyi Lejip la. Premye jou twazyèm mwa

2 a, yo rive nan dezè Sinayi a. Lè yo kite Refidim, yo rive nan dezè Sinayi a. Se la yo moute tant

3 yo, anfas mòn lan. Moyiz moute sou mòn lan, l' al bò kote Bondye. Seyè a rete sou tèt mòn lan, li rele Moyiz, li di l': -Men sa pou ou di moun fanmi Jakòb yo, men sa pou ou fè pèp Izrayèl la

4 konnen: Seyè a pale, li voye di nou konsa: Nou wè sa mwen te fè moun peyi Lejip yo. Nou wè ki jan mwen te pote nou tankou malfini pote pitit li yo sou do li, mwen fè nou vin jwenn mwen.

5 Koulye a menm, si nou koute sa mwen di nou, si nou kenbe kontra mwen an, se nou menm m'ap

6 chwazi pou moun pa m' nan mitan tout pèp ki sou latè. Tout latè se pou mwen, se vre. Men nou menm, n'ap vini yon nasyon moun k'ap sèvi m' tankou prèt, yon pèp k'ap viv apa pou mwen. Wi,

7 se sa pou ou di moun Izrayèl yo. Moyiz ale, li fè sanble tout chèf fanmi pèp la, li rapòte yo tou

8 sa Seyè a te ba li lòd di yo. Tout pèp la reponn ansanm, yo di: -N'a fè tou sa Seyè a di nou fè.

9
 Apre sa, Moyiz al rapòte bay Seyè a repons pèp la. ¶ Seyè a di Moyiz: -M'ap vin jwenn ou nan yon gwo nwaj byen pwès. Konsa pèp la va tandè lè m'ap pale avè ou, y'a toujou kwè nan ou. Moyiz

10
 rakonte Seyè a sa pèp la te reponn. Seyè a di Moyiz: -Ale bò kote pèp la. Fè yo pran jounen jòdi a ak jounen denmen an pou yo mete yo nan kondisyon pou fè sèvis pou mwen. Se pou yo lave rad

11
 yo. Se pou yo pare pou twazyèm jou a. Paske, sou twa jou mwen menm, Seyè a, m'ap desann

12
 sou mòn Sinayi a pou tout moun ka wè m'. W'a mete yon limit toutalantou mòn lan pou pèp la pa depase. W'a avèti yo pou yo pa moute sou mòn lan, ni pou pesonn pa menm pwoche bò pye

13
 mòn lan. Nenpòt moun ki va mete pye sou mòn lan, se pou yo touye l'. y'a kalonnen l' kout ròch osinon y'a pèse l' ak kout flèch jouk li mouri, san pesonn p'ap bezwen manyen li ak men yo. Kit se yon moun, kit se yon bèt, se pou yo touye l'. Lè y'a tandè kòn lan kònen, se lè sa a y'a moute sou

14
 mòn lan. Moyiz desann soti sou mòn lan, l' al bò kote pèp la. Li fè yo mete tèt yo nan kondisyon

15
 pou fè sèvis pou Seyè a. Yo lave rad yo. Apre sa, Moyiz di yo: -Pare nou pou apre denmen. Pa

16
 kouche ak ankenn fanm. ¶ Sou twazyèm jou a vre, nan granmaten, loraj t'ap gwonde sou mòn lan. Te gen zèklè ak yon gwo nwaj byen pwès sou mòn lan tou. Yon twonpèt t'ap kònen byen fò.

17
 Tout moun t'ap tranble kou fèy bwa kote yo te ye a, sitèlman yo te pè. Moyiz fè pèp la soti kote

18
 yo te moute tant yo a pou y al kontre Bondye. Yo rete nan pye mòn lan. Tout mòn Sinayi a te kouvri nèt ak lafimen, paske Seyè a te desann sou li nan mitan yon gwo dife. Lafimen t'ap moute

19
 tankou nan yon fou lacho. Tout mòn lan t'ap tranble avèk fòs. Twonpèt la t'ap kònen pi fò toujou.

20
 Moyiz t'ap pale, Bondye t'ap reponn li byen fò avèk yon bri ou ta di yon bri loraj. Seyè a desann sou mòn Sinayi a, sou tèt mòn lan menm. Li rele Moyiz sou tèt mòn lan. Moyiz moute al jwenn li.

21
 Seyè a di Moyiz konsa: -Desann, avèti pèp la pou yo pa depase limit la, paske yo ka pran kouri

22
 vin gade mwen. Lè sa a, anpil ladan yo ta kapab mouri. Ata prèt yo ki ka pwoche bò kote m',

23
 se pou yo mete tèt yo nan kondisyon pou sa tou. Si se pa sa, mwen ka touye yo. Moyiz di Seyè a: -Pèp la p'ap kapab moute sou mòn Sinayi a, paske se ou menm ki defann yo moute, lè ou te di:

24
 Trase yon limit toutalantou mòn lan, mete l' apa pou mwen. Lè sa a Seyè a di Moyiz: -Desann non. Epi tounen ansanm ak Arawon. Men pa kite prèt yo ak pèp la depase limit ou te ba yo a pou

25
 yo kouri vin kote m'. Si yo fè sa, m'ap touye yo. Moyiz desann bò kote pèp la, li di yo tout bagay.

Chapter 20

¹ ¶ Bondye pran pale, li di: ² -Se mwen menm, Seyè a, Bondye nou an, ki te fè nou soti nan
 peyi Lejip kote nou te esklav la. ³ Piga nou gen lòt bondye pase mwen menm sèlman. ⁴ Piga nou
 janm fè ankenn estati ni ankenn pòtre ki sanble bagay ki anwo nan syèl la, osinon bagay ki sou latè
⁵ ou ankò nan dlo anba tè a. Piga nou adore yo, ni piga nou sèvi yo. Paske mwen menm, Seyè a,
 Bondye nou an, mwen se yon Bondye ki fè jalouzi. Lè yon moun rayi m', mwen fè pitit li, pitit pitit
 li ak pitit pitit pitit li yo peye sa. ⁶ Men, lè yon moun renmen m', lè li fè sa m' mande l' fè, m'ap
 moutre l' jan mwen renmen l' tou ansanm ak tout pitit pitit li yo pandan mil jenerasyon. ⁷ Piga nou
 sèvi mal ak non Seyè a, Bondye nou an, paske Seyè a p'ap manke pa pini moun ki sèvi mal avèk
 non li. ⁸ Toujou chonje jou repo a pou nou mete l' apa pou mwen. ⁹ N'a travay sis jou. Lè sa yo n'a
¹⁰ fè tou sa nou gen pou fè. Men, setyèm jou a, se jou repo pou nou mete apa pou Seyè a, Bondye
 nou an. Jou sa a, nou p'ap fè ankenn travay, ni nou menm, ni pitit gason nou, ni pitit fi nou, ni moun
¹¹ k'ap travay lakay nou, ni bèt nou yo, ni etranje ki lakay nou. Paske, Seyè a te pran sis jou pou
 l' fè syèl la, latè a ak lanmè a ansanm ak tou sa ki ladan yo. Apre sa, sou setyèm jou a, li pran repo.
¹² Se poutèt sa, Seyè a beni jou repo a, li mete l' apa pou li. ¶ Respekte manman nou ak papa nou
¹³ pou nou ka viv lontan nan peyi Seyè a, Bondye nou an, ban nou an. Piga nou touye moun.
¹⁴ Piga nou fè adiltè. ¹⁵ Piga nou pran sa ki pa pou nou. ¹⁶ Piga nou bay manti sou frè parèy nou.
¹⁷ Piga nou pote lanvi sou sa ki pa pou nou: ni sou kay frè parèy nou, ni sou madanm li, ni sou
 moun k'ap sèvi lakay li, ni sou bèf li, ni sou bourik li, ni sou ankenn lòt bagay ki pou frè parèy nou.
¹⁸ ¶ Lè pèp la tande bri loraj la ak son twonpèt la, lè yo wè kout zèklè sou kout zèklè, ak mòn lan
¹⁹ ki t'ap pouse lafimen, yo tranble sitèlman yo te pè. Yo ret kanpe byen lwen. Yo di Moyiz konsa:
 -Pito se ou menm ki pale ak nou, n'a koute sa w'ap di. Men, si se Bondye ki pou pale avèk nou, n'a
²⁰ mouri. Moyiz di pèp la: -Nou pa bezwen pè. Bondye vini pou wè kote nou ye avèk li. Li vle
²¹ pou nou toujou gen krentif pou li, pou nou pa lage kò nou nan fè peche. Men pèp la rete kanpe
 byen lwen. Sèl Moyiz te pwoche kote nwaj nwa a kote Bondye te ye a. ²² ¶ Seyè a di Moyiz: -Men
²³ sa pou ou di moun pèp Izrayèl yo: Nou wè ki jan mwen ret nan syèl la pou m' pale ak nou. Piga
²⁴ n al fè lòt bondye an ajan osinon an lò pou nou sèvi yo ansanm avè m'. N'a bati yon lòtèl an tè
 pou mwen. Se sou li n'a ofri bèt n'a touye pou boule nèt yo ak bèt n'a touye pou di mès. Se sou li
 n'a ofri mouton ak bèf nou yo. Chak kote m'a di nou pou nou fè sèvis pou mwen, m'a vin jwenn
²⁵ nou la, m'a beni nou. Si nou fe yon lòtèl ak ròch pou mwen, pa travay ròch n'a pran pou fè l' la.

Paske lè ou travay yon ròch ak sizo, li pa ka sèvi pou mwen ankò. ²⁶ Piga nou sèvi ak macheskalye pou nou moute sou lòtèl mwen pou moun pa wè anba rad nou.

Chapter 21

¹ ¶ -Men regleman w'a mete devan moun pèp Izrayèl yo: ² Lè ou achte yon moun menm ras avè ou pou sèvi ou esklav, li gen pou l' sèvi ou sizan. Lè setyèm lanne a rive, l'a lib. L'a gen dwa ³ al fè wout li san l' pa gen anyen pou l' peye ou. Si li te pou kont li lè l' te vini an, li va ale pou kont li. Si li te gen madanm lè l' te vini an, madanm lan va ale avè l'. ⁴ Si se mèl li ki te ba li madanm, epi madanm lan te fè pitit pou li, ni pitit yo, ni manman lan va rete pou mèl la. Msye va al fè wout li pou kont li. ⁵ Men, si esklav la di: Mwen renmen mèl mwen, mwen renmen madanm mwen ak pitit mwen yo, mwen pa vle vin lib ankò, ⁶ enben, lè sa a, mèl la va mennen l' devan Bondye. L'a fè l' pwoche bò pòt la, osinon bò chanbrann pòt la, l'a pèse zòrèy li ak yon bagay pwenti. Konsa esklav la va rete ap sèvi li jouk li mouri. ⁷ Lè yon nonm vann pitit fi li pou sèvi esklav, pitit fi sa a pa ka lib ankò, jan yo ka fè l' pou gason yo. ⁸ Si mèl la te fin dakò pou l' te pran fi a pou madanm, epi si apre sa fi a pa fè l' plezi ankò, msye va fè yon jan pou papa ak manman fi a achte l' nan men li ankò. Men, li pa gen dwa vann li bay yon moun lòt nasyon, paske se trayi l'a trayi fi a lè sa a. ⁹ Men, si li te fè lide bay pitit gason l' fi a, se pou l' aji avè l' tankou si se te pròp pitit fi li. ¹⁰ Si li pran yon lòt madanm sou li, li pa gen dwa wete anyen sou sa li dwe l': ni sou manje l', ni sou rad li, epi se pou l' toujou sevi ak li tankou madanm li. ¹¹ Si li pa fè twa bagay sa yo pou li, madanm lan gen dwa ale fè wout li, san li pa gen anyen pou l' peye mèl la, san bay senk kòb. ¹² ¶ Si yon moun leve men l' sou yon lòt, epi li touye l', moun sa a, se pou yo touye l' tou. ¹³ Men, si se pa espere li fè, si se Bondye ki fè lòt moun lan tonbe anba men l', m'ap chwazi yon kote pou l' ale kache kò l'. ¹⁴ Men, si yon moun chache yon lòt kont, epi li fè plan pou li touye l', li te mèl al kache bò kote lòtèl mwen an, se pou n al pran l' pou nou touye l'. ¹⁵ Si yon moun leve men l' sou papa l' osinon sou manman l', se pou yo touye l'. ¹⁶ Si yon moun pran yon lòt pa fòs pou l' al vann li osinon pou kenbe l' lakay li, se pou yo touye l'. ¹⁷ Si yon moun bay papa l' osinon manman l' madichon, se pou yo touye l'. ¹⁸ Lè de moun gen kont, si yonn bay lòt yon koutwòch osinon yon koutpwèn,

epi si sak resevwa kou a pa mouri, men li blije pran kabann, men jan pou sa regle: ¹⁹ Si li ka leve, si li ka mache pwonmennen ak baton, y'a fè pa moun ki te ba l' kou a. Tansèlman, l'a gen pou l' peye lòt la dedomajman pou tout jou li fè rete san travay, epi l'a reskonsab pran swen l' jouk li geri.

²⁰ Lè yon moun leve men l' sou yon esklav li, kit se gason, kit se fi, pou ba li koutbaton, si esklav la mouri frèt, se pou yo pini mèt la. ²¹ Men, si esklav la fè yon jou osinon de jou anvan l' mouri, se pa nesesè pou yo pini mèt la, paske se lajan pa l' li te mete deyò pou l' achte l'. ²² ¶ Lè gason ap goumen, si nan voye kou yo frape yon fanm ansent, epi si fanm lan fè foskouch san anyen ankò pa rive l', moun ki ba l' kou a va peye dedomajman dapre sa mari a va mande. L'a peye sa jij yo va deside. ²³ Men, si malè rive fanm lan, y'a fè l' peye lavi pou lavi, ²⁴ yon je pou yon je, yon dan pou yon dan, yon men pou yon men, yon pye pou yon pye, ²⁵ boule pou boule, blese pou blese, foule pou foule. ²⁶ Lè yon moun frape yon esklav li nan je, kit se yon gason, kit se yon fanm, si esklav la pèdi je a, mèt la va ba li libète l' pou dedomajman pou je a. ²⁷ Si se dan yon esklav li rache, l'a ba li libète li pou dedomajman pou dan an. ²⁸ Lè yon bèf touye yon gason osinon yon fanm ak koutkòn, se pou yo touye l' ak koutwòch. Se pa pou yo manje vyann lan, ni yo pa bezwen fè mèt bèf la peye anyen. ²⁹ Men, si se pa premye fwa bèf la atake moun, si yo te pale mèt li men mèt li pa t' fè anyen pou sa, si bèf la touye yon gason osinon yon fanm, nan ka sa a y'ap toujou touye bèf la ak koutwòch, epi y'a touye mèt la tou pou pini l'. ³⁰ Men, si yo mande mèt bèf la pou l' peye pou l' ka sove lavi pa l', se pou l' peye tou sa y'a mande l' la. ³¹ Si bèf la atake yon ti gason osinon yon ti fi, se menm règleman an ki pou fèt. ³² Si bèf la atake yon esklav, kit se gason, kit se fi, mèt bèf la va bay mèt esklav la trant pyès an ajan. Bèf la menm, y'a touye l' ak koutwòch. ³³ Si yon moun kite yon pi dekouvri, ou ankò si l'ap fouye yon pi epi li kite l' san kouvèti, si yon bèf osinon yon bourik vin tonbe ladan l', ³⁴ se pou mèt pi a peye mèt bèf la sa bèf la vo. Bèt mouri a menm va rete pou mèt pi a. ³⁵ Si yon moun gen yon bèf ki touye bèf yon lòt moun ak yon koutkòn, de mesye yo va vann bèf vivan an, y'a separe lajan an mwaye pou mwaye. y'a separe vyann bèf ki mouri a tou. ³⁶ Men, si se pa premye fwa bèf la ap bay koutkòn, si yo te pale mèt li men mèt li pa t' fè anyen pou sa, nan ka sa a, mèt bèf la gen pou peye. L'a bay yon bèf vivan pou bèf ki mouri a. Bèt mouri a menm va rete pou li.

Chapter 22

¹ ¶ Si yon moun vòlò yon bèf osinon yon mouton, si li touye l' epi li vann li, li gen pou l' bay
senk bèf pou bèf li pran an osinon kat mouton pou mouton li pran an. ² Si yo bare yon vòlè ap kase
yon kay epi yo touye l', moun ki touye l' la pa koupab. ³ Men, si sa rive apre solèy fin leve, moun
ki touye l' la koupab. Li gen pou l' peye pou li, wè pa wè. Si li pa gen anyen, y'a vann li pou yo ka
peye pou sa l' te vòlò a. ⁴ Men, si yo jwenn bèt li te vòlò a vivan nan men l' toujou, kit se bèf, kit
se kabrit, kit se bourik, l'a renmèt de pou yonn. ⁵ Si yon moun kite bèt li manje nan jaden yon lòt,
osinon nan jaden rezen li, si yon moun kite bèt li lage pou yo fè kont dega nan jaden yon lòt moun,
li gen pou l' dedonmaje lòt moun lan. L'a ba li pi bon bagay li gen nan jaden pa l' la osinon nan
jaden rezen l' yo. ⁶ Si yon dife pran yon kote, li tonbe nan zèb chèch epi li rive boule danre ki nan
depo, osinon grenn ki fin keyi, ou ankò yon jaden tou plante, moun ki lakòz dife a va peye yon
dedomajman. ⁷ ¶ Si yon moun pran lajan l' osinon yon bagay ki gen anpil valè, li bay yon lòt moun
sere l' pou li, si yo rive vòlò bagay sa yo nan kay moun ki te sere yo a, si yo jwenn vòlè a, vòlè a
va gen pou renmèt de fwa lavalè. ⁸ Men, si yo pa jwenn vòlè a, y'a mennen mèl kay kote bagay yo
te sere a devan lòtèl Bondye a, pou yo wè si se pa li menm ki te pran bagay lòt moun lan. ⁹ Si yon
moun pèdi yon bagay, kit se yon bèf, osinon yon bourik, ou ankò yon mouton, kit se yon rad ou
nenpòt lòt bagay, si lè yo jwenn sak te pèdi a yon lòt moun pretann di se pou li li ye, y'a mennen
yo tou de devan lòtèl Bondye a pou regle sa. Moun Bondye va kondannen an va gen pou l' bay lòt
la de fwa lavalè pou dedomajman. ¹⁰ Si yon moun bay yon frè parèy li gade yon bourik, yon bèf,
yon mouton, ou ankò nenpòt ki lòt bèt pou li, si bèt la mouri osinon si malè rive l' ou ankò si piyajè
pran l' san pesonn pa wè sa, ¹¹ lè sa a, y'a mande ni mèl bèt la ni gadò a pou yo fè sèman devan
lòtèl Bondye a. Moun ki t'ap gade bèt la va deklare se pa li menm ki te pran bèt lòt moun lan. Lè
sa a, mèl bèt la va asepte pèt la. Gadò a p'ap gen ankenn dedomajman pou l' bay. ¹² Men si se vòlò
yo te vòlò bèt la nan men l', l'a gen pou l' peye mèl la kichòy. ¹³ Si se bèt nan bwa ki devore bèt
la, l'a pote rèl la pou mèl bèt la ka wè ak de je l' se pa manti l'ap ba li. Li p'ap gen anyen pou l' peye
pou sa. ¹⁴ Si yon moun prete yon bèt nan men yon frè parèy li, epi malè rive bèt la, osinon li mouri
an absans mèl li, se pou l' peye mèl bèt la kichòy. ¹⁵ Men, si mèl la te la lè malè a rive, moun lan
pa gen anyen pou l' peye. Si se yon bèt li te lwe, se pri li te lwe l' la ase pou li bay. ¹⁶ ¶ Si yon
nonm pran tèt yon jenn fi ki poko fiyansè, epi li kouche avè l', li gen pou l' peye lajan yo konn bay
yon maryaj, epi se pou l' marye ak jenn fi a. ¹⁷ Men, si papa jenn fi a refize kite l' marye avè
l', tout jan se pou msye peye lajan yo bay lè yo pral marye ak yon fi ki tifi. ¹⁸ Se pou nou touye

tout fanm k'ap fè maji. ¹⁹ Se pou yo touye tout moun ki kwaze ak zannimo. ²⁰ Si yon moun ofri bèt pou yo touye pou lòt bondye pase Seyè a, se pou yo disparèt li tankou bèt y'ap ofri bay Bondye.

²¹ Piga nou maltrete moun lòt nasyon ki vin rete nan peyi nou. Piga nou peze yo non plis, paske nou menm, chonje nou te etranje tou nan peyi Lejip. ²² Piga nou maltrete ni vèv yo, ni timoun san papa yo. ²³ Si nou malmennen yo, m'ap reponn yo lè y'a rele mande m' sekou. ²⁴ m'a fache, m'a fè nou mouri nan lagè. Konsa, madanm nou yo ap vin vèv tou, pitit nou yo ap rete san papa tou.

²⁵ ¶ Si nou prete yonn nan frè parèy nou yo lajan, yonn nan pòv ki nan mitan nou yo, piga nou fè tankou moun k'ap bay ponya pou nou egzije l' peye enterè. ²⁶ Si yon nonm plane levit li lakay ou pou ou prete l' yon ti kòb, se pou ou renmèt li rad li anvan solèy kouche. ²⁷ Paske, se sèl rad li gen pou l' mete sou li pou fredy pa bat li. Kisa pou l' mete sou li pou l' kouvri aswè? Si li rele mande m' sekou, m'a reponn li paske mwen gen bon kè. ²⁸ Piga nou pale Bondye mal. Piga nou bay chèf pèp la madichon. ²⁹ Pa pran reta pou n' ofri m' sa pou n' ofri m' nan rekòt danre nou yo ak nan diven nou. n'a ban mwen premye pitit gason nou yo. ³⁰ N'a ban mwen tou premye pitit bèf nou yo ak premye pitit mouton nou yo. Ti bèt la va pase sèt jou avèk manman l'. Sou wityèm jou a n'a ofri l' ban mwen. ³¹ Se pou nou mache tankou moun k'ap viv apa pou mwen. Pa manje vyann bèt nou jwenn lòt bèt nan bwa devore. Vyann konsa se chen pou nou jete l' bay.

Chapter 23

¹ ¶ Piga nou fè manti sou frè parèy nou. Lè n'ap sèvi temwen, piga nou bay manti pou ede yon mechan. ² Pa konprann pou nou fè sa ki mal paske nou wè se sa tout moun ap fè. Lè n'ap sèvi temwen nan yon pwose, piga nou pran pati pou bò ki gen plis moun lan lè nou konnen se yo ki antò. ³ Konsa tou, lè gen pwose, se pa paske yon moun pòv pou nou pran pati pou li. ⁴ Si nou pa byen ak yon moun, epi nou jwenn bèf li osinon bourik li ki kase kòd, se pou nou mennen l' ba li. ⁵ Si nou pa byen ak yon moun, epi nou wè bourik li kouche anba yon chay, pa vire do nou kite l' pou kont li. Se pou nou ede l' fè bourik la kanpe. ⁶ Lè yon malere nan pwose, pa anpeche yo fè l' jistis. ⁷ Evite fè manti sou moun pou akize yo. Moun inonsan ak moun ki nan dwa yo, piga nou fè touye yo, paske mwen p'ap padonnen moun ki fè bagay konsa. ⁸ Lè n'ap sèvi temwen nan yon kòz,

pa pran lajan anba nan men moun, paske lajan konsa bouche je nou, li fè nou pa wè kote jistis la
 ye. Li fè moun ki pa antò a pèdi kòz li. ⁹ Piga nou aji mal ak moun lòt nasyon k'ap viv nan peyi a.
 Paske, nou menm tou, yon lè, nou te etranje nan peyi Lejip, kifè nou konnen sa ki rele viv nan lòt
¹⁰ peyi. ¶ Pandan sizan n'a travay tè a, epi n'a ranmase sa li bay. ¹¹ Men, sou setyèm lanne a, n'a
 kite tè a poze. Menm si li bay kichòy, nou p'ap ranmase anyen sou li. N'a kite rekòt la pou pòv
 malere yo. Rèl la va rete pou bèt nan bwa manje. N'a fè menm bagay la tou pou jaden rezen ak
¹² jaden oliv nou yo. N'a travay sis jou. Men setyèm jou a, n'a sispann travay, n'a pran repo. Konsa,
 bèf nou yo ak bourik nou yo, moun k'ap sèvi avèk nou yo ansanm ak etranje ki lakay nou yo va ka
¹³ pran repo tou. Se pou nou swiv tou sa mwen sot di nou la a. Pa lapriyè lòt bondye, piga mwen
¹⁴ tandè non yo soti nan bouch nou. Twa fwa chak lanne, n'a fè fèt pou mwen. ¹⁵ N'a fè fèt Pen
 san ledven yo. Jan mwen te ban nou lòd la, n'a manje pen san ledven pandan sèt jou nan epòk yo
 fikse nan mwa Abib la. Paske se nan mwa sa a nou te soti kite peyi Lejip. Lè sa a, nou p'ap gen
¹⁶ dwa parèt devan m' de men vid. Apre sa, n'a fete fèt Premye Rekòt la lè nou fèk konmansè
 rekòlte grenn nou simen nan jaden nou yo. N'a fete fèt Dènye Rekòt la menm vè fen lanne a, lè
¹⁷ n'ap fin rekòlte tou sa ki nan jaden nou yo. Twa fwa chak lanne, tout gason nan pèp la va parèt
¹⁸ devan mwen menm Seyè a, Bondye a. Lè n'ap touye yon bèt pou mwen, piga nou ofri san an
¹⁹ ansanm ak pen ki fèt ak ledven. Piga nou sere grès bèt la tout lannwit jouk denmen maten. N'a
 pran pi bèl fwi nan premye rekòt jaden nou, n'a pote yo bay Seyè a, Bondye nou an, lakay li, Piga
²⁰ ou kwit yon ti kabrit nan lèt manman li. ¶ Men m'ap voye yonn nan zanj mwen yo devan nou
²¹ pou pwoteje nou sou wout la, pou l' fè nou rive san danje kote mwen pare pou nou an. Veye kò
 nou devan li. Koute sa l'ap di nou. Pa kenbe tèt avè l'. Si nou fè sa, li p'ap padonnen nou sa paske
²² se nan non mwen l'ap fè tou sa l'ap fè a. Men, si nou koute sa li di nou, si nou fè tou sa mwen
²³ di nou fè, m'ap rayi moun ki rayi nou, mwen p'ap vle wè moun ki pa vle wè nou. Zanj mwen an
 va mache devan nou, l'ap mennen nou nan peyi moun Amori yo, peyi moun Et yo, peyi moun Ferezi
²⁴ yo, peyi moun Kanaran yo, peyi moun Evi yo ak peyi moun Jebis yo. M'ap detwi yo tout. Piga
 nou mete ajenou devan bondye lòt nasyon yo. Piga nou janm sèvi yo. Pa fè menm jan ak moun lòt
²⁵ nasyon yo. Se pou nou detwi bondye yo nèt, se pou nou kraze tout moniman yo fè pou yo. Se
 mwen menm Seyè a, Bondye nou an, pou nou sèvi. M'ap beni nou, m'ap ban nou manje pou n'
²⁶ manje, dlo pou nou bwè. Mwen p'ap kite maladi tonbe sou nou. Nan peyi nou an p'ap gen fanm
²⁷ k'ap fè foskouch, ni fanm ki p'ap ka fè pitit. M'ap kite nou viv jouk nou fin granmoun. M'ap fè
 tout moun pè nou. Kote nou pase, m'ap fè moun pèdi tèt yo. M'ap fè tout lènmi nou yo pran rak

²⁸
 devan nou. m'a voye gwo gèp devan nou, y'a fè moun Evi yo, moun Kanaran yo ak moun Et yo
²⁹
 kouri byen lwen nou. Mwen p'ap fè yo ale tout ansanm yon sèl kou, yon sèl lanne, pou peyi a
³⁰
 pa tounen savann, pou bèt nan bwa yo pa vin twòp pou nou. Men, piti piti m'ap mete yo deyò,
³¹
 jouk n'a gen plis moun pou nou ka pran tout peyi a pou nou. M'ap fè fwontyè peyi nou an
 konmanse depi sou lanmè Wouj la rive jouk sou lanmè Mediterane, depi sou dezè a al bat sou
 larivyè Lefrat la. M'ap lage tout moun nan peyi a anba men nou, n'ap chase yo met deyò devan nou.
³²
³³
 Piga nou pase ankenn kontra ak moun sa yo, ni ak bondye yo. Se pa pou yo rete nan peyi nou
 an, pou yo pa ankouraje nou fè peche kont mwen. Si nou sèvi bondye moun sa yo, sa ka yon malè
 pou nou.

Chapter 24

¹
 ¶ Apre sa, Bondye di Moyiz: -Moute sou mòn lan bò kote m' ansanm ak Arawon, Nadab,
 Abiyon ak swasanndis nan chèf fanmi pèp Izrayèl la. N'a rete yon distans, n'a bese tèt nou jouk atè
²
 pou adore m'. Apre sa, Moyiz va pwoche pou kont li, l'a vin bò kote m'. Piga lòt yo pwoche. Pèp
³
 la menm pa pou moute avè yo. Moyiz ale, li rapòte bay pèp la tou sa Seyè a te di l' yo ansanm ak
⁴
 tout lòd li te bay yo. Tout pèp la reponn ansanm: -N'a fè tou sa Seyè a di nou fè. Moyiz ekri tou
 sa Seyè a te di l' yo. Nan denmen maten, byen bonè, lè Moyiz leve, li bati yon lòtèl nan pye mòn
⁵
 lan. Li pran douz gwo ròch, yonn pou chak branch fanmi pèp Izrayèl la, li mete yo kanpe. Apre
 sa, li pran kèk jenn gason nan moun Izrayèl yo, li voye yo al ofri bèt pou touye bay Seyè a: yo ofri
⁶
 bèt yo te boule nèt pou Seyè a. Yo touye kèk towò bèf pou di Seyè a mès. Moyiz pran mwatye
⁷
 nan san an, li mete l' nan ganmèl. Lòt mwatye a, li vide l' sou lòtèl la. Lèfini, li pran liv kontra a,
 li li l' pou tout pèp la ka tandè. Apre sa, pèp la di: -N'a fè tou sa Seyè a mande nou fè, n'a obeyi l'.
⁸
 Lè sa a, Moyiz pran san ki te nan ganmèl yo, li voye l' sou pèp la, li di: -San sa a sèvi pou siyen
⁹
 kontra Seyè a pase ak nou an, dapre pawòl li di yo. ¶ Moyiz moute sou mòn lan ansanm ak
¹⁰
 Arawon, Nadab, Abiyon ak swasanndis nan chèf fanmi pèp Izrayèl la. Yo te wè Bondye pèp
 Izrayèl la. Anba pye l', te gen yon bagay plat fèt ak bèl pyè kristal ble yo rele safi. Li te klè tankou
¹¹
 syèl la lè pa gen yon ti nwaj menm ladan li. Seyè a pa t' fè chèf pèp Izrayèl yo anyen. Se konsa
¹²
 yo te wè Bondye. Apre sa, yo manje epi yo bwè. ¶ Seyè a di Moyiz konsa: -Moute sou mòn lan

bò kote m'. Rete la. m'a ba ou de ròch plat avèk lalwa ak regleman mwen te ekri sou yo pou fè
¹³ levasyon pèp la. ¹⁴ Moyiz leve ansanm ak Jozye, adjwen li a, yo moute sou mòn Bondye a. Anvan
 Moyiz te ale, li di chèf fanmi yo: -Rete tann nou isit la jouk nou tounen. Men Arawon ak Our ap
 rete ak nou. Si yon moun bezwen regle yon pwoblèm, li mèt al jwenn yo. ¹⁵ Moyiz moute sou mòn
 lan, epi nwaj kouvri mòn lan nèt. ¹⁶ Pouvwa Seyè a desann sou mòn Sinayi a. Nwaj kouvri mòn
 lan pandan sis jou. Sou setyèm jou a, Seyè a rete nan nwaj la, li rele Moyiz. ¹⁷ Pou moun pèp
 Izrayèl yo menm, pouvwa Seyè a te parèt tankou yon gwo dife ki t'ap boule sou tèt mòn lan.
¹⁸ Moyiz antre nan mitan nwaj la, li moute sou mòn lan. Moyiz pase karant jou ak karant nwit sou
 mòn lan.

Chapter 25

¹ ¶ Seyè a pale ak Moyiz, li di l': ² -Pale ak moun Izrayèl yo. Di yo pote yon ofrann ban mwen.
 W'a resevwa l' pou mwen nan men tout moun ki vle bay ak kè kontan. ³ Men ofrann pou ou resevwa
 nan men yo: lò, ajan ak kwiv, ⁴ bon twal koulè violèt, ble ak wouj, twal fen blan, twal fèt ak pwal
 kabrit, ⁵ po belye tenn koulè wouj ak po bazann, bwa zakasya, ⁶ lwil pou gwo lanp sèt branch lan,
 epis santi bon pou mete nan lansan an ak nan lwil yo sèvi pou mete moun apa pou sèvis Bondye
 a, ⁷ pyè oniks ak lòt pyè pou gani jile ak plastwon granprèt la. ⁸ y'a mete yon kote apa pou mwen
 pou m' ka vin rete nan mitan yo. ⁹ W'a fè tant lan ak tout bagay ki pou ale ladan l', dapre modèl
 mwen pral ba ou a. ¹⁰ ¶ y'a pran bwa zakasya, y'a fè yon gwo bwat. Bwat la va mezire twa pye nèf
 pous longè, de pye twa pous lajè, de pye twa pous wotè. ¹¹ W'a kouvri l' nèt, anndan kou deyò, ak
 pi bon klas lò ki genyen. Epi w'a mete yon bòdi an lò fè wonn li. ¹² W'a fonn lò a fè kat gwo bag
 tou won. W'a moute yonn sou chak kwen bwat la, de chak bò. ¹³ W'a pran de jenn poto zakasya,
 w'a kouvri yo nèt ak lò. ¹⁴ W'a pase poto yo nan twou bag yo, sou de bò bwat la. Poto sa yo va
 sèvi manch pou pote bwat la. ¹⁵ Se pou poto yo toujou rete nan bag yo, san yo pa janm wete yo.
¹⁶ Mwen pral ba ou de ròch plat ki va sèvi pou nou toujou chonje m'. W'a mete yo nan bwat la.
¹⁷ W'a pran pi bon lò ki genyen, w'a fè yon kouvèti pou bwat la. L'a mezire twa pye nèf pous longè

¹⁸ sou de pye twa pous lajè. W'a fè pòtre de zanj cheriben an lò. y'a pran lò a, y'a bat li ak mato
¹⁹ pou yo fè pòtre yo. W'a mete yo anwo kouvèti a, yonn sou bò dwat, yonn sou bò gòch. W'a kole
²⁰ yo byen kole sou kouvèti a pou yo fè kò avè l'. Zanj cheriben yo va louvri zèl yo anwo tèt yo,
²¹ konsa y'a kouvri kouvèti a. Se pou yo yonn anfas lòt, avèk tèt yo bese ap gade kouvèti a. W'a
mete kouvèti a sou bwat la. Nan bwat la menm, w'a mete de ròch plat mwen pral ba ou pou nou ka
²² toujou chonje mwen. Se la m'a toujou kontre avè ou. m'a rete anwo kouvèti a, nan mitan de zanj
cheriben yo, m'a ba ou tout lòd mwen gen pou m' ba ou yo pou moun Izrayèl yo. ¶ ²³ W'a fè yon
tab an bwa zakasya. Desi tab la va mezire twa pye longè, yon pye sis pous lajè ak de pye twa pous
²⁴ wotè. W'a kouvri l' nèt ak pi bon lò ki genyen. W'a mete yon bòdi an lò fè wonn li. W'a mete
²⁵ yon ankadreman kat pous lajè anba desi a fè wonn tab la. Epi w'a kouvri tout ankadreman an ak
²⁶ yon plak lò. W'a fonn lò a fè kat gwo bag tou won pou tab la. W'a moute yo nan kat kwen tab
²⁷ la kote pye yo moute a. W'a moute bag yo toupren ankadreman an. Se nan twou bag yo pou ou
²⁸ pase poto bwa zakasya ki pou sèvi pou pote tab la. W'a fè poto yo ak bwa zakasya, epi w'a kouvri
²⁹ yo nèt ak lò. Se ak poto sa yo pou yo sèvi pou pote tab la. W'a fè asyèt, bòl, tas, kafetyè. W'a
mete yo apa pou mwen. W'a fè yo ak pi bon lò ki genyen. Se ak yo pou nou sèvi lè n'ap fè sèvis
³⁰ pou mwen. Epi w'a toujou mete sou tab la pen yo ofri ban mwen yo. Wi, se pou pen yo tout tan
³¹ la devan mwen. ¶ W'a fè yon gwo lanp sèt branch ak pi bon lò ki genyen. y'a pran yon sèl gwo
mòso lò, y'a bat li ak mato pou fè pye gwo lanp sèt branch lan ansanm ak tout kò li. y'a fè pòtre bèl
³² flè, flè an bouton, flè louvri, sou tout kò li. Yo tout va fè yon sèl pyès ak pye lanp lan. Gwo lanp
³³ lan va gen sèt branch, yonn kanpe dwat nan mitan ak twa branch chak bò. Sou chak branch sou
³⁴ kote yo, y'a fè pòtre twa flè nwa kajou ak tout boujon yo. Sou branch ki nan mitan an va gen
³⁵ kat flè nwa kajou ak tout boujon yo. W'a mete yon ti boujon anba chak pè branch sou kote yo.
³⁶ Boujon yo ak branch yo va fè yon sèl pyès ak pye gwo lanp lan. Se va yon sèl pyès lò y'a bat ak
mato pou ba li fòm yo vle a. ³⁷ y'a fè sèt lanp pou gwo lanp lan, y'a moute yo sou li yon jan pou
³⁸ yo ka klere sou devan. N'a fè pensèt pou netwaye gwo lanp lan ak plato pou resevwa sann lan.
³⁹ W'a fè yo ak pi bon lò ki genyen. N'a pran swasannkenz liv bon lò pou fè gwo lanp lan ansanm

ak tout bagay pou sèvi ak gwo lanp lan. ⁴⁰ Gade byen pou ou ka fè tout bagay dapre modèl mwen te moutre ou sou mòn lan.

Chapter 26

¹ ¶ N'a fè tant kote pou Bondye rete a ak dis lèz twal fen blan tise byen sere, ansanm ak lenn koulè ble, violèt ak wouj. W'a fè yo bwode bèl pòtre zanj cheriben byen fèt sou tout twal la. ² Chak lèz twal va gen katòz mèt longè, de mèt lajè. Yo tout va menm gwo. ³ N'a koud lèz yo ansanm, senk yon bò, senk yon lòt bò. ⁴ Lè w'a fin koud senk premye lèz yo ansanm, w'a fè pasan ak kòdon ble sou tout bòdi senk premye lèz yo. W'a fè menm jan an tou ak senk lòt lèz yo. ⁵ W'a fè senkant pasan nan premye lèz premye gwoup la, ak senkant pasan nan dènye lèz dezyèm gwoup la. W'a fè yo koresponn de pa de. ⁶ W'a fè senkant ti kwòk an lò ki va sèvi pou kole de gwoup lèz yo yonn ak lòt pou yo fè yon sèl tant. ⁷ ¶ W'a fè onz lèz twal ak pwal kabrit pou fè yon gwo tant pou kouvri kay Bondye a. ⁸ Chak lèz va gen kenz mèt longè ak de mèt lajè. Yo tout va menm gwo. ⁹ W'a pran senk ladan yo, w'a koud yo ansanm. Apre sa, w'a pran lòt sis yo, w'a koud yo ansanm tou. W'a pliye sizyèm lèz la an de sou devan tant lan. ¹⁰ W'a mete senkant pasan sou bòdi premye lèz premye gwoup la, ak senkant pasan sou bòdi dènye lèz dezyèm gwoup la. ¹¹ W'a fè senkant ti kwòk an kwiv, w'a pase yo nan pasan yo pou kole de gwoup lèz yo ansanm pou fè yon sèl tant. ¹² Mwatye lèz ki an plis la va bat sou dèyè kay Bondye a pou kouvri l'. ¹³ Menm jan an tou, lèz ki sou kote yo pral gen yon pye edmi k'ap depase. Sa ki an plis la pral desann sou bò kay Bondye a pou kouvri l'. ¹⁴ W'a fè yon kouvèti ak po belye pou tant lan. W'a tenn li wouj. Apre sa, w'a fè yon lòt kouvèti ak po bazann pou kouvri tant Bondye a. ¹⁵ ¶ W'a pran bwa zakasya pou fè planch ankadreman pou soutni tant Bondye a. ¹⁶ Chak ankadreman va gen kenz pye longè sou vensèt pous lajè. ¹⁷ Yo chak va gen de bout depase ki va penmèt yo kole yonn ak lòt. ¹⁸ Lè w'ap fè ankadreman yo, w'a fè ven pou bò sid la. ¹⁹ W'a fè karant sipò an ajan pou ale anba ankadreman yo, de sipò anba chak ankadreman. Se ladan yo bout ki depase yo va chita. ²⁰ Konsa tou, w'a fè ven ankadreman pou bò nò a ²¹ ak karant sipò an ajan, de pou chak ankadreman. ²² W'a fè sis ankadreman pou dèyè tant

Bondye a, sou bò lwès la, ²³ ak de ankadreman pou chak kwen ki sou dèyè tant Bondye a.
²⁴ Ankadreman kwen yo va mare yonn ak lòt pa anba. y'a bout-a-bout depi anba jouk anwo kote
 gwo bag la. Se konsa w'a moute de ankadreman k'ap fè kwen yo. ²⁵ Konsa, va gen wit ankadreman
 avèk sèz sipò an ajan, de sipò anba chak ankadreman. ²⁶ W'a fè travès ak bwa zakasya, senk pou
 ankadreman sou bò sid tant Bondye a, ²⁷ senk pou ankadreman sou bò nò a, senk pou ankadreman
 ki sou bò lwès la, pa dèyè. ²⁸ Travès mitan an, k'ap pase nan ren ankadreman yo, va soti nan yon
 bout pou ale nan yon lòt bout. ²⁹ W'a kouvri tout kò ankadreman yo ak lò. W'a moute gwo bag an
 lò sou yo pou kenbe travès yo. W'a kouvri travès yo ak lò tou. ³⁰ W'a fè tant lan dapre modèl mwen
 te moutre ou sou mòn lan. ³¹ ¶ W'a fè yon rido ak bon twal koulè ble, violèt ak wouj ansanm ak
 twal fen blan tise byen sere. y'a bwode bèl pòtre zanj cheriben byen fèt sou tout rido a. ³² W'a pann
 rido a sou kat poto an bwa zakasya. Poto yo va kouvri ak lò. y'a gen kwòk an lò moute sou yo. y'a
 chita sou kat sipò an ajan. ³³ Mete rido a anba kwòk ki nan twati tant lan. W'a mete Bwat Kontra
 a dèyè rido a. Rido a va separe kote ki apa apa nèt pou Bondye sèlman an ak rès tant Bondye a.
³⁴ W'a mete kouvèti a sou Bwat Kontra ki nan kote ki apa apa nèt pou Bondye a. ³⁵ W'a mete tab
 la pa deyò rido a. Mete gwo lanp sèt branch lan sou bò sid tant lan, an fas tab la. Tab la menm va
 sou bò nò a. ³⁶ Konsa tou, w'a fè yon rido an bon twal ble, violèt ak wouj ansanm ak twal fen blan
 tise byen sere. Rido a va sèvi pou fèmèn kote yo pase pou antre nan tant lan. y'a fè bèl bodri sou
 tout rido a. ³⁷ Pou kenbe rido a, w'a fè senk poto an bwa zakasya, w'a kouvri yo ak lò, w'a moute
 ti kwòk an lò sou yo. y'a chita sou senk sipò an kwiv.

Chapter 27

¹ ¶ W'a fè yon lòtèl an bwa zakasya. L'a kare kare. L'a mezire sèt pye sis pous longè sou sèt pye
 sis pous lajè ak kat pye sis pous wotè. ² W'a travay kat kòn sou kat kwen lòtèl la. Se pou kòn yo
 fè yon sèl pyès ak lòtèl la. Apre sa, w'a kouvri tout ak kwiv. ³ Pou lòtèl la, w'a fè pèl, kivèt, fouchèt,
 recho ak plato pou resevwa sann. Tout bagay sa yo va fèt an kwiv. ⁴ Pou lòtèl la toujou, w'a fè yon
 griyaj an kwiv, tankou griy yo sèvi pou griye vyann. W'a mete kat gwo bag an kwiv nan kat pwent
 griyaj la. ⁵ W'a mete griyaj la anba rebò lòtèl la, pou l' soti anba rive mwatye wotè lòtèl la. ⁶ W'a

fè baton an bwa zakasya ki va sèvi manch pou lòtèl la. W'a kouvri yo an kwiv. ⁷ W'a pase manch yo nan gwo bag yo. Manch yo va sou chak bò lòtèl la lè y'ap pote l'. ⁸ Lòtèl la va fèt an planch. Anndan li va rete tou vid. W'a fè l' dapre modèl mwen te moutre ou sou mòn lan. ⁹ ¶ W'a fè yon galeri wonn kay la. Sou bò sid la, w'a moute yon seri rido fèt ak lèz twal fen blan tise byen sere, sou senkant mèl longè pou bò sa a. ¹⁰ Pou kenbe rido yo, va gen ven poto an kwiv chita sou ven sipò an kwiv tou. Men, kwòk ki sou poto yo ak trenng ki pou soutni rido yo va fèt an ajan. ¹¹ Menm jan an tou, sou bò nò a va gen yon seri rido fèt ak lèz twal sou senkant mèl longè pou bò sa a, avèk ven poto an kwiv chita sou ven sipò an kwiv tou. Kwòk yo ak trenng yo va fèt an ajan. ¹² Sou bò lwès la, va gen yon galeri tou. W'a moute yon seri rido sou vennsenk mèl longè ak dis poto chita sou dis sipò. ¹³ Sou bò lès la, galeri a va gen swasannkenz pye lajè. ¹⁴ Sou bò gòch pòt antre a, y'a moute rido sou yon longè vennde pye sis pous avèk twa poto chita sou twa sipò. ¹⁵ Sou bò dwat la tou, y'a moute rido sou yon longè vennde pye sis pous avèk twa poto chita sou twa sipò. ¹⁶ Pou pòt antre a menm, va gen yon rido trant pye longè, fèt ak twal siperyè koulè ble, violèt ak wouj ansanm ak twal fen blan tise byen sere, dekore avèk bodri. Se kat poto chita sou kat sipò ki pou soutni rido a. ¹⁷ Tout poto ki fè wonn galeri a va gen trenng fèt an ajan, kwòk fèt an ajan ak sipò fèt an kwiv. ¹⁸ Galeri a va gen sansenkant pye longè, swasannkenz pye lajè ak sèt pye sis pous wotè. Rido yo va fèt ak twal fen blan tise byen sere. Sipò yo va fèt an kwiv. ¹⁹ Tout bagay ki la pou sèvi nan tant lan, tout pikèt pou tant lan ak pou galeri a, tou sa gen pou fèt an kwiv. ²⁰ ¶ W'a pase pèp Izrayèl la lòd pou yo pote ba ou pi bon kalite lwil oliv ki genyen pou lanp yo. Konsa, lanp lan va toujou ka rete limen. ²¹ Se Arawon ak pitit li yo ki va mete lwil nan lanp sa a, ki nan Tant Randevou a pa deyè rido a, devan Bwat Kontra a. Se la gwo lanp lan va limen devan Seyè a depi aswè jouk maten. Se pou moun Izrayèl yo swiv lòd sa a pou tout tan, de pitit an pitit.

Chapter 28

¹ ¶ W'a pran Arawon ak pitit li yo: Nadab, Abiyon, Eleaza, Itama, w'a wete yo nan mitan moun Izrayèl yo, w'a fè yo vin jwenn ou. W'a mete yo apa pou yo sèvi m' prèt. ² W'a fè rad pou Arawon, frè ou la, rad pou li mete lè l'ap fè sèvis, pou l' ka byen abiye, pou moun ka rekonèt grad li. ³ W'a pale ak atizan ki konnen metye yo byen. Se mwen menm ki ba yo tout ladrès yo genyen an. W'a

mande yo pou yo fè rad Arawon yo, pou ou ka mete l' apa pou mwen pou l' ka sèvi m' prèt.⁴ Men
 ki rad pou yo fè: yon plastwon, yon jile, yon gwo rad long, yon chemiz byen bwode, yon gwo
 mouchwa pou vlope tèt ak yon sentiwon. y'a fè rad sa yo pou Arawon, frè ou la, ak pou pitit li yo
 pou yo ka sèvi m' prèt.⁵ Pou fè travay la, atizan yo va sèvi ak lò ak twal siperyè koulè ble, violèt
 ak wouj ansanm ak twal fen.⁶ ¶ y'a fè jile a ak lò ak twal siperyè koulè ble, violèt ak wouj ansanm
 ak twal fen blan tise byen sere. y'a fè bèl bodri byen fèt sou li.⁷ Va gen de zèpòlèt, yonn chak bò
 jile a. Se yo ki pou tache moso devan an ak moso dèyè a ansanm.⁸ Bèl sentiwon byen bwode ki
 pou kenbe jile a va fè yon sèl pyès ak li, ak menm kalite bodri a sou li tou. y'a fè l' an lò ak twal
 siperyè koulè ble, violèt ak wouj, ansanm ak twal fen blan tise byen sere.⁹ W'a pran de pyè oniks,
 w'a grave non branch fanmi douz pitit Izrayèl yo sou yo.¹⁰ W'a grave non sis sou yon pyè, ak non
 sis sou lòt la, dapre laj yo, depi pi gran an jouk pi piti a.¹¹ Avèk ladrès òfèv ki konn grave non
 sou bag, ou ankò ladrès atizan ki konn fè so, w'a grave non branch fanmi pèp Izrayèl yo sou de pyè
 yo, epi w'a moute pyè yo chak sou yon moso lò.¹² W'a moute yo sou de zèpòlèt jile a pou yo pa
 bliye branch fanmi pèp Izrayèl yo. Konsa, Arawon va pote non yo sou zepòl li pou Seyè a pa janm
 bliye yo.¹³ W'a pran de moso lò pou moute pyè yo sou yo.¹⁴ W'a fè de ti chenn ak pi bon kalite
 lò ki genyen. Chenn yo va trese tankou ti kòdon. W'a tache yo sou moso lò yo.¹⁵ ¶ W'a fè yon
 plastwon pou yo mete bagay y'a sèvi pou chache konnen sa Bondye vle. Se yon bon atis ki pou fè
 travay bodri a tankou pou jile a. W'a fè l' an lò ak twal siperyè koulè ble, violèt ak wouj ansanm
 ak twal fen blan tise byen sere.¹⁶ Plastwon an va mezire nèf pous kare kare, l'a double.¹⁷ W'a
 moute kat ranje pyè sou li. Nan premye ranje a, va gen yon pyè woubi, yon pyè topaz ak yon pyè
 emwòd.¹⁸ Nan dezyèm ranje a, va gen yon pyè malachi, yon pyè safi ak yon pyè dyaman.¹⁹ Nan
 twazyèm ranje a, va gen yon pyè opal, yon pyè agat ak yon pyè ametis.²⁰ Nan katriyèm ranje a,
 va gen yon pyè krizolit, yon pyè oniks ak yon pyè jasp. y'a moute tout pyè sa yo chak sou yon moso
 lò.²¹ Va gen douz pyè ak non branch fanmi pèp Izrayèl yo grave sou yo, yon non sou chak pyè.
 y'a grave non yo tankou lè òfèv ap grave bag.²² W'a pran pi bon kalite lò ki genyen, w'a fè de ti
 chenn pou plastwon an. W'a trese yo tankou ti kòdon.²³ W'a fè de ti bag an lò, w'a tache yo nan
 de bout anwo plastwon an.²⁴ W'a mare de ti chenn yo nan de bag yo.²⁵ W'a pran de lòt bout
 chenn yo, w'a fè yo pase pa devan jile a, w'a tache yo sou de moso lò ki sou zèpòlèt jile a.²⁶ W'a
 fè ankò de lòt bag an lò, w'a tache yo nan de bout anba plastwon an sou lanvè, nan bòdi a toupre

²⁷
 jile a. W'a fè de lòt bag an lò ankò, w'a tache yo anba zèpòlèt jile a pa devan, toupre kouti a
²⁸
 anwo tèt sentiwon bwode a. y'a mare de bag plastwon an ak de bag jile a ansanm ak yon kòdon
 ble pou plastwon an bat sou sentiwon jile a. Konsa, plastwon an p'ap ka soti detache sou jile a.
²⁹
 Lè Arawon va antre nan kote ki apa pou Bondye a, l'a pote non branch fanmi pèp Izrayèl yo sou
³⁰
 kè l', sou plastwon an, konsa Seyè a p'ap janm bliye yo. W'a mete nan plastwon an ourim yo ak
 toumim yo. Konsa, Arawon va pote yo sou kè l' lè l'ap parèt devan lòtèl Seyè a. Lè l'a kanpe devan
³¹
 lòtèl Seyè a, l'a toujou pote sou kè l' sa li sèvi pou fè pèp Izrayèl la konnen volonte m'. ¶ W'a
³²
 pran twal ble pou fè rad ki ale anba jile a. Nan mitan rad la, w'a fè yon twou pou l' pase tèt li.
³³
 W'a mete yon doubli nan ankoli a, tankou yo fè l' pou varèz an po bèt yo, pou li pa chire. Sou
 tout woulèt anba rad la, w'a pran twal ble, violèt ak wouj, w'a fè bodri an fòm grenad ak ti klòch
³⁴
 an lò nan mitan yo. Sou tout woulèt rad la va gen yon grenad, yon ti klòch, yon grenad, yon ti
³⁵
 klòch, jouk yo fè tout tou rad la. Se rad sa a Arawon va mete sou li lè li pral fè sèvis. Lè l'ap
 antre kote yo mete apa pou Bondye a pou l' parèt devan lòtèl Seyè a, ansanm ak lè l'ap soti, y'a
³⁶
 tandè ti klòch yo ap sonnen. Konsa li p'ap mouri. W'a fè fè yon ti plak ak pi bon kalite lò ki
³⁷
 genyen. Tankou lè y'ap fè so, w'a grave pawòl sa a sou li: Apa pou Seyè a. W'a mare l' sou devan
³⁸
 mouchwa tèt la avèk yon ti kòdon ble. Arawon va mete l' sou fwon li, konsa Arawon va pran
 sou tèt li tou sa pèp Izrayèl la va fè ki mal lè y'ap pote ofrann apa yo bay Seyè a. Arawon va toujou
³⁹
 pote l' sou fwon li pou ofrann yo ka toujou fè Seyè a plezi. W'a fè chemiz la ak mouchwa tèt la
⁴⁰
 ak twal fen blan, ansanm ak yon sentiwon bwode byen bèl. ¶ W'a fè rad, sentiwon ak bonnèt
⁴¹
 pou pitit gason Arawon yo tou, pou yo ka byen abiye pou moun ka rekonèt grad yo. Apre sa,
 w'a mete rad yo sou Arawon, frè ou la, ansanm ak pitit gason l' yo. Lèfini, w'a vide lwil sou tèt yo,
 w'a ba yo pouvwa pou yo fè sèvis Bondye. W'a mete yo apa pou mwen pou yo ka sèvi m' prèt.
⁴²
 W'a fè kalson ak twal fen pou yo pou kò yo pa parèt anba rad la. Kalson yo va pran depi nan ren
⁴³
 desann wotè jenou yo. Se pou Arawon ak pitit gason l' yo toujou pote kalson yo lè y'ap antre
 nan Tant Randevou a, osinon lè y'ap pwoche bò lòtèl la pou fè sèvis nan kote ki apa pou Bondye
 a. Konsa, yo p'ap fè sa ki mal, yo p'ap mouri. Sa se yon lwa k'ap la pou tout tan pou Arawon ak
 tout pitit pitit gason li yo apre li.

Chapter 29

¹ ¶ Men sa ou gen pou fè pou mete Arawon ak pitit gason l' yo apa pou mwen pou yo ka sèvi
 m' prèt. Pran yon jenn ti towò bèf ak de belye mouton ki san defo. ² W'a pran bon farin frans, w'a
 fè kèk pen san ledven, kèk gato san ledven, men ak lwil melanje nan pa t' la. W'a fè tou kèk gato
 plat san ledven wouze ak lwil. ³ Mete yo nan yon panyen. Ofri yo ban mwen nan panyen an ansanm
 ak ti towò a ak de belye mouton yo. ⁴ W'a fè Arawon ansanm ak pitit gason l' yo vance jouk devan
 pòt Tant Randevou a. W'a benyen yo nan dlo. ⁵ Apre sa, w'a pran rad yo, w'a biye Arawon. W'a
 mete chemiz la, rad la, jile a ak plastwon an sou li. W'a mare sentiwon an nan ren li. ⁶ W'a mete
 mouchwa a nan tèt li. W'a mare plak ki make Apa pou Seyè a, sou mouchwa a. ⁷ Lèfini, w'a pran
 lwil pou mete moun apa a, w'a vide l' sou tèt Arawon. Konsa, w'a mete l' apa pou mwen. ⁸ W'a fè
 pitit li yo pwoche, w'a mete chemiz yo sou yo. ⁹ W'a pase sentiwon nan ren yo, w'a mete bonnèt
 yo nan tèt yo. Se yo menm k'ap sèvi m' prèt dapre yon lwa ki la pou tout tan. Se konsa w'a bay
 Arawon ak pitit gason l' yo pouvwa pou fè sèvis Bondye. ¹⁰ Mennen towò bèf la devan Tant
 Randevou a. Arawon ak pitit gason l' yo va mete men yo sou tèt li. ¹¹ W'a touye towò a la devan
 Seyè a, devan pòt Tant Randevou a. ¹² W'a tranpe dwèt ou nan san towò a. W'a mete ti degout san
 sou kat kòn lòtèl la. Apre sa, w'a vide tout rès san an atè nan pye lòtèl la. ¹³ Lèfini, w'a pran grès
 ki vlope tripay yo, mas grès ki sou fwa a ansanm ak de wonyon yo ak tout grès yo, w'a ofri yo ban
 mwen. W'a boule yo nèt sou lòtèl la. ¹⁴ Men w'a pran tout vyann lan, po a ak tout tripay la, w'a
 boule yo andeyò limit kote nou rete a. Se va yon ofrann bèt y'ap touye pou Bondye ki va sèvi pou
 wete peche moun fè san yo pa konnen. ¹⁵ W'a pran yonn nan belye mouton yo. Arawon ak pitit
 gason l' yo va mete men yo sou tèt li. ¹⁶ W'a touye l', w'a pran san an, w'a vide l' tout arebò lòtèl
 la. ¹⁷ W'a dekoupe belye a an divès moso. W'a lave tonbe a ansanm ak pye yo. W'a mete yo anwo
 moso vyann yo ansanm ak tèt la. ¹⁸ W'a ofri tout belye a ban mwen. W'a boule l' nèt sou lòtèl la.
 Sa se yon ofrann bèt w'a boule nèt pou Seyè a, yon ofrann bèt ki fèt pou boule nèt nan dife, yon
 ofrann bèt k'ap fè Seyè a plezi ak bon sant li. ¹⁹ Apre sa, pran lòt belye mouton an. Arawon ak pitit
 gason l' yo va mete men yo sou tèt li. ²⁰ W'a touye l', w'a pran ti gout nan san li, w'a mete l' sou
 tete zòrèy dwat Arawon ak sou tete zòrèy dwat pitit gason l' yo, sou gwo pous men dwat yo ak sou
 gwo zòtèy pye dwat yo. W'a pran rès san an, w'a vide l' tout arebò lòtèl la. ²¹ Pran ti gout nan san
 ki sou lòtèl la ansanm ak ti gout nan lwil pou mete moun apa a, voye yo sou Arawon ak sou rad li

yo, sou pitit gason l' yo ak sou rad yo tou. Konsa, w'a mete Arawon ak pitit gason l' yo ansanm ak
²² tout rad yo apa pou mwen nèt. Wete tout grès dezyèm belye mouton an: ke a ak tout grès li, grès
ki vlope tripay yo, moso grès ki sou fwa a, de wonyon yo ak tout grès yo, ansanm ak jigo dwat la,
²³ paske se yon belye k'ap sèvi nan sèvis pou mete prèt yo apa a. Nan panyen pen san ledven ki
²⁴ devan Seyè a, w'a pran yon pen antye, yon gato fèt ak lwil ak yon pen plat. W'a mete tout bagay
sa yo nan men Arawon ak nan men pitit gason l' yo. W'a mete yo apa pou sèvis mwen, w'a fè yo
²⁵ balanse l' devan Seyè a tankou yon ofrann. Lèfini, pran manje a nan men yo, boule l' sou lòtèl
la, anwo ofrann ki boule deja a, pou l' fè Seyè a plezi ak bon sant li. Se va yon ofrann pou Seyè a
²⁶ ki fèt pou boule nèt nan dife. Pran vyann pwatrin belye ki te sèvi nan sèvis pou mete Arawon
²⁷ apa a, w'a balanse l' devan Seyè a tankou yon ofrann. Se va pòsyon pa ou la sa. W'a pran vyann
pwatrin belye ki te sèvi nan sèvis pou mete Arawon ak pitit gason l' yo apa a, w'a mete yo apa pou
Seyè a. W'a balanse yo devan Seyè a tankou yon ofrann. W'a fè menm bagay la tou pou jigo w'ap
²⁸ wete pou prèt yo. Dapre lòd mwen bay pèp Izrayèl pou tout tan an, moso vyann sa yo va pou
Arawon ak pou pitit gason l' yo. Se va yon kado pèp Izrayèl la pral blije fè. Se pòsyon yo va toujou
wete pou prèt yo, pòsyon pèp Izrayèl la va toujou bay nan ofrann y'ap fè pou di mèsè. Se kado y'a
²⁹ bay Seyè a. Lè Arawon va mouri, rad sèvis li yo va rete pou pitit li yo. Se rad sa yo y'a mete
sou yo lè y'ap vide lwil sou tèt yo pou mete yo apa, lè y'ap ba yo pouvwa pou fè sèvis Bondye.
³⁰ Pitit Arawon ki va pran plas Arawon nan sèvis Seyè a va mete rad yo sou li pandan sèt jou, epi
³¹ l'a antre nan tant lan pou fè sèvis li nan kote ki apa pou Bondye a. W'a pran belye mouton ki te
³² sèvi nan sèvis pou mete apa a, w'a fè kwit vyann li yon kote ki apa pou Bondye. Arawon ak pitit
gason l' yo va manje vyann belye a ansanm ak pen ki nan panyen an. y'a rete bò pòt devan Tant
³³ Randevou a. y'a manje manje ki te sèvi nan sèvis yo fè pou mande Bondye padon pou peche yo
fè san yo pa konnen, sèvis yo te fè lè yo t'ap mete yo apa, lè yo t'ap resevwa pouvwa pou fè sèvis
³⁴ Bondye a. Se prèt yo ase ki ka manje manje sa yo, paske se manje yo mete apa pou Bondye. Si
gen rès nan vyann lan ak nan pen an ki rete apre yo fin manje, nan denmen maten w'a boule l' nan
³⁵ dife. Piga pesonn manje li, paske se manje yo mete apa pou Bondye. W'a fè tou sa m' te ba ou
lòd fè pou Arawon ansanm ak pitit gason l' yo. W'a pase sèt jou ap fè sèvis pou mete yo apa pou
³⁶ sèvis mwen. Chak jou, w'a ofri yon towò bèf, w'a touye l' pou mande Bondye padon pou peche
yo fè san yo pa konnen. Avèk ofrann bèt sa a w'ap fè pou peche a, w'a mete lòtèl la nan kondisyon
³⁷ pou l' sèvi nan sèvis Bondye. Lèfini, w'a vide lwil sou li, w'a mete l' apa pou sèvis Bondye. Pandan
sèt jou, w'a fè ofrann bèt pou peche yo fè san yo pa konnen an sou lòtèl la. Konsa w'a mete lòtèl la
apa pou sèvis Bondye a. Konsa, lòtèl la va apa nèt pou Bondye. Tout moun ki va manyen lòtèl la,

ak tout bagay ki va an kontak ak lòtèl la va tounen bagay yo mete apa pou Bondye tou. ³⁸ ¶ Men sa ou gen pou ofri sou lòtèl la: Chak jou, san sote yon jou, w'a ofri de ti mouton ki poko gen ennan bay Bondye. ³⁹ W'a ofri yonn nan mouton yo nan maten, lòt la nan aswè anvan li fin fè nwa nèt. ⁴⁰ Avèk premye ti mouton an, w'a ofri sèt ti mamit farin frans melanje ak yon lit edmi bon lwil oliv fèt nan moulen. W'a pran yon lit edmi diven pou ofri pou bwason ak manje a. ⁴¹ W'a touye dezyèm ti mouton an aswè. W'a ofri ansanm avè l' menm manje ak menm bwason ou te ofri nan maten an. W'a boule tout bagay sa yo nèt nan dife. Se va yon ofrann bèt k'ap fè Seyè a plezi ak bon sant li. ⁴² Ofrann nan dife sa a, yo gen pou yo fè l' tout tan devan mwen, de pitit an pitit nan papòt Tant Randevou a. Se la mwen menm Seyè a, m'ap kontre ak pèp mwen an pou m' pale ak yo. ⁴³ Se la m'ap kontre pèp Izrayèl la. Avèk pouvwa mwen, m'ap mete kote sa a apa pou mwen. ⁴⁴ M'ap mete Tant Randevou a apa pou sèvis mwen. M'ap fè menm bagay la tou pou lòtèl la. M'ap mete Arawon ak pitit gason l' yo apa pou mwen pou yo ka sèvi m' prèt. ⁴⁵ M'ap rete nan mitan pèp Izrayèl la, se mwen menm ki va Bondye yo. ⁴⁶ y'a konnen se mwen menm ki Seyè a, Bondye yo a, se mwen menm ki te fè yo soti kite peyi Lejip pou m' te kapab rete nan mitan yo. Se mwen ki Seyè a, Bondye yo a.

Chapter 30

¹ ¶ W'a fè yon lòtèl an bwa zakasya pou boule lansan. ² W'a fè l' kare kare. L'a mezire dizwit pous longè, dizwit pous lajè ak transtis pous wotè. Kat pwent ki depase yo va fè yon sèl pyès avèk lòtèl la. Se va kòn lòtèl la. ³ W'a kouvri tout anwo lòtèl la, kat kote l' yo ansanm ak kat kòn li yo ak pi bon kalite lò ki genyen. W'a fè yon bòdi an lò tout arebò l'. ⁴ W'a fè de bag an lò, w'a tache yo anba bòdi a sou de bò lòtèl la. Se nan bag sa yo w'a pase manch ki pou sèvi pou pote lòtèl la. ⁵ W'a fè manch yo an bwa zakasya, epi w'a kouvri yo ak lò. ⁶ W'a mete lòtèl la devan rido ki pann devan Bwat Kontra a avèk kouvèti li sou li. Se la m'a vin jwenn ou. ⁷ Arawon va boule lansan bon sant sou li chak maten lè l'ap netwaye lanp yo. ⁸ L'a boule lansan tou chak swa lè l'ap ranje lanp yo. Se pou yo toujou fè ofrann lansan sa a devan lòtèl Seyè a, chak jou san sote yonn, de pitit an pitit. ⁹ Se pa pou nou ofri sou lòtèl la lansan ki pa fèt tout espre pou sèvis la, ni vyann bèt ki fèt pou boule, ni lòt manje. Ni se pa pou nou ofri ankenn bwason sou li non plis. ¹⁰ Yon fwa chak

lanne, Arawon va fè yon seremoni sou kòn lòtèl la pou Bondye ka fè gras. Yon fwa chak lanne, avèk san bèt yo touye pou mande padon pou peche a, l'a mande gras pou lòtèl la. Se pou yo toujou fè sa de pitit an pitit. Lòtèl sa a, se yon lòtèl ki fèt pou yo mete apa nèt pou Seyè a. ¶ Seyè a di
¹¹
 Moyiz: ¹² -Lè n'ap konte konbe moun ki genyen nan peyi Izrayèl la pou nou fè resansman, chak gason va bay Seyè a kichòy pou lavi yo, pou malè pa rive lè y'ap fè resansman an. ¹³ Chak moun y'a konte nan resansman an va peye de goud edmi, dapre jan yo konte lajan nan kote ki apa pou Bondye a. Chak moun va peye sa tankou yon ofrann yo mete apa pou Seyè a. ¹⁴ Tout moun ki dwe bay non yo nan resansman an, sa vle di tout moun ki gen ventan osinon ki depase ventan, va peye menm lajan an bay Seyè a. ¹⁵ Moun ki rich p'ap peye plis, ni moun ki pòv p'ap peye mwens, lè y'ap peye lajan an bay Seyè a pou lavi yo. ¹⁶ W'a resevwa lajan sa a nan men pèp la, w'a depanse l' pou sèvis Tant Randevou a. Sa va sèvi pou Seyè a pa janm bliye pèp Izrayèl la. Se va bagay y'a peye pou sove lavi yo. ¹⁷ ¶ Seyè a di Moyiz konsa: ¹⁸ -W'a fè yon gwo basen an kwiv avèk yon pye an kwiv tou. W'a mete l' ant Tant Randevou a ak lòtèl la. W'a mete dlo ladan l'. ¹⁹ Arawon ak pitit gason l' yo va sèvi ak dlo sa a pou yo lave men yo ak pye yo. ²⁰ Lè y'ap antre nan Tant Randevou a, y'a lave men yo ak pye yo nan dlo sa a. y'a fè menm jan an tou lè y'ap pwoche bò lòtèl la pou fè sèvis pou ofri Seyè a bèt ki fèt pou boule nèt nan dife a pou li. Konsa, yo p'ap mouri.
²¹ Wi, se pou yo lave men yo ak pye yo pou yo pa mouri. Se yon lòd pou Arawon, pou pitit gason l' yo ak pitit pitit k'ap vin apre yo, lòd pou yo toujou swiv, de pitit an pitit. ²² ¶ Seyè a di Moyiz ankò: ²³ -Pran pi bon plant santi bon ki genyen: ven liv lami, dis liv kannèl bon kalite, dis liv fèy sitwonèl, ²⁴ ven liv kas. W'a mezire yo dapre mezi yo sèvi nan kote ki apa pou Bondye a. W'a pran tou senk ka lwil oliv. ²⁵ Avèk tou sa, w'a fè yon lwil jan moun ki konn fè odè a fè. Lwil sa a va sèvi pou mete moun apa pou sèvis Bondye. Se avèk lwil sa a w'a sèvi pou mete moun osinon nenpòt bagay apa pou sèvis Bondye. ²⁶ W'a voye lwil la sou Tant Randevou a, sou Bwat Kontra a, ²⁷ sou tab la ak tout bagay ki sèvi sou tab la, sou lanp sèt branch lan ak tout bagay ki sèvi ak li, sou lòtèl lansan an, ²⁸ sou lòtèl kote yo boule ofrann yo ak sou tout bagay ki sèvi sou li, sou basen lan ak tout pye l'. ²⁹ Se konsa w'a mete tout bagay sa yo apa pou mwen pou yo ka pou mwen ase. Tout bagay ki va touche ak yo va apa pou mwen tou. ³⁰ Lèfini, w'a vide lwil la sou Arawon ak sou pitit gason l' yo. Konsa w'a mete yo apa pou yo ka sèvi m' prèt. ³¹ W'a pale ak pitit Izrayèl yo, w'a di yo: Nou wè lwil sa a, se ak li pou nou sèvi, de pitit an pitit, pou mete moun osinon nenpòt bagay

³²
 apa pou mwen. ³² Nou pa dwe sèvi ak lwil sa a sou nenpòt ki moun, ni nou pa fèt pou fè yon lòt lwil ak menm konpozisyon an. Se yon bagay ki apa pou mwen nèt. Nou fèt pou nou konsidere l' pou sa li ye a. ³³ Si yon moun sèvi ak menm konpozisyon an pou fè lwil, osinon si yon moun sèvi avè l' sou yon moun ki pa prèt, se pou yo disparèt li nan mitan pèp la. ³⁴ Apre sa, Seyè a di Moyiz konsa: -Pran epis sa yo: safetida, lorye, gonm bwa ak pi bon kalite lansan. W'a pran menm valè nan chak. ³⁵ W'a fè yon lansan ak yo san ankenn kras ladan l', menm jan moun ki konn fè odè yo fè sa. W'a mete yon ti sèl ladan l', w'a mete l' apa pou mwen. ³⁶ W'a pran ti gout ladan l', w'a pile l' fè l' fè poud. W'a sèvi avèk ti gout dèvan bwat ki gen ròch plat kontra a, nan Tant Randevou a kote pou m' kontre avè ou la. Se pou ou konsidere lansan sa a tankou yon bagay yo mete apa pou mwen ase. ³⁷ Piga ou sèvi ak menm konpozisyon sa a pou fè lansan pou sèvi pou tèt pa ou. Sa se yon bagay ki rezève pou sèvis Bondye ase. ³⁸ Si yon moun fè yon konpozisyon menm jan an pou sèvi l' odè, se pou yo disparèt li nan mitan pèp la.

Chapter 31

¹ ¶ Seyè a pale ak Moyiz, li di l': ² -Mwen chwazi Bezaleyèl, pitit Ouri, pitit pitit Our, nan branch fanmi Jida a. ³ Mwen mete lespri m' sou li an kantite pou l' ka gen ladrès, bon konprann ak konesans pou l' fè tout kalite travay atizan yo konn fè, ⁴ pou l' ka fè bèl desen, pou l' travay yo an lò, an ajan ak an kwiv, ⁵ pou l' travay pyè tankou òfèv yo konn fè a, pou l' moute yo sou nenpòt bagay, pou l' ka fè desen sou bwa, wi pou l' fè tout kalite bon bagay atizan konn fè. ⁶ Nan travay sa a, mwen bay Bezaleyèl yon lòt bòs pou ede l' nan travay la: se Owoliyab, pitit Ayisamak, moun branch fanmi Dann. Konsa tou, tout lòt moun nan pèp Izrayèl la n'a wè ki gen ladrès, konnen se mwen menm ki ba yo l' pou yo ka fè sa mwen mande ou fè a. ⁷ Men sa mwen te mande ou fè: Tant Randevou a, Bwat Kontra a avèk ròch plat yo, kouvèti ki pou ale sou bwat la ansanm ak tout mèb ki pou ale nan tant lan, ⁸ tab la ak lanp sèt branch an lò a ansanm avèk tout bagay ki pou sèvi avèk yo, lòtèl pou boule lansan an, ⁹ lòtèl pou boule ofrann yo ak tout bagay ki pou sèvi sou lòtèl la, basen lan ak tout pye l' a, ¹⁰ bèl rad seremoni, rad pou Arawon, prèt la, ak pou pitit gason l' yo mete sou yo lè y'ap fè sèvis nan tant lan, ¹¹ lwil pou mete moun apa pou Bondye a ak lansan santi

bon pou kote ki apa pou Bondye a. Lè y'ap fè bagay sa yo, se pou yo fè l' jan mwen te di ou la.

¹² ¶ Seyè a di Moyiz konsa: ¹³ -W'a di pèp Izrayèl la: Se pou nou respekte jou repo mwen yo, paske se va yon siy ant mwen menm ak nou menm, ak tout pitit pitit nou yo, pou fè konnen se mwen ¹⁴ menm, Seyè a, ki mete nou apa pou mwen. Se poutèt sa, se pou nou respekte jou repo a paske se yon jou pou nou mete apa pou mwen. Si yon moun pa respekte jou sa a, se pou yo touye l'. Si ¹⁵ yon moun fè nenpòt ki travay jou sa a, se pou yo disparèt li nan mitan pèp li a. N'a fè tout travay nou pandan sis jou. Men setyèm jou a, se va yon gwo jou repo, jou n'a mete apa pou Seyè a. Nenpòt ¹⁶ moun ki fè nenpòt ki travay jou sa a, se pou yo touye l'. Se tout pèp la nèt ki pou respekte jou ¹⁷ repo a de pitit an pitit. Se yon kontra ki la pou tout tan. Sa va yon siy ant mwen menm ak pèp Izrayèl la, paske mwen menm, Seyè a, mwen te pran sis jou pou m' fè syèl la ak latè a. Sou setyèm ¹⁸ jou a mwen te sispann travay, mwen te pran repo. Lè Seyè a te fin pale konsa ak Moyiz sou mòn Sinayi a, li ba li de ròch plat kote li te ekri kontra a ak pròp men li.

Chapter 32

¹ ¶ Lè pèp la wè Moyiz te rete lontan sou mòn lan san li pa desann, yo sanble bò kote Arawon, yo di l' konsa: -Ann debouye nou fè lòt bondye ki pou mache devan nou, paske nonm yo rele Moyiz ² la ki te fè nou moute soti nan peyi Lejip la, nou pa konn sa ki rive l'. Arawon di yo: -Wete tout zanno lò ki nan zòrèy madanm nou yo ak nan zòrèy pitit fi ak pitit gason nou yo, pote yo ban mwen. ³ ⁴ Konsa, tout pèp la wete zanno lò yo te gen nan zòrèy yo, yo pote yo bay Arawon. Arawon pran zanno yo, li fonn yo, li koule lò a nan yon moul, li fè estati yon ti towò bèf. Pèp la di: -Pèp Izrayèl, ⁵ men bondye nou an. Se li ki te fè nou soti kite peyi Lejip la. Lè Arawon wè sa, li bati yon lòtèl ⁶ devan estati ti towò bèf la, epi li di yo: -Denmen m'ap fè yon gwo fèt pou Seyè a. Nan denmen maten yo leve byen bonè, yo touye bèt, yo boule yo nèt ofri bay Seyè a. Yo touye lòt bèt tou pou ⁷ di l' mèsè. Apre sa, pèp la chita, yo manje, yo bwè. Lèfini, yo leve pou yo pran plezi yo. ¶ Lè sa a, Seyè a di Moyiz: -Ale non, ou mèt desann. Paske pèp ou a, pèp ou te fè moute soti nan peyi Lejip ⁸ la, gen tan deraye, yo lage tèt yo nan bwa. Yo gen tan kite chemen mwen te mande yo swiv la. Yo pran lò, yo fonn li, yo fè estati yon ti towò bèf, yo tonbe fè sèvis pou li, yo touye bèt ofri ba li, ⁹ epi yo di: Pèp Izrayèl, men bondye nou an. Se li ki te fè nou soti kite peyi Lejip la. Seyè a di ¹⁰ Moyiz ankò: -Mwen wè pèp sa a se yon pèp ki gen tèt di. Bon, koulye a kite m' al regle ak yo. Mwen pral fè yo konnen lè m' an kòlè, m'ap detwi yo, m'ap boule yo. Men, ou menm, m'ap fè ou

¹¹
 vin yon gwo nasyon. Moyiz kriye nan pye Seyè a, Bondye l' a, li di l': -Seyè, poukisa pou ou ta koute kòlè ou pou ou fache sou pèp ki pou ou a, pèp ou menm menm te fè moute soti kite Lejip

¹²
 avèk gwo pouvwa ou, avèk fòs ponyèt ou? Atò, sa pou moun peyi Lejip yo di? y'a di: Ala Bondye malveyan! Li fè yo soti kite Lejip pou l' te ka touye yo nan mòn yo, pou l' te ka disparèt yo sou

¹³
 latè. Seyè, pa koute kòlè ou! Chanje lide. Pa fè malè sèk sa a tonbe sou pèp ou a. Chonje sèvitè ou yo, Abraram, Izarak ak Izrayèl. Chonje pwomès ou te fè yo. Ou te fè sèman sou tèt ou, ou te di yo: M'ap ban nou pitit pitit an kantite, y'ap tankou zetwal nan syèl la. M'ap bay pitit pitit nou yo

¹⁴
 tout peyi mwen te di m'ap ban nou an, pou peyi a rele yo chèmèt pou tout tan. Lè sa a, Seyè a

¹⁵
 chanje lide, li pa voye malè sèk li te fè lide voye sou pèp la ankò. ¶ Moyiz pran chemen pou l' tounen. Li desann soti nan mòn lan avèk de ròch plat kontra a nan men l'. Ròch yo te ekri sou tout

¹⁶
 kò yo, devan kou dèyè. Se Bondye menm ki te travay ròch plat sa yo. Se li menm tou ki te ekri

¹⁷
 sou yo ak pròp men li. Se li ki te grave tout lèt ki ekri sou ròch yo. Jozye te tande pèp la ki t'ap

¹⁸
 rele byen fò anba a. Li di Moyiz: -Pou tout bri mwen tande a, gen gwo goumen nan kan an! Men Moyiz reponn li: -Non! Non! Kalite chante sa a, se pa chante moun ki genyen yon batay ni chante

¹⁹
 moun ki pèdi batay. Se de gwoup moun k'ap chante: yonn ap reponn lòt. Lè Moyiz rive toupre kan an, li wè estati ti towò bèf la ak moun yo ki t'ap danse. Moyiz fè yon sèl kòlè, li voye ròch plat

²⁰
 ki te nan men l' yo jete. Yo tonbe, y al kraze an miyèt moso anba pye mòn lan. Li pran estati ti towò bèf yo te fè a, li boule l', li kraze l', li fè l' tounen pousyè. Li simen pousyè a nan dlo. Lèfini,

²¹
 li fè moun Izrayèl yo bwè dlo a. ¶ Apre sa li di Arawon: -Kisa moun sa yo fè ou menm pou ou

²²
 kite yo fè kalite gwo peche sa a? Arawon reponn li: -Mèt, tanpri, pa fache sou mwen! Ou menm,

²³
 ou konnen jan pèp sa a toujou pare pou fè sa ki mal. Se yo menm ki di m' fè bondye pou yo, bondye ki pou mache devan yo, paske yo pa konnen sa ki rive Moyiz, nonm sa a ki te fè yo soti

²⁴
 kite Lejip la. Lè sa a, mwen mande kilès nan mitan yo ki gen lò. Tout moun ki te gen lò sou yo

²⁵
 ban mwen l'. Mwen lage lò a nan dife, epi estati ti towò bèf sa a parèt. Moyiz wè pèp la te fin dechennen, paske Arawon te lage brid ba yo, yo te lage kò yo nan sèvi zidòl. Sa fè yo pa t' anyen

²⁶
 ankò devan lènmi yo. Moyiz kanpe nan pòtay lakou kan an, li pale byen fò, li di: -Tout moun

²⁷
 ki pou Seyè a, vin jwenn mwen. Se konsa tout pitit Levi yo vin jwenn li. Li di yo: -Men sa Seyè a, li menm ki Bondye pèp Izrayèl la di: Se pou nou chak pran nepe nou, mache nan tout kan an, depi nan pòtay sa a rive jouk lòt bò a. Touye mezi moun ki tonbe anba men nou, kit se frè nou, kit

²⁸
 se zanmi nou, osinon vwazinaj nou. Pitit Levi yo fè sa Moyiz te ba yo lòd fè a. Jou sa a, te gen

²⁹ twamil moun konsa nan pèp la ki te pèdi lavi yo. Moyiz di pitit Levi yo: -Jòdi a, avèk san pitit gason nou yo ak san frè nou yo nou fè koule a, nou mete tèt nou apa nèt pou sèvis Seyè a. Se poutèt sa tou, Seyè a pa manke ban nou benediksyon l' jòdi a. ³⁰ ¶ Nan denmen, Moyiz rele pèp la, li di yo: -Nou te fè yon gwo peche. Men koulye a, mwen pral moute sou mòn lan bò kote Seyè a. m'a wè si m' ka jwenn padon pou peche nou an. ³¹ Moyiz tounen bò kote Seyè a. Li di l': -Ou wè gwosè peche pèp la fè. Yo fè yon estati an lò pou sèvi yo bondye. ³² Men, tanpri, padonnen peche yo. Si se pa sa, tanpri efase non m' nan liv ou a. ³³ Seyè a reponn Moyiz, li di l': -Moun ki peche kont mwen an, se non l' pou m' efase nan liv mwen an. ³⁴ Koulye a, ou mèt ale. W'a mennen pèp la kote mwen te di ou mennen yo a. Chonje byen. Zanj mwen an ap mache devan ou. Men, lè jou a va rive pou m' vin fè regleman ak yo a, m'ap pini yo pou peche yo. ³⁵ Seyè a te voye yon maladi sou pèp la pou pini l', paske yo te fòse Arawon fè estati yon ti bèf pou yo.

Chapter 33

¹ ¶ Seyè a di Moyiz: -Leve non, ou menm ak tout pèp ou te fè soti kite Lejip la. Kite kote nou ye a. Pran chemen pou n' ale nan peyi mwen te sèman bay Abraram, Izzak ak Jakòb la, lè m' te di yo m'ap ba yo tè sa a pou pitit pitit yo. ² M'ap voye yonn nan zanj mwen yo devan nou. M'ap mete moun Kanaran yo, moun Amori yo, moun Et yo, moun Ferezi yo, ak moun Jebis yo deyò sou tè yo a. ³ Ale. W'ap rive nan yon peyi kote lèt ak siwo myèl koule tankou dlo. Men, se pa mwen menm menm ki prale ansanm ak nou, paske nou se yon bann moun ki gen tèt di, mwen ta ka touye nou sou wout la. ⁴ Lè pèp la tandè move nouvèl sa a, yon sèl lapenn pran yo. Tout moun refize pote bijou sou yo. ⁵ Seyè a di Moyiz konsa: -Di pitit Izrayèl yo se yon bann moun ki gen tèt di yo ye. Si se pou m' ta ale ak yo, menm yon sèl ti kadè, mwen ta fin estèminen yo nèt. Koulye a, se pou yo wete tout bijou yo gen sou yo. Lè sa a m'a wè, sa m' ka fè pou yo. ⁶ Se konsa, depi sou mòn Orèb, moun Izrayèl yo pa janm pote bijou ankò sou yo. ⁷ ¶ Moyiz pran tant lan, li mete l' yon ti distans an deyò limit kan kote yo te enstale a. Li rele l' Tant Randevou a. Tout moun ki te bezwen pale ak Seyè a te blije soti nan kan an pou ale nan Tant Randevou a. ⁸ Chak fwa Moyiz te soti pou l' al nan tant lan, tout pèp la te fèt pou kanpe, chak moun devan papòt kay yo, ap gade Moyiz jouk li antre nan tant lan. ⁹ Depi Moyiz antre nan tant lan, poto nwaj la desann, li kanpe sou papòt tant

lan. Epi Seyè a pran pale ak Moyiz.¹⁰ Lè tout moun wè poto nwaj la kanpe nan papòt tant lan, yo leve, yo bese tèt yo jouk atè devan papòt kay pa yo.¹¹ Seyè a te konn pale fasafas ak Moyiz tankou yon moun k'ap pale ak zanmi l'. Apre sa, Moyiz te tounen nan kan kote pèp la te enstale a. Men, te gen yon jenn gason yo te rele Jozye, pitit gason Noum lan, ki t'ap sèvi ak Moyiz. Li menm, li pa t' janm kite tant lan.¹² ¶ Moyiz di Seyè a: -Ala ou di m' fè pèp la moute ale nan peyi a, men ou pa di m' kilès w'ap voye avè m' pou ede m'. Men, koulye a ou di m' ou konnen m' byen, ou konnen ki moun mwen ye. Ou kontan mwen anpil.¹³ Bon, si ou kontan m' vre, tanpri, fè m' konnen lide ou gen nan tèt ou pou m' ka konnen ki moun ou ye, pou m' ka toujou fè ou plezi. Chonje tou, pèp sa a se pa ou li ye wi!¹⁴ Seyè a reponn: -Se mwen menm k'ap mache avè ou. M'ap fè ou jwenn repo.¹⁵ Moyiz di l': -Si se pa ou menm menm k'ap mache avè nou, ou pa bezwen kite nou soti isit la.¹⁶ Lè ou gade byen, ki jan pou mwen fè konnen ou konsidere m' anpil, mwen menm ansanm ak pèp ou a? Eske se pa lè ou mache ak nou? Si ou mache ak nou, tout moun va rekonèt mwen menm ansanm ak pèp la, nou pa menm ak lòt pèp ki sou latè yo.¹⁷ Seyè a di Moyiz: -m'a fè sa ou mande m' lan, paske ou fè kè m' kontan anpil. Mwen konnen ki moun ou ye.¹⁸ Moyiz di l': -Tanpri, fè m' wè pouvwa ou!¹⁹ Lè sa a Seyè a reponn li: -M'ap fè ou wè jan m' gen bon kè, m'ap nonmen non m' devan ou. M'ap fè moun mwen vle gras, m'ap gen pitye pou moun mwen vle gen pitye.²⁰ Seyè a pale ankò, li di-Ou p'ap kapab wè figi m', paske ankenn moun sou latè pa kapab wè figi m' pou l' kontinye ap viv apre sa.²¹ Li di ankò: -Men yon ti plas bò kote m'. W'a kanpe sou ròch sa a.²² Lè pouvwa mwen vin ap pase, m'ap mete ou nan twou ròch la, m'a kouvri ou avèk men mwen jouk mwen fin pase.²³ Apre sa, m'a wete men m' sou ou. Se do m' ase w'a wè ki prale, men ou p'ap wè figi m'.

Chapter 34

¹ ¶ Seyè a di Moyiz konsa: -Taye de ròch plat tankou de premye yo. m'a ekri sou yo tout pawòl ki te sou premye ròch ou te kraze yo.² Pare ou byen bonè denmen maten. W'a moute sou mòn Sinayi a. Vin jwenn mwen la sou tèt mòn lan.³ Pa kite pesonn moute avè ou. Pa kite pesonn parèt sou mòn lan. Ata mouton ak bèf pa pou vin manje twò pre mòn lan.⁴ Moyiz taye de ròch plat

tankou de premye yo. Nan denmen maten byen bonè, li moute sou mòn Sinayi a ak de ròch plat yo nan men l' jan Seyè a te ba li lòd la. ⁵ ¶ Seyè a desann nan yon nwaj, li kanpe la toupre Moyiz. Li fè l' konnen se li menm yo rele Seyè a. ⁶ Seyè a pase devan Moyiz, li pale byen fò, li di: -Seyè a, Seyè a se yon Bondye ki gen pitye pou moun, yon Bondye ki gen bon kè. Li pa fè kòlè fasil, li p'ap janm sispann renmen, l'ap toujou kenbe pawòl li. ⁷ L'ap kenbe pwomès li pou tout tan jouk sou mil jenerasyon, de pitit an pitit. L'ap toujou padonnen sa nou fè ki mal, sa nou te dwe fè nou pa fè, ak peche nou yo. Men, li pa nan kase fèy kouvri sa. Lè yon moun fè yon peche, l'ap pini pitit li yo, pitit pitit li yo ak pitit pitit pitit li yo pou sa li fè a, jouk sou twazyèm ak katriyèm jenerasyon. ⁸ Lamenn, Moyiz prese bese tèt li byen ba jouk atè, li adore Bondye. ⁹ Li di: -Seyè! Si ou kontan m' vre, tanpri, mache avè nou non! Pèp sa a, se yon bann moun ki gen tèt di, se vre. Men, padonnen fòt nou yo ak peche nou yo. Asepte nou pou moun ki rele ou pa ou. ¹⁰ ¶ Seyè a reponn: -Mwen pral fè yon kontra avèk nou. Devan tout pèp la, mwen pral fè gwo bèl bagay, bèl bagay ankenn peyi sou latè ni ankenn nasyon poko janm wè. Konsa, tout pèp ki avè ou yo pral wè travay Seyè a ka fè, paske mwen pral sèvi avè ou pou m' fè yon bagay estraòdinè. ¹¹ Se pou ou swiv tout kòmandman mwen ba ou jòdi a. M'ap mete moun Amori yo deyò, ansanm ak tout moun Kanaran yo, tout moun Et yo, moun Ferezi yo, moun Evi yo ak moun Jebis yo, pou yo fè plas pou nou. ¹² Pran prekosyon nou pou nou pa antre nan ankenn konfyolo ak moun ki rete nan peyi kote nou prale a, paske sa ka tounen yon pèlen pou nou. ¹³ Okontrè, se pou nou kraze lòtèl yo, dehouke tout vye ròch moniman yo te kanpe. Koupe tout poto bwa yo te plante pou zidòl yo. ¹⁴ Nou pa fèt pou nou sèvi lòt bondye paske mwen menm, Seyè a, yo rele m' Bondye ki fè jalouzi. Mwen se yon Bondye ki fè jalouzi anpil. ¹⁵ Pa antre nan ankenn konfyolo ak moun ki rete nan peyi a, paske lè y'ap sèvi bondye yo, lè y'ap touye bèt pou yo, sa y'ap fè a se menm bagay ak fanm k'ap fè jennès. Lè sa a y'a konprann pou yo vin envite nou. Konsa nou ka tonbe nan manje vyann bèt yo te ofri bay zidòl yo. ¹⁶ Konsa konsa, yon lè n'a pran pitit fi moun sa yo pou madanm pitit gason nou yo. Lè pitit fi yo menm va lage kò yo nan sèvis lòt bondye yo, yo ka pran tèt pitit gason nou yo, fè yo vire do ban mwen pou y al sèvi bondye pa yo a, tankou lè yon nonm kite madanm li pou l' al dèyè lòt fanm. ¹⁷ Piga ou janm fonn metal pou fè estati ki pou sèvi ou bondye. ¹⁸ ¶ Se pou ou toujou fete fèt pen san ledven an. Pandan sèt jou nan mwa Abib la, nou va manje pen san ledven, jan mwen te ban nou lòd la, paske se nan mwa sa a nou te soti kite peyi Lejip. ¹⁹ Tout premye pitit gason se pou mwen yo ye. Konsa tou, tout bèt, kit se bèf, kit se mouton, kit se kabrit, premye pitit mal yo fè, se pou mwen yo ye tou. ²⁰ Men, lè yon manman bourik fè premye pitit mal li, nou ka achte l' nan men m'. N'a ban mwen yon mouton pou li. Si nou pa vle peye pou li, se pou nou kase kou l'. Konsa tou, nou va achte nan men m' tout premye pitit gason gason nou yo va fè. N'a ban mwen

kichòy pou yo. Piga pesonn janm parèt devan mwen de men l' vid. ²¹ W'a travay sis jou. Men
 setyèm jou a, se pou ou sispann travay, te mèt nan sezon plante osinon nan sezon rekòt. ²² W'a
 fete fèt Senmenn yo, fèt premye grap ble ou koupe lè rekòt la. Lèfini, nan fen lanne a w'a fete fèt
 Rekòt la. ²³ Twa fwa chak lanne, tout gason ki nan mitan nou gen pou parèt devan mwen, Seyè
 sel Mèt la, Bondye pèp Izrayèl la. ²⁴ Lè m'a fin mete lòt nasyon yo deyò pou fè plas pou nou, lè
 m'a fin laji teritwa nou an, pesonn p'ap gen lanbisyon pou yo seye vin pran peyi a nan men nou lè
 n'a moute chak lanne pou parèt devan mwen menm, Seyè a, Bondye nou an, pou fete twa fèt sa yo.
²⁵ Lè n'ap touye yon bèt pou ofri l' ban mwen, piga nou janm sèvi ak pen ki fèt ak ledven. Lè fèt
 Delivrans lan menm, piga nou kite ankenn vyann bèt yo touye pou fèt la rete pou denmen maten.
²⁶ N'a pran pi bèl fwi nan premye rekòt jaden nou yo, n'a pote yo bay Seyè a, Seyè nou an, lakay
 li. Piga ou janm kwit yon ti mouton nan lèt manman l'. ²⁷ Seyè a di Moyiz ankò: -Ekri tout pawòl
 sa yo, paske se dapre pawòl sa yo m'ap siyen kontra m' lan avè ou ansanm avèk pèp Izrayèl la. ²⁸ ¶
 Moyiz te rete la avèk Seyè a pandan karant jou karant nwit. Li pase tout jou sa yo san manje san
 bwè. Li te ekri tout pawòl kontra a sou ròch plat yo. Se te dis kòmandman yo. ²⁹ Lè Moyiz desann
 soti sou mòn Sinayi a, li t'ap pote de ròch plat yo nan men l'. Men, gen yon bagay li pa t' konnen.
 Lè li t'ap pale ak Seyè a, figi l' te vin klere byen bèl. ³⁰ Arawon ak tout pèp la t'ap gade Moyiz, yo
 we jan figi l' te klere, yo te pè pwoche bò kote l'. ³¹ Men Moyiz rele yo. Arawon vin jwenn li
 ansanm ak tout chèf pèp la. Moyiz pale ak yo. ³² Apre sa, tout rès pèp Izrayèl la pwoche, epi Moyiz
 ba yo tout lòd li te resevwa nan men Seyè a sou mòn Sinayi a. ³³ Lè Moyiz fin pale ak yo, li kouvri
 figi li ak yon twal. ³⁴ Chak fwa Moyiz antre nan tant lan devan Seyè a pou pale avè l', li toujou
 wete twal la jouk li soti deyò ankò. Lè l' soti, li rakonte pèp Izrayèl la tou sa Seyè a te ba li lòd di
 yo. ³⁵ Lè konsa, moun pèp Izrayèl yo gade, yo wè figi Moyiz te klere byen bèl. Apre sa, Moyiz
 remete twal la sou figi l' ankò, pou jouk lè li antre ankò pou l' pale ak Seyè a.

Chapter 35

¹ ¶ Moyiz sanble tout pèp Izrayèl la, li di yo: -Men sa Seyè a bay lòd pou nou fè. ² N'a travay
 sis jou, men se pou nou mete setyèm jou a apa pou Bondye, se jou repo ki apa nèt pou Seyè a. Si
 yon moun fè nenpòt ki travay jou sa a, se pou yo touye l'. ³ Ata dife piga nou limen nan ankenn

⁴ kay jou repo a. Moyiz pale ak tout pèp Izrayèl la ki te sanble, li di yo: -Men sa Seyè a ban nou
⁵ lòd fè: Se pou nou pran nan sa nou genyen pou fè ofrann pou Seyè a. Tout moun ki vle bay ak
⁶ tout kè yo pou fè yon ofrann pou Seyè a va fè l'. y'a pote lò, ajan ak kwiv, bon twal siperyè koulè
⁷ violèt, ble ak wouj, twal fen blan ak twal pwès fèt ak pwal kabrit, po belye tenn koulè wouj, po
⁸ bazann, ak bwa zakasya, lwil pou lanp sèt branch lan, epis santi bon pou mete nan lwil yo sèvi
⁹ pou mete moun apa pou Bondye a ak nan lansan an, pyè oniks ak lòt pyè pou gani jile ak plastwon
¹⁰ prèt la. Se pou tout moun pami nou ki gen ladrès vin jwenn mwen pou yo fè travay Seyè a bay
¹¹ lòd fè a: kay Bondye a avèk tant lan, twati li, kwòk li yo, ankadreman li yo, travès li yo, potò li
¹² yo ak tout sipò yo, Bwat kontra a ak manch li yo, kouvèti bwat la, ak rido pou kache bwat la,
¹³ tab la avèk manch li yo ansanm ak tout bagay pou sèvi ak li, ak pen yo ofri bay Bondye a tou,
¹⁴ gwo lanp sèt branch lan ak tout bagay ki sèvi avè l' yo, tèt lanp yo ak lwil pou lanp yo, lòtèl
¹⁵ pou boule lansan an ak tout manch li yo, lwil yo sèvi pou mete moun apa pou sèvis Bondye a,
¹⁶ lansan santi bon, rido pou fèmèn kote yo antre nan tant lan, lòtèl pou boule nan dife bèt yo ofri
¹⁷ bay Bondye, avèk griyaj an kwiv li a, ak tout manch li yo ak tout bagay ki pou sèvi avè l' yo, basen
¹⁸ lan ak tout pye li, rido pou galeri a ak potò l' yo ak tout sipò yo, rido pou fèmèn kote pou yo
¹⁹ antre nan galeri a, dis pikèt ak tout kòd pou tant lan ak galeri a, bèl rad seremoni pou prèt yo
²⁰ mete sou yo lè y'ap fè sèvis nan kote ki apa pou Bondye a, rad pou Arawon, prèt la, ak rad pou pitit
²¹ gason l' yo lè y'ap fè travay prèt yo. ¶ Lè Moyiz fin di yo sa, tout pèp Izrayèl la al lakay yo.
²² Apre sa, tout moun ki te soti pou bay ak tout kè yo, ki te vle fè ofrann, tounen vin jwenn li. Yo
²³ te pran nan sa yo genyen, yo pote ofri bay Seyè a pou fè Tant Randevou a, pou fè tout bagay yo
²⁴ bezwen pou sèvis li ansanm ak rad seremoni yo. Tout moun ki te soti pou bay ak tout kè yo pou
²⁵ fè ofrann, fanm kou gason, yo vini, yo pote zanno, bag, kolye, braslè ak tout kalite bijou an lò.
²⁶ Chak moun te pote bijou an lò yo te mete apa pou Bondye. Tout moun ki te gen bon twal siperyè
²⁷ koulè ble, koule violèt osinon koulè wouj, twal fen blan, twal pwès fèt ak pwal kabrit, po belye
²⁸ tenn koulè wouj, ou ankò po bazann, tout moun ki te gen bagay sa yo lakay yo pote yo vini. Tout
²⁹ moun ki te vle ofri ajan ak kwiv devan Seyè a, yo te pote l', yo te leve l' devan Seyè a. Tout moun
³⁰ ki te gen bwa zakasya lakay yo ki te ka sèvi nan travay la te pote l'. Tout fanm ki te gen ladrès
³¹ te file fil koulè ble, violèt ak wouj, ak twal fen koulè blan, epi yo pote yo vini. Tout fanm ki te

soti pou fè kichòy ak tout kè yo te fè twal pwès ak pwal kabrit, yo pote yo vini tou. ²⁷ Chèf yo menm te pote pyè oniks ak lòt pyè pou yo gani jile ak plastwon prèt la, ²⁸ ansanm ak epis santi bon ak lwil pou lanp sèt branch lan, lwil yo sèvi pou mete moun apa pou Bondye, ak lansan santi bon. ²⁹ Se konsa tout moun pèp Izrayèl ki te soti pou bay kichòy ak tout kè yo pou travay Seyè a te di Moyiz ba yo lòd fè a, fanm kou gason, yo te pote ofrann yo te vle fè bay Seyè a. ³⁰ ¶ Moyiz di pèp Izrayèl la: -Gade. Seyè a chwazi Bezaleyèl, pitit Ouri a, pitit pitit Our, nan branch fanmi Jida a. ³¹ Li mete lespri l' sou li an kantite pou l' ba li ladrès, konesans ak bon konprann pou l' fè tout kalite travay atizan yo konn fè a, ³² pou l' konn fè bèl desen, pou l' fè travay an lò, an ajan ak an kwiv, ³³ pou l' travay pyè tankou òfèv yo konn fè a, epi pou l' konn moute yo, pou l' travay bwa, pou l' ka fè tout kalite travay atizan konn fè. ³⁴ Bondye ba li don pou l' moutre lòt moun metye sa yo. Se menm jan an tou pou Owoliyab, pitit Ayisamak, nan branch fanmi Dann lan. ³⁵ Seyè a ba yo konesans ak ladrès pou yo ka fè tout kalite travay atizan ka fè, desen sou bwa, bon twal koulè ble, violèt ak wouj, twal fen blan. Wi, li ba yo ladrès pou yo ka fè tout metye, pou yo ka fè tout kalite bèl bagay.

Chapter 36

¹ ¶ Bezaleyèl, Owoliyab ansanm ak tout moun ki gen konprann, tout moun Seyè a te bay ladrès ak konesans pou yo ka fè tou sa ki nesèsè pou kay Bondye a, se pou yo fè tout bagay jan Seyè a te bay lòd la. ² Moyiz fè rele Bezaleyèl, Owoliyab ansanm ak tout lòt bòs atizan Bondye te bay ladrès ak konesans. Li fè rele tout moun ki te vle pou yo mete men nan travay la ak tout kè yo. ³ Yo resevwa nan men Moyiz tout ofrann moun pèp Izrayèl yo te pote pou fè tou sa ki nesèsè pou kay Bondye a. Y al travay. Moun Izrayèl yo menm te toujou ap pote ofrann yo bay Moyiz chak maten, san pesonn pa t' fòse yo. ⁴ Lè sa a, tout bòs atizan ki t'ap travay pou kay Bondye a kite travay yo t'ap fè a, yo vin jwenn Moyiz. ⁵ Yo di l' konsa: -Pèp la pote depase sa nou bezwen pou nou fini ak travay Seyè a te bay lòd fè a. ⁶ Lè sa a, Moyiz fè pibliye lòd sa a nan tout kan an: -Pesonn, ni gason ni fanm, pa bezwen pote ankenn ofrann pou kay Bondye a ankò. Se konsa, yo te fè moun yo sispann pote lòt ofrann. ⁷ Sa yo te pote deja a te menm twòp pou travay ki te gen pou fèt la. ⁸ ¶ Yo pran ouvriye ki te pi abil nan travay la pou fè tant lan. Yo fè l' ak dis lèz twal fen blan tise byen sere,

twal lenn koulè ble, violèt, wouj, avèk pòtre zanj cheriben bwode byen bèl sou tout kò l'.⁹ Chak
 lèz te mezire katòz mèl longè, de mèl lajè. Tout lèz yo te menm gwosè.¹⁰ Yo pran senk lèz, yo
 koud yo ansanm. Apre sa, yo fè menm bagay la tou ak senk lòt lèz yo.¹¹ Yo pran kòdon fèt ak
 twal ble, yo fè pasan, yo moute yo sou rebò dènye lèz nan chak gwoup.¹² Yo mete senkant pasan
 nan premye lèz premye gwoup la ak senkant pasan nan dènye lèz dezyèm gwoup la yon jan pou
 yo koresponn de pa de.¹³ Yo te fè senkant ti kwòk an lò. Yo pase kwòk yo nan pasan yo pou kenbe
 de gwoup rido yo ansanm. Se konsa, yo te fè yon sèl tant pou sèvi kay kote pou Bondye rete a.
¹⁴ ¶ Apre sa, yo fè onz lèz twal ak pwal kabrit pou kouvri tant kote Bondye rete a.¹⁵ Tout onz lèz
 yo te menm gwosè, chak te mezire kenz mèl longè ak de mèl lajè.¹⁶ Yo pran senk lèz, yo koud
 yo ansanm sou yon bò. Apre sa, yo fè menm bagay la ak sis lòt lèz yo apa.¹⁷ Yo mete senkant
 pasan sou rebò dènye lèz nan premye gwoup la ak senkant pasan sou rebò dènye lèz nan dezyèm
 gwoup la.¹⁸ Yo fè senkant ti kwòk an kwiv pou kenbe de gwoup lèz yo ansanm, pou yo ka fè yon
 sèl tant.¹⁹ Yo fè yon kouvèti pou tant lan ak po belye tenn koulè wouj. Apre sa, yo fè yon lòt
 kouvèti ak po bazann pou ale anwo kouvèti ki fèt ak po belye a.²⁰ Yo te fè ankadreman an bwa
 zakasya pou soutni tant Bondye a.²¹ Chak ankadreman te mezire kenz pye longè sou vennsèt pous
 lajè.²² Yo chak te gen de bout ki depase ki te penmèt mare yo yonn ak lòt. Yo fè tout ankadreman
 kay la menm jan an tou.²³ Yo te fè ven ankadreman pou fasad sid la.²⁴ Yo fè karant sipò an ajan
 pou ale anba pye ankadreman yo, de sipò pou chak ankadreman.²⁵ Yo fè ven ankadreman pou
 fasad nò a,²⁶ ak karant sipò an ajan, de pou chak ankadreman.²⁷ Pou fasad lwès kay Bondye a,
 ki bay sou dèyè, yo fè sis ankadreman²⁸ ak de lòt ankadreman ki pou fè kwen ki sou deyè kay
 Bondye a.²⁹ Kwen yo te mare yonn ak lòt pa anba, yo te bout-a-bout jouk anwo nan gwo bag la.
 Se konsa yo te moute de ankadreman ki te fè de kwen yo.³⁰ Konsa sa te fè wit ankadreman ak sèz
 sipò an ajan, de sipò pou chak ankadreman.³¹ Apre sa, yo fè travès yo an bwa zakasya. Yo mete
 senk pou ankadreman sou yon bò kay Bondye a,³² senk pou ankadreman sou lòt bò a ak senk pou
 ankadreman sou bò lwès la pa dèyè.³³ Yo fè travès mitan an yon jan pou l' pase nan ren ankadreman
 yo, depi yon bout rive nan lòt bout la.³⁴ Yo te kouvri ankadreman yo ak lò. Yo te fè bag an lò pou

kenbe travès yo. Apre sa, yo kouvri tout travès yo ak lò tou. ¶³⁵ Yo fè rido a ak bon twal koulè ble, violèt epi wouj ansanm ak twal fen blan tise byen sere, avèk pòtre zanj cheriben bwode byen bèl sou tout kò l'.³⁶ Yo fè kat poto an bwa zakasya pou rido a. Yo te kouvri yo ak lò, yo moute kwòk an lò sou yo. Yo travay kat sipò an ajan pou poto yo.³⁷ Pou fèmen kote yo antre nan tant lan, yo fè yon rido ak bon twal ble, violèt ak wouj, ansanm ak twal fen blan tise byen sere, bwode sou tout kò l'.³⁸ Yo fè senk poto avèk kwòk. Yo kouvri tèt poto yo ak trenng pou soutni rido yo ak lò. Epi yo fè senk sipò an kwiv pou poto yo.

Chapter 37

¹ ¶ Bezaleyèl te fè Bwat Kontra a an bwa zakasya. Bwat la te mezire twa pye nèf pous longè, de pye twa pous lajè ak de pye twa pous wotè.² Li kouvri l' nèt, andedan kou deyò, ak pi bon kalite lò ki genyen. Li mete yon bòdi an lò fè wonn li.³ Li fonn lò pou fè kat gwo bag tou won pou bwat la. Li moute yonn sou chak kwen bwat la, de chak bò.⁴ Li fè de jenn ti poto an bwa zakasya, li kouvri yo nèt ak lò.⁵ Li pase poto yo nan twou bag yo, yonn sou chak bò bwat la pou yo te kapab pote l' kote yo vle.⁶ Li fè yon kouvèti an bon lò pou bwat la. Kouvèti a te mezire twa pye nèf pous longè ak de pye twa pous lajè.⁷ Li pran de gwo moso lò, li bat yo ak mato, li fè pòtre de zanj cheriben li moute sou de pwent kouvèti a,⁸ yonn sou bò gòch, lòt la sou bò dwat. Li fè yo tankou si yo te fè yon sèl pyès ak kouvèti a.⁹ Zanj cheriben yo te gen zèl yo louvri anwo tèt yo pou kouvri kouvèti a. Yo te yonn anfas lòt, avèk tèt yo bese ap gade kouvèti a.¹⁰ ¶ Li fè tab la an bwa zakasya. Tab la te mezire twa pye longè, yon pye sis pous lajè ak de pye twa pous wotè.¹¹ Li kouvri l' nèt ak pi bon lò ki genyen, li mete yon bòdi an lò fè wonn li.¹² Li mete yon ankadreman kat pous lajè anba desi a fè wonn tab la. Epi li kouvri tout ankadreman an ak yon plak lò.¹³ Li fè kat gwo bag tou won an lò. Li moute yo nan kat kwen tab la kote pye yo moute a.¹⁴ Li te moute bag won yo toupre ankadreman an. Se nan twou bag yo yo pase poto bwa ki pou sèvi pou pote tab la.¹⁵ Li fè poto yo ak bwa zakasya, epi li kouvri yo nèt ak lò. Se poto sa yo ki sèvi pou pote tab la.¹⁶ Li fè tout bagay ki pou ale sou tab la: asyèt, bòl, tas, gode, bagay ki pou sèvi lè y'ap fè sèvis pou Bondye.

¹⁷
 Li fè yo ak pi bon lò ki genyen. Li fè gwo lanp sèt branch lan ak pi bon lò ki genyen. Li pran yon sèl moso lò pou li fè lanp sèt branch lan: kò li, branch li yo, flè yo, boujon yo, ak fèy yo ki te fè yon sèl pyès ak li. ¹⁸ Li te gen yon branch nan mitan ak twa branch chak bò. ¹⁹ Sou chak branch sou kote yo, te gen pòtre twa flè nwa kajou ak tout boujon yo sou yo. Konsa, konsa, sou tout sis branch sou kote yo. ²⁰ Sou branch mitan an te gen kat flè nwa kajou avèk tout boujon yo sou yo. ²¹ Te gen yon ti boujon anba chak pè branch sou kote yo. ²² Boujon yo ak branch yo te fè yon sèl pyès ak pye lanp sèt branch lan. Se yon sèl moso lò yo bat pou fè tout. ²³ Li fè sèt ti lanp pou lanp sèt branch lan avèk pensèt pou netwaye lanp lan ak plato pou resevwa sann lan. Li fè yo ak pi bon lò ki genyen. ²⁴ Li te pran swasannkenz liv bon lò pou fè lanp sèt branch lan ansanm ak tout bagay pou sèvi ak lanp sèt branch lan. ²⁵ ¶ Bezaleyèl fè lòtèl pou boule lansan an ak bwa zakasya. Li fè l' kare kare: dizwit pous lajè, dizwit pous longè, trannsis pous wotè. Kat kòn yo te fè yon sèl pyès ak lòtèl la. ²⁶ Bezaleyèl kouvri tout anwo lòtèl la, kat kote l' yo ansanm ak kat kòn li yo ak pi bon kalite lò ki genyen. Apre sa, li mete yon bòdi an lò fè wonn li. ²⁷ Li fè de bag an lò, li moute yo anba bòdi a sou de kote lòtèl la. Se nan bag sa yo pou yo pase manch ki pou sèvi pou pote lòtèl la. ²⁸ Li fè manch yo an bwa zakasya epi li kouvri yo nèt ak lò. ²⁹ Bezaleyèl fè lwil ki pou sèvi pou mete moun osinon nenpòt bagay apa pou Bondye a ansanm ak lansan santi bon an, jan moun ki konn fè odè avèk ladrès yo fè yo.

Chapter 38

¹
 ¶ Bezaleyèl fè lòtèl pou boule ofrann yo an bwa zakasya. Li fè l' kare kare: Li te mezire sèt pye sis pous longè, sèt pye sis pous lajè, kat pye sis pous wotè. ² Li travay kat kòn sou kat kwen lòtèl la. Kòn yo te fè yon sèl pyès ak lòtèl la. Apre sa, li kouvri tout ak kwiv. ³ Li fè tout bagay ki pou mache ak lòtèl la: recho, pèl, fouchèt, plato pou resevwa sann, kivèt. Li fè tout bagay sa yo an kwiv. ⁴ Li fè yon griyaj an kwiv pou lòtèl la, tankou griy pou griye vyann. Li mete griyaj la anba rebò lòtèl la, li fè l' soti anba rive mwatye wotè lòtèl la. ⁵ Li fè kat gwo bag tou won an kwiv, li mete yo nan kat pwent griyaj la. Se nan bag sa yo pou yo pase poto ki sèvi manch pou pote lòtèl la. ⁶ Apre sa, li fè manch an bwa zakasya, li kouvri yo an kwiv nèt. ⁷ Li pase manch yo nan bag won yo sou chak bò lòtèl la, pou yo ka pote lòtèl la. Li fè lòtèl la an planch. Tout anndan lòtèl la

⁸
 te rete vid. Bezaleyel pran moso kwiv poli ki te sèvi glas pou medam k'ap sèvi nan pòt antre Tant
 Randevou a, li fè yon gwo basen an kwiv avèk yon pye an kwiv tou pou mete l' chita. ⁹ ¶ Li fè
 galeri a. Sou bò sid la, li moute yon seri rido fèt ak lèz twal fen blan tise byen sere, sou senkant
 mètr longè. ¹⁰ Ven ankadreman yo ak ven sipò yo te fèt an kwiv. Kwòk poto yo ak trenng yo te an
¹¹
 ajan. Menm jan an tou, sou bò nò a, li moute yon seri rido ki gen senkant mètr longè avèk ven
 poto sou ven sipò an kwiv. Kwòk poto yo ak trenng yo te an ajan. ¹² Sou bò lwès la, li moute yon
 seri rido fèt ak lèz twal ki mezire ven mètr longè, avèk dis poto chita sou dis sipò avèk kwòk poto
 yo ak trenng yo an ajan. ¹³ Sou bò lès la, galeri a te gen swasannkenz pye lajè. ¹⁴ Sou bò gòch
 espas kote yo antre a, li moute rido sou yon longè vennde pye sis pous avèk twa poto chita sou twa
¹⁵
 sipò. Sou bò dwat la, li moute rido sou yon longè vennde pye sis pous avèk twa poto chita sou
 twa sipò. Se konsa sa te fèt chak bò pòt kote yo antre a. ¹⁶ Tout rido yo te fèt ak twal fen blan tise
 byen sere. ¹⁷ Sipò poto yo te fèt an kwiv. Kwòk poto yo ak trenng yo, te fèt an ajan. Tèt poto yo
¹⁸
 te kouvri an ajan. Tout poto galeri a te mare yonn ak lòt ak trenng an ajan. Rido ki te fèmen kote
 yo antre nan tant lan te bwode byen bèl sou tout kò l'. Li te fèt ak bon twal siperyè koulè ble, violèt
 ak wouj ansanm ak twal fen blan tise byen sere. Li te gen dis mètr longè, de mètr edmi wotè, tankou
¹⁹
 rido galeri a. Kat poto kwen, chita sou kat sipò an kwiv tou, t'ap soutni rido pòt la. Kwòk yo ak
 trenng yo te fèt an ajan. Tèt poto yo te kouvri an ajan. ²⁰ Li fè tout pikèt pou tant lan ak pou galeri
²¹
 a an kwiv. ¶ Men kantite metal yo te sèvi pou fè tant kote yo mete Bwat Kontra a. Dapre lòd
 Moyiz te bay, se pitit Levi yo ki te fè lis metal yo, epi se Itama, pitit Arawon, prèt la, ki t'ap dirije
²²
 yo nan travay sa a. Bezaleyèl, pitit Ouri, pitit pitit Our, nan branch fanmi Jida a, te fè tou sa
²³
 Seyè a te bay Moyiz lòd fè a. Se Owoliyab, pitit Ayisamak, nan branch fanmi Dann lan, ki te
 ede l'. Owoliyab sa a te yon bon bòs atizan ki te konn fè desen. Li te konn bwode lenn ble, violèt
²⁴
 ak wouj ansanm ak twal fen blan. Tout lò yo te sèvi pou fè travay nan kote ki apa pou Bondye
 a, se te lò moun yo te ofri bay Bondye. Lò a te peze demil nèfsantrant (2930) liv, dapre mezi yo
²⁵
 sèvi nan kote ki apa pou Seyè a. Ajan yo te ranmase pou resansman an te peze dimil swasanndis
²⁶
 (10.070) liv, dapre mezi yo sèvi kote ki apa pou Seyè a. Sa se kantite ajan yo ranmase antou
 nan men moun ki te vin bay non yo lè resansman an. Chak moun te bay kantite yo te mande yo, ki
 vle di yon pyès ajan ki peze yon ons, dapre mezi yo sèvi kote yo mete apa pou Seyè a. Te gen
 sisantwamil senksansenkant (603.550) gason ki te gen ventan pou pi piti, ki te enskri nan resansman
²⁷
 an. Nan dimil swasanndis (10.070) liv ajan yo, dimil (10.000) liv te sèvi pou fè sipò pou tant

lan ansanm ak sipò pou rido yo. Chak sipò te pran san liv. ²⁸ Avèk swasanndis liv ajan ki te rete
a, yo fè kwòk ak trenng pou poto yo, epi yo kouvri tèt poto yo. ²⁹ Yo te ofri bay Seyè a sètmi
katrevendis (7.090) liv kwiv antou. ³⁰ Yo sèvi ak kwiv la pou fè sipò ki nan pòt antre tanp lan,
lòtèl la ak griyaj kwiv la ansanm ak tout bagay y'ap bezwen pou sèvi ak lòtèl la. ³¹ Yo fè sipò pou
galeri toutotou a, sipò pou pòt kote ki apa pou Seyè a, ansanm ak tout pikèt pou tant lan ak pou
galeri a.

Chapter 39

¹ ¶ Yo pran twal siperyè koulè ble, violèt ak wouj, yo fè bèl rad seremoni pou prèt yo mete sou
yo lè y'ap fè sèvis nan kote ki apa pou Bondye a. Yo fè rad tou pou Arawon mete sou li sèlman lè
l'ap fè sèvis Bondye, dapre lòd Seyè a te bay Moyiz. ² Yo fè jile a ak lò, ak twal siperyè koulè ble,
violèt ak wouj, ak twal fen blan tise byen sere. ³ Yo pran fèy lò, yo bat yo, yo koupe yo an filang,
yo travay yo nan twal ble, violèt ak wouj la, ansanm ak nan twal fen blan an. Yo bwode yo byen
bèl ak anpil ladrès. ⁴ Yo fè zèpòlèt pou jile a. Yo tache yo yonn chak bò jile a pou kenbe moso
devan an ak moso dèyè a nan plas yo. ⁵ Bèl sentiwon byen bwode ki mache ak jile a te fè yon sèl
pyès ak li, ak menm kalite bodri a. Yo te fè l' an lò avèk twal siperyè koulè ble, violèt ak wouj,
ansanm ak twal fen blan tise byen sere, dapre lòd Seyè a te bay Moyiz. ⁶ Apre sa, yo pran pyè oniks
yo, yo moute yo chak sou yon gwo moso lò, yo grave non douz branch fanmi Izrayèl yo tankou lè
y'ap grave non moun sou so. ⁷ Yo moute pyè yo sou de zèpòlèt jile a, pou yo toujou chonje branch
fanmi pep Izrayèl yo, jan Seyè a te bay Moyiz lòd la. ⁸ Yo fè plastwon an, yo bwode l' byen bèl
ak anpil ladrès tankou jile a. Yo fè l' an lò ak twal siperyè koulè ble, violèt ak wouj ansanm ak twal
fen blan tise byen sere. ⁹ Yo fè l' kare kare, epi yo double l'. Li te mezire nèf pous kare kare, li te
double. ¹⁰ Yo moute kat ranje pyè sou li. Nan premye ranje a, yo mete yon pyè woubi, yon pyè
topaz ak yon pyè emwòd. ¹¹ Nan dezyèm ranje a, yo mete yon pyè malachi, yon pyè safi ak yon
pyè dyaman. ¹² Nan twazyèm ranje a, yo mete yon pyè opal, yon pyè agat ak yon pyè ametis.
¹³ Nan katriyèm ranje a, yo mete yon pyè krizolit, yon pyè oniks ak yon pyè jasp. Yo te moute chak
pyè sou yon moso lò. ¹⁴ Te gen antou douz pyè ak non douz branch fanmi pèp Izrayèl yo grave

yonn sou chak pyè. Yo te grave yon non sou chak pyè tankou lè òfèy ap grave so sou bag. ¹⁵ Yo fè ti chenn pou plastwon an. Ti chenn yo te trese tankou ti kòdon. Yo te fèt ak pi bon kalite lò ki genyen. ¹⁶ Apre sa, yo fè de moso lò pou moute pyè yo ak de bag an lò. Yo moute de bag yo nan de bout anwo plastwon an. ¹⁷ Yo mare de ti kòdon an lò yo nan de bag yo, nan bout anwo plastwon an. ¹⁸ Yo pran de lòt bout chenn yo, yo fè yo pase sou devan jile a. Yo tache yo sou de moso lò yo ki sou zèpòlèt jile a. ¹⁹ Yo fè de lòt bag an lò, yo tache yo nan bout anba plastwon an sou lanvè, nan bòdi a toupre jile a. ²⁰ Yo fè de lòt bag an lò ankò, yo tache yo anba de zèpòlèt jile a, sou devan, toupre kouti a anwo sentiwon jile a. ²¹ Yo mare de bag plastwon an ak de bag jile a ansanm ak yon kòdon ble pou plastwon an bat sou sentiwon jile a. Konsa, plastwon an p'ap ka soti detache sou jile a. Yo fè tou sa dapre lòd Seyè a te bay Moyiz. ²² Apre sa, yo pran twal ble, yo fè rad ki pou ale anba jile a. ²³ Nan mitan rad la, yo fè yon twou pou pase nan tèt prèt la, epi yo mete yon doubli nan ankoli a tankou yo fè l' pou varèz an po bèt yo, pou li pa chire. ²⁴ Yo pran twal koulè ble, violèt ak wouj ansanm ak twal fen blan tise byen sere, yo fè bodri an fòm grenad sou tout woulèt anba rad la. ²⁵ Yo fè ti klòch an lò, yo mete yo nan espas ki separe grenad yo sou tout woulèt rad la. Ti klòch yo ak grenad yo te fè wonn rad la. ²⁶ Yon ti klòch, yon grenad, yon ti klòch, yon grenad sou tout woulèt rad la pa anba, jouk yo fè tout tou rad pou Arawon mete sou li lè l'ap fè sèvis la, jan Seyè a te bay Moyiz lòd fè l' la. ²⁷ Yo pran twal fen blan, yo fè chemiz pou Arawon ak pou pitit gason l' yo. ²⁸ Yo pran twal fen blan, yo fè mouchwa tèt la ak ganiti pou bonnèt yo pou moun rekonèt grad yo. Epi yo pran twal fen blan tise byen sere, yo fè kalson yo. ²⁹ Yo pran twal fen blan tise byen sere ak bon twal siperyè koulè ble, violèt ak wouj, yo fè sentiwon bwode byen bèl la, jan Seyè a te bay Moyiz lòd fè l' la. ³⁰ Yo fè ti plak lò ki pou ale sou mouchwa tèt la ak pi bon kalite lò ki genyen. Yo grave pawòl sa a sou li: Apa pou Seyè a, tankou lè y'ap grave so sou bag. ³¹ Yo mare l' ak yon ti kòdon ble anwo nèt sou devan mouchwa tèt la, dapre lòd Seyè a te bay Moyiz. ³² ¶ Se konsa yo te fin fè tout travay pou Tant Randevou a, kote pou Bondye rete a. ³³ Moun pèp Izrayèl yo te fè tout bagay dapre lòd Seyè a te di Moyiz la. Wi, se konsa yo te fè l'. Yo pran tout bagay, yo pote yo bay Moyiz, depi tant lan, kay kote pou Bondye rete a, ak tout bagay ki mache avè li yo, kwòk li yo, ankadreman li yo, trenng li yo, poto li yo ak sipò yo, ³⁴ twati ki fèt ak po belye tenn tou wouj yo, twati yo fè ak po bazann ak rido pou kache Bwat Kontra a, ³⁵ bwat

ki gen de moso ròch kontra yo, manch li yo ak kouvèti a, ³⁶ tab la ak tou sa ki pou sèvi ak tab la,
 pen yo ofri bay Bondye a, ³⁷ gwo lanp sèt branch fèt an lò a, ti lanp ki pou moute an liy dwat sou
 li yo, avèk tou sa ki pou sèvi ak lanp sèt branch lan ansanm ak lwil pou lanp yo, ³⁸ lòtèl fèt an lò
 a, lwil pou mete moun osinon bagay apa pou Bondye a, lansan ki santi bon an ak rido pou fèmen
 kote pou antre nan tant lan, ³⁹ lòtèl fèt an kwiv la avèk griyaj an kwiv la, manch yo ak tou sa ki
 pou sèvi ak lòtèl la, basen lan ak pye l' a, ⁴⁰ rido pou galeri a, poto yo, sipò yo, rido pou fèmen
 kote pou yo antre sou galeri a, kòd yo, pikèt yo ak tou sa yo bezwen pou fè sèvis nan Tant Randevou
 a kote pou Bondye rete a, ⁴¹ bèl rad seremoni pou yo mete lè y'ap fè sèvis nan kote ki apa pou
 Bondye a, rad pou Arawon, prèt la, mete sou li ansanm ak rad pou pitit gason l' yo mete sou yo lè
 y'ap fè travay prèt yo. ⁴² Se konsa moun pèp Izrayèl yo te fè tout travay la jan Seyè a te bay Moyiz
 lòd fè l' la. ⁴³ Moyiz egzaminen travay yo te fè a, li wè yo te fè l' jan Seyè a te bay lòd fè l' la. Wi,
 se konsa yo te fè l'. Lèfini, Moyiz beni yo.

Chapter 40

¹ ¶ Seyè a pale ak Moyiz, li di l' konsa: ² -Sou premye jou premye mwa a, w'a moute Tant
 Randevou a kote pou Bondye rete a. ³ W'a mete bwat ki gen ròch kontra a ladan l'. y'a cache bwat
 la ak rido a. ⁴ Apre sa, w'a pote tab la vini, w'a pran tout bagay ki pou sèvi ak tab la, w'a ranje yo
 sou li byen ranje. W'a fè pote lanp sèt branch lan tou, w'a moute ti lanp yo sou li. ⁵ W'a pran lòtèl
 an lò pou boule lansan an, w'a mete l' devan bwat ki gen ròch kontra yo, w'a moute rido ki pou
 fèmen kote pou moun antre nan tant lan. ⁶ W'a pran lòtèl pou boule bèt yo ofri yo, w'a mete l' devan
 kote pou moun antre nan Tant Randevou a. ⁷ W'a mete basen lan nan espas ki ant Tant Randevou
 a ak lòtèl la. W'a mete dlo ladan l'. ⁸ W'a moute galeri a fè wonn tant lan, w'a moute rido ki pou
 fèmen kote pou moun antre sou galeri a. ⁹ W'a pran lwil yo sèvi pou mete moun osinon bagay apa
 pou Bondye a, w'a voye l' sou tant Bondye a, sou tout bagay ki ladan l'. Se konsa w'a mete tant lan
 ak tou sa ki ladan li apa pou mwen. y'a tounen bagay ki apa pou mwen nèt. ¹⁰ W'a voye lwil la tou
 sou lòtèl pou boule ofrann bèt yo, ak sou tout bagay ki sèvi avè l'. Se konsa w'a mete lòtèl la apa
 pou mwen, l'a pou mwen nèt ale. ¹¹ W'a voye lwil la tou sou basen lan ak sou pye l' a. Se konsa

¹² w'a mete yo apa pou mwen. Apre sa, w'a fè Arawon ak pitit gason l' yo pwoche bò kote yo antre
 nan Tant Randevou a. W'a pran dlo, w'a benyen yo byen benyen. ¹³ W'a mete rad seremoni yo sou
 Arawon. Lèfini, w'a vide lwil sou tèt li. W'a mete l' apa pou mwen pou l' ka sèvi m' prèt. ¹⁴ W'a
 fè pitit gason l' yo pwoche tou. W'a mete chemiz sou yo. ¹⁵ W'a vide lwil sou yo menm jan ou te
 vide lwil sou papa yo pou yo ka sèvi m' prèt. Seremoni sa a va mete yo apa pou yo ka toujou sèvi
 m' prèt, de pitit an pitit. ¹⁶ ¶ Moyiz te fè tou sa Seyè a te ba li lòd fè. Wi, li fè tout bagay jan Seyè
 a te mande l' la. ¹⁷ Sou premye jou premye mwa nan dezyèm lanne a, yo kanpe tant lan. ¹⁸ Moyiz
 fè kanpe tant lan. Li mete sipò yo nan pozisyon yo, li poze ankadreman yo, li moute trenng yo nan
 plas yo, li drese poto yo. ¹⁹ Li louvri twal tant lan sou kay la, epi li mete twati tant lan anwo l', jan
 Seyè a te ba li lòd fè a. ²⁰ Li pran ròch kontra yo, li mete yo nan bwat la. Li pase manch yo nan
 bag yo, epi li mete kouvèti a anwo bwat la. ²¹ Apre sa, li pote Bwat Kontra a andedan kay la, epi
 li moute rido yo. Se konsa, li kache Bwat Kontra a, jan Seyè a te ba li lòd la. ²² Li mete tab la nan
 plas li nan Tant Randevou a, sou bò nò tant lan, pa deyò rido a. ²³ Li ranje pen yo byen ranje sou
 tab la devan Seyè a, jan Seyè a te bay Moyiz lòd fè l' la. ²⁴ Apre sa, Moyiz mete lanp sèt branch
 lan nan Tant Randevou a, sou bò sid tant lan anfas tab la. ²⁵ Li ranje ti lanp yo devan Seyè a, dapre
 lòd Seyè a te bay Moyiz. ²⁶ Li mete lòtèl an lò a nan Tant Randevou a, devan rido a. ²⁷ Li fè boule
 lansan santi bon sou li, jan Seyè a te bay Moyiz lòd fè a. ²⁸ Li moute rido yo kote pou yo pase
 antre nan tant lan. ²⁹ Li mete lòtèl pou boule bèt yo ofri yo devan kote pou yo antre nan Tant
 Randevou a. Apre sa, li pran bèt yo ofri yo, li touye yo, li boule yo sou lòtèl la ansanm ak lòt ofrann
 yo, jan Seyè a te ba li lòd fè a. ³⁰ Li mete basen lan nan espas ki nan mitan Tant Randevou a ak
 lòtèl la, epi li mete dlo ladan l'. ³¹ Moyiz, Arawon ansanm ak pitit Arawon yo lave men yo ak pye
 yo nan basen lan. ³² Depi y'ap antre nan Tant Randevou a, depi y'ap pwoche bò lòtèl la, yo te lave
 men yo ak pye yo, jan Seyè a te bay Moyiz lòd pou yo fè a. ³³ Apre sa, li moute galeri a fè wonn
 tant lan ak lòtèl la, li mete rido kote pou yo pase antre nan tant lan. Se konsa Moyiz te fin fè travay
 la. ³⁴ ¶ Nwaj la kouvri Tant Randevou a, epi limyè prezans Seyè a plen tant lan. ³⁵ Moyiz pa t'
 kapab antre nan Tant Randevou a, paske nwaj la te rete anplas anwo tant lan, epi limyè prezans
 Seyè a te plen tant lan. ³⁶ Pandan tout tan moun pèp Izrayèl yo t'ap vwayaje a, se sèlman lè nwaj

la te leve soti anwo tant lan yo te ka derape.³⁷ Men, si nwaj la pa t' leve anwo tant lan, yo pa t' pati. Yo te tann jouk nwaj la te leve.³⁸ Lajounen, nwaj Seyè a te rete anwo tant lan, men lannwit, se te yon dife tout pèp Izrayèl la te wè klere nan nwaj la. Se konsa sa te fèt pandan tout vwayaj la.

Leviticus

Chapter 1

¹ ¶ Seyè a rete nan Tant Randevou a, li rele Moyiz, li di l' konsa: ² -W'a pale ak moun pèp Izrayèl yo, w'a di yo: Lè yon moun vle fè Seyè a yon ofrann, si se yon bèt li vle ofri, l'a ofri yon bèf osinon yon kabrit ou ankò yon mouton l'a pran nan bèt li yo. ³ ¶ Si se yon gwo bèt li vle ofri pou yo boule pou Seyè a, l'a mennen yon towò bèf ki pa gen ankenn enfimite. L'a vin avè l' jouk devan pòt Tant Randevou a pou Seyè a ka asepte l'. ⁴ L'a mete men l' sou tèt bèt l'ap ofri a pou Bondye ka asepte l' tankou yon ofrann l'ap fè pou mande Bondye fè li gras. ⁵ L'a touye towò a la devan Seyè a. Apre sa, prèt yo, pitit Arawon yo, va pran san an pou yo ofri l' bay Seyè a. Lèfini, y'a voye san an sou kat bò lotèl ki toupre pòt Tant Randevou a. ⁶ Apre sa, y'a kòche towò a, y'a koupe l' an moso. ⁷ Prèt yo, pitit Arawon, prèt la, va limen dife sou lotèl la, y'a mete bwa nan dife a. ⁸ Apre sa, prèt yo, pitit Arawon yo, va mete moso vyann yo ansanm ak tèt la ak moso grès yo sou dife ki sou lotèl la. ⁹ Moun k'ap fè ofrann lan va lave tripay yo ak pye dèyè yo nan dlo. Lèfini, prèt yo va ofri yo bay Seyè a. Konsa y'a boule tout ofrann lan nèt sou lotèl la. Se sa yo rele yon ofrann bèt ou boule pou Seyè a, yon ofrann ou boule nèt nan dife epi k'ap fè Seyè a plezi ak bon sant li. ¹⁰ ¶ Si se yon ti bèt moun lan vle ofri pou boule nèt pou Seyè a, l'a ofri yon ti bouk kabrit osinon yon belye mouton ki pa gen ankenn enfimite. ¹¹ L'a touye l' sou bò nò lotèl la, devan Seyè a. Apre sa, prèt yo, pitit Arawon yo, va voye san an sou kat bò lotèl la. ¹² Lèfini, nonm lan va koupe l' an moso. Prèt yo va mete tout moso yo ansanm ak tèt la ak moso grès yo sou dife ki sou lotèl la. ¹³ Moun k'ap fè ofrann lan va lave tripay yo ak pye dèyè yo nan dlo. Apre sa, prèt yo va ofri yo bay Seyè a. Konsa l'a boule tout ofrann lan nèt sou lotèl la. Se sa yo rele yon ofrann bèt ou boule pou Seyè a, yon ofrann ou boule nèt nan dife epi k'ap fè Seyè a plezi ak bon sant li. ¹⁴ Si se zwazo nonm lan ap ofri pou yo boule pou Seyè a, se va toutrèl osinon pijon. ¹⁵ Prèt la va pran

zwazo a, l'a pote l' bò lotèl la, l'a peze bèk li, l'a tòde kou l' pou l' touye l'. Y'a boule tèt la sou lotèl la, y'a fè san li koule sou kat bò lotèl la. ¹⁶ L'a rache fal zwazo a ak tout plim li sou li. L'a jete l' bò lotèl la, sou bò solèy leve, kote yo mete sann dife a. ¹⁷ Apre sa, l'a bay yon kout kouto nan mitan de zèl yo, l'a kenbe zèl yo, l'a louvri kò zwazo a ande san li pa detache zèl yo. Lèfini, prèt la va boule l' nèt sou dife ki sou lotèl la. Se sa yo rele yon ofrann bèt yo boule pou Seyè a, yon ofrann ou boule nèt nan dife epi k'ap fè Seyè a plezi ak bon sant li.

Chapter 2

¹ ¶ Lè yon moun vle fè yon ofrann fèt ak grenn ki soti nan jaden yo bay Seyè a, se pou l' fè farin ak grenn yo anvan. Apre sa, l'a vide ti gout lwil oliv sou li, epi l'a mete lansan sou li tou. ² Lèfini, l'a pote l' bay prèt yo, pitit Arawon yo. Yonn nan prèt yo va pran yon ponyen nan farin melanje ak lwil la ansanm ak tout lansan an, l'a boule l' nèt sou lotèl la, pou Seyè a pa janm bliye nonm ki fè ofrann lan. Se sa yo rele yon ofrann yo boule nèt nan dife epi k'ap fè Seyè a plezi ak bon sant li. ³ Rès ofrann lan va rete pou Arawon ansanm ak pitit gason l' yo. Rès ofrann sa a apa nèt pou Seyè a, paske se nan manje yo ofri pou boule pou Seyè a li soti. ⁴ Lè w'ap ofri yon pen kwit nan fou, se pou ou fè l' ak farin lan san ou pa mete ledven ladan l'. Se ka gwo pen pwès fèt ak farin bat ak lwil oliv, ou ankò ti biswit plat wouze ak lwil oliv. ⁵ Lè w'ap ofri yon pen kwit sou platin, w'a fè l' ak farin ble bat ak lwil oliv, men san ledven ladan l'. ⁶ W'a koupe l' an ti moso, epi w'a vide lwil sou li. Se konsa w'a ofri l' bay Seyè a. ⁷ Lè w'ap ofri yon pen kwit nan chodyè, w'a fè l' ak farin melanje ak lwil oliv. ⁸ W'a fè yon ofrann avè l' bay Seyè a. W'a pote l' bay prèt la ki va mete l' sou lotèl la. ⁹ Prèt la va pran yon moso nan ofrann lan ki va sèvi pou Seyè a pa janm bliye moun ki fè ofrann lan, l'a boule l' sou lotèl la. Se sa yo rele yon ofrann manje yo boule nan dife epi k'ap fè Seyè a plezi ak bon sant li. ¹⁰ Rès ofrann lan va rete pou Arawon ansanm ak pitit gason l' yo. Rès ofrann sa a apa nèt pou Seyè a, paske yo pran l' nan manje yo ofri pou boule pou Seyè a. ¹¹ ¶ Piga ou janm ofri bay Seyè a ofrann manje ki gen ledven ladan l'. Piga ou janm sèvi ni ak ledven, ni ak siwo myèl nan ofrann w'ap boule nan dife pou Seyè a. ¹² W'a ofri ledven ak siwo myèl fè Seyè a kado tankou ofrann premye donn nan jaden nou. Men, piga ou boule yo sou lotèl la, tankou ofrann ki pou fè Seyè a plezi ak bon sant yo. ¹³ W'a simen sèl sou tout ofrann w'ap fè, paske sèl la se pou fè ou chonje kontra Bondye te pase avè ou la. Wi, se pou nou mete sèl sou tou sa n'ap ofri. ¹⁴ Lè w'ap

ofri bay Seyè a premye grenn ki bon yo, w'a ofri grenn griye nan dife ak farin ble. ¹⁵ W'a mete
 lwil oliv sou li ansanm ak lansan. Se konsa w'a ofri l' bay Seyè a. ¹⁶ Prèt la va pran ti gout nan
 ofrann manje a ak nan lwil la, l'a boule l' ansanm ak tout lansan an. Se sa yo rele yon ofrann manje
 yo boule nan dife pou Seyè a.

Chapter 3

¹ ¶ Lè yon moun vle ofri bèt pou di Bondye mès, si se yon gwo bèt l'ap ofri, l'a bay yon towò
 bèt osinon yon vach ki pa gen ankenn enfimite. ² L'a mete men l' sou tèt bèt l'ap ofri a, l'a touye l'
 devan pòt Tant Randevou a. Prèt yo, pitit Arawon yo, va voye san an sou kat bò lotèl la. ³ Nan bèt
 yo ofri a, l'a pran pati sa yo: grès ki vlope tripay la, ⁴ de wonyon yo ak tout grès ki sou yo a, ansanm
 ak mas grès ki sou fwa a, l'a boule yo tout nan dife pou Seyè a. ⁵ Pitit Arawon yo va boule tou sa
 sou lotèl la ansanm ak ofrann boule ki te deja sou bwa dife a. Se sa yo rele yon ofrann yo boule nèt
 nan dife k'ap fè Seyè a plezi ak bon sant li. ⁶ ¶ Si se yon ti bèt moun lan vle ofri, l'a bay yon mouton
 osinon yon kabrit, bouk ou fenmèl, men ki pa gen ankenn enfimite. ⁷ Si se yon ti mouton l'ap ofri
 bay Seyè a, l'a mennen l' devan lotèl Seyè a, ⁸ l'a mete men l' sou tèt bèt l'ap ofri a, l'a touye l' la
 devan pòt Tant Randevou a. Apre sa, pitit Arawon yo va voye san an sou kat bò lotèl la. ⁹ Nan bèt
 yo ofri a, l'a pran pati sa yo: grès la, ke y'a koupe ra koupyon an, grès ki vlope tripay la, ¹⁰ de
 wonyon yo ak tout grès ki sou yo a, ansanm ak mas grès ki sou fwa a, l'a boule yo nan dife pou
 Seyè a. ¹¹ Prèt la va boule tou sa sou lotèl la. Se konsa y'a sèvi pou fè yon ofrann boule nèt pou
 Seyè a. ¹² Si se yon kabrit li vle ofri, l'a mennen l' devan lotèl Seyè a. ¹³ L'a mete men l' sou tèt
 li, l'a touye l' la devan Tant Randevou a. Lèfini, pitit Arawon yo va voye san an sou kat bò lotèl la.
¹⁴ L'a pran pati sa yo: grès ki vlope tripay la, ¹⁵ de wonyon yo ak tout grès ki sou yo a, ansanm ak
 mas grès ki sou fwa a, l'a boule yo nan dife pou Seyè a. ¹⁶ Prèt la va boule tou sa sou lotèl la. Tout
 grès la se pou Seyè a li ye. Se yon ofrann ou boule nèt nan dife epi k'ap fè Seyè a plezi ak bon sant
 li. ¹⁷ Piga nou janm manje ni grès ni san. Sa se yon regleman pou nou swiv, de pitit an pitit, kote
 nou pase.

Chapter 4

¹ ¶ Seyè a pale ak Moyiz, li di l' konsa: ² -Men sa pou ou di moun pèp Izrayèl yo: Si yon moun fè yon peche san li pa konnen, si li pa swiv lòd Seyè a bay epi li fè sa l' pa t' dwe fè, men sa pou yo fè l': ³ Si se granprèt la ki fè yon peche konsa epi ki lakòz tout pèp la ap sibi chatiman, granprèt la va mennen yon ti towò bès san ankenn enfimite, l'a ofri l' bay Seyè a pou peche l' la. ⁴ L'a mennen towò a devan pòt Tant Randevou a, l'a mete men l' sou tèt towò a, epi l'a touye l' la devan Seyè a. ⁵ Apre sa, granprèt la va pran ti gout nan san towò a, l'a pote l' anba Tant Randevou a, ⁶ l'a tranpe dwèt li nan san an, epi l'a voye san an sèt fwa devan rido kote ki apa pou Seyè a. ⁷ Apre sa, l'a pran ti gout nan san an, l'a mete l' sou kat kòn lotèl lansan an ki anndan Tant Randevou a. L'a vide rès san an nan pye lotèl kote yo boule bèt yo ofri yo, ki bò pòt kote yo antre nan tant lan. ⁸ Apre sa, l'a wete tout grès ki nan towò yo te ofri pou peche a. Y'a wete tout grès ki vlope tripay la, ⁹ de wonyon yo ak tout grès ki sou yo a, ansanm ak mas grès ki sou fwa a. ¹⁰ L'a wete yo menm jan yo fè sa lè y'ap fè ofrann bèt pou di Bondye mès. Prèt la va boule tout grès la sou lotèl ki la pou boule kalite ofrann bèt sa yo. ¹¹ Men, l'a pran po towò a ansanm ak tout vyann lan, tèt la, pye yo, tout tripay la avèk tout pou pou a ladan l'. ¹² Wi, l'a pran tout rès towò a, l'a fè yo pote l' andeyò limit kote yo rete a. Lè y'a rive kote ki rezève pou jete sann lotèl yo, y'a fè yon dife bwa, y'a boule rès towò a sou li. Wi, kote yo jete sann dife a, se la pou yo boule vyann towò a. ¹³ ¶ Si se tout pèp Izrayèl la ki fè peche san yo pa fè espè, si yo antò devan Bondye paske, san yo pa konnen, yo fè yon bagay Seyè a te ba yo lòd pou yo pa fè, ¹⁴ lè y'a vin wè yo te fè yon peche, y'a mennen yon jenn towò, y'a ofri l' bay Bondye pou l' ka wete peche yo a. Y'a mennen l' devan Tant Randevou a. ¹⁵ Lè y'a rive la, chèf fanmi pèp Izrayèl yo va mete men yo sou tèt towò a, epi y'a touye l' la devan lotèl Seyè a. ¹⁶ Granprèt la va pran ti gout nan san towò a, l'a pote l' anndan Tant Randevou a. ¹⁷ L'a tranpe dwèt li nan san an sèt fwa, l'a voye l' sèt fwa sou devan rido kote ki apa pou Seyè a. ¹⁸ Apre sa, l'a pran ti gout nan san an, l'a mete l' sou kat kòn lotèl ki devan Seyè a, anndan Tant Randevou a. L'a vide rès san an nan pye lotèl kote yo boule bèt yo ofri yo, lotèl ki bò pòt kote yo antre nan tant lan. ¹⁹ Apre sa, l'a pran tout grès towò a, l'a boule l' sou lotèl la. ²⁰ Menm sa li gen pou l' fè pou towò li ta ofri pou pwòp peche li fè, l'a fè l' pou towò sa a tou. Konsa, prèt la va fè ofrann bèt pou peche pèp la te fè san yo pa konnen an, epi Bondye va padonnen peche yo a. ²¹ Lèfini, l'a pran rès towò a, l'a pote l' andeyò limit kote yo rete a, l'a boule l' menm jan li gen pou

l' boule towo li ta ofri pou pwòp peche li fè. Se sa yo rele ofrann bèt yo fè pou wete peche tout pèp
 la te fè san li pa konnen. ²² ¶ Si se yon chèf ki fè peche, ki rive antò devan Bondye li a paske, san
 li pa fè espre, li pa swiv yonn nan lòd Seyè a te bay la, ²³ rive li rive konnen sa l' fè a pa bon, se
 pou l' mennen yon ti bouk kabrit ki pa gen ankenn enfimite, l'a ofri l' pou yo touye l' bay Seyè a.
²⁴ L'a mete men l' sou tèt kabrit la, l'a touye l' sou bò nò lotèl la, kote yo konn touye bèt yo ofri pou
 boule nèt pou Seyè a. Se sa yo rele yon ofrann bèt pou wete peche moun fè san yo pa konnen.
²⁵ Prèt la va tranpe dwèt li nan san bèt yo ofri pou peche a, l'a mete san sou kat kòn lotèl kote yo
 boule bèt yo ofri bay Bondye yo, l'a vide rès san an nan pye lotèl la. ²⁶ Apre sa, l'a boule tout grès
 la sou lotèl la, menm jan yo fè l' pou grès bèt yo ofri pou di Bondye mèsì a. Se konsa prèt la va fè
 ofrann bèt pou wete peche chèf la te fè san li pa konnen an, epi Bondye va padonnen l' sa. ²⁷ ¶ Si
 se nenpòt lòt moun nan pèp la ki fè peche san li pa fè espre, ki vle di li antò paske li fè yon bagay
 Seyè a te bay lòd pa fè men li fè l' san l' pa konnen, ²⁸ rive moun sa a rive konnen sa l' fè a pa bon,
 se pou l' mennen yon fenmèl kabrit ki pa gen ankenn enfimite, l'a ofri l' pou yo touye l' bay Seyè
 a pou peche li a. ²⁹ L'a mete men l' sou tèt kabrit la, l'a touye l' sou bò nò lotèl la, kote yo konn
 touye bèt yo ofri pou boule nèt pou Seyè a. ³⁰ Prèt la va tranpe dwèt li nan san bèt yo ofri a, l'a
 mete san sou kat kòn lotèl kote yo boule bèt yo ofri bay Bondye yo, l'a vide rès san an nan pye lotèl
 la. ³¹ Lèfini, l'a wete tout grès la, menm jan yo fè l' pou bèt yo ofri pou di Bondye mèsì a, y'a boule
 l' sou lotèl la pou fè Bondye plezi ak bon sant li. Se konsa prèt la va fè ofrann bèt pou wete peche
 moun lan te fè san li pa t' konnen an, epi Bondye va padonnen l' sa. ³² Si se yon ti mouton moun
 lan ap ofri pou wete peche li fè a, se yon ti fenmèl ki pa gen ankenn enfimite pou l' mennen. ³³ L'a
 mete men l' sou tèt bèt li ofri pou wete peche li a, l'a touye l' sou bò nò lotèl la, kote yo konn touye
 bèt yo ofri pou boule nèt pou Seyè a. ³⁴ Prèt la va tranpe dwèt li nan san bèt yo ofri a, l'a mete san
 sou kat kòn lotèl kote yo boule bèt yo ofri bay Bondye yo, epi l'a vide rès san an nan pye lotèl la.
³⁵ Apre sa, l'a wete tout grès la, menm jan yo fè l' pou mouton yo ofri pou di Bondye mèsì a, l'a
 boule l' sou lotèl la ansanm ak lòt ofrann y'ap boule pou Seyè a. Se konsa prèt la va fè ofrann bèt
 pou wete peche moun lan te fè san l' pa t' konnen an, epi Bondye va padonnen l' sa.

Chapter 5

¹ ¶ Men nan ki sikonstans pou yo fè ofrann bèt pou peche moun fè san yo pa konnen: Si yon
 moun fin fè sèman nan tribinal pou l' di sa ki pase epi li refize pale sa l' te wè ou ankò sa li vin

konnen, li gen pou l' peye pou sa li fè a. ² Si yon moun rive manyen, san li pa konnen, yon bagay moun k'ap sèvi Bondye pa gen dwa manyen, tankou kadav yon bèt ki pa bon pou moun k'ap sèvi Bondye, li te mèt yon bèt nan bwa, li te mèt yon bèt kay, li te mèt yon bèt k'ap trennen sou vant, lè l' rive konnen sa l' fè a, li menm tou li pa nan kondisyon pou fè sèvis pou Bondye, epi li antò

³ pou sa l' fè a. Si, san li pa konnen, li rive manyen yon nonm ki pa nan kondisyon pou fè sèvis pou Bondye, nenpòt ki jan moun lan te ka rive nan eta sa a, lè pita li vin konnen sa l' fè a, li antò

⁴ pou sa l' fè a. Si yon moun kite bouch li mennen l', epi li sèmante, li di l'ap fè yon bagay, se ka yon move bagay osinon yon bon bagay, lè l' vin rekonèt sa, se pou l' peye sa l' fè a. ⁵ Lè yon moun

⁶ rive antò paske li fè yonn nan bagay sa yo, se pou l' rekonèt devan tout moun sa l' fè a mal. Apre sa, l'a peye pou peche li fè a, l'a pran yon fenmèl nan mouton pa l' yo, osinon nan kabrit li yo, l'a

⁷ ofri l' bay Seyè a pou peche li te fè a. Prèt la va fè ofrann bèt pou wete peche nonm lan. ¶ Men, si nonm lan pa ka bay yon mouton osinon yon kabrit, l'a pote yon pè toutrèl osinon yon pè pìjon pou peye pou peche a. L'a ofri yo bay Seyè a, yonn pou yo touye pou peche a, lòt la pou yo boule

⁸ nèt sou lotèl la. L'a pote yo bay prèt la. Prèt la menm va ofri zwazo pou peche a anvan. L'a kase

⁹ kou zwazo a, san li pa separe tèt la ak rès kò a. L'a voye ti gout nan san an bò lotèl la. Epi l'a vide

¹⁰ rès san an nan pye lotèl la. Se va yon ofrann bèt yo touye pou wete peche a. Apre sa, l'a ofri dezyèm zwazo a, l'a boule l' dapre regleman yo. Se konsa prèt la va fè ofrann bèt pou wete peche

¹¹ moun lan te fè a, epi Bondye va padonnen l' sa l' te fè a. Si moun lan pa ka bay de toutrèl osinon de pìjon pou peye pou peche li fè a, l'a pote de liv bon farin. Li p'ap bezwen mete ni lwil oliv ni

¹² lansan sou li, paske se yon ofrann pou wete peche l'ap fè. L'a pote l' bay prèt la, prèt la va pran yon ponyen nan farin lan ki va sèvi pou Seyè a pa janm bliye moun ki fè ofrann lan. L'a ofri l' bay Seyè a, l'a boule l' sou lotèl la tankou yon ofrann yo boule bèt pou Seyè a. Se va yon ofrann yo fè

¹³ pou wete peche a. Se konsa, prèt la va fè ofrann pou wete peche moun lan te fè a, Bondye va

¹⁴ padonnen l' sa l' te fè a. Rès farin lan va rete pou prèt la, tankou lè y'ap fè ofrann manje. ¶ Seyè

¹⁵ a pale ak Moyiz, li di l' konsa: -Si yon moun fè yon peche san li pa fè espre, si li fè sa li pa t' dwe fè, tankou lè li bliye bay sa li te dwe bay pou Seyè a, l'a fè yon ofrann pou repare bagay li te fè ki mal la. L'a pran yon belye mouton nan bèt li yo, yonn ki san ankenn enfimite. Y'a di konbe bèt la vo, dapre lajan yo sèvi nan kay Bondye a, epi l'a ofri l' bay Seyè a. Se sa yo rele yon ofrann

¹⁶ pou peye pou sa yon moun fè ki mal. Se pou l' peye tou sa li te bliye bay Seyè a, plis vin pou san anwo li. L'a pote l' bay prèt la. Prèt la menm va ofri bouk la, l'a touye l' pou peye pou sa moun

¹⁷ lan te fè ki mal, epi Bondye va padonnen l' sa. Si yon moun fè peche san l' pa konnen, si li fè

18
 yon bagay Seyè a te bay lòd pa fè, atout li pa t' fè espre, li antò. Se pou l' peye pou sa l' fè a. L'a pran yon belye nan bèt li yo, yonn ki pa gen ankenn enfimite, l'a pote l' bay prèt la. Prèt la menm va ofri l' pou peye pou sa moun lan te fè ki mal. Y'a kalkile pri bèt la dapre sistèm lajan yo sèvi nan kay Bondye a. Prèt la va fè ofrann lan pou peye pou sa moun lan te fè san l' pa t' konnen an, epi Bondye va padonnen l' sa. 19 Se sa yo rele yon ofrann moun fè pou peye pou sa yo fè ki mal kont Seyè a.

Chapter 6

1 ¶ Seyè a pale ak Moyiz, li di l' konsa: 2 -Si yon moun fè peche, si li fè bagay Seyè a pa vle moun fè, si li bay yon moun pèp Izrayèl parèy li manti sou bagay li te mete an depo lakay li, sou bagay li te ba li kenbe pou li an zanmi, ou ankò si li vòlò l', ou ankò si li twonpe l', 3 ou ankò si li jwenn bagay lòt la te pèdi epi li manti, li sèmante li pa t' jwenn li, pou tout bagay mal sa yo yon moun ka fè, se pou yo fè yon ofrann. 4 Lè yon moun fè yon peche konsa, li koupab, epi se pou l' renmèt sa l' te vòlò a, osinon lajan li te fè sou tèt lòt la, osinon depo yo te ba l' kenbe a, ou ankò bagay pèdi li te jwenn lan, 5 ou ankò sa l' te sèmante li pa t' jwenn lan. Wi, se pou l' renmèt tout plis ven pou san bay mèt bagay la, jou l'ap fè ofrann pou peye pou sa l' te fè ki mal la. 6 Apre sa, l'a pran yon belye nan bèt li yo, yonn ki san ankenn enfimite, l'a mennen l' bay prèt la ki va ofri l' bay Seyè a pou li peye pou sa l' te fè ki mal la. Y'a kalkile pri belye a dapre sa yo gen pou yo peye pou ofrann konsa. 7 Prèt la va fè ofrann lan pou li bay Seyè a. Bondye va padonnen l' nenpòt kisa li te fè li pa t' dwe fè. 8 ¶ Seyè a pale ak Moyiz, li di l' ankò: 9 -Men lòd pou ou pase Arawon ansanm ak pitit gason l' yo. Men ki jan pou yo fè ofrann pou yo boule nèt pou Seyè a. Se pou ofrann lan pase tout nwit la ap boule jouk denmen maten sou lotèl la. Se pou dife sou lotèl la pa janm 10 mouri. Nan maten, prèt la va chanje rad sou li, l'a mete yon chemiz fèt ak twal fen blan, ansanm ak yon kalson ki fèt ak menm twal la, l'a wete sann ki rete apre ofrann lan fin boule nèt sou lotèl la, l'a mete l' sou kote lotèl la. 11 Apre sa, l'a chanje rad ankò, l'a mete rad òdinè l' sou li, l'a pote sann lan kote ki rezève pou sa, andeyò lòt bò limit kote moun yo rete a. 12 Fòk dife ki sou lotèl la toujou ap boule. Pa janm kite l' mouri. Chak maten prèt la va mete bwa ladan l', epi l'a ranje ofrann pou boule a sou li, epi l'a boule grès ofrann yo fè pou di Bondye mèsè a. 13 Se pou dife a toujou ap boule sou lotèl la. Pa janm kite l' mouri. 14 ¶ Men regleman pou lè n'ap ofri grenn ki soti nan jaden nou. Yonn nan pitit Arawon yo va prezante grenn y'ap ofri a bay Seyè a devan lotèl la.

15

Aprè sa, l'a pran yon ponyen farin nan ofrann grenn lan tou melanje ak lwil ansanm ak tout lansan an, l'a boule l' sou lotèl la pou Seyè a pa janm bliye moun ki fè ofrann lan, ki vle di se tout yo ofri

bay Seyè a. Sant ofrann yo boule a va fè Seyè a plezi. ¹⁶ Arawon ak pitit li yo va manje rès la. Y'a fè pen san ledven avè l', y'a manje pen an yon kote apa pou Seyè a nan lakou Tant Randevou a.

17

Se pou yo kwit pen an san ledven. Se mwenmenm menm ki ba yo pòsyon pa yo nan ofrann y'ap boule nèt pou mwen an. Se yon bagay ki apa nèt pou mwen, tankou yon ofrann yo fè pou peche yo

ak ofrann yo fè pou peye pou sa yo te fè ki mal. ¹⁸ Nenpòt gason nan branch fanmi Arawon an ka manje l'. Sa se yon prensip k'ap la pou tout tan. Se va pòsyon pa yo nan ofrann grenn y'ap boule pou Seyè a. Si lòt moun manyen yon ofrann grenn yo mete apa pou Seyè a, malè va rive l' poutèt

sa. ¹⁹ Aprè sa, Seyè a pale ak Moyiz, li di l' ankò: ²⁰ -Men ofrann Arawon ak pitit gason l' yo va fè pou Seyè a jou y'ap mete yo apa pou sèvis Bondye a. Jou sa a, y'a pote yon liv farin menm kantite

ak sa yo ofri chak jou a, y'a ofri mwatye ladan l' nan maten, lòt mwatye a nan aswè. ²¹ Y'a melanje lwil ladan l', y'a kwit li sou griy. Aprè sa, y'a kraze l' an ti moso tankou lè y'ap fè ofrann grenn ki

soti nan jaden yo, y'a ofri l' bay Seyè a. Sant ofrann yo boule a va moute, l'a fè Seyè a plezi. ²² Se yon lòd ki la pou tout tan. Se pou pitit Arawon y'a mete apa pou ranplase Arawon an toujou fè

ofrann sa a bay Seyè a. Y'a boule ofrann lan nèt, y'a ofri l' bay Seyè a. ²³ Lè yon prèt ap fè yon ofrann grenn pou tèt pa l', se pou yo boule tout nèt nan dife. Yo pa fèt pou yo manje anyen ladan

l'. ²⁴ ¶ Seyè a pale ak Moyiz, li di l': ²⁵ -Men sa w'a di Arawon ak pitit gason l' yo. Men regleman pou yo swiv lè y'ap fè ofrann pou peche moun fè san yo pa konnen. Y'a touye bèt y'a ofri pou kalite peche sa yo sou bò nò lotèl la, kote yo touye bèt yo ofri pou boule a. Sa se yon ofrann yo mete apa

nèt pou Seyè a. ²⁶ Prèt ki va touye bèt la va manje l' kote yo mete apa pou Bondye nan lakou Tant

Randevou a. ²⁷ Nenpòt moun osinon nenpòt bagay ki va manyen osinon ki va touche vyann bèt yo mete apa pou Seyè a va tounen yon moun osinon yon bagay yo mete apa pou Bondye tou. Si

san bèt la tonbe sou rad, w'a lave rad la yon kote ki apa pou Seyè a. ²⁸ Se pou yo kraze tout veso an tè ki te sèvi pou bouyi vyann lan. Men, si se nan yon veso an kwiv yo te bouyi l', se pou

yo grate l' byen grate epi lave l' nan gwo dlo. ²⁹ Tout gason nan fanmi prèt yo gen dwa manje nan

vyann lan, paske se yon vyann yo mete apa nèt pou Seyè a. ³⁰ Men, si yo pran ti gout nan san bèt la pou yo pote l' anndan Tant Randevou a pou yo sèvi avè l' tankou san bèt yo ofri pou repare sa yon moun fè ki mal, yo pa fèt pou yo manje anyen nan bèt la. Se pou yo boule l' nèt nan dife.

Chapter 7

¹ ¶ Men regleman pou yo swiv lè moun ap fè ofrann pou peye pou sa yo te fè ki mal. Ofrann sa yo se ofrann y'a mete apa nèt pou Seyè a. ² Y'a touye bèt pou ofrann sa a sou bò nò lotèl la, kote yo touye bèt yo ofri pou boule yo. Y'a voye san an sou kat bò lotèl la. ³ Y'a wete tout pati sa yo: ke a, grès ki vlope tripay yo, ⁴ de wonyon yo ak tout grès ki sou yo a, ansanm avèk mas grès ki sou fwa a, l'a ofri yo sou lotèl la pou Seyè a. ⁵ Prèt la va boule tout pati sa yo sou lotèl la, tankou ofrann yo boule pou Seyè a. Se sa yo rele yon ofrann pou repare sa yo te fè ki mal. ⁶ Tout gason nan fanmi prèt yo kapab manje ladan l'. Se pou yo manje l' kote yo mete apa pou Bondye a, paske se yon ofrann ki apa nèt pou Bondye. ⁷ Ofrann pou peye pou sa yo te fè ki mal la, se menm bagay ak ofrann pou peche yon moun fè san l' pa konnen. Se menm regleman an pou tou de: vyann lan va rete pou prèt ki fè ofrann lan. ⁸ Po bèt y'a ofri pou boule pou Bondye a va rete pou prèt ki fè ofrann lan. ⁹ Tout ofrann fèt ak grenn ki soti nan jaden, kit yo te kwit nan fou, kit yo te kwit sou platin osinon sou griy, y'a rete pou prèt ki te ofri yo bay Bondye a. ¹⁰ Men, lè se yon ofrann grenn ki soti nan jaden ki fèt tou kri, kit li melanje avèk lwil, kit li chèch, se pou tout pitit Arawon yo li ye, se pou yo separe l' bay yo tout. ¹¹ ¶ Men regleman pou yo swiv lè yon moun ap fè ofrann bay Bondye pou di l' mès: ¹² Si yon moun ap fè ofrann pou di Bondye mès, l'a ofri yon bèt pou yo touye epi ansanm avè l' a pote gwo pen fèt ak farin san ledven melanje ak lwil oliv, pen plat san ledven avèk lwil oliv pase sou li, epitou gato fèt ak flè farin melanje ak lwil oliv. ¹³ Konsa tou, l'a ofri avèk bèt pou yo touye a pen kwit ak ledven. ¹⁴ L'a pran yonn nan chak kalite pen yo, l'a ofri yo espesyalman bay Seyè a. Pen sa yo va rete pou prèt ki va pran san bèt la pou voye sou lotèl la. ¹⁵ Kanta vyann bèt la, se pou yo manje tout menm jou yo te touye l' la. Yo pa fèt pou yo kite anyen pou denmen maten. ¹⁶ Si yon moun pote yon ofrann pou di Bondye mès, paske li te vle kenbe yon ve li te fè, ou ankò paske li vle fè yon ofrann konsa, yo pa bezwen manje tout vyann ofrann lan menm jou a. Men yo gen dwa kite rès pou denmen. ¹⁷ Men vyann ki rete pou twazyèm jou a, se pou yo boule yo. ¹⁸ Si yo manje anyen nan ofrann lan sou twazyèm jou a, Bondye p'ap asepte ofrann moun lan. Ofrann lan p'ap sèvi l' anyen. Se yon vyann fezande, moun ki manje l' va peye pou sa l' fè a. ¹⁹ Si yon bagay ki pa bon pou fè sèvis Bondye tonbe sou vyann lan, yo pa ka manje l' non plis. Se pou yo boule l' nan dife. Tout moun ki nan kondisyon pou fè sèvis Bondye a ka manje nan vyann lan. ²⁰ Si yon moun ki pa nan kondisyon pou fè sèvis Bondye a manje nan vyann yo

²¹ ofri bay Seyè a, se pou yo mete l' deyò nèt nan mitan pèp Bondye a. Si yon moun manje nan vyann yo ofri bay Seyè a apre li fin manyen yon bagay ki pa nan kondisyon pou fè sèvis Bondye, kit se yon moun, kit se yon bèt, kit se nenpòt lòt bagay, se pou yo mete l' deyò nèt nan mitan pèp Bondye a.

²² Seyè a pale ak Moyiz, li di l' ankò:
 ²³ -Men sa pou di moun pèp Izrayèl yo: Piga nou janm manje grès bèf, grès kabrit osinon grès mouton.
 ²⁴ Nou pa fèt pou nou manje grès bèt ki rete konsa li mouri mò natirèl li, ni grès bèt yon bèt nan bwa touye, men nou gen dwa sèvi ak grès la pou nou fè nenpòt lòt bagay nou vle.

²⁵ Lè yon moun manje grès yon zannimo yo te ofri pou boule pou Seyè a, se pou yo mete l' deyò nèt nan mitan pèp Bondye a.
 ²⁶ Nenpòt ki kote nou ye, piga nou janm manje san zwazo, ni san ankenn lòt bèt.

²⁷ Si yon moun rive manje san nenpòt ki bèt, se pou yo mete l' deyò nèt nan mitan pèp Bondye a.
 ²⁸ Seyè a pale ak Moyiz, li di l' konsa:
 ²⁹ -Men sa w'a di moun pèp Izrayèl yo. Lè yon moun ap fè yon ofrann pou di Bondye mèsì, se pou l' pran yon pòsyon ladan l' ki va sèvi tankou yon ofrann espesyal pou Seyè a.
 ³⁰ L'a pote l' ak men l' pou yo boule l' pou Seyè a. L'a pote grès bèt la ansanm ak tout pwatrin lan pou yo ka balanse yo tankou yon ofrann devan Seyè a.

³¹ Prèt la va boule grès la sou lotèl la. Men pwatrin lan va rete pou Arawon ak pitit li yo.
 ³² N'a pran jigo dwat bèt li te ofri pou di Bondye mèsì a, n'a bay prèt la li pou li prezante l' tankou yon ofrann devan Seyè a.

³³ Konsa, prèt ki ofri san an ak grès bèt yo te touye pou di Bondye mèsì a va resevwa jigo dwat la pou tèt pa l'.
 ³⁴ Pwatrin bèt la, se yon ofrann espesyal y'a annik balanse devan Seyè a. Jigo dwat la, se yon ofrann y'a annik prezante devan Seyè a. Se Seyè a menm ki wete moso sa yo nan ofrann pèp la va fè a pou li bay prèt yo. Sa se bagay moun Izrayèl yo dwe toujou bay prèt yo.

³⁵ Se pou yo pran nan ofrann yo fè pou boule pou Seyè a pou yo te bay Arawon ak pitit li yo, depi jou yo te mete yo apa pou sèvi prèt pou Seyè a.
 ³⁶ Jou sa a, se Seyè a menm ki te bay pèp Izrayèl la lòd pou yo bay prèt yo pòsyon sa yo nan ofrann lan. Sa se yon regleman pou pèp Izrayèl la toujou swiv de pitit an pitit.

³⁷ Men regleman pou yo swiv lè y'ap fè ofrann pou yo boule pou Seyè a, lè y'ap fè ofrann grenn ki soti nan jaden yo, lè y'ap fè ofrann pou peche moun fè san yo pa konnen, ofrann pou peye pou sa yo fè ki mal, ofrann pou lè y'ap mete prèt yo apa pou Bondye, ofrann pou di Bondye mèsì.
 ³⁸ Se Seyè a menm ki te bay Moyiz regleman sa yo, sou mòn Sinayi nan mitan dezè a, jou li te mande moun pèp Izrayèl yo pou yo fè ofrann ba li.

Chapter 8

¹ ¶ Seyè a pale ak Moyiz, li di l' konsa: ² -Pran Arawon ak pitit gason l' yo ansanm avè ou. W'a pote rad seremoni yo, lwil pou mete moun osinon bèt apa pou Bondye a, towò yo ofri pou peye pou sa moun fè ki mal la, de belye mouton yo ak panyen pen san ledven yo tou. ³ Apre sa, w'a rele tout pèp la pou yo sanble devan pòt kay Randevou a. ⁴ Moyiz fè sa Seyè a te ba li lòd fè a, epi tout pèp la sanble devan pòt kay Randevou a. ⁵ Moyiz di moun yo: -Men sa Seyè a te ban mwen lòd fè a. ⁶ Lè sa a Moyiz fè Arawon ak pitit gason l' yo pwoche, li benyen yo nan dlo. ⁷ Lèfini, li mete chemiz la ak gwo rad la sou Arawon, li mare sentiwon an nan ren li. Apre sa, li mete jile a sou li, li mare bèl sentiwon jile a nan ren l'. ⁸ Epi li mete plastwon an sou li, li mete ourim ak tourim yo nan pòch plastwon an. ⁹ Li mare tèt Arawon ak gwo mouchwa tèt la, epi li pran plak lò ki te gen pawòl sa yo grave sou li: Apa pou Bondye, li mare l' sou devan mouchwa a dapre lòd Seyè a te ba li. ¹⁰ Apre sa, Moyiz pran lwil pou mete moun apa pou Bondye a, li voye l' sou kay Bondye a ak sou tout bagay ki ladan l'. Se konsa, li te mete yo apa pou sèvis Seyè a. ¹¹ Li voye lwil la sèt fwa sou lotèl la ak sou tout bagay ki sèvi sou lotèl la, sou kivèt la ak tout pye li. Se konsa li mete yo apa pou sèvis Bondye. ¹² Lèfini ankò, li pran lwil pou mete moun apa pou Bondye a, li vide l' sou tèt Arawon. Se konsa li mete l' apa pou Bondye. ¹³ Moyiz fè pitit gason Arawon yo pwoche, li mete rad yo sou yo, li pase sentiwon nan ren yo, li mare mouchwa tèt sou tèt yo, dapre lòd Seyè a te ba li. ¹⁴ ¶ Apre sa, Moyiz fè mennen ti towò yo ofri pou peye pou sa moun fè ki mal la. Arawon ak pitit gason l' yo mete men yo sou tèt li. ¹⁵ Lèfini, Moyiz touye towò a, li tranpe dwèt li nan san towò a, li mete ti degout san sou kat kòn lotèl la. Apre sa, li fè ofrann pou peye pou tou sa moun te fè ki mal sou lotèl la, li vide tout rès san an atè nan pye lotèl la. Se konsa li mete l' apa pou Bondye, li mande Bondye gras pou li. ¹⁶ Apre sa, Moyiz pran grès ki vlope tripay yo, mas grès ki sou fwa a, ansanm ak de wonyon yo ak tout grès yo, li boule yo nèt sou lotèl la. ¹⁷ Men, li pran tout vyann ti towò a, po a ak tout tripay la, li boule yo an deyò limit kote yo rete a, dapre lòd Seyè a te ba li. ¹⁸ Apre sa, Moyiz fè mennen belye mouton ki pou boule nèt pou Seyè a. Arawon ak pitit gason l' yo mete men yo sou tèt li. ¹⁹ Moyiz touye l', li pran san an, li vide l' tout arebò lotèl la. ²⁰ Li dekoupe belye a an divès moso. Apre sa, li boule tèt la, moso vyann yo ak tout moso grès yo nèt sou lotèl la. ²¹ Moyiz lave tripay yo ak pye yo nan dlo. Apre sa li boule tout towò a nèt sou lotèl la. Se te yon bèt li ofri pou boule nèt nan dife pou Seyè a, yon ofrann bèt k'ap fè Seyè a plezi ak bon sant li, dapre lòd Seyè a te ba li. ²² Apre sa, Moyiz fè mennen lòt belye mouton an, belye

ki pou sèvi nan seremoni pou mete prèt yo apa pou Seyè a. Arawon ak pitit gason l' yo mete men
²³ yo sou tèt li. Moyiz touye l', li pran ti gout nan san belye a, li mete l' sou tete zòrèy dwat Arawon,
²⁴ sou pous men dwat li ak sou gwo zòtèy pye dwat li. Apre sa, Moyiz fè pitit gason Arawon yo
 pwoche, li mete ti gout san sou tete zòrèy dwat yo, sou gwo pous men dwat yo ak sou gwo zòtèy
²⁵ pye dwat yo. Lèfini, Moyiz pran rès san an, li vide l' tout arebò lotèl la. Apre sa, li pran tout
 moso grès yo, ke a, tout grès ki vlope tripay yo, moso grès ki sou fwa a, de wonyon yo ak tout grès
²⁶ yo, ansanm ak jigo dwat la. Nan panyen pen san ledven ki devan Seyè a, li pran yon pen antye,
²⁷ yon gato fèt ak lwil, ak yon pen rale. Li mete yo sou moso grès yo ak sou jigo dwat la. Apre sa,
 li mete tout bagay sa yo nan men Arawon ak nan men pitit gason l' yo, li balanse yo devan Seyè a
²⁸ tankou yon ofrann. Apre sa, Moyiz pran ofrann yo nan men yo, li boule yo sou lotèl la anwo
 ofrann ki t'ap boule deja a. Se te yon ofrann pou bay prèt yo pouvwa pou yo sèvi Bondye, yon
 ofrann bèt k'ap boule nèt nan dife pou Seyè a, yon ofrann bèt k'ap fè Seyè a plezi ak bon sant li.
²⁹ Moyiz pran moso pwatrin lan, li balanse l' devan Seyè a tankou yon ofrann. Nan belye ki te sèvi
 nan seremoni pou mete prèt yo apa a, se pòsyon sa a ki te pou Moyiz, dapre lòd Seyè a te bay Moyiz
³⁰ la. Lè sa a, Moyiz pran ti gout nan lwil pou mete moun apa pou sèvis Bondye a, li melanje l' ak
 san ki te sou lotèl la, li voye l' sou Arawon ak sou tout rad li yo, sou pitit gason Arawon yo ak sou
³¹ tout rad yo. ¶ Moyiz pale ak Arawon ansanm ak pitit gason l' yo, li di yo: -N'a fè kwit vyann
 belye a devan pòt Tant Randevou a. Se la n'a manje l' tou ansanm ak pen ki nan panyen ofrann yo
 fè lè nou t'ap resevwa pouvwa pou fè sèvis pou Bondye a, dapre lòd mwen te resevwa lè li te di
³² m': Arawon ak pitit gason l' yo va manje vyann belye a. Si gen rès nan vyann lan ak nan pen an
³³ ki rete apre yo fin manje, n'a boule l' nan dife. Pandan sèt jou, nou p'ap soti devan pòt Tant
 Randevou a, jouk lè y'a fini ak seremoni pou mete nou apa pou sèvis Bondye a, paske y'ap pran sèt
³⁴ jou pou fè seremoni pou ban nou pouvwa pou fè sèvis pou Bondye. Sa nou wè nou fè jòdi a, se
³⁵ Seyè a menm ki te bay lòd pou nou te fè l' pou peye pou tou sa nou te fè ki mal. Pandan sèt jou,
 lajounen kou lannwit, n'a rete la devan pòt Tant Randevou a, epi n'a fè tou sa Seyè a te ban nou lòd
³⁶ fè a. Si se pa sa, n'a mouri. Wi, men lòd Seyè a te ban mwen an. Se konsa, Arawon ak pitit gason
 l' yo te fè tou sa Moyiz te di yo Seyè a te ba yo lòd fè a.

Chapter 9

¹ ¶ Sou wityèm jou a apre yo fini avèk sèvis pou mete yo apa pou Bondye a, Moyiz rele Arawon
ak pitit gason l' yo ansanm ak tout chèf fanmi pèp Izrayèl la. ² Epi li di Arawon konsa: -Pran yon
jenn ti towò san ankenn enfimite ki pou sèvi ofrann pou peye pou sa nou fè ki mal, ak yon belye
mouton san ankenn enfimite ki pou sèvi ofrann pou nou boule nèt pou Seyè a. Ofri yo bay Seyè a.
³ Apre sa, w'a mande moun pèp Izrayèl yo pou yo pran yon bouk san ankenn enfimite ki pou sèvi
ofrann pou yo boule nèt pou Seyè a, yon ti towò san ankenn enfimite ki gen ennan ak yon ti mouton
san ankenn enfimite ki gen ennan ki pou sèvi ofrann pou peye pou sa pèp la fè ki mal. ⁴ Lèfini, y'a
pran yon towò ak yon belye pou sèvi ofrann pou di Bondye mèsì. Y'a ofri yo tout bay Seyè a ansanm
ak ofrann grenn ki sot nan jaden yo melanje ak lwil. Y'a fè sa paske Seyè a pral parèt devan yo jòdi
⁵ a. Se konsa yo pran tou sa Moyiz te ba yo lòd pran an. Yo mennen yo devan pòt Tant Randevou
a. Apre sa, tout pèp la nèt sanble menm kote a, yo rete kanpe devan Seyè a. ⁶ Lè sa a Moyiz di yo:
-⁷ Seyè a te bay lòd pou nou te fè tou sa pou li ka fè nou wè pouvwa li. Apre sa, Moyiz di Arawon
konsa: -Pwoche bò lotèl la, fè yon ofrann pou peye pou tou sa ou fè ki mal, ak yon ofrann pou ou
boule nèt pou Seyè a. Apre sa w'a fè menm bagay pou pèp la. Wi, mete ofrann pèp la devan Bondye,
mande Bondye pou l' fè yo gras, jan Seyè a te bay lòd la. ⁸ ¶ Se konsa Arawon pwoche bò lotèl la,
⁹ li touye ti towò bèf li te bay pou ofrann pou peye pou sa li te fè ki mal. Pitit li yo pote san an ba
li, li tranpe dwèt li nan san an, epi li mete ti gout san sou kat kòn lotèl la. Apre sa, li vide rès la nan
¹⁰ pye lotèl la. Lè l' fini, li pran grès la, wonyon yo, mas grès ki te sou fwa a, li mete yo boule sou
¹¹ lotèl la jan Seyè a te bay Moyiz lòd la. Pou vyann lan ak po a, li boule yo nan dife andeyò lòt
¹² bò limit kote yo rete a. Apre sa, Arawon touye bèt li te ofri pou boule nèt pou Seyè a. Pitit li yo
¹³ pote san an ba li, li vide l' sou lotèl la ak tout arebò lotèl la. Yo pote ba li tou tèt la ansanm ak
¹⁴ rès vyann lan dekoupe, epi li mete yo boule sou lotèl la. Li lave tripay yo ansanm ak pye yo.
¹⁵ Lèfini li mete yo boule sou lotèl la anwo vyann yo t'ap boule pou Seyè a. Apre sa, Arawon mete
ofrann pèp la devan Seyè a: li pran bouk pèp la te ofri pou peye pou sa yo fè ki mal la, li touye l'
¹⁶ epi li ofri l' bay Seyè a pou peche pèp la, jan l' te fè l' pou pa l' la. Apre sa, li fè ofrann pou yo
¹⁷ boule nèt pou Seyè a, dapre regleman yo. Li mete ofrann grenn jaden yo devan Seyè a. Li pran
¹⁸ yon ponyen farin, li boule l' sou lotèl la, anplis ofrann ki t'ap boule depi maten an. Li touye towò
a ak belye a, li ofri yo tankou ofrann pèp la fè pou di Bondye mèsì. Pitit li yo pote san an ba li, li
¹⁹ vide san an sou lotèl la ak tout arebò lotèl la. Apre sa, Arawon pran tout moso grès towò a ak

moso grès belye a, ke yo, grès ki vlope zantray yo, mas fwa yo, grès ki kouvri wonyon yo. ²⁰ Li mete yo yonn sou lòt sou de moso pwatrin yo, epi li pote tout grès yo, li mete yo boule nèt sou lotèl ²¹ la. Men, li pran moso pwatrin yo ak jigo dwat yo, li balanse yo devan Seyè a tankou yon ofrann, jan Moyiz te ba li lòd fè a. ²² Lè Arawon fin fè tout ofrann pou peye pou sa yo te fè ki mal, ofrann pou yo boule nèt pou Bondye ak ofrann pou di Bondye mèsì, li leve men l' anwo pèp la, li beni yo epi li desann. ²³ ¶ Moyiz ak Arawon antre anndan Tant Randevou a. Lè yo soti, yo beni pèp la ankò. Se lè sa a pouvwa Seyè a parèt devan je pèp la. ²⁴ Yon dife rete konsa, li soti nan syèl la, li boule tout vyann ak tout grès ki te sou lotèl la. Lè pèp la wè sa, yo tout pran rele sitèlman yo te kontan epi yo tonbe fas atè devan Bondye.

Chapter 10

¹ ¶ Yon jou, de nan pitit Arawon yo, Nadab ak Abiyon, leve, yo pran ti recho yo, yo mete chabon dife tou limen ladan yo, yo mete lansan nan dife a, epi y' al ofri l' bay Seyè a. Men, dife a pa t' bon paske se pa t' yon dife Seyè a te bay lòd fè. ² Seyè a voye yon dife sou yo, dife a boule yo, epi yo mouri la devan Seyè a. ³ ¶ Lè sa a, Moyiz di Arawon: -Men sa Seyè a t'ap di nou an wi lè l' te di: Moun k'ap sèvi m' fèt pou respekte m'. M'a fè pèp la konnen pouvwa mwen! Arawon pa di anyen. ⁴ Moyiz rele Mikayèl ak Elzafan, de pitit gason Ouzyèl, tonton Arawon, li di yo: -Vini non! Wete kadav kouzen nou yo devan tant Seyè a, pote yo deyò lòt bò limit kan an. ⁵ Se konsa yo vini, yo pran kò yo ak tout rad ki te sou yo, yo pote yo lòt bò limit kan an, jan Moyiz te di a. ⁶ Apre sa, Moyiz pale ak Arawon ansanm ak de lòt pitit gason l' yo, Eleaza ak Itama, li di yo: -Pa rete san penyen tèt nou, pa chire rad sou nou jan moun yo fè l' la lè yo nan lapenn pou ka lanmò. Si nou fè sa n'a mouri, Seyè a va fache sou tout pèp la. Men, frè nou yo ansanm ak tout lòt moun peyi Izrayèl ⁷ yo gen dwa pran lapenn pou moun sa yo ki boule nan dife Seyè a te voye sou yo a. Nou menm, rete nan tant Randevou a. Pa mete pwent pye nou deyò. Si nou fè sa n'a mouri, paske avèk lwil yo ⁸ te vide sou tèt nou an, yo mete nou apa pou Seyè a. Yo fè jan Moyiz te di a. ¶ Seyè a pale ak ⁹ Arawon, li di l' konsa: -Ni ou menm, ni pitit gason ou yo, nou pa fèt pou nou bwè diven ni ankenn gwòg lè se jou nou gen pou nou antre nan Tant Randevou a. Si nou fè sa n'a mouri. Sa se yon ¹⁰ regleman pou nou swiv tout tan, nou menm, pitit nou yo ak pitit pitit nou yo. Se pou nou konnen sa ki apa pou sèvis Bondye ak sa ki pou sèvis òdinè, sa ki pa ka sèvi pou sèvis Bondye ak sa ki ka

¹¹ sèvi pou sèvis Bondye. Lèfini, se devwa nou pou nou moutre pèp Izrayèl la tout regleman mwen
 menm Seyè a, mwen te bay Moyiz pou nou. ¹² ¶ Moyiz pale ak Arawon ansanm ak de lòt pitit
 gason ki te rete l' yo, Eleaza ak Itama, li di yo: -N'a pran farin ki rete nan ofrann grenn yo boule
 pou Seyè a, n'a fè pen san ledven avè l', n'a manje yo bò lotèl la, paske ofrann lan, se yon ofrann
 ki apa nèt pou Seyè a. ¹³ N'a manje l' yon kote ki apa pou Seyè a. Wi, se pòsyon sa a ki pou ou
 ansanm ak pitit ou yo nan ofrann yo fè pou boule pou Seyè a. Se sa Seyè a te ban m' lòd fè. ¹⁴ Konsa
 tou, nou menm ak tout fanmi nou, fi kou gason, nou gen dwa manje pwatrin yo balanse devan Seyè
 a ak jigo yo te ofri bay Seyè a pou prèt yo. N'a manje yo yon kote yo mete apa pou sèvis Seyè a.
 Paske, pòsyon sa yo se pou nou yo ye, pou nou ansanm ak pitit nou yo. Se nan ofrann moun Izrayèl
 yo fè pou di Bondye mèsè yo soti. ¹⁵ Wi, y'a pote jigo ak pwatrin y'ap ofri pou boule ansanm ak
 pòsyon grès y'ap ofri pou boule nan dife pou Seyè a. Y'a balanse yo devan Bondye. Pòsyon sa yo
 va toujou rete pou ou ansanm ak pou pitit ou yo, jan Seyè a te bay lòd la. ¹⁶ Lè sa a, Moyiz mande
 sa yo te fè ak kabrit ki sèvi ofrann pou peye pou sa moun te fè ki mal la. Yo di l' yo te gen tan boule
 l'. Moyiz fè yon sèl move sou Eleaza ak Itama, de gason Arawon ki te rete yo, li di yo konsa:
¹⁷ -Poukisa nou pa t' manje ofrann yo te fè pou peche a nan kote yo mete apa pou sèvis Bondye a?
 Nou konnen ofrann lan se yon bagay ki apa nèt pou Seyè a. Seyè a ban nou l' pou nou manje, pou
 li ka wete peche pèp la, pou peye pou peche yo fè. ¹⁸ Tande byen. Nou wè yo pa t' pote san an
 anndan kay Bondye a. Se pou nou te manje vyann lan nan kay ki apa pou Bondye a, jan Bondye
 te ban mwen lòd fè l' la. ¹⁹ Arawon reponn Moyiz: -Ou wè sa ki rive m' jòdi a? Atout pèp la te fè
 ofrann pou wete peche li yo ak ofrann pou boule pou Seyè a, mwen t'ap mande m' si m' te manje
 ofrann peche yo a jòdi a, ou kwè sa ta fè Seyè a plezi? ²⁰ Lè Moyiz tande sa, sa te fè kè l' kontan.

Chapter 11

¹ ¶ Seyè a pale ak Moyiz ansanm ak Arawon, li di yo konsa: ² -Men sa pou nou di moun pèp
 Izrayèl yo. ³ Nan tout bèt ki sou latè, men bèt nou ka touye pou nou manje. Nou ka manje tout bèt
 ki gen zago yo fann an de depi yo remoute manje tou. ⁴ Men, gen bèt ki remoute manje epi ki pa
 gen zago yo fann. Bèt konsa nou pa gen dwa manje yo. Sa pa bon pou nou! Nou gen chamo ki
 remoute manje men ki pa gen zago yo fann. Vyann li pa bon pou nou manje. ⁵ Nou gen daman ki
 remoute manje men ki pa gen zago yo fann. ⁶ Nou gen ankò lapen ki remoute manje men ki pa gen

zago fann an de. Vyann li pa bon pou nou manje. ⁷ Nou gen ankò kochon. Li menm li gen zago
 fann an de, men li pa remoute manje. Vyann li tou pa bon pou nou manje. ⁸ Piga nou janm manje
 vyann bèt sa yo. Piga nou manyen kadav yo. Yo pa bon pou nou menm k'ap sèvi Bondye. ¶ ⁹ Nan
 bèt k'ap viv nan dlo men sa nou ka manje. Nou ka manje tout bèt nan lanmè ak nan dlo dous ki gen
 zèl ak kal sou kò yo. ¹⁰ Men, tout bèt k'ap viv nan lanmè osinon nan dlo dous men ki pa gen ni zèl
 ni kal sou kò yo, sa pa bon pou manje yo. ¹¹ Gade yo pou move vyann. Pa manje vyann yo, pa
 manyen kadav yo. ¹² Tout bèt k'ap viv nan dlo men ki pa gen zèl ak kal sou kò yo, nou pa fèt pou
 nou manje yo. ¹³ Nan tout zwazo men sa nou pa gen dwa manje paske yo pa bon pou nou menm
 k'ap sèvi Bondye. ¹⁴ Malfini karanklou ak lòt bèt menm fanmi ak yo ki manje kadav, ¹⁵ tout kalite
 kònèy, ¹⁶ otrich, janmichèt, poul dlo, grigri, ak lòt bèt menm fanmi ak yo ki manje vyann vivan,
¹⁷ koukou, plonjon, frize, ¹⁸ gwo kanna mawon blan, grangozye, chwèt, ¹⁹ sigòy, krabye ak tout
 lòt bèt menm fanmi ak yo, chòchòt, sèpantye. ¶ ²⁰ Tout ti bètazèl ki mache sou kat pye pa bon pou
 nou manje. ²¹ Men, nou ka manje tout ti bètazèl ki mache sou kat pye, depi yo gen de gwo pye ki
 penmèt yo sote, ²² tankou krikèt kay, krikèt bwa, chwal bondye ak lòt kalite krikèt. ²³ Men, tout
 lòt ti bètazèl ki gen kat pye pa bon pou nou manje. ²⁴ Depi yon moun manyen kadav yonn nan bèt
 sa yo, li pa nan kondisyon pou l' fè sèvis pou Bondye jouk aswè. ²⁵ Tout moun ki pote menm yon
 moso nan kadav yo gen pou lave tout rad sou li, epi li p'ap nan kondisyon pou l' fè sèvis pou Bondye
 jouk aswè. ²⁶ Tout bèt ki pa gen zago yo fann an de osinon ki pa remoute manje pa bon pou nou
 manje. Tout moun ki manyen ata kadav bèt sa yo pa nan kondisyon pou l' fè sèvis pou Bondye.
²⁷ Konsa tou, tout bèt ki mache sou kat pa t' men ki pa gen zago, yo pa bon pou nou manje. Depi
 yon moun manyen kadav yonn nan bèt sa yo, li pa nan kondisyon pou fè sèvis pou Bondye jouk
 aswè. ²⁸ Tout moun ki pote kadav bèt yo al jete gen pou lave tout rad sou li, epi li p'ap nan kondisyon
 pou l' fè sèvis pou Bondye jouk aswè. Wi, tout bèt sa yo pa bon pou nou manje. ²⁹ Pami tout bèt
 toupatou sou latè ki mache sou vant, men sa ki pa bon pou nou manje: tout kalite zagoudi, sourit
 ak leza, ³⁰ zandolit, soud, mabouya, gongolo, aganman. ³¹ Wi, tout bèt sa yo pa bon pou nou
 manje. Si yon moun annik manyen kadav yonn nan bèt sa yo, l'a nan kondisyon pou l' pa fè sèvis
 pou Bondye jouk aswè. ³² Si kadav bèt sa yo tonbe sou nenpòt ki bagay, kit an bwa, kit an twal,
 kit an po, kit an twal sak, osinon sou nenpòt ki zouti nou sèvi pou nou travay, bagay sa a osinon

zouti sa a pa bon pou nou sèvi. Se pou nou mete l' tranpe nan dlo, li p'ap bon pou nou sèvi avè l' jouk aswè rive. Apre sa, nou ka sèvi avè l' san danje. ³³ Si kadav yonn nan bèt sa yo tonbe nan yon veso fèt an tè, tou sa ki nan veso a pa bon pou nou sèvi ankò, epitou se pou nou kraze veso sa a.

³⁴ Si ti gout nan dlo ki soti nan veso sa a ta rive tonbe sou nenpòt manje nou gen dwa manje, manje a pa bon ankò pou nou manje. Konsa tou, tout bwason nou gen dwa bwè, si yo ta rive vide l' nan yon veso konsa, li pa bon ankò pou nou bwè. ³⁵ Si kadav yonn nan bèt sa yo tonbe sou nenpòt bagay, bagay sa a pa bon pou sèvi ankò. Si se yon fou osinon yon recho, se pou yo kraze yo an miyèt moso. Yo pa bon, nou pa fèt pou sèvi ak yo ankò menm. ³⁶ Men, si yo tonbe nan yon sous osinon nan yon sitèn pou ranmase dlo, sous la osinon sitèn lan ap toujou bon pou sèvis nou. Men, moun ki manyen kadav la pou wete l' nan dlo a p'ap nan kondisyon pou fè sèvis Bondye. ³⁷ Si kadav yonn nan bèt sa yo tonbe sou grenn nou pral plante, grenn yo bon toujou pou plante. ³⁸ Men, si grenn lan te tranpe nan dlo epi kadav yonn nan bèt sa yo tonbe sou li, grenn lan pa bon ankò pou plante. ³⁹ Lè yon bèt nou ka manje rete konsa li mouri, tout moun ki manyen kadav li p'ap kapab fè sèvis pou Bondye jouk aswè. ⁴⁰ Moun ki manje nenpòt moso nan vyann bèt mouri a gen pou l' lave rad sou li epi li p'ap nan kondisyon pou l' fè sèvis Bondye jouk aswè. Moun ki pote kadav la al jete gen pou l' lave rad sou li, epi li p'ap nan kondisyon pou l' fè sèvis pou Bondye jouk aswè.

⁴¹ Tout ti bèt k'ap trennen sou vant pa bon pou moun k'ap sèvi Bondye. Nou pa fèt pou manje yo.

⁴² Depi se ti bèt k'ap trennen sou vant ou ankò ti bèt kat pye, ou ankò ti bèt ki gen anpil pye, yo yonn pa bon menm pou moun k'ap sèvi Bondye: nou pa fèt pou nou manje yo. ⁴³ ¶ Pa manje ankenn nan ti bèt k'ap trennen sou vant yo pou yo pa mete nou nan kondisyon pou nou pa kapab fè sèvis pou mwen. ⁴⁴ Se mwen menm Seyè a ki Bondye nou. Se pou nou kenbe kò nou yon jan pou nou viv apa pou mwen, paske mwen menm se yon Bondye apa mwen ye. Pa kite ankenn ti bèt k'ap trennen sou vant mete nou nan kondisyon pou nou pa ka sèvi m'. ⁴⁵ Se mwen menm, Seyè a, se mwen menm ki te mennen nou soti kite peyi Lejip pou m' te ka Bondye nou. Wi, se pou nou viv apa pou mwen, paske mwen se yon Bondye apa. ⁴⁶ Men regleman ki gen rapò ak bèt, zwazo ak tout lòt bèt k'ap viv nan dlo, osinon k'ap trennen sou vant. ⁴⁷ Se pou nou toujou rekonèt bèt ki ka mete nou nan kondisyon pou nou pa ka sèvi Bondye ak bèt ki p'ap fè l', bèt ki bon pou nou manje ak bèt ki pa bon pou nou manje.

Chapter 12

¹ ¶ Seyè a pale ak Moyiz, li di l' konsa: ² -Men sa pou ou di pep Izrayèl la pou mwen. Lè yon fanm vin ansent, epi li fè yon pitit gason, li p'ap nan kondisyon pou l' fè sèvis pou mwen pandan sèt jou apre jou akouchman an, menm jan li pa ka fè sèvis pou mwen lè li gen règ li. ³ Sou wityèm jou a, y'a sikonsi pitit la. ⁴ Men, madanm lan va rete ankò tranntwa jou. Se apre sa l'a fè sèvis pou san li pèdi a. Li p'ap gen dwa manyen ankenn bagay yo mete apa pou Bondye, ni li p'ap gen dwa antre nan tant ki apa pou Bondye a, toutotan li poko fè sèvis pou mete l' ankò nan kondisyon pou fè sèvis pou Bondye a. ⁵ Si se yon tifi li fè, li p'ap nan kondisyon pou l' fè sèvis pou mwen pandan de senmenn apre akouchman an, menm jan li pa ka fè sèvis pou mwen lè li gen règ li. Apre sa se pou l' pase swasannis jou anvan li fè sèvis pou san li pèdi a. ⁶ ¶ Lè li fin pase kantite jou pou l' pase a, kit se pou yon pitit gason, kit se pou yon pitit fi, fanm lan va pran yon ti mouton ki poko gen ennan ak yon jenn ti pijon osinon yon toutrèl, l'a pote yo bay prèt la devan pòt Tant Randevou a. Ti mouton an va sèvi ofrann yo boule nèt pou Bondye a. Ti pijon an osinon ti toutrèl la va sèvi ofrann pou mande Bondye padon pou sa l' te fè ki mal. ⁷ Prèt la va ofri yo bay Seyè a pou mande padon pou fanm lan. Se konsa fanm lan va fè sèvis pou san li pèdi a. Wi, se sa pou yon fanm fè ⁸ apre li fin akouche, kit se yon gason, kit se yon fi li fè. Si fanm lan pa gen mwayen pou l' pote yon ti mouton, lè sa a l'a pote de pijon osinon de toutrèl, yonn pou yo boule nèt pou Bondye, lòt la pou yo ofri pou mande padon. Prèt la va ofri yo bay Seyè a pou l' mande padon pou li. Se konsa fanm lan va fè sèvis pou l' ka nan kondisyon sèvi Bondye ankò.

Chapter 13

¹ ¶ Seyè a pale ak Moyiz ansanm ak Arawon, li di yo konsa: ² -Si yon moun wè yon kote sou po kò l' anfle, ou ankò si li wè yon bouton osinon yon tach parèt sou po l' ki ta vle sanble konmansman yon move maladi po ki ka kontaminen lòt moun, y'a mennen l' bay Arawon, prèt la, ou ankò bay yonn nan pitit li yo ki prèt tou. ³ Prèt la va egzaminen kote ki malad la. Si pwal yo vin tou blan, epi si maladi a fouye po a ti kras, l'a konnen se yon move maladi po ki ka kontaminen lòt moun. Lè prèt la va wè sa, l'a fè konnen moun lan pa nan kondisyon pou l' fè sèvis Bondye. ⁴ Men, si kote po a anfle a vin tou blan san li pa fouye, si pwal yo pa vin blan, prèt la va fèmen moun lan yon kote pou kont li pandan sèt jou. ⁵ Sou setyèm jou a, prèt la va egzaminen l' ankò. Si li wè bouton an rete menm jan an, li pa laji sou po a, prèt la va fèmen moun lan pou kont li pou sèt ⁶ jou ankò. Apre sa, prèt la va egzaminen l' ankò. Si bouton an cheche, si li pa laji kò l' sou po a, prèt la va fè konnen moun lan nan kondisyon pou l' fè sèvis Bondye. Se yon bouton ase li te genyen.

Lè sa a, moun lan va lave rad li, epi l'ap nan kondisyon pou l' fè sèvis pou Bondye. ⁷ Men si bouton an vin pi laj sou po a, apre prèt la te fin di moun lan bon lè li te wè l' la, se pou moun lan parèt
⁸ devan prèt la ankò. Prèt la va egzaminen l' ankò. Si li wè bouton an vin pi laj sou po a, prèt la va fè konnen moun lan pa nan kondisyon pou fè sèvis Bondye. Se yon move maladi po li genyen!
⁹ Lè yon moun va gen yon move maladi po sou li, y'a mennen l' bay prèt la. ¹⁰ Prèt la va egzaminen
¹¹ l'. Si li wè yon bouton blan sou po a ki fè pwal yo vin blan tou, si bouton an plen postim, se va yon move maladi po ki chita sou li. Prèt la va fè konnen nonm lan pa nan kondisyon pou fè sèvis pou Bondye. Li p'ap bezwen fèmen l' yon kote pou kont li, paske se bagay ki klè, nonm lan pa nan
¹² kondisyon pou fè sèvis pou Bondye. Men, si maladi a gaye sou tout kò l', si li kouvri ak bouton
¹³ depi nan tèt jouk nan pye, kifè kote prèt la voye je l' li wè se bouton, prèt la va egzaminen l' ankò. Si maladi a kouvri tout kò l', prèt la va di moun lan toujou nan kondisyon pou fè sèvis Bondye.
¹⁴ Depi tout kò l' vin tou blan, li nan kondisyon pou fè sèvis Bondye. Men, jou yon bouton pete,
¹⁵ li p'ap nan kondisyon pou fè sèvis Bondye. Prèt la va egzaminen l' ankò. Si li wè yon bouton pete, l'a fè konnen nonm lan pa nan kondisyon pou fè sèvis Bondye. Depi bouton an pete se yon
¹⁶ move maladi po li genyen, nonm lan pa nan kondisyon pou fè sèvis Bondye. Men, lè bouton an
¹⁷ va konmanse geri, po a konmanse vin blan ankò, moun lan va tounen al jwenn prèt la. Prèt la va egzaminen l' ankò. Si li wè bouton an vin tou blan, prèt la va fè konnen nonm lan nan kondisyon
¹⁸ pou fè sèvis Bondye. ¶ ¹⁹ Si yon moun gen yon apse ki geri, men kote apse a te ye a vin anfle,
²⁰ ou ankò yon ti bouton wouj anba po a vin parèt, se pou l' al wè prèt la. Prèt la va egzaminen l'. Si bouton an gen lè yon ti jan pi fon pase rès po a, epi si pwal ki ladan l' yo vin tou blan, prèt la va fè konnen moun lan pa nan kondisyon pou fè sèvis Bondye. Se yon move maladi po k'ap parèt sou
²¹ mak apse a. Men, lè prèt la egzaminen l', si li wè pwal ki ladan l' yo pa blan, si bouton an pa pi fon pase rès po a, si li konmanse chanje koulè, prèt la va fèmen moun lan yon kote pou kont li pou
²² sèt jou. Si bouton an gaye sou tout kò l', prèt la va fè konnen moun lan pa nan kondisyon pou
²³ fè sèvis Bondye. Se yon move maladi po li genyen. Men, si bouton an rete jan l' te ye a, y'a konnen se mak apse a ase li ye. Prèt la va fè konnen moun lan pa gen anyen, li toujou nan kondisyon
²⁴ pou fè sèvis Bondye. Ou ankò, lè yon moun boule nan dife, si lè li konmanse geri, po a vin yon
²⁵ ti jan wouj e blan, prèt la va egzaminen l'. Si li wè pwal yo vin blan, epi si tach la gen lè pi fon pase rès po a, y'a konnen se yon move maladi po k'ap devlope sou boule a. Prèt la va fè konnen
²⁶ moun lan pa nan kondisyon pou fè sèvis Bondye. Se yon move maladi po li genyen. Men, si lè

prèt la egzaminen l' li pa jwenn pwal blan ladan l', epi tach la pa pi fon pase rès po a, men li ta vle
 chanje koulè, prèt la va fèmen l' yon kote pou kont li pou sèt jou. ²⁷ Sou setyèm jou a, prèt la va
 egzaminen l' ankò. Si li wè tach la ap gaye, l'a konnen se yon move maladi po li genyen. Lè sa a,
 prèt la va fè konnen moun lan pa nan kondisyon pou l' fè sèvis Bondye. ²⁸ Men, si tach la rete jan
 l' te ye a, si li pa gaye sou po a, si se koulè a ase ki chanje, l'a konnen se mak boule a ase li ye. Prèt
 la va fè konnen moun lan toujou nan kondisyon pou fè sèvis Bondye, paske se boule a k'ap geri.
²⁹ Lè yon gason osinon yon fanm gen yon kote nan cheve l' osinon nan bab li ki fè yon plak, ³⁰ prèt
 la va egzaminen plak la. Si li gen lè pi fon pase rès po a, si li gen cheve yon ti jan jòn, fin fen ladan
 l', l'a konnen se pyas moun lan genyen. Se yon move maladi po ki parèt nan cheve l' osinon nan
 bab li. Prèt la va fè konnen moun lan pa nan kondisyon pou fè sèvis Bondye. ³¹ Men, lè prèt la
 egzaminen plak pyas la, si li wè gen lè li pa pi fon pase rès po a, epi cheve ki ladan l' yo yon ti jan
 jòn, prèt la va fèmen moun lan yon kote pou kont li pou sèt jou. ³² Sou setyèm jou a, prèt la va
 egzaminen malenng lan ankò. Si pyas la gaye, si cheve ki ladan l' yo pa vin jòn, si li gen lè pa pi
 fon pase rès po a, ³³ moun lan va koupe tout cheve nan tèt li san l' pa manyen pyas la. Apre sa,
 prèt la va fèmen l' yon kote pou kont li pou sèt jou ankò. ³⁴ Sou setyèm jou a, prèt la va egzaminen
 l' ankò. Si pyas la pa laji sou po a, si li pa fouye po a, prèt la va fè konnen moun lan nan kondisyon
 pou fè sèvis Bondye. Moun lan menm va lave rad sou li, epi l'a nan kondisyon pou fè sèvis Bondye
 ankò. ³⁵ Men, si apre prèt la te fin di moun lan nan bon kondisyon an, pyas la gaye tout bon vre
 sou po a, ³⁶ prèt la va egzaminen l' ankò. Si pyas la gaye vre sou po a, li pa bezwen chache wè si
 li gen cheve jòn ankò. L'a tou konnen moun lan pa nan kondisyon pou fè sèvis Bondye. ³⁷ Men si
 li wè pyas la rete jan l' te ye a, epi cheve nwa ap pouse sou li, l'a tou konnen pyas la geri, epi prèt
 la va fè konnen moun lan nan kondisyon pou fè sèvis Bondye. ³⁸ ¶ Lè yon gason osinon yon fanm
 gen ti tach blan ki parèt sou po l', ³⁹ prèt la va egzaminen l'. Si tach yo yon ti koulè blan sal, l'a
 konnen se yon ti gratèl ki parèt sou po a, moun lan toujou nan kondisyon pou fè sèvis Bondye.
⁴⁰ Lè yon nonm pèdi tout cheve nan tèt li, li chòv. Sa pa vle di li pa nan kondisyon pou fè sèvis
 Bondye. ⁴¹ Konsa tou, lè yon moun pèdi cheve sou tout devan tèt li, li demi chòv. Sa pa vle di li
 pa nan kondisyon pou fè sèvis Bondye. ⁴² Men, si kote l' chòv la yon ti tach koulè wouj-blanc parèt,
 se ka yon move maladi po k'ap leve sou kò l'. ⁴³ Lè sa a, prèt la va egzaminen l'. Si plak la gen yon
 ti koulè wouj-blanc tankou lè moun gen move maladi po sou kò yo, ⁴⁴ l'a konnen se yon moun ki
 gen move maladi po. Prèt la va fè konnen moun lan pa nan kondisyon pou fè sèvis Bondye, akòz

45
 move maladi po ki parèt sou tèt li a. Lè yon moun gen yon move maladi po, l'a mete vye rad chire sou li. L'a kite tèt li san penyen, l'a kouvri figi l' depi anba nen l' desann, epi kote l' pase la

46
 pran rele: Men moun malad! Men moun malad! Pandan tout tan maladi a va sou li, li p'ap nan kondisyon pou fè sèvis Bondye. Se yon moun ki gen move maladi po li ye. L'a rete yon kote pou

47
 kont li, nan yon kay andeyò limit kote moun rete. ¶ Lè yon rad fèt an lenn nèt osinon an twal

48
 fen blan nèt bay mak tankou li ta vle kanni, ou ankò lè nan yon moso twal, fil dwat yo osinon fil travè yo, kit yo fèt an lenn ou ankò an kenaf, bay mak tankou yo ta vle kanni, ou ankò lè yon

49
 moso po osinon yon bagay fèt an po bay mak tankou li ta vle kanni, si kote ki vle kanni an gen

50
 yon ti koulè vèt osinon wouj, sa vle di se kanni l'ap kanni. Se pou nou pote l' moutre prèt la. Prèt

51
 la va pran l', l'a egzaminen l' epi l'a fèmen bagay ki vle kanni an yon kote pou sèt jou. Sou setyèm jou a, prèt la va egzaminen l' ankò. Si li wè kanni an gaye sou twal la, osinon li mache nan fil dwat yo osinon nan fil travè yo, oswa sou po a, osinon sou bagay fèt ak po, sa vle di se kanni l'ap kanni

52
 vre. Moun k'ap sèvi Bondye pa ka sèvi avè l' ankò. Prèt la va boule bagay ki kanni an, paske se

53
 yon move maladi k'ap manje tout rad la. Se pou yo boule l' nan dife. Men, si lè prèt la egzaminen

54
 l', li jwenn kanni an pa gaye nan twal la osinon nan po a, prèt la va bay lòd pou yo lave l'. Apre

55
 sa, l'a fèmen l' ankò yon kote pou sèt jou. Sou setyèm jou a, l'a egzaminen l' ankò. Si li wè kote ki te vle kanni an rete menm jan an, menm si li pa gaye sou rès twal la, bagay la pa nan bon kondisyon, moun k'ap sèvi Bondye pa ka sèvi avè l'. Se pou yo boule l' nan dife, kanni an te mèt

56
 sou lanvè ou sou landrèt li. Men, si lè prèt la ap egzaminen l' dezyèm fwa a, li wè kanni an te pèdi koulè, fwa sa a, l'a chire kote ki te kanni nan twal la osinon nan po a. Ou ankò, l'a wete fil

57
 dwat ou fil travè ki te kanni nan twal la. Si apre sa, kanni an parèt ankò epi li konmanse gaye

58
 nan rès rad la, mèt rad la va boule l'. Si apre yo lave yon rad, kanni an disparèt, y'a lave l' yon

59
 dezyèm fwa. Se lè sa a rad la va nan bon kondisyon, moun k'ap sèvi Bondye ka sèvi avè l'. Men regleman pou nou swiv lè yon rad fèt an lenn osinon an twal fen blan bay mak tankou li ta vle kanni, ou ankò lè nan yon moso twal, fil dwat osinon fil travè yo, kit yo fèt an lenn ou ankò an kenaf, bay mak tankou li ta vle kanni, ou ankò lè yon moso po osinon nenpòt bagay ki fèt an po bay mak tankou li ta vle kanni. Se konsa n'a konnen si moun k'ap sèvi Bondye ka sèvi osinon pa ka sèvi ak yo.

Chapter 14

¹ ¶ Seyè a pale ak Moyiz, li di l' konsa: ² -Men regleman w'a bay pou yo swiv lè y'ap fè sèvis pou moun ki geri apre yo te gen move maladi po. Jou pou yo rekonèt moun lan geri a, y'a mennen l' bay prèt la. ³ Prèt la va pran l', l'a soti ansanm avè l' lòt bò limit kan kote moun rete a. L'a egzaminen l' byen egzaminen, pou l' wè si malad la geri vre. ⁴ Prèt la va bay lòd pou yo pote pou moun ki te malad la de zwazo tou vivan epi ki bon pou moun k'ap fè sèvis pou Bondye, ansanm ak yon moso bwa sèd, yon moso twal kamwazi ak yon ti branch izòp. ⁵ Apre sa, prèt la va bay lòd pou yo touye premye zwazo a anwo yon bòl an tè plen dlo fre. ⁶ L'a pran lòt zwazo a tou vivan ansanm ak bwa sèd la, moso twal kamwazi a ak ti branch izòp la, l'a plonje yo nan san zwazo yo te touye anwo dlo fre a. ⁷ Apre sa, l'a voye san an sèt fwa sou moun ki te gen move maladi po a epi l'a di moun lan nan kondisyon ankò pou fè sèvis Bondye. L'a lage zwazo vivan an pou l' vole al fè wout li nan bwa. ⁸ Moun ki te malad la va lave rad ki te sou li yo, l'a kale tèt li nèt, l'a benyen nan gwo dlo, epi l'a nan kondisyon pou fè sèvis Bondye ankò. Apre sa, l'a antre nan kan kote moun rete a, men li p'ap antre lakay li pandan sèt jou. ⁹ Sou setyèm jou a, l'a kale tèt li ankò, l'a koupe tout bab li, tout plim je l' ak tout plim ki sou tout rès kò li. L'a lave rad ki te sou li a, l'a lave kò l' nan gwo dlo. Apre sa, l'a nan kondisyon pou l' fè sèvis Bondye. ¹⁰ ¶ Sou wityèm jou a, l'a pran de ti belye ki pa gen ankenn enfimite ak yon ti fenmèl mouton ki gen ennan epi ki pa gen ankenn enfimite. L'a pran tou de mamit farin melanje ak lwil oliv epi yon boutèy demi lit plen lwil oliv. ¹¹ Prèt k'ap fè sèvis la va mennen moun lan ansanm ak ofrann li yo devan Seyè a, jouk nan papòt Tant Randevou a. ¹² Rive la, prèt la va pran yonn nan ti belye yo, l'a ofri l' ansanm ak demi lit lwil la bay Seyè a pou peye pou sa moun lan te fè ki mal. L'a balanse yo devan Seyè a tankou yon ofrann espesyal pou Seyè a. ¹³ L'a touye ti mouton an kote yo konn touye bèt yo ofri pou mande padon an osinon pou boule nèt la, nan kote yo mete apa pou sèvis Bondye a. L'a fè sa konsa paske bèt moun yo ofri pou peye pou sa yo fè ki mal la osinon pou mande Bondye padon an, se pou prèt la li ye. Se yon ofrann yo mete apa nèt pou Seyè a. ¹⁴ Apre sa, prèt la va pran ti gout nan san ti mouton an, l'a pase l' sou pwent tete zòrèy dwat moun ki te malad la, sou gwo pous men dwat li ak sou gwo zòtèy pye dwat li. ¹⁵ Prèt la va pran ti gout lwil nan boutèy la, l'a vide l' nan pla men gòch li. ¹⁶ L'a tranpe yon dwèt men dwat li nan lwil ki nan pla men gòch li a. Avèk dwèt la, l'a voye ti gout lwil sèt fwa devan lotèl Bondye a. ¹⁷ L'a pran ti gout nan lwil ki nan pla men gòch li a, l'a mete l' menm kote li te mete san ti mouton an, ki vle di sou pwent tete zòrèy dwat moun lan, sou gwo pous men dwat li ak sou gwo zòtèy pye dwat li. ¹⁸ Lèfini, l'a vide rès lwil ki nan pla men l' lan sou tèt moun lan. Se konsa prèt la va fè sèvis pou mande Bondye padon devan lotèl Seyè a. ¹⁹ Apre sa, prèt la

va fè ofrann pou peye sa moun lan fè ki mal. L'a fè sèvis pou mande Bondye padon pou moun ki
 te malad la. L'a touye bèt pou yo boule nèt la. ²⁰ L'a mete l' sou lotèl la ansanm ak farin ble melanje
 ak lwil la. Se konsa prèt la va fè sèvis pou mande padon pou moun lan, epi moun lan va nan
 kondisyon ankò pou l' fè sèvis Bondye. ²¹ ¶ Si moun lan pòv epi li pa gen anpil mwayen, l'a pote
 yon sèl ti mouton pou yo ofri pou peye pou sa moun lan te fè ki mal la. L'a pote twaka mamit farin
 sèlman melanje ak lwil oliv ak yon boutèy demi lit plen lwil. ²² L'a pote de ti toutrèl tou osinon
 de ti pijon, jan mwayen li va penmèt li, yonn pou sèvi ofrann pou mande padon, lòt la pou boule
 nèt pou Seyè a. ²³ Sou wityèm jou a, l'a pote yo bay prèt la devan pòt Tant Randevou a, pou prèt
 la fè sèvis pou mete l' nan kondisyon pou li ka sèvi Seyè a ankò. ²⁴ Prèt la va pran ti mouton li ofri
 pou peye pou sa moun lan fè ki mal la ansanm ak boutèy lwil la, l'a balanse yo devan Seyè a tankou
 yon ofrann. ²⁵ Apre sa, l'a touye ti mouton an, l'a pran ti gout nan san li l'a mete sou pwent tete
 zòrèy dwat moun ki te malad la, sou gwo pous men dwat li ak sou gwo zòtèy pye dwat li. ²⁶ Prèt
 la va vide ti gout lwil nan pla men gòch li, ²⁷ l'a tranpe yon dwèt men dwat li nan lwil ki nan pla
 men gòch li a. Avèk dwèt la, l'a voye lwil la sèt fwa devan lotèl Seyè a. ²⁸ Apre sa, l'a pran nan
 lwil ki nan men gòch li a, l'a mete l' menm kote li te mete san ti mouton an, ki vle di sou pwent tete
 zòrèy dwat moun lan, sou gwo pous men dwat li a ak sou gwo zòtèy pye dwat li a. ²⁹ Lèfini, l'a
 vide rès lwil ki nan pla men gòch li a sou tèt moun lan. Se konsa l'a fè sèvis pou mande Bondye
 padon devan lotèl Seyè a. ³⁰ Apre sa, l'a ofri toutrèl yo, osinon pijon yo, dapre sa mwayen moun
 lan te penmèt li, ³¹ yonn pou mande padon pou peche, lòt la pou yo boule nèt ansanm ak ofrann
 farin ble a. Se konsa prèt la va fè sèvis pou mande Bondye padon pou moun lan. ³² Men regleman
 pou yo swiv lè yon moun ki gen move maladi po pa gen dekwa pou l' ofri tou sa li te dwe ofri pou
 sèvis ki pou mete l' nan kondisyon pou fè sèvis Bondye ankò. ³³ ¶ Seyè a pale ak Moyiz ansanm
 ak Arawon, li di yo: ³⁴ -Lè n'a fin antre nan peyi Kanaran an, peyi m'ap ban nou pou rele nou pa
 nou an, si mwen voye salpèt sou yonn nan kay kote nou rete yo, men sa pou nou fè. ³⁵ Mèt kay la
 va al jwenn prèt la, l'a di l': Gen yon bagay tankou salpèt ki parèt sou miray kay mwen an. ³⁶ Prèt
 la va bay lòd pou yo mete tou sa ki nan kay la deyò anvan li vin egzaminen kay la. Konsa, tou sa
 ki te nan kay la ka toujou sèvi pou moun k'ap sèvi Bondye. Apre sa, prèt la va vini, l'a antre nan
 kay la pou egzaminen l'. ³⁷ L'a egzaminen tout miray yo. Si li wè gen kèk kote ki manje nan miray
 la, epi ki gen ti koulè vèt osinon wouj, ³⁸ prèt la va soti nan kay la, l'a fèmen l' akle pou sèt jou.

39

Sou setyèm jou a, prèt la va tounen, l'a egzaminen miray kay la ankò. Si li wè tach la gaye sou

miray kay la, ⁴⁰ prèt la va bay lòd pou yo wete wòch kote yo te jwenn salpèt la, y'a voye wòch yo

jete yon kote andeyò lavil la, kote yo mete bagay ki pa ka sèvi pou sèvis Bondye. ⁴¹ Apre sa, l'a fè yo grate tout anndan kay la, epi y'a jete tout vye kras mòtye yo te grate a andeyò lavil la, menm

kote yo mete bagay ki pa ka sèvi nan sèvis Bondye. ⁴² Y'a pran lòt wòch ranplase wòch yo te wete

yo epi y'a rekrepi kay la. ⁴³ Si salpèt la parèt ankò apre yo fin wete wòch malad yo, apre yo fin

grate kay la epi yo rekrepi ⁴⁴ prèt la va tounen vin gade. Si li wè salpèt la gaye nan kay la, la

konnen kay la gen yon move maladi sou miray li. Moun k'ap sèvi Bondye pa ka rete ladan l'. ⁴⁵ Lè sa a, y'a demoli kay la nèt epi y'a pran wòch, bwa, mòtye ki te nan kay la, y'a voye yo jete andeyò

lavil la, kote yo mete bagay ki pa ka sèvi pou sèvis Bondye. ⁴⁶ Tout moun ki te antre anndan kay

la lè kay la te fèmen an p'ap nan kondisyon pou sèvi Bondye jouk aswè rive. ⁴⁷ Tout moun ki te

kouche osinon ki te manje anndan kay la va gen pou lave rad ki te sou yo. ⁴⁸ Lè prèt la vin gade

a, si li te jwenn salpèt la disparèt nèt apre yo te fin rekrepi kay la, prèt la va fè konnen kay la nan bon kondisyon ankò pou moun k'ap sèvi Bondye ka rete ladan l', paske salpèt la disparèt nèt.

49

Apre sa, prèt la va fè sèvis pou wete peche nan kay la. L'a pran de zwazo, kèk moso bwa sèd,

yon moso twal kamwazi ak yon ti branch izòp. ⁵⁰ L'a touye yonn nan ti zwazo yo anwo yon bòl

an tè plen dlo fre. ⁵¹ Apre sa, l'a pran bwa sèd la, ti branch izòp la, moso twal kamwazi a ansanm

ak lòt zwazo ki vivan an, l'a plonje yo nan san premye zwazo a ki melanje ak dlo fre a. Apre sa, l'a

voye san an sèt fwa sou kay la. ⁵² Se konsa prèt la va fè sèvis pou wete peche nan kay la, avèk san

zwazo a, dlo fre a, zwazo vivan an, bwa sèd la, ti branch izòp la, epi moso twal kamwazi a. ⁵³ Apre

sa, l'a lage ti zwazo vivan an pou l' vole al fè wout li nan bwa andeyò lavil la. Se konsa l'a fè sèvis pou mande Bondye padon pou kay la epi kay la va nan bon kondisyon pou moun k'ap sèvi Bondye

ka rete ladan l' ankò. ⁵⁴ ¶ Men regleman pou nou swiv lè yon moun gen move maladi po osinon

pyas, ⁵⁵ lè kanni tonbe sou rad osinon lè salpèt parèt nan yon kay, ⁵⁶ lè yon moun gen yon kote

sou po l' ki anfle osinon lè li gen yon bouton ou ankò yon tach ki parèt sou po l'. ⁵⁷ Se konsa n'a

konnen lè yon bagay nan bon kondisyon osinon lè li pa nan bon kondisyon pou moun k'ap sèvi Bondye. Se tout regleman yo sa pou move maladi po.

Chapter 15

¹ ¶ Seyè a pale ak Moyiz ansanm ak Arawon, li di yo konsa: ² -Pale ak pèp Izrayèl la, di yo pou mwen: Lè yon nonm gen ekoulman, li pa nan kondisyon pou fè sèvis Bondye. ³ Kit ekoulman an ap koule, kit li bloke ti pati li, nonm lan pa nan kondisyon pou fè sèvis Bondye. ⁴ Moun k'ap sèvi Bondye pa ka sèvi ak kabann kote moun malad la kouche ni ak bagay kote l' te chita. ⁵ Tout moun ki manyen kabann lan gen pou lave rad ki sou yo, yo gen pou yo benyen nan gwo dlo, epi yo p'ap nan kondisyon pou fè sèvis Bondye jouk aswè. ⁶ Konsa tou, tout moun ki chita sou bagay kote li te chita gen pou lave rad ki sou yo, pou yo benyen nan gwo dlo epi yo p'ap nan kondisyon pou fè sèvis Bondye jouk aswè. ⁷ Tout moun ki manyen yon moun ki gen ekoulman gen pou yo lave rad ki sou yo, pou yo benyen nan gwo dlo epi yo p'ap nan kondisyon pou fè sèvis Bondye jouk aswè. ⁸ Si nonm malad la krache sou yon moun ki te nan kondisyon pou fè sèvis Bondye, moun sa a gen pou l' lave rad ki te sou li a, li gen pou l' benyen nan gwo dlo epi li p'ap nan kondisyon pou fè sèvis Bondye jouk aswè. ⁹ Si nonm malad la moute sou yon sèl chwal, moun ki nan kondisyon pou fè sèvis Bondye pa ka sèvi avèk sèl la. ¹⁰ Tout moun ki manyen nenpòt bagay kote nonm lan te chita a p'ap nan kondisyon pou fè sèvis Bondye jouk aswè. Tout moun ki va pran nenpòt bagay kote nonm lan te chita a pou yo pote l' ak men yo, yo gen pou lave rad sou yo, pou yo benyen nan gwo dlo epi yo p'ap nan kondisyon pou fè sèvis Bondye jouk aswè. ¹¹ Si yon nonm ki gen ekoulman manyen yon moun san li pa lave men l' anvan, moun sa a gen pou lave rad ki sou li, li gen pou l' benyen nan gwo dlo epi li p'ap nan kondisyon pou l' fè sèvis Bondye jouk aswè. ¹² Depi nonm malad la manyen yon veso fèt an tè, se pou yo kraze veso a. Men, si veso a fèt an bwa, y'a lave l' nan gwo dlo. ¹³ Apre nonm ki te gen ekoulman an fin geri, li gen pou l' tann sèt jou anvan li fè sèvis ki pou mete l' nan kondisyon pou fè sèvis Bondye. Lè sa a, l'a lave rad ki sou li, l'a benyen nan dlo dous. Se konsa l'a vin nan kondisyon pou fè sèvis Bondye ankò. ¹⁴ Sou wityèm jou a, l'a pran de toutrèl osinon de pijon, l'a pote yo bay prèt la devan pòt Tant Randevou a. ¹⁵ Prèt la va ofri yonn ladan yo pou wete peche li yo, lòt la pou yo boule nèt pou Seyè a. Se konsa l'a fè sèvis pou mande Bondye padon pou ekoulman nonm lan te genyen an. ¹⁶ Lè yon nonm voye sou li, se pou li lave tout kò l' nan dlo epi li p'ap nan kondisyon pou fè sèvis Bondye jouk aswè. ¹⁷ Depi dechay la tonbe sou yon bagay fèt an twal osinon an po, se pou yo lave bagay sa yo, epi moun ki nan kondisyon pou fè sèvis Bondye p'ap ka sèvi ak bagay sa yo jouk aswè. ¹⁸ Lè yon nonm kouche ak yon fanm epi li voye anndan l', tou de gen pou benyen nan gwo dlo, epi yo p'ap nan kondisyon

19
 pou fè sèvis Bondye jouk aswè. ¶ Lè yon fanm gen règ li, li p'ap nan kondisyon pou fè sèvis Bondye pandan sèt jou. Tout moun ki manyen l' pandan sèt jou sa yo p'ap nan kondisyon tou pou

20
 fè sèvis Bondye jouk aswè. Lè konsa, moun k'ap sèvi Bondye pa ka sèvi ak kabann kote l' kouche

21
 ni ak bagay li te sèvi pou l' chita. Lè yon moun manyen kabann yon fanm konsa, li gen pou l' lave rad ki sou li, l'a benyen nan gwo dlo, epi li p'ap nan kondisyon pou fè sèvis Bondye jouk aswè.

22
 Si yon moun manyen yon bagay fanm lan te sèvi pou l' chita, li gen pou l' lave rad ki sou li, l'a

23
 benyen nan gwo dlo epi li p'ap nan kondisyon pou l' fè sèvis Bondye jouk aswè. Wi, depi se kabann fanm lan osinon yon bagay fanm lan sèvi pou l' chita yon moun manyen, moun sa a p'ap

24
 nan kondisyon pou fè sèvis Bondye jouk aswè. Si yon nonm kouche ak yon fanm ki gen règ li epi li sal ak san, li p'ap nan kondisyon pou l' fè sèvis Bondye pandan sèt jou. Depi li kouche sou

25
 yon kabann, moun k'ap sèvi Bondye p'ap ka sèvi ak kabann sa a. Si yon fanm gen règ li pandan plizyè jou lè li pa nan peryòd li, osinon si règ li kontinye koule kèk jou apre peryòd li pase, se va menm jan an tou. Li p'ap nan kondisyon pou l' fè sèvis Bondye pandan tout jou san an ap koule a,

26
 tankou lè l' gen règ li nòmal. Lè sa a, moun k'ap sèvi Bondye pa ka sèvi ni ak kabann kote l'

27
 kouche ni ak bagay li sèvi pou l' chita. Si yon moun manyen yonn nan bagay sa yo, li p'ap nan kondisyon pou l' fè sèvis Bondye, l'a gen pou l' lave rad ki sou li, pou l' benyen nan gwo dlo epi li

28
 p'ap nan kondisyon pou l' fè sèvis Bondye jouk aswè. Lè san an va sispann koule, fanm lan va

29
 tann sèt jou. Se apre sa l'a nan kondisyon pou l' fè sèvis Bondye. Sou wityèm jou a, l'a pran de

30
 toutrèl osinon de pijon, l'a pote yo bay prèt la devan pòt Tant Randevou a. Prèt la va ofri yonn ladan yo pou wete peche li yo, l'a ofri lòt la pou boule nèt pou Bondye. Se konsa l'a fè sèvis pou mande Bondye padon pou fanm lan, paske règ la te mete l' nan kondisyon li pa t' ka fè sèvis Bondye.

31
 Seyè a di Moyiz ankò: -Pale moun Izrayèl yo byen. Lè yo pa nan kondisyon pou fè sèvis Bondye,

32
 piga yo pwoche bò Tant Randevou a ki nan mitan kan kote yo rete a. Si yo fè sa y'a mouri. Men regleman pou yo swiv lè yon nonm pa ka fè sèvis Bondye paske li gen ekoulman osinon paske li

33
 voye sou li, lè yon fanm gen règ li, osinon lè yon nonm kouche ak yon fanm ki pa nan kondisyon pou fè sèvis Bondye, wi pou tout moun, fanm kou gason, ki gen ekoulman.

Chapter 16

¹ ¶ Seyè a pale ak Moyiz apre lanmò de pitit gason Arawon yo ki te mouri lè yo te ofri yon dife
 ki pa t' bon bay Seyè a. ² Seyè a di Moyiz konsa: -Pale ak Arawon, frè ou la, pou l' pa antre nenpòt
 kilè, nenpòt ki jan dèyè rido a nan kote ki apa pou mwen an, devan kouvèti espesyal ki sou Bwat
 Kontra a. Paske se la, sou kouvèti ki sou bwat kontra a, mwen parèt nan yon nwaj. Si li pa swiv
³ lòd sa a, li ka mouri. Lè l'ap antre nan kote ki apa nèt pou Bondye a, li gen pou l' pote yon jenn
 ti towò ak yon belye. Ti towò a va sèvi pou mande Bondye padon, epi y'a boule belye a nèt pou
⁴ Seyè a. Men ki jan pou Arawon abiye lè l'ap antre nan kay Bondye a. L'a mete rad seremoni pou
 prèt yo mete lè y'ap fè sèvis pou Bondye. L'a mete chemiz twal fen blan an ak kalson twal fen blan
 an, l'a mare sentiwon twal fen blan an nan ren l' ak mouchwa tèt twal fen blan an nan tèt li. L'a lave
⁵ kò l' nan gwo dlo anvan la mete yo sou li. ¶ Moun pèp Izrayèl yo va bay Arawon de bouk kabrit
 ak yon belye. Bouk kabrit yo va sèvi ofrann pou mande Bondye fè gras. Belye a menm, y'a boule
⁶ l' nèt pou Seyè a. Arawon va ofri ti towò bèf la pou yo touye l' pou wete peche l' yo ak peche
 fanmi l' yo. Se konsa l'a fè sèvis pou mande Bondye padon an pou li ak pou fanmi l'. ⁷ Apre sa, l'a
 pran de bouk kabrit yo, l'a mennen yo devan pòt Tant Randevou a. L'a prezante yo devan lotèl
⁸ Bondye a. Apre sa, l'a tire osò ak de ti wòch, yonn make: Pou Seyè a, lòt la: Pou Azazèl. ⁹ Arawon
¹⁰ va touye bouk kabrit ki soti pou Seyè a, l'a ofri l' pou wete peche. Men, l'a pran bouk kabrit ki
 soti pou Azazèl la, y'a prezante l' tou vivan devan Seyè a. Apre sa, lè y'a fin fè sèvis sou li pou wete
¹¹ peche pou pèp la, y'a lage l' nan dezè a pou l' al jwenn Azazèl. Lèfini, Arawon va touye ti towò
 bèf li te ofri pou wete peche pa l' yo. L'a fè sèvis pou mande Bondye padon pou peche pa l' yo
¹² ansanm ak peche fanmi l' yo. Apre sa, l'a pran yon rechò, l'a plen l' chabon dife tou limen la
 jwenn sou lotèl la, l'a pran de ponyen lansan santi bon an poud. L'a pote rechò a ak lansan an antre
¹³ nan kote ki apa nèt pou Seyè a. Rive la, devan lotèl Seyè a, l'a mete lansan an sou dife a, lafimen
¹⁴ lansan an va kouvri kouvèti Bwat Kontra a nèt. Konsa, li p'ap ka wè l', li p'ap mouri. L'a tranpe
 dwèt li nan san ti towò bèf la, l'a voye san an sou bò devan kouvèti Bwat Kontra a, sou bò solèy
¹⁵ leve. Apre sa, l'a voye san an sèt fwa devan kouvèti a avèk dwèt li. ¶ Se lè sa a l'a touye kabrit
 pou wete peche pèp la. L'a pran san an, l'a pote l' anndan kote ki apa nèt pou Seyè a, l'a voye l' sou
¹⁶ kouvèti a ak devan kouvèti a, menm jan li te fè pou san ti towò bèf la. Se konsa, poutèt tout
 peche ak tout mechanste pèp la fè yo, epi poutèt moun nan pèp la ki pa nan kondisyon pou fè sèvis
 Bondye, Arawon va fè sèvis pou mande Bondye fè gras pou kote ki apa nèt pou li a. L'a fè sa tou
 pou Tant Randevou a, paske tant lan kanpe nan mitan pèp la ak tout moun nan pèp la ki pa nan
¹⁷ kondisyon pou fè sèvis Bondye. Depi Arawon antre nan kote ki apa nèt pou Seyè a pou l' fè
 sèvis pou mande padon an jouk lè li soti, lòt moun pa gen dwa anndan tant Randevou a. L'a fè sèvis

la pou li menm, pou fanmi l' ak pou tout moun pèp Izrayèl yo. ¹⁸ Lèfini, l'a soti, l'a ale bò kote lotèl pou boule ofrann lan, l'a fè sèvis pou wete peche pou li tou. Epi, l'a pran nan san ti towò bèf

la ak nan san bouk kabrit la, l'a mete sou kat kòn ki sou kat kwen lotèl la. ¹⁹ Lèfini, avèk dwèt li, l'a voye san an sèt fwa sou lotèl la. Se konsa, poutèt moun nan pèp Izrayèl la ki pa nan kondisyon pou fè sèvis pou Bondye, l'a fè sèvis pou mete lotèl la nan kondisyon pou fè sèvis Bondye, l'a mete

l' apa pou Bondye. ²⁰ ¶ Lè Arawon va fin fè sèvis pou wete peche pou kote ki apa nèt pou Bondye a, pou Tant Randevou a ak pou lotèl la, l'a fè yo pwoche bouk kabrit vivan yo te chwazi pou Azazèl

la devan Seyè a. ²¹ L'a mete tou de men l' yo sou tèt kabrit la, l'a rekonèt sou li tout peche, tout mechanste ak tout movezak pèp Izrayèl la te fè. Se konsa l'a mete tout peche sa yo sou tèt kabrit

la. Lèfini, l'a fè moun ki chwazi pou sa a mennen kabrit la al lage l' nan dezè a. ²² Bouk la va pote

tout peche yo ale sou li yon zòn kote pa gen moun rete la. ²³ Apre sa, Arawon va antre ankò nan Tant Randevou a. L'a wete rad fen blan li te mete sou li pou li te ka antre nan kote ki apa nèt pou

Seyè a, l'a kite yo la. ²⁴ L'a pran yon bon beny nan kote yo mete apa pou sa a, l'a mete lòt rad sou li. Apre sa, l'a soti, l'a ofri bèt pou yo boule nèt yo pou peche pa l' yo ak pou tout peche pèp la. L'a

fè sèvis pou mande Bondye padon. ²⁵ L'a pran grès bèt yo te ofri pou peche a, l'a boule yo sou lotèl

la. ²⁶ Nonm ki te al lage bouk kabrit la pou Azazèl nan dezè a gen pou l' lave tout rad ki sou li, epi

pou l' pran yon bon beny nan gwo dlo, anvan li tounen nan kan kote moun yo rete a. ²⁷ Y'a pran towò bèf ak kabrit yo te touye pou wete peche a, y'a pote yo ale andeyò limit kan kote moun yo rete a, epi y'a boule po vyann yo ansanm ak tout tripay yo nèt. Se san bèt sa yo yo te pote nan kote

ki apa nèt pou Seyè a pou fè sèvis pou mande padon pou peche. ²⁸ Moun ki te al boule yo a va gen pou l' lave rad li tou, pou l' benyen nèt nan gwo dlo anvan li tounen nan kan kote moun yo rete a.

²⁹ ¶ Men regleman pou nou fè tout tan tout tan jouk sa kaba. Sou dizyèm jou nan setyèm mwa a, tout moun pèp Izrayèl yo ansanm ak tout moun lòt nasyon k'ap viv nan mitan nou yo va fè jèn, yo

p'ap fè ankenn travay jou sa a. ³⁰ Paske, jou sa a y'a fè sèvis pou wete yo anba tout peche yo, pou

yo ka parèt nan bon kondisyon devan Seyè a. ³¹ Jou sa a va yon jou espesyal pou nou fè jèn, yon

jou pou nou pa travay menm. Se lòd mwen ban nou, se pou nou toujou fè sèvis sa a. ³² Se va reskonsablite granprèt yo va mete apa pou fè sèvis Seyè a nan plas papa l' la pou li fè sèvis pou

mande Bondye padon, l'a mete rad fen blan yo, rad pou prèt yo mete lè y'ap fè sèvis. ³³ L'a fè sèvis pou wete peche pou kote ki apa nèt pou Bondye a, pou Tant Randevou a ak pou lotèl la, l'a fè ofrann

pou prèt yo ak pou tout pèp Izrayèl la. ³⁴ Men regleman pou nou swiv tout tan tout tan. Se yon

sèvis pou yo fè yon fwa chak lanne pou mande padon pou peche pèp Izrayèl la. Yo te fè tout bagay jan Seyè a te bay Moyiz lòd fè a.

Chapter 17

¹ ¶ Seyè a pale ak Moyiz, li di l' konsa: ² -Pale ak Arawon ak pitit gason l' yo epi ak tout moun pèp Izrayèl yo. W'a di yo: Men bagay Seyè a bay lòd pou nou fè: ³ Si yonn nan moun Izrayèl yo touye yon towò bèf, yon mouton osinon yon kabrit nan kan kote yo rete a, ou ankò lòt bò limit kan an, ⁴ depi se pa devan pòt Tant Randevou a li touye l' pou l' ofri l' bay Seyè a la devan kay Seyè a, moun sa a koupab, li fè yon krim, li fè san koule. Se pou yo wete l' nèt nan mitan moun pèp Bondye ⁵ a. Sa vle di: Depi koulye a moun pèp Izrayèl yo gen pou mennen devan Seyè a tout bèt yo te konn touye nan jaden. Se pou yo mennen yo bay prèt la devan pòt Tant Randevou a. Se la y'a touye yo, menm jan yo touye bèt y'ap ofri pou di Bondye mèsì. ⁶ Prèt la va pran san an, l'a vide l' sou lotèl la, devan pòt Tant Randevou a. L'a boule grès la pou l' fè yon bon sant ki va fè Seyè a plezi. ⁷ Se pou moun pèp Izrayèl yo sispann ofri bèt pou yo touye bay zidòl nan jaden tankou yo te konn fè lè yo te vire do bay Bondye a. Se pou pèp la toujou kenbe lòd sa a de pitit an pitit. ⁸ Epi w'a di yo ankò: Ankenn moun nan pèp Izrayèl la, ni moun lòt nasyon k'ap viv nan mitan yo pa gen dwa touye bèt yo ofri ni pou yo boule nèt ni pou lòt kalite sèvis ⁹ ankenn lòt kote, si se pa devan pòt Tant Randevou a pou li ofri l' bay Seyè a. Si se pa sa, y'a wete l' nèt nan mitan moun pèp Bondye a. ¹⁰ ¶ Pesonn ni nan pèp Izrayèl la, ni pami moun lòt nasyon k'ap viv nan mitan yo pa gen dwa manje vyann ak tout san li ladan l'. Si li fè l', mwen menm Seyè a, mwen p'ap okipe l' ankò, m'ap wete l' nan mitan pèp mwen an. ¹¹ Nanm tout bèt vivan se nan san an li ye. Se poutèt sa, mwen menm Seyè a, mwen mande pou yo vide tout san an sou lotèl la pou li ka wete peche pèp la. Nou bay san an pou nanm nou. ¹² Se poutèt sa Seyè a te di moun pèp Izrayèl yo: Pesonn nan pèp Izrayèl la, ni ankenn moun lòt nasyon k'ap viv nan mitan nou pa gen dwa manje vyann ki gen san ladan l'. ¹³ Lè yon moun nan pèp Izrayèl la osinon yon moun lòt nasyon k'ap viv nan mitan yo al lachas, si li pran yon bèt osinon yon zwazo yo gen dwa manje, l'a vide tout san bèt la atè epi la kouvri l' ak tè. ¹⁴ Paske nanm tout bèt vivan se nan san an li ye. Se poutèt sa mwen menm, Seyè a, mwen di moun pèp Izrayèl yo: Yo pa gen dwa manje vyann ankenn bèt ak tout san an ladan l'. Paske se nan san an nanm lan ye. Tout moun ki manje vyann ak san li ladan l', m'ap wete yo nan mitan pèp mwen an. ¹⁵ Mwen pa bezwen konnen si se moun pèp Izrayèl la osinon moun lòt nasyon k'ap viv nan

mitan nou, depi yon moun manje vyann yon bèt mouri osinon vyann bèt yon lòt bèt nan bwa ta touye, l'a gen pou l' lave rad ki sou li, l'a benyen nan gwo dlo, epi li p'ap nan kondisyon pou fè sèvis Bondye jouk aswè. Se aprè sa l'a nan kondisyon pou fè sèvis Bondye ankò. ¹⁶ Men, si li pa lave rad ki sou li yo, si li pa benyen nèt, l'a peye sa l' fè a.

Chapter 18

¹ ¶ Seyè a pale ak Moyiz, li di l' konsa: ² -Pale ak moun pèp Izrayèl yo, w'a di yo: Se mwen menm ki Seyè a, Bondye nou an! ³ Piga nou janm fè menm jan ak moun peyi Lejip kote nou te ye a, ni tankou moun peyi Kanaran kote mwen pral mennen nou an. Piga nou swiv mès yo. ⁴ Se pou nou swiv lòd mwen ban nou. Se pou nou fè sa mwen di nou fè. Se pou nou mache dapre prensip mwen ban nou. Se mwen menm ki Seyè a, Bondye nou an. ⁵ Se pou nou swiv regleman ak lòd mwen ban nou yo. Gremesi sa m' di nou fè a, tout moun ki koute m' va jwenn lavi. Se mwen menm ki Seyè a! ⁶ ¶ Apre sa, Seyè a bay regleman sa yo: -Piga pesonn kouche yon fanm ki fanmi pre l'. Se mwen menm ki Seyè a. ⁷ Piga ou jete dezonè sou papa ou pou ou kouche madanm li, se manman ou li ye. Pa jete dezonè sou manman ou. ⁸ Piga ou jete dezonè sou papa ou pou ou kouche yonn nan fanm kay papa ou yo. ⁹ Piga ou kouche sè ou, li te mèt menm papa osinon menm manman avè ou, kit li te elve nan menm kay avè ou, kit li te elve lòt kote. Piga ou kouche l'. ¹⁰ Piga ou kouche pitit fi pitit gason ou osinon pitit fi pitit fi ou. Se va sou pwòp tèt ou w'a jete dezonè. ¹¹ Piga ou kouche pitit fi madanm papa ou. Se pou ou konsidere l' tankou pwòp sè ou. ¹² Piga ou kouche matant ou, kit se matant bò papa, ¹³ kit se bò manman. ¹⁴ Piga ou kouche madanm tonton ou bò papa. Se pou ou konsidere l' tankou matant ou. ¹⁵ Piga ou kouche bèlfi ou: se madanm pitit gason ou li ye. Pa jete dezonè sou li. ¹⁶ Piga ou kouche madanm frè ou. Pa jete dezonè sou frè ou. ¹⁷ Piga ou kouche pitit fi osinon pitit fi yon madanm ki te nan afè avè ou deja. Pa kouche yo. Se tankou si se te fanmi pre ou yo te ye. Si ou fè sa, se va yon wont! ¹⁸ Piga ou pran yonn nan sè madanm ou pou yonn nan pwòp madanm ou yo toutotan madanm ou vivan. Sa ka mete yon jalouzi nan mitan yo. ¹⁹ ¶ Piga ou kouche yon fanm ki gen règ li, paske lè sa a li pa nan kondisyon pou fè sèvis Bondye. ²⁰ Piga ou kouche madanm yon frè parèy ou, paske lè nou fè sa, ni ou ni fanm lan, nou

²¹
 pa nan kondisyon pou fè sèvis Bondye. Piga ou janm bay yonn nan pitit fi ou yo tankou ofrann pou yo boule bay zidòl yo rele Molòk la, paske lè sa a w'a fè yo derespekte non Bondye. Se mwen menm ki Seyè a.

²²
 Piga yon gason kouche yon lòt gason tankou yo kouche yon fanm: Se bagay Bondye pi pa vle wè.

²³
 Ni fanm ni gason pa gen dwa kwaze ak zannimo. Se bagay k'ap mete yo nan kondisyon pou yo pa ka fè sèvis Bondye. Se bagay sal nèt.

²⁴
 Piga nou janm fè bagay sa yo k'ap mete nou nan kondisyon pou nou pa ka fè sèvis Bondye. Se bagay konsa pèp lòt nasyon ki t'ap viv nan peyi a anvan nou yo te konn fè. Se poutèt sa Seyè a ap mete yo deyò pou nou ka pran plas yo.

²⁵
 Yo te mete tout peyi a nan move kondisyon ak sa yo t'ap fè a. Se konsa mwen menm Seyè a, m'ap peni peyi a, m'ap fè l' voye moun ki rete sou li yo jete deyò.

²⁶
 Men nou menm, se pou nou kenbe tout lòd ak tout kòmandman mwen ban nou yo. Piga pesonn ni nan nou, ni nan moun lòt nasyon k'ap viv nan mitan nou yo fè ankenn nan bagay mwen pa vle wè yo.

²⁷
 Se paske moun ki te rete nan peyi a anvan nou yo te fè tout kalite bagay sa yo, kifè yo te mete peyi a nan move kondisyon sa a.

²⁸
 Konsa tou, si nou mete peyi a nan move kondisyon, peyi a pral voye nou jete deyò menm jan li te fè l' pou pèp ki te la anvan nou yo.

²⁹
 Depi yon moun fè yonn nan bagay sal sa yo, y'ap wete l' nan mitan pèp Bondye a.

³⁰
 Epi Seyè a di: -Se pou nou kenbe lòd mwen yo. Pa swiv move mès moun ki te rete nan peyi a anvan nou yo. Pa fè vye bagay sa yo k'ap mete nou nan kondisyon pou nou pa ka fè sèvis Bondye. Se mwen menm ki Seyè a, Bondye nou an!

Chapter 19

¹
 ¶ Seyè a pale ak Moyiz, li di l' konsa:

²
 -Pale ak tout moun ki fè pati pèp Izrayèl la. W'a di yo: Se pou nou viv apa pou mwen paske mwen menm, Seyè a, Bondye nou an, mwen se yon Bondye apa.

³
 Se pou nou tout respekte manman ak papa nou. Se pou nou respekte regleman jou repo mwen yo. Se mwen menm ki Seyè a, Bondye nou an!

⁴
 Pa janm vire do ban mwen pou n' al sèvi zidòl. Piga nou janm fonn metal pou fè estati ki pou sèvi nou bondye. Se mwen menm ki Seyè a, Bondye nou an!

⁵
 Lè n'ap touye bèt pou fè ofrann pou di Seyè a mès, se pou nou fè l' jan mwen mande l' la pou m' ka asepte l' nan men nou.

⁶
 Se pou nou manje vyann bèt yo ofri ban mwen an menm jou a, osinon nan denmen. Men, sou twazyèm jou a, tout sa ki rete nan vyann lan, se pou nou boule l'.

⁷
 Paske si nou manje l' sou twazyèm jou a, se yon manje gate li ye! Seyè a p'ap asepte l' nan men

⁸
 nou. Se poutèt sa, tout moun ki va manje yon vyann konsa va gen pou peye pou sa l' fè a, paske li pa respekte bagay yo te mete apa pou mwen. Moun konsa se pou nou wete yo nan mitan pèp

⁹
 mwen an. Lè n'ap ranmase rekòt nan jaden nou, se pa pou nou ranmase sa ki toupre lizyè jaden

¹⁰
 an, ni nou pa bezwen tounen dèyè pou nou ranmase ti grenn ki te tonbe atè. Nou pa bezwen tounen nan jaden rezen an pou nou ranmase dènye ti grap rezen yo te bliye, osinon pou nou ranmase ti grenn rezen ki te tonbe atè. N'a kite sa pou moun peyi a ki pa gen anyen, ak pou moun lòt nasyon

¹¹
 k'ap viv nan mitan nou yo. Se mwen menm ki Seyè a, Bondye nou an! ¶ Piga nou pran sa ki pa

¹²
 pou nou. Piga nou yonn twonpe lòt. Piga nou bay frè parèy nou manti. Piga nou pran non m' pou fè sèman pou twonpe moun. Si nou fè sa, se derespekte n'ap derespekte non Bondye nou an.

¹³
 Se mwen menm ki Seyè a! Piga nou pwofite sou moun menm ras ak nou. Lè lè pou nou peye

¹⁴
 moun ki travay pou nou an rive, peye l' lajan l'. Piga nou voye l' pou denmen maten. Piga ou madichonnen moun soud. Piga ou mete ankenn bagay sou chemen moun avèk pou fè yo tonbe. Se

¹⁵
 pou nou gen krentif pou mwen. Se mwen menm ki Seyè a! Piga nou fè lenjistis lè nou nan tribinal. Piga nou fè patipri pou pòv. Piga nou achte figi grannèg. N'a rann jistis pou tout frè parèy

¹⁶
 nou san fè paspouki. Pa mache bay manti sou moun menm ras avèk nou. Piga nou kanpe pou

¹⁷
 fè yo touye san rezon yon moun menm ras avèk nou. Se mwen menm ki Seyè a! Piga nou kenbe frè nou nan kè. Si yo gen kichòy avèk nou, regle sa la pou la. Konsa, yo p'ap lakòz nou tonbe nan

¹⁸
 peche. Piga nou tire revanj sou pesonn. Piga nou kenbe moun menm ras ak nou nan kè, men se

¹⁹
 pou nou renmen yo tankou nou renmen pwòp tèt pa nou. Se mwen menm ki Seyè a! ¶ Se pou nou kenbe lòd mwen ban nou yo. Piga nou kwaze de zannimo ki pa menm kalite. Piga nou plante

²⁰
 de kalite plant anmenmtan nan jaden nou. Piga nou mete sou nou rad depaman. Lè yon moun te gen tan pwomèt vann yon esklav fi bay yon nonm pou madanm, men lòt nonm lan poko peye pou esklav la, ni li menm li poko ba li libète l', si li kouche fi a, se pou yo peni yo san yo pa bezwen

²¹
 touye yo, paske fanm lan te esklav li toujou. Nonm lan va mennen yon belye mouton devan pòt

²²
 Tant Randevou a, l'a ofri l' bay Seyè a pou peye pou sa l' fè a. Prèt la va pran belye mouton an,

²³
 l'a fè sèvis pou l' mande Bondye gras pou peche li te fè a epi Bondye va padonnen l' sa. Le n'a antre nan peyi Kanaran an, apre n'a fin plante tout kalite pyebwa ki ka donner, n'a konsidere rekòt twa premye lanne yo tankou bagay ki pa bon pou nou manje. Pandan twazan, piga nou manje anyen

²⁴
 nan rekòt la. Lè katriyèm lanne a vin rive, n'a pran tout rekòt katriyèm lanne a, n'a ofri l' ban

²⁵
 mwen, mwen menm Seyè a, pou nou moutre jan nou genyen m' rekonesans. Men sou senkyèm

lanne a, nou ka manje donn yo. Si nou fè sa konsa, pyebwa nou yo va donneren pi plis toujou. Se
²⁶
 mwen menm ki Seyè a, Bondye nou an! Piga nou manje ankenn vyann ak tout san li ladan l'.
 Piga nou chache konnen davans bagay ki gen pou rive nou nan lavi. Pa etidye pozisyon zetwal pou
²⁷
 chache konnen sa ki pral rive sou latè. Lè nou gen moun mouri, pigas nou koupe pafouten nou
²⁸
 raz, pigas nou taye pwent bab nou, pigas nou make kò nou avèk kout kouto, ni pigas nou fè desen
²⁹
 ak lank sou kò nou. Se mwen menm ki Seyè a! Piga nou avili pitit fi nou yo pou nou voye yo
 fè jennès nan tanp zidòl yo. Si nou fè sa, tout peyi a va vire al jwenn zidòl yo. Lè sa a, tout moun
³⁰
 va lage kò yo nan fè sa ki mal. ¶ Se pou nou respekte regleman jou repo mwen yo. Se pou nou
³¹
 respekte kay ki apa pou mwen an. Se mwen menm ki Seyè a! Piga n' al konsilte moun k'ap rele
 mò nan tab tounant osinon moun k'ap fè divinò. Si nou fè sa, n'ap tounen tankou moun sa yo, nou
³²
 p'ap nan kondisyon pou fè sèvis pou mwen. Se mwen menm ki Seyè a, Bondye nou an! Toujou
 leve kanpe devan granmoun cheve blan. Respekte figi vye granmoun, paske nou gen krentif pou
³³
 mwen menm, Bondye nou an. Se mwen menm ki Seyè a! Pigas nou maltrete moun lòt nasyon
³⁴
 ki vin rete nan peyi a ansanm ak nou. Se pou nou aji ak yo menm jan nou gen pou nou aji ak
 moun natif natal peyi a. Se pou nou renmen yo tankou nou renmen pwòp tèt pa nou. Pa bliye nou
 menm tou yon lè nou te rete nan peyi Lejip ki pa t' peyi pa nou! Se mwen menm ki Seyè a, Bondye
³⁵
 nou an! Piga nou fè lenjistis nan tribinal. Piga nou twonpe moun lè n'ap mezire longè yon bagay,
³⁶
 lè n'ap peze nan balans, lè n'ap mezire pa mamit. N'a toujou gen bon balans, bon pwa, bon lòn,
 bon mezi. Se mwen menm ki Seyè a, Bondye nou an. Se mwen menm ki te fè nou soti kite peyi
³⁷
 Lejip! Se pou nou kenbe tout lòd ak tout kòmandman mwen ban nou yo. Se pou nou swiv yo.
 Se mwen menm ki Seyè a!

Chapter 20

¹
 ¶ Seyè a pale ak Moyiz, li di l' konsa: ²
 -Men sa pou ou di moun pèp Izrayèl yo: Depi yon
 moun bay yonn nan pitit li yo pou sèvi nan sèvis zidòl Molòk, li te mèt moun peyi a osinon moun
 lòt nasyon k'ap viv nan peyi a, se pou yo touye l'. Wi, tout moun nan peyi a va kalonnen l' wòch
³
 jouk li mouri. Mwen menm bò pa m', mwen p'ap okipe l' ankò, m'ap wete l' nan mitan pèp mwen
 an. Paske li te bay yonn nan pitit li yo pou sèvi nan sèvis Molòk, li mete kay ki apa pou mwen an
⁴
 nan kondisyon yo pa ka fè sèvis ladan l' pou mwen, li derespekte non mwen. Men, si moun ki
 nan peyi a fèmen je yo sou sa nonm lan fè a, lè li te bay pitit li pou fè sèvis pou Molòk la, si yo pa

5
 touye l', se mwen menm ki p'ap okipe l' ankò, li menm ak tout fanmi l'. M'ap wete yo nan mitan
 pèp mwen an, ni li, ni nenpòt lòt moun k'ap vire do ban mwen tankou l' pou y al sèvi Molòk. 6
 Si
 yon moun vire do ban mwen poul al konsilte moun k'ap rele mò nan tab tounant, osinon moun k'ap
 7
 fè divinò, mwen p'ap okipe l' ankò, m'ap wete l' nan mitan pèp mwen an. Se pou nou viv apa pou
 mwen. Piga nou fè bagay mwen di nou pa fè, paske se mwen menm ki Seyè a, Bondye nou an.
 8
 Se pou nou kenbe lòd mwen ban nou yo, se pou nou swiv yo. Se mwen menm Seyè a, se mwen
 9
 menm k'ap fè nou sèvi m' nan tou sa n'ap fè! Depi yon moun bay manman l' osinon papa l'
 madichon, se pou yo touye l'. Paske li madichonnen manman l' ak papa l', se li menm sèl kab
 10
 reskonsab lanmò li. ¶ Depi yon nonm fè adiltè ak madanm yon frè parèy li, se pou yo touye yo,
 11
 ni li ni madanm lan. Depi yon nonm kouche madanm papa l', li jete dezonè sou papa l'. Se pou
 12
 yo touye yo, ni li ni madanm lan. Lè konsa, se yo menm sèl k'ap reskonsab lanmò yo. Depi yon
 moun kouche bèlfi li, se pou yo touye tou de. Sa yo fè a se yon wont. Lè konsa, se yo menm sèl
 13
 k'ap reskonsab lanmò yo. Depi yon nonm kouche yon nonm tankou li ta fè l' ak yon fanm, sa
 yo fè la a se bagay Bondye pi pa vle we. Se pou yo touye tou de. Lè konsa, se yo menm sèl k'ap
 14
 reskonsab lanmò yo. Si yon nonm marye ak yon fi ansanm ak manman fi a tou, se bagay ki sal
 15
 nèt yo fè la a. Se pou yo boule tou twa nan dife. Bagay konsa pa fèt pou fèt nan mitan nou. Si
 yon nonm kwaze ak yon zannimo, se pou yo touye l', li menm ansanm ak zannimo a. Wi, se pou
 16
 yo touye yo. Si yon fanm chache yon jan pou li kwaze ak yon zannimo, se pou yo touye l', li
 menm ansanm ak zannimo a. Wi, se pou yo touye yo. Lè konsa, se yo menm sèl k'ap reskonsab
 17
 lanmò yo. Si yon nonm marye ak sè li, li te mèt pitit fi manman l' osinon pitit fi papa l', si yo
 kouche yonn ak lòt, yo avili tèt yo devan tout pèp Izrayèl la. Sa yo fè a se yon gwo wont. Se pou
 18
 yo chase yo nan mitan pèp la. Li te kouche sè li, se pou li peye pou sa l' fè a. Si yon nonm kouche
 19
 yon fanm ki gen règ li, se pou yo wete yo nan mitan pèp la. Si yon nonm kouche matant li,
 matant bò papa l' osinon matant bò manman l', li kouche pwòp fanmi l'. Se pou yo fè tou de peye
 20
 pou sa yo fè a. Si yon nonm kouche madanm tonton li, li jete dezonè sou tonton li. Lè konsa, ni
 21
 li, ni madanm lan, yo gen pou peye pou sa yo fè a. Y'a mouri san fè pitit. Si yon nonm marye
 ak madanm frè li, sa l' fè a se yon bagay k'ap mete l' nan kondisyon li pa ka sèvi Bondye, li jete
 22
 dezonè sou frè li. Se poutèt sa, ni li ni madanm lan va rete san fè pitit. ¶ Seyè a di ankò: -Se pou
 nou kenbe tout lòd mwen yo ak tout kòmandman mwen ban nou yo, se pou nou swiv yo. Konsa,
 23
 peyi kote mwen pral mennen nou pou nou rete a p'ap voye nou jete deyò. Piga nou swiv move

mès moun lòt nasyon mwen te mete deyò pou nou te ka antre nan peyi a. Yo te ban m' degoutans
 ak tout move bagay yo t'ap fè a. ²⁴ Men, mwen te pwomèt mwen t'ap ban nou peyi sa a pou peyi
 pa nou. Se yon peyi kote lèt ak siwo myèl koule tankou dlo. Wi, se mwen menm Seyè a, Bondye
 nou an, ki te chwazi nou nan mitan tout pèp yo pou mete nou apa. ²⁵ Se konsa, koulye a, piga nou
 mele zannimo nou gen dwa manje ak zannimo nou pa gen dwa manje, zwazo nou gen dwa manje
 ak zwazo nou pa gen dwa manje. Pa kite ankenn zannimo ni ankenn zwazo nou pa gen dwa manje,
 ni bèt k'ap trennen sou vant mwen menm mwen di ki pa bon pou nou, mete nou nan kondisyon pou
 nou pa ka fè sèvis mwen. ²⁶ Se pou nou viv apa pou mwen, paske mwen menm se yon Bondye
 apa mwen ye. Mwen menm Seyè a, mwen mete nou apa nan mitan tout lòt pèp yo pou nou ka pou
 mwen nèt. ²⁷ Depi yon nonm osinon yon fanm gen lespri yon mò sou li, osinon yon lòt lespri k'ap
 fè l' fè divinò, se pou yo touye yo. Y'a touye yo ak kout wòch. Lè konsa, se yo menm sèl k'ap
 reskonsab lanmò yo.

Chapter 21

¹ ¶ Seyè a di Moyiz konsa: -Pale ak pitit Arawon yo, prèt yo. W'a di yo konsa: Lè yon prèt gen
 yon moun mouri nan fanmi l', piga li patisipe nan ankenn seremoni yo fè pou mò, pou sa pa mete
 l' nan kondisyon pou l' pa ka fè sèvis Bondye, ² esepite pou fanmi pre anpil tankou manman, papa,
 pitit fi, pitit gason, frè. ³ Pou yon sè, si sè a poko fè zafè, li gen dwa mete tèt li nan kondisyon pou
 l' pa ka fè sèvis Bondye. ⁴ Yon prèt pa gen dwa mete tèt li nan kondisyon pou l' pa ka fè sèvis
 Bondye lè se yon sè li ki deja marye ki mouri. ⁵ Prèt yo pa gen dwa kale ankenn pati nan tèt yo, ni
 yo pa gen dwa taye pwent bab yo, ni yo pa gen dwa make kò yo avèk kouto, pou fè wè yo gen
 moun mouri. ⁶ Se pou yo viv apa nèt pou Bondye yo. Yo pa dwe derespekte non mwen. Paske se
 yo menm k'ap mete nan dife ofrann yo fè pou Seyè a, se manje Bondye y'ap ofri. Se pou yo toujou
 rete apa pou mwen. ⁷ Yon prèt pa gen dwa marye ni ak yon fanm ki t'ap fè jennès, ni ak yon fanm
 ki konn gason deja, ni ak yon fanm mari l' kite l', paske yo mete yo apa pou fè sèvis mwen. ⁸ Tout
 moun dwe konsidere prèt yo tankou moun yo mete apa pou Bondye, paske se yo menm k'ap fè
 ofrann pou Bondye nou an. Mwen menm Seyè a, mwen yon Bondye apa. Se mwen k'ap fè nou viv
 apa pou mwen. Wi, se pou nou konsidere prèt yo tankou moun yo mete apa pou Bondye. ⁹ Si pitit
 fi yon prèt tonbe nan fè jennès, l'ap avili papa l', y'a boule l' nan dife pou touye l'. ¹⁰ ¶ Granprèt la,
 se chèf li ye nan mitan tout prèt yo. Se moun yo te vide lwil sou tèt li a, moun yo te mete apa pou

mete rad prèt la sou li a. Li pa fèt ni pou kite tèt li san penyen, ni pou l' chire rad sou li lè li gen
¹¹
 moun mouri. Yo mete kouwòn mwen sou tèt li, yo vide lwil sou tèt li pou mete l' apa pou mwen.
 Li pa fèt pou l' fè bagay ki pou mete l' nan kondisyon pou li pa ka fè sèvis Bondye, pou l' derespekte
¹²
 kay yo mete apa pou Bondye a. Li pa fèt pou l' kite kay Bondye a pou l' al antre nan yon kay
 kote gen kadav moun mouri, menm si se papa l' osinon manman l' ki mouri a. Se mwen menm ki
¹³ ¹⁴
 Seyè a! Granprèt la va marye ak yon jenn fi ki tifi. Li p'ap pran pou madanm yon fanm vèv,
 ni yon fanm divòse, ni yon fanm ki konn gason deja, osinon yon fanm ki t'ap fè jennès. Se sèlman
¹⁵
 yon jenn fi ki soti nan menm branch fanmi avè l' pou li pran pou madanm. Sinon, pitit li yo va
¹⁶
 yon wont pou fanmi an. Se mwen menm, Seyè a, ki mete li apa pou sèvis mwen. ¶ Seyè a pale
¹⁷
 ak Moyiz, li di l' konsa: -Pale ak Arawon, w'a di li: Si gen yon moun nan fanmi ou ki gen yon
 enfimite, li p'ap janm ka pwoche pou l' fè ofrann manje pou Bondye li. Regleman sa a ou fèt pou
¹⁸
 swiv li tout tan de pitit an pitit. Ankenn gason enfim pa gen dwa prezante ofrann bay Bondye,
¹⁹
 kit li avèg, kit li bwete, kit li domaje nan figi, kit li difòm, kit li enfim nan men osinon nan pye,
²⁰
 kit li gen boul nan do, kit li rachitik, kit li malad nan je, kit li gen maladi po, kit grenn li kraze.
²¹
 Depi yon gason nan ras prèt Arawon an enfim yon kote nan kò li, li p'ap ka pwoche pou fè ofrann
 pou boule nan dife pou Seyè a. Wi, si li gen yon enfimite, li p'ap ka pwoche devan Bondye pou fè
²²
 ofrann pou li. Yon nonm konsa ka toujou manje nan manje yo ofri ban mwen, kit se nan manje
²³
 yo ofri m' lan osinon nan manje yo mete apa pou mwen an. Men, li pa gen dwa pwoche bò rido
 a ni vin bò lotèl la paske li enfim nan kò l'. Li pa fèt pou derespekte bagay ki apa pou mwen yo
²⁴
 paske se mwen menm Seyè a ki mete yo apa pou mwen. Se konsa, Moyiz pale ak Arawon, ak
 pitit gason l' yo ansanm ak tout moun pèp Izrayèl yo, li di yo tou sa.

Chapter 22

¹ ¶ Seyè a pale ak Moyiz, li di li: ² -Men sa w'a di Arawon ak pitit gason l' yo. Se pou yo konnen
 ki jan pou yo sèvi ak sa moun pèp Izrayèl yo ofri m', ofrann yo mete apa pou mwen, pou yo pa
³
 derespekte non m'. Se mwen menm ki Seyè a. W'a di yo pou mwen: Lè yon gason nan fanmi nou
 pa nan kondisyon pou fè sèvis mwen, si li pwoche bò kote ofrann moun pèp Izrayèl yo mete apa
⁴
 pou mwen, piga yo janm kite l' parèt devan m' ankò! Se mwen menm ki Seyè a. Si yon gason nan
 branch fanmi Arawon an gen yon move maladi po osinon ekoulman, li p'ap ka manje nan ofrann

yo mete apa pou Bondye toutotan li pa nan kondisyon pou fè sèvis Bondye ankò. Konsa tou, si yon prèt manyen yon kadav, osinon yon nonm ki gen ekoulman, li pa nan kondisyon pou l' fè sèvis

⁵ Bondye a. Ou ankò si yon prèt manyen yonn nan bèt k'ap trennen sou vant yo, bèt ki ka mete l' nan kondisyon pou l' pa kapab fè sèvis Bondye, ou ankò si li manyen yon moun ki deja nan

kondisyon sa a pou tèt pa l', prèt la tou pa ka fè sèvis Bondye. ⁶ L'a rete nan kondisyon sa a jouk aswè, lèfini tou li p'ap ka manje nan ofrann yo mete apa pou Bondye yo. Se pou li pran yon bon

⁷ beny nan dlo anvan. Apre solèy kouche, l'a nan kondisyon pou l' fè sèvis Bondye. Se lè sa a l'a

ka manje nan ofrann yo mete apa pou Bondye a, paske se sa ki manje l'. ⁸ Li pa gen dwa manje ni vyann bèt ki mouri mò natirèl, ni vyann bèt bèt nan bwa touye. Bagay konsa ap mete l' nan kondisyon

⁹ pou li pa kapab fè sèvis Bondye. Se mwen menm ki Seyè a! Se pou tout prèt yo swiv regleman mwen bay yo. Si yo pa swiv yo, y'a koupab, epi y'ap mouri paske yo pa respekte lòd Bondye menm te bay yo. Se mwen menm ki Seyè a, se mwen menm ki mete yo apa pou yo viv apa pou mwen.

¹⁰ ¶ Depi yon moun pa fè pati fanmi prèt yo, li te mèt yon moun ki rete lakay yon prèt osinon yon moun k'ap travay pou lajan l' lakay prèt la, li pa gen dwa manje nan ofrann yo mete apa pou Bondye

¹¹ yo. Men, esklav yon prèt, kit se achte li te achte l', kit li te fèt lakay li, gen dwa manje nan manje

prèt la resevwa a. ¹² Si pitit fi yon prèt marye ak yon nonm ki pa prèt, li p'ap ka manje anyen nan

ofrann yo fè pou Bondye yo. ¹³ Men, si pitit fi a vèv osinon si li divòse, si li pa gen pitit epi li tounen kay papa l' sou kont papa l', l'a ka manje nan manje papa l'. Men, moun ki pa fè pati fanmi

prèt yo pa gen dwa manje anyen ladan l'. ¹⁴ Si yon moun ki pa fè pati fanmi prèt yo manje nan manje yo mete apa pou Bondye a san li pa konnen, li gen pou l' renmèt sa l' manje a plis ven pou

¹⁵ san valè bagay la. Prèt yo pa gen dwa kite moun ki pa fè pati fanmi yo derespekte manje yo

mete apa pou Bondye. ¹⁶ Si yo kite sa rive, moun lan va antò, l'ap peye pou sa. Se mwen menm

ki Seyè a. Se mwen menm ki mete ofrann yo apa pou mwen. ¹⁷ ¶ Seyè a pale ak Moyiz, li di l'

¹⁸ konsa: -Pale ak Arawon ak pitit gason l' yo ak tout moun pèp Izrayèl la. Men sa w'a di yo: Lè yon moun nan pèp Izrayèl la, osinon yon moun lòt nasyon k'ap viv nan peyi a fè ofrann pou boule

pou Seyè a, kit se paske li te fè yon ve, kit se paske li menm li fè lide fè ofrann lan, ¹⁹ se pou l' chwazi yon towo bèf, yon belye osinon yon bouk kabrit san ankenn enfimite si li vle pou m' asepte

ofrann lan. ²⁰ Si nou ofri yon bèt ki gen nenpòt enfimite, Seyè a p'ap asepte l' nan men nou. ²¹ Lè yon moun ap fè ofrann pou di Bondye mès, kit se paske li te fè yon ve, kit se paske li menm li vle

fè ofrann lan, se pou bèt l'ap ofri a, li te mèt gwo bèt, li te mèt ti bèt, pa gen ankenn enfimite, si li

²² vle pou m' asepte l'. Piga nou janm ofri bay Seyè a bèt je pete, bèt k'ap bwete, bèt ki pèdi janm,

bèt ki gen malenng, bèt ki gen maladi po. Piga nou janm pran yon bèt konsa pou nou mete sou lotèl
 la pou nou boule nan dife pou Seyè a. ²³ Lè nou menm nou fè lide fè yon ofrann pou Seyè a, nou
 ka ofri yon towò bèf osinon yon belye ki difòm osinon ki kata. Men, nou pa ka sèvi ak yo pou yon
 ofrann n'ap fè paske nou te fè yon ve. Mwen p'ap asepte l'. ²⁴ Pa ofri bay Seyè a yon mal bèt ki
 gen grenn li yo foule, kraze, rache, osinon koupe. Nou pa gen dwa ofri bèt konsa nan peyi nou an.
²⁵ Piga nou pran bèt moun lòt nasyon fè nou kado pou n' ofri bay Seyè a. Paske bèt konsa pa antye,
 yo manke kichòy nan kò yo. Seyè a p'ap asepte yo nan men nou. ²⁶ Seyè a pale ak Moyiz, li di l'
²⁷ konsa: -Lè yon ti bèf, yon ti mouton osinon yon ti kabrit fenk fèt, se pou nou kite l' dèyè manman
 l' pandan sèt jou. Depi sou wityèm jou a, nou gen dwa ofri l' pou boule nan dife pou Seyè a. ²⁸ Kit
 se bèf, kit se mouton, pa janm ofri yon bèt ansanm ak pitit li menm jou a. ²⁹ Lè n'ap fè ofrann pou
 di Bondye mèsi, se pou nou swiv tout regleman yo si nou vle Seyè a asepte ofrann lan nan men
 nou. ³⁰ Se pou nou manje l' menm jou a. Pa kite anyen pou denmen maten. Se mwen menm ki
 Seyè a! ³¹ Se pou nou fè tou sa mwen ban nou lòd fè. Wi, se pou nou swiv lòd mwen yo. Se mwen
 menm ki Seyè a! ³² Piga nou derespekte non mwen. Se pou tout moun pèp Izrayèl la respekte m'.
 Se mwen menm ki Seyè a, se mwen menm ki mete nou apa pou nou viv apa pou mwen. ³³ Se
 mwen menm ki te fè nou soti kite peyi Lejip pou m' te ka Bondye nou. Se mwen menm ki Seyè a!

Chapter 23

¹ ¶ Seyè a pale ak Moyiz, li di l' konsa: ² -Pale ak moun pèp Izrayèl yo. W'a di yo pou mwen:
 Men jou pou nou mande pèp la pou li reyini pou fè fèt pou Seyè a. Men lè pou nou fè fèt pou mwen.
³ Chak senmenn nou gen sis jou pou n' fè travay nou. Men, setyèm jou a se jou repo. Jou sa a, piga
 nou fè ankenn travay. Se jou n'a reyini pou n' fè sèvis pou Bondye. Jou repo a se pou Seyè a li ye.
 Nenpòt kote nou rete jou sa a, piga nou fè ankenn travay lakay nou. ⁴ ¶ Men jou pou nou fè fèt pou
 Seyè a, jou pou nou mande pèp la pou li reyini pou fè fèt pou Seyè a. Men dat pou nou reyini pèp
 la pou fèt yo: ⁵ N'a fete fèt Delivrans lan pou Seyè a chak lanne, nan katòzyèm jou premye mwa
 a. N'a konmanse fèt la lè solèy fin kouche. ⁶ Sou kenzyèm jou premye mwa a, n'a konmanse fèt
 pen san ledven yo. Pandan sèt jou, n'a manje pen ki fèt san ledven. ⁷ Premye jou a, n'a reyini tout

pèp la pou n' fè sèvis pou Bondye. Nou p'ap fè ankenn gwo travay jou sa a. ⁸ Pandan sèt jou n'a
 boule ofrann nan dife pou Seyè a. Sou setyèm jou a, n'a reyini tout pèp la ankò pou n' adore Seyè
 a. Jou sa a, nou p'ap fè ankenn gwo travay non plis. ⁹ Seyè a pale ak Moyiz, li di l' konsa: ¹⁰ -Pale
 ak moun pèp Izrayèl yo. Men sa pou ou di yo. Lè n'a antre nan peyi m'ap ban nou an, lè n'a fin
 ranmase premye rekòt grenn nan jaden nou, n'a pran premye makout la, n'a pote l' bay prèt la.
¹¹ Prèt la va balanse l' devan Seyè a tankou yon ofrann espesyal, pou Seyè a ka asepte resevwa nou.
 Prèt la va fè ofrann lan jou ki vini apre jou repo a. ¹² Jou n'ap fè ofrann premye makout rekòt la,
 n'a pran yon ti belye ki pa gen ankenn enfimite epi ki poko gen ennan, n'a boule l' nèt pou Seyè a.
¹³ N'a ofri ansanm avè l' tou katòz ti mamit farin frans melanje ak lwil oliv pou nou boule nan dife
 pou Seyè a. Bon sant ofrann lan va fè Seyè a plezi. N'a ofri tou yon boutèy ka diven pou yo vide
 pou Seyè a. ¹⁴ Piga nou pran nan grenn nou fèk rekòlte yo ni pou nou manje kri, ni pou nou griye,
 ni pou nou fè pen, toutotan nou pa pote ofrann premye grenn yo bay Seyè a. Se va yon regleman
 pou nou swiv tout tan, de pitit an pitit, kote nou pase. ¹⁵ ¶ N'a konte sèt semèn antye, depi jou nou
 te pote premye makout rekòt la ofri bay Seyè a, apre jou repo a. ¹⁶ Wi, n'a konte senkant jou. Sa
 va mennen nou sou jou ki vini apre setyèm jou repo a. N'a fè yon lòt ofrann grenn jaden bay Seyè
 a. ¹⁷ Chak fanmi va soti lakay yo ak de gwo pen pou yo ofri bay Seyè a. Chak pen va fèt ak de liv
 farin kwit ak ledven. Y'a ofri yo bay Seyè a tankou ofrann premye grenn yo rekòlte. ¹⁸ Ansanm
 ak pen yo, pèp la va ofri sèt ti mouton ki poko gen ennan, yon jenn ti towò bèf ak de belye. Fòk
 tout bèt sa yo pa gen ankenn enfimite. Y'a boule yo nèt nan dife pou Seyè a, ansanm ak ofrann
 grenn jaden yo ak ofrann diven an. Bon sant ofrann sa a va fè Seyè a plezi. ¹⁹ N'a touye tou yon
 bouk ki va sèvi ofrann pou peye pou tou sa nou fè ki mal, ak de ti mouton ki poko gen ennan ki va
 sèvi ofrann pou di Bondye mèsi. ²⁰ Prèt la va balanse pen yo ansanm ak de ti mouton yo tankou
 yon ofrann espesyal devan Seyè a. Ofrann sa yo se bagay ki apa nèt pou Seyè a. Se pou prèt yo yo
 ye. ²¹ Jou sa a, n'a reyini pèp la pou l' adore Bondye. Pesonn p'ap fè gwo travay. Sa se regleman
 pou nou swiv tout tan, de pitit an pitit, kote nou pase. ²² Lè n'ap fè rekòt nan jaden nou, se pa pou
 nou ranmase grenn ki toupre lizyè jaden an, ni nou pa bezwen tounen dèyè pou ranmase grenn ki
 te tonbe atè. W'a kite yo pou moun peyi a ki pa genyen ak pou moun lòt nasyon k'ap viv nan mitan
 nou. Se mwen menm ki Seyè a, Bondye nou an! ²³ ¶ Seyè a pale ak Moyiz, li di l' konsa: ²⁴ -Pale
 ak moun pèp Izrayèl yo. Men sa pou ou di yo: Premye jou setyèm mwa a va yon gwo jou repo pou
 nou. Jou sa a n'a kònen twonpèt pou fè moun yo chonje se jou pou yo reyini pou adore Bondye.
²⁵ Piga nou fè gwo travay. N'a fè ofrann pou yo boule nan dife pou Seyè a. ²⁶ Seyè a pale ak Moyiz,

²⁷
 li di l': -Dizyèm jou setyèm mwa sa a, se gran jou padon an li ye. N'a reyini tout moun pou n'
 adore Bondye. N'a fè jèn epi n'a fè ofrann pou yo boule nan dife devan Seyè a. ²⁸ Jou sa a, nou
 p'ap travay menm, paske se gran jou padon an, jou pou nou fè sèvis pou Seyè a, Bondye nou an,
²⁹
 pou nou mande l' fè nou gras. Si yon moun mete anyen nan bouch li jou sa a, y'ap wete l' nan
³⁰
 mitan pèp li a. Si yon moun travay jou sa a, se mwen menm, Seyè a, k'ap touye l'. ³¹ Nou pa
³²
 pou fè anyen jou sa a. Sa se regleman pou nou swiv tout tan, de pitit an pitit, kote nou pase. Se
 va yon gwo jou repo, jou nou p'ap fè ankenn travay. Depi lè solèy kouche nan nevyèm jou mwa a
³³
 jouk lè li kouche ankò dizyèm jou a, n'a rete san manje. ¶ Seyè a pale ak Moyiz, li di l': ³⁴ -Pale
 ak moun pèp Izrayèl yo, w'a di yo konsa: N'a fete fèt jouna yo pandan sèt jou. N'a konmanse sou
³⁵
 kenzyèm jou setyèm mwa a. Premye jou a, n'a reyini tout moun pou adore Bondye. Pesonn p'ap
³⁶
 fè gwo travay jou sa a. Chak jou, pandan sèt jou, n'a boule ofrann nan dife pou Seyè a. Sou
 wityèm jou a, n'a reyini moun yo ankò pou adore Bondye, epi n'a boule ofrann nan dife pou Seyè
³⁷
 a. Se va yon jou pou adore Bondye. Jou sa a, piga nou fè gwo travay. Men fèt pou nou fete pou
 Seyè a. Men jou n'a reyini tout moun pou yo fè sèvis pou Bondye. Men ofrann pou nou boule nan
 dife pou Seyè a, se ka bèt pou nou boule nèt, se ka ofrann grenn jaden, se ka bèt pou nou touye, se
³⁸
 ka ofrann diven. Chak jou fèt gen ofrann pa li. Apa tout jou repo Seyè yo, n'a fete fèt sa yo tou.
 Apa kado pou nou fè nòmalmman, apa ofrann n'ap fè paske nou te fè ve, apa ofrann n'ap fè pou Seyè
³⁹
 a paske nou te vle fè l', n'a fè ofrann sa yo. Sou kenzyèm jou setyèm mwa a, n'a fè fèt pou Seyè
 a pandan sèt jou, apre n'a fin rekòlte jaden nou yo. Premye jou a ak wityèm jou a va de gwo jou
⁴⁰
 repo. Premye jou a, n'a keyi pi bon fwi nan pye sitwon nou yo, n'a koupe fèy nan pye dat nou
 yo ak branch nan pye jasmen ak pye sikren, n'a fè kè nou kontan devan Seyè a, Bondye nou an,
⁴¹
 pandan sèt jou. Chak lanne, pandan sèt jou nan setyèm mwa a, n'a fete fèt sa a pou mwen menm,
⁴²
 Seyè a, Bondye nou an. Sa se yon regleman pou nou swiv tout tan, de pitit an pitit. Pandan sèt
⁴³
 jou tout moun pèp Izrayèl yo va rete anba jouna. Wi, n'a rete anba jouna pandan sèt jou. Konsa,
 pitit pitit nou yo va konnen mwen menm, Seyè a, mwen te fè pèp Izrayèl rete anba jouna lè mwen
⁴⁴
 te fè yo soti kite peyi Lejip la. Se mwen menm ki Seyè a, Bondye nou an! Se konsa Moyiz te
 bay moun pèp Izrayèl yo tout kalite fèt pou yo fete pou Seyè a.

Chapter 24

¹ ¶ Seyè a pale ak Moyiz, li di l' konsa: ² -Bay moun pèp Izrayèl yo lòd pou yo fè ou jwenn bon lwil fèt ak grenn oliv kraze pou gwo lanp sèt branch ki nan Tant Randevou a, pou lanp yo toujou ka rete limen. ³ Chak aswè, Arawon va limen yo, l'a veye pou yo toujou rete limen jouk denmen maten devan Seyè a, sou deyò rido ki devan Bwat Kontra a nan Tant Randevou a. Sa se yon regleman pou yo kenbe pou tout tan, de pitit an pitit. ⁴ Arawon va pran swen tout ti lanp ki sou gwo lanp sèt branch an lò a. L'a veye pou yo toujou rete limen devan Seyè a. ⁵ W'a pran vennkat liv farin frans, w'a fè douz pen. Chak pen va fèt ak de liv farin. ⁶ W'a mete pen yo sou de ran sou tab lò ki devan Seyè a, sis pen nan chak ran. ⁷ Apre sa, w'a pran lansan bon kalite, w'a mete sou chak ran pen yo. ⁸ Se lansan sa a w'a ofri nan dife bay Seyè a tankou si se te pen yo menm ou te ofri. Se pou moun pèp Izrayèl yo pote pen chak jou repo, pou yo ofri bay Seyè a. Se bagay pou yo toujou fè dapre ⁹ kontra Bondye a ki p'ap janm kase. Se pou Arawon ak pitit gason l' yo pen yo va ye. Y'a manje yo yon kote ki apa pou Seyè a, paske se yon pòsyon ki apa nèt pou Bondye nan manje yo ofri pou ¹⁰ boule nan dife pou Seyè a. Se yon regleman ki la pou tout tan tout tan. ¶ Vwala te gen yon nonm, manman l' te moun pèp Izrayèl, men papa l' te moun peyi Lejip. Msye vin rive nan mitan pèp la, ¹¹ epi li pete yon kont nan kan an avèk yon moun pèp Izrayèl la. Manman nonm lan te rele Chelomit. Se te pitit fi Dibri, yon moun nan branch fanmi Dann lan. Pandan yo t'ap joure a, nonm lan nonmen ¹² non Bondye mal. Nan koze a, li derespekte Bondye. Se konsa yo pran l' mennen bay Moyiz. Yo mete msye yon kote ak moun pou veye l', pandan Moyiz menm t'ap tann Seyè a vin di l' sa pou l' ¹³ fè. Seyè a di Moyiz konsa: ¹⁴ -Mennen nonm lan lòt bò limit kan an. Fè tout moun ki te tande l' lè li t'ap derespekte Bondye a mete men yo sou tèt li. Konsa, y'a ba l' pote reskonsablite sa l' fè a, epi tout pèp la va kalonnen msye wòch jouk li mouri. ¹⁵ Apre sa, w'a pale ak moun pèp Izrayèl yo, w'a di yo: Lè yon moun derespekte Bondye, se pou l' peye pou sa l' fè a. ¹⁶ Se pou yo touye l'. Wi, si yon moun peyi a osinon yon moun lòt nasyon k'ap viv nan mitan nou derespekte Bondye, ¹⁷ se pou yo touye l'. Tout moun nan peyi a va kalonnen l' wòch jouk li mouri. Depi yon moun ¹⁸ touye yon lòt, se pou yo touye l' tou. Si yon moun touye yon bèt ki pa pou li, se pou l' renmèt li. Prensip la vle kou pou kou, lavi pou lavi. ¹⁹ Si ou fè yon moun menm peyi avè ou mal, se pou yo fè ou menm bagay la tou. ²⁰ Si ou kase yon zo nan kò l', y'a kase yon zo nan kò pa ou tou. Si ou pete yon grenn je l', y'a pete yon grenn je pa ou tou. Si ou kase yon dan nan bouch li, y'a kase yon dan nan bouch pa ou tou. Sa ou fè lòt la, se sa y'a fè ou tou. ²¹ Si ou touye yon bèt ki pa pou

ou, se pou ou renmèt li. Men, si se yon moun ou touye, y'ap touye ou tou. ²² Menm jijman sa a va pou tout moun k'ap viv nan peyi a, kit se yon moun peyi a ki menm ras avè ou, kit se yon moun lòt nasyon, paske se mwen menm Seyè a ki Bondye nou an. ²³ Moyiz pale ak moun pèp Izrayèl yo, epi yo pran nonm ki te nonmen non Bondye a mal la, yo mennen l' andeyò lòt bò limit kote tout moun rete a, epi yo kalonnen l' wòch jouk yo touye l'. Se konsa moun pèp Izrayèl yo te fè tou sa Seyè a te bay Moyiz lòd fè a.

Chapter 25

¹ ¶ Seyè a pale ak Moyiz sou mòn Sinayi a, li di l' konsa: ² -Pale ak moun pèp Izrayèl yo, w'a di yo pou mwen: Lè n'a antre nan peyi m'ap ban nou an, n'a bay tè a yon repo pou Seyè a. ³ Pandan sizan n'a plante jaden nou, n'a taye pye rezen nou yo, epi n'a ranmase rekòt pandan sizan. ⁴ Men, setyèm lanne a n'a kite tè a poze nèt. Se va yon gwo lanne repo pou tè a. Se va yon lanne n'a kite tè a pran repo pou Seyè a. Nou p'ap simen anyen nan jaden nou, ni nou p'ap taye pye rezen nou yo. ⁵ Piga nou ranmase grenn ki pouse konsa nan jaden nou pou nou vann. Ni pigas nou keyi rezen ki donnen nan pye rezen nou pa t' taye pou nou vann. Se va yon lanne repo nèt pou te a. ⁶ Pandan tout lanne a tè a va rete san nou pa travay li. Men, sa l'a bay la va sèvi manje pou nou ak pou tout moun k'ap viv lakay nou, pou moun lòt nasyon ki fè ladesant lakay nou. ⁷ Bèt domestik nou yo ak bèt bwa ki nan peyi a va manje nan sa tè a bay la tou. ⁸ ¶ N'a konte sèt lanne Repo, ki vle di sèt fwa sèt lanne, sa va ban nou karantnèf lanne. ⁹ Sou dizyèm jou setyèm mwa a ki jou pou n' mande Bondye gras la, n'a fè kònen twonpèt nan tout peyi a. ¹⁰ N'a mete senkantyèm lanne sa a apa pou Bondye, epi n'a bay lòd pou yo bay tout moun ki esklav nan peyi a libète yo pou tout lanne a. Se va yon lanne rejwisans pou tout moun. Lanne sa a, tou sa yo te vann anvan ap tounen pou ansyen mèt yo ankò osinon pou eritye yo. Tout moun ki te esklav ap tounen lib lakay yo. ¹¹ Senkantyèm lanne sa a va yon lanne rejwisans pou tout moun: Nou p'ap simen anyen nan jaden nou yo, ni nou p'ap ranmase grenn ki pouse konsa nan jaden nou yo pou nou vann, ni nou p'ap keyi rezen ki donnen nan pye rezen nou pa t' taye pou nou vann. ¹² Paske se va yon lanne rejwisans, se va yon lanne n'a mete apa nèt pou Seyè a. Men n'a manje tou sa jaden nou pa t' plante yo bay. ¹³ Nan lanne rejwisans sa a, tout tè ki te vann ap tounen pou ansyen mèt yo ankò. ¹⁴ Konsa, si n'ap vann yon moun pèp Izrayèl parèy nou yon tè osinon si n'ap achte tè nan men l', pigas nou fè koutay yonn sou do lòt.

15

Lè n'ap achte yon tè osinon lè w'ap vann yon tè, se pou nou kalkile pri a sou kantite lanne tè a ka travay anvan lanne rejwisans k'ap vini an rive. ¹⁶ Plis gen lanne anvan lanne rejwisans lan rive, se plis pri a va pi wo. Mwens gen lanne, se plis pri a va pi ba, paske se kantite lanne rekòt tè a ka

bay la n'ap vann osinon n'ap achte. ¹⁷ Pa fè lajan sou do moun pèp Izrayèl parèy nou. Men, se pou

nou gen krentif pou Bondye nou, paske se mwen menm ki Seyè a, Bondye nou an. ¹⁸ Se pou nou swiv lòd mwen ban nou yo, se pou nou kenbe tout kòmandman m' yo. Se pou nou swiv yo, se konsa

n'a kapab viv nan peyi a san nou pa bezwen pè anyen. ¹⁹ Tè a va bay rekòt li, n'a manje kont nou,

epi n'a viv nan peyi a ak kè poze. ²⁰ Men, gen moun ki va mande kisa y'a manje setyèm lanne a si

yo pa plante, si yo pa ranmase rekòt. ²¹ Mwen menm, Seyè a, m'a voye benediksyon m' sou tè a

pandan sizyèm lanne a pou l' ka donner rekòt kantite pou twazan. ²² Konsa, lè wityèm lanne a va rive pou nou plante jaden nou yo, n'a jwenn manje toujou nan ansyen rekòt sizyèm lanne a. N'a gen kont pou nou manje jouk nevyèm lanne a rivè, lè n'a gen pou n' ranmase rekòt wityèm lanne

sa a. ²³ ¶ Yon tè pa fèt pou vann pou tout tan, paske tè a pa pou nou, se pou mwen li ye. Nou menm,

nou tankou moun lòt peyi ki rete lakay mwen: mwen ban nou dwa sèvi sou tè a. ²⁴ Lè n'ap achte yon tè nan peyi nou an, se pou nou rekonèt dwa ansyen mèt tè a genyen pou l' reachte tè a ankò.

25

Lè yon moun pèp Izrayèl parèy nou vin nan nesosite, epi li blije vann pòsyon tè ki pou li a, fanmi

ki pi pre l' la va reachte tè li te vann lan, paske se li ki gen dwa fè sa. ²⁶ Men, si yon nonm pa gen fanmi pre pou reachte tè a, epi apre kèk tan zafè l' vin bon ankò, l'a reachte tè a lè l'a gen kont lajan

pou sa. ²⁷ L'a kalkile depi ki tan li te vann tè a, epi l'a renmèt moun ki te achte tè a nan men l' lan lajan ki koresponn ak kantite lanne ki rete anvan lanne rejwisans k'ap vini an, epi l'a reprann tè li.

28

Men, si li pa gen kont kòb pou reachte tè a, tè a va rete nan men moun ki te achte l' la jouk lanne

rejwisans k'ap vini an. Lè sa a, tè a va tounen nan men ansyen mèt li ankò. ²⁹ Si yon nonm vann yon kay ki nan yon bouk ki gen ranpa, li gen yon lanne delè, depi dat li te vann kay la, pou l' reachte

l' ankò. Pase yon lanne, li pèdi dwa a. ³⁰ Si li kite tout lanne a pase san li pa reachte kay la, kay la ap rete pou moun ki te achte l' la ak pou pitit pitit li yo. Yo p'ap renmèt li kay la lè lanne rejwisans

la rive. ³¹ Men, kay ki nan bouk kote ki pa gen ranpa, y'ap konsidere yo menm jan ak yon jaden. Ansyen mèt la gen dwa reachte l' ankò. Men, tout jan se pou yo renmèt li kay la, lè lanne rejwisans

lan rive. ³² Moun Levi yo menm ap gen lavil pa yo apa. Yon moun Levi ap toujou gen dwa reachte

kay ki te pou li nenpòt kilè. ³³ Si yon moun Levi rive vann yon kay ki nan lavil moun Levi yo, epi li pa reachte l', se pou yo renmèt li kay la lè lanne rejwisans lan rive, paske lè yon moun Levi gen

yon kay nan mitan pèp la, kay la pou li nè. ³⁴ Konsa tou, pou jaden ki tout arebò lavil moun Levi
 yo, yo pa gen dwa vann li, paske se pou yo li ye pou tout tan. ³⁵ Si yon moun pèp Izrayèl parèy
 nou k'ap viv toupre lakay nou vin nan neseseite, epi li tonbe nan malsite, se pou nou lonje men ba
 li tankou nou ta dwe fè l' pou yon moun lòt nasyon k'ap travay lakay nou osinon ki vin fè ladesant
 lakay nou. Konsa, l'a toujou ka viv bò kote nou. ³⁶ Pa fè l' peye ankenn enterè, pa ba l' ponya. Gen
 krentif pou Bondye. Bay moun pèp Izrayèl parèy nou an yon chans pou l' viv tou. ³⁷ Piga nou
 mande l' enterè sou lajan nou prete l'. Piga nou ba l' ponya pou manje nou vann li. ³⁸ Se mwen
 menm Seyè a, Bondye nou an. Se mwen menm ki te fè nou soti kite peyi Lejip pou m' te ka ban
 nou peyi Kanaran an epitou pou m' te ka Bondye nou. ³⁹ ¶ Si yon moun pèp Izrayèl parèy nou k'ap
 viv toupre lakay nou vin nan neseseite, epi li vann tèt li ban nou pou li sèvi nou esklav, pigasou fè
 l' fè travay yon domestik. ⁴⁰ L'ap rete lakay nou tankou moun lòt nasyon yo k'ap travay pou lajan
 lakay nou. L'a sèvi nou jouk lanne rejwisans k'ap vini an. ⁴¹ Lè sa a, li menm ak tout pitit li yo, y'a
 kite lakay nou, y'a tounen al jwenn fanmi yo, epi y'a renmèt yo tè zansèt yo te kite pou yo a. ⁴² Paske
 se esklav mwen nou ye, se mwen menm ki te fè nou soti kite peyi Lejip. Yo pa gen dwa vann nou
 pou fè nou sèvi esklav lòt moun. ⁴³ Piga nou aji mal ak moun pèp Izrayèl parèy nou yo. Se pou
 nou gen krentif pou Bondye nou an. ⁴⁴ Lè n'a bezwen gason osinon fi pou sèvi esklav lakay nou,
 nou ka achte yo nan moun lòt nasyon k'ap viv lòt bò fwontyè peyi nou an. ⁴⁵ Nou ka achte pitit
 moun lòt nasyon k'ap viv nan mitan nou tou. Konsa tou, lè yo rete lakay nou, si yo fè pitit sou tè
 ki pou nou, pitit yo va pou nou tou. ⁴⁶ N'a kite yo tankou byen pou pitit nou yo. Y'a sèvi yo jouk
 yo mouri. Nou pa dwe maltrete moun pèp Izrayèl parèy nou. Men, se pou nou aji avèk yo tankou
 frè ak frè. ⁴⁷ Sipoze yon moun lòt nasyon k'ap viv nan mitan nou nan peyi a vin gen anpil mwayen
 epi yon moun pèp Izrayèl parèy nou k'ap viv lakay nou, osinon pre kay moun lòt nasyon an, vin
 nan neseseite epi l' al vann tèt li bay moun lòt nasyon an, osinon bay yonn nan fanmi moun lòt nasyon
 an pou li sèvi l' esklav. ⁴⁸ Apre li vann tèt li a, l'a toujou gen avantaj moun ka reachte l' pou ba li
 libète l'. Se bagay yonn nan frè li yo, ⁴⁹ osinon tonton l', osinon pitit gason tonton l' yo, osinon
 yonn nan fanmi pre li yo ka fè pou li. Si li menm li vin gen mwayen, li ka reachte tèt li tou. ⁵⁰ Dakò
 ak moun ki te achte l' la, se pou l' konte konbe lanne ki gen depi lanne li te vann tèt li bay moun
 lan jouk lanne rejwisans k'ap vini an. Lè sa a, l'a kalkile lajan pou l' bay la sou kantite lanne l'a
 jwenn lan, epi sou pri yo peye lè konsa pou yon moun k'ap travay pou lajan lakay moun. ⁵¹ Lè gen
 anpil lanne ki rete, l'a kalkile sou yo pou l' konnen valè lajan pou l' renmèt pou l' ka reachte tèt li.

52

Men, si pa gen lanne ki rete anvan lanne rejwisans lan, y'a kalkile ansanm, epi l'a renmèt li lajan dapre kantite lanne ki rete a pou l' ka reachte tèt li. ⁵³ Paske l'ap travay ak moun lan tankou domestik

k'ap travay pou lajan pa an, ou pa fèt pou kite moun lan maltrete li. ⁵⁴ Si li pa reachte tèt li konsa, lè lanne rejwisans lan rive, ni li menm, ni pitit gason l' yo va lib ankò. Epi y'a kite kay moun lan.

55

Se pou nou swiv regleman sa yo, paske se esklav pa m' moun pèp Izrayèl yo ye. Yo se esklav mwen te fè soti kite peyi Lejip. Se mwen menm ki Seyè a, Bondye nou an.

Chapter 26

¹ ¶ Seyè a di: -Nou pa gen dwa fè zidòl, nou pa gen dwa fè estati, ni mete wòch kanpe. Nou pa gen dwa pran wòch pou fè desen sou li, lèfini pou n' mete l' kanpe yon kote nan peyi a pou nou adore yo. Se mwen menm ki Seyè a, Bondye nou an. ² Se pou nou fete tout fèt mwen yo. Se pou

nou respekte kay ki apa pou mwen an. Se mwen menm ki Seyè a! ³ Si nou mache dapre lòd mwen yo, si nou kenbe tout kòmandman m' yo, si nou swiv yo, ⁴ lè sezon an rive, m'a ban nou lapli.

Konsa, tè nou va bay rekòt, pyebwa nan jaden nou va donner. ⁵ Lè sa a, nou p'ap anko fin bat ble, n'ap gen tan nan keyi rezen. Nou p'ap ankò fin keyi rezen, n'ap gen tan nan plante grenn. N'a gen

kont manje pou nou manje, epi n'a rete nan peyi nou an san nou pa bezwen pè anyen. ⁶ M'a mete kè poze nan peyi a, n'a kouche dòmi san kè sote. M'ap fè tout bèt mawon disparèt nan peyi a, moun

p'ap vin fè nou lagè ankò. ⁷ N'a kouri dèyè lènmi nou yo, n'a bat yo, n'a kraze yo ak nepe nou.

⁸ Senk moun nan mitan nou va kont pou bat san lènmi, san moun nan mitan nou va kont pou bat mil lènmi. N'a kraze lènmi nou yo anba kout nepe nou yo. ⁹ M'a beni nou, m'a ban nou pitit, m'a

ban nou anpil pitit. Mwen menm, m'a kenbe kontra mwen te siyen ak nou an. ¹⁰ N'a sitèlman fè bèl rekòt, apre nou fin manje pandan ennan, n'a setoblige mete rès grenn dènye rekòt la deyò pou

nou fè plas pou rekòt k'ap vin apre a. ¹¹ M'ap rete nan mitan nou nan kay mwen an, m'ap toujou

kontan ak nou. ¹² M'a toujou la nan mitan nou, se mwen menm k'ap Bondye nou, se pèp mwen n'a

ye. ¹³ Se mwen menm, Seyè a, Bondye nou an, ki te fè nou soti kite peyi Lejip pou nou pa t' rete esklav moun sa yo ankò. Mwen kase gwo kòd lwijanboje ki t'ap jouke nou an, mwen fè nou mache

tèt anlè. ¹⁴ ¶ Men tou, si nou pa koute m', si nou pa vle fè tou sa m' mande nou fè la a, m'ap peni

¹⁵ nou. Si nou meprize lòd mwen yo, si nou voye kòmandman mwen yo jete, si nou pa fè tou sa
¹⁶ mwen mande nou fè, si nou pa kenbe kontra m' pase ak nou an, men ki jan m'ap peni nou: M'ap
 voye gwo malè sou nou. Maladi ap mennen nou. Lafyèb ap fè nou deperi. Nou p'ap ka wè nan je
 nou, n'ap pèdi souf nou. Nou va simen grenn nan jaden nou. Men, sa p'ap sèvi nou anyen, paske se
¹⁷ lènmi nou yo ki va jwi rekòt nou yo. M'a vire do ban nou, epi lènmi nou va bat nou. Moun ki
 pa vle wè nou yo va donminen sou nou. N'a rete konsa, n'a pran kouri san pa gen pesonn k'ap kouri
¹⁸ dèyè nou. Si, atousa toujou, nou pa koute m', m'ap peni nou sèt fwa pi rèd pase anvan poutèt
¹⁹ peche nou yo. Pouvwa nou genyen an epi k'ap fè nou gonfle konsa a, m'ap kraze l' nèt. Pa yon
²⁰ ti degout lapli p'ap tonbe sot nan syel la, tè a ap vin di kou wòch. N'a kraze kouraj nou travay
 di, men sa p'ap sèvi nou anyen: tè jaden nou yo p'ap bay anyen ankò, pyebwa yo p'ap donner menm.
²¹ Si, apre sa, nou vle kenbe tèt ak mwen toujou, si nou derefize koute m', mwen menm tou m'ap
²² peni nou sèt fwa pi rèd toujou pase anvan poutèt peche nou yo. M'a lage bèt nan bwa dèyè nou,
 y'a touye pitit nou yo, y'a fini ak tout zannimo nou yo. Anpil nan nou va mouri tou. p'ap gen pesonn
²³ ap mache sou chemen nan peyi a. Si apre tout malè sa yo nou pa korije toujou, n'ap kenbe tèt
²⁴ avè m' toujou, mwen menm tou m'a kenbe tèt avèk nou. M'ap frape nou sèt fwa pi rèd ankò pase
²⁵ anvan poutèt peche nou yo. M'ap fè lènmi nou yo vin fè nou lagè poutèt kontra m' nou pa kenbe
 a. Lè sa a, n'a anpile kò nou nan lavil yo pou chache pwoteksyon, m'a voye tout kalite move maladi
²⁶ sou nou, jouk n'a blije rann tèt nou bay lènmi nou yo. M'ap koupe viv nou. Yon sèl fou ap kont
 pou dis fanm pare pen pou tout fanmi yo. Y'a kontwole sa y'ap bay chak moun. Lè n'a fin manje,
²⁷ se atò n'a grangou. Epi, si apre tou sa toujou, nou pa koute m', n'ap kenbe tèt avè m' toujou,
²⁸ lè sa a m'a kenbe tèt ak nou tou, m'a pran chenn sou nou. Se mwen menm toujou k'ap peni nou
²⁹ sèt fwa pi rèd pase anvan poutèt peche nou yo. N'a sitèlman grangou n'a touye pwòp pitit gason
³⁰ ak pwòp pitit fi nou yo, n'a manje vyann yo. M'a detwi tout kay nou bati sou tèt mòn pou fè
 sèvis, m'a kraze lotèl lansan nou yo mete atè, m'a anpile kadav nou yo atè sou moso estati vye zidòl
³¹ nou yo. N'a ban m' degoutans. M'a fè lavil nou yo tounen mazi. M'ap detwi tout kote nou fè
³² sèvis yo. M'ap derefize pran bon sant ofrann nou yo. Se mwen menm ankò ki pral devaste peyi
³³ nou an. Ata lènmi nou yo ki pral pran peyi a pou yo rete pral sezi wè sa m'ap fè. M'ap mennen
 lènmi nou yo vin fè nou lagè. M'ap leve moun dèyè nou pou vin fè nou lagè. M'ap gaye nou nan
³⁴ mitan lòt peyi etranje yo. Peyi a va tounen yon dezè. Lavil nou p'ap gen pesonn rete ladan yo. Lè

sa a, tè a va pran repo. Wi, lè lènmi nou yo va depòte nou byen lwen nan peyi pa yo, tè a va rete
³⁵ san travay, l'a pran repo. Pandan tout tan tè a va rete san travay la, l'a jwi tout lanne repo nou
³⁶ pa t' ba li yo lè nou te rete sou li a. Kanta pou rès moun ki pa mouri yo, lè y'a rive nan peyi kote
yo depòte yo a, m'ap fè yo viv tout tan ak yon kè sote san rete. Konsa, bri yon fèy bwa chèch van
ap pote ap kont pou fè yo kouri. Y'ap kouri tankou moun ki gen lagè dèyè yo, y'ap tonbe san pa
³⁷ gen moun k'ap kouri dèyè yo. Y'ap tonbe yonn sou lòt tankou nan lagè san pa gen pesonn k'ap
³⁸ kouri dèyè yo. Yo p'ap fouti kanpe pou yo goumen ak lènmi yo. N'a mouri nan peyi kote yo te
³⁹ depòte nou yo. Y'a antere nou nan peyi moun ki pa vle wè nou yo. Moun ki rete nan sa yo te
depòte yo va depafini nan peyi lènmi nou yo, paske y'a peye pou peche zansèt yo ak pou pwòp
⁴⁰ peche pa yo. ¶ Men, lè sa a pitit pitit nou yo va rekonèt peche yo ak peche zansèt yo, peche yo
⁴¹ te fè paske yo te refize fè sa m' te di yo fè, peche yo te fè paske yo te kenbe tèt avè m'. Se poutèt
sa mwen menm tou, mwen te kenbe tèt ak yo, mwen te mennen yo prizonye nan peyi lènmi yo. Lè
⁴² sa a, moun ki te gen lògèy plen kè yo va soumèt devan m', y'a peye pou sa yo te fè a. Mwen
menm m'a chonje kontra mwen te pase avèk Jakòb, avèk Izarak epi avèk Abraram. Wi, m'a chonje
⁴³ pwomès mwen te fè yo ak peyi mwen te di m'ap ba yo a. Men, yo gen pou yo pati byen lwen,
pou yo kite peyi a san moun pou tè a ka pran repo li. Wi, y'a peye pou sa yo te fè a, paske yo pa t'
⁴⁴ swiv prensip mwen te ba yo, paske yo te voye kòmandman m' yo jete. Men, menm lè sa a, antan
yo la toujou nan peyi lènmi yo, mwen p'ap meprize yo, mwen p'ap lage yo jouk pou m' ta fini ak
yo nèt. Mwen p'ap kase kontra m' pase ak yo a. Paske se mwen menm ki Seyè a, Bondye yo a.
⁴⁵ Men, m'a fè pa yo, m'a chonje kontra mwen te pase avèk zansèt yo lè mwen te fè yo soti kite
⁴⁶ peyi Lejip devan je moun lòt nasyon yo pou m' te ka Bondye yo. Se mwen menm ki Seyè a! Men
tout prensip, tout lòd ak tout kòmandman Seyè a te bay Moyiz lòd mete nan kontra li te siyen ak
moun pèp Izrayèl yo sou mòn Sinayi a.

Chapter 27

¹ ¶ Seyè a pale ak Moyiz, li di l' konsa: ² -Pale ak moun pèp Izrayèl yo, w'a di yo pou mwen:
Lè yon moun pran angajman pou l' ofri yon moun bay Seyè a, se nou menm ki pou fikse kantite
³ lajan pou yo bay nan plas moun lan, dapre sistèm yo sèvi nan tanp lan. Men ki jan n'a fè sa: Pou
⁴ yon gason ki gen ant ventan al swasantan, se va senkant pyès ajan. Pou yon fanm menm laj la,

⁵ se va trant pyès ajan Pou yon jenn gason ki gen ant senkan al ventan, se va vin pyès ajan. Pou
 yon jenn fi ki gen menm laj la, se va dis pyès ajan. ⁶ Pou yon timoun ki gen ant yon mwa al senkan,
 si se yon gason se va senk pyès ajan. Pou yon ti fi menm laj la, se va twa pyès ajan ⁷ Pou yon gason
 ki depase swasantan, se va kenz pyès ajan. Pou yon fanm menm laj la, se va dis pyès ajan. ⁸ Men,
 si moun ki te pran angajman an pa gen kont lajan pou peye valè nou mande a, l'a mennen moun li
 te pwomèt bay la bay prèt la. Prèt la va fè yon lòt pri, dapre sa moun lan ka peye. ⁹ Si se yon bèt
 yon moun pran angajman pou l' ofri bay Seyè a, nenpòt kisa l'a bay Seyè a va rete apa nèt pou Seyè
¹⁰ a. Li p'ap ka chanje yon move pou yon bon. Li p'ap ka bay yon lòt bèt nan plas sa li te pwomèt
 la. Si li fè sa, tou de bèt yo, ni sa li te di l'ap bay anvan an, ni sa li ta vle bay nan plas li a, va rete
 apa pou Seyè a. ¹¹ Men, si bèt li te pran angajman ofri a se yon bèt ki pa ka sèvi ofrann pou Seyè
 a, l'a mennen bèt la bay prèt la. ¹² Prèt la va fè pri bèt la dapre jan l' wè bèt la. Lè l'a fin fè pri bèt
 la, pri l' mande a, se sa y'a peye pou li. ¹³ Men, si moun ki te fè ofrann lan ta vle achte bèt la ankò,
 l'a peye pri prèt la te fikse a plis ven pou san (20%) lavalè. ¹⁴ ¶ Lè yon moun ap mete kay li apa
 pou Seyè a, prèt la va fè pri kay la dapre jan l' wè kay la. Lè l'a fin fè pri a, pri l' mande a, se sa pou
¹⁵ yo bay. Men, si moun k'ap mete kay la apa pou Seyè a ta vle achte kay la ankò, l'a peye pri prèt
 la te fikse a, plis ven pou san (20%) lavalè. Epi y'a renmèt li kay li. ¹⁶ Si yon moun pran yon pòsyon
 nan jaden l' epi li mete l' apa pou Seyè a, w'a fè pri pòsyon tè a dapre kantite grenn yo ka simen
 ladan l'. Pou chak barik grenn lòj yo ka simen, l'a bay dis pyès ajan. ¹⁷ Si li fè ofrann lan apre yo
 fèk fin fete lanne rejwisans lan, se pou l' peye tout pri a nèt. ¹⁸ Men, si li fè l' kèk tan apre yo fin
 fete lanne rejwisans lan, prèt la va kalkile pri a sou kantite lanne ki rete anvan yo fete lanne rejwisans
¹⁹ k'ap vini an, konsa l'a desann premye pri li te bay la. Si moun ki mete pòsyon tè a apa pou Seyè
 a ta vle achte tè a ankò, l'a peye pri yo te bay pou tè a plis ven pou san (20%). Epi tè a va rete pou
²⁰ li. Men, si yo te gen tan vann tè a bay yon lòt moun anvan li menm li te mande achte l' ankò, li
 p'ap ka achte l' ankò. ²¹ Yon tè konsa, lè lanne rejwisans lan va rive, pase yo renmèt li nan men
 premye mèt li, l'ap rete yon bagay apa pou Seyè a, yon jaden pesonn p'ap ka manyen. L'a rete pou
²² prèt yo. Si yon moun pran yon jaden li menm li te achte, yon jaden ki pa jaden eritye, epi li mete
²³ l' apa pou Seyè a, prèt la va kalkile pri jaden an sou kantite lanne ki rete anvan yo fete lanne
 rejwisans k'ap vini an, epi moun lan va peye lajan an menm jou a. Lajan sa a va rete apa nèt pou
²⁴ Seyè a. Lè lanne rejwisans lan va rive, jaden an va tounen pou premye mèt la osinon pou pitit

premye mèt la. ²⁵ Y'a fè tout pri yo dapre sistèm lajan yo sèvi nan kote yo mete apa pou Bondye
a: yon gwo pyès pou ven ti pyès. ²⁶ ¶ Pesonn p'ap ka pran angajman pou yo ofri Seyè a premye
pitit mal yon bèt fè paske li deja pou Seyè a. Kit se premye pitit bèf, kit se premye pitit mouton
²⁷ osinon kabrit, se pou Seyè a yo ye. Men, si se premye pitit yon bèt ki pa ka sèvi ofrann pou Seyè
a, y'a ka achte l' ankò nan men Seyè a pou pri n'a fikse a, plis ven pou san (20%) lavalè. Men, si
²⁸ moun lan pa vle achte l' ankò pou tèt li, y'a vann yon lòt moun li pou pri n'a fikse a. Tou sa yon
moun mete apa nèt pou Seyè a, kit se yon moun, kit se yon bèt, kit se yon jaden, li pa ka vann li ni
²⁹ li pa ka reachte l'. Bagay la fèt pou l' rete la, apa nèt pou Seyè a. Pesonn p'ap ka manyen l'. Si
se yon moun yo vle ki pou rete apa nèt pou Seyè a, yo p'ap ka reachte l'. Se touye pou yo touye
³⁰ moun sa a. N'a mete dis pou san (10%) nan tout rekòt jaden nou apa pou Seyè a, li te mèt rekòt
jaden nou fè nou menm, osinon rekòt pyebwa ki donnen nan jaden nou. Se pou Seyè a dis pou san
³¹ sa yo ye. Si yon moun vle achte pou li menm kichòy nan dis pou san (10%) ki pou Seyè a, la
peye pri bagay la plis ven pou san (20%) lavalè. ³² Sou chak dis bèt, li te mèt bèf, kabrit osinon
mouton n'ap gade, gen yonn ki pou Seyè a. Sa vle di lè n'ap konte bèf nou yo, n'a konte yo pa dis.
³³ Konsa, chak fwa nou rive sou dityèm lan, n'a mete l' apa pou Seyè a. Nou pa bezwen konnen
si li bon si li pa bon, ni nou pa bezwen pran yon lòt mete nan plas li. Si nou vle chanje yon bèt, ni
sa nou ta vle chanje a, ni sa nou ta renmen bay nan plas li a, tou de va pou Seyè a. Epitou nou p'ap
³⁴ ka reachte yo ankò. Men tout regleman Seyè a te bay Moyiz pou moun pèp Izrayèl yo sou mòn
Sinayi a.

Numbers

Chapter 1

¹ ¶ Premye jou dezyèm mwa nan dezyèm lanne depi moun pèp Izrayèl yo te soti kite peyi Lejip
la, antan yo te nan dezè Sinayi a, Seyè a pale ak Moyiz nan Tant Randevou a. Li di l' konsa: ² -Se
pou ou menm ak Arawon, nou fè yon resansman pou konte tout moun nan pèp Izrayèl la, dapre
fanmi yo, dapre branch fanmi yo. W'a pran non tout gason, yonn apre lòt. ³ N'a konte tou sa ki gen
ventan osinon ki pi gran, depi yo bon pou fè lagè. N'a fè resansman an dapre jan lame a òganize.
⁴ N'a pran yon chèf nan chak branch fanmi, dapre zansèt yo, pou ede nou. ⁵ Men non moun ki va

ede nou nan resansman an: Nan branch fanmi Woubenn lan, se va Elizou, pitit gason Chedeyou.
⁶ Nan branch fanmi Simeyon an, se va Cheloumyèl, pitit gason Sourichadayi. ⁷ Nan branch fanmi
⁸ Jida a, se va Nakchon, pitit gason Aminadab. Nan branch fanmi Isaka a, se va Netanèl, pitit gason
⁹ Swa. ¹⁰ Nan branch fanmi Zabilon an, se va Eliyab, pitit gason Elon. Nan branch fanmi Efrayim,
premye pitit gason Jozèf la, se va Elichama, pitit gason Amiyoud. Nan branch fanmi Manase,
¹¹ dezyèm pitit gason Jozèf la, se va Gamliyèl, pitit gason Pedachou. Nan branch fanmi Benjamen
¹² an, se va Abidan, pitit gason Gideyoni. Nan branch fanmi Dann lan, se va Ayezè, pitit gason
¹³ Amichadayi. ¹⁴ Nan branch fanmi Asè a, se va Pagiyèl, pitit gason Okran. Nan branch fanmi
¹⁵ Gad la, se va Elyasaf, pitit gason Dewèl. Nan branch fanmi Neftali a, se va Ayira, pitit gason
¹⁶ Enan. ¹⁷ Se moun sa yo yo te chwazi nan pèp la pou fè travay la. Se yo ki te chèf lakay yo, chèf
¹⁸ branch fanmi zansèt yo. ¶ Moyiz ak Arawon pran douz mesye Bondye te nonmen yo, yo
¹⁹ reyini tout pèp la, premye jou dezyèm mwa a. Yo pran non tout moun dapre fanmi yo, dapre branch
²⁰ fanmi zansèt yo. Yo konte tout gason, yonn apre lòt, tou sa ki gen ventan osinon ki pi gran, dapre
²¹ lòd Seyè a te bay Moyiz la. Se nan dezè Sinayi a yo te fè resansman tout pèp la. Se konsa yo
²² konte tout gason nan branch fanmi Woubenn, premye pitit Jakòb la, tou sa ki gen ventan ak tou sa
²³ ki pi gran epi ki bon pou fè lagè. Yo pran non yo yonn apre lòt, yo di pitit ki moun yo ye, dapre
²⁴ fanmi yo, dapre branch fanmi zansèt yo. Yo jwenn karanssimil senksan (46.500) gason pou
²⁵ branch fanmi Woubenn lan. ²⁶ Yo fè menm bagay la tou pou tout lòt branch fanmi yo. Pou branch
²⁷ fanmi Simeyon an, yo jwenn senkantnèfmil twasan (59.300) gason. Pou branch fanmi Gad
²⁸ la, yo jwenn karanssenkmil sisansenkant (45.650) gason. Pou branch fanmi Jida a, ²⁹ yo
³⁰ jwenn swasannkatòzmil sisan (74.600) gason. Pou branch fanmi Isaka a, yo jwenn
³¹ senkannkatmil katsan (54.400) gason. Pou branch fanmi Zabilon an, ³² yo jwenn senkansèt
³³ mil katsan (57.400) gason. Pou branch fanmi Efrayim, premye pitit gason Jozèf la, ³⁴ yo jwenn
³⁵ karantmil senksan (40.500) gason. Pou branch fanmi Manase, dezyèm pitit gason Jozèf la, ³⁶ yo
³⁷ jwenn tranndemil desan (32.200) gason. Pou branch fanmi Benjamen an, ³⁸ yo jwenn
³⁹ trannsenkmil katsan (35.400) gason. Pou branch fanmi Dann lan, ⁴⁰ yo jwenn swasann
⁴¹ demil sètsan (62.700) gason. Pou branch fanmi Asè a, yo jwenn karanteyenmil senksan (41.500)

⁴² gason. Pou branch fanmi Neftali a, ⁴³ yo jwenn senkanntwamil katsan (53.400) gason. ¶ ⁴⁴ Se non tout moun sa yo Moyiz ak Arawon te pran lè sa a. Te gen douz chèf, yonn pou chak branch fanmi pèp Izrayèl la, ki t'ap ede yo nan travay la. ⁴⁵ Pou tout branch fanmi yo ansanm, ⁴⁶ yo jwenn sisantwamil senksansenkant (603.550) gason. ¶ ⁴⁷ Men yo pa t' fè resansman branch fanmi Levi a ansanm ak lòt branch fanmi yo, ⁴⁸ paske Seyè a te di Moyiz konsa: ⁴⁹ -Ou pa bezwen fè resansman branch fanmi Levi a. Ou pa bezwen konte moun fanmi Levi yo ansanm ak rès moun pèp Izrayèl ⁵⁰ yo. Men, w'a mete moun fanmi Levi yo reskonsab Tant Randevou a ak tou sa ki ladan l' ansanm ak tou sa ki pou li. Se yo ki pou pote l' ansanm ak tou sa ki ladan l'. Se yo ki pou sèvi ladan l' epi ⁵¹ yo gen pou yo moute kay yo fè wonn Tant Randevou a. Lè pou Tant Bondye a deplase, se moun fanmi Levi yo ki va demoute l'. Lè yo rive kote pou yo rete a, se moun fanmi Levi yo ki va moute l' tou. Nenpòt lòt moun ki pa nan branch fanmi Levi a epi ki ta pwoche bò tant lan, se pou yo touye ⁵² l'. Lòt moun pèp Izrayèl yo menm va moute tant yo apa, chak fanmi ansanm bò l' banyè yo, ⁵³ dapre pozisyon yo nan lame a. Men, moun fanmi Levi yo va moute kay yo fè wonn Tant Randevou a pou kòlè Bondye pa tonbe sou pèp Izrayèl la. Se yo menm tou ki la pou veye sou Tant ⁵⁴ Randevou a. Moun pèp Izrayèl yo te fè tou sa Seyè a te bay Moyiz lòd fè a. Se konsa yo te fè l' vre.

Chapter 2

¹ ¶ Seyè a pale ak Moyiz ansanm ak Arawon, li di yo konsa: ² -Lè moun pèp Izrayèl yo va rive yon kote pou yo rete, chak moun va moute tant yo toupre l' banyè yo, anba ti drapo branch fanmi zansèt yo. Y'a moute tant yo devan ak sou kote Tant Randevou a, men pa twò pre l'. ³ ¶ Tout moun k'ap mache anba l' banyè Jida a va moute kan yo sou bò solèy leve, chak divizyon apa. Se Nakchon, ⁴ pitit gason Aninabad la, ki te chèf fanmi Jida a. Dapre resansman an, te gen swasannkatòzmil ⁵ sisan (74.600) gason nan divizyon sa a. Moun Isaka yo va moute kan yo sou menm bò a, adwat ⁶ moun Jida a yo. Se Netanèl, pitit gason Swa a, ki te chèf fanmi yo a. Dapre resansman an, te gen ⁷ senkannkatmil katsan (54.400) gason nan divizyon sa a. Moun Zabilon yo va moute kan yo sou ⁸ menm bò a tou, agoch moun Jida yo. Se Eliyab, pitit gason Elon an, ki te chèf fanmi yo a. Dapre ⁹ resansman an, te gen senkannsètmit katsan (57.400) gason nan divizyon sa a. Konsa, anba l' banyè

Jida a, te gen twa divizyon. Sa te fè antou sankatrevensimil katsan (186,400) gason. Se toujou yo menm ki pou mache devan lè y'ap deplase. ¹⁰ Tout moun k'ap mache anba l'banmyè Woubenn yo va moute kan yo sou bò sid, chak divizyon apa. Se Elisou, pitit gason Chedeyou a, ki te chèf fanmi Woubenn lan. ¹¹ Dapre resansman an, te gen karanssimil senksan (46.500) gason nan divizyon sa a. ¹² Moun Simeyon yo va moute kan yo sou menm bò a, adwat moun Woubenn yo. Se Cheloumyèl, pitit gason Sourichadayi a, ki te chèf fanmi yo a. ¹³ Dapre resansman an, te gen senkannèmil twasan (59.300) gason nan divizyon sa a. ¹⁴ Moun Gad yo va rete sou menm bò a, agoch moun Woubenn yo. Se Elyasaf, pitit gason Reouyèl la, ki te chèf fanmi yo a. ¹⁵ Dapre resansman an, te gen karanssenkmil sisan (45.600) gason nan divizyon sa a. ¹⁶ Konsa, anba l'banmyè Woubenn lan te gen twa divizyon. Sa te fè antou sansenkanteynmil katsansenkant (151.450) gason. Se toujou yo menm ki pou mache an dezyèm pozisyon lè y'ap deplase. ¹⁷ Lè tout moun ap deplase, y'a mache nan menm pozisyon yo mete yo lè y'ap moute kan yo, anba l'banmyè yo: de divizyon devan, de divizyon dèyè ak fanmi Levi yo nan mitan ap pote Tant Randevou a. ¹⁸ Tout moun k'ap mache anba l'banmyè Efrayim lan va moute kan yo sou solèy kouche, chak divizyon apa. Se Elichama, pitit gason Amiyoud la, ki te chèf fanmi Efrayim lan. ¹⁹ Dapre resansman an, te gen karantmil senksan (40.500) gason nan divizyon sa a. ²⁰ Moun Manase yo va moute kan yo sou menm bò a, adwat moun Efrayim yo. Se Gamliyèl, pitit gason Pedachou a, ki te chèf fanmi yo a. ²¹ Dapre resansman an, te gen tranndemil desan (32.200) gason nan divizyon sa a. ²² Moun Benjamen yo va moute kan yo sou menm bò a tou, agoch moun Efrayim yo. Se Abidan, pitit gason Gideyoni a, ki te chèf fanmi yo a. ²³ Dapre resansman an, te gen trannsenkmlil katsan (35.400) gason nan divizyon sa a. ²⁴ Konsa, anba l'banmyè Efrayim lan, te gen twa divizyon. Sa te fè antou sanwitmil san (108.100) gason. Se toujou yo menm ki pou mache an twazyèm pozisyon lè y'ap deplase. ²⁵ Tout moun k'ap mache anla l'banmyè Dann lan va moute kan yo sou bò nò, chak divizyon apa. Se Ayezè, pitit gason Amichadayi a, ki te chèf fanmi Dann lan. ²⁶ Dapre resansman an, te gen swasandemil sètisan (62.700) gason nan divizyon sa a. ²⁷ Moun Asè yo va moute kan yo sou menm bò a, adwat moun Dann yo. Se Pagiyèl, pitit gason Okran an, ki te chèf fanmi yo a. ²⁸ Dapre resansman an, te gen karanteynmil senksan (41.500) gason nan divizyon sa a. ²⁹ Moun Neftali yo va moute kan yo sou menm bò a tou, agoch moun Efrayim yo. Se Ayira, pitit gason Enan an, ki te chèf fanmi yo a.

30 Dapre resansman an, te gen senkanntwamil katsan (53.400) gason nan divizyon sa a. 31 Konsa, anba l'byanè Dann lan, te gen twa divizyon. Sa te fè antou sansenkansèt mil sisan (157.600) gason.

32 Se toujou yo menm ki pou mache dèyè nèt, chak divizyon anba drapo pa yo. Men kantite gason yo te jwenn nan pèp Izrayèl la dapre branch fanmi zansèt yo. Dapre resansman yo te fè a, divizyon

33 pa divizyon, te gen sisantwamil senksansenkant (603.550) gason antou. Men yo pa t'konte moun branch fanmi Levi yo ansanm ak rès moun pèp Izrayèl yo, dapre lòd Seyè a te bay Moyiz la.

34 Moun pèp Izrayèl yo te fè tou sa Seyè a te bay Moyiz lòd fè a. Se konsa yo moute kan yo, chak divizyon apa, anba l'byanè pa yo. Lè y'ap deplase, yo mache pa divizyon, chak moun ansanm ak branch fanmi zansèt yo.

Chapter 3

1 ¶ Lè nou remoute nan tan Seyè a te pale ak Moyiz sou mòn Sinayi a, men moun ki te nan fanmi Arawon ak Moyiz. 2 Men non pitit Arawon yo: se te Nadab, pi gran an. Apre li vin Abiyou, Eleaza ak Itama. 3 Se yo menm Bondye te chwazi, li te ba yo pouvwa pou yo te sèvi l' prèt. 4 Men, Nabad ak Abiyou te mouri nan dezè Sinayi a, lè yo te ofri bay Seyè a yon dife yo pa t' gen dwa ofri ba li. Yo pa te gen pitit. Konsa, se Eleaza ak Itama ki te sèvi prèt ansanm ak Arawon, papa yo.

5 Seyè a pale ak Moyiz, li di l' konsa: 6 -Fè moun fanmi Levi yo pwoche. Mete yo ansanm ak Arawon, prèt la, pou yo ka ede l' nan travay l'ap fè a. 7 Y'a travay nan kay Bondye a, y'a fè tout kalite sèvis ki gen pou fèt pou Arawon ak pou pèp la devan Tant Randevou a. 8 Yo va reskonsab tout bagay ki anndan Tant Randevou a. Y'a fè tout travay moun Izrayèl yo ta gen pou yo fè nan Tant Randevou a. 9 W'a mete yo sou kont Arawon ak pitit gason l' yo. Wi, nan tout moun pèp Izrayèl yo, w'a pran moun fanmi Levi yo, w'a mete yo sou kont prèt yo pou toutan. 10 Men, w'a bay Arawon ak pitit gason l' yo reskonsablite tout travay prèt yo. Si yon lòt moun ki pa prèt ta konprann pou li fè travay prèt yo, se pou yo touye l'. 11 Seyè a pale ak Moyiz, li di l' ankò: 12 -Gade non! Nan tout moun pèp Izrayèl yo, mwen chwazi moun fanmi Levi yo. Mwen pran yo nan plas premye pitit gason moun pèp Izrayèl yo. Se pou mwen yo ye. 13 Paske, tout premye pitit gason yo se pou mwen yo ye. Depi jou mwen te touye tout premye pitit gason moun peyi Lejip yo, mwen te mete tout premye pitit gason moun pèp Izrayèl yo apa pou mwen, ansanm ak tout premye ti mal bèt yo fè. Se pou mwen menm yo tout ye. Se mwen menm ki Seyè a. 14 ¶ Seyè a pale ak Moyiz

¹⁵
 nan dezè Sinayi a, li di l' konsa: -Ou pral fè resansman tout moun Levi yo, dapre fanmi yo, dapre
 branch fanmi zansèt yo. W'a konte tout gason depi sa ki gen yon mwa depi yo fèt jouk sa ki pi gran
¹⁶
 yo. Moyiz fè resansman an dapre lòd Seyè a te ba l' a. Li konte yo jan Seyè a te di l' fè l' la.
¹⁷ ¹⁸
 Men non twa pitit gason Levi yo: Se te Gèchon, Keyat ak Merari. Men non pitit Gèchon yo
¹⁹
 ak tout fanmi yo: Se te Libni ak Chimèyi. Men non pitit Keyat yo ak tout fanmi yo: Se te Amram,
²⁰
 Jizeya, Ebwon ak Ouzyèl. Men non pitit gason Merari yo ak tout fanmi yo: Se te Makli ak
²¹
 Mouchi. Men non fanmi moun Levi yo, dapre non zansèt yo. Te gen de fanmi nan branch Gèchon
²²
 an: Se te pitit Libni yo ak pitit Chimeyi yo. Se tout fanmi Gèchon yo sa. Lè yo konte gason yo,
 depi sa ki te gen yon mwa depi yo fèt jouk sa ki pi gran yo, yo jwenn sètmil senksan (7.500) gason.
²³ ²⁴
 Fanmi sa yo te rete dèyè kay Bondye a, sou bò solèy kouche. Se Elyasaf, pitit gason Layèl
²⁵
 la, ki te chèf fanmi Gèchon yo. Se yo ki te reskonsab kay Bondye a, ak de tant ki kouvri l' yo,
²⁶
 rido ki nan pòt devan Tant Randevou a, rido pou galeri ki fè wonn Tant Randevou a ak lotèl la,
²⁷
 rido ki nan pòt devan galeri a ak tout kòd yo bezwen pou sèvi nan kay Bondye a. Te gen kat
 fanmi nan branch Keyat la: Se te pitit Amram yo, pitit Jizeya yo, pitit Ebwon yo ak pitit Ouzyèl
²⁸
 yo. Se tout fanmi Keyat yo sa. Lè yo konte tout gason yo, depi sa ki gen yon mwa depi yo fèt
 jouk sa ki pi gran yo, yo jwenn witmil sisan (8.600) gason. Se yo ki te reskonsab kote ki apa nèt
²⁹ ³⁰
 pou Seyè a nan kay Bondye a. Fanmi sa yo te moute kan yo sou bò sid kay Bondye a. Se
³¹
 Elizafan, pitit gason Ouzyèl la, ki te chèf fanmi Keyat yo. Se yo ki te reskonsab Bwat Kontra
 a, tab la, gwo lanp sèt branch lan, lotèl yo ak tout bagay ki sèvi nan kote ki apa nèt pou Bondye a,
³²
 rido yo ansanm ak tout bagay ki mache avèk rido yo. Se Eleaza, pitit gason Arawon, prèt la, ki
 te chèf tout chèf fanmi Levi yo. Se li ki te kontwole travay moun ki te reskonsab kote ki apa nèt
³³
 pou Seyè a. Te gen de fanmi nan branch fanmi Merari a: se te pitit Makli yo ak pitit Mouchi yo.
³⁴
 Se tout fanmi Merari yo sa. Lè yo konte tout gason yo, depi sa ki gen yon mwa depi yo fèt jouk
³⁵
 sa ki pi gran yo, yo jwenn simil desan (6.200) gason. Se Zouryèl, pitit gason Abikayil la, ki te
³⁶
 chèf fanmi Merari yo. Yo te moute kan yo sou bò nò kay Bondye a. Se yo ki te reskonsab
 ankadreman pou soutni kay Bondye a, travès yo, poto yo, sipò yo ak tout rido yo ansanm ak tout
³⁷ ³⁸
 bagay ki sèvi ak yo. Yo te reskonsab poto, sipò, pikèt ak kòd pou soutni galeri yo tou. Moyiz,
 Arawon ak pitit gason l' yo te moute kay pa yo devan Tant Randevou a, sou bò lès. Se yo ki te
 reskonsab pou fè sèvis nan kote ki apa nèt pou Bondye a pou pèp Izrayèl la. Tout lòt moun ki ta

³⁹ konprann pou yo fè travay prèt yo, se pou yo touye yo. Lè Moyiz ak Arawon te fè resansman moun fanmi Levi yo, chak fanmi apa, dapre lòd Seyè a te bay yo a, yo jwenn antou venndemil
⁴⁰ (22.000) gason, depi sa ki te gen yon mwa depi yo te fèt jouk sa ki pi gran yo. ¶ Seyè a di Moyiz konsa: -Pran non tout premye pitit gason moun pèp Izrayèl yo, depi sa ki gen yon mwa depi yo fèt
⁴¹ jouk sa ki pi gran yo. W'a konte konbe ki genyen. Se mwen menm ki Seyè a. W'a pran moun fanmi Levi yo, w'a mete yo apa pou mwen nan plas tout premye pitit gason moun pèp Izrayèl yo. Konsa tou, w'a pran tout bèt ki pou moun fanmi Levi yo, w'a mete yo apa pou mwen nan plas
⁴² premye ti mal bèt moun Izrayèl yo va fè. Moyiz pran non tout premye pitit gason moun pèp
⁴³ Izrayèl yo, dapre lòd Seyè a te ba l' a. Li konte tout premye pitit gason yo, depi sa ki te gen yon
⁴⁴ mwa jouk sa ki pi gran yo. Li jwenn venndemil desanswasantrèz (22.273). Apre sa, Seyè a
⁴⁵ pale ak Moyiz, li di l' konsa: -Pran moun fanmi Levi yo, mete yo apa pou mwen nan plas premye pitit gason moun pèp Izrayèl yo. Epi w'a mete bèt moun Levi yo apa pou mwen tou nan plas premye ti mal bèt moun pèp Izrayèl yo va fè. Konsa, tout moun Levi yo va pou mwen. Se mwen menm ki
⁴⁶ Seyè a. Ou te jwenn te gen plis premye pitit gason nan pèp Izrayèl la pase te gen moun Levi. Te gen desanswasantrèz (273) an plis. Men sa pou yo peye pou sove lavi desanswasantrèz premye
⁴⁷ pitit gason sa yo. Pou yo chak, y'a bay senk pyès ajan, dapre sistèm lajan yo sèvi nan kay Bondye
⁴⁸ a: vin gara pou yon pyès ajan. W'a pran lajan yo peye pou sove lavi sa ki an plis yo, w'a bay
⁴⁹ Arawon ak pitit gason l' yo. Se konsa, Moyiz pran lajan yo te peye pou sove lavi premye pitit
⁵⁰ gason ki te an plis sou kantite moun Levi yo. Li pran mil twasanswasansenk (1.365) pyès lajan nan men premye pitit moun Izrayèl yo, dapre sistèm lajan yo sèvi nan kote ki apa pou Bondye a.
⁵¹ Apre sa, Moyiz pran tout lajan yo te peye pou sove lavi rès premye pitit gason yo, dapre lòd Seyè a te bay la, li bay Arawon ak pitit gason l' yo, jan Seyè a te ba li lòd la.

Chapter 4

¹ ¶ Seyè a pale ak Moyiz ansanm ak Arawon, li di yo konsa: ² -Fè resansman tout pitit gason
³ moun Keyat yo, nan branch fanmi Levi a, dapre fanmi yo, dapre branch fanmi zansèt yo. Pran non tout gason, depi sa ki gen trantan jouk sa ki gen senkantan, tou sa ki gen laj pou fè travay ki
⁴ gen pou fèt nan Tant Randevou a. Men travay pitit gason Keyat yo va fè nan Tant Randevou a,

⁵
 kote yo mete apa nèt pou Seyè a. Lè lè a rive pou pèp la ranmase zafè yo pou yo deplase, Arawon ak pitit gason l' yo va antre nan kay Bondye a, y'a desann rido ki devan Bwat Kontra a, y'a kouvri

⁶
 bwat la ak li. Y'a mete yon premye gwo nap an po bazann sou li, epi y'a kouvri l' ak yon dezyèm

⁷
 nap an twal ble. Apre sa, y'a pase manch pou pote bwat la nan gwo bag yo. Y'a kouvri tab pou

⁸
 pen yo ofri bay Bondye a ak yon dra ble. Y'a mete asyèt, tas, kafetyè ak bòl yo sèvi nan sèvis pou

⁹
 mwen yo sou li. Pen yo ofri bay Seyè a va toujou rete sou li tou. Y'a voye yon dra wouj sou li,

¹⁰
 y'a kouvri tout ak yon nap fèt ak po bazann, epi y'a pase manch pou pote tab la nan gwo bag yo.

¹¹
 Y'a pran yon dra tou ble, y'a kouvri gwo lanp sèt branch lan ak tout ti lanp li yo, pensèt li yo, plat

¹²
 li yo ak veso pou lwil yo. Y'a vlope yo ansanm nan yon nap an po bazann, epi y'a mete l' sou

¹³
 yon branka pou pote l'. Apre sa, y'a mete yon dra ble sou lotèl an lò a, y'a kouvri l' nèt ak yon

¹⁴
 nap an po bazann, epi y'a pase manch pou pote lotèl la nan bag yo. Y'a pran tout bagay yo sèvi

¹⁵
 nan kote ki apa nèt pou Seyè a, y'a mete yo nan yon dra ble, y'a vlope yo nan yon nap an po bazann,

¹⁶
 epi y'a mete yo sou yon branka pou pote yo. Y'a wete sann ki sou lotèl la, epi y'a kouvri lotèl la

¹⁷
 ak yon dra wouj. Y'a pran tout bagay ki mache ak lotèl la: recho, pèl, fouchèt, plat pou resevwa

¹⁸
 sann, y'a mete yo sou lotèl la. Apre sa, y'a kouvri l' ak yon nap an po bazann, epi y'a pase manch

¹⁹
 pou pote lotèl la. Lè lè a va rive pou pèp la leve lamach, lè Arawon ak pitit gason l' yo va fin

²⁰
 kouvri tout mèb ki nan kote ki apa nèt pou Seyè a, ansanm ak tout bagay ki mache ak yo a, se lè

²¹
 sa a gason moun Keyat yo va vin pran mèb yo pou pote yo. Moun Keyat yo pa gen dwa manyen

²²
 bagay yo mete apa nèt pou Seyè a. Si yo fè sa, y'ap mouri. Se tout reskonsablite moun Keyat yo

²³
 sa, lè y'ap deplase Tant Randevou a. Eleaza, pitit gason Arawon, prèt la, va reskonsab kontwole

²⁴
 lwil lanp yo, lansan santi bon an, pen yo toujou ofri bay Seyè a ak lwil pou mete moun apa a. Wi,

²⁵
 l'a kontwole tout kay Bondye a nèt ak tou sa ki ladan l', menm kote ki apa nèt pou Seyè a ak bagay

²⁶
 ki ladan l' yo. Seyè a pale ak Moyiz ansanm ak Arawon, li di yo konsa: -Pa kite anyen rive

²⁷
 moun fanmi Keyat yo ki pou ta fè yo disparèt nan mitan moun Levi yo. Men sa pou nou fè pou

²⁸
 yo pa mouri, pou yo ka viv, lè y'ap pwoche bò bagay ki apa nèt pou Seyè a. Arawon ak pitit gason

²⁹
 l' yo va antre anvan epi y'a bay chak moun travay pa yo, y'a di yo sa pou yo pote. Men, moun

³⁰
 Keyat yo pa janm gen dwa antre al gade lè y'ap vlope bagay ki apa nèt pou Seyè a. Si yo fè sa, y'ap

³¹
 mouri. ¶ Seyè a pale ak Moyiz, li di l' konsa: -Fè resansman tout pitit gason moun Gèchon

³²
 yo tou, dapre fanmi yo, dapre branch fanmi zansèt yo. Pran non tout gason, depi sa ki gen trantan

³³
 jouk sa ki gen senkant, tou sa ki gen laj pou fè travay ki gen pou fèt nan Tant Randevou a. Men

25
 travay moun Gèchon yo, men sa pou yo pote: lèz twal ki sèvi pou moute kay Bondye a ansanm ak gwo tant ki kouvri kay Bondye a, kouvèti fèt ak po bazann ki anwo tant lan, seri rido ki fèmèn

26
 pòt Tant Randevou a, rido galeri ki kouvri tant lan ak lotèl la nèt, rido ki fèmèn galeri a, kòd yo ak tout lòt bagay ki mache ak bagay sa yo. Se yo ki pou fè tout travay ki gen rapò ak bagay sa yo.

27
 Moun Gèchon yo va travay sou lòd Arawon ak pitit gason l' yo. Y'a fè tout travay yo, y'a pote

28
 tou sa yo gen pou yo pote. Y'a reskonsab tou sa y'ap pote. Sa se tout reskonsablite moun Gèchon yo nan travay ki gen pou fèt nan Tant Randevou a. Se Itama, pitit gason Arawon, prèt la,

29
 ki va kontwole tou sa y'ap fè. Seyè a di Moyiz ankò: -W'a fè resansman tout pitit gason moun

30
 Merari yo, dapre fanmi yo, dapre branch fanmi zansèt yo. W'a pran non tout gason, depi sa ki gen trantan jouk sa ki gen senkant, tou sa ki gen laj pou fè travay ki gen pou fèt nan Tant Randevou

31
 a. Se yo menm k'ap reskonsab pote ankadreman, travès, poto ak sipò kay Bondye yo, poto, sipò, pikèt ak kòd pou galeri ki fè wonn tant lan, avèk tout bagay ki sèvi ak yo, ansanm ak tout

32
 zouti y'ap bezwen pou fè travay yo. Y'a bay chak moun non bagay la reskonsab pou l' pote a. Se

33
 tout reskonsablite moun Merari yo sa nan travay yo gen pou fè nan Tant Randevou a. Se Itama,

34
 pitit Arawon, prèt la, ki va ba yo sa pou yo fè. ¶ Dapre lòd Seyè a te bay la, Moyiz, Arawon ak chèf pèp Izrayèl yo te fè resansman gason nan fanmi Keyat yo, dapre fanmi yo ak dapre branch

35
 fanmi zansèt yo. Yo pran non tout gason, depi sa ki gen trantan jouk sa ki gen senkant, tou

36
 sa ki gen laj pou fè pati gwoup moun k'ap travay nan Tant Randevou a. Yo jwenn demil sètsansenkant (2.750) gason antou nan tout fanmi Keyat yo. Se moun sa yo ki te la pou fè travay ki gen pou fèt nan Tant Randevou a. Se yo menm Moyiz ak Arawon te konte dapre lòd Seyè a te

37
 bay Moyiz la. Apre sa, yo fè resansman gason nan fanmi Gèchon yo, dapre fanmi yo ak dapre

38
 branch fanmi zansèt yo. Yo pran non tout gason, depi sa ki gen trantan jouk sa ki gen senkant,

39
 tou sa ki gen laj pou fè pati gwoup moun k'ap travay nan Tant Randevou a. Yo jwenn demil

40
 sisantran (2.630) gason nan tout fanmi Gèchon yo. Se moun sa yo ki te la pou fè travay ki gen pou fèt nan Tant Randevou a. Se yo menm Moyiz ak Arawon te konte dapre lòd Seyè a te bay

41
 Moyiz la. Apre sa, yo fè resansman gason nan fanmi Merari yo, dapre fanmi yo ak dapre branch

42
 fanmi zansèt yo. Yo pran non tout gason, depi sa ki gen trantan jouk sa ki gen senkant, tou

43
 sa ki gen laj pou fè pati gwoup moun k'ap travay nan Tant Randevou a. Yo jwenn twamil desan

44
 (3.200) gason nan tout fanmi Merari yo. Se moun sa yo ki te la pou fè travay ki gen pou fèt nan

45

Tant Randevou a. Se yo menm Moyiz ak Arawon te konte dapre lòd Seyè a te bay Moyiz la. ⁴⁶ Se konsa Moyiz ak Arawon ak chèf pèp Izrayèl yo te fè resansman branch fanmi Levi yo, dapre fanmi ⁴⁷ yo ak dapre branch fanmi zansèt yo. Yo te pran non tout gason, depi sa ki gen trantan jouk sa ki gen senkant, tou sa ki gen laj pou fè pati gwoup moun k'ap travay nan Tant Randevou a, osinon ⁴⁸ k'ap pote l' lè y'ap deplase. Yo jwenn antou witmil senksankatreven (8.580) gason. ⁴⁹ Se konsa, dapre lòd Seyè a te bay Moyiz pou pèp la, yo pran non chak gason moun Levi yo ak travay pou yo fè ak sa pou yo pote. Se Seyè a menm ki te bay Moyiz lòd fè resansman sa a.

Chapter 5

¹ ¶ Seyè a pale ak Moyiz, li di l' konsa: ² -Bay moun pèp Izrayèl yo lòd pou yo mete deyò nan kan kote yo rete a tout moun ki gen move maladi po, moun ki gen ekoulman, osinon moun ki pa nan kondisyon pou sèvi Bondye paske yo manyen kadav moun mouri. ³ Wi, se pou nou mete tout moun ki pa nan kondisyon pou sèvi m' yo deyò nan kan an, fanm kou gason, pou yo pa mete kan kote m'ap viv nan mitan pèp mwen an nan kondisyon li pa ka sèvi m'. ⁴ Se konsa, moun pèp Izrayèl yo fè sa Seyè a te di Moyiz la. Yo mete tout moun sa yo deyò nan kan kote yo rete a. ⁵ Seyè a pale ak Moyiz, li di l' konsa: ⁶ -Pale ak moun pèp Izrayèl yo. Lè yon gason osinon yon fanm pa kenbe pawòl l' ak Seyè a, l' al fè yon bagay mal kont yon moun, l' antò. ⁷ Moun ki antò a va rekonèt devan tout moun li te fè yon bagay mal, epi li va renmèt tout sa l' te pran an bay moun li te fè tò a plis vin ⁸ pou san (20%) lavalè. Men, si moun li te fè tò a mouri san li pa kite yon fanmi pre ki pou resevwa sa y'ap renmèt l' a, y'a pran sa l'ap renmèt la, y'a ofri l' bay Seyè a pou prèt yo. Apre sa, moun lan ⁹ ap toujou gen pou l' ofri bay Bondye yon belye mouton pou repare sa l' te fè ki mal la. Tout ofrann ¹⁰ moun Izrayèl yo mete apa pou Seyè a va rete pou prèt y' al jwenn pou fè ofrann lan. Tout ofrann yon moun pote bay prèt la va rete pou prèt la. Tou sa yon moun pote renmèt va rete pou prèt la tou. ¹¹ ¶ Seyè a pale ak Moyiz, li di l' konsa: ¹² -Pale ak moun pèp Izrayèl yo. W'a di yo pou mwen: ¹³ Sipoze madanm yon nonm lage kò l' nan dezòd, epi l'ap twonpe mari l', si li kouche ak yon lòt gason san mari l' pa konn sa, si li te kache kò l' pandan li t'ap fè bagay ki mete l' nan kondisyon pou li pa ka fè sèvis pou Bondye a, kifè pa gen temwen ki pou pale kont li, ni yo pa t' kenbe l' nan ¹⁴ men, osinon si yon mari vin sispèk madanm li nan dezòd, kifè madanm lan pa nan kondisyon pou l' fè sèvis pou Bondye, kit madanm lan fè l' vre, kit li pa fè l', ¹⁵ nonm lan va mennen madanm

lan bay prèt la, epi l'a pote ofrann madanm lan gen pou fè nan ka sa a: se va de liv farin lòj. Li p'ap bezwen vide lwil sou li, ni li p'ap bezwen mete lansan sou li, paske se yon ofrann l'ap fè paske li sispèk kichòy, se yon ofrann l'ap fè pou l' ka konn verite a. ¹⁶ Apre sa, prèt la va fè madanm lan pwoche vin kanpe devan lotèl Seyè a. ¹⁷ Prèt la va pran ti gout dlo nan kivèt la, l'a mete l' nan yon veso fèt an fè, l'a pran yon priz pousyè tè nan Tant Randevou a, l'a mete l' nan dlo a. ¹⁸ Lèfini, l'a fè madanm lan kanpe devan lotèl Seyè a, l'a wete twal ki sou tèt madanm lan, epi l'a mete ofrann farin lan nan de pla men l' yo. Prèt la menm va kenbe nan men l' veso ki gen dlo anmè a, dlo ki bay madichon an. ¹⁹ Prèt la va mande madanm lan pou li sèmante. L'a di l' konsa: Si ou pa kouche avèk okenn lòt gason pase avèk mari ou, si ou pa lage kò ou nan dezòd ki pou ta mete ou nan kondisyon pou ou pa ka fè sèvis pou Bondye, ou mèt bwè dlo anmè sa a, dlo ki bay madichon an, anyen p'ap rive ou. ²⁰ Men, si ou te lage kò ou nan dezòd vre, si ou pa nan kondisyon pou ou fè sèvis pou Bondye, paske ou te kouche ak yon gason ki pa mari ou, ²¹ se pou Seyè a fè tout moun pran non ou pou bay madichon. Se pou l' fè ou pa ka janm fè pitit. Se pou vant ou anfle. ²² Se pou dlo anmè ki bay madichon an antre nan vant ou pou fè l' anfle, pou l' fè ou pa ka janm fè pitit. Madanm lan va reponn: -Mwen dakò. Se pou Seyè a fè m' sa vre, si m' antò! ²³ Lè sa a, prèt la va ekri sèman an yon kote, epi l'a lave kote li te ekri a ak dlo anmè a pou efase sa l' te ekri a. ²⁴ Apre sa, l'a fè madanm lan bwè dlo anmè ki bay madichon an, pou dlo a pase nan kò l' ba li gwo doulè nan vant. ²⁵ Prèt la va pran ofrann farin lan nan men madanm lan, l'a balanse l' devan Seyè a tankou yon ofrann, epi l'a mete l' sou lotèl la. ²⁶ Apre sa, l'a pran yon ponyen nan farin lan, l'a ofri l' bay Bondye, l'a boule l' sou lotèl la. Se konsa l'a mete tout farin lan nèt apa pou Seyè a. Apre sa, l'a fè fanm lan bwè dlo a. ²⁷ Si fanm lan te antò vre, si li te twonpe mari l', dlo a va desann nan kò l', l'a ba li gwo doulè. Vant li va anfle, li p'ap janm ka fè pitit ankò, epi non l' va sèvi pou bay madichon. ²⁸ Men, si fanm lan inonsan, si li te nan kondisyon pou fè sèvis Bondye, anyen p'ap rive l', l'ap toujou ka fè pitit. ²⁹ Se regleman sa a pou yo swiv lè yon fanm pran gason sou mari l', lè li lage kò l' nan dezòd pou l' fè sa li pa t' dwe fè, ³⁰ osinon lè yon nonm sispèk madanm l' ap twonpe l'. L'a mennen madanm lan devan lotèl Seyè a, epi prèt la va fè sèvis sa a pou madanm lan. ³¹ Mari a p'ap reskonsab anyen ki ka rive madanm lan. Men madanm lan, si l' antò, va pote chay peche l' la.

Chapter 6

¹ ¶ Seyè a pale ak Moyiz, li di l' konsa: ² -Pale ak moun pèp Izrayèl yo, w'a di yo: Lè yon gason
osinon yon fanm fè yon ve espesyal, ve nazareyen yo, pou li viv apa nèt pou Seyè a, ³ se pou l' rete
san li pa bwè diven ni okenn bweson ki gen alkòl ladan l'. Ni li p'ap bwè vinèg ki fèt ak diven ni
okenn lòt bweson fèmante, ni li p'ap bwè ji rezen. Ata rezen fre osinon rezen chèch li p'ap ka manje.
⁴ Pandan tout tan l'ap viv apa pou Bondye tankou yon nazareyen an, li pa gen dwa manje anyen ki
soti nan pye rezen, pa menm grenn rezen an ak po a. ⁵ Pandan tout tan li fè ve pou l' viv apa pou
Bondye tankou yon nazareyen an, li pa gen dwa koupe cheve nan tèt li, ni fè labab. Se pou l' kenbe
ve a pandan tout tan l'ap viv apa nèt pou Bondye a, jouk lè tan ve a bout. Se pou l' kite cheve nan
tèt li pouse byen long san li pa janm koupe yo. ⁶ Pandan tout tan l'ap viv apa pou Bondye a, piga
li janm pwoche bò yon kadav moun mouri, ⁷ pa menm kadav papa l', osinon kadav manman l',
kadav frè l', osinon kadav sè li. Li pa fèt pou li pwoche bò kadav moun mouri pou li pa mete tèt li
nan kondisyon pou l' pa ka sèvi Bondye, paske avèk cheve ki nan tèt l' a, sa vle di l'ap viv apa nèt
pou Bondye. ⁸ Pandan tout tan l'ap viv apa pou Bondye a, se pou l' rete apa nèt pou Bondye. ⁹ Si
yon moun rete konsa, li tonbe li mouri devan yon nazareyen, devan yon moun ki t'ap viv apa nèt
pou Seyè a san koupe cheve nan tèt li, nazareyen an ap twouve l' nan kondisyon pou l' pa ka sèvi
Bondye ankò. Se pou l' tann sèt jou anvan l'a nan kondisyon pou l' ka fè sèvis Bondye ankò. Jou
sa a, l'a koupe tout cheve nan tèt li. ¹⁰ Sou wityèm jou a, l'a pran de toutrèl osinon de pijon, l'a pote
yo bay prèt la devan pòt Tant Randevou a. ¹¹ Prèt la va ofri yo bay Seyè a, yonn pou repare sa li
te fè ki mal la, lòt la pou yo boule sou lotèl la. Se konsa l'a ofri bèt pou yo touye pou peche moun
lan fè a akòz kontak li te gen avèk kadav moun mouri a. ¹² Nonm lan va refè ve li te fè pou l' viv
apa nèt pou Bondye a. Tou sa li te fè anvan an pa vo anyen ankò, paske ve li te fè a gate. Epi l'a
pote yon ti mouton ki poko gen ennan pou yo ofri pou repare sa li te fè ki mal la. ¹³ Men sèvis yon
nazareyen va fè lè tan pou l' kenbe ve l' te fè a bout. Y'a mennen l' devan pòt Tant Randevou a.
¹⁴ L'a ofri twa bèt ki san okenn enfimite bay Seyè a: yon ti belye mouton ki poko gen ennan, yon
ti fenmèl mouton ki poko gen ennan ak yon gwo belye mouton. Ti belye mouton an va sèvi ofrann
pou boule nèt pou Seyè a, ti fenmèl mouton va sèvi ofrann pou wete peche, ak gwo belye mouton
an va sèvi ofrann pou di Bondye mèsì. ¹⁵ L'a ofri tou yon panyen pen san ledven: pen gwo mit fèt
avèk farin frans melanje ak lwil oliv ak ti pen plat ak lwil pase sou yo, ansanm ak ofrann grenn
jaden ak ofrann diven ki mache ak yo. ¹⁶ Prèt la va ofri yo pou li devan lotèl Seyè a. L'a fè sèvis
pou repare sa moun lan te fè ki mal la, epi l'a boule ofrann l' a nan dife. ¹⁷ L'a touye belye mouton
an, l'a ofri l' pou di Bondye mèsì ansanm ak panyen pen san ledven an. Lèfini, l'a fè ofrann grenn
jaden ak ofrann diven ki mache ak yo a. ¹⁸ Lè sa a, nazareyen an va koupe tout cheve nan tèt li

devan pòt Tant Randevou a, l'a pran cheve yo, l'a mete yo nan dife kote ofrann pou di Bondye mès
¹⁹
 a ap boule. ¹⁹ Apre nazareyen an fin fè sa, prèt la va pran jigo mouton yo te kwit la, yon pen gwo
²⁰
 mit ak yon ti pen plat nan panyen an, l'a mete tou sa nan pla men nazareyen an. ²⁰ Lèfini, prèt la
 va balanse yo tankou yon ofrann devan Seyè a: pòsyon sa yo va yon bagay yo mete apa pou Bondye,
 y'a rete pou prèt la anplis vyann pwatrin lan ak jigo ki te pou li deja a. Apre sa, nazareyen an gen
²¹
 dwa bwè diven. ²¹ Se tout regleman yo sa pou moun ki fè ve nazareyen yo swiv. Y'a fè ofrann yo
 bay Seyè a dapre ve yo te fè pou yo viv apa nèt pou Seyè a. Men, si yon moun pwomèt pou li ofri
²²
 lòt bagay anplis sa yo mande l' la a, se pou l' fè tou sa li te pwomèt pou l' fè a. ¶ Seyè a di Moyiz
²³
 konsa: ²³ -Pale ak Arawon ansanm ak pitit gason l' yo. W'a di yo men sa pou nou di lè n'ap beni
 pèp Izrayèl la: ²⁴ Se pou Seyè a beni nou, se pou l' pran swen nou. ²⁵ Se pou Seyè a fè nou santi
²⁶
 li la avèk nou, se pou l' gen pitye pou nou. ²⁶ Se pou Seyè a fè nou wè jan li renmen nou, se pou
²⁷
 l' ban nou kè poze. ²⁷ Se konsa y'a nonmen non m', y'a lapriyè nan pye m' pou pèp Izrayèl la, epi
 m'a beni yo.

Chapter 7

¹
 ¶ Jou Moyiz te fin moute kay Bondye a, li vide lwil sou li pou mete l' apa pou Bondye, li fè
 sèvis pou mete l' apa pou Bondye ansanm ak tout bagay ki mache avè l' nan tant lan, lotèl la ak tout
²
 bagay ki sèvi sou lotèl la. ² Apre sa, chèf fanmi moun Izrayèl yo, chèf douz branch fanmi pèp
³
 Izrayèl la, vin pote ofrann yo. Se chèf sa yo ki te reskonsab fè resansman an. ³ Men sa yo te ofri
 bay Seyè a: sis kabwa ak douz towò bèf, ki vle di yon kabwa pou chak de chèf ak yon bèf pou chak
⁴
 chèf. Yo mennen yo devan kay Bondye a epi yo ofri yo bay Bondye. ⁴ Lè sa a, Seyè a di Moyiz
⁵
 konsa: ⁵ -Ou mèt asepte kado sa yo nan men yo. W'a sèvi ak yo nan travay ki gen pou fèt nan Tant
 Randevou a. W'a bay moun fanmi Levi yo kabwa yo, dapre travay ki sou kont yo. ⁶ Se konsa,
⁷
 Moyiz pran kabwa yo ak bèf yo, li bay moun Levi yo. ⁷ Li bay moun fanmi Gèchon yo de kabwa
⁸
 ak kat bèf, dapre travay li konnen ki sou kont yo. ⁸ Li bay moun fanmi Merari yo kat kabwa ak wit
 bèf, dapre travay li konnen ki sou kont yo, travay pou yo fè sou lòd Itama, pitit Arawon, prèt la.
⁹
⁹ Men li pa bay noun Keyat yo anyen, paske se sou zepòl yo pou yo pote tout bagay ki nan kote ki

10
 apa nèt pou Bondye a. ¶ Chèf yo te fè lòt ofrann pou lotèl la, jou yo t'ap vide lwil sou li pou
 mete l' apa pou sèvis Bondye a. Yo mete ofrann yo devan lotèl la. 11
 Seyè a di Moyiz konsa: -Chèf
 yo va pote ofrann yo pou sèvis y'ap fè pou mete lotèl la apa pou mwen. Y'a vini yonn apre lòt, yonn
 12
 chak jou. Chèf yo vini vre, yo fè ofrann yo yonn apre lòt. Premye jou a, se te tou pa Nakchon,
 13
 pitit gason Aminadab la, chèf branch fanmi Jida a. Men sa li te ofri: yon bòl an ajan ki peze twa
 liv enka, yon plat an ajan ki peze yon liv twaka, dapre sistèm yo sèvi nan tanp lan. Ni bòl la ni plat
 14
 la te plen farin frans melanje ak lwil ki te sèvi pou ofrann grenn jaden yo. Li te ofri tou yon kiyè
 15
 an lò, ki peze yon ka liv, plen lansan, yon jenn ti towò bèf, yon belye mouton ak yon ti mouton
 ki poko gen ennan, tou sa pou yo boule nèt pou Seyè a. 16
 Li te ofri ankò yon bouk pou yo touye
 17
 pou repare sa yo fè ki mal, de towò, senk belye, senk bouk, senk ti mouton ki poko gen ennan
 pou ofrann pou di Bondye mèsi. Se ofrann sa a Nakchon, pitit gason Anminadab la, te ofri bay
 18
 Seyè a. Dezyèm jou a, se te tou pa Netanèl, pitit gason Zwa a, chèf branch fanmi Isaka a. 19
 Li
 ofri menm bagay ak Nakchon. 20
 Li ofri menm bagay ak Nakchon. 21
 Li ofri menm bagay ak
 Nakchon. 22
 Li ofri menm bagay ak Nakchon. 23
 Li ofri menm bagay ak Nakchon. 24
 Twazyèm
 25
 jou a, se te tou pa Eliyab, pitit gason Elon an, chèf branch fanmi Zabilon an. Li ofri menm bagay
 ak Nakchon. 26
 Li ofri menm bagay ak Nakchon. 27
 Li ofri menm bagay ak Nakchon. 28
 Li ofri
 menm bagay ak Nakchon. 29
 Li ofri menm bagay ak Nakchon. 30
 Katriyèm jou a, se te pou pa
 31
 Elizou, pitit gason Chedeyou a, chèf branch fanmi Woubenn lan. Li ofri menm bagay ak Nakchon.
 32
 Li ofri menm bagay ak Nakchon. 33
 Li ofri menm bagay ak Nakchon. 34
 Li ofri menm bagay
 ak Nakchon. 35
 Li ofri menm bagay ak Nakchon. 36
 Senkyèm jou a, se te tou pa Cheloumyèl, pitit
 gason Sourichadayi a, chèf branch fanmi Simeyon an. 37
 Li ofri menm bagay ak Nakchon. 38
 Li
 ofri menm bagay ak Nakchon. 39
 Li ofri menm bagay ak Nakchon. 40
 Li ofri menm bagay ak
 Nakchon. 41
 Li ofri menm bagay ak Nakchon. 42
 Sizyèm jou a, se te tou pa Elyasaf, pitit gason
 Dewèl la, chèf branch fanmi Gad la. 43
 Li ofri menm bagay ak Nakchon. 44
 Li ofri menm bagay
 ak Nakchon. 45
 Li ofri menm bagay ak Nakchon. 46
 Li ofri menm bagay ak Nakchon. 47
 Li ofri
 menm bagay ak Nakchon. 48
 Setyèm jou a, se te tou pa Elichama, pitit gason Amiyoud la, chèf

49 branch fanmi Efrayim lan. Li ofri menm bagay ak Nakchon. 50 Li ofri menm bagay ak Nakchon.
 51 Li ofri menm bagay ak Nakchon. 52 Li ofri menm bagay ak Nakchon. 53 Li ofri menm bagay
 54 ak Nakchon. Uityèm jou a, se te tou pa Gamliyèl, pitit gason Pedachou a, chèf branch fanmi
 55 Manase a. Li ofri menm bagay ak Nakchon. 56 Li ofri menm bagay ak Nakchon. 57 Li ofri
 58 menm bagay ak Nakchon. Li ofri menm bagay ak Nakchon. 59 Li ofri menm bagay ak Nakchon.
 60 Nevyèm jou a, se te tou pa Abidan, pitit gason Gideyoni an, chèf branch fanmi Benjamen an.
 61 Li ofri menm bagay ak Nakchon. 62 Li ofri menm bagay ak Nakchon. 63 Li ofri menm bagay
 64 ak Nakchon. Li ofri menm bagay ak Nakchon. 65 Li ofri menm bagay ak Nakchon. 66 Dizyèm
 67 jou a, se te tou pa Ayezè, pitit gason Amichadayi a, chèf branch fanmi Dann lan. Li ofri menm
 68 bagay ak Nakchon. Li ofri menm bagay ak Nakchon. 69 Li ofri menm bagay ak Nakchon. Li
 70 ofri menm bagay ak Nakchon. 71 Li ofri menm bagay ak Nakchon. 72 Onzyèm jou a, se te tou pa
 73 Pagiyèl, pitit gason Okran an, chèf branch fanmi Asè a. Li ofri menm bagay ak Nakchon. Li
 74 ofri menm bagay ak Nakchon. 75 Li ofri menm bagay ak Nakchon. 76 Li ofri menm bagay ak
 77 Nakchon. Li ofri menm bagay ak Nakchon. 78 Douzyèm jou a, se te tou pa Ayira, pitit gason
 79 Enan an, chèf branch fanmi Neftali a. Li ofri menm bagay ak Nakchon. 80 Li ofri menm bagay
 81 ak Nakchon. Li ofri menm bagay ak Nakchon. 82 Li ofri menm bagay ak Nakchon. 83 Li ofri
 84 menm bagay ak Nakchon. Men ofrann tout chèf yo te pote pou lotèl la, jou yo t'ap vide lwil sou
 85 li pou mete l'apa pou sèvis Bondye a: douz bòl an ajan, douz plat an ajan, douz kiyè an lò. Chak
 86 bòl an ajan te peze twa liv enka, chak plat an ajan te peze yon liv twaka. Sa te fè antou swasant liv
 87 ajan, dapre sistèm yo sèvi nan tanp lan. Chak kiyè an lò pou lansan an te peze yon ka liv, dapre
 88 sistèm pèz yo sèvi nan kay Bondye a. Sa te fè antou pou douz kiyè yo twa liv lò. Men kantite
 89 bèt yo te ofri antou pou boule nèt pou Seyè a ansanm ak ofrann grenn jaden ki mache ak yo: douz
 towò, douz belye, douz ti mouton ki poko gen ennan. Yo te bay douz bouk tou pou yo touye pou
 repare sa yo fè ki mal. Men kantite bèt yo te ofri an total pou di Bondye mès: vennkat jenn ti
 towò, swasant belye, swasant bouk ak swasant ti mouton ki poko gen ennan. Se ofrann sa a yo te
 fè pou mete lotèl la apa nèt pou sèvis Seyè a, apre yo te fin vide lwil sou li. Chak fwa Moyiz te

antre nan Tant Randevou a pou l' pale ak Seyè a, li te tandè vwa Seyè a ki t'ap pale avè l' anwo kouvèti espesyal ki sou Bwat Kontra a, nan mitan de zanj cheriben yo.

Chapter 8

¹ ¶ Seyè a pale ak Moyiz, li di l' konsa: ² -Pale ak Arawon. W'a di l' konsa: Lè l'ap fè moute sèt ti lanp yo sou pye gwo lanp sèt branch lan, ranje yo yon jan pou yo klere sou devan gwo lanp sèt branch lan. ³ Arawon swiv lòd Seyè a te bay Moyiz la: li fè moute ti lanp yo pou yo ka klere sou devan gwo lanp sèt branch lan. ⁴ Men ki jan gwo lanp lan te fèt: tout kò a nèt te fèt ak pi bon lò ki genyen. Yo te fè depi pye gwo lanp lan jouk flè yo nan yon sèl gwo moso lò, dapre modèl Seyè a te fè Moyiz wè nan vizyon an. ⁵ ¶ Seyè a pale ak Mwiz, li di l' konsa: ⁶ -Wete moun Levi yo nan mitan rès pèp Izrayèl la. Mete yo nan kondisyon pou yo ka fè sèvis pou mwen. ⁷ Men ki jan w'a fè l': W'a pran nan dlo pou wete peche a, w'a voye l' sou yo. Apre sa, y'a koupe cheve ak pwal sou tout kò yo nèt, epi y'a lave rad ki sou yo. Se konsa y'a nan kondisyon pou fè sèvis pou mwen. ⁸ Apre sa, moun Levi yo va pran yon jenn ti towò ansanm ak ofrann grenn jaden ki pou mache avè l' la, ki vle di ti gout farin frans melanje ak lwil. Ou menm, w'a pran yon dezyèm ti towò tou jenn pou ou touye pou repare sa yo fè ki mal. ⁹ Apre sa, w'a fè moun Levi yo pwoche devan pòt Tant Randevou a, epi w'a fè tout moun pèp Izrayèl yo sanble. ¹⁰ Y'a poze men yo sou tèt moun Levi yo. ¹¹ Lèfini, Arawon va pran moun Levi yo, l'a vire yo adwat, l'a vire yo agoch devan mwen menm, Seyè a, tankou yon ofrann espesyal moun pèp Izrayèl yo ap fè m' pou moun Levi yo ka fè sèvis mwen. ¹² Apre sa, moun Levi yo va poze men yo sou tèt ti towò bèf yo, w'a ofri yonn pou mande padon pou peche yo, w'a ofri lòt la pou yo boule nèt pou mwen. Se konsa y'a fè sèvis pou mande m' gras pou moun Levi yo. ¹³ Mete moun Levi yo apa tankou yon kado espesyal moun yo fè m'. Mete yo sou zòd Arawon ak pitit gason l' yo. ¹⁴ W'a wete moun Levi yo nan mitan rès pèp Izrayèl la, konsa moun Levi yo va pou mwen nèt ale. ¹⁵ Lè w'a fin mete moun Levi yo nan kondisyon pou fè sèvis pou mwen, lè w'a fin vire yo adwat agoch devan m', tankou yon kado espesyal moun yo fè m', y'a gen dwa pwoche vin fè travay yo nan Tant Randevou a. ¹⁶ N'a wete yo nan mitan rès pèp Izrayèl la, n'a fè m' kado yo nèt. Mwen va pran yo pou mwen nan plas tout premye pitit gason moun pèp Izrayèl yo. ¹⁷ Paske, tout premye pitit gason moun pèp Izrayèl yo ak tout premye ti mal bèt yo fè se pou mwen yo ye. Depi jou mwen te touye tout premye pitit moun peyi Lejip yo, wi

¹⁸
 depi jou sa a mwen mete premye pitit nou yo apa pou mwen. Koulye a, mwen pran moun Levi
¹⁹
 yo nan plas premye pitit moun pèp Izrayèl yo. Mwen pran moun Levi yo tankou yon kado moun
 yo fè m', mwen renmèt yo nan men Arawon ak pitit gason l' yo pou yo fè travay moun Izrayèl yo
 gen pou yo fè nan Tant Randevou a, pou mande Bondye gras pou pèp la. Konsa, okenn malè p'ap
 rive tonbe sou pèp la paske yo p'ap janm bezwen pwoche twò pre kote ki apa nèt pou mwen nan
²⁰
 tanp lan. Se konsa, Moyiz, Arawon ak tout pèp Izrayèl la mete moun Levi yo apa nèt pou Seyè
²¹
 a, jan li te bay Moyiz lòd la. Wi, yo te fè tou sa pou yo te fè pou moun Levi yo. Moun Levi yo
 fè sèvis pou peye pou tou sa yo te fè ki mal, yo lave rad ki sou yo. Arawon mete yo apa devan Seyè
 a, li vire yo adwat agoch devan Seyè a tankou yon kado espesyal pou Bondye, epi li fè sèvis pou
²²
 mande gras pou yo te ka nan kondisyon sèvi Bondye. Apre sa, moun Levi yo antre al fè travay
 yo nan Tant Randevou a sou lòd Arawon ak pitit gason l' yo. Se konsa pèp la te fè pou moun Levi
²³ ²⁴
 yo tou sa Seyè a te bay Moyiz lòd fè a. Seyè a pale ak Moyiz ankò, li di l' konsa: -Sa mwen
 pral di ou la a, se pou moun Levi yo: Depi yo rive laj vennsenkan y'a fè pati gwoup moun k'ap
²⁵
 travay nan Tant Randevou a. Lè y'a gen senkant, y'a pran retrèt yo, yo p'ap reskonsab okenn
²⁶
 travay ankò nan tant lan. Men, y'a gen dwa ede moun Levi parèy yo nan nenpòt travay y'ap fè
 nan Tant Randevou a. Men yo menm poutèt pa yo, yo p'ap reskonsab okenn travay ankò. Se konsa
 w'a bay moun Levi yo travay pou yo fè.

Chapter 9

¹
 ¶ Nan premye mwa dezyèm lanne apre yo te soti kite peyi Lejip la, Seyè a pale ak Moyiz nan
²
 dezè Sinayi a, li di l' konsa: -Se pou tout moun pèp Izrayèl yo fete fèt delivrans lan dat mwen te
³
 di yo fete l' la. Katòzyèm jou premye mwa a, lè solèy fin kouche, n'a fete fèt la dapre tout lòd ak
⁴ ⁵
 regleman mwen te ban nou pou sa. Moyiz di pèp Izrayèl la pou yo fete fèt delivrans lan. Epi
 yo fete fèt la nan aswè katòzyèm jou premye mwa a, nan dezè Sinayi a. Pèp la fè tout bagay jan
⁶
 Seyè a te bay Moyiz lòd fè a. Men, vwala te gen kèk moun ki pa t' nan kondisyon pou fè sèvis
 pou Bondye, paske yo te manyen kadav yon moun mouri. Yo pa t' kapab fete fèt delivrans lan jou
⁷
 sa a. Yo leve, y' al jwenn Moyiz ak Arawon. Yo di yo: -Nou pa nan kondisyon pou nou fè sèvis
 pou Bondye, paske nou te manyen yon kadav moun mouri. Men, poukisa nou pa ta ka pote ofrann
⁸
 nou yo bay Seyè a jou sa a, ansanm ak tout moun pèp Izrayèl yo? Moyiz reponn yo: -Rete tann

9
 jouk Seyè a va ban m' lòd sa pou m' di nou. Seyè a pale ak Moyiz, li di l' konsa: 10 -Pale ak moun
 pèp Izrayèl yo, w'a di yo pou mwen: Lè yonn nan nou, osinon yonn nan pitit pitit nou yo, twouve
 li pa ta nan kondisyon pou fè sèvis pou Bondye, paske li te manyen kadav yon moun mouri, ou
 ankò si li ta nan vwayaj byen lwen, l'a toujou ka fete fèt Delivrans lan pou Bondye. 11 Y'a tann
 katòzyèm jou dizyèm mwa a, lè sòlèy fin kouche, pou yo fè l'. Y'a manje manje Delivrans lan avèk
 12
 pen san ledven yo epi ak fèy lanman. Yo p'ap gen dwa kite anyen pou denmen maten, ni yo pa
 fèt pou yo kraze okenn zo bèt yo touye a. Y'a fè tout bagay dapre regleman mwen bay pou fete fèt
 13
 Delivrans lan. Men, si yon moun ki nan kondisyon pou fè sèvis pou mwen epi ki pa nan vwayaj
 ta rive pa fete fèt Delivrans lan, se pou yo mete l' deyò nèt nan mitan fanmi l' yo, paske li pa t' ofri
 14
 ofrann li bay Seyè a dat pou l' te fè l' la. Se pou l' peye pou sa l' fè a. Si gen moun lòt nasyon
 k'ap viv nan mitan nou, li menm tou se pou l' fete fèt Delivrans Seyè a, dapre lòd ak regleman fèt
 la. Va gen yon sèl regleman pou tout moun, ni pou moun natif natal peyi a, ni pou moun lòt nasyon
 15
 yo. ¶ Jou yo t'ap moute Tant Randevou a, yon nwaj vini epi li kouvri tant kote Bwat Kontra a
 16
 ye a. Lè aswè rive, ou ta di yon gwo dife ki te parèt anwo tant lan jouk nan maten. Se konsa sa
 17
 te toujou ye: lajounen nwaj la te kouvri l', lannwit li te klere tankou yon dife. Chak fwa nwaj la
 fè yon leve anwo tant lan, la menm moun pèp Izrayèl yo leve, epi yo pati. Lè li desann poze sou
 18
 tant lan, yo rete, yo moute tant yo la. Konsa, se sou kòmandman Seyè a yo te leve pati, e se sou
 kòmandman li tou yo te rete moute tant yo. Toutotan nwaj la te rete anwo tant lan, yo menm tou,
 19
 yo te rete kote yo te ye a. Si nwaj la te rete anpil jou anwo tant lan san deplase, moun pèp Izrayèl
 20
 yo te swiv lòd Seyè a, yo menm tou yo pa t' deplase. Gen de fwa nwaj la pa t' rete lontan anwo
 tant lan san deplase. Men, se te toujou konsa: se sou kòmandman Seyè a yo te leve pati, se sou
 21
 kòmandman li tou yo te rete moute tant yo. Gen de lè nwaj la rete sèlman pou yon nwit anwo
 tant lan, depi aswè jouk nan denmen maten. Leve nwaj la leve nan maten, yo menm tou yo leve,
 yo pati. Gen de fwa tou, li te rete yon jou yon nwit. Leve nwaj la leve, yo menm tou yo leve, yo
 22
 pati. Toutotan nwaj la te rete la anwo tant lan san deplase, li te mèt de jou, yon mwa, yon lanne,
 23
 yo menm tou, yo pa t' deplase. Men, leve nwaj la leve, yo leve, yo pati. Konsa, yo moute tant
 yo sou lòd Seyè a, yo leve yo pati sou lòd Seyè a: Yo te fè tou sa Seyè a te di Moyiz di yo fè.

Chapter 10

¹ ¶ Seyè a pale ak Moyiz, li di l' konsa: ² -Fè yo fè de twonpèt an ajan pou ou. Y'a pran yon gwo moso ajan, y'a bat l' ak mato pou fè chak twonpèt yo. W'a sèvi ak yo pou avèti moun yo lè pou yo reyini ak lè lè a rive pou yo leve pati. ³ Depi yo kònen twonpèt yo ansanm, se pou tout moun kouri reyini bò kote ou devan pòt Tant Randevou a. ⁴ Si se yon sèl twonpèt yo kònen, se tout chèf branch fanmi yo ase ki va reyini bò kote ou. ⁵ Lè y'a tande twonpèt yo kònen yon premye fwa ansanm ak bri moun k'ap rele, se va siyal pou branch fanmi ki rete bò solèy leve a leve pati. ⁶ Lè y'a tande twonpèt yo kònen yon dezyèm fwa ansanm ak bri moun k'ap rele yo, se va siyal pou branch fanmi ki rete bò sid la leve pati. ⁷ Men lè y'ap reyini tout moun yo, y'a kònen twonpèt yo sèlman, san pesonn pa bezwen rele. ⁸ Se prèt yo, pitit gason Arawon yo, ki pou kònen twonpèt yo. Men regleman pou nou swiv tout tan tout tan, de pitit an pitit. ⁹ Lè nan peyi a, nou pral fè lagè kont lènmi ki vin atake nou, n'a kònen twonpèt yo epi n'a pouse rèl pou bay siyal batay la. Mwen menm ¹⁰ Seyè a, Bondye nou an, m'a vin ede nou, m'a sove nou anba men lènmi nou yo. Konsa tou, lè kè nou kontan, lè n'ap fete fèt yo, lè premye jou chak mwa rive avèk lalin nouvèl lan, n'a kònen twonpèt yo tou pandan n'ap fè ofrann pou boule nèt pou Seyè a ak ofrann pou di Bondye mèsè. Lè ¹¹ sa a m'a vin ede nou. Se mwen menm ki Seyè a, Bondye nou an. ¶ Ventyèm jou, dezyèm mwa nan dezyèm lanne depi pèp la te soti kite peyi Lejip, nwaj la rete, li leve anwo Tant Randevou a. ¹² Epi moun pèp Izrayèl yo leve, yo pati, chak fanmi nan pozisyon yo te ba yo a. Yo kite dezè Sinayi a. Apre yon tan, nwaj la rete nan dezè Paran an. ¹³ Se konsa yo konmanse vwayaje ankò sou kòmandman Seyè a, jan li te di Moyiz di yo sa pou l' a. ¹⁴ Premye moun ki pati se moun k'ap mache dèyè l'banyè fanmi Jida a, chak divizyon apa. Alatèt divizyon branch fanmi Jida yo, se te Nakchon, pitit gason Aminadab la. ¹⁵ Se Netanèl, pitit gason Swa a, ki te alatèt divizyon branch fanmi Isaka a. ¹⁶ Epi se Eliyab, pitit gason Elon an, ki te alatèt divizyon branch fanmi Zabilon an. ¹⁷ Apre sa, yo demoute tant lan, epi moun Gèchon yo ak moun Merari yo ki la pou pote tant lan pati. ¹⁸ Apre yo, moun k'ap mache dèyè l'banyè fanmi Woubenn lan vini, chak divizyon apa. Alatèt divizyon branch fanmi Woubenn lan, se te Elizou, pitit gason Chedeyou a. ¹⁹ Se Cheloumyèl, pitit gason Sourichadayi a, ki te alatèt divizyon branch fanmi Simeyon an. ²⁰ Epi se Elyasaf, pitit gason Dewèl la, ki te alatèt branch fanmi Gad la. ²¹ Apre yo, se te moun Keyat yo ki reskonsab pou pote tout bagay ki apa nèt pou Bondye yo. Tan pou yo rive kote yo pral rete a, tant lan va gen tan moute

²²
 ankò ap tann yo. Apre yo, moun k'ap mache dèyè l'banyè fanmi Efrayim lan vini, chak divizyon apa. Alatèt divizyon branch fanmi Efrayim lan, se Elichama, pitit gason Amiyou a, ki t'ap mache.

²³ Se Gamaliyèl, pitit gason Pedachou a, ki te alatèt divizyon branch fanmi Manase a. ²⁴ Epi se

²⁵
 Abidan, pitit gason Gideyoni an, ki te alatèt divizyon branch fanmi Benjamen an. Apre yo, moun k'ap mache dèyè l'banyè fanmi Dann lan vini, chak divizyon apa. Se yo k'ap pwoteje tout pèp la pa dèyè nèt. Alatèt divizyon branch fanmi Dann lan se Ayezè, pitit gason Amichadayi a, ki t'ap

²⁶ mache. ²⁷ Se Pagiyèl, pitit gason Okran an, ki te alatèt divizyon branch fanmi Asè a. Epi se

²⁸
 Ayira, pitit gason Enan an, ki te alatèt divizyon branch fanmi Neftali a. Men nan ki lòd moun

²⁹
 pèp Izrayèl yo t'ap mache, chak divizyon nan pozisyon yo, lè yo leve pou yo pati. ¶ Moyiz rele bòfrè l' a, Obab, pitit gason Ragèl, moun peyi Madyan an, li di l' konsa: -Nou pral pati la a pou n' ale nan peyi Seyè a te di l'ap ban nou an. Seyè a te pwomèt li t'ap fè anpil byen pou nou. Vini avèk

³⁰
 nou non! N'a pataje tout byen nou yo avè ou. Obab reponn li: -Non. M'ap tounen nan peyi m'

³¹
 al jwenn fanmi m'. Moyiz di l' konsa: -Tanpri, pa kite nou pou kont nou. Se ou ki konnen dènye

³²
 kote nou ka moute tant nou yo nan dezè a. W'a sèvi nou gid. Si ou vini ak nou, w'a gen pa ou

³³
 nan tout byen Seyè a ap ban nou. Se konsa, pèp la leve li pati, li kite mòn Sinayi a, mòn Seyè a, yo mache twa jou. Epi Bwat Kontra Seyè a pran devan yo tout pou chache yon kote pou yo moute

³⁴
 tant yo. Chak fwa y'ap kite yon kote pou yo ale yon lòt kote, nwaj Seyè a te rete anlè tèt yo nan

³⁵
 syèl la tout lajounen. Chak fwa Bwat Kontra a pati, Moyiz di: -Leve non, Seyè! Gaye lènmi ou

³⁶
 yo! Fè tout moun ki rayi ou yo kouri lè ou parèt! Lè Bwat Kontra a kanpe, Moyiz di: -Tounen non, Seyè! Vin rete nan mitan tout lame moun pèp Izrayèl yo!

Chapter 11

¹
 ¶ Pèp la te konmanse ap plenyen nan zòrèy Seyè a jan zafè yo pa t' bon. Lè Seyè a tandè sa, li fè yon sèl kòlè, li voye dife sou pèp la. Dife a pran nan mitan yo, li boule yon bò nan kan an nèt.

² Pèp la rele Moyiz vin delivre yo. Moyiz lapriyè Seyè a pou yo epi dife a sispann. ³ Se konsa yo

⁴
 rele kote yo te ye a Tabera, paske se la dife Seyè a te pran nan mitan yo a. ¶ Bann moun lòt nasyon ki te la nan mitan pèp Izrayèl la te anvi manje vyann. Pèp la menm te pran plenyen ankò, yo t'ap

⁵
 di: -Ki moun k'ap fè nou jwenn vyann pou nou manje koulè a? Jan nou te konn manje pwason

pou gremesi nan peyi Lejip! Nou chonje kalite bon ti konkonm, melon dlo, powo, zonyon, ak lay nou te konn manje! ⁶ Men koulye a, se deperi n'ap deperi. Nou pa gen anyen pou nou manje, anyen menm pase laman lan ki devan je nou tout tan! ⁷ Laman lan te gen fòm grenn pitimi, li te blan epi ou ta di se gonm arabik. ⁸ Pèp la ale toupatou, li ranmase yo. Apre sa, oubyen li te pase yo nan moulen wòch, oubyen li te pile yo nan pilon pou fè farin. Lèfini, yo kwit li nan chodyè, yo fè gato plat avè l'. Li te gen menm gou avèk pen ki fèt ak lwil oliv. ⁹ Se lannwit laman lan te konn tonbe nan kan an, menm lè ak lawouze. ¹⁰ Moyiz te tande jan pèp la t'ap plenyen, chak moun ak fanmi yo devan papòt tant yo. Seyè a te fache anpil sou moun yo. Sa te fè Moyiz lapenn. ¹¹ Lè sa a, Moyiz di Seyè a konsa: -Poukisa ou ajì mal avè m' konsa? Kisa m' fè ki pa fè ou plezi? Poukisa ou mete tout pèp sa a sou kont mwen? ¹² Eske se mwen ki papa yo? Eske se mwen ki manman yo? Poukisa w'ap mande m' pou mwen pote yo sou lestonmak mwen tankou nouris k'ap bay timoun tete, jouk yo rive nan peyi ou te pwomèt zansèt yo ou t'ap ba yo a? ¹³ Kote pou m' jwenn vyann pou m' bay tout moun sa yo? Y'ap plede plenyen nan zòrèy mwen, y'ap mande m' pou m' ba yo vyann pou yo manje. ¹⁴ Mwen pa kapab reskonsab tout pèp sa a pou kont mwen. Chay la twò lou pou mwen. ¹⁵ Si se konsa w'ap ajì avè m', tanpri, fè m' favè sa a: pito ou tou touye m' fin ak sa, pou m' pa wè m'ap pase tout malè sa a. ¹⁶ ¶ Seyè a di Moyiz konsa: -Sanble swasanndis nan chèf fanmi pèp Izrayèl la, moun ou konnen ki gen otorite sou pèp la, ki konn bout yo. Mennen yo nan Tant Randevou a. Fè yo rete kanpe la avèk ou. ¹⁷ M'ap desann epi m'a pale avè ou. M'a pran ti gout nan lespri mwen te ba ou a, m'a ba yo. Konsa, y'a ede ou pote reskonsablite pèp la, ou p'ap pote chay la pou kont ou ankò. ¹⁸ W'a di pèp la menm: Pran nwit la pou nou pare kò nou pou nou ka fè sèvis pou mwen denmen maten. Epi n'a jwenn vyann pou nou manje. Seyè a te tande jan nou t'ap plenyen nan zòrèy li, jan nou t'ap di nou ta renmen jwenn vyann pou nou manje. Nou te pi bon lè nou te nan peyi Lejip. Koulye a, Seyè a pral ban nou vyann. Se pou nou manje l' ban mwen. ¹⁹ Se pa sèlman yon jou, ni de jou, ni senk jou, ni dis jou, ni vin jou n'a jwenn vyann sa a pou nou manje. ²⁰ Se va pandan tout yon mwa. N'a gen pou nou manje l' jouk l'a soti nan twou nen nou, jouk n'a rebite l', paske nou te vire do bay Bondye ki te la nan mitan nou an, nou t'ap plenyen nan zòrèy li, nou t'ap di nou pa t' dwe janm soti kite peyi Lejip. ²¹ Moyiz di Seyè a: -Se sisanmil (600.000) moun wi ki sou kont mwen. Epi ou di w'ap ba yo vyann kont pou yo manje yon mwa. ²² Kote pou yo jwenn kantite mouton ak bèf pou touye ki pou ta kont pou yo? Si yo ta ka ranmase tout pwason ki nan lanmè, ou kwè li ta ase pou yo? ²³ Seyè a di Moyiz: -Pa gen bagay mwen vle fè mwen pa

ka fè! Talè konsa w'a wè si sa m' di a p'ap rive vre. ²⁴ ¶ Se konsa Moyiz soti, li di pèp la tou sa Seyè a te di l'. Li pran swasanndis nan chèf fanmi pèp Izrayèl la, li mete yo kanpe fè wonn kay ²⁵ Bondye a. Seyè a desann nan yon nwaj, li pale ak Moyiz ankò. Apre sa, li pran ti gout nan lespri li te bay Moyiz la, li bay swasanndis chèf yo. Lè lespri a vin sou yo, yo tonbe pale tankou pwofèt ²⁶ yo sou tout kalite bagay. Apre sa, yo sispann. Te gen de nan chèf fanmi yo te chwazi yo ki te rete nan kan an. Yo pa t' ale nan kay Bondye a. Yonn te rele Eldad, lòt la Medad. Lespri a te desann ²⁷ sou yo tou, yo t'ap pale pawòl Bondye a byen fò nan kan an. Yon jenn gason kouri al di Moyiz ²⁸ men Eldad ak Medad ap pale pawòl Bondye a byen fò nan kan an. Lè sa a Jozye, pitit gason Noun lan, ki te adjwen Moyiz nan tou sa l' t'ap fè depi li te jenn tibway, pran lapawòl, li pale ak ²⁹ Moyiz, li di l' konsa: -Msysè Moyiz, fè yo sispann non! Moyiz reponn li: -Kouman? Ou gen lè w'ap fè jalouzi pou mwen? Pa pito Seyè a te mete lespri l' sou tout pèp la pou yo te ka pale tankou ³⁰ pwofèt! Apre sa, Moyiz tounen nan kan an ansanm ak swasanndis chèf fanmi yo. ³¹ ¶ Apre sa, Seyè a fè yon sèl van soufle sot nan lanmè, li bwote yon bann zòtolan ki vin tonbe toupatou nan kan kote moun yo te rete a ak toutotou kan an. Yon moun ta gen dwa mache tout yon jounen nan nenpòt direksyon anvan pou l' ta kite kote zòtolan yo te tonbe a. Zòtolan yo te fè pil rive twa pye ³² wotè sou tè a. Pèp la pase tout jounen an, tout nwit la, ak tout jounen denmen an ap ranmase zòtolan. Sa ki te ranmase pi piti a te ranmase dis barik pou tèt pa l'. Yo blayi yo atè toupatou nan ³³ kan an pou mete yo cheche. Yo te fèk konmanse manje vyann, lè Seyè a fè kòlè sou pèp la, li ³⁴ lage yon sèl epidemi sou yo pou pini yo. Yo rele kote sa a: Simityè Grangou, paske se la yo te ³⁵ antere tout moun nan pèp la ki t'ap plenyen pou vyann. Apre sa, pèp la kite Simityè Grangou kote yo te ye a, yo pati pou Azewòt kote yo moute kay yo.

Chapter 12

¹ ¶ Moyiz te marye ak yon fanm peyi Etiopi. Miryam ak Arawon t'ap pale Moyiz mal sou sa. ² Yo t'ap di konsa: -Eske se sèlman Moyiz Seyè a te pran pou pale ak pèp la? Eske li pa konn pale ak nou pou pèp la tou? Seyè a tande sa yo t'ap di a. ³ Men Moyiz se yon nonm ki pa t' grandizè. pa ⁴ t' gen pase l' sou latè. ¶ Seyè a rete konsa li pale ak Moyiz, Arawon ak Miryam, li di yo: -Nou ⁵ twa sa yo, soti non. Ale nan Tant Randevou a. Yo twa a ale vre. Seyè a desann nan yon gwo nwaj ki te gen fòm yon poto. Li kanpe nan papòt tant lan, li rele Arawon ak Miryam ki pwoche vin jwenn

⁶ li. Li di yo konsa: -Tande byen sa m'ap di nou la a. Lè gen yon pwofèt nan mitan nou, se nan vizyon mwen fè l' wè mwen, se nan rèv mwen pale avè l'. ⁷ Men, se pa menm bagay la ak Moyiz, sèvitè m' lan. Li se sèl moun mwen fè konfyans nan mitan tout pèp la. ⁸ Mwen pale avè l' aklè, mwen pa ba li parabòl. Mwen fè l' wè mwen. Ki jan nou fè penmèt nou pale Moyiz, sèvitè m' lan, mal? ⁹ Seyè a te fè yon sèl fache sou yo, epi l' ale. ¹⁰ ¶ Nwaj la leve anwo tant lan, l' ale. Menm lè a, yon sèl maladi tonbe sou Miryam: tout po kò l' vin blanch kou koton. Arawon gade Miryam, li wè Miryam te kouvri ak bouton sou tout po li. ¹¹ Arawon di Moyiz konsa: -Tanpri, mèt mwen. Pa kite nou peye pou sa nou fè a. Tèt nou pa t' la! ¹² Tanpri, pa kite Miryam tounen tankou yon tibebe ki fèt tou mouri ak tout mwatye nan kò l' manje. ¹³ Se konsa, Moyiz rele nan pye Bondye, li di l' konsa: -Bondye, tanpri, geri l' non! ¹⁴ Men, Seyè a di Moyiz: -Si se te papa l' ki te krache nan figi l', li t'ap blije pote wont la pandan sèt jou, pa vre? Enben, se pou yo fèmen l' pou kont li pandan sèt jou yon kote andeyò limit kan an. Apre sa, y'a kite l' tounen. ¹⁵ Yo fèmen Miryam pou kont li pandan sèt jou yon kote andeyò limit kan an. Pèp la pa t' leve pati toutotan yo pa t' kite Miryam tounen nan kan an ankò. ¹⁶ Apre sa, pèp la kite Azewòt kote yo te ye a, yo pati al moute tant yo nan dezè Paran an.

Chapter 13

¹ ¶ Seyè a pale ak Moyiz, li di l' konsa: ² -Ou pral chwazi douz nan chèf fanmi pèp Izrayèl yo, yonn pou chak branch fanmi. Ou pral voye yo pou y' al wè ki jan peyi Kanaran an ye, peyi m'ap bay moun Izrayèl yo. ³ Dapre lòd Moyiz te resevwa nan men Seyè a, li pran douz gason ki te chèf fanmi nan pèp Izrayèl la. Antan li te nan dezè Paran an, li voye yo al rekonèt peyi a. ⁴ Men non yo: Pou branch Woubenn lan, se te Chamwa, pitit gason Zakou a. ⁵ Pou branch fanmi Simeyon an, se te Chafa, pitit gason Ori a. ⁶ Pou branch fanmi Jida a, se te Kalèb, pitit gason Jefoune a. ⁷ Pou branch fanmi Isaka a, se te Jigal, pitit gason Jozèf la. ⁸ Pou branch fanmi Efrayim lan, se te Oze, pitit gason Noun lan. ⁹ Pou branch fanmi Benjamen an, se te Palti, pitit gason Rafou a. ¹⁰ Pou branch fanmi Zabylon an, se te Gadiyèl, pitit gason Sodi a. ¹¹ Pou branch fanmi Jozèf la, nan branch Manase a, se te Gadi, pitit gason Souzi a. ¹² Pou branch fanmi Dann lan, se te Amiyèl, pitit gason

¹³ Jemali a. Pou branch fanmi Asè a, se te Setou, pitit gason Mikayèl la. ¹⁴ Pou branch fanmi
 Neftali a, se te Nakbi, pitit gason Wopsi a. ¹⁵ Pou branch fanmi Gad la, se te Geouyèl, pitit gason
 Maki a. ¹⁶ Se te non douz mesye Moyiz te voye al rekonèt peyi Kanaran an. Moyiz te chanje non
 Oze, pitit gason Noun lan, li rele l' Jozye. ¹⁷ Lè Moyiz voye yo ale nan peyi Kanaran an, li di yo:
 -Moute nan peyi a. N'a pase pa Negèv la, n'a pran chemen mòn pou nou. ¹⁸ Ale gade peyi a. Chache
 konnen ki jan li ye, ki kalite moun ki rete ladan l', konbe yo ye, ak ki fòs yo. ¹⁹ Chache konnen si
 tè a se yon bon tè osinon yon move tè, si moun yo rete nan lavil ki gen ranpa pou pwoteje yo osinon
 nan kan anba tant twal. ²⁰ Chache konnen si peyi a rich osinon pòv, si gen anpil pyebwa sou tè a
 ou si pa genyen. Nou pa bezwen pè anyen. Lè n'ap tounen, pote kèk nan fwi ki donnen laba a. Se
²¹ te sezon rezen te konmanse ap mi. ¶ Se konsa mesye yo moute, y' al chache konnen tout bagay
 ki gen nan peyi a, depi dezè Zin ki nan sid peyi a rive jouk Reyòb toupre pas Amat la, nan nò.
²² Yo travèse zòn Negèv la, yo rive lavil Ebwon kote moun Ayiman yo, moun Chechayi yo ak
 moun Talmayi yo rete. Yo tout te fè pati ras moun Anak yo. Ebwon sa a, se yon lavil ki te bati sètan
²³ anvan yo te bati lavil Zoan nan peyi Lejip. Yo rive nan ravin Echkòl, yo koupe yon branch rezen
 ki te gen yon sèl gwo grap rezen nan li. Yo mete l' sou yon gòl pou de moun te ka pote l' sou zepòl
²⁴ yo, si tèlman li te lou. Yo pote grenad ak fig frans tou. Yo rele kote sa a Ravin Echkòl, poutèt
²⁵ gwo grap rezen moun pèp Izrayèl yo te koupe la a. Apre karant jou, lè yo fin vizite toupatou
²⁶ nan peyi a, yo tounen, ¶ yo vin jwenn Moyiz, Arawon ak tout moun pèp Izrayèl yo Kadès, nan
²⁷ dezè Paran an. Yo detaye ba yo tou sa yo te wè, yo moutre yo fwi yo te pote yo. Yo di Moyiz
 konsa: -Nou vizite toupatou nan peyi ou te voye nou al chache konnen an. Se yon peyi ki rich anpil,
²⁸ kote lèt ak siwo myèl koule tankou dlo. Se vre wi. Gade fwi nou jwenn ladan l'. Men, moun ki
 rete nan peyi a gwonèg anpil. Lavil yo gran, yo byen pwoteje. Sa ki pi rèd nou wè yon kalite ras
²⁹ moun gwonèg bèl wotè. Moun Amalèk yo rete nan sid peyi a, nan zòn Negèv la. Moun It yo,
 moun Jebis yo ak moun Amon yo rete nan mòn yo. Moun Kanaran yo rete bò lanmè Mediterane a
³⁰ ak bò larivyè Jouden an. Kalèb fè moun yo sispann bougonnen sou do Moyiz, li di yo konsa:
³¹ -Ann moute koulye a. Ann al pran peyi a pou nou. Pa gen anyen la a nou pa ka fè! Men mesye
 ki te moute ansanm ak Kalèb yo di konsa: -Non. Nou pa ka al atake moun sa yo. Yo pi fò pase nou.
³² Se konsa yo pran pale mal sou peyi yo te al vizite a devan pèp Izrayèl la. Yo t'ap di: -Peyi nou
 ta l' vizite a, peyi nou ta l' chache konnen an, se yon peyi ki pa menm bay kont manje pou moun

k'ap viv sou li yo. Epi, tout moun nou wè la se moun ki wo anpil. ³³ Sa ki pi rèd, nou wè yon kalite gwonèg bèl wotè, moun ras Anak yo. Devan moun sa yo se krebetè nou ye, tèlman nou piti. Se konsa nou te santi nou devan yo.

Chapter 14

¹ ¶ Lè sa a, pèp la pran rele byen fò, yo pase tout nwit la ap kriye san rete. ² Yo tout t'ap bougonnen sou Moyiz ak Arawon. Yo vin di yo konsa: -Pito nou te mouri nan peyi Lejip osinon nan dezè a! ³ Poukisa Seyè a mennen nou nan peyi sa a? Koulye a, yo pral touye nou nan lagè, yo pral pran madanm ak pitit nou yo fè yo tounen esklav. Pa pito nou tounen nan peyi Lejip? ⁴ Yonn t'ap di lòt: -Ann chwazi yon lòt chèf! Ann tounen nan peyi Lejip! ⁵ ¶ Lè Moyiz ak Arawon wè sa, yo tonbe fas atè devan tout pèp la ki te sanble la a. ⁶ Lè sa a, de nan mesye espyon yo, Jozye, pitit gason Noun lan, ak Kalèb, pitit gason Jefoune a, chire rad ki te sou yo sitèlman yo te fache. ⁷ Epi yo di pèp la: -Peyi nou te al vizite a se yon bon bon peyi. ⁸ Si Seyè a vle fè sa pou nou, l'ap fè nou antre nan peyi a, l'ap ban nou li. Se yon peyi ki rich anpil, yon peyi kote lèt ak siwo myèl koule tankou dlo. ⁹ Sèlman, pa kenbe tèt ak Seyè a! Nou pa bezwen pè moun k'ap viv nan peyi sa a. N'ap manje yo tankou kann. Bondye ki t'ap pwoteje yo a kouri mete deyò. Men Seyè a kanpe la avèk nou. Nou pa bezwen pè yo. ¹⁰ Lè sa a, tout pèp la ranmase wòch pou yo kalonnen Jozye ak Kalèb. Men, lamennm pouvwa Bondye a parèt anwo Tant Randevou a, li fè tout pèp la wè l'. ¹¹ ¶ Seyè a di Moyiz konsa: -Kilè pèp sa a va sispann meprize mwen? Kilè y'a soti pou yo fè m' konfyans? ¹² Gade tout bèl bagay mwen te fè pou yo. Malgre sa, yo pa vle kwè m' toujou! ¹³ M'ap voye yon sèl epidemi sou yo, m'ap touye yo tout. M'ap anpeche yo pran posesyon tè ki pou yo a. Men ou menm, m'ap fè ou tounen yon nasyon k'ap pi gwo, k'ap pi fò pase yo. ¹⁴ Men, Moyiz di Seyè a konsa: -Se ou menm ak fòs ponyèt ou ki te fè pèp Izrayèl la soti kite peyi Lejip la. ¹⁵ Lè moun pèyi Lejip yo va vin konnen sa ou pral fè pèp la, y'a rakonte l' bay moun ki rete nan peyi Kanaran yo. Yo menm tou, yo deja konnen se ou menm, Seyè, ki kanpe la nan mitan pèp la, se ou menm ki parèt aklè devan je yo, se nwaj ou, Granmèt, ki rete anwo yo. Se ou menm ki t'ap mache devan yo lajounen nan yon gwo nwaj ki te gen fòm yon poto, lannwit nan yon gwo flanm dife ki te gen fòm yon poto ¹⁶ tou. Koulye a, si ou rete konsa ou touye tout pèp ou a, moun lòt nasyon yo ki te tandè pale ki kalite moun ou ye, yo pral di se kapab ou pa t' kapab mennen pèp la nan peyi ou te fè sèman

17 w'ap ba yo a kifè ou touye yo nan dezè a. Non. Seyè! Se koulye a pou ou fè wè gwo pouvwa ou

18 la, jan ou te pwomèt l' a, lè ou te di: Se mwen menm ki Seyè a, mwen pa an kòlè fasil, mwen p'ap janm sispann renmen nou. M'ap toujou padonnen sa nou fè ki mal ak sa nou te dwe fè nou pa fè. Men, mwen pa nan kase fèy kouvri sa ak pesonn. Si yon moun fè yon bagay mal, m'ap pini pitit li, pitit pitit li, ak pitit pitit pitit li yo pou sa li fè a, jouk sou twazyèm ak katriyèm jenerasyon.

19 Tanpri, jan ou gen bon kè sa a, padonnen sa pèp la fè ki mal la, menm jan ou te pran pasyans ak

20 yo depi yo kite peyi Lejip jouk yo rive isit la. ¶ Seyè a di: -M'ap padonnen yo, jan ou mande m'

21 lan. Men, menm jan ou wè mwen vivan an, menm jan ou wè pouvwa mwen toupatou sou latè,

22 okenn nan moun sa yo p'ap rive viv lontan ase pou yo antre nan peyi a. Yo te wè pouvwa mwen, yo te wè tout bèl bagay mwen te fè nan peyi Lejip ak nan dezè a. Men anpil fwa deja, yo chache

23 wè jouk ki bò mwen ye ak yo, yo pa janm vle koute m' lè m' pale ak yo. Yo p'ap menm wè peyi mwen te sèman mwen t'ap bay zansèt yo a. Yo tout ki vire do ban mwen yo, yo yonn p'ap wè

24 peyi a. Men, paske Kalèb, sèvitè m' lan, pa aji tankou yo, li swiv mwen san gad dèyè, m'ap fè

25 l' antre nan peyi li te al rekonèt la. Pitit pitit li yo va pran peyi a pou yo. Y'a rete nan plenn kote moun Amalèk yo ak moun Kanaran yo rete koulye a. Denmen n'ap fè bak, n'a tounen nan dezè a

26 ankò nan direksyon Lanmè Wouj la. Apre sa, Seyè a pale ak Moyiz ansanm ak Arawon, li di

27 yo konsa: -Kilè bann moun mechan sa yo va sispann bougonnen sou do mwen konsa? Mwen

28 bouke tande jan moun pèp Izrayèl yo ap pale m' mal. Men sa pou ou di yo pou mwen: Se mwen menm menm, Seyè a, ki di sa. Menm jan nou wè m' vivan an, mwen fè sèman sa nou te di k'ap rive

29 nou an, se li k'ap rive nou vre. Y'ap antere kadav nou tout nan dezè a. Nou tout ki t'ap bougonnen sou mwen yo, nou tout yo te konte lè resansman an, nou tout ki gen ventan ak sa ki pi gran yo, nou

30 yonn p'ap antre nan peyi a. Dakò! Mwen te fè sèman mwen t'ap fè nou al rete nan peyi a. Men, nou yonn p'ap gen chans lan, esepite Kalèb, pitit gason Jefoune a, ak Jozye, pitit gason Noun lan.

31 Nou te di pitit pitit nou yo pral tonbe anba men lènmi nou yo. Men, se yo menm m'ap fè antre

32 nan peyi nou menm nou refize al pran an. Men, nou menm y'ap antere kadav nou yo isit nan

33 dezè a. Pitit nou yo pral moute desann nan tout dezè a. Pandan karant lanne, y'a peye pou vire

34 nou te vire do ban mwen an, jouk nou tout nèt n'a fin mouri nan dezè a. Nou menm, n'a peye konsekans peche nou an pandan karant lanne, yon lanne pou chak jou nan karant jou nou te pase

35 ap vizite peyi a. Lè sa a, n'a konnen sa sa vle di lè m' vire do bay moun. Se mwen menm Seyè a ki di sa: Mwen fè sèman se konsa mwen pral aji ak bann moun sa yo ki mete tèt yo ansanm sou

do m'. Yo tout gen pou yo disparèt nan dezè sa a. Wi, se la menm yo tout ap mouri. ³⁶ ¶ Mesye Moyiz te voye al rekonèt peyi a te fè tout pèp la ap bougonnen sou Moyiz avèk move rapò yo te fè sou peyi a, lè yo te tounen an. ³⁷ Se konsa yon sèl maladi tonbe sou mesye sa yo ki te pale peyi a mal konsa. Yo tonbe, yo mouri frèt devan Seyè a. ³⁸ Nan douz mesye ki te al vizite peyi a, se de sèlman ki pa t' mouri: se te Jozye, pitit gason Noun lan, ak Kalèb, pitit gason Jefoune a. ³⁹ Lè Moyiz di moun pèp Izrayèl yo tout pawòl sa yo, sa te fè yo lapenn anpil. ⁴⁰ Nan denmen maten, byen bònè, yo leve pou y' al janbe lòt bò mòn yo pou yo antre nan peyi a. Yo t'ap di: -Men nou! Nou pare pou n' ale kote Seyè a di pou n' ale a. Nou rekonèt sa nou te fè a mal. ⁴¹ Men Moyiz di yo: -Pouki pou n'ap dezobeyi lòd Seyè a ankò? Sa p'ap mache pou nou non, fwa sa a! ⁴² Piga nou moute. Seyè a vire do ban nou, nou pa bezwen ale fè lènmi nou yo bat nou pou gremesi. ⁴³ Lè n'a rive devan moun Amalèk yo ak moun Kanaran yo, nou pral mouri nan batay la. Seyè a p'ap kanpe la avèk nou, paske nou te vire do ba li. ⁴⁴ Pèp la fè tèt di, yo moute moute yo sou mòn yo pou yo seye antre nan peyi a. Men, ni Bwat Kontra Seyè a, ni Moyiz pa deplase kote yo te ye nan kan an. ⁴⁵ Se konsa moun Amalèk yo ak moun Kanaran yo ki te rete nan mòn yo desann, yo bat yo, yo kouri dèyè yo jouk yon kote yo rele Oma.

Chapter 15

¹ ¶ Seyè a pale ak Moyiz ankò, li di l' konsa: ² -Pale ak moun pèp Izrayèl yo, w'a di yo pou mwen: Lè n'a antre nan peyi mwen pral ban nou pou nou rete a, ³ lè n'ap ofri yon towò bèf, osinon yon mouton, oswa yon kabrit pou yo boule nèt nan dife pou Seyè a, tankou yon ofrann ki pou fè Seyè a plezi ak bon sant li, kit se paske nou te fè yon ve, kit se paske nou menm nou te fè lide fè yon ofrann, osinon paske lè fèt n'ap fete pou mwen yo rive, ⁴ wi, lè n'ap fè ofrann konsa pou Seyè a, n'a fè ofrann grenn ki donnen nan jaden pou mache ak yo tou: sèt ti mamit farin frans melanje avèk de boutèy ka plen lwil oliv. ⁵ Lè n'ap fè ofrann pou yo boule nèt pou Seyè a, n'a ofri de boutèy ka plen diven pou chak ti mouton n'ap ofri. ⁶ Lè se yon belye mouton n'ap ofri, se va katòz ti mamit farin frans melanje avèk twa boutèy ka plen lwil oliv n'a ofri pou ofrann grenn ki donnen nan jaden, ⁷ ansanm ak twa boutèy ka diven. Ofrann sa yo, lè yo boule nan dife, y'a fè Seyè a plezi ak bon sant yo. ⁸ Lè se yon jenn towò n'ap ofri pou yo boule nèt nan dife osinon pou yo touye pou Seyè a, kit

9 se paske nou te fè yon ve, kit se pou di Bondye mèsì, se pou nou pote yon ofrann grenn ki donnen
 nan jaden tou: venteyen ti mamit farin frans melanje ak senk ti boutèy ka lwil oliv. 10 Lèfini, n'a
 ofri kat boutèy ka diven avèk li. Ofrann sa a, lè li boule nan dife, l'a fè Seyè a plezi ak bon sant li.
 11 Se sa pou nou bay ansanm ak chak jenn towò, chak belye mouton osinon chak bouk kabrit n'ap
 12 ofri. Pou chak bèt n'ap ofri an plis, n'a ofri kantite grenn jaden ki pou mache ak l' a. 13 Se konsa
 chak moun natif natal peyi Izrayèl la gen pou fè l' lè y'ap ofri yon bèt pou boule nèt pou Seyè a,
 yon ofrann ki pou fè Seyè a plezi ak bon sant li. 14 Lè yon moun lòt nasyon k'ap viv nan mitan nou
 pou yon ti tan, osinon pou tout tan, ap fè yon ofrann bay Bondye, yon ofrann pou yo boule nan dife
 epi ki pou fè Seyè a plezi ak bon sant li, se pou l' swiv menm regleman ak nou. 15 Nan peyi a, se
 va yon sèl regleman pou tout moun, ni pou nou menm ni pou moun lòt nasyon k'ap viv nan mitan
 nou yo, yon sèl regleman pou tout tan, de pitit an pitit: Se va menm bagay la ni pou nou ni pou
 moun lòt nasyon yo devan Seyè a. 16 Se va yon sèl lwa, yon sèl regleman ni pou nou ni pou moun
 lòt nasyon k'ap viv nan mitan nou yo. 17 Apre sa Seyè a pale ak Moyiz, li di l' konsa: 18 -Pale ak
 moun pèp Izrayèl yo. W'a di yo pou mwen: Lè n'a antre nan peyi kote mwen pral mennen nou an,
 19 lè n'ap manje manje peyi a va bay, n'a wete yon pòsyon, n'a mete l' apa pou nou fè Seyè a kado.
 20 Chak lanne, apre rekòt la, n'a pran yon pen nan premye pen fèt ak ble nou fèk rekòlte a, n'a mete
 l' apa pou nou fè Seyè a kado, jan nou fè l' pou grenn ki pase sou glasi. 21 Se pou nou toujou wete
 yon pen nan premye pen nou fè apre rekòt nou yo pou nou fè Seyè a kado. Se va yon lwa pou pitit
 ak pitit pitit nou yo, depi koulye a ak pou tout tan. 22 ¶ Men, si san nou pa fè espere, nou pa swiv
 yonn nan lòd Seyè a te bay Moyiz yo, 23 lòd pou nou te toujou swiv de pitit an pitit depi jou li te
 veye Moyiz pale ak nou an, men sa pou yo fè: 24 Si se tout pèp la ki fè sa l' pa t' dwe fè san li pa
 t' konnen sa l'ap fè a, yo tout ansanm y'a ofri yon jenn ti towò bèf pou yo boule nèt nan dife pou
 Seyè a. Se va yon ofrann pou yo boule nan dife pou fè Seyè a plezi ak bon sant li. Y'a ofri l' ansanm
 ak ofrann grenn jaden ak bwason ki pou mache avè l' la. Apre sa, y'a ofri yon bouk kabrit pou repare
 sa yo te fè ki mal la. 25 Prèt la va pote ofrann lan devan Bondye, l'a touye bèt yo ofri pou peche
 tout moun pèp Izrayèl yo te fè a, epi Bondye va padonnen sa yo te fè a, paske yo pa t' fè espere, epi
 yo te pote ofrann pou yo te boule nan dife pou Seyè a ansanm ak ofrann pou repare sa yo te fè ki
 mal devan Seyè a san yo pa t' fè espere a. 26 Se konsa Bondye va padonnen tout moun pèp Izrayèl
 yo ansanm ak tout moun lòt nasyon k'ap viv nan mitan yo, paske se yo tout ki te koupab nan sa yo
 te fè san yo pa konnen an. 27 Si se yon moun ki fè sa l' pa t' dwe fè san li pa fè espere, l'a gen pou

l' ofri yon ti fenmèl kabrit ki poko gen ennan pou repare pou sa l' te fè a. ²⁸ Prèt la va pote ofrann lan devan Seyè a, l'a touye bèt yo ofri pou peche moun lan te fè san li pa t' fè espre a, epi Bondye va padonnen l' sa l' te fè a. ²⁹ Se va menm regleman an pou tout moun ki fè bagay yo pa t' dwe fè san yo pa fè espre, kit se yon moun pèp Izrayèl la menm li ye, kit se yon moun lòt nasyon k'ap viv nan mitan yo a. ³⁰ ¶ Men, lè yon moun fè yon bagay li konnen byen pwòp li pa t' dwe fè, kit se yon moun pèp Izrayèl la menm li ye, kit se yon moun lòt nasyon k'ap viv nan mitan yo a, se pase l'ap pase Seyè a nan betiz. Se pou yo wete moun sa a nan mitan pèp la. ³¹ Paske li refize tandè sa Seyè a te di a, li fè sa li konnen li pa t' dwe fè. Dapre lòd Seyè a, se pou yo touye l'. Epi se li menm sèl ki va reskonsab lanmò li. ³² Yon jou, antan moun pèp Izrayèl yo te nan dezè a, yo bare yon nonm ki t'ap ranmase bwa jou repo a. ³³ Moun ki te bare l' yo mennen l' bay Moyiz, Arawon ak tout moun pèp Izrayèl yo. ³⁴ Yo pran msye, yo mete moun veye l', paske yo pa t' fin konnen sa pou yo te fè avè l'. ³⁵ Lè sa a, Seyè a di Moyiz konsa: -Se pou nou touye nonm lan pou sa li fè a. Y'a mennen msye andeyò limit kan kote yo rete a, pou tout moun kalonnen l' kout wòch jouk li mouri. ³⁶ Se konsa tout moun yo fè msye soti andeyò limit kan an, epi yo kalonnen msye kout wòch jouk li mouri, jan Seyè a te ba yo lòd la. ³⁷ ¶ Seyè a pale ak Moyiz, li di l' konsa: ³⁸ -Pale ak moun pèp Izrayèl yo. W'a di yo pou mwen: Se pou yo toujou mete ponpon sou woulèt rad yo, se pou yo pase kòdon ble nan chak ponpon. Se pou nou toujou fè sa de pitit an pitit. ³⁹ Chak fwa n'a wè ponpon sa yo, sa va fè nou chonje tou sa Seyè a te ban nou lòd fè pou nou ka fè yo. Konsa, nou p'ap pèdi tèt nou, nou p'ap vire do ban mwen pou nou swiv pwòp lide pa nou ak pwòp dezi pa nou. ⁴⁰ Ponpon yo va fè nou chonje tout lòd mwen te ban nou pou nou ka swiv yo, pou nou ka viv apa nèt pou mwen menm ki Bondye nou an. ⁴¹ Se mwen menm ki Seyè a, Bondye nou an. Se mwen menm ki te fè nou soti kite peyi Lejip la pou m' te ka Bondye nou. Se mwen menm ki Seyè a, Bondye nou an.

Chapter 16

¹ ¶ Kore, pitit gason Iza, moun laras Levi nan fanmi Keyat la, pran tèt Datan ak Abiram, pitit gason Eliyab yo ansanm ak One, pitit gason Pelèt, twa moun laras Woubenn. ² Yo revòlte kont Moyiz. Te gen desansenkant (250) lòt moun nan pèp Izrayèl la avèk yo. Mesye sa yo, se te chèf pèp la menm te chwazi, moun ki te fè pati konsèy pèp la, chèf moun yo te konsidere anpil. ³ Yo

tout reyini devan Moyiz ak Arawon, yo di yo konsa: -Koulye a, mesye, n' al twò lwen tande! Dènye moun nan pèp la se pou Seyè a y'ap viv. Seyè a la nan mitan nou tout, pa vre? Poukisa, nou menm

⁴ Moyiz ak Arawon, nou pran pòz chèf nou anwo pèp Seyè a konsa? Lè Moyiz tande sa, li lage kò

⁵ l' atè plat, li lapriyè. Lèfini, li di Kore ak bann moun ki te avè l' yo konsa: -Denmen maten, Seyè a va fè nou konnen ki moun ki pou li, ki moun li mete apa pou l' ak ki moun ki gen dwa pwoche

⁶ bò kote l'. Moun la kite pwoche bò kote l' la, n'a konnen se moun sa a Bondye chwazi. Men sa pou n' fè. Ou menm, Kore, ak chak moun ki nan bann ou an, nou chak n'a pran yon ti recho dife.

⁷ Denmen maten chak moun va ranje chabon dife nan recho pa l' la, epi l'a mete lansan sou dife a devan lotèl Seyè a. Konsa, moun Seyè a va chwazi a, n'a konnen se li menm Bondye mete apa pou

⁸ l' a. Se nou menm, pitit Levi yo, ki pral twò lwen koulye a! Moyiz di Kore konsa: -Koute non,

⁹ nou menm pitit Levi yo! Apre tou sa Bondye fè pou nou, nou jwenn li pa fè ase toujou: Nan tout pèp Izrayèl la, se nou li chwazi pou pwoche bò kote l', pou fè sèvis li nan kay li, pou kanpe devan

¹⁰ pèp la pou fè sèvis pou yo. Ou menm Kore ak tout frè ou yo, pitit Levi yo, li ban nou dwa pou

¹¹ nou pwoche bò kote l'. Epi koulye a, n'ap mande pou yo ban nou plas prèt yo! Lè ou menm ak tout bann mesye ou yo n'ap plenyen konsa sou do Arawon, kisa Arawon ye nan sa? Konnen se kont

¹² Seyè a menm wi nou pran pozisyon. ¶ Apre sa, Moyiz voye rele Datan ak Abiram, de nan pitit

¹³ gason Eliyab yo. Men yo voye di Moyiz: -Nou p'ap vini. Ou fin fè nou kite yon bon ti peyi kote lèt ak siwo myèl t'ap koule tankou dlo, ou mennen nou vin mouri isit nan dezè a, epi koulye a ou

¹⁴ vle pran pòz chèf ou sou nou ankò! Ou mèt di sa ou vle, men se pa nan yon peyi kote lèt ak siwo myèl koule tankou dlo ou mennen nou la a! Ou pa ban nou okenn jaden pou n' plante grenn ni okenn jaden rezen ou te di ou t'ap ban nou an. Atò, ou kwè ou kapab pete je moun sa yo? Non! Nou

¹⁵ p'ap vini. Lè sa a, Moyiz fè yon sèl fache, li di Seyè a konsa: -Pa asepte okenn ofrann moun sa yo ta pote vin ofri ou. Mwen pa janm pran anyen nan zafè yo, pa menm yon bourik. Mwen pa janm

¹⁶ fè yonn ladan yo anyen. Apre sa, Moyiz di Kore konsa: -Ou menm ak tout bann moun ou yo,

¹⁷ denmen n'a vini devan lotèl Seyè a. Arawon va la tou. Chak moun va pran yon ti recho dife, y'a mete lansan ladan l', epi y'a pote recho yo devan Seyè a. Sa va fè desansenkant (250) recho. Ou

¹⁸ menm ak Arawon, n'a vini ak recho pa nou tou. Se konsa, yo chak pran yon ti recho, yo ranje chabon dife ladan l', yo mete lansan sou dife a, epi yo vin kanpe devan pòt Tant Randevou a ansanm

¹⁹ ak Moyiz ak Arawon. Kore te fè tout pèp la reyini nan pòt Tant Randevou a anfas Moyiz ak

²⁰ Arawon. Yo rete konsa, epi pouvwa Bondye parèt tankou yon gwo limyè devan tout pèp la. Seyè

a pale ak Moyiz ansanm ak Arawon, li di yo: ²¹ -Wete kò nou nan mitan moun sa yo. Mwen pral
 disparèt yo koulye a. ²² Men Moyiz ak Arawon tonbe fas atè, yo di: -O Bondye, ou menm ki bay
 tout moun lavi, se pa paske yon sèl moun fè sa l' pa t' dwe fè kifè pou ou fache sou tout pèp la. ¶ ²³
 Seyè a pale ak Moyiz, li di l' konsa: ²⁴ -Pale ak tout pèp la. Di yo pou mwen pou yo wete kò yo
 bò kote Kore, Datan ak Abiram rete a. ²⁵ Moyiz leve, l' al jwenn Datan ak Abiram. Tout chèf fanmi
 pèp Izrayèl yo te ale avè l' tou. ²⁶ Li pale ak pèp la, li di yo: -Wete kò nou bò kote bann mechan
 sa yo rete a. Pa manyen anyen ki pou yo, si nou pa vle pase tou nan chatiman yo pral ba yo pou
 peche yo fè a. ²⁷ Se konsa, tout pèp la wete kò yo, yo rete byen lwen kote Kore, Datan ak Abiram
 te rete a. Datan ak Abiram menm soti, yo vin kanpe devan pòt kay yo ansanm ak madanm yo, pitit
 yo ak pitit pitit yo. ²⁸ Moyiz di pèp la konsa: -Avèk sa ki pral rive a, nou pral konnen se Seyè a
 menm ki te voye m' fè tout travay sa yo. Se pa mwen menm ki rete konsa mwen di mwen pral fè
 yo. ²⁹ Si moun sa yo mouri jan tout moun fèt pou mouri a, san se pa Bondye ki pini yo, enben, se
 pa Seyè a ki te voye m'. ³⁰ Men, si Seyè a fè bagay nou poko janm wè, si li fè tè a louvri pou l'
 vale moun sa yo ansanm ak tou sa ki pou yo, kifè y'ap desann tou vivan nan peyi kote mò yo ye a,
 n'a konnen se Seyè a menm yo t'ap derespekte konsa. ³¹ Fini li fini di pawòl sa yo, tè a fann, li
 louvri anba pye Datan ak Abiram. ³² Li vale yo, yo menm, tout fanmi yo ansanm ak tout moun ki
 te pran pozisyon pou Kore, ak tou sa ki te pou yo. ³³ Yo desann tou vivan avèk tou sa ki te pou yo
 nan peyi kote mò yo ye a. Apre sa, tè a fèmen sou yo, yo disparèt nèt nan mitan pèp la. ³⁴ Tout
 moun nan pèp la ki te la pran kouri lè yo tande jan moun yo t'ap rele. Yo t'ap di: -Ann kouri pou tè
 a pa vale nou tou. ³⁵ ¶ Menm lè a tou, Seyè a voye yon sèl dife ki devore tout desansenkant (250)
 mesye ki t'ap ofri lansan yo. ³⁶ Seyè a pale ak Moyiz, li di l' konsa: ³⁷ -Mande Eleaza, pitit gason
 Arawon, prèt la, pou l' ale wete recho dife an kwiv yo nan mitan rès moun boule yo. L'a jete chabon
 dife ki ladan yo yon kote byen lwen, paske recho dife sa yo se bagay ki apa pou mwen. ³⁸ Wi, yo
 apa pou mwen paske mesye sa yo ki mouri pou peche yo te ofri yo devan lotèl Seyè a. W'a pran
 recho sa yo, w'a bat yo ak mato fè yo tounen plak fin pou kouvri lotèl la. Sa va sèvi yon avètisman
 pou moun pèp Izrayèl yo. ³⁹ Se konsa, Eleaza, prèt la, te pran recho an kwiv moun boule yo te ofri
 yo, li bat yo ak mato, li fè yon kouvèti pou lotèl la ⁴⁰ pou sa sèvi yon avètisman pou moun pèp
 Izrayèl yo, pou yo konnen moun ki pa fè pati fanmi Arawon an pa gen dwa pwoche devan lotèl
 Seyè a pou boule lansan. Si yo fè sa, sa ki rive Kore ak moun li yo, se sa k'ap rive moun sa yo tou.

⁴¹
 Tou sa pase konsa vre dapre lòd Seyè a te bay Moyiz pou Eleaza. ¶ Nan denmen, tout moun pèp Izrayèl yo pran bougonnen sou do Moyiz ak Arawon, yo t'ap di: -Se nou menm ki lakòz moun pèp Seyè a ap mouri konsa. ⁴² Lè pèp la fin sanble pou yo pran pozisyon kont Moyiz ak Arawon, yo vire je yo gade Tant Randevou a, yo wè nwaj la te kouvri tant lan. Menm lè a, pouvwa Bondye-a parèt tankou yon gwo limyè. ⁴³ Moyiz ak Arawon ale, yo kanpe devan Tant Randevou a. ⁴⁴ Seyè a pale ak Moyiz ansanm ak Arawon, li di yo konsa: ⁴⁵ -Wete kò nou nan mitan pèp sa a. Mwen pral disparèt yo koulye a menm! De mesye yo tonbe fas atè. ⁴⁶ Epi Moyiz di Arawon konsa: -Pran ti recho dife ou la, pran chabon dife sou lotèl la, mete ladan l'. Vide ti lansan sou dife a. Epi kouri vit avè l' al jwenn pèp la. W'a fè sèvis pou mande Bondye padon pou yo. Fè vit non! Seyè a fache anpil, li gen tan pran desizyon l'. Malè a konmanse deja. ⁴⁷ Arawon pran ti recho a, li fè sa Moyiz te di l' fè a. Epi li pran kouri nan mitan pèp la. Men, malè a te deja konmanse ap fè dega nan pèp la. Lè Arawon wè sa, li mete lansan sou dife a, li fè sèvis pou mande Bondye padon pou yo. ⁴⁸ Se konsa malè a te sispann. Arawon te kanpe nan mitan ak mò yo yon bò, moun vivan yo yon lòt bò. ⁴⁹ Te gen katòzmil sètans moun (14.700) antou ki te mouri nan malè sa a, san konte sa ki te mouri akòz Kore yo. ⁵⁰ Lè malè a sispann nèt, Arawon tounen al jwenn Moyiz, devan papòt Kay Randevou a.

Chapter 17

¹ ¶ Seyè a pale ak Moyiz, li di l' konsa: ² -Pale ak moun pèp Izrayèl yo. Di yo pou yo pote douz branch bwa, yon branch bwa pou chak branch fanmi pèp Izrayèl la. Wi, y'a pran yon branch bwa nan men chèf chak branch fanmi. Epi w'a ekri non chak chèf sou branch bwa pa yo. ³ W'a ekri non Arawon sou branch bwa Levi a. Va gen yon sèl branch bwa pou chak moun ki chèf nan branch fanmi pa l'. ⁴ W'a mete yo nan Tant Randevou a, devan Bwat Kontra a, kote mwen ban nou randevou a. ⁵ Branch bwa ki pote non moun mwen chwazi a, se li menm ki va fè flè. Se konsa m'a fè moun Izrayèl yo sispann bougonnen sou do ou. ⁶ Moyiz pale ak moun pèp Izrayèl yo. Epi chak chèf pote ba li yon branch bwa, yonn pou chak branch fanmi. Sa te fè douz branch bwa antou. Branch bwa Arawon an te nan mitan tout lòt yo. ⁷ Moyiz pran tout branch bwa yo, li mete yo devan Bwat Kontra Seyè a, nan Tant Randevou a. ⁸ ¶ Nan denmen, lè Moyiz antre nan Tant Randevou a, li wè branch bwa Arawon an, ki pou branch fanmi Levi a, te fè flè. Li te gen tan fè bouton, flè yo te louvri,

9
 zanmann yo te mi. Moyiz pran tout branch bwa yo ki te devan lotèl Seyè a, li pote yo bay moun
 pèp Izrayèl yo. Yo wè sa ki rive, epi chak chèf pran branch bwa ki te pou yo a. 10
 Seyè a di Moyiz:
 -Remete branch bwa Arawon an devan Bwat Kontra a. Se pou yo konsève l' pou sa sèvi yon siy
 pou moun tèt di sa yo, pou yo ka sispann bougonnen. Si yo pa sispann bougonnen, y'ap mouri!
 11
 Moyiz fè jan Seyè a te ba li lòd fè a. 12
 Apre sa, moun pèp Izrayèl yo pale ak Moyiz, yo di l'
 konsa: -Gade jan n'ap mouri, n'ap deperi, nou tout ap fini. 13
 Depi yon moun pwoche bò Tant
 Randevou a, li mouri. Si se konsa, nou tout ap mouri!

Chapter 18

1
 ¶ Seyè a di Arawon konsa: -Se ou menm, pitit gason ou yo ansanm ak tout lòt moun nan branch
 fanmi Levi a, ki va reskonsab tout bagay mal ki pase nan tant yo mete apa pou Bondye a. Men, se
 ou menm ak pitit gason ou yo ase ki va reskonsab tout bagay mal ki pase nan travay prèt yo gen
 2
 pou fè a. W'a pran fanmi ou yo, moun branch fanmi Levi, granpapa ou la, w'a mete yo ansanm
 avè ou pou yo ka ede ou, pandan ou menm ak pitit gason ou yo, n'ap fè travay nou devan Tant
 3
 Randevou a. Y'a fè tou sa yo gen pou yo fè pou ou, ak tou sa pou yo fè nan kay Bondye a. Men,
 se pa pou yo janm pwoche bò bagay yo mete apa pou Bondye yo, ni bò lotèl yo. Si yo fè sa, ni ou
 4
 menm ni yo menm, n'ap mouri. Y'a travay ansanm avè ou, y'a fè tou sa y'a gen pou yo fè nan kay
 Bondye a, nan tout travay ki gen pou fèt nan kay Bondye a. Pesonn lòt pa gen dwa travay avè ou.
 5
 Men, ou menm ak pitit gason ou yo, n'a fè tou sa nou gen pou nou fè nan kote ki apa pou Seyè a,
 tou sa nou gen pou nou fè pou lotèl la. Konsa, mwen p'ap janm fache ankò sou moun pèp Izrayèl
 6
 yo. Se mwen menm ki te pran fanmi ou yo, moun Levi yo, ki te chwazi yo nan mitan tout moun
 pèp Izrayèl yo, mwen mete yo apa pou mwen. Se mwen ki ba ou yo pou yo ka travay nan Tant
 7
 Randevou a. Men, se ou menm sèl ak pitit gason ou yo ki pou fè travay prèt yo bò lotèl la ak dèyè
 rido a. Sa se travay pa nou sa. Mwen ban nou pouvwa pou nou sèvi m' prèt. Se yon kado mwen fè
 8
 nou. Se pou yo touye nenpòt lòt moun ki va pwoche bò bagay yo mete apa pou mwen yo. ¶ Apre
 sa, Seyè a di Arawon konsa: -Chonje mwen pran yon pòsyon nan tout ofrann moun pèp Izrayèl yo
 fè pou mwen, mwen ba ou yo. Se va pòsyon ki va toujou rete pou ou ak pou pitit gason ou yo depi
 9
 lè mwen te mete nou apa pou mwen an, dapre regleman ki la pou tout tan tout tan an. Nan ofrann
 yo mete apa nèt pou mwen yo, lè ou fin wete pòsyon pou boule nan dife a, tout rèz la va pou nou:
 tout ofrann grenn ki donnen nan jaden, tout ofrann pou mande Bondye padon, tout ofrann pou
 repare sa yo fè ki mal. Tou sa yo ofri ban mwen tankou yon ofrann yo mete apa pou mwen, se pou

¹⁰
 ou ak pou pitit gason ou yo y'a ye. N'a manje yo yon kote yo mete apa pou Seyè a. Se gason ase
¹¹
 ki pou manje ladan yo. Konsidere ofrann sa yo tankou bagay ki apa pou Seyè a. Lèfini, tout
 ofrann espesyal moun pèp Izrayèl yo va fè pou yo balanse devan Seyè a, se pou ou yo va ye tou.
 M'ap ba ou yo pou ou, pou pitit gason ou yo ak pitit fi ou yo, dapre yon regleman k'ap la pou tout
 tan tout tan. Tout moun nan fanmi ou ki nan kondisyon pou fè sèvis pou mwen va gen dwa manje
¹²
 ladan l'. M'ap ba ou tou tousa ki pi bon nan premye fwi rekòt y'ap ofri bay Seyè a chak lanne:
¹³
 lwil oliv, diven ak grenn ki donnen nan jaden. Tout premye fwi ki mi nan peyi a, fwi yo ofri
 bay Seyè a, se va pou ou tou. Tout moun lakay ou ki nan kondisyon pou sèvi Seyè a va gen dwa
¹⁴
 manje ladan yo. Tout bagay moun pèp Izrayèl yo pran angajman mete apa pou Seyè a va pou
¹⁵
 ou tou. Tout premye pitit, kit se pitit moun, kit se pitit bèt, y'a mete yo apa pou mwen, e se pou
 ou yo va ye tou. Men, se pou ou asepte yo peye ou pou chak premye pitit moun ak tout premye
¹⁶
 pitit bèt ki pa ka sèvi ofrann pou mwen. Lè premye pitit gason an va gen yon mwa, w'a fè yo
 peye ou senk pyès ajan dapre sistèm yo sèvi nan kay Bondye a, -vin gera pou yon pyès ajan -, pou
¹⁷
 yo ka achte lavi l' nan men m'. Men, pou premye ti mal yon manman bèf osinon yon manman
 kabrit ou ankò yon manman mouton fè, ou p'ap asepte anyen pou yo. Se bagay ki apa pou mwen
 nèt. Se pou yo touye yo. Y'a vide san yo sou lotèl la, w'a boule grès yo. Se va yon ofrann y'a boule
¹⁸
 nèt pou mwen, yon ofrann ki va fè m' plezi ak bon sant li. Men, vyann yo va rete pou ou ansanm
¹⁹
 ak vyann pwatrin lan ak jigo dwat ki te deja pou ou a. M'ap ba ou pou ou menm, pou pitit gason
 ak pitit fi ou yo tout pòsyon ki va rete nan ofrann moun pèp Izrayèl yo va mete apa pou mwen. Se
 va yon regleman k'ap la pou tout tan tout tan. Se yon kontra ki p'ap janm kase ni ki p'ap janm gate
²⁰
 mwen fè la avèk ou, pou ou ak pou tout ras fanmi ou. ¶ Apre sa, Seyè a di Arawon konsa: -Ou
 p'ap jwenn okenn pòsyon nan tè eritaj ki pou pèp la. Ou p'ap janm gen yon moso tè ki va rele ou
 pa ou nan peyi a. Se mwen menm ki tout ou, se mwen menm ki tout byen ou nan mitan pèp Izrayèl
²¹
 la. Seyè a di konsa: -Mwen mete tout ladim moun Izrayèl yo va bay la apa pou moun branch
²²
 fanmi Levi yo, pou sèvis y'ap rann nan tanp lan, pou travay y'ap fè nan Tant Randevou a. Moun
 pèp Izrayèl yo pa janm bezwen preche bò Tant Randevou a. Konsa, yo p'ap rive fè yon peche ki
²³
 pou ta fè yo mouri. Depi koulye a, se moun Levi yo ki va pran swen tout bagay nan Tant
 Randevou a. Y'a reskonsab pou tout bagay mal y'a fè. Sa se yon lòd sevè pou tout moun swiv de
 pitit an pitit. Se konsa yo menm tou, yo p'ap gen tè k'ap rele yo pa yo pou tout tan nan mitan pèp
²⁴
 Izrayèl la. M'ap bay moun Levi yo tout ladim moun pèp Izrayèl yo pran sou sa yo genyen pou
 ofri bay Seyè a. Se poutèt sa, mwen di moun fanmi Levi yo p'ap gen okenn pòsyon tè ki pou rele
²⁵
 yo pa yo nan peyi Izrayèl la. Seyè a pale ak Moyiz ankò, li di l':
²⁶
 -Pale ak moun Levi yo, di

yo konsa: Lè n'a resevwa nan men moun pèp Izrayèl yo ladim Seyè a ban nou pou byen pa nou,
 n'a wete yon dizyèm ladan l' pou mwen. Se va ofrann ladim pa nou bay Seyè a. ²⁷ Y'a konsidere
 ofrann sa a tankou ofrann lòt moun yo fè sou farin ble ak diven apre chak rekòt. ²⁸ Konsa, nou
 menm tou, n'a pran yon pòsyon nan tout ofrann ladim moun pèp Izrayèl yo va fè, n'a mete l' apa
 pou mwen. Epi n'a pran pòsyon nou wete pou Seyè a nan sa ki pou nou an, n'a bay Arawon, prèt
 la, li pou tèt pa li. ²⁹ N'a pran sa ki pi bon nan tout sa ki pou nou an, n'a ofri l' bay Seyè a. ³⁰ W'a
 di yo tou: Lè moun Levi yo fin pran sa ki pi bon nan tou sa ki pou vin pou yo a, y'a konsidere rès
 ki rete a tankou rekòt farin ble ak diven yo menm yo fè. ³¹ Y'a manje l' kote yo vle, ansanm ak
 tout moun lakay yo. Se tankou lajan yo ba yo pou travay y'ap fè nan Tant Randevou a. ³² Depi nou
 ofri sa ki pi bon an bay Seyè a, nou mèt manje rès la san kè sote, anyen p'ap rive nou. Piga nou
 derespekte bagay moun pèp Izrayèl yo mete apa pou mwen. Si nou fè sa, n'ap mouri.

Chapter 19

¹ ¶ Seyè a pale ak Moyiz ansanm ak Arawon, li di yo konsa: ² -Men yon regleman Seyè a bay
 lòd pou yo swiv tankou yon lwa: Men sa li di: Mande moun pèp Izrayèl yo pou yo fè ou jwenn yon
 gazèl pwal koulè wouj, ki pa gen okenn enfimite e ki poko janm travay. ³ W'a renmèt Eleaza, prèt
 la, li. L'a fè l' soti andeyò limit kan kote moun yo rete a, epi l'a fè yo touye l' devan je li. ⁴ Apre sa,
 Eleaza va pran ti gout nan san an. Epi, kote l' kanpe a, avèk dwèt li, l'a voye san an sèt fwa nan
 direksyon Tant Randevou a. ⁵ Lèfini, y'a boule tout bèt la nèt devan je prèt la: po a, vyann lan, san
 an ansanm ak tout tripay la. ⁶ Prèt la va pran kèk moso bwa sèd, kèk branch izòp, yon moso twal
 wouj, l'a jete yo nan boukan dife kote gazèl la ap boule a. ⁷ Apre sa, prèt la va lave rad ki te sou li,
 l'a benyen nan gwo dlo. Lèfini, l'a tounen antre nan kan an. Prèt la p'ap nan kondisyon pou l' fè
 okenn sèvis pou Bondye jouk aswè. ⁸ Moun ki te boule gazèl la va lave rad ki te sou l' a, epi l'a
 benyen nan gwo dlo tou. Li menm tou, li p'ap nan kondisyon pou l' fè okenn sèvis pou Bondye jouk
 aswè. ⁹ Yon lòt moun ki nan kondisyon pou fè sèvis pou Bondye va ranmase tout sann gazèl wouj
 la, l'a mete l' yon kote ki apa pou Bondye andeyò limit kan kote moun yo rete a. Y'a konsève sann
 lan pou lè moun pèp Izrayèl yo va bezwen pran ladan l' pou pare dlo y'a sèvi pou mete nenpòt bagay
 nan kondisyon pou fè sèvis Bondye ankò, lè y'ap fè sèvis pou mande Bondye padon pou sa yo fè
 ki mal. ¹⁰ Nonm ki te ranmase sann gazèl la va lave rad ki te sou l' a, epi li p'ap nan kondisyon pou
 l' fè okenn sèvis pou Bondye jouk aswè. Sa se va yon regleman pou tout moun nan peyi a toujou

swiv, kit se moun pèp Izrayèl yo, kit se moun lòt nasyon k'ap viv nan mitan yo. ¹¹ ¶ Depi yon moun manyen kadav yon moun mouri, pandan sèt jou apre sa, li p'ap nan kondisyon pou l' fè sèvis pou

¹² Bondye. L'a fè sèvis pou mande Bondye gras avèk dlo yo pare pou sa a sou twazyèm jou a ak sou setyèm jou a. Apre sa, l'a nan kondisyon pou l' fè sèvis Bondye. Men, si li pa fè sèvis pou mande Bondye gras sou twazyèm jou a ak sou setyèm jou a, li p'ap nan kondisyon pou l' fè sèvis Bondye.

¹³ Depi yon moun manyen kadav yon moun mouri, si li pa fè sèvis pou mande Bondye gras, piga li pwoche bò Tant Randevou a pou li pa derespekte tant lan. Si li fè sa, se pou yo touye l'. Se pou yo konsidere moun sa a tankou yon moun ki pa fè pati pèp Bondye a, paske yo pa t' voye dlo pou mete nan bon kondisyon an sou li, li pa nan kondisyon pou l' sèvi Bondye. Toutotan yo pa fè sèvis

¹⁴ la pou li, l'ap rete nan kondisyon sa a. Men regleman pou yo swiv: lè yon moun mouri nan yon kay, tout moun ki te nan kay la lè lanmò a, ou ankò tout moun ki vin antre nan kay la apre sa, p'ap

nan kondisyon pou fè sèvis Bondye pandan sèt jou. ¹⁵ Tout veso ki pa kouvri ak yon kouvèti byen

mare sou li p'ap ka sèvi pou moun ki nan kondisyon pou sèvi Bondye. ¹⁶ Konsa tou, depi yon moun k'ap mache nan jaden manyen kadav yon moun mouri, kit moun lan mouri mò natirèl, kit se ansasinen yo te ansasinen l', osinon depi yon moun manyen zosman yon moun mouri oswa tonm kote yo

antere yon moun mouri, moun sa a p'ap nan kondisyon pou l' sèvi Bondye pandan sèt jou. ¹⁷ Si yon moun ta rive nan kondisyon sa a konsa, y'a pran ti gout nan sann gazèl yo te boule pou wete

peche a, y'a mete l' nan yon veso, epi y'a vide ti gout dlo dous sou li. ¹⁸ Nan premye ka a, yon moun ki nan kondisyon pou fè sèvis Bondye va pran yon branch izòp, l'a plonje l' nan dlo a, epi l'a voye dlo sou kay la, sou tout bagay ki ladan l' ak sou tout moun ki te la nan kay la. Nan dezyèm ka a, l'a voye dlo a sou moun lan, kit li te manyen zosman moun mouri osinon kadav moun yo te ansasinen, osinon kadav moun ki te mouri mò natirèl, kit li te manyen yon tonm moun mouri.

¹⁹ Sou twazyèm jou a ak sou setyèm jou a, nonm ki nan kondisyon pou fè sèvis pou Bondye a va voye dlo a sou moun ki pa nan kondisyon pou sèvi Bondye a. Sou setyèm jou a, l'a fè sèvis pou mande Bondye gras pou nonm lan. Apre sa, nonm lan va lave rad ki sou l' a, l'a benyen nan gwo

²⁰ dlo. Men, se lè solèy va fin kouche la nan kondisyon ankò pou l' fè sèvis Bondye. Men lè yon nonm pa nan kondisyon pou fè sèvis Bondye, si li pa fè sèvis pou mande Bondye gras, se pou yo konsidere l' tankou yon moun ki pa fè pati pèp Bondye a. Li pa ka pwoche bò Tant Randevou a pou l' pa derespekte l'. Toutotan yo pa fè pou li sèvis voye dlo ki pou mete l' nan bon kondisyon

²¹ an, l'ap rete nan kondisyon pou l' pa ka fè sèvis Bondye. Se va la yon regleman pou yo toujou swiv tout tan. Moun ki te voye dlo sou lòt la pou mete l' nan bon kondisyon an, va gen pou l' lave rad ki te sou l' a tou. Depi yon moun manyen dlo pou mete nan bon kondisyon an, li p'ap nan

²² kondisyon pou l' fè sèvis pou Bondye jouk nan aswè menm jou a. Depi yon nonm ki pa nan kondisyon pou sèvi Bondye manyen yon bagay, moun ki nan kondisyon pou sèvi Bondye pa ka

sèvi ak bagay sa a. Depi yon moun manyen yon bagay konsa, li menm tou, li p'ap nan kondisyon pou l' sèvi Bondye jouk aswè rive.

Chapter 20

¹ ¶ Sou premye mwa a, tout moun pèp Izrayèl yo te rive nan dezè Zin lan, epi yo moute tant yo yon kote yo rele Kadès. Se la Miryam mouri, se la menm yo antere l'. ² Men, pa t' gen dlo la pou pèp la te bwè. Pèp la sanble bò kote Moyiz ak Arawon, yo leve kont ak yo. ³ Pèp la fè kont ak Moyiz, yo di l' konsa: -Pa pito nou te mouri devan lotèl Seyè a ansanm ak lòt frè nou yo! ⁴ Poukisa ou mennen nou nan dezè a? Gen lè se pou fè nou mouri, nou menm pèp Seyè a, ansanm ak tou bèt nou yo? ⁵ Poukisa ou fè nou soti kite peyi Lejip la pou mennen nou nan move kote sa a? Se yon kote ou pa jwenn grenn pou simen, ou pa jwenn okenn pye fig frans, ni pye rezen, ni pye grenad. Pa menm gen dlo pou moun bwè! ⁶ Moyiz ak Arawon pati kite pèp la, y' ale devan pòt Tant Randevou a. Yo lage kò yo fas atè, epi bèl limyè prezans Bondye a parèt sou yo. ⁷ Seyè a pale ak Moyiz, li di l' konsa: ⁸ -Pran baton ki sou devan Bwat Kontra a. Lèfini, ou menm ak Arawon, frè ou la, sanble tout pèp la. Epi devan yo tout, w'a pale ak wòch ki bò laba a, wòch la va bay dlo. Se konsa w'a fè dlo soti nan wòch la pou pèp la, pou yo tout ka bwè ansanm ak bèt yo. ⁹ Moyiz pran baton ki sou devan lotèl la, jan Seyè a te ba li lòd la. ¹⁰ Moyiz ak Arawon sanble tout pèp la devan gwo wòch la. Epi Moyiz di yo: -Louvri zòrèy nou, bann moun tèt di! Se vle nou vle mwen fè dlo soti nan wòch sa a pou nou? ¹¹ Moyiz leve men l', li frape wòch la de fwa avèk baton an. Epi yon gwo sous dlo pete nan wòch la. Tout moun yo bwè ansanm ak bèt yo tou. ¹² Men, Seyè a di Moyiz ak Arawon konsa: -Paske nou pa t' fin gen konfyans nèt nan mwen pou n' te fè moun pèp Izrayèl yo wè jan mwen se yon Bondye apa, se pa nou menm m'ap kite mennen pèp la antre nan peyi mwen pwomèt m'ap ba yo a. ¹³ Se kote sa a yo rele sous Meriba a, paske se la moun pèp Izrayèl yo te leve kont ak Seyè a. Se la Seyè a te moutre yo li se yon Bondye ki pa tankou lòt bondye yo. ¹⁴ ¶ Moyiz rete Kadès, li voye kèk mesajè bò wa peyi Edon an pou di l' konsa: -Men sa moun pèp Izrayèl yo, moun menm fanmi ak ou yo, voye di ou: Ou konnen tout tray nou pase. ¹⁵ Ou konnen ki jan zansèt nou yo te desann al rete nan peyi Lejip pandan lontan, ki jan moun peyi sa a tonbe maltrete nou menm jan yo te maltrete zansèt nou yo. ¹⁶ Lè nou wè sa, nou rele nan pye Seyè a. Li tande vwa nou, epi li voye zanj li, li fè nou soti kite peyi Lejip sa a. Koulye a, men nou Kadès, yon lavil

¹⁷ ki toupre fwontyè peyi ou la. Tanpri, n'ap mande ou yon ti pèmisyon pou nou pase ase nan mitan peyi ou la. Nou p'ap kite wout nou pou n' pase nan mitan jaden ou, ni nan mitan pye rezen ou yo. Ata dlo nan pi ou yo nou p'ap bwè. Nou p'ap kite gran chemen w'a moutre nou an, nou p'ap vire ni adwat ni agoch, jouk n'a fin travèse lòt bò peyi a.

¹⁸ Wa Edon an voye di yo: -Non. Nou p'ap kite nou travèse peyi a. Si nou chache fè sa, n'ap mache pran nou, n'ap atake nou.

¹⁹ Men, moun pèp Izrayèl yo voye di l' ankò: -Nou p'ap kite gran chemen w'a louvri devan nou an. Epi si yonn nan nou, osinon yonn nan bèt nou yo ta bwè nan dlo peyi ou la, n'ap peye ou pou sa. Se annik pase nou bezwen pase nan mitan peyi a, pa lòt bagay!

²⁰ Men, wa Edon an voye di yo ankò: -Non! Nou p'ap pase menm! Epi li soti avèk yon gwo lame ak yon bann lòt moun, yo mache kontre moun pèp Izrayèl yo.

²¹ Se konsa moun peyi Edon yo te refize kite moun pèp Izrayèl yo pase nan peyi yo a. Kifè moun Izrayèl yo te blije vire do yo, fè yon lòt wout.

²² ¶ Tout moun pèp Izrayèl yo kite Kadès, yo rive sou Mòn Or la,

²³ ki te toupre fwontyè peyi Edon an. Antan yo la, Seyè a pale ak Moyiz ansanm ak Arawon, li di yo:

²⁴ -Arawon pa pral antre nan peyi mwen pwomèt pou m' bay moun pèp Izrayèl yo. Msye pral mouri, li pral jwenn moun li yo ki te mouri anvan l' yo, paske nou tou de, nou pa t' fè sa mwen te ban nou lòd fè bò sous dlo Meriba a.

²⁵ Pran Arawon ak Eleaza, pitit gason l' lan, moute sou mòn Or la ak yo.

²⁶ W'a wete rad espesyal ki sou Arawon yo, w'a mete yo sou Eleaza, pitit gason l' lan. Se la sou mòn lan Arawon pral mouri.

²⁷ Moyiz fè tou sa Seyè a te mande l' fè a: Devan je tout moun, yo tou twa yo moute sou mòn Or la.

²⁸ Lèfini, Moyiz wete rad espesyal ki te sou Arawon yo, li mete yo sou Eleaza, pitit gason Arawon an. Se la sou tèt mòn lan Arawon mouri. Apre sa, Moyiz ak Eleaza desann desann yo sou mòn lan.

²⁹ Tout pèp la vin konnen Arawon te mouri. Se konsa tout moun nan pèp Izrayèl la pase trant jou ap kriye pou Arawon.

Chapter 21

¹ ¶ Wa lavil Arad la, nan rejyon Negèv la, te yon moun peyi Kanaran. Lè li vin tandè moun pèp Izrayèl yo t'ap vini sou chemen ki mennen Atarim lan, l' al atake yo. Li fè kèk ladan yo prizonye.

² Lè sa a, moun pèp Izrayèl yo fè yon ve bay Seyè a, yo di konsa:

³ -Si ou lage moun sa yo nan men nou, n'ap mete yo tout apa pou ou ansanm ak tout lavil yo. N'ap detwi yo nè.

³ Seyè a tandè sa yo te mande l' la, epi li ede yo, li fè yo mete men sou moun Kanaran yo. Moun pèp Izrayèl yo disparèt

tout moun yo ansanm ak tout lavil yo. Se poutèt sa yo rele kote sa a Oma. ¶ Moun Izrayèl yo pati,
 yo kite mòn Or la, yo pran wout ki mennen bò Lanmè Wouj la, pou yo pa pase nan peyi Edon an.

Men, antan y'ap vwayaje a, pèp la vin dekouraje. Pèp la pale Bondye ansanm ak Moyiz mal, yo
 leve dèyè yo, yo di konsa: -Poukisa nou fè nou soti kite peyi Lejip la? Gen lè se pou fè nou vin
 mouri nan dezè sa a kote ki pa gen ni manje ni dlo. Nou bouke manje vye manje sa a ki pa ka fè

anyen pou nou ankò. Lè sa a, Seyè a voye yon bann ti sèpan sou pèp la. Kote sèpan sa yo mòde

ou la boule kou dife. Yo mòde pèp la. Anpil moun te mouri. Pèp la vin jwenn Moyiz, yo di l'
 konsa: -Nou rekonèt nou fè sa ki mal lè nou pale kont Seyè a ak kont ou menm tou. Tanpri, lapriyè

Seyè a pou nou pou l' fè sèpan sa yo ale. Moyiz lapriyè pou pèp la vre. Seyè a di Moyiz konsa:
 -Fè pòtre yon sèpan parèy ak sèpan sa yo. Mete l' sou yon poto byen wo. Konsa, depi yon sèpan

mòde yon moun, moun lan va annik gade pòtre sèpan an, epi li p'ap mouri. Moyiz pran kwiv, li
 fonn li, li fè yon sèpan parèy ak sèpan yo. Lèfini, li mete l' sou yon poto byen wo. Tout moun sèpan

mòde, depi yo voye je yo gade sèpan an kwiv la, yo pa mouri. ¶ Moun pèp Izrayèl yo pati, y' al

moute kan yo nan fon Obòt la. Apre sa, yo kite fon Obòt, y' al moute kan yo bò mazi Abarim

yo nan dezè ki sou bò lès peyi Moab la. Apre sa ankò, yo kite kote yo te ye a, y' al moute kan

yo nan ravin Zerèd. Lè yo kite ravin Zerèd, y' al moute kan yo lòt bò larivyè Anon nan dezè ki
 rive jouk nan teritwa moun Amori yo. Rivyè Anon sa a te sèvi fwontyè ant peyi Moab ak peyi

Amori a. Se poutèt sa, nan liv istwa ki rakonte batay Seyè a, nou jwenn yo pale sou lavil Vayèb,

nan peyi Soufa a, ak ravin li yo, sou rivyè Anon avèk fon lavalas li yo, ki desann bò lavil Amoab

la nan direksyon fwontyè peyi Moab la. Apre sa, yo kite kote yo te ye a, y' al yon kote yo rele

Beyè. Se la Seyè a te pale ak Moyiz, lè li te di l': Reyini tout pèp la. Mwen pral ba yo dlo. Lè

sa a, moun Izrayèl yo pran chante chante sa a: Pi a bay dlo! Annou chante pou sa! Pi chèf yo te

fouye Avèk baton kòmandan yo! Pi grannèg yo te fouye Avèk baton yo sèvi lè y'ap mache a! Apre

sa, yo kite dezè a, y' al moute kan yo Matana. Lè yo kite Matana, y' ale Nakalyèl. Lè yo kite

Nakalyèl, yo moute Bannòt. Lè yo kite Bannòt, y' ale nan fon ki nan peyi Moab la, jouk sou tèt

mòn Pisga, kote y'ap gade tout dezè a nan pye yo. ¶ Lè sa a, moun pèp Izrayèl yo voye mesaje

bò kote Siyon, wa peyi Amori a, pou di l' konsa: -Kite nou pase ase nan mitan peyi ou la! Nou

p'ap kite wout nou pou pase nan mitan jaden ou, ni nan mitan pye rezen ou yo. Ata bwè nou p'ap

bwè dlo nan pi ou yo. N'ap rete sou gran chemen ou va moutre nou an, jouk n'a fin travèse lòt bò

²³ peyi ou la. Men, Siyon pa t' vle kite pèp Izrayèl la pase sou tè li yo. Li leve tout pèp l' a, li mache
²⁴ sou moun pèp Izrayèl yo, l' al kontre ak yo yon kote nan dezè a yo rele Jaza, l' atake yo. Men,
 moun Izrayèl yo touye anpil ladan yo nan batay la, yo pran tout peyi a nan men yo, depi larivyè
 Anon nan sid rive larivyè Jabòk nan nò, toupre fwontyè peyi Amon an, ki te yon fwontyè byen
²⁵ gade. Se konsa, moun Izrayèl yo pran tout lavil moun Amori yo, depi Esbon, kapital la ak lòt ti
²⁶ bouk nan vwazinaj li ki te sou kont li, epi yo rete ladan yo tout. Lavil Esbon te kapital peyi a.
 Se la Siyon, wa peyi Amori a, te rete. Se menm Siyon sa a ki te goumen kont ansyen wa peyi Moab
²⁷ la epi ki te pran tout peyi a pou li jouk larivyè Anon. Se poutèt sa sanba yo di: -Ann ale Esbon!
²⁸ Ann al bati l' ankò! Ann al mete lavil wa Siyon an kanpe sou de pye l' ankò! Paske yon sèl dife
 te soti lavil Esbon, Wi, lame wa Siyon an derape tankou yon flanm dife, li boule lavil A Moab. Li
²⁹ devore tout chèf ki rete sou mòn Anon an. Sa pral rès nèt pou nou, moun peyi Moab! Nou pèdi
 nèt, nou menm sèvitè Kemòch! Bondye nou an fè pitit gason nou yo kouri al kache. Li kite pitit fi
³⁰ nou yo tounen prizonnye nan men Siyon, wa peyi Amori a. Men koulye a, se moun lavil Esbon
 yo ki pèdi nèt fwa sa a! Nou mete kou sou yo depi lavil Esbon rive Dibon! Nou devaste peyi a kite
³¹ l' blanch jouk Nofak, toupre Medeba. Se konsa, moun pèp Izrayèl yo vin rete nan peyi Amori
³² a. Moyiz menm voye kèk moun wè ki jan sa ye nan lavil Jazè. Apre sa, moun Izrayèl yo mache
 pran lavil la ak lòt ti bouk ki nan vwazinaj li. Kote yo pase, yo mete moun Amori yo deyò lakay
³³ yo. Apre sa, moun pèp Izrayèl yo tounen sou wout yo, yo pran chemen ki mennen lavil Bazan.
³⁴ Epi Og, wa lavil Bazan an, leve tout pèp l' a, li vin kontre ak yo pou l' atake yo bò Edreyi. Seyè
 a di Moyiz konsa: -Ou pa bezwen pè msye! M'ap fè nou kraze l' anba pye nou, li menm ansanm ak
 tout pèp l' a. M'ap fè nou pran peyi l' la pou nou. Nou pral fè l' pase sa nou te fè Siyon, wa peyi
³⁵ Amori ki te rete Esbon an, pase. Se konsa, moun pèp Izrayèl yo touye Og, ansanm ak pitit gason
 l' yo ak tout pèp l' a. Yo pa kite yonn chape, yo pran tout peyi a pou yo.

Chapter 22

¹ ¶ Moun pèp Izrayèl yo kite kote yo te ye a, y' al moute kan yo nan plenn Moab, ki lòt bò larivyè
² Jouden, anfas lavil Jeriko. Lè wa Balak, pitit Zipò, wè tou sa moun pèp Izrayèl yo te fè moun
³ Amori yo, li menm ak tout moun pèp Moab yo te vin pè pèp Izrayèl la kou chat, paske moun pèp

⁴
 Izrayèl yo te anpil anpil. Moun Moab yo pale ak chèf fanmi moun Madyan yo, yo di yo: -Bann moun sa yo pral manje tou sa ki alantou nou, tankou bèf k'ap manje zèb nan savann. Lè sa a, se
⁵
 Balak, pitit Zipò, ki te wa peyi Moab. Li voye kèk mesaje bò kote Balaram, pitit Beyò a, ki te rete lavil Petò, bò gwo larivyè Lefrat la nan peyi moun Amaf yo. Men komisyon li te voye ba li: -Men, gen yon pèp la a ki soti nan peyi Lejip. Y'ap mache pran tout peyi pou yo. Koulye a, men
⁶
 yo kanpe toupre lòt bò fwontyè peyi mwen an. Tanpri, vini non. Vin madichonnen yo pou mwen, paske yo pi fò pase m'. Lè sa a, ou pa janm konnen, m'a ka bat yo, m'a mete yo deyò nan peyi a. Paske mwen konnen lè ou beni yon moun, li beni nèt, Konsa tou, lè ou bay yon moun madichon, li madichonnen nèt.
⁷
 Se konsa, chèf fanmi moun Moab yo ak chèf fanmi moun Madyan yo pati. Yo te pote ak yo sa ki te nesèsè pou peye konsiltasyon an. Yo rive kay Balaram, epi yo ba li
⁸
 komisyon Balak la. Balaram di yo: -Bon. Nou mèt pase nwit la isit la. Denmen m'a ban nou repons mwen dapre sa Seyè a va fè m' konnen. Se konsa, chèf fanmi moun Moab yo rete lakay Balaram.
⁹
 Bondye vin bò kote Balaram, li di l' konsa: -Ki moun sa yo ki lakay ou a? ¹⁰ Balaram reponn:
¹¹
 -Se Balak, pitit Zipò a, wa peyi Moab, ki voye yo vin di m': Men gen yon pèp ki soti nan peyi Lejip k'ap mache pran tout peyi pou yo. Tanpri, vini ba yo madichon pou li. Konsa, l'a ka rive bat
¹²
 yo, l'a ka mete yo deyò nan peyi a. Men Bondye di Balaram konsa: -Piga ou ale ak mesye sa
¹³
 yo, tandè. Piga ou bay pèp Izrayèl la madichon, paske se mwen ki beni yo. Nan denmen maten, byen bonè, Balaram leve, l' al jwenn moun Balak te voye yo, li di yo: -Tounen lakay nou, paske
¹⁴
 Seyè a pa vle kite m' ale ak nou. Se konsa chèf moun Moab yo leve, yo tounen bò kote Balak, yo di l' konsa: -Balaram refize vini avèk nou! ¹⁵ ¶ Lè sa a, Balak voye yon bann lòt chèf kote
¹⁶
 Balaram ankò. Men, fwa sa a chèf sa yo te pi plis, epi yo te pi grannèg pase premye yo. Mesye yo leve vre, y' ale bò kote Balaram, epi yo di l' konsa: -Men sa Balak, pitit Zipò a, voye di ou: ¹⁷
 Tanpri, pa kite anyen anpeche ou vin bò kote m'. Gade: m'ap kite anpil bèl bagay pou ou. M'ap
¹⁸
 fè tou sa ou di m' fè. Tanpri, vini non! Vin bay pèp sa a madichon pou mwen. Men, Balaram reponn moun Balak yo, li di yo: -Balak te mèt ban mwen kay li plen ajan ak lò, mwen p'ap fè anyen, ni lou ni lejè, ki pou fè m' dezobeyi lòd Seyè a, Bondye mwen an. ¹⁹ Yon sèl bagay, nou mèt dòmi
²⁰
 isit la aswè a, pou m' ka konnen si Seyè a gen lòt bagay li vle di m' ankò. Jou lannwit sa a, Bondye vin jwenn Balaram, epi li di l' konsa: -Si se chache mesye sa yo vin chache ou, ou mèt leve
²¹
 ale ak yo. Men, se sa mwen di ou fè ase pou ou fè. Nan denmen maten, byen bonè, Balaram
²²
 leve, li sele manman bourik l' a, epi li pati avèk chèf moun Moab yo. ¶ Pati Balaram pati, Bondye

fache sou li. Se konsa, antan Balaram taprale sou manman bourik l' a, avèk de domestik ki t'ap
mache avè l' yo, zanj Seyè a vin kanpe nan mitan wout la pou bare chemen l'.²³ Lè manman bourik
la wè zanj Seyè a ki te kanpe nan mitan wout la avèk nepe li nan men l', bourik la chankre, li lage
kò l' nan jaden. Balaram bat bourik la jouk li fè l' tounen sou wout la.²⁴ Men zanj Seyè a vin kanpe
yon kote wout la te jennen, kote wout la pase nan mitan de jaden rezen avèk yon miray kloti sou
chak bò.²⁵ Lè manman bourik la wè zanj Seyè a, l' al fwote kò l' sou miray la. Se konsa li kwense
pye Balaram sou miray la. Balaram tanmen bat l' ankò.²⁶ Zanj Seyè a fè yon ti mache ankò, epi
l' al kanpe yon kote wout la te pi jennen toujou, kifè pa t' gen yon ti espas menm pou pase ni adwat,
ni agoch.²⁷ Lè bourik la wè zanj Seyè a, fwa sa a, li kouche ak tout Balaram sou li. Balaram fache,
li tonbe bat bourik la ak gwo baton ki te nan men l' lan.²⁸ Lè sa a, Seyè a bay bourik la lapawòl.
Bourik la di Balaram konsa: -Kisa m' fè ou? Poukisa an twa fwa ou bat mwen konsa:²⁹ Balaram
di bourik la konsa: -Se paske w'ap pase m' nan jwèt! Pa pito se te yon manchèt osinon yon nepe ki
te nan men m', ou ta gen tan konnen. Ou mouri lontan!³⁰ Bourik la reponn, li di l': -Eske se pa
bourik ou mwen ye! Se pa sou mwen ou toujou moute depi tout tan jouk jòdi a? Ou janm wè mwen
konn aji konsa avè ou? Balaram reponn: -Non!³¹ Lè sa a, Seyè a louvri je Balaram, li fè l' wè zanj
lan ki te kanpe nan mitan wout la avèk nepe l' nan men l'. Balaram lage kò l' fas atè.³² Zanj lan di
l' konsa: -Poukisa an twa fwa ou bat bourik la konsa? Se mwen menm ki vin bare chemen ou, paske
ou pa t' dwe al fè vwayaj sa a.³³ Men bourik ou a te wè m'. Se poutèt sa, an twa fwa, li te vle
chankre. Men, ou mèt di l' mèsì, paske si li pa t' fè sa, mwen ta gen tan touye ou. Li menm, mwen
pa t'ap fè l' anyen.³⁴ Balaram reponn: -Sa m' fè a pa bon, vre! Sèlman, mwen pa t' konnen se ou
menm ki te bare wout la devan m'. Men si koulye a ou pa vle m' al pi lwen, m'ap tou tounen lakay
mwen.³⁵ Men, zanj Bondye a di li: -Ou mèt ale ak mesye yo. Sèlman, pa di anyen pase sa m'a di
ou di. Se konsa Balaram ale ak chèf Balak te voye bò kote l' yo.³⁶ ¶ Lè Balak vin konnen Balaram
t'ap vini, li pati, l' al kontre l' jouk Amoab, yon lavil sou fwontyè bò larivyè Anon an.³⁷ Balak di
Balaram konsa: -Ki jan fè mwen voye moun al chache ou, ou pa vin jwenn mwen? Se konprann
ou konprann mwen pa ta ka resevwa ou jan ou merite l' la?³⁸ Balaram reponn: -Apa mwen vini
fwa sa a! Men mwen tou pale ou, se pawòl Bondye va mete nan bouch mwen ase m'ap di.³⁹ Se
konsa, Balaram ale avèk Balak jouk yo rive lavil Kiriyat-Ousòt.⁴⁰ Rive la, Balak fè touye bèf ak
mouton, epi li voye kèk moso vyann bay Balaram ansanm ak chèf ki te avè l' yo.⁴¹ Nan denmen

maten, Balak pran Balaram, yo moute sou mòn Bamòtbaal. Antan yo la, yo te kapab wè yon pòsyon nan moun Izrayèl yo.

Chapter 23

¹ ¶ Balaram di Balak konsa: -Bati sèt lotèl isit la pou mwen. Apre sa, ban mwen sèt towò bèf ak sèt belye mouton. ² Balak fè sa Balaram te di l' fè a. Lèfini, Balaram ak Balak touye yon towò bèf ak yon belye mouton sou chak lotèl. ³ Apre sa, Balaram di Balak konsa: -Rete kanpe bò kote ofrann ou mete ap boule la a. Mwen menm, mwen pral wè si Seyè a p'ap vin jwenn mwen. Apre sa, m'a fè ou konnen sa l'a fè m' wè a. Epi l' ale sou tèt yon ti mòn ki pa t' gen yon ti pyebwa sou li. ⁴ Epi Bondye vin jwenn li la. Balaram di l' konsa: -Mwen te fè bati sèt lotèl pou ou, epi mwen te touye yon towò bèf ak yon belye mouton sou chak lotèl pou ou. ⁵ Seyè a pale ak Balaram byen pale. Apre sa, li di l': -Tounen bò kote Balak. W'a pale avè l' jan mwen di ou la. ⁶ Se konsa, Balaram tounen bò kote Balak. Li jwenn li kanpe bò ofrann boule yo ansanm ak lòt chèf moun Moab yo. ⁷ Lèfini, li pran chante chante sa a: -Balak fè m' kite peyi m', peyi Aram. Wa Moab la fè m' desann soti nan mòn bò solèy leve yo. Li di m': Vini non! Vin bay moun Jakòb yo madichon. Vini non! Vin kraponnen moun Izrayèl yo. ⁸ Men ki jan ou ta vle pou m' madichonnen moun Bondye pa madichonnen? ⁹ Ki jan ou ta vle pou m' kraponnen moun Bondye pa kraponnen? Mwen kanpe sou tèt gwo wòch yo, mwen wè yo. Antan mwen sou ti mòn yo, m'ap gade anba: Wi, se yon pèp k'ap viv yon jan apa pou kont li. ¹⁰ Se yon pèp ki pa menm ak lòt pèp yo! Ki moun ki ka konte valè pitit Jakòb genyen? Yo anpil tankou grenn pousyè ki sou latè. Ki moun ki ka konte valè pitit Izrayèl yo ye? Mwen ta renmen mouri tankou moun ki mache dwat devan Bondye. Mwen ta renmen fini tankou yo ak kè poze. ¹¹ Balak di Balaram: -Kisa w'ap fè m' konsa? Mwen mennen ou isit la pou bay lènmi m' yo madichon, epi se beni mwen wè w'ap beni yo! ¹² Balaram reponn: -Mwen te tou di ou se sèlman pawòl Seyè a va mete nan bouch mwen m'ap di. ¹³ ¶ Balak di Balaram konsa: -Ann al avè m' yon lòt kote. Antan ou va la, ou p'ap wè tout pèp Izrayèl la, men sèlman yon pòsyon ladan l'. ¹⁴ W'a rete kanpe la, epi w'a bay ti sa w'a wè a madichon pou mwen. Balak pran Balaram, li mennen l' nan jaden Santinèl yo, sou tèt mòn Pisga. Lè l' rive la, li bati sèt lotèl. Epi li touye yon jenn ti towò bèf ak yon belye mouton sou chak lotèl pou Bondye. ¹⁵ Balaram di Balak konsa: -Rete kanpe bò kote ofrann ou mete boule sou lotèl yo. Mwen menm, mwen pral kontre ak Bondye pi

¹⁶ devan. Seyè a vin jwenn Balaram, li pale ak Balaram byen pale ankò, epi li di l': -Tounen al
¹⁷ jwenn Balak. W'a pale avè l' jan mwen di ou la. Se konsa Balaram tounen bò kote Balak, li
 jwenn li kanpe bò ofrann boule yo ansanm ak tout chèf moun Moab yo. Epi Balak mande l': -Kisa
¹⁸ Seyè a di konsa? Epi Balaram pran chante chante sa a: -Souke kò ou, Balak! Vin tande! Pare
¹⁹ zòrèy ou, pitit Zipò! Bondye pa tankou moun k'ap bay manti. Non! Li pa tankou moun k'ap
 chanje lide yo pou ti krik ti krak! Depi li pwomèt yon bagay, l'ap fè l'. Depi li pale, fòk sa li di a
²⁰ rive vre! Yo ban m' lòd pou m' beni pèp Izrayèl la! Lè Bondye fin bay benediksyon l', nanpwen
²¹ anyen mwen ka fè ankò. Mwen pa wè okenn malè pou moun Jakòb yo. Ni mwen pa wè okenn
 traka pou moun Izrayèl yo. Seyè a, Bondye yo a, l'a avèk yo. Yo tout kontan, y'ap fè konnen se li
²² ki wa yo. Paske, lè Bondye t'ap fè yo soti kite peyi Lejip la, li te ba yo fòs pou yo te goumen
²³ tankou towò mawon. Pa gen wanga ki ka pran sou moun Jakòb yo. Pa gen maji ki ka fè moun
 Izrayèl yo anyen. Lè lè a va rive, y'a di moun Jakòb yo ak moun Izrayèl yo: Gade sa Seyè a fè pou
²⁴ nou! Gade! Pèp Izrayèl la kanpe tankou yon manman lyon. Yo leve kanpe tankou yon mal lyon.
 Yo p'ap chita toutotan yo pa fin devore moun ki tonbe anba men yo, toutotan yo pa fin bwè san
²⁵ moun yo touye yo. Lè sa a, Balak di Balaram konsa: -Menm jan ou pa vle ba yo madichon an,
²⁶ ou pa t' dwe asepte ba yo benediksyon non plis. Men, Balaram reponn Balak, li di l': -Mwen te
²⁷ tou pale ou wi. Mwen te di ou: Tou sa Seyè a va di m' fè, se sa m'ap fè. Balak di Balaram konsa:
 -Ann al non! Mwen pral mennen ou yon lòt kote. Ou pa janm konnen, antan ou la a, Bondye ka
²⁸ kite ou bay pèp la madichon pou mwen. Balak mennen Balaram sou tèt mòn Peyò a. Antan yo
²⁹ la, yo dekouvri tout dezè a nan pye yo. Balaram di Balak konsa: -Bati sèt lotèl pou mwen isit
³⁰ la. Lèfini, fè m' jwenn sèt jenn ti towò bèf ak sèt belye mouton. Balak fè tou sa Balaram te di l'
 fè a, epi li touye yon ti towò bèf ak yon belye mouton sou chak lotèl pou Bondye.

Chapter 24

¹ ¶ Lè sa a, Balaram te fin konprann se yon sèl bagay Seyè a te vle, se beni pou li beni pèp
 Izrayèl la. Se poutèt sa, li pa fè tankou lòt fwa yo. Li pa al chache konnen sa Seyè a te vle fè l'
² konnen an. Men, li bay fas li sou dezè a. Li leve je l', epi li wè moun pèp Izrayèl yo ak tant yo

byen ranje, chak branch fanmi apa. Lespri Bondye desann sou li. ³ Epi li pran chante chante sa a: -Men sa mwen menm, Balaram, pitit Bèyò, m'ap di: Men pawòl k'ap soti nan bouch moun Bondye

te louvri je a, ⁴ pawòl moun ki te tandè sa Bondye ap di a, pawòl moun ki te wè sa Bondye ki gen tout pouvwa a fè l' wè a. Lè sa a, li te tonbe fas atè, men Bondye te louvri je l'. ⁵ Ala bèl tant nou yo bèl, moun Jakòb yo! Ala bèl kote nou rete a bèl, moun Izrayèl yo! ⁶ Yo laji kò yo tankou dlo larivyè k'ap desann. Yo tankou jaden k'ap pouse sou bò larivyè, tankou yon pye lalwa Bondye li menm ta plante, tankou yon pye sèd k'ap grandi bò kannal dlo. ⁷ Lame pèp Izrayèl la ap fè nasyon yo tranble. Pèp Izrayèl la ap donminen sou anpil lòt pèp. Wa li yo ap pi fò pase wa Agag, Y'ap gouvènèn sou anpil nasyon. ⁸ Bondye te mennen yo soti kite peyi Lejip. Li te goumen pou yo tankou yon towò mawon. L'ap manje tout nasyon ki pa vle wè yo. L'ap kraze tout zo yo an miyèt moso. L'ap pèse yo pak an pak ak flèch li yo. ⁹ Pèp Izrayèl la chita atè a, l' ap pran repo, tankou yon lyon, tankou yon fenmèl lyon. Lè l'ap dòmi, ki moun ki ka penmèt yo leve l'? benediksyon pou tout moun ki mande benediksyon pou pèp Izrayèl la! Madichon pou tout moun k'ap mande madichon pou pèp Izrayèl la! ¹⁰ ¶ Lè sa a, Balak fè yon sèl move sou Balaram, li frape pye l' atè, li di konsa: -Mwen te rele ou isit la pou bay lènmi m' yo madichon pou mwen. Men, gade sa ou fè. Se beni ou beni yo pito. Sa fè twa fwa ou fè sa. ¹¹ Koulye a, pito ou kouri al lakay ou, tandè. Mwen te pwomèt pou m' te fè anpil bèl bagay pou ou. Men, gade sa Seyè a fè ou: ou pèdi tout. ¹² Balaram reponn, li di l' konsa: -Mwen te tou pale moun ou te voye chache m' yo. Mwen te di yo: ¹³ Balak te mèt ban mwen kay li plen ajan ak lò, mwen p'ap fè anyen poutèt pa m' ki pou fè m' dezobeyi lòd Seyè a, ni an byen ni an mal. Sa Seyè a di m' di, se sa ase m'ap di. ¹⁴ Balaram di Balak ankò: -Wi, koulye a mwen pral lakay mwen. Men, anvan m' ale, vini m' di ou kisa pèp Izrayèl la pral fè pèp ou a nan jou k'ap vini yo. ¹⁵ ¶ Epi Balaram pran chante chante sa a: -Men sa mwen menm, Balaram, pitit Bèyò, m'ap di. Men pawòl k'ap soti nan bouch moun Bondye te louvri je a, ¹⁶ moun ki ka tandè sa Bondye ap di a, moun ki gen konesans ki soti nan men Bondye ki anwo nan syèl la, moun ki te wè sa Bondye ki gen tout pouvwa a fè l' wè a. Li te tonbe fas atè, men Bondye te louvri je l'. ¹⁷ Mwen wè sa ki gen pou rive pèp Izrayèl la. M'ap gade sa ki pral rive l' pita. Tankou yon gwo zetwal, mwen wè yon chèf k'ap soti nan fanmi Jakòb la. Yon gwo wa pral leve nan mitan pèp Izrayèl la. L'ap kraze chèf Moab yo, l'ap detwi tout pitit Sèt yo. ¹⁸ Y'a depose moun Edon yo. Y'a pran peyi Seyi a nan men lènmi l' yo. Men, yo menm, moun Izrayèl yo, y'ap fè mèvèy nan lagè. ¹⁹ Yon gwo chèf pral soti nan pèp Izrayèl la. L'a gouvènèn sou yo tout. L'a touye rès moun ki te rete nan

lavil yo apre batay la. ²⁰ Apre sa, Balaam wè moun Amalèk yo nan vizyon l' lan. Li bay mesaj sa a, li di konsa: -Moun Amalèk yo, se yon nasyon ki fò anpil. Men, bout pou bout, yo gen pou yo disparèt nèt. ²¹ Apre sa, Balaram wè moun Kayen yo nan vizyon l' lan. Li bay mesaj sa a, li di konsa: -Kote ou rete a ou byen pwoteje. Ou ta di yon nich poze sou tèt yon gwo falèz. ²² Men, wè pa wè, moun Kayen yo la pou yo fini mal. Peyi Lasiri va depòte yo. ²³ Balaram pran pale ankò. Li bay mesaj sa a, li di ankò: -Kilès ki va la lè Bondye va fè tou sa? ²⁴ Lè sa a, moun ap soti lavil Kitim nan bato vin anvayi peyi a. Yo pral kraze peyi Lasiri ak lavil Babilòn. Men, ata moun Kitim yo gen pou disparèt nèt tou. ²⁵ Apre sa, Balaram leve, li tounen tounen l' lakay li. Epi Balak al fè wout li.

Chapter 25

¹ ¶ Pèp Izrayèl la vin moute tant yo nan Fon Zakasya yo. Lè sa a, mesye yo konmanse lage kò yo nan vagabondaj ak fanm peyi Moab yo. ² Medam peyi Moab yo menm envite yo nan seremoni ofrann bèt yo t'ap touye pou bondye pa yo. Moun pèp Izrayèl yo ale vre, yo manje epi yo sèvi bondye moun Moab yo. ³ Se konsa pèp Izrayèl la pran sèvi Baal-Peyò. Sa te fè Seyè a ankòlè anpil sou moun pèp Izrayèl yo. ⁴ Seyè a di Moyiz konsa: -Pran tout chèf pèp la, pann yo gwo midi devan mwen. Konsa, mwen p'ap ankòlè sou yo ankò. ⁵ Moyiz di chèf ki te reskonsab pèp la: -Se pou nou chak nou touye tout gason nan moun nou yo ki te al sèvi Baal-Peyò. ⁶ ¶ Lè sa a, antan tout moun yo t'ap kriye sou devan pòt Tant Randevou a, yonn nan gason pèp Izrayèl la ale, li mennen yon fanm peyi Madyan lakay li, devan Moyiz ak tout moun pèp Izrayèl la. ⁷ Lè Fineas, pitit gason Eleaza a, pitit pitit Arawon, prèt la, wè sa, li leve, li kite moun yo kote yo te reyini an, li pase men l', li pran yon frenn. ⁸ Li swiv nonm lan ak fanm lan anba tant lan, epi li pèse tou de, ni nonm lan ni fanm lan, ak frenn lan anba ti vant yo. Lamenm, epidemi ki t'ap ravaje pèp la sispann. ⁹ Te gen vennkatmil (24.000) moun ki te gen tan mouri nan epidemi an. ¹⁰ Seyè a pale ak Moyiz, li di l' konsa: ¹¹ -Se Fineas, pitit gason Eleaza a, pitit pitit gason Arawon prèt la, ki te fè m' sispann ankòlè sou pèp la. Paske nan tout moun sa yo, se li menm ki pa t' ka sipòte wè yon moun nan pèp Izrayèl la kite m' pou l' al sèvi yon lòt bondye. Se poutèt sa, atout mwen t'ap fè jalouzi a, mwen pa fin touye

¹²
 tout pèp la nè. Men sa pou ou di Fineas pou mwen: m'ap siyen yon kontra avè l' ki pou ba li kè
¹³
 poze. M'ap mete li, li menm ak tout ras fanmi l' apre li, pou yo sèvi m' prèt pou tout tan. Paske
 li te fè m' wè jan li pa t' tolere moun sèvi lòt bondye pase mwen. Se konsa li fè m' padonnen sa pèp
¹⁴
 la te fè ki mal la. Nonm pèp Izrayèl ki te mouri ansanm ak fanm peyi Madyan an te rele Zimri.
¹⁵
 Se te pitit gason Salou, chèf nan branch fanmi Simeyon an. Fanm peyi Madyan yo te touye a te
¹⁶
 rele Kozbi. Se te pitit fi Sou, ki li menm te chèf yon branch nan fanmi moun Madyan yo. ¶ Lè
¹⁷
 sa a, Seyè a pale ak Moyiz, li di l': -Al atake moun Madyan yo. Bat yo byen bay. Paske se
¹⁸
 yo menm ki te atake nou anvan ak malefis yo te voye sou nou nan zafè Peyò a, ak nan zafè Kozbi
 a, pitit fi chèf peyi Madyan an, moun menm ras ak yo a, fanm yo te touye lè epidemi te tonbe sou
 nou nan peyi Peyò a.

Chapter 26

¹
 ¶ Apre epidemi an, Seyè a pale ak Moyiz ansanm ak Eleaza, pitit gason Arawon, prèt la, li di
²
 yo konsa: -Nou pral fè resansman tout moun pèp Izrayèl la, tou sa ki gen ventan osinon ki pi gran,
 chak fanmi apa, dapre zansèt yo. W'a pran non tout gason nan pèp Izrayèl la ki bon pou fè lagè.
³
 Se konsa, antan pèp la nan plenn peyi Moab yo, toupre larivyè Jouden, anfas lavil Jeriko, Moyiz
⁴
 ak Eleaza, prèt la, ba yo lòd pou tout gason ki gen ventan osinon ki pi gran vin bay non yo, dapre
⁵
 lòd Seyè a te bay Moyiz. Men moun pèp Izrayèl la ki te soti kite peyi Lejip: ¶ Nan branch fanmi
⁶
 Woubenn, premye pitit gason Izrayèl la, te gen fanmi moun Enòk yo, fanmi moun Palou yo, fanmi
⁷
 moun Ezwon yo ak fanmi moun Kami yo. Se tout moun sa yo ki nan branch fanmi Woubenn lan.
 Lè resansman an, yo te jwenn karantwamil sèsantrant (43.730) gason nan branch fanmi sa a.
⁸
⁹
 Palou te papa Eliyab. Eliyab te papa Nemwèl, Datan ak Abiram. Se Datan ak Abiram sa yo, de
 nèg moun yo te konsidere anpil, ki te revòlte kont Moyiz ak Arawon. Yo te fè pati bann moun Kore
¹⁰
 yo ki te revòlte kont Seyè a. Lè sa a, tè a te louvri, li vale yo, epi yo mouri ansanm ak Kore ak
 tout bann moun li yo. Jou sa a, dife te boule desansenkant (250) moun. Se te yon avètisman pou
¹¹
 pèp la. Men, pitit gason Kore yo pa t' mouri lè sa a. Men pitit gason Simeyon yo ak tout kòt
¹²
 fanmi yo. Te gen fanmi moun Nemwèl yo, fanmi moun Yamen yo, fanmi moun Yakim yo, fanmi
¹³

14
 moun Zera yo ak fanmi moun Sayil yo. Se tout moun sa yo ki nan branch fanmi Simeyon an.
 15
 Lè resansman an, te gen venndemil desan (22.200) gason nan branch fanmi sa a. Men pitit gason
 Gad yo ak tout kòt fanmi yo. Te gen fanmi moun Sefon yo, fanmi moun Agi yo, fanmi moun Chouni
 16
 yo, fanmi moun Ozni yo, fanmi moun Eri yo, 17 fanmi moun Awòd yo, fanmi moun Areli yo.
 18
 Se tout moun sa yo ki nan branch fanmi Gad la. Lè resansman an, te gen karantmil senksan
 19
 (40.500) gason nan branch fanmi sa a. Men pitit gason Jida yo. Te gen Er ak Onan, men yo tou
 20
 de mouri nan peyi Kanaran san kite pitit. Apre yo, te gen Chela, Perèz ak Zirak, ki bay yo chak
 21
 yon kòt fanmi. Perèz te gen de pitit gason. Yo chak bay yon fanmi apa. Se te fanmi Eswon an
 22
 ak fanmi Amoul lan. Se tout moun sa yo ki nan branch fanmi Jida a. Lè resansman an, te gen
 23
 swasansèzmil senksan (76.500) gason nan branch fanmi sa a. Men pitit gason Isaka yo ak tout
 24
 kòt fanmi yo. Te gen fanmi moun Tola yo, fanmi moun Pouva yo, fanmi moun Yachoub yo,
 25
 fanmi moun Chimwon yo. Se tout moun sa yo ki te fè pati branch fanmi Isaka a. Lè resansman
 26
 an, yo te jwenn swasannkatmil twasan (64.300) gason nan branch fanmi sa a. Men pitit gason
 Zabilon yo ak tout kòt fanmi yo. Te gen fanmi moun Serèd yo, fanmi moun Elon yo, fanmi moun
 27
 Yaleyèl yo. Se tout moun sa yo ki te fè pati branch fanmi Zabilon an. Lè resansman an, yo te
 28
 jwenn swasantmil senksan (60.500) gason nan branch fanmi sa a. Jozèf te gen de pitit gason:
 29
 Manase ak Efrayim. Men pitit gason Manase yo ak tout kòt fanmi yo: Te gen fanmi moun Maki
 30
 yo. Maki te papa Galarad ki te bay fanmi moun Galarad yo. Galarad te fè sis pitit gason, yo chak
 31
 bay yon branch fanmi. Te gen fanmi moun Yezè yo, fanmi moun Elèk yo, fanmi moun Asriyèl
 32
 yo, fanmi moun Sichèm yo, fanmi moun Chemida yo, fanmi moun Efè yo. 33 Men Zelofeyad,
 pitit gason Efè a, pa t' gen pitit gason. Se annik pitit fi li te genyen. Men non yo: Se te Mala, Noa,
 34
 Ogla, Milka ak Tisa. Se tout moun sa yo ki te fè pati branch fanmi Manase a. Lè resansman an,
 35
 yo te jwenn senkanndemil sètsan (52.700) gason nan branch fanmi sa a. Men pitit gason Efrayim
 yo ak tout kòt fanmi yo: Te gen fanmi moun Choutela yo, fanmi moun Bekè yo, fanmi moun Tayan
 36
 yo. Choutela poutèt pa l' te gen yon pitit gason. Se te Eran ki bay yon fanmi apa. 37 Se tout
 moun sa yo ki te nan branch Efrayim lan. Lè resansman an, yo te jwenn tranndemil senksan (32.500)
 38
 gason nan branch fanmi sa a. Men pitit gason Benjamen yo ak tout kòt fanmi yo: Te gen fanmi

moun Bela yo, fanmi moun Achbèl yo, fanmi moun Ayiram yo, ³⁹ fanmi moun Choufan yo ak
 fanmi moun Oufam yo. ⁴⁰ Bela pou tèt pa l' te gen de pitit gason ki bay de lòt branch nan branch
 fanmi an ankò. Se te Ad ak Naaman. ⁴¹ Se tout moun sa yo ki te fè pati branch fanmi Benjamen
 an. Lè resansman an, yo te jwenn karanssenkmil sisan (45.600) gason nan branch fanmi sa a.
⁴² Men pitit gason Dann lan ak tout kòt fanmi l'. Se te fanmi moun Chwanm yo. Se tout moun sa
 yo ki te fè pati branch fanmi Dann lan. ⁴³ Lè resansman an, yo te jwenn swasannkatmil katsan
 (64.400) gason nan branch fanmi sa a. ⁴⁴ Men pitit gason Asè yo ak tout kòt fanmi yo. Te gen
 fanmi moun Imna yo, fanmi moun Ichvi yo ak fanmi moun Berya yo. ⁴⁵ Berya pou tèt pa l' te gen
 de pitit gason ki bay de lòt branch nan fanmi an ankò: Se te Ebè ak Malkiyèl. ⁴⁶ Asè te gen yon
 pitit fi yo te rele Sera. ⁴⁷ Se tout moun sa yo ki te fè pati branch fanmi Asè a. Lè resansman an, yo
 te jwenn senkanntwamil katsan (53.400) gason nan branch fanmi sa a. ⁴⁸ Men pitit gason Neftali
 yo ak tout kòt fanmi yo. Te gen fanmi moun Yazeyèl yo, fanmi moun Gouni yo, ⁴⁹ fanmi moun
 Yesè yo ak fanmi moun Chilèm yo. ⁵⁰ Se tout moun sa yo ki te fè pati branch fanmi Neftali a,
 fanmi pa fanmi. Lè resansman an, yo te konte karanssenkmil katsan (45.400) gason nan fanmi sa
 yo. ⁵¹ Konsa, te gen antou sisan enmil sètsantrant (601.730) gason nan tout pèp Izrayèl la. ⁵² ¶
⁵³ Seyè a pale ak Moyiz, li di l' konsa: -Nou pral separe peyi a bay chak fanmi pòsyon pa yo dapre
⁵⁴ kantite gason yo jwenn nan chak. Fanmi ki gen anpil gason va resevwa yon pi gwo pòsyon.
 Fanmi ki pa gen anpil gason va resevwa yon pi piti pòsyon. Chak fanmi va resevwa yon pòsyon
⁵⁵ dapre kantite gason ki gen ladan l'. Men, pou fè separasyon peyi a, n'a tire osò: chak fanmi va
⁵⁶ resevwa pòsyon pa l' dapre kantite moun yo te konte nan chak. Y'a tire osò pou yo separe bay
 chak branch fanmi pòsyon pa yo: yon gwo pòsyon pou chak branch fanmi ki anpil, yon ti pòsyon
 pou chak branch fanmi ki pa anpil. ⁵⁷ ¶ Men, nan branch fanmi Levi a, men moun yo te konte
⁵⁸ dapre fanmi yo. Te gen fanmi Gèchon an, fanmi Keyat la ak fanmi Merari a. Men lòt fanmi Levi
 yo: moun Libni yo, moun Ebwon yo, moun Makli yo, moun Mouchi yo ak moun Kore yo. Keyat
⁵⁹ te papa Amram. Madan Amram te rele Yokebèd. Se te yon pitit fi Levi. Li te fèt nan peyi Lejip.
⁶⁰ Li te fè twa pitit pou Amram: Arawon, Moyiz ak Miryam, sè yo. Arawon te papa kat pitit gason:
⁶¹ Nadab, Abiyou, Eleaza ak Itama. Nadab ak Abiyou te mouri lè yo te ofri bay Seyè a yon dife

yo pa t' dwe ofri. ⁶² Lè resansman an, yo te jwenn nan branch fanmi sa a venntwamil (23.000) gason ki te gen yon mwa depi yo te fèt osinon ki te pi gran. Yo pa t' konte yo ansanm ak rès pèp Izrayèl la, paske yo pa t'ap resevwa okenn pòsyon nan tè ki pou pèp la. ⁶³ ¶ Men tout moun Moyiz ak Eleaza te konte lè yo t'ap fè resansman moun pèp Izrayèl la nan plenn Moab yo, lòt bò larivyè Jouden, anfas lavil Jeriko. ⁶⁴ Pami yo pa t' gen yonn menm nan sa Moyiz ak Arawon te konte lè yo t'ap fè premye resansman pèp Izrayèl la nan dezè Sinayi a. ⁶⁵ Paske Seyè a te di yo tout gen pou mouri nan dezè a. Yo tout te mouri vre, esepite Kaleb, pitit gason Jefoune a ak Jozye, pitit gason Noun lan.

Chapter 27

¹ ¶ Lè sa a, te gen nan branch fanmi Manase a senk fi, Mala, Noa, Ogla, Milka ak Tiza. Yo tout te pitit fi Zelochad. Zelochad sa a te pitit gason Efè. Efè te pitit gason Galarad, ki te pitit gason Maki, ki li menm te pitit gason Manase, ki te pitit gason Jozèf. ² Medam yo vini, yo kanpe devan Moyiz ak Eleaza, prèt la, devan chèf fanmi yo ak devan tout pèp la, devan pòt Tant Randevou a, epi yo di: ³ -Papa nou mouri nan dezè a san li pa kite okenn pitit gason. Li pa t' fè pati bann moun Kore yo ki te revòlte kont Seyè a. Se poutèt pwòp peche pa l' yo kifè li mouri san li pa t' gen tan gen pitit gason. ⁴ Se pa paske papa nou pa t' gen pitit gason kifè pou non li disparèt nan fanmi an. Ban nou yon pòsyon tè tou nan mitan fanmi papa nou. ⁵ Moyiz al pale koze a avèk Seyè a. ⁶ Seyè a di l' konsa; ⁷ -Pitit fi Zelochad yo gen rezon. W'a ba yo yon pòsyon tè ki va rete pou yo nan mitan fanmi papa yo. W'a ba yo pòsyon tè ki te pou papa yo a. ⁸ Apre sa, w'a pale ak moun pèp Izrayèl yo, w'a di yo konsa: Si yon moun mouri san li pa kite pitit gason, n'a renmèt pòsyon tè pa l' la bay pitit fi li yo. ⁹ Si li pa gen pitit fi, n'a renmèt pòsyon tè pa l' la bay frè l' yo. ¹⁰ Si li pa gen frè, n'a renmèt tè a bay frè papa l' yo. ¹¹ Si papa l' pa t' gen frè, n'a renmèt li bay fanmi pi pre l' la. Epi tè a va rete pou li. Se pou moun pèp Izrayèl yo swiv regleman sa a tankou yon lwa, jan mwen menm Seyè a, mwen te bay Moyiz lòd la. ¹² ¶ Seyè a di Moyiz konsa: -Moute sou mòn Abarim. Voye je ou gade peyi mwen pral bay moun pèp Izrayèl yo. ¹³ Lè w'a fin wè li, ou pral mouri, tankou Arawon, frè ou la. ¹⁴ paske nou tou de nou pa t' fè sa m' te di nou fè a nan dezè Zin lan. Lè pèp la t'ap chache m' kont bò sous dlo Meriba yo, nou te refize kite m' fè yo wè pouvwa mwen nan zafè dlo a. (Meriba

se sous dlo bò Kadès nan dezè Zin lan.)¹⁵ ¶ Lè sa a, Moyiz pale ak Seyè a, li di l' konsa:¹⁶ -O
 Seyè, Bondye ki bay tout moun lavi, tanpri, chwazi yon nonm ki ka mennen pèp la,¹⁷ yon nonm
 ki ka mache alatèt yo nan tout antre soti yo, pou pèp ou a, pèp Seyè a, pa rete tankou yon bann
 mouton san gadò pou okipe yo.¹⁸ Seyè a reponn Moyiz: -Pran Jozye, pitit gason Noun lan. Se yon
 nonm ki gen lespri Bondye k'ap travay nan kè l'. W'a mete men ou sou tèt li,¹⁹ epi w'a fè l' kanpe
 devan Eleaza, prèt la, ak devan tout pèp la. Epi la, devan yo tout, w'a ba li tout lòd ou gen pou ba
 li.²⁰ W'a separe avè l' pouvwa otorite ou genyen an, pou tout moun nan pèp Izrayèl la ka obeyi l'.
²¹ L'a toujou kanpe devan Eleaza, prèt la, ki va sèvi ak Ourim yo pou chache konnen sa mwen vle
 yo fè. Se konsa, Eleaza va dirije Jozye ak tout pèp la nan tout antre soti yo.²² Moyiz fè jan Seyè
 a te ba li lòd fè a. Li pran Jozye, li fè l' kanpe devan Eleaza, prèt la, ak tout pèp la.²³ Li mete men
 l' sou tèt li, epi li ba li lòd li yo, jan Seyè a te di l' la.

Chapter 28

¹ ¶ Seyè a pale ak Moyiz, li di l' konsa:² -Men lòd w'a bay moun pèp Izrayèl yo. W'a di yo pou
 mwen: Se pou yo toujou chonje dat pou yo fè ofrann yo, dat pou yo vin pote ofrann y'ap boule nèt
 pou mwen nan dife, ofrann k'ap fè m' plezi ak bon sant yo.³ W'a di yo pou mwen: Men ofrann pou
 nou boule nan dife pou Seyè a. Chak jou, san sote yonn, n'a ofri de ti mouton ki gen ennan, ki pa
 gen okenn enfimite. N'a boule yo nèt nan dife pou mwen.⁴ N'a ofri premye ti mouton an nan maten,
 n'a ofri lòt la nan aswè.⁵ Ansanm avèk chak ti mouton, n'a ofri sèt ti mamit farin frans melanje ak
 de boutèy ka plen pi bon kalite lwil oliv ou ka jwenn.⁶ (Sa se ofrann pou yo boule nèt chak jou
 nan dife, ofrann yo te konn fè nan tan lontan sou mòn Sinayi a, tankou yon manje yo boule pou
 Seyè a, yon ofrann k'ap fè Seyè a plezi ak bon sant li.)⁷ Avèk chak ti mouton, n'a ofri de boutèy
 ka bwason, n'a vide l' sou lotèl la pou Seyè a.⁸ Nan aswè, n'a boule dezyèm ti mouton an menm
 jan nou te fè l' nan maten an. N'a fè ofrann farin frans lan tou ansanm ak bwason an. Se va yon
 manje n'a boule nèt pou Seyè a, yon ofrann k'ap fè Seyè a plezi ak bon sant li.⁹ ¶ Pou jou repo a,
 n'a ofri de ti belye mouton ki gen ennan, ki san okenn enfimite, kat ti mamit farin frans melanje ak
 lwil oliv tankou ofrann grenn jaden ak yon ofrann bwason.¹⁰ Chak jou repo, se pou nou fè ofrann

¹¹ sa yo an menm tan ak ofrann pou chak jou yo ansanm ak ofrann bwason yo. Nan konmansman chak mwa, n'a fè yon ofrann boule pou Seyè a. Lè sa a, n'a ofri de towò bèf, yon belye mouton ak

¹² sèt ti mouton ki gen ennan. Epi fòk yo tout san okenn enfimite. N'a fè yon ofrann grenn manje tou ansanm ak chak bèt. Pou chak towò bèf, n'a ofri vennkat ti mamit farin frans melanje ak lwil oliv. Pou chak belye mouton, n'a ofri katòz ti mamit farin frans tankou yon ofrann grenn manje.

¹³ Pou chak ti mouton, n'a ofri sèt ti mamit farin frans. Se va yon ofrann n'a boule nèt pou Seyè a,

¹⁴ yon ofrann k'ap fè Seyè a plezi ak bon sant li. N'a fè ofrann bwason tou: kat boutèy ka pou chak towò bèf, twa boutèy ka pou belye mouton an ak de boutèy ka pou chak ti mouton. Se ofrann sa

¹⁵ yo n'a boule nèt pou Seyè a, nan konmansman chak mwa, pandan tout lanne a. Anplis ofrann pou chak jou yo, w'a touye yon bouk pou mande padon pou peche, epi w'a ofri tou ofrann bwason

¹⁶ ki toujou mache ansanm avè l' la. ¶ Katòzyèm jou nan premye mwa a, n'a fete fèt Delivrans lan

¹⁷ pou Seyè a. Kenzyèm jou menm mwa a va yon gwo jou fèt. Pandan sèt jou, n'a manje pen ki

¹⁸ fèt san ledven. Sou premye jou a, n'a reyini tout moun pou vin adore Seyè a. Lè sa a, pesonn

¹⁹ p'ap gen dwa fè okenn gwo travay. N'a fè ofrann bèt pou yo boule nèt pou Seyè a: de jenn towò

²⁰ bèf, yon belye mouton ak sèt ti mouton ki gen ennan. Fòk yo tout san okenn enfimite. N'a fè ofrann grenn jaden sou fòm farin frans melanje ak lwil oliv: venteyen ti mamit pou chak towò,

²¹ katòz ti mamit pou belye mouton an, ak sèt ti mamit pou chak ti mouton. N'a ofri tou yon

²² bouk pou yo touye pou mande padon pou peche. Se konsa, n'a fè ofrann bèt pou nou touye pou

²³ mande Bondye gras pou pèp la. N'a fè tout ofrann sa yo anplis ofrann bèt nou gen pou nou boule

²⁴ chak maten san sote jou a. Se va menm jan an tou pou tout sèt jou yo. Chak jou n'a ofri manje pou yo boule nèt pou Seyè a: se va tankou yon ofrann k'ap fè Seyè a plezi ak bon sant li. N'a fè ofrann sa a anplis ofrann bèt pou yo boule chak jou pou Seyè a ak ofrann bwason ki mache avè l'

²⁵ la. Sou setyèm jou a, n'a reyini tout pèp la ankò pou n' fè sèvis pou Seyè a. Jou sa a, nou p'ap fè

²⁶ okenn gwo travay non plis. Konsa tou, premye jou fèt premye rekòt la, lè n'ap pote ofrann grenn nou fèk rekòlte yo bay Seyè a, n'a reyini tout moun pou yo vin fè sèvis pou Bondye. Jou sa a, pesonn

²⁷ p'ap gen dwa fè okenn gwo travay. Men bèt n'a ofri pou yo boule nèt nan dife pou Seyè a, ofrann ki va fè Seyè a plezi ak bon sant li: de jenn towò, yon belye mouton ak sèt ti mouton ki gen ennan.

²⁸ Fòk yo tout san okenn enfimite. N'a fè ofrann grenn jaden yo tou sou fòm farin frans melanje

²⁹ ak lwil oliv: ki vle di venteyen ti mamit pou chak towò, katòz ti mamit pou belye mouton an ak

³⁰ sèt ti mamit pou chak ti mouton yo. N'a ofri tou yon bouk pou mande Bondye padon pou peche.

Se konsa n'a fè ofrann bèt pou yo touye pou mande Bondye gras pou tout pèp la. ³¹ N'a ofri bèt sa yo ansanm ak ofrann bwason ki mache avèk yo chak, anplis ofrann bèt pou yo boule chak jou a ansanm ak ofrann grenn jaden yo. Se pou tout bèt yo san okenn enfimite.

Chapter 29

¹ ¶ Premye jou setyèm mwa a, n'a sanble tout moun pou yo vin fè sèvis pou adore Bondye. Jou sa a, pesonn p'ap gen dwa fè okenn gwo travay. Se jou sa a tou, y'a kònen twonpèt yo pou fè konnen jou a rive. ² Men bèt n'a ofri pou yo boule nèt nan dife pou Seyè a, men ofrann ki va fè Seyè a plezi ak bon sant li: yon jenn towò bèf, yon belye mouton ak sèt ti mouton ki gen ennan. Fòk yo tout san okenn enfimite. ³ N'a fè ofrann grenn jaden yo tou sou fòm farin frans melanje ak lwil oliv: ki vle di venteyen ti mamit farin frans pou towò a, katòz ti mamit pou belye mouton an, ⁴ ak sèt ti mamit pou chak ti mouton yo. ⁵ N'a ofri tou yon bouk kabrit pou mande padon pou peche. Se konsa n'a fè ofrann bèt pou touye pou mande Bondye gras pou tout pèp la. ⁶ N'a fè ofrann sa yo anplis ofrann bèt pou yo boule nan dife chak premye jou nan mwa yo ansanm ak ofrann grenn jaden ki toujou mache avèk yo a, mete sou ofrann bèt pou yo boule chak jou a ansanm ak ofrann grenn jaden ak bwason ki toujou mache avè l' la. Se ofrann manje sa yo n'a boule nèt pou Seyè a. Se va ofrann k'ap fè Seyè a plezi ak bon sant yo. ⁷ Dizyèm jou setyèm mwa a, n'a reyini tout moun pou yo vin fè sèvis pou Bondye. Jou sa a, tout moun va rete san manje. Pesonn p'ap gen dwa fè okenn travay. ⁸ N'a ofri bèt pou yo boule nèt nan dife pou Bondye. Se va yon ofrann ki va fè Seyè a plezi ak bon sant li. Men bèt n'a ofri: yon towò bèf, yon belye mouton, sèt ti mouton ki gen ennan. Fòk yo tout san okenn enfimite. ⁹ N'a fè ofrann grenn jaden ki pou mache ak chak bèt sou fòm farin frans melanje ak lwil oliv: ki vle di venteyen ti mamit farin pou towò bèf la, katòz ti mamit pou belye mouton an ¹⁰ ak sèt ti mamit pou chak ti mouton yo. ¹¹ N'a ofri tou yon bouk pou mande Bondye padon pou peche anplis ofrann bèt pou touye pou gran jou padon an, mete sou ofrann bèt pou yo boule chak jou a ansanm ak ofrann grenn jaden yo ak ofrann bwason ki mache ak yo a. ¹² ¶ Kenzyèm jou setyèm mwa a, n'a reyini tout moun pou yo vin adore Bondye. Jou sa a, pesonn p'ap gen dwa fè okenn gwo travay. N'a fè yon fèt pou Seyè a pandan sèt jou. ¹³ Premye jou a, n'a ofri bèt pou yo boule nèt nan dife pou Seyè a, ofrann ki va fè Seyè a plezi ak bon sant li: Men bèt pou nou ofri: trèz towò bèf, de belye mouton, katòz ti mouton ki gen ennan. Fòk yo tout san okenn enfimite. ¹⁴ Men ofrann grenn jaden sou fòm farin frans melanje ak lwil oliv ki pou mache ak bèt yo: venteyen

ti mamit farin frans pou chak towò, katòz ti mamit pou chak belye, ¹⁵ ak sèt ti mamit pou chak ti
 mouton, ansanm ak ofrann bwason ki pou mache ak yo chak. ¹⁶ N'a ofri tou yon bouk kabrit pou
 mande Bondye padon pou peche. N'a fè ofrann sa yo anplis ofrann pou nou boule nèt chak jou a
 ansanm ak ofrann grenn jaden ak ofrann diven ki pou mache avè l' yo. ¹⁷ Dezyèm jou fèt la, n'a
 ofri douz towò bèf, de belye mouton ak katòz ti mouton ki gen ennan. Fòk yo tout san okenn
 enfimite. ¹⁸ Ansanm ak chak bèt n'a fè ofrann grenn jaden ak ofrann bwason ki pou mache ak yo,
 dapre regleman an. ¹⁹ Epi, anplis ofrann bèt nou fè pou yo boule nèt pou Seyè a chak jou ansanm
 ak ofrann grenn jaden ak ofrann bwason ki mache ak yo a, n'a ofri yon bouk kabrit pou yo touye
 pou mande Bondye padon pou peche. ²⁰ Twazyèm jou fèt la, n'a ofri onz towò bèf, de belye mouton
 ak katòz ti mouton ki gen ennan. Fòk yo tout san okenn enfimite. ²¹ Ansanm ak chak bèt n'a fè
 ofrann grenn jaden ak ofrann bwason ki pou mache ak yo, dapre regleman an. ²² Epi, anplis ofrann
 bèt nou fè chak jou pou yo boule nèt pou Seyè a ansanm ak ofrann grenn jaden ak ofrann bwason
 ki mache ak yo a, n'a ofri yon bouk kabrit pou yo touye pou mande Bondye padon pou peche.
²³ Katriyèm jou fèt la, n'a ofri dis towò bèf, de belye mouton ak katòz ti mouton ki gen ennan. Fòk
 yo tout san okenn enfimite. ²⁴ Ansanm ak chak bèt n'a fè ofrann grenn jaden ak ofrann bwason ki
 pou mache ak yo, dapre regleman an. ²⁵ Epi, anplis ofrann bèt nou fè chak jou pou yo boule nèt
 pou Seyè a ansanm ak ofrann grenn jaden ak ofrann bwason ki mache ak yo a, n'a ofri yon bouk
 kabrit pou yo touye pou mande Bondye padon pou peche. ²⁶ Senkyèm jou fèt la, n'a ofri nèf towò,
 de belye mouton ak katòz ti mouton ki gen ennan. Fòk yo tout san okenn enfimite. ²⁷ Ansanm ak
 chak bèt n'a fè ofrann grenn jaden ak ofrann bwason ki pou mache ak yo, dapre regleman an. ²⁸ Epi,
 anplis ofrann bèt nou fè chak jou pou boule nèt pou Seyè a ansanm ak ofrann grenn jaden ak ofrann
 bwason ki mache ak yo a, n'a ofri yon bouk kabrit pou yo touye pou mande Bondye padon pou
 peche. ²⁹ Sizyèm jou fèt la, n'a ofri wit towò, de belye mouton ak katòz ti mouton ki gen ennan.
 Fòk yo tout san okenn enfimite. ³⁰ Ansanm ak chak bèt n'a fè ofrann grenn jaden ak ofrann bwason
 ki pou mache ak yo, dapre regleman an. ³¹ Epi, anplis ofrann bèt nou fè chak jou pou boule nèt
 pou Seyè a ansanm ak ofrann grenn jaden ak ofrann bwason ki mache ak yo a, n'a ofri yon bouk
 kabrit pou yo touye pou mande Bondye padon pou peche. ³² Setyèm jou fèt la, n'a ofri sèt towò,
 de belye mouton ak katòz ti mouton ki gen ennan. Fòk yo tout san okenn enfimite. ³³ Ansanm ak
 chak bèt n'a fè ofrann grenn jaden ak ofrann bwason ki pou mache ak yo, dapre regleman an. ³⁴ Epi,

anplis ofrann bèt nou fè chak jou pou boule nèt pou Seyè a ansanm ak ofrann grenn jaden ak ofrann bwason ki mache ak yo a, n'a ofri yon bouk kabrit pou yo touye pou mande Bondye padon pou peche. ³⁵ Wityèm jou fèt la, n'a sanble tout moun pou adore Bondye. Jou sa a, pesonn p'ap fè okenn gwo travay. ³⁶ N'a fè ofrann bèt pou yo boule nèt nan dife, ofrann ki va fè Seyè a plezi ak bon sant li. Men bèt pou nou ofri: yon towò bèf, yon belye mouton ak sèt ti mouton ki gen ennan. Fòk yo tout san okenn enfimite. ³⁷ Ansanm ak chak bèt n'a ofri ofrann grenn jaden ak ofrann bwason ki pou mache ak yo, dapre regleman an, ³⁸ Epi, anplis ofrann bèt nou fè chak jou pou boule nèt pou Seyè a ansanm ak ofrann grenn jaden ak ofrann bwason ki mache ak yo, n'a ofri yon bouk kabrit pou yo touye pou mande Bondye padon pou peche yo. ³⁹ Men tou sa nou va ofri bay Seyè a lè n'ap fè gwo fèt nou dwe fè pou li yo, apa ofrann n'ap fè paske nou te pran angajman pou nou te fè yo, ou ankò ofrann n'ap fè paske nou rete konsa nou vle fè l', mete sou bèt n'ap ofri pou boule nèt nan dife pou Bondye, sou ofrann grenn jaden ak ofrann bwason yo, ak sou ofrann nou fè pou di Bondye mèsi. ⁴⁰ Se konsa Moyiz te di pèp Izrayèl la tou sa Seyè a te ba li lòd di yo.

Chapter 30

¹ ¶ Moyiz pale ak chèf branch fanmi pèp Izrayèl yo. Li di yo konsa: -Men lòd Seyè a bay. ² Lè yon moun fè yon ve l'ap bay Seyè a kichòy ou ankò lè yon moun pwomèt li p'ap fè yon bagay, li pa fèt pou l' pa kenbe pawòl. Se pou l' fè tou sa li te pwomèt l'ap fè a. ³ ¶ Si yon jenn fi ki lakay papa l' toujou fè yon ve l'ap bay Seyè a kichòy ou ankò li pwomèt pou l' pa fè yon bagay, ⁴ lè papa a vin konn sa, si li pa di l' anyen, jenn fi a gen obligasyon pou l' kenbe ve li te pran an, osinon pwomès li te fè a. ⁵ Men, si lè papa a vin konn sa, li fè opozisyon, ni ve jenn fi a te pran yo ni pwomès li te fè yo pa kenbe ankò: yo pa vo anyen. Seyè a p'ap gade sou sa, li p'ap fè l' anyen, paske se pa fòt li. Se papa l' ki derefize kite l' kenbe pawòl li. ⁶ Si yon jenn fi te anba obligasyon pou l' te kenbe yon ve li te pran osinon yon pwomès li te fè, menm si li te pran yo an jwèt, si li rive marye, ⁷ epi mari a pa di l' anyen lè li vin konn sa, fi a gen obligasyon pou l' kenbe ve li te pran an osinon pwomès li te fè a. ⁸ Men, si jou mari a vin konn sa li fè opozisyon, lamenn li wete fanm lan anba obligasyon li te genyen pou l' te kenbe ve li te pran an osinon pwomès li te fè a. Seyè a p'ap gade sou sa, li p'ap fè l' anyen. ⁹ Men lè yon fanm ki vè osinon ki divòse fè yon ve pou l' bay Seyè a kichòy, osinon li pwomèt pou l' pa fè yon bagay, se pou l' kenbe pawòl li. ¹⁰ Si yon madanm marye,

¹¹
 antan li lakay mari l', pran yon ve pou fè kichòy osinon pwomèt pou l' pa fè yon bagay, epi si
 lè mari l' vin konn sa, li pa di l' anyen, li pa fè okenn opozisyon, fanm lan gen obligasyon pou l'
¹²
 kenbe ve li te pran an osinon pwomès li te fè a, nenpòt kisa yo te ye. Men, si mari a vin konn
 sa, epi menm jou li vin konn sa a, li di li pa dakò, fanm lan p'ap nan obligasyon pou l' kenbe pawòl
 ni pou ve li te pran an, ni pou pwomès li te fè a. Se mari a ki te derefize kite l' kenbe pawòl li.
¹³
 Konsa, Seyè a p'ap gade sou sa, li p'ap fè l' anyen. Yon mari gen dwa dakò, konsa tou li gen
 dwa refize dakò kite madanm li kenbe pawòl li, ni pou ve madanm li te pran an, ni pou pwomès li
¹⁴
 te fè a. Men, si apre mari a vin konn sa li kite yon jou pase, li pa di l' anyen ankò, sa vle di li
 dakò ak ve madanm li te pran an osinon ak pwomès madanm lan te fè a. Depi mari a pa di l' anyen
¹⁵
 lè li vin konn sa, sa vle di se dakò li dakò. Men si, apre mari a vin konn angajman madanm lan
 te pran an, mari a kite kèk jou pase anvan li di li pa dakò, se li menm k'ap sibi chatiman ki pou ta
¹⁶
 tonbe sou madanm lan pou pawòl li pa kenbe a. Men tout regleman Seyè a te bay Moyiz pou
 yon fanm ki fè ve osinon ki pran yon angajman. Si li marye, men tout jan mari a ka boule avè l'
 nan ka sa a. Si li poko marye, li lakay papa l' toujou, men tout jan papa a ka pran sa.

Chapter 31

¹
 ¶ Seyè a pale ak Mwiz, li di l' konsa: ² -Ou pral pini moun Madyan yo pou sa yo fè moun pèp
 Izrayèl yo pase. Apre sa, ou pral mouri pou ou al jwenn moun pa ou yo ki mouri deja. ³ Se konsa,
 Moyiz pale ak pèp la, li di yo konsa: -Pare kèk gason nan mitan nou pou y' al goumen, pou yo
⁴
 mache pran moun Madyan yo, fè yo peye sa yo fè Seyè a. N'a pran mil gason nan chak branch
⁵
 fanmi pèp Izrayèl la pou n' voye al goumen. Se konsa nan tout kantite gason ki nan pèp Izrayèl
 la, yo pran mil gason nan chak branch fanmi. Sa te bay douzmil (12.000) gason antou ki te pare
⁶
 pou al goumen. Moyiz voye douzmil gason sa yo al fè lagè. Li voye ak yo Fineas, pitit gason
⁷
 Eleaza, prèt la, ki t'ap pote veso Bondye yo ak twonpèt pou bay siyal yo. ¶ Yo atake moun Madyan
⁸
 yo jan Seyè a te bay Moyiz lòd la, yo touye tout gason yo. Yo touye senk wa moun Madyan yo:
⁹
 Evi, Rekèm, Zou, Our ak Reba. Yo touye Balaram, pitit Beyò a, tou. Moun Izrayèl yo fè tout
 fanm ak tout timoun Madyan yo prizonye. Yo pase men yo pran tout bèf yo, tout mouton yo, tout
¹⁰
 kabrit yo ak tout lòt byen yo. Yo boule tout kay nan lavil yo ak tout kan kote moun yo te rete.
¹¹
 Apre sa, yo pran tou sa yo te ranmase, tout bèt ak tout moun yo te fè prizonye yo, ¹² yo mennen

yo bay Moyiz ansanm ak Eleaza, prèt la, ak tout moun pèp Izrayèl yo ki te nan kan an, nan plenn
 Moab yo, lòt bò larivyè Jouden, anfas lavil Jeriko. ¹³ ¶ Moyiz, Eleaza, prèt la ak tout chèf pèp
 Izrayèl yo soti nan kan an al kontre lame a. ¹⁴ Moyiz move sou chèf reskonsab lame yo, sou chèf
 divizyon mil yo ak chèf konpayi san yo ki t'ap tounen soti nan lagè a. ¹⁵ Li di yo konsa: -Poukisa
 nou pa touye tout medam sa yo? ¹⁶ Se yo menm ki te swiv konsèy Balaram yo, se yo ki te lakòz
 moun pèp Izrayèl yo te vire do bay Bondye nan zafè Baal-Peyò a, kifè gwo malè nou konnen an
 te tonbe sou pèp Izrayèl la. ¹⁷ Se pou nou touye tout pitit gason yo. Se pou nou touye tout fanm ki
 kouche ak gason deja. ¹⁸ Men, n'a sove lavi tout jenn fi ki poko janm kouche ak gason. N'a pran
 yo pou nou. ¹⁹ Men, nou menm ki touye moun osinon ki manyen kadav moun mouri, nou pral rete
 sèt jou andeyò limit kan an. Sou twazyèm jou a ak sou setyèm jou a n'a fè sèvis pou mete nou nan
 kondisyon, nou menm ak tout prizonye nou yo, pou nou ka fè sèvis Bondye. ²⁰ N'a fè sèvis pou
 mete tout rad ak tout bagay ki fèt ak po bèt, bagay ki fèt ak pwal kabrit, bagay ki fèt an bwa, nan
 kondisyon pou moun k'ap sèvi Bondye ka sèvi ak yo. ²¹ Eleaza, prèt la, pale ak mesye ki te tounen
 soti nan lagè yo. Li di yo konsa: -Men yon regleman nou jwenn nan lòd Seyè a te bay Moyiz.
²² Tout moso lò, tout moso ajan, tout bout fè, tout moso kwiv, tout moso plon, ²³ tou sa ki pa ka
 boule nan dife, n'a pase yo nan dife pou yo ka nan kondisyon sèvi pou moun k'ap sèvi Bondye.
 Men tou sa ki ka boule nan dife, se nan dlo yo mete apa pou sa a n'a pase yo pou yo ka nan kondisyon
 sèvi pou moun k'ap sèvi Bondye. ²⁴ Sou setyèm jou a, n'a lave rad ki sou nou yo. Konsa n'a nan
 kondisyon pou nou fè sèvis Bondye. Se lè sa a n'a ka antre nan kan an. ²⁵ ¶ Seyè a pale ak Moyiz,
 li di l' konsa: ²⁶ -Ou menm, Moyiz ak Eleaza, prèt la, ansanm ak tout lòt chèf pèp Izrayèl yo, n'a
 konte tou sa lame a te ranmase nan lagè a, san bliye bèt yo ak prizonye yo. ²⁷ Apre sa, n'a separe
 tout bagay mwatye pou mwatye, mwatye pou moun ki te al goumen yo, mwatye pou rès moun pèp
 Izrayèl yo. ²⁸ Nan mwatye ki pou moun ki te al goumen yo, n'a wete yon pòsyon ki va tankou yon
 taks y'a peye pou Seyè a: sou chak senksan (500) moun, sou chak senksan bèt menm kalite, bèf,
 bourik, mouton, kabrit, w'a wete yonn pou Seyè a. ²⁹ Sa w'a wete nan mwatye ki pou moun ki te
 al goumen yo, w'a bay Eleaza, prèt la, tankou yon bagay yo pran pou Seyè a. ³⁰ Sou lòt mwatye
 ki rete pou rès moun pèp Izrayèl la, w'a pran yonn sou chak senkant moun, sou chak senkant bèt
 menm kalite, bèf, bourik, mouton, kabrit. Epi w'a bay moun Levi yo ki reskonsab Tant Randevou
 Seyè a. ³¹ Moyiz ak Eleaza, prèt la, te fè tout bagay jan Seyè a te bay Moyiz lòd fè a. ³² San konte
 sa sòlda yo te pran pou yo menm, men sa yo te pran nan men lènmi yo epi yo te pote bay Moyiz:

sisanswasannkenz mil (675.000) mouton ak kabrit,³³ swasanndouz mil (72.000) bèf,³⁴ swasanteyen mil (61.000) bourik,³⁵ tranndemil (32.000) jenn fi ki poko janm kouche ak gason.
36

Yo pran mwatye ladan yo bay sòlda ki te al goumen yo. Epi yo wete sa ki pou Seyè a ladan l'. Sa te fè twasantrannsetmil senksan (337.500) mouton ak kabrit,³⁷ ak sisanswasannkenz (675) ladan yo pou Seyè a,³⁸ tranmsimil (36.000) bèf ak swasanndouz ladan yo pou Seyè a,³⁹ trantmil senksan

(30.500) bourik ak swasanteyen ladan yo pou Seyè a,⁴⁰ sèzmil (16.000) jenn fi ak trannde ladan yo pou Seyè a.⁴¹ Se konsa, Moyiz renmèt bay Eleaza, prèt la, tou sa yo te wete pou Seyè a, jan

Seyè a te bay Moyiz lòd la.⁴² Lòt mwatye a te pou rèz pèp Izrayèl la. Lè Moyiz fin wete sa ki te pou sòlda yo,⁴³ men sa ki te rete: twasantrannsetmil senksan (337.500) mouton ak kabrit,

⁴⁴ tranmsimil (36.000) bèf,⁴⁵ trantmil senksan (30.500) bourik ak ⁴⁶ sèzmil (16.000) jenn fi.⁴⁷ Sou mwatye ki te pou rèz moun pèp Izrayèl la, Moyiz pran yon moun sou chak senkant moun ak yon bèt sou chak senkant bèt menm kalite, li bay moun Levi yo ki te reskonsab tant Seyè a, jan Seyè a

te bay Moyiz lòd la.⁴⁸ ¶ Lè sa a, tout moun ki te chèf lame a, chèf divizyon mil yo ak chèf konpayi san yo, yo tout vin jwenn Moyiz.⁴⁹ Epi yo di l': -Nou konte kantite sòlda ki te sou kont nou yo, nou jwenn yo tout la.⁵⁰

Se poutèt sa, n'ap pote tout bijou lò nou te jwenn epi nou te pran: braslè, chennèt, bag, zanno, chenn ak meday, n'ap ofri yo bay Seyè a pou li ka fè nou gras.⁵¹ Moyiz ak

Eleaza, prèt la, resevwa tout bijou lò yo te pote yo.⁵² Sa te fè katsan (400) liv konsa chèf divizyon mil yo ak chèf konpayi san yo te pote bay Moyiz ak Eleaza ki te resevwa yo pou Seyè a.⁵³ Men,

sòlda yo menm te kenbe sa yo te pran pou tèt pa yo.⁵⁴ Se konsa Moyiz ak Eleaza, prèt la, pran lò chèf divizyon mil ak chèf konpayi san yo te pote ba yo a, yo pote l' nan Tant Randevou a, pou Seyè a te ka toujou chonje pwoteje pèp Izrayèl la.

Chapter 32

¹ ¶ Moun branch fanmi Woubenn ak moun branch fanmi Gad yo te gen anpil anpil bèt. Lè yo wè jan peyi Jazè a ak peyi Galarad la te bon pou fè gadinaj,² yo vin jwenn Moyiz, Eleaza, prèt la, ak chèf fanmi pèp Izrayèl yo, yo di yo konsa:³ -Tout rejyon kote nou jwenn lavil sa yo: Atawo, Dibon, Jazè, Nimra, Esbon, Eleyale, Sèbam, Nebo ak Biyon,⁴ tout peyi Seyè a te ede moun pèp

Izrayèl yo pran pou yo bò isit la, se tè ki bon pou fè gadinaj, lèfini nou menm nou gen anpil bèt.

⁵ Tanpri, si ou vle fè nou favè sa a, ban nou peyi sa a pou pòsyon pa nou. Pa fòse nou janbe lòt bò

larivyè Jouden an. ⁶ Moyiz reponn yo: -Nou ta renmen rete isit la pandan lòt frè nou yo pral nan

goumen? ⁷ Poukisa nou vle dekouraje moun pèp Izrayèl yo pou yo pa ale nan peyi Seyè a ba yo

a? ⁸ Se menm bagay la zansèt nou yo te fè wi lè mwen te voye yo ale vizite peyi a antan nou te

Kadès Banea. ⁹ Yo moute jouk nan ravin Echkòl la, yo vizite tout peyi a. Apre sa, yo dekouraje

moun pèp Izrayèl yo pou yo pa antre nan peyi Seyè a te ba yo a. ¹⁰ Jou sa a, Seyè a te move anpil

sou yo. Li sèmante, li di konsa: ¹¹ Okenn nan gason ki te gen ventan osinon ki te pi gran lè yo te soti kite peyi Lejip p'ap mete pwent pye yo nan peyi mwen te pwomèt sou sèman m'ap bay Abraram,

Izarak ak Jakòb la, paske yo pa t' kenbe pawòl yo ak mwen, ¹² an wetan Kalèb, pitit gason Jefoune, moun fanmi Kenaz yo, ak Jozye, pitit gason Noun lan. Se yo menm sèlman ki te toujou swiv Seyè

a san mank. ¹³ Se konsa, Seyè a fè yon sèl move sou pèp Izrayèl la, li fè yo moute desann nan dezè

a pandan karantan, jouk dènye moun ki te fè sa ki mal devan Seyè a mouri. ¹⁴ Epi koulye a, nou vle fè tankou papa nou yo? Ou byen wè se pitit yo nou ye vre! Nou pral fè Seyè a pi move ankò

sou pèp Izrayèl la. ¹⁵ Si nou vire do nou ba li, l'a fè pèp la rete pi lontan ankò nan dezè a. Se nou

menm ki va lakòz pèp la fini nèt. ¹⁶ ¶ Yo pwoche bò Moyiz, yo di l' konsa: -Pou konmanse, nou ta renmen moute kloti ak wòch pou fèmen pak bèt nou yo, epi nou ta renmen bati lavil ak ranpa

¹⁷ pou pitit nou yo. Men, nou menm gason yo, nou tou pare pou n' ale goumen ansanm ak rès moun pèp Izrayèl yo, pou nou pran devan lè n'ap atake lènmi jouk yo rive nan peyi ki pou yo a. Pandan tan sa a, moun pa nou yo menm va rete isit la nan lavil ak ranpa yo kote moun peyi a p'ap ka fè yo

anyen. ¹⁸ Nou p'ap tounen lakay nou toutotan tout lòt moun nan pèp Izrayèl la poko jwenn pòsyon

tè ki pou yo a. ¹⁹ Nou p'ap pran anyen nan tè ki pou yo lòt bò larivyè Jouden an, paske yo ban nou

tè ki bò isit larivyè Jouden an, sou kote solèy leve a, pou pòsyon pa nou. ²⁰ Moyiz di yo konsa:

-Si nou fè tou sa nou sot di la a, si vreman vre nou pare pou n' al goumen devan Seyè a, ²¹ si tout gason ki ka goumen pami nou yo janbe lòt bò larivyè Jouden an devan Seyè a, jouk Seyè a va fin

kraze tout lènmi l' yo devan li, ²² enben, apre tout peyi a va tonbe anba men Seyè a, n'a tounen vin lakay nou, paske n'a fin fè tou sa nou te dwe fè pou Seyè a ak pou pèp Izrayèl la. Lè sa a, tout peyi

ki bò isit la va rele nou pa nou devan Seyè a. ²³ Men, si nou pa fè tou sa, konnen se kont Seyè a

menm n'a peche. N'a peye konsekans peche nou an. ²⁴ Nou mèt bati lavil ak ranpa pou moun pa

nou yo. Nou mèt moute lantouraj pou mete bèt nou yo nan pak. Men, se pou nou fè sa nou pwomèt
²⁵ n'ap fè a. Moun fanmi Woubenn yo ak moun fanmi Gad yo di konsa: -Mèt, n'ap fè tou sa ou
²⁶ mande nou fè. Pitit nou yo va rete nan lavil ki nan peyi Galarad yo ansanm ak madanm nou yo
²⁷ ak tout bèf, tout mouton ak tout kabrit nou yo, Men, nou menm gason ki pare pou n' al goumen
²⁸ yo, n'ap pase devan Seyè a pou n' al fè lagè jan ou di l' la. ¶ Lè sa a, Moyiz bay Eleaza, prèt la,
²⁹ Jozye, pitit gason Noun lan, ak tout chèf fanmi pèp Izrayèl la lòd sa a sou moun sa yo. Li di yo:
 -Si gason nan branch fanmi Woubenn ak nan branch fanmi Gad yo janbe lòt bò larivyè Jouden an
 avèk nou tou pare pou y' al goumen devan Seyè a, lè tout peyi a va anba men nou, n'a ba yo tè peyi
³⁰ Galarad la pou yo. Men, si yo pa janbe lòt bò larivyè Jouden an pou y' al goumen avèk nou, y'a
³¹ resevwa pòsyon tè pa yo nan peyi Kanaran an ansanm ak nou. Mesye branch fanmi Woubenn
 ak branch fanmi Gad yo reponn Moyiz, yo di l' konsa: -N'a fè tou sa Seyè a mande nou fè. Se sèvitè
³² li nou ye. N'a janbe lòt bò larivyè a tou pare pou n' al goumen devan Seyè a, n'a antre nan peyi
 Kanaran an. Men toutjan, nou mande pou yo ban nou pòsyon tè ki bò isit larivyè Jouden an pou
³³ nou. Se konsa Moyiz pran tout peyi Amori ki te pou wa Siyon, ak peyi Bazan ki te pou wa Og,
 avèk tout lavil ki nan limit fwontyè peyi yo, li bay moun fanmi Gad yo, moun fanmi Woubenn yo
³⁴ ak mwatye moun ki nan fanmi Manase, pitit gason Jozèf la. Moun fanmi Gad yo rebati tout lavil
³⁵ sa yo: Dibon, Atawòt, Awoyè, Atawo, Sofam, Jaze ak Jobeya, ³⁶ Bèt-Nimra, Bèt aran. Yo rebati
³⁷ yo avèk ranpa pou pwoteje yo, yo fè pak tou pou mouton ak kabrit. Moun fanmi Woubenn yo
³⁸ menm rebati lavil sa yo: Esbon, Elealè, Kiryatayim, Nebo, Baal Meyon ak Sibma. Yo te chanje
³⁹ non lavil Nebo ak Baal Meyon. Yo bay tout lavil yo rebati yo lòt non. Moun fanmi Maki, pitit
 gason Manase a, pati pou peyi Galarad kote moun Amori yo te rete a. Yo anvayi tout peyi a, yo
⁴⁰ mete moun Amori yo deyò. Se konsa tou, Moyiz bay moun fanmi Maki, pitit gason Manase a,
⁴¹ peyi Galarad la pou yo rete. Moun fanmi Jayi, pitit gason Manase a, al atake yon seri ti bouk.
⁴² Yo anvayi yo epi yo rele yo Bouk Jayi. Noba menm al atake lavil Kenat ak lòt ti bouk ki sou
 lòd li yo. l' anvayi l', epi li ba li non l'. Li rele l' Noba.

Chapter 33

¹ ¶ Men non tout kote moun Izrayèl yo te pase depi apre yo tout te soti kite peyi Lejip tankou
yon lame, avèk Moyiz ak Arawon alatèt yo. ² Dapre lòd Seyè a te bay Moyiz, chak kote yo te rive,
li te make non kote a anvan yo reprann vwayaj yo. ³ Moun pèp Izrayèl yo te kite lavil Ranmsès
jou ki te kenzyèm jou nan premye mwa a, yon jou apre premye Fèt Delivrans lan. Yo soti kite peyi
a devan je tout moun peyi Lejip yo san pesonn pa di yo anyen. ⁴ Lè sa a, moun peyi Lejip yo t'ap
antere premye piti gason yo. Se Seyè a menm ki te touye yo. Se konsa li te fè wè li gen plis pouvwa
pase bondye moun peyi Lejip yo. ⁵ Moun pep Izrayèl yo kite lavil Ranmsès, yo rive yon kote ki
rele Soukòt. Se la yo moute kan yo. ⁶ Apre sa, yo kite Soukòt, y' al moute kan yo Etam ki sou limit
dezè a. ⁷ Yo kite Elam, yo tounen sou Pi ayiwòt, ki anfas Baal-Sefon, bò solèy leve, epi yo moute
kan yo devan Migdòl. ⁸ Yo kite Pi ayiwòt, yo travèse Lanmè Wouj la, yo rive nan dezè a. Yo pase
twa jou ap mache nan dezè Etam lan, yo rive Mara kote yo moute kan yo. ⁹ Yo kite Mara, yo rive
Elim kote ki te gen douz sous dlo ak swasanndis pye palmis. Yo moute kan yo la. ¹⁰ Yo kite Elim,
y' al moute kan yo toupren Lanmè Wouj la. ¹¹ Yo kite Lanmè Wouj, y' al moute kan yo nan dezè
Zin lan. ¹² Yo kite dezè Zin lan, y' al moute kan yo Dofka. ¹³ Yo kite Dofka, y' al moute kan yo
Alouch. ¹⁴ Yo kite Alouch, y' al moute kan yo Refidim kote pèp la pa t' jwenn dlo pou yo bwè a.
¹⁵ Yo kite Refidim, y' al moute kan yo nan dezè Sinayi a. ¹⁶ Yo kite dezè Sinayi a, y' al moute kan
yo Simityè Grangou. ¹⁷ Yo kite Simityè Grangou, y' al moute kan yo Azewòt. ¹⁸ Yo kite Azewòt,
y' al moute kan yo Ritma. ¹⁹ Yo kite Ritma, y' al moute kan yo Rimonn Perèz. ²⁰ Yo kite Rimonn
Perèz, y' al moute kan yo Libna. ²¹ Yo kite Libna, y' al moute kan yo Risa. ²² Yo kite Risa, y' al
moute kan yo Keyelata. ²³ Yo kite Keyelata, y' al moute kan yo sou mòn Chefè a. ²⁴ Yo kite mòn
Chefè a, y' al moute kan yo Arada. ²⁵ Yo kite Arada, y' al moute kan yo Makelòt. ²⁶ Yo kite
Makelòt, y' al moute kan yo Tayat. ²⁷ Yo kite Tayat, y' al moute kan yo Tara. ²⁸ Yo kite Tara, y'
al moute kan yo Mitka. ²⁹ Yo kite Mitka, y' al moute kan yo Asmona. ³⁰ Yo kite Asmona, y' al
moute kan yo Mosewòt. ³¹ Yo kite Mosewòt, y' al moute kan yo Benè-Jakan. ³² Yo kite Benè-Jakan,
y' al moute kan yo Ogidgad. ³³ Yo kite Ogidgad, y' al moute kan yo Jotbata. ³⁴ Yo kite Jotbata,
y' al moute kan yo Abwona. ³⁵ Yo kite Abwona, y' al moute kan yo Ezyongebè. ³⁶ Yo kite

Ezyongebè, y' al moute kan yo nan dezè Zin lan, ki vle di Kadès. ³⁷ Yo kite Kadès, y' al moute
 kan yo sou mòn Or, toupre fwontyè peyi Edon an. ³⁸ Dapre lòd Seyè a te bay la, Arawon, prèt la,
 moute sou tèt mòn lan. Se la li mouri. Lè sa a, moun pèp Izrayèl yo te gen trantnevan kat mwa yon
 jou depi yo te soti kite peyi Lejip. ³⁹ Lè Arawon mouri sou mòn Or la, li te gen sanvenntwazan
 sou tèt li. ⁴⁰ Wa Arad, yon moun Kanaran ki te rete nan pati sid peyi Kanaran yo rele Negèv la,
 vin konnen moun Izrayèl yo t'ap rive. ⁴¹ Se konsa, moun Izrayèl yo kite Mòn Or la, y' al moute
 kan yo Zalmona. ⁴² Yo kite Zalmona, y' al moute kan yo Pounon. ⁴³ Yo kite Pounon, y' al moute
 kan yo Obòt. ⁴⁴ Yo kite Obòt, y' al moute kan yo Ije abrarim nan peyi Moab la. ⁴⁵ Yo kite Ije
 abrarim nan peyi Moab la, y' al moute kan yo Dibon Gad. ⁴⁶ Yo kite Dibon Gad, y' al moute kan
 yo Almon-Diblatayim. ⁴⁷ Yo kite Almon-Diblatayim, y' al moute kan yo sou mòn Abarim yo,
 anfas Mòn Nebò, bò solèy leve. ⁴⁸ Yo kite mòn Abarim yo, y' al moute kan yo nan plenn Moab
 yo, lòt bò larivyè Jouden, anfas lavil Jeriko. ⁴⁹ Yo te moute kan yo nan tout plenn Moab yo, toupre
 larivyè Jouden an, depi Bèt ayechimòt jouk Abèl-Chitim. ⁵⁰ ¶ Antan yo la nan plenn Moab yo,
 toupre larivyè Jouden, anfas lavil Jeriko, Seyè a pale ak Moyiz, li di l' konsa: ⁵¹ -Men sa pou ou
 di moun pèp Izrayèl yo pou mwen. Lè n'a janbe lòt bò larivyè Jouden pou nou antre nan peyi
 Kanaran an, ⁵² se pou nou mete tout moun ki rete nan peyi a deyò. N'a kraze tout estati zidòl yo
 fè nan moul, osinon ki fèt ak wòch, n'a demoli mete atè dènye kay kote moun yo fè sèvis pou bondye
 yo. ⁵³ N'a pran peyi a pou nou, n'a rete ladan l' paske se mwen menm ki ban nou li pou bitasyon
 nou. ⁵⁴ N'a tire osò pou nou ka separe l' bay chak branch fanmi pa yo. N'a bay branch fanmi ki
 anpil la yon gwo pòsyon. N'a bay branch fanmi ki pa anpil la yon ti pòsyon. Chak branch fanmi va
 resevwa pòsyon ki va vin pou l' a. Se konsa n'a separe tè a bay chak branch fanmi zansèt nou yo
 pa yo. ⁵⁵ Men, si nou pa mete moun ki rete nan peyi a deyò, sa ki va rete yo pral ban nou gwo
 pwoblèm. Y'ap tankou yon pay ki tonbe nan je nou, osinon tankou pikan k'ap pike nou nan tout kò
 nou. Yo pral tounen yon tizon pou nou lè n'a fin tabli nan peyi a. ⁵⁶ Lè sa a, sa m' te fè lide fè yo
 a, se nou m'ap fè l'.

Chapter 34

¹ ¶ Seyè a pale ak Moyiz, li di l' konsa: ² -Men lòd w'a bay moun Izrayèl yo pou mwen. Lè n'a
antre nan peyi Kanaran mwen pral ban nou an, men fwontyè ki pral limite peyi a. ³ Sou bò sid la,
n'a gen dezè Zin ki toupre Edon an pou limit. Fwontyè a va konmanse bò solèy leve nan pwent sid
⁴ Lanmè Sale a. L'a chankre desann nan direksyon sid bò pas Eskòpyon yo, l'a travèse dezè Zin
lan, jouk li rive anba nèt bò Kadès-Banea. L'a pran direksyon nò, l'a moute bò Aza ada, l'a rive
⁵ Achmon, l'a chankre bò ravin ki sèvi fwontyè ak peyi Lejip la, epi l'a bout nan Lanmè Mediterane.
⁶ Sou bò solèy kouche, teritwa a nou an va rive jouk sou rivaj gwo lanmè a. Se Lanmè Mediterane
a ki va sèvi nou fwontyè. ⁷ Sou bò nò a, fwontyè a va swiv yon liy dwat ki soti depi gwo lanmè a
rive sou mòn Or la. ⁸ Antan nou la, n'a trase yon liy dwat ankò jouk nou rive nan Pas Amat la, ale
pi lwen toujou jouk nou rive Zedad. ⁹ N'a pouse pi lwen toujou nan direksyon Zifwon jouk nou
rive Aza-Enan. Men fwontyè nou sou bò nò a. ¹⁰ Fwontyè sou bò solèy leve a va soti Aza-Enan
pou rive Chefam. ¹¹ L'a desann soti Chefam nan direksyon Ribla, sou kote Ayen bò solèy leve.
L'a desann pi ba toujou jouk l'a rive sou rivaj lanmè Galile a, sou bò solèy leve. ¹² Fwontyè a va
swiv larivyè Jouden an pou l' al bout sou lanmè Sale a. Men fwontyè k'ap limite peyi nou an sou
¹³ kat bò. Moyiz bay moun Izrayèl yo lòd sa yo: -Men peyi nou pral separe yonn ak lòt la. Nou
pral tire osò pou fè sa. Men peyi Seyè a bay pou nèf branch fanmi ak mwatye yon branch fanmi
nan pèp Izrayèl la. ¹⁴ Branch fanmi Woubenn lan ak branch fanmi Gad la ansanm ak mwatye nan
branch fanmi Manase a deja resevwa tè pa yo, chak fanmi apa. ¹⁵ Yo resevwa pòsyon tè pa yo ki
anfas lavil Jeriko, lòt bò larivyè Jouden, sou bò solèy leve. ¹⁶ ¶ Seyè a pale ak Moyiz, li di l' konsa:
¹⁷ -Men non moun ki pral fè pataj tè a pou nou: se va Eleaza, prèt la, Jozye, pitit gason Noun lan,
¹⁸ avèk douz chèf n'a chwazi pou fè pataj la, yonn nan chak branch fanmi. ¹⁹ Men non chèf yo.
²⁰ Pou branch fanmi Jida a, se va Kalèb, pitit gason Jefoune a. Pou branch fanmi Simeyon an, se
va Chemwèl, pitit gason Amiyoud la. ²¹ Pou branch fanmi Benjamen an, se va Elidad, pitit gason
Kislòn lan. ²² Pou branch fanmi Dann lan, se va chèf Bouki, pitit gason Jogli a. ²³ Pou branch
fanmi Jozèf la, va gen chèf Aniyèl, pitit gason Efòd la, pou fanmi Manase a, ²⁴ ak chèf Kemwèl,
pitit gason Chiftan an, pou fanmi Efrayim lan. ²⁵ Pou branch fanmi Zabylon an, se va chèf Elichafan,
pitit gason Panak la. ²⁶ Pou branch fanmi Isaka a, se va chèf Paltiyèl, pitit gason Azan an. ²⁷ Pou

branch fanmi Asè a, se va chèf Akiyoul, piti gason Chelomi a. ²⁸ Pou branch fanmi Neftali a, se
 va chèf Pedayèl, piti gason Amiyoud la. ²⁹ Men moun Seyè a te mete reskonsab pou fè pataj tè a
 pou bay chak moun nan pèp Izrayèl la pòsyon pa yo nan peyi Kanaran.

Chapter 35

¹ ¶ Antan yo nan plenn Moab yo, lòt bò larivyè Jouden, sou bò solèy leve anfas lavil Jeriko,
 Seyè a pale ak Moyiz, li di l' konsa: ² -W'a bay moun pèp Izrayèl yo lòd pou yo pran nan pòsyon
 tè yo resevwa a kèk lavil pou yo bay moun Levi yo pou yo rete, ansanm ak savann ki toutotou lavil
 sa yo pou yo ka fè gadinaj. ³ Se nan lavil sa yo moun Levi yo va rete. Savann sa yo va rete pou yo,
 y'a sèvi pou zannimo yo ak pou tout lòt bèt y'a genyen. ⁴ Savann yo va toutotou lavil yo. Y'a mezire
 mil senksan (1.500) pye depi ranpa lavil la nan chak direksyon. ⁵ Konsa, savann yo va fè yon gwo
 teren kare kare ki va mezire twamil (3.000) pye sou chak bò: twamil pye sou bò lès, twamil pye
 sou bò lwès, twamil pye sou bò nò, twamil pye sou bò sid ak lavil la nan mitan l'. Y'a sèvi kote pou
 bèt moun Levi ki rete nan lavil la jwenn manje. ⁶ Nan lavil n'a bay moun Levi yo, gen sis ladan yo
 ki va sèvi pou bay moun ki touye moun pwoteksyon. Apa sis lavil sa yo, n'a bay moun Levi yo
 karannde lòt lavil ankò. ⁷ Antou, se pou nou bay moun Levi yo karantwit lavil ak tout savann pou
 bèt yo. ⁸ Lè n'ap wete nan pòsyon ki pou pèp Izrayèl la lavil pou moun Levi yo, chak fanmi va bay
 dapre pòsyon tè li te resevwa. Sa ki gen pi gwo pòsyon an va bay plis. Sa ki gen ti pòsyon an va
 bay mwens. ⁹ ¶ Seyè a pale ak Moyiz, li di l' konsa: ¹⁰ -Pale ak moun pèp Izrayèl yo, di yo pou
 mwen. Lè n'a janbe lòt bò larivyè Jouden an pou nou antre nan peyi Kanaran an, ¹¹ se pou nou
 chwazi kèk lavil kote yon moun ki touye yon lòt san li pa fè espere ka kouri chache pwoteksyon.
¹² Se la y'a pwoteje l' anba fanmi mò a ki ta chache tire revanj mò a. Yo p'ap gen dwa touye l'
 toutotan yo pa jije l' devan tout moun. ¹³ Nan lavil n'a bay moun Levi yo, sis va sèvi pou bay moun
 konsa pwoteksyon, ¹⁴ twa lòt bò larivyè Jouden an sou bò solèy leve, twa bò isit nan peyi Kanaran
 an. ¹⁵ Sis lavil sa yo va sèvi ni pou moun peyi a ni pou moun lòt nasyon k'ap viv nan mitan nou
 osinon ki depasaj. Se la tout moun ki touye yon lòt san fè espere va kouri chache pwoteksyon. ¹⁶ Si
 yon moun frape yon lòt ak yon bout fè epi li touye l', se ansasen li ye, se pou yo touye l' tou. ¹⁷ Si

18 yon moun bay yon lòt yon kout wòch epi li touye l', se ansasen li ye, se pou yo touye l' tou. Si
 19 yon moun bay yon lòt yon kout bwa epi li touye l', se ansasen li ye, se pou yo touye l' tou. Moun
 ki fanmi pi pre moun yo touye a va reskonsab pou li touye ansasen an, nenpòt kilè li bare avè l'.
 20 Si yon moun rayi yon lòt epi li ba li yon move bourad pou li touye l', osinon si li voye yon bagay
 21 dèyè l' pou touye l', oswa ankò, paske li pa vle wè l' li bat li ak koutpwen pou l' touye l', epi li
 touye l' vre, li gen pou l' mouri tou. Se yon ansasen li ye. Moun ki fanmi pi pre moun li touye a va
 22 reskonsab pou touye l' tou, nenpòt lè li bare avè l'. Men, sipoze yon moun bay yon lòt yon move
 bourad san li pa fè espere, san li pa rayi l', osinon li voye yon bagay konsa konsa, epi l' al pran yon
 23 moun move kote san li pa t'ap voye l' dèyè l', oswa ankò, sipoze li voye yon wòch epi li pa wè
 sa, wòch la al tonbe sou yon moun, li touye l' frèt, san li pa t' rayi moun lan ni li pa t'ap chache fè
 24 moun lan mal, nan ka sa yo, men regleman pou moun pèp Izrayèl yo swiv pou yo regle bagay
 25 la ant moun ki te touye lòt la ak fanmi pi pre moun mouri a ki reskonsab pou tire revanj la. Pèp
 la va sove moun ki te touye lòt la anba men fanmi pi pre moun li touye a, l'a fè l' tounen nan lavil
 kote li te al kache kò l' la. Moun ki te touye lòt la va rete la jouk granprèt ki la lè sa a pou fè sèvis
 26 Bondye a va mouri. Si moun ki touye lòt la ta rive soti andeyò limit lavil kote li kache a, si
 27 moun ki fanmi pi pre moun li touye a bare avè l', epi li touye l', yo pa gen dwa fè fanmi pre a peye
 28 pou sa l' fè a. Paske moun ki touye yon lòt san li pa fè espere a fèt pou rete nan lavil kote li te
 kache a jouk granprèt ki la lè sa a va mouri. Se apre lanmò granprèt la ase l'a ka tounen lakay li.
 29 Regleman sa yo va sèvi tankou yon lwa pou nou pou tout tan, de pitit an pitit, kote nou pase.
 30 Lè yon moun touye yon lòt, anvan yo touye l', se pou yo gen depozisyon divès temwen kont li.
 31 Depozisyon yon sèl temwen pa kont pou kondannen yon moun. Nou pa gen dwa asepte lajan
 pou sove lavi yon moun yo kondannen pou mouri paske li touye yon lòt. Wè pa wè se pou nonm
 32 sa a mouri. Ni nou pa gen dwa asepte lajan pou penmèt yon moun ki kite lavil kote l' te kache
 33 a pou l' al lakay li anvan granprèt ki la lè sa a mouri. Piga nou janm fè bagay ki pou fè Bondye
 vire do bay peyi kote nou pral viv la. Lè yon moun touye yon lòt moun, se sa k'ap mete peyi a nan
 kondisyon li derespekte Bondye ak san ki koule a. Lè konsa, pa gen lòt mwayen pou fè Bondye
 34 padonnen peyi a pase se touye pou nou touye moun ki touye a. Piga nou janm fè bagay ki pou
 fè Bondye vire do bay peyi kote nou rete a, paske mwen menm Seyè a, se nan mitan moun pèp
 Izrayèl yo, nan mitan peyi kote yo rete a, mwen rete tou.

Chapter 36

¹
 ¶ Moun branch fanmi Galarad yo se desandan Maki yo ye. Maki sa a se te pitit Manase, yonn nan de pitit Jozèf yo. Chèf fanmi moun Galarad yo al jwenn Moyiz ak lòt chèf branch fanmi pèp Izrayèl la, ² yo di yo konsa: -Seyè a te ba ou, Moyiz, lòd pou ou te separe peyi a bay chak branch fanmi Izrayèl la pa yo dapre sa ki va soti pou yo lè y'a tire osò. Apre sa, Seyè a ta ba ou lòd pou ou te pran pòsyon ki pou Zelo Chad, fanmi nou an, pou ou bay pitit fi li yo. ³ Men, si medam sa yo marye ak yon nonm ki fè pati yon lòt branch nan fanmi pèp Izrayèl la, pòsyon ki pou yo a pral soti sou tè zansèt pa nou yo. Konsa, pòsyon tè ki pou branch fanmi nonm yo marye a pral vin pi plis, epi pòsyon tè ki te vin pou nou an lè yo te tire osò a pral vin pi piti. ⁴ Lè lanne rejwisans lan va rive pou moun pèp Izrayèl yo, yo pral pran pòsyon tè ki te pou medam sa yo, yo pral wete l' nan pa branch fanmi zansèt nou yo, yo pral mete l' sou pa branch fanmi mari yo. ⁵ ¶ Se konsa, dapre lòd Seyè a te ba li, Moyiz bay moun pèp Izrayèl yo regleman sa a pou yo swiv. Li di yo konsa: -Moun branch fanmi Jozèf yo gen rezon. ⁶ Se poutèt sa, men lòd Seyè a bay: Pitit fi Zelo Chad yo lib marye moun yo vle, depi se yon moun ki nan menm branch fanmi ak yo. ⁷ Pòsyon tè yon branch fanmi pa gen dwa pase pou yon lòt branch fanmi. Konsa, pòsyon tè yon fanmi va toujou rete nan fanmi an. ⁸ Si yon fi vin eritye yon pòsyon nan tè yonn nan branch fanmi pèp Izrayèl la, se pou l' marye ak yon moun ki nan menm branch fanmi avè l'. Konsa, chak moun va kenbe eritaj zansèt yo nan fanmi an. ⁹ Tè yon branch fanmi p'ap ka pase pou yon lòt branch fanmi. Konsa, pòsyon tè ki pou yon fanmi va toujou rete nan fanmi an. ¹⁰ Se konsa, pitit fi Zelo Chad yo fè jan Seyè a te bay Moyiz lòd la. ¹¹ Mala, Tiza, Ogla, Milka ak Noa marye ak pitit gason tonton yo bò papa. ¹² Yo marye nan branch fanmi Manase, pitit Jozèf la. Konsa, pòsyon tè papa yo a rete nan menm branch fanmi an. ¹³ Men tout lòd ak regleman Seyè a te bay Moyiz pou moun pèp Izrayèl yo, lè yo te nan plenn Moab yo, lòt bò larivyè Jouden, anfas lavil Jeriko.

Deuteronomy

Chapter 1

¹
 ¶ Men pawòl Moyiz te di tout pèp Izrayèl la lè yo te lòt bò larivyè Jouden an, nan dezè a, nan plenn Araba ki anfas Souf: Yo te gen dezè Paran an sou yon bò ak lavil Tofèl, Liban, Azewòt ak

Dizaab sou lòt bò a. ² Pou mache soti mòn Sinayi rive Kadès-Banea, lè ou swiv wout ki pase nan
 mòn Seyi a, sa pran onz jou. ³ Se premye jou nan onzyèm mwa karantèm lanne depi yo te soti
 kite peyi Lejip la Moyiz te fè pale sa a ak pèp Izrayèl la, jan Seyè a te mande l' la. ⁴ Lè sa a, Seyè
 a te fin bat Siyon, wa peyi Amori a, ki te rete Esbon, ak Og, wa peyi Bazan an, ki te rete Astawòt
 nan zòn Edreyi. ⁵ Se antan pèp la te lòt bò larivyè Jouden, nan peyi Moab la, Moyiz tanmen esplike
 yo tou sa Seyè a te di. Li di yo konsa: ⁶ -Lè nou te sou mòn Orèb la, nou chonje Seyè a, Bondye
 nou an, te pale ak nou. Li te di nou: Koulye a, nou rete kont nou sou mòn sa a. ⁷ Ranmase tout zafè
 nou pati. Ale nan mòn peyi Amori yo ak nan tout lòt peyi ki toupre l' yo, nan plenn Araba a, nan
 mòn yo, nan fon yo, nan Negèv la bò sid ak bò gwo lanmè Mediterane a. Ale nan peyi Kanaran an
 ak nan peyi Liban an jouk nou rive bò gwo larivyè Lefrat la. ⁸ Nou wè! Men m'ap ban nou tout
 peyi sa yo. Al pran posesyon peyi mwen menm Seyè a, mwen te pwomèt m'ap bay zansèt nou yo,
 Abraram, Izarak ak Jakòb, pou yo ak pou tout pitit yo ak pitit pitit yo apre yo. ⁹ ¶ Menm lè sa a,
 mwen te di nou: Mwen pa kapab reskonsab nou tout pou kont mwen, chay la twòp pou mwen.
¹⁰
 Seyè a, Bondye nou an, ban nou anpil pitit, kifè koulye a nou vin anpil, tankou zetwal nan syèl
¹¹
 la. Se pou Seyè a, Bondye zansèt nou yo, ban nou mil fwa plis pitit pase sa nou gen koulye a.
¹²
 Se pou l' beni nou jan li te pwomèt nou an. Men, ki jan pou m' fè pote tout chay sa a pou kont
 mwen, pou m' jwenn solisyon pou tout pwoblèm nou, pou m' regle tout kont nou gen yonn ak lòt?
¹³
 Se poutèt sa, nan chak branch fanmi nou yo, chwazi kèk nèg ki gen lespri, ki gen bon konprann,
¹⁴
 ki konn lavi, m'a mete yo chèf pou dirije nou. Lè sa a, nou te reponn mwen, nou te di m' konsa:
¹⁵
 Sa ou mande nou fè la a bon wi! Se konsa mwen pran nan chak branch fanmi nou yo moun ki
 gen lespri, moun ki konn lavi, mwen mete yo chèf pou dirije nou. Genyen mwen mete chèf sou mil
 gason, dèt sou san gason, dèt sou senkant gason, dèt ankò sou dis gason. Mwen te chwazi lòt chèf
¹⁶
 tou pou chak branch fanmi. Lè sa a, men sa mwen te mande chèf nou yo pou yo fè: Chache
 konnen lè gen kont nan mitan pèp la. N'a regle tout kont yon moun ka gen ak frè parèy li osinon
¹⁷
 ak moun lòt nasyon k'ap viv nan mitan nou. N'a fè sa san patipri. Nou p'ap nan achte figi lè n'ap
 jije yon bagay. Se pou nou jije tout moun menm jan, kit se yon ti malere, kit se yon grannèg. Nou
 pa bezwen pè pesonn paske n'ap jije dapre prensip Bondye bay. Lè se yon ka ki twò difisil pou nou,
¹⁸
 n'a pote l' vin devan mwen, m'a jije l' mwen menm. Se konsa, menm lè sa a, mwen te ban nou
¹⁹
 lòd, mwen te di nou sa pou n' fè ak sa pou n' pa fè. ¶ Apre sa, nou leve, nou kite mòn Orèb la.
 Jan Seyè a, Bondye nou an, te ban nou lòd la, nou mache nan tout gwo dezè ki gen anpil danje

ladan l' lan, dezè nou te wè a, nou pran chemen pou n' al nan mòn peyi Amori yo, epi nou rive
²⁰
 Kadès Banea. Lè sa a, mwen di nou: Men nou rive nan mòn peyi Amori yo, peyi Seyè a, Bondye
²¹
 nou an, ap ban nou an. Gade, men peyi Seyè a, Bondye nou an, ap ban nou an. Ale non, pran
 peyi a pou nou, jan Seyè a, Bondye zansèt nou yo, te di l' la. Nou pa bezwen pè, kè nou pa pou
²²
 janm kase. Lè sa a nou tout, nou vin jwenn mwen, nou di m' konsa: Ann voye kèk nèg pami nou
 devan pou y' al wè ki jan peyi a ye. Y'a tounen vin esplike nou ki wout pou nou swiv ak nan ki lavil
²³
 nou ka antre. Mwen te wè sa nou di m' lan se te bon koze. Se konsa mwen chwazi douz nèg,
²⁴
 yonn nan chak branch fanmi. Yo pati, yo pran chemen mòn lan jouk yo rive nan Fon Echkòl:
²⁵
 yo vizite tout zòn lan nèt. Yo pran kèk fwi peyi a donnen, yo pote ban nou. Epi yo di nou peyi
²⁶
 Seyè a ap ban nou an se yon bon venn tè. Men, nou pa t' vle al ladan l'. Se konsa nou te derefize
²⁷
 obeyi lòd Seyè a, Bondye nou an, te ban nou. Nou antre lakay nou, nou pran plenyen. Epi nou
 di se vle Seyè a pa vle wè nou! Se poutèt sa li fè nou soti kite peyi Lejip pou l' lage nou nan men
²⁸
 moun peyi Amori yo pou yo ka fini ak nou. Kote nou prale koulye a? Moun nou te voye yo
 dekouraje nou. Yo di nou moun ki nan peyi sa a pi fò pase nou, yo pi bèl wotè pase nou. Lavil yo
 gran anpil ak gwo ranpa byen wo ki rive jouk nan syèl la. Nou te menm wè kèk moun ras Anak yo
²⁹
 la tou. Men, mwen di nou: Kè nou pa bezwen kase, nou pa bezwen pè moun sa yo. Seyè a,
³⁰
 Bondye nou an, ap mache alatèt nou. Li pral goumen pou nou menm jan nou te wè l' fè l' la nan
³¹
 peyi Lejip ak nan dezè a. Nou wè ki jan sou tout wout la li pa janm lage nou, tankou yon papa
³²
 ki pa janm lage pitit li, jouk nou rive bò isit la. Men, atout mwen te di nou sa, nou pa t' vle mete
³³
 konfyans nou nan Seyè a, Bondye nou an, li menm ki te pran devan nou sou tout wout la pou l'
 te ka jwenn kote pou nou moute kan nou. Lannwit, li te mache devan nou nan yon poto dife.
³⁴
 Lajounen, nan yon gwo nwaj li te moutre nou chemen pou nou pran. Lè Seyè a tandè jan nou
³⁵
 t'ap plenyen, li te fache anpil, li fè sèman, li di: Pa gen yonn nan tout move sije sa yo k'ap viv
³⁶
 koulye a k'ap antre nan bon peyi mwen te pwomèt m'ap bay zansèt nou yo, an wetan Kalèb, pitit
 gason Jefoune a, ki va antre nan peyi sa a. M'a ba li peyi li te al espyonnen an, pou li ak pou pitit
³⁷
 li yo, paske li te obeyi m' san gad dèyè. Nou lakòz Seyè a te fache ata avè m', epi li di m': Ou
³⁸
 menm tou Moyiz, ou p'ap antre nan peyi a. Se Jozye, pitit gason Noun lan, k'ap sèvi avè ou la,
 ki va antre nan plas ou. Ankouraje l' tandè, paske se li menm ki pou fè pèp Izrayèl la antre al pran
³⁹
 peyi a. Men, se pitit nou yo, sa nou di ki tapral tonbe anba men lènmi nou yo, timoun nou yo ki
 koulye a poko konnen sa ki byen ak sa ki mal, se yo menm ki pral antre nan peyi a. Se yo menm

⁴⁰
 mwen pral bay peyi a, se yo menm ki pral rete ladan l'. Men nou menm, tounen tounen nou nan
⁴¹
 dezè a! Pran chemen Lanmè Wouj la ankò! Lè sa a nou reponn mwen: Nou rekonèt nou peche
 kont Seyè a. Nou prale, epi n'a goumen jan Seyè a, Bondye nou an, te ban nou lòd la. Epi nou leve
⁴²
 nou pran zam nou. Nou te kwè sa tapral fasil pou nou pran mòn yo. Men, Seyè a di m' avèti nou:
⁴³
 Piga n' al atake, piga n' al fè lènmi nou yo bat nou, paske li p'ap kanpe avèk nou. Mwen te pale
 nou, men nou pa t' koute m', nou derefize swiv lòd Seyè a te ban nou. Nou te konprann nou te fò
⁴⁴
 kont kò nou pou n' te al pran mòn lan. Lè sa a, moun peyi Amori yo ki te rete nan mòn yo soti
 vin kontre ak nou. Tankou yon desen myèl, yo kouri dèyè nou, yo bat nou byen bat nan tout peyi
⁴⁵
 Seyi a rive jouk Oma. Lè nou tounen, nou kriye nan pye Seyè a, men Seyè a pa t' koute sa nou
⁴⁶
 t'ap di l', li pa t' pran ka nou. Se poutèt sa nou te blije pase tout tan sa a nan zòn Kadès la.

Chapter 2

¹
 ¶ Lè sa a, nou tounen tounen nou nan dezè a, nou pran chemen Lanmè Wouj la pou nou, jan
 Seyè a te pase nou lòd la. Nou pase yon pakèt tan ap mache moute desann nan mòn peyi Seyi yo.
²
³
 Apre sa, Seyè a pale avè m', li di m' konsa: Nou fè kont moute desann nou nan mòn yo. Koulye
⁴
 a, pran direksyon nò pou nou. Bay pèp la lòd sa a: Nou pral pase nan mitan peyi Seyi a, kote pitit
⁵
 pitit Ezaou yo rete a. Moun sa yo se menm ras ak nou yo ye. Y'ap pè nou, men, atansyon! Pa
 chache yo kont, paske mwen p'ap ban nou ata yon pous tè nan peyi yo a. Se mwen menm ki bay
⁶
 moun fanmi Ezaou yo tout mòn Seyi a nèt pou yo rete. N'a achte manje pou nou manje nan men
⁷
 yo pou lajan nou, n'a mande yo achte ata dlo pou nou bwè. Chonje byen, Seyè a, Bondye nou an,
 te beni nou nan tou sa n'ap fè. Li te pran swen nou pandan tout tan nou t'ap moute desann nan gwo
⁸
 dezè a. Sa fè karantan depi Seyè a la nan mitan nou, nou pa janm manke anyen. ¶ Se konsa nou
 leve, nou pati, nou kite wout Araba a ki soti lavil Elat ak lavil Etsongebè, nou pase byen lwen peyi
 kote pitit Ezaou yo rete a, peyi ki pou moun menm ras ak nou yo. Nou vire, nou pran chemen ki
⁹
 mennen nan dezè Moab la. Lè sa a, Seyè a di m': Pa chache moun Moab yo, moun fanmi Lòt yo,
 kont. Pa al goumen ak yo paske mwen p'ap ban nou anyen nan peyi ki pou yo a. Se mwen menm
¹⁰
 ki bay yo lavil A Moab la pou yo rete. (Nan tan lontan, se te emen yo ki te rete nan lavil Ar la.
¹¹
 Se te yon ras moun ki te wo anpil tankou moun Anak yo. Yo te anpil, yo te barak gason. Tout

lòt moun te rele yo refayim, menm non ak moun Anak yo. Men, se moun Moab yo ki te rele yo
¹² emen. Konsa tou, nan tan lontan se orit yo ki te rete nan peyi Edon an. Men moun fanmi Ezaou
yo te pran peyi a nan men yo, yo touye tout moun epi yo rete ladan l' nan plas moun yo, menm jan
moun Izrayèl yo te fè pou peyi ki pou yo a, peyi Seyè a te ba yo a.) ¹³ Aprè sa, Seyè a di ankò:
Leve non! Janbe lòt bò ravin Zerèd la. Se konsa nou janbe lòt bò ravin Zerèd la. ¹⁴ Nou pran
trantwitan pou nou mache soti Kadès Banea jouk nou rive janbe lòt bò ravin Zerèd la. Pandan tout
tan sa a, mezi gason ki te gen laj pou fè lagè lè sa a te gen tan mouri, jan Seyè a te di li t'ap fè a.
¹⁵ Seyè a te leve dèyè yo nan kan an jouk yo tout te mouri. ¹⁶ Lè tout gason ki te gen laj pou fè
lagè lè sa a te fin mouri, ¹⁷ Seyè a pale avè m', li di m' konsa: ¹⁸ Jòdi a ou pral pase fwontyè peyi
Moab la, ou pral pran chemen lavil Ar la. ¹⁹ Ou pral tonbe bab pou bab ak moun Amori yo. Pa
chache yo kont. Pa al goumen ak yo paske mwen p'ap ba ou anyen nan peyi Amon an. Se pitit pitit
²⁰ Lòt yo ye; se mwen menm ki ba yo peyi sa a pou yo rete. (Nan tan lontan, dapre sa yo di, peyi
sa a, se te peyi refayim yo. Se refayim yo ki te rete ladan l' anvan. Moun Amon yo te rele yo
²¹ Zanzoumim. Yo te bèl wotè tankou moun Anak yo. Yo te anpil, yo te barak gason. Men, Seyè
a te touye yo pou moun Amon yo te ka pran peyi a nan men yo, pou yo te ka rete yo menm ladan
²² l'. Se menm bagay Seyè a te fè pou moun fanmi Ezaou yo ki rete nan peyi Seyi a. Li touye orit
yo pou moun Ezaou yo te ka pran peyi a nan men yo, pou yo te ka rete yo menm ladan l'. ²³ Se
menm bagay la ki rive avit yo ki te rete nan tout ti bouk ou jwenn jouk ou rive lavil Gaza: moun
²⁴ Kaftò yo soti zile Krèt, yo touye avit yo epi yo rete nan peyi a nan plas yo. ¶ Seyè a di m' ankò:
Leve, ranmase tout zafè nou yo. Pase lòt bò ravin Anon an. Mwen pral lage Siyon, moun peyi
Amori ki wa lavil Esbon an, ansanm ak tout peyi li a nan menm nou. Atake l', konmanse pran peyi
²⁵ a pou nou. Depi jòdi a, m'ap fè tout nasyon ki sou latè pè nou kou chat. Konsa, depi y'a tande
yo nonmen non nou, y'a pran tranble, y'a gen yon sèl kè sere k'ap pran yo. ²⁶ Lè sa a, antan nou te
nan dezè Kedemòt la, mwen voye kèk mesajè bò kote Siyon, wa lavil Esbon an, pou yo te pale an
²⁷ zanmi avè l', pou yo te di l' pou mwen: Mwen fè lide pase nan peyi a. N'ap pase pase nou sou
gran chemen an san nou pa vire ni adwat ni agoch. ²⁸ W'a vann nou pou lajan nou manje nou ka
bezwen pou n' manje ansanm ak dlo pou nou bwè. Se pase sèlman n'ap pase nan peyi a san rete,
²⁹ jouk nou rive lòt bò larivyè Jouden an, nan peyi Seyè a, Bondye nou an, ap ban nou an. Se konsa
moun fanmi Ezaou yo ki te rete nan peyi Seyi a, ak moun Moab yo ki rete nan lavil Ar la te ban
³⁰ nou pèmisyon pou n' pase nan peyi yo. Men, Siyon, wa Esbon an, pa t' dakò pou l' te kite nou
pase nan pèyi l' la. Seyè a, Bondye nou an, fè l' kenbe tèt ak nou, li fè l' refize chanje lide malgre

³¹
 tou sa nou fè, pou l' sa lage l' nan men nou ansanm ak tout peyi a, jan sa ye jouk koulye a. Lè
 sa a, Seyè a di m' konsa: Gade! Depi koulye a mwen lage Siyon ak tout peyi li a nan men nou.
³²
 Konmanse anvayi peyi a, pran peyi l' la pou nou. Siyon mache kontre nou ak tout lame l' la, li
³³
 vin mande nou batay bò Jayat. Men, Seyè a, Bondye nou an, lage l' nan men nou. Nou bat li
³⁴
 byen bat, li menm, pitit gason l' yo ak tout lame l' yo. Tout lavil yo tonbe nan men nou tou epi
 nou touye yo nèt pou Bondye nou an tankou yon ofrann. Nou touye tout moun nèt, fanm kou gason,
³⁵
 timoun kou granmoun. Nou pa kite yonn chape. Tansèlman, nou pran tout bèt yo pou nou epi
³⁶
 nou piye tout lavil nou te pran yo. Depi lavil Awoyè ki anwo bò falèz ki bay sou ravin Anon an
 ak lavil ki nan fon an, jouk lavil Galarad la, pa t' gen yon lavil ki te ka kenbe tèt ak nou. Seyè a,
³⁷
 Bondye nou an, te lage yo tout nan men nou. Men nou pa t' pwoche bò peyi moun Amon yo, ni
 bò zòn larivyè Jabòk la, ni bò lavil ki nan mòn yo, ni bò ankenn kote Seyè a te ban nou lòd pa atake.

Chapter 3

¹
 ¶ Apre sa, nou pran yon lòt chemen nan direksyon peyi Bazan an. Men, Og, wa peyi Bazan
 an, soti ak tout lame li a, li vin kare pou batay ak nou bò lavil Edreyi a. ² Lè sa a, Seyè a di m'
 konsa: Nou pa bezwen pè li, mwen pral lage yo nan men nou, li menm ansanm ak tout pèp li a ak
 tout peyi li a. Menm sa nou te fè Siyon, wa peyi Amori ki te rete lavil Esbon an, se sa nou pral fè
³
 li tou. Se konsa Seyè a, Bondye nou an, te lage Og, wa peyi Bazan an, nan men nou ansanm ak
⁴
 tout pèp li a. Nou touye yo tout. Nou pa kite pesonn chape. Konsa tou, nou pran tout lavil yo pou
 nou. Pa t' gen yonn menm ki pa t' tonbe nan men nou. Antou nou te pran swasant lavil, tout lavil
⁵
 ki te nan zòn Agòb la, kote Og, wa Bazan an, t'ap gouvènen. Tout lavil sa yo te gen bèl defans.
 Yo te gen ranpa byen wo, gwo baryè ak ba solid pou fèmèn baryè yo. Nou te pran tou yon bann lòt
⁶
 lavil ki pa t' gen ranpa. Nou detwi yo nèt pou Bondye tankou yon ofrann, menm jan nou te fè l'
 pou Siyon, wa lavil Esbon an. Nou touye tout moun ki te nan lavil yo, fanm kou gason, timoun kou
⁷
 granmoun. Men, nou pran tout zannimo yo ak tout lòt bagay ki gen valè nan lavil yo pou nou.
⁸
 Se konsa, lè sa a, nou pran pou nou peyi tou de wa peyi Amori yo ki t'ap viv sou bò solèy leve,
⁹
 depi ravin Anon jouk mòn Emon, lòt bò larivyè Jouden an. Moun Sidon yo rele mòn Emon an
¹⁰
 Siryon, men moun Amori yo menm rele l' Seni. Nou pran tout lavil ki nan gwo platon sou tèt

mòn yo, tout peyi Galarad la ak peyi Bazan an rive jouk Salka ak Edreyi, de lavil ki te pou Og, wa

¹¹ Bazan an. (Og, wa Bazan an, se te dènye moun nan ras refayim yo ki te vivan. Sèkèy li te fèt an fè, li te gen kat mèdmi longè sou de mèdmi lajè. Yo ka wè l' jouk koulye a nan lavil yo rele Raba

moun Amon yo.) ¹² ¶ Lè nou fin pran peyi a pou nou, mwen bay branch fanmi Woubenn lan ak branch fanmi Gad la pòsyon ki soti bò lavil Awoyè a, toupre ravin Anon, rive pran mwatye nan

mòn Galarad la avèk tout lavil ki ladan yo. ¹³ Mwen bay mwatye nan branch fanmi Manase a rèz zòn Galarad la ak tout peyi Bazan an, kote Og t'ap gouvènen an. (Dapre sa yo di, peyi Bazan an,

tout zòn Agòb la, se peyi refayim yo. ¹⁴ Jayit, moun fanmi Manase, te pran tout zòn Agòb la, ki vle di peyi Bazan an rive jouk sou fwontyè peyi moun Jechou yo ak peyi moun Maka yo. Li bay

peyi a non li. Li rele l' Bouk Jayi. Non sa a rete pou peyi a jouk koulye a.) ¹⁵ Mwen bay Maki peyi

Galarad la. ¹⁶ Mwen bay branch fanmi Woubenn ak branch fanmi Gad yo zòn ki soti depi peyi Galarad la rive ravin Anon. Sou nan sid, baliz peyi a pase nan mitan ravin Anon. Sou nan nò, peyi

a rive rivyè Jabòk ki te sèvi l' fwontyè ak peyi Amon an. ¹⁷ Sou bò solèy kouche, larivyè Jouden an, depi letan Kinerèt jouk lanmè Sale a, lanmè yo rele Araba a, va sèvi fwontyè ki va desann anba

lanmè Sale a jouk nan pye mòn Pisga a bò solèy leve. ¹⁸ Menm lè sa a tou, mwen ba yo lòd sa yo: Seyè a, Bondye nou an, te ban nou peyi sa a pou nou rete! Koulye a, se pou tout gason ki gen laj pou fè lagè pran zam yo. Se pou yo janbe lòt bò larivyè Jouden an pran devan moun lòt branch

fanmi nou yo. ¹⁹ Sèl moun n'a kite nan lavil mwen ban nou yo, se va madanm nou ak pitit nou yo

ansanm ak bèt nou yo. Pou bèt, mwen konnen nou pa manke sa. ²⁰ N'a ede rèz moun pèp Izrayèl yo jouk Seyè a va fin ba yo pòsyon pa yo jan li deja fè l' pou nou an, jouk y'a fin pran peyi Seyè a ap ba yo a lòt bò larivyè Jouden. Se lè sa a n'a tounen nan peyi mwen te chwazi pou m' ban nou

an. ²¹ ¶ Apre sa, mwen bay Jozye lòd sa a: Ou wè ak je ou tou sa Seyè a, Bondye nou an, te fè de

wa peyi Amon yo. Se menm bagay la Seyè a ap fè wa tout peyi kote nou pral pase yo. ²² Nou pa

bezwen pè yo menm. Se Seyè a menm, Bondye nou an, ki pral goumen pou nou. ²³ Lè sa a atò,

mwen mande Seyè a yon favè. Mwen di l': ²⁴ Seyè, Bondye mwen, se ou menm ki konmanse fè sèvitè ou la wè jan ou gen pouvwa, jan ou gen fòs kouraj. Pa gen lòt bondye ni nan syèl, ni sou latè

ki ka fè tout gwo bagay w'ap fè yo. ²⁵ Tanpri souple, kite m' travèse lòt bò larivyè Jouden an pou

m' ka wè bèl peyi ki lòt bò a, bèl mòn sa yo ak peyi Liban an tou. ²⁶ Men, se nou menm ki lakòz Seyè a te fache sou mwen, li refize tande m'. Li di m' konsa: Ase la! Pa janm vin pale m' bagay sa

a ankò. ²⁷ Moute sou tèt mòn Pisga a. Antan ou la, w'a voye je ou, w'a gade sou bò nò, sou bò sid, sou bò solèy kouche ak sou bò solèy leve. Louvri je ou. Gade byen, paske ou p'ap janm mete pwent

28
 pye ou lòt bò larivyè Jouden an. Bay Jozye lòd tou sa pou li fè. Ankouraje l'. Ba li fòs kouraj, paske se li menm ki pral janbe lòt bò larivyè Jouden an alatèt pèp la. Se li menm ki pral fè yo pran peyi ou pral wè a pou yo. 29 Epi nou rete nan fon an, anfas lavil Bètpeyò.

Chapter 4

1 ¶ Apre sa, Moyiz di pèp la: -Koulye a, nou menm pèp Izrayèl, se pou nou kenbe tout lòd ak tout prensip mwen te moutre nou yo. Se pou nou mache dapre lòd sa yo pou nou ka viv, pou nou ka antre nan peyi Seyè a, Bondye zansèt nou yo, ap ban nou an. 2 Piga nou mete, pigas nou wete anyen sou sa mwen mande nou fè a. Se pou nou kenbe tout kòmandman Seyè a, Bondye nou an, jan mwen te moutre nou yo a. 3 Nou menm, nou te wè sa Seyè a te fè bò mòn Peyò a, lè li te touye tout moun nan mitan nou ki te al fè sèvis pou Baal sou mòn lan. 4 Men, nou menm ki pa t' lage pye Seyè a, Bondye nou an, nou tout la byen vivan toujou. 5 Gade! Mwen te moutre nou tout lòd ak tout regleman, jan Seyè a, Bondye mwen an, te mande m' fè l' la, pou nou te ka viv dapre lòd sa yo nan peyi nou pral pran pou nou an. 6 Se pou nou kenbe yo, se pou nou fè tou sa yo mande nou fè ladan yo. Paske, se konsa n'a fè lòt nasyon yo wè jan nou gen konprann, jan nou gen lespri. Lè y'a rive tande pale tout lòd sa yo, y'a di: Ala yon gwo pèp, papa! Pèp sa a gen tan gen konprann, yo gen tan gen lespri! 7 Paske pa gen lòt nasyon, li te mèt gran kou l' gran, ki gen yon Bondye toupre yo, yon Bondye k'ap kanpe la avèk yo, tankou Seyè a, Bondye nou an, fè l' pou nou chak fwa nou rele l'. 8 Pa gen lòt nasyon, li te mèt gran kou l' gran, ki gen bon lòd ak bon prensip pou regle tout bagay san patipri tankou lalwa mwen mete devan nou jòdi a. 9 Tansèlman, veye kò nou! Atansyon pou nou pa janm bliye bagay nou te wè ak pwòp je nou, pou nou pa janm wete yo nan lide nou pandan tout lavi nou. Okontrè, se pou nou moutre pitit nou ak pitit pitit nou yo tout bagay sa yo. 10 Pa bliye jou nou te kanpe sou mòn Orèb la, devan Seyè a, Bondye nou an. Lè sa a, li te di mwen: Sanble tout pèp la pou m' ka fè yo tande pawòl mwen gen pou m' di yo, pou yo aprann respekte m' pandan tout lavi yo sou latè, lèfini pou yo moutre pitit yo fè menm bagay la tou. 11 N'a di yo ki jan nou te pwoche bò pye mòn lan. Lè sa a, gwo flanm dife t'ap soti sou mòn lan, yo t'ap moute byen wo nan syèl la. 12 Seyè a rete nan mitan dife a li pale ak nou. Se bri bouch li ase nou te tande ap pale. 13 Seyè a te fè nou konnen kontra li te pase ak nou an. Li mande nou pou nou kenbe l'. Li te ekri dis kòmandman yo sou de wòch plat yo, li mande pou nou swiv yo. 14 Lè sa a, Seyè a pase

m' lòd pou m' moutre nou tout lwa ak tout prensip nou gen pou nou swiv nan peyi kote nou pral antre a, peyi nou pral pran pou nou an. ¹⁵ Veye kò nou, tandè! Se pou byen nou wi! Lè Seyè a te pale ak nou nan mitan dife a, sou mòn Orèb la, nou pa t' wè anyen ki ta sanble ak yon bagay. ¹⁶ Piga nou fè sa nou pa dwe fè. Piga n' al fè ankenn zidòl pou nou adore, kit li gen fòm gason, osinon fòm fanm, ¹⁷ kit li gen fòm zannimo oswa fòm zwazo, ¹⁸ kit li gen fòm bèt k'ap trennen sou vant yo osinon fòm pwason. ¹⁹ Konsa tou, lè nou leve je nou nan syèl la, nou wè solèy la, lalin lan, zetwal yo ak tout lòt bagay ki anwo nan syèl la. Pa kite yo vire tèt nou pou nou fè sèvis pou yo. Pa al mete ajenou devan yo. Bondye mete yo la pou sèvis tout moun ki sou latè. ²⁰ Kanta nou menm, Seyè a te pran nou, li fè nou soti kite peyi Lejip ki te pou nou tankou yon gwo fou dife kote yo fonn fè, epi li fè nou tounen sa nou ye koulye a: yon pèp ki rele l' pa l'. ²¹ Men, Seyè a, Bondye nou an, te fache sou mwen poutèt nou. Li fè sèman li p'ap kite m' janbe lòt bò larivyè Jouden an, ni li p'ap kite m' mete pwent pye m' nan bon peyi li menm, Seyè a, Bondye nou an, ap fè nou kado a. ²² Se konsa, mwen menm, m'ap mouri bò isit la, mwen p'ap janbe lòt bò larivyè Jouden an. Men, nou menm, n'ap janbe lòt bò larivyè a, nou pral pran bon peyi sa a pou nou. ²³ Veye kò nou pou nou pa janm bliye kontra Seyè a, Bondye nou an, te pase ak nou an. Piga nou janm fè ankenn zidòl, ankenn pòtre bagay Seyè a, Bondye nou an, te defann nou fè. ²⁴ Paske Seyè a, Bondye nou an, se yon Bondye ki fè jalouzi anpil, li tankou yon dife k'ap boule tout bagay kote l' pase. ²⁵ Lè n'a gen pitit ak pitit pitit, lè n'a fin vye granmoun nan peyi a, piga nou fè sa nou pa t' dwe fè. Piga nou fè estati osinon pòtre ankenn bagay pou nou fè sèvis pou yo. Piga nou fè sa ki mal nan je Seyè a, Bondye nou an, pou nou fè l' fache. ²⁶ Si nou fè bagay konsa, men m'ap pran syèl la ak latè a pou temwen pou yo tandè sa m'ap di nou jòdi a: N'ap rete konsa, n'ap disparèt nan peyi nou pral pran pou nou lòt bò larivyè Jouden an. Nou p'ap rete lontan nan peyi a, paske nou tout pral disparèt nèt. ²⁷ Seyè a pral gaye nou toupatou nan mitan lòt nasyon yo. Se yon ti ponyen moun ase nan nou ki p'ap mouri nan peyi kote Seyè a pral mennen nou an. ²⁸ Lè n'a rive nan peyi sa yo, nou pral fè sèvis pou bondye moun fè ak men yo, pou zidòl fèt an bwa, osinon an wòch, zidòl ki pa ka wè, ki pa ka tandè, ki pa ka manje, ki pa ka pran sant anyen. ²⁹ Men, lè sa a, n'a pran chache Seyè a, Bondye nou an. Si nou chache l' ak tout kè nou, n'a jwenn li. ³⁰ Men, lè n'a gen kè sere, lè tout bagay sa yo va rive nou vre, bout pou bout yon jou n'a tounen nan pye Seyè a, Bondye nou an. N'a koute tou sa l' t'ap di nou an. ³¹ Paske Seyè a, Bondye nou an, se yon Bondye ki gen bon kè, li p'ap lage nou, ni li p'ap detwi nou. Li p'ap janm bliye kontra li menm li te pase ak zansèt nou yo, kontra li te fè sèman l'ap toujou kenbe a. ³² Chache konnen sa ki te pase nan tan lontan, nan tan ki te la

anvan nou te fèt, depi lè Bondye te mete moun sou latè. Ale toupatou sou latè, mande si yon gwo bagay konsa te janm rive. Eske yo janm tande yon gwo koze tankou koze sa a? ³³ Eske janm gen yon pèp ki te tande Bondye rete nan mitan dife pou pale ak yo, jan nou menm nou te tande l' la, epi ki pa mouri apre sa? ³⁴ Eske te janm gen yon bondye ki te penmèt li al chache yon pèp nan mitan yon lòt pèp pou fè li tounen pèp pa li, yon bondye ki te janm fè tout mirak ak tout bèl bagay sa yo, yon bondye ki te janm goumen tout goumen sa yo ak fòs ponyèt li, ak gwo kouraj li epi ki te fè anpil bagay pou fè moun tranble jan Seyè a, Bondye nou an, te fè l' pou nou devan je nou nan peyi Lejip la? ³⁵ Se nou menm sèl Seyè a te fè wè tou sa pou nou te ka konnen se Seyè a ki sèl Bondye tout bon an, pa gen lòt ankò. ³⁶ Li rete nan syèl la, li fè nou tande vwa l' pou l' te ka moutre nou anpil bagay. Sou latè menm, li fè nou wè yon gwo dife, epi li rete nan mitan dife a, li pale ak nou. ³⁷ Li te renmen zansèt nou yo, li te chwazi pitit pitit yo apre yo, kifè li te fè yo santi li la ak yo, li fè yo wè gwo pouvwa li, li fè yo soti kite peyi Lejip. ³⁸ Lèfini, li fè yon bann nasyon ki pi gran, ki pi fò pase nou kouri mete deyò pou fè plas ban nou. Li fè nou antre nan peyi yo. Li ban nou yo pou yo rele nou pa nou, jan sa ye jouk jòdi a. ³⁹ Bon. Koulye a, konprann sa byen. Pa janm bliye se Seyè a ki Bondye anwo nan syèl la ak isit la sou latè. Wi, se li menm, pa gen lòt. ⁴⁰ Se pou nou swiv tout lòd ak tout kòmandman mwen ban nou jòdi a. Konsa, ni nou menm, ni tout pitit nou yo apre nou, n'a viv lontan ak kè kontan nan peyi Seyè a, Bondye nou an, ap ban nou pou rele nou pa nou pou tout tan. ⁴¹ ¶ Apre sa, Moyiz chwazi twa lavil lòt bò larivyè Jouden, sou bò solèy leve, ⁴² lavil kote moun gen dwa kouri al kache si li ta touye yon moun pèp Izrayèl parèy li san li pa fè espere, san li pa janm gen anyen avè l'. Li gen dwa al kache kò l' nan yonn nan lavil sa yo pou yo pa touye l'. ⁴³ Pou moun branch fanmi Woubenn yo, se te lavil Bezè nan dezè ki anwo sou platon an. Pou moun branch fanmi Gad yo, se te lavil Ramòt nan zòn Galarad la. Pou moun fanmi Manase yo, se te lavil Golan nan peyi Bazan. ⁴⁴ Men lalwa Moyiz te mete devan moun pèp Izrayèl yo. ⁴⁵ Men kòmandman, lòd ak prensip Moyiz te ba yo apre yo te fin soti kite peyi Lejip. ⁴⁶ Lè sa a, yo te deja rive lòt bò larivyè Jouden, sou bò solèy leve, nan fon ki anfas Bètpeyò a, nan peyi wa Siyon an. Siyon sa a te wa peyi Amori a, li te rete lavil Esbon. Men, Moyiz ak moun pèp Izrayèl yo te bat li apre yo te fin soti kite peyi Lejip la. ⁴⁷ Yo pran peyi a nan men l'. Yo fè menm bagay la tou nan peyi Bazan, kote wa Og t'ap gouvènen an. De wa peyi Amori sa yo t'ap viv lòt bò larivyè Jouden, sou bò solèy leve. ⁴⁸ Peyi yo te pran an te konmanse depi lavil Awoyè ki sou tèt falèz toupre larivyè Anon an, li rive jouk mòn Siryon. Yo rele mòn sa a mòn Emon tou. ⁴⁹ Yo te pran tou tout zòn Araba a, ki sou bò solèy leve larivyè Jouden an, rive lanmè Mouri a nan pye mòn Pisga.

Chapter 5

¹ ¶ Moyiz fè tout pèp Izrayèl la sanble, epi li di yo: -Nou menm pèp Izrayèl, koute lòd ak kòmandman m'ap fè nou tandè jòdi a. Aprann yo byen. Pa janm bliye yo pou nou ka toujou fè tou sa yo mande nou fè.

² Seyè a, Bondye nou an, te siyen yon kontra ak nou sou Mòn Orèb la.
 ³ Se pa t' avèk zansèt nou yo sèlman Seyè a te pase kontra a, men avèk nou menm tou, nou tout k'ap viv isit la jòdi a.
 ⁴ Bondye te rete sou mòn lan, nan mitan dife a. Li te pale ak nou fas pou fas.
 ⁵ Lè sa a, mwen menm mwen te kanpe nan mitan, Seyè a yon bò, nou menm yon bò, pou m' te rapòte nou tout pawòl Seyè a te di, paske nou te pè dife a, nou pa t' vle moute sou mòn lan. Men sa Seyè a te di:
 ⁶ ¶ Se mwen menm, Seyè a, Bondye nou an, ki te fè nou soti kite peyi Lejip kote nou te esklav la.
 ⁷ Piga nou sèvi lòt bondye pase mwen menm sèlman.
 ⁸ Piga nou janm fè ankenn estati ni ankenn pòtre ki sanble bagay ki anwo nan syèl la osinon bagay ki sou latè ou ankò nan dlo anba tè a.
 ⁹ Piga nou adore yo, ni piga nou sèvi yo. Paske, mwen menm Seyè a, Bondye nou an, mwen se yon Bondye ki fè jalouzi anpil. Lè yon moun rayi m', mwen fè pitit li, pitit pitit li ak pitit pitit pitit li yo peye sa.
 ¹⁰ Men, lè yon moun renmen m', lè li fè sa m' mande l' fè, m'ap moutre l' jan moun renmen l' tou ansanm ak tout pitit pitit li yo pandan mil jenerasyon.
 ¹¹ Piga nou janm nonmen non Seyè a, Bondye nou an, an jwèt osinon pou bay manti, paske mwen menm, Seyè a, Bondye nou an, mwen p'ap manke pini moun ki nonmen non m' pou gremesi.
 ¹² Toujou chonje jou repo a pou nou mete l' apa pou Bondye, jan mwen menm Seyè a, Bondye nou an, te ban nou lòd fè l' la.
 ¹³ N'a travay sis jou. Lè sa a, n'a fè tou sa nou gen pou nou fè.
 ¹⁴ Men, setyèm jou a, se jou repo Seyè a, Bondye nou an. Jou sa a, nou p'ap fè ankenn travay, ni nou menm, ni pitit gason nou, ni pitit fi nou, ni fanm ni gason k'ap travay lakay nou, ni bèf nou, ni bourik nou, ni ankenn nan lòt bèt nou genyen, ni moun lòt nasyon ki rete lakay nou. Konsa, ni fanm ni gason k'ap travay lakay nou ka pran repo menm jan ak nou.
 ¹⁵ N'a toujou chonje se esklav nou te ye nan peyi Lejip la. E se mwen menm, Seyè a, Bondye nou an, ki te vin delivre nou ak fòs ponyèt mwen, ak gwo kouraj mwen. Se poutèt sa, Seyè a, Bondye nou an, te pase nou lòd pou nou pa bliye jou repo a.
 ¹⁶ Respekte manman nou ak papa nou jan Seyè a, Bondye nou an, te pase nou lòd la, pou nou ka viv lontan ak kè kontan nan peyi Seyè a, Bondye nou an, te ban nou.
 ¹⁷ Piga nou janm touye moun.
 ¹⁸ Piga nou janm fè adiltè.
 ¹⁹ Piga nou janm pran sa ki pa pou nou.
 ²⁰ Piga nou janm fè manti sou frè parèy nou nan tribinal.
 ²¹ Piga nou janm pote lanvi sou madanm frè parèy nou. Pa mete lide nou ni sou kay li, ni sou jaden li, ni sou gason osinon fanm k'ap travay lakay li, ni sou bèf li, ni sou bourik li, ni sou anyen ki pou

frè parèy nou. ²² Men pawòl Seyè a te di nou lè nou tout nou te sanble sou mòn lan. Li te rete nan mitan dife a, anndan gwo nwaj nwa a, li pale byen fò ak nou. Li pa di anyen ankò apre sa. Li ekri kòmandman sa yo sou de wòch plat, epi li ban mwen yo. ²³ ¶ Men, lè pèp la tande bri vwa ki t'ap soti nan nwaj nwa a, lè yo wè mòn lan ki t'ap pran dife, yo vin jwenn mwen ansanm ak tout chèf branch fanmi yo ak tout chèf fanmi yo. ²⁴ Yo di m' konsa: -Koulye a, nou wè Seyè a, Bondye nou an. Nou wè jan li gen pouvwa, jan li merite yo fè lwanj li. Nou tande vwa l' ap pale nan mitan dife a. Jòdi a nou wè tout bon vre Bondye ka pale ak moun san yo pa mouri pou sa. ²⁵ Bon. Koulye a, poukisa pou n' al riske tèt nou ankò avèk gwo dife sa a ki ka kankannen nou? Eske nou p'ap mouri si nou tande vwa Seyè a, Bondye nou an, ap pale yon lòt fwa ankò? ²⁶ Eske gen moun sou latè ki ka rete vivan toujou lè yo fin tande Bondye tout bon an rete nan mitan dife pou pale ak yo, jan sa te rive nou an? ²⁷ Ou mèt pwoche ou menm, pou ou tande tou sa Seyè a, Bondye nou an, va di. Apre sa, w'a tounen vin di nou sa li te di ou. N'a koute ou, epi n'a fè tou sa l' di nou fè. ²⁸ Seyè a te tande sa nou te di a, li di m' konsa: Mwen tande sa pèp la di la a. Yo gen rezon. ²⁹ Mwen ta swete yo toujou gen bon santiman nan kè yo pou yo ka gen krentif pou mwen, pou yo kenbe lòd mwen yo, konsa yo ta viv ak kè kontan tout tan, ni yo menm ni pitit yo. ³⁰ Ale di yo yo mèt tounen anba tant yo. ³¹ Men ou menm, ou va rete isit la avè m'. M'a ba ou tout kòmandman, tout lòd ak tout prensip pou ou moutre yo pou yo ka swiv yo nan peyi m'ap ba yo a. ³² Veye kò nou pou nou viv jan Seyè a, Bondye nou an, te mande nou viv la. Pa vire ni adwat ni agoch. ³³ N'a mache dwat nan chemen Bondye nou an, Seyè a, mete devan nou an. Se konsa n'a gen lavi, n'a gen kè kontan. N'a viv lontan nan peyi nou pral pran pou nou rete a.

Chapter 6

¹ ¶ Koulye a, men kòmandman, lòd ak prensip Seyè a, Bondye nou an, te mande pou yo moutre nou, pou nou te ka swiv yo nan peyi kote nou pral antre pou nou pran pou nou an. ² Konsa, ni nou menm, ni pitit nou yo, ni pitit pitit nou yo, n'a gen krentif pou Seyè a, Bondye nou an, n'a kenbe tout lòd ak tout kòmandman li ban nou yo, chak jou nan lavi nou. Se konsa n'a viv lontan. ³ Koute byen sa m'ap di nou, nou menm pèp Izrayèl! Pa bliye yo. Fè tou sa mwen di nou fè. Se sa ki va fè nou viv ak kè kontan. Se sa ki va fè nou tounen yon gran nasyon nan bon peyi sa a, kote lèt ak siwo myèl ap koule tankou dlo, jan Seyè a, Bondye zansèt nou yo, te di l' la. ⁴ ¶ Koute byen, nou menm

5
 pep Izrayèl! Seyè a, Bondye nou an, se li ki sèl mèl. Se pou nou renmen Seyè a, Bondye nou an,
 6
 avèk tout kè nou, avèk tout nanm nou, avèk tout fòs kouraj nou. Pa janm bliye kòmandman m'ap
 7
 ban nou jòdi a. N'a moutre yo bay pitit nou yo. N'a repete yo nan zòrèy yo, kit nou chita lakay
 nou, kit n'ap mache sou granchemen, kit nou kouche nan kabann nou, kit nou kanpe ap travay.
 8
 9
 Mare yo sou ponyèt nou ak sou fwon nou pou nou sa pa janm bliye yo. N'a ekri yo sou chanbrann
 10
 pòt lakay nou ak sou pòtay lavil nou yo. Seyè a pral kenbe pwomès li te fè Abraram, Izarak ak
 Jakòb, zansèt nou yo, li pral fè nou antre nan peyi li te fè sèman l'ap ban nou an. Se yon peyi kote
 11
 n'a jwenn gwo bèl lavil nou pa t' bati, kote n'a jwenn kay plen bon bagay san se pa nou menm
 ki te mete yo la, avèk pi byen fon nou pa t' fouye, avèk jaden rezen ak jaden oliv nou pa t' plante.
 12
 Lè sa a, lè n'a fin manje plen vant nou, fè atansyon pou nou pa bliye Seyè a, li menm ki te fè
 13
 nou soti kite peyi Lejip kote nou te esklav la. Se pou Seyè a, Bondye nou an, ase pou nou gen
 14
 krentif. Se li menm ase pou nou sèvi. Se non li sèlman pou nou pran pou fè sèman. Pa kouri
 15
 dèyè lòt bondye. Piga n' al sèvi bondye pèp k'ap viv toupre nou yo. Paske Seyè a, Bondye ki
 rete nan mitan nou an, se yon Bondye ki fè jalouzi anpil. Si nou fè sa, l'a fache sou nou, l'a disparèt
 16
 nou nèt sou latè. Piga nou sonde Seyè a, Bondye nou an, jan nou te fè l' bò Masa a. ¶ Se pou
 17
 nou kenbe tout kòmandman Seyè a ansanm ak tout lòd ak tout prensip li ban nou pou nou swiv.
 18
 N'a fè sa ki dwat ak sa ki byen nan je Bondye pou nou ka gen kè kontan, pou nou ka pran bèl
 19
 peyi Seyè a te fè sèman l'ap bay zansèt nou yo, pou nou ka chase tout lènmi nou yo devan nou,
 20
 jan li te pwomèt la. Yon jou, lè pitit nou yo va mande nou poukisa Seyè a, Bondye nou an,
 21
 mande nou pou nou swiv tout lòd, tout prensip ak tout kòmandman sa yo, lè sa a, n'a di yo: Nou
 te esklav farawon an nan peyi Lejip. Seyè a te fè nou soti kite peyi Lejip la avèk fòs ponyèt li.
 22
 Nou te wè ak je nou tout mèvèy ak tout mirak li te fè pou kraze peyi Lejip, ansanm ak farawon
 23
 an ak tout moun pa l' yo. Men nou menm, li fè nou soti kote nou te ye a, li mennen nou nan peyi
 24
 li te pwomèt zansèt nou yo, epi li ban nou li. Apre sa, Seyè a, Bondye nou an, te pase nou lòd
 pou nou kenbe tout prensip sa yo. Konsa, n'a gen krentif pou li, n'a viv ak kè kontan, epi l'a konsève
 25
 lavi nou jan li fè sa pou nou jouk koulye a. Si nou vle fè Bondye plezi, se pou nou fè atansyon
 pou nou swiv tout kòmandman sa yo nèt, se pou nou mache devan Seyè a, Bondye nou an, jan li
 te mande nou an.

Chapter 7

¹ ¶ Seyè a, Bondye nou an, pral fè nou antre nan peyi nou pral pran pou nou an. Li pral fè sèt nasyon ki gen plis moun pase nou, ki pi fò pase nou, kouri met deyò devan nou, ki vle di moun Et yo, moun Gigach yo, moun Amori yo, moun Kanaran yo, moun Perèz yo, moun Evi yo ak moun

² Jebis yo. Seyè a, Bondye nou an, pral lage yo nan men nou, nou pral bat yo. Lè sa a, se pou nou detwi yo nèt tankou yon ofrann pou Bondye nou an. Piga nou pase ankenn kontra ak yo. Piga nou

³ gen pitye pou yo. Piga nou marye ak moun sa yo. Pa kite pitit fi nou marye ak pitit gason yo, ni

⁴ pa kite pitit gason nou marye ak pitit fi yo. Paske y'a pran tèt pitit gason nou yo, y'a fè yo vire do ban mwen pou y' al sèvi lòt bondye. Si nou fè sa, Bondye va fache sou nou, l'a disparèt nou la pou

⁵ la. Men sa pou n' fè yo: Demoli tout lòtèl yo, kraze tout estati yo, rache tout poto Achera yo, boule tout zidòl yo.

⁶ N'a fè sa paske se yon pèp k'ap viv apa pou Seyè a, Bondye nou an, nou ye. Se nou menm Seyè a, Bondye nou an, te chwazi nan tout pèp ki sou latè pou li fè nou tounen yon

⁷ pèp ki rele l' pa l'. Si, nan tout pèp ki sou latè, se nou menm Seyè a te pi pito, si li te chwazi nou, se pa paske nou te gen plis moun nan pèp nou an pase lòt yo. Okontrè, se nou ki te gen pi piti moun.

⁸ Men, se paske Seyè a te renmen nou, epi li te vle kenbe pwomès li te fè zansèt nou yo. Se poutèt sa li delivre nou avèk fòs ponyèt li. Li fè nou soti kite peyi Lejip kote nou te tounen esklav la. Li

⁹ wete nou anba pouvwa farawon an. Se pou nou rekonèt Seyè a, Bondye nou an, se sèl Bondye ki genyen, sèl Bondye k'ap toujou kenbe pawòl li. Wi, l'ap toujou kenbe kontra li pase a. L'ap toujou renmen moun ki renmen l', moun ki fè tou sa l' mande yo fè, de pitit an pitit, pandan mil jenerasyon.

¹⁰ Men, li p'ap manke pini moun ki rayi l'. Se moun sa yo menm l'ap touye, pa lòt moun ankò. Wi,

¹¹ li p'ap pran reta pou l' fè yo peye sa yo fè a. Se poutèt sa, se pou nou swiv tout kòmandman, tout

¹² lòd ak tout prensip mwen mande nou jòdi a pou nou swiv. ¶ Si nou koute tou sa mwen mande nou la a, si nou kenbe yo nan tèt nou, si nou swiv yo pwen pa pwen, Seyè a, Bondye nou an, va toujou kenbe kontra li te pase ak zansèt nou yo, l'ap toujou renmen nou jan li te fè sèman bay zansèt

¹³ nou yo. L'a renmen nou, l'a beni nou, l'a fè nou peple. L'a ban nou anpil pitit. L'a voye benediksyon sou jaden nou, n'a gen anpil manje, anpil diven ak anpil lwil. Bèf nou yo va bay anpil pòte, mouton nou yo va fè anpil pitit. L'a fè tou sa pou nou nan peyi li te pwomèt zansèt nou yo

¹⁴ l'ap ban nou an. Bondye ap beni nou plis pase tout lòt pèp yo. p'ap gen yon moun nan mitan nou, fanm kou gason, ki p'ap ka fè pitit. Konsa tou, p'ap gen yonn nan bèt nou yo, ni mal ni fenmèl,

¹⁵ ki p'ap ka fè pitit. Seyè a p'ap kite ankenn maladi tonbe sou nou. Li p'ap janm voye sou nou move epidemi nou te wè ki te tonbe sou moun peyi Lejip yo. L'ap kite sa pou tout moun ki pa vle

16 wè nou yo. Se pou nou disparèt tout pèp Seyè a, Bondye nou an, va lage nan men nou. Se pou nou san pitye pou yo. Piga nou fè sèvis pou bondye moun sa yo, paske sa ka fini mal pou nou.

17 Si nou ta rive di nan kè nou: Nasyon sa yo gen plis moun pase nou. Ki jan pou n' fè pou n' pran peyi a nan men yo? wete lide konsa nan tèt nou. 18 Nou pa bezwen pè yo. Chonje tou sa Seyè a, Bondye nou an, te fè farawon an ak tout peyi Lejip li a. 19 Chonje tout gwo malè nou te wè ak je nou, tout mèvèy ak tout mirak Seyè a te fè ak fòs ponyèt li ak gwo kouraj li pou l' fè nou soti kite peyi sa a. Seyè a pral fè menm jan an tou ak tout pèp nou pè yo. 20 Sa ki pi rèd ankò, l'ap voye yon bann tanwouan pou touye tou sa ki va chape anba men nou pou y' al kache pou nou. 21 Nou pa bezwen pè moun sa yo menm. Seyè a, Bondye nou an, kanpe la avèk nou. Se yon Bondye ki gen anpil pouvwa, yon Bondye ki fè tout moun respekte l'. 22 Seyè a, Bondye nou an, va mete nasyon sa yo deyò devan nou, yonn apre lòt. Nou p'ap ka detwi yo tout yon sèl kou. Paske si nou fè l', bèt nan bwa ka anvayi peyi a, epi sa pa ta bon pou nou. 23 Men, Seyè a, Bondye nou an, pral lage yo nan men nou. L'ap fè yo pati kouri devan nou jouk n'a fin disparèt yo nèt. 24 Seyè a pral mete wa yo anba pye nou. Nou pral touye yo, nou pral fè tout moun sou latè bliye non yo. Pesonn p'ap ka rete nou sou kous nou. Nou pral detwi yo tout. 25 N'a boule tout zidòl yo te taye nan bwa. Pa kite lò ak ajan ki kouvri zidòl yo mete move lanvi nan ke nou. Pa pran yo pou nou. Sa ka yon pèlen pou nou. Nou konnen bagay konsa se bagay Seyè a, Bondye nou an, pa vle wè menm. 26 Konsa tou, pa pran ankenn nan zidòl sa yo pou nou mete anndan lakay nou, pou menm madichon ki sou yo a pa tonbe sou nou tou. Se pou nou konsidere yo pou move bagay, pou vye bagay sal. Se bagay ki madichonnen, bagay ki fèt pou disparèt nèt.

Chapter 8

1 ¶ Se pou nou swiv pwen pa pwen tout kòmandman m'ap ban nou jòdi a pou nou ka viv, pou nou ka gen anpil pitit, pou nou ka mache pran peyi mwen te fè sèman m'ap bay zansèt nou yo.

2 Chonje tout chemen Seyè a, Bondye nou an, te fè nou pran nan dezè a pandan karantan pou l' te ka kraze lògèy nou, pou l' te ka sonde nou, pou l' te ka konnen sa ki nan kè nou, si tout bon vre nou te soti pou kenbe kòmandman l' yo. 3 Li kraze lògèy nou, li fè nou soufri grangou. Apre sa, li ba nou laman pou nou manje, yon kalite manje ni nou menm ni zansèt nou yo pa t' janm konnen. Li fè tou sa pou li te fè nou konnen se pa pen ase moun bezwen pou yo viv. Yo bezwen tout pawòl ki soti nan bouch Seyè a tou pou yo viv. 4 Pandan tout karantan sa yo, rad sou nou pa janm fini, pye

⁵ nou yo pa janm fè yon ti anfle. Se pou nou manyè konprann koulye a, Seyè a, Bondye nou an,
⁶ t'ap mete nou sou lòd tankou yon papa k'ap mete pitit li sou lòd. Se poutèt sa, toujou kenbe tout
 lòd Seyè a, Bondye nou an, ban nou pou nou ka mennen bak nou dwat nan chemen li mete devan
⁷ nou yo, lèfini pou nou toujou gen krentif pou li. Men, Seyè a, Bondye nou an, ap mennen nou
 nan yon bèl peyi, yon peyi kote ki gen anpil rivyè, anpil sous dlo, anpil dlo anba tè k'ap pete nan
⁸ fon yo ak sou flan mòn yo, yon peyi kote ki gen ble, lòj, rezen, pye fig frans, grenad, oliv ak siwo
⁹ myèl, yon peyi kote nou p'ap janm manke manje, kote nou va jwenn tou sa nou vle. Plen fè nan
¹⁰ mitan wòch li yo. N'a jwenn kwiv nan mòn li yo. ¶ Men, lè n'a fin manje plen vant nou, n'a fè
¹¹ lwanj Seyè a, Bondye nou an, pou bon peyi li te ban nou an. Veye kò nou pou nou pa janm bliye
 Seyè a, Bondye nou an, pou nou pa janm neglije kòmandman, lòd ak prensip m'ap ban nou jòdi a.
¹² Lè n'a fin manje plen vant nou, lè n'a fin bati bèl kay pou nou rete, ¹³ lè n'a wè bèf nou yo, kabrit
 nou yo ak mouton nou yo ap peple, lè n'a wè n'a gen lò ak ajan an kantite, lè n'a wè tout byen nou
¹⁴ yo ap vin pi plis chak jou, pa kite lògèy vire tèt nou pou nou bliye Seyè a, Bondye nou an, ki te
¹⁵ fè nou soti kite peyi Lejip kote yo te fè nou tounen esklav la. Se li menm ki te pran men nou
 pou fè nou travèse gwo dezè plen danje a, kote ki gen eskòpyon ak sèpan ki gen move pwazon nan
 bouch yo, kote moun ap mouri swaf dlo paske pa gen dlo la menm. Men, se li menm ki te fè dlo
¹⁶ soti nan gwo wòch di a pou nou. Nan dezè a se li menm ki te ban nou manje laman, yon kalite
 manje zansèt nou yo pa t' janm konnen. Li kraze lògèy nou, li sonde nou pou nou te ka gen kè
¹⁷ kontan pi devan. Pa janm mete nan tèt nou se kouraj nou ak fòs ponyèt nou ki fè nou gen tout
¹⁸ richès sa yo. Chonje se Seyè a, Bondye nou an, ki te ban nou kouraj sa a. Se li menm ki te fè
 nou rive gen tout richès sa yo, paske li te kenbe kontra li te pase ak zansèt nou yo, epi l'ap kenbe
¹⁹ l'jouk jòdi a. Si nou rive bliye Seyè a, Bondye nou an, pou n' al kouri dèyè lòt bondye, pou nou
 fè sèvis pou yo, pou n' adore yo, mwen tou avèti nou jòdi a, nou tout nou gen pou nou disparèt.
²⁰ Si nou pa koute sa Seyè a, Bondye nou an, di nou, nou pral disparèt menm jan ak nasyon Bondye
 pral disparèt devan nou yo.

Chapter 9

¹ ¶ Koute byen, nou menm pèp Izrayèl! Lè a rive, jòdi a nou pral janbe lòt bò larivyè Jouden
 an pou n' al anvayi peyi ki pou nasyon ki gen plis moun pase nou, nasyon ki pi fò pase nou. Nou

pral pran yon bann gwo lavil ki gen ranpa wotè syèl la pou pwoteje yo. ² Moun peyi a se yon bann moun ki gwonèg, ki bèl wotè tankou moun Anak yo. Nou konn tande yo di pa gen moun ki ka kenbe tèt ak moun sa yo. ³ Enben, koulye a, nou pral konnen se Seyè a, Bondye nou an, ki pral pran devan nou. Tankou yon gwo dife k'ap boule tou sa li kontre, li pral disparèt yo chak fwa n'a jwenn yo sou wout nou. Li pral fè yo bese tèt devan nou. Se konsa n'a pran peyi a nan men yo, n'a disparèt yo la pou la jan Seyè a te di l' la. ⁴ Lè Seyè a, Bondye nou an, va fin chase moun sa yo devan nou, piga nou di nan kè nou se paske nou merite kifè Seyè a te fè n' antre pran peyi a pou nou. Non. Se paske moun sa yo mechan kifè Seyè a te mete yo deyò ban nou plas yo. ⁵ Non! Se pa paske nou te merite, ni paske nou te mennen bak nou dwat kifè Seyè a pral fè nou pran peyi a pou nou. Se paske moun sa yo mechan kifè Seyè a, Bondye nou an, pral disparèt yo sou tout wout nou. Epitou, se pou l' te ka kenbe pawòl li te sèman bay zansèt nou yo, Abraram, Izarak ak Jakòb. ⁶ Se pou nou konnen se pa paske nou merite anyen kifè Seyè a, Bondye nou an, ap ban nou bon peyi sa a pou rele nou pa nou. Non! Paske se yon pèp ki gen tèt di anpil nou ye. ⁷ ¶ Pa janm bliye jan ou te fè Seyè a, Bondye nou an, fache anpil nan dezè a. Depi lè nou te soti nan peyi Lejip jouk nou rive isit la, n'ap fè wòklò devan Seyè a. ⁸ Lè nou te sou mòn Orèb la, nou te eksite kòlè Seyè a. Li te sitèlman fache lè sa a, li te fè lide detwi nou tout. ⁹ Mwen te moute sou mòn lan pou m' te al resevwa de wòch plat yo, wòch ki te gen kontra Seyè a te fè ak nou an ekri sou yo. Mwen rete la, mwen pase karant jou, karant nwit, san manje, san bwè anyen sou mòn lan. ¹⁰ Se lè sa a Seyè a te ban mwen de wòch plat yo. Se sou yo li te ekri avèk pwòp men l' tou sa li di nou, antan li te nan mitan gwo dife a, jou nou tout te reyini nan pye mòn lan. ¹¹ Wi, apre karant jou ak karant nwit, Seyè a ban mwen de wòch plat yo avèk kontra a ekri sou yo. ¹² Epi li di m' konsa: Leve non, desann mòn lan byen vit, paske pèp ou a, pèp ou te mennen soti kite peyi Lejip la, lage kò l' nan fè sa ki mal. Yo pa tann lontan pou yo kite chemen mwen te mete devan yo pou yo swiv la. Yo gen tan fonn metal, yo fè yon zidòl pou tèt pa yo. ¹³ Apre sa, Seyè a di m' ankò: mwen gade pèp la, mwen wè se yon pèp ki gen tèt di anpil. ¹⁴ Kite m' fè sa m'ap fè a non! Mwen pral disparèt yo nèt pou pesonn sou latè pa janm chonje te gen moun sa yo. Men ou menm, m'ap ba ou pitit ki va vin zansèt yon nasyon k'ap pi gran, k'ap pi fò pase yo. ¹⁵ Mwen desann soti nan mòn lan ki te plen flanm dife: mwen te gen de wòch kontra yo nan men m'. ¹⁶ Lè mwen wè nou te gen tan dezobeyi Seyè a, Bondye nou an, nou te gen tan kite chemen Seyè a te mete devan nou, nou te fonn metal, nou te fè estati yon ti towò, ¹⁷ mwen pran de wòch plat ki te nan men m' yo, mwen voye yo jete, mwen kraze yo devan nou tout. ¹⁸ Apre sa, mwen lage kò m' fas atè devan Seyè a. Tankou premye fwa a, mwen

pase karant jou ak karant nwit, san manje, san bwè anyen. Tou sa, paske nou te fè sa ki mal devan
 Seyè a, nou pa t' fè l' plezi, nou te fè l' fache anpil. ¹⁹ Mwen menm, mwen te pè anpil lè m' wè jan
 Seyè a te fache, paske li te fache kont pou l' te disparèt nou nèt. Men, fwa sa a ankò, Seyè a koute
 m'. ²⁰ Lè sa a, li te fache anpil tou sou Arawon jouk li te vle touye l'. Men, mwen te lapriyè nan
 pye l' pou Arawon. ²¹ Mwen te pran estati ti towò bèn nou te fè ak move lide nan tèt nou an, mwen
 jete l' nan dife. Mwen mete l' nan yon pilon, mwen kraze l' an myèt moso, mwen fè l' tounen pousyè.
 Lèfini, mwen te jete pousyè a nan dlo larivyè ki desann soti nan mòn lan. ²² Nou te eksite kòlè
 Seyè a tou lè nou te Tabera, lè nou te Masa ak lè nou te Simityè Grangou. ²³ Le Seyè a te ban nou
 lòd pati kite Kadès-Banea pou n' al pran pou nou peyi li te di l'ap ban nou an, nou t'ap fè wòklò ak
 Seyè a, Bondye nou an. Nou pa t' kwè nan li, nou te derefize tandè l'. ²⁴ Depi mwen konnen nou,
 se wòklò n'ap plede fè ak Bondye! ²⁵ Se konsa mwen lage kò m' fas atè devan Seyè a, pandan
 karant jou ak karant nwit, paske Seyè a te di l'ap disparèt nou. ²⁶ mwen te lapriyè Seyè a pou nou,
 mwen di l' konsa: O Seyè, Bondye mwen, tanpri! Pa detwi pèp ou a, pèp ki rele ou pa ou la, pèp
 ou te delivre ak pouvwa ou la, pèp ou te fè soti kite peyi Lejip ak fòs ponyèt ou a. ²⁷ Chonje sèvitè
 ou yo, Abraram, Izarak ak Jakòb! Pa gade sou tèt di pèp la, ni sou mechanste ak sou peche l'ap fè.
²⁸ Mwen pa ta vle pou nan peyi kote ou fè nou soti a moun yo ta di: Wi, Seyè a pa t' ka mennen yo
 nan peyi li te pwomèt l'ap ba yo a. Se rayi li rayi yo kifè li fè yo soti kite peyi Lejip la pou l' touye
 yo nan dezè a. ²⁹ Men, se pèp ou yo ye! Yo rele ou pa ou! Se avèk gwo pouvwa ou, avèk fòs ponyèt
 ou ou te fè yo soti kite peyi Lejip.

Chapter 10

¹ ¶ Apre sa, Seyè a te di m': Taye de wòch plat tankou de premye yo. Fè yon bwat an bwa, mete
 yo ladan l'. Moute vin jwenn mwen sou mòn lan. ² Mwen pral ekri sou wòch yo tou sa mwen te
 ekri sou wòch plat ou te kraze yo. Lèfini, w'a mete yo nan bwat la. ³ Se konsa, mwen fè yon bwat
 an bwa zakasya, mwen taye de wòch plat tankou de premye yo, epi mwen moute sou mòn lan ak
 wòch yo nan men m'. ⁴ Seyè a make sou wòch yo dis pawòl li te ekri premye fwa a, dis kòmandman
 Seyè a te ban nou antan li te nan mitan dife a, jou nou tout nou te reyini nan pye mòn lan. Apre sa
 li ban mwen yo. ⁵ Mwen desann soti nan mòn lan. Mwen mete wòch plat yo nan bwat mwen te fè

⁶
 a, jan Seyè a te ban mwen lòd la, epi se la yo rete depi lè sa a. Moun pèp Izrayèl yo kite pi Benèy-Jakan yo, yo pati pou Mosera. Se la Arawon te mouri. Se la tou yo antere l'. Se Eleaza, pitit

⁷
 li a, yo te mete prèt nan plas li. Yo kite kote yo te ye a, yo pati pou Goud Goda, epi yo rive Jobata,

⁸
 yon kote ki te gen anpil dlo. Se lè sa a Seyè a te mete moun branch fanmi Levi yo apa pou yo reskonsab pote Bwat Kontra Seyè a, pou yo ka kanpe devan l' fè sèvis pou li, pou yo ka beni pèp

⁹
 la nan non l', jan y'ap fè l' jouk koulye a. Se poutèt sa, moun branch fanmi Levi yo pa t' resevwa ankenn pòsyon tè pou rele yo pa yo menm jan ak moun lòt branch fanmi yo paske se Seyè a ki tout

¹⁰
 byen yo, jan Seyè a, Bondye nou an, te di l' la. Mwen menm, mwen rete karant jou, karant nwit sou mòn lan, jan mwen te fè l' premye fwa a. Fwa sa a ankò, Seyè a koute m', li te dakò pou l' pa

¹¹
 detwi nou. Lè sa a, li di m' konsa: Leve non. Pati, pran devan pèp la. Mennen yo al pran pou yo

¹²
 peyi mwen te sèmante m'ap bay zansèt yo a. ¶ Koulye a, nou menm pèp Izrayèl, men sa Seyè a, Bondye nou an, mande nou: Se pou nou gen krentif pou Seyè a, Bondye nou an. Se pou nou swiv chemen li mete devan nou an. Se pou nou renmen l'. Se pou nou sèvi l' ak tout kè nou ak tout nanm

¹³
 nou. Se pou nou mache dapre tout kòmandman ak tout lòd li yo. Se pou byen nou mwen ban

¹⁴
 nou yo jòdi a. Gade non! Se pou Seyè a syèl la ak tou sa ki anwo nèt nan syèl la ye. Se pou li

¹⁵
 latè ak tou sa ki ladan l' lan ye. Men, pami tout ras moun ki sou latè yo, se zansèt nou yo li te pi pito, paske li te renmen yo. Apre yo, se nou menm, pitit yo, li pi pito nan mitan tout lòt ras moun,

¹⁶
 jan sa ye jouk koulye a. Se poutèt sa, louvri kè nou nèt bay Seyè a. Sispann fè wòklò ak li,

¹⁷
 paske Seyè a, Bondye nou an, se li menm ki Bondye anwo tout bondye, se li menm ki chèf sou tout chèf. Li gen pouvwa, li gen fòs, li fè moun respekte l'. Li pa nan paspouki, li pa kite yo achte

¹⁸
 figi l' avèk kado y'ap ofri ba li. L'ap defann kòz timoun ki san papa yo ak kòz fanm ki pèdi mari yo. Li renmen moun lòt nasyon k'ap viv nan mitan pèp li a, li ba yo manje pou yo manje ak rad pou

¹⁹
 yo mete sou yo. Se pou nou renmen moun lòt nasyon sa yo tou paske yon lè se sa nou te ye nan

²⁰
 peyi Lejip la. Se pou Seyè a, Bondye nou an, ase pou nou gen krentif. Se li menm sèlman pou

²¹
 nou sèvi. Pa janm lage l'. Se nan non l' ase pou nou fè sèman. N'a fè lwanj li, se li menm ki

²²
 Bondye nou. Nou te wè ak je nou tout gwo bagay ak bèl mèvyè li te fè pou nou. Lè zansèt nou yo te desann nan peyi Lejip, yo te swasann dis moun sèlman. Koulye a, Seyè a, Bondye nou an, fè nou vin anpil tankou zetwal nan syèl la.

Chapter 11

¹ ¶ Se pou nou renmen Seyè a, Bondye nou an. Se pou nou toujou kenbe lòd, prensip ak kòmmandman li ban nou yo. ² Se pou nou rekonèt jòdi a tou sa Seyè a te moutre nou. Nou te wè jan li gen pouvwa, jan li gen fòs, jan li gen kouraj. Se nou menm ki te viv tout bagay sa yo, se pa t' pitit nou yo. Yo menm yo pa t' konn anyen, ni yo pa t' wè anyen. ³ Seyè a te fè nou wè mirak ak gwo mèvèy li te fè nan mitan peyi Lejip, pou li te fini ak farawon an ansanm ak tout moun nan peyi a. ⁴ Nou te wè kisa li te fè lame Lejip la ak tout chwal yo ak tout cha yo, ki jan li te fè dlo lanmè Wouj la kouvri yo, lè yo t'ap rapouswiv nou an. Seyè a te kraze yo nèt. ⁵ Nou konnen sa li te fè pou nou tout tan nou te nan dezè a jouk nou rive isit la. ⁶ Chonje sa li te fè Datan ak Abiram, pitit Eliyab, moun fanmi Woubenn yo. Tè a te fann, li vale yo tou vivan ansanm ak tout fanmi yo, tout tant yo ak tout moun ki te avèk yo, devan je tout pèp Izrayèl la. ⁷ Se nou menm ki te wè ak je nou tout gwo mèvèy sa yo Seyè a te fè. ⁸ ¶ Se pou nou mache dapre lòd m'ap ban nou jòdi a, pou nou ka vin fò, pou nou ka pran peyi nou pral anvayi a pou nou, ⁹ pou nou ka viv lontan nan peyi Seyè a te fè sèman l'ap bay zansèt nou yo pou yo menm ak tout ras yo, nan peyi kote lèt ak siwo myèl ap koule tankou dlo. ¹⁰ Peyi nou pral anvayi pou nou pran pou nou an pa yon peyi ki tankou peyi Lejip kote nou soti a, yon peyi kote se nou menm ki te blije simen grenn nan jaden nou, lèfini pou nou te travay di pou nou wouze yo tankou yo wouze jaden legim. ¹¹ Non! Peyi nou pral anvayi pou nou pran pou nou an, se yon peyi ki gen anpil mòn ak anpil fon, yon peyi lapli soti nan syèl wouze tout tan. ¹² Se yon peyi Seyè a, Bondye nou an, ap pran swen, yon peyi l'ap veye pou anyen pa rive l' depi premye jou nan lanne a rive dènye jou a. ¹³ Nou mèt sèten, si nou mache dapre kòmmandman mwen ban nou jòdi a, si nou renmen Seyè a, Bondye nou an, si nou sèvi l' ak tout kè nou ak tout nanm nou, ¹⁴ m'a voye lapli sou tè nou lè n'a bezwen l', m'a bay lapli nan sezon plante ak nan sezon rekòt pou nou ka gen anpil manje, anpil diven ak anpil lwil. ¹⁵ M'a fè anpil zèb pouse nan savann nou yo pou bèt nou manje. Konsa, n'a jwenn manje pou nou manje plen vant nou. ¹⁶ Fè atansyon pou nou pa pèdi tèt nou, pou nou pa kite chemen ki devan nou an pou n' al sèvi lòt bondye, pou n' al adore yo. ¹⁷ Si nou kite sa rive nou, Seyè a va fache anpil sou nou, li p'ap voye lapli. Si pa gen lapli, tè a p'ap bay sa pou l' te bay la. Nou tout n'ap mouri byen vit nan bon peyi Seyè a ban nou an. ¹⁸ ¶ Fè pawòl m'ap di nou la a antre nan tèt nou pou nou pa janm bliye yo! Mare yo sou

ponyèt nou ak sou fwon nou pou nou ka toujou chonje yo. ¹⁹ N'a moutre yo bay timoun nou yo, n'a repete yo nan zòrèy yo, nou te mèt lakay nou, nou te mèt ap mache granchemen, nou te mèt kouche nan kabann nou, nou te mèt kanpe ap travay. ²⁰ Ekri yo sou chanbrann pòt lakay nou ak sou pòtay lavil nou yo, ²¹ pou nou ka viv lontan, nou menm ansanm ak tout ras nou yo, nan peyi Seyè a te fè sèman l'ap bay zansèt nou yo toutotan va gen yon syèl anwo tè a. ²² Si nou swiv pwen pa pwen tout kòmandman mwen ban nou lòd pou nou swiv yo, si nou renmen Seyè a, Bondye nou an, si nou mache sou chemen li mete devan nou an, si nou pa janm lage l', ²³ Seyè a va mete tout nasyon sa yo deyò devan nou pou nou ka pran plas yo. N'a pran pou nou peyi yon bann nasyon ki gen plis moun pase nou, ki pi fò pase nou. ²⁴ Tout kote pye nou va pile, se pou nou la ye. N'a gen dezè a pou lizyè sou anba, peyi Liban an sou anwo. N'a gen gwo larivyè Lefrat la yon bò ak lanmè Mediterane a sou bò solèy kouche. ²⁵ Pesonn p'ap ka kanpe devan nou pou rete nou sou kous nou. Kote nou pase, Seyè a, Bondye nou an, pral fè moun peyi a pè nou, yo pral kouri pou nou jan li te pwomèt nou li a. ²⁶ ¶ Jòdi a, mwen mete benediksyon ak madichon devan nou. Se nou ki pou chwazi. ²⁷ Se va benediksyon pou nou si nou swiv tout kòmandman Seyè a, Bondye nou an, kòmandman mwen ban nou jòdi a. ²⁸ Men se va madichon pou nou si nou pa vle mache dapre kòmandman Seyè a, Bondye nou an, si nou kite chemen mwen mande nou pou nou swiv jòdi a pou n' al kouri dèyè lòt bondye nou pa janm konnen. ²⁹ Lè Seyè a, Bondye nou an, va fè nou antre nan peyi nou pral pran pou nou an, n'a mete benediksyon an sou mòn Garizim, n'a mete madichon an sou mòn Ebal. ³⁰ Mòn sa yo lòt bò larivyè Jouden, nan direksyon solèy kouche, nan peyi moun Kanaran yo ki rete nan plenn Araba a, anfas Gilga, toupre pye chenn More a. ³¹ Nou prèt pou nou janbe lòt bò larivyè Jouden an pou n' al pran pou nou peyi Seyè a, Bondye nou an, ap ban nou an. N'a pran peyi a pou nou, n'a rete ladan l'. ³² N'a fè atansyon pou nou kenbe tout lòd ak tout prensip mwen mete devan nou jòdi a.

Chapter 12

¹ ¶ Men lòd ak kòmandman pou nou swiv pandan tout tan nou gen pou nou viv nan peyi Seyè a, Bondye zansèt nou yo, ban nou pou nou rete a. ² Nan peyi nou pral pran pou nou an, se pou nou kraze tout kote moun yo te konn sèvi bondye yo sou gwo mòn wo yo, sou ti bit mòn yo, anba

³
 pyebwa vèt yo. Se pou nou demoli tout lòtèl yo, se pou nou gaye tout pil wòch zidòl yo. Se pou nou rache tout poto Achera yo. Se pou nou boule tout zidòl yo pou moun pa janm chonje yo te konn fè sèvis pou bondye sa yo la ankò.

⁴
 Nou pa fèt pou nou sèvi Seyè a, Bondye nou an, jan moun sa yo te konn sèvi bondye yo.

⁵
 ¶ Se Bondye menm ki pral chwazi yon kote pou l' rete nan mitan pèp la, kote pou yo fè sèvis pou li. Se la n'a vin jwenn Seyè a, Bondye nou an.

⁶
 Se la n'a pote ofrann pou boule nèt nan dife pou Seyè a ak lòt bèt n'ap ofri ba li, ladim nou yo ak kado nou yo, ofrann nou te pwomèt bay Bondye, ofrann nou leve konsa nou vle fè pou Bondye, premye pitit

⁷
 bèf nou yo, premye pitit kabrit nou yo ak premye pitit mouton nou yo. Se la, devan Seyè a, Bondye nou an, n'a fè fèt, n'a manje ansanm ak tout moun nan fanmi nou yo. Se la n'a fè kè nou kontan

⁸
 chak lè Seyè a va beni nou pou li te fè nou fè bèl rekòt. Lè sa a, nou p'ap gen dwa fè sa n'ap fè

⁹
 koulye a kote chak moun ap fè sa yo pi pito, paske nou poko antre nan peyi Seyè a, Bondye sou

¹⁰
 an, ap ban nou pou nou rete ak kè poze. Men, yon fwa n'a janbe lòt bò larivyè Jouden an pou n' al rete nan peyi Seyè a, Bondye nou an, ap ban nou an, l'a pwoteje nou nan mitan tout lènmi k'ap

¹¹
 viv nan peyi ki sou fwontyè nou yo, n'a rete nan peyi a ak kè poze. Wi, Seyè a, Bondye nou an, va chwazi yon sèl kote pou yo fè sèvis pou li. Se la n'a pote tout ofrann mwen mande nou yo ba li: ofrann bèt pou nou boule nèt nan dife pou Seyè a, lòt bèt n'ap ofri ba li, ladim nou yo, lòt ofrann

¹²
 yo ak tout lòt bèl kado nou te pwomèt pou n' te bay Seyè a. Lè sa a, n'a fè fèt devan Seyè a, Bondye nou an, ansanm avèk pitit gason nou yo, pitit fi nou yo, gason ak fanm k'ap travay lakay nou yo ak moun Levi k'ap viv nan mitan nou yo, paske moun Levi yo pa gen ankenn pòsyon tè ki

¹³
 rele yo pa yo menm jan ak nou nan peyi a. Piga nou ofri bèt nou yo pou mwen nenpòt kote nou

¹⁴
 wè yo te mete apa pou lòt bondye yo. Seyè a pral chwazi yon kote nan pòsyon tè yonn nan branch fanmi nou yo. Se la sèlman n'a ka ofri bèt pou nou boule nèt pou Seyè a, se la n'a fè tou sa

¹⁵
 li mande pou nou fè a. Men, nou lib pou nou touye bèt chak fwa nou vle manje vyann nenpòt kote nou ye, dapre kantite Seyè a va ban nou. Tout moun, kit sa ki nan kondisyon, kit sa ki pa nan kondisyon pou fè sèvis pou Bondye, va gen dwa manje vyann sa yo, tankou yo ta manje vyann

¹⁶
 gazèl ak vyann towò bèf. Men, pigas nou janm manje san yo. Se pou nou vide tout san an atè

¹⁷
 tankou dlo. Nan tout lavil kote nou rete, nou p'ap gen dwa manje ladim ble, ladim diven osinon ladim lwil nou gen pou n' ofri bay Seyè a. Piga nou janm manje anyen nan sa n'ap ofri bay Seyè a: ki vle di premye pitit bèf nou yo, premye pitit kabrit osinon mouton nou yo, ou ankò kado nou ta pwomèt Seyè a pou nou ba li, kado nou leve konsa nou vle fè Seyè a, ni ankenn lòt ofrann nou pote

¹⁸
 bay Seyè a. Men, se kote Seyè a, Bondye nou an, te chwazi a, se la sèlman n'a manje ofrann yo devan Seyè a, Bondye nou an, ansanm ak pitit gason nou, pitit fi nou, gason ak fanm k'ap travay

lakay nou ak moun Levi ki rete nan mitan nou yo. Se la n'a pran nan ofrann nou te pote yo, n'a fè fèt devan Seyè a, Bondye nou an. ¹⁹ Toutotan n'ap viv nan peyi a, piga nou janm bliye moun Levi yo. ²⁰ Lè Seyè a, Bondye nou an, va mete sou tè nou deja genyen an jan li te pwomèt nou sa a, depi nou vle manje vyann, nou mèt manje vyann lè nou vle, kantite nou vle. ²¹ Lè kote Seyè a chwazi pou yo fè sèvis pou li a twò lwen pou nou ale, n'a gen dwa touye bèf, kabrit ak mouton Seyè a va ban nou, jan mwen te di nou pou nou fè l' la. N'a gen dwa manje vyann lakay nou lè nou vle, kantite nou vle. ²² Tout moun, kit yo nan kondisyon kit yo pa nan kondisyon pou fè sèvis pou Bondye, tout moun va gen dwa manje nan vyann sa a, tankou yo gen dwa manje vyann gazèl ak vyann towò bèf. ²³ Tansèlman, piga nou janm manje san an, paske san an se nanm bèt la li ye. Piga nou janm manje vyann lan ansanm ak nanm lan ladan l'. ²⁴ Piga nou janm manje san an. N'a vide l' atè tankou dlo. ²⁵ Si nou pa manje san an, tout bagay va mache byen pou nou ak pou tout ras nou apre nou, paske n'a fè sa ki fè Seyè a plezi. ²⁶ Men, n'a pran tout ofrann nou yo ak tout kado nou te pwomèt bay Seyè a, n'a pote yo kote Seyè a te chwazi a. ²⁷ Se la n'a ofri bèt pou boule nèt pou Seyè a sou lòtèl Seyè a. Se la n'a vide san lòt bèt n'ap ofri sou lòtèl Seyè a, epi se la n'a manje vyann lan tou. ²⁸ Se pou nou swiv pwen pa pwen tou sa m'ap mande nou fè a, se pou nou kenbe tout lòd mwen ban nou pou tout bagay toujou mache byen pou nou ak pou tout ras nou apre nou, paske n'ap fè tou sa ki byen, tou sa ki dwat devan Seyè a, Bondye nou an. ²⁹ Lè Seyè a, Bondye nou an, va fin disparèt nasyon yo sou chemen nou pou nou ka anvayi peyi yo a, lè n'a fin pran peyi a nan men yo pou nou ka rete nou menm ladan l', ³⁰ atansyon pou nou pa kite yo pran tèt nou pou nou fè menm jan ak yo. Apre Seyè a va fin kraze nasyon sa yo devan nou, pa konprann pou n' al swiv move egzanp yo. Pa chache konnen ki bondye yo t'ap sèvi, ni ki jan yo t'ap sèvi yo, lèfini pou nou fè tankou yo. ³¹ Se pa konsa pou n' aji ak Seyè a, Bondye nou an. Paske, Seyè a pa ka sipòte tout vye sèvis y'ap fè pou bondye sa yo. Yo menm rive pran pwòp pitit gason ak pitit fi yo pou yo boule nan dife pou bondye yo! ³² Se pou nou toujou fè tou sa mwen mande nou fè la a, san nou pa ni mete ni wete anyen ladan yo.

Chapter 13

¹ ¶ Si ta gen nan mitan nou yon pwofèt osinon yon moun ki konn fè vizyon, epi ki ta fè konnen kèk siy osinon kèk gwo bagay pral rive nan mitan nou, ² si sa li te anonse a rive vre epi li ta vin di

nou: Ann al swiv lòt bondye nou poko konnen menm yo! Ann al fè sèvis pou yo! ³ nou pa fèt pou
 nou koute pawòl pwofèt sa a ap di, ni sa moun ki konn fè vizyon an ap vin rakonte nan zòrèy nou.
 Paske se Seyè a, Bondye nou an, k'ap sonde nou, l'ap chache konnen si vreman vre nou renmen
 Seyè a ak tout kè nou, ak tout nanm nou. ⁴ Se Seyè a, Bondye nou an, pou nou swiv. Se li menm
 pou nou gen krentif. Se lòd li pou nou swiv. Se sa li di nou pou nou koute. Se li menm pou nou
 sèvi. Pa janm vire do ba li. ⁵ Kanta pou pwofèt sa a, osinon moun k'ap fè vizyon an, se pou nou
 touye yo. Paske y'ap ban nou konsèy pou nou kenbe tèt ak Seyè a, Bondye nou an, ki te fè nou soti
 kite peyi Lejip epi ki te wete nou nan esklavaj nou te ye laba a. Se pou nou touye yo, paske y'ap
 chache fè nou kite chemen Seyè a, Bondye nou an, te mete devan nou pou nou te swiv la. Se konsa
 n'a wete bagay mal k'ap fèt nan mitan nou. ⁶ ¶ Si yon frè nou, bò papa osinon bò manman, osinon
 yon pitit gason nou, osinon yonn nan pitit fi nou, osinon madanm k'ap viv nan menm kay avèk nou,
 osinon ankò yonn nan bon bon zanmi nou ta chache pran tèt nou an kachèt pou fè n' al sèvi lòt
 bondye, bondye ni nou menm ni zansèt nou yo pa t' janm konnen, ⁷ yonn nan bondye lòt moun
 k'ap viv ansanm avèk nou sou latè, kit yo toupre nou, kit yo byen lwen nou, ⁸ pa janm tonbe dakò
 avèk li. Pa koute sa l'ap di nou. Se pou nou san pitye pou li. Pa chache pwoteje li, pa chache kouvri
 anyen pou li. ⁹ Okontrè, se pou nou touye l'. Premye moun ki pou leve men sou li pou touye l' ak
 koutwòch se va nou menm. Apre sa, n'a kite lòt moun vin ede nou touye l'. ¹⁰ N'a kalonnen l' wòch
 jouk li mouri, paske li te vle fè nou vire do bay Seyè a, Bondye nou an, li menm ki te fè nou soti
 kite peyi Lejip kote nou te nan esklavaj la. ¹¹ Lè sa a, tout moun pèp Izrayèl yo va konn sa, y'a pè.
 Konsa, yo yonn p'ap janm fè yon bagay mal konsa ankò nan mitan pèp la. ¹² ¶ Si nou vin tande
 y'ap di nan yonn nan lavil Seyè a ban nou pou nou rete yo, ¹³ gen kèk moun, kèk vòryen, moun
 menm ras ak nou ki te pran tèt moun k'ap viv nan lavil sa a pou fè yo al sèvi lòt bondye nou pa
 janm konnen, ¹⁴ se pou nou chache konnen bagay la byen. N'a mennen ti ankèt nou, n'a poze
 keksyon adwat agoch. Si bri y'ap fè kouri a vre, si nou jwenn prèv yon bagay mal konsa te fèt vre,
¹⁵ se pou nou pran nepe nou, se pou nou touye dènye moun ki nan lavil sa a ansanm ak tout bèt yo.
 Se pou nou detwi lavil la nèt nan dife pou Bondye ansanm ak tou sa ki ladan l'. ¹⁶ N'a ranmase tou
 sa moun yo te genyen nan lavil la, n'a anpile yo sou plas piblik la. N'a mete dife nan lavil la ak tou
 sa ki ladan l' pou yo sèvi yon ofrann pou Seyè a, Bondye nou an. Se pou lavil la toujou rete yon pil
 mazi pou li pa janm rebati ankò. ¹⁷ Piga nou kenbe pou nou anyen nan bagay nou fèt pou boule
 pou Seyè a. Se konsa Seyè a va sispann fache sou nou, l'a gen pitye pou nou. Wi, l'a fè pa nou. L'a
 fè nou peple jan li te pwomèt sa bay zansèt nou yo. ¹⁸ Men, se pou nou toujou koute sa Seyè a,

Bondye nou an, ap di nou. Se pou nou toujou kenbe tout lòd m'ap ban nou jòdi a. Se pou nou toujou fè sa ki dwat devan Seyè a, Bondye nou an.

Chapter 14

¹ ¶ Seyè a, Bondye nou an, konsidere nou tankou pwòp pitit li. Lè nou gen moun mouri, piga nou kòche kò nou ak kouto, ni piga nou kale devan tèt nou. ² Paske se yon pèp k'ap viv apa pou Seyè a, Bondye nou an nou ye. Se nou menm Seyè a te chwazi nan mitan tout pèp sou latè pou nou te tounen yon pèp ki rele l' pa li. ³ Piga nou manje anyen Seyè a deklare nou pa gen dwa manje. ⁴ Men bèt nou gen dwa manje: se bèf, se ti mouton, se ti kabrit, ⁵ se sèf, se kabrit mawon, se den, se boukten, se antilòp, se bèf mawon, se mouflon. ⁶ Nou gen dwa manje vyann tout bèt ki gen zago fann an de depi yo remoute manje tou. ⁷ Men, nan bèt ki remoute manje yo, piga nou manje vyann bèt tankou chamo, lapen ak daman ki pa gen zago yo fann an de. Bèt konsa pa bon pou nou manje. ⁸ Konsa tou, piga nou manje vyann kochon, paske atout li gen zago li yo fann an de, li pa remoute manje. Se yon bèt ki pa bon pou nou menm k'ap sèvi Bondye pou nou manje. Piga nou janm manje vyann yo ni piga nou janm manyen kadav yo. ⁹ Nou gen dwa manje tout bèt lanmè depi yo gen zèl najwa pou naje ak kal sou kò yo. ¹⁰ Men, piga nou manje ni sa ki pa gen zèl najwa, ni sa ki pa gen kal sou kò yo. Bèt konsa pa bon pou nou menm k'ap sèvi Bondye pou nou manje. ¹¹ Se pa tout zwazo moun k'ap sèvi Bondye gen dwa manje. ¹² Men zwazo nou pa gen dwa manje: se lèg, lòfre, malfini lanmè, ¹³ milan, otou, votou ak lòt bèt menm fanmi ak yo ki manje kadav, ¹⁴ tout kalite kaou, ¹⁵ otrich, janmichèt, poul dlo, malfini ak lòt bèt menm fanmi ak yo ki manje vyann vivan, ¹⁶ koukou, frize, gwo kanna mawon blan, ¹⁷ grangozye, plonjon, chwèt, ¹⁸ sigòy, krabye ak tout lòt bèt menm fanmi ak yo, sèpantye ak tchotcho. ¹⁹ Tout ti bèt ak zèl pa bon pou nou menm k'ap sèvi Bondye. Piga nou manje yo. ²⁰ Men, nou gen dwa manje zwazo ki bon pou moun k'ap sèvi Bondye. ²¹ Piga nou janm manje ankenn bèt nou jwenn tou mouri, paske nou menm se yon pèp k'ap viv apa pou Seyè a, Bondye nou an, nou ye. Men, nou ka pran vyann lan pou nou bay osinon pou nou vann moun lòt nasyon k'ap viv nan mitan nou ou ankò ki depasaj lakay nou. Piga nou janm kwit yon jenn ti kabrit nan lèt manman l'. ²² ¶ Chak lanne, n'a pran ladim rekòt nou, yon dizyèm

²³
 nan tou sa jaden nou yo donnen, n'a mete l' apa. Apre sa, nou va ale kote Seyè a te chwazi pou fè sèvis pou li a. Epi la, devan Seyè a, n'a manje ladim farin nou, ladim diven nou ak ladim lwil oliv nou ansanm ak premye pitit bèf, premye pitit mouton ak premye pitit kabrit nou yo. Se konsa
²⁴
 n'a aprann pou nou toujou gen krentif pou Seyè a. Men, si kote Seyè a chwazi pou fè sèvis pou li a twò lwen lakay nou, kifè vwayaj la ap twòp pou nou, nou pa ka pote ladim rekòt Bondye ban
²⁵
 nou pou benediksyon an, lè sa a, n'a vann ladim lan, n'a kenbe lajan lavant lan nan men nou epi
²⁶
 n'a ale kote Seyè a te chwazi pou fè sèvis pou li a. Lè n'a rive, n'a achte ak lajan an sa nou pi pito: bèf, mouton, kabrit, diven, likè, wi tou sa nou pi renmen. Epi la, devan Seyè a, Bondye nou
²⁷
 an n'a manje yo, n'a fè fèt ansanm ak tout moun lakay nou. Pa bliye moun Levi k'ap viv nan
²⁸
 lavil nou yo paske yo menm yo pa gen anyen ki rele yo pa yo. Chak twazan, n'a pran ladim tout
²⁹
 rekòt n'a fè nan lanne a, n'a mete yo nan pòtay lavil nou yo. Moun Lèvi yo ki pa gen anyen ki rele yo pa yo va vini, y'a pran sa yo bezwen. Konsa tou, moun lòt nasyon yo, timoun ki pèdi papa yo, fanm vèy yo va vini, y'a pran sa yo bezwen. Se konsa, Seyè a, Bondye nou an, va beni nou nan tou sa n'ap fè.

Chapter 15

¹
 ¶ Chak sètan n'a annile dèt tout moun ki dwe nou, n'a kite lajan an pou yo. ² Men ki jan n'a fè l': Tout moun ki te prete yon moun pèp Izrayèl parèy li lajan va kite lajan an pou li. Depi lè a
³
 rive pou yo annile tout dèt pou Seyè a, li p'ap ka egziye pou lòt la renmèt li lajan an ankò. N'a gen
 dwa egziye pou moun lòt nasyon yo peye nou sa yo dwe nou. Men, nenpòt kisa yon moun pèp
⁴
 Izrayèl parèy nou dwe nou, n'a kite l' pou li. Konsa, p'ap gen moun pòv nan mitan nou, paske
 Seyè a, Bondye nou an, va beni nou nan peyi l'ap ban nou pou byen eritaj nou an, nan peyi nou
⁵
 pral pran pou nou an. Men, se pou nou toujou obeyi Seyè a, se pou nou swiv pwèn pa pwèn tout
⁶
 kòmandman m'ap ban nou jòdi a. Wi, Seyè a, Bondye nou an, va beni nou, jan li te pwomèt nou
 an, konsa n'a gen lajan pou prete anpil lòt nasyon. Men, nou menm nou p'ap janm bezwen prete
⁷
 nan men pesonn. N'a donminen sou anpil lòt pèp. Men, yo yonn p'ap gen pye sou kou nou. Si ta
 gen yon pòv nan mitan moun pèp Izrayèl parèy nou yo k'ap viv nan yonn nan lavil nan peyi Seyè
⁸
 a te ban nou an, pa fèmen kè nou, pa refize lonje men bay frè nou ki nan nesosite. Okontrè, se
⁹
 pou nou lonje men ba li, n'a prete l' lajan pou l' achte tou sa li bezwen. Pa kite ankenn move lide
 pase nan tèt nou pou nou ta di: Nou toupre setyèm lanne a, lanne pou nou annile dèt tout moun ki

dwe nou, epi pou nou fè move jan ak frè parèy nou ki nan nesosite, pou nou derefize prete l' anyen.

Paske lè sa a, l'a rele Seyè a, l'a pale l' pou nou, epi n'a gen tò.¹⁰ Non. Se pou nou prete l' epi lè n'ap prete l', se pou ou fè l' ak tout kè ou. Konsa, poutèt sa, Seyè a, Bondye nou an, va beni nou nan tout travay nou, nan tou sa n'ap fè.¹¹ Va toujou gen kèk moun nan pèp Izrayèl la k'ap nan nesosite. Se poutèt sa mwen mande nou pou nou aprann louvri men nou bay frè parèy nou ki pòv osinon ki nan nesosite nan peyi nou an.¹² ¶ Si yon moun menm ras ak nou, kit se gason, kit se fanm, vin vann tèt li ban nou pou li sèvi nou esklav, li va sèvi nou sizan. Lè setyèm lanne a va rive, se pou nou kite l' al fè wout li.¹³ Lè n'ap ranvwaye l' la, pa kite l' ale san nou pa ba li anyen.

¹⁴ Men, n'a fè l' kado nan bèt nou yo, nan rekòt jaden nou, nan diven nou ak lwil nou, ki vle di n'a separe avè l' byen Seyè a, Bondye nou an, te ban nou pou benediksyon.¹⁵ Pa bliye se esklav nou te ye tou nan peyi Lejip la, epi se Seyè a, Bondye nou an, ki te delivre nou. Se poutèt sa mwen ban nou lòd sa a jòdi a.¹⁶ Men, si yon esklav konsa di nou li p'ap kite nou, paske li renmen nou ansanm ak tout moun lakay nou, paske nou aji byen avè l',¹⁷ lè sa a, n'a pran yon bagay pwenti, n'a fè l' pwoche bò pòt devan lakay nou, n'a pèse zòrèy li. Konsa, l'a rete ap sèvi nou pou tout tan jouk li mouri. N'a fè menm bagay la tou pou fanm ki esklav lakay nou.¹⁸ Piga nou janm wè sa twò rèd pou nou voye yon esklav tounen lakay li, paske li te sèvi nou pandan sizan pou mwatye pri nou ta peye yon moun k'ap travay pou lajan lakay nou. Se konsa, Seyè a, Bondye nou an, va beni nou nan tou sa n'ap fè.¹⁹ ¶ Tout premye pitit mal fenmèl bèf nou osinon fenmèl mouton nou va fè, n'a mete yo apa pou Bondye, Seyè a. Piga nou janm fè premye ti towò fenmèl bèf nou fè a travay pou nou.

Ni nou pa dwe janm taye lenn ki sou premye ti belye mouton fenmèl mouton nou yo fè a.²⁰ Chak lanne, nou menm ak tout fanmi nou, n'a manje yo devan Seyè a, kote Seyè a, Bondye nou an, te chwazi a.²¹ Men, si l'ap bwete, osinon si li pèdi yon je, oswa si li gen nenpòt lòt enfimite ki konsekan, se pa pou nou touye l' pou Seyè a, Bondye nou an.²² N'a manje l' lakay nou, tout moun va manje ladan l', kit yo nan kondisyon pou sèvi Bondye, kit yo pa nan kondisyon pou fè l', menm jan yo konn manje vyann gazèl ak vyann towò bèf.²³ Tansèlman, pigas nou manje san l'. Se pou nou vide tout san an atè tankou dlo.

Chapter 16

¹ ¶ Lè mwa Abib la va rive, se pou nou fete fèt delivrans lan pou Seyè a, Bondye nou an, paske se yon jou lannwit konsa, nan mwa Abib la, Seyè a, Bondye nou an, te fè nou soti kite peyi Lejip

² la. Pou fèt delivrans lan, n'a ofri bèf, kabrit ak mouton pou yo touye pou Seyè a, Bondye nou an,
³ kote li te chwazi pou yo adore l' la. Lè n'ap manje vyann bèt nou touye pou mwen an, nou pa pou
manje pen fèt ak ledven avè l'. Pandan sèt jou, n'a manje pen fèt san ledven, pen malere, paske se
prese prese nou te soti kite peyi Lejip la. Konsa, n'a toujou chonje tout tray nou te pase jou nou t'ap
⁴ soti kite peyi Lejip la. Pandan sèt jou sa yo, pesonn nan peyi nou an pa gen dwa gen ledven lakay
li. Epi nan vyann nou te ofri pou mwen nan aswè premye jou a, pa kite anyen pase nwit pou denmen
⁵ maten. Nou p'ap gen dwa touye bèt nou ofri pou delivrans lan nan ankenn lavil Seyè a va ban
⁶ nou pou nou rete. Se va sèlman kote Seyè a te chwazi pou fè sèvis pou li a n'a touye bèt delivrans
lan nan aswè apre solèy fin kouche, paske se yon lè konsa nou te soti kite peyi Lejip. ⁷ N'a kwit
vyann bèt nou te ofri a epi n'a manje l' kote Seyè a te chwazi a. Apre sa, nan maten, n'a vire do nou,
⁸ n'a tounen lakay nou. Pandan sis jou, n'a manje pen fèt san ledven. Sou setyèm jou a, n'a reyini
⁹ tout moun pou fè gwo sèvis pou Seyè a, Bondye nou an. Jou sa a, nou p'ap fè ankenn travay. N'a
¹⁰ konte sèt senmenn apre premye jou nou konmanse ranmase rekòt grenn nan jaden nou yo. Apre
sa, n'a fete Fèt Senmenn yo pou di Seyè a, Bondye nou an, mèsì. N'a pote ba li ofrann n'a vle dapre
¹¹ sa Seyè a va ban nou nan favè li. N'a fè fèt devan Seyè a, Bondye nou an, kote li te chwazi pou
fè sèvis pou li a, nou menm, pitit gason ak pitit fi nou yo, domestik nou yo, fanm kou gason, ansanm
ak moun Levi yo ak moun lòt nasyon yo, timoun ki san papa ak fanm vèv k'ap viv ansanm ak nou
¹² nan lavil kote nou rete a. N'a toujou chonje nou menm tou yon lè nou te esklav nan peyi Lejip.
¹³ Se poutèt sa n'a toujou obeyi tout lwa sa yo. Lè n'a fin moulen grenn jaden nou yo, lè n'a fin
¹⁴ kraze rezen nou yo, n'a fè fèt Joupa yo pandan sèt jou. N'a pran kont plezi nou, nou menm, pitit
gason ak pitit fi nou yo, ansanm ak moun Levi yo ak moun lòt nasyon yo, timoun ki san papa ak
¹⁵ fanm vèv ki rete nan lavil kote nou ye a. Pandan sèt jou, n'a fè fèt pou Seyè a, Bondye nou an,
kote li menm li te chwazi a, paske Seyè a, Bondye nou an, te beni nou nan tout rekòt nou yo, ak
¹⁶ nan tout travay nou yo pou nou te ka kontan nèt ale. Twa fwa chak lanne, pou fèt Delivrans lan,
pou fèt Premye Rekòt la ak pou fèt Joupa yo, chak gason nan peyi a va vin adore Seyè a, Bondye
¹⁷ nou an, kote Seyè a te chwazi pou fè sèvis pou li a. Yo p'ap gen dwa vini de men vid. Men, yo
¹⁸ chak va bay kichòy, dapre benediksyon Seyè a, Bondye nou an, va ba yo. ¶ N'a mete jij ak
majistra nan chak lavil Seyè a, Bondye nou an, va ban nou pou dirije tout branch fanmi nou yo.
¹⁹ Y'a fè travay yo san patipri. Piga yo fè ankenn lenjistis. Piga yo gade sou figi moun pou jije yo.
Piga yo pran lajan anba nan men pesonn paske lajan konsa ka anpeche menm moun ki gen konprann

20
wè klè, li ka fè nou kondannen moun inonsan. Pa janm kite anyen anpeche nou rann jistis jan nou dwe fè l' la. Konsa, n'a kapab viv, n'a kapab pran peyi Seyè a, Bondye nou an, ap ban nou an
21
pou nou. Piga nou janm plante ankenn poto Achera ni ankenn pyebwa repozwa pou sèvi nou
22
zidòl bò kote lòtèl n'ap bati pou Seyè a, Bondye nou an. Piga nou janm mete wòch kanpe pou fè sèvis zidòl. Seyè a pa vle wè bagay konsa menm.

Chapter 17

1 ¶ Piga nou janm pran yon bèf, osinon yon kabrit oswa yon mouton ki gen yon enfimite, osinon ki donmaje pou nou ofri bay Seyè a, Bondye nou an, paske Seyè a, Bondye nou an, pa vle wè bagay
2
konsa menm. Si ta gen nan mitan nou, nan yonn nan lavil Seyè a, Bondye nou an, te ban nou yo, yon nonm osinon yon fanm ki ta fè yon bagay ki pa fè Seyè a, Bondye nou an, plezi, si li ta rive
3
pa kenbe kontra li pase ak Bondye a, pou l' al fè bagay Seyè a pa janm mande nou fè, pou l' al
4
sèvi lòt bondye, tankou solèy, lalin osinon kèk lòt zetwal nan bann zetwal ki nan syèl la, epi sa rive tonbe nan zòrèy nou, lè n'a vin konn sa, n'a chache konnen byen sa ki te pase. Si sa te fèt vre,
5
si yo ka rive ban nou prèv se yon moun nan pèp Izrayèl la menm ki te fè move bagay sa a, lè sa a, n'a fè yo pran moun ki te fè move bagay sa a, fanm ou gason, y'a mennen l' lòt bò pòtay lavil la,
6
y'a kalonnen l' wòch jouk li mouri. Anvan nou kondannen yon moun amò, fòk gen de osinon twa moun ki pou kanpe pou fè depozisyon kont li. Si se yon sèl moun ki fè depozisyon kont li, yo pa
7
ka kondannen moun lan amò. Lèfini, se temwen sa yo menm ki va bay moun yo kondannen an premye kout wòch yo. Apre sa, rès pèp la va kalonnen l' wòch jouk li mouri. Se konsa n'a wete
8
bagay mal sa a ki t'ap fèt nan mitan pèp la. ¶ Si yo ta mennen ban nou yon ka ki twò difisil pou nou jije, tankou ka yon moun ki touye yon lòt, osinon ka moun k'ap diskite pou defann dwa yo ak enterè yo, ou ankò lè yon moun resevwa yon move kou nan kò l', ou nenpòt lòt ka ki ta prezante devan nou nan lavil kote nou rete a epi ki twò difisil pou nou jije l' nou menm, n'a leve, n'a moute
9
kote Seyè a, Bondye nou an, te chwazi pou yo fè sèvis pou li a, n'aval jwenn prèt yo, moun Lèvi yo, ak jij ki de sèvis lè sa a, n'a espoze ka a ba yo. Yo menm y'a di nou ki jan pou nou rann jijman
10
an. Lè sa a, nou menm poutèt pa nou, n'a fè tou sa moun ki rete kote Bondye te mete apa pou fè sèvis pou li a te di nou. N'a pran tout kalite prekosyon pou nou fè tou sa yo te moutre nou an.
11
Se pou nou rann jijman an dapre regleman yo te moutre nou an, dapre jan yo menm yo te jije
12
bagay la, san nou pa chanje anyen nan sa yo te di nou an. Men, si yon moun ap fè grandizè, epi

li pa koute ni prèt ki la pou sèvis Bondye a, ni jij la, se pou yo touye l'. Se konsa n'a wete bagay mal sa a ki t'ap fèt nan mitan pèp la. ¹³ Konsa tou, lè tout pèp la va konn sa, y'a pè, yo p'ap pran pòz grandizè yo ankò. ¹⁴ ¶ Lè n'a fin antre nan peyi Seyè a, Bondye nou an, va ban nou an, lè n'a fin pran tout peyi a pou nou rete ladann l', si lide ta vin nan tèt nou pou nou di: Nou ta renmen gen yon wa pou gouvènè nou tankou tout lòt nasyon k'ap viv nan peyi ki sou fwontyè nou yo, ¹⁵ se yon moun menm ras ak nou Seyè a, Bondye nou an, va chwazi pou li mete wa sou nou. Nou pa gen dwa pran yon moun lòt nasyon ki pa menm ras avèk nou pou nou mete l' wa sou nou. ¹⁶ Men, wa sa a pa bezwen gen kantite chwal pou lame li, ni li pa bezwen voye moun nan peyi Lejip al achte chwal pou kavalye l' yo, paske Seyè a te di nou: Piga nou janm pran chemen tounen nan peyi sa a ankò. ¹⁷ Wa a pa fèt pou l' gen anpil madanm, paske sa ka fè l' pèdi tèt li. Li pa fèt pou l' gen twòp ajan ak twòp lò pou tèt pa l'. ¹⁸ Lè wa a va pran pouvwa a, l'a mande pou yo kopye tout lalwa Bondye a nan yon liv pou sèvis pa li, dapre orijinal ki nan men prèt fanmi Levi yo. ¹⁹ Se pou li toujou gen liv la avèk li, se pou li li l' chak jou jouk li mouri, pou l' ka aprann gen krentif pou Seyè a, Bondye li a, pou l' ka swiv tout prensip ki nan lalwa a, pou l' ka fè tou sa yo mande l' fè ladan l'. ²⁰ Konsa, li p'ap ka mete nan tèt li li plis pase rès pèp la, li p'ap janm dezobeyi ankenn lòd nan sa Seyè a te bay la. Se konsa, ni li ni pitit li yo y'a rete chèf lontan nan mitan pèp Izrayèl la.

Chapter 18

¹ ¶ Prèt yo, fanmi Levi yo, ki vle di tout gason ki nan branch fanmi Levi a, p'ap gen anyen ki rele yo pa yo nan byen eritaj moun pèp Izrayèl yo. Y'a viv ak manje pèp la va ofri bay Seyè a ak tou sa pèp la va mete apa pou Seyè a. ² Moun fanmi Levi yo p'ap gen anyen nan byen ki pou tout moun pèp Izrayèl yo. Se Seyè a ki pòsyon pa yo jan li te di yo sa. ³ Lè yon moun nan pèp la vin ofri yon bèf osinon yon kabrit, oswa yon mouton pou yo touye pou Seyè a, men pòsyon ki va rete pou prèt fanmi Levi a. Men pòsyon y'a ba li: jigo a, machwè yo ak gradoub la. ⁴ N'a ba li tou premye grenn n'a rekòlte nan jaden ble nou yo, premye diven ak premye lwil n'a fè, ansanm ak premye lenn mouton n'a wete sou mouton nou yo. ⁵ Paske se yo menm ak pitit gason yo Seyè a te chwazi nan mitan tout moun pèp Izrayèl yo pou sèvi l' prèt pou tout tan. ⁶ Lè yon moun fanmi Levi ki rete nan yonn nan lavil nou yo, nenpòt kote nan peyi Izrayèl la, santi li ta renmen ale kote Seyè a te chwazi pou yo fè sèvis pou li a, ⁷ lè li rive, si li fè travay yon prèt nan non Seyè a, Bondye li a, tankou tout

lèt frè moun fanmi Levi parèy li yo ki te toujou la ap sèvi devan Seyè a, ⁸ l'a resevwa menm kantite manje ak lèt yo, san yo pa bezwen konsidere sa li resevwa deja nan byen papa l'. ⁹ ¶ Lè n'a fin antre nan peyi Seyè a, Bondye nou an, va ban nou an, pa lage kò nou nan fè menm vye bagay moun lèt nasyon yo ap fè. ¹⁰ Piga pesonn nan nou pran pitit gason osinon pitit fi li pou li boule nan dife pou zidòl. Piga gen pesonn nan mitan nou k'ap fè divinò, k'ap etidye zetwal nan syèl la pou konnen sa ki gen pou rive, k'ap pran pwen, k'ap fè maji. ¹¹ Piga gen nan mitan nou moun k'ap sèvi ak cham, moun ki pral nan tab tounant, k'ap vizite moun ki konn tire kat, ak moun k'ap rele mò pou pale ak yo. ¹² Paske Seyè a pa vle wè moun k'ap fè bagay sa yo. Epitou, se paske moun lèt nasyon yo t'ap fè tout vye bagay sa yo kifè Seyè a, Bondye nou an, te mete yo deyò pou nou ka pran plas yo. ¹³ Piga nou janm fè sa Seyè a, Bondye nou an, pa vle nou fè. ¹⁴ Bann nasyon nou pral mete deyò nan peyi a, se moun ki te renmen koute sa divinò ak moun k'ap etidye zetwal yo ap di yo. Men nou menm, Seyè a, Bondye nou an, pa penmèt nou fè bagay konsa. ¹⁵ ¶ Moyiz di pèp la konsa: -Seyè a, Bondye nou an, gen pou l' voye yon pwofèt ban nou tankou l' te voye m' lan. Se va yonn nan nou, yon moun pèp Izrayèl parèy nou. Se pou nou koute tou sa l'a di nou. ¹⁶ Se sa menm nou te mande Seyè a, Bondye nou an, lè nou tout te reyini sou mòn Orèb la. Nou t'ap di nou pa vle tandè vwa Seyè a, Bondye nou an, ni nou pa ta renmen wè gwo flanm dife sa a ankò pou nou pa mouri. ¹⁷ Lè sa a, Seyè a di mwen konsa: Sa yo di a, se vre wi. ¹⁸ M'a chwazi yonn nan yo pou pwofèt, m'a voye l' ba yo tankou mwen te voye ou la. M'a mete pawòl mwen nan bouch li. Epi l'a di pèp la tou sa m'a ba li lòd di yo. ¹⁹ Si yon moun pa koute sa pwofèt la ap di yo nan non mwen, se avè m' menm l'ap an afè. Se mwen menm menm la gen pou l' rann kont. ²⁰ Konsa tou, si yon pwofèt ta penmèt li louvri bouch li pou l' pale nan non mwen pou l' di sa mwen pa di l' di, oswa pou l' ta pale nan non lèt bondye, se pou yo touye l' pou sa l' fè a. ²¹ Koulye a nou dwe ap di nan kè nou: Ki jan pou nou fè konnen si sa pwofèt la ap di a se pa pawòl ki soti nan Bondye? ²² Enben, si pwofèt la di l'ap pale nan non Seyè a, epi sa li di a pa rive vre, lè sa a, n'a konnen Seyè a pa t' janm di l' di pawòl konsa. Se lògèy ki te pouse pwofèt la di sa l' di a. Nou pa bezwen pè l'.

Chapter 19

¹ ¶ Moyiz di yo ankò: -Lè Seyè a, Bondye nou an, va fin detwi nasyon sa yo pou l' ban nou peyi ki te pou yo a, lè n'a fin pran tout peyi a nan men yo pou nou rete nan lavil yo ak nan lakay yo, ² n'a chwazi twa lavil nan peyi Seyè a, Bondye nou an, te ban nou pou nou rete a, n'a mete yo apa.

3

N'a kenbe wout ki mennen nan lavil sa yo an bon eta. N'a divize teritwa Seyè a, Bondye nou an, te ban nou pou nou rete a an twa zòn ak yon lavil nan chak zòn. Konsa, nenpòt moun ki ta rive

4

touye yon lòt ka kouri al cache nan yonn nan lavil sa yo pou sove lavi l'. Men nan ki sikonstans yon moun ka kouri al cache nan yonn nan lavil sa yo pou sove lavi l': Se lè yon moun touye yon

5

frè parèy li san li pa fè espere, san li pa janm gen anyen avè l'. Konsa, si de moun al nan bwa ansanm pou koupe bwa epi yonn ladan yo fè sa li leve rach li pou l' koupe yon bwa epi rach la chape soti nan manch lan, l' al frape zanmi l' lan, li touye l' frèt, yon nonm konsa gen dwa kouri al

6

cache nan yonn nan lavil sa yo pou l' ka sove lavi l'. Si te gen yon sèl lavil konsa, distans la ta ka twò long. Lè sa a, moun ki reskonsab pou tire revanj moun yo touye a, si l'ap kouri dèyè moun ki te fè krim lan, li ta ka rapouswiv li. Nan kè cho li, li ta ka ba l' yon kou, li touye l'. Lè sa a, li ta touye yon inonsan, paske nonm lan pa t' fè espere, li pa t' janm gen anyen nan kè l' kont moun li

7

touye a. Se poutèt sa mwen mande nou pou nou mete twa lavil konsa apa espere pou sa. Konsa tou, lè Seyè a, Bondye nou an, va fè peyi nou an vin pi gran jan li te pwomèt zansèt nou yo, lè l'a

8

9

ban nou tout peyi li te pwomèt l'ap bay zansèt nou yo, n'a chwazi twa lòt lavil, n'a mete sou sa nou genyen deja yo. Men, pa bliye, l'ap ban nou peyi a, se pou nou toujou swiv tout lòd m'ap ban nou jòdi a, se pou nou toujou renmen Seyè a Bondye nou an, pou nou swiv chemen li mete devan

10

nou an. Se konsa, nou p'ap kite yo touye moun ki inonsan nan peyi Seyè a, Bondye nou an, te

11

ban nou pou rele nou pa nou. Si nou kite sa rive, n'a peye pou sa nou fè a. Men, si yon moun rayi yon lòt, epi li pran veye l' jouk li tonbe sou li, li ba l' kou jouk li touye l', epi apre sa, li kouri

12

al cache nan yonn nan lavil sa yo, lè sa a, chèf fanmi ki reskonsab lavil kote li rete a va voye

13

chache l' epi y'a lage l' nan men fanmi pre moun ki mouri a pou yo touye l'. N'a san pitye pou li, n'a wete moun k'ap mache touye inonsan nan peyi Izrayèl la. Se konsa tout bagay va mache byen

14

pou nou. ¶ Nan peyi Seyè a, Bondye nou an, pral ban nou pou nou rete a, pa janm deplase bòn

15

tè moun pèp Izrayèl parèy nou. Kite yo kote zansèt nou yo te plante yo a. Depozisyon yon sèl temwen pa kont pou moutre si yon moun fè yon krim, osinon yon bagay mal tout bon nan nenpòt akizasyon yo ta ka fè sou do li. Fòk gen de osinon twa temwen ki pou fè depozisyon kont li pou

16

akizasyon an ka kenbe. Lè yon fo temwen kanpe pou l' akize yon moun pou yon krim li pa fè,

17

de moun ki nan pwose yo va prezante ansanm devan lòtèl Seyè a, devan prèt yo ak jij yo ki

18

desèvis lè sa a. Jij yo va egzaminen ka a. Y'a mennen yon bon ankèt jan yo dwe fè l' la. Si yo jwenn se manti temwen an ap bay, se akize l'ap akize yon moun pèp Izrayèl parèy li pou yon bagay

19

li pa janm fè, n'a fè l' sibi chatiman li te vle pou moun li akize a. Se konsa n'a wete mechanste

sa a ki te nan mitan nou. ²⁰ Lè lòt moun yo va konn sa, y'a pè, yo p'ap rekonmanse fè move bagay
 konsa ankò nan mitan nou. ²¹ Se pou nou san pitye pou moun konsa. Se pou nou fè yo peye lavi
 pou lavi, yon je pou yon je, yon dan pou yon dan, yon men pou yon men, yon pye pou yon pye.

Chapter 20

¹ ¶ Lè nou soti pou n' al goumen kont lènmi nou yo, epi nou wè yo gen plis chwal, plis cha lagè
 ak plis moun pase nou, nou pa bezwen pè, paske Seyè a, Bondye nou an, li menm ki te fè nou moute
 soti nan peyi Lejip la, l'ap kanpe la avèk nou. ² Lè lè batay la rive, prèt la va vanse, l'a pale ak sòlda
 yo. ³ L'a di yo: -Koute byen, moun Izrayèl yo: Jòdi a nou pral goumen kont lènmi nou yo. Kè nou
 pa bezwen sote. Nou pa bezwen pè, nou pa bezwen tranble, ni nou pa bezwen kouri pou yo. ⁴ Seyè
 a, Bondye nou an, ap mache avèk nou. L'a goumen pou nou kont lènmi nou yo pou l' fè nou genyen
 batay la. ⁵ Apre sa, chèf yo va pale ak sòlda yo. Y'a di yo: -Eske gen yon moun la a ki fèk fin bati
 yon kay, men ki poko fè sèvis pou mete kay la apa pou Bondye? Si gen yon moun konsa, pito l' al
 fè wout li lakay li, paske li ka mouri nan goumen an, epi se yon lòt moun ki va fè sèvis pou mete
 kay la apa pou Bondye. ⁶ Eske gen yon moun la a ki fèk plante yon jaden rezen epi ki poko gen
 chans fè yon rekòt rezen menm? Si gen yon moun konsa, pito l' al fè wout li lakay li, paske li ka
 mouri nan batay la, epi se va yon lòt moun ki va jwi jaden rezen l' lan. ⁷ Eske gen yon moun isit
 la ki fiyanse pou l' marye? Si gen yon moun konsa, pito l' al fè wout li lakay li, paske li ka mouri
 nan lagè a epi se yon lòt moun ki va marye ak fiyanse l' la. ⁸ Apre sa, chèf yo va di sòlda yo ankò:
 -Eske gen yon moun la a ki pè, ki santi li pa gen kouraj pou l' al goumen? Si gen yon moun konsa,
 pito l' al fè wout li lakay li, paske li ka kraze kouraj lòt yo tou. ⁹ Lè chèf yo va fin pale konsa ak
 sòlda yo, y'a chwazi yon kaptenn pou chak divizyon pou mache alatèt lame a. ¹⁰ ¶ Lè n'ap pwoche
 bò yon lavil pou n' atake l', premye bagay n'a fè, n'a mande l' pou l' fè lapè ak nou. ¹¹ Si yo dakò,
 si yo louvri pòtay lavil la ban nou, tout moun nan lavil la va travay fè kòve pou nou, y'a tounen
 esklav nou. ¹² Men, si yo refize fè lapè ak nou epi yo mande goumen, n'a sènen lavil la toupatou
 epi n'a atake l'. ¹³ Seyè a, Bondye nou an, va lage l' nan men nou. Epi n'a touye dènye gason ki
 nan lavil la. ¹⁴ Men, n'a pran tout fanm yo, tout pitit yo, tout bèt yo ak tou sa ki nan lavil la, ak tout
 byen lènmi yo va kite pou nou. N'a manje tou sa n'a pran nan men lènmi nou yo paske se Seyè a

menm ki ban nou yo. ¹⁵ Se konsa n'a fè sa pou tout lavil ki byen lwen nou, andeyò limit peyi Seyè a ban nou pou nou rete a. ¹⁶ Men, lè nou pran yon lavil ki nan limit peyi Seyè a ap ban nou pou nou rete a, se pou nou touye tou sa ki vivan ladan l'. ¹⁷ Se pou nou touye tout moun sa yo: moun Et yo, moun Amori yo, moun Kanaran yo, moun Ferèz yo, moun Ivi yo, moun Jebis yo. Se pou nou ofri yo bay Seyè a, Bondye nou an, jan li te ban nou lòd la. ¹⁸ Se pou nou disparèt yo pou yo pa fè nou tonbe nan peche kont Seyè a, Bondye nou an, pou yo pa moutre nou fè tout vye bagay lèd y'ap fè pou bondye pa yo. ¹⁹ Si lè n'ap atake yon lavil nou wè nou blije sènen l' pandan lontan anvan pou nou ka pran l', piga nou koupe ankenn pyebwa ki bay fwi, paske nou ka bezwen fwi yo pou nou manje. Pa koupe pyebwa yo. Se pyebwa ase yo ye, se pa moun yo ye. Ou pa ka aji avèk yo tankou moun ki nan lavil ou sènen an. ²⁰ Men, nou gen dwa debranche pyebwa ki pa bay fwi, nou ka koupe yo, nou ka sèvi ak yo pou fè zouti pou atake lavil la jouk lavil la va tonbe nan men nou.

Chapter 21

¹ ¶ Si nan peyi Seyè a, Bondye nou an, te ban nou pou n' rete a, nou rive jwenn kadav yon moun yo sasinen nan yon jaden, san nou pa konnen ki moun ki fè sa, ² chèf fanmi yo ak jij yo va soti, y'a mezire distans ki genyen ant kote yo jwenn kadav la ak lavil ki toupre yo. ³ Y'a wè lavil ki pi pre a. Le sa a, chèf fanmi ki reskonsab lavil ki pi pre kote yo te jwenn kadav la va pran yon jenn ti gazèl bèf ki poko janm sèvi pou fè ankenn travay. ⁴ Y'a mennen l' bò yon larivyè ki pa janm chèch, nan yon pozisyon kote tè a pa janm travay ni sekle. Epi se la y'a kase kou l'. ⁵ Apre sa, prèt yo, pitit Levi yo, va vini, paske se yo menm Seyè a, Bondye nou an, te chwazi pou fè sèvis pou li ak pou beni pèp la nan non li. Se yo menm ki pou bay dènye mo a lè gen diskisyon, lè gen san deyò. ⁶ Apre sa, chèf fanmi ki reskonsab lavil ki pi pre kote yo te jwenn kadav la va lave men yo ak dlo anwo gazèl yo te touye a. ⁷ Y'a di: Se pa nou ki touye moun sa a, ni nou pa wè ki moun ki fè krim sa a. ⁸ Seyè! Ou menm ki te delivre moun Izrayèl yo anba moun peyi Lejip yo, padonnen pèp ou a. Pa rann nou reskonsab lanmò yon inonsan yo touye. Bondye va padonnen krim ki fèt la. ⁹ Se konsa, n'a fè sa Seyè a te ban nou lòd fè a, yo p'ap rann nou reskonsab lanmò inonsan yo touye a. ¹⁰ ¶ Lè n'ap fè lagè ak lènmi nou yo epi Seyè a, Bondye nou an, fè nou genyen yo, li fè nou fè anpil prizonye,

11 si yonn nan nou wè pami prizonye yo yon bèl fanm, epi li tonbe damou pou li, l'a gen dwa pran
 l' pou madanm li. ¹² L'a mennen l' lakay li. Fanm lan va koupe tout cheve nan tèt li, l'a koupe tout
 zong dwèt ak tout zong pye l' yo, ¹³ l'a wete rad ki te sou li lè yo te fè l' prizonye a. L'a rete anndan
 kay nonm lan pandan yon mwa ap kriye pou papa l' ak manman l'. Apre sa, nonm lan va pwoche
 bò kote l', l'a marye avè l', l'a pran l' pou madanm li. ¹⁴ Si apre sa, rive yon lè nonm lan pa renmen
 l' ankò, l'a kite l' al fè wout li. Li p'ap ka vann li pou lajan, ni li pa ka aji avè l' tankou yon esklav,
 paske se fòse li te fòse l' vin madanm li. ¹⁵ ¶ Sipoze yon nonm ki gen de madanm, gen yonn li
 renmen plis pase lòt epi tou de madanm yo fè pitit gason pou li. Men, premye pitit gason l' lan
 twouve se pitit fanm li renmen mwens lan li ye. ¹⁶ Lè lè a va rive pou l' separe byen l' yo bay pitit
 li yo, li p'ap ka fè patipri pou l' pran pitit gason fanm li pi renmen an pou l' ba li pòsyon ki pou ale
 pou premye pitit gason an, pòsyon ki pou pitit gason fanm li renmen mwens lan. ¹⁷ Wè pa wè, se
 pou l' respekte dwa premye pitit gason l' lan, dwa pitit gason fanm li renmen mwens lan. L'a ba li
 de fwa lavalè sa li gen pou l' bay chak lòt pitit li yo, paske se li menm ki premye pitit gason li te fè
 lè li te jenn gason. Se li ki gen tout dwa yon premye pitit gason genyen. ¹⁸ ¶ Si yonn nan nou gen
 yon pitit gason ki radi, ki gen tèt di, ki pa vle koute ni manman l' ni papa l' lè y'ap pale ak li, yo te
 mèt bat li, sa antre nan yon zòrèy soti nan lòt la, ¹⁹ manman l' ak papa l' va kenbe l', y'a trennen l'
 devan chèf fanmi yo, nan tribinal ki bò pòtay lavil kote yo rete a. ²⁰ Epi y'a di yo: Men pitit gason
 nou an. Nou mennen l' ban nou paske li radi, l'ap fè wondonmon, li pa vle koute lè n'ap pale avè l'.
 L'ap gaspiye tout lajan nou nan bweson, li nan tout kalite vis. ²¹ Lè sa a, tout gason ki rete nan
 lavil la va kalonnen l' wòch jouk yo touye l'. Se konsa n'a wete bagay mal sa a ki t'ap fèt nan mitan
 nou an. Tout moun nan pèp Izrayèl la va konn sa, y'a mache sou piga yo. ²² Si yo kondannen yon
 moun pou yon krim li fè, epi lè yo fin touye l', yo pann kadav la nan yon pyebwa, ²³ pa janm kite
 kadav la pase nwit sou pyebwa a. Se pou nou antere l' menm jou a, paske yon kadav pann nan yon
 pyebwa se bagay ki pa fè Bondye plezi. Se konsa nou p'ap kite yo fè ankenn vye bagay ki pou fè
 Seyè a, Bondye nou an, vire do ban nou nan peyi Seyè a pral ban nou pou nou rete a.

Chapter 22

¹ ¶ Lè nou jwenn bèf osinon kabrit yon moun pèp Izrayèl parèy nou ki kase kòd, pa fè tankou
 nou pa wè. Se pou nou pran l' mennen l' tounen ba li. ² Men, si mèt bèt la rete twò lwen, osinon si
 nou pa konnen pou ki moun li ye, n'a pran l', n'a mennen l' lakay nou. N'a kenbe l' lakay nou jouk

mèt li va vin chache l'. Lè sa a n'a renmèt li li. ³ N'a fè menm jan an tou pou bourik, rad osinon nenpòt bagay yon moun pèp Izrayèl parèy nou ta rive pèdi epi se nou ki ta jwenn li. Pa fè tankou nou pa wè sa. ⁴ Lè nou wè bourik osinon bèf yon moun pèp Izrayèl parèy nou kouche nan chemen, pa fè tankou nou pa wè sa. Se pou nou ride l' fè l' kanpe ankò. ⁵ ¶ Fanm pa gen dwa mete rad gason sou yo. Gason pa gen dwa mete rad fanm sou yo. Seyè a, Bondye nou an, pa vle wè moun k'ap fè bagay konsa. ⁶ Si sou chemen nou, nou jwenn yon nich zwazo, swa sou yon pyebwa, swa atè avèk manman zwazo a kouche sou pitit li yo, osinon sou ze l'ap kouve, piga nou pran manman zwazo a sou nich la. ⁷ N'a kite manman zwazo a vole ale, n'a pran ti zwazo yo sèlman. Se konsa Bondye va fè tout zafè nou mache byen, l'a fè nou viv lontan. ⁸ Lè n'ap bati yon kay nèf, n'a mete balistrad pou moun pa sot tonbe sou teras twati a. Konsa yo p'ap ka rann nou reskonsab si yon moun ta rive tonbe epi li mouri lakay nou. ⁹ Pa janm plante ankenn lòt kalite grenn nan jaden rezen nou. Si nou fè sa, nou p'ap ka sèvi ni avèk rezen yo ni avèk rekòt lòt grenn nou te plante yo. ¹⁰ Piga nou mete bèf ak bourik ansanm pou rale chari. ¹¹ Piga nou janm mete sou nou rad ki fèt ak divès kalite lenn ak twal fin blan tise ansanm. ¹² N'a mete yon ponpon nan kat kwen rad nou mete sou nou. ¹³ ¶ Sipoze yon nonm pran yon fanm pou madanm li, li kouche avè l', epi apre sa, li vin pa renmen l' ankò. ¹⁴ Lè sa a, li ba l' tout kalite defo ki genyen, li avili l' devan tout moun, li di: Fanm sa a pa di m' anyen ankò, paske lè m' marye avè l', lè nou vin ansanm, mwen te jwenn li pa t' tifi. ¹⁵ Enben, lè sa a, papa ak manman jenn madanm lan va pran dra maryaj la ki gen prèv madanm lan te tifi, y'a pote l' nan tribinal bò pòtay lavil la, y'a moutre chèf fanmi lavil yo li. ¹⁶ Epi, papa jenn ti madanm lan va di chèf fanmi yo: mwen te bay nonm sa a pitit fi mwen pou madanm. Koulye a, li pa renmen l' ankò, ¹⁷ li pretann di madanm lan plen defo, l'ap di: O wi, mwen pa jwenn madanm lan tifi, men mwen pote ban nou prèv li te tifi. Epi l'a louvri dra a devan tout chèf fanmi lavil la. ¹⁸ Lè sa a chèf fanmi lavil yo va pran mari a, y'a bat li byen bat. ¹⁹ Y'a fè l' peye yon amann, y'a fè l' bay san pyès ajan, y'a renmèt bay papa jenn fanm lan, paske li te pale yon jenn tifi moun Izrayèl yo mal. Lèfini l'a blije rete ak fanm lan, li p'ap janm ka divòse avè l', jouk li menm li mouri. ²⁰ Men, si sa mari a te di a se te vre, kifè yo pa t' kapab bay prèv madanm lan te tifi, ²¹ y'a pran ti madanm lan, y'a mennen l' deyò devan lakay papa l', epi tout gason ki rete nan lavil la va kalonnen l' wòch jouk li mouri, paske li te fè yon wont nan peyi Izrayèl la, li te lage kò l' nan dezòd antan li te lakay papa l'. Se konsa n'a wete bagay mal k'ap fèt nan mitan nou. ²² Si nou bare yon nonm ap kouche ak yon madan marye, yo tou de fèt pou mouri, ni nèg ki te kouche ak fanm lan ni fanm lan tou. Se konsa

n'a wete bagay mal k'ap fèt nan mitan nou. ²³ Si yon jenn fi tifi fiyanse ak yon nonm epi yon lòt nèg kontre avè l' nan yon lavil, li kouche avè l' epi moun bare yo, n'a kalonnen yo wòch jouk yo mouri. Jenn fi a va mouri paske se nan mitan yon lavil li ye, li ta ka rele mande sekou. ²⁴ Nèg la va mouri tou paske li te avili yon fi ki te fiyanse ak yon moun pèp Izrayèl parèy li. Wi, se konsa n'a wete bagay mal k'ap fèt nan mitan nou. ²⁵ Men, si se andeyò lwen kay moun nèg la te kontre ak jenn fi fiyanse a, epi li kenbe l', li kouche avè l', se nèg la sèlman ki pou mouri. ²⁶ Yo pa gen dwa fè jenn fi a anyen, paske li pa fè anyen la a pou li ta merite lanmò. Se menm jan si se te yon nonm ki atake yon lòt epi li touye l'. ²⁷ Nèg la te kontre avè l' andeyò lwen kay. Jenn fi a te ka rele, men pa t' gen pesonn pou pote l' sekou. ²⁸ Si yon nonm kontre ak yon jenn fi ki tifi lakay papa l', ki poko fiyanse, epi li kenbe l', li fòse l' kouche avè l', si yo bare yo, ²⁹ nèg ki te kouche avèk fi a va gen pou l' bay papa fi a senkant pyès ajan. Li va pran fi a pou madanm li, paske li te fòse l' kouche avè l'. Li p'ap janm ka divòse avè l' jouk li mouri. ³⁰ Yon nonm pa gen dwa kouche ak madanm papa l'. Li pa gen dwa avili papa l' konsa.

Chapter 23

¹ ¶ Lè yon nonm gen grenn li yo kraze, osinon pati li koupe, li pa gen dwa parèt tèt li ankò nan reyinyon pèp la ap fè pou fè sèvis pou Seyè a. ² Konsa tou, yon nonm ki gen san mele pa gen dwa parèt tèt li nan reyinyon pèp la ap fè pou fè sèvis pou Seyè a, ni pitit li yo, ni pitit pitit li yo, te mèt sou dis jenerasyon. ³ Moun Amon yo ak moun Moab yo p'ap janm gen dwa parèt tèt yo nan reyinyon n'ap fè pou fè sèvis pou Bondye, ni pitit yo, ni pitit pitit yo, te mèt sou dis jenerasyon. ⁴ Paske le nou te sou wout nou, apre nou te fin kite peyi Lejip la, yo pa t' ofri nou manje ak dlo. Okontrè, yo te peye Balaram, pitit gason Bejò a, pou l' te soti lavil Petò nan Mezopotami, vin ban nou madichon. ⁵ Men, Seyè a, Bondye nou an, te refize koute Balaram, epi li fè madichon an tounen benediksyon pou nou, paske Seyè a, Bondye nou an, renmen nou. ⁶ Konsa, toutotan n'ap viv sou latè, piga nou janm fè anyen ni pou ede yo ni pou fè yo plezi. ⁷ Pa meprize moun Edon yo. Se moun menm ras avè nou yo ye. Pa meprize moun peyi Lejip yo non plis, paske yon lè se nan peyi yo nou te rete. ⁸ Lè moun sa yo vin rete nan peyi nou an, sou twa jenerasyon, pitit yo va gen dwa vin nan reyinyon n'ap fè pou fè sèvis pou Bondye. ⁹ ¶ Lè n'ap fè lagè ak lènmi nou yo, antan n'ap viv nan kan, se

¹⁰
 pou nou egzante tou sa ki ka mete nou nan kondisyon pou nou pa ka fè sèvis Bondye. Si yon
 moun ta nan kondisyon pou li pa ka sèvi Bondye paske li te voye sou li lannwit, l'a soti kite kan
¹¹
 an, l'a rete deyò pou tout jounen an. Nan aswè, l'a lave kò l'. Apre solèy kouche, l'a ka antre nan
¹² ¹³
 kan an ankò. N'a chwazi yon kote andeyò limit kan an kote n'a ka ale fè bezwen nou. N'a
¹⁴
 pran yon pikwa nan zouti nou yo, n'a fouye yon twou, n'a degaje nou, epi n'a kouvri l' ak tè. Seyè
 a, Bondye nou an, ap pwonmennen nan tout kan an pou l' pwoteje nou, pou l' lage lènmi nou yo
 nan men nou. Se poutèt sa, se pou nou toujou kenbe kan an pwòp nèt pou Seyè a pa wè anyen ladan
¹⁵
 l' ki pou ba l' kè tounen epi ki pou ta fè l' vire do ban nou. ¶ Si yon esklav sove lakay mèl li vin
¹⁶
 mande nou pwoteksyon, nou pa gen dwa renmèt li bay mèl li. N'a kite l' viv avèk nou nan mitan
¹⁷
 pèp la, nan nenpòt ki lavil l'a chwazi, kote l'a pi pito. Pa janm pwofite sou li. Piga ankenn gason
 ni ankenn fanm nan pèp Izrayèl la al pote tèt yo fè jennès nan sèvis pou zidòl moun lòt nasyon yo.
¹⁸
 Pa janm kite yon fanm osinon yon gason vin nan tanp Bondye a pou fè ankenn ofrann ak lajan
¹⁹
 yo fè nan kondisyon sa a, paske Seyè a pa vle wè moun k'ap fè bagay konsa. Piga nou janm fè
 yon moun pèp Izrayèl parèy nou peye enterè lè nou prete l' lajan, osinon manje, osinon nenpòt lòt
²⁰
 bagay. Nou gen dwa egzije yon moun lòt nasyon pou l' peye nou enterè sou sa nou prete l'. Men,
 nou pa ka fè yon moun pèp Izrayèl parèy nou sa. Se konsa, Seyè a, Bondye nou an, va beni nou
²¹
 nan tou sa nou pral fè nan peyi Bondye pral ban nou pou rele nou pa nou. Lè yonn nan nou
 pwomèt Seyè a n'ap fè kichòy pou li, pa kite twòp tan pase anvan nou kenbe pwomès la, paske
 Seyè a, Bondye nou an, p'ap manke mande nou kont. Lè sa a, n'a gen yon peche sou konsyans nou.
²² ²³
 Si nou pa fè Seyè a ankenn pwomès, nanpwen peche nan sa. Men, depi yon pawòl sot nan
 bouch nou, fòk nou kenbe l'. Lè nou fè Seyè a yon pwomès ak pwòp bouch nou san anyen pa t' fòse
²⁴
 nou fè l', se pou nou kenbe l'. Lè nou pase nan jaden rezen yon moun pèp Izrayèl parèy nou, nou
²⁵
 gen dwa manje kont rezen nou, jan nou vle. Men, pigas nou pran anyen pote ale. Si nou antre
 nan jaden ble yon moun pèp Izrayèl parèy nou, si ble a mi, nou gen dwa kase kèk zepi ak men nou.
 Men, pigas nou mete manchèt pou koupe ble ki mi nan jaden moun pèp Izrayèl parèy nou.

Chapter 24

¹
 ¶ Si yon nonm marye ak yon fanm epi rive yon lè fanm lan pa fè l' plezi ankò, paske li dekouvri
 nan fanm lan yon bagay ki pa byen, l'a ekri yon papye divòs bay fanm lan, epi l'a voye l' tounen

lakay papa l'.² Apre sa, si fanm lan kite kay papa l', l' al marye ak yon lòt gason,³ sipoze dezyèm mari a tou ta rive pa vle wè l', epi li ekri yon lèt divòs ba li, epi li voye l' tounen lakay papa l' ankò,

osinon sipoze dezyèm mari a ta rive mouri,⁴ lè sa a, premye mari a p'ap ka marye avè l' ankò. Se pou li konsidere fanm lan tankou yon moun ki pa nan kondisyon pou sèvi Bondye. Paske si li marye avè l' apre sa, l'ap fè yon bagay Seyè a pa vle wè. Piga nou rale madichon sou peyi Seyè a, Bondye

nou an, ap ban nou pou rele nou pa nou an.⁵ ¶ Si yon nonm fèk marye, li pa fèt pou l' al nan lagè, ni yo pa bezwen mande l' fè ankenn travay nan sèvis piblik pandan ennan. Konsa, pandan tan sa a,

l'a lib pou l' rete lakay li pou l' fè kè madanm li kontan.⁶ Lè n'ap prete yon moun lajan, nou pa gen dwa pran de wòl moulen li yo, pa menm yon sèl ladan yo, pou garanti. Si nou fè sa, se tankou si

se te lavi moun lan menm nou te pran pou garanti.⁷ Si yo bare yon moun pèp Izrayèl ap kenbe yon moun pèp Izrayèl parèy li pou fè l' tounen esklav li osinon pou l' vann li, se pou yo touye l'. Se

konsa n'a wete bagay mal k'ap fèt nan mitan nou.⁸ Lè gen yon ka move maladi po, se pou nou sèten yo fè tou sa moun Levi yo mande fè. Se pou nou swiv tout regleman mwen te ba yo sou sa.

Pa janm bliye sa Seyè a, Bondye nou an, te fè Miryam, lè nou t'ap soti kite peyi Lejip la.⁹ Lè n'ap prete yon moun yon lajan sou garanti, nou pa gen dwa antre lakay li pou n' al pran sa l'ap ban nou pou garanti a.¹⁰

N'a rete deyò, n'a tann li pote garanti a ban nou deyò a.¹¹ Si se yon nonm

ki pòv, pa kite rad li ban nou pou garanti a pase nwit lakay nou.¹² Se pou nou tounen l' ba li lè solèy kouche, pou l' ka mete l' sou li lè l'ap dòmi. L'a genyen nou rekonesans, epi nou menm nou

va fè yon bon zèv devan Seyè a, Bondye nou an.¹³ ¶ Piga nou peze yon pòv malere k'ap travay pou lajan l', li te mèt yon moun pèp Izrayèl parèy nou, li te mèt yon moun lòt nasyon k'ap viv nan

peyi a nan yonn nan lavil nou yo.¹⁴ Peye l' lajan l' chak jou, anvan solèy kouche, paske li pòv, li bezwen lajan an pou l' viv. Konsa, li p'ap bezwen rele Seyè a pou nou. Men, si sa rive, se nou menm

k'ap antò.¹⁵ Nou pa gen dwa touye yon papa pou krim pitit li fè. Ni nou pa gen dwa touye yon

pitit pou krim papa l' te fè. Y'a touye yon moun pou krim li menm li fè.¹⁶ Pa fè ankenn moun lòt nasyon k'ap viv nan mitan nou lenjistis. Respekte dwa timoun ki san papa. Pa pran rad yon vèv an

garanti pou lajan nou prete l'.¹⁷ Chonje nou menm tou nou te esklav nan peyi Lejip. Se Seyè a menm, Bondye nou an, ki te delivre nou. Se poutèt sa mwen mande nou pou nou swiv regleman

sa a.¹⁸ Lè n'ap ranmase rekòt ble nan jaden nou epi nou bliye ranmase kèk grap ki tonbe atè, pa tounen al pran yo. N'a kite yo pou moun lòt nasyon k'ap viv nan mitan nou, pou timoun san papa

ak fanm ki pèdi mari yo. N'a fè sa pou Seyè a, Bondye nou an, ka beni nou nan tou sa n'ap fè.¹⁹ Lè n'ap keyi grenn oliv, nou pa bezwen pase yon dezyèm fwa pou keyi sa ki te rete yo. N'a kite yo pou

moun lòt nasyon k'ap viv nan mitan nou yo, pou timoun san papa ak pou fanm ki pèdi mari yo.

21

Lè nou fin koupe grap rezen nan jaden nou yo, pa tounen yon dezyèm fwa anba chak pye rezen pou repase branch yo. Sa ki va rete a, n'a kite yo pou moun lòt nasyon k'ap viv nan mitan nou yo,

pou timoun ki san papa ak pou fanm ki pèdi mari yo. ²² Se pou nou toujou chonje yon lè nou te esklav nan peyi Lejip. Se poutèt sa mwen mande non pou nou swiv lòd mwen ban nou la a.

Chapter 25

¹ ¶ Lè yon kont pete nan mitan nou, moun ki gen kont yo va ale lajistis pou yo jije ka a. Y'a bay sa ki gen rezon an rezon, sa ki gen tò a tò. ² Si sa ki gen tò a merite bat, jij la va fè l' kouche plat atè, epi, l'a devan je l', l'a fè yo ba li kantite kou li merite pou sa l' fè a. ³ Nou pa janm gen dwa depase karant kou. Si nou ba li plis, nou ka pini l' twòp. Lè sa a, n'a avili l' devan tout moun. ⁴ Nou pa bezwen mare bouch bèf la pou enpoze l' manje lè l'ap vire moulen pou kraze ble pou nou. ¶ ⁵ Lè de frè rete ansanm nan menm kay, si yonn ladan yo rive mouri san li pa kite pitit, madan defen an pa ka al marye ak yon moun ki pa nan fanmi an. Se va devwa bòfrè a pou l' al jwenn vèv la pou l' marye ak li. ⁶ Premye pitit gason madanm lan va fè a va pote non frè ki mouri a pou non l' pa pèdi nan peyi Izrayèl la. ⁷ Men, si nonm lan pa vle marye ak bèlsè li a, bèlsè a va moute nan tribinal bò pòtay lavil la, epi l'a di chèf fanmi yo: Bòfrè mwen an derefize fè devwa l'. Li pa vle konsève non frè li nan peyi Izrayèl la. Li refize marye avè m', jan lalwa peyi a mande l' fè l' la. ⁸ Lè sa a, chèf fanmi ki nan lavil la va fè rele nonm lan vin jwenn yo epi y'a pale avè l'. Si li derefize marye avèk bèlsè a, ⁹ bèlsè a va mache sou li, devan tout chèf fanmi yo, l'a wete yon grenn sapat nan pye nonm lan, l'a krache nan figi l', epi l'a di: -Men sa ki pou rive yon nonm ki refize bay frè li yon pitit. ¹⁰ Nan peyi Izrayèl la, y'a rele fanmi nonm sa a: fanmi nonm grenn sapat la. ¹¹ Si pandan de gason nan moun Izrayèl yo ap goumen, madanm yonn nan yo pwoche pou l' sove mari l' anba men lòt k'ap bat li a, epi li lonje men l', li kenbe lòt lan nan pati li, ¹² se pou nou san pitye pou li: koupe men l' la pou la. ¹³ ¶ Nou pa gen dwa gen de kalite pwa nan sakit nou pou pran pèz, yonn ki bon, yonn ki pa bon, ¹⁴ ni de kalite mezi lakay nou, yonn ki bon ak yonn ki pa bon. ¹⁵ N'a toujou sèvi ak bon mezi, san wete san mete. Se konsa n'a ka viv lontan nan peyi Seyè a, Bondye nou an, ap ban nou an. ¹⁶ Paske Seyè a pa vle wè moun k'ap fè bagay konsa, moun k'ap fè lenjistis. ¹⁷ Pa

janm bliye sa Amalèk te fè nou lè nou te sou wout nou ap soti nan peyi Lejip.¹⁸ Yo pa t' gen krentif Bondye. Yo vin kontre nou sou chemen nou. Lè sa a nou te bouke, kò nou te kraze, epi yo pase pa dèyè, yo touye tout moun ki t'ap trennen dèyè yo.¹⁹ Se poutèt sa, lè Seyè a, Bondye nou an, va ban nou lapè ak tout lènmi sa yo ki antoure nou toupatou nan peyi l'ap ban nou pou rele nou pa nou an, se pou nou touye tout moun Amalèk yo pou pesonn sou latè pa janm chonje yo ankò. Pa bliye sa!

Chapter 26

¹ ¶ Lè n'a rive nan peyi Seyè a, Bondye nou an, ban nou pou rele nou pa nou an, lè n'a fin pran tout peyi a pou nou pou nou rete ladan l',² chak moun va pran premye donn tout pyebwa nan jaden li fè sou tè Seyè a, Bondye li a, va ba li, l'a mete yo nan yon panyen, epi l'a pote l' kote Seyè a te chwazi pou l' rete nan mitan nou an.³ Li aval jwenn prèt ki desèvis lè sa a, epi l'a di l': -Mwen deklare jòdi a, devan Seyè a, Bondye mwen an, mwen rekonèt mwen antre nan peyi li te pwomèt li t'ap bay zansèt nou yo.⁴ Prèt la va pran panyen an nan men li, l'a depoze l' devan lòtèl Seyè a, Bondye nou an.⁵ Lè sa a, moun k'ap fè ofrann lan va pran lapawòl devan Seyè a, Bondye nou an, l'a fè deklarasyon sa a: -Zansèt mwen te yon moun peyi Aram ki t'ap pwonmennen mache toupatou. Yon jou, li desann nan peyi Lejip ak moun pa l' yo ki pa t' anpil. Yo pase kèk tan nan peyi a, yo tounen yon gwo nasyon ki te fò ak anpil anpil moun ladan l'.⁶ Moun peyi Lejip yo tonbe maltrete nou, yo malmennen nou, yo fòse nou travay di tankou esklav.⁷ Lè sa a, nou rele Seyè a, Bondye zansèt nou yo, pou l' vin ede nou. Li tandè lapriyè nou. Li wè nan ki mizè nou te ye, li wè tout lapenn ki te nan kè nou, li wè jan yo t'ap peze nou.⁸ Seyè a fè nou soti kite peyi Lejip la ak gwo fòs ponyèt li, li te fè anpil mirak ak anpil mèvèy, bagay ki te fè moun pè anpil.⁹ Apre sa, li mennen nou isit la, li ban nou bèl tè sa a, kote lèt ak siwo myèl ap koule tankou dlo.¹⁰ Se sa ki fè koulye a, Seyè, mwen pote ba ou pi bèl fwi nan premye rekòt ou ban mwen nan peyi a. Apre sa, nonm lan va depoze panyen an devan Seyè a, Bondye nou an, l'a mete ajenou devan l'.¹¹ Lèfini, li menm ak tout moun lakay li, l'a fè fèt pou tout bon bagay sa yo Seyè a te ba li. L'a fè moun Levi yo ansanm ak moun lòt nasyon k'ap viv nan mitan nou yo fete ansanm ak li tou.¹² ¶ Chak twazan n'a bay ladim, ki vle di yon dizyèm tout bagay nou rekòlte. N'a ranmase sa n'ap bay la, n'a mache nan tout lavil nou yo, n'a bay prèt yo, moun lòt nasyon yo, timoun san papa yo ak vèv yo, pou yo tout ka manje plen vant yo.¹³ Lèfini, n'a parèt devan lòtèl Seyè a, Bondye nou an, n'a di l': -Mwen pa kite

lakay mwen anyen nan sa mwen fèt pou mete apa pou ou. Mwen mache bay prèt yo, moun lòt nasyon yo, timoun san papa ak vèv yo, dapre lòd ou te ban mwen. Mwen fè tou sa ou te mande m' fè sou keksyon sa a. Mwen pa bliye anyen nan tou sa ou di m'.¹⁴ Mwen pa t' manje ladan yo lè mwen te nan lapenn, ni lè mwen pa t' nan kondisyon pou fè sèvis pou ou. Ni mwen pa t' wete anyen ladan l' pou m' fè ofrann bay mò. Seyè, Bondye mwen, mwen te obeyi ou, mwen te fè tou sa ou te ban m' lòd fè sou keksyon sa a.¹⁵ Rete nan syèl la, nan kay ki apa nèt pou ou a, voye je ou gade pèp ou a. Beni pèp Izrayèl la ansanm ak tè ou te ban nou an dapre pwomès ou te fè zansèt nou yo. Beni peyi kote lèt ak siwo myèl ap koule tankou dlo a.¹⁶ ¶ Seyè a, Bondye nou an, pase nou lòd jòdi a pou nou swiv tout lwa ak tout regleman sa yo. N'a kenbe yo, n'a fè sa yo mande nou la a ak tout kè nou ak tout nanm nou.¹⁷ Jòdi a nou fè deklarasyon nou bay Seyè a: Nou di se li ki Bondye nou. Nou pwomèt pou nou toujou mache jan li vle l' la, pou nou fè tou sa ki nan lwa, nan lòd ak nan regleman li yo pou nou toujou koute sa l' di nou.¹⁸ Jòdi a tou, Seyè a te asepte nou pou pèp li renmen anpil la, jan l' te fè nou pwomès la. Epi li pase nou lòd pou nou fè tou sa l'a mande nou fè.¹⁹ L'ap fè nou tounen nasyon ki pi gran pase tout lòt nasyon li te fè yo. N'a gen pouvwa pase yo, n'a gen repitasyon pase yo, y'a respekte nou pase yo. Wi, n'a yon pèp k'ap viv apa nèt pou Seyè a, Bondye nou an, jan l' te di l' la.

Chapter 27

¹ ¶ Lè sa a, Moyiz ansanm ak tout chèf fanmi pèp Izrayèl yo bay pèp la lòd sa yo: -Se pou nou fè tou sa mwen mande nou fè jòdi a.² Lè n'a janbe lòt bò larivyè Jouden an, pou nou antre nan peyi Seyè a, Bondye nou an, ap ban nou an, n'a pran kèk gwo wòch, n'a mete yo kanpe, n'a blanchi yo ak lacho.³ Apre sa, n'a ekri sou yo tout lòd ki nan lalwa sa a. Lè n'a fin antre nan peyi Seyè a, Bondye nou an, ap ban nou an, peyi kote lèt ak siwo myèl ap koule tankou dlo jan li te pwomèt zansèt nou yo,⁴ lè n'a fin janbe lòt bò larivyè Jouden an, n'a kanpe wòch sa yo sou tèt mòn Ebal, jan mwen di nou li jòdi a. N'a blanchi yo ak lacho.⁵ N'a pran wòch, n'a moute yon lòtèl la tou pou Seyè a, Bondye nou an. Pa travay wòch n'a pran pou n' fè lòtèl la ak sizo.⁶ Se pou n' pran wòch yo konsa, jan nou jwenn yo a, pou nou bati lòtèl Seyè a, Bondye nou an. Se la n'a touye bèt nou ofri pou yo boule nèt pou Seyè a.⁷ Se la n'a fè ofrann bèt pou yo touye pou di Bondye mesi. Se la n'a manje ofrann nou yo, se la n'a fè fèt devan Seyè a, Bondye nou an.⁸ N'a ekri sou wòch yo tout lòd ki nan lalwa sa a. N'a ekri yo pou tout moun ka li yo.⁹ Apre sa, Moyiz ansanm ak prèt moun

Levi yo pale ak tout pèp la. Li di yo konsa: -Nou menm, moun pèp Izrayèl yo, fè yon ti silans pou mwen, tanpri. Koute byen. Depi jòdi a se pèp Seyè a, Bondye nou an, nou ye. ¹⁰ Se pou nou obeyi l', se pou nou swiv tout lòd ak tout regleman mwen ban nou jòdi a. ¹¹ ¶ Menm jou sa a, Moyiz bay pèp Izrayèl la lòd sa a: ¹² -Lè n'a fin pase larivyè Jouden an, moun branch fanmi Simeyon, moun branch fanmi Levi, moun branch fanmi Jida, moun branch fanmi Isaka, moun branch fanmi Jozèf ak moun branch fanmi Benjamen yo va moute kanpe sou mòn Garizim lè y'ap beni pèp la. ¹³ Moun branch fanmi Woubenn, moun branch fanmi Gad, moun branch fanmi Asè, moun branch fanmi Zabilon, moun branch fanmi Dann ak moun branch fanmi Neftali yo va moute kanpe sou mòn Ebal lè y'ap bay pèp la madichon. ¹⁴ Moun Levi yo va pale ak pèp la, y'a rele byen fò pou tout moun ka tande: ¹⁵ -Madichon Bondye pou tout moun ki fè travay yon wòch ak sizo osinon fè fonn metal pou fè yon zidòl, epi lèfini ki kache l' yon kote pou l' fè sèvis pou li. Se yon bondye moun fè ak men yo. Seyè a pa vle wè bagay konsa! Tout pèp la va reponn: -Se sa menm! Nou dakò! ¹⁶ -Madichon pou moun ki derespekte manman l' al papa l'! Tout pèp la va reponn: -Se sa menm! Nou dakò! ¹⁷ -Madichon pou moun ki deplase bòn tè yon moun pèp Izrayèl parèy li! Tout pèp la va reponn: -Se sa menm! Nou dakò! ¹⁸ -Madichon Bondye pou moun ki fè yon avèg pèdi chemen l'! Tout pèp la va reponn: -Se sa menm! Nou dakò! ¹⁹ -Madichon Bondye pou moun k'ap fè pasdwa sou moun lòt nasyon yo, sou timoun ki san papa ak sou vèv yo! Tout pèp la va reponn: -Se sa menm! Nou dakò! ²⁰ -Madichon Bondye pou tout gason ki va kouche ak madanm papa l', paske se avili l'ap avili papa l'! Tout pèp la va reponn: -Se sa menm! Nou dakò! ²¹ -Madichon Bondye pou tout moun ki kwaze ak nenpòt ki bèt! Tout pèp la va reponn: -Se sa menm! Nou dakò! ²² -Madichon Bondye pou tout moun ki kouche avèk sè li, kit se pitit fi papa l', kit se pitit fi manman l'! Tout pèp la va reponn: -Se sa menm! Nou dakò! ²³ -Madichon Bondye pou moun ki kouche ak bèlmè li, manman madanm li! Tout pèp la va reponn: -Se sa menm! Nou dakò! ²⁴ -Madichon Bondye pou moun ki touye yon lòt moun Izrayèl parèy li an kachèt! Tout pèp la va reponn: -Se sa menm! Nou dakò! ²⁵ -Madichon Bondye pou moun ki asepte lajan pou touye yon inonsan! Tout pèp la va reponn: -Se sa menm! Nou dakò! ²⁶ -Madichon Bondye pou moun ki pa kenbe pawòl ki nan lalwa a, ki pa fè sa yo di ladan l'! Tout pèp la va reponn: -Se sa menm! Nou dakò!

Chapter 28

¹ ¶ Si nou koute Seyè a, Bondye nou an, si nou fè tou sa mwen ban nou lòd fè jòdi a, Seyè a va
 fè nou tounen nasyon ki pi gran pase tout lòt nasyon ki sou latè. ² Wi, si nou koute Seyè a, Bondye
 nou an, men benediksyon l'ap vide sou nou: ³ Seyè a va beni nou lavil kou andeyò. ⁴ Seyè a va
 beni pitit nou yo, rekòt jaden nou yo, pòte bèf nou yo, pòte kabrit nou yo, pòte mouton nou yo ak
 pòte tout lòt bèt nou yo. ⁵ Seyè a va beni rekòt ble nou ak rekòt farin nou. ⁶ Seyè a va beni nou
 nan tou sa n'ap fè, depi nan mete men jouk nou bout. ⁷ Seyè a va fè nou kraze tout lènmi ki va atake
 nou. Lè y'ap vin sou nou, y'a mache ansanm sou yon sèl chemen. Men, y'a gaye toupatou lè y'ap
 kraze rak pou nou. ⁸ Seyè a va beni nou tout tan, l'a beni depo manje nou, l'a beni tou sa n'ap fè.
 L'a beni nou nan peyi Seyè a, Bondye nou an, va ban nou an. ⁹ Si nou fè tou sa Seyè a, Bondye
 nou an, mande nou fè, si nou viv jan li vle nou viv la, n'a yon pèp k'ap viv apa nèt pou Seyè a,
 Bondye nou an, jan l' te fè nou pwomès la. ¹⁰ Lè sa a, tout pèp sou latè va wè Seyè a te chwazi
 nou pou pote non l', y'a gen respè pou nou. ¹¹ Seyè a va kouvri nou ak benediksyon, l'a ban nou
 anpil pitit, anpil bèt ak anpil rekòt nan peyi Seyè a te pwomèt zansèt nou yo l'ap ban nou an. ¹² L'a
 rete nan syèl la, l'a louvri trezò li, l'a voye lapli sou peyi a lè sezon an va rive, l'a beni tout travay
 n'ap fè. N'a gen pou nou prete tout moun. Nou p'ap janm bezwen mande pesonn prete. ¹³ Seyè a
 va mete nou devan, nou p'ap janm dèyè. N'a toujou anwo, nou p'ap janm anba, depi nou swiv tout
 lòd Seyè a, Bondye nou an, depi nou fè tou sa mwen mande nou fè jòdi a, ¹⁴ san nou pa janm kite
 chemen li mete devan nou an pou n' ale dèyè lòt bondye pou nou sèvi yo. ¶ Men tou, si nou pa
 koute Seyè a, Bondye nou an, si nou pa fè tou sa mwen ban nou lòd fè jòdi a, si nou pa swiv regleman
 mwen ban nou yo, men madichon l'ap ban nou epi k'ap tonbe sou nou: ¹⁶ Madichon Bondye va
 tonbe sou nou nan lavil kou andeyò. ¹⁷ Madichon Bondye va tonbe sou rekòt ble nou ak sou rekòt
 farin nou. ¹⁸ Madichon Bondye va tonbe sou pitit nou yo, sou rekòt jaden nou yo, sou pòte bèf,
 pòte kabrit ak pòte mouton nou yo. ¹⁹ Madichon Bondye va tonbe sou tou sa n'ap fè, depi nan mete
 men jouk nou bout. ²⁰ Si nou fè bagay ki mal, si nou vire do bay Seyè a, l'ap voye tout kalite
 madichon sou nou: Nou p'ap konn sa pou n' fè, n'a gen kè sere nan tou sa n'ap fè jouk n'a rete konsa
 n'a fin disparèt nèt, paske nou te fè bagay ki mal, nou te vire do ba li. ²¹ Seyè a ap voye yon sèl
 move maladi po k'ap fini nèt ak nou nan peyi nou pral pran pou nou an. ²² L'ap voye sou nou
 epidemi, move lafyèb, maladi anfle, chalè pou toufe moun, jouk n'a mouri. L'a voye chechrès,

vèmen ak pichon pou detwi rekòt nou yo. Malè sa yo va tonbe sou nou jouk n'a fin disparèt nèt.

²³ Syèl la p'ap bay yon degout lapli menm. Tè a va vin di kou wòch. ²⁴ Nan plas lapli, Seyè a va

²⁵ fè pousyè tè ak sab kouvri nou jouk nou mouri. L'a fè lènmi nou yo bat nou. N'a pran yon sèl chemen ansanm pou n' atake yo. Men, n'a gaye toupatou lè n'a pran rak devan yo. Tout moun sou

latè pral mete men nan tèt lè y'a wè sa ki rive nou. ²⁶ Lè n'a mouri, se zwazo ak bèt nan bwa ki

pral manje kadav nou yo san p'ap gen pesonn pou pouse yo ale. ²⁷ Seyè a va fè bouton leve sou tout kò nou, menm jan li te fè moun peyi Lejip yo, n'a gen apse, lagal, pyas, epi nou p'ap ka jwenn

gerizon pou maladi po sa yo. ²⁸ Seyè a va fè nou pèdi tèt nou, nou p'ap konprann sa n'ap fè, nou

p'ap konnen kote pou n' mete kò nou. ²⁹ Gwo midi, n'a tatonnen tankou avèg k'ap mache nan fènwa. Nou p'ap jwenn rannman nan ankenn travay n'ap fè. Tout tan moun ap malmennen nou, y'ap vòlè

nou, lèfini p'ap gen pesonn pou pote nou sekou. ³⁰ N'a fyanse ak yon fi, men se yon lòt gason ki va kouche ak li. N'a bati yon kay, men nou p'ap janm rete ladan l'. N'a plante yon jaden rezen, men

nou p'ap janm jwi l'. ³¹ Y'a touye bèf nou yo la devan je nou, men nou p'ap ka mete yon ti moso nan vyann li nan bouch nou. Y'ap pran bourik nou nan bab nou al avè l', yo p'ap janm renmèt nou

li. Y'a bay lènmi nou yo tout mouton nou yo, epi p'ap gen pesonn pou pote nou sekou. ³² N'a wè ak je nou y'ap pran pitit gason ak pitit fi nou yo bay moun lòt nasyon. Tout lè n'a anvi wè yo ankò,

men p'ap gen anyen nou ka fè pou sa. ³³ Moun nou pa janm konnen va manje tou sa ki nan jaden

nou ak tout pwofi travay nou. Se tout tan y'a malmennen nou, y'a maltrete nou. ³⁴ Lè n'a wè tout

bagay sa yo rive nou, n'a pèdi tèt nou! ³⁵ Seyè a va ban nou yon sèl malenng nan jenou ak sou kwis

janm nou ki p'ap janm geri. Bouton ap parèt sou tout kò nou, depi nan pye jouk nan tèt. ³⁶ Seyè a pral depòte nou ansanm ak tout wa nou te mete alatèt nou, nan yon peyi etranje ni nou menm ni zansèt nou yo pa t' janm konnen. Lè n'a rive la, n'a sèvi zidòl fèt an bwa ak zidòl fèt ak wòch.

³⁷ Nan tout peyi kote Seyè a pral gaye nou yo, moun pral sezi wè sa ki rive nou, y'a pase nou anba

kont betiz, y'a fè chante sou nou. ³⁸ N'a plante anpil grenn nan jaden nou, men n'a rekòlte yon ti

kras, paske krikèt va manje pifò. ³⁹ N'a plante jaden rezen, n'a okipe yo byen. Men, nou p'ap jwenn

rezen ni pou nou rekòlte, ni pou fè diven pou nou bwè, paske vèmen va fin manje tout. ⁴⁰ Pye oliv va pouse toupatou nan peyi nou an, men nou p'ap gen yon ti degout lwil oliv, paske tout grenn oliv

yo ap koule. ⁴¹ N'a fè pitit fi ak pitit gason, men yo p'ap pou nou, paske lènmi nou yo ap fè yo

prizonnye, y'ap depòte yo. ⁴² Krikèt pral manje tout pyebwa nou yo ak tout ti plant ki nan jaden nou

43
yo. Moun lòt nasyon k'ap viv nan mitan nou va vin pi fò pase nou. Nou menm, chak jou, n'a
pèdi fil. 44
Se yo menm ki va gen lajan pou yo prete nou. Nou menm nou p'ap gen anyen pou n'
prete yo. Se yo ki va devan, nou menm nou pral dèyè nèt. 45 ¶ Tout giyon sa yo va tonbe sou nou.
Kote nou pase y'a pase dèyè nou. Y'a rete sou nou jouk y'a fini nèt ak nou. Tou sa, paske nou pa t'
koute sa Seyè a, Bondye nou an, di nou, nou pa t' fè tou sa li te mande nou fè nan lòd ak regleman
li te ban nou yo. 46
Madichon sa yo va sèvi ni pou nou ni pou pitit nou yo pou moutre nou kalite
mèvèy ak mirak Bondye ka fè. 47
Bondye te ban nou tou sa nou te bezwen. Men malgre sa, nou
pa t' sèvi l' tout bon ak kè kontan. 48
Se poutèt sa, nou pral sèvi lènmi Seyè a pral voye sou nou.
Nou pral soufri grangou, swaf dlo, toutouni, dizèt ak tout kalite mizè. Seyè a pral fè lènmi yo kraze
nou anba men yo, jouk y'a fini nèt ak nou. 49
Seyè a pral mennen yon nasyon soti byen lwen nan
dènye bout latè, yon nasyon ki pale yon lang nou p'ap konprann, yo pral vare sou nou tankou malfini
sou poul. 50
Se moun ki gen kè di. Yo p'ap respekte vye granmoun, ni yo p'ap gen pitye pou timoun.
51
Y'a manje pwofi bèt nou yo, ak rekòt jaden nou yo jouk y'a kite nou mouri grangou. Yo p'ap kite
anyen pou nou, ni farin, ni diven, ni lwil, ni pòte bèf nou yo ni pòte mouton nou yo, jouk y'a fini
nèt ak nou. 52
Y'a atake nou. Y'a sènen tout lavil nou yo, jouk y'a fin kraze gwo miray byen wo ki
te sèvi nou ranpa, miray nou te kwè ki ta ka toujou pwoteje nou yo. Wi, y'a fèmen nou, y'a sènen
tout lavil nou yo, toupatou nan peyi Seyè a, Bondye nou an, te fè nou kado a. 53
Lè lènmi nou yo
va sènen nou nan lavil nou yo, y'a mete nou nan yon sèl kalite mizè ak kè sere, n'a sitèlman grangou,
n'a manje pwòp pitit nou yo, pitit gason ak pitit fi Seyè a, Bondye nou an, te ban nou. 54
Menm
moun nou konnen ki pi bon nan mitan nou an, moun ki pa janm nan kont ak pesonn lan, enben
menm li menm, l'a fèmen kè l', li p'ap konn frè, li p'ap konn madanm li te renmen an, ni ankenn
pitit nan sa ki rete l' yo, 55
pou li pa bay pesonn nan vyann pitit li l'ap manje a, paske ak lènmi k'ap
sènen nou nan lavil nou yo, ap gen yon sèl mizè ak kè sere nan mitan lavil nou yo, ata li menm, l'a
sitèlman grangou, l'a blije manje pwòp pitit li, epi li p'ap bay pesonn ladan l'. 56
Menm fanm nou
konnen ki pi bon moun nan mitan nou an, fanm ki pa ta janm ap mache nan lari tèlman li gen bon
jan ak bon levasyon an, li va fèmen kè l', li p'ap konn ni mari li renmen anpil la, ni pitit fi, ni pitit
gason. 57
Pou li pa separe ak yo, l'a kache kò l' pou yo pa wè l' lè l'ap manje pitit li fenk fè a, ansanm
ak tout manman vant lan. Paske, avèk lènmi k'ap sènen nou nan lavil nou yo, ap gen yon sèl mizè
ak kè sere, p'ap gen anyen pou manje. Lè sa a, l'a kache kò l' pou l' pa bay yo anyen nan sa l'ap
manje a. 58
Si nou pa swiv tout regleman ki ekri nan liv lalwa sa a, si nou pa gen krentif pou Bondye
nou an, Seyè ki gen anpil pouvwa a, Bondye moun fèt pou respekte a, 59
Seyè a va voye gwo malè

sa yo sou nou ak sou pitit nou yo, l'a voye gwo epidemi ki pa tande rete, move maladi ki pa konn renmèd. ⁶⁰ L'a voye sou nou ankò tout malè ki te tonbe sou moun peyi Lejip yo, malè ki te fè nou tranble yo. Nou p'ap janm ka soti anba yo. ⁶¹ Sa ki pi rèd ankò, Seyè a va voye sou nou tout kalite epidemi ak maladi yo pa pale nan liv lalwa Seyè a jouk la fini nèt avèk nou. ⁶² Epi nou menm, moun pèp Izrayèl yo, ki te anpil tankou zetwal ki nan syèl la, n'a tounen yon ti ponyen moun, paske nou pa t' koute sa Seyè a, Bondye nou an, te di nou. ⁶³ Menm jan Seyè a, Bondye nou an, te pran plezi pou l' te fè nou byen, pou l' te fè nou vin anpil la, se konsa tou l'a pran plezi pou l' fè nou pèdi tout bagay, pou l' fini nèt ak nou. L'a rache nou met deyò nan peyi kote nou pral antre a, peyi nou pral pran pou nou rete a. ⁶⁴ Seyè a va gaye nou nan mitan tout nasyon ki toupatou sou latè. Lè n'a rive la, n'a sèvi lòt bondye ni zansèt nou yo, ni nou menm nou pa t' janm tande pale, zidòl fèt an bwa, zidòl fèt ak wòch. ⁶⁵ Antan n'ap viv nan mitan lòt nasyon sa yo, nou p'ap janm gen kè poze, nou p'ap janm ka rete yon sèl kote. Seyè a va fè nou viv ak kè sote, nan lapenn ak dekourajman. ⁶⁶ Lavi nou ap toujou an danje. Lajounen kou lannwit, n'ap nan laperèz, n'ap pè pou lanmò pa pran nou. ⁶⁷ Devan bagay n'a wè k'ap pase devan je nou, n'a gen yon sèl laperèz nan kè nou, kè nou va bat bip-bip! Chak maten n'a mande kilè aswè va rive. Chak aswè n'a mande kilè la jou. ⁶⁸ Seyè a va fè nou tounen nan peyi Lejip nan bato, atout se li menm ki te pwomèt nou pa t'ap janm tounen la ankò. N' aval vann tèt nou bay lènmi nou yo pou nou sèvi yo esklav, men pesonn p'ap vle achte nou.

Chapter 29

¹ ¶ Men pawòl ki te nan kontra Seyè a te bay Moyiz lòd pase ak moun pèp Izrayèl yo, lè yo te nan peyi Moab la. Kontra sa a te vin mete sou kontra li te deja fè ak yo sou Mòn Orèb la. ² Moyiz fè rele tout pèp Izrayèl la, li di yo konsa: -Nou wè ak je nou tou sa Seyè a te fè wa peyi Lejip la, moun ki t'ap travay ak li yo ak tout peyi a. ³ Nou wè ak je nou tout gwo malè li te voye sou yo, tout mirak ak tout mèvèy li te fè. ⁴ Men, jouk koulye a, Seyè a poko louvri lespri nou ase pou nou konprann byen konprann tou sa nou wè ak tou sa nou tande. ⁵ Pandan karantan, mwen pran men nou, mwen moutre nou chemen pou nou swiv nan dezè a. Rad sou nou pa t' janm chire, sapat nan pye nou pa t' janm fini. ⁶ Nou pa t' gen pen pou nou manje, ni diven, ni ankenn bwason pou nou bwè, men Seyè a te ban nou tou sa nou bezwen pou n' te ka konnen se li menm, Seyè a, ki Bondye

nou an. ⁷ Rive nou rive isit la, Siyon, wa Esbon an ak Og, wa Bazan an, soti vin atake nou. Nou
 bat yo byen bat. ⁸ Nou pran peyi yo a bay moun branch fanmi Woubenn yo, moun branch fanmi
 Gad yo ansanm ak mwatye nan moun branch fanmi Manase yo pou yo rete. ⁹ N'a kenbe kontra sa
 a. N'a fè tou sa ki di ladan l' pou nou ka reyisi nan tout sa n'ap fè. ¹⁰ ¶ Jòdi a, men nou tout nou
 reyini la a devan Seyè a, Bondye nou an, nou menm chèf tout branch fanmi nou yo, tout chèf fanmi
 nou yo ak tout lòt chèf yo, ak tout lòt gason nan pèp Izrayèl la, ¹¹ tout pitit nou yo, madanm nou
 yo, tout moun lòt nasyon k'ap viv nan mitan nou yo, depi sa k'ap koupe bwa jouk sa ki la pou al
 chache dlo pou nou, ¹² nou vin pran angajman sou sèman pou nou asepte tout egzijans kontra Seyè
 a, Bondye nou an, ap pase ak nou jòdi a. ¹³ Konsa depi jòdi a, se pèp li nou ye, se Bondye pa nou
 li ye, jan l' te di l' la, jan l' te pwomèt Abraram, Izarak ak Jakòb, zansèt nou yo. ¹⁴ Men, se pa avèk
 nou menm sèlman l'ap pase kontra li te fè nou sèman pou n' kenbe a. ¹⁵ Men se pa sèlman ak
 nou tout ki la jòdi a devan mwen, men tou se avèk tout pitit nou yo ki poko fèt. ¹⁶ Nou konnen
 byen pwòp ki kalite lavi nou t'ap mennen nan pèyi Lejip la ak ki jan nou te pase nan mitan moun
 lòt nasyon nou te kontre sou wout nou. ¹⁷ Nou te wè tout vye bagay yo t'ap fè, ak tout zidòl fèt an
 bwa, osinon ak wòch, osinon an ajan oswa an lò yo te gen lakay yo. ¹⁸ Piga pesonn nan mitan nou,
 ni fanm ni gason, nan ankenn fanmi ni branch fanmi pèp la vire do bay Seyè a, Bondye nou an,
 pou y' al sèvi zidòl moun sa yo. Piga pesonn nan mitan nou tounen yon move grenn k'ap detounen
 pèp la, k'ap anpwazonnen l'. ¹⁹ Si yon moun, apre li fin tande sa ki di nan kontra a ak tout egzijans
 ki ladan l' yo, mete nan tèt li se bon li bon, epi li di nan kè l': Koulye a, mwen pa bezwen pè anyen.
²⁰ Mwen gen dwa fè sa m' pi pito, sa ap lakòz nou tout ap mouri, inonsan kou koupab. Bondye
 p'ap janm padonnen yon moun konsa. Okontre, Bondye, ki yon Bondye ki fè jalouzi anpil pou
 moun pa li yo, ap fache yon sèl fache sou nonm sa a, tout madichon ki ekri nan liv sa a pral tonbe
 sou li. Bondye ap fè non l' disparèt nèt sou latè. ²¹ Seyè a va wete l' nan mitan rès moun pèp Izrayèl
 yo, l'a pini l' dapre madichon n'a jwenn nan kontra ki ekri nan liv lalwa Seyè a. ²² Moun k'ap vin
 apre nou yo, pitit nou yo k'ap fèt apre nou ansanm ak moun lòt nasyon k'ap soti byen lwen yo, va
 wè malè ki tonbe sou peyi a ak tout maladi Seyè a voye nan peyi a. ²³ Y'a wè tout peyi a kouvri
 anba souf ak sèl, tout tè a boule. Lè sa a, moun p'ap ka simen anyen nan tè a, ankenn plant p'ap ka
 pran ladan l'. Pa menm vye zèb p'ap ka pouse. Peyi nou an va tankou lavil Sodòm ak Gomò, tankou
²⁴ lavil Adma ak Siboyen, lavil Seyè a te detwi nèt lè l' te ankòlè a, lè l' te move anpil la. Lè sa a,
 tout moun sou latè va mande: Poukisa Seyè a fè moun sa yo sa? Pouki tout kòlè sa a sou peyi a?

25

Y'a reponn yo: Se paske yo pa t' kenbe kontra Seyè a, Bondye zansèt yo a, kontra li te pase ak yo lè li t'ap fè yo soti kite peyi Lejip la. ²⁶ Yo leve al sèvi lòt bondye yo pa t' janm konnen anvan.

Y' al mete ajenou devan bondye Seyè a pa t' ba yo pou yo sèvi. ²⁷ Se konsa Seyè a vin fache anpil sou moun peyi sa a. Li sitèlman fache, li fè tout madichon ki ekri nan liv lalwa a tonbe sou yo.

28

Seyè a fè kòlè, li move, li fache, li rache yo met deyò nan peyi yo a, l' al jete yo nan yon lòt peyi etranje kote yo ye koulye a. ²⁹ Gen bagay nou pa konnen, se bagay Bondye kenbe nan kè l' pou li menm. Men, bagay li fè nou konnen yo, se bagay nou menm ak pitit nou yo pa dwe janm bliye pou nou ka fè tou sa li mande nou fè nan lalwa a.

Chapter 30

1

¶ Mwen mete benediksyon ak madichon dèvan nou pou n' chwazi. Lè tout bagay mwen te di nou yo va rive nou, si, antan n'ap viv nan mitan lòt nasyon nan peyi kote Seyè a te gaye nou yo,

nou vin chonje sa m' te di nou, ² si nou tounen vin jwenn Seyè a, Bondye nou an, si nou koute l' ak tout kè nou, ak tout nanm nou, nou menm ak tout pitit nou yo, jan m'ap ban nou lòd jòdi a,

3

enben, lè sa a Seyè a, Bondye nou an, va gen pitye pou nou. L'a mennen tout moun yo te depòte yo tounen lakay yo. L'a chanje sò nou. Li pral mache chache nou nan tout peyi kote li te gaye nou

yo, l'a sanble nou ankò. ⁴ Yo mè depòte nou jouk nan dènnye bout latè, Seyè a, Bondye nou an,

pral chache nou jouk la pou l' sanble nou ankò. ⁵ Seyè a va fè nou tounen nan peyi kote zansèt nou yo te rete a, n'a tounen pran l' pou nou ankò. L'a fè nou plis byen pase sa l' te fè pou zansèt nou yo,

l'a fè nou vin pi plis pase zansèt nou yo. ⁶ Seyè a, Bondye nou an, va mete mak kontra li a sou kè nou ak sou kè pitit nou yo, pou nou ka renmen l' ak tout kè nou, ak tout nanm nou, pou nou ka gen

lavi. ⁷ Seyè a, Bondye nou an, va fè tout madichon sa yo tonbe sou lènmi nou yo, sou moun ki pa

t' vle wè nou yo, sou moun ki t'ap maltrete nou yo. ⁸ Men, nou menm, n'a tounen vin jwenn Seyè

a, n'a koute l', n'a fè tou sa li ban nou lòd fè a, jan mwen mande nou li jòdi a. ⁹ Seyè a, Bondye nou an, va kouvri nou anba benediksyon. Li va fè tout zafè nou mache byen, l'a ban nou anpil pitit, l'a ban nou anpil bèt, l'a fè jaden nou yo bay bèl rekòt. Paske, Seyè a va pran plezi ankò pou l' fè nou

viv ak kè kontan, menm jan li te pran plezi fè sa pou zansèt nou yo. ¹⁰ Men, n'a gen pou nou koute Seyè a, Bondye nou an, n'a gen pou nou kenbe tout kòmandman li yo ak tout regleman li yo, tou sa ki ekri nan liv lalwa a. Wi, se pou nou tounen vin jwenn Seyè a, Bondye nou an, ak tout kè nou,

ak tout nanm nou. ¹¹ ¶ Kòmandman m'ap ban nou jòdi a, se pa bagay nou pa kapab fè, bagay nou pa ka rive fè. ¹² Se pa nan syèl la li ye pou n' ta di: Kilès ki pral moute al chache l' nan syèl la pou fè nou tande l', pou n' ka fè sa l' mande nou fè a? ¹³ Se pa lòt bò lanmè li ye non plis pou nou ta di: Kilès ki pral janbe lanmè al chache l' pou nou ka tande sa l' di, pou nou ka fè sa l' mande nou fè a? ¹⁴ Non. Li la toupre nou. Li nan bouch nou, li nan tèt nou pou nou ka fè sa l' mande nou fè a. ¹⁵ ¶ Gade. Jòdi a mwen mete devan nou lavi ak benediksyon yon bò, lanmò ak madichon yon bò. ¹⁶ Se nou ki pou chwazi. Sa m'ap mande nou jòdi a, se pou nou renmen Seyè a, Bondye nou an, se pou nou viv jan li vle l' la, se pou nou fè tou sa li mande nou fè nan kòmandman li yo, nan lòd li yo ak nan regleman li yo. Konsa, n'a gen lavi, n'a gen anpil pitit. Seyè a, Bondye nou an, va ¹⁷ beni nou nan peyi nou pral pran pou rele nou pa nou an. Men, si nou vire do ba li, si nou derefize koute l', si nou kite yo pran tèt nou pou n' al mete ajenou devan lòt bondye, pou n' al fè sèvis pou yo, ¹⁸ m'ap avèti nou depi koulye a: nou tout gen pou mouri. Nou p'ap viv lontan nan peyi lòt bò larivyè Jouden kote nou pral antre pou nou pran pou nou an. ¹⁹ Mwen pran syèl la ak latè a sèvi m' temwen jòdi a: Men li, mwen mete devan nou lavi yon bò, lanmò yon bò, benediksyon yon bò, madichon yon bò pou nou chwazi. Chwazi lavi tande, pou nou ka viv, nou menm ansanm ak tout ²⁰ pitit nou yo. renmen Seyè a, Bondye nou an. Koute l'. Pa lage l' menm, paske se li menm ki tout lavi nou, se li k'ap fè nou viv lontan nan peyi Seyè a te fè pwomès li t'ap bay Abraram, Izarak ak Jakòb, zansèt nou yo.

Chapter 31

¹ ¶ Moyiz pale ankò ak tout pèp Izrayèl la, li di yo: ² -Koulye a, mwen gen sanventan sou tèt mwen. Mwen pa gen fòs pou m' fè anyen ankò. Lèfini, Seyè a te tou di m' mwen p'ap janbe lòt bò larivyè Jouden an. ³ Seyè a, Bondye nou an, se li menm ki pral pran devan nou. L'ap detwi tout nasyon sa yo devan je nou pou nou ka pran peyi yo pou nou: Se Jozye ki va mache devan nou, jan Seyè a te di l' la. ⁴ Seyè a va detwi nasyon sa yo nèt, menm jan li te detwi Siyon ak Og, wa peyi Amori yo, ansanm ak tout moun nan peyi yo a nèt ale. ⁵ Seyè a pral lage yo nan men nou. Lè sa a, se pou nou aji avèk yo jan Seyè a te ban nou lòd aji ak yo a. ⁶ Se pou nou vyanan. Se pou nou mete gason sou nou! Nou pa bezwen pè. Pa tranble lè yo parèt devan nou. Seyè a, Bondye nou an, kanpe ⁷ la avèk nou. Li p'ap janm lage nou, li p'ap janm kite nou pou kont nou. Apre sa, Moyiz rele Jozye,

li pale avè l' devan tout pèp Izrayèl la, li di l' konsa: -Mete gason sou ou! Se pou ou vanyan! Paske se ou menm ki pral alatèt pèp la pou l' antre pran peyi Seyè a te fè sèman l'ap bay zansèt yo a.

8

Seyè a va pran devan ou, l'a kanpe la avè ou. Li p'ap janm lage ou, li p'ap kite ou pou kont ou: Ou

9

pa bezwen pè. Ou pa bezwen tranble. ¶ Apre sa, Moyiz ekri tout lalwa a, epi li renmèt li bay prèt yo, moun fanmi Levi yo ki te reskonsab Bwat Kontra Seyè a, ansanm ak tout chèf fanmi pèp Izrayèl

10

la. Moyiz ba yo lòd sa a: -Chak sètan, lè lanne pou yo renmèt dèt yo va rive, pandan y'ap fete

11

fèt Joupa yo. lè tout pèp Izrayèl la va vin adore Seyè a, Bondye nou an, nan kote li te chwazi

12

pou sa a, n'a li tout liv lalwa a byen fò devan yo tout, pou yo ka tandè l' nan zòrèy yo. N'a sanble tout moun, fanm kou gason, timoun kou granmoun, ansanm ak moun lòt nasyon k'ap viv nan lavil nou yo, pou yo ka tandè l', pou yo ka aprann gen krentif pou Seyè a, Bondye nou an, pou yo kenbe

13

lalwa a, epi pou yo fè tou sa ki ladan l'. Se konsa, pitit yo ki pa t' janm konn lalwa a va tandè l'. Y'a aprann gen krentif pou Seyè a, Bondye nou an, chak jou pandan tout tan n'ap viv nan peyi nou

14

pral pran pou nou an, lè n'a janbe lòt bò larivyè Jouden an. ¶ Lè sa a, Seyè a di Moyiz konsa: -Ou pa lwen mouri. Rele Jozye. Vini ansanm avè l' nan Tant Randevou a pou m' ka ba li lòd sa pou

15

l' fè. Se konsa, Moyiz ak Jozye al kanpe nan Tant Randevou a. Seyè a parèt devan yo anndan

16

Tant Randevou a, nan yon nwaj ki te gen fòm yon gwo poto devan pòt tant lan. Seyè a di Moyiz: -Ou pral mouri. Ou pa lwen al jwenn zansèt ou yo ki mouri deja. Men, apre ou fin mouri, pèp la pral leve, yo pral vire do ban mwen pou y' al kouri dèyè lòt bondye y'ap sèvi nan peyi lòt nasyon

17

kote nou pral antre a. Wi, yo pral lage m', yo pral kase kontra m' te pase avèk yo a. Lè sa va rive, m'a fè yon sèl kòlè anwo yo, m'a lage yo tout, mwen p'ap okipe yo ankò. Se peri y'a peri. Tout kalite malè ak lafliksyon pral tonbe sou yo. Se lè sa a y'a blije rekonèt se paske Bondye yo a pa la

18

nan mitan yo ankò kifè tout malè sa yo rive yo. Men malgre sa, mwen menm m'a refize ede yo

19

paske yo te fè twòp bagay mal lè yo te al kouri dèyè lòt bondye. Koulye a, ekri chante sa a. W'a moutre tout moun pèp Izrayèl yo li, pou l' ka nan bouch yo tout, epi pou l' sa sèvi m' temwen kont

20

yo. Lè m'ap fè yo antre nan peyi mwen te pwomèt bay zansèt yo a, peyi kote lèt ak siwo myèl ap koule tankou dlo a, m'a fè yo manje plen vant yo, y'a viv alèz. Men, y'a kouri dèyè lòt bondye,

21

y'a sèvi yo. Men mwen menm, y'a voye m' jete, y'a kraze kontra mwen te pase ak yo a. Konsa, lè tout kalite malè ak lafliksyon va tonbe sou yo, chante sa a va sèvi m' temwen, l'ap toujou nan bouch yo, paske pitit yo p'ap janm bliye l'. Wi, depi koulye a, anvan menm mwen fè yo antre nan

22

peyi mwen te pwomèt yo a, mwen konnen sa yo gen nan tèt yo. ¶ Menm jou sa a, Moyiz ekri

23

chante a epi li moutre tout moun pèp Izrayèl yo li. Apre sa, Seyè a bay Jozye, pitit gason Noun lan, lòd li yo. Li di l' konsa: -Mete gason sou ou. Se pou ou vanyan. Paske se ou menm ki pou fè

moun pèp Izrayèl yo antre nan peyi mwen te pwomèt m'ap ba yo a. M'ap kanpe la avè ou. ²⁴ Lè
 Moyiz fin ekri tout pawòl lalwa Bondye a nan yon liv san li pa sote anyen, ²⁵ li rele moun Levi ki
 te reskonsab pou pote Bwat Kontra Seyè a, li di yo konsa: ²⁶ -Pran liv lalwa a, mete l' sou kote
 Bwat Kontra Seyè a, Bondye nou an. L'a rete la, l'a sèvi temwen kont nou. ²⁷ Mwen konnen jan
 nou gen tèt di, jan nou pa vle koute. Si koulye a, pandan mwen vivan ankò nan mitan nou an, nou
 te kenbe tèt ak Seyè a konsa, lè m'a mouri menm se va pi rèd. ²⁸ Sanble bò kote m' tout chèf fanmi
 nou yo ak tout chèf branch fanmi nou yo pou m' fè yo tandè pawòl sa yo. Mwen pral pran syèl la
 ak latè a sèvi m' temwen sa mwen pral di nou la a. ²⁹ Paske mwen konnen, lè m'a mouri, nou pral
 lage kò nou nan fè move bagay, nou pral kite chemen mwen te louvri devan nou an. Lè sa a, malè
 pral tonbe sou nou, paske nou te fè sa ki mal nan je Seyè a, nou te eksite kòlè li avèk tout move
 bagay nou t'ap fè yo. ³⁰ Lè sa a, Moyiz pran resite byen fò tout chante sa a, depi nan konmansman
 jouk li bout, devan tout moun pèp Izrayèl yo ki te reyini pou yo te ka tandè sa l'ap di a.

Chapter 32

¹ ¶ Ou menm syèl, tandè sa mwen pral di la a! Koute byen, ou menm latè, pawòl ki pral soti
 nan bouch mwen! ² Sa m'ap di a pral tonbe tankou grenn lapli! Pawòl mwen yo pral tankou lawouze
 k'ap tonbe sou latè. Pawòl nan bouch mwen pral tankou bèl lapli k'ap tonbe sou jenn plant yo,
 tankou yon ti lapli nò k'ap tonbe sou zèb gazon. ³ Mwen pral fè lwanj Seyè a! Rekonèt jan Bondye
 nou an gen pouvwa! ⁴ Se Seyè a k'ap pwoteje nou. Tou sa li fè bon nèt. Li pa nan patipri nan anyen
 l'ap fè. Bondye nou an ap toujou kenbe pawòl li Li pa nan bay manti. Li fè sa ki dwat, li pa fè
 ankenn lenjistis. ⁵ Se yo menm, pèp li a, ki pa kenbe pawòl yo, bagay yon bon pitit Bondye pa ta
 janm fè. Se yon bann mechan k'ap mache twonpe moun. ⁶ Se konsa nou di Seyè a mèsè pou sa l'
 fè pou nou, bann moun fou san konprann? Se pa li ki papa nou? Se pa li ki kreye nou? Se pa li ki
 fè nou sa nou ye a? Se pa li ki ban nou lavi? ⁷ ¶ Chonje tan lontan! Repase tèt nou sou tan lontan!
 Mande papa nou pou li di nou sak te pase. Mande granmoun lontan yo rakonte nou istwa tan lontan.
⁸ Lè Bondye ki anwo nan syèl la t'ap bay chak nasyon pòsyon ki pou yo, lè li t'ap bay kote pou chak
 moun rete sou latè, li fikse fwontyè tout peyi dapre kantite moun li te mete sou latè. ⁹ Men, li chwazi
 pitit Jakòb yo pou li. Se yo ki pèp pa l' la menm. ¹⁰ Li te jwenn yo nan dezè a, kote moun pa rete,

kote van an ap soufle san rete. Li pran yo nan bra l', li pran swen yo, li pwoteje yo tankou de grenn
 je nan tèt li. ¹¹ Tankou malfini k'ap moutre pitit li vole, Seyè a ap plane anwo pitit li yo. Li louvri
 zèl li yo pou li ka pran swen yo, li pote yo sou do l' pou yo pa tonbe. ¹² Seyè a sèl chèf yo. Li pa
 bezwen lòt bondye pou ede l'. ¹³ Li fè yo mache an grannèg sou tèt mòn peyi a. Li fè yo manje
 grenn bwa nan savann. Yo jwenn siwo myèl nan tou wòch pou yo bwè. Pye oliv yo donnen nan
 wòch karyann. ¹⁴ Bèl yo ak mouton yo ap bay lèt an kantite. Y'a manje vyann mouton gra, vyann
 belye Bazan ak vyann bouk kabrit. Y'a manje pi bon kalite farin frans, y'a bwè ji rezen pou diven.
¹⁵ ¶ Pitit Jakòb yo manje plen vant yo! Yo vin gra, y'ap pete nan po yo, yo konmanse voye pye. Yo
 voye Bondye ki te fè yo a jete. Yo vire do bay Bondye ki t'ap pwoteje yo a, Bondye ki te delivre
 yo a. ¹⁶ Y' al adore bondye lòt nasyon. Yo fè Seyè a fè jalouzi, y' al fè sa ki mal, yo fè l' fè kòlè.
¹⁷ Y' al ofri bèt pou yo touye bay zidòl ki pa bondye tout bon, yon kalite bondye yo pa t' janm
 konnen anvan, lòt bondye ki fèk parèt, bondye zansèt yo pa t' janm gen krentif. ¹⁸ Yo bliye Bondye
 ki te pwoteje yo, Bondye ki papa yo a. Yo pa chonje Bondye ki te fè yo, Bondye ki te ba yo lavi
 a. ¹⁹ ¶ Lè Seyè a wè sa, li fache. Li fè kòlè sou pitit gason l' yo ak sou pitit fi l' yo! ²⁰ Li di: mwen
 pral vire do m' ba yo. M'a wè sa ki pral rive yo. Se yon bann moun ki plen vis, yon bann pitit ou
 pa ka fin fye nèt. ²¹ Yo fè m' fè jalouzi, y' al adore yon bondye ki pa bondye tout bon. Yo fè m' fè
 kòlè, y' al fè sèvis pou zidòl ki pa vo anyen. Enben, mwen menm, mwen pral fè yo fè jalouzi pou
 yon pèp ki pa menm yon pèp. M'ap fè yo fè kòlè pou yon nasyon moun ki san konprann. ²² Lè m'
 an kòlè, se tankou yon gwo dife k'ap flanbe. Mwen boule tou sa ki sou latè. Mwen desann byen
 fon kote mò yo ye anba tè a. M'ap mete dife jouk nan rasin mòn yo. ²³ M'ap fè yon seri malè tonbe
 sou yo. M'ap voye tout flèch mwen yo sou yo. ²⁴ Y'a mouri grangou. Lafyèb va fini ak yo. Move
 maladi va minen yo. M'a voye bèt nan bwa atake yo. M'a voye sèpan ak pwazon venen pou touye
 yo. ²⁵ Nan lari, y'a touye pitit pitit gason yo nan goumen. Moun ki anndan kay va sitèlman pè, kè
 yo va rete. Jenn gason ak jenn fi va mouri menm jan an tou. Depi timoun nan tete jouk granmoun
 cheve blan, pesonn p'ap chape. ²⁶ ¶ Mwen te di mwen tapral detwi yo nèt, pou pesonn pa janm
 chonje yo ankò sou latè. ²⁷ Men, mwen pa ta vle kite lènmi yo pran pye sou yo. Mwen pa ta renmen
 pou moun ki pa vle wè m' yo mete nan tèt yo se yo menm ak fòs kouraj yo ki fè sa, pou yo pa di:
 Seyè a pa gen anyen pou l' wè nan sa. ²⁸ Pèp Izrayèl la, se yon pèp ki pèdi bonnanj yo. Yo pa gen
 konprann. ²⁹ Si yo te gen konprann, yo ta louvri je yo, yo ta wè sa ki pral rive yo. ³⁰ Kouman ou
 ta vle pou yon sèl grenn lènmi fè mil ladan yo kouri, pou de grenn lènmi fè dimil ladan yo kraze

rak? Se sèlman paske Seyè a lage yo, paske moun ki te konn pwoteje yo a vire do ba yo. ³¹ Lènmi
 yo konn byen pwòp bondye k'ap pwoteje yo a pa ka parèt devan Bondye pèp Izrayèl la. ³² Ou ta
 di se menm ras moun Sodòm ak Gomò yo ye. Yo tankou pye rezen k'ap donner rezen anmè, rezen
³³ ki plen pwazon. ³⁴ Diven yo tankou pwazon nan bouch sèpan, venen nan bouch sèpan aspik k'ap
 touye moun frèt. ³⁵ Seyè a konnen tou sa lènmi te fè pèp la. L'ap tann lè a rive pou l' pini yo. ³⁶ Se
 Seyè a k'ap tire revanj sou yo, se li k'ap fè yo peye sa yo fè a, lè lè a va rive pou yo tonbe. Jou pou
 yo detwi yo a pa lwen. Sa ki pare pou yo a fin rive. ³⁷ Seyè a pral pran defans pèp li a, lè l'a wè
 tout fòs yo fin desann. Li pral gen pitye pou sèvitè l' yo, lè l'a wè pa gen anpil ankò ki rete, ni anndan
 peyi a, ni deyò. ³⁸ Lè sa a, Seyè a va mande: -Kote bondye yo a, sa ki te konn pwoteje yo a? bondye
 yo te konn al jwenn pou pran defans yo a? ³⁹ Se pa yo ki te konn manje grès bèt nou te konn ofri
 yo? Se pa yo ki te konn bwè diven nou te konn vide sou lòtèl yo? Se pou yo vin koulye a, se pou
 yo vin delivre nou! Se pou yo kouri vin pwoteje nou! ⁴⁰ ¶ Se mwen menm, mwen menm sèl ki
 Bondye. Pa gen lòt bondye pase mwen menm. Mwen bay lavi, mwen pran lavi jan m' vle. Lè mwen
 bay maladi, se mwen ki pou bay gerizon. Pa gen moun ki ka delivre pesonn anba men mwen.
⁴¹ Men m'ap leve men m' anlè, mwen fè sèman: Menm jan nou wè m' vivan pou tout tan an, ⁴² lè
 m'a file bèl nepe klere mwen an, lè m'a soti pou m' rann jistis, m'a tire revanj mwen sou lènmi m'
 yo, m'a bay moun ki pa vle wè m' yo sa yo merite. ⁴³ Flèch mwen yo pral tranpe nan san, nan san
 moun blese yo ak san prizonye yo. Nepe mwen ap koupe moun san gad dèyè, l'ap koupe tèt tout
 chèf lènmi yo. ⁴⁴ Nou menm nasyon ki sou latè, fè kè nou kontan ak pèp Bondye chwazi a! Paske
 Seyè a pral tire revanj pou lanmò sèvitè l' yo. L'a bay moun ki pa vle wè l' yo sa yo merite. L'a wete
 tout vye bagay ki t'ap fèt nan peyi pèp li a. ⁴⁵ ¶ Moyiz ak Jozye, pitit gason Noun lan, te repete
 tout pawòl chante sa a byen fò pou tout pèp la te tande. ⁴⁶ Lè Moyiz fin bay pèp Izrayèl la tout
 pawòl sa yo, ⁴⁷ li di yo konsa: -Se pou nou koute tout kòmandman m'ap ban nou jòdi a. Y'a sèvi
 m' temwen mwen te fè nou konnen yo. Nou menm, n'a pase pitit nou yo lòd pou yo kenbe yo, pou
 yo swiv tout pawòl ki nan lalwa Bondye a. ⁴⁸ Paske, se pa pawòl nou ka pran konsa konsa. Se lavi
 yo ye pou nou. Se yo menm k'ap fè nou viv lontan nan peyi nou pral pran pou nou an, lè n'a fin
 janbe lòt bò larivyè Jouden an. ⁴⁹ Menm jou sa a, Seyè a pale ak Moyiz, li di l' konsa: ⁵⁰ -Ale nan
 chenn mòn Abarim yo, ki nan peyi Moab anfas lavil Jeriko a. Moute sou mòn Nebo. Antan ou la,
 w'a voye je ou, w'a gade, w'a wè peyi Kanaran an, peyi mwen pral bay moun pèp Izrayèl yo pou
 yo rete a. ⁵⁰ Ou pral mouri sou mòn kote ou pral moute a, ou pral jwenn moun pa ou yo ki deja
 mouri, menm jan sa te rive Arawon, frè ou la, ki te mouri sou mòn Or la, epi ki te al jwenn moun

51
 pa l' yo ki deja mouri. Nou tou de, nou pa t' fè sa m' te di nou fè devan pèp Izrayèl la, lè yo te bò sous dlo Meriba yo, bò lavil Kadès, nan dezè Zin lan. Nou te manke m' respe devan tout pèp Izrayèl la. 52
 Se poutèt sa, w'a rete byen lwen, w'a wè peyi mwenn pral bay moun pèp Izrayèl yo anba nan pye ou. Men ou menm, ou p'ap mete pye ou ladan l'.

Chapter 33

1 ¶ Men benediksyon Moyiz, sèvitè Bondye a, te bay moun pèp Izrayèl yo anvan li mouri. 2 Li di: -Seyè a soti mòn Sinayi, li leve tankou solèy lòt bò peyi Seyi. L'ap klere depi sou tèt mòn Paran an. Li rive jouk Meriba nan peyi Kadès. Sou bò dwat li yon flanm dife. 3 Seyè a renmen tout pèp sou latè. Men, li pwoteje tout moun k'ap viv apa pou li. Yo bese nan pye l'. Yo resevwa lòd l'ap ba yo. 4 Moyiz ban nou lalwa. Se yon byen li kite pou tout fanmi Jakòb la. 5 Seyè a te wa nan mitan pèp Izrayèl la lè tout chèf pèp la te reyini, lè tout branch fanmi pèp Izrayèl la te sanble. 6 ¶ Men sa li di pou branch fanmi Woubenn lan: Se pou Woubenn viv lontan! Fanmi li p'ap janm disparèt, malgre li pa gen anpil moun. 7 Men sa li di pou branch fanmi Jida a: Seyè, koute vwa moun fanmi Jida yo! Fè yo mete tèt yo ansanm ankò ak rèz pèp la. Goumen pou yo, Seyè! Se pou ou ede yo lè y'ap batay ak lènmi l' yo. 8 ¶ Men sa li di pou branch fanmi Levi a: Seyè! Se ou menm ki pou fè yo konnen volonte ou. Y'ap sèvi ou san lage. Ou te sonde yo bò Masa. Ou te kenbe tèt ak yo bò sous dlo Meriba yo. 9 Yo pa konn papa! Yo pa konn manman! Yo pa konn frè! Yo pa konn pitit! Se lòd ou yo y'ap swiv, se kontra ou la y'ap kenbe fèm. 10 Y'a moutre pitit Jakòb yo regleman ou yo. Y'a moutre pitit Izrayèl yo lalwa ou la. Y'a boule lansan devan ou, y'a ofri sou lòtèl bèt yo touye pou boule nèt pou ou. 11 Seyè, ba yo anpil kouraj! Se pou yo fè ou plezi nan tou sa y'ap fè! Kase ren moun ki pa vle wè yo. Se pou lènmi l' yo pa ka leve tèt ankò. 12 ¶ Men sa li di pou branch fanmi Benjamen an: Se moun Seyè a renmen anpil. Y'a viv ak kè poze bò kote l'. Bondye ki anwo nan syèl la va toujou pwoteje yo, l'a moute kay li nan mitan yo. 13 Men sa li di pou branch fanmi Jozèf la: Se pou Seyè a beni peyi ki pou yo a. L'a voye bonkou lapli sot nan syèl la, l'a fè sous dlo pete toupatou. 14 L'a fè pyebwa ki donnent chak lanne bay bon rekòt. L'a fè pyebwa ki donnent chak sezon bay bon fwi. 15 L'a fè vye mòn yo bay bèl rekòt. L'a fè vye tè mòn yo bay pi bon manje ki genyen. 16 L'a fè tè yo a bay tout kalite bon rekòt. Bondye ki te pale nan touf raje a va ba yo favè l'. Se pou tout benediksyon sa yo tonbe sou tèt Jozèf, paske nan tout pitit papa li yo, se li menm yo

17
te chwazi. Li byen kanpe tankou premye pitit yon towò bèf. L'ap gen fòs kouraj yon bèf savann. L'ap bat tout pèp ki sou latè ak kout kòn, l'ap kouri dèyè yo jouk nan dènnye bout latè. Wi, se sa tout milyon moun Efrayim yo ak tout kantite moun Manase yo pral fè.

18 ¶ Men sa li di pou branch fanmi Zabilon an ak branch fanmi Isaka a: Nou menm moun Zabilon yo, se pou trafik sou lanmè nou mache byen. Nou menm moun Isaka yo, se pou komès n'ap fè lakay nou mache byen tou.

19 Yo rele tout moun lòt nasyon yo vin sou mòn lan. Se la y'a fè ofrann Bondye mande yo, paske yo fè tout lajan yo sou lanmè, nan komès yo fè sou lanmè ak nan trafik lakòt y'ap fè toupatou.

20 Men sa li di pou branch fanmi Gad la: Lwanj pou Bondye ki bay Gad anpil tè pou l' rete. Gad kouche tankou yon lyon k'ap veye, pou l' dechire yon bra, yon tèt, yon figi.

21 Yo pran pi bon venn tè a pou yo. Se pòsyon tè ki toujou vin pou chèf. Se yo k'ap mache devan pèp la. Yo fè tou sa Seyè a te mande, yo swiv tout regleman Seyè a te bay pèp Izrayèl la.

22 ¶ Men sa li di pou branch fanmi Dann lan: Dann se yon jenn ti lyon k'ap kouri soti peyi Bazan.

23 Men sa li di pou branch fanmi Neftali a: Neftali resevwa kont benediksyon l'. Seyè a fè l' anpil anpil favè. Pòsyon tè yo ap soti bò letan an, l'ap desann jouk nan pwent sid peyi a.

24 Men sa li di pou branch fanmi Asè a: Nan tout pitit Jakòb yo, benediksyon pou Asè! Tout frè li yo ap renmen l'. Se pou tè li yo rich ak pye oliv.

25 Se pou pòtay lavil li yo fèt an fè ak an asye, pou li ka toujou viv ak kè poze.

26 ¶ Pa gen tankou Bondye moun pèp Izrayèl la. Li kouri sou nwaj yo nan syèl la pou l' vin pote yo sekou avèk fòs ponyèt li.

27 Bondye ki la pou tout tan an ap pwoteje nou. L'ap pran dèfans nou ak pouvwa li ki p'ap janm fini. L'ap fè lènmi nou yo kouri met deyò devan nou, l'ap ban nou lòd pou nou detwi yo nèt.

28 Pèp Izrayèl la ap viv ak kè poze. Moun pèp Izrayèl yo p'ap viv tankou lòt nasyon yo. Y'ap viv nan yon peyi k'ap bay anpil farin ak diven, nan yon peyi kote ki p'ap janm manke lapli.

29 Ala bon sa bon pou nou, moun pèp Izrayèl! Pa gen tankou nou! Se Seyè a menm ki delivrans nou! Se li ki pwoteksyon nou! Se li ki defans nou! L'ap mache devan nou pou l' fè nou genyen batay la. Lènmi nou yo va vin mande padon nan pye nou. Men nou menm, n'a kraze sa ki fè lògèy yo a anba pye nou.

Chapter 34

1 ¶ Moyiz kite plenn Moab yo, li moute sou mòn Nebo a, sou tèt mòn Pisga a ki anfas lavil Jeriko a. Antan li la, Seyè a fè l' wè tout peyi a, depi zòn Galarad la rive jouk pòsyon tè ki pou Dann lan,

2 tout pòsyon ki pou Neftali a, tout peyi Efrayim lan ak peyi Manase a, tout peyi Jida a rive

sou lanmè Mediterane a, ³ tout zòn Negèv la, fon larivyè Jouden an, depi plenn Jeriko, lavil pye
 koko ginen yo, desann jouk lavil Zoa. ⁴ Seyè a di li konsa: -Men peyi mwen te pwomèt Abraram,
 Izarak ak Jakòb mwen t'ap bay pitit pitit yo k'ap vin apre yo a. Mwen fè ou wè l' ak je ou, men ou
 p'ap antre ladan l'. ⁵ ¶ Se la Moyiz, sèvitè Seyè a, te mouri nan peyi Moab la, jan Seyè a te di li t'ap
 mouri a. ⁶ Seyè a antere l' nan peyi Moab la, nan fon ki anfas Bèt-Peyò a. Jouk jòdi a, pesonn pa
 konnen ki kote li antere. ⁷ Lè Moyiz mouri, li te gen sanventan. Li te wè byen nan je l' toujou, li
 te byen enganm toujou. ⁸ Moun pèp Izrayèl yo pase trant jou nan plenn Moab yo ap kriye lanmò
 li. Apre sa, yo fini ak tan yo t'ap pase ap kriye pou lanmò Moyiz la. ⁹ ¶ Jozye, pitit gason Noun
 lan, te vin gen anpil bon konprann sou li, paske Moyiz te mete men sou tèt li. Moun Izrayèl yo
 koute tou sa Jozye di yo. Yo fè tou sa Seyè a te bay Moyiz lòd pou yo fè a. ¹⁰ Depi lè sa a, pa janm
 gen lòt pwofèt konsa ankò ki parèt nan mitan pèp Izrayèl la tankou Moyiz. Seyè a te konn pale avè
 l' fas pou fas. ¹¹ Pa gen lòt pwofèt ki janm fè tout mirak ak tout mèvyè sa yo Seyè a te voye l' al
 fè nan peyi Lejip, kont farawon an, kont moun k'ap sèvi gouvènman l' yo ak tout moun ki te nan
 peyi a. ¹² Pa gen lòt pwofèt ki janm gen menm pouvwa sa a pou fè tout kalite gwo bagay sa yo
 Moyiz te fè devan tout pèp Izrayèl la.

Joshua

Chapter 1

¹ ¶ Apre Moyiz, sèvitè Seyè a, mouri, Seyè a pale ak Jozye, pitit gason Noun lan, ki te aladwat
 Moyiz nan tou sa li t'ap fè. Li di l' konsa: ² -Koulye a, Moyiz, sèvitè m' lan, mouri. Pare kò ou, ou
 menm ansanm ak tout pèp Izrayèl la. Nou pral janbe lòt bò larivyè Jouden an pou nou ka antre nan
 peyi m'ap ban nou an. ³ Jan mwen te di Moyiz la, mwen pral ban nou tout peyi kote nou pral mete
 pye nou an. ⁴ Peyi a pral konmanse depi nan dezè a sou bò nan sid, jouk mòn Liban nou wè laba
 a, nan nò. L'ap pran tout peyi moun Et yo, depi larivyè Lefrat sou bò solèy leve, jouk gwo lanmè
 a sou bò solèy kouche. ⁵ Pandan tout rès vi ou, pesonn p'ap ka kenbe tèt ak ou. M'ap toujou kanpe
 la avèk ou, menm jan mwen te toujou la avèk Moyiz. Mwen p'ap vire do ba ou, mwen p'ap janm
 lage ou. ⁶ Mete gason sou ou! Pa janm dekouraje, paske se ou menm ki pral fè pèp la antre pran

peyi mwen te fè sèman m'ap bay zansèt yo a. ⁷ Wi. Sèl bagay mwen mande ou, se mete gason sou ou, pa janm dekouraje. Veye kò ou pou ou mache dapre tout lòd Moyiz, sèvitè m' lan, te ba ou yo.

Pa janm neglije anyen nan sa li te di ou, pou zafè ou ka mache byen kote ou pase. ⁸ Se pou pawòl ki nan liv lalwa a toujou nan bouch ou. Se pou w'ap kalkile yo nan tèt ou lajounen kou lannwit, pou ou ka viv dapre sa ki ekri nan liv la. Se konsa w'a mennen bak ou byen. Tout zafè ou va mache

byen. ⁹ Chonje lòd mwen te ba ou! Mete gason sou ou! Pa janm dekouraje! Ou pa bezwen tranble, ou pa bezwen pè, paske Seyè a, Bondye ou la, ap toujou kanpe la avèk ou kote ou pase. ¹⁰ ¶ Lè sa a, Jozye rele tout chèf pèp la. Li ba yo lòd sa a: ¹¹ -Mache nan tout kan an. Bay pèp la lòd pou yo pare tout zafè yo, paske nan twa jou nou pral janbe lòt bò larivyè Jouden an pou nou antre nan peyi Seyè a, Bondye nou an, ap ban nou pou peyi pa nou. ¹² Apre sa, Jozye pale ak moun branch fanmi Woubenn yo ak moun branch fanmi Gad yo ansanm ak mwaye moun nan branch fanmi Manase a. Li di yo: ¹³ -Chonje lòd Moyiz, sèvitè Seyè a, te ban nou lè li te di nou: Seyè a, Bondye nou an, ap ban nou tè bò isit la pou nou tabli, pou nou viv ak kè poze. ¹⁴ Madanm nou, pitit nou ak tout bèt nou yo pral rete nan peyi Moyiz ban nou sou bò isit larivyè Jouden an, bò solèy leve a. Men, nou menm gason yo, vanyan sòlda, se pou nou pran zam nou nan men nou pou nou mache devan tout rès pèp la, pou nou ka ede yo, si gen nesosite. ¹⁵ Lè Seyè a va fin fè yo pran peyi a pou yo, lè l'a fin ba yo yon kote pou yo viv ak kè poze, menm jan li te fè l' pou nou an, se lè sa a atò n'a tounen nan peyi ki pou nou an. Wi, n'a vin rete nan peyi pa nou an, peyi Moyiz, sèvitè Bondye a, te ban nou lòt bò larivyè Jouden an, sou bò solèy leve. ¹⁶ ¶ Yo tout yo reponn Jozye, yo di l': -Tou sa ou ban nou lòd fè, n'ap fè l'! Kote ou voye nou, nou prale! ¹⁷ Menm jan nou te toujou obeyi Moyiz, se konsa n'ap obeyi ou tou. Sèl bagay, n'ap lapriyè pou Bondye toujou kanpe avèk ou menm jan li te kanpe ak Moyiz la. ¹⁸ Se pou yo touye tout moun ki pa dakò ak lòd ou, osinon ki pa vle obeyi lòd ou bay, osinon ki derefize fè sa ou mande yo fè. Sèlman, met gason sou ou! Pa janm dekouraje!

Chapter 2

¹ ¶ Lè sa a, Jozye, pitit gason Noun lan, rete Sitim kote yo te ye a, li voye de nèg an kachèt al wè jan sa ye lavil Jeriko. Li di yo: -Ale vizite peyi a ak lavil Jeriko. Se konsa mesye yo ale, yo antre lakay yon jennès ki te rele Rarab. Se la yo desann. ² Men, nouvèl la tonbe nan zòrèy wa Jeriko a. Yo vin di l' konsa: -Gen kèk moun nan pèp Izrayèl la ki antre isit la lannwit lan pou espyonnen nou. ³ Lè wa a tande sa, li voye di Rarab konsa: -Mesye ki vin lakay ou yo, se espyonnen yo vin

4
 espyonnen tou sa k'ap fèt nan peyi a, tandè! Mete yo deyò lakay ou. Men, fanm lan menm pa fè
 ni de ni twa, li pran de mesye yo, li kache yo. Apre sa, li voye di wa a: -Wi, te gen kèk mesye ki
 5
 te vin lakay mwen. Mwen pa t' konnen ki bò yo soti. Men, lè yo tapral fèmèn pòtay la apre solèy
 fin kouche, mesye yo soti, y' ale fè wout yo. Mwen pa konn ki wout yo fè. Si nou fè vit rapouswiv
 6
 yo, n'a jwenn yo. Men madanm lan te fè de mesye yo moute sou teras anwo kay li a, li te kache
 7
 yo anba yon pakèt kòs bwa ki te blayi atè sou teras la pou yo cheche. Sòlda wa yo menm soti sou
 wout ki mennen larivyè Jouden an, yo pati dèyè mesye yo pou yo pran yo anvan yo rive nan pas
 8
 la. Soti sòlda yo soti, yo fèmèn pòtay la. ¶ Anvan mesye yo gen tan dòmi, Rarab moute bò kote
 9
 yo, sou teras la. Li di yo: -Mwen konnen Seyè a lage peyi a nan men nou. Mwen rekonèt tout
 10
 moun pè nou, tout moun nan peyi a pa konn sa pou yo fè devan nou. Paske, nou tandè ki jan
 Seyè a te cheche dlo Lanmè Wouj la devan nou lè nou t'ap soti kite peyi Lejip la. Nou tandè sa nou
 te fè Siyon ak Og, de wa peyi Amori yo, ki rete lòt bò larivyè Jouden an, jan nou te touye yo pou
 11
 Seyè a. Lè nou tandè sa, kè nou fann. Tout moun pèdi kouraj lè yo wè nou, paske Seyè a, Bondye
 12
 nou an, se li menm vre ki Bondye anwo nan syèl la ak sou latè a. Koulye a, m'ap mande nou
 pou nou fè sèman devan Seyè a pou nou pwomèt n'ap aji byen avèk fanmi mwen, menm jan mwen
 13
 aji byen avèk nou tou. Men sa m'ap mande nou pou nou fè pou mwen. Tanpri, sove lavi manman
 m' ak papa m', sove lavi frè m' yo ak sè m' yo ansanm ak tout fanmi m' yo. Pa kite yo touye nou.
 14
 Mesye yo reponn li. -Nou pwomèt ou n'a pito mouri nou menm pase pou n' kite yo touye ou. Si
 ou pa di pesonn sa nou vin fè isit la, lè Seyè a va ban nou peyi a, n'a aji byen avè ou, n'a kenbe
 15
 pawòl nou. Rarab te rete nan yon kay ki te bati nan miray ranpa lavil la. Se konsa, li file yon
 16
 kòd desann nan fennèt lakay li a, li fè mesye yo desann sou deyò. Li di yo: -Ale nan mòn yo
 pou nou pa kontre ak moun yo voye dèyè nou yo. N'a rete kache la pandan twa jou. Sa va ba yo
 17
 tan pou yo tounen. Apre sa, nou mèt al fè wout nou. Mesye yo di l': -N'ap kenbe pwomès ou te
 18
 fè nou fè ou la. Tandè byen. Lè n'a anvayi peyi a, w'a mare kòdon wouj sa a nan fennèt kote ou
 fè nou desann lan. W'a pran manman ou ak papa ou, frè ou yo ak tout lòt moun ki nan fanmi ou
 19
 lan, w'a fè yo reyini lakay ou. Lè sa a, nenpòt kilès ladan yo ki va soti lakay ou, sa ki rive l' se
 20
 pa l'. Se p'ap fòt nou. Men, si anyen rive yon moun andedan lakay ou, se va fòt pa nou. Konsa
 tou, si ou di yon moun sa nou te vin fè a, nou p'ap gen ankenn obligasyon kenbe pwomès nou te fè
 21
 ou la ankò. Fanm lan di yo: -Mwen dakò ak sa nou di a! Epi li voye yo ale, yo pati. Apre sa, li
 22
 pran ti kòdon wouj la, li mare l' nan fennèt la. ¶ De mesye yo menm ale, yo rive nan mòn yo.

Yo rete kache la pandan twa jou. Moun yo te voye dèyè yo menm t'ap chache yo sou tout wout la, men yo pa jwenn yo. Bout pou bout, yo tounen lavil Jeriko. ²³ Lè sa a, de mesye yo tounen, yo desann soti nan mòn yo, yo janbe larivyè Jouden an, y' al jwenn Jozye, pitit Noun lan, yo rakonte ²⁴ l' tou sa ki te rive yo. Yo di l' konsa: -Seyè a lage tout peyi a nan men nou. Tout moun nan peyi a ap tranble tèlman yo pè nou.

Chapter 3

¹ ¶ Jozye leve granmaten, epi li menm ansanm ak tout pèp Izrayèl la yo kite Sitim kote yo te ye a, yo rive devan larivyè Jouden an. Epi yo pase nwit lan la anvan yo janbe lòt bò a. ² Twa jou apre sa, chèf yo mache nan tout kan an. ³ Yo t'ap bay pèp la lòd sa pou yo fè. Yo t'ap di yo: -Lè n'a wè prèt yo ak moun Levi yo leve Bwat Kontra Seyè a, Bondye nou an, pou yo pati, n'a fè pakèt nou pou nou ka swiv yo. ⁴ Se konsa n'a konnen ki wout pou nou pran, paske nou poko janm pase bò isit la. Men, piga nou pwoche twò pre Bwat Kontra a. N'a kite yon distans senksan (500) mètr konsa ⁵ ant li ak nou. Apre sa, Jozye di pèp la: -Mete nou nan kondisyon pou nou fè sèvis pou Bondye, paske denmen Seyè a pral fè mèvèy devan je nou. ⁶ Jozye pale ak prèt yo, li di yo: -Pran Bwat Kontra a, epi pran devan pèp la sou wout la. Prèt yo pran Bwat Kontra a, epi yo pran devan pèp la. ⁷ ¶ Seyè a di Jozye konsa: -Sa mwen pral fè jòdi a pral fè tout pèp Izrayèl la respekte ou tankou yon grannèg. Yo pral konnen mwen kanpe la avè ou menm jan mwen te kanpe avèk Moyiz. ⁸ Ou menm, pase prèt k'ap pote Bwat Kontra a lòd sa a. Di yo lè y'a rive bò rivyè a, y'a antre nan dlo a, epi y'a rete toupre rivaj la. ⁹ Lè sa a, Jozye di moun pèp Izrayèl la: -Pwoche non: Vin tandè sa Seyè a, Bondye nou an, gen pou di nou. ¹⁰ Lèfini, Jozye di yo konsa: -Jòdi a, nou pral konnen Seyè a, Bondye vivan an, nan mitan nou vre. Li pral chase devan nou moun Kanaran yo, moun Et yo, moun Evi yo, moun Ferezi yo, moun Gigach yo, moun Amori yo, moun Jebis yo. ¹¹ Bwat Kontra Mèt tout latè a pral janbe lòt bò larivyè Jouden an anvan nou. ¹² Chwazi douzòm, yonn nan chak branch fanmi pèp Izrayèl la. ¹³ Lè prèt k'ap pote Bwat Kontra Seyè a, Mèt tout latè a, va mete pye yo nan dlo larivyè Jouden an, larivyè a pral sispann koule desann, dlo a pral gonfle yon sèl kote bò tèt dlo a. ¹⁴ ¶ Se konsa, pèp la leve, yo kite kote yo te ye a. Yo pati pou janbe lòt bò larivyè Jouden an. Prèt yo pran devan pèp la avèk Bwat Kontra a. ¹⁵ Se te sezon rekòt, rivyè a t'ap desann, li te gonfle

moute sou tout rivaj la. Lè prèt ki t'ap pote Bwat Kontra a rive bò larivyè Jouden an, yo mete pye
¹⁶
yo nan dlo a. Dlo ki t'ap koule desann lan sispann koule. Li gonfle yon sèl bò, bò anwo byen
lwen, jouk Adam, lavil ki te toupre Zaretan an. Pa t' gen dlo ki t'ap koule desann nan lanmè Mouri
¹⁷
a ankò. Se konsa pèp la janbe lòt bò larivyè a toupre lavil Jeriko. Pandan pèp la t'ap janbe lòt
bò san tak dlo pa mouye pye yo, prèt yo te rete kanpe nan mitan larivyè a avèk Bwat Kontra a. Pa
t' gen tak dlo kote yo te ye a. Yo rete kanpe la jouk tout pèp la te fin pase nèt.

Chapter 4

¹
¶ Lè tout moun fin janbe lòt bò larivyè Jouden an, Seyè a pale ak Jozye. Li di l' konsa:
²
-³Chwazi douzòm, yonn nan chak branch fanmi yo. W'a ba yo lòd pou yo chak pran yon wòch
nan mitan larivyè Jouden an, kote prèt yo te kanpe a. Y'a pran douz wòch sa yo, y'a pote yo lòt bò
⁴
larivyè a. N'a mete yo kote nou pral moute tant nou yo aswè a. Lè sa a, Jozye fè rele douz mesye
⁵
li te chwazi pami moun pèp Izrayèl yo, yonn pou chak branch fanmi yo. Epi li di yo: -Ale devan
Bwat Kontra Seyè a, Bondye nou an, ki nan mitan larivyè a. Chak moun va pran yon wòch mete
⁶
sou zepòl yo, yonn pou chak branch fanmi pèp Izrayèl la. Wòch sa yo va sèvi pou fè pèp la chonje
⁷
sa Seyè a te fè pou yo. Denmen, lè pitit nou yo va mande nou kisa wòch sa yo vle di pou nou, n'a
reponn yo: Dlo larivyè Jouden an te sispann koule devan Bwat Kontra Seyè a. Wòch sa yo la pou
pèp Izrayèl la ka toujou chonje dlo larivyè Jouden an te sispann koule lè yo t'ap janbe lòt bò larivyè
⁸
a. Mesye yo fè sa Jozye te ba yo lòd fè a. Jan Seyè a te di Jozye, yo pran douz wòch nan mitan
larivyè Jouden an, yonn pou chak branch fanmi pèp Izrayèl la, yo pote yo avèk yo lòt bò rivyè a.
⁹
Yo mete yo kote yo moute tant yo pou pase nwit lan. Apre sa, Jozye pran douz lòt wòch, li mete
yo kanpe nan mitan larivyè a, kote prèt ki t'ap pote Bwat Kontra yo te kanpe a. Wòch yo la jouk
¹⁰
koulye a. ¶ Prèt yo te rete kanpe avèk Bwat Kontra a sou zepòl yo, nan mitan larivyè a jouk yo
fin fè tout sa Seyè a te bay lòd pou pèp la te fè, jan Moyiz te mande pou Jozye fè l' la. Se konsa,
¹¹
pèp la prese janbe lòt bò larivyè a. Lè yo tout fin pase, prèt yo fè rès travès a ak Bwat Kontra
¹²
Seyè a, epi yo pran devan pèp la ankò. Premye moun ki te janbe lòt bò larivyè a, devan tout
pèp la se te gason branch fanmi Woubenn yo, gason branch fanmi Gad yo ak mwatye nan gason
¹³
branch fanmi Manase yo, jan Moyiz te di yo a. Yo te tou pare pou fè lagè. Jou sa a, te gen antou
karantmil (40.000) gason tou pare pou fè lagè ki te janbe al nan plenn Jeriko yo, devan je Seyè a.
¹⁴
Sa Seyè a te fè jou sa a te fè tout pèp Izrayèl la pran Jozye pou yon grannèg vre. Depi lè sa a yo

respekte msye jouk li mouri, menm jan yo te respekte Moyiz la. ¹⁵ Apre sa, Seyè a pale ak Jozye,
 li di l' konsa: ¹⁶ -Bay prèt k'ap pote Bwat Kontra a lòd pou yo soti nan larivyè Jouden an. ¹⁷ Jozye
 pale ak prèt yo, li ba yo lòd sa a: -Moute soti nan larivyè Jouden an. ¹⁸ Soti prèt yo soti nan larivyè
 a, lè pye yo touche tè sèk sou rivaj la, dlo larivyè a konmanse koule ankò jan li te toujou koule
 anvan an. Li gonfle moute rive jouk sou rivaj li yo. ¹⁹ Jou pèp la te janbe lòt bò larivyè Jouden an,
 se te dizyèm jou nan premye mwa a. Y' al moute tant yo yon kote ki rele Gilgal, ki te sou bò solèy
 leve lavil Jeriko. ²⁰ ¶ Se la Jozye pran douz wòch yo te pran nan mitan larivyè Jouden an, li mete
 yo kanpe fè yon wonn. ²¹ Lè l' fini, li di moun pèp Izrayèl yo konsa: -Denmen, lè pitit nou yo va
 mande papa yo poukisa wòch sa yo la a, ²² n'a fè pitit nou yo konnen pèp Izrayèl la te janbe lòt bò
 larivyè Jouden an san pye yo pa t' mouye. ²³ Paske Seyè a, Bondye nou an, te cheche dlo larivyè
 Jouden an devan nou jouk nou tout fin pase, menm jan li te cheche Lanmè Wouj la devan zansèt
 nou yo jouk yo tout te fin pase. ²⁴ Se poutèt sa, tout moun sou latè va konnen jan Seyè a gen
 pouvwa, lèfini nou menm n'a toujou gen krentif pou Seyè a, Bondye nou an.

Chapter 5

¹ ¶ Lè tout wa peyi Amori yo ki te rete lòt bò larivyè Jouden sou bò solèy kouche a ansanm ak
 tout wa peyi Kanaran yo ki te rete sou tout rivaj gwo lanmè Mediterane a vin konnen Seyè a te
 cheche dlo larivyè Jouden an pou pèp Izrayèl la te pase larivyè a, yo vin pè anpil, yo pèdi tout
 kouraj yo devan pèp Izrayèl la. ² Lè sa a, Seyè a pale ak Jozye, li di l' konsa: -Pran wòch dife, kase
 yo fè zenglen pou sikonsi gason pèp Izrayèl ki fèt nan dezè a. ³ Se konsa, Jozye fè yon bann zenglen
 wòch byen file, li sikonsi tout gason pèp Izrayèl la yon kote yo rele Bit po ti kòk. ⁴ Li te fè sa paske
 tout gason ki te gen laj pou yo pote zam lè yo te soti kite peyi Lejip la te mouri nan dezè a pandan
 yo t'ap vwayaje a. ⁵ Tout gason ki te vivan lè yo te soti kite peyi Lejip la te sikonsi. Men, ankenn
 nan gason ki te fèt pandan yo t'ap vwayaje nan dezè a pa t' ankò sikonsi. ⁶ Pèp Izrayèl la te pase
 karantan ap vwayaje nan dezè a. Pandan tout tan sa a, tout gason ki te gen laj pou fè lagè lè yo te
 soti kite peyi Lejip la te mouri, paske yo pa t' koute Seyè a lè li te pale yo. Se konsa li te di yo li pa
 t'ap kite yo yonn wè peyi li te pwomèt li t'ap bay zansèt yo a, bon peyi kote lèt ak siwo myèl ap
 koule tankou dlo a. ⁷ Men, li ba yo pitit pou ranplase yo. Se pitit sa yo Jozye te sikonsi paske yo

pa t' sikonsi yo lè yo t'ap vwayaje nan dezè a. ⁸ Lè li fin sikonsi tout gason yo, tout pèp la rete la
 kote yo te moute tant yo a, jouk yo te geri. ⁹ Apre sa, Seyè a di Jozye konsa: -Jòdi a mwen wete
 wont yo te fè nou nan peyi Lejip la, mwen voye l' jete. Se poutèt sa yo rele kote yo te ye a Gilgal
 jouk jòdi a. ¹⁰ ¶ Antan pèp Izrayèl la te rete Gilgal nan plenn ki toupre lavil Jeriko, yo fete Fèt
 Delivrans lan nan aswè katòzyèm jou premye mwa a. ¹¹ Nan denmen Fèt Delivrans lan, yo manje
 manje yo rekòlte nan peyi a: grenn ble griye ak pen kwit san ledven. ¹² Apre sa, laman lan sispann
 tonbe. Depi lè sa a, pèp Izrayèl la pa jwenn laman pou yo manje ankò. Pandan tout lanne a yo manje
 manje yo te rekòlte nan peyi Kanaran an. ¹³ ¶ Yon jou, antan Jozye te toupre lavil Jeriko a, li rete
 konsa, li wè yon nonm kanpe devan l' avèk yon nepe nan men l'. Jozye mache sou li, epi li mande
 l': -Ou se yonn nan moun pa nou yo osinon yon lènmi? ¹⁴ Nonm lan reponn li: -M' pa ni yonn ni
 lòt. Mwen se kòmandan an chèf lame Seyè a. Mwen fèk rive. Jozye tonbe ajenou devan l', li bese
 tèt li jouk atè, li di l' konsa: -Se sèvitè ou mwen ye, mèt. Kisa ou vle m' fè pou ou? ¹⁵ Kòmandan
 an chèf lame Seyè a di l' konsa: -Wete sapat nan pye ou. Kote ou kanpe a se yon kote ki apa pou
 Bondye. Epi Jozye fè sa li di l' fè a.

Chapter 6

¹ ¶ Yo te fèmen tout pòtay lavil Jeriko yo, yo te barikade yo poutèt moun pèp Izrayèl yo. Deyò
 pa antre, anndan pa soti. ² Seyè a di Jozye konsa: -Koute. Mwen pral lage lavil Jeriko nan men ou
 ansanm ak wa a ak tout vanyan sòlda li yo. ³ Ou menm ak tout sòlda pa ou yo, nou pral mache fè
 wonn lavil la yon fwa chak jou pandan sis jou. ⁴ Sèt prèt va mache devan Bwat Kontra a, avèk sèt
 kòn belye pou kònen, yonn nan men yo chak. Men, setyèm jou a, n'a mache fè wonn lavil la sèt
 fwa ansanm ak prèt k'ap kònen kòn belye yo. ⁵ Lè n'a tandè yon kout kòn ki trennen, tout pèp la
 va pran pouse yon sèl rèl byen fò. Miray ranpa lavil la pral tonbe plat atè. Lè sa a, chak moun va
 mache dwat devan yo sou lavil la. ⁶ ¶ Se konsa, Jozye, pitit gason Noun lan, rele prèt yo, li di yo:
 -Leve Bwat Kontra a, mete l' sou zepòl nou. Sèt prèt va mache devan l' avèk kòn belye yo nan men
 yo. ⁷ Apre sa, li di pèp la: -Leve mache! Nou pral fè wonn lavil la. Pòsyon lame ki pou mache
 devan an va pran devan Bwat Kontra a. ⁸ Pèp la fè jan Jozye te ba yo lòd fè a. Sèt prèt yo pran
 devan Bwat Kontra Seyè a, yo t'ap kònen kòn yo. ⁹ Pòsyon lame ki pou mache devan an pran devan

prèt ki t'ap kònen yo. Pòsyon lame ki pou mache dèyè a t'ap mache dèyè Bwat Kontra a. Pandan
 10
 yo t'ap mache konsa, yo t'ap kònen kòn belye yo. Men, Jozye te bay pèp la lòd pou yo pa t' pouse
 ankenn rèl jan yo te konn fè l' la lè y'ap goumen. Se pou yo tout rete bouch fèmen, san di yon mo,
 11
 jouk lè l'a ba yo lòd pouse rèl goumen an. Prèt yo pati ak Bwat Kontra Seyè a, yo fè wonn lavil
 12
 yon fwa. Apre sa, yo tounen nan kan an epi yo pase nwit lan la. Nan denmen maten, Jozye leve,
 13
 epi prèt yo pran Bwat Kontra Seyè a ankò. Sèt prèt yo avèk sèt kòn belye yo t'ap mache devan
 Bwat Kontra a. Yo t'ap kònen. Pòsyon lame ki pou devan an t'ap mache devan yo, pòsyon lame ki
 14
 pou mache dèyè a t'ap mache dèyè Bwat Kontra a: yo t'ap kònen tout tan yo t'ap mache a. Dezyèm
 jou a, yo mache fè wonn lavil la ankò yon sèl fwa. Epi yo tounen nan kan yo. Yo fè sa konsa pandan
 15
 sis jou. Sou setyèm jou a, yo leve lè bajou kase, yo mache menm jan an. Men, jou sa a yo fè
 16
 wonn lavil la sèt fwa. Se jou sa a ase yo te fè wonn lavil la sèt fwa. Setyèm fwa a, apre prèt yo
 fin kònen kòn belye yo, Jozye di pèp la konsa: -Nou mèt rele koulye a! Seyè a lage lavil la nan men
 17
 nou! ¶ Nou pral ofri lavil la ak tou sa ki ladan l' tankou yon ofrann pou Bondye. Nou pral touye
 dènye moun ki ladan l'. Sèl moun ki va rete vivan, se va Rarab, jennès la, ak tout moun ki va lakay
 18
 li, paske li te kache mesaje nou te voye yo. Men, nou menm, pa mete men nou nan sa nou gen
 pou nou detwi pou Seyè a. Si nou pran anyen nan sa nou gen pou nou detwi a, n'ap lakòz malè
 19
 tonbe sou kay moun Izrayèl yo, n'ap lakòz tèt chaje vin pou tout moun. Tout bagay ki fèt an lò,
 an ajan, an fè osinon an kwiv, n'a mete yo apa pou Seyè a. N'a depoze yo nan depo richès Seyè a.
 20
 Se konsa, yo kònen kòn belye yo. Tande pèp la tandè son kòn belye yo, yo pouse yon sèl gwo
 rèl, epi miray ranpa lavil la tonbe plat atè. Epi chak moun pran mache dwat devan yo sou lavil la,
 21
 yo anvayi l'. Yo ofri tou sa ki nan lavil la bay Seyè a. Avèk nepe yo, yo touye tout moun nan
 22
 lavil la, fanm kou gason, granmoun kou timoun, tout bèf, tout mouton, tout bourik. Jozye rele
 de mesye li te voye an kachèt al vizite lavil Jeriko a, li di yo: -Ale lakay jennès la. Fè l' soti ak tout
 23
 fanmi li, jan nou te pwomèt li a. Se konsa y' ale, yo fè Rarab soti ansanm ak papa l', manman l',
 frè l' yo, tout rès fanmi l' yo ak tou sa yo te genyen, yo enstale yo yon kote andeyò kan moun Izrayèl
 24
 yo. Yo mete dife nan lavil la, yo boule l' nèt ak tou sa ki ladan l', an wetan bagay ki te fèt an lò,
 25
 an ajan, an fè ak an kwiv yo. Yo pran yo, yo pote yo nan depo richès Seyè a. Men, Jozye te sove
 Rarab, jennès la, ak tout fanmi l' yo ansanm ak tou sa ki pou yo, paske Rarab te kache mesye Jozye
 te voye espyonnen lavil Jeriko a. Moun fanmi Rarab yo ap viv jouk koulye a nan mitan pèp Izrayèl
 26
 la. Lè sa a, Jozye bay avètisman sa a pou tout moun, li di: -Madichon Bondye pou nenpòt moun
 ki konprann pou l' ta rebati lavil yo rele Jeriko a. Si yon moun mete men nan fondasyon l' yo, l'ap

pèdi premye pitit gason l' lan. Si yon moun remoute pòtay li yo, l'ap pèdi dènye pitit gason l' la.

27

Se konsa Seyè a te kanpe la avèk Jozye. Nan tout peyi a yo t'ap nonmen non l'.

Chapter 7

1

¶ Men, pèp Izrayèl la te dezobeyi lòd Seyè a te bay pou yo pa t' pran anyen nan sa yo te gen pou yo detwi nèt yo. Te gen yon nonm nan branch fanmi Jida a ki te rele Akan. Se te pitit Kami. Kami sa a te pitit Zabdi, Zabdi te pitit Zarak. Akan sa a te pran kichòy nan sa yo te gen pou yo

detwi nèt yo. Kifè Seyè a te move anpil sou pèp Izrayèl la. ² Jozye te voye kèk moun soti lavil Jeriko ale bò Ayi, yon lavil ki te toupre Bèt Avenn, sou bò solèy leve lavil Betèl. Li te di yo pou

y' al wè jan sa ye nan peyi a. Mesye yo ale vre, yo wè jan sa ye nan lavil Ayi. ³ Lè yo tounen vin jwenn Jozye, yo di li: -Nou pa bezwen deplase tout moun. N'a voye de twa mil moun konsa pou

atake lavil Ayi a. Ou pa bezwen voye tout moun al goumen, paske pa gen anpil moun la. ⁴ Lè sa a, yo chwazi twamil sòlda konsa ki te moute al atake. Men, moun lavil Ayi yo te fè yo kraze rak.

5

Yo kouri dèyè sòlda pèp Izrayèl yo depi devan pòtay lavil la jouk nan men wòch yo. Nan ladesant lan yo touye transis moun konsa nan sòlda pèp Izrayèl yo. Lè sa a, pèp Izrayèl la soti pè. Yo pèdi

kouraj. ⁶ ¶ Jozye te sitèlman nan lapenn, li chire rad sou li, epi li tonbe ajenou, li bese tèt jouk atè devan Bwat Kontra Seyè a. Li rete konsa jouk aswè ansanm ak tout chèf fanmi pèp Izrayèl yo, yo

pran pousyè tè yo mete sou tèt yo pou fè wè jan yo te nan lapenn. ⁷ Epi Jozye di: -Ay, Seyè Bondye! Poukisa ou fè pèp la janbe lòt bò larivyè Jouden an? Gen lè se pou ou te lage nou nan men moun

Amori yo pou yo touye nou? Pa pito ou te kite nou rete lòt bò larivyè Jouden an! ⁸ Tanpri, Mèt

mwen! Kisa m' ka di koulye a lè m' wè moun Izrayèl yo ap kouri devan lènmi l' yo? ⁹ Moun Kanaran yo ak tout lòt moun ki rete nan peyi a pral konn sa. Yo pral leve dèyè nou. Yo pral touye nou nèt

nan peyi a. Kisa ou pral fè lè sa a pou yo pa avili non ou? ¹⁰ ¶ Seyè a di Jozye konsa: -Leve non!

Poukisa ou lage kò ou atè konsa? ¹¹ Se paske pèp Izrayèl la peche, yo pa respekte kontra mwen te pase ak yo a ak lòd mwen te ba yo. Yo pran nan bagay pou yo te detwi yo. Yo vòlò yo, yo kache

yo, yo mete yo nan zafè pa yo. ¹² Se poutèt sa, pèp Izrayèl la p'ap ka kanpe devan lènmi l' yo. Yo gen pou yo kouri devan lènmi yo, paske koulye a se yo menm ki gen pou mouri. Mwen p'ap kanpe la avèk yo ankò, si bagay mwen te ban nou lòd pa pran an nou pa wete l' nan mitan nou pou nou

detwi l' tou. ¹³ Leve non! Fè sèvis pou mete pèp la nan kondisyon pou sèvi m'. W'a di yo pou yo pare kò yo pou yo ka nan kondisyon fè sèvis pou mwen denmen, paske mwen menm, Bondye pèp

Izrayèl la, men sa mwen di: Nou menm pèp Izrayèl, nou gen nan mitan nou bagay mwen te ban
 nou lòd detwi. Nou p'ap ka kenbe tèt ak lènmi nou yo si nou pa wete l' nan mitan nou. ¹⁴ Se konsa,
 denmen maten, nou tout n'ap vini, branch fanmi pa branch fanmi. Branch fanmi Seyè a va denonse
 a va pwoche fanmi pa fanmi. Nan fanmi Seyè a va denonse a, chèf fanmi yo va pwoche yonn apre
 lòt avèk moun pa yo. Chèf fanmi Seyè a va denonse a va fè moun pa l' yo pwoche grenn pa grenn.
¹⁵
 Moun y'a jwenn avèk bagay la gen pou mouri boule nan dife, ansanm ak tout fanmi l' ak tou sa
 li genyen, paske li pa respekte kontra Seyè a te pase ak pèp la. Se yon gwo wont pou tout pèp Izrayèl
 la. ¹⁶ ¶ Nan denmen maten vre, Jozye leve byen bonè, li fè tout pèp Izrayèl la pwoche vin jwenn
 li, branch fanmi pa branch fanmi. Se branch fanmi Jida a Seyè a te denonse. ¹⁷ Li fè fanmi Jida yo
 vin jwenn li yonn apre lòt. Se fanmi Zerk la Seyè a te denonse. Li fè tout chèf fanmi Zerk yo vin
 jwenn li yonn apre lòt ak tout fanmi yo. Se Zabdi Seyè a te denonse. ¹⁸ Zabdi fè tout moun pa l'
 yo pwoche grenn pa grenn. Se konsa Seyè a denonse Akan, pitit Kami an. Kami te pitit Zabdi,
 Zabdi te pitit Zerk, yo tout te fè pati branch fanmi Jida a. ¹⁹ Jozye di Akan konsa: -Pitit mwen,
 fè lwanj Seyè a! Moutre ou gen respe pou Bondye pèp Izrayèl la! Koulye a, di m' kisa ou fè. Pa
 kache m' anyen. ²⁰ Akan reponn li: -Se vre wi. Se mwen ki peche kont Seyè a, Bondye pèp Izrayèl
 la. Men sa m' fè. ²¹ Nan bagay nou te pran apre batay la, mwen te wè yon bèl manto ki te soti lavil
 Babilòn, desan (200) pyès an ajan ki te peze wit liv antou, ak yon gwo moso lò ki te peze de liv.
 Mwen te sitèlman anvi yo, mwen pran yo. Mwen fouye yon twou nan mitan tant kote m' rete a,
 mwen antere yo ladan l', avèk pyès ajan yo anba nèt. ²² Jozye voye kèk mesaj ki kouri al nan tant
 Akan an. Yo jwenn tout bagay yo nan twou a avèk pyès ajan yo anba nèt. ²³ Yo pran yo, yo soti
 avèk yo nan tant lan. Yo pote yo bay Jozye ak tout pèp Izrayèl la. Yo mete yo atè devan Seyè a.
²⁴
 Jozye, ansanm ak tout moun pèp Izrayèl yo, pran Akan, pyès ajan yo, manto a, moso lò a ansanm
 ak pitit fi l' yo, pitit gason l' yo, bèlfi li yo, bèf li yo, bourik li yo, mouton l' yo ak tout lòt bagay li
 te genyen, yo mennen yo nan Fon Malè. ²⁵ Epi Jozye di Akan konsa: -Poukisa ou rale tout malè
 sa a sou tèt nou? Jòdi a, Seyè a pral fè malè tonbe sou ou! Epi tout moun pèp Izrayèl yo pran wòch,
 yo kalonnen yo jouk yo touye yo. Yo boule tout bagay yo nan dife. Yo touye tout fanmi l' yo ak
 bèt li yo ak koutwòch. ²⁶ Yo mete yon gwo pil wòch sou yo. Gwo pil wòch sa a la jouk jòdi a. Se
 poutèt sa, jouk jòdi a, yo rele kote sa a Fon Malè. Se konsa Seyè a te sispann move sou pèp la.

Chapter 8

¹ ¶ Seyè a di Jozye konsa: -Ou pa bezwen pè. Ou pa bezwen dekouraje. Pran tout sòlda yo avè ou, epi mache sou lavil Ayi. M'ap lage wa lavil la ansanm ak pèp la, lavil la ak tout zòn yo a nan men ou. ² Menm sa ou te fè moun lavil Jeriko yo ak wa yo a, se sa ou pral fè moun lavil Ayi yo ak wa yo a. Men, fwa sa a, n'a gen dwa pran byen yo ak bèt yo pou nou. Fè sòlda yo al anbiske kò yo pou yo atake lavil la pa dèyè. ³ ¶ Se konsa, Jozye reyini tout sòlda pèp Izrayèl yo, li fè plan pou yo mache sou lavil Ayi. Jozye chwazi trantmil (30.000) vanyan gason, li fè yo pati devan nan mitan lannwit. ⁴ Men lòd li ba yo: -Al anbiske kò nou lòt bò sou dèyè lavil la. Pa kache twò lwen non. Epi pare pou nou atake. ⁵ Mwen menm, mwen pral pwoche bò lavil la avèk tout sòlda ki avè m' yo pa devan pòtay la. Lè n'a wè moun lavil yo soti vin fè fas kare ak nou, nou menm ki sou devan yo, n'a pran kouri devan yo ankò, jan nou te fè l' anvan an. ⁶ Yo menm menm yo pral kouri dèyè nou, jouk y'a kite lavil la byen lwen dèyè yo, paske yo pral konprann se tankou premye fwa a. ⁷ Lè sa a, nou menm ki te kache sou dèyè a, n'a soti kote nou te anbiske kò nou an, n'a antre nan lavil la, paske Seyè a, Bondye nou an, ap lage lavil la nan men nou. ⁸ Lè n'a fin pran lavil la, n'a mete dife ladan l' jan Seyè a te mande l' la. Men lòd mwen ban nou. ⁹ Se konsa, Jozye voye yo ale. Y' al anbiske kò yo sou dèyè lavil la, sou bò solèy kouche, ant lavil Ayi ak lavil Betèl. Jozye menm rete pase lannwit lan nan kan an. ¹⁰ Nan maten, bonè bonè, Jozye leve, li reyini tout lòt sòlda yo. Li pase yo enspeksyon. Apre sa, li pran direksyon lavil Ayi a pou li. Li t'ap mache alatèt lame a ansanm ak tout chèf fanmi pèp Izrayèl yo. ¹¹ Sòlda ki te avè l' yo rive jouk anfas pòtay lavil la. Yo moute kan yo sou bò nò lavil Ayi a. Yo kite yon ti fon nan mitan yo ak lavil Ayi a. ¹² Jozye pran senkmil (5.000) sòlda, li fè yo al kache sou bò solèy kouche, ant lavil Ayi ak lavil Betèl. ¹³ Se konsa, pifò nan lame a moute kan yo sou bò nò lavil la, epi rès lame a al kache kò yo sou bò solèy kouche. Jou sa a, Jozye pase lannwit lan nan Fon an. ¹⁴ Lè wa lavil Ayi a wè sòlda Jozye yo, li menm ansanm ak tout gason nan lavil la, yo leve granmaten, yo prese pare yo. Yo soti al atake moun Izrayèl yo sou pant ki desann nan Fon Jouden an. Men, li pa t' konnen yo tapral atake l' sou dèyè. ¹⁵ Jozye ak moun pa l' yo fè tankou y'ap kouri pou yo, yo lage kò yo nan dezè a. ¹⁶ Tout gason ki te nan lavil la t'ap kouri dèyè yo, yo t'ap rele byen fò. Se konsa, nan kouri dèyè Jozye a, yo kite lavil la byen lwen dèyè. ¹⁷ Pa t' gen yon gason nan lavil Ayi a, tout te kouri soti dèyè pèp Izrayèl la. Yo kite pòtay lavil la gran batan louvri san pesonn pou defann li. ¹⁸ Seyè a di Jozye konsa: -Leve frenn ki nan men ou lan, lonje l' sou lavil Ayi a: mwen pral lage lavil la nan men ou. Jozye lonje frenn ki te nan men l' lan sou lavil la. ¹⁹ Leve li leve men l', mesye ki te anbiske kò yo

soti byen vit nan kachèt yo a, yo kouri antre nan lavil la, yo pran lavil la pou yo. Lamenn yo mete
²⁰ dife ladan l'. Lè mesye lavil Ayi yo vire tèt yo gade, yo wè yon gwo lafimen ki t'ap soti nan lavil
 la moute nan syèl, yo pa t' konn ki bò pou yo fè, paske lè sa a, sòlda pèp Izrayèl ki t'ap kouri nan
²¹ direksyon dezè a te vire tounen sou yo. Lè Jozye ak tout moun li yo wè lòt sòlda ki te kache yo
 te pran lavil la, lè yo wè dife nan lavil la, yo vire tounen, yo atake moun lavil Ayi yo. ²² Lòt moun
 pèp Izrayèl yo menm soti nan lavil la, epi yo mache sou yo tou. Konsa moun lavil Ayi yo te sènen
 toupatou ak moun pèp Izrayèl yo. Sòlda pèp Izrayèl yo touye mezi moun yo jwenn devan yo. Yo
²³ pa kite yonn vivan, ¶ ²⁴ esepite wa lavil Ayi a. Yo pran msye, yo mennen l' bay Jozye. Moun
 Izrayèl yo kouri dèyè lènmi yo nan tout mòn yo ak nan tout dezè a. Lè yo fin touye tout, yo tounen
²⁵ lavil Ayi, epi yo touye tout moun ki te ladan l'. Jou sa a, yo touye douzmil (12000) moun, fi kou
²⁶ gason, ki t'ap viv nan lavil Ayi a. Jozye menm te kenbe bra l' leve anlè ak frenn lan lonje sou
 lavil Ayi a jouk yo te fin touye tout moun ki te rete nan lavil la tankou yon ofrann pou Seyè a.
²⁷ Moun Izrayèl yo te pran tout bèt moun yo ak tout byen yo pou yo, jan Seyè a te bay Jozye lòd
²⁸ la. Jozye boule lavil Ayi a, li fè l' tounen mazi, kote moun pa janm rete jouk jòdi a. ²⁹ Li fè yo
 pann wa lavil Ayi a nan yon pyebwa, epi yo kite l' la jouk aswè. Lè solèy kouche, Jozye bay lòd
 pou yo desann kadav la. Yo pran l', yo voye l' jete devan pòtay lavil la. Yo mete yon gwo pil wòch
³⁰ sou li. Pil wòch la la jouk jòdi a. ¶ Lè sa a, Jozye bati yon lotèl pou Seyè a, Bondye pèp Izrayèl
³¹ la, sou mòn Ebal. Li bati li dapre lòd Moyiz, sèvitè Seyè a, te bay moun pèp Izrayèl yo, jan sa
 ekri nan liv Lalwa Moyiz la: N'a bati yon lotèl ak wòch ki pa t' janm travay ak zouti fè. Yo ofri sou
³² lotèl la bèt yo touye pou boule nèt pou Seyè a, epi yo touye bèt pou mande Bondye padon. Antan
 yo la, Jozye pran lalwa Moyiz te ekri pou pèp Izrayèl la, li kopye l' sou tout wòch lotèl la devan
³³ tout pèp la. Apre sa, tout pèp Izrayèl la vini ak chèf fanmi yo, direktè yo ak jij yo ansanm ak
 moun lòt nasyon ki t'ap viv nan mitan yo, yo kanpe sou de bò Bwat Kontra Seyè a, ak fas yo vire
 ap gade moun Levi ki t'ap pote Bwat Kontra a sou zepòl yo nan mitan. Mwatye ladan yo te kanpe
 sou pant Mòn Garizim, mwatye sou bò mòn Ebal. Se konsa, depi lontan Moyiz, sèvitè Bondye a,
³⁴ te ba yo lòd kanpe lè lè a va rive pou yo resevwa benediksyon. Lèfini, Jozye li tout pawòl ki te
³⁵ nan liv lalwa a, pawòl benediksyon yo kou pawòl madichon yo, jan yo ekri nan liv lalwa a. Jozye
 li tout kòmandman Moyiz te bay yo san sote yon mo devan tout pèp Izrayèl la ki te reyini ansanm
 ak fanm yo, timoun yo ak tout moun lòt nasyon ki t'ap viv nan mitan yo.

Chapter 9

¹ ¶ Nouvèl bagay sa yo rive nan zòrèy tout wa ki t'ap gouvènen lòt bò larivyè Jouden an sou solèy kouche, nan mòn yo, nan plenn yo, sou tout rivaj lanmè Mediterane a, jouk peyi Liban sou bò nò. Te gen wa moun Et yo, wa moun Amori yo, wa moun Kanaran yo, wa moun Ferezi yo, wa moun Evi yo ak wa moun Jebis yo. ² Yo tout yo mete tèt ansanm pou yo goumen kont Jozye ak pèp Izrayèl la. ³ ¶ Lè moun peyi Gabawon yo vin konnen kisa Jozye te fè moun Jeriko yo ak moun Ayi yo, ⁴ yo di yo pral pran li nan plan. Yo leve, yo fè pwovizyon, yo chaje bourik yo avèk yon bann vye sak ak veso fèt ak po bèt pou mete diven. Veso yo te tou kreve, yo te pyese nan tout kò yo. Moun Gabawon yo pati. ⁵ Yo te menm rive mete vye sapat rapyese nan pye yo ak vye rad chire sou yo. Yo pran pen rasi kraze an miyèt moso, yo pote pou manje yo. ⁶ Yo pati, yo vin jwenn Jozye nan kan Gilgal la. Yo pale ak li ansanm ak mesye pèp Izrayèl yo, yo di yo konsa: -Nou soti nan yon peyi ki byen lwen isit la. Ann pase yon kontra yonn ak lòt non! ⁷ Men, mesye pèp Izrayèl yo di moun Evi yo konsa: -Pou di se pa toupre la a nou rete? Ki jan nou ta vle pou nou pase kontra ak nou? ⁸ Moun Evi yo di Jozye: -Se sèvi nou vin sèvi ou! Jozye mande yo: -Men, ki moun nou ye menm? Ki bò nou soti? ⁹ Yo reponn li: -Mèt, nou soti nan yon peyi byen lwen, paske nou tande pale ki moun Seyè a, Bondye ou la, ye. Nou pran nouvèl tou sa li fè nan peyi Lejip, ¹⁰ ak tou sa li fè de wa moun Amori yo ki t'ap gouvènen lòt bò larivyè Jouden an: Siyon, wa peyi Esbon an ak Og, wa peyi Bazan an, ki te rete lavil Astawòt. ¹¹ Lè sa a, chèf nou yo ak tout moun ki rete nan peyi nou an di nou fè pwovizyon pou n' al vwayaje al kontre moun sa yo. N'a di yo konsa men nou vin sèvi yo. Tanpri, pase yon kontra ak nou. ¹² Gade pen nou rete. Yo te tou cho jou nou pati vin kontre nou an. Men, koulye a, gade jan yo rasi, jan yo tounen ti miyèt. ¹³ Lè nou te plen veso diven sa yo, yo te tou nèf. Gade koulye a jan yo plen twou. Gade jan rad nou ak sapat nou fini tèlman nou mache anpil. ¹⁴ Chèf pèp Izrayèl yo pran nan sa yo te pote a, san yo pa mande Seyè a sa li di nan sa. ¹⁵ ¶ Jozye pase yon kontra ak yo pou yo viv byen yonn ak lòt, li fè kontra ak yo pou li pa touye yo. Chèf pèp Izrayèl yo fè sèman yo p'ap fè yo anyen. ¹⁶ Twa jou apre yo te fin siyen kontra a, moun pèp Izrayèl yo vin konnen moun sa yo te rete toupre a, nan mitan peyi Izrayèl la. ¹⁷ Moun pèp Izrayèl yo leve, yo pati dèyè yo. Sou twa jou, yo rive nan lavil kote moun sa yo te rete a. Se te lavil Gabawon, lavil Kefira, lavil Beewòt ak Keryat-Jearim. ¹⁸ Men, moun pèp Izrayèl yo pa t' ka touye yo, paske chèf moun Izrayèl yo te fè sèman ba yo nan non Seyè a, Bondye pèp Izrayèl la, yo p'ap fè yo anyen. Lè sa a, tout pèp Izrayèl la t'ap bougonnen sou do chèf yo pou sa. ¹⁹ Men, chèf yo reyini tout moun, yo di yo: -Depi nou fè sèman ba yo nan non Seyè a, Bondye pèp Izrayèl la,

²⁰ nou pa gen dwa manyen yo. Konsa, poutèt sèman nou te fè a, se pou nou kite yo viv. Paske, si
²¹ nou fè yo anyen, Bondye va pini nou. Wi, se pou yo viv. Men, n'a pran yo pou fann bwa, pou
²² bwote dlo pou nou jan chèf yo te di a. ¶ Jozye fè chache moun Gabawon yo, li mande yo:
 -Poukisa nou ban nou gwo manti sa a? Nou di nou rete byen lwen, epi se la a, nan mitan nou, nou
²³ moun. Poutèt sa, madichon ap tonbe sou nou. N'ap toujou sèvi nou domestik. Depi jòdi a, se
²⁴ nou menm ki pou fann bwa, ki pou bwote dlo nou bezwen pou kay Bondye nou an. Yo reponn:
 -Mèt, nou te fè sa paske nou te vin konnen se tout bon Seyè a, Bondye pèp Izrayèl la, te bay Moyiz,
 sèvitè l' la, lòd pou li ba yo tout peyi sa a, pou li touye tout pèp ki rete ladan l' pou fè plas pou yo.
 Konsa, lè nou vin konnen nou t'ap pwoche bò kote nou rete a, nou te pè anpil pou nou pa t' mouri.
²⁵ Se sa ki fè nou te fè sa. Koulye a, nou nan men ou! W'a fè sa ou vle ak nou, jan ou santi ou dwe
²⁶ fè l' la. Se konsa Jozye delivre yo anba men moun pèp Izrayèl yo, li pa kite yo touye yo. ²⁷ Depi
 jou sa a, Jozye mete yo la pou fann bwa, pou bwote dlo pou pèp Izrayèl la ak pou lotèl Seyè a. Jouk
 jòdi a, se sa y'ap fè tout kote Seyè a chwazi pou yo adore l' la.

Chapter 10

¹ ¶ Adonisedèk, wa lavil Jerizalèm lan, te vin konnen Jozye te pran lavil Ayi a, li te detwi l' nèt
 tankou yon ofrann pou Seyè a, li te touye wa a menm jan li te fè l' pou lavil Jeriko ansanm ak wa
 li a. Adonisedèk te vin pran nouvèl tou moun Gabawon yo te al rann tèt yo bay moun Izrayèl yo,
² epi yo t'ap viv nan mitan yo. Tout moun lavil Jerizalèm yo te pè anpil, paske Gabawon te yon
 gwo lavil, tankou nenpòt ki lavil ki te gen yon wa ap gouvènen li. Li te pi gwo pase lavil Ayi.
³ Lèfini, tout gason la te vanyan sòlda. Se konsa, Adonisedèk, wa lavil Jerizalèm lan, voye misyon
 bay Oram, wa lavil Ebwon, bay Pireyam, wa lavil Jamout, bay Jafya, wa lavil Lakis, ak bay Debi,
⁴ wa lavil Eglon. Li voye di yo. -Vin jwenn mwen. Vin ede m' atake lavil Gabawon, paske moun
⁵ sa yo al rann tèt yo bay Jozye ak pèp Izrayèl la. Se konsa senk wa moun Amori yo: wa lavil
 Jerizalèm lan, wa lavil Ebwon an, wa lavil Jamout la, wa lavil Lakis la, wa lavil Eglon an, mete tèt
⁶ ansanm, yo fè yon sèl lame ak tout sòlda yo. Yo sènen lavil Gabawon, yo atake l'. Moun lavil
 Gabawon yo voye mesaje nan kan Gilgal la di Jozye konsa: -Mèt, tanpri, pa lage nou! Prese vin
 jwenn nou pou ede nou, pou delivre nou. Paske tout wa moun Amori ki rete nan mòn yo mete tèt
⁷ ansanm, yo leve dèyè nou pou yo fini ak nou. ¶ Se konsa, Jozye ak tout lame a ansanm ak tout
⁸ vanyan sòlda li yo kite Gilgal, yo leve yo pati. Seyè a di Jozye konsa: -Ou pa bezwen pè yo. M'ap

lage yo tout nan men ou. Pa gen yonn ladan yo ki ka kenbe tèt avè ou. ⁹ Lè Jozye kite Gilgal, li
pase tout nwit lan ap mache. Li rive sou moun Amori yo san yo pa t' atann. ¹⁰ Seyè a fè moun
Amori yo pran kouri lè yo wè moun Izrayèl yo. Li fè pèp Izrayèl la bat yo byen bat lòt bò lavil
Gabawon an. Moun Izrayèl yo kouri desann dèyè yo nan pant Bètowon an, yo bat yo jouk Azeka
¹¹ ak Makeda nan sid la. Pandan yo t'ap kouri devan lame Izrayèl la, depi nan desann pant Bètowon
an jouk yo rive Azeka, Seyè a rete nan syèl la, li voye gwo boul lagrèl sou yo pou touye yo. Lagrèl
¹² la te touye plis moun pase lame Izrayèl la avèk nepe yo. Jou Seyè a te lage moun Amori yo nan
men moun pèp Izrayèl yo, Jozye pale ak Seyè a devan tout pèp la, li di: -Solèy! Rete klere sou lavil
¹³ Gabawon! Lalin! Rete klere sou Pon Ayalon! Solèy la rete kote l' te ye a, lalin lan pa fè yon pa
jouk pèp Izrayèl la te fin kraze lènmi l' yo. Se sa nou jwenn ekri nan liv Moun ki mache dwat la.
Solèy la rete nan mitan syèl la san li pa mache yon bon tan, longè yon jounen konsa. Se apre sa l'
¹⁴ al kouche. Ni anvan sa, ni apre sa, pa janm gen yon jou tankou jou sa a lè Seyè a te fè sa yon
moun te mande l' fè, epi li goumen pou pèp Izrayèl la. ¹⁵ ¶ Apre sa, Jozye ak tout lame Izrayèl la
¹⁶ tounen nan kan yo Gilgal. Men, senk wa yo te kouri chape, y' al kache nan gwòt Makeda a.
¹⁷ Y' al di Jozye yo jwenn senk wa yo kache nan gwòt Makeda a. ¹⁸ Jozye reponn: -Woule wòch
¹⁹ bouche bouch gwòt la. Mete moun veye yo. Men, nou menm, souke kò nou. Kouri dèyè lènmi
yo. Atake yo pa dèyè. Pa kite yo gen tan rive nan lavil yo! Seyè a, Bondye nou an, lage yo nan men
²⁰ nou. Jozye ak sòlda pèp Izrayèl yo t'ap masakre yo: sa ki te chape yo kouri al kache nan lavil
²¹ ki gen gwo ranpa yo. Lè sa a, tout lame Jozye a tounen vin jwenn li nan kan Makeda a san
²² pwoblèm, san danje. Pesonn pa t' penmèt yo di anyen sou moun pèp Izrayèl yo. Lè sa a, Jozye
²³ di: -Degaje bouch gwòt la. Mennen senk wa yo deyò vin jwenn mwen. Yo degaje bouch gwòt
²⁴ la, yo mennen senk wa yo deyò vin jwenn li. Se te wa lavil Jerizalèm lan, wa lavil Ebwon an, wa
lavil Jamout la, wa lavil Lakis la ak wa lavil Eglon an. Lè yo mennen wa yo ba li, Jozye rele
²⁵ tout gason nan pèp Izrayèl la, epi li di chèf ki te avè l' yo: -Vini non! Mete pye nou sou kou wa sa
yo! Yo pwoche vre, yo mete pye yo sou kou wa yo. Epi Jozye di yo: -Nou pa bezwen tranble!
Nou pa bezwen pè! Mete gason sou nou! Pa janm dekouraje paske Seyè a pral fè nou mete pye nou
²⁶ sou kou tout lènmi n'a jwenn sou wout nou! Apre sa, Jozye touye wa yo epi li fè pann kadav yo
²⁷ sou senk pyebwa kote yo rete pandye jouk aswè. Lè solèy fin kouche, Jozye bay lòd pou yo
desann kadav yo, epi pou yo voye yo jete nan gwòt kote yo te kache a. Apre sa, yo pran gwo wòch
²⁸ yo bouche bouch gwòt la. Wòch yo la jouk jòdi a. ¶ Menm jou sa a, Jozye atake lavil Makeda,

epi li pran l'. Li touye wa a. Lèfini, li fè touye tout moun ak tout bèt ki te nan lavil la tankou yon ofrann pou Seyè a, san li pa kite anyen chape. Li fè wa Makeda a menm sa li te fè wa Jeriko a.

29 30

Aprè sa, Jozye ansanm ak tout lame Izrayèl la kite Makeda, y' al atake lavil Libna. Seyè a lage lavil la ansanm ak tout wa a nan men moun pèp Izrayèl yo. Yo touye dènye moun ak dènye

bèt ki te nan lavil la san yo pa kite anyen chape. Li fè wa a menm sa li fè wa Jeriko a. 31 Aprè sa,

Jozye ansanm ak tout lame Izrayèl la kite Libna, y' al atake Lakis. Yo sènen lavil la nèt. 32 Seyè a

lage lavil Lakis nan men moun pèp Izrayèl yo. Sou dezyèm jou a, yo pran lavil la. Li fè yo touye dènye moun ak dènye bèt ki te nan lavil la, menm jan yo te fè l' nan lavil Libna a, san li pa kite

yonn chape. 33 Lè sa a Oram, wa peyi Gezè a, moute vin pote moun Lakis yo sekou. Men, Jozye

bat li byen bat ansanm ak tout moun pa l' yo. Li fè touye yo tout san li pa kite yonn chape. 34 Aprè

sa, Jozye ansanm ak tout lame Izrayèl la kite lavil Lakis, y' al atake lavil Eglon. Yo sènen l' nèt.

35 Menm jou a, yo pran lavil la, yo touye tout moun ladan l'. Wi, jou sa a, tankou yon ofrann y'ap fè pou Seyè a, yo touye dènye moun ak dènye bèt ki t'ap viv la, menm jan yo te fè l' nan lavil Lakis

la. 36 37 Aprè sa, Jozye ansanm ak lame Izrayèl la kite lavil Eglon, yo moute al atake Ebwon. Yo

pran lavil la, yo touye dènye moun ak dènye bèt ki te rete la ansanm ak tou sa ki te rete nan ti bouk nan zòn lan. Li pa kite yon moun chape, menm jan li te fè l' lavil Eglon an. Li fè touye dènye moun

ak dènye bèt tankou yon ofrann pou Seyè a. 38 Aprè sa ankò, Jozye ansanm ak tout lame Izrayèl

la vire sou lavil Debi, y' al atake l'. 39 Yo pran lavil la ansanm ak wa a ak tout lòt ti bouk nan zòn

lan. Jozye fè touye tout moun ak tout bèt tankou yon ofrann pou Seyè a. Li pa kite yonn chape. Menm sa li te fè moun lavil Ebwon yo, menm sa li te fè moun lavil Libna yo ak wa yo a, se sa

Jozye fè lavil Debi ak wa li a tou. 40 Se konsa Jozye te fè tout peyi a soumèt devan li. Li te kraze

tout wa yo, kit sa ki t'ap gouvènen nan mòn yo ak nan Negèv la, kit sa ki t'ap gouvènen nan plenn yo ak sou ti mòn yo. Li pa kite yon moun chape. Li touye dènye moun, dènye bèt tankou yon ofrann

pou Seyè a, jan Seyè a, Bondye pèp Izrayèl la, te ba li lòd fè a. 41 Jozye bat yo depi Kadès-Banea

sou bò sid rivyè Gaza, bò rivaj la, nan tout zòn Gochenn lan jouk Gabawon sou bò nò. 42 Jozye te

pran tout wa sa yo ak tout peyi yo nan yon sèl soti, paske Seyè a, Bondye pèp Izrayèl la, t'ap goumen

pou pèp la. 43 Lèfini, Jozye ansanm ak tout lame Izrayèl la tounen nan kan yo Gilgal.

Chapter 11

¹
 ¶ Nouvèl tout bagay sa yo rive nan zòrèy Jabèn, wa Azò a. Li menm, li voye nouvèl la bay
 Yobad, wa lavil Madon, bay wa Chimwon ak wa Akchaf, ² bay tout wa ki rete bò nò a, nan mòn
 yo, nan fon ki anba Chinawòt, nan plenn yo ak nan koulin Dò yo bò solèy kouche. ³ Li voye nouvèl
 la bay moun Kanaran yo ki rete sou de bò larivyè Jouden an, bay moun Amori yo, bay moun Evi
 yo, bay moun Ferezi yo, bay moun Jebis yo nan tout mòn yo, bay moun Evi yo ki rete nan pye mòn
 Emon nan peyi Mispa. ⁴ Tout wa yo vini avèk tout sòlda yo. Sa te fè yon gwo lame sòlda pesonn
 pa t' ka konte, ou ta di grenn sab bò lanmè, avèk yon kantite chwal ak cha lagè. ⁵ Wa yo pran
 randevou, yo mete tout sòlda yo ansanm. Yo rive, yo moute kan yo yonn sou kote lòt, toupre dlo
 Mewòm yo, pou yo atake pèp Izrayèl la. ⁶ Seyè a di Jozye konsa: -Ou pa bezwen pè moun sa yo!
 Denmen, lè konsa, m'ap fè nou wè tout tonbe mouri la devan je nou. Nou menm, nou pral koupe
 jarèt tout chwal yo, epi n'ap boule cha yo. ⁷ Se konsa, Jozye rive bò dlo Mewòm lan ak tout sòlda
 li yo, li tonbe sou lènmi yo san yo pa t' atann, li atake yo. ⁸ Seyè a lage yo nan men pèp Izrayèl la:
 sòlda pèp Izrayèl yo bat yo byen bat. Yo kouri dèyè yo jouk Gwo Sidon ak Misrefòt sou bò nò,
 jouk Fon Mispa sou bò solèy leve. Yo bat yo nèt, yo pa kite yonn ladan yo chape. ⁹ Jozye fè yo
 tou sa Seyè a te ba li lòd fè a: li koupe jarèt chwal yo, li boule tout cha lagè yo. ¹⁰ ¶ Apre sa, Jozye
 tounen sou dèyè, li pran lavil Azò, epi li touye wa li a. Lè sa a, Azò te pi gwo lavil nan tout peyi
 wa yo. ¹¹ Li fè touye dènye moun ak dènye bèt vivan ki te la tankou yon ofrann y'ap fè pou Seyè
 a. Yo pa kite yonn ladan yo chape. Lèfini, yo mete dife nan lavil la. ¹² Jozye pran tout lavil yo
 ansanm ak wa yo. Epi li fè touye tout wa yo, dapre prensip ki vle pou yo touye yo tankou yon ofrann
 pou Seyè a, jan Moyiz, sèvitè Seyè a, te kite lòd pou yo fè l' la. ¹³ Men, moun Izrayèl yo pa t' boule
 ankenn lavil nan lavil ki te bati sou ti mòn yo, an wetan lavil Azò Jozye te fè boule. ¹⁴ Moun pèp
 Izrayèl yo pran tout bagay ak tout bèt yo te jwenn nan lavil yo. Men, yo touye tout moun, yo pa
 kite yonn chape. ¹⁵ ¶ Seyè a te bay Moyiz, sèvitè li a, lòd li yo. Moyiz menm te bay Jozye menm
 lòd yo tou. Se konsa Jozye te fè tou sa Seyè a te bay Moyiz lòd fè, san manke anyen. ¹⁶ Jozye ak
 pèp Izrayèl la te pran tout peyi a nan men moun yo, ki vle di: mòn yo, tout Negèv la, tout peyi
 Gochenn lan, plenn yo, Fon Jouden an, tout mòn ak tout ti bit peyi Izrayèl yo, ¹⁷ depi Mòn Alak
 ki toupre peyi Seyi a, jouk Baal-Gad ki nan fon Liban an nan pye mòn Emon an. Li mete men sou
 tout wa yo, li bat yo, li touye yo. ¹⁸ Jozye te pase yon bon tan ap fè lagè ak wa sa yo. ¹⁹ An wetan
 lavil Gabawon kote moun Evi yo te rete a, pa t' gen ankenn lavil ki te vle fè lapè ak moun pèp
 Izrayèl yo, ²⁰ paske Seyè a te fè tout moun sa yo soti pou goumen ak pèp Izrayèl la. Se pou pèp

Izrayèl la te touye tout tankou ofrann pou Seyè a, san pitye pou yo yonn menm, pou yo tout te ka disparèt, jan Seyè a te bay Moyiz lòd la. ²¹ Lè sa a, Jozye leve, l' ale, li touye tout moun Anak yo ki te rete nan mòn yo, nan lavil Ebwon, lavil Debi, lavil Anab, nan tout mòn peyi Jida ak tout mòn peyi Izrayèl yo. Li fè touye yo tout. Apre sa, li detwi tout lavil yo tankou ofrann pou Seyè a. ²² Pa t' gen yon moun Anak ankò nan peyi Izrayèl la, eseptè lavil Gaza, lavil Gat ak lavil Asdòd. ²³ Jozye te pran tout peyi a, jan Seyè a te di Moyiz la, epi li bay pèp Izrayèl la li pou li rele l' pa l'. Li separe l', li bay chak branch fanmi pòsyon pa yo. Apre tout batay sa yo, peyi a t'ap viv nan lapè, pa t' gen goumen ankò.

Chapter 12

¹ ¶ Moun pèp Izrayèl yo te bat tout wa ki te rete lòt bò larivyè Jouden yo, sou bò solèy leve. Epi yo pran tout peyi wa sa yo nan men yo, ki vle di tout zòn lan nèt, depi ravin Anon an, moute nan fon Jouden an, jouk nan pye mòn Emon. ² Men wa yo te kraze yo: Se te Siyon, wa moun Amori yo, ki te rete lavil Esbon. Peyi li t'ap gouvènen an te pran depi nan fon ravin Anon an moute Awoyè ki sou bò ravin lan, rive larivyè Jabòk sou fwontyè moun Amon yo, ki vle di mwatye nan peyi Galarad la. ³ Li te gouvènen zòn ki sou bò lès fon Jouden an tou, depi letan Kinerèt la desann sou lanmè Mouri a, nan direksyon Bèt-Jechimòt jouk nan pye mòn Pisga a. ⁴ Yo te kraze Og, wa peyi Bazan an tou. Se te yonn nan dènye refayim yo. Li te rete lavil Astawòt ak lavil Edreyi. ⁵ Peyi li t'ap gouvènen an konmanse depi nan mòn Emon ak mòn Salka, li pran tout peyi Bazan an nèt rive sou fwontyè peyi moun Jechou yo ak moun Maaka yo, plis lòt mwatye peyi Galarad la rive sou fwontyè peyi wa Siyon an ki te rete lavil Esbon. ⁶ Se Moyiz, sèvitè Seyè a, ansanm ak pèp Izrayèl la ki te kraze wa sa yo. Apre sa, Moyiz, sèvitè Seyè a, te pran tout peyi sa yo li bay moun branch fanmi Woubenn lan, moun branch fanmi Gad la ak mwatye nan moun branch fanmi Manase a. ⁷ ¶ Jozye ansanm ak pèp Izrayèl la te bat tout wa ki te rete nan zòn lòt bò larivyè Jouden an, sou bò solèy kouche, depi lavil Baal-Gad nan fon Liban an jouk mòn Chòv la nan direksyon Seyi. Se tè wa sa yo Jozye te pran, li separe yo bay moun pèp Izrayèl yo pou byen pa yo. ⁸ Tè sa yo te pran tout mòn yo, tout plenn yo, fon Jouden an, tout pye mòn yo, dezè a ak zòn Negèv la. Se sou tè sa yo moun Et yo, moun Amori yo, moun Kanaran yo, moun Ferezi yo, moun Evi yo ak moun Jebis yo te rete. ⁹ Men wa yo te kraze yo: wa lavil Jeriko, wa lavil Ayi, toupren Betèl, ¹⁰ wa lavil Jerizalèm, wa lavil Ebwon, ¹¹ wa lavil Jamout, wa lavil Lakis, ¹² wa lavil Eglon, wa lavil Gezè, ¹³ wa lavil

Debi, wa lavil Gedè,¹⁴ wa lavil Oma, wa lavil Arad,¹⁵ wa lavil Libna, wa lavil Adoulam,¹⁶
 lavil Makeda, wa lavil Betèl,¹⁷ wa lavil Tapwach, wa lavil Efè,¹⁸ wa lavil Afèk, wa lavil Sawon,
¹⁹ wa lavil Madòn, wa lavil Azò,²⁰ wa lavil Chimwon, wa lavil Mewòm, wa lavil Akchaf,²¹ wa
 lavil Tanak, wa lavil Megido,²² wa lavil Kadès, wa lavil Jokneyam nan zòn mòn Kamèl la,²³ wa
 lavil Dò sou zòn bò rivaj lanmè a, wa Goyim yo nan peyi Galile,²⁴ wa lavil Tiza. Sa te fè antou
 tranteyen wa ki te peri.

Chapter 13

¹ ¶ Lè sa a, Jozye t'ap antre nan laj, li te fin granmoun. Seyè a di l' konsa: -Koulye a, ou fin granmoun, ou antre nan laj serye. Men, gen yon bon pòsyon nan peyi a toujou ki rete pou nou pran.
² Rete nou tout teritwa moun Filisti yo ak tout peyi moun Jechou yo,³ ki vle di depi larivyè Chikò k'ap koule sou fwontyè lès peyi Lejip la, moute nan nò, jouk sou fwontyè Ekwon an. Tout teritwa sa a te pase pou peyi moun Kanaran yo. Te gen senk chèf pami moun Filisti yo: yonn te rete lavil Gaza, yon lòt te rete lavil Asdòd, yon lòt lavil Askalon, yon lòt lavil Gat, yon lòt lavil Ekwon. Te
⁴ rete peyi moun Avit yo tou, sou bò sid la, tout peyi moun Kanaran yo, depi lavil Meara ki pou moun Sidon yo jouk Afeka, sou fwontyè peyi Amori a.⁵ Te rete ankò tè moun Jebal yo ak tout peyi Liban sou bò solèy leve, depi Baal-Gad nan pye mòn Emon jouk kote Pas Amat la konmanse
⁶ a. Tout moun ki rete nan mòn yo, depi peyi Liban jouk lavil Misrefòt Mayim, tout moun Sidon yo, se mwen menm ki pral mete yo deyò pou fè plas pou pèp Izrayèl la. Men, se ou menm ki pral
⁷ separe tè a bay chak moun pèp Izrayèl yo pòsyon pa yo, jan mwen te ba ou lòd la. ¶ Lè a rive koulye a pou nou separe peyi a bay nèf lòt branch fanmi yo ak lòt mwatye nan branch fanmi Manase
⁸ a pòsyon pa yo. Branch fanmi Woubenn lan ak branch fanmi Gad la ansanm ak mwatye nan branch fanmi Manase a te deja resevwa pòsyon tè pa yo lòt bò larivyè Jouden sou solèy leve. Se
⁹ Moyiz, sèvitè Seyè a, ki te ba yo li. Peyi yo a te soti depi lavil Awoyè ki sou bò gwo ravin Anon
¹⁰ an ak lavil ki nan mitan ravin lan, li pran tout plenn Medeba a rive lavil Dibon. Li pran tout lavil ki te pou Siyon, wa moun Amori yo, ki te rete lavil Esbon pandan tout rèy li, li rive jouk sou fwontyè
¹¹ moun Amon yo. Li pran tout peyi Galarad la, tout teritwa moun Jechou yo ak moun Maaka yo
¹² ansanm ak tout mòn Emon ak mòn Bachan jouk Salka. Nan peyi Bazan an, yo pran tout zòn kote wa Og t'ap gouvènen an. Wa Og sa a te rete lavil Astawòt ak lavil Edreyi lè sa a. Se te dènye

moun nan ras refayim yo ki te vivan. Moyiz te goumen ak pèp sa yo, li bat yo byen bat, li pran tout peyi a nan men de wa yo. ¹³ Men, pèp Izrayèl la pa t' mete moun Jechou yo ak moun Maaka yo deyò. Se konsa, jouk jòdi a de pèp sa yo ap viv nan mitan pèp Izrayèl la toujou. ¹⁴ Sèl branch fanmi Levi a pa t' resevwa ankenn pòsyon tè ki rele l' pa l' nan pataj la, paske Seyè a, Bondye pèp Izrayèl la, te kite tou sa yo ofri ba li pou yo, jan li te di l' la. ¹⁵ Moyiz te separe tè branch fanmi Woubenn lan, li bay chak fanmi pòsyon pa yo. ¹⁶ Se konsa, pòsyon pa yo a te konmanse depi lavil Awoyè, ki sou bò ravin Anon an, li pran lavil ki nan mitan ravin lan, tout platon Medeba a, ¹⁷ lavil Esbon ak tout lòt lavil ki te sou platon an, ki vle di Dibon, Bamòt, Baal, Bèt-Baal Meyon, ¹⁸ Jaza, Kedemòt, Mefrat, ¹⁹ Kiryatayim, Libna ak Zerèt acha Jechimòt, sou ti bit ki nan fon an, ²⁰ Bèt-Peyò, sou pant Pizga a, Bèt ajechimòt, ²¹ tout lavil ki sou platon an, tout peyi wa Siyon ki t'ap gouvènen moun Amori yo nan lavil Esbon. Se Moyiz ki te kraze l' ansanm avèk chèf peyi Madyan yo: Evi, Rekèm, Zou, Our, Reba. Tout chèf sa yo t'ap viv nan peyi a sou lòd wa Siyon. ²² Pami moun moun pèp Izrayèl yo te touye yo, te gen pwofèt yo te rele Balaram, pitit Beyò a. ²³ Pòsyon tè moun branch fanmi Woubenn yo te rive jouk larivyè Jouden. Se tout lavil ak tout ti bouk sa yo yo te bay moun branch fanmi Woubenn yo. Yo te separe bay chak fanmi pòsyon pa yo, dapre kantite fanmi yo te genyen. ²⁴ Moyiz te separe tè branch fanmi Gad la, li bay chak fanmi pòsyon pa yo. ²⁵ Se konsa, pòsyon pa yo a te pran tout peyi Jazè a, tout lavil ki nan peyi Galarad la, mwatye nan peyi moun Amon yo, rive sou lavil Awoyè sou bò solèy leve lavil Raba. ²⁶ Li te pran depi Esbon jouk Ramat Mizpe ak Betonim, depi Manayim jouk fwontyè peyi Lodeba. ²⁷ Nan fon an yo te gen lavil sa yo: Bèt aram, Bèt-Nimra, Soukòt ak Zafon, rès peyi wa Siyon ki te rete Esbon an. Larivyè Jouden te sèvi yo fwontyè rive letan Galile nan nò. Tout pòsyon pa yo a te lòt bò solèy leve. ²⁸ Se tout lavil ak tout ti bouk sa yo yo te bay moun branch fanmi Gad yo. Yo te separe bay chak fanmi pòsyon pa yo, dapre kantite fanmi yo te genyen. ²⁹ Moyiz te separe tè ki pou mwatye nan branch fanmi Manase a, li bay chak fanmi pòsyon pa yo. ³⁰ Se konsa, pòsyon pa yo a te konmanse depi Manayim, li pran tout peyi Bazan an, tout peyi wa Og t'ap gouvènen an, ak swasant bouk ki te pou Jayi nan peyi Bazan an, ³¹ mwatye nan peyi Galarad la ansanm ak Astawòt ak Edreyi, lavil ki te pou wa Og nan peyi Bazan an. Se tout zòn sa yo ki vin pou mwatye nan branch fanmi Maki, pitit gason Manase a. Yo bay chak fanmi pòsyon pa yo. ³² Se konsa Moyiz te separe tè ki lòt bò larivyè Jouden, anfas lavil Jeriko, sou bò solèy leve, lè li te nan plenn Moab yo. ³³ Men, Moyiz pa t' bay moun

branch fanmi Levi yo ankenn pòsyon nan peyi a pou rele yo pa yo. Li te di yo sèl byen yo se Seyè a, Bondye pèp Izrayèl la.

Chapter 14

¹ ¶ Men tè yo te separe bay moun pèp Izrayèl yo. Se Eleaza, prèt la, ak Jozye, pitit gason Noun lan, ansanm ak tout chèf fanmi nan tout branch pèp Izrayèl yo ki te bay chak fanmi pòsyon pa yo.

² Jan Seyè a te bay Moyiz lòd la, yo te tire osò devan Seyè a pou yo te ka konnen ki pòsyon ki tapral pou nèf branch fanmi ki te rete yo ak lòt mwatye branch nan fanmi Manase a. ³ Moyiz te gen tan bay de branch fanmi ak mwatye nan yon twazyèm branch fanmi pòsyon pa yo lòt bò larivyè Jouden.

Men, li pa t' bay moun fanmi Levi yo ankenn pòsyon nan tè sa yo. ⁴ Fanmi Jozèf la te fè de branch: yonn pou Manase, yonn pou Efrayim. Moun Levi yo pa t' resevwa ankenn pòsyon nan tè a pou yo. Men yo te ba yo kèk lavil pou yo te rete ak savann toupren lavil yo pou yo gade bèt ak zannimo.

⁵ Se konsa, moun pèp Izrayèl yo te separe peyi a jan Seyè a te bay Moyiz lòd fè l' la. ⁶ ¶ Moun branch fanmi Jida yo al jwenn Jozye nan kan Gilgal la. Kalèb pitit gason Jefoune, nan fanmi Kenaz la, di li: -Ou konnen sa Seyè a te di Moyiz, sèvitè Bondye a, sou ou ak sou mwen lè li te lavil

⁷ Kadès-Banea. Mwen te gen karantan lè Moyiz, sèvitè Seyè a, rete lavil Kadès-Banea, li voye m' al vizite tout peyi sa a. Lè m' tounen, mwen fè l' yon bon rapò dapre sa m' te wè. ⁸ Moun ki te moute avè m' yo pran dekouraje pèp la. Men mwen menm, mwen te fè tou sa Seyè a, Bondye mwen an,

te vle m' fè. ⁹ Lè sa a, Moyiz fè m' pwomès sa a, li di m': Ou wè ou menm, ou fè tou sa Seyè a te vle ou fè. Se poutèt sa y'a ba ou tout kote ou mete pye ou yo pou ou ak pou tout ras ou apre ou.

¹⁰ Gade! Seyè a kenbe pwomès li, li pa kite m' gen tan mouri. Sa te fè deja karanssenkan depi Seyè a te di Moyiz sa. Lè sa a, pèp Izrayèl la t'ap moute desann nan dezè a. Koulye a mwen gen

¹¹ katrevensenkan. Men, mwen santi m' vanyan gason jòdi a tankou lè Moyiz te voye m' al vizite peyi a. Mwen santi mwen ka goumen, mwen ka regle tout zafè m' jan m' te konn fè l' lè sa a. ¹² Se poutèt sa, mwen mande ou pou ou ban mwen mòn Seyè a te pwomèt mwen jou sa a. Ou te rive konnen se yon bann gwonèg bèl wotè yo rele anakim ki t'ap viv la. Yo te gen anpil gwo lavil ki te byen pwoteje ak ranpa. Men, mwen kwè Seyè a pral kanpe avè m'. L'a ede m' pran peyi a nan men

yo jan li te di l' la. ¹³ Lè sa a, Jozye bay Kalèb, pitit gason Jefoune a, benediksyon, epi li ba li pòsyon tè Ebwon an pou pòsyon pa li. ¹⁴ Jouk koulye a, Ebwon rete pou Kalèb ak pou moun ras fanmi li yo, paske Kalèb te fè tou sa Seyè a, Bondye pèp Izrayèl la, te vle l' fè. ¹⁵ Nan tan lontan,

yo te rele lavil Ebwon an Kiriyat aba. Aba sa a, se li ki te pi gwonèg nan tout ras moun Anak yo. Depi apre lè sa a, peyi a t'ap viv ak kè poze. Pa t' gen goumen ankò.

Chapter 15

¹ ¶ Lè yo te tire osò a, men pòsyon tè ki vin pou moun branch fanmi Jida yo. Se tè sa a yo te separe bay chak fanmi nan branch lan pòsyon pa yo. Tè a bonè nan sid ak peyi Edon an, depi dezè Zin lan rive Kadès nan direksyon sid. ² Fwontyè tè a konmanse nan pwent sid lanmè Sale a, ³ li pase anba pas Akrabim lan, li travèse dezè Zin, li moute pou l' pase anba Kadès Banea, li pase Ezwon, li moute Ada, li vire sou Kareka, ⁴ li pase Azmon, li kouri nan ravin ki sou fwontyè Lejip la jouk li rive sou lanmè a. Men limit sid tè moun Jida yo. ⁵ Sou bò solèy leve, lanmè Sale a te sèvi yo fwontyè rive nan lanbouchi larivyè Jouden an. Se la fwontyè nò a te konmanse. ⁶ Li moute Bèt-Ogla, li pase anwo Bèt araba, li rive jouk Wòch Boan. Boan, se non yonn nan pitit gason Woubenn yo. ⁷ Apre sa, li pase nan fon Akò, li moute jouk Debi. Li vire sou bò nò nan direksyon Gilgal, anfas pas Adoumen ki sou bò sid ravin lan. Li pase moute bò sous Anchemèch, l' al bout sou Anwogèl. ⁸ Apre sa, li remoute ravin Pitit Ennon an ki nan sid mòn moun Jebis yo, ki vle di Jerizalèm, li moute sou tèt mòn ki anfas ravin Ennon an, sou bò solèy kouche, nan pwent nò plenn refayim yo. ⁹ Li soti nan tèt mòn lan, li desann bò sous Neftoa a. Apre sa li pran direksyon mòn Efwon an, li vire sou lavil Bala (ki rele Kiriyat-Jearim tou). ¹⁰ Li soti Bala, li fè yon ti koube moute nan direksyon solèy kouche, sou mòn Seyi, li lonje flan nò mòn Jearim lan (ki rele Kisalòn tou), li desann Bètchemèch, li travèse Timna, ¹¹ li rive sou bò nò mòn Ekwon, li vire sou Chikawon, li pase sou ti bit Bala a, li pase Jabneyèl, epi l' al bout nan lanmè. ¹² Sou bò lwès la, se lanmè Mediterane a ki te sèvi yo limit. Men limit ki te fèmen pòsyon tè yo te bay tout fanmi ki nan branch fanmi Jida a. ¹³ ¶ Jan Seyè a te bay Jozye lòd la, yon pòsyon nan tè moun Jida yo vin pou Kalèb, pitit gason Jefoune a. Jozye ba li Kiriyat aba, kapital peyi Anak yo. (Koulye a yo rele lavil la Ebwon). ¹⁴ Kalèb mete twa pitit gason Anak yo deyò nan lavil la. Se te Chechayi, Ayiman ak Talmayi, ¹⁵ Apre sa, li kite Ebwon, l' al atake moun lavil Debi yo. (Nan tan lontan, yo te rele lavil sa a Kiriyat-Sefè). ¹⁶ Lè sa a, Kalèb di konsa: -Moun ki va resi kraze moun Kiriyat-Sefè yo, epi ki va pran lavil la nan men yo, m'a ba li Aksa, pitit fi mwen an, pou madanm. ¹⁷ Se pwòp frè Kalèb,

Otonyèl, pitit Kenaz, ki te pran lavil la. Kalèb ba li Aksa, pitit fi li a, pou madanm. ¹⁸ Lè Aksa rive lakay mari l', mari a di l' poukisa li pa mande papa l' yon bon jaden. Aksa al jwenn papa l'. Desann
 li desann bourik li, Kalèb mande l': -Sa ki genyen, pitit mwèn? ¹⁹ Aksa reponn: -Mwèn vin mande ou yon favè. Ou voye m' byen lwen nan dezè Negèv la. Tanpri, ban m' kek sous kote pou m' jwenn
 dlo non. Se konsa Kalèb ba li Sous Dlo Anwo ak Sous Dlo Anba yo. ²⁰ ¶ Men tout tè ki te vini
 pou branch fanmi Jida a. Yo separe l' bay yon pòsyon pou chak fanmi. ²¹ Men non lavil kote moun Jida yo te rete nan Negèv la, anba pwent sid peyi a, bò fwontyè peyi Edon an: Kabseyèl, Edè, Jagou,
²² Kina, Dimona, Adada, ²³ Kedèch, Azò-Yitnan, ²⁴ Zif, Telèm, Bejalòt, ²⁵ Azò adata, Keriyòt-Ezwon (ki rele Azò tou), ²⁶ Aman, Chema, Molada, ²⁷ Aza-Gada, Echmon, Bèt-Pelèt,
²⁸ Aza-Chwal, Bècheba, Biziotya, ²⁹ Bala, Iyim, Azèm, ³⁰ Eltola, Kesil, Oma, ³¹ Ziklag, Madmana, Sansana, ³² Lebaòt, Chilim, Ayin ak Rimon. Sa te fè antou vennèf lavil ak tout ti bouk ki sou lòd
 yo. ³³ Men non lavil kote yo te rete nan plenn yo: Echtawòl, Zorea, Akna, ³⁴ Zanoa, An-Gannim, Tapwak, Enan, ³⁵ Jamout, Adoulam, Soko, Azeka, ³⁶ Charayim, Aditayim, Gedera ak Gedewotayim. Sa te fè antou katòz lavil ak tout ti bouk ki sou lòd yo. ³⁷ Te gen tou Etzenan, Adaka, Migdal-Gad,
³⁸ Dilean, Am Mizpe, Jokteyèl, ³⁹ Lakis, Boska, Eglon, ⁴⁰ Kabon, Lamas, Kitlis, ⁴¹ Jedewòt, Bèt-Dagon, Nama, Makeda. Sa te fè antou sèz lavil ak tout ti bouk ki sou lòd yo. ⁴² Te gen tou Libna, Etè, Akan, ⁴³ Jifta, Akna, Nezib, ⁴⁴ Keyila, Akzib, Marecha. Sa te fè antou nèf lavil ansanm ak tout ti bouk ki sou lòd yo ⁴⁵ Te gen Ekwon ak tout ti bouk ki sou lòd li. ⁴⁶ Soti Ekwon pou al bò lanmè, tout lavil ki nan zòn Asdòd ak tout ti bouk ki sou lòd yo, ⁴⁷ Asdòd ak tout ti vil ak tout ti bouk ki sou lòd li, Gaza ak tout ti bouk osinon ti vil ki sou lòd li, depi ravin ki sou fwontyè Lejip la rive sou lanmè ki sèvi yo limit la. ⁴⁸ Men lavil yo te genyen nan mòn yo: Chami, Jati, Soko,
⁴⁹ Dana, Kiriyaat-Sefè (Koulye a li rele Debi), ⁵⁰ Anad, Estemoa, Anim, ⁵¹ Gochenn, Alon, Gilo. Sa te fè antou onz lavil ak tout ti bouk ki sou lòd yo. ⁵² Te gen tou Arab, Douma, Echean, ⁵³ Janoum, Bèt-Tapwa, Afeka, ⁵⁴ Oumeta, Kiriyaat aba (Jòdi a li rele Ekwon), ak Ziò. Sa te fè antou nèf lavil ak tout ti bouk ki sou lòd yo. ⁵⁵ Te gen ankò Maon, Kamèl, Zif, Jouta, ⁵⁶ Jizrèyèl, Jokdeam, Zanoa, ⁵⁷ Kayin, Gibeya, Tima, Antou sa te fè dis lavil ak tout ti bouk ki sou lòd yo. ⁵⁸ Te gen ankò Aloul, Bètsou, Gidò, ⁵⁹ Maarat, Bèt anòt, Eltekon. Antou sa te fè sis lavil ak tout ti bouk ki

60 sou lòd yo. Te gen ankò Kiriyat-Baal (Jòdi a li rele Kiriyat-Jearim) ak Araba. Antou sa te fè de
 lavil ak tout ti bouk ki sou lòd yo. 61 Men non lavil kote yo te rete nan dezè a: Bèt araba, Miden,
 Sekaka, 62 Nibkan, Site Sèl la ak Angedi. Antou sa te fè sis lavil ak tout ti bouk ki sou lòd yo.
 63 Men, moun Jida yo pa t' janm rive mete bann moun Jebis ki te rete lavil Jerizalèm yo deyò. Kifè,
 jouk jòdi a moun Jebis yo rete lavil Jerizalèm ansanm ak moun Jida yo.

Chapter 16

1 ¶ Tè ki te vin pou moun fanmi Jozèf yo te konmanse bò larivyè Jouden, anfas lavil Jeriko, sou
 bò solèy leve. Li soti la, li moute nan mòn yo jouk li rive Betèl. 2 Li soti Betèl, li moute Louz, li
 pase Atawòt, kote moun Aki yo te rete. 3 Baliz fwontyè a desann apre sa bò solèy kouche, nan
 direksyon peyi moun Jaflet yo jouk sou limit Bètowon, li pase rive Gezè, l' al bout nan lanmè.
 4 Men pòsyon tè ki te vin pou fanmi de pitit Jozèf yo: Manase ak Efrayim. 5 ¶ Men tè yo te bay
 branch moun Efrayim yo pou yo separe bay chak fanmi yon pòsyon. Sou bò solèy leve, Atawòt,
 Adak te sèvi yo fwontyè jouk Bètowon. 6 Baliz fwontyè a soti la, l' al bout nan lanmè Mediterane
 a. Li kite lavil Mikmetat sou bò nò li. Sou bò solèy leve, fwontyè a vire desann bò Taanat-Silo, li
 pase bò kote l', sou bò lès lavil Janoa. 7 Li desann soti Janoa, li pase lavil Atawòt ak Nara, li rive
 lavil Jeriko, l' al bout sou larivyè Jouden. 8 Li soti Tapwa, li pran direksyon lwès jouk li rive nan
 dlo Kana, l' al bout sou lanmè a. Men tout pòsyon tè ki te vin pou branch fanmi Efrayim yo. Yo
 separe l', yo bay chak fanmi yon pòsyon, 9 ansanm ak lavil yo te pran nan mitan ti mòn moun
 Manase yo pou bay moun Efrayim yo. 10 Men yo pa t' rive mete moun Kanaran ki te rete lavil
 Gezè yo deyò. Se konsa, jouk jòdi a moun Kanaran yo ap viv nan mitan moun Efrayim yo. Men,
 yo te fòse moun Kanaran yo fè kòve pou yo.

Chapter 17

1 ¶ Manase te premye pitit gason Jozèf. Se konsa yon pòsyon nan tè a vin pou moun fanmi
 Manase yo. Maki, papa Galarad, te premye pitit gason Manase. Se te yon vanyan sòlda. Se konsa
 yo te ba li peyi Galarad ak peyi Bazan. 2 Apre sa, yo bay fanmi lòt pitit Manase yo yon pòsyon

nan tè a, dapre kantite moun yo te genyen: yon pòsyon pou pitit Abyezè yo, yon pòsyon pou pitit Elèk yo, yon pòsyon pou pitit Asriyèl yo, yon pòsyon pou pitit Sichèm yo, yon pòsyon pou pitit Efè yo, yon lòt pòsyon pou pitit Chemida yo. Se moun sa yo ki te branch fanmi pitit gason Manase,

³ pitit Jozèf la. Nan branch fanmi Manase a, te gen yon nonm yo te rele Zelochad. Se te pitit gason Efè. Efè sa a te pitit Galarad, Galarad te pitit Maki, Maki te pitit Manase. Zelochad pa t' gen pitit

⁴ gason menm. Se fi ase li te fè. Men ki jan yo te rele: Mala, Noa, Ogla, Milka ak Tiza. Yo vin jwenn Eleaza, prèt la, Jozye, pitit gason Noun lan, ak tout chèf yo. Yo di yo konsa: -Seyè a te bay Moyiz lòd pou l' te ban nou yon pòsyon nan tè a, tankou tout moun nan fanmi an. Se konsa, jan

⁵ Seyè a te bay lòd la, yo ba yo yon pòsyon pou yo tankou tout moun nan fanmi papa yo. Konsa yo te rive bay moun Manase yo dis pòsyon tè, san konte peyi Galarad ak peyi Bazan ki lòt bò larivyè

⁶ Jouden an, paske pitit fi Manase yo te resevwa yon pòsyon apa pou yo tankou pitit gason l' yo.

⁷ Men, yo te bay peyi Galarad la pou lòt pitit Manase yo. ¶ Men limit tè yo te bay moun Manase yo. Li konmanse bò tè moun Asè yo, li rive lavil Mikmetat, anfas Sichèm, sou bò solèy leve. Li

⁸ vire desann bò sid nan direksyon Jamen nan peyi moun Antapwak yo. Tout peyi Tapwak la te

⁹ pou moun Manase yo. Men, lavil Tapwak ki sou fwontyè a te pou moun Efrayim yo. Limit la desann nan ravin Kana a, li pase sou bò nò ravin lan epi l' al bout nan lanmè. Tout lavil ki te sou bò sid ravin lan, atout yo te nan mitan tè moun Manase yo, se pou moun Efrayim yo yo te ye.

¹⁰ Moun Efrayim yo te anba sou bò sid, moun Manase yo te anwo sou bò nò, avèk lanmè Mediterane a sou bò solèy kouche. Pòsyon tè yo a te rive sou lizyè tè moun Asè yo sou bò nò ak lizyè tè moun

¹¹ Isaka yo sou bò lès. Nan mitan pòsyon tè ki te vin pou moun Isaka yo ak moun Asè yo, yo te bay moun Manase yo lavil Bèt-Chean ak tout ti bouk ki sou lòd li yo, moun ki rete lavil Ibleyam, lavil Dò ki bò lanmè a, lavil Andò, lavil Tanak, lavil Megido ak tout ti bouk ki te sou lòd yo.

¹² Men, moun fanmi Manase yo pa t' kapab mete moun ki t'ap viv nan lavil sa yo deyò. Se konsa

¹³ moun Kanaran yo te rive rete nan peyi a. Men, lè moun Izrayèl yo vin pi fò, yo pa mete yo deyò

¹⁴ nan peyi a, yo sèlman fòse yo fè kòve pou yo. ¶ Moun fanmi Jozèf yo di Jozye konsa: -Poukisa se yon sèl pòsyon ou ban nou nan tè a pou rele nou pa nou? Nou anpil wi. Seyè a pa manke beni

¹⁵ nou. Jozye reponn yo: -Si nou anpil, si mòn nan peyi Efrayim yo pa ase pou nou, se pou n' moute nan gwo rakbwa ki nan peyi moun Ferezi yo ak moun reffrayim yo, n'a koupe bwa fè plas pou nou.

¹⁶ Moun fanmi Jozèf yo di l' ankò: -Mòn lan pa kont pou nou. Lèfini, moun Kanaran ki rete nan plenn yo gen cha an fè pou fè lagè. Moun Kanaran ki rete Bèt Chean ak nan ti bouk ki sou lòd yo,

¹⁷ ansanm ak sa ki rete nan plenn Jizreyèl yo gen menm kalite cha a tou. Jozye di moun Jozèf yo, ki vle di moun Efrayim yo ak moun Manase yo: -Nou anpil vre. Nou gen anpil fòs. Nou pa ka rete

18
 ak yon sèl pòsyon tè. Tout mòn yo ap pou nou. Malgre se yon gwo rakbwa yo ye. N'a koupe bwa yo, epi n'a pran tout zòn lan nèt pou nou. Pou moun Kanaran yo menm, atout nou wè yo gen cha ki fèt an fè, atout yo fò a, rive yon lè, n'a mete yo deyò.

Chapter 18

1 ¶ Lè yo fin soumèt tout peyi a, tout moun pèp Izrayèl yo reyini lavil Silo kote yo te kanpe
 Tant Randevou a. Tout peyi a te pou yo. 2 ¶ Men, te gen sèt branch fanmi nan pèp Izrayèl la ki pa
 t' ankò resevwa pòsyon pa yo nan tè a. 3 Lè sa a, Jozye di yo: -Kisa n'ap tann pou n' al pran peyi
 Seyè a, Bondye zansèt nou yo, ban nou an? 4 Chak branch fanmi pral chwazi twa gason ban mwen.
 M'a voye yo al mache toupatou nan peyi a. Y'a make pòsyon yo ta renmen gen pou yo. Apre sa,
 5 y'a tounen vin jwenn mwen. Y'a separe rès peyi a an sèt pòsyon. Moun branch fanmi Jida yo va
 rete sou tè pa yo nan sid, epi moun branch fanmi Jozèf yo va rete sou pòsyon tè pa yo tou nan nò.
 6 N'a make sou papye jan nou ta renmen separe rès peyi a an sèt pòsyon. N'a pote papye a ban mwen
 isit la. Apre sa, m'a vin tire osò pou nou devan Seyè a, Bondye nou an. 7 Moun Levi yo menm p'ap
 resevwa ankenn pòsyon nan tè a tankou lòt branch fanmi yo, paske tou sa y'a gen pou yo fè se sèvi
 pou yo sèvi prèt pou Seyè a. Pou moun branch fanmi Gad yo, moun branch fanmi Woubenn yo ak
 mwatye nan branch fanmi Manase a, yo gen tan resevwa pòsyon pa yo lòt bò larivyè Jouden, sou
 8 bò solèy leve, jan Moyiz, sèvitè Bondye, te ba yo l' la. Se konsa mesye yo al vizite tout peyi a
 pou yo ka make sou papye jan peyi a ye. Anvan sa, Jozye te bay mesye yo lòd sa a: -Ale mache
 nan tout peyi a. Make jan nou wè l'. Apre sa, tounen vin jwenn mwen. M'a moute Silo pou m' ka
 9 tire osò pou nou, pou m' ka konnen volonte Seyè a. Mesye yo pati, yo mache nan tout peyi a. Yo
 make sou papye tout lavil yo jwenn. Yo separe yo fè sèt pòsyon ak non tout lavil yo, epi yo pote l'
 10 bay Jozye nan kan Silo a. Lè sa a, Jozye tire osò pou yo devan Seyè a nan Silo. Se la li separe
 11 peyi a bay moun pèp Izrayèl yo. Li bay chak moun pòsyon ki vin pou yo. ¶ Moun branch fanmi
 Benjamen yo te jwenn pòsyon tè ki nan mitan an, pòsyon tè moun Jida yo yon bò ak pòsyon tè
 12 moun Jozèf yo yon lòt bò. Sou bò nò, lizyè yo a te konmanse larivyè Jouden, li moute flan nò
 mòn Jeriko a, li rale moute sou mòn yo nan direksyon solèy kouche, jouk li rive nan dezè Bèt avenn
 13 lan. Apre sa, li pase lavil Louz, sou bò sid bit Louz la kote yo rele jouk jòdi a Betèl. Li desann
 14 Atawòt ada, sou mòn ki sou bò sid lavil Bètowon an. Lizyè a fè yon koube, li vire kite direksyon
 lwès, li pran direksyon sid, depi sou mòn ki anfas Bètowon an sou bò sid, jouk li rive lavil

Kiriyat-Baal yo rele Kiriyat-Jearim jòdi a, ki te pou moun Jida yo. Se sa ki te limit pòsyon pa moun
¹⁵ Benjamen yo sou bò solèy kouche. Men limit yo sou bò sid: li pati depi nan Kalfou Kiriyat-Jearim
¹⁶ lan, li moute bò Gachen, li pran direksyon lwès, li parèt bò sous dlo Neftoa yo. Apre sa, li rive
 jouk bò mòn ki anfas fon Pitit Ennon an, ki sou bò nò plenn Refayim yo. Li pran pant mòn moun
¹⁷ Jebis yo desann nan fon Ennon an, l' al bout sou Anwogèl. Apre sa, li fè yon koub li vire sou
 nan nò, li pase Anchemèch. Apre sa, li rive Gelilòt anfas pas Adoumim. Li desann bò Wòch Boan.
¹⁸ Boan sa a te pitit Woubenn. Apre sa, li pase sou flan nò mòn Neta araba, li desann nan fon
¹⁹ Jouden an. Li rive sou flan nò mòn Bèt-Ogla. L' al bout nan pwent nò lanmè Mouri a, nan bout
²⁰ sid larivyè Jouden an. Se sa ki te limit sid yo. Sou bò solèy leve, larivyè Jouden an te sèvi yo
 baliz. Men limit pòsyon tè yo te bay moun Benjamen yo pou yo separe bay chak fanmi pa yo.
²¹ Men non lavil ki te pou fanmi moun Benjamen yo. Se te Jeriko, Bèt-Ogla, Emèkkesis, ²² Bèt
 arara, Semarayim, Betèl, ²³ Avim, Para, Ofra, ²⁴ Kefa amoni, Ofni, Geba. Sa te fè antou douz lavil
 ak tout ti bouk ki sou lòd yo. ²⁵ Te gen tou Gabawon, Rama, Beewòt, ²⁶ Mizpe, Kefira, Mosa,
²⁷ Rekèm, Jipeyèl, Tareala, ²⁸ Sela-Elèf, Jebis ki vle di Jerizalèm, Gibeya ak Kiriyat. Sa te fè antou
 katòz lavil ak tout ti bouk ki sou lòd yo. Men pòsyon tè yo te bay branch fanmi Benjamen yo pou
 yo separe bay chak fanmi pa yo.

Chapter 19

¹ ¶ Dezyèm pòsyon an te vin pou moun Simeyon yo, pou yo separe bay chak fanmi pa yo.
 Pòsyon tè yo a te nan mitan pòsyon tè yo te bay moun branch fanmi Jida yo. ² Men lavil yo te ba
 yo pou yo separe pou yo: Bècheba, Cheba, Molada ³ Asa-Chwal, Bala, Atsèm, ⁴ Eltolad, Betoul,
⁵ Oma, ⁵ Ziklag, Bèt Makabòt Asa-Sousa, ⁶ Bèt Lebayòt ak Chawouyèm. Sa te fè antou trèz lavil
 ak tout ti bouk ki sou lòd yo. ⁷ Yo te ba yo ankò Ayin, Rimon, Etè ak Achan, kat lòt lavil ak tout
⁸ ti bouk ki sou lòd yo. Fòk nou konte tou tout ti bouk nan vwazinaj lavil sa yo rive jouk Baalat-Beyè
 ak Rama nan dezè a. Men pòsyon tè yo te bay branch fanmi Simeyon yo pou yo separe bay chak
⁹ fanmi pa yo. Nan pòsyon tè moun Jida yo, yo te pran yon pòsyon bay moun Simeyon yo, paske
 pòsyon tè ki te pou moun Jida yo te twòp pou yo. Se konsa, moun branch fanmi Simeyon yo te

¹⁰
 jwenn yon pòsyon tè ki te nan mitan pòsyon tè moun Jida yo. ¶ Twazyèm pòsyon tè a te vin pou
 moun branch fanmi Zabilon yo, pou yo separe bay chak fanmi pa yo. Pòsyon tè yo te resevwa a te
¹¹
 rive jouk Sarid. Limit la moute bò lwès, li rive Mareala, li pase Dabechèt. Apre sa, li rive nan
¹²
 ravin ki pase anfas Jokneyam, lòt bò lavil Sarid, nan direksyon solèy leve, jouk yo rive sou limit
¹³
 Kislòt-Tabò. Apre sa, li pran chemen Daberat, li moute Jafya. Li soti Jafya nan menm direksyon
¹⁴
 solèy leve a, li rive sou Gat-Efè ak Itakasen. Li pase sou Rimon, li vire sou Nea. Sou bò nò,
¹⁵
 limit la vire sou Anaton, l' al bout nan fon Jiftayèl. Yo te ba yo lavil sa yo tou: Katat, Naala,
¹⁶
 Chimwon, Jideala ak Betleyèm. Sa te fè antou douz lavil ak tout ti bouk ki te sou lòd yo. Tout
 lavil sa yo ak tout ti bouk ki te sou lòd yo te nan pòsyon tè yo te bay moun branch fanmi Zabilon
¹⁷
 yo pou yo separe bay chak fanmi pa yo. ¶ Katriyèm pòsyon tè a te vin pou moun branch fanmi
¹⁸
 Isaka yo pou yo separe bay chak fanmi pa yo. Pòsyon sa a te rive jouk lavil Jizreyèl. Men lòt
¹⁹ ²⁰
 lavil ki te ladan l': Kesoulòt, Choumèm, Afarayim, Chiyon, Anakarat, Rabbit, Kichyon, Abèz,
²¹ ²²
 Remèt ak An-Gannim, An ada ak Bèt-Pasèz. Fwontyè a te rive lavil Tabò, lavil Charasima
 ak lavil Bèt-Chemèch. Epi l' al bout nan larivyè Jouden. Antou sa te fè sèz lavil ak tout ti bouk ki
²³
 sou lòd yo. Tout lavil sa yo ak tout ti bouk ki te sou lòd yo te nan pòsyon tè yo te bay moun
²⁴
 branch fanmi Isaka yo pou yo separe bay chak fanmi pa yo. ¶ Senkyèm pòsyon tè a soti pou
²⁵
 branch fanmi Asè a pou yo separe bay chak fanmi pa yo. Men lavil ki te nan pòsyon tè pa yo a:
²⁶
 Elkat, Ali, Betèn, Akchaf, Alamelèk, Ameyad, Micheyal. Sou bò solèy kouche, li te rive mèn
²⁷
 Kamèl ak ravin Libnat. Sou bò solèy leve, tè a rive jouk Bèt-Dagon, li rive sou limit tè moun
 Zabilon yo, li pran fon Jiftayèl la moute nan direksyon nò, li pase Bèt-Emèk ak Neyèl, li bout sou
²⁸
 Kaboul bò nan nò nèt. Konsa men lòt lavil ki te nan pòsyon tè sa a: Abdon, Reyòb, Amon ak
²⁹
 Kana jouk gwo lavil Sidon an. Apre sa, limit la vire tounen nan direksyon Rama jouk li rive nan
 gwo fò lavil Tir la, li pouse pou Osa epi l' al bout nan lanmè Mediterane a. Nan menm pòsyon tè
³⁰
 yo a, te vin gen tou Maralèb, Aksib, Ako, Afèk, Reyòb. Sa te fè antou vennde lavil ak tout ti
³¹
 bouk ki te sou lòd yo. Tout lavil sa yo ak tout ti bouk ki te sou lòd yo te nan pòsyon tè yo te bay
³²
 moun branch fanmi Asè yo pou yo separe bay chak fanmi pa yo. ¶ Se pou moun branch fanmi
³³
 Neftali yo sizyèm pòsyon tè a vini pou yo te ka separe bay chak fanmi pa yo. Limit la soti lavil

Elèf, bò pye chenn Sananim lan, li pase Adami-Nekèd, Jabneyèl jouk li rive Lakoum, pou l' al
³⁴
 bout sou larivyè Jouden an. Sou bò solèy kouche, limit la vire sou Aznòt-Tabò. Lè l' soti la, l'
 al Oukòk, li pase sou limit tè moun Zabilon yo bò nan sid, sou baliz tè moun Asè yo sou bò lwès.
³⁵
 Sou bò lès, li pase sou limit tè moun Jida yo kote li lonje larivyè Jouden an. Men lavil ki te gen
³⁶ ³⁷
 fò ak ranpa pou pwoteje yo: Se te Sidim, Sèr, Amat, Raka, Kinerèt, Adama, Rama, Asò, Kadès,
³⁸
 Edreyi, An asò, Jireyon, Migdalèl, Orèm, Bèt anat, Bèt-Chemèch. Sa te fè antou disnèf lavil ak
³⁹
 tout ti bouk ki sou lòd yo. Men tout lavil ansanm ak tout ti bouk sou lòd yo ki te nan pòsyon tè
⁴⁰
 yo bay moun Neftali yo pou yo separe bay chak fanmi pa yo. ¶ Se pou moun branch fanmi Dann
⁴¹
 yo setyèm pòsyon tè a te vini pou yo te ka separe bay chak fanmi pa yo. Men lavil yo te jwenn
⁴² ⁴³
 nan pòsyon tè pa yo a: Se te Soreya, Ehtawòl, Ichemèch, Chalabin, Ajalon, Jitla, Elon,
⁴⁴ ⁴⁵ ⁴⁶
 Timnata, Ekwon, Eltekè, Gibeton, Baalat, Jewoud, Bene-Berak Gat-Rimon, Me-jakon ak
⁴⁷
 Rakon, ansanm avèk tout tè ki anfas lavil Jope. Men, moun branch fanmi Dann yo kite lòt moun
 pran peyi a nan men yo. Se konsa, yo moute al atake lavil Lechèm. Yo anvayi lavil la, yo touye
 tout moun ki te rete ladan l'. Yo pran lavil la pou yo, yo rete ladan l'. Epi yo chanje non l'. Yo pa
⁴⁸
 rele l' Lechèm ankò. Yo ba li non zansèt yo, yo rele l' Dann. Men pòsyon tè ansanm ak tout lavil
 ak ti bouk ki te sou lòd yo, ki te vin pou moun branch fanmi Dann yo pou yo te separe bay chak
⁴⁹
 fanmi pa yo. ¶ Aprè moun pèp Izrayèl yo te fin separe rès peyi a bay chak branch fanmi pòsyon
⁵⁰
 pa yo, yo bay Jozye, pitit gason Noun lan, yon pòsyon nan tè a ki pou rele l' pa l'. Jan Seyè a te
 ba yo lòd la, yo ba li lavil li te mande a: Timnat-Sera nan mòn Efrayim. Li rebati lavil la epi li rete
⁵¹
 ladan l'. Men divès pòsyon tè Eleaza, prèt la, Jozye, pitit gason Noun lan, ak chèf fanmi yo te
 separe bay branch fanmi pèp Izrayèl la, devan Seyè a, nan papòt Tant Randevou a, apre yo te fin
 tire osò. Se konsa yo te fin separe peyi a nèt.

Chapter 20

¹ ¶ Seyè a pale ak Jozye, li di l' konsa: ² -Pale ak moun pèp Izrayèl yo, di yo pou yo chwazi
³
 lavil kote moun ka jwenn pwoteksyon, jan mwen te bay Moyiz lòd pou yo fè a. Lè yon moun
 touye yon moun san li pa fè espre, san li pa t' gen lide fè sa, li ka kouri al kache la pou yo ka pwoteje
⁴
 l' pou l' pa tonbe anba men moun k'ap chache l' pou yo tire revanj. Moun k'ap chache pwoteksyon

nan yonn nan lavil sa yo va kouri ale bò pòtay lavil la, l'a esplike chèf fanmi lavil la sa ki te rive l'.
 Lèfini, y'a kite l' antre nan lavil la. Y'a ba li yon kote pou l' rete nan mitan yo. ⁵ Si moun k'ap chache
 tire revanj yo rive jouk la deyè l', chèf fanmi lavil la p'ap renmèt yo nonm lan, paske se pa espere li
 te fè lè l' te touye moun menm ras ak li a. Li pa t' gen anyen avè l'. ⁶ L'a gen pou l' rete nan lavil la
 jouk la parèt devan tout pèp la pou yo jije l', jouk moun ki granprèt lè sa a va mouri. Se lè sa a nonm
 lan va gen dwa tounen lakay li, nan lavil li te kouri kite a. ⁷ ¶ Se konsa, moun yo pran lavil Kadès
 nan peyi Galile, nan mòn ki pou moun branch fanmi Neftali yo, lavil Sichèm nan mòn ki pou moun
 branch fanmi Efrayim yo ak lavil Kiriyat aba ki rele koulye a Ebwon, nan mòn ki pou moun branch
 fanmi Jida yo pou sèvi pwoteksyon. ⁸ Lòt bò larivyè Jouden an menm, nan platon ki anfas lavil
 Jeriko, bò solèy leve, yo chwazi twa lavil nan dezè a pou sa tou: Bezè nan zòn ki pou moun branch
 fanmi Woubenn yo, Ramòt-Galarad nan zòn ki pou moun branch fanmi Gad yo, ak Golan nan peyi
 Bazan an nan zòn ki pou moun branch fanmi Manase yo. ⁹ Men non lavil yo te chwazi pou bay
 pwoteksyon yo. Nenpòt moun nan pèp Izrayèl la osinon nan moun lòt nasyon k'ap viv nan mitan
 yo ki ta touye yon moun san fè espere, l'a gen dwa kouri al kache la pou yo ka pwoteje l' pou l' pa
 tonbe anba men moun ki fanmi pi pre moun li te touye a, anvan li parèt devan tout pèp la pou yo
 jije l'.

Chapter 21

¹ ¶ Chèf fanmi Levi yo vin jwenn Eleaza, prèt la, Jozye, pitit gason Noun lan, ak chèf tout lòt
 branch fanmi pèp Izrayèl la. ² Lè sa a, tout moun sa yo te reyini lavil Silo, nan peyi Kanaran. Chèf
 fanmi Levi yo di yo: -Seyè a te pale ak Moyiz pou nou. Li te bay lòd pou yo te ban nou lavil pou
 nou rete ak savann pou bèt nou yo jwenn manje. ³ Se konsa, moun pèp Izrayèl yo chwazi kèk lavil
 ak tout savann pou bèt nan pwòp pòsyon tè pa yo, yo bay moun branch fanmi Levi yo, jan Seyè a
 te bay lòd la. ⁴ Yo tire osò. Premye moun ki jwenn pa yo se te moun fanmi Keyat yo. Yo pran trèz
 lavil nan pòsyon tè ki pou moun branch fanmi Jida, branch fanmi Simeyon ak branch fanmi
 Benjamen yo, yo bay moun Keyat yo. Moun sa yo se ras fanmi Arawon, prèt la, yo ye. ⁵ Apre sa,
 yo pran dis lavil nan pòsyon tè ki pou branch fanmi Efrayim, branch fanmi Dann ansanm ak mwaye
 branch fanmi Manase yo, yo separe bay lòt pitit Keyat yo, chak fanmi pa yo apa. ⁶ Lèfini, yo pran
 trèz lavil nan pòsyon tè ki pou branch fanmi Isaka, branch fanmi Asè, branch fanmi Neftali ak lòt
 mwaye branch fanmi Manase a nan peyi Bazan, yo separe bay pitit Gèchon yo, chak fanmi pa yo
 apa. ⁷ Yo pran douz lavil nan pòsyon tè ki pou branch fanmi Woubenn, branch fanmi Gad ak branch

fanmi Zabilon yo, yo separe bay pitit Merari yo, chak fanmi pa yo apa.⁸ Se konsa moun pèp Izrayèl
 yo te tire osò pou Seyè a te ka fè yo konnen ki lavil ak tout savann pou yo bay moun Levi yo, jan
 Seyè a te bay Moyiz lòd pou yo fè a.⁹ ¶ Men non lavil moun branch fanmi Jida ak branch fanmi
 Simeyon yo te bay nan pòsyon tè pa yo.¹⁰ Lavil sa yo te soti pou moun fanmi Keyat, pitit gason
 Arawon, nan branch fanmi Levi a. Premye gwoup lavil la te vin pou yo.¹¹ Yo te ba yo lavil Kiriyaat
 aba, ki rele koulye a Ebwon, yon lavil ki te nan mòn peyi Jida yo, ansanm ak tout savann pou
 mouton yo. Se lavil sa a ki te kapital peyi moun Anak yo.¹² Men, yo pran tout jaden ki te andeyò
 lavil la ak tout ti bouk ki te sou lòd li yo, yo bay Kalèb, pitit gason Jefoune a, pou rele l' pa l'.
¹³ Men lavil yo te bay moun fanmi Arawon, prèt la: lavil Ebwon, kote moun ki touye moun ka
 kouri al chache pwoteksyon, ansanm ak tout savann pou bèt li yo,¹⁴ lavil Jati, lavil Echemoa,
¹⁵ lavil Olòn, lavil Debi,¹⁶ lavil Ayin, lavil Jouta, lavil Bèt-Chemèch, ansanm ak tout savann pou
 bèt yo: Sa te fè nèf lavil yo te pran sou de branch fanmi sa yo.¹⁷ Nan pòsyon tè pou branch fanmi
 Benjamen an, yo te bay lavil Gabawon, lavil Geba ansanm ak tout savann pou bèt yo,¹⁸ lavil
 Anatòt, lavil Almon ansanm ak tout savann pou bèt yo. Sa te fè kat lavil.¹⁹ Antou yo te pran trèz
 lavil ak tout savann pou bèt yo bay prèt yo, moun fanmi Arawon yo.²⁰ Lòt moun ki te rete nan
 fanmi Keyat la, moun Levi ki pa t' ankò jwenn anyen yo, resevwa lavil ki te nan pòsyon tè yo te
 bay moun branch fanmi Efrayim yo.²¹ Yo te ba yo yon lavil nan mòn peyi Efrayim, lavil Sichèm
 kote moun ki touye moun ka kouri al chache pwoteksyon, ansanm ak tout savann pou bèt yo. Yo
 te ba yo tou lavil Gezè,²² lavil Kibsayim, lavil Bètowon ansanm ak tout savann pou bèt yo. Sa te
 fè kat lavil sou tè moun branch fanmi Efrayim yo.²³ Nan pòsyon tè moun branch fanmi Dann yo,
 yo ba yo kat lavil: lavil Elteke, lavil Gibeton,²⁴ lavil Ajalon, lavil Gat-Rimon, ansanm ak tout
 savann pou bèt yo.²⁵ Nan pòsyon tè pou mwaye branch fanmi Manase a, yo ba yo de lavil: lavil
 Tanak ak lavil Gat-Rimon ansanm ak tout savann pou bèt yo.²⁶ Antou yo te bay rès moun nan
 fanmi Keyat la dis lavil ak tout savann pou bèt yo.²⁷ Pou moun Levi nan branch fanmi Gèchon
 yo, yo pran de lavil sou tè ki pou mwaye branch fanmi Manase a, yo ba yo. Se te lavil Golan nan
 peyi Bazan, yonn nan lavil kote moun ki touye moun ka kouri al chache pwoteksyon, ak lavil Bestra
 ansanm ak tout savann pou bèt yo.²⁸ Yo ba yo kat lavil yo te pran sou tè ki pou branch fanmi Isaka
 a. Se te lavil Kichyon, lavil Dabera,²⁹ lavil Jamout, lavil Angannim ansanm ak tout savann pou

³⁰ bèt yo. Yo pran kat lavil nan pòsyon tè ki pou branch fanmi Asè a ba yo. Se te lavil Micheyal,
³¹ lavil Abdon, lavil Elkat, lavil Reyòb ansanm ak tout savann pou bèt yo. ³² Yo pran twa lavil
 nan pòsyon tè ki pou branch fanmi Nèftali a ba yo tou. Se te lavil Kadès nan peyi Galile, yonn nan
 lavil kote moun ki touye moun ka kouri al chache pwoteksyon, lavil Amot-Dò, lavil Katan ansanm
³³ ak tout savann pou bèt yo. Sa te fè antou trèz lavil ansanm ak tout savann pou bèt yo te bay
³⁴ moun fanmi Gèchon yo. Pou rès moun Levi ki nan branch fanmi Merari a, yo pran kat lavil nan
 pòsyon tè ki pou branch fanmi Zabilon an ba yo. Se te lavil Jokneyam, lavil Kata, ³⁵ lavil Dimna,
³⁶ lavil Nalal ansanm ak tout savann pou bèt yo. Apre sa, yo pran kat lavil nan pòsyon tè lòt bò
 larivyè Jouden ki pou moun branch fanmi Woubenn lan ba yo. Se te lavil Bezè, yonn nan lavil kote
³⁷ moun ki touye moun ka kouri al chache pwoteksyon nan dezè sou platon an, lavil Jatsa, lavil
³⁸ Kedemòt, lavil Mefat ansanm ak tout savann pou bèt yo. Yo ba yo kat lòt lavil nan pòsyon tè
 ki pou branch fanmi Gad la. Se te lavil Ramòt-Galarad, yonn nan lavil kote moun ki touye moun
³⁹ ka kouri al chache pwoteksyon, lavil Manayim, lavil Esbon, lavil Jazè ansanm ak tout savann
⁴⁰ pou bèt yo. Antou sa te fè douz lavil ki te vin pou rès moun Levi yo, pou moun fanmi Merari
⁴¹ yo separe bay chak fanmi pa yo apa. Se konsa, yo te pran karantwit lavil ansanm ak tout savann
⁴² pou bèt nan mitan tè ki te pou moun Izrayèl yo, yo bay moun Levi yo. Chak lavil sa yo te mache
⁴³ ak tout savann pou bèt yo. ¶ Se konsa, Seyè a te bay pèp Izrayèl la peyi li te pwomèt li t'ap bay
⁴⁴ zansèt yo a. Yo pran tout peyi a pou yo, yo rete ladan l'. Seyè a te fè yo gen lapè sou tout fwontyè
⁴⁵ yo, jan li te pwomèt zansèt yo. Ankenn lènmi pa t' resi kenbe tèt ak yo. Seyè a te lage tout lènmi
 yo nan men yo. Seyè a te kenbe dènye pwomès li te fè pèp Izrayèl la. Tout bagay te pase jan l'
 te pwomèt la.

Chapter 22

¹ ¶ Lè sa a, Jozye fè rele tout moun nan branch fanmi Woubenn, nan branch fanmi Gad ak nan
 mwatye branch fanmi Manase a, li reyini yo, ² li di yo: -Nou fè tou sa Moyiz, sèvitè Seyè a, te ban
 nou lòd fè a. Nou te koute m' chak fwa mwen te mande nou fè kichòy. ³ Depi nan konmansman
 rive jòdi a, nou pa lage moun pèp Izrayèl parèy nou yo, nou te fè tou sa Seyè a, Bondye nou an, te

4
mande nou fè. Koulye a, Seyè a, Bondye nou an, ba yo lapè jan li te di yo a. Se konsa, nou mèt tounen al lakay nou, nan peyi ki pou nou an, peyi Moyiz, sèvitè Seyè a, te ban nou lòt bò larivyè

5
Jouden. Sèl bagay n'ap mande nou, se pou nou obeyi kòmandman ak lalwa Moyiz, sèvitè Seyè a, te ban nou an. Se pou nou renmen Seyè a, Bondye nou an. Se pou nou toujou mache nan chemen li mete devan nou an. Se pou nou fè tou sa l' mande nou fè. Se pou nou kenbe pye l' fèm. Se pou

6
nou sèvi l' ak tout kè nou ak tout nanm nou. Apre sa, Jozye ba yo benediksyon, li voye yo ale.

7
Epi, y' al lakay yo. Moyiz te pran peyi Bazan an, li te bay mwatye nan branch fanmi Manase a. Jozye menm te bay lòt mwatye branch fanmi an yon pòsyon tè nan peyi ki sou bò solèy kouche larivyè Jouden an ansanm ak lòt branch fanmi pèp la. Lè Jozye t'ap voye premye mwatye moun

8
Manase yo ale lakay yo, lè li fin beni yo, li di yo konsa: -N'ap tounen lakay nou avèk anpil richès, avèk anpil bèt, avèk anpil bagay fèt an ajan, an lò, an kwiv, an fè, ansanm ak anpil rad. Separe avèk

9
moun pèp Izrayèl parèy nou yo tou sa nou te pran nan men lènmi nou yo nan lagè. Se konsa, moun branch fanmi Woubenn yo, moun branch fanmi Gad yo ak mwatye moun nan branch fanmi Manase yo tounen tounen yo lakay yo. Yo kite rès pèp Izrayèl la lavil Silo nan peyi Kanaran, y' al

10
nan peyi Galarad, nan peyi yo te ba yo a, dapre lòd Seyè a te bay Moyiz pou yo. ¶ Lè moun Woubenn yo, moun Gad yo ak mwatye moun Manase yo rive devan larivyè Jouden, sou bò peyi

11
Kanaran an, yo bati yon kokenn chenn lotèl sou rivaj la. Lòt moun pèp Izrayèl yo vin konn sa. Moun te vin di yo: -Men moun Woubenn yo, moun Gad yo ak mwatye moun Manase yo bati yon

12
lotèl toupre larivyè Jouden sou fwontyè peyi Kanaran an, sou bò peyi moun Izrayèl yo. Lè pèp Izrayèl la vin konn sa, tout moun sanble lavil Silo pou y' al goumen ak moun Woubenn yo, moun

13
Gad yo ak lòt mwatye moun Manase yo. Moun pèp Izrayèl yo voye Fineas, pitit gason Eleaza, prèt la, bò kote moun Woubenn yo, moun Gad yo ansanm ak mwatye moun Manase yo nan pèyi

14
Galarad. Yo te pran dis chèf, yonn pou chak branch fanmi pèp Izrayèl la, yo voye yo avèk Fineas.

15
Chèf sa yo, se moun ki te alatèt branch fanmi pèp Izrayèl yo. Se konsa, mesye sa yo rive bò moun Woubenn yo, moun Gad yo ak mwatye moun Manase yo nan peyi Galarad, epi yo di yo:

16
-Men sa tout moun pèp Izrayèl yo voye di nou: Ki bagay lèd sa a nou fè konsa kont Bondye pep Izrayèl la? Poukisa jòdi a nou vire do bay Seyè a, n' al bati yon lotèl pou tèt pa nou? Poukisa nou

17
leve kont Seyè a jòdi a? Chonje peche nou te fè bò Peyò a, lè Seyè a te pini pèp li a. Jouk koulye

18
a n'ap soufri pou bagay sa a toujou. Sa pa kont toujou? Men jòdi a, n'ap vire do bay Seyè a ankò.

19
Si nou leve kont Seyè a jòdi a, denmen se sou tout pèp Izrayèl la li pral fache. Si nou wè peyi yo ban nou an pa bon pou fè sèvis Bondye, pito nou vin bò isit la nan peyi Seyè a, kote kay Seyè a ye a. Mande pou yo ban nou yon pòsyon pou nou ladan l'. Men, pa leve kont Seyè a, ni pa vire

do ban nou. Piga nou kite lotèl Seyè a, Bondye nou an, pou n' al bati yon lòt lotèl. ²⁰ Chonje Akan, pitit gason Zera a, lè li te derefize swiv lòd Seyè a te bay pou bagay nou te fèt pou detwi nèt yo. Lè sa a, se tout pèp Izrayèl la nèt wi, Seyè a te pini. Se pa Akan sèlman ki te peye pou sa l' te fè a.

²¹ ¶ Lè sa a, moun Woubenn yo, moun Gad yo ak mwatye moun Manase yo pran lapawòl, yo reponn

chèf fanmi pèp Izrayèl la. Yo di yo: ²² -Seyè a, Bondye ki gen plis pouvwa pase tout lòt bondye yo, konnen se pa paske nou leve kont li, ni paske nou vle vire do ba li kifè nou bati lotèl sa a. Li konnen sa, epi se pou l' fè pèp Izrayèl la konn sa tou. Si se pou rezon sa yo nou te moute lotèl sa

a, se pou l' kite yo touye nou jòdi a menm. ²³ Si nou bati lotèl sa a pou nou vire do bay Seyè a, pou nou ka gen lotèl pa nou pou boule bèt n'ap ofri yo sou li, oswa pou fè lòt ofrann jaden nou yo,

osinon ofrann pou di Bondye mèsì, se pou Seyè a mande nou kont pou sa nou fè a. ²⁴ Pou di vre, nou te fè l' paske nou te pè pou denmen pitit pitit nou menm moun pèp Izrayèl bò lòt bò a pa di

pitit pitit pa nou yo bò isit la: Nou pa gen anyen pou nou wè ak Seyè a. ²⁵ Seyè a mete larivyè Jouden an tankou yon limit nan mitan pèp Izrayèl la yon bò ak moun Woubenn yo ak moun Gad yo yon bò. Se sa ki fè moun Woubenn yo ak moun Gad yo pa gen anyen pou yo wè ak Seyè a. Konsa pitit moun pèp Izrayèl yo va lakòz pitit moun Woubenn yo ak pitit moun Gad yo sispann

gen krentif pou Seyè a. ²⁶ Lè sa a nou di: Bon! Nou pral bati yon lotèl, nou pa pral boule ofrann

ni touye ankenn bèt sou li. ²⁷ Sèlman, se pou lotèl sa a sèvi yon mak pou nou tout ki la koulye a ak pou pitit nou yo, pou fè nou chonje se Seyè a nou sèvi avèk ofrann boule nou yo, avèk bèt nou touye yo, avèk ofrann pou di Bondye mèsì nou yo. Konsa denmen, pitit moun pèp Izrayèl yo p'ap

ka di pitit pa nou yo: Wi, nou pa gen anyen pou nou wè ak Seyè a. ²⁸ Nou te fè lide si yon jou yon moun ta vin di nou bagay konsa, osinon ta vin pale konsa ak pitit nou yo, n'a ka reponn yo: Gade! Men lotèl zansèt nou yo te bati. Li pòtre ak lotèl Seyè a. Se pa t' pou boule ofrann, ni pou touye

ankenn bèt sou li. Men, se te yon mak pou fè nou tout chonje sak te pase! ²⁹ Nou pa janm fè lide leve kont Seyè a, ni vire do ba li. Nou pa bati yon lotèl jòdi a pou nou boule bèt nou yo, ni pou fè ofrann jaden nou yo, ni pou touye bèt nou ofri yo. Nou p'ap janm bati yon lòt lotèl ki pou ranplase

lotèl Seyè a, Bondye nou an, ki kanpe devan kay kote l' rete a. ³⁰ ¶ Lè Fineas, prèt la, chèf pèp la ak chèf branch fanmi pèp Izrayèl ki te ale avè l' yo tandè sa moun Gad, moun Woubenn ak moun

Manase yo te di yo, sa te fè yo plezi anpil. ³¹ Lè sa a, Fineas, pitit gason Eleaza, prèt la, pale ak yo, li di yo konsa: -Koulye a nou konnen Seyè a avèk nou vre, paske nou pa t' chache vire do ba

li. Se konsa nou sove pèp Izrayèl la anba chatiman Seyè a. ³² Apre sa, Fineas, pitit Eleaza, prèt la, ak tout chèf yo kite moun Woubenn yo ak moun Gad yo nan peyi Galarad, yo tounen nan peyi

Kanaran al jwenn rès pèp Izrayèl la. Yo rapòte yo repons lòt moun yo te ba yo a. ³³ Sa te fè pèp Izrayèl la plezi anpil: yo fè lwanj Bondye. Depi lè sa a, yo pa janm pale ankò sou keksyon al atake

34

moun Woubenn yo ak moun Gad yo ni sou keksyon al detwi peyi moun sa yo. Moun branch fanmi Woubenn yo ak moun branch fanmi Gad yo rele lotèl la Temwen, paske yo t'ap di: L'a sèvi temwen devan nou tout se Seyè a ki Bondye.

Chapter 23

¹ ¶ Depi lontan Seyè a te fin bay moun pèp Izrayèl yo lapè nan mitan tout lènmi l' yo. Jozye bò pa l' te fin granmoun. Li te gen anpil laj sou tèt li. ² Li fè rele tout pèp Izrayèl la, tout chèf fanmi yo, tout lòt chèf yo, tout jij yo, tout notab nan peyi a, li di yo: -Koulye a mwen fin granmoun! ³ Nou te wè tou sa Seyè a, Bondye nou an, te fè tout pèp sa yo ki t'ap kenbe tèt ak nou. Se Seyè a, Bondye nou an, ki t'ap goumen pou nou. ⁴ Koute! Mwen separe tout peyi a bay chak branch fanmi pòsyon pa yo. Mwen separe ni peyi nou deja pran nan men nasyon nou disparèt yo, ni peyi ki rete pou nou pran nan men kèk lòt nasyon, depi larivyè Jouden bò solèy leve jouk lanmè Mediterane a bò solèy kouche. ⁵ Seyè a, Bondye nou an, pral pran peyi a nan men moun ki rete la yo, l'ap mete yo deyò pou nou ka pran tè a pou nou, jan Seyè a, Bondye nou an, te di l' la. ⁶ Se pou nou fè sa nou kapab pou nou toujou swiv tou sa ki ekri nan liv lalwa Moyiz la, san neglije anyen ladan l'. ⁷ Pa mele avèk moun lòt nasyon k'ap viv nan mitan nou yo. Pa nonmen non bondye yo. Pa pran non bondye yo pou fè sèman. Pa mete ajenou devan bondye yo. Pa fè sèvis pou yo. ⁸ Se Seyè a, Bondye nou an, ase pou nou toujou kenbe fèm, jan nou te toujou fè l' jouk jounen jòdi a. ⁹ Seyè a te mete yon bann gwo nasyon ki te fò anpil deyò devan nou. Pesonn pa t' kapab kenbe tèt ak nou jouk jòdi a. ¹⁰ Yon sèl gason nan mitan nou kont pou fè mil gason nan lènmi nou yo kouri met deyò, paske Seyè a, Bondye nou an, ap goumen pou nou, jan li te di l' la. ¹¹ ¶ Atansyon wi! Se pou nou renmen Seyè a, Bondye nou an. ¹² Si nou vire do bay Bondye, si n' al mete tèt nou ansanm ak rès moun lòt nasyon sa yo k'ap viv nan mitan nou, si nou marye ak yo, si nou nan antre soti avèk yo, ¹³ nou mèt sèten, Seyè a, Bondye nou an, p'ap mete pèp sa yo deyò devan nou ankò. Okontrè, l'ap fè yo tounen yon pèlen, yon senn pou fèmèn nou, yon fwèt nan dèyè nou, yon pikan nan je nou jouk l'a fè nou disparèt nan bon peyi sa a Seyè a, Bondye nou an, te ban nou. ¹⁴ Mwen menm, mwen pa lwen kite tè a. Nou tout nou konnen nan kè nou ak nan lespri nou Seyè a, Bondye nou an, te ban nou tout bèl bagay li te pwomèt nou yo. Li kenbe tou sa li te pwomèt, yo tout rive vre. ¹⁵ Wi, menm jan Seyè a, Bondye nou an, te fè pou nou tout bèl bagay li te pwomèt nou yo, konsa tou, si nou vire

do ba li, l'a voye sou nou tout kalite malè, jouk l'a disparèt nou nèt nan bon peyi Seyè a, Bondye nou an, ban nou an. ¹⁶ Si nou pa respekte kontra Seyè a, Bondye nou an, te pase ak nou an, si n' al adore lòt bondye, si n' al fè sèvis pou yo, Seyè a pral move sou nou, epi lapoula, n'ap disparèt nan bon peyi sa a li te ban nou an.

Chapter 24

¹ ¶ Jozye reyini tout branch fanmi pèp Izrayèl yo lavil Sichèm. Li fè rele tout chèf fanmi yo, tout lòt chèf yo, tout jij yo ak tout notab yo. Yo parèt devan lotèl Seyè a. ² Jozye di pèp la konsa: -Men sa Seyè a, Bondye pèp Izrayèl la, di: Lontan lontan, zansèt nou yo, Terak ak de pitit gason l' yo, Abraram ak Nakò, t'ap viv nan yon peyi lòt bò larivyè Lefrat, kote yo t'ap sèvi lòt bondye. ³ Lè sa a, mwen pran Abraram lòt bò larivyè Lefrat la, mwen fè l' travèse tout peyi Kanaran an. Mwen ba li anpil pitit pitit. Pou konmanse, mwen ba li Izarak. ⁴ Apre sa, mwen bay Izarak de pitit: Jakòb ak Ezaou. Mwen bay Ezaou tout mòn Seyi a pou li. Men Jakòb desann nan peyi Lejip ansanm ak tout pitit li yo. ⁵ Apre sa, mwen voye Moyiz ak Arawon nan peyi Lejip. Mwen fè gwo malè tonbe sou peyi a pou pini moun li yo. Mwen fè nou soti kite peyi a. ⁶ Lè mwen fè zansèt nou yo soti kite peyi Lejip, yo rive bò lanmè Wouj la. Moun peyi Lejip yo pran kouri deyè yo ak cha lagè yo ak kavalye yo jouk lanmè Wouj la. ⁷ Zansèt nou yo rele nan pye m', mwen mete yon fènwa nan mitan yo ak moun peyi Lejip yo. Mwen fè lanmè a vini sou moun peyi Lejip yo, li kouvri yo. Nou te wè ak je nou sa mwen te fè moun peyi Lejip yo. Apre sa, nou pase anpil tan ap viv nan dezè a. ⁸ Lèfini, mwen fè nou antre nan peyi moun Amori yo, lòt bò larivyè Jouden, sou bò solèy leve. Yo leve goumen ak nou. Men mwen lage yo nan men nou. Nou pran peyi yo a pou nou. Mwen disparèt yo devan nou kote nou pase. ⁹ Apre sa, Balak, pitit gason Zipò a, wa peyi Moab, leve vin fè nou lagè. Li fè chache Balaram, pitit gason Peyò a, pou l' vin ban nou madichon. ¹⁰ Men, mwen pa koute l'. ¹¹ Konsa, li te blije ban nou benediksyon. Se konsa mwen sove nou nan men Balak. Lèfini, nou janbe lòt bò larivyè Jouden, nou rive lavil Jeriko. Moun ki te rete lavil Jeriko yo pran goumen ak nou. Moun Amori yo, moun Ferezi yo, moun Kanaran yo, moun Et yo, moun Gigach yo, moun Evi yo ak moun Jebis yo fè menm bagay la tou. Mwen lage yo tout nan men nou. ¹² Mwen voye yon kantite gèp panyòl devan nou. Yo fè de wa moun Amori yo kouri met deyò anvan nou rive sou yo. ¹³ Se pa t' ni banza nou yo ni nepe nou yo ki te fè sa! Apre sa, mwen ban nou tè nou pa t' janm travay plante. Mwen ban nou anpil lavil nou pa t' janm bati. Se la nou rete koulye a. N'ap manje

rezen nan pye rezen nou pa t' plante, oliv nan pye oliv nou pa t' plante. ¹⁴ Koulye a menm, se pou nou gen krentif pou Seyè a, se pou nou sèvi l' ak tout kè nou tout bon vre. Voye bondye zansèt nou

yo te konn sèvi lòt bò larivyè Lefrat la ak nan peyi Lejip la jete! Sèvi Seyè a. ¹⁵ ¶ Men, si nou pa vle sèvi Seyè a, depi koulye a chwazi sa nou vle sèvi a: oswa bondye zansèt nou yo t'ap sèvi nan peyi lòt bò larivyè Lefrat la, osinon bondye moun Amori yo t'ap sèvi nan peyi kote n'ap viv koulye

a. Men, pou mwen menm ansanm ak tout moun lakay mwen, se Seyè a n'ap sèvi. ¹⁶ Pèp la reponn!

-Nou p'ap janm fè lide vire do bay Seyè a pou n' al sèvi lòt bondye. ¹⁷ Se Seyè a, Bondye nou an, ki te fè nou soti ansanm ak zansèt nou yo nan esklavaj nou te ye nan peyi Lejip la. Se li menm ki te fè tout gwo mèvèy sa yo devan je nou. Se li menm ki te pwoteje nou tout kote nou pase, nan

mitan tout nasyon sa yo, lè nou t'ap travèse peyi yo. ¹⁸ Se Seyè a ki te chase tout pèp sa yo pou yo te fè plas pou nou ansanm ak moun Amori yo ki te rete nan peyi a. Nou menm tou, se Seyè a n'ap

sèvi, paske se limenm ki Bondye nou. ¹⁹ Lè sa a, Jozye di pèp la: -Nou p'ap ka sèvi Seyè a, paske Seyè a se yon Bondye ki apa, yon Bondye ki fè jalouzi. Li p'ap janm padonnen peche nou yo ak sa

n'ap fè ki mal. ²⁰ Si nou lage Seyè a, si n' al sèvi lòt bondye, Seyè a pral leve dèyè nou. Atout li te

fin fè tout byen sa yo pou nou, l'a pini nou, l'a fini nèt ak nou. ²¹ Pèp la reponn: -Non. Sa p'ap janm

rive. Se Seyè a n'ap sèvi! ²² Lè sa a, Jozye di pèp la: -Mwen pran nou sèvi temwen, se nou menm

menm ki chwazi se Seyè a n'ap sèvi. Yo reponn: -Wi, nou tout temwen. ²³ Jozye di yo lè sa a: -Koulye a, se pou nou pran tout bondye lòt pèp ki nan mitan nou ap sèvi yo, voye yo jete. Se pou

nou apiye nèt ak tout kè nou sou Seyè a, Bondye pèp Izrayèl la. ²⁴ Pèp la reponn li: -Se Seyè a,

Bondye nou an, n'ap sèvi. N'ap koute tou sa li di nou fè. ²⁵ Se konsa, jou sa a, Jozye pase yon

kontra avèk pèp la lavil Sichèm. Li ba yo tout lwa ak tout regleman pou yo swiv. ²⁶ Jozye ekri yo tout nan liv lalwa Bondye a. Li pran yon gwo wòch, li plante l' kanpe anba pye chenn ki te anndan

kote yo te mete apa pou Seyè a. ²⁷ Epi Jozye di pèp la konsa: -Nou wè wòch sa a! Enben, l'ap sèvi yon mak pou l' fè nou chonje paske li te tande tout pawòl Seyè a te di nou. L'ap sèvi yon mak pou

l' fè nou chonje pou nou pa janm vire do bay Bondye nou an! ²⁸ Apre sa, Jozye voye pèp la ale,

chak moun sou pòsyon tè ki te vin pou fanmi yo. ²⁹ ¶ Apre tout bagay sa yo, Jozye, pitit gason

Noun lan, sèvitè Seyè a, mouri. Li te gen sandizan (110 an). ³⁰ Yo antere l' sou tè ki te pou li a,

nan zòn Timnat-Sera, nan mòn ki pou branch fanmi Efrayim lan, sou bò nò mòn Gach. ³¹ Pèp Izrayèl la te sèvi Seyè a pandan tout tan Jozye te vivan an, epi apre sa, pandan tout tan chèf ki te

konnen sa Seyè a te fè pou pèp Izrayèl la te vivan toujou. ³² Pèp Izrayèl la te pran zosman Jozèf

yo avèk yo lè yo t'ap soti kite peyi Lejip. Yo antere zosman yo sou moso tè Jakòb te achte nan men pitit Amò yo pou san pyès ajan. Se Amò sa a ki te papa Sichèm. Moso tè a rete pou pitit pitit Jozèf³³
yo. Apre sa, lè Eleaza, pitit gason Arawon an, mouri, yo antere l' sou ti mòn ki te pou Fineas, pitit gason l' lan. Yo te ba li ti mòn sa a ki nan mitan mòn ki pou branch fanmi Efrayim lan.

Judges

Chapter 1

¹ ¶ Apre Jozye mouri, pèp Izrayèl la mande Seyè a: -Nan tout branch fanmi nou yo, kilès ladan yo ki pou al atake moun Kanaran yo anvan? ² Seyè a reponn yo: -Se branch fanmi Jida a ki pou premye ale. Se mwen menm k'ap lage tout peyi a nan men yo. ³ Moun Jida yo di moun Simeyon yo konsa: -Ann al ansanm ak nou nan pòsyon tè yo ban nou an, nou menm moun Jida yo. Enpi n'a mete ansanm pou goumen ak moun Kanaran yo. Apre sa, nou menm moun Jida yo, n'a ale ansanm ak nou nan pòsyon tè yo ban nou an, nou menm moun Simeyon yo. Se konsa, moun Simeyon yo ale ansanm ak ⁴ moun Jida yo, yo moute al goumen. Seyè a lage moun Kanaran yo ak moun Ferezi yo nan men yo. Yo bat yon lame dimil (10.000) sòlda nan lavil Bezèk. ⁵ Yo jwenn Adonibezèk l'a tou. Yo goumen avè l'. Yo bat moun Kanaran yo ak moun Ferezi yo byen bat. ⁶ Adonibezèk te kouri pou yo. Yo kouri dèyè l', yo mete men sou li, epi yo koupe de dwèt gwopous li yo ak de gwo tèt zòtèy pye l' yo. ⁷ Lè sa a, Adonibezèk di: -Mwen te koupe dwèt gwopous ak gwo tèt zòtèy pye swasann dis wa. Yo te konn ranmase kras manje ki tonbe anba tab mwen. Jòdi a, Bondye fè m' sa m' te fè yo a. Yo mennen msye lavil Jerizalèm. Se la li mouri. ⁸ Moun fanmi Jida yo al atake lavil Jerizalèm, epi yo pran l'. Yo touye dènye moun ki te rete la, lèfini yo mete dife ladan l'. ⁹ ¶ Apre sa, y' al goumen ak moun Kanaran ki t'ap viv nan mòn yo ak nan pye mòn yo nan Negèv la. ¹⁰ Moun Jida yo atake moun Kanaran ki te rete lavil Ebwon, ki te rele anvan sa Kiriyat Aba. Yo bat Chechayi, Ayiman ak Talmayi. ¹¹ Yo kite Ebwon, yo mache al atake moun ki te rete lavil Debi yo. Nan tan lontan yo te rete lavil sa a Kiriyat-Sefè. ¹² Kalèb di: -Moun ki va resi pran lavil Kiriyat-Sefè a, m'ap marye l' ak Aksa, pitit fi mwen an. ¹³ Se Otonyèl, pitit gason Kenaz, ti frè Kalèb la, ki te pran lavil la. Konsa, Kalèb ba li Aksa, pitit fi li a, pou madanm. ¹⁴ Lè Aksa rive lakay mari l', mari a di l' poukisa li pa mande papa l' yon bon jaden. Akza al jwenn Kalèb. Desann li desann bourik li,

15
Kalèb mande l': -Sak genyen, pitit mwen? Akza reponn: -Mwen vin mande ou yon favè. Se ou menm ki voye m' al viv nan dezè Negèv la, se pou ou ban m' kote pou m' pran dlo tou. Se konsa

16
Kalèb ba li Sous Dlo Anwo ak Sous Dlo Anba Negèv la. Moun Kayen yo, fanmi bòpè Moyiz la, kite lavil Palmis. Yo moute ansanm ak moun Jida yo nan dezè peyi Jida a sou bò sid lavil Arad.

17
Se la y' al rete ansanm ak moun Amalèk yo. Moun Jida yo ale ansanm ak moun Simeyon yo, yo bat moun Kanaran ki te rete lavil Zefa yo. Yo detwi lavil la, yo touye dènye moun ak dènye bèt ki te ladan l'. Yo boule yo tankou yon ofrann pou Seyè a. Yo chanje non lavil la, yo rele l' Oma.

18
Moun Jida yo pa t' pran lavil Gaza ak tout zòn ki sou zòd li, lavil Askalon ak tout zòn ki sou zòd

19
li, lavil Ekwon ak tout zòn ki sou zòd li. Seyè a te kanpe ak moun Jida yo, li fè yo pran tout mòn yo pou yo. Men, yo pa t' kapab mete moun ki nan laplenn yo deyò paske yo te gen cha lagè fèt an

20
fè. Jan Moyiz te bay lòd la, yo pran lavil Ebwon bay Kalèb. Kalèb mete twa pitit gason Anak

21
yo deyò nan lavil la. ¶ Men, moun branch fanmi Benjamen yo pa t' mete moun Jebis yo deyò nan lavil Jerizalèm. Se konsa moun Jebis yo rete ap viv ansanm ak moun Benjamen yo nan lavil

22
Jerizalèm jouk jòdi a. Moun de branch fanmi Jozèf yo moute al atake lavil Betèl ki te rele Louz

23
anvan sa. Seyè a te kanpe avèk yo tou. Yo voye kèk moun an kachèt al wè jan sa ye nan lavil

24
la. Moun yo te voye yo kontre yon nonm ki t'ap soti lavil la. Yo di l' konsa: -Moutre nou ki jan

25
moun ka antre nan lavil la. Nou pwomèt ou nou p'ap fè ou anyen. Se konsa nonm lan moutre yo ki jan pou yo antre nan lavil la. Yo touye tout moun ki te nan lavil la, esepite nonm lan ansanm

26
ak tout fanmi l'. Apre sa, nonm lan pati ale nan peyi moun Et yo. Li bati yon lavil laba a, li rele

27
l' Louz. Se konsa yo rele lavil la jouk jòdi a. Moun branch fanmi Manase yo pa t' rive mete tout moun deyò nan lavil Bèt Chean, nan lavil Tanak, nan lavil Dò, nan lavil Jibleyam, nan lavil Megibo

28
ak nan tout ti bouk ki te sou kont yo. Konsa, moun Kanaran yo te toujou ap viv nan peyi a. Lè moun Izrayèl yo te vin pi fò, yo fòse moun Kanaran yo travay pou yo, men, yo pa janm mete yo

29
deyò. Moun branch fanmi Efrayim yo tou pa t' mete moun Kanaran yo deyò nan lavil Gezè. Se

30
konsa, moun Kanaran yo rete viv la ansanm ak yo. Moun branch fanmi Zabylon yo pa t' mete moun Kanaran yo deyò nan lavil Kitwon ak nan lavil Naalòl. Moun Kanaran yo te rete viv ansanm

31
ak yo, men yo te blije travay pou moun Zabylon yo. Moun branch fanmi Asè yo pa t' mete moun Kanaran yo deyò nan lavil Sidon, lavil Alad, lavil Akzid, lavil Elba, lavil Afik ak lavil Reyòb.

32
Se konsa, moun Asè yo t'ap viv ansanm ak moun Kanaran ki te rete nan peyi a, paske yo pa t'

33
mete yo deyò. Moun branch fanmi Nèftali yo pa t' mete moun Kanaran yo deyò nan lavil

Bèt-Chemèch, ni nan lavil Bèt Anat. Yo te rete ansanm ak moun Kanaran ki te rete nan peyi a.

Men, moun lavil Bèt-Chemèch ak moun lavil Bèt anat yo te blije travay pou yo. ³⁴ Moun Amori yo menm te kwense moun fanmi Dann yo nan mòn yo. Yo pa t' kite yo desann nan plenn lan menm.

³⁵ Se konsa, moun Amori yo rete rete yo nan mòn Erès, nan lavil Ayalon ak nan lavil Chalbim.

Men, lè moun fanmi Jozèf yo rive donminen sou yo, yo fè yo travay pou yo. ³⁶ Fwontyè peyi moun Amori yo te konmanse depi pas Eskòpyon yo, moute rive gwo Wòch.

Chapter 2

¹ ¶ Zanj Seyè a kite Gilgal, li moute nan Kriye. Li di pèp Izrayèl la konsa: -Mwen fè nou soti kite peyi Lejip. Mwen fè nou antre nan peyi mwen te pwomèt zansèt nou yo. Mwen te di mwen

p'ap janm kase kontra mwen te pase ak nou pou tout tan an. ² Nou menm, bò pa nou, piga nou fè ankenn kontra ak moun k'ap viv nan peyi a. Se pou nou kraze tout lotèl yo. Men, nou pa fè sa m'

te di nou fè a. Gade sa nou pito fè! ³ Se poutèt sa m'ap di nou: Mwen p'ap mete yo deyò devan nou.

Y'ap rete la bò kote nou, bondye yo ap tounen yon pèlen pou nou. ⁴ Lè zanj Seyè a fin di yo sa,

tout pèp la pran kriye. ⁵ Se poutèt sa yo rele kote yo te ye a Nankriye. Epi yo ofri bèt pou touye

pou Seyè a la. ⁶ ¶ Jozye voye pèp la ale lakay yo. Se konsa, chak branch fanmi pèp la pati al pran

pòsyon tè yo te ba yo nan peyi a. ⁷ Pèp Izrayèl la te sèvi Seyè a pandan tout tan Jozye te vivan. Apre sa, yo sèvi l' pandan tout tan chèf ki te konnen sa Seyè a te fè pou pèp Izrayèl la te vivan

toujou. ⁸ Jozye, pitit gason Noun lan, sèvitè Seyè a, mouri. Li te gen sandizan (110 an). ⁹ Yo antere l' sou tè ki te vin pou li a nan zòn Timnat-Erès, nan mòn ki pou branch fanmi Efrayim lan, sou bò

nò mòn Gach. ¹⁰ Tout jenerasyon moun Jozye yo te fin mouri tou, yo te al jwenn zansèt yo anba tè. Apre yo, te vin gen yon lòt jenerasyon moun ki te bliye ni Seyè a ni sa li te fè pou pèp Izrayèl

la. ¹¹ Moun pèp Izrayèl yo lage kò yo nan fè sa ki mal nan je Seyè a. Y' al sèvi Baal yo. ¹² Yo vire do bay Seyè a, Bondye zansèt yo a, Bondye ki te fè yo soti kite peyi Lejip la. Yo tonbe mache dèyè lòt bondye ki te fè pati bann bondye pèp ki te la toupatou bò kote yo. Y' al adore yo. Sa te fè Seyè

a an kolè sou yo. ¹³ Yo vire do bay Seyè a, y' al fè sèvis pou Baal yo ak Astate yo. ¹⁴ Seyè a vin an kolè sou pèp Izrayèl la, li kite ansasen atake yo pou pran tou sa yo te genyen. Li kite lènmi ki

toupatou bò kote yo mete pye sou kou yo. Yo pa t' ka kenbe tèt devan lènmi yo ankò. ¹⁵ Chak fwa y' al nan lagè, Seyè a te pran pozisyon kont yo pou malè yo, jan li te di li t'ap fè l' la. Se konsa yo

¹⁶
 t'ap bat yon sèl mizè! Se lè sa a Seyè a voye bay pèp Izrayèl la kèk chèf, vanyan gason ki te
¹⁷
 delivre yo anba men ansasen yo. Men, menm chèf sa yo, yo pa t' koute yo. Yo vire do bay Seyè
 a, y' al dèyè lòt bondye, yo fè sèvis pou yo. Yo te toujou prese kite chemen dwat kote zansèt yo
¹⁸
 t'ap mache lè yo t'ap swiv lòd Seyè a. Yo pa t' koute lòd Seyè a. Chak fwa Seyè a voye yon chèf
 konsa ba yo, li te kanpe la avèk chèf la, li te delivre yo anba men lènmi yo toutotan chèf la te vivan.
 Seyè a te gen pitye pou yo paske yo t'ap souffri anpil anba moun ki t'ap pèsekite yo ak anba moun
¹⁹
 ki t'ap peze yo. Men, mouri chèf la mouri, pitit yo te rekonmanse lage kò yo nan menm vye
 bagay yo ankò pi mal pase papa yo. Y' al dèyè lòt bondye, yo fè sèvis pou yo, yo adore yo. Yo t'ap
²⁰
 fè tèt di, yo derefize sispann fè bagay sa yo. Seyè a te fache anpil sou pèp Izrayèl la. Li di konsa:
²¹
 -Nasyon an kase kontra mwen te mande zansèt yo kenbe a. Yo pa vle koute m'. Bon, mwen
²²
 menm tou, mwen p'ap mete lòt nasyon Jozye te mouri kite nan peyi a deyò ankò. Se konsa m'a
 wè kote m' ye ak pèp Izrayèl la. M'a konnen si wi ou non yo soti pou fè sa m' mande yo fè a jan
²³
 zansèt yo te fè l' la. Se konsa Seyè a te kite lòt nasyon li pa t' lage anba men Jozye yo rete nan
 peyi a. Li pa prese mete yo deyò.

Chapter 3

¹
 ¶ Seyè a te kite kèk nasyon nan peyi a pou l' te ka sonde moun pèp Izrayèl la ki patko fèt lè
²
 yo t'ap fè lagè pou antre nan peyi Kanaran an. Li te fè sa konsa pou l' te ka moutre chak jenerasyon
³
 pèp Izrayèl la sa yo rele fè lagè, sitou sa ki pa t' janm al nan lagè anvan sa. Men moun li te kite
 nan peyi a: Se te moun Filisti yo ki te rete nan senk lavil, tout moun Kanaran yo, moun Sidon yo
⁴
 ak moun Evi yo ki te rete nan mòn Liban yo, depi mòn Baal-Emon jouk Pas Amat. Se ak moun
 sa yo Seyè a t'ap sonde pèp la pou l' te ka konnen si yo te soti pou koute lòd Seyè a te bay Moyiz
⁵
 pou zansèt yo a. Se konsa pèp Izrayèl la twouve l' rete ap viv nan mitan moun Kanaran yo, moun
⁶
 Et yo, moun Amori yo, moun Ferezi yo, moun Evi yo ak moun Jebis yo. Yo pran pitit fi moun
 sa yo pou madanm, yo bay pitit gason moun sa yo pitit fi pa yo pou madanm, epi yo pran sèvi
⁷
 bondye moun sa yo tou. Moun pèp Izrayèl yo tanmen fè bagay ki te mal nan je Seyè a. Yo bliye
⁸
 Seyè a, Bondye-yo a, yo pran fè sèvis pou Baal yo ak Achera yo. ¶ Seyè a fache sou pèp Izrayèl
 la epi li kite Kouchan-Riche Atayim, wa peyi Mezopotami an, mete pye sou kou yo. Pandan witan

9
 pèp Izrayèl la te anba men Kouchan-Riche Atayim. Apre sa, moun pèp Izrayèl yo pran kriye nan pye Seyè a. Seyè a voye yon nonm pou delivre yo. Se te Otonyèl, pitit gason Kenaz, ki te ti frè

10
 Kalèb. Lespri Seyè a te sou li, li vin yon gwo chèf nan peyi Izrayèl. Li leve l' al goumen. Seyè

11
 a lage Kouchan-Riche Atayim, wa peyi Mezopotami an, nan men li, li fè l' kraze l'. Apre sa, te

12
 gen lapè nan peyi a pandan karantan. Epi Otonyèl, pitit gason Kenaz la, mouri. ¶ Moun pèp

13
 Izrayèl yo te rekonmanse ap fè sa ki te mal nan je Seyè a ankò. Seyè a pran Eglon, wa peyi Moab

14
 la, li fè l' vin pi fò pase pèp Izrayèl la. Epi li fè l' leve dèyè pèp Izrayèl la. Eglon pran moun

15
 Amon yo ak moun Amalèk yo ansanm avè l', epi yo ale, yo bat moun pèp Izrayèl yo. Yo pran lavil

16
 Palmis yo pou yo. Pandan dizwitan pèp Izrayèl la te anba men Eglon, wa peyi Moab la. Apre

17
 sa, moun pèp Izrayèl yo pran kriye nan pye Seyè a. Seyè a voye yon lòt moun pou delivre yo. Se

18
 te Eyoud, pitit gason Gera, moun branch fanmi Benjamen an. Msye te goche. Moun pèp Izrayèl yo

19
 bay Eyoud yon kado al pote bay Eglon, wa peyi Moab. Eyoud fè yo fè yon ponya espesyal pou

20
 li. Ponya a te gen yon pye edmi longè, li te file de bò. Li mare l' sou kwis pye dwat li, anba rad li.

21
 Epi li pote kado a bay Eglon, wa peyi Moab la. Eglon te gwo anpil. Lè Eyoud fin bay wa a

22
 kado a, li voye moun ki te pote kado a ale. Men li menm, lè li rive bò estati zidòl yo ki toupre

23
 lavil Gilgal la, li tounen vin jwenn Eglon. Li di l' konsa: -Monwa, mwen gen yon komisyon pou

24
 ou, men fòk pa ta gen lòt moun la. Lè sa a, wa a di moun ki te la yo: -Kite nou pou kont nou! Tout

25
 moun ki te la avè l' yo soti. Wa a te chita nan chanm pa l' anwo kay la, kote ki te fè fre anpil.

26
 Eyoud pwoche bò kote l', li di l' konsa: -Se yon mesaj Bondye ban m' pou ou. Wa a leve kanpe.

27
 Eyoud lonje men gòch li, li rale ponya a bò kwis pye dwat li, epi li sèvi wa a yon kou nan vant.

28
 Li foure ponya a tout longè l' nèt jouk manch li pèdi nan vant li, epi po grès la fèmen sou ponya

29
 a paske Eyoud pa t' rale l' soti. Pwent ponya a menm te parèt pa dèyè. Lèfini, Eyoud soti nan

30
 chanm lan, li fèmen pòt yo dèyè l', li klete yo, epi l' ale fè wout li. Lè domestik wa yo vini, yo

31
 wè pòt chanm wa a te fèmen akle. Yo di konsa: -Gen lè wa a okipe anndan an. L'ap fè bezwen li.

32
 Yo tann yon bon ti moman, yo ba li tan pou l' fini. Men, yo wè li pa janm louvri pòt la. Lè sa a,

33
 yo pran kle a epi yo louvri. Yo wè wa a kouche tou long atè, li te mouri! Pandan mesye yo t'ap

34
 tann tout tan sa a, Eyoud menm gen tan chape kò l'. Li pase bò estati zidòl yo, epi li pran wout mòn

35
 Seyira a pou li, l' ale. Lè li rive Seyira nan mòn peyi Efrayim lan, li kònen pou rele moun pèp

36
 Izrayèl yo. Moun pèp Izrayèl yo desann soti nan mòn lan, epi Eyoud pran mache alatèt yo. Li

37
 di yo konsa: -Swiv mwen! Seyè a lage moun Moab yo, lènmi nou yo, nan men nou jòdi a! Yo tout

desann swiv li. Yo bare pas dlo kote moun Moab yo konn janbe larivyè Jouden an. Yo pa kite yon
²⁹ moun pase. Lè sa a, yo te touye dimil (10.000) sòlda konsa, sòlda ki te gwonèg epi ki te konn
³⁰ goumen. Yonn pa chape. Jou sa a, moun pèp Izrayèl yo bat moun Moab yo byen bat. Apre sa,
³¹ pandan katreventan te gen lapè nan peyi a. ¶ Apre Eyoud, yo vin gen yon lòt chèf: Se te Chanmga,
 pitit Anat. Li menm menm avèk yon fwèt kach po bèf, li te touye sisan (600) sòlda nan lame moun
 Filisti yo. Konsa li delivre pèp Izrayèl la.

Chapter 4

¹ ¶ Lè Eyoud mouri, moun pèp Izrayèl yo rekonmanse ankò ap fè bagay ki te mal nan je Seyè
² a. Lè sa a, Seyè a te kite Jaben, wa peyi Kanaran an, mete pye sou kou yo. Jaben sa a t'ap gouvènen
 nan lavil Azò. Chèf ki t'ap kòmande lame Jaben an te rele Sisera. Li menm, li te rete lavil
³ Awochèt-Goyim. Li te gen nèfsan (900) cha lagè fèt an fè. Pandan ventan li t'ap maltrete moun
 pèp Izrayèl yo, li t'ap malmennen yo. Lè sa a, pèp Izrayèl la pran rele nan pye Seyè a. ⁴ ¶ Debora,
 madanm yon nonm yo te rele Lapidòt, te pwofèt Bondye. Nan tan sa a, se li ki te konn rann jijman
⁵ sou tout bagay nan peyi Izrayèl la. Nan mòn peyi Efrayim yo, ant lavil Rama ak lavil Betèl, te
 gen yon pye palmis yo te rele Palmis Debora. Se la anba pye palmis sa a li te konn chita, lèfini
⁶ moun nan pèp la te konn vin kote l' pou l' te regle tout bagay pou yo. Li voye chache Barak, pitit
 gason Abinoram, moun lavil Kadès nan peyi moun Neftali yo. Li di l' konsa: -Men lòd Seyè a,
 Bondye pèp Izrayèl la, voye ba ou: Ale! Mennen sòlda ou yo sou mòn Tabò. Nan branch fanmi
⁷ Neftali a ak nan branch fanmi Zabilon an, pran dimil (10.000) gason avè ou. M'a pral fè Sisera,
 kòmandan an chèf lame wa Jaben an, vin goumen avè ou bò larivyè Kichon an. L'ap vini avèk cha
⁸ lagè l' yo ansanm ak tout sòlda li yo. Men, m'ap lagè l' nan men ou. Barak di Debora: -Si ou prale
⁹ avè m', m'a prale. Men si ou pa prale avè m', mwen pa prale. Debora reponn: -Bon. Dakò! M'
 prale avè ou. Men, yo p'ap janm di se ou ki te bat Sisera, paske se yon fanm Seyè a ap fè touye l'.
¹⁰ Epi Debora leve, l' ale lavil Kadès ansanm ak Barak. ¶ Barak rele moun nan branch fanmi Zabilon
 yo ak moun nan branch fanmi Neftali yo vin Kadès. Se konsa dimil (10.000) gason ale avè l'. Debora
¹¹ ale avè l' tou. Lè sa a te gen yon nonm nan fanmi Kayen an yo te rele Ebè ki te moute kay li
 toupre lavil Kadès, bò pye chenn nan fon Zaranayim lan. Li te wete kò l' nan mitan lòt moun fanmi
¹² Kayen yo, desandan Obab, bòpè Moyiz la. Y' al di Sisera men Barak, pitit gason Abinoram lan,

¹³ te pran chemen moute mòn Tabò. Sisera fè chache nèfsan (900) cha lagè an fè l' yo ak tout sòlda
¹⁴ li yo, li fè yo kite Awochèt-Goyim desann ravin Kichon. Debora di Barak konsa: -Annou wè!
 Jòdi a, se jou Seyè a pral lage Sisera nan men ou. Se Seyè a k'ap mache devan ou. Se konsa, Barak
¹⁵ desann soti sou mòn Tabò a avèk dimil (10.000) sòlda dèyè l'. Lè Barak parèt avèk lame l' la,
 Seyè a lage yon sèl kè kase sou Sisera ak tout moun sou cha lagè l' yo ansanm ak tout lame l' la.
¹⁶ Sisera desann sot sou cha li a, li met deyò, li di pye sa m' manje m' pa ba ou! Barak menm pran
 kouri dèyè cha yo ak lame a jouk Awochèt-Goyim. Yo touye tout sòlda Sisera yo nèt. Yo pa kite
¹⁷ yonn chape. ¶ Sisera kouri sou de pye l' bò tant Jayèl, madanm Ebè, moun branch fanmi Kayen
¹⁸ yo, paske Jaben, wa Azò a, ak moun fanmi Ebè yo te byen yonn ak lòt. Jayèl soti al kontre Sisera,
 epi li di l' konsa: -Vini non, chèf mwen! Vin kache lakay mwen non! Ou pa bezwen pè anyen. Se
¹⁹ konsa Sisera antre lakay Jayèl ki kache msye anba yon gwo dra. Sisera di l' konsa: -Tanpri, ban
 m' ti gout dlo. Swaf ap touye m'! Jayèl louvri yon veso lèt fèt an po, li ba l' ti gout lèt bwè, epi li
²⁰ kache l' anba gwo dra a ankò. Sisera di l' ankò: -Rete kanpe devan papòt tant lan. Nenpòt moun
²¹ ki ta vin mande ou si gen yon moun nan kay la w'a reponn li: Non. Pa gen pesonn. Sisera te
 sitèlman bouke, dòmi pote l' ale. Lè sa a, Jayèl, madanm Ebè, pran yonn nan pikèt tant yo ak yon
 mato, li pwoche tou dousman bò kote Sisera, epi li foure pikèt la nan tanp msye, li fè l' travèse tèt
²² Sisera pak an pak, jouk li antre nan tè. Epi Sisera mouri. Lè Barak rive bò kay la ap chache
 Sisera, Jayèl soti vin kontre l', epi li di l': -Vini non! M'a fè ou wè moun w'ap chache a! Se konsa
 Barak antre avè l' anba tant li a, li wè Sisera kouche atè a tou mouri avèk pikèt la plante nan tanp
²³ li. Jou sa a, Bondye te fè Jaben, wa peyi Kanaran an, bese tèt devan pèp Izrayèl la. Moun
²⁴ pèp Izrayèl yo pran maltrete Jaben, wa peyi Kanaran an, jouk yo touye l'.

Chapter 5

¹ ¶ Jou sa a, Debora ak Barak, pitit gason Obinoram lan, pran chante chante sa a: ² -Lwanj pou
 Seyè a, lè moun pèp Izrayèl yo soti pou yo goumen, lè pèp la pote tèt li ak kè kontan pou fè lagè!
³ Nou menm wa yo, koute sa m'ap di! Nou menm gwo chèf yo, louvri zòrèy nou! Mwen pral chante
⁴ pou Seyè a! Mwen pral fè lwanj Sengè a, Bondye pèp Izrayèl la! Seyè! Lè ou te kite mòn Seyi
 yo, lè ou te soti nan zòn peyi Edon an, latè te pran tranble, lapli tonbe anpil sot nan syèl la. Wi,
⁵ nwaj yo pran lage dlo. Mòn yo pran tranble devan mèt mòn Sinayi a, devan Seyè a, Bondye pèp

Izrayèl la! ⁶ ¶ Sou tan Chanmga, pitit gason Anat la, ak sou tan Jayèl, bann machann yo te sispann
 pwonmennen nan tout peyi a ak bèt yo. Vwayajè yo te blije pase nan lòt chemen. ⁷ Lavil peyi
 Izrayèl yo pa t' gen moun ladan yo ankò pou pran defans yo. Yo te rete san moun pou defann yo,
 jouk jou mwen menm, Debora, mwen parèt tankou yon manman pou pèp Izrayèl la. ⁸ Lè sa a, te
 prèt pou gen lagè nan peyi a. Moun pèp Izrayèl yo tanmen sèvi lòt bondye. Lè sa a tou, te gen
 karantmil (40.000) gason nan pèp Izrayèl la. Men, pa t' gen yon plak pwotèj ak frenn pou yo sèvi.
⁹ Mwen kontan chèf k'ap kòmande pèp Izrayèl la! Mwen kontan moun ki te pote tèt yo pou y' al
 goumen! Lwanj pou Seyè a! ¹⁰ Nou menm ki moute manman bourik blan yo, nou menm ki chita
 sou bèl tapi, nou menm k'ap mache apye sou gran chimen, kalkile sa byen! ¹¹ Koute vwa moun ki
 al bò sous dlo yo! Y'ap rakonte tout bèl bagay Seyè a te fè, bèl bagay li te fè pou pèp Izrayèl la. Lè
 sa a, pèp Seyè a te desann bò pòtay yo. ¹² ¶ Annavan! Debora! Annavan! Annou wè! Chante yon
 chante! Annavan! Annavan! Barak! pitit gason Abinoram lan! Mennen prizonye yo vini! ¹³ Lè sa
 a, sa ki pa t' vire do bay Bondye yo desann vin jwenn chèf yo. Pèp Seyè a vin jwenn li, tou pare
 pou lagè. ¹⁴ Yo soti nan mòn Efrayim yo desann nan fon an, dèyè moun Benjamen yo ak sòlda
 lame yo. Kòmandan lame yo desann soti Maki, jeneral yo soti nan peyi Zabilon. ¹⁵ Chèf branch
 fanmi Isaka yo te la avèk Debora. Wi, moun Isaka yo vini, Barak te vini tou. Yo swiv li nan tout
 plenn lan. Men, moun branch fanmi Woubenn yo te divize. Yo pa t' ka deside pou yo vini. ¹⁶ Poukisa
 yo rete dèyè avèk mouton yo? Pou yo te ka tande gadò yo ap rele bann mouton yo? Wi! Moun
 Woubenn yo te an balan. Yo pa t' ka deside si y'ap vini, si yo p'ap vini! ¹⁷ Moun Galarad yo te rete
 rete yo lòt bò larivyè Jouden an. Moun Dann yo rete rete yo sou bato yo. Moun Asè yo rete rete yo
 bò lanmè a, yo rete sou tout rivaj yo. ¹⁸ Men, moun Zabilon yo ak moun Neftali yo al brave danje
 kote batay la ye a. ¹⁹ Wa yo vini, yo kwaze fè bò Tanak, toupresous dlo Megido a. Wa peyi Kanaran
 yo goumen, men yo pa jwenn anyen pou yo pote ale! Pa menm yon ti moso ajan! ²⁰ Zetwal yo rete
 nan syèl la yo goumen. Yo rete kote y'ap mache nan syèl la, yo goumen ak Sisera. ²¹ Dlo ravin
 Kichon an desann pote yo ale. Wi, se ansyen ravin lan, ravin Kichon an, ki fè sa. M'ap mache pran
 yo, je m' byen kale! ²² Lè sa a, yo tande chwal yo ki t'ap galope ale. Chwal yo t'ap pilonnen tè a
 ak zago yo. ²³ Zanj Seyè a di: Ann mande madichon pou lavil Mewòz! Madichon, madichon pou
 tout moun k'ap viv nan lavil la. Yo pa t' vin ede Seyè a, yo pa t' voye sòlda goumen pou li. ²⁴ ¶
 Nan tout fanm ki sou latè, Jayèl se yon fanm Bondye beni anpil. Wi, Jayèl, madan Ebè, moun fanmi

Kayen, nan tout fanm ki sou latè, se yon fanm Bondye beni anpil. ²⁵ Sisera mande l' dlo, li ba li
 lèt. Li ba l' yon krèm lèt nan pi bèl bòl li te genyen. ²⁶ Li pran yon pikèt tant nan men gòch li, yon
 mato travayè nan men dwat li. Li frape Sisera nan tèt ak mato a, li krabouye tèt li. Li pèse tanp li,
 li touye l'. ²⁷ Sisera tonbe sou jenou, li woule atè, epi li mouri nan pye Jayèl. Wi, nan pye madanm
 lan, li tonbe sou jenou li yo, li woule atè. Kote li kouche a, li mouri frèt. ²⁸ Manman Sisera ap gade
 nan fennèt la. L'ap gade dèyè jalouzi a, l'ap mande: -Kote cha pitit mwen an depi tout tan sa a?
 Poukisa chwal li yo pran tout reta sa a pou yo vini? ²⁹ Lè sa a, medam ki gen plis konprann nan
 sèvant li yo reponn li. Li menm tou, li t'ap repete nan kè l': ³⁰ -Koulye a yo dwe ap separe sa yo
 pran nan men lènmi yo! Yon fi, de fi pou chak sòlda, bèl twal koulè byen bwode pou Sisera, yon
 gwo mouchwa bwode byen bèl pou l' mete nan kou l'. ³¹ Wi, Seyè! Se konsa pou tout lènmi ou yo
 mouri. Men, zanmi ou yo ap klere tankou solèy midi. Apre sa, te gen lapè nan peyi a pandan
 karantan.

Chapter 6

¹ ¶ Pèp Izrayèl la lage kò l' ankò nan fè sa ki mal nan je Seyè a. Seyè a kite moun peyi Madyan
 yo mete pye sou kou yo pandan sètan. ² Moun peyi Madyan yo te pi fò pase moun pèp Izrayèl yo.
 Se poutèt sa, moun pèp Izrayèl yo al cache kò yo nan fon ravin, nan gwòt, nan twou wòch yo jwenn
 nan mòn yo. ³ Chak fwa moun Izrayèl yo te fè yon ti plante, moun Madyan yo moute ansanm avèk
 moun Amalèk yo ak lòt bann moun k'ap viv sou bò solèy leve, yo vin atake yo. ⁴ Yo moute tant
 yo sou tè moun Izrayèl yo, yo ravaje tout rekòt yo rive jouk toupre lavil Gaza. Yo pa kite anyen
 pou moun Izrayèl yo manje, pa menm yon mouton, yon bèf osinon yon bourik. ⁵ Lè konsa, yo
 moute ak tout tant yo ak bann bèt yo. Yo moute an kantite, ou ta di bann krikèt vèt. Ou pa ka konte
 konbe ki genyen, ni kantite chamo yo mennen ak yo. Yo te vin nan peyi a pou ravaje l'. ⁶ Moun
 peyi Madyan yo te fini ak moun Izrayèl yo. Lè sa a, moun Izrayèl yo kriye nan pye Seyè a, yo
 mande l' sekou. ⁷ ¶ Lè pèp Izrayèl la te kriye nan pye Seyè a pou moun peyi Madyan yo, ⁸ Seyè a
 te voye yon pwofèt bay pèp la ki di yo: -Men sa Seyè a, Bondye pèp Izrayèl la, voye di nou: Se
 mwen menm ki te fè nou soti nan peyi Lejip kote nou te nan esklavaj la. ⁹ Mwen te delivre nou
 anba men moun Lejip yo ak anba men tout lòt moun ki t'ap malmennen nou isit la. Mwen mete yo
 deyò pou yo fè plas pou nou, lèfini mwen ban nou peyi moun sa yo pou nou rete. ¹⁰ Mwen te di

nou se mwen menm Seyè a ki Bondye nou an. Koulye a nou rete nan peyi moun Amori yo, piga

n' al sèvi bann bondye moun sa yo. Men, nou pa t' koute m' lè m' te pale nou. ¶ Lè sa a, zanj¹¹ Seyè a vini, li chita anba pye chenn ki toupre yon ti bouk yo rele Ofra, ki te pou Joas, moun fanmi Abyezè yo. Jedeyon, pitit gason l' lan, t'ap bat ble an kachèt anndan kay kote yo konn kraze rezen

an, pou moun Madyan yo pa t' vin pran l' nan men l'.¹² Zanj Seyè a parèt devan l', li di l' konsa:

-Bonjou, vanyan sòlda! Seyè a avè ou!¹³ Jedeyon reponn li: -Abye, msye! Si Seyè a avè nou vre, manyè di m' poukisa tout bagay sa yo rive nou! Kote tout bèl bagay zansèt nou yo te rakonte nou Seyè a te konn fè, jan se li menm ki te fè nou soti kite peyi Lejip? Men koulye a, Seyè a lage nou,

li kite moun Madyan yo fè sa yo vle ak nou.¹⁴ Lè sa a, Seyè a bay Jedeyon lòd sa a, li di l': -Ale non. Avèk fòs kouraj ou genyen an, w'a delivre pèp Izrayèl la anba men moun peyi Madyan yo. Se

mwen menm menm ki voye ou!¹⁵ Jedeyon reponn li! -Tanpri, mèt! Avèk kisa mwen pral delivre pèp Izrayèl la? Fanmi mwen, se li ki gen pi piti moun nan branch fanmi Manase a. Lèfini, mwen

menm pou tèt pa m', se mwen menm ki pi piti lakay papa m'.¹⁶ Seyè a di l': -Ou ka fè l', paske m'ap kanpe la avè ou. Ou pral kraze moun Madyan yo tankou si se te yon sèl moun yo te ye.

¹⁷ Jedeyon reponn: -Si reyèlman vre ou vle fè m' favè sa a, ban m' yon prèv se ou menm tout bon

k'ap pale avè m' la a.¹⁸ Tanpri, pa deplase kote ou ye a jouk m'a pote yon ofrann mete nan pye ou.

Li reponn: -M'ap rete la tann ou.¹⁹ Se konsa, Jedeyon antre, li kwit yon jenn ti kabrit. Li pran yon mamit farin frans, li fè pen san li pa mete ledven ladan l'. Li mete vyann lan nan yon ti panyen, li mete sòs vyann lan nan yon gode, li pote yo bay zanj Seyè a anba pye chenn lan. Li lonje yo ba li.

²⁰ Zanj lan di l': -Mete vyann lan ak pen yo sou gwo wòch ou wè la a, epi vide sòs la sou yo. Jedeyon

fè sa vre.²¹ Zanj Seyè a leve baton ki te nan men l' lan, li lonje l', li manyen vyann lan ak pen yo ak pwent baton an. Yon dife soti nan wòch la, li boule tout vyann lan ak pen yo. Epi, lamenm zanj

Seyè a disparèt devan li.²² Lè Jedeyon wè se zanj Seyè a menm ki te parèt devan l', li di: -Bondye

Seyè o! Gade malè ki rive m' non! Mwen wè zanj Seyè a fas pou fas!²³ Men, Seyè a di l' konsa:

-Ou pa bezwen pè. Poze san ou. Ou p'ap mouri pou sa.²⁴ Jedeyon bati yon lotèl pou Seyè a la menm. Epi li rele l': Seyè a bay kè poze. Jouk jòdi a lotèl la la nan ti bouk Ofra a, sou pwopryete

ki pou moun Abyezè yo.²⁵ ¶ Menm jou lannwit sa a, Seyè a di Jedeyon konsa: -Pran towò bès papa ou la, ansanm ak yon lòt towò ki gen sètan. Kraze lotèl papa ou te fè pou Baal la. Koupe potò

Achera ki bò kote l' la.²⁶ Moute sou ti bit sa a, bati yon lotèl pou Seyè a, Bondye ou la, jan yo konn fè l' la. Lèfini, pran dezyèm towò a, boule l' nèt sou lotèl la pou mwen nan dife w'a fè avèk

moso potò Achera ou te koupe a.²⁷ Jedeyon pran dis nan domestik li yo, epi li fè tou sa Seyè a te

di l' fè. Men, li te pè fanmi l' yo ak lòt moun yo ki rete nan lavil la. Li pa t' fè sa lajounen, l' al fè l' lannwit.²⁸ Lè mesye yo ki rete nan lavil la leve granmaten, yo wè lotèl Baal la kraze, poto Achera a koupe, epi dezyèm towò a menm boule sou lotèl yo te bati la a.²⁹ Yonn di lòt: Ki moun ki fè sa, en? Yo tonbe chache, yo t'ap mande moun ki jan sa fè fèt. Yo vin konnen se Jedeyon, pitit Joas la, ki te fè sa.³⁰ Mesye yo al di Joas konsa: -Fè pitit gason ou lan soti vin jwenn nou isit la. Se pou n' touye l'! Li kraze lotèl Baal la, epi li koupe gwo poto Achera ki te bò kote l' la.³¹ Joas reponn tout moun ki te kanpe devan l' yo. Li di yo: -Anhan! Se nou ki pou goumen pou Baal? Se nou ki pou defann li? Enben, moun ki vle goumen pou Baal gen pou l' mouri anvan solèy leve. Si Baal se yon bondye vre, se li ki pou defann tèt li. Se lotèl li a yo kraze!³² Depi jou sa a yo rele Jedeyon Jewoubaal paske Joas te di: Kite Baal koresponn ak li, paske se lotèl Baal la li te kraze.³³ ¶ Lè sa a, tout moun Madyan yo, tout moun Amalèk yo ak tout moun k'ap viv nan dezè a bò solèy leve yo mete tèt ansanm, yo janbe lòt bò larivyè Jouden an, yo moute kan yo nan plenn Jizreyèl la.³⁴ Lespri Seyè a desann sou Jedeyon. Li soufle nan yon kòn belye mouton, li rele tout gason nan fanmi Abyezè a vin jwenn li.³⁵ Apre sa, li voye mesaje nan tout peyi Manase a al rele moun yo pou yo vin jwenn li tou. Li voye mesaje nan peyi Asè, nan peyi Zabilon ak nan peyi Neftali. Tout moun sa yo moute vin jwenn li.³⁶ Lè sa a, Jedeyon di Bondye konsa: -Si se ou menm vre ki vle sèvi avè m' pou delivre pèp Izrayèl la,³⁷ men mwen mete yon moso lenn sou glasi a. Si denmen maten mwen wè gen lawouze sou moso lenn lan sèlman epi tout rèz glasi a chèch, lè sa a m'a konnen se ou menm vre ki pral sèvi avè m' pou delivre pèp Izrayèl la.³⁸ Se sa ki te rive vre. Nan denmen maten, lè Jedeyon leve byen bonè, li tòde moso lenn lan, li wete dlo ladan l' kont pou ta plen yon bòl.³⁹ Lèfini, Jedeyon di Bondye ankò: -Tanpri, pa fache sou mwen non! Kite m' di ou yon dènye bagay. Kite m' fè esperyans moso lenn lan yon lòt fwa ankò. Men, fwa sa a se pou moso lenn lan rete chèch, epi pou lawouze sou tout glasi a.⁴⁰ Jou lannwit sa a, Bondye fè sa konsa vre: moso lenn lan te rete byen chèch, men te gen lawouze sou tout glasi a.

Chapter 7

¹ ¶ Jewoubaal, ki vle di Jedeyon, leve granmaten ansanm ak tout moun ki te avè l' yo, y' al moute kan yo bò Sous Awòd la. Moun Madyan yo menm te moute kan pa yo nan tout plenn lan, nan pye mòn More, sou bò nò kan Jedeyon an.² Seyè a di Jedeyon konsa: -Ou gen twòp moun avè ou pou m' kite ou kraze moun Madyan yo! Moun pèp Izrayèl yo va mete nan tèt yo se yo menm ak pwòp

fòs kouraj yo ki delivre peyi yo a, yo p'ap vle kwè se mwen menm ki fè sa pou yo. ³ Koulye a, pale ak tout pèp la. Di yo konsa: Si gen moun ki pè, k'ap tranble, yo mèt al fè wout yo lakay yo, kite nou sou mòn Gilboa a. Se konsa venndemil (22.000) moun al lakay yo. Te rete dimil (10.000).

⁴ Seyè a di Jedeyon ankò: -Gen twòp moun toujou. Fè yo tout desann bò larivyè a. M'a separe yo la pou ou. Moun m'a di ou ki pou ale avè ou yo va ale. Moun m'a di ou ki pa pou ale avè ou yo va

⁵ rete. Jedeyon fè tout mesye yo desann bò larivyè a. Epi Seyè a di Jedeyon konsa: -Tout moun w'a wè k'ap lape dlo tankou chen, w'a mete yo yon bò, tout moun w'a wè ki va kwoupi pou bwè

⁶ dlo, w'a mete yo yon lòt bò. Te gen twasan (300) gason ki te pran dlo nan pla men yo epi ki t'ap

⁷ lape dlo a. Tout rès yo te kwoupi pou bwè dlo. Seyè a di Jedeyon! -Se avèk twasan nèg sa yo ou wè ki te lape dlo a mwen pral delivre nou. Mwen pral lage moun Madyan yo nan men ou. Kite tout

⁸ lòt yo ale lakay yo. Yo pran tout pwovizyon lòt moun yo te genyen ansanm ak twonpèt yo, yo kenbe yo pou yo. Lèfini, Jedeyon voye tout rès moun pèp Izrayèl yo ale lakay yo. Li fè twasan

⁹ (300) moun yo rete ak li sou mòn lan. Moun Madyan yo menm te anba nan plenn lan. ¶ Jou lannwit sa a, Seyè a di Jedeyon konsa: -Leve non! Desann al atake kan moun Madyan yo. Mwen

¹⁰ lage yo nan men ou. Men si ou pè atake, desann bò kan moun Madyan yo ansanm ak Poura,

¹¹ domestik ou a. W'a tandè sa y'ap di. Lè sa a, w'a pran kouraj epi w'a desann al atake yo. Se konsa

¹² Jedeyon desann ansanm ak Poura, domestik li a, li rive toupre avanpòs kan an. Moun Madyan yo, moun Amalèk yo ak moun k'ap viv nan dezè bò solèy leve yo te kouvri tout plenn lan, tankou desen krikèt vèt nan jaden. Chamo yo te genyen, moun pa t' ka konte sa, menm jan yo pa ka konte

¹³ grenn sab bò lanmè. Lè Jedeyon rive, li jwenn yon nonm ki t'ap rakonte yon zanmi l' yon rèv li te fè. Li t'ap di l' konsa: -Monchè, mwen fè yon rèv: Mwen wè yon pen won fèt ak farin lòj ki t'ap woule nan mitan kan an. Epi li rive, l' al frape sou tant lan. Tant lan chavire, li tonbe plat atè.

¹⁴ Zanmi an reponn li: -Boul pen won an, se nepe Jedeyon, pitit Joas la, nonm pèp Izrayèl la. Sa

¹⁵ pa vle di lòt bagay! Bondye lage moun Madyan yo ak tout lame a nan men l'. Lè Jedeyon tandè rèv la ak esplikasyon yo ba li a, li lage kò l' atè devan Bondye. Apre sa, li leve, li tounen nan kan

¹⁶ moun pèp Izrayèl yo. Li di yo: -Ann ale! Seyè a lage kan moun Madyan yo nan men nou. ¶ Li pran twasan mesye yo, li fè twa gwoup. Li bay chak moun yon twonpèt ak yon krich vid. Lèfini,

¹⁷ li ba yo chak yon bwa chandèl pou mete nan krich la. Epi li di yo: -Se pou tout moun gade sou

¹⁸ mwen pou wè sa m'ap fè. Lè n'a rive toupre kan an, tou sa n'a wè m' fè, n'a fè l' tou. N'a fè wonn kan an. Lè m'a kònen twonpèt ansanm ak tout moun ki avè m' yo, nou menm tou n'a kònen twonpèt.

¹⁹ Epi n'a rele: Annavan pou Seyè a ak pou Jedeyon! Lè Jedeyon rive toupre kan an ansanm ak

san moun ki te avè l' yo, li te prèt pou menwit. Yo te fenk chanje faksyonè. Yo pran kònen twonpèt
²⁰
yo epi yo kraze krich yo te gen nan men yo. Tou twa gwoup moun yo pran kònen twonpèt
ansanm epi yo kraze krich yo. Yo kenbe bwa chandèl yo nan men gòch yo, twonpèt yo nan men
²¹
dwat yo pou yo ka kònen yo, epi yo rele: -Ann al goumen pou Seyè a ak pou Jedeyon! Yo te
kanpe fè wonn kan an, chak moun nan plas yo. Lè sa a tout moun nan kan an pran kouri met deyò,
²²
yo t'ap rele byen fò. Antan twasan moun Jedeyon yo t'ap kònen twonpèt yo, Seyè a menm t'ap
fè moun Madyan yo yonn ap goumen ak lòt. Sa ki chape yo pran kouri nan direksyon Bèt-Chita
²³
bò Serera rive jouk bò lavil Abèl Meola, toupre Tabat. ¶ Lè sa a yo rele tout gason nan branch
fanmi Neftali a, nan branch fanmi Asè a ak nan tout branch fanmi Manase a, epi yo pran kouri dèyè
²⁴
moun Madyan yo. Jedeyon menm voye mesaje nan tout mòn Efrayim yo pou di mesye yo:
-Desann, vin goumen ak moun Madyan yo. Al bare yo bò dlo a sou tout longè larivyè Jouden an
jouk Bèt-Bara pou anpeche yo pase. Tout moun Efrayim yo reyini vre. Epi y' al bare wout la sou
²⁵
bò dlo a sou tout longè larivyè Jouden an jouk Bèt-Bara. Yo mete men sou Orèb ak Zeyèb, de
nan chèf moun Madyan yo. Yo touye Orèb sou Wòch Orèb la, Zeyèb nan basen rezen Zeyèb la.
Aprè sa, yo kouri toujou dèyè moun Madyan yo. Lèfini, yo pote tèt Orèb ak tèt Zeyèb bay Jedeyon
ki te sou bò solèy leve larivyè Jouden an.

Chapter 8

¹
¶ Moun fanmi Efrayim yo di Jedeyon konsa: -Poukisa ou pa t' rele nou depi lè ou tapral goumen
ak moun peyi Madyan yo? Poukisa ou fè nou sa? Yo te fache anpil sou li. ²
Men, li di yo: -Sa m'
fè a pa ka parèt devan sa nou menm nou fè a! Ti sa nou menm moun Efrayim yo, nou fè a pi plis
³
pase sa nou menm ti fanmi Abyezè a, nou fè! Bondye lage Orèb ak Zeyèb, de chèf moun Madyan
yo, nan men nou. Kisa mwen fè ki ka parèt devan sa? Fini li fin di yo sa, mesye Efrayim yo pa
⁴
fache sou li ankò. ¶ Jedeyon rive bò larivyè Jouden an avèk twasan mesye ki te avè l' yo. Yo
⁵
janbe larivyè a. Aprè tout kouri sa a yo te fè dèyè lènmi yo, yo te bouke anpil. Jedeyon pale ak
moun lavil Soukòt yo, li di yo: -Tanpri, bay mesye m' yo kèk moso pen pou yo manje. Yo bouke
⁶
anpil. M'ap kouri dèyè Zebak ak Salmouna, wa moun Madyan yo. Men chèf lavil Soukòt yo di
l' konsa: -Poukisa ou vle pou nou bay lame ou la manje! Ala ou poko mete men sou Zebak ak
⁷
Salmouna! Jedeyon di yo: -Anhan! Se konsa! Bon! Lè Seyè a va fin lage Zebak ak Salmouna nan
⁸
men mwen, m'ap tounen pou nou! M'ap filange nou ak fwèt pikan ak chadwon savann. Li kite

lavil Soukòt, li moute lavil Penyèl. Li mande yo menm bagay la. Men, moun lavil Penyèl yo reponn
⁹ li tankou moun lavil Soukòt yo. Jedeyon di yo: -Mwen gen pou m' tounen apre batay la! Lè sa a,
¹⁰ m'ap kraze gwo fò won sa a. Zebak ak Salmouna te lavil Kakò avèk tout lame yo. Nan tout
kantite sòlda moun dezè yo, te gen sanvenmil (120.000) sòlda ki te mouri. Te rete sèlman kenzmil
¹¹ (15.000) gason. Jedeyon pran wout ki pase nan dezè a, sou bò solèy leve lavil Nobak ak lavil
¹² Yogbeya, epi li tonbe sou lame a ki te kwè pa t' gen danje pou yo ankò. Zebak ak Salmouna, de
wa Madyan yo, kouri met deyò. Jedeyon kouri deyò yo, li mete men sou yo, li gaye tout lame a, li
¹³ fè yo kraze rak. Lè Jedeyon, pitit Joas la, tounen soti nan lagè a, li pase sou ti mòn Erès la. ¹⁴ Li
fè yo mete men sou yon jenn gason ki te rete lavil Soukòt epi li keksyonnen l'. Jenn gason an ekri
¹⁵ non swasann disèt moun ki te otorite ak chèf fanmi lavil Soukòt li bay Jedeyon. Apre sa, Jedeyon
al jwenn moun lavil Soukòt yo, li di yo: -Nou chonje jan nou te joure m' pou Zebak ak Salmouna!
Nou te di m' nou pa t' ka bay mesye m' yo moso pen pou yo manje atout yo te bouke, paske mwen
¹⁶ pa t' ankò mete men sou Zebak ak Salmouna. Men yo tande! Lèfini, li pran branch pikan ak
¹⁷ chadwon nan savann lan, li bat chèf lavil Soukòt yo byen bat. Apre sa, l' al kraze gwo fò won
¹⁸ lavil Penwèl la, epi li touye mezi gason ki te rete nan lavil la. ¶ Lèfini, li di Zebak ak Salmouna:
-Moun nou te touye sou mòn Tabò a, ki jan yo te ye? Sa yo te sanble? Yo reponn: -Yo te sanble
¹⁹ avè ou. Nou ta di yo tout se pitit wa yo ye. Li di yo: -Se frè m' yo te ye, pitit menm manman avè
m'. Mwen fè sèman, devan Bondye ki vivan an, si nou pa t' touye yo, mwen pa ta touye nou tou!
²⁰ Epi li di Jetè, premye pitit gason l' lan: -Annavan! Touye yo! Men, jenn gason an pa wete nepe
²¹ l' nan djenn li. Li te pè paske li te timoun toujou. Lè sa a, Zebak ak Salmouna di: -Annavan non,
monchè! Se ou menm ki pou touye nou! Se gason tout bon ki pou fè kalite travay konsa. Jedeyon
leve vre, li touye Zebak ak Salmouna. Apre sa, li pran tout bijou ki te gen fòm dekou lalen ki te
²² mare nan kou chamo yo. ¶ Apre sa, moun pèp Izrayèl yo di Jedeyon konsa: -Se pou ou vin chèf
sou nou, ou menm, pitit ou ak pitit pitit ou apre ou. Paske ou delivre nou anba men moun Madyan
²³ yo. Men, Jedeyon reponn yo: -Mwen p'ap chèf nou, ni pitit mwen p'ap chèf nou tou. Se Seyè a
²⁴ ki va chèf nou. Apre sa, Jedeyon di yo: -Yon sèl bagay m'ap mande nou: Se pou chak moun
wete yon grenn zanno nan sa li pran an ban mwen. Moun Madyan yo te pote zanno lò, tankou lòt
²⁵ moun k'ap viv nan dezè a. Moun pèp Izrayèl yo reponn li: -Se tout plezi nou pou n' ba ou yo!
Yo louvri yon rad atè, epi chak moun pran yon zanno nan sa yo te pran an, yo mete l' sou rad la.
²⁶ Tout zanno Jedeyon te mande yo te fè antou swasant liv lò konsa, san konte bijou ki te gen fòm

dekou lalen yo, kolye yo, bèl rad wouj ki te sou wa yo, ak kolye ki te mare nan kou chamo yo.

27

Jedeyon fè yon estati ak lò a, li mete l' nan lavil Ofra, kote l' moun lan. Tout moun pèp Izrayèl yo vire do bay Bondye, yo vin adore estati a lavil Ofra. Sa te tounen yon pèlen pou Jedeyon ak tout

28

fanmi li yo. Se konsa moun Madyan yo te vin soumèt devan moun pèp Izrayèl la. Depi jou sa a yo pa janm leve tèt yo ankò. Pandan karantan te gen lapè nan peyi a jouk jou Jedeyon mouri.

29

¶ Jedeyon, pitit Joas la, ki rele Jewoubaal tou, tounen al rete lakay li. Li te gen swasanndis

30

pitit gason, paske li te gen anpil manman pitit. Li te gen yon fanm kay ki te rete Sichèm. Ti fanm

31

sa a te fè yon pitit gason pou li, li rele l' Abimelèk. Lè Jedeyon, pitit Joas la, mouri, li te gen yon bèl laj sou tèt li. Yo antere l' nan kavo Joas, papa l', te genyen lavil Ofra, lavil ki te pou fanmi

32

Abyeze yo. Apre Jedeyon mouri, pèp Izrayèl la vire do bay Bondye ankò, yo pran fè sèvis pou

33

Baal yo. Yo fè Baal-Berit sèvi yo bondye. Se konsa, yo pa dòmi reve Seyè a, Bondye yo a, li

34

menm ki te delivre yo anba men lènmi ki te sènen yo toupatou. Yo moutre yo engra, yo bliye fanmi Jedeyon an ansanm ak tout byen li te fè pou pèp Izrayèl la.

35

Chapter 9

1

¶ Abimelèk, pitit gason Jewoubaal ki te rele Jedeyon tou, ale lavil Sichèm kote frè menm

manman avè l' yo te rete. Li pale ak yo ansanm ak tout fanmi papa manman l' yo, li di yo: -Tanpri, ale pale ak tout grannèg ki mèt lavil Sichèm yo. Mande yo si yo ta pito gen tout swasanndis pitit

2

gason Jewoubaal yo pase yon sèl ladan yo pou chèf? Pa bliye, se bon fanmi san nou mwen ye! Se konsa tout fanmi manman Abimelèk yo mache pale ak tout grannèg ki mèt lavil Sichèm yo, yo mande yo menm bagay la. Tout moun te panche pou Abimelèk, paske yo t'ap di se ti fanmi yo li

3

ye. Yo ba li swasanndis pyès ajan yo te pran nan tanp Baal-Berit la. Avèk lajan sa a, li lwe sèvis

4

kèk vòryen ak kèk vakabon pou mache avè l'. L' ale lakay papa l' nan lavil Ofra, li touye tout swasanndis frè l' yo, pitit Jewoubaal yo, anwo menm wòch la. Men, dènye pitit gason Jewoubaal

5

la, Jotam, te kache. Se konsa li pa t' mouri. Lè sa a, tout chèf ki nan lavil Sichèm yo ansanm ak tout moun Bèt Milo yo mete tèt yo ansanm, y' al toupre pye bwadchenn repozwa ki kanpe nan lavil

6

Sichèm lan, yo fè Abimelèk wa. ¶ Lè Jotam vin konn sa, l' al kanpe sou tèt mòn Garizim lan, li pran pale byen fò pou tout moun tandè, li di konsa: -Nou menm grannèg ki mèt lavil Sichèm yo,

7

koute sa m'ap di nou. Apre sa, se pou Bondye koute sa nou menm nou pral di. Vwala yon jou,

8

tout pyebwa yo pran desizyon chwazi yon wa pou mete alatèt yo. Yo di pye benzoliv la: Vin
 gouvènen nou non! ⁹ Pye benzoliv la di yo: Nou ta vle mwen sispann bay lwil ki sèvi pou fè lwanj
 bondye yo ak lwanj lèzòm pou m' al chèf sou tout pyebwa! ¹⁰ Y' al jwenn pye figfrans lan, yo di
 l': Ou menm, pye figfrans, vin gouvènen nou non! ¹¹ Pye figfrans lan di yo: Nou ta vle mwen
 sispann bay bon ti fwi dous pou m' ale chèf sou tout pyebwa! ¹² Lè sa a, yo di pye rezen an: Ou
 menm pye rezen, vin gouvènen nou non! ¹³ Pye rezen an di yo: Nou ta vle mwen sispann bay diven
 ki fè kè bondye yo ak kè lèzòm kontan pou m' al chèf sou tout pyebwa! ¹⁴ Lè sa a, yo di pye pikan
 an: Ou menm pye pikan, vin gouvènen nou non! ¹⁵ Pye pikan an di yo: Si nou soti tout bon vre
 pou nou fè m' wa alatèt nou, enben, vini non. Vin mete kò nou nan lonbraj mwen. Si nou pa fè sa,
 gen yon sèl dife k'ap soti nan touf pikan an, l'ap boule nou tout, ata pye sèd peyi Liban yo! ¹⁶ Koulye
 a, m'ap mande nou: Eske se tout bon vre epi ak tout kè nou nou mete Abimelèk wa pou gouvènen
 nou? Dapre nou, se yon bèl bagay nou fè la a pou Jewoubaal ak fanmi l' yo? Eske se sa Jewoubaal
 merite apre sa li te fè pou nou? ¹⁷ Chonje jan papa m' te goumen pou nou, jan li te riske lavi l' pou
 nou, pou l' te ka delivre nou anba men moun Madyan yo. ¹⁸ Epi pou jòdi a nou leve dèyè fanmi
 papa m' yo. Nou touye swasann dis pitit gason l' yo sou menm wòch la, epi nou pran Abimelèk, yon
 pitit gason li fè ak yonn nan sèvant li yo, nou mete l' wa alatèt grannèg lavil Sichèm yo. Poukisa?
¹⁹ Paske se fanmi nou li ye? Si se tout bon vre epi ak tout kè nou nou fè Jewoubaal ak fanmi l' yo
 sa nou fè la a, enben, n'ap kontan avèk Abimelèk nou an. Li menm tou l'a kontan ak nou! ²⁰ Men,
 si se pa sa, se pou yon dife soti nan Abimelèk pou li boule dènye grannèg lavil Sichèm yo ak tout
 moun ki nan Bèt Milo. Se pou dife soti nan grannèg lavil Sichèm yo ak tout moun ki nan Kay-Ranble
 a pou l' devore Abimelèk! ²¹ Apre sa, Jotam kouri met deyò. L' al cache lavil Beyè, paske li te pè
 Abimelèk, frè l' la. ²² ¶ Abimelèk gouvènen pèp Izrayèl la pandan twazan. ²³ Apre sa, Bondye
 mete yon sèl bouyay ant Abimelèk ak grannèg Sichèm yo, li fè grannèg Sichèm yo leve dèyè
 Abimelèk. ²⁴ Sa te rive konsa pou yo tout te ka peye sa yo te fè a: Abimelèk pou masakre li te
 masakre swasann dis pitit gason Jewoubaal yo, grannèg lavil Sichèm yo pou ankouraje yo te ankouraje
 Abimelèk lè li t'ap touye frè l' yo. ²⁵ Grannèg lavil Sichèm yo mete anbiskad sou tèt mòn yo ap
 veye Abimelèk. Moun ki nan anbiskad yo menm te rete ap vòlò tout moun ki t'ap pase sou chemen
 an bò kote yo. Abimelèk vin konn sa. ²⁶ Gaal, pitit gason Ebèd la, vin rive lavil Sichèm ansanm
 ak frè l' yo. Grannèg lavil Sichèm yo fè msye konfyans. ²⁷ Y' al nan jaden yo, yo keyi rezen nan
 jaden rezen yo, yo fè diven, yo fè fèt. Y' al nan tanp bondye yo a, yo manje, yo bwè, epi yo bay

²⁸
 Abimelèk kont madichon li. Gaal, pitit gason Ebèd la, di yo: -Kisa Abimelèk ye menm pou n'ap sèvi l' konsa? Ki kalite moun ki gen nan lavil Sichèm la menm pou y'ap sèvi Abimelèk? Ki moun li ye? An! Pitit gason Jewoubaal la! Epi se nan men l' Zeboul ap resevwa lòd? Poukisa pou n' sèvi l'? Non! Se pou moun Sichèm yo respekte Amò, zansèt yo, se moun fanmi li pou yo sèvi. Pa mande Bondye se mwen ki te chèf pèp sa a! Mwen ta mete Abimelèk nan wòl li! Mwen ta di l': Si ou gen yon gwo lame vre, soti non! Soti vin goumen! Zeboul te chèf lavil Sichèm. Lè li tande tout pawòl Gaal, pitit gason Ebèd la, te di yo, li fache anpil. Li voye mesaje an kachèt bò Abimelèk pou di l' konsa: -Gaal, pitit gason Ebèd la, rive lavil Sichèm ansanm ak frè l' yo. Y'ap moute tèt moun lavil la sou do ou pou yo pa kite ou antre. Men sa ou pral fè. Leve nan mitan lannwit ansanm ak tout moun ki avè ou yo, al kache nan tout bwa a. Nan maten, lè solèy fenk leve, w'a parèt, w'a tonbe sou lavil la pou atake l'. Lè Gaal ak moun li yo va soti vin kontre ak ou, w'a kraze l' ak tout fòs ou. Se konsa, Abimelèk ak tout moun li yo leve lannwit, yo separe fè kat gwoup, y' al kache andeyò limit lavil la. Gaal, pitit gason Ebèd la, soti, l' al kanpe bò pòtay lavil la. Lè sa a, Abimelèk ak moun pa l' yo soti nan kachèt yo. Lè Gaal wè moun yo, li di Zeboul konsa: -Gade. Men yon bann moun k'ap desann sot sou tèt mòn yo! Men, Zeboul di li: -Se pa anyen, monchè! Se lonbraj sou mòn yo ou pran pou moun! Gaal di l' ankò: -Gade! Men yon bann moun k'ap desann Mòn Lonbrit latè a. Men yon lòt ankò k'ap vini sou chemen Pye Chenn moun k'ap li zetwal yo. Lè sa a, Zeboul di l' konsa: -Kote bèl pawòl ki te nan bouch ou yo? Se pa ou ki t'ap mande ki moun Abimelèk ye konsa pou n'ap sèvi l'? Apa moun ou t'ap pase nan betiz yo? Soti non! Koulye a al goumen ak yo! Gaal pran devan, li mennen grannèg lavil Sichèm yo pou y' al goumen ak Abimelèk. Men, lè Abimelèk mache sou li, Gaal pran kouri met deyò. Sòlda Abimelèk yo te blese anpil moun rive jouk devan pòtay lavil la. Apre sa, Abimelèk tounen lavil Awouma. Zeboul menm mete Gaal deyò ak tout frè l' yo, kifè yo pa t' kapab rete lavil Sichèm ankò. Nan denmen, moun lavil Sichèm yo fè lide soti al nan jaden. Yo vin di Abimelèk sa. Li pran moun li yo, li separe yo fè twa gwoup epi l' al kache nan jaden yo. Lè li wè moun yo ap soti nan lavil la, li vare sou yo, li pran goumen ak yo, li touye yo. Abimelèk ak gwoup li a kouri devan, y' al rete devan pòtay lavil la, pandan de lòt gwoup yo menm t'ap atake moun ki nan jaden yo, yo t'ap touye yo. Abimelèk goumen ak moun lavil la tout jounen an. Li pran lavil la pou li, li touye tout moun ki te ladan l'. Apre sa, li kraze lavil la ratè, epi li simen sèl sou tout anplasman lavil la. Lè tout grannèg ki rete nan gwo fò won Sichèm lan vin konn sa, yo antre al kache nan fò tanp Baal-Berit

⁴⁷ la. Y' al di Abimelèk tout grannèg yo te sanble la. ⁴⁸ Lè sa a, Abimelèk moute sou mòn Zalmon avèk moun ki te avè l' yo. Li pran yon rach li koupe yon branch bwa, li pran l', li mete l' sou zepòl ⁴⁹ li. Epi li di tout moun ki te avè l' yo: -Nou wè sa m' fè a, kouri vit! Al fè menm bagay la tou. Chak moun koupe yon branch bwa vre, epi yo pran mache dèyè Abimelèk. Yo anpile branch bwa yo nan pye fò a. Epi yo mete dife nan fò a ak tout moun yo ladan l'. Se konsa tout moun ki rete nan fò ⁵⁰ Sichèm lan mouri. Te gen mil (1.000) moun konsa, fanm ak gason, ki mouri. ¶ Apre sa, Abimelèk ⁵¹ ale lavil Tebèz, li sènen l' epi li pran l'. Te gen yon gwo fò won nan mitan lavil la. Tout moun, fanm kou gason, ansanm ak chèf yo, kouri al kache ladan l'. Yo fèmen tout pòt yo dèyè yo epi yo ⁵² moute sou tèt fò a. Abimelèk rive jouk bò fò a. Li pwoche bò pòt la pou l' te mete dife nan fò ⁵³ a. Men yon fanm lage yon wòl moulen sou tèt Abimelèk, li kraze zo bwa tèt li. ⁵⁴ Abimelèk rele jenn gason ki t'ap pote zam li yo, li di l' konsa: -Rale nepe ou, touye m'. Mwen pa vle yo di se ⁵⁵ yon fanm ki touye m'. Se konsa jenn gason an pèse l' pak an pak, epi li mouri. Lè moun pèp ⁵⁶ Izrayèl yo wè Abimelèk mouri, yo tout al lakay yo. Se konsa Bondye te fè Abimelèk peye pou ⁵⁷ krim li te fè kont fanmi papa l' la, lè li te touye swasanndis frè l' yo. Bondye te fè moun lavil Sichèm yo soufri pou mechanste yo te fè lòt moun soufri. Se konsa, madichon Jotam, pitit gason Jewoubaal la, te wè pou yo a rive yo vre.

Chapter 10

¹ ¶ Apre Abimelèk, se Tola, pitit gason Pwa, pitit pitit gason Dodo, ki parèt pou delivre pèp ² Izrayèl la. Tola se moun branch fanmi Isaka. Li te rete lavil Chami nan mòn Efrayim yo. Li te ³ chèf nan peyi Izrayèl la pandan venntwazan. Apre sa, li mouri. Yo antere l' lavil Chami. Apre li, ⁴ se Jayi, moun peyi Galarad, ki te parèt. Li gouvènen peyi Izrayèl la pandan venndezen. Li te gen ⁵ trant pitit gason ki te moute trant bourik. Yo te gen trant lavil ki te rele yo pa yo nan peyi Galarad. ⁶ Jouk koulye a yo rele lavil yo lavil Jayi. Jayi mouri, yo antere l' lavil Kamon. ¶ Apre sa, moun ⁷ pèp Izrayèl yo rekonmanse ankò ap fè sa ki mal nan je Bondye. Yo pran fè sèvis pou Baal yo, pou Astate yo, pou bondye moun peyi Siri yo, pou bondye moun peyi Sidon yo, pou bondye moun peyi Moab yo, pou bondye moun peyi Amon yo ak bondye moun peyi Filisti yo. Yo vire do bay Seyè ⁸ a, yo sispann sèvi l'. Se konsa Seyè a fache sou pèp Izrayèl la. Li kite moun Filisti yo ak moun ⁸ Amon yo mete pye sou kou yo. Pandan tout lanne a, moun sa yo maltrete pèp Izrayèl la, yo

malmennen yo. Pandan dizwitan, yo t'ap peze tout moun nan pèp Izrayèl la ki t'ap viv lòt bò larivyè
⁹
 Jouden an, sou bò solèy leve, nan peyi Galarad kote yo te rete a. Moun Amon yo te menm rive
 janbe lòt bò larivyè Jouden an pou y' al goumen ak moun branch Jida yo, moun branch fanmi
¹⁰
 Benjamen yo ak moun branch fanmi Efrayim yo. Pèp Izrayèl la te nan gwo lapenn. ¶ Lè sa a,
 yo rele nan pye Seyè a, yo di l' konsa: -Nou te peche kont ou, nou te vire do ba ou, ou menm Bondye
¹¹
 nou an, n' al fè sèvis pou Baal yo. Seyè a reponn pèp Izrayèl la: -Moun Lejip yo, moun Amori
¹²
 yo, moun Amon yo, moun Filisti yo, moun Sidon yo, moun Amalèk yo ak moun Mawon yo t'ap
 peze nou nan tan lontan, nou te kriye nan pye m'. Eske mwen pa t' delivre nou anba men yo lè sa
¹³
 a? Men chak fwa, nou vire do ban mwen pou n' al fè sèvis pou lòt bondye. Se poutèt sa mwen
¹⁴
 pa pral delivre nou fwa sa a ankò. Ale kriye nan pye bondye nou te chwazi yo! Se yo ki pou
¹⁵
 sove nou lè nou nan ka! Men, moun pèp Izrayèl yo di Seyè a: -Nou fè sa nou pa t' dwe fè: Ou
¹⁶
 mèt fè nou sa ou vle. Men, tanpri delivre nou jòdi a! Apre sa, yo wete tout bondye lòt nasyon
 yo te gen lakay yo, yo pran sèvi Seyè a. Seyè a pa t' gen kè pou l' wè jan pèp Izrayèl la te nan lapenn.
¹⁷
 Lè sa a, lame pèp Amon an sanble, y' al moute kan yo nan peyi Galarad. Lame pèp Izrayèl la
¹⁸
 menm te sanble tou, yo moute kan yo lavil Mispà. Pèp peyi Galarad la ak chèf yo t'ap pale, yonn
 t'ap di lòt: -Moun ki pral mennen batay la kont moun Amon yo, se li menm ki pral chèf tout moun
 nan peyi Galarad!

Chapter 11

¹
 ¶ Jefte, moun peyi Galarad, te yon vanyan sòlda. Papa l' te rele Galarad. Manman l' te yon
²
 jennès. Madan Galarad te fè lòt pitit gason pou mari l'. Men, lè pitit li yo fin gran, yo mete Jefte
 deyò nan kay la, yo di l' konsa: -Ou pa gen dwa jwenn anyen nan byen papa nou, paske ou se pitit
³
 yon jennès. Jefte kouri met deyò pou frè l' yo, l' al rete nan peyi Tòb. Yon bann vòryen vin mete
 tèt ansanm avèk Jefte. Yo te konn soti avè l' al devalize moun. ¶ Kèk tan apre sa, moun Amon
⁴
 yo leve vin fè lagè ak pèp Izrayèl la. Lè moun Amon yo vin atake pèp Izrayèl la, chèf fanmi peyi
⁵
 Galarad la al chache Jefte nan peyi Tòb pou mennen l' tounen. Yo di l' konsa: -Vini non! Pran
⁶
 kòmandman lame nou an pou n' ka goumen ak moun Amon yo. Men, Jefte di chèf fanmi peyi
⁷
 Galarad yo: -Mwen te kwè nou pa vle wè m'? Nou fòse m' kite lakay papa m'! Koulye a nou nan

8
 traka, poukisa se mwen menm nou vin jwenn? Chèf fanmi peyi Galarad yo di Jefte konsa: -Nou vin jwenn ou koulye a, paske nou bezwen pou ou mache ansanm avèk nou, pou ou goumen ak

9
 moun Amon yo, pou ou ka chèf tout moun ki rete nan peyi Galarad la. Lè sa a, Jefte di chèf fanmi peyi Galarad yo: -Tansèlman, si nou fè m' tounen lakay pou m' goumen ak moun Amon yo, si Seyè

10
 a fè m' kraze yo, se mwen menm k'ap chèf nou tout bon wi! Chèf fanmi peyi Galarad yo di Jefte

11
 konsa: -Nou pran Seyè a sèvi nou temwen! N'ap fè tou sa ou sot di la a. Se konsa, Jefte ale avèk chèf fanmi peyi Galarad la, epi yo mete l' chèf pou l' gouvènèn yo, pou l' kòmande lame yo. Apre

12
 sa, Jefte al repete tout kondisyon sa yo devan Seyè a, lavil Mispà. ¶ Lèfini, Jefte voye mesaje bay wa moun Amon yo pou di l': -Kisa ou gen avèk nou? Poukisa ou vini goumen ak nou jouk nan

13
 peyi nou? Wa moun Amon yo reponn mesaje Jefte yo: -Se paske pèp Izrayèl la, lè yo soti kite peyi Lejip, yo pran peyi a nan men nou, depi larivyè Anon jouk larivyè Jabòk ak larivyè Jouden.

14
 Koulye a se pou yo renmèt nou tè nou san bri san kont. Jefte voye mesaje yo tounen al jwenn

15
 wa moun Amon yo, avèk repons sa a: -Pèp Izrayèl la pa janm pran ankenn pòsyon nan tè moun

16
 Moab yo, ni nan tè moun Amon yo. Paske lè pèp Izrayèl la t'ap kite Lejip, yo te mache nan tout

17
 dezè a jouk lanmè Wouj yo, epi yo rive Kadès. Lè sa a, pèp Izrayèl la voye mesaje bò kote wa peyi Edon an pou di l' konsa: Tanpri, kite nou fè yon ti pase nan peyi a. Men, wa peyi Edon an pa t' vle kite yo pase. Yo te voye tou bò kote wa Moab la. Men, li menm tou, li pa t' vle kite yo pase.

18
 Se konsa pèp Izrayèl la rete Kadès. Apre sa, yo pran mache nan dezè a, yo fè yon detou pou yo pa pase nan peyi Edon an ak nan peyi Moab la. Yo rive sou bò solèy leve peyi Moab la, lòt bò larivyè Anon an. Se la yo moute kan yo pou yo rete. Men, yo pa janm janbe lòt bò larivyè Anon

19
 paske se li ki te sèvi fwontyè pou peyi Moab la. Lè sa a pèp Izrayèl la voye mesaje bay Siyon, wa peyi Amori a, ki te rete Esbon. Yo voye mande l' pèmasyon pou yo fè yon ti pase nan peyi l' la

20
 pou yo ka rive nan peyi kote yo prale a. Men, Siyon pa t' fè pèp Izrayèl la konfyans, li pa t' kite yo pase. Li sanble tout sòlda li yo, yo vin moute kan yo bò Ajaza, epi yo atake pèp Izrayèl la.

21
 Men, Seyè a, Bondye pèp Izrayèl la, lage Siyon ansanm ak tout moun li yo nan men pèp Izrayèl la ki bat yo byen bat. Se konsa, pèp Izrayèl la pran peyi a nan men moun Amori yo ki te rete nan

22
 zòn lan. Yo pran tout peyi moun Amori yo pou yo, soti larivyè Anon bò nan sid jouk larivyè

23
 Jabòk bò nan nò, depi dezè a bò solèy leve jouk larivyè Jouden bò solèy kouche. Konsa, se Seyè a, Bondye pèp Izrayèl la, ki te mete moun Amori yo deyò pou fè plas pou pèp Izrayèl la, pèp li a.

24
 Koulye a, ou ta vle reprann tè a nan men Seyè a? Eske ou pa kenbe pou ou tou sa Kemòch,

bondye ou la, ba ou? Epi ou ta vle pou nou pa kenbe sa Seyè a, Bondye nou an, ban nou? ²⁵ Eske
 ou pi bon pase Balak, pitit gason Zipò a, wa peyi Moab la? Li pa janm leve dwèt li sou pèp Izrayèl
²⁶
 la, li pa janm leve vin goumen ak nou. Pèp Izrayèl la gen twasanzen depi li rete lavil Esbon ak
 lavil Awoyè ansanm ak tout ti bouk ki sou kont yo, ak tout lavil ki sou de bò larivyè Anon an.
²⁷
 Poukisa, depi tout tan sa a, nou pa t' reprann yo? Non. Mwen pa fè nou anyen, se nou menm ki
 fè m' lè nou vin fè m' lagè. Se Seyè a sèl moun ki pou jije. L'a deside ant pèp Izrayèl la ak pèp
²⁸
 Amori a kilès ki gen rezon! Men, wa moun Amori yo pa t' koute mesaj Jefte te voye ba li a.
²⁹
 ¶ Lespri Seyè a te sou Jefte. Jefte travèse peyi Galarad ak peyi Manase, li tounen lavil Mispa
 nan peyi Galarad. Apre sa, li kite lavil Mispa, li pase nan peyi Amon an. ³⁰ Jefte te fè Seyè a yon
³¹
 ve. Li te di: -Si ou lage moun Amon yo nan men m', m'ap ofri ou premye moun ki va soti lakay
 mwen vin kontre m' lè m'a tounen soti kraze moun Amon yo. M'ap boule l' nèt nan dife pou ou.
³²
 Se konsa, Jefte janbe lòt bò fwontyè a, li antre nan peyi moun Amon yo, l' al goumen ak yo. Epi
³³
 Seyè a lage yo nan men l'. Li bat yo depi lavil Awoyè rive nan tout zòn Minit la jouk Abèl
 Kiramen. Sa te fè vin lavil antou. Yo te touye anpil moun. Se konsa, moun Amon yo vin soumèt
³⁴
 devan pèp Izrayèl la. Lè Jefte tounen lakay li lavil Mispa, vwala se pitit fi li a ki te soti vin kontre
 l'. Li t'ap danse, li t'ap jwe tanbouren. Se te sèl pitit li te genyen. Li pa t' gen lòt pitit ankò, ni fi ni
³⁵
 gason. Lè Jefte wè li, li chire rad sou li sitèlman sa te fè l' lapenn, li di: -O pitit fi mwen! Ou
 touye papa ou. Poukisa se ou menm ki pou fè m' tout lapenn sa a! Mwen te fè yon gwo ve bay Seyè
³⁶
 a. Koulye a m' pa ka pa kenbe l'. Pitit fi a di l': -Papa, si ou te fè yon ve bay Seyè a, se pou ou
 fè m' sa ou te di w'ap fè m' lan, paske Seyè a te ba ou pouvwa pou ou tire revanjan sou lènmi ou yo.
³⁷
 Apre sa li di papa l' konsa: -Yon sèl bagay m'ap mande ou! Ban m' yon ti delè de mwa pou m'
 al pwonmennen ansanm ak zanmi m' yo nan mòn yo pou m' al kriye, paske mwen pral mouri san
³⁸
 m' pa marye. Jefte kite l' ale pou de mwa. Se konsa, pitit fi Jefte a ansanm ak zanmi l' yo ale nan
³⁹
 mòn, y' al kriye paske li tapral mouri tifi. Sou de mwa, li tounen vin jwenn papa l' ki fè sa l' te
 pwomèt fè pou Seyè a. Se konsa, li mouri tifi. Se depi lè sa a sa rete yon koutim nan peyi Izrayèl
⁴⁰
 la, pou chak lanne medam pèp Izrayèl yo soti al pase kat jou ap kriye pou pitit fi Jefte, moun
 peyi Galarad la.

Chapter 12

¹
 ¶ Lè sa a, moun branch fanmi Efrayim yo reyini ansanm, yo janbe lòt bò larivyè Jouden, y' al lavil Zafon. Yo di Jefte konsa: -Poukisa ou travèse al goumen ak moun Amon yo san ou pa rele nou ale avè ou? Se poutèt sa, nou pral boule kay ou a sou ou. ² Men Jefte di yo: -Moun pa m' yo ansanm avè m', nou te gen yon gwo kont ak moun Amon yo. Mwen te rele nou, men nou pa t' vle vin delivre m' anba men yo. ³ Lè m' wè nou pa t' soti pou nou vin pote m' sekou, m' al riske vi m'. Mwen travèse al goumen ak moun Amon yo, epi Seyè a lage yo nan men m'. Poukisa pou koulye a nou moute jouk lakay mwen vin chache m' kont? ⁴ Lè sa a menm, Jefte sanble tout gason ki nan peyi Galarad la, y' al goumen ak moun Efrayim yo. Yo bat yo byen bat. Moun Efrayim yo te konn joure moun Galarad yo. Yo te konn di: Moun Galarad yo, se yon bann trèt yo ye. Yo kite peyi yo, Efrayim, y' al rete nan peyi Manase a! ⁵ Apre sa, moun Galarad yo pran kontwole tout pas larivyè Jouden kote pou janbe ale nan peyi Efrayim. Chak fwa yonn nan moun Efrayim yo rive pou yo kouri janbe al nan peyi yo, li te blije mande yo pèmisyon. Lè konsa, moun Galarad yo mande l' èske se moun Efrayim li ye. Si li reponn non, ⁶ lè sa a yo mande l' pou l' di: Chibolèt. Men li di: Sibolèt paske li pa t' ka rive di l' jan yo di l' la. Lamenm yo mete men sou li, yo touye l' la nan pas la. Lè sa a, yo te touye karandemil (42.000) moun nan branch fanmi Efrayim lan. ⁷ Jefte, moun Galarad la, te gouvènen pèp Izrayèl la pandan sizan. Apre sa, li mouri, epi yo antere l' nan lavil kote li te fèt la nan peyi Galarad. ⁸ ¶ Apre Jefte, se Ibzán, moun lavil Betleyèm, ki te gouvènen pèp Izrayèl la. ⁹ Li te gen trant pitit gason ak trant pitit fi. Li marye trant pitit fi l' yo ak moun ki pa t' nan branch fanmi l' epi li fè chache jenn fi nan lòt branch fanmi pou pitit gason l' yo. Li gouvènen pèp Izrayèl la pandan sètan. ¹⁰ Apre sa, Ibzán mouri, yo antere l' lavil Betleyèm. ¹¹ Apre li, se Elon, moun Zabilon an, ki te gouvènen pèp Izrayèl la pandan dizan. ¹² Lè Elon, moun Zabilon an, mouri, yo antere l' lavil Ajalon nan peyi Zabilon. ¹³ Apre li, se Abdon, pitit gason Ilèl, moun lavil Piraton, ki t'ap gouvènen pèp Izrayèl la. ¹⁴ Li te gen karant pitit gason ak trant pitit pitit gason ki te konn moute sou swasanndis ti bourik. Li gouvènen pèp Izrayèl la pandan witan. ¹⁵ Lè Abdon, pitit gason Ilèl la, mouri, yo antere l' lavil Piraton nan peyi Efrayim, nan mòn moun Amalèk yo.

Chapter 13

¹
 ¶ Moun pèp Izrayèl yo te rekonmanse ankò ap fè sa ki mal nan je Seyè a. Seyè a lage yo nan men moun Filisti yo pandan karantan. ² Te gen yon nonm yo te rele Manoak. Se te moun lavil

Zora, li te fè pati branch fanmi Dann lan. Madanm li pa t' janm ka fè pitit. ³ Zanj Seyè a parèt devan madanm lan, li di l' konsa: -Ou pa t' janm ka fè pitit, pa vre? Men ou pral vin ansent, ou pral fè yon pitit gason. ⁴ Piga ou janm bwè diven, ni ankenn lòt bweson ki pou fè ou sou. Nitou, pigas ou manje anyen ki pa bon pou moun k'ap sèvi Bondye manje. ⁵ Paske ou pral ansent, ou pral fè yon pitit gason. Piga ou janm koupe cheve nan tèt li, paske depi nan vant manman l', se yon gason k'ap viv apa pou Bondye tankou nazirit yo l'ap ye. Se li menm ki pral konmanse travay pou delivre pèp Izrayèl la anba men moun Filisti yo. ⁶ Apre sa, madanm lan antre al di mari l': -Yon moun Bondye te vin bò kote m'. Lè mwen gade l', pou jan li te fè m' pè a ou ta di yon mesaj Bondye. Mwen pa mande l' kote l' soti, ni li pa ban m' non li. ⁷ Li di m' konsa: Ou pral ansent, ou pral fè yon pitit gason. Piga ou janm bwè diven, ni ankenn lòt bweson ki pou fè ou sou. Ni pigas ou manje anyen ki pa bon pou moun k'ap sèvi Bondye manje. Paske pitit gason ou lan pral viv apa pou Bondye tankou nazirit yo depi nan vant manman l' jouk jou li mouri. ⁸ ¶ Lè sa a, Manoak lapriyè Seyè a, li di: -Tanpri, Mèt mwen, fè moun Bondye ou te voye a vin bò kote nou ankò pou l' ka di nou sa pou nou fè pou ti gason ki pral fèt la. ⁹ Bondye fè sa Manoak te mande l' la vre. Epi mesaj Bondye a vin bò kote madanm lan ki te chita nan yon jaden. Manoak, mari a, pa t' avè l'. ¹⁰ Madanm lan prese kouri al bay mari l' nouvèl la. Li di li konsa: -Men moun ki te vin bò kote m' lòt jou a parèt devan m' ankò. ¹¹ Manoak leve, li swiv madanm li. L' al jwenn nonm lan, epi li di l': -Se ou menm ki te pale ak madanm sa a? Li reponn: -Wi, se mwen. ¹² -Manoak di l': -Bon. Lè tou sa ou di yo va rive, kijan pou m' elve ti pitit la? Kisa pou l' fè ak sa pou l' pa fè? ¹³ Mesaj Seyè a di Manoak konsa: -Se pou madanm ou fè tou sa mwen di l' fè a. ¹⁴ Piga li janm manje anyen ki fèt avèk rezen. Piga li janm bwè diven ni ankenn lòt bweson ki pou fè l' sou. Piga li janm manje anyen ki pa bon pou moun k'ap sèvi Bondye manje. Se pou li fè tou sa mwen mande l' fè a. ¹⁵ ¶ Manoak di mesaj Seyè a: -Tanpri, poko ale. Kite nou kwit yon jenn ti kabrit pou ou. ¹⁶ Mesaj Seyè a di Manoak konsa: -Menm si mwen rete mwen p'ap manje manje w'ap ban mwen an. Men si ou vle, touye yon ti kabrit, boule l' nan dife tankou yon ofrann pou Seyè a. Manoak pa t' ankò konnen si se te yon mesaj Seyè a ki te devan l'. ¹⁷ Manoak di mesaj Seyè a: -Di nou ki jan ou rele pou nou ka fè lwanj pou ou lè pawòl ou di yo va rive vre. ¹⁸ Mesaj Seyè a di l': -Poukisa nou vle konnen non m'? Non m' se yon mèvèy. ¹⁹ Manoak pran jenn ti kabrit la ak kèk grenn jaden, li mete yo sou lotèl wòch la, li ofri yo pou Seyè a ki fè yon mèvèy devan Manoak ak madanm li ki te rete la ap gade. ²⁰ Pandan flanm dife yo t'ap soti sou lotèl la moute nan syèl la, Manoak ak madanm li wè mesaj

21
 Seyè a moute nan syèl la nan flanm dife a. Lè yo wè sa, yo lage kò yo fas atè. Manoak ak madanm li pa janm wè mesajè Bondye a ankò. Se lè sa a, Manoak vin konprann se te yon mesajè Seyè a ki te parèt devan yo a. 22 Lè sa a, Manoak di madanm li: -Nou pral mouri, paske nou wè Bondye! 23 Madanm lan di l': -Si Seyè a te vle touye nou, li pa ta asepte ofrann nou fè pou li yo. Li pa ta fè nou wè tout bagay sa yo, ni li pa ta fè nou tande tout pawòl sa yo. 24 ¶ Apre sa, madanm lan fè yon pitit gason, li rele l' Samson. Pitit la grandi, Seyè a te beni l'. 25 Epi lespri Seyè a konmanse travay nan li antan li te nan kan moun Dann yo, ant Soreja ak Echtawòl.

Chapter 14

1 ¶ Yon jou Samson desann ale lavil Timna, li wè yon jenn fi nan moun Filisti yo li renmen. 2 Li tounen vin di papa l' ak manman l': -Mwen wè lavil Timna yon jenn fi mwen renmen nan moun Filisti yo. Al mande pou li pou mwen. 3 Manman l' ak papa l' di l' konsa: -Poukisa pou ou ale jouk kay moun Filisti yo, moun ki p'ap sèvi Bondye nou an, pou al chache yon madanm? Ou pa jwenn yon jenn fi nan fanmi ou, osinon nan pèp nou an pou ou marye? Men, Samson reponn papa l': -Tanpri, al fè lademann lan pou mwen, paske se li menm mwen renmen. 4 Papa l' ak manman l' pa t'konnen se Seyè a ki t'ap pouse Samson fè sa pou l' te ka jwenn yon okazyon gen kont ak moun Filisti yo. Lè sa a, se moun Filisti ki te chèf sou moun pèp Izrayèl yo. 5 Se konsa Samson desann lavil Timna ansanm ak papa l' ak manman l'. Lè yo rive nan jaden rezen ki toupre lavil Timna a, li wè yon jenn lyon ki t'ap gwonde ki t'ap vanse sou li. 6 Lamenn, lespri Seyè a vin sou li. Li vin gen yon sèl fòs, li dechèpiye lyon an pak an pak ak men li tankou si se te yon jenn ti kabrit. Men, li pa rakonte papa l' ak manman l' sa l' te fè a. 7 Lèfini, l' ale, li pale ak ti fi a, li renmen l'. 8 Kèk tan apre sa, li tounen vin marye avè l'. Sou wout li, li fè yon ti detou pou l' al wè kadav lyon li te touye a. 9 Li tou sezi jwenn yon desen myèl avèk siwo myèl anndan kadav la. Li pran ti moso gato myèl nan men l', li manje ladan l' antan l'ap fè rès vwayaj la. L' al jwenn manman l' ak papa l', li ba yo rès gato myèl la, epi yo manje. Men, li pa t' di yo se nan kadav lyon an li te pran l'. 10 ¶ Apre sa, papa l' desann ale kay ti fi a. Lè sa a, Samson fè yon bèl resepsyon lakay la. Se konsa jenn gason yo toujou fè lè y'ap marye. 11 Lè moun Filisti yo wè l', yo pran trant jenn gason yo voye pou rete avè l'. 12 Samson di yo: -Mwen pral ban nou yon kont. Si nou jwenn li anvan sèt jou fèt nòs la fin

13
 pase, m'ap ban nou trant bèl varèz ak trant rechanj fèt ak bèl twal. Men, si nou pa jwenn li anvan lè sa a, se nou ki pral ban mwen trant varèz ak trant rechanj. Yo di l': -Dakò! Ban nou kont la. Fè nou tande l'.
 14
 Li di yo: -Manje soti nan vant sa ki konn touye pou manje. Sa ki dous soti nan sa ki gen anpil fòs. Twa jou pase, yo pa t' ankò jwenn kont la.
 15
 Sou katriyèm jou a, yo rele madan Samson, yo di l' konsa: -Pran tèt mari ou, fè l' ban nou kont la. Si ou pa fè sa, n'ap mete dife lakay papa ou, n'ap boule l' ansanm avè ou ladan l'! Gen lè se pou eskanmòte tou sa nou genyen ou te envite nou isit la?
 16
 Se konsa madan Samson al jwenn mari l', li pran kriye sou zepòl li, li di l' konsa: -Ou pa renmen m'! Se rayi ou rayi m'! Ou bay zanmi m' yo yon kont, ou pa janm di m' sa l' vle di! Samson reponn li: -Gade, machè! Mwen pa menm di papa m' ak manman m' sa kont la ye.
 17
 Atò se ou menm mwen ta di l'? Pandan tout sèt jou fèt nòs la, li pa t' sispann kriye nan zòrèy Samson. Sou setyèm jou a, Samson ba li sekrè kont la paske fanm lan t'ap anbete l' twòp. Lèfini fanm lan soti al di ras li yo sa kont lan vle di.
 18
 Se konsa, sou setyèm jou a, anvan Samson antre nan chanm li pou l' al dòmi, mesye lavil yo di l' konsa: -Kisa ki pi dous pase siwo myèl? Kisa ki gen plis fòs pase lyon? Samson di yo: -Si nou pa t' travay tèt madanm mwen, nou pa ta janm jwenn kont mwen an!
 19
 Lè sa a, lespri Seyè a desann sou Samson pou ba l' fòs. Li pati, l' ale lavil Askalon. Li touye trant gason nan moun lavil la, epi li pran rad ki te sou yo, li pote yo bay mesye ki te jwenn kont lan. Apre sa, li fè yon sèl kòlè, li tounen lakay papa l'.
 20
 Lè sa a, moun yo rele yonn nan moun ki te avèk Samson yo, sa ki te pi bon zanmi l' lan, yo ba li madan Samson pou madanm li.

Chapter 15

1
 ¶ Kèk tan apre sa, pandan rekòt ble a, Samson al rann madanm li vizit. Li te pote yon jenn ti kabrit pou li. Li di bòpè li: -Mwen pral antre nan chanm madanm mwen! Men, bòpè a pa t' kite l' antre.
 2
 Li di Samson konsa: -Mwen te kwè ou te rayi l'! Se konsa, mwen pran l' bay pi bon zanmi ou lan. Men, ti sè l' la pi bèl pase l'. Ou te mèt pran ti sè a nan plas gran sè a.
 3
 Samson di yo: -Fwa sa a, si m' fè moun Filisti yo kichòy, piga pesonn vin di m' anyen.
 4
 L' ale, li pran twasan (300) chen mawon. Li mare yo nan ke de pa de, ak yon bwa chandèl nan mitan ke yo.
 5
 Apre sa, li mete dife nan bwa chandèl yo, epi li lage chen mawon yo nan jaden ble moun Filisti yo. Dife boule dènye ble moun yo, non sèlman ble ki kase deja yo, men tou ble ki te sou pye toujou. Dife a boule ata jaden rezen yo ak jaden oliv yo.
 6
 Lè sa a, moun Filisti yo mande: -Ki moun ki fè sa? Yo di yo: -Se Samson, bofi nonm lavil Timna a, ki fè l', paske bòpè l' te pran madan Samson, li bay yon bon

zanmi Samson. Se konsa moun Filisti yo ale yo boule madanm lan ansanm ak papa l' nan kay la.

⁷ Samson di yo: -Anhan! Se konsa nou fè sa? Bon. Mwen p'ap sispann toutotan mwen pa fin fè nou peye sa nou fè m' la a. ⁸ Se konsa, li atake yo avèk raj, li touye anpil ladan yo. Apre sa, l' ale rete nan yon twou wòch bò lavil Etam. ⁹ ¶ Moun Filisti yo al moute kan yo nan peyi Jida, epi yo atake lavil Leki. ¹⁰ Moun peyi Jida yo mande yo: -Poukisa nou vin atake nou? Yo reponn: -Nou vin isit la pou n' mare Samson, pou n' fè l' pase menm sa li te fè nou pase a. ¹¹ Lè sa a, twamil (3000) gason peyi Jida desann bò twou wòch Etam lan, epi yo di Samson: -Gen lè ou pa konnen se moun Filisti yo ki chèf nan peyi nou an? Poukisa ou fè nou sa? Li reponn yo: -Mwen fè yo menm sa yo te fè m' lan. ¹² Yo di l': -Nou vin isit la pou nou mare ou, pou nou ka mennen ou bay moun Filisti yo. Samson di yo: -Fè m' sèman nou p'ap touye m', nou menm! ¹³ Yo di l': -O non! N'ap annik mare ou, epi n'ap mennen ou bay moun Filisti yo. Nou p'ap touye ou! Yo pran de kòd tou nèf, yo mare l' byen mare epi yo tounen avè l' soti nan twou wòch la. ¹⁴ Lè yo rive lavil Leki, moun Filisti yo kouri vin kontre avè l', yo t'ap rele sitèlman yo te kontan yo te pran li. Lespri Seyè a desann sou Samson. Epi li kase kòd ki te mare de bra l' yo. Moso kòd yo tonbe atè, ou ta di fil ki boule nan dife. ¹⁵ Li jwenn zo machwè yon bourik ki te fenk mouri, li lonje men l', li pran l', li touye mil (1000) moun avè l'. ¹⁶ Lèfini, li pran chante, li di: -Avèk yon zo machwè bourik mwen touye mil moun. Avèk yon zo machwè bourik mwen bat yo byen bat. ¹⁷ Lè li fin di sa, li voye zo machwè bourik la jete. Li rele kote l' te ye a: Mòn zo machwè. ¹⁸ ¶ Apre sa, Samson vin anvi bwè dlo. Li rele Seyè a, li di: -Ou fin fè m' genyen bèl batay sa a. Koulye a, w'ap kite m' mouri swaf dlo pou bann moun ki p'ap sèvi ou yo mete men sou mwen! ¹⁹ Lè sa a, Bondye louvri yon twou nan tè a bò lavil Leki a, epi dlo pete soti ladan l'. Samson bwè dlo, li santi l' refè. Se poutèt sa yo rele sous sa a Sous Akore. Sous sa a la bò lavil Leki jouk jòdi a. ²⁰ Samson gouvènen pèp Izrayèl la pandan ventan sou rèy moun Filisti yo.

Chapter 16

¹ ¶ Yon lè Samson desann lavil Gaza, li wè yon jennès, li antre kay jennès la. ² Moun lavil Gaza yo vin konnen Samson te la nan lavil la. Yo mache chache l' toupatou, yo pase nwit la ap veye l' bò pòtay lavil la. Yo pa fè bri menm tout nwit la. Yo t'ap di nan kè yo: -N'ap tann solèy leve, lè sa a n'a touye l'. ³ Samson rete kouche jouk nan mitan lannwit lan. Lè sa a, li leve, li pran de batan

pòtay lavil la, li rache yo ansanm ak tout montan yo ak bwa travès ki te pase dèyè batan yo. Li mete
 yo sou zepòl li, li pote yo ale sou tèt mòn ki anfas lavil Ebwon an. ¶⁴ Aprè sa, Samson tonbe damou
 pou yon fanm ki te rete nan Ravin Sorèk. Fanm lan te rele Dalila.⁵ Gwo chèf moun Filisti yo al
 jwenn Dalila, yo di l' konsa: -Pran tèt Samson! Chache konnen sa ki ba li tout fòs sa a, kijan nou
 ka met men sou li. N'a mare l' anba kòd, n'a rann li san fòs. Lèfini, nou chak n'a ba ou milsan (1.100)
 pyès lajan.⁶ Se konsa, Dalila al di Samson: -Tanpri, di m' sa ki ba ou tout fòs sa a. Manyè di m'
 kouman yo ta ka mare ou pou kraze kouraj ou.⁷ Samson reponn li: -Si yo mare m' avèk sèt kòd
 tou nèf ki poko fin cheche m'ap pèdi tout fòs mwen, m'ap tankou nenpòt ki moun.⁸ Chèf moun
 Filisti yo pote sèt kòd tou nèf ki pa t' ankò fin cheche bay Dalila. Dalila mare Samson avèk kòd yo.
⁹ Li te fè kèk moun kache nan yon lòt chanm, epi li rete konsa, li di: -Samson! Men moun Filisti
 yo sou ou! Samson kase kòd yo. Moso kòd yo tonbe atè ou ta di fil boule nan dife. Konsa yo pa t'
 rive konnen sa ki te ba l' tout fòs sa a.¹⁰ Dalila di Samson: -Gade jan ou pase m' nan betiz! On
 ban m' manti! Tanpri, di m' non! Ki jan yo ka mare ou!¹¹ Samson di l' konsa: -Si yo mare m' ak
 kòd tou nèf ki poko janm sèvi pou fè ankenn travay, m'ap pèdi tout fòs mwen, m'ap tankou nenpòt
 ki moun.¹² Dalila pran kèk kòd tou nèf, li mare Samson avèk yo, epi li di: -Samson! Men moun
 Filisti yo sou ou! Li te mete moun yo kache nan lòt chanm lan. Men, Samson kase kòd ki te mare
 bra l' yo tankou si se te fil yo te ye.¹³ Dalila di Samson: -W'ap pase m' nan betiz toujou. W'ap ban
 m' manti. Tanpri, moutre m' kijan yo ka mare ou. Samson di l': -Si ou pran sèt trè cheve m' yo ou
 trese yo ansanm epi ou kenbè yo ak yon gwo peny, m'ap pedi tout fòs mwen, m'ap tankou nenpòt
 ki moun.¹⁴ Dalila fè l' dòmi. Li trese sèt trè cheve l' yo ansanm, li sere yo byen sere avèk yon
 gwo peny, epi li rele: -Samson! Men moun Filisti yo sou ou! Samson leve, li rache peny lan, li
 detrese cheve l' yo.¹⁵ Dalila di l' konsa: -Ou pa bezwen di ou renmen m' menm, paske ou pa sensè
 avè m'. Sa fè twa fwa ou pase m' nan betiz. Ou pa janm di m' ki bò ou jwenn tout fòs sa a.¹⁶ Chak
 jou li rete la nan kò Samson, l'ap plenyen nan tèt li. Samson pa t' kapab ankò, rete pou l' te mouri.
¹⁷ Bout pou bout li ba li sekre a, li di l' konsa: -Mwen pa janm koupe cheve nan tèt mwen. Se yon
 nazirit mwen ye, yo mete m' apa pou Bondye depi nan vant manman m'. Si yo koupe tout cheve
 nan tèt mwen, m'ap pèdi tout fòs mwen, m'ap tankou nenpòt ki moun.¹⁸ ¶ Lè Dalila wè Samson
 te ba l' sekre a, li voye rele chèf moun Filisti yo, li di yo: -Fwa sa a, nou mèt vini, paske li ban m'
 sekre a. Chèf moun Filisti yo vin jwenn li. Yo tou pote lajan an avèk yo.¹⁹ Dalila fè dòmi pran
 Samson sou jenou l', li fè rele yon nonm ki koupe sèt trè cheve Samson yo ra. Epi li seye fè fòs
 ak li. Men Samson te pèdi tout fòs li.²⁰ Lè sa a, Dalila rele: -Samson! Men moun Filisti yo sou

ou! Msye leve, li t'ap di nan kè l' l'ap soti anba kòd yo, l'ap met deyò tankou lòt fwa yo. Men, li pa
²¹
t' konnen Seyè a pa t' avè l' ankò. Moun Filisti yo mete men sou li, epi yo pete de grenn je l' yo.
Yo mennen l' lavil Gaza, yo mare l' avèk de gwo chenn an asye. Se li menm yo te fè vire gwo wòl
²² ²³
moulen prizon an. ¶ Men, cheve l' te konmanse pouse ankò. Aprè sa, yon jou, chèf moun
Filisti yo te reyini pou fè yon gwo sèvis pou Dagon, bondye yo a. Yo t'ap fè fèt. Yo t'ap di: -Bondye
²⁴
nou an lage Samson, lènmi nou an, nan men nou. Lè pèp la te wè Samson, yo t'ap fè lwanj pou
bondye yo a. Yo t'ap di: -Bondye nou an fè nou mete men sou Samson lènmi nou an ki t'ap devaste
²⁵
peyi a, ki t'ap touye tout moun sa yo nan mitan nou. Kè tout moun te kontan. Yo di konsa: -Fè
chache Samson pou n' ka pran plezi nou ak li. Y' al chache Samson nan prizon an, yo mennen l'
²⁶
devan yo pou yo te ka pran plezi yo avè l'. Yo mete msye nan mitan de gwo poto. Samson di ti
bway ki te kenbe men l' lan: -Mennen m' bò de gwo poto ki kenbe tout tanp lan. Mete men m' sou
²⁷
yo pou m' ka fè yon ti apiye. Tanp lan te plen moun, fanm kou gason. Tout chèf moun Filisti
yo te la. Te gen twamil (3.000) moun konsa, fanm kou gason, anwo twati a ki t'ap gade Samson,
²⁸
ki t'ap pran plezi yo ak li. Lè sa a, Samson lapriyè nan pye Bondye, li di: -O Bondye Seyè!
Tanpri, chonje m' non jòdi a! Tanpri, Bondye, ban m' fòs ankò pou yon dènye fwa, pou m' ka fè
²⁹
moun Filisti yo peye yon grenn kou pou de je m' yo pete a. Epi Samson mete men l' sou de gwo
³⁰
poto mitan ki te kenbe tout tanp lan. Li apiye yon men l' sou chak. Epi li di: -M' te mèt mouri
ansanm ak moun Filisti yo. Li pouse ak tout fòs li sou poto yo, epi tanp lan tonbe sou tout chèf yo
ak sou tout moun ki te la yo. Jou li mouri a, li te touye plis moun pase kantite moun li te touye
³¹
pandan lavi li. Frè l' yo ansanm ak tout fanmi l' yo desann vin pran kadav la. Yo pote l' tounen
lakay yo, yo antere l' nan kavo Manoak, papa li, ant lavil Soreja ak lavil Echtawòl. Li te pase ventan
(20 an) ap gouvènènan moun pèp Izrayèl la.

Chapter 17

¹ ¶ Te gen yon nonm yo te rele Mika ki te rete nan mòn peyi Efrayim yo. ² Li di manman l'
konsa: -Lè yo te vòlò milsan (1.100) pyès lajan ou yo, ou te bay vòlò a madichon. Nou te tande ou
ak pwòp zòrèy nou. Gade, men lajan an nan men m'. Se mwen menm ki te pran yo. Manman an di
l': -Se pou Seyè a beni ou, pitit mwen, pou sa!³ Mika renmèt milsan pyès lajan yo bay manman l'.
Manman an di l' konsa: -Mwen te mete lajan an apa pou Seyè a pou anyen pa rive ou, pitit gason
mwen. W'a sèvi avè l' pou fè yon zidòl, yon estati fonn nan mou. Se poutèt sa m'ap renmèt ou lajan
⁴
an ankò. Men, pitit la renmèt lajan an bay manman l'. Madanm lan pran desan (200) pyès an ajan,

li bay yon bòs ki fè yon zidòl an bwa epi li kouvri li nèt ak ajan. Li mete li lakay Mika. ⁵ Nonm Mika a te mete yon kote apa pou li menm l' al fè sèvis pou Seyè a. Li fè yon estati ansanm ak lòt ti zidòl wogatwa epi li chwazi yonn nan pitit gason li yo, li ba l' pouvwa pou l' sèvi l' prèt. ⁶ Nan tan sa a, pa t' gen wa nan peyi Izrayèl la. Chak moun t'ap fè sa yo pito. ⁷ ¶ Te gen yon jenn gason ki te rete lavil Betleyèm nan peyi Jida. Se te yon moun nan fanmi Levi yo. ⁸ Li kite lavil Betleyèm nan peyi Jida a, li pati, l' al chache yon lòt kote pou l' fè ladesant. Antan l'ap vwayaje konsa, li rive lakay Mika, nan mòn peyi Efrayim yo. ⁹ Mika mande l': -Kote ou soti? Nèg la reponn: -Mwen se moun fanmi Levi, m' soti lavil Betleyèm nan peyi Jida. M'ap chache yon lòt kote pou m' fè ladesant. ¹⁰ Mika di l' konsa: -Vin rete lakay mwen non. W'a tou sèvi m' konseye ak prèt. M'a ba ou dis pyès lò chak lanne, san konte rad ak manje. ¹¹ Moun Levi a te dakò pou l' rete lakay Mika ki te sèvi avè l' tankou pwòp pitit gason l'. ¹² Mika menm bay moun Levi a pouvwa pou l' sèvi l' prèt. Se konsa, li rete nèt lakay Mika. ¹³ Lè sa a, Mika di konsa: -Koulye a, mwen konnen Seyè a pral fè tout zafè m' mache byen paske mwen gen yon moun Levi k'ap sèvi m' prèt.

Chapter 18

¹ ¶ Nan tan sa a pa t' gen wa nan peyi Izrayèl la. Lè sa a, moun branch fanmi Dann yo t'ap chache yon pòsyon tè nan peyi a pou yo rete, paske depi tout tan sa a, nan tout branch fanmi pèp Izrayèl la, yo pa t' ankò resevwa pòsyon pa yo a. ² Moun Dann yo chwazi senk vanyan gason ki gen lespri nan branch fanmi yo, moun lavil Soreja ak moun lavil Echtawòl, yo voye yo al vizite tout peyi a pou wè ki jan sa ye. Se konsa, y' al nan mòn Efrayim yo, yo rive toupre lakay Mika, yo rete pase lannwit lan la. ³ Antan yo te la bò kay Mika a, yo rekonèt vwa jenn moun Levi a. Yo pwoche, yo mande l': -Ki moun ki mennen ou isit la? Sa w'ap fè isit la? Kisa ou pèdi isit la? ⁴ Li reponn yo: -Mwen gen yon dizon ak Mika, l'ap peye m', epi m'ap sèvi l' prèt. ⁵ Yo di l' konsa: -Tanpri, mande Bondye si n'ap jwenn sa n'ap chache nan vwayaj nou an. ⁶ Prèt la di yo: -Nou pa bezwen pè. Seyè a ap voye je sou nou pandan tout vwayaj la. ⁷ ¶ Senk mesye yo ale, yo rive lavil layis. Yo wè ki jan moun ki te rete Layis yo te san pwoblèm, tankou moun peyi Sidon yo. Se te yon bann moun ki t'ap viv byen yonn ak lòt, ki pa t' nan kont ak pesonn nan peyi a. Yo te gen tou sa yo te bezwen. ⁸ Yo t'ap viv byen lwen moun peyi Sidon yo, yo pa t' mele ak pesonn moun lòt nasyon yo. Mesye

yo tounen lavil Soreja ak lavil Echtawòl. Fanmi yo mande yo kisa yo wè. ⁹ Yo reponn: -Nou wè
 peyi a. Li bon anpil. Pa rete isit la bra kwaze ap gade. Prese non! Ann moute al pran peyi a pou
¹⁰
 nou. Lè n'a rive, n'a jwenn yon bann moun ki p'ap sispèk anyen. Peyi a laj anpil. Se Bondye
 menm ki ban nou peyi a. Se kote n'ap jwenn tou sa nou ka bezwen. ¹¹ Se konsa sisan (600) gason
 nan branch fanmi Dann lan, yo tout moun lavil Soreja ak moun lavil Echtawòl, yo chak ak zam
¹²
 nan men yo, yo pati al goumen. Yo moute, yo rete toupre lavil Kiriyat-Jearim, nan peyi Jida sou
¹³
 bò solèy kouche. Se poutèt sa, jouk jounen jòdi a, yo rele kote sa a Kan moun Dann yo. Apre
¹⁴
 sa, yo kite kote yo te ye a, y' al nan mòn Efrayim yo, yo rive bò kay Mika a. ¶ Lè sa a, senk
 mesye yo te voye al vizite peyi ki nan vwazinaj lavil layis la di lòt moun ki te avèk yo konsa: -Eske
 nou konnen, nan yonn nan kay sa yo gen yon estati ansanm ak lòt zidòl wogatwa? Gen yon estati
¹⁵
 an bwa ki kouvri ak ajan tou. Kisa nou kwè nou ta fè la a? Yo fè yon ti chankre, yo antre lakay
¹⁶
 Mika, kote jenn moun fanmi Levi a te rete a. Yo mande l' nouvèl li. Sisan moun fanmi Dann yo
¹⁷
 te kanpe ak tout zam yo nan men yo bò pòt devan an. Senk mesye yo te voye al vizite peyi a
 antre nan kay la, yo pran estati a, zidòl wogatwa yo ak estati an bwa ki kouvri ak ajan an. Prèt la
¹⁸
 menm te rete bò pòt devan an ak sisan sòlda ame yo. Lè prèt la wè senk mesye yo ki t'ap soti
 lakay Mika a ak estati a, zidòl wogatwa yo ak estati an bwa kouvri ak ajan an, li di yo: -Sa n'ap fè
¹⁹
 la a? Yo reponn li: -Pe bouch ou, monchè! Ou pa bezwen di anyen! Vin avèk nou, w'a sèvi nou
 konseye, w'a prèt nou tou. Sa ou pi pito: prèt fanmi yon grenn moun osinon prèt tout yon branch
²⁰
 fanmi nan pèp Izrayèl la? Sa te fè kè prèt la kontan. Li pran zidòl la, estati an bwa a, ak lòt zidòl
²¹
 wogatwa yo, epi l' ale ansanm ak yo. Mesye yo reprann chemen yo, y' al fè wout yo. Yo fè
²²
 timoun yo pran devan ansanm ak bèt yo ak tout lòt bagay yo. Yo te deja kite kay Mika a yon
²³
 bèl ti bout, lè moun nan vwazinaj kay Mika yo sanble. Yo tanmen rapouswiv moun Dann yo. Yo
 t'ap rele dèyè yo. Moun Dann yo vire, yo mande Mika: -Sa ki genyen? Pouki tout moun sa yo dèyè
²⁴
 nou an? Mika reponn yo: -N'ap mande m' sa ki genyen menm? Nou fin vòlò estati zidòl yo,
²⁵
 ansanm ak prèt mwen an epi n' al fè wout nou. Ak kisa nou kite m' la a? Moun Dann yo di l'
 konsa: -Pa pale fò sou nou konsa, tandè. Mesye yo va fache. Y'a tonbe sou ou. Lè sa a, ni ou ni
²⁶
 moun lakay ou yo, n'a pèdi lavi nou. Après sa, moun Dann yo al fè wout yo. Mika menm, lè li
²⁷
 wè mesye yo te pi fò pase l', li tounen tounen l', l' al lakay li. ¶ Moun Dann yo te pran bagay
 Mika te fè yo ansanm ak prèt ki t'ap sèvi li a pou yo. Yo rive lavil layis, kote moun yo t'ap viv byen
 yonn ak lòt san bri san kont, yo atake lavil la. Yo bat moun yo, yo touye yo tout epi yo met dife

28
 nan lavil la. Pa t' gen pesonn pou vin sove moun sa yo anba men moun Dann yo, paske lavil la te lwen peyi Sidon an anpil, lèfini tou, moun yo pa t' mele ak pesonn moun lòt nasyon yo. Lavil la
 29
 te nan menm fon ak lavil Bètreyòb la. Moun Dann yo rebati lavil la, yo rete ladan l'. Yo rele l' lavil Dann, menm non ak Dann, zansèt yo a, pitit gason Jakòb la. Anvan sa, lavil la te rele Layis.
 30
 Moun Dann yo fè yon zidòl pou yo sèvi. Se Jonatan, pitit gason Gèchon ki li menm te pitit Moyiz, ki te sèvi yo prèt. Se pitit li yo ki te toujou sèvi yo prèt apre sa jouk lè yo te depòte pèp la nan peyi etranje.
 31
 Zidòl Mika a te rete la nan mitan yo pandan tout tan kay Bondye a te lavil Silo.

Chapter 19

1
 ¶ Nan tan sa a pa t' gen wa nan peyi Izrayèl la. Yon jou, yon moun Levi ki te rete nan fon mòn Efrayim yo leve, l' al pran yon fanm, moun lavil Betleyèm nan peyi Jida, pou fanm kay li. Men, fanm lan vin tonbe nan dezòd sou li, epi li kite l', li tounen lakay papa l', lavil Betleyèm nan peyi Jida. Li pase kat mwa la.
 3
 Lè sa a, mari a leve, l' al dèyè l' pou l' wè si li te ka tounen avè l' ankò. Li te pati ansanm ak yon domestik ak de bourik. Madanm lan te byen resevwa l' lakay papa l'. Lè papa madanm lan wè l', li te byen kontan resevwa l' tou.
 4
 Bòpè a pran tèt moun Levi a, li fè l' rete pase twa jou avè l'. Mesyedam yo manje, yo bwè, yo pase nwit nan kay la.
 5
 Sou katriyèm jou a, yo leve granmaten, yo pare zafè yo pou yo pati. Men, papa madanm lan di moun Levi a konsa: -Mete yon bagay nan vant ou anvan. W'a santi ou anfòm. Aprè sa, w'a pati.
 6
 Mesyedam yo chita, yo manje, epi yo bwè. Apre sa, papa madanm lan di moun Levi a konsa: -Tanpri, pase nwit la ankò isit la. Pran plezi ou non!
 7
 Nonm lan te leve pou l' pati, men bòpè a sitèlman kenbe la avè l', li tounen pase nwit la la ankò.
 8
 Sou senkyèm jou a, nan granmaten, li leve pou l' ale. Bòpè a di l' konsa: -Mete kichòy nan vant ou non, monchè. W'a pati pita. Se konsa de mesye yo chita, yo manje.
 9
 Aprè sa, nonm lan leve pou l' ale ansanm ak fanm kay li ak domestik li a, men bòpè a di l': -Gade solèy pral kouche, tou rete pase nwit lan non. Talè fènwa pral tonbe. Rete non, monchè. Pran plezi ou!
 10
 Denmen, w'a leve byen bonè pou vwayaj la, w'aprale lakay ou. Men, fwa sa a nonm lan pa t' vle rete pase yon lòt nwit ankò. Li leve, l' ale ansanm ak fanm kay li ak de bourik yo tou sele. Yo rive toupre lavil Jebis ki vle di lavil Jerizalèm.
 11
 Lè sa a, te konmanse ap fè nwa anpil, domestik la di l' konsa: -Ann fè yon antre nan lavil moun Jebis yo non. N'a pase nwit la la.
 12
 Men, mèl la di l' konsa: -Non! Nou pa pral antre nan lavil moun lòt nasyon yo, kote pa gen yon moun pèp Izrayèl

la menm. N'ap fè wout nou jouk nou rive lavil Gibeya. ¹³ Ann al pi devan. N'a pase nwit lan lavil Gibeya osinon lavil Rama. ¹⁴ Se konsa yo pa rete, y' al fè wout yo. Solèy t'ap fin kouche lè yo rive bò lavil Gibeya, ki nan teritwa moun branch fanmi Benjamen yo. ¹⁵ Yo chankre sou wout la, yo vin pase nwit lan lavil Gibeya. Moun Levi a antre nan lavil la, l' al chita sou plas la, men pesonn pa t' envite yo vin pase nwit lan lakay yo. ¹⁶ ¶ Nan aswè, yon granmoun gason ki t'ap sot nan jaden vin ap antre lakay li. Se te yon moun mòn Efrayim yo li te ye. Li te rete lavil Gibeya. Men, tout moun lavil yo se moun fanmi Benjamen yo te ye. ¹⁷ Je granmoun lan al tonbe sou vwayajè yo ki te sou plas la. Li di moun Levi a konsa: -Kote ou prale? Kote ou soti? ¹⁸ Moun Levi a reponn li: -Nou soti lavil Betleyèm nan peyi Jida, n'ap vwayaje, nou pral byen lwen nan fon mòn Efrayim yo. Se la mwen rete. Mwen te desann ale Betleyèm, men koulye a m'ap tounen lakay mwen. Pesonn pa envite nou vin pase nwit lan lakay yo. ¹⁹ Nou gen manje ak zèb pou bourik nou, nou gen pen ak diven pou mwen, pou fanm kay mwen, ak pou domestik ki ak nou an. Nou pa manke anyen. ²⁰ Lè sa a granmoun lan di: -Pòt kay mwen louvri pou nou! Se mwen menm k'ap ba ou tou sa ou bezwen. Sèlman pa rete pase nwit lan la sou plas la. ²¹ Se konsa li mennen yo lakay li, li bay bèt yo zèb. Mesyedam yo menm lave pye yo, epi yo manje, yo bwè. ²² ¶ Yo t'ap koze yonn ak lòt lè kèk mesye lavil la, yon bann vòryen, vin sènen kay la. Yo pran frape nan pòt la. Yo pale ak granmoun ki te mèt kay la, yo di l' konsa: -Fè nonm ki lakay ou a soti vin jwenn nou pou nou ka kouche avè l'. ²³ Mèt kay la soti al jwenn yo, li di yo konsa: -Non, mezanmi! Tanpri, pa fè vye bagay lèd sa a. Nonm lan se lakay mwen li ye. Pa vin fè bagay sal sa a. ²⁴ Bon, gade! Mwen gen yon jenn pitit fi, li menm li gen yon fanm kay. Mwen pral fè yo soti vin jwenn nou. Nou mèt kouche ak yo. Nou mèt fè sa nou vle ak yo. Men, pa vin fè ankenn vye bagay derespektan ak nonm lan. ²⁵ Men, mesye yo pa t' vle koute l'. Lè sa a, moun Levi a pran fanm kay li a, li fè l' soti al jwenn yo deyò a. Tout mesye yo kouche avè l', yo fè tout kalite bagay avè l' pandan tout nwit lan. Solèy t'apral leve lè yo kite l'. ²⁶ Lè bajou kase, fanm lan trennen jouk li rive devan papòt kay kote mari l' te ye a. Li rete atè a jouk solèy fin leve. ²⁷ Nan maten, mari a leve, li louvri pòt pou l' soti. Li fè sa pou l' al fè wout li, li wè fanm kay li a blayi atè a devan kay la, ak de men l' yo lonje sou papòt la. ²⁸ Li di: -Leve non! Ann ale! Men, fanm lan pa reponn li. Li pran kadav la, li mete l' detravè sou bourik li, epi li pati, l' al lakay li. ²⁹ Lè l' rive lakay li, li pran yon kouto, li koupe kadav fanm kay li a fè douz moso, epi li voye yon moso nan chak branch fanmi peyi Izrayèl la. ³⁰ Chak moun ki te wè sa di

konsa: -Nou pa janm wè bagay konsa! Bagay konsa pa janm rive nan mitan nou depi lè pèp Izrayèl la kite peyi Lejip rive jounen jòdi a. Annou kalkile byen kisa nou pral fè pou sa. Sa nou di nan sa?

Chapter 20

¹ ¶ Tout pèp Izrayèl la nèt, depi lavil Dann nan nò jouk lavil Bècheba nan sid, pase nan peyi Galarad, tout pèp la nèt kanpe. Yo reyini ansanm devan Seyè a, lavil Mispa. ² Tout chèf fanmi yo ansanm ak tout lòt chèf pèp Izrayèl la te sanble la devan Seyè a. Te gen katsanmil (400.000) sòlda apye antou. ³ Moun Benjamen yo vin konnen rès pèp Izrayèl la te moute lavil Mispa. Moun Izrayèl yo mande: -Manyè di nou ki jan bagay lèd sa a fè rive. ⁴ Moun Levi a, mari fanm yo te sasinen an, reponn: -Mwen te ale lavil Gibeya nan peyi Benjamen an ansanm ak fanm kay mwen pou m' te pase nwit. ⁵ Mesye lavil Gibeya yo te soti pou vin pran m' nan mitan lannwit lan, yo sènen kay kote m' te ye a. Yo te vle touye m'. Yo fè kadejak sou fanm kay mwen an, epi li mouri. ⁶ Mwen pran kadav la, mwen koupe l' an moso, epi mwen voye moso yo toupatou nan peyi Izrayèl la, paske moun Benjamen yo te fè yon vye bagay derespektan, yon move bagay nan mitan pèp Izrayèl la. ⁷ Nou tout isit la se moun pèp Izrayèl la nou ye. Sa nou di nan sa? Sa nou pral fè? ⁸ Tout pèp la kanpe ansanm, epi yo di: -Pesonn nan nou la a pa pral lakay li, kit li rete lavil, kit li rete andeyò. ⁹ Men sa nou pral fè: nou pral tire osò pou n' chwazi kèk moun pou al regle moun lavil Gibeya yo. ¹⁰ Lèfini n'ap pran yon moun sou dis nan chak branch fanmi yo pou al chache manje pou moun ki pral regle moun lavil Gibeya yo pou vye bagay derespektan yo te fè nan peyi Izrayèl la. ¹¹ Se konsa tout pèp Izrayèl la te mete tèt yo ansanm pou y' al pini moun lavil Gibeya yo. ¹² ¶ Lòt branch fanmi pèp Izrayèl yo te voye mesaj nan tout peyi moun Benjamen yo pou di yo: -Ki vye krim sa a nou tande ki fèt konsa lakay nou? ¹³ Koulye a ban nou moun sa yo, bann vòryen lavil Gibeya yo, pou nou ka touye yo, pou n' ka wete move bagay derespektan sa a nan peyi Izrayèl la. Men, moun Benjamen yo pa koute sa lòt moun pèp Izrayèl yo t'ap di yo. Yo rete sou sa yo te fè a. ¹⁴ Yo soti toupatou nan tout lavil Benjamen yo, yo sanble lavil Gibeya pou y' al goumen ak rès pèp Izrayèl la. ¹⁵ Jou sa a yo konte, yo jwenn te gen vennsimil (26.000) sòlda antou ki te soti nan tout lavil yo, san konte sètisan (700) sòlda moun lavil Gibeya yo te chwazi. ¹⁶ Pami tout sòlda sa yo te gen sètisan (700) ladan yo ki te bon anpil nan fè lagè. Yo tout te sèvi ak men gòch yo. Yo tout te ka vize yon cheve ak yon wòch, san yo pa janm manke l' yon fwa. ¹⁷ Moun pèp Izrayèl yo menm, san

18

konte branch fanmi Benjamen an, te gen katanmil (400.000) gason ki te konn goumen. ¶ Moun pèp Izrayèl yo leve, y' ale lavil Betèl, y' al mande Seyè a sa pou yo fè. Yo mande l': -Ki branch fanmi nan pèp Izrayèl la ki pou al atake moun Benjamen yo anvan? Seyè a di yo: -Se branch fanmi

19

Jida a. Se konsa, pèp Izrayèl la leve nan denmen maten, y' al pran pozisyon bò lavil Gibeya.

20

Lèfini, yo pati pou y' al goumen ak moun branch fanmi Benjamen yo. Yo pran pozisyon anfas

21

lavil Gibeya. Moun Benjamen yo soti lavil Gibeya. Jou sa a yo desann venndemil (22.000) sòlda

22

nan lame pèp Izrayèl la. Men, lame pèp Izrayèl la reprann fòs, yo pran pozisyon ankò menm

23

kote yo te ye premye jou a pou y' al goumen. Moun pèp Izrayèl yo menm moute Betèl, y' al kriye nan pye Seyè a jouk aswè, epi yo mande Seyè a sa pou yo fè. Yo di l': -Eske se pou n' al goumen ankò kont moun fanmi Benjamen yo, frè nou yo? Seyè a reponn yo: -Wi. Nou mèt ale.

24

25

Se konsa lame pèp Izrayèl la atake moun Benjamen yo yon dezyèm fwa. Men, moun Benjamen yo soti lavil Gibeya vin kontre ak yo. Fwa sa a yo touye dizwitmil (18.000) solda nan lame pèp

26

Izrayèl la. ¶ Lè sa a, ni lame a ni rès pèp Izrayèl la moute lavil Betèl. Yo chita la devan Seyè a ap kriye. Jou sa a, yo rete san manje jouk aswè. Apre sa, yo boule bèt nan dife pou Seyè a, yo fè

27

ofrann pou mande Seyè a padon. Lèfini, yo mande Seyè a ankò sa pou yo fè. Lè sa a, Bwat

28

Kontra Bondye a te lavil Betèl. Se Fineas, pitit gason Eleaza, pitit pitit Arawon an, ki te reskonsab pou fè sèvis devan Bwat Kontra a. Yo di Seyè a: -Eske se pou n' al goumen ankò kont moun Benjamen yo, frè nou yo, osinon èske se pou n' rete sou sa nou fè a? Seyè a reponn yo: -Nou mèt

29

al goumen. Paske denmen m'ap lage yo nan men nou. Moun Izrayèl yo mete kèk sòlda kache

30

toupatou bò lavil Gibeya a. Apre sa, sou twazyèm jou a, yo moute al goumen ak lame moun

31

Benjamen yo. Yo pran pozisyon ankò devan lavil Gibeya a jan yo te fè l' anvan an. Moun Benjamen yo soti vin kontre ak lame a. Yo kite lavil la byen lwen dèyè yo. Tankou lòt fwa yo, yo konmanse desann gason nan lame a, yo touye trant sòlda konsa, ni sou wout ki moute lavil Betèl

32

la, ni sou wout ki mennen lavil Gibeya a pa mòn. Moun Benjamen yo t'ap di: -Nou bat yo ankò, tankou lòt fwa yo. Men, moun pèp Izrayèl yo t'ap di: -Ann kouri devan yo sou wout andeyò yo pou

33

yo ka kite lavil la byen lwen dèyè yo. Lè sa a, lame pèp Izrayèl la kouri kite tout kote yo te gaye yo, yo sanble bò Baal-Tama. Men mesye ki te kache yo kouri soti kote yo te ye a, dèyè gwo wòch

34

ki te bò lavil Gibeya a. Dimil (10.000) bon sòlda yo te chwazi nan lame pèp Izrayèl la al kontre ak moun Gibeya yo. Batay la te rès mare. Men, moun Benjamen yo pa t' ankò konprann batay la

35

tapral vire mal pou yo. Seyè a fè pèp Izrayèl la bat lame moun Benjamen yo byen bat jou sa a.

³⁶
 Lame pèp Izrayèl la te desann vennsenkmil san (25.100) sòlda nan moun Benjamen yo. Se lè sa a, moun Benjamen yo vin wè yo t'ap pèdi batay la vre. Moun pèp Izrayèl yo menm t'ap fè bak devan moun Benjamen yo paske yo t'ap konte sou mesye ki te anbiske kò yo bò lavil Gibeya a.

³⁷
 Mesye sa yo kouri soti nan kachèt yo, yo desann sou lavil Gibeya a, yo gaye nan tout lavil la,

³⁸
 yo touye dènye moun yo jwenn ladan l'. Moun Izrayèl yo te gen dizon ak mesye ki te kache yo pou yo te bay yon siyal ak lafimen. Lè yo wè gwo nwaj lafimen an ap moute soti nan lavil la,

³⁹
 moun Izrayèl yo vire fè fas kare ak moun Benjamen yo. Lè sa a, moun Benjamen yo te gen tan touye trant moun konsa nan mitan yo. Yonn t'ap di lòt konsa: -Wi, nou bat yo fwa sa a tankou anvan

⁴⁰
 an. Lamenm siyal la parèt. Nwaj lafimen an konmanse moute soti nan lavil la. Moun Benjamen

⁴¹
 yo vire gade dèyè, yo sezi wè dife te pete toupato nan lavil la. Moun Izrayèl yo menm te vire tounen sou yo. Lè sa a, laperèz fè moun Benjamen yo pèdi tèt yo, paske yo te vin konprann bagay

⁴²
 la tapral pase mal pou yo. Yo pran kouri pou moun Izrayèl yo, yo pran wout dezè a pou yo. Men, li te twò ta, yo pa t' ka chape ankò. Yo pran nan mitan de kan, lame moun Izrayèl la yon bò

⁴³
 ak sòlda ki t'ap soti lavil la lòt bò. Yo tout mouri. Moun Izrayèl yo kouri dèyè yo san rete, yo

⁴⁴
 touye yo yonn apre lòt jouk yo rive yon kote anfas Gibeya bò solèy leve. Yo touye dizwitmil

⁴⁵
 (18.000) moun nan pi bon sòlda moun Benjamen yo. Lòt yo menm kouri ale nan dezè a bò wòch Rimon an. Yo touye senkmil (5.000) ladan yo sou wout yo. Yo kouri dèyè rès la jouk Gideyon. Yo

⁴⁶
 touye demil (2.000) ladan yo. Jou sa a, yo te touye vennsenkmil (25.000) moun antou nan branch

⁴⁷
 fanmi Benjamen an. Epi tout te bon sòlda ki te konn goumen. Men, gen sisan (600) nan moun

⁴⁸
 ki te kouri al nan dezè a, bò Wòch Rimon an, ki rete kache pandan kat mwa. Moun Izrayèl yo menm tounen dèyè lòt moun Benjamen yo. Yo touye depi se gason, bèt ak tout lòt moun ki te nan lavil yo. Yo mete dife nan tout lavil yo jwenn sou wout yo.

Chapter 21

¹
 ¶ Moun pèp Izrayèl yo te fè gwo sèman devan Seyè a lavil Mispa. Yo te di: -Nou p'ap janm

²
 bay pitit fi nou pou yo marye ak moun nan fanmi Benjamen yo. Pèp la moute lavil Betèl, yo chita

³
 devan Bwat Kontra Seyè a jouk aswè. Yo t'ap rele, yo t'ap kriye ak gwo dlo nan je yo. Yo t'ap di: -Seyè o, Bondye pèp Izrayèl la, poukisa sa rive? Poukisa gen yon branch fanmi nan pèp Izrayèl

la ki manke jòdi a? ⁴ Nan denmen, moun yo leve byen bonè, yo bati yon lotèl. Yo boule bèt nan dife nèt sou li, yo fè ofrann pou mande Bondye padon. ⁵ Lèfini, yo t'ap mande: -Kilès nan tout branch fanmi pèp Izrayèl la ki pa t' nan reyinyon nou te fè devan Seyè a? Lè reyinyon an, yo te fè yon gwo sèman pou yo touye tout moun ki pa t' mete pye yo lavil Mispa devan Seyè a. ⁶ Men, pèp Izrayèl la te nan gwo lapenn pou moun Benjamen yo, frè yo. Yo t'ap di: -Wi jòdi a, pèp Izrayèl la pèdi yon branch fanmi vre! ⁷ Kisa nou pral fè pou ti rèz ki rete a ka jwenn fi pou yo marye, paske nou te fè sèman devan Seyè a nou p'ap janm ba yo pitit fi nou yo pou madanm. ⁸ Lè sa a, yo mande: -Kilès nan branch fanmi pèp Izrayèl la ki pa t' moute lavil Mispa devan Seyè a? Yo jwenn pesonn nan lavil Jabès nan peyi Galarad la, pa t' vin nan kan an pou patisipe nan reyinyon an. ⁹ Lè yo t'ap konte moun ki te la yo, pa t' gen yon moun nan lavil Jabès nan peyi Galarad la. ¹⁰ Se konsa, moun ki te sanble yo chwazi douz mil (12.000) sòlda nan sa ki pi bon yo, yo voye yo la ak lòd sa a: -Ale nan peyi Galarad. Touye dènye moun lavil Jabès, ata fanm ak timoun. ¹¹ Men sa pou nou fè: N'a touye dènye gason ak tout fanm ki deja marye tankou ofrann n'ap fè pou Seyè a. ¹² Nan moun lavil Jabès nan peyi Galarad la, yo jwenn katsan (400) jenn fi ki pa t' janm ko konn gason. Yo mennen yo nan kan an lavil Silo, nan peyi Kanaran. ¹³ Lèfini, tout moun ki te sanble yo voye komisyon bay moun Benjamen yo ki te bò Wòch Rimon an. Yo mande yo fè lapè. ¹⁴ Moun Benjamen yo tounen, epi lòt moun Izrayèl yo ba yo jenn fi lavil Jabès yo pa t' touye yo pou madanm. Men, pa t' gen ase pou yo tout. ¹⁵ Sa te fè pèp Izrayèl la lapenn anpil pou moun Benjamen yo, paske Seyè a te kraze tèt ansanm ki te gen nan pèp Izrayèl la. ¹⁶ ¶ Se konsa chèf ki te la yo di konsa: -Pa gen fanm ankò nan branch fanmi Benjamen an. Kisa nou pral fè la a pou nou bay rèz mesye yo fanm pou yo marye? ¹⁷ Yo di ankò: -Pèp Izrayèl la pa ka pèdi yon branch fanmi. Se pou nou jwenn yon mwayen pou branch fanmi Benjamen an ka la toujou. ¹⁸ Men, nou pa ka pran nan fi nou yo pou nou ba yo pou madanm, paske pèp Izrayèl la te fè sèman pou yo pa fè sa. Yo te di: Madichon pou nenpòt moun ki va pran pitit fi yo bay moun nan fanmi Benjamen an pou madanm. ¹⁹ Apre sa yo di: -Nan kèk jou, se pral lè pou nou fè gwo fèt nou gen pou nou fè chak lanne pou Seyè a lavil Silo. Lavil Silo sa a te sou bò nò lavil Betèl, sou bò sid lavil Lebona, sou bò solèy kouche wout ki soti Betèl moute Sichèm. ²⁰ Yo di moun Benjamen yo: -Al kache nan jaden rezen yo. ²¹ Lè n'a wè jenn fi lavil Silo yo soti pou y' al danse ansanm pandan fèt la, nou menm n'a soti nan jaden rezen yo. Chak moun va pran yonn ladan yo pa fòs, epi n'a ale nan peyi Benjamen avèk yo. ²² Si papa yo osinon frè yo vin jwenn nou, nou menm chèf pèp la, pou pote plent, n'a di yo: Tanpri, kite yo

pran yo, paske nou pa t' jwenn kont fanm pou yo lè nou te al goumen lavil Jabès la. Epitou, se pa nou menm ki te ba yo pitit fi nou yo pou madanm. Konsa, pesonn p'ap ka di nou pa t' kenbe sèman
²³ nou. Mesye Benjamen yo fè sa yo te di yo fè a. Chak mesye yo pran yon fi pami sa ki t'ap danse
yo, yo pati ak yo. Yo tounen nan peyi zansèt yo. Yo rebati lavil yo, epi yo rete la. ²⁴ Lè sa a, rès
moun pèp Izrayèl la leve yo pati, yo tounen lakay yo al jwenn fanmi yo, nan pòsyon tè yo te bay
zansèt yo. ²⁵ Nan tan sa a pa t' gen wa nan peyi Izrayèl la. Chak moun te fè sa yo pito.

Ruth

Chapter 1

¹ ¶ Vwala, te gen yon grangou ki te tonbe sou peyi Izrayèl la. Lè sa a, se chèf ki t'ap gouvènen
peyi a. Se konsa yon nonm lavil Betleyèm, nan pòsyon tè ki pou branch fanmi Jida a, leve, li pran
madanm li ak de pitit gason l' yo, li al pase kèk tan nan peyi Moab. ² Nonm lan te rele Elimelèk,
madanm li te rele Naomi. De pitit gason l' yo te rele Maklon ak Kiljon. Se moun branch fanmi Efrat
la yo te ye, moun lavil Betleyèm nan peyi Jida. Antan yo t'ap viv nan peyi Moab la, ³ Elimelèk
mouri, li kite Naomi pou kò l' ak de pitit gason li yo. ⁴ De ti mesye yo te marye ak de fi moun peyi
Moab: yonn te rele Opa, lòt la te rele Rit. Yo t'ap mache sou dizan depi yo t'ap viv nan peyi a, ⁵ lè
Maklon ak Kiljon tonbe, yo mouri tou. Se konsa Naomi twouve vin pou kont li: li te pèdi ni mari
l' ni pitit gason l' yo. ⁶ ¶ Antan Naomi te peyi Moab toujou, li vin pran nouvèl jan Seyè a te voye
benediksyon sou pèp li a, jan li te fè yo fè bon rekòt. Menm lè a, li pare zafè l' pou l' kite peyi Moab
ansanm ak de bèlfi li yo. ⁷ Se konsa yo leve, yo kite kote yo te ye a, yo pati ansanm pou y' al nan
peyi Jida. ⁸ Men, antan yo sou wout, Naomi di bèlfi li yo konsa: -Pito nou tounen lakay nou al
jwenn manman nou. Mwen mande Seyè a pou l' aji byen ak nou menm jan nou te aji byen avè m'
ansanm ak defen yo. ⁹ Mwen mande l' pou l' fè nou chak jwenn yon moun remarye ak nou pou nou
ka viv ak kè poze lakay nou. Lè li fin di yo sa, li bo yo, li di yo li ale. Men, de medam yo pete rele.
¹⁰ Yo di l' konsa: -Non! Nou prale avè ou nan peyi ou. ¹¹ Men, Naomi reponn yo: -Pitit mwen,
pito nou tounen! Poukisa nou vle ale avè m'? Nou kwè mwen ka fè pitit gason ankò pou marye ak
nou? ¹² Tounen lakay nou! Mwen twò granmoun pou m' marye ankò. Epitou, menm si mwen ta
mete nan tèt mwen mwen gen espwa marye ankò, menm si mwen ta rive marye aswè a epi m' ta

¹³
 fè pitit gason ankò, èske n'ap rete tann yo fin gran? Eske se sa k'ap anpeche nou marye ak yon lòt moun? Non, pitit fi m' yo. Nou konnen sa pa ka fèt. Sa fè m' mal anpil pou nou. Men Seyè a fè
¹⁴
 m' twòp lapenn deja. Medam yo pran rele pi rèd. Apre sa, Opa bo bèlmè li a, li di l' orevwa, epi
¹⁵
 li al jwenn fanmi li. Men, Rit menm te refize kite l'. Naomi di l' konsa: -Rit machè! Gade bèlsè ou la! Li tounen li al jwenn moun li yo ansanm ak Bondye l'ap sèvi yo. Fè menm jan an tou. Tounen
¹⁶
 ansanm avè l' non! Men, Rit reponn: -Pa fòse m' kite ou! Tanpri, kite m' ale avè ou. Kote ou prale, mwen prale avè ou. Kote ou rete, m'a rete avè ou. Se moun pa ou yo ki va moun pa m'. Bondye
¹⁷
 w'ap sèvi a, se li m'a sèvi tou. Kote w'a mouri a, se la m'a mouri tou. Epi se la y'a antere m' tou. Mwen mande Seyè a pou l' ban mwen pi gwo madichon ki ka genyen, si se pa lanmò ki pou separe
¹⁸
 nou. Lè Naomi wè Rit te soti vre pou ale avè l', li pa di l' anyen ankò. ¶ Yo pati, yo vwayaje
¹⁹
 ansanm jouk yo rive lavil Betleyèm. Lè yo rive, wè moun wè yo, lavil la te tèt anba. Medam yo
²⁰
 menm t'ap di: -Ou kwè se Naomi sa? reponn yo: -Tanpri, pa rele m' Naomi. Pito nou rele m'
²¹
 Mara, paske Bondye ki gen tout pouvwa a fè m' soufri anpil. Lè m' te pati isit la, mwen te gen
 tou sa m' te bezwen. Men jòdi a, Seyè a mennen m' tounen de men m' de pye m'. Poukisa pou n'ap
 rele m' Naomi toujou lè Seyè a fin vire do ban mwen, lè se malè ase Bondye ki gen tout pouvwa a
²²
 voye sou mwen? Se konsa Naomi tounen soti nan peyi Moab ansanm ak bèlfi li, Rit, moun peyi
 Moab. Lè yo rive lavil Betleyèm, rekòt grenn lòj te fèk konmanse.

Chapter 2

¹
 ¶ Naomi te gen yon fanmi mari l' yo te rele Bòz. Se te yon nonm ki te rich epi ki te grannèg.
²
 Li te fè pati menm branch fanmi ak Elimelèk, defen mari Naomi an. Rit, fanm peyi Moab la, di
 Naomi konsa: -Kite m' ale nan jaden yo pou m' ranmase tèt lòj moun k'ap ranmase rekòt yo kite
 tonbe atè. M'a jwenn yon moun ki va kite m' ranmase nan jaden li. Naomi reponn li: -Ale non, mafi.
³
 Se konsa, Rit leve, li al nan jaden yo, li pran mache dèyè travayè yo, li t'ap ranmase tèt lòj yo te
⁴
 kite tonbe atè. Chans pou li, li rive nan yon jaden ki te pou Bòz, fanmi Elimelèk la. ¶ Li te la depi
 kèk tan lè Bòz rive soti Betleyèm. Li di travayè yo bonjou, li di yo: -Seyè a avèk nou! Yo reponn
⁵
 li: -benediksyon Seyè a avè ou tou! Bòz mande kontwòlè a: -Ki jenn ti madanm sa a? Nonm
⁶
 lan reponn: -Se yon fi moun lòt peyi li ye. Se li menm ki te vini ansanm ak Naomi lè li te tounen
⁷
 soti nan peyi Moab. Li te mande m' pou m' kite l' mache dèyè travayè yo ranmase tèt lòj ki tonbe

8
 atè yo. L'ap degaje l' la a depi maten. Li fèk sispann pou l' pran yon ti repo anba tonèl lan la a. Lè
 sa a, Bòz di Rit konsa: -M'ap ba ou yon ti konsèy, tande, mafi. Ou pa bezwen ale nan lòt jaden pou
 9
 ranmase tèt lòj. Ou mèt rete nan jaden sa a, bò medam yo ki isit la. Gade tout kote y'ap travay
 nan jaden an, fè dèyè yo, rete ak yo. Mwen bay mesye m' yo lòd pou yo pa anbete ou. Chak fwa
 10
 w'a swaf dlo, ou mèt al bwè nan kannari yo plen pou sa. Rit bese tèt li jouk atè devan Bòz. Li
 di l' konsa: -Poukisa w'ap bay kò ou tout traka sa a pou mwen? Poukisa w'ap fè tout bagay sa a pou
 11
 yon moun ki pa menm ras avè ou? Bòz reponn li: -Yo di m' tou sa ou te fè pou bèlmè ou depi
 mari ou mouri a. Mwen konnen ou kite manman ou, papa ou ak peyi kote ou moun lan, ou vin viv
 12
 nan mitan yon lòt pèp ou pa t' janm konnen anvan. Mwen mande Seyè a pou li rekonpanse ou
 pou tou sa ou te fè. Wi. Ou vini mete ou anba zèl li pou l' pwoteje ou. Se pou Seyè a, Bondye pèp
 13
 Izrayèl la, ba ou yon bèl rekonpans! Rit reponn li: -Ou pa konn sa ou fè la a pou mwen, msye!
 Jan ou pale byen avè m' la a, sa ban m' kouraj, malgre mwen pa vo yonn nan medam k'ap sèvi avè
 14
 ou yo. Lè lè pou yo manje a rive, Bòz di Rit konsa: -Pwoche non! Pran yon moso pen, tranpe l'
 nan sòs vinèg la pou ou manje! Se konsa Rit vin chita ansanm ak lòt travayè yo. Bòz te ba li kèk
 15
 grenn lòj griye tou. Rit manje plen vant li, epi rès manje ki te rete a, li sere l'. Lè Rit leve al
 ranmase, Bòz bay travayè yo lòd sa a: -Nou mèt kite l' ranmase grenn menm kote pakèt mare yo
 16
 ye a. Pa chache l' kont. Okontrè, rache kèk tèt nan pakèt mare yo, lage yo atè pou l' ka ranmase.
 17
 Pa di l' anyen, tande! ¶ Se konsa Rit rete ranmase grap lòj nan jaden an jouk solèy kouche. Lè
 18
 li fin bat tèt lòj yo, li jwenn sa ki te manke l' pou l' te gen vennsenk ti mamit la pa t' anyen. Li
 pran grenn lòj li yo, li tounen lavil, li moutre bèlmè li tou sa li te ranmase. Li ba li tou rès manje ki
 19
 te rete lè l' te fin manje a. Naomi mande l': -Kote ou ranmase tout lòj sa a jòdi a? Nan jaden ki
 moun ou t'ap travay, en? Se pou Bondye beni moun ki fè sa pou ou a! Lè sa a, Rit di bèlmè li konsa
 20
 li t'ap travay nan jaden yon msye yo rele Bòz. Naomi di bèlfi li a: -benediksyon Seyè a pou Bòz!
 Wi. Seyè a ap toujou kenbe pawòl li, nou te mèt vivan, nou te mèt mouri! Naomi di ankò: -Nonm
 21
 sa a, se yon fanmi pre nou li ye. Se yonn nan moun ki reskonsab defann enterè fanmi an. Lè sa
 a, Rit di konsa: -Men sa l' di m' ankò: Se pou m' rete ranmase tèt lòj ansanm ak travayè li yo jouk
 22
 rekòt la fini. Naomi reponn li: -Wi, pitit mwen! Pito ou rete travay avèk medam yo nan jaden
 23
 Bòz la, tande. Si ou ale nan jaden lòt moun, malè ka rive ou. Se konsa, Rit rete ansanm avèk
 medam k'ap travay ak Bòz yo. Li t'ap ranmase tèt lòj jouk travayè yo te fin rekòlte tout lòj la ak
 tout ble a. Li t'ap viv tout tan sa a ak bèlmè li toujou.

Chapter 3

¹ ¶ Kèk tan apre sa, Naomi di Rit konsa: -Pa pito m' chache yon mari pou ou, pou ou ka viv ak
² kè poze lakay ou? Ou chonje Bòz, pa vre? Mèt jaden kote ou te ye ansanm ak medam yo? Bon!
 Ou chonje mwen te di ou se yon fanmi pre nou li ye! Bon. Koute! Aswè a, yo pral vannen lòj yo
³ fin bat yo. Al benyen. Mete odè sou ou, mete pi bèl rad ou sou ou. Epi ale bò glasi a, kote y'ap
 vannen an. Men, pa kite Bòz konnen ou la. W'a tann li fin manje, li fin bwè diven anvan. ⁴ Lè sa
 a, w'a gade byen kote li al kouche. Lè w'a wè dòmi pran l', ou va ale, w'a leve pwent dra ki kouvri
 pye l' yo, epi w'a kouche kouche ou la, bò kote l'. Li menm l'a di ou sa pou ou fè apre sa. ⁵ Rit
 reponn li: -M'a fè tou sa ou di m' fè. ⁶ ¶ Se konsa Rit leve vre, li ale bò glasi a, li fè sa bèlmè li te
⁷ di l' fè a. Lè Bòz fin manje, lè li fin bwè diven, kè l' te kontan. Li al kouche bò yon pil pay lòj,
 epi dòmi pote l' ale. Lè sa a, Rit pwoche tou dousman, li leve pwent dra ki te kouvri pye l' yo, epi
⁸ li kouche la bò kote l'. Nan mitan lannwit, Bòz pantan nan dòmi an. Li leve, li panche, li tou sezi
⁹ wè yon fanm ki te kouche nan pye l'. Li mande: -Ki moun sa? Rit reponn li: -Se mwen menm,
 Rit. Ou se yon fanmi pre nou. Se ou ki reskonsab pou pran swen mwen. Mwen vin jwenn ou.
¹⁰ Bòz di l' konsa: -benediksyon Seyè a avè ou, mafi! Sa w'ap fè la a pi konsekan pase tou sa ou te
 fè pou bèlmè ou la. Sa moutre ou pa soti pou ou lage fanmi an. Ou ta gen dwa al dèyè nenpòt ki
¹¹ jenn gason, rich osinon pòv, pou marye avè ou, men ou pa fè l'. Ou pa bezwen bat kò ou, tande.
¹² M'ap fè tou sa ou mande m' fè pou ou a. Tout moun konnen ou se yon fanm total. Se vre sa ou
 di a. Mwen se yon fanmi pre nou. Mwen reskonsab ou. Men, gen yon nonm ki fanmi ou pi pre pase
¹³ m'. Ou mèt rete pase nwit lan la. Denmen maten m'a chache konnen si li vle pran reskonsablite
 a sou do li. Si li dakò pou li pran li, m'a byen kontan. Si li pa vle, enben, mwen fè sèman devan
 Bondye vivan ki nan syèl la, m'ap pran l' mwen menm. Koulye a, rete kouche la jouk denmen
¹⁴ maten. ¶ Se konsa Rit kouche la nan pye l'. Men, anvan bajou kase, li leve pou moun pa wè l',
¹⁵ paske Bòz pa t' vle pesonn konnen li te la. Bòz di l' konsa: -Wete dra ki vlope ou la, louvri l' atè
 a. Rit louvri dra a atè. Bòz vide dis mamit lòj konsa ladan l'. Li mare l', epi li ede l' mete l' sou tèt
¹⁶ li. Apre sa, Rit tounen lavil ak pakèt la. Lè li rive lakay li, bèlmè a mande l': -Enben, mafi! Ki
¹⁷ jan sa pase? Rit tanmen rakonte l' tou sa Bòz fè pou li. Epi li di: -Anvan m' ale, li di m' konsa
¹⁸ ou pa ka tounen san anyen. Se konsa, li ban m' dis mamit lòj sa yo. Naomi di l': -Koulye a, Rit

mafi, poze kò ou tann pou ou wè jan sa pral pase. Bòz p'ap bay kò l' kanpo jòdi a, tout tan li pa regle zafè sa a.

Chapter 4

¹ ¶ Bòz ale nan pòtay lavil la, kote moun yo konn reyini an, epi li chita. Lè sa a, yon moun vin ap pase. Se te nèg ki te fanmi Elimelèk pi pre pase l' la, nonm Bòz t'ap pale Rit la. Bòz rele l', li di l': -Entèl, vini m' pale ou, monchè! Chita non! Nonm lan al jwenn li, li chita. ² Bòz fè rele dis nan chèf fanmi lavil la, li fè yo chita la tou. Lè yo fin chita, ³ li di nonm ki te fanmi pre Elimelèk la: -Naomi tounen soti nan peyi Moab. Koulye a, li ta vle vann jaden ki te pou Elimelèk, fanmi nou ⁴ an. Mwen kwè se devwa m' pou m' fè ou konnen sa. Si ou vle achte tè a, ou mèt di l' devan dis mesye chèf yo ki chita la a, paske se ou menm an premye lalwa rekonèt dwa sa a. Konsa tou, si ou pa vle, ou mèt di l', paske apre ou, se mwen menm ki gen dwa sa a. Nonm lan di l': -M'ap achte l'. ⁵ Lè sa a Bòz di l': -Bon. Mwen byen kontan. Men, si ou achte jaden an nan men Naomi ak Rit, ti fanm peyi Moab la, vèv pitit Elimelèk la, se pou Rit vin madanm ou tou pou non fanmi defen an pa pèdi, epi pou tè a ka rete nan fanmi defen an tou. ⁶ Lè sa a, nonm lan reponn: -Si se konsa, mwen p'ap ka achte tè a. Paske, si m' achte l', pitit mwen riske pèdi nan sa m'ap kite pou yo a. Ou mèt achte l' ou menm. Mwen p'ap fè zafè a ankò. ⁷ Nan tan sa a, nan peyi Izrayèl, lè yon moun pase dwa li genyen pou achte osinon pou twoke yon tè bay yon lòt moun, men sa yo te konn fè: Moun ki te gen dwa a wete yon grenn sapat nan pye l', li bay lòt moun lan li. Se konsa moun Izrayèl yo ⁸ te konn fè tout moun konnen zafè a te regle nèt. Se poutèt sa, lè nonm lan di Bòz ou mèt achte tè a, li wete yon grenn sapat nan pye l', li lonje l' bay Bòz. ⁹ ¶ Lè sa a, Bòz di chèf fanmi yo ak lòt moun yo ki te la a: -Nou tout nou temwen, pa vre! Jòdi a, yo ban m' dwa achte nan men Naomi tou ¹⁰ sa ki te pou Elimelèk ak de pitit gason l' yo, Maklon ak Kiljon. An menm tan tou, yo ban m' dwa pran Rit, vèv Maklon an, pou madanm mwen. Konsa, tè a va rete nan fanmi defen an: Non defen an p'ap pèdi non plis nan lavil la. N'a sèvi m' temwen pou sa ki rive jòdi a. ¹¹ Chèf yo ak lòt moun yo di l': -Wi, nou temwen. N'ap lapriyè Seyè a pou madanm sa a, ki pral antre lakay ou a, tankou Rachèl ak Leya ki te fè anpil pitit pou Jakòb, zansèt pèp Izrayèl la. Se pou ou vin rich anpil ¹² nan branch fanmi Efrat la. Se pou ou gen bon repitasyon nan lavil Betleyèm. Se pou pitit Seyè a va ba ou ak jenn fanm sa a fè onè fanmi an, menm jan Perèz, pitit gason Jida ak Tama a, te fè l' ¹³ pou fanmi l'. ¶ Se konsa, Bòz pran Rit pou madanm li. Seyè a te beni Rit. Rit vin ansent, li fè

¹⁴ yon pitit gason. Medam lavil yo di Naomi konsa: -Lwanj pou Seyè a! Jòdi a li ba ou yon pitit
gason ki pral pran swen ou. N'ap lapriyè pou ti gason sa a kite non l' nan peyi Izrayèl la. ¹⁵ Bèlfi
ou la gen tan renmen ou. Li fè pou ou sa sèt pitit gason pa ta ka fè. Koulye a, li ba ou yon pitit pitit
ki pral fè ou anvi viv ankò, yon pitit gason ki pral tounen baton vyeyès ou. ¹⁶ Naomi pran ti bebe
a, li kenbe l' lakay li, li pran swen li tankou pitit li. ¹⁷ Medam yo ki rete nan vwazinaj la rele ti
gason an Obèd. Yo mache di tout moun: Naomi gen yon lòt pitit gason. Se Obèd sa a ki pita vin
gen yon pitit gason yo te rele Izayi, Izayi sa a ki te papa David. ¹⁸ Men non zansèt David yo depi
Perèz: Perèz te papa Ezwon, ¹⁹ Ezwon te papa Ram. Ram te papa Aminadad, ²⁰ Aminadad te papa
Nachon. Nachon te papa Salmon, ²¹ Salmon te papa Bòz. Bòz te papa Obèd, ²² Obèd te papa Izayi,
epi Izayi te papa David.

1 Samuel

Chapter 1

¹ ¶ Te gen yon nonm, moun branch fanmi Efrayim, ki te rele Elkana. Li te rete lavil Rama nan
mòn peyi Efrayim. Se te pitit Jewokam, pitit pitit Eliyou, nan fanmi Tokou, nan branch fanmi Zouf
² la. Elkana te gen de madanm, yonn te rele Ana, lòt la te rele Penina. Penina te fè pitit pou li. Men,
³ Ana pa t' gen pitit. Chak lanne, Elkana soti lavil Rama, li moute lavil Silo pou l' al fè sèvis pou
Seyè ki gen tout pou vwa a, pou l' touye bèt pou li. Se de pitit Eli yo, Ofni ak Fineas, ki te prèt Seyè
⁴ a lavil Silo. Chak fwa Elkana te ofri bèt pou Seyè a, li te toujou pran yon pòsyon pou Penina, yon
pòsyon pou chak pitit fi ak pitit gason li yo. ⁵ Men, li te bay Ana yon pòsyon doub, paske li te
renmen l' anpil, atout Seyè a pa t' ba li pitit. ⁶ Penina menm te toujou ap giyonnen Ana pou fè l'
⁷ wont, paske Seyè a pa t' ba li pitit. Sa kontinye konsa chak lanne pandan lontan. Chak fwa yo te
moute ale nan tanp Seyè a, Penina gen pou anbete Ana jouk li fè l' fache. Lè konsa, Ana menm rete
⁸ ap kriye, li pa vle manje anyen. Elkana, mari li, di l' konsa: -Aa, machè! Poukisa w'ap plede kriye
konsa? Poukisa ou pa manje? Poukisa ou kagou konsa? Ou genyen m', se tankou si ou te genyen
⁹ depase dis pitit gason. ¶ Yon lè yo te lavil Silo, apre yo te fin manje, yo te fin bwè, Ana leve. Eli,

prèt la, te chita sou chèz li bò pòtay Tanp Seyè a. ¹⁰ Ana te gen anpil lapenn. Li t'ap lapriyè nan
¹¹ pye Seyè a, dlo t'ap koule nan je l'. Li fè Seyè a yon pwomès, li di l' konsa: -Seyè, ou menm ki
gen tout pouvwa a, tanpri voye je ou sou sèvant ou a non! Gade lapenn mwen! Si ou pa bliye m',
si ou ban m' yon pitit gason, m'ap mete l' apa pou li viv pou ou ase. Li p'ap janm koupe cheve nan
¹² tèt li. Pandan tout tan Ana t'ap lapriyè konsa devan Seyè a, Eli t'ap gade bouch li. ¹³ Men, Ana
t'ap lapriyè nan kè l'. Se bouch li ase ki t'ap bat, konsa moun pa t' ka tandè sa l'ap di a. Lè sa a, Eli
¹⁴ te konprann se sou li te sou. Li di l' konsa: -Kilè w'a sispann bwè jouk pou ou sou konsa? Soti
¹⁵ al desoule ou yon lòt kote! Ana reponn li: -Se pa sou mwen sou non, mèt! Mwen pa goute ni
diven ni ankenn lòt bweson. Se nan gwo lapenn mwen ye. Se louvri m'ap louvri kè m' bay Seyè a.
¹⁶ Se rakonte m'ap rakonte Seyè a lapenn mwen. Tanpri, mèt! Pa pran m' pou yon fanm lib! Kifè
¹⁷ m'ap pale konsa, se paske mwen nan gwo tèt chaje. Chagren ap touye m'. Lè sa a, Eli reponn li:
¹⁸ -Ale ak kè poze. Mwen mande Bondye pèp Izrayèl la pou l' ba ou sa ou mande l' la. Ana reponn
li: -M' espere ou p'ap janm bliye m'! Epi li leve, l' al fè wout li. Li manje. Depi lè sa a, li pa t' menm
¹⁹ moun lan ankò. ¶ Nan denmen maten, Elkana leve byen bonè ak tout fanmi li, yo adore Seyè a.
Aprè sa, yo tounen lakay yo lavil Rama. Elkama kouche ak Ana, madanm li. Epi, Seyè a fè pou
²⁰ Ana sa li te mande l' la. Se konsa Ana vin ansent. Lè lè a rive pou l' akouche, li fè yon pitit
²¹ gason. Li rele l' Samyèl, paske li te di: Mwen te mande Seyè a li. Aprè sa, Elkana moute lavil
Silo ansanm ak tout fanmi li yo pou yo te ka fè ofrann yo gen pou yo fè chak lanne bay Seyè a,
²² ansanm ak ofrann espesyal yo te fè ve bay Seyè a. Men Ana pa t' ale. Li di mari l' konsa: -Fini
²³ m'a fin sevre pitit la, m'a mennen l' nan Tanp Seyè a kote li pral rete pou tout tan. Elkana, mari
li, di l': -Fè sa ou wè ki pi bon an. Rete non jouk w'a fin sevre l'. Tansèlman, se pou Seyè a fè sa li
²⁴ te di a rive vre. Se konsa Ana rete pou l' pran swen ti bebe a jouk li sevre l'. Aprè li fin sevre
pitit la, li mennen l' lavil Silo. Li te pran avè l' yon ti towò bèf twazan, yon barik farin, yon sak an
po bèt plen diven. Li mennen ti gason an nan tanp Seyè a, lavil Silo, atout li te tou piti toujou.
²⁵ Yo touye ti towò a, epi yo mennen ti gason an bay Eli. ²⁶ Ana di l': -Eskize m' wi, mèt. Ou pa
chonje ki moun mwen ye? Menm jan ou vivan an, se mwen menm fanm ou te wè ki te kanpe bò
²⁷ kote ou la yon jou ap lapriyè Seyè a. Mwen te mande l' pou l' te ban mwen pitit gason sa a. Li
²⁸ ban mwen sa m' te mande l' la. Se konsa m' vin mete l' apa pou l' ka viv pou Seyè a ase jouk li
mouri. Aprè sa, yo adore Seyè a la nan tanp lan.

Chapter 2

¹ ¶ Lè sa a, Ana lapriyè, li di: -Seyè a fè kè m' kontan anpil! Seyè a remoute kouraj mwen. M'ap
kenbe tèt ak lènmi yo. Kè m' kontan paske Bondye delivre mwen. ² Pa gen Bondye tankou Seyè
a. Non, pa gen tankou l'. Pa gen moun ki ka pwoteje tankou Bondye nou an. ³ Sispann pale avèk
lògèy. Pa kite pawòl radiyès soti nan bouch nou. Paske Seyè a se yon Bondye ki konnen tout bagay.
⁴ Li jije tou sa moun ap fè. L'ap kraze zam ki nan men vanyan sòlda yo. Men l'ap bay moun ki fèb
yo fòs kouraj. ⁵ Sa ki te konn manje vant deboutonnen yo al vann jounen pou yo ka jwenn manje
pou yo manje. Sa ki t'ap mouri grangou yo pa grangou ankò. Fanm ki pa t' ka fè pitit la fè pitit sèt
fwa. Sa ki te gen anpil pitit la rete san anyen. ⁶ Seyè a touye, lèfini li bay lavi ankò. Li fè moun
desann nan peyi kote mò yo ye a. Li mennen yo tounen ankò. ⁷ Li fè moun rich, li fè moun pòv.
⁸ Li desann moun jouk atè, lèfini li fè yo kanpe ankò. Li wete pòv yo nan lapenn yo, li bay endijan
yo men pou yo soti nan mizè yo. Li fè yo chita menm kote ak grannèg yo. Li ba yo bèl pozisyon
nan lasosyete. Fondasyon latè, se nan men Seyè a sa ye. Se sou yo li bati tou sa ki la. ⁹ L'ap pwoteje
lavi moun k'ap sèvi l' ak tout kè yo. Men, mechan yo pral mouri nan fènwa. Paske se pa fòs kouraj
¹⁰ yon nonm k'ap fè l' genyen. Seyè a ap kraze tout lènmi l' yo. L'ap rete nan syèl la, l'ap voye loraj
tonbe sou yo. Seyè a gen pou jije dènye moun ki sou latè. L'a bay wa li a pouvwa, l'ap chita pouvwa
¹¹ moun li te chwazi pou wa a. ¶ Apre sa, Elkana tounen lakay li lavil Rama, men yo kite ti gason
¹² an lavil Silo pou l' te sèvi Seyè a sou zòd Eli, prèt la. Pitit gason Eli yo te yon bann vòryen. Pou
¹³ yo, Seyè a pa t' egziste, ni yo pa t' aji jan prèt yo fèt pou aji ak pèp la. Chak fwa yon nonm t'ap
touye bèt pou ofri bay Bondye, domestik prèt la vini avèk yon gwo fouchèt twa dan nan men l'.
¹⁴ Antan vyann lan ap kwit nan dife a, li plonje fouchèt la nan kaswòl la, nan chodyè a, nan mamit
la osinon nan bonm lan. Tou sa fouchèt la te pran, se te pou prèt la. Se konsa yo te fè sa lavil Silo
¹⁵ ak tout moun pèp Izrayèl la ki te vin fè ofrann yo la. Sa ki pi rèd ankò, anvan menm yo te wete
grès pou boule yo, domestik prèt la vini, epi li di nonm ki t'ap ofri bèt yo te touye a konsa: -Ban m'
¹⁶ moso vyann pou prèt la fè woti. Li p'ap asepte ou ba li vyann bouyi. Li bezwen vyann fre. Men,
si nonm lan ta reponn li: Tann yo boule grès la anvan, apre sa w'a pran sa ou vle, domestik prèt la
¹⁷ ap di l': -Non! Ban mwen l' koulye a. Si ou pa ban mwen li, m'ap pran l' ak fòs pa m'. Peche pitit
gason Eli yo te grav anpil anpil devan Seyè a, paske yo pa t' respekte ofrann yo te fè pou Seyè a.
¹⁸ Ti Samyèl menm t'ap sèvi Seyè a. Li te gen yon ti jile tankou prèt yo konn mete a. ¹⁹ Chak lanne

manman l' te fè yon ti rad pou li, epi li te pote l' ba li lè li moute ak mari l' pou touye bèt pou yo
²⁰
ofri chak lanne a. Se konsa, Eli te beni Elkana ansanm ak madanm li. Li di Elkana: -M'ap lapriyè
Seyè a pou l' ba ou lòt pitit avèk madanm sa a pou ranplase pitit ou mete apa pou Seyè a. Apre sa
²¹
yo tounen lakay yo. Seyè a beni Ana ankò. Ana fè senk lòt pitit, de fi twa gason. Ti Samyèl
²²
menm t'ap grandi nan kay Seyè a. Eli te fin granmoun. Li te tande moun ap di tou sa pitit gason
l' yo t'ap fè moun Izrayèl yo pase, jan yo te menm rive kouche ak medam ki t'ap travay nan pòtay
²³
devan Kay Randevou a. Lè sa a, li di yo konsa: -Poukisa n'ap fè bagay konsa? Mwen tande tout
²⁴
vye koze y'ap di sou nou nan pèp la. Sispann non, pitit mwen yo! Paske, sa m' tande y'ap di sou
²⁵
nou yo se pa bèl bagay menm. Si yon moun fè yon lòt yon bagay mal, Seyè a ka pran defans li.
Men lè se Bondye menm yon moun fè mal, ki moun ki va pran defans li? Men, mesye yo pa t' vle
²⁶
koute sa papa a t'ap di yo, paske Seyè a te fin pran desizyon l' pou l' te touye yo. Ti Samyèl
²⁷
menm t'ap grandi toujou. Li t'ap aji yon jan ki te fè ni Bondye ni lèzòm plezi. ¶ Yon pwofèt
Bondye vin jwenn Eli, li di l' konsa: -Men sa Seyè a voye di ou: Lè zansèt ou yo, Arawon ak moun
fanmi l' yo, te esklav nan peyi Lejip ap sèvi farawon an, mwen te fè yo konnen ki moun mwen ye.
²⁸
Nan tout branch fanmi pèp Izrayèl yo se fanmi pa li a mwen te chwazi pou sèvi m' prèt devan
lotèl mwen, pou yo boule lansan, pou pote ti jile prèt yo devan m'. Epi mwen ba yo dwa pou yo
²⁹
pran yon pòsyon nan tout bèt yo ofri pou boule pou mwen sou lotèl la. Pouki nou pa respekte
bèt yo touye pou mwen ak ofrann mwen te bay lòd pou pèp la fè nan Tanp mwen an? Poukisa, ou
menm Eli, ou gen pitit ou yo plis krentif pase m', kifè ou kite yo ap gra ak pi bon pòsyon nan tout
³⁰
ofrann moun pèp Izrayèl yo ap fè pou mwen? Se poutèt sa, mwen menm Seyè a, Bondye pèp
Izrayèl la, men sa m'ap di: Nan tan lontan, mwen te pwomèt mwen t'ap kite fanmi ou ak moun
branch fanmi ou yo sèvi m' prèt pou tout tan. Men koulye a, mwen di: Mwen p'ap fè sa ankò paske
m'ap fè bèl bagay pou moun ki gen krentif pou mwen. Men moun k'ap derespekte m' yo, m'ap fè
³¹
yo wont. Se mwen menm Seyè a ki di sa. Gade! Koulye a lè a pral rive, mwen pral touye tout
jenn gason ki nan fanmi ou ak nan tout branch fanmi zansèt ou a. Konsa p'ap gen gason nan fanmi
³²
ou ki va rive granmoun. Lespri ou pral boulvèse lè w'a wè tout bagay ap mache byen pou pèp
³³
la, men pesonn nan fanmi ou p'ap janm viv lontan jouk pou yo rive granmoun. M'ap kite yonn
nan fanmi ou yo vivan pou li ka sèvi m' prèt. Men, l'ap pèdi de grenn je l' yo, epi lapenn ap fini avè
³⁴
l'. Tout lòt fanmi ou yo pral mouri tou jenn nan move kondisyon. Lè w'a wè de pitit gason ou
³⁵
yo, Ofni ak Fineas, tonbe mouri menm jou a, w'a konnen sa m' te di a se vre. Mwen pral chwazi
yon lòt prèt ki p'ap janm twonpe m'. L'a fè tou sa m'a vle l' fè, tou sa mwen ta renmen wè l' fè. M'a

ba li yon fanmi ki p'ap janm disparèt, se yo ki va toujou sèvi wa mwen va chwazi a. ³⁶ Men, moun ki va rete vivan nan fanmi ou lan va ale bò kote prèt sa a pou mande l' yon ti lajan ak yon ti manje, l'a lapriyè nan pye prèt la pou prèt la kite l' ede lòt prèt yo pou li ka jwenn kichòy pou l' manje.

Chapter 3

¹ ¶ Lè sa a, Samyèl te timoun toujou, li t'ap sèvi Seyè a sou zòd Eli. Nan tan sa a se pa t' fasil pou Seyè a te pale ak moun. Se bagay ki te ra anpil pou Seyè a te fè moun wè l'. ² Je Eli yo te fin bese, li pa t' ka wè ladan yo ankò. Yon jou lannwit, Eli te kouche nan chanm li ap dòmi. ³ Samyèl menm te kouche nan Tanp Seyè a, nan pyès kote Bwat Kontra Bondye a te ye a. Lanp lan te limen toujou. ⁴ Seyè a rele Samyèl. Samyèl reponn: -Men mwen wi! ⁵ Epi li leve, l' al jwenn Eli, li di l': -Men mwen wi! M' tande ou rele m'! Eli reponn li: -Mwen pa rele ou non! Tounen nan kabann ou. ⁶ Samyèl ale, li kouche. Seyè a rele l' ankò. Samyèl leve, l' al jwenn Eli, li di l': -Men mwen wi! Mwen tande ou rele m'! Men, Eli reponn li: -Pitit mwen, mwen pa rele ou. Al kouche tande! ⁷ Samyèl pa t' ankò konnen Seyè a paske Seyè a pa t' ankò janm pale avè l' anvan sa. ⁸ Seyè a rele Samyèl yon twazyèm fwa. Samyèl leve, l' al jwenn Eli, epi li di l': -Mwen tande ou rele m'. Men mwen wi! Fwa sa a, Eli vin konprann se Seyè a ki t'ap rele ti gason an. ⁹ Li di Samyèl konsa: -Al kouche tande! Si ou tande yo rele ou ankò, w'a reponn: Pale non, Seyè! Sèvitè ou la ap koute ou! ¹⁰ Samyèl ale, li kouche nan kabann li. Seyè a vini, li kanpe, epi li rele l' jan l' te fè l' anvan an: -Samyèl! Samyèl! Samyèl reponn: -Pale non! Sèvitè ou la ap koute ou! ¹¹ ¶ Seyè a di l' konsa: -Mwen pral fè yon gwo bagay nan mitan pèp Izrayèl la. Lè moun va tande sa, yo pral sezi. ¹² Jou sa a, tout malè mwen te di Eli ki pou te rive fanmi l' yo pral rive vre san manke yonn. ¹³ Mwen te di l' mwen tapral pini fanmi l' lan yon sèl kou pou m' fini ak yo poutèt pitit gason l' yo. Li konnen yo t'ap fè sa ki mal, yo t'ap pale Bondye mal, epi li pa di yo anyen. ¹⁴ Se poutèt sa mwen te fè moun fanmi Eli yo konnen mwen sèmante pa gen ankenn bèt yo ka touye ni ankenn ofrann ki ka fè m' padonnen peche yo fè a. ¹⁵ Samyèl rete nan kabann li jouk denmen maten. Li leve granmaten, li louvri tout pòt nan Tanp Seyè a. Men, li te pè al rakonte Eli vizyon li te fè a. ¹⁶ Men Eli rele l': -Samyèl, pitit mwen! Samyèl reponn li: -Men mwen wi! ¹⁷ Eli mande l': -Kisa Seyè a di ou konsa? Tanpri pa kache m' anyen. Se pou Bondye ba ou pi gwo pinisyon ki genyen si ou kache m' anyen

¹⁸ nan sa li di ou la. Se konsa Samyèl rapòte l' tout pawòl Seyè a san kache l' anyen. Epi Eli di l':
¹⁹ -Se Seyè a li ye, l'a fè tou sa li wè ki bon. ¶ Samyèl t'ap grandi, Seyè a te avèk li. Li te fè tout
²⁰ pawòl ki te soti nan bouch Samyèl rive vre. Konsa, tout pèp Izrayèl la, depi moun ki te rete nan
 peyi Dann lan jouk sa ki rete lavil Bècheba, te vin rekonèt Samyèl tankou yon bon pwofèt k'ap pale
²¹ pawòl Seyè a. Seyè a menm te toujou ap parèt lavil Silo, paske se la li te konn fè Samyèl wè li,
 se la li te konn pale ak li.

Chapter 4

¹ ¶ Chak fwa Samyèl te pale tout pèp la te koute l'. Lè sa a, pèp Izrayèl la soti pou y' al goumen
 ak moun Filisti yo. Konsa, yo moute kan yo bò lavil Ebeneze. Moun Filisti yo menm moute kan
² pa yo lavil Afèk. Moun Filisti yo pran pozisyon anfas moun Izrayèl yo pou yo goumen. Epi batay
 la konmanse. Moun Filisti yo bat moun Izrayèl yo byen bat, yo touye katmil (4000) moun konsa
³ nan plenn kote yo t'ap goumen an. Lè sa a, sa ki te chape yo tounen nan kan yo a, tout chèf ki te
 reskonsab pèp Izrayèl la di: -Poukisa Seyè a kite moun Filisti yo bat nou konsa jòdi a? Ann al pran
 Bwat Kontra Seyè a ki lavil Silo pou li ka nan mitan nou. Konsa l'a delivre nou anba men lènmi
⁴ nou yo. Se konsa yo voye kèk moun lavil Silo. Yo pran Bwat Kontra Seyè ki gen tout pouvwa
 a, Seyè ki chita sou fotèy li anwo zanj cheriben yo. Yo pote l' vini. Tout de pitit Eli yo, Ofni ak
⁵ Fineas, te la ansanm ak Bwat Kontra a. Lè Bwat Kontra Seyè a rive nan kan an, tout moun Izrayèl
⁶ yo bay yon sèl gwo rèl, tè a tranble. Moun Filisti yo tandè rèl la, yo di: -Pouki tout gwo rèl sa a
⁷ nan kan moun Izrayèl yo? Lè yo vin konnen se Bwat Kontra Seyè a ki te rive nan kan an, yo vin
 pè, yo t'ap di: -Bondye moun sa yo rive nan kan yo a. Nou nan ka, de venn pa nou! Bagay konsa pa
⁸ janm rive nou anvan sa! Ala de venn pou nou, mezanmi! Ki moun ki ka delivre nou anba men
 bondye sa yo ki plen pouvwa? Se bondye sa yo ki te voye tout kalite malè sou moun Lejip yo nan
⁹ dezè a. Se pou nou mete gason sou nou, nou menm moun Filisti, pou nou pa tounen esklav ebre
¹⁰ yo menm jan yo te esklav nou an. Se pou n' goumen tankou vanyan gason! ¶ Moun Filisti yo
 goumen rèd mare, yo bat moun Izrayèl yo ki kouri chape al lakay yo. Se te yon gwo kou pou pèp
¹¹ Izrayèl la. Te gen trantmil (30000) sòlda apye ki te mouri nan lame pèp Izrayèl la. Moun Filisti
¹² yo te sezi Bwat Kontra Bondye a epi tou de pitit Eli yo, Ofni ak Fineas, te mouri. ¶ Yon nonm
 nan branch fanmi Benjamen an te pran kouri depi kote yo t'ap goumen an jouk lavil Silo. Li rive

menm jou a. Li te chire rad sou li, li te mete pousyè sou tèt li pou fè wè jan li te nan lapenn. ¹³ Eli menm te chita sou chèz li a bò wout la ap veve paske kè l' pa t' poze pou Bwat Kontra Bondye a.

Nonm lan lage nouvèl la nan tout lavil la. Tout moun t'ap pouse rèl tèlman yo te pè. ¹⁴ Eli tandè bri a, li mande: -Pouki tout bri sa a? Nonm lan kouri pote nouvèl la bay Eli. ¹⁵ Eli te gen katrevendizwitan sou tèt li, li pa t' wè menm nan je l' ankò. ¹⁶ Nonm lan di Eli konsa: -Mwen fèk soti kote yo t'ap goumen an, mwen chape kò m' nan batay la vin isit la. Eli di l': -Ki jan sa pase, pitit mwen! ¹⁷ Mesaje a reponn, li di l' konsa: -Moun Izrayèl yo kouri pou moun Filisti yo ki touye anpil moun nan pèp la. De pitit gason ou yo, Ofni ak Fineas, mouri. Moun Filisti yo sezi Bwat Kontra Bondye a. ¹⁸ Nonmen nonm lan nonmen Bwat Kontra a, Eli sot tonbe sou chèz la, li blayi atè devan pòtay la. Li te fin granmoun epi li te gwo anpil. Nwa kou l' kase sèk, li mouri. Li te pase karantan ap gouvènen pèp Izrayèl la. ¹⁹ ¶ Bèlfi Eli a, madanm Fineas, te ansent, li t'ap tann jou pou l' akouche. Lè li tandè yo te pran Bwat Kontra Bondye a, epi bòpè l' ansanm ak mari l' te mouri, lamenn tranche pran l', li akouche. ²⁰ Men, medam ki te la avè l' yo wè l'ap mouri, yo di l' konsa: -Pran kouraj, machè! Ou fè yon pitit gason. Men li pa reponn anyen, li pa okipe yo. ²¹ Li rele ti gason an Ikabòd, epi li di: -Pèp Izrayèl la pèdi lasistans pouvwa Bondye a. Li t'ap di sa akòz Bwat Kontra Bondye yo te sezi a. ²² Li t'ap di: -Wi, avèk Bwat Kontra Bondye yo pran an, pèp Izrayèl la pèdi lasistans pouvwa Bondye a.

Chapter 5

¹ ¶ Lè moun Filisti yo sezi Bwat Kontra Bondye a bò lavil Ebenezer, yo pote l' ale lavil Asdòd.

² Yo antre avè l' nan tanp Dagon, bondye pa yo a. Yo mete l' sou kote estati Dagon an. ³ Nan denmen maten byen bonè, lè moun lavil Asdòd yo leve, yo wè estati Dagon an te tonbe fas atè devan Bwat Kontra Bondye a. Yo pran estati Dagon an, yo mete l' kanpe nan plas li ankò. ⁴ Nan denmen ankò lè yo leve nan maten, yo wè estati Dagon an te tonbe fas atè devan Bwat Kontra Seyè a. Tèt li ak de bra l' yo te kraze, yo te sou papòt tanp lan. Se rèz kò a ase ki te rete. ⁵ Se poutèt sa, jouk koulye a, ni prèt Dagon yo ni moun k'ap antre nan tanp Dagon an lavil Asdòd, lè yo rive devan pòtay la, yo sote papòt la, yo pa janm pile li. ⁶ ¶ Seyè a t'ap manyen ak pèp lavil Asdòd la, li te mete yo vant ba. Li fè yon bann gwo bouton soti sou yo ak sou moun ki t'ap viv nan vwazinaj lavil la. ⁷ Lè moun lavil Asdòd yo wè sa ki te rive yo a, yo di: -Pa kite Bwat Kontra Bondye pèp Izrayèl la nan mitan

nou ankò! Se pa ti kras kale l'ap kale Dagon, zidòl nou an, ansanm ak nou. ⁸ Se konsa yo voye chache senk chèf moun Filisti yo, epi yo di yo: -Kisa pou nou fè ak Bwat Kontra Bondye pèp Izrayèl la? Chèf yo reponn: -Pote l' ale lavil Gat. Se konsa yo pote Bwat Kontra Bondye pèp Izrayèl la ⁹ lavil Gat. Men, lè Bwat Kontra a rive la, Seyè a manyen ak moun lavil la. Li fè yon sèl kouri pete nan lavil la. Bondye pini yo, li voye yon kalite gwo bouton ki leve sou tout kò moun lavil la, timoun ¹⁰ kou granmoun. Se konsa yo voye Bwat Kontra a lavil Ekwon. Rive li rive la, moun yo pran rele: -Men yo pote Bwat Kontra Bondye pèp Izrayèl la lakay nou. Se touye yo vle touye tout moun isit ¹¹ la! Yo fè chache senk chèf moun Filisti yo. Yo di yo: -Voye Bwat Kontra Bondye pèp Izrayèl la tounen nan plas li, pou li pa touye tout moun isit yo. Tout lavil la te tèt anba, moun t'ap mouri ¹² paske Seyè a t'ap manyen rèd ak yo. Sa ki pa t' mouri yo te gen tout kò yo kouvri ak bouton. Tout moun t'ap rele mande bondye pa yo sekou.

Chapter 6

¹ ¶ Bwat Kontra Seyè a te gen tan pase sèt mwa nan peyi Filisti a. ² Moun Filisti yo fè rele prèt yo ak divinò yo. Yo mande yo: -Kisa pou n' fè ak Bwat Kontra Seyè a? Ki jan pou n' fè pou n' voye ³ l' tounen nan plas li? Yo reponn: -Si n'ap voye Bwat Kontra Bondye pèp Izrayèl la tounen, nou pa ka voye l' konsa san anyen. Se pou nou voye kichòy ki va sèvi pou peye pou sa nou fè a. Si nou ⁴ fè l' konsa, nou tout n'a geri, epi n'a konnen poukisa li t'ap plede frape nou konsa. Pèp la mande yo: -Ki kalite bagay pou nou bay ki va sèvi pou peye pou sa nou fè a? Yo di yo: -Senk bouton lò ak senk sourit an lò, yonn pou chak chèf moun Filisti yo, paske se menm maladi a ki te tonbe ni ⁵ sou nou ni sou senk chèf nou yo. N'a fè bouton lò yo pou yo sanble ak bouton ki te leve sou nou yo. Konsa tou, n'a fè senk sourit an lò pòtre ak sourit k'ap plede ravaje peyi a. Epi n'a rekonèt Bondye pèp Izrayèl la se yon Bondye ki gen pouvwa. Lè sa a, nou kwè l'a sispann frape nou, nou ⁶ menm, bondye nou yo ak peyi nou an. Poukisa pou n'ap fè tèt di tankou farawon an ak moun peyi ⁷ Lejip yo? Eske lè Bondye te konmanse manyen ak yo, yo pa t' kite moun yo al fè wout yo? Nou pral pare yon kabwa tou nèf ak de manman bèf ki gen pitit dèyè yo epi ki pa janm sèvi pou fè ankenn travay anvan sa. N'a mare yo nan kabwa a, men n'a fè ti bèf dèyè manman yo tounen lakay. ⁸ N'a pran Bwat Kontra Seyè a, n'a mete l' sou kabwa a. N'a pran sa n'ap bay pou sèvi pou peye pou sa nou fè a, n'a mete yo nan yon ti bwat sou kote l'. N'a mete kabwa a sou wout la, n'a kite l' ale ⁹ pou kont li. N'a rete ap gade l' ale. Si nou wè l' pran chemen moute lavil Bèt-Chemèch, n'a konnen se Bondye pèp Izrayèl la ki te voye tout malè sa yo sou nou. Men si li pran yon lòt wout, lè sa a

n'a konnen malè sa yo pa t' soti nan li. Se te de venn pa nou. ¶ Moun yo fè sa yo te di yo fè a. Yo pran de manman bèf ki te gen pitit dèyè yo, yo mare yo nan kabwa a, men yo kenbe ti bèf ki te dèyè manman yo lakay. ¶ Yo mete Bwat Kontra a sou kabwa a ansanm ak ti bwat ki te gen ti sourit an lò yo ak pòtre bouton yo. ¶ Bèf yo pran wout lavil Bèt-Chemèch dirèk dirèk. Y' al tou dwat devan yo. Sou tout wout la bèf yo t'ap rele. Senk chèf moun Filisti yo t'ap mache dèyè yo jouk yo rive sou baliz lavil Bèt-Chemèch. ¶ Moun lavil Bèt-Chemèch yo t'ap ranmase ble nan plenn lan. Lè yo leve je yo, yo wè Bwat Kontra a, yo pran rele sitèlman yo te kontan. ¶ Kabwa a rive nan jaden Jozye a nan peyi Bèt-Chemèch epi li rete. Te gen yon gwo wòch bò la. Moun yo demoute kabwa a, yo fann tout bwa yo, yo touye bèf yo, epi yo boule yo nèt pou Seyè a. ¶ Apre sa, moun Levi yo desann Bwat Kontra Seyè a ansanm ak ti bwat ki te gen bagay an lò yo. Yo mete yo sou gwo wòch la. Jou sa a, moun lavil Bèt-Chemèch yo ofri lòt bèt tou pou boule nèt nan dife ansanm ak lòt ofrann pou Seyè a. ¶ Lè senk chèf moun Filisti yo wè sa, yo tounen lavil Ekwon menm jou a. ¶ Moun Filisti yo te voye senk bouton lò bay Seyè a pou sa te sèvi pou peye pou sa yo te fè a: yonn pou Asdòd, yonn pou Gaza, yonn pou Achkalon, yonn pou Gat, yonn pou Ekwon. ¶ Yo te voye senk ti sourit fèt an lò tou, yonn pou chak lavil kote chèf moun Filisti yo t'ap kòmande, kit se lavil ki gen ranpa, kit se lavil ki pa gen ranpa. Gwo wòch kote yo te mete Bwat Kontra Seyè a nan mitan jaden Jozye a, bò lavil Bèt-Chemèch la, kanpe la jouk koulye a, tankou yon mak pou fè chonje sak te rive lè sa a. ¶ Apre sa, Seyè a te touye kèk moun nan moun lavil Bèt-Chemèch yo paske yo t' al voye je yo wè sa ki anndan Bwat Kontra a. Li touye swasanndis ladan yo. Pèp la te nan gwo lapenn, paske Seyè a te fè gwo malè sa a sou yo. ¶ Lè sa a, moun lavil Bèt-Chemèch yo di: -Ki moun ki ka kanpe devan Seyè a, Bondye sa a ki yon Bondye apa? Ki bò pou n' voye Bwat Kontra a ale pou l' pa rete lakay nou? ¶ Yo pran kèk mesaj, yo voye yo ale bò kote moun lavil Kiriyaat-Jearim, yo di yo konsa: -Moun Filisti yo voye Bwat Kontra Seyè a tounen. Vin pran l' mennen lakay nou.

Chapter 7

¶ Se konsa moun lavil Kiriyaat Jearim yo vin pran Bwat Kontra Seyè a. Yo mete l' lakay Abinadad, sou tèt yon ti mòn. Yo chwazi Eleaza, pitit gason Abinadad la, pou okipe Bwat Kontra Seyè a. ¶ Bwat Kontra Seyè a te rete yon bon tan lavil Kiriyaat-Jearim. Li te pase ventan la. Pandan tout tan sa a, tout moun pèp Izrayèl yo t'ap rele nan pye Seyè a pou mande l' sekou. ¶ Samyèl

pale ak tout pèp la, li di yo konsa: -Si nou tounen vin jwenn Seyè a ak tout kè nou vre, se pou nou wete tout bondye moun lòt nasyon yo ak tout pòtre metrès Astate yo nan mitan nou. Viv pou Seyè⁴ a sèlman, se li menm ase pou nou sèvi. Lè sa a l'a delivre nou anba men moun Filisti yo. Se konsa moun pèp Izrayèl yo wete tout estati bondye Baal ak metrès Astate yo nan mitan yo. Yo pran sèvi⁵ Seyè a sèlman. Apre sa, Samyèl di yo: -Sanble tout pèp Izrayèl la lavil Mispa, m'a lapriyè Seyè a la pou nou.⁶ Se konsa yo tout sanble lavil Mispa. Yo tire dlo, yo vide l' atè tankou yon ofrann pou Seyè a. Jou sa a, yo rete san manje. Epi yo di: -Nou peche kont Seyè a! Samyèl te rete lavil Mispa, se la li te konn regle tout bagay pou pèp Izrayèl la. ¶ Lè moun Filisti yo vin konnen pèp Izrayèl la te sanble lavil Mispa, senk chèf moun Filisti yo moute al atake yo. Moun pèp Izrayèl yo⁸ tandè sa, yo te pè. Epi yo di Samyèl: -Pa sispann lapriyè Seyè a pou nou, pou l' ka sove nou anba men moun Filisti yo.⁹ Samyèl pran yon ti mouton dèyè manman, li boule l' nèt, li ofri l' bay Seyè a. Lèfini, Samyèl lapriyè Seyè a pou l' vin ede pèp Izrayèl la. Seyè a reponn lapriyè a.¹⁰ Pandan Samyèl t'ap boule ofrann lan, moun Filisti yo mache sou pèp Izrayèl la vin atake yo. Men lè sa a, Seyè a voye yon kout loraj sou moun Filisti yo. Moun Filisti yo pèdi tèt yo, yo pran kouri met deyò devan pèp Izrayèl la.¹¹ Moun Izrayèl yo soti lavil Mispa, yo pran kouri dèyè moun Filisti yo jouk rive toupren lavil Bètkà. Sou tout wout la yo bat yo byen bat.¹² Lè sa a, Samyèl pran yon wòch, li mete l' ant lavil Mispa ak lavil Chenn. Li rele wòch la Ebeneze, paske li t'ap di: Jouk jòdi a se Seyè a ki pote nou sekou.¹³ ¶ Se konsa moun Filisti yo te pèdi batay la nèt. Yo pa janm rekonmanse anvayi teritwa moun Izrayèl yo ankò. Seyè a te kenbe yo anba men l' pandan tout tan Samyèl te vivan.¹⁴ Tout lavil moun Filisti yo te pran, depi lavil Ekwon jouk lavil Gat, tout te tounen nan men moun Izrayèl yo ankò. Se konsa pèp Izrayèl la te mete moun Filisti yo deyò sou tout teritwa ki te pou yo. Epi tou pa t' gen lagè menm ant moun Izrayèl yo ak moun Amori yo.¹⁵ Samyèl gouvènè pèp Izrayèl la jouk li mouri.¹⁶ Chak lanne li te fè vizit nan tout peyi a, li pase lavil Betèl, lavil Gilgal ak lavil Mispa. Nan tout lavil yo, li te konn regle tout kont moun yo te gen yonn ak lòt.¹⁷ Apre sa, li tounen lakay li lavil Rama kote li te konn regle zafè pou pèp Izrayèl la tou. Li te bati yon lotèl pou Seyè a lavil Rama.

Chapter 8

¹ ¶ Lè Samyèl konmanse granmoun, li mete pitit gason l' yo pou gouvènen pèp Izrayèl la. ² Pi
gran an te rele Joèl, piti a te rele Abija. Se lavil Bècheba yo t'ap gouvènen. ³ Men yo pa t' swiv
egzanp papa yo. Yon sèl bagay ki te enterese yo se te fè lajan. Yo te konn pran lajan sou kote nan
men moun pou regle zafè pou yo. Yo t'ap fè patipri. ⁴ ¶ Lè sa a, tout chèf fanmi ki te reskonsab
pèp Izrayèl la sanble, y' al jwenn Samyèl lavil Rama. ⁵ Epi yo di l': -Gade! Ou fin granmoun. Pitit
ou yo pa swiv egzanp ou te ba yo. Koulye a, chwazi yon wa pou gouvènen nou, jan sa fèt nan tout
lèt peyi yo. ⁶ Pawòl sa yo pa t' fè Samyèl plezi paske yo t'ap mande pou li ba yo yon wa pou
gouvènen yo. Samyèl lapriyè Seyè a. ⁷ Seyè a di Samyèl ankò: -Ou mèt koute tou sa pèp la di ou.
Paske se pa ou menm y'ap voye jete, se mwen menm menm y'ap voye jete. Yo pa vle m' pou wa
yo ankò. ⁸ Depi lè mwen te fè yo soti kite peyi Lejip la, se sa ase y'ap fè m'. Y'ap vire do ban mwen,
y'ap sèvi lòt bondye. Se menm bagay la y'ap fè ou jòdi a tou. ⁹ Se poutèt sa, koute sa y'ap di ou.
Tansèlman, avèti yo pou mwen. Tou fè yo konnen ki jan yon wa pral boule ak yo. ¹⁰ Samyèl rapòte
bay pèp la ki t'ap mande yon wa a tout pawòl Seyè a te di l'. ¹¹ Li di yo: -Men ki jan wa a pral
boule ak nou: Li pral pran pitit gason nou yo pou fè yo sèvi nan lame li a. Genyen ki pral aprann
moute cha, gen lòt ki pral aprann moute chwal pou fè lagè. Genyen ki pral sèvi gad kò li pou kouri
devan pwòp cha pa li. ¹² L'ap pran ladan yo pou mete chèf sou mil (1000) sòlda ak chèf sou senkant
sòlda. Se yo ki pral pare tè nan jaden wa a pou li, se yo ki pral ranmase rekòt li yo pou li. Se yo ki
pral fè zam pou li ak lòt lekipay l'ap bezwen pou cha lagè l' yo. ¹³ L'ap pran pitit fi nou yo pou fè
odè, pou fè manje ak pou fè pen pou li. ¹⁴ L'ap pran pi bon jaden nou yo, pi bon jaden rezen nou
yo, pi bon jaden oliv nou yo, l'a bay moun k'ap sèvi l' yo. ¹⁵ L'ap pran yon dizyèm sou tout rekòt
danre nou yo ak sou tout rekòt pye rezen nou yo pou l' bay moun konfyans li yo ak lòt moun k'ap
sèvi anndan lakay li. ¹⁶ L'ap pran pi bon domestik nou yo ak pi bon sèvant nou yo, pi bon bèf nou
yo ak pi bon bourik nou yo pou fè yo travay pou li. ¹⁷ L'ap pran yon mouton pou chak dis mouton
n'a genyen. Lèfini, l'ap fè nou tounen esklav li. ¹⁸ Jou sa a, n'a rele anmwe pou wa nou an, wa nou
menm n'ava chwazi a. Men lè sa a, Seyè a p'ap okipe nou. ¹⁹ Pèp la te derefizye koute Samyèl. Yo
t'ap di: -Non! Se yon wa nou vle pou gouvènen nou, ²⁰ pou nou kapab menm jan ak tout lòt nasyon
yo. Wa nou an va gouvènen nou, l'a mache alatèt lame nou lè nou pral nan lagè, l'a mennen batay
nou pou nou. ²¹ Samyèl tandè tou sa pèp la t'ap di. L'ale rapòte yo bay Seyè a. ²² Lè sa a, Seyè a

reponn li: -Ou mèt fè sa yo di a. Ba yo yon wa pou gouvènèn yo. Epi Samyèl di moun pèp Izrayèl yo: -Tout moun mèt tounen lakay yo.

Chapter 9

¹ ¶ Te gen yon nonm nan branch fanmi Benjamen an yo te rele Kich. Se te pitit Abiyèl, pitit pitit Zewò ki te pitit Bekora, pitit pitit Afya. Kich te yon grannèg. ² Li te gen yon pitit gason ki te rele Sayil, yon bèl gason byen kanpe. pa t' gen moun nan pèp Izrayèl la ki te pi bèl pase l'. Li te pi wo pase yo tout. ³ ¶ Kich te gen kèk manman bourik ki te pèdi. Li di Sayil konsa: -Pran yonn nan domestik yo avè ou, al bouske manman bourik yo pou mwen. ⁴ Yo mache nan tout mòn Efrayim yo ak nan tout peyi Chalicha a, men yo pa jwenn bourik yo. Y' ale nan tout peyi Chaalim lan, yo pa jwenn yo. Y' ale nan tout peyi Benjamen an, yo pa jwenn yo. ⁵ Lè yo rive nan peyi Souf, Sayil di domestik ki te avè l' la: -Ann tounen lakay pou papa m' pa gen tèt chaje pou nou jouk pou l' ta rive bliye bourik li yo. ⁶ Domestik la reponn li: -Gen yon bon sèvitè Bondye nan lavil sa a. Se yon nonm tout moun respekte paske tou sa li di rive vre. Ann al jwenn li. Ou pa janm konnen, li ka di nou kote pou n' ale pou n' jwenn bourik yo. ⁷ Sayil di domestik la: -Dakò! Nou pral jwenn li. Men, kisa pou nou pote ba li? Nou pa gen pen ankò nan ralfò nou. Nou pa gen anyen pou n' fè sèvitè Bondye a kado. ⁸ Domestik la reponn li: -Mwen gen yon ti pyès ajan sou mwen, m'a ba li l'. L'a di nou kote n'a jwenn yo. ⁹ Nan tan lontan, lè yon moun te bezwen mande Bondye kichòy, li te konn di: Ann al kay divinò a, paske lè sa a se konsa yo te konn rele pwofèt Bondye yo. ¹⁰ Sayil di domestik li a: -Sa ou di a bon wi! Ann ale! Se konsa y' ale nan lavil kote sèvitè Bondye a te ye. ¹¹ ¶ Pandan yo t'ap moute ti pant ki mennen lavil la, yo kontre ak kèk jenn fi ki t'ap soti lavil la pou y' al nan dlo. Yo mande medam yo: -Eske divinò a la nan lavil la? ¹² Jenn fi yo reponn: -Li la wi. Gade, men li la devan ou lan. Fè vit, li fenk rive lavil la, paske jòdi a se jou pou moun yo al touye bèt pou Bondye sou lotèl ki sou ti mòn lan. ¹³ Rive n'a rive lavil la, n'a jwenn li anvan l' al manje sou ti mòn lan. Pèp la p'ap manje toutotan li pa rive, paske se li ki pou beni ofrann bèt la anvan. Lè li fini, moun yo envite yo va manje. Prese ale koulye a pou nou ka jwenn li. ¹⁴ Se konsa yo moute ale lavil la. Antan yo t'ap antre lavil la, yo wè Samyèl ki t'ap vin devan yo, sou wout pou l' al sou mòn lan. ¹⁵ Men, lavèy jou Sayil rive lavil la, Seyè a te fè Samyèl yon revelasyon. Li te di l' konsa: ¹⁶ -Denmen, vè lè konsa, m'ap voye yon moun ki soti nan peyi Benjamen an bò kote ou. W'a vide

lwil sou tèt li, w'a mete l' apa pou l' chèf pèp mwen an, chèf pèp Izrayèl la. Se li ki va delivre pèp mwen an anba men moun Filisti yo. Mwen wè jan pèp la ap souffri, mwen tandè jan y'ap rele mande

¹⁷ sekou. Lè Samyèl wè Sayil, Seyè a di l' konsa: -Men nonm mwen t'ap pale ou la. Se li ki pral

gouvènè pèp mwen an. ¹⁸ ¶ Sayil mache sou Samyèl ki te toupre pòtay la. Li mande l': -Tanpri,

moutre m' kay divinò a. ¹⁹ Samyèl reponn li: -Se mwen menm divinò a! Pran devan m', moute sou mòn lan. W'a manje avè m' jòdi a. Denmen maten, m'a reponn tout keksyon ou gen sou kè ou. Apre

sa, m'a kite ou al fè wout ou. ²⁰ Kanta manman bourik ou te pèdi depi twa jou yo, ou pa bezwen bat kò ou, paske yo jwenn yo déjà. Men, ki moun pèp Izrayèl la ap chache li menm? Se pa ou menm

ak tout fanmi papa ou yo? ²¹ Sayil reponn li: -Mwen se moun branch fanmi Benjamen an, yonn nan pi piti branch fanmi nan pèp Izrayèl la. Lèfini, fanmi pa m' lan, se li ki pi piti nan tout fanmi

Benjamen yo. Poukisa w'ap di m' tout bagay sa yo? ²² Samyèl pran Sayil ansanm ak domestik li a, li fè yo antre nan gwo pyès kay la, li fè yo chita nan premye plas bò tab la ansanm ak tout envite

yo. Te gen trant gason konsa yo te envite. ²³ Epi Samyèl di chèf kizin lan: -Pote moso vyann mwen

te ba ou mete apa pou mwen an. ²⁴ Chèf kizin lan pran jigò a avèk tout vyann ki te avè l' la, li mete l' devan Sayil. Samyèl di li: -Gade, men moso yo te sere pou ou a. Manje l', paske se pou ou mwen te fè mete l' apa lè mwen t'ap envite pèp la. Se konsa Sayil manje ansanm ak Samyèl jou sa a.

²⁵ Apre sa, yo desann soti sou mòn lan, y' al lavil la. Yo ranje yon kabann pou Sayil sou teras ki

anwo kay la. ²⁶ Nan denmen yo leve byen bonè. Lè bajou kase, Samyèl rele Sayil sou teras la: -Leve non. Mwen pral voye ou ale lakay ou. Sayil leve, epi yo tou de yo soti nan lari a ansanm.

²⁷ Lè yo rive sou limit lavil la, Samyèl di Sayil konsa: -Di domestik ou a pran devan nou. Domestik la pran devan, epi Samyèl di Sayil ankò: -Ou menm, rete la yon ti moman pou m' ka fè ou konnen sa Seyè a di.

Chapter 10

¹ ¶ Samyèl pran yon ti poban lwil oliv, li vide l' sou tèt Sayil. Apre sa, li bo l', epi li di l': -Seyè a ba ou pouvwa pou gouvènè pèp Izrayèl la ki rele l' pa l'. W'a gouvènè pèp li a, w'a delivre yo anba men tout lènmi ki bò kote l' yo. Men sa k'ap fè ou wè se Seyè a menm ki mete ou apa pou

gouvènè pèp ki pou li a. ² Lè w'a kite m' jòdi a, w'a jwenn de mesye toupre tonm Rachèl la lavil Sèlza, nan lizyè peyi moun Benjamen yo. Y'a di ou bourik ou t'ap bouske yo, yo jwenn yo. Men, koulye a papa ou bliye bourik li yo, se pou ou li gen tèt chaje. L'ap mande: Kisa mwen pral fè pou

3
 pitit gason m' lan? Lèfini, w'a mache pi devan jouk w'a rive bò pye bwadchenn Tabò a. Lè w'a rive la, w'a kontre ak twa nèg k'ap moute lavil Betèl pou y' al ofri bèt pou touye pou Bondye. Yonn ap mennen twa jenn ti kabrit, dezyèm lan va gen twa pen nan men l', twazyèm lan va gen yon vesò

4
 fèt an po bèt plen diven. Y'a di ou bonjou, y'a ba ou de nan pen yo. W'a pran yo nan men yo.

5
 Apre sa, w'a moute sou ti mòn Bondye yo rele Gibeya a, kote yon lame moun Filisti moute ganizon yo. Lè w'ap antre nan lavil la, w'a kontre ak yon gwoup pwofèt k'ap desann soti bò lotèl ki sou ti mòn lan. Y'ap jwe gita, y'ap bat tanbou, y'ap jwe fif ak bandjo, y'ap danse, y'ap bay mesaj ki sot

6
 nan Bondye. Lespri Bondye a va desann sou ou, w'a pran danse, w'ap bay mesaj ki soti nan

7
 Bondye tankou yo. Ou p'ap menm moun lan ankò. Lè bagay sa yo va rive, w'a fè tou sa ki vin

8
 pou fèt paske se Bondye k'ap avè ou. Apre sa, w'a pran devan m', w'a desann lavil Gilgal kote m'a vin jwenn ou pita pou m' ofri bèt pou boule nèt pou Seyè a ansanm ak ofrann pou di Bondye

9
 mèsi. Lèfini, w'a tann sèt jou anvan m'a vin jwenn ou ankò pou m' di ou sa pou ou fè. ¶ Vire Sayil vire pou l' kite Samyèl, Bondye fè Sayil tounen yon lòt moun nèt. Jou sa a tout pawòl Samyèl te

10
 di l' yo rive vre. Lè Sayil rive lavil Gibeya ak domestik li a, yon bann pwofèt vin kontre avè l'.

11
 Lespri Bondye a desann sou li epi li pran danse, li pran bay mesaj tankou yo. Tout moun ki te konnen l' anvan sa wè li t'ap danse, li t'ap bay mesaj ansanm ak pwofèt yo. Yonn t'ap di lòt: -Sa ki

12
 rive pitit gason Kich la? Sayil gen lè pwofèt tou? Yon moun lavil Gibeya ki te la mande: -Lòt mesye pwofèt yo, ki moun ki papa yo? Se konsa moun te konmanse ap di: Gen lè menm Sayil

13
 pwofèt tou? Lè Sayil fin danse, lè li te fin bay mesaj, li moute sou ti mòn lan bò lotèl la. Tonton 14
 Sayil la mande l' ansanm ak domestik li a: -Kote nou te ye konsa? Sayil reponn tonton l' lan: -Mwen

15
 t' al chache bourik yo. Lè nou pa jwenn yo, n' al kote Samyèl. Tonton Sayil la mande l': -Rakonte

16
 m' sa li di ou. Sayil reponn li: -Li di m' yo jwenn bourik yo deja. Men, li pa di tonton l' sa Samyèl

17
 te di l' sou koze wa a. ¶ Samyèl reyini pèp Izrayèl la pou fè yon gwo sèvis pou Bondye lavil

18
 Mispa. Li di yo: -Men sa Seyè a, Bondye pèp Izrayèl la di: Se mwen menm ki te fè nou soti kite peyi Lejip la. Se mwen menm ki te delivre nou anba men moun Lejip yo, anba men moun lòt nasyon

19
 ki t'ap peze nou yo. Se mwen menm Bondye nou an ki te pwoteje nou nan tout move pa, nan tout kè sere, epi koulye a n'ap voye m' jete, n'ap di m' se yon wa pou m' mete gouvènè nou! Enben, nou tout, vini non devan Seyè a. Sanble tout moun, branch fanmi pa branch fanmi, fanmi pa fanmi.

20
 Fè yo parèt devan li. Lè sa a, Samyèl fè tout pèp Izrayèl la pwoche branch fanmi pa branch

21
 fanmi. Seyè a chwazi branch fanmi Benjamen an. Apre sa, Samyèl fè tout fanmi branch Benjamen

yo pwoche yonn apre lòt. Seyè a chwazi fanmi Matri a. Lè sa a, li fè tout gason nan fanmi Matri a parèt devan Seyè a, Bondye chwazi Sayil, pitit gason Kich la. Yo chache l', men yo pa t' ka jwenn
²² li. Y' al mande Seyè a si pa gen lòt moun ankò. Seyè a reponn: -Men Sayil kache dèyè pwovizyon
²³ yo! Se konsa yo kouri al wete l' la, yo mennen l', yo fè l' kanpe nan mitan pèp la. Li te pi wo
²⁴ pase yo tout. Samyèl di pèp la: -Men moun Seyè a chwazi a. Pa gen tankou l' nan mitan pèp la.
²⁵ Tout pèp la pran rele: -Viv wa Sayil! Apre sa, Samyèl esplike pèp la ki jan pou wa a boule ak
yo. Lèfini, li ekri tou sa li te di yo nan yon liv li mete devan lotèl Seyè a. Apre sa, Samyèl voye
²⁶ tout moun lakay yo. Sayil tou al lakay li lavil Gibeya. Bondye te pale nan kèk vanyan gason.
²⁷ Yo menm tou, y' ale ansanm ak Sayil. Men te gen kèk vòryen ki t'ap di: -Ki jan jenn gason sa
a ka rive delivre nou? Yo pa okipe Sayil menm, yo pa fè l' kado anyen. Sayil menm fè tankou li pa
konprann.

Chapter 11

¹ ¶ Yon mwa konsa apre bagay sa yo fin pase, Nakach, moun peyi Amon, moute al atake lavil
Jabès nan peyi Galarad. Li sènen lavil la. Mesye lavil Jabès yo di Nakach konsa: -Ann siyen yon
kontra. N'ap asepte ou pou chèf. ² Men, Nakach reponn yo: -M'ap siyen kontra a avèk nou, men
sou yon sèl kondisyon: m'ap pete je dwat nou tout. Konsa, m'a fè tout pèp Izrayèl la wont. ³ Chèf
lavil Jabès la di li: -Ban nou sèt jou pou nou voye mesaje bay tout pèp la nan tout peyi Izrayèl la.
Si pa gen pesonn pou sove nou, lè sa a n'a rann tèt nou ba ou. ⁴ Mesaje yo rive lavil Gibeya kote
Sayil te rete a. Lè yo bay pèp la mesaj la, tout moun pete rele byen fò. ⁵ ¶ Sayil t'ap antre sot nan
jaden ak bèf li yo. Li mande sa ki genyen, pouki tout moun t'ap rele konsa. Yo di l' sa moun lavil
⁶ Jabès yo te vin di yo. Tande li tandè koze a, lespri Bondye desann sou li, epi li fè gwo kòlè. ⁷ Li
pran de bèf, li koupe yo an moso, epi li voye mesaje pote moso vyann bèf yo nan tout peyi Izrayèl
la avèk mesaj sa a: -Tout moun ki va derefize mache dèyè Sayil ak Samyèl nan batay la, n'ap koupe
bèf yo an moso tankou bèf sa a. Seyè a voye yon sèl lapè sou pèp la. Yo tout leve avèk menm lide
⁸ nan tèt yo, yo vin jwenn Sayil. Sayil sanble yo bò lavil Bezèk pou l' pase yo enspeksyon: Te gen
⁹ twasan mil (300.000) sòlda ki te moun pèp Izrayèl ak trantmil (30.000) ki te moun fanmi Jida. Yo
rele mesaje ki te soti lavil Jabès yo, yo di yo: -Men sa n'a di moun lavil Jabès yo nan peyi Galarad:
Denmen, vè midi, n'a vin delivre nou. Lè moun lavil Jabès yo resevwa mesaj la yo te kontan anpil.
¹⁰ Yo voye di Nakach: -Denmen n'ap rann tèt nou ba ou. Lè sa a, w'a fè sa ou vle avèk nou. ¹¹ Nan

denmen maten Sayil pran sòlda yo, li fè twa gwoup. Epi anvan solèy leve, yo kouri antre nan kan moun Amon yo, yo atake yo, yo bat yo. Li te midi yo t'ap touye moun toujou. Sa ki pa t' mouri yo kouri chape kò yo grenn pa grenn. ¹² ¶ Lè sa a, pèp Izrayèl la di Samyèl konsa: -Kote moun ki t'ap di Sayil pa ka wa nou? Lage yo nan men nou pou nou touye yo. ¹³ Men, Sayil di yo konsa: -Nou p'ap touye pesonn jòdi a. Paske jòdi a se jou Seyè a delivre pèp Izrayèl la. ¹⁴ Epi Samyèl di yo: -Leve non. Ann al lavil Gilgal. Lè n'a rive la, n'a fè seremoni pou renmèt li pouvwa a. ¹⁵ Se konsa tout moun moute lavil Gilgal. Yo fè Sayil wa devan lotèl Seyè a. Yo touye bèt yo te ofri pou di Bondye mès. Sayil fè gwo fèt ansanm ak tout moun pèp Izrayèl yo lavil Gilgal.

Chapter 12

¹ ¶ Samyèl di moun pèp Izrayèl yo: -Nou wè mwen fè tou sa nou te mande m' fè. Mwen ban nou yon wa pou gouvènen nou. ² Koulye a nou gen yon wa alatèt nou. Mwen menm, poutèt pa m', mwen fin granmoun, cheve m' fin blan, se pitit gason m' yo ki la avèk nou. Depi mwen jenn gason ³ rive jòdi a m'ap mache alatèt nou. Koulye a, men mwen! Se pou nou di m' devan Seyè a, devan wa li chwazi a, sa mwen janm fè nou. Eske mwen janm pran bèf osinon bourik yonn nan nou? Eske mwen janm pwofite sou pesonn? Eske mwen janm aji mal ak pesonn? Eske mwen janm pran lajan nan men pesonn pou m' kache anyen pou li? Si mwen janm fè bagay konsa, m'ap renmèt sa m' te pran an. ⁴ Pèp la reponn: -Ou pa janm aji mal ak nou. Ou pa janm pwofite sou nou ni ou pa janm pran lajan nan men pesonn. ⁵ Samyèl di yo: -Jòdi a, Seyè a ansanm ak wa li chwazi a temwen nou pa jwenn anyen pou nou repwoche m'. Pèp la reponn: -Seyè a temwen! ⁶ ¶ Samyèl di yo: -Seyè a temwen sa nou di a, li menm ki te voye Moyiz ak Arawon pou fè zansèt nou yo soti kite peyi Lejip ⁷ la. Koulye a, nou menm, vin kanpe la devan lotèl Seyè a pou m' akize nou. Pou konmanse, m'ap fè nou chonje tout bèl bagay Seyè a te fè pou nou ak pou zansèt nou yo. ⁸ Jakòb te desann nan peyi Lejip ansanm ak tout fanmi li. Lè moun peyi Lejip yo pran maltrete zansèt nou yo, zansèt nou yo rele mande Seyè a sekou. Lè sa a, Seyè a voye Moyiz ak Arawon ki fè yo soti kite peyi Lejip la epi ⁹ ki mennen yo vin rete isit la. Men yo bliye Seyè a, Bondye yo a. Lè sa a, Bondye lage yo nan men Sisera, chèf lame lavil Azò a, nan men moun Filisti yo ak nan men wa peyi Moab ki leve fè ¹⁰ lagè ak yo. Yo rele mande Seyè a sekou, yo di konsa: Nou te fè sa ki mal, paske nou te vire do bay Seyè a, n' al sèvi yon bann zidòl yo rele Baal ak Astate. Koulye a, tanpri, delivre nou anba men ¹¹ lènmi nou yo, n'a sèvi ou. Lè sa a, Seyè a voye Jewoubaal, Abdon, Jefte ak mwen menm, Samyèl,

li delivre nou anba men lènmi nou yo ki te tout bò kote nou yo, li fè nou viv ak kè poze. ¹² Epi lè nou wè Nakach, wa moun peyi Amon yo, te pare pou l' atake nou, atout nou te konnen se Seyè a, Bondye nou an, ki wa nou, nou di m': Non! nou pa vle sa ankò. Se yon wa nou vle pou gouvènènen

¹³ nou. ¹⁴ Koulye a, men wa nou te chwazi a. Nou te mande yon wa, Seyè a ban nou li. ¹⁵ Tansèlman, Seyè a, Bondye nou an, va kanpe avèk nou si nou gen krentif pou li, si nou sèvi l', si nou koute sa li di nou, si nou fè tou sa li mande nou fè, si nou menm ansanm ak wa k'ap gouvènènen nou an nou

¹⁶ fè volonte li nan tou sa n'ap fè. ¹⁷ Men, si nou pa koute sa Seyè a di nou, si nou pa fè tou sa li mande nou fè, l'ap leve dèyè nou ansanm ak tout wa nou an. ¶ ¹⁸ Bon, koulye a, rete kanpe kote nou ye a, nou pral wè bèl bagay Seyè a pral fè devan je nou. ¹⁹ Nou pa nan sezon lapli, pa vre? Nou nan sezon chechrès, sezon pou ranmase ble nan jaden nou? Bon! Mwen pral lapriyè Seyè a, li pral voye loraj ak lapli. Lè sa a, n'a konnen, n'a wè ki kalite gwo peche nou te fè devan Seyè a,

²⁰ lè nou te mande yon wa pou gouvènènen nou. ²¹ Samyèl lapriyè Seyè a. Jou sa a, Seyè a voye loraj ak lapli. Tout pèp la pran tranble, yo te vin pè Seyè a ansanm ak Samyèl. ²² Yo tout di Samyèl konsa: -Tanpri, mèt, lapriyè Seyè a, Bondye ou la, pou nou pa mouri. Paske nou mete sou peche nou te fè deja yo, lè nou te mande yon wa pou gouvènènen nou. ²³ Samyèl di pèp la konsa: -Nou pa bezwen pè! Malgre nou fè bagay mal sa a, pa vire do bay Seyè a. Sèvi l' ak tout kè nou. ²⁴ Pa vire do ba li pou n' al sèvi sa ki pa Bondye. Yo pa ka ede nou, yo pa ka sove nou, paske yo menm yo pa anyen. ²⁵ Bondye ap kenbe pawòl li. Li te pwomèt li p'ap voye nou jete, paske li soti pou l' fè nou tounen yon pèp ki rele l' pa l'. ²⁶ Mwen menm, mande Bondye padon! mwen p'ap sispann lapriyè pou nou. Se ta yon gwo peche mwen ta fè devan Seyè a si m' ta fè sa. M'a moutre nou jan pou nou viv byen, jan pou nou mache dwat devan Seyè a. ²⁷ Gen krentif pou Seyè a. Sèvi l' tout bon ak tout kè nou. Chonje tout bèl bagay sa yo li fè pou nou! ²⁸ Mentou, si nou fè sa ki mal, ni nou, ni wa nou an, n'ap mouri.

Chapter 13

¹ ¶ Sayil te majè lè yo te fè l' wa. Li pase kèk tan ap gouvènènen pèp Izrayèl la. ² Sayil chwazi twamil (3000) gason nan pèp Izrayèl la, epi li voye tout rès yo al lakay yo. Li pran demil gason, li fè yo rete avè l' lavil Mikmas ak nan mòn Betèl la. Lòt mil yo te avèk Jonatan, pitit gason Sayil la,

³ lavil Gibeya nan peyi moun Benjamen yo. Jonatan touye chèf moun Filisti yo ki te rete lavil Gibeya a. Moun Filisti yo vin konn sa. Sayil voye moun kònen twonpèt nan tout peyi a pou avèti

⁴
pèp ebre a. Nouvèl la gaye nan tout pèp Izrayèl la: Sayil te touye chèf moun Filisti yo. Koulye a moun Filisti yo pa vle wè pèp Izrayèl la. Se konsa tout pèp la vin jwenn Sayil lavil Gilgal, yo kanpe

⁵
avè l'. Moun Filisti yo menm, bò pa yo tou, sanble pou y' al atake pèp Izrayèl la. Yo te gen trantmil (30.000) cha lagè, simil (6000) kavalye. Pou sòlda apye menm, moun pa t' ka konte sa. Ou ta di grenn sab bò lanmè. Yo moute al pran pozisyon bò lavil Mikmas, sou bò solèy leve lavil Bètavenn.

⁶
Moun pèp Izrayèl yo wè zafè a pa t' bon pou yo menm. Moun Filisti yo te atake moun pèp Izrayèl yo ak fòs. Pèp Izrayèl la vin pèdi espwa. Sa pa t' bon menm pou yo. Gen ladan yo ki al kache nan

gwòt, nan twou wòch, dèyè gwo wòch, nan pi, nan twou anba tè. ⁷ Genyen ki menm janbe lòt bò larivyè Jouden an, al nan peyi moun Gad yo ak moun Galarad yo. Sayil menm te lavil Gilgal toujou.

⁸
Tout moun ki te avè l' yo t'ap tranble sitèlman yo te pè. ¶ Dapre dat Samyèl te fikse ba li a, li rete la sèt jou ap tann Samyèl. Sèt jou yo pase, Samyèl pa vin lavil Gilgal. Pèp la konmanse vire do yo

⁹
kite Sayil. Lè Sayil wè sa, li di yo: -Mennen bèt pou boule nan dife yo ban mwen ansanm ak lòt

ofrann pou mande Bondye padon yo. Epi li fè ofrann pou boule nan dife a. ¹⁰ Li t'ap fini fè sèvis

ofrann pou boule nan dife a lè Samyèl parèt. Sayil al kontre l' pou di l' bonjou. ¹¹ Samyèl di li: -Kisa ou fè konsa? Sayil reponn li: -Mwen wè pèp la t'ap pati kite m'. Ou menm, ou pa t' vini lè ou

te di ou t'ap vini an. Lèfini, moun Filisti yo t'ap sanble bò lavil Mikmas la. ¹² Mwen di nan kè m': Men moun Filisti yo pral vin atake m' isit la lavil Gilgal, epi mwen pa fè anyen pou mete Seyè a bò kote m'. Se konsa mwen pran sou kont mwen pou m' fè ofrann bèt pou boule nan dife pou Seyè

¹³
a. Samyèl di Sayil konsa: -Se bagay moun fou ou fè la a! Ou pa swiv lòd Seyè a, Bondye ou la, te ba ou. Si ou te swiv lòd li, li ta kite ou gouvènen pèp Izrayèl la, lèfini pitit ou yo ta ranplase ou

¹⁴
jouk sa kaba. Men koulye a, rèy ou pa la pou lontan. Seyè a pral chache yon lòt moun ki va fè

tou sa l'a vle l' fè, l'a mete l' chèf sou pèp li a, tou sa paske ou pa t' swiv lòd Seyè a te ba ou a. ¶ ¹⁵

Epi Samyèl leve, li kite lavil Gilgal l' al fè wout li. Tout rèz pèp la pran swiv Sayil ki leve al jwenn sòlda li yo. Yo pati kite Gilgal, y' ale lavil Gibeya nan peyi moun Benjamen yo. Sayil fè enspeksyon

¹⁶
lame ki te avè l' la. Te gen sisan (600) sòlda konsa. Sayil rete nan peyi moun Benjamen yo ansanm ak Jonatan, pitit gason l' lan, ak moun ki te avè l' yo. Moun Filisti yo menm pran pozisyon

¹⁷
lavil Mikmas. Sòlda Filisti yo soti kote yo te ye a pou y' al kraze brize. Yo fè twa gwoup. Yon

gwoup pran chemen ki mennen lavil Ofra nan peyi Chwal la. ¹⁸ Yon lòt gwoup pran chemen ki mennen lavil Bètowon, ak yon lòt gwoup pran chemen ki mennen sou fwontyè a, kote moun ka

donminen tout fon Zeboyim lan ale nan dezè a. ¹⁹ Lè sa a, nan tan sa a, nan tout peyi Izrayèl la yo

pa t' ka jwenn fòjon paske moun Filisti yo te soti pou pa kite ebre yo fè ni nepe ni lans fè. ²⁰ Se

konsa, moun pèp Izrayèl yo te blije al lakay moun Filisti yo pou fè dan chari yo, wou yo, rach yo ak kouto digo yo. ²¹ Moun Filisti yo te mande yo yon ti pyès ajan pou file chak dan rach epi pou fè pwent frenn yo, de ti pyès ajan pou fè dan chari yo ak pwent wou yo. ²² Se sa ki fè, lè jou batay la rive, pa t' gen yonn nan mesye ki te avèk Sayil ak Jonatan yo ki te gen yon nepe osinon yon lans fè. Sèl Sayil ak Jonatan, pitit gason l' lan, te gen yonn pou yo chak. ²³ Moun Filisti yo voye yon ganizon al defann pas Mikmas la.

Chapter 14

¹ ¶ Yon jou, Jonatan, pitit Sayil la, pale ak jenn gason ki t'ap pote zam li yo, li di l' konsa: -Ann al avè m'! Ann travèse lòt bò a, nan kan moun Filisti yo. Men Jonatan pa t' avèti papa l'. ² Sayil menm te moute kan li anba pye grenad Migwon an, sou lizyè peyi Gibeya a. Li te gen sisan (600) sòlda konsa avè l'. ³ Prèt ki t'ap pote jile Bondye a te rele Akija. Se te pitit Akitoub, pitit frè Ikabòd la. Yo te pitit Fineas ki li menm te pitit Eli, ki te prèt Seyè a lavil Silo. Sòlda yo pa t' konnen Jonatan te pati. ⁴ Nan pas kote Jonatan t'ap chache janbe larivyè pou ale nan kan moun Filisti yo, te gen de gwo wòch, yonn chak bò pas la. Yonn te rele Bozès, lòt la Sene. ⁵ Yonn te sou bò nò anfas lavil Mikmas, lòt la sou bò sid anfas lavil Geba. ⁶ Jonatan di jenn gason an: -Ann janbe lòt bò nan kan moun Filisti yo, bann moun sa yo ki pa sèvi Seyè a. Ou pa janm konnen, Seyè a ka ede nou. Paske pa gen anyen ki ka anpeche l' fè nou genyen, nou te mèt anpil, nou te mèt pa anpil. ⁷ Jenn gason an reponn li: -Fè sa ou gen nan lide ou. Ale non! M'ap kanpe avè ou! ⁸ Jonatan di l': -Bon! Nou pral janbe lòt bò a epi n'ap kite yo wè nou. ⁹ Si yo di nou rete kote nou ye a, y'ap vin jwenn nou, n'ap rete kote nou ye a, nou p'ap mache sou yo. ¹⁰ Men, si yo di nou moute vin jwenn yo, enben! n'a mache sou yo. Paske, sa vle di Seyè a gen tan lage yo nan men nou. ¹¹ Yo parèt kò yo, yo kite moun Filisti yo wè yo. Moun Filisti yo di: -Gade! Men kèk ebre k'ap soti nan twou kote yo te kache. ¹² Sòlda Filisti yo rele Jonatan ak jenn gason an, yo di yo: -Moute vin jwenn nou non. Nou gen yon bagay pou n' di nou. Lè sa a, Jonatan di jenn gason an: -Swiv mwen. Seyè a lage yo nan men pèp Izrayèl la. ¹³ Jonatan grenpe moute sou men l' ak sou pye l' yo, jenn gason an t'ap swiv li. Jonatan atake moun Filisti yo, li jete yo atè. Jenn gason an menm t'ap touye yo dèyè l'. ¹⁴ Nan premye atak sa a, Jonatan ak jenn gason an te touye vin sòlda konsa, sou yon ti teren ki pa t' menm mezire yon

¹⁵
 ka (1/4) kawo tè. Tout moun Filisti ki te nan kan an, nan tout plenn lan, vin pè anpil. Sòlda yo te mete an avangad yo ak tout rèz lame a te vin pè tou. Tè a pran tranble, te gen yon gwo kouri nan tout peyi a.

¹⁶
 ¶ Faksyonnè Sayil te mete ap veye lavil Gibeya nan peyi moun Benjamen yo wè te gen yon sèl debandad nan mitan moun Filisti yo ki t'ap kouri tankou moun fou.

¹⁷
 Sayil di moun ki te avè l' yo: -Konte sòlda yo! Gade kilès ki pa la! Yo konte, yo pa jwenn ni Jonatan ni jenn gason ki te konn pote zam li yo.

¹⁸
 Lè sa a, Sayil di Akija konsa: -Pwoche ak Bwat Kontra Bondye a isit. Li te di sa paske jou sa a se Akija ki t'ap pote bwat la devan pèp Izrayèl la.

¹⁹
 Pandan Sayil t'ap pale ak prèt la, kouri a te vin pi rèd nan mitan moun Filisti yo. Sayil di prèt la konsa: -Rete sou sa ou fè!

²⁰
 Li leve ansanm ak moun ki te avè l' yo, yo ale kote batay la te cho a. Moun Filisti yo menm te fin pèdi tèt yo, yo t'ap goumen yonn ak lòt.

²¹
 Gen kèk ebre ki te mete tèt yo bò kote moun Filisti yo, yo te la avèk yo nan kan an. Lè sa a, yo vire kont moun Filisti yo, yo mete yo bò moun pèp Izrayèl yo ki te avèk Sayil ak Jonatan.

²²
 Moun pèp Izrayèl ki te kache nan mòn Efrayim yo vin tandè moun Filisti yo t'ap kraze rak. Yo menm tou yo vini, yo lage kò yo nan batay la, yo t'ap kouri dèyè moun Filisti yo.

²³
 Se konsa jou sa a, Seyè a te sove pèp Izrayèl la. Yo rive jouk lòt bò lavil Bèt-Avenn, yo t'ap goumen toujou.

²⁴
 ¶ Jou sa a, moun pèp Izrayèl yo te fèb anpil tèlman yo te grangou paske Sayil te pran yon gwo angajman devan tout pèp la, li te pase lòd sa a: -Madichon pou nenpòt moun ki va mete manje nan bouch li jòdi a anvan mwen pran revanj mwen sou lènmi m' yo. Se konsa pesonn nan peyi a pa t' manje anyen jou sa a.

²⁵
 Pèp la rive nan yon gwo rakbwa kote ki te gen anpil siwo myèl.

²⁶
 Siwo myèl t'ap koule konsa atè nan rakbwa a, men pesonn pa goute menm ladan l' paske yo te pè pou malè Sayil te di a pa rive yo.

²⁷
 Men, Jonatan pa t' konnen papa l' te bay pèp la prigad sa a. Sa li fè, li lonje baton ki te nan men l' lan, li tranpe bout baton an nan yon gato myèl, epi li mete l' nan bouch li. Lamenm, li santi li vin gen fòs ankò.

²⁸
 Men, yonn nan mesye yo di li: -Tout moun ap tonbe feblès, yo pa manje paske papa ou te ban nou prigad sa a, li te di: Madichon pou nenpòt moun ki manje anyen jòdi a.

²⁹
 Jonatan reponn li: -Sa papa m' fè pèp la la a pa bon menm! Gade jan m' santi m' gen fòs ankò, paske mwen goute yon ti siwo myèl.

³⁰
 Si pèp la te manje nan manje li pran lakay moun Filisti yo jòdi a, koulye a èske nou wè kantite moun Filisti nou ta ka touye met sou sa nou touye deja yo?

³¹
 Jou sa a, moun pèp Izrayèl yo bat moun Filisti yo byen bat, depi lavil Mikmas jouk lavil Ajalon. Pèp la t'ap tonbe feblès tèlman yo te grangou.

³²
 Se konsa yo lage kò yo sou sa yo te pran nan men lènmi yo: yo pran mouton, kabrit, gwo bèf, ti bèf, yo touye yo lamenm epi yo manje vyann lan ak tout san an ladan

33
l'. Y' al di Sayil konsa: -Gade! Men pèp la ap peche kont Seyè a: Y'ap manje vyann ak tout san an ladan l'. Sayil di konsa: -Nou se yon bann lach! Woule yon gwo wòch bò isit la ban mwen.

34
Aprè sa, li bay lòd sa a: -Gaye kò nou nan tout pèp la. Al di pou chak moun mennen bèf yo ak mouton yo ban mwen. Se isit la n'a touye yo, se isit la n'a manje yo pou nou pa fè peche kont Seyè a, pou nou pa manje vyann yo ak tout san yo ladan yo. Jou swa sa a, chak moun mennen bèt yo te

35
genyen, yo touye yo la. Sayil bati yon lotèl pou Seyè a. Se te premye lotèl li te bati. ¶ Sayil di moun yo: -Ann desann dèyè moun Filisti yo. Ann pase nwit lan ap bat yo, n'a piye yo jouk bajou kase, n'a touye yo tout. Yo reponn li: -Fè sa ou wè ki bon! Men, prèt la di: -Ann gade sa Seyè a di

36
nou sou sa! 37 Sayil mande Seyè a: -Eske se pou m' desann dèyè moun Filisti yo? Eske w'ap lage yo nan men pèp Izrayèl la? Men Seyè a pa reponn li jou sa a. 38 Lè sa a, li rele tout chèf pèp la, li

39
di yo: -Pwoche devan la a. Chache konnen ki peche nou te fè jòdi a. Mwen bay pawòl mwen. Mwen fè sèman devan Seyè ki vivan an, li menm ki delivre pèp Izrayèl la, menm si se Jonatan,

40
pitit mwen, ki koupab, se pou l' mouri. Pesonn pa louvri bouch yo di anyen. Epi li di tout pèp Izrayèl la: -Nou menm kanpe bò isit. Mwen menm ak Jonatan, pitit gason m' lan, m'ap kanpe bò

41
la. Pèp la di Sayil: -Fè sa ou wè ki bon! Sayil di Seyè a: -Bondye pèp Izrayèl la! Poukisa ou pa reponn mwen jòdi a? Seyè, Bondye pèp Izrayèl la, tanpri, reponn mwen nan ourim ak toumim yo. Si se mwen menm osinon Jonatan ki koupab, w'a bay ourim yo. Men, si se yon moun nan pèp la ki koupab, w'a bay toumim yo. Seyè a fè yo konnen se bò Sayil ak Jonatan fòt la te ye, pèp la te

42
pou anyen nan sa. Sayil di: -Koulye a, ant Jonatan avè m', di kilès nan nou de a ki koupab. Seyè

43
a fè konnen se Jonatan. Lè sa a, Sayil mande Jonatan: -Kisa ou fè? Jonatan reponn: -Mwen te pran ti gout siwo myèl nan pwent baton ki te nan men m' lan, mwen goute. Men mwen! Mwen pare

44
pou m' mouri. Sayil di li: -Se pou Bondye ban m' pi gwo pinisyon ki genyen si mwen pa fè yo

45
touye ou. Men pèp la di Sayil konsa: -Se Jonatan ki te genyen bèl batay sa a pou pèp Izrayèl la, li pa ka mouri. Mande Bondye padon! Nou fè sèman devan Seyè ki vivan an, nou p'ap kite yon grenn cheve nan tèt li tonbe, paske se avèk lasistans Bondye li fè sa l' fè jòdi a. Se konsa moun yo

46
enpoze yo touye Jonatan. Li pa mouri. Aprè sa, Sayil sispann kouri dèyè moun Filisti yo. Moun

47
Filisti yo menm tounen nan peyi yo. ¶ Aprè yo te fin fè Sayil wa peyi Izrayèl la, li fè lagè ak tout lènmi l' yo alawonnbadè: ak moun Moab yo, moun Amon yo, moun Edon yo, ak wa lavil Soba

48
yo, ak moun Filisti yo. Kote li pase, li genyen batay yo. Li te fè wè jan li te yon vanyan sòlda. Li bat ata moun Amalèk yo. Konsa, li delivre pèp Izrayèl la anba men tout moun ki t'ap piye l' yo.

49
Men pitit gason Sayil te genyen: Se te Jonatan, Yichwi ak Malkichwa. Men non de pitit fi li yo:

Pi gran an te rele Merab, pi piti a te rele Mikal. ⁵⁰ Madan Sayil te rele Akinoam. Se te pitit Akimas.
 Kòmandan lame a te rele Abnè. Se te pitit Nè, tonton Sayil. ⁵¹ Kich, papa Sayil, ak Nè, papa Abnè,
⁵² te pitit gason Abiyèl. ⁵² Sayil pase tout lavi li ap mennen gwo batay ak moun Filisti yo. Chak fwa
 li te jwenn yon vanyan gason osinon yon moun ki te gen anpil fòs ak kouraj, li te mete l' nan lame
 li a.

Chapter 15

¹ ¶ Samyèl di Sayil: -Se mwen menm Seyè a te voye pou vide lwil sou tèt ou pou ou te ka wa
 sou pèp Izrayèl la. Koulye a, koute pawòl Seyè a. ² Men sa Seyè ki gen tout pouvwa a voye di ou:
 Li pral pini moun Amalèk yo paske yo te kenbe tèt ak pèp Izrayèl la lè yo t'ap moute soti peyi Lejip.
³ Koulye a, leve al atake moun Amalèk yo. W'a pran tou sa ki pou yo, w'a ofri yo bay Seyè a. Ou
 p'ap gen pitye pou pesonn lakay yo: N'a touye fanm kou gason, timoun ak ti bebe nan tete, ata bèf,
 mouton, chamo ak bourik. ⁴ Sayil rele tout sòlda li yo. Li pase yo enspeksyon lavil Telayim. Te
 gen desanmil (200.000) sòlda apye ki te moun Izrayèl ak dimil (10.000) sòlda ki te moun Jida.
⁵ Lèfini, li desann toupre yonn nan lavil moun Amalèk yo. L' al cache kò li nan yon ravin chèch.
⁶ Apre sa, li voye avèti moun Kayen yo: -Wete kò nou! Kite moun Amalèk yo pou kont yo, pou
 nou pa touye nou ansanm ak yo. Paske nou menm moun Kayen, nou te aji byen ak pèp Izrayèl la
 lè yo t'ap tounen soti nan peyi Lejip la. Se konsa moun Kayen yo pati, yo wete kò yo nan mitan
 moun Amalèk yo. ⁷ Sayil bat moun Amalèk yo depi lavil Avila rive Chou sou bò solèy leve peyi
 Lejip. ⁸ Li pran Agag, wa moun Amalèk yo, tou vivan, men li touye tout rèz moun yo tankou yon
 ofrann pou Bondye. ⁹ Men Sayil ak sòlda li yo pa t' touye Agag. Yo pa t' touye pi bèl mouton yo
 ni pi bèl bèf yo, ni yo pa t' touye ankenn bèt ki te bon. Men, yo touye tout bèt ki te lèd, tout bèt ki
 te mèt tankou yon ofrann pou Bondye. ¹⁰ ¶ Seyè a pale ak Samyèl, li di l' konsa: ¹¹ -Mwen règrèt
 mwen te fè Sayil wa. Li vire do ban mwen. Li pa fè sa mwen ba li lòd fè. Samyèl pa t' kontan, li
 fè tout nwit lan ap lapriyè nan pye Seyè a. ¹² Nan denmen maten, bonè bonè, li soti al cache Sayil.
 Yo vin di Samyèl Sayil t' ale lavil Kamèl, kote li fè bati yon moniman pou tèt li, apre sa, li tounen
 isit, li desann lavil Gilgal. ¹³ Samyèl al jwenn Sayil. Sayil vin di l' bonjou: -Se pou Seyè a beni
 ou! Mwen fè tou sa li te ban m' lòd fè. ¹⁴ Samyèl mande l': -Ki tout bri mouton ak bèf m'ap tande

15
 nan zòrèy mwen konsa? Sayil reponn li: -Anhan! Se bèt sòlda mwen yo pran kay moun Amalèk yo. Yo pran pi bèl mouton yo ak pi bèl bèf yo, yo pa touye yo pou yo te ka ofri yo bay Seyè a, Bondye ou la. Men, yo touye tout rès yo nèt tankou yon ofrann pou Bondye.

16
 Samyèl di l' konsa:

17
 -Pe bouch ou, tandè! Kite m' di ou sa Seyè a te vin di m' lannwit lan. Sayil di li: -Pale non! Samyèl di li: -Atout yon lè ou te rekonèt ou pa t' anyen, jòdi a se pa ou menm ki chèf tout branch fanmi

18
 pèp Izrayèl la? Se pa Seyè a menm ki te chwazi ou pou wa pèp Izrayèl la? Li voye ou ale avèk lòd espere pou ou te touye tout moun Amalèk yo, bann moun sa yo k'ap fè sa ki mal, tankou yon

19
 ofrann pou Bondye. Se pou ou te goumen ak yo jouk ou te fin touye yo tout. Poukisa ou pa koute sa Seyè a te di ou? Poukisa ou lage kò ou sou sa ou te pran nan men lènmi ou yo, epi ou fè sa ki pa

20
 fè Seyè a plezi. Sayil reponn Samyèl li di li: -Mwen fè tou sa Seyè a te di m' fè! Mwen mache dapre lòd li. Mwen pran Agag, wa moun Amalèk yo, mwen tounen avè l'. Mwen touye tout rès

21
 moun Amalèk yo tankou yon ofrann pou Bondye. Men sòlda mwen yo pa t' touye bèl mouton ak pi bèl bèf yo te jwenn nan sa yo te pran lakay lènmi sa yo. Yo pote yo isit la, lavil Gilgal, pou

22
 yo te ka ofri yo sou lotèl la bay Seyè a, Bondye ou la. Lè sa a, Samyèl di l' konsa: -Dapre ou, kisa Seyè a pito: yon moun k'ap ofri bèt pou boule nan dife, k'ap fè tout kalite ofrann bèt pou li, osinon yon moun k'ap fè sa li di l' fè a? Konn sa tandè! Pito yon moun fè sa Seyè a di l' fè a pase pou l' touye bèt ofri pou Bondye. Pito yon moun soumèt devan Bondye pase pou l' ofri bèl belye

23
 chatre pou Seyè a. Dezobeyi Bondye nan sa l' mande ou fè a se menm bagay ak fè maji. Fè tèt di ak Bondye se menm bagay ak sèvi zidòl. Enben, ou voye pawòl Bondye a jete, Seyè a wete ou

24
 nan plas wa a, li voye ou jete tou. Li pa gen anyen pou l' wè avè ou ankò! ¶ Sayil reponn li: -Mwen peche, mwen pa fè sa Seyè a te ban m' lòd fè. Mwen pa t' koute pawòl ou te di m' lan. Se

25
 pè mwen te pè mesye m' yo kifè m' fè sa yo te vle fè a. Men koulye a, tanpri, padonnen peche

26
 m' lan. Tounen avè m' pou m' ka sèvi Seyè a. Samyèl di li: -Non, mwen p'ap tounen avè ou.

27
 Paske ou voye pawòl Bondye a jete, Seyè a wete ou nan plas wa a, li voye ou jete tou. Samyèl

28
 fè sa li vire pou l' ale, Sayil kenbe rad li, rad la chire. Samyèl di li: -Seyè a rache gouvènman peyi Izrayèl la nan men ou jòdi a. Li rale l' nan men ou. Li pral renmèt li bay yon lòt moun ki pi

29
 bon pase ou. Bondye ki wa pèp Izrayèl la pa konn manti, ni li pa konn chanje lide. Se pa moun

30
 li ye. Li p'ap chanje pawòl. Sayil reponn li: -Mwen peche, se vre! Men, pa fè m' wont devan tout chèf pèp mwen an, devan tout pèp Izrayèl la. Tounen avè m' pou m' ka fè sèvis pou Seyè a,

31
 Bondye ou la. Se konsa Samyèl tounen avèk Sayil, epi Sayil fè sèvis pou Seyè a.

32
 ¶ Apre sa, Samyèl di konsa: -Mennen Agag, wa moun Amalèk yo, ban mwen. Agag vin jwenn li. Li t'ap

tranble tèlman li te pè. Li t'ap di nan kè l': Ala bagay di, mezanmi, se lanmò!³³ Samyèl di li: -Avèk nepe ou, ou te fè anpil manman pèdi pitit yo. Koulye a, nan tout fanm ki sou latè, manman ou pral pèdi pitit pa li tou. Epi li koupe Agag an moso la devan lotèl Seyè a lavil Gilgal.³⁴ Lèfini, Samyèl desann lavil Rama. Sayil menm moute al lakay li lavil Gibeya.³⁵ Depi lè sa a, Samyèl pa janm wè wa Sayil ankò jouk li mouri. Men, sa te fè l' lapenn anpil pou Sayil. Seyè a menm te règrèt deske li te fè Sayil wa pèp Izrayèl la.

Chapter 16

¹ ¶ Seyè a di Samyèl konsa: -Kilè w'a sispann gen lapenn pou Sayil? Se mwen menm ki voye l' jete pou l' pa wa pèp Izrayèl la ankò. Plen ti poban ou lan lwil. Leve ou ale. M'ap voye ou lavil Betleyèm, kay yon nonm yo rele Izayi, paske mwen chwazi yonn nan pitit gason l' yo pou vin wa.

² Samyèl di li: -Ki jan ou vle mwen fè bagay konsa? Si Sayil vin konn sa, l'a touye m'. Seyè a reponn li: -Pran yon jenn ti gazèl avè ou, epi w'a di: Mwen vin fè yon sèvis ofrann bèt pou Seyè a.³ W'a envite Izayi nan sèvis la. Mwen menm, m'a di ou sa pou ou fè. W'a mete moun m'a di ou la apa pou sèvi wa devan m'.⁴ Samyèl fè tou sa Seyè a te di l' fè a. L' ale lavil Betleyèm. Chèf ki responsab lavil yo vin kontre l'. Yo tout te gen kè sote. Yo di l' konsa: -Eske se pou byen nou ou vin isit la?

⁵ Samyèl di: -Wi se pou byen nou. Mwen vin fè yon sèvis ofrann bèt pou Seyè a. Ale mete nou nan kondisyon pou fè sèvis pou Bondye. Apre sa, n'a vin avè m' nan sèvis la. Li te mande Izayi ansanm ak pitit li yo pou yo te mete yo nan kondisyon pou fè sèvis pou Bondye tou. Lèfini, li envite yo nan sèvis ofrann bèt la tou.⁶ ¶ Lè yo rive, Samyèl wè Eliyab, yonn nan pitit gason Izayi yo, li di nan kè l': -Nèg sa a ki kanpe devan lotèl la, sèten se li menm Seyè a chwazi.⁷ Men Granmèt la di l': -Pa gade sou bèl aparans li, ni sou bèl wotè li. Paske mwen mete l' sou kote. Mwen pa jije valè yon moun jan lèzòm fè l' la. Lèzòm gade sou sa ki parèt devan je yo. Men, mwen menm mwen gade sa ki nan kè moun.⁸ Apre sa, Izayi fè rele Abinadab, yon lòt nan pitit gason l' yo, li mennen l' bay Samyèl. Men, Samyèl di: -Sa a tou, se pa li Seyè a chwazi.⁹ Izayi fè mennen Chama devan Samyèl. Men, Samyèl di: -Sa a tou, se pa li Seyè a chwazi.¹⁰ Konsa konsa, Izayi te mennen sèt nan pitit gason l' yo bay Samyèl. Epi Samyèl di Izayi konsa: -Non, Seyè a pa chwazi yonn ladan yo.¹¹ Lè sa a, Samyèl di Izayi ankò: -Se tout pitit gason ou yo sa? Ou pa gen lòt? Izayi reponn: -Wi, mwen gen yon ti dènye. Men, l' al mennen mouton m' yo al nan manje. Samyèl di li: -Voye chache l', paske nou p'ap konmanse sèvis la tout tan li pa vini.¹² Se konsa Izayi voye chache ti nonm lan.

Yo mennen l' vini. Se te yon jenn gason ak bèl ti je, cheve l' te yon ti koulè kannèl, li te gen bèl
 figi. Seyè a di Samyèl: -Men li! Kanpe non, vide lwil sou tèt li. ¹³ Samyèl pran ti poban lwil la, li
 vide l' sou tèt David, la devan tout frè li yo. Lamennm Lespri Seyè a desann sou David. Depi jou
 sa a, li pa t' janm kite l'. Apre sa, Samyèl leve, li tounen lavil Rama. ¹⁴ ¶ Lespri Seyè a te kite Sayil,
 epi Seyè a voye yon move lespri sou li ki t'ap toumante l'. ¹⁵ Moun k'ap sèvi Sayil yo di l' konsa:
 -Gade! Ou konnen Seyè a voye yon move lespri sou ou k'ap toumante ou! ¹⁶ Mèt, annik pase yon
 lòd, epi nou menm ki la avè ou, n'a chache yon moun ki konn jwe gita. Konsa, chak fwa move
 lespri a va vin sou ou, moun lan va jwe pou ou, epi w'a santi yon soulajman. ¹⁷ Sayil di moun k'ap
 sèvi l' yo: -Al chache yon moun ki konn jwe mizik mennen ban mwen. ¹⁸ Yonn nan mesye yo di
 konsa: -Izayi, moun lavil Betleyèm lan, gen yon pitit gason ki konn jwe mizik. Se yon vanyan
 gason, yon bon sòlda ki gen bon pawòl nan bouch li. Lèfini, li byen kanpe. Seyè a avèk li. ¹⁹ Se
 konsa Sayil voye kèk mesaje bò kote Izayi pou di li: -Voye David, pitit gason ou ki konn okipe
 mouton ou yo, ban mwen. ²⁰ Izayi pran yon veso plen diven, yon jenn ti kabrit ak yon bourik chaje
 pen, li bay David pou renmèt Sayil. Epi li voye a al jwenn wa a. ²¹ Se konsa David al jwenn Sayil
 ki pran l' pou sèvi l'. Sayil te vin renmen David anpil. Li pran l' pou pote zam li yo. ²² Sayil voye
 di Izayi konsa: -Tanpri, kite David rete avè m'. Mwen renmen l' anpil. ²³ Depi lè sa a, chak fwa
 move lespri Bondye te voye a desann sou Sayil, David pran gita a epi li tonbe jwe. Lè konsa, move
 lespri a kite l', epi Sayil te soulaje, li te santi l' byen ankò.

Chapter 17

¹ ¶ Moun Filisti yo sanble tout sòlda yo lavil Soko nan peyi moun Jida yo, pou y' al goumen.
 Yo pran pozisyon yon kote yo rele Fwontyè San, ant lavil Soko ak lavil Azeka. ² Sayil vini ansanm
 ak moun Izrayèl yo, yo pran pozisyon nan fon Bwadchenn lan, epi yo ranje kò yo anfas moun Filisti
 yo pou y' al goumen ak yo. ³ Moun Filisti yo te sou yon ti mòn yon bò, moun pèp Izrayèl yo te sou
 yon lòt ti mòn anfas. Fon an te nan mitan de lame yo. ⁴ Yon bowòm yo rele Golyat, moun lavil
 Gat, soti nan kan moun Filisti yo, li parèt devan sòlda pèp Izrayèl yo, li mande pou yonn ladan yo
 vin fè fas kare ak li. Li te gen nèf pye wotè. ⁵ Li te gen yon kas fè nan tèt li ak yon rad fèt an plak
 fè sou li. Rad la te peze sansenkant (150) liv pou pi piti. ⁶ Li te gen janbyè fèt an fè nan janm li,

ak yon ti frenn fèt an asye pandye sou zepòl li. ⁷ Bwa gwo frenn ki te nan men l' lan te menm gwosè
 ak yon gwo manch pilon. Pwent frenn lan te fèt an fè. Li te peze vin liv konsa. Te gen yon sòlda
 ki t'ap mache devan l' avèk plak pwotèj li a. ⁸ Golyat kanpe, epi li rele moun pèp Izrayèl yo, li di
 yo konsa: -Se goumen nou vin goumen? Poukisa atò? Mwen menm, se moun Filisti mwen ye. Nou
 menm, se esklav Sayil nou ye. Chwazi yon nonm nan mitan nou pou l' vin kare avè m'. ⁹ Si l' rive
 bat mwen pou l' touye m', moun Filisti yo va vin esklav moun Izrayèl yo. Men, si se mwen ki bat
 li, si m' touye l', se nou menm moun Izrayèl yo k'ap vin esklav moun Filisti yo pou sèvi yo. ¹⁰ Li
 di yo ankò: -Jòdi a mwen mete tout moun Izrayèl yo an defi. M' pini nou jwenn yon nonm ki pou
 vin kare avè m'. ¹¹ Lè Sayil ak tout sòlda moun Izrayèl yo tande sa sòlda Filisti a te di yo, yo vin
 pè anpil. Yo pran tranble. ¹² ¶ David te pitit gason yon nonm fanmi Efrata yo, ki te rete lavil
 Betleyèm, nan peyi Jida. Nonm lan te rele Izayi. Li te gen wit pitit gason. Sou rèy wa Sayil, li te
 deja fin granmoun. ¹³ Twa premye pitit gason l' yo te pati al nan lagè ansanm ak Sayil. Pi gran an
 te rele Eliyab, dezyèm lan te rele Abinadab, twazyèm lan te rele Chama. ¹⁴ David te dènye pitit
 Izayi. Twa pi gran yo te pati ansanm ak Sayil. ¹⁵ Tanzantan David te konn soti lakay Sayil desann
 lavil Betleyèm pou l' al okipe mouton papa l' yo. ¹⁶ Chak maten, chak aswè, pandan karant jou,
 Golyat te vin kanpe devan sòlda pèp Izrayèl yo pou mande yo batay. ¹⁷ Yon jou, Izayi di David
 konsa: -Pran yon mamit grenn griye ak dis pen sa yo, kouri pote yo bay frè ou yo nan kan an.
¹⁸ Pran dis fwomaj sa yo, pote yo bay kòmandan an. W'a pran nouvèl frè ou yo, ki jan yo ye. Epi
 w'a fè yo ba ou yon bagay pou m' sèten ou wè yo an sante. ¹⁹ Wa Sayil, frè ou yo ansanm ak tout
 lòt mesye Izrayèl yo nan Fon Bwadchenn lan ap goumen ak moun Filisti yo. ²⁰ Nan denmen maten,
 David leve byen bonè, li kite yon gadò pou veye mouton yo pou li, li pran manje a, epi li pati jan
 Izayi te di l' la. Lè li rive nan kan an, moun pèp Izrayèl yo te fèk soti pou y' al pran pozisyon batay.
²¹ Yo t'ap rele pou chofe sòlda yo. Lame moun Filisti yo ak lame moun Izrayèl yo vin kanpe yonn
 anfas lòt pou batay la. ²² David kite manje li te pote a nan men nonm ki te reskonsab pwovizyon
 yo, li kouri kote batay la tapral mare a, l' al jwenn frè li yo. Li mande yo nouvèl yo. ²³ Li t'ap pale
 ak yo konsa, lè Golyat, gwo sòlda Filisti a, moun lavil Gat la, soti nan kan moun Filisti yo, li vin
 kanpe devan sòlda pèp Izrayèl yo pou mande yo batay jan l' te konn fè l' anvan an. David tande sa
²⁴ Golyat t'ap di. Lè moun pèp Izrayèl yo wè Golyat parèt yo pran kouri tèlman yo te pè. ²⁵ Yonn
 t'ap di lòt: -Gade nonm lan non! Tande jan l'ap mete nou an defi! Si yon moun rive bat nonm sa a,
 wa a ap fè moun sa a rich, l'ap marye l' ak pitit fi li. Lèfini, l'ap bay tout fanmi l' yo dwa pou yo pa

janm bezwen peye ankenn taks nan peyi Izrayèl. ²⁶ David mande moun ki te kanpe bò kote l' yo:
 -Kisa y'a bay moun ki va touye sòlda Filisti a, moun ki va wete pèp Izrayèl la nan gwo wont sa a?
 Epitou, kisa sòlda Filisti sa a, ki pa moun k'ap sèvi Seyè a, ye menm pou l' mete lame Bondye vivan
 an an defi vin goumen avè l' la? ²⁷ Mesye yo di l' tou sa y'a fè pou moun ki va touye Golyat la.
²⁸ Eliyab, pi gran nan frè David yo, te tandè l' ap pale ak mesye yo. Li fache sou li, li di l' konsa:
 -Sa w'ap fè la a? Ki moun k'ap okipe mouton ou yo pou ou nan dezè a? Mwen konnen jan ou lafoura.
 Ou toujou sou plan! Se batay la ou vin gade. ²⁹ David reponn li: -Kisa m' fè, mezanmi! Yon senp
 ti keksyon m'ap mande moun yo la a wi! ³⁰ Li vire bò yon lòt moun, li mande l' menm keksyon
 an. Chak fwa, moun yo fè l' menm repons la. ³¹ ¶ Kèk moun ki te tandè sa David t'ap di al rapòte
 sa bay Sayil ki voye chache l'. ³² David di Sayil: -Monwa, pesonn pa dwe kite sòlda Filisti sa a ap
 kraponnen yo konsa. Mwen pral goumen avè l'. ³³ Sayil di David konsa: -Non, ou pa ka goumen
 ak sòlda Filisti sa a. Ou twò piti. Nèg sa a se yon sòlda k'ap goumen depi l' jenn gason. ³⁴ David
 di Sayil: -Monwa, se mwen menm k'ap okipe mouton papa m' yo. Nenpòt lè yon lyon osinon yon
 lous vin pran yonn nan mouton yo, ³⁵ mwen kouri dèyè l', m' atake l', mwen wete mouton an anba
 grif li. Si lè sa a, lyon an osinon lous la konprann pou l' vire sou mwen, mwen pran l' nan gagann,
 mwen bat li jouk mwen touye l'. ³⁶ Menm jan mwen touye lyon ak lous, se konsa m'a touye sòlda
 Filisti sa a ki pa moun k'ap sèvi Seyè a. M'ap touye l' paske li mete lame Bondye vivan an an defi
 vin goumen avè l'. ³⁷ David di ankò: -Seyè a te delivre m' anba pat lyon yo ak pat lous yo, l'a delivre
 m' tou anba men sòlda Filisti sa a. Sayil di David: -Bon, ale non! Mwen mande Seyè a pou l' avèk
 ou! ³⁸ Sayil pran pwòp rad lagè pa l' yo, li mete sou David. Li mete yon kas fè nan tèt David ak
 yon rad fèt an plak fè pou pwoteje kò li. ³⁹ David pase nepe Sayil la nan ren l', anwo rad lagè a.
 Men, li fè sa pou l' mache, li pa t' kapab, paske li pa t' konn sèvi ak tout bagay sa yo. Li di Sayil
 konsa: -Mwen pa ka mache ak tout bagay sa yo sou mwen, mwen pa konn sèvi ak yo. Epi David
 wete tout bagay yo sou li. ⁴⁰ ¶ Lèfini, li pran baton l' nan men l', li ranmase senk ti wòch won nan
 ravin lan, li mete yo nan ralfò li sèvi lè l'ap okipe mouton yo. Apre sa, fistibal li nan men l', li mache
 sou Golyat. ⁴¹ Sòlda Filisti a pran mache sou David tou. Nonm ki t'ap pote plak pwotèj li a t'ap
 mache devan li. Li t'ap pwoche pi pre David. ⁴² Lè sòlda Filisti a gade, li wè David pi pre, li
 tchwipe, epi li vire tèt li sou kote, paske li te wè se yon timoun ak cheve koulè kannèl, ak yon bèl
 ti figi ki te devan l'. ⁴³ Sòlda Filisti a di David konsa: -Gen lè se yon chen mwen ye pou se avèk
 yon baton w'ap mache sou mwen? Epi li pran non bondye l' yo pou madichonnen David. ⁴⁴ Apre

sa, li di ankò: -Mwen pini ou vanse sou mwen pou ou wè si mwen p'ap pran kò ou pou m' bay
⁴⁵zwazo nan syèl ak bèt nan bwa manje. David di sòlda Filisti a konsa: -W'ap mache sou mwen
avèk nepe, gwo frenn ak ti frenn. Men mwen menm, m'ap mache sou ou nan non Seyè ki gen tout
⁴⁶pouvwa a, Bondye lame pèp Izrayèl la. Se li menm ou te mete an defi vin goumen avè ou. Jòdi
a menm, Seyè a pral lage ou nan men m'. M'ap vide ou atè, m'ap koupe tèt ou. Lèfini, m'ap kite
kadav ou ansanm ak kadav sòlda Filisti yo pou zwazo nan syèl ak bèt nan bwa manje. Konsa, tout
⁴⁷moun nan peyi a va konnen pèp Izrayèl la gen yon Bondye. Wi, tout moun ki sanble isit la a va
wè Bondye pa bezwen ni nepe ni frenn pou delivre pèp li a. Batay la rele l' pa l'. Se li menm ki pral
⁴⁸lage tout moun Filisti yo nan men pèp Izrayèl la. ¶ Golyat pran mache ankò sou David. David
⁴⁹menm t'ap kouri al kontre ak li devan lame yo. Li fourè men l' nan ti ralfò li a, li pran yon wòch
ladan l', li mete l' nan fistibal la, li vize Golyat. Li frape sòlda Filisti a nan mitan fwon. Wòch la
⁵⁰antre nan kalbas tèt sòlda Filisti a. Sòlda Filisti a tonbe fas atè. Se konsa David te bat sòlda Filisti
a avèk yon fistibal ak yon wòch. Li vide sòlda Filisti a atè, li touye l'. Li pa t' gen yon bout nepe
⁵¹menm nan men l'. David kouri al bò kote sòlda Filisti a, li moute sou li, li rale nepe sòlda Filisti
a soti nan djenn li, li touye l', lèfini li koupe tèt li. Lè moun Filisti yo wè bowòm yo a te mouri, yo
⁵²kouri met deyò. Sòlda pèp Izrayèl yo ak mesye peyi Jida yo leve, yo pouse gwo rèl lagè yo a,
yo pran kouri dèyè moun Filisti yo jouk devan lavil Gat, jouk devan pòtay Ekwon. Te gen kadav
⁵³moun Filisti sou tout wout ki mennen lavil Charayim lan jouk lavil Gat ak Ekwon. Se lè sa a
moun pèp Izrayèl yo sispann kouri dèyè moun Filisti yo, yo kase tèt tounen. Yo fè yon gwo piyay
⁵⁴nan kan moun Filisti yo. David pran tèt Golyat, li pote l' lavil Jerizalèm, men li kenbe zam sòlda
⁵⁵Filisti a lakay li. Lè Sayil wè David t'ap mache al kontre ak sòlda Filisti a, li mande Abnè,
kòmandan lame li a: -Abnè, pitit ki moun jenn gason sa a ye? Abnè reponn li: -Monwa, mwen fè
⁵⁶sèman, menm jan ou vivan an, mwen pa konnen l'. Wa a di li: -Al chache konnen pitit ki moun
⁵⁷li ye. Apre David fin touye sòlda Filisti a, li tounen nan kan moun pèp Izrayèl yo. Abnè pran l',
⁵⁸li mennen l' devan Sayil. David te kenbe tèt sòlda Filisti a nan men l' toujou. Sayil mande l': -Ti
gason, pitit ki moun ou ye hen! David reponn: -Mwen se pitit moun pa ou la, Izayi, moun lavil
Betleyèm.

Chapter 18

¹ ¶ Lè David fin pale ak Sayil, kè Jonatan, pitit gason Sayil la, vin louvri pou David. Li vin renmen l' tankou li renmen tèt pa li. ² Depi jou sa a, Sayil fè David rete ak li, li pa kite l' tounen lakay papa l' ankò. ³ Jonatan mare zanmi ak David pou tout tan, paske li te renmen l' tankou li te renmen tèt pa li. ⁴ Li wete gwo rad ki te sou li a, li bay David li ansanm ak tout bagay li te genyen, ata nepe li, banza li ak sentiwon l'. ⁵ Chak fwa Sayil te voye David an misyon, kote li pase, li toujou reyisi. Se konsa Sayil moute l' grad, li fè l' chèf nan lame a. Sa te fè tout moun Sayil yo ansanm ak tout pèp la plezi. ⁶ ¶ Sòlda yo t'ap tounen lakay yo. Lè sa a, David te fin touye sòlda Filisti a, li t'ap tounen lakay li tou. Yon bann medam soti nan tout lavil peyi Izrayèl la vin kontre wa Sayil. Yo t'ap chante, yo t'ap danse, yo t'ap jwe tanbouren, yo t'ap bat òg^n, yo t'ap chante pou fè kè moun kontan. ⁷ Medam yo t'ap fè fèt, yo t'ap danse, yo t'ap di: -Sayil desann mil. David desann dimil. ⁸ Sayil pa t' renmen sa menm, li te fache. Li t'ap di: -Anhan! Yo di David touye dimil (10.000), mwen menm, yo di m' touye mil ase! Sèl bagay ki rete la a, se wa ase yo poko fè l' wa! ⁹ Depi jou sa a, Sayil gade David ak move je. ¹⁰ Nan denmen, Bondye voye yon move lespri desann sou Sayil. Msye t'ap depale nan tout kay la, tankou yon moun fou. David menm t'ap jwe gita, jan li te konn fè l' chak jou a. Sayil te kenbe frenn li nan men l'. ¹¹ Sayil di nan kè l': Mwen pral kloure David sou miray la, epi li voye frenn lan an de fwa sou David. Men, chak fwa, David eskive frenn lan. ¹² ¶ Sayil te pè David anpil, paske Seyè a te vire do bay Sayil, se avèk David li te ye koulye a. ¹³ Se konsa Sayil voye David al byen lwen, li wete l' anba je l'. Li mete l' chèf sou mil sòlda. David pa t' chita menm, tout tan li te nan goumen. ¹⁴ Men, kote li pase li toujou kraze lènmi yo, paske Seyè a te kanpe avèk li. ¹⁵ Sayil wè ki jan David t'ap reyisi kote l' pase, li vin pè l' pi rèd. ¹⁶ Men, tout moun nan peyi Izrayèl ak nan peyi Jida te renmen David paske se li yo te konnen pou chèf lame a. ¹⁷ Yon lè Sayil di David konsa: -Men Merab, premye pitit fi mwen an. M'ap ba ou l' pou madanm. Sèl bagay se pou fè m' wè se yon vanyan gason ki pa pè batay ou ye, se pou ou goumen tout kote Seyè a va voye ou al goumen pou li! Sayil t'ap di nan kè l': Konsa, se moun Filisti yo ki pral touye David, mwen p'ap bezwen fè l' mwen menm. ¹⁸ David di Sayil: -Kisa m' ye? Kisa m'ap fè pou m' viv? Kisa fanmi papa m' ye konsa nan peyi Izrayèl la pou m' marye ak pitit fi wa a? ¹⁹ Men, lè lè a rive pou yo te marye Merab ak David, wa a marye Merab ak Adriyèl, moun lavil Meola. ²⁰ Men, Mikal, yon lòt pitit fi Sayil te genyen, te tonbe pou David. Lè y' al di Sayil sa, bagay la te fè l' plezi. ²¹ Sayil t'ap di nan kè l': M'ap bay David Mikal pou madanm. L'ap tounen

yon pèlen pou li, epi moun Filisti yo va touye l'. Se konsa Sayil rele David yon dezyèm fwa, li di
²² l': -Monchè, ou pral vin bofi mwen. Li pale sou kote ak moun pa l' yo, li ba yo lòd pou y' al
 jwenn David an prive pou yo di l': Wa a kontan ou anpil, epi tout moun pa l' yo renmen ou. Se yon
²³ bon lè koulye a pou ou marye ak pitit fi wa a. Se konsa y' al di David sa. David reponn yo: -Se
 bèl bagay pou yon moun marye ak pitit fi wa a. Men, se yon bagay ki twòp pou yon moun ki pòv,
²⁴ ki pa anyen tankou m'. Moun Sayil yo al rapòte wa a sa David te di a. ²⁵ Epi Sayil di yo: -Men
 sa n'a di David: Wa a pa bezwen ou ba l' ankenn lajan pou ou marye ak pitit fi li a. Sèlman sa li ta
 renmen, se san po ti kòk moun Filisti. Konsa, l'a tire revanj sou lènmi li yo. Sayil te fè plan sa a
²⁶ pou David te ka tonbe nan men moun Filisti yo. Moun Sayil yo al rapòte pawòl sa yo bay David.
 David te asepte kondisyon an pou li marye ak pitit fi wa a. Anvan lè a rive pou yo fè maryaj la,
²⁷ David leve, li pati ak sòlda li yo. Li touye desan (200) moun Filisti. Li pote po ti kòk yo bay wa
 a. Li konte yo yonn pa yonn, li renmèt li yo san manke yonn, pou l' te ka tounen bofi wa a. Se konsa
²⁸ Sayil marye Mikal, pitit fi li a, ak David. Lè Sayil vin konprann non sèlman Seyè a te avèk
²⁹ David, men Mikal, pwòp pitit fi Sayil la, te renmen David tou, Sayil te vin pè David plis toujou.
³⁰ Depi jou sa a li te lènmi David jouk jou li mouri. Lame moun Filisti yo te konn vin atake yo.
 Men chak fwa, nan tout chèf k'ap sèvi ak Sayil yo, se toujou David ki te resi kenbe tèt ak yo pi
 byen. Tout moun nan peyi a te vin konsidere l' anpil.

Chapter 19

¹ ¶ Sayil pale ak Jonatan ansanm ak chèf k'ap sèvi avè l' yo, li di yo li fè lide touye David. Men
 Jonatan, pitit gason Sayil la, te renmen David anpil. ² Li fè David konnen sa. Li di l': -Sayil, papa
 m', ap chache touye ou. Denmen maten, rete sou prigad ou. Al kache kò ou yon kote. Pa soti menm.
³ Mwen menm, m'ap soti, mwen pral jwenn papa m' nan jaden kote ou kache a, m'a pale sou ou ak
⁴ li. Jan l' reponn mwen, m'a fè ou konnen. Jonatan t'ap bay bèl pawòl pou David devan papa l', li
 t'ap di konsa: -Monwa, piga ou fè David, sèvitè ou la, anyen. Li menm, li pa janm fè ou anyen. Tou
⁵ sa li fè toujou sèvi ou. Li riske lavi li lè l' al touye sòlda Filisti a. Se konsa Seyè a te delivre tout
 pèp la, se te bèl bagay. Ou te wè sa, ou te kontan. Poukisa koulye a ou ta renmen wè malè rive yon
⁶ moun inonsan, ou ta vle touye David san l' pa fè anyen? Sayil koute Jonatan, li fè sèman, li di l':
⁷ -Mwen fè sèman devan Seyè a ki vivan, yo p'ap touye David. Jonatan rele David, li rapòte l' tout
 pawòl sa yo. Apre sa, li mennen David bay Sayil. Epi David tanmen sèvi wa a ankò jan li te konn

fè anvan an. ⁸ ¶ Lagè pete ankò ak moun Filisti yo. David leve al atake yo, li goumen ak yo, li bat
 yo byen bat, li fè yo kouri met deyò devan li. ⁹ Yon jou Seyè a voye yon move lespri ki desann
 sou Sayil. Sayil te chita lakay li, li te kenbe frenn li nan men l'. David menm t'ap jwe mizik. ¹⁰ Sayil
 t'ap chache kloure David nan miray la ak frenn li, men David eskive kò l', epi frenn lan al antre nan
 miray la. David kouri chape kò l'. Menm jou sa a, nan mitan lannwit, ¹¹ ¶ Sayil voye kèk espyon
 al veye kay David la pou yo te touye l' nan maten. Men, Mikal, madan David, avèti mari l'. Li di
 l': -Si ou pa chape poul ou lannwit lan, denmen maten ou mouri. ¹² Li fè David soti nan yon fennèt.
 David kouri, li chape kò l'. ¹³ Lè sa a, Mikal pran yon zidòl wogatwa, li mete l' kouche sou kabann
 lan, li pran yon zòrye fèt ak plim kabrit, li mete l' nan plas tèt la, epi li kouvri tout ak yon dra. ¹⁴ Lè
 moun Sayil yo vin pou pran David, Mikal di yo David kouche malad. ¹⁵ Men, Sayil voye mesye
 yo tounen pou y' al wè David ak je yo. Li di yo: -Mennen l' isit ban mwen ak tout kabann li an pou
 m' fè touye l'. ¹⁶ Lè mesye yo antre anndan kay la, yo jwenn estati zidòl wogatwa a sou kabann
 lan ak zòrye plim kabrit la kote pou tèt la te ye a. ¹⁷ Sayil di Mikal konsa: -Poukisa ou woule m'
 konsa? Ou kite lènmi mwen an chape. Mikal reponn li: -Li te di m' si m' pa kite l' chape, l'ap touye
 m'! ¹⁸ ¶ David menm kouri chape kò l', l' al jwenn Samyèl lavil Rama. Li rakonte l' tou sa Sayil te
 fè l'. Apre sa, li menm ansanm ak Samyèl y' ale rete lavil Najòt. ¹⁹ Y' al di Sayil men David te lavil
 Najòt nan zòn Rama a. ²⁰ Sayil voye kèk moun al arete l'. Lè yo rive, yo wè yon gwoup pwofèt ki
 te gen lespri Bondye a nan tèt yo, avèk Samyèl kanpe devan yo tankou chèf yo. Lamenm lespri
 Bondye a desann nan tèt moun Sayil te voye yo, epi yo pran fè menm bagay ak pwofèt yo. ²¹ Yo
 vin di Sayil sa. Lè sa a, li voye lòt moun ankò. Yo menm tou, yo pran fè menm bagay ak pwofèt
 yo tou. Yon twazyèm fwa, Sayil voye lòt moun ankò. Yo menm tou, yo pran fè menm bagay ak
 pwofèt yo. ²² Lè sa a, Sayil leve, l' ale li menm lavil Rama. Lè li rive bò gwo sitèn dlo ki lavil
 Sekou a, li mande kote Samyèl ak David ye. Yo di l' yo lavil Najòt nan zòn Rama a. ²³ Li pati dèyè
 yo. Antan l'ap mache konsa, lespri Bondye a desann nan tèt li tou. Li t'ap fè menm bagay ak pwofèt
 yo sou tout wout la, jouk li rive devan lavil Najòt nan zòn Rama a. ²⁴ Li wete tout rad sou li, li fè
 tankou pwofèt yo devan Samyèl. Apre sa, li tonbe atè a toutouni. Li rete tout rèz jounen an ak tout
 lannwit lan atè a konsa. Se depi lè sa a, yo di: Menm Sayil gen lè pwofèt tou?

Chapter 20

¹
 ¶ David kouri kite lavil Najòt nan zòn Rama a, li chape kò l', l' al jwenn Jonatan epi li di l':
 -Kisa m' fè? Kisa m' fè ki mal? Kisa m' fè papa ou pou li vle touye m' konsa? ² Jonatan reponn li:
 -Mande Bondye padon, ou p'ap mouri! Papa m' pa fè anyen san li pa di m'. Pa gen rezon pou l' ta
³
 kache m' sa. Se pa vre, monchè! Men David sèmante, li di l' konsa: -Papa ou konnen jan ou renmen
 m'. Li ka di nan kè l': mwen p'ap kite Jonatan konnen sa mwen gen lide fè a pou sa pa fè l' lapenn.
⁴
 M'ap fè ou sèman devan Bondye, sa ki rete pou m' mouri a pa anyen. Jonatan di l': -Sa ou vle m'
⁵
 fè pou ou! David reponn li: -Denmen se fèt lalin nouvèl. Mwen te sipoze manje ansanm ak wa
⁶
 a. Men, avèk pèmisyon ou, m'ap pati, mwen pral kache nan bwa jouk apre denmen nan aswè. Si
 papa ou wè mwen pa la epi li mande pou mwen, w'a di l' mwen te mande ou pèmisyon pou m' kouri
 rive lakay mwen, lavil Betleyèm, paske se lè pou yo fè sèvis ofrann bèt pou yo fè chak lanne pou
⁷
 tout fanmi mwen. Si li di li dakò, w'a konnen mwen sove. Men, si li fè kolè, w'a konnen li soti
⁸
 vre pou li touye m'. Tanpri, mwen menm k'ap sèvi ou la, m'ap mande ou yon favè, paske se Seyè
 a, Bondye menm, ki te fè ou mare zanmi avè m'. Pa kite anyen rive m'. Si m' antò, se ou menm ki
⁹
 pou touye m'. Pa kite m' rive devan papa ou! ¶ Jonatan di li: -Wete sa nan lide ou, monchè! Si
¹⁰
 mwen vin konnen papa m' soti vre pou touye ou, m'ap avèti ou! David di li: -Ki moun ki va fè
¹¹
 m' konnen si papa ou reponn ou mal? Jonatan di li: -Ann al deyò nan jaden yo. Epi yo tou de
¹²
 soti, y' al nan jaden yo. Lèfini, Jonatan di David konsa: -Mwen pran Seyè a, Bondye pèp Izrayèl
 la, pou temwen. Denmen lè konsa, mwen pral mande papa m' sa ki genyen. M'ap fè menm bagay
 la tou apre denmen. Si mwen wè li pa gen ankenn move santiman nan kè li pou ou, m'ap voye
¹³
 komisyon ba ou. Men, si li fè lide pou li touye ou, mwen mande Bondye pou l' ban mwen pi
 gwo pinisyon ki genyen, si mwen pa voye komisyon ba ou pou ou chape kò ou. Mwen mande pou
¹⁴
 Seyè a toujou la avè ou, menm jan li te konn kanpe la avèk papa m'. Bon, koulye a menm, si lè
¹⁵
 sa a mwen poko mouri, tanpri kenbe pwomès ou te fè m' devan Bondye a. Pa lage m'. Toujou
¹⁶
 aji byen ak moun lakay mwen. Menm lè Seyè a va fin disparèt tout lènmi ou yo sou latè, piga
 ou janm kase kontra zanmi nou te pase yonn ak lòt la nan non fanmi nou. Si ou kase l', se pou
¹⁷
 Bondye pini ou. Jonatan fè David pwomèt li ankò l'ap toujou renmen l', paske li menm Jonatan
¹⁸
 li te renmen David tankou li renmen pwòp tèt pa li. Apre sa, Jonatan di David: -Denmen se fèt
¹⁹
 lalin nouvèl la, y'ap wè ou pa la, paske plas ou ap rete vid. Apre denmen y'ap wè ou pa la menm.
 Lè sa a, w'a desann, w'a ale kote ou te kache dènye fwa a. W'a rete kache dèyè pil wòch Ezèl la.

20

Mwen menm, m'a tire twa flèch nan direksyon pil wòch la, tankou se pil wòch la menm m'ap

21 vize. Lèfini, m'a rele domestik mwen an, m'a voye l' al chache flèch yo pote ban mwen. Si ou tande mwen di l': Gade, flèch yo tonbe bò isit anvan yo gen tan rive kote ou ye a, al pran yo pou mwen, sa vle di ou pa bezwen pè anyen, ou mèt vini. Mwen fè sèman nan non Seyè a, anyen p'ap

22 rive ou. Men, si mwen di domestik la: flèch yo tonbe bò lòt bò, yo depase kote ou ye a, leve met deyò, paske se Seyè a menm k'ap voye ou ale. 23 Pou pwomès nou fè yonn bay lòt la, Seyè a ap

24 fè n'ap kenbe l' pou tout tan. ¶ Se konsa David t' al kache kò li nan jaden yo. Lè fèt lalin nouvèl la rive, wa Sayil vin chita bò tab la pou l' manje. 25 Li te chita nan plas li, sou fotèy bò miray la. Jonatan te chita bò tab la tou anfas wa a. Abnè menm te chita sou kote wa a. Plas David la te vid.

26

Jou sa a, Sayil pa t' di anyen, paske li t'ap di nan kè l': Se yon bagay ki dwe rive l'. Li pa nan kondisyon pou fè sèvis pou Bondye. 27 Sèten, li pa nan kondisyon vre pou l' sèvi Bondye. Men, nan denmen, jou apre jou lalin nouvèl la, plas David la te vid ankò. Sayil mande Jonatan: -Poukisa

28 David, pitit Izayi a, pa vin manje ni ayè, ni jòdi a? Jonatan reponn li: -Li te mande m' pèmisyon

29 pou l' al lavil Betleyèm. Li te di m': Tanpri, kite m' ale paske fanmi nou ap fè yon sèvis ofrann bèt nan lavil Betleyèm. Frè m' yo te voye lòd ban mwen pou m' la. Si ou se zanmi m', kite m' al wè

30 fanmi m' yo. Se poutèt sa li pa nan plas li bò tab wa a. Sayil fè yon sèl kòlè sou Jonatan, li di l': -Ou se yon loraj kale! Koulye a mwen konnen se pran w'ap pran pou David. Se yon wont pou ou!

31 Se yon wont pou manman ou! Men, m' fè ou konnen toutotan pitit Izayi sa a vivan, ou p'ap janm wa nan peyi a, ou p'ap janm ka gouvènen. Voye chache l' mennen ban mwen. Se pou l' mouri.

32 Men Jonatan reponn: -Pouki pou yo touye l' la? Kisa li fè? 33 Lè sa a, Sayil leve frenn li tankou

34 si li ta vle voye l' sou Jonatan. Jonatan vin wè papa l' te soti pou touye David vre. Li leve soti bò tab la, li te fache anpil. Jou sa a, li pa manje anyen. Se te dezyèm jou fèt lalin nouvèl la. Sa te

35 fè l' lapenn anpil pou David, paske papa l' te pale David mal. ¶ Nan denmen maten, Jonatan

36 leve, l' al nan jaden yo pou l' wè David jan li te pwomèt li a. Li pran yon jenn gason avè l'. Epi li di l': -Kouri non. Ou pral chache flèch mwen pral tire yo. Ti gason an pran kouri. Jonatan voye

37 flèch la pou l' depase ti gason an. Lè ti gason an rive kote flèch la te tonbe a, Jonatan pale byen

38 fò, li di l' konsa: -Flèch la pi devan an toujou! Pa kanpe la konsa. Fè vit non! Ti gason an ranmase

39 flèch la, li pote l' tounen bay mèt li. Li pa t' konnen sa sa te vle di. Sèl Jonatan ak David te

40 konnen. Jonatan bay ti gason an tout zam li yo, epi li di l' pote yo tounen lavil pou li. 41 Lè ti

gason an fin ale, David soti dèyè pil wòch la, li lage kò l' atè, li bese twa fwa devan Jonatan. Apre sa, li menm ak Jonatan, yo tonbe yonn nan bra lòt, yo t'ap kriye. Men David te nan pi gwo lapenn

⁴² pase Jonatan. Apre sa, Jonatan di David konsa: -Ale ak kè poze! Nou te fè sèman devan Seyè a pou nou toujou zanmi. Bondye va fè fanmi nou toujou rete zanmi tou. Lè sa a, David leve, l' ale fè wout li. Jonatan menm tounen lavil la.

Chapter 21

¹ ¶ David ale lakay Akimelèk, prèt la, nan lavil Nòb. Akimelèk soti vin kontre l', li te tou ap tranble. Li di l' konsa: -Poukisa ou vin pou kont ou, san moun avè ou? ² David reponn li: -Wa a voye m' regle yon bagay pou li. Li di m' pa kite pesonn konnen sa li voye m' fè a. Pou moun ki avè m' yo, mwen ba yo randevou yon kote. ³ Bon, koulye a, kisa ou gen la a pou moun manje? Ban m' senk pen ou nenpòt lòt sa ou genyen. ⁴ Prèt la di l': -Mwen pa gen pen òdinè la a non. Sèl sa mwen genyen se pen yo mete apa pou Bondye. Mwen ka ba ou li, si ou konnen mesye ou yo pa nan anyen ak fanm depi kèk jou. ⁵ David reponn li: -Se toujou konsa, lè nou nan misyon, nou pa nan anyen ak fanm menm. Sou pwèn sa a, depi m'ap soti ak mesye m' yo, li te mèt pou yon misyon òdinè, mesye m' yo fèt pou toujou nan kondisyon pou yo fè sèvis Bondye, ale wè fwa sa a se pou yon misyon espesyal. ⁶ Se konsa prèt la pran nan pen yo te mete apa pou Bondye yo, li ba li paske sèl sa li te genyen se pen yo te ofri bay Bondye chak jou a. Yo te fèk wete yo sou tab la devan Seyè a pou yo te mete lòt pen fre. ⁷ Men jou sa a, Doèg, yon moun peyi Edon, yonn nan domestik Sayil yo, te la tou, paske li te gen yon bèt pou l' te ofri pou Seyè a. Se li ki te chèf tout gaddò mouton Sayil yo. ⁸ David di Akimelèk ankò: -Eske ou gen yon frenn osinon yon nepe la a ou ka ban mwen? Paske, wa a te ban m' lòd pou m' te pati prese prese, mwen pa t' gen tan pran ni nepe mwen, ni ankenn lòt zam. ⁹ Akimelèk di li: -Mwen gen nepe Golyat, sòlda Filisti ou te touye nan Fon Bwadchenn lan. Men li la dèyè Bwat kontra a, li vlope nan yon moso twal. Si ou vle l', ou mèt pran l'. Se sèl zam ki gen isit la. David di li: -Ban mwen li non! Pa gen pi bon pase l'. ¹⁰ ¶ Lèfini, David pati, li sove pou Sayil, l' ale lakay Akich, wa lavil Gat la. ¹¹ Moun wa Akich yo di wa a konsa: -Se pa David sa, wa peyi a? Se pou li medam yo te fè chante yo t'ap chante lè yo t'ap danse a, chante ki di: Sayil desann mil! David desann dimil! ¹² Pawòl sa yo te aji anpil sou David. Li vin pè Akich, wa lavil Gat la. ¹³ Li pran pòz moun fou li devan yo tout. Li aji tankou yon moun fou lè yo mete men sou li. Li pran fè grabji ak dwèt li sou pòt yo, li kite bave koule sou tout bab li. ¹⁴ Lè sa a,

15

Akich di moun li yo: -Nou pa wè se yon moun fou? Poukisa nou mennen l' ban mwen? Mwen pa gen kont moun fou avè m' deja? Poukisa nou mennen sa a ankò vin plede fè tenten andedan lakay mwen an?

Chapter 22

¹ ¶ David kite lavil Gat, li sove, l' al kache nan yon gwòt toupre lavil Adoulam. Lè frè l' yo ak rès fanmi li vin konn sa, yo tout desann al jwenn li la. ² Lè sa a, tout moun ki te gen pwoblèm, tout moun ki te dwe lajan, tout moun ki pa t' kontan sitiyasyon an vin jwenn li. David vin chèf yo. Te gen katan (400) gason konsa antou. ³ David kite kote l' te ye a, l' ale lavil Mispa nan peyi Moab. Epi li di wa Moab la: -Tanpri, kite papa m' ak manman m' vin rete isit la lakay ou, jouk mwen rive konnen sa Bondye vle fè avè m'. ⁴ Se konsa David mennen papa l' ak manman l' lakay wa Moab la. Yo rete la pandan tout tan David te rete kache nan gwòt la. ⁵ Yon pwofèt yo rele Gad vin di David: -Piga ou rete nan gwòt la. Pati koulye a. Ale nan peyi Jida! David pati vre, l' al nan rakbwa Erèt la. ⁶ ¶ Sayil menm te lavil Gibeya, chita anba pye tonmaren ki sou mòn lan, avèk frenn li nan men l'. Tout chèf ki t'ap sèvi avè l' yo te kanpe la bò kote l'. Li te pran nouvèl moun te vin konnen kote David ak mesye l' yo te ye. ⁷ Epi Sayil di chèf ki t'ap sèvi avè l' yo: -Nou menm fanmi Benjamen yo, koute! Eske nou mete nan lide nou David, pitit gason Izayi a, pral ban nou jaden ak pye rezen tou? Eske l'ap fè nou kaptenn ak chèf nan lame li a? ⁸ Se poutèt sa nou tout n'ap fè konplo sou mwen. Nou yonn pa di m' pwòp pitit gason m' lan te koupe kontra ak David, pitit gason Izayi a? Pa gen yonn nan nou ki pran lapenn pou mwen. Pesonn pa vin di m' pitit gason mwen an ap moute tèt David sou do mwen, yon moun ki t'ap sèvi avè m', epi ki koulye a ap chache mwayen pou li touye m'. ⁹ Doèg, moun peyi Edon an ki te chèf tout moun k'ap travay ak Sayil yo, di l' konsa: -Mwen te wè David, pitit gason Izayi a lè li t' ale lavil Nòb, lakay Akimelèk, pitit gason Akitoub la. ¹⁰ Akimelèk te pale ak Seyè a pou David. Apre sa, li bay David kèk pwovizyon ansanm ak nepe Golyat, sòlda Filisti a. ¹¹ Se konsa, wa a voye rele Akimelèk, prèt la, pitit gason Akitoub la, ansanm ak tout fanmi l' yo ki te prèt tou nan lavil Nòb. Yo tout moute kay wa a. ¹² Sayil di Akimelèk: -W'ap tande m', pitit gason Akitoub la? Akimelèk reponn li: -M'ap tande ou wi, monwa! ¹³ Sayil mande l': -Poukisa ou mete tèt ou ansanm ak David, pitit gason Izayi a, pou nou fè konplo sou mwen? Poukisa ou ba li pwovizyon ansanm ak yon nepe? Poukisa ou pale ak Seyè a pou li? Koulye a, men li leve dèyè m', l'ap chache okazyon pou li touye m'. ¹⁴ Akimelèk reponn li: -Nan tout moun

k'ap sèvi avè ou yo, pa gen yonn ki renmen ou tankou David. Se bofi ou li ye, li fè pati gad kò ou
 yo. Tout moun lakay ou respekte l'.¹⁵ Se pa jòdi a premye fwa mwen pale ak Seyè a pou li, mande
 Bondye padon. Monwa, ou pa bezwen akize ni mwen ni pesonn nan fanmi m' n'ap fè konplo sou
 ou. Mwen pa konn anyen sou koze sa a, monwa!¹⁶ Wa a di l' konsa: -Akimelèk, yo pral touye ou,
 ou menm ansanm ak tout fanmi ou yo.¹⁷ Lèfini, li di gad ki te kanpe bò kote l' yo: -Touye prèt
 Seyè yo. Yo menm tou y'ap fè konplo ak David la. Yo te konnen byen pwòp se sove msye t'ap
 sove, yo pa di m' anyen. Men gad yo refize leve men yo sou prèt Seyè a pou touye yo.¹⁸ Lè sa a,
 Sayil di Doèg: -Ou menm, touye prèt yo: Epi Doèg touye yo tout. Jou sa a, li touye katrevensenk
 prèt Seyè a.¹⁹ Sayil fè touye tout moun ki te rete nan Nòb, lavil prèt yo: fanm kou gason, timoun,
 ti bebe nan tete, ansanm ak bèf, bourik, ak mouton. Yo touye tout.²⁰ ¶ Sèl Abyata, yonn nan pitit
 gason Akimelèk yo, te resi chape kò l'. Li kouri l' al jwenn David.²¹ Li rakonte David ki jan Sayil
 te masakre tout prèt Seyè yo.²² David di l' konsa: -Depi mwen te wè Doèg, nèg peyi Edon an, la,
 mwen te konnen li pa t'ap pa di Sayil sa. Se mwen menm ki reskonsab lanmò tout fanmi ou yo.
 23
 Ou mèt rete avè m'. Ou pa bezwen pè. Koulye a Sayil pral chache touye ni ou ni mwen. Bò kote
 m', anyen p'ap rive ou.

Chapter 23

¹
 ¶ Yon jou, David vin konnen moun Filisti yo t' al atake lavil Keyila, yo t'ap vòlò tout grenn
 jaden moun yo te gen sou glasi yo.² Lè sa a, David al mande Seyè a: -Eske mwen mèt al atake
 moun Filisti yo? Seyè a di David: -Ou mèt ale! Atake yo. Delivre lavil Keyila.³ Men, moun David
 yo di l' konsa: -Kote nou ye bò isit la nan peyi Jida, nou te pè kont kò nou deja. Sa pral pi rèd pou
 nou si se pou n' al lavil Keyila pou n' goumen ak lame moun Filisti yo.⁴ David tounen al pale ak
 Seyè a ankò. Seyè a reponn li: -Leve non! Desann lavil Keyila, paske m'ap lage moun Filisti yo
 nan men ou.⁵ Se konsa, David mache sou lavil Keyila avèk tout moun ki te avè l' yo. Li atake
 moun Filisti yo. Li touye anpil nan yo, epi li pran tout zannimo yo. Se konsa David te delivre moun
 lavil Keyila yo.⁶ Lè Abyata, pitit gason Akimelèk la, te sove al jwenn David, li te desann lavil
 Keyila avèk Bwat Kontra Bondye a nan men l'.⁷ ¶ Yo vin di Sayil David te desann lavil Keyila.
 Epi Sayil di: -Bondye lage l' nan men m' koulye a. Gade ki jan David al fèmen kò l' nan yon lavil

ki gen gwo miray ak gwo pòtay byen solid!⁸ Se konsa Sayil fè rele tout lame li a pou y' al goumen,
 pou yo mache sou lavil Keyila, pou yo sènen David ansanm ak tout moun ki te avè l' yo.⁹ Lè David
 tandè Sayil te fè lide vin atake l', li rele Abyata, prèt la, li di l' konsa: -Pote Bwat Bondye a vini!
¹⁰ Epi David di: -Seyè, ou menm ki Bondye pèp Izrayèl la, mwen tandè yo di Sayil pare pou l' antre
 lavil Keyila, pou l' kraze l' nèt e se dèyè m' li ye.¹¹ Eske moun lavil Keyila yo pral lage m' nan
 men l'? Eske se tout bon Sayil ap desann jan yo di m' li an? O Seyè, Bondye pèp Izrayèl la, tanpri,
 di m' si se vre? Seyè a reponn: -Sayil ap desann vre!¹² David di li: -Eske moun lavil Keyila yo
 pral lage m' nan men Sayil? Seyè a reponn: -Y'ap fè l' vre.¹³ Se konsa David leve ansanm ak tout
 moun ki te avè l' yo. Yo te sisan (600) konsa. Yo kite lavil Keyila lamenn, yo pati, yo pran mache
 san konnen kote yo prale. Lè Sayil vin konnen David te chape soti lavil Keyila, li chanje lide, li pa
 mache sou Keyila ankò.¹⁴ ¶ David te rete kache nan falèz ki nan dezè Zif la, Sayil menm chak
 jou t'ap chache l'. Men, Bondye pa janm lage David nan men Sayil.¹⁵ Atousa David te pè toujou
 paske li te konnen Sayil te soti pou touye l'. David te bò lavil Oreya, nan dezè Zif la.¹⁶ Jonatan,
 pitit Sayil la, al jwenn li la, li t'ap ba l' kouraj. Li t'ap di l' ki jan Bondye ap toujou la avèk li.¹⁷ Li
 t'ap di l' konsa: -David monchè, ou pa bezwen pè! Sayil, papa m', p'ap janm ka jwenn ou. Se ou
 menm ki gen pou wa pèp Izrayèl la. Mwen menm, m'ap vin apre ou. Ata Sayil, papa m', konn sa
¹⁸ tou! De mesye yo koupe yon kontra pou yo toujou zanmi devan Seyè a. David rete lavil Oreya,
 Jonatan ale ale l' lakay li.¹⁹ ¶ Kèk moun nan zòn Zif la moute al jwenn Sayil lavil Gibeya, y' al di
 l': -Men David kache nan peyi nou an, nan falèz ki bò lavil Oreya, sou mòn Akiya ki nan bò sid
²⁰ dezè Jida a. Nenpòt kilè ou fè lide desann lakay nou, ou mèt desann, n'a mete men sou li pou
 nou ba ou li.²¹ Sayil reponn yo: -Se pou Seyè a beni nou pou sa n'ap fè pou mwen la a.²² Ale
 non. Ale wè si se vre. Se pou nou chache konnen byen kote li fè, ki moun ki wè l' la. Paske yo di
²³ m' li malen anpil. Chache konnen tout kote li kab kache. Epi lè n'a sèten tout bon, n'a tounen
 vin jwenn mwen. Lè sa a, m'a desann avèk nou. Si li la toujou nan peyi a, m' aval chache l', menm
²⁴ si m' dwe fouye nan tout rakwen peyi Jida a. Se konsa moun Zif yo leve, yo pran devan wa a,
 yo pati pou peyi yo. David menm ansanm ak moun li yo te nan dezè Maon an, nan fon ki nan pòsyon
²⁵ sid dezè a. Sayil ak moun pa l' yo mete chache David. Men David vin konn sa. Li desann nan
 Pas Galèt la, ki nan dezè Maon an. Epi li rete la. Lè Sayil vin konn sa, li desann dèyè David nan
²⁶ dezè Maon an. Sayil ak mesye l' yo t'ap mache sou yon bò ravin lan sou flan mòn lan. David
 menm ak mesye pa l' yo t'ap mache sou lòt bò a, sou flan mòn anfas la tou. Li t'ap kouri pou l' te

ka mete bèl distans ant li ak Sayil ki t'ap pwoche dèyè l'. Sayil te prèt pou mete men sou li. ²⁷ Lè sa a, yon mesaj vin jwenn Sayil, li di l' konsa: -Tounen touswit, paske men moun Filisti yo ap anvayi peyi a. ²⁸ Sayil sispann kouri dèyè David, l' al mache kontre moun Filisti yo. Se poutèt sa yo rele ravin sa a Galèt Separasyon. ²⁹ David menm ale nan falèz Angedi yo, li rete kache la.

Chapter 24

¹ ¶ Lè Sayil tounen soti fè lagè ak moun Filisti yo, yo vin di l' David te nan dezè Angedi a. ² Sayil pran twamil (3000) sòlda nan pèp Izrayèl la, sa ki te fò anpil nan fè lagè. Epi li pati al chache David ak mesye l' yo sou solèy leve Wòch Kabrit mawon yo. ³ Li rive devan yon gwòt ki te toupre yon pak mouton bò wout la. Li antre nan gwòt la al fè bezwen li. David menm te kache nan fon gwòt la ansanm ak mesye l' yo. ⁴ Mesye yo di David konsa: -Men chans ou, men okazyon Seyè a te di l'ap ba ou a. Seyè a te di: L'ap lage lènmi ou la nan men ou, w'a fè sa ou vle avè l'. David leve, li mache tou dousman, li koupe yon moso nan rad Sayil san Sayil pa konn sa. ⁵ Men apre sa, konsyans David repwoche l' pou ke rad Sayil li te koupe a. ⁶ Li di moun li yo: -Mande Bondye padon! Mwen p'ap fè bagay konsa sou mèt mwen, moun Bondye chwazi pou wa a. Mwen p'ap janm leve men mwen sou li, paske se Seyè a menm ki te chwazi l' pou wa. ⁷ David pale ak mesye l' yo pou yo wete lide konsa nan tèt yo. Li pa kite yo fè Sayil anyen. Sayil leve, li soti nan gwòt la, li mache al fè wout li. ⁸ Lè sa a, David soti dèyè l', li rele l': -Monwa! Monwa! Sayil vire gade dèyè li. David tonbe ajenou, li bese tèt li jouk atè. ⁹ ¶ Epi li di: -Poukisa w'ap koute moun k'ap di ou m'ap chache fè malè sou ou? ¹⁰ Gade, jòdi a ou wè ak je ou ki jan Seyè a te lage ou nan men m' anndan gwòt la. Gen moun ki di m' se pou m' te touye ou. Men, kè m' fè m' mal pou ou. Mwen di mwen p'ap janm leve men m' sou mèt mwen, paske se Seyè a menm ki te chwazi ou pou wa. ¹¹ Gade, papa mwen! Men yon moso ke rad ou nan men m'! Mwen koupe moso ke rad ou, men mwen pa t' touye ou. Koulye a ou konnen, ou wè mwen pa gen anyen dèyè tèt mwen, mwen pa gen ankenn lide mechanste nan tèt mwen. Mwen pa fè ou anyen ki mal. Se ou menm k'ap chache touye m'. ¹² Se pou Seyè a jije ant nou de a kilès ki antò! Se pou Seyè a pini ou pou sa w'ap fè m' la a, paske mwen menm, mwen p'ap janm leve men m' sou ou. ¹³ Jan pwovèb granmoun lontan yo di: Se moun mechan ki fè mechanste! Men mwen p'ap leve men m' sou ou. ¹⁴ Dèyè ki moun wa pèp

Izrayèl la ye konsa? Dèyè ki moun l'ap kouri konsa? Dèyè yon chen mouri? Dèyè yon ti pis?
¹⁵ Seyè a va sèvi nou jij! L'a jije ant nou de a kilès ki antò! Se pou l' mete bouch nan zafè a, pou l' pran defans mwen, pou l' delivre m' anba men ou.
¹⁶ ¶ Lè David fin pale, Sayil di: -Se pa vwa David, pitit gason m' lan, sa? Epi li pran kriye.
¹⁷ Li di David konsa: -Ou gen rezon. Se mwen ki antò! Ou te aji byen avè m'. Se mwen menm ki te aji mal avè ou.
¹⁸ Jòdi a ankò, ou fè m' wè se byen ou vle fè pou mwen paske, atout Seyè a lage m' nan men ou, ou pa touye m'.
¹⁹ Lè yon moun jwenn okazyon pou l' mete men l' sou lènmi l', èske l'ap kite l' al fè wout li san li pa fè l' anyen? Bondye va beni ou pou sa ou fè pou mwen jòdi a.
²⁰ Koulye a, mwen konnen ou gen pou ou wa vre. Avèk ou menm wa pèp Izrayèl la, gouvènman an ap kanpe fèm.
²¹ Men tanpri, pwomèt mwen, nan non Seyè a, ou p'ap touye pitit mwen yo lè m'a mouri, pou non m' pa disparèt nan fanmi papa m'.
²² David pwomèt Sayil li p'ap fè sa. Apre sa, Sayil al lakay li. David menm tounen nan kachèt li ansanm ak mesye pa l' yo.

Chapter 25

¹ ¶ Samyèl mouri, tout pèp Izrayèl la sanble pou yo kriye lanmò li. Lèfini, yo antere l' anndan lakay li lavil Rama. Apre sa, David pati, li desann nan dezè Paran an.
² ¶ Te gen yon nonm moun lavil Maon ki te gen bitasyon l' lavil Kamèl. Nonm lan te rich anpil: li te gen twamil (3.000) tèt mouton ak mil (1000) tèt kabrit. Lè sa a, msye te lavil Kamèl pou fè taye lenn mouton l' yo.
³ Msye te rele Nabal, madanm li te rele Abigayèl. Se te yon fanm ki te gen anpil lespri, lèfini li te bèl. Men, mari a te gen move jan, li pa t' konn boule byen ak moun menm. Se te fanmi moun Kalèb yo.
⁴ Antan David nan dezè a, li vin konnen Nabal t'ap taye lenn mouton l' yo.
⁵ Li voye dis jenn gason bò kote l'. Li di yo konsa: -Moute lavil Kamèl, ale lakay Nabal, n'a di l' mwen voye bonjou pou li.
⁶ Men sa n'a di l': David, frè ou, voye bonjou pou ou ak pou tout moun lakay ou. Li swete tout bagay ap mache byen lakay ou.
⁷ Li tande ou ap taye lenn mouton ou yo. Li voye di ou lè gadò mouton ou yo te avèk nou, nou pa t' janm fè yo anyen. Yo pa janm pèdi anyen pandan tout tan yo te nan zòn Kamèl la.
⁸ Ou mèt mande yo, y'a di ou. David voye mande ou pou resevwa mesye pa l' yo byen, paske se yon jou fèt nou rive isit la. Tanpri, mèt! Bay sa ou genyen pou nou k'ap sèvi ou, ak pou David, zanmi ou lan.
⁹ Mesye David yo rive vre, yo bay Nabal komisyon an nan non David.

10 Epi yo rete tann. Apre yon ti tan, Nabal reponn yo: -David? Pitit gason Izayi a? Mwen pa konnen
 11 l' non. Atò, koulye peyi a plen yon bann domestik ki sove kite lakay mèt yo. Anhan! Pou m'
 pran pen ak dlo lakay mwen ak vyann bèt nou fè touye pou gadò mouton m' yo, pou m' bay yon
 12 bann moun mwen pa konnen kote yo soti? ¶ Mesye yo tounen al jwenn David. Lè yo rive, yo
 13 rapòte ba li tou sa Nabal te di. David di yo: -Pran nepe nou, pase yo nan ren nou. Yo tout pase
 nepe yo nan ren yo. David tou. Lèfini, katsan (400) nan mesye yo ale avèk David. Lòt desan yo
 14 (200) rete dèyè ak pwovizyon yo. Yonn nan domestik Nabal yo al avèti Abigayèl, madanm
 Nabal, li di l': -David te voye kèk mesaj soti nan dezè a avèk bèl bonjou pou mèt nou an. Men li
 15 menm, li pale mal ak yo. Men, mesye sa yo te bon pou nou: Yo pa t' janm chache nou kont. Nou
 16 pa t' janm pèdi anyen pandan tout tan nou te la ansanm ak yo nan savann lan. Yo te pwoteje nou
 lajounen kou lannwit pandan tout tan nou te la nan mitan yo ap pran swen bann mouton nou yo.
 17 Koulye a, kalkile byen sa ou wè ou ka fè, paske bagay la ka vire mal ni pou mèt nou ni pou tout
 18 fanmi l'. Mari ou sitèlman gen move jan, moun pa ka pale ak li. ¶ Abigayèl prese pran desan
 (200) pen, de gwo vesò an po bèt plen diven, senk mouton tou kwit, de barik grenn griye, san mamit
 19 rezen chèch, desan (200) gato fèt ak figfrans chèch, li chaje tou sa sou bourik. Lèfini, li di
 domestik li yo: -Nou mèt pran devan, mwen menm mwen dèyè. Men li pa di Nabal, mari l' anyen.
 20 Abigayèl te moute sou yon bourik. Li t'ap desann yon ti mòn lè li rive nan yon koube, li tonbe
 21 bab pou bab ak David ki t'ap mache sou li ansanm ak mesye l' yo. Yo kontre. David t'ap di nan
 kè li: -Sa m' te bezwen pwoteje tou sa nonm sa a te genyen nan dezè a fè? Li pa janm pèdi anyen
 22 nan sa ki te pou li. Epi se konsa l'ap peye m' pou tout byen mwen fè pou li yo? Se pou Bondye
 ban m' pi gwo pinisyon ki genyen si anvan denmen maten mwen pa touye dènye moun lakay li,
 23 granmoun kou timoun. Wè Abigayèl wè David, li kouri desann bourik li a, li lage kò l' ajenou
 24 devan David, li bese tèt li jouk atè. Apre sa, li lage kò l' nan pye David, li di l' konsa: -Tanpri,
 25 chèf mwen, ban m' pèmisyon pale avè ou. Tout fòt la se pou mwen. Koute sa m'ap di ou. Tanpri,
 pa okipe nonm yo rele Nabal la. Se yon vòryen. Se pa pou gremesi yo rele l' Nabal ki vle di moun
 26 fou. Mwen menm, mèt, mwen pa t' wè mesye ou te voye yo. Se Seyè a menm ki anpeche ou
 mete san deyò pou pran revanj ou. Koulye a, mwen fè sèman devan Seyè a ak devan ou menm,
 27 mèt mwen, se pou tout lènmi ou yo, tout moun ki ta vle fè ou mal, fini tankou Nabal. Koulye a,
 28 mèt mwen, men sa mwen pote fè ou kado pou ou bay moun k'ap mache avè ou yo. Tanpri, mèt,
 padonnen sa mwen fè ki mal. Seyè a va ba ou yon fanmi ki p'ap janm disparèt, paske batay w'ap

mennen yo se batay Seyè a yo ye. Ou p'ap janm fè anyen ki mal nan tout lavi ou. ²⁹ Si yon moun konprann pou li atake ou, si l'ap chache touye ou, Seyè a, Bondye ou la, va pwoteje ou. L'a sere ou bò kote l' tankou lè yon moun ap sere yon bagay li renmen anpil. Men l'ap pran lènmi ou yo, l'ap ³⁰ voye yo jete byen lwen tankou lè yon moun ap voye wòch nan fistibal. Konsa, lè Seyè a va fè ³¹ pou ou tout bèl bagay li te pwomèt ou yo, lè l'a mete ou chèf sou pèp Izrayèl la, wi, lè sa a, mèt mwen, ou p'ap bezwen nan règrèt, ni konsyans ou p'ap boulvèse deske ou te mete san moun deyò san rezon osinon deske ou te pran revanj ou sou moun. Lè Seyè a va beni ou, tanpri pa bliye m'. ³² ¶ David di Abigayèl konsa: -Lwanj pou Seyè a, Bondye pèp Izrayèl la, ki voye ou jòdi a vin ³³ kontre avè m'! Kite m' di Bondye mèsè pou bon konprann ou genyen an, pou ou menm tou deske jòdi a ou vin kenbe men m' pou m' pa mete san moun deyò, pou m' pa tire revanj mwen mwen ³⁴ menm. Seyè a pa kite m' fè ou anyen. Men tou, si ou pa t' prese vin kontre avè m', mwen fè sèman devan Seyè a, Bondye pèp Izrayèl la, anvan denmen maten tout gason fanmi Nabal yo, ata ³⁵ ti gason piti yo, t'ap pèdi lavi yo. Abigayèl renmèt David tou sa li te pote, epi David di l': -Tounen ³⁶ lakay ou ak kè poze! Mwen koute tou sa ou di m' la a. Ou pa bezwen bat kò ou. ¶ Abigayèl tounen al jwenn Nabal lakay li. Nabal t'ap fè yon gwo resepsyon, parèy ak resepsyon wa yo konn ³⁷ fè. Nabal te sou anpil, kè l' te kontan. Madanm lan pa di l' anyen jouk nan denmen maten. Nan maten, lè Nabal fin desoule, madanm li rakonte l' tout bagay. Msye fè yon kriz kè, li vin paralize ³⁸ nan tout kò l'. Dis jou apre sa, Seyè a frape Nabal, Nabal mouri. ³⁹ Lè David vin konnen Nabal mouri, li di: -Lwanj pou Seyè a! Li fè Nabal peye wont li te fè m' lan, li kenbe men m' pou m' pa fè sa ki mal. Seyè a fè mechanste Nabal la tonbe sou pwòp tèt li. Apre sa a David voye di Abigayèl ⁴⁰ li ta renmen l' pou madanm. Moun David yo al jwenn Abigayèl lavil Kamèl. Yo pale avè l', yo ⁴¹ di l' konsa: -David voye nou bò kote ou pou nou mennen ou ba li pou l' sa marye avè ou. Abigayèl leve, li lage kò l' ajenou, li bese tèt li atè epi li di: -Se domestik li mwen ye, mwen tou pare pou m' ⁴² lave pye moun pa l' yo. Abigayèl leve byen vit, li moute bourik li. Li pran senk jenn fi ki t'ap ⁴³ sèvi avè l' lakay li. Li pati ak mesaje David yo. Se konsa li vin madanm David. David te deja marye ak Akinoam, moun lavil Jizreyèl. Li vin pran Abigayèl koulye a, sa te fè l' de madanm. ⁴⁴ Sayil menm bò pa l' te pran Mikal, pitit fi li a ki te madanm David, li marye l' ak Palti, pitit gason Layis, moun lavil Galim.

Chapter 26

¹ ¶ Moun ki rete nan dezè Zif yo al jwenn Sayil lavil Gibeya, yo di l': -Men David kache sou ti mòn Akila a, sou limit dezè peyi Jida a. ² Sayil pati lamenm avèk twamil (3000) sòlda nan pi bon sòlda peyi Izrayèl la. Li desann nan dezè Zif la al dèyè David. ³ Li moute kan li sou ti mòn Akila a, toupre wout la, sou limit dezè a. David menm te nan dezè a toujou. Lè li vin konnen Sayil te vin dèyè l' nan dezè a, ⁴ li voye kèk espyon. Yo vin di l' Sayil te desann vre nan dezè a. ⁵ David leve, li pati pou kote Sayil te moute kan lame li a. Li gade pozisyon kote Sayil ak kòmandan lame li a, Abnè, pitit gason Nè a, te kouche. Sayil te kouche nan mitan, tout sòlda yo te kouche bò kote l'. ⁶ ¶ David pale ak Akimelèk, moun peyi Et la, ak Abichayi, frè Joab, pitit gason Sewouya a, li di yo: -Kilès nan nou de a ki ta vle desann avè m' nan kan Sayil la? Abichayi reponn: -M'ap desann avè ou. ⁷ Se konsa, jou sa a, nan mitan lannwit, David ak Abichayi rive nan kan an. Yo wè Sayil kouche ap dòmi nan mitan kan an, frenn li te plante nan tè a bò tèt li. Abnè ak tout rès sòlda yo te kouche bò kote l' ap dòmi tou. ⁸ Abichayi di David konsa: -Aswè a Seyè a lage lènmi ou lan nan men ou vre. Koulye a, kite m' kloure l' atè a ak pwòp frenn li a. Yon sèl kou ap ase. Mwen p'ap bezwen frape l' de fwa. ⁹ Men, David di Abichayi konsa: -Pa leve men sou li. Seyè a p'ap manke pini moun ki va leve men l' sou wa li menm li te chwazi a. ¹⁰ Apre sa, David di: -Mwen fè sèman devan Seyè ki vivan an, se Seyè a menm ki pou touye l'. L'a mouri lè pou l' mouri a va rive, osinon l'a mouri nan lagè. ¹¹ Mande Bondye padon non! Mwen p'ap leve men m' sou wa Seyè a te chwazi a. Ann pran frenn li a ak krich dlo ki bò tèt li a. Epi ann ale. ¹² David pran frenn lan ak krich dlo ki te bò tèt Sayil la, epi yo ale. Pesonn pa t' wè sa, pesonn pa t' konnen sa ki te rive. Pesonn pa t' leve nan dòmi an. Yo te dòmi nèt ale, paske Seyè a te fè yon gwo dòmi pran yo. ¹³ ¶ Lè sa a, David janbe lòt bò fon an, li kanpe sou tèt ti mòn lan, byen lwen ak yon bèl distans nan mitan li ak lame a. ¹⁴ Li pran rele sòlda yo ak Abnè, pitit gason Nè a, li di yo konsa: -Abnè o! Eske ou tande mwen? Abnè reponn: -Kilès k'ap rele nan zòrèy wa a konsa? ¹⁵ David di li: -Se pa gason ou ye? Ki moun ki ka koresponn avè ou nan peyi Izrayèl la? Poukisa ou pa pwoteje wa a, mèt ou, pi byen? Talè a, gen yon moun ki antre nan kan an ak lide pou l' te touye wa a. ¹⁶ Li pa bon non sa ou fè a. Ou manke sou travay ou, Abnè. Mwen fè sèman devan Bondye ki vivan an, nou tout nou merite yo touye nou. Paske nou pa pwoteje mèt nou, wa Seyè a te chwazi a! Gade non! Kote frenn wa a? ¹⁷ Kote krich dlo ki te bò tèt li a? Sayil rekonèt vwa David, li di: -David, pitit mwen, se ou menm pa vre? David di li: -Se mwen wi, monwa! ¹⁸ Apre sa, li di ankò: -Chèmèt mwen, poukisa w'ap pousib mwen konsa, mwen menm k'ap sèvi ou la? Kisa m' fè? Ki krim mwen fè? ¹⁹ Koulye a,

monwa, tanpri koute sa m'ap di ou. Si se Seyè a ki moute tèt ou kont mwen, al fè yon ofrann ba li pou li ka chanje lide l'. Men, si se moun k'ap fè ou fè sa, se pou madichon Seyè a tonbe sou yo! Koulye a, yo mete m' deyò nan peyi a pou m' pèdi pòsyon pa m' nan tèt Seyè a te bay pèp li a, yo

²⁰ voye m' al sèvi lòt bondye. Pa kite yo touye m' nan peyi etranje byen lwen Seyè a! Poukisa pou wa Izrayèl la leve tout lame a pou l' chache touye yon ti pis tankou m'? Poukisa pou l' ap kouri dèyè

²¹ m' nan tout mòn yo tankou lè moun ap fè lachas ranmye! ¶ Sayil reponn: -Sa m' fè a mal. Tounen non, David, pitit mwen. Mwen p'ap janm chache fè ou mal paske ou refize touye m' aswè a ankò.

²² Wi, mwen te aji tankou moun fou, mwen te fè yon bagay ki pa bon menm. David reponn li:

²³ -Monwa, men frenn ou an. Fè yonn nan moun ou yo janbe vin chache l'. Seyè a va bay chak moun sa yo merite, dapre jan yo mache devan li, dapre jan yo kenbe pwomès yo. Jòdi a, li te lage ou nan men m'. Men, mwen pa fè ou anyen, mwen pa leve men m' sou wa Seyè a te chwazi a.

²⁴ Menm jan mwen te gen respè pou ou jòdi a, m' pa touye ou, mwen mande Seyè a pou l' fè menm

²⁵ bagay la pou mwen tou, lèfini pou l' wete m' nan tout tèt chaje sa yo. Sayil di David: -Se pou Bondye beni ou, pitit gason mwen! Se pou tou sa w'ap fè mache byen! Apre sa, David al fè wout li, Sayil menm tounen lakay li.

Chapter 27

¹ ¶ David di nan kè l': -Yon jou konsa Sayil ap touye m'. L'a pi bon pou mwen si m' sove al kache nan peyi Filisti a. Konsa, Sayil va sispann mache chache m' nan tout peyi pèp Izrayèl la. p'ap

² gen danje pou mwen ankò. David leve ansanm ak sisan (600) moun pa l' yo, y' ale kay Akich,

³ pitit gason Maòk la, ki te wa lavil Gat. David ak mesye l' yo rete ak Akich lavil Gat ak tout fanmi yo. David te gen de madanm ak li: Akinoam, yon fanm lavil Jizreyèl ak Abigayèl, madan defen

⁴ Nabal, moun lavil Kamèl. Lè Sayil vin tande David te kouri al kache lavil Gat, li sispann mache

⁵ chache l' pou mete men sou li. David di Akich konsa: -Si ou se zanmi m' vre, ban m' yon ti plas nan yonn nan bouk andeyò yo pou m' rete. Pa gen rezon, monwa, pou m' rete viv ansanm avè ou

⁶ nan kapital la. Se konsa, jou sa a, Akich ba li lavil Ziklag. Se poutèt sa, depi jou sa a, lavil Ziklag

⁷ toujou rete pou wa peyi Jida yo. David pase ennan kat mwa ap viv nan peyi moun Filisti yo. ¶

⁸ Tanzantan, David ak mesye l' yo te konn pati al atake moun Jechou yo, moun Jizi yo ak moun Amalèk yo jouk lakay yo. Depi tout tan se pèp sa yo ki te rete nan zòn ki soti depi lavil Telayim,

⁹ nan direksyon lavil Chou rive jouk peyi Lejip. Se konsa, David te dechèpiye tout peyi a, li touye

fanm kou gason. Li pran mouton moun yo, bèf yo, bourik yo, chamo yo, ata rad yo. Lèfini, li tounen
¹⁰ al jwenn Akich. Lè Akich mande l': -Ki kote ou t' al demele ou jòdi a? David te kouri reponn li
 se nan zòn Negèv nan peyi Jida a, osinon nan zòn sid peyi moun Jerakmeyèl yo, ou ankò nan zòn
¹¹ sid teritwa moun Kayen yo. Men David te toujou touye tout moun, fanm kou gason, paske li
 t'ap di nan kè l' konsa pesonn p'ap ka al di moun lavil Gat yo sa li te fè yo. Se sa David t'ap mache
¹² fè pandan tout tan li pase nan peyi Filisti a. Akich menm te fè David konfyans. Li t'ap di nan
 kè l': -Msye tèlman fè moun pèp Izrayèl yo rayi l', l'ap blije rete pase tout rès lavi l' ap sèvi m'.

Chapter 28

¹ ¶ Kèk tan apre sa, moun Filisti yo sanble tout sòlda yo pou y' al goumen ak pèp Izrayèl la. Lè
 sa a, Akich di David: -Ou tou konnen se pou ou pati ansanm avè m' ak mesye ou yo pou n' al
² goumen. David reponn li: -Se moun ou mwen ye. Ou pral wè sa m' ka fè. Akich di li: -Bon! Apre
³ sa, m'ap fè ou gad kò mwen pou tout tan. Samyèl te deja mouri lè sa a, tout pèp Izrayèl la te kriye
 kont kriye yo pou li. Apre sa, yo antere l' lavil Rama kote li te moun. Sayil te mete tout divinò deyò
⁴ nan peyi a ansanm ak tout moun ki konn rele mò pou pale ak yo. Sòlda moun Filisti yo te sanble,
 yo moute kan yo bò lavil Chounèm. Sayil menm sanble tout sòlda pèp Izrayèl yo, epi li moute kan
⁵ l' sou mòn Gilboa. Lè Sayil wè lame moun Filisti yo, li soti pè, kè l' pran bat byen fò. ⁶ Se konsa,
 li mande Seyè a sa pou l' fè. Men, Seyè a pa ba li ankenn repons, ni nan rèv, ni avèk ourim yo, ni
⁷ nan mesaj pwofèt yo. ¶ Lè sa a, Sayil rele moun k'ap sèvi avè l' yo, li ba yo lòd sa a: -Al chache
 kote nou ka jwenn yon fanm ki konn rele mò pou l' travay pou mwen. Yo reponn li: -Gen yonn
⁸ lavil Andò. Sayil mete lòt kalite rad sou li, li maske. Li leve, li pati ak de moun pa l'. Yo rive kay
 fanm lan nan mitan lannwit. Sayil di fanm lan: -M' pral ba ou non yon mò pou ou rele pou mwen.
⁹ Rele li pou mwen tanpri, pou m' konnen sa ki pral rive m'. Men, fanm lan di l': -Ou konnen sa
 wa Sayil te fè a pa vre? Li te mete tout divinò ak tout moun k'ap pale ak mò deyò nan peyi a wi.
¹⁰ Poukisa atò w'ap seye pran m' nan plan pou fè yo touye m'? Sayil pran non Bondye fè sèman,
 li di: -Devan Seyè ki vivan an, mwen fè sèman yo p'ap fè ou anyen pou zafè sa a. ¹¹ Fanm lan di
 l': -Ki moun pou m' rele pou ou? Li reponn: -Rele Samyèl pou mwen. ¹² Lè madanm lan wè Samyèl,
 li pete rele, li di Sayil: -Poukisa ou twonpe m' konsa? Ou se wa Sayil! ¹³ Wa a di l': -Ou pa bezwen
¹⁴ pè. Kisa ou wè? Fanm lan di Sayil: -Mwen wè yon lespri k'ap moute soti anba tè a. Wa a di l':

-Kisa ou wè li sanble? Fanm lan reponn: -Se yon vye granmoun gason k'ap moute la a. Li vlope nan yon gwo dra. Lè sa a, Sayil vin konnen se te Samyèl. Li tonbe ajenou, li bese tèt li jouk atè.

15

¶ Samyèl di Sayil: -Poukisa ou detounen m' konsa? Poukisa ou fè m' remoute la a en? Sayil di li: -Mwen nan gwo tèt chaje: Moun Filisti yo ap fè m' lagè. Epi Bondye vire do ban mwen. Li pa pale avè m' ankò, ni nan rèv, ni nan mesaj pwofèt yo. Se poutèt sa, mwen fè rele ou pou ou ka fè

m' konnen sa pou m' fè. ¹⁶ Samyèl di l': -Koulye a Seyè a vire do ba ou, li tounen lènmi ou, poukisa

se mwen menm w'ap mande bagay konsa? ¹⁷ Seyè a annik fè sa li te di m' di ou la: li wete

gouvènman an nan men ou, li bay David li pito. ¹⁸ Ou pa t' koute sa Seyè a te di ou, ou pa t' detwi moun Amalèk yo nèt ansanm ak tou sa yo te genyen. Se poutèt sa Seyè a fè ou sa li fè ou jòdi a.

19

Li pral lage ou ansanm ak tout pèp Izrayèl la nan men moun Filisti yo. Denmen lè konsa, ni ou menm ni pitit gason ou yo ap menm kote avè m'. Seyè a pral lage lame pèp Izrayèl la nan men

moun Filisti yo. ²⁰ ¶ Tande Sayil tande sa, li tonbe tou long atè, li te pè akòz pawòl Samyèl te di

l' la a. Li te fèb anpil tou, paske li pa t' manje anyen depi maten. ²¹ Fanm lan al jwenn Sayil atè a, li wè jan Sayil t'ap tranble tèlman li te pè. Li di l' konsa: -Tanpri, mèt, tande sa m'ap di ou: Mwen

te mete lavi m' an danje pou m' te fè sa ou te mande m' fè a. ²² Koulye a, tanpri, tande sa m'ap di ou. Ou pral fè sa m'a pral di ou la a: Kite m' al pare yon ti manje pou ou. W'a manje, w'a pran fòs

ankò pou ou ka al fè wout ou. ²³ Sayil refize, li di li p'ap manje anyen. Men mesye ki te avè l' yo ansanm ak fanm lan pale avè l', yo fè l' tande rezon. Bout pou bout, li dakò, li leve sot atè a, li chita

sou kabann lan. ²⁴ Fanm lan te gen yon ti bèf li t'ap angrese lakay li. Li prese touye l'. Apre sa, li pran farin, li fè pat avè l', li kwit kèk ti pen san ledven. ²⁵ Li pote tout bagay sa yo devan Sayil ak mesye l' yo. Yo manje. Lèfini, lannwit lan menm yo leve, yo pati.

Chapter 29

1

¶ Moun Filisti yo sanble tout sòlda yo nèt lavil Afèk. Moun Izrayèl yo menm te moute kan yo

bò sous ki nan Fon Jizreyèl la. ² Senk chèf moun Filisti yo te pran devan, yo t'ap mache yonn dèyè lòt ak divizyon lame yo. Yo te gen batayon san sòlda ak rejiman mil sòlda. David t'ap mache dèyè

nèt avèk mesye l' yo ansanm ak Akich. ³ Lòt chèf moun Filisti yo di konsa: -Sa bann ebre sa yo ap fè la a? Akich reponn yo: -Se David, yonn nan mesye ki t'ap sèvi ak Sayil, wa pèp Izrayèl la. Li gen kèk tan depi li avè m'. Depi jou li kite wa pèp Izrayèl la pou li vin jwenn mwen, mwen pa janm

jwenn anyen pou m' repwoche l' jouk jounen jòdi a. ⁴ Men, lòt chèf moun Filisti yo move sou

Akich, yo di l' konsa: -Voye nonm sa a ale. Fè l' tounen nan lavil ou te ba li pou l' rete a. Pa kite l' al goumen avèk nou pou pandan batay la li pa vire sou do nou. Sa ka ba l' yon bèl okazyon pou l' touye moun nou yo, epi pou l' byen ankò ak mèt li. ⁵ Lèfini, fòk nou pa bliye, se David wi. Se pou li medam yo te fè chante sa a lè yo t'ap danse a. Chante a te pati konsa: Sayil desann mil. David desann dimil. ⁶ ¶ Akich rele David, li di l' konsa: -Mwen pran Seyè ki vivan an pou temwen, ou se yon nèg serye, ou toujou kenbe pawòl ou avè m'. Se ta tout plezi m' pou m' ta toujou wè ou la avè m' nan tout antre soti m' nan batay la. Paske, depi jou ou te vin jwenn mwen an rive jòdi a, mwen pa janm jwenn anyen ou fè ki mal. Men, mesye chèf yo pa fè ou konfyans. ⁷ Konsa, tounen al lakay ou ak kè poze. Epi, piga ou janm fè anyen ki pa fè yo plezi, tandè! ⁸ David reponn li: -Men, mèt mwen, kisa m' fè? Depi premye jou mwen prezante lakay ou pou m' sèvi ou rive jòdi a, ou pa janm jwenn anyen mwen fè ki mal. Poukisa ou pa vle mwen vin goumen bò kote ou, monwa, mèt mwen, kont lènmi ou yo? ⁹ Akich reponn David: -Ou pa bezwen di m' anyen! Pou mwen, ou bon tankou yon zanj Bondye. Men, sa ou vle m' fè? Lèt chèf yo di ou pa pral avèk nou nan batay la. ¹⁰ Koulye a, David, denmen maten, ou pral leve bonè bonè, ansanm ak tout mesye ki te vire do bay Sayil, mèt ou a, pou yo te vin avè ou bò isit la vin jwenn mwen. Kou bajou kase n'a pati al fè wout nou. ¹¹ Konsa vre, nan denmen maten, bonè bonè David leve ansanm ak tout mesye l' yo, yo pati, yo tounen nan peyi Filisti a. Lame moun Filisti yo menm pran chemen pou yo ale Jizreyèl.

Chapter 30

¹ ¶ De jou apre, David rive lavil Ziklag ansanm ak mesye l' yo. Moun Amalèk yo te gen tan anvayi tout zòn Negèv nan peyi Jida. Yo te atake lavil Ziklag tou, yo te boule lavil la nèt. ² Lèfini, yo te pran tout fanm yo ak tout rèss moun ki te la yo, timoun kou granmoun, yo te pati ak yo. Yo pa t' touye pesonn, men yo te pran tout moun, yo pati ak yo al fè wout yo. ³ Lè David rive ak mesye l' yo, yo jwenn lavil la te boule nèt epi madanm yo, pitit gason yo ak pitit fi yo pa t' la. Moun yo te pati ak yo tout. ⁴ David ak mesye l' yo pran rele, yo kriye jouk yo pa kapab ankò. ⁵ Moun yo te pati ak de madanm David yo tou, Akinoam, moun lavil Jizreyèl ak Abigayèl, madan defen Nabal, moun lavil Kamèl. ⁶ David te nan gwo tèt chaje paske mesye l' yo te fache anpil deske yo te pèdi pitit gason yo ak pitit fi yo, yo te fè lide touye David ak kout wòch. Men, Seyè a, Bondye li a, te ba l' kont kouraj. ⁷ ¶ David rele Abyata, prèt la, pitit gason Akimelèk la, li di l' konsa: -Pote jile Bondye a isit ban mwen! Abyata pote jile Bondye a bay David. ⁸ David pale ak Seyè a, li di li:

-Eske se pou m' ale dèyè bann moun sa yo? Eske m'a rapouswiv yo? Seyè a di li: -Ou mèt ale dèyè
yo. W'a rapouswiv yo, epi w'a sove moun yo fè prizonye yo. ⁹ Se konsa David pati avèk sisan (600)
mesye ki te avè l' yo. Lè yo rive nan ravin Bezò a, gen kèk nan mesye yo ki rete la. ¹⁰ David menm
kontinye sou wout li avèk katsan (400) moun. Lòt desan (200) yo te rete paske yo te bouke anpil,
yo pa t' gen fòs pou yo te travèse dlo Bezò a. ¹¹ Mesye ki t' ale avèk David yo jwenn yon moun
peyi Lejip nan zòn lan. Yo mennen l' bay David. Yo ba li manje, yo ba li bwè. ¹² Yo ba li yon
moso gato figfrans ak de grap rezen chèch. Lè li fin manje, li reprann fòs, paske depi twa jou twa
nwit li pa t' manje anyen, ni li pa t' janm bwè dlo. ¹³ David mande l': -Ki moun ki mèt ou? Moun
ki bò ou ye? Li reponn: -Mwen se moun peyi Lejip, esklav yonn nan moun Amalèk yo. Jòdi a fè
twa jou depi mèt mwen kite m' dèyè, paske mwen te malad. ¹⁴ Nou te anvayi zòn Negèv kote
keretyen yo rete a. Apre sa, nou pase nan zòn Negèv ki nan peyi Jida a, ak zòn Negèv ki nan peyi
Kalèb la. Lèfini, nou mete dife nan lavil Ziklag. ¹⁵ David mande l': -Eske ou ka mennen nou kote
bann moun sa yo ye a? Li reponn li: -Si ou pran Bondye pou temwen pou ou pwomèt mwen ou
p'ap touye m', ni ou p'ap lage m' nan men mèt mwen an, m'ap mennen ou kote yo ye a. ¹⁶ Li mennen
David kote moun Amalèk yo ye a. Moun Amalèk yo te gaye toupatou. Sa ki t'ap manje t'ap manje,
sa ki t'ap bwè t'ap bwè. Yo t'ap fè fèt paske yo te piye anpil bagay kay moun Filisti yo ak kay moun
peyi Jida yo. ¹⁷ Nan denmen, granmaten David atake yo, li goumen ak yo jouk nan aswè. Pesonn
pa t' chape, an wetan katsan (400) jenn gason ki moute kèk chamo epi ki gen tan kouri ale. ¹⁸ David
sove dènye sa moun Amalèk yo te pran nan piyay yo a. Li sove de madanm li yo tou. ¹⁹ David
mennen tout pitit fi ak tout pitit gason mesye l' yo tounen ansanm ak tout bagay moun Amalèk yo
te pran nan piyay yo a. Pa t' manke anyen. ²⁰ Lèfini, li pran tout bann mouton ak bèf yo tou. Mesye
yo t'ap pouse bèt yo devan, yo t'ap di: -Men, tou sa David pran pou li nan batay la. ²¹ ¶ David t'ap
tounen, li rive bò desan (200) mesye li te kite bò ravin Bezò a paske yo te twò fèb pou ale avè l'.
Yo mache vin kontre David ansanm ak lòt mesye l' yo. David mache al jwenn yo, li di yo bèl bonjou.
²² Men, pami mesye ki t' ale avèk David yo, te gen kèk malveyan ak vòryen ki t'ap di: -Mesye sa
yo pa t' ale avèk nou. Nou p'ap ba yo anyen nan sa nou pran an. N'ap annik renmèt yo madanm yo
ak pitit yo pou y' al fè wout yo. ²³ Men David di yo konsa: -Frè m' yo, nou pa ka fè sa ak sa Seyè
a ban nou! Li pa kite anyen rive nou, li lage bann moun ki te vin piye nou yo nan men nou. ²⁴ Pesonn
pa ka dakò ak sa n'ap di la a. Nou pral separe bay chak moun sa ki pou yo: sa ki te rete dèyè nan
kan an ap resevwa menm kantite ak sa ki te desann al goumen. ²⁵ Se konsa depi jou sa a, David

fè prensip sa a tounen yon lwa. Jouk jòdi a y'ap swiv menm prensip sa a toujou nan peyi Izrayèl.
26

Lè David tounen Ziklag, li pran nan bagay li te sezi nan men lènmi yo, li voye bay zanmi l' yo ki te chèf nan peyi Jida a, li di yo konsa: -Men kado mwen voye pou nou nan sa nou pran nan men

lènmi Seyè yo.²⁷ Li voye bay moun lavil Betèl, bay moun lavil Rama nan zòn Negèv la, bay moun

lavil Yati,²⁸ bay moun lavil Awoyè, bay moun lavil Sifmòt ak moun lavil Echemoa,²⁹ bay moun lavil Rakal ak moun ki rete nan lavil branch fanmi Jerakmeyèl yo ak nan lavil moun Kayen yo,

30 bay moun lavil Oma, moun lavil Borachan ak moun lavil Atak,³¹ bay moun lavil Ebwon, bay moun ki toupatou kote David ak mesye l' yo te pase.

Chapter 31

¹ ¶ Moun Filisti yo leve yon sèl batay ak moun pèp Izrayèl yo sou mòn Gilboa. Anpil nan moun

pèp Izrayèl yo te mouri, rès yo te kouri met deyò.² Moun Filisti yo rive sou Sayil ak pitit gason l'

yo. Yo touye Jonatan, Abinadad ak Malchichwa frèt.³ Batay la te mangonmen kote Sayil te ye a.

Mesye ki t'ap voye flèch nan banza yo te konmanse ap vize sou li. Lè li wè sa, li pran tranble.⁴ Li rele gad ki t'ap pote zam li yo, li di l' konsa: -Rale nepe ou, touye m' pou bann moun sa yo ki pa sèvi Bondye pa gen tan rive sou mwen pou se yo ki touye m', lèfini pou yo pase m' nan betiz. Men gad kò a pa t' vle paske li te pè anpil. Lè sa a, Sayil pran nepe a, li vire l' tèt anba, li lage kò l' sou

li.⁵ Lè gad kò a wè Sayil mouri, li fè menm bagay la tou, li lage kò l' sou nepe li a. Li mouri ansanm

avèk Sayil.⁶ Se konsa, ni Sayil, ni twa pitit gason l' yo, ni gad kò a te mouri. Jou sa a, tout mesye

Sayil yo te mouri.⁷ Lè moun pèp Izrayèl yo ki te rete lòt bò Fon Jizreyèl la ak lòt bò larivyè Jouden wè sòlda pèp Izrayèl yo kouri mèt deyò epi Sayil ak pitit gason l' yo mouri, yo leve kite lavil kote

yo te rete yo, yo mete deyò tou. Moun Filisti yo vini, yo pran lavil yo pou yo.⁸ ¶ Nan denmen apre batay la, moun Filisti yo tounen pou pran zam ki te sou kadav sòlda mouri yo, yo jwenn kadav

Sayil ak kadav twa pitit gason l' yo kouche atè sou mòn Gilboa a.⁹ Yo koupe tèt Sayil, yo pran tout zam li yo. Lèfini, yo voye gaye bon nouvèl sa a nan tout peyi Filisti a, nan tanp zidòl yo ak

nan zòrèy tout pèp la.¹⁰ Yo mete zam Sayil yo nan tanp Astate, zidòl yo a. Epi yo pran rès kò a,

yo kloure l' sou miray lavil Bèt Chean an.¹¹ Lè moun lavil Jabès yo, nan peyi Galarad, vin konnen

sa moun Filisti yo te fè Sayil,¹² tout mesye ki te brave danje yo leve, yo mache tout lannwit jouk yo rive lavil Bèt Chean, yo desann kadav Sayil la ak kadav pitit gason l' yo ki te kloure sou miray

13
lavil la, yo tounen ak yo lavil Jabès, kote yo boule yo. Lèfini, yo pran zosman yo, yo antere yo anba pye tonmaren ki nan lavil Jabès la. Apre sa, yo pase sèt jou san manje.

2 Samuel

Chapter 1

¹ ¶ Apre li te fin kraze moun Amalèk yo, David tounen lavil Ziklag. Lè sa a Sayil te deja mouri. David menm te lavil Ziklag depi de ² jou. Sou twazyèm jou a, yon nonm rive soti nan kan Sayil la. Rad sou li te chire, li te gen pousyè sou tèt li pou fè wè jan li te nan gwo lapenn. Lè li rive bò kote David, li lage kò l' atè, li bese tèt li byen ba devan li. ³ David mande l': -Kote ou soti? Nonm lan reponn: -Mwen chape kò m' soti nan kan moun Izrayèl yo. ⁴ David di li: -Manyè di m' sa ki pase. Nonm lan reponn: -Lame pèp Izrayèl la kouri pandan batay la te mare. Gen anpil sòlda ki mouri. Sayil ak Jonatan, pitit gason l' lan, mouri tou. ⁵ David mande nonm ki te pote nouvèl la: -Ki jan ou fè konnen Sayil ak Jonatan, pitit li a, mouri? ⁶ Nonm lan reponn: -Mwen t'ap pase konsa sou mòn Gilboa a lè mwen wè Sayil apiye sou freng li pou l' pa tonbe atè. Cha lagè lènmi yo ak kavalye yo te prèt pou rive sou li. ⁷ Lè sa a, li voye je l' gade, li wè m', epi li rele m' vini. Mwen reponn li: Men mwen, monwa. ⁸ Li mande m' ki moun mwen ye. Mwen reponn li se yon moun Amalèk mwen ye. ⁹ Lè sa a, li mande m' pou m' pwoche bò kote l' pou m' touye l', paske li te santi tèt li ap vire, atout li te gen tout konnesans li sou li. ¹⁰ Se konsa, mwen pwoche bò kote l', mwen touye l' paske mwen te konnen tonbe li te tonbe li t'ap toujou mouri. Apre sa, mwen pran kouwòn ki te sou tèt li ak braslè ki te nan ponyèt li, mwen pote yo ba ou, mèt. ¹¹ ¶ David chire rad ki te sou li sitèlman sa te fè li lapenn. Tout moun ki te la avè l' yo fè menm bagay la tou. ¹² Yo kriye, yo pran gwo lapenn pou Sayil, pou Jonatan, pitit li a, pou lame Seyè a ak pou pèp Izrayèl la, paske te gen anpil ladan yo ki te mouri nan lagè a. Yo rete san manje jouk aswè. ¹³ Apre sa, David mande jenn gason ki te pote nouvèl la: -Ki moun ou ye? Jenn gason an reponn: -Mwen se pitit yonn nan moun Amalèk ki vin rete nan peyi a. ¹⁴ David di l' konsa: -Bon. Ki jan ou fè pa t' pè leve men ou sou wa Bondye chwazi a pou ou rive touye l'? ¹⁵ David rele yonn nan moun li yo. Li di l' konsa:

¹⁶
 -Vini non! Touye msye. Nonm lan bay moun Amalèk la yon sèl kou, li touye l' frèt. David menm
 te di moun Amalèk la: -Se ou menm ki reskonsab sa ki rive ou la a. Se ou menm ki kondannen tèt
¹⁷
 ou lè ou di ak bouch ou se ou menm ki touye wa Bondye te chwazi a. ¶ David pran chante pou
¹⁸
 plenn lanmò Sayil ak Jonatan, pitit Sayil la. Li bay lòd pou yo moutre chante a bay tout moun
¹⁹
 Jida yo. Se chante banza yo. Yo jwenn li ekri nan Liv Moun ki mache dwat la. O Izrayèl, tout
²⁰
 gwo chèf ou yo mouri sou mòn yo. Yo desann tout vanyan sòlda ou yo. Pa kite nouvèl la rive
 nan lavil Gad. Pa gaye nouvèl la nan lavil Askalon, pou medam peyi Filisti yo pa fè fèt, pou pitit
²¹
 fi moun sa yo ki pa sèvi Bondye pèp Izrayèl la pa leve danse. Nou menm mòn Giboa yo, se pou
 nou rete san yon grenn lapli, san yon degout lawouze. Piga jaden janm pouse sou flan mòn nou yo!
 Paske se la yo trennen nan labou plak fè pwotèj sòlda yo, plak fè pwotèj wa Sayil la ki p'ap janm
²²
 fwote ak lwil ankò. Jonatan pa t' janm fè bak toutotan li pa tranpe flèch li yo nan san lènmi l'
²³
 yo. Sayil pa t' janm tounen toutotan li pa t' plonje nepe l' nan vant vanyan sòlda lènmi l' yo. Sayil
 ak Jonatan, yonn te renmen lòt! Toujou ansanm nan lavi, ansanm ansanm tou nan lanmò! Pi veyatif
²⁴
 pase malfini, pi vanyan pase lyon. Medam pèp Izrayèl yo, rele pou Sayil! Li te konn ban nou
²⁵
 bèl rad koulè violèt ki koute byen chè, ak bèl bijou an lò pou mete sou nou. Vanyan sòlda yo
²⁶
 mouri nan lagè! Jonatan mouri, li blayi atè plat sou ti mòn yo! Mwen gen gwo lapenn pou ou,
 Jonatan, frè mwen. Jan mwen te renmen ou sa a! Jan ou menm ou te renmen m', se pa pale. Zanmitay
²⁷
 sa a te pi bon pou mwen lontan pase renmen ankenn fanm ta ka gen pou mwen! Vanyan sòlda
 yo mouri! Tout zam lagè yo pa vo anyen koulye a!

Chapter 2

¹
 ¶ Apre sa, David mande Seyè a: -Eske se pou m' ale nan yonn nan lavil peyi Jida yo? Seyè a
²
 reponn li: -Wi. Se pou ou ale! David mande l': -Kote pou m' ale? Seyè a di l': -Lavil Ebwon. Se
 konsa, David pran de madanm li yo, Akenoam ki te moun lavil Jizreyèl, ak Abigayèl, vèw Nabal
³
 la, ki te moun lavil Kamèl, li pati pou Ebwon. Li mennen moun ki te avè l' yo tou ansanm ak tout
⁴
 fanmi yo. Y' al rete lavil Ebwon ak nan tout ti bouk ki toupre l' yo. Apre sa, moun Jida yo rive
 lavil Ebwon, yo fè seremoni pou mete David apa pou sèvi wa peyi Jida. David vin pran nouvèl se
⁵
 moun lavil Jabès yo, nan peyi Galarad, ki te antere Sayil. Lè sa a, li voye kèk mesaje di yo konsa:

-Se pou Seyè a beni nou, paske nou moutre jan nou pa janm lage Sayil, mèt nou an. Nou antere l'.

⁶ Mwen mande Seyè a pou li aji byen ak nou tou, pou li pa janm lage nou. Mwen menm pou tèt pa m', m'ap aji byen avèk nou tou poutèt sa nou fè a. ⁷ Koulye a, pran kouraj! Mete gason nou nou!

Sayil, mèt nou an, mouri. Se mwen menm moun Jida yo mete apa pou wa yo. ⁸ ¶ Abnè, pitit gason Nè a, kòmandan lame Sayil la, pran Ichbochèt, pitit gason Sayil la, li mennen l' lavil Manayim, lòt

⁹ bò larivyè Jouden. Rive la, li nonmen Ichbochèt wa peyi Galarad, peyi Asè, peyi Jizreyèl, peyi

Efrayim ak peyi Benjamen, ki vle di wa tout pèp Izrayèl la. ¹⁰ Ichbochèt, pitit gason Sayil la, te gen karantan lè yo fè l' wa peyi Izrayèl. Li gouvènen pandan dezan. Men, moun branch fanmi Jida

yo te kanpe avèk David. ¹¹ David te wa peyi Jida a pandan sètan sis mwa. Se Ebwon li te rete.

¹² Abnè leve ansanm ak moun Ichbochèt yo, yo kite lavil Manayim, y' ale lavil Gabawon. ¹³ Joab menm, pitit gason Sewouya a, leve ansanm ak sòlda David yo, yo kite lavil Ebwon, yo pati tou. Yo kontre ak moun Abnè yo bò rezèvwà Gabawon an. De lame yo pran pozisyon, yonn chak bò

¹⁴ rezèvwà a. Abnè di Joab konsa: -Annou chwazi kèk jenn gason pou yo goumen devan nou la a.

¹⁵ Joab reponn: -Dakò! Se konsa, douz gason nan branch fanmi Benjamen an kanpe pou Ichbochèt

yon bò, douz gason kanpe pou moun David yo lòt bò. ¹⁶ Mesye yo mare goumen. Yonn pran lòt nan tèt epi yonn foure nepe yo nan kò lòt. Se konsa yo tout tonbe ansanm, yo mouri. Se poutèt sa,

yo rele kote sa a nan peyi Gabawon an Elkatazourim. ¹⁷ Apre sa, yon gwo batay pete. Moun David

yo kraze Abnè ansanm ak moun Izrayèl yo. ¹⁸ ¶ Tou twa pitit gason Sewouya yo te la. Se te Joab,

Abichayi ak Asayèl. Asayèl te konn kouri, ou ta di yon ti kabrit mawon. ¹⁹ Li pran kouri pye pou

pye dèyè Abnè ki t'ap chache chape kò l'. ²⁰ Abnè vire tèt li gade dèyè. Li di: -Se pa ou menm sa,

Asayèl? Asayèl reponn li: -Men wi, se mwen. ²¹ Abnè di l' konsa: -Sispann kouri dèyè m'. Pito ou kouri dèyè yonn nan sòlda yo. Lèfini, w'a pran tou sa li genyen. Men, Asayèl pa t' vle sispann kouri

dèyè l'. ²² Yon dezyèm fwa Abnè di l': -Asayèl, m' di ou sispann kouri dèyè m' wi! Pa fòse m' touye

ou! Apre sa, ki jan m'a fè pou m' parèt devan Joab, frè ou la? ²³ Men, Asayèl pa t' vle sispann kouri

dèyè l'. Lè sa a, Abnè ba li yon kou nan vant ak pwent dèyè frenn li an. Frenn lan travèse Asayèl, li soti nan do l'. Asayèl tonbe atè, li mouri frèt. Lè tout moun rive kote li te tonbe a yo rete la.

²⁴ Men Joab ak Abichayi pran kouri pi rès dèyè Abnè. Solèy tapral kouche lè yo rive sou ti bit mòn

Anma a, ki sou bò solèy leve lavil Giyak, sou chemen ki mennen nan dezè Gabawon an. ²⁵ ¶ Moun branch fanmi Benjamen yo sanble bò kote Anbè ankò. Yo pran pozisyon pou yo goumen sou tèt

²⁶
 yon ti mòn. Abnè rele Joab, li di l' konsa: -Gen lè nou p'ap janm fini ak batay sa a? Ou pa wè sa ap fini mal pou nou tou de? Se frè nou ye. Sa w'ap tann pou ou bay moun ou yo lòd pou yo sispann kouri dèyè nou? ²⁷ Joab reponn li: -Mwen pran Bondye ki vivan an pou temwen. Si ou pa t' pale konsa se denmen maten moun pa m' yo t'ap sispann kouri dèyè ou. ²⁸ Joab fè kònen klewon. Tout moun li yo rete sou sa yo te fè, yo sispann kouri dèyè moun Izrayèl yo. Se konsa batay la fini. ²⁹ Abnè ak moun pa l' yo mache nan fon Jouden an tout lannwit lan. Lèfini, yo janbe lòt bò larivyè Jouden an. Yo travèse tout zòn Bitwon an jouk yo rive lavil Manayim. ³⁰ Joab menm, lè li sispann kouri dèyè Abnè a, li sanble tout lame a. Te gen disnèf sòlda nan moun David yo ki pa t' reponn prezan san konte Asayèl. ³¹ Patizan David yo te touye twasanswasant (360) nan patizan Abnè yo, tout nan branch fanmi Benjamen an. ³² Joab ak moun pa l' yo pran kadav Asayèl, y' al antere l' nan tonm fanmi an lavil Betleyèm. Apre sa, yo pase nwit lan ap mache. Solèy t'ap leve lè yo rive Ebwon.

Chapter 3

¹
 ¶ Patizan fanmi Sayil yo ak patizan David yo pase lontan ap goumen yonn ak lòt konsa. Men, patizan David yo t'ap vin pi plis chak jou. Patizan fanmi Sayil yo menm t'ap bese. ² Men sis pitit gason David vin fè antan li te lavil Ebwon: Pi gran an te rele Amon. Se Akenoam, moun lavil Jizreyèl, ki te manman l'. ³ Dezyèm lan te rele Kileyab. Se Abigayel, vèv Nabal la, moun lavil Kamèl, ki te manman l'. Twazyèm lan te rele Absalon. Se Maka, pitit fi Talmayi, wa lavil Gechou a, ki te manman l'. ⁴ Katriyèm lan te rele Adonija. Se Agit ki te manman l'. Senkyèm lan te rele Chefatya. Se Abital ki te manman l'. ⁵ Sizyèm lan te rele Jitreyam. Se Eglà, yon lòt madanm David te genyen, ki te manman l'. Yo tout te fèt antan David te rete lavil Ebwon. ⁶ Pandan lagè a t'ap kaye ant patizan fanmi Sayil yo ak patizan David yo, Abnè te vin gen plis pouvwa chak jou sou patizan fanmi Sayil yo. ⁷ ¶ Sayil te gen yon fanm kay ki te rele Rispa. Se te pitit fi Aja. Abnè te kouche avè l'. Yon jou, Ichbochèt rele Abnè, li di l' konsa: -Poukisa w' al kouche avèk yonn nan fanm kay papa m' yo? ⁸ Lè Abnè tande sa, li fache anpil. Li di Ichbochèt konsa: -Eske se yon chen k'ap travay pou moun Jida yo mwen ye? Jouk jounen jòdi a mwen pa janm trayi Sayil, papa ou, ni patizan l' yo, ni zanmi l' yo. Mwen goumen rèd mare pou m' pa kite yo tonbe nan men David. Lèfini, pou ⁹ koulye a w'ap fè m' repwòch pou yon ti pachat mwen te fè ak fanm sa a! Se pou Seyè a ban m'

pi gwo pinisyon ki genyen si mwen pa fè pwomès Bondye te fè David la rive vre. ¹⁰ Paske li te fè sèman l'ap wete baton kòmandman an nan fanmi Sayil la pou l' mete David wa sou moun Izrayèl
 yo ak sou moun Jida yo, soti depi teritwa Dann lan rive teritwa Becheba a. ¹¹ Ichbochèt pa t' ka reponn Abnè anyen sitèlman li te pè l'. ¹² Abnè voye kèk mesaje bò kote David pou di li: -Ki moun ki pral gouvènen peyi sa a? Pase yon kontra avè m'. M'ap ede ou pou tout moun Izrayèl yo vin jwenn ou. ¹³ David reponn li: -Dakò. M'ap pase yon kontra avè ou. Men, m'ap mande yon sèl bagay. Piga ou vin wè m' san ou pa mennen Mikal, pitit fi Sayil la, avè ou. Se sèl jan pou ou parèt devan m'. ¹⁴ Apre sa, David voye kèk mesaje bò kot Ichbochèt pou di li: -Renmèt mwen Mikal, madanm mwen. Mwen te bay san po ti kòk moun Filisti pou m' te ka marye avè l'. ¹⁵ Ichbochèt voye pran Mikal lakay mari li, Paltyèl, pitit gason Layis la. ¹⁶ Paltyèl pati dèyè l', li t'ap kriye sou tout wout la jouk yo rive lavil Baourim. Men Abnè di Paltyèl konsa: -Tounen lakay ou non, monchè! ¹⁷ Epi Paltyèl tounen tounen l'. Abnè al jwenn chèf fanmi moun Izrayèl yo pou fè yon koze ak yo. Li di yo konsa: -Depi lontan nou te vle se David ki pou te wa nou, pa vre. ¹⁸ Enben, men chans nou. Paske men sa Seyè a te di sou David: Mwen pral sèvi ak David, sèvitè m' lan, pou m' delivre pèp Izrayèl la, pèp mwen an, anba men moun Filisti yo ak anba men tout lòt lènmi l' yo. ¹⁹ Anbè pale ak moun branch fanmi Benjamen yo tou. Lèfini, li pati pou Ebwon pou li al di David sa moun pèp Izrayèl yo ansanm ak tout moun branch fanmi Benjamen yo te tonbe dakò pou yo fè. ²⁰ Li rive lakay David lavil Ebwon. Li te gen vin lòt gason avè l'. David fè yon gwo resepsyon pou Abnè ak pou vin moun ki te avè l' yo. ²¹ Abnè di David konsa: -Monwa, mwen prale koulye a, mwen pral sanble tout moun pèp Izrayèl yo bò kote ou. y'a pase yon kontra avè ou. Konsa, w'a ka gouvènen tout peyi a jan ou vle l' la. David bay Abnè pèmision pou li ale. Lèfini, Abnè pati ak kè poze. ¶ ²² Apre sa, Joab ak patizan David yo vin rive. Yo te sot fè yon pase kay lènmi yo, yo te tounen ak anpil bagay yo te pran lakay yo. Lè sa a, Abnè pa t' Ebwon ankò lakay David, paske David te gen tan kite l' ale ak garanti anyen p'ap rive l'. ²³ Lè Joab ak sòlda ki te avè l' yo rive, yo di Joab Abnè, pitit Nè a, te vin wè wa a, epi wa a kite l' ale ak garanti anyen p'ap rive l'. ²⁴ Joab al jwenn wa a, li di li: -Sa ou fè konsa? Abnè vin jwenn ou epi ou kite l' ale san ou pa fè l' anyen? ²⁵ Ou konn ki moun yo rele Abnè, pitit Nè a! Si li vini, se pou l' ka woule ou, pou l' ka konnen tout vire tounen ou, pou l' konnen tou sa w'ap fè. ²⁶ Lèfini, Joab soti kay David, li voye moun al chache Abnè san David pa konnen. Yo jwenn Abnè bò sitèn dlo Sira a, yo fè l' tounen. ²⁷ Lè Abnè rive Ebwon, Joab mennen l' apa bò pòtay lavil la tankou si li te vle pale pou kont li avè l'. Epi li ba li yon kout ponya

nan vant. Se konsa Joab touye Abnè paske Abnè te touye Asayèl, frè l' la. ²⁸ Lè David vin pran
nouvèl la, li di: -Seyè a wè ni mwen ni moun gouvènman yo, nou pa gen anyen pou nou wè nan
lanmò Abnè, pitit Nè a. ²⁹ Se pou chatiman an tonbe sou tèt Joab ak tout fanmi li! Se pou toujou
gen nan fanmi li moun k'ap gen ekoulman osinon move maladi po, gason k'ap blije fè travay fanm,
gason k'ap mouri nan lagè, gason k'ap nan grangou. ³⁰ Se konsa, Joab ak Abichay, frè l' la, te
ansasinen Abnè paske Abnè te touye Asayèl, frè yo a, lè batay Gabawon an. ³¹ Apre sa, David bay
Joab ak tout moun ki te avè l' yo lòd pou yo chire rad ki sou yo, pou yo mete rad sak sou yo, lèfini
pou yo mache devan sèkèy Abnè a ap kriye. Wa David menm t'ap mache dèyè sèkèy defen an.
³² Yo antere Abnè Ebwon. Apre sa, wa a pran rele byen fò, li t'ap kriye sou tonm Abnè a. Tout pèp
la t'ap kriye tou. ³³ Wa a pran chante pou plenn lanmò Abnè. Li di nan chante a: -Abnè, poukisa
ou mouri bèt konsa? ³⁴ Men ou yo pa t' mare, pye ou yo pa t' nan chenn. Ou mouri tankou moun
ki tonbe nan men malfektè! Tout pèp la pran kriye ankò pou Abnè. ³⁵ Apre sa, pandan tout rès
jounen an, yo pote manje bay David pou li manje, men David fè sèman sa a: -Se pou Bondye ban
m' pi gwo pinisyon ki genyen si mwen mete anyen nan bouch mwen anvan solèy kouche! ³⁶ Tout
pèp la vin konn sa. Sa te fè yo plezi. Pou di vre, tou sa David te fè te fè pèp la plezi. ³⁷ Se konsa
tout moun David yo ansanm ak tout moun pèp Izrayèl yo te vin konnen tout bon vre wa a pa t' gen
anyen pou l' te wè nan jan yo te ansasinen Abnè, pitit gason Nè a. ³⁸ Wa a di moun k'ap sèvi avè
l' yo: -Aa, mesye! Jòdi a pèp Izrayèl la pèdi yon chèf, yon gwo chèf wi! ³⁹ Atout se wa Bondye
chwazi a mwen ye, mwen santi m' fèb jòdi a. Pitit gason Sewouya yo twò mechan pou mwen. Se
pou Bondye pini krimenèl sa yo pou mechanste yo fè a.

Chapter 4

¹ ¶ Lè Ichbochèt, pitit Sayil la, pran nouvèl jan Abnè te mouri lavil Ebwon, kè l' kase nèt. Tout
pèp Izrayèl la te tèt anba. ² Ichbochèt te gen nan lame li a de chèf piyajè ki te rele Bana ak Rekeb.
Yo te pitit Rimon, yon nonm nan branch fanmi Benjamen an ki te rete lavil Bewòt. Yo te toujou
mete nan tèt yo lavil Bewòt se pou branch fanmi Benjamen an li ye, ³ depi lè moun Bewòt yo te
kouri kite lavil la pou y' al lavil Gitayim, kote y'ap viv jouk koulye a. ⁴ Jonatan, pitit Sayil la, te
gen yon pitit gason yo te rele Mefibochèt. Li te enfim nan tou de pye l' yo. Li te gen senkan lè Sayil
ak Jonatan mouri. Lè nouvèl lanmò yo rive soti lavil Jizreyèl, nouris la pran Mefibochèt, li kouri

al kache avè l'. Men, pandan l'ap prese kouri a, pitit la sot tonbe nan men l'. Se konsa li vin enfim nan pye.⁵ Rekab ak Bana, pitit gason Rimon, moun lavil Bewòt la, pati pou lakay Ichbochèt. Yo rive vè midi. Lè sa a, Ichbochèt t'ap fè yon ti dòmi pou poze kò l'.⁶ Fanm ki t'ap veye bò pòt la t'ap triye ble, men li te kite dòmi pran l'. Se konsa mesye yo fofile kò yo antre nan kay la.⁷ Lè yo rive anndan, y' al nan pyès chanm kote Ichbochèt te kouche ap dòmi an, yo touye l'. Lèfini, yo koupe tèt li, yo pran l', yo pati avè l'. Yo pase nwit lan ap mache nan fon Jouden an.⁸ Yo pote tèt Ichbochèt bay David lavil Ebwon. Yo di l' konsa: -Men tèt Ichbochèt, pitit Sayil la, moun ki pa t' vle wè ou la, moun ki t'ap chache touye ou la. Jòdi a Seyè a bay monwa chans pou li tire revanj sou Sayil ansanm ak sou rèss fanmi li.⁹ ¶ David reponn yo: -Mwen fè sèman devan Seyè a ki delivre m' nan tout malè,¹⁰ lè moun ki te vin fè m' konnen Sayil te mouri a te kwè se yon bon nouvèl li t'ap pote ban mwen, mwen pran l', mwen fè touye l' lavil Ziklag. Men rekonpans mwen te ba li pou bon nouvèl sa a.¹¹ Sa pral pi rèd toujou pou nou, bann mechan, ki touye yon inonsan anndan lakay li, nan kabann li. Mwen pral fè nou peye pou touye nou touye l' la, mwen pral fè yo disparèt nou sou latè.¹² David bay sòlda yo lòd epi yo touye Rekab ak Bana. Yo koupe de men ak de pye yo. Y' al pann yo bò rezèvw a dlo Ebwon an. Apre sa, yo pran tèt Ichbochèt, y' al antere l' Ebwon, nan tonm Abnè a.

Chapter 5

¹ ¶ Tout branch fanmi Izrayèl yo vin jwenn David lavil Ebwon, yo di l' konsa: -Nou se moun menm ras, menm fanmi avè ou.² Depi lontan, menm sou rèy Sayil, se ou menm ki te kòmande lame pèp Izrayèl la kote l' pase. Lèfini ankò, Seyè a te pwomèt se ou menm ki pral gouvènè pèp li a, pèp Izrayèl la, se ou menm ki pral chèf yo.³ Se konsa tout chèf fanmi pèp Izrayèl yo vin jwenn David lavil Ebwon. Yo pase yon kontra avè l' devan Seyè a. Yo fè seremoni, yo mete l' wa sou pèp Izrayèl la tou.⁴ David te gen trantan lè l' rive wa. Li kòmande pandan karantan.⁵ Antan lavil Ebwon, li kòmande moun Jida yo pandan sètan simwa. Lavil Jerizalèm, li kòmande ni moun pèp Izrayèl yo ni moun pèp Jida yo pandan tranntwazan.⁶ ¶ Apre sa, wa David pati pou lavil Jerizalèm ansanm ak sòlda li yo, li al atake moun Jebis yo ki te rete nan zòn sa a. Moun Jebis yo te konprann David pa ta ka antre pran lavil la. Yo di l' konsa: -Ou p'ap janm ka rive antre nan lavil nou an. Ata moun je pete ak moun enfim ka gen kont fòs pou mete ou deyò.⁷ Men, David pran gwo fò ki te sou tèt mòn Siyon an. Se li yo rele lavil David la.⁸ Jou sa a, David te di moun pa li yo: -Tout moun

ki vle atake moun Jebis yo va pase nan kannal la, y'a tonbe sou bann enfim ak je pete sa yo ki pa vle wè m' yo. Se depi lè sa a yo di moun je pete ak moun enfim pa gen dwa mete pwent pye yo nan

⁹ Tanp Seyè a. Apre sa, David al rete nan gwo fò a, li rele l' lavil David la. Lèfini, li bati lòt kay fè wonn fò a, depi sou teras la rive bò palè a. ¹⁰ Chak jou David t'ap vin pi fò. Seyè a, Bondye ki gen tout pouvwa a, te avè l'. ¹¹ ¶ Se konsa, Iram, wa lavil Tir la, delege kèk mesaje bò kot David ak yon chajman bwa sèd. Li voye tou kèk bòs chapant ak bòs mason ki bati yon palè pou David. ¹² Lè sa a atò, David wè tout bon vre se Seyè a menm ki te mete l' wa pèp Izrayèl la. Se li menm menm ki te fè tout bagay mache byen pou gouvènman li a, akòz pèp li a, pèp Izrayèl la. ¹³ Lè David kite lavil Ebwon pou li al lavil Jerizalèm, rive la li pran lòt madanm ak lòt fanm kay ki ba li lòt pitit gason ak lòt pitit fi. ¹⁴ Men jan yo te rele pitit David ki te fèt lavil Jerizalèm yo: Chamwa, Chobab, Natan, Salomon, ¹⁵ Jibka, Elichwa, Nefèg, Jafya, ¹⁶ Elichama, Elyada ak Elifelèt. ¹⁷ ¶ Lè moun Filisti yo vin konnen yo te mete David wa pèp Izrayèl la, yo tout yo leve pou y' al mete men sou li. Lè David pran nouvèl la, li desann al kache nan yon fò. ¹⁸ Moun Filisti yo rive, yo pran tout fon Refayim lan pou yo. ¹⁹ David pale ak Seyè a, li mande l': -Eske se pou m' atake moun Filisti yo? Eske w'ap lage yo nan men m'? Seyè a reponn li: -Wi, atake yo. M'ap lage yo nan men ou. ²⁰ David ale Baal Perazim. li bat moun Filisti yo. Lèfini, li di: -Tankou yon lavalas, Seyè a pase, li louvri yon pasaj pou mwen nan mitan lènmi m' yo. Se poutèt sa yo rele kote sa a Baal Perazim. ²¹ Moun Filisti yo te kouri kite zidòl yo dèyè nan plenn lan. David ak moun pa l' yo pran yo pote ale. ²² Moun Filisti yo tounen nan fon Refayim lan, yo pran tout plenn lan pou yo ankò. ²³ David mande Seyè a sa pou l' fè. Seyè a di l': -Pa atake yo pa devan. Pase pa dèyè yo. Pare kò ou pou ou atake yo bò pye gayak yo. ²⁴ Lè w'a tande yon bri tankou bri pye yon moun k'ap mache sou tèt pyebwa yo, w'a fonsè sou yo. Paske sa vle di m'ap pran devan ou pou m' bat lame moun Filisti yo. ²⁵ David fè sa Seyè a te mande l' fè a. Li bat moun Filisti yo, li kouri dèyè yo depi Lavil Gebarive lavil Gezè.

Chapter 6

¹ ¶ Yon lòt fwa ankò, David reyini tout pi bon sòlda pèp Izrayèl la. Sa te fè antou trantmil (30.000) gason. ² Li leve, li pati pou Balat nan peyi Jida ansanm ak tout sòlda ki te avè l' yo. Li tapral chache Bwat Kontra Bondye a, bwat ki pote non Seyè ki gen tout pouvwa a, Seyè ki gen

fotèy li anwo zanj cheriben yo.³ Yo pran Bwat la kay Abenadab sou mòn lan, mete l' sou yon kabwa tou nèf, yo pote l' ale. Ouza ak Akiyo, pitit gason Abenadab yo, t'ap mennen kabwa⁴ kote yo te mete Bwat Kontra Bondye a. Akiyo t'ap mache devan kabwa a.⁵ David ansanm ak tout moun pèp Izrayèl yo menm t'ap danse ak tout nanm yo. Yo t'ap chante fè lwanj Seyè a. Yo t'ap jwe gita ak bandjo. Yo t'ap bat tanbou, tanbouren ak senbal.⁶ ¶ Lè yo rive bò glasi Nakon an, bèf yo bite, yo manke tonbe. Ouza lonje men l', li soutni Bwat Kontra a.⁷ Men Seyè a move sou Ouza, li touye l' frèt paske li pa t' gen dwa manyen Bwat Kontra a. Ouza mouri la toupre Bwat Kontra a.⁸ David menm te fache dèske Seyè a te touye Ouza konsa. Se poutèt sa depi lè sa a yo rele kote sa a Perèz-Ouza, non ki rete pou li jouk jounen jòdi a.⁹ Lè sa a, David vin pè Seyè a. Li di li pa wè ki jan pou l' pran Bwat Kontra a lakay li.¹⁰ Se konsa li pran desizyon pou l' pa pote Bwat Kontra Seyè a lakay li nan Lavil David la. Li fè yo pote l' kay Obèdedon, yon moun lavil Gat.¹¹ Bwat la pase twa mwa lakay li. Seyè a te beni Obèdedon ansanm ak tout moun lakay li.¹² ¶ Lè David tandè jan Seyè a te beni Obèdedon ak tout moun lakay li, jan zafè l' t'ap mache byen poutèt Bwat Kontra a, David pati, li ale kay Obèdedon, li pran Bwat Kontra Seyè a pou pote l' nan Lavil David la avèk gwo seremoni sou tout wout la.¹³ Lè moun ki t'ap pote Bwat Kontra Seyè a fè sis pa annavan, David fè yo rete, li touye yon gwo towò ak yon ti towò bèf chatre pou Seyè a.¹⁴ Apre sa, David pran danse ak tout nanm li devan Seyè a. Li pa t' gen pase yon moso twal fen blan mare nan ren l'.¹⁵ Se konsa, li menm ak tout pèp Izrayèl la, yo pote Bwat Kontra Seyè a lavil Jerizalèm. Yo t'ap fè fèt, yo t'ap kònen twonpèt sou tout wout la.¹⁶ Antan yo t'ap antre ak Bwat Kontra a nan lavil David la, Mikal, pitit fi Sayil la, te kanpe bò yon fennèt ap gade. Li wè David ki t'ap danse fè laviwonn devan Seyè a. Li vin pa gen yon san pou li ankò.¹⁷ Yo pote Bwat Kontra Seyè a, yo mete l' nan plas li nan tant David te moute pou li a. Apre sa, David ofri bèt pou boule nèt pou Seyè a ak ofrann pou di Bondye mèsi.¹⁸ Lè David fin fè ofrann sa yo, li beni pèp la nan non Seyè ki gen tout pouvwa a.¹⁹ Li separe manje bay tout moun pèp Izrayèl yo, fanm kou gason. Li ba yo chak yon pen, yon moso vyann woti ak yon pen rezen. Lèfini, tout moun al lakay yo.²⁰ ¶ Apre sa, David al lakay li pou l' beni fanmi pa l' tou. Men, Mikal, pitit fi Sayil la, soti vin kontre li. Epi li di l' konsa: -Ala yon bèl bagay wa pèp Izrayèl la fè pou tèt li jòdi a! Tou sa yon vakabon ta fè. Li wete rad sou li devan tout sèvant moun k'ap sèvi avè l' yo!²¹ David reponn li: -Se vre. Mwen t'ap danse pou m' te fè lwanj Seyè a ki te pito m' pase papa ou ak tout fanmi ou. Li chwazi m', li mete m' chèf pèp

Izrayèl la, pèp li a. M'ap toujou ka danse devan l' pou m' fè lwanj li. ²² M'ap desanm tèt mwen pi ba toujou pase sa. Dapre ou, se desann m'ap desann sousi m'. Men, sèvant w'ap pale yo ap toujou ka leve m' anlè. ²³ Mikal, pitit fi Sayil la, pa janm fè pitit jouk li mouri.

Chapter 7

¹ ¶ Wa David te byen chita nan palè li. Seyè a te pwoteje l', li te fè tout lènmi ki te alantou peyi a pa chache l' kont ankò. ² Wa a pale ak pwofèt Natan, li di l' konsa: -Gade! Mwen rete nan yon kay bati ak bwa sèd, men Bwat Kontra Seyè a se anba yon kay twal li ye. ³ Natan reponn li: -Tou sa ou gen lide fè, ou mèt fè l', paske Seyè a kanpe la avè ou. ⁴ ¶ Men, menm jou lannwit sa a, Seyè a pale ak Natan, li di l' konsa: ⁵ -Ale di David, sèvitè m' lan, men sa mwen menm Seyè a, mwen voye di l': Se pa ou menm ki pral bati yon tanp pou m' rete. ⁶ Depi jou mwen te fè moun pèp Izrayèl yo soti kite peyi Lejip rive jòdi a, mwen pa janm rete nan yon kay. Tout kote m' pase se anba yon tant twal mwen toujou ye. ⁷ Nan tout deplase mwen ansanm ak moun Izrayèl yo, mwen pa janm mande yonn nan chèf mwen te chwazi pou gouvènèn pèp mwen an poukisa yo pa bati yon kay an bwa sèd pou mwen. ⁸ Koulye a, men sa w'a di David, sèvitè m' lan: Men sa Seyè ki gen tout pouvwa a voye di ou: Se mwen menm ki te pran ou dèyè mouton ou t'ap gade nan savann yo, mwen mete ⁹ ou chèf pèp mwen an. Nan tou sa ou t'ap fè, mwen te kanpe la avè ou. Mwen kraze tout lènmi ou yo devan ou. Mwen pral fè yo nonmen non ou tankou y'ap nonmen non pi gwo chèf ki sou latè. ¹⁰ Lèfini, mwen pare yon kote pou pèp Izrayèl mwen an. Mwen pral tabli yo la pou yo ka viv san yo pa bezwen pè anyen ankò. Mechan yo p'ap vin maltrete yo ankò jan yo te konn fè l' anvan an, ¹¹ lè mwen te mete jij yo pou gouvènèn pèp Izrayèl mwen an. M'ap delivre ou anba men tout lènmi ou yo. Mwen te fè ou konnen m'ap ba ou pitit ak pitit pitit. ¹² Lè lè a va rive pou ou mouri, lè y'a antere ou, m'ap pran yonn nan pitit ou yo, m'ap mete l' wa nan plas ou. M'ap fè gouvènman l' lan kanpe fèm. ¹³ Se li menm ki va bati yon tanp pou mwen. M'ap fè gouvènman l' lan kanpe fèm pou tout tan. ¹⁴ M'ap yon papa pou li. Li menm l'ap yon pitit pou mwen. Si li fè sa ki mal, m'ap korije l' tankou yon papa korije pitit gason li. ¹⁵ Men, m'ap toujou soutni l', mwen p'ap lage l' jan mwen te lage Sayil lè mwen te kite l' tonbe pou m' te mete ou nan plas li. ¹⁶ Ap toujou gen moun nan

fanmi ou chita sou fotèy la ap gouvènen apre ou, paske m'ap fè gouvènman fanmi ou lan kanpe
¹⁷ fèm pou tout tan. Natan rakonte David tou sa Bondye te fè l' konnen nan vizyon an. ¶ ¹⁸ Apre
 sa, wa David ale nan tanp lan, li chita devan Seyè a, li di l' konsa: -Seyè, Bondye sèl Mèt la, kisa
¹⁹ mwen ye, kisa fanmi mwen ye pou ou te fè tou sa ou deja fè pou nou? Men ou wè sa pa kont
 toujou, Seyè, Bondye sèl Mèt la, kifè koulye a w'ap fè konnen sa ki pral rive fanmi mwen denmen
 nan lanne k'ap vini yo. Epi ou fè m' konn sa, mwen menm ki yon senp moun, Seyè, Bondye sèl
²⁰ Mèt la! Kisa mwen menm David, mwen ka di ou, Seyè, apre sa? Ou konnen ki moun mwen ye,
²¹ mwen menm k'ap sèvi ou la. Se paske ou te fè pwomès la, se paske ou te vle l' konsa, kifè ou te
²² fè tout bèl bagay sa yo pou ou te fè m' konnen yo. Seyè, Bondye mwen, ala gwo pouvwa ou la
²³ gwo! Pa gen tankou ou! Pa gen lòt Bondye pase ou menm! Yo te toujou di nou sa. Pa gen lòt
 nasyon sou latè tankou pèp Izrayèl la! Se ou menm ki delivre yo pou yo te ka tounen yon pèp ki
 rele ou pa ou. Se pou yo ase ou fè sa. Toupatou sou latè, y'ap nonmen non ou yo pou gwo mirak
 ak bèl bagay ou fè pou yo. Ou mete lòt nasyon deyò nan peyi ou la ansanm ak bondye yo pou fè
 plas pou pèp ou, pèp ou te delivre anba pouvwa pèp peyi Lejip la, pou yo te ka tounen pèp pa ou.
²⁴ Ou fè pèp Izrayèl la tounen pèp pa ou pou tout tan, ou menm ou tounen Bondye yo. ²⁵ Koulye
 a, Seyè, Bondye, se pou ou kenbe pwomès ou te fè sèvitè ou la ansanm ak fanmi li an. Se pou ou
²⁶ fè sa ou di w'ap fè a. Toupatou sou latè y'a toujou rekonnèt jan ou gen pouvwa. y'a di se Seyè
 ki gen tout pouvwa a ki Bondye pèp Izrayèl la. Konsa, gouvènman ki nan men fanmi David, sèvitè
²⁷ ou la, va kanpe fèm pou tout tan anba pwoteksyon ou. Seyè ki gen tout pouvwa a, Bondye pèp
 Izrayèl la, se ou menm ki te fè m' konnen tou sa. Ou te di m', mwen menm sèvitè ou la, w'ap ban
 mwen yon fanmi, lèfini w'ap fè baton gouvènman an toujou rete nan men fanmi mwen. Se poutèt
²⁸ sa mwen gen kouraj fè lapriyè sa a nan pye ou. Koulye a, Seyè sèl Mèt, se ou ki Bondye tout
²⁹ bon an. Ou toujou kenbe pwomès ou yo. Gade bèl pawòl kè kontan ou di sèvitè ou la! Tanpri,
 beni tout fanmi mwen apre mwen pou yo ka toujou anba pwoteksyon ou. Wi, Seyè sèl Mèt, ou te
 pwomèt mwen sa. Se pou ou toujou voye benediksyon ou sou fanmi mwen.

Chapter 8

¹ ¶ Apre sa, David atake moun Filisti yo ankò. Li bat yo byen bat. Se konsa li kraze pouvwa yo
² te gen nan peyi a, li pran peyi a nan men yo. Lèfini li bat moun peyi Moab yo. Li fè prizonye yo
 kouche plat atè. Pou chak twa ladan yo, li touye de, li kite yonn vivan. Depi lè sa a moun peyi Moab

yo soumèt devan David nèt. Li fè yo peye taks ba li chak lè. ³ Apre sa, li bat Adadezè, pitit gason Reyòb, wa peyi Zoba a, ki t'ap mache pran zòn ki sou anwo larivyè Lefrat la. ⁴ David pran mil sètans (1700) kavalye nan lame wa Adadezè a, li fè yo prizonnye ansanm ak venmil (20.000) sòlda ki t'ap mache apye. Lè li fin wete kont chwal pou san cha lagè, li fè koupe jarèt tout rès chwal yo.

⁵ Moun peyi Siri ki te rete lavil Damas yo voye yon lame pou pote Adadezè, wa peyi Zoba a, konkou. David atake yo, li bat yo tou. Li touye venndemil (22.000) sòlda. ⁶ Apre sa, David mete kèk ganizon sòlda pa l' nan teritwa Damas la. Moun peyi Siri yo soumèt devan li. Li fè yo peye l' taks chak lè.

Se konsa, Seyè a te fè David genyen tout batay kote l' pase. ⁷ David sezi tout gwo plak pwotèj an fè chèf lame wa Adadezè yo, li pote yo lavil Jerizalèm. ⁸ Li pran yon gwo kantite kwiv li te jwenn lavil Beta ak lavil Bewotayi, ki te pou Adadezè. ⁹ ¶ Lè Tòy, wa lavil Amat la, tandè jan David te kraze tout lame Adadezè a, ¹⁰ li voye pitit li, Joram, al wè David pou di l' bonjou epi pou fè l' konpliman dèske li te bat Adadezè, paske Tòy te toutan ap fè lagè ak Adadezè. Joram te pote kado fèt an lò, an ajan ak an kwiv bay David. ¹¹ Wa David pran tout bagay sa yo, li mete yo apa pou sèvis Seyè a ansanm ak tout lò ak ajan li te pran lakay moun lòt nasyon li te fè soumèt devan li, ¹² ki vle di moun peyi Edon, moun peyi Moab, moun peyi Amon, moun peyi Filisti ak moun peyi Amalèk. Li fè menm bagay la tou ak tou sa li te pran apre lagè ak Adadezè, pitit Reyòb, wa Zoba a. ¹³ Non David te nan bouch tout moun pi rès toujou, lè li te fin touye dizwitmil (18.000) moun peyi Edon nan fon Sèl la. ¹⁴ Li mete kèk ganizon sòlda pa l' nan teritwa Edon an. Moun Edon yo soumèt devan li. Li fè yo peye l' taks chak lè. Se konsa Seyè a te fè David genyen tout batay kote l' pase. ¹⁵ ¶ David t'ap gouvènen tout pèp Izrayèl la. Li te fè tout moun jistis san patipri. Li te fè tout zafè l' dwat. ¹⁶ Joab, pitit gason Sewouya a, te kòmandan lame a. Jozafa, pitit gason Akiloud la, te reskonsab achiv yo. ¹⁷ Zadòk, pitit gason Akitoub la, ak Akimelèk, pitit gason Abyata a, te prèt. Seraja te sekretè. ¹⁸ Benaja, pitit gason Jeojada a, te chèf keretyen ak peletyen yo ki te gad pèsònèl wa a. Pitit gason David yo menm te prèt.

Chapter 9

¹
 ¶ Yon jou, David mande: -Pa rete yon moun menm nan fanmi Sayil la? Si genyen, mwen ta renmen aji byen avè l' poutèt Jonatan. ² Te gen yon domestik ki t'ap travay lakay Sayil ki te rele Ziba. Yo fè chache l', yo mennen l' bay wa a. Wa a mande l': -Se ou menm nonm yo rele Ziba a? Li reponn: -Wi, monwa. Mwen la pou m' sèvi ou. ³ Wa a mande l': -Pa gen yon moun ki rete nan fanmi Sayil la, pou m' ka fè kichòy pou li jan mwen te pwomèt sa devan Bondye? Ziba reponn li: -Wi, gen yonn nan pitit gason Jonatan yo ki vivan toujou. Men, li enfim nan tou de pye l' yo. ⁴ Wa a mande l': -Kote l' ye? Ziba reponn: -Li kay Maki, pitit gason Amiyèl la, lavil Lodeba. ⁵ Se konsa, David voye chache l'. ⁶ Lè Mefibochèt, pitit Jonatan, pitit pitit Sayil la, rive, li mete ajenou, li bese tèt li rive atè devan David. David di l' konsa: -Mefibochèt? Li reponn: -Se mwen menm, monwa. ⁷ M' la pou m' sèvi ou. David di l' konsa: -Ou pa bezwen pè. Mwen pral aji byen avè ou poutèt Jonatan, papa ou. M'ap renmèt ou tout tè ki te pou Sayil, granpapa ou. Lèfini, chak jou w'a vin manje sou tab avè m'. ⁸ Mefibochèt bese tèt li byen ba ankò, li di: -Monwa, poukisa w'ap okipe yon vye chen tou mouri tankou mwen? ⁹ ¶ Lè sa a, wa a rele Ziba, domestik Sayil la, li di l' konsa: ¹⁰ -Mwen renmèt Mefibochèt, pitit pitit gason mèt ou a, tou sa ki te pou Sayil ak fanmi l'. Ou men, ansanm ak pitit gason ou yo ak moun k'ap sèvi avè ou yo, nou pral travay tè a pou li. W'a pote rekòt la ba li pou rès fanmi l' ka jwenn manje pou yo manje. Men, Mefibochèt li menm ap toujou vin manje chak jou sou tab avè m'. Ziba te gen kenz pitit gason ak ven moun k'ap sèvi l'. ¹¹ Ziba reponn li: -M'ap fè tou sa monwa ban m' lòd fè. Se konsa, Mefibochèt toujou manje sou tab ansanm ak David tankou si li te yonn nan pitit wa a. ¹² Mefibochèt te gen yon pitit gason ki te piti joujou. Li te rele Mika. Tout moun ki te rete kay Ziba t'ap travay pou Mefibochèt. ¹³ Se konsa, Mefibochèt ki te enfim nan tou de pye l' yo rete lavil Jerizalèm. Li t'ap manje chak jou sou tab ansanm ak wa a.

Chapter 10

¹
 ¶ Kèk tan apre sa, Nakach, wa lavil Amon an, mouri. Se pitit li, Anoun, ki moute wa nan plas li. ² David di: -Se pou m' aji byen ak Anoun menm jan papa l', Nakach, te aji byen avè m'. Se konsa David voye mesaje al di Anoun jan sa te fè l' lapenn lè l' pran nouvèl lanmò papa l'. Lè mesaje yo rive lavil Amon, ³ chèf moun Amon yo di wa Anoun konsa: -Pa konprann se sèlman pou lanmò papa ou la kifè David voye mesaje sa yo bò kote ou pou konsole ou. Detwonpe ou. Li voye yo isit

la pou yo wè jan lavil la ye, pou yo gade byen jan sa ap pase nan lavil la. Konsa, pita li ka vin pran
 lavil la nan men nou. ⁴ Sa Anoun fè lè sa a, li pran moun David te voye yo, li raze tout yon bò nan
 bab yo, li koupe anba rad yo ra dèyè yo, li voye yo tounen. ⁵ Mesye yo te wont anpil pou yo te
 tounen lakay yo konsa. Lè David vin konn sa ki te rive yo, li voye di yo rete lavil Jeriko, y'a tounen
 lakay yo lè bab yo va pouse ankò. ⁶ ¶ Moun Amon yo vin konprann yo te fè David fache. Yo voye
 chache venmil (20.000) sòlda lavil Bètreyòb ak lavil Zoba nan peyi Aram lan, ak douzmil (12.000)
 gason lavil Tòb. Yo voye chache wa lavil Maka a tou ansanm ak mil (1.000) sòlda. Yo peye yo
 pou yo vin goumen pou yo. ⁷ David menm vin konn sa, li voye Joab ak tout lame vanyan sòlda li
 yo al kontre yo. ⁸ Moun Amon yo soti, y' al pran pozisyon devan pòtay lavil Raba, kapital yo a.
 Moun Aram ki soti lavil Bètreyòb ak lavil Zoba yo ansanm ak mesye lavil Tòb yo ak mesye lavil
 Maka yo pran pozisyon nan plenn lan. ⁹ Joab te wè lame lènmi yo te ka atake l' ni sou devan ni
 sou dèyè. Sa l' fè? Li chwazi pi bon sòlda nan lame pèp Izrayèl la, li mete yo an pozisyon devan
 lame moun Aram yo. ¹⁰ Lèfini, li mete Abichayi, frè l' la, alatèt rès lame a, li fè yo pran pozisyon
 devan moun Amon yo. ¹¹ Joab di Abichayi konsa: -Si ou wè moun Aram yo soti pou yo bat mwen,
 w'a vin ede m'. Konsa tou, si mwen wè moun Amon yo vle pi fò pase ou, m'a vin ede ou. ¹² Mete
 gason sou nou. Kouraj! Nou pral goumen rès mare pou pèp nou an ak pou lavil Bondye nou an.
 Bondye va fè sa li vle li menm. ¹³ Joab ak sòlda li yo mache sou moun Aram yo. Moun Aram yo
 kouri pou li. ¹⁴ Lè moun Amon yo wè moun Aram yo kouri ale, yo kouri tou pou Abichayi, yo
 antre nan lavil la. Lè sa a, Joab sispann batay la ak moun Amon yo, li tounen lavil Jerizalèm. ¹⁵ ¶
 Lè moun Aram yo wè moun Izrayèl yo te bat yo ankò, yo sanble dènye sòlda yo te genyen.
¹⁶ Adadezè voye yon mesaj bay moun Aram ki rete lòt bò larivyè Lefrat la, pou yo pare vin goumen
 pou li. Yo reyini lavil Elam. Se Chobak, chèf lame Adadezè a, ki te alatèt yo. ¹⁷ Lè David vin konn
 sa, li sanble tout lame pèp Izrayèl la, li janbe lòt bò larivyè Jouden, li rive Elam. Moun Aram yo
 pran pozisyon devan li. Epi batay la konmanse. ¹⁸ Moun Izrayèl yo fè moun Aram yo kouri met
 deyò. David ak sòlda li yo touye sètans (700) sòlda ki te sou cha lagè, katòzmil (14.000) sòlda ki
 te sou chwal. Yo blese Chobak, chèf lame lènmi yo, ki mouri la menm kote yo t'ap goumen an.
¹⁹ Lè tout ti wa ki te mete tèt ansanm ak Adadezè yo wè jan moun Izrayèl yo te bat yo, yo fè lapè
 ak yo, yo soumèt devan yo. Se konsa, moun Aram pa pran chans al pote moun Amon yo sekou
 ankò.

Chapter 11

¹ ¶ Nan prentan apre sa, nan epòk wa yo konn soti pou al fè lagè, David voye Joab ansanm ak tout lòt ofisye yo alatèt lame pèp Izrayèl la al goumen ak moun Amon yo. Yo ravaje peyi Amon an, yo sènen lavil Raba. David menm te rete lavil Jerizalèm. ² Yon jou, bò aswè, David te fin fè yon ti poze, li leve, li soti al sou teras ki anwo palè a. Antan li la, li wè yon fanm ki t'ap benyen. Fanm lan te bèl anpil. ³ Li voye chache konnen ki moun fanm lan te ye. Yo vin di l' se Batcheba, pitit fi Eliyam lan, madan Ouri, moun peyi Et la. ⁴ David voye mesaje al chache l' mennen l' ba li, li kouche avè l'. Lè sa a Batcheba te fèk fin fè sèvis pou l' fè apre règ li. Apre sa, Batcheba tounen lakay li. ⁵ Fanm lan vin ansent. Li voye nouvèl bay David pou fè l' konn sa. ⁶ ¶ David voye yon mesaj bay Joab, li mande l' pou l' voye Ouri, moun peyi Et la, ba li. Se konsa, Joab voye Ouri bay David. ⁷ Lè Ouri rive, David mande l' nouvèl Joab ak sòlda yo, ki jan batay la ye. ⁸ Apre sa, li di Ouri: -Desann al lakay ou non! Al poze kò ou! Ouri soti. David voye yon kado pou li lakay li. ⁹ Men Ouri pa al lakay li. Li kouche bò pòtay palè a ansanm ak tout lòt sòlda wa yo. ¹⁰ Lè David vin konnen Ouri pa t' al lakay li, li mande l': -Ou fèk antre soti nan vwayaj, poukisa ou pa al lakay ou? ¹¹ Ouri reponn David: -Sòlda Izrayèl yo ak sòlda Jida yo byen lwen ap fè lagè, Bwat Kontra Seyè a ansanm ak yo. Kòmandan Joab ak lòt chèf lame monwa yo ap pase nwit deyò nan plenn yo. Ki jan ou vle pou m' al lakay mwen, manje, bwè, kouche ak madanm mwen? Mwen fè sèman sou tèt ou, menm jan ou vivan an, m' pa ka janm fè bagay konsa. ¹² David di li: -Bon. Ou mèt rete pase rès jounen an isit la. Denmen m'a voye ou ale. Se konsa, Ouri rete lavil Jerizalèm pou de jou ankò. ¹³ David envite l' vin manje avè l'. Li fè l' bwè jouk li sou. Men jou swa sa a tou, Ouri pa desann al lakay li. Li kouche sou kabann li ansanm ak sòlda palè wa yo. ¹⁴ ¶ Nan denmen, David ekri Joab yon lèt, li bay Ouri pote l' ale. ¹⁵ Nan lèt la, li te ekri: W'a mete Ouri devan nèt, kote batay la pi cho a. Apre sa, rale kò ou dèyè, kite yo touye l'. ¹⁶ Se konsa, Joab ki te sènen lavil Raba a voye Ouri kote li te konnen lènmi yo te pi fò a. ¹⁷ Lame lènmi yo soti nan lavil la, yo vin kontre ak lame Joab la. Gen anpil sòlda ak anpil ofisye lame David la ki te mouri. Ouri, moun peyi Et la, mouri tou. ¹⁸ Joab voye rakonte David tout ti detay sou jan batay la pase. ¹⁹ Epi li bay mesaje a lòd sa a: -Lè w'a fin rakonte wa a tout ti detay batay la, ²⁰ li ka fè kòlè, li ka di ou: Poukisa nou te pwoche pre lavil la konsa pou m' te goumen ak lènmi yo? Se konnen nou pa konnen yo te ka rete sou tèt miray la pou yo tire flèch sou nou? ²¹ Nou gen lè bliye jan Abimelèk, pitit Jedeyon an te mouri lavil Tebès? Se yon fanm ki te rete sou tèt miray la, li voye yo wòl moulen sou li, li touye l' frèt.

Poukisa atò nou te pwoche pre lavil la konsa? Si wa a pale konsa avè ou, w'a di l': Ouri, moun peyi
 Et la, ofisye lame ou la, mouri tou. ²² Mesaje a ale, li rakonte David tou sa Joab te ba li lòd rakonte
 l' la. ²³ Li di l': -Lènmi nou yo te pi fò pase nou. Yo fè yon soti nan lavil la, yo vin goumen avè
 nou nan plenn lan. Men nou fè yo kase tèt tounen, nou kouri dèyè yo jouk devan pòtay lavil la.
²⁴ Se lè sa a, yo rete sou tèt miray yo, yo voye flèch sou nou. Gen kèk ofisye lame wa a ki mouri.
 Ouri, moun peyi Et la, ofisye wa a, mouri tou. ²⁵ David di mesaje a: -Ankouraje Joab. Di li li pa
 bezwen kite sa fatigue l' twòp. Se toujou konsa lè y'ap fè lagè. Ou pa janm konnen kilès ki pral mouri.
 Di li pare pou li fè yon gwo atak sou lavil la pou li pran l'. ²⁶ Lè Batcheba vin pran nouvèl mari l'
 te mouri, li pran lapenn pou li. ²⁷ Lè seremoni lantèman yo fini, David voye chache l', li pran l'
 lakay li. Batcheba vin madanm li. Li fè yon pitit gason pou David. Men, sa David te fè a pa t' fè
 Seyè a plezi menm.

Chapter 12

¹ ¶ Seyè a voye pwofèt Natan kot David. Natan rive kote l', li di l' konsa: -Vwala te gen de nonm
 ki t'ap viv nan yon lavil. Yonn te rich, lòt la te pòv. ² Nonm rich la te gen mouton ak bèf an kantite.
³ Pòv la menm pa t' gen pase yon sèl ti mouton li te achte. Li swen li. Se anndan lakay li ansanm
 ak pitit li yo ti mouton an grandi. Se nan asyèt malere a menm ti mouton an te konn manje. Se nan
 gode l' li bwè dlo. Se sou janm li li konn dòmi. Ti mouton an te tankou yon pitit fi pou li. ⁴ Yon
 jou, yon vizitè vin rive lakay nonm rich la. Nonm rich la pa t' santi kouraj li pou l' te pran yonn nan
 mouton l' yo osinon nan bèf li yo pou l' fè manje bay vizitè a. Li pran ti mouton malere a, li fe manje
 ak li bay vizitè ki te lakay li a. ⁵ David fache anpil sou nonm rich la. Li di Natan konsa: -Mwen fè
 sèman nan non Seyè ki vivan an! Nonm ki fè bagay sa a merite pou yo touye l'. ⁶ Pou l' peye bagay
 lèd li fè a, l'ap renmèt kat fwa lavalè sa l' te pran an, paske li san pitye. ⁷ Le sa a, Natan di David:
 -Nonm sa a, se ou menm! Men mesaj Seyè a, Bondye pèp Izrayèl la, voye ba ou: Mwen te fè ou
 wa pèp Izrayèl la. Mwen sove ou anba men Sayil. ⁸ Mwen ba ou baton kòmandman ki te nan men
 l' lan ansanm ak tout madanm li yo. Mwen mete ou wa pou gouvènèni ni moun Izrayèl yo, ni moun
 Jida yo. Si sa pa t' kont toujou, mwen ta ba ou menm de fwa lavalè ankò. ⁹ Poukisa atò ou pa swiv
 lòd mwen yo? Poukisa ou fè mechanste sa a? Ou fè yo touye Ouri nan lagè, ou kite moun Amon
 yo touye l'. Lèfini, ou pran madanm li! ¹⁰ Koulye a, paske ou pa t' koute m', paske ou pran madan

Ouri, moun Et la, pou madanm ou, nan fanmi ou ap toujou gen goumen. ¹¹ Men sa mwen menm Seyè a, mwen di: M'ap fè yon moun nan fanmi ou menm soti pou ba ou traka. M'ap wete madanm ou yo nan men ou, m'ap bay yon moun nan fanmi ou yo. L'a kouche avèk yo devan tout moun.

¹² Ou menm, ou te fè zafè ou la an kachèt. Mwen menm, m'ap fè sa rive devan tout moun pou tout

pèp Izrayèl la ka wè sa. ¹³ David di Natan konsa: -Wi, mwen rekonèt mwen peche kont Seyè a!

Lè sa a Natan di l' konsa: -Bondye sèl Mèt la p'ap pini ou pou sa ou fè a, ou p'ap mouri. ¹⁴ Sèlman, ak sa ou fè la a, ou moutre jan ou ka derespekte Seyè a. Se poutèt sa pitit ou fèk genyen an ap mouri.

¹⁵ ¶ Apre sa, Natan al lakay li. Seyè a fè pitit madanm Ouri te fè pou David la vin malad grav.

¹⁶ David tonbe lapriyè Seyè a pou ti gason an. Li derefize mete anyen nan bouch li. Chak swa, li

antre nan chanm li, li pase nwit lan kouche atè. ¹⁷ Chèf ki te reskonsab palè li a al jwenn li, yo fè

sa yo kapab pou fè l' leve atè a, men li derefize. Konsa tou, li pa t' vle manje avèk yo. ¹⁸ Apre yon senmenn, pitit la mouri. Chèf kay David yo te pè al ba li nouvèl la. Yo t'ap di: Si lè pitit la te malad ase, David te refize reponn nou lè nou pale avè l', ki jan pou n' al di l' koulye a pitit la mouri? Li

ka fè malè sou tèt li. ¹⁹ Men David wè moun li yo t'ap pale nan zòrèy yonn ak lòt, li vin konprann

pitit la mouri. Li mande yo: -Pitit la mouri? Yo reponn li: -Wi, li mouri. ²⁰ David leve atè a, li al benyen, li penyen tèt li, li chanje rad sou li. li ale nan kay Seyè a, li lapriyè. Apre sa, li tounen lakay

li, li mande pou yo sèvi l' manje. Li manje. ²¹ Moun pa l' yo t'ap di l': -Monwa, nou pa konprann sa w'ap fè konsa? Lè pitit la te vivan, ou t'ap plede kriye, ou rete san manje. Men, mouri pitit lan

mouri, ou leve, ou manje. ²² David reponn yo: -Wi, mwen t'ap kriye, mwen te rete san manje lè pitit la te vivan toujou. Mwen te kwè Seyè a ta gen pitye pou mwen, li pa ta kite pitit la mouri.

²³ Men, koulye a, pitit la mouri, sa m' bezwen rete san manje toujou fè? Eske mwen ka fè l' leve ankò? Yon jou se mwen ki gen pou ale kote l' ye a. Men li menm, li p'ap janm ka tounen vin jwenn

mwen ankò. ²⁴ Apre sa, David al konsole Batcheba, madanm li. Li kouche avè l', Batcheba vin

ansent, li fè yon pitit gason. David rele l' Salomon. Seyè a te renmen ti gason sa a. ²⁵ Li bay pwofèt

Natan lòd al di David rele pitit la Jedidya, paske Seyè a te renmen l' vre. ²⁶ ¶ Pandan tout tan sa a, Joab t'ap goumen toujou devan lavil Raba, kapital peyi Amon an. Li te prèt pou pran katye kote

wa a te rete a. ²⁷ Li voye mesaje al di David pou li: -Mwen atake lavil Raba. Mwen pran rezèvwa

dlo yo. ²⁸ Koulye a, sanble tout rès lame a, mache sou lavil la, vin pran li. Mwen pa ta vle se mwen

menm ki pran lavil la lèfini pou tout lwanj lan vin pou mwen. ²⁹ Se konsa, David sanble tout lame

a, li mache sou lavil Raba. Li atake l', li pran l'.³⁰ Estati Milkòm, zidòl moun Amon yo, te gen yon gwo kouwòn fèt an lò sou tèt li. Kouwòn lan te peze swasannkenz liv, li te gen yon gwo pyè koute chè ladan l'. David pran kouwòn lò ki te sou tèt zidòl la, li mete l' sou tèt pa l'. Lèfini, se pa³¹ de bagay li pa pran nan lavil la. Li pran moun ki te rete nan lavil la, li fè yo travay ak goyin, wou ak rach. Li mete yo travay ap fè brik. Li fè menm bagay la tou nan tout lòt lavil nan peyi Amon an. Apre sa, li tounen Jerizalèm ak tout moun li yo.

Chapter 13

¹ ¶ Men sa ki vin rive apre sa: Absalon, pitit gason David la, te gen yon sè ki te bèl anpil. Li te rele Tama. Amnon, yon lòt pitit gason David, tonbe damou pou li.² Amnon te sitèlman renmen l', li vin malad paske li pa t' ka fè anyen pou sa. Tama te tifi toujou. Yo pa t' kite l' kontre ak ankenn gason.³ Men, Amnon te gen yon zanmi, yon moun yo te rele Jonadab, pitit gason Chimeya, frè David. Jonadab sa a te mètdam anpil.⁴ Li di Amnon konsa: -Ou se pitit wa a. Chak jou mwen wè figi ou kagou. Sa ki genyen? Amnon reponn li: -Mwen renmen Tama, sè Absalon, frè menm papa avè m' lan.⁵ Jonadab di li: -Pran pòz malad ou, moute kabann ou kouche. Lè papa ou va vin wè ou, w'a di l': Tanpri, kite Tama, sè m' lan, vin ban m' manje. Mwen ta renmen pou li pare manje a devan m' pou m' wè l', lèfini pou l' sèvi m' manje a li menm.⁶ Se konsa Amnon moute kabann li kouche, li pran pòz malad li. Wa David vin wè l'. Amnon di l' konsa: -Tanpri, kite Tama vin pare de ti gato la devan m' lan, lèfini pou l' sèvi m' yo li menm.⁷ David voye komisyon bay Tama nan palè a pou l' ale kay Amnon pare manje pou li.⁸ Tama ale vre kay Amnon, li jwenn li kouche sou kabann li. Li pran ti gout farin frans, li pare l', li fè kèk gato pou li devan je l'. Lèfini, li mete yo⁹ kwit. Apre sa, li wete yo nan pwelon an devan Amnon. Men, Amnon refize manje. Li di l': -Fè tout moun soti! Lè tout moun fin soti,¹⁰ Amnon di Tama konsa: -Pote gato yo nan chanm lan. Se ou menm ki pou sèvi m'. Tama pran gato li te fè yo, li pote yo bay Amnon nan chanm lan.¹¹ Antan l'ap lonje gato a ba li, Amnon mete men sou li. Li di l' konsa: -vin kouche avè m' non, sè m'!¹² Tama di l': -Non, frè m'! Pa fòse m'! Sa pa fèt konsa nan peyi Izrayèl! Pa fè bagay lèd sa a.¹³ Apre sa, mwen p'ap ka gade moun nan je ankò. Ou menm, pou tèt pa ou, w'ap pase pou yonn nan pi move moun nan peyi Izrayèl. Tanpri, pale ak wa a. Mwen sèten li p'ap refize ou marye avè m'.¹⁴ Men, Amnon pa wè li pa tandè, li kenbe l' la. Li te gen plis fòs pase l', li kouche ak li.

15

Lèfini, li santi li rayi Tama pou l' mouri. Li vin rayi l' plis pase jan li te renmen l' lan. Li di l':

-Mete ou deyò lakay mwen!¹⁶ Tama reponn li: -A non! Mete m' deyò konsa! Sa pi mal ankò pase

sa ou sot fè m' la a! Men Amnon pa t' soti pou koute l'.¹⁷ Li rele gason ki t'ap sèvi l' la, li di l':

-Wete fi sa a devan je m'! Mete l' deyò. Lèfini, fèmen pòt la akle dèyè l'.¹⁸ Gason an fè Tama soti deyò, li fèmen pòt la akle dèyè l'. Tama te gen yon rad long ak gwo manch sou li. Se rad konsa pitit

wa yo te konn mete sou yo lè yo poko marye.¹⁹ Li simen sann dife sou tèt li, li chire rad ki te sou

li a, li mete de men nan tèt, li pran rele epi li ale.²⁰ Lè sa a, Absalon, frè l' la, mande l': -Eske Amnon, frè ou la, fè kadejak sou ou? Tanpri, sè m' pa kite sa fatigue ou twòp, tandè. Se frè ou li ye. Pa di pesonn anyen. Se konsa Tama rete pou kont li kay Absalon, frè l' la. Li te nan gwo lapenn.

21

¶ Lè wa David vin konn sa ki te pase, li te move. Men, li pa di Amnon anyen, paske se te premye

pitit gason l'. Li te renmen l' kou de grenn je nan tèt li.²² Absalon vin rayi Amnon pou kadejak li

te fè sou Tama, sè li a. Li koupe l' bonjou.²³ Dezan apre sa, Absalon t'ap koupe lenn mouton l' yo

l'avil Baal azò, toupre lavil Efrayim. Li envite tout pitit gason wa yo vin manje.²⁴ li al jwenn wa David, li di l' konsa: -Monwa, mwen pral koupe lenn mouton m' yo. Ou pa ta vle vini ansanm ak

tout chèf ou yo lakay mwen?²⁵ W'a reponn li: -Non, pitit mwen! Se pral twòp traka pou ou si nou

tout nou vini. Absalon pèsiste, men wa a pa pran priyè, li voye l' ale ak benediksyon l'.²⁶ Lè sa a Absalon di l': -Men, èske w'ap kite Amnon, frè m' lan, vini ak nou? Wa a reponn li? -Poukisa pou

l' ale a?²⁷ Men Absalon sitèlman pèsiste, bout pou bout, David kite Amnon ale ansanm ak tout

lèt pitit gason l' yo. Absalon te pare yon gwo fèt tankou si l' t'ap fè l' pou yon wa.²⁸ Epi li bay domestik li yo lòd sa a, li di yo: -Gade byen, lè n'a wè Annon ak bon gwòg nan tèt li, m'a di nou: Desann Amnon. n'a touye l'. Nou pa bezwen pè, mwen pran tout reskonsablite a sou mwen. Mete

gason sou nou. Frape san tranble.²⁹ Se konsa domestik Absalon yo swiv lòd Absalon te ba yo, yo

touye Amnon. Lè sa a, tout lòt pitit gason David yo leve, yo moute milèt yo, yo met deyò.³⁰ ¶ Yo te sou chemen lakay yo toujou, lè David vin pran nouvèl Absalon touye dènye pitit gason li yo, pa

gen yonn ki chape.³¹ Wa a leve kanpe, li chire rad ki te sou li, li lage kò l' atè. Tout moun ki te

avèk wa a chire rad sou yo tou.³² Men Jonabad, pitit gason Chimeya, frè David la, di l': -Monwa, yo pa touye tout pitit gason ou yo non. Se Amnon ase ki mouri, paske Absalon te gen lide nan tèt

li pou l' te fè sa depi lè Amnon te fè kadejak sou Tama, sè l' la.³³ Koulye a, monwa, ou pa bezwen

koute moun k'ap vin di ou tout pitit gason ou yo mouri. Se Amnon ase yo touye.³⁴ Lè sa a Absalon

te gen tan kraze rak. Sòlda ki te faksyonnè a wè yon foul moun ki t'ap kouri desann ti pant sou chemen lavil Owonayim lan. li al jwenn wa a, li di l' sa li wè. ³⁵ Jonabad di wa a konsa: -Men sa m' t'ap di ou la. Se pitit gason ou yo k'ap vini. ³⁶ Fini li fin di sa, pitit gason David yo rive. Yo pete rele. Wa a pran rele ansanm ak tout chèf li yo. Yo rele kont rele yo. ³⁷ Absalon menm kraze rak, li al kay Talmayi, pitit gason Amiyoud la, ki te wa lavil Gechou a. David menm te nan gwo lapenn pandan kèk jou pou lanmò Amnon. ³⁸ Absalon rete pase twazan lavil Gechou kote li te kouri al kache a. ³⁹ Lè wa David fin konsole apre lanmò Amnon, li vin anvi wè Absalon.

Chapter 14

¹ ¶ Joab, pitit Sewouya a, te konnen wa David te anvi wè Absalon anpil. ² Sa li fè, li voye lavil Tekoa al chache yon fanm ki te gen anpil ladrès. Lè fanm lan rive, li di l' konsa: -Ou pral pran pòz ou nan gwo lapenn. W'ap mete rad dèy sou ou, lèfini pa mete ankenn odè sou ou. Se pou yo ka pran ou pou yon moun ki gen yon moun mouri depi lontan. ³ Lèfini, ou pral bò kote wa a, w'a di l' tou sa m'a di ou di li. Apre sa, Joab fè bouch li. ⁴ Fanm lan ale vre bò kot wa a, li tonbe ajenou devan wa a, li bese tèt li jouk atè, epi li di: -Tanpri, monwa, fe kichòy pou mwen! ⁵ Wa a mande l': -Kisa ou genyen? Fanm lan reponn li: -Adje, monwa! Se yon pòv vèv mwen ye. Mari m' mouri. ⁶ Li kite m' ak de pitit gason. Yon jou, yo te nan jaden, yonn gen kont ak lòt, yo goumen. Pa t' gen pesonn la pou separe yo. Yonn ladan yo touye lòt la. ⁷ Koulye a menm, tout fanmi m' yo leve dèyè m', y'ap mande m' pou m' lage sa ki te touye lòt la nan men yo pou yo touye l' tou, paske li te touye frè l' la. Si yo fè sa, m'ap rete san pitit gason. Y'ap wete dènye ti espwa ki te rete m' lan. Lèfini, mari m' p'ap gen yon pitit gason pou leve non l' sou tè a. ⁸ Wa a di madanm lan: -Ou mèl al lakay ou. M'ap okipe sa pou ou. ⁹ Fanm lavil Tekoa a di wa a konsa: -Monwa, nenpòt kisa w'a deside fè, si pou gen repwòch, y'a repwoche mwen menm ansanm ak fanmi pa m'. Men, ou menm ak gouvènman ou, nou pa reskonsab anyen. ¹⁰ Wa a reponn li: -Si yon moun konprann pou li kraponnen ou, mennen l' ban mwen. Li p'ap janm chache ou kont ankò. ¹¹ Fanm lan di ankò: -Tanpri, monwa! Lapriyè Seyè a, Bondye ou la, pou moun nan fanmi an ki reskonsab pou tire revanj lanmò pitit gason m' lan pa fè plis dega toujou, pou l' pa touye lòt pitit gason ki rete m' lan. David reponn li: -Mwen fè sèman nan non Seyè ki vivan an, mwen p'ap kite yo manyen yon grenn cheve nan tèt pitit gason ou lan! ¹² Lè sa a, fanm lan di ankò: -Tanpri, monwa! Kite m' di ou yon dènye pawòl.

¹³ Wa a reponn li: -Pale non. Fanm lan di l' konsa: -Poukisa ou fè move lide sa a sou pèp Bondye a? Ou pa vle kite pwòp pitit gason ou lan tounen nan peyi a. Jan ou sot pale a, ou kondannen pwòp

¹⁴ tèt ou. Nou tout gen pou mouri. Nou tankou dlo. Depi ou lage dlo atè, ou pa ka ranmase l' ankò. Lè yon moun fin mouri, li mouri nèt. Men, Bondye ta vle pou moun ki te kouri al chache pwoteksyon

¹⁵ nan peyi etranje a tounen nan peyi l'. Monwa, rezon ki fè mwen te vin pale avè ou la, se paske moun yo t'ap fè m' pè. Mwen di nan kè m' mwen pral pale ak wa a. Wa a ka fè sa m'ap mande l' la.

¹⁶ Mwen t'ap di wa a ka koute m', li ka delivre m' anba men moun ki soti pou yo touye pitit gason m' lan ansanm avè m', anba men moun ki soti pou wete moso tè ki vin pou nou nan peyi Bondye

¹⁷ bay pèp li a. Mwen di ankò pawòl monwa va ban m' kouraj paske wa a se tankou yon zanj Bondye li ye. Li konn rekonèt sa ki byen ak sa ki mal. Mwen mande pou Seyè a, Bondye ou la,

¹⁸ toujou kanpe la avè ou! Wa a di l' konsa: -Mwen pral mande ou kichòy, pa cache m' anyen.

¹⁹ Fanm lan reponn: -Monwa, mande m' sa ou vle? Wa a mande l': -Eske Joab pa nan plan sa a avè ou? Fanm lan reponn li: -Menm jan ou vivan an, monwa, pa gen anyen ki pi sèten pase sa ou di la

²⁰ a. Wi, monwa. Se Joab, chèf lame ou la, ki di m' tou sa pou m' fè ak tou sa pou m' di. Men, si li fè l' se paske li vle pou tout bagay sa a regle. Monwa, ou gen bon konprann tankou yon zanj

²¹ Bondye, ou konnen tou sa ki ap pase nan peyi a. ¶ Pita, wa a di Joab konsa: -Mwen pral fè sa

²² ou vle m' fè a. Ale chache jennonm yo rele Absalon an, mennen l' tounen isit la. Joab tonbe ajenou devan David, li bese tèt li jouk atè. Li di: -Se pou Bondye beni ou, monwa! Jòdi a mwen

²³ konnen ou kontan avè m' vre, paske ou ban mwen sa m' mande ou la. Joab leve, li ale lavil

²⁴ Gechou, li mennen Absalon tounen lavil Jerizalèm. Men, wa a bay lòd pou Absalon pa vin rete nan palè a, paske li pa vle pou l' parèt devan li. Se konsa Absalon al rete lakay li, li pa janm parèt

²⁵ devan wa a. Pa t' gen pi bèl gason nan tout peyi Izrayèl la pase Absalon. Tout moun t'ap di sa.

²⁶ Pran depi nan cheve l' rive nan pwent zòtèy li, li pa t' gen ankenn defo. Li te gen anpil cheve. Li te blije koupe yo chak lanne paske, lè yo te lonje yo te vin twò lou pou li. Lè yo peze cheve yo,

²⁷ yo ka rive peze senk liv dapre sistèm pèz yo sèvi kay wa a. Absalon te gen twa pitit gason ak

²⁸ yon pitit fi ki te rele Tama. Tama te bèl anpil. ¶ Absalon pase dezan lavil Jerizalèm san li pa

²⁹ janm parèt devan wa a. Apre sa, li voye chache Joab pou mande l' al kote wa a pou li. Men, Joab

³⁰ pa vini. Yon lòt fwa ankò, Absalon voye chache l'. Fwa sa a tou Joab refize vini. Lè sa a, Absalon di domestik li yo: -Gade! Nou wè jaden Joab ki toupre jaden pa m' lan. Li plante lòj. Enben, al met

³¹ dife ladan l'. Y' ale, yo mete dife nan jaden Joab la. Joab al lakay Absalon, li mande l': -Poukisa

32
 moun pa ou yo mete dife nan jaden m' lan? Absalon reponn li: -Paske ou pa t' vle vini lè mwen te voye chache ou la. Mwen te bezwen ou ale bò kote wa a pou mwen pou ou mande l' sa m' te bezwen kite lavil Gechou a vin isit la fè. Pito m' te rete laba a. Koulye a, mwen ta renmen ou jwenn
 33
 yon jan pou m' parèt devan wa a. Si m' antò, li mèt touye m'! Se konsa Joab al bò kote wa David, li rapòte l' sa Absalon te di l' la. Wa a voye chache Absalon. Absalon vini, li tonbe ajenou devan wa a, li bese tèt li jouk atè. Wa resevwa l', li bo l'.

Chapter 15

1
 ¶ Apre sa, Absalon achte yon cha lagè ak tout chwal pou tèt pa li. Li pran senkant gason pou mache avèk li. 2
 Chak maten, Absalon leve byen bonè, li al kanpe sou wout la bò pòtay lavil la. Chak fwa yon moun vini ak yon pwoblèm li ta renmen wa a regle pou li, Absalon rele l' sou kote, li mande l' ki bò li moun. Apre moun lan fin di l' moun ki branch fanmi li ye, 3
 Absalon di l' konsa: -Gade! Se ou menm ki gen rezon, lalwa avè ou. Men, p'ap gen yon moun kay wa a k'ap koute ou. 4
 Apre sa, li di ankò: -Ki moun ki va mete m' chèf nan peyi Izrayèl la? Lè sa a, tout moun ki ta gen yon zafè osinon yon plent ta vin jwenn mwen, mwen ta fè l' jistis. 5
 Chak fwa yon moun pwoche bò Absalon pou mete ajenou devan l', Absalon lonje men l', li kenbe l' epi li bo l'. 6
 Se konsa Absalon te fè ak tout moun peyi Izrayèl ki te vin bò kote wa a pou chache jistis. Se konsa li fè yo vin renmen l'. 7
 ¶ Apre katran, Absalon di wa David konsa: -Monwa, tanpri! Kite m' ale lavil Ebwon pou m' ka kenbe yon pwomès mwen te fè Seyè a. 8
 Antan mwen te lavil Gechou nan peyi Siri, mwen te pwomèt Seyè a si m' te tounen lavil Jerizalèm, mwen ta fè yon sèvis pou li Ebwon. 9
 Wa a di l': -Ale ak kè poze. Se konsa Absalon ale lavil Ebwon. 10
 Menm lè a, li voye mesaj nan tout branch fanmi Izrayèl yo pou di yo: Lè n'a tandè twonpèt yo kònen, n'a fè konnen yo fè Absalon wa lavil Ebwon. 11
 Te gen desan (200) moun lavil Jerizalèm ki te pati avèk Absalon. Se Absalon ki te envite yo. Yo te byen kontan pati avè l', men yo pa t' konn anyen nan zafè konplo a. 12
 Antan Absalon t'ap ofri bèt pou Seyè a, li voye lavil Gilo al chache Achitofèl ki te yonn nan konseye David yo. Konplo a t'ap pran fòs. Patizan Absalon yo t'ap vin pi plis. 13
 ¶ Yon mesaj vin di David: -Moun peyi Izrayèl yo ap mache avèk Absalon, yo dakò avè l'. 14
 Se konsa David rele moun pa l' yo ki te avè l' lavil Jerizalèm, li di yo: -Se pou n' prese mete deyò si nou vle chape anba men Absalon. Ann fè vit kite lavil la. Si se pa sa, talè l'ap sou nou. L'ap fè nou pase pa nou, l'ap touye dènye moun

¹⁵ nan lavil la. Patizan wa yo reponn: -Wi, monwa. Nenpòt kisa ou vle nou fè, n'ap fè l'. ¹⁶ Wa a
 pran tout fanmi l', li pati apye. Li kite dis nan fanm kay li yo pou okipe palè a. ¹⁷ Wa a leve pati
 kite lavil la ansanm ak tout moun pa l' yo. Lè yo rive devan dènye kay la, yo fè yon kanpe. ¹⁸ Tout
 chèf li yo te kanpe bò kote l'. Yo kite tout gad pèsònèl wa a, ki vle di sòlda keretyen yo ak sòlda
 peletyen yo pase devan. Te gen sisan (600) sòlda moun lavil Gat ki te kite peyi yo vin jwenn David
¹⁹ lavil Jerizalèm. Yo vin ap pase devan li tou. Wa a rele Itayi, chèf moun lavil Gat yo, li di l'
 konsa: -Poukisa ou prale ak nou tou? Tounen non, monchè. Rete ak lòt wa a. Ou pa moun peyi a.
²⁰ Se kouri ou kouri vin kache isit la. Ou pa gen lontan depi ou rive. Poukisa jòdi a pou m' fè ou
 ap mache nan bwa tankou vakabon ansanm avèk nou? Mwen pa menm konnen kote mwen prale.
 Tounen tounen ou ansanm ak tout moun menm peyi avè ou yo. Mwen mande Seyè a pou l' aji byen
²¹ avè ou, pou l' pa janm lage ou! Men Itayi reponn li: -Monwa, mwen fè sèman devan Seyè a ak
 devan ou, se ou menm m'ap sèvi. Kote ou prale mwen pral avè ou, menm si mwen gen pou m'
²² mouri. Lè sa a, David di li: -Bon. Ou mèt pran devan nou. Se konsa Itayi, moun lavil Gat la, ale
²³ avèk wa a, li menm, tout moun li yo ansanm ak tout fanmi yo. Tout moun nan peyi a t'ap rele
 byen fò lè yo wè David ak moun pa l' yo ap pase ale. David janbe lòt bò ravin Sedwon an ansanm
²⁴ ak tout moun li yo. Yo pran wout ki mennen nan dezè a. ¶ Zadòk, prèt la, te la tou ansanm ak
 tout moun fanmi Levi yo ki t'ap pote Bwat Kontra Seyè a. Yo depoze Bwat Kontra a atè. Yo pa
²⁵ leve l' jouk tout rèz moun yo fin soti kite lavil la. Abyata, prèt la, te la tou. Apre sa, wa a di
 Zadòk konsa: -Pote Bwat Kontra a tounen nan lavil la. Si Seyè a pran plezi nan mwen, yon jou l'a
²⁶ kite m' tounen pou m' wè bwat la ansanm ak kote l' rete a. Men, si li pa kontan avè m' anko,
²⁷ enben, lè sa a, l'a fè sa li vle avè m'. Epi wa a di Zadòk ankò: -Gade! Ou menm ak Abyata,
 tounen tounen nou lavil Jerizalèm ansanm ak Akimaz, pitit gason ou lan, ak Jonatan, pitit gason
²⁸ Abyata a. Mwen menm, mwen pral tann nou bò larivyè a nan dezè a jouk n'a voye nouvèl ban
²⁹ mwen. Se konsa Zadòk ak Abyata pote Bwat Kontra a tounen lavil Jerizalèm, yo rete la. David
³⁰ menm moute sou mòn Pye Oliv yo. Li t'ap kriye, li te pye atè, tèt li te kouvri, paske li te nan gwo
³¹ lapenn. Tout moun ki t'ap mache deyè l' yo te gen tèt yo kouvri tou, yo t'ap kriye. ¶ Lè David
 vin konnen Achitofèl te pran pozisyon ak Absalon nan konplo a, li lapriyè, li di: -Tanpri, Seyè! Fè
³² konsèy Achitofèl yo pase pou pawòl moun fou! Lè David rive sou tèt ti mòn lan, kote yo konn
 fè sèvis pou Bondye a, Ouchayi, moun peyi Ak la, vin kontre l', rad sou li dechire, tèt li kouvri ak
³³ pousyè tè. David di l' konsa: -Ou p'ap ka fè anyen pou mwen si ou vin avè m'. ³⁴ Men, ou ka
 ede m' anpil si ou tounen lavil Jerizalèm. W'a di Absalon ou pral sèvi l' koulye a menm jan ou te

sèvi papa l' nan tan lontan. Lè sa a, w'a ede m' pare tout move kou Achitofèl va gen lide pote m'.

³⁵ Zadòk ak Abyata, de prèt yo, va la tou. W'a di yo tou sa w'a tande y'ap di nan palè a. ³⁶ Yo gen Akimaz ak Jonatan, pitit gason yo, ak yo. W'a voye yo vin di m' dènye sa w'a tande nan palè a.

³⁷ Se konsa, Ouchayi, bon zanmi David la, tounen lavil Jerizalèm. Li antre nan lavil la an menm tan ak Absalon.

Chapter 16

¹ ¶ David te fèk fin kite tèt mòn lan lè li wè Ziba, domestik Mefibochèt la, k'ap vin kontre l'. Li t'ap mennen de bourik byen chaje avèk desan (200) pen, san (100) grap rezen chèch, san (100) pake

fwi mi ak yon gwo vesò fèt ak po bèt plen diven. ² Wa David mande l': -Sa ou pral fè ak tout bagay sa yo? Ziba reponn li: -Bourik yo, se pou wa a ansanm ak fanmi li yo moute. Pen yo ak fwi yo, se

pou moun ou yo manje, diven an pou yo bwè lè y'a santi yo bouke nan dezè a. ³ Wa a mande l': -Kote mèt ou, Mefibochèt, pitit pitit Sayil la? Ziba reponn: -Li rete lavil Jerizalèm, paske li di li sèten moun peyi Izrayèl yo pral renmèt li baton kòmandman ki te nan men Sayil, granpapa l' la.

⁴ Wa a di Ziba konsa: -Depi jòdi a, tou sa ki te pou Mefibochèt se pou ou yo ye. Ziba reponn li:

-Men mwen lage kò m' nan pye ou, monwa. Mwen mande pou ou toujou kontan avè m'. ⁵ ¶ Lè wa David rive bò lavil Bakourim, yon moun fanmi wa Sayil soti lavil la vin kontre l'. Se te Chimeyi,

pitit gason Gera a. Antan l'ap vanse sou David, li t'ap joue l', li t'ap ba li madichon. ⁶ Li konmanse voye wòch sou David ak sou moun pa l' yo, atout pèp la ak sòlda yo t'ap mache sou bò dwat ak sou

bò gòch wa a. ⁷ Chimeyi t'ap bay David madichon, li t'ap di l': -Ale ou vouzan! Ale ou vouzan!

Vakabon! Ansaen! ⁸ Ou te pran plas wa Sayil la! Jòdi a Seyè a ap pini ou pou tout moun nan fanmi Sayil ou te sasinen yo. Seyè a renmèt gouvènman an nan men Absalon, pitit gason ou lan. Se konsa

pou ou te fini, se ansaen ou ye! ⁹ Abichayi, pitit gason Sewouya a, di wa a konsa: -Monwa, poukisa

pou ou kite chen mouri sa a ap madichonnen ou konsa? Kite m' janbe lòt bò a al koupe tèt li! ¹⁰ Wa a di Abichayi ansanm ak Joab, frè li a: -Pa antre nan sa ki pa gade nou, tande. Si se Seyè a ki di l'

pou l' ban m' madichon, ki moun ki gen dwa mande l' pouki l'ap fè sa? ¹¹ Apre sa, David pale ak Abichayi ansanm ak tout moun pa l' yo, li di yo: -Gade! Pwòp pitit gason mwen, san mwen, deyò pou l' touye m'. Ale wè pou moun sa a ki soti nan ras Benjamen yo! Kite l' ban m' madichon, si se

Seyè a ki di l' ban m' madichon. ¹² Nou pa janm konnen, Seyè a va wè nan ki mizè mwen ye. Lè

sa a, l'a ban m' benediksyon nan plas madichon l'ap ban m' jòdi a. ¹³ Se konsa, David ale chemen

l' avèk tout moun li yo. Chimeyi menm t'ap mache dèyè yo sou flan mòn lan, li t'ap ba yo madichon, li t'ap voye wòch ak pousyè tè sou yo. ¹⁴ Wa a ansanm ak tout pèp la te bouke jouk yo pa t' kapab ankò lè yo rive bò larivyè Jouden. Se la yo rete pran souf. ¹⁵ ¶ Absalon antre lavil Jerizalèm ansanm ak tout moun peyi Izrayèl yo. Achitofèl te ansanm ak yo. ¹⁶ Lè Ouchayi, bon zanmi David la, kontre ak Absolon, li di: -Viv wa a! Viv wa a! ¹⁷ Absalon di l' konsa: -Se konsa ou te bon zanmi David la? Poukisa ou pa t' ale ansanm avè l'? ¹⁸ Ouchayi reponn li: -Ki jan pou m' ta fè sa? Se pou moun Seyè a ansanm ak moun sa yo ak tout moun peyi Izrayèl yo chwazi a mwen ye. Se avè l' pou m' rete. ¹⁹ Lèfini, ki moun pou m' ta sèvi si se pa pitit mèt mwen an? Menm jan mwen te sèvi papa ou, konsa m'a sèvi ou tou. ²⁰ Apre sa, Absalon vire bò Achitofèl, li di l' konsa: -Ann antann nou sou sa nou pral fè koulye a. ²¹ Achitofèl reponn: -Al kouche ak lòt fanm kay papa ou yo, sa li kite dèyè pou okipe palè a. Lè sa a, tout moun nan peyi Izrayèl la va konnen bagay la gate nèt ant ou menm ak papa ou. Konsa, moun ki avè ou yo ap vin pi ankouraje. ²² Se konsa, yo moute yon tant pou Absalon sou teras sou do palè a. Epi la, devan tout moun peyi Izrayèl yo, Absalon kouche ak fanm kay papa l' yo. ²³ Lè sa a, nenpòt konsèy Achitofèl te bay se tankou si se te pawòl Bondye. Ni David ni Absalon te toujou swiv konsèy li yo.

Chapter 17

¹ ¶ Apre sa, Achitofèl di Absalon konsa: -Kite m' chwazi douzmil (12.000) sòlda. M'ap pati aswè a menm dèyè David. ² M'ap pwofite antan li tou bouke, tou dekouraje a, m'ap atake l', m'ap fè l' pè. Lè sa a, tout moun ki avè l' yo va kraze rak. Se wa a ase m'ap touye. ³ Lèfini, m'ap mennen tout lòt moun yo vin jwenn ou, menm jan yon madan marye tounen vin jwenn mari l'. Se yon sèl moun ou vle yo touye, pa vre. Apre sa, repo pou tout moun. ⁴ Koze a te fè Absalon ak tout chèf moun Izrayèl yo plezi. ⁵ Absalon di konsa: -Rele Ouchayi, moun peyi Ak la. Ann tande sa li gen pou l' di nou. ⁶ Lè Ouchayi rive, Absalon di l' konsa: -Men konsèy Achitofèl ban nou. Eske se pou nou fè sa li di nou fè a? Si ou pa dakò, di nou sa pou nou fè. ⁷ Ouchayi reponn li: -Fwa sa a, konsèy Achitofèl bay la pa bon menm. ⁸ Ou konnen jan papa ou ak moun pa li yo vanyan gason? Koulye a, yo move tankou yon manman lous ki pèdi pitit li. Papa ou se yon sòlda ki gen anpil esperyans

9
 nan fè lagè. Li p'ap janm rete pase lannwit menm kote ak moun li yo. Koulye a li dwe kache nan yon gwòt osinon yon lòt kote. Premye atak David va fè sou moun ou yo, moun pral konn sa, y'a
 10
 di: David bat patizan Absalon yo. Lè sa a, menm sòlda ki pi vanyan yo, sa ki tankou lyon, ki pa pè anyen yo, pral pèdi kouraj, paske tout moun peyi Izrayèl yo konnen jan papa ou se sòlda ki konn
 11
 goumen, jan moun pa l' yo se brave danje. Men konsèy mwen menm m'ap bay: Fè sanble dènye gason nan tout peyi Izrayèl la, depi lavil Dann jouk lavil Bècheba, pou yo tankou grenn sab bò
 12
 lanmè. Lèfini, ou menm w'a mache alatèt yo. Nenpòt kote David ye, n'a tonbe sou li tankou lawouze sou fèy bwa, n'a atake l' anvan menm li konnen sa k'ap rive l'. Nou p'ap kite pesonn chape,
 13
 ni li, ni yonn nan moun pa l' yo. Si li al kache kò l' nan yon lavil, tout moun Izrayèl yo va pran kòd, y'a mare lavil la, y'a trennen l' al jete anba nan fon an. Yo pa t' kite yon grenn wòch sou tèt
 14
 mòn kote lavil la te ye a. Absalon ak tout moun peyi Izrayèl yo di: -Konsèy Ouchayi, moun Ak la, pi bon pase pa Achitofèl la. Sa te pase konsa, paske Seyè a te deside pou li pa t' kite yo swiv
 15
 konsèy Achitofèl la pou malè te ka tonbe sou Absalon. ¶ Apre sa, Ouchayi rele Zadòk ak Abyata, prèt yo, li di yo: -Men konsèy Achitofèl te bay Absalon ak chèf fanmi moun Izrayèl yo. Men konsèy
 16
 mwen menm mwen te ba yo. Koulye a, prese voye komisyon bay David. Di li pa rete pase nwit
 17
 nan plenn dezè a. Se pou l' al pi lwen toujou pou yo pa touye l' ansanm ak moun pa li yo. Jonatan, pitit Abyata a, ak Akimaz, pitit Zadòk la, te rete bò sous Lesivèz yo ap tann, paske yo pa t' ka antre nan lavil la pou moun pa t' wè yo. Se yon sèvant ki te konn al pote nouvèl sa k'ap pase ba yo pou
 18
 yo te ka al avèti wa David. Men, yon ti gason bare yo, li al di Absalon sa. De mesye yo kouri al kache lakay yon moun ki te rete lavil Bakourim. Nonm lan te gen yon pi nan lakou lakay li.
 19
 Mesye yo desann al kache ladan l'. Madanm nonm lan pran yon gwo dra, li kouvri bouch pi a.
 20
 Lèfini, li simen grenn pile sou li, konsa pesonn pa wè sa ki anba dra a. Moun Absalon yo vini nan kay la, yo mande madanm lan: -Kote Akimaz ak Jonatan? Madanm lan reponn: -Yo janbe lòt bò dlo a. Mesye Absalon yo chache, men yo pa jwenn yo. Apre sa, yo tounen tounen yo lavil
 21
 Jerizalèm. Lè yo fin ale, Akimaz ak Jonatan soti nan pi a, y' al pote nouvèl bay wa David. Yo
 22
 rakonte l' ki konsèy Achitofèl te bay Absalon. Epi yo di l': -Prese janbe lòt bò larivyè Jouden. ¶ Se konsa David leve ansanm ak tout moun ki te avè l' yo, yo janbe lòt bò larivyè Jouden. Lè bajou
 23
 kase, yo tout te gen tan lòt bò larivyè a. Lè Achitofèl wè yo pa t' soti pou swiv konsèy li te bay la, li sele bourik li, li tounen lakay li nan peyi l'. Lè li fin regle tout zafè l', li pann tèt li. Se konsa
 24
 li mouri. Apre sa, yo antere l' nan kavò papa l'. Lè Absalon ansanm ak moun li yo rive pou yo
 25
 janbe lòt bò larivyè Jouden an, David te gen tan rive lavil Manayim. Absalon te chwazi Amasa

pou kòmande lame a nan plas Joab. Amasa sa a te pitit gason Jitra, yon moun fanmi Izmayèl.
 Manman l' te rele Abigal, pitit fi Nach, sè Sewouya, manman Joab. ²⁶ Absalon ak moun peyi Izrayèl
 yo moute tant yo nan peyi Galarad. ²⁷ Lè David rive lavil Manayim, gen twa moun ki vin jwenn
 li. Se te Choni, pitit gason Nach, moun lavil Raba, kapital peyi Amon an, Maki, pitit gason Amyèl,
 moun lavil Lodeba, ak Bazilayi, moun lavil Wogelim nan peyi Galarad. ²⁸ Twa mesye sa yo te
 pote bagay pou moun kouche, bòl, kaswòl ak manje pou David ak moun pa l' yo. Te gen ble, lòj,
 farin, grenn griye, ti pwa ak gwo pwa tout kalite, ²⁹ siwo myèl, bè, fwomaj lèt bèf, fwomaj lèt
 mouton. Yonn te di lòt: -Aprè tout mache sa a nan dezè a, moun sa yo dwe grangou, yo dwe swaf,
 yo dwe bouke kont kò yo.

Chapter 18

¹ ¶ Wa David sanble tout moun li yo. Li chwazi chèf pou chak rejiman mil sòlda ak pou chak
 divizyon san sòlda. ² Lèfini, li separe lame a an twa pòsyon, yon pòsyon sou lòd Joab, yon pòsyon
 sou lòd Abichayi, frè Joab la, yon pòsyon sou lòd Itayi, moun lavil Gat. Apre sa, wa a di yo: -Mwen
 prale avè nou tou. ³ Men sòlda yo reponn li: -Non. Ou pa prale avè nou. Sa p'ap di lènmi nou yo
 anyen si nou kouri pou yo. Si mwatye nan nou mouri, sa p'ap di yo anyen tou. Men ou menm pou
 kont pa ou, ou vo dimil (10.000) sòlda tankou nou. Se poutèt sa, pito ou rete isit nan lavil la, kote
 ou ka jwenn konkou pou voye ban nou. ⁴ W'a reponn yo: -Bon! M'ap fè sa nou wè ki pi bon an.
 Apre sa, li al kanpe bò pòtay lavil la, pandan lame a t'ap soti, divizyon apre divizyon, rejiman apre
 rejiman. ⁵ Wa a bay Joab, Abichayi ak Itayi lòd sa a: -Tanpri, fè sa pou mwen. Al dousman ak
 jennonm yo rele Absalon an tande! Tout sòlda yo te tande lè David t'ap bay chèf yo lòd sa a. ⁶ Lame
 David la soti al goumen ak moun peyi Izrayèl yo. Batay la te fèt nan rakkwa Efrayim lan. ⁷ Lame
 David la bat lame Absalon an byen bat. Jou sa a, lame Absalon an pèdi venmil (20.000) sòlda.
⁸ Batay la gaye nan tout peyi a. Jou sa a, te gen plis moun ki mouri nan rakkwa a pase nan batay la
 menm. ⁹ ¶ Absalon al kontre ak kèk sòlda nan lame David la. Li te moute sou yon milèt. Antan
 l'ap pase anba yon gwo pyebwa, cheve li yo al pran nan yon branch, milèt la menm pa rete, li kouri
 al fè wout li. Absalon rete pandye anlè. ¹⁰ Yonn nan moun David yo wè sa, li al bay Joab nouvèl
 la. Li di li: -Mwen wè Absalon pandye nan yon pyebwa. ¹¹ Joab di nonm lan: -Ou wè l'? Poukisa
 ou pa touye l' la menm? M' ta fè ou kado dis pyès an ajan ak yon sentiwon. ¹² Men nonm lan reponn

Joab: -Ou ta mèt ban mwen mil (1000) pyès an ajan la nan pla men m', mwen pa t'ap leve men m' sou pitit gason wa a. Nou tout nou te tande lòd wa a te ba ou ansanm ak Abichayi ak Itayi. Li te di:

13
Tanpri, fè sa pou mwen. Pa kite anyen rive Absalon, pitit mwen an. Si m' te pran pòz mwen pa t' tande anyen, epi m' te touye l', wa a t'ap toujou konn sa. Paske li toujou konn tou sa k'ap pase. Lè

14
sa a, ou pa ta janm pran defans mwen. Joab di li: -M'ap pèdi twòp tan la a avè ou. Li pran twa baton ak pwent yo byen fèt, li al plante yo nan kè Absalon ki te vivan toujou kote li te pandye nan

15
pyebwa a. Apre sa, dis jenn sòlda ki t'ap pote zam Joab yo tonbe sou Absalon, yo fin touye l'.

16
Lèfini, Joab fè kònen twonpèt la pou yo sispann batay la. Se konsa sòlda David yo kite rès sòlda

17
Izrayèl yo al fè wout yo. Yo pran kadav Absalon an, yo jete l' nan yon twou nan rakbwa a. Lèfini,

18
yo kouvri l' ak yon gwo pil wòch. Tout rès moun peyi Izrayèl yo te kouri al lakay yo. Depi anvan l' te mouri, Absalon te fè bati yon bèl kavo pou li nan fon Wa a, paske li t'ap di li pa t' gen pitit

19
gason pou leve non li. Jouk jòdi a yo rele kavo a moniman Absalon an. ¶ Akimaz, pitit gason Zadòk la, di Joab konsa: -Kite m' kouri al fè wa a konnen jan Seyè a rann li jistis, jan li delivre l'

20
anba men lènmi l' yo. Joab reponn li: -Non. Jòdi a pa gen bon nouvèl pou ou pote. Yon lòt jou va gen bon nouvèl pou ou pote. Men jòdi a, ou p'ap pote ankenn nouvèl bay wa a, paske se pitit

21
gason wa a menm ki mouri. Joab rele yon sòlda, moun peyi Letiopi, li di l': -Ou menm, al rakonte

22
wa a tou sa ou te wè ak je ou. Sòlda a bese tèt devan Joab. Lèfini, li kouri, li ale. Akimaz menm t'ap kenbe se pou l' ale, li di: -Nenpòt sa ki rive m', kite m' ale pote nouvèl la tou dèyè moun Letiopi a. Joab mande l': -Poukisa ou vle fè sa, pitit mwen? Yo p'ap ba ou anyen pou yon nouvèl konsa.

23
Akimaz reponn: -Sa pa fè anyen. Mwen vle ale. Lè sa a, Joab di l': -Ale non! Se konsa Akimaz

24
kouri ale, li pran wout ki pase nan plenn Jouden an, li pran devan moun peyi Letiopi a. David menm te chita ant pòtay deyò a ak pòtay anndan an. Yon faksyonè te moute sou teras anwo miray

25
la, li te kanpe sou tèt pòtay la. Li leve je l', li wè yon nonm ki t'ap kouri vini. Li rele pou avèti

26
wa a. Wa a di l': -Si li pou kont li, se bon nouvèl l'ap pote. Mesaje a t'ap pwoche toujou lè faksyonè a wè yon lòt moun ki t'ap kouri vini tou. Li pale ak nonm ki t'ap fè pòs bò pòtay la, li di l' konsa: -Men yon lòt moun k'ap vini pou kont li tou. Wa a reponn: -Sa a tou, se bon nouvèl l'ap

27
pote. Faksyonè a pran ankò: -Sou jan l'ap kouri a, gen lè premye a se Akimaz, pitit gason Zadòk

28
la. Wa a di: -Se yon bon gason. Ou mèt sèten se bon nouvèl l'ap pote. Akimaz pwoche, li di wa a bonjou. Lèfini, li tonbe ajenou devan wa a, li bese tèt li jouk atè, li di: -Monwa, Iwanj pou Seyè

29
a, Bondye ou la, paske li lage tout moun ki te leve dèyè ou yo nan men ou! David mande l': -Ban m' nouvèl ti Absalon an non. Li byen? Akimaz reponn li: -Monwa, lè Joab, moun pa wa a, te voye

m' lan, mwen wè te gen yon gwo kouri. Men, m' pa konnen sa ki te genyen. ³⁰ Wa a di l': -Bon. Kanpe bò la a. Tann mwen. Akimaz mete kò l' sou kote, li rete ap tann. ³¹ Apre sa, nonm peyi Letiopi a vin rive. Li di wa a: -Monwa, mwen gen bon nouvèl pou ou! Jòdi a, Seyè a rann ou jistis. Li wete ou anba men tout moun ki te leve dèyè ou yo. ³² Wa a mande l': -Ban m' nouvèl ti Absalon an non. Li byen? Nonm peyi Letiopi a reponn, li di l': -Se pou sa ki rive jenn gason sa a rive tout lènmi monwa yo ansanm ak tout lòt moun k'ap leve dèyè ou pou fè ou mal. ³³ Lè wa a pran nouvèl la, sa te twòp pou li. Li moute nan chanm li anwo sou tèt pòtay la pou l' kriye. Antan li prale konsa, li t'ap rele: -Absalon! Absalon, pitit mwen! Absalon! Poukisa se pa mwen ki te mouri nan plas ou! Woy! Absalon, pitit mwen! Absalon, pitit mwen!

Chapter 19

¹ ¶ Yo voye di Joab jan wa a t'ap kriye, jan li te pran lapenn pou Absalon ki mouri a. ² Jou sa a, sòlda David yo pa t' fè fèt pou genyen yo genyen batay la. Yo tout te kagou, paske yo te pran nouvèl jan wa a te nan gwo lapenn pou lanmò pitit li a. ³ Yo antre nan lavil la san fè ankenn bri, tankou sòlda ki wont paske yo kouri pou lagè. ⁴ Wa a menm te kouvri tèt li, li t'ap rele: -Woy! Gason m' lan! Absalon, pitit gason m' lan! Absalon, pitit gason m' lan! ⁵ Joab al jwenn wa a nan chanm li, li di l' konsa: -Jan ou fè sa jòdi a ou fè tout sòlda ou yo wont. Yo menm ki te sove lavi ou ansanm ak lavi pitit gason ak pitit fi ou yo, lavi madanm ak fanm kay ou yo. ⁶ Ou moutre jan ou renmen moun ki rayi ou, men ou pa vle wè moun ki renmen ou. Ou fè wè jan chèf lame ak sòlda k'ap goumen pou ou yo pa di ou anyen. Jòdi a mwen wè monwa ta pi kontan si Absalon te vivan, epi nou tout nou te mouri. ⁷ Koulye a, monwa, leve non! Al pale ak moun pa ou yo pou ankouraje yo. Si ou pa fè sa, mwen fè sèman devan Bondye, denmen maten p'ap gen yon moun k'ap kanpe avè ou ankò. Malè sa a pral pi rèd pase tout malè ki janm tonbe sou ou depi ou te jenn gason rive jounen jòdi a. ⁸ Wa a leve vre, li vin chita bò pòtay lavil la. Lè sòlda yo vin konn sa, yo tout vin sanble bò kote l'. Moun peyi Izrayèl yo menm te kouri ale chak moun lakay yo. ⁹ ¶ Nan tou peyi Izrayèl la, moun t'ap diskite, yo t'ap di: -Wa David te delivre nou anba men lènmi nou yo. Li te sove nou anba men moun peyi Filisti yo. Men koulye a, li kouri kite peyi a poutèt Absalon. ¹⁰ Nou te fè /seremoni pou mete Absalon wa peyi a. Men li mouri nan lagè. Sa ki kenbe nou koulye a pou nou fè wa David tounen ankò? ¹¹ Antan wa a lakay li, li vin konnen tou sa pèp la t'ap di. Lamennm, li voye yon mesaj bay Zadòk ak Abyata, li di yo: -Pale ak chèf fanmi moun peyi Jida yo. Mande

yo poukisa se pa yo menm premye moun ki chache fè wa a tounen lakay li. ¹² Di yo se fanmi m'
 yo ye, menm ras avè m'. Poukisa se yo menm dènye moun ki pou fè m' tounen nan palè a? ¹³ n'a
 pale ak Amasa, n'a di l' pou mwen se fanmi m' li ye. Depi jòdi a, mwen mete l' alatèt lame mwen
 an nan plas Joab. Si mwen pa kenbe pawòl, se pou Bondye ban m' pi gwo pinisyon ki genyen!
¹⁴ Lè tout moun peyi Jida yo tande pawòl David yo, yo tonbe dakò ak li. Yo mete tèt yo ansanm,
 yo voye di l': -Ou mèt tounen ansanm ak tout moun pa ou yo. ¹⁵ Wa a leve, li pran wout pou l'
 tounen. Li rive bò larivyè Jouden an. Tout moun peyi Jida yo, bò pa yo, kite lavil Gilgal, y' al kontre
 wa a. Yo ede l' janbe larivyè a. ¹⁶ ¶ Se konsa yon nonm nan branch fanmi Benjamen an, Chimeyi,
 pitit Gera a, moun lavil Baourim, te kouri al kontre wa David bò larivyè Jouden an ansanm ak yo.
¹⁷ Te gen mil (1000) gason nan branch fanm Benjamen an avè l'. Ziba, domestik fanmi Sayil la, te
 la tou ansanm ak kenz pitit gason l' yo ak vin moun k'ap travay avèk li yo. Yo tout kouri al kontre
 wa a bò larivyè Jouden an. ¹⁸ Yo janbe larivyè a, yo ede moun wa yo janbe pas la. Yo fè tou sa
 wa a te mande yo fè. Lè wa a fè sa pou l' janbe tou, Chimeyi lage kò l' atè devan wa a. ¹⁹ Li di l'
 konsa: -Monwa, tanpri! Pa kenbe m' nan kè! Bliye sa m' te fè ou jou ou t'ap kite lavil Jerizalèm lan.
²⁰ Tanpri, pa kenbe m' nan kè! Mwen konnen sa m' te fè a te mal, monwa. Ou wè jòdi a, premye
 moun nan tout branch fanmi Jozèf la ki kouri vin resevwa ou, se mwen menm. ²¹ Lè sa a, Abichayi,
 pitit gason Sewouya a, pale, li di konsa: -Sa pa ka anpeche yo touye Chimeyi, paske li te bay moun
 Bondye te chwazi pou wa a madichon. ²² Men David reponn li: -Pa antre nan koze a. Sa pa gade
 ou, pitit Sewouya! Poukisa jòdi a ou vle kenbe tèt avè m'? Mwen pa vle yo touye pesonn nan moun
 peyi Izrayèl yo, paske jòdi a mwen konnen se mwen menm ki wa peyi Izrayèl la vre. ²³ Apre sa,
 wa a di Chimeyi konsa: -Mwen fè ou sèman, yo p'ap touye ou! ²⁴ ¶ Mefibochèt, pitit pitit Sayil la,
 te vin kontre wa a tou. Depi jou wa David te kite lavil Jerizalèm lan jouk jou li te tounen san danje
 san malè a, Mefibochèt pa t' koupe bab li, ni li pa t' lave pye l', ni li pa t' lave rad sou li. ²⁵ Lè
 Mefibochèt rive lavil Jerizalèm pou li al resevwa wa a, wa a di l': -Mefibochèt, poukisa ou pa t'
 pati ansanm avè m'? ²⁶ Mefibochèt reponn li: -Monwa, se domestik mwen an ki woule m'. Ou
 konnen m' enfim. Mwen te mande domestik mwen an pou l' te sele fenmèl bourik mwen an pou m'
 te ka ale ansanm avèk monwa. ²⁷ Domestik la al ba ou manti sou mwen. Men, monwa, mèt mwen,
 ou tankou yon zanj Bondye. Ou mèt fè sa ou vle avè m'. ²⁸ Tout moun nan fanmi Sayil, granpapa
 m' lan, te merite pou ou te touye yo vre. Men monwa, ou ban m' dwa pou m' manje sou menm tab
 avè ou. Mwen pa gen dwa mande monwa ankenn lòt favè ankò. ²⁹ Wa reponn li: -Ou pa bezwen

di anyen ankò! Mwen pran desizyon m' deja. W'a antann ou ak Ziba pou nou pataje tè Sayil yo.
30

Mefibochèt di wa a: -Ziba te mèt pran tout pou li. Sa ki pi enpòtan pou mwen, se wè pou m' wè
31
wa a tounen san danje san malè nan palè li. ¶ Bazilayi, moun lavil Gilgal, te desann soti lavil
Wogelim rive larivyè Jouden ansanm ak wa a. Li janbe lòt bò larivyè a ansanm ak wa a. Lè li fin

32
janbe, li di wa a orevwa pou l' te tounen lakay li. Bazilayi te yon vye granmoun, li te gen
katrevenzan. Li te rich anpil. Se li menm ki te bay wa a tout pwovizyon li te bezwen lè wa a te lavil

33
Manayim. Wa a di l' konsa: -Ann ale ansanm avè m' lavil Jerizalèm non. M'a pran swen ou.

34
Men Bazilayi reponn li: -Monwa, mwen pa rete anpil tan ankò pou m' viv. M' pa wè poukisa pou

35
m' ale ansanm avè ou lavil Jerizalèm. Mwen deja gen katreven lanne sou tè mwen. Anyen pa
di m' anyen ankò. M' pa pran gou ni sa m'ap manje, ni sa m'ap bwè. M' pa tande vwa gason ak fi

36
k'ap chante yo ankò. M' pral tounen yon chay pou monwa. Epitou, mwen pa merite tout rekonpans

37
sa a. Se annik yon ti bout chemen m' te vle fè avè ou lòt bò larivyè Jouden an. Tanpri, kite m'
tounen lakay mwen. Konsa, m'a mouri toupre tonm fanmi mwen. Men Chimkam, pitit mwen, ki

38
va sèvi ou. Ou mèt pran l' avè ou, monwa. W'a fè sa ou wè ki pi bon pou li. Wa a reponn li:
-Bon. M'ap pran l' avè m'. M'a fè pou li tou sa ou menm w'a wè ki bon pou li. Nenpòt kisa w'a

39
mande m', m'a fè l' pou ou. Apre sa, tout moun yo janbe lòt bò larivyè Jouden an. Lè wa a fin

40
janbe, li bo Bazilayi, li rele benediksyon Bondye sou li. Bazilayi tounen lakay li apre sa. ¶ Tout
moun peyi Jida yo ak mwatye nan moun peyi Izrayèl yo janbe lòt bò larivyè Jouden an ansanm ak

41
wa a. Wa a desann lavil Gilga. Chimkam te ale avè l'. Lè sa a, moun peyi Izrayèl yo al jwenn
wa a, yo di l' konsa: -Monwa, poukisa frè nou yo, moun peyi Jida yo, te vin pran ou, yo fè ou janbe

42
larivyè Jouden ansanm ak tout fanmi ou ak tout moun pa ou yo? Moun Jida yo reponn: -Nou fè
l' paske wa a pi fanmi moun Jida yo pase li fanmi moun Izrayèl yo. Sa ki gen la a atò pou nou fache?

43
Li pa janm peye manje pou nou ki fanmi l', ni li pa janm fè nou kado anyen. Lamenm, moun
peyi Izrayèl yo reponn moun peyi Jida yo: -Nou gen dis fwa plis dwa pase moun Jida yo sou wa
a, menm si se fanmi yo li ye. Poukisa nou menm moun Jida yo, nou meprize moun peyi Izrayèl yo
konsa? Pa bliye se nou menm premye moun ki te pale koze fè wa a tounen an. Men moun peyi Jida
yo pale pi fò, yo fèmen bouch moun peyi Izrayèl yo.

Chapter 20

¹
 ¶ Nan lavil Gilgal te gen yon nonm yo te rele Cheba, pitit Bikri, nan branch fanmi Benjamen an. Se te yon vakabon. Li manche twonpèt li, li rele pèp la, epi li di yo byen fò: -Nou pa gen anyen pou nou wè ak David! Nou pa bezwen anyen nan zafè pitit Izayi a! Ann al lakay nou, nou menm

²
 moun peyi Izrayèl yo! Se konsa moun peyi Izrayèl yo vire do bay David pou yo swiv Cheba, pitit Bikri a. Men, moun peyi Jida yo rete ak David. Yo swiv li depi larivyè Jouden rive lavil Jerizalèm.

³
 Lè David rive nan palè li lavil Jerizalèm, li pran dis fanm kay li te kite pou okipe palè a, li fèmen yo nan yon kay apa ak moun pou siveye yo. Li ba yo tou sa yo bezwen, men li pa janm kouche ak

⁴
 yo yonn ankò. Yo rete fèmen la tout rès lavi yo, tankou fanm ki pèdi mari yo. ¶ Apre sa, wa a pale ak Amasa, li di l' konsa: -M' ba ou twa jou pou ou sanble tout mesye Jida yo. Apre sa, w'a vin

⁵
 ak yo devan m'. Amasa pati al avèti mesye Jida yo. Men, li pa tounen dat wa a te ba li pou l' te

⁶
 tounen an. Wa a rele Abichayi, li di l' konsa: -Cheba pral ban nou plis traka pase Absalon. Pran kòmandman lame mwen an. Pati dèyè l' anvan li gen tan jwenn yon lavil ak gwo ranpa pou l' chape

⁷
 anba men nou. Se konsa sòlda Joab yo, keretyen yo ak peletyen yo ak tout lòt vanyan sòlda ki te

⁸
 nan lame wa a kite lavil Jerizalèm ak Abichayi, yo pati dèyè Cheba. Lè yo rive bò gwo wòch ki nan lavil Gibeyon an, Amasa vin kontre ak yo. Joab te gen rad batay li sou li ak yon nepe nan djenn

⁹
 li mare nan ren l'. Joab vanse devan l'. Nepe a soti nan djenn lan, li tonbe atè. Joab di Amasa:

¹⁰
 -Ban m' nouvèl ou non, zanmi. Epi li kenbe l' nan bab ak men dwat li pou l' bo li. Amasa menm pa fè atansyon lòt nepe Joab te kenbe nan men gòch li a. Joab djage l' nan vant. Tout trip li soti deyò. Li mouri la menm. Konsa, Joab pa t' bezwen ba li yon dezyèm kou. Apre sa, Joab ak Abichayi,

¹¹
 frè l' la, pati dèyè Cheba. Yonn nan sòlda Joab yo te kanpe bò kadav Amasa a. Li pran rele byen

¹²
 fò: -Tout moun ki pou Joab ak David, se pou yo swiv Joab! Men, kadav Amasa a, tou plen san, te blayi nan mitan wout la. Lè sòlda Joab la wè chak fwa yon moun rive devan kadav la li rete, li

¹³
 pran kadav Amasa a, li trennen l' nan yon jaden sou kote wout la, li voye yon rad sou li. Lè li

¹⁴
 wete kadav la nan mitan wout la, tout lame a pase, yo pati ak Joab dèyè Cheba, pitit Bikri a. ¶ Cheba bò pa l' menm te pase nan tout peyi ki pou branch fanmi Izrayèl yo, li rive lavil Abèl-Bèt

¹⁵
 Maka. Tout moun fanmi Bikri yo te sanble dèyè l', yo swiv li nan lavil la. Sòlda Joab yo vin rive devan Abèl-Bèt Maka. Yo sènen lavil la, yo anpile ranblè nan pye gwo miray deyò a pou yo

¹⁶
 te ka anvayi lavil la. Apre sa, yo pran fouye anba miray la pou fè l' tonbe. Te gen yon fanm nan lavil la ki te gen bon konprann. Li rete sou miray la, li di: -Ey! Ey! Tanpri, koute sa m'ap di nou!

¹⁷
 Al di Joab pou l' pwoche bò isit la. Mwen ta renmen fè yon ti pale avè l'. Joab vin rive. Fanm lan mande l': -Se ou menm ki Joab la? Joab reponn: -Wi, se mwen menm. Fanm lan di l': -Se sèvis

18
 m'ap rann ou. Koute sa m'ap di ou. Joab reponn: -M'ap koute ou, wi. Fanm lan di konsa: -Nan tan lontan yo te konn di: Depi ou bezwen konnen kichòy, desann lavil Abèl, al mande la. Se konsa moun te toujou regle zafè yo. 19
 Lavil nou se yonn nan lavil peyi Izrayèl yo kote ki pa gen dezòd. Lèfini, li pa janm vire do bay wa a. Poukisa w'ap chache detwi l'? Se kraze ou vle kraze sa ki pou Seyè a? 20
 Joab reponn li: -Sa ou kwè a se pa sa! Se pa t' nan lide m' ni pou m' te kraze, ni pou m' te detwi lavil nou an. 21
 Se pa dèyè sa nou ye. Gen yon nonm yo rele Cheba, pitit gason Bikri a. Se moun mòn Efrayim li ye. Li pran lezam kont wa David. Si ou lage nonm sa a nan men m', m'ap vire do m' kite lavil la an repo. Fanm lan reponn li: -N'ap voye tèt li jete lòt bò miray la ba ou. 22
 li al pale ak moun lavil yo, li di yo sa li gen lide fè. Yo koupe tèt Cheba, yo voye l' jete lòt bò miray la bay Joab. Joab fè kònen twonpèt la pou bay sòlda li yo siyal pou yo kite lavil la al fè wout yo lakay yo. Joab menm tounen lavil Jerizalèm al jwenn wa a. 23
 ¶ Joab te kòmandan tout lame pèp Izrayèl la. Benaja, pitit Jeyojada, te kòmandan keretyen yo ak peletyen yo, gad pèsonèl wa a. 24
 Adoram te reskonsab kòve yo. Jozafa, pitit gason Aliyoud la, te reskonsab achiv wa a. 25
 Cheva te sekretè gouvènman an. Zadòk ak Abyata te prèt. 26
 Te gen yon nonm yo te rele Ira, moun lavil Jayi, ki te prèt wa David tou.

Chapter 21

1
 ¶ Sou rèy wa David, vin gen yon gwo grangou pandan twazan yonn apre lòt. Lè sa a, David al mande Seyè a sa k'ap pase. Seyè a reponn li: -Se krim Sayil ak fanmi l' yo te fè ki lakòz grangou sa a, paske yo te sasinen moun lavil Gabawon yo. 2
 Moun lavil Gabawon yo pa t' fanmi moun Izrayèl yo. Se yon ti rès nan moun peyi Amori moun Izrayèl yo te pran angajman yo t'ap toujou pwoteje. Men, Sayil te sitèlman cho pou defann enterè moun fanmi Izrayèl ak fanmi Jida yo, li te soti pou l' te detwi yo. 3
 Se konsa David voye chache yo, li mande yo: -Kisa m' ka fè pou nou? Ki jan pou m' repara tou sa nou sibi pou nou ka rale benediksyon sou pèp Seyè a? 4
 Yo reponn li: -Sa nou gen pou n' regle ak Sayil ansanm ak rès fanmi li an, se pa yon keksyon lò ak ajan, ni nou pa ta renmen touye pesonn nan peyi Izrayèl. David mande yo: -Manyè di m' sa nou vle m' fè pou nou. 5
 Yo reponn li: -Sayil te soti pou disparèt nou. Li te fè lide pou l' te touye nou nèt pou l' pa kite yonn nan nou vivan nan tout peyi Izrayèl la. 6
 Enben, renmèt nou sèt gason nan fanmi li an pou nou ka pann yo devan Seyè a nan lavil Gabawon, lavil Sayil la menm, nonm Seyè a te chwazi pou wa a. 7
 David reponn yo: -M'ap ban nou yo. David pa ba yo Mefibochèt, pitit Jonatan an, pitit pitit Sayil

⁸
 la, poutèt sèman li menm ak Jonatan, pitit Sayil la, yo te fè devan Bondye. Men, li pran Amoni
 ak Mefibochèt, de pitit gason Rispa, pitit Ayi a, te fè pou Sayil, ansanm ak senk pitit gason Merab,
⁹
 pitit Sayil la, te fè pou Adriyèl, pitit gason Bazilayi, moun lavil Meola a. Li lage yo nan men
 moun Gabawon yo ki pann yo sou yon ti mòn devan Seyè a. Yo tou lesèt mouri ansanm. Lè sa a,
¹⁰
 se te fen sezon prentan, yo te fèk konmanse rekòt lòj la. ¶ Apre sa, Rispa, pitit Ayi a, pran yon
 rad sak, li vlope kò l' ladan l', li al chita sou wòch kote kadav yo te ye a. Li rete la depi nan
 konmansman rekòt la jouk sezon lapli a rive. Lajounen li t'ap chase zwazo ki te vle vin poze sou
¹¹
 kadav yo. Lannwit li t'ap kouri dèyè bèt nan bwa ki te vle vin devore yo. Y' al rapòte bay David
¹²
 sa Rispa, yonn nan fanm kay Sayil yo, t'ap fè a. David al pran zosman Sayil ansanm ak zosman
 Jonatan nan men moun lavil Jabès yo nan peyi Galarad. (Moun sa yo te al vòlò kadav Sayil ak
 Jonatan sou plas piblik lavil Bèt-Chean kote moun Filisti yo te pann yo lè yo te fin touye Sayil sou
¹³
 mòn Gilboa a.) David pran zosman Sayil ansanm ak zosman Jonatan yo, li ranmase zosman sèt
¹⁴
 mesye yo te pann yo tou. Lèfini, yo antere yo ansanm ak zosman Sayil ak zosman Jonatan yo
 nan tonm Kich, papa Sayil la, lavil Zela nan pòsyon peyi ki pou branch fanmi Benjamin yo. Yo fè
¹⁵
 tou sa wa a te bay lòd fè a. Apre sa, Bondye tandè lapriyè yo pou peyi a. ¶ Lagè pete ankò ant
 moun Filisti yo ak moun peyi Izrayèl yo. David desann ak sòlda li yo, li al goumen ak moun Filisti
¹⁶
 yo. Pandan y'ap goumen konsa, David santi l' bouke. Yon potorik gason bèl wotè yo te rele
 Ichbibenòb, moun laras Arafa yo, fè lide pou l' touye David. Li te gen yon frenn an kwiv ki te peze
¹⁷
 sèt liv edmi konsa ak yon nepe tou nèf mare nan ren li. Men, Abichayi, pitit gason Sewouja a,
 vin pote wa a sekou. Li atake moun Filisti a, li touye l'. Lè sa a, moun David yo fè wa a pwomèt
 pou li pa janm vin nan lagè avè yo ankò. Yo di l': -Ou se espwa pèp Izrayèl la. Nou pa vle pèdi ou.
¹⁸
 Apre sa, te gen yon lòt batay ankò avè moun Filisti yo lavil Gòb. Lè sa a, Sibekayi, moun lavil
¹⁹
 Ousa, touye Saf, yon lòt potorik gason nan ras moun Arafa yo. Pandan yon lòt batay avèk moun
 Filisti yo ankò nan menm lavil Gòb la, Elanan, pitit gason Jari, moun lavil Betleyèm, touye Golyat,
 yon moun lavil Gat. Frenn Golyat la te gen yon manch menm gwosè ak yon gwo manch pilon.
²⁰
 vin gen yon lòt batay ankò lavil Gat. Lè sa a, te gen yon sòlda bèl wotè ki te gen sis dwèt nan
²¹
 chak men, sis zòtèy nan chak pye. Se te yonn nan ras moun Arafa yo. Li t'ap pase moun pèp
²²
 Izrayèl yo nan betiz. Jonatan, pitit gason Chimeya, frè David la, touye l'. Kat sòlda peyi Filisti
 sa yo te moun bèl wotè, potorik gason, nan ras moun Arafa yo lavil Gat. David ak moun pa li yo
 touye yo.

Chapter 22

¹ ¶ Lè Seyè a te fin delivre David anba men Sayil ak anba men tout lènmi li yo, David chante
 chante sa a pou Seyè a. ² ¶ Li di konsa: -Seyè, se ou menm ki twou wòch kote m' kache a. Se ou
 menm ki sèvi m' ranpa. Se ou menm ki delivre m'. ³ Ou se Bondye mwen, se ou menm ki pwoteje
 m'. Se nan ou mwen mete tout konfyans mwen. Se ou ki tout defans mwen. Se fòs ou k'ap sove m'.
 Se anba zèl ou m' jwenn kote pou m' kache. Se ou ki delivrans mwen. Se ou ki delivre m' anba
 mechan yo. ⁴ Mwen rele Seyè a, li delivre m' anba lènmi m' yo. Lwanj pou Seyè a! ⁵ Lanmò te fin
 vlope m', mwen te pè lè m' wè tout malè sa yo tonbe sou mwen. ⁶ Privye lanmò te tonbe sou mwen
 yon sèl kou. Kote m' vire, mwen wè lanmò devan m'. ⁷ Nan mizè mwen te ye a mwen rele Seyè a,
 Mwen mande Bondye mwen sekou. Kote l' chita lakay li a, li tandè vwa mwen. Rèl mwen rive jouk
 nan zòrèy li. ⁸ Lè sa a, latè pran tranble, li souke. Fondasyon syèl la pran tranble. Yon sèl frison
 pran yo, paske Bondye te an kòlè. ⁹ Lafimen t'ap soti nan twou nen li. Yon gwo flannm dife ak moso
 chabon tou limen t'ap soti nan bouch li. ¹⁰ Li bese syèl la, li desann ak yon gwo nwaj nwa anba
 pye li. ¹¹ Li moute sou do yon zanj cheriben, li t'ap vole. Yon kouran van t'ap pouse l' ale. ¹² Li
 te kache kò l' nan fènwa. Yon gwo nwaj pwès plen dlo te vlope l' toupatou. ¹³ Anpil chabon dife
 tou limen t'ap soti nan gwo limyè ki t'ap klere devan li an. ¹⁴ Seyè a pran gwonde nan syèl la.
 Bondye ki anwo nan syèl la fè tout moun tandè vwa li. ¹⁵ Li voye flèch li yo, li gaye tout lènmi m'
 yo, li fè yo tout kouri ak kout zèklè. ¹⁶ Lè ou an kòlè, Seyè, van soti ak fòs nan twou nen ou. Lè
 konsa, moun wè fon lanmè a, fondasyon latè a parèt aklè. ¹⁷ Seyè a rete nan syèl la, li lonje men
 l', li pran m'. Li rale m' soti nan mitan gwo dlo yo. ¹⁸ Li delivre m' anba gwo lènmi m' yo, anba
 tout moun sa yo ki te rayi m', epi ki te pi fò pase m'. ¹⁹ Lè m' te nan tray, yo pwofite atake m'. Men,
 Seyè a te kenbe m'. ²⁰ Li wete m' nan move pa a. Li delivre m' paske li renmen m'. ²¹ Seyè a ban
 m' sa m' merite, paske li wè m' mache dwat devan li. Li ban m' benediksyon paske li wè mwen
 inonsan. ²² Mwen te obeyi lalwa Seyè a, mwen pa janm vire do bay Bondye. ²³ Mwen fè tou sa
 ki nan lalwa li, mwen pa janm dezobeyi kòmandman li yo. ²⁴ Li konnen mwen pa antò. Mwen
 kenbe kò m' pou m' pa fè sa ki mal. ²⁵ Se konsa li ban m' sa m' merite, paske mwen mache dwat

devan li, paske li wè mwen inonsan. ²⁶ Ou menm, Seyè, ou kenbe pawòl ou ak moun ki kenbe
 pawòl yo, ou bon ak moun ki bon. ²⁷ Ou pa fè ipokrit ak moun ki pa fè ipokrit avè ou, men ou
 malen ak moun ki malen. ²⁸ Ou sove moun ki soumèt yo devan ou. Men, ou annik gade moun ki
 gen lògèy yo, ou desann yo. ²⁹ Seyè, ou se limyè mwen. Se ou ki wete m' nan fènwa kote m' te ye
 a. ³⁰ Avè ou, mwen fonsè sou bann lènmi m' yo ki ame jouk nan dan. Avè ou, mwen eskalade
 miray ki sèvi yo defans. ³¹ Bondye o! Tou sa ou fè bon nèt ale. Ou pa gen de pawòl. Ou pwoteje
 tout moun ki chache pwoteksyon anba zèl ou. ³² Ki moun ki Bondye si se pa Seyè a? Ki moun ki
 defans nou si se pa Bondye nou an? ³³ Se Bondye ki pwoteje m' avè fòs li. Li fè m' mennen yon
 lavi san repwòch. ³⁴ Li asire pye m' tankou pye kabrit, li fè m' mache sou mòn yo san m' pa tonbe.
³⁵ Li moutre m' jan pou m' goumen. Li ban m' fòs pou m' sèvi ak pi gwo banza ki genyen. ³⁶ Se
 ou menm, Seyè, ki pwoteje m'. Se ou ki sove m'. Si m' kapab leve kanpe, se paske ou renmen m'.
³⁷ Ou pa kite yo bare wout mwen. Mwen pa janm pèdi pye. ³⁸ Mwen kouri dèyè lènmi m' yo,
 mwen bat yo. Mwen pa tounen toutan mwen pa fin kraze yo nèt. ³⁹ Mwen jete yo atè, m' kraze yo,
 yo pa ka leve. Yo tonbe, mwen mete pye m' sou kou yo. ⁴⁰ Ou ban m' kont fòs pou m' goumen.
 Ou fè lènmi m' yo mande m' padon. ⁴¹ Ou fè yo kouri devan m'. Mwen disparèt tout moun ki rayi
 m' yo. ⁴² Y'ap mande sekou, men pa gen moun ki ka sove yo. Y'ap rele Seyè a, men li pa reponn
 yo. ⁴³ Mwen kraze yo fè yo tounen pousyè. M' pilonnen yo, m' mache sou yo tankou sou labou
 nan lari. ⁴⁴ Ou delivre m' anba pèp rebèl sa a. Ou fè m' rete chèf pou m' gouvènè tout nasyon yo
 tou. Pèp mwen pa t' konnen, se yo menm k'ap sèvi m'. ⁴⁵ Moun lòt peyi yo ap achte figi m'. Kou
 yo tande vwa m', yo obeyi m'. ⁴⁶ Yo pèdi tout kouraj yo. Yo soti kote yo te kache a, y'ap tranble
 kou fèy bwa. ⁴⁷ Konpliman pou Seyè a! Lwanj pou moun ki pran defans mwen an! Se Bondye ki
 delivre m', se li menm ki pwoteje m'. Ann fè konnen jan li gen pouvwa! ⁴⁸ Se Bondye ki pran
 revanj mwen. Se li ki mete pèp yo anba pye mwen. ⁴⁹ Ou sove m' anba men lènmi m' yo. Ou wete
 m' anba men moun ki t'ap konbat mwen yo. Ou delivre m' anba ansasen yo. ⁵⁰ Se poutèt sa m'a fè
 moun lòt nasyon yo konnen ki moun ou ye. m'a chante pou fè lwanj ou. ⁵¹ Bondye delivre wa li a

anpil fwa. Li moutre jan li pa janm sispann renmen David, moun li chwazi a, ansanm ak pitit pitit li yo pou tout tan.

Chapter 23

¹ ¶ Men dènye pawòl David yo. David, pitit gason Izayi a, te yon nonm Bondye te mete byen wo. Se li menm Bondye Jakòb la te chwazi pou wa. Li te fè bèl chante pou pèp Izrayèl la. Men sa li te di: ² Se lespri Seyè a k'ap pale nan mwen. Se mesaj li k'ap soti nan bouch mwen. ³ Bondye pèp Izrayèl la pale. Moun k'ap pwoteje pèp Izrayèl la di m' konsa: Chèf k'ap gouvènen san patipri, k'ap gouvènen avèk krentif pou Bondye, ⁴ ap tankou solèy k'ap leve byen klere nan maten, nan yon syèl klè san yon ti nwaj ladan l'. L'ap tankou solèy k'ap fè zèb pouse apre lapli. ⁵ Se konsa Bondye pral beni tout ras mwen, paske li te pase yon kontra avè m' pou tout tan, yon kontra ki p'ap janm kase, yon pwomès ki p'ap janm chanje. Nan tout sikonstans l'ap fè m' genyen. L'ap ban mwen tou sa mwen vle. ⁶ Men, moun ki pa konn Bondye yo, y'ap tankou pikan y'ap voye jete. Pesonn p'ap manyen yo ak men. ⁷ Pou manyen yo se pou ou gen yon bout fè osinon yon frenn. Lèfini, ou boule yo nèt nan dife. ⁸ ¶ Men non vanyan sòlda David yo: Premye a te rele Jochèb Bachebèt, moun lavil Tachemon. Se li menm ki te chèf Twa pi vanyan yo. Pou kont li, li goumen ak frenn li ak witsan (800) moun. Li touye tout yon sèl kou. ⁹ Dezyèm lan te rele Eleaza, pitit Dodo, pitit yon moun lavil Awoya. Se te yonn nan Twa pi vanyan yo. Yon jou, li menm ak David, y' al atake moun Filisti yo ki te sanble pou goumen. Sòlda pèp Izrayèl yo te kouri pou batay la. ¹⁰ Men, li menm, li kenbe tèt ak moun Filisti yo, li touye moun jouk li gen lakranp nan men l'. Li pa t' ka louvri men l' pou l' lage nepe a. Jou sa a, Seyè a goumen byen goumen jouk li touye tout lènmi yo. Apre sa, lame pèp Izrayèl la tounen kote Eleaza te ye a, yo pran tou sa lènmi yo te kite. ¹¹ Twazyèm lan te rele Chama, pitit gason Age, moun lavil Ara. Yon jou, moun Filisti yo te sanble lavil Lechi, kote ki te gen yon gwo jaden pwa. Sòlda pèp Izrayèl yo t'ap kouri pou moun Filisti yo. ¹² Men Chama rete kanpe nan mitan jaden pwa a, li kenbe tèt ak moun Filisti yo, li bat yo byen bat. Se konsa Seyè a te goumen byen goumen jouk li touye tout lènmi yo. ¹³ Yon lòt jou, nan sezon rekòt, twa nan gwoup trant yo al jwenn David nan gwòt Adoulam lan. Lame moun Filisti yo te moute kan yo nan plenn Refrayim yo. ¹⁴ Lè sa a, David te nan ti fò a. Yon gwoup moun Filisti te pran lavil Betleyèm. ¹⁵ Yon sèl anvè pran David, li di konsa: Ki moun ki va fè m' bwè ti gout dlo nan pi ki nan pòtay lavil Betleyèm lan? ¹⁶ Lamenn, twa mesye yo desann nan kan moun Filisti yo, yo pran dlo nan pi

ki te nan pòtay lavil Betleyèm lan, yo pote l' vin bay David. Men, David refize bwè dlo a. Li vide
¹⁷
 l' atè, li ofri l' bay Seyè a. Li di konsa: Seyè, mwen pa gen dwa bwè dlo sa a. Se tankou si m' ta
 bwè san mesye sa yo ki te riske lavi yo pou al chache l'. Se konsa li derefize bwè dlo a. Se sa twa
¹⁸
 vanyan sòlda sa yo te fè. Abichayi, frè Joab, pitit Sewouja, te chèf gwoup trant yo. Pou kont li,
 avèk yon frenn nan men l', li goumen ak twasan (300) moun, li touye yo. Se konsa, tout moun t'ap
¹⁹
 nonmen non l' nan gwoup trant lan. Se non li yo t'ap nonmen pi plis nan Trant yo. Apre sa, li
²⁰
 vin chèf yo. Men, li pa janm rive fè sa Twa pi vanyan yo te fè. Benaja, pitit gason Jeojada a,
 moun lavil Kabseyèl, te pitit pitit yon vanyan sòlda. Li te fè anpil bagay ki fè wè li pa t' manke
 kouraj. Se li menm ki te touye de pitit Ariyèl yo, moun lavil Moab. Yon jou, lanèj t'ap tonbe, li
²¹
 desann nan yon sitèn dlo pou li touye yon lyon. Se li menm ki te touye yon moun peyi Lejip,
 yon potorik gason bèl wotè, ki te gen yon frenn nan men l'. Li menm, li atake l' ak yon baton ase.
²²
 Li wete frenn lan nan men moun Lejip la epi li touye l' avè l'. Men sa Benaja, pitit gason Jeojada
²³
 a, te fè. Se konsa tout moun t'ap nonmen non l' nan gwoup Trant lan. Se non li yo t'ap nonmen
 pi plis nan Trant yo. Apre sa, li vin chèf yo. Men, li pa t' janm rive fè sa twa pi vanyan yo te fè.
²⁴
 David te mete l' chèf gad kò li. Nan gwoup Trant lan te gen ankò: Asayèl, frè Joab la, Elanan,
²⁵ ²⁶
 pitit gason Dodo, moun lavil Betleyèm, Chama ak Elika, moun lavil Awòd, Elèz, moun lavil
²⁷
 Pelèt, Ira, pitit gason Ikèch, moun lavil Tekoa, Abyezè, moun lavil Anatòt, Mebounayi, moun
²⁸ ²⁹
 lavil Oucha, Salmon, moun lavil Awoya, Marayi, moun lavil Netofa, Elèb, pitit gason Bana,
³⁰
 moun lavil Gibeya nan pòsyon tè ki pou branch fanmi Benjamen yo, Benaja, moun lavil Piraton,
³¹
 Idayi, moun ravin Gach yo, Abyalbon, moun lavil Araba, Azmavèt, moun lavil Baawoun,
³² ³³
 Elyaba, moun lavil Chalbon, pitit gason Joachenn yo, Jonatan, Chama, moun lavil Ara,
³⁴
 Akiyam, pitit gason Chara, moun lavil Ara, Elifelèt, pitit gason Asbayi, moun lavil Maka, Elyam,
³⁵
 pitit gason Achitofèl, moun lavil Gilo, Ezarayi, moun lavil Kamèl, Parayi, moun lavil Arab,
³⁶ ³⁷
 Igal, pitit gason Natan, moun lavil Zoba, Bani, moun lavil Gad, Zelèk, moun lavil Amon,
³⁸
 Nakarayi, moun lavil Bewòt, se li menm ki te pote zam Joab, pitit Sewouya a, Ira ak Garèb, nan
³⁹
 fanmi Jetè a, Ouri, moun lavil Et la. Antou, te gen transèt vanyan sòlda.

Chapter 24

¹
 ¶ Yon jou, Seyè a move sou pèp Izrayèl la ankò. Li fè David lakòz malè tonbe sou yo. Seyè
 a di David al konte konbe moun ki nan peyi Izrayèl ak nan peyi Jida. ² Wa a pale ak Joab,
 kòmandman an chèf lame a, ki te la avè l', li di l' konsa: -Ale nan tout branch fanmi Izrayèl yo, depi
 lavil Dann nan nò jouk lavil Bètcheba nan sid. Konte mezi moun ki nan pèp la. Mwen vle konnen
³
 konbe moun ki gen nan peyi a. Men, Joab di wa a: -Monwa, mwen mande Seyè a, Bondye ou la,
 pou li fè pèp Izrayèl la vin san fwa pi plis pase jan li ye koulye a, lèfini pou monwa ka viv lontan
⁴
 pou wè sa! Men, poukisa, monwa, ou vle konte konbe moun ki nan peyi a? Men, wa a pa t' soti
 pou li chanje lòd li te bay la. Konsa, Joab ak lòt gwo chèf lame yo te blije soumèt yo. Yo soti devan
⁵
 wa a, yo pati, y' al konte konbe moun ki nan peyi Izrayèl la. Yo travèse larivyè Jouden, y' al moute
 kan yo lavil Awoyè, nan mitan fon an, nan pòsyon tè ki pou branch fanmi Gad la. Apre sa, yo pati
⁶
 pou Jazè bò nan nò. Y' al lavil Galarad, yo pase lavil Kadès nan pòsyon tè ki pou moun Et yo,
⁷
 jouk yo rive Dann. Yo mache nan tout zòn lan, apre sa y' ale lavil Sidon sou bò lwès. Lèfini, yo
 desann nan direksyon sid, yo rive nan Fò Tir la, yo pase nan tout bouk moun Iva yo ak bouk moun
⁸
 Kanaran yo, yo rive Bècheba nan zòn Negèv nan peyi Jida a. Se konsa yo mache nan tout peyi
⁹
 a. Apre nèf mwa ven jou, yo tounen lavil Jerizalèm. Joab renmèt wa a rapò ki bay kantite moun
 antou ki te gen nan tout peyi a. Se konsa yo te jwenn witsanmil (800.000) gason ki ka fè lagè epi
¹⁰
 ki konn sèvi ak nepe nan peyi Izrayèl la ak senksanmil (500.000) nan peyi Jida a. ¶ Lè David
 fin fè konte konbe moun ki gen nan peyi a, konsyans li konmanse repwoche l'. Li di Seyè a: -Lè
 m' fè sa m' fè a, mwen fè yon gwo peche. Tanpri, Seyè, padonnen m', se sèvitè ou mwen ye. Mwen
¹¹
 te aji tankou moun fou. Nan denmen maten, antan David ap leve sot nan kabann li, ¹² Seyè a
 pale ak pwofèt Gad, konseye David la, li di l' konsa: -Al di David mwen ba li twa chatiman pou li
¹³
 menm li chwazi yonn ladan yo. Sa l'a chwazi a se sa m'a fè l'. Gad vin jwenn li lakay li. Li fè l'
 konnen mesaj Seyè a te ba li a. Li di l' konsa: -Kisa ou vle? Sèt lanne grangou nan tout peyi a, twa
 mwa ap kouri devan lènmi ou, osinon twa jou epidemi nan tout peyi a. Al kalkile sou sa pou ou fè
¹⁴
 m' konnen ki repons pou m' pote bay moun ki voye m' lan. David reponn: -Mwen nan gwo tèt
 chaje! Men, m' pa vle tonbe anba men lèzòm menm! Pito se Seyè a menm ki pini m', paske li gen
¹⁵
 bon kè. Se konsa Seyè a voye yon epidemi sou pèp Izrayèl la, li konmanse menm jou maten sa
 a pou twa jou, jan l' te di a. Depi lavil Dann nan nò rive lavil Bètcheba nan sid peyi a, swasanndimil
¹⁶
 (70.000) moun nan pèp Izrayèl la mouri. Lè zanj Seyè a te prèt pou lonje men l' sou lavil Jerizalèm
 pou detwi l', Seyè a fè lide sispann chatiman an. Li di zanj ki t'ap touye moun yo: -Sispann! kenbe

men ou! Lè sa a, zanj lan te gen tan toupre gwo glasi Araounak, moun lavil Jebis la. ¹⁷ David wè zanj lan ki t'ap touye moun yo, li pale ak Seyè a, li di l' konsa: -Se mwen menm ki koupab. Se mwen menm ki fè sa ki mal la. Kisa inonsan sa yo fè? Tanpri, se mwen menm ansanm ak fanmi mwen pou ou ta pini! ¹⁸ ¶ Men, jou sa a pwofèt Gad al jwenn David, li di l' konsa: -Moute lakay Araounak, moun lavil Jebis la, bati yon lotèl pou Seyè a nan mitan gwo glasi a. ¹⁹ David koute sa Gad te di l' la, li moute lakay Araounak jan Seyè a te ba li lòd la. ²⁰ Araounak t'ap gade, li wè wa a ki t'ap vin sou li ansanm ak chèf li yo. Li tonbe ajenou devan wa a, li bese tèt li jouk atè. ²¹ Li di l' konsa: -Monwa, sa ki mennen ou isit lakay mwen? David reponn li: -Mwen vin achte anplasman glasi a pou m' bati yon lotèl pou Seyè a, konsa epidemi an va sispann nan peyi a. ²² Araounak di l' konsa: -Monwa, ou mèt pran l'. Ofri Seyè a sa ou vle. Men bèf sa yo pou ou boule nèt tankou yon ofrann sou lotèl la. Men jouk yo ak bwa kabwa yo pou fè dife. ²³ Araounak bay wa a tout bagay sa yo. Lèfini, li di: -Mwen mande Bondye pou l' asepte ofrann ou an! ²⁴ Men wa a reponn li, li di l': -Non. Se achte m'ap achte. Se pou m' peye pou yo. Mwen p'ap pran anyen ki pa koute m' lajan pou m' ofri pou boule nèt pou Seyè a. Se konsa, David achte anplasman glasi a ansanm ak tout bèf yo pou senkant pyès ajan. ²⁵ Lèfini, li bati yon lotèl pou Seyè a, li fè ofrann pou boule nèt pou Bondye ak ofrann pou di Bondye mèsi. Seyè a tande lapriyè yo pou peyi a. Epidemi an sispann nan peyi Izrayèl la.

1 Kings

Chapter 1

¹ ¶ David te fin vye granmoun, li te gen gwo laj sou tèt li. Menm lè yo te kouvri l' byen kouvri ak anpil rad sou li, li te santi frèt toujou. ² Lè sa a, moun pa l' yo di l': -Monwa, nou pral chache yon jenn fi ki tifi toujou pou rete avè ou, pou pran swen ou. L'a kouche kole avè ou pou chofe ou. ³ Yo mete chache yon bèl jenn fi nan tout peyi Izrayèl la. Yo jwenn yon jenn fi nan ti bouk Chounam lan. Li te rele Abichag. Yo mennen l' bay wa a. ⁴ Se te yon bèl bèl fi. Li pran swen wa a, li sèvi l'. Men, wa a pa janm kouche avè l'. ⁵ ¶ Lè sa a, Adonija, pitit gason David te fè ak Agit la, pran pòz otorite li. Li t'ap di: -Se mwen menm ki pou wa. Li chache cha lagè, chwal ak yon eskòt senkant moun ki t'ap kouri devan l' lè li sou cha pa l'. ⁶ Men, depi li piti, papa a te gate l', li toujou kite l' fè

sa li vle. Adonija te fèt apre Absalon. Li te yon bèl gason tou. ⁷ Adonija pale avèk Joab, pitit gason
 Sewouya a, ansanm ak Abyata, prèt la. De mesye sa yo dakò pou mete tèt ansanm avè l'. ⁸ Men
 Zadòk, prèt la, Benaja, pitit gason Jeojada a, pwofèt Natan, Chimeyi, Reyi ak vanyan sòlda David
 yo pa te patizan Adonija. ⁹ Yon jou, Adonija fè yon gwo sèvis pou Bondye bò Wòch Zoelèt la
 toupre sous Anwochèl. Li touye mouton, bèf ak ti towò bèf chatre sou lotèl la. Li envite tout lòt frè
 l' yo, pitit gason David yo, ansanm ak tout gwo chèf nan peyi Jida ki t'ap travay ak papa l'. ¹⁰ Men,
 li pa t' envite ni Natan, ni Benaja, ni vanyan sòlda David yo, ni Salomon, frè menm papa avè l' la.
¹¹
 ¶ Lè sa a, Natan al jwenn Batcheba, manman Salomon, li di l' konsa: -Ou pa tande jan Adonija,
 pitit gason Agit la, gen tan pran pòz wa li? Men, wa David pa konn anyen. ¹² Koulye a, mwen pral
 ba ou yon konsèy si ou vle sove lavi ou ansanm ak lavi Salomon, pitit gason ou lan. ¹³ Ou prale
 jwenn wa a, w'ap di l' konsa: Monwa, se pa ou menm ki te fè m' sèman se Salomon, pitit gason m'
 lan, ki t'ap wa apre ou, se li menm ki tapral chita sou fotèy la nan plas ou? Kijan fè se Adonija ki
 wa koulye a? ¹⁴ Pandan w'ap pale ak wa a konsa, mwen menm m'ap antre dèyè ou, m'ap di wa a
 menm bagay la tou. ¹⁵ Se konsa, Batcheba al jwenn wa a nan chanm li. Wa a te fin granmoun. Se
 Abichag, moun lavil Chounam lan, ki t'ap pran swen li. ¹⁶ Batcheba tonbe ajenou devan wa a, li
 bese tèt li jouk atè. Wa a mande l': -Kisa ou vle? ¹⁷ Li reponn, li di konsa: -Monwa, ou te fè m'
 sèman devan Seyè a, Bondye ou la, se Salomon, pitit gason m' lan, ki t'ap wa apre ou, se li menm
 ki t'ap chita sou fotèy la nan plas ou. ¹⁸ Men koulye a, Adonija gen tan wa sou nou la a. Ou menm,
 monwa, ou pa konn sa. ¹⁹ Li fè sèvis pou Bondye, li touye yon pakèt mouton, bèf, ti towò chatre.
 Li envite tout lòt pitit gason ou yo, Abyata, prèt la, Joab, kòmandan lame a. Men, li pa envite
 Salomon, pitit gason ou lan. ²⁰ Koulye a, monwa, je tout pèp Izrayèl la sou ou, y'ap tann ou di yo
 ki moun ki pral chita sou fotèy la apre ou. ²¹ Si ou pa fè sa, monwa, lè w'a mouri, yo pral pran ni
 mwen, ni Salomon, pitit mwen an, y'ap touye nou pou move je. ²² Batcheba pa t' ankò fin pale ak
 wa a lè pwofèt Natan rive nan palè a. ²³ Yo vin di wa a men pwofèt Natan la. Natan antre, li tonbe
 ajenou, li bese tèt li jouk atè devan wa a. ²⁴ Lèfini, li di konsa: -Monwa, mèt mwen, èske se ou
 menm ki di se Adonija ki pou wa apre ou, se li ki pou chita sou fotèy la nan plas ou? ²⁵ Paske jòdi
 a l' ale, li fè sèvis pou Bondye, li touye yon pakèt bèf, ti towò chatre ak mouton. Li envite tout lòt
 pitit gason ou yo, tout gwo chèf lame a ansanm ak Abyata, prèt la. Koulye a y'ap manje, y'ap bwè
 avè l', y'ap di: Viv wa Adonija! ²⁶ Men, monwa, li pa envite ni mwen, ni Zadòk, prèt la, ni Benaja,

pitit Jeojada a, ni Salomon, pitit gason ou lan. ²⁷ Eske se monwa ki bay lòd fè sa san ou pa fè moun
 k'ap sèvi ou yo konnen ki moun ki pral chita sou fotèy la nan plas ou? ²⁸ Wa David reponn, li di:
 -Rele Batcheba pou mwen, tanpri! Batcheba antre ankò, li kanpe devan wa a. ²⁹ Lè sa a, wa a fè
 sèman, li di konsa: -Mwen fè sèman nan non Seyè ki vivan an, li menm ki te delivre m' anba tout
 tray mwen yo. ³⁰ Sa m' te pwomèt ou pou m' fè nan non Seyè a, Bondye pèp Izrayèl la, m'ap fè l'
 jòdi a. Se Salomon, pitit gason ou lan, k'ap chita sou fotèy la nan plas mwen, se li menm k'ap
 gouvènènen apre mwen. ³¹ Batcheba tonbe ajenou devan wa a, li bese tèt li byen ba jouk atè, li di:
 -Se pou yo toujou fè lwanj wa David, mèt mwen! ³² ¶ Lè sa a, wa David voye chache Zadòk, prèt
 la, Natan pwofèt la, ak Benaja, pitit gason Jeojada a. Lè yo parèt devan wa a, ³³ wa a di yo konsa:
 -Pran tout chèf gouvènman m' yo. Fè Salomon, pitit gason m' lan, moute sou milèt pa m' lan. Nou
 tout va desann avè l' bò sous Giyon an. ³⁴ Lè n'a rive la, Zadòk, prèt la, ak Natan, pwofèt la, va
 vide lwil sou tèt li, y'a mete l' apa pou l' sèvi wa pèp Izrayèl la. Apre sa, n'a fè kònen twonpèt, epi
 n'a rele: Viv wa Salomon! ³⁵ Lèfini, n'a pran mache dèyè l', n'a tounen isit la. Salomon va vin chita
 sou fotèy mwen an. L'a pran plas mwen, paske se li menm mwen chwazi pou gouvènènen pèp Izrayèl
 la ansanm ak pèp Jida a. ³⁶ Benaja, pitit gason Jeojada a, reponn wa a: -Se sa menm! Se Seyè a,
 Bondye monwa a menm, ki pale nan bouch ou! ³⁷ Menm jan Seyè a te toujou kanpe la avè monwa,
 se pou li toujou kanpe la avèk Salomon tou. Se pou gouvènman li an pi byen chita toujou pase
 gouvènman wa David, mèt mwen. ³⁸ Zadòk, prèt la, Natan, pwofèt la, ak Benaja, pitit Jeojada a,
 ansanm ak keretyen yo ak peletyen yo ale, yo fè Salomon moute sou milèt wa David la, yo mennen
 l' bò sous Giyon an. ³⁹ Zadòk, prèt la, pran kòn lwil ki te nan Tant Randevou a, li vide ti gout sou
 tèt Salomon. Yo kònen twonpèt, tout pèp la pran rele: Viv wa Salomon! ⁴⁰ Apre sa, yo tout t'ap
 mache dèyè li, yo tounen lavil Jerizalèm. Yo t'ap jwe fif, yo t'ap danse. Sitèlman yo t'ap fè bri ou
 ta di tè a t'ap tranble anba pye yo. ⁴¹ ¶ Adonija te fin manje ansanm ak tout envite l' yo lè yo tande
 bri a. Lè Joab tande twonpèt la, li mande: -Pouki tout bri sa a nan lavil la? ⁴² Li pa t' ankò fèmen
 bouch li, Jonatan, pitit Abyata prèt la, rive. Adonija di l' konsa: -Antre non, monchè! Ou se moun
 debyen, se bon nouvèl ase pou ou pote! ⁴³ Jonatan reponn, li di Adonija konsa: -Nouvèl yo pa bon
 menm. Wa David, chèf nou an, fè Salomon wa. ⁴⁴ Li voye chache Zadòk, prèt la, Natan, pwofèt
 la, Benaja, pitit Jeojada a, ansanm ak keretyen yo ak peletyen yo, li fè yo ale ak Salomon. Yo menm,
 yo fè Salomon moute sou milèt wa a. ⁴⁵ Zadòk, prèt la, ak Natan, pwofèt la, vide lwil sou tèt li bò
 sous Giyon an, yo mete l' apa pou l' sèvi wa. Lèfini, yo tounen lavil la, y'ap rele tèlman yo kontan.

Tout lavil la tèt anba. Se bri sa a nou tande a. ⁴⁶ Lèfini, Salomon moute chita sou fotèy wa a.
⁴⁷ Tout moun k'ap travay nan gouvènman wa David yo vin fè wa David, chèf nou an, konpliman.
 Yo di: Se pou Bondye ou la fè Salomon yon pi gwo wa pase ou. Se pou gouvènman li an pi chita
 toujou pase pa ou la! Lèfini, wa David bese byen ba sou kabann li pou li adore Bondye. ⁴⁸ Li di:
 Lwanj pou Seyè a, Bondye pèp Izrayèl la, li menm ki penmèt pou jòdi a se yonn nan pitit mwen
 yo ki chita sou fotèy la nan plas mwen. Lèfini, li kite m' wè sa anvan m' mourir. ⁴⁹ Lè sa a, tout
 envite Adonija yo pran tranble. Yo tout leve, y' al fè wout yo, chak moun bò pa yo. ⁵⁰ Adonija
 menm bò pa l' te sitèlman pè pou Salomon pa touye l', li leve, li kouri ale nan Tant Randevou a, li
 kenbe kòn lotèl la. ⁵¹ Y' al di wa Salomon: -Adonija sitèlman pè pou monwa pa touye l', l' al cache
 bò lotèl la. Li di li vle pou wa Salomon fè l' sèman jòdi a menm li p'ap fè yo touye l'. ⁵² Salomon
 reponn: -Si msye aji tankou moun debyen, yon grenn cheve nan tèt li p'ap tonbe. Men, si li fè sa li
 pa t' dwe fè, l'ap mourir. ⁵³ Salomon voye chache Adonija soti bò lotèl la. Yo fè l' desann lotèl la.
 Li vin bese byen ba devan wa Salomon. Wa a di l' konsa: -Ou mèt al lakay ou.

Chapter 2

¹ ¶ Lè David santi li pral mourir, li rele Salomon, pitit gason l' lan, li ba li dènnye volonte l'. Li
 di l' konsa: ² -Talè konsa mwen pral fè dènnye gwo vwayaj la tankou tout moun sou latè. Pran kouraj,
 pitit mwen! Mete gason sou ou! ³ Se pou ou fè tou sa Seyè a, Bondye ou la, va ba ou lòd fè. W'a
 fè volonte Bondye, w'a mache dapre lòd, kòmandman, regleman ak prensip li bay yo jan sa ekri
 nan liv Lalwa Moyiz la, pou tout zafè ou mache byen kote ou pase, nan tou sa w'ap fè. ⁴ Si ou fè
 sa, Seyè a va kenbe pwomès li te fè a lè l' te di m' si pitit mwen yo mennen bak yo byen, si yo
 mache dwat devan li ak tout kè yo, ak tout nanm yo, ap toujou gen yonn nan yo pou gouvènmen pèp
 Izrayèl la apre mwen. ⁵ Koulye a, ou konnen sa Joab, pitit gason Sewouya a, te fè m' lè li te touye
 de jeneral lame pèp Izrayèl la: Abnè, pitit gason Nè a, ak Amasa, pitit gason Jetè a. Ou chonje jan
 lè sa a pa t' gen lagè. Li touye yo pou l' te ka tire revanj pou moun mesye sa yo te touye pandan
 lagè. Li touye de inonsan, kifè jouk jounen jòdi a m'ap pote chaj la pou li, m'ap peye konsekans sa
 li te fè a. ⁶ Ou konnen sa ou gen pou fè. Pa kite se vyeyès ki touye l'. ⁷ W'a aji byen ak pitit gason
 Bazilayi yo, moun lavil Galarad la. y'a manje sou tab avè ou, paske yo te aji byen avè m' lè mwen
 t'ap kouri pou Absalon, frè ou la. ⁸ Ou gen ankò bò kote ou Chimeyi, pitit gason Gera a, moun lavil
 Bakourim nan pòsyon tè branch fanmi Benjamen yo. Jou mwen t'ap kouri ale lavil Manayim lan,

li te ban m' gwo madichon. Men, lè m' t'ap tounen, li vin kontre m' bò larivyè Jouden. Jou sa a,
 mwen te fè sèman nan non Seyè a mwen p'ap fè yo touye l'.⁹ Men ou menm, pa padonnen l' sa.
 Ou gen bon konprann, ou konn sa pou ou fè avè l'. Jwenn yon jan pou fè yo touye l' atout li fin vye
 granmoun lan.¹⁰ Lè David mouri yo antere l' nan lavil David la.¹¹ Li pase karantan ap gouvènen
 pèp Izrayèl la: Pandan sètan li te rete lavil Ebwon. Pandan rès tranntwazan yo, li te rete lavil
 Jerizalèm.¹² ¶ Salomon, pitit gason David la, vin wa nan plas papa li. Gouvènman li te byen chita.
¹³ Yon jou, Adonija, pitit Agit la, al wè Batcheba, manman Salomon. Batcheba mande l': -Se yon
 vizit zanmi ou vin fè m' la a? Adonija reponn: -Se sa menm!¹⁴ Apre sa, li di l': -Mwen gen yon
 bagay mwen ta renmen mande ou! Batcheba di l': -Kisa l' ye?¹⁵ Adonija reponn: -Ou konnen se
 mwen menm ki pou te wa apre papa m'. Lèfini, se sa tout pèp Izrayèl la t'ap tann. Men, sa pase yon
 lòt jan. Se frè m' lan ki wa koulye a paske se Seyè a ki vle l' konsa.¹⁶ Bon, yon sèl favè m'ap mande
 ou. Pa refize m' li.¹⁷ Batcheba di l': -Pale non! Adonija reponn: -Tanpri, al mande wa Salomon
 pou l' ban mwen Abichag, tifi lavil Chounam lan, pou madanm mwen. Mwen konnen li p'ap refize
 ou sa.¹⁸ Batcheba reponn: -Bon, dakò! m'a pale ak wa a pou ou!¹⁹ Se konsa Batcheba al pale ak
 wa Salomon pou Adonija. Wa a leve kanpe pou l' resevwa manman l'. Li bese byen ba devan l' pou
 di l' bonjou. Apre sa, l' al chita sou fotèy li, epi li bay lòd pou yo pote yon lòt fotèy pou manman l'
 chita bò dwat li.²⁰ Batcheba di konsa: -Mwen ta renmen mande yon ti favè. Tanpri, pa refize m'
 sa. W'a reponn: -Manman, mande m' sa ou vle. Mwen p'ap refize ou li.²¹ Batcheba di l': -Kite
 Adonija, frè ou la, pran Abichag, tifi lavil Chounam lan, pou madanm li.²² Wa a reponn manman
 li, li di li: -Poukisa w'ap mande m' pou m' bay Adonija Abichag, tifi lavil Chounam lan? Ou ta mèt
 tou mande m' pou m' ba li plas wa a tou, se gran frè m' li ye. Lèfini, li gen Abyata, prèt la, ak Joab,
 pitit Sewouja a, avè l'.²³ Apre sa Salomon fè sèman sa a devan Seyè a: -Se pou Bondye ban m' pi
 gwo pinisyon ki genyen si mwen pa fè Adonija peye pou sa l' mande m' la a!²⁴ Seyè a vivan. Se
 li menm ki mete m' chita sou fotèy David, papa m' lan. Li kenbe pwomès li, li mete m' chèf. Lèfini,
 li di se pitit mwen ki pou chèf apre m'. Mwen fè sèman nan non Seyè a, se pou Adonija mouri jòdi
 a menm.²⁵ Se konsa Salomon bay Benaja, pitit gason Jeojada a, lòd pou l' al touye Adonija. Benaja
 ale, li touye Adonija.²⁶ ¶ Apre sa, wa a pale ak Abyata, prèt la, li di l' konsa. -Ale fè wout ou
 Anatòt, lakay ou. Ou merite lanmò tou. Men, jòdi a mwen p'ap fè yo touye ou, paske se ou ki te
 pote Bwat Kontra Seyè a devan David, papa m'. Lèfini, ou te soufri ansanm avè l'.²⁷ Salomon
 revoke Abyata, li enpoze l' sèvi tankou prèt Seyè a. Se konsa, sa Seyè a te di lavil Silo sou Eli, prèt

28
 la, ak sou pitit li yo, rive vre. Lè Joab vin konnen sa ki te rive, li kouri al kache nan Tant Randevou a. Li kenbe kòn lotèl la pou yo pa touye l'. Joab te pran pozisyon pou Adonija, men li pa t' janm

29
 pran pozisyon pou Absalon. Y' al di Salomon men Joab kouri al kache nan Tant Randevou a, li

30
 kanpe bò lotèl la. Salomon voye Benaja, pitit Jeojada a, pou touye Joab. Benaja ale nan Tant Randevou a, li di Joab konsa: -Wa a bay lòd pou ou soti la a. Joab reponn: -Non. Se isit la m'ap

31
 mouri. Benaja tounen al jwenn wa a, li rapòte l' repons Joab te ba li a. Wa a reponn: -Fè jan li di ou la. Touye l', lèfini, antere l'. Konsa ni mwen, ni pyès lòt moun nan fanmi papa m' p'ap reskonsab

32
 pou sa Joab te fè lè li te touye de inonsan yo. Seyè a pral pini Joab pou krim sa yo li te fè san David, papa m', pa t' konnen. Joab te touye de moun inonsan ki te pi bon pase l': Abnè, pitit pitit gason Nè a, kòmandan lame peyi Izrayèl la ak Amasa, pitit gason Jetè a, kòmandan lame peyi Jida

33
 a. Wi, chatiman krim sa yo va tonbe sou Joab ak sou pitit li yo pou tout tan. Men, Seyè a ap

34
 toujou bay David ak pitit li yo, fanmi li ak tout wa ki va vin apre l' yo kè poze. Se konsa, Benaja

35
 tounen nan Tant Randevou a, li touye Joab. Yo antere Joab lakay li nan dezè a. ¶ Apre sa, wa a

36
 mete Benaja kòmandan lame a nan plas Joab, li mete Zadòk, prèt la, nan plas Abyata. Apre sa, wa a voye chache Chimeyi, li di l' konsa: -Bati yon kay pou ou isit nan lavil Jerizalèm. Se la mwen

37
 vle ou rete. Piga ou janm kite lavil la. Mwen tou pale ou, jou ou soti kite lavil la, jou ou janbe lòt bò ravin Sedwon an, w'ap mouri wi. Mwen ki di ou sa. Se ou menm ki va reskonsab nenpòt sa

38
 ki va rive ou. Chimeyi reponn: -Dakò, monwa. m'a fè sa ou di a. Se konsa Chimeyi rete lontan

39
 lavil Jerizalèm. Twazan apre sa, de nan esklav Chimeyi yo sove, y' al lakay Akich, pitit gason

40
 Maka a, ki te wa lavil Gat. Yo vin di Chimeyi esklav li yo te lavil Gat. Chimeyi leve, li sele bourik li, l' al chache esklav li yo lakay Akich lavil Gat. Apre sa, li tounen lakay li ansanm ak esklav

41
 li yo. Yo fè Salomon konnen Chimeyi te soti lavil Jerizalèm ale lavil Gat epi li tounen. Wa

42
 a voye chache Chimeyi, li di l' konsa: -Mwen te kwè m' te fè ou pwomèt devan Seyè a pou ou pa janm kite lavil Jerizalèm? Mwen te tou pale ou. Jou w'a soti lavil Jerizalèm pou ale nenpòt ki kote, w'ap mouri. Eske ou pa t' reponn mwen ou te dakò avè m', ou t'ap fè tou sa mwen mande ou la?

43
 Poukisa atò ou pa kenbe pwomès ou te fè devan Seyè a? Poukisa ou dezobeyi m'? Ou konnen

44
 byen pwòp tou sa ou te fè David, papa m'. Seyè a pral pini ou pou sa. Men, l'ap beni m', mwen

45
 menm Salomon. L'ap fè gouvènman fanmi David la chita pou tout tan. Apre sa, wa a pase Benaja,

46
 pitit Jeyoada a, lòd. Benaja soti, l' al touye Chimeyi. Se konsa Chimeyi mouri. Depi lè sa a, Salomon te gen tout pouvwa a nan men l'.

Chapter 3

¹
 ¶ Salomon antre nan fanmi farawon an, wa peyi Lejip. Li marye ak pitit fi farawon an. Li mennen l' rete nan lavil David la jouk li fin bati palè li a, Tanp Bondye a ak gwo miray ranpa ki fè wonn lavil Jerizalèm yo. ² Yo pa t' ankò bati yon kay pou Seyè a. Se sa ki fè pèp la t'ap touye bèt yo te ofri pou lòt bondye divès kote sou mòn yo toujou. ³ Salomon li menm te renmen Seyè a, li te mache dapre lòd David, papa l', te ba li. Men li menm tou, li te touye bèt pou lòt bondye, li te ofri yo lansan sou divès lotèl sou mòn yo. ⁴ Salomon te konn al lavil Gabawon pou touye bèt pou Bondye, paske se la ki te gen pi gwo lotèl la. Li te deja ofri mil bèt pou yo te boule nèt sou lotèl la. ⁵ ¶ Yon jou lannwit, Seyè a parèt devan Salomon nan dòmi lavil Gabawon, li di l' konsa: -Kisa ou ta vle m' ba ou? ⁶ Salomon reponn: -Ou te toujou fè wè jan ou te renmen papa m', David, sèvitè ou la, anpil. Li menm, li te mache dwat devan ou, li pa t' janm vire do ba ou, li te sèvi ou ak tout kè li. Ou pa t' janm sispann fè l' wè jan ou te renmen li. Ou ba li yon pitit gason k'ap gouvènen nan plas li jòdi a. ⁷ Seyè, Bondye mwen, koulye a atout mwen jenn toujou, atout mwen pankò gen esperyans pou m' gouvènen, ou pran m', ou mete m' wa a nan plas David, defen papa m'. ⁸ Men mwen alatèt pèp ou chwazi pou rele ou pa ou la, yon pèp ki sitèlman anpil nou pa ka konte konbe moun ki ladan l'. ⁹ Tanpri, ban mwen lespri veyatif pou m' ka gouvènen pèp ou a san patipri, pou m' konn sa ki byen ak sa ki mal. Si se pa sa, ki jan m'a fè pou m' gouvènen pèp ou a ak tout moun sa yo ki ladan l'? ¹⁰ Seyè a te kontan wè se sa Salomon te mande l'. ¹¹ Li di l' konsa: -Monchè, ou pa mande m' pou ou viv lontan, ou pa mande m' richès, ni ou pa mande m' lanmò pou lènmi ou yo, men ou mande m' yon lespri veyatif pou ou ka gouvènen san patipri. ¹² M'ap ba ou sa ou mande a, m'ap ba ou plis konesans ak plis bon konprann pase tout moun, pase ni sa ki te la anvan ou yo, ni sa k'ap vin apre ou. ¹³ Lèfini, m'ap ba ou sa ou pa t' mande tou. M'ap ba ou anpil richès ak anpil pouvwa. Konsa, p'ap gen ankenn lòt wa tankou ou pandan tout rèz tan ou gen pou viv la. ¹⁴ Si ou fè volonte m', si ou mache dapre lòd ak kòmandman m' yo, tankou David, papa ou, te fè l' la, m'ap fè ou viv lontan. ¹⁵ Lè Salomon leve, li vin konprann Bondye te pale avè l' nan rèv. Li tounen lavil Jerizalèm, l' ale devan Bwat Kontra Seyè a, li ofri bèt pou yo boule nèt, bèt pou yo touye pou di Seyè a mèsi. Apre sa, li bay yon gwo fèt pou tout moun k'ap travay nan gouvènman l' lan. ¹⁶ ¶ Yon jou, de fanm, de jennès, vin prezante devan wa Salomon. ¹⁷ Yonn ladan yo pran lapawòl, li di: -Monwa, madanm sa a avè m' nou rete nan menm kay. Mwen fè yon pitit gason nan kay la devan li. ¹⁸ De jou apre pitit mwen an fèt, li menm tou li akouche, li fè yon pitit gason tou. Nou de ase

19 ki te nan kay, pa t' gen lòt moun la ankò. Pandan lannwit, antan l'ap dòmi li woule sou pitit pa
 20 l' la, li toufe l'. Li leve nan mitan lannwit lan, antan m'ap dòmi, li pran ti pitit mwen an ki te bò
 kote m', li mete l' nan kabann pa l'. Li pran ti pitit pa l' la, li mete l' tou mouri a nan kabann pa m'.
 21 Nan maten lè m' leve pou m' bay ti pitit mwen an tete, mwen jwenn li mouri. Men, lè m' gade
 22 byen gade, mwen wè se pa t' pitit mwen an sa. Men lòt fanm lan di: -Non, se pa vre. Se pitit pa
 m' lan ki vivan. Se pa ou la ki mouri. Lè sa a, premye fanm lan reponn: -Non se pa vre. Se pitit pa
 23 m' lan ki vivan. Se pa ou la ki mouri. Se konsa yo t'ap fè kont devan wa a. Lè sa a, wa a pran
 lapawòl, li di: -Sa a di se pitit li a ki vivan, ti pitit mouri a se pou lòt la. Lòt la menm di non, se pitit
 24 pa li a ki vivan, ti pitit mouri a se pou sa a. Wa a voye chache yon nepe. Lè yo pote nepe a li di
 25 konsa: -Koupe ti pitit vivan an mwaye mwaye, bay chak fanm yon moso. Men manman ti
 26 pitit vivan an santi zantray li ap rache pou pitit li a. Li di wa a: -Tanpri, monwa, pa touye ti pitit la.
 Pito ou bay madanm sa a li. Men lòt madanm lan menm di: -Ou mèt koupe l'! Li p'ap ni pou ou, ni
 27 pou mwen. Lè sa a Salomon di: -Pa touye pitit la. Renmèt li bay premye fanm lan. Se li menm
 28 ki manman ti pitit ki vivan an. Lè pèp Izrayèl la tande jan Salomon te regle kont lan, yo vin gen
 anpil respè pou li, paske yo te wè se Bondye menm ki te ba li bon konprann sa a pou regle tout
 bagay san patipri.

Chapter 4

1 ¶ Salomon te wa sou tout pèp Izrayèl la nèt. 2 Men non chèf ki te nan gouvènman li an: Azarya,
 pitit Zadòk, te prèt la. 3 Elikorèf ak Akija, pitit gason Chicha yo, te sekretè palè a. Jozafa, pitit
 Ayiloud, te responsab achiv wa a. 4 Benaja, pitit gason Jeojada, te kòmandan tout lame a. Zadòk
 ak Abyata te prèt. 5 Azarya, pitit gason Natan, te chèf tout gouvènè yo. Zaboud, pitit gason Natan,
 prèt la, te konseye pèsònèl wa a. 6 Ayicha te chèf kanbiz palè a. Adoniram, pitit gason Abda, te
 7 responsab travay kòve yo. Salomon te chwazi douz gouvènè pou tout peyi a. Travay yo se te
 8 yon mwa nan lanne a. Men non douz gouvènè yo ak zòn sou responsablite yo chak: Bennour,
 9 pou zòn mòn Efrayim yo, Benndeke, pou zòn lavil Makaz, lavil Chalbim, lavil Bèt-Chemèch,

10
 lavil Elon ak lavil Bèt anan. Bennesèd, pou zòn lavil Awoubòt, lavil Soko ak tout peyi Efè a.
 11
 12
 Bennabinadab, ki te marye ak Tafat, pitit fi Salomon an, pou tout zòn Dò a. Bana, pitit gason
 Akiloud, pou zòn lavil Tanak, lavil Megido, pou tout zòn bò lavil Bèt-Chean toupre lavil Zaretan,
 13
 sou bò sid lavil Jizreyèl la rive lavil Abèl Meola ak lavil Jokmeyam. Benngèbè, pou lavil Ramòt
 nan peyi Galarad, ak tout ti bouk nan peyi Galarad la ki pou branch fanmi Jayi, pitit Manase, ak
 tout zòn Agòb nan peyi Bazan. Antou swasant gwo lavil fèmèn dèyè gwo miray ranpa ak gwo pòtay
 bare ak poto kwiv. 14
 15
 Akinadad, pitit gason Ido, pou zòn Manayim. Akimaz, ki te marye ak
 Basmat, yonn nan pitit Salomon yo, pou zòn Neftali a. 16
 Bana, pitit gason Ouchayi, pou zòn Asè
 a ak lavil Bealòt. 17
 18
 Jozafa, pitit gason Pawouk, pou zòn Isaka a. Chimeyi, pitit gason Ela, pou
 zòn Benjamen an. 19
 Gebè, pitit gason Ouri, pou zòn Galarad, ansyen peyi Siyon, wa moun Amon
 yo ak Og, wa peyi Bazan an. Te gen yon gouvènè jeneral tou pou tout peyi a. ¶ Pèp Izrayèl la
 ak pèp Jida a te anpil, yo te tankou grenn sab bò lanmè. Yo t'ap manje, yo t'ap bwè, kè yo te kontan.
 21
 Salomon te rive gouvènen tout nasyon nan zòn ki pran depi larivyè Lefrat rive nan peyi Filisti
 a ak fwontyè Lejip la. Yo tout te peye Salomon taks, yo tout te soumèt devan li pandan tout rèy li
 jouk li mouri. 22
 Men pwovizyon Salomon te bezwen chak jou: sansenkant (150) barik kè ble,
 23
 twasan (300) barik farin frans, dis bèf angrese nan pak, ven bèf angrese nan savann, san mouton,
 24
 san konte bèt mawon, mal ak fenmèl, ak bèt volay byen gra. Salomon te rive chèf sou tout peyi
 ki sou bò solèy kouche larivyè Lefrat la depi lavil Tifsak bò larivyè Lefrat la jouk lavil Gaza nan
 direksyon lwès. Tout ti wa ki t'ap gouvènen sou bò solèy kouche larivyè Lefrat la te soumèt devan
 25
 li. Salomon menm pa t'ni nan goumen ni nan kont ak ankenn peyi nan vwazinaj li. Pandan tout
 rèy Salomon jouk li mouri, moun peyi Izrayèl yo ak moun peyi Jida yo t'ap viv ak kè poze, san
 26
 danje ni malè, chak fanmi nan lakou yo ak ti jaden rezen yo anba pye fig frans yo. Salomon te
 27
 gen katmil (4.000) pak pou chwal cha lagè yo, ak douzmil (12.000) chwal pou sòlda. Douz
 gouvènè yo te gen pou ranmase pwovizyon wa Salomon te bezwen pou li menm ak pou moun k'ap
 28
 manje nan palè a, yo chak pandan yon mwa nan lanne a. Yo pa janm kite anyen manke. Gouvènè
 29
 yo te gen pou bay lòj ak zèb tout kote yo bezwen pou chwal cha lagè yo ak lòt bèt chay. ¶ Bondye
 30
 te bay Salomon anpil lespri, anpil bon konprann ak yon konesans nou pa ka mezire. Salomon
 te gen plis bon konprann pase tout moun ki gen bon konprann nan peyi bò solèy leve yo, osinon
 31
 pase tout moun ki gen bon konprann nan peyi Lejip. Li te gen plis bon konprann pase tout moun,
 pase Etan, moun lavil Ezrak, pase Eman, Kalkòl ak Dada, pitit gason Makòl yo. Nan tout peyi ki

toupre peyi Izrayèl la yo t'ap nonmen non Salomon.³² Li te ekri twamil (3.000) pwovèb ak mil senk (1.005) chante pou pi piti.³³ Li fè bèl pawoli sou pyebwa ak tout kalite plant, depi pye sèd peyi Liban yo jouk lyann izòp ki pouse sou miray. Li pale tou sou bèt kat pat, sou zwazo, sou bèt ki trennen sou vant ak sou pwason.³⁴ Moun te soti toupatou pou vin tandè Salomon ap pale. Ata wa tout lòt peyi latè yo te pran nouvèl jan li te gen anpil bon konprann. Yo menm tou yo te voye moun vin tandè l'.

Chapter 5

¹ ¶ Iram, wa peyi Tir, te toujou yon bon zanmi wa David. Lè li vin konnen se Salomon ki te vin moute wa nan plas David, papa l', li voye kèk chèf bò kote l'.² Salomon ba yo mesaj sa a pou yo pote bay Iram:³ -Ou konnen ak lagè David, papa m', te genyen ak peyi ki toupre l' yo, li pa t' kapab bati yon kay kote pou yo adore Seyè a, Bondye li a, toutotan Seyè a pa t' fè l' kraze lènmi l' yo anba pye l'.⁴ Men koulye a, Seyè a, Bondye mwen an, ban m' lapè sou tout fwontyè yo. Mwen pa gen moun pou chache m' kont, ni moun pou fè m' move kou.⁵ Seyè a te fè David, papa m', pwomès sa a: Se pitit gason ou m'ap mete wa nan plas ou a k'ap bati yon kay pou mwen. Enben, koulye a, mwen fè lide bati yon kay pou Seyè a, Bondye mwen an.⁶ Ou menm, ou pral bay lòd pou yo koupe kèk pye sèd pou mwen nan peyi Liban. Moun pa m' yo va travay ansanm ak moun pa ou yo. m'a peye mesye ou yo jan wa vle l' la. Ou konnen pa gen moun nan peyi m' ki ka koupe bwa tankou moun Sidon yo.⁷ Lè Iram resevwa mesaj Salomon an, sa te fè l' plezi anpil. Li di: -Lwanj jòdi a pou Seyè a ki bay David yon pitit gason ak bon konprann konsa pou gouvènèn sou gwo pèp sa a!⁸ Apre sa, Iram voye di Salomon: -Mwen resevwa mesaj ou a. M'ap fè tou sa ou mande m' fè pou bwa sèd ak bwa pichpen yo.⁹ Moun pa m' yo va pote madriye yo desann soti peyi Liban jouk bò lanmè. Lè y'a rive la, m'a fè yo mare madriye yo fè rado, y'a pouse yo sou lanmè a rive jouk kote w'a chwazi sou kòt la. Rive la, moun pa m' yo va demare madriye yo. Lè sa a, w'a fè moun pa ou yo fè rèz travay la. Ou menm, w'a ban m' pwovizyon pou moun pa m' yo.¹⁰ ¶ Se konsa Iram bay Salomon tout madriye sèd ak madriye pichpen li te bezwen.¹¹ Salomon menm, bò pa l', bay Iram sanmil (100.000) barik ble ak sandimil (110.000) galon lwil oliv chak lane pou l' bay moun li yo manje.¹² Seyè a kenbe pwomès li. Li bay Salomon anpil bon konprann. Te gen bon antann ant Iram ak Salomon. Yo siyen yon kontra yonn ak lòt.¹³ wa Salomon fè ranmase trantmil (30.000)

¹⁴
 moun nan tout peyi Izrayèl la pou fè kòve. Li te mete Adoniram reskonsab kòve a. Li separe mesye yo fè twa gwoup, ak dimil (10.000) moun nan chak. Chak gwoup pase yon mwa nan peyi Liban, de mwa lakay yo. Chak fwa yon gwoup tounen, yon lòt al pran plas li. ¹⁵ Salomon te gen katrevenmil (80.000) moun ap taye wòch nan min wòch, ak swasanndimil (70.000) moun pou pote yo lavil Jerizalèm, ¹⁶ san konte twamil twasan (3.300) fòmman gouvènè yo te nonmen alatèt mesye sa yo pou kontwole travay yo. ¹⁷ Wa Salomon te bay lòd pou yo taye kèk gwo blòk nan bèl wòch pou sèvi fondasyon kay la. ¹⁸ Se konsa bòs mason Salomon yo ak bòs mason Iram yo ansanm ak mesye lavil Gebal yo te pare blòk wòch ak bwa pou bati Tanp lan.

Chapter 6

¹
 ¶ Lè sa a te gen katsankatreven (480) lanne depi pèp Izrayèl la te soti kite peyi Lejip, Salomon te gen katran depi li t'ap gouvènènan pèp Izrayèl la. Nan mwa Ziv la, ki dezyèm mwa nan kalandriye jwif yo, Salomon mete men nan bati kay Seyè a. ² Kay wa Salomon bati pou Seyè a te gen katrevendis pye longè, trant pye lajè ak karantsenk pye wotè. ³ Premye pyès devan an te gen kenz pye longè, trant pye lajè. Li te menm lajè ak kay la. ⁴ Miray tanp lan te gen fennèt ak griyaj bare yo. ⁵ Kole kole ak miray yo, sou de sou kote yo ak sou dèyè Tanp lan ak pyès dèyè a, li fè bati twa ran pyès, yonn sou lòt. Chak etaj te gen sèt pye edmi wotè. ⁶ Chak pyès nan dènye etaj anba a te gen sèt pye edmi lajè. Pyès nan etaj mitan an te gen nèf pye lajè ak pyès nan etaj anwo nèt la te gen dis pye edmi. Miray tanp lan menm te pi laj anba pase anwo. Konsa, gwo travès plafon yo te chita sou miray yo san yo pa t' bezwen fouye twou ladan yo. ⁷ Wòch yo te sèvi pou bati Tanp lan te pare depi nan min wòch kote yo te jwenn yo a. Konsa, pandan yo t'ap bati Tanp lan pa t' gen ankenn bri mato, bri sizo, ni bri ankenn zouti fè. ⁸ Pòt pou antre nan premye chanm anba yo te bay sou bò sid Tanp lan. Te gen eskalye pou moute nan premye ak nan dezyèm etaj yo. ⁹ Lè Salomon fin bati Tanp lan, li mete yon plafon fèt ak travès ak planch sèd. ¹⁰ Li bati pyès chanm yo tout arebò tanp lan. Chak etaj te gen sèt pye edmi wotè. Yo te kole kole ak miray kay la. Yo te mare sou miray la ak travès sèd. ¹¹ ¶ Seyè a pale ak Salomon, li di l' konsa: ¹² -Lè w'a fin bati tanp lan, si ou mache dapre lòd mwen, si ou fè sa m' di ou fè, si ou kenbe tout kòmandman mwen yo, m'a fè pou ou tou sa mwen te pwomèt David, papa ou. ¹³ M'ap rete nan mitan peyi Izrayèl la, mwen p'ap janm lage

¹⁴ yo. Se konsa Salomon fin bati Tanp lan. ¹⁵ ¶ Tout miray yo te plake sou anndan ak planch sèd
 depi planche a rive nan plafon an. Planche a te fèt ak bwa pichpen. ¹⁶ Li bati sou dèyè tanp lan
 yon gwo pyès li rele Pyès ki apa nèt pou Seyè a. Pyès la te gen trant pye longè. Panno pyès la fèt
 ak planch sèd ki soti depi atè rive nan plafon an. ¹⁷ Pati tanp lan ki te devan pyès ki apa nèt pou
 Seyè a te gen swasant pye longè. ¹⁸ Sou anndan, tout miray tanp lan te kouvri ak planch sèd, ou
 pa t' ka wè yon wòch. Planch sèd yo te travay ak desen flè ak ti kalbas sou tout kò yo. ¹⁹ Anndan
 Tanp lan, sou dèyè, li bati yon pyès apa pou Seyè a. Se la yo te mete Bwat Kontra Seyè a. ²⁰ Pyès
 la te gen trant pye longè, trant pye lajè ak trant pye wotè. Li te kouvri nèt ak lò. Sou devan pyès la
 yo bati yon lotèl ak bwa sèd, lèfini yo te kouvri li nèt ak lò. ²¹ Tout miray anndan tanp lan te kouvri
 ak lò. Pyès apa nèt pou Seyè a te kouvri ak lò tou. Yo fè chenn lò pou fèmèn pòt pyès ki apa pou
 Seyè a. ²² Konsa, tout anndan Tanp lan nèt ansanm ak lotèl ki te devan pyès ki apa pou Seyè a te
 kouvri nèt ak lò. ²³ Apre sa, li fè fè de estati zanj cheriben yo an bwa oliv pou pyès ki apa nèt pou
 Seyè a. Chak estati te gen kenz pye wotè. ²⁴ Chak zèl te mezire sèt pye edmi longè. Konsa, depi
 pwent yon zèl rive nan pwent lòt zèl la te gen kenz pye. ²⁵ Tou de estati yo te gen menm fòm,
 menm gwochè. ²⁶ Tou de te menm wotè, yo te gen kenz pye wotè. ²⁷ Salomon fè mete de estati yo
 anndan pyès ki apa pou Seyè a, kòtakòt, ak zèl yo louvri pou pwent zèl anndan yo touche yonn ak
 lòt nan mitan pyès la, de pwent zèl deyò yo touche ak de miray sou kote yo. ²⁸ De estati ak zèl yo
 te kouvri nèt ak lò. ²⁹ Sou tout miray anndan tanp lan te gen pòtre zanj cheriben, pòtre pye palmis
 ak pòtre flè yo te travay nan bwa a. ³⁰ Menm planche a te kouvri ak lò anndan kou deyò. ³¹ Salomon
 fè mete yon pòt de batan fèt ak bwa oliv pou fèmèn pyès apa pou Seyè a. Lento pòt la ak de montan
 yo te pran yon senkyèm nan ouvèti pòt la. ³² Batan pòt yo te dekore ak pòtre zanj cheriben, pye
 palmis ak flè yo te travay nan bwa a. Tout pòt la ansanm ak pòtre yo te kouvri nèt ak lò. ³³ Pòt
 pyès mitan Tanp lan te gen yon ankadreman fèt ak bwa oliv ki te pran yon ka nan ouvèti pòt la.
³⁴ Pòt la menm te fèt an pichpen. Li te gen kat batan, de batan chak bò ki ka fèmèn yonn sou lòt.
³⁵ Batan pòt yo te dekore ak pòtre zanj cheriben, pye palmis ak flè yo te travay sou bwa a. Tout
 pòt la ansanm ak pòtre yo te kouvri nèt ak lò. ³⁶ Li fè bati yon lakou fèmèn devan Tanp lan. Miray
 lakou a te fèt ak yon ranje madriye sèd pou chak twa ranje wòch yonn sou lòt. ³⁷ Se nan katriyèm

lanne rèy Salomon, nan mwa Ziv la, yo te mete men nan fondasyon kay Seyè a. ³⁸ Tanp lan te fin bati ak tout ti detay li yo, jan yo te fè plan an, nan onzyèm lanne rèy Salomon nan wityèm mwa kalandriye jwif yo, ki rele Boul. Salomon te pran sètan pou l' bati Tanp lan.

Chapter 7

¹ ¶ Salomon te bati yon palè pou li menm tou. Li pran trèzan pou l' fini l'. ² Li bati yon kay yo rele Rakkwa peyi Liban an. Li te gen sansenkant (150) pye longè, swasannkenz pye lajè ak karannsenk pye wotè. Li te gen kat ranje gwo poto bwa sèd. Chak ranje te gen kenk poto ak gwo ³ travès sèd chita sou tèt poto yo. Plafon an te fèt an planch sèd. Li te kloure sou karannsenk travès ⁴ ki te chita sou tèt poto yo. Nan de miray sou kote yo, te gen twa ranje fennèt. Fennèt yo te bay ⁵ yonn sou lòt. Pòt yo ak fennèt yo te kare kare. Te gen twa ranje fennèt sou chak bò, yonn an fas ⁶ lòt. Li bati yon lòt gwo pyès yo rele Chanm Poto yo. Li te gen swasannkenz pye longè, karannsenk ⁷ pye lajè. Te gen yon lòt ti pyès sou devan l' avèk gwo poto ak dòmant. Yo bati yon lòt kay yo rele Chanm Fotèy la ou ankò Salon Jijman an. Se la Salomon te konn rann jijman. Miray yo te ⁸ kouvri ak bwa sèd depi anba rive nan plafon an. Kay kote Salomon te rete a te nan yon lòt lakou deyè Salon Jijman an. Li te bati tankou lòt kay yo. Salomon bati yon lòt kay menm jan an tou pou ⁹ madanm li, pitit fi wa peyi Lejip la. Tout kay sa yo te bati ak bèl wòch taye, depi nan fondasyon yo jouk anba twati yo. Wòch yo te pare depi nan min wòch la. Yo te taye sou mezi. Fasad anndan ¹⁰ ak fasad deyò wòch yo te taye ak si. Fondasyon yo te fèt ak gwo wòch yo te taye nan min wòch ¹¹ la. Genyen ladan yo ki te gen douz pye longè. Anwo fondasyon an te gen menm kalite wòch ¹² taye sou mezi ak madriye sèd. Gwo lakou palè a te fèmen ak yon miray fèt ak twa ranje wòch ¹³ pou chak ranje madriye sèd, tankou lakou anndan ak lakou devan Tanp lan. ¶ Wa Salomon voye ¹⁴ chache yon bòs ki te rele Iram tou. Se te yon moun lavil Tir. Papa Iram te moun lavil Tir tou. Se te yon bòs fò nan travay kwiv. Manman li te moun nan branch fanmi Neftali a. Se te yon vè. Iram te yon moun ki te gen anpil ladrès, anpil konesans ak bon konprann pou fè tout kalite bagay ¹⁵ an kwiv. Se konsa li te vin kay wa a, li fè tout travay li yo. Iram koule de gwo poto kwiv won yo. Yo chak te gen vennsèt pye wotè. Wonn poto yo te mezire dizwit pye. Li mete yo kanpe devan ¹⁶ Tanp lan. Apre sa, li fè fè blòk kwiv tou pou ale sou tèt poto yo. Yo chak te mezire sèt pye edmi

¹⁷ wotè. Li dekore wonn tèt poto yo ak desen ti chenn makònen yonn ak lòt. Te gen sèt desen konsa
¹⁸ pou chak tèt poto. Li mete de ranje grenad an kwiv anwo ak anba desen ti chenn lan sou tout
¹⁹ wonn chak tèt poto yo. Tèt poto ki nan gwo lakou devan an te gen fòm yon flè choublak. Yo
²⁰ chak te gen sis pye wotè. Sou rebò anwo chak tèt poto yo, te gen yon vant resoti ki te anwo
²¹ desen ti chenn yo, ak desan pòtre grenad sou de ranje ki te fè wonn chak poto yo. Iram mete
poto yo kanpe devan pòt antre Tanp lan, yonn sou bò dwat, yonn sou bò gòch. Li rele sa ki sou bò
²² dwat la Jaken, sa ki sou bò gòch la Boaz. Sou tèt chak poto te gen yon blòk an fòm yon flè. Se
²³ konsa Iram fini ak travay poto yo. Apre sa, Iram fè yon gwo basen an kwiv tou won. Li te mezire
²⁴ kenz pye lajè anndan anndan ak sèt pye edmi fondè. Wonn li te mezire karannsenk pye. Sou
tout wonn basen lan, sou deyò, te gen de ranje ti kalbas an kwiv, ti kras anba rebò a. Te gen dis
kalbas pou chak pye edmi longè. Yo te fè yon sèl kò ak basen lan, yo te koule yo ansanm lè yo t'ap
²⁵ fè basen lan. Basen lan te chita sou do douz towo bèf an kwiv. Fas towo yo tout bay sou deyò:
fas twa bay sou solèy leve, fas twa bay sou bò nò, fas twa bay sou solèy kouche, ak fas twa bay
²⁶ sou bò sid. Dèyè yo te anba basen lan. Rebò basen lan te gen twa pous epesè. Rebò a te tankou
rebò yon tas, li fè yon ti vire sou deyò tankou yon flè. Basen lan te ka kenbe dimil galon konsa.
²⁷ Iram te fè tou dis kabwa an kwiv. Yo chak te gen sis pye longè, sis pye lajè ak kat pye edmi
²⁸ wotè. Yo te fèt an ti panno kare kare ki te moute nan yon ankadreman. Sou chak ti panno yo,
²⁹ te gen pòtre lyon, pòtre towo ak pòtre zanj cheriben. Sou rebò yo, anwo ak anba lyon yo ak towo
³⁰ yo, te gen yon ranje flè resoti. Chak kabwa te gen kat wou an kwiv ak lesye an kwiv tou. Nan
kat kwen yo te gen yon zepòlman, antou kat pou kenbe basen lan anplas. Zepòlman yo te dekore
³¹ ak yon ranje flè chak bò. Anwo chak kabwa te gen yon ankadreman tou won pou basen yo.
Ankadreman an te gen dizwit pous lajè anndan anndan. Li te gen desen sou tout kò l'. Pati anwo
³² kabwa a te kare, li pa t' won. Wou yo te gen vennsenk pous wotè. Yo te anba panno yo. Lesye
³³ wou yo te fè yon sèl pyès ak rès kabwa a. Wou yo te tankou wou cha lagè. Pen yo, jant yo, reyon
³⁴ yo, lesye yo, tout te fèt an kwiv. Kat zepòlman ki te nan kwen anba chak kabwa yo te fè yon sèl
³⁵ pyès ak chasi kabwa a. Pati plat anwo kabwa a te dekore ak yon wonn nèf pous wotè ki te fè
³⁶ rebò ouvèti a. Zepòlman ki te nan kwen anwo yo ak panno yo te fè yon sèl pyès ak kabwa a. Yo
te dekore panno yo ak zepòlman yo ak pòtre zanj cheriben, pòtre lyon ak pòtre pye palmis, tout
³⁷ kote yo te jwenn yon ti espas, ak flè sou tout wonn lan. Se konsa Iram te fè dis kabwa yo. Yo

tout te fèt menm jan, menm fòm, menm gwosè. ³⁸ Iram te fè dis basen tou, yonn pou chak kabwa.
 Chak basen te mezire sis pye lajè. Yo chak te kenbe desan galon konsa. ³⁹ Li mete senk kabwa
 sou bò sid Tanp lan, lòt senk yo sou bò nò. Gwo basen kwiv la menm, li mete l' sou bò dwat Tanp
 lan nan kwen sidès la. ⁴⁰ Iram te fè plato pou sann, pèl ak kivèt. Se konsa li te fin fè tout travay
 Salomon te mande l' fè pou Tanp Seyè a. ⁴¹ Men sa li te fè: de gwo poto won yo, de blòk yon ti
 jan pi gwo pou ale sou tèt poto yo, ⁴² katsan pòtre grenad ki pou ale sou de ran nan desen ti chenn
 ki fè wonn tèt poto yo, ⁴³ dis kabwa yo, dis basen ki pou ale sou kabwa yo, ⁴⁴ yon gwo basen tou
 won pou dlo, douz towo bèf pou soutni gwo basen lan, ⁴⁵ plato pou sann yo, pèl yo ak kivèt yo.
 Tou sa Iram te fè pou Tanp Seyè a te fèt an kwiv poli, dapre lòd li te resevwa nan men Salomon.
⁴⁶ Wa a te fè fonn yo nan moule tèt nan fon larivyè Jouden an, ant lavil Soukòt ak lavil Zaretan.
⁴⁷ Te sitèlman gen anpil bagay fèt an kwiv, Salomon pa t' chache konnen pèz yo. ⁴⁸ ¶ Salomon te
 fè fè tout mèb yo te bezwen pou Tanp lan an lò: lotèl la, tab pou pen yo mete apa pou Bondye a,
⁴⁹ dis lanp sèt branch pou ranje devan pyès yo mete apa nèt pou Seyè a, senk sou bò dwat, senk
 sou bò gòch, flè yo, ti lanp yo ak pensèt pou lanp sèt branch yo, ⁵⁰ gode yo, kouto pou netwaye
 lanp yo, bòl yo, plato pou lansan yo, plato pou pote chabon dife tou limen yo, gon pou pòt pyès ki
 apa nèt pou Seyè a, ak gon pou lòt pòt tanp lan menm. Tout bagay sa yo te fèt ak bon lò. ⁵¹ Lè wa
 Salomon te fin fè tout travay pou bati Tanp Seyè a, li fè yo pote tout ajan ak tout lò David, papa l',
 te ofri bay Seyè a ansanm ak tout lòt bagay li menm li te bay, li fè mete yo nan chanm trezò Tanp
 lan.

Chapter 8

¹ ¶ Apre sa, Salomon bay lòd pou tout gwo chèf pèp Izrayèl yo ansanm ak tout chèf branch
 fanmi yo ak lòt chèf fanmi pèp la vin jwenn li lavil Jerizalèm pou y' al pran Bwat Kontra Seyè a
 nan lavil David la, lavil Siyon an, pou yo pote l' nan Tanp lan. ² Pandan Fèt Joupa yo nan mwa
 Etanim lan, setyèm mwa nan kalandriye jwif yo, tout pèp Izrayèl la reyini ansanm ak wa Salomon.
³ Lè tout chèf fanmi pèp Izrayèl yo reyini, prèt yo pran Bwat Kontra a, ⁴ yo pote l' nan Tanp lan
 ansanm ak Tant Randevou Seyè a ak tout bagay ki te apa pou Seyè a nan Tant Randevou a. Se prèt
⁵ yo ak moun Levi yo ki te pote yo moute. Wa Salomon ansanm ak tout pèp Izrayèl la sanble devan
 Bwat Kontra a, yo touye bèf, kabrit ak mouton an kantite pou Bondye. Moun pa t' ka konte konbe

bèt yo te touye jou sa a sitèlman yo te anpil. ⁶ Lè yo fini, prèt yo pote Bwat Kontra a nan pyès ki
 apa nèt pou Seyè a, yo mete l' nan mitan de pòtre zanj cheriben yo. ⁷ Zèl cheriben yo te louvri, yo
 te kouvri tout kote Bwat Kontra a ye a ansanm ak poto ki sèvi pou pote l' yo. ⁸ Si yon moun kanpe
 sou devan pyès ki apa pou Seyè a, yo ka wè pwent poto yo tèlman yo te long. Men, ou pa ka wè
 yo lòt kote ankò. Jouk koulye a poto yo la toujou. ⁹ Nan Bwat Kontra a pa t' gen pase de moso
 wòch plat Moyiz te mete ladan l' yo depi sou Mòn Orèb la. Se sou de wòch sa yo Seyè a te make
 kontra li te pase avèk moun pèp Izrayèl yo lè yo t'ap soti kite peyi Lejip. ¹⁰ Lè prèt yo fè sa y'ap
 soti nan pyès apa pou Seyè a, nwaj la plen Tanp Seyè a nèt. ¹¹ Poutèt nwaj la prèt yo pa t' ka rete
 fè sèvis yo, paske limyè prezans Seyè a te plen Tanp lan nèt. ¹² ¶ Lèfini, Salomon di konsa: -Seyè,
 ou di ou pito viv kote ki fè nwa. ¹³ Koulye a, mwen bati yon tanp pou ou ka rete, yon kay kote ou
 pral viv pou tout tan. ¹⁴ Lèfini, wa a vire, li bay pèp Izrayèl la fas. Tout pèp la te kanpe. Li mande
 benediksyon Bondye pou pèp la, li di konsa: ¹⁵ -Lwanj pou Seyè a, Bondye pèp Izrayèl la. Avèk
 fòs kouraj li, li kenbe pwomès li te fè David, papa m', lè li te di l' konsa: ¹⁶ Depi jou mwen te fè
 pèp mwen an soti kite peyi Lejip, mwen pa janm chwazi yon lavil nan tout peyi pèp Izrayèl la kote
 pou yo bati yon tanp ladan l' pou mwen rete. Men, mwen te chwazi David pou li gouvènen pèp
 mwen an, pèp Izrayèl la. ¹⁷ David, papa m', te fè lide bati yon tanp pou Seyè a, Bondye pèp Izrayèl
 la. ¹⁸ Men, Seyè a te di l': Ou byen fèt gen lide bati yon tanp pou mwen. ¹⁹ Men, se pa ou ki va
 bati l'. Se pwòp pitit gason w'ap fè a ki va bati Tanp lan pou mwen. ²⁰ Koulye a, Seyè a kenbe
 pwomès li. Jan li te di l' la, se mwen ki nan plas David, papa m'. Mwen chita sou fotèy wa a Izrayèl
 la, mwen bati yon tanp pou Seyè a, Bondye pèp Izrayèl la. ²¹ Lèfini, mwen fè yon plas ladan l' pou
 Bwat Kontra Seyè a ki gen de moso wòch plat kote Seyè a te ekri kontra li te pase ak zansèt nou
 yo lè li te fè yo soti kite peyi Lejip. ²² ¶ Apre sa, Salomon al kanpe devan lotèl Seyè a, devan tout
 pèp Izrayèl la, li leve de men l' anlè, li lapriyè Bondye, ²³ li di: -Seyè, ou menm ki Bondye pèp
 Izrayèl la, pa gen Bondye tankou ou ni nan syèl ni sou latè. Ou kenbe kontra ou te pase ak pèp ou
 a. Ou moutre jan ou renmen moun k'ap sèvi ou ak tout kè yo. ²⁴ Ou te kenbe pwomès ou te fè
 David, papa m' lan. Tou sa ou te di, ou fè l' rive vre jòdi a. ²⁵ Se poutèt sa, Seyè, Bondye pèp Izrayèl
 la, m'ap mande ou pou ou kenbe lòt pwomès ou te fè David, papa m', sèvitè ou la, lè ou te di l' va
 toujou gen yonn nan pitit pitit li yo pou gouvènen pèp Izrayèl la, depi yo veye jan y'ap mache a
 pou yo mennen bak yo devan ou jan li menm li te fè l' la. ²⁶ Se konsa, Bondye pèp Izrayèl la, tanpri,

fè tout bagay rive jan ou te fè pwomès la bay David, papa m', sèvitè ou la. ²⁷ Men, Bondye, èske ou ka rete tout bon sou latè? Ata syèl la pa laj ase pou l' kenbe ou. Ale wè pou ti kay mwen bati

pou ou la a! ²⁸ Seyè, Bondye m', tanpri, se sèvitè ou mwen ye. Tanpri, tande jan m'ap lapriyè ou.

Koute jan m'ap rele nan pye ou jòdi a. ²⁹ Lajounen kou lannwit, voye je ou sou Tanp lan, Tanp kote ou te di w'ap toujou la a. Koute lapriyè mwen menm, sèvitè ou la, m'ap fè nan pye ou la a.

³⁰ Wi, koute lapriyè m'ap fè ak lapriyè pèp Izrayèl ou a ap fè nan pye ou isit la. Nan syèl kote ou rete a, koute lapriyè nou, padonnen nou. ³¹ Lè yo pote plent pou yon moun ki fè frè l' yon bagay mal, si yo mande l' pou l' fè sèman se pa vre, epi li vin fè sèman an devan lotèl ou a, nan tanp sa a,

³² ou menm, Seyè ki nan syèl la, w'a tande, w'a fè sa ki gen pou fèt la, w'a jije sèvitè ou yo. W'a pini moun ki koupab la, w'a fè chatiman li merite a tonbe sou tèt li. W'a fè rekonèt lè yon moun

inonsan pou yo ka rann li jistis. ³³ Lè lènmi va bat pèp Izrayèl la paske pèp la te peche kont ou, Bondye, si yo tounen vin jwenn ou, si yo fè lwanj pou ou, si yo vin lapriyè nan pye ou isit nan Tanp

sa a, ³⁴ tanpri, kote ou ye nan syèl la, koute yo. Padonnen peche pèp Izrayèl ou a, fè yo tounen nan peyi ou te bay zansèt yo a. ³⁵ Lè va gen chechrès nan peyi a san yon ti degout lapli paske pèp la te peche kont ou, si yo règrèt sa yo te fè a paske ou te pini yo, si yo vin lapriyè isit la, si yo rele non

ou, ³⁶ tanpri, kote ou ye nan syèl la, koute yo. Padonnen peche wa a ansanm ak peche pèp Izrayèl la. Moutre yo bon chemen pou yo pran an. Apre sa, Seyè, w'a voye lapli sou peyi ou te bay pèp ou

a pou rele l' pa l' la. ³⁷ Lè va gen grangou nan peyi a, osinon lè move maladi lapès va tonbe sou li, lè plant yo va cheche nan van cho, lè krikèt ak chwal bondye va ravaje jaden yo, lè lènmi va sènen

lavil nou yo pou atake pèp la, lè nenpòt maladi osinon nenpòt malè va tonbe sou pèp la, ³⁸ koute lapriyè y'ap fè nan pye ou. Lè nenpòt moun osinon tout pèp la va lapriyè nan pye ou, lè y'a règrèt

sa yo fè a, lè y'a leve men yo nan direksyon Tanp lan pou yo lapriyè ou, ³⁹ tanpri, koute lapriyè yo, kote ou ye nan syèl kote ou rete a, padonnen yo, fè sa ou gen pou fè a. Bay chak moun sa yo merite, paske ou konnen sa ki nan kè yo chak. Se ou menm sèlman ki konnen sa ki nan fon kè

moun. ⁴⁰ Wi, w'a bay chak moun sa yo merite, konsa pèp ou a va gen krentif pou ou pandan tout tan y'ap viv sou tè ou te bay zansèt nou yo. ⁴¹ Menm lè yon moun lòt nasyon ki pa fè pati pèp ou

a soti byen lwen vini isit la poutèt ou, ⁴² paske li tande jan y'ap nonmen non ou, li tande pale tout bèl bagay w'ap fè avèk fòs kouraj ou, si li vin lapriyè nan tanp sa a, ⁴³ tanpri, nan syèl kote ou rete a, koute lapriyè li. W'a fè pou li tou sa li mande ou. Konsa tout pèp sou latè va konnen ou. y'a gen krentif pou ou tankou pèp Izrayèl ou a gen krentif pou ou. y'a konnen Tanp mwen bati pou ou a,

44 se la pou yo vin adore ou. Lè pèp ou a va pati al goumen ak lènmi l' yo, nenpòt ki bò w'a voye yo, lè y'a vire tèt yo nan direksyon lavil ou chwazi a ak nan direksyon Tanp mwen bati pou ou a

45 pou yo lapriyè nan pye ou, tanpri, nan syèl kote ou rete a, koute lapriyè yo. Koute lapriyè y'ap

46 fè nan pye ou, defann kòz yo. Lè pèp ou a va peche kont ou, paske pa gen moun ki pa fè peche, lè w'a move sou yo, w'a lage yo nan men lènmi yo ki va fè yo prizonye, ki va depòte yo nan lòt

47 peyi, li te mèt toupre, li te mèt byen lwen, antan yo la nan peyi kote lènmi yo te depòte yo a, si yo règrèt sa yo te fè, si yo lapriyè nan pye ou, si yo rekonèt yo te fè sa ki mal, si yo rekonèt yo te

48 peche, si yo rekonèt yo antò, si yo tounen vin jwenn ou ak tout kè yo ak tout nanm yo, antan yo nan peyi kote lènmi te depòte yo a, si yo vire tèt yo nan direksyon peyi ou te bay zansèt yo a, nan direksyon lavil ou te chwazi a, nan direksyon Tanp mwen bati pou ou a pou yo lapriyè nan pye ou,

49 tanpri, koute lapriyè y'ap fè nan pye ou, kote ou ye nan syèl kote ou rete a. Koute lapriyè yo,

50 defann kòz yo. Padonnen pèp ou a tout peche yo te fè kont ou, tout vire do yo te vire do ba ou.

51 W'a fè lènmi ki te depòte yo gen pitye pou yo. Paske, se pèp ki rele ou pa ou la yo ye, pèp ou

52 menm ou te fè soti kite peyi Lejip ki te pou yo tankou yon gwo fou dife kote yo fonn fè. Seyè, Bondye, louvri je ou! Koute lapriyè mwen menm, sèvitè ou, m'ap fè nan pye ou ansanm ak tout

53 pèp Izrayèl la, chak fwa n'ap rele pou mande ou sekou. Se ou menm ki te chwazi nou nan mitan tout lòt pèp sou latè pou nou te ka rele ou pa ou, jan ou te di l' nan bouch Moyiz, sèvitè ou la, lè ou

54 te fè zansèt nou yo soti kite peyi Lejip. ¶ Pandan Salomon t'ap fè lapriyè sa a nan pye Bondye,

55 li te ajenou devan lotèl la, de bra leve anlè. Lè li fini, li leve. Li kanpe, li mande Bondye pou l'

56 voye benediksyon l' sou tout pèp Izrayèl la ki te sanble la a. Li pale byen fò, li di: -Lwanj pou Seyè a ki bay pèp Izrayèl la kè poze, jan li te pwomèt la. Li kenbe tout bèl pwomès li te fè nan

57 bouch Moyiz, sèvitè l' la. Koulye a, mwen mande pou Seyè a, Bondye nou an, toujou kanpe la avèk nou jan li te toujou kanpe la ak zansèt nou yo. Mwen mande l' pou l' pa janm lage nou, pou l'

58 pa janm bliye nou. Se pou li fè nou pa janm bliye l' pou nou ka toujou fè volonte l' nan tout sa

59 n'ap fè, pou nou kenbe lòd, prensip ak kòmandman li te bay zansèt nou yo. Se pou Seyè a, Bondye nou an, pa janm bliye lapriyè sa yo mwen sot fè nan pye l' la. Se pou l' toujou gen pitye

60 pou pèp Izrayèl la ansanm ak wa a, sèvitè li a, dapre sa y'a bezwen chak jou. Konsa, tout nasyon

61 sou latè va konnen se Seyè a sèl ki Bondye. Pa gen lòt! Se pou nou toujou kenbe pye Seyè a, Bondye nou an, fèm. Se pou nou mache dapre lòd li ban nou, pou nou fè tou sa li mande nou fè

62 tankou jòdi a. ¶ Apre sa, wa Salomon ansanm ak tout pèp Izrayèl ki te la a ofri bèt pou touye

pou Seyè a. ⁶³ Salomon te ofri venndemil (22.000) towò ak sanvenmil (120.000) mouton pou mande Bondye padon. Se konsa wa a ansanm ak tout moun pèp Izrayèl yo te mete Tanp lan apa pou Seyè a. ⁶⁴ Menm jou a, li mete mitan gwo lakou ki devan Tanp Seyè a apa pou Bondye. Lèfini, se la li ofri bèt pou boule nèt pou Seyè a, grenn jaden ak grès bèt yo te touye pou mande Bondye padon, paske lotèl kwiv ki devan Tanp lan te twò piti pou pran tout ofrann sa yo. ⁶⁵ Lè sa a, Salomon ansanm ak tout pèp Izrayèl la fete Fèt Joupa yo pandan sèt jou. Foul moun te soti depi Pas Amat la nan nò jouk sou fwontyè ak peyi Lejip la nan sid, yo vin fete fèt la pandan sèt jou. Lèfini, yo fete pandan sèt jou ankò. Sa te fè antou katòz jou. ⁶⁶ Sou wityèm jou a, Salomon voye tout moun tounen lakay yo. Yo tout t'ap fè lwanj li, y' al lakay yo ak kè kontan, paske sa te fè yo plezi pou wè tout benediksyon Seyè a te bay David, sèvitè l' la, ansanm ak pèp Izrayèl li a.

Chapter 9

¹ ¶ Lè wa Salomon fin bati Tanp Seyè a, palè wa a ak tout lòt bagay li te gen lide fè yo, ² Seyè a te fè Salomon wè l' ankò, menm jan li te fè l' wè l' lavil Gabawon an. ³ Seyè a di l' konsa: -Mwen tande lapriyè ou la. Mwen mete tanp ou bati a apa pou sèvis mwen. Se la pou moun adore m' tout tan. M'ap voye je sou li, m'ap toujou pwoteje l'. ⁴ Si ou mache devan m' tankou David, papa ou, ak tout kè ou jan ou dwe fè l' la, si ou fè tout sa mwen mande ou fè, si ou koute lòd ak bon prensip mwen yo, m'a fè gouvènman ou lan kanpe fèm nan peyi Izrayèl la pou tout tan, ⁵ m'a kenbe pwomès mwen te fè David, papa ou la, lè m' te di l' ap toujou gen yon moun nan fanmi li ki pou gouvènè pèp Izrayèl la. ⁶ Men, si ou menm osinon yonn nan pitit ou yo vire do ban mwen, si nou pa fè sa m' mande nou fè, si nou pa koute lòd mwen ban nou, si n' al sèvi lòt bondye, si n' al adore lòt bondye, ⁷ lè sa a, m'ap wete pèp Izrayèl la nan peyi mwen ba yo a. M'ap vire do bay tanp mwen te mete apa tankou kote pou yo fè sèvis pou mwen an. Moun toupatou va pase pèp Izrayèl la nan betiz, y'a fè chante sou li. ⁸ Tanp sa a va tounen yon vye mazi. Tout moun ki va pase bò la va sezi, y'a met men nan bouch. y'a mande poukisa Seyè a fè peyi a ak tanp lan sa. ⁹ y'a reponn yo: Se paske yo te vire do bay Seyè a, Bondye yo a, ki te fè zansèt yo soti kite peyi Lejip. Yo kouri al jwenn lòt bondye, yo fè sèvis pou yo, yo adore yo. Se poutèt sa Seyè a te voye malè sa a sou yo. ¹⁰ ¶ Wa Salomon te pran ventan pou l' bati tanp Seyè a ak palè wa a. ¹¹ Iram, wa peyi Tir, te ba li tout bwa sèd ak bwa pichpen ansanm ak tout lò li te bezwen pou l' fè travay la. Lè travay la fini, wa Salomon bay Iram ven lavil nan zòn Galile a. ¹² Iram kite peyi l', Tir, li desann al wè lavil

13
 Salomon te ba li yo. Men, li pa t' renmen yo. Li di Salomon konsa: -Se lavil sa yo ou wè pou ou ban mwen, frè mwen! Yo pa vo anyen. Se poutèt sa, depi lè sa a rive jòdi a, yo rele zòn sa a Nan

14
 Kaboul. Iram te voye senk tòn lò an total bay Salomon. 15 ¶ Wa Salomon te fè moun fè kòve pou bati tanp Seyè a ak palè pa l' la, pou mete ranblè plen bò solèy leve lavil la ak pou bati gwo miray lavil la. Li sèvi ak moun kòve yo tou pou l' rebati lavil Azò, lavil Megido ak lavil Gezè.

16
 Lontan anvan sa, farawon an, wa peyi Lejip la, te moute atake lavil Gezè. Li pran l', li touye tout moun Kanaran ki te rete la, lèfini li mete dife ladan l'. Apre sa, li fè pitit fi l' la kado l' lè li te marye

17
 ak wa Salomon. 18 Salomon rebati lavil Gezè, li rebati lavil Bètowon ki nan fon an, 18 lavil Balat

19
 ak lavil Tama nan dezè Jida a. 19 Li rebati tout lavil kote yo te fè depo pwovizyon Salomon yo, lavil pou chwal li yo ak pou cha lagè li yo, ak tou sa li te vle bati ni lavil Jerizalèm, ni nan peyi

20
 Liban, ni nan tout lòt peyi ki te sou lòd li yo. 20 Te gen moun Amori yo, moun Et yo, moun Ferezi

21
 yo, moun Evi yo ak moun Jebis yo. 21 Lè moun Izrayèl yo te fin pran peyi Kanaran an pou yo, gen anpil nan moun ansyen mèt peyi a yo pa t' touye pou Bondye. Yo te kite yo rete nan peyi a. Se pitit

22
 moun sa yo Salomon te pran sèvi esklav pou fè kòve. Se sa k'ap fèt jouk jounen jòdi a. 22 Salomon pa t' fè ankenn moun nan pèp Izrayèl la sèvi esklav. Li te fè yo sèvi sòlda, ofisyè, chèf, kaptenn ak

23
 kòmandan cha lagè yo ak kavalye yo. 23 Te gen senksansenkant (550) fòmman gouvènè yo te

24
 nonmen responsab travay li yo. Se yo ki t'ap dirije moun ki t'ap travay yo. 24 Pitit fi farawon an kite Lavil David la, l' al rete nan palè Salomon te bati pou li a. Se apre sa Salomon fè ranbleye

25
 pòsyon ki bay sou solèy leve a. 25 Twa fwa chak lanne, Salomon te ofri bèt pou yo boule nèt pou Bondye ak ofrann pou di Bondye mèsis sou lotèl li te bati pou Seyè a, epi li fè boule lansan sou lotèl

26
 ki devan Seyè a. Se konsa, li te fè Tanp lan sèvi pou sa yo te bati l' la. 26 Wa Salomon te bati yon bann gwo batiman lavil Ezyongebè ki te toupre Elat, bò lanmè Wouj la, nan pòsyon tè ki pou Edon

27
 an. 27 wa Iram te voye kèk moun peyi l' ki te bon maren pou sèvi ansanm ak moun Salomon yo

28
 sou batiman yo. 28 Yo vwayaje rive peyi Ofi kote y' al chache sèz tòn lò pote bay Salomon.

Chapter 10

1
 ¶ Larenn peyi Saba tande pale ki kalite moun Salomon te ye ak jan sa te sèvi yon lwanj pou Seyè a. Li vwayaje pou lavil Jerizalèm pou l' sonde konesans Salomon avèk kèk keksyon difisil.

2
 Se konsa, li rive lavil Jerizalèm avèk yon pakèt moun ak anpil chamo chaje fèy santi bon, bèl pyè

koute chè ak kantite lò. Lè li rive devan Salomon, li mande l' tout kalite keksyon li te fè lide mande
³ l'. Salomon menm reponn tout keksyon l' yo. pa t' gen anyen ki te twò difisil ni pou li reponn ni
⁴ pou li esplike. Larenn peyi Saba a wè jan Salomon te gen anpil bon konprann. Li wè palè li te
⁵ bati a. Li wè kalite manje yo te sèvi sou tab li ak kay li te fè bati pou chèf li yo, jan li te òganize
moun k'ap travay nan palè a, rad inifòm yo te genyen, domestik ki t'ap sèvi l' bweson, ak bèt li te
⁶ ofri pou boule nèt pou Seyè a nan Tanp lan. Lè li wè tou sa, li pèdi lapawòl tèlman li te sezi. Li
di wa Salomon konsa: -Sa m' te tande nan peyi m' sou ou ak sou bon konprann ou an, se te vre!
⁷ Men, mwen pa t' vle kwè toutotan mwen pa t' vini wè ak je pa mwen. Men, sa m' te tande a se pa
⁸ mwatye sa m' wè a. Bon konprann ou ak richès ou pi plis pase sa yo te di m' lan. Ala bèl chans
madanm ou yo genyen! Ala bèl chans moun k'ap travay avè ou yo genyen! Yo toujou la devan ou
⁹ ap tande pawòl bon konprann k'ap soti nan bouch ou! Lwanj pou Seyè a, Bondye ou la! Li moutre
jan li kontan avè ou. Li mete ou wa peyi Izrayèl la. Li menm ki renmen peyi Izrayèl la pou tout
¹⁰ tan, li mete ou wa pou ou ka kenbe peyi a nan lòd, nan bon chemen san patipri. Larenn lan fè
wa a kado senk tòn lò ak kantite fèy santi bon ak anpil pyè koute chè. Wa a pa janm resevwa nan
¹¹ lavi li kantite fèy santi bon larenn Saba te ba li lè sa a. Batiman Iram yo ki te al chache lò nan
peyi Ofi, te pote soti nan menm peyi sa a yon gwo kantite bwa koray ak anpil bèl pyè koute chè.
¹² Salomon sèvi ak bwa koray la pou fè balistrad nan tanp lan ak nan palè a. Li fè gita ak bandjo
pou mizisyen yo ak bwa sa a tou. Se te pi bon kalite bwa koray yo te janm fè antre nan peyi Izrayèl.
¹³ Depi lè sa a yo pa janm wè sa ankò. Wa Salomon te bay larenn peyi Saba a tou sa li te mande
l', san konte lòt kado li menm, wa Salomon, li te vle ba li. Apre sa, larenn lan tounen nan peyi Saba
¹⁴ ansanm ak tout moun ki te avè l' yo. ¶ Chak lanne wa Salomon te resevwa vennsenk tòn lò,
¹⁵ san konte lajan li resevwa nan men moun k'ap fè trafik, nan men moun k'ap fè komès, nan men
wa peyi Arabi yo ak nan men gouvènè pèp Izrayèl yo. ¹⁶ Salomon te fè fè desan (200) gwo plak
¹⁷ pwotèj an fè. Lèfini, li fè kouvri yo chak ak yon kouch lò ki peze kenz liv. Li fè fè tou twasan
ti plak pwotèj an fè, li fè kouvri yo chak ak yon kouch lò ki peze kat liv. Li mete tout plak pwotèj
¹⁸ sa yo nan Salon Rakbwa peyi Liban an. Li fè fè yon gwo fotèy ak kòn elefan. Li fè kouvri l' ak
¹⁹ pi bon kalite lò ki genyen. Pou rive bò fotèy la, se pou ou te moute sis mach eskalye. Dèyè fotèy
²⁰ la te gen pòtre yon gwo tèt towò. Sou kote manch yo sou chak bò, te gen pòtre yon lyon. Te gen
douz lyon sou macheskalye yo, de sou chak mach, nan de pwent yo. Pa t' gen ankenn lòt peyi ki te
²¹ gen fotèy pou w'a parèy ak fotèy sa a. Tout gode wa Salomon te sèvi pou l' bwè te fèt an lò.

Tout bagay ki te sèvi nan Salon Rakbwa peyi Liban an te fèt ak bon lò. Yo pa t' sèvi ak ajan menm,
 paske nan tan Salomon ajan pa t' vo anyen. ²² Li te gen kantite batiman pa l' ki t'ap vwayaje toupatou
 sou lanmè ansanm ak batiman Iram yo. Chak twazan, batiman yo tounen, yo pote lò, ajan, kòn
 elefan, pan ak makak. ²³ Wa Salomon te pi rich pase tout lòt wa yo, li te gen plis bon konprann
 pase yo tout. ²⁴ Tout moun toupatou te vle vin wè l' pou tandè pawòl bon konprann Bondye te
 mete nan bouch li. ²⁵ Chak moun ki te vini te pote kado pou li: bagay fèt an ajan ak an lò, rad,
 zam, fèy santi bon, chwal ak milèt. Chak lanne se te konsa. ²⁶ Salomon te sanble mil katsan (1.400)
 cha lagè ak douzmil (12.000) chwal pou sòlda kavalye yo. Li mete yon pòsyon ladan yo nan lavil
 li te fè bati tout espè pou yo. Rè s yo, li mete yo bò kote l' lavil Jerizalèm. ²⁷ Pandan tout rèy wa
 a, ajan te tankou wòch lavil Jerizalèm. Bwa sèd menm, ou te jwenn sa an kantite tankou pye sikomò
 nan rakbwa ki nan plenn peyi Jida yo. ²⁸ Chwal Salomon yo te soti nan peyi Lejip ak nan peyi
 Silisi. Wa a te gen moun pa l' ki te konn al achte chwal yo pou li la. ²⁹ Chak cha lagè achte nan
 peyi Lejip te koute sisan (600) pyès ajan, chak chwal te koute sansenkant (150) pyès ajan. Se menm
 moun sa yo ki te konn al achte chwal pou revann wa peyi Et yo ak wa peyi Siri yo.

Chapter 11

¹
 ¶ Salomon te renmen ak anpil fanm ki moun lòt nasyon. San konte pitit fi wa peyi Lejip la, li
 te gen fanm ki soti nan peyi Moab, nan peyi Amon, nan peyi Edon, nan peyi Sidon ak nan peyi Et.
²
 Li te marye ak anpil fanm ki soti nan lòt nasyon, atout Seyè a te bay moun pèp Izrayèl yo lòd pou
 yo pa janm marye ak moun sa yo, pou yo pa janm kite yo mele ak yo, paske moun sa yo va pran
 tèt yo pou fè yo sèvi bondye pa yo. Men, Salomon te sitèlman renmen yo, li marye ak yo. ³ Salomon
 te marye ak sètisan (700) madanm ki soti nan fanmi gwo chèf, lèfini li te gen twasan (300) fanm
 kay. Medam sa yo fè l' vire do bay Bondye. ⁴ Lè Salomon konmanse granmoun, medam yo pran
 tèt li, yo fè l' al sèvi lòt bondye. Li pa sèvi Seyè a, Bondye li a, ak tout kè li ankò, jan David, papa
 l', te fè l' la. ⁵ Li pran sèvi Astate, bondye peyi Sidon an, ak Milkòm, vye zidòl degoutan peyi Amon
 an. ⁶ Salomon tanmen fè sa ki mal devan Seyè a. Li pa sèvi l' ak tout kè li jan David, papa l', te fè
 a. ⁷ Sou mòn ki sou bò solèy leve lavil Jerizalèm lan, li bati de tanp, yonn kote yo fè sèvis pou
 Kemòch, vye zidòl degoutan peyi Moab la, ak yonn kote yo fè sèvis pou Molòk, vye zidòl degoutan
 peyi Amon an. ⁸ Se konsa li bati lòt tanp kote pou medam lòt nasyon li te marye yo al boule lansan

ak ofri bèt pou touye pou bondye pa yo. ⁹ ¶ Seyè a move sou Salomon paske Salomon te vire do
 bay Seyè a, Bondye pèp Izrayèl la. Atout Seyè a te parèt de fwa devan Salomon, ¹⁰ atout li te ba
 li lòd pou li pa sèvi bondye lòt nasyon yo, Salomon pa t' koute Seyè a, li pa swiv lòd li yo. ¹¹ Seyè
 a di Salomon konsa: -Gade sa ou fè! Ou pa respekte kontra mwen te pase avè ou la, ou pa fè sa m'
 te ba ou lòd fè. M'ap wete baton kòmandman an nan men ou, m'ap mete yonn nan chèf ou yo nan
¹² plas ou. Men, poutèt David, papa ou, mwen p'ap fè sa nan vivan ou. Se nan men pitit gason ou
¹³ lan m'ap wete gouvènman an. Men, mwen p'ap wete tout peyi a nèt anba lòd li. Poutèt David,
 sèvitè m' lan, poutèt lavil Jerizalèm mwen chwazi pou rele m' pa m' lan, m'ap kite yon branch fanmi
¹⁴ pou li. ¶ Se konsa, Seyè a fè Adad, yon moun nan fanmi wa Edon an, leve dèyè Salomon. ¹⁵ Men
 istwa Adad: Lontan sa, nan tan David t'ap fè lagè ak peyi Edon, Joab, kòmandan lame li a, te moute
 nan peyi Edon al antere kadav sòlda pèp Izrayèl yo ki te mouri nan lagè a. Lèfini, yo touye dènye
¹⁶ gason ki te nan peyi a. Joab rete sis mwa nan peyi a ansanm ak tout lame a jouk yo fin touye
¹⁷ dènye gason ladan l'. Lè sa a, Adad te timoun. Li te rive chape kò l' ansanm ak kèk lòt moun
¹⁸ peyi Edon ki t'ap travay kay papa l'. Y' ale nan peyi Lejip. Yo kite lavil Madyan, yo pase lavil
 Paran. Antan yo la, yo pran kèk gason avèk yo, yo desann peyi Lejip bò kote wa peyi a. Farawon
¹⁹ an ba li yon kay pou l' rete ak yon pòsyon tè pou l' travay. Lèfini li ba li manje. Adad sitèlman
 vin bon zanmi farawon an, farawon an pran bèlsè li, sè larenn Takpènès, li bay Adad li pou madanm.
²⁰ Madan Adad fè yon pitit gason yo te rele Genoubat. Larenn Takpènès fè elve Genoubat nan palè
²¹ a kote li grandi ansanm ak tout pitit wa yo. Lè nouvell lanmò David ak lanmò Joab rive nan peyi
²² Lejip, tonbe nan zòrèy Adad, Adad di farawon an konsa: -Kite m' tounen nan peyi m'. Farawon
 an mande l': -Poukisa? Eske ou janm manke anyen isit lakay mwen kifè ou vle tounen lakay ou?
 Adad reponn li: -Mwen gen tou sa m' bezwen. Men se pou ou kite m' ale. Se konsa Adad tounen
²³ nan peyi l'. Bondye fè yon lòt moun leve dèyè Salomon ankò. Se te Rezon, pitit gason Elyada,
²⁴ ki te kouri kite lakay mèt li, Adadezè, wa peyi Soba a. Rezon sanble yon bann gason avè l'. Se
 konsa li vin chèf yon bann bandi. Lè sa a, David te bat Adadezè, li touye tout moun peyi Siri ki
²⁵ t'ap mache avèk Adadezè. Se konsa Rezon desann lavil Damas. Li vin chèf lavil Damas. Pandan
 tout rèy wa Salomon, Rezon pa t' vle wè pèp Izrayèl la. Mete sou mechanste Adad t'ap fè pèp Izrayèl
²⁶ la, Rezon pa t' vle wè pèp Izrayèl la menm. Rezon te vin wa nan peyi Siri. ¶ Yon lòt moun ki te
 bay Salomon do ankò, se te Jewoboram, yonn nan moun ki t'ap sèvi avèk Salomon yo. Jewoboram
 te pitit Nebat, yon nonm lavil Zereda nan peyi Efrayim. Manman l' te yon vèv yo te rele Sewa.

27

Men rezon ki te pote Jewoboram bay Salomon do. Salomon t'ap fè yo ranbleye teras ki bay sou solèy leve lavil Jerizalèm lan. Li t'ap fè repare miray Lavil David, papa l'.²⁸ Jewoboram te yon vanyan gason, lèfini li te konn sa li vle. Lè Salomon wè jan jenn gason an te travay rès, li mete l'

reskonsab travay kòve nan pòsyon tè ki pou fanmi pitit Jozèf yo.²⁹ Yon jou, Jewoboram te fèk kite lavil Jerizalèm, li kontre sou wout li ak Akija, pwofèt lavil Silo a. Akija te gen yon rad tou nèf sou li. De mesye yo te pou kont yo sou wout la nan mitan jaden yo.³⁰ Akija wete rad nèf ki te sou

li a, li chire l' fè douz moso.³¹ Lèfini, li di Jewoboam: -Pran dis moso pou ou, paske Seyè a, Bondye pèp Izrayèl la, voye di ou: Mwen pral wete kòmandman peyi a nan men Salomon, m'ap ba ou dis

branch fanmi pou ou.³² Salomon pral rete ak yon sèl branch fanmi. M'ap fè sa pou li poutèt David, sèvitè m' lan, poutèt lavil Jerizalèm mwen te chwazi nan tout peyi Izrayèl pou rele m' pa m' lan.

33

Salomon vire do ban mwen, l' al adore bondye lòt nasyon, tankou Astate, zidòl fanm moun peyi Sidon yo, Kemòch, bondye moun Moab yo, ak Milkòm, bondye moun Amon yo. Salomon pa fè sa ki byen devan je mwen, li pa mache dwat, li pa swiv lòd ak kòmandman mwen yo tankou David,

papa l', te fè l' la.³⁴ Men, mwen pa t' wete gouvènman tout peyi a nan men l'. M'ap kite l' gouvènman konsa jouk li mouri. M'ap fè sa pou li poutèt David, sèvitè m' lan, yon nonm mwen te chwazi, yon

nonm ki te mache sou lòd ak kòmandman mwen yo.³⁵ Men, m'ap wete gouvènman tout peyi a

nan men pitit gason l' lan. M'ap ba ou dis branch fanmi pou gouvènman.³⁶ M'ap kite yon sèl branch fanmi pou pitit li a. Konsa, David, sèvitè m' lan, va toujou gen yon moun nan ras li ap gouvènman

lavil Jerizalèm, lavil mwen te chwazi pou m' rete a.³⁷ Ou menm, mwen pran ou, m'ap mete ou wa

sou tout peyi Izrayèl la. Konsa, w'a chèf sou tout peyi ou vle a.³⁸ Si ou fè tou sa mwen mande ou fè, si ou mache sou lòd mwen, si ou fè sa ki dwat devan je m', si ou kenbe tout lòd ak tout kòmandman mwen yo tankou David, sèvitè m' lan, te fè l' la, m'ap toujou kanpe la avè ou. Lèfini, tankou mwen te fè sa pou David, m'ap fè ou toujou gen yon moun nan fanmi ou k'ap wa apre ou.

M'ap ba ou peyi Izrayèl la pou ou.³⁹ Se konsa m'ap pini moun fanmi David yo. Men, se p'ap pou

tout tan.⁴⁰ Se poutèt sa Salomon te soti pou l' touye Jewoboam. Men, Jewoboram leve, li kouri

ale nan peyi Lejip, bò Chichak, wa peyi a. Li rete la jouk Salomon mouri.⁴¹ ¶ Se nan liv istwa

Salomon an nou jwenn tout lòt bagay Salomon te fè yo ak jan li te gen bon konprann.⁴² Salomon

te wa lavil Jerizalèm, li te gouvènman tout pèp Izrayèl la pandan karantan.⁴³ Lè li mouri, yo antere l' nan lavil David, papa l'. Se Woboram, pitit li, ki moute nan plas li sou fotèy la.

Chapter 12

¹ ¶ Woboram moute lavil Sichèm kote tout pèp Izrayèl la nèt te sanble pou fè li wa. ² Lè Jewoboram, pitit gason Nebat la, ki te nan peyi Lejip kote li te al kache pou Salomon an, pran nouvèl la, li kite peyi Lejip, li tounen nan peyi l'. ³ Moun branch fanmi ki nan nò peyi a voye chache l'. Yo tout ansanm, y' al jwenn Woboram, yo di l' konsa: ⁴ -Salomon, papa ou, te di anpil ak nou, li te peze nou anpil. Koulye a, fè yon leve men pou nou. Kite nou viv yon ti jan pi alèz, n'a sèvi ou nèt ale. ⁵ Woboram di yo: -Tounen nan twa jou. Lè sa a, m'a ban nou repons. Epi pèp la al fè wout li. ⁶ Woboram menm al jwenn chèf fanmi ki te sèvi konseye pou Salomon, papa l', lè l' t'ap viv, li mande yo: -Kisa pou m' reponn pèp la? Ki konsèy nou ban mwen? ⁷ Yo reponn li: -Si jòdi a ou fè pèp la wè se sèvi ou vle sèvi l', si ou asepte fè sa yo mande ou la, si ou pale byen ak yo, y'ap toujou sèvi ou. ⁸ Men, Woboram pa koute konsèy granmoun yo te ba li a, l' al jwenn jenn gason ki te leve ansanm avè l' yo, lèfini ki te toujou la avè l', li mande yo konsèy. ⁹ Li di yo: -Ki konsèy nou ta ban mwen? Kisa pou m' reponn pèp la k'ap mande m' pou m' fè yon leve men pou yo? ¹⁰ Jenn gason kanmarad li yo reponn li: -Men sa w'a di moun sa yo k'ap plenyen ba ou pou papa ou ki t'ap peze yo, epi k'ap mande ou fè yon leve men pou yo. W'a di yo: Si papa m' te di ak nou, mwen menm m'ap pi di pase l'. ¹¹ Wi, w'a di yo: Papa m' t'ap peze nou anba chay lou, mwen menm m'ap mete sou chay la ankò. Papa m' te bat nou ak fwèt, mwen menm m'ap pase fwèt la anba sann pou m' bat nou. ¹² Twa jou apre vre, Jewoboram tounen ansanm ak tout pèp Izrayèl la vin jwenn wa Woboram jan li te di yo a. ¹³ Wa a pa koute konsèy granmoun yo, li pale di ak pèp la. ¹⁴ Li reponn yo jan jenn gason yo te ba l' konsèy fè a. Li di yo: -Papa m' t'ap peze nou anba chay lou, mwen menm m'ap mete sou chay n'ap pote deja a. Papa m' te bat nou ak fwèt, mwen menm m'ap pase fwèt la anba sann pou m' bat nou. ¹⁵ Se konsa wa a pa t' asepte fè sa pèp la te mande l' la. Sa se travay Seyè a menm ki te vle pou sa li te voye Akija, pwofèt Silo a, al di Jewoboram, pitit Nebat la, rive vre. ¹⁶ ¶ Lè pèp Izrayèl la wè wa a pa t' soti pou li fè sa yo te mande l' la, yo reponn wa a. Yo di li: -Nou pa gen anyen pou nou wè ak David. Nou pa bezwen anyen nan zafè pitit Izayi a. Ann al lakay nou, nou menm moun peyi Izrayèl yo! Ann kite pitit David yo degaje yo pou kont yo ak fanmi yo! Se konsa moun pèp Izrayèl yo vire do al lakay yo. ¹⁷ Yo kite Woboram pou li gouvènen sèlman sou moun ki rete nan pòsyon tè branch fanmi Jida a. ¹⁸ Apre sa, wa Woboram voye Adoram ki te reskonsab travay kòve yo bò kote moun Izrayèl yo. Men moun Izrayèl yo kalonnen li wòch jouk li mouri. Lè sa a, wa Woboram prese moute sou cha li, li kouri ale lavil Jerizalèm. ¹⁹ Depi lè

sa a, moun pèp Izrayèl yo vire do bay moun fanmi David yo jouk jounen jòdi a. ²⁰ Lè moun peyi Izrayèl yo vin konnen Jewoboram te tounen soti peyi Lejip, yo voye chache l' pou l' vin nan yon reyinyon. Yo fè msye wa sou tout peyi Izrayèl la. Se moun branch fanmi Jida yo ase ki te kenbe

²¹ fèm ak fanmi David la. Lè Woboram rive lavil Jerizalèm, li sanble sankatrevenmil (180.000) sòlda nan pi bon sòlda ki te nan branch fanmi Jida ak nan branch fanmi Benjamen pou l' al goumen

ak moun peyi Izrayèl yo, pou l' mete yo anba lòd li ankò. ²² Men, Bondye pale ak Chemaya, pwofèt

²³ li a, li di l' konsa: -Pale ak Woboram, pitit Salomon an, wa peyi Jida a, ansanm ak tout moun ki

²⁴ fè pati branch fanmi Jida ak branch fanmi Benjamen. Di yo: Men mesaj mwen menm Seyè a, mwen voye ba yo: Pa konprann pou n' al atake moun peyi Izrayèl yo. Se fanmi nou yo ye. Tounen lakay nou. Sa ki rive a se travay mwen, se mwen ki vle l' konsa. Moun yo koute lòd Seyè a vre, yo

²⁵ tout al lakay yo jan Seyè a te di yo a. ¶ Jewoboram ranfòse miray ranpa lavil Sichèm nan mòn peyi Efrayim. Se la l' al rete pou yon tan. Apre sa, li kite Sichèm, l' al ranfòse miray ranpa lavil

²⁶ Penwèl. Lèfini, Jewoboram di nan kè li: -Jan sa ye koulye a, gouvènman an pral tounen nan

²⁷ men moun fanmi David yo ankò. Paske, si pèp la gen pou moute lavil Jerizalèm chak lè pou touye bèt pou Seyè a nan Tanp lan, rive yon lè, y'ap tounen al jwenn Woboram, wa peyi Jida a. Lè

²⁸ sa a, y'a touye m' pou y' al jwenn li ankò. Lè li fin fè lide sa a, li fè de estati towò an lò, epi li di pèp la: -Nou moute kont nou koulye a lavil Jerizalèm pou fè sèvis. Nou menm moun pèp Izrayèl,

²⁹ men bondye pa nou, bondye ki te fè nou soti kite peyi Lejip. Li mete yonn nan estati towò yo

³⁰ lavil Betèl, li mete lòt la lavil Dann. Se konsa pèp la rive fè sa ki mal. Y' al fè sèvis pou zidòl

³¹ yo lavil Betèl ak lavil Dann. Jewoboram al bati lòt kay zidòl sou tèt kèk mòn. Li chwazi kèk

³² gason nan pèp la ki pa t' nan branch fanmi Levi yo pou sèvi prèt. Jewoboram chwazi kenzyèm jou nan wityèm mwa a pou yon jou fèt, tankou fèt yo fè nan peyi Jida a. Sou lotèl lavil Betèl la, li touye bèt pou estati towò li te fè fè yo. Lèfini, se la lavil Betèl ankò li mete prèt ki pou sèvi nan lòt

³³ kote li te bati pou fè sèvis yo. Se konsa, sou kenzyèm jou wityèm mwa a, jou li menm li te chwazi a, li moute lavil Betèl, l' al touye bèt sou lotèl la pou fete fèt li menm li te fè lide fete pou pèp Izrayèl la.

Chapter 13

¹ ¶ Lè sa a, Seyè a bay yonn nan pwofèt li yo ki te nan peyi Jida lòd pou li moute lavil Betèl.
 Lè li rive lavil Betèl, Jewoboram te kanpe bò lotèl la ap boule lansan. ² Dapre lòd Seyè a te ba li a, pwofèt la pale byen fò, li bay mesaj sa a sou lotèl la: -Ou menm lotèl! Wi, ou menm lotèl! Men sa Seyè a di: Nan fanmi David la, gen yon timoun ki pral fèt, y'ap rele l' Jozyas. L'ap vini, l'ap pran tout prèt k'ap sèvi nan kay zidòl yo, prèt k'ap boule lansan sou ou yo, l'ap touye yo sou ou. Lèfini, sou ou ankò y'a boule zosman moun. ³ Menm jou sa a pwofèt la bay yon siy, li di konsa: -Lotèl sa a pral fann de bò. Sann dife ki sou li a pral gaye tout atè a. Lè n'a wè sa, n'a konnen se Seyè a menm ⁴ ki pale nan bouch mwen. Lè Jewoboram tandè pawòl pwofèt la te di sou lotèl Betèl la, li lonje men l' anwo lotèl la sou pwofèt la, li di: -Pran msye! Men, men li te lonje sou pwofèt la rete tou rès, li pa t' ka fè yon mouvman avè l' ankò. ⁵ Lamenm, lotèl la rete konsa, li fann de bò, epi sann dife ki te sou li a gaye tout atè a, jan pwofèt la te di sa nan non Seyè a. ⁶ wa Jewoboram pran lapawòl ankò, li di pwofèt Bondye a konsa: -Tanpri, lapriyè Seyè a, Bondye ou la, pou mwen. Mande l' pou l' geri men m'. Pwofèt la lapriyè Seyè a vre, epi men wa a geri, li vin jan li te ye anvan ⁷ an. Apre sa, wa a di pwofèt la konsa: -Ann al lakay avè m'. W'a manje. Lèfini, m'a fè ou kado kichòy. ⁸ Pwofèt la reponn: -Ou ta mèt ban mwen mwaye nan tout richès ou yo, mwen p'ap mete pwent pye m' lakay ou. Mwen p'ap manje pen, ni mwen p'ap bwè dlo isit la. ⁹ Paske, Seyè a te ban mwen lòd pou m' pa ni manje ni bwè anyen, lèfini pou m' pa pran menm chemen mwen te vini an pou m' tounen lakay mwen. ¹⁰ Se konsa li pran yon lòt wout pou l' tounen lakay li, li pa pran menm chemen li te pran lè li t'ap vini lavil Betèl la. ¹¹ ¶ Nan tan sa a, te gen yon pwofèt ki te rete lavil Betèl. Li te granmoun anpil. Pitit gason l' yo vin rakonte l' tou sa pwofèt Bondye a te fè jou sa a lavil Betèl, ak tou sa li te di wa Jewoboram. ¹² Pwofèt la mande yo ki wout yo wè l' pran. Pitit gason l' yo moutre l' chemen pwofèt Bondye ki te soti peyi Jida a te pran. ¹³ Li di pitit gason l' yo sele bourik li pou li. Yo sele bourik li a, li moute sou li, ¹⁴ li pati dèyè pwofèt Bondye a. Li jwenn li chita anba yon pye chenn. Li mande l': -Se ou menm pwofèt Bondye ki soti peyi Jida a? Nonm lan reponn: -Se mwen wi! ¹⁵ Li di l' konsa: -Ann al lakay avè m'. W'a manje kichòy! ¹⁶ Men pwofèt peyi Jida a di l': -Non, m' pa ka tounen avè ou, ni m' pa ka al lakay ou. Lèfini, m' p'ap manje, m' p'ap bwè anyen avè ou isit la. ¹⁷ Paske Seyè a te ban m' lòd pou m' pa t' ni manje ni bwè anyen avè ou isit la, lèfini pou m' pa pran menm chemen mwen te pase pou m' vini an pou m' tounen. ¹⁸ Lè sa a pwofèt lavil Betèl la di l': -Mwen menm tou, mwen se yon pwofèt tankou ou. Se Seyè a menm ki te voye yonn nan zanj li yo vin di m' pou m' fè ou tounen lakay ansanm avè m', lèfini pou m' ba

ou manje, pou m' ba ou bwè! Men se manti pwofèt lavil Betèl la t'ap ba li. ¹⁹ Se konsa pwofèt peyi Jida a tounen lakay pwofèt Betèl la, li manje, li bwè avè l'. ²⁰ Yo te chita bò tab la toujou lè Seyè a pale ak pwofèt Betèl la ²¹ ki pale byen move ak pwofèt peyi Jida a. Li di l' byen fò: -Seyè a di ou ou pa koute lòd li te ba ou, ou pa fè sa li te mande ou fè a. ²² Okontrè, ou tounen, ou manje, ou bwè yon kote li te ba ou lòd pa fè sa. Se poutèt sa w'ap mouri, lèfini, ou p'ap antere nan kavo fanmi ou. ²³ ¶ Lè yo fin manje, pwofèt lavil Betèl la sele bourik pwofèt peyi Jida a pou li. ²⁴ Pwofèt peyi Jida a pati. Li kontre ak yon lyon sou chemen li, lyon an touye l'. Kadav li te blayi atè a nan mitan chimen an. Bourik la ak lyon an te rete la bò kote l'. ²⁵ Moun ki t'ap pase bò la wè kadav la atè nan chimen an ansanm ak lyon an bò kote l'. Yo antre lavil Betèl kote pwofèt granmoun lan te rete a, yo rakonte sa yo wè. ²⁶ Lè pwofèt la tande sa, li di: -Se pwofèt ki te dezobeyi lòd Seyè a te ba li a. Konsa, Seyè a voye yon lyon atake l'. Lyon an kraze l', li touye l' jan Seyè a te di l' l'ap fè l' la. ²⁷ Li di pitit gason l' yo. -Sele bourik la pou mwen! Yo sele bourik msye. ²⁸ Msye pati, li jwenn kadav pwofèt peyi Jida a lonje atè a nan chimen an, bourik la ak lyon an kanpe bò kote l' toujou. Lyon an pa t' manje kadav la, ni li pa t' fè bourik la anyen. ²⁹ Pwofèt lavil Betèl l'a ranmase kadav l'a, li mete l' sou bourik la, li pote l' tounen lavil Betèl. Li pran lapenn pou li. Lèfini, li antere l'. ³⁰ Li mete kadav la nan kavo pwòp fanmi l'. Li menm ansanm ak pitit gason li yo kriye pou li, yo t'ap di: -Woy, frè mwen! Ou al kite m' vre? ³¹ Apre lantèman an, pwofèt la pale ak pitit gason l' yo. Li di yo: -Lè m'a mouri, n'a antere m' nan kavo sa a, n'a mete kadav mwen kole kole ak kadav pa l' la. ³² Pawòl Seyè a te ba li lòd di sou lotèl lavil Betèl la ak sou lòt kote y'ap fè sèvis nan lavil Samari yo gen pou rive vre. ³³ Apre tout bagay sa yo, Jewoboram, wa peyi Izrayèl la, donnen pi rèd nan vye bagay li t'ap fè yo. Li t'ap chwazi moun nan pèp la toujou pou sèvi prèt nan tanp li te bati pou zidòl yo. Depi yon moun te vle prèt, li te ba l' pouvwa a pou li te sèvi prèt nan tanp zidòl yo. ³⁴ Se konsa, tout fanmi Jewoboram lan lage kò yo nan fè sa ki mal. Se poutèt sa, tout fanmi sa a fini, li disparèt nèt sou latè.

Chapter 14

¹ ¶ Lè sa a, Abija, pitit gason wa Jewoboram lan, tonbe malad. ² Jewoboram di madanm li: -Abiye ou yon jan pou pesonn pa rekonèt se madanm mwen ou ye, pati ale lavil Silo. Se la pwofèt Akija rete; se li ki te di m' mwen tapral gouvènènan pèp Izrayèl la. ³ W'a pran dis pen, kèk gato ak

yon bokal siwo myèl pou fè l' kado, ou v al lakay li. Sèten, l'a fè ou konnen sa ki pou rive pitit gason nou an. ⁴ Se konsa madan Jewoboram ale lakay Akija lavil Silo. Akija te granmoun anpil, li pa t' wè nan je l' ankò. ⁵ Seyè a te fè Akija konnen madan Jewoboram ap vin wè li pou pitit gason l' lan ki malad. Li te di l': -Lè madan Jewoboram vini, l'ap fè tèt li pase pou yon lòt moun. Ou menm, w'a di l' sa m'a mete nan bouch ou pou di l'. Lè madan Jewoboram rive, li fè tèt li pase pou yon lòt moun vre. ⁶ Men, lè Akija tandè l' bri pye l' ap vini nan papòt la, li di l': -Antre non, madan Jewoboram. Poukisa w'ap fè tèt ou pase pou lòt moun konsa? Tout jan, mwen gen move nouvèl pou ou. ⁷ ¶ Ale di Jewoboram men sa Seyè a, Bondye pèp Izrayèl la voye di l': Mwen te chwazi ou nan mitan pèp la, mwen mete ou chèf sou pèp mwen an, pèp Izrayèl la. ⁸ Mwen wete baton kòmandman nan men moun fanmi David yo, mwen ba ou li. Men, ou pa t' tankou David. sèvitè m' lan, ki te toujou koute lòd mwen te ba li, ki te mache ak kè kontan nan chemen mwen te ba li, ki te fè sa ki pou fè m' plezi ase. ⁹ Ou fè pi mal pase sa ki te chèf anvan ou yo. Ou sèvi lòt bondye, ou fè estati an kwiv pou yo, ou voye m' jete, ou fè m' fache. ¹⁰ Se poutèt sa, Jewoboram, mwen pral fè malè tonbe sou fanmi ou. Mwen pral touye dènye gason nan fanmi ou, timoun kou granmoun. ¹¹ M'ap disparèt fanmi ou nèt nan peyi Izrayèl, y'ap bale yo voye jete tankou yo jete pou pou. Chen pral manje kadav moun nan fanmi ou ki va mouri nan lavil. Malfini karanklou va manje kadav sa ki va mouri andeyò. ¹² Se Seyè a menm ki di sa. Ou menm pou tèt pa ou, madan Jewoboram, leve non, tounen lakay ou. Rive w'a rive lavil la, pitit la ap mouri. ¹³ Tout moun peyi Izrayèl yo va pran lapenn pou li, y'a antere l'. Nan tout fanmi Jewoboram lan, se li menm ase y'ap antere paske, nan tout fanmi an, se li menm ase ki te yon ti jan bon nan je Seyè a, Bondye pèp Izrayèl la. ¹⁴ Seyè a pral mete yon lòt wa pou gouvènè pèp Izrayèl la. Se li menm ki pral disparèt fanmi Jewoboram lan. ¹⁵ Se pou jòdi a wi sa m'ap di la a. Se pou koulye a menm. Seyè a pral pini pèp Izrayèl la. Yo pral tranble tankou pye wozo k'ap tranble bò kouran dlo. Li pral dechouke pèp Izrayèl la nan bon peyi li te bay zansèt yo a, li pral gaye yo lòt bò larivyè Lefrat, paske yo fè Seyè a fache lè yo fè estati pou zidòl Astate a. ¹⁶ Seyè a pral lage pèp Izrayèl la paske Jewoboram te fè anpil peche, lèfini li te pote pèp Izrayèl fè sa ki mal tou. ¹⁷ Madan Jewoboram pati, li tounen lavil Tisra. Lè li fè sa l'ap antre lakay li, pitit la mouri. ¹⁸ Moun pèp Izrayèl yo pran lapenn pou pitit la, yo antere l', jan Seyè a te di sa nan bouch pwofèt Akija a. ¹⁹ Tout lòt bagay wa Jewoboram te fè yo, istwa lagè li te fè ak jan li te gouvènè peyi a, n'a jwenn tou sa ekri nan liv Istwa wa peyi Izrayèl yo. ²⁰ Jewoboram te wa pandan venndezan. Lè li mouri, yo antere l'. Se Nadab, pitit gason l' lan, ki

²¹
 moute sou fotèy la nan plas li. ¶ Woboram, pitit gason Salomon an, te gen karanteyennan lè li
 vin wa peyi Jida. Li gouvènen pandan disetan lavil Jerizalèm, lavil Seyè a te chwazi nan tout peyi
 Izrayèl la pou anplasman kote pou yo fè sèvis pou li a. Manman Woboram te moun lavil Amon.
²²
 Li te rele Nama. Moun peyi Jida yo fè sa ki mal nan je Seyè a. Yo fè pi mal pase zansèt yo. Se
 konsa yo te lakòz kolè Seyè a tonbe sou yo. ²³ Yo menm tou, yo bati kay pou fè sèvis pou zidòl,
²⁴
 yo fè gwo moniman wòch ak estati pou Astate sou tèt mòn anba gwo pyebwa. Sa ki pi rès toujou,
 te gen fanm ak gason nan tout kote sa yo ap fè jennès nan sèvis pou zidòl. Moun peyi Jida yo te
 lage kò yo nan fè tout vye malpwòpte pèp Seyè a te mete deyò nan peyi a pou fè plas pou pèp
²⁵
 Izrayèl la. Woboram te gen senkan depi li te wa lè Chichak, wa peyi Lejip la, atake lavil Jerizalèm.
²⁶
 Li pran tout trezò ki te nan tanp lan ak nan palè wa a, ata gwo plak pwotèj an lò Salomon te fè
²⁷
 fè yo. Wa Woboram fè fè gwo plak pwotèj an kwiv pou mete nan plas yo. Lèfini, li renmèt yo
 nan men chèf gad ki t'ap fè pòs nan pòtay kay wa a. ²⁸ Chak fwa wa a t'ap antre nan Tanp lan, chèf
 gad yo pran gwo plak pwotèj yo pote yo vini. Lè l' ale, yo pote yo tounen nan sal gad la. ²⁹ Tout
³⁰
 lòt bagay wa Woboram te fè yo, n'a jwenn yo ekri nan liv Istwa wa peyi Jida yo. Pandan tout
³¹
 tan sa a se te yon lagè san rete ant Woboram ak Jewoboram. Lè Woboram mouri, yo antere l'
 nan tonm fanmi an nan lavil David la. Manman l' te rele Nama, se te moun lavil Amon. Se Abijam,
 pitit gason Woboram lan, ki moute sou fotèy la nan plas papa l'.

Chapter 15

¹
 ¶ Jewoboram te gen dizwitan depi li te wa peyi Izrayèl la, lè Abijam moute wa nan peyi Jida.
²
 Li gouvènen lavil Jerizalèm pandan twazan. Manman l' te rele Maka, se te pitit fi Absalon. ³ Abijam
 te lage kò l' nan fè menm bagay ak papa l'. Li pa t' sèvi Seyè a, Bondye li a, ak tout kè li jan David,
⁴
 zansèt li a, te fè. Men poutèt David, Seyè a, Bondye li a, te bay Abijam yon pitit gason pou te
 toujou gen yon moun nan ras li ap gouvènen lavil Jerizalèm apre li. Konsa lavil Jerizalèm va toujou
⁵
 rete kanpe. Seyè a te fè sa paske David te toujou fè sa ki dwat devan Seyè a. Pandan tout lavi li,
⁶
 li pa t' janm dezobeyi ankenn lòd Seyè a, si ou wete zafè Ouri, moun peyi Et la. Pandan tout rèy
⁷
 Woboram lan, se te yon lagè san rete ant Woboram ak Jewoboram. Toutan te gen lagè tou ant
 Abijam ak Jewoboram. Tout lòt bagay Abijam te fè yo, n'a jwenn yo ekri nan liv Istwa wa peyi

8 Jida yo. Lè Abijam mouri, yo antere l' nan lavil David la, Se Asa, pitit gason l' lan, ki moute sou
 fotèy la nan plas li. ¶ Wa Jewoboram t'ap mache sou ventan depi li t'ap gouvènen peyi Izrayèl,
 9
 10 lè Asa moute wa nan peyi Jida. Li gouvènen pandan karanteyennan lavil Jerizalèm. Maka, pitit
 11 fi Absalon an, te grann li. Asa te fè sa ki dwat devan Seyè a, tankou David, zansèt li. Li
 12 netwaye peyi a, li mete tout gason ak tout fanm ki t'ap fè jennès nan kay zidòl yo deyò nan peyi a.
 Li wete tout vye zidòl chèf ki te la anvan l' yo te fè. Li menm rive wete Maka, grann li, nan
 13 pozisyon manman larenn yo te ba li nan peyi a, paske Maka te fè yon vye estati pou Astate. Asa
 14 kraze estati a, li fè boule l' nan fon Sedwon an. Malgre li pa t' rive fè disparèt tout kay zidòl yo,
 15 limenm li te toujou sèvi Seyè a ak tout kè li pandan tout lavi li. Li mete nan Tanp lan tou sa papa
 l' te bay pou sèvis Bondye ansanm ak tout bagay an lò ak an ajan limenm li te bay pou Bondye.
 16 Pandan tout tan yo t'ap gouvènen chak moun bò pa yo, se te yon lagè san rete ant Asa, wa peyi
 17 Jida, ak Bacha, wa peyi Izrayèl. wa Bacha anvayi peyi Jida. Li pran lavil Rama, li plen l' sòlda
 18 pa l' pou anpeche moun pase antre soti nan peyi Jida. Lè wa Asa wè sa, li pran tout rès bagay
 an lò ak bagay an ajan ki te rete nan tanp lan ak nan palè a, li renmèt yo nan men kèk moun pa l',
 li voye yo lavil Damas bò kote Bennadad, wa peyi Siri, pitit gason Tabrimon, pitit pitit Ezyon, ak
 19 mesaj sa a: -Annou pase kontra yonn ak lòt tankou zansèt nou yo te fè l' la. Men mwen voye
 bagay an lò ak bagay an ajan sa yo fè ou kado. Koulye a, kase kontra ou pase ak Bacha, wa peyi
 20 Izrayèl la, konsa la blije wete sòlda li yo nan peyi mwen an. wa Bennadad dakò avèk sa wa Asa
 te voye di l' la. Li voye chèf lame li yo al atake lavil peyi Izrayèl yo. Yo pran lavil Iyon, lavil Dann,
 lavil Abèl-bèt Maka, tout zòn ki toupre letan Galile a, ak tout pòsyon tè branch fanmi Neftali a.
 21 Lè Bacha vin konn sa, li wete tout sòlda ki te plen lavil Rama a, l' ale lavil Tizra. Lè sa a, wa
 22 Asa fè rele dènye moun nan peyi Jida a pou wete wòch ak bwa wa Bacha te fè anpile pou ranfòse
 miray ranpa lavil Rama. Wa Asa sèvi ak materyo sa yo pou ranfòse miray ranpa lavil Mispa ak
 23 lavil Geba nan pòsyon tè branch fanmi Benjamen yo. Tout lòt istwa sou sa wa Asa te fè yo, sou
 jan li te yon vanyan gason, sou lavil li te bati yo, n'a jwenn tou sa ekri nan liv Istwa wa peyi Jida
 24 yo. Men, lè l' konmanse granmoun, yon maladi nan pye rann li enfim. Lè Asa mouri, yo antere
 25 l' nan tonm fanmi li nan lavil David la. Se Jozafa, pitit li, ki moute sou fotèy la nan plas li. ¶ Wa
 Asa te gen dezan depi li t'ap gouvènen peyi Jida a lè Nadad, pitit gason Jewoboram, moute wa nan
 26 peyi Izrayèl. Li gouvènen peyi a pandan dezan ase. Li fè sa ki mal nan je Seyè a. Tankou papa
 27 l', li pa t' mache dwat devan Bondye, lèfini li te lakòz pèp la fè sa ki mal tou. Bacha, pitit gason

Akija, nan branch fanmi Isaka a, moute yon konplo pou touye Nadab. Lè sa a, Nadab ak lame
 Izrayèl la t'ap sènen lavil Gibetou nan peyi Filisti. Se la Bacha touye Nadab. ²⁸ Sa rive nan twazyèm
 lanne rèy wa Asa nan peyi Jida. Se konsa Bacha moute wa peyi Izrayèl nan plas Nadab. ²⁹ Rive
 li rive wa, li touye dènye moun nan fanmi Jewoboram lan. Konsa, dapre pawòl Seyè a te mete nan
 bouch pwofèt Akija, moun lavil Silo, sèvitè Bondye a, li touye tout moun nan fanmi Jewoboram
 lan, li pa kite yonn chape. ³⁰ Sa te rive konsa paske Jewoboram te fè sa ki mal, lèfini li te lakòz
 pèp la fè sa ki mal tou. Se konsa li te fè Seyè a, Bondye pèp Izrayèl la, fache sou li. ³¹ Tout lòt
 bagay Nadab te fè yo, n'a jwenn yo ekri nan liv Istwa wa peyi Izrayèl yo. ³² Se te yon lagè san rete
 ant Asa, wa peyi Jida a, ak Bacha, wa peyi Izrayèl la, pandan tout tan yo t'ap gouvènen, chak moun
 bò pa yo. ³³ Wa Asa t'ap mache sou twazan depi li t'ap gouvènen peyi Jida a lè Bacha, pitit gason
 Akija, moute wa nan peyi Izrayèl. ³⁴ Li gouvènen pandan vennkatran nan lavil Tiza. Li te fè sa ki
 mal devan Seyè a. Tankou Jewoboram, li pa t' mache dwat devan Bondye. Li te lakòz pèp la fè sa
 ki mal tou.

Chapter 16

¹ ¶ Seyè a pale ak Jeou, pitit gason Anani. Li ba li mesaj sa a pou Bacha. Li di l' konsa: ² -Bacha
 pa t' anyen menm. Men, mwen mete l' chèf sou pèp mwen an, pèp Izrayèl la. Koulye a menm, li fè
 tankou Jewoboram, lèfini li lakòz pèp la fè sa ki mal tou. Yo fè m' fache ak peche yo fè yo. ³ Se
 konsa mwen pral disparèt Bacha ansanm ak tout fanmi li, tankou m' te fè fanmi Jewoboram lan.
⁴ Chen pral manje kadav moun nan fanmi li ki va mouri nan lavil la. Malfini karanklou va manje
 kadav sa ki va mouri andeyò yo. ⁵ Tout lòt istwa sou sa Bacha te fè yo, sou jan li te yon vanyan
 gason, n'a jwenn yo ekri nan liv Istwa wa peyi Izrayèl yo. ⁶ Lè Bacha mouri, yo antere l' lavil Tiza.
 Se Ela, pitit gason l', ki moute wa nan plas li. ⁷ Seyè a te bay pwofèt Jeou, pitit gason Anani an,
 mesaj sa a pou Bacha ak fanmi li poutèt peche Bacha te fè kont Seyè a. Li te fè Seyè a fache sou
 li non sèlman paske li te fè sa ki mal tankou moun fanmi Jewoboram yo, men tou paske li te touye
 tout moun nan fanmi Jewoboram lan. ⁸ Wa Asa t'ap mache sou vennsizan depi li t'ap gouvènen
 peyi Jida lè Ela, pitit gason Bacha, moute wa peyi Izrayèl la. Li gouvènen pandan dezan lavil Tiza.
⁹ Zimri, yonn nan chèf li yo ki te reskonsab mwatye cha lagè wa a, moute yon konplo kont wa a.
 Yon jou, Ela te lavil Tiza, li t'ap bwè gwòg lakay Atza ki te reskonsab palè wa a. ¹⁰ Zimri antre

nan kay la, li touye wa Ela, li pran plas li sou fotèy la. Tou sa pase nan vennsetyèm lanne rèy Asa,
¹¹ wa peyi Jida a. Moute Zimri moute wa, li touye dènye moun nan fanmi Bacha a. Li touye tout
¹² gason ki te fanmi l' osinon zanmi l'. Se konsa Zimri te touye tout fanmi Bacha a, jan Seyè a te
¹³ mete pawòl la nan bouch pwofèt Jeou a. Paske Bacha ak Ela, pitit li a, te fè Seyè a, Bondye pèp
Izrayèl la, fache ak vye zidòl yo. Yo te peche kont Seyè a, yo te lakòz pèp la fè sa ki mal tou.
¹⁴ Tout lòt bagay Ela te fè yo, n'a jwenn yo ekri nan liv Istwa wa peyi Izrayèl la. ¶ ¹⁵ Wa Asa t'ap
mache sou vennsetan depi li t'ap gouvènen peyi Jida a, lè Zimri pran pouvwa a pou sèt grenn jou
lavil Tiza nan peyi Izrayèl. Lè sa a, lame pèp Izrayèl la t'ap sènen lavil Gibeton nan peyi Filisti.
¹⁶ Lè sòlda yo pran nouvèl Zimri te fè konplo sou wa a, li te menm touye l', lapoula yo nonmen
Omri, kòmandan lame a, wa peyi Izrayèl. ¹⁷ Omri kite lavil Gibeton ansanm ak tout lame a, li
¹⁸ moute, l' al sènen lavil Tiza. Lò Zimri wè lavil la tapral tonbe nan men Omri, li antre nan ti fò
¹⁹ ki sou tèt palè wa a, li mete dife nan palè a, epi li mouri nan dife a. Sa te pase konsa paske Zimri
te fè sa ki mal nan je Seyè a. Tankou Jewoboram, li pa t' fè sa ki dwat devan Seyè a, li te lakòz pèp
²⁰ Izrayèl la fè peche tou. Tout lòt bagay Zimri te fè ak istwa konplo li te moute a, n'a jwenn sa
²¹ ekri nan liv Istwa wa peyi Izrayèl yo. Lè sa a, moun peyi Izrayèl yo te fè de kan: Mwatye ladan
²² yo te vle fè Tibni, pitit gason Genat la, wa. Mwatye te pou Omri. Patizan Omri yo kraze patizan
²³ Tibni, pitit gason Genat la. Tibni mouri, Omri moute wa. Se konsa nan tranteyenyèm lanne rèy
Asa, wa peyi Jida, Omri moute wa peyi Izrayèl. Li gouvènen peyi a pandan douzan. Pandan sizan,
²⁴ li gouvènen nan lavil Tiza. Apre sa, li achte mòn Samari a pou simil (6.000) pyès ajan nan men
yon nonm yo te rele Chemè. Omri bati yon lavil sou tèt mòn lan, li rele l' Samari, dapre non Chemè,
²⁵ ansyen mèt tè a. Omri fè sa ki mal nan je Seyè a. Li fè pi mal pase moun ki te chèf anvan l' yo.
²⁶ Li mache pye pou pye dèyè Jewoboram, pitit Nebat la: li fè sa ki mal, li lakòz pèp la fè sa ki mal
²⁷ tou. Se konsa yo te fè Seyè a, Bondye pèp Izrayèl la, fache ak vye zidòl yo. Tout lòt istwa sou
sa Omri te fè yo, sou jan li te yon vanyan gason, n'a jwenn sa ekri nan liv Istwa wa peyi Izrayèl yo.
²⁸ Lè Omri mouri, yo antere l' lavil Samari. Se Akab, pitit gason l' lan, ki moute wa nan plas li.
²⁹ ¶ Wa Asa te gen trantwitan depi li t'ap gouvènen peyi Jida a lè Akab, pitit Omri a, moute wa
³⁰ peyi Izrayèl. Pandan venndezan li gouvènen peyi Izrayèl nan lavil Samari. Li fè sa ki mal nan
³¹ je Seyè a. Li fè pi mal pase tout moun ki te chèf anvan l' yo. Non sèlman li te fè tankou
Jewoboram, pitit Nebat la, men l' ale pi lwen toujou. Li marye ak Jezabèl, pitit fi Elbaal, wa peyi

Sidon. Li pran sèvi Baal, l' al met ajenou devan li. ³² Nan mitan lavil Samari, li bati yon tanp pou Baal, li mete yon lotèl ladan l'. ³³ Li fè yon estati pou Astate tou. Li fè pi mal pase tout lòt wa peyi Izrayèl ki te pase anvan l' yo pou fè Seyè a, Bondye pèp Izrayèl la, fache. ³⁴ Se pandan rèy Akab la, yon nonm yo rele Iyèl, moun lavil Betèl, rebati lavil Jeriko. Men, pawòl Seyè a te di Jozye, pitit Noun lan, rive vre. Abiram, premye pitit Iyèl la, mouri lè yo t'ap foye fondasyon lavil la, lèfini Segoub, dezyèm pitit gason Iyèl la, mouri lè yo t'ap moute pòtay lavil la.

Chapter 17

¹ ¶ Yon pwofèt yo te rele Eli, moun lavil Tichbe nan zòn Galarad, di wa Akab konsa: -Nan non Seyè m'ap sèvi a, Bondye vivan pèp Izrayèl la, men sa m'ap di ou: Pandan lanne k'ap vini yo, p'ap gen lawouze, p'ap gen lapli si se pa mwen ki mande sa. ² Apre sa, Seyè a pale ak Eli, li di l' konsa: ³ -Kite kote ou ye a, ale nan direksyon solèy leve. Al kache toupre ravin Kerit la ki sou bò solèy leve larivyè Jouden. ⁴ W'a jwenn dlo nan ravin lan pou ou bwè. Mwen bay kaou yo lòd pou yo pote manje ba ou. ⁵ Eli fè sa Seyè a te di l' fè a. Li pati, l' al rete toupre ravin Kerit la. ⁶ Kaou yo pote pen ak vyann pou li chak maten, chak aswè. Li te jwenn dlo pou l' bwè nan ravin lan. ⁷ Kèk tan apre sa, ravin lan vin chèch, paske lapli pa t' tonbe nan peyi a. ⁸ ¶ Lè sa a, Seyè a pale ak Eli, li di l' konsa: ⁹ -Leve non! Ale lavil Sarepta, nan peyi wa Sidon an. Se la ou pral rete koulye a. Mwen bay yon fanm vèv ki rete laba a lòd pou li ba ou manje. ¹⁰ Se konsa Eli leve vre, li pati pou lavil Sarepta. Lè li rive bò pòtay lavil la, li wè yon fanm vèv ki t'ap ranmase bwa. Li rele l', li di l' konsa: -Tanpri, pote ti gout dlo nan yon veso pou m' bwè. ¹¹ Madanm lan fè sa pou l' al chache dlo a, Eli rele l' ankò, li di l' konsa: -Tanpri, pote yon moso pen pou mwen tou. ¹² Madanm lan reponn li: -Mwen pran Seyè a, Bondye ou la ki vivan an, pou temwen, mwen pa gen pen tou kwit lakay mwen. Tou sa m' genyen se yon ponyen farin Frans nan yon ti bòl ak tigout lwil nan yon boutèy. Mwen vin ranmase de ti bwa la a pou m' al pare ti sa ki rete m' lan pou mwen ak pitit gason m' lan. ¹³ Lè n'a fin manje l', nou pral rete konsa jouk grangou touye nou. Eli di li: -Pa bat kò ou! Ale pare ti manje ou la! Sèlman fè yon ti pen pou mwen anvan, epi pote l' vini. Apre sa, w'a fè yon pou ou ak pitit gason ou lan. ¹⁴ Paske men pawòl Seyè a, Bondye pèp Izrayèl la, di: Ti bòl farin Frans lan ak ti boutèy lwil oliv la p'ap janm vid jouk jou mwen menm Seyè a m'a fè lapli tonbe sou

15
latè ankò. Madanm lan ale, li fè sa Eli te di l' fè a. Se konsa pandan lontan, ni madanm lan, ni
pitit gason l' lan, ni Eli, yo tout jwenn manje pou yo manje. 16 Te toujou gen farin frans nan ti bòl
la ak lwil oliv nan ti boutèy la, jan Seyè a te mete pawòl la nan bouch pwofèt Eli. 17 ¶ Kèk tan apre
sa, pitit gason metrès kay la tonbe malad. Maladi a vini pi mal sou li jouk li mouri. 18 Madanm lan
di Eli konsa: -Sèvitè Bondye, poukisa ou fè m' sa? Ou vin lakay mwen pou fè Bondye chonje peche
m' yo, pou fè pitit gason m' lan mouri. 19 Eli reponn: -Ban m' pitit la. Li pran ti gason an nan men
manman l', li moute avè l' nan pyès chanm anwo kay la kote li te rete a, li mete l' kouche sou kabann
li. 20 Apre sa, li lapriyè, li di: -Seyè, Bondye mwen, poukisa pou ou fè vèv sa a tout lapenn sa a?
Li resevwa m' lakay li, men w'ap pran pitit li. 21 Eli kouche twa fwa sou pitit la, li lapriyè. Li di:
-Seyè, Bondye mwen, tanpri, bay pitit la lavi ankò. 22 Seyè a koute lapriyè Eli a, li bay pitit la lavi
ankò. Ti gason an rekonmanse pran souf. 23 Eli pran ti bway la, li desann anba avè l', li renmèt li
bay manman l', li di l': -Gade! Ti gason ou lan vivan! 24 Madanm lan reponn: -Koulye a mwen wè
se yon sèvite Bondye ou ye vre. Pawòl nan bouch ou se pawòl Bondye vre.

Chapter 18

1 ¶ Apre sa, kèk tan pase. Chechrès la t'ap mache sou twazan depi li t'ap bat peyi a. Lè sa a,
Seyè a pale ak Eli, li di l' konsa: -Al parèt devan wa Akab. Mwen pral fè lapli tonbe. 2 Eli pati pou
l' al devan wa Akab. Grangou a te rèd anpil pou moun lavil Samari yo. 3 Akab te fè rele Abdyas
ki te reskonsab palè a. Abdyas sa a te sèvi Seyè a ak tout kè li. 4 Lè larenn Jezabèl t'ap fè touye
pwofèt Seyè yo, li menm Abdyas te sove san (100) ladan yo. Li te kache yo nan de gwòt, li te mete
5 senkant nan chak gwòt. Lèfini, li ba yo manje, li ba yo bwè. Akab te di Abdyas: -Nou pral mache
nan tout peyi a, nou pral gade bò tout sous dlo, nan tout ravin kote nou ka jwenn zèb pou bay chwal
6 yo ak milèt yo. Konsa nou p'ap bezwen touye ladan yo. Yo separe peyi a fè de zòn, yo chak pran
yon zòn pou yo mache al chache zèb. Se konsa Akab pran yon chemen, Abdyas pran yon lòt chemen.
7 Antan Abdyas ap mache konsa, li tonbe bab pou bab ak Eli. Li rekonèt li, li bese tèt li jouk atè
devan li. Li mande l': -Se ou menm vre, Eli, mèt mwen? 8 Eli reponn: -Wi, se mwen! Ale di wa a,
mèt ou a, men m' isit la! 9 Abdyas reponn: -Kisa m' fè ki mal pou ou voye m' al chache lanmò nan

10
men wa Akab? Mwen pran Seyè ki vivan an, Bondye ou la, pou temwen, pa gen peyi sou latè kote wa a pa fè chache ou. Chak fwa nan yon peyi yo di l' ou pa lakay yo, wa Akab te fòse chèf la

11
ak tout pèp la fè sèman yo pa t' jwenn ou. Epi, koulye a ou vle pou m' al di li men ou isit la?

12
Bon, vire m' vire do m' ale la a, si lespri Seyè a pran ou, li pote ou yon kote m' pa konnen, lè m'a di wa Akab ou isit la, lè l'a vini li pa wè ou, l'ap touye m'. Chonje mwen menm m'ap sèvi Seyè a

13
ak krentif depi mwen piti. Mèt, yo pa janm rakonte ou sa m' te fè lè Jezabèl t'ap touye pwofèt Seyè yo? Mwen kache san (100) pwofèt nan de gwòt, senkant nan chak gwòt, mwen ba yo manje,

14
mwen ba yo bwè. Men koulye a ou vle pou m' al di wa a men ou isit la! L'ap touye m'! Eli
15
reponn li: -Mwen pran Seyè m'ap sèvi a, Bondye ki gen tout pouvwa a, pou temwen. Jòdi a m'ap

16
parèt devan Akab! Se konsa Abdyas pati, li jwenn Akab, li fè l' rapò. Akab vin kontre Eli. ¶

17
18
Wè Akab wè Eli, li di l': -Apa ou sa! Se ou menm k'ap rale malè sou pèp Izrayèl la konsa! Eli
reponn li: -Se pa mwen ki rale malè sou pèp Izrayèl la. Se ou menm ak tout fanmi papa ou yo ki

19
lakòz, paske nou dezobeyi lòd Seyè a te bay, n' al adore zidòl Baal yo. Koulye a, bay lòd pou
tout moun pèp Izrayèl yo vin sanble bò kote m' sou mòn Kamèl la. Gen katsansenkant (450) pwofèt
Baal ak katsan (400) pwofèt zidòl fanm yo rele Astate a Jezabèl ap pran swen. Fè yo vini tou.

20
21
Akab voye chache tout pèp Izrayèl la. Li fè sanble tout pwofèt Baal yo sou mòn Kamèl la. ¶
Eli al kanpe devan pèp la, li di yo: -Kilè n'a sispann woule de bò! Si se Seyè a ki Bondye, se li pou

22
n' sèvi. Si se Baal ki Bondye, se li pou n' sèvi! Men pèp la pa di yon mo. Eli di yo: -Nan tout

23
pwofèt Seyè a, se mwen menm ase ki rete. Men gen katsansenkant (450) pwofèt Baal. Mennen
de jenn towò ban nou. Pwofèt Baal yo va chwazi yonn, y'a touye l', y'a koupe l' an moso, y'a mete
l' sou yon pil bwa, men piga yo limen dife. Mwen menm m'a fè menm jan an tou ak lòt towò a. m'a

24
mete l' sou yon pil bwa, mwen p'ap limen dife. y'a rele bondye yo a. Mwen menm, m'a rele Seyè

25
a. Sa ki va voye dife pou reponn lan se li ki Bondye. Tout pèp la reponn: -Nou dakò! Lè sa a,
Eli di pwofèt Baal yo: -Nou anpil, mwen ban nou devan. Chwazi yon towò. Pare li. Lèfini, rele

26
bondye nou an. Men, pa mete dife nan bwa a. Pwofèt Baal yo pran towò yo ba yo a, yo pare l'.
Lèfini, yo pran rele Baal depi nan maten rive vè midi. Yo t'ap di: -Baal o! Reponn nou non! Yo

27
t'ap danse fè wonn lotèl yo te moute a. Pa yon vwa, pa yon repons. Vè midi, Eli tanmen pase
yo nan betiz. Li di yo: -Rele pi fò non! Se bondye li ye. Li dwe okipe anpil. Li ka ap kalkile, osinon

28
li nan vwayaj. Li ka ap dòmi tou. Se pou nou leve l'. Pwofèt yo pran rele pi fò. Yo pran nepe ak

29
kouto, yo make tout kò yo jan yo te konn fè l' la. San t'ap koule sou yo konsa. Lè midi fin pase,
yo pran rele Baal pi rèd toujou jouk lè pou yo fè ofrann apremidi a rive. Men, ankenn vwa pa

reponn! Anyen pa pati. ³⁰ Lè sa a, Eli mande pèp la pou yo pwoche bò kote l'. Lè yo pwoche vin
 jwenn li, li rebati lotèl Seyè a paske yo te kraze l'. ³¹ Li pran douz wòch, yonn pou chak branch
 fanmi pitit Jakòb yo. Se Seyè a ki te bay Jakòb non Izrayèl li pote a. ³² Li pran wòch yo, li rebati
 lotèl Seyè a. Li fouye yon kannal fè wonn lotèl la. Kannal la te ka pran kat galon dlo. ³³ Li ranje
 bwa yo sou lotèl la, li dekoupe towò a, li mete moso vyann yo sou bwa yo. Lèfini li di: -Plen kat
 krich dlo vide yo sou ofrann lan ak sou bwa yo. Apre yo fè sa, ³⁴ li di yo: -Fè l' yon dezyèm fwa.
 Apre yo fè l', li di yo ankò: -Fè l' yon twazyèm fwa. Yo fè l' ankò. ³⁵ Dlo a koule tout atè bò lotèl
 la, li plen kannal la. ³⁶ Lè lè pou yo fè ofrann apremidi a rive, pwofèt Eli pwoche bò lotèl la, li di:
 -Seyè, Bondye Abraram, Bondye Izarak ak Bondye Jakòb, fè yo wè jòdi a se ou menm ki Bondye
 pèp Izrayèl la. Fè yo rekonèt se sèvitè ou mwen ye. Se ou menm ki ban m' lòd fè tout bagay sa yo.
³⁷ Reponn mwen, Seyè! Reponn mwen pou pèp sa a ka konnen se ou menm Seyè a ki Bondye, pou
 yo rekonèt se ou menm k'ap fè yo tounen vin jwenn ou. ³⁸ Seyè a voye dife soti nan syèl la, li boule
 ofrann lan, bwa yo, wòch yo ak anplasman kote lotèl la te ye a, li fè tout dlo ki te nan kannal la
 cheche. ³⁹ Lè pèp la wè sa, yo tonbe fas atè, yo pran rele: -Se Seyè a ki Bondye! Se Seyè a ki
 Bondye! ⁴⁰ Lè sa a, Eli di yo: -Mete men sou pwofèt Baal yo! Pa kite yonn chape. Pèp la mete
 men sou tout pwofèt yo. Eli mennen yo desann nan ravin Kison an, li touye yo. ⁴¹ ¶ Apre sa Eli
 di wa Akab konsa: -Koulye a, ou mèt al manje, ou mèt al bwè. Mwen tandè bri lapli a k'ap vini.
⁴² Akab al manje, l' al bwè. Eli menm moute sou tèt mòn Kamèl. Li mete ajenou, li bese tèt li jouk
 atè. ⁴³ Li di domestik li a: -Al gade bò lanmè a. Domestik la ale, li gade. Li tounen, li di: -M' pa
 wè anyen! Pandan sèt fwa Eli di li al gade. ⁴⁴ Sou setyèm fwa a, domestik la di l': -Mwen wè yon
 ti nwaj k'ap moute sot lòt bò lanmè a. Li gwosè yon pla men. Lè sa a Eli bay domestik li a lòd sa
 a: -Al jwenn wa Akab, w'a di l': Moute sou cha ou, al lakay ou anvan lapli a bare ou. ⁴⁵ Yon sèl lè
 a, syèl la gen tan kouvri ak nwaj nwa. Van an tanmen soufle, yon gwo lapli pran tonbe. Akab moute
 sou cha li, li pati pou Jizreyèl. ⁴⁶ Pouvwa Seyè a vin sou Eli. Eli mare rad li nan ren, li pran kouri
 devan Akab jouk yo rive lavil Jizreyèl.

Chapter 19

¹ ¶ Wa Akab rakonte Jezabèl, madanm li, tou sa Eli te fè, ki jan li te touye tout pwofèt Baal yo.
² Jezabèl voye yon misyon bay Eli. Li voye di l': -Se ou, se mwen! Se pou bondye yo ban m' pi gwo
pinisyon ki genyen si denmen lè konsa mwen pa fè ou tou sa ou te fè pwofèt yo. ³ Eli vin pè. Li
kouri met deyò pou l' sove lavi li. Li pran domestik li avè l', l' ale lavil Bècheba nan peyi Jida. Li
⁴ kite domestik li a la. Eli menm mache tout yon jounen nan dezè a. Lè li rete, l' al chita anba
lonbray yon ti pye bayawonn. Li mande lanmò, li di: -M' pa kapab ankò, Seyè! Pito m' mouri kont
⁵ fini. M' pa pi bon pase zansèt mwen yo. Li lage kò l' anba pye bayawonn lan. Dòmi pran l'. Antan
⁶ l' nan dòmi an, yon zanj vin souke l', li di l' konsa: -Leve ou manje! Eli voye je l' gade bò kote l',
li wè yon ti pen plat tankou sa yo kwit sou chabon dife ak yon krich dlo bò tèt li. Li manje, li bwè.
⁷ Lèfini, li kouche, li dòmi ankò. Zanj Seyè a tounen yon dezyèm fwa, li souke Eli, li leve l', li di
⁸ l': -Leve ou manje, paske vwayaj la pral long anpil pou ou. Eli leve, li manje, li bwè. Manje a ba
li kont fòs kouraj pou li mache pandan karant jou, karant nwit jouk li rive sou mòn Orèb, mòn
⁹ Bondye a. ¶ Lè li rive, li antre nan yon gwòt, li pase nwit lan la. Seyè a pale ak Eli ankò, li di li:
¹⁰ -Eli, sa w'ap fè la a? Eli reponn: -Seyè, Bondye ki gen tout pouvwa, mwen renmen ou anpil,
mwen pa ka wè sa pèp Izrayèl la ap fè ou la. Li pa kenbe kontra li te pase avè ou la, li kraze lotèl
¹¹ ou yo, li touye tout pwofèt ou yo. Se mwen menm sèl ki rete. Men y'ap chache touye m'. Seyè
a di li: -Soti, vin kanpe devan Seyè a sou tèt mòn lan. M' pral pase! Seyè a vin ap pase. Yon gwo
van vin leve, li pran vante byen fò, li fann mòn yo, li pete wòch yo devan Seyè a. Men Seyè a pa
¹² t' nan van an. Lè van an kase, tè a pran tranble, men Seyè a pa t' nan tranbleman tè a. Lè tè a
sispann tranble, te gen yon dife, men Seyè a pa t' nan dife a. Apre dife a, yon ti bri tou piti fèt, yon
¹³ ti briz tou fèb vin ap soufle. Lè Eli tande l', li kouvri tèt li ak gwo rad li, li soti, li kanpe devan
¹⁴ gwòt la. Li tande yon vwa ki di l': -Eli, sa w'ap fè isit la? Eli reponn: -Seyè, Bondye ki gen tout
pouvwa a, mwen renmen ou anpil, mwen pa ka wè sa pèp Izrayèl la ap fè ou la. Li pa kenbe kontra
li te pase avè ou la. Li kraze lotèl ou yo. Li touye tout pwofèt ou yo. Se mwen menm sèl ki rete.
¹⁵ Men y'ap chache touye m'. Seyè a di li: -Ale non! Pran menm wout ou te pase nan dezè a pou
vini isit la, tounen lavil Damas. W'a antre lavil Damas, w'a pran Azayèl, w'a mete l' wa peyi Siri
¹⁶ nan non mwen. Apre sa, w'a ale lakay Jeou, pitit gason Nimchi a, w'a mete l' wa peyi Izrayèl
nan non mwen. Lèfini, w'a pran Elize, pitit gason Chafat, moun lavil Abèl Meola a, w'a mete l' apa
¹⁷ nan non mwen pou l' sèvi pwofèt nan plas ou. Tout moun ki va chape anba men Azayèl va tonbe
¹⁸ anba men Jeou. Tout moun ki va chape anba men Jeou va tonbe anba men Elize. Men m'ap kite

sètmi (7.000) moun vivan nan peyi Izrayèl la. Se moun ki pa t' mete ajenou devan Baal pou sèvi

19
li, ni ki pa t' bo estati li yo. ¶ Eli pati. Li jwenn Elize, pitit gason Chafat la, ki t'ap raboure yon jaden avèk douz pè bèf. Elize t'ap raboure dènye pòsyon tè a ak douzyèm pè bèf la lè Eli pwoche

20
bò kote l'. Eli wete gwo rad ki te sou li a, li voye l' sou Elize. Menm lè a, Elize kite bèf li yo, li kouri dèyè Eli. Li di l' konsa: -Kite m' al di manman m' ak papa m' orevwa anvan. Apre sa m'a swiv ou. Eli reponn li: -Ou mèt tounen tounen ou. M' pa rete ou, mwen menm! Kisa m' fè ou la a?

21
Elize kite Eli, li tounen tounen l', li pran yon pè bèf, li touye yo. Li pran bwa jouk yo, li limen dife, li kwit vyann lan. Li bay moun ki te avè l' yo pou yo manje. Lèfini, li pati al jwenn Eli, li rete avè l'.

Chapter 20

1
¶ Bennadad, wa peyi Siri a, reyini tout lame li a. Trannde lòt wa, avèk tout chwal yo ak cha lagè yo, vin mete tèt ansanm avè l'. Bennadad mache sou lavil Samari. Li sènen l', li atake l'. 2 Li

voye mesaje anndan lavil la bò kote Akab, wa peyi Izrayèl la, 3 pou di li: -Wa Bennadad voye di ou tout bagay ou gen an lò ak an ajan se pou li yo ye. Tout madanm ou yo ak tout pi bon pitit gason

4
ou yo se pou li yo ye tou. Wa Akab reponn: -Di wa Bennadad, mèt mwen, se jan li vle! Li mèt

5
pran m' ansanm ak tou sa m' genyen. Mesaje yo tounen ankò vin di Akab: -Men sa Bennadab voye di ou: M' te voye mande ou pou ou ban mwen tou sa ou gen an lò ak an ajan, tout madanm

6
ak tout pitit gason ou yo. Koulye a, denmen vè lè konsa, m'ap voye moun pa m' yo pou yo fouye

7
palè ou la ak kay tout moun pa ou yo, pou yo pran tou sa y'a jwenn ki gen valè nan je yo. Wa Akab fè rele tout chèf fanmi ki nan peyi a, li di yo konsa: -Jan nou wè l' la, nonm sa a soti pou l' pran tou sa nou genyen. Li te voye mande m' madanm mwen yo, pitit gason m' yo ak tout bagay

8
an lò ak an ajan mwen genyen. Mwen pa refize l' anyen. Chèf fanmi yo ansanm ak pèp la di l'

9
konsa: -Pa koute l', pa dakò avè l'! Lè sa a, Akab di mesaje Bennadab yo: -Ale di mèt mwen, wa Bennadab, m' te dakò ak sa li te mande m' premye fwa a. Men, sa l' mande fwa sa a, m' pa ka fè l'.

10
Mesaje yo pati, y' al pote repons lan bay Bennadad. Bennadab voye yo tounen al di Akab: -M'ap vini ak anpil moun pou m' kraze lavil Samari. p'ap gen ase demoli pou m' bay chak moun ki avè m' yo ti kras pou yo pote ale sitèlman y'ap anpil. Si m' pa fè sa, se pou bondye yo ban m' pi gwo

11
pinisyon ki genyen Wa Akab voye reponn li: -Yon sòlda pa fèt pou l' ap vante tèt li anvan l' al

12
goumen. ¶ Bennadad t'ap bwè ak lòt wa yo anba tant yo lè yo pote repons Akab la ba li. Lamenn,

li bay moun pa l' yo lòd pou yo mache sou lavil Samari. Se konsa, y' al pare pou atake. ¹³ Lè sa a, yon pwofèt Bondye vin jwenn Akab, li di l' konsa: -Men sa Seyè a voye di ou: Ou wè tout kantite sòlda sa yo? Enben, mwen pral lage yo nan men ou jòdi a, konsa w'a konnen se mwen menm ki

¹⁴ Seyè a. Akab mande l': -Ki moun ou pral fè lage yo nan men m' jòdi a? Pwofèt la reponn li: -Seyè a voye di ou se jenn sòlda ki sou lòd gouvènè pwovens yo ki pral fè l'. Wa mande ankò: -Ki

¹⁵ moun ki pral atake anvan? Pwofèt la reponn: -Ou menm. Lamenn, wa a fè rele jenn sòlda ki te sou lòd gouvènè pwovens yo. Li jwenn desantrannde (232) sòlda antou. Apre sa, li fè rele tout lame

¹⁶ pèp Izrayèl la, li jwenn sèt mil (7.000) gason. Vè midi, yo soti al atake pandan Bennadad ansanm

¹⁷ ak trannde lòt wa ki t'ap mache avè l' yo t'ap bwè anba tant yo. Se jenn sòlda yo ki t'ap mache devan. Bennadad te voye al wè jan sa ye bò kay moun pèp Izrayèl yo. Yo vin di li yo wè yon gwoup

¹⁸ sòlda ki t'ap soti lavil Samari. Lè sa a, li di: -M' pa bezwen konnen si y'ap vin pou goumen

¹⁹ osinon pou mande lapè, kenbe yo vivan mennen ban mwen. Jenn sòlda gouvènè yo soti nan

²⁰ lavil la pou al atake. Yo t'ap mache devan, rès lame a t'ap swiv yo. Yo chak yo touye moun ki te vin pou goumen ak yo a. Moun peyi Siri yo pran kouri, moun Izrayèl yo menm t'ap kouri dèyè

²¹ yo. Bennadad menm resi chape kò l' sou chwal ansanm ak kèk lòt kavalye. Wa Akab vin atake

²² lè sa a, li touye chwal moun Siri yo, li kraze cha lagè yo. Li bat moun Siri yo byen bat. ¶ Apre sa, pwofèt la al jwenn wa Akab, li di l' konsa: -Ou mèt tounen koulye a, mete lame ou la anfòm. Kalkile byen sou sa ou pral fè, paske nan ennan, dat pou dat, wa peyi Siri a ap tounen vin atake ou

²³ ankò. Chèf ki te avèk wa Bennadad yo vin di l': -Bondye pèp Izrayèl yo se bondye mòn yo ye. Se poutèt sa yo bat nou jan yo bat nou an. Men, si nou goumen ak yo nan tè plat, wè pa wè, n'ap

²⁴ bat yo. Koulye a, men sa ou pral fè. Wete kòmandman an nan men lòt wa yo, mete chèf pa ou

²⁵ nan plas yo. Ou menm ou pral moute yon gwo lame tankou lame ou pèdi a, ak menm kantite chwal ak cha lagè ou te gen anvan an. Nou pral goumen ak moun pèp Izrayèl yo nan plenn. W'ap

²⁶ wè fwa sa a n'ap bat yo. Wa Bennadad dakò, li fè sa chèf yo te di l' fè a. Ennan apre, dat pou dat, li reyini tout sòlda moun peyi Siri yo, li mennen yo jouk lavil Afèk pou y' al atake moun peyi

²⁷ Izrayèl yo. Akab reyini tout lame pèp Izrayèl la, li ba yo zam ak pwovizyon. Yo soti al kontre moun Siri yo. Yo separe fè de gwoup, yo moute kan yo devan lame moun Siri yo. Sòlda peyi Izrayèl

²⁸ yo te sanble ak de ti bann kabrit devan lame moun Siri a menm ki te kouvri tout peyi a. Yon pwofèt Bondye vin jwenn Akab, wa Izrayèl la, li di l' konsa: -Men mesaj Seyè a voye ba ou: Paske moun Siri yo di se yon bondye mòn mwen ye, mwen pa konn tè plat, mwen pral lage tout gwo lame

²⁹ sa a nan men ou. Konsa w'a konnen se mwen menm ki Seyè a. Pandan sèt jou, moun Siri yo ak

moun Izrayèl yo rete nan kan yo, yonn anfas lòt. Sou setyèm jou a yo konmanse goumen. Moun
 30

Izrayèl yo touye sanmil (100.000) moun Siri. Sa ki chape yo kouri ale lavil Afèk. Lè yo rive la,
 miray lavil la tonbe sou yo, li touye vennsètmi (27.000) sòlda ki te rete yo. Bennadad tou te chape

31
 kò l' nan lagè a. Li antre nan yon kay, l' al kache nan yon pyès jouk nan fon. ¶ Moun pa l' yo
 vin jwenn li, yo di l' konsa: -Nou tande jan wa peyi Izrayèl yo se moun ki gen bon kè. Ban nou
 otorizasyon pou n' al jwenn wa peyi Izrayèl la. N'ap mete rad sak sou nou tankou moun yo fè

32
 prizonye. Ou pa janm konnen li ka sove lavi ou. Se konsa yo mete rad sak sou yo tankou moun
 ki nan lapenn, yo plòtonnen moso kòd nan kou yo, y' al jwenn Akab, yo di l' konsa: -Bennadad
 voye di ou, monwa, se esklav ou li ye. Tanpri, pa touye l'. Akab reponn: -An! Msyè vivan toujou.

33
 Mwen byen kontan! Se yon frè li ye pou mwen wi! Moun Bennadad yo pran sa pou yon bon
 siy, yo repete pawòl ki te fèk sot nan bouch wa a, yo di l' konsa: -Bennadad, se frè monwa! Akab
 reponn: -Al chache l' mennen ban mwen! Bennadad soti kote l' te ye a, li parèt devan Akab, Akab

34
 fè l' moute sou cha pa l' ansanm avè l'. Bennadad di li: -M'ap renmèt ou tout lavil papa m' te
 pran nan men papa ou yo. Ou mèt louvri boutik nan lavil Damas pou vann, menm jan papa m' te
 fè l' lavil Samari. Akab reponn li: -Si se konsa, w'ap pase yon kontra avè m', mwen menm m'ap

35
 kite ou al fè wout ou. Akab pase yon kontra avèk Bennadad, lèfini li kite l' al fè wout li. Nan
 menm epòk sa a, Seyè a pale ak yon pwofèt nan gwoup pwofèt li yo. Li ba li lòd pou li mande yon

36
 lòt pwofèt ba l' kou. Men lòt pwofèt la derefize. Lè sa a, premye pwofèt la di l' konsa: -Poutèt
 ou derefize obeyi lòd Seyè a, separe n'a separe, yon lyon ap touye ou. Konsa vre, ale premye pwofèt

37
 la ale, yon lyon vin rive, li touye lòt pwofèt la. Apre sa, premye pwofèt la kontre yon lòt moun,

38
 li mande l' pou li ba l' kou. Nonm lan frape l' byen fò, jouk li mete san l' deyò. Lèfini, pwofèt la
 kouvri figi l' ak yon moso twal pou moun pa rekonèt li, l' al kanpe bò wout la ap tann wa a pase.

39
 Lè wa a vin ap pase, pwofèt la pran pale byen fò, li di konsa: -Monwa, mwen te nan mitan batay
 la, mwen t'ap goumen lè yon sòlda mennen yon lènmi li te fè prizonye. Li di m' konsa: Veye msye
 pou mwen. Si ou kite l' chape anba men ou, m'ap touye ou osinon w'ap peye twamil (3.000) pyès

40
 an ajan pou li. Men, monwa, pandan m' okipe ap fè lòt bagay, prizonye a sove. Wa Izrayèl la di
 l' konsa: -Se ou menm ki kondannen tèt ou, lèfini ou tou di sa ou gen pou peye pou sa ou fè a!

41
 Pwofèt la prese wete moso twal ki te bouche figi l' la. Lamenn wa a rekonèt se yonn nan pwofèt

42
 yo. Pwofèt la di wa a: -Men mesaj Seyè a voye di ou: Poutèt ou kite moun mwen te bay lòd pou
 yo touye a chape, se ou menm ki pral peye pou li. Ou pral mouri. Se lame ou ki pral peye pou lame

43
 pa l'. Yo pral mouri. Se konsa, wa peyi Izrayèl la tounen lakay li lavil Samari, li te boulvèse,
 men li byen mare.

Chapter 21

¹ ¶ Apre tout bagay sa yo, men sa ki rive: Nan lavil Jizreyèl, toupre palè wa Akab la, te gen yon jaden rezen ki te pou yon nonm yo te rele Nabòt. ² Yon jou, wa Akab di Nabòt konsa: -Ban m' jaden rezen ou lan pou m' ka fè yon jaden legim. Li toupre kay mwen. m'a ba ou yon lòt jaden rezen ki pi bon pase sa a. Osinon si ou pito, m'a ba ou yon bon pri pou li. ³ Men, Nabòt reponn Akab: -Se tè eritaj li ye. Dapre lalwa Seyè a, mwen pa gen dwa vann ou li. ⁴ Akab al lakay li men li byen mare. Li te fache poutèt Nabòt te di l' li p'ap vann byen eritaj li a. Li moute kabann, li kouche, li bay figi l' nan panno, li derefize manje. ⁵ ¶ Jezabèl, madanm li, vin bò kote l'. Li mande l': -Sa ou genyen ou move konsa? Poukisa ou pa manje? ⁶ Akab reponn, li di li: -M' pale ak Nabòt, nonm Jizreyèl la. Mwen mande l' pou l' vann mwen jaden rezen l' lan, osinon si li pito, m'a ba li yon lòt pou li. Men, li di m' li p'ap ban mwen jaden l' lan. ⁷ Jezabèl di li: -Kouman! Se pa ou ki wa nan peyi Izrayèl la ankò? Leve non, monchè! Manje manje ou, fè kè ou kontan. Mwen pral ba ou jaden rezen Nabòt la. ⁸ Jezabèl ekri kèk lèt, li siyen non Akab anba yo, li sele yo ak so wa a, epi li voye yo bay chèf fanmi ak otorite ki rete lavil Jizreyèl menm kote ak Nabòt. ⁹ Men sa li voye di yo nan lèt yo: Sanble tout moun pou yon sèvis jèn. Mande Nabòt pou li dirije sèvis la. ¹⁰ Lèfini, jwenn de vakabon, fè yo vin kanpe devan l' pou yo akize l'. y'a di li derespekte Seyè a ansanm ak wa a. Lè sa a, n'a pran Nabòt, n'a trennen l' andeyò limit lavil la, n'a kalonnen l' wòch jouk li mouri. ¹¹ Chèf fanmi yo ak otorite lavil Jizreyèl yo fè tou sa Jezabèl ba yo lòd fè nan lèt yo. ¹² Yo fè ¹³ konnen yo pral fè sèvis jèn. Yo fè tout pèp la sanble, yo mete Nabòt devan pou dirije sèvis la. De vakabon vin rive, yo kanpe devan Nabòt, yo akize msye devan tout pèp la. Yo di li derespekte Bondye ansanm ak wa a. Lamenm, yo pran Nabòt, yo mennen l' andeyò limit lavil la, yo kalonnen li wòch jouk li mouri. ¹⁴ Apre sa, yo voye di Jezabèl: -Nou kalonnen Nabòt wòch, li mouri. ¹⁵ Resevwa Jezabèl resevwa nouvèl lanmò Nabòt, l' al di Akab: -Leve non. Al pran jaden rezen Nabòt, nonm lavil Jizreyèl la, pou ou, jaden li te refize vann ou an. Nabòt pa nan moun isit ankò, li mouri. ¹⁶ Lè wa Akab tande Nabòt, nonm lavil Jizreyèl la, te mouri, l' ale, li pran jaden rezen an pou li. ¹⁷ ¶ Lè sa a, Seyè a pale ak Eli, pwofèt lavil Tichbe a, li di l' konsa: ¹⁸ -Al jwenn wa Akab nan peyi Samari. W'ap jwenn li koulye a nan jaden rezen Nabòt la. Li vin pran l' pou li. ¹⁹ W'a di li men mesaj Seyè a voye ba li: Ou fin touye Nabòt, koulye a ou soti pou pran jaden rezen l' lan! Apre sa, w'a di l' ankò men sa Seyè a voye di ou: Menm kote chen te niche san Nabòt la, chen gen

20
 pou yo niche san pa ou tou. Lè Akab wè Eli, li di l' konsa: -Enben, lènmi mwen, ou jwenn mwen jòdi a! Eli reponn, li di l': -Wè! Mwen jwenn ou paske se renk move bagay w'ap plede fè devan

21
 Seyè a. Men mesaj Seyè a voye ba ou: M'ap voye yon gwo malè sou ou. Mwen pral disparèt

22
 ou. Mwen pral touye dènye gason, granmoun kou timoun, nan fanmi ou. Sa ki te rive fanmi wa Jewoboam, pitit Nebat la, ak fanmi wa Bacha, pitit Akija a, se sa ki pral rive fanmi pa ou la tou. Se mwen menm k'ap fè sa paske ou fè m' fache anpil, lèfini se ou ki lakòz pèp Izrayèl la ap fè sa

23
 ki mal. Men sa Seyè a di sou Jezabèl: Chen gen pou manje kadav li nan mitan lavil Jizreyèl.

24
 Chen pral manje kadav tout moun nan fanmi Akab ki va mouri anndan lavil la. Malfini karanklou

25
 va manje kadav tout moun nan fanmi an ki va mouri andeyò limit lavil la. Pa janm gen pesonn mechan tankou Akab. Li te lage kò l' nèt nan fè sa ki mal devan Seyè a. Li te kite madanm li,

26
 Jezabèl, pran tèt li. Li te fè bagay ki lèd nèt, l' al fè sèvis pou vye zidòl tankou moun Amori yo te fè l' la. Se moun Amori sa yo Seyè a te mete deyò nan peyi a pou fè plas pou moun Izrayèl yo.

27
 Lè Eli fin pale, Akab pran lapenn, li chire rad sou li, li mete yon rad sak, li rete san manje. Ata

28
 dòmi li dòmi ak rad sak la sou li. Li t'ap mache kagou. Apre sa, Seyè a pale ak Eli, moun lavil

29
 Tichbe a, li di l' konsa: -Ou wè jan Akab vin dou nan pye m'! Paske li fè sa, m'ap tann li mouri anvan m' voye malè a sou fanmi li. Se va pandan rèy pitit gason l' lan m'a voye malè sou fanmi l'.

Chapter 22

1 ¶ Pandan twazan, pa t' gen lagè ant peyi Izrayèl ak peyi Siri. 2 Men nan twazyèm lanne a, Jozafa, wa peyi Jida a, al vizite Akab, wa peyi Izrayèl la. 3 Wa Izrayèl la di chèf li yo: -Nou konnen lavil Ramòt ki nan peyi Galarad la se pou nou li ye. Poukisa nou pa fè anyen pou nou reprann li

4 nan men wa peyi Siri a? Lèfini li mande Jozafa: -Eske w'ap vin avè m' pou atake lavil Ramòt nan peyi Galarad la? Jozafa reponn li: -Mwen menm ak tout sòlda mwen yo ak kavalye mwen yo, nou avè ou ansanm ak pèp ou a: se yonn lan nou ye. 5 Apre sa, Jozafa di Akab, wa peyi Izrayèl la: -Annou mande Seyè a sa li di nan sa. 6 Se konsa Akab reyini katan (400) pwofèt li yo, li mande yo: -Eske se pou m' al atake lavil Ramòt nan peyi Galarad la, osinon èske se pou m' kite sa? Yo reponn li: -Atake l', monwa! Seyè a ap lage l' nan men ou. 7 Lè sa a, Jozafa di konsa: -Pa gen lòt pwofèt nou ta ka mande si se volonte Seyè a pou n' al fè sa vre? 8 Akab reponn: -Gen yon lòt pwofèt

ankò ki ta ka fè sa pou nou. Se Miche, pitit gason Jimla a. Men, m' rayi l', paske li pa janm di anyen
⁹
ki pou bon pou mwen. Li toujou wè malè pou mwen. Jozafa reponn: -Pa di sa, monchè! Se konsa
Akab rele yonn nan nèg konfyans li yo, li di li: -Prese al cache Miche, pitit gason Jimla a, pou
¹⁰
mwen. Wa peyi Izrayèl la ak Jozafa, wa peyi Jida a, te chita, yo chak sou fotèy pa yo ak bèl rad
wa yo sou yo, sou gwo glasi ki bò pòtay lavil Samari a sou deyò. Tout pwofèt yo te la devan yo ap
¹¹
bay mesaj pa yo. Yonn ladan yo te rele Sedesyas. Se te pitit Kenana. Li fè fè de kòn an fè. Li
¹²
di: -Men sa Seyè a di: Avèk kòn sa yo, ou pral atake moun Siri yo, ou pral fini ak yo. Tout lòt
pwofèt yo t'ap bay menm mesaj la tou. Yo t'ap di: -Ou mèl al atake Ramòt nan peyi Galarad. W'ap
¹³
bon. Seyè a ap lage lavil la nan men ou. Mesaje ki te pati al rele Miche a di Miche konsa: -Tout
¹⁴
lòt pwofèt yo te pale anfavè wa a. Ranje kò ou pou pale tankou yo tout. Pale anfavè wa a. Men,
Miche reponn li: -Mwen pran Seyè a, Bondye vivan an, sèvi m' temwen. Sa Seyè a va di m' di se
¹⁵
sa m'a di. ¶ Lè Miche rive devan wa a, wa a di l' konsa: -Miche, èske se pou m' al atake lavil
Ramòt nan peyi Galarad, osinon èske sè pou m' kite sa? Miche reponn: -Ou mèl al atake Ramòt
¹⁶
nan peyi Galarad. W'ap bon. Seyè a ap lage lavil la nan men ou. Men Akab di li: -Konbe fwa
¹⁷
pou m' di ou lè w'ap pale avè m' nan non Seyè a se pou di m' laverite? Lè sa a, Miche reponn li:
-Mwen wè tout sòlda pèp Izrayèl yo gaye toupatou sou mòn yo, tankou yon bann mouton san gadò.
¹⁸
Seyè a di: Moun sa yo san chèf. Kite yo tounen lakay yo ak kè poze. Akab, wa peyi Izrayèl la,
di Jozafa: -Mwen pa t' di ou li pa janm di anyen ki bon pou mwen. Li toujou wè malè pou mwen.
¹⁹
Miche pran lapawòl ankò li di: -Bon! Koute mesaj Seyè a. Mwen te wè Seyè a chita sou fotèy
²⁰
li nan syèl la, avèk tout zanj li yo kanpe bò kote l', sou bò dwat ak sou bò gòch li. Seyè a t'ap
mande ki moun ki vle al pran tèt Akab pou l' al fè yo touye l' lavil Ramòt. Gen zanj ki di yon bagay,
²¹
gen lòt zanj ki di yon lòt bagay. Se lè sa a, yon lespri vane devan Seyè a, li di: Mwen pral pran
²²
tèt li. Seyè a mande l': Ki jan? Lespri a reponn: Mwen pral mete pawòl manti nan bouch pwofèt
²³
Akab yo. Seyè a di l': W'a pran tèt li vre konsa. Ou mèl al fè jan ou di a. Koulye a, ou konnen
si Seyè a te mete yon lespri mantò sou pwofèt ou yo pou yo ba ou manti, se paske li pran desizyon
²⁴
pou l' fini avè ou. Lè sa a, Sedesyas, pitit Kenana a, mache sou Miche, li flanke li yon souflèt.
²⁵
Epi li di l': -Depi kilè lespri Bondye a kite m' pou se nan bouch ou l'ap pale a? Miche reponn li:
-W'a konn sa lè w'a kouri pase soti nan yon chanm antre nan yon lòt pou al cache jouk nan fon!
²⁶
Se konsa, wa Akab pase yon lòd, li di: -Pran Miche. Mennen l' bay Amon, gouvènè lavil la, ak
²⁷
Joas, pitit wa a. Di yo mwen bay lòd pou yo mete l' nan prizon, pou yo ba li renk pen ak dlo

28
 jouk m'a tounen soti nan lagè a san danje ni malè. Lè sa a, Miche di: -Si ou tounen soti nan lagè a san danje ni malè vre, w'a konnen Seyè a pa t' pale nan bouch mwen. Lèfini, li di: -Nou tout pèp
 29
 yo, koute sa m' di la a wi! ¶ Se konsa Akab, wa peyi Izrayèl la ansanm ak Jozafa, wa peyi Jida
 30
 a, moute al atake lavil Ramòt nan peyi Galarad. Akab di Jozafa konsa: -Mwen pral mete yon lòt rad sou mwen anvan m' al goumen an, pou moun pa rekonèt mwen. Ou menm, ou mèt mete rad wa ou sou ou. Se konsa wa peyi Izrayèl la chanje rad sou li pou moun pa rekonèt li. Apre sa, l' al
 31
 goumen. Men, wa peyi Siri a te bay trannde chèf ki t'ap kòmande cha lagè yo pou yo pa atake
 32
 pesonn pase wa peyi Izrayèl la. Se konsa, lè kòmandan cha lagè yo wè Jozafa, yo tout te konprann
 33
 se li ki te wa peyi Izrayèl la. Yo vire sou li pou atake l'. Men, Jozafa rele anmwe. Lè mesye yo
 34
 tandè sa, yo wè se pa t' wa peyi Izrayèl la. Yo rete sou sa yo te vle fè a. Lè sa a, yon sòlda peyi Siri a rete konsa li voye yon flèch. Flèch la al pran Akab, wa Izrayèl la, nan fant rad lagè ki te sou li a. Wa a di sòlda ki t'ap mennen cha li a: -Kase tèt tounen. Annou kite batay la, paske mwen blese
 35
 grav. Jou sa a, batay la te makònen anpil. Wa Akab menm te blije rete kanpe sou cha li a ap gade moun peyi Siri yo. San t'ap koule soti kote li te blese a, li sal tout anndan cha a. Rive aswè,
 36
 li mouri. Lè solèy pral kouche, yon vwa pran pale nan zòrèy sòlda pèp Izrayèl yo, li t'ap di: -Chak moun al nan peyi yo, chak moun al lakay yo, 37 paske wa a mouri. Apre sa, yo mennen kadav wa a lavil Samari. Se la yo antere l'. 38 Y' al lave cha wa a nan basen Samari a, kote jennès yo konn al benyen an. Chen vin niche san Akab la jan Seyè a te di sa t'ap rive a. 39 Tout rès istwa Akab la ansanm ak tou sa li te fè, bèl palè ivwa ak lavil li te bati yo, n'a jwenn tou sa ekri nan liv Istwa wa peyi Izrayèl yo. 40 Lè Akab mouri, se pitit li, Okozyas ki moute wa nan plas li. 41 ¶ Akab te gen katran depi li t'ap gouvènen peyi Izrayèl la lè Jozafa, pitit Asa a, moute sou fotèy wa peyi Jida a. 42 Lè sa a, li te gen trannsenkan sou tèt li. Li pase vennsenkan ap gouvènen lavil Jerizalèm. Manman li te rele Azouba. Se te pitit fi Chilki. 43 Jozafa li menm te swiv Asa, papa l', pye pou pye nan tou sa l' te fè. Li te fè sa ki dwat devan Seyè a. Tansèlman, tanp zidòl yo te la toujou nan peyi a, kifè pèp la pa t' sispann fè sèvis, touye bèt pou zidòl yo. 44 Jozafa te siyen lapè ak wa peyi Izrayèl la. 45 n'a jwenn rès istwa Jozafa a nan liv Istwa wa peyi Jida yo. Se la yo rakonte jan li te yon vanyan sòlda, ak tout lagè li te fè yo, 46 jan li disparèt rès gason ak fanm ki t'ap fè jennès nan kay zidòl yo toujou depi sou rèy Asa, papa l'. 47 (Lè sa a, pa t' gen wa nan peyi Edon. Se yon gouvènè wa Jida a te mete pou gouvènen yo.) 48 Jozafa te fè fè kèk gwo batiman, tankou batiman moun

Tasis yo, pou al chache lò nan peyi Ofi. Men, batiman yo pa janm rive al fè vwayaj la, paske yo kraze bò Ezyongebè. ⁴⁹ Lè sa a, Okozyas, pitit Akab la, ofri pou maren peyi Izrayèl yo ale ansanm ak maren peyi Jida yo sou batiman pa yo. Men, Jozafa derefize. ⁵⁰ Lè Jozafa mouri, yo antere l' nan Lavil David, zansèt li a. Se pitit li, Joram, ki moute sou fotèy la nan plas li. ⁵¹ Jozafa t'ap mache sou disetan depi li te wa peyi Jida a, lè Okozyas, pitit Akab, moute sou fotèy wa peyi Izrayèl la. Li pase dezan ap gouvènen peyi Izrayèl la lavil Samari. ⁵² Li fè sa ki mal nan je Seyè a. Li swiv egzanp papa l' ak manman l'. Li fè tankou Jewoboram, pitit gason Nebat la, ki te lakòz moun pèp Izrayèl yo fè sa ki mal. ⁵³ Li sèvi Baal, li adore l' tankou papa l' te fè a. Se konsa li te fè Seyè a, Bondye pèp Izrayèl la, fache anpil.

2 Kings

Chapter 1

¹ ¶ Apre lanmò Akab, wa peyi Izrayèl la, peyi Moab pran lèzam kont moun Izrayèl yo. ² Okozyas, wa peyi Izrayèl la, pran yon so, li soti nan balkon lakay li, li tonbe sou twati palè li lavil Samari. Li fraktire nan tout kò l'. Li voye moun al pale ak Baalzeboub, bondye moun Filisti yo ki te gen tanp li lavil Ekwon, pou konnen si l'ap refè. ³ Men, zanj Seyè a pale ak pwofèt Eli, moun lavil Tichbe a, li di l' konsa: --Leve al kontre mesaj Okozyas, wa peyi Samari a. W'a mande yo si pa gen Bondye nan peyi Izrayèl la kifè yo pral pale ak Baalzeboub, bondye lavil Ekwon an. ⁴ W'a di yo tou men mesaj Seyè a voye bay wa a: Li p'ap leve sou kabann kote li kouche a paske li pral mouri. Eli leve, li fè sa Seyè a te mande l' fè a. ⁵ Lè mesaj yo tounen al jwenn wa a, wa a mande yo: --Poukisa nou tounen? ⁶ Yo reponn li: --Paske nou kontre ak yon nonm sou wout nou ki di nou: Tounen al jwenn wa ki te voye nou an. N'a di li: Men mesaj Seyè a voye ba li: Kouman? Pa gen Bondye nan peyi Izrayèl la kifè ou voye moun al pale ak Baalzeboub, bondye lavil Ekwon an? ⁷ Poutèt sa ou fè a, ou p'ap leve sou kabann kote ou kouche a, ou pral mouri. Wa a mande yo: --Moun ki te vin kontre nou an epi ki di nou tout pawòl sa yo, ki jan li te ye? ⁸ Msye yo reponn li: --Li te gen yon gwo rad fèt ak po bèt sou li ak yon sentiwon po bèt mare nan ren l'. Wa a di: --Se ⁹ Eli, moun lavil Tichbe a. ¶ Li voye yon kaptenn ak senkant sòlda al chache Eli. Lè yo rive, yo jwenn Eli chita sou tèt yon ti mòn. Yo di li konsa: --Sèvitè Bondye, wa a pase ou lòd pou ou desann.

10

Eli reponn: --Si m' se yon sèvitè Bondye vre, se pou dife soti nan syèl la tonbe ni sou ou ni sou sòlda ou yo pou l' kankannen nou! Lamenn, yon dife soti nan syèl la, li kankannen ni kaptenn lan

ni senkant sòlda li yo. ¹¹ Wa voye yon lòt kaptenn ak senkant lòt sòlda. Lè yo rive, yo di Eli:

--Sèvitè Bondye, wa a voye di ou desann koulye a san pèdi tan. ¹² Eli reponn: --Si m' se yon sèvitè Bondye vre, se pou dife soti nan syèl la tonbe ni sou ou ni sou senkant sòlda ou yo pou l' kankannen

nou. Lamenn, yon dife soti nan syèl la, li kankannen ni kaptenn lan ni senkant sòlda li yo. ¹³ Fwa

sa a ankò, wa a voye yon lòt kaptenn avèk senkant lòt sòlda. Lè kaptenn lan rive, li moute jouk kote Eli te ye a, li mete ajenou devan Eli, li di l' konsa: --Tanpri, sèvitè Bondye! Pitye pou mwen

ak senkant sòlda mwen yo. Nou la pou rann ou nenpòt sèvis. Sove lavi nou! ¹⁴ Dife soti nan syèl

la, li tonbe sou de lòt kaptenn yo ak tout sòlda ki te avèk yo! Tanpri, pitye pou mwen. ¹⁵ Lè sa a, zanj Seyè a di Eli konsa: --Ou mèt ale ak msye. Ou pa bezwen pè l'. Eli leve, li desann ak kaptenn

lan, l' al jwenn wa a. ¹⁶ Li di wa a konsa: --Men mesaj Seyè a voye ba ou: Paske ou voye moun al pale ak Baalzeboub, bondye lavil Ekwon an, tankou si pa gen Bondye nan peyi Izrayèl la ou ta ka

al wè, ou p'ap janm leve sou kabann kote ou kouche a, ou pral mouri. ¹⁷ Okozyas mouri vre, jan Seyè a te di l' la nan bouch Eli. Okozyas pa t' gen pitit gason. Se Joram, frè li, ki moute sou fotèy la nan plas li. Lè sa a, Joram, pitit gason Jozafa a, t'ap mache sou dezan depi li t'ap gouvènen nan

peyi Jida. ¹⁸ Tout rès istwa Okozyas la ansanm ak tou sa li te fè, n'a jwenn yo ekri nan liv Istwa wa peyi Izrayèl yo.

Chapter 2

1

¶ Lè a te rive pou Seyè a te fè Eli moute nan syèl nan yon toubouyon. Eli ak Elize pati ansanm,

yo kite lavil Gilgal. ² Eli di Elize konsa: --Ou mèt rete isit la tandè, paske Seyè a ban m' lòd pou m' al Betèl. Men, Elize reponn li: --Mwen pran ou menm ansanm ak Seyè ki vivan an pou temwen,

mwen p'ap kite ou ale pou kont ou. Se konsa yo pati ansanm pou lavil Betèl. ³ Men, yon gwoup pwofèt ki te rive lavil Betèl vin kontre Elize, yo di l' konsa: --Ou pa konnen Seyè a pral pran mèt ou a jòdi a? Elize reponn yo: --Mwen konn sa wi. Men nou menm, nou pa bezwen di anyen ankò!

⁴ Apre sa, Eli di Elize: --Koulye a ou mèt rete isit la tandè, paske Seyè a te ban m' lòd pou m' al Jeriko. Men, Elize reponn li: --Mwen pran ou menm ansanm ak Seyè ki vivan an pou temwen,

mwen p'ap kite ou ale pou kont ou. Se konsa yo pati ansanm pou lavil Jeriko. ⁵ Yon gwoup pwofèt ki te rete lavil Jeriko vin kontre Elize, yo di l' konsa: --Ou pa konnen Seyè a pral pran mèt ou a jòdi

a? Elize reponn: --Mwen konn sa wi! Men nou menm, nou pa bezwen di anyen ankò. ⁶ Apre sa, Eli di Elize: --Koulye a ou mèt rete isit la tandè, paske Seyè a ban m' lòd pou m' al bò larivyè Jouden. Men, Elize reponn li: --Mwen pran ou menm ansanm ak Seyè ki vivan an pou temwen, mwen p'ap kite ou ale pou kont ou. Se konsa yo pati ansanm ankò. ⁷ Senkant nan pwofèt Jeriko yo t'ap mache dèyè yo. Eli ak Elize rete bò larivyè Jouden an. Senkant pwofèt yo menm rete yo ti distans lwen yo. ⁸ Eli wete gwo rad ki te sou li a, li woule l', li frape dlo a avè l'. Dlo a fann de bò. Eli ak Elize janbe lòt bò larivyè a san pye yo pa mouye. ⁹ ¶ Lè yo fin janbe, Eli di Elize konsa: --Di m' kisa ou ta vle m' fè pou ou anvan Bondye pran m'. Elize reponn li: --Mwen ta renmen resevwa yon pòsyon doub nan lespri ki sou ou a. ¹⁰ Eli di li: --Sa ou mande m' la a pa fasil. Men, si ou wè m' ak je ou lè m'ap kite ou la, w'ap jwenn sa ou mande a. Men, si ou pa wè m', w'a konnen ou p'ap jwenn li. ¹¹ Yo t'ap mache ansanm, yo t'ap pale yonn ak lòt lè yo cha dife ak chwal dife vin nan mitan yo. Epi li pote Eli moute nan syèl nan yon gwo toubouyon. ¹² Lè Elize wè sa, li rele Eli, li di: --Papa mwen! papa mwen! Ou menm ki te tankou yon gwo lame pou pran defans peyi Izrayèl la, ou ale! Epi li pa wè Eli ankò. Yon sèl lapenn pran Elize, li chire rad ki te sou li a fè de moso. ¹³ ¶ Lèfini, li ranmase gwo rad ki te soti sou zepòl Eli tonbe atè a, epi li tounen. Rive bò larivyè Jouden an li kanpe. ¹⁴ Li frape dlo a ak rad ki te soti sou zepòl Eli a, epi li di byen fò: --Kote Seyè a, Bondye Eli a? Li frape dlo a yon dezyèm fwa ak rad Eli a. Dlo a fann de bò. Elize janbe lòt bò larivyè a. ¹⁵ Lè pwofèt Jeriko yo ki te pi devan an wè sa, yo di: --Lespri Eli a sou Elize! Yo vin jwenn li, yo bese tèt yo jouk atè devan l'. ¹⁶ Yo di li: --Koute. Gen senkant nan nou la a. Nou tout se vanyan gason. Kite n' al chache mèt ou a. Ou pa janm konnen. Lespri Bondye a ka pran l' al lage sou yon mòn osinon nan yon fon. Men, Elize di yo: --Non. Pa voye pesonn dèyè l'. ¹⁷ Men yo kenbe la avè l' jouk li di yo: --Bon. Nou mèt ale! Se konsa yo voye senkant moun yo al chache Eli. Yo pase twa jou ap chache, yo pa jwenn li. ¹⁸ Yo tounen al jwenn Elize ki te rete ap tann yo lavil Jeriko. Elize di yo: --Mwen pa t' di nou nou pa t' bezwen ale! ¹⁹ ¶ Moun lavil Jeriko yo vin di Elize: --Mèt, lavil la bati nan yon bon pozisyon, jan ou ka wè l' la. Men, dlo a pa bon, li fè tè a pa bay anyen. ²⁰ Elize di yo: --Pote ti gout sèl nan yon bòl tou nèf ban mwen! Yo pote veso sèl la bay Elize. ²¹ Elize moute nan sous la, li voye sèl jete nan dlo a. Lèfini, li di: --Men sa Seyè a di: M'ap netwaye dlo sa a. Li p'ap janm touye moun ankò, ni li p'ap fè tè a rete san donnen anyen. ²² Depi lè sa a dlo a vin bon jouk jounen jòdi a, jan Elize te di l' la. ²³ Elize kite lavil Jeriko, l' ale lavil Betèl. Li t'ap mache sou chemen an konsa, lè yo bann ti gason soti lavil la, yo pran pase l'

nan betiz, yo t'ap rele: --Al fè wout ou, tèt chòv! Al fè wout ou, tèt chòv! ²⁴ Elize vire, li gade ti gason yo, li ba yo madichon nan non Seyè a. Lamem, de lous soti nan rakbwa a, yo dechire karannde nan ti gason yo. ²⁵ Apre sa, Elize ale mòn Kamèl. Lèfini li tounen lavil Samari.

Chapter 3

¹ ¶ Lè sa a, wa Jozafa t'ap mache sou dizwitan depi li t'ap gouvènen nan peyi Jida lè Joram, pitit Akab la, moute sou fotèy wa peyi Izrayèl la. Li pase douzan ap gouvènen nan lavil Samari. ² Li fè sa ki mal nan je Seyè a, men pa tankou papa l' ak manman l' Jezabèl. Li wete gwo wòch papa l' te mete kanpe pou sèvis Baal la. ³ Men, li fè menm peche ak Jewoboram, pitit gason Nebat la, li lakòz pèp Izrayèl la fè peche. Li pa t' soti pou l' te kite vye chemen sa a. ⁴ Mesa, wa peyi Moab la, te fè gadinaj mouton. Se konsa li te pran angajman pou li te bay wa peyi Izrayèl la sanmil (100.000) ti mouton ak sanmil (100.000) belye ak tout lenn yo sou yo. ⁵ Men, lè Akab, wa peyi Izrayèl la, mouri, wa peyi Moab la revòlte kont otorite wa peyi Izrayèl la. ⁶ ¶ Lamem, wa Joram kite lavil Samari, li sanble tout lame pèp Izrayèl la. ⁷ Epi li pati, li voye di Jozafa, wa peyi Jida a: --Wa peyi Moab la revòlte kont otorite mwen. Ou pa ta vle vin avè m' pou nou atake moun Moab yo? Jozafa reponn: --Men wi! Mwen menm ak tout sòlda mwen yo ak kavalye mwen yo, nou avè ou ansanm ak pèp ou a. Se yonn nou ye! ⁸ Ki wout n'ap pran pou n' al atake? Joram reponn li: --N'ap pran chemen ki pase nan dezè Edon an. ⁹ Se konsa Joram, wa peyi Izrayèl la, ansanm ak wa peyi Jida a ak wa peyi Edon an pati. Yo pase sèt jou ap mache. Lè sa a dlo yo fini, pa t' gen yon ti gout dlo ni pou sòlda yo ni pou bèt chay ki te avè yo. ¹⁰ Joram, wa peyi Izrayèl la, di: --Woy! Nou fini! Seyè a fè nou tou twa vin isit la ansanm pou l' lage nou nan men wa Moab la. ¹¹ Jozafa mande: --Pa gen yon pwofèt bò isit la ki ta ka pale ak Seyè a pou nou? Yonn nan chèf wa peyi Izrayèl yo di: --Bò isit la gen Elize, pitit gason Chafa a. Se li ki t'ap sèvi ak Eli. ¹² Jozafa di: --Sèten l'ap gen kichòy pou l' di nou nan non Seyè a! Se konsa wa peyi Izrayèl la ansanm ak Jozafa ak wa peyi Edon an pati, y' al wè Elize. ¹³ Elize di wa Izrayèl la konsa: --Ki rapò m' gen avè ou! Al wè pwofèt papa ou ak manman ou te konn al wè yo! Joram reponn: --Non! Se Seyè a ki voye chache nou pou l' lage nou twa wa sa yo nan men wa peyi Moab la. ¹⁴ Elize reponn: --Mwen pran Seyè vivan m'ap sèvi a pou temwen! Si mwen pa t' gen respè pou Jozafa, wa peyi Jida a, m' pa ta menm gade ou,

¹⁵ m' pa ta okipe ou. Koulye a, al chache yon mizisyen pou mwen. Pandan mizisyen an t'ap jwe
 mizik, pouvwa Seyè a desann sou Elize. ¹⁶ Elize di: --Men sa Seyè a di: Fouye anpil gwo twou
 nan fon ravin sa a. ¹⁷ Paske, men sa li di ankò: Nou p'ap wè van, nou p'ap wè lapli, men ravin sa
 a pral plen dlo. Konsa n'a jwenn kont dlo pou nou bwè ansanm ak bèf, kabrit nou yo ak bèt chay
¹⁸ nou yo. Men tou sa pa anyen bò kote sa Seyè a ka fè. Li pral lage moun peyi Moab yo nan men
¹⁹ nou. Nou pral pran tout bèl lavil ak ranpa yo, nou pral koupe tout bèl pyebwa yo, nou pral bouche
 tout sous dlo yo. Nou pral gate tout pi bèl jaden yo, nou pral kouvri yo ak wòch. ²⁰ ¶ Nan denmen
²¹ maten, lè lè pou yo fè ofrann lan rive, yon dlo soti nan direksyon Edon, li kouvri tout tè a. Lè
 moun Moab yo pran nouvèl twa wa yo te moute vin atake yo, tout gason ki te gen laj pou pote zam,
²² gran kou piti, yo sanble, y' al mase kò yo sou fwontyè a. Nan denmen maten, lè yo leve, limyè
²³ solèy la t'ap bat sou dlo a. Li bay dlo a yon koulè wouj, moun Moab yo te kwè se san. Yo di:
²⁴ --Gade san! Lame wa yo gen lè goumen yonn ak lòt, yonn touye lòt. Ann al piye kan yo! Men
 lè moun Moab yo rive nan kan moun Izrayèl yo, moun Izrayèl yo tonbe sou yo, yo kòmanse bat
 yo. Moun Moab yo pran kouri. Moun Izrayèl yo antre dèyè yo nan peyi Moab, yo touye tout moun
²⁵ Moab ki tonbe anba men yo. Yo detwi lavil yo. Chak fwa yo rive bò yon bèl jaden, chak moun
 pran wòch, yo voye ladan l' jouk jaden an kouvri nèt ak wòch. Yo bouche tout sous dlo yo, yo
 koupe tout bèl pyebwa yo. Sèl kote ki te rete kanpe se te lavil Kiraresèt, kapital la. Sòlda yo sènen
²⁶ l', yo atake l' ak kout wòch. Lè wa peyi Moab la wè li t'ap pèdi batay la, li pran sètisan (700)
 sòlda avè l'. Avèk nepe yo, yo chache mwayen pou yo pase nan mitan sòlda Izrayèl yo al fè wout
²⁷ yo nan direksyon peyi Edon, men yo pa t' kapab. Lè sa a, wa peyi Moab la pran premye pitit
 gason l' lan, sa ki te pou pran plas li sou fotèy la, li ofri l' bay bondye peyi Moab la, li touye l' sou
 tèt miray lavil la. Lè moun Izrayèl yo wè sa, yo pè pou malè pa rive yo. Yo rale kò yo dèyè, yo
 tounen nan peyi yo.

Chapter 4

¹ ¶ Madanm yonn nan pwofèt yo al jwenn Elize, li di l' konsa: --Mari m' mouri. Ou konnen se
 yon nonm ki te gen krentif anpil pou Bondye. Koulye a, yon nonm mari m' te dwe lajan vini, li vle
² pran de pitit gason m' yo pou l' al vann yo tankou esklav pou l' ka antre lajan l' lan. Elize mande
 l': --Kisa m' ka fè pou ou? Di m' kisa ou gen lakay ou. Madanm lan reponn li: --Mèt, m' pa gen

³ anyen pase yon ti boutèy lwil. Lè sa a Elize di li: --Ale nan vwazenaj. Mande prete valè ja vid
⁴ ou ka jwenn. Lèfini, tounen lakay ou ansanm ak pitit gason ou yo. Fèmen tout pòt. Konmanse
⁵ plen tout ja yo lwil. Chak ja ki plen, w'a mete l' sou kote. Se konsa, madanm lan kite Elize, li
tounen lakay li al jwenn pitit gason l' yo. Li fèmen pòt. Li pran ti boutèy lwil la, li vide lwil nan ja
⁶ vid yo. Pitit gason l' yo t'ap pote ja yo ba li yonn apre lòt. Li menm li t'ap plen yo. Lè tout ja yo
fin plen, madanm lan mande yonn nan pitit li yo si pa t' gen ja ankò. Gason l' lan reponn li. --Pa
⁷ gen ja vid ankò non. Lamenn lwil la sispann koule. Madanm lan al jwenn Elize, li rakonte l' tout
bagay. Elize di li: --Bon. Al vann lwil la. Peye tout dèt ou yo. Lèfini, w'ap gen lajan rete nan men
⁸ ou pou ou viv ak pitit ou yo. ¶ Yon jou, Elize t'ap pase lavil Chounèm kote te gen yon madanm
ki te gen bon ti mwayen. Madanm lan fann dèyè l' pou li vin manje avè l'. Depi lè sa a, chak fwa
⁹ Elize pase lavil Chounèm, se lakay madanm sa a l' al manje. Yon lè, madanm lan di mari l':
--Gade! Mwen vin konnen nonm sa k'ap pase tout tan vin isit la se yon pwofèt Bondye, yon nonm
¹⁰ k'ap viv apa pou Bondye li ye. Ann bati yon ti pyès an masonn sou teras anwo a. N'a mete yon
kabann, yon chèz, yon tab ak yon lanp ladan l'. Konsa, lè la vin vizite nou, la gen yon kote pou l'
¹¹ ka pou kont li. Yon jou, Elize te vin lavil Chounèm, li moute nan chanm li, li kouche. Li di
¹² Gerazi, domestik li a, rele madanm lan pou li. Gerazi rele madanm lan. Lè madanm lan rive, Elize
¹³ di Gerazi konsa: --Mande l' pou mwen kisa m' ka fè pou li pou tout traka li bay tèt li pou nou. Eske
li ta vle m' al pale ak wa a osinon kòmandan lame a pou li? Madanm lan reponn: --Mèsi wi. Mwen
¹⁴ gen tou sa m' bezwen nan mitan pèp la. Elize mande Gerazi: --Kisa nou ta ka fè pou li en? Gerazi
¹⁵ di li: --Podyab! Li pa gen pitit gason, lèfini, mari l' fin granmoun! Elize di: --Rele l' pou mwen!
¹⁶ Gerazi rele madanm lan. Madanm lan vini, li kanpe nan papòt la. Elize di li: --Nan ennan, vè lè
konsa, w'a kenbe yon pitit gason nan bra ou. Madanm lan di: --Non, mèt. Tanpri, se sèvitè Bondye
¹⁷ ou ye, pa ban m' manti. Men, madanm lan vin ansent jan Elize te di l' la. Se konsa ennan apre,
¹⁸ li fè yon pitit gason. ¶ Ti gason an grandi. Yon jou ti gason an t al jwenn papa l' ki t'ap ranmase
¹⁹ rekòt nan jaden l' ak kèk lòt moun, li rete konsa, li di papa l': --Woy! Tèt mwen! Tèt mwen!
²⁰ Papa a rele yonn nan domestik li yo, li di l' konsa: --Pote ti gason an bay manman l'. Domestik
la pran ti gason an, li pote l' bay manman l'. Manman an kenbe ti gason an sou janm li. Rive midi,
²¹ ti gason an mouri. Manman an moute avè l' nan chanm Elize a. Li mete l' kouche sou kabann
²² lan. Li fèmen pòt la, epi li soti. Li fè rele mari li, li di l' konsa: --Tanpri, voye yon domestik ban

mwen ak yon bourik. Mwen bezwen ale bò kote Elize, pwofèt la. M' p'ap mize. ²³ Mari a mande l': --Poukisa se jòdi a pou ou ale bò kot pwofèt la. Se pa jou repo, ni se pa jou fèt lalin nouvl.

Madanm lan reponn li: --Sa pa fè anyen! ²⁴ Li fè sele bourik la, epi li di domestik li a: --Degage ²⁵ ou fè bourik la mache vit. Pa kite l' al dousman jouk m'a di ou rete. Se konsa, li pati pou mòn Kamèl kote Elize, sèvitè Bondye a, te ye. Elize wè l' byen lwen ap vini. Li di Gerazi, domestik li a: --Men madanm lavil Choumèn lan ap vini. ²⁶ Kouri al jwenn li. Mande l' si tout moun lakay li ²⁷ byen, li menm, mari l' ak pitit li a. Madanm lan di Gerazi tout moun byen. Men lè li rive kot Elize, li lage kò l' atè devan li, li mare nan pye Elize. Gerazi fè sa pou l' pouse l', Elize di l' konsa: ²⁸ --Kite l'. Ou pa wè jan li gen gwo lapenn? Epi Seyè a pa kite m' konn sa. Li kache m' sa. Lè sa a madanm lan di: --Mèt, se mwen ki te mande ou yon pitit gason? M' pa t' di ou pa ban m' move ²⁹ espwa? Elize vire bò Gerazi, li di l' konsa: --Pare kò ou non! Pran baton m' lan avè ou. Pati. Pa rete sou wout ou pou di pesonn bonjou. Si yon moun di ou bonjou, pa reponn. Ale dirèk dirèk kay ³⁰ madanm lan. Lè w'a rive, w'a mete baton m' lan sou figi pitit la. Men manman ti gason an di Elize konsa: --Mwen pran Seyè vivan an ansanm ak ou tou pou temwen. Mwen pa pral san ou! Lè ³¹ sa a Elize leve, li pati avè l'. Gerazi te gen tan pran devan. Li mete baton Elize a sou figi ti gason an. Men, ti gason an pa bridging kò l'. Gerazi tounen al jwenn Elize, li di l': --Ti gason an pa leve. ³² Lè Elize rive, li moute pou kont li nan chanm lan. Li wè ti gason an mouri kouche sou kabann ³³ lan. Li fèmen pòt la, epi li pran lapriyè Seyè a. ³⁴ Lèfini, li moute kouche sou ti gason an, li mete bouch li sou bouch ti gason an, je li sou je ti gason an ak men l' sou men ti gason an. Li rete ³⁵ kouche konsa sou ti gason an. Kò ti gason an konmanse vin cho. Elize leve, li fè yon ti mache nan chanm lan. Lèfini, l' al kouche menm jan an sou ti gason an ankò. Ti gason an estènen sèt fwa, ³⁶ epi li louvri je l'. Elize rele Gerazi, li di l': --Rele madanm lan pou mwen. Lè madanm lan vini, ³⁷ li di l': --Men pitit gason ou lan. Madanm lan tonbe ajenou nan pye Elize, li bese tèt li jouk atè. ³⁸ Lèfini, li pran pitit li, l' ale. ¶ Apre sa, Elize tounen lavil Gilgal. Lè sa a, yon sèl grangou te tonbe sou tout peyi a. Yon jou, yon gwoup pwofèt te chita ap pale ak Elize. Elize rele domestik li a, li di ³⁹ l' konsa: --Mete gwo mamit la sou dife. Pare yon bouyon pou pwofèt yo. Yonn nan pwofèt yo soti al chache kèk fèy legim. Li jwenn yon pye lyann mawon, li keyi kèk fwi ki te tankou ti kalbas, li plen rad li. Li tounen, li koupe yo an ti moso, li mete yo nan bouyon an san konnen sa yo te ye. ⁴⁰ Yo sèvi mesye yo. Goute yo goutte bouyon an, yo pran rele. Yo di: --Pwofèt Elize! Manje a gen ⁴¹ yon pwazon ladan l'. Yo derefize manje. Men Elize di: --Pote ti gout farin frans pou mwen. Li

mete farin lan nan bouyon an. Epi li di: --Bay mesye yo manje. Mesye yo manje. Pa t'gen pwazon
⁴²
 ankò nan manje a. Yon lòt fwa ankò, yon nonm soti lavil Baal Chalicha, li pote yon sak pwovizyon
 fè Elize kado. Nan sak la te gen ven pen li te fè ak premye grenn lòj li te rekolte pou lanne a ansanm
 ak yon pakèt grap lòj li te fèk koupe. Elize di domestik li a pou li sèvi yo bay pwofèt yo manje.
⁴³
 Men domestik la di l': --Ki jan pou m' rive bay san moun manje ak ti pwovizyon sa a? Elize
⁴⁴
 reponn li: --Ba yo l' pou yo manje, paske Seyè a di y'ap manje kont yo, y'ap kite rè. Domestik
 la sèvi manje a. Tout pwofèt yo manje, yo kite rè jan Seyè a te di l' la.

Chapter 5

¹
 ¶ Naaman, kòmandan lame wa peyi Siri a, te yon nonm wa a te renmen anpil. Li te ba li anpil
 favè paske se gremesi Naaman Seyè a te fè peyi Siri a genyen nan tout batay li yo. Se te yon vanyan
²
 sòlda, men li trape yon move maladi po. Yon lè yon bann moun peyi Siri t al fè piyay nan peyi
³
 Izrayèl la, yo te fè yon tifi moun Izrayèl yo prizonye. Tifi a te rete ak madan Naaman. Yon jou,
 li di metrès li a: --Si mèt mwen te ka al wè pwofèt ki nan peyi Samari a, pwofèt la ta ka geri maladi
⁴
 a wi. Lè Naaman tandè sa, l' al jwenn wa a, li di l' sa tifi a te di. ⁵ Wa Siri a reponn: --Bon, ou
 pral jwenn wa peyi Izrayèl la, m'ap ba ou yon lèt pou li. Se konsa Naaman pati. Li te pote trantmil
⁶
 (30.000) pyès ajan, simil (6.000) pyès lò ak dis rad nèf fèt ak bon twal fen. Li renmèt lèt la bay
 wa peyi Izrayèl la. Men sa ki te ekri nan lèt la: Mwen voye Naaman, yonn nan chèf mwen yo, avèk
⁷
 lèt sa a pou ou ka geri maladi po l' la. Lè wa peyi Izrayèl la li lèt la, li vin gen yon kè sere, li chire
 rad sou li epi li di: --Eske se Bondye ki bay lavi ki bay lanmò mwen ye pou msye voye yon moun
⁸
 ak maladi pou m' geri l'? Nou tou wè se chache l'ap chache m' kont. Lè pwofèt Elize vin konnen
 jan wa a te nan tèt chaje pou lèt la, li voye di l': --Poukisa ou gen kè sere konsa? Voye moun lan
⁹
 ban mwen, m'a fè l' konnen gen yon pwofèt nan peyi Izrayèl la. ¶ Se konsa Naaman ale ak cha li
¹⁰
 a ansanm ak chwal li yo. Li rete devan pòt kay Elize a. Men Elize voye yon mesaj di l': --Ale
¹¹
 lave kò ou sèt fwa nan larivyè Jouden an, maladi po a va disparèt sou kò ou. W'a geri. Naaman
 fache, li vire do l' ale. Li di: --Mwen te kwè li t'ap soti vin resevwa m'. Apre sa, li ta lapriyè Seyè
¹²
 a, Bondye l' la. Li ta pase men l' kote ki malad la, konsa mwen ta geri. Lèfini, èske dlo larivyè
 Abana ak larivyè Fafa nan peyi Damas yo pa pi bon pase nenpòt dlo larivyè nan peyi Izrayèl yo?
¹³
 Mwen ta ka benyen ladan yo tou, mwen ta geri. Li vire do l' ale byen move. Men, domestik li
 yo al jwenn li, yo di l' konsa: --Mèt, si pwofèt la te mande ou yon bagay pi difisil, èske ou pa ta fè

14
l'? Poukisa koulye a ou pa al lave kò ou pou ou ka geri jan li di ou la? Naaman ale, li plonje sèt fwa nan larivyè Jouden an, jan pwofèt la te di l' la. Po kò l' tounen tankou po timoun. Li te geri nèt.

15
¶ Lè sa a li tounen bò kote sèvitè Bondye a ansanm ak tout moun ki te avè l' yo. Li kanpe devan l', li di l' konsa: --Koulye a, mwen konnen pa gen Bondye lòt kote sou latè pase nan peyi Izrayèl

16
la. Tanpri, resevwa kado m'ap ba ou la a. Men Elize di l': --Mwen pran Seyè vivan m'ap sèvi a pou temwen, mwen p'ap resevwa ankenn kado. Naaman t'ap fòse l' pou l' pran kado a, men Elize

17
derefize. Lè sa a, Naaman di: --Dakò, ou pa vle. Men tanpri, ban m' ti gout tè pou m' chaje sou de milèt pote ale avè m'. Paske mwen menm ki la pou sèvi ou la, depi jòdi a mwen p'ap fè ofrann,

18
mwen p'ap boule bèt pou ankenn lòt bondye pase pou Seyè a. Tansèlman, se pou Seyè a padonnen m' kichòy. Lè chèf mwen pral fè sèvis nan tanp Rimon an, se pou l' apiye sou bra m', mwen fèt pou

19
m' bese tèt ansanm avè l' nan tanp lan. Mwen ta mande Seyè a pou l' padonnen m' sa. Elize

20
reponn li: --Ale ak kè poze! Naaman pati. Lè li rive yon distans, ¶ Gerazi, domestik Elize, pwofèt Bondye a, di nan kè l': --Mèt mwen kite Naaman, moun Siri a, ale, li pa pran anyen nan sa l' te pote pou li a. Mwen pran Seyè vivan an pou temwen, mwen pral kouri dèyè l' pou m' pran kichòy nan

21
men l'. Se konsa li pati dèyè Naaman. Lè Naaman wè l' ap kouri vin jwenn li, li prese desann

22
sot sou cha li a, l' al jwenn li, li mande l': --Ki malè ki rive? Gerazi reponn li: --Se pa anyen non. Se mèt mwen ki voye m' di ou konsa gen de jenn pwofèt ki soti nan mòn Efrayim yo ki fèk rive

23
lakay li, li ta renmen ou voye twasan (300) pyès ajan ak de rad nèt pou l' ba yo. Naaman reponn: --Tanpri, pran sisan (600) pyès ajan. Li fòse l' pran yo, li mare pyès ajan yo nan de ti sak, li lonje

24
yo bay de nan domestik pa l' yo ansanm ak de bèl rechanj pou yo pote yo devan Gerazi. Lè yo rive sou ti mòn lan, Gerazi pran de ti sak yo nan men domestik yo, li mete yo lakay li, lèfini, li voye

25
domestik Naaman yo ale fè wout yo. Apre sa, l' ale jwenn mèt li. Elize mande l': --Gerazi, kote

26
ou soti? Gerazi reponn: --M' pa t al ankenn kote non, mèt! Elize di li: --Mwen te la avè ou, nan lespri m', lè nonm lan desann soti sou cha li a pou l' resevwa ou. Men se pa lè sa a pou nou resevwa lajan ak rad ni pou n' achte jaden oliv, jaden rezen, bèf, mouton, kabrit, osinon fanm ak gason pou

27
sèvi nou esklav. Se poutèt sa, maladi Naaman an pral tonbe sou ou, sou pitit ak pitit pitit ou yo pou tout tan. Lè Gerazi soti, li te gen maladi po a. Po kò l' te blan kou koton.

Chapter 6

¹ ¶ Yon jou, pwofèt yo di Elize konsa: --Gade, kote n'ap viv avè ou la vin twò piti pou nou.
² Kite n' ale larivyè Jouden an. Nou chak va koupe yon madriye, n'a bati yon kay la pou nou ka viv.
³ Elize reponn: --Ale non! Yonn nan pwofèt yo mande l': --Tanpri, mèt, ann al avè nou non! Li di:
⁴ --Dakò. Li pati ak yo. Lè yo rive bò larivyè Jouden an, yo tanmen koupe bwa. ⁵ Yonn ladan yo
t'ap koupe yon madriye lè rach la soti nan manch li, li tonbe nan dlo a. Li pran rele: --Mèt, mèt! Sa
m' pral fè la a? Se prete yo te prete m' rach la wi! ⁶ Elize mande l': --Kote rach la tonbe la a? Li
moutre l' kote a. Elize kase yon moso bwa, li voye l' nan dlo a. Rach la moute anwo dlo a. ⁷ Elize
di l': --Wete l' nan dlo a. Pwofèt la lonje men l', li pran rach la. ⁸ ¶ Wa peyi Siri a t'ap fè lagè ak
⁹ peyi Izrayèl la. Li reyini chèf li yo, li di yo ki kote li pral moute kan lame a. Men, Elize voye
avèti wa peyi Izrayèl la pou l' pa pwoche bò tèl kote, paske lame peyi Siri a desann la ap tann li.
¹⁰ Se konsa wa peyi Izrayèl la voye yon mesaj al avèti moun ki nan zòn Elize te di l' la pou yo
rete sou prigad yo. Sa rive plizyè fwa. ¹¹ Sa te boulvèse wa peyi Siri a anpil. Li rele chèf li yo, li
di yo: --Manyè di m' kilès nan nou la a ki pou wa peyi Izrayèl la? ¹² Yonn nan chèf yo reponn:
--Pesonn, monwa. Men se Elize, pwofèt ki nan peyi Izrayèl la, k'ap fè wa peyi Izrayèl la konnen
¹³ tou sa ou di, ata sa ou di anndan chanm ou. ¶ Wa peyi Siri a di: --Chache konnen kote Elize sa
¹⁴ a ye pou m' voye pran l': Yo vin di li Elize te lavil Dotan. Li voye yon gwo lame ak anpil chwal
¹⁵ ak cha lagè dèyè l'. Yo rive Dotan solèy kouche, yo sènen lavil la. Nan denmen maten, domestik
pwofèt la leve byen bonè, li soti. Li wè te gen yon gwo lame ki te sènen tout lavil la ak anpil chwal
¹⁶ ak anpil cha lagè. Lamenm, l' al di Elize: --Mèt, mèt, malè sou nou! Kisa nou pral fè la a? Elize
¹⁷ reponn li: --Ou pa bezwen pè! Nou gen plis moun avèk nou pase yo. Lèfini, Elize lapriyè Seyè
a, li di: --Seyè, tanpri louvri je l' pou l' wè! Seyè a louvri je domestik la. Domestik la wè tout mòn
¹⁸ lan te kouvri ak flanm dife an fòm kavalye ak cha lagè bò kote Elize. Lè sòlda peyi Siri yo atake,
Elize lapriyè ankò, li di: --Seyè, fè sòlda sa yo pa wè nan je yo! Seyè a fè sòlda peyi Siri yo pa wè
¹⁹ nan je yo, jan Elize te mande l' la. Lèfini, Elize al jwenn yo, li di yo: --Se pa chemen an sa, ni
se pa lavil n'ap chache a sa. Swiv mwen, m'a mennen nou kote moun n'ap chache a ye. Li mennen
²⁰ yo lavil Samari. Rive yo rive la, Elize lapriyè ankò, li di: --Seyè, louvri je yo pou yo wè! Seyè
²¹ a louvri je yo. Yo wè yo te nan mitan lavil Samari. Lè wa peyi Izrayèl la wè sòlda peyi Siri yo,
²² li mande Elize: --Touye yo, papa mwen? Touye yo? Elize reponn li: --Non. Pa touye yo. Ou

janm touye moun ou fè prizonye lè w'ap goumen ak nepe epi ak banza? Ba yo manje, ba yo bwè,
 Lèfini, kite yo tounen al jwenn mèt yo! ²³ Se konsa, wa a fè yon gwo resepsyon pou yo. Yo manje,
 yo bwè. Lèfini, wa a voye yo ale jwenn mèt yo. Depi lè sa a, sòlda peyi Siri yo sispann anvayi peyi
 Izrayèl la. ²⁴ ¶ Kèk tan apre sa, Bennadad, wa peyi Siri a, sanble tout lame li, li moute vin atake
 peyi Izrayèl. Li sènen lavil Samari. ²⁵ Se konsa, yon sèl grangou t'ap bat moun nan lavil la. Lènmi
 pa t' bay ankenn chans pou moun antre soti. Lè sa a yon tèt bourik te koute katreven pyès ajan, yon
 demi liv kaka pijon te koute senk pyès ajan. ²⁶ Yon jou, wa peyi Izrayèl la t'ap pase sou miray lavil
 la, yon madanm pran rele: --Monwa, monwa, fè kichòy pou mwen non! ²⁷ Wa a reponn: --Si Seyè
 a pa ka fè anyen pou ou, kisa mwen menm, mwen ka fè pou ou. Kisa ou vle m' ba ou: farin osinon
 diven? ²⁸ Sa ou genyen? Madanm lan reponn: --Lòt jou, madanm sa ou wè la a vin di m' pou mwen
 bay pitit pa m' lan pou nou manje jou sa a, nan denmen n'a manje pitit pa l' la. ²⁹ Se konsa nou
 kwit pitit pa m' lan, nou manje l'. Nan denmen, mwen di l' pou li bay pitit pa l' la pou nou manje,
 men li sere l'. ³⁰ Lè wa a tande sa madanm lan di l' la, li chire rad sou li sitèlman li te fache. Moun
 ki te toupre miray la te ka wè wa a te gen yon rad sak anba rad li. ³¹ Wa a pale byen fò, li di: --Se
 pou Bondye ban m' pi gwo chatiman ki genyen si anvan jounen an fini, yo pa koupe tèt Elize, pitit
 Safa a! ³² Wa a voye yon mesaje al chache Elize. Lè sa a, Elize te chita lakay li ak kèk chèf fanmi
 ki t'ap vizite l'. Men, anvan mesaje wa a gen tan rive, Elize di chèf fanmi yo: --Gade, Ansasen an
 voye yon moun pou touye m'. Men sa n'ap fè. Lè mesaje wa a va rive, fèmèn pòt la sou li. Pa kite
 l' antre. Wa a pye pou pye dèyè l'. ³³ Elize pankò fèmèn bouch li, lè wa a rive devan l'. Wa a di l'
 konsa: --Se Seyè a ki voye malè sa a sou nou! Sa m' bezwen rete ap tann li fè kichòy pou nou ankò?

Chapter 7

¹ ¶ Elize reponn li: --Koute sa Seyè a voye di ou: Denmen, vè lè sa a, nan pòtay lavil Samari a,
 moun pral achte dis liv bon farin Frans osinon ven liv lòj pou yon grenn pyès ajan. ² Gadkò wa a
 reponn pwofèt la, li di l': --Seyè a ta mèt louvri syèl la pou voye bagay sa yo, sa ou di a pa ka fèt.
 Elize di li: --Ou wè ou menm, w'ap wè sa rive ak pwòp je ou, men ou p'ap gen chans manje ladan
 l'! ³ ¶ Bò pòtay lavil Samari a, te gen kat gason ki te gen move maladi po. Yonn di lòt konsa:
 --Poukisa pou n' rete isit la ap tann lanmò? ⁴ Si nou di n'ap antre lavil la, avèk grangou ki gen la
 a, n'ap mouri. Si nou di n'ap rete isit la, n'ap mouri tou. Pito n' al pran yon chans nan kan lame Siri

a. Si yo fè pa nou, n'a viv. Men, si yo touye nou, n'a tou mouri mouri nou. ⁵ Se konsa, solèy te fèk kouche lè mesye yo leve, yo pati pou kan lame Siri a. Lè yo rive toupre kan an, yo pa wè pesonn.

⁶ Seyè a te fè sòlda lame Siri yo tandè yon bann bri, ou ta di yon pakèt cha lagè, kavalye sou chwal ak yon gwo lame k'ap mache vini sou yo. Tout sòlda peyi Siri yo te konprann se wa peyi Izrayèl la ki te pran kontak ak wa peyi Et la ansanm ak wa peyi Lejip la pou vin atake yo. ⁷ Se konsa, solèy te fèk kouche jou sa a lè yo leve yo kouri met deyò. Yo kite tant yo, chwal yo, bourik yo. Yo chape

kò yo kite kan an jan l' te ye a. ⁸ Lè kat mesye yo rive nan kan an, yo antre nan yon premye tant, yo manje, yo bwè. Yo pase men yo pran lò, ajan, rad yo jwenn, yo soti al sere yo. Lèfini, yo tounen,

yo antre nan yon dezyèm tant, yo fè menm bagay la. ⁹ Men lè sa a, yonn di lòt konsa: --Sa n'ap fè a pa bon non! Nou gen bon nouvèl konsa, nou pa ka kenbe l' pou nou ase. Si nou tann denmen maten pou n' al di moun yo sa, ou mèt sèten y'ap ban nou tò. Pito n' ale koulye a. Ann al bay nouvèl

la kay wa a! ¹⁰ Se konsa, yo tounen lavil Samari, yo rele gad ki t'ap fè pòs nan pòtay lavil la. Yo ba yo nouvèl la, yo di yo: --Nou t al nan kan moun Siri yo. Nou pa jwenn pesonn, nou pa tandè pesonn ap pale. Chwal ak bourik sèlman nou jwenn mare nan kòd. Ata tant yo te la jan yo te moute

yo. ¹¹ Faksyonnè ki t'ap fè pòs nan pòtay lavil la bay nouvèl la byen fò. Konsa, nouvèl la gaye

jouk li rive anndan palè a. ¹² ¶ Se te nan mitan lannwit. Wa a leve sot nan kabann li, li di chèf li yo: --Mwen pral esplike nou sa sòlda peyi Siri yo gen deyè tèt yo kifè yo fè sa. Yo konnen jan grangou ap bat nou isit la. Yo soti kite kan an, y' al kache nan plenn lan. Yo konprann nou pral soti kite lavil la pou n' al deyè manje. Lè sa a, y'a tonbe sou nou, y'a pran nou tou vivan, y'a antre nan

lavil la. ¹³ Men, yonn nan chèf li yo di l' konsa: --Poukisa nou pa voye kèk moun ak senk chwal ki rete yo pou y' al wè sa ki pase. Kit yo tounen vivan, kit yo mouri, yo p'ap pi mal ni pi byen pase

rès moun Izrayèl yo ki rete isit la. Wè pa wè, y' ap pase tankou sa ki mouri deja yo. ¹⁴ Se konsa yo chwazi kèk moun, wa a voye yo ak de cha lagè pou y' al wè sa ki rive nan kan lame peyi Siri a.

¹⁵ Mesye yo pati, yo rive jouk bò larivyè Jouden an. Sou tout wout la, yo wè rad ak yon bann lòt bagay sòlda peyi Siri yo te jete lè yo t'ap kouri met deyò a. Yo tounen, yo fè rapò yo bay wa a.

¹⁶ Menm lè a, pèp la kouri soti al piye kan lame peyi Siri yo. Jan Seyè a te di l' la, yo vann dis liv

bon farin frans pou yon pyès ajan, ven liv lòj pou menm pri a. ¹⁷ Men, wa a te mete chèf gadkò li a ap veye pòtay lavil la. Se konsa pèp la pilonnen l' anba pye yo lè y'ap pase nan pòtay lavil la. Li

mouri jan Elize te di l' sa lè wa a te vin wè l' la. ¹⁸ Lè sa a, Elize t'ap pale ak wa a li te di l' konsa: Denmen lè konsa, nan pòtay lavil Samari y'ap vann dis liv bon farin frans pou yon pyès ajan ak

ven liv lòj pou menm pri a. ¹⁹ Se konsa chèf gadkò a te di Seyè a te mèt louvri syèl la pou voye bagay sa yo, sa Elize di a pa ka fèt. Elize menm te reponn li, li te di l': Ou wè ou menm, w'ap wè

sa rive ak pwòp je ou, men ou p'ap gen chans manje ladan l'.²⁰ Se sa menm ki rive l'. Li mouri pilonnen anba pye pèp la lè y'ap pase nan pòtay lavil la.

Chapter 8

¹ ¶ Elize te pale ak madanm ki te manman ti gason li te fè tounen vivan sot nan lanmò a, li te di l' pou li pati ansanm ak tout fanmi l' al viv nan yon lòt peyi paske Seyè a te fè konnen talè konsa yon gwo grangou tapral tonbe sou tout peyi a pou sètan.² Fanm lan leve, li fè sa pwofèt la te ba li konsèy fè a. Li pati ansanm ak tout fanmi l' al rete nan peyi Filisti a pandan sètan.³ Lè sètan yo fin pase, li tounen nan peyi Izrayèl, l' al jwenn wa a, li mande l' pou yo renmèt li kay li ak jaden li.

⁴ Li jwenn wa a t'ap pale ak Gerazi, domestik pwofèt Bondye a, paske wa a te mande l' pou l' te vin rakonte l' tout bèl bagay Elize te fè yo.⁵ Gerazi t'ap rakonte wa a kijan Elize te fè pitit gason yon fanm leve soti vivan nan lanmò lè madanm lan vin pale ak wa a pou kay li ak jaden l' yo. Gerazi di wa a: --Monwa, men madanm lan ansanm ak pitit gason Elize te fè leve soti vivan nan lanmò a.

⁶ Wa a mande madanm lan pou li rakonte l' jan sa te pase. Lè madanm lan fini, wa a bay yonn nan chèf li yo lòd renmèt madanm lan tou sa ki te pou li ansanm ak tou sa jaden yo te rapòte depi jou

li te kite peyi a rive jouk jou li tounen an.⁷ ¶ Apre sa, Elize ale lavil Damas. Bennadad, wa peyi Siri a, te malad. y' al di wa a pwofèt la te nan lavil la.⁸ Wa a rele Azayèl, yonn nan chèf li yo, li di l' konsa: --Pote yon bagay fè pwofèt Bondye a kado. Lèfini, mande l' pou l' pale ak Seyè a pou

⁹ konnen si m'ap leve anba maladi sa a. Se konsa Azayèl al wè Elize, li pran tout kalite bon bagay li jwenn lavil Damas, li chaje yo sou karant chamo pote bay Elize. Lè li rive devan Elize, li di l' konsa: --Pitit ou, Bennadad, wa peyi Siri a, voye m' vin mande ou si l'ap leve anba maladi l' la.

¹⁰ Elize reponn: --Seyè a fè m' konnen l'ap mouri, men ou menm, al di l' l'ap refè.¹¹ Lè li fin di sa, Elize pran gade Azayèl nan je. Lè Azayèl wè sa, sa jennen l' anpil. Elize rete konsa, dlo pran

¹² kouri nan je l'. Azayèl mande l': --Mèt, poukisa w'ap kriye a? Elize reponn: --Paske mwen gen tan konnen tou sa ou pral fè pèp Izrayèl la pase. Ou pral met dife nan gwo fò yo, ou pral touye jenn gason l' yo ak nepe, ou pral kraze pitit yo, ou pral louvri vant fanm ansent yo.¹³ Azayèl mande l': --Kisa m' ye menm pou m' ta rive fè tou sa? Mwen pa pi bon pase yon chen. Elize reponn li: --Seyè

¹⁴ a fè m' konnen se ou ki pral wa peyi Siri. Azayèl kite Elize, li tounen al jwenn mèt li ki mande

¹⁵ l': --Sa Elize di ou? Li reponn: --Li di m' li sèten w'ap refè. Men nan denmen, Azayèl pran yon dra, li plonje l' nan dlo, li mete l' sou figi wa a. Wa a toufe, li mouri. Azayèl moute wa sou fotèy

16
Siri a nan plas Bennadad. ¶ Wa Joram, pitit gason Akab la, t'ap mache sou senkan depi li t'ap gouvènen peyi Izrayèl lè Joram, pitit gason Jozafa ki te wa peyi Jida a, moute wa nan plas papa l'.

17
Li te gen tranndezan lè li moute wa. Li gouvènen nan lavil Jerizalèm pandan witan. 18
Li te marye ak yon pitit fi Akab. Tankou lòt moun fanmi Akab yo, li mache pye pou pye dèyè wa peyi Izrayèl yo. Li fè sa ki mal nan je Seyè a. 19
Men, Seyè a pa t' vle detwi peyi Jida a, paske li te pwomèt David, sèvitè l' la, t'ap toujou gen yon moun nan ras li pou gouvènen peyi a devan Seyè a. 20
Sou reny wa Joram, moun peyi Edon yo pran lezam kont moun peyi Jida yo. Yo pran libète granmoun yo. Yo nonmen yon wa pou gouvènen yo. 21
Se konsa Joram soti ak tout cha lagè li yo, li mache sou lavil Zayi. Lame moun Edon yo sènen l'. Pandan lannwit, li menm ak chèf cha lagè li yo, yo leve yo atake moun Edon yo ki te sènen yo, yo pase soti nan mitan yo, yo chape. Tout sòlda yo gaye al lakay yo. 22
Se depi lè sa a, peyi Edon an soti anba lòd peyi Jida, yo granmoun lakay yo. Se menm lè a tou moun lavil Libna yo pran libète granmoun yo tou. 23
N'a jwenn rès istwa Joram ak tou sa li te fè ekri nan liv Istwa wa peyi Jida yo. 24
Lè Joram mouri, yo antere l' nan kavo zansèt li yo nan lavil David la. Apre sa, se Okozyas, pitit li a, ki moute wa nan plas li.

25
¶ Wa Joram, pitit Akab la, t'ap mache sou douzan depi li t'ap gouvènen peyi Izrayèl lè Okozyas, pitit Joram, moute wa sou fotèy peyi Jida a. 26
Li te gen venndezan. Li gouvènen nan lavil Jerizalèm pandan ennan. Manman l' te rele Atali. Se te pitit fi Akab, pitit pitit fi Omri, tou de wa peyi Izrayèl.

27
Okozyas mache pye pou pye dèyè moun fanmi Akab yo. Li te marye nan fanmi wa Akab. Li fè sa ki mal nan je Seyè a tankou yo. 28
Wa Okozyas mete tèt ansanm ak wa Joram, pitit Akab, pou y' al atake Azayèl, wa peyi Siri a. Lame yo kontre yonn ak lòt bò lavil Ramòt nan peyi Galarad.

29
Sòlda peyi Siri yo blese Joram nan batay la. Joram tounen lavil Jizreyèl pou l' te refè anba kou sòlda peyi Siri yo te ba li lavi Ramòt lè li t'ap goumen ak Azayèl, wa peyi Siri a. Okozyas, pitit Joram, wa peyi Jida a, desann lavil Jizreyèl al wè wa Joram, pitit Akab la, paske Joram te malad.

Chapter 9

1
¶ Pwofèt Elize rele yonn nan jenn pwofèt yo, li di l' konsa: --Pare pou ale lavil Ramòt nan peyi Galarad. Pran ti poban lwil oliv sa a avè ou. 2
Lè w'a rive, w'a chache kote Jeou, pitit gason Jozafa a, pitit pitit Nimchi a, ye. W'a antre kote l' ye a, w'a fè l' leve kite kanmarad li yo, w'a mennen l' nan yon pyès apa. 3
W'a pran ti poban lwil la, w'a vide l' sou tèt li. W'a di l': Men sa Seyè a di:

Mwen chwazi ou pou ou wa nan peyi Izrayèl. Lèfini, pa rete. Louvri pòt la, prese al fè wout ou.

⁴ Se konsa jenn pwofèt la ale lavil Ramòt nan peyi Galarad. ⁵ Li jwenn tout chèf lame yo te reyini ap pale ansanm. Li di konsa: --Chèf, mwen gen yon mesaj pou ou. Jeou mande l': --Pou kilès nan

nou? Pwofèt la reponn: --Pou ou wi, chèf. ⁶ Jeou leve, li antre nan kay la. Lamenn jenn pwofèt la vide lwil oliv la sou tèt Jeou, li di l' konsa: --Seyè a, Bondye pèp Izrayèl la, di: Mwen chwazi ou

pou ou wa sou pèp Izrayèl, pèp mwen an. ⁷ Ou pral touye tout fanmi Akab, mèt ou a. Se konsa

mwen pral peni Jezabèl pou touye li te touye pwofèt mwen yo ak tout lòt sèvitè m' yo. ⁸ Tout rès fanmi Akab la fèt pou disparèt. M'ap touye dènye gason ki gen nan fanmi an, jenn moun kou

granmoun. ⁹ Menm sa m' te fè fanmi Jewoboram, pitit Nebat, wa peyi Izrayèl la, menm sa m' te fè

fanmi Bacha, pitit Akija, wa peyi Izrayèl la tou, se sa m'ap fè fanmi pa l' la tou. ¹⁰ Pou Jezabèl menm, se chen ki pral manje kadav li nan jaden Jizreyèl la. P'ap gen pesonn pou antere l'. Lè li fin

di sa, li louvri pòt la, li kouri ale. ¹¹ ¶ Jeou tounen al jwenn lòt chèf parèy li yo. Yo mande l': --Sa ki genyen? Sa nèg fou sa a te bezwen ou fè? Jeou reponn yo: --Anyen. Nou konnen ki moun pwofèt

sa yo ye. Nou konnen sa y'ap mache di! ¹² Mesye yo reponn: --Manti w'ap ban nou la a! Annou wè non, monchè. Rakonte nou sa l' di ou. Lè sa a, Jeou di yo: --Li di m' Seyè a voye di m' li chwazi

m' pou wa peyi Izrayèl la. ¹³ Lamenn chèf lame yo wete manto yo, yo louvri yo sou tèt macheskalye

a, yo fè Jeou moute chita. Yo kònen klewon, yo di: --Viv Jeou, wa peyi Izrayèl! ¹⁴ Jeou, pitit Jozafa, pitit pitit Nimchi, moute yon konplo kont Joram. Joram te moute lavil Ramòt nan peyi

Galarad ak tout moun peyi Izrayèl yo al goumen ak Azayèl, wa peyi Siri. ¹⁵ Men, li te tounen lavil Jizreyèl fè mete renmèd sou kote sòlda peyi Siri yo te blese l' lè li t'ap goumen ak Azayèl, wa peyi Siri a. Lè sa a Jeou di moun ki te avè l' yo: --Si nou avè m' vre, pa kite pesonn soti lavil Ramòt al

bay nouvèl la lavil Jizreyèl. ¹⁶ ¶ Apre sa, li moute sou cha lagè li, li pati pou lavil Jizreyèl. Joram

te kouche malad toujou. Akazya, wa peyi Jida a, te desann vin wè l'. ¹⁷ Yon faksyonnè ki te nan fò won Jizreyèl la wè Jeou ansanm ak yon bann moun ki t'ap pwoche. Li rele: --Mwen wè yon bann moun k'ap vini wi! Joram bay lòd sa a: --Voye yon kavalye al kontre yo pou l' mande yo si y'ap

vin an zanmi! ¹⁸ Kavalye a pati al kontre Jeou, li di l': --Wa a bezwen konnen si se an zanmi w'ap vini! Jeou reponn li: --Sa pa gade ou! Pase dèyè do m'. Faksyonnè a bay nouvèl la konsa: --Mesaje

a rive bò kote yo, men li pa tounen. ¹⁹ Yo voye yon dezyèm kavalye. Lè li rive bò kote yo, li di: --Wa a mande ou si se an zanmi w'ap vini. Jeou reponn li: --Sa pa gade ou! Pase dèyè do m'.

²⁰ Faksyonnè a bay nouvèl la ankò: --Mesaje a rive bò kote yo, men li pa tounen. Lèfini, moun ki

sou premye cha a gen lè se Jeou, pitit pitit Nimchi a. L'ap kouri cha lagè a tankou moun fou. ²¹ Lè

sa a Joram di: --Pare cha lagè a pou mwen! Yo mennen chwal yo, yo pare cha lagè wa a. Joram, wa peyi Izrayèl la, ak Okozyas, wa peyi Jida a, pati, chak moun sou cha yo. y' al kontre Jeou. Yo kontre avè l' nan jaden ki te pou Nabòt, moun lavil Jizreyèl la. ²² Joram mande l': --Eske ou vin an zanmi? Jeou reponn: --Ki zanmi w'ap pale la a lè manman ou, Jezabèl, ap donner pi rèd nan fè maji ak nan sèvi zidòl? ²³ Joram kase tèt tounen, li kouri met deyò, li di Okozyas konsa: --Yo trayi nou, Okozyas! ²⁴ Jeou pran banza li, li voye yon flèch ak tout fòs li. Flèch la pran Joram nan mitan de zepòl li yo, li pèse kè l'. Joram tonbe nan cha lagè li a. ²⁵ Jeou rele Bidka, òdonans li an, li ba li lòd sa a: --Pran kadav la, jete l' nan jaden Nabòt, moun Jizreyèl la. Ou chonje lè ou menm avè m' nou te sou chwal nou dèyè Akab, papa l'? Seyè a te pale kont Joram, li te di: ²⁶ Menm jan ayè, mwen te wè jan nou te touye Nabòt ak pitit gason l' yo, se konsa m'a ba ou sa ou merite a nan menm jaden an. Se mwen menm, Seyè a, ki di sa. Koulye a, pran kadav li, jete l' nan jaden Nabòt la, jan Seyè a te di l' la. ²⁷ Lè Okozyas, wa peyi Jida a, wè sa ki te rive, li kouri nan cha lagè li a nan direksyon lavil Betagan. Men, Jeou pati dèyè l'. Li di: --Touye l' tou. Yo blese l' sou cha a nan ti moute ki mennen lavil Gour, toupre lavil Jibleyam. Men, Okozyas kenbe jouk li rive lavil Megido. Se la li mouri. ²⁸ Apre sa, chèf li yo mete kadav la sou cha a, yo mennen l' lavil Jerizalèm. Yo antere l' nan kavò fanmi li nan lavil David la. ²⁹ Joram, pitit Akab la, t'ap mache sou onzan depi li te wa peyi Izrayèl lè Okozyas te moute wa nan peyi Jida. ³⁰ ¶ Jeou rive lavil Jizreyèl. Lè Jezabèl vin konn sa, li pase fa bò je li, li ranje tèt li, l' al kanpe bò yon fennèt ap gade. ³¹ Lè Jeou antre nan pòtay lavil la, Jezabèl di l' konsa: --Ban m' nouvèl ou non, Zimri, ansasen mèt ou! ³² Jeou leve je l' gade bò fennèt la, li di: --Ki moun ki avè m'? De twa gad palè a parèt tèt yo nan yon fennèt. ³³ Jeou di yo: --Voye Jezabèl jete anba! Yo voye Jezabèl jete anba. San li gaye sou tout miray la ak sou chwal yo. Jeou fè chwal li yo ak cha lagè li a pase sou kadav la. ³⁴ Li antre nan palè a, li manje, li bwè. Apre sa li di: --Al okipe fanm madichon an! Antere l'. Tout jan, se pitit fi yon wa li ye. ³⁵ Men, lè mesye yo ale pou antere l' yo pa jwenn anyen pase zo bwa tèt li, de pye l' ak de pla men l' yo. ³⁶ Yo tounen al fè rapò yo bay Jeou. Jeou di konsa: --Se sa menm Seyè a te di ki pou te rive l' lè li te bay Eli, moun Tichbe a mesaj sa a pou li: Chen va manje Jezabèl nan peyi Jizreyèl. ³⁷ Kadav li pral tounen fimye gaye nan tout jaden zòn Jizreyèl la. Konsa pesonn p'ap ka rekonèt li.

Chapter 10

¹
 ¶ Akab te gen swasanndis pitit gason nan lavil Samari. Jeou ekri yon lèt, li voye yon kopi bay tout chèf ki lavil Samari yo, bay chèf fanmi yo ak bay moun ki reskonsab pitit Akab yo. Men sa li voye di yo:

² --Mwen konnen se nou menm ki gen reskonsablite tout pitit mèt nou yo, cha lagè li yo, chwal li yo, ranpa lavil la ak tout zam ki ladan l'. Resevwa n'a resevwa lèt sa a,

³ n'a chwazi yonn nan pitit mèt nou an, sa nou wè ki pi bon an, sa ki gen kalite pou sa, n'a mete l' sou fotèy la nan plas papa l'. Lèfini, n'a goumen pou pran defans li.

⁴ Men mesye yo te pè anpil, yo di: --De wa pa t' ka kenbe tèt ak li. Kote se nou ki pou ta rive fè l'!

⁵ Se konsa ofisye ki te anchaj palè a, gouvènè lavil la, chèf fanmi yo ak reskonsab pitit wa yo voye di Jeou: --Se sou zòd ou nou ye, n'ap fè tou

⁶ sa ou di nou fè. Men, nou p'ap mete pesonn wa. W'a fè sa w'a wè ki pi bon. Jeou voye yon dezyèm lèt ba yo, li di yo: --Si nou avè m', si nou vle koute lòd mwen enben, denmen lè konsa, pote tèt pitit Akab yo ban mwen isit lavil Jizreyèl. Swasanndis pitit Akab yo te lakay grannèg lavil Samari ki

⁷ t'ap elve yo. Lè yo resevwa lèt Jeou a, yo touye swasanndis pitit Akab yo, yo mete tèt yo nan panyen, yo voye yo bay Jeou lavil Jizreyèl.

⁸ Lè yo vin di Jeou yo te pote tèt pitit wa Akab yo, li bay lòd pou yo fè de pil ak yo bò pòtay lavil la, kite yo la jouk denmen maten.

⁹ Nan denmen maten li soti, l' ale kanpe bò pòtay la, li di moun ki te la yo: --Se mwen menm ki te fè konplo kont Joram, mèt mwen an, pou m' te touye l'. Nou pa gen anyen pou nou wè nan sa. Men, sa yo, ki moun ki

¹⁰ touye yo? Sa vle di Seyè a pa nan pale mete la. Tou sa li te di sou fanmi Akab la te fèt pou rive vre. Se Seyè a menm ki fè tou sa rive jan li te di sa nan bouch Eli, sèvitè l' la.

¹¹ Se konsa Jeou touye tout rès fanmi Akab ki te lavil Jizreyèl, tout grannèg ki t'ap sèvi avè l' li yo, bon zanmi l' yo ak prèt li yo. Li pa kite yonn ladan yo vivan.

¹² Apre sa, li pati pou lavil Samari. Sou wout la, lè li rive bò kan gadò mouton yo,

¹³ li jwenn ak kèk fanmi Okozyas, wa peyi Jida a. Li mande yo: --Ki moun nou ye? Yo reponn li: --Nou se fanmi wa Okozyas. Nou pral di pitit wa a ak pitit larenn lan bonjou.

¹⁴ Jeou bay moun ki te avè l' yo lòd sa a: --Pran yo tou vivan! Yo pran yo tou vivan, yo koupe kou yo bò kan gadò mouton yo. Te gen karannde moun antou. Yo pa kite yonn ladan yo

¹⁵ vivan. ¶ Jeou pati ankò. Sou wout li, li kontre ak Jonadab, pitit gason Rekab la, ki t'ap mache vin jwenn li. Jeou di l' bonjou, epi li di l' konsa: --Ou gen menm lide avè m'? Eske w'ap mache avè m'? Jonadab reponn: --Wi, m'ap mache avè ou. Jeou di li: --Si nou dakò, ban m' lanmen. Jonadab

¹⁶ ak Jeou bay lanmen. Jeou ede l' moute sou cha lagè a bò kote l'. Li di l' konsa: --Ann al avè m'.

¹⁷ W'a wè jan mwen soti pou m' sèvi Seyè a. Se konsa yo pati ansanm sou cha a. Lè yo rive lavil Samari, Jeou touye dènye rès moun nan fanmi Akab la. Li pa kite yonn ladan yo vivan, dapre pawòl

18 Seyè a te mete nan bouch pwofèt Eli a. Apre sa, Jeou reyini tout pèp lavil Samari a, li di yo:
 --Akab te sèvi Baal yon ti kras, mwen menm m'ap sèvi l' plis pase l'.
 19 Se poutèt sa, fè chache tout pwofèt yo, tout sèvitè Baal yo ak tout prèt li yo, fè yo vin jwenn mwen. Mwen vle pou tout moun la, paske mwen gen pou m' fè yon gwo sèvis pou Baal. Si yon moun pa la l'ap mouri. Men se yon
 20 plan Jeou te gen nan tèt li pou l' te touye tout moun k'ap sèvi Baal. Se poutèt sa li bay lòd pou
 21 yo fè tout moun konnen yo pral fè yon gwo sèvis pou Baal. Yo fè piblikasyon an. Jeou voye bay nouvèl la nan tout peyi Izrayèl la. Tout moun ki sèvi Baal yo vini. Pa t' gen yonn ki pa t' la. Yo
 22 tout antre nan tanp Baal la, yo plenn l' nèt. Jeou rele moun ki te reskonsab rad seremoni yo, li di l' konsa: --Pran rad seremoni bay tout sèvitè Baal yo. Nonm lan mete rad yo deyò, li bay yo chak
 23 yonn. Lèfini, Jeou ak Jonadab, pitit Rekab la, rive nan tanp Baal la, li di moun yo: --Se pou nou sèten se renk moun ki sèvi Baal ki la avè nou. Pa kite ankenn moun k'ap sèvi Seyè a nan mitan nou.
 24 Tout moun yo antre nan tanp lan pou ofri bèt pou yo touye pou Baal ak bèt pou yo boule pou li. Men, Jeou te mete katreven moun pa l' sou deyò tanp lan. Li te avèti yo, li te di yo: --Si yonn nan nou kite yonn nan moun mwen pral lage nan men nou yo chape, se li menm k'ap mouri nan plas li.
 25 Fini Jeou fini boule bèt yo pou Baal, li di gad yo ak kaptenn yo: --Antre, touye yo tout! Pa kite yonn ladan yo chape! Mesye Jeou yo antre ak nepe nan men yo, yo touye tout moun, yo trennen
 26 kadav yo met deyò. Lèfini, yo tounen nan pyès kote lotèl la ye nan tanp Baal la. Yo pran pote
 27 yo te mete kanpe pou Baal la, yo pote l' deyò, yo boule l'. Yo demoli lotèl Baal la ansanm ak
 28 tanp lan. Yo pran tanp lan yo fè l' sèvi latrin jouk jounen jòdi a. Se konsa Jeou fè disparèt sèvis
 29 Baal nan peyi Izrayèl la. ¶ Men li tonbe nan menm peche ak wa Jewoboram, pitit Nebat la, ki te lakòz pèp Izrayèl fè sa ki mal: li sèvi estati lò an fòm towò bèf ki te lavil Betèl ak lavil Dann.
 30 Seyè a di Jeou konsa: --Ou fè fanmi wa Akab la tou sa m' te vle fè yo. Ou byen fèt, ou fè sa ki dwat nan je m'. Se poutèt sa, pitit pitit ou yo pral wa nan peyi Izrayèl la rive sou kat jenerasyon.
 31 Men, Jeou pa t' bat kò l' plis pase sa pou l' te mache dapre lalwa Seyè a. Okontrè, li lage kò l' nan fè menm peche ak wa Jewoboram ki te lakòz pèp Izrayèl la fè sa ki mal.
 32 Lè sa a, Seyè a konmanse wonyen sou teritwa peyi Izrayèl la. Wa Azayèl atake moun Izrayèl yo toupatou nan peyi
 33 a, depi sou bò solèy leve larivyè Jouden jouk lavil Awoyè, anwo ravin Amon an nan sid, ki vle di nan tout peyi Galarad la ak peyi Bazan an kote moun branch fanmi Gad, fanmi Woubenn ak
 34 fanmi Manase yo rete. Tout rès istwa Jeou a ansanm ak tou sa li te fè ak kote yo rakonte jan li
 35 te vanyan sòlda, n'a jwenn tou sa ekri nan liv Istwa wa Izrayèl yo. Lè Jeou mouri, yo antere l'

lavil Samari. Se Joakaz, pitit li, ki moute wa nan plas li. ³⁶ Jeou te gouvènen peyi Izrayèl pandan ventwitan nan lavil Samari.

Chapter 11

¹ ¶ Lè Atali, manman Okozyas, vin konnen yo te touye pitit li a, li bay lòd pou yo touye tout rès fanmi wa a. ² Men lè yo t'ap touye pitit wa yo, Jocheba, pitit fi wa Joram, sè menm papa ak Okozyas la, te pran Joas, yonn nan pitit gason Okozyas yo, li cache l' ansanm ak moun ki te sèvi l' nouris la nan yon chanm kote moun dòmi nan tanp lan. Yo pa kite Atali wè Joas. Se konsa Joas pa mouri. ³ Joas rete cache nan tanp lan ansanm ak moun ki te sèvi l' nouris la pandan sizan. Atali menm t'ap gouvènen peyi a. ⁴ ¶ Sou setyèm lanne a, Jeojada, prèt la, fè chache tout kaptenn gadkò wa a ak tout chèf gad palè yo, li fè yo vin jwenn li nan tanp lan. La, li pran dizon ak yo, li fè yo fè sèman epi li moutre yo Joas, pitit wa a. ⁵ Apre sa, li ba yo lòd sa a: --Men sa nou pral fè! N'ap separe moun k'ap vin pran pòs jou repo a an twa gwoup menm fòs, yon gwoup va fè pòs nan palè wa a, ⁶ yon lòt gwoup va kanpe bò pòtay Sou a, dènye gwoup la va rete bò pòtay ki dèyè lòt gad yo. Y'a moute lagad nan palè wa a yonn apre lòt. ⁷ De gwoup gad k'ap leve pòs jou repo a va moute gad nan tanp Seyè a pou pwoteje wa a. ⁸ N'a fè yon gwo wonn ak wa a nan mitan. N'a kenbe zam nou nan men nou. Si yon moun ta vle pase nan mitan nou se pou nou touye l'. Kote wa a va fè, n'a fè avè l'. ⁹ Kaptenn yo fè tou sa Jeojada, prèt la, te ba yo lòd fè a. Yo pran tout gad yo, ni sa ki t'ap pran pòs jou repo a, ni sa ki t'ap leve pòs jou sa a tou, y' al jwenn Jeojada, prèt la. ¹⁰ Jeojada pran frenn ak plak pwotèj wa David yo ki te nan Tanp Seyè a, li bay kaptenn gad yo kenbe. ¹¹ Gad yo menm, yo chak ak zam yo nan men yo, li ranje yo tout devan Tanp lan depi sou bò dwat rive sou bò gòch, yo fè wonn lotèl la pou pwoteje wa a. ¹² Lè sa a, Jeojada fè pitit wa a soti. Li mete kouwòn lan sou tèt li, li renmèt li kontra Bondye a. Li vide lwil sou tèt li epi li deklare Joas wa. Tout moun bat bravo, yo pran rele: Viv wa a! ¹³ ¶ Lè Atali tande tout bri gad yo ak pèp la t'ap fè, li kouri al nan tanp lan kote moun yo te ye a. ¹⁴ Li wè wa a kanpe bò gwo poto a, jan sa te toujou fèt la. Tout chèf yo ak tout mizisyen yo te bò kote wa a, tout pèp la te kontan, yo t'ap kònen twonpèt. Lè Atali wè sa, kè l' kase. Li chire rad sou li, li rele: --Men yo moute yon konplo sou do m! ¹⁵ Lamenn Jeojada, prèt la, bay kaptenn ki t'ap kòmande lame a lòd sa a: --Pase nan mitan de ran sòlda yo avè l', mennen l' deyò. Touye nenpòt moun nou wè k'ap swiv li. Prèt la pa t' vle pou yo touye l' nan

Tanp Seyè a. ¹⁶ Yo pran Atali, yo mennen l' nan palè wa a bò Pòtay Chwal yo. Se la yo touye l'.
¹⁷ ¶ Apre sa, Jeojada, prèt la, pase yon kontra ant Seyè a ak wa a ansanm ak pèp la. Dapre kontra
a, yo rekonèt se pèp Seyè a yo ye. Li pase yon kontra tou ant wa a ak pèp la. ¹⁸ Lèfini, tout pèp la
al nan tanp Baal la, yo demoli l'. Yo kraze tout lotèl yo ak tout estati yo byen kraze. Yo touye Matan,
prèt Baal la, devan lotèl yo. Jeojada mete gad veye Tanp Seyè a. ¹⁹ Apre sa, li menm, kaptenn yo,
gad wa yo, gad palè yo ak tout pèp la, yo soti nan Tanp lan ansanm ak wa a, y' ale nan palè wa a.
Yo pase antre nan pòt gad yo. Joas al chita sou fotèy wa a. ²⁰ Tout pèp la te kontan anpil. Yo te
touye Atali ak kout nepe nan palè wa a. Apre sa, pa t' gen yon ti bri nan tout lavil la. ²¹ Joas te gen
sètan lè l' moute wa.

Chapter 12

¹ ¶ Lè sa a, Jeou t'ap mache sou sètan depi li t'ap gouvènen. Joas pase karantan lavil Jerizalèm
ap dirije peyi a. Manman l' te yon moun lavil Bècheba ki te rele Zibya. ² Joas pase tout lavi li ap
fè sa ki dwat devan Seyè a, paske se Jeojada, prèt la, ki te leve l'. ³ Tansèlman, se pa sa ki te fè
tanp zidòl yo disparèt nan peyi a. Moun yo te toujou ap fè ofrann, ap boule lansan nan tanp sa yo.
⁴ ¶ Yon jou, Joas rele prèt yo, li di yo: --Se nou ki pou reskonsab tout lajan ofrann yo pote nan tanp
Seyè a, ni lajan chak moun fèt pou yo bay pou sakrifis yo, ni lajan moun yo vle bay paske yo fè
lide a. ⁵ Chak prèt va resevwa lajan nan men moun yo konnen. Y'a sèvi ak lajan sa a pou fè
reparasyon ki bezwen fèt nan Tanp lan. ⁶ Men, Joas te gen tan ap mache sou venntwazan depi li
te wa, prèt yo pa t' fè ankenn reparasyon nan Tanp Seyè a. ⁷ Wa Joas rele Jeojada, prèt la, ansanm
ak tout lòt prèt yo, li di yo: --Poukisa nou pa fè reparasyon nan Tanp lan? Depi jòdi a, nou p'ap
resevwa lajan ankò nan men moun nou konnen yo. Se pou nou renmèt lajan an pou yo ka fè
reparasyon nan tanp lan. ⁸ Prèt yo dakò pou yo pa kenbe lajan yo resevwa nan men pèp la ankò,
lèfini pou yo pa reskonsab fè reparasyon nan Tanp lan. ⁹ Lè sa a, Jeojada, prèt la, pran yon bwat,
li fè yon twou nan kouvèti li, li mete l' toupre lotèl la, sou bò dwat lè w'ap antre nan Tanp Seyè a.
¹⁰ Se ladan l' prèt ki t'ap veye nan papòt Tanp lan mete tout lajan yo te bay pou Tanp lan. Chak
fwa yo wè te gen bonkou lajan nan bwat la, sekretè wa a ansanm ak granprèt la vini, yo kontwole
¹¹ lajan an, yo mete l' nan sak. Lè yo fin make kantite lajan yo te jwenn lan, yo renmèt li bay moun

ki te reskonsab travay ki pou fèt nan Tanp lan. Moun sa yo menm peye bòs chapant yo, lòt bòs ki t'ap fè travay nan Tanp lan,¹² bòs mason yo ak moun k'ap taye wòch yo. Yo achte bwa ak gwo wòch taye pou fè reparasyon nan Tanp Seyè a. Se yo menm ki te fè tout kalite depans pou sa.

¹³ Men yo pa t' pran nan lajan yo te pote nan Tanp lan pou fè gwo basin an ajan, kouto, bòl ak twonpèt yo, ni ankenn lòt bagay an lò osinon an ajan.¹⁴ Yo te renmèt tout lajan an bay moun ki te reskonsab travay yo pou yo te ka sèvi avè l' pou fè reparasyon nan Tanp Seyè a.¹⁵ Yo pa t' fè ankenn regleman ak moun ki te reskonsab lajan pou peye travayè yo, paske se moun serye yo te ye.¹⁶ Yo pa t' mete lajan ofrann moun fè pou peye pou sa yo fè ki mal ak lajan ofrann moun fè pou peche yo fè san yo pa konnen nan bwat Tanp Seyè a. Se pou prèt yo li te ye.¹⁷ ¶ Lè sa a,¹⁸ Azayèl, wa peyi Siri a, atake lavil Gat. Li pran l', lèfini li pran mache sou lavil Jerizalèm. Joas, wa peyi Jida a, pran tout bagay zansèt li yo, depi Jozafa ak Joram rive sou Okozyas ki te ansyen wa peyi Jida yo, te ofri bay Seyè a ansanm ak tout bagay li menm li te ofri bay Seyè a epi ki te nan Tanp lan, li pran tout lò li jwenn nan trezò Tanp lan ak tout lò ki te nan palè a, li voye yo fè Azayèl, wa peyi Siri a, kado.¹⁹ Azayèl chanje lide, li pa moute atake lavil Jerizalèm ankò. Tout rès istwa Joas ak tou sa li te fè, n'a jwenn yo ekri nan liv Istwa Wa peyi Jida yo.²⁰ Se pwòp chèf li yo ki te moute yon konplo sou do l'. Yo touye l' nan kay yo te bati sou ranblè ki sou bò solèy leve lavil Jerizalèm lan, sou wout ki mennen desann bò Sila a.²¹ Se Jozaka, pitit Chimeya, ak Jozabab, pitit Chomè, de chèf ki t'ap sèvi ak wa a, ki touye l'. Yo antere Joas nan lavil David nan kavo fanmi an. Se Amasya, pitit gason li, ki moute wa nan plas li.

Chapter 13

¹ ¶ Joas, pitit wa Okozyas, t'ap mache sou venntwazan depi li t'ap gouvènen peyi Jida a lè Joakaz, pitit Jeou, moute wa nan peyi Izrayèl. Li gouvènen pandan disetan nan lavil Samari.² Men, li te fè sa ki mal nan je Seyè a, li te lage kò l' nan fè menm peche ak Jewoboram, pitit Nebat la, li lakòz pèp Izrayèl la peche tou. Li pa t' soti pou l' te kite vye chemen sa a.³ Se konsa li fè Seyè a fache sou moun peyi Izrayèl yo. Se sa ki fè Seyè a te lage yo nan men Azayèl, wa peyi Siri a, ak nan men Bennadad, pitit li, anpil fwa.⁴ Lè sa a, Joakaz lapriyè nan pye Seyè a. Seyè a reponn li paske li te wè jan wa peyi Siri a t'ap toupizi moun peyi Izrayèl yo.⁵ Seyè a voye yon moun pou sove pèp la. Se konsa, moun peyi Izrayèl yo soti anba men pèp Siri a. Yo tanmen viv ankò ak kè poze tankou

⁶ anvan. Atousa, yo pa t' sispann fè peche fanmi Jewoboram yo te lakòz pèp la te fè. Yo lage kò
yo nan fè menm peche yo tou. Eitati Astate a te toujou kanpe lavil Samari. ⁷ Lame Joakaz te rete
avèk sèlman senkant kavalye, dis cha lagè ak dimil (10.000) sòlda apye, paske wa peyi Siri a te
⁸ touye tout lòt yo, li te pilonnen yo anba pye l' tankou pousyè. Rès istwa Joakaz la ansanm ak tou
⁹ sa li te fè, n'a jwenn yo ekri nan liv Istwa Wa peyi Izrayèl yo. Lè Joakaz mouri, yo antere l' lavil
¹⁰ Samari. Se Joas, pitit gason l' lan, ki moute wa nan plas li. ¶ Wa Joas t'ap mache sou transtetan
depi li t'ap gouvènen peyi Jida lè Joas, pitit Joakaz la, moute wa peyi Izrayèl. Li gouvènen peyi a
¹¹ pandan sèzan nan lavil Samari. Men, li te fè sa ki mal nan je Seyè a, li te lage kò l' nan fè menm
peche ak Jewoboram, pitit Nebat la, li lakòz pèp Izrayèl la peche tou. Li lage kò l' pi rèd ladan l'.
¹² Tout rès istwa Joas la, tout sa li te fè, jan li te vanyan sòlda lè li t'ap fè lagè ak Amasya, wa peyi
¹³ Jida a, tou sa te ekri nan liv Istwa Wa peyi Izrayèl yo. Lè li mouri, yo antere l' menm kote ak
¹⁴ lòt wa peyi Izrayèl yo lavil Samari. Se Jewoboram ki moute wa nan plas li. Elize tonbe malad.
Se maladi sa a ki te pou pote l' ale. Joas, wa peyi Izrayèl la, al wè l'. Wa a kriye, li lage kò l' sou
figi Elize, li di konsa: --Papa mwen! Papa mwen! Ou menm ki te tankou yon gwo lame pou pran
¹⁵ defans peyi Izrayèl la, w'ap mouri vre! Elize di li: --Pran yon banza ak kèk flèch. Wa a pran yon
¹⁶ banza ak kèk flèch. Lè sa a, Elize di l' konsa: --Pare ou pou ou tire yon flèch. Wa a pare. Elize
¹⁷ mete men pa l' sou men wa a. Li di l': --Louvri fennèt ki bay sou solèy leve a. Wa a louvri fennèt
la. Elize di li: --Koulye a tire! Wa a tire flèch la, lè sa a Elize pale byen fò li di: --Men flèch Seyè
a voye pou bay delivrans lan, flèch ki pral kraze peyi Siri a! Ou pral bat moun Siri yo lavil Afèk
¹⁸ jouk ou a fini ak yo. Apre sa, Elize di wa a: --Pran lòt flèch yo! Wa a pran flèch yo. Elize di li:
¹⁹ --Frape yo atè. Wa a frape yo atè an twa fwa epi li rete. Lè sa a, pwofèt la fache sou li, li di l'
konsa: --Se pou ou te frape atè a senk fwa osinon sis fwa. Konsa, ou ta bat moun peyi Siri yo jouk
²⁰ ou ta fini nèt nèt ak yo. Koulye a, ou pral bat yo twa fwa ase. ¶ Elize mouri, yo antere l'. Chak
²¹ lanne moun Moab yo te konn fè bann pou vin fè piyay nan peyi Izrayèl la. Yon lè moun peyi
Izrayèl yo tapral antere yon moun mouri, yo wè yonn nan bann moun Moab yo, yo prese lage kadav
la nan tonm Elize a epi yo met deyò. Kadav la al tonbe sou zosman Elize yo. Lamenm, mò a leve
²² vivan, li kanpe sou de pye l'. Azayèl, wa peyi Siri a, te maltrete pèp peyi Izrayèl la pandan tout
²³ reny Joakaz. Men, Seyè a te aji byen ak moun peyi Izrayèl yo, li te gen pitye pou yo. Li pa t'
kite moun fini ak yo, li te ede yo poutèt kontra li te pase ak Abraram, Izarak ak Jakòb. Li pa janm
²⁴ bliye pèp li a, jouk lè sa a. Lè Azayèl, wa peyi Siri a, mouri, se Bennadad, pitit li, ki moute wa

25
 nan plas li. Wa Joas, pitit gason Joakaz, repran nan men Bennadad tout lavil Azayèl te pran yo lè li t'ap fè lagè ak Joakaz la, papa l'. Joas bat Bennadad an twa fwa, li reprann tout lavil peyi Izrayèl yo nan men l'.

Chapter 14

1 ¶ Wa Joas, pitit gason Joakaz la, t'ap mache sou dezan depi li t'ap gouvènen peyi Izrayèl lè Amasya, pitit Joas, moute wa nan peyi Jida. 2 Li te gen vennsenkan lè sa a. Li gouvènen nan lavil Jerizalèm pandan ventnevan. Manman l' te rele Jeojadan. Se te yon moun lavil Jerizalèm. 3 Li te fè sa ki dwat devan Seyè a, men pa tankou David, zansèt li a. Li te fè menm jan ak Joas, papa l'. 4 Tansèlman, li pa t' kraze tanp bondye lòt nasyon yo, kifè moun yo te toujou al touye bèt, boule lansan nan tanp sa yo. 5 Lè Amasya santi li byen chita sou pouvwa a, li fè touye tout chèf nan lame a ki te touye papa l'. 6 Men, li pa t' manyen pitit ansasen sa yo, paske, dapre sa ki ekri nan liv lalwa Moyiz la, Seyè a te di: Papa pa gen dwa peye pou sa pitit li yo fè, ni pitit pa gen dwa peye pou sa papa yo fè. 7 Chak moun va peye pou sa yo fè. Amasya te touye dimil (10.000) sòlda peyi Edon nan fon Sale a. Li goumen jouk li pran lavil Sela. Li rele l' Jokteyèl, non ki rete pou li jouk jounen jòdi a. 8 ¶ Apre sa, Amasya voye misyon bay Joas, pitit Joakaz, pitit pitit Jeou, wa peyi Izrayèl la, li mande l' batay. 9 Joas voye reponn li: --Yon lè, yon touf pikan ki te sou mòn Liban voye yon misyon bay pye sèd la. Li di l' konsa: Bay pitit gason m' lan pitit fi ou la pou l' marye avè l'. Yon bèt nan bwa pase bò la, li kraze touf pikan an. 10 Se pou m' di ou, Amasya, ou kraze moun peyi Edon yo. Koulye a, ou santi ou gwonèg anpil. M' byen kontan pou ou. Gonfle lestonmak ou jan ou kapab, men rete sou sa ou fè a. Poukisa pou w'ap chache traka bay kò ou pou sa pase mal ni pou ou ni pou peyi Jida a? 11 Men, Amasya derefize koute l'. Se konsa, Joas soti ak lame li pou l' al goumen ak Amasya bò lavil Betchemèch nan peyi Jida. 12 Lame Izrayèl la bat lame Jida a byen bat. Tout sòlda peyi Jida yo vole gagè, y' al lakay yo. 13 Joas, wa peyi Izrayèl la, fè Amasya, wa peyi Jida a, prizonye lavil Betchemèch. Lèfini li mache sou lavil Jerizalèm, li kraze miray ranpa lavil la depi nan Pòtay Efrayim rive bò Pòtay Kwen an sou yon longè sankatreven mèt antou. 14 Li pran dènye bagay an lò ak an ajan li jwenn, tou sa ki te nan Tanp Seyè a ak tout richès ki te nan palè wa a. Li pote yo avè l' lavil Samari, san konte kantite moun li te fè prizonye sou kondisyon. 15 ¶ Tout rès istwa Joas la, tou sa li te fè, jan li te vanyan sòlda lè li t'ap goumen ak Amasya, wa

16
 peyi Jida a, nou jwenn tou sa ekri nan liv Istwa wa peyi Izrayèl yo. Lè Joas mouri, yo antere l' lavil Samari nan kavo wa Izrayèl yo. Se Jewoboram, pitit gason l' lan, ki moute wa nan plas li.

17
 Amasya, pitit Joas, wa peyi Jida a, te viv kenan ankò apre lanmò Joas, pitit Joakaz, wa peyi Izrayèl la. 18 Tout rès istwa Amasya a ekri nan liv Istwa wa peyi Jida yo. 19 Yo moute yon konplo lavil Jerizalèm pou yo touye Amasya. Se konsa Amasya kouri al kache lavil Lakis. Men, lènmi l' yo rapouswiv li, yo touye l'. 20 Apre sa, yo mete kadav li sou chwal, yo tounen avè l' lavil Jerizalèm, yo antere l' lavil David la nan kavo zansèt li yo. 21 Tout pèp peyi Jida a pran Azarya, pitit gason Amasya a, yo fè l' wa nan plas papa l'. Azarya te gen sèzan lè sa a. 22 Se li menm ki reprann lavil Elat, li fè l' tounen anba otorite wa Jida a, apre lanmò papa l'. 23 ¶ Amasya, pitit Joas, t'ap mache sou kenan depi li t'ap gouvènen peyi Jida lè Jewoboram, pitit Joas, wa peyi Izrayèl la, moute wa nan plas papa l'. Li gouvènen nan lavil Samari pandan karanteyen an. 24 Men li fè sa ki mal nan je Seyè a, li te lage kò l' nan fè menm peche ak Jewoboram, pitit Nebat la, li lakòz pèp Izrayèl la peche tou. 25 Se Jewoboram ki reprann tout zòn ki te pou peyi Izrayèl la depi nan Pas Amat la nan nò, rive Lanmè Mouri a nan sid, jan Seyè a, Bondye pèp Izrayèl la, te bay Jonas, sèvitè l' la, mesaj la. Jonas sa a, pitit Amitayi, te yon pwofèt lavil Gatefè. 26 Seyè a te wè jan pèp Izrayèl la t'ap soufri anpil. Tout moun, jenn gason kou granmoun, t'ap pase pa yo. Pa t'gen pyès moun pou pote yo sekou.

27
 Se konsa, li voye Jewoboram, pitit Joas la, pou vin delivre yo, paske se pa t' janm lide l' pou l' te disparèt yo sou latè. 28 Tout rès istwa Jewoboram lan, tou sa li fè, jan li te vanyan sòlda lè li t'ap fè lagè, jan li te fè lavil Damas ak lavil Amat soti anba men moun Jida yo tounen anba otorite wa Izrayèl la, n'a jwenn tou sa ekri nan liv Istwa wa Izrayèl yo. 29 Lè Jewoboram mouri, yo antere l' menm kote ak tout wa Izrayèl yo. Se Zakari, pitit li, ki moute wa nan plas li.

Chapter 15

1
 ¶ Wa Jewoboram te gen vennsetan depi li t'ap gouvènen peyi Izrayèl lè Azarya, pitit Amasya, moute wa nan peyi Jida. 2 Li te gen sèzan lè sa a. Li gouvènen nan lavil Jerizalèm pandan senkanndezan. Manman l' te rele Jekolya. Se te moun lavil Jerizalèm. 3 Li te fè sa ki dwat devan Seyè a, menm jan ak Amasya, papa l'. 4 Tansèlman, li pa t' kraze tanp bondye lòt nasyon yo, kifè

⁵ moun yo te toujou al touye bèt, boule lansan nan tanp sa yo. Seyè a peni wa a pou sa. Li voye yon move maladi po sou li ki rete avè l' jouk jou li mouri. Li te rete nan yon kay apa, yo pa t' kite l' gouvènèn. Se Jotam, pitit li, ki te chèf nan palè a. Se li menm ki te regle tout zafè nan peyi a.

⁶ Tout rès istwa Azarya a ak tou sa li te fè, n'a jwenn sa ekri nan liv Istwa wa peyi Jida yo. ⁷ Lè Azarya mouri, yo antere l' menm kote ak zansèt li yo nan lavil David la. Se Jotam, pitit gason l'

⁸ lan, ki moute wa nan plas li. ¶ Wa Azarya te gen tranntwitan depi li t'ap gouvènèn peyi Jida lè Zakari, pitit Jewoboram, moute wa nan peyi Izrayèl. Li gouvènèn nan lavil Samari pandan sis mwa.

⁹ Men li fè sa ki mal nan je Seyè a tankou zansèt li yo. Li te lage kò l' nan fè menm peche ak

¹⁰ Jewoboram, pitit Nebat la, li te lakòz pèp Izrayèl la peche tou. Chaloum, pitit Jabès, moute yon konplo sou do Zakari. Li atake l' lavil Jibleyam, li ansasinen l'. Apre sa, li moute wa nan plas li.

¹¹ Tout rès istwa Zakari a ekri nan liv Istwa wa peyi Izrayèl yo. ¹² Se konsa pawòl Seyè a te di Jeou a rive vre. Li te di l': Pitit ou yo ap chita sou fotèy wa peyi Izrayèl la jouk sou kat jenerasyon

¹³ apre ou. Wa Azarya te gen trannevan depi li t'ap gouvènèn peyi Jida a lè Chaloum, pitit Jabès,

¹⁴ moute wa nan peyi Izrayèl. Li gouvènèn nan lavil Samari pandan yon mwa. Menayèm, pitit gason Gadi, soti lavil Tiza, li moute lavil Samari, l' al atake Chaloum. Li touye l', lèfini li moute

¹⁵ wa nan plas li. Tout rès istwa Chaloum lan ak konplo li te moute sou do Zakari a, tou sa ekri

¹⁶ nan liv Istwa wa peyi Izrayèl yo. Apre sa, Menayèm soti lavil Tiza, li atake lavil Tifsak, li touye dènye moun ki te rete ladan l' ak nan tout vwazenaj lavil la. Li menm rive louvri vant tout fanm

¹⁷ ansent yo. Li te fè sa paske yo pa t' louvri pòtay lavil la ba li. Wa Azarya t'ap mache sou tranzeyennan depi li t'ap gouvènèn peyi Jida lè Menayèm, pitit Gadi, moute wa nan peyi Izrayèl.

¹⁸ Li gouvènèn nan lavil Samari pandan dizan. Men, li fè sa ki mal nan je Seyè a. Jouk jou li mouri a, li lage kò l' nan fè menm peche ak Jewoboram, pitit Nebat la. Li lakòz pèp Izrayèl la peche tou.

¹⁹ Poul, wa peyi Lasiri, anvayi peyi a. Menayèm bay Poul twamil (3000) kilo ajan pou Poul te ka

²⁰ ede l' chita pouvwa li nan peyi a. Pou Menayèm te ka peye kantite lajan sa a bay wa Lasiri a, li pase lòd nan peyi a pou chak moun rich nan peyi Izrayèl la bay yon demi kilo ajan yo chak. Apre

²¹ sa, wa peyi Lasiri a tounen lakay li, li pa rete pi lontan nan peyi Izrayèl. Tout rès istwa Menayèm

²² lan ak tou sa li te fè, nou jwenn sa ekri nan liv Istwa wa peyi Izrayèl yo. Lè li mouri, se Pekaya,

²³ pitit li, ki moute wa nan plas li. Wa Azarya t'ap mache sou senkantannan depi li t'ap gouvènèn peyi Jida lè Pekaya, pitit Menayèm, moute wa nan peyi Izrayèl. Li gouvènèn nan lavil Samari pandan

²⁴ dezan. Men, li fè sa ki mal nan je Seyè a. Li te lage kò l' nan fè menm peche ak Jewoboram,

²⁵
 pitit Nebat la. Li lakòz pèp Izrayèl la peche tou. Men, yonn nan òdonans li yo, Peka, pitit gason Remalya, moute yon konplo sou do li. Li pran senkant gason nan lavil Galarad, l' al atake gwo fò
²⁶
 ki nan palè wa a lavil Samari, li touye l'. Lèfini, li moute wa nan plas li. Tout rès istwa Pekaya
²⁷
 a ak tou sa li te fè, nou jwenn sa ekri nan liv Istwa wa peyi Izrayèl yo. Wa Azarya t'ap mache sou senkanndezan depi li t'ap gouvènen peyi Jida lè Peka, pitit Remalya, moute wa nan peyi Izrayèl.
²⁸
 Li gouvènen nan lavil Samari pandan ventan. Li fè sa ki mal nan je Seyè a. Li te lage kò l' nan
²⁹
 fè menm peche ak Jewoboram, pitit Nebat la. Li lakòz pèp Izrayèl la peche tou. Se sou reny Peka, Tiglat Pilesè, wa peyi Lasiri, anvayi peyi a, li pran lavil Ijon, lavil Abèl bèt Maka, lavil Janoa, lavil Kadès, lavil Azò, tout teritwa Galarad, tout teritwa Galile ak tout zòn Neftali a. Li fè tout
³⁰
 moun yo prizonye, li depòte yo nan peyi Lasiri. Lè sa a, Oze, pitit gason Ela a, moute yon konplo sou do Peka, pitit Remalya a. Li atake l', li touye l'. Lèfini, li moute wa nan plas li. Lè sa a, Jotam,
³¹
 pitit gason Ozyas la, te gen ventan depi li t'ap gouvènen peyi Jida. Tout rès istwa Peka a ak tou
³²
 sa li te fè, nou jwenn sa ekri nan liv Istwa wa peyi Izrayèl yo. ¶ Wa Peka, pitit Remalya, t'ap mache sou dezan depi li t'ap gouvènen peyi Izrayèl lè Jotam, pitit Ozyas, moute wa nan peyi Jida.
³³
 Li te gen vennsenkan lè li moute wa. Li gouvènen nan lavil Jerizalèm pandan sèzan. Manman l' te rele Jewoucha. Se te pitit fi Zadòk.
³⁴
 Li te mache dwat devan Seyè a, li te fè menm jan ak Ozyas,
³⁵
 papa l'. Tansèlman, li pa t' kraze tanp bondye lòt nasyon yo, kifè moun yo te toujou al touye bèt, boule lansan nan tanp sa yo. Se Jotam ki te bati gwo pòtay ki nan Tanp Seyè a.
³⁶
 Tout rès istwa Jotam ak tou sa li te fè, n'a jwenn sa ekri nan liv Istwa wa peyi Jida yo.
³⁷
 Se sou reny li Seyè a te voye Rezin, wa peyi Siri, ak Peka, pitit Remalya a, vin atake peyi Jida yonn apre lòt.
³⁸
 Lè Jotam mouri, yo antere l' menm kote ak zansèt li yo nan lavil David, zansèt li a. Se Akaz, pitit gason li, ki moute wa nan plas li.

Chapter 16

¹
 ¶ Wa Peka, pitit Remalya, te gen tan gen disetan depi li t'ap gouvènen peyi Izrayèl lè Akaz, pitit Jotam, moute wa peyi Jida.
²
 Akaz te gen ventan lè sa a. Li gouvènen nan lavil Jerizalèm pandan sèzan. Men, li pa t' mache dwat devan Seyè a, Bondye li a, tankou David, zansèt li a, te fè
³
 l'. Li te pito fè tankou wa peyi Izrayèl yo, li menm rive ofri pwòp pitit gason l' pou yo boule pou

zidòl yo, dapre vye prensip krimenèl nasyon Seyè a te mete deyò pou fè plas pou moun Izrayèl yo
 te konn swiv. ⁴ Li fè touye bèt, li boule lansan nan tout tanp zidòl yo sou ti mòn yo ak anba gwo
 pyebwa. ⁵ ¶ Se sou reny Akaz, Rezin, wa peyi Siri a, ak Peka, pitit gason Remalya a, wa peyi
 Izrayèl, mache sou lavil Jerizalèm pou yo atake l'. Yo fèmen Akaz anndan lavil la, men yo pa t' ka
 pran lavil la. ⁶ Se lè sa a wa peyi Edon an pwofite pou reprann lavil Elat nan men moun peyi Jida
 yo, li mete yo deyò nan lavil la. Se konsa moun Edon yo tounen nan lavil la kote yo rete jouk jounen
 jòdi a. ⁷ Lè sa a, Akaz voye mesaj bay Tiglat Pilesè, wa peyi Lasiri a, pou di l' konsa: --M'ap sèvi
 ou tankou pitit ou. Tanpri, vin delivre m' anba men wa peyi Siri a ak wa peyi Izrayèl la ki vin atake
 m'. ⁸ Akaz pran ajan ak lò ki te nan tanp lan ak nan trezò palè wa a, li voye yo fè Tiglat Pilesè, wa
 peyi Lasiri a, kado. ⁹ Wa Lasiri a koute l' vre, li moute al atake lavil Damas, li pran l'. Li depòte
 tout moun ki te rete la, mennen yo lavil Ki, epi li fè touye Rezin. ¹⁰ ¶ Lè wa Akaz te lavil Damas
 pou l' te kontre ak Tiglat Pilesè, wa peyi Lasiri a, li wè lotèl ki te la a. Li leve plan lotèl la, li voye
 l' bay Ouri, prèt la. ¹¹ Se konsa, Ouri gen tan bati yon lotèl sou modèl wa Akaz te voye ba li soti
 Damas la anvan menm Akaz tounen soti Damas. ¹² Lè Akaz tounen soti Damas, li wè lotèl la, li
 pwoche, li moute bò lotèl la. ¹³ Li fè boule yon bèt sou li, li fè ofrann grenn jaden. Li vide yon
 ofrann diven ak san bèt li te ofri pou di mèsè a sou lotèl la tou. ¹⁴ Lotèl an kwiv ki apa pou Seyè a
 te ant lotèl sa a ak kay Seyè a. Akaz fè deplase l' wete devan Tanp lan, li mete l' sou kote lòt lotèl
 la sou bò nò. ¹⁵ Epi Akaz bay Ouri lòd sa a: --Se sou gwo lotèl mwen an pou ou fè ofrann bèt yo
 boule nèt chak maten an ansanm ak ofrann grenn jaden chak aswè a. Se sou li pou ou fè ofrann bèt
 pou boule nèt ak ofrann grenn jaden pou wa a ak pou tout pèp la. Se sou li w'a ofri san bèt y'a touye
 yo ak diven ofrann yo. Se sou li w'a vide san tout bèt yo ofri pou boule nèt ak bèt y'a ofri bay
 Bondye. Pou lotèl an kwiv la menm, kite sa sou kont mwen. ¹⁶ Ozyas, prèt la, fè tou sa wa Akaz
 te ba li lòd fè. ¹⁷ ¶ Apre sa, wa Akaz fè demoute kabwa an kwiv yo. Li fè wete gwo basin an kwiv
 ki te chita sou bèf yo, li fè mete l' sou yon pave wòch. ¹⁸ Lèfini, pou l' te fè wa peyi Lasiri a plezi,
 li wete platfòm yo te bati anndan Tanp lan pou jou repo a. Li fè fèmen pòt deyò a kote wa a te konn
 pase pou antre nan Tanp lan. ¹⁹ Tout rès istwa wa Akaz la, tou sa li te fè, n'a jwenn sa ekri nan liv
 Istwa wa peyi Jida yo. ²⁰ Lè wa Akaz mouri, yo antere l' menm kote ak zansèt li yo nan Lavil
 David. Se Ezeqyas, pitit li, ki moute wa nan plas li.

Chapter 17

¹ ¶ Wa Akaz t'ap mache sou douzan depi li t'ap gouvènen peyi Jida lè Oze, pitit Ela, moute wa nan peyi Izrayèl. Li gouvènen nan lavil Samari pandan nevan. ² Li fè sa ki mal nan je Seyè a, men tansèlman pa tankou lòt wa ki te gouvènen peyi Izrayèl la anvan l' yo. ³ Salmanaza, wa peyi Lasiri a, atake Oze. Oze soumèt devan l'. Li peye l' yon lajan chak lanne. ⁴ Men, Salmanaza vin dekouvri Oze t'ap moute konplo sou do l'. Oze te voye mesajè bò kot So, wa peyi Lejip, pou mande l' konkou. Lèfini, li te sispann voye lajan li te gen pou l' peye wa peyi Lasiri a chak lanne. Se konsa Salmanaza fè arete Oze, mete l' nan prizon ak chenn nan pye l'. ⁵ Salmanaza anvayi peyi Izrayèl la. Li sènen lavil Samari pandan twazan. ⁶ Oze te gen nevan depi li te wa lè wa Lasiri a pran lavil Samari. Salmanaza fè tout pèp Izrayèl la prizonye, li depòte yo nan peyi Lasiri. Li mete yon pati ladan yo lavil Ala, toupre larivyè Abò nan zòn Gozan, yon pati nan lavil peyi Medi yo. ⁷ ¶ Sa te rive konsa paske moun peyi Izrayèl yo te fè peche kont Seyè a, Bondye yo a, ki te fè yo soti kite peyi Lejip, ki te delivre yo anba men farawon an, wa peyi Lejip la. Yo t'ap sèvi lòt bondye. ⁸ Yo t'ap swiv mès moun lòt nasyon Seyè a te mete deyò nan peyi a pou fè plas pou yo. Yo t'ap mache dapre lòt vye prensip wa Izrayèl yo te ba yo. ⁹ Lèfini, moun peyi Izrayèl yo te fè yon bann bagay yo pa t' dwe fè devan Seyè a. Yo bati tanp pou zidòl nan tout lavil yo, depi nan ti bouk kote ki gen avanpòs pou faksyonnè rive nan gwo lavil ak ranpa yo. ¹⁰ Sou tout mòn, anba tout gwo pyebwa, yo kanpe gwo wòch ak estati pou Achera, zidòl fanm lan. ¹¹ Yo boule lansan sou tout lotèl zidòl yo tankou moun Seyè a te mete deyò nan peyi a te konn fè. Yo fè yon bann bagay derespektan ki lakòz Seyè a te fache anpil. ¹² Yo adore zidòl, bagay Seyè a te ba yo lòd pa fè. ¹³ Seyè a te voye mesajè ak pwofèt li yo avèti moun peyi Izrayèl yo ansanm ak moun peyi Jida yo. Li te byen di yo: Manyè kite move chemen n'ap swiv la! Fè sa m' mande nou fè. Kenbe lòd mwen yo jan sa ye nan lalwa mwen te bay zansèt nou yo, lalwa mwen te fè pwofèt yo, sèvitè m' yo, moutre nou an. ¹⁴ Men, yo pa koute l', yo fè tèt di tankou zansèt yo ki pa t' mete konfyans yo nan Seyè a, Bondye yo a. ¹⁵ Yo derefize kenbe lòd li yo, yo pa respekte kontra li te pase ak zansèt yo. Yo pa okipe avètisman li te ba yo, yo pran sèvi zidòl ki pa vo anyen. Yo menm, yo pèdi valè yo. Yo pran fè tankou lòt nasyon k'ap viv bò kote yo t'ap fè, yo dezobeyi lòd Seyè a ki te di yo pa fè sa. ¹⁶ Yo lage tout kòmandman Seyè a, Bondye yo a, te ba yo. Yo fè de estati towò an kwiv pou yo sèvi ak yon pòtre Achera, zidòl fanm lan, yo sèvi zetwal nan syèl la ansanm ak Baal. ¹⁷ Yo bay pitit fi ak pitit gason yo pou boule pou bondye lòt nasyon yo, y' al dèyè divinò ak chòche. Yo vann tèt yo, yo lage kò yo nan fè sa ki mal

18 nan je Seyè a, pou yo te ka fè l' move jouk li pa kapab ankò. Se konsa Seyè a fè yon sèl move
 sou pèp Izrayèl la, li wete yo devan je l'. Pa rete pase branch fanmi Jida a. 19 Men, ata moun peyi
 Jida yo tou pa t' kenbe lòd Seyè a, Bondye yo a. Yo t'ap fè tankou moun peyi Izrayèl yo. Yo t'ap
 20 fè tout vye bagay moun peyi Izrayèl yo te ranmase. Se poutèt sa Seyè a vire do bay dènye moun
 nan ras Izrayèl la. Li fè yo wont, li lage yo nan men yon bann piyajè, jouk li wete yo devan je l'.
 21 Li separe pèp la, li mete moun peyi Izrayèl yo yon bò, moun fanmi David yo yon bò. Moun peyi
 Izrayèl yo pran Jewoboram, pitit Nebat, yo mete l' wa pou gouvènèn yo. Jewoboram lakòz yo kite
 22 chimen Seyè a nèt. Li fè yo fè pi gwo peche toujou. Moun peyi Izrayèl yo pran fè tankou
 23 Jewoboram, yo donnen ladan l' san rete. Bout pou bout, Seyè a wete yo nèt devan je l', jan li te
 voye sèvitè l' yo, pwofèt yo avèti yo a. Se konsa yo depòte moun peyi Izrayèl yo byen lwen nan
 24 peyi Lasiri kote yo ye jouk jounen jòdi a. ¶ Wa peyi Lasiri a pran moun lavil Babilòn, moun
 lavil Kout, moun lavil Ava, moun lavil Ama ak moun lavil Sefavayim, li voye yo al rete nan lavil
 peyi Samari nan plas moun Izrayèl li te fè depòte yo. Moun yo pran peyi Samari a pou yo, y' al rete
 25 nan tout lavil yo. Moun sa yo pa t' nan sèvi Seyè a. Konsa, lè yo fèk vin tabli nan peyi a, Seyè
 26 a voye lyon ki touye kèk ladan yo. Yo voye di wa peyi Lasiri a: Moun ou te voye vin rete lavil
 peyi Samari yo pa konnen jan pou yo sèvi Bondye peyi a. Se konsa bondye peyi a voye lyon k'ap
 27 fini ak yo. Lè sa a, wa peyi Lasiri a bay lòd sa a: Pran yonn nan prèt nou te fè prizonye yo, voye
 28 l' tounen al viv laba a pou l' ka moutre moun yo jan pou yo sèvi bondye peyi a. Se konsa yonn
 nan prèt yo te depòte yo tounen nan peyi Samari, l' al rete lavil Betèl, li moutre yo jan pou yo fè
 29 sèvis pou Seyè a. Men, chak nasyon te fè bondye pa yo nan lavil kote yo te rete a, yo mete yo
 30 nan tanp ansyen moun peyi Izrayèl yo te bati pou zidòl yo. Moun lavil Babilòn yo te fè pòtre
 Soukòt Benòt. Moun lavil Kout yo te fè pòtre Negal. Moun lavil Amat yo te fè pòtre Asima.
 31 Moun lavil Ava yo te fè pòtre Nibaz ak Tatak. Moun lavil Sefavayim yo ofri pitit yo pou boule
 32 pou Adramelèk ak Anamelèk, bondye pa yo. Kifè yo t'ap sèvi Seyè a, men an menm tan yo
 33 chwazi moun nan mitan yo pou sèvi prèt zidòl yo, pou fè sèvis pou yo nan tanp zidòl yo. Se
 konsa yo t'ap adore Seyè a men yo t'ap adore bondye pa yo tou, dapre koutim peyi kote yo te soti.
 34 Jouk jounen jòdi a y'ap fè sa yo te konn fè a. Men, yo pa adore Seyè a, yo pa fè sa li mande nan
 lalwa ak kòmandman li te bay moun fanmi Jakòb yo swiv. Se Jakòb sa a Bondye sèl Mèt la te bay
 35 yon lòt non, li te rele l' Izrayèl. Seyè a te pase yon kontra ak pitit Jakòb yo, li te ba yo lòd sa a:
 Pa sèvi lòt bondye, pa mete jenou atè devan yo. Pa fè sèvis pou yo, pa ofri ankenn bèt pou touye

³⁶
 pou yo. Se mwen menm Seyè a pou nou sèvi, mwen menm Bondye nou an ki te fè nou soti kite peyi Lejip ak gwo kouraj mwen, ak fòs ponyèt mwen. Se mwen menm sèlman pou nou sèvi, pou nou adore. Se pou mwen ase pou nou ofri bèt pou touye. ³⁷ Se pou nou toujou kenbe prensip ak regleman, lòd ak kòmandman mwen te ekri ban nou pou nou te ka swiv yo chak jou. Piga nou gen krentif pou bondye lòt nasyon yo. ³⁸ Piga nou bliye kontra mwen te pase ak nou an. Piga nou gen krentif pou bondye lòt nasyon yo. ³⁹ Se mwen menm ase, Seyè a, Bondye nou an, pou nou sèvi, m'a delivre nou anba men lènmi nou yo. ⁴⁰ Men, moun yo pa koute m', yo toujou ap fè sa yo te konn fè anvan an. ⁴¹ Konsa moun nasyon sa yo t'ap sèvi Seyè a, men yo te toujou ap sèvi zidòl pa yo tou. Pitit yo ak pitit pitit yo ap fè tankou papa yo jouk jounen jòdi a.

Chapter 18

¹
 ¶ Oze, pitit Ela, t'ap mache sou twazan depi li t'ap gouvènen peyi Izrayèl lè Ezekyas, pitit gason Akaz, moute wa nan peyi Jida. ² Lè sa a, li te gen vennsenkan. Li gouvènen nan lavil Jerizalèm pandan ventnevan. Manman l' te rele Abi. Se te pitit fi Zakari. ³ Li te mache dwat devan Seyè a, li te fè menm jan ak David, zansèt li a. ⁴ Se li menm ki te kraze tout tanp zidòl yo. Li kraze tout wòch yo te mete kanpe pou zidòl yo, li koupe estati Achera yo. Li kraze an miyèt moso estati sèpan an kwiv Moyiz te fè a, paske jouk lè sa a toujou pèp Izrayèl la t'ap boule lansan pou li. Yo te rele l' Newouchtan. ⁵ Ezekyas te mete tout konfyans li nan Seyè a, Bondye pèp Izrayèl la. Peyi Jida a pa janm gen yon wa tankou l', ni anvan l' ni apre l'. ⁶ Li te kenbe Bondye li fèm, li pa t' janm dezobeyi l'. Li te fè tou sa Seyè a te mande dapre lòd Seyè a te bay Moyiz. ⁷ Se poutèt sa, Seyè a te toujou la avè l'. Tou sa li te fè te byen soti. Ezekyas kenbe tèt ak wa peyi Lasiri a. Li derefize soumèt devan li. ⁸ Li bat moun peyi Filisti yo, li kouri dèyè yo rive lavil Gaza ak sou fwontyè l' yo, li piye dènye kote yo te rete, depi ti bouk avanpòs yo rive nan gwo lavil ak ranpa yo. ⁹ ¶ Ezekyas t'ap mache sou katran depi li te wa nan peyi Jida, Oze, pitit Ela a menm, te gen sètan depi li t'ap gouvènen peyi Izrayèl la lè Salmanaza, wa peyi Lasiri a, anvayi peyi Izrayèl, li sènen lavil Samari. ¹⁰ Sou bout twazan, li pran lavil la. Lè sa a, Ezekyas t'ap mache sou sizan depi li te wa, Oze menm te gen nevan depi li t'ap gouvènen peyi Izrayèl. ¹¹ Salmanaza fè tout moun peyi Izrayèl yo prizonye. Li depòte yo nan peyi Lasiri. Li mete yon pati ladan yo lavil Ala, toupre larivyè Abò nan zòn Gozan

12
an, yon pati nan lavil peyi Medi yo. Lavil Samari te tonbe paske moun pèp Izrayèl yo pa t' obeyi Seyè a, Bondye yo a. Yo pa t' respekte kontra li te pase ak yo a. Yo pa t' fè tou sa Moyiz, sèvitè

13
Seyè a, te mande yo fè. Yo pa t' koute l'. Wa Ezekyas t'ap mache sou katòzan depi li t'ap gouvènen peyi Jida lè Senakerib, wa peyi Lasiri, vin atake tout lavil ak gwo ranpa peyi Jida yo. Li pran yo.

14
Lè sa a, Ezekyas, wa peyi Jida, voye yon mesaj bay Senakerib ki te lavil Lakis. Li di l' konsa: --Sa m' fè a mal. Tanpri, pa atake m' ankò. Nenpòt kisa w'a egzije m' bay, m'ap ba ou li. Wa peyi

15
Lasiri a egzije pou Ezekyas, wa peyi Jida a, ba li dis tòn ajan ak yon tòn lò. Ezekyas ba li tout

16
ajan ki te nan Tanp Seyè a ak nan trezò palè a. Li dekale tout lò li menm li te fè plake sou pòt

17
ak chanbrann pòt Tanp Seyè a, li voye yo bay wa peyi Lasiri a. ¶ Apre sa, wa peyi Lasiri a rete lavil Lakis li voye kòmandan chèf lame li a, chèf gad pèsonèl li a ak chèf gad palè li a ansanm ak yon gwo lame bò kote Ezekyas. Yo moute lavil Jerizalèm pou atake l'. Lè yo rive la, yo moute kan yo sou wout ki mennen nan jaden kote yo lave twal ki fenk tenn yo, toupren kannal ki bay dlo nan

18
rezèvwà anwo lavil la. Yo voye chache wa a. Men se twa otorite ki soti vin jwenn yo. Se te Elyakim, pitit Ilkija a, ki te chèf moun k'ap travay nan palè a, Chebna, sekretè a, ak Joak, pitit Asaf

19
la, ki te reskonsab achiv leta a. Chèf gad palè wa Lasiri a di yo konsa: --Ale di wa Ezekyas men

20
mesaj gran wa a, wa peyi Lasiri a, voye ba li: Poukisa ou gen tout konfyans sa a? Ou konprann ou ka fè lagè ak bèl pawòl ase, san ou pa bezwen lespri ak bon sòlda? Sou ki moun ou apiye pou

21
ou kenbe tèt ak mwen konsa? W'al mete konfyans ou nan peyi Lejip! Yon baton wozo tou kase! Anvan ou apiye sou li, l'ap antre nan men ou, l'ap blese ou. Farawon an, wa peyi Lejip ou wè a, se

22
konsa li ye pou tout moun ki fè l' konfyans. Nou pral di m' koulye a se nan Seyè a, Bondye nou an, nou mete konfyans nou! Atò, se pa kote nou te mete apa pou li yo ansanm ak tout lotèl li yo wa Ezekyas te fè disparèt nan peyi a, lèfini, li mande tout moun peyi Jida ak moun lavil Jerizalèm pou

23
yo vin devan yon sèl lotèl la? Antann nou avè mèt mwen an, wa peyi Lasiri a. Lèfini, m'ap ban

24
nou demil (2.000) chwal si nou ka jwenn demil sòlda pou moute yo. Ou pa menm gen moun ase pou bat yonn nan pi piti chèf ki sou lòd wa mwen an! Epi se sou peyi Lejip w'ap konte pou

25
jwenn cha lagè ak kavalye pou fè lagè? Epi tou, pa konprann se san konsantman Seyè a mwen

26
vin atake peyi a pou m' detwi l'. Se Seyè a menm ki di m' atake peyi ou la pou m' detwi l'. Lè sa a, Elyakim, pitit Ilkija a, Chebna ansanm ak Joak, di chèf gad palè a: --Tanpri, mèt. Pale arameyen

27
ak nou. Nou konprann lang sa a. Men, pa pale ebre. Tout moun ki sou miray la ap koute. Men, chèf gad palè a di yo an ebre: --An! Nou konprann se pou wa nou an ansanm ak nou twa la a ase wa mwen an voye m' vin pale pawòl sa yo? Non. M'ap pale ak tout moun ki chita sou miray la tou.

Yo menm tou yo pral manje pou pou yo, yo pral bwè pipi yo ansanm ak nou! ²⁸ Lè sa a, chèf gad palè a kanpe, li pran pale byen fò an ebre, li di konsa: --Koute sa gran wa a, wa peyi Lasiri a, voye ²⁹ di nou. ³⁰ Li voye di nou pa kite Ezekyas twonpe nou. Li pa ka sove nou tande. ³¹ Pa kite l' pran tèt nou lè l'ap di nou nou mèt sèten Seyè a pral sove nou, Seyè a p'ap lage lavil la nan men wa peyi Lasiri a. ³² Pa koute wa Ezekyas! Wa peyi Lasiri a mande pou nou fè lapè avè l', pou nou rann tèt nou ba li. Konsa, nou tout ka manje rezen nan jaden rezen nou, n'a ka manje fig frans nan pye fig frans nou, n'a ka bwè dlo nan pi nou. ³³ Lè wa a va vin isit la pita, la pran nou, la mennen nou nan yon lòt peyi ki tankou peyi pa nou an, yon peyi kote ki gen anpil ble pou fè farin ak anpil rezen pou fè diven, yon peyi kote ki gen pye oliv pou fè lwil oliv ak anpil siwo myèl. Konsa n'a viv, nou p'ap mouri. ³⁴ Pa kite Ezekyas pran tèt nou pou nou kwè Seyè a va delivre nou. ³⁵ Eske bondye lòt nasyon yo te delivre yo anba men wa peyi Lasiri a? ³⁶ Kote bondye moun Amat yo ak bondye moun Apad yo? Kote bondye moun Sefavayim yo, moun Ena ak moun Iva yo? Eske yo te sove peyi Samari anba men l'? ³⁷ Nan tout bondye sa yo, kilès ki te rive sove moun yo anba men l'? Poukisa atò se Seyè a ki pou ta sove lavil Jerizalèm anba men l'? ³⁸ Men pèp la pa louvri bouch reponn, yo pa di yon mo paske wa a te bay lòd pou pesonn pa reponn. ³⁹ Apre sa, Elyakim, pitit Ilkija a, ki chèf moun k'ap travay nan palè a, Chebna, sekretè a ak Joak, pitit Azaf la, ki te reskonsab achiv leta a, chire rad sou yo sitèlman sa te fè yo lapenn. Yo tounen al jwenn Ezekyas, yo rapòte l' tou sa chèf gad palè wa Lasiri a te di.

Chapter 19

¹ ¶ Lè wa Ezekyas tande pawòl sa yo, li chire rad sou li tèlman sa te fè l' lapenn, li mete yon rad sak sou li, epi l' al nan tanp Seyè a. ² Li voye Elyakim, chèf moun k'ap travay nan palè a, ak Chebna, sekretè a, ansanm ak chèf prèt yo, bò kote pwofèt Ezayi, pitit Amòz la. Yo tout te gen rad sak sou yo. ³ Men mesaj Ezekyas te ba yo pou Ezayi: --Jodi a se jou malè pou nou! Bondye ap peni nou. Se yon wont pou nou. Nou tankou yon fanm ansent ki deja kase lèzo, men ki pa gen fòs pou li pouse pitit la soti. ⁴ Wa peyi Lasiri a te voye chèf gad palè li a manke Bondye vivan an dega. Se pou Seyè a, Bondye ou la, tande tout jouman sa yo. Se pou l' peni moun ki di pawòl sa yo. Ou menm, lapriyè pou rès moun pèp nou an ki vivan toujou. ⁵ Lè moun wa Ezekyas yo al jwenn Ezayi, ⁶ men repons Ezayi ba yo pou wa Ezekyas: --Men sa Seyè a voye di ou: Ou pa bezwen pè tout

⁷ pawòl ou tande yo, tout jouman moun wa Lasiri yo di sou mwen. Mwen pral fè wa Lasiri a tande
⁸ yon sèl nouvèl, li pral kouri tounen nan peyi l'. Rive li rive, m'ap fè yon moun touye l'. ¶ Chèf
gad palè a te vin konnen wa Lasiri a te pati kite Lakis pou l' t al atake lavil Libna. Se la l' al jwenn
⁹ wa a, paske wa a te pran nouvèl Tiraka, wa peyi Letiopi a, t'ap moute vin atake l'. Wa a voye lòt
¹⁰ mesaje ankò bò kote Ezekyas. Li di yo: --Men mesaj n'a bay Ezekyas, wa peyi Jida a, pou mwen.
Ou mèt tande Bondye ou la, Bondye ou fè konfyans la, di ou Jerizalèm p'ap tonbe nan men wa
¹¹ Lasiri a, pa kite l' twonpe ou. Ou te pran nouvèl sa wa Lasiri yo te fè tout lòt peyi anvan ou yo.
¹² Yo te soti pou detwi yo nèt. Atò, se ou menm ki pou ta chape anba men m! Lè zansèt mwen yo
te touye dènye moun nan lavil Gozan, nan lavil Aran, nan lavil Rezèf ak dènye moun Betedenn yo
¹³ ki rete lavil Telasa, èske bondye nasyon sa yo te delivre yo? Kote wa lavil Amak la, wa lavil
¹⁴ Apad la, wa lavil Sefarayim lan, wa lavil Ena a ak wa lavil Iva a? Ezekyas pran lèt la nan men
¹⁵ mesaje yo, li li l'. Apre sa, li pati al nan tanp lan, li mete lèt la devan lotèl Seyè a. Epi li lapriyè
Seyè a, li di l' konsa: --Seyè ki gen tout pouvwa, Bondye pèp Izrayèl la, ou menm ki chita sou fotèy
zanj cheriben yo ap pote sou zepòl yo a, se ou menm sèl Bondye k'ap gouvènen tout peyi sou latè.
¹⁶ Se ou menm ki fè syèl la ak latè a. Panche zòrèy ou non, Seyè, pou ou tande. Louvri je ou pou
¹⁷ ou wè. Koute pawòl Senakerib voye di m', pawòl ki manke Bondye vivan an dega! Nou konnen,
¹⁸ Seyè, wa peyi Lasiri yo te fini ak anpil nasyon, yo te detwi peyi yo. Yo te boule tout bondye yo
paske se pa t' bondye yo te ye. Se estati fèt an bwa ak an wòch moun te fè ak men yo. Se poutèt sa
¹⁹ yo te rive detwi yo. Koulye a, Seyè, Bondye nou an, tanpri, delivre nou anba men Senakerib,
²⁰ pou tout nasyon ki sou latè ka konnen se ou menm sèl, Seyè, ki Bondye. ¶ Lè sa a, Ezayi, pitit
Amòz la, voye mesaj sa a bay Ezekyas: --Ou te lapriyè Seyè a, Bondye pèp Izrayèl la, pou Senakerib,
²¹ wa peyi Lasiri a. Men repons li voye ba ou. Men pawòl Seyè a di sou Senakerib: Lavil Jerizalèm
ki sou mòn Siyon an ap ri ou, l'ap pase ou nan rizib. Moun lavil Jerizalèm yo ap rele chalbari dèye
²² ou. Ki moun ou konprann ou derespekte, ou joure konsa? Sou ki moun ou pale fò konsa? Ki
²³ moun w'ap klere je ou gade konsa? Se sou Bondye pèp Izrayèl la ki yon Bondye apa. Ou voye
moun ou yo vin manke Bondye dega. Ou deklare: O wi, avèk tout kalite cha lagè m' yo, mwen
moute sou tèt tout mòn, ata sou tèt mòn Liban an. Mwen koupe pi gwo pye sèd li yo, pi bèl pye
²⁴ rezen li yo. Mwen rive jouk anwo nèt sou tèt li, nan mitan rakbwa li yo ki tankou bèl jaden. Mwen
fouye pi nan peyi moun lòt nasyon yo, mwen bwè dlo. Mwen cheche dlo nan tout larivyè Lejip yo
²⁵ pou sòlda mwen yo pase san pye yo pa mouye. Ou pa t' konnen gen lontan depi mwen te fè lide

pou tou sa te rive? Gen lontan depi sa te nan tèt mwen? Koulye a, mwen kite sa rive, pou m' te ka kraze tout lavil ak ranpa yo pou fè yo tounen yon pil demoli. ²⁶ Moun ki te rete la te san fòs. Yo te pè, yo pa t' konn sa pou yo fè. Yo te tankou raje nan jaden, tankou zèb gazon, tankou raje k'ap pouse sou do kay, tankou pye mayi ki cheche anvan li mete zepi. ²⁷ Mwen konnen lè ou leve, mwen konnen lè ou chita. Mwen konnen lè ou soti, mwen konnen lè ou antre. Mwen pran nouvèl jan ou fin anraje sou mwen. ²⁸ Koulye a, mwen vin konnen jan ou move sou mwen, jan ou vin awogan. Se poutèt sa, mwen mete yon fè won nan bwa nen ou, ak yon mò nan bouch ou. Mwen pral fè ou pran menm chimen ou te pran pou vini an pou ou tounen. ²⁹ Apre sa, Izayi di wa Ezeqyas konsa: --Men sa ki pral sèvi yon siy pou ou. Lanne sa a, n'a manje rès grenn ki te tonbe atè. Lanne k'ap vin apre sa a, n'a manje grenn nou pa t' plante. Men, apre sa ankò, n'a ka plante, n'a ka fè rekòt. ³⁰ N'a plante pye rezen, n'a manje rezen. Rès moun peyi Jida ki va chape yo va pran pye. Y'a kanpe ankò. ³¹ Va gen yon ti rès moun nan lavil Jerizalèm ak sou mòn Siyon an ki va chape. Se Seyè ki gen tout pouvwa a ki soti pou fè sa, paske li renmen ou anpil. ³² Men sa Seyè a di sou wa peyi Lasiri a: Li p'ap mete pye l' nan lavil sa a. Li p'ap gen tan voye yon sèl grenn flèch sou li. P'ap gen yon sèl sòlda ak plak pwotèj k'ap pwoche bò kote l'. Ni yo p'ap fouye twou pou sènen l'. ³³ Chemen li te pran pou l' vini an, se li menm l'ap pran pou l' tounen. Li p'ap mete pye l' nan lavil sa a. Se mwen menm, Seyè a menm, ki di sa. ³⁴ M'ap pwoteje lavil sa a. M'ap delivre l' pou m' fè respè tèt mwen, pou m' kenbe pwomès mwen te fè David, sèvitè m' lan. ³⁵ ¶ Menm jou sa a, nan mitan lannwit, zanj Seyè a al nan kan moun Lasiri yo, li touye sankatrevensenk mil (185.000) sòlda. Nan maten, lè moun leve se kadav yo ase yo jwenn. Yo tout te mouri. ³⁶ Senakerib, wa peyi Lasiri a, leve, li pati, li tounen lavil Neniv. ³⁷ Yon jou, antan wa a t'ap fè sèvis nan tanp Niswòk, bondye li a, de nan pitit gason l' yo touye l' ak nepe yo, epi yo kouri al cache nan peyi Arara. Yo te rele Adramelèk ak Sarezè. Se yon lòt nan pitit gason li yo ki te rele Asaradon ki moute wa nan plas li.

Chapter 20

¹ ¶ Vè menm epòk sa a, Ezeqyas tonbe malad, li te prèt pou l' mouri. Pwofèt Ezayi, pitit Amòz la, vin wè li, li di l' konsa: --Men sa Seyè a voye di ou: Ou mèt mete lòd nan zafè ou paske ou pral mouri. Pa gen rechap pou ou. ² Ezeqyas vire figi l' bay panno a fas, li lapriyè Seyè a. ³ Li di: --Tanpri, Seyè! Chonje jan mwen te sèvi ou ak tout kè mwen san m' pa janm vire do ba ou! Mwen te toujou fè sa ou te vle m' fè. Epi li pran kriye kont kriye l'. ⁴ Lè Ezayi kite wa a, li pa t' ankò soti

nan lakou ki nan mitan palè a lè Seyè a pale avè l', li di l' konsa: ⁵ --Tounen al jwenn Ezekyas, chèf pèp mwen an. W'a di l' pou mwen. Men sa Seyè a, Bondye David, zansèt ou a, voye di ou. Mwen tande lapriyè ou. Mwen wè jan sa fè ou mal, m'ap geri ou. Nan twa jou w'ap kanpe, ou pral nan Tanp Seyè a. ⁶ M'ap kite ou viv kenzan ankò, m'ap delivre ou, ou menm ansanm ak lavil Jerizalèm anba men wa Lasiri a. M'a pwoteje lavil la poutèt David sèvitè m' lan, ak poutèt mwen. ⁷ Ezayi mande pou fè yon kataplas ak fig frans mete sou malenng wa a. Yo fè sa vre. Epi wa a geri. ⁸ Lè sa a, wa a mande Ezayi: --Kisa ki pral fè m' konnen Seyè a pral geri m' pou nan twa jou m' ka al nan Tanp Seyè a? ⁹ Ezayi reponn li: --Men siy Seyè a pral fè ou wè pou ou ka konnen l'ap kenbe pawòl li. Gade kadran solèy la. Eske ou ta vle pou lonbraj la mache annavan sou dis ti mak, osinon pou l' fè bak sou dis ti mak? ¹⁰ Ezekyas di l': --Se bagay fasil pou lonbraj la mache annavan sou dis ti mak. L'ap pi difisil pou l' fè bak sou dis ti mak. ¹¹ Pwofèt Izayi lapriyè Seyè a epi Seyè a fè lonbraj la fè bak sou dis ti mak li te fin depase nan kadran solèy wa Akaz te fè a. ¹² ¶ Nan menm epòk sa a, wa peyi Babilòn lan, Mewodak Baladan, pitit gason Baladan, vin konnen wa Ezekyas te malad. Li voye yon lèt ba li ansanm ak yon kado. ¹³ Ezekyas te kontan jès la. Li moutre mesaj wa Babilòn te voye yo tout richès li yo: pyès an ajan, lò, epis, boutèy odè, zam ansanm ak tout lòt bagay li te gen nan depo l' yo. Li fè yo wè dènye bagay li te gen lakay li ak nan tout peyi a. ¹⁴ Lè sa a, pwofèt Ezayi al jwenn wa Ezekyas, li mande l': --Kote mesye sa yo soti? Kisa yo di ou? Ezekyas reponn: --Yo soti nan yon peyi byen lwen, yo soti nan peyi Babilòn. ¹⁵ Ezayi di l' konsa: --Kisa yo wè nan palè a? Ezekyas reponn: --Yo wè tout sa ki nan palè a. Mwen fè yo wè dènye bagay mwen gen nan depo m' yo. ¹⁶ Ezayi di wa Ezekyas konsa: --Koute mesaj Seyè ki gen pouvwa a voye ba ou: ¹⁷ Yon lè gen pou rive. Lè sa a, y'ap pran dènye bagay ki nan palè ou la, tou sa zansèt ou yo te anpile depi nan tan lontan jouk jòdi a, y'ap pote yo ale nan peyi Babilòn. Yo p'ap kite anyen. Se Seyè a menm ki di sa. ¹⁸ Y'ap pran kèk nan pwòp pitit pitit ou yo, y'ap depòte yo, y'ap chatre yo pou yo ka sèvi nèg konfyans nan palè wa Babilòn lan. ¹⁹ Ezekyas reponn Ezayi, li di l' konsa: --Mesaj Bondye ba ou pou di m' lan gen tan bon. Men li t'ap di nan kè l': Depi pa gen boulvès, depi pa gen lagè nan peyi a tout tan m'ap viv la! ²⁰ Tout rès istwa Ezekyas la, jan li te vanyan sòlda, jan li te bati rezèvwa dlo a ak gwo kannal anba tè pou mennen dlo nan lavil la, nou jwenn tou sa ekri nan liv Istwa wa peyi Jida yo. ²¹ Lè Ezekyas mouri, se Manase, pitit gason l' lan, ki moute wa nan plas li.

Chapter 21

¹ ¶ Manase te gen douzan lè li moute wa peyi Jida. Li gouvènen nan lavil Jerizalèm pandan senkansenkan. Manman l' te rele Efbziba. ² Li fè sa ki mal devan Seyè a, dapre vye prensip krimenèl lèt nasyon Seyè a te mete deyò pou fè plas pou moun pèp Izrayèl yo. ³ Li rebati tanp bondye lèt nasyon Ezeqyas, papa l', te fè kraze. Li bati lotèl pou Baal, li fè fè yon estati Achera, tankou sa Akab, wa peyi Izrayèl la, te fè fè a. Lèfini, li adore dènye zetwal ki nan syèl la, li fè sèvis pou yo. ⁴ Li menm rive bati lotèl pou zidòl anndan Tanp Seyè a, kote Seyè a te di se la l'ap rete lavil Jerizalèm. ⁵ Li fè bati lotèl nan de lakou tanp lan pou tout zetwal ki nan syèl la. ⁶ Li bay pitit gason l' pou yo boule sou lotèl pou zidòl yo. Li lage kò l' nan li nwaj nan syèl la ak nan fè maji pou konnen sa ki gen pou rive, li ankouraje divinò yo ak moun ki konn rele mò pou pale ak yo. Li donnen nan fè sa ki mal nan je Seyè a pou l' te fè l' move jouk li pa kapab ankò. ⁷ Li te fè yon estati Achera, zidòl fanm lan, li mete l' nan Tanp lan, atout Seyè a te pale ak David ansanm ak Salomon sou Tanp lan. Li te di yo: Se isit lavil Jerizalèm, nan Tanp kote mwen te chwazi nan tout peyi douz branch fanmi pèp Izrayèl la, pou yo fè sèvis pou mwen. ⁸ Si moun pèp Izrayèl yo viv jan mwen mande yo viv la, si yo fè tou sa ki nan lalwa Moyiz, sèvitè m' lan, te ba yo a, mwen p'ap mete yo deyò nan peyi mwen te bay zansèt yo a. ⁹ Men moun peyi Jida yo pa koute Seyè a, Manase pran tèt yo, yo fè pi mal pase nasyon Seyè a te mete deyò nan peyi a pou fè plas pou yo. ¹⁰ ¶ Lè sa a, Seyè a voye sèvitè l' yo, pwofèt yo, pou di yo: ¹¹ --Wa Manase te fè tout bagay degoutan sa yo. Li te fè pi mal pase moun Amori yo ki te la nan peyi a anvan yo. Avèk tout vye zidòl li yo, li fè pèp Jida a tonbe nan fè sa ki mal. ¹² Se poutèt sa, men sa mwen menm, Seyè a, Bondye pèp Izrayèl la, mwen di: Mwen pral voye yon sèl malè sou lavil Jerizalèm ak sou peyi Jida a. Lè moun va pran nouvèl la, y'ap rete gaga. ¹³ M'ap peni lavil Jerizalèm menm jan mwen te peni lavil Samari ak fanmi wa Akaz la. Mwen pral netwaye lavil Jerizalèm tankou yo netwaye yon asyèt lèfini yo vire l' bouch anba. ¹⁴ M'ap vire do bay rès moun ki va chape yo, m'ap lage yo nan men lènmi yo ki pral piye yo, ki pral pran peyi a nan men yo. ¹⁵ M'ap fè pèp mwen an sa paske yo fè sa ki mal devan m', yo fè m' fache anpil depi jou zansèt yo te soti kite peyi Lejip jouk jounen jòdi a. ¹⁶ Manase pa sèlman lakòz pèp Jida a fè sa li pa t' dwe fè avèk tou sa li menm li t'ap fè ki mal nan je Seyè a, li fè pi rès toujou. ¹⁷ Li sitèlman touye moun inonsan, tout lari lavil Jerizalèm te plen san. Tout rès istwa Manase a, tou sa li te fè ak tout move zak li te fè yo, n'a jwenn tou sa ekri nan liv Istwa wa peyi Jida yo. ¹⁸ Lè Manase mouri, yo antere l' nan jaden palè a, jaden Ouza a. Se Amon, pitit gason l' lan, ki moute

¹⁹
 wa nan plas li. ¶ Amon te gen venndezan lè li moute wa peyi Jida. Li gouvènen lavil Jerizalèm
 pandan dezan. Manman l' te rele Mechoulemèt. Se te pitit fi Awouz, yon moun lavil Jotba. ²⁰ Tankou
 Manase, papa l', li fè sa ki mal devan Seyè a. ²¹ Li mache pye pou pye dèyè Manase nan tout bagay.
 Li sèvi zidòl papa l' te sèvi yo, li adore yo. ²² Li vire do bay Seyè a, Bondye zansèt li yo, li pa
 mache jan Seyè a vle l' la. ²³ Chèf ki t'ap sèvi avèk Amon yo fè konplo, yo touye l' anndan palè a.
²⁴ Moun pèp Jida yo touye mesye ki te fè konplo pou touye Amon yo, yo mete Jozyas, pitit gason
 l' lan, wa nan plas li. ²⁵ Tout rès istwa Amon an, tou sa li te fè, n'a jwenn tou sa ekri nan liv Istwa
 wa peyi Jida yo. ²⁶ Lè Amon mouri, yo antere l' nan kavo fanmi an, nan jaden Ouza a. Lèfini, se
 Jozyas, pitit gason l' lan, ki moute wa nan plas li.

Chapter 22

¹
 ¶ Jozyas te gen witan lè li moute wa peyi Jida. Li gouvènen nan lavil Jerizalèm pandan
 tranteyennan. Manman l' te rele Jedida. Se te pitit fi Adaja, moun lavil Bozka. ² Jozyas te fè sa ki
 dwat devan Seyè a. Li mache pye pou pye dèyè David, zansèt li, nan tou sa l'ap fè san li pa janm
 fè sa ki mal. ³ Wa Jozyas t'ap mache sou dizwitan depi li t'ap gouvènen. Yon jou li pran sekretè
 palè a, Chafan, pitit gason Azalya a, pitit pitit Mechoulam lan, li voye l' nan Tanp Seyè a, li di l'
 konsa: ⁴ --Ale jwenn Ilkija, granprèt la. W'a di l' pou l' fè rapò kantite lajan prèt ki desèvis devan
 pòt Tanp lan ranmase nan men pèp la. ⁵ W'a di l' pou l' renmèt lajan an nan men mesye ki reskonsab
 travay ki pou fèt nan Tanp lan, pou yo menm yo ka peye moun k'ap travay repare Tanp lan, ki vle
⁶ di: bès chapant yo, kontremèt yo ak bès mason yo, lèfini pou yo achte bwa ak wòch yo bezwen
 pou fè reparasyon nan Tanp lan. ⁷ Li p'ap bezwen fè regleman ak moun sa yo, paske se moun serye
 yo ye. ⁸ Lè Chafan, sekretè a, fin bay Ilkija lòd wa a, Ilkija di l' konsa: --Mwen jwenn liv lalwa a
 nan Tanp Seyè a. Ilkija bay Chafan liv la. Chafan li l'. ⁹ Lèfini, li tounen al jwenn wa a, li fè rapò
 li. Li di l' konsa: --Moun ou yo pran tout lajan ki te nan Tanp lan, yo renmèt li bay moun ki reskonsab
 fè reparasyon nan Tanp Seyè a. ¹⁰ Lèfini, li di wa a: --Ilkija, prèt la, te ban m' yon liv tou. Chafan
 li liv la pou wa a. ¹¹ ¶ Lè wa a tande pawòl ki te ekri nan liv la, li chire rad sou li a sitèlman li te

12
 sezi. Li fè chache Ilkija, prèt la, Akikam, pitit Chafan an, Achbò, pitit Mikaja a, Chafan, sekretè
 palè a, ak Asaja, nèg konfyans wa a. Li ba yo lòd sa a: 13 --Ale chache konnen sa Seyè a vle nou
 fè, mwen menm ansanm ak tout pèp Jida a, avèk tout pawòl ki nan liv nou jwenn lan! Seyè a move
 anpil sou nou, paske zansèt nou yo pa t' okipe sa yo di nan liv la, ni yo pa t' fè tou sa ki ekri ladan
 14
 l'. Se konsa Ilkija, prèt la, Akikam, Akbò, Chafan ak Asaja al kay Oulda, yon pwofèt fanm ki
 te rete nan katye yo te fèk bati lavil Jerizalèm lan. Oulda sa a se te madanm yon nonm yo rele
 Chaloum, pitit Tikva, pitit pitit Aras ki te reskonsab rad seremoni yo. Mesye yo di Oulda sa ki te
 15
 rive. Oulda reponn: --Men sa Seyè a, Bondye pèp Izrayèl la, di: Tounen al di moun ki voye nou
 16
 bò kote m' lan: Men mesaj Seyè a voye ba li. Mwen pral voye yon malè sou lavil Jerizalèm
 17
 ansanm ak sou tout moun li yo jan sa ekri nan liv wa Jida a te li a. Yo vire do ban mwen, yo fè
 sèvis pou lòt bondye. Avèk tout zak sa yo, yo fè m' fè kolè. Mwen move anpil sou lavil Jerizalèm.
 18
 Kolè m' poko ap pase. Men sa n'a di wa peyi Jida a ki voye nou vin konnen volonte Bondye a.
 19
 Wi, men sa Seyè a, Bondye pèp Izrayèl la, voye di l': Ou tandè sa ki ekri nan liv la. Sa fè kè ou
 fè ou mal, ou soumèt ou devan mwen, lè ou tandè deklarasyon mwen fè sou lavil sa a ak sou tout
 moun li yo. Se bagay ki pral fè moun mete men nan bouch. Y'ap sèvi ak non yo pou bay madichon.
 Wi, lè ou tandè sa ou chire rad sou ou, dlo koule nan je ou. Se poutèt sa, mwen menm tou, mwen
 20
 tandè ou. Se mwen menm, Seyè a, k'ap di ou sa. Ou menm, w'ap mouri ak kè poze nan kabann
 ou, y'ap antere ou nan menm kavo ak zansèt ou yo. Ou p'ap gen tan wè malè m'ap voye sou lavil
 Jerizalèm lan. Mesye yo tounen pote mesaj la bay wa Jozyas.

Chapter 23

1
 ¶ Lè sa a, wa Jozyas voye misyon bay tout chèf fanmi nan lavil Jerizalèm ak nan tout peyi
 2
 Jida a pou yo reyini ansanm avè l'. Apre sa, wa a moute nan Tanp Seyè a ansanm avèk prèt yo,
 pwofèt yo, tout moun peyi Jida yo, moun ki rete lavil Jerizalèm yo ak tout rès pèp la, grannèg kou
 tinèg. Wa a kanpe devan yo tout, li li byen fò tou sa ki te nan Liv Kontra yo te jwenn nan Tanp
 3
 Seyè a. Lè li fini, li rete kanpe nan plas rezève pou li bò gwo poto a, li pran angajman devan Seyè
 a pou li fè volonte Seyè a, pou li mache dapre kòmandman, prensip ak lòd Bondye yo ak tout kè li
 ak tout nanm li. Lèfini, pou l' kenbe tout kondisyon kontra ki ekri nan liv la. Tout pèp la pran
 4
 angajman pou yo kenbe kontra a tou. ¶ Apre sa, Jozyas rele Ilkija, granprèt la, prèt ki te avè l' yo
 ak sòlda ki te desèvis nan pòt Tanp lan, li ba yo lòd al pran nan Tanp lan tout bagay yo te fè pou
 Baal, pou Achera ak pou zetwal yo, pote yo deyò. Wa a boule tout bagay sa yo andeyò lavil la, bò

5
 fon Sedwon an. Lèfini, li fè pote tout sann yo lavil Betèl. Li revoke tout prèt ansyen wa peyi Jida yo te nonmen pou fè sèvis sou lotèl zidòl yo nan lavil peyi Jida yo ak nan zòn Jerizalèm, tout prèt ki t'ap fè sèvis pou Baal, pou solèy, pou lalin, pou douz gwoup zetwal yo ak pou tout lòt zetwal yo.

6
 Li wete estati Achera, zidòl fanm ki te nan Tanp lan, li fè yo pote l' andeyò lavil la nan fon Sedwon.

7
 Li boule l', li kraze l' fè l' tounen pousyè, l' al simen pousyè a nan simityè pèp la. Li demoli tout kay kote mesyedam k'ap fè jennès pou zidòl yo te rete nan Tanp Seyè a. Se la medam yo te konn

8
 fè twal pou estati Achera a tou. Lèfini, li fè tout prèt ki te rete nan lavil peyi Jida yo antre lavil Jerizalèm. Li mache nan tout peyi a depi lavil Geba jouk lavil Bècheba, li gate tout kote prèt sa yo te konn fè sèvis pou zidòl yo, kifè yo pa t' ka sèvi pou sa ankò. Li demoli lotèl pòtay yo, ki te bò

9
 pòtay Jozye, gouvènè lavil la, te bati sou bò gòch pòtay prensipal la lè w'ap antre. Tansèlman, prèt ki te sèvi nan tanp zidòl sa yo pa t' gen dwa sèvi nan Tanp lan ankò, men yo te gen dwa manje

10
 pen san ledven ansanm ak lòt prèt parèy yo. Wa Jozyas gate Tofèt la tou, yon tanp zidòl ki te nan fon Enon an, konsa pesonn pa t' ka ofri pitit fi osinon pitit gason yo pou boule pou Molòk ankò.

11
 Li wete chwal wa Jida yo te mete apa pou sèvis bondye Solèy la. Li boule cha ki te konn sèvi nan sèvis pou solèy la. Se nan yon pyès nan lakou tanp lan yo te ye, toupren pòtay la, bò kay kote

12
 Netanmelèk, nèg konfyans wa a, te rete. Wa Jozyas demoli lotèl wa Jida yo te fè bati sou teras anwo apatman wa Akaz la, ansanm ak lotèl wa Manase te bati nan de lakou Tanp lan. Li kraze lotèl

13
 yo an miyèt moso, li voye yo jete nan fon Sedwon. Jozyas gate tout lotèl wa Salomon te fè bati sou bò solèy leve lavil Jerizalèm, sou bò sid Mòn Pye Oliv yo, pou fè sèvis pou Astate, vye zidòl

14
 peyi Sidon an, pou Kemòch, vye zidòl peyi Moab la, ak Milkòm, vye zidòl peyi Amon an. Wa Jozyas kraze Poto Wòch yo, li koupe estati Achera, zidòl fanm lan. Li kouvri tout kote yo te ye a

15
 ak zosman moun. Jozyas demoli lotèl ak tanp zidòl wa Jewoboram, pitit Nebat la, te bati lavil Betèl la tou. Se Jewoboram sa a ki te lakòz pèp Izrayèl la fè sa ki mal. Li kraze lotèl la, li fè wòch

16
 yo tounen poud. Li boule estati Achera a. Lèfini, Jozyas voye je l' sou ti mòn lan, li wè yon bann tonm. Li fè detere zosman yo pou boule yo sou lotèl la. Se konsa li gate lotèl la, jan Seyè a te fè pwofèt la di l' la lè Jewoboram te kanpe bò lotèl la pandan fèt la. Apre sa, Jozyas voye je l' gade

17
 ankò, li wè tonm pwofèt ki te fè konnen bagay sa yo gen pou rive a. Li mande: --Ki gwo tonm mwen wè laba a: Moun Betèl yo reponn: --Se tonm pwofèt ki te soti peyi Jida vin fè nou konnen

18
 sa monwa t'ap vin fè lotèl Betèl la. Jozyas di: --Bon. Kite l' jan li ye a! Piga pesonn manyen zosman li yo. Se konsa yo respekte zosman li yo ansanm ak zosman pwofèt ki te soti lavil Samari

19
 a. Nan tout lavil peyi Izrayèl yo, wa Jozyas demoli tout kay zidòl wa peyi Izrayèl yo te fè bati epi ki te lakòz Seyè a te fache anpil. Li fè yo tou sa li te fè tanp zidòl lavil Betèl yo. Li mete

men sou tout prèt zidòl li te jwenn la yo, li touye yo sou lotèl yo. Lèfini, li boule zosman moun sou yo. Apre sa, li tounen tounen l' lavil Jerizalèm.²¹ Wa Jozyas bay pèp la lòd pou yo fete fèt Delivrans lan pou fè lwanj Seyè a, Bondye yo a, jan sa ekri nan Liv Kontra a.²² Yo pa t' janm fete fèt Delivrans lan konsa depi lè jij chèf yo t'ap gouvènen peyi a, ni pandan reny tout wa peyi Izrayèl yo ak tout wa peyi Jida yo.²³ Se sèlman sou reny wa Jozyas yo fete fèt Delivrans lan konsa lavil Jerizalèm pou Seyè a. Lè sa a, wa a t'ap mache sou dizwitan depi li t'ap gouvènen peyi a.²⁴ Jozyas fè disparèt tout divinò ak tout moun ki konn rele mò, tout estati zidòl wogatwa ak lòt vye zidòl degoutan, ak tout lòt vye bagay yo te konn wè nan tout peyi Jida ak nan lavil Jerizalèm. Li fè sa pou l' te ka kenbe kòmandman ak prensip ki ekri nan liv Lalwa Ilkija, prèt la, te jwenn nan Tanp Seyè a.²⁵ ¶ Ni anvan l', ni apre l', pa t' janm gen yon wa tankou l' ki te sèvi Seyè a ak tout kè li, ak tout nanm li, ak tout kouraj li, jan lalwa Moyiz mande l' la.²⁶ Men malgre sa, Seyè a te move toujou sou pèp peyi Jida a depi lè li te fache sou Manase pou sa l' te fè a.²⁷ Se poutèt sa, Seyè a di: --Mwen pral wete moun peyi Jida yo devan je m' menm jan m' te fè l' pou moun peyi Izrayèl yo. Se mwen ki te chwazi lavil Jerizalèm. Enben, m' pral voye l' jete ansanm ak Tanp mwen te di se la m'ap rete a.²⁸ Tout rès istwa Jozyas la ak tou sa li te fè, n'a jwenn yo ekri nan liv Istwa wa Jida yo.²⁹ Se sou reny Jozyas, farawon Neko, wa peyi Lejip, te moute nan direksyon larivyè Lefrat pou l' al bay wa peyi Lasiri a yon koutmen. Wa Jozyas soti al kontre l' pou anpeche li pase. Rive bò lavil Megido, wa Neko wè l', li touye l'.³⁰ Ofisye lame wa Jozyas yo pran kadav la, yo mete l' sou yon cha soti Megido, yo mennen l' lavil Jerizalèm kote yo antere l' nan kavo li. Apre sa, pèp la pran Joakaz, pitit Jozyas, yo mete l' apa devan Bondye pou l' sèvi wa nan plas papa l'.³¹ ¶ Joakaz te gen venntwazan lè li moute wa nan peyi Jida. Li gouvènen lavil Jerizalèm pandan twa mwa. Manman l' te rele Amoutal. Se te pitit fi Jeremi, moun lavil Libna.³² Men li fè sa ki mal nan je Seyè a tankou zansèt li yo.³³ Farawon Neko fèmen l' nan prizon lavil Ribla nan zòn Amat, pou li pa gouvènen nan lavil Jerizalèm anko. Lè sa a tou, farawon an fè peyi Jida soumèt devan l'. Li fòse peyi a ba li sètmit senksan (7.500) liv ajan ak swasannkenz liv lò.³⁴ Apre sa, li pran Elyakim, pitit Jozyas, li mete l' wa nan plas papa l'. Lè sa a, li chanje non Elyakim, li rele l' Jojakim. Lèfini, li pran Joakaz, li mennen l' nan peyi Lejip. Se la Joakaz mouri.³⁵ Jojakim bay farawon Neko tout ajan ak tout lò li te mande a. Pou l' te ka jwenn yo, li te fè chak moun nan peyi a bay dapre sa yo genyen. Se konsa li te fòse pèp la bay ajan ak lò farawon Neko te mande a.³⁶ Jojakim te gen vennsenkan lè li moute wa peyi Jida. Li gouvènen lavil Jerizalèm pandan onzan. Manman l' te rele Zebida. Se te pitit fi Pedaja, moun lavil Wouma.³⁷ Men li fè sa ki mal nan je Seyè a tankou zansèt li yo.

Chapter 24

¹ ¶ Pandan reny Jojakim lan, Nèbikadneza, wa peyi Babilòn, anvayi peyi Jida. Pandan twazan Jojakim soumèt devan li. Apre sa, li konmanse kenbe tèt avè l'. ² Lè sa a, Seyè a voye ansasen soti nan peyi Babilòn, nan peyi Siri, nan peyi Moab ak nan peyi Amon vin dèyè Jojakim. Li lage yo nan peyi Jida a pou yo fini avè l' dapre sa Seyè a te di nan bouch pwofèt yo, sèvitè l' yo. ³ Sa te rive peyi Jida a paske Seyè a te vle wete pèp peyi Jida a devan je l' poutèt peche wa Manase te fè yo, ⁴ ak pou kantite moun inonsan li te touye jouk tout lari Jerizalèm te plen san. Seyè a pa t' vle padonnen ankò. ⁵ Tout rèss istwa Jojakim lan, sa li te fè yo, n'a jwenn sa ekri nan liv Istwa wa peyi Jida yo. ⁶ Lè Jojakim mouri se Jojakin, pitit gason li a, ki moute wa nan plas li. ⁷ Wa peyi Lejip la pa janm soti kite peyi l' la ankò, paske wa peyi Babilòn lan te pran tout zòn ki te pou wa peyi Lejip la, depi larivyè Lefrat rive nan ravin Lejip. ⁸ ¶ Jojakin te gen dizwitan lè li moute wa peyi Jida. Li gouvènen lavil Jerizalèm pandan twa mwa. Manman l' te rele Neouchta. Se te pitit fi Elnatan, moun lavil Jerizalèm. ⁹ Li fè sa ki mal devan Seyè a tankou papa l'. ¹⁰ Se sou reny li lame Nèbikadneza, wa peyi Babilòn lan, te mache sou lavil Jerizalèm. Yo sènen lavil la. ¹¹ Pandan lame a te sènen lavil la, Nèbikadneza vin atake lavil la li menm menm. ¹² Lè sa a, Jojakin, wa peyi Jida a, al rann tèt li bay wa Babilòn lan ansanm ak manman l', pitit gason l' yo, chèf lame l' yo ak chèf palè li yo. Wa a fè yo tout prizonye. Lè sa a, Nèbikadneza t'ap mache sou witan depi li te wa. ¹³ Li pran tout richès ki te nan Tanp Seyè a ak nan palè wa a. Li kraze tout bèl bagay an lò Salomon, wa pèp Izrayèl la, te fè pou sèvi nan Tanp Seyè a, jan Seyè a te fè konn sa depi lontan an. ¹⁴ Nèbikadneza depòte dènye moun ki te lavil Jerizalèm, tout chèf yo, tout grannèg yo, li depòte tout atizan yo ak tout bòs fòjon yo. Sa te fè dimil (10.000) moun antou. Se moun pòv yo ase li kite nan peyi Jida a. ¹⁵ Nèbikadneza fè Jojakin prizonye ansanm ak manman l', madanm li yo, chèf nan gouvènman l' yo ak tout grannèg peyi Jida yo. Li depòte yo, li pran yo lavil Jerizalèm li mennen yo peyi Babilòn. ¹⁶ Wa peyi Babilòn lan te depòte antou sètmit (7.000) prizonye nan peyi Babilòn, ansanm ak mil atizan ak bòs fòjon san konte vanyan gason ki te ka fè lagè. ¹⁷ Apre sa, Nèbikadneza pran Matanya, tonton wa Jojakin, li mete l' wa nan peyi Jida. Li chanje non l', li rele l' Sedesyas. ¹⁸ Sedesyas te gen venteyennan lè li vin wa peyi Jida. Li pase onzan lavil Jerizalèm ap gouvènen peyi a. Manman l' te rele Amoutal. Se te pitit fi Jeremi, moun lavil Libna. ¹⁹ Wa Sedesyas te fè sa ki mal devan Bondye menm jan ak Jojakin. ²⁰ Se konsa, Seyè a te fache ni sou moun lavil Jerizalèm

yo, ni sou moun peyi Jida yo jouk jou li wete yo devan je l'. Men, rive yon lè Sedesyas derefize soumèt devan Nèbikadneza, wa Babilòn lan.

Chapter 25

¹ ¶ Se konsa sou dizyèm jou dizyèm mwa nevyèm lanne depi Sedesyas te wa a, Nèbikadneza, wa Babilòn lan, vin atake lavil Jerizalèm ak tout lame li a. Yo moute kan yo devan miray lavil la, yo mete ranblè nan tout pye miray yo. ² Yo sènen l' nèt. Yo fèmen lavil la depi lè sa a rive sou onzyèm lanne reny Sedesyas la. ³ Sou nevyèm jou katriyèm mwa menm lanne sa a, te gen yon sèl grangou nan lavil la, moun yo pa t' gen anyen pou yo manje ankò. ⁴ Yo fè yon twou nan miray yo. Atout lame moun Babilòn yo te sènen lavil la nèt, tout sòlda jwif yo mete deyò kite lavil la nan mitan lannwit. Yo pase nan mitan jaden wa a, yo desann nan wout pòtay la nan mitan de miray yo, yo pran chemen fon Jouden an pou yo. ⁵ Men, lame moun Babilòn yo pousib wa Sedesyas. Lè yo rive nan plenn bò lavil Jeriko yo, yo mete men sou li. Lè sa a, tout sòlda li yo gaye, yo kouri kite l'. ⁶ Sòlda lènmi yo pran wa a, yo mennen l' bay wa Babilòn lan ki te lavil Ribla. Se la Nèbikadneza jije li. ⁷ Antan yo lavil Ribla, li fè yo koupe kou tout pitit wa Sedesyas yo devan wa a, papa yo. Lèfini, li fè yo pete tou de je wa Sedesyas, epi yo mare l' ak de gwo chenn fèt an kwiv. Yo mennen l' lavil Babilòn. ⁸ ¶ Sou setyèm jou senkyèm mwa nan diznevyèm lanne reny Nèbikadneza, wa Babilòn lan, Neboucharadan, chèf lagad la, yonn nan konseye li yo, antre lavil Jerizalèm. ⁹ Li met dife nan kay Bondye a ak nan palè wa a. Li boule dènye kay ki te lavil Jerizalèm, ata kay grannèg yo. ¹⁰ Li bay sòlda ki te avè l' yo lòd demoli tout gwo miray ranpa lavil Jerizalèm yo met atè. ¹¹ Lèfini, Neboucharadan, chèf lagad la, pran rès moun yo te kite nan lavil la, li depòte yo lavil Babilòn ansanm ak tout moun ki te vin rann tèt yo bay wa Babilòn lan ak tout bon bès ki te rete nan lavil la. ¹² Men, li kite kèk moun nan mas pèp la, nan sa ki te pi pòv yo. Li ba yo jaden rezen ak lòt jaden pou yo okipe. ¹³ Moun Babilòn yo pran gwo poto kwiv yo ki te nan Tanp Seyè a ansanm ak sipò yo ak basin kwiv yo. Yo kraze yo an ti moso, yo pote kwiv la ale lavil Babilòn. ¹⁴ Yo pran plat pou resevwa sann yo, pèl yo, kouto yo, gode yo, tas yo, kiyè yo ak tout lòt bagay an kwiv yo te konn sèvi nan tanp lan. ¹⁵ Chèf lagad la pran kivèt yo, recho yo ak dènye bagay ki te fèt an lò ak an ajan: ¹⁶ de gwo poto won yo, gwo basin lan ak douz estati towò bèf ki te sèvi l' sipò yo, ak kabwèt wa Salomon te fè fè an kwiv pou mete nan Tanp lan. Tout bagay sa yo te lou

17
 anpil, pesonn pa t' konn pèz yo. Chak poto te gen vennsèt pye wotè. Sou tèt chak poto te gen yon blòk an kwiv sèt pye edmi wotè. Sou tout wonn tèt poto yo, te gen desen ti chenn makòn

18
 yonn ak lòt ak anpil pòtre grenad plake sou yo. Tout te fèt an kwiv. De poto yo te parèy. Lèfini, Neboucharadan, chèf lagad la, pran Seraja, granprèt la, Sefanya, adjwen granprèt la, ansanm ak

19
 twa lòt gwo chèf nan Tanp lan, li fè yo prizonye. Nan lavil la, li pran chèf ki te kòmandan lame a ansanm ak senk lòt otorite ki te konseye wa a, ak sekretè kòmandan lame a ki te reskonsab pou pran moun nan lame a, ak swasant lòt grannèg. Tout moun sa yo te nan lavil la toujou.

20
 Neboucharadan pran yo, li mennen yo bay wa Babilòn lan lavil Ribla. 21 Wa a fè bat yo, lèfini, li fè touye yo lavil Ribla nan peyi Amat. Se konsa yo te depòte moun Jida yo byen lwen peyi yo.

22
 ¶ Nèbikadneza, wa Babilòn lan, pran Gedalya, pitit Achikam, pitit pitit Chafan, li mete l' chèf

23
 sou rès moun li te kite nan peyi a. Rès chèf lame yo ansanm ak sòlda yo vin konnen wa Babilòn lan te mete Gedalya chèf sou tout peyi a. Se konsa Ismayèl, pitit Netanya, Joanan, pitit Karèd, Seraja, pitit Tannoumèt, moun lavil Netofa, ansanm ak Zezanya, pitit Makan, yo moute lavil Mispa,

24
 y' al jwenn Gedalya ansanm ak tout sòlda yo. Gedalya di yo: --Mwen ban nou pawòl mwen, nou pa bezwen pè soumèt devan moun Babilòn yo. Rete nan peyi a. Sevi wa Babilòn lan. Tout

25
 bagay va mache byen pou nou. Nan setyèm mwa a menm lanne sa a, Ismayèl, pitit Netanya, pitit pitit Elichama, rive Mispa ansanm ak dis lòt moun. Ismayèl te yon ti fanmi wa a. Yo touye Gedalya ansanm ak tout gason jwif ki te lavil Mispa avèk Gedalya. Yo touye tout sòlda moun

26
 Babilòn ki te la tou. Lè sa a, tout moun, granmoun kou timoun, ansanm ak chèf lame yo leve,

27
 yo desann peyi Lejip paske yo te pè moun Babilòn yo. Premye lanne wa Evilmewodak pran pouvwa a lavil Babilòn, li fè pa Jojakin, wa Jida a, li fè l' soti nan prizon. Lè sa a, Jojakin te gen

28
 transsizan, onz mwa vennsèt jou, jou pou jou, depi yo te depòte l'. Evilmewodak te sèvi byen

29
 avè l', li ba l' premye plas nan mitan tout lòt wa yo te depòte lavil Babilòn tankou l' yo. Li wete rad prizonye ki te sou Jojakin lan, li fè l' vin manje sou menm tab avè l' chak jou jouk Jojakin mouri.

30
 Chak jou, wa a ba li sa li te bezwen pou l' viv, konsa, konsa, jouk li mouri.

1 Chronicles

Chapter 1

¹ ¶ Adan te papa Sèt, Sèt te papa Enòk, ² Enòk te papa Kenan, Kenan te papa Malaleyèl, Malaleyèl te papa Jerèd, ³ Jerèd te papa Enòk, Enòk te papa Metouchela, Metouchela te papa Lemèk, ⁴ Lemèk te papa Noe, Noe te papa Sèm, Kam ak Jafè. ⁵ Men non pitit Jafè yo: Gomè, Magòg, Madayi, Javan, Toubal, Mechèk ak Tiras. ⁶ Men non pitit Gomè yo: Achkenaz, Rifat ak Togama. ⁷ Men non pitit Javan yo: Elicha, Tasis, Kitim ak Wodanim. ⁸ Men non pitit Kam yo: Kouch, Mizrayim, Pout ak Kanaran. Se yo ki zansèt moun ki pote non yo. ⁹ Men non pitit Kouch yo: Seba, Avila, Sabta, Rama ak Sabteka. Men non pitit Rama yo: Seba ak Dedan. ¹⁰ Kouch te papa Nimwòd ki te premye gwo chèf sou latè. ¹¹ Mizrayim fè pitit. Se yo ki te zansèt moun peyi Lidi yo, moun Anam yo, moun Leyab yo, moun Naftou yo, ¹² moun Patwous yo, moun Kaslou yo ak moun lil Kaftò yo. Se nan ras sa a moun Filisti yo soti. ¹³ Men non pitit Kanaran yo: Sidon, premye pitit li ak Et. Se yo menm ki zansèt moun ki pote non yo. ¹⁴ Kanaran te zansèt moun Jebis yo, moun Amori yo, moun Gigach yo, ¹⁵ moun Evi yo, moun Aka yo, moun Sini yo, ¹⁶ moun Avad yo, moun Zema yo ak moun Amat yo. ¹⁷ Men non pitit Sèm yo: Elam, Asou, Apachad, Lidi, Aram. Men non pitit Aram yo: Ouz, Oul, Getè ak Mechèk. Se yo ki zansèt moun ki pote non yo. ¹⁸ Apachab te papa Chelak, Chelak te papa Ebè. ¹⁹ Ebè te gen de pitit gason. Yonn te rele Pelèg, paske sou tan li moun sou latè te divize yonn ak lòt. Lòt pitit Ebè a te rele Joktan. ²⁰ Joktan te papa Almodad, Chelèf, Azamavèt, Jerak, ²¹ Adoram, Ouzal, Dikla, ²² Ebal, Abimayèl, Seba, ²³ Ofi, Avila ak Jobab. Tout moun sa yo se pitit Joktan yo ye. ²⁴ Soti nan Sèm rive sou Abraram, nou jwenn Sèm, Apachad, Chelak, ²⁵ Ebè, Pelèg, Reou, ²⁶ Sewoug, Nakò, Terak ²⁷ ak Abram ki te rele Abraram tou. ²⁸ ¶ Abraram te gen de pitit gason: Izarak ak Izmayèl. ²⁹ Pitit gason Izmayèl yo te vin zansèt douz branch fanmi: Se te Nebajòt, premye pitit Izmayèl la, Keda, Adbeyèl, Mibsam, ³⁰ Michma, Douma, Masa, Adad, Tema, ³¹ Jetou, Nafich ak Kedma. ³² Abraram te gen yon lòt fanm kay ki te rele Ketoura. Ketoura sa a fè sis pitit gason pou li. Men non yo: Zimran, Joksan, ³³ Medan, Madyan, Jisbak ak Swak. Joksan te gen de pitit gason. Se te Seba ak Dedan. ³⁴ Madyan te gen senk pitit gason. Se te Efa, Efè, Enòk, Abida ak Elda. Tout moun sa yo, se nan branch fanmi Ketoura a yo ye. ³⁵ Izarak, pitit gason Abraram, te gen de pitit gason: Se te Ezaou ak Izrayèl. ³⁶ Men non pitit Ezaou yo: Elifaz, Reouyèl, Jeouch, Jalam ak Kore. Se Elifaz ki zansèt branch

fanmi sa yo: Teman, Oma, Zefi, Gayetan, Kenaz, Timna ak Amalèk. ³⁷ Reouyèl te zansèt branch
 fanmi sa yo: Naat, Zera, Chanma ak Miza. ³⁸ Se Seyi ki zansèt premye moun ki te rete nan peyi
 Edon an. Men non pitit li yo: Lotan, Chobal, Zibeyon, Ana, Dichon, Ezè ak Dichan. ³⁹ Men non
 pitit Lotan yo: Ori ak Oman. Lotan te gen yon sè ki te rele Timna. ⁴⁰ Men pitit Chobal yo: Aljan,
 Manarat, Ebal, Chefi, Onam. Men non pitit Zibeyon yo: Aja ak Ana. ⁴¹ Ana te papa Dichon, Dichon
 te papa Amram, Echban, Jitran ak Keran. ⁴² Ezè te papa Bilan, Zavan ak Jakan. Dichan menm te
 papa Ouz ak Aran. ⁴³ Men wa ki te gouvènè nan peyi Edon an, anvan te gen ankenn wa nan peyi
 Izrayèl la. Premye a te Bela, pitit gason Beyò. Lavil kote li moun lan te rele Dinaba. ⁴⁴ Lè Bela
 mouri, se Jobab, pitit gason Zerak, moun lavil Bozra, ki te gouvènè nan plas li. ⁴⁵ Lè Jobab mouri,
 se Oucham, moun peyi Teman, ki te gouvènè nan plas li. ⁴⁶ Lè Oucham mouri, se Adad, pitit
 gason Bedad, ki te gouvènè nan plas li. Se Adad sa a ki te bat moun peyi Madyan yo nan plenn
 Moab la. Yo te rele lavil kote li moun lan Avit. ⁴⁷ Lè Adad mouri, se Samla, moun Masreka, ki te
 gouvènè nan plas li. ⁴⁸ Lè Samla mouri, se Sayil, moun lavil Reyobòt bò larivyè Lefrat la, ki te
 gouvènè nan plas li. ⁴⁹ Lè Sayil mouri, se Baalanan, pitit gason Akbò, ki te gouvènè nan plas
 li. ⁵⁰ Lè Baalanan mouri, se Ada ki te gouvènè nan plas li. Yo te rele lavil kote li moun lan Payi.
 Madanm li te rele Metabèl. Se te pitit fi Matrèb, ki pou tèt pa l' te pitit fi Mezarab. ⁵¹ Ada mouri.
 Apre sa, men non pitit Ezaou yo ki te chèf branch fanmi yo: Se te Timna, Alva, Jetèt, ⁵² Olibama,
 Ela, Pinon, ⁵³ Kenaz, Teman, Mibza, ⁵⁴ Masdiyèl, Iram. Se te non tout chèf peyi Edon yo sa.

Chapter 2

¹ ¶ Men non pitit gason Izrayèl yo: Woubenn, Simeyon, Levi, Jida, Isaka, Zabilon, ² Dann,
 Jozèf, Benjamen, Neftali, Gad ak Asè. ³ Jida te gen senk pitit gason antou. Chwa, moun peyi
 Kanaran, te fè twa pitit pou li. Se te Er, Onan ak Chela. Er, pi gran pitit gason Jida a, te sitèlman
 fè sa ki mal, Seyè a touye l'. ⁴ Tama, bèlfi Jida a, fè de pitit pou Jida. Se te Perèz ak Zerak. ⁵ Perèz
 te gen de pitit gason. Se te Ezwon ak Amoul. ⁶ Zerak te gen senk pitit gason: Zimri, Etan, Eman,

⁷ Kalkòl ak Dada. Se Aka, pitit gason Kami, yon moun fanmi Zarak la, ki te rale malè sou pèp
 Izrayèl la, lè li te pran nan sa pou yo te boule nèt pou Seyè a. ⁸ Etan te papa Azarya. ⁹ Ezwon te
 papa Jerakmeyèl, Ram ak Keloubayi. ¹⁰ Ram te papa Aminadab, Aminadab te papa Nachon, yonn
 nan gwo chèf fanmi Jida yo. Nachon te papa Salma. ¹¹ Salma te papa Boz. ¹² Boz te papa Obèd,
 Obèd te papa Izayi. ¹³ Men pitit Izayi yo: Eliyab, premye pitit gason l', Abinadab, dezyèm pitit
 gason l', Chimeya, twazyèm pitit gason l', ¹⁴ Netanèl, katriyèm pitit gason li, Radayi, senkyèm
 pitit gason li, Ozèm, sizyèm pitit gason li ¹⁵ ak David, setyèm pitit gason l'. ¹⁶ De pitit fi Izayi yo
 te rele Sewouya ak Abigayil. Sewouya, pitit fi Izayi a, te gen twa pitit gason: Abichayi, Joab ak
¹⁷ Asayèl. Abigayil te fè yon pitit gason pou Jetè, yon moun nan fanmi Izmayèl. Pitit la te rele
¹⁸ Amasa. ¶ Kalèb, pitit Ezwon, te marye ak Azouba. Yo te gen yon pitit fi yo te rele Jeriòt ak twa
¹⁹ lòt pitit gason: Jechè, Chobab ak Adon. Lè Azouba mouri, Kalèb marye ak Efrata. Yo te gen
²⁰ yon pitit gason yo rele Our. Our te papa Ouri, Ouri te papa Bezaleyèl. ²¹ Lè Ezwon te gen
 swasantan laj, li marye ak pitit fi Maki a, sè Galarad. Yo te gen yon pitit gason yo te rele Segoub.
²² Segoub te papa Jayi. Jayi te gouvènè venntwa lavil nan peyi Galarad. ²³ Men moun Gèchou
 ak moun Aram yo te pran nan men l' zòn Jayi a ak lavil Kenat ansanm ak tout ti bouk ki nan vwazinaj
 li yo. Sa te fè antou swasant bouk. Tout moun ki te rete nan zòn lan te fanmi Maki, papa Galarad.
²⁴ Lè Ezwon mouri, Kalèb marye ak Efrata, madanm Ezwon, papa l'. Efrata fè yon pitit gason pou
²⁵ li ki te rele Askou, papa Tekoa. Jerakmeyèl, premye pitit gason Ezwon an, te gen senk pitit
 gason: Ram, pi gran an, Bouna, Orèn, Ozèm ak Akija. ²⁶ Jerakmeyèl te gen yon lòt madanm ki te
 rele Atara. Atara fè yon pitit gason pou li. Se te Onam. ²⁷ Ram, premye pitit gason Jerakmeyèl la,
 te gen twa pitit gason: Maz, Jamen ak Ekè. ²⁸ Onam te gen de pitit gason: Chamayi ak Jada.
 Chamayi te gen de pitit gason tou: Nadad ak Abichou. ²⁹ Madanm Abichou te rele Abijayil. Li fè
 de pitit gason pou Abichou: Aban ak Molib. ³⁰ Nadab, frè Abichou a, te gen de pitit gason: Selèd
 ak Apayim. Men Selèd mouri san kite pitit gason. ³¹ Apayim te papa Icheyi. Icheyi te papa Chechan,
 Chechan te papa Alayi. ³² Jada, frè Chamayi a, te gen de pitit gason: Jetè ak Jonatan. Men Jetè
 mouri san kite pitit gason. ³³ Jonatan te gen de pitit gason: Pelèt ak Zaza. Tout moun sa yo se fanmi
³⁴ Jerakmeyèl yo ye. Chechan pa t' gen pitit gason. Tout pitit li yo se fi yo te ye. Li te gen yon

domestik ki te moun peyi Lejip. Domestik la te rele Jara. ³⁵ Chechan marye yonn nan pitit fi li yo
 avè l'. Yo te gen yon pitit gason ki te rele Atayi. ³⁶ Atayi te papa Natan, Natan te papa Zabad.
³⁷ Zabad te papa Efal, Efal te papa Obèd. ³⁸ Obèd te papa Jeou. Jeou te papa Azarya. ³⁹ Azarya
 te papa Elèz. Elèz te papa Elasa. ⁴⁰ Elasa te papa Sismayi, Sismayi te papa Chaloum. ⁴¹ Chaloum
 te papa Jekamya. Jekamya te papa Elichama. ⁴² Premye pitit gason Kalèb, frè Jerakmeyèl la, te
 rele Mecha. Mecha te papa Zif. Marecha, dezyèm pitit Kalèb la, te papa Ebwon. ⁴³ Ebwon te gen
 kat pitit gason: Kora, Tapwak, Rekèm ak Chema. ⁴⁴ Chema te papa Raam ki te papa Jòkeam.
 Rekèm te papa Chamayi. ⁴⁵ Chamayi te papa Maon ki te papa Betsou. ⁴⁶ Kalèb te gen yon lòt
 fanm kay yo te rele Efa. Li fè twa lòt pitit avè l': Aran, Moza ak Gazèz. Aran te gen yon pitit gason
 yo te rele Gazèz tou. ⁴⁷ Yon nonm yo te rele Jadayi te gen sis pitit gason: Regèm, Jotam, Gechan,
 Pelèt, Efa ak Chaf. ⁴⁸ Kalèb te gen yon lòt fanm kay ankò ki te rele Maka. Maka fè de pitit gason
 pou li: Chebè ak Tirana. ⁴⁹ Apre sa, Maka fè de lòt pitit gason: Chaf ki te papa Madmana, ak Seva
 ki te papa Makbena ak Gibeya. Kalèb te gen yon pitit fi tou ki te rele Aksa. ⁵⁰ Tout moun sa yo te
 nan fanmi Kalèb. Our te premye pitit gason Efrata ak Kalèb. Men pitit li yo: Chobal ki te papa
 Kiriyaat-Jearim, ⁵¹ Salma ki te papa Betleyèm, ak Arèf ki te papa Betgadè. ⁵² Chobal, papa
 Kiriyaat-Jearim, te zansèt moun Awoyè yo, mwatye nan moun ki rete Menouyèt yo, ⁵³ ak moun ki
 te rete nan Kiriyaat-Jearim, ki vle di: moun Jetè yo, moun Pout yo, moun Choumat yo ak moun
 Michra yo. Moun ki rete lavil Sora ak lavil Ehtawòl yo te soti nan branch fanmi moun sa yo tou.
⁵⁴ Salma, papa Betleyèm, te zansèt moun lavil Netofat, moun lavil Atwòt-Bèt-Joab, ak moun Sora
 yo ki te yonn nan de branch fanmi ki te rete Manarat yo. ⁵⁵ Men branch fanmi moun ki te abil nan
 ekri ak kopye dokiman. Yo te rete lavil Jabèz. Se te moun Tira yo, moun Chima yo ak moun Souka
 yo. Se moun branch fanmi Kayen ki soti nan fanmi Amat, zansèt moun Rekab yo.

Chapter 3

¹ ¶ Men non pitit gason David vin genyen antan li te lavil Ebwon. Pi gran an te rele Amon. Se
 Akinoam, moun lavil Jizreyèl, ki te manman l'. Dezyèm lan te rele Danyèl. Se Abigayil, moun lavil
 Kamèl, ki te manman l'. ² Twazyèm lan te rele Absalon. Se Maka, pitit fi Talmayi, wa lavil Gechou

a, ki te manman l'. Katriyèm lan te rele Adonija. Se Agit ki te manman l'. ³ Senkyèm lan te rele Chefatya. Se Abital ki te manman l'. Sizyèm lan te rele Jitreyam. Se Eglà, madan David, ki te manman l'. ⁴ Sis pitit sa yo te fèt lavil Ebwon kote David te gouvènen pandan sètan sis mwa. Apre sa, David al rete lavil Jerizalèm kote li gouvènen pandan tranntwazan. ⁵ Li fè anpil pitit gason la tou. Batcheba, pitit fi Amiyel la, fe kat pitit gason pou li: Chimea, Chabab, Natan ak Salomon. ⁶ Li te gen nèf lòt pitit gason: Iba, Elichwa, Elpelèt, ⁷ Noga, Nefèg, Jafya, ⁸ Elichama, Elyada, Elifelèt. ⁹ David te fè lòt pitit gason toujou ak lòt fanm kay mete sou sa yo. Li te gen yon pitit fi yo te rele Tama. ¹⁰ ¶ Salomon te papa Woboram, Woboram te papa Abija, Abija te papa Asa, Asa te papa Jozafa, ¹¹ Jozafa te papa Joram, Joram te papa Okozyas, Okozyas te papa Joas, ¹² Joas te papa Amazyà, Amazyà te papa Azarya, Azarya te papa Jotam, ¹³ Jotam te papa Akaz, Akaz te papa Ezekyas, Ezekyas te papa Manase, ¹⁴ Manase te papa Amon, Amon te papa Jozyas. ¹⁵ Jozyas te gen kat pitit gason. Pi gran an te rele Jokanan, dezyèm lan Jojakim, twazyèm lan Sedesyas, katriyèm lan Chaloum. ¹⁶ Jojakim te papa Jekonya ak Sedesyas. ¹⁷ Men non fanmi wa Jojakim moun Babilòn yo te fè prizonye a. Jojakim te gen sèt pitit gason: Chealtyèl, ¹⁸ Malkiram, Pedaja, Chenasa, Jekamya, Ochama ak Nedabya. ¹⁹ Pedaja te gen de pitit gason: Zowobabèl ak Chimeyi. Zowobabel te gen de pitit gason: Mechoulam ak Ananya, ak yon pitit fi, Chelomit. ²⁰ Li te fè senk lòt pitit gason. Se te Achouba, Ojèl, Berekya, Asadya ak Jouchabesèd. ²¹ Ananya te gen de pitit gason: Pelatya ak Jechaya. Jechaya te papa Refaya, Refaya te papa Anan, Anan te papa Obadya, Obadya te papa Chekanya. ²² Chekanya te gen yon pitit gason, Chemaya, ak senk pitit pitit: Atouch, Igal, Barya, Nearya ak Chafat. ²³ Nearya te gen twa pitit gason: Elioenayi, Izkiya ak Azrikam. ²⁴ Elioenayi te gen sèt pitit gason: Odavya, Elyachib, Pelaya, Akoub, Joanan, Delaya ak Anani.

Chapter 4

¹ ¶ Men non lòt pitit gason Jida te gen: Perèz, Ezwon, Kami, Our ak Chobal. ² Chobal te papa Reaja, Reaja te papa Jakat, Jakat te papa Akoumayi ak Laad. Se yo ki zansèt moun ki rete lavil Zora. ³ Etam te pitit Our. Se li ki papa Jizreyèl, Ichma, Idbak ak yon pitit fi yo rele Azelèl-poni.

⁴ Penwèl, yon lòt pitit Our, te papa Gedò. Ezè, yon lòt pitit Our, te papa Oucha. Our te premye pitit
Efrata, madan Kalèb. Se branch fanmi l' lan ki te bati lavil Betleyèm. ⁵ Achou, ki te bati lavil Tekoa,
te gen de madanm: Ela ak Nara. ⁶ Nara te fè kat pitit gason pou li. Se te Aouzam, Efè, Temeni ak
Ayachtari. ⁷ Ela te fè twa pitit gason pou li: Zerèt, Soa ak Etnan. ⁸ Kòz te papa Anoub ak Zobeba.
Se li ki zansèt tout branch fanmi Arèl, pitit gason Awoum. ⁹ Te gen yon moun yo te rele Jabez.
Nan tout fanmi l', se li menm yo te pi respekte. Manman l' te rele l' konsa, paske li te soufri anpil
¹⁰ lè li t'ap fè l'. Men Jabèz te lapriyè Bondye pèp Izrayèl la, li te di l': -Tanpri, Bondye, beni mwen.
Ban m' anpil tè. Kanpe la ave m'. Pa kite ankenn malè rive m' pou m' pa soufri. Se konsa Bondye
¹¹ ba li sa l' te mande a. ¶ Keloub, frè Choula, te gen yon pitit gason yo te rele Meyi. Meyi te papa
¹² Ehton. Ehton te papa Betrafa, Pasea ak Techima. Se Techima ki te tabli lavil Nagach. Se fanmi
¹³ moun sa yo ki rete lavil Reka. Kenaz te gen de pitit gason: Otnyèl ak Seraja. Otnyèl te gen de
¹⁴ pitit gason tou: Atat ak Meonotayi. Meonotayi te papa Ofra. Seraja te papa Joab, zansèt moun
¹⁵ ki rete nan fon Bòs Atizan yo. Tout moun sa yo te bòs nan metye yo. Kalèb, pitit gason Jefoune,
¹⁶ te gen twa pitit gason pou tèt pa l': Iwou, Ela ak Nam. Ela te papa Kenaz. Jealelèl te gen kat pitit
¹⁷ ¹⁸ gason: Zif, Zifa, Tirya ak Azareyèl. - Esdras te gen kat pitit gason: Jetè, Merèd, Efè ak Jalou.
Merèd marye ak Bitya, yonn nan pitit fi farawon peyi Lejip la. Yo fè yon pitit fi, Miryam, ak de
pitit gason: Chamayi ak Ichba. Ichba te papa Estemoa. Merèd te pran yon fanm nan branch fanmi
Jida a tou pou madanm. Madanm sa a ba li twa pitit gason: Jerèd, papa Gedò, Ebè, papa Soko, ak
¹⁹ Jekoutiyèl, papa Zanoa. Odiya marye ak sè Naam lan. Se pitit yo ki zansèt branch fanmi moun
²⁰ Gram yo ki te rete lavil Kejila, ak branch fanmi moun Makat yo ki te rete lavil Estemoa. Chimon
te gen kat pitit gason: Amnon, Rina, Bennanan ak Tilon. Icheyi te gen de pitit gason: Zoet ak
²¹ Bennzoèt. Men moun ki nan branch fanmi Chela, pitit Jida a: Er, papa Leka, Lada, papa Marecha,
²² branch fanmi moun ki fè bon twal fin nan lavil Bètachbea yo. Jokim, moun ki rete lavil Kozeba,
Joas ak Saraf. Moun sa yo te marye ak fanm moun peyi Moab, lèfini yo tounen vin rete lavil
²³ Betleyèm, dapre sa moun lontan yo ap repete. Se moun ki te konn fè veso an tè. Yo te rete lavil
²⁴ Netayim ak lavil Geder. Se yo ki te konn travay pou wa a. ¶ Simeyon te gen senk pitit gason:
²⁵ Nemwèl, Jamen, Jarib, Zera ak Sayil. Sayil te papa Chaloum, Chaloum te papa Mibsam, Mibsam
²⁶ te papa Michma, Michma te papa Amwèl, Amwèl te papa Zakou, Zakou te papa Chimeyi.

27

Chimeyi te gen sèz pitit gason ak sis pitit fi. Men lòt frè l' yo pa t' fè anpil pitit. Se konsa branch fanmi Simeyon an pa t' rive gen menm kantite moun ak branch fanmi Jida a. ²⁸ Rive sou rèy wa

David, moun branch fanmi Simeyon yo te rete nan lavil sa yo: Becheba, Molada, Azachwal, ²⁹ Bila,

Ezèm, Tolad, ³⁰ Betwèl, Oma, Zikla, ³¹ Bètmakabòt, Azasousim, Bètbireyi ak Charayim. ³² Yo

te rete nan senk lòt kote apre sa: Etam, Ayin, Rimon, Tochenn ak Achan, ³³ ak tout ti bouk ki nan vwazinaj yo, rive lavil Balat, nan direksyon sid. Tou sa se kote yo t'ap viv ak liv rejis fanmi yo.

34 35

- Men moun ki te chèf branch fanmi Simeyon yo: Mechobab, Jamlèk, Jocha, pitit gason Amazyà, ak Joèl, Jeou, pitit gason Jozibyas ki te pitit Seraja, pitit pitit Asiyèl, ³⁶ Elioenayi, Jakoba,

Jekoaja, Asaya, Adyèl, Jezimyèl, Benaja, ³⁷ Ziza, pitit gason Chifi, ki te pitit gason Alon. Alon sa

a te pitit Jedaja. Jedaja menm te pitit Chimri ki te pitit Chemaja. ³⁸ Tout moun nou sot nonmen la

yo te chèf nan fanmi yo. Branch fanmi an t'ap peple toujou. ³⁹ Y' al chache patiraj pou mouton yo

toupre lavil Gedò, sou bò solèy leve nan fon kote lavil la ye a. ⁴⁰ La, yo jwenn yon bon patiraj ki te fre nan yon plenn kote ki pa t' gen bri ni dezòd. Se la moun branch fanmi Kam yo te rete nan tan

⁴¹ lontan. Sou rèy Ezekyas, wa peyi Jida, moun nou sot bay non yo la a rive lavil Gedò, yo touye moun fanmi Kam yo nèt tankou yon ofrann pou Bondye. Yo detwi tout lavil la ak ti joupa moun yo. Yo pran plas moun yo nan peyi a, paske te gen anpil bon patiraj pou mouton ak kabrit yo.

42

Senksan (500) lòt moun nan branch fanmi Simeyon an pati pou mòn Seyi, nan peyi Edon. Yo te gen pou chèf kat pitit gason Icheyi yo: Pelatya, Nearya, Refaja ak Ouzyèl. ⁴³ Lè yo rive, yo touye rès moun Amalèk yo. Depi lè sa a se la yo rete jouk jounen jòdi a.

Chapter 5

¹ ¶ Men moun branch fanmi Woubenn, premye pitit Izrayèl la. Se Woubenn ki te premye pitit gason, men li te pèdi dwa premye pitit li paske li te kouche ak yonn nan madanm papa l' yo. Se pitit Jozèf yo, yon lòt pitit Izrayèl, yo te bay dwa premye pitit la. Tansèlman, yo pa t' pote non Jozèf

la sou rejis tankou premye pitit. ² Lèfini, se branch fanmi Jida a ki te vin pi fò. Se li menm ki bay yon chèf pou gouvènè tout branch fanmi yo. Men tout jan, se Jozèf yo te bay dwa premye pitit la.

3

Woubenn, pi gran nan pitit gason Izrayèl yo, te gen kat pitit gason: Enòk, Palou, Ezwon ak Kami.

⁴ Joël te papa Chemaja, Chemaja te papa Gòg, Gòg te papa Chimeyi, ⁵ Chimeyi te papa Mika, Mika
 te papa Reaja, Reaja te papa Baal. ⁶ Baal te papa Bera, yonn nan chèf fanmi Woubenn yo. Se li
 menm Tiglat-Pilesè, wa peyi Lasiri a, te depòte. ⁷ Men lis lòt chèf fanmi Woubenn yo dapre rejis
 kote yo te ekri non yo. N'ap konmanse ak pi ansyen an. Te gen Jeyèl, Zakari, ⁸ Bela, pitit Aza, pitit
 pitit Chema nan branch fanmi Joël. Se yo ki te rete nan zòn Awoyè, rive Nebo ak Baal Meon sou
 nan nò. ⁹ Yo te gen anpil mouton ak kabrit nan tout peyi Galarad la. Se konsa yo pran tout peyi a
 depi bò dezè a rive jouk bò larivyè Lefrat bò solèy leve. ¹⁰ Sou rèy wa Sayil, moun Woubenn yo
 atake moun Aga yo. Yo bat yo, yo pran tout tè moun yo ki sou bò solèy leve nan peyi Galarad.
¹¹ Branch fanmi Gad la te rete sou bò nò moun branch fanmi Woubenn yo, nan peyi Bazan, rive
 Salka sou bò solèy leve. ¹² Joël te vin an premye. Apre li te gen Chafam, Janayi ak Chafat nan
 peyi Bazan. ¹³ Lòt moun nan fanmi an te fè sèt branch. Men non branch fanmi yo, dapre non zansèt
 yo: Mikayèl, Mechoulam, Cheba, Jorayi, Jakan, Zya ak Ebè. ¹⁴ Yo tout te pitit Abikayil ki te pitit
 Ouri. Ouri te pitit Jawoja ki te pitit Galarad. Galarad te pitit Mikayèl ki te pitit Jechichayi. Jechichayi
 te pitit Jakdo ki te pitit Bouz. ¹⁵ Aki, pitit Abdyèl, pitit pitit Gouni, te zansèt tout fanmi sa yo.
¹⁶ Yo te rete nan peyi Bazan ak nan peyi Galarad, nan lavil yo ak nan tout savann patiraj peyi Sawon
 an. ¹⁷ Se sou rèy Jotam, wa peyi Jida, ak Jewoboram, wa peyi Izrayèl, yo te fè rejis sa yo. ¹⁸ ¶
 Branch fanmi Woubenn lan, branch fanmi Gad la ak mwatye branch fanmi Manase a te gen antou
 karannkatmil sètsanswasant (44.760) sòlda, tout vanyan gason, ki konn sèvi ak pwotèj an fè ak
 nepe, ak banza. Yo te abil nan fè lagè. ¹⁹ Yo fè lagè ak moun Aga yo ki te rete lavil Jetou, lavil
 Nafich ak lavil Nodab. ²⁰ Yo pa t' pou kont yo nan batay la. Yo te mete konfyans yo nan Bondye.
 Pandan batay la, yo lapriyè mande l' konkou. Bondye reponn yo, li lage tout moun Aga yo ansanm
 ak tout moun ki te avèk moun Aga yo nan men yo. ²¹ Yo pran senkantmil (50.000) chamo,
 desansenkantmil (250.000) mouton ak kabrit, demil (2.000) bourik nan men lènmi yo. Yo fè sanmil
 (100.000) prizonye. ²² Yo touye anpil ladan lènmi yo paske batay la se Bondye menm ki t'ap
 mennen l' pou yo. Se konsa yo rete nan zòn sa a jouk jou yo depòte yo. ²³ Moun mwatye branch
 fanmi Manase ki sou bò solèy leve larivyè Jouden an te rete nan zòn ki soti Bazan moute nan nò
 rive Baalèmòn, lavil Sini ak mòn Emon. Yo te peple anpil. ²⁴ Men non chèf fanmi yo: Efè, Icheyi,
 Eliyèl, Azryèl, Jeremi, Odavya ak Jadyèl. Mesye sa yo te vanyan sòlda, chèf fanmi yo. Tout moun
 t'ap nonmen non yo. ²⁵ Men, pèp la te vire do bay Bondye zansèt yo a, y' al kouri fè sèvis pou

26

bondye lòt nasyon Bondye te disparèt pou fè plas pou yo. Se poutèt sa, Bondye pèp Izrayèl la fè Poul, wa peyi Lasiri a ki te rele Tiglat-Pilesè tou, anvayi peyi yo a, depòte moun branch fanmi Woubenn yo, moun branch fanmi Gad yo ak moun mwatye branch fanmi Manase yo. Li mennen yo lavil Ala, lavil Abò, lavil Ara ak bò larivyè Gozan kote yo rete jouk jounen jòdi a.

Chapter 6

¹ ¶ Levi te gen twa pitit gason: Gèchon, Keyat ak Merari. ² Keyat te gen kat pitit gason: Amram, Jizeya, Ebwon ak Ouzyèl. ³ Amram te gen de pitit gason, Arawon ak Moyiz ak yon pitit fi yo te rele Miryam. Arawon te gen kat pitit gason: Nadab, Abiyon, Eleaza ak Itama. ⁴ Eleaza te papa Fineas, Fineas te papa Abichwa, ⁵ Abichwa te papa Bouki, Bouki te papa Ouzi, ⁶ Ouzi te papa Zeraja, Zeraja te papa Merajòt, ⁷ Merajòt te papa Amarya, Amarya te papa Akitoub, ⁸ Akitoub te papa Zadòk, Zadòk te papa Akimaz, ⁹ Akimaz te papa Azarya, Azarya te papa Joanan, ¹⁰ Joanan te papa Azarya. Se li menm Azarya ki te sèvi prèt nan tanp Salomon te bati lavil Jerizalèm lan.

¹¹ Azarya te papa Amarya, Amarya te papa Achitoub, ¹² Achitoub te papa Zadòk, Zadòk te papa Chaloum, ¹³ Chaloum te papa Ilkija, Ilkija te papa Azarya, ¹⁴ Azarya te papa Seraja, Seraja te papa Jeosadak. ¹⁵ Wa Nèbikadneza te depòte Jeosadak ansanm ak tout moun peyi Jida ak tout moun lavil Jerizalèm yo, jan Bondye te vle l' la. ¹⁶ Levi te gen twa pitit gason: Gèchon, Keyat ak Merari. ¹⁷ Men non pitit Gèchon yo: Libni ak Chimeyi. ¹⁸ Keyat te papa Amram, Jizeya, Ebwon ak Ouzyèl. ¹⁹ Merari te papa Makli ak Mouchi. Men non branch fanmi Levi yo dapre zansèt yo.

²⁰ Gèchon te papa Libni, Libni te papa Jakat, Jakat te papa Zima, ²¹ Zima te papa Joak, Joak te papa Ido, Ido te papa Zerek, Zerek te papa Jeatrayi. ²² Keyat te papa Aminadab, Aminadab te papa Kore, Kore te papa Asi. ²³ Asi te papa Elkana, Elkana te papa Ebyasaf, Ebyasaf te papa Asi. ²⁴ Asi te papa Tajat, Tajat te papa Ouryèl, Ouryèl te papa Ouzya, Ouzya te papa Sayil. ²⁵ Elkana te gen de pitit gason: Amasayi ak Akimòt. ²⁶ Akimòt te papa Elkana, Elkana te papa Zofayi, Zofayi te papa Naat, ²⁷ Naat te papa Eliyab, Eliyab te papa Jeworam, Jeworam te papa Elkana. Elkana te papa Samyèl. ²⁸ Samyèl te gen de pitit gason: Joèl, pi gran an ak Abija, dezyèm lan. ²⁹ Merari bò

pa l' te papa Makli, Makli te papa Libni, Libni te papa Chimeyi, Chimeyi te papa Ouza. ³⁰ Ouza
 te papa Chimeya, Chimeya te papa Agija, Agija te papa Asaja. ³¹ ¶ Men moun David te mete pou
 reskonsab tout chante nan Tanp Seyè a lè y'a fin enstale Bwat Kontra a ladan l'. ³² Se yo ki te konn
 chante devan Tant Randevou a, jouk wa Salomon te fin bati Tanp Seyè a lavil Jerizalèm. Yo te fè
 travay yo yonn apre lòt dapre regleman yo te ba yo. ³³ Men non sanba yo ak tout fanmi yo: Nan
 fanmi Keyat la te gen Eyman premye sanba, ki te pitit Joèl, ki li menm te pitit Samyèl, ³⁴ ki li
 menm te pitit Elkana, ki li menm te pitit Jeworam, ki li menm te pitit Eliyèl, ki li menm te pitit
 Toak, ³⁵ ki li menm te pitit Zouf, ki li menm te pitit Elkana, ki li menm te pitit Maat, ki li menm
 te pitit Amasayi, ³⁶ ki li menm te pitit Elkana, ki li menm te pitit Joèl, ki li menm te pitit Azarya,
 ki li menm te pitit Sofoni, ³⁷ ki li menm te pitit Tat, ki li menm te pitit Asi, ki li menm te pitit
 Ebyasaf, ki li menm te pitit Kore, ³⁸ ki li menm te pitit Jizeya, ki li menm te pitit Keyat, ki li menm
 te pitit Levi, ki li menm te pitit Izrayèl. ³⁹ Asaf, dezyèm sanba a, te kanpe sou bò dwat Eyman.
 Asaf te pitit Berekya, ki li menm te pitit Chimeya, ⁴⁰ ki li menm te pitit Mikayèl, ki li menm te
 pitit Baseja, ki li menm te pitit Malkija, ⁴¹ ki li menm te pitit Etni, ki li menm te pitit Zarak, ki li
 menm te pitit Adaja. ⁴² ki li menm te pitit Etan, ki li menm te pitit Zima, ki li menm te pitit Chimeyi,
⁴³ ki li menm te pitit Jakat, ki li menm te pitit Gèchon, ki li menm te pitit Levi. ⁴⁴ Etan ki soti nan
 branch fanmi Merari a te twazyèm sanba a ki te sou bò gòch Eyman. Se pitit Kichi li te ye. Kichi
 sa a te pitit Abdi, ki li menm te pitit Malouk, ⁴⁵ ki li menm te pitit Asabija, ki limenm te pitit
 Amazya, ki li menm te pitit Ilkija, ⁴⁶ ki li menm te pitit Amasi, ki li menm te pitit Bani, ki li menm
 te pitit Chemè, ⁴⁷ ki li menm te pitit Mali, ki li menm te pitit Mouchi, ki li menm te pitit Merari,
 ki li menm te pitit Levi. ⁴⁸ Lòt moun branch fanmi Levi yo te gen travay pa yo nan sèvis Tanp
⁴⁹ Seyè a. Se Arawon ak pitit li yo ki te pou boule bèt yo te ofri sou lotèl yo te mete la pou sa, ak
 lansan sou lotèl lansan an. Se yo menm tou ki te reskonsab pou tout sèvis nan kay yo mete apa nèt
 pou Seyè a, pou mande padon pou peche pèp Izrayèl la, dapre tout regleman Moyiz, sèvitè Bondye
⁵⁰ a, te bay. Men fanmi Arawon yo: Arawon te papa Eleaza, Eleaza te papa Fineas, Fineas te papa
⁵¹ Abichwa, Abichwa te papa Bouki, Bouki te papa Ouzi, Ouzi te papa Zeraja, ⁵² Zeraja te papa
⁵³ Merajòt, Merajòt te papa Amarya, Amarya te papa Akitoub, Akitoub te papa Zadòk, Zadòk te

54 papa Akimaz. ¶ Men kote fanmi Arawon yo te rete ak limit zòn ki te pou yo. Lè yo fè tiraj osò,
 se branch fanmi Keyat yo ki soti an premye avèk 55 Ebwon, nan pòsyon tè ki pou branch fanmi
 Jida a, ansanm ak tout savann pou bèt yo. 56 Yo bay Kalèb, pitit Jefoune a, tout jaden ki te andeyò
 lavil la ak tout ti bouk ki te sou lòd li yo. 57 Men lavil yo te bay moun branch fanmi Arawon yo:
 Ebwon ansanm ak tout savann pou bèt yo, Libna ak tout savann pou bèt yo, Jati ak tout savann pou
 bèt yo, Estemoa ak tout savann pou bèt yo, 58 Ilenn ak tout savann pou bèt yo, Debi ak tout savann
 pou bèt yo, 59 Achan ak tout savann pou bèt yo, Bètchemèch ak tout savann pou bèt yo. 60 Nan
 pòsyon tè moun branch fanmi Benjamen yo, yo ba yo Geba ak tout savann pou bèt yo, Alemèt ak
 tout savann pou bèt yo, Anatòt ak tout savann pou bèt yo. Sa te fè antou trèz lavil pou yo te separe
 61 bay chak fanmi pa yo apa. Yo pran dis lavil nan pòsyon tè ki pou branch fanmi Efrayim, pou
 branch fanmi Dann lan ak pou lòt mwatye branch fanmi Manase a, yo bay rès moun nan fanmi
 62 Keyat la. Trèz lavil nan pòsyon tè ki pou branch fanmi Isaka, branch fanmi Asè, branch fanmi
 Nèftali ak lòt mwatye branch fanmi Manase nan peyi Bazan an te soti pou branch fanmi Gèchon
 63 yo, chak fanmi ak lavil pa yo apa. Konsa tou, douz lavil nan pòsyon tè ki pou branch fanmi
 Woubenn, branch fanmi Gad ak branch fanmi Zabylon soti pou branch fanmi Merari yo, chak fanmi
 64 ak lavil pa yo apa. Se konsa moun pèp Izrayèl yo bay moun Levi yo lavil sa yo pou yo rete
 65 ansanm ak tout savann pou bèt yo. Yo te tire osò tou pou yo ba yo lavil nan pòsyon tè branch
 66 fanmi Jida, branch fanmi Simeyon ak branch fanmi Benjamen, jan nou sot nonmen yo a. Gen
 kèk fanmi nan branch Keyat la ki te jwenn lavil nan pòsyon tè ki pou branch fanmi Efrayim lan.
 67 Yo ba yo tou lavil Sichèm, yonn nan lavil kote moun ki touye moun ka kouri al chache pwoteksyon
 an, ansanm ak tout savann pou bèt yo nan mòn Efrayim lan, Gezè ansanm ak tout savann pou bèt
 68 yo, 69 Yokmeam ak tout savann pou bèt yo, Bètowon ak tout savann pou bèt yo, Ajalon ak tout
 70 savann pou bèt yo, Gat-Rimon ak tout savann pou bèt yo. Nan pòsyon tè ki pou lòt mwatye
 branch fanmi Manase a, sou bò solèy kouche, yo ba yo Tanak ak tout savann pou bèt yo, Jibleam
 71 ak tout savann pou bèt yo. Tou sa pou rès fanmi nan branch Keyat la. Nan pòsyon tè ki pou
 mwatye branch fanmi Manase a sou bò solèy leve, yo bay moun fanmi Gèchon yo lavil Golan nan
 72 peyi Bazan ak tout savann pou bèt yo, lavil Astawòt ak tout savann pou bèt yo. Nan pòsyon tè
 ki pou branch fanmi Isaka a, yo ba yo Kadès ak tout savann pou bèt yo, Dobera ak tout savann pou
 73 bèt yo, 74 Ramòt ak tout savann pou bèt yo, Anèm ak tout savann pou bèt yo. Nan pòsyon tè ki
 pou branch fanmi Asè a, yo ba yo Machal ak tout savann pou bèt yo, Abdon ak tout savann pou

⁷⁵ bèt yo, Oukòk ak tout savann pou bèt yo, ⁷⁶ Reyòb ak tout savann pou bèt yo. Nan pòsyon tè pou branch fanmi Neftali a, yo ba yo Kadès nan peyi Galile ak tout savann pou bèt yo, Amon ak tout savann pou bèt yo, ⁷⁷ Kiriyatayim ak tout savann pou bèt yo. Nan pòsyon tè ki pou branch fanmi Zablon an, yo bay Rimono ak tout savann pou bèt yo, Tabò ak tout savann pou bèt yo pou ⁷⁸ rès moun nan branch fanmi Merari a. Nan pòsyon tè ki pou branch fanmi Woubenn lan, sou bò solèy leve larivyè Jouden, anfas lavil Jeriko, yo ba yo Bezè nan dezè a ak tout savann pou bèt yo, ⁷⁹ Jaza ak tout savann pou bèt yo, Kedemòt ak tout savann pou bèt yo, Mefat ak tout savann pou ⁸⁰ bèt yo. Nan pòsyon tè ki pou branch fanmi Gad la, yo ba yo Ramòt nan peyi Galarad ak tout ⁸¹ savann pou bèt yo, Manayim ak tout savann pou bèt yo, Esbon ak tout savann pou bèt yo, Jazè ak tout savann pou bèt yo.

Chapter 7

¹ ¶ Isaka te gen kat pitit gason: Tola, Fwa, Yachoub ak Chimwon. ² Tola te gen sis pitit gason: Ouzi, Refaja, Jeryèl, Jakmayi, Jibsam ak Samyèl. Se yo ki te chèf fanmi Tola yo. Se te yon bann vanyan sòlda brave danje. Sou rèy David te gen venndemil sisan (22.600) moun nan branch fanmi sa a. ³ Ouzi te gen yon sèl pitit gason: Jizrakya. Jizrakya te gen kat pitit gason: Mikayèl, Obadya, Joèl ak Jichiya. Sa fè antou senk chèf fanmi. ⁴ Yo te gen anpil madanm ak anpil pitit gason. Se ⁵ konsa branch fanmi sa a te bay anpil gason bon pou fè lagè. Antou tranmsimil (36.000). Lè yo konte tout branch fanmi Isaka a dapre rejis fanmi yo, yo te rive sou katrevensètmiil (87.000) gason antou, tout vanyan sòlda. ⁶ Benjamen te gen twa pitit gason: Bela, Bekè ak Jedyayèl. ⁷ Bela te gen senk pitit gason: Esbon, Ouzi, Ouzyèl, Jerimòt ak Iri. Yo tout te chèf fanmi yo. Yo te vanyan sòlda. ⁸ Dapre rejis fanmi yo, yo te rive gen venndemil tranngat (22.034) moun nan fanmi yo. Men non pitit gason Bekè yo: Zemira, Joas, Elyezè, Elioenayi, Omri, Jeremòt, Abija, Anatòt ak Alamèt. Yo ⁹ tout te pitit gason Bekè, chèf fanmi yo, tout vanyan sòlda. Dapre rejis fanmi yo, te gen venmil ¹⁰ desan (20.200) gason antou sou zòd yo. Men pitit Jedyayèl la: Bilan. Men pitit Bilan yo: Jeouch, Benjamen, Eyoud, Kenana, Zetan, Tasis ak Akichaka. ¹¹ Yo tout te moun fanmi Jedyayèl, chèf ¹² fanmi yo ak vanyan sòlda. Yo te gen disètmiil desan (17.200) gason bon pou fè lagè. Iri te gen ¹³ de pitit gason: Choupim ak Oupim. Ouchim te pitit Ayè. Men pitit gason Neftali yo: Jazeyèl,

Gouni, Jezè ak Chaloum. Yo tout te pitit pitit Bila.¹⁴ Men pitit gason Manase te fè ak fanm kay
 peyi Siri a: Asriyèl ak Maki, papa Galarad.¹⁵ Maki fè afè ak Maka, yon fanm nan fanmi Oupim
 ak Choupim. Dezyèm pitit gason Maki a te rele Zelofeyad. Zelofeyad te fè pitit fi ase.¹⁶ Maka,
 madan Maki, fè yon pitit gason. Li rele l' Perès. Frè Perès la te rele Serès. Serès te gen de pitit
 gason: Oulam ak Rekèm.¹⁷ Oulam fè yon pitit gason yo te rele Bedan. Yo tout te pitit Galarad, ki
 te pitit Maki, ki li menm te pitit Manase.¹⁸ Sè Maki a te rele Amolekèt. Li fè twa pitit gason:
 Ichòd, Abyezè ak Makla.¹⁹ Men pitit Chemida yo: se te Akcham, Sichèm, Liki ak Anyam.²⁰ ¶
 Efrayim te papa Soutelak ki te papa Berèd. Berèd te papa Taka ki te papa Elada. Elada te papa Taka
 21
 ki te papa Zabad. Zabad te papa Soutelak. Efrayim te gen de lòt pitit gason: Ezè ak Elad. Men,
 moun ki rete nan zòn Gad la touye yo paske yo te vin vòlò mouton yo.²² Lè sa a, Efrayim, papa
 yo, te pran lapenn pou yo pandan lontan. Se fanmi l' yo ki vin ba l' kouraj.²³ Apre sa, li al kouche
 ak madanm li. Madanm lan vin ansent, li fè yon pitit gason, li rele l' Berya paske malè te tonbe sou
 kay la.²⁴ Chera, pitit fi Berya a, bati Bètowon anba ak Bètowon anwo. Se li ki bati Ouzennchera
 tou.²⁵ Berya te papa Refak ki te papa Rechèf. Rechèf te papa Tela ki te papa Takan.²⁶ Takan te
 papa Layedan ki te papa Amiyoud. Amiyoud te papa Elichama²⁷ ki te papa Noun. Noun te papa
 Jozye.²⁸ Pòsyon tè yo te ba yo pou yo te rete a se zòn lavil Betèl ak tout ti bouk ki sou lòd li yo,
 rive lavil Naaran sou bò solèy leve, lavil Gezè ak tout ti bouk ki sou lòd li yo sou bò solèy kouche,
 ak zòn lavil Sichèm jouk lavil Aja ak tout ti bouk ki sou lòd li yo.²⁹ Moun Manase yo te kontwole
 lavil Bèt Chean ak tout ti bouk ki sou lòd li yo, lavil Tanak ak tout ti bouk ki sou lòd li yo, lavil
 Megido ak tout ti bouk ki sou lòd li yo, ak lavil Dò ak tout ti bouk ki sou lòd li yo. Se nan lavil sa
 yo moun branch fanmi Jozèf, pitit Jakòb la, t'ap viv.³⁰ Asè te gen kat pitit gason: Imna, Ichva,
 Ichvi, Berya ak yon pitit fi ki te rele Sera.³¹ Berya te gen de pitit gason: Ebè ak Malkyèl. Se
 Malkyèl sa a ki te tabli lavil Bizayit.³² Ebè te gen twa pitit gason: Jaflè, Chomè, Otam ak yon pitit
 fi yon te rele Chwa.³³ Jaflè te gen twa pitit gason tou: Pasak, Bimal ak Achvat.³⁴ Chomè, frè
 Jaflè a, te gen twa pitit gason tou: Wogach, Wouba ak Aram.³⁵ Otam, lòt frè li a, te gen kat pitit
 gason: Zofa, Imna, Chelèk ak Amal.³⁶ Men pitit Zofa yo: Swa, Anefè, Chwal, Beri, Imra,³⁷ Bezè,
 Wòd, Chama, Chilcha, Jitran, Bera.³⁸ Men pitit Jezè yo: Jefounè, Pispa ak Ara.³⁹ Men pitit Oula

40
yo: Ara, Anyèl ak Rizya. Tout moun sa yo te moun branch fanmi Asè. Yo tout te chèf fanmi, vanyan sòlda, grannèg. Dapre rejis fanmi yo, te gen venmsimil (26.000) gason ki te gen laj pou fè sèvis lame, epi ki te bon pou fè lagè.

Chapter 8

1 ¶ Benjamen te gen senk pitit gason. Pi gran an te rele Bela, dezyèm lan Achbèl, twazyèm lan
2 Akra, katriyèm lan Nora, senkyèm lan Rafa. 3 Men non pitit Bela yo: Ada, Gera, Abiyoud,
4 Abichwa, Naaman, Akora, 5 Gera, Chefoufan ak Ouram. 6 7 Men non pitit Eyoud yo: Naaman,
Ajija ak Gera. Yo te chèf branch fanmi ki t'ap viv nan zòn Geba a. Apre sa, yo mete yo deyò, y' al
8 9 rete Manarat. Se Gera, papa Ouza ak Akiyoud, ki te mennen yo al rete Manarat la. - Charayim
divòse ak de madanm li yo: Ouchim ak Bara. Apre sa, li al rete nan peyi Moab, li marye ak Odèch
ki ba li sèt pitit gason: Jobab, Zibya, Mecha, Malkam, 10 Jeou, Sakya, Mima. Tout pitit gason l'
yo te chèf fanmi. 11 Li te gen de lòt pitit gason Ouchim te fè pou li: Abitoub ak Elpal. 12 Elpal te
gen twa pitit gason: Ebè, Micham ak Chèmèd. Se Chèmèd sa a ki te bati lavil Ono ak lavil Lòd
ansanm ak tout ti bouk ki te sou kont li yo. 13 Berya ak Chema te chèf fanmi moun ki te rete lavil
Ajalon. Se yo ki te mete ansyen moun ki te rete lavil Gat yo deyò. 14 Men pitit Berya yo: Akio,
Chachak, Jeremòt, 15 Zebadya, Arad, Edè, 16 Michayèl, Ichpa ak Joa. 17 Men non pitit Elpal yo:
Zebadya, Mechoulam, Izki, Ebè, 18 Ichmerayi, Izlija ak Jobab. 19 Men pitit Chimèyi yo: Jakim,
Zikri, Zabdi, 20 Elyenayi, Ziltayi, Eliyèl, 21 Adaja, Beraja ak Chimrat. 22 Men pitit Chachak yo:
Ichpan, Ebè, Eliyèl, 23 Abdon, Zikri, Anan, 24 Ananya, Elam, Antotija, 25 Ifdeja ak Penwèl.
26 Men pitit Jeworam yo: Chamcherayi, Chearya, Atalya, 27 Jarechya, Elija ak Zikri. 28 Chak
mesye sa yo te chèf fanmi yo. Yo te rete lavil Jerizalèm. 29 Jeyèl te bati lavil Gabawon kote li te
rete. Madanm li te rele Maaka. 30 Premye pitit gason l' lan te rele Abdon. Lòt pitit li yo te rele Zou,
Kich, Nè, Nadab, 31 Gedò, Akio, Zekè 32 ak Miklòt ki te papa Chimea. Pitit moun sa yo te rete
lavil Jerizalèm bò kote moun ki te menm branch fanmi ak yo. 33 ¶ Nè te papa Kich ki te papa Sayil.
Sayil te gen kat pitit gason: Jonatan, Malchichwa, Abinadab ak Echbaal. 34 Jonatan te papa Meribaal

³⁵ ki te papa Mika. ³⁶ Mika te gen kat pitit gason: Piton, Melèk, Tarea ak Akaz. ³⁷ Akaz te papa Jeojada ki te gen twa pitit gason: Alemèt, Azmavèt ak Zimri. ³⁸ Zimri te papa Moza. ³⁹ Moza te papa Binea ki te papa Rafad. ⁴⁰ Rafad te papa Eleaza ki te papa Azèl. ³⁸ Azèl te gen sis pitit gason. Se te Azrikam, Bokwou, Ichmayèl, Chearya, Obadya ak Anan. ³⁹ Echèk, frè Azèl la, te gen twa pitit gason: Oulam, Jeouch ak Elifelèt. ⁴⁰ Pitit gason Oulam yo te vyan sòlda ki te gen anpil ladrès nan sèvi ak banza. Yo te gen sansenkant (150) pitit ak pitit pitit antou. Tout moun sa yo te fè pati branch fanmi Benjamen an.

Chapter 9

¹ ¶ Se konsa yo te make non tout moun pep Izrayèl yo dapre fanmi yo nan liv wa Izrayèl yo. Yo te depòte moun peyi Jida yo lavil Babilòn paske yo pa t' fè volonte Bondye. ² Premye moun nan pèp Izrayèl la ki te tounen vin rete sou tè yo ak nan lavil yo se te prèt yo, moun Levi yo ak moun k'ap travay nan Tanp lan. ³ Se lavil Jerizalèm moun nan branch fanmi Jida, moun nan branch fanmi Benjamen, moun nan branch fanmi Efrayim ak moun nan branch fanmi Manase, yo tout al rete. ⁴ Nan moun Jida yo te gen Outayi, pitit gason Amiyoud. Amiyoub sa a te pitit Omri, Omri te pitit Imri, Imri te pitit gason Bani, Bani te soti nan fanmi Perèz, pitit Jida. ⁵ Nan fanmi Chela a te gen Asaja ki te chèf fanmi an. ⁶ Nan fanmi Zerak la te gen Jeoujèl ki te chèf fanmi an. Sa te fè antou sisankatrevendis (690) moun nan fanmi Jida a ki te rete lavil Jerizalèm. ⁷ Nan moun fanmi Benjamen yo te gen Salou, pitit gason Mechoulam, ki te pitit gason Odavya, ki li menm te pitit gason Asenwa. ⁸ Te gen Jibneja, pitit gason Jeworam, Ela, pitit gason Ouzi, pitit pitit Mikri, ak Mechoulam, pitit Chepatya, ki te pitit Reouyèl, pitit pitit Jibniya. ⁹ Sa te fè antou nèfsansenkansis (956) moun nan fanmi Benjamen an ki te rete lavil Jerizalèm. Yo tout te chèf fanmi yo. ¹⁰ Men prèt ki t'ap viv nan lavil la. Te gen Jedaja, Jejarib, Jaken, ¹¹ Azarya, pitit Ilkija. Ilkija sa a te pitit Mechoulam, Mechoulam te pitit Zadòk, Zadòk te pitit Merajòt, Merajòt te pitit Achitoub. Se li menm Achitoub sa a ki te chèf nan tanp Bondye a. ¹² Lèfini, te gen Adaja, pitit gason Jeworam. Jeworam sa a te pitit Pachou ki te pitit Malkija. Te gen ankò Masayi, pitit Adyèl. Adyèl sa a te pitit Jazera, Jazera te pitit Mechoulam, Mechoulam te pitit Mechilemit, Mechilemit te pitit Ime. ¹³ Prèt

sa yo ak fanmi yo te fè antou milsètsanswasant (1.760) moun ki te chèf fanmi, vanyan gason ki te bon pou sèvis kay Bondye a. ¹⁴ ¶ Men moun Levi ki te rete nan lavil la. Te gen Chemaja, pitit gason Achoub. Achoub sa a te pitit Azrikam, Azrikam te pitit Achabya, nan branch fanmi Merari a. ¹⁵ Te gen Bakbaka, Erès, Galal ak Matanya. Matanya sa a te pitit Mika. Mika te pitit Zikri, Zikri li menm te pitit Asaf. ¹⁶ Te gen Obadya, pitit Chemaya. Chemaya sa a te pitit Galal, Galal te pitit Jedoutoun. Pou fini, te gen Berekya, pitit Asa, ki te pitit Elkana ki te rete nan ti bouk moun Netofa yo. ¹⁷ Men gad ki t'ap fè pòs nan pòtay Tanp lan. Se te Chaloum, Akoub, Talmon, Akiman ak lòt fanmi yo. Se Chaloum ki te chèf yo. ¹⁸ Jouk jounen jòdi a se yo k'ap fè pòs nan Pòtay Wa ki bay sou bò solèy leve a, kote pou wa a pase a. Nan tan lontan, se yo menm ki te konn fè pòs nan Pòtay Kay moun Levi yo. ¹⁹ Chaloum, pitit Kore, pitit pitit Ebyazaf nan branch fanmi Kore a, ansanm ak lòt moun nan fanmi Kore a te reskonsab veye pòtay pou antre nan kote ki apa pou Seyè a, tankou zansèt yo te fè l' anvan sa lè yo t'ap veye Pòtay kan Seyè a. ²⁰ Yon lè se Fineas, pitit Eleaza a, ki te chèf yo. Seyè a te toujou kanpe avè l'. ²¹ Zakari, pitit Mechelemya, te gad nan pòtay Tant Randevou a tou. ²² Antou te gen desandouz (212) gason yo te chwazi pou fè pòs nan pòtay tanp lan, dapre liv rejis fanmi yo nan ti bouk kote yo moun. Se wa David ak pwofèt Samyèl ki te bay zansèt yo reskonsablite sa a pou tout tan. ²³ Se konsa, yo menm ak pitit yo yo toujou ap fè pòs nan pòtay Tanp lan, nan pòtay Tant Randevou a. ²⁴ Te gen kat pòtay ki te bay sou kat bòn direksyon yo: lès, lwès, nò ak sid. Pou chak pòtay te gen yon chèf gad. ²⁵ Fanmi yo ki te rete nan ti bouk yo te vin ede yo nan travay la pandan sèt jou, yonn apre lòt. ²⁶ Men, kat chèf gad yo te toujou la desèvis. Se moun fanmi Levi yo te ye. Se yo ki te reskonsab tout pyès chanm ansanm ak tout trezò ki te la nan Tanp lan. ²⁷ Yo te rete pase nwit yo toupre Tanp lan, paske se yo ki te reskonsab veye l'. Lèfini, chak maten se yo ki pou te louvri pòtay yo. ²⁸ Te gen lòt moun Levi ki te reskonsab tout veso yo sèvi pou fè seremoni yo. Se pou yo te kontwole yo ni anvan ni apre chak seremoni yo. ²⁹ Te gen lòt moun Levi ki te reskonsab tout rès bagay ki te nan Tanp lan ansanm ak farin frans, diven, lwil oliv, lansan ak odè yo. ³⁰ Men, se prèt yo ki te reskonsab pare odè yo. ³¹ Se yon moun Levi yo te rele Matitya, premye pitit Chaloum nan fanmi Kore a, ki te toujou reskonsab fè gato pou ofrann yo. ³² Lòt moun Levi nan fanmi Keyat la te reskonsab pare pen pou yo te mete chak jou repo nan Tanp lan. ³³ Genyen nan fanmi Levi yo ki te sanba. Chèf fanmi sa yo te viv nan pyès chanm ki te nan Tanp lan. Yo pa t' gen lòt okipasyon pase lajounen kou lannwit yo t'ap fè travay

³⁴ yo. Tout mesye sa yo te chèf fanmi moun Levi yo, dapre zansèt yo rive jòdi a. Yo te rete lavil
 Jerizalèm. ³⁵ ¶ Jeyèl te bati lavil Gabawon kote li te rete. Madanm li te rele Maaka. ³⁶ Premye
 pitit gason l' lan te rele Abdon. Lòt pitit li yo te rele Zou, Kich, Baal, Nè, Nadak, ³⁷ Gedò, Akio,
 Zèkè ak Miklòt. ³⁸ Se Miklòt sa a ki te papa Chimeam. Pitit moun sa yo te rete lavil Jerizalèm bò
 kote moun ki te menm branch fanmi ak yo. ³⁹ Nè te papa Kich ki te papa Sayil. Sayil te gen kat
 pitit gason: Jonatan, Malchichwa, Abinadab ak Echbaal. ⁴⁰ Jonatan te papa Meribaal ki te papa
 Mika. ⁴¹ Mika te gen kat pitit gason: Piton, Melèk, Tarea ak Akaz. ⁴² Akaz te papa Jeojada ki te
 gen twa pitit gason: Alemèt, Azmavèt ak Zimri. Zimri te papa Moza. ⁴³ Moza te papa Binea ki te
 papa Rafad. Rafad te papa Eleaza ki te papa Azèl. ⁴⁴ Azèl te gen sis pitit gason. Se te Azrikam,
 Bokewou, Ichmayèl, Chearya, Obadya ak Anan, Se non pitit gason Azèl yo sa.

Chapter 10

¹ ¶ Moun Filisti yo leve yon sèl batay ak moun pèp Izrayèl yo sou mòn Gilboa. Anpil nan moun
 pèp Izrayèl yo te mouri, rès yo te kouri met deyò. ² Moun Filisti yo rive sou Sayil ak pitit gason l'
 yo. Yo touye Jonatan, Abinadab ak Malchichwa frèt. ³ Batay la te mangonmen kote Sayil te ye a.
 Mesye ki t'ap voye flèch nan banza yo te konmanse ap vize sou li. Lè li wè sa, li pran tranble. ⁴ Li
 rele gad kò ki t'ap pote zam li yo, li di l' konsa: -Rale nepe ou, touye m' pou bann moun sa yo ki
 pa sèvi Bondye pa gen tan rive sou mwen pou yo pase m' nan betiz. Men, gad kò a pa t' vle paske
 li te pè anpil. Lè sa a, Sayil pran nepe a, li vire l' tèt anba, li lage kò l' sou li. ⁵ Lè gad kò a wè Sayil
 te mouri, li fè menm bagay la tou, li lage kò l' sou nepe pa li a, li mouri ansanm ak Sayil. ⁶ Se
 konsa, ni Sayil ni twa pitit gason l' yo te mouri. Jou sa a, tout mesye Sayil yo te mouri. ⁷ Moun pèp
 Izrayèl yo ki te rete nan fon an te wè sòlda pèp Izrayèl yo kouri epi Sayil ak pitit gason l' yo mouri.
 Lè sa a, yo leve kite lavil kote yo te rete yo, yo met deyò. Moun Filisti yo vini, yo pran lavil yo pou
⁸ yo. ¶ Nan denmen apre batay la, moun Filisti yo tounen pou pran zam ki te sou kadav sòlda mouri
 yo, yo jwenn kadav Sayil ak kadav twa pitit gason l' yo kouche atè sou mòn Gilboa a. ⁹ Yo koupe
 tèt Sayil, yo pran tout zam li yo. Lèfini, yo voye gaye bon nouvèl sa a nan tout peyi Filisti a, nan
¹⁰ tanp zidòl yo ak nan zòrèy tout pèp la. Yo mete zam Sayil yo nan tanp Astate, zidòl yo a. Epi

yo pran tèt li, yo kloure l' nan tanp Dagon an. ¹¹ Lè moun lavil Jabès yo, nan peyi Galarad, vin konnen sa moun Filisti yo te fè Sayil, ¹² tout mesye ki te brave danje yo leve, y' al pran kadav Sayil la ansanm ak kadav pitit gason l' yo, yo tounen ak yo lavil Jabès. Yo antere zosman yo anba pye tonmaren ki nan lavil Jabès la. Apre sa, yo pase sèt jou san manje. ¹³ Se konsa Sayil mouri paske li pa t' kenbe pawòl li ak Seyè a. Li pa t' obeyi lòd Seyè a te ba li. Li te pito fè yo rele nanm moun mouri pou l' te konnen sa ki tapral rive l', ¹⁴ pase pou l' te al mande Seyè a sa. Se poutèt sa Seyè a te touye l', li renmèt gouvènman an nan men David, pitit Izayi a.

Chapter 11

¹ ¶ Tout branch fanmi Izrayèl yo vin jwenn David lavil Ebwon, yo di l' konsa: -Nou se moun menm ras, menm fanmi avè ou. ² Depi lontan, menm sou rèy wa Sayil, se ou menm ki te kòmande lame pèp Izrayèl la kote l' ale. Lèfini ankò, Seyè a, Bondye ou la, te pwomèt se ou menm ki pral gouvènen pèp li a, pèp Izrayèl la. Se ou menm ki pral chèf yo. ³ Se konsa, tout chèf fanmi pèp Izrayèl yo vin jwenn David lavil Ebwon. Yo pase yon kontra avè l' devan Seyè a. Yo fè seremoni, yo mete l' wa sou pèp Izrayèl la tou, jan Seyè a te fè pwomès la nan bouch pwofèt Samyèl. ⁴ David mache sou lavil Jerizalèm ansanm ak tout moun pèp Izrayèl yo. Lè sa a, lavil la te rele Jebis. Se moun Jebis yo, premye moun ki te rete nan peyi a, ki t'ap viv la toujou. ⁵ Moun Jebis yo te di David: Ou p'ap janm ka rive antre nan lavil nou an. Men David pran gwo fò ki te sou tèt mòn Siyon an. Se li yo rele lavil David la. ⁶ David pou tèt pa l' te di premye moun ki va atake moun Jebis yo, l'ap mete l' chèf, moun sa a ap grannèg nan gouvènman l' lan. Joab, pitit gason Sewouya a, te premye moun ki atake. Se konsa li vin chèf. ⁷ Apre sa, David al rete nan fò a. Se poutèt sa yo rele l' lavil David la. ⁸ Lèfini, li bati lòt kay fè wonn fò a, depi sou teras la rive bò palè a. Joab menm rebati rès lavil la. ⁹ Chak jou David t'ap vin pi fò. Seyè a, Bondye ki gen tout pouvwa a, te kanpe avè l'. ¹⁰ ¶ Men non chèf vanyan sòlda David yo. Se yo ki te soutni gouvènman David la ansanm ak tout pèp Izrayèl la pou l' te ka wa, jan Seyè a te pwomèt moun Izrayèl yo sa. ¹¹ Pou konmanse, te gen Jakobeyam ki soti nan branch fanmi Akmoni an. Se li menm ki te chèf twa pi vanyan yo. Pou kont li, li batay ak twasan (300) moun ak frenn li ase. Li touye yo tout yon sèl kou. ¹² Dezyèm lan te rele Eleaza, pitit gason Dodo, pitit yon moun lavil Akwo. Se te yonn nan twa pi vanyan yo. ¹³ Li

te avèk David lè David t'ap goumen ak moun Filisti yo nan batay bò Pasdamen an. Li te nan yon jaden lòj lè sòlda pèp Izrayèl yo konmanse kouri devan moun Filisti yo. ¹⁴ Se konsa, li menm ak sòlda li yo, yo tout rete kanpe nan mitan jaden lòj la, yo kenbe tèt ak moun Filisti yo, yo bat yo byen bat, yo kraze yo. Se konsa Seyè a te fè yo genyen batay la sou lènmi yo. ¹⁵ Yon lòt jou, nan sezon rekòt, twa nan gwoup Trant yo al jwenn David nan gwòt Adoulam lan. Lame moun Filisti yo te moute kan yo nan plenn moun Refayim yo. ¹⁶ Lè sa a, David te nan fò a. Yon gwoup moun Filisti te pran lavil Betleyèm. ¹⁷ Yon sèl anvè pran David, li di konsa: -Ki moun ki va fè m' bwè ti gout dlo nan pi ki nan pòtay lavil Betleyèm lan? ¹⁸ Lamenm twa mesye yo desann, yo fofile kò yo nan mitan moun Filisti yo, yo pran dlo nan pi ki te nan pòtay lavil Betleyèm lan, yo pote l' vin bay David. Men, David refize bwè dlo a. Li vide l' atè, li ofri l' bay Seyè a. ¹⁹ Li di konsa: -Seyè, mwen pa gen dwa bwè dlo sa a. Se tankou si m' ta bwè san mesye sa yo ki riske lavi yo pou y' al chache l'. Se konsa, li derefize bwè dlo a. Se sa twa vanyan gason sa yo te fè. ²⁰ Abichayi, frè Joab, te chèf trant vanyan yo. Pou kont li, avèk yon frenn nan men l', li goumen ak twasan (300) moun, li touye yo. Se konsa, tout moun t'ap nonmen non l' nan gwoup Trant vanyan yo. ²¹ Se li menm ki te resevwa plis lwanj nan Trant vanyan yo. Apre sa, li vin chèf yo. Men, li pa janm rive fè sa twa pi vanyan yo te fè. ²² Benaja, pitit gason Jeojada a, moun lavil Kabseyèl, te pitit pitit yon vanyan sòlda. Li te fè anpil bagay ki fè wè li pa t' manke kouraj. Se li menm ki te touye de pitit Ariyèl yo, moun lavil Moab. Yon jou, lanèj t'ap tonbe, li desann nan yon sitèn dlo al touye yon lyon. ²³ Li touye tou yon moun peyi Lejip, yon gwo potòrik gason sèt pye sis pous wotè, ki te gen yon gwo frenn nan men li. Frenn lan te gen yon manch menm gwosè ak yon gwo mach pilon. Benaja menm al atake li ak yon baton ase. Li wete lans lan nan men moun peyi Lejip la, epi li touye l' avè l'. ²⁴ Men sa Benaja, pitit gason Jeojada a, te fè. Se konsa, tout moun t'ap nonmen non l' nan gwoup Trant Vanyan yo. ²⁵ Se non li yo t'ap nonmen pi plis nan Trant Vanyan yo. Apre sa, li vin chèf yo. Men, li pa t' janm rive fè sa twa pi vanyan yo te fè. David te mete l' nan gad kò li. ²⁶ Men non lòt vanyan sòlda yo: Asayèl, frè Joab la, Elanan, pitit gason Dodo, moun lavil Betleyèm. ²⁷ Chamòt, moun lavil Awòd, Elèz, moun lavil Palon, ²⁸ Ira, pitit gason Ikèch, moun lavil Tekoa, Abyezè, moun lavil Anatòt, ²⁹ Sibekayi, moun lavil Oucha, Ilayi, moun lavil Awoya, ³⁰ Marayi, moun lavil Netofa, Elèb, pitit gason Bana, moun lavil Netofa, ³¹ Itayi, pitit gason Ribayi, moun lavil Gibeya nan pòsyon tè ki pou branch fanmi Benjamen yo, Benaja, moun lavil Piraton, ³² Ourayi, moun ravin Gach yo, Abiyèl, moun lavil Araba, ³³ Azmavèt, moun lavil Baawoum, Elyaba, moun lavil

³⁴ Chalbon, Pitit gason Achèm yo, moun lavil Gizon, Jonatan, pitit gason Chage, moun lavil Ara,
³⁵ Akiyam, pitit gason Saka, moun lavil Ara, Elifal, pitit gason Our, ³⁶ Efè, moun lavil Mekera,
 Akija, moun lavil Palon, ³⁷ Ezwo, moun lavil Kamèl, Narayi, pitit gason Esbayi, ³⁸ Joèl, frè Natan
 an, Mibka, pitit gason Agri, ³⁹ Zelèk, moun lavil Amon, Nakarayi, moun lavil Bewòt. Se li menm
 ki te pote zam Joab, pitit gason Sewouya a. ⁴⁰ Ira ak Garèb, nan fanmi Jetè a, ⁴¹ Ouri, moun lavil
 Et la, Zabad, pitit Aklayi, ⁴² Adina, pitit Siza, yon chèf nan branch fanmi Woubenn lan, ak yon
 gwoup trant moun avè l'. ⁴³ Anan, pitit gason Maka, Jozafa, moun lavil Mitni, ⁴⁴ Ouzya, moun
 lavil Astawòt, Sama ak Jeyèl, pitit gason Otam, moun lavil Awoyè. ⁴⁵ Jedyayèl ak Joa, frè li, tou
 de pitit gason Chimri, moun lavil Tiz. ⁴⁶ Eliyèl, moun lavil Manayim, Jeribayi ak Josavya, pitit
 gason Elnam, Jitma, moun lavil Moab, ⁴⁷ Eliyèl, Obèd ak Jasiyèl, moun lavil Soba.

Chapter 12

¹ ¶ Lè David t'ap viv lavil Ziklag kote li te al cache pou Sayil, pitit gason Kich la, pa jwenn li,
 yon bann vanyan sòlda te vin jwenn li la pou ba l' konkou nan lagè a. ² Yo tout te gen banza. Yo
 te gen ladrès pou voye wòch ak pou tire flèch ni ak men gòch ni ak men dwat. Se te moun branch
 fanmi Benjamen yo te ye tankou Sayil. ³ Alatèt yo te gen Akyezè ak Joas, pitit gason Chema, moun
 lavil Gibeya, Jezyèl ak Pelèt, pitit gason Azmavèt, Beraka ak Jeou, moun lavil Anatòt, ⁴ Jismaja,
 moun lavil Gabawon, yonn nan trant vanyan sòlda yo ak yonn nan chèf yo, Jeremi, Jakazyèl, Joanan
 ak Jozabad, moun lavil Geder. ⁵ Elouzayi, Jerimòt, Bealya, Chemarya ak Chefatya, moun lavil
 Awòf, ⁶ Elkana, Jichija, Azariyèl, Joezè ak Jakobeyam, nan branch fanmi Kore a. ⁷ Joela ak
 Zebadya, pitit gason Jewokam, moun lavil Gedò. ⁸ Konsa tou, nan branch fanmi Gad la, te gen
 moun ki te pati al jwenn David lè li te nan fò nan dezè a. Se te yon bann vanyan sòlda ki te gen
 ladrès nan fè lagè. Yo tout te gen plak pwotèj ak frenn. Yo te move tankou lyon, yo te konn kouri
 tankou kabrit nan mòn. ⁹ Premye a te rele Ezè, dezyèm lan Obadya, twazyèm lan Eliyab, ¹⁰ katriyèm
 lan Michmana, senkyèm lan Jeremi, ¹¹ sizyèm lan Atayi, setyèm lan Eliyèl, ¹² wityèm lan Jokanan,
 nevyèm lan Elzabad, ¹³ dizyèm lan Jeremi, onzyèm lan Makbanayi. ¹⁴ Mesye branch fanmi Gad

yo te chèf nan lame a. Pi piti ladan yo a te vo san (100) sòlda, pi gran an te vo mil (1000) sòlda.
15

Se yo menm ki te janbe lòt bò larivyè Jouden an yon lè larivyè a t'ap desann nan premye mwa lanne a. Lèfini, yo fè tout moun ki te rete nan fon yo mete deyò, ni sou bò solèy leve, ni sou bò

solèy kouche. 16 Nan branch fanmi Benjamen ak branch fanmi Jida yo te gen moun ki te vin jwenn

David jouk nan fò kote l' te kache a. 17 David soti al kontre yo, li di yo: -Si se an zanmi nou vini pou ede m', m' byen kontan nou vin jwenn mwenn. Men, si se pou nou trayi m' bay moun ki pa vle wè m' yo, mwenn menm mwenn konnen mwenn pa fè ankenn mechanste, mwenn lapriyè Bondye ak

18 tout kè m'. Bondye zansèt nou yo va wè sa, se li ki va pini nou. Lè sa a, lespri Bondye desann sou Amasayi, chèf trant vanyan yo, li di byen fò: -Nou la avè ou, David! Nou kanpe avè ou, pitit Izayi! Kè poze pou ou ak pou moun k'ap ede ou yo! Paske Bondye te pote ou sekou! Lè sa a, David

19 resevwa yo, li mete yo chèf nan lame li a. Nan branch fanmi Manase a, te gen moun ki te vin jwenn David lè li te mete tèt ansanm ak moun Filisti yo pou goumen ak Sayil. Men, lè sa a, David pa t' bay moun Filisti yo ankenn konkou. Lè gwo chèf moun Filisti yo reyini pou koze sou zafè a, yo te pran desizyon di l' non mès, paske yo t'ap di li ta ka vann yo pou li te ka byen anko ak Sayil,

20 mèt li. Men moun nan branch fanmi Manase a ki te vin mete tèt ansanm ak David apre li te tounen lavil Ziglag. Se te Adnak, Jozabad, Jedayèl, Mikayèl, Jozabad, Eliyou ak Siltayi, ki te chèf

21 rejiman mil sòlda laba nan peyi Manase. Se yo menm ki te ede David ansanm ak lame a, paske

22 se te yon bann vanyan sòlda. Apre sa, yo te gwo chèf nan lame a. Se chak jou moun t'ap vin

23 jwenn David pou ede l'. Se konsa li vin gen yon gwo lame ak anpil anpil moun ladan l'. ¶ Men kantite moun avèk zam pou fè lagè ki te vin jwenn David lavil Ebwon pou renmèt li gouvènman

24 an nan plas Sayil, jan Seyè a te bay lòd la. Nan branch fanmi Jida a, similwisan (6.800) gason

25 avèk plak pwotèj yo ak frenn yo, tout byen pare pou fè lagè. Nan branch fanmi Simeyon an,

26 sètmilsan (7.100) vanyan sòlda byen pare pou fè lagè. Nan branch fanmi Levi a, katmilsisan

27 (4.600), plis twamilsètsan (3.700) nan fanmi Mawon an ak Jeojada alatèt yo. 28 Te gen Zadòk

29 tou, yon jenn vanyan gason ak vennde lòt chèf nan fanmi li. Nan branch fanmi Benjamen an, fanmi Sayil la menm, twamil (3.000) gason. Pifò nan moun fanmi Benjamen yo te kanpe toujou

30 avèk Sayil. Nan branch fanmi Efrayim lan, venmilwisan (20.800) vanyan sòlda. Tout moun t'ap

31 nonmen non yo nan fanmi yo. Nan mwatye branch fanmi Manase a, dizwimil (18.000) gason

32 yo te chwazi pou al mete David wa sou fotèy la. Nan branch fanmi Isaka a, moun ki te fò nan konnen sa pou pèp Izrayèl la fè ak lè pou yo fè l', desan (200) chèf ansanm ak tout gason nan branch

fanmi an ki te sou kòmandman yo. ³³ Nan branch fanmi Zabilon an, senkantmil (50.000) sòlda ki
 konn mache fè lagè avèk tout kalite zam, epi ki te soti pou ede David ak tout kè yo. ³⁴ Nan branch
 fanmi Neftali a, mil (1000) chèf ansanm ak transtèmil (37.000) gason ak plak pwotèj ak frenn.
³⁵ Nan branch fanmi Dann lan ventwimilsisan (28.600) sòlda. ³⁶ Nan branch fanmi Asè a, karantmil
 (40.000) sòlda ki konn mache fè lagè. ³⁷ Lèfini, nan branch fanmi Woubenn lan, nan branch fanmi
 Gad la, ak nan mwatye branch fanmi Manase a ki te lòt bò larivyè Jouden an te gen sanvenmil
 (120.000) gason ak tout kalite zam. ³⁸ Tout sòlda sa yo, ki te tou pare pou fè lagè, te vin jwenn
 David lavil Ebron ak tout kè yo. Yo te soti pou yo te fè l' wa sou tout peyi Izrayèl la. Tout rès pèp
 Izrayèl la te vini ak menm lide a tou: fè David wa. ³⁹ Yo pase twa jou la ansanm ak David, yo t'ap
 manje, yo t'ap bwè, paske moun Izrayèl parèy yo te pare tout bagay pou yo. ⁴⁰ Lèfini, moun soti
 nan tout vwazinaj la, jouk nan peyi Isaka, peyi Zabilon ak peyi Neftali, yo pote manje sou bourik,
 sou chamo, sou milèt ak sou bèf. Te gen pwovizyon farin frans, gato, fig frans, grap rezen chèch,
 diven, lwil ak kantite bèf, mouton ak kabrit. Tout pèp Izrayèl la t'ap fè fèt nan tout peyi a.

Chapter 13

¹ ¶ David reyini tout chèf lamè a, ni sa ki te alatèt rejiman mil (1000) sòlda yo ni sa ki te alatèt
 divizyon san sòlda yo, li pran konsèy nan men yo. ² Lèfini, David di pèp Izrayèl la: -Si nou wè se
 yon bon lide, si se volonte Seyè a, Bondye nou an, nou pral voye misyon bay tout frè nou yo ki
 rete toupatou nan tout peyi a, bay tout prèt yo ak tout moun Levi yo nan lavil kote yo rete ak nan
 savann kote yo fè gadinaj, pou yo vin mete tèt yo ansanm ak nou, ³ pou n' al chache Bwat Kontra
 Bondye nou an, paske nou te bliye l' pandan tout rèy Sayil la. ⁴ Tout pèp la te dakò pou yo te fè
 sa, paske yo wè se te yon bon lide. ⁵ Se konsa, David reyini tout pèp Izrayèl la nan tout peyi a, depi
 kannal Sikò sou fwontyè ak peyi Lejip la rive jouk Pas Amat la, pou y' al chache Bwat Kontra a
 lavil Kiriya-Jarim. ⁶ Se konsa li pati avèk tout pèp Izrayèl la, pou lavil Kiriya-Jarim yo te rele
 Baala tou, nan peyi Jida, pou y' al chache Bwat Kontra Bondye a, bwat ki pote non Seyè ki gen
 tout pouvwa a, Seyè ki gen fotèy li anwo zanj cheriben yo. ⁷ Lè yo rive kay Abinadab, yo pran
 Bwat la, yo mete l' sou yon kabwa tou nèf. Ouza ak Akijo t'ap mennen kabwa a. ⁸ David ansanm
 ak tout moun Izrayèl yo menm t'ap danse ak tout nanm yo. Yo t'ap chante fè lwanj Seyè a, yo t'ap
 jwe gita ak bandjo, yo t'ap bat tanbouren ak senbal, yo t'ap kònen twonpèt. ⁹ ¶ Lè yo rive bò glasi

Kidon an, bèf yo bite, yo manke tonbe. Ouza lonje men l' pou kenbe Bwat Kontra a. ¹⁰ Men, Seyè a move sou Ouza, li touye l' frèt, paske li pa t' dwe manyen Bwat Kontra a. Bondye touye l', Ouza mouri la menm devan Bondye. ¹¹ David menm te fache dèske Seyè a te touye Ouza. Se konsa yo rele kote sa a Perèz-Ouza. Non sa a rete jouk jounen jòdi a. ¹² Lè sa a, David vin pè Seyè a, li di konsa: -M' pa wè ki jan pou m' pran Bwat Kontra a avè m' koulye a! ¹³ Se konsa, li pran desizyon pa pote Bwat Kontra Seyè a lakay li nan lavil David. Li fè yo pote l' kay Obèd-Edon, yon moun lavil Gat. ¹⁴ Bwat la pase twa mwa lakay Obèd-Edon, Seyè a te beni fanmi Obèd-Edon ak tout bagay ki te pou yo.

Chapter 14

¹ ¶ Iram, wa lavil Tir la, delege kèk mesaje bò kote David ak yon chajman bwa sèd. Li voye tou kèk bòs mason ak bòs chapant pou bati yon palè pou li. ² Lè sa a atò, David wè tout bon vre se Seyè a menm ki te mete l' wa pèp Izrayèl la, epi ki te fè tout bagay mache byen pou gouvènman li, akòz pèp Bondye a, pèp Izrayèl la. ³ Lè David te lavil Jerizalèm, li pran lòt madanm ki ba li lòt pitit gason ak lòt pitit fi. ⁴ Men non pitit David ki te fèt lavil Jerizalèm: Chamwa, Choba, Natan, Salomon, ⁵ Jibka, Elichwa, Elpelèt, ⁶ Noga, Nefèg, Jafya, ⁷ Elichama, Baalyada ak Elifelèt. ⁸ ¶ Lè moun Filisti yo vin konnen yo te mete David wa pou tout pèp Izrayèl la, yo tout yo leve pou y' al mete men sou li. ⁹ Lè David li menm pran nouvèl la, li soti al kontre yo. Moun Filisti yo rive, yo anvayi tout fon Refayim lan. ¹⁰ David pale ak Bondye, li mande l': -Eske se pou m' atake moun Filisti yo? Eske w'ap lage yo nan men m'? Seyè a reponn li: -Wi, atake yo. M'ap lage yo nan men ou. ¹¹ David moute Baal Perazim, li kraze moun Filisti yo. Le sa a, David di: -Tankou yon lavalas, Bondye sèvi avè m' pou l' louvri yon pasaj nan mitan lènmi m' yo. Se poutèt sa yo rele kote sa a Baal Perazim. ¹² Moun Filisti yo te kouri kite zidòl yo dèyè. David bay lòd pou yo boule yo nan dife. ¹³ Apre sa, moun Filisti yo tounen nan fon an ankò pou fè piyay. ¹⁴ David mande Bondye sa pou li fè. Bondye di li: -Pa atake yo pa devan bò isit la. Fè yon detou, pase pa dèyè yo. W'a atake yo bò pye gayak yo. ¹⁵ Lè w'a tande yon bri tankou bri pye yon moun k'ap mache sou tèt pyebwa yo, w'a fonce sou yo. Paske sa vle di se mwen menm Bondye k'ap pran devan ou pou bat lame moun Filisti yo. ¹⁶ David fè sa Seyè a te mande l' fè a. Yo bat lame moun Filisti yo, yo kouri dèyè

17
 yo depi lavil Geba rive lavil Gezè. Se konsa toupatou yo t'ap nonmen non wa David. Seyè a te fè tout nasyon yo pè li.

Chapter 15

¹ ¶ David fè yo bati anpil kay pou li nan lavil David la. Li pare yon anplasman pou Bwat Kontra Bondye a, li moute yon gwo tant twal pou li. ² Epi li di: -Se moun Levi yo ase ki pou pote Bwat Kontra Bondye a, paske se yo menm Seyè a te chwazi pou pote Bwat la, se yo li te chwazi pou sèvi l' pou tout tan. ³ Lèfini, li reyini tout pèp Izrayèl la lavil Jerizalèm pou yo pote Bwat Kontra a kote li te pare pou li a. ⁴ Apre sa, li voye chache tout moun nan ras fanmi Arawon yo ansanm ak moun Levi yo. ⁵ Nan branch fanmi Keyat la, te gen Ouryèl, chèf la, ak tout fanmi l' yo. Sa te fè antou sanven (120). ⁶ Nan branch fanmi Merari a, te gen Asaja, chèf la, ak tout fanmi l' yo. Sa te fè antou desanven (220). ⁷ Nan branch fanmi Gèchon an, te gen Joèl, chèf la, ak tout fanmi l' yo. Sa te fè antou santrant (130). ⁸ Nan branch fanmi Elizafan an, te gen Semaja, chèf la, ak tout fanmi l' yo. Sa te fè antou desan (200). ⁹ Nan branch fanmi Ebwon an, te gen Eliyèl, chèf la, ak tout fanmi l' yo. Sa te fè antou katreven. ¹⁰ Nan branch fanmi Ouzyèl la te gen Aminadad, chèf la, ak tout fanmi l' yo. Sa te fè antou sandouz (112). ¹¹ David rele Zadòk ak Abyata, prèt yo, ansanm ak sis moun Levi: Ouryèl, Asaja, Joèl, Chemaja, Eliyèl ak Aminadad. ¹² Li di yo: -Se nou menm ki chèf branch fanmi Levi yo. Mete nou nan kondisyon pou fè sèvis pou Bondye, nou menm ansanm ak tout moun nan fanmi nou, pou nou ka al pote Bwat Kontra Seyè a, Bondye pèp Izrayèl la, kote mwen fè pare pou li a. ¹³ Premye fwa a, nou pa t' la. Se poutèt sa Seyè a, Bondye nou an, te touye kèk nan nou paske nou pa t' fè l' jan nou te dwe fè l' la. ¹⁴ Se konsa, prèt yo ak moun Levi yo al mete yo nan kondisyon pou fè sèvis Bondye, pou yo te ka al pote Bwat Kontra Seyè a, Bondye pèp Izrayèl la. ¹⁵ Yo mete Bwat la sou gwo travès long yo, yo leve l' mete l' sou zepòl yo, yo pote l' ale jan Moyiz te ba yo lòd fè l' la dapre pawòl Seyè a. ¹⁶ David bay chèf moun Levi yo lòd pou yo chwazi divès moun nan fanmi yo ki konn chante, pou yo vini ak enstriman mizik yo, gita, bandjo ak senbal, pou jwe mizik cho paske kè tout moun te kontan. ¹⁷ Moun Levi yo chwazi Eyman, pitit gason Joèl la, ansanm ak Asaf, pitit gason Berekyà, yon fanmi Eyman, ak Etan, pitit gason Kouchaja nan branch

18

fanmi Merari a, fanmi ak de lòt premye yo. Apre sa, yo chwazi lòt moun Levi nan menm fanmi ak premye yo, pou ede yo nan travay yo. Se te Zakari, Aziyèl, Semiramòt, Jekiyèl, Ouni, Eliyab, Benaja, Maseja, Matitya, Elifeleou, Mikneja, ak de gad pòtay tanp lan, Obèd-Edon ak Jeyèl.

19 Eyman, Asaf ak Etan, sanba yo, te reskonsab pou bat senbal kwiv yo pou fè mizik. 20 Zakari, Aziyèl, Semiramòt, Jekiyèl, Ouni, Eliyab, Maseja ak Benaja t'ap jwe premye gita yo. 21 Matitya, Elifeleou, Mikneja, Obèd-Edon, Jeyèl ak Azazyà t'ap jwe gita bas. Se yo ki pou te bay kadans chante yo. 22 Se Kenanya, chèf moun Levi ki te reskonsab pote Bwat la, ki t'ap dirije yo, paske li te fò nan fè travay konsa. 23 Se Berekya ak Elkana ki t'ap pote Bwat Kontra a. 24 Men non prèt yo te chwazi pou kònen twonpèt devan Bwat Kontra a. Se te Chebanyas, Jozafa, Netaneyèl, Amasayi, Zakari, Benaja ak Elyezè. Obèd-Edon ak Jebija te la pou pote Bwat Kontra a tou. ¶ Se konsa David ak tout chèf fanmi pèp Izrayèl yo ansanm ak tout chèf rejiman mil sòlda yo ale lakay Obèd-Edon, yo pran Bwat Kontra a pou yo pote l' lavil Jerizalèm ak kè kontan. 26 Yo touye sèt towò ak sèt belye pou Bondye te ka ede moun Levi ki t'ap pote Bwat Kontra a. 27 David te gen yon rad fèt ak twal fin blan sou li, menm jan ak tout moun Levi yo ki t'ap mache devan Bwat Kontra a, sanba yo ak Kenaja ki t'ap dirije travay transpò a. David te gen yon moso twal fin blan tou mare nan ren li. 28 Se konsa, tout pèp Izrayèl la ale ansanm ak Bwat Kontra Seyè a, yo pote l' lavil Jerizalèm. Yo t'ap rele, yo t'ap fè fèt. Yo t'ap jwe klewon, twonpèt, senbal, gita ak bandjo sou tout wout la. 29 Antan yo t'ap antre ak Bwat Kontra a lavil Jerizalèm, Mikal, pitit fi Sayil la, te kanpe bò yon fennèt ap gade. Li wè David ki t'ap danse fè laviwonn devan Bwat la. Li vin pa gen yon san pou li ankò.

Chapter 16

1 ¶ Yo pote Bwat Kontra Seyè a, yo mete l' nan plas li nan tant David te moute pou li a. Apre sa, yo ofri bèt pou boule nèt pou Bondye, ak ofrann pou di Bondye mèsi. 2 Lè David fin fè ofrann sa yo, li beni pèp la nan non Seyè a. 3 Li separe manje bay tout moun pèp Izrayèl yo, fanm kou gason. Li bay yo chak yon pen, yon moso vyann woti ak yon pen rezen. 4 David chwazi kèk moun Levi pou reskonsab sèvis y'ap fè devan Bwat Kontra a pou Seyè a, Bondye pèp Izrayèl la, pou adore l', pou di l' mèsi, pou fè lwanj li. 5 Li mete Asaf chèf ak Zakari pou vin apre li. Sou zòd yo te gen Aziyèl, Chemiramòt, Jekiyèl, Matitya, Eliyab, Benaja, Obèd-Edon, Jeyèl pou jwe enstriman

mizik yo, gita ak bandjo. Asaf menm t'ap bat senbal ki fè gwo bri yo. ⁶ Se Benaja ak Jaziyèl, prèt
 yo, ki te pou kònen twonpèt devan Bwat Kontra Bondye a tout tan. ⁷ ¶ Se lè sa a, pou premye fwa,
 David te bay Asaf ak lòt moun Levi yo reskonsablite pou yo fè lwanj Seyè a. ⁸ Lwanj pou Seyè a!
 Fè konnen jan li gen pouvwa! Fè nasyon yo konnen sa li fè! ⁹ Chante pou li! Fè lwanj li! Rakonte
 tout bèl bagay li te fè yo. ¹⁰ Fè kè nou kontan, paske nou se moun pa l'. Wi, se pou tout moun k'ap
 sèvi Seyè a fè fèt. ¹¹ Ale jwenn Seyè a pou l' ka ede nou. Toujou chache rete devan li. ¹² - ¹³ Nou
 menm, pitit pitit Izrayèl, sèvitè Bondye a, Nou menm, pitit pitit Jakòb yo, nou menm Bondye chwazi
 yo, chonje mirak ak bèl bagay li te fè yo. Chonje jijman ki te soti nan bouch li. ¹⁴ Seyè a, se Bondye
 nou li ye. Lè li pase yon lòd, se pou tout latè. ¹⁵ Toujou chonje kontra li a. L'ap kenbe pwomès li
 pou tout tan tout tan. ¹⁶ Se kontra li te fè ak Abraram lan, sèman li te fè bay Izarak la. ¹⁷ Sa li te
 pwomèt Abraram lan, li fè l' tounen yon lwa pou pitit Jakòb yo, yon kontra ak pèp Izrayèl la pou
 tout tan. ¹⁸ Li te di: M'ap ba ou peyi Kanaran an pou pòsyon pa ou nan byen m' yo. ¹⁹ Lè sa a, pèp
 Bondye a pa t' anpil. Yo te sèlman yon ti ponyen moun. Yo te tankou etranje toujou nan peyi a.
²⁰ Yo t'ap mache ale vini nan tout nasyon yo. Yo t'ap soti nan yon peyi ale nan yon lòt. ²¹ Men, li
 pa t' kite pesonn maltrete yo. Li te menm rive pini anpil wa poutèt yo. ²² Li te di: Piga nou manyen
 moun mwen chwazi yo. Piga nou fè pwofèt mwen yo anyen. ²³ Nou tout ki rete sou latè, chante
 pou Seyè a! Chak jou, fè konnen jan li delivre nou. ²⁴ Fè nasyon yo konnen pouvwa li. Fè tout pèp
 yo konnen bèl bagay li fè yo. ²⁵ Seyè a gen gwo pouvwa. Li merite pou yo fè lwanj li vre. Se pou
 tout moun pè l' pi plis pase lòt bondye yo. ²⁶ Bondye lòt nasyon yo pa anyen, se pòtre yo ye. Men,
 se Seyè a ki fè syèl la. ²⁷ Devan li, se respè, se chapo ba. Gen pouvwa, gen kè kontan kote l' ye
 lakay li a. ²⁸ Nou tout pèp ki sou latè, fè lwanj Seyè a! Fè lwanj Seyè a pou pouvwa ak fòs li
 genyen! ²⁹ Fè lwanj Seyè a, paske li merite sa! Pote ofrann ba li anndan lakay li! Adore Bondye
 nan bèl kay ki apa pou li a! ³⁰ Nou tout ki sou latè, tranble devan li. Latè kanpe fèm, anyen pa ka
 brannen l'. ³¹ Se pou syèl la kontan, se pou latè a fè fèt. Mache di nan tout peyi yo: Se Seyè a ki
 sèl wa. ³² Se pou lanmè a ansanm ak tou sa ki ladan l' pran fè bri sitèlman yo kontan. Se pou jaden
 yo ak tou sa ki ladan yo fè fèt. ³³ Lè Seyè a parèt se pou tout pyebwa nan gwo rak yo rele sitèlman

yo kontan. Paske l'ap vini pou l' jije tout moun ki sou latè. ³⁴ Lwanj pou Seyè a paske li bon. Li
³⁵
 p'ap janm sispann renmen nou. ³⁵ Se pou nou di: Delivre nou non, Bondye delivrans nou! Fè nou
 soti nan tout peyi kote nou gaye yo. Sanble nou, pou nou ka di ou mèsè pou tout bagay ou menm
³⁶
 sèl ka fè, pou nou ka kontan lè n'ap fè lwanj ou. ³⁶ Ann fè lwanj Seyè a, Bondye pèp Izrayèl la!
 Ann fè lwanj li depi tout tan ak pou tout tan. Epi tout pèp la pran reponn: -Wi, se vre! Lwanj pou
³⁷
 Seyè a! ³⁷ ¶ Lèfini, David kite Asaf ak moun Levi menm fanmi avè l' yo devan Bwat Kontra Seyè
 a pou yo toujou reskonsab tout sèvis ki pou fèt kote yo te mete Bwat Kontra a. Yo te gen pou fè
³⁸
 sèvis yo la chak jou san rete. ³⁸ Obèd-Edon ak swasantwit lòt moun nan fanmi li t'ap ede yo nan
³⁹
 travay yo. Osa ak Obèd-Edon, pitit gason Jeditoun lan, te reskonsab pòtay yo. ³⁹ Men David kite
 Zadòk, prèt la, ak moun Levi menm fanmi avè l' yo ki te prèt tou devan Tant Seyè a, nan kote yo
⁴⁰
 te mete apa pou Seyè a lavil Gabawon. ⁴⁰ Chak maten, chak aswè, se yo ki pou boule bèt yo ofri
 bay Seyè a nèt sou lotèl ki fèt pou sa a, dapre sa ki ekri nan lalwa Seyè a te bay pèp Izrayèl la.
⁴¹
⁴¹ Te gen avèk yo tou Eyman, Jedoutoun ansanm ak lòt moun yo te chwazi tout espre pou chante:
⁴²
 Lwanj pou Seyè a paske li p'ap janm sispann renmen nou. ⁴² Eyman ak Jedoutoun te gen twonpèt,
 senbal ki fè gwo bri yo ak lòt enstriman mizik pou yo jwe antan yo t'ap chante fè lwanj pou Bondye.
⁴³
 Manm fanmi Jedoutoun yo te reskonsab veye pòtay yo. ⁴³ Apre sa, tout pèp la tounen lakay yo.
 David tounen lakay li tou pou l' beni fanmi pa l' tou.

Chapter 17

¹
¹ ¶ Wa David te byen chita nan palè li. Yon jou li fè rele pwofèt Natan, li di l' konsa: -Gade!
 Mwen rete nan yon kay bati ak bwa sèd, men Bwat Kontra Seyè a se anba yon kay twal li ye.
²
² Natan reponn li: -Tou sa ou gen lide fè, ou mèt fè l' paske Seyè a kanpe la avèk ou. ³ Men, menm
⁴
 jou lannwit sa a, Bondye pale ak Natan. Li di l' konsa: ⁴ -Ale di David, sèvitè m' lan, men sa mwen
⁵
 menm Seyè a, mwen voye di l': Se pa ou menm ki pral bati yon tanp pou m' rete. ⁵ Depi jou mwen
 te fè moun pèp Izrayèl yo soti kite peyi Lejip rive jòdi a, mwen pa janm rete nan yon kay. Tout
⁶
 kote m' pase, se anba yon tant twal mwen toujou ye. ⁶ Nan tout depasman mwen ansanm ak moun
 Izrayèl yo, mwen pa janm mande yonn nan chèf mwen te chwazi pou gouvènè pèp mwen an
⁷
 poukisa yo pa bati yon kay ak bwa sèd pou mwen. ⁷ Koulye a, men sa w'a di David, sèvitè m' lan:
 Men sa Seyè ki gen tout pouvwa a voye di ou: Se mwen menm ki te pran ou dèyè mouton ou t'ap

8
 gade nan savann yo, mwen mete ou chèf pèp Izrayèl la, pèp mwen an. Kote ou pase, mwen te kanpe la avè ou. Mwen kraze tout lènmi ou yo devan ou. Mwen pral fè yo nonmen non ou tankou
 9
 y'ap nonmen non pi gwo chèf ki sou latè. Lèfini, mwen pare yon kote pou pèp Izrayèl mwen an. Mwen pral tabli yo la pou yo ka viv san yo pa bezwen pè anyen ankò. Mechan p'ap vin maltrete
 10
 yo ankò jan yo te konn fè l' anvan an, lè mwen te mete jij chèf yo pou gouvènè pèp Izrayèl mwen an. M'ap delivre ou anba men tout lènmi ou yo. Mwen te fè ou konnen m'ap ba ou pitit ak
 11
 pitit pitit. Lè lè a va rive pou ou mouri, lè y'a antere ou, m'ap pran yonn nan pitit ou yo, m'ap
 12
 mete l' wa nan plas ou. M'ap fè gouvènman l' lan kanpe fèm. Se li menm ki va bati yon tanp pou
 13
 mwen, m'ap fè gouvènman l' lan kanpe fèm pou tout tan. M'ap yon papa pou li. Li menm l'ap
 14
 yon pitit pou mwen. Mwen p'ap lage l' jan mwen te lage moun ki te wa anvan ou lan. M'ap mete
 15
 l' chèf lakay mwen ak nan gouvènman mwen an pou tout tan. M'ap fè gouvènman fanmi li an kanpe
 16
 fèm pou tout tan. Natan rakonte David tou sa Bondye te fè l' konnen nan vizyon an. ¶ Aprè
 sa, wa David ale nan Tanp lan, li chita devan Seyè a, li di l' konsa: -Seyè Bondye sèl Mèt la, kisa
 17
 mwen ye? Kisa fanmi mwen ye pou ou te fè tout sa ou deja fè pou nou? Men, ou wè sa pa kont
 toujou, Bondye sèl Mèt la! Kifè koulye a w'ap fè konnen sa ki pral rive fanmi mwen denmen nan
 18
 lanne k'ap vini yo. Ou trete m' tankou yon grannèg, Seyè sèl Mèt la. Kisa mwen menm David,
 mwen ka di ou, Seyè, apre sa pou bèl bagay ou fè pou mwen yo? Ou konnen ki moun mwen ye,
 19
 mwen menm k'ap sèvi ou la. Se paske ou te fè pwomès la, paske ou te vle l' konsa, Seyè, kifè
 20
 ou te fè tout bèl bagay sa yo pou ou te fè m' konnen yo. Seyè, Bondye mwen, pa gen tankou ou.
 21
 Pa gen lòt Bondye pase ou menm! Yo te toujou di nou sa. Pa gen lòt nasyon sou latè tankou pèp
 Izrayèl la. Se ou menm ki delivre yo pou yo te ka tounen yon pèp ki rele ou pa ou. Se pou yo ase
 ou fè sa! Toupatou sou latè y'ap nonmen non ou pou gwo mirak ak bèl bagay ou fè pou yo. Ou
 mete lòt nasyon deyò pou fè plas pou pèp ou a, pèp ou te delivre anba pouvwa pèp peyi Lejip la.
 22
 Ou fè pèp Izrayèl la tounen pèp pa ou pou tout tan, ou menm ou tounen Bondye yo. Koulye
 a, Seyè, Bondye, se pou ou kenbe pwomès ou te fè sèvitè ou la ansanm ak fanmi li an. Se pou ou
 24
 fè sa ou di w'ap fè a. Kenbe pwomès ou pou tout moun rekonèt jan ou gen pouvwa, pou yo di:
 Se Seyè ki gen tout pouvwa a ki Bondye pèp Izrayèl la vre. Se yon Bondye pou pèp Izrayèl la.
 Konsa, gouvènman ki nan men fanmi David, sèvitè ou la, va kanpe fèm pou tout tan devan ou.
 25
 Se ou menm, Bondye mwen, ki te fè m' konnen tou sa. Ou te di m', mwen menm sèvitè ou la,
 w'ap ban mwen yon fanmi, lèfini w'ap fè baton gouvènman an toujou rete nan men fanmi mwen.
 26
 Se poutèt sa mwen gen kouraj fè lapriyè sa a nan pye ou. Koulye a, Seyè, se ou ki Bondye, se

ou ki pwomèt sèvitè ou la bèl bagay sa yo.²⁷ Tanpri, beni tout fanmi mwen apre mwen, pou yo ka toujou anba pwoteksyon ou. Wi, Seyè, se ou ki bay benediksyon. Se pou ou toujou voye benediksyon ou sou fanmi mwen.

Chapter 18

¹ ¶ Apre sa, David atake moun Filisti yo ankò. Li bat yo byen bat. Se konsa li pran lavil Gat ak tout ti bouk ki te sou lòd li yo, nan men moun Filisti yo.² Lèfini, li bat moun peyi Moab yo. Moun Moab yo soumèt devan David. Li fè yo peye taks ba li chak lè.³ Apre sa, li bat Adadezè, wa peyi Zoba a, ki t'ap mache pran zòn ki sou anwo lariyè Lefrat la.⁴ David pran mil (1.000) cha lagè, sèt mil (7.000) kavalye nan lame wa Adadezè a, li fè yo prizonye ansanm ak venmil (20.000) sòlda ki t'ap mache apye. Lè li fin wete kont chwal pou san (100) cha lagè, li fè koupe jarèt tout rès chwal yo.⁵ Moun Siri lavil Damas yo voye yon lame pou pote Adadezè, wa peyi Zoba a, konkou. David atake yo, li bat yo tou. Li touye venndemil (22.000) sòlda.⁶ Apre sa, David mete moun pa l' pou gouvènè peyi Damas la. Moun Siri yo soumèt devan li. Li fè yo peye taks chak lè. Se konsa Seyè a te fè David genyen tout batay kote l' pase.⁷ David sezi tout gwo plak pwotèj an lò chèt lame wa Adadezè yo, li pote yo lavil Jerizalèm.⁸ Li pran yon gwo kantite kwiv li te jwenn lavil Tiba ak lavil Koun ki te pou Adadezè. Se ak kwiv sa yo Salomon te fè gwo basen lan, poto won yo ak lòt veso an kwiv pou Tanp lan.⁹ ¶ Lè Towou, wa lavil Amat la, tandè jan David te kraze tout lame Adadezè a,¹⁰ li voye pitit li, Adouram al wè David pou di l' bonjou, epi pou fe l' konpliman deske li te bat Adadezè, paske Towou te toutan ap fè lagè ak Adadezè. Adouram te pote kado fèt an lò, an ajan ak an kwiv bay David.¹¹ Wa David pran tout bagay sa yo, li mete yo apa pou sèvis Seyè a, ansanm ak tout lò ak tout ajan li te pran lakay moun lòt nasyon li te fè soumèt devan li, ki vle di moun peyi Edon, moun peyi Moab, moun peyi Amon, moun peyi Filisti ak moun peyi Amalèk.¹² Apre sa, Abichayi, pitit gason Sewouja a, touye dizwitmil (18.000) moun peyi Edon nan Fon Sèl la.¹³ Li mete kèk ganizon sòlda nan teritwa Edon an. Tout moun Edon yo soumèt devan David. Se konsa, Seyè a te fè David genyen tout batay kote l' pase.¹⁴ David t'ap gouvènè tout pèp Izrayèl la. Li te fè tout moun jistis san patipri. Li te fè tout afè l' dwat.¹⁵ Joab, pitit gason Sewouya a, te kòmandan chèf lame a. Jozafa, pitit gason Akiloud la, te reskonsab achiv yo.¹⁶ Zadòk, pitit gason

17

Akitoub, ak Akimelèk, pitit gason Abyata a, te prèt. Chaoucha te sekretè. Benaja, pitit gason Jeojada a, te chèf keretyen yo ak pelesyen yo ki te gad pèsonèl wa a. Pitit gason David yo menm te gwo chèf apre wa a.

Chapter 19

¹ ¶ Apre sa, Nakach, wa lavil Amon, mouri. Se pitit gason li ki moute wa nan plas li. ² David di: -Se pou m' aji byen ak Anoun, pitit Nakach la, paske papa l' te boule byen avè m'. Se konsa, David voye mesaje al di Anoun jan sa te fè l' lapenn lè l' pran nouvèl lanmò papa l'. Mesaje David

yo rive lakay Anoun nan peyi moun Amon yo pou konsole l'. ³ Men, chèf moun Amon yo di Anoun konsa: -Pa konprann se sèlman pou lanmò papa ou la kifè David voye mesaje sa yo bò kote ou pou konsole ou. Wete sa nan tèt ou. Li voye yo isit la pou yo wè jan lavil la ye, pou yo gade byen sa

k'ap pase nan lavil la. Konsa, pita li ka vin pran lavil la nan men nou. ⁴ Sa Anoun fè lè sa a, li pran moun David te voye yo, li raze tout yon bò nan bab yo, li koupe anba rad yo ra dèyè yo, li voye yo

tounen. ⁵ Mesye yo te wont anpil pou yo te tounen lakay yo konsa. Lè David vin konn sa ki te rive yo, li voye di yo rete lavil Jeriko, y'a tounen lakay yo lè bab yo va pouse ankò. ⁶ ¶ Wa Anoun ak moun Amon yo vin konprann yo te fè David fache. Yo pran mil pyès ajan, yo voye chache sòlda, cha lagè, ak kavalye kay moun Aram yo lavil Narayim, lavil Maka ak lavil Zoba pou vin goumen

pou yo. ⁷ Se konsa yo lwe sèvis tranndemil (32.000) cha lagè ki vin kanpe devan lavil Medeba ansanm ak wa lavil Maka a ak tout lame li a. Moun peyi Amon yo kite lavil yo, yo reyini ansanm

pou pare pou batay la. ⁸ David vin konnen sa. Li voye Joab ak tout lame vanyan sòlda li yo al kontre yo. ⁹ Moun Amon yo soti, y' al pran pozisyon devan pòtay lavil la. Wa ki te vin ede yo bò

pa yo pran pozisyon nan plenn lan. ¹⁰ Joab te wè lame lènmi yo te ka atake l' ni sou devan, ni sou dèyè. Sa l' fè, li chwazi pi bon sòlda nan lame pèp Izrayèl la, li mete yo an pozisyon devan lame

moun Aram yo. ¹¹ Lèfini, li mete Abichayi, frè l' la, alatèt rès lame a. Li fè yo pran pozisyon devan

moun Amon yo. ¹² Joab di Abichayi konsa: -Si nou wè moun Aram yo soti pou yo bat mwen, w'a

vin ede m'. Konsa tou, si mwen wè moun Amon yo vle pi fò pase ou, m'a vin ede ou. ¹³ Mete gason sou nou. Kouraj! Nou pral goumen rès mare pou pèp nou an ak pou lavil Bondye nou an. Bondye

va fè sa li vle li menm. ¹⁴ Joab ak sòlda ki te avè l' yo mache sou moun Aram yo. Moun Aram yo

kouri pou li. ¹⁵ Lè moun peyi Amon yo wè moun Aram yo kouri ale, yo kouri tou pou Abichayi,

frè Joab la, yo antre nan lavil la. Lè sa a, Joab tounen tounen l' lavil Jerizalèm. ¹⁶ Lè moun Aram yo wè moun Izrayèl yo te bat yo, yo voye yon mesaj bay moun Aram ki te lòt bò larivyè Lefrat la, pou yo pare vin goumen pou yo. Yo reyini lavil Elam. Se Chofak, chèf lame Adadezè a, ki te alatèt ¹⁷ yo. Lè David vin konn sa, li sanble tout lame pèp Izrayèl la, li janbe lòt bò larivyè Jouden, li mache sou yo, li pran pozisyon devan yo. David ranje sòlda li yo pou li goumen ak moun Aram ¹⁸ yo. Epi batay la konmanse. Moun Izrayèl yo fè moun Aram yo kouri met deyò. David ak sòlda li yo touye sòlda ki te sou sèt mil (7.000) cha lagè ak karantmil (40.000) sòlda ki te apye. Yo touye ¹⁹ Chofak, chèf lame lènmi an. Lè moun ki te avek Adadezè yo wè jan moun Izrayèl yo te bat yo, yo fè lapè ak David. Yo soumèt devan li. Se konsa, moun Aram yo pa t' vle vin pote moun Amon yo sekou ankò.

Chapter 20

¹ ¶ Nan prentan apre sa, nan epòk wa yo konn soti al fè lagè, Joab pati ak pifò sòlda lame pèp Izrayèl la. Yo ravaje peyi Amon an, yo sènen lavil Raba. David menm te rete lavil Jerizalèm. Joab ² pran lavil la, li kraze l'. Estati Milkòm, zidòl moun Amon yo, te gen yon gwo kouwòn fèt an lò sou tèt li. Kouwòn lan te peze swasannkenz liv, li te gen yon gwo pyè koute chè ladan l'. David pran kouwòn lò ki te sou tèt zidòl la, li mete l' sou tèt pa l'. Lèfini, se pa de bagay li pa pran nan ³ lavil la. Li pran moun ki te rete nan lavil la, li mete yo fè travay ak goyin, wou ak rach. Li fè menm bagay la tou nan tout lòt lavil peyi Amon an. Apre sa, David tounen lavil Jerizalèm ak tout ⁴ moun li yo. ¶ Apre sa, lagè pete ankò ant moun Filisti yo ak moun pèp Izrayèl yo bò lavil Gezè. Lè sa a, Sibekayi, yon moun lavil Ousa, touye Sipayi, yon moun nan ras Arafa yo. Yo fè moun ⁵ Filisti yo soumèt devan yo. Pandan yon lòt batay ak moun Filisti yo ankò, Elkanan, pitit gason Jayi, touye Lami, frè Golyat, yon moun lavil Gat. Frenn Lami an te gen yon manch menm gwosè ⁶ ak yon gwo manch pilon. Vin gen yon lòt batay ankò lavil Gat. Lè sa a, te gen yon sòlda bèl wotè ⁷ ki te gen sis dwèt nan chak men, sis zòtèy nan chak pye. Se te yonn nan ras moun Arafa yo. Li ⁸ t'ap pase moun pèp Izrayèl yo nan betiz. Jonatan, pitit gason Chimeya, frè David la, touye l'. Kat sòlda peyi Filisti sa yo te soti nan ras moun Arafa yo, nan lavil Gat. David ak sòlda li yo touye yo.

Chapter 21

¹ ¶ Yon jou, Satan move sou pèp Izrayèl la, li pouse David al konte konbe moun ki nan pèp
² Izrayèl la. Wa a pale ak Joab ansanm ak lòt chèf yo, li di yo konsa: -Ale nan tout branch fanmi
Izrayèl yo, depi lavil Bètcheba nan sid jouk lavil Dann nan nò. Konte dènye moun ki nan pèp la.
³ Lèfini, fè m' yon rapò pou m' ka konnen konbe moun ki gen nan peyi a. Men Joab di wa a konsa:
-Monwa, mwen mande Seyè a pou li fè pèp Izrayèl la vin san fwa pi plis pase jan li ye koulye a.
Lèfini, monwa, ou konnen yo tout la ap sèvi ou. Men poukisa, monwa, ou vle fè sa? Poukisa ou
⁴ vle pòte pèp Izrayèl la fè sa ki mal? Men, wa a pa t' soti pou li chanje lòd li te bay la. Konsa, Joab
⁵ pati, li vwayaje nan tout peyi a. Apre sa, li tounen lavil Jerizalèm. Joab renmèt wa a rapò ki bay
kantite moun ki te gen antou nan tout peyi a. Se konsa yo te jwenn yon milyon sanmil (1.100.000)
gason ki konn sèvi ak nepe nan peyi Izrayèl la ak katsanswasanndimil (470.000) nan peyi Jida a.
⁶ Men Joab pa t' konte moun ni nan branch fanmi Levi a, ni nan branch fanmi Benjamen an, paske
⁷ lòd wa a te bay la pa t' antre nan santiman l' menm. ¶ Men, sa David te fè a pa t' fè Bondye plezi.
⁸ Bondye pini pèp Izrayèl la. Lè sa a, David di Bondye: -Sa m' fè la a, se yon gwo peche. Koulye
⁹ a, tanpri, padonnen m'. Pa bliye se sèvitè ou mwen ye. Mwen te aji tankou moun fou. Seyè a pale
¹⁰ ak pwofèt Gad, konseye David la, li di l' konsa: -Ale pale ak David. W'a di l' men mesaj Seyè
a voye ba ou. Li mete twa chatiman devan ou. Ou menm, w'a chwazi yonn ladan yo. Sa w'a chwazi
¹¹ a, se sa l'a fè ou. Se konsa Gad al jwenn David lakay li, li di l' konsa: -Men sa Seyè a voye di
¹² ou: Kisa ou vle? Twa lanne grangou nan tout peyi a, twa mwa ap kouri devan lènmi k'ap pousib
ou ak sòlda yo, osinon twa jou ap sibi chatiman Seyè a ak yon epidemi nan tout peyi a, pou zanj
Seyè a menm ap mache touye moun nan tout peyi Izrayèl la? Al kalkile sou sa pou fe m' konnen
¹³ ki repons pou m' pote bay moun ki voye m' lan. David reponn: -M' nan gwo tèt chaje! Men, m'
¹⁴ pa vle tonbe anba men lèzòm menm! Pito se Seyè a ki pini m', paske li gen bon kè! Se konsa,
Seyè a voye yon epidemi sou pèp Izrayèl la. Li touye swasanndimil (70.000) moun nan pèp Izrayèl
¹⁵ la. Seyè a te voye zanj li sou lavil Jerizalèm pou detwi l'. Lè zanj lan konmanse fè travay li, Seyè
a wè sa, li fè lide sispann chatiman an. Li di zanj ki t'ap touye moun yo: -Sispann! Kenbe men ou!
¹⁶ Lè sa a, zanj lan te gen tan toupre glasi Onan an, moun lavil Jebis la. David voye je l', li wè zanj
Seyè a kanpe nan lè a, san pye l' pa touche tè, bra l' lonje sou lavil Jerizalèm ak yon nepe nan men
¹⁷ l'. Lè sa a, David ak chèf fanmi yo, rad sak yo sou yo, bese tèt yo jouk atè. David pale ak Seyè
a, li di l' konsa: -Se mwen menm ki te mande pou yo konte moun yo. Se mwen menm ki antò. Se
mwen menm ki fè sa ki mal. Kisa moun sa yo fè? Se mouton yo ye. Tanpri, Seyè, Bondye mwen,

pa voye ankenn malè sou pèp la. Se mwen menm ansanm ak fanmi mwen pou ou ta pini. ¹⁸ ¶ Zanj Seyè a te bay pwofèt Gad lòd pou l' te al mande David pou l' moute lakay Onan, moun lavil Jebis la, bati yon lotèl pou Seyè a nan mitan glasi a. ¹⁹ David koute sa Gad te di l' la, li moute lakay Onan jan Seyè a te ba li lòd la. ²⁰ Onan menm t'ap bat ble ansanm ak kat pitit gason l' yo ki te la avè l' sou glasi a. Lè yo wè zanj lan, pitit li yo kouri al kache. ²¹ Onan vire tèt li, li wè David ki t'ap vini. Li kite glasi a, li tonbe ajenou devan wa a, li bese tèt li jouk fwon li touche tè. ²² David di Onan konsa: -Vann mwen anplasman glasi a pou m' bati yon lotèl pou Seyè a. Ban mwen li pou pri li vo. Konsa, epidemi k'ap fini ak pèp la va sispann. ²³ Onan di David konsa: -Monwa, ou mèt pran l' pou fè sa ou vle avè l'. Men m'ap bay bèf sa yo pou ou boule nèt sou lotèl la. Men jouk bèf yo ak bwa kabwa yo pou fè dife, ak ble pou sèvi ofrann grenn jaden an. M'ap ba ou tout bagay sa yo. ²⁴ Men wa David reponn Onan, li di l': -Non. Se achte m'ap achte. Se pou m' peye ou sa yo vo. M' pa ka ofri Seyè a sa ki pou ou. Mwen p'ap pran anyen ki pa koute m' lajan pou m' ofri bay Seyè a. ²⁵ Se konsa David bay Onan swasant pyès lò pou anplasman glasi a. ²⁶ Lèfini, li bati yon lotèl pou Seyè a, li fè ofrann bèt boule pou Bondye ak ofrann pou di Bondye mèsì. Li lapriyè nan pye Seyè a. Seyè a reponn li, li voye dife soti nan syèl la pou boule ofrann ki sou lotèl la. ²⁷ Lè sa a, Seyè a bay zanj li a lòd pou li mete nepe li nan djenn li ankò. ²⁸ Lè David wè Seyè a te reponn lapriyè li te fè nan pye l' sou glasi Onan, moun lavil Jebis la, li ofri bèt pou touye sou lotèl la. ²⁹ Men lè sa a, Tant Randevou Moyiz te fè moute pou Seyè a nan dezè a ansanm ak lotèl pou boule ofrann bèt yo te sou mòn Gabawon toujou, kote yo te mete apa pou Seyè a. ³⁰ Men, David pa t' ka ale la pou adore Seyè a, paske li te pè nepe zanj Seyè a.

Chapter 22

¹ ¶ Se konsa David te di: -Se la Tanp Bondye Seyè a ye, ansanm ak lotèl pou boule bèt yo ofri bay Bondye pou pèp Izrayèl la. ² David bay lòd pou tout moun lòt nasyon k'ap viv nan peyi Izrayèl la reyini. Li moute chantye kote pou taye wòch pou bati Tanp Bondye a. ³ Li fè pare fè an kantite pou fè klou ak kranpon pou batan pòt yo. Pou kwiv la menm, moun pa ka kalkile kantite li te fè pare. ⁴ Pou bwa sèd, moun peyi Sidon ak moun lavil Tir te fè David jwenn sa an kantite. ⁵ David t'ap di nan kè l': Salomon, pitit gason m' lan, se yon timoun ki poko gen esperyans. Tanp li gen pou l' bati pou Seyè a, se li ki pou pi gwo, pi bèl pase dènye tanp, pou toupatou sou latè y'ap pale sou

li. Se pou m' pare tout bagay kite pou li. Se konsa, anvan li mouri, David pare materyo an kantite kite la pou sa. ¶ Lèfini, li voye chache Salomon, pitit gason l' lan, li ba li lòd pou li bati Tanp Seyè a, Bondye pèp Izrayèl la. Li di l' konsa: -Pitit mwen, mwen te fè lide bati yon tanp pou Seyè a, Bondye mwen an. Men Seyè a fè m' konnen mwen touye twòp moun, mwen fè anpil lagè. Se poutèt sa se pa mwen ki pral bati tanp lan pou li, paske mwen fè twòp san koule. Men li di m' konsa: Ou pral gen yon pitit gason ki p'ap nan touye moun li menm. M'ap fè tout lènmi l' yo toupatou viv byen ak li tou. Se poutèt sa y'a rele l' Salomon. Sou rèy li, peyi Izrayèl la ap viv ak ke poze, san danje ni malè. Se li menm ki va bati yon tanp pou mwen. L'ap yon pitit pou mwen, mwen menm m'ap yon papa pou li. M'ap fè l' toujou gen yon moun nan fanmi l' wa pou gouvènèn pèp Izrayèl la. Koulye a, pitit mwen, se pou Seyè a, Bondye w'ap sèvi a, toujou kanpe la avè ou pou ou ka rive bati Tanp lan pou li, jan li te pwomèt ou sa. Mwen mande Seyè a pou l' ba ou bon konprann ak anpil lespri, pou lè l'a mete ou chèf nan peyi Izrayèl la, ou ka toujou fè tou sa ki nan Lalwa Seyè a, Bondye ou la. Konsa, tout bagay va mache byen pou ou si ou veye kò ou pou ou mennen bak ou dapre lòd ak regleman Seyè a te bay Moyiz pou pèp Izrayèl la. Mete gason sou ou, kenbe fèm! Pa kite anyen fè ou pè. Gade! Mwen bay kò m' anpil traka pou m' pare tout bagay pou Tanp Seyè a: twamil twasan (3.300) tòn lò, tranntwamil (33.000) tòn ajan, ak yon gwo kantite kwiv ak fè moun pa ka kalkile. M' pare bwa ak wòch tou. Men, se pou ou fè pare toujou. Lèfini, w'ap jwenn anpil travayè, kantonye, moun pou taye wòch, chapant, ak anpil moun ki bòs nan tout kalite travay. Pou lò, ajan, kwiv ak fè, ou gen sa an kantite. Konsa, mete men nan travay la! Mwen mande pou Seyè a toujou kanpe la avè ou. ¶ Apre sa, David mande tout chèf pèp Izrayèl yo pou yo ede Salomon, pitit gason l' lan. Li di yo konsa: -Seyè a, Bondye nou an, te toujou la avèk nou. Li fè nou viv nan lapè ak tout moun toupatou. Li lage nan men mwen tout lòt moun ki rete nan peyi a, kifè tout peyi a soumèt nèt devan Seyè a ak devan pèp li a. Koulye a, se pou nou pran desizyon chache fè volonte Seyè a, Bondye nou an, ak tout kè nou, ak tout nanm nou. Pare kò nou pou nou bati tanp Seyè a, Bondye nou an, pou nou ka mete Bwat Kontra Seyè a ak tout lòt bagay yo mete apa pou fè sèvis Seyè a ladan l'.

Chapter 23

¹ ¶ David te fin vye granmoun, li te fin viv kont li, lè li mete Salomon, pitit li a, wa sou pèp Izrayèl la. ² Li reyini tout chèf pèp Izrayèl yo, tout prèt yo ak tout moun Levi yo. ³ Li fè konte tout moun Levi yo, depi sa ki gen trantan pou pi piti rive sou sa ki pi gran yo. Antou yo jwenn trantwimil (38.000) gason. ⁴ David mete vennkatmil (24.000) pou dirije travay tanp lan, simil (6000) pou ekri tou sa k'ap pase ak pou rann jistis, ⁵ katmil (4000) pou fè pòs nan pòtay la ak katmil (4000) pou fè lwanj Seyè a ak enstriman mizik David te fè pou sa. ⁶ David separe moun Levi yo fè twa gwoup dapre branch fanmi pitit gason Levi yo: Gèchon, Keyat ak Merari. ⁷ Gèchon te gen de pitit gason: Layedan ak Chimèyi. ⁸ Layedan te fè twa pitit gason: Yekiyèl, pi gran an, Zetam ak Joèl. ⁹ Chimeyi te fè twa pitit gason tou: Chelomit, Aziyèl ak Aran. Se yo ki te chèf fanmi moun Layedan yo. ¹⁰ Chimeyi te gen kat lòt pitit gason: Jaka, Ziza, Jeouch ak Berya. ¹¹ Se Jaka ki te pi gran, Ziza te dezyèm pitit la. Jeouch ak Berya pa t' gen anpil pitit. Se konsa yo mete yo ansanm, yo pase pou yon sèl branch fanmi. ¹² Keyat te gen kat pitit: Amram, Jizeya, Ebwon ak Ouzyèl. ¹³ Amram te gen de pitit gason: Arawon ak Moyiz. Bondye te mete Arawon ak pitit li yo apa pou yo okipe pyès ki apa nèt pou Bondye a, pou boule lansan devan Seyè a, pou yo sèvi l', pou yo beni pèp la nan non li. Se te travay pa yo sa pou tout tan. ¹⁴ Moyiz te moun Bondye a menm. Pitit li yo te fè pati branch fanmi Levi a tou. ¹⁵ Moyiz te gen de pitit gason: Gèchèm ak Elyezè. ¹⁶ Premye pitit Gèchèm lan te rele Chebwèl. ¹⁷ Elyezè li menm te gen Rekabya pou premye pitit. Li pa t' fè lòt pitit gason ankò. Men Rekabya te fè anpil pitit. ¹⁸ Premye pitit Jizeya a te rele Chelomit. ¹⁹ Men pitit Ebwon yo: Premye a te rele Jerija, dezyèm lan Amarya, twazyèm lan Jakazyèl, katriyèm lan Jekameam. ²⁰ Men pitit Ouzyèl yo: Miche, premye a ak Jikija, dezyèm lan. ²¹ Merari te gen de pitit gason: Makli ak Mouchi. Makli te gen de pitit gason: Eleaza ak Kich. ²² Eleaza mouri san kite pitit gason. Pitit fi ase li te genyen. Yo marye ak kouzen yo, pitit gason Kich yo. ²³ Mouchi te gen twa pitit gason: Makli, Edè ak Jerimòt. ²⁴ ¶ Se tout moun nan ras Levi yo sa, dapre fanmi yo, ki te gen non yo kouche nan rejis tankou chèf fanmi. Yo chak te gen travay pa yo nan sèvis kay Seyè a, depi sa ki gen ventan pou pi piti rive sou pi gran yo. ²⁵ David te di: -Seyè a, Bondye pèp Izrayèl la, te fè pèp li a viv ak kè poze. Li menm, Seyè a, l'ap toujou rete lavil Jerizalèm. ²⁶ Konsa, moun Levi yo p'ap nan pote Tant Randevou Seyè a ankò ansanm ak tout bagay yo bezwen pou fè sèvis pou li ankò. ²⁷ Se konsa, dapre dènye pawòl sa yo David te di lè sa a, yo enskri tout moun Levi yo, depi sa ki

28
gen ventan pou pi piti rive sou pi gran yo. Travay yo se ede prèt yo, pitit Arawon yo, nan sèvis y'ap fè nan Tanp Seyè a. Se yo ki pou okipe lakou yo ak tout pyès nan Tanp lan. Se yo ki pou veye pou tout bagay rete nan kondisyon pou fè sèvis Bondye a. Se yo ki reskonsab tout lòt sèvis nan

29
Tanp lan. Yo te reskonsab pen yo te ofri bay Bondye yo, farin frans yo sèvi pou fè ofrann yo, pen san ledven yo, ofrann farin melanje ak lwil yo. Se yo ki te reskonsab peze ak mezire ofrann

30
nan Tanp lan. Lèfini, se pou yo la nan Tanp lan chak jou, nan maten ak nan aswè, pou di Bondye

31
mèsi, pou fè lwanj pou li. Se pou yo la tou lè y'ap fè ofrann pou yo boule nèt pou Seyè a jou repo yo, premye jou chak mwa yo, ak pou lòt jou fèt yo. Te gen regleman ki te bay travay moun Levi yo gen pou fè ak kantite moun ki pou fè chak travay. Se te reskonsablite yo pou yo te toujou

32
ap sèvi Seyè a. Se yo menm tou ki te reskonsab okipe Tant Randevou a, ak kote yo mete apa pou Seyè a, ak prèt yo, fanmi yo ki soti nan branch fanmi Arawon an, lè y'ap sèvi nan Tanp lan.

Chapter 24

1 ¶ Men moun ki te soti nan branch fanmi Arawon an dapre travay yo. Arawon te gen kat pitit gason: Nadab, Abiyou, Eleaza ak Itama.

2 Men Nadab ak Abiyou mouri anvan papa yo, san kite

3 pitit gason. Konsa, se Eleaza ak Itama ki vin prèt apre Arawon. Avèk konkou Zadòk, moun fanmi Eleaza a, ak Akimelèk, moun fanmi Itama a, wa David separe moun fanmi Arawon yo an gwoup.

4 Chak gwoup te gen travay pa yo. Men, lè yo jwenn te gen plis gason chèf fanmi nan moun Eleaza yo pase nan moun Itama yo, yo òganize sèz gwoup nan moun Eleaza yo ak wit gwoup nan moun

5 Itama yo. Nan tou de fanmi yo te gen moun ki te chèf nan Tanp lan ak chèf pou fè sèvis Bondye.

6 Chak moun te gen tou pa yo. Yo te fè yo piye pou yo te ka konnen tou chak moun. Se konsa, Chemaja, pitit Netaneyèl, yonn nan moun Levi yo, ki te sekretè, te kouche non yo nan rejis devan wa a, devan chèf yo, devan Zadòk, prèt la, devan Akimelèk, pitit Abyata, ak devan tout chèf fanmi

7 prèt yo ak moun Levi yo. Yo piye yonn apre lòt, de moun Eleaza pou chak yon moun Itama. Men

8 nan ki lòd vennkat gwoup yo te soti lè yo fin piye: Jeoyarib soti premye, Jedaja dezyèm, Arim

9 twazyèm, Seorim katriyèm, Malkija senkyèm, Mijamen sizyèm, Akòz setyèm, Abija wityèm,

10 Jezwa nevyèm, Chekanya dizyèm, Elyakib onzyèm, Yakim douzyèm, Oupa trèzyèm,

11 Jekebeab katòzyèm, Bilga kenzyèm, Imè sèzyèm, Ezi disetyèm, Apizèz dizwityèm, Petaja

12 13 14 15 16

dizneyèm, Ezekyèl ventyèm,¹⁷ Jakin venteyenyèm, Gamoul venndezyèm,¹⁸ Delaya venntwazyèm,
 Mazya vennkatriyèm.¹⁹ Se konsa yo te enskri non moun sa yo nan jan pou yo te al nan Tanp lan
 pou fè travay yo yonn apre lòt, jan Arawon zansèt yo te mete l' pou yo fè l' la, dapre lòd Seyè a,
 Bondye pèp Izrayèl la, te bay.²⁰ ¶ Men non lòt chèf fanmi ki soti nan fanmi Levi a: Se te Choubayèl
 nan fanmi Amran, Jedeya nan fanmi Choubayèl,²¹ Ichiya nan fanmi Rekabya. Se li ki te pi gran.
²² Te gen Chelomòt nan fanmi Jizeya, Jaat nan fanmi Chelomòt.²³ Nan fanmi Ebwon an te gen
 Jerija, pi gran an, Amarya, dezyèm lan, Jazyèl, twazyèm lan ak Jekameam, katriyèm lan.²⁴ Te
 gen tou Miche, pitit gason Ouzyèl, Chami, pitit gason Miche.²⁵ Jikija, frè Miche a, Zakari, pitit
 gason Jikija,²⁶ Makli ak Mouchi, pitit gason Merari, pitit gason Jazyà yo, ki te pitit Merari.²⁷ Nan
 fanmi Merari a, Jazyà, pitit li, te gen twa pitit gason: Choam, Zakou ak Ibrì.²⁸ Makli te gen de
 pitit gason: Eleaza ki pa t' gen pitit gason,²⁹ ak Kich ki te papa Jerakmeyèl.³⁰ Mouchi te gen twa
 gason: Makli, Edè ak Jerimòt. Se tout fanmi Levi yo sa dapre non zansèt yo.³¹ Tankou moun
 fanmi Arawon yo, yo menm tou, yo piye devan wa David, devan Zadòk ak Akimelèk, devan chèf
 fanmi prèt yo ak moun Levi yo, pou yo separe travay la bay chak moun pa yo, depi sou fanmi chèf
 yo rive sou fanmi pi piti ladan yo, san patipri.

Chapter 25

¹ ¶ Apre sa, wa David ak chèf moun Levi ki reskonsab sèvis nan Tanp lan te chwazi branch
 fanmi Asaf, branch fanmi Eyman ak branch fanmi Jedoutoun pou ba yo travay pa yo. Se yo ki pou
 bay mesaj Bondye yo, antan y'ap jwe gita, bandjo ak senbal. Men lis moun yo te chwazi yo ak
 travay yo chak:² Asaf te gen kat pitit: Zakou, Jozèf, Netama ak Acharela. Yo te sou zòd Asaf. Se
 li ki te konn fè konnen mesaj Bondye yo chak lè wa a mande l' pou l' fè l'.³ Jedoutoun te gen sis
 pitit: Gedalya, Zeri, Izayi, Chimèy, Asabya ak Matatya. Yo te sou zòd Jedoutoun, papa yo. Se yo
 ki te konn fè konnen mesaj Bondye yo antan y'ap jwe gita, pou fè lwanj Bondye, pou di l' mèsì.
⁴ Eyman te gen katòz pitit: Boukija, Matanya, Ouzyèl, Sebwèl, Jerimòt, Ananya, Anani, Elyata,
 Gidalti, Womanti-Ezè, Josbekacha, Maloti, Oti ak Maziòt.⁵ Bondye te bay Eyman, pwofèt wa a,
 katòz pitit gason sa yo ak twa pitit fi, dapre pwomès li te fè l' pou l' te ba li anpil pouvwa. Lè yo
 t'ap fè konnen mesaj Bondye yo, se yo ki te pou kònen twonpèt yo.⁶ Se Eyman, papa yo, ki t'ap

dirije yo lè y'ap chante nan sèvis y'ap fè nan Tanp Bondye a, antan y'ap jwe gita, bandjo ak senbal.
 Asaf, Jedoutoun ak Eyman te sou zòd wa a. ⁷ Sa te fè antou desankatrevenwit (288) mizisyen ki
 te fò nan fè mizik, ansanm ak tout lòt moun Levi parèy yo ki te aprann chante pou Seyè a. ¶ Yo
 fè tout moun piye, gran kou piti, ni sa ki te fò nan fè mizik, ni sa ki te fèk konmanse aprann, pou
 yo te ka konnen lè pou yo fè travay yo nan sèvis la. ⁹ -(We vèsè 31) ¹⁰ -(We vèsè 31) ¹¹ -(We
 vèsè 31) ¹² -(We vèsè 31) ¹³ -(We vèsè 31) ¹⁴ -(We vèsè 31) ¹⁵ -(We vèsè 31) ¹⁶ -(We vèsè 31)
¹⁷ -(We vèsè 31) ¹⁸ -(We vèsè 31) ¹⁹ -(We vèsè 31) ²⁰ -(We vèsè 31) ²¹ -(We vèsè 31) ²² -(We
 vèsè 31) ²³ -(We vèsè 31) ²⁴ -(We vèsè 31) ²⁵ -(We vèsè 31) ²⁶ -(We vèsè 31) ²⁷ -(We vèsè 31)
²⁸ -(We vèsè 31) ²⁹ -(We vèsè 31) ³⁰ -(We vèsè 31) ³¹ Desankatrevenwit (288) mesye sa yo te
 separe chak fanmi apa. Sa te fè vennkat gwoup. Chak gwoup te gen douz moun. Nan chak gwoup
 te gen yon chèf ak pitit gason l' yo ansanm ak frè l' yo. Men nan ki lòd yo te soti apre yo fin piye
 a. Premye a te Jozèf nan fanmi Asaf la, dezyèm lan Gedalya, twazyèm lan Zakou, katriyèm lan
 Jisri, senkyèm lan Netanya, sizyèm lan Boukya, setyèm lan Acharela, wityèm lan Izayi, nevyèm
 lan Matanya, dizyèm lan Chimeyi, onzyèm lan Azareyèl, douzyèm lan Achabya, trèzyèm lan
 Choubayèl, katòzyèm lan Matatya, kenzyèm lan Jerimòt, sèzyèm lan Ananya, disetyèm lan
 Josbekacha, dizwityèm lan Anani, diznevyèm lan Maloti, ventyèm lan Elyata, venteyenyèm lan
 Oti, venndezyèm lan Gidalti, venntwazyèm lan Maziòt, vennkatriyèm lan Womanti-Ezè.

Chapter 26

¹ ¶ Men jan yo te separe travay la pou moun Levi ki t'ap sèvi tankou gad nan pòtay Tanp lan.
 Nan branch fanmi Kore a, te gen Mechelemya, pitit gason Kore a ki te yon pitit Ebyasaf.
² Mechelemya te gen sèt pitit gason: Zakari pi gran an, Jedayèl dezyèm lan, Zebadya twazyèm
 lan, Jatniyèl katriyèm lan. ³ Elam senkyèm lan, Joanan sizyèm lan ak Elioenayi setyèm lan. ⁴ Te
 gen Obèd-Edon tou. Bondye te beni l', li te ba li wit pitit gason: Chenaja premye a, Jezabad dezyèm
 lan, Joa twazyèm lan, Saka katriyèm lan, Netaneyèl senkyèm lan. ⁵ Amiyèl sizyèm lan, Isaka
 setyèm lan ak Peoultayi wityèm lan. ⁶ Chemaja, premye pitit Obèd-Edon an, te gen sis pitit gason:
 Se yo ki te chèf nan branch fanmi yo paske yo te vanyan sòlda ak anpil ladrès. ⁷ Men non pitit
 Chemaja yo: Otni, Refayèl, Obèd, Elzabad, Eliyou ak Semakya. De dènye yo te vanyan sòlda. ⁸ Se
 tout fanmi Obèd-Edon an sa ansanm ak pitit yo ak frè yo. Yo tout te vanyan sòlda ak anpil ladrès
 pou fè travay yo. Te gen swasannde moun antou nan fanmi Obèd-Edon an. ⁹ Nan fanmi Mechelemya

¹⁰
 a, te gen antou dizwit gason, tout vanyan sòlda. Nan branch fanmi Merari a te gen Oza ki te gen kat pitit gason: Se te Chimri ki te chèf fanmi an. Se pa li ki te premye pitit gason, men se papa l' ki te mete l' chèf fanmi an.

¹¹
 Ilkija dezyèm lan, Tebalya twazyèm lan, Zakari katriyèm lan. Sa te fè antou trèz frè ak pitit gason nan fanmi Oza a.

¹²
 Travay gwoup moun sa yo se fè pòs nan pòtay Tanp lan. Yo te bay chak gwoup travay pa yo nan sèvis Tanp lan, tankou yo te fè l' pou lòt moun

¹³
 Levi yo. Chak fanmi, gwo kou piti, piye pou yo konnen nan ki pòtay y'ap fè travay yo.

¹⁴
 Chelemya soti pou pòtay ki bay sou solèy leve a. Pòtay nò a soti pou Zakari, pitit gason l' lan,

¹⁵
 ki te konn bay moun bon konsèy. Pòtay sid la soti pou Obèd-Edon. Pitit gason l' yo te gen depo

¹⁶
 yo sou kont yo. Pòtay solèy kouche a ak pòtay Chalechèt ki bay sou chemen ki moute a te sou

¹⁷
 kont Choupim ak Oza. Chak faksyon, yonn apre lòt, te gen lè sèvis pa yo. Chak jou, te gen sis gad pou pòtay bò solèy leve a, kat gad pou pòtay nò a, kat gad pou pòtay sid la ak de gad pou

¹⁸
 chak depo yo. Pou pòsyon kay ki bay sou solèy kouche a, te gen kat gad pou wout la ak de gad

¹⁹
 pou pòsyon kay la menm. Men travay yo te bay moun fanmi Kore yo ak moun fanmi Merari

²⁰
 yo. ¶ Gen lòt moun Levi yo te mete reskonsab trezò Tanp lan ak depo kote yo mete tout bagay

²¹
 ki apa pou Bondye yo. Layedan, yonn nan pitit Gèchon yo, te zansèt anpil fanmi. Yonn ladan

²²
 yo te fanmi Jekiyèl yo. Pitit Jekiyèl yo ak pitit frè l' yo, Zetam ak Joèl, te reskonsab trezò Tanp

²³
 Seyè a. Yo te bay pitit Amram yo, pitit Isa yo, pitit Ebwon yo ak pitit Ouzyèl yo travay pa yo

²⁴
 tou. Chebwèl, yonn nan fanmi Gèchèm, pitit gason Moyiz la, te premye reskonsab trezò Tanp

²⁵
 lan. Sou bò Elyezè, tonton li, li te fanmi ak Rekabya, pitit Elyezè a, ki te papa Jezaja. Jezaja sa

²⁶
 a te papa Joram, Joram te papa Zikri, Zikri te papa Chelomit. Se Chelomit sa a ansanm ak fanmi l' yo ki te reskonsab depo tout bagay wa David, chèf fanmi yo, kòmandan rejiman mil sòlda yo,

²⁷
 kòmandan divizyon san sòlda yo ak tout lòt gwo chèf nan lame a te mete apa pou Seyè a. Nan

²⁸
 bagay yo te pran nan lagè, yo te mete kèk ladan yo apa pou fè Tanp lan pi bèl. Te gen bagay Samyèl, pwofèt la, wa Sayil, pitit gason Kich la, Abnè, pitit Nè a, ak Joab, pitit Sewouya a, te mete

²⁹
 apa pou sèvis Bondye. Tou sa te sou kont Chelomit ak fanmi l' yo. ¶ Nan branch fanmi Jizeya a, te gen Kenanya ak pitit gason l' yo ki te reskonsab travay ki fèt an deyò Tanp lan pou pèp Izrayèl

³⁰
 la. Se yo ki te kenbe tout papye konsekan yo, epi ki te rann jijman nan tribinal. Nan branch fanmi Ebwon an, te gen Asabya ak fanmi l' yo, antou milsètsan (1700) vanyan gason ki te reskonsab

enspekte zòn peyi Izrayèl ki te sou bò solèy kouche larivyè Jouden an, pou wè si tout bagay ki gen rapò ak sèvis Seyè a ansanm ak zafè wa a t'ap mache byen. ³¹ David te gen karantan depi li te wa, lè yo mennen yon ankèt nan branch fanmi Ebwon an. Lè sa a, yo jwenn te gen anpil vanyan sòlda nan fanmi sa a ki t'ap viv lavil Jazè nan zòn Galarad. Chèf fanmi Ebwon an te rele Jerija. ³² Nan fanmi an, te gen antou demilsètsan (2700) vanyan gason ki te chèf fanmi yo. Wa David te mete yo reskonsab branch fanmi Woubenn lan, branch fanmi Gad la ak mwatye nan branch fanmi Manase a ki t'ap viv lòt bò larivyè Jouden sou bò solèy leve, pou wè si tout bagay ki gen rapò ak sèvis Bondye ansanm ak zafè wa a t'ap mache byen.

Chapter 27

¹ ¶ Men lis chèf fanmi pèp Izrayèl la ak kòmandan rejiman mil sòlda ak kòmandan divizyon san sòlda ansanm ak lòt anplwaye yo te konte ki t'ap sèvi ak wa a nan gouvènman li. Chak mwa nan lanne a te gen yon gwoup vennkatmil gason (24.000) ki te desèvis sou lòd yon chèf diferan.

² Pou gwoup ki te desèvis pou premye mwa a, se Jachobeam, pitit gason Zabdyèl la, ki te chèf.

³ Se te yon moun nan fanmi Farèz. Li te kòmandan tout chèf lame ki te desèvis pou premye mwa a.

⁴ Pou gwoup dezyèm mwa a, se te Dodayi, moun lavil Akoa, ki te chèf. Li te gen Miklòt pou adjwen.

⁵ Pou gwoup twazyèm mwa a, chèf lame a te rele Benaja, pitit Jeoyada, granprèt la.

⁶ Benaja sa a te chèf trant pi vanyan sòlda yo. Apre li, se Amizabad, pitit gason l', ki te pran kòmandman gwoup la.

⁷ Pou gwoup katyèm mwa a, se Azayèl, frè Joab la, ki te chèf. Apre li, se Zebadya, pitit li, ki te pran kòmandman an.

⁸ Pou gwoup senkyèm mwa a, se Chamout, moun fanmi Izra, ki te chèf.

⁹ Pou gwoup sizyèm mwa a, se Ira, pitit gason Ikèch, moun lavil Tekoa, ki te chèf.

¹⁰ Pou gwoup setyèm mwa a, se Elèz, moun fanmi Efrayim nan lavil Pelon, ki te chèf. ¹¹ Pou gwoup wityèm mwa a, se Sibekayi, moun lavil Oucha, ki te chèf. Se yon moun fanmi Zera nan gwo branch fanmi Jida a.

¹² Pou gwoup nevyèm mwa a, se Abyezè, moun lavil Anatòt nan branch fanmi Benjamen, ki te chèf.

¹³ Pou gwoup dizyèm mwa a, se Marayi, moun lavil Netofa nan fanmi Zera, ki te chèf.

¹⁴ Pou gwoup onzyèm mwa a, se Benaja, moun lavil Piraton nan zòn ki pou branch fanmi Efrayim lan, ki te chèf.

¹⁵ Pou gwoup douzyèm mwa a, se Eldayi, moun fanmi Otnyèl nan lavil Netofa, ki te chèf.

¹⁶ ¶ Men non chèf ki te reskonsab douz gwo branch fanmi pèp Izrayèl la:

Pou branch fanmi Woubenn lan, se te Elyezè, pitit gason Zikri. Pou branch fanmi Simeyon an, se te Sefatya, pitit gason Maka. ¹⁷ Pou branch fanmi Levi a, se te Asabya, pitit gason Kemwèl. Pou branch fanmi Arawon an, se te Zadòk. ¹⁸ Pou branch fanmi Jida a, se te Eliyou, yonn nan frè David yo. Pou branch fanmi Isaka a, se te Omri, pitit gason Mikayèl. ¹⁹ Pou branch fanmi Zabilon an, se te Ismaja, pitit gason Obadya. Pou branch fanmi Neftali a, se te Jerimòt, pitit gason Azriyèl. ²⁰ Pou branch fanmi Efrayim lan, se te Oze, pitit gason Azazyà. Pou mwatye branch fanmi Manase a, se te Joèl, pitit gason Pedaja. ²¹ Pou lòt mwatye branch fanmi Manase a, ki te rete nan peyi Galarad, se te Ido, pitit gason Zakari. Pou branch fanmi Benjamen an, se te Jasiyèl, pitit gason Abnè. ²² Pou branch fanmi Dann lan, se te Azareyèl, pitit gason Jeworam lan. Se yo ki te chèf branch fanmi pèp Izrayèl yo. ²³ David pa t' fè konte moun ki pa t' ankò gen ventan sou tèt yo, paske Seyè a te pwomèt li t'ap fè pèp Izrayèl la peple pou yo te rive menm kantite ak zetwal nan syèl la. ²⁴ Joab, pitit gason Sewouya a, te konmanse ap konte moun nan pèp la, men li pa t' fin fè l' paske sa te lakòz Bondye te fache sou pèp la. Se konsa yo pa mete nan liv Istwa wa David la kantite moun yo te jwenn. ²⁵ Se Azmavèt, pitit gason Adiyèl la, ki te reskonsab trezò wa a. Se Jonatan, pitit Ozyas la, ki te reskonsab tout depo ki te nan jaden, nan lavil, nan ti bouk ak sou fwontyè yo. ²⁶ Se Ezri, pitit gason Keloub la, ki te reskonsab tout moun ki t'ap okipe jaden wa a. ²⁷ Se Chimeyi, moun lavil Rama, ki te reskonsab tout jaden rezen yo. Se Zabdi, moun lavil Chefam ki te reskonsab tout depo diven yo te fè ak rezen yo te ranmase nan jaden yo. ²⁸ Se Baal anan, moun lavil Gedè, ki te reskonsab tout pye oliv ak pye sikomò ki te nan basrak yo. Se Joach ki te reskonsab depo lwil yo. ²⁹ Se Chitrayi, moun Sawon, ki te reskonsab tout bèf yo t'ap gade nan zòn Sawon an. Se Chafat, pitit gason Adlayi, ki te reskonsab bèf yo t'ap gade nan fon yo. ³⁰ Se Obil, moun fanmi Izmayèl yo, ki te reskonsab chamo yo. Se Jekdeja, moun lavil Mewonòt, ki te reskonsab fenmèl bourik yo. ³¹ Se Jazis, moun peyi Aga, ki te reskonsab mouton ak kabrit yo. Se tout moun sa yo ki te jeran tout byen wa David yo. ³² Jonatan, tonton David, te yon konseye. Se te yon moun lespri ki te fò anpil. Jekiyèl, pitit Akmoni, te reskonsab levasyon tout pitit gason wa a. ³³ Akitofèl te konseye wa a tou. Ouzayi, moun peyi Ak, te bon zanmi wa a. ³⁴ Lè Akitofèl mouri, se Abyata ak Jeojada, pitit Benaja, ki vin konseye wa a. Joab te kòmandan lame wa a.

Chapter 28

¹ ¶ David mande pou tout otorite peyi Izrayèl la reyini lavil Jerizalèm. Se konsa tout chèf branch fanmi yo, tout chèf gwoup ki te reskonsab dirije peyi a pou wa a, tout kòmandan rejiman mil sòlda yo ak kòmandan divizyon san sòlda yo, jeran tout tè ak gadò tout bèt ki pou wa a ak pou pitit li yo, moun konfyans li yo, chèf lame li yo ak tout vanyan sòlda li yo, yo tout reyini lavil Jerizalèm.

² David kanpe devan yo tout, li di yo konsa: -Frè m' yo ak nou tout moun nan pèp mwen an, koute sa m'ap di nou. Mwen te fè lide bati yon kay kote pou Bwat Kontra Seyè a rete, yon kay kote Seyè

a ka mete fotèy li. Mwen te pare tout bagay pou bati kay la. ³ Men, Bondye te fè m' konnen mwen

p'ap ka bati kay la pou li paske se sòlda mwen ye, mwen fè twòp san koule. ⁴ Men se mwen menm Seyè a, Bondye Izrayèl la, te chwazi nan mitan tout fanmi m' yo pou fè m' wa peyi Izrayèl la pou tout tan. Li te chwazi branch fanmi Jida a pou pran kòmandman peyi a. Nan branch fanmi Jida a, li chwazi fanmi papa m'. Nan fanmi papa m', sa te fè l' plezi pou l' chwazi m' pou l' mete m' wa sou

tout peyi Izrayèl la. ⁵ Koulye a, Seyè a te ban mwen anpil pitit. Men, nan tout pitit sa yo li chwazi

Salomon pou chita sou fotèy la pou gouvènè pèp Izrayèl la ak pouvwa l'ap ba li. ⁶ Seyè a te di m' tou: Se Salomon, pitit gason ou lan, ki va bati kay mwen an ak tout lakou yo. Se li menm mwen

chwazi pou pitit mwen. M'a yon papa pou li. ⁷ M'ap fè gouvènman l' lan kanpe fèm pou tout tan, depi li menm li toujou kenbe lòd mwen, depi li toujou mache dapre kòmandman m' yo jan l'ap fè

l' jòdi a. ⁸ Koulye a, devan tout pèp Izrayèl la, pèp Bondye a ki sanble isit la, ak devan Bondye nou k'ap koute nou an, mwen mande pou nou kenbe tout kòmandman Seyè a, Bondye nou an, ban nou

pou bèl peyi nou sa a toujou rete pou nou. Konsa, nou ka kite l' pou pitit nou yo jouk sa kaba. ⁹ Ou menm, Salomon, pitit mwen, se pou ou rekonèt Bondye papa ou la. Se pou ou sèvi l' ak tout kè ou, avèk bon santiman, paske Seyè a sonde kè tout moun, li konnen tou sa k'ap pase nan tèt yo. Konsa,

si ou chache l', l'ap kite ou jwenn li. Men, si ou vire do ba li, l'ap lage ou nèt tou pou tout tan. ¹⁰ Se pou ou rekonèt se Seyè a menm ki chwazi ou pou bati yon kay pou mete apa pou li. Mete gason

sou ou! Antre nan travay! ¹¹ ¶ Apre sa, David bay Salomon plan tout kay tanp lan, plan tout chanm ak tout depo yo, plan tout lòt chanm sou anwo yo, chanm anndan yo ak plan gwo chanm yo mete

apa pou Bondye a, kote yo fè sèvis pou mande padon pou peche yo. ¹² Li ba li plan tout bagay li te gen nan tèt li pou lakou tanp yo, pou tout chanm ki bay sou lakou yo, pou depo veso yo sèvi nan

tanp lan ak pou depo bagay yo ofri pou mete apa pou Seyè a. ¹³ David te ba li tou jan pou li òganize prèt yo ak moun Levi yo pou yo fè travay yo, jan pou yo fè tout sèvis nan kay Seyè a, ak jan pou

yo okipe tout veso Tanp lan. ¹⁴ Li di li konbe ajan ak lò la bezwen pou fè veso yo, ¹⁵ pou chak lanp, pou chak gwo lanp sèt branch an ajan osinon an lò ak pèz yo chak dwe genyen dapre sèvis

16 yo, pou chak tab an ajan osinon an lò kote pou yo ranje pen yo mete apa pou Seyè a. Li di li konbe lò l'a bezwen pou fè fouchèt yo, bòl yo, gwo gode yo, ak modèl lòt veso an ajan osinon an 17
lò dapre pèz yo chak. Li di l' konbe bon lò l'ap bezwen pou fè lotèl lansan an, ak lò pou fè kabwa 18
a, pou pòtre zanj cheriben yo ak zèl yo louvri sou Bwat Kontra Seyè a. David di li: -Tout plan 19
travay la ekri an detay nan yon liv dapre lòd Seyè a menm te ban mwen. Li esplike m' tou sa pou
m' fè. 20
Aprè sa, wa David di Salomon, pitit li a: -Mete gason sou ou! Pran kouraj, pitit mwen!
Fè sa ou gen pou fè a! Pa kite anyen fè ou pè, paske Seyè a, Bondye mwen an, kanpe la avè ou,
jouk tout travay pou sèvis Tanp lan fini. 21
Gwoup prèt yo ak gwoup moun Levi yo deja resevwa
travay pou yo fè nan Tanp lan. Pou tout lòt travay yo, ou gen avè ou ouvriye ki vle ede ou, lèfini
ki gen ladrès nan tout kalite djòb. Chèf yo ak tout pèp la ap tann lòd ou pou tout bagay fèt.

Chapter 29

1 ¶ Lèfini, David pale ak tout moun ki te sanble la yo, li di yo konsa: -Salomon, pitit gason m' lan, se li menm Bondye chwazi, men li jenn anpil, li pa gen esperyans. Travay la anpil, paske se 2
pa yon kay pou moun li pral bati, men yon tanp pou Bondye, Seyè a. Mwen fè sa m' te kapab pou m' te pare materyo pou tanp lan: lò, ajan, kwiv, fè, bwa, bèl pyè oniks, bèl pyè pou sèvi ganiti, pyè 3
malachit ak tout kalite lòt koulè, tout kalite bèl pyè koute chè ak mab an kantite. Men, pou mete sou tou sa mwen pare pou kay n'ap mete apa pou Seyè a, mwen pran lò ak ajan mwen te genyen, 4
mwen bay tout paske mwen renmen kay Bondye a anpil: sanmil (100.000) kilo bon lò ki soti nan 5
peyi Ofi, ak desantrant (230) kilo bon ajan pou dekore miray Tanp lan, pou fè tout bèl bagay an lò osinon an ajan bòs atizan yo gen pou fè. Koulye a, kilès ankò ki vle bay ak tout kè li pou Bondye? 6
Lè sa a, chèf branch fanmi yo, chèf chak fanmi pèp Izrayèl la, tout chèf rejiman mil sòlda yo ak chèf divizyon san sòlda yo, ak tout jeran ki t'ap travay pou wa a, fè kado yo te vle fè. 7
Yo bay sanswasannsenk (165) kilo lò, twasantrantmil (330.000) kilo ajan, sèt-sanmil (700.000) kilo kwiv 8
konsa, ak twa milyon twasanmil (3,300.000) kilo fè pou travay Tanp lan. Sa ki te gen bèl pyè koute chè bay yo pou trezò Tanp lan ki te sou kont Jeyèl, yon moun Levi nan fanmi Gèchon an. 9
Pèp la menm te kontan bay sa yo t'ap bay pou Seyè a paske yo te fè l' ak tout kè yo. Wa David 10
tou te kontan anpil. ¶ Lè sa a, David fè lwanj Bondye devan tout pèp la ki te reyini. Li di konsa: 11
-Lwanj pou ou, Seyè a, Bondye Izrayèl, papa nou, depi tout tan ak pou tout tan! Seyè, ou gen

pouvwa, ou gen kouraj! Se pou ou tout lwanj. W'ap donminen sou tout bagay pou tout tan. Tou sa ki nan syèl la ak sou latè a se pou ou yo ye. Se ou menm Seyè ki sel wa, paske ou sèl chèf sou tout

bagay.¹² Se nan men ou tout richès ak tout byen soti. Ou gouvènè tout bagay avèk fòs ponyèt

ou ak pouvwa ou. Se ou menm ki bay tout moun pouvwa ak fòs.¹³ Koulye a, Bondye nou, nou di

ou mès. N'ap fè lwanj pou ou sitèlman ou gen pouvwa.¹⁴ Men, kisa m' ye, kisa pèp mwen an ye menm, pou m' ta kapab ofri ou tout bagay sa yo ak tout kè nou? Se nan men ou tout bagay sa yo

soti, se nan sa nou resevwa nan men ou n'ap ba ou.¹⁵ Seyè, ou konnen, devan ou se pase n'ap pase tankou moun k'ap vizite, menm jan ak tout zansèt nou yo. Lavi nou sou latè tankou yon nwaj k'ap

pase. Wè pa wè fòk nou mouri.¹⁶ Seyè, Bondye nou, nou pare tout richès sa yo pou bati yon kay pou ou, ou menm ki yon Bondye apa. Men, se nan men ou yo tout yo soti, se pou ou yo tout ye.

¹⁷ Mwen konnen, Bondye mwen, ou sonde kè tout moun, ou kontan ak moun ki mache dwat. Se poutèt sa, ak tout kè mwen, mwen ofri ou tout bagay sa yo. Koulye a mwen wè jan pèp ou a ki

sanble isit la, kontan pou yo pote ofrann pa yo pou ou tou ak tout kè yo.¹⁸ Seyè, Mèt, Bondye Abraram, Bondye Izarak ak Bondye Izrayèl, Bondye zansèt nou yo, tanpri, fè pèp ou a pa janm

pèdi bon santiman sa yo ki nan kè yo jòdi a.¹⁹ Tanpri, bay Salomon, pitit gason m' lan, bon santiman tou pou li renmen ou nèt ale, pou li ka mache dapre lòd, regleman ak kòmandman ou yo nan tou

sa l'ap fè, pou l' ka bati Tanp lan avèk tout materio mwen fin pare yo.²⁰ Apre sa David pale ankò ak tout pèp la ki te reyini, li di yo: -Annou fè lwanj pou Seyè a, Bondye nou an! Tout pèp la nèt pran fè lwanj Seyè a, Bondye zansèt yo. Yo mete jenou yo atè, yo bese tèt yo byen ba devan Seyè

a ak devan wa a.²¹ Nan denmen, yo ofri bèt pou yo touye pou Seyè a, yo boule kèk bèt nèt pou Seyè a: antou mil (1.000) ti towò bèf, mil (1.000) belye mouton, mil (1.000) jenn ti mouton ak ofrann diven ki fèt pou mache ak yo. Yo touye yon pakèt lòt bèt yo tè ofri bay Bondye pou pèp

Izrayèl la.²² Jou sa a, yo manje, yo bwè ak gwo kè kontan dèvan Seyè a. Apre sa yon dezyèm fwa, yo fè deklarasyon yo rekonèt Salomon, pitit David la, pou wa yo. Yo fè sèvis mete l' apa pou l' chèf

yo nan non Seyè a. Menm lè a, yo mete Zadòk apa pou l' sèvi granprèt nan non Seyè a tou.²³ ¶ Se konsa Salomon pran plas David, papa l', sou fotèy gouvènman Seyè a te tabli a. Tout zafè l' te

mache byen. Tout pèp Izrayèl la te obeyi l'.²⁴ Tout chèf yo, tout sòlda yo ansanm ak tout lòt pitit David yo te rekonèt Salomon pou sèl chèf yo.²⁵ Seyè a te bay Salomon yon bèl pozisyon devan

pèp la. Li te fè gouvènman Salomon an kanpe fèm ak yon pouvwa ankenn lòt wa nan peyi Izrayèl la pa t' janm genyen anvan sa.²⁶ David, pitit gason Izayi a, te gouvènè tout peyi Izrayèl la.²⁷ Li

pase karantan ap gouvènè pèp Izrayèl la. Pandan sètan li te rete lavil Ebwon. Pandan rès tranntwazan yo, li te rete lavil Jerizalèm.²⁸ Lè li mouri, li te granmoun anpil, men kè li te kontan. Li te gen

anpil richès. Tout moun t'ap fè lwanj pou li. Se Salomon, pitit gason l' lan, ki moute wa nan plas
²⁹ li. Se nan liv istwa pwofèt Samyèl, liv istwa pwofèt Natan ak liv istwa pwofèt Gad nou jwenn
³⁰ istwa tou sa David te fè depi nan konmansman jouk li mouri. Liv sa yo fè nou konnen jan li te
 gouvènèn, jan li te yon vanyan gason, ansanm ak tou sa ki te rive l', tou sa ki pase nan peyi Izrayèl
 la ak nan lòt peyi yo tou.

2 Chronicles

Chapter 1

¹ ¶ Salomon, pitit gason wa David la, chita otorite gouvènman l'. Seyè a, Bondye li a, te kanpe
 la avè l', li te ba li anpil pouvwa. ² Wa Salomon fè rele tout pèp Izrayèl la, kòmandan rejiman mil
 sòlda yo, kòmandan divizyon san sòlda yo, jij yo, tout anplwaye gouvènman an ak tout chèf fanmi
³ yo. Li ba yo lòd pou yo ale avè l' kote yo fè sèvis pou Bondye lavil Gabawon an, paske se la Tanp
 Randevou Bondye a te ye, tant Moyiz, sèvitè Seyè a, te fè lè yo te nan dezè a. ⁴ Men, David te fè
 yo pran Bwat Kontra a lavil Kiriyat-Jearim pou yo pote l' moute lavil Jerizalèm. Depi lè sa a, li te
⁵ anba yon tant wa David te fè pou li. Gwo lotèl kwiv Bezaleyèl, pitit Ouri, pitit pitit Our la, te fè
 a te lavil Gabawon tou devan Tant Randevou Seyè a. Se la wa Salomon ak tout pèp la vin pale ak
⁶ Seyè a. Devan Tant Randevou Seyè a, Salomon moute sou lotèl kwiv la, li touye mil bèt li fè
⁷ boule nèt sou lotèl la. Jou lannwit sa a, Bondye parèt devan Salomon, li di l' konsa: -Mande m'
⁸ sa ou vle, m'ap ba ou li. Salomon reponn li: -Ou te toujou moutre jan ou te renmen David, papa
⁹ m', sèvitè ou la, anpil. Koulye a, se mwen menm ou mete nan plas li pou gouvènèn. O Seyè,
 Bondye, kenbe pwomès ou te fè papa m' lan! Ou mete m' wa pou m' gouvènèn yon pèp ki gen anpil
¹⁰ anpil moun ladan l'. Yo pi plis pase grenn pousyè tè. Se poutèt sa, ban mwen konesans ak bon
 konprann pou m' ka gouvènèn pèp sa a. Si se pa sa, mwen pa wè ki jan m'a fè pou m' gouvènèn
¹¹ pèp ou a ak tout moun sa yo ladan l'. Bondye reponn Salomon: -Depi se sa ou wè ou ta renmen
 genyen! Ou pa mande m' ni richès, ni byen, ni lwanj pou ou. Ou pa mande m' lanmò pou lènmi ou
 yo, ni ou pa mande m' pou ou sa viv lontan. Ou annik mande m' konesans ak bon konprann pou ou
¹² ka kondi pèp mwen an, pèp mwen mete ou gouvènèn an. M'ap ba ou konesans ak bon konprann.
 Men an plis, m'ap ba ou richès, byen ak lwanj pase tout wa ki te la anvan ou, pase tout wa ki va

13
 vin apre ou. ¶ Apre sa, Salomon kite kote yo konn fè sèvis pou Bondye lavil Gabawon an, kote
 Tant Randevou a te ye a, li tounen lavil Jerizalèm. Se la li gouvènen pèp Izrayèl la. 14 Li te sanble
 milkatsan (1.400) cha lagè ak douzmil (12.000) chwal pou sòlda kavalye li yo. Li mete yon pòsyon
 ladan yo nan lavil li te fè bati espre pou yo. Rès yo, li mete yo toupre l' lavil Jerizalèm. 15 Pandan
 tout rèy li, ajan ak lò te tankou wòch lavil Jerizalèm. Bwa sèd menm, ou te jwenn sa an kantite
 tankou pye sikomò nan rakbwa ki nan plenn peyi Jida yo. 16 Chwal Salomon yo te soti nan peyi
 Moukri ak nan peyi Silisi. Wa a te gen moun pa l' ki te konn al achte chwal yo la pou li. 17 Chak
 cha lagè yo te achte nan peyi Lejip te koute sisan (600) pyès ajan, chak chwal te koute sansenkant
 (150) pyès ajan. Se menm moun sa yo ki te konn al achte pou revann wa peyi Et yo ak wa peyi Siri
 yo.

Chapter 2

1
 ¶ Wa Salomon te deside bati yon kay kote pou yo fè sèvis pou Seyè a, ansanm ak yon palè
 pou l' rete. 2 Li mete swasandimil (70.000) moun ap travay pote materyo, katrevenmil (80.000)
 moun ap taye wòch nan mòn. Te gen twamilsisan (3.600) moun reskonsab kontwole travay la.
 3 Salomon voye misyon bay Iram, wa lavil Tir. Li di l': -Annou fè zafè yonn ak lòt tankou ou te fè
 avèk wa David, papa m', lè ou te vann li madriye sèd pou l' te bati yon kay pou l' rete. 4 Mwen pral
 bati yon tanp pou Seyè a, Bondye mwen an. Se pral yon kay n'ap mete apa pou li, kote n'a boule
 lansan pou li, kote n'a toujou mete devan l' pen y'ap ofri l' yo, kote chak maten chak aswè y'a ofri
 bèt pou yo boule nèt pou li lè jou repo yo, lè lalin nouvèl, ak lè lòt fèt nou fete pou Seyè a, Bondye
 nou an, jan li te bay pou yo toujou fè l' nan peyi Izrayèl. 5 Men, se pou tanp mwen pral bati a gwo
 anpil, paske Bondye nou an gen plis pouvwa pase tout lòt bondye yo. 6 Lèfini, ki moun ki ka rive
 bati yon kay vre pou Bondye, si syèl la, atout li gwo a, twò piti pou li? Mwen menm, kisa m' ye
 pou m' ta bati yon kay pou li? Se annik yon kote pou m' boule lansan pou li m'ap fè. 7 Se konsa,
 voye ban mwen yon bòs ki gen ladrès pou travay lò, ajan, kwiv, fè, yon bòs ki konn koupe twal
 ble, twal violèt ak twal wouj, bòs ki konn travay bwa ak wòch tou. L'a travay ansanm ak bòs atizan
 mwen gen avè m' nan peyi Jida ak lavil Jerizalèm yo, moun David, papa m', te chwazi pou sa.
 8 W'a voye ban mwen madriye sèd, bwapen ak bwa koray ki soti nan peyi Liban. Paske mwen
 konnen moun peyi ou yo konn pare bwa sa yo byen. M'a voye moun pa m' ede pa ou yo 9 pou yo
 ka pare yon bon kantite bwa, paske se pou tanp mwen fè lide bati a gwo anpil, se pou l' yon bèl

10 bagay. Men pwovizyon m'ap voye pou moun ou yo k'ap koupe pyebwa yo ak pou moun k'ap siye yo: sanmil (100.000) barik ble, sanmil (100.000) barik lòj, sandimil (110.000) galon diven ak sandimil (110.000) galon lwil oliv.

11 ¶ Lè sa a, wa Iram ekri yon lèt voye reponn Salomon. Li di l' nan lèt la: -Se paske Seyè a renmen pèp Izrayèl la kifè li mete ou wa pou gouvènèn yo.

12 Lwanj pou Seyè a, Bondye pèp Izrayèl la, li menm ki fè syèl la ak latè a! Paske li bay wa David yon pitit gason ki gen anpil bon konprann, anpil lespri epi ki veye tou sa l'ap fè, yon pitit ki koulye a fè lide bati yon tanp pou Seyè a ansanm ak yon palè pou tèt pa l'.

13 M'ap voye yon moun ki gen bon konesans ak ladrès ba ou. Se bès Iram.

14 Manman li se moun branch fanmi Dann. Papa l' se natif natal lavil Tir. Li konn jan pou travay lò, ajan, kwiv, fè, wòch, bwa. Li konn jan pou koupe tou twal fin wouj, ble ak violèt, ak twal lenn tou. Li konn grave tout kalite desen, li ka fè tout kalite travay ou mande l' fè. L'a travay ansanm ak bès pa ou yo, ak bès wa David, papa ou, mèt mwen an, te genyen.

15 Koulye a, ou mèt voye ban nou ble, lòj, diven ak lwil oliv ou te di w'ap voye yo.

16 Nou menm bò pa nou, nou pral koupe mezi bwa nan peyi Liban ou ka bezwen. N'a pote yo sou lanmè ba ou lavil Joze, n'a mare yo ansanm fè rado. Rive la, ou menm w'a fè pran yo pote moute lavil Jerizalèm.

17 Lè sa a, Salomon fè konte mete sou lis tout moun lòt nasyon ki t'ap viv nan peyi Izrayèl la, menm jan David, papa l', te fè l' la. Li jwenn sansenkanntwamil sisan (153.600) moun.

18 Li pran swasandimil (70.000) ladan yo pou pote materyo, katrevenmil (80.000) pou taye wòch nan mòn yo. Lèfini, li pran twamilsisan (3.600) ki rete yo, li mete yo fòmman responsab pou fè pèp la travay.

Chapter 3

1 ¶ Salomon tanmen bati Tanp Seyè a lavil Jerizalèm sou mòn Moriya a, kote Seyè a te parèt devan David, papa l', sou anplasman David te pare pou sa a, ki vle di kote Onan, moun Jebis la, te gen glasi l' la.

2 Lè sa a, Salomon te gen twazan yon mwa de jou depi li te wa.

3 Salomon te bati Tanp lan sou yon fondasyon ki te gen katrevendis pye longè sou trant pye lajè.

4 Gwo pyès ki te devan Tanp lan te gen trant pye lajè menm jan ak Tanp lan, ak sankatreven (180) pye wotè. Salomon te fè kouvri tout miray anndan pyès la ak bon lò.

5 Li plake planch bwapen sou tout anndan gwo pyès la. Li kouvri tout bwa yo nèt ak bon lò. Lèfini, li fè yo mete pòtre pye palmis ak ti chenn.

6 Li dekore l' ak bèl pyè koute chè. Yo te sèvi ak bon kalite lò ki soti peyi Pavayim.

7 Li kouvri tout anndan Tanp lan ak lò: travès yo, ankadremman pòt yo, palisad yo ak pòt yo menm. Sou tout palisad

⁸
 yo, li fè mete pòtre zanj cheriben. Yo bati tou pyès ki apa nèt pou Seyè a. Li te gen trant pye lajè, menm jan ak Tanp lan, ak trant pye longè, kare kare. Yo sèvi ak venmil (20.000) kilo lò pou kouvri tout anndan l'.
⁹
 Klou yo te sèvi yo te fèt an lò tou. Yo chak te peze senksan (500) gram. Yo kouvri tout miray anndan pyès anwo yo tou ak lò.
¹⁰ ¶ Nan pyès ki apa nèt pou Seyè a, li fè fè de estati zanj cheriben. Li fè kouvri yo ak lò nèt.
¹¹ -(we vèsè pwochen) ¹² -(we vèsè pwochen) ¹³ Yo te mete zanj yo kanpe yonn bò kote lòt, ak figi yo bay sou pòt antre pyès la. Yo chak te gen de zèl. Chak zèl te gen sèt pye edmi longè. Zèl yo te louvri. Pwent zèl anndan yo touche yonn ak lòt nan mitan pyès la, de pwent zèl deyò yo touche ak de miray sou kote yo. Konsa, longè tout zèl yo ansanm te bay trant pye.
¹⁴ Li fè yo fè yon rido pou pyès ki apa nèt pou Seyè a ak twal ble, twal wouj, twal violèt. Li fè bwode pòtre zanj cheriben sou rido a tou.
¹⁵ Salomon fè fè de gwo pote won. Yo chak te gen senkannde pye wotè. Li mete yo kanpe devan Tanp lan. Tèt pote yo te mezire sèt pye edmi wotè.
¹⁶ Li fè ti chenn mare yonn ak lòt, li mete yo fè wonn anwo tèt pote yo ansanm ak pòtre grenad li mare nan ti chenn yo.
¹⁷ Li mete pote yo devan Tanp lan, yo yonn chak bò pòtay la. Yo rele sa ki te bò dwat la Jakin, sa ki te bò gòch la Boaz.

Chapter 4

¹ ¶ Salomon fè fè tou yon lotèl kwiv kare kare, ki te mezire trant pye lajè sou trant pye longè ak kenz pye wotè.
² Li fè fè ankò yon gwo basen an kwiv tou won pou mete dlo. Basen lan te mezire kenz pye lajè ak sèt pye edmi wotè. Le ou mezire wonn li, li ba ou karannsenk pye.
³ Sou tout wonn basen lan sou deyò, te gen de ranje pòtre ki sanble pòtre bèf. Yo te an kwiv, yon ti jan anba rebò a. Te gen dis pòtre pou chak pye edmi. Yo te fè yon sèl kò ak basen lan. Yo te koule yo ansanm.
⁴ Basen lan te chita sou do douz towo fèt an kwiv. Fas yo bay sou deyò, fas twa bay sou solèy leve, fas twa bay sou bò nò, fas twa bay sou solèy kouche ak fas twa bay sou bò sid. Basen lan menm te chita sou dèyè yo ki te bay sou anndan.
⁵ Rebò basen lan te gen twa pous epesè. Rebò a te tankou rebò yon tas. Li te fè yon ti vire sou deyò tankou yon flè ki louvri. Basen lan te ka kenbe kenzmil (15.000) galon dlo konsa.
⁶ Li fè fè dis lòt basen an kwiv. Li mete senk sou bò dwat ak senk sou bò gòch. Se la yo te lave vyann bèt yo te gen pou boule nèt sou lotèl la. Prèt yo menm te sèvi ak dlo ki te nan gwo basen lan pou lave kò yo.
⁷ Salomon fè fè dis gwo lanp sèt branch an lò, dapre jan pou yo te fè yo a. Li mete yo nan Tanp lan, senk sou bò gòch, senk sou bò dwat.
⁸ Li fè

fè dis tab pou mete nan Tanp lan tou, senk sou bò gòch, senk sou bò dwat. Li fè fè san bòl an lò.
⁹ Li fè yo bati lakou anndan an pou prèt yo ak gwo lakou a ak tout pòtay li yo. Tout pòtay yo te
¹⁰ kouvri ak kwiv. ¹¹ Li fè mete gwo basen lan menm sou bò dwat Tanp lan, nan kwen sidès la. ¶
Iram te fè plato pou sann dife, pèl ak kivèt. Se konsa li te fin fè tout travay Salomon te mande l' fè
¹² pou Tanp Seyè a. Men sa li te fè: de gwo poto won yo, de blòk won yon ti jan pi gwo pou ale
¹³ sou tèt poto yo, ak desen ti chenn mare yonn ak lòt ki te kouvri de blòk tèt poto yo, katsan (400)
¹⁴ pòtre grenad ki pou ale sou de ran nan desen ki kouvri blòk won ki sou tèt poto yo, dis kabwa
¹⁵ yo, dis basen ki pou ale sou kabwa yo, yon gwo basen tou won pou mete dlo, douz towò pou
¹⁶ soutni basen lan, plato pou sann yo, pèl yo ak fouchèt yo. Bòs Iram te fè tout bagay sa yo an
¹⁷ kwiv poli pou Tanp Seyè a, dapre lòd li te resevwa nan men wa Salomon. Wa a te fè fonn yo
¹⁸ nan moule nan fon Jouden an, ant lavil Soukòt ak lavil Zaretan. Te sitèlman gen anpil bagay
¹⁹ fèt an kwiv, Salomon pa t' chache konn pèz yo. Salomon fè fè tout mèb an lò yo te bezwen pou
²⁰ Tanp lan: lotèl la, tab pou pen yo mete apa pou Bondye yo, gwo lanp sèt branch yo ak tèt lanp
²¹ fèt ak bon lò yo ki fèt pou limen devan pyès yo mete apa nèt pou Seyè a, jan pou yo fè l' la, flè
²² yo, lanp yo ak pensèt pou gwo lanp sèt branch yo, kouto yo, gode yo, bòl yo, recho pou pote
chabon tou limen yo. Tout bagay sa yo te fèt ak bon jan lò. Batan pòt ki bay sou deyò Tanp lan ak
batan pòt ki bay sou pyès ki apa nèt pou Seyè a te kouvri nèt ak lò tou.

Chapter 5

¹ ¶ Lè wa Salomon te fin fè travay bati tanp Seyè a, li fè yo pote tout ajan, tout lò ansanm ak
tout lòt bagay David, papa l', te ofri bay Seyè a. Li fè mete yo nan chanm trezò Tanp lan. ² Apre
sa, Salomon bay lòd pou tout gwo chèf pèp Izrayèl yo ansanm ak tout chèf branch fanmi yo ak lòt
chèf fanmi pèp Izrayèl la sanble devan l' lavil Jerizalèm pou yo al pran Bwat Kontra Seyè a nan
³ lavil David la, lavil Siyon an, pou yo pote l' nan Tanp lan. Pandan fèt Joupa yo, nan setyèm mwa
⁴ a, tout pèp Izrayèl la reyini ansanm ak wa Salomon. Lè tout chèf pèp Izrayèl yo fin reyini, moun
⁵ Levi yo pran Bwat Kontra a, yo pote l' nan Tanp lan ansanm ak Tant Randevou Seyè a ak tout
⁶ bagay yo te mete ladan l' apa pou Seyè a. Se prèt yo ak moun Levi yo ki te pote yo. Wa Salomon

ansanm ak tout pèp Izrayèl la sanble devan Bwat Kontra a. Yo touye bèf, kabrit ak mouton an kantite pou Bondye. Moun pa t' ka konte konbe bèt yo te touye jou sa a sitèlman yo te anpil. ⁷ Lè yo fini, prèt yo pote Bwat Kontra a nan pyès ki apa nèt pou Seyè a anndan tanp lan, yo mete l' nan mitan de pòtre zanj cheriben yo. ⁸ Zèl zanj cheriben yo te louvri, yo te kouvri tout kote Bwat Kontra a ye a ansanm ak poto ki sèvi pou pote l' yo. ⁹ Si yon moun kanpe sou devan pyès ki apa nèt pou Seyè a, yo ka wè pwent poto yo nan kote ki apa pou Bondye a tèlman yo te long. Men, ou pa ka wè yo lòt kote ankò. Jouk koulye a poto yo la toujou. ¹⁰ Nan Bwat Kontra a pa t' gen pase de moso wòch plat Moyiz te mete ladan l' yo depi sou mòn Orèb la. Se sou mòn sa a Seyè a te pase kontra a ak moun pèp Izrayèl yo lè yo t'ap soti kite peyi Lejip la. ¹¹ ¶ Prèt yo soti nan pyès ki apa nèt pou Seyè a. Tout prèt ki te la yo te mete yo nan kondisyon pou yo fè sèvis pou Bondye, san yo pa tann tou pa yo pou yo pran sèvis. ¹² Tout moun Levi ki te sanba yo, depi Asaf, Eyman ak Jedoutoun jouk tout pitit yo ak lòt fanmi yo, te kanpe sou bò solèy leve lotèl la ak rad blan sou yo. Yo te gen senbal, bandjo, gita. Lèfini, te gen sanven (120) prèt bò kote yo ki t'ap kònen twonpèt. ¹³ Lè tout moun sa yo mete ansanm pou yo pran kònen twonpèt, pou yo chante fè lwanj Bondye, pou di li mèsi, nan mitan bèl mizik yo t'ap jwe nan twonpèt ak senbal ak lòt enstriman mizik yo, ou tande vwa moun yo ki t'ap chante: Lwanj pou Seyè a, paske li bon! Li p'ap janm sispann renmen nou! Lè sa a, nwaj la plen Tanp Seyè a nèt. ¹⁴ Poutèt nwaj la, prèt yo pa t' ka rete fè sèvis yo, paske limyè prezans Seyè a te plen Tanp lan nèt.

Chapter 6

¹ ¶ Lè sa a, Salomon di konsa: -Seyè, ou di ou pito viv kote ki fè nwa. ² Koulye a, mwen bati yon tanp pou ou ka rete, yon kay kote ou pral viv pou tout tan. ³ Lèfini, wa a vire, li bay pèp Izrayèl la fas. Tout pèp la te kanpe. Li mande benediksyon Bondye pou pèp la, ⁴ li di: -Lwanj pou Seyè a, Bondye pèp Izrayèl la! Avèk fòs kouraj li, li kenbe pwomès li te fè David, papa m' lan, lè li te di l' konsa: ⁵ Depi jou mwen te fè pèp mwen an soti kite peyi Lejip, mwen pa janm chwazi yon lavil nan tout peyi pèp Izrayèl la pou yo bati yon tanp ladan l' pou mwen rete, ni mwen pa t' chwazi pesonn pou gouvènè pèp mwen an, pèp Izrayèl la. ⁶ Men koulye a, mwen chwazi lavil Jerizalèm pou se la yo fè sèvis pou mwen, lèfini mwen chwazi David pou li gouvènè pèp mwen an. ⁷ David, papa m', te fè lide bati yon tanp pou Seyè a, Bondye pèp Izrayèl la, ⁸ Men, Seyè a te di l': Ou byen

fèt gen lide bati yon kay pou mwen. ⁹ Men, se pa ou ki va bati l'. Se pwòp pitit gason w'ap fè a ki
 va bati tanp lan pou mwen. ¹⁰ Koulye a, Seyè a kenbe pwomès li. Jan li te di l' la, se mwen menm
 ki nan plas David, papa m'. Mwen chita sou fotèy wa Izrayèl la. Mwen bati yon tanp pou Seyè a,
 Bondye pèp Izrayèl la. ¹¹ Lèfini, mwen fè yon plas ladan l' pou Bwat Kontra Seyè a, kontra li te
 pase ak moun pèp Izrayèl yo. ¹² ¶ Apre sa, Salomon al kanpe devan lotèl Seyè a, devan tout pèp
 Izrayèl la, li leve de men l' anlè pou l' lapriyè. ¹³ Salomon te fè fè yon platfòm an kwiv. Li fè yo
 mete l' nan mitan lakou a. Platfòm lan te kare kare, wit pye longè, wit pye lajè ak senk pye wotè.
 Li moute sou li, li mete ajenou devan tout pèp Izrayèl la. Li leve de men l' anlè, ¹⁴ epi li di: -Seyè,
 ou menm ki Bondye pèp Izrayèl la, pa gen Bondye tankou ou ni nan syèl ni sou latè. Ou kenbe
 kontra ou te siyen ak pèp ou a. Ou moutre jan ou renmen moun k'ap sèvi ou ak tout kè yo. ¹⁵ Ou
 te kenbe pwomès ou te fè David, papa m', sèvitè ou la. Tou sa ou te di w'ap fè, ou fè l' rive vre jòdi
 a ak fòs ponyèt ou. ¹⁶ Se poutèt sa, Seyè, Bondye pèp Izrayèl la, m'ap mande ou pou ou kenbe lòt
 pwomès ou te fè David, papa m', sèvitè ou la, lè ou te di l' va toujou gen yonn nan pitit li yo pou
 gouvènènan pèp Izrayèl la, depi yo veye jan y'ap mache pou yo mennen bak yo devan ou jan li menm
 li te fè l' la. ¹⁷ Se konsa, Seyè, Bondye pèp Izrayèl la, fè tout bagay rive jan ou te fè pwomès la
 bay David, sèvitè ou la. ¹⁸ Men, Bondye, èske ou ka rete tout bon sou latè ak moun? Ata syèl la
 pa laj ase pou l' kenbe ou! Ale wè pou ti kay mwen bati pou ou la a! ¹⁹ Seyè, Bondye m', tanpri,
 se sèvitè ou mwen ye! Tanpri, tande jan m'ap lapriyè nan pye ou. Koute jan m'ap rele nan zòrèy ou
 jòdi a. Tande jan m'ap rele, jan m'ap lapriyè nan pye ou. ²⁰ Lajounen kou lannwit, voye je ou sou
 tanp lan, tanp kote ou te di w'ap toujou la a. Koute lapriyè mwen menm, sèvitè ou la, m'ap fè nan
 pye ou. ²¹ Wi, koute lapriyè m'ap fè ak lapriyè pèp Izrayèl ou a ap fè nan pye ou isit la. Nan syèl
 kote ou rete a, koute lapriyè nou, padonnen nou. ²² Lè y'a pote plent pou yon moun ki fè frè l' yon
 bagay mal, si yo mande l' pou l' fè sèman se pa vre, epi li vin fè sèman an devan lotèl ou a, nan
 tanp sa a, ²³ ou menm, Seyè ki nan syèl la, w'a tande, w'a fè sa ki gen pou fèt la. W'a jije sèvitè ou
 yo. W'a pini moun ki koupab la, w'a fè chatiman li merite a tonbe sou tèt li. W'a fè rekonèt lè yon
 moun inonsan pou yo ka rann li jistis. ²⁴ Lè lènmi va bat pèp Izrayèl la paske pèp la te peche kont
 ou, si yo tounen vin jwenn ou, si yo fè lwanj pou ou, si yo vin lapriyè nan pye ou isit la nan kay sa
 a, ²⁵ tanpri, kote ou ye nan syèl la, koute yo. Padonnen peche pèp Izrayèl ou a, fè yo tounen nan
 peyi ou te ba yo ansanm ak zansèt yo a. ²⁶ Lè va gen chechrès nan peyi a san yon ti degout lapli,
 paske pèp la te peche kont ou, si yo règrèt sa yo te fè a paske ou te pini yo, si yo vin lapriyè isit la,

si yo fè lwanj ou, ²⁷ tanpri, kote ou ye nan syèl la, koute yo. Padonnen peche sèvitè ou yo ak peche moun pèp Izrayèl ou yo. Moutre yo bon chemen pou yo pran an. Apre sa, Seyè, w'a voye lapli sou

²⁸ peyi ou te bay pèp ou a pou l' rele l' pa l' la. Lè va gen grangou nan peyi a, osinon lè move maladi lapès va tonbe sou li, lè plant yo va cheche nan van cho, lè krikèt ak chwal bondye va ravaje jaden yo, lè lènmi va sènen lavil nou yo pou atake pèp la, lè nenpòt maladi osinon nenpòt malè va tonbe

²⁹ sou pèp la, koute lapriyè y'ap fè nan pye ou. Lè nenpòt moun osinon tout pèp la va lapriyè nan

³⁰ pye ou, lè y'a règrèt sa yo fè a, lè y'a leve men yo nan direksyon tanp lan pou yo lapriyè ou, tanpri, kote ou ye nan syèl kote ou rete a, koute lapriyè yo, padonnen yo. Bay chak moun sa yo merite,

³¹ paske ou konnen sa ki nan kè yo. Se ou menm ki konnen sa ki nan fon kè moun. Wi, w'a bay chak moun sa yo merite, konsa pèp ou a va gen krentif pou ou, y'a mache nan chemen ou mete

³² devan yo, pandan tout tan y'ap viv sou tè ou te bay zansèt nou yo. Menm lè yon moun lòt nasyon ki pa fè pati pèp ou a soti byen lwen vini poutèt ou, paske li tande jan n'ap nonmen non ou, li tande

³³ pale tout bèl bagay w'ap fè avèk fòs kouraj ou, si li vin lapriyè nan tanp sa a, tanpri, nan syèl kote ou rete a, koute lapriyè li. W'a fè pou li tou sa li mande ou. Konsa, tout pèp sou latè va konnen ou. Y'a gen krentif pou ou tankou pèp Izrayèl ou a gen krentif pou ou. Y'a konnen tanp mwen bati

³⁴ pou ou a, se la pou yo vin adore ou. Lè pèp ou a va soti al goumen kont lènmi l' yo, nenpòt ki bò w'a voye yo, lè y'a vire tèt yo nan direksyon lavil ou chwazi a ak nan direksyon Tanp mwen bati

³⁵ pou ou a pou yo lapriyè nan pye ou, tanpri, nan syèl kote ou rete a, koute lapriyè yo. Koute

³⁶ lapriyè y'ap fè nan pye ou, defann kòz yo. Lè pèp ou a va peche kont ou, paske pa gen moun ki pa fè peche, lè w'a move sou yo, lè w'a lage yo nan men lènmi yo ki va fè yo prizonnye, ki va depòte

³⁷ yo nan lòt peyi, li te mèt toupre, li te mèt byen lwen, antan yo la nan peyi kote lènmi yo te depòte yo a, si yo règrèt sa yo te fè, si yo lapriyè nan pye ou, si yo rekonèt yo te fè sa ki mal, si yo rekonèt

³⁸ yo te peche, si yo rekonèt yo antò, si yo tounen vin jwenn ou ak tout kè yo ak tout nanm yo, antan yo nan peyi kote lènmi te depòte yo a, si yo vire tèt yo nan direksyon peyi ou te bay zansèt yo a, nan direksyon lavil ou te chwazi a, nan direksyon Tanp mwen bati pou ou a, pou yo lapriyè

³⁹ ou, tanpri, koute lapriyè y'ap fè nan pye ou, kote ou ye nan syèl kote ou rete a. Koute lapriyè

⁴⁰ yo, defann kòz yo. Padonnen pèp ou a tout peche yo te fè kont ou yo. Koulye a, Bondye mwen,

⁴¹ louvri je ou, koute lapriyè n'ap fè nan pye ou isit la. Koulye a, leve non, Seyè, Bondye! Vin kote pou ou pran repo a! Vini non ansanm ak Bwat Kontra ou la ki fè wè jan ou gen pouvwa. Se pou prèt yo fè konnen jan ou bay pèp ou a delivrans! Se pou tout pèp ou a rele tèlman yo kontan!

⁴² Poutèt pwomès ou te fè David, sèvitè ou la, tanpri, Seyè, pa vire do bay moun ou te chwazi a!

Chapter 7

¹
 ¶ Lè wa Salomon fin fè lapriyè sa a, dife desann soti nan syèl la, li boule bèt yo te ofri sou
 lotèl la ak lòt pòsyon vyann yo te ofri. ² Anmenmtan an, limyè prezans Seyè a te plen Tanp lan.

³
 Lè tout moun pèp Izrayèl yo wè dife desann soti nan syèl la ak bèl limyè prezans Seyè a ki te klere
 tout anndan Tanp lan, yo mete ajenou, yo bese tèt yo jouk fwon yo rive sou dal pave a, yo adore
 Bondye, yo t'ap fè lwanj Seyè a, yo di l' mèsè paske li bon, paske li p'ap janm sispann renmen yo.

⁴
 Apre sa, wa Salomon ansanm ak tout pèp Izrayèl ki te la a ofri bèt pou yo touye pou Seyè a. ⁵ Wa
 Salomon te ofri venndemil (22.000) towò ak sanvenmil (120.000) mouton pou mande Bondye

⁶
 padon. Se konsa wa a ansanm ak tout moun pèp Izrayèl yo te mete Tanp lan apa pou Seyè a. Prèt
 yo te rete nan plas yo te ba yo nan Tanp lan. Devan yo se te moun Levi yo ki t'ap fè lwanj Seyè a
 ak enstriman mizik wa David te fè fè pou jwe pandan y'ap chante chante ki di: Paske li p'ap janm

⁷
 sispann renmen nou. Prèt yo t'ap kònen twonpèt, tout pèp Izrayèl la menm te rete kanpe. Menm
 jou sa a, Salomon mete mitan gwo lakou ki devan Tanp Seyè a apa pou Bondye. Lèfini, se la li ofri
 bèt pou boule nèt pou Seyè a, ak grès bèt yo te touye pou mande Bondye padon, paske lotèl kwiv
 Salomon te fè fè a te twò piti pou pran tout ofrann bèt yo te touye pou boule nèt pou Seyè a, grenn

⁸
 jaden yo ak grès bèt yo te touye pou mande Bondye padon. Lè sa a, Salomon ansanm ak tout pèp
 Izrayèl la fete fèt Joupa yo pandan sèt jou. Foul moun te soti depi Pas Amat la nan nò jouk sou

⁹
 fwontyè ak peyi Lejip la nan sid, yo vin fete la. Yo pase sèt jou ap fè sèvis pou mete lotèl la apa
 pou sèvis Bondye, lèfini yo pase sèt jou ankò ap fè fèt. Sou wityèm jou fèt la, yo fè yon gwo sèvis

¹⁰
 pou fèmen seremoni an. Nan denmen, ki vle di nan venntwazyèm jou setyèm mwa a, Salomon
 voye tout moun tounen lakay yo. Yo tout t'ap fè fèt, yo al lakay yo ak kè kontan, paske sa te fè yo

¹¹
 plezi pou wè tou sa Seyè a te fè pou David, pou Salomon ak pou pèp Izrayèl li a. Lè wa Salomon

¹²
 fin bati Tanp Seyè a ansanm ak palè wa a, lè li fin fè tou sa li te gen lide fè nan yo, ¶ Seyè a fè
 Salomon wè l' ankò yon jou lannwit. Li di l' konsa: -Mwen tande lapriyè ou fè nan pye m'. M'

¹³
 chwazi kay sa a pou sèvi kote pou yo vin touye bèt pou mwen. Si mwen ta rive fèmen syèl la
 pou lapli pa tonbe, si mwen ta voye krikèt pou devore peyi a, si mwen ta voye move maladi sou

¹⁴
 pèp la, lè sa a si pèp ki pote non m' lan lapriyè nan pye m', si yo soumèt devan mwen, si yo pran
 chache m' ankò, si yo vire do bay vye peche yo t'ap fè yo, m'ap tande yo nan syèl kote m' ye a, m'ap

¹⁵
 padonnen peche yo, m'ap fè peyi a kanpe ankò. Depi jòdi a, je m' louvri, zòrèy mwen pare pou

¹⁶
 m' tande tout lapriyè y'ap fè isit la. Depi jòdi a, mwen chwazi kay sa a, mwen mete l' apa pou

17
 mwen. Se la pou yo fè sèvis pou mwen. M'ap veye l', m'ap pwoteje l' chak jou. Ou menm pou
 tèt pa ou, si ou mache devan m' tankou David, papa ou, si ou fè tou sa mwen mande ou fè, si ou
 18
 koute lòd ak bon prensip mwen yo, m'a kenbe gouvènman ou lan chita jan mwen te pwomèt
 David, papa ou la, lè m' te di l' ap toujou gen yon moun nan fanmi li ki pou gouvènen pèp Izrayèl
 19
 la. Men, si ou menm osinon yonn nan pitit ou yo vire do ban mwen, si nou pa fè sa m' mande
 20
 nou fè, si nou pa koute lòd mwen ban nou, si n al sèvi lòt bondye, si n' al adore lòt bondye, lè
 sa a, m'ap wete pèp Izrayèl la nan peyi mwen ba yo a. M'ap vire do bay tanp mwen te mete apa
 tankou kote pou yo fè sèvis pou mwen an. Moun toupatou va pase l' nan betiz, y'a fè chante sou li.
 21
 Kay sa a ki te sitèlman bèl pral tounen yon pil mazi. Tout moun ki va pase bò la a va sezi, y'a
 22
 mete men nan bouch, y'a mande poukisa Seyè a fè peyi a ak tanp lan sa. Y'a reponn: Se paske
 yo te vire do bay Seyè a, Bondye zansèt yo a, ki te fè yo soti kite peyi Lejip. Yo kouri dèyè lòt
 bondye, yo fè sèvis pou yo, yo adore yo. Se poutèt sa Seyè a te voye gwo malè sa a sou yo.

Chapter 8

1 ¶ Wa Salomon te pran ventan pou l' bati kay Seyè a ak kay pa li a. 2 Li rebati tout lavil wa
 Iram te ba li, li voye moun pèp Izrayèl al rete ladan yo. 3 Apre sa, li al atake lavil Amat nan Zoba,
 4 li pran li. Li rebati lavil Tadmò nan dezè a ansanm ak tout lavil nan zòn Amat la pou sevi depo
 5 pwovizyon. Salomon rebati Bètowon anwo ak Bètowon anba, li byen pwoteje yo ak miray ranpa,
 6 gwo pòtay ak ba pou fèmen yo. Li rebati lavil Balat, tout lavil kote li te fè depo pwovizyon, tout
 lavil kote yo te gade chwal li yo ansanm ak cha lagè yo. Li bati tou sa li te fè lide bati nan lavil
 7 Jerizalèm, nan peyi Liban ak nan tout lòt peyi ki te sou zòd li yo. 8 -(we vèsè pwochen) Lè moun
 Izrayèl yo te fin pran peyi Kanaran an pou yo, gen anpil nan moun ansyen mèt peyi a yo pa t' touye.
 Yo te kite yo rete nan peyi a. Te gen moun Amori, moun Et, moun Ferezi, moun Iva ak moun Jebis.
 Se pitit moun sa yo Salomon te pran sèvi esklav pou fè kòve. Se sa k'ap fèt jouk jounen jòdi a.
 9 Salomon pa t' fè ankenn moun nan pèp Izrayèl la sèvi esklav. Li te fè yo sèvi sòlda, ofisyè, chèf,
 10 kaptenn ak kòmandan cha lagè yo ak kavalye yo. Te gen desansenkant (250) moun gouvènè yo
 11 te chwazi pou sèvi fòmman. Se yo ki te reskonsab kontwole tout travay ki t'ap fèt yo. Salomon
 fè madanm li, pitit fi farawon an, kite lavil David, al rete nan kay li te bati pou li a. Li t'ap di nan
 kè l': Ata madanm mwen pa gen dwa rete nan kay David, wa peyi Izrayèl la, paske tout kote Bwat

Kontra Seyè a te pase se kote ki fèt pou rete apa pou Bondye. ¹² ¶ Salomon te ofri bèt pou yo boule nèt pou Bondye sou lotèl li te fè bati pou Seyè a devan Tanp lan. ¹³ Li ofri bèt pou yo boule nèt pou Seyè a, dapre lòd Moyiz te bay nan lalwa a pou chak jou fèt: pou jou repo yo, pou jou lalin nouvèl yo, ak pou twa gwo fèt yo fete chak lanne yo, ki vle di: Fèt Pen san ledven yo, Fèt Rekòt yo ak Fèt Joupa yo. ¹⁴ Dapre regleman David, papa l', te bay, li mete chak gwoup nan travay pa yo, prèt yo pou fè sèvis pou Bondye, moun Levi yo pou fè lwanj Seyè a epi pou ede prèt yo nan travay yo dapre sa ki pou fèt chak jou fèt yo. Li bay chak gwoup gad pòtay Tanp lan lè travay yo nan chak pòtay, dapre lòd David, moun Bondye a, te kite. ¹⁵ Se konsa, yo te swiv tout ti detay ki nan lòd wa David te bay pou prèt yo ak pou moun Levi yo, ata lòd li te bay pou trezò Tanp lan. ¹⁶ Se konsa tout travay Salomon te vle fè a te fin fèt, depi jou yo t'ap fouye fondasyon Tanp Seyè a jouk yo fini l'. Tanp Seyè a pa t' manke anyen ankò pou l' fini. ¹⁷ Apre sa, Salomon ale lavil Ezyongebè ak lavil Elat bò Lanmè Wouj la, nan pòsyon tè ki pou moun Edon yo. ¹⁸ Wa Iram te voye batiman ansanm ak moun peyi l' ki te konn lanmè bay Salomon pou sèvi ansanm ak moun Salomon yo sou batiman yo. Se chèf ki t'ap sèvi nan gouvènman Iram yo ki te vin renmèt batiman yo. Maren Iram yo vwayaje ansanm ak moun pa Salomon yo rive peyi Ofi, kote yo al chache trèzòn lò pote bay Salomon.

Chapter 9

¹ ¶ Larenn peyi Saba tande pale ki kalite moun Salomon te ye. Li vwayaje pou lavil Jerizalèm pou l' sonde konnesans Salomon avèk kèk keksyon difisil. Se konsa, li mennen anpil moun avè l' ak anpil chamo chaje odè, fèy santi bon, kantite lò ak pyè koute chè. Lè li rive devan Salomon, li poze l' tout kalite keksyon li te fè lide mande l'. ² Salomon menm reponn tout keksyon l' yo. pa t' gen anyen ki te twò difisil pou li reponn. ³ Larenn peyi Saba a wè jan Salomon te gen anpil bon konprann. Li wè palè li te bati a. ⁴ Li wè kalite manje yo te sèvi sou tab li, kay li te fè bati pou chèf li yo, jan li te òganize moun k'ap travay nan palè a, rad inifòm yo te genyen, domestik ki t'ap sèvi l' bweson ak bèt li te ofri pou boule nèt pou Seyè a nan Tanp lan. Lè li wè tou sa, li pèdi lapawòl sitèlman li te sezi. ⁵ Li di wa Salomon konsa: -Sa m' te tande nan peyi m' sou ou ak sou bon konprann ou an, se te vre! ⁶ Men, mwen pa t' vle kwè toutotan mwen pa t' vini wè ak je pa mwen. Men, sa m' te tande a se pa mwaye sa m' wè a. Bon konprann ou ak richès ou pi plis pase sa yo te di a. ⁷ Ala bèl chans moun pa ou yo genyen! Ala bèl chans pou moun k'ap travay avè ou yo! Yo toujou la devan

⁸
 ou ap tande bèl pawòl k'ap soti nan bouch ou! Lwanj pou Seyè a, Bondye ou la! Li moutre jan li kontan avè ou. Li mete ou chita sou fotèy li a pou ou te ka wa peyi Izrayèl la. Li menm ki renmen peyi Izrayèl la, li vle pou peyi a pa janm disparèt. Li mete ou wa pou ou ka kenbe peyi a nan lòd,

⁹
 nan bon chemen, san patipri. Larenn Saba a fè wa a kado twa tòn edmi lò ak kantite fèy santi bon ak anpil pyè koute chè. Pat janm rive gen nan pèyi Izrayèl la kantite fèy santi bon tankou sa larenn

¹⁰
 Saba a te bay wa Salomon lè sa a. Moun Iram yo ansanm ak moun Salomon yo, ki te al chache lò nan peyi Ofi, te pote yon gwo kantite bwa koray ak anpil bèl pyè koute chè soti nan menm peyi

¹¹
 a. Salomon sèvi ak bwa koray yo pou fè planche nan Tanp lan ak nan palè a. Li fè gita ak bandjo

¹²
 pou mizisyen yo ak bwa sa a tou. Yo pa t' janm wè bagay konsa nan peyi Jida a anvan sa. Wa Salomon te bay larenn peyi Saba a tou sa li te mande l', san konte kado li te ba li pou koresponn ak sa larenn lan te pote ba li. Apre sa, larenn lan tounen tounen l' nan peyi Saba ansanm ak tout

¹³ ¹⁴
 moun ki te avè l' yo. ¶ Chak lanne, wa Salomon te resevwa vennsenk tòn lò, san konte lajan li te resevwa nan men moun k'ap fè trafik yo ak moun k'ap fè kòmès yo. Tout wa peyi Arabi yo ak

¹⁵
 gouvènè pèp Izrayèl yo te pote lò ak ajan bay Salomon tou. Salomon te fè fè desan (200) gwo

¹⁶
 plak pwotèj an fè. Lèfini, li fè kouvri yo chak ak yon kouch lò ki peze douz liv. Li fè fè twasan (300) ti plak pwotèj, li fè kouvri yo chak ak yon kouch lò ki peze sis liv. Li mete tout plak pwotèj

¹⁷
 sa yo nan salon Rakbwa Peyi Liban an. Li fè fè tou yon gwo fotèy ak kòn elefan. Li fè kouvri

¹⁸
 l' ak pi bon kalite lò ki genyen. Pou rive bò fotèy la, se pou ou te moute sis mach eskalye. Devan fotèy la te gen yon ti ban an lò pou wa a lonje pye l'. Fotèy la te gen de manch. Sou kote manch

¹⁹
 yo, sou chak bò te gen pòtre yon lyon. Te gen douz lyon sou mach eskalye yo, de sou chak mach

²⁰
 nan de pwent yo. Pat gen ankenn lòt peyi ki te gen yon fotèy pou wa parèy ak sa a. Tout gode wa Salomon te sèvi pou l' bwè te fèt an lò. Tout bagay ki te sèvi nan Salon Rakbwa Peyi Liban an

²¹
 te fèt an bon lò. Yo pa t' sèvi ak ajan menm, paske sou rèy Salomon, ajan pa t' vo anyen. Li te gen yon kantite batiman pa l' ki t'ap vwayaje ale nan peyi Tasis. Se moun Iram yo ki te mennen yo

²²
 pou li. Chak twazan, batiman yo te tounen chaje ak lò, ajan, kòn elefan, pan ak makak. Wa

²³
 Salomon te pi rich pase tout lòt wa yo. Li te gen plis bon konprann pase yo tout. Tout wa toupatou

²⁴
 te vin wè Salomon pou tande bèl pawòl Bondye te mete nan bouch li. Chak moun ki te vini te pote kado pou li, bagay ki fèt an ajan ak an lò, rad, zam, fèy santi bon, chwal ak milèt. Chak lanne

²⁵
 se te konsa. Salomon te gen katmil (4.000) kay kote li te mete chwal li yo ak cha lagè, ak douzmil (12.000) chwal pou sòlda kavalye yo. Li mete yon pòsyon nan lavil kote li te gen cha li yo, rèz yo

li mete yo lavil Jerizalèm bò kote l'.²⁶ Salomon te sèl chèf sou tout wa ki t'ap gouvènen depi larivyè
 Lefrat rive nan peyi Filisti, jouk sou fwontyè peyi Lejip.²⁷ Pandan tout rèy li, ajan te tankou wòch
 lavil Jerizalèm. Bwa sèd menm, ou te jwenn sa an kantite tankou pye sikomò nan rakbwa nan plenn
 peyi Jida yo.²⁸ Se nan peyi Lejip ak nan tout lòt peyi Salomon te fè chache chwal li yo.²⁹ Tout
 rès istwa Salomon an, depi premye jou li te moute wa a rive jouk dènye jwa a, nou jwenn li nan liv
 istwa pwofèt Natan, nan liv mesaj Akija, moun lavil Silo a, ak nan liv vizyon pwofèt Ido ki pale
 sou wa Jewoboram, pitit Nebat la.³⁰ Salomon te wa lavil Jerizalèm, li te gouvènen tout pèp Izrayèl
 la pandan karantan.³¹ Lè li mouri, yo antere l' nan lavil David, papa l'. Se Woboram, pitit li, ki
 moute wa nan plas li.

Chapter 10

¹ ¶ Woboram moute lavil Sichèm, paske se la tout pèp Izrayèl la nèt te sanble pou fè li wa.² Lè
 Jewoboram, pitit gason Nebat la, ki te nan peyi Lejip kote li te al kache pou Salomon an, pran
 nouvèl la, li kite peyi Lejip, li tounen lakay li.³ Moun branch fanmi ki nan nò peyi a voye chache
 l'. Yo tout ansanm, yo al jwenn Woboram, yo di l' konsa:⁴ -Papa ou te di anpil ak nou. Li te peze
 nou anpil. Koulye a, fè yon leve men pou nou. Kite nou viv yon ti jan pi alèz, n'a sèvi ou nèt ale.
⁵ Woboram di yo: -Tounen nan twa jou. Lè sa a, m'a ban nou repons. Epi moun yo al fè wout yo.
⁶ Woboram menm al jwenn chèf fanmi ki te sèvi konseye pou Salomon, papa l', lè li t'ap viv la, li
 mande yo: -Kisa pou m' reponn pèp la? Ki konsèy nou ban mwen?⁷ Yo reponn li: -Si ou aji byen
 ak pèp la, si ou asepte fè sa yo mande ou la, si ou pale byen ak yo, y'ap toujou sèvi ou,⁸ Men,
 Woboram pa koute konsèy granmoun yo te ba li a, li al jwenn jenn gason ki te leve ansanm avè l'
 yo, lèfini ki te toujou la pou ba l' konsèy tou.⁹ Li di yo: -Ki konsèy nou ta ban mwen? Kisa pou
 m' reponn pèp la k'ap mande m' pou m' fè yon leve men pou yo?¹⁰ Jenn gason kanmarad li yo
 reponn li: -Men sa w'a di moun sa yo k'ap plenyen pou papa ou ki t'ap peze yo, epi k'ap mande ou
 fè yon leve men pou yo a. W'a di yo: Si papa m' te di ak nou, mwen menm m'ap pi di pase l'.¹¹ Wi,
 w'a di yo: Papa m' t'ap peze nou anba chay lou, mwen menm se mete m'ap mete sou chay la anko.
¹² Papa m' te bat nou ak fwèt, mwen menm m'ap pase fwèt la anba sann pou m' bat nou. ¶ Twa jou
 apre vre, Jewoboram tounen ansanm ak tout moun Izrayèl yo vin jwenn wa Woboram, jan li te di

¹³ yo a. Wa a pa koute konsèy granmoun yo, li pale di ak pèp la. ¹⁴ Li reponn yo jan jenn gason yo te ba l' konsèy la. Li di yo: -Papa m' te peze nou anba chay lou, mwen menm, m'ap mete sou chay n'ap pote deja a. Papa m' te bat nou ak fwèt, mwen menm, m'ap pase fwèt la anba sann pou ¹⁵ nou. Se konsa wa a pa t' asepte fè sa pèp la te mande l' la. Sa se travay Seyè a menm ki te vle pou sa li te voye Akija, pwofèt Silo a, al di Jewoboram, pitit Nebat la, rive vre. ¹⁶ Lè pèp Izrayèl la wè wa a pa t' soti pou li fè sa yo te mande l' la, yo reponn wa a, yo di li: -Nou pa gen anyen pou nou wè ak David. Nou pa gen anyen pou n' separe ak pitit Izayi a. Nou menm pèp Izrayèl la, ann al lakay nou! Ann kite pitit David yo degaje yo pou kont yo ak fanmi yo! Se konsa moun pèp Izrayèl la vire do al lakay yo. ¹⁷ Yo kite Woboram pou li gouvènè sèlman sou moun ki rete nan pòsyon tè branch fanmi Jida a. ¹⁸ Apre sa, wa Woboram voye Adoram ki te reskonsab travay kòve yo al bò kote moun Izrayèl yo. Men, moun Izrayèl yo kalonnen li koutwòch jouk li mouri. Lè sa a, wa Woboram prese moute sou cha li, li kouri ale lavil Jerizalèm. ¹⁹ Depi lè sa a, moun pèp Izrayèl yo vire do bay moun fanmi David yo jouk jounen jòdi a.

Chapter 11

¹ ¶ Lè Woboram rive lavil Jerizalèm, li sanble sankatrevenmil (180.000) sòlda nan pi bon sòlda ki te nan branch fanmi Jida ak nan branch fanmi Benjamen. Li te fè lide al goumen ak moun peyi Izrayèl yo pou l' mete yo anba lòd li ankò. ² Men, Bondye pale ak Chemaya, pwofèt li a, li di l' konsa: ³ -Pale ak Woboram, pitit Salomon an, wa peyi Jida a, ansanm ak tout moun pep Izrayèl ki fè pati branch fanmi Jida ak branch fanmi Benjamen yo. Di yo konsa: ⁴ Men mesaj mwen menm Seyè a, mwen voye ba yo: Piga n' al goumen ak fanmi nou yo. Tounen lakay nou. Sa ki rive a se travay mwen. Se mwen menm ki vle l' konsa. Moun yo koute lòd Seyè a vre, yo pa moute al goumen ak Jewoboram. ⁵ Woboram rete lavil Jerizalèm, li moute ranpa nan anpil lavil peyi Jida pou pwoteje yo. ⁶ Se konsa, li ranfòse miray lavil Betleyèm, Eytam, Tekoa, ⁷ Betsou, Soko, Adoulam, ⁸ Gat, Marecha, ⁹ Zif, Adorayim, Lakis, Aseka, ¹⁰ Soreya, Ajalon, Ebwon. Tou sa se lavil ak ranpa ki te nan peyi Jida ak nan peyi Benjamen. ¹¹ Li ranfòse miray ranpa yo, li mete chèf reskonsab yo, li fè bati depo pou mete manje, lwil ak diven. ¹² Lèfini, nan chak lavil, li fè bay gwo plak pwotèj ak frenn an kantite. Lavil sa yo te byen pwoteje. Se konsa Woboram te kenbe moun branch fanmi Jida ak branch fanmi Benjamen yo anba otorite l'. ¹³ ¶ Prèt yo ak moun Levi yo soti toupatou nan peyi

14 Izrayèl, yo vin jwenn Woboram. Moun Levi yo te kite bèt yo nan savann ak tout lòt byen yo, yo desann lavil Jerizalèm ak nan peyi Jida, paske Jewoboram, wa peyi Izrayèl la ak tout wa ki te vin apre l' yo, te enpoze moun Levi yo fè sèvis yo tankou prèt Seyè a. 15 Jewoboram te chwazi prèt pa l' pou fè sèvis kote yo fè ofrann bèt pou lòt bondye li t'ap sèvi sou fòm estati bouk kabrit ak ti towò bèf li te fè pou li yo. 16 Nan tout peyi Izrayèl la moun ki te vle sèvi Seyè a, Bondye pèp Izrayèl la, ak tout kè yo fè tankou moun Levi yo ak prèt yo. Yo desann lavil Jerizalèm pou yo te ka ofri bèt pou yo touye pou Seyè a, Bondye zansèt yo a. 17 Sa te bay gouvènman peyi Jida a anpil fòs. Pandan twazan yo kenbe la ak Woboram, pitit Salomon an, yo viv jan yo te konn viv sou rèy wa David ak wa Salomon. 18 Woboram te marye ak Malat, pitit fi Jerimòt ki te pitit David ak Abigayil, pitit fi Eliyab, pitit pitit fi Izayi. 19 Yo fè twa pitit gason: Jeouch, Chemarya ak Saram. 20 Apre sa, Woboram marye ak Maka, pitit fi Absalon, ki ba li kat pitit gason: Abija, Atayi, Ziza ak Chelomit. 21 Antou Woboram te gen dizwit madan marye ak swasant fanm kay. Li fè venntwit pitit gason ak swasant pitit fi. Nan tout madan marye li yo ak fanm kay li yo, se Maka, pitit fi Absalon an, li te pi renmen. 22 Konsa tou, li te pito Abija, pitit gason Maka te fè pou li a, pase tout lòt pitit li yo. Li mete l' chèf tout frè l' yo. Li te vle se li ki pou pran plas li lè li mouri. 23 Li te fè lide bay chak pitit gason l' yo yon responsablite. Se konsa, li voye yo al rete toupatou nan peyi Jida ak nan peyi Benjamen, nan tout lavil li te ranfòse yo, li ba yo pwovizyon an kantite epi li marye yo ak anpil fanm.

Chapter 12

1 ¶ Lè Woboram fin chita gouvènman li byen chita, lè li santi li te fò, li pa mache dapre lalwa Seyè a ankò. Lèfini, tout pèp Izrayèl la fè menm jan an tou. 2 Paske moun yo te vire do bay Seyè a, Chichak, wa peyi Lejip la, moute vin atake lavil Jerizalèm nan senkyèm lanne rèy wa Woboram, 3 avèk mildesan (1.200) cha lagè, swasantmil (60.000) kavalye ak yon kantite sòlda moun pa t' ka konte ki te moute avè l' soti nan peyi Lejip. Te gen moun peyi Libi, moun peyi Soukit ak moun peyi Letiopi nan lame a. 4 Li pran tout lavil ak gwo ranpa peyi Jida yo, jouk li rive lavil Jerizalèm. 5 Chichak t'ap pwoche sou lavil la, lè Chemaya, pwofèt la, al jwenn Woboram ak tout chèf peyi Jida yo ki te reyini lavil la, li di yo konsa: -Men sa Seyè a voye di nou. Menm jan nou te lage m' lan, se konsa m'ap lage nou tou nan men Chichak. 6 Wa a ansanm ak chèf yo rekonèt yo te fè sa

⁷
 ki mal: -Seyè a gen rezon l' nan pla men l'! Lè Seyè a wè jan yo rekonèt tò yo, li pale ak Chemaya ankò, li di l' konsa: -Paske yo rekonèt yo pa t' dwe fè sa yo fè a, mwen p'ap detwi yo nèt. Men, lè Chichak va atake, m'ap ba yo chans pou yo chape kò yo. Mwen p'ap sèvi ak Chichak pou m' fè
⁸
 moun lavil Jerizalèm yo santi jan m' fache sou yo. Men, Chichak pral fè yo soumèt devan l'. Lè
⁹
 sa a, y'a wè sèvi m' ak sèvi chèf sou latè sa ki pi dous. Wa Chichak atake lavil Jerizalèm. Li pran tout trezò ki te nan Tanp lan ak nan palè wa a. Li pran ata gwo plak pwotèj an lò Salomon te fè fè
¹⁰
 yo. Wa Woboram fè fè lòt gwo plak pwotèj an kwiv fwa sa a pou mete nan plas yo. Lèfini, li
¹¹
 renmèt yo nan men chèf gad ki t'ap fè pòs nan pòtay palè a. Chak fwa wa a t'ap antre nan Tanp lan, chèf gad yo al pran gwo plak pwotèj yo pote vini. Lè li ale, yo pote yo tounen nan chanm gad
¹²
 yo. Paske Woboram te rekonèt li pa t' dwe fè sa l' te fè a devan Seyè a, kòlè Seyè a bese, li pa
¹³
 fini nèt avè l'. Men pou di vre, te gen bon bagay ki te pase nan peyi Jida lè sa a tou. ¶ Woboram te gouvènen lavil Jerizalèm, li chita otorite l' byen chita. Woboram te gen karanteyennan lè li vin wa peyi Jida. Li gouvènen pandan disètan lavil Jerizalèm, lavil Seyè a te chwazi nan tout peyi Izrayèl pou anplasman kote pou yo fè sèvis pou li a. Manman Woboram te moun lavil Amon. Li
¹⁴
 te rele Nama. Woboram te fè sa ki mal, paske li pa t' chache fè volonte Seyè a. Tou sa wa
¹⁵
 Woboram te fè, depi premye jou li te moute wa a rive jouk dènye jou a, nou jwenn yo ekri nan liv travay pwofèt Chemaya ak nan liv vizyon pwofèt Ido ki bay lis fanmi yo. Se te yon lagè san rete
¹⁶
 ant Woboram ak Jewoboram. Lè Woboram mouri, yo antere l' nan lavil David la. Se Abija, pitit gason li, ki pran plas li sou fotèy la.

Chapter 13

¹
 ¶ Jewoboram te gen dizwitan depi li te wa peyi Izrayèl la, lè Abija moute wa nan peyi Jida.
²
 Li gouvènen pandan twazan lavil Jerizalèm. Manman l' te rele Mikaja. Se te pitit fi Ouryèl, moun
³
 lavil Gibeya. Se te yon lagè san rete ant Abija ak Jewoboram. Abija leve yon lame katanmil (400.000) vanyan sòlda ki konn goumen. Jewoboram bò pa l' kanpe pou goumen kont Abija ak
⁴
 witsanmil (800.000) vanyan sòlda ki konn goumen. De lame yo kontre nan mòn peyi Efrayim yo. Wa Abija kanpe sou mòn Zemarayim, li pale byen fò, li di: -Koute m' non, Jewoboram ak nou
⁵
 tout moun peyi Izrayèl yo! Eske se konnen nou pa konnen Seyè a, Bondye pèp Izrayèl la, te pase yon kontra ak David, kontra ki pa kapab kase. Dapre kontra a, li mete gouvènman pèp Izrayèl la
⁶
 nan men l' ak nan men fanmi l' pou tout tan. Men, Jewoboram, pitit gason Nebat la, li menm ki

⁷
 t'ap sèvi ak Salomon, pitit David la, revòlte kont mèti li. Apre sa, yon bann vòryen ak yon bann vakabon al mete tèt yo ansanm ak li, yo fòse Woboram, pitit gason Salomon an, yo fè l' fè sa yo
⁸
 vle, paske li te jenn, li te gen tèt fèb. Li pa t' ka kenbe tèt ak yo. Koulye a, nou fè lide vin kraze otorite Seyè a te mete nan men fanmi David la, tou sa paske nou gen avèk nou yon gwo lame ak
⁹
 tout estati towò bès an lò Jewoboram te fè pou sèvi nou bondye a. Nou mete prèt Seyè yo, pitit Arawon yo, deyò ansanm ak moun Levi yo, lèfini nou fè tankou lòt nasyon yo, nou chwazi moun pa nou pou sèvi prèt. Nenpòt moun ki vin jwenn nou ak yon towò bès osinon ak sèt mouton, nou
¹⁰
 fè l' prèt bondye nou yo ki pa bondye. Men nou menm, se Seyè a ki Bondye nou. Nou pa janm vire do ba li. Prèt k'ap sèvi devan Seyè a se fanmi Arawon yo ye. Moun ki reskonsab sèvis yo se
¹¹
 moun Levi yo ye. Chak maten, chak aswè, y'ap ofri bèt yo boule nèt pou Seyè a ansanm ak lansan. Yo mete pen ki apa pou Bondye yo sou yon tab ki nan kondisyon pou sèvis Bondye. Chak aswè, yo limen lanp ki sou gwo lanp sèt branch lan. Nou fè tou sa Seyè a ban nou lòd fè. Men, nou
¹²
 menm moun peyi Izrayèl, nou vire do ba li. Se Bondye menm ki alatèt nou avèk prèt li yo. Yo tou pare pou kònen twonpèt yo pou bay siyal mache pran nou. Se poutèt sa, nou menm moun peyi
¹³
 Izrayèl yo, pa fè lagè ak Seyè a, Bondye zansèt nou yo. Paske se nou k'ap anba. ¶ Jewoboram fè sòlda ki te dèyè yo fè yon detou al pase dèyè lame moun peyi Jida yo. Konsa, pifò sòlda li yo te
¹⁴
 kanpe sou devan lame moun Jida yo, ak yon bon valè sòlda li yo sou dèyè yo. Lè moun peyi Jida yo voye je alawonn, yo wè yo te sènen sou devan ak sou dèyè, yo rele mande Seyè a sekou.
¹⁵
 Prèt yo menm pran kònen twonpèt yo. Moun Jida yo bay yon sèl rèl byen fò, epi yo atake.
¹⁶
 Bondye fè Jewoboram ak tout lame moun Izrayèl yo pèdi devan Abija ak moun Jida yo. Moun
¹⁷
 Izrayèl yo pran kouri pou moun Jida yo, Bondye lage yo nan men moun Jida yo. Abija ak sòlda li yo touye yon pakèt ladan yo. Yo touye senksanmil (500.000) nan pi bon sòlda lame pèp Izrayèl
¹⁸
 la. Se konsa moun peyi Izrayèl yo soti wont nan batay la, men moun peyi Jida yo soti pi fò, paske se sou Seyè a, Bondye zansèt yo a, yo te apiye.
¹⁹
 Abija kouri dèyè Jewoboram, li pran lavil
²⁰
 Betèl, lavil Jesana ak lavil Efwon ansanm ak tout ti bouk ki te sou kont yo. Jewoboram pa janm
²¹
 pran pye ankò pandan tout rèy Abija. Bout pou bout, Seyè a frape l', li mouri. Abija menm te
²²
 vin pi fò toujou, li te gen katòz fanm ki te fè vennde pitit gason ak sèz pitit fi pou li. Tout rès istwa Abija a, tou sa li te fè ak tou sa li te di, nou jwenn yo nan liv istwa pwofèt Ido te ekri a.

Chapter 14

¹ ¶ Lè Abija mouri, yo antere l' lavil David la. Se Asa, pitit gason li, ki moute wa nan plas li. Sou rèy Asa, peyi a viv ak kè poze pandan dizan. ² Asa te fè sa ki byen ak sa ki dwat devan Seyè a, Bondye l' la. ³ Li fè disparèt tout lotèl yo te bati pou bondye lòt nasyon yo ak tout kote yo te konn fè sèvis pou yo. Li fè kraze zidòl yo, li koupe estati Achera yo voye jete. ⁴ Li bay tout moun Jida yo lòd pou yo mache dapre volonte Seyè a, Bondye zansèt yo a, pou yo fè tou sa ki nan lalwa ak nan kòmandman Bondye yo. ⁵ Li fè disparèt tout kote yo te konn fè sèvis pou lòt bondye yo ansanm ak lotèl pou boule lansan pou yo nan dènnye lavil nan peyi Jida a. Se konsa, pandan tout rèy li, peyi a t'ap viv ak kè poze. ⁶ Pandan tout tan sa a, peyi a pa t' nan dezòd, ni li pa t' nan fè lagè ak pesonn, paske Seyè a te ba li chans viv ak kè poze. Wa a pwofite tout tan sa yo, li bati gwo ranpa ⁷ pou pwoteje lavil peyi Jida yo. Li di moun peyi Jida yo: -Annou ranfòse defans lavil yo! Annou bati miray ranpa ak fò pou pwoteje yo ak pòtay solid ak gwo ba pou fèmèn yo. Peyi a nan men nou toujou, paske nou te fè volonte Seyè a, Bondye nou an. Se li menm ki pwoteje nou, li fè nou viv ⁸ byen san kont ak tout vwazen nou yo. Se konsa yo mete men nan travay la jouk yo fini l'. Wa Asa te gen yon gwo lame. Nan lame a te gen twasanmil (300.000) sòlda moun branch fanmi Jida ki te gen plak pwotèj ak frenn, plis desankatreven mil (280.000) sòlda moun branch fanmi Benjamen ⁹ ki te gen plak pwotèj ak banza pou voye flèch. Yo tout te vanyan sòlda. ¶ Yon moun peyi Letiopi yo te rele Zera vin anvayi peyi Jida ak yon lame ki te gen yon milyon sòlda ansanm ak twasan (300) ¹⁰ cha lagè. Yo vanse jouk lavil Marecha. Asa soti ak lame pa l' la al kontre avè l'. De lame yo pran ¹¹ pozisyon nan fon Zefata a, toupre Marecha. Asa lapriyè Seyè a, Bondye li a, li di l' konsa: -Bondye sèl Mèt, kit w'ap ede yon gwo, kit w'ap ede yon piti, pou ou se menm bagay la. Tanpri, vin ede nou koulye a, Seyè, Bondye nou an, paske se sou ou nou konte. Se nan non ou nou vin goumen ak bann moun sa yo. Seyè, se ou menm ki Bondye nou. Fè wè pesonn pa ka kenbe tèt avè ¹² ou! Se konsa, Seyè a fè Asa ak lame peyi Jida a bat lame Letiopi a. Lame Letiopi a kouri met ¹³ deyò. Men Asa ak sòlda li yo kouri dèyè yo jouk lavil Gera. Yo touye sòlda lame Letiopi yo, yo pa kite yonn ladan yo chape. Seyè a te kraze yo tout ak lame li a. Lame a pran yon pakèt bagay ¹⁴ lènmi yo te kite. Lèfini, yo detwi tout ti bouk ki te nan zòn Gera a, paske moun la yo te pè Seyè a anpil. Lame Jida a piye lavil yo. Yo pote anpil anpil bagay ale paske moun sa yo te gen anpil ¹⁵ byen. Yo atake gadò mouton yo anba tant yo. Yo pran yon bon valè mouton ak chamo. Apre sa, yo tounen tounen yo lavil Jerizalèm.

Chapter 15

¹ ¶ Lespri Bondye te desann sou Azarya, pitit Obèd. ² Azarya soti al kontre wa Asa, li di l' konsa: -Koute sa m'ap di nou, ou menm Asa ansanm ak tout moun fanmi Jida ak fanmi Benjamen yo! Seyè a ap kanpe ak nou si nou menm tou nou kanpe avè l'. Si nou chache l', l'ap kite nou jwenn li. Men, si nou vire do ba li, l'ap vire do ban nou tou. ³ Pandan lontan, pèp Izrayèl la t'ap viv san Bondye tout bon an, san prèt pou moutre yo sa pou yo fè, san lalwa Bondye a. ⁴ Men, lè malè tonbe sou yo, yo tounen nan pye Seyè a, Bondye pèp Izrayèl la. Yo chache l', li kite yo jwenn li. ⁵ Nan tan sa yo, pesonn pa t' ka okipe zafè yo ak kè poze, paske te gen gwo dezòd pou tout moun nan tout peyi. ⁶ Nasyon t'ap kraze nasyon, yon lavil t'ap detwi yon lòt lavil, paske Bondye te lage tout kalite malè sou yo. ⁷ Men nou menm, mete gason sou nou! Pa dekouraje, paske n'ap jwenn rekonpans travay nou. ⁸ ¶ Lè Asa tandè mesaj pitit Obèd la te bay nan non Bondye, li pran kouraj. Li fè yo wete dènnye vye zidòl ki te nan peyi moun Jida yo ak nan peyi moun Benjamen yo, ansanm ak tout zidòl ki te nan lavil li te pran nan zòn mòn Efrayim yo. Li repare lotèl Seyè a ki te kanpe nan lakou devan gwo pyès Tanp Seyè a. ⁹ Anpil moun soti toupatou nan peyi Efrayim, nan peyi Manase ak nan peyi Simeyon, yo vin jwenn Asa. Yo t'ap viv nan peyi a sou zòd li, paske yo te wè Seyè a te kanpe la avè l'. Asa reyini yo tout ansanm ak tout moun Jida yo ak moun Benjamen yo. ¹⁰ Yo tout reyini lavil Jerizalèm. Lè sa a, Asa te gen katòzan twa mwa depi li te wa. ¹¹ Jou sa a, yo pran sètisan (700) bèf ak sètmil (7.000) mouton nan tou sa yo te pran nan men lènmi yo, yo touye yo pou Seyè a. ¹² Yo pran angajman pou yo sèvi Seyè a, Bondye zansèt yo a, ak tout kè yo, ak tout nanm yo. ¹³ Yo pwomèt pou yo touye nenpòt moun, kit se fanm kit se gason, kit se granmoun kit se jennmoun, ki pa soti pou sèvi Seyè a. ¹⁴ Yo fè sèman bay Seyè a byen fò y'ap kenbe angajman yo. Yo te kontan, yo t'ap rele, yo t'ap kònen twonpèt ak klewon. ¹⁵ Tout moun peyi Jida yo te kontan, paske yo te fè sèman an ak tout kè yo. San pesonn pa fòse yo, yo te soti pou yo te chache konnen volonte Seyè a. Seyè a menm te kite yo jwenn li. Li fè yo viv ak kè poze ak tout moun nan vwazinaj yo. ¹⁶ Wa Asa menm rive wete Maka, grann li, nan pozisyon yo te ba li tankou manman Larenn nan peyi a, paske Maka te fè yon vye estati pou Achera. Asa kraze estati a an miyèt moso, li fè boule l' nan ravin Sedwon an. ¹⁷ Atout li pa t' rive fè disparèt tout kay zidòl yo, li menm li te toujou sèvi Seyè a ak tout kè li pandan lavi li. ¹⁸ Li pran tou sa papa l' te bay pou sèvis Bondye a, li mete yo

nan Tanp lan ak tout bagay an lò ak an ajan li menm li te bay pou Bondye. ¹⁹ Pat gen lagè menm jouk wa Asa rive sou trannsenkan depi li t'ap gouvènèn.

Chapter 16

¹ ¶ Wa Asa te gen trannsenkan depi li t'ap gouvènèn, lè Bacha, wa peyi Izrayèl la, anvayi peyi Jida. Li pran lavil Rama, li plen l' sòlda pa l' pou anpeche moun Asa yo pase antre soti nan peyi Jida. ² Lè wa Asa wè sa, li pran bagay an lò ak bagay an ajan ki te nan tanp lan ak nan palè a, li renmèt yo nan men kèk moun pa l', li voye yo bò kote Bennadad, wa peyi Siri, ki te rete lavil Damas, ak mesaj sa a: ³ -Annou pase kontra yonn ak lòt, tankou zansèt nou yo te fè l' la. Men mwen voye bagay an lò ak bagay an ajan sa yo fè ou kado. Koulye a, kase kontra ou te pase ak Bacha, wa peyi Izrayèl la. Konsa, l'a blije wete sòlda li yo nan peyi mwen an. ⁴ Wa Bennadad dakò avèk sa wa Asa te di l' la. Li voye chèf lame li yo al atake lavil peyi Izrayèl yo. Yo pran lavil Ijon, lavil Dann, lavil Abèl Mayim ak tout lavil nan pòsyon tè branch fanmi Neftali a ki te sèvi depo. ⁵ Lè Bacha vin konn sa, li wete tout sòlda li te kite nan lavil Rama yo, li sispann travay li t'ap fè pou ranfòse miray lavil la. ⁶ Lè sa a, wa Asa fè rele dènye moun nan peyi Jida pou wete wòch ak bwa wa Bacha te fè anpile pou ranfòse miray ranpa lavil Rama a. Wa Asa sèvi ak materyo sa yo pou ranfòse miray lavil Mispa ak miray lavil Gibeya. ⁷ ¶ Lè sa a, pwofèt Anani vin jwenn Asa, wa peyi Jida a, li di l' konsa: -Se paske ou te pito mete konfyans ou nan lame wa peyi Siri a pase nan Seyè a, Bondye ou la, kifè lame wa peyi Siri a chape anba men ou. ⁸ Eske moun Letiopi yo ak moun Libi yo ansanm pa t' fè yon gwo lame ak anpil cha lagè, anpil kavalye sou chwal? Malgre sa, Seyè a te lage yo nan men ou paske ou te mete konfyans ou nan li. ⁹ Seyè a ap veye tou sa k'ap pase sou latè. Li pa kite anyen chape pou l' ka bay moun ki mete tout konfyans yo nan li fòs ak kouraj. Men fwa sa a, ou resi pèdi tèt ou. Ou aji tankou moun fou. Se poutèt sa moun pral fè ou lagè san rete. ¹⁰ Koze sa a te fè Asa fache anpil sou pwofèt la. Li fè yo fèmen l' nan prizon. Se depi lè sa a Asa konmanse ap maltrete kèk moun nan pèp la. ¹¹ Tou sa wa Asa te fè depi premye jou li moute wa a rive jouk dènye jou a, nou jwenn sa ekri nan liv Istwa wa peyi Jida yo ak wa peyi Izrayèl yo. ¹² Asa te gen trantnevan depi li te wa, lè yon gwo maladi nan pye rann li enfim. Malgre sa, li pa t' al chache gerizon nan men Seyè a. Li te pito al kay dòktè. ¹³ Lè li mouri, li t'ap mache sou karanteyennan depi li te wa. ¹⁴ Yo antere l' nan kavò li te fè fouye pou tèt pa li nan lavil David la. Yo mete kadav

la kouche sou yon payas fèt ak fèy santi bon ak tout kalite bon odè yo te pare jan yo konn fè l' la. Apre sa, yo limen yon gwo boukan pou li.

Chapter 17

¹ ¶ Jozafa, pitit Asa, moute wa nan plas papa l'. Li ranfòse pozisyon l' devan peyi Izrayèl la.

² Li mete sòlda nan tout lavil ki gen ranpa nan peyi Jida a, li mete gouvènè nan tout peyi Jida a ak nan tout lavil Asa, papa l', te pran nan peyi Efrayim lan. ³ Seyè a te kanpe avèk Jozafa, paske li te fè tankou David, granpapa l', nan konmansman rèy li. Li pa t' kouri dèyè Baal yo. ⁴ Li t'ap chache tout jan pou li te sèvi Bondye zansèt li a. Li te mache dapre lòd Bondye bay yo, li pa t' fè tankou wa Izrayèl yo. ⁵ Seyè a bay gouvènman l' lan fòs. Nan peyi Jida a, tout moun t'ap pote kado ba li. Konsa, li te vin gen anpil byen. Tout moun t'ap fè lwanj li. ⁶ Li te pran plezi l' nan fè volonte Seyè a. Li fè disparèt tout kote yo t'ap sèvi zidòl nan peyi Jida a, ansanm ak tout estati Achera yo. ⁷ Li te gen twazan depi li te wa lè li voye kèk chèf nan tout lavil peyi Jida yo pou moutre pèp la sa pou l' fè. Men non chèf yo: Se te Bennayil, Obadya, Zekaraya, Netaneyèl ak Mikaya. ⁸ Yo te gen nèf moun Levi ak de prèt ak yo. Moun Levi yo te rele Chemaya, Netanya, Zebadya, Asayèl, Chemiramòt, Jonatan, Adonija, Tobija ak Tobadonija. Prèt yo te rele: Elichama ak Joram. ⁹ Avèk liv lalwa Seyè a nan men yo, yo mache nan tout peyi a, yo ale nan tout lavil yo pou moutre pèp la sa pou li fè.

¹⁰ ¶ Tout gouvènman peyi ki te vwazen ak peyi Jida a te sitèlman pè Seyè a, yo yonn pa chache fè lagè ak wa Jozafa. ¹¹ Lekontrè, te gen anpil moun Filisti ki te pote anpil kado ak anpil ajan ba li tankou si li te chèf yo. Ata moun peyi Arabi yo te pote sètmiil sètisan (7.700) mouton ak sètmiil sètisan (7.700) kabrit fè l' kado. ¹² Se konsa, pouvwa Jozafa a t'ap vin pi fò chak jou. Nan tout peyi Jida a, li bati sitadèl ak lavil pou sèvi l' depo. ¹³ Li te gen pwovizyon an kantite nan tout lavil peyi a. Nan lavil Jerizalèm menm, li te gen anpil vanyan sòlda. ¹⁴ Men kantite ki te genyen dapre branch fanmi yo: Te gen Adna, kòmandan tout chèf batayon branch fanmi Jida a ak twasanmil (300.000) sòlda sou zòd li. ¹⁵ Li te gen avè l' Jokanan avèk desankatrevenmil (280.000) sòlda sou zòd li.

¹⁶ Avè l' toujou te gen Amasya, pitit Zikri a, ak desanmil (200.000) sòlda. Amasya sa a te pote tèt li limenm, san pesonn pa t' mande l' pou sèvi Seyè a. ¹⁷ Alatèt moun branch fanmi Benjamen yo

te gen Elyada, yon vanyan sòlda, ak desanmil (200.000) sòlda ki te gen plak pwotèj ak banza.
¹⁸ Avè l' te gen Jeozabad avèk sankatrevenmil (180.000) sòlda byen ame pou lagè. ¹⁹ Se moun sa yo ki t'ap sèvi wa a lavil Jerizalèm, san konte lòt sòlda wa a te mete an ganizon nan lòt lavil ak ranpa nan peyi Jida a.

Chapter 18

¹ ¶ Jozafa te vin gen anpil richès, tout moun t'ap fè lwanj pou li. Li ranje yon maryaj ant yon moun nan fanmi l' ak yon moun nan fanmi Akab, wa peyi Izrayèl la. ² Kèk lanne apre sa, Jozafa al rann Akab yon vizit lavil Samari. Lè sa a, Akab fè yon gwo fèt pou Jozafa ansanm ak moun ki te avè l' yo. Li te fè touye yon pakèt mouton ak bèf pou fèt la. Lèfini, li chache pran tèt Jozafa pou yo al atake lavil Ramòt nan peyi Galarad. ³ Akab, wa peyi Izrayèl la, di Jozafa, wa peyi Jida a: -Eske w'ap vin avè m' pou atake lavil Ramòt nan peyi Galarad la? Jozafa reponn li: -Mwen menm ak tout sòlda mwen yo, nou avè ou ansanm ak pèp ou a. Se yonn nou ye! ⁴ ¶ Apre sa, Jozafa di Akab, wa peyi Izrayèl la: -Tanpri, annou mande Seyè a sa li di nan sa. ⁵ Se konsa, Akab reyini katsan (400) pwofèt li yo, li mande yo: -Eske se pou m' al atake lavil Ramòt nan peyi Galarad la, osinon èske se pou m' kite sa? Pwofèt yo reponn li: -Atake l', monwa! Seyè a ap lage l' nan men ou! ⁶ Lè sa a, Jozafa di konsa: -Pa gen lòt pwofèt nou ta ka mande si se volonte Seyè a pou n' al fè sa? ⁷ Akab reponn: -Gen yon lòt pwofèt ankò ki ta ka fè sa pou nou. Se Miche, pitit gason Jimla a. Men, m' rayi l', paske li pa janm di anyen ki bon pou mwen. Li toujou wè malè pou mwen. Jozafa reponn: -Pa di sa, monchè! ⁸ Se konsa Akab rele yonn nan nèg konfyans li yo, li di l': -Prese al chache Miche, pitit gason Jimla a, pou mwen. ⁹ Wa peyi Izrayèl la ak Jozafa, wa peyi Jida a, te chita yo chak sou fotèy pa yo ak bèl rad wa yo sou yo, sou gwo glasi ki bò pòtay lavil Samari a sou deyò. Tout pwofèt yo te la devan yo ap bay mesaj pa yo. ¹⁰ Yonn ladan yo te rele Sedesyas. Se te pitit Kenana. Li fè fè de kòn an fè. Li di: -Men sa Seyè a di: Avèk kòn sa yo ou pral atake moun Siri yo. Ou pral fini ak yo. ¹¹ Tout lòt pwofèt yo t'ap bay menm mesaj la tou. Yo t'ap di: -Ou mèt al atake Ramòt nan peyi Galarad. W'ap bon. Seyè a ap lage lavil la nan men ou. ¹² Mesaje ki te pati al rele Miche a di Miche konsa: -Tout lòt pwofèt yo te pale an favè wa a. Ranje kò ou pou ou pale tankou yo tout. Pale an favè wa a. ¹³ Men, Miche reponn li: -Mwen pran Seyè a, Bondye vivan an, sèvi m' temwen. Sa Seyè a va di m' di se sa m'a di. ¹⁴ Lè Miche rive devan wa a, wa a di l' konsa: -Miche, èske se pou m' al atake lavil Ramòt nan peyi Galarad, osinon èske se pou n' kite

sa? Miche reponn: -Ou mèt al atake Ramòt nan peyi Galarad. W'ap bon. Seyè a ap lage lavil la nan men ou. ¹⁵ Men, Akab di li: -Konbe fwa pou m' di ou lè w'ap pale avè m' nan non Seyè a, se pou ou di m' laverite? ¹⁶ Lè sa a, Miche reponn li: -Mwen te wè tout sòlda pèp Izrayèl yo gaye toupatou sou mòn yo, tankou yon bann mouton san gadò. Seyè a te di: Moun sa yo san chèf. Kite yo tounen lakay yo ak kè poze. ¹⁷ Akab, wa peyi Izrayèl la, di Jozafa: -Mwen pa t' di ou li pa janm di anyen ki bon pou mwen. Li toujou wè malè pou mwen. ¹⁸ Miche pran lapawòl ankò, li di: -Bon! Koute mesaj Seyè a. Mwen te wè Seyè a chita sou fotèy li nan syèl la, avèk tout zanj li yo kanpe bò kote l', sou bò dwat ak sou bò gòch li. ¹⁹ Seyè a t'ap mande ki moun ki vle al pran tèt Akab pou li al fè yo touye l' lavil Ramòt. Gen zanj ki di yon bagay, gen lòt zanj ki di yon lòt bagay. ²⁰ Se lè sa a, yon lespri vanse devan Seyè a, li di: Mwen pral pran tet li. ²¹ Seyè a mande l': Ki jan? Lespri a reponn: Mwen pral mete pawòl manti nan bouch pwofèt Akab yo. Seyè a di l': W'a pran tèt li vre konsa. ²² Ou mèt al fè jan ou di a. Koulye a, ou konnen Seyè a te mete yon lespri mantò sou pwofèt ou yo pou yo ba ou manti, paske li pran desizyon pou l' fini avè ou. ²³ Lè sa a, Sedesyas, pitit gason Kenana a, mache sou Miche, li flanke li yon souflèt. Epi li di l': -Depi kilè lespri Bondye a kite m' pou se nan bouch ou l'ap pale a? ²⁴ Miche reponn li: -W'a konn sa lè w'a kouri pase sot nan yon chanm antre nan yon lòt pou al kache jouk nan fon. ²⁵ Se konsa wa Akab pase yon lòd, li di: -Arete Miche. Mennen l' bay Amon, gouvènè lavil la, ak Joas, pitit wa a. ²⁶ Di yo mwen bay lòd pou yo mete l' nan prizon, pou yo ba li renk pen ak dlo jouk m'a tounen soti nan lagè a san danje ak malè. ²⁷ Lè sa a, Miche di: -Si ou tounen soti nan lagè a san danje ni malè vre, w'a konnen Seyè a pa t' pale nan bouch mwen. Lèfini, li di: -Nou tout pèp yo, koute sa m' di la a wi. ²⁸ ¶ Se konsa Akab, wa peyi Izrayèl la, ansanm ak Jozafa, wa peyi Jida a, moute al atake lavil Ramòt nan peyi Galarad. ²⁹ Akab di Jozafa konsa: -Mwen pral mete yon lòt rad sou mwen anvan m al goumen an, pou moun pa rekonèt mwen. Ou men, ou mèt mete rad wa ou sou ou. Se konsa wa peyi Izrayèl la chanje rad sou li pou moun pa rekonèt li. Apre sa, li al goumen. ³⁰ Men, wa peyi Siri a te bay trannde chèf ki t'ap kòmande cha lagè yo lòd pou yo pa atake pesonn pase wa peyi Izrayèl la. ³¹ Se konsa, lè kòmandan cha lagè yo wè Jozafa, yo tout te konprann se li ki te wa peyi Izrayèl la. Yo vire sou li pou yo atake l'. Men, Jozafa rele anmwe. Bondye sèl mèt la vin pote l' sekou, li fè yo vire kite l'. ³² Lè mesye yo wè se pa li menm ki te wa peyi Izrayèl la, yo rete sou sa yo te vle fè a. ³³ Lè sa a, yon sòlda peyi Siri rete konsa li voye yon flèch. Flèch la al pran Akab, wa Izrayèl la, nan fant rad lagè ki te sou li a. Wa a di sòlda ki t'ap mennen cha li a: -Kase tèt tounen. Annou kite batay la,

34
 paske mwen blese grav. Jou sa a, batay la te makònen anpil. Wa Akab menm te rete kanpe sou cha li a, l'ap gade moun peyi Siri yo jouk aswè. Lè solèy kouche li mouri.

Chapter 19

1 ¶ Jozafa li menm, wa peyi Jida a, tounen lakay li lavil Jerizalèm san anyen pa rive l'. 2 Yon pwofèt yo te rele Jeou, pitit gason Anani an, vin kontre wa a, li di l' konsa: -Ki jan ou fè al ede moun k'ap fè mal? Ki jan ou rive fè zanmi ak moun ki pa vle wè Seyè a? Se poutèt sa, Seyè a fache sou ou anpil. 3 Men malgre sa, ou fè kèk bagay ki bon. Ou te kraze tout pòtre Achera, bondye fanm, ki te nan peyi a. Lèfini ou te chache fè volonte Bondye. 4 Jozafa te rete lavil Jerizalèm. Men, li pran vizite pèp la nan tout peyi a ankò, depi lavil Bècheba nan sid, rive jouk nan mòn Efrayim yo nan nò, pou l' te fè pèp la tounen vin jwenn Seyè a, Bondye zansèt yo a. 5 ¶ Li mete jij nan chak lavil ak ranpa peyi Jida a, yonn apre lòt. 6 Li di jij yo: -Kalkile byen travay nou pral fè a, paske nou pa pral jije nan non yon moun, men nan non Seyè a. L'ap kanpe la bò kote nou lè n'ap rann jijman. 7 Se pou nou gen krentif pou Seyè a. Veye zo nou nan tou sa n'ap fè, paske Seyè a, Bondye nou an, pa tolere lenjistis ak patipri. Li pa nan pran kado nan men moun pou fè pa yo. 8 Nan lavil Jerizalèm menm, Jozafa chwazi kèk moun Levi, prèt ak chèf fanmi, li mete pou jije tout ka ki an rapò ak lalwa Bondye a, tout pwose moun lavil Jerizalèm yo ka gen yonn ak lòt. 9 Li ba yo lòd, li di yo: -Se pou nou fè travay nou ak krentif pou Bondye. Se pou nou swiv lòd li nan tou sa n'ap fè. 10 Chak fwa frè nou yo ki rete nan lòt lavil yo vin pote yon ka devan nou, kit se pou yon moun yo touye, kit se pou yon lwa, yon lòd, yon regleman osinon yon prensip yo dezobeyi, se pou nou pale ak yo pou yo pa fè anyen ki mal devan Seyè a. Si nou pa fè sa, Seyè a ap move ni sou nou ni sou moun nou yo. Si nou fè sa nou dwe fè, nou p'ap koupab nou menm. 11 Amarya, granprèt la, va pi gwo jij pou tout ka ki an rapò ak lalwa Bondye a. Zebadya, pitit Izmayèl la, chèf branch fanmi Jida a, va pi gwo jij pou tou sa ki an rapò ak lalwa peyi a. Se va reskonsablite moun Levi yo pou yo fè respekte tout desizyon n'a pran. Mete gason sou nou. Fe travay nou. Se pou Seyè a toujou kanpe la ak moun ki mache dwat yo.

Chapter 20

¹ ¶ Kèk tan apre sa, moun peyi Moab yo ak moun peyi Amon yo mete ansanm ak moun Mawon
yo, yo vin atake Jozafa. ² Yo vin bay Jozafa nouvèl la, yo di l' konsa: -Men yon gwo lame soti nan
peyi Edon lòt bò Lanmè Mouri a vin atake ou. Yo gen tan pran lavil Azason Tama. Azason Tama,
se yon lòt non yo te bay lavil Angedi. ³ Yon sèl laperèz pran Jozafa. Li pran desizyon mande Seyè
a sa pou l' fè. Li bay lòd pou tout moun nan peyi a fè jèn. ⁴ Moun soti toupatou nan lavil peyi Jida
yo vin lapriyè nan pye Seyè a. ⁵ Jozafa rete kanpe nan mitan tout pèp peyi Jida a, ansanm ak pèp
lavil Jerizalèm lan, devan lakou nèf Tanp Seyè a. ⁶ Li lapriyè byen fò, li di: -Seyè, Bondye zansèt
nou yo, se ou menm ki Bondye nan syèl la. Se ou menm k'ap gouvènen tout nasyon sou latè a. Se
nan men ou tout fòs ak tout pouvwa ye. Pesonn pa ka kenbe tèt avè ou. ⁷ Ou se Bondye nou. Se
ou menm ki te mete tout moun ki te rete nan peyi sa a deyò fè plas pou pèp Izrayèl la. Lèfini, ou
bay tout pitit Abraram, zanmi ou lan, peyi a pou l' rele yo pa yo pou tout tan. ⁸ Se isit la yo rete,
yo bati yon tanp pou ou. Yo te di ⁹ nenpòt malè ki ta ka tonbe sou yo pou pini yo: te mèt lagè, te
mèt chatiman, te mèt move maladi osinon grangou, y'ap vin kanpe devan ou, devan Tanp sa a,
paske se nan Tanp sa a ou ye. Nan tout mizè yo, y'a lapriyè nan pye ou. W'a tande yo, w'a delivre
yo. ¹⁰ Koulye a, men moun peyi Amon yo, moun peyi Moab yo ak moun peyi Edon yo vin atake
nou. Lè zansèt nou yo t'ap soti kite peyi Lejip, ou pa t' kite yo antre nan peyi moun sa yo. Se konsa
yo te chankre pou yo pa t' pase lakay yo, yo pa detwi yo. ¹¹ Gade ki jan y'ap fè nou peye sa jòdi
a! Men y'ap vin mete nou deyò nan peyi ou te ban nou an! ¹² Ou se Bondye nou. Se ou menm ki
pou pini yo paske nou pa gen fòs pou n' kanpe devan tout gwo lame sa a k'ap vin atake nou an. Nou
pa konn sa pou nou fè! N'ap tann sa ou pral fè pou nou. ¹³ Tout mesye peyi Jida yo te kanpe la
devan kay Seyè a, ansanm ak madanm yo, pitit yo ak pitit pitit yo. ¹⁴ ¶ Lespri Seyè a desann sou
yon moun Levi ki te la nan mitan yo. Li te rele Jaziyèl. Se te yon moun nan branch fanmi Zakari.
¹⁵ Zakari sa a te pitit Benaja ki te pitit Jeyèl. Jeyèl te pitit Matanya ki te pitit Asaf. Jaziyèl di konsa:
-Louvri zòrèy nou, nou tout moun peyi Jida, moun lavil Jerizalèm ansanm ak ou menm, wa Jozafa.
Seyè a voye di nou: Pa dekouraje. Nou pa bezwen pè devan gwo lame sa a. Batay sa a se pa batay
¹⁶ pa nou, se batay Bondye menm. Denmen, nou mèt desann al atake yo. Yo pral pase moute sou
ti bit flè yo. N'a kontre ak yo nan pwent ravin ki mennen nan dezè bò Jewouyèl la. ¹⁷ Nou p'ap
bezwen nan goumen menm. N'ap annik pran pozisyon nou. Apre sa, tann. N'ap wè Seyè a ap ban
nou gany. Wi, nou menm moun peyi Jida ak moun lavil Jerizalèm, nou pa bezwen pè, nou pa
¹⁸ bezwen gen kè kase. Denmen, mache pran yo, paske Seyè a ap kanpe la avèk nou. Lè sa a, wa

Jozafa mete ajenou, li bese tèt li byen ba devan Seyè a jouk fwon li rive atè. Tout moun peyi Jida
19

yo ak moun lavil Jerizalèm yo bese tèt yo byen ba devan Seyè a tou pou adore l'. Moun Levi
branch fanmi Keyat yo ansanm ak moun Levi branch fanmi Kore yo leve kanpe, yo pran fè lwanj

20
Seyè a, Bondye pèp Izrayèl la, byen fò. ¶ Nan denmen maten, byen bonè, pèp la leve, li pati pou
dezè Tekoa a. Le yo tapral leve lamach, Jozafa pale ak yo, li di konsa: -Nou menm moun peyi Jida
ak moun lavil Jerizalèm, koute sa m'ap di nou! Mete konfyans nou nan Seyè a, Bondye nou an!

21
Nou p'ap vole gadjè. Se pou nou kwè sa pwofèt li yo di nou an. N'ap genyen batay la. Apre sa,
li fè yon pale ak pèp la. Li fè kèk mizisyen pran mache devan sòlda yo ak rad yo konn mete lè gen
gwo fèt seremoni. Yo t'ap mache devan sòlda yo, yo t'ap chante: -Lwanj pou Seyè a! Li p'ap janm

22
sispann renmen nou! Lè yo tanmen chante ak kè kontan pou fè lwanj Seyè a, Seyè a lage yon
sèl bouyay nan mitan moun Amon yo, moun Moab yo ak moun mòn Seyi yo ki te vin atake peyi

23
Jida a, yo pèdi batay la. Moun peyi Amon yo ak moun peyi Moab yo atake lame moun mòn
Seyi yo, yo detwi yo nèt. Lèfini, yo vire yonn sou lòt nan yon chen manje chen, yonn touye lòt.

24
Lè moun peyi Jida yo rive sou tèt yon ti bit kote yo ka wè tout dezè a, yo voye je yo gade kote

25
lènmi yo ye a, yo wè yo tout te kouche mouri atè a. Pat gen yon moun ki te chape. Jozafa ansanm
ak lame li a desann al piye tou sa lènmi yo te kite. yo jwenn kantite bèt, pwovizyon, rad ak anpil
lòt bagay ki te gen valè. Yo pase twa jou ap ranmase. Men te gen sitelman, yo pa t' ka pran tout

26
pote ale. Sou katriyèm jou a, yo sanble nan fon benediksyon an pou fè lwanj Seyè a pou tou sa

27
li te fè pou yo. Se poutèt sa yo rele fon an Beraka, non ki rete pou li jouk jounen jòdi a. Lèfini,
tout moun peyi Jida yo ak moun lavil Jerizalèm yo ak wa Jozafa alatèt yo tounen lavil Jerizalèm

28
ak gwo kè kontan, paske se Seyè a menm ki te ba yo okazyon fè fèt sou do lènmi yo. Lè yo rive

29
lavil Jerizalèm, yo ale nan Tanp Seyè a, pandan yo t'ap jwe gita, bandjo ak twonpèt. Lè moun

30
lòt nasyon yo vin konnen jan Seyè a te kraze lènmi peyi Jida yo, yo tout te soti pè anpil. Se
konsa rèy Jozafa a pase dous, san bri san kont. Bondye te fè tout peyi ki te nan vwazinaj yo viv

31
byen avè l'. ¶ Lè Jozafa moute sou fotèy wa peyi Jida a, li te gen transsenkan sou tèt li. Li pase

32
vennsenkan ap gouvènen lavil Jerizalèm. Manman l' te rele Azouba. Se te pitit fi Chilki. Jozafa

33
te swiv Asa, papa l', pye pou pye nan tou sa li te fè. Li te fè sa ki dwat devan Seyè a. Tansèlman,
tanp zidòl yo te la toujou nan peyi a, kifè pèp la pa t'ap sèvi Bondye zansèt yo a ak tout kè yo.

34
Tou sa Jozafa te fè depi premye jou li te moute wa a rive jouk dènnye jou a, n'a jwenn sa ekri nan

35
liv Istwa Jeou, pitit Anani an, ki yon pòsyon nan liv Istwa Wa peyi Izrayèl yo. Yon lè, Jozafa,
wa peyi Jida a, te pase kontra ak Okozyas, wa peyi Izrayèl la, ki te fè anpil bagay ki te mal devan

Seyè a. ³⁶ Yo mete ansanm, yo fè fè anpil gwo batiman nan pò lavil Ezyongebè pou al fè trafik sou lanmè jouk nan peyi Tasis. ³⁷ Men Elyezè, pitit gason Dodava a, moun lavil Marecha, te avèti Jozafa. Li te di l': -Paske ou te mete tèt ou ak Okozyas, Seyè a pral kraze sa ou te bati a. Batiman yo kraze, yo pa janm rive vwayaje pou peyi Tasis.

Chapter 21

¹ ¶ Jozafa mouri, yo antere l' nan tonm wa yo, nan lavil David la. Se pitit li, Joram, ki moute sou fotèy la nan plas li. ² Joram, pitit Jozafa, wa peyi Jida a, te gen sis frè: Azarya, Jeyèl, Zakari, Azaryawou, Mikayèk ak Chefatyawou. ³ Papa yo te ba yo chak yon kantite lò, ajan, ak tout kalite lòt bagay ki gen valè. Li mete yo chèf nan gwo lavil ki gen miray ranpa nan peyi Jida a. Men li te mete Joram wa nan plas li, paske Joram te premye pitit gason l'. ⁴ Lè Joram moute wa nan plas papa l', li chita otorite l' byen chita nan peyi a. Lèfini, li fè touye tout frè l' yo ansanm ak kèk gwo chèf pèp Izrayèl la. ⁵ Joram te gen tranndezan lè li moute wa. Li gouvènen lavil Jerizalèm pandan witan. ⁶ Li fè tankou wa Akab ak lòt wa peyi Izrayèl yo te fè. Li te marye ak yon pitit fi Akab, li fè sa ki mal nan je Seyè a. ⁷ Men Seyè a pa t' vle detwi fanmi David la, paske li te pase kontra ak David. Li te pwomèt David li t'ap toujou gen yon moun nan ras li pou gouvènen peyi a devan Seyè a. ⁸ Sou rèy wa Joram, moun peyi Edon yo pran lèzam kont moun peyi Jida yo. Yo pran libète granmoun yo, yo nonmen yon wa pou gouvènen yo. ⁹ Se konsa Joram soti ak tout chèf li yo ak tout cha lagè li yo, li mache sou yo. Lame moun Edon yo sènen l'. Pandan lannwit, Joram ak chèf cha lagè li yo leve, yo atake moun Edon yo, yo pase soti nan mitan yo, yo chape kò yo. ¹⁰ Se depi lè sa a, peyi Edon soti anba otorite peyi Jida a. Yo granmoun lakay yo. Se menm lè sa a tou, moun lavil Libna yo soti anba otorite peyi Jida a, paske Joram te vire do bay Seyè a, Bondye zansèt yo a. ¹¹ Li te menm rive fè bati tanp pou sèvi zidòl nan mòn peyi Jida yo. Li lakòz moun lavil Jerizalèm yo vire do bay Bondye. Li fè peyi Jida a pèdi wout li. ¹² ¶ Se konsa Joram resevwa yon lèt pwofèt Eli te voye ba li. Nan lèt la pwofèt la di: -Men sa Seyè a, Bondye David, zansèt w'a a, voye di ou: ¹³ Ou pa swiv egzanp Jozafa, papa ou, ni egzanp Asa, granpapa ou. Ou te pito swiv egzanp wa peyi Izrayèl yo. Ou lakòz peyi Jida a ak tout moun lavil Jerizalèm yo vire do bay Bondye tankou moun fanmi Akab yo te fè l' la. Ou menm rive touye frè ou yo, pwòp pitit papa ou yo, ki te pi bon pase ou. ¹⁴ Se poutèt sa, Seyè a pral voye yon gwo malè sou pèp la, sou pitit ou yo, sou madanm

¹⁵ ou yo ak sou tou sa ou genyen. Ou menm pou tèt pa ou, ou pral malad anpil. Ou pral gen yon
¹⁶ sèl maladi vant ki pral fè ou soufri jouk trip ou va soti. Lè sa a, te gen kèk moun Filisti ak moun
¹⁷ Arabi ki t'ap viv toupre ak moun Letiopi yo. Seyè a fè yo vin atake Joram. Yo anvayi peyi Jida,
yo piye palè wa a, yo fè tout madanm li yo prizonye ansanm ak tout pitit gason l' yo. Sèl pitit gason
¹⁸ yo te kite pou li se te Joakaz, ti dènye a. Apre sa, Seyè a voye yon sèl maladi vant sou li ki pa
¹⁹ t' ka geri. Pandan dezan maladi a t'ap minen l', trip li yo soti, li t'ap soufri anpil lè li mouri. Pèp
²⁰ la pa t' limen boukan pou li jan yo te fè l' pou zansèt li yo. Joram te gen tranndezan lè li moute
wa, li gouvènèn lavil Jerizalèm pandan witan. Pesonn pa t' pran lapenn pou li lè li mouri. Yo antere
l' nan lavil David la, men yo pa mete l' nan tonm wa yo.

Chapter 22

¹ ¶ Yon bann arab te anvayi kan lame a, yo te touye tout gran pitit gason Joram yo. Sèl Okozyas,
² dènye pitit gason l' lan, te rete. Se konsa pèp Jerizalèm lan fè Okozyas wa nan plas papa l'. Okozyas
te gen venndezan lè li moute wa. Li gouvènèn lavil Jerizalèm pandan yon sèl lanne. Manman l' te
³ rele Atali, pitit fi Akab, pitit pitit fi Omri. Okozyas tou te mache pye pou pye dèyè moun fanmi
⁴ Akab yo, paske manman l' t'ap ba li move konsèy. Li fè sa ki mal nan je Seyè a paske, apre lanmò
⁵ papa l', se lòt moun fanmi Akab yo ki vin sèvi tankou konseye wa a. Se sa ki pèdi l' nèt. Li koute
konsèy yo, li mete tèt ansanm ak Joram, pitit pitit Akab, wa peyi Izrayèl la, pou al atake Azayèl,
wa peyi Siri a. Lame yo kontre yonn ak lòt lavil Ramòt nan peyi Galarad. Moun Siri yo blese Joram.
⁶ Joram tounen lavil Jizreyèl pou l' te refè anba blese li te pran nan batay li t'ap mennen kont Azayèl,
wa peyi Siri a, lavil Ramòt. Lè sa a, Okozyas moute lavil Jizreyèl pou l' vizite Joram, pitit pitit
⁷ Akab, paske Joram te malad. Se Bondye ki te fè Okozyas al rann Joram vizit sa a pou l' te ka
kraze l'. Rive Okozyas rive, li pati ansanm ak Joram al kontre Jeou, pitit gason Nimchi a, yon moun
⁸ Bondye te chwazi pou disparèt tout fanmi Akab la. Se konsa, pandan Jeou t'ap regle ak fanmi
Akab la, li kontre kèk chèf peyi Jida ak ti fanmi wa Okozyas yo ki t'ap sèvi nan lame Okozyas la.
⁹ Li touye tout. Apre sa, li mande pou yo chache Okozyas ki te kache nan peyi Samari a. Yo jwenn
li, yo mennen l' bay Jeou ki fè yo touye l'. Apre sa, yo antere kadav li, paske yo t'ap di se pitit pitit
Jozafa ki te fè sa l' kapab pou l' sèvi Seyè a. Se konsa pa t' rete pesonn nan fanmi Okozyas la ki te
¹⁰ ka pran pouvwa a pou gouvènèn. ¶ Lè Atali, manman Okozyas, vin konnen yo te touye pitit li

a, li bay lòd pou yo touye tout rès fanmi wa peyi Jida yo.¹¹ Men, lè yo t'ap touye pitit wa yo, Jozabèt, pitit fi wa Joram lan, pran Joas, pitit gason Okozyas la, li sere l'. Li kache l' ansanm ak moun ki te sèvi l' nouris la nan yon chanm kote moun dòmi nan Tanp lan. Se konsa, Jozabèt, pitit fi wa Joram lan, sè menm papa ak Okozyas, epi ki te madanm Jeojada, prèt la, te sere Joas san Atali pa konn sa, kifè li pa t' mouri tou.¹² Pandan sizan Joas te rete kache nan Tanp lan ansanm ak moun ki te sèvi l' nouris la. Atali menm t'ap gouvènen peyi a.

Chapter 23

¹ ¶ Sou setyèm lanne a, Jeojada, prèt la, pran kouraj li ak de men, li deside lè a rive pou l' fè sa pou l' fè a. Li fè rele senk kaptenn nan lame a: Azarya, pitit Jewokam, Ismayèl, pitit Jokanan, Azaryawou, pitit gason Obèd, Maseja, pitit gason Adaja ak Elichafat, pitit Zikri. Li pran yon dizon ak yo.² Mesye sa yo vwayaje ale nan tout lavil peyi Jida yo, yo al chache moun Levi yo ak tout chèf fanmi yo, fè yo moute lavil Jerizalèm.³ Yo tout reyini nan Tanp lan. Yo pase yon kontra ak wa Joas, lèfini Jeojada di yo: -Men pitit gason defen wa nou an. Se li menm ki pral gouvènen koulye a jan Seyè a te pwomèt fanmi David la.⁴ Men sa nou pral fè: Lè prèt yo ak moun Levi yo va vin pran pòs jou repo a, y'a separe fè twa gwoup menm fòs. Yon gwoup va fè pòs nan pòtay Tanp lan.⁵ Yon lòt gwoup va pran pòs bò palè wa a. Rès yo va moute lagad bò pòtay fondasyon an. Tout pèp la va sanble nan gwo lakou Tanp Seyè a.⁶ Pa kite pesonn antre anndan Tanp lan, esepite prèt ak moun Levi ki nan sèvis yo. Yo menm yo gen dwa antre, paske yo mete yo apa pou Bondye. Tout rès pèp la va rete deyò pou moute lagad pou Seyè a.⁷ Moun Levi yo va fè yon wonn ak wa a nan mitan yo. Y'a kenbe zam yo nan men yo. Kote wa a va fè, y'a mache avè l' nan pozisyon sa a. Si yon moun ta vle seye antre nan Tanp lan, touye l'.⁸ Moun Levi yo ak tout moun peyi Jida yo fè tou sa Jeojada te ba yo lòd fè a. Jeojada, prèt la, pa t' kite gwoup ki te fin fè sèvis yo jou repo a ale. Konsa, kaptenn lame yo te gen avèk yo ni sa ki t'ap vin pran sèvis, ni sa ki te fin fè sèvis yo.⁹ Jeojada bay kaptenn lame yo frenn ak divès plak pwotèj wa David yo ki te sere nan Tanp Bondye a.¹⁰ Li mete moun ak nepe nan men yo sou tout devan Tanp lan ak devan lotèl la, depi sou bò gòch rive sou bò dwat Tanp lan pou pwoteje wa a.¹¹ Lèfini, li fè Joas, pitit wa a, soti. Li mete kouwòn lan sou tèt li, li pase ti chenn yo nan ponyèt li ak nan janm li. Yo fè l' wa. Jeojada, prèt la, ak pitit li yo vide lwil sou tèt Joas pou mete l' apa pou travay la. Tout pèp la pran rele: -Viv wa a!¹² ¶ Lè Atali tande bri pye pèp la ki t'ap kouri epi ki t'ap bat bravo pou wa a, li prese al nan Tanp

¹³
 kote pèp la te ye a. Li wè wa a te kanpe bò gwo poto a, bò pòtay pou antre nan Tanp lan, chèf yo ak tout mizisyen yo bò kote l'. Tout pèp la te kontan, yo t'ap kònen twonpèt. Sanba yo ak enstriman mizik yo t'ap voye chante. Kè Atali kase, li chire rad sou li, li pran rele: -Men yo moute yon konplo
¹⁴
 sou do m'. Lamenm Jeojada, prèt la, bay kaptenn ki t'ap kòmande lame a lòd, li di yo: -Pase nan mitan de ran sòlda yo avè l', mennen l' deyò. Touye nenpòt moun nou wè ki ta vle swiv li. Prèt la
¹⁵
 te bay lòd pou yo pa touye Atali anndan Tanp Seyè a. Yo pran Atali, yo mennen l' nan palè wa
¹⁶
 a, bò Pòtay Chwal yo. Se la yo touye l'. Lè sa a, Jeojada pase yon kontra ak wa a ansanm ak tout
¹⁷
 pèp la. Dapre kontra a, yo rekonèt se pèp Seyè a yo ye. Lè yo fini, tout pèp la ale nan tanp Baal la, yo demoli l'. Yo kraze tout lotèl yo ak tout estati li yo. Yo touye Matan, prèt Baal la, devan lotèl
¹⁸
 yo. Jeojada mete gad pou fè faksyon devan Tanp Seyè a, anba otorite prèt yo ak moun Levi yo ki te reskonsab travay nan Tanp lan. Chak prèt ak chak moun Levi te gen jou pa yo David te ba yo pou yo te pran sèvis pou boule nèt ofrann pou Seyè a, dapre lalwa Moyiz la. Se yo menm tou ki te
¹⁹
 reskonsab voye chante kè kontan jan David te moutre l' la. Jeojada mete gad an faksyon devan
²⁰
 pòtay Tanp lan pou enpoze moun ki pa nan kondisyon pou fè sèvis Bondye a antre. Apre sa, li pran kaptenn yo, notab yo, otorite yo ak tout rès pèp la, yo soti nan Tanp lan ansanm ak wa a, yo
²¹
 mennen l' ale nan palè a. Yo pase antre nan pòtay Wa a. Lèfini, yo fè wa a chita sou fotèy li. Tout pèp la te kontan anpil. Pat gen yon ti bri nan lavil la depi yo te fin touye Atali ak kout nepe a.

Chapter 24

¹
 ¶ Joas te gen sètan lè li moute wa. Li pase karantan lavil Jerizalèm ap gouvènen peyi a. Manman
²
 l' te yon moun lavil Bècheba ki te rele Zibya. Joas te fè sa ki dwat devan Seyè a toutotan Jeojada,
³
 prèt la, pa t' ankò mouri. Jeojada te marye wa a ak de madanm ki ba li pitit gason ak pitit fi. Kèk
⁴
 tan apre sa, Joas pran desizyon pou l' repare Tanp Seyè a. Li reyini prèt yo ak moun Levi yo, li
⁵
 di yo: -Ale nan tout lavil peyi Jida yo. Ranmase lajan nan men tout pèp la pou repare Tanp lan chak
⁶
 lanne. Souke kò nou, pa mize. Men moun Levi yo pa t' prese. Lè sa a, wa a fè rele Jeojada, granprèt
⁷
 la, li di l' konsa: -Poukisa ou pa rele dèyè moun Levi yo pou yo ranmase nan men moun peyi Jida yo ak moun lavil Jerizalèm yo lajan Moyiz, sèvitè Seyè a, ansanm ak tout pèp Izrayèl la te dakò
 pou yo egzije pèp la bay pou Tanp Randevou a? Atali ki te yon fanm vèmen ansanm ak moun pa
 l' yo te antre fè dega nan Tanp Seyè a. Yo te pran bagay yo te mete apa pou Bondye nan Tanp lan

pou fè sèvis pou Baal li yo. ⁸ Lè sa a wa a bay lòd pou yo fè yon gwo bwat pou yo mete bò pòtay
 Tanp lan, sou deyò. ⁹ Apre sa, li voye fè konnen nan tout lavil Jerizalèm ak nan peyi Jida pou tout
 moun pote bay Seyè a lajan Moyiz, sèvitè Bondye a, te mande pèp Izrayèl la bay lè yo te nan dezè
¹⁰ a. Sa te fè tout chèf yo ak tout pèp la kontan. Yo pote lajan taks la, yo mete l' nan bwat la jouk
¹¹ li rive plen. Chak jou, moun Levi yo te pote bwat la bay chèf wa a te mete reskonsab pou sa. Lè
 yo wè bwat la plen, sekretè wa a ak komisè granprèt la te delege pou sa a wete lajan an. Apre sa,
¹² yo mete bwat vid la nan plas li ankò. Yo te fè sa chak jou. Konsa yo te ranmase anpil lajan. Wa
 a ak Jeojada renmèt lajan an bay moun ki te reskonsab repara Tanp Seyè a. Moun sa yo menm te
 anplwaye mason ak chapant sou kontra pou repara Tanp Seyè a. Yo te anplwaye bòs ki gen ladrès
¹³ pou travay fè ak kwiv pou repara Tanp lan tou. Tout moun ki te reskonsab travay la mete men.
¹⁴ Yo repara Tanp lan, yo mete l' jan l' te ye anvan an, yo fè l' byen solid. Lè yo fini ak travay
 reparasyon an, yo pote rès lò ak rès ajan an renmèt wa a ak Jeojada ki sèvi avèk yo pou fè bagay
 pou Tanp Seyè a, tankou bòl ak veso yo bezwen lè y'ap fè sèvis, lè y'ap boule bèt yo touye pou
 Bondye ak tout kalite veso an lò ak an ajan. Pandan tout tan Jeojada te la a, yo pa te sispann boule
¹⁵ bèt nèt nan dife nan Tanp Seyè a jan pou yo fè l' la. ¶ Men, Jeojada te fin vye granmoun. Li te
¹⁶ gen santrantan lè li mouri. Yo antere l' nan tonm wa yo nan lavil David la, paske li te fè anpil
¹⁷ pou pèp Izrayèl la, pou Bondye ak pou Tanp li a. Mouri Jeojada mouri, chèf peyi Jida yo vin
¹⁸ jwenn wa a, yo bese tèt jouk atè devan li. Wa a koute konsèy yo. Se konsa pèp la sispann sèvi
 Bondye zansèt yo nan Tanp Seyè a, yo tanmen fè sèvis pou estati Achera yo ak pou lòt zidòl. Poutèt
¹⁹ peche sa a, Seyè a fache anpil sou peyi Jida ak sou lavil Jerizalèm. Seyè a voye pwofèt pou fè
²⁰ pèp la tounen vin jwenn li, men pèp la derefize koute sa pwofèt yo t'ap di yo. Lè sa a, lespri
 Bondye desann sou Zakari, pitit gason Jeojada, prèt la. li al kanpe yon kote pou tout pèp la wè l',
 li di yo konsa: -Seyè a, Bondye a mande poukisa nou pa vle swiv kòmandman li yo kifè n'ap rale
²¹ malè sou nou konsa? Nou vire do ba li, l'ap vire do ban nou tou! Men pèp la fè konplo sou do
²² Zakari. Wa a bay lòd pou yo touye l' ak kout wòch nan gran lakou Tanp Seyè a. Joas te bliye
 tout byen Jeojada, papa Zakari, te fè pou li, li fè touye Zakari. Anvan Zakari rann dènnye souf li, li
²³ di byen fò: -Se pou Seyè a wè sa ou fè la a, se pou l' pini ou pou sa! Menm lanne sa a, lè sezon
 prentan rive, lame peyi Siri a atake wa Joas, yo anvayi peyi Jida ak lavil Jerizalèm. Yo touye tout
²⁴ chèf yo, yo piye peyi a, yo voye tou sa yo te pran bay wa lavil Damas la. Lame peyi Siri a pa t'
 anpil, men Seyè a te kite l' kraze yon lame ki te plis pase yo lontan paske pèp Jida a te vire do bay

Seyè a, Bondye zansèt yo a. Se konsa Joas t'ap soufri nan men moun Siri yo pou sa l' te fè a. ²⁵ Lè moun Siri yo wete kò yo, yo kite wa a malad grav. De nan chèf ki t'ap sèvi avè l' yo fè konplo sou do l' pou yo tire revanj lanmò pitit Jeojada, prèt la. Yo touye wa a sou kabann li. Yo antere l' nan lavil David la, men yo pa mete l' nan tonm wa yo. ²⁶ Men non chèf ki te fè konplo a: se te Zabab, pitit gason Chimeya, yon fanm peyi Amon ak Jeozabad, pitit Chimrit, yon fanm peyi Moab. ²⁷ Nan espikasyon yo bay sou liv wa yo, n'a jwenn istwa pitit gason Joas yo, mesaj pwofèt yo te bay sou li, epi yo rakonte ki jan li te rebati Tanp Bondye a. Se Amasya, pitit Joas la, ki moute wa nan plas li.

Chapter 25

¹ ¶ Amasya te gen vennsenkan lè li moute wa. Li gouvènen lavil Jerizalèm pandan ventnevan. Manman l' te rele Jeojadan, moun lavil Jerizalèm. ² Amasya te fè sa ki dwat devan Seyè a, men pa ak tout kè li. ³ Lè Amasya fin chita otorite l', li fè touye chèf lame ki t'ap sèvi avè l' yo epi ki te touye papa l'. ⁴ Men li pa t' manyen pitit ansasen sa yo, paske dapre sa ki ekri nan Liv lalwa Moyiz la, Bondye te bay lòd sa a: Nou pa gen dwa touye yon papa pou krim pitit li fè. Ni nou pa gen dwa touye yon pitit pou krim papa l' te fè. Y'a touye yon moun pou krim li menm li fè. ⁵ Amasya reyini tout gason nan branch fanmi Jida yo ak nan branch fanmi Benjamen yo, li moute yon lame, chak fanmi apa. Li mete yon chèf alatèt chak rejiman mil sòlda ak yon chèf alatèt chak divizyon san sòlda. Li fè konte tout gason ki te gen ventan ak sa ki te gen ventan depase. Li fè kouche yo sou rejis. Li jwenn te gen twasanmil (300.000) sòlda ki te pi bon nan sèvi ak zam, ki te pare pou fè lagè, ki te gen ladrès pou sèvi ak frenn ak gwo plak pwotèj. ⁶ Lèfini, li pran sanmil (100.000) vanyan sòlda nan peyi Izrayèl, li peye yo chak twasan (300) kilo ajan pou yo goumen pou li. ⁷ Men yon pwofèt Bondye vin di li: -Monwa, pa pran sòlda peyi Izrayèl sa yo ak ou nan lame a, paske Seyè a pa avèk moun peyi Izrayèl yo, avèk bann pitit Efrayim sa yo. ⁸ Paske si ou konprann ou ka ranfòse lame ou la avèk moun sa yo pou ou al fè lagè, Bondye ap fè ou bese tèt devan lènmi ou yo, paske se Bondye ki gen pouvwa pou fè ou genyen osinon pou fè ou pèdi batay la. ⁹ Amasya mande pwofèt Bondye a: -Bon, sa k'ap rive twa san kilo ajan sa yo mwen deja bay sòlda peyi Izrayèl yo? ¹⁰ Pwofèt la reponn li: -Seyè a ka renmèt ou plis pase sa! Se konsa Amasya fè sòlda li te fè vini soti nan peyi Efrayim yo mete kò yo sou kote, li voye yo al fè wout yo lakay yo. Men sòlda sa yo ¹¹ te fache anpil sou moun peyi Jida yo poutèt sa. Yo tounen lakay yo byen move. Amasya mete

gason sou li, li mennen lame li a nan Fon Sale a kote li touye dimil (10.000) moun mòn Seyi.

12

Sòlda peyi Jida yo fè dimil (10.000) prizonye met sou sa. Yo pran yo, yo mennen yo sou tèt yon

13

falèz, yo lage yo anba kote yo mouri kraze. Men, sòlda Amasya te voye tounen lakay yo pou yo pa ale nan lagè ansanm avè l' yo, anvayi lavil peyi Jida yo, depi lavil Samari rive lavil Bètowon.

14

Yo touye twamil (3.000) moun, yo pran yon pakèt bagay pote ale. ¶ Lè Amasya t'ap tounen apre li fin kraze moun peyi Edon yo, li pran bondye moun mòn Seyi yo avè l'. Li fè yo tounen bondye

15

pa l', li sèvi yo, li boule lansan pou yo. Seyè a fache kont Amasya. Li voye yon pwofèt pou di l' konsa: -Poukisa koulye a ou pran sèvi bondye yon pèp ki pa t' ka sove pèp sa a anba men ou?

16

Amasya koupe l' lapawòl, li di li: -Depi kilè mwen te nonmen ou konseye wa a? Pe la, si ou pa bezwen m' fè yo wonpi ou! Pwofèt la rete sou sa l' t'ap di a, men li di: -Koulye a mwen konnen Bondye pran desizyon pou l' fini avè ou vre, paske ou fè sa ou fè a, epi ou pa vle koute konsèy

17

mwen. ¶ Men Amasya, wa peyi Jida a, koute konsèy lòt moun, li voye misyon bay Joas, pitit

18

Joakaz, pitit pitit Jeou, wa peyi Izrayèl la, li di l': -Vini non! Ann wè sa ki pi fò! Men, Joas voye reponn li: -Yon jou, yon pye pikan ki te sou mòn Liban an voye yon misyon bay yon pye sèd. Li di l': Bay pitit gason m' lan pitit fi ou la pou l' marye avè l'. Yon bèt bwa pase bò la, li kraze pye

19

pikan an. Amasya, ou di ou kraze moun peyi Edon yo, koulye a, ou kite lògèy vire tèt ou. Men pito ou rete chita lakay ou tandè! Poukisa pou w'ap chache traka bay kò ou epi pou sa pase mal ni

20

pou ou, ni pou peyi Jida a? Men Amasya derefize koute l'. Paske se te volonte Bondye pou l' te

21

lage l' nan men Joas poutèt li te pran sèvi bondye pèp Edon yo. Se konsa Joas soti ak lame li

22

pou l' al goumen ak Amasya bò lavil Bètchemès, nan peyi Jida. Lame Izrayèl la bat lame Jida

23

a byen bat. Tout sòlda peyi Jida yo vole gaye, yo kouri al lakay yo. Joas, wa peyi Izrayèl la, fe Amasya, pitit Joas, pitit pitit Joakaz, wa peyi Jida a, prizonye lavil Bètchemès. Lèfini, li mache sou lavil Jerizalèm. Li kraze miray lavil la sou yon longè ki pran depi nan pòtay Efrayim lan rive jouk

24

bò pòtay Kwen an. Sa te fè antou Li pran dènye bagay an lò ak an ajan li jwenn, tou sa ki te nan Tanp Seyè a sou kont Obèd-Edon, ak tout richès ki te nan palè a, san konte kantite moun li te fè

25

prizonye tankou yon garanti. Apre sa, li tounen tounen l' lavil Samari. Amasya, wa peyi Jida a,

26

te viv kenzan ankò apre lanmò Joas, pitit Joakaz, wa peyi Izrayèl la. Tout rès istwa Amasya a, depi premye jou li te moute wa a rive jouk dènye jou a, tou sa ekri nan liv Istwa Wa peyi Izrayèl

27

yo. Depi lè Amasya te lage pye Seyè a, yo t'ap fè konplo sou do l' lavil Jerizalèm. Bout pou bout, li kouri al kache lavil lakis. Men, yo voye dèyè l' jouk lavil lakis, yo pran l', yo touye l'.

28

Lèfini yo pote kadav li sou chwal lavil Jerizalèm. Yo antere l' nan tonm wa yo nan lavil David
180
la. mèt nan miray la.

Chapter 26

¹ ¶ Tout pèp peyi Jida a pran Ozyas, pitit gason Amasya a, yo fè l' wa nan plas papa l'. Ozyas
te gen sèzan lè sa a. ² Se li menm ki reprann lavil Elat, li fè l' tounen anba otorite wa peyi Jida a
apre lanmò papa l'. ³ Ozyas te gen sèzan lè li moute wa peyi Jida. Li gouvènen nan lavil Jerizalèm
pandan senkanndezan. Manman l' te rele Jekolya. Se te moun lavil Jerizalèm. ⁴ Ozyas te fè sa ki
dwat devan Seyè a menm jan ak Amasya, papa l', te fè l'. ⁵ Pandan toutan Zakari te la pou moutre
l' jan pou l' gen krentif Bondye a li t'ap sèvi Seyè a san mank. Pandan tout tan li t'ap sèvi Seyè a,
Bondye te fè zafè l' mache byen. ⁶ Ozyas leve al goumen ak moun Filisti yo. Li kraze miray ranpa
lavil Gat, lavil Jabne ak lavil Asdòd. Li bati lòt lavil ak miray ranpa nan zòn Asdòd ak nan mitan
peyi Filisti a. ⁷ Bondye ede l' goumen kont moun Filisti yo, kont moun Arabi ki t'ap viv lavil
Goubaal yo, ak kont moun Mawon yo. ⁸ Moun Amon yo te peye lajan taks bay Ozyas. Yo t'ap
nonmen non l' jouk sou fwontyè peyi Lejip, paske li te vin gen anpil pouvwa. ⁹ Ozyas ranfòse
defans lavil Jerizalèm. Li bati gwo fò tou won bò Pòtay Kwen an, bò Pòtay Fon an ak nan yon
kwen miray la. ¹⁰ Li bati gwo fò tou won nan dezè a, li fouye gwo basen pou kenbe dlo paske li
te gen anpil mouton ni nan plenn lan ni sou platon yo. Li te gen moun ap travay pou li nan jaden
li yo, ak moun pou okipe jaden rezen l' yo nan mòn, paske li te renmen travay latè. ¹¹ Ozyas te gen
yon gwo lame toujou pare pou fè lagè. Lame a te separe an gwoup, dapre jan yo te enskri nan rejis
Jeiyèl, sekretè wa a, ak Masyas, grefye a, te kenbe sou kontwòl Ananya, yonn nan gwo chèf wa a.
¹² Te gen demil sisan (2.600) chèf fanmi alatèt vanyan sòlda sa yo. ¹³ Sou zòd yo te gen yon lame
ak twasansètmil senksan (307.500) sòlda toujou pare pou lagè. Yo te grannèg anpil, yo te toujou
pare pou al goumen ak lènmi wa yo. ¹⁴ Ozyas bay tout moun nan lame a plak pwotèj, frenn, kas
pou tèt yo, rad an plak fè, banza ak flèch, ak wòch pou gwo fistibal. ¹⁵ Nan lavil Jerizalèm, li te
gen yon enjenyè ki t'ap fè tout kalite machin pou voye flèch ak gwo wòch. Li fè mete machin sa
yo nan fò won yo ak nan kwen miray ranpa yo. Yo t'ap nonmen non Ozyas byen lwen, paske Bondye
te sitèlman ede l' li te vin gen anpil pouvwa. ¹⁶ ¶ Men, lè li fin chita pouvwa l' byen chita, lògèy

vire tèt li, sa lakòz pye l' chape. Li fè bagay Seyè a, Bondye li a, pa t' ba li dwa fè. Yon jou li antre
 nan Tanp Seyè a pou boule lansan sou lotèl lansan an. ¹⁷ Azarya, prèt la, antre dèyè l' ak katreven
 lòt prèt Seyè a, tout vanyan gason. ¹⁸ Yo vin kanpe devan wa a, yo di l': -Ozyas, ou pa gen dwa
 boule lansan pou Seyè a. Se prèt yo ase, moun fanmi Arawon yo, yo mete apa pou fè sa. Wete kò
 ou kote yo mete apa nèt pou Seyè a. Paske sa w'ap fè a pa bon devan Bondye. Bondye p'ap kontan
 avè ou poutèt sa. ¹⁹ Ozyas te kanpe ak lansanswa a nan men l' pou l' te ofri lansan an. Li move sou
 prèt yo. Lamenn, nan mitan Tanp Seyè a, toupre lansan an, devan tout prèt yo, yon move maladi
 po parèt sou fwon li. ²⁰ Lè granprèt la, Azarya, ak lòt prèt yo gade l', yo wè maladi a parèt sou
 fwon li. Yo mete l' deyò. Li menm, li prese soti paske se Seyè a menm ki te pini l'. ²¹ Wa Ozyas
 rete ak maladi po a sou li jouk li mouri. Li te rete nan yon ti kay apa pou kont li, jan yo fè l' pou
 moun ki gen maladi sa a. Yo enpoze l' mete pye l' nan kay Seyè a. Se Jotam, pitit gason l' lan, ki
 te reskonsab tout bagay nan palè a. Se li menm tou ki te gouvènè pèp la nan peyi a. ²² Pwofèt
 Izayi, pitit Amòz la, te ekri tout rès istwa Ozyas la, depi premye jou li te moute wa a rive jouk
 dènye jou a. ²³ Lè Ozyas mouri, yo antere l' apa nan simityè wa yo. Poutèt vye maladi po li a, yo
 pa t' mete l' nan tonm wa yo. Se Jotam, pitit li a, ki moute wa nan plas li.

Chapter 27

¹ ¶ Jotam te gen vennsenkan lè li moute wa peyi Jida. Li gouvènè nan lavil Jerizalèm pandan
 sèzan. Manman l' te rele Jewoucha. Se te pitit fi Zadòk. ² Jotam te fè sa ki dwat devan Seyè a,
 tankou Ozyas, papa l', te fè. Tansèlman, li pa t' janm mete pwent pye l' nan Tanp lan. Pèp la menm
 te toujou ap fè vye sèvis li yo. ³ Se Jotam ki te bati Pòtay Nò Tanp Seyè a. Li fè anpil travay nan
 miray lavil la nan zòn yo rele Ofèl la. ⁴ Li bati anpil lavil nan mòn peyi Jida a. Li bati gwo fò ak
 fò won nan tout rakbwa yo. ⁵ Li fè lagè ak wa peyi Amon an. Li bat li. Lanne sa a, moun peyi
 Amon yo ba li twamiltwasan (3.300) kilo ajan, senkantmil (50.000) barik ble ak senkantmil barik
 lòj. Pandan dezan apre sa, yo ba li menm kantite a chak lanne. ⁶ Jotam te vin gen anpil pouvwa,
 paske li te mache dwat devan Seyè a, Bondye li a. ⁷ Tout rès istwa Jotam lan, tout lagè li te fè, tou
 sa li te reyalize, nou jwenn sa ekri nan liv Istwa wa peyi Izrayèl ak wa peyi Jida yo. ⁸ Li te gen
 vennsenkan lè li moute wa nan peyi Jida. Li gouvènè nan lavil Jerizalèm pandan sèzan. ⁹ Lè Jotam
 mouri, yo antere l' nan lavil David la. Se Akaz, pitit li, ki moute wa nan plas li.

Chapter 28

¹
 ¶ Akaz te gen ventan lè li moute wa peyi Jida. Li gouvènen nan lavil Jerizalèm pandan sèzan.
 Men, li pa t' fè sa ki dwat devan Seyè a, Bondye li a, tankou David, zansèt li a, te fè l'.² Li te pito
 fè tankou wa peyi Izrayèl yo. Li menm rive fè estati an kwiv pou Baal yo.³ Li fè boule lansan pou
 yo nan Fon Benninon an, li ofri pwòp pitit gason l' yo pou yo boule yo dapre vye prensip krimenèl
 nasyon Seyè a te mete deyò pou fè plas pou moun Izrayèl yo.⁴ Li fè touye bèt, boule lansan nan
 tout tanp zidòl yo, sou ti mòn yo ak anba gwo pyebwa.⁵ Poutèt tout bagay sa yo, Seyè a, Bondye
 Akaz la, lage l' nan men wa peyi Siri a. Moun Siri yo bat li. Yo fè anpil moun peyi a prizonye, yo
 mennen yo lavil Damas. Konsa tou, Seyè a lage l' nan men wa peyi Izrayèl la ki bat li byen bat.
⁶
 ¶ Se konsa, yon sèl jou Peka, pitit Remalya, touye sanvenmil (120.000) sòlda, tout vanyan gason,
 nan peyi Jida a, paske pèp la te vire do bay Seyè a, Bondye zansèt yo a.⁷ Zikri, yon vanyan sòlda
 peyi Efrayim, touye Maseja, pitit wa a, Azrikam, chèf palè a, ak Elkana, chèf ki vin apre wa a.
⁸
 Atout moun peyi Jida yo te fanmi moun peyi Izrayèl yo, moun peyi Izrayèl yo fè desanmil (200.000)
 moun prizonye, fanm ak timoun, yo piye peyi a, yo pran yon pakèt bagay pote ale lavil Samari.
⁹
 Nan lavil Samari te gen yon moun yo te rele Odèd ki te pwofèt Bondye. Li soti al kontre lame
 moun peyi Izrayèl yo ki t'ap rive lavil Samari. Li di yo: -Seyè a, Bondye zansèt nou yo, te fache
 sou moun peyi Jida yo. Se poutèt sa li lage yo nan men nou. Men koulye a, Bondye tande ki jan
¹⁰
 nou menm nou ansasinen yo ak raj. Koulye a menm, nou soti pou nou fè moun peyi Jida ak
 moun lavil Jerizalèm yo tounen esklav pou sèvi nou. Men nou menm poutèt pa nou, lè nou fè sa,
¹¹
 èske nou pa fè sa ki mal tou devan Seyè a, Bondye nou an? Koute sa m'ap di nou: Prizonye sa
¹²
 yo se frè ak sè nou yo ye. Kite yo tounen lakay yo, paske se sou nou Seyè a move koulye a. Lè
 sa a, kat nan gwo chèf moun peyi Efrayim yo: Azarya, pitit Jokanan, Berekyà, pitit Mesilemòt,
¹³
 Ezekya, pitit Chaloum, ak Amasa, pitit Adlayi, leve dèyè moun ki te soti nan lagè yo. Yo di yo:
 -Pa mennen prizonye sa yo isit la! Si nou fè sa n'ap antò devan Seyè a. Nou deja fè kont peche nou
 konsa, Seyè a tou move sou pèp Izrayèl la, pou n'ap vin mete ankò sou sa nou fè ki mal ak sou
¹⁴
 peche nou yo! Se konsa sòlda yo renmèt prizonye yo ak tou sa yo te pran bay chèf yo ak tout
¹⁵
 pèp la. Lè sa a, yo chwazi kat menm mesye sa yo pou yo reskonsab prizonye yo. Yo pran rad
 nan bagay sòlda yo te piye yo, yo mete sou moun ki te toutouni yo, yo biye yo, mete sapat nan pye
 yo, yo ba yo manje, yo ba yo bwè. Yo mete renmèt sou tout kote yo te blese. Yo fè tou sa ki te twò
 fèb yo moute bourik, yo mennen tout prizonye yo tounen lavil Jeriko, lavil Palmis yo, yo renmèt

yo bay fanmi yo. Lèfini, yo tounen tounen yo lavil Samari. ¶ Lè sa a, wa Akaz voye mande wa
 peyi Lasiri a sekou, ¹⁷ paske moun peyi Edon yo te fè yon pase nan peyi a ankò. Yo bat lame peyi
 Jida a, yo fè anpil moun prizonye. ¹⁸ Moun Filisti yo, bò pa yo menm, t'ap piye lavil peyi Jida yo
 ki te nan pye mòn yo ak nan zòn Negèv la. Yo pran pou yo lavil sa yo: Bèchemès, Ajalon, Gedewòt,
 Soko, Timna ak Gimzo ansanm ak tout ti bouk ki te sou zòd lavil sa yo. Yo rete ladan yo. ¹⁹ Seyè
 a te voye tout malè sa yo sou peyi Jida a poutèt Akaz, wa peyi Jida a, ki te pouse pèp la neglije
 Bondye yo a, epi ki poutèt pa l' te vire do bay Bondye nè. ²⁰ Men Tiglat Pilesè, wa peyi Lasiri a,
 vin atake wa Akaz pito. Pase pou l' ede l', li kraze l' pi mal. ²¹ Se konsa, Akaz pran dènye bagay
 ki gen valè nan kay Seyè a, nan palè wa a ak lakay chèf yo, li fè wa peyi Lasiri a kado. Men, sa pa
 t' sèvi l' anyen. ²² Pandan tout tan yo t'ap kraze l' konsa a, nonm yo bay pou wa Akaz la t'ap donner
 pi mal nan pa sèvi Seyè a. ²³ Li t'ap ofri bèt pou yo touye pou bondye moun lavil Damas yo ki te
 bat li. Li t'ap di nan kè l': Bondye wa peyi Siri yo te ede yo. Si mwen fè sèvis pou yo, y'a ede m'
 tou. Men se sèvis bondye sa yo menm ki lakòz malè rive ni li ni pèp Izrayèl la. ²⁴ Akaz pran tout
 veso ki te nan Tanp Bondye a, li kraze yo an miyèt moso. Li kondannen pòt Tanp Seyè a. Li fè fè
 lòt lotèl pou lòt bondye yo toupatou nan lavil Jerizalèm. ²⁵ Li bati tanp nan tout lavil ak ti bouk
 nan peyi Jida pou boule lansan pou lòt bondye yo. Se konsa li fè Seyè a, Bondye zansèt li yo, fache
 anpil sou li. ²⁶ Tout rèz istwa Akaz la ak tou sa li te fè depi premye jou li te moute wa a rive jouk
 dènye jou a, n'a jwenn tou sa ekri nan Liv Istwa wa peyi Jida ak wa peyi Izrayèl yo. ²⁷ Lè li mouri,
 yo antere l' lavil Jerizalèm, men yo pa t' mete l' nan tonm wa Izrayèl yo. Se Ezekyas, pitit li, ki
 moute wa nan plas li.

Chapter 29

¹ ¶ Ezekyas te gen vennsenkan lè li moute wa peyi Jida. Li gouvènen nan lavil Jerizalèm pandan
 ventnevan. Manman l' te rele Abija. Se te pitit fi Zakari. ² Ezekyas te fè sa ki dwat devan Seyè a
 tankou David, zansèt li a, te fè l'. ³ Ezekyas te gen yon mwa depi li te wa, lè li louvri tout pòt nan
 Tanp Seyè a. Li fè repare yo. ⁴ Lèfini, li fè chache tout prèt yo ak moun Levi yo, li reyini yo sou
 lakou ki bay sou bò solèy leve nan Tanp lan. ⁵ Li di yo: -Nou menm fanmi Levi yo, koute sa m'ap
 di nou: mete nou nan kondisyon pou fè sèvis pou Seyè a. Mete Tanp Seyè a, Bondye zansèt nou

yo, nan kondisyon pou yo ka fè sèvis ladan l' pou li. Wete tout vye bagay yo te mete ladan l' kifè
 li pa nan kondisyon pou fè sèvis Bondye a. ⁶ Zansèt nou yo pa t' kenbe pawòl yo ak Bondye. Yo
 te fè sa ki mal devan Seyè a, Bondye nou an, yo vire do ba li. Yo pa t' okipe Tanp kote Seyè a rete
 a ankò. Yo pa gade l' menm! ⁷ Yo kondannen tout pòt nan Tanp lan, yo kite lanp yo mouri, yo
 sispann boule lansan, yo sispann boule bèt nan Tanp lan pou Bondye pèp Izrayèl la. ⁸ Se poutèt sa
 Seyè a te fache anpil sou peyi Jida ak sou lavil Jerizalèm. Tout moun te sezi, tout moun te pè lè yo
 wè sa ki rive yo, tout moun t'ap pase yo nan betiz, tankou nou wè l' nou menm ak pwòp je nou tou.
⁹ Yo touye papa nou yo nan lagè. Yo fè madanm ak pitit nou yo prizonye. ¹⁰ Se konsa mwen pran
 desizyon jòdi a pou m' pase yon kontra ak Seyè a, Bondye pèp Izrayèl la, pou li ka pa janm move
 sou nou ankò. ¹¹ Koulye a, pitit mwen yo, souke kò nou. Se nou menm Seyè a te chwazi pou toujou
 kanpe devan l', pou sèvi l', pou fè travay li, pou boule lansan pou li. ¹² ¶ Men moun Levi ki vin
 pote tèt yo an premye: Nan branch fanmi Keyat la, se te Makat, pitit Amasayi ak Joèl, pitit Azarya.
 Nan branch fanmi Merari a, se te Kich, pitit Abdi ak Azarya, pitit Jealelèl. Nan branch fanmi Gèchon
 an, se te Joak, pitit Zimna ak Edèn, pitit Joak. ¹³ Nan branch fanmi Elizafan an, se te Chimri ak
 Jeiyèl. Nan branch fanmi Asaf la, se te Zekaraja ak Matanya. ¹⁴ Nan branch fanmi Eyman an, se
 te Jeiyèl ak Chimeyi. Nan branch fanmi Jedoutoun lan, se te Chemaja ak Ouziyèl. ¹⁵ Mesye sa yo
 reyini tout fanmi yo, yo fè sèvis pou yo ka nan kondisyon sèvi Bondye. Lèfini, yo antre nan Tanp
 lan pou mete l' nan kondisyon sèvi Bondye, jan wa a te ba yo lòd la, dapre sa ki nan lalwa Seyè a.
¹⁶ Prèt yo antre anndan Tanp lan pou mete l' nan kondisyon pou fè sèvis Bondye. Yo pran tout vye
 bagay yo jwenn ladan l', yo pote yo deyò nan lakou Tanp lan. Moun Levi yo menm ranmase yo
 nan lakou a, yo al jete yo nan ravin Sedwon an. ¹⁷ Yo konmanse travay la premye jou premye mwa
 a. Sou wit jou, yo te rive anndan kote ki apa pou Bondye nan Tanp lan. Yo travay pandan wit jou
 ankò. Sou sèzyèm jou mwa a yo te fini nèt ak travay pou mete Tanp lan nan kondisyon pou l' fè
 sèvis Bondye ankò. ¹⁸ Lè yo fini, moun Levi yo ale lakay wa Ezekyas, yo di l': -Monwa, nou fin
 travay la, nou mete tout kay Seyè a, lotèl pou boule ofrann yo ak tout batri ki mache avè l' yo, tab
 pou pen yo mete apa pou Seyè a ak tout batri pa l' yo tou, nan kondisyon pou fè sèvis Bondye ankò.
¹⁹ Nou pran tout veso wa Akaz te detounen yo pandan tout tan li te vire do bay Bondye a, nou
 repare yo, nou mete yo nan kondisyon pou fè sèvis Bondye ankò. Koulye a, yo tout devan lotèl
 Seyè a. ²⁰ ¶ Nan denmen maten, byen bonè, wa Ezekyas leve, li reyini tout chèf lavil la, li moute
 ak yo nan Tanp Seyè a. ²¹ Yo mennen sèt ti towò, sèt belye mouton, sèt ti mouton, sèt bouk kabrit,
 yo ofri yo pou peye pou sa fanmi wa a ak tout moun pèp Jida yo te fè ki mal ak pou sa moun te fè
 ki mal nan Tanp lan. Wa a mande prèt yo, moun fanmi Arawon yo, pou yo touye bèt yo sou lotèl

²²
 Seyè a. Prèt yo touye towò yo anvan, yo ranmase tout san an nan yon veso, yo al vide l' sou lotèl la. Apre sa, yo touye belye mouton yo, yo al vide san yo sou lotèl la. Apre sa ankò, yo touye ti

²³
 mouton yo, yo al vide san yo sou lotèl la tou. Lè yo fini, yo mennen bouk kabrit yo te ofri pou

²⁴
 peche yo devan wa a ansanm ak lòt moun ki te la yo pou yo mete men yo sou tèt bèt yo. Lè yo fin fè sa, prèt yo touye bouk kabrit yo, yo vide san yo sou lotèl la tankou yon ofrann pou peche yo. Yo ofri yo bay Bondye pou mande padon pou peche tout pèp Izrayèl la, paske wa a te bay lòd pou

²⁵
 yo te boule ofrann lan pou tout pèp Izrayèl la. Wa Ezekyas mete moun Levi nan Tanp Seyè a avèk senbal, bandjo ak gita, dapre regleman David, Gad, pwofèt wa a ansanm ak pwofèt Natan te

²⁶
 bay, paske tout lòd Seyè a vle bay, se nan bouch pwofèt li yo li toujou mete yo. Moun Levi yo

²⁷
 al nan plas yo ak enstriman mizik David yo. Prèt yo te la tou ak twonpèt yo. Ezekyas bay lòd pou yo boule ofrann yo nèt sou lotèl la. Lè yo konmanse seremoni an, pèp la pran chante pou Seyè a, yo t'ap kònen twonpèt anmenmtan yo t'ap jwe lòt enstriman mizik David, wa peyi Izrayèl la.

²⁸
 Tout moun ki te la yo mete ajenou, mizisyen yo t'ap chante, yo t'ap kònen twonpèt pandan tout

²⁹
 seremoni boule a. Lè yo fin boule ofrann yo sou lotèl la, wa a ak tout moun ki te la yo mete

³⁰
 ajenou, yo bese tèt yo jouk atè devan Bondye. Apre sa, wa Ezekyas ak lòt chèf yo mande moun Levi yo pou yo chante pou Seyè a chante David ak pwofèt Asaf te ekri pou fè lwanj Seyè a. Se

³¹
 konsa tout moun t'ap chante ak kè kontan, antan yo te ajenou ak tèt yo bese jouk atè. Lè sa a, Ezekyas di pèp la: -Koulye a nou menm ki mete tèt nou apa pou fè sèvis Seyè a, pwoche non! Pote ofrann nou ansanm ak bèt pou yo touye pou di Bondye mèsi. Se konsa tout pèp la pote bèt pou yo touye ak lòt ofrann pou di Bondye mèsi. Gen ladan yo ki te ofri bèt pou yo boule nèt pou Bondye

³²
 paske yo te vle fè l'. Yo mennen swasanndis towò, san belye mouton ak desan (200) ti mouton

³³
 pou yo te boule nèt pou Seyè a. Konsa tou, yo ofri sisan (600) towò, twamil (3.000) mouton pou

³⁴
 yo touye pou Bondye. Men prèt yo pa t' anpil, yo pa t' ka kòche tout bèt yo te ofri pou boule nèt yo. Se moun Levi yo, moun menm fanmi ak yo, ki te vin ede yo fin fè travay la, jouk lòt prèt yo te fin mete yo nan kondisyon pou fè sèvis Bondye a, paske moun Levi yo te pi prese mete yo nan

³⁵
 kondisyon pou fè sèvis Bondye a pase prèt yo. Lèfini, san konte tout bèt yo te touye pou boule nèt pou Seyè a, prèt yo te gen pou ofri bay Bondye grès lòt bèt yo te touye pou mande Bondye padon ak ofrann diven ki mache ak bèt yo boule nèt pou Seyè a. Se konsa yo konmanse ankò ap

³⁶
 fè sèvis pou Bondye nan Tanp lan. Wa Ezekyas ak tout pèp la te kontan deske Bondye te penmèt yo fè tou sa san pèdi twòp tan.

Chapter 30

¹ ¶ Ezekyas voye envite tout moun peyi Jida ak tout moun peyi Izrayèl yo. Li voye lèt bay branch fanmi Efrayim ak branch fanmi Manase yo. Li voye envite yo pou yo vin nan Tanp Seyè a, lavil Jerizalèm, pou yo fete fèt Delivrans lan pou Seyè a, Bondye pèp Izrayèl la. ² Wa a te diskite koze a ak chèf li yo ansanm ak tout pèp lavil Jerizalèm lan: yo deside pou yo fete fèt Delivrans lan nan dezyèm mwa a. ³ Yo pa t' ka fè l' lè pou yo te fè l' la pou de rezon. Pou konmanse, pa t' ankò gen kont pret ki te nan kondisyon pou fè sèvis Bondye. Lèfini, tout pep la pa t' reyini lavil Jerizalèm. ⁴ Ni wa a, ni pèp la te dakò se te yon bon lide pou yo te fè l' lè sa a. ⁵ Se konsa yo pran desizyon voye envitasyon bay tout pèp Izrayèl la, depi lavil Becheba nan sid jouk lavil Dann nan nò, pou yo vini lavil Jerizalèm fete fèt Delivrans lan pou Seyè a, Bondye pèp Izrayèl la. Paske anvan sa, tout moun yo pa t' konn vini nan fèt la jan Lalwa mande l' la. ⁶ Se konsa yo voye mesaje nan tout peyi Jida a ak nan tout peyi Izrayèl la avèk lèt wa a te siyen ansanm ak chèf li yo. Dapre lòd wa a te bay, men mesaj yo t'ap mache fè konnen: -Nou menm rès pèp Izrayèl la, nou menm ki te chape anba men wa peyi Lasiri yo lè yo te anvayi peyi a, tounen vin jwenn Seyè a, Bondye Abraram, Bondye Izarak ak Bondye Izrayèl la, konsa l'a tounen vin jwenn nou tou. ⁷ Piga nou fè tankou zansèt nou yo ak lòt frè parèy nou yo ki pa t' kenbe pawòl yo ak Seyè a, Bondye yo a. Nou wè jan li te kite yo fini. ⁸ Pa fè tèt di tankou zansèt nou yo, men soumèt nou devan Seyè a. Vin lavil Jerizalèm nan Tanp Seyè a te mete apa pou li pou toutan an. Sevi Seyè a, Bondye nou an, pou Seyè a pa fache sou nou ankò. ⁹ Si nou tounen vin jwenn Seyè a, lènmi ki te fè moun menm fanmi ak nou yo ak pitit nou yo prizonye a va gen pitye pou yo, l'a kite yo tounen nan peyi yo. Paske Seyè a, Bondye nou an, se yon Bondye ki gen bon kè, yon Bondye ki gen pitye pou moun. Si nou tounen vin jwenn li, l'a louvri bra l' ban nou. ¹⁰ Mesaje yo ale toupatou nan peyi moun Efrayim ak moun Manase yo, yo pase nan tout lavil yo, yo rive jouk nan peyi moun Zabylon yo. Men, moun t'ap ri yo, yo t'ap pase yo nan betiz. ¹¹ Tansèlman, te gen kèk moun nan branch fanmi Asè, nan branch fanmi Manase ak nan branch fanmi Zabylon ki rekonèt fòt yo epi ki moute lavil Jerizalèm. ¹² Bondye te manyen kè moun peyi Jida yo tou, yo mete tèt ansanm pou yo fè sa wa a ak lòt chèf yo te mande yo fè, dapre lòd Seyè a te bay. ¹³ ¶ Se konsa, yon pakèt moun sanble lavil Jerizalèm nan dezyèm mwa a, pou yo fete fèt Pen san ledven yo. ¹⁴ Yo pran tout lòt lotèl kote yo te konn boule bèt yo ofri yo ak lotèl kote yo boule lansan ki te lavil Jerizalèm yo, yo al voye yo jete nan Fon Sedwon an. ¹⁵ Nan katòzyèm jou dezyèm mwa a, yo touye ti mouton Delivrans yo. Prèt yo ak moun Levi ki pa t' nan kondisyon pou fè sèvis pou Seyè a vin wont tèt yo, yo fè sa pou yo fè pou yo ka nan kondisyon

pou sèvis Seyè a, lèfini yo antre nan Tanp lan al boule bèt yo ofri nèt pou Seyè a. ¹⁶ Yo al pran plas yo nan Tanp lan dapre regleman ki nan lalwa Moyiz, sèvitè Bondye a. Moun Levi yo bay prèt
¹⁷ yo san bèt yo pou yo vide sou lotèl la. Te gen anpil moun ki pa t' mete tèt yo nan kondisyon pou fè sèvis Bondye a. Kifè yo pa t' kapab touye ti mouton Delivrans pa yo. Konsa, se moun Levi yo
¹⁸ ki te fè l' pou yo, lèfini ki te mete yo apa nèt pou Seyè a. Paske pifò moun ki te soti nan branch fanmi Efrayim, nan branch fanmi Manase, nan branch fanmi Isaka ak nan branch fanmi Zabilon yo pa t' fè sèvis pou mete tèt yo nan kondisyon pou sèvi Bondye. Yo te manje manje Delivrans lan yon jan ki pa konfòm ak sa ki ekri nan liv lalwa a. Men, Ezekyas lapriyè Bondye pou yo, li di: -O
¹⁹ Seyè, Bondye zansèt nou yo, pou jan ou gen bon kè, tanpri padonnen tout moun sa yo ki soti pou sèvi ou ak tout kè yo, menm si yo pa nan kondisyon pou sèvi ou, pou yo manyen sa yo mete
²⁰ apa pou ou yo. Seyè a tande lapriyè Ezekyas te fè a, li padonnen pèp la. ²¹ ¶ Konsa pandan sèt jou, moun pèp Izrayèl ki te sanble lavil Jerizalèm yo fete fèt Pen san ledven yo avèk anpil kè kontan. Chak jou, prèt yo ak moun Levi yo menm t'ap chante fè lwanj Seyè a, yo t'ap jwe enstriman mizik
²² yo byen fò pou Seyè a. Ezekyas t'ap ankouraje tout moun Levi yo pou jan yo t'ap mennen sèvis Seyè a byen. Pandan sèt jou, tout pèp la t'ap manje manje fèt Delivrans lan, yo fè ofrann pou mande
²³ padon, yo t'ap di Seyè a, Bondye zansèt yo a, mèsè. Apre sa, tout pèp la tonbe dakò pou yo pase
²⁴ sèt lòt jou ankò ap fè fèt. Se konsa, yo fete pou sèt lòt jou ankò ak kè kontan. Ezekyas, wa peyi Jida a, te bay mil (1.000) towò bèf ak sèt mil (7.000) mouton pou yo bay pèp la manje. Lòt otorite yo menm bò pa yo te bay mil towò bèf ak dimil mouton. Anpil prèt te mete tèt yo nan kondisyon
²⁵ pou sèvis Seyè a. Tout moun te kontan, depi moun peyi Jida yo, prèt yo, moun Levi yo jouk moun ki te soti nan peyi Izrayèl yo ansanm ak moun lòt nasyon ki te tabli ni nan peyi Jida a ni nan
²⁶ peyi Izrayèl la. Se te gwo fèt nan lavil Jerizalèm, paske depi sou rèy Salomon, pitit David, wa
²⁷ pèp Izrayèl la, pa t' janm gen bagay konsa lavil Jerizalèm. Apre sa, prèt yo ak moun Levi yo kanpe, yo mande benediksyon Bondye pou tout pèp la. Lapriyè yo moute rive jouk nan syèl la, kay Bondye a menm, kote Bondye ki apa nèt la rete a. Bondye tande lapriyè yo.

Chapter 31

¹ ¶ Lè fèt la fini, tout moun pèp Izrayèl ki te la yo ale nan tout lavil peyi Jida yo. Yo kraze moniman wòch yo, yo jete estati zidòl Achera yo, yo demoli dènnye tanp ak lotèl kote yo fè sèvis pou zidòl yo. Yo mache fè sa nan tout peyi Jida a, nan peyi moun Benjamen, moun Efrayim ak
² moun Manase yo. Lèfini, tout moun pèp Izrayèl yo tounen lakay yo nan peyi pa yo. Apre sa,

Ezekyas separe prèt yo ak moun Levi yo an gwoup ankò. Li bay chak gwoup lè pou yo pran sèvis yonn apre lòt. Nan chak gwoup, chak moun te gen travay pa yo pou fè lè y'ap boule bèt nèt pou Seyè a, lè y'ap fè ofrann pou mande Bondye padon, lè y'ap di Bondye mèsi, lè y'ap fè lwanj li, lè y'ap sèvi l' nan papòt Tanp Seyè a. ³ Apre sa, li pran nan bèt ki pou li yo li bay pou yo boule nèt pou Seyè a chak maten, chak aswè, pou ofrann jou repo yo, pou fèt lalin nouvel ak pou lòt gwo jou fèt yo, jan sa ekri nan Lalwa Seyè a. ⁴ Lèfini, li mande moun ki rete lavil Jerizalèm yo pou yo fè ofrann pou prèt ak moun Levi yo, pou mesye sa yo ka bay tout tan yo nan fè travay yo, jan Lalwa Seyè a mande l' la. ⁵ Lè nouvel la gaye, moun pèp Izrayèl yo pote premye sa yo rekolte nan ble, nan diven, nan lwil oliv, nan siwo myèl ak nan tout lòt danre jaden yo an kantite. Lèfini, yo pote yon dizyèm sou tou sa yo te genyen. ⁶ Tout moun peyi Izrayèl ak moun peyi Jida ki t'ap viv nan lòt lavil peyi Jida yo te bay yon bèt pou chak dis bèf osinon kabrit ak mouton yo te genyen. Yo pote yon dizyèm nan tout bagay yo te mete apa pou Bondye, sèl Mèt yo a. Yo pote yo fè pil sou pil. ⁷ Yo konmanse pote kado yo depi nan twazyèm mwa a rive sou setyèm mwa a. ⁸ Lè wa Ezekyas ak chèf li yo wè kantite bagay moun yo te bay, yo di Bondye mèsi, yo fè lwanj pou pèp Izrayèl la, pèp Bondye a. ⁹ Lè sa a, Ezekyas pale ak prèt yo ansanm ak moun Levi yo sou koze ofrann yo. ¹⁰ Azarya, granprèt la, moun fanmi Zadòk yo, di l' konsa: -Depi lè pèp la konmanse ap pote ofrann nan Tanp lan, gen kont manje pou moun manje. Lèfini, rete yon bon kantite, paske Seyè a beni pèp li a. Sa ki rete la a, se sa ki te anplis la. ¹¹ ¶ Ezekyas bay lòd pou yo pare kèk pyès nan Tanp lan pou sèvi depo. Lè depo yo fin pare, ¹² li fè mete tout sa yo te pran sou rekòt yo, tout ladim yo ak tout bagay yo te mete apa pou Bondye yo ladan yo. Yo mete Konanya, yon moun Levi, chèf reskonsab ak Chimèyi, frè li, pou adjwen. ¹³ Yo chwazi dis moun pou travay sou lòd Konanya ak Chimèyi, frè li a, dapre lòd wa a ak Azarya, prèt reskonsab Tanp lan, te bay. Se te Jeiyèl, Azaryawou, Nakat, Asayèl, Jerimòt, Jozaba, Eliyèl, Jismakya, Makat ak Benaja. ¹⁴ Kore, pitit Jimna a, yon moun Levi ki te chèf gad nan Pòtay sou solèy leve Tanp lan, te reskonsab resevwa kado moun yo te ofri pou Seyè a paske yo te vle. Se li tou ki pou te separe ofrann yo te fè pou Seyè a ak pòsyon yo te mete apa nèt pou Seyè a. ¹⁵ Nan lòt lavil kote prèt yo rete a, men moun ki te toujou la pou ede Kore: Se te Edèn, Menjamin, Jechwa, Chemaja, Amarya ak Chekanya. Se yo menm ki pou te separe manje a bay moun Levi parèy yo, gran kou piti, dapre travay yo gen pou fè. ¹⁶ Non sèlman yo te bay tout moun Levi ki te gen non yo pote nan rejis fanmi yo, depi sa ki gen twazan laj pou pi piti, pòsyon manje pa yo, men yo te bay chak gwoup moun Levi ki te travay nan Tanp Seyè a chak jou, dapre jou travay yo ak dapre travay yo gen pou fè. ¹⁷ Prèt yo te enskri dapre fanmi yo. Men moun Levi yo, depi sa ki gen ventan pou pi piti, te enskri dapre travay pou yo fè ak jou pou yo travay. ¹⁸ Yo tout te enskri ansanm ak pitit gason yo, pitit fi yo, madanm yo ak tout moun ki sou

kont yo, pou yo te ka bay tout tan yo pou travay nan Tanp Bondye a. ¹⁹ Yo te chwazi moun tou pou mete reskonsab separe manje bay tout prèt yo, moun fanmi Arawon yo, ak moun Levi ki te enskri nan rejis yo epi ki t'ap viv andeyò nan vwazinaj lavil prèt yo. ²⁰ Se konsa Ezekyas te fè nan tout peyi Jida a. Li te fè sa ki byen, sa ki dwat ak tout kè li devan Seyè a, Bondye li a. ²¹ Nan tou sa li te fè pou sèvis Tanp Bondye a, pou lalwa ak pou kòmandman Bondye yo, li te chache fè volonte Bondye ak tout kè li. Se poutèt sa tout bagay te mache byen pou li.

Chapter 32

¹ ¶ Apre Ezekyas te fin fè tout bagay sa yo pou moutre jan li t'ap sèvi Bondye ak tout kè li, Senakerib, wa peyi Lasiri, anvayi peyi Jida. Li sènen tout lavil ak gwo ranpa yo avèk lide pou l' pran yo. ² Lè Ezekyas wè Senakerib t'ap pwoche bò lavil Jerizalèm ak lide pou l' atake l' tou, ³ li reyini tout otorite ak chèf lame l' yo, li di yo li fè lide bouche tout sous dlo ki andeyò lavil la. Yo tout dakò. ⁴ Yon foul moun reyini vre, yo bouche tout sous dlo yo ansanm ak kannal anba tè ki te konn mennen dlo a byen lwen nan peyi a. Yo t'ap di yo p'ap kite wa peyi Lasiri yo jwenn anpil dlo lè y'a rive isit la. ⁵ Ezekyas mete gason sou li. Li fè repare tout miray lavil la, li bati fò won sou li ak yon lòt miray sou deyò. Li ranfòse ranpa ki pwoteje teren ranbleye ki bay sou solèy leve lavil David la. Li fè fè anpil frenn ak manch long ak anpil plak pwotèj. ⁶ Li mete chèf lame alatèt pèp la, li reyini yo sou plas piblik ki bò pòtay lavil la. Li ankouraje yo, li di yo: -Mete gason sou nou! Kenbe fèm! Pa kite anyen fè nou pè, ni devan wa peyi Lasiri a, ni devan gwo lame k'ap mache avè l' la, paske nou gen plis fòs avèk nou pase li menm li gen avè l'. ⁷ Li menm, li konte sou fòs sòlda li yo. Nou menm, nou gen Seyè a, Bondye sèl Mèt la, pou ede nou, pou goumen pou nou. Lè pèp la tandè pawòl sa yo soti nan bouch Ezekyas, wa peyi Jida a, yo tout pran kouraj. ⁸ ¶ Kèk tan apre sa, Senakerib, wa peyi Lasiri a, te rive devan lavil lakis ansanm ak tout lame li a pou l' atake l'. Li voye kèk chèf bò kote Ezekyas, wa peyi Jida a ak bò kote tout pèp ki te lavil Jerizalèm lan avèk mesaj sa a: ⁹ -Men sa Senakerib, wa peyi Lasiri a, voye di nou: Poukisa nou gen tout konfyans sa a, kifè nou rete nan lavil Jerizalèm ki sènen toupatou a? ¹⁰ Lè Ezekyas di nou Seyè a, Bondye nou an, va delivre nou anba men wa peyi Lasiri a, se twonpe l'ap twonpe nou. Li pral kite nou mouri grangou ak swaf dlo. ¹¹ Apa Ezekyas menm ki te disparèt dènye lotèl ak dènye kote yo te konn fè sèvis pou Seyè a, lèfini ki te di tout moun peyi Jida ak lavil Jerizalèm yo se devan yon sèl lotèl pou yo fè sèvis, pou yo boule lansan? ¹² Se konnen nou pa konnen sa zansèt mwen yo ansanm avè m' ¹³

nou te fè pèp lòt nasyon yo? Eske bondye nasyon sa yo te rive delivre yo anba men mwen? ¹⁴ Pa gen yonn nan bondye lòt nasyon zansèt mwen yo te detwi yo ki te rive delivre yo anba men mwen.

¹⁵ Poukisa atò nou vle kwè Bondye nou an ka delivre nou anba men m'? Se poutèt sa, pa kite Ezekyas ban nou manti, pa kite li pete nou! Nou pa bezwen kwè l'! Pa gen bondye ankenn gouvènman, ni bondye ankenn nasyon ki te ka delivre yon peyi anba men zansèt mwen yo, ni anba

men pa m'! Ale wè pou Bondye nou an ta ka delivre nou anba men mwen! ¹⁶ Chèf lame Lasiri yo

te pale pi mal toujou sou Bondye pèp Izrayèl la, Seyè a, ak sou Ezekyas, sèvitè l' la. ¹⁷ Senakerib te ekri yon lèt kote li te joure Seyè a, Bondye pèp Izrayèl la. Li te di ladan l': Bondye lòt nasyon ki sou latè yo pa t' ka delivre pèp yo anba men m'. Se pa Bondye Ezekyas la ki va delivre pèp la anba

men m'! ¹⁸ Mesaje wa Lasiri yo t'ap pale byen fò nan lang ebre pou tout moun ki te sou miray lavil Jerizalèm yo te ka tande. Yo t'ap fè yo pè, yo t'ap fè yo pèdi kouraj pou yo te ka pran lavil la fasil.

¹⁹ Yo t'ap pale sou Bondye lavil Jerizalèm lan tankou yo te konn pale sou bondye lòt nasyon yo ki

yon bann estati moun fè ak men. ²⁰ Lè sa a, wa Ezekyas ak pwofèt Ezayi, pitit Amòz la, pran

lapriyè, yo t'ap mande Bondye sekou. ²¹ Seyè a voye yon zanj nan kan moun peyi Lasiri yo, li touye tout vanyan sòlda yo ansanm ak kaptenn ak chèf lame yo. Se konsa wa peyi Lasiri a tounen tou wont nan peyi l'. Yon jou li te antre nan tanp bondye li a, pwòp pitit li yo touye l' ak kout nepe.

²² Se konsa Seyè a te delivre Ezekyas ak tout moun lavil Jerizalèm yo anba men Senakerib, wa peyi Lasiri a, ak anba lòt lènmi yo. Li fè yo viv san bri san kont ak tout peyi nan vwazinaj yo.

²³ Anpil moun vini lavil Jerizalèm pote ofrann pou Seyè a ak kado pou Ezekyas, wa peyi Jida a.

Depi lè sa a tout lòt nasyon nan vwazinaj yo respekte Ezekyas. ²⁴ ¶ Yon lè rive, Ezekyas tonbe

malad, li te prèt pou mouri. Li lapriyè Seyè a. Seyè a reponn li, li fè l' wè yon mirak. ²⁵ Men, Ezekyas kite lògèy vire tèt li, li refize di mèsè pou sa Seyè a te fè pou li. Se konsa, Seyè a move ni

sou li, ni sou peyi Jida, ni sou lavil Jerizalèm. ²⁶ Tansèlman, Ezekyas ansanm ak moun lavil Jerizalèm yo rekonèt fòt yo apre sa. Depi lè sa a, Seyè a pa move sou yo ankò jouk jou Ezekyas

mouri. ²⁷ Ezekyas te gen anpil richès, tout moun te respekte l'. Li fè bati depo pou mete tout bagay an ajan, an lò li te genyen, bèl pyè koute chè, epis santi bon, plak pwotèj ak tout lòt bagay koute chè l' yo.

²⁸ Li fè bati tou depo pou mete grenn manje, diven ak lwil oliv, kay pou tout bèt li yo ak pak pou mouton l' yo. ²⁹ Li fè bati kèk vil, li achte kantite mouton, kabrit ak bèf, paske Bondye te

ba li anpil richès. ³⁰ Se wa Ezekyas ki te bouche kote dlo sous Giyon an te konn soti sou anwo a

pou fè l' pase sou anba bò solèy kouche lavil David la. Tou sa li te vle fè te mache byen. ³¹ Se

konsa, lè wa Babilòn yo te voye delege bò kote l' pou wè kalite mirak ki te fèt nan peyi a, Bondye te kite l' pou kont li pou sonde l', pou l' te ka konnen sa ki te nan kè li. ³² Tout lòt bagay wa Ezekyas te fè yo, jan li te sevi Bondye nan tou sa li t'ap fè, tou sa ekri nan liv Vizyon pwofèt Ezayi, pitit Amòz la, ak nan liv Istwa wa peyi Jida ak wa peyi Izrayèl yo. ³³ Lè Ezekyas mouri, yo antere l' nan yon chanm anwo nan kavo fanmi David yo. Lè l' mouri, tout moun peyi Jida yo ak moun lavil Jerizalèm yo fè bèl lantèman pou li. Se Manase, pitit li, ki moute wa nan plas li.

Chapter 33

¹ ¶ Manase te gen douzan lè li moute wa peyi Jida. Li gouvènen nan lavil Jerizalèm pandan senkansan. ² Li fè sa ki mal devan Seyè a, dapre vye prensip krimenèl lòt nasyon Seyè a te mete deyò pou fè plas pou moun pèp Izrayèl yo. ³ Li rebati tanp bondye lòt nasyon Ezekyas, papa l', te fè kraze yo. Li bati lotèl pou Baal, li fè yon estati Achera. Lèfini, li adore dènye zetwal ki nan syèl la, li fè sèvis pou yo. ⁴ Li menm rive bati lotèl pou zidòl nan Tanp Seyè a menm, kote Seyè a te di se la l'ap rete nan lavil Jerizalèm pou toutan. ⁵ Li fè bati lotèl nan de lakou tanp Seyè a pou tout zetwal ki nan syèl la. ⁶ Li ofri pitit gason l' pou yo boule sou lotèl zidòl yo nan Fon Inon an. Li lage kò l' nan li nwaj nan syèl la ak nan fè maji pou konnen sa ki gen pou rive. Li ankouraje divinò yo ak moun ki konn rele mò pou pale ak yo. Li donnen nan fè sa ki mal devan Seyè a pou l' te fè Seyè a move jouk li pa kapab ankò. ⁷ Li fè fè yon estati zidòl mete nan Tanp Seyè a, atout Seyè a te pale ak David ansanm ak Salomon, pitit li. Li te pale ak yo sou Tanp lan, li te di yo se isit lavil Jerizalèm, nan Tanp kote mwen te chwazi nan tout peyi douz branch fanmi pèp Izrayèl la, pou yo fè sèvis pou mwen. ⁸ Depi moun pèp Izrayèl yo viv jan mwen mande yo viv la, si yo fè tou sa ki nan lalwa Moyiz, sèvitè m' lan, te ba yo a, mwen p'ap mete yo deyò nan peyi mwen te vle bay zansèt yo a. ⁹ Men, Manase te lakòz pèp Jida a ak moun lavil Jerizalèm yo pèdi tèt yo, yo fè pi mal pase nasyon Seyè a te mete deyò nan peyi a pou fè plas pou yo. ¹⁰ Seyè a te pale ak Manase ansanm ak pèp li a, men yo derefize koute l'. ¹¹ ¶ Lè sa a, Seyè a voye chèf lame wa peyi Lasiri a vin atake yo. Yo mete men sou Manase, yo pase kwòk nan machwè li, yo mare l' ak de gwo chenn fèt an kwiv, yo mennen l' lavil Babilòn. ¹² Manase te nan gwo lafliksyon, li rele Seyè a, Bondye li a, li rekonèt tout fòt li yo devan Seyè a, Bondye zansèt li yo. ¹³ Li lapriyè Bondye, Bondye tande lapriyè l' la, li ba li sa l' te mande a. Li fè l' tounen lavil Jerizalèm pou li al pran plas li ankò. Se konsa

¹⁴
 Manase vin konprann se Seyè a ki Bondye vre. Apre sa Manase bati yon miray byen wo sou deyò lavil David la, sou bò solèy kouche, bò sous Giyon an. Miray la pran depi nan ravin lan, li pase bò Pòtay Pwason yo, li fè wonn Ofèl la. Manase mete yon kòmandan nan tout lavil peyi Jida

¹⁵
 yo ki gen gwo ranpa. Li wete tout estati zidòl lòt nasyon yo ak gwo estati ki te nan Tanp lan. Li kraze tout lotèl yo te bati sou mòn kote Tanp Seyè a te ye a ak nan lavil Jerizalèm. Li pran tout

¹⁶
 bagay sa yo, li voye yo jete an deyò lavil la. Li fè repare lotèl Seyè a, li fè ofrann pou mande Bondye padon ak pou di l' mès. Li mande pou tout moun nan peyi Jida a sèvi Seyè a, Bondye pèp

¹⁷
 Izrayèl la. Pèp la te toujou ap ofri bèt pou yo touye lòt kote, men se te toujou pou Seyè a, Bondye

¹⁸
 yo a, ase. Tout rès istwa Manase a, lapriyè li te fè nan pye Bondye li a, mesaj pwofèt yo te ba

¹⁹
 li nan non Seyè a, Bondye pèp Izrayèl la, tou sa ekri nan Liv Istwa wa pèp Izrayèl yo. Lapriyè wa a te fè a, repons Bondye te ba li, tout peche l' yo, jan li te vire do bay Bondye, tout kote li te bati pou zidòl yo, estati Achera ak estati lòt zidòl li te fè fè pou l' te ka sèvi anvan li te rekonèt

²⁰
 peche li yo, nou jwenn tou sa ekri nan Liv Istwa pwofèt Ozayi a. Lè Manase mouri, yo antere

²¹
 l' nan jaden palè a. Se Amon, pitit gason l' lan, ki moute wa nan plas li. ¶ Amon te gen venndezan

²²
 lè li moute wa peyi Jida a. Li gouvènen nan lavil Jerizalèm pandan dezan. Tankou Manase, papa l', li fè sa ki mal devan Seyè a. Li ofri bèt pou yo touye, li fè sèvis pou tout zidòl papa l' te fè fè yo.

²³
 Men, li pa t' rekonèt peche l' yo devan Seyè a, tankou Manase, papa l', te fè l' la. Li menm rive

²⁴
 fè pi mal pase papa l' toujou. Chèf ki t'ap sèvi avèk Amon yo fè konplo, yo touye l' anndan palè

²⁵
 a. Moun peyi Jida yo touye mesye ki te fè konplo pou touye Amon yo. Yo mete Jozyas, pitit gason Amon an, wa nan plas li.

Chapter 34

¹
 ¶ Jozyas te gen witan lè li moute wa peyi Jida. Li gouvènen nan lavil Jerizalèm pandan

²
 tranteyennan. Jozyas te fè sa ki dwat devan Seyè a. Li mache pye pou pye dèyè David, zansèt li

³
 a. Li fè tankou l' nan tou sa l'ap fè, san li pa janm fè sa ki mal. Jozyas t'ap mache sou witan depi li te wa lè li konmanse chache konnen volonte Bondye David, zansèt li a. Lè sa a li te yon jenn gason toujou. Li t'ap mache sou douzan depi li te wa lè li konmanse fè detwi tout tanp zidòl, tout

⁴
 pòtre Achera, tout lòt estati an bwa ak an bwonz nan peyi Jida ak nan lavil Jerizalèm. Li fè yo demoli devan je li tout lotèl kote yo te fè sèvis pou Baal yo. Li fè yo kraze tout recho kote yo te

boule lansan sou lotèl yo. Li fè yo kraze an miyèt moso pòtre Achera ak pòtre tout lòt zidòl ak estati an bwonz yo. Apre sa, yo fè yo tounen poud, yo simen poud la sou tonm moun ki te konn fè sèvis

⁵ pou yo. Li boule zosman prèt zidòl yo sou lotèl kote yo te konn fè sèvis pou yo a. Se konsa li

mete tout peyi Jida a ak lavil Jerizalèm nan kondisyon pou fè sèvis Bondye. ⁶ Li fè menm bagay la tou nan lavil ki nan zòn moun Manase, moun Efrayim, ak moun Simeyon yo rive nan zòn moun

Neftali yo ak nan tout ti bouk ki te nan vwazinaj yo. ⁷ Nan tout peyi Izrayèl la, li fè demoli lotèl yo. Li kraze tout estati Achera yo ak lòt zidòl yo fè yo tounen poud. Yo kraze tout lotèl lansan yo

an miyèt moso, lèfini li tounen lavil Jerizalèm. ¶ ⁸ Lè sa a, wa Jozyas t'ap mache sou dizwitan depi li t'ap gouvènèn, li t'ap mete peyi a ansanm ak Tanp lan nan kondisyon pou fè sèvis pou Bondye. Wa a rele twa moun: Chafan, pitit gason Asalya a, Maseya, gouvènè lavil la, ak Joa, pitit gason

Joakaz, sekretè wa a. Li ba yo lòd al repare Tanp Seyè a, Bondye li a. ⁹ Mesye yo al jwenn Ilkija, granprèt la. Yo pote ba li tout lajan yo te ranmase nan Tanp lan, lajan moun Levi ki desèvis nan papòt Tanp lan te ranmase nan men moun Efrayim, moun Manase ak lòt moun peyi Izrayèl yo, ansanm ak sa yo te ranmase nan men moun Jida, moun Benjamen ak moun lavil Jerizalèm yo.

¹⁰ Yo renmèt lajan an nan men mesye ki te reskonsab travay ki pou fèt nan Tanp lan, pou yo menm

yo ka peye moun k'ap travay repare Tanp lan, ki vle di, ¹¹ bès chapant yo ak bès mason yo, pou yo ka achte wòch taye ak bwa yo bezwen pou sèvi sipò ak ranfò chapant tanp wa Jida yo te kite ap

tonbe a. ¹² Mesye yo te serye nan travay yo. Te gen kat moun Levi ki t'ap dirije yo. Se te: Joak ak Obadya, moun nan branch fanmi Merari a, Zekaraja ak Mechoulam, moun nan branch fanmi Keyat.

Moun Levi ki te konn fè mizik sou enstriman yo ¹³ te reskonsab moun ki t'ap bwote materyo yo ak tout lòt ouvriye ki t'ap fè lòt travay yo. Te gen lòt moun Levi ki te reskonsab ekri istwa tou sa

k'ap pase. Genyen ki te sekretè, genyen ki t'ap fè pòs nan papòt yo. ¹⁴ ¶ Pandan yo t'ap wete lajan

yo te mete nan Tanp Seyè a, Ilkija, prèt la, jwenn liv Lalwa Seyè a te bay Moyiz pou pèp la. ¹⁵ Ilkija

pale ak Chafan, sekretè a, li di l' li jwenn liv Lalwa a nan Tanp Seyè a. Epi li ba li l'. ¹⁶ Chafan

pote liv la bay wa a, epi li fè rapò li, li di l' konsa: -Nou fè tou sa ou te ban nou lòd fè. ¹⁷ Yo pran tout lajan ki te nan Tanp Seyè a, yo renmèt li nan men moun ki reskonsab fè reparasyon nan Tanp

lan ak moun k'ap fè travay yo. ¹⁸ Lèfini, Chafan di wa a: -Ilkija, prèt la, te ban m' yon liv. Chafan

li liv la pou wa a. ¹⁹ Lè wa a tande pawòl ki te ekri nan Liv la, li chire rad sou li tèlman li te sezi.

²⁰ Lèfini, li fè rele Ilkija, prèt la, Akikam, pitit gason Chafan an, Abdon, pitit Mikaja a, Chafan,

sekretè a, ak Asaja, nèg konfyans wa a. Li ba yo lòd sa a: ²¹ -Ale chache konnen sa Seyè a vle nou fè, mwen menm ansanm ak tout rès pèp li a ki rete nan peyi Jida ak nan peyi Izrayèl la. Chache

konnen sa pou n' fè ak pawòl ki nan liv nou jwenn lan. Seyè a move anpil sou nou, paske zansèt
²²

nou yo pa t' koute pawòl Seyè a, ni yo pa t' fè tou sa ki ekri nan liv la. Se konsa, Ilkija ansanm
 ak lòt mesye wa a te chwazi yo al kay Oulda, yon pwofèt fanm ki te rete nan katye yo te fèk bati
 lavil Jerizalèm lan. Oulda sa a te madanm yon nonm yo te rele Chaloum, pitit Tokeyat, pitit pitit

²³
 Asra a, ki te reskonsab rad yo sèvi nan Tanp lan. Yo esplike Oulda tou sa ki rive. Oulda di yo
 konsa: -Men sa Seyè a, Bondye pèp Izrayèl la, di: Tounen al di moun ki voye nou bò kote m' lan
²⁴

men mesaj Seyè a voye ba li: Mwen pral voye yon malè sou lavil Jerizalèm ansanm ak sou tout
²⁵

moun li yo, jan sa ekri nan liv yo li pou wa peyi Jida a. Moun lavil Jerizalèm yo vire do ban
 mwen. Yo fè sèvis pou lòt bondye. Avèk tout zak sa yo, mwen move anpil sou lavil Jerizalèm.

²⁶
 Kòlè m' poko ap pase. Men sa n'a di wa peyi Jida a ki voye nou vin konnen volonte Bondye a.

²⁷
 Wi, men sa Seyè a, Bondye pèp Izrayèl la, voye di l': Ou tande sa ki ekri nan liv la. Sa fè kè ou
 fè ou mal, ou desann ou devan mwen lè ou tande deklarasyon mwen fè sou lavil sa a ak sou tout
 moun li yo. Wi, lè ou tande sa, ou chire rad sou ou, dlo koule nan je ou. Se poutèt sa mwen menm

²⁸
 tou mwen tande ou. Se mwen menm, Seyè a, k'ap di ou sa. Ou menm, w'ap mouri nan kabann
 ou, y'ap antere ou nan menm kavo ak zansèt ou yo. Ou p'ap gen tan wè malè m'ap voye sou lavil

²⁹
 Jerizalèm ak sou moun ki rete ladan l' yo. Mesye yo tounen rapòte mesaj la bay wa Jozyas. ¶
 Lè sa a, wa a voye misyon bay tout chèf fanmi nan lavil Jerizalèm ak nan tout peyi Jida a, pou yo

³⁰
 reyini ansanm avè l'. Apre sa, wa a moute nan Tanp Seyè a ansanm ak prèt yo, moun Levi yo,
 tout moun peyi Jida yo, moun ki rete lavil Jerizalèm yo ak tout rès pèp la, grannèg kou tinèg. Wa

³¹
 a kanpe devan yo tout, li li byen fò tou sa ki nan liv Kontra yo te jwenn nan Tanp Seyè a. Lè li
 fini, li rete kanpe nan plas rezève pou li bò gwo poto a, li pran angajman devan Seyè a pou li fè
 volonte Seyè a, pou li mache dapre kòmandman, prensip ak lalwa Bondye yo ak tout kè li ak tout

³²
 nanm li, lèfini pou l' kenbe tout kondisyon kontra ki ekri nan liv la. Apre sa, wa a fè tout moun
 ki te lavil Jerizalèm ansanm ak moun branch fanmi Benjamin yo pran menm angajman an tou.
 Depi lè sa a, moun lavil Jerizalèm yo mache dapre kontra yo te pase ak Bondye zansèt yo a.

³³
 Jozyas fè disparèt tout vye ziddòl sal nan peyi ki te pou moun pèp Izrayèl yo. Li mete tout moun
 ki te rete nan peyi Izrayèl la nan obligasyon pou yo sèvi Seyè a, Bondye yo a. Se konsa pandan
 tout tan Jozyas te vivan an, tout pèp la te kenbe pye Seyè a, Bondye zansèt yo a, fèm.

Chapter 35

¹ ¶ Wa Jozyas fete fèt Delivrans lan pou Seyè a. Nan katòzyèm jou premye mwa a, yo touye ti mouton pou fèt la. ² Li bay chak prèt travay pou yo fè nan Tanp lan ankò, li ankouraje yo pou yo fè l' byen. ³ Lèfini, li pale ak moun Levi yo ki te responsab moutre pèp Izrayèl la sa pou l' fè epi ki t'ap viv apa nèt pou Seyè a. Li di yo konsa: -Mete Bwat Kontra Bondye a nan Tanp Salomon, pitit David, wa pèp Izrayèl la, te bati a. Nou pa bezwen ap pote l' sou zepòl nou ankò. Koulye a se ⁴ sèvi nou pral sèvi Seyè a, Bondye nou ak Bondye pèp Izrayèl ki pou li a. Pran plas nou nan Tanp lan, chak fanmi apa, dapre responsablite nou jan David, wa pèp Izrayèl la, ak Salomon, pitit li, te ⁵ ekri l' la. N'a rete kote yo mete apa nèt pou Seyè a. N'a ranje nou yon jan pou gen yon gwoup moun Levi pou ede chak branch fanmi pèp Izrayèl la. ⁶ Se nou ki pou touye ti mouton yo ak kabrit yo pou fèt Delivrans lan. Ale mete nou nan kondisyon pou fè sèvis Seyè a. Pare tou sa nou bezwen pou touye bèt yo pou moun pèp Izrayèl yo, frè nou yo, ka fè seremoni an jan Seyè a te bay Moyiz ⁷ lòd la pou nou. Apre sa, Jozyas pran trantmil (30.000) ti mouton ak ti kabrit ansanm ak twamil (3.000) bèf nan bèt pa l', li bay moun pèp Izrayèl ki te la yo pou fè fèt Delivrans lan. ⁸ Chèf li yo te bay pa yo tou pou pèp la, pou prèt yo ak moun Levi yo. Ilkija, Zakari ak Jeiyèl, ki te responsab Tanp Seyè a, bay demil sisan (2.600) ti mouton ak ti kabrit ansanm ak twasan (300) bèf pou yo ⁹ touye pou fèt la. Konanya ak de frè li yo, Chemaja ak Netanèl, ansanm ak Achabya, Jeiyèl ak Jozaba, chèf moun Levi yo, bò pa yo te bay senkmil (5.000) ti mouton ak ti kabrit ak senksan (500) ¹⁰ bèf pou moun Levi yo te ofri pou fèt Delivrans lan. Lè tout bagay te pare pou fèt la, prèt yo pran ¹¹ plas yo, moun Levi yo fè gwoup apa jan wa a te ba yo lòd la. Lè yo fin touye ti mouton yo, moun ¹² Levi yo bay prèt yo san an pou yo vide sou lotèl la. Moun Levi yo menm kòche tout bèt yo. Apre sa, yo wete pati ki pou boule nèt pou Seyè a, yo bay chak fanmi pòsyon pa yo pou yo al ofri bay ¹³ Seyè a, jan sa ekri nan Liv Moyiz la. Yo fè menm bagay la pou bèf yo. Lèfini, moun Levi yo griye ti mouton Delivrans lan sou dife, jan yo te konn fè l' la. Yo bouyi lòt vyann yo te mete apa pou Bondye yo nan chodyè, nan mamit ak nan kaswòl. Lèfini, yo prese separe vyann lan bay tout ¹⁴ pèp la. Lè yo fin fè sa, moun Levi yo pare sa ki rete pou yo menm ansanm ak prèt yo, paske prèt yo, moun fanmi Arawon yo, te rete byen ta jouk aswè ap boule bèt moun yo te ofri nèt pou Seyè a ansanm ak grès lòt bèt yo. Se poutèt sa, se moun Levi yo ki te pare vyann ni pou tèt yo ni pou prèt ¹⁵ yo, moun fanmi Arawon yo. Sanba yo menm, moun fanmi Asaf yo, te nan plas yo dapre lòd David, Asaf, Eyman ak Jedoutoun, pwofèt wa a, te bay. Gad pòtay Tanp yo te nan plas yo tou. Yo ¹⁶ yonn pa kite pòs yo, paske moun Levi parèy yo t'ap pare pòsyon vyann pa yo pou yo tou. Se konsa jou sa a yo te òganize tout sèvis Seyè a pou fete fèt Delivrans lan, pou boule vyann bèt yo

nèt sou lotèl la pou Bondye, jan wa Jozyas te bay lòd la. ¹⁷ Pandan sèt jou, tout moun pèp Izrayèl
 ki te la yo t'ap fete fèt Delivrans lan ak fèt Pen san ledven yo. ¹⁸ Depi sou tan pwofèt Samyèl, yo
 pa t' janm fete fèt Delivrans lan konsa. Pa gen yonn nan ansyen wa pèp Izrayèl yo ki te fete fèt
 Delivrans lan tankou Jozyas te fè l' lè sa a ansanm ak prèt yo, moun Levi yo ak tout pèp peyi Jida
 a, moun peyi Izrayèl ki te la yo ansanm ak moun lavil Jerizalèm yo. ¹⁹ Jozyas te gen dizwitan depi
 li te wa lè yo te fete fèt Delivrans sa a. ¶ ²⁰ Apre sa, lè wa Jozyas te fin fè tout reparasyon ki pou
 te fèt nan Tanp lan, Neko, wa peyi Lejip la, moute nan direksyon larivyè Lefrat pou l' al goumen
 bò lavil Kakemich. Jozyas soti al kontre l' pou anpeche l' pase. ²¹ Men Neko voye misyon sa a bay
 Jozyas: -Ou wè ou menm, wa peyi Jida, pa antre nan lagè sa a tandè! M' pa vin pou m' goumen avè
 ou, men se avèk yon lòt nasyon mwen gen kont. Bondye di m' pa mize. Tanpri, pou pwòp byen ou,
 pa kenbe tèt ak Bondye ki avè m'. Konsa li p'ap detwi ou. ²² Men, Jozyas te soti pou goumen avè
 l'. Li derefize koute mesaj Neko te voye ba li a, mesaj ki te soti nan bouch Bondye menm. Se konsa,
 li degize kò l', li al goumen avè l' nan plenn Megido a. ²³ Pandan batay la, sòlda ak banza yo tire
 sou wa Jozyas. Jozyas di moun ki te avè l' yo: -M' blese anpil. Mennen m' ale. ²⁴ Moun li yo wete
 l' nan cha lagè li a, yo mete l' nan yon lòt cha li te gen la, epi yo mennen l' lavil Jerizalèm. Se la li
 mouri. Yo antere l' nan kavo zansèt li yo. Tout moun peyi Jida ak moun lavil Jerizalèm te pran gwo
 lapenn pou Jozyas. ²⁵ Pwofèt Jeremi te fè yon chante pou plenn sò wa Jozyas. Depi lè sa a, se yon
 koutim nan peyi Izrayèl: chak fwa fi yo ak gason yo ap chante nan yon lanmò, yo chonje Jozyas.
 Yo mete tout chante lanmò sa yo ansanm nan yon liv. ²⁶ Tou sa Jozyas te fè, jan li sèvi Seyè a ak
 tout kè li, jan li te mache dapre sa ki ekri nan Lalwa Seyè a, ²⁷ wi, tout istwa Jozyas la nèt, depi
 premye jou li te moute wa rive jouk dènye jou a, n'a jwenn tou sa ekri nan Liv Istwa Wa peyi Jida
 ak wa peyi Izrayèl yo.

Chapter 36

¹ ¶ Moun peyi Jida yo chwazi Joakaz, pitit gason Joas la, yo mete l' wa nan plas papa l'. ² Joakaz
 te gen venntwazan lè li moute wa nan peyi Jida. Li gouvènen lavil Jerizalèm pandan twa mwa.
³ Neko, wa peyi Lejip la, mete l' atè, li fòse peyi Jida a ba li sèt mil senksan (7500) liv ajan ak
 swasannkenz liv lò. ⁴ Apre sa, Neko pran Elyakim, frè Joakaz, li mete l' wa nan plas li. Lè sa a, li
 chanje non Elyakim, li rele l' Jojakim. Lèfini, li pran Joakaz, li mennen l' nan peyi Lejip. ⁵ Jojakim
 te gen vennsenkan lè li moute wa peyi Jida. Li gouvènen nan lavil Jerizalèm pandan onzan. Li te

fè sa ki mal devan Seyè a, Bondye li a. ⁶ Nebikadneza, wa Babilòn, anvayi peyi Jida, li fè wa Jojakim prizonye, li mete l' anba chenn doub, li mennen l' lavil Babilòn. ⁷ Nebikadneza pran tout bèl bagay ki te nan Tanp Seyè a, li pote yo lavil Babilòn, li mete yo nan tanp bondye pa l'. ⁸ Tout rès istwa Jojakim lan, jan li te sèvi vye zidòl yo ak tout mechanste li te fè yo, nou jwenn tou sa ekri nan liv Istwa wa peyi Jida ak wa peyi Izrayèl yo. Se Jojakin, pitit li, ki moute wa nan plas li.

⁹ Jojakin te gen dizwitan lè li moute wa peyi Jida. Li gouvènen nan lavil Jerizalèm pandan twa mwa dis jou. Li menm tou, li te fè sa ki mal devan Seyè a. ¹⁰ Nan sezon prentan ki vin apre sa, wa Nebikadneza fè Jojakin prizonye, li mennen l' lavil Babilòn. Li pran tout richès ki te nan Tanp Seyè a pote ale. Apre sa, Nebikadneza pran Sedesyas, frè papa Jojakin, li mete l' wa lavil Jerizalèm nan peyi Jida. ¹¹ ¶ Sedesyas te gen venteyennan lè li vin wa peyi Jida. Li pase onzan lavil Jerizalèm ap gouvènen peyi a. ¹² Li fè sa ki mal devan Seyè a, li pa t' soumèt devan pwofèt Jeremi ki t'ap pale pawòl Bondye nan zòrèy li. ¹³ Sedesyas leve kont wa Nebikadneza ki te fè l' sèmante devan Bondye li t'ap toujou soumèt devan li. Li fè tèt di, li derefize chanje lavi li t'ap mennen an pase pou l' ta tounen vin jwenn Seyè a, Bondye pèp Izrayèl la. ¹⁴ Ata lòt chèf peyi Jida yo, prèt yo ansanm ak tout pèp la te lage kò yo nan sèvi yon bann vye zidòl, tankou tout lòt nasyon yo te konn fè. Yo derespekte Tanp Seyè a te mete apa pou li menm lavil Jerizalèm. ¹⁵ Seyè a, Bondye zansèt yo a, pa t' manke voye pwofèt pou avèti pèp li a, paske li pa t' vle anyen rive ni pèp li a ni Tanp li a.

¹⁶ Men, yo pase mesaj Bondye yo nan betiz, yo pa okipe sa Bondye te di yo, yo pase pwofèt yo anba rizib. Bout pou bout, Seyè a te vin sitèlman fache pa t' gen rechap pou yo ankò. ¹⁷ Se konsa Seyè a fè wa Babilòn lan moute vin atake yo. Wa a touye tout jenn gason peyi Jida a nan Tanp lan menm. Li pa t' gen pitye pou pesonn, granmoun kou timoun, fanm kou gason, malad ou pa malad. Bondye lage yo tout nan men wa a. ¹⁸ Wa a menm pran dènnye sa ki te nan Tanp lan ak nan pyès trezò Tanp lan ansanm ak richès wa a ak richès lòt gwo chèf yo, li pote yo lavil Babilòn. ¹⁹ Lèfini, li mete dife nan Tanp lan. Li kraze miray lavil la. Li boule tout gwo kay yo ak tout bèl bagay koute chè ki te ladan yo. ²⁰ Li pran tout moun ki pa t' mouri yo, li depòte yo lavil Babilòn kote yo sèvi l', li menm ansanm ak pitit li yo, tankou esklav, jouk gouvènman an pase nan men wa peyi Pès la.

²¹ Se konsa, sa Seyè a te mete nan bouch pwofèt Jeremi an rive vre: Pandan swasannndizan tè a pral rete san yon moun ladan l', li pral pran repo pou tout jou repo yo pa t' janm ba li a. ²² ¶ Lè sa a, wa Siris pa t' ankò gen ennan depi li t'ap gouvènen peyi Pès la, lè Seyè a mete lide nan tèt wa a pou li bay yon lòd, fè kouche l' sou papye, voye l' toupatou nan peyi a pou yo te ka li l' pou tout moun tande. Sa te pase konsa pou pawòl Seyè a te mete nan bouch pwofèt Jeremi an te ka rive vre. Men

23
 lòd la: -Mwen menm Siris, wa peyi Pès la, men lòd mwen bay: Seyè a, Bondye nan syèl la, te mete m' chèf sou tout peyi ki sou latè. Li ban m' reskonsablite pou m' bati yon Tanp pou li lavil Jerizalèm nan peyi Jida. Nou mande pou Bondye pèp sa a beni tout moun ki fè pati pèp Izrayèl la, pou yo moute lavil Jerizalèm.

Ezra

Chapter 1

1 ¶ Lè sa a, wa Siris pa t' ankò gen ennan depi li t'ap gouvènen peyi Pès la, lè Seyè a mete lide nan tèt wa a pou li bay yon lòd, fè kouche l' sou papye voye toupatou nan peyi a pou yo te ka li l' pou tout moun tandè. Sa te pase konsa pou pawòl Seyè a te mete nan bouch pwofèt Jeremi an te
 2 ka rive vre. Men lòd la: -Mwen menm Siris, wa peyi Pès, men lòd mwen bay: Seyè a, Bondye nan syèl la, te mete m' chèf sou tout peyi ki sou latè. Li ban m' reskonsablite pou m' bati yon tanp
 3 pou li lavil Jerizalèm, nan peyi Jida. Nou mande pou Bondye pèp Izrayèl la beni tout moun ki fè pati pèp sa a pou yo moute lavil Jerizalèm, nan peyi Jida, pou yo rebati Tanp Seyè a, Bondye pèp
 4 Izrayèl la, Bondye yo adore lavil Jerizalèm lan. Toupatou nan peyi a, moun k'ap viv menm kote ak ti rès ki rete nan pèp Izrayèl la va ba yo konkou pou yo ka tounen nan peyi pa yo. Y'a ba yo ajan ak lò, pwovizyon ak bèt ansanm ak tout lòt bagay yo vle ba yo pou yo ofri nan tanp Bondye a ki
 5 nan lavil Jerizalèm lan. ¶ Lè sa a, chèf branch fanmi Jida ak chèf branch fanmi Benjamen yo, prèt yo, moun Levi yo ak tout lòt moun ki te fè lide a gremesi Seyè a, yo leve pou y' al rebati kay Seyè
 6 a nan lavil Jerizalèm. Tout vwazen yo te ba yo tout kalite konkou, bagay fèt an ajan ak an lò, pwovizyon, bèt ak anpil lòt bagay ki gen anpil valè, san konte tout kalite bagay yo te vle bay pou
 7 ofri nan tanp lan. Nan tan lontan, wa Nèbikadneza te pran tout bòl ak tout lòt bagay ki t'ap sèvi nan tanp Seyè a lavil Jerizalèm, li te mete yo nan tanp bondye pa l' la. Wa Siris fè chache tout bagay
 8 sa yo. Li fè Mitridat ki te reskonsab tout richès peyi a mete yo deyò pou l' te kontwòle yo bay
 9 Chechbaza, gouvènè peyi Jida a. Men sa yo te jwenn: trant gwo bòl an lò pou mete ofrann mil
 10 (1.000) gwo bòl an ajan pou mete ofrann ventnèf lòt gwo kouto trant ti bòl an lò katsandis (410)
 11 ti bòl an ajan mil (1.000) lòt kalite bagay. Antou, sa te fè senkmilcatsan (5.400) divès kalite bagay an lò ak an ajan. Se tout bagay sa yo Chechbaza te pran ak li lè li t'ap kite lavil Babilòn ansanm ak lòt moun yo te depòte yo, pou tounen lavil Jerizalèm.

Chapter 2

¹ ¶ Men lis moun ki te kite peyi Babilòn pou yo tounen lavil Jerizalèm ak nan peyi Jida, chak
² moun nan lavil kote yo moun. Se moun sa yo wa Nèbikadneza te fè depòte nan peyi Babilòn. Men
moun ki te alatèt yo: Se te Zowobabèl, Jozye, Neemi, Seraja, Reelaja, Madoche, Bilchan, Mispà,
Bigwayi, Reyoum ak Baana. Men lis moun nan pèp Izrayèl la, fanmi pa fanmi, ak kantite moun
⁴ nan chak fanmi: ³ Nan fanmi Pareòch yo, demilsanswasanndouz (2.172) moun. Nan fanmi Chefatya
yo, twasanswasanndouz (372) moun. ⁵ Nan fanmi Arak yo, sètsanswasannkenz (775) moun. ⁶ Nan
fanmi Pakat Moab yo, pitit pitit Jechwa ak Joab, demilwitsandouz (2.812) moun. ⁷ Nan fanmi Elam
yo, mildesansenkannkat (1.254) moun. ⁸ Nan fanmi Zatou yo, nèfsankarannsenk (945) moun.
⁹ Nan fanmi Zakayi yo, sètsanswasant (760) moun. ¹⁰ Nan fanmi Bani yo, sisankarannde (642)
moun. ¹¹ Nan fanmi Bebayi yo, sisanvenntwa (623) moun. ¹² Nan fanmi Azgad yo, mildesanvennde
(1.222) moun. ¹³ Nan fanmi Adonikan yo, sisanswasanssis (666) moun. ¹⁴ Nan fanmi Bigwayi
yo, demilsenkanssis (2.056) moun. ¹⁵ Nan fanmi Aden yo, katsansenkannkat (454) moun. ¹⁶ Nan
fanmi Atè yo, (anvan sa Atè te rele Ezekyas) katrevendizwit moun. ¹⁷ Nan fanmi Betzayi yo,
twasanvenntwa (323) moun. ¹⁸ Nan fanmi Jora yo, sandouz (112) moun. ¹⁹ Nan fanmi Achoum
yo, desanvenntwa (223) moun. ²⁰ Nan fanmi Giba yo, katrevenkenz moun. ²¹ Men lis moun ki te
tounen dapre non lavil kote yo moun: Pou lavil Betleyèm, sanvenntwa (123) moun. ²² Pou lavil
Netofa, senkanssis moun. ²³ Pou lavil Anatòt, sanvenntwit (128) moun. ²⁴ Pou lavil Azmavèt,
karannde moun. ²⁵ Pou lavil Kiriyat-Jearim ansanm ak pou lavil Kefera ak pou lavil Beewòt,
sètsankaranntwa (743) moun. ²⁶ Pou lavil Arama ak pou lavil Geba, sisanventeyen (621) moun.
²⁷ Pou lavil Mikmas, sanvennde (122) moun. ²⁸ Pou lavil Betèl ak pou lavil Ayi, desanvenntwa
(223) moun. ²⁹ Pou lavil Nebo, senkannde moun. ³⁰ Pou lavil Magbich, sansenkanssis (156) moun.
³¹ Pou lòt lavil Elam lan, mildesansenkannkat (1.254) moun. ³² Pou lavil Arim, twasanven (320)
moun. ³³ Pou lavil Lòd ansanm ak pou lavil Adid ak lavil Ono, sètsanvennsenk (725) moun. ³⁴ Pou
lavil Jeriko, twasankarannsenk (345) moun. ³⁵ Pou lavil Senaa, twamilsisantrant (3.630) moun.

36

¶ Men lis prèt ki te tounen, dapre non fanmi yo: Nan pitit Jedaja, ki soti nan branch Jozye a, nèfsanswasantrèz (973) moun. ³⁷ Nan pitit Imè yo, milsenkannde (1.052) moun. ³⁸ Nan pitit

Pachou yo, mildesankaransèt (1.247) moun. ³⁹ Nan pitit Arim yo, mildisèt (1.017) moun. ⁴⁰ Men lis moun Levi ki te tounen yo: Nan pitit Jechwa ak pitit Kadmyèl, ki soti nan branch fanmi Odavya

a, swasannkatòz moun. ⁴¹ Te gen sanvenntwit (128) sanba ki konn chante ak fè mizik nan tanp lan

ki te tounen. Yo soti nan branch fanmi Asaf. ⁴² Te gen santrantnèf (139) moun ki pou sèvi gad nan pòtay Tanp lan. Yo soti nan branch fanmi Chaloum, branch fanmi Atè, branch fanmi Talmon,

branch fanmi Akoub, branch fanmi Atita ak branch fanmi Chobayi. ⁴³ Men lis moun yo te bay pou travay nan tanp Bondye a epi ki te tounen nan peyi a: moun fanmi Sika, moun fanmi Asoufa ak

moun fanmi Tabayòt, ⁴⁴ moun fanmi Kewòs, moun fanmi Siyaa ak moun fanmi Padon, ⁴⁵ moun

fanmi Lebana, moun fanmi Agaba ak moun fanmi Akoub, ⁴⁶ moun fanmi Agad, moun fanmi

Chamlayi ak moun fanmi Anan, ⁴⁷ moun fanmi Gidèl, moun fanmi Gaka ak moun fanmi Reaja,

⁴⁸ moun fanmi Rezen, moun fanmi Nekoda ak moun fanmi Gazam, ⁴⁹ moun fanmi Ouza, moun

fanmi Paseyak ak moun fanmi Besayi, ⁵⁰ moun fanmi Asna, moun fanmi Neounen ak moun fanmi

Nefisim, ⁵¹ moun fanmi Bakbouk, moun fanmi Akoufa ak moun fanmi Awou, ⁵² moun fanmi

Baslout, moun fanmi Mechisa ak moun fanmi Acha, ⁵³ moun fanmi Bakòs, moun fanmi Sisera ak

moun fanmi Tamak, ⁵⁴ moun fanmi Nezyak ak moun fanmi Atifa. ⁵⁵ Men lis moun nan branch fanmi domestik Salomon yo ki te tounen nan peyi a: moun fanmi Sotayi, moun fanmi Asoferèt ak

moun fanmi Pewouda, ⁵⁶ moun fanmi Yaala, moun fanmi Dakon ak moun fanmi Gidèl, ⁵⁷ moun

fanmi Chefatya, moun fanmi Atil, moun fanmi Pokerèt Azebayim ak moun fanmi Ami. ⁵⁸ Konsa,

men kantite moun ki soti nan fanmi travayè tanp lan ak domestik Salomon yo: antou sa te fè

twasankatrevendouz (392). ⁵⁹ Men, te gen yon seri moun ki soti nan lavil Tèl Melak, lavil Tèl Acha, lavil Kewoub Adan, lavil Imè ki te moun nan peyi Babilòn epi ki te moute ansanm ak tout

moun sa yo, atout yo pa t' ka fè konnen non zansèt yo ak non fanmi yo pou wè si yo te fè pati pèp

Izrayèl la vre. ⁶⁰ Se te pitit Delaya, pitit Tobija ak pitit Nekoda: antou sisansenkannde (652) moun.

61

Konsa tou, pami prèt yo te gen moun fanmi Abaya, moun fanmi Akòz ak moun fanmi Bazilayi. Zansèt Bazilayi sa yo te marye ak yon fanm nan fanmi Bazilayi, moun Galarad. Se konsa yo te

pran non papa manman yo. ⁶² Sa ki pa t' ka jwenn rejis pou moutre ki moun ki zansèt yo, yo pa t'

⁶³ asepte yo pou prèt. Gouvènè jwif la te di yo yo pa t' kapab manje nan manje yo mete apa pou Bondye a toutotan pa t' gen prèt ki konn sèvi ak Ourim yo ansanm ak Tourim yo pou wè sa Bondye

⁶⁴ vle. ¶ Antou nèt, te gen karann demil tousanswasant (42.360) moun ki tounen nan peyi a. ⁶⁵ Avèk yo te gen sèt mil twasantrann sèt (7.337) gason ak fanm ki te sèvi yo domestik. Te gen tou desan

⁶⁶ (200) gason ak fanm ki te konn fè misik ak chante. Te gen sèt sanswasansis (766) chwal,

⁶⁷ desankarannsenk (245) milèt, kasantrannsenk chamo (435) ak simil sèt sanven (6.720) bourik.

⁶⁸ Lè yo rive nan tanp Seyè a, lavil Jerizalèm, gen kèk chèf fanmi ki fè ofrann pa yo pou ede rebati

⁶⁹ tanp lan sou menm anplasman kote li te ye a. Yo bay tou sa yo te ka bay pou travay la: sèz mil senksanven (16.520) ons lò, sandisèt mil (117.000) ons ajan ak san (100) gwo rad pou prèt yo mete

⁷⁰ sou yo. Prèt yo, moun Levi yo ak kèk moun nan pèp la al rete lavil Jerizalèm ak nan vwazinaj lavil la. Mizisyen yo, gad yo ak travayè tanp yo al rete nan lavil ki pa twò lwen kapital la. Tout rès pèp Izrayèl la al rete nan lavil kote yo moun.

Chapter 3

¹ ¶ Lè pou setyèm mwa lanne jwif yo rive, moun pèp Izrayèl yo te gen tan chita lakay yo nan lavil yo. Lè sa a, yo tout yo sanble lavil Jerizalèm.

² Jozye, pitit gason Jeozadak la, ak tout prèt parèy li yo leve ansanm ak Zowobabèl, pitit gason Chealtyèl la, ak tout fanmi l' yo, yo rebati lotèl Bondye pèp Izrayèl la pou yo te ka boule ofrann bèt sou li, dapre regleman ki ekri nan lalwa Moyiz,

³ sèvitè Bondye a. Atout yo te pè lòt moun yo ki t'ap viv nan peyi a, yo rebati lotèl la menm kote li te ye anvan an. Epi yo tanmen boule bèt sou li pou Seyè a, chak maten ak chak aswè.

⁴ Yo fete

⁵ fèt Joupa yo, dapre sa ki ekri a. Chak jou yo te ofri kantite bèt yo te dwe boule pou jou sa a. Apre sa, yo ofri bèt pou yo boule chak jou a, bèt pou yo boule chak fèt lalin nouvèl yo, ak bèt pou tout lòt jou y'ap fè fèt pou Seyè a, ansanm ak tout lòt ofrann moun yo vle fè pou Seyè a san se pa li ki

⁶ mande yo fè l'. Pèp la pa t' ankò mete men nan tanp lan, men depi premye jou setyèm mwa a yo

⁷ te konmanse ap boule bèt nèt pou Seyè a. Pèp la bay lajan pou peye bòs ki t'ap taye wòch yo ak bòs chapant yo. Yo bay pwovizyon, bwason ak lwil pou yo voye lavil Tir ak lavil Sidon pou bwa sèd y'ap achte nan men moun la yo. Bwa yo te soti peyi Liban, yo pase sou lanmè, yo debake Jope.

⁸ Yo fè tou sa dapre otorizasyon Siris, wa peyi Pès la, te ba yo. ¶ Te gen ennan yon mwa depi yo te rive lavil Jerizalèm sou anplasman tanp Seyè a, lè Zowobabèl, pitit gason Chealtyèl la, ak Jozye, pitit gason Jeozadak la, te mete men nan travay la ansanm ak rès moun pèp la, prèt yo ak moun

Levi yo, avèk tout moun ki te tounen lavil Jerizalèm. Yo pran tout moun Levi ki te gen ventan
 9
 osinon plis, yo mete yo anchaj pou dirije tout travay ki t'ap fèt nan tanp Seyè a. Se konsa Jozye,
 pitit gason l' yo ak lòt fanmi li yo, ansanm ak Kadmyèl ak pitit gason l' yo, moun fanmi Jida, mete
 10
 tèt yo ansanm, yo pran reskonsablite travay ki t'ap fèt nan tanp Bondye a. Lè bès mason yo te
 konmanse ak premye fondasyon tanp Seyè a, prèt yo avèk gwo rad yo sou yo, twonpèt yo nan men
 yo, vin pran plas yo ansanm ak moun Levi branch fanmi Asaf yo ak tanbouren yo nan men yo. Yo
 11
 te fè lwanj Seyè a dapre regleman David, wa peyi Izrayèl la, te bay depi lontan. Yo t'ap fè lwanj
 Seyè a, yo t'ap di l' mès, yo t'ap chante yonn apre lòt: Ala bon Seyè a bon! Li p'ap janm sispann
 renmen pèp Izrayèl la Tout pèp la t'ap rele byen fò. Yo t'ap fè lwanj Seyè a, paske yo t'ap mete men
 12
 nan travay fondasyon tanp Seyè a. Te gen anpil prèt, anpil moun Levi ak anpil chèf fanmi ki te
 fin vye granmoun. Yo te konnen ansyen tanp lan anvan li te kraze. Lè yo wè fondasyon tanp lan
 t'ap moute ankò devan je yo, genyen ki t'ap kriye ak dlo nan je. Men, anpil lòt t'ap rele sitèlman yo
 13
 te kontan. Men, pesonn pa t' ka di kilès ki t'ap rele ak kè kontan, kilès ki t'ap plede kriye ak dlo
 nan je, paske tout pèp la t'ap rele ansanm byen fò. Moun te ka tandè yo byen lwen.

Chapter 4

1
 ¶ Lènmi moun Jida yo ak lènmi moun Benjamen yo vin konnen moun ki te tounen soti nan
 kote yo te depòte yo a t'ap rebati yon kay pou Seyè a, Bondye pèp Izrayèl la. 2
 Yo vin jwenn
 Zowobabèl ak chèf fanmi yo, yo di yo konsa: -Kite nou mete men ansanm ak nou nan travay pou
 rebati tanp lan, paske nou menm tou se menm Bondye a nou adore ak nou. Epi, depi lè Esaradon,
 3
 wa peyi Lasiri a, te fè nou vin rete isit la, n'ap ofri bèt pou yo touye pou li. Zowobabèl, Jozye ak
 tout lòt chèf fanmi yo reponn yo: -Non mès! Nou pa bezwen konkou pesonn pou nou bati yon tanp
 pou Seyè a, Bondye nou an. N'a bati l' nou menm, pou kont nou ak men nou, jan Siris, wa peyi Pès
 4
 la, te ban nou lòd fè a. Lè sa a, moun ki t'ap viv depi lontan nan peyi a soti pou yo dekouraje
 moun Jida yo. Yo t'ap kraponnen yo pou yo te sispann travay batiman an. 5
 Yo menm rive bay
 kèk anplwaye gouvènman an lajan anba chal pou anpeche travay la mache. Se konsa, pandan tout
 6
 tan wa Siris t'ap gouvènen an jouk sou rèy wa Dariyis, yo antrave travay moun yo san rete. ¶
 Konsa tou, lè wa Zèsès te fenk pran pouvwa a, yo ekri yon lèt akizasyon voye bay wa a kont moun
 7
 k'ap viv nan peyi Jida ak nan lavil Jerizalèm. Sou rèy wa Atagzèsès, Bislam, Mitridat ak Tabeyèl
 mete tèt yo ansanm avèk kèk lòt kòlèg yo, yo ekri yon lèt plent voye bay Atagzèsès, wa peyi Pès
 la, kont moun Jerizalèm yo. Lèt la te ekri nan lang arameyen, e se pou yo te tradwi l' lè yo t'ap li

8
 l'. (Dokiman arameyen an konmanse isit la). Se konsa Reyoun, gouvènè a, ak Chimchayi, ki te sekretè pwovens la, ekri yon lèt bay wa Atagzèsès sou keksyon lavil Jerizalèm lan. Men ki jan lèt

9
 te pati: Se mwen menm, Reyoun, gouvènè a ak Chimchayi, sekretè pwovens la, ki ekri lèt sa a ansanm ak tout lòt kòlèg nou yo anplwaye gouvènman an, moun lavil Den, moun lavil Afasatak, moun lavil Tapèl, moun lavil Afaras, moun lavil Erèk, moun lavil Babilòn, moun lavil Souz, moun

10
 lavil Deya ak moun peyi Elam, avèk chèf tout lòt pèp k'ap viv koulye a nan lavil peyi Samari yo ak nan rès pwovens ki bò solèy kouche larivyè Lefrat la. Se gran wa Asnapa, wa ki te fè tout

11
 moun respekte l' la, ki te depòte yo al fè yo viv kote yo ye koulye a. Men kopi lèt yo te voye bay wa a. -Pou wa Atagzèsès. Se nou menm sèvitè ou yo, moun pwovens lòt bò larivyè Lefrat la,

12
 k'ap voye di ou bonjou. Nou vle fè wa a konnen jwif yo soti nan tout teritwa ki sou lòd li yo, yo vini lavil Jerizalèm, epi y'ap rebati lavil sa a ki pa janm vle soumèt devan li epi ki toujou ap fè bagay ki mal. Y'ap travay pou rebati gwo miray ranpa lavil la, yo gen tan fini ak fondasyon an.

13
 Nou vle fè wa a konnen, si moun sa yo rebati lavil la, si yo remoute miray ranpa a ankò, yo p'ap peye okenn taks, yo p'ap fè okenn kontribisyon, ni yo p'ap bay lajan yo fè moun peye pou pase

14
 lakay yo. Lè sa a se kès wa a menm ki pral fè defisi. Men, paske nou respekte kontra nou gen avè ou la, monwa, nou pa ka rete konsa ap gade moun yo ap kraze enterè wa a. Se poutèt sa nou

15
 voye fè wa a konn sa, pou l' ka fè rechèch nan achiv zansèt li yo te kite. Nan ansyen dokiman sa yo, l'a jwenn sa yo te ekri sou lavil sa a. L'a konnen jan lavil sa a pa te janm vle soumèt devan

16
 yo, li te toujou pare pou revòlte. Se poutèt sa yo te detwi lavil sa a nèt. Nou fè wa a konnen si yo rebati lavil sa a, si yo refè miray ranpa li yo, talè konsa wa a p'ap gen yon teritwa pou li ankò

17
 nan pwovens bò solèy kouche larivyè Lefrat la. ¶ Men repons wa a voye ba yo: -Nou voye gwo bonjou pou Reyoun, gouvènè a, Chimchayi, sekretè pwovens la, ak tout lòt kòlèg yo k'ap viv nan

18
 peyi Samari ak nan rès pwovens lòt bò larivyè Lefrat. Lèt nou te voye ban mwen an rive jwenn

19
 mwen. Yo tradwi l' mo pa mo pou mwen. Mwen pase lòd pou yo fè rechèch nan achiv yo, epi yo jwenn lavil sa a, depi tout tan, te toujou derefize soumèt devan otorite wa yo. Se tout tan gen

20
 moun la k'ap revòlte, k'ap pran lèzam kont wa yo. Te gen gwo wa ki te konn gouvènè lavil Jerizalèm. Yon lè, yo te donminen sou tout teritwa ki lòt bò larivyè Lefrat la. Yo te konn fè moun

21
 peye yo taks, lajan kontribisyon ak lajan pou pèmèt yo pase sou chemen lakay yo. Se poutèt sa, nou mèt bay lòd pou yo rete travay mesye yo ap fè a: Pesonn p'ap gen dwa rebati lavil sa a toutotan

22
 mwen pa bay lòd pou sa. Piga nou pote neglijan nan zafè sa a, pou kès wa a pa fè plis defisi

23
 pase sa. Fini yo fini li lèt wa Atagzèsès la bay Reyoun, gouvènè a, Chimchayi, sekretè pwovens la, ak lòt kòlèg yo nan gouvènman an, mesye yo leve, yo kouri lavil Jerizalèm al jwenn jwif yo,

avèk zam nan men yo, yo fòse yo sispann travay la. ²⁴ Se konsa yo te rete travay tanp Bondye a lavil Jerizalèm. Travay la rete bloke jouk dezyèm lanne rèy Dariyis, wa peyi Pès la.

Chapter 5

¹ ¶ Lè sa a, de pwofèt, Aje ak Zakari, pitit gason Ido a, tanmen bay mesaj ki soti nan Bondye pèp Izrayèl la, pou jwif ki rete nan peyi Jida ak lavil Jerizalèm yo. ² Lè Zowobabèl, pitit gason Chealtyèl la, ak Jozye, pitit gason Jeozadak la, tandè mesaj yo, lamenm yo konmanse rebati tanp Bondye a lavil Jerizalèm. De pwofèt yo menm te kanpe la avèk moun yo, ap ankouraje yo. ³ ¶ Lè sa a, Tatenayi, gouvènè pwovens lòt bò larivyè Lefrat la, Cheta-Boznayi ak lòt anplwaye gouvènman parèy yo, moute lavil Jerizalèm, yo mande jwif yo: -Ki moun ki ban nou otorizasyon rebati tanp sa a pou nou mete lotèl ladan l'? ⁴ Apre sa, yo mande yo ankò: -Eske nou ka ban nou non tout moun k'ap travay sou chantye sa a? ⁵ Men Bondye t'ap veye chèf fanmi jwif yo pou anyen pa t' rive yo. Se konsa, chèf gouvènman yo pa t' rete travay la. Men, yo voye yon rapò bay wa Dariyis, epi yo tann repons li anvan yo pran okenn desizyon sou zafè sa a. ⁶ Men kopi rapò Tatenayi, gouvènè pwovens lòt bò larivyè Lefrat la, Cheta-Boznayi ak kòlèg li yo ansanm ak tout otorite pwovens la te voye bay wa Dariyis. ⁷ Men sa yo te voye di l' nan rapò a: -Nou voye bonjou pou Wa Dariyis! Kè poze pou ou nan tou sa w'ap fè! ⁸ Se devwa nou pou nou fè wa a konnen nou te ale nan pwovens Jida a, nou jwenn y'ap rebati tanp Bondye ki gen pouvwa a, avèk gwo blòk wòch, y'ap koupe gwo poto bwa pou mete nan mi yo. Moun yo pran san yo pou yo fè bon travay, travay la ap mache byen. ⁹ Nou pale ak chèf fanmi yo, nou mande yo ki moun ki te ba yo otorizasyon bati tanp lan, ak otorizasyon mete lotèl ladan l'. ¹⁰ Nou te mande yo tou pou yo ban nou non yo pou n' te ka fè ou konnen ki chèf ki te alatèt moun sa yo. ¹¹ Men sa yo reponn nou: Yo menm, se sèvitè Bondye ki kreye syèl la ak latè a yo ye. Y'ap rebati yon tanp yon gran wa peyi Izrayèl la te bati nan tan lontan kite pou yo. ¹² Men, zansèt yo te fè Bondye nan syèl la fache ak yo, kifè Bondye lage yo nan men Nèbikadneza, moun peyi Kalde, ki te wa peyi Babilòn. Wa sa a te fè detwi tanp lan, epi li fè depòte tout pèp la lavil Babilòn. ¹³ Koulye a, yo pretann di Siris, wa Babilòn lan, pa t' ankò fin gen ennan depi li t'ap gouvènen lè li ba yo otorizasyon pou yo rebati tanp Bondye a. ¹⁴ Yo di ankò: Nèbikadneza te pran tout veso an lò ak an ajan ki te nan tanp Bondye a lavil Jerizalèm, li te fè pote yo lavil Babilòn mete nan tanp lavil sa a. Men, wa Siri a fè wete tout veso sa yo nan tanp Babilòn lan, li renmèt yo bay yon nonm yo te rele Chechbaza. Se nonm sa a li te mete chèf nan pwovens

15
 Jida a. Wa a te di l': Pran veso sa yo, al pote yo tounen nan tanp ki lavil Jerizalèm lan, epi rebati
 tanp Bondye a sou menm anplasman kote l' te ye a. 16
 Se konsa, Chechbaza sa a vini, li moute
 fondasyon tanp Bondye a lavil Jerizalèm. Depi lè sa a, travay la ap mache, men yo poko fini.
 17
 Koulye a menm, si wa a ta vle, li ta ka mande yo chache nan achiv wa yo lavil Babilòn, pou wè
 si tout bon vre, wa Siris te ba yo otorizasyon rebati tanp Bondye a lavil Jerizalèm. Apre sa, y'a fè
 nou konnen desizyon wa a sou zafè sa a.

Chapter 6

1 ¶ Se konsa wa Dariyis bay lòd pou yo fè chache nan tout depo kote yo te sere achiv yo ak
 trezò yo nan peyi Babilòn. 2
 Epi yo jwenn yon woulo papye nan fò Achmeta, yon fòtrès ki te nan
 pwovens Medi a. Men sa ki te ekri nan woulo papye a: 3
 -Nan premye lanne rèy li, wa Siris te bay
 lòd sa a sou tanp Bondye a nan lavil Jerizalèm: Se pou yo rebati tanp lan pou l' ka sèvi kote yo ka
 touye bèt ak boule ofrann nan dife pou Bondye. Tanp lan va gen trant mèt wotè, trant mèt lajè.
 4
 Y'a moute miray yo an bwa ak wòch, yonn sou lòt, twa ranje wòch pou chak ranje bwa. Y'a pran
 lajan nan kès wa a pou peye tout depans ki va fèt pou travay la. 5
 Konsa tou, y'a renmèt yo tout
 veso an lò ak an ajan Nèbikadneza te pran nan tanp Bondye a lavil Jerizalèm pou l' te pote isit lavil
 Babilòn, pou tout bagay tounen nan plas yo nan tanp Bondye a lavil Jerizalèm. 6
 Lè sa a, wa Dariyis
 voye repons sa a: -Pou Tatenayi, gouvènè pwovens lòt bò larivyè Lefrat la, Cheta-Boznayi ak lòt
 kòlèg yo ki otorite nan Afasak la. Pa pwoche bò tanp lan. 7
 Kite yo travay nan tanp Bondye a. Se
 pou gouvènè pèyi Jida a ak chèf fanmi yo rebati tanp lan sou menm anplasman kote l' te ye anvan
 an. 8
 Okontrè, men ki jan pou nou boule ak chèf fanmi pèp jwif yo nan travay y'ap fè pou rebati
 tanp Bondye sa a: N'a pran lajan nan kès wa ki nan men nou an, ki vle di nan lajan kontribisyon
 n'a ranmase nan pwovens la, n'a renmèt yo kòb tout depans y'a fè, san wete senk, pou travay la pa
 rete. 9
 N'a bay prèt Jerizalèm yo tou sa y'a bezwen pou fè ofrann bèt pou yo boule nèt nan dife pou
 Bondye ki nan syèl la. Chak jou, dapre sa prèt lavil Jerizalèm yo va di nou, n'a ba yo jenn ti towò,
 belye, ti mouton ansanm ak ble, sèl, diven, lwil y'a bezwen pou boule pou Seyè a. Pa pote okenn
 neglijanans nan sa. 10
 Konsa, y'a ka ofri sakrifis santi bon ki va fè Seyè a plezi. Y'a lapriyè pou wa
 a ak pou pitit li yo. 11
 Men yon lòd mwen bay ankò: si yon moun refize fè anyen nan sa m' mande
 la a, y'a rache yon poto bwa nan kay li, y'a fè yon pwent li, y'a pèse moun lan pak an pak ak li. Pou
 kay li a menm, y'a fè l' tounen yon pil fatra, poutèt sa li fè a. 12
 Se pou Bondye ki chwazi lavil

Jerizalèm pou se la yo bati kay li a jete tout wa, kraze tout nasyon ki ta konprann pou yo pa koute lòd mwen bay la a, epi ki ta detwi tanp Bondye a ki lavil Jerizalèm. Se mwen menm, Dariyis, ki

bay lòd sa a. Se pou yo fè sa mwen bay lòd fè a san wete san mete. ¹³ ¶ Tatenayi, gouvènè pwovens ki lòt bò larivyè Efrat la, Cheta-Boznayi ak lòt chèf yo fè sa wa Dariyis te bay lòd fè a san wete

san mete. ¹⁴ Chèf fanmi jwif yo menm rebati tanp lan san pwoblèm, avèk ankourajman Aje, pwofèt Bondye a, ak Zakari, pitit gason Ido a, t'ap ba yo ak mesaj Bondye yo. Se konsa yo fin rebati tanp lan jan Bondye pèp Izrayèl la te ba yo lòd la, ak jan Dariyis, Siris ak Atagzèsès, tou twa wa peyi

Pès la, te ba yo lòd la tou. ¹⁵ Travay la fini sou twazyèm jou nan mwa Ada a, nan sizyèm lanne

rèy wa Dariyis. ¹⁶ Lè sa a, tout pèp Izrayèl la, prèt yo, moun Levi yo ak tout rès moun ki te tounen

yo fè fèt, yo fè gwo seremoni pou mete tanp lan apa pou sèvis Bondye. ¹⁷ Yo ofri san (100) towò, desan (200) belye mouton, katsan (400) ti mouton pou yo touye pou mete tanp lan apa pou sèvis Bondye. Yo ofri tou douz bouk kabrit, yonn pou chak branch fanmi pèp Izrayèl la, pou mande

Bondye padon pou peche pèp la. ¹⁸ Apre sa, yo òganize sèvis tanp Bondye a lavil Jerizalèm. Yo separe prèt yo an divès kategori, yo separe moun Levi yo an divès klas, chak gwoup ak travay pa

yo pou yo fè, jan sa ekri nan liv Moyiz la. ¹⁹ Katòzyèm jou mwa Nisan an, nan lanne senksankenz

(515), jwif ki te tounen soti nan peyi kote yo te depòte yo a fete fèt Delivrans lan. ²⁰ Yo te fè yon sèl sèvis pou tout prèt yo ansanm ak tout moun Levi yo pou mete yo nan kondisyon pou fè sèvis Bondye. Yo tout te nan kondisyon pou fè sèvis Bondye: yo touye bèt yo te ofri pou fèt Delivrans

lan, yo fè yon sèl seremoni pou tout pèp la, pou prèt parèy yo ak pou yo menm tou. ²¹ Men moun ki te manje manje Delivrans lan. Se te tout jwif ki te tounen soti nan peyi kote yo te depòte yo a ansanm ak rès moun pèp Izrayèl yo ki pa t' janm kite peyi yo men ki te vire do bay vye bagay lòt moun yo t'ap fè nan peyi yo epi ki te vin mete tèt ansanm ak moun ki te tounen yo pou adore Seyè

a, Bondye pèp Izrayèl la. ²² Pandan sèt jou, yo fete Fèt Pen san ledven an ak kè kontan. Yo te kontan anpil dèske Seyè a te manyen kè wa peyi Lasiri a, ki te ankouraje yo anpil nan tout gwo travay yo t'ap fè a pou rebati tanp Bondye pèp Izrayèl la.

Chapter 7

¹ ¶ Kèk tan apre tout evènman sa yo, sou rèy Atagzèsès, wa peyi Pès la, te gen yon nonm yo te rele Esdras ki te soti nan branch fanmi Arawon an. Papa l' te rele Seraja. Seraja te pitit Azarya,

Azarya te pitit Ilkija. ² Ilkija te pitit Chaloum, Chaloum te pitit Zadòk, Zadòk te pitit Achitoub.

³ Achitoub te pitit Amarya, Amarya te pitit Azarya, Azarya te pitit Merajòt. ⁴ Merajòt te pitit Zeraja,

⁵ Zeraja te pitit Ouzi, Ouzi te pitit Bouki. Bouki te pitit Abichwa, Abichwa te pitit Fineas, Fineas
⁶ te pitit Eleaza, Eleaza te pitit Arawon, granprèt la. Esdras te yon nonm save ki te fò anpil nan
 lalwa Seyè a, lalwa Bondye pèp Izrayèl la te bay Moyiz la. Li t'ap travay ak wa a. Wa a te bay
 Esdras tou sa li te mande l', paske Seyè a, Bondye li a, t'ap pwoteje l'. Se konsa li kite lavil Babilòn
⁷ pou l' moute lavil Jerizalèm. Anpil lòt moun nan pèp Izrayèl la, nan prèt yo, nan moun Levi yo,
 nan sanba yo, nan gad tanp yo ak lòt travayè yo, te pran wout la moute lavil Jerizalèm ansanm ak
⁸ li. Lè sa a, wa Atagzèsès te nan setyèm lanne rèy li. Yo rive Jerizalèm nan senkyèm mwa setyèm
⁹ lanne rèy Atagzèsès la. Yo te kite lavil Babilòn premye jou nan premye mwa a. Epi yo rive lavil
¹⁰ Jerizalèm premye jou nan senkyèm mwa a, avèk pwoteksyon Bondye. Esdras te pase tout tan
 li ap etidye lalwa Seyè a. Li t'ap swiv tou sa ki ladan l'. Li t'ap moutre pèp Izrayèl la tout lòd ak
¹¹ tout regleman Seyè a. ¶ Men kopi lèt wa Atagzèsès te renmèt Esdras, ki te yon prèt ak yon nonm
¹² save. Li te dòktè nan zafè lalwa ak kòmandman Seyè a te bay pèp Izrayèl la. Men lèt Atagzèsès,
¹³ gran wa a, te ekri bay Esdras, nonm save ki fò nan lalwa Bondye ki nan syèl la! -Koulye a, mwen
 bay lòd nan tout peyi m'ap gouvènen yo pou tout moun nan pèp Izrayèl la, nan prèt yo osinon nan
¹⁴ moun Levi yo, ki vle ale avè ou lavil Jerizalèm, pou yo kite yo ale. Se mwen menm, wa a,
 ansanm ak sèt konseye m' yo ki voye ou al fè enspeksyon nan peyi Jida a ak nan lavil Jerizalèm
¹⁵ pou ou wè ki jan moun yo ap swiv liv lalwa Bondye ki nan men ou lan. W'a pran avè ou ajan
 ak lò wa a ansanm ak konseye l' yo te fè lide bay pou Bondye pèp Izrayèl la, ki gen tanp li lavil
¹⁶ Jerizalèm. W'a pote tou tout ajan ak lò y'a ba ou nan tout pwovens Babilòn lan ansanm ak ofrann
¹⁷ pèp la ak prèt yo te fè lide voye paske yo vle fè l' pou kay Bondye a nan lavil Jerizalèm. Konsa,
 avèk tout ajan sa a w'a achte towò bèf, belye mouton, jenn ti mouton ansanm ak grenn jaden, grenn
 danre, diven ak lwil ki pou mache ak yo. Epi w'a ofri yo sou lotèl la nan tanp Bondye ou la ki lavil
¹⁸ Jerizalèm. Avèk ajan ak lò ki va rete a, ou menm ak frè ou yo, n'a fè sa nou vle avè l', depi sa
¹⁹ nou fè a dakò ak volonte Bondye nou an. W'a pran tout veso yo te renmèt ou nan men pou sèvi
²⁰ nan tanp Bondye ou la, w'a mete yo nan tanp lan lavil Jerizalèm, devan lotèl Bondye ou la. Si
 gen lòt bagay ou bezwen ankò pou tanp Bondye ou la, ou mèt pran nan kès wa a pou achte yo.
²¹ Mwen menm, wa Atagzèsès, mwen pase lòd bay tout trezorye leta ki nan pwovens lòt bò larivyè
 Lefrat la, pou yo bay Esdras, prèt la, nonm save ki fò nan lalwa Bondye ki nan syèl la, tou sa l'a
²² mande yo san pran reta, depi sa l' mande a pa depase an total sanvenmil ons ajan, sisansenkant
 (650) barik ble, sisan (600) galon diven, sisan (600) galon lwil oliv. Pou disèl la, y'a ba li valè li

bezwen. ²³ Se pou ou sèten yo bay tou sa Bondye ki nan syèl la mande pou tanp li a, san manke anyen, pou Bondye pa janm fache sou mwen, ni sou pitit ki va gouvènen peyi a apre m'. ²⁴ Epi m' fè nou konnen yo pa gen dwa fè ni prèt yo, ni moun Levi yo, ni sanba yo, ni gad tanp yo, ni domestik yo, ni okenn lòt moun k'ap sèvi nan tanp Bondye a, peye okenn taks, okenn kontribisyon ni okenn dwa lese pase. ²⁵ Ou menm menm, Esdras, avèk bon konprann Bondye ba ou a, w'a chwazi majistra ak jij pou gouvènen tout moun pèp Izrayèl yo k'ap viv dapre lalwa Bondye ou la, nan pwovens lòt bò larivyè Lefrat la. Si genyen ki pa konnen lalwa a, se pou ou fè yo aprann li. ²⁶ Tout moun ki pa mache dapre lalwa Bondye ou la osinon dapre lòd wa a bay la, se pou yo san pitye pou yo lè y'ap pini yo pou sa yo fè a. Sa pou yo touye y'a touye. Sa pou yo depòte y'a depòte. Sa pou yo fè peye amann y'a fè peye amann. Sa pou yo mete nan prizon y'a mete nan prizon! ²⁷ ¶ Lè sa a, Esdras di: -Lwanj pou Seyè a, Bondye zansèt nou yo! Li mete nan tèt wa a lide pou l' fè tout bèl bagay sa yo pou tanp Seyè a lavil Jerizalèm. ²⁸ Li fè m' jwenn favè devan wa a, devan konseye l' yo ak tout lòt gwo zotobre k'ap travay ak wa a. Li te ban m' kouraj, mwen te rive sanble tout chèf fanmi pèp Izrayèl la pou yo pati avè mwen!

Chapter 8

¹ ¶ Men lis chèf fanmi yo ansanm ak non zansèt yo ki te pati ansanm avè m' soti lavil Babilòn pou moute lavil Jerizalèm sou rèy wa Atagzèsès: ² -(we vèsè pwochen)³ Se te Gèson, chèf branch fanmi Fineas la, Danyèl, chèf branch fanmi Itama a, Atouch, pitit gason Chekanya a, chèf branch fanmi David la, Zekarya, chèf branch fanmi Pareòch la. Zekarya te gen avè l' sansenkant (150) gason yo te konte nan fanmi an. ⁴ Elyeyoenayi, pitit gason Seraji a, chèf branch fanmi Pakat m'oab la. Li te gen avè l' desan (200) gason. ⁵ Chekanya, pitit gason Jazyèl la, chèf branch fanmi Zatou a. Li te gen avè l' twasan (300) gason. ⁶ Ebèd, pitit gason Jonatan an, chèf branch fanmi Aden an. Li te gen avè l' senkant gason. ⁷ Yechaya, pitit gason Atalya a, chèf branch fanmi Elam lan. Li te gen avè l' swasanndis gason. ⁸ Zebadya, pitit gason Mikayèl la, chèf branch fanmi Chefatya a. Li te gen katreven gason avè l'. ⁹ Obadya, pitit gason Jeyèl la, chèf branch fanmi Joab la. Li te gen desandizwit (218) gason avè l'. ¹⁰ Chelomit, pitit gason Josifya a, chèf branch fanmi Bani an. Li te gen sanswasant (160) gason avè l'. ¹¹ Zakariya, pitit gason Bebayi a, chèf branch fanmi Bebayi

a. Li te gen ventwit gason avè l'.¹² Jokanan, pitit gason Akatan an, chèf fanmi Azgad la. Li te gen sandis (110) gason avè l'.¹³ Pou branch fanmi Adonikam an, se te Elifelèt, Jeyèl ak Chemaja. Yo te gen swasant gason avèk yo. Moun sa yo te vin apre.¹⁴ Outayi, pitit gason Zaboud la, chèf branch fanmi Bigvayi a. Li te gen swasandis gason avè l'.¹⁵ Mwen sanble tout moun sa yo bò gwo kannal ki mennen dlo nan lavil Aava a. Nou pase twa jou la. Antan nou la, mwen remake nou te gen prèt nan gwoup la, men pa t' gen moun Levi.¹⁶ Lè sa a, mwen fè chache nèf chèf sa yo: Elyezè, Aryèl, Chemaja, Elnatan, Jarib, Elnatan, Natan, Zakaraya ak Mechoulam ansanm ak direktè sa yo: Jojarib ak Elnatan, de moun ki konn esplike lalwa a.¹⁷ Mwen voye yo bò kote Ido, chèf kominote Kasifya a. Mwen esplike yo tou sa pou yo di Ido ak kòlèg li yo ki konn tout travay pou fèt nan tanp lan, epi ki t'ap viv ansanm nan kominote Kasifya a, pou yo ka fè nou jwenn kèk gason pou travay nan tanp Bondye nou an.¹⁸ Se konsa, avèk benediksyon Bondye ki te sou nou, yo ban nou Cherebya, yon nonm lespri, ki te soti nan branch fanmi Makli, yonn nan pitit gason Levi yo ki li menm te pitit Izrayèl. Te gen dizwit nan pitit li yo ak fanmi l' yo ki te vini ak li tou.¹⁹ Yo ban nou ankò Achabya ak Jechaya, frè li a, tou de moun branch fanmi Merari. Te gen vin nan pitit gason yo ki te vini ak yo tou.²⁰ Te gen tou desanven (220) travayè pou tanp lan. Se wa David ak chèf li yo ki te bay zansèt moun sa yo reskonsablite pou ede moun Levi yo nan sèvis yo. Yo te pran non tout moun sa yo.²¹ ¶ Antan nou la bò kannal Aava a, mwen bay lòd pou tout moun fè jèn, pou nou soumèt nou devan Bondye, pou mande l' pou nou fè yon bon vwayaj, pou l' pwoteje nou, pitit nou yo ansanm ak tout byen nou yo.²² Mwen te wont mande wa a yon lame ak kavalye pou pwoteje nou si yon lènmi ta atake nou sou wout, paske mwen te fin di wa a konsa Bondye nou an ap pwoteje tout moun ki mete konfyans yo nan li, l'ap beni yo. Konsa tou, l'ap fache sou moun ki vire do ba li, l'ap pini yo.²³ Se konsa nou fè jèn, nou lapriyè Bondye pou l' pwoteje nou. Epi li reponn lapriyè nou yo.²⁴ ¶ Apre sa, mwen chwazi douz moun nan chèf prèt yo: se te Cherebya, Achabya ak dis lòt chèf prèt.²⁵ Mwen pran pèz tout ajan ak tout lò ak tout lòt veso wa a, konseye l' yo ak lòt chèf ki avè l' yo te bay pou sèvi nan tanp Bondye nou an ansanm ak ofrann moun pèp Izrayèl yo, epi mwen renmèt yo bay douz chèf prèt yo.²⁶ Men sa mwen te renmèt yo nan men: nèfsandouzmil (912.000) ons ajan, ak san veso an ajan ki te peze demilkatsan (2.400) ons, sansenkantwitmil (158.000) ons lò,²⁷ ak vin bòl an lò ki te peze desanswasanndis (270) ons. Te gen de bèl bòl an kwiv dore ki te gen menm valè ak bòl an lò yo.²⁸ Mwen di yo: Nou menm, nou se moun yo mete apa pou sèvis Seyè a. Veso sa yo, yo mete yo apa pou Seyè a tou. Ajan sa yo ak lò sa yo se ofrann moun yo te fè

²⁹ lide ofri bay Seyè a, Bondye zansèt nou yo. Nou reskonsab yo jouk n'a rive nan tanp lan lavil Jerizalèm. Rive la, nan chanm prèt yo ki nan tanp Bondye a, n'a peze yo ankò devan chèf prèt yo
³⁰ ak chèf moun Levi yo, devan chèf branch fanmi pèp Izrayèl la, epi n'a renmèt yo li. Se konsa, lè mwen fin peze ajan an, lò a ak veso yo, prèt yo ak moun Levi yo pran yo nan men m', pou pote
³¹ yo jouk lavil Jerizalèm, nan tanp Bondye nou an. ¶ Sou douzyèm jou premye mwa a, nou kite kote nou te ye a bò kannal Aava a, nou pati pou lavil Jerizalèm. Bondye nou an te la ak nou sou tout wout la. Li pwoteje nou, li pa kite okenn lènmi atake nou, li pa kite nou tonbe nan okenn
³² anbiskad vòlò ta ka pare sou wout pou nou. Nou rive lavil Jerizalèm, nou pase twa jou ap poze
³³ kò nou. Sou katriyèm jou a, n' al nan tanp Bondye nou an, yo peze ajan an, lò a ak veso yo, epi yo renmèt yo nan men Meremòt, prèt la, pitit gason Ouri a. Avèk li te gen Eleaza, pitit gason Fineas
³⁴ la, ak de moun Levi: Jozabad, pitit gason Jozye, ak Noadja, pitit gason Bennwi a. Yo konte, yo peze, yo jwenn tout bagay, anyen pa t' manke. Lè sa a, yo fè yon lis tou sa yo te peze, epi yo sere
³⁵ lis la. Moun ki te tounen soti nan peyi kote yo te depòte yo a ofri bèt pou yo boule nèt pou Bondye pèp Izrayèl la. Yo ofri douz towò pou tout pèp Izrayèl la, katrevensèz belye mouton, swasann disèt ti mouton ak douz bouk kabrit pou mande Bondye padon pou peche yo. Yo boule
³⁶ tout bèt sa yo nèt nan dife pou Seyè a. Yo pran tout dokiman wa a te ba yo, yo renmèt prefè wa yo ak gouvènè yo ki reskonsab pwovens lòt bò larivyè Lefrat la. Se konsa, tout chèf sa yo vin ede pèp la, yo bay konkou yo pou tanp Bondye a.

Chapter 9

¹ ¶ Lè tout bagay sa yo fin regle, chèf pèp Izrayèl yo vin jwenn mwen, yo di m' konsa: -Pèp la, ansanm ak prèt yo ak moun Levi yo fin melanje nèt ak moun lòt nasyon ki nan peyi a: moun Kanaran yo, moun Et yo, moun Ferezi yo, moun Jebis yo, moun Amon yo, moun Moab yo, moun Lejip yo
² ak moun Amori yo. Yo lage kò yo nan fè menm vye bagay ak moun sa yo. Yo marye ak fanm pèp sa yo, yo marye pitit gason yo ak pitit fi pèp sa yo. Se konsa, ras Bondye chwazi pou li a twouve l' melanje ak ras moun peyi a. Premye moun ki lage kò yo nan move zak sa yo se chèf yo ak konseye
³ yo. Lè m' tande sa, mwen vin gen yon sèl lapenn, mwen chire rad sou mwen, mwen rache cheve
⁴ nan tèt mwen ak plim bab mwen. M' al koupi kò m' yon kote sitèlman sa te fè m' lapenn. Anpil moun te pè lè yo vin konnen sa Seyè a te di sou koze peche moun yo te depòte epi ki te tounen nan peyi a te fè a. Yo tout vin sanble bò kote m'. Mwen menm menm, mwen te rete chita koupi atè a,
⁵ jouk lè pou yo fè ofrann chak aswè a rive, tèlman sa te fè m' mal. ¶ Lè lè a rive pou yo fè ofrann

chak aswè a, mwen leve kote m' te koupi ap kriye a, epi ak tout rad chire yo sou mwen, mwen tonbe
 ajenou, mwen louvri de bra m' devan Seyè a, Bondye mwen an. ⁶ Mwen di l' konsa: -O Bondye
 papa m'! Mwen twò wont, mwen pa konn sa pou m' fè! M' pa ka leve tèt mwen devan ou, Bondye
 mwen! Nou tèlman fè sa ki mal, yo fè pil moute pi wo pase tèt nou. Peche nou yo anpile yonn sou
 lòt, yo rive jouk nan syèl la. ⁷ Depi nan tan zansèt nou yo jouk jounen jòdi a, nou pa manke fè sa
 ki mal. Se poutèt tou sa nou te fè ki mal kifè ou te lage nou ansanm ak wa nou yo ak prèt nou yo
 nan men wa lòt peyi yo. Yo touye nou nan lagè, yo depòte nou, yo piye tout ajan nou, yo fè nou
 wont jan nou ye jouk koulye a. ⁸ Men koulye a, depi kèk jou, Seyè a, Bondye nou an, te fè nou yon
 favè. Li sove de twa nan nou, li ban nou yon kote pou nou jwenn pwoteksyon nan kay ki apa pou
 li a. Se konsa li ban nou kouraj ankò, li wete nou nan kalite esklavaj kote nou te ye a, li ban nou
 yon ti souf. ⁹ Paske se esklav nou ye jouk jòdi a. Men menm nan esklavaj sa a, Bondye pa lage
 nou. Li fè wa peyi Pès yo aji byen ak nou. Yo ban nou yon ti souf, pou nou te ka rebati tanp Bondye
 nou an ki te fin kraze nèt. Yo ban nou yon kote pou nou jwenn pwoteksyon nan peyi Jida ak lavil
 Jerizalèm. ¹⁰ Koulye a menm, Bondye, kisa pou nou di ou? Menm apre tou sa ou deja fè pou nou,
 nou dezobeyi tout kòmandman ¹¹ ou te ban nou pou nou swiv, lè pwofèt yo, sèvitè ou yo, te di nou
 nan non ou: Peyi kote nou pral antre a, peyi nou pral pran pou nou rete a, se yon peyi ki pèdi favè
 Bondye, paske moun k'ap viv ladan l' yo ap fè yon bann bagay degoutan, vye bagay sal toupatou
 ladan l'. ¹² Enben! Piga nou marye pitit fi nou yo ak pitit gason yo, ni pigas nou chwazi pitit fi yo
 pou pitit gason nou yo. Nou pa bezwen chache konnen si zafè yo ap mache, si yo gen kè kontan.
 Se sèl jan nou menm nou ka vin fò, nou ka manje tout bon bagay ki donnen nan peyi a, nou ka kite
 tè sa a pou pitit nou yo pou tout tan. ¹³ Apre tou sa ki te rive nou, yon jan pou ou te pini nou pou
 move zak ak tout bagay mal nou te fè yo, nou wè, O Bondye nou, ou pa t' pini nou jan nou te merite
 l' la. Ou te kite yon ti rès nan nou ap viv toujou, nou menm ki la koulye a. ¹⁴ Epi pou koulye a
 ankò pou nou pa swiv kòmandman ou yo, pou n' al marye avèk kalite move moun sa yo? Fwa sa
 a, p'ap gen anyen ki pou anpeche ou fache sou nou jouk pou ou detwi nou nèt, san ou pa kite pesonn
 chape! ¹⁵ Seyè, ou menm ki Bondye pèp Izrayèl la, se paske ou bon anpil pou nou kifè gen yon ti
 ponyen nan nou ki rete toujou, jan sa ye jòdi a. Epi, gade koulye a, men nou kanpe devan ou avèk
 tout peche nou yo! Wi, nou pa gen dwa rete vivan devan ou ankò poutèt sa!

Chapter 10

¹ ¶ Esdras menm te ajenou toujou, fas atè, devan Kay Bondye a, li t'ap lapriyè. Dlo nan je, li
 t'ap rekonèt tout fòt pèp la te fè devan Bondye. Pandan li t'ap fè sa, yon foul moun pèp Izrayèl la,

gason, fanm ak timoun, vin sanble fè wonn bò kote l'. Dlo t'ap ponpe nan je yo tout. ² Le sa a, Chekanya, pitit gason Jeyèl la, nan branch fanmi Elam lan, pran lapawòl. Li di Esdras konsa: -Nou trayi Bondye nou an vre lè nou pran fanm lòt nasyon k'ap viv nan peyi a pou madanm nou. Men

malgre sa, mwen kwè gen espwa toujou pou pèp Izrayèl la. ³ Nou tout pral pran angajman an piblik devan Bondye pou nou ranvwaye tout medam sa yo ansanm ak pitit yo fè pou nou. Wi, mèt, nou pral swiv konsèy ou menm ak lòt moun ki gen respè pou kòmandman Bondye nou an te ban nou.

Se pou nou fè tou sa lalwa Bondye a mande nou fè. ⁴ Leve non! Se ou menm ki pou regle bagay sa a. N'ap kanpe la avè ou! Kouraj! Annavan! ⁵ Lè sa a, Esdras leve, li fè chèf prèt yo, chèf moun

Levi yo ak tout rès moun yo sèmante yo pral fè sa Chekanya te di a. Yo sèmante vre. ¶ ⁶ Apre sa, Esdras ale lakay Jokanan, pitit gason Eliyachib la, sou devan tanp Bondye a. Li pase nwit lan la, san manje, san bwè, paske li te nan gwo lapenn dèske moun yo te depòte epi ki te tounen nan peyi

a pa t' kenbe pawòl yo. ⁷ Yo fè yon piblikasyon nan tout peyi Jida a ak nan lavil Jerizalèm, pou mande tout moun ki te tounen soti nan peyi kote yo te depòte yo a pou yo tout te reyini lavil

Jerizalèm. ⁸ Si yon moun kite twa jou pase li pa moute, tout chèf yo ak tout moun ki an tèt branch fanmi yo te dakò pou yo te sezi tout byen moun sa a, pou yo te fè tanp Bondye a kado l', lèfini pou yo pa t' konsidere l' tankou moun sosyete a ankò avèk rès moun ki te tounen soti kote yo te depòte

yo a. ⁹ Nan twa jou vre, ki te ventyèm jou nan nevyèm mwa a, tout gason ki t'ap viv sou pòsyon tè ki te pou branch fanmi Jida ak branch fanmi Benjamen yo te sanble lavil Jerizalèm. Yo rete sou plas piblik ki devan tanp Bondye a. Yon gwo lapli t'ap tonbe. Tout moun t'ap tranble, yo te frèt,

men yo te pè tou paske se te yon gwo zafè. ¹⁰ Lè sa a, Esdras, prèt la, leve, li di yo: -Lè nou marye ak fanm lòt nasyon yo, se trayi nou trayi Bondye. Se mete nou mete sou tou sa k'ap fèt mal deja

nan mitan pèp Izrayèl la. ¹¹ Men koulye a, rekonèt devan Seyè a, Bondye zansèt nou yo, sa nou fè ki mal la. Fè sa li vle nou fè a: pran distans nou ak moun lòt nasyon k'ap viv nan peyi a. Separe

ak fanm nou te pran pami lòt nasyon yo pou madanm. ¹² Tout pèp la pran reponn byen fò: -Wi.

N'ap fè tou sa ou mande nou fè! ¹³ Men pèp la anpil. Se sezon lapli. Nou pa ka rete deyò a konsa. Epitou, se pa bagay k'ap pran yon jou osinon de jou, paske gen anpil nan nou ki koupab nan zafè

sa a. ¹⁴ Se pou chèf nou yo rete isit la nan plas nou pou regle bagay la. Nan dat y'a fikse a, tout moun nan peyi a ki marye ak yon fanm lòt nasyon va vin parèt devan yo. Chèf fanmi yo ak jij k'ap dirije lavil kote moun lan rete a va vin avè l'. Konsa konsa, jouk kòlè Bondye ki te tonbe sou nou

poutèt bagay sa a va bese. ¹⁵ ¶ Tout moun te dakò esepite Jonatan, pitit gason Asayèl, ak Jaksya, pitit gason Tikva a, ki te kont. Machoulam ak Chabtayi, yon moun Levi, te pran pozisyon ak yo

tou. ¹⁶ Men, moun ki te tounen soti nan peyi kote yo te depòte yo a te dakò ak sa yo te mande yo fè a. Esdras, prèt la, fè chwazi kèk moun ki te chèf branch fanmi pou ede l' nan travay la. Li pran

non yo sou lis. Epi se konsa, depi premye jou dizyèm mwa a yo chita nan tribinal, y'ap egzaminen
 ka chak moun yonn apre lòt. ¹⁷ Apre twa mwa, jou pou jou, lè premye jou premye mwa a rive, yo
 te fin regle zafè tout moun ki te marye ak fanm lòt nasyon yo. ¹⁸ Men lis gason ki te marye ak
 fanm lòt nasyon yo: Pami prèt yo, nan branch fanmi Jozye a, pitit Jeozadak la ak nan branch fanmi
 frè l' yo, te gen Maseja, Elyezè ak Gedalya. ¹⁹ Yo fè sèman y'ap ranvwaye madanm yo, epi yo ofri
 yon belye mouton bay Seyè a pou mande li padon pou fòt yo te fè a. ²⁰ Nan branch fanmi Imè a
 te gen Anani ak Zebadya. ²¹ Nan branch fanmi Arim lan, te gen Maseja, Elija, Chemaja, Jeyèl ak
 Ouzya. ²² Nan branch fanmi Pachou an, te gen Elyeyoenayi, Maseja, Jichmayèl, Netaneyèl, Jozabad
 ak Eleaza. ²³ Pami moun Levi yo, te gen Jozabad, Chimeyi, Kelaya (yo te rele l' Kelita tou), Petaja,
 Jeouda ak Elyezè. ²⁴ Pami sanba yo, te gen Elijachib. Pami gad tanp yo, te gen Chaloum, Telèm
 ak Ouri. ²⁵ Pami rès pèp la, nan branch fanmi Pareòch la, te gen Ramya, Jizija, Malkija, Mijamen,
 Eleaza, Malkija ak Benaja. ²⁶ Nan branch fanmi Elam lan, te gen Natanya, Zekarya, Jeyèl, Abdi,
 Jeremòt ak Elija. ²⁷ Nan branch fanmi Zatou a, te gen Elyeyoenayi, Elyachib, Matanya, Jeremòt,
 Zabad ak Azisa. ²⁸ Nan branch fanmi Bebayi a, te gen Yokanan, Ananya, Zabayi a ak Atlayi.
²⁹ Nan branch fanmi Bani an, te gen Mechoulam, Malouk, Adaja, Jachoub, Cheal ak Jeramòt.
³⁰ Nan branch fanmi Pakat m'oab la, te gen Adna, Kelal, Benaja, Machiya, Matanya, Bezaleyèl,
 Bennwi ak Manase. ³¹ Nan branch fanmi Arim lan, te gen Elyezè, Jichija, Malkija, Chemaja,
 Simeyon, ³² Benjamen, Malouk ak Chemarya. ³³ Nan branch fanmi Achoum lan, te gen Matenayi,
 Matata. Zabab, Elifelèt, Jeremayi, Manase ak Chimèyi. ³⁴ Nan branch fanmi Bani an, te gen Madayi,
 Amram, Ourèl, ³⁵ Benaja, Bedeja, Kelwit, ³⁶ Vanya, Meremòt, Elyachib, ³⁷ Matanya, Matenayi
 ak Jasayi. ³⁸ Nan branch fanmi Bennwi a, te gen Chimèyi, ³⁹ Chelemija, Natan, Adaja,
⁴⁰ Maknadebayi, Chachayi, Charayi, ⁴¹ Azaryèl, Chelemya, Chemarya, ⁴² Chaloum, Amarya ak
⁴³ Jozèf. ⁴⁴ Nan branch fanmi Nebo a te gen Jeyèl, Matitya, Zabab, Zebina, Jadayi, Joèl ak Benaja.
 Tout mesye sa yo te marye ak fanm lòt nasyon. Yo ranvwaye medam yo ansanm ak tout pitit yo
 te fè pou yo.

Nehemiah

Chapter 1

¹ ¶ Men istwa Neemi, pitit gason Akalya a, jan li menm li te rakonte l' la. Se te nan mwa Kislèv. Lè sa a, wa Atagzèsès te gen ventan depi li t'ap gouvènen. Mwen menm, Neemi, mwen te lavil

Souz, kapital peyi a. ² Anani, yonn nan frè m' yo, rive soti nan peyi Jida ansanm ak kèk lòt moun. Mwen mande yo nouvèl jwif yo, ti ponyen moun pèp Izrayèl ki te soti nan peyi kote yo te depòte

yo epi ki tounen nan peyi yo a, ansanm ak nouvèl lavil Jerizalèm. ³ Yo reponn mwen: Moun ki tounen soti nan peyi kote yo te depòte yo epi ki rete laba nan peyi nou an anba gwo pwoblèm. Yo pa konn sa pou yo fè tèlman yo wont. Kanta miray lavil Jerizalèm yo, yo te fin kraze. Gwo pòtay

yo menm te menm jan an toujou depi dife te fin boule yo a. ⁴ Lè m' tande sa, mwen chita atè, mwen pran kriye. Mwen pase anpil jou konsa nan gwo lapenn. Mwen pa manje, mwen t'ap lapriyè Bondye

ki nan syèl la. ⁵ ¶ Mwen di: -Aa, Seyè, Bondye ki nan syèl la, ou se yon Bondye ki gen pouvwa, yon Bondye ki fè moun gen krentif pou ou. Ou kenbe pawòl ou te bay nan kontra ou la. Ou toujou

gen pitye pou moun ki renmen ou, pou moun ki swiv lòd ou yo. ⁶ Tanpri, voye je ou sou mwen menm k'ap sèvi ou la. Panche zòrèy ou pou tande lapriyè m'ap fè nan pye ou koulye a, lajounen kou lannwit, pou sèvitè ou yo, moun pèp Izrayèl yo. Mwen rekonèt tou sa moun pèp Izrayèl yo fè

ki mal devan je ou. Mwen rekonèt ni mwen menm ni zansèt mwen yo nou fè peche. ⁷ Nou aji mal anpil avè ou. Nou pa swiv tout kòmandman, tout lòd ak tout regleman ou te bay Moyiz, sèvitè ou

la, pou nou. ⁸ Koulye a, chonje pawòl ou te bay Moyiz, sèvitè ou la, lòd ki di nou: Si nou menm, moun pèp Izrayèl yo, nou pa kenbe pawòl mwen yo, m'ap gaye nou sou latè nan mitan tout lòt

nasyon yo. ⁹ Men, si nou tounen vin jwenn mwen, si nou pran swiv kòmandman mwen yo pou nou fè sa m' di nou fè, yo te mèt depòte nou jouk byen lwen nan dènnye bout latè a, m'ap sanble nou,

m'ap fè nou tounen kote mwen chwazi pou m' rete a. ¹⁰ Enben! Seyè, men yo, moun k'ap sèvi ou

yo. Men pèp ou a, pèp ou te delivre ak gwo pouvwa ou ak fòs ponyèt ou a. ¹¹ Aa! Seyè, panche zòrèy ou pou tande lapriyè mwen menm, sèvitè ou, m'ap fè nan pye ou, lapriyè tout sèvitè ou yo ki pran plezi nan gen krentif pou ou. Tanpri, Seyè, fè tout bagay mache byen pou mwen jòdi a. Fè wa a resevwa m' byen. Lè sa a, mwen te chèf kanbiz wa a.

Chapter 2

¹
 ¶ Lè sa a, wa Atagzèsès te gen ventan depi li t'ap gouvènen, nou te nan mitan mwa Nisan. Jou sa a, se te tou pa m' pou m' te pote diven bay wa a. Mwen pran diven an, mwen pote l' ba li. Li pa t' janm konn wè m' parèt devan l' kagou. ² Epi li di m' konsa: -Ki jan figi ou fè rale konsa? Se pa malad ou malad? Kisa k'ap fè ou lapenn konsa? Lè sa a m'ap mande nan kè m' sa ki pral rive m'. ³ Mwen reponn li: -Mwen swete pou monwa viv lontan! Men, ki jan pou m' fè pa kagou lè lavil kote zansèt mwen yo antere a ap fin kraze, lè dife fin boule tout pòtay li yo? ⁴ Wa a di m' konsa: -Kisa ou ta renmen m' fè pou ou? Mwen lapriyè Bondye ki nan syèl la nan kè m'. ⁵ Epi mwen reponn li: -Si sa fè monwa plezi, si ou kontan jan m'ap sèvi ou la, tanpri, kite m' ale nan peyi Jida, nan lavil kote zansèt mwen yo antere a, pou m' ka rebati l'. ⁶ Wa a te chita avèk larenn li bò kote l', li mande m': -Konbe tan vwayaj la pral pran ou? Kilè w'a tounen? Mwen di l' konbe tan sa ka pran m'. Epi li dakò pou l' kite m' ale. ⁷ Lè sa a, mwen di wa a: -Si sa fè monwa plezi, li ta fè ekri kèk lèt pou mwen pou gouvènè ki nan pwovens lòt bò larivyè Lefrat yo, pou yo ka kite m' pase jouk mwen rive nan peyi Jida. ⁸ Li ta ban m' yon lèt tou pou Azaf, chèf ki reskonsab rakbwa leta yo, pou l' ka ban mwen bwa pou gwo pòtay fò k'ap pwoteje tanp lan, bwa pou ranpa lavil la ak bwa pou kay kote pou m' rete a. Wa a ban mwen tou sa mwen te mande l' paske Bondye te avèk mwen. ⁹ ¶ Wa a te voye kèk ofisye nan lame a ak kèk kavalye pou ale avè m'. Se konsa, mwen pati pou pwovens ki lòt bò larivyè Lefrat la, mwen pase lakay tout gouvènè yo, mwen renmèt yo lèt wa a te ban mwen pou yo. ¹⁰ Men, lè Sanbala, moun lavil Bèt-Owon, ak Tobija, yon moun peyi Amon ki t'ap travay nan gouvènman an, vin konnen te gen yon nonm ki te vin travay pou byen pèp Izrayèl la, sa te gate san yo anpil. ¹¹ Lè m' rive lavil Jerizalèm, mwen kite twa jou pase anvan m' fè anyen. ¹² Apre sa, mwen leve nan mitan lannwit, mwen pran kèk moun pa m' avè m'. Mwen pati san m' pa di pesonn sa Bondye te ban m' lide fè pou lavil Jerizalèm. Sèl bèt nou te pran ak nou, se te bèt pou m' moute a. ¹³ Li te fè nwa. Nou soti nan pòtay Ti Fon an ki sou bò lwès, nou vire desann nan direksyon sid, nou pase devan Fontenn Dragon an, ak devan pòtay Depotwa a. Sou tout wout la, mwen t'ap egzaminen eta ranpa lavil Jerizalèm lan, kote ki te gen twou ak pòtay dife te boule yo. ¹⁴ Mwen vanse pi devan, mwen vire sou bò nò. Mwen pase devan pòtay Fontenn lan ak Rezèvwa Wa a. ¹⁵ Lè m' rive la, bèt mwen te moute a pa t' ka jwenn kote pou l' pase. Nan fènwa a, mwen pase nan ravin lan, mwen moute nan direksyon nò. Mwen t'ap egzaminen eta miray la byen. Apre sa, mwen kase tèt tounen sou menm chemen m' te pase a, mwen antre nan lavil la, nan pòtay Ti-Fon an. ¹⁶ Pesonn nan chèf lavil yo pa t' konnen kote m' te ale ni sa m' te al fè. Lè sa a, mwen pa t' ankò di jwif yo anyen, ni prèt yo, ni chèf yo, ni majistra yo, ni ankenn lòt moun ki te reskonsab travay

17
 reparasyon yo. Men lè sa a, mwen di yo: -Nou wè nan ki traka nou ye avèk lavil Jerizalèm k'ap fin kraze nan men nou avèk pòtay boule li yo. Vini non! Ann al rebati miray ranpa lavil la! Moun va sispann fè nou wont. 18
 Lè sa a, mwen fè yo konnen ki jan Bondye te la avè m' pou pwoteje m' ak tou sa wa a te di m'. Yo reponn: -Bon. Annavan! Ann al rebati! Epi yo ranje kò yo pou mete 19
 men nan travay la. Men, lè Sanbala, moun lavil Bèt-Owon an, Tobija, moun Amon ki t'ap travay nan gouvènman an, ak Gechèm, arab la, vin pran nouvèl la, yo ri nou kont kò yo, epi yo pase nou nan kont betiz yo. Yo di nou: -Sa n'ap fè la a, mesye? Apa n'ap dezobeyi lòd wa a! 20
 Mwen reponn, mwen di yo: -Se Bondye nan syèl la k'ap fè nou reyisi nan sa nou vle fè a. Nou menm ki sèvitè Bondye, nou pral konmanse rebati l'. Men nou menm, moun lòt nasyon, nou pa gen ankenn dwa sou lavil Jerizalèm. Nou pa gen anyen pou nou wè nan sa. Pesonn pa janm nonmen non nou nan koze lavil Jerizalèm.

Chapter 3

1
 ¶ Men ki jan yo rebati miray ranpa a. Elyachib, granprèt la, ansanm ak prèt parèy li yo rebati Pòtay Mouton yo. Yo fè sèvis pou mete l' apa pou Bondye, yo moute batan yo. Apre sa, yo rebati miray la jouk Fò Meyà ak Fò Ananeyèl. 2
 Moun lavil Jeriko yo rebati ti pòsyon ki vin apre pa Elyachib, granprèt la. Zakòv, pitit gason Imri a, rebati pòsyon ki vin apre pa moun Jeriko yo. 3
 Moun branch fanmi Sena yo rebati Pòtay Pwason yo. Yo plante gwo poto pòtay yo nan tè, yo moute batan yo, yo mete kwòk ak gwo ba pou fèmen pòtay yo. 4
 Meremòt, pitit Ouri, pitit pitit Akòk la, repare pòsyon ki vin apre a. Mechoulam, pitit gason Berekya a, pitit pitit Mechezabeyèl la, rebati pòsyon ki vin apre a. Zadòk, pitit gason Bana a, rebati pòsyon ki vin apre a. 5
 Moun lavil Tekoa yo rebati pòsyon ki vin apre a. Men, grannèg lavil Tekoa yo te refize fè travay chèf la te ba yo fè a. 6
 Jorada, pitit gason Paseyak, ak Mechoulam, pitit gason Besodya a, travay ansanm pou rebati Pòtay Ansyen an. Yo plante gwo poto pòtay yo nan tè, yo moute batan yo, yo mete kwòk ak gwo ba pou fèmen pòtay la. 7
 Melatya, moun lavil Gabawon, Jadon, moun lavil Mewonòt, avèk moun lavil Gabawon yo ansanm ak moun lavil Mispa yo rebati pòtay miray ki vin apre a, rive jouk bò kay gouvènè Pwovens lòt bò larivyè Lefrat la. 8
 Ouzyèl, pitit gason Araja, yon òfèv, te rebati pòsyon ki vin apre a. Ananya, yon nonm ki konn fè odè, te repare pòsyon ki vin apre a. Se konsa yo te ranfòse ranpa lavil Jerizalèm lan jouk gwo miray laj la. 9
 Refaja, pitit gason Our la, chèf mwatye lavil Jerizalèm, te repare pòsyon ki vin apre a. 10
 Jedaya, pitit gason Awoumaf, te rebati

pòsyon miray ki devan lakay li a. Atouch, pitit gason Achabneja a, rebati pòsyon ki vin apre a.
11

Malkija, pitit gason Arim lan, ak Achoub, pitit gason Pakat Moab la, te repare tou pòsyon ki vin
apre a, jouk Fò Founacho a. 12 Chaloum, pitit gason Aloèch la, chèf lòt mwatye lavil Jerizalèm la,

te rebati pòsyon ki vin apre a. Pitit fi li yo te ede l' nan travay la. 13 Anoun avèk moun ki rete lavil
Zanoak yo rebati Pòtay Ti-Fon an. Yo plante gwo poto pòtay yo nan tè, yo moute batan yo, epi yo
mete kwòk ak gwo ba pou fèmèn pòtay la. Epi yo repare yon bout nan miray la ki te mezire

milsenksan (1.500) pye longè rive jouk bò Pòtay Depotwa a. 14 Se Malkija, pitit gason Rekab la,
chèf lavil Bèt akerèm lan, ki te rebati Pòtay Depotwa a, li menm ansanm ak pitit gason l' yo. Yo
plante gwo poto pòtay yo nan tè, yo moute batan yo, epi yo mete kwòk ak gwo ba pou fèmèn pòtay

la. 15 Se Chaloum, pitit gason Koloze a, gouvènè lavil Mispa a, ki te rebati Pòtay Fontenn lan. Li
mete yon twati sou li, yo moute batan yo, epi yo mete kwòk ak gwo ba pou fèmèn pòtay la. Li refè
miray ki soti bò letan Chela a tou, toupren jaden wa a, rive jouk bò macheskalye ki desann soti nan

lavil David la. 16 Neemi, pitit Azbouk, chèf mwatye lavil Bèt-Sou a, te rebati pòsyon ki vin apre

a, rive bò tonm David la, bò sitèn dlo a, ak bò kazèn Vanyan gason yo. 17 Men moun Levi ki te
ede rebati miray ranpa yo: Reyoum, pitit gason Bani a, te rebati pòsyon ki vin apre pa Neemi an.
Achabya, chèf mwatye lavil Keyla a, rebati pòsyon ki vin apre a pou tout moun ki sou bò pa l' nan

lavil la. 18 Bavayi, pitit gason Enadad, ki te chèf lòt mwatye lavil Keyla a, te rebati pòsyon ki vin

apre a. 19 Ezè, pitit gason Jechwa a, chèf lavil Mispa, repare yon dezyèm lòt pòsyon ankò, pòsyon

ki vin apre a, anfas kote pou moute lasnal la, nan direksyon kwen miray ranpa a. 20 Bawouk, pitit
gason Zabayi a, te repare pòsyon ki vin apre a, depi kwen an rive devan pòt kay Elyachib, granprèt

la. 21 Meremòt, pitit gason Ouri a, pitit pitit gason Akòz, te rebati pòsyon ki vin apre a, pran depi

devan papòt kay Elyachib la rive jouk nan dènye bout kay la. 22 Men non prèt ki te ede nan rebati
miray ranpa lavil Jerizalèm lan tou. Prèt ki rete nan tout zòn bò lavil la rebati pòsyon miray ki vin

apre kay Elyachib la. 23 Benjamen ak Achoub te repare pòsyon miray ki devan lakay yo a, pòsyon
ki vin apre a. Azarya, pitit gason Maseya a, pitit pitit gason Ananya a, te rebati pòsyon miray ki

vin apre a, devan lakay li a. 24 Bennwi, pitit gason Enadad la, te repare yon lòt pòsyon ankò, pòsyon

ki vin apre a, depi bò kay Azarya a rive jouk nan kwen an. 25 Palal, pitit gason Ouzayi a, te repare
pòsyon ki vin apre a. Li konmanse nan kwen an, li pran miray Fò Palè Wa ki anwo nan lakou prizon

an. Pedaja, pitit gason Pareòch la, repare pòsyon ki vin apre a, 26 moute sou bò solèy leve, rive
anfas Pòtay Dlo yo, bò fò ki pwoteje Tanp lan. (Tout moun k'ap travay nan tanp lan te rete nan zòn

Ofèl la.) 27 Moun lavil Tekoa yo te repare yon lòt pòsyon ankò nan miray la, pòsyon ki vin apre

a, anfas gwo fò ki pwoteje tanp lan, rive toupre miray Ofèl la. ²⁸ Yon gwoup prèt te rebati pòsyon
 ki vin apre a, nan direksyon nò. Chak moun te rebati pòsyon ki devan kay yo a. ²⁹ Zadòk, pitit Imè
 a, te repare pòsyon ki vin apre a, anfas lakay li a. Chemaya, pitit Chekanya a, nonm ki te wachmann
³⁰
 Pòtay Solèy leve a, te rebati pòsyon ki vin apre a. Ananya, pitit Chelemaya a, ak Anoun, sizyèm
 gason Zalaf la, rebati pòsyon ki vin apre a. Se te dezyèm pòsyon yo te repare. Mechoulam, pitit
³¹
 gason Berekya a, rebati pòsyon ki te vin apre a, anfas lakay li a. Malchiya, yon òfèv, te repare
 pòsyon ki vin apre a, jouk kote travayè tanp yo ak kòmèsan yo rete, anfas Pòtay Mifkad la ki bay
³²
 sou tanp lan, toupre pyès chanm ki anwo kwen sou bò miray la. Efèy yo ak kòmèsan yo te rebati
 pòsyon miray ki soti bò pyès chanm anwo kwen nò a rive Pòtay Mouton yo.

Chapter 4

¹
 ¶ Lè Sanbala vin konnen nou menm jwif yo nou t'ap rebati miray ranpa a, li fache, li move.
²
 Li konmanse pase nou nan betiz. Li t'ap di devan moun pa l' yo ak devan sòlda lame peyi Samari
 a: -Kisa jwif yo konprann y'ap fè la a? Yo ta renmen rebati lavil la. Yo konprann avèk tout bèt y'ap
 ofri pou touye yo, nan yon jou yo pral fini? Yo mete nan tèt yo avèk demoli ki fin tounen pousyè
 ak sann dife yo ka fè wòch pou rebati lavil la. ³ Tobija, moun peyi Amon an, te kanpe bò kote
 Sanbala. Li t'ap di: -Anhan! Y'ap rebati! Kite yon chat mawon vole sou miray wòch yo a, sa kont
⁴
 pou jete l' atè! Lè sa a, mwen menm, Neemi, mwen lapriyè Bondye. Mwen di l': -O Bondye papa
 nou! Tande jan y'ap pase nou nan betiz! Sa yo ta renmen wè rive nou an, se sa ki pou rive yo! Se
 yo ki pou wont! Se pou lènmi vin fè yo prizonye epi pou li depòte yo tout nan yon lòt peyi. ⁵ Pa
 padonnen sa yo fè ki mal. Pa janm bliye peche yo fè a, paske yo t'ap pale moun ki t'ap rebati lavil
 ou a mal. ⁶ Se konsa, nou t'ap rebati ranpa a. Anvan lontan, ranpa a te gen tan rive nan mwaye
 wotè, paske pèp la te soti pou l' te fè travay la. ⁷ ¶ Lè Sanbala ak Tobija ansanm ak moun Arabi
 yo, moun Amon yo ak moun Achdòd yo tande travay reparasyon miray ranpa lavil Jerizalèm yo
 t'ap mache, epi twou ki te nan miray yo te konmanse bouche, yo fè gwo kòlè, yo fache. ⁸ Yo mete
 tèt yo ansanm pou yo vin atake lavil Jerizalèm, pou yo bay pwoblèm. ⁹ Men, nou lapriyè Bondye
 nou an, epi nou mete moun ap veye lajounen kou lannwit, pou pwoteje nou. ¹⁰ Men, moun peyi
 Jida yo t'ap plede di: -Nou fin fèb nan pote chay! Gen twòp vye ranblè pou n' netwaye! Nou p'ap
¹¹
 janm fin rebati miray sa a! Lènmi nou yo menm, bò pa yo, t'ap di: -San yo pa konnen, san yo

pa wè anyen, n'ap gen tan nan mitan yo. N'ap masakre yo, n'ap fè travay la sispann. ¹² Men, chak fwa lènmi nou yo moute vin atake nou, jwif ki t'ap viv nan mitan yo te vin avèti nou. Konsa konsa, an dis fwa. ¹³ Lè konsa, mwen ranje pèp la dèyè ranpa a, chak fanmi apa, avèk nepe yo, frenn yo ak banza yo. Mwen mete yo kote miray la pa t' ankò fini an. ¹⁴ Lè m' wè pèp la te gen kè sote, mwen leve, mwen pale ak chèf yo ak majistra yo ak tout rès pèp la, mwen di yo: -Nou pa bezwen pè moun sa yo! Chonje jan Seyè a gen pouvwa, jan li fè moun pè l'. Ann goumen pou moun menm ¹⁵ ras ak nou yo, pou pitit fi nou yo, pou pitit gason nou yo, pou madanm nou yo ak kay nou yo. Lè lènmi nou yo wè nou te konnen sa yo t'ap konplote a, yo vin konprann Bondye te soti pou gate plan yo. Apre sa, nou tounen al travay nan miray ranpa a, chak moun bò pa yo. ¹⁶ ¶ Depi lè sa a, mwatye nan gason yo al nan travay, lòt mwatye a t'ap veye avèk frenn yo, pwotèj pou bra yo, banza yo ak gwo plak fè sou lestonmak yo pou pwoteje yo. Tout chèf yo te la dèyè pèp Jida a ¹⁷ ki t'ap rebati ranpa a. Tout moun ki t'ap bwote materyo te gen zam tou. Yo t'ap travay ak yon men, nan lòt men an yo te kenbe zam yo. ¹⁸ Moun ki t'ap travay yo menm te toujou gen yon nepe pase nan ren yo. Nèg ki te konn kònen klewon an te toujou bò kote m'. ¹⁹ Mwen di chèf yo, majistra yo ansanm ak tout rès pèp la: -Chantye a se yon gwo chantye. Travay la gaye, kifè nou yonn pa pre lòt sou ranpa a. ²⁰ Depi nou tande klewon an bay siyal la, n'a kouri vin sanble bò kote m'. Bondye nou an va goumen pou nou. ²¹ Se konsa, chak jou, depi bajou kase jouk zetwal parèt nan syèl la, mwatye nan nou t'ap mennen travay la sou ranpa a, lòt mwatye a t'ap veye avèk zam yo nan men yo. ²² Nan menm epòk la, mwen pale ak pèp la. Mwen di yo konsa: -Se pou tout moun rete pase nwit lavil Jerizalèm ansanm ak domestik yo. Konsa, n'a pase tout nwit la ap veye. Lajounen, n'a travay. ²³ Se konsa, lannwit, nou pa janm wete rad sou nou, ni mwen, ni frè parèy mwen yo, ni domestik nou yo, ni gad kò m' yo. Nou tout nou te gen zam nou bò kote nou.

Chapter 5

¹ ¶ Yon lè, moun pèp Izrayèl yo ansanm ak tout madanm yo konmanse plenyen sou do kèk chèf jwif parèy yo. ² Genyen ki t'ap di: Nou gen anpil moun nan fanmi nou, anpil pitit gason ak anpil pitit fi. Nou bezwen manje pou n' manje pou n' pa mouri grangou. ³ Gen lòt ki t'ap di: Nou te gen yon sèl grangou ki t'ap bat nou, nou setoblige pran potèk sou jaden nou, sou pye rezen nou yo, sou kay nou pou n' ka jwenn manje pou n' manje. ⁴ Gen lòt ankò ki t'ap di: Pou n' te ka peye taks

5
 kontribisyon pou wa a, nou te setoblaje prete lajan sou jaden ak pye rezen nou yo. Nou menm ras ak lòt jwif yo. Pitit nou yo pa pi mal pase pa yo. Men, nou setoblaje bay pitit fi nou ak pitit gason nou yo sèvi domestik lakay yo. Nou menm rive gen pitit fi nou k'ap fè restavèk! Nou pa ka fè anyen

6
 kont sa, paske jaden nou yo ak pye rezen nou yo pa pou nou ankò. ¶ Lè mwen menm, Neemi,

7
 mwen tande tout plent sa yo, tout pawòl sa yo, mwen te fache anpil. Lè m' fin kalkile bagay la byen nan kè m', mwen fè lide pa dòmi sou sa. Mwen denonse chèf yo, grannèg yo ak majistra yo. Mwen di yo se esplwate y'ap esplwate frè parèy yo. Mwen fè reyini tout moun pou diskite pwoblèm

8
 lan. Epi mwen di: -Nou fè sa nou te kapab pou nou te rachte frè jwif parèy nou yo ki te vann tèt yo bay moun lòt nasyon pou sèvi yo esklav. Koulye a, se nou menm jwif k'ap fòse jwif parèy nou vann tèt yo bay jwif parèy yo! Tout moun rete bouch pe, yo pa t' gen anyen pou reponn nan sa.

9
 Mwen di yo ankò: -Sa n'ap fè la a pa bon, tande! Se pou n' mache avèk krentif pou Bondye, pou

10
 nou pa bay moun lòt nasyon yo, lènmi nou yo, okazyon pase nou nan betiz. Moun lakay mwen yo ansanm ak moun pa m' yo tou, ak mwen menm tou, nou te prete yo lajan ak ble. Nou p'ap mande

11
 yo pou yo renmèt nou sa yo dwe nou. Renmèt yo jaden yo, pye rezen yo, pye oliv yo ak kay yo

12
 touswit. Kite tou sa yo dwe nou pou yo, kit se lajan, kit se ble, kit se diven, kit se lwil. Chèf yo reponn: -Wi! N'ap fè jan ou di l' la. N'ap renmèt yo tou sa yo te ban nou kenbe pou dèt yo. Nou p'ap mande yo pou yo peye nou sa yo dwe nou. Lè sa a, mwen fè rele prèt yo, epi mwen fè chèf yo

13
 sèmante y'ap fè sa yo sot pwomèt la. Apre sa, mwen pran ti sak ki te mare nan ren mwen an, mwen vire l' tèt anba, mwen souke l', epi mwen di: -Se pou Bondye pran nenpòt nan nou ki pa kenbe pwomès li, pou l' souke l' konsa tou. Bondye ap pran kay li ak tout lòt byen li genyen, l'ap kite l' san anyen. Tout moun ki te la yo reponn: -Amèn! Se sa menm! Se sa menm! Apre sa, yo fè

14
 lwanj Seyè a. Se konsa tout pèp la te kenbe pwomès yo te fè a. ¶ Pandan tout douzan mwen pase gouvènè nan peyi Jida a, depi jou wa Atagzèsès te nonmen m' nan pòs sa a, lè sa a li t'ap mache sou ventan depi li te wa, rive sou tranndezan depi li t'ap gouvènè an, ni mwen ni ankenn moun

15
 lakay mwen, nou pa janm manyen lajan yo te dwe peye gouvènè a. Gouvènè ki te la anvan m' yo te konn ap peze pèp la: chak jou yo te konn pran karant pyès an ajan pou pen ak diven. Ata moun ki t'ap travay avèk yo te konn ap peze pèp la tou. Men mwen menm, mwen pa t' fè sa, paske mwen

16
 te gen krentif Bondye. Mwen te mete men nan travay ranpa a tankou tout moun, mwen pa achte

17
 ankenn tè, epi tout moun ki t'ap travay avè m' yo te la tou nan travay miray la. Chak jou mwen te gen sansenkant (150) moun ap manje sou menm tab avè m' lakay mwen: se te chèf yo ak majistra

18
 yo, san konte tout lòt moun ki te vin lakay mwen soti nan lòt peyi nan vwazinaj la. Chak jou mwen te fè yo kwit pou mwen yon bèf, sis bon mouton byen gra ak anpil bèt volay. Se mwen menm ki te peye pou tout bagay sa yo ak lajan nan pòch mwen. Chak dis jou mwen fè yon pwovizyon

diven fre. Men, malgre sa, mwen pa janm mande pou yo ban mwen sa pou yo bay gouvènè a pou manje l', paske pèp la te gen kont chay sou do li deja.¹⁹ Bondye mwen, tanpri, pa bliye anyen nan tou sa mwen fè pou pèp sa a. Make sa yon kote pou mwen!

Chapter 6

¹ ¶ Sanbala, Tobija, Gechèm, moun peyi Arabi a, ansanm ak tout rès lènmi nou yo vin konnen nou te fin rebati miray la. Pa t' gen ankenn twou ladan l' ankò. Men lè sa a, nou pa t' ankò moute gwo batan pòtay yo.² Sanbala ak Gechèm voye yon mesaj vin di m' yo ta renmen kontre avè m' lavil Akkefirim, nan Fon Ono a. Men yo menm, yo t'ap chache yon jan pou yo fè m' mal.³ Se konsa mwen voye mesaj bò kote yo avèk repons sa a: -M' okipe ak yon travay enpòtan, m' pa ka desann. Si m' kite travay la pou m' ale kote nou, li pral sispann.⁴ An kat fwa, yo voye fè m' menm envitasyon an. Chak fwa, mwen voye menm repons lan ba yo.⁵ Lè sa a, Sanbala voye yon senkyèm mesaj ban mwen. Men fwa sa a, li renmèt yon lèt nan yon anvlòp tou louvri bay yonn nan moun k'ap sèvi l' yo pou mwen.⁶ Men sa ki te nan lèt la: Gen yon sèl bri k'ap kouri nan mitan moun lòt nasyon yo: Se Gechèm ki di m' sa. Li tande l' ak de zòrèy li. Ou menm ak pèp jwif la, nou fè lide pran lezam. Se poutèt sa n'ap rebati ranpa a. Yo di se ou menm y'a nonmen wa yo.⁷ Ou menm rive ranje ak kèk pwofèt pou yo mache fè konnen nan tout lavil Jerizalèm se ou menm ki wa peyi Jida a. Koulye a, tout bri sa yo pral rive nan zòrèy wa a. Se poutèt sa, mwen mande ou pou ou vin kote m' pou nou fè yon ti pale ansanm sou koze a.⁸ Mwen voye reponn li: -Tou sa ou di la a se manti. Se ou menm menm ki fè koze a.⁹ Yo t'ap chache kraponnen nou pou rete travay la. Yo t'ap di nan kè yo: Talè konsa y'a dekouraje avèk travay la, li p'ap janm fini. Aa, Bondye! Ban m' fòs non! Fè m' pa dekouraje!¹⁰ ¶ Yon lòt jou ankò, m' te al wè Chemaja, pitit gason Delaja, pitit pitit Metabeyèl, lakay li, paske li menm li pa t' ka soti. Li di m' konsa: -Ann al nan tanp Bondye a, nan mitan kote yo mete apa pou Bondye a! Ann al kache kote yo mete apa pou Bondye a! N'a fèmen tout pòt yo byen fèmen, paske y'ap vin touye ou. Wi, aswè a menm, y'ap vin touye ou!¹¹ Mwen reponn li: -Se pa mwen ki pou kouri al kache. Epitou, yon moun tankou mwen pa pral kache nan tanp lan pou m' sove lavi m'. Non! Mwen pa prale!¹² Lè m' kalkile, mwen wè se pa t' Bondye ki te ba l' mesaj sa a pou mwen. Se Tobija ak Sanbala ki te peye l' pou l' te di m' sa.¹³ Konsa, mwen ta pran nan kraponnay, mwen ta fè sa l' di m' fè a, epi mwen ta fè bagay mwen pa gen dwa fè. Yo menm, lè sa a, yo ta pran sa pou pale m' mal, yo ta fè m' wont.¹⁴ O Bondye mwen, pa bliye sa Tobija ak Sanbala

te fè! Pa bliye Nadya, fanm ki pwofèt la, ansanm ak lòt pwofèt yo ki t'ap chache kraponnen m'!
15

¶ Se konsa, apre senkannde jou travay, ranpa a te fin repare. Lè sa a, nou te rive sou vennsenkyèm
16
jou nan mwa Eloul la. Lè lènmi nou yo vin konn sa, lè moun lòt nasyon k'ap viv nan vwazinaj

nou yo wè sa, yo te wont. Yo rekonèt si travay la te fini se paske Bondye nou an te vle l'.
17 Pandan

tout tan sa a, chèf peyi Jida yo te kenbe kontak ak Tobija. Yonn t'ap voye lèt bay lòt.
18 Te gen
anpil moun nan peyi Jida a ki te pou Tobija paske se bofis Chekanya, pitit Arak la, li te ye. Lèfini

19
Jokanan, pitit gason li a, te marye ak pitit fi Mechoulam, pitit Berekya a. Yo te konn ap fè lwanj
Tobija devan m', yo t'ap di tout bèl bagay Tobija te fè. Epi apre sa, y' al rapòte l' tou sa m' te di.
Tobija menm t'ap voye lèt ban mwen pou kraponnen m'.

Chapter 7

1
¶ Lè nou te fin rebati miray la, nou moute gwo batan pòtay yo. Nou bay gad tanp yo, moun
k'ap chante yo ak moun Levi yo travay yo gen pou yo fè.
2 Mwen mete de moun reskonsab pou
gouvènèn lavil Jerizalèm lan. Se te Anani, frè mwen an, ak Ananya, kòmandan gwo fò a. Ananya

3
sa a te yon nonm serye ki te gen krentif pou Bondye. Pa t' gen tankou l'. Mwen di yo pa kite yo
louvri pòtay lavil Jerizalèm yo nan maten toutotan solèy la pa konmanse cho. Konsa tou, aswè se
devan yo pou yo fè fèmèn batan pòtay yo epi pou yo mete ba yo dèyè pòtay yo anvan gad yo leve
pòs le solèy pral kouche. Y'a chwazi kèk moun nan moun ki rete lavil Jerizalèm yo, yon seri pou

4
fè pòs sou miray la, yon lòt pou fè patwouy bò lakay yo. Lavil la te gran anpil, te gen anpil espas,

5
men pa t' gen anpil moun ki t'ap viv ladan l'. Yo pa t' ankò rebati anpil kay. ¶ Bondye mete nan
tèt mwen lide pou m' sanble tout pèp la ak chèf yo, majistra yo, pou m' fè yon resansman, fanmi
pa fanmi. N' al tonbe sou ansyen rejis resansman premye moun ki te tounen nan peyi a. Nan rejis

6
sa a m' te jwenn lis moun ki te kite pwovens Babilòn pou yo tounen lavil Jerizalèm ak nan peyi
Jida, chak moun nan lavil kote yo te moun. Se moun sa yo wa Nèbikadneza te fè depòte nan peyi

7
Babilòn. Men non chèf ki te vin ak yo: Zowobabèl, Jozye, Neemi, Azarya, Ramiya, Nachamani,
Madoche, Bilchan, Misperèt, Bigwayi, Nawoum ak Bana. Men lis moun nan pèp Izrayèl la, fanmi

8
pa fanmi, ak kantite moun nan chak branch fanmi: Nan fanmi Pareòch yo, demil sanswasanndouz

9
(2.172) moun, nan fanmi Chefatya yo, twasanswasanndouz (372) moun, nan fanmi Arak yo,

10
sisanssenkannde (652) moun, nan fanmi Pakat Moab yo, pitit pitit Jechwa ak Joab, demil
11

wisandiswit (2.818) moun,¹² nan fanmi Elam yo, mil desansenkannkat (1254) moun,¹³ nan fanmi
 Zatou yo, witsankaransenk (845) moun,¹⁴ nan fanmi Zakayi yo, sètsansousant (760) moun,
¹⁵ nan fanmi Bennwi yo, sisankaranntwit (648) moun,¹⁶ nan fanmi Bebayi yo, sisanvenntwit (628)
 moun,¹⁷ nan fanmi Azgad yo, demil twasanvennde (2.322) moun,¹⁸ nan fanmi Adonikan yo,
 sisanswasansèt (667) moun,¹⁹ nan fanmi Bigwayi yo, demil swasansèt (2.067) moun,²⁰ nan
 fanmi Aden yo, sisansenkansenk (655) moun,²¹ nan fanmi Atè yo, katrevendizwit moun, (Anvan
 sa, Atè te rele Ezekyas)²² nan fanmi Achoum yo, twasanvenntwit (328) moun,²³ nan fanmi
 Betsayi yo, twasanvennkat (324) moun,²⁴ nan fanmi Arif yo, sandouz (112) moun,²⁵ nan fanmi
 Gabawon yo, katrevenkenz moun.²⁶ Men lis moun ki te tounen dapre non lavil kote yo moun:
 Pou lavil Betleyèm ak pou lavil Netofa, sankatreventwit (188) moun,²⁷ pou lavil Anatòt,
²⁸ sanvenntwit (128) moun,²⁹ pou lavil Azmavèt, karande moun,³⁰ pou lavil Kiriyat-Jearim, lavil
 Kefira ak lavil Bewòt, sètsankaranntwa (743) moun,³¹ pou lavil Rama ak pou lavil Geba,
 sisanventeyen (621) moun,³² pou lavil Mikmas, sanvennde (122) moun,³³ pou lavil Betèl ak pou
 lavil Ayi, sanvenntwa (123) moun,³⁴ pou lavil Neba, senkannde moun,³⁵ pou lavil Elam lan,
 mil desansenkannkat (1.254) moun,³⁶ pou lavil Arim lan, twasanven (320) moun,³⁷ pou lavil Lòd ansanm ak pou lavil Adid ak Ono,
³⁹ sètsanventeyen (721) moun,³⁸ pou lavil Sena, twamil nèfsantrant (3.930) moun.³⁹ Men lis prèt
 ki te tounen, dapre non fanmi yo: Nan pitit Jedaja ki te soti nan branch fanmi Jozye a,
⁴⁰ nèfsanswasantrèz (973) moun,⁴¹ nan pitit Imè yo, mil senkannde (1.052) moun,⁴² nan pitit
 Pachou yo, mil desankaransèt (1.247) moun,⁴³ nan pitit Arim yo, mil disèt (1.017) moun.⁴⁴ Men
 lis moun Levi ki te tounen yo: Te gen swasannkatòz moun nan pitit Jechwa ak pitit Kadmyèl ki
⁴⁴ soti nan branch fanmi Odva a.⁴⁵ Te gen sankarantwit (148) sanba, moun ki konn chante ak moun
⁴⁵ ki konn fè mizik nan tanp lan, epi ki soti nan branch fanmi Asaf la.⁴⁶ Te gen santranntwit (138)
 moun ki pou sèvi gad nan pòtay tanp lan epi ki soti nan branch fanmi Chaloum, branch fanmi Atè,
⁴⁶ branch fanmi Talmon, branch fanmi Akoub, branch fanmi Atita ak branch fanmi Chobayi.⁴⁷ Men
 lis moun yo te bay pou travay nan tanp Bondye a, epi ki te tounen nan peyi a. Se moun fanmi Zika,
⁴⁷ moun fanmi Asoufa ak moun fanmi Tabayòt,⁴⁸ moun fanmi Kewòs, moun fanmi Sya ak moun
⁴⁸ fanmi Padon,⁴⁹ moun fanmi Lebana, moun fanmi Agaba ak moun fanmi Samayi,⁴⁹ moun fanmi
⁵⁰ Anan, moun fanmi Gidèl ak moun fanmi Gaka,⁵⁰ moun fanmi Reaja, moun fanmi Rezin ak moun

⁵¹ fanmi Nekoda, ⁵² moun fanmi Gazam, moun fanmi Ouza ak moun fanmi Paseyak, ⁵³ moun fanmi Besayi, moun fanmi Meounim ak moun fanmi Nefichim, ⁵⁴ moun fanmi Bakbouk, moun fanmi Akoufa ak moun fanmi Awou, ⁵⁵ moun fanmi Baslou, moun fanmi Mechida ak moun fanmi Acha, ⁵⁶ moun fanmi Bakòs, moun fanmi Sisera ak moun fanmi Tamak, ⁵⁷ moun fanmi Nezyak ak moun fanmi Atifa. ⁵⁸ Men lis non moun nan branch fanmi domestik Salomon yo ki te tounen nan peyi a: Moun fanmi Sotayi, moun fanmi Asoferèt ak moun fanmi Perida, ⁵⁹ moun fanmi Jaala, moun fanmi Dakon ak moun fanmi Gidèl, ⁶⁰ moun fanmi Chefatya, moun fanmi Atil, moun fanmi Pokerèt, moun fanmi Azebayim ak moun fanmi Amon. ⁶¹ Konsa, men kantite moun ki soti nan fanmi travayè tanp lan ak domestik Salomon yo: antou twasankatrevendouz (392). ⁶² Men te gen yon seri moun ki soti nan lavil Tèl Melak, lavil Tèl Acha, lavil Kewoub Adan, ak lavil Imè nan peyi Babilòn epi ki te moute ak tout moun sa yo, atout yo pa t' ka rive fè konnen non zansèt yo ak non fanmi yo pou yo te ka fè wè yo fè pati pèp Izrayèl la vre. ⁶³ Se te pitit Delaja, Tobija ak Nekoda: antou sisankarannde (642). ⁶⁴ Konsa tou, pami prèt yo te gen moun fanmi Obaja, Akòs ak Bazilayi. Zansèt moun Bazilayi sa yo te marye ak yon fanm nan fanmi Bazilayi, moun Galarad. Se konsa yo te pran non papa manman yo. ⁶⁵ Moun sa yo pa t' ka jwenn rejis pou moutre ki moun ki zansèt yo. ⁶⁶ Konsa yo pa t' asepte yo pou prèt. ⁶⁷ Gouvènè jwif la te di yo yo pa t' kapab manje nan manje yo mete apa pou Bondye a toutotan pa t' gen prèt ki konn sèvi ak Ourim yo ansanm ak Tourim yo pou wè sa Bondye di nan sa. ⁶⁸ Antou nèt, te gen karann demil twasanswasant (42.360) moun ki tounen soti nan peyi kote yo te depòte yo a. ⁶⁹ Avèk yo te gen sèt mil twasantrann sèt (7.337) gason ak fanm ki te sèvi yo domestik. Te gen tou desan (200) gason ak fanm ki te konn fè mizik ak konn chante. ⁷⁰ Te gen sètanswasannsis (766) chwal, desankarannsenk (245) milèt, ⁷¹ kasantrannsenk (435) chamo ak simil sèt sanven (6.720) bourik. ⁷² Te gen kèk chèf ki te fè ofrann pa yo pou travay la san pesonn pa fòse yo. Gouvènè a te bay pou mete nan kès la desanswasann dis (270) ons lò, senkant gwo plat pou sèvis, senksantrant (530) rad pou prèt yo mete sou yo ak onz mil ⁷³ sisankatreventrèz (11.693) ons ajan. ⁷⁴ Chèf fanmi yo te bay pou mete nan kès la pou fè travay la: senkmil kasan (5.400) ons lò ak senkanteyenmil kasan senkant (51.450) ons ajan. ⁷⁵ Rès moun pèp la te fè anpil kado tou. Antou, yo te bay senkmil kasan (5.400) ons lò, karannsimil sètanswasann dis (46.770) ons ajan ak swasann sèt rad pou prèt yo. ⁷⁶ Prèt yo, moun Levi yo, gad

pòtay tanp yo, mizisyen yo ak anpil nan moun pèp Izrayèl yo ansanm ak travayè tanp yo, wi tout pèp Izrayèl la al rete nan lavil kote yo moun.

Chapter 8

¹ ¶ Lè setyèm mwa lanne jwif yo rive, tout moun pèp Izrayèl yo te chita lakay yo nan lavil yo. Lè sa a, yo tout nèt, yo te sanble sou plas piblik ki devan pòtay Dlo yo. Yo mande Esdras, direktè lalwa a, pou li pote liv lalwa Seyè a te bay Moyiz pou pèp Izrayèl la. ² Esdras, prèt la, pran liv la, li pote l' kote tout moun yo te reyini an: fanm, gason ak tout timoun ki te gen laj konprann. Se te ³premye jou nan setyèm mwa a. Se konsa, sou plas ki devan pòtay Dlo yo, Esdras li nan liv lalwa a pou yo, depi granmaten jouk rive midi. Tout pèp la, fanm, gason ak tout timoun ki te gen laj ⁴konprann, te louvri zòrèy yo pou yo tande sa ki te nan liv lalwa a. Esdras, direktè lalwa a, te kanpe sou yon lestrad an bwa yo te bati espre pou sa. Sou bò dwat li, te gen Matitya, Chema, Anaja, Ourija, Ilkija ak Maseja. Sou bò gòch li, te gen Pedaja, Mikayèl, Malkija, Achoum, Achbadana, ⁵Zakarya ak Mechoulam. Kote Esdras te kanpe byen wo sou lestrad la, li louvri liv la devan tout moun. Lè sa a, tout pèp la leve kanpe. ⁶ Esdras di: -Lwanj pou Seyè a, Bondye ki gen pouvwa a. Tout pèp la leve men yo anlè, yo reponn: -Amèn! Li merite sa vre! Lèfini, yo mete ajenou, yo bese ⁷tèt yo jouk atè devan Seyè a. Apre sa, pèp la leve kanpe epi kèk moun Levi pran esplike yo lalwa a. Se te Jechwa, Bani, Cherebya, Jamen, Akoub, Chabetayi, Odija, Maseja, Kelita, Azarya, Jozabab, ⁸Anan, Pelaja. Yo t'ap li nan liv lalwa Bondye a, yo t'ap tradwi l' pou yo, yo t'ap esplike l' ba yo, pou yo te ka konprann sa yo t'ap li pou yo a. ⁹ ¶ Lè pèp la tande sa ki te ekri nan liv lalwa a, yo pran kriye. Lè sa a, Neemi, gouvènè a, ansanm ak Esdras, prèt direktè lalwa a, ak lòt moun Levi yo ki t'ap esplike lalwa a di moun yo konsa: -Jou sa a, se yon jou yo mete apa pou Seyè a, Bondye ¹⁰nou an! Pa kite lapenn anvayi kè nou! Pa kriye, mezanmi! Okontrè, al lakay nou, fè fèt! Separe vyann gra ak bon ti likè nou genyen ak moun ki pa genyen, paske jou sa a se yon jou nou fèt pou mete apa pou Seyè a. Pa kite lapenn pran nou! Kontantman Bondye ap mete nan kè nou an va ban ¹¹nou fòs! Tout moun Levi yo pran mache nan mitan tout pèp la pou fè yo pe. Yo t'ap di yo: -Pe ¹²bouch nou, mezanmi! Siye dlo nan je nou! Jou sa a se yon jou apa pou Bondye li ye! Se konsa tout pèp la al lakay yo, yo manje, yo bwè, yo separe sa yo genyen ak lòt moun. Tout moun te kontan, ¹³yo t'ap fè fèt, paske yo te konprann sa yo te li pou yo nan liv la. ¶ Nan denmen, tout chèf branch fanmi pèp Izrayèl yo, prèt yo ak moun Levi yo sanble ankò bò direktè Esdras pou yo te ka etidye

14
 pawòl lalwa a. Men sa yo jwenn nan lalwa Seyè a te bay Moyiz pou yo a: Pandan y'ap fete fèt
 15
 setyèm mwa a, moun Izrayèl yo va rete nan ti joupa. Lè yo vin konn sa, yo voye fè piblikasyon
 nan lavil Jerizalèm ak nan tout lavil yo. Yo voye mesaj sa a bay tout moun: -Ale nan mòn. Koupe
 branch nan pye oliv, nan pye pichpen, nan pye pwadous, ak nan tout lòt kalite pyebwa ansanm ak
 16
 fèy palmis pou nou fè ti joupa jan sa ekri nan liv la. Se konsa, pèp la ale, yo ranmase kont branch
 bwa yo, epi yo moute yon pakèt ti joupa. Genyen ki bati ti joupa yo sou teras anwo tèt kay yo.
 Genyen ki fè l' nan lakou lakay yo. Gen lòt ankò ki bati pa yo nan gwo lakou Tanp lan, sou plas
 17
 piblik ki bò pòtay Dlo yo ak sou plas ki bò pòtay Efrayim lan. Se konsa, tout moun ki te tounen
 nan peyi kote yo te depòte yo a moute ti joupa epi yo rete anba yo. Depi sou rèy Jozye, pitit Noun
 lan, se te premye fwa moun pèp Izrayèl yo t'ap fete fèt sa a konsa. Tout moun te kontan. Yo t'ap
 18
 fete. Yo pase sèt jou ap fete. Chak jou, depi premye jou a jouk dènye jou a, yo t'ap li nan liv
 lalwa Bondye a. Sou wityèm jou a, yo fè yon gwo reyinyon pou fèmen fèt la jan regleman an mande
 l' la.

Chapter 9

1
 ¶ Sou vennkatriyèm jou nan menm mwa a, tout moun pèp Izrayèl yo reyini pou fè jèn pou
 mande Bondye padon pou peche yo. Tout moun te la, yon rad sak kòlèt sou yo, pousyè tè kouvri
 2
 tout tèt yo pou fè wè jan yo te nan lapenn. Tout moun pèp Izrayèl yo mete kò yo ansanm. Yo pa
 kite ankenn moun lòt nasyon mele ak yo. Epi se konsa yo kanpe, yo konmanse di tou sa yo menm
 3
 yo fè ki mal ansanm ak tout peche zansèt yo te fè. Pandan twazè, yo tout rete kanpe kote yo te
 ye a, y'ap tande moun ap li nan liv lalwa Seyè a, Bondye yo a. Apre sa, pandan twazè ankò, yo t'ap
 4
 di tout peche yo te fè, epi yo tonbe ajenou ap adore Seyè a, Bondye a. ¶ Yo te moute yon lestrad
 pou moun Levi yo. Men moun ki te kanpe sou lestrad la: Se te Jozye, Bani, Kadmyèl, Chebanya,
 5
 Bouni, Cherebya, Bani ak Kenani. Yo t'ap lapriyè byen fò nan pye Bondye. Apre sa, moun Levi
 sa yo: Jozye, Kadmyèl, Bani, Achabnya, Cherebya, Odija, Chebanya ak Petaja pran lapawòl. Yo
 di: -Leve non, mezanmi! Fè lwanj Seyè a, Bondye nou an, pou toutan toutan! Se pou nou tout fè
 lwanj non li ki gen pouvwa, malgre moun p'ap janm ka rive fin di li mèsè ni fè lwanj li jan li merite
 6
 l' la. Seyè, se ou menm ki sèl mèt. Pa gen lòt. Se ou ki fè syèl la, sa ki anwo syèl la ansanm ak
 tout sa ki ladan l'. Se ou ki fè tè a ak tou sa ki sou li, lanmè a ak tou sa ki ladan l'. Se ou ki bay tout
 7
 bagay sa yo lavi. Tout pouvwa nan syèl la bese tèt devan ou pou adore ou. Seyè, se ou menm
 Bondye ki te chwazi Abram, ki te fè l' kite lavil Our nan peyi Kalde. Ou chanje non l', ou rele l'

⁸
 Abraram. Lè ou wè li te soti pou l' kenbe pawòl li ak ou, ou pase yon kontra avè l'. Ou pwomèt w'ap ba li peyi moun Kanaran yo, peyi moun Et yo ak peyi moun Amori yo, peyi moun Ferezi yo, peyi moun Jebis yo ak peyi moun Gigach yo pou li ak pou pitit pitit li yo. Ou te kenbe pwomès ou
⁹
 yo paske ou pa janm nan bay manti. Ou te wè jan zansèt nou yo t'ap soufri nan peyi Lejip. Ou te
¹⁰
 tandè jan yo t'ap rele mande sekou bò lanmè Wouj la. Ou te fè anpil mirak ak mèvèy pou pini farawon an, moun ki t'ap sèvi l' yo ansanm ak tout pèp peyi Lejip la paske ou te konnen jan moun
¹¹
 sa yo t'ap maltrete pèp ou a. Depi lè sa a, y'ap nonmen nou ou jouk jòdi a. Ou louvri yon chemen nan lanmè a pou pèp la pase san pye yo pa mouye. Moun ki t'ap pousib yo, ou neye yo nan fon
¹²
 lanmè. Yo fè fon tankou wòch nan gwo lanmè. Lajounen se avèk yon gwo nwaj ou moutre yo
¹³
 chemen pou yo pran. Lannwit, avèk yon flannm dife, ou klere chemen kote pou yo pase. Ou soti nan syèl la, ou desann sou mòn Sinayi a pou pale ak yo. Ou ba yo regleman ki pou fè yo mache
¹⁴
 dwat, lwa ki gen verite ladan l'. Ou ba yo bon prensip ak bon kòmandman. Ou moutre yo pou yo mete jou repo a apa pou ou. Ou voye Moyiz, sèvitè ou la, pou li ba yo tout kòmandman, tout
¹⁵
 lòd ak lalwa ou mande pou yo swiv. Lè yo te grangou, ou ba yo pen ki soti nan syèl la. Lè yo te swaf dlo, ou fè dlo pete soti nan wòch. Ou ba yo lòd pou y' al pran pou yo peyi ou te pwomèt ou
¹⁶
 t'ap ba yo a. Men, zansèt nou yo kite lògèy vire lòlòj yo. Yo fè tèt di, yo derefize obeyi lòd ou
¹⁷
 te ba yo. Yo refize obeyi ou, yo bliye tout bèl mèvèy ou te fè pou yo. Yo fè tèt di, yo chwazi yon chèf pou mennen yo tounen nan esklavaj peyi Lejip la. Men, ou se Bondye ki konn padonnen. Ou gen pitye, ou gen bon kè. Ou pa fè kòlè fasil, Ou pa t' janm sispann renmen yo. Ou pa t' lage
¹⁸
 yo. Yo fonn metal, yo fè yon zidòl fòm yon ti towò bèf. Epi yo di se li menm ki bondye yo,
¹⁹
 bondye ki te fè yo moute soti kite peyi Lejip. Lè sa a, se pi gwo jouman yo ta ka fè ou! Men, ou pa vire do ou kite yo nan dezè a, sitèlman ou te gen anpil pitye pou yo. Ou pa t' wete nwaj ki t'ap moutre yo chemen pou yo pran lajounen, ni gwo flannm dife ki t'ap klere chemen pou yo te pran
²⁰
 lannwit. Ou pran ti gout nan lespri ou, ou ba yo pou yo ka gen konprann. Ou toujou ba yo laman
²¹
 pou yo manje, ou toujou ba yo dlo lè yo te swaf dlo. Pandan karantan, ou pran swen yo nan dezè
²²
 a: yo pa janm manke anyen! Rad sou yo pa janm fini, pye yo pa janm anfle. Ou lage nan men yo peyi anpil wa ak anpil pèp. Ou separe l' ba yo pou chak moun viv nan limit ou ba yo. Yo pran
²³
 peyi Esbon, kote wa Siyon t'ap gouvènen an, ak peyi Bazan kote wa Og te chèf la. Ou ba yo anpil pitit, menm kantite ak zetwal nan syèl la. Ou mennen yo nan peyi ou te pwomèt zansèt yo ou
²⁴
 t'ap fè yo pran pou yo a. Yo anvayi peyi Kanaran, yo pran l' pou yo. Ou fè moun peyi Kanaran an bese tèt devan yo. Ou lage tout wa yo ak tout pèp ki t'ap viv nan peyi a nan men pèp ou a, pou

25
 yo te fè ak yo sa yo te vle. Pèp ou a mache pran tout lavil ki te gen gwo fò pou defann yo, ak tout bon venn tè moun yo. Yo pran tout kay yo ansanm ak tout byen ki te ladan yo. Yo jwenn sitèn tou fouye, jaden rezen, jaden oliv ak pyebwa k'ap donner an kantite. Yo manje, yo plen vant yo,

26
 yo vin gra. Yo pran plezi jwi tout kantite bèl bagay ou te ba yo. Men, yo rete konsa, yo vire do ba ou, yo fè wondonmon. Yo pran lalwa ou la, yo voye l' jete dèyè do yo. Yo touye pwofèt ou te voye ak mesaj pou ba yo avètisman pou yo te ka tounen vin jwenn ou. Se pa ti kras manke yo te

27
 manke ou dega! Se konsa, ou lage yo nan men moun ki pa vle we yo, ki bat yo nan lagè, ki mete pye sou kou yo. Nan tray yo te ye a, yo rele mande ou sekou. Ou rete nan syèl la, ou reponn yo.

28
 Ou te gen pitye pou yo, ou voye chèf pou delivre yo anba men moun ki t'ap peze yo. Men, kou ou ba yo yon ti souf, yo konmanse ap fè sa ki mal ankò devan ou. Ou lage yo nan men lènmi ki t'ap kraze yo. Lè sa a ankò, yo pran rele nan pye ou. Ou menm menm, ou rete nan syèl la, ou reponn

29
 yo. Ou sitèlman gen bon kè, se pa ni de ni twa fwa ou delivre yo. Ou te avèti yo, ou te mande yo pou yo obeyi tout lòd ou yo. Men, lògèy vire lòlòj yo, yo refize swiv kòmandman ou yo. Yo fè bagay ki pa dakò ak lòd ou ba yo. Epi se lè yon moun swiv lòd ou yo, li jwenn lavi! Men, yo fè

30
 wòklò, yo fè tè di, yo derefize obeyi ou. Pandan lontan lontan, ou pran pasyans ak yo, ou voye lespri ou sou pwofèt ou yo pou avèti yo. Men, yo bouche zòrèy yo pou yo pa tandè. Lè sa a, ou

31
 lage yo nan men moun lòt nasyon yo. Men, ou sitèlman gen bon kè, ou pa fin detwi yo nèt, ou pa lage yo nèt ale. Paske ou se yon Bondye ki gen bon kè, yon Bondye ki gen pitye pou moun!

32
 Koulye a, Bondye nou, ou se yon Bondye ki gen pouvwa, yon Bondye ki gen fòs kouraj, yon Bondye ki fè moun respekte l'. W'ap toujou kenbe kontra ou te pase a, ou p'ap janm sispann gen bon kè. Tanpri, chonje lafliksyon ki te tonbe sou nou tout, sou wa nou yo, sou chèf nou yo, sou prèt nou yo, sou pwofèt nou yo, sou zansèt nou yo ak sou tout pèp la, depi lè wa peyi Lasiri yo t'ap

33
 peze nou an rive jouk koulye a. Pa kite nou soufri tou sa pou gremesi. Nan tou sa ki rive nou an, ou te gen rezon ou nan pla men ou. Paske, ou menm ou toujou kenbe pawòl ou. Se nou menm

34
 ki toujou ap fè sa ki mal. Wi, wa nou yo, chèf nou yo, prèt nou yo ak zansèt nou yo pa t' fè sa

35
 ki nan lalwa ou la. Yo pa t' koute kòmandman ak avètisman ou te ba yo. Lè yo t'ap viv nan peyi yo a avèk pwòp wa yo, avèk tout gwo benediksyon ou te ba yo, nan gwo peyi plen bon venn tè ou

36
 te mete nan men yo a, yo pa t' sèvi ou, yo pa t' sispann fè move bagay. Jòdi a, nou tounen esklav nan pwòp peyi nou, nan peyi ou te bay zansèt nou yo, pou yo te ka pwofite rekòt tè a bay ak tout

37
 lòt riches ki ladan l'. Nou tounen esklav lakay nou! Tout rekòt peyi a al nan pòch wa ou mete sou kou nou. Tou sa, paske nou te fè peche. Yo fè sa yo vle ak nou ansanm ak bèt nou yo. Aa! Gade

38
 nan ki mizè nou ye non! Avèk tout bagay sa yo ki rive nou, jòdi a nou menm pèp Izrayèl la, n'ap

pran yon angajman, n'ap kouche l' sou papye. Epi tout chèf nou yo, tout moun Levi nou yo ak tout prèt nou yo pral siyen dokiman an anvan nou mete so sou li.

Chapter 10

¹ ¶ Premye moun ki siyen dokiman sele a se te gouvènè Neemi, pitit gason Akalya a. Apre li, Sidkiya vin siyen. ² Men non pret ki te siyen dokiman an: Seraja, Azarya, Jiremeja, ³ Pachou, Amarya, Malkija, ⁴ Atouch, Chebanya, Malouk, ⁵ Arim, Meremòt, Obadya, ⁶ Danyèl, Gineton, Bawouk, ⁷ Mechoulam, Abija, Mijamen, ⁸ Maazyà, Bilgayi ak Chemaja. ⁹ Apre yo vin moun Levi yo: Jozye, pitit gason Azanya, Bennwi, moun fanmi Enadad la, Kadmyèl, ¹⁰ ak lòt moun Levi parèy yo: Chekanya, Odija, Kelita, Pelaja, Anan, ¹¹ Miche, Reyòb, Achabya, ¹² Zakou, Cherebya, Chebanya, ¹³ Odija, Bani ak Kenani. ¹⁴ Apre yo se te chèf pèp la: Pareòch, Pakat Moab, Elam, Zatou, Bani, ¹⁵ Bouni, Azgad, Bebayi, ¹⁶ Adonija, Bigvayi, Adin, ¹⁷ Atè, Ezekyas. Azou, ¹⁸ Odija, Achoum, Betsayi, ¹⁹ Arif, Anatòt, Nebayi, ²⁰ Magpyach, Mechoulam, Ezi, ²¹ Michezabèl, Tsadòk, Yadwa, ²² Pelatya, Anan, Anaja, ²³ Oze, Ananya, Achoub, ²⁴ Alochèch, Pilba, Chobèk, ²⁵ Reyoum, Achabna, Maseja, ²⁶ Akija, Ranan, Anan, ²⁷ Malouk, Arim ak Bana. ²⁸ Nou menm, moun pèp Izrayèl la, prèt yo, ak moun Levi yo, gad pòtay tanp yo, mizisyen tanp yo, travayè tanp yo, ak tout lòt moun yo ki te wete kò yo nan mitan moun lòt nasyon k'ap viv nan peyi a pou nou ka fè sa lalwa Bondye a mande nou an, ansanm ak madanm nou yo, pitit gason ak pitit fi nou yo ki gen laj ²⁹ konprann, nou mete tèt nou ansanm ak frè nou yo ki chèf nan mitan nou, nou fè sèman pou nenpòt bagay rive nou si nou pa kenbe pwomès n'ap fè la a. Nou pran angajman n'ap mache dapre lalwa Bondye te bay Moyiz, sèvitè l' la, pou nou. Nou pran angajman n'ap obeyi tou sa Seyè a, Bondye nou an, kòmande nou pou nou swiv ansanm ak tout regleman ak tout lòd li ban nou yo. ³⁰ Nou pran angajman espesyalman pou nou pa marye pitit fi nou ak lòt moun k'ap viv nan peyi a, epi pou nou pa chwazi pitit fi moun sa yo pou marye ak pitit gason nou yo. ³¹ Si moun sa yo pote machandiz osinon nenpòt pwovizyon vin vann nou jou repo a, nou p'ap achte anyen nan men yo jou sa a. Se menm bagay la tou si se yon jou fèt pou Seyè a. Chak sètan, n'a kite jaden nou yo poze, epi tout moun ki dwe nou, n'a kite dèt la pou yo. ³² ¶ Men lòt obligasyon nou bay tèt nou ankò: Chak lanne, chak moun ap bay yon demi ka ons ajan pou depans y'ap fè pou sèvis Bondye nou an nan tanp lan. ³³ N'a bay tou pen pou yo mete apa pou Bondye yo, ofrann grenn pou chak jou yo,

bèt pou yo boule chak jou pou Bondye yo, ofrann pou jou repo yo, pou fèt lalin nouvèl yo, ak pou lòt gwo fèt yo, manje pou yo mete apa pou Bondye yo, ofrann pou wete peche moun pèp Izrayèl

34

yo, ak tout lòt bagay yo ka bezwen pou fè sèvis nan tanp Bondye nou an. Nou menm, prèt yo, moun Levi yo ak rès pèp la, men ki jan pou nou regle keksyon livrezon bwa pou tanp lan: Chak lanne y'a tire osò pou konnen kilè chak fanmi, yonn apre lòt, va pote bwa y'a bezwen pou boule

35

sou lotèl Seyè a, Bondye nou an, jan sa ekri nan lalwa Bondye a. Nou deside tou chak lanne, n'a pote nan tanp lan pou n' ofri bay Seyè a premye grenn nou rekòlte nan jaden nou ak premye fwi

36

ki mi sou tout pyebwa nou yo. Jan sa ekri nan lalwa Bondye a, n'a pote bay prèt yo k'ap sèvi nan tanp Bondye nou an premye pitit gason nou yo lè yo fèt pou yo ka mete yo apa pou Bondye. Konsa tou, n'a pote ba yo premye ti towò manman bèf nou yo va fè ak premye ti belye manman mouton nou yo va fè ak premye ti bouk manman kabrit nou yo va fè paske se pou prèt yo yo ye.

37

Konsa tou, n'a pote bay prèt yo kote y'ap viv nan tanp lan pen n'a fè ak premye grenn n'a rekòlte chak lanne yo, ansanm ak lòt ofrann fwi pyebwa nou yo va donner, diven ki fenk fèt ak lwil oliv fre. N'a pote ladim tout rekòt n'a fè nan jaden nou bay moun Levi yo. Se yo menm ki va mache nan

38

tout ti bouk nou yo pou ranmase ladim kote yo fè jaden. Yonn nan prèt yo, ki soti nan branch fanmi Arawon an, va toujou ale avèk moun Levi yo lè yo pral ranmase ladim lan. Lèfini, moun Levi yo va pote mete nan depo pwovizyon tanp lan yon dizyèm nan tout ladim y'a ranmase a pou

39

sèvis Tanp lan. Se nan chanm depo tanp lan moun pèp Izrayèl yo ak moun Levi yo va pote tout grenn, tout diven ak tout lwil yo fèt pou bay la. Se la tou y'a mete tout veso ak tout lòt bagay ki pou sèvi nan tanp lan. Epitou, prèt desèvis yo, gad pòtay tanp yo ak mizisyen tanp yo va gen kote pou yo rete la tou. Se konsa nou pran angajman nou p'ap janm neglije kay Bondye nou an ankò!

Chapter 11

1

¶ Tout moun ki te chèf pèp la te rete lavil Jerizalèm. Men pou rès pèp la, yo tire osò pou yo chwazi yon fanmi sou chak dis fanmi pou al viv nan lavil Bondye a, Jerizalèm. Tout rès yo va rete

2

nan lòt lavil yo. Pèp la te fè lwanj tout moun ki te ofri tèt yo pou yo rete lavil Jerizalèm. Men lis chèf ki t'ap dirije pwovens Jida a, epi ki te rete lavil Jerizalèm. Rès moun pèp Izrayèl la, prèt yo, moun Levi yo, travayè tanp yo ak pitit domestik wa Salomon yo t'ap viv nan lòt lavil peyi Jida

3

a, chak moun nan lavil kote yo te moun lan, sou pòsyon tè ki te pou yo a. Moun branch fanmi Jida yo ak moun branch fanmi Benjamen yo te rete lavil Jerizalèm. Nan moun Jida yo te gen Ataja, pitit gason Ouzija. Ouzija sa a te pitit Zekaraya, Zekaraya te pitit Amarya, Amarya te pitit Chefatya,

4

Chefatya te pitit Maleyèl, Maleyèl te pitit Perès. Te gen Maseya, pitit gason Bawouk. Bawouk sa a te pitit Kòloze, Kòloze te pitit Azaja, Azaja te pitit Adaja, Adaja te pitit Jojarib. Jojarib te pitit

5

⁶ Zekarya, Zekarya te pitit Chela. Antou te gen katsanswasanntwit (468) vanyan gason, moun fanmi
⁷ Perès, ki te tabli lavil Jerizalèm. Nan moun Benjamen yo te gen Salou, pitit gason Mechoulam.
 Mechoulam sa a te pitit Joèd, Joèd te pitit Pedaja, Pedaja te pitit Kolaja, Kolaja te pitit Maseja,
⁸ Maseja te pitit Ityèl, Ityèl te pitit Jechaja. Te gen Gabayi ak Salayi, fanmi Salou tou. Antou te
⁹ gen nèfsanvenntwit (928) moun Benjamen ki t'ap viv lavil Jerizalèm. Se Joèl, pitit Zikri, ki te
¹⁰ chèf yo. Jeouda, pitit gason Asenwa a, te dezyèm chèf nan lavil Jerizalèm. Men prèt ki t'ap viv
¹¹ nan lavil la: Pou konmanse, te gen Jedaja, pitit gason Jojarib lan ak Jaken. Te gen Seraja, pitit
 Ilkija. Ilkija sa a te pitit Mechoulam, Mechoulam te pitit Zadòk, Zadòk te pitit Merajòt, Merajòt te
¹² pitit Akitoub. Se li menm Akitoub yo te chwazi pou sèvi granprèt nan tanp Bondye a. Antou te
 gen wisanvennde (822) moun nan fanmi sa a ki t'ap travay nan tanp lan. Te gen Adaja, pitit gason
 Jeworam. Jeworam sa a te pitit Pelaja, Pelaja te pitit Amsi, Amsi te pitit Zekarya, Zekarya te pitit
¹³ Pachou, Pachou te pitit Malkija. Antou te gen desankarannde (242) moun nan branch fanmi sa
 a ki te chèf fanmi. Te gen Amasayi, pitit gason Azareyèl. Azareyèl sa a te pitit Aksayi, Aksayi te
¹⁴ pitit Mechilemòt, Mechilemòt te pitit Imè. Te gen antou sanvenntwit (128) vanyan gason nan
¹⁵ branch fanmi sa a. Se Zabdyèl, pitit gason Agadòl, ki te chèf yo. Nan moun Levi ki te rete nan
 lavil la, te gen Chemaja, pitit gason Achoub. Achoub sa a te pitit Azrikam, Azrikam te pitit Achabya,
¹⁶ Achabya te pitit Bouni. Te gen Chabtayi ak Jozabad tou, de nan chèf moun Levi yo ki te reskonsab
¹⁷ pou regle tout zafè tanp lan avèk lòt moun deyò. Te gen Matanya, pitit gason Mika. Mika sa a
 te pitit Zabadi, Zabadi te pitit Asaf. Se Matanya ki te konn voye chante yo, se li ki te konn konmanse
 kantik pou di Bondye mèsè lè yo t'ap lapriyè. Te gen Bakboukya, ki te asistan Matanya, ak Abda,
¹⁸ pitit gason Chamwa. Chamwa sa a te pitit Galal, Galal te pitit Jedoutoun. Antou te gen
¹⁹ desankatrevennèf (289) moun Levi nan lavil Bondye a. Nan moun k'ap fè pòs nan pòtay tanp
²⁰ yo te gen Akoub, Talmon ak lòt fanmi yo. Antou te gen sanswasanndouz (172) gad. ¶ Rès pèp
²¹ la ak lòt prèt yo ak moun Levi yo t'ap viv sou pòsyon tè fanmi yo nan lòt lavil peyi Jida a. Travayè
 tanp yo t'ap viv nan katye lavil Jerizalèm yo rele Ofèl la. Se Zicha ak Gichpa ki te chèf travayè yo.
²² Chèf moun Levi lavil Jerizalèm yo te rele Ouzi, pitit gason Bani. Bani sa a te pitit Achabya,
 Achabya te pitit Matanya, Matanya te pitit Mika. Ouzi te fè pati branch fanmi Asaf. Se yo ki te
²³ reskonsab jwe mizik nan sèvis Tanp Bondye a. Se wa a menm ki te bay lòd sa a. Te gen yon
 regleman tou ki te mande pou mizisyen sa yo te fè woulman nan travay yo yonn apre lòt, yon jou
²⁴ pou chak moun. Se Petachya, pitit gason Mechezabeyèl, moun Zerak nan branch fanmi Jida a,

yo te nonmen delege lakay wa a pou regle tout zafè pèp Izrayèl la. ²⁵ Anpil moun t'ap viv nan ti bouk yo, nan mitan jaden yo. Moun branch fanmi Jida yo te rete nan lavil Kiriyat Aba ak nan bouk ki te sou kont li yo, nan lavil Dibon ak nan bouk ki te sou kont li yo, nan lavil Jekabzel ak nan bouk ki te sou kont li yo. ²⁶ Yo te rete tou nan lavil Jechwa, lavil Molada, lavil Bèt-Pelèt, ²⁷ lavil Azachwal, lavil Becheba ak nan ti bouk ki te sou kont li yo. ²⁸ Yo te rete nan lavil Ziklag, nan lavil Mekona ak nan ti bouk ki te sou kont li yo, ²⁹ nan lavil Anrimon, nan lavil Zorea, nan lavil Jamout, ³⁰ nan lavil Zanoa, nan lavil Adoulam ak nan ti katye ki te sou kont yo. Yo te rete lavil Lakis ak nan jaden ki toupre lavil la, nan lavil Azèka ak nan ti bouk ki te sou kont li yo. Se konsa moun fanmi Jida yo te rete nan teritwa ki konmanse nan sid bò lavil Bècheba a pou rive nan nò jouk Fon Inon, bò lavil Jerizalèm. ³¹ Moun fanmi Benjamen yo te rete nan lavil Geba, lavil Mikmach, lavil Aja, lavil Betèl ak nan ti bouk ki te sou kont yo, ³² lavil Anatòt, lavil Nòb, lavil Ananya, ³³ lavil Azò, lavil Rama, lavil Gitayim, ³⁴ lavil Adid, lavil Zeboyim, lavil Nebalat, ³⁵ lavil Lòd, lavil Ono ak nan Fon Atizan yo. ³⁶ Te gen kèk moun Levi ki te rete nan teritwa moun Jida yo, yo voye yo al rete nan teritwa moun Benjamen yo.

Chapter 12

¹ ¶ Men lis prèt ak moun Levi ki te tounen nan peyi a ansanm ak Zowobabèl, pitit gason Chealtyèl la, ak Jozye. Men non prèt yo: Seraja, Jirimeja, Esdras, ² Amarya, Malouk, Atouch, ³ Chekanya, Reyoum, Meremòt, ⁴ Ido, Ginetoyi, Abija, ⁵ Mijamen, Maadya, Bilga, ⁶ Chemaja, Jojarib, Jedaja, ⁷ Salou, Amòk, Ilkija ak Jedaja. Mesye sa yo te chèf prèt yo nan tan Jozye. Ni yo ni prèt yo te soti nan yon sèl fanmi. ⁸ Men non moun Levi yo: Te gen yon premye gwoup ki te reskonsab chante kantik pou di Bondye mèsi. Se te Jozye, Bennwi, Kadmyèl, Cherebya, Jeouda ak Natanya. ⁹ Te gen yon lòt gwoup ki te kanpe anfas yo pou reponn yo lè y'ap chante. Se te Bakboukya, Ouni ak lòt moun Levi menm fanmi ak yo. ¹⁰ Jozye te papa Jojakim, Jojakim te papa Elyachib, Elyachib te papa Jorada, ¹¹ Jorada te papa Jonatan, Jonatan te papa Jadwa. ¹² Lè Jojakim te granprèt, men moun ki te chèf branch fanmi prèt yo: Meraja, chèf branch fanmi Seraja a, Ananya, chèf branch fanmi Jirimeja a, ¹³ Mechoulam, chèf branch fanmi Esdras la, Jokanan, chèf branch fanmi Amarya

¹⁴ a, Jonatan, chèf branch fanmi Melikou a, ¹⁵ Jozèf, chèf branch fanmi Chebanya a, Adna, chèf
branch fanmi Arim lan, Elkayi, chèf branch fanmi Merayòt la, ¹⁶ Zekarya, chèf branch fanmi Ido
a, Mechoulam, chèf branch fanmi Gineton an, ¹⁷ Zikri, chèf branch fanmi Abija a, ...chèf branch
fanmi Minyamen, Piltayi, chèf branch fanmi Moadya a, ¹⁸ Chamwa, chèf branch fanmi Bilga a,
Jonatan, chèf branch fanmi Chemaja a, ¹⁹ Matenayi, chèf branch fanmi Jojarib la, Ouzi, chèf branch
fanmi Jedaja a, ²⁰ Kalayi, chèf branch fanmi Salou a, Ebè, chèf branch fanmi Amòk la, ²¹ Achabya,
chèf branch fanmi Ilkija a, Netaneèl, chèf branch fanmi Jedaja a. ²² Pandan tout tan Elyachib,
Jodaja, Jokanan ak Jadwa te pase granprèt, yonn apre lòt, yo te enskri non chèf tout fanmi prèt yo
ak non moun Levi yo nan gwo rejis ofisyèl tanp lan. Yo te kenbe rejis sa a jouk sou rèy wa Dariyis
ki t'ap gouvènen peyi Pès la. ²³ Pou branch fanmi Levi yo, yo te enskri nou chèf fanmi yo tou nan
gwo rejis ofisyèl la, men lè yo rive sou tan Jokanan, pitit pitit Elyachib la, yo sispann fè sa. ²⁴ Chèf
moun Levi yo te Achabya, Jechwa, Bennwi ak Kadmyèl. Yo te separe moun Levi yo an gwoup.
De gwoup te kanpe yonn anfas lòt pou chante Iwanj Seyè a ak kantik pou di Bondye mès, yonn
apre lòt, dapre lòd wa David, sèvitè Bondye, te kite a. ²⁵ Men non moun ki t'ap sèvi tankou gad
pòtay tanp lan: Se te Matanya, Bakboukya, Obadya, Mechoulam, Talmon ak Akoub. Yo te reskonsab
veye depo magazen ki te bò pòtay tanp lan. ²⁶ Moun sa yo t'ap viv nan tan Jojakim, pitit Jozye,
pitit pitit Josadak la, te granprèt la, nan tan Neemi t'ap gouvènen an ak nan tan Esdras, prèt ki te
direktè lalwa a, tou. ²⁷ ¶ Lè yo tapral fè sèvis benediksyon miray ranpa lavil Jerizalèm lan, yo fè
chache tout moun Levi yo toupatou kote yo te rete, yo mennen yo lavil Jerizalèm. Yo te vle fè yon
gwo fèt pou sèvis benediksyon an ak kè kontan. t'ap gen chante pou di Bondye mès, avèk mizik,
senbal, gita ak bandjo. ²⁸ Se konsa mizisyen sanba yo, moun branch nan fanmi Levi yo, soti nan
tout zòn ki bò lavil Jerizalèm, nan ti bouk ki bò Netofa yo, yo sanble. ²⁹ Genyen tou ki te soti lavil
Betgilgal ak andeyò Geba ak Azmavèt. Lè sa a, mizisyen yo te rete nan anpil ti bouk yo te bati nan
tout zòn bò lavil Jerizalèm lan. ³⁰ Prèt yo ak moun Levi yo fè sèvis pou mete tèt yo, pèp la, pòtay
yo ak miray ranpa a nan kondisyon pou fè sèvis Bondye. ³¹ Mwen fè tout chèf peyi Jida yo moute
sou tèt miray ranpa a: Mwen fè de gwoup mizisyen ak moun pou chante pandan y'ap mache sou
tèt miray la. Premye gwoup la al sou bò dwat nan direksyon Pòtay Fatra a. ³² Ozaya t'ap mache
dèyè yo ak mwatye nan chèf peyi Jida yo. ³³ Dèyè yo t'ap mache Azarya, Esdras, Mechoulam,
³⁴ Jeouda, Benjamen, Chemaja ak Jirimeja. ³⁵ Mesye sa yo se prèt yo te chwazi pou kònen twonpèt
yo. Dèyè yo t'ap mache Zekarya, pitit Jonatan. Jonatan sa a te pitit Chemaja, Chemaja te pitit

Matanya, Matanya te pitit Mika, Mika te pitit Zakou, Zakou te pitit Asaf. ³⁶ Zekarya t'ap mache avèk lòt moun menm fanmi avè l' yo. Se te Chemaja, Azareèl, Milalayi, Gilalayi, Maayi, Netaneèl, Jeouda ak Anani. Yo tout yo te gen nan men yo tout kalite enstriman mizik wa David, sèvitè Bondye

a, te konn jwe. Se Esdras, direktè lalwa a, ki t'ap mache devan premye gwoup sa a. ³⁷ Lè yo rive Pòtay Fontenn dlo a, yo moute dwat devan yo, yo pran macheskalye ki mennen nan lavil wa David la, yo pase sou kote palè David la, yo moute sou tèt miray la ankò jouk yo rive Pòtay Dlo yo bò

solèy leve. ³⁸ Lòt gwoup la menm al sou bò gòch, sou tèt miray la: Mwen t'ap mache dèyè yo ansanm ak lòt mwatye moun yo. Nou pase bò gwo Fò Fou yo jouk nou rive sou gwo miray laj la.

³⁹ Apre sa, nou pase anwo pòtay Efrayim lan, anwo vye Pòtay la, anwo Pòtay Pwason yo, sou kote Fò Ananeèl ak Fò Meya a jouk nou rive bò Pòtay Mouton yo. Nou rete bò Pòtay Gad Tanp lan.

⁴⁰ Se konsa, de gwoup moun yo ki t'ap chante pou di Bondye mèsì a rive nan tanp Bondye a. Mwen

te gen avè mwen mwatye nan chèf yo, ⁴¹ ansanm ak prèt ki t'ap kònen twonpèt yo: Elyakim,

Maaseja, Menjamen, Mika, Elioenayi, Zekarya, Ananya, avèk twonpèt yo nan men yo, ⁴² ansanm avèk moun k'ap chante yo: Maseja, Chemaja, Eleaza, Ouzi, Jokanan, Malkija, Elam ak Azè. Se

Jizraja ki t'ap mennen chante a. ⁴³ Jou sa a, yo te ofri anpil gwo sakrifis pou Bondye. Tout pèp la t'ap fè fèt paske Seyè a te ba yo gwo kè kontan. Tout fanm yo ak tout timoun yo t'ap fete tou. Byen

lwen yo te ka tandè moun yo ki t'ap fete nan lavil Jerizalèm lan. ⁴⁴ ¶ Lè sa a, yo chwazi kèk gason yo mete reskonsab chanm depo kote yo te mete pwovizyon yo, ofrann premye grenn ak premye fwi yo ranmase nan chak rekòt yo, ofrann ladim yo ak lòt ofrann pou moun yo fè pou tanp lan: Se mesye sa yo ki te gen pou ale nan tout jaden bò lavil yo, pou ranmase sa lalwa te mande pou bay prèt yo ak moun Levi yo. Tout moun peyi Jida te kontan ak travay moun Levi yo ak prèt yo t'ap

⁴⁵ yo fè. Paske, yo t'ap fè sèvis Bondye yo san mank. Yo t'ap fè sèvis pou mete tout moun ak tout bagay nan kondisyon pou fè sèvis Bondye. Mizisyen yo ak gad pòtay tanp yo tou, tout moun t'ap

fè travay yo dapre regleman wa David ak pitit li, wa Salomon, te bay. ⁴⁶ Depi lontan, sou rèy David, nan tan Asaf te chèf mizisyen yo, te gen yon gwoup mizisyen ki te la pou chante lwanj

Bondye ak lòt chante pou di l' mèsì. ⁴⁷ Se konsa, nan tan Zowobabèl ak nan tan Neemi, tout pèp Izrayèl la te pote kado chak jou bay mizisyen yo ak gad pòtay tanp yo. Yo te pote renmèt moun Levi yo ofrann yo te mete apa pou Bondye. Moun Levi yo menm te bay prèt yo, moun fanmi Arawon yo, pòsyon pa yo.

Chapter 13

¹
 ¶ Yon jou, pandan yo t'ap li nan liv lalwa Moyiz la pou pèp la, yo rive yon kote ki di: Moun
 Amon yo ak moun Moab yo pa janm gen dwa mete pwent pye yo kote pèp Bondye a sanble. ² Paske
 moun Amon ak moun Moab yo te refize bay moun pèp Izrayèl yo pen ak dlo lè yo t'ap soti kite
 peyi Lejip la. Okontrè, yo bay Balaram lajan pou l' te ka madichonnen yo. Men, Bondye fè tou, li
 vire madichon an, li fè l' tounen benediksyon. ³ Lè moun pèp Izrayèl yo tandè sa yo te li nan liv
 lalwa a, yo pran tout moun lòt nasyon ki t'ap viv nan mitan yo, yo mete yo deyò. ⁴ Anvan tout
 bagay sa yo, se Elyachib, yonn nan prèt yo, yo te mete reskonsab chanm depo magazen tanp lan.
⁵
 Li te fanmi prèt Tobija. Se konsa li pran yonn nan gwo chanm depo kote yo te konn mete ofrann
 yo, lansan an, veso ki sèvi nan tanp lan, ofrann ladim sou ble a, sou diven nivo a ak sou lwil, ofrann
 yo te fè pou moun Levi yo, pou mizisyen yo ak pou gad pòtay yo, ansanm ak pòsyon yo mete apa
 pou prèt yo, li fè ranje chanm lan pou Tobija. ⁶ Pandan tout bagay sa yo t'ap pase, mwen pa t' lavil
 Jerizalèm paske, lè wa Atagzèsès te rive sou tranndezan depi l' t'ap gouvènen, nou te fè yon vwayaj
 al bò kote l'. ⁷ Kèk tan apre sa, li ban m' otorizasyon ankò, epi m' tounen lavil Jerizalèm. Se lè sa
 a mwen vin konnen move bagay Elyachib te fè a, lè li te pran yon chanm nan lakou tanp Bondye
 a pou l' te bay Tobija rete. ⁸ Mwen te fache anpil poutèt sa. Mwen pran tout mèn ki te lakay Tobija
⁹
 yo, mwen jete yo deyò nan lari. Lèfini, mwen bay lòd pou yo fè sèvis pou mete chanm depo yo
 nan kondisyon pou fè sèvis Bondye, apre sa pou yo mete tout veso ki pou sèvis tanp lan, ansanm
 ak ofrann yo ak lansan an nan plas yo ankò. ¹⁰ ¶ Mwen vin konnen tou pèp la pa t' bay sa pou yo
 te bay pou moun Levi yo, kifè moun Levi yo ak mizisyen yo te leve kite travay yo lavil Jerizalèm,
¹¹
 yo tounen nan jaden yo. Mwen rale zòrèy chèf yo, mwen mande yo poukisa yo pa okipe tanp
 la ankò. Mwen voye chache moun Levi yo ak mizisyen yo, m' fè yo tounen nan tanp lan vin fè
 travay yo. ¹² Lè sa a, tout moun pèp Izrayèl yo pote ofrann ladim ble, ladim diven ak ladim lwil
¹³
 vin mete nan depo a. Mwen chwazi twa moun: Chelemya, yon prèt, Zadòk, yon direktè lalwa,
 ak Pedaja, yon moun Levi, mwen mete yo reskonsab chanm depo yo. Mwen chwazi yon lòt moun,
 Anan, pitit gason Zakou, pitit pitit Matanya, pou ede yo nan travay la. Mwen konnen mesye sa yo
¹⁴
 te nèg serye. Se yo ki te reskonsab separe pwovizyon yo bay prèt ak moun Levi parèy yo. Se
 poutèt sa, O Bondye mwen, pa bliye m', tanpri! Pa bliye tout bagay sa yo mwen te fè pou tanp ou
¹⁵
 a ak pou regleman ou bay yo, paske mwen bay lavi m' nèt pou sèvi ou! ¶ Lè sa a tou, mwen wè
 kèk moun nan peyi Jida a ki t'ap fè ji rezen gwo jou repo a. Gen lòt menm ki t'ap chaje pakèt ble,
 diven, rezen, fig Frans ak anpil lòt chay toujou sou bourik pou yo ale lavil Jerizalèm jou repo a.
¹⁶
 Mwen avèti yo pou yo pa vann jou sa a. Te gen kèk moun lavil Tir ki te rete lavil Jerizalèm pou
 fè kòmès. Yo te konn pote pwason ak tout lòt kalite machandiz pou yo te vann moun Jida yo jou

17
 repo a. Mwen rale zòrèy chèf peyi Jida yo, mwen di yo: -Ki kalite bagay lèd n'ap fè la a konsa!

18
 Gade jan n'ap derespekte jou repo Bondye a non! Se sa menm zansèt nou yo te konn fè, kifè Bondye nou an te pini nou, li te kite tout malè sa yo tonbe sou nou ak sou lavil la. Koulye a n'ap

19
 fè Bondye pi fache toujou lè nou pa respekte jou repo li a! Se konsa mwen bay lòd pou yo toujou fèmen tout batan pòtay lavil la pou tout jou repo a, depi lavèy lè solèy fin kouche, epi pou yo kite yo fèmen pou jouk nan denmen lè solèy la va kouche ankò. Mwen mete kèk moun pa m' menm ap

20
 veye bò pòtay yo pou ankenn chay pa antre nan lavil la jou repo a. Yonn ou de fwa, kèk machann k'ap fè trafik vann tout kalite machandiz te blije pase nwit lavèy jou repo a, deyò lòt bò pòtay lavil

21
 Jerizalèm. Mwen avèti yo, mwen di yo: -Sa nou bezwen rete pase nwit lan deyò bò miray la fè?

22
 Si nou fè sa ankò, m'ap fè mete men sou nou. Depi lè sa a yo pa janm vini jou repo a ankò. Mwen bay moun Levi yo lòd pou yo fè sèvis pou mete tèt pa yo nan kondisyon pou fè sèvis Bondye, apre sa pou yo vin veye pòtay yo pou nou te ka fete jou repo a jan Bondye vle l' la. Poutèt sa tou, o

23
 Bondye mwen, pa bliye mwen! Pou jan ou gen bon kè, tanpri, pitye pou mwen! ¶ Se lè sa a tou, mwen vin wè te gen anpil jwif ki te marye ak fanm ki te moun peyi Asdòd, moun peyi Amon osinon

24
 moun peyi Moab. Mwatye nan timoun yo te pale lang peyi Asdòd la ase ou ankò yon lòt kalite

25
 lang. Yo pa t' konn pale lang nou an. Mwen rale zòrèy mesye yo, mwen mande pou madichon tonbe sou yo. Mwen fè bat anpil ladan yo, mwen fè rache cheve nan tèt yo. Mwen fè yo fè sèman devan Bondye pou yo pa janm pran pitit fi yo pou yo marye yo ak mesye lòt nasyon yo, ni tou pou yo pa janm pran fi nan mitan fi lòt nasyon yo pou madanm pa yo osinon pou madanm pitit gason

26
 yo. Mwen di yo: -Se peche sa a menm wa Salomon te fè! Atout pa t' gen tankou l' nan tout wa lòt nasyon yo, atout Bondye l' la te renmen l', atout se Bondye menm ki te mete l' wa sou tout pèp

27
 Izrayèl la, se madanm lòt nasyon yo ki te pran tèt li pou fè l' fè sa ki mal. Koulye a nou ta renmen tout moun vin konnen n'ap fè menm gwo peche sa a, n'ap trayi Bondye nou an, n'ap marye ak

28
 medam ki moun lòt nasyon? Jorada te pitit Elyachib, granprèt la. Yonn nan pitit gason l' yo te marye ak pitit fi Sanbalat, nèg lavil Bèt-Owon an. Mwen mete l' deyò pou m' pa janm wè l' devan

29
 je m' ankò. O Bondye mwen, pa janm bliye moun sa yo pou jan yo avili travay prèt yo ak kontra

30
 ou te siyen ak prèt yo ansanm ak moun Levi yo! Mwen te wete tout bagay ki pou moun lòt nasyon yo nan mitan pèp la pou yo te ka nan kondisyon pou sèvi Bondye. Mwen fè regleman pou

31
 prèt yo ak moun Levi yo. Konsa, chak moun te gen travay pa yo. Mwen bay lè pou yo fè ofrann bwa yo ak ofrann premye grenn ak premye fwi ki mi nan jaden lè rekòt. O Bondye mwen, pa bliye m' tande! Pa bliye se mwen menm ki fè tou sa!

Esther

Chapter 1

¹ ¶ Vwala se te sou rèy wa Asyeris. Li t'ap gouvènen sanvensèt (127) pwovens depi peyi Lend
² rive peyi Letiopi. Lè sa a, wa a te rete lavil Souz, kapital la, ki te tankou yon sitadèl. ³ Li te gen
 twazan depi li te wa. Yon jou, li bay yon gwo fèt babako pou tout chèf li yo ak pou tout moun k'ap
 sèvi avè l' nan gouvènman an. Tout lame peyi Pès ak peyi Medi a te la tou ansanm ak tout gouvènè
⁴ ak tout gwo zotobre pwovens yo. Pandan sis mwa, wa a t'ap fè yo wè jan palè l' la te rich, jan li
⁵ te grannèg anpil, ak kantite bèl bagay li te genyen. Apre tout jou sa yo, wa a fè yon gwo fèt pou
 tout moun, rich kou pòv, ki te rete lavil Souz, kapital la. Pandan sèt jou, li resevwa mesye yo nan
⁶ lakou jaden palè l' la. Lakou palè a te dekore ak bèl rido koulè blan ak ble. Yo te mare rido yo
 ak bèl ti kòdon koulè violèt nan bag fèt an ajan moute sou gwo poto fèt an mab. Yo te ranje bèl ti
 kabann fèt an lò ak an ajan nan tout lakou a. Lakou a te pave ak mab blan, mab wouj, mab nwa,
⁷ gwo pèl klere, ak bèl pye ble. Yo te sèvi bweson nan gwo gode lò. Chak gode te gen yon fòm
 apa. Yo te bay diven wa a an kantite, jan wa a te vle l' la. ⁸ Tout moun t'ap bwè san pesonn pa
 kontwòle bouch yo, paske wa a te bay kanbizye li yo lòd pou chak moun te jwenn mezi yo vle.
⁹ Larenn Vachti bò pa l' t'ap resevwa medam yo anndan palè wa Asyeris la. ¹⁰ ¶ Dènye jou fèt la,
 wa a t'ap bwè, kè l' te kontan. Li fè rele sèt nan nèg konfyans pa l' yo: Se te Mayouman, Bizta,
¹¹ Abona, Bigta, Obagta, Zeta ak Kakas. Li ba yo lòd pou y' al cache larenn Vachti ak tout kouwòn
¹² li sou tèt li. Larenn lan te yon bèl fanm. Wa a te vle fè pèp la ak tout chèf li yo wè jan li bèl. Men
 lè nèg konfyans yo al di larenn Vachti lòd wa a te ba yo a, li derefize vini. Sa te fè wa a fache. Li
¹³ te move anpil. Se te koutim lan lè sa a chak fwa wa a te gen yon bagay pou l' regle, li toujou
 pran konsèy nan men moun ki konnen sa ki dwat ak sa lalwa mande. Se konsa, wa a fè cache
¹⁴ konseye l' yo pou yo di l' sa pou l' fè. Men konseye ki te pi pre l' yo se te Kachna, Cheta, Admata,
 Tachich, Meris, Masena ak Mimoukan, sèt gwo chèf ki te soti nan peyi Pès ak nan peyi Medi ki te
¹⁵ gen dwa wè wa a lè yo vle. Lèfini, se yo ki te gen premye plas nan gouvènman an. Wa a di yo
 konsa: -Dapre lalwa, kisa pou m' fè larenn Vachti? Mwen voye nèg konfyans mwen yo al ba li yon
¹⁶ lòd, li derefize obeyi m'. Lè sa a Mimoukan pran lapawòl devan wa a ak tout lòt chèf yo, li di
 konsa: -Se pa sèlman wa a larenn Vachti manke dega. Se tout chèf ak tout gason k'ap viv nan tout
¹⁷ peyi ki sou lòd wa a li manke dega. Lè medam yo va konnen sa larenn Vachti fè a, yo tout yo

pral pran mari yo pou bòbòy. Y'ap di: Wa Asyeris ki wa Asyeris, li te bay larenn Vachti lòd pou
 vin bò kote l', larenn lan te derefize!¹⁸ Lè madanm chèf peyi Pès ak peyi Medi yo va konnen sa
 larenn lan fè la a, se sa ase yo pral pale nan zòrèy mari yo depi jòdi a menm. Lè sa a, toupatou
 medam yo p'ap respekte mari yo ankò. Mari yo menm pral fè kòlè sou madanm yo.¹⁹ Si wa a
 dakò, se pou l' fè yon deklarasyon pou l' fè tout moun konnen larenn Vachti pa janm gen dwa parèt
 devan l' ankò. Li pral chwazi yon lòt madanm pi bon pase l' mete larenn nan plas li. Lèfini, l'a fè
 ekri lòd sa a nan liv lalwa peyi Pès ak peyi Medi a, pou yo pa janm chanje l'.²⁰ Y'a pibliye lòd wa
 a nan tout gwo peyi ou la pou tout moun konnen. Lè sa a, mesye yo te mèt grannèg, yo te mèt ti
 nèg, madanm yo va gen respè pou yo.²¹ Wa a ansanm ak chèf yo te renmen lide Mimoukan te bay
 la. Se konsa wa a fè sa Mimoukan te di fè a.²² Li voye mesaj nan tout peyi ki te anba baton
 kòmandman l' lan. Mesaj la te ekri nan lang chak peyi, jan yo ekri lang lan nan peyi a. Li voye di
 se pou chak gason chèf lakay yo: Lè yo pale, se fini!

Chapter 2

¹ ¶ Apre sa, lè kolè wa a fin pase, lide wa a te toujou sou sa Vachti te fè a ak sou desizyon li
 menm li te pran lè sa a.² Se konsa, nan moun ki toujou avèk wa a, gen ladan yo ki di l': -Poukisa
 ou pa mete moun chache pou ou kèk bèl ti jenn fi ki tifi toujou?³ Nan tout pwovens peyi ou la, wa
 chwazi kèk enspekte ki va chache dènye bèl ti jenn fi ki poko nan gason. Y'a mennen yo nan kay
 madanm ou yo, isit la, lavil Souz, kapital la. Wa mete yo sou kont Egayi, domestik konfyans ou ki
 reskonsab madanm ou yo, pou li ba yo tou sa yo bezwen pou fè kò yo bèl.⁴ Lèfini, jenn fi ki va fè
 ou plezi plis la wa mete l' larenn nan plas Vachti a. Wa a wè se te yon bon lide, li fè sa konsa vre.
⁵ Lè sa a, nan lavil Souz, kapital peyi a, te gen yon jwif ki te rele Madoche. Se te pitit Jayi, nan
 branch fanmi Benjamen. Li te soti nan fanmi Kich ak Chimeyi.⁶ Lè Nèbikadneza, wa peyi Babilòn
 lan, te pran Jekonya, wa peyi Jida a, ansanm ak lòt prizonye yo nan lavil Jerizalèm pou l' te depòte
 yo, Madoche te ladan l' tou.⁷ Li te gen yon ti kouzin li ki te rele Estè. Men bon non jwif li se te
 Adasa. Se te yon bèl fi anfòm. Lè papa l' ak manman l' mouri, Madoche te pran l' lakay li, li leve
 l' tankou pwòp pitit fi li.⁸ Apre yo te fin pibliye lòd wa a, yo mache chache anpil jenn fi, yo mennen
 yo lakay wa a lavil Souz, kapital la. Estè te ladan yo tou. Se konsa li te lakay wa a, sou kont Egayi
 ki te reskonsab tout madanm wa yo.⁹ Estè te fè Egayi plezi anpil. San l' te ale avè l'. Li pa pèdi
 tan li, li ba li tou sa li te bezwen pou fè kò l' bèl ak manje ki bon pou li. Li chwazi sèt bòn lakay

wa a, li bay Estè pou sèvis pa l', epi li mete l' nan pi bon apatman ki te genyen nan kay madanm
¹⁰wa yo. Estè pa t' kite pèsonn konnen moun ki peyi ak ki ras li te ye, paske Madoche te ba li lòd
¹¹pou l' pa t' di anyen sou sa. Chak jou, Madoche bò pa l' menm t'ap pwonmennen devan lakou
¹²kay medam yo pou l' te konnen jan Estè t'ap degaje l', ki jan sa tapral pase pou li. Yo te pran
yon lanne nèt pou pare jenn fi yo. Yo pase sis mwa ap pran masaj ak lwil fèt ak lami, sis mwa ak
odè ansanm ak krèm fèt pou madan marye. Apre sa, yo mennen jenn fi yo yonn apre lòt al jwenn
¹³wa Asyeris. Men ki jan sa te fèt: lè yon jenn fi ap kite kay medam yo pou ale kay wa a, yo ba
¹⁴li tou sa li te vle mete sou li. Se yon jou swa yo toujou mennen l'. Nan maten, yo fè l' ale nan
yon lòt kay wa a te genyen pou fanm kay li yo. Yo renmèt li nan men Chagaz ki te reskonsab kay
sa a. Jenn fi a pa t' gen pou l' te tounen kay wa a ankò, esepite si wa a te vle. Lè konsa, se wa a ki
¹⁵pou bay non fi li vle a. Jou pou Estè ale kay wa a rive. Estè, pitit fi Abikayil la, kouzin Madoche
te pran pou pitit fi li a, leve, li pa mande anyen pase sa Egayi, domestik konfyans wa a ki te reskonsab
¹⁶jenn fi yo, te ba li konsèy mande pou mete sou li. Tout moun tonbe pou Estè lè yo wè l'. Se
konsa, Asyeris t'ap mache sou sètan depi li te wa, nan dizyèm mwa, mwa yo rele Tebèt la, lè yo
¹⁷mennen Estè devan wa a lakay li. Wa a tonbe pou Estè plis pase pou tout lòt fanm li te janm
konnen. Estè te rive fè wa a plezi plis pase tout lòt jenn fi yo. Wa a renmen l' plis pase lòt yo. Li
¹⁸mete kouwòn li a sou tèt Estè, li nonmen l' larenn nan plas Vachti a. Lèfini, li voye envite tout
chèf li yo ak moun pa l' yo, li fè yon gwo resepsyon pou Estè. Li bay yon jou vakans nan tout peyi
¹⁹a nèt. Apre sa, li bay kado adwat agoch jan wa yo konn fè l' la. Pandan tout tan yo t'ap mennen
²⁰jenn fi yo bay wa a, Madoche te chita bò pòtay palè a. Estè menm pa t' kite pèsonn konnen moun
ki peyi ak ki ras li te ye. Madoche te ba li lòd pa di anyen sou sa. Estè te obeyi l' jan li te toujou
²¹obeyi l' lè li te timoun lakay li. ¶ Antan Madoche te chita bò pòtay la, de domestik konfyans wa
a, Bigtan ak Tèrèch, ki t'ap fè pòs devan chanm wa a, fache sou wa a, yo fè konplo pou yo touye
²²l'. Madoche vin konn sa. Li di larenn Estè sa. Larenn Estè menm al di wa a men sa Madoche
²³voye di l'. Yo mennen ankèt, yo jwenn sa Madoche te di a se te vre. Yo pann de mesye yo.
Lèfini, wa a bay lòd pou yo ekri koze a nan gwo liv achiv gouvènman yo.

Chapter 3

¹ ¶ Kèk tan apre sa, wa Asyeris mete yon nonm ki te rele Aman nan yon gwo pozisyon. Li
nonmen l' chèf sou tout lòt chèf nan peyi a apre wa a. Aman sa a te pitit Amedata, moun fanmi wa

²
 Agag. Wa a pase lòd pou tout anplwaye gouvènman li mete ajenou, bese tèt yo jouk atè devan Aman pou montre jan yo respekte l'. Tout anplwaye yo te fè sa vre esepite Madoche ki te derefize fè bagay konsa.

³
 Lòt anplwaye yo mande Madoche poukisa li t'ap dezobeyi lòd wa a te bay la.

⁴
 Chak jou yo te dèyè l' pou l' te konfòm l'. Men, li te refize koute yo. Li esplike yo se jwif li ye, li pa kapab bese tèt li jouk atè devan Aman. Se konsa mesye yo al di Aman sa pou yo wè si li pa

⁵
 t'ap di Madoche anyen. Lè Aman wè Madoche te derefize ni mete ajenou, ni bese tèt li jouk atè

⁶
 devan li lè l'ap pase, li ofiske. Lè li vin konnen menm se jwif Madoche te ye, li fè lide se pa Madoche sèlman l'ap pini. L'ap òganize l' pou l' touye dènnye kras jwif ki nan peyi wa Asyeris la.

⁷
 ¶ Lè sa a, wa Asyeris t'ap mache sou douzan depi li t'ap gouvènen. Nan premye mwa a, mwa Nisan an, Aman mande yon divinò fè l' konnen ki jou ak ki mwa ki pi bon pou l' fè sa l' te vle fè a.

⁸
 Se konsa yo tonbe sou douzyèm mwa a, mwa Ada a. Lè sa a, Aman al di wa a: -Monwa, gen yon ras moun ki gaye nan tout peyi w'ap gouvènen yo, yo toupatou nan mitan pèp yo, men yo viv apa. Mès pa yo pa menm ak mès lòt pèp yo. Lèfini, yo derefize obeyi lòd ou bay yo. Li pa ta bon pou

⁹
 wa a fèmen je l' sou sa. Si wa a ta vle, li ta bay lòd pou yo touye yo. Si wa a fè sa, m'ap ranmase

¹⁰
 twasanswasannkenz (375) tòn ajan nan men anplwaye leta yo m'a mete nan kès wa a. Wa a ba li kat blanch. Li wete gwo bag ki nan dwèt li a bay Aman, pitit gason Amedata, moun ras Agag la,

¹¹
 ki pa t' vle wè jwif yo. Epi wa a di l' konsa: -Mwen ba ou pèp sa a ansanm ak richès li yo. Fè sa

¹²
 ou vle ak yo. Se konsa, nan trèzyèm jou premye mwa a, Aman fè rele tout sekretè wa yo, li ba yo yon piblikasyon pou yo mete nan lang chak peyi, jan yo ekri lang lan nan peyi a. Lèfini, li bay lòd pou yo voye l' bay tout prefè wa a, tout gouvènè pwovens yo ak tout chèf lòt pèp yo. Piblikasyon

¹³
 an te fèt nan non wa Asyeris. Lèfini, li mete so bag wa a anba li. Yo voye mesaje kouri pote piblikasyon an nan tout peyi ki anba kòmandman wa a. Piblikasyon an te bay lòd pou lè trèzyèm jou mwa Ada a va rive, yon sèl jou a pou yo te touye tout jwif yo, granmoun kou jennmoun, fanm

¹⁴
 kou timoun. Se pou yo te masakre yo san pitye, lèfini pou yo te piye tout byen yo. Yo voye yon kopi piblikasyon an nan chak pwovens avèk lòd esprès pou yo te fè tout moun konnen pou yo pare

¹⁵
 kò yo pou jou sa a. Dapre lòd wa a, mesaje yo kouri pote mesaj la nan tout pwovens yo. Yo pibliye nouvèl la tou nan lavil Souz, kapital la. Tout lavil Souz te tèt anba, wa a menm te chita ap bwè ak Aman.

Chapter 4

¹ ¶ Lè Madoche pran nouvèl tou sa ki t'ap pase, sa te fè l' lapenn anpil. Li chire rad sou li. Li mete yon rad sak anwo li ak sann dife sou tèt li, li pran lari pou li, li t'ap rele, li t'ap plenn byen fò.

² Li rive devan pòtay palè a. Li pa antre, paske moun pa gen dwa antre anndan kay wa a ak rad sak

³ sou yo. Nan tout pwovens yo, toupatou kote yo te pibliye lòd wa a, se te yon gwo lafliksyon pou jwif yo. Yo fè jèn, yo t'ap kriye, yo t'ap plenn. Anpil ladan yo mete rad sak sou yo, yo kouche nan

⁴ sann dife. Lè sèvant Estè yo ansanm ak domestik konfyans li yo al di li sa Madoche t'ap fè, sa te boulvèse li anpil. Estè voye bon rad bay Madoche pou li te ka wete rad sak la sou li. Men Madoche

⁵ derefize. ¶ Lè sa a, Estè rele Atach, yonn nan domestik konfyans wa a te ba li pou sèvis li, li voye

⁶ l' bò kote Madoche pou konnen sa k'ap pase ak poukisa l'ap fè sa. Atach al jwenn Madoche sou

⁷ plas piblik ki te devan pòtay palè wa a. Madoche rakonte l' tou sa ki te rive l', ki jan Aman te pwomèt pou l' te bay anpil lajan pou mete nan kès wa a si wa a te dakò pou yo masakre tout jwif

⁸ yo. Li bay Atach yon kopi lòd wa a yo te pibliye lavil Souz la, ki te mande pou yo te detwi tout jwif yo. Madoche mande l' pou l' pote kopi piblikasyon an bay Estè, pou li esplike l' sitiyasyon an,

⁹ lèfini pou Estè al bò kot wa a pou pale avè l', pou mande l' gras pou pèp li a. Atach al di Estè tou

¹⁰ sa Madoche te di l'. Estè menm voye Atach di Madoche konsa: -Pèsonn, li te mèt fanm li te mèt gason, pa gen dwa antre nan lakou anndan palè a pou wè wa a, si se pa wa a ki voye chache l'. Si

¹¹ yon moun fè sa, y'ap touye l'. Se lalwa. Tout moun k'ap travay ak wa a ansanm ak tout pèp lòt peyi ki sou lòd li yo konn sa. Sèl jan pou l' pa mouri se si wa a lonje baton an lò a bay moun lan.

¹² Mwen menm, gen yon mwa depi wa a pa mande pou mwen. Lè Atach bay Madoche mesaj Estè

¹³ a, Madoche voye repons sa a bay Estè: -Pa mete nan tèt ou lè y'ap touye jwif yo w'ap chape

¹⁴ paske se lakay wa a ou rete. Si ou konprann pou fèmen bouch ou nan yon ka konsa, Bondye ap toujou delivre pèp jwif la. Y'a sove, men ou menm, w'ap mouri epi fanmi ou ap disparèt. Ou pa

¹⁵ janm konnen si se pa pou move pa sa a ou larenn jounen jòdi a. Estè voye reponn Madoche:

¹⁶ -Ou mèt ale. Reyini dènye jwif ki nan lavil Souz; fè yo fè jèn pou mwen. N'a pase twa jou twa nwit san manje san bwè. Mwen menm bò pa m' ansanm ak sèvant mwen yo, nou pral fè jèn tou.

¹⁷ Apre sa, m' aval kote wa a, atout lalwa defann sa. Si se pou m' mouri, m'a mouri. Madoche ale, li fè tou sa Estè te di l' fè a.

Chapter 5

¹
 ¶ Sou twazyèm jou a, Estè mete rad larenn li sou li, li ale, li kanpe nan lakou anndan palè a, devan salon wa a. Wa a te chita sou fòtèy li anndan salon an anfas pòt pou antre a. ² Lè wa a wè larenn Estè kanpe deyò a, sa te fè kè l' kontan, li lonje baton an lò ki te nan men l' lan ba li. Estè antre, li manyen pwent baton an. ³ Wa a mande l': -Sa ki genyen, larenn Estè? Sa ou bezwen? Ou te mèt mande m' mwatye nan peyi a, m'ap ba ou li. ⁴ Estè reponn li: -Si sa fè wa a plezi, mwen ta renmen wa a vini ansanm ak Aman nan yon ti fèt m'ap fè pou li lakay mwen aswè a. ⁵ Lamenm wa a di: -Kouri vit al chache Aman pou n' al kay Estè ki envite nou. Se konsa, wa a ale nan ti fèt Estè te fè pou li a ansanm ak Aman. ⁶ Pandan yo t'ap bwè diven, wa a mande Estè konsa: -Di m' sa ou vle, m'ap ba ou li. Ou te mèt mande m' mwatye nan peyi a, m'ap ba ou li. ⁷ Estè reponn, li di konsa: -Sa m' bezwen...? Sa m' ta mande ou...? ⁸ Si wa a kontan avè m', si se plezi li pou li ban m' sa m' vle a, pou li fè sa m'a mande l' fè a. mwen ta renmen wa a ansanm ak Aman vini denmen lakay mwen pou yon lòt ti fèt m'ap fè pou li ansanm ak Aman. Lè sa a, m'a di monwa sa m' bezwen. ⁹ ¶ Jou sa a, lè Aman soti nan fèt la, li te kontan, li t'ap ri ak tout moun. Men, lè li rive bò pòtay palè a, li wè Madoche pa menm fè yon rimay leve lè l'ap pase. Li move anpil sou Madoche, ¹⁰ men li pa kite moun wè sa, epi li al lakay li. Lèfini, li fè chache zanmi l' yo, epi li mande madanm li ¹¹ Zerès pou li vini tou. Aman konmanse pale devan yo, li di yo jan li rich, jan li gen lajan, konbe pitit gason li genyen, jan wa a te moute l' grad, li te mete l' chèf anwo tout lòt chèf ak tout lòt moun ¹² k'ap sèvi nan gouvenman an. Lèfini, li di: -Sa ki pi rèd, larenn Estè fè fèt pou wa a, kilès ou kwè li envite? Mwen menm ase, pèsonn ankò! Men li envite m' pou denmen ankò! ¹³ Men, tou sa pa di m' anyen, toutotan m'a wè jwif yo rele Madoche a chita nan papòt palè wa a. ¹⁴ Lè sa a, Zerès, madanm li, ak tout zanmi l' yo di l' konsa: -Poukisa ou pa fè yo kanpe yon poto swasannkenz pye wotè nan lakou lakay ou? Denmen maten, w'a mande wa a pou yo pann Madoche nan poto a. Apre sa, wa va ale nan fèt la ak kè kontan. Aman wè se te yon bon lide yo te ba li la a. Li fè kanpe yon poto swasannkenz pye wotè nan lakou lakay li.

Chapter 6

¹
 ¶ Menm jou lannwit sa a, wa a pa t' ka dòmi. Li fè yo pote achiv gouvènman kote yo te ekri tou sa ki te pase nan peyi a nan tan lontan. Li fè yo li ladan l' pou li. ² Nan sa yo li a, te gen yon pòsyon kote yo te rakonte ki jan Madoche te dekouvri konplo de nan domestik konfyans wa a,

Bigtan ak Tèrèch, ki t'ap fè pòs devan chanm wa a, te moute pou yo ansasinen wa a. ³ Wa a mande: -Kisa yo te fè pou Madoche lè sa a? Kisa yo te ba li pou sa? Mesye ki te la ap sèvi wa a reponn: -Yo pa t' fè anyen pou li non. ⁴ ¶ Wa a mande: -Kilès nan chèf yo ki nan lakou palè a? Lè sa a, Aman te fèk antre nan lakou palè a. Li te vin mande wa a pou l' te fè pann Madoche nan potò li te pare a. ⁵ Mesye yo reponn: -Aman la a wi! L'ap espere ou nan lakou a. Wa a di: -Fè l' antre! ⁶ Lè Aman antre, wa a di l' konsa: -Ki pi bèl bagay m' ta fè pou yon moun mwen ta renmen remèsye pou sèvis li rann mwen. Aman di nan kè l': Pa gen lòt moun wa a ta renmen remèsye pase mwen menm! ⁷ Epi li di wa a: -Yon moun ou ta renmen remèsye pou sèvis li rann ou! ⁸ Enben! Fè yo pran yonn nan bèl rad ou konn mete sou ou yo pote l' bay moun sa a. Pran chwal ou konn moute a ak tout kouwòn lan sou tèt li. ⁹ Chwazi yonn nan pi gwo chèf ou yo, fè l' al abiye moun sa a ak rad wa a. Lèfini, l'a fè l' moute sou chwal la. Epi, l'a pwonmennen l' nan tout lavil la sou plas piblik la. Pandan y'ap mache konsa, chèf la va di byen fò: Men ki jan wa a remèsye moun pou sèvis yo rann li. ¹⁰ Lè sa a, wa a di Aman: -Kouri al chache rad la ak chwal la. Epi w'a fè tou sa ou di la a pou Madoche, nonm jwif la. w'a jwenn li chita bò pòtay palè a. Pa bliye anyen nan sa ou te di fè a. ¹¹ Aman pran rad la ak chwal la, li mete rad la sou Madoche. Li fè Madoche moute sou chwal la. Epi, Aman pwonmennen l' sou plas piblik la. Pandan y'ap mache konsa, li t'ap di byen fò pou tout moun tande: Men ki jan wa a remèsye moun pou sèvis yo rann li. ¹² ¶ Apre sa, Madoche tounen tounen l' bò pòtay palè wa a. Aman menm kouri al lakay li, li bouche figi l' sitèlman li te wont. ¹³ Li rakonte madanm li ak tout zanmi l' yo tou sa ki te rive l'. Lèfini, Zerès, madanm li, ak zanmi l' yo ki te gen bon konprann di l' konsa: -Si Madoche se yon jwif vre, koulye a ou p'ap ka fè l' anyen. Ou konmanse pèdi pye devan l'. Ou mèt sèten se li k'ap kraze ou. ¹⁴ Zanmi l' yo t'ap pale toujou, lè domestik konfyans wa yo rive vin chache Aman pou l' ale touswit nan fèt Estè te pare a.

Chapter 7

¹ ¶ Wa a te al nan fèt larenn Estè a ankò ansanm ak Aman. ² Pandan yo t'ap bwè diven, wa a mande Estè, tankou premye jou a: -Di m' sa ou vle, m'ap ba ou li. Ou te mèt mande m' mwatye nan peyi a, m'ap ba ou li! ³ Estè reponn li: -Si wa a kontan avè m', si se plezi li pou li ban mwen sa m' vle a, tanpri, sove lavi m' ansanm ak lavi pèp mwen an. Se sa ase mwen mande ou. ⁴ Paske yo vann nou, mwen menm ansanm ak tout pèp mwen an, pou yo ka masakre nou, touye nou, disparèt nou nèt. Si se vann yo te vann nou pou fè nou tounen esklav, mwen pa ta di anyen, mwen pa ta deranje

ou pou sa ase. Men, moun ki pa vle wè nou an p'ap janm ka ranplase pèt l'ap fè ou fè a. ⁵ Wa Asyeris mande larenn Estè: -Ki moun ki penmèt li gen lide fè bagay konsa? Kote moun lan? ⁶ Estè reponn li: -Moun ki pa vle wè nou an, moun k'ap pèsèkite nou an, se Aman, mechan sa a! Aman dekare, li pran tranble devan wa a ak larenn lan. ⁷ ¶ Wa a leve bò tab la byen move, li soti deyò al nan jaden palè a. Aman te konnen wa a tapral pini l' pou sa l' fè a. Li rete pou l' mande larenn lan fè pa ⁸ l'. Aman te fèk panche kò l' sou divan Estè a pou mande l' padon lè wa a tounen antre soti nan jaden an. Lè wa a wè sa, li di: -Koulye a, apa nonm lan soti pou li fè kadejak sou larenn Estè, l'a devan je m', nan mitan lakay mwen an! Wa a poko fin pale, nèg konfyans yo gen tan kouvri tèt ⁹ Aman. Yonn ladan yo ki te rele Abona, di konsa: -Aman te menm gen tan fè kanpe yon poto nan lakou lakay li pou l' te pann Madoche ki te sove lavi wa a. Poto a gen swasannkenz pye wotè. Wa ¹⁰ a bay lòd pou yo pann Aman ladan l'. Se konsa yo pann Aman nan poto li te pare pou Madoche a. Apre sa, kòlè wa a tonbe.

Chapter 8

¹ ¶ Menm jou sa a, wa Asyeris pran tout byen Aman yo, nonm ki pa t' vle wè jwif yo, li fè larenn Estè kado. Estè fè wa a konnen Madoche se fanmi li. Depi lè sa a, Madoche te gen dwa parèt devan ² wa a. Wa a wete bag li te reprann nan men Aman an, li bay Madoche li. Estè menm mete Madoche ³ reskonsab tout byen Aman yo. ¶ Apre sa, Estè al pale ak wa a ankò. Li lage kò l' nan pye l' ap kriye. Li mande l' pou l' fè kichòy pou kraze vye konplo Aman, moun laras Agag la, te moute sou ⁴ do jwif yo. Wa a lonje baton an lò a bay Estè. Estè leve epi li di: ⁵ -Si sa fè wa a plezi, si wa a kontan avè m', si se yon bagay li ka fè, si mwen fè wa a plezi, tanpri, ekri yon lèt pou revoke lòd Aman, pitit Amedata, moun laras Agag la, te bay pou yo te touye dènye kras jwif toupatou nan ⁶ peyi wa a. Mwen p'ap ka rete konsa pou m' wè malè sa a ap tonbe sou moun pèp mwen yo, pou m' wè y'ap touye tout fanmi m' yo. ⁷ Wa Asyeris di Estè ak Madoche konsa: -Gade, mwen fè pann ⁸ Aman poutèt konplo li te moute sou do jwif yo, lèfini, m' bay Estè tout byen li yo. Men, depi yo bay yon lòd piblik nan non wa a, avèk so wa a sou li, li pa ka revoke. Tansèlman, nou menm, nou ⁹ gen dwa ekri yon lèt bay jwif yo nan non mwen avèk so mwen sou li. Tou sa te pase nan venntwazyèm jou twazyèm mwa a, mwa Sivan an. Madoche fè chache tout sekretè wa yo, li di yo tou sa pou yo mete nan lèt pou yo voye bay jwif yo, bay gouvènè yo, bay prefè yo ak lòt chèf pèp yo, nan tout sanvensèt (127) pwovens yo, depi peyi Lend rive peyi Letiopi. Lèt yo te ekri pou

chak pwovens yo nan lang yo, dapre jan yo ekri lang lan nan peyi a. Yo ekri lèt pou jwif yo nan lang pa yo, dapre jan yo ekri lang pa yo a tou. ¹⁰ Madoche fè ekri lèt yo nan non wa a, epi li mete so wa a sou yo. Yo renmèt lèt yo bay mesaje pote ale. Mesaje yo te moute sou chwal yo te pran nan ekri wa a. ¹¹ Dapre sa ki te nan lèt yo, wa a te bay tout jwif yo pèmision pou yo te òganize yo nan chak lavil peyi a pou yo te ka defann tèt yo. Nenpòt moun lòt nasyon ki ta atake yo ak zam nan nenpòt pwovens, se pou yo koresponn ak yo, se pou yo masakre yo ansanm ak madanm yo ak pitit yo. Se pou yo touye yo nèt ale, lèfini pou yo pran tout byen yo. ¹² Se sa pou jwif yo fè nan tout pwovens peyi wa Asyeris la, nan trèzyèm jou douzyèm mwa a, ki vle di mwa Ada a. ¹³ Nan chak pwovens, se pou yo te konsidere lèt la tankou yon lwa. Se pou yo te pibliye l' pou tout moun te ka konnen sa ki ladan l'. Jwif yo menm te pou pare pou yo te tire revanj yo sou lènmi yo jou sa a. ¹⁴ Jan wa a te bay lòd la, mesaje yo moute sou chwal wa yo, yo kouri pote lèt yo ale. Yo te mache fè konnen lòd wa a nan lavil Souz, kapital la, tou. ¹⁵ ¶ Madoche soti kite palè wa a. Li te gen yon bèl rad ble e blan, tankou rad wa a, sou li, yon gwo kouwòn lò sou tèt li ak yon manto koulè violèt sou zepòl li. Tout moun lavil Souz te kontan, yo t'ap fè fèt. ¹⁶ Pou jwif yo menm, se te yon gwo soulajman; yo te kontan, yo t'ap fè fèt, se te yon bèl bagay pou yo. ¹⁷ Nan tout pwovens yo, nan chak lavil yo, toupatou kote yo te li lèt wa a te voye a, jwif yo pase jou a ap fè fèt, yo te kontan, yo fè resepsyon, yo bay manje. Anpil moun lòt nasyon fè yo jwif lè sa a, paske yo te pè jwif yo anpil.

Chapter 9

¹ ¶ Trèzyèm jou nan douzyèm mwa a, mwa Ada a, rive. Se te jou pou yo te fè sa wa a te bay lòd fè a. Se te jou moun ki pa t' vle wè jwif yo t'ap tann pou yo te kraze yo. Men, sa ki pou te rive jou sa a, se pa sa ki rive. Se jwif yo ki kraze moun ki te rayi yo. ² Nan tout pwovens peyi wa Asyeris la, jwif yo reyini nan katye yo nan chak lavil. Yo òganize yo pou yo atake tout moun ki te vle fè yo mal. Pèsonn pa t' ka kenbe tèt ak yo. Tout moun te pè yo. ³ Sa ki pi rèd, tout gouvènè yo, tout prefè yo ak tout anplwaye leta yo nan tout pwovens yo te pran pou jwif yo, paske yo te pè Madoche anpil. ⁴ Nan tout peyi a, tout moun te konnen jan Madoche te yon grannèg nan palè wa a, chak jou li te vin gen plis pouvwa. ⁵ Jwif yo tonbe sou tout lènmi yo ak kout nepe. Yo touye yo, yo masakre yo. Yo fè sa yo vle ak moun ki pa t' vle wè yo. ⁶ Nan lavil Souz, kapital la menm, yo touye, yo masakre senksan (500) moun. ⁷ Nan moun yo touye yo te gen dis pitit gason Aman yo: Pachandat,

⁸ Dalfon, Aspata, ⁹ Porata, Adalya, Aridata, Pamachta, Arisayi, Aridayi ak Vayzata. ¹⁰ Se te pitit gason Aman yo, pitit pitit Amedata a, moun ki pa t' vle wè jwif yo. Men, jwif yo pa t' pran anyen lakay moun yo. ¹¹ Jou sa a, yo fè wa a konnen jwif yo te touye senksan (500) moun nan lavil Souz, kapital la. ¹² Wa a di larenn Estè konsa: -Nan lavil Souz ase, jwif yo touye senksan (500) moun. Nan moun sa yo te gen dis pitit gason Aman yo. Nou pa bezwen mande sa yo fè nan pwovens yo. Kisa ou vle koulye a? M'ap ba ou li. Di m' kisa ou vle m' fè, m'ap fè l'. ¹³ Estè reponn li: -Si sa fè monwa plezi, li ta bay jwif ki nan lavil Souz yo otorizasyon pou denmen yo fè menm jan yo te fè jòdi a. Lèfini, pou yo pann kadav dis pitit gason Aman yo sou plas piblik. ¹⁴ Wa a bay lòd pou yo fè sa vre. Yo fè piblikasyon nan tout lavil Souz, epi yo pann kadav dis pitit gason Aman yo sou plas piblik. ¹⁵ Nan katòzyèm jou moun Ada a, jwif lavil Souz yo reyini ankò epi yo touye twasan (300) moun nan lavil la. Men, lè sa a tou, yo pa t' pran anyen nan zafè moun yo. ¹⁶ Nan pwovens yo menm, jwif yo te òganize yo pou defann tèt yo. Yo fè lènmi yo ba yo lapè, yo touye swasannkenzmil (75.000) moun ki pa t' vle wè yo. Men, yo menm tou yo pa t' pran anyen nan zafè moun yo. ¹⁷ Tou sa pase nan trèzyèm jou mwa Ada a. Nan denmen, ki vle di nan katòzyèm jou mwa a, jwif nan pwovens yo pa t' touye yon moun ankò. Se te jou yo t'ap fè fèt, jou yo t'ap pran plezi yo. ¹⁸ Men, jwif lavil Souz yo te pran de jou, trèzyèm jou ak katòzyèm jou nan mwa Ada a, pou yo te touye lènmi yo. Nan kenzyèm jou mwa a, yo pa t' touye yon moun ankò. Se jou sa a yo te fè fèt, se jou sa a yo t'ap pran plezi yo. ¹⁹ Se poutèt sa, jwif k'ap viv nan ti bouk yo, ki gaye nan tout pwovens yo, pran katòzyèm jou mwa Ada a pou yon jou fèt, jou pou fè kè yo kontan, jou pou yo pa travay. Se jou sa a yonn voye kado bay lòt. ²⁰ ¶ Madoche fè ekri tout bagay sa yo, lèfini li voye lèt bay tout jwif ki te nan pwovens peyi wa Asyeris la, kit yo te pre, kit yo te lwen. ²¹ Li voye di yo pou yo te toujou pran de jou sa yo, katòzyèm ak kenzyèm jou nan mwa Ada a, pou jou fèt chak lanne. ²² Se jou sa yo jwif yo te fè lènmi yo ba yo lapè. Se mwa sa a sitiyasyon an te chanje pou yo: yo te sispann gen lapenn, kè yo te kontan. Yo pa t' dekouraje, yo t'ap fè fèt. Se pou yo te make jou sa yo tankou jou pou fè fèt ak gwo resepsyon. Jou sa a, se pou yo voye kado yonn bay lòt, se pou yo bay pòv yo kado tou. ²³ Se konsa, jwif yo pran abitud mete jou sa yo apa, jan yo te konmanse fè l' la, dapre sa Madoche te ekri yo. ²⁴ Aman, pitit gason Amedata, moun laras Agag, moun ki pa t' vle wè jwif yo, te fè lide disparèt yo. Li te mande yon divinò fè l' konnen ki jou ki ta pi bon pou detwi yo, pou masakre yo. ²⁵ Men, lè Estè al di wa a sa, wa a bay yon lòt lòd. Se konsa malè Aman t'ap pare pou jwif yo, se sou pwòp tèt li li tonbe. Yo pann ni li ni pitit gason l' yo byen wo sou plas piblik. ²⁶ Se poutèt sa yo rele jou fèt sa yo: Pourim, dapre yon mo ansyen ki vle di:

chans. Konsa, dapre sa ki te nan lèt Madoche te voye ba yo a, lèfini poutèt sa yo te wè ki te rive
²⁷ yo, jwif yo make dat sa a pou yo toujou fè fèt jou sa yo. Yo pran angajman pou yo, pou pitit yo
ak pitit pitit yo, ak pou tout moun ki ta vle fè yo jwif, pou chak lanne lè de jou sa yo rive pou yo
²⁸ toujou fè fèt jan Madoche te ekri l' la. Yo bay lòd pou tout jwif yo, nan tout branch fanmi, nan
tout lavil, nan tout peyi toujou chonje jou sa yo pou yo fè gwo fèt lè sa a, depi sa ki la koulye a
jouk ras la va kaba. Se pou jwif yo make jou chans sa yo, pou yo pa janm bliye yo, lèfini pou pitit
²⁹ pitit yo ka toujou chonje jou sa yo. Apre sa, larenn Estè, pitit fi Abikayil la, mete tèt ansanm ak
Madoche, li ekri yon lèt pou di jan li dakò. Se konsa, li bay premye lèt Madoche te ekri sou jou
³⁰ chans sa yo plis fòs toujou. Yo voye lèt la bay tout jwif nan sanvennsèt (127) pwovens peyi wa
³¹ Asyeris la. Lèt la te mande pou jwif yo te viv ak kè poze san fè kont. Lèfini, li mande yo pou
ni yo ni pitit yo, ni pitit pitit yo, pou yo toujou fete jou chans sa yo lè dat la rive, jan Madoche ak
larenn Estè te bay lòd la, menm jan yo te swiv lòd yo te bay pou fè jèn epi pou yo te leve men yo
³² nan syèl pou plenn sò yo. Yo pran lèt larenn Estè te ekri pou bay regleman jou chans sa yo plis
fòs la, yo ekri l' nan liv la.

Chapter 10

¹ ¶ Wa Asyeris te bay lòd pou tout moun ki rete nan peyi a, ata moun nan zile yo, peye yon
² lajan. Yo ekri tou sa wa a te fè nan gwo liv istwa wa peyi Medi ak peyi Pès yo. Yo di tout bèl
bagay li te fè, jan li te yon vanyan gason. Yo bay tout ti detay sou jan li te rive mete Madoche nan
³ gwo plas sa a. Madoche, nonm jwif la, te sèl chèf apre wa Asyeris. Tout jwif parèy li yo te respekte
l', yo te renmen l' anpil. Li te travay anpil pou byen pèp la, li te vle pou tout moun nan ras jwif la
viv ak kè poze.

Job

Chapter 1

¹ ¶ Te gen yon nonm yo te rele Jòb. Li te rete nan peyi Ouz. Se te yon nonm san repwòch ki te
mache dwat nan tou sa l'ap fè. Li te gen krentif pou Bondye, li te toujou ap cache fè sa ki byen.
² Li te gen sèt pitit gason ak twa pitit fi. ³ Li te gen sèt mil (7.000) mouton, twamil (3.000) chamo,

mil (1.000) tèt bèf, senksan (500) fenmèl bourik. Li te gen anpil anpil moun ap sèvi avè l'. Nonm sa a, se li ki te pi grannèg nan peyi bò solèy leve a. ¶ Pitit gason Jòb yo te konn reyini yonn lakay lòt pou fè gwo resepsyon. Konsa, yo chak te gen jou pa yo. Yo te toujou envite twa sè yo vin manje, vin bwè ansanm ak yo tou. Chak lè yo fin fete konsa, Jòb fè yo tout vini lakay li. Nan maten, anvan bajou kase, li leve, li boule ofrann bay Bondye pou mande padon pou yo chak. Li te toujou fè sa, paske li t'ap di nan kè l': Ou pa janm konnen. Pitit gason m' yo ka fè peche, yo ka di sa yo pa t' dwe di sou Bondye, san yo pa fè espere. ¶ Yon jou tout zanj Bondye yo te reyini devan Seyè a, Satan vini tou nan mitan yo. Seyè a mande l' konsa: -Kote ou soti? Satan reponn: -M' sot moute desann toupatou sou latè. Mwen t'ap pwonmennen gade! Seyè a di Satan konsa: -Eske ou te wè Jòb, sèvitè m' lan? Pa gen tankou l' sou tout latè. Se yon nonm san repwòch ki mache dwat nan tou sa l'ap fè. Li gen krentif pou Bondye, li toujou ap chache fè sa ki byen. Satan reponn li: -Atò, se pou gremesi Jòb gen krentif pou ou konsa a? Ou toujou pwoteje l', li menm, moun lakay li ansanm ak tou sa li genyen. Ou beni tou sa l'ap fè. Bèt li yo plen peyi a. Men, kite ou manyen byen li yo pou ou wè, m' garanti ou, l'ap di sa l' pa t' dwe di sou ou nan figi ou! Seyè a di Satan: -Bon! Ou mèt fè sa ou vle ak byen l' yo. Men, m' tou pale ou, li menm, pa manyen l'! Se konsa Satan vire do l', li ale. ¶ Yon jou, pitit gason ak pitit fi Jòb yo te nan gwo resepsyon kay pi gran frè a. Yo t'ap manje, yo t'ap bwè diven. Yon mesajè kouri vin jwenn Jòb, li di l' konsa: -Nou t'ap raboure tè ak bèf yo, fenmèl bourik yo t'ap manje toupre, lè yon bann moun Seba tonbe sou nou, yo pran tout bèt yo, yo touye tout moun ou yo. Se renk mwen menm ki resi chape vin di ou sa. Msye pa t' ankò fin pale lè yon lòt moun kouri vini. Li di konsa: -Loraj tonbe sou mouton yo, li boule ni bèt yo ni gadò yo. Se renk mwen menm ki resi chape vin fè ou konn sa. Msye pa t' ankò fin pale lè yon lòt moun rive, li di konsa: -Twa bann moun Kalde tonbe sou chamo ou yo, yo pran yo, y' ale ak yo. Yo touye tout moun ou yo. Se renk mwen menm ki resi chape vin di ou sa. Msye t'ap pale toujou lè yon lòt moun vin rive, li di konsa: -Pitit gason ak pitit fi ou yo t'ap manje, yo t'ap bwè diven lakay premye pitit gason ou lan, lè yon sèl gwo van tanpèt leve soti nan dezè a. Li kraze kay la, li touye tout moun. Se renk mwen menm ki resi chape vin di ou sa. ¶ Lè Jòb tandè sa, li leve. Yon sèl lapenn pran l', li chire rad sou li, li koupe tout cheve nan tèt li, li lage kò l' atè, li bese tèt li. Epi li di: -San anyen m' soti nan vant manman m'. San anyen m'ap tounen anba tè. Seyè a bay! Seyè a pran! Lwanj pou Seyè a! Malgre tout malè sa yo ki te rive l', Jòb pa t' fè ankenn peche, ni li pa janm di sa li pa t' dwe di sou Bondye.

Chapter 2

¹ ¶ Yon jou tout zanj Bondye yo te reyini devan Seyè a, Satan vini tou nan mitan yo. ² Seyè a mande l': -Kote ou soti? Satan reponn: -Mwen sot moute desann toupatou sou latè, mwen t'ap pwonmennen gade. ³ Seyè a di Satan konsa: -Eske ou te wè Jòb, sèvitè m' lan? Pa gen tankou l' sou tout latè. Se yon nonm san repwòch ki mache dwat nan tou sa l'ap fè. Li gen krentif pou Bondye, li toujou ap chache fè sa ki byen. Se koulye a li kenbe m'. Ou wè se pou gremesi ou t'ap pouse m' pou m' te fini avè l'. ⁴ Satan reponn li: -Lavi miyò pase byen! Yon moun va bay tou sa li genyen pou l' pa mouri. ⁵ Men, si ou manyen kò pa l' menm, ou mèt sèten fwa sa a, l'ap di sa li pa t' dwe di sou ou nan figi ou. ⁶ Seyè a di Satan konsa: -Ou mèt fè sa ou vle avè l'. Men, pa touye l' pou mwen. ⁷ ¶ Lamenm, Satan vire do l', li ale. Li fè gwo bouton pete sou tout kò Jòb, depi anba pla pye l' jouk nan po tèt li. ⁸ Lè sa a, Jòb soti, li al chita nan pil sann kote yo boule fatra. Li pran yon moso krich kraze pou grate kò l'. ⁹ Madanm li di l' konsa: -Ou nan kenbe pye Bondye fèm toujou? Joure l' byen joure, epi mouri mouri ou kont fini! ¹⁰ Jòb di li: -Pe bouch ou la, madanm! W'ap pale tankou moun fou! Lè Bondye ban nou benediksyon, nou kontan. Atò poukisa pou nou plenyen lè li voye malè sou nou? Malgre tou sa ki te rive l', Jòb pa t' kite ankenn move pawòl soti nan bouch li pou li fè peche kont Bondye. ¹¹ ¶ Twa nan zanmi Jòb yo vin konnen tout malè ki te tonbe sou li. Yo kite peyi yo, yo vin wè Job. Se te Elifaz, moun Teman, Bildad, moun Chwak, epi Sofa, moun Naama. Yo fè lide vin ansanm pou plenn sò li epi pou ba li kouraj. ¹² Yo te yon bèl ti distans toujou lè yo wè Jòb. Yo pa t' rekonèt li. Lè yo rekonèt li, dlo vin nan je yo, yo konmanse rele, yo kriye. Yo chire rad sou yo, yo voye pousyè tè sou tèt yo tèlman sa te fè yo lapenn. ¹³ Apre sa, yo chita atè a bò kot Jòb pandan sèt jou sèt nwit san di yon mo, paske yo te wè jan l'ap soufri.

Chapter 3

¹ ¶ Bout pou bout, Jòb louvri bouch li, li pran madichonnen jou l' te fèt la. ² Li di konsa: ³ -Se pou Bondye efase jou m' te fèt la. Se pou l' efase jou lannwit m' te konmanse devlope nan vant manman m' lan. ⁴ Fè jou sa a tounen fènwa, Bondye! Kote ou chita anwo a, pa janm chonje jou sa a ankò. Pa janm kite limyè solèy klere l'. ⁵ Se pou fènwa anvayi jou sa a. Se pou nwaj kouvri l' nèt.

6 Se pou lonbraj lanmò bouche l' nèt. Jou lannwit sa a, se pou fènwa pran l' pou li nèt. Se pou l'
 disparèt nèt nan lanne a pou yo pa janm konte l' nan almanak ankò. 7 Se pou jou lannwit sa a fè
 cheve nan tèt moun kanpe, pou yo pa tande pèsonn ap ri! 8 Se pou chòche yo bay jou lannwit sa a
 madichon, yo menm ki konn ki jan pou yo eksite levyatan an! 9 Pa kite gwo zetwal devanjou a
 klere jou sa a. Pa janm fè bajou kase pou li, pou l' pa janm wè solèy leve. 10 Paske li pa t' enpoze
 m' soti nan vant manman m', li pa t' egzante m' tout soufrans sa yo. 11 ¶ Poukisa mwen pa t' mouri
 depi nan vant manman m'? Poukisa mwen pa t' tou mouri nan pasaj kite sa? 12 Poukisa mwen te
 jwenn yon manman ki pran m' sou jenou li epi ki ban m' tete? 13 Si m' te mouri, atò konsa mwen
 pa ta nan tout lapenn sa a. Mwen ta kouche yon kote ap dòmi ak kè poze, 14 ansanm ak wa yo ak
 gwo chèf yo, ki fè bati gwo tonm pou yo nan mitan dezè. 15 Mwen ta kouche ap dòmi ansanm ak
 chèf ki te gen kay yo plen lò ak ajan. 16 Ou ankò, mwen ta tankou yon timoun ki fèt anvan tèm,
 tankou timoun ki fèt tou mouri. 17 Kote yo ye anba tè a, mechan yo sispann bay kò yo mouvman.
 Anba tè a, sa ki bouke travay ap poze kò yo. 18 Anba tè a, tout prizonye gen kè poze. Yo p'ap tande
 vwa majò prizon an nan zòrèy yo. 19 Anba tè a, se menm bagay pou grannèg kou malere. Ata
 esklav pa gen mèt ankò! 20 ¶ Poukisa, Bondye, ou kite moun ki nan mizè ap viv? Poukisa ou bay
 moun ki nan gwo lapenn lavi? 21 Y'ap tann lanmò konsa. Men, lanmò pa vini! Yo ta pito lanmò
 pase nenpòt gwo richès! 22 Yo pa gen kè kontan toutotan yo pa mouri, toutotan yo pa ale anba tè.
 23 Yo pa konn sa pou yo fè. Bondye sènen yo kote yo pase. 24 Mwen pa ka manje. Se plenn m'ap
 plenn. M'ap soufri, dlo nan je m' tankou larivyè k'ap koule. 25 Sa m' pè rive m' lan, se li k'ap rive
 m'. Sa m' pa ta vle wè a, se li ki tonbe sou mwen. 26 Kè m' pa poze. Tèt mwen pa la. Mwen pa ka
 dòmi. Se soti nan ka tonbe nan ka.

Chapter 4

¹ ¶ Elifaz, moun Teman an, pran lapawòl, li di konsa: ² -Jòb, si m' pale avè ou, ou p'ap fache, vye frè? Mwen pa ka pa pale. ³ Yon lè, se ou ki te konn moutre moun anpil bagay, se ou ki te konn bay moun fòs lè yo fèb. ⁴ Pawòl nan bouch ou te yon ankourajman pou moun ki te dekouraje. Ou te ede yo kanpe sou de pye yo ankò. ⁵ Koulye a, paske se tou pa ou, ou pèdi tèt ou. Malè tonbe sou ou, w'ap depale. ⁶ W'ap sèvi Bondye, ou fèt pou genyen l' konfyans. Ou mennen bak ou byen, ou pa fèt pou dekouraje. ⁷ ¶ Repase tèt ou byen. Ou janm konnen yon inonsan ki mouri mal? Ou janm wè yo touye yon moun ki mache dwat? ⁸ M'ap di sa m' wè ak je m': Moun ki kouve mechanste nan kè yo epi k'ap mache bay moun lapenn, se mechanste ak lapenn yo rekòlte. ⁹ Lè Bondye fache, li soufle sou yo, yo mouri. Lè van tanpèt Bondye a leve, yo disparèt. ¹⁰ Mechan yo rele kou lyon, yo gwonde kou bèt sovaj. Men, Bondye fèmen bouch yo, li kase dan nan bouch yo. ¹¹ Yo mouri tankou lyon ki pa jwenn bèt pou yo manje. Tout pitit yo gaye nan bwa. ¹² ¶ Yon lè, mwen tande Bondye t'ap pale tou dousman nan zòrèy mwen. Mwen pa t' fin tande nèt sa li t'ap di. ¹³ Tankou yon move rèv nan mitan lannwit, li mete yon bann vye lide nan tèt mwen. M' pa ka dòmi tèlman mwen pè. ¹⁴ Mwen pran tranble, mwen santi yon frison mache nan tout kò m'. Tout zo nan kò m' ap krake. ¹⁵ Yon souf pase bò figi m', tout cheve nan tèt mwen kanpe. ¹⁶ Mwen rete konsa mwen wè yon moun kanpe devan m'. Mwen pa t' rekonèt ki moun li ye. Men, fòm moun lan te la devan je m'. Mwen pa tande yon ti bri menm. Apre sa, mwen tande yon vwa ki t'ap pale tou dousman, li t'ap di: ¹⁷ Ki moun ki ka di li mache dwat devan Bondye? Ki moun ki san repwòch devan Bondye ki kreye l' la? ¹⁸ Bondye pa janm fin fye sèvitè l' yo nèt. Ata zanj li yo, li jwenn bagay pou l' repwoche yo. ¹⁹ Ale wè atò pou moun ki fèt ak labou, pou moun ki soti nan pousyè tè, pou moun yo kapab kraze tankou poubwa! ²⁰ Yon sèl jou kont pou yo tounen pousyè, yo disparèt nèt. Pesonn pa wè sa. ²¹ Yo rete konsa yo kase kòd. Yo mouri san yo pa janm rive fin gen bon konprann.

Chapter 5

¹ ¶ Rele non, Jòb! W'a wè si gen moun k'ap reponn ou! Ak kilès nan zanj Bondye yo ou ta vle
² pale? Se moun fou ki kite chagren ap minen yo. Se moun sòt ki kite move san touye yo. ³ Mwen
menm, mwen wè moun fou ki te kwè zafè yo bon. M' rete konsa, mwen wè madichon tonbe sou
⁴ kay yo. Pitit yo pa ka jwenn yon moun pou pwoteje yo. Pa gen pesonn pou pran defans yo nan
⁵ tribinal. Se moun grangou ki pral manje rekòt jaden yo. Yo pral pran ata sa ki donnen nan raje
pikan. Se moun akrèk ki pral mete men sou tout byen yo. ⁶ ¶ Non. Laflikasyon pa tonbe sou moun
konsa konsa. Ni moun pa rete konsa pou l' tonbe anba soufrans. ⁷ Menm jan tensèl dife fèt pou
vole, konsa tou, moun fèt pou soufri. ⁸ Si m' te nan plas ou, Job, se Bondye m' ta rele. Mwen ta
mete sitiyasyon an devan l'. ⁹ Se li menm ki fè yon bann bèl bagay nou pa ka fin konprann, yon
dal mèvèy nou pa ka fin konte. ¹⁰ Li voye lapli sou latè, li wouze tout jaden. ¹¹ Moun ki t'ap mache
¹² tèt bese yo, se li menm ki fè yo leve tèt yo. Se li menm ki konsole moun ki te nan lapenn yo. Li
¹³ gate mannigèt bakoulou yo. Li pa janm kite yo rive fè sa yo te mete nan tèt yo. Li pran moun
¹⁴ entelijan yo nan pèlen yo te tann. Li pa kite mètdam yo reyalize plan yo te fè. Gwo lajounen
¹⁵ y'ap bite tankou nan fènwa. Gwo midi, y'ap tatonnen tankou nan mitan lannwit. Men, Bondye
¹⁶ sove pòv la anba dan yo. Li delivre malere anba ponyèt grannèg k'ap peze yo. Li bay pòv yo
¹⁷ espwa. Li fèmen bouch mechan yo. ¶ Ala bon sa bon pou yon moun lè Bondye ap korije l'! Lè
Bondye ki gen tout pouvwa a ap pini ou, pa pran sa an jwèt! ¹⁸ Lè li blese ou, se li menm ankò
¹⁹ k'ap mete renmèd pou ou. Lè li frape ou, se li menm ankò k'ap geri ou. Lapo delivre ou nan tout
²⁰ move pa. Ankenn malè p'ap tonbe sou ou. Nan grangou, li p'ap kite ou mouri. Nan lagè, li p'ap
²¹ kite yo touye ou. L'a pwoteje ou anba kout lang. Ou p'ap bezwen pè lè w'a wè gwo malè ap
²² pwoche. W'a pase ni malè ni grangou nan rizib. Ou p'ap pè bèt nan bwa. ²³ Jaden w'ap travay
²⁴ yo p'ap gen wòch ladan yo. Bèt nan bwa p'ap janm atake ou. Lè sa a, w'a viv ak kè poze lakay
ou. Lè w'a vizite pak zannimo ou yo, w'a kontan. ²⁵ W'a gen anpil pitit. Y'a pouse tankou plant
²⁶ nan jaden. Menm jan se lè mayi fin mi yo kase l', konsa tou se lè ou fin vye granmoun, w'a
²⁷ mouri. Jòb monchè, nou te kalkile sou bagay sa yo anpil. Se konsa sa ye, tandè. Pa fè tèt di.
Asepte verite a.

Chapter 6

¹ ¶ Jòb pran lapawòl, li di konsa: ² -Si yo te ka pran pèz lapenn mwen, si yo te ka peze tout malè mwen yo nan balans, ³ yo ta jwenn yo pi lou pase tout sab ki bò lanmè. Lè sa a, nou pa ta sezi tande m' pale jan m'ap pale a. ⁴ Bondye ki gen tout pouvwa a plante flèch li yo sou mwen. Pwazon yo a anvayi tout kò m'. Bondye voye sou mwen tout kalite malè pou fè kè m' kase. ⁵ Bourik mawon pa ranni lè li gen zèb pou l' manje. Ni bèf pa rele lè li gen manje devan l'. ⁶ Moun pa manje manje ki san gou, manje ki san sèl. Blan ze pa gen bon gou nan bouch. ⁷ Mwen pa menm gen apeti pou bagay konsa. Tou sa mwen manje fè kè m' tounen. ⁸ ¶ Si Bondye te ka ban mwen sa m' mande l' la! Si li te ka fè m' jwenn sa m'ap tann lan! ⁹ Si sèlman sa ta fè l' plezi pou l' touye m'! Si li ta vle lonje men l' pou l' disparèt mwen! ¹⁰ Se ta va yon gwo konsolasyon pou mwen. Malgre tout soufrans mwen yo, mwen ta danse, mwen ta fè fèt, paske mwen konnen mwen pa janm dezobeyi lòd Bondye ki apa a bay. ¹¹ Mwen pa gen fòs pou m' tann ankò. Pa gen ankenn espwa pou mwen. Sa m' bezwen viv toujou fè? ¹² Se pa wòch mwen ye. Se pa bout fè kò m' ye. ¹³ Mwen pa gen fòs ankò pou m' kenbe. Kote m' vire, mwen pa jwenn sekou. ¹⁴ ¶ Nan tray m'ap pase koulye a, mwen bezwen bon zanmi ki pou soutni m', menm si mwen ta vire do bay Bondye. ¹⁵ Men, frè m' yo, nou p'ap di m' anyen la a. Nou tankou ravin chèch ki pa gen dlo depi lapli pa tonbe. ¹⁶ Nan sezon fredè, lè lanèj ap fonn, yo plen dlo sal ki frèt kou glas. ¹⁷ Men, nan sezon lesèk, pa yon gout dlo! Chalè solèy la cheche yo nèt. ¹⁸ Bann vwayajè yo kite chemen yo pou y' al dèyè dlo. Yo pèdi nan dezè a. Yo mouri. ¹⁹ Vwayajè ki soti nan peyi Cheba ak nan peyi Saba ap touye tèt yo chache dlo. ²⁰ Yo pa ka jwenn. Rive devan ravin lan, yo pa konn sa pou yo fè. ²¹ Wi, mezanmi. Nou tankou yon ravin chèch pou mwen. Nou wè nan ki eta mwen ye, nou pè, n'ap renka kò nou dèyè. ²² ¶ Eske m' te mande nou pou nou fè m' kado kichòy? Osinon pou nou fè yon moun kado pou mwen nan sa nou genyen? ²³ Eske mwen te mande nou pou nou vin wete m' anba grif yon lènmi, osinon pou nou delivre m' anba men yon moun k'ap fè m' soufri? ²⁴ Bon. Pale avè m'. Si m' antò, fè m' wè kote m' antò a. Lè sa a, m'a pe bouch mwen. M'a koute nou. ²⁵ Pawòl ki pale verite bon pou tande. Men,

²⁶
 m' pa wè sa nou vle di m' la a. Ou di mwen fin dekouraje. Se depale m'ap depale. Poukisa atò
²⁷
 w'ap kritike pawòl mwen yo konsa? Konsa tou, ou ta rive jwe lajan sou tèt timoun san papa. Ou
²⁸
 ta fè lajan sou tèt bon zanmi ou. Koulye a, monchè, tanpri, gade m' nan je. Mwen p'ap ba ou
²⁹
 manti. Tounen non! Pa fè m' lenjistis sa a! Tounen, mwen di ou. Se kòz mwen m'ap defann.
³⁰
 Eske se manti m'ap bay? Dapre nou, mwen pa konnen sa ki byen ak sa ki mal?

Chapter 7

¹
 ¶ Lavi yon nonm sou latè, se tankou sèvis militè l'ap fè. Li tankou moun k'ap vann jounen!
²
 Li tankou yon esklav k'ap tann lannwit pou l' poze, tankou yon travayè k'ap tann kòb jounen travay
³
 li. Depi kèk mwa, m' pa wè poukisa m'ap viv. Tout lannwit se soufri m'ap soufri. ⁴ M' poko
 kouche nan kabann mwen, m'ap mande kilè pou l' jou. Nwit la long. M' pa ka dòmi, yon bann vye
⁵
 lide ap pase nan tèt mwen jouk solèy leve. Tout kò m' plen vè ak gwo plak bouton toupatou. Po
⁶
 m' fann fann, l'ap bay postim. Jou m' yo pase pi vit pase zegwi nan men moun k'ap maye senn.
⁷
 Yo disparèt, pa gen anyen m'ap tann ankò. ¶ Bondye o! Pa bliye, lavi m' tankou yon nwaj k'ap
⁸
 pase. Lè m'a fèmen je m', mwen p'ap janm kapab jwi lavi a ankò. Ou wè m' koulye a, men ou
⁹
 p'ap janm wè m' ankò. W'a chache m', ou p'ap jwenn mwen. Tankou yon nwaj ki ale nèt, ki
¹⁰
 disparèt, lè yon moun mouri, pa gen leve pou li ankò. Li p'ap janm tounen lakay li. Moun lakay
¹¹
 li tou bliye l'. Se poutèt sa, m' pa ka pa pale. Kè m' sere. Kite m' pale pale m'. Lapenn kaye nan
¹²
 kè m'. Kite m' plenyen plenyen m'. Poukisa ou mete moun veye m' konsa? M' pa lanmè. M' pa
¹³
 gwo bèt lanmè. M' te di nan kè m': M' pral lage kò m' yon kote. M'a pran yon ti kanpo. Si m'
¹⁴
 dòmi, m'a jwenn yon ti soulajman! Men, ou fè m' fè yon bann vye rèv k'ap fè m' pè. M'ap fè
¹⁵
 yon bann vye vizyon k'ap fè m' tranble. Lè konsa, pito moun te trangle m'. Pito m' te mouri pase
¹⁶
 pou m' soufri tout doulè sa yo. Se fini m'ap fini. Fòk mwen mouri yon jou! Kite m' pou kont
¹⁷
 mwen. Lavi m' prèt pou bout! ¶ Kisa lèzòm ye pou ou pran ka yo konsa? Kisa yo ye menm pou

w'ap okipe yo konsa? ¹⁸ Chak maten ou pase wè jan yo ye. Chak lè, w'ap gade nan fon kè yo, w'ap sonde yo. ¹⁹ Kilè w'a sispann gade m'? Ban m' yon ti souf non kont pou m' vale krache m'! ²⁰ Si m' fè peche, kisa m' fè ou? Di m' non, ou menm k'ap veye tou sa moun ap fè? Poukisa w'ap plante tout flèch ou yo nan kò m' konsa? Poukisa ou fè m' tounen yon chay pou ou? ²¹ Se sipòte ou pa ka sipòte ankò sa mwen fè ki mal? Se padonnen ou pa ka padonnen peche m' yo? Talè konsa mwen pral anba tè. W'a chache m', ou p'ap jwenn mwen ankò.

Chapter 8

¹ ¶ Lè sa a, Bildad, moun peyi Chwa a, pran lapawòl, li di konsa: ² -Kilè w'a sispann pale jan w'ap pale a? Se bri ase w'ap fè tankou kalbas gran bouch! ³ Bondye pa nan lenjistis. Bondye ki gen tout pouvwa a ap toujou fè sa ki dwat. ⁴ Si pitit ou yo te dezobeyi lòd li yo, li fè yo peye sa yo fè a. ⁵ Ou menm menm, rele Bondye. Lapriyè nan pye Bondye ki gen tout pouvwa a. ⁶ Si li pa gen anyen pou l' repwoche ou, si ou toujou mache dwat devan li, lè sa a, ou mèt sèten, l'a fè kichòy pou ou, l'ap renmèt ou tou sa ou te genyen. ⁷ Tou sa ou te gen anvan an p'ap anyen devan sa Bondye pral ba ou a. ⁸ ¶ Chache konnen sa ki te pase nan tan lontan. Gade sa ki te rive zansèt nou yo. ⁹ Nou menm, nou se moun ayè. Nou pa konn anyen. Se pase n'ap pase sou tè a. ¹⁰ Men, granmoun tan lontan yo va moutre ou anpil bagay. Y'a pale avè ou. Tande sa y'ap di ou. ¹¹ Se nan marekay ou jwenn jon. Wozo pa pouse kote ki pa gen dlo. ¹² Nan tan chechrès, li te mèt tou piti, tou vèt, lè lesèk tonbe, anvan menm yo koupe l', premye zèb ki fennen se li menm. ¹³ Se menm bagay la tou pou moun ki bliye si gen Bondye. Moun ki vire do bay Bondye p'ap jwenn sa y'ap tann lan. ¹⁴ Konfyans yo pa chita sou anyen. Se tankou si y'ap apiye sou bwa pouri. ¹⁵ Si yo panche sou li, li ale. Si yo kenbe l' fò, y'ap blayi atè ansanm avè l'. ¹⁶ Mechan yo pouse tankou move zèb nan solèy. Yo pran tout jaden an pou yo. ¹⁷ Rasin yo mache nan mitan tout fant wòch yo. Se la yo jwenn sa yo bezwen pou yo viv. ¹⁸ Rache ou rache yo pa gen moun ki pou konnen kote yo te ye a. ¹⁹ Talè konsa, l'ap pouri bò chemen an. Se lòt k'ap pouse nan plas li. ²⁰ ¶ Non, monchè! Bondye pa janm lage moun ki kenbe pye l' fèm. Ni li pa janm lonje men l' pou l' soutni mechan yo. ²¹ L'a

fè kè ou kontan ankò, bouch ou pral chante bèl chante pou li. ²² Men, l'ap fè moun ki pa vle wè ou yo wont. Fanmi mechan yo va disparèt.

Chapter 9

¹ ¶ Lè sa a, Jòb pran lapawòl, li di konsa: ² -Wi, mwen konnen se konsa sa ye. Men, ki jan pou yon moun ka gen rezon devan Bondye? ³ Si li vle plede ak Bondye, Bondye ap mande l' venmil keksyon, li p'ap ka reponn yonn menm. ⁴ Bondye sitèlman gen bon konprann, li sitèlman gen fòs, pa gen moun ki ka kenbe tèt avè l' pou yo pa peye sa. ⁵ Li deplase mòn yo lè lide l' di l'. Lè li an kòlè, li voye yo jete byen lwen. ⁶ Bondye fè tè a tranble kote l' chita a. Li souke potò ki soutni l' yo. ⁷ Li annik bay yon lòd, epi solèy la pa leve. Li fè zetwal yo pa klere lannwit. ⁸ Li te pou kont li lè li t'ap louvri syèl la anwo tè a. Li mache sou lanmè a jan li vle. ⁹ Se li ki fè zetwal yo: Gwo Kabwèt la, Oryon, Lapousiyè ak zetwal Sid yo. ¹⁰ Se li menm ki fè yon bann bèl bagay nou pa ka fin konprann, yon dal mèvèy nou pa ka fin konte. ¹¹ Bondye te mèt ap pase toupre m', mwen pa ka wè l'. Li glise kò l', li ale. ¹² Li pran sa l' bezwen. Pa gen moun ki pou enpoze l' fè l'. Pa gen moun ki ka penmèt yo mande l': Sa w'ap fè la a? ¹³ Bondye pa ka kenbe kòlè l' ankò! Li fè tout patizan Raab yo bese tèt devan li. ¹⁴ ¶ Se mwen menm atò ki pou ta kenbe tèt avè l'? Se mwen menm atò ki pou ta plede avè l'? ¹⁵ Menm si m' te gen rezon, sa m' bezwen defann tèt mwen fè? Se li k'ap jije m', se padon ase pou m' mande l'. ¹⁶ Menm si li ta reponn mwen lè m' rele l', mwen pa kwè li ta koute sa m'ap di l'. ¹⁷ Li rete konsa li kraze m' pou anyen. Li blese m' nan tout kò m', san m' pa fè anyen. ¹⁸ Li pa ban m' tan pou m' pran yon ti souf menm. Li voye malè sou mwen yonn apre lòt. ¹⁹ Mwen ta seye fè fòs avè l'? Fòs, se nan men l' sa ye. Mwen ta rele l' tribinal? Ki jij ki va voye manda ba li? ²⁰ M' te mèt gen rezon, pawòl nan bouch mwen ap kondannen m'. M' te mèt inonsan, tou sa m'ap di ap ban m' tò. ²¹ Eske m' inonsan? M' pa menm ka di sa. Lavi pa di m' anyen ankò! ²² ¶ Si gen yon bagay m' ka di: inonsan ou koupab, se menm bagay. Bondye ap

toujours detwi nou. ²³ Si yon malè konmanse ap simen lanmò, inonsan te mèt ap rele, Bondye ri sa.
²⁴ Lè yon peyi tonbe anba men moun ki mechan, Bondye bouche je tout jij yo. Si se pa li ki fè sa,
 ki moun ki pou fè l'? ²⁵ ¶ Jou yo pase pou mwen pi vit pase dlo larivyè. Pa gen yonn ki ban m' kè
 kontan. ²⁶ Yo kouri tankou bwa fouye sou larivyè, tankou malfini k'ap plonje sou ti poul. ²⁷ Si
 mwen di: Bon. M' p'ap plenyen ankò. M'ap chanje figi m', m'ap fè yon ti ri, ²⁸ soufrans yo vin pi
 rèd sou mwen. Mwen pè, paske mwen konnen pou Bondye mwen pa inonsan. ²⁹ Si m' antò, sa m'
 bezwen bat kò m' pou gremesi fè? ³⁰ Pa gen dlo ki ka lave m'. Pa gen savon ki ka blanchi m'.
³¹ Bondye voye m' jete nan yon pil fatra. Ata rad m' pa ka mete sou mwen. ³² Men, Bondye pa
 yon moun tankou m'. M' pa ka diskite avè l'. Nou pa ka al lajistis. ³³ Pa gen moun ki ka mete ola
 nan koze a. Pa gen moun ki ka jije m' ansanm avè l'. ³⁴ Pa gen moun ki ka kenbe men l' pou li
 sispann fè m' pè. ³⁵ Men, mwen pa pè l'. M'ap pale, paske se mwen ki konnen sa ki nan kè m'.

Chapter 10

¹ ¶ M' degoute ak lavi a. M' pa ka kenbe ankò. Kite m' plenn sò mwen! Kite m' di tout lapenn
 ki nan kè mwen! ² M'a di Bondye: Tanpri, pa kondannen m'. Fè m' konnen poukisa ou leve dèyè
 m' konsa. ³ Eske ou gen rezon pou ou fè m' tou sa w'ap fè m' lan, pou ou meprize sa ou fè ak men
 ou, pou ou ri lè mechan yo ap fè konfyolo yo? ⁴ Eske ou wè sa k'ap fèt sou latè tankou nou menm
 moun nou wè l' la? ⁵ Lavi ou pa tankou lavi pa nou. Nou gen pou nou mourir, ou menm w'ap toujours
 la. ⁶ W'ap chache dènye ti peche moun fè. Ou dèyè pou ou konnen tou sa mwen fè ki mal. ⁷ Ou
 konnen m' pa antò. Pa gen moun ki ka sove m' anba men ou! ⁸ ¶ Se ak men ou ou te fè m'. Se avè
 l' ou te ban m' fòm mwen. Epi se ak menm men sa yo ou vle detwi m' ankò? ⁹ Chonje se ou menm
 ki fè m' ak labou tè wouj. Koulye a, ou pral kraze m' fè m' tounen pousyè? ¹⁰ Se ou menm ki bay
 papa m' fòs pou li fè m'. Ou fè m' devlope nan vant manman mwen. ¹¹ Ou fè tout zo ak tout venn
 nan kò m'. Ou kouvri yo ak vyann epi ak po. ¹² Lèfini, ou fè m' kado lavi. Ou veye avèk prekasyon

pou m' pa mouri. ¹³ Men, ou te gen yon lòt lide dèyè tèt ou. Koulye a, mwen konnen ou te pare
 yon lòt bagay pou mwen. ¹⁴ ¶ Ou t'ap veye m' pou wè si m' t'ap fè sa m' pa t' dwe fè. Ou pa t'ap
 kite anyen pase pou mwen. ¹⁵ Si m' antò, zafè m' pa bon! Mwen te mèt inonsan, m' pa ka leve tèt
 devan ou. Mwen wont, se yon pòv malere mwen ye devan ou. ¹⁶ Si m' leve tèt mwen, ou fann dèyè
 m' tankou yon lyon dèyè bèt pou l' manje. Ou rive fè mirak pou ou ka fè m' lapenn. ¹⁷ Ou toujou
 pare pou fè yon atak sou mwen. Chak jou w'ap vin pi ankòlè. Se san pran souf w'ap voye lafliksyon
 sou mwen yonn apre lòt. ¹⁸ Bondye, poukisa ou te kite m' soti nan vant manman m'? Mwen ta
 mouri anvan pesonn ta wè m'. ¹⁹ Soti nan vant, ale nan simityè, se tankou si m' pa t' janm fèt.
²⁰ Mwen pa rete lontan pou m' viv ankò. Kite m' pou kont mwen! Ban m' yon ti kanpo. Kite m' jwi
 de twa jou ki rete m' yo non! ²¹ Talè konsa mwen prale pou m' pa janm tounen. Mwen prale nan
 peyi kote ki fè nwa a, kote moun pè a, ²² nan peyi kote se fènwa ak dezòd ase ki gen toutan, kote
 menm gwo lajounen fè nwa tankou lannwit!

Chapter 11

¹ ¶ Lè sa a, Sofa, moun Naama a, pran lapawòl, li di konsa: ² -Atò pesonn p'ap reponn gwo
 paladò sa a? Pale anpil pa ka bay moun rezon. ³ Pa konprann pale anpil ou a ka enpoze moun louvri
 bouch yo reponn ou. Paske w'ap pase moun nan betiz la, atò yo pa ka fè ou wont? ⁴ Ou pretann sa
 ou di a se verite. Pou ou, ou san repwòch devan Bondye! ⁵ Pa pito Bondye ta pale pou l' reponn
 ou! ⁶ Li ta fè ou wè gen anpil lòt bagay ou poko konnen, bagay moun pa ka konprann. Lè sa a, ou
 ta wè Bondye pa fè ou peye pou tou sa ou fè. ⁷ ¶ Ou konprann ou ka konnen sa ki nan kè Bondye,
 ou ka konnen tout bagay nèt sou Bondye ki gen tout pouvwa a? ⁸ Li pi wo pase syèl la. Sa ou ka
 fè pou sa? Li pi fon pase peyi kote mò yo ye a. Sa ou ka konnen la? ⁹ Li pi long pase longè tout tè
 a. Li pi laj pase lanmè a. ¹⁰ Si Bondye arete ou, li mete ou nan prizon, li trennen ou nan tribinal,
 ki moun ki ka di l' non? ¹¹ Bondye konnen tout moun k'ap bay manti. Je l' byen louvri, li wè tout
 mekanste moun ap fè. ¹² Konsa, moun fou va konmanse gen konprann. Bourik sovaj yo va donte.

¹³ ¶ Annou wè, monchè! Pran tèt ou! Louvri bra ou devan Bondye. ¹⁴ Sispann fè vye bagay k'ap sal men ou yo. Pa kite mechanste chita lakay ou. ¹⁵ Lè sa a, w'a leve tèt ou pou gade moun nan je. W'a byen fèm, ou p'ap pè anyen. ¹⁶ W'a bliye lapenn ou yo. Tankou yon inondasyon ki fin pase, ou p'ap chonje yo ankò. ¹⁷ Lavi ou pral klere pi bèl pase gwo solèy midi. Move pa yo pral tankou yon douvan jou. ¹⁸ Ou pral viv san kè sote. Ou p'ap dekouraje. Bondye va pwoteje ou, l'a ba ou kè poze. ¹⁹ Lè w'ap dòmi, pesonn p'ap deranje ou. Anpil moun va vin achte figi ou. ²⁰ Men, mechan yo ap voye je yo bouske toupatou, yo p'ap jwenn kote pou yo chape kò yo. Sèl espwa yo, se lanmò y'ap tann.

Chapter 12

¹ ¶ Jòb pran lapawòl, li di: ² -Apa nou k'ap pale pou pèp la! Mouri nou mouri, bon konprann kaba! ³ Men, mwen menm tou, mwen gen lespri menm jan avè nou. Mwen pa pi mal pase nou. Sa nou sot di la a, tout moun konnen l'. ⁴ Koulye a, menm zanmi m' ap pase m' nan rizib. Y'ap ri m', mwen menm yon moun Bondye pa gen anyen pou l' repwoche, yon moun Bondye te konn reponn lè m' rele l'. ⁵ Se konsa, moun ki pa nan pwoblèm meprize moun ki nan lafliksyon. Yo wè yon moun k'ap tonbe, yo ba l' bourad fè l' tonbe pi vit. ⁶ ¶ Piyajè yo byen trankil lakay yo. Moun k'ap fè Bondye fache yo ap viv alèz. Bondye yo se fòs ponyèt yo. ⁷ Manyè fè ti koze ak zannimo yo, ak zwezo yo. Yo gen anpil bagay pou yo moutre nou. ⁸ Bèt k'ap trennen sou vant va ban nou leson, pwason nan lanmè va di nou sa yo konnen. ⁹ Pa gen yonn ladan yo ki pa konnen se Bondye ki fè tout bagay ak men li. ¹⁰ Bondye gen nanm tout sa ki vivan nan men li. Wi, lavi tout moun nan men li. ¹¹ Bèl pawòl fè plezi zòrèy menm jan bon manje gou nan bouch. ¹² ¶ Yo di se vye granmoun ki gen konesans, se laj ki bay bon konprann. ¹³ Men, Bondye gen konesans, lèfini li gen pouvwa. Li gen bon konprann, lèfini li fè sa li vle. ¹⁴ Lè Bondye kraze yon bagay, pesonn pa ka refè l'. Lè li mete yon moun nan prizon, pesonn pa ka lage l'. ¹⁵ Lè li pa bay lapli, sèk tonbe sou latè. Lè li bay lapli, dlo fè dega toupatou. ¹⁶ Bondye gen fòs, li konn sa l'ap fè. Ni moun k'ap bay manti, ni

¹⁷
 moun k'ap pran manti, se anba ponyèt li yo ye. Li fè moun k'ap bay konsèy yo pèdi tèt yo. Li fè
¹⁸
 chèf yo aji tankou moun fou. Li wete tout pouvwa nan men wa yo. Li mare yon tanga nan ren
¹⁹
 yo jete yo nan prizon. Li fè prèt yo mache pye atè. Li mete gwo zotobre atè! ²⁰ Li fèmen bouch
²¹
 moun k'ap bay bon konsèy. Li fè granmoun yo depale. Li fè pase grannèg yo nan betiz. Li wete
²²
 pouvwa gwo chèf yo nan men yo. Li klere twou fon kote ki fè nwa a, li mete twou lanmò a aklè.
²³
 Li fè nasyon yo fè pwogrè, lèfini, li fè yo deperi. Li fè yon pèp pran elan, lèfini, li fè l' disparèt.
²⁴
 Li fè chèf pèp yo pèdi tèt yo, li fè yo moute desann nan dezè, san yo pa konn kote yo prale.
²⁵
 Y'ap tatonnen nan fènwa, y'ap titibe tankou moun sou.

Chapter 13

¹
 ¶ Wi, mwen wè tou sa ak de je m'. Mwen tande tou sa ak de zòrèy mwen epi mwen konprann.
²
 Sa nou konnen an, mwen konnen l' tou. M' pa pi sòt pase nou. ³ Men, mwen menm, se ak Bondye
⁴
 ki gen tout pouvwa m' annafè. Se avè l' mwen vle pale pou m' defann kòz mwen. Nou menm,
⁵
 kote nou pa konnen nou bay manti. Nou tankou dòktè ki pa janm geri pyès moun. Pito nou pe
⁶
 bouch nou! Lè sa a, n'a pase pou moun ki gen bon konprann. Koute sa mwen gen sou kè m'.
⁷
 Louvri zòrèy nou pou n' tande jan m' pral plede kòz mwen. Se defann nou vle defann Bondye
⁸
 kifè n'ap bay tout manti sa yo, kifè n'ap pale kwochi konsa? Se pou li n'ap pran? Se kòz li nou
⁹
 ranmase? Pou li, li ta bon pou nou si li t'ap chache konnen sa nou gen nan fon kè nou! Pa konprann
¹⁰
 nou ka woule Bondye tankou nou woule moun! Li ta regle nou byen regle, paske li ta tou wè se
¹¹
 figi l' n'ap achte anba chal. Nou pa pè gwo pouvwa Bondye a? Nou pa pè li kraze nou? ¹² Bèl
 pawòl nou yo pa gen plis valè pase pousyè tè. Repons n'ap ban mwen yo pa kenbe, yo tankou miray
¹³
 sab. ¶ Koulye a, pe bouch nou! Ban m' yon chans pou m' pale. Sa ki pou rive a te mèt rive!
¹⁴
 Mwen mèt mouri! Zafè! M' mare ren m', m' sere dan m'! ¹⁵ Bondye te mèt touye m'. Sèl chans
¹⁶
 mwen se pou m' esplike avè l'. Nou pa janm konnen, se sa ki ka sove m', paske moun ki fè mal

pa ka parèt devan Bondye.¹⁷ Koute byen sa m' pral di la a. Louvri zòrèy nou pou n' tande
 deklarasyon mwen.¹⁸ M' pare pou m' defann kòz mwen, paske mwen konnen mwen nan dwa m'.
¹⁹ Bondye, èske se ou ki pral plede avè m'? M' tou pare pou m' pe bouch mwen, pou m' asepte
²⁰ lanmò m'. De sèl ti chans ase m'ap mande ou. Apre sa, m' p'ap kache pou ou ankò.²¹ Sispann
 leve men ou sou mwen. Sispann fè m' pè tout pè sa a.²² Ou mèt pale anvan, m'a reponn ou. Osinon,
 kite m' pale anvan, w'a reponn mwen.²³ ¶ Konbe peche, konbe bagay mal mwen fè? Kisa m' fè
 mwen pa t' dwe fè? Kisa m' fè ki mal?²⁴ Poukisa w'ap kache pou mwen konsa? Poukisa ou fè
 tankou si se lènmi ou mwen ye?²⁵ Poukisa w'ap chache fè m' pè? Poukisa ou leve dèyè m' konsa?
 M' tou fini, m' tankou fèy bwa, tankou pay chèch van ap pote ale.²⁶ W'ap akize m' yon bann bagay
 k'ap fè m' mal. W'ap fè m' peye tou sa m' te fè lè m' te jenn gason.²⁷ Ou mete pye m' nan sèp. Ou
 veye tout vire tounen m'. Ou gade tout kote m'ap mete pye m'.²⁸ M'ap dekalè tankou bwa pouri,
 tankou rad sizo ap manje.

Chapter 14

¹ ¶ Nou menm moun, se nan vant fanm nou soti. Lavi nou kout, men li pa manke traka!² Nou
 parèt tankou yon flè. Epi lamenn nou fennen. Nou disparèt tankou yon nwaj k'ap pase.³ Epi,
 Bondye, se sa w'ap louvri je ou gade. Se sa w'ap fè kanpe devan ou pou jijje l'?⁴ Ki moun ki ka fè
 dlo pwòp soti nan yon sous sal? Pesonn moun.⁵ Tan chak moun gen pou l' viv la fikse deja depi
 lontan. Kantite mwa li gen pou l' viv la, se nan men ou sa rete. Anyen pa ka chanje.⁶ Tanpri, wete
 je ou sou mwen. Kite m' pran yon ti souf. Tankou moun ki fin pase yon jounen ap travay di, kite
 m' pran yon ti kanpo.⁷ ¶ Toujou gen yon ti espwa pou yon pyebwa. Yo te mèt koupe l', l'ap toujou
 pouse ankò, li p'ap mouri.⁸ Rasin li yo te mèt fin vye nan tè a, bout chouk la te mèt fin chèch,
⁹ depi li jwenn dlo, l'ap boujonnen, l'ap pouse kreyòl.¹⁰ Men moun, depi yo mouri, yo tounen
 kadav. Lè yo kase kòd, ou pa wè kote yo fè.¹¹ Letan ka cheche, larivyè ka sispann koule.¹² Men,
 kote yon moun mouri kouche a, pa gen leve pou li ankò. Poul va fè dan anvan y'a leve vivan ankò,

anvan y'a leve soti nan dòmi yo a. ¹³ Si sèlman ou ta vle kache m' nan peyi kote mò yo ye a? Si
 ou te ka kite m' la jouk kòlè ou la fin pase? Apre sa, ou ta fikse yon dat pou chonje m' ankò. ¹⁴ Men,
 sa m'ap di la a? Eske moun mouri ka leve? Sa pa fè anyen. Mwen ta tann move tan sa a fin pase,
 jouk sa ta bon pou mwen ankò. ¹⁵ Lè sa a, ou ta rele m', mwen ta reponn ou. Ou ta kontan wè sa
 ou te fè ak men ou lan. ¹⁶ ¶ Lè sa a, ou ta gade jan m'ap mache a, men, ou pa ta chonje sa m' te
 konn fè ki mal. ¹⁷ Ou ta padonnen m' peche m' yo, ou ta mare yo tout fè yon pakèt voye jete.
¹⁸ Rive yon lè se pou mòn yo anfale, se pou wòch yo woule desann. ¹⁹ Rive yon lè dlo ap fin manje
 wòch yo, lapli ap fin bwote tout tè a desann. Konsa tou, rive yon lè ou wete tout espwa nan kè
 moun. ²⁰ Ou kraze yo nèt anba men ou, epi yo mouri. Ou fè moun pa ka rekonèt yo, epi ou voye
 yo ale. ²¹ Moun fè lwanj pitit mò yo, men mò yo menm yo pa konn anyen. Moun pase yo nan betiz,
 men yo menm, sa pa di yo anyen. ²² Yon sèl soufrans yo santi se sa k'ap manje yo nan tout kò yo
 a. Se pou tèt pa yo ase y'ap plenyen!

Chapter 15

¹ ¶ Fwa sa a, Elifaz, moun lavil Teman an, pran lapawòl ankò, li di konsa: ² -Lè yon moun gen
 bon konprann, se pa avèk pawòl anlè pou li reponn. Li p'ap chita ap fè jazè. ³ Li p'ap rete ap defann
 tèt li ak mo ki pa vle di anyen, ak bèl diskou ki pa sèvi anyen. ⁴ Ou menm menm, ou al pi lwen.
 Dapre sa ou di la a, moun pa bezwen gen krentif pou Bondye ankò. Pa gen nesese pou moun
 lapriyè Bondye. ⁵ Jan ou pale a, yo wè ou se yon moun ki mechan nan fon kè ou. Ou pale tankou
 moun k'ap kache yon bagay. ⁶ Se bouch ou menm k'ap kondannen ou. Se pa mwen. Se pawòl nan
 bouch ou menm k'ap fini avè ou. ⁷ Manyè di m' non: Eske se ou menm premye moun Bondye te
 fè? Eske ou te fèt anvan tout mòn yo? ⁸ Eske ou te la lè Bondye t'ap fè plan travay li, kifè ou konnen
 pase tout moun? ⁹ Kisa ou konnen nou menm nou pa konnen? Kisa ou konprann nou menm nou
 pa ka konprann? ¹⁰ Se nan bouch granmoun lontan, granmoun cheve blan ki pi gran pase papa ou
 nou pran tout konesans pa nou. ¹¹ Poukisa ou pa asepte ankourajman Bondye voye ba ou a? Poukisa
 ou pa koute nou? N'ap pale byen dousman avè ou la a. ¹² Men, gade jan ou move! W'ap louvri je

¹³ ou sou nou! W'ap pase kòlè ou sou Bondye. W'ap plede joure l'. ¹⁴ Ki jan ou ta vle pou moun
 san repwòch devan Bondye? Pou moun ki soti nan vant fanm gen rezon devan Bondye? ¹⁵ Ata
 zanj li yo, Bondye pa fè yo konfyans. Yo menm tou yo pa fin bon nèt nan je l'. ¹⁶ Ale wè atò pou
 moun, ki pèvèti, ki pa vo anyen, ki fè mechanste tankou yo bwè dlo! ¶ ¹⁷ Koulye a, Jòb, koute m'.
 Kite m' esplike avè ou! Mwen pral di ou sa mwen menm mwen wè. ¹⁸ Moun ki gen bon konprann
 moutre m' anpil verite. Yo pa t' cache m' anyen. Yo menm, se nan bouch granmoun lontan yo te
 pran l'. ¹⁹ Granmoun sa yo t'ap viv nan peyi Bondye te ba yo pou yo menm ase, san ankenn moun
 lòt nasyon pa t' mele ak yo. ²⁰ Mechan yo pase tout lavi yo nan tèt chaje. Moun k'ap plede maltrete
 parèy yo p'ap viv lontan. ²¹ Rèl moun k'ap souffri yo ap kònen nan zòrèy yo. Lè zafè yo pi bon, se
 lè sa a vòlè tonbe sou yo. ²² Yo pa gen espwa chape nan fènwa a, paske manchèt pare ap tann yo.
²³ Y'ap kouri adwat agoch, y'ap cache manje. Yo konnen wè pa wè y'ap pran yo. ²⁴ Lanmò fè yo
 pè. Malè ak lafliksyon ap tonbe sou yo tankou yon wa ki tou pare pou batay. ²⁵ Men sa k'ap tann
 moun k'ap lonje men nan figi Bondye, moun ki pa pè kenbe tèt ak Bondye. ²⁶ Yo cache dèyè
 pwotèj anfe yo epi yo fonsse sou Bondye. ²⁷ Figi yo gra kou chat. Men gwosè vant yo ak grès!
²⁸ Yo rete nan lavil ki fin kraze, nan kay moun kouri kite, kay ki fin tounen mazi. ²⁹ Yo p'ap janm
 rich toutan. Sa yo genyen an la pou yon tan. Menm lonbray yo ap disparèt. ³⁰ Yo p'ap ka kouri
 pou fènwa a. Y'ap tankou yon pyebwa dife boule tout branch li yo epi van bwote tout flè l' yo ale.
³¹ Yo pa bezwen konte sou pozisyon yo. Nou konnen sa p'ap sèvi yo anyen. ³² Anvan yo donnen,
 branch yo ap fennen. boujon yo p'ap pouse fèy ankò. ³³ Y'ap tankou yon pye rezen ki pèdi tout
 grap rezen vèt yo, tankou yon pye oliv ki pèdi tout flè l'. ³⁴ Wi, mechan yo p'ap gen pitit. Dife ap
 boule tout kay yo bati ak lajan yo volè. ³⁵ Lè yon moun ap cache fè moun mal, se sou li malè a
 tonbe. Se pwòp tèt li l'ap twonpe.

Chapter 16

¹ ¶ Jòb pran lapawòl ankò, li di konsa: ² -Mwen bouke tande pawòl sa yo! Pase nou konsole
 moun, se plis lapenn n'ap ba yo. ³ Kilè n'a sispann tout pale anpil sa a? Sa k'ap pouse nou konsa?
 Nou toujou pare pou reponn moun! ⁴ Si m' te nan plas nou, epi nou menm nan plas mwen, m' ta
 ka pale jan nou pale a tou, m' ta pase nou nan yon wonn tenten, m' ta vide bèl diskou sou nou. ⁵ M'
 ta remoute kouraj nou ak konsèy, m' ta pale ak nou jouk nou ta soulaje. ⁶ ¶ Men, lè mwen pale,
 doulè a la pi rèd pou mwen. Lè mwen pa pale, se pa sa k'ap fè l' ban m' yon ti louga. ⁷ Koulye a,
 Bondye, se fini ou fini avè m'. Ou kite yo touye tout fanmi m'. ⁸ Ou mete men sou mwen, ou pa
 vle wè m' ankò. Mwen tounen zo ak po. Yo di se paske mwen antò ki fè sa rive m'. ⁹ Nan kòlè li,
 Bondye ap dechire m' moso pa moso. L'ap devore m' anba dan l'. L'ap louvri je l' sou mwen, li pa
 vle wè m'! ¹⁰ Moun prèt pou manje m'. Yo kouri sou mwen, y'ap joure m', y'ap touye m' anba
 souflèt. ¹¹ Bondye lage m' nan men mechan yo. Li jete m' anba grif san manman yo. ¹² Mwen t'ap
 viv tou dousman, li bouskile m'. Li pran m' dèyè nwa kou, li kraze m', li fè m' tounen jwèt li. ¹³ L'ap
 voye flèch li sou mwen kote m' vire. Li pèse tout kò m', li san pitye pou mwen, li mete san m' deyò.
¹⁴ Kote m' vire li blese m', li vare sou mwen tankou yon sòlda nan lagè. ¹⁵ Mwen fè rad sak mete
 sou mwen, mwen woule kò m' nan pousyè tèlman mwen te nan lapenn. ¹⁶ Je m' vin wouj afòs
 mwen kriye. Tout anba je m' gonfle vin tou nwa. ¹⁷ ¶ Men, mwen konnen mwen pa fè ankenn
 moun mechanste. Mwen lapriyè Bondye ak tout kè m'. ¹⁸ Ou menm latè, pa kache mizè mwen. Pa
 kite yo fèmen bouch mwen lè m'ap rele nan pye Bondye! ¹⁹ Paske mwen konnen gen yon moun
 nan syèl la k'ap kanpe pou mwen, gen yon moun anwo a k'ap pran defans mwen. ²⁰ Zanmi m' yo
 ap pase m' nan betiz, men, m'ap kriye nan pye Bondye. ²¹ Mwen bezwen moun pou plede kòz
 mwen ak Bondye a, menm jan yon moun plede kòz zanmi l'. ²² M' pa lontan mouri. Mwen pral
 pran chemen kote moun pa janm tounen an.

Chapter 17

¹ ¶ Souf mwen prèt pou koupe. Mwen pa lwen mouri. Se pou simityè ase mwen bon. ² Kote m' vire, se moun k'ap pase m' nan betiz. Vye pawòl jouman yo enpoze m' dòmi. ³ Ou mèt kwè m', Bondye! Se ou menm ankò ki pou bay garanti pou mwen. M' pa gen pesonn lòt ki ka tope ak yo. ⁴ Ou fèmen lespri yo pou yo pa konprann. Pa kite yo gen rezon sou mwen. ⁵ Pawòl la di: Yon moun ap fè gwo fèt pou zanmi l', epi pitit li yo ap mouri grangou anndan lakay li. ⁶ Yo fè koze sou mwen nan pèp la. Yo vin krache nan figi m'! ⁷ Mwen sitèlman nan lapenn, m' pa ka louvri je m'. Mwen fin tounen zo ak po. Ata lonbraj mwen pa fè! ⁸ Moun k'ap mache dwat yo sezi lè yo wè sa. Inonsan yo fin debòde sou mechan an ki vire do bay Bondye. ⁹ Moun k'ap mennen yon vi dwat, se yo ki gen rezon. Sa ki pa mete men yo nan ankenn move zafè kanpe pi rèd sou pozisyon yo. ¹⁰ ¶ Nou tout mèt vin kanpe devan m', mwen p'ap jwenn yonn ladan nou ki gen bon konprann. ¹¹ Mwen fin viv! Tout plan m' te gen nan tèt mwen kraze. Mwen pa gen ankenn espwa ankò. ¹² Yo pretann lannwit se lajounen. Lè fènwa, yo di limyè a pa lwen. ¹³ Se lanmò m'ap tann. Se al kouche nan simityè ki sèl espwa m'. ¹⁴ Mwen di tonm lan ou se papa m'. Mwen di vèmen ki pral manje m' yo: nou se manman m' ak sè m'. ¹⁵ Kote ki gen espwa pou mwen ankò? Ki moun ki wè yon bon lavi pou mwen ankò? ¹⁶ Lè m'a mouri, lè m'a fin desann nan peyi kote mò yo ye a, èske m'a ka pote espwa m' yo ansanm avè m'?

Chapter 18

¹ ¶ Bildad, moun peyi Chwa a, pran lapawòl, li di konsa: ² -Jòb monchè, ou pa ka pe bouch ou yon ti kadè? Si ou te fè yon ti sispann, nou ta pale avè ou! ³ Poukisa ou pran nou pou moun san konprann? Poukisa ou pran nou pou zannimo? ⁴ Si ou ankòlè, se pwòp tèt ou ase w'ap fè mal. Atò, poutèt ou, se pou tout moun sou latè te mouri? Se pou Bondye te deplase mòn yo pou fè ou plezi? ⁵ ¶ Wi, y'ap touye limyè mechan an, flanm dife l' la p'ap klere ankò. ⁶ Lanp lakay li ap mouri, limyè lakay li ap tenyen. ⁷ Li te konn mache byen engannm, koulye a se ti pa ti pa, l'ap bite. Se plan li t'ap fè yo ki lakòz sa rive l'. ⁸ Li pile yon pèlen, pye l' pran ladan l'. ⁹ Kòd la mare nan je pye l', l'ap

¹⁰ sere l' byen sere. Yo kache yon chita tann pou li anba tè. Yo moute yon pèlen sou wout li. ¶¹¹
 Kote l' vire, malè ap tann li. Kote l' pase, yo la dèyè l'.¹² Grangou nan kò l' fini ak kouraj li. Malè
 kanpe la bò kote l' ap tann li.¹³ Yon sèl maladi po pete sou tout kò l'. L'ap manje tout janm li ak
 tout bra li yo. Se tè ki pou geri l'.¹⁴ Yo rale l' mete deyò anba tant kote li te al kache a. Yo trennen
 l' devan jeneral Lanmò.¹⁵ Koulye a, nenpòt moun gen dwa pran kay li a pou yo. Y'ap dezenfèkte
 l' nèt ak souf.¹⁶ Anba tè, rasin li yo ap mouri. Anwo tè, branch li yo ap fennen.¹⁷ p'ap gen pesonn
 k'ap chonje l' ankò sou latè. Y'ap bliye l' nèt nan tout peyi a.¹⁸ Y'ap pouse l' soti nan limyè ale nan
 fènwa. Y'ap depòte l' byen lwen nan peyi san chapo.¹⁹ Li p'ap kite ni pitit, ni ankenn lòt fanmi
 nan mitan pèp la. Yo tout ap mouri anvan l'.²⁰ Depi solèy leve jouk solèy kouche, tout moun pral
 sezi wè jan li fini.²¹ Wi, men sa k'ap tann lakou moun k'ap fè mechanste yo, fanmi moun ki pa
 respekte Bondye yo.

Chapter 19

¹ ¶ Jòb pran lapawòl, li di konsa: ² -Manyè sispann vire lòlòj mwen non! Manyè sispann kraze
 kouraj mwen ak tout pawòl sa yo? ³ Tout tan n'ap plede joure m', n'ap trennen m' nan labou. Nou
 pa wont jan n'ap malmennen m' la a? ⁴ Menm si mwen ta fè sa m' pa t' dwe fè, ki jan pou sa ta ka
 fè nou mal? ⁵ Nou konprann nou pi bon pase m'. Nou di se paske mwen antò kifè m'ap pase tray
 sa a. ⁶ Nou pa wè se Bondye k'ap manyen avè m'. Se li menm ki pran m' nan pèlen. ⁷ Si m' rele
 anmwe ansasen, pesonn p'ap reponn. Si m' mande jistis, pesonn p'ap kanpe pou defann mwen. ¶⁸
 Bondye bare tout chemen devan mwen. M' pa ka pase. Li fè m' wè tou nwa devan mwen. ⁹ Li fè
 yo ban m' move non. Li fè m' pèdi tout byen m'. ¹⁰ Li minen m' tout jan. M'ap deperi. Li wete tout
 espwa m'. Mwen tankou yon pyebwa yo derasin. ¹¹ Bondye ankòlè nèt sou mwen. Li konsidere
 m' tankou yon lènmi. ¹² Li voye yon bann malè sou mwen yon grenn kou, tankou yon lame k'ap
 atake m'. Yo rive sou mwen san m' pa wè sa. Yo sènen m' anndan lakay mwen. ¹³ Bondye fè frè

m' yo renka kò yo sou mwen. Zanmi m' yo kouri pou mwen. ¹⁴ Tout fanmi mwen yo, tout bon
 zanmi m' yo disparèt. Moun mwen te konn resevwa lakay mwen bliye m'. ¹⁵ Ata sèvant lakay
 mwen pa rekonèt mwen. Pou yo, yo pa janm konnen m'. ¹⁶ Si mwen rele yon domestik, li pa reponn
 mwen. Mwen te mèt lapriyè nan pye l', li pa okipe m'. ¹⁷ Madanm mwen pa ka pran sant mwen.
 Ata pwòp pitit mwen yo pè pwoche bò kote m'. ¹⁸ Tout timoun ap pase m' nan betiz. Si m' fè yon
 ti kanpe, yo pase m' nan tenten. ¹⁹ Pi bon zanmi m' yo ap gade m' ak degoutans. Sa m' pi renmen
 yo ap pale sou do m'. ²⁰ Mwen tounen zo ak po. Sa ki rete pou m' mouri a pa anyen. ²¹ Nou se
 zanmi m'. Pitye pou mwen! Pitye! Se Bondye menm ki leve men sou mwen. ²² Poukisa pou nou
 leve dèyè m' tou menm jan ak Bondye? Koulye a, nou pa pèsekite m' kont nou? ²³ ¶ Si sèlman te
 gen yon moun pou kouche pawòl mwen yo, pou ekri yo sou papye, ²⁴ pou grave yo ak sizo sou
 wòch plat, pou yo toujou rete make! ²⁵ Mwen menm, mwen konnen moun ki gen pou vin pran
 defans mwen an byen vivan. Se li menm an dènye k'ap kanpe sou latè pou pale pou mwen. ²⁶ Apre
 m' fin mouri, l'ap mete m' kanpe bò kote l'. M'a wè Bondye ak pwòp je m'. ²⁷ Se mwen menm
 menm k'ap wè l'. Se p'ap yon lòt moun! Kè m' ap fann, ²⁸ paske n'ap mande ki jan pou n' fè m'
 pase mizè ankò? Ki rezon n'ap jwenn nan mwen pou nou atake m'? ²⁹ Men, atansyon pou se pa
 sou nou nepe a tonbe, lè Bondye va soti pou pini moun ki antò yo. Lè sa a, n'a konnen gen yon
 moun k'ap jije tout bon.

Chapter 20

¹ ¶ Lè sa a, Sofa, moun lavil Naama a, pran lapawòl, li di konsa: ² -Mwen gen yon bann lide
 k'ap travay nan tèt mwen. Mwen pa ka tann ankò. Se pou m' reponn ou. ³ Tou sa ou di la a vekse
 m'. Men, mwen konnen jan pou m' reponn ou. ⁴ Ou konnen, depi nan tan lontan, depi premye moun
 Bondye te mete sou tè a, ⁵ mechan yo pa janm gen kè kontan pou lontan. Plezi moun k'ap fè mal
 yo se pou yon ti tan. ⁶ Yo te mèt grandi jouk pou yo rive wotè syèl la, jouk pou tèt yo ta rive nan
 nwaj yo, ⁷ y'ap rete konsa, y'ap disparèt tankou yon pil fatra yo boule. Moun ki te konnen yo va

8 mande kote yo pase. Moun bliye yo tankou yon rèv yo fè yo pa ka chonje, tankou yon vizyon yo
 fè lannwit, yo p'ap janm wè ankò. 9 Moun ki te konn wè yo p'ap wè yo ankò. Menm moun lakay
 yo p'ap konnen kote yo pase. 10 ¶ Pitit yo va peye pòv yo pou tou sa yo te fè yo. Se pwòp pitit yo
 ak men yo ki va renmèt pòv yo sa yo te pran pa fòs. 11 Mechan yo te gen tout fòs jenn gason yo
 sou yo toujou. Men koulye a, tou sa pral tounen pousyè ansanm ak yo. 12 Lè l' t'ap fè sa ki mal sa
 te sitèlman gou nan bouch li, li te kenbe ti gout anba lang li. 13 Li pa t' kite l' fin twò vit nan bouch
 li, pou l' te ka jwi gou a pandan lontan. 14 Men, rive manje a rive nan lestonmak li, li vin anmè kou
 fyèl. Anndan vant li pran boule l' tankou si li te vale pwazon. 15 Mechan an gen pou l' vonmi tout
 richès li te vòlò yo, paske Bondye ap foure dwèt nan gòj li. 16 Tou sa li te vale tounen pwazon pou
 li. L'ap mouri tankou si se yon sèpan laspik ki mòde l'. 17 Li p'ap viv pou l' wè lwil koule tankou
 dlo larivyè, ni siwo myèl ak lèt koule tankou lavalas. 18 L'ap blije bay tou sa li te travay fè. Li p'ap
 gen chans jwi richès li yo. 19 Paske li te piye kay pòv malere yo, li te pito vòlò kay moun pase pou
 l' bati. 20 Li pa t' janm gen kont li. Men, richès li p'ap ka delivre l'. 21 Pesonn pa t' ka chape anba
 men l' sitèlman li te ak rèk. Non. Tout richès li yo pa la pou lontan. 22 Atout li gen tout richès sa
 yo, li pral gen kè sere. Tout kalite mizè pral tonbe sou li. 23 ¶ Pandan l'ap manje plen vant li, Bondye
 pral move kont move sou li. Malè pral tonbe dri sou li. 24 Lè l'ap chache kouri pou yon nepe fèt
 an fè, yon flèch an kwiv pral pèse l' pak an pak. 25 Yon flèch ap pèse kò l'. San li ap degoute konsa
 nan pwent flèch la. Kè l' sere, li wè lanmò anfas. 26 Li pèdi tou sa li te sere. Yon dife pesonn pa
 limen ap boule l'. L'ap devore tou sa ki lakay li. 27 Syèl la fè konnen tou sa li te fè ki mal. Latè
 kanpe pou denonse l'. 28 Yon sèl dlo desann va pote kay li ale, jou Bondye va fè kolè sa a sou li.
 29 Wi, se sa Bondye sere pou mechan yo. Se sa mechan yo pral resevwa nan men Bondye.

Chapter 21

¹ ¶ Lè sa a, Jòb pran lapawòl ankò, li di konsa: ² -Manyè tande sa m' pral di nou la a, non!
³ Tanpri, charite m' ti ankourajman sa a! Ban m' yon ti chans pou m' pale. Lè m'a fini, nou mèt pase
⁴ m' nan betiz kont nou! Se pa avèk yon moun mwen annafè. Mwen gen rezon si m' pa ka tann
⁵ ankò! Voye je nou gade m' byen. N'a sezi. N'a mete men nan bouch. ⁶ Mwen menm, lè m' chonje
⁷ sa ki rive m', m' pè. Tout kò m' pran tranble. ¶ Poukisa Bondye kite mechan yo ap viv? Li kite
⁸ yo rive vye granmoun, epi tout zafè yo mache byen? Yo gen pitit ak pitit pitit. Yo wè yo ap grandi
⁹ devan je yo. Bondye pa voye malè sou yo pou pini yo. Y'ap viv alèz lakay yo san ankenn danje.
¹⁰ Wi, bèf yo kwaze san mank, yo fè pitit san pèdi pòte. ¹¹ Timoun yo ap kouri tankou ti mouton
¹² nan savann. Y'ap jwe, y'ap sote tankou ti kabrit. Y'ap chante, y'ap jwe gita, y'ap bat tanbou, y'ap
¹³ danse pandan moun ap jwe fif pou yo. Jouk jou yo mouri, kè yo kontan. Yo desann nan peyi
¹⁴ kote mò yo ye a ak kè poze. Se yo menm k'ap plede di Bondye: Kite n' an repo! Nou pa bezwen
¹⁵ konnen jan ou vle pou moun viv la. Kisa Bondye ki gen tout pouvwa a ye menm pou nou sèvi
¹⁶ l' la? Kisa sa ap rapòte nou lè nou lapriyé l'? Yo pretann tou sa yo genyen se kouraj yo ki ba yo
¹⁷ l'. Yo pa t' janm mete Bondye nan koze yo. Mwen pa dakò ak jan y'ap pale a, non. ¶ Ou janm
¹⁸ wè limyè mechan an mouri? Ou janm tande malè rive yo? On jan wè Bondye fè kolè pou l' pini
¹⁹ malveyan yo, pou van bwote yo ale tankou zèb chèch, pou van tanpèt chase yo tankou pay
²⁰ pitimi? Yo pretann di Bondye va pini pitit pou peche papa yo! Poukisa se pa papa yo menm li
²¹ pini pou yo ka pran leson? Se pou mechan yo te wè chatiman yo. Se yo menm ki te pou santi
²² kòlè Bondye ki gen tout pouvwa a pa dous. Ki mele yo sa ki rive pitit yo, lè yo fin ale, lè yo fin
²³ viv tan pou yo te viv la? Men, Bondye ki jije ata zanj ki nan syèl la, ki moun ki ka moutre l' sa
²⁴ pou li fè? Gen moun ki pa janm malad jouk yo mouri. Jouk jou yo antre anba tè, yo kontan, yo
²⁵ pa gen tèt chaje. Yo gra nan tout kò yo, tout zo yo plen ak mwèl. Yon lòt menm pa janm
²⁶ konnen sa ki rele kè kontan. Li pase tout lavi l' nan nesosite, li mouri nan mizè. Men, lè tou de
²⁷ mouri, yo antere yo, vèmen kouvri kadav yo menm jan. ¶ Men wi, mwen konnen sa ki nan tèt
²⁸ nou. Mwen konnen ki move lide n'ap fè sou mwen koulye a. N'ap mande kote kay gwo zotobre

a. Sa ki rive kay nèg ki te konn fè sa ki mal la. ²⁹ Kouman? Nou pa pale ak moun ki vwayaje? Nou pa konn ki nouvèl y'ap bay? ³⁰ Jou Bondye ankòlè, lè l'ap pini an, se toujou mechan yo ki resi chape kò yo! ³¹ Men, ki moun ki ka kanpe devan yo pou akize yo? Ki moun ki ka fè yo peye sa yo fè a? ³² Yo fè bèl lanmèman pou yo. Yo mete moun veye tonm yo. ³³ Foul moun ap swiv sèkèy yo, yon pati moun devan, yon pati moun dèyè. Menm tè a chita dous sou kadav yo. ³⁴ Lèfini, n'ap chache konsole m' ak yon bann pawòl san sans. Tou sa n'ap reponn mwen la a se manti.

Chapter 22

¹ ¶ Lè sa a, Elifaz, moun lavil Teman an, pran lapawòl. Li di konsa: ² -Eske yon moun ka itil Bondye? Non! Ata moun ki gen bon konprann yo, se tèt yo ase yo itil. ³ Lè ou fè sa ki byen, ki enterè Bondye ki gen tout pouvwa a jwenn nan sa? Sa sa rapòte l' lè ou mennen bak ou dwat? ⁴ Eske se paske ou gen krentif pou Bondye kifè l'ap rale zòrèy ou konsa, kifè l'ap trennen ou nan tribinal li? ⁵ ¶ Non. Se paske ou fè anpil peche. Se paske ou te san limit nan fè mechanste. ⁶ Ou fè frè ou ba ou garanti pou lajan li pa t' dwe ou. Ou pran ata rad ki sou li, ou kite l' toutouni. ⁷ Ou refize bay moun ki te swaf yo ti gout dlo. Ou refize bay moun ki te grangou yo moso pen. ⁸ Ou pwofite fòs ou ak pozisyon ou pou pran tout peyi a pou ou. ⁹ Ou refize lonje men ou bay vèv yo. Ou maltrete timoun ki san papa yo. ¹⁰ Se poutèt sa, kote ou rive se pèlen yo pare pou ou. Ou rete konsa, kè ou kase. ¹¹ Sitèlman fè nwa, ou pa ka wè. Ou nan dlo jouk nan kou! ¹² Eske se pa anwo nèt nan syèl la Bondye rete? Se anba pou li voye je l' pou l' ka wè zetwal yo. ¹³ Ou konn sa, epi w'ap di: Sa Bondye ka konnen? Li kache dèyè nwaj yo, ki jan pou l' jije sa k'ap pase sou latè? ¹⁴ Nwaj yo twò pwès, li pa ka wè. Se sou fetay syèl la l'ap mache. ¹⁵ ¶ Ou vle mache pye pou pye dèyè mechan yo, nan move chemen yo te toujou pran depi lontan an! ¹⁶ Yo mouri anvan lè yo tou. Yo tankou lavalas: anvan ou bat je ou, yo pase. ¹⁷ Yo menm tou yo t'ap di Bondye: Wete kò ou sou nou! Kisa Bondye ki gen tout pouvwa a ka fè nou? ¹⁸ Atò, se Bondye menm ki te plen kay yo ak richès. Mwen pa janm konprann ki jan mechan yo ka fè di sa. ¹⁹ Men, lè y'ap pini mechan yo,

moun ki mache dwat yo va kontan, inonsan yo va pase yo nan rizib. ²⁰ Gade jan grannèg yo fini
 non! Dife boule tou sa yo te genyen. ²¹ ¶ Jòb monchè, byen ak Bondye ankò, tandè! Sispann chache
 l'kont! ²² Koute pawòl li t'ap di ou yo. Kenbe yo nan kè ou. ²³ Wi, tounen vin jwenn li, san lògèy
 nan kè ou. Sispann fè sa ki mal lakay ou. ²⁴ Voye tout lò ou jete nan fatra. Pi bon pyès lò ou yo,
 jete yo nan galèt larivyè. ²⁵ Se Bondye ki gen tout pouvwa a ki va tout lò ou. Se li menm ki va
 gwo pil lajan byen wo pou ou. ²⁶ Paske, lè sa a, se nan Bondye ki gen tout pouvwa a w'a jwenn
 tout plezi ou. Se sou Bondye w'a toujou gade. ²⁷ Lè w'a lapriyè nan pye l', l'a reponn ou. W'a kenbe
 tout pwomès ou fè l' yo. ²⁸ Tout zafè ou va mache byen. Limyè va klere byen bèl sou tout wout
 ou. ²⁹ Bondye kraze lògèy moun awogan. Men, li sove moun ki bese tèt devan li. ³⁰ L'ap delivre
 ou si ou inonsan. L'a sove ou, si ou pa janm sal men ou nan anyen.

Chapter 23

¹ ¶ Lè sa a, Jòb pran lapawòl, li di konsa: ² -Fwa sa a ankò, m'ap kenbe tèt ak Bondye, m'ap
 plenyen nan pye l'. Se plenn m'ap plenn pou sa m'ap pase anba men l'. ³ Si m' te ka konnen kote
 pou m' jwenn li, mwen ta rive kote l' ye a. ⁴ M' ta defann kòz mwen devan li. M' ta di l' dènye sa
 ki nan lide m' pou defann tèt mwen. ⁵ M' ta konnen jan l'ap reponn mwen, m' ta tandè sa l'ap di m'.
⁶ Eske Bondye tapral sèvi ak tout fòs li pou diskite avè m'? Non. Li ta rete koute m' ase. ⁷ Li ta wè
 moun k'ap pale avè l' la se yon moun ki toujou mache dwat. Li menm k'ap jije m' lan, li ta rekonèt
 mwen inonsan. ⁸ ¶ M' ale bò solèy leve, Bondye pa la. M' ale bò solèy kouche, mwen pa wè l' tou.
⁹ Mwen moute nan nò al chache l', m' pa wè l'. Mwen desann nan sid, bichi! ¹⁰ Men, Bondye konnen
 tout ti vire tounen mwen. Si li sonde m', l'a wè m' bon tankou bon lò ki pase nan dife. ¹¹ M' mache
 pye pou pye dèyè l'. M' swiv chemen li mete devan m' lan. M' pa janm devire ni adwat ni agoch.
¹² Mwen toujou fè tou sa li bay lòd fè. Mwen te fè volonte l', mwen pa fè sa m' te gen nan tèt mwen.
¹³ ¶ Men, lè Bondye fin deside yon bagay, ki moun ki ka fè l' chanje lide? Ki moun ki ka enpoze
¹⁴ l' fè sa li vle fè a? L'ap toujou fè m' sa li vle fè m' lan. Sa se yonn nan tout bagay li deside fè yo.

15 Se poutèt sa, m'ap tranble devan l'. Lè m' chonje sa, mwen soti pè l'.¹⁶ Men wi, se Bondye k'ap
 kraze kouraj mwen. Se Bondye menm mwen soti pè. Se pa fènwa a.¹⁷ Fènwa a kache Bondye pou
 m' pa wè l'. L' enpoze m' santi prezans li. Se tout!

Chapter 24

¹ ¶ Poukisa Bondye ki gen tout pouvwa a pa fikse yon dat pou li jije tout moun, yon jou pou li
 rann tout moun k'ap sèvi l' yo jistis?² Mechan yo deplase bòn tè moun. Yo vòlò mouton lòt moun,
 mete ansanm avèk bann mouton pa yo.³ Yo pran bourik ki pou timoun san papa yo. Yo sezi bèf
 vèv la jouk li resi peye dèt li.⁴ Yo enpoze pòv yo jwenn sa ki vin pou yo. Yo fòse tout pòv malere
 kouri al kache.⁵ Tankou bourik mawon, pòv yo soti al nan dezè a, y' al chache lavi pou pitit yo ki
 grangou. Pa gen lòt kote yo ka ale.⁶ Y'ap ranmase rekòt pou lòt moun. Y'ap keyi rezen nan jaden
 pou mechan yo.⁷ Lè yo toutouni, yo pa gen rad pou mete sou yo. Lannwit, yo pa gen anyen pou
 chofè kò yo lè yo frèt.⁸ Lapli k'ap tonbe sou mòn yo mouye yo jouk nan zo. Yo kwoupi kò yo
 dèyè wòch pou pare lapli.⁹ Mechan yo wete timoun san papa yo nan men manman yo pou fè yo
 tounen esklav. Yo pran rad pòv malere yo pou garanti dèt yo.¹⁰ Pòv yo menm ap mache yon men
 devan yon men dèyè, san rad pou mete sou yo. Y'ap mache ranmase rekòt nan jaden, men y'ap
 mouri grangou.¹¹ Nan lakou mechan yo y'ap moulen grenn oliv fè lwil. Y'ap kraze rezen fè diven.
 Men y'ap mouri swaf dlo.¹² Nan lavil yo, ou tande moun k'ap mouri yo ap plenn. Ou tande moun
 ki blese yo ap rele anmwe. Men, Bondye fè tankou li pa tande yo.¹³ ¶ Se moun sa yo ki pa vle wè
 limyè a. Yo derefize konprann limyè a. Yo pa vle pran chemen limyè a nan tou sa y'ap fè.¹⁴ Anvan
 bajou kase, ansasen an gen tan leve, pou li al touye pòv malere yo. Lannwit, se vòlò l'ap mache
 vòlò.¹⁵ Mouche marye k'ap fè adiltè a ap tann solèy kouche konsa. Li bouche figi l' pou pesonn
 pa wè l'.¹⁶ Lannwit, vòlò ap kraze kay moun. Lajounen yo kache, y'ap kouri pou solèy.¹⁷ Yo pè
 limyè lajounen an. Men, pa gen anyen ki pou fè yo pè nan fènwa a.¹⁸ ¶ Lè sa a, Sofa di konsa:
 -Men dlo desann pote mechan yo ale. Madichon Bondye tonbe sou tout tè ki pou yo. Yo pa soti al
 travay nan jaden rezen yo.¹⁹ Menm jan chalè fonn lanèj, lèfini tè sèk bwè dlo a, se konsa moun

k'ap fè peche yo ap disparèt ale nan peyi kote mò yo ye a. ²⁰ Tout moun bliye yo. Ata manman ki fè yo pa chonje yo. Se vè k'ap manje kadav yo. Yo fini tankou yon pyebwa yo koupe jete. ²¹ Tou sa rive konsa, paske li maltrete fanm ki pa ka fè pitit. Li san pitye pou vè yo. ²² Lè sa a, Bondye detwi gwo chèf yo ak fòs ponyèt li. Li annik parèt, mechan an konnen li mouri. ²³ Bondye kite l' viv alèz san pwoblèm, men, se toutan l'ap veye tou sa l'ap fè. ²⁴ Zafè mechan yo mache byen pou yon tan. Men, apre sa, yo fennen tankou zèb savann, tankou tèt ble yo koupe. ²⁵ Si se pa konsa sa ye, ki moun ki ka demanti sa m' di la a? Ki moun ki ka fè wè pawòl mwen yo pa vo anyen?

Chapter 25

¹ ¶ Bildad, moun lavil Chwa a, pran lapawòl, li di konsa: ² -Bondye se chèf. Li fè tout moun respekte l'. Li fè tout moun nan peyi ki nan syèl la viv ak kè poze. ³ Ki moun ki ka konte kantite zanj k'ap sèvi l'? Pa gen kote limyè Bondye a pa klere. ⁴ Atò, moun ka konprann yo gen rezon devan Bondye? Pitit fanm pouse met atè ka san repwòch devan li? ⁵ Nan je Bondye, menm lalin lan pa klere ase. Pa gen yonn nan zetwal yo ki bon nèt pou li. ⁶ Ale wè pou moun, yon vètè, yon ti krebete! Kisa yo vo nan je Bondye?

Chapter 26

¹ ¶ Jòb pran lapawòl ankò, li di l' konsa: ² -Ou gen tan konn konsole moun ki nan lafliksyon! Ou gen tan konn lonje men bay moun ki san fòs! ³ Ala bon konsèy ou bay moun ki san konprann lan! Ou gen tan gen anpil konesans nan ou! ⁴ Men, pou ki moun tout bèl diskou sa yo? Ki moun ki mete pawòl sa yo nan bouch ou? ⁵ ¶ Bildad pran lapawòl ankò li di: -Nanm moun mouri k'ap viv nan fon lanmè a ap tranble anba tè a. ⁶ Peyi kote mò yo ye a louvri aklè devan je Bondye. Pa gen anyen ki pou anpeche Bondye wè sa k'ap pase ladan l'. ⁷ Se li menm ki louvri syèl ki sou bò nò a anlè, san anyen pou soutni l'. Li pandye tè a ankò san anyen pou kenbe l'. ⁸ Se li menm ki plen

nwaj yo dlo. Se li menm ki pa kite pèz dlo a pete nwaj yo. ⁹ Se li menm ki kache lalin plenn lan
 dèyè yon nwaj. ¹⁰ Se li menm ki trase yon wonn sou lanmè a, li separe limyè ak fènwa. ¹¹ Lè li
 bay potò ki soutni syèl la yon prigad, yo sezi, yo pran tranble sitèlman yo pè. ¹² Avèk fòs ponyèt
 li, li fè lanmè a vin dou devan li. Avèk ladrès li, li kraze Raab, gwo bèt lèd la. ¹³ Avèk souf li, li
 fè syèl la vin klè. Avèk men li, li touye gwo koulèv ki t'ap kouri chape a. ¹⁴ Sa se yon ti kal nan
 tou sa li fè. Se sa ase ki resi rive nan zòrèy nou! Men, ki moun ki ka konnen tou sa Bondye fè?

Chapter 27

¹ ¶ Jòb pran lapawòl ankò pou l' bay rèspònans li a. Li di konsa: ² -Mwen fè sèman, mwen pran
 Bondye vivan an pou temwen, Bondye ki gen tout pouvwa a, li menm ki refize rann mwen jistis
 la, li menm ki ban m' degoutans ak lavi a, ³ toutotan mwen poko mouri, toutotan Bondye ban m'
 yon ti souf toujou, ⁴ mwen p'ap janm kite ankenn move pawòl soti nan bouch mwen, ni m' p'ap
 janm bay ankenn manti. ⁵ Pa janm konprann m'ap ban nou rezon! M'ap kenbe ak nou mwen inonsan
 jouk mwen rann dènye souf mwen. ⁶ Mwen soti pou m' defann kòz mwen. Mwen p'ap fè bak.
 Konsyans mwen pa repwoche m' anyen. M' pa gen anyen ki pou fè m' wont. ⁷ ¶ Se pou tout moun
 ki pa vle wè m' yo sibi menm sò ak mechan yo. Se pou lènmi m' yo gen menm sò ak moun ki pa
 mache dwat yo. ⁸ Ki espwa ki gen pou mechan an lè Bondye rele l', lè li pral pran nanm li? ⁹ Lè
 malè ap tonbe sou mechan an, èske Bondye ap tande rèl li yo? ¹⁰ Li pa t' janm pran plezi l' nan fè
 volontè Bondye. Li pa t' lapriyè Bondye tout tan. ¹¹ ¶ Kite m' moutre nou jan Bondye konnen sa
 l'ap fè. Mwen p'ap kache di nou sa ki nan tèt Bondye ki gen tout pouvwa a. ¹² Sa m'ap di la a? Nou
 wè tou sa ak je nou byen pwòp tou. Poukisa atò tout pale anpil sa a ki pa vle di anyen? ¹³ Lè sa a,
 Sofa, moun lavil Naama a, pran lapawòl. Epi li di: -Men kisa Bondye pare pou mechan yo. Men
 sa li sere pou chèf k'ap peze pèp la. ¹⁴ Yo te mèt gen anpil pitit gason, yo tout ap mouri nan lagè.
 Pitit yo p'ap janm gen kont manje pou yo manje. ¹⁵ Sa ki chape nan lagè, move maladi ap pote yo
 ale. Ata vèy yo p'ap ka rele pou yo jou lanmò yo. ¹⁶ Mechan an te mèt anpile lajan kou l' pa konnen,
 li te mèt gen rad depase sa l' bezwen, ¹⁷ se moun dwat yo ki va mete rad yo, se pou moun inonsan

¹⁸ yo lajan an va rete. Kay li bati tankou twal anasi, tankou yon ti kay jaden. ¹⁹ Nan aswè, li moute kabann li rich. Lè li leve, li pa jwenn anyen. ²⁰ Malè tonbe sou li tankou lavalas k'ap desann. Yon sèl nwit lan, yon gwo van pote l' ale. ²¹ Yon van lès leve, li pote l' ale. Li rache l' nan kay kote l' ye a. ²² Van an ap vante sou li san pitye. Li menm l'ap fè sa li kapab pou l' chape anba l'. ²³ Moun kontan wè jan li fini. Kote l' pase, y'ap rele chalbari dèyè l'.

Chapter 28

¹ ¶ Gen mi n anba tè kote yo jwenn ajan. Gen kote se la yo netwaye lò. ² Yo fouye tè pou jwenn fè. Yo fonn wòch pou jwenn kwiv. ³ Yo desann ak limyè anba tè, kote ki fè nwa anpil, yo fouye byen fon nan vant latè, mezi yo kapab. Y' al chache wòch ki kache kote ki fè nwa anpil la. ⁴ Byen lwen, kote moun pa ka rete, kote moun pa janm mete pye yo, moun ap fouye gwo koridò anba tè. Y'ap travay pou kont yo, ak yon kòd pase nan ren yo, y'ap balanse nan twou yo. ⁵ Manje soti nan tè. Men, nan zantray latè a dife fin debòde. ⁶ Wòch latè a gen bèl pyè safi ladan l'. Nan pousyè a yo jwenn ti grenn lò. ⁷ Koukou pa janm konnen chemen pou ale la. Karanklou pa janm wè kote sa a ak je l'. ⁸ Ni lyon, ni ankenn lòt bèt nan bwa, pa janm mete pye yo la. ⁹ Yo fouye nan wòch dife. Yo fè gwo twou byen fon nan pye mòn yo. ¹⁰ Yo fè gwo koridò byen long nan wòch yo. Yo jwenn tout kalite bèl pyè bijou ki koute chè. ¹¹ Yo fouye nan sous tèt dlo yo tou. Yo mete deyò tou sa ki te kache. ¹² Men, kote nou ka jwenn konesans lan? Kote bon konprann lan ye menm? ¹³ Lèzòm pa konnen sa pou yo fè pou yo mete men sou li. Yo pa jwenn li ankenn kote sou latè. ¹⁴ ¶ Fon lanmè a deklare li pa gen bagay konsa. Lanmè a deklare bon konprann pa lakay li. ¹⁵ Ou te mèt gen lò, ou pa ka achte l'. Ou pa ka bay lajan pou ou genyen l'. ¹⁶ Li gen plis valè pase lò peyi Ofi a. Bèl pyè oniks ak safi pa ka parèt la. ¹⁷ Yo pa ka konpare l' ni ak lò ni ak bèl kristal. Yo pa ka boukante l' pou yon bèl veso fèt an lò. ¹⁸ Pou grenn koray ak wòch kristal menm, yo pa ka parèt la. Pito ou al dèyè bon konprann pase ou ale dèyè bèl pyè lanbi. ¹⁹ Topaz peyi Letiopi pa vo anyen devan l'. Pi bon lò a pa ka konpare ak bon konprann. ²⁰ ¶ Men, kote nou ka jwenn konesans lan?

Kote bon konprann lan ye menm? ²¹ Pa gen moun, pa gen bèt ki ka wè l', pa menm zwazo k'ap
 vole nan syèl la. ²² Ata lanmò ak simityè di se tande yo tande nonmen non l'. ²³ Se Bondye ase ki
 konn chemen an. Se li ase ki konnen kote li rete. ²⁴ Paske Bondye wè dènye bout latè. Li voye je
 l', li gade tou sa ki anba syèl la. ²⁵ Lè Bondye t'ap bay van yo pèz yo, lè li t'ap bay dlo lanmè a
 mezi kote pou l' rive a, ²⁶ lè li t'ap bay lòd kote pou lapli tonbe ak chemen pou loraj yo pran lè y'ap
 gwonde, ²⁷ se lè sa a li te wè bon konprann, li wè sa li vo. Li egzaminen l' byen egzaminen, li
 sonde l' byen sonde. ²⁸ Apre sa, Bondye di moun konsa: -Gen krentif pou Bondye, se sa ki rele
 bon konprann. Vire do bay sa ki mal, men sa ki rele gen lespri.

Chapter 29

¹ ¶ Jòb tanmen pale ankò, li di: ² -Ki moun ki va fè m' viv tan lontan an, lè Bondye t'ap voye
 je sou mwen an? ³ Lè sa a, Bondye te toujou la avèk mwen. Limyè li te klere anwo tèt mwen, li
 t'ap moutre m' kote pou m' mete pye m' nan fènwa a. ⁴ Nan tan sa a, tout zafè m' t'ap mache byen.
 Bondye te zanmi m'. Li t'ap pwoteje kay mwen. ⁵ Bondye ki gen tout pouvwa a te toujou la avèk
 mwen. Mwen t'ap viv nan mitan tout pitit gason m' yo. ⁶ Bèf ak kabrit mwen yo te konn bay anpil
 lèt. Pye oliv mwen yo te donnen menm nan tè wòch. ⁷ ¶ Lè mwen parèt pòtay lavil la, lè mwen
 pran plas mwen nan mitan chèf fanmi yo, ⁸ wè yo wè m', jenn gason yo mete kò yo sou kote,
 granmoun yo leve kanpe pa respè pou mwen. ⁹ Notab yo sispann pale, yo fèmen bouch yo. ¹⁰ Ata
 chèf yo pa ka pale ankò! Lang yo vin lou nan bouch yo. ¹¹ Tout moun ki te wè m' t'ap mache fè
 lwanj mwen, tout moun ki te tande m' te kontan avè m'. ¹² Mwen lonje men bay pòv malere ki nan
 ka ansanm ak timoun san papa ki san sekou. ¹³ Moun ki te nan pi gwo mizè t'ap fè lwanj mwen.
 Mwen te fè kè vè yo kontan. ¹⁴ Mwen te toujou fè sa ki dwat. Mwen pa t' janm nan patipri. ¹⁵ Se
 mwen ki te wè pou avèg yo. Se mwen ki te mache pou kokobe yo. ¹⁶ Mwen te yon papa pou pòv
 malere yo. Mwen te kanpe pou defann kòz etranje yo. ¹⁷ Mwen te kraze pouvwa malveyan yo.

¹⁸
 Mwen sove moun ki te anba men yo. ¶ Mwen t'ap di nan kè m': M'a viv kont viv mwen. M'a
¹⁹
 mouri sou kabann mwen ak kè poze. Mwen te tankou yon pyebwa plante bò larivyè. Sou tout
²⁰
 branch li yo se lawouze. Moun pa ta janm sispann fè lwanj mwen. Mwen t'ap toujou gen tout
²¹
 fòs mwen sou mwen. Lè m'ap pale, tout moun fèmèn bouch yo. Yo louvri zòrèy yo, y'ap tann
²²
 konsa konsèy m'ap bay. Pawòl mwen tonbe nan kè yo tankou grenn lapli. Lè m' fin pale, pesonn
²³
 pa gen anyen pou di ankò. Yo t'ap tann mwen pale tankou tè sèk k'ap tann lapli. Yo rete bouch
²⁴
 louvri pou ranmase sa m'ap di. Lè yo dekouraje, mwen fè yon ti ri ak yo. Sa te kont pou remoute
²⁵
 kouraj yo. Mwen te kanpe alatèt yo. Mwen mennen yo tankou yon wa k'ap mennen sòlda li yo.
 Mwen di yo sa pou yo fè. Mwen te ba yo kouraj lè yo nan lafliksyon.

Chapter 30

¹
 ¶ Men koulye a, moun ki pi jenn pase m' yo ap pase m' nan rizib. Papa yo se moun mwen pa
²
 t' pran pou anyen, moun mwen pa ta menm mete ak chen m' pou gade mouton. Epitou, yo te twò
³
 fèb pou fè anyen pou mwen. Se te yon bann gason san kouraj. Mizè ak grangou te fini ak yo.
⁴
 Lannwit se grenn bwa yo te konn al souse nan savann kote moun pa rete. Yo pran fèy raje pou
⁵
 yo manje. Ata rasin bayawonn pase. Kote yo pase moun mete yo deyò, yo rele bare dèyè yo
⁶
 tankou vòlè. Yo te blije al rete nan twou wòch, nan twou tè sou bò ravin yo. Y'ap rele tankou
⁷
 bèt mawon nan raje a. Yo fè pil sou pil nan savann lan. Se te yon bann sanzave ki pa t' menm gen
⁸
 non. Yo te mete yo deyò nan peyi a. Koulye a, y'ap fè chante sou mwen. Y'ap bay istwa sou do
⁹
 m'. Yo pè pwoche bò kote m' pou m' pa sal yo. Yo menm krache nan figi m'. Paske Bondye
¹⁰
 kraze kouraj mwen, li lage m' atè, kifè, mapou tonbe, kabrit manje fèy li. Bann moun sa yo leve
¹¹
 dèyè m', y'ap fè m' kouri. Yo lage dèyè m' pou yo pran m'. Yo sènen m' toupatou pou yo ka fini
¹²
 avè m'. Pa gen pesonn pou di yo pa fè sa. Yo pase nan fant barikad, yo tonbe sou mwen. Yo
¹³
 pilonnen m' anba pye yo. ¶ Yon sèl latranblad pran mwen. Tankou yon kout van li kraze kouraj
¹⁴
¹⁵

mwen. Tankou yon nwaj k'ap pase, tout byen m' yo disparèt. ¹⁶ Koulye a, mwen prèt pou m' mouri.
¹⁷ Laflikasyon ap fini avè m'. Lannwit, tout zo nan kò m' ap fè m' mal. Doulè ap manje m' anndan
¹⁸ san rete. Bondye ponyen m' nan kòlèt, l'ap chifonnen tout rad sou mwen. ¹⁹ Li voye m' jete nan
²⁰ labou. Mwen pa pi bon pase pousyè tè ak sann dife. Mwen rele nan pye ou, Bondye! Ou pa
²¹ reponn mwen. Mwen kanpe devan ou, ou pa okipe m' menm. Ou pa menm moun lan ankò. W'ap
²² malmennen m'. Ou soti pou pèsekite m' ak tout fòs ou. Ou fè van pote m' ale. M'ap vole tankou
²³ pay. Ou voye yon van tanpèt boulvèse m'. Wi, mwen konnen byen pwòp w'ap mennen m' pou
²⁴ m' al mouri, pou m' al sibi sò k'ap tann tout moun lan. Poukisa w'ap atake yon moun ki tou fin
²⁵ mouri, yon moun ki pa ka fè anyen ankò pase mande padon? Eske mwen pa t' nan lapenn ansanm
²⁶ ak moun ki te nan mizè? Eske kè m' pa t' fè m' mal pou moun ki pa t' gen anyen menm yo? Mwen
²⁷ t'ap tann kontantman, se malè ki vini. Mwen t'ap tann limyè, se fènwa ki kouvri m'. Tout zantray
²⁸ mwen ap bouyi san rete. Chak jou m'ap soufri pi rèd. M'ap mache kagou, san pesonn pou konsole
²⁹ m'. Mwen kanpe nan mitan tout moun, m'ap mande sekou. Vwa mwen tankou vwa koukou.
³⁰ Mwen rele tankou frize. Po m' vin tou nwa, l'ap dekalè. Lafyèb ap manje m' nan zo. ³¹ Lontan
 se mizik gita ak fif ase ki te nan zòrèy mwen. Men, koulye a, se plenn, se kriye ase m'ap tande.

Chapter 31

¹ ¶ Mwen te fè sèman pou m' pa janm gade yon jenn fi avèk move lide. ² Kisa Bondye ki anwo
 a ap fè nou konsa? Kisa Bondye ki gen tout pouvwa a sere pou nou? ³ Li voye malè pou moun ki
 pa mache dwat. Li voye tribilasyon pou moun k'ap fè mechanste. ⁴ Eske Bondye pa konnen tou sa
 n'ap fè? Eske li pa wè tout vire tounen m'? ⁵ Eske mwen janm nan bay manti? Eske mwen janm
 chache twonpe moun? ⁶ Se pou Bondye peze m' nan bon balans li a. Se pou Bondye wè jan m'
 toujou mache dwat. ⁷ Si mwen janm pran chemen kwochi pou mwen, si mwen te kite lanvi anvayi
 kè m', si mwen janm mete men m' nan sa ki mal, ⁸ se pou lòt moun rekòlte sa mwen plante. Se pou

yo rache tout ti plant k'ap pouse nan jaden m'. ⁹ ¶ Si mwen te kite yon lòt fanm pran tèt mwen, pou
 m' al kache devan pòt yon frè mwen ap veye, ¹⁰ se pou madanm mwen fè manje pou yon lòt gason.
 Se pou lòt gason kouche avè l'. ¹¹ Se yon gwo bagay sal mwen ta fè la a. Se bagay pou yo ta touye
 m'. ¹² Se ta tankou yon gwo dife mwen limen pou fini avè m' nèt. Li ta boule dènye sa m' genyen.
¹³ Lè domestik mwen osinon sèvant mwen gen kont avè m', si mwen ta refize mete rezon an kote
 l' ye a, ¹⁴ kisa mwen ta fè, lè Bondye parèt devan m'? Lè l'a mande m' kont, kisa m'a reponn li?
¹⁵ Menm Bondye ki fè m' nan vant manman m' lan, se li menm tou ki fè yo nan vant manman pa
 yo. Se li menm ki kreye nou tout. ¹⁶ ¶ Mwen pa janm refize ede yon pòv. Ni mwen pa janm kite
 vèy yo nan nesosite. ¹⁷ Mwen pa janm kite timoun san papa yo rete grangou pou m'ap manje manje
 m' pou kont mwen. ¹⁸ Okontrè, depi m' fèt, m' sèvi ak timoun sa yo tankou papa ak pitit. Depi m'
 soti nan vant manman m', m'ap pran swen vèy yo. ¹⁹ Lè m' jwenn yon malere toutouni osinon yon
 pòv endijan san yon bout dra, ²⁰ mwen ba yo rad pou mete sou yo, mwen pran lenn sou do mouton
 m' pou m' ba yo chofe. ²¹ Si m' te janm aji mal ak yon timoun san papa paske mwen konnen y'a
 toujou ban m' rezon nan tribinal, ²² enben, se pou zepòl mwen dejwente, se pou de bra m' kase.
²³ Paske, mwen pè jijman Bondye. Mwen pa ka kanpe devan l'. ²⁴ ¶ Mwen pa janm mete konfyans
 mwen nan lò pou m' ta di se sa k'ap pwoteje m'. ²⁵ Mwen pa janm vante tèt mwen dèske mwen
 gen anpil byen, dèske mwen fè anpil lajan ak men mwen. ²⁶ Mwen pa janm adore solèy ak lalin
 lè yo klere byen bèl nan syèl la. ²⁷ Mwen pa janm pèdi tèt mwen pou m' sèvi yo an kachèt. ²⁸ Sa
 a tou, yo ta mèt touye m' si m' ta fè l', paske mwen ta nye Bondye ki gen tout pouvwa a. ²⁹ Mwen
 pa janm kontan lè lènmi m' ap souffri. Mwen pa janm fè fèt lè malè tonbe sou yo. ³⁰ Mwen pa janm
 kite bouch mwen chape pou m' ta ba yo madichon, pou m' ta rive mande lanmò pou yo. ³¹ Tout
 moun k'ap viv nan kay avè m' konnen mwen toujou byen resevwa tout moun lakay mwen.
³² Vwayajè pa janm dòmi deyò nan lari. Pòt kay mwen toujou louvri pou yo. ³³ ¶ Mwen pa janm
 kache peche m' pou pesonn. Ni mwen pa janm fè sa ki mal an kachèt. ³⁴ Mwen pa janm pè sa moun
 ap di. Mwen pa janm pè louvri bouch mwen ni pè mete pwent tèt mwen deyò, paske mwen ta pè
 pou moun pa lonje dwèt sou mwen. ³⁵ Pa gen pesonn pou koute sa m'ap di la a? Mwen fin di sa

pou m' di a. Koulye a, se Bondye ki pou reponn mwen. Si moun ki pa vle wè m' lan ta voye papye nan tribinal pou mwen, ³⁶ mwen ta pote papye sa a sou zepòl mwen san ankenn wont. Mwen ta mare l' sou tèt mwen, tankou yon kouwòn. ³⁷ Mwen ta di Bondye dènye sa mwen fè. Mwen ta kenbe tèt mwen dwat devan l'. ³⁸ Si se vòlò mwen te vòlò tè m'ap travay la kifè koulye a tè a ap mande m' kont, ³⁹ si mwen te manje rekòt jaden an san peye travayè yo kifè koulye a y'ap pote plent pou mwen, ⁴⁰ enben, se pikan ak chadwon ki pou leve nan jaden m' kote ble ak lòj te konn pouse. Se konsa Jòb te fin pale.

Chapter 32

¹ ¶ Jòb te sitèlman sèten li te inonsan, twa mesye yo kite sa, yo pa chache reponn li ankò. ² Men, Eliyou ki te kanpe la fè yon sèl kòlè. Eliyou sa a, se pitit Barakèl, moun fanmi Bouz, nan branch fanmi Ranm lan. Li fè yon sèl kòlè sou Jòb, paske Jòb t'ap bay tèt li rezon, li t'ap bay Bondye tò. ³ Li te ankòlè sou twa zanmi Jòb yo tou. Yo pa t' jwenn anyen pou yo reponn Jòb. Konsa, yo menm tou, se Bondye yo te bay tout tò a. ⁴ Antan yo twa a t'ap pale, Eliyou te rete la san di anyen, paske yo te pi gran pase l'. ⁵ Lè li wè mesye yo pa t' jwenn anyen ankò pou reponn Jòb, li fè yon sèl kòlè. ⁶ ¶ Li pran lapawòl, li di konsa: -Mwen menm, se jenn gason mwen ye. Nou menm, se granmoun nou ye. Se poutèt sa mwen te yon ti jan wont. Mwen te pè antre nan koze a. ⁷ Mwen t'ap di nan kè m': Kite granmoun pale! Kite sa ki gen laj sou tèt yo mete bon konprann yo deyò. ⁸ Men, pou di vre, se lespri Bondye ki gen tout pouvwa a sèl ki pou antre nan tèt yon moun pou ba li bon konprann! ⁹ Se pa laj ki bay moun bon konprann. Se pa cheve blan ki fè moun konnen sa ki dwat. ¹⁰ Koulye a, mwen ta renmen nou koute m'. Kite m' di nou sa m' konnen sou koze a. ¹¹ Mwen tande byen tande tou sa nou di. Mwen te louvri zòrèy mwen gran louvri pou m' pa manke anyen nan pawòl nou yo, pandan n'ap chache mo pou nou di. ¹² Mwen t'ap swiv sa n'ap di. Men, yonn nan nou pa rive fè Jòb fèmen bouch li. Nou yonn pa rive demanti msye. ¹³ Pa vin di m' nou konprann koulye a se Bondye ki pou reponn. Lèzòm pa kapab. ¹⁴ Se avè nou Jòb t'ap pale. Se pa avè m'. Konsa, mwen pral reponn msye yon lòt jan. ¹⁵ ¶ Jòb, ou wè mesye yo pa konn sa pou yo di ou. Yo pa jwenn anyen pou reponn ou ankò. ¹⁶ Mwen t'ap tann yo. Men, koulye a yo fèmen bouch yo. Yo

¹⁷
 sispann pale, yo pa reponn ou. Atòkile, se mwen ki pral pale, mwen pral di ou sa m' konnen nan
¹⁸ koze a. Mwen plen pawòl nan bouch mwen. Si m' pa pale m'a toufe. ¹⁹ Pawòl ki nan tèt mwen,
²⁰ ou ta di yon diven k'ap fèmante. Li prèt pou pete veso kote l' ye a. Se pou m' pale pou m' ka
²¹ soulaje konsyans mwen. Se pou m' louvri bouch mwen reponn ou. Mwen p'ap pran defans pyès
²² moun. Mwen pa pral achte figi nou yonn la a. Mwen pa konn flate moun. Lèfini, si m' ta fè sa,
 Bondye ki kreye m' lan ta disparèt mwen lapoula.

Chapter 33

¹ ¶ Atòkile, Jòb, tanpri, koute sa m'ap di ou. Louvri zòrèy ou byen pou ou tande m'. ² M' pare
 pou m' di dènnye sa ki vin nan bouch mwen. ³ M' pral di tou sa ki nan kè m'. Se verite a tou senp
⁴ mwen pral pale. Se lespri Bondye a ki fè m'. Se souf Bondye ki gen tout pouvwa a ki ban m' lavi.
⁵ Si ou kapab, w'a reponn mwen. Pare kò ou. Pran pozisyon batay ou avè m'. ⁶ Ou menm avè m',
 devan Bondye nou tout se menm. Nou tou de, se ak labou li fè nou. ⁷ Ou wè! Ou pa bezwen pè m'!
⁸ Mwen pa ka fè ou anyen! ¶ Mwen te tande ou ak de zòrèy mwen. Ki jan ou fè ka di: ⁹ Mwen
¹⁰ menm, mwen inonsan. M' pa fè ankenn peche! M' pa gen anyen sou konsyans mwen. Men, se
 Bondye ki pretann mwen ba l' jwen pou l' atake m'. Se li menm k'ap aji avè m' tankou si mwen te
¹¹ lènmi l'. Li mete de pye m' nan sèp. L'ap veye tou sa m'ap fè. ¹² La, Jòb monchè, m'ap reponn
 ou: ou antò. Paske Bondye pa kanmarad moun. ¹³ Poukisa w'ap chache Bondye kont konsa? Se
¹⁴ paske li pa reponn lè w'ap plenyen nan pye l'? ¶ Bondye pale divès jan. Men, pesonn pa okipe
¹⁵ sa l'ap di. Lè moun kouche nan kabann yo, lè yo fon nan dòmi lannwit, Bondye pale ak yo nan
¹⁶ rèv, nan vizyon. Li fè yo konnen sa li gen pou l' di yo. Li ba yo avètisman pou yo mache sou
¹⁷ piga yo. Li vle pou yo kite move chemen y'ap swiv la, pou yo pa kite lògèy vire tèt yo. ¹⁸ Konsa,
¹⁹ yo p'ap mourì. Y'a sove lavi yo. ¶ Bondye avèti moun tou lè li voye maladi sou yo. Li ba yo
²⁰ doulè nan tout kò yo. Li bay yo degoutans manje. Yo pèdi anvi manje menm lò manje a gou.
²¹ Y'ap depafini, tout moun wè jan y'ap vin mège. Tout zo nan kò yo griyen. ²² Sa ki rete pou yo

mouri a, pou y' ale nan peyi san chapo a pa anyen. ²³ Lè sa a, yon zanj Bondye ka vin bò kote l',
 yonn nan milyonven zanj Bondye yo ki la pou fè moun chonje devwa yo. ²⁴ Zanj lan va gen pitye
 pou li. L'a di Bondye: -Tanpri, pa kite l' mouri. M'ap peye pou sove lavi li. ²⁵ Kò li va refè, l'a vin
 fre tankou lè l' te jenn. ²⁶ Li lapriyè Bondye, Bondye reponn li. li al adore Bondye ak kè kontan.
 Bondye padonnen l' devan tout moun. ²⁷ L'ap mache bay Bondye lwanj toupatou. L'ap di: -Mwen
 te peche, mwen te fè sa ki mal. Men, Bondye pa fè m' peye pou sa m' te fè a. ²⁸ Li egzante m'
 lanmò. Li ban m' lavi ankò. ²⁹ ¶ Men tou sa Bondye ap fè, de fwa, twa fwa pou lèzòm, ³⁰ pou l'
 pa kite yo mouri, pou l' ba yo lavi ak kè kontan. ³¹ Koulye a, Jòb, louvri zòrèy ou! Koute byen sa
 m'ap di! Pe bouch ou la! Kite m' fin pale! ³² Men, si ou gen kichòy ou vle di, pale; m'ap koute ou.
 Paske mwen ta vle ba ou rezon. ³³ Osinon, pe bouch ou, koute m' pito! Kite m' moutre ou sa ki
 rele gen bon konprann.

Chapter 34

¹ ¶ Eliyou pran lapawòl ankò. Li di konsa: ² -Nou menm moun lespri yo, koute sa m'ap di nou!
 Nèg save yo, louvri zòrèy nou! ³ Zòrèy konnen lè pawòl bèl menm jan bouch konnen lè manje
 gou. ⁴ Annou wè kote jistis la ye. Ann mete rezon an kote pou l' ye a. ⁵ Jòb pretann li nan dwa li,
 se Bondye ki derefize rann li jistis. ⁶ Li di: Si m' di m' antò, se manti m'ap bay. Mwen malad pou
 m' mouri. Men, m' pa fè anyen ki mal. ⁷ Ou janm jwenn yon moun tankou Jòb? L'ap pase verite
 Bondye a nan betiz alèz tankou si se dlo l'ap bwè. ⁸ Li fè bann ak moun k'ap fè mechanste yo. L'ap
 pwonmennen ansanm ak malveyan yo. ⁹ Se li menm menm ki di ak bouch li: Sa pa rapòte anyen,
 lè yon moun ap chache fè volonte Bondye. ¹⁰ ¶ Nou menm ki gen lespri, koute sa m'ap di. Bondye
 pa ka fè mechanste. Bondye ki gen tout pouvwa a pa ka nan patipri. ¹¹ Li bay chak moun sa yo
 merite dapre sa yo fè. Li aji ak yo dapre jan yo mennen bak yo. ¹² Non! Bondye pa janm fè sa ki
 mal. Bondye ki gen tout pouvwa a pa nan paspouki. ¹³ Se pa yon lòt moun ki te bay Bondye pouvwa

pou l' gouvènen latè, ni se pa yon lòt moun ki te mete tou sa ki egziste sou kont li. ¹⁴ -(we vèsè
 pwochen) ¹⁵ Si Bondye te kenbe souf ki bay lavi a pou tèt li, yon sèl kou a, bèt kou moun ta mouri.
 Yo ta tounen pousyè tè ankò. ¹⁶ ¶ Si nou gen bon konprann, koute sa byen. Louvri zòrèy nou pou
 nou tande sa m'ap di. ¹⁷ Eske n'ap kondann Bondye ki gen tout pouvwa a, epi k'ap rann jistis la?
 Eske yon moun ki pa vle wè jistis ka gouvènen? ¹⁸ Bondye pini wa yo lè yo fè sa ki mal. Li pini
 gwo chèf yo lè yo fè mechanste. ¹⁹ Li pa nan achte figi chèf yo. Ou te mèt pòv, ou te mèt rich, pa
 gen diferans pou li, paske se li menm ki fè yo tout. ²⁰ Yo rete konsa yo mouri, yo ale nan mitan
 lannwit. Pèp la annik souke kò l', yo disparèt. Bondye touye gwo chèf yo san li pa leve ti dwèt li.
²¹ L'ap veye tout vire tounen lèzòm. L'ap gade tout kote y'ap mete pye yo. ²² Pa gen ankenn fènwa,
 ni ankenn lonbray ki ka anpeche l' wè sa mechan yo ap fè. ²³ Li pa bezwen voye manda bay moun
 pou yo prezante devan l' pou l' jije yo. ²⁴ Li pa bezwen nan chache konnen pou l' kraze chèf yo,
 lèfini pou l' mete lòt moun nan plas yo. ²⁵ Paske li konnen dènye sa yo fè. Yon jou lannwit konsa,
 li desann yo li pilonnen yo anba pye l'. ²⁶ Li souflete yo tankou malfektè nan mitan lari pou tout
 moun ka wè. ²⁷ Paske yo te vire do ba li, yo te fè tankou yo pa konnen lòd li bay yo. ²⁸ Yo fè, yo
 fè jouk pòv yo rele mande Bondye sekou, jouk Bondye tande jan piti yo ap rele anba men yo.
²⁹ Men, si Bondye rete san l' pa fè anyen, ki moun ki ka di l' kichòy? Si li kache kò li, ki moun ki
 ka wè l'! Men, pa pè! L'ap veye sou tout moun nan tout peyi. ³⁰ Li p'ap kite move chèf gouvènen
 yo, li p'ap kite yo tann pèlen pou pèp la. ³¹ ¶ Men, si yon mechan pale ak Bondye, si li di l': -Wi,
 mwen te fè sa ki mal. Mwen p'ap fè sa ankò. ³² Tanpri. Louvri je m'. Fe m' wè sa m' fè a. Si mwen
 te aji ak mechanste, mwen p'ap rekonmanse ankò. ³³ Dapre ou, Jòb, èske se pou Bondye pini l'?
 Mwen mande ou sa paske m' konnen ou pa dakò ak sa Bondye fè a. Men, se ou menm ki pou deside.
 Pa mwen menm. Manyè di m' sa ki nan kè ou. ³⁴ Moun lespri ansanm ak moun bon konprann k'ap
 koute m' yo va di m' konsa: ³⁵ Jòb ap pale anpil, men li pa konn sa l'ap di. Tou sa l'ap di yo pa gen
 ni pye ni tèt. ³⁶ Egzaminen byen tou sa Jòb di la a. N'a wè li pale tankou yon moun ki mechan nan
 kè l'. ³⁷ Li fin fè kont peche l', koulye a l'ap kenbe tèt ak Bondye. L'ap seye fè nou konprann li pa
 antò. L'ap plede fè Bondye remontrans.

Chapter 35

¹ ¶ Eliyou pran lapawòl ankò, li di: ² -Pa konprann ou gen rezon lè w'ap di ou inonsan devan Bondye, ³ lè w'ap di Bondye: Ki mele ou sa? M' te mèt peche, sa pa fè ou anyen. ⁴ Enben. Mwen pral reponn ou, ni ou ni zanmi ou yo. ⁵ Gade syèl la! Ou wè jan nwaj yo wo anwo tèt ou! ⁶ Si ou fè peche, sa pa fè Bondye anyen! Ou te mèt fè peche sou peche, sa pa di l' anyen? ⁷ Si ou mache dwat, ki avantaj Bondye jwenn nan sa? Kisa ou ba li la a? ⁸ Se moun parèy ou ki souffri lè ou fè sa ki mal. Se yo ki pwofite tou lè ou fè sa ki dwat. ⁹ ¶ Lè moun ap sibi anba ponyèt lòt moun, yo plenyen. Lè se chèf k'ap peze yo, yo rele. ¹⁰ Men, yo pa vire kote Bondye ki kreye yo a. Yo te mèt nan nenpòt gwo lapenn, se li menm k'ap ba yo kouraj. ¹¹ Yo pa vire kote Bondye ki ba yo plis lespri pase bèt nan bwa, plis bon konprann pase zwezo nan syèl la. ¹² Yo rele kont rele yo, Bondye pa reponn yo, paske mechan yo gen lògèy. ¹³ Se pou gremesi y'ap plede rele konsa. Bondye pa tande, li pa wè. ¹⁴ ¶ Jòb monchè, ou di ou pa ka wè Bondye. Men, ou mete ka ou devan li. ¹⁵ Ou di ankò: Bondye pa nan pini. Mwen te mèt peche, sa pa di l' anyen. ¹⁶ Jòb monchè, w'ap louvri bouch ou pou ou pa di anyen. W'ap fè tout pale anpil sa a paske ou pa konn sa w'ap di.

Chapter 36

¹ ¶ Eliyou pran pale ankò, li di konsa: ² -Pran yon ti pasyans. Kite m' fè yon ti pale ankò, paske m' poko fin di sa m' gen pou m' di pou pran defans Bondye. ³ Mwen pral sèvi ak tou sa mwen konnen pou m' moutre ou se Bondye ki kreye m' lan ki gen rezon. ⁴ Mwen p'ap bay manti nan sa m'ap di la a. Se yon nonm ki gen anpil konesans k'ap pale avè ou la a. ⁵ ¶ Bondye gen pouvwa. Li pa meprize pesonn. Pa gen anyen li pa konprann. ⁶ Li p'ap kite mechan yo viv lontan. Li toujou aji ak pòv yo san patipri. ⁷ Li defann kòz moun ki mache dwat yo. Li mete yo chèf pou yo gouvènen tankou wa. Toutan tout moun ap pale byen pou yo. ⁸ Men, si Bondye mete yo nan chenn, si lafliksyon makònen nan tout kò yo, ⁹ Bondye va louvri je yo pou yo ka wè tou sa y'ap fè a. Li moutre yo se

¹⁰ lògèy k'ap fè yo fè peche. Li pale nan zòrèy yo pou avèti yo. Li mande yo pou yo sispann fè sa
¹¹ ki mal. Si yo koute Bondye, si yo soumèt devan li, y'a viv rèz lavi yo nan kè kontan ak nan plezi.
¹² Si se pa sa, y'ap rete konsa y'ap mouri. Y'ap desann kote mò yo ye a san yo pa konnen. ¹³ Men,
¹⁴ mechan yo ap fè tèt di. Yo fache pi rèd. Yo te mèt anba kou, yo p'ap mande sekou. Yo jenn
¹⁵ gason toujou, yo gen tan mouri. Yo t'ap mennen yon lavi dezòd. ¶ ¹⁵ Men, Bondye pran soufrans
¹⁶ lan, li sèvi avè l' pou li moutre lèzòm anpil bagay. Se lè yo anba tray, li louvri lespri yo. Ou
¹⁷ menm tou, Bondye vle wete ou nan gwo lapenn sa a, pou ou ka rive gen jwisans san moun pa chache
¹⁷ ou kont. Te gen yon lè tab ou te chaje ak bon manje. Lè sa a, ou te fè menm lide ak mechan yo.
¹⁸ Koulye a, yo pral pini ou jan ou merite l' la. Veye zo ou! Pa kite richès vire tèt ou ankò! Pa kite
¹⁹ yo achte ou ak lajan osinon ak gwo kado! Se pou ou jije tout moun, rich kou pòv, gwonèg la
²⁰ tankou nèg fèb la. Pa kraze moun ki pa anyen pou ou pou mete fanmi ou nan plas yo. ²¹ Atansyon
²² pou ou pa fè sa ki mal. Se pou sa menm w'ap souffri konsa. Gade jan Bondye gen anpil pouvwa.
²³ Pa gen pi gran mèt pase l'. Pesonn pa ka di Bondye sa pou l' fè. Pesonn pa ka di l' sa l' fè a mal.
²⁴ ¶ ²⁵ Se pou ou fè lwanj travay li pito, tankou tout moun toujou fè l' la. Se bèl bagay pou tout
²⁶ moun wè. Yo rete byen lwen, y'ap gade. Wi. Nou p'ap janm ka fin konprann jan Bondye gen
²⁷ pouvwa! Nou p'ap janm ka fin konnen depi kilè Bondye la. Se li menm ki rale dlo sou latè, ki
²⁸ fè l' tounen vapè nan nwaj yo pou bay lapli. Lèfini, li kite lapli soti nan syèl la tonbe sou tout
²⁹ moun sou latè. Pesonn pa konnen ki jan nwaj yo fè deplase, ki jan loraj fè gwonde nan syèl kote
³⁰ Bondye rete a. Li kouvri syèl la ak nwaj yo. Li kouvri tout tèt mòn yo. ³¹ Se konsa li bay pèp
³² la manje. Li ba yo manje an kantite. Li kenbe zèklè yo nan pla men li. Li bay lòd pou loraj tonbe
³³ kote li menm li vize a. Loraj la anonse move tan. Ata bèt yo santi move tan an ap vini.

Chapter 37

¹ ¶ Lè konsa, kè m' ap bat. M' santi l'ap rache. ² Nou tout, koute vwa Bondye! Koute jan l'ap
gwonde! ³ Zèklè a kouri nan tout syèl la. Li klere dènye bout latè. ⁴ Apre sa, yo tandè vwa li ap
gwonde. Loraj la gwonde avèk fòs. Lè konsa, zèklè fè mikalaw. ⁵ Lè Bondye ap pale konsa, li fè
bèl bagay, bagay nou pa ka konprann. ⁶ ¶ Li bay lanèj lòd kouvri latè. Li bay gwo lapli lòd tonbe.
⁷ Li fè tout moun sispann travay. Li fè yo wè sa se travay pa l'. ⁸ Tout bèt antre nan twou. Y' al
kache kò yo nan nich. ⁹ Van tanpèt soti nan sid. Van frèt soti nan nò. ¹⁰ Souf Bondye fè dlo tounen
glas. Konsa, tout dlo tounen glas. ¹¹ Zèklè yo ap fè yan nan nwaj yo. Nwaj yo klere byen lwen.
¹² Bondye fè yo vire nan syèl la jan li vle. Yo fè tou sa li ba yo lòd fè toupatou sou latè. ¹³ Bondye
voye lapli pou wouze latè. Li voye l' pou pini moun, li voye l' pou beni yo tou. ¹⁴ ¶ Louvri zòrèy
ou, Jòb, pou ou tandè sa m' pral di la a. Pran tèt ou, egzaminen bèl travay Bondye yo byen. ¹⁵ Eske
ou konnen ki jan Bondye ba yo lòd, ki jan li fè zèklè yo klere nan nwaj yo? ¹⁶ Eske ou konnen ki
jan nwaj yo fè flote nan syèl la? Sa se yon bèl bagay. Pou ou fè l' fòk ou gen anpil ladrès. ¹⁷ Lè
van cho ki soti nan sid la ap kwit tè a, ou santi rad sou ou ap boule tout kò ou. ¹⁸ Eske ou ka ede
Bondye louvri nwaj yo nan syèl la, pou fè yo di tankou bout fè? ¹⁹ Fè m' konnen sa pou nou di
Bondye. Lespri nou vid. Nou pa gen anyen pou nou di l'. ²⁰ Mwen pa mande pou m' pale ak Bondye.
Poukisa pou m' ba li okazyon pou li touye m'? ²¹ ¶ Ou rete konsa ou pa wè solèy la. Li kache anba
nwaj yo. Yon van leve, li fè solèy la klere ankò. ²² Yon bèl klète, klere kou lò, parèt sou bò nò.
Nou wè Bondye kanpe nan mitan yon bèl limyè ki fè nou pè. ²³ Nou pa ka pwoche bò kote Bondye
ki gen tout pouvwa a. Li sèl gwo chèf, li sèl jij, li pa nan patipri. Li p'ap kondannen yon moun ki
²⁴ inonsan. Se poutèt sa, tout moun fèt pou gen krentif pou li. Li p'ap okipe moun ki pretann yo
gen bon konprann.

Chapter 38

¹ ¶ Lè sa a, nan yon gwo van tanpèt, Seyè a pale ak Jòb. Li di l' konsa: ² -Kisa ou ye menm pou
w'ap poze kekasyon sou plan travay mwen ak yon bann diskou ki pa vle di anyen? ³ Mete gason

sou ou! M' pral poze ou keksyon. Pare kò ou pou ou reponn mwen. ¶⁴ Kote ou te ye lè m' t'ap fè
 latè? Se pou ou reponn mwen si ou konn tout bagay! ¶⁵ Ki moun ki te deside lajè l'ap genyen? Ki
 moun ki te pran mezi l'? Eske ou konn sa? ¶⁶ Sou kisa fondasyon latè chita? Ki moun ki te poze
 wòch ki kenbe l' la? ¶⁷ Jou maten sa a, tout zetwal yo t'ap chante, tout sèvitè Bondye yo t'ap bat
 bravo. ¶⁸ Ki moun ki fèmen pòtay pou bare lanmè a, lè li pete soti nan vant latè a? ¶⁹ Lè mwen kouvri
 lanmè a ak nwaj, lè mwen vlope l' nan gwo nwaj nwa yo, ¶¹⁰ mwen bay lanmè a bòn li. Mwen mete
 pòt avèk kle pou kenbe l' nan plas li. ¶¹¹ Mwen di l': Men limit ou. Pa depase l'. Se la m'ap kraze
 fòs lanm ou yo. ¶¹² ¶ Jòb, èske yon sèl fwa ou janm bay lòd pou maten rive? Ou janm bay lè pou
 bajou kase? ¶¹³ Eske ou janm bay devanjou l' lòd pou l' klere sou tout latè, l' pou l' fè mechan yo
 soti nan twou yo? ¶¹⁴ Lè sa a, tout mòn yo ak tout fon yo parèt aklè, tankou mak pye bèt nan labou.
 Yo pran koulè yo, ou ta di yon rad latè mete sou li. ¶¹⁵ Limyè solèy la antrave mechan yo nan travay
 yo. Yo blije kite mechanste yo te pare pou fè a. ¶¹⁶ Eske ou te desann jouk kote sous lanmè a pete
 a? Eske ou te mache nan fon lanmè a? ¶¹⁷ Eske yo te janm moutre ou pòtay peyi lanmò a? Eske ou
 te janm wè pòt ki louvri sou gwo twou san fon an? ¶¹⁸ Eske ou gen lide ki lajè latè a genyen? Reponn
 mwen non, si ou konnen! ¶¹⁹ Eske ou konnen ki bò limyè soti, ki bò fènwa rete, ¶²⁰ pou ou ka moutre
 yo jouk ki bò pou yo ale, osinon pou ou voye yo tounen lakay yo? ¶²¹ Si ou konn sa, enben, ou te
 fèt deja lè mwen t'ap kreye yo a. Ou pa manke gen laj sou tèt ou! ¶²² Eske ou janm rive kote yo fè
 depo lanèj lan? Ou janm wè depo lagrèl la? ¶²³ Ou konnen depo kote m' sere yo pou lè gen move
 tan, pou lè batay ak lagè ap fèt? ¶²⁴ Ou konnen ki bò solèy la leve, ki bò van lès la soti pou l' soufle
 sou latè? ¶²⁵ ¶ Ou konnen ki moun ki fè wout bay lapli tonbe, ki moun ki fè chemen pou loraj la,
 ¶²⁶ pou lapli tonbe sou dezè a kote moun pa rete, ¶²⁷ pou wouze tè sèk k'ap fann nan solèy, pou fè
 zèb pouse nan savann? ¶²⁸ Eske lapli a gen papa? Ki moun ki fè lawouze? ¶²⁹ Ki bò moso glas yo
 soti? Lagrèl ki soti nan syèl la, ki moun ki manman l'? ¶³⁰ Se yo menm ki fè dlo vin di kou wòch,
 ki fè tout dlo anwo lanmè a di kou wòch? ¶³¹ Ou ka mare zetwal Lapousiyè yo ansanm? Ou ka lage
 kòd ki kenbe zetwal Oryon yo ansanm? ¶³² Ou ka mennen zetwal yo soti lè lè yo rive? Ou ka bay

Gwo Kabwèt la ak Ti Kabwèt la direksyon pou yo pran? ³³ Ou konnen lwa k'ap gouvènen tout bagay nan syèl la? Eske ou ka sèvi ak lwa sa yo pou gouvènen sa k'ap pase sou latè? ³⁴ Eske ou ka bay nwaj yo lòd pou yo voye gwo lapli sou ou? ³⁵ Si ou bay zèklè yo lòd pou yo pati, èske y'ap reponn ou: Wi, men nou? ³⁶ Ki moun ki penmèt krabye konprann lè pou li anonse dlo pral desann fè inondasyon? Ki moun ki fè gwo zwezo sa a konnen lè lapli pral tonbe? ³⁷ Ki moun ki ka konte kantite nwaj ki genyen, san manke yonn? Ki moun ki ka panche yo pou vide dlo lapli, ³⁸ pou pousyè tè a tounen labou, pou boul tè yo kole ansanm? ³⁹ Eske se ou ki jwenn manje pou bay lyon yo manje? Eske ou bay ti lyon yo manje plen vant yo, ⁴⁰ kote yo kache nan twou yo a, osinon kote yo kouche ap tann nan nich yo a? ⁴¹ Ki moun ki pare manje pou kònèy yo, lè grangou fè yo soti nan nich yo, lè pitit yo ap rele nan pye m' pou m' ba yo manje?

Chapter 39

¹ ¶ Eske ou konnen lè kabrit mawon yo ap fè pitit? Eske ou janm wè kote femèl yo ap miba? ² Eske ou konnen konbe mwa yo pote yon pitit nan vant yo? Kilè pitit yo rive dat pou yo fèt? ³ Eske ou konnen lè yo pral kwoupi pou miba, lè y'ap fè pitit yo nan mitan dezè a? ⁴ Pitit yo grandi, yo pran fòs, yo kite manman yo, y' ale, yo pa tounen. ⁵ Ki moun ki bay bourik mawon libète yo? Ki moun ki lage yo nan savann? ⁶ Mwen ba yo dezè pou kay yo. Mwen kite yo viv nan savann tè sale a. ⁷ Tout bri k'ap fèt nan lavil yo pa di yo anyen. Pesonn pa ka donte yo pou fè yo travay. ⁸ Yo mache nan tout mòn yo dèyè manje. Y'ap chache fèy vèt pou yo mete anba dan yo. ⁹ Eske ou ka fè bèf mawon travay pou ou? Eske l'ap rete pase nwit mare nan lakou kay ou? ¹⁰ Eske ou ka pase kòd nan kou yonn pou fè l' raboure tè a pou ou? Eske ou ka fè l' rale chari pou woule tè jaden ou yo? ¹¹ Eske ou ka konte sou gwo fòs kouraj li pou fè li travay di pou ou? ¹² Eske ou kwè l'ap asepte pote rekòt ou soti nan jaden? Eske l'ap asepte ranmase grenn ou yo sou glasi? ¹³ ¶ Otrich alèz lè l'ap bat zèl li, men, li pa ka vole tankou sigòy. ¹⁴ Otrich la ponn ze l' yo atè konsa. Se chalè tè a ki fè yo kale. ¹⁵ Li pa konnen nenpòt moun k'ap pase ka pile yo, nenpòt bèt nan raje ka kraze

¹⁶ yo anba pye. Li fè tankou ze yo pa pou li. Sa pa di l' anyen si li bay tèt li tout lapenn ponn ze
¹⁷ yo pou gremesi, Se mwen menm, Bondye, ki fè l' sòt konsa, ki pa ba li lespri menm. ¹⁸ Men,
¹⁹ lè l' pran kouri, nanpwen kavalye sou chwal ki ka pran devan l'. ¶ Eske se ou menm ki bay chwal
²⁰ yo fòs, ki mete bèl krenyen sou kou yo? Eske se ou ki fè yo sote ponpe tankou kabrit, ki fè yo
²¹ ranni pou fè moun pè? Y'ap pyafe konsa nan ti fon yo, y'ap bat tè a ak zago yo. Yo kouri ak tout
²² fòs yo lè yo nan lagè. Se brave danje yo ye. Yo pa janm pè anyen. Pa gen zam ki pou fè yo fè
²³ bak. Lè konsa, ti sak flèch ki nan do kavalye yo ap fè bri. Lans ak frenn ki nan men yo ap fè
²⁴ zèklè. Yo eksite, yo pa ka tann. Y'ap kouri sou lènmi an. Lè yo tande twonpèt la soufle, yo pa
²⁵ ka rete an plas. Chak fwa twonpèt la soufle, yo fè han! Yo gen tan pran sant batay la byen lwen.
²⁶ Yo tande chèf yo k'ap pase lòd byen fò. ¶ Eske se ou ki moutre grigri jan pou l' vole lè li louvri
²⁷ zèl li yo vole ale nan sid? Eske se ou ki bay malfini lòd pou li fè nich li byen wo sou tèt mòn
²⁸ yo? Li rete sou tèt gwo wòch yo. Se la li pase nwit. Kote l' ye a, moun pa ka vin pran l'. ²⁹ Se
³⁰ la li rete, l'ap veye bèt pou l' trape manje. Li te mèt byen lwen, l'ap wè yo ak je li. Se san bèt ti
 malfini yo bwè. Kote ki gen kadav, se la yo ye.

Chapter 40

¹ ¶ Seyè a pale ak Jòb. Li di l' konsa: ² -Jòb monchè, ou menm ki t'ap kenbe tèt ak Bondye ki
 gen tout pouvwa a, ou p'ap kite pou li? Ou menm ki t'ap kritike Bondye a, ou vle reponn li koulye
³ a? Jòb reponn Seyè a, li di l' konsa: ⁴ -Mwen pa t' konn sa m' t'ap di. Kisa pou m' reponn ou? Se
⁵ fèmen pou m' fèmen bouch mwen. Mwen pale twòp deja. Mwen pa gen anyen pou m' di ankò.
⁶ ¶ Seyè a rete nan van tanpèt la, li pale ak Jòb ankò. Li di l': ⁷ -Koulye a, kanpe! Mete gason sou
⁸ ou! Mwen pral poze ou keksyon, se pou ou reponn mwen. Eske ou soti vre pou moutre se lenjistis
⁹ m'ap fè ou? Se mwen menm ki antò, ou menm ou gen rezon? Eske ou gen menm fòs avè m'?
¹⁰ Eske vwa ou ka gwonde tankou vwa pa m'? Si se konsa, kanpe non! Kenbe tèt ou byen dwat!
¹¹ Gade tout moun nan je! Mete chèf sou ou! Fè wè pouvwa ou! Gade moun k'ap gonfle lestonmak

yo nan je. Move sou yo! Kraze kouraj yo!¹² Wi. Gade yo nan je. Fè yo bese tèt yo! Kraze mechan
yo la kote yo ye a!¹³ Mete yo tout anba tè. Mare bouch yo tout nan twou kote mò yo ye a.¹⁴ Lè
sa a, mwen menm, m'a fè lwanj ou, dèske avèk pwòp fòs ou ou te rive kraze yo. ¶ Gade gwo¹⁵
bèt lèd yo rele Beyemòt la. Se mwen ki fè l', menm jan se mwen ki fè ou. Se zèb li manje tankou
bèf.¹⁶ Tout fòs li, se nan ren l'. Tout kouraj li, se nan venn vant li.¹⁷ Ke l' kanpe tankou yon pye
sèd. Venn janm li yo fè boul.¹⁸ Zo l' yo di tankou fè tiyo. Janm li yo tankou de bout fè.¹⁹ Nan
tout bèt mwen fè, se li ki pote premye pri. Se mwen ki kreye l' la sèlman ki ka fè l' bat ba.²⁰ Li
manje zèb ki pouse sou mòn kote lòt bèt nan bwa ap pran plezi yo.²¹ Li kouche anba raje. Li kache
nan mitan wozo marekay yo.²² Raje yo fè lonbray pou li. Pye sikren bò larivyè yo ap pwoteje l'.
²³ Larivyè ap desann, sa pa di l' anyen. Larivyè Jouden gonfle rive wotè bouch li, li kè pòpòz.²⁴ Ki
moun ki ka pete je l' pou mete men sou li? Ki moun ki ka pèse bwa nen l' ak yon fwenn bwa.

Chapter 41

¹ ¶ Eske ou ka pran levyatan an nan zen? Eske ou ka mare lang li ak yon kòd?² Eske ou ka
pase yon bwa wozo nan nen l'? Eske ou ka pèse machwè l' ak yon gwo zen?³ Eske li pral mande
ou: Tanpri souple, kite m' ale? Eske l'ap pale dous avè ou?⁴ Eske l'ap pase kontra avè ou pou l'
sèvi ou pou tout tan?⁵ Eske ou ka mare l' tankou yon ti zwezo pou pitit fi ou yo ka jwe avè l'?
⁶ Eske moun k'ap fè lapèch yo pral fè lajan avè l'? Eske machann yo pral koupe l' an moso pou yo
vann?⁷ Eske ou ka pike tout po kò l' ak fwenn? Eske ou ka pèse tèt li ak yon fwenn?⁸ Seye mete
men ou sou li yon grenn fwa, ou p'ap janm fè sa ankò, lè w'a chonje sa l'a fè ou!⁹ Depi ou wè
levyatan an, ou pèdi tout kouraj ou. Ou annik wè l', ou tonbe atè.¹⁰ Si yo leve l' nan dòmi, li move.
Pa gen moun ki ka kanpe devan l'.¹¹ ¶ Ki moun ki ka atake l' san anyen pa rive l'? Pa gen moun
sou latè ki ka fè sa.¹² Mwen pa bezwen di ou anyen sou pa t' janm li yo. Men, m'a fè ou konnen
pa gen bèt ki gen fòs pase l'.¹³ Pesonn pa janm rive dechire premye po li. Ni pesonn pa janm rive
pèse karapas li.¹⁴ Ki moun ki janm fòse l' louvri bouch li? Dan nan bouch li, se bagay ki pou fè

¹⁵ moun kouri. Tout do l', se yon seri gwo kal mare yonn ak lòt. Yo di kou wòch. ¹⁶ Yo kole yonn
 ak lòt, yo fè yon sèl. Pa gen yon ti fant nan mitan yo pou lè pase. ¹⁷ Yo sitèlman byen kole yonn
 ak lòt anyen pa ka separe yo. ¹⁸ Lè l' estènen, limyè fè yan-yan. Je l' klere tankou solèy lè l'ap leve.
¹⁹ Flanm dife ap soti nan bouch li. Tensèl dife ap vole soti ladan l'. ²⁰ Lafimen ap soti nan tout
 twou nen l' tankou nan yon chodyè k'ap bouyi sou dife. ²¹ Souf li ta ka limen bwa dife. Flanm dife
 ap soti nan bouch li. ²² Se nan kou li tout fòs li ye. Depi moun wè l', kè yo kase. ²³ Po li fè kal kal
 sou tout kò li. Yo kole yonn ak lòt. Yo di kou wòch. ²⁴ Kè li di kou wòch, li pa pè anyen. Li fèm
 kou wòl moulen. ²⁵ Lè li leve kanpe, ata gwonèg yo pè. Yo kouri san gad dèyè. ²⁶ Pa gen nepe ki
 ka blese l'. Ni fwenn, ni lans, ni flèch pa ka fè l' anyen. ²⁷ Pou li, nenpòt bout fè lejè kou pay,
 nenpòt bout asye mou tankou bannann mi. ²⁸ Pa gen kout flèch ki pou fè l' kouri. Wòch fistibal,
 se boul koton pou li. ²⁹ Yon baton fè se yon bwa mayi pou li. Li ri lè yo voye lans sou li. ³⁰ Anba
 vant li graj graj tankou moso kannari kraze. Kote li pase nan labou a, li make l' tankou machin k'ap
 kraze boul tè nan jaden. ³¹ Lè l' plonje, li boulvèse fon lanmè a, se tankou dlo nan chodyè k'ap
 bouyi sou dife. Li fè l' bouyi tankou dlo nan veso y'ap boule odè. ³² Lè l'ap naje, li kite nan dlo a
 yon chemen ki klere nan solèy la. Li fè tout lanmè a kimen. ³³ Pa gen bèt tankou l' sou latè. Bondye
 kreye l' pou l' pa janm pè anyen. ³⁴ Li gade bèt ki pi fewòs yo nan je. Se li ki wa tout bèt sovaj yo.

Chapter 42

¹ ¶ Men sa Jòb reponn Seyè a: ² -Mwen konnen, Seyè, ou gen tout pouvwa. W'ap fè tou sa ou
 mete nan tè ou pou ou fè. ³ Ou mande kisa mwen ye menm pou m'ap poze keksyon sou plan travay
 ou, ak yon bann diskou ki pa vle di anyen. Mwen te louvri bouch mwen pale sou sa m' pa konprann,
 sou bèl bagay ki twò fò pou mwen. ⁴ Ou te mande m' pou m' koute sa w'ap di m', pou m' pare pou
 m' reponn ou. ⁵ Sa m' te konn sou ou a, se sa lòt moun te di m' ase. Koulye a, mwen wè ou ak je
 mwen. ⁶ Se konsa, mwen wete tou sa mwen te di. Mwen kouche sou sann ak nan pousyè, m'ap
 mande padon. ⁷ ¶ Lè Seyè a fin pale konsa ak Jòb, li pale ak Elifaz, moun lavil Teman an. Li di l'

konsa: -Mwen te fache sou ou ak sou de zanmi ou yo, paske sa nou di sou mwen an pa vre menm.

⁸
Nou pa t' pale tankou Jòb, sèvitè m' lan. Atòkile, men sa pou nou fè: Pran sèt towò bèf ak sèt belye mouton. Al jwenn Jòb ak yo. N'a ofri yo pou nou, n'a boule yo nèt. Jòb li menm va lapriyè pou nou. M'a reponn li. Konsa, m'a fè pa nou. Mwen p'ap pini nou deske nou pa t' pale byen sou

⁹
mwen, jan Jòb, sèvitè m' lan, te fè l' la. Elifaz, moun lavil Teman an, Bildad, moun lavil Chwa a, ak Sofa, moun lavil Naama a, al fè tou sa Seyè a te di yo fè a. Seyè a fè tou sa Jòb te mande l'

¹⁰
nan lapriyè a. ¶ Apre Jòb te fin lapriyè pou twa zanmi l' yo, Seyè a mete l' kanpe ankò. Tout

¹¹
zafè l' vin mache byen ankò. Lèfini, Seyè a ba li de fwa lavalè tou sa li te genyen anvan an. Tout frè ak sè l' yo ansanm ak tout ansyen zanmi l' yo vin wè li. Yo fè fèt avè l' lakay li. Yo fè l' konnen jan sa te fè kè yo mal pou li pou tout malè sa yo Seyè a te voye sou li. Yo fè l' pran kouraj. Yo chak

¹²
yo fè l' kado yon pyès ajan ak yon bag lò. Apre sa, Seyè a te beni Jòb plis pase jan li te fè l' anvan an. Jòb te vin genyen katòzmil (14.000) mouton, simil (6.000) chamo, demil (2.000) tèt bèf

¹³ ak mil (1000) manman bourik. ¹⁴ Li fè sèt pitit gason ak twa pitit fi. Li rele pi gran pitit fi a

¹⁵
Jemina, dezyèm lan Kesya, twazyèm lan Kerèn apouk. Nan tout peyi a pa t' gen pi bèl fanm

¹⁶
pase twa pitit fi Jòb yo. Papa a te ba yo chak yon pòsyon nan byen l' yo ansanm ak frè yo. Apre sa, Jòb viv jouk li rive gen sankarantan sou tèt li. Li wè pitit pitit li yo ak pitit pitit pitit li yo, jouk

¹⁷
rive sou kat jenerasyon. Lè li mouri, li te fin vye granmoun, li te viv kont li.

Psalms

Chapter 1

¹
¶ Ala bon sa bon pou moun ki pa koute konsèy mechan yo, ki pa swiv egzanp moun k'ap fè

sa ki mal, ki pa chita ansanm ak moun k'ap pase Bondye nan betiz, ² men ki pran tout plezi l' nan

lalwa Seyè a, k'ap repase l' nan tèt li lajounen kou lannwit. ³ Li tankou yon pyebwa yo plante bò

kannal dlo: Li donnen lè sezon l' rive. Fèy li p'ap janm fennen. Tou sa l' fè soti byen. ⁴ ¶ Men, se

⁵
p'ap menm bagay pou mechan yo. Yo tankou pay van an ap gaye. Se poutèt sa, jou jijman an, mechan yo p'ap ka leve tèt yo devan Bondye, moun ki fè mal yo p'ap chita ansanm ak moun ki fè

⁶
byen yo. Paske, Seyè a konnen jan moun ki fè byen yo ap viv. Men, jan mechan yo ap viv la, yo gen pou yo fini mal.

Chapter 2

¹ ¶ Poukisa nasyon yo ap toumante kò yo konsa? Poukisa pèp yo ap fè plan ki p'ap sèvi yo anyen? ² Wa latè yo pran lèzam. Chèf yo mete tèt yo ansanm, y'ap fè konplo sou do Seyè a, y'ap fè konplo sou do wa li chwazi a. ³ Y'ap plede di: -Ann kase chenn yo mete nan pye nou yo! Ann voye yo jete! ⁴ Seyè a rete chita nan syèl la, l'ap ri. L'ap pase yo nan jwèt. ⁵ Apre sa, li fè kòlè, li pale ak yo. Li move sou yo, li fè kè yo kase. ⁶ Li di: -Se mwen menm ki mete wa mwen an sou mòn Siyon, mòn ki apa pou mwen an. ⁷ ¶ Wa a di: -M'ap fè nou konnen sa Seyè a deside. Li di mwen: Ou se pitit mwen. Depi jòdi a, se mwen ki papa ou. ⁸ Mande m', m'a ba ou tout nasyon yo pou eritaj ou. M'a ba ou tout latè pou bitasyon ou. ⁹ W'ap kraze ren yo avèk yon baton fè, w'ap kraze yo an miyèt moso tankou yon kannari yo kraze. ¹⁰ ¶ Koulye a, nou menm wa yo, manyè konprann. Nou menm k'ap dirije moun sou latè, manyè koute. ¹¹ Sèvi Seyè a avèk krentif, tranble nan tout kò nou, ¹² bese tèt devan li. Si se pa sa, n'a fè l' fache, n'a mouri, paske kòlè l' moute fasil. Ala bon sa bon pou moun k'ap chache pwoteksyon anba zèl li!

Chapter 3

¹ ¶ (3:1) David t'ap kouri pou Absalon, pitit li, lè li ekri sòm sa a. (3:2) Seyè, ala anpil lènmi m' yo anpil! Ala anpil moun k'ap leve dèyè m' yo anpil! ² (3:3) Ala anpil moun k'ap pale sou mwen yo anpil! Y'ap di: Aa! Bondye p'ap delivre l'! (3:4) Men ou menm, Seyè, w'ap toujou pran defans mwen. W'ap fè m' genyen batay la. Ou p'ap kite m' wont devan lènmi m' yo. ⁴ ¶ (3:5) Mwen rele Seyè a ak tout fòs mwen. Li rete sou mòn ki apa pou li a, li reponn mwen. ⁵ (3:6) Mwen kouche, mwen dòmi, mwen leve anbyen, paske Seyè a ap soutni mwen. ⁶ (3:7) Mwen pa pè tout kantite moun sa yo ki sènen m' toupatou. ⁷ (3:8) Leve non, Seyè! Sove m' non, Bondye mwen! Ou bay tout lènmi m' yo yon souflèt. Ou kase dan mechan yo. ⁸ (3:9) Se ou menm sèl, Seyè, ki ka sove nou. Beni tout pèp ou a.

Chapter 4

¹
¶ (4:1) Pou chèf sanba yo. Se sou enstriman akòd pou yo jwe mizik la. Se yon sòm David.
(4:2) Lè m' rele ou, reponn mwen non, Bondye, ou menm k'ap fè m' jistis! Lè m' te nan tèt chaje,
ou te vin ede m'. Gen pitye pou mwen. Koute lapriyè mwen. ² (4:3) Nou menm menm lèzòm, kilè
n'a sispann trennen non m' nan labou! Kilè n'a sispann renmen bagay ki pa vo anyen! Kilè n'a
sispann kouri dèyè bagay ki pa vre!³ (4:4) Pa bliye, se Seyè a ki chwazi m' pou moun pa li. Seyè
a tandè m' lè mwen rele l'. ⁴ (4:5) Se pou nou tranble tèlman nou pè, se pou n' sispann fè sa ki mal.
Lè nou pou kont nou nan chanm nou, kalkile sou sa. Epi pe bouch nou. ⁵ (4:6) Ofri bèt Seyè a
mande pou yo touye pou li. Mete konfyans nou nan li! ⁶ ¶ (4:7) Gen anpil moun k'ap di: -Jan nou
ta renmen Bondye beni nou! Tanpri, Seyè, fè nou santi ou la avèk nou! ⁷ (4:8) Kontantman ou mete
nan kè m' pi gwo pase kontantman ki nan kè lèzòm lè yo gen anpil manje ak anpil bwason. ⁸ (4:9)
Mwen moute kabann mwen ak kè poze. Kou m' kouche, dòmi pran m'. Seyè, se ou menm sèl ki
p'ap janm kite anyen rive m'.

Chapter 5

¹
¶ (5:1) Pou chèf sanba yo. Se sou enstriman yo rele fif pou yo jwe mizik la. Se yon sòm David.
(5:2) Koute sa m'ap di ou, Seyè! Tandè jan m'ap plenn! ² (5:3) Se ou ki wa mwen, se ou ki Bondye
mwen. Pran ka m', Seyè, lè m'ap rele ou! Se ou menm m'ap lapriyè, Seyè. ³ (5:4) Chak maten ou
tandè vwa m'. Kou solèy leve, mwen mete lapriyè m' devan ou. M'ap tann ou reponn mwen. ⁴ (5:5)
Ou se yon Bondye ki pa pran plezi nan bagay ki mal. Ou pa tolere mechan yo bò kote ou. ⁵ (5:6)
Moun k'ap vante tèt yo pa ka kanpe devan ou. Ou pa vle wè moun k'ap fè mechanste. ⁶ (5:7) Ou
detwi tout moun k'ap bay manti. Ou pa ka sipòte moun k'ap touye moun, ni moun k'ap twonpe
moun. ⁷ ¶ (5:8) Men mwen menm, m'a antre lakay ou, paske ou renmen m' anpil. M'ap lage kò m'
nan pye ou, nan kay ki apa pou ou a. M'ap adore ou. ⁸ (5:9) Seyè, mwen gen anpil lènmi k'ap veye
m'. Pran men m' pou m' ka fè sa ki dwat devan ou. Fè m' wè chemen ou mete devan m' lan, fè m'
wè l' aklè. ⁹ (5:10) Ou pa janm ka kwè moun sa yo. Se dèyè yon sèl bagay yo ye: yo vle fini ak
tout moun. Anndan bouch yo, ou ta di yon kavo ki louvri, lang yo menm dous konsa pou flate

¹⁰
 moun. (5:11) Se mechan yo ye. Kondannen yo, Bondye. Gate tout plan yo te fè. Pou valè peche
 yo fè, wete yo devan jè ou. paske se kenbe y'ap kenbe tèt ak ou. ¹¹ (5:12) Men, tout moun ki mete
 konfyans yo nan ou, fè kè yo kontan. Se pou yo chante san rete tèlman yo kontan. W'ap pwoteje
 moun ki renmen ou. Ou fè yo chante pou ou tèlman yo kontan. ¹² (5:13) Paske ou menm Seyè, ou
 beni moun ki obeyi ou. Ou kouvri yo avèk favè ou, w'ap kanpe bò kote yo pou pran defans yo.

Chapter 6

¹
 ¶ (6:1) Pou chèf sanba yo. Se sou enstriman akòd pou yo jwe mizik la. Sou wityèm lan. Se
 yon sòm David. (6:2) Seyè, pa pini m' lè ou fache! Pa kale m' lè ou an kòlè! ² (6:3) Gen pitye pou
 mwen, Seyè, paske mwen santi m' san fòs. Geri mwen, Seyè, paske m'ap deperi. ³ (6:4) Lespri m'
 boulvèse anpil, Seyè. Pou konbe tan bagay sa a la ankò? ⁴ (6:5) Tounen vin delivre m' non, Seyè!
 Jan ou gen kè sansib sa a, pa kite m' mouri. ⁵ (6:6) Paske, lè yon moun mouri li pa chonje ou ankò.
 Pesonn pa fè lwanj ou kote mò yo ye a. ⁶ (6:7) Se fini m'ap fini afòs m'ap kriye. Lannwit, kabann
 mwen mouye nèt afòs jè m' kouri dlo. ⁷ (6:8) Figi m' fin rale afòs mwen gen lapenn. Mwen fin vye
 anba moun k'ap pèsekite m' yo. ⁸ ¶ (6:9) Wete kò nou sou mwen, nou tout k'ap fè sa ki mal, paske
 Seyè a tande lè m'ap kriye. ⁹ (6:10) Li tande m' lè m'ap rele nan pye li. Li reponn mwen lè m'ap
 lapriyè li. ¹⁰ (6:11) Tout lènmi m' yo pral wont, y'ap pè. Se vre wi. Y'ap kouri fè bak. Y'ap rete
 konsa lawont ap pran yo.

Chapter 7

¹
 ¶ (7:1) Plent David te pote bay Seyè a pou Kouch, moun laras Benjamen. (7:2) Seyè, Bondye
 mwen, se nan ou mwen mete tout konfyans mwen. Delivre m'. Pa kite m' tonbe nan men moun k'ap
 pèsekite m' yo. ² (7:3) Si se pa sa, tankou lyon yo fè, y'ap pote m' ale, y'ap devore m' san pesonn
 p'ap ka pote m' sekou. ³ (7:4) Seyè, Bondye mwen, si m' te fè bagay sa yo vre, si m' te fè yon moun
 mal, ⁴ (7:5) si m' te aji mal ak moun ki te fè m' byen, si m' te pèsekite lènmi m' san rezon, ⁵ (7:6)

ou mèt kite lènmi pousib mwen jouk li mete men sou mwen. Ou mèt kite l' mache sou mwen, ou mèt kite l' trennen non m' nan labou. ⁶ (7:7) Seyè, leve non! Mete ou ankòlè! Leve, pran pozisyon kont lènmi m' yo ki fin debòde. Leve non! vin pote m' sekou, paske se jistis ou m'ap chache. ⁷ (7:8) Sanble tout nasyon yo bò kote ou. Rete nan syèl la, gouvènèn yo tout. ⁸ (7:9) Ou menm Seyè, ou se jij tout moun. Tanpri, Seyè, fè m' jistis paske mwen mache dwat, mwen inonsan. ⁹ (7:10) Fè mechan yo sispann fè move bagay. Tanpri, bay moun ki mache dwat yo fòs. Ou se yon Bondye ki pa nan patipri: Ou konnen tout lide moun gen nan tèt yo ak tout santiman ki nan kè yo. ¶ ¹⁰ (7:11) Se Bondye ki defans mwen. Li delivre tout moun ki mache dwat. ¹¹ (7:12) Bondye se yon jij ki san patipri: Li toujou kondannen mechan yo. ¹² (7:13) Si yon moun pa chanje lavi li, Bondye ap file nepe li, l'ap pare banza li pou l' vize li. ¹³ (7:14) Bondye ap pare zam sa yo pou touye li. L'ap sèvi ak flèch li yo pou simen dife. ¹⁴ (7:15) Gade jan mechan an gen move lide nan kè li! L'ap fè plan pou fè moun mal. L'ap plede bay manti. ¹⁵ (7:16) Li fouye yon gwo twou byen fon nan tè a. Lèfini, se li menm ki tonbe ladan li. ¹⁶ (7:17) Se konsa, malè li te pare pou lòt moun, se sou li li tonbe. Se pwòp mechanste l' ki tounen kont li! ¹⁷ (7:18) Mwen menm, m'ap di Seyè a mèsì pou jistis li. M'ap fè lwanj Seyè a ki anwo nan syèl la.

Chapter 8

¹ ¶ (8:1) Pou chèf sanba yo. Se sou lè chante yo chante lè y'ap kraze rezen. Se yon sòm David. (8:2) Seyè, Mèt nou, se toupatou sou latè yo rekonèt jan ou gen pouvwa! Pouvwa ou moute pi wo pase syèl la! ² (8:3) Ou fè timoun piti ak tibebe nan tete chante jan ou gen fòs, pou ou koresponn ak moun ki pa vle wè ou yo, pou ou fèmen bouch lènmi ou yo ak moun k'ap kenbe tèt avè ou yo. ³ ¶ (8:4) Lè m'ap gade syèl ou fè ak men ou lan, lalin ak zetwal ou mete ladan li, ⁴ (8:5) m'ap mande: -Kisa lèzòm ye pou ou chonje yo konsa? Kisa yo ye menm pou ou pran ka yo konsa? ⁵ (8:6) Ou fè yo yon ti kras pi piti pase ou, Bondye. Tankou yon kouwòn sou tèt yo, ou ba yo pouvwa ak respè. ⁶ (8:7) Ou mete yo pou yo donminen sou tou sa ou fè, ou mete tout bagay anba pye yo: ⁷ (8:8) Bèf kou kabrit, ansanm ak tout bèt nan bwa yo, ⁸ (8:9) zwazo nan syèl, pwason nan dlo, ansanm ak

9
 tout lòt bèt k'ap viv nan lanmè. (8:10) Seyè, Mèt nou, se toupatou sou latè yo rekonèt jan ou gen pouvwa!

Chapter 9

1 ¶ (9:1) Pou chèf sanba yo. Sou menm lè ak chante ki di: Lanmò pitit gason an. Se yon sòm David. (9:2) M'a fè lwanj ou ak tout kè m', Seyè. M'a rakonte tout bèl mèvèy ou yo. 2 (9:3) Se ou menm k'ap fè m' chante, se ou menm k'ap fè kè m' kontan. Bondye ki anwo nan syèl la, m'a chante lwanj ou. 3 (9:4) Parèt ou parèt, lènmi m' yo fè bak. Yo pran tranble, yo tonbe, yo mouri. 4 (9:5) Tankou yon jij ki san patipri, ou chita sou fotèy ou. ou fè m' jistis, ou defann kòz mwen. 5 (9:6) Ou regle moun lòt nasyon yo, ou detwi mechan yo. Ou efase non yo nèt pou tout tan. 6 (9:7) Pa gen lènmi ankò, yo fini nèt. Ata lavil yo ou vide atè. Pa gen anyen pou fè moun chonje yo ankò. 7 (9:8) Men Seyè a, se wa li ye pou tout tan. Li mete fotèy li la pou l' fè jistis. 8 (9:9) Li gouvènen tout bagay avèk jistis. Li jije tout moun san patipri. 9 (9:10) Moun y'ap peze yo, se bò kote Seyè a yo jwenn pwoteksyon. Se la yo jwenn yon kote pou yo kache, lè yo nan tray. 10 (9:11) Moun ki konnen ou, Seyè, y'ap mete konfyans yo nan ou. Paske, ou pa lage moun k'ap chache ou. 11 ¶ (9:12) Ann fè lwanj Seyè a k'ap gouvènen sou mòn Siyon an. Ann fè tout nasyon yo konnen sa li te fè. 12 (9:13) Bondye chonje moun k'ap souffri yo, li pa bliye rèl malere yo, li pini moun ki fè yo mal. 13 (9:14) Gen pitye pou mwen, Seyè! Gade nan ki mizè moun ki rayi m' yo mete m'. vin sove m'! Pa kite m' mouri, Seyè, 14 (9:15) pou m' ka kanpe devan moun lavil Jerizalèm yo, pou m' di yo poukisa m'ap fè lwanj ou. M'ap kontan nèt, paske ou te delivre m'. 15 (9:16) Moun lòt nasyon yo fouye yon gwo twou: se yo menm ki tonbe ladan li. Yo tann yon pèlen: se pye yo ki pran ladan li. 16 (9:17) Seyè a fè yo konnen ki moun li ye, li jije yo san patipri. Sa mechan yo fè a tounen kont yo. 17 (9:18) Tout mechan yo gen pou mouri. Tout moun ki bliye gen Bondye gen pou mouri tou. 18 (9:19) Se pa tout tan yo ka bliye moun ki nan mizè. Se pa tout tan yo ka wete espwa moun ki nan lafliksyon. 19 (9:20) Leve non, Seyè! Pa kite lèzòm genyen batay la! Mennen moun lòt nasyon yo vin jije devan ou. 20 (9:21) Fè kè yo kase, Seyè! Fè yo konnen se moun ase yo ye.

Chapter 10

¹ ¶ Poukisa ou rete lwen konsa, Seyè? Poukisa ou cache kò ou konsa lè nou nan ka? ² Mechan an ap gonfle lestonmak li, l'ap pèsekite malere yo. Se pou pye l' pran nan pèlen limenm li tann lan.

³ Mechan an ap vante tèt li pou move lanvi li gen nan kè l'. Lanbisyon fè l' pale mal, li vire do bay Bondye. ⁴ Mechan an tèlman gen lògèy, l'ap plede di: -Bondye p'ap pini m'. Pa gen Bondye. Se sa ase mechan an mete nan tèt li. ⁵ Tou sa li fè toujou mache byen. Li pa konprann jijman Bondye yo. L'ap meprize lènmi l' yo. ⁶ L'ap di nan kè l': Anyen pa ka brannen m'. Mwen p'ap janm nan pwoblèm. ⁷ Tout pawòl li se madichon, se manti, se twonpe moun. Li cho konsa pou l' pale moun mal, pou l' di gwo mo. ⁸ Li cache kò l' nan ti bouk yo, l'ap pare tann inonsan yo pou l' touye yo an kachèt. L'ap veye moun ki san defans. ⁹ Li anbiske kò l' tankou yon lyon nan kachèt li. Li kouche, l'ap tann malere yo. Li pran yo nan pèlen li, li trennen yo pote ale. ¹⁰ Li bese, li kwoupi kò l', malere yo tonbe nan men l'. ¹¹ Mechan an di nan kè l': -Bondye p'ap okipe bagay konsa. Li fèmen je l', li p'ap janm wè m'. ¹² ¶ Leve non, Seyè! vin sove mwen! Bondye, pa bliye moun y'ap peze yo! ¹³ Ki jan mechan an fè ap meprize Bondye jouk pou li di nan kè l': Li p'ap pini mwen? ¹⁴ Men, ou make tout bagay. Ou konnen soufrans ak lapenn lèzòm. Ou toujou pare pou ede yo. Moun ki san defans yo, se nan men ou yo lage kòz yo, paske ou toujou ede moun ki san papa. ¹⁵ Kraze pouvwa mechan yo, pouvwa moun k'ap fè mal yo. Fè yo rann kont pou sa yo fè, jouk yo disparèt nèt devan je ou.

¹⁶ Seyè a, se wa li ye depi tout tan ak pou tout tan. Moun lòt nasyon yo gen pou disparèt nan peyi li a. ¹⁷ Seyè, w'a koute moun ki soumèt devan ou lè y'ap lapriyè. W'a ba yo kouraj. ¹⁸ W'a tande rèl moun y'ap peze yo, rèl timoun ki san papa yo. W'a fè yo jistis. Konsa, lèzòm ki fèt ak pousyè tè p'ap kapab fè moun pè ankò.

Chapter 11

¹ ¶ Pou chèf sanba yo. Se yon sòm David. Se bò kote Seyè a m'ap chache pwoteksyon. Ki jan nou ka fè di m': Kouri al cache kò ou nan mòn tankou zwazo, ² paske mechan yo pare banza yo, y'ap vize ak flèch yo pou yo tire nan fènwa sou moun k'ap mache dwat yo? ³ Pa gen anyen yon

bon moun ka fè, lè tout bagay tèt anba. ⁴ ¶ Seyè a nan kay ki apa pou li a, li gen fotèy li nan syèl
 la. L'ap gade lèzòm: li konnen sa y'ap fè. ⁵ Kit yo bon, kit yo mechan, Bondye ap gade sa y'ap fè.
 li pa vle wè moun k'ap fè mechanste. ⁶ Li voye chabon dife ak souf cho sou mechan yo tankou
 lapli. Li soufle yon van cho kou dife sou yo. Se sa yo tout yo merite. ⁷ Seyè a pa nan patipri, li
 renmen lè moun fè bagay ki byen. Moun ki mache dwat yo va parèt devan li.

Chapter 12

¹ ¶ (12:1) Pou chèf sanba yo. Sou wityèm lan. Se yon sòm David. (12:2) vin sove nou non,
 Seyè! Pa gen moun ki renmen ou ankò! Pa gen moun sou latè k'ap sèvi ou ak tout kè yo ankò!
² (12:3) Yonn ap bay lòt manti. Yonn ap flate lòt, yonn ap twonpe lòt. ³ (12:4) Seyè, fèmèn bouch
 bann flatè sa yo, bann moun sa yo k'ap vante tèt yo. ⁴ (12:5) Y'ap plede di: -Nou pale jan nou vle.
 Bouch nou rele n' pa nou. Ki moun ki pou pase nou lòd? ⁵ (12:6) Y'ap peze malere yo. Pòv yo ap
 soufri, y'ap plenyen. Men, Seyè a di: M'ap vini koulye a. M'ap ba yo sekou y'ap tann lan. ⁶ (12:7)
 Pawòl Seyè a se bon pawòl. Li tankou lajan yo pase sèt fwa nan dife pou wè si li bon. ⁷ (12:8) Ou
 menm, Seyè, w'a toujou defann nou! Pa kite moun sa yo fè nou anyen! ⁸ (12:9) Mechan yo ap
 pwonmennen sou moun toupatou: se tout moun k'ap fè lwanj move bagay y'ap fè yo.

Chapter 13

¹ ¶ (13:1) Pou chèf sanba yo. Se yon sòm David. (13:2) Konbe tan ankò w'a bliye m', Seyè?
 Gen lè ou bliye m' nèt? Konbe tan ankò m'a rete san m' pa wè ou? ² (13:3) Konbe tan ankò pou m'
 soufri? Konbe tan ankò pou m' gen lapenn nan kè mwen, pou m' gen lapenn lajounen kou lannwit?
 Konbe tan ankò lènmi m' yo va pilonnen m' anba pye yo? ³ (13:4) Gade m' non, Seyè! Reponn
 mwen non, Bondye mwen! Kenbe m' pou m' pa mouri. ⁴ (13:5) Konsa, moun k'ap pèsekite m' yo
 p'ap ka di: Nou fini avè l'! Yo p'ap gen chans wè m' tonbe pou yo kontan! ⁵ (13:6) Pou mwen menm,
 se sou ou mwen konte, paske ou renmen m' anpil. Kè m' kontan, paske ou delivre mwen. ⁶ (13:7)
 M'ap chante pou Seyè a, paske li te bon pou mwen.

Chapter 14

¹
 ¶ Pou chèf sanba yo. Se yon sòm David. Moun fou yo di nan kè yo: Pa gen Bondye. Yo tout fin pouri. Y'ap fè yon bann vye bagay sal. Pa gen yonn ki fè sa ki byen. ² Seyè a rete nan syèl la, l'ap gade lèzòm anba, pou l' wè si gen ladan yo ki gen konprann, si gen ladan yo k'ap chache l'.
³ Men yo tout pèdi chemen yo. Yo tout lage kò yo nan vis. Pa gen yonn ladan yo ki fè sa ki byen, non, pa menm yon sèl ladan yo. ⁴ ¶ Seyè a di: Moun sa yo k'ap fè mechanste yo, se konnen yo pa konnen? Y'ap souse pèp mwen an pou yo ka viv. Pa gen yonn ladan yo ki rele non mwen! ⁵ Men tou, yo pral sezi, yo pral tranble paske Bondye la avèk moun ki mache dwat yo. ⁶ Y'ap pase sa malere yo gen lide fè a nan betiz, men se nan Seyè a malere yo mete konfyans yo. ⁷ Oo! Kilè Bondye va soti sou mòn Siyon an pou l' vin delivre pèp Izrayèl la? Lè Seyè a va fè pèp li a kanpe ankò, pitit pitit Jakòb yo pral fè fèt. Se vre wi, pèp Izrayèl la pral kontan.

Chapter 15

¹
 ¶ Se yon sòm David. Seyè, ki moun ki ka rete lakay ou a? Ki moun ki ka viv sou mòn ki apa pou ou a? ² Se moun ki fè volonte Bondye nan tout bagay, ki toujou fè sa ki byen. Se moun ki pale verite a jan l' ye nan kè li, ³ ki pa nan bay moun kout lang. Se moun ki p'ap fè zanmi l' yo anyen ki mal, ki p'ap mache fè tripotaj sou vwazinaj. ⁴ Li meprize tout moun Bondye vire do bay, men, li respekte tout moun ki gen krentif pou Seyè a. Li toujou kenbe pawòl li, menm si sa koute l' chè.
⁵ Li prete moun san mande enterè. Li p'ap pran lajan anba pou l' bay manti sou moun ki inonsan. Moun ki fè bagay sa yo p'ap janm tonbe!

Chapter 16

¹
 ¶ Sè yon kantik David. Pwoteje m', Bondye, paske se bò kote ou m'ap chache pwoteksyon.
² Mwen di Seyè a: -Se ou ki sèl Mèt mwen. Se ou menm ki tout mwen. Pa gen pase ou! ³ Tout plezi m' se pou m' toujou la avè moun k'ap sèvi Seyè a nan peyi a. ⁴ Moun k'ap kouri dèyè tout lòt bondye

yo, se traka y'ap chache bay tèt yo. Mwen p'ap mele nan ofrann bèt y'ap fè. Mwen p'ap janm nonmen non bondye sa yo. ⁵ Seyè, se ou menm ki tout byen mwen. Se ou ki ban m' tou sa m' merite. Lavi m' nan men ou. ⁶ Ala yon bèl eritaj ki vin pou mwen! Ala kontan mwen kontan pou pòsyon pa m' lan! ⁷ M'ap fè lwanj Seyè a paske li ban m' bon konsèy. Menm lannwit, konsyans mwen di m' sa pou m' fè. ⁸ ¶ Mwen toujou mete Seyè a devan je m'. Paske li toujou bò kote m'. Anyen pa ka brannen m'. ⁹ Se poutèt sa, kè m' kontan anpil. Mwen santi se tout tan mwen ta chante. Ata kò mwen m'ap poze ak konfyans nan Bondye. ¹⁰ Paske ou p'ap kite m' kote mò yo ye a, ou p'ap penmèt moun k'ap sèvi ou la pouri anba tè. ¹¹ W'a fè m' konnen chemen ki bay lavi a. Paske ou la avè m', mwen pa manke kontan. Bò kote ou, Seyè, se yon plèzi ki p'ap janm fini.

Chapter 17

¹ ¶ Se yon lapriyè David. Seyè, koute kòz mwen lè m' gen rezon! Pran ka m', lè m'ap rele nan pye ou! Koute m' non, lè m'ap lapriyè ou, paske mwen p'ap bay manti. ² Se ou menm ki pral fè m' jistis, paske ou wè kote jistis la ye. ³ Ou mèt sonde kè m', ou mèt vin wè m' nan mitan lannwit, ou mèt egzaminen m' tout jan, ou p'ap jwenn okenn move lide nan kè m'. Pawòl ki nan bouch mwen, se li ki nan kè m'. ⁴ Mwen pa fè tankou lòt yo. Mwen obeyi kòmandman ou yo. Mwen pa fè tankou moun k'ap maltrete frè parèy yo. ⁵ Se nan chemen ou yo mwen toujou mache. Se yo menm mwen swiv nèt ale. ⁶ M'ap rele ou, Bondye, paske ou reponn mwen. Tanpri, panche zòrèy ou bò kote m', koute sa m'ap di ou: ⁷ Fè moun wè jan ou gen bon kè, ou menm ki delivre moun y'ap pèsekite yo, lè yo vin chache pwoteksyon bò kote ou. ⁸ ¶ Pwoteje m' tankou grenn je ou. Kache m' anba zèl ou. ⁹ Wete m' anba men mechan k'ap maltrete m' yo. Lènmi m' yo soti pou yo touye m', yo sènen m' toupatou. ¹⁰ Yo san zantray. Yo awogan lè y'ap pale. ¹¹ Kote m' fè, yo fann dèyè m'. Yo fin sènen m' nèt. Y'ap chache okazyon pou yo mete m' atè. ¹² Yo tankou lyon, yo pa konn sa yo ta bay pou yo devore m'. Yo tankou jenn ti lyon, yo rete nan kachèt yo, y'ap veye m'. ¹³ Leve non, Seyè. ¹⁴ Mache pran lènmi m' yo. Fese yo atè. Rale nepe ou, delivre m' anba men mechan yo. Sove m' anba moun alekile yo avèk fòs ponyèt ou. Tout byen yo se byen latè. Ou pran nan richès ou yo, ou

15

ba yo tou sa yo bezwen. Pitit yo pa manke anyen. Yo kite rès pou pitit pitit yo. Men pou mwen menm, m'ap parèt devan ou, paske mwen inonsan. Lè m'a leve, m'ap kontan nèt ale, paske w'ap toujou la avèk mwen.

Chapter 18

¹ ¶ (18:1) Pou chèf sanba yo. Se chante sa a David, sèvitè Seyè a, te chante pou Bondye lè Bondye te delivre l' anba Sayil ansanm ak tout lòt lènmi l' yo. (18:2) Ala renmen mwen renmen ou, Seyè! Se ou menm ki tout fòs mwen. ² (18:3) Se ou menm ki twou wòch kote m' cache a. Se ou menm ki sèvi m' ranpa. Se ou menm ki delivre m'. Ou se Bondye mwen, se ou menm ki pwoteje m'. Se nan ou mwen mete tout konfyans mwen. Se ou ki tout defans mwen. Se fòs ou k'ap sove m'. Se anba zèl ou mwen jwenn kote pou m' cache. ³ (18:4) Mwen rele Seyè a: Li delivre m' anba lènmi m' yo. Lwanj pou Seyè a! ⁴ (18:5) Lanmò te fin vlope m'. Mwen te pè lè m' wè tout malè sa yo tonbe sou mwen. ⁵ (18:6) Privye lanmò te tonbe sou mwen yon sèl kou. Kote m' vire, mwen wè lanmò devan m'. ⁶ (18:7) Nan mizè mwen te ye a, mwen rele nan pye Seyè a. Mwen mande Bondye m' lan sekou. Kote l' chita lakay li a, li tandè vwa mwen, rèl mwen rive jouk nan zòrèy li. ⁷ (18:8) Lè sa a, latè pran tranble, li souke. Mòn yo pran tranble jouk nan rasin yo. Yon sèl frison pran yo, paske Bondye te ankòlè! ⁸ (18:9) Lafimen t'ap soti nan twou nen li. Yon gwo flanm dife ak moso chabon tou limen t'ap soti nan bouch li. ⁹ (18:10) Li bese syèl la, li desann avè yon gwo nwaj nwa anba pye li. ¹⁰ (18:11) Li moute sou do yon zanj cheriben, li t'ap vole. Yon kouran van t'ap pouse l' ale. ¹¹ (18:12) Li te cache kò l' nan fènwa. Yon gwo nwaj pwès, plen dlo, te vlope l' toupatou. ¹² (18:13) Anpil lagrèl ak anpil chabon dife t'ap soti nan gwo limyè ki t'ap klere devan l' lan. ¹³ (18:14) Seyè a pran gwonde nan syèl la. Bondye ki anwo nan syèl la fè tout moun tandè vwa li. ¹⁴ (18:15) Li voye flèch li yo, li gaye tout lènmi m' yo. Li fè yo tout kouri ak kout zèklè. ¹⁵ (18:16) Lè ou ankòlè, Seyè, van yo soti ak fòs nan twou nen ou. Lè konsa moun wè fon lanmè a, fondasyon tè a parèt akèl. ¹⁶ (18:17) Seyè a rete nan syèl la, li lonje men l', li pran m'. Li rale m' soti nan gwo dlo yo kote m' te ye a. ¹⁷ (18:18) Li delivre m' anba gwo lènmi m' yo, anba tout moun sa yo ki te rayi m' epi ki te pi fò pase m'. ¹⁸ (18:19) Lè m' te nan tray, yo pwofite atake m'. Men, Seyè a te

¹⁹ soutni m'. (18:20) Li wete m' nan move pa a. Li delivre m' paske li renmen mwen. ¶ ²⁰ (18:21) Seyè a ban m' rekonpans mwen, paske li wè m' mache dwat devan li. Li ban m' benediksyon, paske
²¹ li wè mwen inonsan. (18:22) Mwen te obeyi lalwa Seyè a, mwen pa vire do bay Bondye m' lan
²² pou m' fè sa ki mal. (18:23) Mwen fè tou sa ki nan lalwa li, mwen pa janm dezobeyi kòmandman
²³ li yo. (18:24) Li konnen mwen pa antò. Mwen kenbe kò m' pou m' pa fè sa ki mal. ²⁴ (18:25) Se konsa li ban m' rekonpans mwen, paske mwen mache dwat devan li, paske li wè mwen inonsan.
²⁵ (18:26) Ou menm, Seyè, ou kenbe pawòl ou ak moun ki kenbe pawòl yo. Ou bon ak moun ki
²⁶ bon. (18:27) Ou pa fè ipokrit ak moun ki pa fè ipokrit avè ou, men ou malen ak moun ki malen.
²⁷ (18:28) Ou delivre moun ki soumèt devan ou, men ou desann moun ki konprann yo pa kanmarad
²⁸ pesonn. (18:29) Seyè, ou se limyè mwen, ou se Bondye mwen. Se ou ki wete m' nan fènwa kote
²⁹ m' te ye a. ¶ (18:30) Avè ou, mwen fonsè sou bann lènmi m' yo ki ame jouk nan dan. Avèk ou,
³⁰ mwen eskalade miray ki sèvi yo defans. (18:31) Bondye oo! Tou sa ou fè bon nèt ale. Ou toujou
³¹ kenbe pawòl ou. Ou pwoteje tout moun ki chache pwoteksyon anba zèl ou. (18:32) Ki moun ki
Bondye si se pa Seyè a? Ki moun ki pran defans nou si se pa Bondye nou an? ³² (18:33) Se Bondye
³³ ki ban m' fòs, li fè m' mennen yon vi san repwòch. (18:34) Li asire pye m' tankou pye kabrit. Li
³⁴ fè m' mache sou mòn yo, san m' pa tonbe. (18:35) Li moutre m' jan pou m' goumen. Li ban m'
³⁵ fòs pou m' sèvi ak pi gwo banza ki genyen. (18:36) Se ou menm, Seyè, ki pwoteje m'. Se ou ki
³⁶ delivre m'. Si m' kapab leve kanpe, se paske ou renmen m'. Pouvwa ou pa kite m' tonbe. (18:37)
³⁷ Ou pa kite yo bare wout mwen. Mwen pa janm pèdi pye. (18:38) Mwen kouri dèyè lènmi m'
³⁸ yo, mwen jwenn yo. Mwen pa tounen jouk tan mwen pa fin kraze yo nèt. (18:39) Mwen jete yo
³⁹ atè, yo pa ka leve. Yo tonbe, mwen mete pye m' sou kou yo. (18:40) Ou ban m' kont fòs pou
⁴⁰ batay la. Ou fè lènmi m' yo mande m' padon. (18:41) Ou fè lènmi m' yo kouri devan m'. Mwen
⁴¹ disparèt tout moun ki rayi m' yo. (18:42) Y'ap rele, y'ap mande sekou. Men, pa gen moun ki ka
⁴² delivre yo! Y'ap rele Seyè a, men li pa reponn yo. (18:43) Mwen kraze yo, yo tout tounen pousyè
⁴³ van pote yo ale. Mwen mache sou yo tankou sou labou nan lari. (18:44) Ou delivre m' anba pèp
rebèl sa a. Ou mete m' chèf pou m' gouvènè sou tout nasyon yo. Pèp mwen pa t' janm konnen, se
⁴⁴ yo menm k'ap sèvi m'. (18:45) Moun lòt peyi yo ap flate m'. Kou yo tande vwa m', yo obeyi:

45 (18:46) Yo pèdi tout kouraj yo. Yo soti kote yo te kache a, y'ap tranble kou fèy bwa. 46 (18:47) Viv Seyè a! Lwanj pou moun ki pran defans mwen an! Se Bondye ki delivre mwen! Ann fè konnen
 47 jan li gen pouvwa! (18:48) Se Bondye ki pran revanj mwen. Se li ki mete pèp yo anba pye mwen.
 48 (18:49) Li sove m' anba lènmi m' yo. Li wete m' anba men moun ki t'ap konbat mwen yo. Ou
 49 delivre m' anba ansasen yo. (18:50) Se poutèt sa, Seyè, m'a fè moun lòt nasyon yo konnen ki
 50 moun ou ye. M'a chante pou fè lwanj ou. (18:51) Bondye delivre wa li a anpil fwa. Li moutre
 jan li pa janm sispann renmen David, moun li te chwazi a, ansanm ak pitit pitit li yo pou tout tan.

Chapter 19

1 ¶ (19:1) Pou chèf sanba yo. Se yon sòm David. (19:2) Syèl la fè parèt ak lè pouvwa Bondye
 a. Li fè wè tou sa Bondye te fè ak men l'. 2 (19:3) Jounen jòdi a rakonte koze sa a bay jounen
 denmen k'ap vini an. Lannwit sa a repete l' bay lannwit ki vin apre a. 3 (19:4) Yo pa pale, yo pa di
 yon mo. Ou pa tande yon ti bwi. 4 (19:5) Men, sa yo di a mache ale toupatou sou latè. Mesaj y'ap
 bay la rive jouk nan dènye bout latè. Bondye moute yon kay nan syèl la pou solèy la. 5 (19:6) Solèy
 la menm soti tankou yon nonm ki fèk marye k'ap soti anndan chanm li. Li kontan, l'ap kouri tankou
 yon gwonèg ki konnen li deja genyen kous la. 6 (19:7) Solèy la leve nan yon bout syèl la, li kouche
 nan lòt bout la. Chalè li bat sou tout bagay. 7 ¶ (19:8) Lalwa Seyè a bon sou tout pwèn. Li moutre
 nou jan pou nou viv. Nou mèt gen konfyans nan kòmandman Seyè a. Tout moun ki pa gen konprann,
 8 l'ap ba yo konprann. (19:9) Regleman Seyè a se bagay ki dwat. Moun ki swiv yo ap gen kè kontan.
 9 Kòmandman li yo klè. Yo louvri je moun. (19:10) Se pou nou gen krentif pou Seyè a yon jan ki
 san repwòch. Epi se tout tan pou nou gen krentif sa a. Jijman Seyè a se verite, yo pa janm nan
 10 patipri. (19:11) Moun ap kouri dèyè yo pi rès pase dèyè lò, menm pase lò ki pi bon an. Yo pi
 11 dous pase siwo myèl, menm pase siwo k'ap degoute nan gato myèl. (19:12) Mwen menm k'ap
 12 sèvi ou la, yo ban m' anpil konesans. Gen gwo rekonpans pou moun k'ap obeyi yo. (19:13) Ki
 moun ki konnen tou sa li fè ki mal? Tanpri, Seyè, delivre m' anba sa mwen fè ki mal san m' pa
 13 konnen! (19:14) Mwen menm k'ap sèvi ou la, pwoteje m' tou anba peche mwen fè ak tout
 konesans mwen. Pa kite yo pran pye sou mwen. Se lè sa a m'a san repwòch. Se lè sa a m'a delivre

anba gwo peche a. ¹⁴ (19:15) Seyè, se ou ki twou wòch kote m' cache a, se ou ki delivrans mwen, mwen mande ou pou pawòl ki soti nan bouch mwen, ak lide k'ap travay nan tèt mwen fè ou plezi.

Chapter 20

¹ ¶ (20:1) Pou chèf sanba yo. Se yon sòm David. (20:2) Se pou Seyè a reponn ou lè ou anba tray. Se pou Bondye Jakòb la pwoteje ou. ² (20:3) Se pou l' rete lakay li pou l' voye ede ou. Se pou l' rete sou mòn Siyon an pou l' soutni ou. ³ (20:4) Se pou l' chonje tou sa ou ofri ba li, pou l' kontan tou bèt ou fè touye pou li. ⁴ (20:5) Se pou l' ba ou tou sa ou ta renmen. Se pou l' fè tou sa ou gen lide fè rive vre. ⁵ (20:6) Lè sa a, n'ap rele, n'ap kontan dèske ou genyen batay la. N'ap fè fèt paske ou genyen batay la, n'ap fè lwanj Bondye nou an. Se pou Seyè a ba ou tou sa ou mande l'. ⁶ ¶ (20:7) Koulye a, mwen konnen Seyè a ap fè moun li chwazi a genyen batay la. Li rete nan syèl la, nan kay ki pou li a, li reponn li. Li fè l' genyen batay la avèk gwo pouvwa li. ⁷ (20:8) Gen moun ki mete konfyans yo nan machin pou fè lagè. Gen lòt moun, se nan chwal yo yo mete konfyans yo. Men nou menm, se nan pouvwa Seyè a, Bondye nou an, nou mete konfyans nou. ⁸ (20:9) Yo menm, yo gen pou yo bite, pou yo tonbe. Men nou menm, nou kanpe, n'ap kenbe fèm. ⁹ (20:10) Seyè, fè wa a genyen batay la non! Reponn nou non, lè n'ap rele ou!

Chapter 21

¹ ¶ (21:1) Pou chèf sanba yo. Se yon sòm David. (21:2) Wa a kontan, Seyè, dèske ou te ba li fòs kouraj. Wa a kontan nèt dèske ou fè l' genyen batay la. ² (21:3) Ou ba li tou sa l' te renmen. Ou pa t' refize l' sa l' te mande ou. ³ (21:4) Ou vin bò kote l' avèk anpil benediksyon, ou mete yon kouwòn fèt ak bon lò sou tèt li. ⁴ (21:5) Li mande ou lavi, ou ba li l'. Ou ba l' yon lavi ki long, yon lavi ki p'ap janm fini. ⁵ (21:6) Y'ap fè gwo lwanj pou li, paske ou ede l', ou fè yo respekte l', ou ba li bèl pozisyon, ⁶ (21:7) Ou mete benediksyon ou sou li pou tout tan. Ou fè kè l' kontan paske ou la avè l'. ⁷ ¶ (21:8) Wa a mete konfyans li nan Seyè a. Gremesi Bondye ki anwo nan syèl la, wa a

la pou tout tan. ⁸ (21:9) Wa a ap mete men l' sou tout lènmi l' yo, l'ap mache pran tout moun ki pa vle wè l' yo. ⁹ (21:10) Lè w'a parèt, w'ap detwi yo tankou yon gwo boukan dife. Lè Seyè a ankòlè, se fini l'ap fini ak yo, dife ap boule yo nèt. ¹⁰ (21:11) W'ap disparèt tout pitit yo sou latè, w'ap disparèt tout ras yo pami lèzòm. ¹¹ (21:12) Y'ap fè move plan, y'ap fè konplo sou wa a, men sa p'ap mache pou yo. ¹² (21:13) L'ap tire flèch li sou yo, l'ap fè yo kouri ale. ¹³ (21:14) Seyè, leve non. Fè yo wè fòs ou! N'a chante, n'a fè lwanj pou jan ou gen pouvwa!

Chapter 22

¹ ¶ (22:1) Pou chèf sanba yo. Se pou yo chante l' sou lè chante ki di: Nan granmaten yon fenmèl kabrit. Se yon sòm David. (22:2) Bondye, Bondye m', poukisa ou lage m' konsa? Poukisa ou rete lwen konsa, san pote m' sekou, san koute jan m'ap plenn lan? ² (22:3) Tout lajounen m'ap rele ou, Bondye mwen, ou pa reponn. Tout lannwit m'ap rele, mwen pa ka dòmi. ³ (22:4) Men, se ou menm ki Bondye, ou chita sou fotèy ki apa pou ou a. Pèp Izrayèl la ap fè lwanj ou. ⁴ (22:5) Zansèt nou yo te mete konfyans yo nan ou. Yo te fè ou konfyans, ou te sove yo. ⁵ (22:6) Lè yo te kriye nan pye ou, ou te wete yo nan move pa. Wi, yo te mete konfyans yo nan ou, yo pa t' janm regrèt yo te fè sa. ⁶ (22:7) Men, se pa moun mwen ye ankò, se yon vètè mwen tounen. Tout moun ap meprize m', tout moun ap pase m' nan betiz. ⁷ (22:8) Tout moun ki wè m' pase m' nan rizib. Y'ap lonje dwèt sou mwen, y'ap fè siy sou mwen. ⁸ (22:9) Y'ap di m' konsa: -Jan ou te konte sou Seyè a, poukisa li pa delivre ou? Si Seyè a renmen ou, poukisa li pa ede ou? ⁹ (22:10) Se ou menm ki te fè m' soti san danje nan vant manman m'. Se ou menm ankò ki te pwoteje m' lè m' te nan tete. ¹⁰ (22:11) Depi nan vant manman m', se ou menm k'ap pwoteje m'. Depi anvan mwen te fèt, se ou menm ki Bondye mwen. ¹¹ ¶ (22:12) Pa rete lwen m' konsa. Malè prèt pou tonbe sou mwen, mwen pa gen pesonn pou ede m'. ¹² (22:13) Lènmi m' yo anpil, yo sènen m' toupatou. Yo tankou gwo towò bèf peyi Bazan. Kote m' vire yo la. ¹³ (22:14) Yo louvri bouch yo, ou ta di se lyon k'ap gwonde, ki prèt pou dechire mwen. ¹⁴ (22:15) Mwen pèdi tout fòs mwen, tankou dlo ki tonbe atè. Tout zo nan kò m' dejwente. Mwen santi kè m' ap kase, tout zantray mwen ap bouyi. ¹⁵ (22:16) Fòs mwen ap

cheche, tankou labou nan solèy. Lang mwen kole nan fon bouch mwen. Mwen santi m' prèt pou
¹⁶mouri. (22:17) Tankou yon bann chen, mechan yo sènen m'. Bann mechan yo fèmèn m' toupatou.
 Yo kraze de men m' ak de pye m' yo. ¹⁷(22:18) Tout zo nan kò m' parèt. Y'ap gade m', y'ap veye
 m'. ¹⁸(22:19) Y'ap separe rad mwen ant yo menm, y'ap tire osò pou rad mwen an. ¹⁹(22:20) Pa
 rete lwen m' konsa, Seyè. Ou menm ki tout fòs mwen, prese vin pote m' sekou. ²⁰(22:21) Pa kite
 yo touye m' ak kout nepe. Pa kite chen yo devore m'. ²¹(22:22) Wete m' nan bouch lyon yo. Delivre
 m' anba towò savann sa yo. Ou reponn mwen, Seyè! ²²¶ (22:23) M'a di frè m' yo tout sa ou te fè
 pou mwen. M'a fè lwanj ou lè yo tout reyini ansanm. ²³(22:24) Nou tout ki gen krentif pou Seyè
 a, fè lwanj li. Nou tout pitit pitit Jakòb yo, chante pou li. Nou tout pèp Izrayèl la, adore li. ²⁴(22:25)
 Li pa meprize pòv yo, li pa fèmèn je l' sou soufrans yo. Li pa rete lwen yo. Lè yo rele l', li reponn.
²⁵(22:26) M'a fè lwanj ou pou sa ou fè, nan mitan tout moun yo lè yo reyini. M'a fè sa mwen te
 pwomèt ou yo, devan tout moun ki gen krentif pou ou yo. ²⁶(22:27) Pòv yo va manje mezi yo
 kapab. Moun k'ap chache Seyè a va fè lwanj li. Y'a viv ak kè poze pou tout tan. ²⁷(22:28) Tout
 nasyon va chonje sa Seyè a te fè. Toupatou sou latè yo pral tounen vin jwenn li. Moun tout peyi
 va adore li. ²⁸(22:29) Se Seyè a ki wa. Se li ki donminen sou tout nasyon. ²⁹(22:30) Tout grannèg
 sou latè va bese tèt devan li. Yo tout ki la pou mouri, yo tout ki la pou al anba tè, yo pral adore li.
³⁰(22:31) Jenerasyon k'ap vini yo va sèvi li. Moun va rakonte istwa Seyè a bay pitit yo. ³¹(22:32)
 Pitit yo menm, lè y'a fè pitit, y'a fè konnen jan Seyè a te delivre yo ansanm ak tou sa li te fè pou
 yo.

Chapter 23

¹¶ Se yon sòm David. Seyè a se gadò mwen, mwen p'ap janm manke anyen. ²Kote zèb yo pi
 bèl, se la li fè m' pran repo. Kote dlo a koule poze, se la li mennen m' bwè. ³Li fè m' reprann fòs.
 Li fè m' mache nan chemen dwat, pou sa sèvi yon lwanj pou non li. ⁴Menm si m'ap pase nan yon
 ravin kote ki fè nwa anpil, mwen p'ap pè anyen, paske, Seyè, ou la avèk mwen. Se baton ou ak gòl
 ou ki fè kè m' pa kase. ⁵Ou pare yon tab pou mwen devan je tout lènmi m' yo. Ou resevwa m', ou

fè kè m' kontan ou ban m' tou sa m' bezwen. ⁶ Wi, mwen konnen w'ap toujou renmen m', w'ap toujou bon pou mwen pandan tout lavi m'. Se lakay ou m'ap rete tout tan tout tan.

Chapter 24

¹ ¶ Se yon sòm David. Se pou Seyè a tè a ye ansanm ak tou sa ki sou li. Se pou Seyè a lemonn antye ansanm ak tou sa k'ap viv ladan l'. ² Li mete fondasyon tè a nan fon lanmè, li fè l' chita sou gwo larivyè yo. ³ ¶ Ki moun ki gen dwa moute sou mòn ki pou Seyè a? Ki moun li kite antre nan kay ki apa pou li a? ⁴ Se moun ki pa fè anyen ki mal, moun ki pa gen move lide nan tèt yo. Se moun ki pa nan bay manti, moun ki pa nan fè sèman pou twonpe moun. ⁵ Seyè a va beni moun konsa. Bondye k'ap delivre l' la va fè l' gras. ⁶ Se moun konsa ki pou chache Seyè a, ki pou chache parèt devan Bondye Jakòb la. ⁷ ¶ Wete lento pòt yo! Louvri batan pòt yo gran louvri pou wa ki gen pouvwa a ka antre! ⁸ Kilès ki wa ki gen pouvwa sa a? Se Seyè ki gen fòs ak kouraj la, li vanyan nan batay. ⁹ Wete lento pòt yo! Louvri batan pòt yo gran louvri pou wa ki gen pouvwa a ka antre! ¹⁰ Kilès ki wa ki gen pouvwa sa a? Se Seyè ki chèf lame zanj yo, se li menm ki wa ki gen pouvwa a.

Chapter 25

¹ ¶ Se yon sòm David. Seyè, m'ap fè lapriyè m' moute devan ou. Bondye mwen, se nan ou mwen mete tout konfyans mwen. ² Piga ou fè m' wont, pa kite lènmi yo pase m' nan betiz. ³ Wi, moun ki mete konfyans yo nan ou p'ap janm wont. Men, moun ka soti wont yo, se moun k'ap trayi ou pou gremesi. ⁴ Seyè, fè m' konnen jan ou vle m' viv la! Moutre m' nan ki chemen ou vle pou m' mache a! ⁵ Moutre m' sa pou m' fè pou m' viv yon jan ki konfòm ak verite ou la, paske se ou menm ki delivrans mwen. Se sou ou mwen konte tout jounen. ⁶ Seyè, chonje jan ou gen kè sansib, chonje jan ou renmen nou depi nan tan lontan. ⁷ Pa chonje peche ak fòt mwen te fè lè m' te jenn. Seyè,

jan ou renmen m' sa a, jan ou gen bon kè, tanpri, pa bliye m'! ¶ Seyè a bon, li pa nan patipri, li
 moutre moun k'ap fè sa ki mal yo jan pou yo viv. Li pran men moun ki soumèt devan l' yo, li fè
 yo mache nan bon chemen an, li moutre yo jan li vle pou yo viv la. Moun ki kenbe kontra li fe
 ak yo a, moun ki obeyi kòmandman l' yo, li fè yo wè jan li renmen yo, jan li p'ap janm lage yo.
 11 Seyè, poutèt non ou pote a, padonnen peche m' yo, paske yo anpil. Si yon moun gen krentif
 pou Seyè a, Seyè a va moutre l' chemen pou l' pran. L'ap toujou gen kè kontan. Pitit li yo va
 pran peyi a pou yo. Seyè a, se zanmi moun ki gen krentif pou li. Li fè yo konnen kontra li pase
 ak yo a. ¶ Se sou Seyè a m'ap gade tout tan, l'ap delivre m' lè m' nan move pa. Seyè, vire je
 ou bò kote m'. Gen pitye pou mwen, paske mwen pou kont mwen, mwen san fòs. Pa kite m' ak
 kè sere sa a. Wete m' nan tray m'ap pase a. Gade nan ki mizè mwen ye! Gade jan m'ap soufri!
 Padonnen tout peche m' yo. Gade tout kantite lènmi mwen genyen! Gade jan yo rayi m', jan
 y'ap pousib mwen. Pwoteje m' non! Delivre m' non! Piga ou fè m' wont, paske se bò kote ou
 m'ap chache pwoteksyon, se anba zèl ou mwen vin kache. Fè m' viv yon jan ki san repwòch. Fè
 m' mache dwat pou ou ka pwoteje m', paske tout espwa mwen se nan ou li ye. O Bondye, delivre
 pèp Izrayèl la anba tray l'ap pase yo.

Chapter 26

1 ¶ Se yon sòm David. Fè m' jistis, Seyè, paske m'ap viv yon jan ki san repwòch. Mwen mete
 tout konfyans mwen nan ou, mwen pa janm lage ou. Fouye m', Seyè. Wè tou sa ki nan kè mwen.
 Sonde m'. Wè tou sa ki nan lide m', Ou fè m' wè jan ou renmen mwen. M'ap viv yon jan ki dakò
 ak verite ou la. Mwen pa chita ansanm ak moun k'ap bay manti, mwen pa gen anyen pou m' wè
 ak moun ipokrit. Mwen rayi tout moun k'ap fè sa ki mal. Mwen pa chita ansanm ak mechan yo.
 6 ¶ Seyè, m'ap lave men m' pou m' moutre jan m' inosan, mwen pral pwoche bò lotèl ou a, pou
 m' fè tout moun tandè jan m'ap di ou mèsè, pou m' rakonte tout bèl bagay ou yo. Seyè, mwen
 renmen kay kote ou rete a, kay kote pouvwa ou ye a. Pa trete m' menm jan ak moun k'ap fè sa ki

mal. Pa detwi m' ansanm ak sanginè yo, ¹⁰ ansanm ak moun sa yo k'ap fè krim tout tan, ki toujou
 pare pou achte bouch moun. ¹¹ Pou mwen menm, m'ap mennen yon lavi ki san repwòch. Delivre
 m', gen pitye pou mwen. ¹² M'ap mache byen fèm nan chemen ki pa gen move pa a. M'a fè lwanj
 Seyè a nan mitan pèp la lè l' reyini.

Chapter 27

¹ ¶ Se yon sòm David. Seyè a se limyè mwen, se li ki delivrans mwen. Ki moun ki ka fè m' pè?
 Se Seyè a k'ap pwoteje mwen. Ki moun ki ka fè m' tranble? ² Lè mechan yo ap mache sou mwen,
 lè lènmi m' yo ap chache touye m', se yo menm k'ap bite, se yo menm k'ap tonbe. ³ Menm si tout
 yon lame ta sènen m' toupatou, mwen p'ap pè anyen. Menm si yo ta vle fè m' lagè, m'ap toujou gen
 konfyans nan Bondye. ⁴ Mwen mande Seyè a yon bagay, yon bagay mwen anvi anpil anpil: Se
 pou m' ta pase tout lavi m' nan kay Seyè a, pou m' ka gade bèl bagay li yo byen, pou m' ka pran tan
 m' pou m' kalkile nan kay ki apa pou li a. ⁵ Jou malè tonbe sou mwen, l'a pwoteje m' lakay li. L'a
 kache m' byen fon nan tanp li a. L'a leve m' mete yon kote pou anyen pa rive m'. ⁶ Se konsa m'ap
 genyen batay la sou tout lènmi k'ap sènen m' yo. M'a bat tanbou, m'a ofri bèt pou touye bay Bondye
 nan tanp li a. M'a chante, m'a fè lwanj Seyè a. ⁷ ¶ Seyè, tandè m' non lè m'ap rele ou! Gen pitye
 pou mwen, reponn mwen non! ⁸ Ou pale nan kè m', ou di m' vin jwenn ou. M'ap vin jwenn ou,
 Seyè. ⁹ Pa vire do ban mwen. Pa fache, pa repouse moun k'ap sèvi ou la. Se ou ki tout sekou mwen.
 Pa kite m' pou kont mwen, pa lage m'. ¹⁰ Papa m' ak manman m' te mèl lage m', Seyè a va ranmase
 mwen. ¹¹ Seyè, moutre m' jan ou vle m' viv la. Fè m' mache nan chemen ki pa gen move pa a,
 paske mwen gen anpil lènmi k'ap veye m'. ¹² Pa lage m' nan men lènmi m' yo. Yo soti pou yo touye
 m'. Se yon bann moun k'ap bay manti. ¹³ Mwen menm, mwen sèten m'a viv pou m' wè jan Bondye
 sèvi byen ak pèp li a. ¹⁴ Mete espwa ou nan Seyè a! Gen konfyans, pa dekouraje! Wi, mete espwa
 ou nan Seyè a!

Chapter 28

¹
¶ Se yon sòm David. Seyè, se ou menm ki twou wòch kote m' cache a, se nan pye ou m'ap rele. Pa fè tankou ou pa tande m'. Si ou pa reponn mwen, m'ap tankou yon kadav y'ap antere.

²
Tande m' non, lè m'ap rele ou, lè m'ap mande ou sekou. Koute m' non, lè mwen leve de bra m' nan direksyon kay ki apa pou ou a. ³ Pa mete m' nan menm sak ak mechan yo, ak moun k'ap fè sa ki mal, ak moun ki gen bèl pawòl nan bouch yo men ki gen mechanste plen kè yo. ⁴ Pini yo pou sa yo fè, pou tou sa yo fè ki mal. Pini yo pou tou sa yo fè, ba yo sa yo merite. ⁵ Yo pa pran ka sa Seyè a te fè, sa l' te fè ak men l'. Se pou Seyè a detwi yo, se pou l' disparèt yo nèt alè. ⁶ ¶ Ann fè lwanj Seyè a. Li tande m' lè mwen rele l'. ⁷ Seyè a ap pwoteje m', l'ap pran defans mwen. Mwen mete tout konfyans mwen nan li. Li ede m', kè m' kontan. M'ap chante pou m' fè lwanj li. ⁸ Se Seyè a ki tout fòs pèp li a. L'ap defann wa li chwazi a, l'ap delivre l'. ⁹ Seyè, sove pèp ou a non! Beni tout moun pa ou yo! Aji ak yo tankou yon bon gadò. Pran swen yo tout tan tout tan.

Chapter 29

¹
¶ Se yon sòm David. Nou tout pitit Bondye yo, fè lwanj Seyè a! Fè lwanj Seyè a pou pouvwa ak fòs li genyen! ² Fè lwanj non Seyè ki gen pouvwa a! Adore Seyè a nan bèl kay ki apa pou li a!

³
Seyè a fè tande vwa li sou lanmè. Bondye ki gen pouvwa a fè loraj yo gwonde. Seyè a ap mache sou tout lanmè a. ⁴ Vwa Seyè a se yon vwa ki gen pouvwa! Se yon vwa ki mande pou moun respekte l'! ⁵ Vwa Seyè a kase pye sèd yo, li kase pye sèd peyi Liban yo. ⁶ Li fè mòn nan peyi Liban yo sote ponpe tankou ti gazèl bèf. Li fè mòn Siryon yo sote ponpe tankou jenn ti towò bèf. ⁷ Vwa Seyè a fè zèklè. ⁸ Vwa Seyè a fè dezè a tranble. Wi, li fè dezè Kadès la tranble. ⁹ Vwa Seyè a tòde pye chenn yo. Li fè tout fèy nan rakbwa tonbe. Nan tanp li, tout moun ap fè lwanj pou li. ¹⁰ Seyè a te chita sou fotèy li lè te gen gwo inondasyon an. L'ap gouvènen tankou wa pou tout tan. ¹¹ Seyè a va bay pèp li a fòs, l'a beni yo, l'a ba yo kè poze.

Chapter 30

¹
¶ (30:1) Kantik pou fèt Benediksyon Tanp lan. Se yon sòm David. (30:2) M'ap fè lwanj ou, Seyè, paske ou mete m' sou de pye m' ankò, paske ou pa bay lènmi m' yo chans pou yo pase m' nan rizib. ² (30:3) Seyè, Bondye mwen, mwen rele nan pye ou, epi ou geri mwen. ³ (30:4) Ou rale m' soti nan bouch twou a. Ou ban m' lavi ankò, ou pa kite m' mouri. ⁴ (30:5) Nou tout ki renmen Seyè a, fè lwanj li! Chonje sa l' te fè. Li pa tankou tout moun. Di l' mèsì. ⁵ (30:6) Paske, lè li ankòlè, se pou yon ti tan. Men, li ban nou favè l' pou tout tan n'ap viv. Lannwit nou kriye, Kou l' jou, kè nou kontan. ⁶ ¶ (30:7) Mwen te santi kè m' poze, se sak fè mwen t'ap di: -Anyen p'ap janm rive m'. ⁷ (30:8) Seyè, ou fè m' favè, ou mete m' chita sou yon mòn byen wo. Men, kou ou vire do ban mwen, kè m' kase. ⁸ (30:9) Mwen te kriye nan pye ou, Seyè. Mwen te mande ou sekou. ⁹ (30:10) Si ou kite yo touye m', sa sa ap fè pou ou? Si ou kite m' ale anba tè, sa sa ap rapòte ou? Eske moun mouri ka fè lwanj ou? Eske yo ka mache di jan ou toujou kenbe pawòl ou? ¹⁰ (30:11) Koute m' non, Seyè! Gen pitye pou mwen! Seyè, pote m' sekou! ¹¹ (30:12) Ou siye dlo nan je m', ou fè kè m' kontan anpil. Ou wete rad dèy ki te sou mwen an, ou ban m' yon bèl rad mete sou mwen pou m' fè fèt. ¹² (30:13) Mwen p'ap rete ak bouch mwen fèmen, m'ap chante lwanj ou. Seyè, se ou menm ki Bondye mwen! Se tout tan tout tan m'ap di ou mèsì.

Chapter 31

¹
¶ (31:1) Pou chèf sanba yo. Se yon sòm David. (31:2) Seyè, m'ap chache pwoteksyon anba zèl ou! Pa janm kite m' pran wont ankò. Ou se yon Bondye ki pa nan patipri. Tanpri, delivre mwen. ² (31:3) Panche zòrèy ou bò kote m', prese vin delivre mwen. Se ou menm ki twou wòch kote m' ka jwenn pwoteksyon. Se ou menm ki pou sèvi m' ranpa. Se ou menm ki pou delivre m'. ³ (31:4) Se ou ki tout pwoteksyon mwen, tout defans mwen. Tanpri, dirije m', kondi m' poutèt non ou pote a. ⁴ (31:5) Pa kite m' tonbe nan pèlen yo tann pou mwen an. Se ou menm k'ap pwoteje m'. ⁵ (31:6) Mwen renmèt lespri mwen nan men ou. W'a delivre m', Seyè, paske ou se yon Bondye ki kenbe pawòl li. ⁶ (31:7) Ou rayi moun k'ap adore zidòl. Pou mwen menm, tout konfyans mwen se nan ou li ye. ⁷ (31:8) M'ap kontan, m'ap fè fèt, paske ou renmen m'. Ou wè jan m'ap soufri, ou konnen nan ki pwoblèm mwen ye. ⁸ (31:9) Ou pa kite lènmi m' yo mete men sou mwen, ou mete m' yon

⁹
 kote pou anyen pa rive m'. ¶ (31:10) Gen pitye pou mwen, Seyè, paske mwen anba tray. Figi m'
 fin rale, mwen kagou. Kò m' ap fin deperi afòs mwen gen lapenn. ¹⁰ (31:11) Mwen pase tout lavi
 m' ap souffri, se tout tan m' ap plenn. Mwen santi m' ap febli paske mwen fè twòp move bagay. Tout
¹¹
 zo nan kò m' ap fè m' mal. (31:12) Tout lènmi m' yo ap pase m' nan rizib. Vwazen m' yo ap pase
 m' nan betiz. Tout moun ki konnen m' yo pè m'. Lè yo wè m' nan lari, yo kouri pou mwen. ¹² (31:13)
 Tout moun gen tan bliye m', tankou si m' te mouri deja. Mwen tankou yon vye bagay yo voye jete.
¹³
 (31:14) Mwen tande jan anpil moun ap pale m' mal. Kote m' pase mwen pè. Yo mete tèt yo
 ansanm sou do m', y' ap fè konplo pou yo touye m'. ¹⁴ (31:15) Men, Seyè, se nan ou mwen mete
 tou konfyans mwen. Se ou ki Bondye mwen. ¹⁵ (31:16) Lavi m' nan men ou. Delivre m' anba lènmi
 m' yo, anba moun k' ap pèsekite m' yo. ¹⁶ (31:17) Se sèvi m' ap sèvi ou, tanpri, fè m' santi ou la avèk
 mwen. Delivre m', paske ou renmen m'. ¹⁷ (31:18) M' ap rele ou, Seyè. Pa kite m' pran wont. Se
¹⁸
 mechan yo ki pou wont. Se pou yo mouri san di krik. (31:19) Se pou yo rete san pale, moun sa
 yo k' ap bay manti, tout moun sa yo k' ap fè grandizè yo, k' ap fè awogans, k' ap pale mal sou moun
¹⁹
 k' ap mache dwat devan Bondye yo. ¶ (31:20) Ala bon yo bon, bagay ou kenbe an rezèv pou
 moun ki gen krentif pou ou! Ala bèl yo bèl, bagay ou fè devan tout moun, lè w' ap pwoteje moun
²⁰
 k' ap chache pwoteksyon anba zèl ou! (31:21) Ou kenbe yo la devan je ou, pou ou ka pwoteje
²¹
 yo anba moun k' ap pèsekite yo. Ou kache yo lakay ou pou yo pa fini ak yo anba kout lang. (31:22)
 Lwanj pou Seyè a! Ala bèl bagay li fè pou l' moutre jan l' renmen mwen, lè m' te anba tray, lè yo
²²
 te sènen m' toupatou a! (31:23) Mwen te pè, mwen t' ap di nan kè m': -Gen lè ou voye m' jete
²³
 byen lwen ou. Men, ou te tande rèl mwen, lè m' t' ap mande ou sekou. (31:24) Nou tout k' ap sèvi
 Seyè a, se pou nou renmen l'. Wi, Seyè a pwoteje tout moun ki kenbe fèm nan li. Men, se pa ti pini
²⁴
 l' ap pini moun k' ap vante tèt yo. (31:25) Nou tout ki met espwa nou nan Seyè a, pran kouraj,
 kenbe fèm.

Chapter 32

¹
 ¶ Se yon kantik David. Ala bon sa bon pou yon moun lè Bondye pa gade sou fòt li fè, lè Bondye
²
 padonnen peche l' yo! Ala bon sa bon pou yon moun lè Seyè a pa mande l' kont pou sa li fè ki

mal, lè li pa gen okenn lide twonpe Bondye!³ Tank mwen pa t' ankò vle rekonèt peche m' yo, mwen t'ap cheche sou pye. Tout lajounen, mwen t'ap plenn.⁴ Lajounen kou lannwit ou t'ap kale m', Seyè. Mwen fin rann tout ji mwen, tankou tè sèk nan sezon chalè.⁵ Lè sa a, mwen rekonèt peche m' yo devan ou, mwen pa t' kache ou sa m' te fè ki mal. Mwen di: M'ap rakonte Seyè a tout bagay. Apre sa, ou te padonnen tout peche m' yo.⁶ Se konsa, moun k'ap sèvi ou ak tout kè yo gen pou lapriyè ou lè yo nan tray. Si yo nan gwo dlo, anyen p'ap rive yo.⁷ ¶ Se bò kote ou mwen vin kache. Jou malè w'ap delivre m'. M'ap chante fè konnen jan ou pwoteje m'.⁸ Seyè a di: M'a louvri lespri ou sou anpil bagay. M'a moutre ou chemen pou ou swiv la. M'a ba ou bon konsèy. M'ap voye je sou ou.⁹ Pa fè tankou chwal osinon tankou milèt ki san konprann. Yo blije mete bosal ak brid nan bouch yo pou donte yo. Si se pa sa, ou pa ka pwoche bò kote yo.¹⁰ Mechan yo gen pou yo soufri anpil. Men, Seyè a ap toujou pwoteje moun ki met konfyans yo nan li paske li renmen yo.¹¹ Nou tout k'ap viv jan Bondye vle l' la, fè kè nou kontan, chante pou sa Seyè a fè pou nou. Nou tout k'ap mache dwat devan Bondye, rele, fè wè jan nou kontan.

Chapter 33

¹ ¶ Nou tout k'ap viv jan Bondye vle l' la, fè kè nou kontan pou sa Seyè a fè. Nou tout k'ap mache dwat devan li, li bon pou n' fè lwanj li.² Jwe enstriman mizik pou di Seyè a mèsi! Jwe gita dis kòd la, fè fèt pou li.³ Chante yon chante tou nèf pou li. Wi, jwe bèl mizik, chante byen fò.⁴ Paske, pawòl Seyè a se verite. Li fè tout bagay jan l' te di l' la.⁵ Seyè a renmen sa ki dwat, li renmen sa ki san patipri. Toupatou sou latè nou wè jan li gen bon kè.⁶ Seyè a pale, epi syèl la fèt. Li souffle ak bouch li, tou sa ki nan syèl la fèt.⁷ Li ranmase tout dlo lanmè a yon sèl kote. Li mete tout dlo ki nan fon lanmè a nan rezèvwa.⁸ Se pou tout moun sou latè gen krentif pou Seyè a. Se pou tout moun sou latè tranble devan li.⁹ Paske, li pale, bagay la rive. Li bay lòd, tout bagay fèt.¹⁰ Seyè a detounen plan travay peyi yo, li anpeche pèp yo reyalize sa yo te gen lide fè.¹¹ Men, plan travay Seyè a la pou tout tan. Sa l' gen lide fè a ap toujou fèt.¹² ¶ Ala bon sa bon lè yon peyi gen Seyè a pou Bondye li! Ala bon sa bon pou pèp li chwazi pou rele l' pa l' la!¹³ Seyè a rete nan

¹⁴
 syèl la, li gade anba, li wè tout moun. Kote li ye lakay li a, li gade anba, li wè sa tout moun ap
¹⁵
 fè sou tè a. Se li menm ki penmèt yo gen lide nan tèt yo, l'ap veye tou sa y'ap fè. ¹⁶
 Se pa yon
 gwo lame k'ap fè yon wa genyen batay la. Se pa gwo kouray k'ap fè yon sòlda kraze lènmi l' yo.
¹⁷
 Pa mete nan tèt ou yon chwal ka fè ou genyen batay la. Bon kou l' bon, li pa ka sove pesonn.
¹⁸
 Seyè a ap veye sou moun ki gen krentif pou li. L'ap veye sou moun ki met espwa yo nan li paske
¹⁹
 yo konnen li renmen yo. L'ap rache yo anba lanmò. L'ap kenbe yo vivan lè grangou tonbe sou
²⁰
 peyi a. Nou mete tout espwa nou nan Seyè a. Se li menm ki tout sekou nou. Se li menm ki tout
²¹
 pwoteksyon nou. Se li ki fè kè nou kontan. Nou mete konfyans nou nan li ki yon Bondye apa.
²²
 Tanpri, Seyè, toujou fè nou favè, menm jan nou menm nou mete tout espwa nou nan ou.

Chapter 34

¹
 ¶ (34:1) Yon jou David te pran pòz moun fou li devan Abimelèk, pou Abimelèk te kite l' ale.
 Se aprè sa David ekri sòm sa a. (34:2) Se tout tan m'ap di Seyè a mesi, mwen p'ap janm sispann fè
²
 lwanj li. (34:3) M'ap fè lwanj li pou sa li te fè. Se pou tout moun ki anba tray tande sa pou yo ka
³
 fè kè yo kontan. (34:4) Mete tèt nou ansanm avè m' pou fè konnen jan Seyè a gen pouvwa. Ann
⁴
 fè lwanj li ansanm! (34:5) Mwen te kriye nan pye Seyè a, li te reponn mwen. Li delivre m' anba
⁵
 tout sa ki t'ap fè m' pè yo. (34:6) Lè nou vire je nou gade l', sa fè kè nou kontan. Nou p'ap janm
⁶
 wont. (34:7) Lè moun ki san sekou yo rele l', li reponn yo, li delivre yo anba tout tray. ⁷
 (34:8)
 Zanj Seyè a kanpe bò kote tout moun ki gen krentif pou li, pou pwoteje yo. Li delivre yo lè yo nan
⁸
 danje. (34:9) Goute, n'a wè jan Seyè a bon! Ala bon sa bon pou moun ki jwenn pwoteksyon anba
⁹
 zèl li! (34:10) Nou tout pèp Seyè a, se pou nou gen krentif pou li, paske moun ki gen krentif pou
¹⁰
 li p'ap janm manke anyen. (34:11) Moun rich konn manke manje, yo konn rete grangou. Men,
¹¹
 moun k'ap chache fè volonte Seyè a p'ap manke anyen. ¶ (34:12) Vini non, timoun mwen yo,
¹²
 koute sa m'ap di nou. M'a fè nou konnen ki jan pou nou gen krentif pou Seyè a. (34:13) Ki moun
¹³
 ki ta renmen jwi lavi? Ki moun ki ta renmen viv lontan ak kè kontan? (34:14) Se moun ki pa

lage kò yo nan pale moun mal ni nan bay manti. ¹⁴ (34:15) Sispann fè sa ki mal. Fè sa ki byen! Chache jan pou nou viv byen ak moun. Fè tou sa nou kapab pou nou viv byen ak tout moun.

¹⁵ (34:16) Seyè a ap veye moun ki mache dwat devan l' yo. L'ap koute yo lè y'ap rele nan pye l'.

¹⁶ (34:17) Men, Seyè a vire do bay moun k'ap fè sa ki mal, pou pesonn sou latè pa janm chonje yo.

¹⁷ (34:18) Lè moun ki mache dwat yo rele l', li tandè yo. Li wete yo anba tray. ¹⁸ (34:19) Seyè a kanpe toupre moun ki dekouraje yo, li delivre tout moun ki te pèdi espwa. ¹⁹ (34:20) Lè yon moun ap mache dwat, li gen pou l' soufri anpil. Men, Seyè a ap delivre l' anba tout soufrans li yo. ²⁰ (34:21) L'ap pwoteje l' nèt ale. Pa yon ti zo nan kò l' p'ap kraze. ²¹ (34:22) Malè gen pou fini ak mechan yo. Moun ki pa vle wè moun k'ap mache dwat yo gen pou yo tonbe anba chatiman. ²² (34:23) Seyè a ap delivre moun k'ap sèvi l' yo, li p'ap kondannen okenn moun ki chache pwoteksyon bò kote l'.

Chapter 35

¹ ¶ Se yon sòm David. Seyè, atake moun ki pa vle wè m' yo, goumen ak moun k'ap fè m' lagè

² yo. ³ Pran zam ou sèvi pou pare kou a, leve non, vin pote m' sekou. ⁴ Pran fwenn ou, pran rach ou. Atake moun k'ap pousib mwen yo. Fè m' konnen se ou menm k'ap delivre m'. ⁵ Se pou moun k'ap chache touye m' yo sezi, se pou yo wont. Se pou moun k'ap fè konplo sou mwen yo rale kò yo dèyè.

⁶ Se pou yo pa ka leve tèt yo. ⁷ Se pou yo tankou pay van ap pote ale, lè zanj Bondye a ap kouri dèyè yo. ⁸ Se pou fènwa bare wout yo, pou chemen an glise anba pye yo, lè zanj Bondye a ap talonnen yo. ⁹ San m' pa fè yo anyen, y'ap tann pèlen pou mwen. San m' pa fè yo anyen, y'ap fouye yon twou byen fon pou m' ka tonbe ladan l'. ¹⁰ Men, y'ap rete konsa, malè ap tonbe sou yo, y'ap pran nan pèlen yo te tann lan, y'ap tonbe nan twou yo te fouye a. ¹¹ Se konsa Seyè a pral fè kè m' kontan, m'ap kontan anpil, paske li delivre mwen. ¹² M'a di ak tout kè mwen: -Seyè, pa gen tankou ou! Ou delivre fèb yo anba moun ki gen fòs pase yo. Ou delivre pòv yo ak malere yo anba moun k'ap piye yo. ¹³ ¶ Gen moun k'ap kanpe bay manti sou mwen. Yo di mwen fè yon pakèt bagay mwen pa janm konnen mwen fè. ¹⁴ Moun mwen fè byen se yo k'ap fè m' mal. Mwen fin dekouraje. ¹⁵ Lè yo te malad, mwen te pran gwo lapenn pou yo, mwen rete san manje. Mwen bese tèt mwen pou

¹⁴
 mwen lapriyè pou yo, menm jan mwen ta lapriyè pou yon zanmi osinon pou yon frè. M'ap mache
 do ba ak gwo lapenn nan kè m', tankou yon moun ki pèdi manman l'. ¹⁵ Men, lè mwen menm mwen
 nan tray, yo tout yo kontan, yo mete tèt yo ansanm. Y'ap fè pil dèyè do m' pou bay manti sou mwen.
¹⁶
 Y'ap kale do m' san pran souf. Yo atake m', yo pase m' nan betiz. Y'ap gade m', y'ap griyen dan
 sou mwen. ¹⁷ ¶ Seyè, pou konbe tan ankò w'a penmèt sa? Pwoteje m' non anba bèt sovaj sa yo.
 Sove m' anba lyon sa yo. ¹⁸ M'a di ou mèsè nan mitan tout moun lè yo reyini, m'a fè lwanj ou devan
 yon gwo foul moun. ¹⁹ Pa kite lènmi m' yo, bann mantò sa yo, fè fèt sou tèt mwen. Pa kite moun
 sa yo ki rayi m' san m' pa fè yo anyen an fè siy sou mwen. ²⁰ Yo pale tankou moun k'ap chache
 kont. Y'ap kalkile tout kalite manti pou yo fè sou moun ki pa nan kont ak pesonn nan peyi a. ²¹ Yo
 louvri bouch yo byen laj pou bay manti sou mwen. Y'ap di: -Wi! Nou te wè ou! ²² Men ou menm,
 Seyè, ou wè tout bagay. Pa rete san ou pa di anyen nan sa, Seyè! Pa rete lwen m' konsa. ²³ Leve
 non, Seyè, vin pran defans mwen! Leve non, Bondye mwen, vin plede kòz mwen! ²⁴ Ou pa nan
 patipri, Seyè. Fè m' jistis. Pa kite lènmi m' yo fè fèt sou tèt mwen. ²⁵ Pa kite yo di nan kè yo: -Wi!
 se sa menm nou te vle rive li! Pa kite yo di: -Nou fini avè l'! ²⁶ Tout moun ki kontan wè jan m'ap
 souffri a, se pou yo wont jouk yo pa konn sa pou yo fè. Se pou moun k'ap gonfle lestonmak yo sou
 mwen pèdi fil, se pou yo kouri al kache! ²⁷ Se pou moun ki kontan wè jan m' inonsan an pran rele
 byen fò san rete. Se pou yo di: -Seyè a gen gwo pouvwa! Li vle pou sèvitè li viv ak kè poze. ²⁸ Lè
 sa a, m'a fè konnen jistis ou, m'a fè lwanj ou tout lajounen.

Chapter 36

¹
 ¶ (36:1) Pou chèf sanba yo. Se yon sòm David, sèvitè Seyè a. (36:2) Peche a pale nan fon kè
 mechan an: li mete nan tèt li pa gen rezon pou gen krentif Bondye. ² (36:3) Li kwè li pi bon pase
 sa l' ye a: konsa, li pa vle rekonèt peche l' yo. ³ (36:4) Tout pawòl nan bouch li se move pawòl, se
 manti ase l'ap bay. Li fin pèdi tèt li, li pa ka fè anyen ki byen anko. ⁴ (36:5) Li kouche sou kabann
 li, l'ap fè move plan. Li sou yon move pant, li dakò ak tou sa ki mal. ⁵ ¶ (36:6) Seyè, ou renmen

nou anpil anpil. Ou toujou kenbe pawòl ou. ⁶ (36:7) Jistis ou kanpe fèm tankou gwo mòn ou yo. Jijman ou yo se bagay moun pa ka fin konprann. Seyè, se ou menm ki pran swen moun ansanm ak tout bèt yo. ⁷ (36:8) Bondye, ala bon sa bon, renmen ou gen pou nou an! Se anba zèl ou lèzòm jwenn pwoteksyon. ⁸ (36:9) Yo manje vant plen ak manje yo jwenn an kantite lakay ou. Bon bagay ou yo tankou yon rivyè dlo k'ap koule kote yo bwè kont kò yo. ⁹ (36:10) Paske, se ou menm ki sous lavi a. Se limyè ou ki fè nou wè klè! ¹⁰ (36:11) Toujou renmen moun ki konnen ou! Toujou fè byen pou moun ki san repwòch devan ou! ¹¹ (36:12) Pa kite awogan yo mete pye sou kou m'. Pa kite mechan yo fè m' kouri. ¹² (36:13) Gade jan moun k'ap fè mal yo tonbe non! Yo rete atè a, yo pa ka kanpe sou pye yo ankò!

Chapter 37

¹ ¶ Se yon sòm David. Pa fè kòlè lè ou wè mechan yo! Pa anvyè sò moun k'ap fè mal yo! ² Talè konsa, y'ap rache yo tankou raje. Yo gen pou yo fennen tankou zèb gazon. ³ Mete konfyans ou nan Seyè a, fè sa ki byen! Pran peyi a fè kay ou, viv ak kè poze! ⁴ Si se nan Seyè a ou pran tout plezi ou, l'a ba ou tou sa ou ta renmen. ⁵ Renmèt kòz ou nan men Seyè a! Mete konfyans ou nan li, l'a ede ou. ⁶ L'a fè jistis ou parèt aklè tankou yon limyè, l'a fè rezon ou parèt aklè tankou gwo solèy midi. ⁷ ¶ Rete dousman devan Seyè a, pran san ou. Tann li fè sa l' gen pou l' fè a. Pa fè kòlè lè ou wè moun gen zafè yo ap mache byen. lè ou wè moun reyalize tout move lide yo gen nan tèt yo. ⁸ Pa fache, pa fè move san. Ou pa bezwen ennève! Sa kapab fè ou fè sa ki mal. ⁹ Moun ki mete konfyans yo nan Seyè a va pran peyi a pou yo. Men, y'ap disparèt mechan yo. ¹⁰ Talè konsa, p'ap gen mechan ankò. W'a chache yo, ou p'ap jwenn yo. ¹¹ Men, moun ki soumèt devan Bondye, yo pral resevwa pèyi a pou byen yo, y'a viv ak kè poze nèt ale. ¹² Mechan yo ap fè konplo sou moun k'ap mache dwat yo. Y'ap gade yo konsa, yo anvi devore yo. ¹³ Seyè a ap ri mechan an, paske li konnen mechan an pa la pou lontan. ¹⁴ Mechan yo rale koulin yo, y'ap pare banza yo, pou yo touye pòv yo ak malere yo, pou ansasinen moun k'ap mache dwat yo. ¹⁵ Men, se yo menm menm koulin

yo pral rache. Banza yo menm ap kase nan men yo. ¹⁶ Pito ou pa gen anpil byen, men ou mache
 dwat, pase pou ou gen anpil richès nan fè sa ki mal. ¹⁷ Paske, Bondye ap kraze kouraj mechan yo,
 men l'ap soutni moun ki mache dwat yo. ¹⁸ Seyè a konnen jan moun ki fè volonte l' yo ap viv.
¹⁹ Eritaj yo la pou tout tan. Yo p'ap wont lè bagay gate, y'ap jwenn tou sa yo bezwen lè grangou
²⁰ tonbe sou peyi a. Men mechan yo ap peri. Moun ki pa vle wè Seyè a ap fennen tankou flè savann.
²¹ Y'ap disparèt tankou lafimen. ¶ Mechan an prete, li pa nan renmèt. Men, moun ki mache dwat
²² yo gen kè sansib, yo fè kado. Moun Seyè a beni va pran peyi a pou yo. Men, moun ki anba
²³ madichon Bondye gen pou disparèt sou tè a. Seyè a pran men lèzòm, li mete yo nan bon chemen.
²⁴ Li kontan wè yo mache dwat. Si yo tonbe, yo p'ap rete atè a. Paske Seyè a ap ba yo men. ²⁵ Depi
 mwen timoun jouk mwen vin granmoun, mwen pa janm wè Bondye lage yon moun ki mache dwat,
²⁶ ni mwen pa janm wè pitit pitit li yo ap mande charite. Okontrè, moun ki mache dwat l'a toujou
 gen kè sansib pou l' bay, pou li prete moun tou. Tout pitit pitit li yo tounen yon benediksyon pou
²⁷ lòt moun. Pa fè mal, fè sa ki byen. W'a toujou gen yon kote nan peyi a pou ou rete. ²⁸ Paske,
 Seyè a renmen moun ki mache dwat. Li pa lage moun ki kenbe fèm nan sèvis li. L'ap toujou pwoteje
²⁹ yo. Men, ras mechan yo gen pou disparèt. Moun ki mache dwat gen pou pran peyi a pou yo.
³⁰ Y'ap rete nan peyi a tout tan tout tan. Moun ki mache dwat devan Bondye bay bon konsèy. Se
³¹ bon pawòl ase ki soti nan bouch li. Li kenbe lalwa Bondye a fèm nan kè li, li p'ap janm bite.
³² Mechan an ap veye tout vire tounen moun k'ap mache dwat, l'ap chache jan pou l' touye l'.
³³ Men, Seyè a p'ap lage l' nan men mechan an, li p'ap kite yo kondannen l' lè y'ap jije l'. ³⁴ ¶ Mete
 konfyans ou nan Seyè a, fè tou sa l' mande ou fè. L'ap ba ou fòs pou ou ka pran peyi a pou ou. Ou
³⁵ gen pou wè mechan yo disparèt sou latè. Mwen te wè yon mechan ki te fè tout moun pè li, li te
³⁶ kanpe tankou yon gwo pye mapou. Apre sa, mwen tounen vin pase kote l' te ye a, li pa t' la.
³⁷ Mwen chache l', mwen pa janm wè l' ankò. Gade moun k'ap mache dwat la byen gade. Gade
³⁸ tout vire tounen l'. Moun ki viv byen ak tout moun ap gen pitit ak pitit pitit. Men, moun k'ap fè
³⁹ mal yo, y'ap rete konsa y'ap disparèt. Tout pitit ak pitit pitit yo ap disparèt tou. Se Seyè a k'ap
⁴⁰ sove moun ki mache dwat yo. L'ap sèvi yo defans lè yo nan tray. L'ap pote yo sekou, l'ap delivre
 yo. L'ap wete yo anba men mechan yo, paske se anba zèl li y' al chache pwoteksyon.

Chapter 38

¹ ¶ (38:1) Se yon sòm David. Pou Bondye pa bliye nou. (38:2) Seyè, pa pini m' lè ou fache! Pa kale m' lè ou an kòlè! ² (38:3) Ou bat mwen jouk ou blese m'. Ou kale m' byen kale. ³ (38:4) Ou te fache anpil, se sa ki fè pa gen yon pati nan kò m' ki pa malad. Mwen te peche, se sa ki fè tout zo nan kò m' ap fè m' mal. ⁴ (38:5) Peche m' yo fè pil, yo kouvri tèt mwen. Y'ap kraze m' tankou yon chay ki twò lou pou mwen. ⁵ (38:6) Malenng mwen yo santi, y'ap koule paske mwen te viv tankou moun fou. ⁶ (38:7) Mwen kagou, ren m' kase nèt. Tout lajounen m'ap mache tèt bese, dlo nan je. ⁷ (38:8) Mwen gen yon lafyèb cho sou mwen. Mwen santi mwen malad nan tout kò m' ⁸ (38:9) Mwen san fòs, tout zo nan kò m' kraze. Kè m' sere, m'ap plenn sitèlman m'ap soufri. ⁹ (38:10) Seyè, ou konnen tou sa mwen ta renmen. Ou wè jan m'ap soufri. ¹⁰ (38:11) Kè m' ap bat anpil, mwen pa kapab sipòte ankò! Ata je m', mwen pa ka louvri yo! ¹¹ (38:12) Tout zanmi m', tout vwazinaj kanpe lwen mwen, tout fanmi m' rete lwen mwen poutèt malenng mwen an. ¹² ¶ (38:13) Moun ki ta renmen wè m' mouri yo tann pèlen pou mwen. Moun ki ta renmen wè malè rive m' yo ap plede di yon bann move pawòl sou mwen. Tout lajounen, y'ap fè konplo sou mwen. ¹³ (38:14) Mwen menm, mwen tankou yon moun ki soudè, mwen pa tandè. Mwen tankou yon moun ki bèbè, mwen pa pale. ¹⁴ (38:15) Wi, mwen pa louvri bouch mwen reponn yo paske mwen tankou yon moun ki pa tandè sa y'ap di a. ¹⁵ (38:16) Seyè, se nan ou mwen mete tout konfyans mwen, se ou menm ki va reponn pou mwen, o Seyè, Bondye mwen. ¹⁶ (38:17) Paske, mwen di nan kè m': -Pa kite yo fè fèt sou tèt mwen, pa kite yo moute sou mwen si pye m' chape. ¹⁷ (38:18) Mwen prèt pou m' tonbe. Doulè a pi rèd sou mwen. ¹⁸ (38:19) Mwen rekonèt mechanste mwen fè. Kè m' sere lè m' wè sa m' fè. ¹⁹ (38:20) Lènmi m' yo gwonèg, yo anpil. Se yon bann moun ki rete konsa yo pa vle wè m'. ²⁰ (38:21) Moun sa yo rann mwen mal pou byen, yo leve kont mwen, paske m'ap chache fè byen. ²¹ (38:22) Pa lage m' Seyè! Bondye mwen, pa rale kò ou dèyè! ²² (38:23) Prese vin pote m' sekou, Seyè, ou menm ki delivrans mwen.

Chapter 39

¹
¶ (39:1) Pou chèf sanba yo. Pou Jedoutoun. Se yon sòm David. (39:2) Mwen te pwomèt mwen t'ap veye sou pawòl mwen, pou m' pa peche ak lang mwen. M'ap mete yon fren nan bouch mwen toutotan mechan yo va kanpe la devan mwen. ² (39:3) Mwen fèmèn bouch mwen, mwen pa di yon mo, mwen pa pale menm. Sa pa sèvi m' anyen. Mwen soufri pi rèd. ³ (39:4) Kè m' te sere anpil. Plis mwen kalkile sou sa, se plis sa fatigue m'. Mwen pa t' kapab ankò. Mwen mande: ⁴ (39:5 -) Seyè, fè m' konnen kilè m'ap mouri. Di m' konbe jou ki rete m' pou m' viv ankò, pou m' ka konnen se pase m'ap pase sou tè a. ⁵ (39:6) Gade, mwen konte jou ki rete m' pou m' viv yo sou dwèt mwen. Lavi m' tankou anyen devan ou. Wi, tout moun ki vivan, se tankou lafimen yo ye. ⁶ (39:7) Lèzòm ap pwonmennen sou tè a tankou lonbray. Se pou gremesi y'ap bat kò yo. Y'ap anpile richès sou richès, yo pa konnen ki moun k'ap vin jwi yo. ⁷ ¶ (39:8) Koulye a, Seyè, sa m'ap tann ankò? Tout espwa m' se sou ou! ⁸ (39:9) Delivre m' anba tout peche m' yo. Pa kite egare yo pase m' nan betiz. ⁹ (39:10) M'ap fèmèn bouch mwen, mwen p'ap di yon mo. Paske tou sa se travay ou. ¹⁰ (39:11) Tanpri, pa bat mwen ankò, sispann kale m'. Mwen prèt pou m' mouri anba kout fwèt ou yo. ¹¹ (39:12) Lè w'ap korije moun ou pini yo pou fòt yo fè, ou detwi tou sa yo pi renmen tankou mit k'ap manje rad. Se vre wi, moun se tankou lafimen yo ye. ¹² (39:13) Tanpri, Seyè, koute m' lè m'ap lapriyè. Tande jan m'ap rele, pa fèmèn kè ou lè m'ap kriye nan pye ou. Mwen tankou tout zansèt mwen yo, se etranje mwen ye, se pase m'ap pase lakay ou. ¹³ (39:14) Tanpri, wete je ou sou mwen, pou m' ka pran yon ti souf, anvan m' ale, anvan m' mouri.

Chapter 40

¹
¶ (40:1) Pou chèf sanba yo. Se yon sòm David. (40:2) Mwen te mete tout espwa m' nan Seyè a. Li te panche zòrèy li bò kote m', li te tande m' lè m' t'ap rele. ² (40:3) Li rale m' soti nan twou kote m' t'ap peri a, nan gwo ma labou a. Li mete m' sou gwo wòch la, li fè m' kanpe dwat ankò. ³ (40:4) Li mete yon chante tou nèf nan bouch mwen, yon chante pou m' fè lwanj Bondye nou an. Anpil moun, lè yo wè sa, yo pral pè, y'a mete konfyans yo nan Seyè a. ⁴ (40:5) Ala bon sa bon pou moun ki mete konfyans yo nan Seyè a, pou moun ki p'ap swiv ni moun k'ap fè awogans yo ni moun k'ap bay manti yo! ⁵ (40:6) Seyè, Bondye mwen, ou te fè anpil bèl mèvèy pou nou, ou te fè anpil lide pou nou. Pa gen tankou ou, Seyè! Mwen ta renmen fè moun konnen yo, mwen ta renmen pale

sou yo. Men, yo sitèlman anpil, mwen pa ka rakonte yo. ¶ (40:7) Ou pa bezwen yo fè okenn ofrann bèt pou boule pou ou, ni pou yo fè ou kado anyen. Men, ou louvri zòrèy mwen yo. Ou pa mande pou yo boule okenn vyann bèt pou ou, ni pou yo touye bèt pou wete peche. (40:8) Lè sa a mwen di: -Men mwen, mwen vini, jan sa ekri sou mwen nan liv la. (40:9) Bondye mwen, mwen pran plezi m' nan fè sa ou vle m' fè. Wi, mwen kenbe lalwa ou nan fon kè m' (40:10) Seyè, lè tout pèp Bondye a te reyini, mwen te fè yo konnen jan ou fè nou gras. Wi, ou konn sa, mwen p'ap rete ak bouch mwen fèmen. (40:11) Mwen pa t' manke pa di jan ou fè nou gras, jan ou bay moun sekou. Nan mitan tout pèp Bondye a, lè yo reyini, mwen pa t' manke pa di jan ou renmen nou, jan ou toujou kenbe pawòl ou. ¶ (40:12) Seyè, ou pa janm sispann gen pitye pou mwen. W'ap toujou pwoteje m', paske ou renmen m'. Ou p'ap janm lage m'. (40:13) Kote m' vire, malè tonbe sou mwen. Mwen pa ka konte yo. Peche m' yo twòp pou mwen. Mwen pa k'ap sipòte yo. Yo pi plis pase cheve nan tèt mwen. Mwen pèdi tout kouraj mwen. (40:14) Seyè, tanpri, delivre m' non! Prese vin pote m' sekou, Seyè. (40:15) Moun k'ap chache touye m' yo, se pou yo tout wont, se pou yo pa ka leve tèt yo. Moun ki anvi wè malè rive mwen, se pou yo renka kò yo, se pou yo wont. (40:16) Moun k'ap lonje dwèt sou mwen yo, se pou sezisman pran yo tèlman yo wont. (40:17) Men, tout moun ki vin jwenn ou, se pou yo kontan, se pou yo fè fèt. Tout moun ki renmen jan ou delivre yo a, se tout tan pou yo di: -Seyè a gen gwo pouvwa! (40:18) Pou mwen menm, se yon pòv malere san sekou mwen ye. Men ou menm ki mèt mwen, pa bliye m'. Se ou ki tout sekou mwen, se ou ki tout delivrans mwen. Bondye mwen, pa mize!

Chapter 41

¶ (41:1) Pou chèf sanba yo. Se yon sòm David. (41:2) Ala bon sa bon pou moun ki pran ka pòv yo! Seyè a va delivre l' lè la nan tray. (41:3) Seyè a va pwoteje l', li p'ap kite l' mourir. L'ap fè l' viv ak kè kontan sou latè, li p'ap lage l' nan men lènmi l' yo pou yo fè sa yo vle avè l'. (41:4) Seyè a va ba l' fòs lè maladi fè l' pran kabann. Seyè a va ba l' gerizon lè li malad kouche. (41:5) Mwen menm, mwen te di: Seyè, gen pitye pou mwen. Geri mwen, paske mwen te peche kont ou. (41:6) Lènmi m' yo ap pale m' mal. Y'ap di: Kilè l'a mourir? Kilè y'a bliye l'? (41:7) Moun ki vin wè m' yo, se yon bann ipokrit. Se ranmase yo vin ranmase tout kalite move nouvèl. Soti yo soti,

yo pwonmennen rakonte yo toupatou. ⁷ (41:8) Tout moun ki pa vle wè m' yo mete tèt yo ansanm pou pale nan zòrèy sou mwen. Yo kwè m' fini, nanpwen renmèd pou mwen. Y'ap fè yon pakèt vye lide sou mwen. ⁸ (41:9) Y'ap di: Msye kondannen. Kote l' kouche a, nanpwen leve pou li ankò. ⁹ (41:10) Ata pi bon zanmi m' lan, moun mwen te fè konfyans anpil la, moun ki te konn manje nan menm plat avè m' lan, ata li menm, li trayi m'. ¹⁰ (41:11) Men ou menm, Seyè, gen pitye pou mwen. Mete m' sou de pye m' ankò, pou m' ka ba yo sa yo merite. ¹¹ (41:12) M'a konnen ou kontan avè m' vre si m' wè lènmi m' yo pa banboche sou do m'. ¹² (41:13) Wi, w'ap soutni m', paske mwen pa fè anyen ki mal. W'ap fè m' kanpe la devan ou pou tout tan. ¹³ (41:14) Ann fè lwanj Seyè a, Bondye pèp Izrayèl la. Ann fè lwanj li pou tout tan. Amèn! Se vre!

Chapter 42

¹ ¶ (42:1) Pou chèf sanba yo. Se yonn nan chante pitit Kore yo. (42:2) Menm jan yon bèt anvi bwè dlo larivyè, se konsa mwen anvi wè ou, Bondye. ² (42:3) Se pa ti anvi mwen pa anvi wè Bondye, Bondye ki vivan an. Kilè m' ava ale pou m' adore Bondye lakay li? ³ (42:4) Lajounen kou lannwit m'ap kriye. Se dlo ki soti nan je m' ki sèvi m' manje. Se tout tan moun ap mande m': -Kote Bondye ou la? ⁴ (42:5) Kè m' ap fann lè m' chonje bagay tan lontan: mwen te konn mache ansanm ak yon foul moun, ki te konn ale lakay Bondye. Moun yo te konn fè fèt, yo te konn chante, yo t'ap di Bondye mèsi. ⁵ (42:6) Mwen pale ak tèt mwen, mwen di: -Poukisa m' kagou konsa? Poukisa m'ap plede plenn konsa nan kè m'? M'ap met espwa m' nan Bondye, paske mwen gen pou m' fè lwanj li ankò. Se li k'ap delivre m', se li ki Bondye mwen. ⁶ ¶ (42:7) Wi, mwen kagou. Se poutèt sa, kote m' ye a, bò larivyè Jouden an, sou mòn Emon osinon sou mòn Miza, tout tan lide m' sou ou. ⁷ (42:8) Yon lanm lanmè rale yon lòt lanm lanmè dèyè l' lè gwo lapli ap tonbe. Tout kouran dlo ak tout lanm lanmè yo ap pase sou mwen. ⁸ (42:9) Lajounen Seyè a fè m' anpil favè. Lannwit mwen chante yon chante pou li. Mwen lapriyè Bondye ki tout lavi mwen. ⁹ (42:10) Mwen di Bondye ki twou wòch kote pou m' cache a: -Poukisa ou bliye m' konsa? Poukisa pou m'ap viv ak tout lapenn sa a nan kè m', lè lènmi m' yo ap kraze m' anba pye yo? ¹⁰ (42:11) Mwen santi tout zo nan kò m' ap fè m' mal. lè moun k'ap pèsekite m' yo ap joure m', lè tout tan y'ap mande m': -Kote Bondye ou la? ¹¹ (42:12) Wi, poukisa mwen kagou konsa? Poukisa m'ap plenn konsa nan kè mwen?

M'ap mete espwa m' nan Bondye, paske mwen gen pou m' fè lwanj li ankò. Se li k'ap delivre m', se li ki Bondye mwen.

Chapter 43

¹ ¶ Fè m' jistis, Bondye. Defann kòz mwen kont moun sa yo ki pa konnen ou. Delivre m' anba moun sa yo k'ap bay manti, k'ap fè mechanste. ² Se ou ki Bondye mwen, se ou ki tout pwoteksyon mwen. Poukisa ou lage m' konsa? Poukisa pou m'ap viv ak tout lapenn sa a nan kè m', lè lènmi m' yo ap kraze m' anba pye yo? ³ Voye limyè ou, moutre m' verite ou la. Fè yo fè m' wè chemen pou m' pran an. Fè yo mennen m' sou mòn ki apa pou ou a, nan kay kote ou rete a. ⁴ Lè sa a, m'a tounen vin bò lotèl Bondye a, Bondye ki fè kè m' kontan an, Bondye k'ap fè m' fè fèt la. M'a jwe enstriman mizik pou Bondye, pou Bondye pa m' lan. ⁵ Wi, men poukisa m' kagou konsa? Poukisa m'ap plenn konsa nan kè m'? M'ap mete espwa mwen nan Bondye, paske mwen gen pou m' fè lwanj li ankò. Se li k'ap delivre m', se li ki Bondye mwen.

Chapter 44

¹ ¶ (44:1) Pou chèf sanba yo. Se yonn nan chante pitit Kore yo. (44:2) Bondye, nou te tand ak zòrèy nou tout gwo bagay ou te fè nan tan lontan. Wi, granmoun nou yo te rakonte nou tou sa ou te fè pou yo nan tan lontan. ² (44:3) Yo di nou se avèk fòs kouraj ou ou te chase moun lòt nasyon yo, pou ou te kapab tabli yo nan peyi a. Yo di nou jan ou te maltrete anpil lòt nasyon pou ou te ka fè plas pou zansèt nou yo. ³ (44:4) Se pa t' avèk nepe pèp ou a te pran peyi a, se pa t' fòs ponyèt yo ki te fè yo genyen batay la. Men, se te pouvwa ou ak fòs ponyèt pa ou ki te penmèt yo fè tou sa. Ou te la avèk yo pou ba yo kouraj. Ou te fè tou sa paske ou renmen yo. ⁴ (44:5) Se ou ki wa mwen, se ou ki Bondye mwen. Fè pitit Jakòb yo jwenn delivrans. ⁵ (44:6) Avèk pouvwa ou, nou kilbite lènmi nou yo. Avèk ou menm ki la avèk nou an, n'ap kraze moun ki leve dèyè nou yo. ⁶ (44:7) Mwen p'ap mete konfyans mwen nan banza. Se pa nepe m' ki pou delivre m'. ⁷ (44:8) Se ou menm ki te delivre nou anba lènmi nou yo. Ou fè moun ki pa t' vle wè nou yo wont. ⁸ (44:9) Se chak jou n'ap fè lwanj ou. Se tout tan n'ap nonmen non ou, n'ap di ou mèsì. ⁹ ¶ (44:10) Men koulye a, Bondye,

ou vire do ban nou, ou fè nou pran wont, ou pa soti ansanm avèk lame nou yo ankò. ¹⁰ (44:11) Ou fè nou kouri devan lènmi nou yo. Moun ki pa vle wè nou yo ap piye nou alèz. ¹¹ (44:12) Ou lage nou tankou mouton y'ap mennen labatwa. Ou gaye nou nan mitan tout lòt peyi yo. ¹² (44:13) Ou vann pèp ou a pou gremesi, ou pa fè okenn benefis sou li. ¹³ (44:14) Ou fè nasyon ki bò kote nou yo ap pase nou nan betiz Wi, yo tout ap lonje dwèt sou nou, y'ap pase nou nan rizib. ¹⁴ (44:15) Ou fè tout lòt nasyon yo ap bay istwa sou nou. Kou yo wè nou, y'ap fè siy sou nou. ¹⁵ (44:16) -(we vèsè pwochen) ¹⁶ (44:17) Lè m' tandè moun k'ap joure m' yo, moun k'ap vekse m' yo, mwen pa ka gade yo nan je. Lè m' devan lènmi ak moun ki pa vle wè m' yo, lawont fè m' bouche figi m'. ¹⁷ ¶ (44:18) Wi, tout malè sa yo rive nou, men, nou pa janm bliye ou. Nou pa t' manke anyen nan kontra ou fè avèk nou an. ¹⁸ (44:19) Nou pa janm vire do ba ou, nou pa janm kite chemen ou mete devan nou an. ¹⁹ (44:20) Men ou menm, ki jan ou fè lage nou konsa san sekou nan mitan bèt nan bwa yo? Ou kite nou konsa kote ki fè nwa anpil la. ²⁰ (44:21) Si nou te bliye rele Bondye nou an, si nou te lapriyè yon lòt bondye, ²¹ (44:22) èske Bondye pa ta konn sa, li menm ki konn sekre ki nan kè tout moun? ²² (44:23) Men, se poutèt ou tout tan yo soti pou touye nou. Yo gade nou tankou mouton y'ap pare pou labatwa. ²³ (44:24) Louvri je ou, Seyè. Poukisa w'ap dòmi konsa? Leve non. Pa voye nou jete nèt! ²⁴ (44:25) Poukisa ou vire do ban nou konsa? Poukisa ou bliye anba ki tray nou ye, jan y'ap peze nou? ²⁵ (44:26) Nou tonbe san fòs nan pousyè a. Nou kouche sou vant atè plat. ²⁶ (44:27) Leve non. vin pote nou sekou! Jan ou renmen nou sa, vin delivre nou non!

Chapter 45

¹ ¶ (45:1) Pou chèf sanba yo. Se pou yo chante sou menm lè ak chante ki di: Bèl ti flè savann blan yo. Se yon chante pitit Kore yo. Se yon chan damou. (45:2) Mwen gen anpil bèl pawòl nan bouch mwen. Mwen pral chante yon chante pou wa a, mwen tankou yon moun ki konn konpoze bèl chante. ² (45:3) Pa gen pi bèl gason pase ou sou tout latè. Ou gen bèl pawòl dous nan bouch ou. Se poutèt sa, Bondye ap toujou beni ou. ³ (45:4) Ou menm vanyan gason, pase nepe ou nan

ren ou, pou moun ka wè jan ou gen pouvwa, pou yo ka gen respè pou ou. ⁴ (45:5) Moute sou cha ou, al goumen, pou pran defans moun ki kenbe pawòl yo, moun ki gen bon kè, moun ki mache dwat devan ou. Kouraj ou ap fè ou genyen batay la. ⁵ (45:6) Flèch ou yo pwenti. Moun lòt nasyon yo ap tonbe nan pye ou. Lènmi wa a pèdi tout kouraj yo. ¶ ⁶ (45:7) Gouvènman ou lan la pou tout tan tout tan. W'ap gouvènen san patipri tankou yon wa nan peyi ou la. ⁷ (45:8) Ou renmen tou sa ki byen, ou rayi tou sa ki mal. Se poutèt sa, Bondye ki Bondye ou l'a chwazi ou. Li fè kè ou kontan nèt ale: Li fè pou ou bagay li pa fè pou lòt zanmi ou yo. ⁸ (45:9) Tout rad ou santi bon ak odè flè jasmen, womaren ak sitwonèl. Nan palè ou ki kouvri ak livwa, y'ap fè mizik pou fè kè ou kontan. ⁹ (45:10) Pami medam k'ap sèvi lakay ou yo anpil ladan yo se pitit fi wa yo ye. Sou bò dwat ou, larenn lan kanpe byen bèl. Li gen sou li bijou fèt an lò ki soti peyi Ofi. ¶ ¹⁰ (45:11) Koute, mafi! Gade byen! Tande sa m'ap di ou: -Ou mèt bliye pèp kote ou soti a. Ou mèt bliye moun kay papa ou yo. ¹¹ (45:12) Wa a pa manke renmen ou, paske ou bèl. Se li ki mèt ou, se pou ou obeyi l'. ¹² (45:13) Moun peyi Tir ap pote anpil kado ba ou. Moun rich yo ap vin flate ou. ¹³ (45:14) Pitit fi wa a nan palè a. Ala bèl li bèl! Twal rad ki sou li a fèt ak fil lò. ¹⁴ (45:15) Yo mennen l' bò kote wa a, avèk bèl rad bwode li sou li. Tout fidonè li yo ap mache dèyè l': yo prezante yo ba ou tou. ¹⁵ (45:16) Y'ap vini, yo kontan, y'ap chante, y'ap antre nan palè wa a. ¹⁶ (45:17) Monwa, pitit ou yo va chita kote zansèt ou yo te chita a. W'ap mete yo chèf sou tout latè. ¹⁷ (45:18) Mwen vle chante pou yo pa janm bliye ou, konsa moun lòt peyi yo va fè lwanj ou tout tan tout tan.

Chapter 46

¶ ¹ (46:1) Pou chèf sanba yo. Se yon chante pitit Kore yo pou yo chante tou dousman. (46:2) Se Bondye ki tout pwoteksyon nou, se li menm ki tout fòs nou. Li toujou pare pou ban nou sekou lè nou anba tray. ² (46:3) Se poutèt sa, nou te mèt wè tè a ap tranble, nou te mèt wè mòn yo ap chavire tonbe nan mitan lanmè, nou pa bezwen pè anyen. ³ (46:4) Nou te mèt wè lanm lanmè yo move, y'ap kimen, jouk mòn yo rive tranble lè lanmè a ap frape sou rivay la, nou pa bezwen pè. ⁴ (46:5) Gen yon gwo dlo larivyè k'ap koule pou fè kè moun kontan nan lavil Bondye a, sèl kote ki apa nèt pou Bondye ki anwo nan syèl la. ⁵ (46:6) Bondye nan mitan lavil la, lavil la p'ap janm

brannen. Depi granmaten, Bondye ap pote l' sekou. ¶ (46:7) Moun lòt peyi yo ap bat kò yo, chèf
 gouvènman yo pran lezam. Bondye fè tandè vwa li, latè pran tranble. (46:8) Seyè ki gen tout
 pouvwa a la avèk nou. Se bò kote Bondye Jakòb la nou jwenn kote pou n' kache. (46:9) Vini wè
 travay Seyè a! Gade ravaj l'ap fè sou latè! (46:10) Se li menm ki fè yo sispann fè lagè toupatou
 sou latè. Li kase banza yo, li kase frenn yo de bout, li boule tout cha yo nèt. (46:11) Li di: -Rete
 la! Sispann goumen! Konnen se mwen menm ki Bondye. Se mwen k'ap dominen sou tout nasyon
 yo. Se mwen k'ap dominen sou tout latè. (46:12) Seyè ki gen tout pouvwa a la avèk nou. Se bò
 kote Bondye Jakòb la nou jwenn kote pou n' kache!

Chapter 47

¶ (47:1) Pou chèf sanba yo. Se yon sòm pitit Kore yo. (47:2) Nou tout pèp yo, bat bravo! Fè
 lwanj Seyè a! Rele ak kè kontan! (47:3) Paske, Seyè ki anwo nan syèl la, se moun ki pa nan jwèt,
 se moun pou nou pè. Se yon gwo wa k'ap gouvènen sou tout latè. (47:4) Li fè nou dominen sou
 anpil pèp, li mete anpil nasyon sou zòd nou. (47:5) Se li ki chwazi peyi kote n'ap viv la pou nou.
 Peyi sa a se yon lwanj pou pitit Jakòb li renmen anpil yo. ¶ (47:6) Bondye ap mache moute, tout
 pèp la ap rele, y'ap kònen klewon sitèlman yo kontan. (47:7) Chante pou Bondye, fè lwanj li! Wi,
 chante pou wa nou an, fè lwanj li! (47:8) Paske, se Bondye ki wa sou tout latè. Chante yon chante
 espesyal pou li! (47:9) Bondye dominen sou tout nasyon yo. Bondye chita sou fotèy ki apa pou
 li a. (47:10) Chèf lòt peyi yo mete tèt yo ansanm ak pèp Bondye Abraram lan, paske se Bondye
 ki gen tout zam pou defann pèp yo. L'ap dominen sou tout bagay.

Chapter 48

¶ (48:1) Chante sa a, se yon sòm pitit Kore yo. (48:2) Seyè a gen gwo pouvwa! Li merite pou
 yo fè lwanj li nan lavil Bondye nou an, sou mòn ki apa pou li a. (48:3) Ala yon bèl mòn! Li fè

kè tout moun sou latè kontan. Sou mòn Siyon an, ki sou bò nò, se la yo bati lavil gwo wa a. ³ (48:4)
 Seyè a rete lakay li, li fè konnen se bò kote l' yo jwenn kote pou yo kache. ⁴ (48:5) Men sa ki te
 pase: Wa yo te mete tèt yo ansanm, yo vin atake an menm tan. ⁵ (48:6) Lè yo wè l', yo sezi. Yo pè,
 yo kouri san gad dèyè. ⁶ (48:7) Yon sèl tranbleman pran yo. Kè yo sere tankou yon fanm ki gen
 tranche, ⁷ (48:8) tankou lè van nòde ap kraze batiman Tasis yo sou lanmè. ¶ ⁸ (48:9) Sa nou te
 konn tande moun di a, koulye a nou wè l' ak je nou nan lavil Bondye nou an, nan lavil Seyè ki gen
 tout pouvwa a. Bondye ap toujou pwoteje lavil la. ⁹ (48:10) Nou rete nan tanp ou a, n'ap kalkile
 jan ou renmen nou, Bondye. ¹⁰ (48:11) Se tout moun k'ap nonmen non ou, menm jan an tou,
 toupatou sou latè y'ap fè lwanj ou. Ou gen anpil pouvwa, men ou pa fè lenjistis. ¹¹ (48:12) Moun
 ki rete sou mòn Siyon yo kontan. Moun ki rete nan peyi Jide yo pral fè fèt, paske ou konn fè moun
 jistis. ¹² (48:13) Mache, fè tout tou lavil la. Konte konbe fò li genyen. ¹³ (48:14) Egzaminen miray
 lavil la byen egzaminen. Vizite tout pòs faksyonè yo, pou nou kapab fè pitit pitit nou yo konnen
¹⁴ (48:15) se Bondye sa a ki Bondye nou pou tout tan tout tan. Se li menm k'ap kondi nou jouk sa
 kaba.

Chapter 49

¶ ¹ (49:1) Pou chèf sanba yo. Se yon sòm pitit Kore yo. (49:2) Nou tout, koute sa byen. Louvri
 zòrèy nou, nou menm k'ap viv toupatou sou latè, ² (49:3) gran kou piti, rich kou pòv. ³ (49:4)
 Mwen pral ban nou bon konsèy. Sa ki nan kè m' se bagay ki gen sans. ⁴ (49:5) M'ap louvri zòrèy
 mwen pou m' tande parabòl la. Mwen pral esplike l' ban nou antan m'ap jwe mizik. ⁵ (49:6) Poukisa
 pou m' ta pè, lè jou malè a rive, lè moun ki pa vle wè m' yo sènen m' toupatou ak move lide nan tèt
 yo? ¶ ⁶ (49:7) Moun ki mete konfyans yo nan byen latè, moun k'ap fè grandizè pou richès yo
 genyen, ⁷ (49:8) pa gen yonn ladan yo ki ka bay senk kòb pou delivre frè yo, ni ki ka peye Bondye
 pou l' delivre yo. ⁸ (49:9) Yo ta mèt pare pou yo bay anpil lajan pou sove lavi pa yo, sa p'ap janm
 rive fèt. ⁹ (49:10) Atò, se pou yo ta viv tout tan san yo pa janm al anba tè? ¹⁰ (49:11) Men, nou
 wè moun ki gen bon konprann yo mouri, yo disparèt menm jan ak moun sòt ansanm ak moun egare
 yo. Yo kite tout richès yo pou lòt moun. ¹¹ (49:12) Se nan simityè yo pral bout, se nan tonm yo

pral rete, menm si yo gen gwo bitasyon ki pote non yo. ¹² (49:13) Yon moun te mèt grannèg kou
 l' grannèg li gen pou l' mouri. Li tankou zannimo y'ap mennen labatwa. ¹³ (49:14) Se konsa y'ap
 fini, moun ki mete konfyans yo nan pwòp tèt yo. Se sa ki gen pou rive moun k'ap koute pawòl yo
¹⁴
 tou. (49:15) Tankou yo mete mouton nan pak, se konsa y'ap mete yo kote mò yo ye a. Yo pral
 tou dwat nan simityè, se lanmò ki pral pran swen yo. Bèl kou yo bèl, y'ap tounen pousyè. Se kote
¹⁵
 mò yo ye a y'ap rete. ¶ (49:16) Men, Bondye ap delivre mwen, l'ap wete m' anba pouvwa lanmò.
¹⁶
 (49:17) Ou pa bezwen pè lè ou wè yon moun ap vin pi rich, lè ou wè l'ap mete richès pil sou pil
 lakay li. ¹⁷ (49:18) Lè l' mouri, li p'ap pote anyen ale avèk li, l'ap kite tout richès li yo dèyè.
¹⁸
 (49:19) Li te mèt kontan jan l' t'ap viv la, yo te mèt ap fè lwanj li pou jan afè l' ap mache byen,
¹⁹
 (49:20) yon lè, li gen pou l' mouri tankou zansèt li yo ki p'ap janm wè limyè ankò. ²⁰ (49:21)
 Yon moun te mèt grannèg kou l' grannèg, si li pa gen konprann, li tankou zannimo y'ap mennen
 labatwa.

Chapter 50

¹
 ¶ Se yon sòm Asaf. Seyè ki Bondye tout bondye yo pale. Li rele tout moun ki rete sou latè,
 depi moun ki rete kote solèy leve jouk moun ki rete kote solèy kouche. Li fè yo tout sanble. ² Bondye
 parèt, li klere byen bèl depi Siyon, mòn ki bèl tout bon an. ³ Bondye nou an ap vini. Li p'ap rete
 ak bouch li fèmen. Devan li gen yon gwo dife k'ap boule tout bagay, l'ap vini nan mitan yon gwo
⁴
 van k'ap fè dega. Li rele syèl la ak latè a pou sèvi l' temwen. Li pral jije pèp li a. ⁵ Li di: -Sanble
 tout moun k'ap sèvi m' yo nan pye m'. Sanble tout moun ki te fè kontra avèk mwen lè yo te ofri bèt
⁶
 touye ban mwen. Syèl la va fè konnen Bondye ki pa nan patipri a, se li menm ki sèl jij! ⁷ ¶ Koute,
 pèp Izrayèl, pèp mwen! Mwen pral pale avè ou! Mwen pral mete tout bagay aklè avè ou! Se mwen
 menm ki Bondye, se mwen menm ki Bondye ou. ⁸ Se pa pou bèt ou touye pou mwen yo m'ap fè
 ou repwòch, ni pou bèt ou boule pou mwen yo. ⁹ Mwen pa mande ou ti towò bèf ki nan sèka ou,
¹⁰
 ni bouk kabrit ki nan jaden ou. Paske, tout bèt ki nan bwa, se pou mwen yo ye. Tout kantite bèt
¹¹
 ki nan mòn yo, se pou mwen yo ye tou. Mwen konnen tout zwezo k'ap vole nan mòn yo. Tout
¹²
 zannimo ki nan savann, se pou mwen yo ye. Si m' te grangou, mwen pa ta janm bezwen di ou

sa, paske tout tè a ansanm ak tou sa ki ladan l', se pou mwen yo ye. ¹³ Eske m' manje vyann towò
 bèf? Eske m' bwè san bouk kabrit? ¹⁴ Men sa pou ou fè pou Bondye: Di l' mèsì pou tout bagay.
 Fè tout sa ou te pwomèt fè pou Bondye ki anwo nan syèl la. ¹⁵ Lè ou nan tray, rele m', m'a delivre
 ou. W'a fè lwanj mwen. ¹⁶ ¶ Men, Bondye pale ak mechan yo, li di yo: -Ki dwa nou genyen pou
 n'ap resite kòmandman mwen yo? Ki dwa nou genyen pou nou gen pawòl kontra mwen an nan
 bouch nou? ¹⁷ Nou pa vle kite m' korije nou. Nou derefize obeyi kòmandman mwen yo. ¹⁸ Lè nou
 wè yon vòlè, nou fè zanmi avèk li. Nou met tèt nou ansanm ak fanm movèz vi yo. ¹⁹ Lang nou
 cho pou pale moun mal. Depi nou louvri bouch nou, se manti n'ap bay. ²⁰ Nou chita, n'ap pale frè
 nou mal. N'ap bay manti sou frè nou ki menm manman ak nou. ²¹ Nou fè tou sa, epi nou te vle
 pou m' pe bouch mwen? Nou mete nan tèt nou se menm moun ak nou mwen ye? Men koulye a,
 mwen pral fè nou pran men nou. Mwen pral mete tout bagay aklè devan je nou. ²² Koute sa byen,
 nou menm ki bliye si gen Bondye. Si se pa sa, m'ap dechire nou. Lè sa a, p'ap gen moun ki ka
 delivre nou. ²³ Lè yon moun chonje di m' mèsì pou tout bagay, se lè sa a li fè lwanj mwen. M'ap
 delivre tout moun k'ap veye kote y'ap mete pye yo.

Chapter 51

¹ ¶ (51:1) Pou chèf sanba yo. Se David ki te ekri sòm sa a (51:2) lè pwofèt Natan te vin pale
 avè l' aprè adiltè li te fè avèk Batcheba. (51:3) Gen pitye pou mwen, Bondye. Jan ou gen bon kè
 sa a! Tanpri, efase tou sa mwen fè ki mal, paske ou gen kè sansib. ² (51:4) Lave m', foubi m' pou
 wete fòt mwen fè a. Netwaye m' pou efase peche m' lan. ³ (51:5) Mwen rekonèt sa m' fè a pa bon.
 Se tout tan peche m' lan devan je m'. ⁴ (51:6) Se kont ou menm menm mwen peche-pa kont lòt
 moun. Mwen fè bagay ou pa dakò pou moun fè. Se sak fè ou gen rezon lè ou kondannen yon moun.
 Moun pa ka fè ou okenn repwòch lè ou fin jije. ⁵ (51:7) Wi, depi m' fèt, mwen fèt ak peche nan kè
 m'. Depi nan vant manman m', mwen gen peche nan kè m'. ⁶ (51:8) Men, ou vle pou yon moun
 sensè nan tou sa l'ap fè. Tanpri, fè m' konprann tout bagay non! ⁷ ¶ (51:9) Wete peche m' lan avèk
 yon branch izòp, konsa m'a nan kondisyon pou m' fè sèvis pou ou. Lave m', m'a pi blan pase koton.
⁸ (51:10) Fè m' tande pawòl ki pou fè kè m' kontan an, pawòl ki pou fè m' chante a. Wi, ou te kraze

tout zo nan kò m', men w'a fè kè m' kontan ankò. ⁹ (51:11) Wete peche mwen yo devan je ou. Efase
 tout fòt mwen fè yo. ¹⁰ (51:12) O Bondye, pa kite okenn move lide nan kè m'. Mete bon lide nan
 tèt mwen, pou m' sa kenbe fèm. ¹¹ (51:13) Pa voye m' jete. Pa wete lespri ou te ban mwen an.
¹² (51:14) Sove m'. Fè kè m' kontan ankò. Ban m' bon lide ki pou fè m' toujou obeyisan. ¹³ (51:15)
 Lè sa a, m'a moutre moun k'ap fè peche yo tout kòmandman ou yo, pou yo sa tounen vin jwenn ou.
¹⁴ ¶ (51:16) Pa kite yo tire revan j sou mwen, Bondye, se ou k'ap sove lavi m'. N'a fè konnen jan ou
 gen bon kè. ¹⁵ (51:17) Seyè mwen, mete pawòl nan bouch mwen pou m' ka fè lwanj ou. ¹⁶ (51:18)
 Si se bèt ou ta vle yo touye pou ofri ou, mwen ta ofri bèt ba ou. Men, ou pa pran plezi nan vyann
 bèt y'ap boule ofri ba ou yo. ¹⁷ (51:19) Ofrann ki fè Bondye plezi, se lè yon moun soumèt tèt li
 devan li. Bondye, ou p'ap janm meprize moun ki soumèt tèt li devan ou, moun ki rekonèt tò li.
¹⁸ (51:20) O Bondye, fe anpil byen pou mòn Siyon, paske ou gen bon kè. Rebati miray lavil Jerizalèm
 yo. ¹⁹ (51:21) Se lè sa a w'a pran plezi nan ofrann bèt ou mande pou yo touye pou ou yo, nan vyann
 bèt ak lòt ofrann y'ap boule nèt pou ou yo. Se lè sa a y'a ofri jenn towò bèf sou lotèl ou a.

Chapter 52

¹ ¶ (52:1) Pou chèf sanba yo. Se yon chante David te ekri (52:2) lè Doèg, moun peyi Edon, te
 al pote rapò bay Sayil pou fè l' konnen David te al kache lakay Akimelèk. (52:3) Poukisa, ou menm
 gwo chèf, w'ap vante tèt ou konsa lè ou fè sa ki mal! renmen Bondye a pa janm chanje. ² (52:4)
 W'ap kalkile ki jan pou fè moun mal. Lang ou tankou yon razwa byen file, ou toujou ap fè manti
 sou moun. ³ (52:5) Ou pito fè mal pase pou ou fè byen. Ou pito bay manti pase ou di verite. ⁴ (52:6)
 Ou renmen di pawòl ki pou fè moun mal, lang vipè! ⁵ (52:7) Se poutèt sa, Bondye gen pou fini nèt
 avè ou, l'ap mete men sou ou, l'ap rale ou soti anndan kay ou. L'ap wete ou nan mitan moun ki
 vivan yo. ⁶ ¶ (52:8) Moun k'ap mache dwat yo va wè sa, y'a gen krentif pou Bondye. Men y'a pase
 ou nan betiz, y'a di: ⁷ (52:9 -) Men moun ki te derefize chache pwoteksyon bò kot Bondye a. Li te
 pito mete tout konfyans li nan gwo richès li yo. Li te pito ap fè grandizè pou sa li fè ki mal. ⁸ (52:10)
 Men, mwen tankou yon bèl pye oliv tou vèt nan kay Bondye a. M'ap toujou mete tout konfyans
 mwen nan li, paske li p'ap janm sispann renmen mwen. ⁹ (52:11) M'ap toujou di ou mèsè pou sa

ou fè, Bondye. Tout espwa mwen se nan ou li ye. M'ap kanpe nan mitan moun k'ap sevi ou yo pou m' fè konnen jan ou bon.

Chapter 53

¹ ¶ (53:1) Pou chèf sanba yo. Fè yo chante ansanm, tankou timoun lekòl. Se yon sòm David. (53:2) Moun fou di nan kè yo: -Pa gen Bondye! Yo tout fin pouri. Y'ap fè yon bann mechanste. Pa gen yonn ki fè sa ki byen. ² (53:3) Bondye rete nan syèl la, l'ap gade lèzòm anba, pou l' wè si gen ladan yo ki gen konprann, si gen ladan yo k'ap chache l'. ³ (53:4) Men, yo tout vire do bay Bondye. Yo tout yo mete tèt ansanm pou fè sa ki mal. Pa gen yonn ladan yo k'ap fè sa ki byen, non, pa menm gen yon sèl ladan yo. ⁴ (53:5) Bondye di: -Moun sa yo k'ap fè mechanste, se konnen yo pa konnen? Yo rete, y'ap souse pèp mwen an pou yo ka viv. Pa gen yonn ladan yo ki rele non mwen. ⁵ (53:6) Men tou, yo pral sezi, yo pral tranble, san pa gen rezon pou yo tranble. Men Bondye pral gaye zo tout lènmi ou yo, w'ap fè yo wont, paske Bondye lage yo. ⁶ (53:7) Oo! Kilè Bondye va soti sou mòn Siyon an pou l' delivre pèp Izrayèl li a? Lè Bondye va fè pèp li a kanpe ankò, pitit pitit Jakòb yo pral fè fèt. Se vre wi, pèp Izrayèl la pral kontan.

Chapter 54

¹ ¶ (54:1) Pou chèf sanba yo. Se yon chante David (54:2) te ekri lè moun peyi Zif yo te al di Sayil men David kache lakay yo. (54:3) Bondye, delivre m' non avèk pouvwa ou! Fè m' jistis avèk fòs kouraj ou! ² (54:4) Bondye, koute m' non lè m'ap lapriyè! Panche zòrèy ou pou tande pawòl k'ap soti nan bouch mwen! ³ (54:5) Paske gen yon seri moun awogan ki leve dèyè m', yon bann mechan ki soti pou touye m'! Yo pa menm chonje si gen Bondye! ⁴ ¶ (54:6) Men, Bondye ap vin ede m'. Seyè a ap pran defans mwen. ⁵ (54:7) L'ap fè mechanste moun ki pa vle wè m' yo tonbe sou tèt yo; l'ap fini nèt ak yo paske l'ap toujou kenbe pawòl li. ⁶ (54:8) Seyè, m'a ofri bèt pou yo touye pou ou ak kè kontan, m'a fè lwanj ou, paske ou bon pou mwen. ⁷ (54:9) Ou delivre m' anba tray mwen te ye a; ou fè m' wè lènmi m' yo pèdi batay la.

Chapter 55

¹
 ¶ (55:1) Pou chèf sanba yo. Se sou enstriman mizik akòd pou yo jwe mizik la. Se yon chante David. (55:2) Bondye, panche zòrèy ou bò kote m'! Koute m' non lè m'ap lapriyè! Piga ou vire do
²
 ban mwen lè m'ap rele nan pye ou! (55:3) Pran ka mwen, koute m', reponn mwen non! Kè m' sere, m'ap plenn!³ (55:4) Mwen boulvèse lè m' tande lènmi m' yo ap pale, lè m' tande mechan yo
⁴
 ap pale byen fò. Yo fè malè tonbe sou mwen. Yo move sou mwen, y'ap pèsekite m'. (55:5) Mwen
⁵
 santi kè m' kase. Sezisman pran m' lè m' wè mwen fin mouri. (55:6) Tout kò m' ap tranble tèlman
⁶
 mwen sezi. (55:7) Mwen di konsa: -Pa pito m' te gen zèl tankou yon toutrèl! Mwen ta vole ale.
⁷
 Mwen ta jwenn kote pou m' pran repo. (55:8) Mwen ta kouri pati ale byen lwen. Mwen t'aval
⁸
 rete pou kont mwen nan dezè a. (55:9) Mwen ta prese jwenn yon kote pou m' kache pou gwo van
⁹
 an, pou gwo lapli a pa fè m' anyen. ¶ (55:10) Seyè, mele yo. Fè yonn pa konprann sa lòt ap di.
¹⁰
 Paske, sa m' wè nan lavil la se chen manje chen, yonn ap goumen ak lòt. (55:11) Lajounen kou
¹¹
 lannwit se sa ase ou tande nan lavil la. Anndan lavil la menm, se mechanste, se malfezans. (55:12)
¹²
 Kote ou pase se moun k'ap kraze brize. Nan tout lari se fè moun lenjistis, se twonpe moun. (55:13)
 Si se te yon moun ki rayi m' ki t'ap pale m' mal, mwen ta reziyen m'. Si se te yon moun ki pa vle
¹³
 wè m' ki te leve dèyè mwen, mwen ta kache kò m' pou l' pa jwenn mwen. (55:14) Men, se ou
¹⁴
 menm, kanmarad mwen, yon bon zanmi m' ki te konn tout ti zafè m'. (55:15) Nou te konn fè ti
¹⁵
 koze nou ansanm. Nou te konn al lakay Bondye a ansanm ak foul moun yo. (55:16) Se pou yo
 rete konsa, yo tonbe yo mouri. Se pou yo desann tou vivan kote mò yo ye a, paske mechanste a
¹⁶
 kaye lakay yo, li nan fon kè yo. ¶ (55:17) Men, mwen rele Seyè a, Bondye mwen; l'a delivre
¹⁷
 mwen. (55:18) Maten, midi, aswè, m'ap plenyen, m'ap plenn. L'a tande vwa mwen. (55:19)
 L'a fè m' viv ak kè poze, l'a delivre m' nan batay m'ap mennen ak moun ki leve dèyè m' yo. Yo te
¹⁹
 mèt anpil. (55:20) Bondye k'ap gouvènen depi tout tan an va koute m', l'a kraze lògèy yo. Paske,
²⁰
 yo p'ap janm chanje, yo pa gen krentif pou Bondye. (55:21) Moun ki leve men sou zanmi yo se
²¹
 moun ki trèt. (55:22) Pawòl nan bouch yo pi dous pase siwo. Men, nan fon kè yo se yon sèl
²²
 bagay yo konnen: se goumen. Pawòl yo koule dous tankou lwil, men lang yo se razwa. (55:23)
 Renmèt sò ou nan men Seyè a, l'a kenbe ou fèm. Li p'ap janm kite moun ki mache dwat devan li

yo rete atè lè yo tonbe. ²³ (55:24) Men ou menm, Bondye, w'ap fè bann ansasen sa yo ak bann vòlè sa yo desann anba tè. Yo p'ap wè mwatye nan lavi yo. Men, mwen menm, se nan ou m'ap mete tout konfyans mwen.

Chapter 56

¹ ¶ (56:1) Pou chèf sanba yo. Se pou yo chante sou lè chante ki di: Pijon ki sou pye terebent byen lwen yo. Se yon chante David te ekri lè moun Filisti yo te mete men sou li nan lavil Gat. (56:2) Bondye papa mwen! Gen pitye pou mwen, paske mwen gen anpil moun k'ap pousib mwen. Tout lajounen y'ap fè m' lagè, y'ap toumante mwen. ² (56:3) Tout lajounen lènmi m' yo ap pousib mwen. Se pa ti anpil yo anpil, moun k'ap fè m' lagè yo. ³ (56:4) Bondye ki anwo nan syèl la, lè mwen pè, se nan ou mwen mete tout konfyans mwen. ⁴ (56:5) Mwen gen konfyans nan Bondye. M'ap fè lwanj pawòl li. Mwen pa pè anyen. Kisa lèzòm ka fè m'? ⁵ (56:6) Tout lajounen y'ap manke m' dega. Se yon sèl lide yo gen nan tèt yo: se fè mwen mal! ⁶ (56:7) Yo mete tèt yo ansanm, yo kache kò yo, y'ap veye tout vire tounen mwen. Y'ap tann okazyon konsa pou yo touye m'. ⁷ (56:8) Pa gen sove pou yo, paske yo fè twòp. Lè ou an kòlè, Bondye, fè pèp yo vin ba devan ou. ⁸ ¶ (56:9) Ou konnen tout kouri kache mwen yo. Ou konnen jan dlo koule nan je m'. Eske tout sa pa ekri nan liv ou a? ⁹ (56:10) Se poutèt sa lènmi m' yo gen pou kouri ale lè m' rele ou. Mwen konnen Bondye pou mwen. ¹⁰ (56:11) M'ap fè lwanj pawòl Bondye. Wi, m'ap fè lwanj pawòl Seyè a. ¹¹ (56:12) Mwen gen konfyans nan Bondye, mwen pa pè anyen. Kisa lèzòm ka fè mwen? ¹² (56:13) O Bondye, m'ap ofri ou sa mwen te pwomèt ou yo, m'ap ofri bèt pou yo touye pou ou pou m' di ou mèsi. ¹³ (56:14) Paske ou pa kite m' mouri, ou pa kite m' bite, pou m' kapab mache devan ou nan mitan bèl limyè k'ap klere moun k'ap viv pou ou yo.

Chapter 57

¹ ¶ (57:1) Pou chèf sanba yo. Se pou yo chante sou lè chante ki di: Pa detwi. Se yon chante David te ekri lè li te al kache nan gwòt la pou Sayil ki t'ap kouri dèyè l'. (57:2) Gen pitye pou mwen, Bondye! -Gen pitye pou mwen! Paske, se bò kote ou m'ap chache pwoteksyon. Se anba zèl ou m'ap

kache jouk lè danje a fin pase. ² (57:3) M'ap kriye nan pye Bondye ki anwo nan syèl la, nan pye
 Bondye ki fè anpil byen pou mwen an. ³ (57:4) L'ap rete nan syèl la, l'ap delivre m' anba men moun
 k'ap pèsekite m' yo. Bondye va fè m' wè jan li renmen mwen, jan li toujou kenbe pawòl li. ⁴ (57:5)
 Mwen kouche nan mitan yon bann lyon ki prèt pou devore mwen. Dan yo pwenti tankou flèch,
 tankou frenn, lang yo tankou yon ponya byen file. ⁵ (57:6) Bondye, fè wè nan syèl la jan ou gen
 pouvwa non! Fè wè pouvwa ou sou tout latè! ⁶ (57:7) Lènmi m' yo tann yon pèlen sou wout kote
 pou m' pase a. Kè m' sere anpil. Yo fouye yon twou sou wout mwen. Men, se yo menm ki tonbe
 ladan li. ⁷ ¶ (57:8) Bondye, mwen pare, wi, mwen pare. Mwen pral chante, mwen pral fè lwanj ou.
⁸ (57:9) M'ap souke kò mwen, m'ap leve. M'ap pran gita mwen, m'ap pran bandjo mwen. Mwen
 pral fè solèy leve! ⁹ (57:10) Seyè, m'a fè lwanj ou nan mitan pèp yo! M'a chante pou ou nan mitan
 tout nasyon yo! ¹⁰ (57:11) Ou renmen nou anpil anpil, ou toujou kenbe pawòl ou. ¹¹ (57:12)
 Bondye, fè wè nan syèl la jan ou gen pouvwa non! Fè wè pouvwa ou sou tout latè!

Chapter 58

¹ ¶ (58:1) Pou chèf sanba yo. Se pou yo chante sou lè chante ki di: Pa detwi. Se yon chante
 David. (58:2) Nou menm ki reprezante Bondye, èske nou rann jistis la tout bon vre? Nou menm
 lèzòm, èske nou jije san patipri? ² (58:3) Non! Okontrè! Se move lide ase ki nan kè nou. N'ap plede
 fè mechanste nan tout peyi a. ³ (58:4) Malveyan yo pèvèti depi nan vant manman yo. Moun k'ap
 bay manti yo gen madichon depi yo fèt. ⁴ (58:5) Yo gen yon pwazon nan bouch yo, tankou pwazon
 sèpan. Yo pa pran priyè, yo tankou sèpan aspik, ⁵ (58:6) ki fèmèn zòrèy yo pou yo pa tande vwa
 moun k'ap chante pou fè yo dòmi, menm lè moun yo gen bèl bèl vwa. ⁶ ¶ (58:7) Bondye, tanpri,
 kase dan nan bouch yo! Kase kwòk dan jenn lyon yo, Seyè! ⁷ (58:8) Se pou yo disparèt tankou dlo
 lavalas k'ap koule desann. Se pou moun kraze yo anba pye tankou zèb sou granchemen. ⁸ (58:9)
 Se pou yo fonn tankou mantèg nan solèy. Se pou yo pa janm wè solèy tankou tibebe ki fèt tou
 mouri. ⁹ (58:10) Anvan menm yo konnen sa k'ap rive yo, se pou yo boule tankou raje. Bondye ap
 fè kòlè, l'ap rache yo pandan yo tou vivan. ¹⁰ (58:11) Moun ki mache dwat devan Bondye gen pou

yo kontan lè yo wè jan yo pini mechan yo. Y'a lave pye yo nan san mechan yo. ¹¹ (58:12) Lè sa a, moun va di: -Wi, sa vo lapenn pou moun mache dwat devan Bondye. Wi, gen yon Bondye k'ap jije moun sou latè.

Chapter 59

¹ ¶ (59:1) Pou chèf sanba yo. Se pou yo chante l' sou menm lè ak chante ki di: Pa detwi. Se yon chante David te ekri lè Sayil te voye moun veye kay li pou touye l'. (59:2) Delivre m' anba lènmi m' yo, Bondye mwen! Pwoteje m' pou moun k'ap leve dèyè m' yo pa jwenn mwen! ² (59:3) Delivre m' anba malveyan yo! Sove m' anba ansasen sa yo! ³ (59:4) Yo mete anbiskad pou yo touye m'. Yon bann ansasen ap fè konplo sou do mwen, san m' pa fè anyen ki mal, san m' pa fè okenn fòt, ⁴ Seyè. (59:5) Malgre mwen inonsan, y'ap kouri, y'ap pare tann mwen! Leve non! vin bò kote mwen! Gade yo! ⁵ (59:6) Ou menm, Seyè, Bondye, ou menm ki chèf lame zanj yo, ou menm ki Bondye pèp Izrayèl la, leve non! vin pini moun lòt nasyon yo! Se pou ou san pitye pou bann mechan sa yo k'ap trayi ou! ⁶ (59:7) Chak swa, yo tounen. Yo mache nan tout lavil la, y'ap jape tankou chen. ⁷ (59:8) Tande sa y'ap di! Tande jan y'ap pale! Lang nan bouch yo, ou ta di se yon ponya! Y'ap di: Pa gen moun k'ap tande nou! ⁸ ¶ (59:9) Men ou menm, Seyè, ou pase yo nan rizib! Ou pase tout nasyon yo nan jwèt. ⁹ (59:10) Se ou ki tout defans mwen, se sou ou mwen konte. Bondye, se bò kote ou mwen jwenn pwoteksyon. ¹⁰ (59:11) Bondye mwen, w'ap vin kanpe bò kote m', paske ou renmen m'. W'ap fè m' wè jan moun k'ap pèsekite m' yo ap fini mal. ¹¹ (59:12) Pa touye yo pou moun pa m' yo ka chonje! Avèk pouvwa ou, fè yo pa konn sa y'ap fè, fè yo tonbe. Seyè, se ou menm ki tout pwoteksyon mwen. ¹² (59:13) Chak pawòl ki soti nan bouch yo se yon peche. Se pwòp lògèy yo k'ap fini ak yo. Se madichon ak manti ase k'ap soti nan bouch yo. ¹³ (59:14) Lè ou an kòlè, fini ak yo. Fini ak yo nèt, fè yo disparèt. Fè tout moun konnen se Bondye k'ap gouvènen nan peyi Jakòb la. Se li k'ap gouvènen toupatou sou latè. ¹⁴ (59:15) Chak swa, yo tounen. Y'ap jape tankou chen, y'ap mache nan tout lavil la. ¹⁵ (59:16) Y'ap moute desann, y'ap chache manje. Y'ap plenn paske yo pa jwenn ase pou plen vant yo. ¹⁶ (59:17) Men mwen menm, m'ap chante pou m' di jan ou gen pouvwa. Chak maten m'a fè lwanj ou pou m' di jan ou pa janm sispann renmen nou. Paske, se ou ki tout defans mwen, se bò kote ou mwen te jwenn pwoteksyon lè m' te anba tray.

17

(59:18) Wi, m'ap fè lwanj ou, ou menm ki tout defans mwen. Se bò kot Bondye mwen jwenn pwoteksyon, bò kot Bondye ki renmen m' lan.

Chapter 60

¹ ¶ (60:1) Pou chèf sanba yo. Se pou yo chante sou menm lè ak chante ki di: Bèl flè savann blan yo. Se yon chante David te fè pou moutre moun anpil bagay. (60:2) Li te ekri l' lè li t'ap fè lagè ak moun Aram yo ki te soti nan peyi Naarayen ak peyi Soba. Sa te rive aprè Joab te tounen nan batay la pou l' te touye douz mil (12.000) moun peyi Edon nan Fon Sèl la. (60:3) Bondye, ou vire do ban nou. Ou gaye nou toupatou. Ou te fache ak nou. Tanpri, fè nou kanpe ankò! ² (60:4) Ou fè peyi a tranble, ou mete l' tèt anba. Mete l' sou de pye l' ankò, paske li prèt pou tonbe nèt. ³ (60:5) Ou kite pèp ou a pase anba kont tray li. Ou ba li bwè yon bweson ki fè tèt li vire. ⁴ (60:6) Ou bay moun ki gen krentif pou ou yo yon drapo, pou lè batay la yo jwenn kote pou yo kache. ⁵ (60:7) Delivre nou ak pouvwa ou. Reponn nou lè nou lapriyè nan pye ou, pou moun ou renmen anpil yo ka jwenn delivrans. ⁶ ¶ (60:8) Bondye rete kote ki apa pou li a, li di: -Mwen kontan anpil. Mwen pral separe lavil Sichèm. Mwen pral fè apantaj Fon Soukòt. ⁷ (60:9) Peyi Galarad, se pou mwen li ye. Peyi Manase tou. M'ap fè peyi Efrayim tounen yon kas pou pwoteje tèt mwen. Peyi Jida, se baton kòmandman mwen li ye. ⁸ (60:10) Men m'ap fè peyi Moab sèvi m' kivèt pou m' fè twalèt mwen. M'ap poze men m' sou peyi Edon. Peyi Filisti a menm, m'ap mache pran li. ⁹ (60:11) Ki moun ki pou mennen m' nan lavil ki byen gade a? Ki moun ki pou mennen m' lavil Edon? ¹⁰ (60:12) Eske se pa ou menm, Bondye, ki pou fè sa pou mwen, ou menm ki te vire do ban nou, ou menm ki pa soti ansanm ak lame nou yo ankò? ¹¹ (60:13) Tanpri, ede nou goumen kont lènmi nou yo, paske sekou lèzòm se pawòl nan bouch. ¹² (60:14) Avèk Bondye bò kote nou, n'a fè bèl bagay nan lagè. Se li menm k'ap kraze lènmi nou yo anba pye l'.

Chapter 61

¹ ¶ (61:1) Pou chèf sanba yo. Se sou enstriman akòd pou yo jwe mizik la. Se yon sòm David. (61:2) Bondye, tandè jan m'ap rele nan pye ou! Koute lè m'ap lapriyè ou! ² (61:3) Kè m' kase,

mwen lwen lakay mwen. M'ap rele ou. Tanpri, mennen m' al chache pwoteksyon sou wòch kote mwen pa ka rive a. ³ (61:4) Paske, se ou k'ap pwoteje m', se ou k'ap pran defans mwen kont lènmi m' yo. ⁴ (61:5) Mwen ta renmen pase tout lavi m' lakay ou. Mwen ta renmen rete kache anba zèl ou. ⁵ ¶ (61:6) Bondye, ou tande pwomès mwen fè. Ban mwen sa ou bay tout moun ki respekte non ou lan. ⁶ (61:7) Mete kèk jou sou lavi wa a: Se pou l' viv lontan lontan ankò. ⁷ (61:8) Se pou l' gouvènèn tout tan devan Bondye. Bondye va fè l' wè jan li renmen li, jan li toujou kenbe pawòl li: Bondye va pwoteje l'. ⁸ (61:9) Konsa, mwen p'ap janm sispann chante pou ou. Chak jou m'a fè sa m' te pwomèt ou a.

Chapter 62

¹ ¶ (62:1) Pou chèf sanba yo. Pou Yedoutoun. Se yon chante David. (62:2) Se sou Bondye sèlman mwen konte, se li menm ki pou delivre mwen. ² (62:3) Se li menm ase k'ap pwoteje m', k'ap delivre m'. Se li ki tout defans mwen. Li p'ap janm kite anyen rive m'. ³ (62:4) Kilè n'a sispann tonbe ansanm sou do yon moun pou n' chache lage l' atè tankou yon miray ki tou panche, tankou yon lantouraj k'ap tonbe? ⁴ (62:5) Wi, yo pa gen lòt lide nan tèt yo pase fè l' pèdi gwo plas kote li ye a. Yo pran plezi nan bay manti. Yo louvri bouch yo pou mande benediksyon, men nan kè yo, se madichon y'ap bay. ⁵ (62:6) Wi, se sou Bondye ase pou m' konte. Se nan li mwen mete tout espwa mwen. ⁶ (62:7) Se li menm sèlman k'ap pwoteje m', k'ap delivre m'. Se li ki tout defans mwen, li p'ap janm kite anyen rive m'. ⁷ (62:8) Se Bondye k'ap delivre m'. Se li menm k'ap fè yo respekte m'. Se li menm ki tout fòs mwen, l'ap pran defans mwen. Se li menm ki tout pwoteksyon mwen. ⁸ ¶ (62:9) Nou menm, pèp mwen, toujou mete konfyans nou nan li! Louvri kè nou ba li, paske se li menm ki tout nou. ⁹ (62:10) Wi, moun pa anyen. Grannèg? Se pawòl nan bouch. Mete ¹⁰ yo ansanm nan balans, yo pa gen pèz. Yo pi lejè pase van k'ap soufle a. (62:11) Pa mete konfyans nou nan fè britalite. Pa mete nan tèt nou nou ka genyen anyen nan vòlò. Lè nou wè n'ap fè lajan, pa kite l' pran nanm nou. ¹¹ (62:12) An de fwa, men sa m' tande Bondye di: -Se nan men m' pouvwa ¹² rete. (62:13) Wi, Seyè, ou gen bon kè, paske w'ap bay chak moun sa yo merite dapre sa yo fè.

Chapter 63

¹ ¶ (63:1) Se yon sòm David te ekri lè li te nan dezè peyi Jida a. (63:2) Bondye, se ou ki Bondye mwen. Jan m' anvi wè ou! Jan m' ap tann ou sa a! Se tout kò m' k'ap mande pou ou, tankou tè sèk nan solèy k'ap tann lapli. ² (63:3) Fè m' antre kote ki apa pou ou nan kay ou a pou m' wè ou, pou m' wè jan ou gen pouvwa, jan ou merite pou yo fè lwanj ou. ³ ¶ (63:4) renmen ou gen pou nou an pi bon pase lavi. Se poutèt sa m'ap fè lwanj ou. ⁴ (63:5) Konsa m'a pase tout lavi m' ap di ou mèsi; se ou menm sèlman m'a lapriyè. ⁵ (63:6) M'ap fè fèt, m'ap kontan tankou yon moun ki manje plen vant li yon manje ki gen bon gou, ki gen kont grès li ladan l'. Wi, se konsa kè m' ap kontan. M'ap louvri bouch mwen pou m' fè lwanj ou. ⁶ (63:7) Lè m' kouche sou kabann mwen, lide m' ap travay sou ou. Tout lannwit se ou m'ap kalkile. ⁷ ¶ (63:8) Paske se ou ki tout sekou m', m'ap rete kache anba zèl ou, m'ap chante sitèlman mwen kontan. ⁸ (63:9) Mwen kole kò m' sou ou, se pouvwa ou k'ap soutni mwen. ⁹ (63:10) Men, moun k'ap chache touye m' yo, yo gen pou yo desann kote mò yo ye a. ¹⁰ (63:11) Yo gen pou yo mouri nan lagè, chen mawon gen pou manje kadav yo. ¹¹ (63:12) Men, Bondye ap fè kè wa a kontan. Tout moun ki mete non l' devan va gen kè kontan tou. Men, y'ap fèmen bouch moun k'ap bay manti yo.

Chapter 64

¹ ¶ (64:1) Pou chèf sanba yo. Se yon sòm David. (64:2) Bondye, tandè non lè m'ap plenn! Pwoteje m' kont lènmi m' k'ap fè m' pè yo. ² (64:3) Pwoteje m' anba konplo mechan yo, anba gwo bann malveyan sa yo. ³ (64:4) Lang yo file tankou razwa. Pawòl ki soti nan bouch yo se pwazon. ⁴ (64:5) Yo rete kache, y'ap vize moun ki inonsan an. Yo tire sou li san li pa atann. Yo pa pè fè anyen. ⁵ (64:6) Yonn ap ankouraje lòt nan fè sa ki mal. Y'ap rakonte jan yo mete pèlen pou lòt moun. Y'ap plede di: Ki moun k'ap wè nou? ⁶ (64:7) Y'ap fè move plan, y'ap veye pou moun pa dekouvri yo. Sa ki nan kè yon moun ak nan lide li se mistè. ⁷ ¶ (64:8) Men Bondye ap tire flèch li sou yo: Yo rete konsa, yo blese. ⁸ (64:9) Se lang yo k'ap bat yo. Tout moun ki wè yo ap pase yo

9
 nan betiz. (64:10) Lè sa a, tout moun pral pè, y'a mache fè konnen sa Bondye fè. Y'a egzaminen
 10
 tou sa li fè. (64:11) Tout moun ki mache dwat yo ap kontan tou poutèt sa Seyè a fè. Y'a jwenn
 pwoteksyon anba zèl li. Tout moun ki viv jan Bondye vle l' la va fè lwanj li.

Chapter 65

1
 ¶ (65:1) Pou chèf sanba yo. Se yon sòm David, se yon chante. (65:2) Bondye, ou merite vre
 pou yo fè lwanj ou sou Mòn Siyon, se pou yo ba ou sa yo te pwomèt ou a. 2 (65:3) Paske ou tande
 lè y'ap lapriyé ou. Tout moun ap vin nan pye ou, 3 (65:4) pou rekonèt peche yo. Peche nou yo twòp
 pou nou. Men, w'ap efase yo. 4 (65:5) Ala bon sa bon pou moun ou menm ou chwazi, pou moun
 ou menm ou rele bò kote ou! L'ap rete anndan lakay ou! N'ap plen vant nou ak bon bagay ki gen
 lakay ou, ak benediksyon ki nan kay ki apa pou ou a. 5 (65:6) Bondye, ou menm k'ap delivre nou,
 w'ap reponn nou, paske ou pa nan patipri. w'ap fè bèl bagay pou nou. Moun toupatou sou latè, moun
 byen lwen lòt bò lanmè ap mete konfyans yo nan ou. 6 ¶ (65:7) Avèk fòs ou, ou mete mòn yo kanpe
 nan plas yo. Ou fè wè jan ou gen anpil pouvwa. 7 (65:8) Ou kase lanmè a lè l' move. Ou fè lanm
 lanmè yo sispann fè bri. Ou fè pèp yo rete trankil lè yo move. 8 (65:9) Moun ki rete nan dènye bout
 latè a pran tranble lè yo wè bèl bagay ou fè yo. Depi sou bò solèy leve jouk sou bò solèy kouche
 ou fè moun rele sitèlman yo kontan. 9 (65:10) Ou moutre jan ou pran swen latè: Ou voye lapli pou
 wouze l'. Ou fè l' donner anpil. Larivyè Bondye toujou plen dlo. Ou pare yon bèl rekòt mayi. Men
 ki jan ou pran swen tè a: 10 (65:11) Ou mete dlo nan kannal pou wouze jaden yo. Ou kase bit tè
 yo. Ou voye gwo lapli pou tè a bwè kont dlo li. Ou fè grenn yo jèmen. 11 (65:12) Ala yon bèl rekòt
 ou ban nou lè lanne a fini! Tout kote ou pase gen abondans an kantite! 12 (65:13) Jaden ki nan dezè
 a jwenn kont dlo yo. Ti mòn yo kontan. 13 (65:14) Jaden yo plen zannimo. Jaden mayi kouvri tout
 fon yo. Fon yo kontan, y'ap chante sitèlman yo kontan.

Chapter 66

¹ ¶ Pou chèf sanba yo. Chante sa a se yon sòm li ye. Nou tout ki rete sou latè, rele ak kè kontan pou Bondye! Fe fèt pou fè lwanj Bondye! ² Chante pouvwa Bondye! Fè gwo fèt pou fè lwanj li!
³ Di Bondye: -Sa ou fè yo se bagay ki pou fè moun respekte ou. Ou sitèlman gen pouvwa, lènmi ou yo ap flate ou. ⁴ Tout moun ki rete sou latè ap adore ou. Y'ap chante pou ou, y'ap chante pou sa ou fè. ⁵ Vini non! Al gade sa Bondye fè! Li fè bagay ki pou fè moun sou latè respekte li. ⁶ Li fè fon lanmè a tounen tè sèk: Zansèt nou yo travèse rivyè a san pye yo pa mouye. Ann fè kè nou kontan pou sa li te fè! ⁷ Avèk fòs kouraj li l'ap dominan pou tout tan. L'ap gade tout sa nasyon yo ap fè. Si gen moun ki vle fè rebèl, pito yo pa leve tèt yo? ⁸ ¶ Nou menm pèp yo, di Bondye mèsi! Fè tout moun tande jan n'ap fè lwanj li! ⁹ Se li menm ki ban nou lavi. Li pa kite pye nou glise. ¹⁰ Bondye, ou te fè nou pase anba tray pou ou te wè kote nou ye. Wi, menm jan yo pase lò nan dife pou wè si li bon, se konsa ou te fè nou pase anba tray. ¹¹ Ou te kite nou tonbe nan pèlen an. Ou te mete yon chay lou sou do nou. ¹² Ou kite nenpòt moun ap pase nou lòd. Nou pase nan dife, nou pase nan gwo dlo. Men, ou wete nou nan tout move pa, ou delivre nou. ¹³ ¶ M'a vin lakay ou ak bèt pou yo boule pou ou, m'a ofri ou sa mwen te pwomèt ou a. ¹⁴ M'a kenbe pawòl mwen te di lè m' te nan tray la. ¹⁵ M'a ofri mouton byen gra pou yo boule pou ou sou lotèl la, ansanm ak odè vyann y'ap boukannen pou ou. Wi, m'a ofri ou towò bèf ak bouk kabrit. ¹⁶ vin koute non, nou tout ki gen krentif pou Bondye. M'a di nou sa Bondye fè pou mwen. ¹⁷ Mwen rele nan pye l', mwen te deja pare pou m' te fè lwanj li. ¹⁸ Si mwen te gen move lide nan tèt mwen, Seyè a pa ta koute sa m' t'ap di l' la. ¹⁹ Men Bondye te koute sa m' t'ap di l' la, li te tande m' lè m' t'ap lapriyè. ²⁰ Lwanj pou Bondye! Mèsi Bondye! Ou pa t' kite m' lapriyè pou gremesi. Ou pa t' refize fè m' wè jan ou gen bon kè.

Chapter 67

¹ ¶ (67:1) Pou chèf sanba yo. Se sou enstriman akòd pou yo jwe mizik la. Sòm sa a se yon chante. (67:2) Tanpri, Bondye, gen pitye pou nou! Voye benediksyon ou sou nou! Fè nou santi ou la avèk nou, ² (67:3) pou tout moun sou latè ka konnen sa ou vle, pou tout lòt nasyon yo ka konnen

se ou ki delivre lèzòm. ³ (67:4) Se pou tout pèp sou latè fè lwanj ou, Bondye. Wi, se pou tout pèp sou latè fè lwanj ou. ⁴ (67:5) Se pou tout nasyon yo fè kè yo kontan. Se pou yo chante tèlman yo kontan, paske ou jije pèp yo san patipri, ou dirije tout nasyon ki sou latè. ⁵ (67:6) Se pou tout pèp sou latè fè lwanj ou, Bondye. Wi, se pou tout pèp sou latè fè lwanj ou. ⁶ (67:7) Latè bay rekòt. Bondye ki Bondye nou an te voye benediksyon li sou nou. ⁷ (67:8) Wi, Bondye te voye benediksyon li sou nou. Se pou tout moun toupatou sou latè gen krentif pou li.

Chapter 68

¹ ¶ (68:1) Pou chèf sanba yo. Se yon sòm David. Se yon chante. (68:2) Lè Bondye kanpe, lènmi l' yo gaye, moun ki rayi l' yo kouri lè l' parèt. ² (68:3) Menm jan lafimen disparèt nan lè a, se konsa w'ap disparèt yo. Menm jan lasi fonn nan dife, se konsa mechan yo gen pou yo mouri devan Bondye. ³ (68:4) Men moun ki mache dwat yo ap kontan, y'ap fè fèt devan Bondye. Y'ap kontan anpil anpil. ⁴ (68:5) Chante pou Bondye, fè fèt pou li. Louvri chemen nan laplenn lan bay moun k'ap vini an. Se Seyè ki non li. Fè kè nou kontan lè li parèt devan nou. ⁵ (68:6) Bondye rete nan kay ki apa pou li a, li sèvi papa pou timoun ki san papa yo, li pwoteje vèv yo. ⁶ (68:7) Moun ki san fanmi yo, li ba yo fanmi. Li fè prizonye yo soti nan prizon, li fè kè yo kontan. Men, pou moun k'ap kenbe tèt avè l' yo, y'ap rete nan prizon. ⁷ ¶ (68:8) O Bondye, lè ou t'ap mache alatèt pèp ou a, lè ou t'ap travèse dezè a, ⁸ (68:9) tè a te pran tranble, lapli te pran tonbe soti nan syèl la devan Bondye. devan Bondye mòn Sinayi a, wi, devan Bondye pèp Izrayèl. ⁹ (68:10) Bondye, ou fè lapli tonbe an kantite sou latè. Ou ba li fòs ankò, paske li te fin pèdi tout grès li. ¹⁰ (68:11) Pèp ou a moute kay li nan peyi ou pare pou pòv malere yo, paske ou gen bon kè. ¹¹ (68:12) Seyè a bay lòd, epi yon bann fanm pran gaye nouvèl la: ¹² (68:13 -)Wa yo kouri, yo kouri ansanm ak tout lame yo. Moun yo te kite pou veye kay separe tout sa lènmi yo kite dèyè. ¹³ (68:14) Lè nou rete kouche nan pak mouton yo zèl pijon an klere tankou ajan. Plimaj li jòn tankou lò. ¹⁴ (68:15) Lè Bondye ki gen tout pouvwa a te gaye wa yo nan peyi a, li te fè lanèj kouvri mòn Salmon. ¹⁵ ¶ (68:16) Ala yon gwo

mòn ki wo se mòn Bazan! Se yon mòn ki gen anpil tèt, mòn Bazan an! ¹⁶ (68:17) Poukisa, ou menm mòn ki gen anpil tèt la, w'ap fè jalouzi pou mòn Bondye chwazi pou fè kay pou l' rete a? Se

la Seyè a ap rete pou tout tan. ¹⁷ (68:18) Seyè a gen anpil cha! Li moute sou yo. Li soti mòn Sinayi

pou li al kote ki apa pou li a. ¹⁸ (68:19) Ou moute anwo, ou mennen anpil prizonnye ale avè ou. Yo

fè ou kado anpil moun, menm moun ki te leve dèyè ou yo. ¹⁹ (68:20) Ann fè lwanj Seyè a chak

jou! Li pote chay nou pou nou: Se li ki Bondye nou, se li ki delivre nou. ²⁰ (68:21) Bondye sa a

se Bondye delivrans nou! Seyè a, Bondye nou an, ap wete nou nan bouch twou a. ²¹ (68:22) Bondye

gen pou l' kraze tèt lènmi li yo. Wi, li gen pou l' kraze zo bwa tèt moun k'ap viv nan peche. ¶ ²²

(68:23) Seyè di: -M'ap fè lènmi yo tounen soti nan peyi Bazan. M'ap fè yo tounen soti nan fon

lanmè a. ²³ (68:24) pou ou ka mache nan san yo, pou chen ou yo ka jwenn pa yo nan lènmi ou yo.

²⁴ (68:25) Bondye, tout moun wè jan y'ap fè fèt pou ou. Yo wè ki jan Bondye mwen an, wa mwen

an, ap mache antre kote ki apa pou li a. ²⁵ (68:26) Moun k'ap chante ap mache devan, mizisyen

yo dèyè. Jenn fi yo nan mitan, y'ap bat tanbouren. ²⁶ (68:27) Fè lwanj Bondye nan mitan pèp la lè

l' reyini. Fè lwanj li, nou tout pitit pitit Izrayèl yo! ²⁷ (68:28) Benjamen, ki pi piti a, vin alatèt yo.

Aprè li, vini chèf peyi Jida yo ak lame yo. Aprè yo, vini chèf peyi Zabilon ak chèf peyi Neftali yo.

²⁸ (68:29) Bondye, fè wè pouvwa ou non! Wi, fè wè pouvwa ou te sèvi pou nou an! ²⁹ (68:30)

Rete nan tanp ou a lavil Jerizalèm, kote wa yo ap pote kado ba ou. ³⁰ (68:31) Fè bèt ki rete anba

wozo yo pè, fè bann towò bèf ak jenn ti towò yo pè tou, jouk y'a vin soumèt devan ou, jouk y'a vin

ofri ajan ba ou. Wi, moun sa yo ki renmen batay, gaye yo! Fè yo kouri! ³¹ (68:32) Grannèg ap soti

nan peyi Lejip, moun peyi Letiopi ap louvri bra yo pou lapriyè Bondye. ¶ ³² (68:33) Nou menm

chèf peyi latè yo, chante pou Bondye! Chante pou fè lwanj Seyè a, ³³ (68:34) pou Bondye k'ap

kouri chwal li nan syèl la, nan syèl ki la depi lontan lontan an. Tande jan l'ap rele, jan l'ap rele byen

fò. ³⁴ (68:35) L'ap di: -Rekonèt jan Bondye gen pouvwa! L'ap dominen sou pèp Izrayèl la. Syèl la

fè nou konnen jan li gen pouvwa. ³⁵ (68:36) Bondye chita kote ki apa pou li a, li fè tout moun

respekte l'. Bondye pèp Izrayèl la bay pèp li a fòs ak kouraj. Di Bondye mèsi!

Chapter 69

¹
 ¶ (69:1) Pou chèf sanba yo. Se pou yo chante l' sou menm lè ak chante ki di: Bèl flè savann
 blan yo. Se yon sòm David. (69:2) Delivre m' non, Bondye. Dlo prèt pou neye mwen. ² (69:3) M'ap
 desann nan fon yon ma labou. Mwen pa ka pran pye. Mwen nan yon gwo basen byen fon. Dlo prèt
³
 pou kouvri tèt mwen. (69:4) Mwen bouke rele, mwen pa kapab ankò. Gòj mwen ap fè mwen mal.
 Je m' yo ap boule m' sitèlman m'ap veye tann sekou Bondye mwen an. ⁴ (69:5) Gen yon bann moun
 ki rayi m' san m' pa fè yo anyen. Yo pi plis pase cheve nan tèt mwen. Gen yon seri moun ki rete
 konsa yo fè m' lènmi, yo pi fò pase m', y'ap chache touye mwen. Yo fè m' renmèt sa m' pa pran.
⁵
 (69:6) Bondye, mwen pa kapab kache peche m' yo devan ou. Ou konnen jan m' te aji tankou moun
⁶
 fou. (69:7) Seyè, Bondye ki gen tout pouvwa a, pa kite m' tounen yon wont pou moun ki mete
 konfyans yo nan ou. Ou menm ki Bondye pèp Izrayèl la, pa kite m' fè moun k'ap sèvi ou yo wont.
⁷
 (69:8) Se poutèt ou y'ap joure m' konsa. Wi, se poutèt ou lawont fè m' kache figi m'. ⁸ (69:9)
 Mwen tounen yon etranje pou pwòp frè m' yo, yon moun deyò pou pwòp pitit manman m' yo.
⁹
 (69:10) Mwen sitèlman renmen kay ou a, sa fè m' santi se tankou yon dife k'ap boule tout anndan
 mwen. Tout joure y'ap joure ou yo, se tankou si se mwen menm menm yo t'ap joure. ¹⁰ (69:11)
 Mwen nan gwo lapenn, mwen rete san manje. Se poutèt sa wi y'ap joure m' konsa. ¹¹ (69:12) Si
 m' mete yon rad sak sou mwen pou m' mande ou padon, y'ap pase m' nan rizib. ¹² (69:13) Yo chita
 bò pòtay lavil la, y'ap pale sou mwen, bwèsoneyè yo ap fè chante sou mwen. ¹³ ¶ (69:14) Men mwen
 menm, se ou menm m'ap toujou lapriyè. Reponn mwen, Bondye, lè w'a wè l' nesèsè, paske ou gen
¹⁴
 bon kè, paske w'ap toujou pote m' sekou. (69:15) Wete m' nan ma labou sa a. Pa kite m' desann
¹⁵
 pi fon ladan li. Delivre m' anba lènmi m' yo. Wete m' nan gwo basen byen fon an. (69:16) Pa
 kite dlo yo kouvri tèt mwen ankò. Pa kite m' neye nan gwo lantonwa a. Pa kite bouch twou a fèmen
 sou mwen. ¹⁶ (69:17) Reponn mwen, Seyè, paske ou p'ap janm sispann renmen m'. Voye je ou
¹⁷
 gade mwen, paske ou gen kè sansib. (69:18) Pa vire do ou bay sèvitè ou. Prese vin reponn mwen,
¹⁸
 paske mwen nan gwo traka. (69:19) vin jwenn mwen, vin delivre mwen. Wete m' nan men lènmi
¹⁹
 mwen yo. (69:20) Ou konnen jan y'ap joure mwen, jan y'ap fè m' wont, jan y'ap trennen m' nan
²⁰
 labou. Ou wè tout moun k'ap pèsekite m' yo. (69:21) Yo di m' gwomo jouk yo kraze kouraj
 mwen. Mwen santi se mouri m'ap mouri. Mwen te kwè ta gen moun ki ta gen pitye pou mwen,
²¹
 men pesonn pa vini. Mwen te kwè ta gen moun ki ta vin konsole m', pesonn pa parèt. (69:22)

Yo mete pwazon nan manje mwen. Lè m' mande dlo pou m' bwè, se vinèg yo ban mwen. ¶²²
 (69:23) Se pou resepsyon y'ap fè yo tounen yon pèlen pou yo. Lè yo konprann zafè yo pi bon, se
 lè sa a pou malè tonbe sou yo. ¶²³ (69:24) Se pou je yo bouche pou yo pa wè menm! Kase ren yo
 pou yo pa ka kanpe dwat ankò! ¶²⁴ (69:25) Mete ou an kòlè sou yo! Fè yo santi jan ou fache sou
 yo! ¶²⁵ (69:26) Se pou kay yo rete san moun. Se pou pa gen yon moun lakay yo ki rete vivan ankò.
 ¶²⁶ (69:27) Paske yo te pèsekite moun ou t'ap pini an. Y'ap pwonmennen rakonte soufrans moun ou
 blese a. ¶²⁷ (69:28) Kite yo mete sou sa yo fè deja. Se pou ou san pitye pou yo. ¶²⁸ (69:29) Efase
 non yo nan liv ki gen non moun ki gen lavi a. Pa mete non yo ak non moun k'ap sèvi ou yo.
 ¶²⁹ (69:30) Mwen nan gwo lapenn, m'ap soufri. Bondye, pote m' sekou. Mete m' sou de pye m' ankò.
 ¶³⁰ (69:31) M'a chante pou Bondye, m'a fè lwanj li. M'a di l' mès, m'a fè konnen jan li gen pouvwa.
 ¶³¹ (69:32) Sa va fè Seyè a plezi pi plis pase si m' ta ofri l' yon bèf, pase si m' ta ba li yon jenn towò
 bèf ki fin fè kòn. ¶³² (69:33) Lè malere yo va wè sa, y'a kontan. Se va yon gwo ankourajman pou
 moun k'ap sèvi Bondye yo. ¶³³ (69:34) Seyè a koute lè pòv yo ap lapriyè nan pye l'. Li pa bliye
 moun pa l' yo lè yo nan prizon. ¶³⁴ (69:35) Se pou syèl la ansanm ak latè a, lanmè a ansanm ak tout
 sa ki ladan li fè lwanj Bondye. ¶³⁵ (69:36) L'a delivre peyi Siyon. L'a rebati lavil peyi Jida yo. Pèp
 li va bati kay yo la ankò. Y'a pran tè a pou yo. ¶³⁶ (69:37) Pitit pitit sèvitè l' yo va eritye peyi a. Se
 la moun ki renmen l' yo va viv.

Chapter 70

¶¹ (70:1) Pou chèf sanba yo. Se yon sòm David. Pou Bondye pa bliye nou. (70:2) Delivre m'
 non, Bondye! Prese vin pote m' sekou, Seyè! ¶² (70:3) Moun k'ap chache touye m' yo, se pou yo
 wont, se pou yo pa ka leve tèt yo. Moun ki anvi wè malè rive mwen, se pou yo renka kò yo, se pou
 yo wont. ¶³ (70:4) Moun k'ap lonje dwèt sou mwen yo, se pou sezisman pran yo sitèlman yo wont.
 ¶⁴ (70:5) Men, tout moun ki vin jwenn ou, se pou yo kontan, se pou yo fè fèt. Tout moun ki renmen
 jan ou delivre yo a, se tout tan pou yo di: Bondye gen gwo pouvwa! ¶⁵ (70:6) Pou mwen menm, se
 yon pòv malere san sekou mwen ye. Men ou menm, prese vin delivre m'! Se ou ki tout sekou mwen,
 se ou ki tout delivrans mwen. Prese non, Seyè!

Chapter 71

¹ ¶ Seyè, se nan ou mwen mete tout konfyans mwen! Pa janm kite m' wont! ² Ou se yon jij ki pa nan patipri. Tanpri, sove m' non, delivre mwen. Panche zòrèy ou bò kote m'. Pote m' sekou!

³ Se ou menm ki twou wòch kote pou m' kache. Se ou menm ki pou sèvi m' ranpa ki pou sove mwen. Se ou menm k'ap pwoteje mwen. Se ou menm k'ap pran defans mwen. ⁴ Bondye mwen, wete m'

⁵ anba men mechan yo, anba ponyèt moun k'ap bay manti yo ak moun k'ap fè mechanste yo. Seyè, se ou menm ki tout espwa mwen. Mwen mete konfyans mwen nan ou depi lè m' te jenn gason.

⁶ Se sou ou mwen konte depi m' fèt. Se ou ki fè m' soti nan vant manman m'. Se tout tan m'ap fè lwanj ou. ⁷ Lavi m' se yon mistè pou anpil moun. Men, se ou menm k'ap pwoteje m' ak tout fòs

⁸ ou. Tout lajounen lwanj ou nan bouch mwen. M'ap fè konnen jan ou gen pouvwa. ⁹ Koulye a mwen fin granmoun, tanpri pa voye m' jete. Koulye a mwen fin pèdi fòs, pa lage m'. ¹⁰ Lènmi m'

¹¹ yo ap pale m' mal. Yo mete tèt yo ansanm, yo dèyè pou yo touye m'. Y'ap plede di: -Bondye lage l'. Kouri dèyè l', kenbe l', paske pa gen moun pou delivre l'. ¹² Bondye, pa rete lwen mwen.

¹³ Bondye mwen, prese vin pote m' sekou. Se pou moun k'ap atake m' yo wont, se pou yo disparèt.

¹⁴ Wi, se pou yo wont, se pou moun pase yo nan rizib, moun sa yo ki te vle wè malè rive mwen. ¶

¹⁵ M'ap toujou mete espwa mwen sou ou. M'ap fè lwanj ou tout tan tout tan. M'ap fè konnen jan ou san patipri. Tout lajounen m'a fè konnen jan ou delivre mwen, paske se bagay moun p'ap janm

¹⁶ fin konprann. Seyè, Bondye, m'a rakonte bagay ou fè avèk pouvwa ou. M'a fè chonje jan ou fè

¹⁷ lèzòm gras. Se ou menm sèlman ki ka fè bagay konsa. Bondye, depi lè m' te jenn gason w'ap

¹⁸ aprann mwen anpil bagay. Jouk koulye a m'ap rakonte bèl bagay ou fè yo. Koulye a mwen fin vye granmoun, tout cheve nan tèt mwen fin blan. Tanpri, Bondye, pa lage m'. Kanpe la avè m' pou

¹⁹ m' ka fè moun k'ap viv koulye a konnen jan ou gen fòs, pou m' ka fè tout moun ki gen pou vin apre

²⁰ yo konnen jan ou vanyan, jan jistis ou rive jouk nan syèl la. Bondye, ou fè bèl bagay. Pa gen tankou ou!

²¹ Ou voye traka ak soufrans ban nou. Men se ou k'ap ban nou lavi ankò. W'ap rale nou

²² soti nan bouch twou a. W'ap fè m' pi grannèg pase jan m' te ye a. W'ap konsole m' ankò. Se

²³ vre wi, m'a fè lwanj ou avèk kout gita. M'a fè lwanj ou, Bondye mwen, paske w'ap toujou kenbe

²³ pawòl ou. M'a chante, m'a jwe mizik sou gita mwen pou Bondye pèp Izrayèl la. M'a chante pou

ou. M'a rele sitèlman mwen kontan. M'a chante ak tout kè m' paske ou te delivre m'.²⁴ Tout lajounen m'a fè konnen jan ou pa nan patipri, paske moun ki te vle wè malè rive m' yo gen pou yo wont. Yo p'ap konn sa pou yo fè.

Chapter 72

¹ ¶ Se yon sòm Salomon. Bondye, moutre wa a jan pou l' dirije tankou ou! Bay pitit wa a pouvwa pou l' gouvènen jan ou vle l' la!² ¶ Konsa, l'a gouvènen pèp ou a san patipri, l'a gouvènen malere ou yo jan sa dwe fèt.³ Nan tout mòn peyi a, moun va viv byen yonn ak lòt. p'ap gen lenjistis nan okenn ti mòn peyi a.⁴ Wa a va defann kòz malere ki nan peyi a. L'a wete pitit pòv malere yo nan mizè yo ye a. L'a kraze moun k'ap peze pèp la.⁵ Se pou l' viv lontan, tout tan va gen solèy ak lalin pou bay limyè. Wi, se pou li viv tout tan tout tan.⁶ Se pou wa a tankou lapli k'ap tonbe nan jaden, tankou gwo lapli k'ap wouze tè a.⁷ Sou reny li, ap gen jistis toupatou. Tout moun va viv byen yonn ak lòt tout tan va gen lalin pou bay limyè.⁸ L'ap gouvènen depi yon lanmè jouk nan lòt lanmè a, depi larivyè Lefrat jouk nan dènnye bout latè a.⁹ Moun ki rete nan dezè a pral soumèt devan li, lènmi l' yo pral manje pousyè.¹⁰ Wa peyi Tasis ak wa zile yo va vin ofri l' kado. Wa peyi Saba ak wa peyi Seba va pote kado ba li.¹¹ Wa tout lòt peyi yo va soumèt devan li. Tout lòt peyi yo va sèvi l'.¹² L'a delivre pòv yo lè yo rele nan pye li. L'a delivre tout malere ki san sekou.¹³ L'a gen pitye pou pòv malere yo. L'a sove lavi tout moun ki nan bezwen.¹⁴ L'a delivre yo anba men moun k'ap peze yo, anba men moun k'ap fè yo mechanste. Lavi moun sa yo gen anpil valè pou li!¹⁵ Se pou wa a viv lontan! Y'a ba li lò ki soti nan peyi Saba. Y'a toujou lapriyè pou li. Y'a mande pou Bondye beni li chak jou.¹⁶ Se pou jaden kouvri tout peyi a, jouk sou tèt mòn yo. Se pou yo donnen tankou jaden peyi Liban. Se pou lavil yo plen moun tankou zèb k'ap pouse nan jaden.¹⁷ Se pou yo pa janm bliye non li. Toutotan va gen solèy pou klere tè a, se pou y'ap nonmen non li. Se pou tout nasyon fè lwanj li. Se pou tout moun mande Bondye pou l' beni yo menm jan li beni wa a.¹⁸ ¶ Fè lwanj Seyè a, Bondye pèp Izrayèl la. Se li menm sèl ki ka fè bèl mèvèy sa yo.¹⁹ Fè lwanj li pou gwo pouvwa li. Se pou toupatou sou latè yo rekonèt gwo pouvwa li. Wi, se vre! Amèn!²⁰ Avèk sòm sa a, nou fini ak lapriyè David, pitit Izayi a, te fè.

Chapter 73

¹ ¶ Se yon sòm Asaf. Wi, Bondye bon pou pèp Izrayèl la, pou moun ki pa gen move bagay sou konsyans yo. ² Men, pye m' glise, li manke chape, ti kras mwen tonbe, ³ paske mwen te anvye sò moun k'ap fè grandizè yo lè mwen te wè jan mechan yo alèz. ⁴ Yo pa gen pwoblèm, yo pa malad, yo byen gra. ⁵ Yo pa souffri sa lòt moun ap souffri. Yo pa gen pwoblèm lòt yo genyen. ⁶ Yo pran pòz pa kanmarad pesonn, y'ap plede bat moun. ⁷ Kè yo plen mechanste. Yo plen move plan nan tèt yo. ⁸ Y'ap pase lòt moun nan rizib, y'ap pale move pawòl. Yo awogan, y'ap plede mache di jan y'ap kraponnen moun. ⁹ Yo pale Bondye ki anwo nan syèl la mal, y'ap bay tout lòt moun lòd avèk awogans. ¹⁰ Se konsa, menm pèp Bondye a fè bann ak yo, yo vale tou sa yo di yo san di yon mo. ¹¹ Epi yo di: -Ki jan pou Bondye fè konnen? Moun ki anwo nan syèl la, ki bò l' ta pase pou li konnen? ¹² Wi, men ki jan mechan yo ye: Yo toujou alèz, y'ap anpile richès sou riches. ¹³ Nan kondisyon sa a, gen lè se pou gremesi mwen kenbe kò m' pou m' pa fè move bagay? Se pou gremesi mwen refize mete men m' nan move zafè? ¹⁴ Se tout lajounen, Bondye, w'ap fè m' souffri. Chak maten, ou la pou pini mwen. ¹⁵ ¶ Si m' di nan kè m': Bon, m'ap pale tankou mechan yo! Si m' fè sa, se trayi mwen ta trayi moun k'ap sèvi ou yo. ¹⁶ Se konsa mwen kalkile anpil pou m' konprann bagay sa a. Men, se pa t' bagay fasil menm pou mwen, ¹⁷ jouk lè mwen te al antre lakay ou, pou m' wè jan mechan yo gen pou yo fini. ¹⁸ Wi, ou mete yo sou yon chemen glise, ou fè yo tonbe, epi yo fini. ¹⁹ Kisa ou konprann? Anvan ou bat je ou yo fini, yo disparèt sitèlman yo pè. ²⁰ Seyè, yo tankou yon rèv pou ou. Leve ou leve, ou bliye sa. ²¹ ¶ Lè sa a, mwen santi m' dekouraje; sa te fè m' mal anpil. ²² Mwen te sòt, mwen pa t' konprann anyen. Mwen te tankou yon bèt devan ou. ²³ Mwen menm, mwen toujou la avèk ou, ou kenbe men m' pou m' pa tonbe. ²⁴ Ou ban m' konsèy pou m' pa pèdi chemen m'. Lèfini, ou resevwa m' lakay ou. ²⁵ Se ou menm sèl mwen gen nan syèl la. Mwen pa gen lòt. Se ou ki tout plezi m' sou latè. ²⁶ Kò m' te mèt ap deperi, lespri m' te mèt ap gaga, se ou menm menm, Bondye, ki tout fòs mwen, se ou menm ki tout mwen. ²⁷ Se vre wi, moun ki vire do ba ou pral mouri, w'ap fini nèt ak moun ki pa kenbe pawòl yo gen avè ou. ²⁸ Mwen

menm, sa bon nèt pou m' rete bò kot Bondye: Se nan Seyè a mwen jwenn pwoteksyon. M'a fè konnen tou sa li fè.

Chapter 74

¹ ¶ Se yon chante Asaf. Bondye, poukisa ou lage nou nèt konsa? Poukisa ou an kolè konsa sou moun pa ou yo, sou mouton ki nan savann ou yo? ² Pa bliye pèp ou te chwazi depi nan tan lontan an, pèp ou te achte pou ou te fè yo tounen moun pa ou! Pa bliye mòn Siyon kote ou te chwazi pou rete a! ³ vin wè sa ki rete apre ravaj la! Lènmi nou yo fin kraze dènye bagay nan kay ki apa pou ou a. ⁴ Moun ki pa vle wè ou yo, yo kanpe nan mitan kote pèp ou konn reyini an, y'ap rele byen fò. Yo wete tou sa ki nan tanp lan, yo mete drapo pa yo. ⁵ Yo tankou moun k'ap voye kout rach pou koupe pyebwa nan yon gwo rak. ⁶ Yo kraze bout bèl panno bwa byen travay ki te nan tanp lan, anba kout rach ak kout mato. ⁷ Yo mete dife nan kay ki apa pou ou a, yo derespekte kote yo fè sèvis pou ou a, yo kraze l' vide atè. ⁸ Nan kè yo yo te di: Ann kraze yo tout yon sèl kou! Yo boule tout kote ki te apa pou Bondye nan peyi a! ⁹ Tout bèl bagay ki te nan tanp lan disparèt. Pa gen pwofèt ankò. Pesonn pa konnen kilè sa va chanje. ¹⁰ Bondye, kilè moun k'ap pile nou anba pye yo va sispann joure? Gen lè lènmi yo p'ap janm gen respè pou non ou? ¹¹ Poukisa ou derefize ede nou? Poukisa ou rete kanpe ap gade, de bra ou kwaze? ¹² ¶ Men, Bondye, se ou ki wa nou depi nan tan lontan. Ou fè nou genyen anpil batay sou latè. ¹³ Se avèk pouvwa ou ou te fann lanmè a. Se avè l' ou te kraze tèt gwo bèt lanmè yo. ¹⁴ Se ou ki kraze tèt levyatan an, lèfini, ou fè bèt k'ap viv nan dezè a manje l'. ¹⁵ Ou te fè sous dlo pete, ou fè larivyè koule. Ou fe gwo larivyè rete konsa yo chèch. ¹⁶ Ou fè lajounen, ou fè lannwit. Se ou ki mete lalin lan ak solèy la nan plas yo. ¹⁷ Se ou ki fikse limit tè a. Se ou ki fè sezon chalè ak sezon fred. ¹⁸ ¶ Seyè, pa bliye jan lènmi ou yo ap pase ou nan rizib. Se yon bann moun san konprann ki pa gen respè pou non ou! ¹⁹ Pa lage pèp ou nan men lènmi l' yo tankou toutrèl devan malfini. Pa bliye moun pa ou yo ki nan mizè nèt. ²⁰ Chonje ²¹ kontra ou te siyen avèk yo a! Paske, nan tout ti kwen peyi a, nan tout mòn yo se ansasen. Pa kite

moun y'ap peze yo wont! Fè pou pòv malere yo ka fè lwanj ou. ²² Leve non, Bondye! Defann kòz ou! Pa bliye jan moun fou sa yo ap joure ou tout lajounen! ²³ Pa bliye jan lènmi ou yo ap rele byen fò! Pa bliye jan moun ki pa vle wè ou yo ap fè eskandal san rete.

Chapter 75

¹ ¶ (75:1) Pou chèf sanba yo. Se pou yo chante l' sou menm lè ak chante ki di: Pa detwi. Sòm Asaf sa a se yon chante li ye. (75:2) N'ap fè lwanj ou, Bondye! N'ap fè lwanj ou! Se tout tan n'ap nonmen non ou! N'ap fè konnen bèl mèvèy ou fè yo! ² (75:3) Bondye di: -Mwen fikse yon dat pou jijman an. Lè sa a, m'a jije jan sa dwe fèt. ³ (75:4) Nou te mèt wè latè a ansanm ak tout sa k'ap viv sou li yo pran tranble, m'ap kenbe fondasyon li yo byen fèm. ⁴ (75:5) M'ap di moun k'ap fè grandizè yo: Sispann gonfle lestonmak nou! M'ap di mechan yo: Sispann fè awogans! ⁵ (75:6) Pa gonfle lestonmak nou konsa! Pa fè awogans konsa sou Bondye ki anwo nan syèl la! ⁶ ¶ (75:7) Jijman an pa soti bò kote solèy leve a, ni bò kote solèy kouche a. Li pa soti nan nò ni nan sid. ⁷ (75:8) Non. Se Bondye k'ap jije: L'ap bese yonn, l'ap leve yon lòt. ⁸ (75:9) Seyè a kenbe yon gode nan men l'. Gode a plen divès kalite tranpe ki fèt ak diven. L'ap vide diven bay tout mechan ki sou latè, y'ap bwè, y'ap bwè san yo pa kite yon ti tak. ⁹ (75:10) Mwen menm, mwen p'ap janm sispann nonmen non Bondye Jakòb la. Mwen p'ap janm sispann chante pou fè lwanj li. ¹⁰ (75:11) L'a kraze fòs kouraj mechan yo. Men, l'ap bay moun ki mache dwat yo plis kouraj ankò!

Chapter 76

¹ ¶ (76:1) Pou chèf sanba yo. Se sou enstriman akòd pou yo jwe mizik la. Sòm Asaf sa a, se yon chante li ye. (76:2) Yo konnen ki moun Bondye ye nan tout peyi Jida. Se tout moun k'ap nonmen non l' nan peyi Izrayèl. ² (76:3) Li gen kay li lavil Salèm, li rete sou mòn Siyon. ³ (76:4) Se la li te kase flèch yo, se la li te kase zam yo gen pou defann yo, ak zam yo gen pou atake. Wi, li kase tout zam moun sèvi pou fè lagè. ⁴ (76:5) Gade jan ou gen pouvwa, Bondye! Gade jan w'ap mache tèt wo, lè w'ap desann soti nan mòn kote ou te kraze lènmi ou yo! ⁵ (76:6) Sòlda ki te gen anpil

kouraj nan lagè pèdi tout zafè yo. Koulye a y'ap dòmi nèt, yo mouri. Pa gen yonn nan vanyan gason sa yo ki te ka defann tèt yo. ⁶ (76:7) Aa, Bondye Jakòb! Depi ou fè va sou yo, ni kavalye ni chwal, yo tout yo tonbe, yo mouri frèt. ⁷ ¶ (76:8) Men ou menm, ou fè moun respekte ou! Kilès ki ka rete kanpe devan ou lè ou an kòlè? ⁸ (76:9) Ou rete nan syèl la, ou fè konnen jan w'ap jije. Tout moun ki sou latè rete dousman tèlman yo pè, ⁹ (76:10) lè Bondye leve pou bay santans li, pou l' delivre tout malere y'ap peze sou tè a. ¹⁰ (76:11) Menm lè lèzòm an kòlè, sa sèvi yon lwanj pou ou. Moun ou sove anba lanmò va fè fèt pou ou. ¹¹ (76:12) Fè pwomès ou bay Seyè a ki Bondye, epi kenbe pawòl ou. Nou menm, tout nasyon ki bò kote l' yo, pote kado bay Bondye ki fè moun respekte l' la. ¹² (76:13) Li kraze lògèy chèf yo, li fè wa latè yo respekte l'.

Chapter 77

¹ ¶ (77:1) Pou chèf sanba yo. Pou Jedoutoun. Se yon sòm Asaf. (77:2) Mwen rele byen fò nan pye Bondye. Wi, mwen rele nan pye Bondye, li koute mwen. ² (77:3) Lè mwen nan tray, mwen lapriyè nan pye Seyè a. Tout lannwit m'ap lapriyè san rete, mwen pa ka jwenn konsolasyon. ³ (77:4) Mwen chonje Bondye, m'ap plenn! M'ap kalkile, mwen santi m' dekouraje! ⁴ (77:5) Ou fè m' rete je klè, mwen sitèlman boulvèse, mwen pa ka pale. ⁵ (77:6) M'ap chonje tan lontan, wi, m'ap chonje lanne pase anwo yo. ⁶ (77:7) Mwen pase nwit ap repase chante yo, m'ap kalkile anpil nan kè m', m'ap egzaminen, m'ap di: ⁷ (77:8 -)Eske Seyè a voye m' jete nèt? Eske li p'ap janm kontan avè m' ankò? ⁸ (77:9) Eske Bondye pa gen bon kè ankò? Eske li p'ap kenbe pawòl li ankò? ⁹ (77:10) Eske Bondye bliye gen pitye? Eske lè li ankòlè li pa pran priyè? ¹⁰ (77:11) Apre sa mwen di: Men sak fè m' pi mal ankò! Gen lè Bondye ki anwo nan syèl la pa menm jan an ankò? ¹¹ ¶ (77:12) Seyè, m'a rakonte gwo bagay ou te fè yo, paske mwen chonje bèl mèvèy ou te fè nan tan lontan. ¹² (77:13) M'ap kalkile tout sa ou te fè yo, m'ap egzaminen tout gwo bagay estwòdenè ou te fè yo! ¹³ (77:14) Tout sa ou fè, Bondye, se bagay apa! Nan tout bondye yo, nanpwen ki gen pouvwa tankou ou! ¹⁴ (77:15) Ou se Bondye ki fè mèvèy. Ou fè nasyon yo wè pouvwa ou. ¹⁵ (77:16) Avèk fòs ponyèt

ou ou te delivre pèp ou a, pitit pitit Jakòb yo ak pitit pitit Jozèf yo. ¹⁶ (77:17) Lè dlo yo wè ou,
 Bondye, dlo yo soti pè. Lè dlo yo wè ou, fon lanmè yo pran tranble. ¹⁷ (77:18) Nwaj yo pran vide
 gwo lapli, kout loraj pran woule nan nwaj yo, kout zèklè fè yanyan nan tout syèl la. ¹⁸ (77:19) Bri
 loraj la pran woule nan syèl la. Kout zèklè klere toupatou. Tè a soti pè, li pran tranble. ¹⁹ (77:20)
 Ou louvri yon chemen pou ou nan mitan lanmè a. Ou pase nan mitan gwo lanmè fon fon an. Men
 pesonn pa ka wè mak pye kote ou pase. ²⁰ (77:21) Ou pran Moyiz ak Arawon, ou fè yo mennen
 pèp ou a tankou yon bann mouton y'ap mennen.

Chapter 78

¹ ¶ Se yon chante Asaf. Pèp mwen yo, koute sa m'ap moutre nou! Louvri zòrèy nou pou n' tande
 sa m'ap di! ² Mwen pral pale ak nou, pou m' fè nou konnen sa ki te pase nan tan lontan, ³ bagay
 nou te tande nan zòrèy nou, bagay nou tout te konnen, bagay zansèt nou yo te konn rakonte nou.
⁴ Nou p'ap kache bagay sa yo pou pitit nou yo pa konnen yo. N'ap fè Iwanj Seyè a devan timoun
 k'ap vini yo. N'ap fè yo konnen jan l' gen pouvwa, jan l' gen fòs, jan li fè gwo mèvèy. ⁵ Li te di pèp
 Izrayèl la sa pou li fè. Li te bay pitit pitit Jakòb yo kòmandman li yo. Li te mande zansèt nou yo
 pou yo te moutre pitit yo lalwa Bondye a, ⁶ pou timoun ki fenk fèt yo ka konnen l', pou yo menm
 tou, lè yo grandi, yo ka fè pitit pa yo konnen l'. ⁷ Konsa yo menm tou, y'a mete konfyans yo nan
 Bondye. Yo p'ap bliye sa li te fè. Y'a toujou obeyi kòmandman li yo. ⁸ Konsa yo p'ap tankou zansèt
 yo ki te fè tèt ak Bondye, ki te derefize fè sa li te mande yo fè, ki pa t' janm gen yon konfyans fèm
 nan Bondye, ki pa t' kenbe pawòl yo ak Bondye. ⁹ ¶ Pitit Efrayim yo se moun ki konn goumen, ki
 fò nan tire flèch. Men, yo kouri lè batay mare. ¹⁰ Yo pa t' kenbe kontra Bondye te pase ak yo a.
 Yo derefize fè sa li te mande yo fè. ¹¹ Yo fè espere, yo bliye sa li te fè, tout mèvèy li te fè yo wè.
¹² Wi, se devan je zansèt yo Bondye te fè mirak nan peyi Lejip, nan plenn Zoan an. ¹³ Li fann
 lanmè a an de, li fè yo pase nan mitan l'. Li fè dlo yo kanpe dwat tankou miray. ¹⁴ Pou l' moutre
 yo chemen pou yo pran, lajounen li ba yo yon nwaj, lannwit li ba yo yon dife ki t'ap mache devan
 yo. ¹⁵ Li fann gwo wòch nan dezè a, li ba yo kont dlo pou yo bwè. ¹⁶ Li fè sous dlo pete nan wòch
 la, li fè dlo koule tankou dlo larivyè. ¹⁷ Men, yo pa t' sispann fè peche kont Bondye, yo revòlte

dèyè Bondye ki anwo nan syèl la, lè yo te nan dezè a. ¹⁸ Yo te vle sonde Bondye: yo mande pou
 l' ba yo manje yo te vle manje a. ¹⁹ Yo pale Bondye mal, yo di: -Eske Bondye ka mete manje sou
 tab nan mitan dezè sa a? ²⁰ Wi, se vre. Li frape wòch la: Dlo koule kou larivyè. Men, èske li kapab
 ban nou pen? Eske li ka bay pèp li a vyann? ²¹ Lè Seyè a tande sa, li fè kòlè. Se te tankou yon dife
 li te limen dèyè pitit Jakòb yo. Li vin ankòlè anpil sou yo, ²² paske yo pa t' gen konfyans nan
 Bondye, yo pa t' kwè li ta kapab delivre yo. ²³ Li pale ak nwaj yo ki anwo nan syèl la, li ba yo lòd
 pou yo louvri pòt syèl la. ²⁴ Li grennen laman sou yo pou yo manje. Li ba yo manje farin ki soti
 nan syèl la. ²⁵ Se konsa, yo manje manje zanj Bondye yo. Li ba yo manje pou yo manje plen vant
 yo. ²⁶ Lèfini, li fè yon van lès soufle nan syèl la. Avèk pouvwa li, li fè yon van leve soti nan sid.
²⁷ Li grennen vyann sou yo tankou pousyè. Li fè zwazo soti nan syèl la tonbe atè, tankou sab bò
 lanmè. ²⁸ Li fè yo tonbe nan mitan kote yo te rete a, tout bò kay yo. ²⁹ Yo tout te manje plen vant
 yo. Bondye ba yo tou sa yo te anvi. ³⁰ Men, yo pa t' ankò fin manje, yo pa t' ankò fin plen vant yo,
 manje a te nan bouch yo toujou, ³¹ lè Bondye fache sou yo. Li touye pi gwonèg nan mitan yo, li
 kraze tout jenn gason nan peyi Izrayèl la. ³² Atousa, pèp la donnen pi rèd nan fè peche. Yo pa t'
 vle kwè nan mirak sa yo. ³³ Se konsa, li fè lavi yo disparèt tankou lafimen. Li sezi yo, yo mouri
 frèt. ³⁴ Li te fè detwa ladan yo mouri. Se lè sa a yo tounen vin jwenn li, yo chanje lavi yo, yo lapriyé
 nan pye li. ³⁵ Yo vin chonje se Bondye ki te pwoteksyon yo. Se Bondye anwo nan syèl la ki te
 delivre yo. ³⁶ Men, tout bèl pawòl sa yo, se te manti. Tou sa yo t'ap di a, se te pawòl nan bouch.
³⁷ Yo pa t' sensè avè li, yo pa t' kenbe kontra li te pase ak yo. ³⁸ Men, paske Bondye te gen pitye
 pou yo, li padonnen peche yo, li pa t' touye yo. Anpil fwa menm, li kenbe, li pa t' fè kòlè sou yo.
³⁹ Li pa t' kite kòlè l' tonbe sou yo. Li chonje se moun yo ye, se pase y'ap pase tankou van k'ap
⁴⁰ soufle. ¶ Men, se pa ni de ni twa fwa yo te leve dèyè li nan dezè a! Se pa ni de ni twa fwa yo te
⁴¹ fè l' fè kòlè! Se tout tan yo t'ap tante Seyè a! Se tout tan yo t'ap pwovoke Bondye pèp Izrayèl
⁴² la, ki yon Bondye apa! Yo bliye jan li gen pouvwa. Yo bliye lè li te sove yo anba lènmi yo,
⁴³ lè li te fè gwo mirak ak bèl mèvèy nan peyi Lejip, nan plenn Zoan an. ⁴⁴ Li fè dlo larivyè yo

tounen san. Pesonn pa t' ka bwè dlo sa yo. ⁴⁵ Li voye mouchavè sou yo pou devore yo. Li voye
 krapo pou detwi yo. ⁴⁶ Li voye krikèt vèt pou manje rekòt yo, chwalbwa pou devore tout jaden
 yo. ⁴⁷ Li touye pye rezen yo ak lagrèl, li touye pye sikomò yo ak fredri. ⁴⁸ Li touye tout bèt jaden
 nan savann yo ak lagrèl, li touye bann mouton yo ak loray. ⁴⁹ Li te ankòlè anpil sou yo, li te move,
 li te fache. Li fè anpil malè tonbe sou yo. Li voye yon lame zanj pou detwi yo. ⁵⁰ Li kite kòlè l'
 pase sou yo, li pa t' sove lavi yo yonn. Li lage yon epidemi ki t'ap fini ak yo. ⁵¹ Li touye tout premye
 pitit gason ki nan peyi Lejip la, tout premye pitit gason nan laras Kam lan. ⁵² Lèfini, tankou yon
 bann mouton, li mennen pèp li ale, li kondi yo nan mitan dezè a. ⁵³ Li mennen yo san danje san
 malè. Yo pa t' bezwen pè anyen. Men, lanmè a te kouvri tout lènmi yo. ⁵⁴ Li fè yo rive sou fwontyè
 peyi li te chwazi pou li a, toupre mòn li te pran ak fòs kouraj li a. ⁵⁵ Li mete lòt nasyon yo deyò
 pou bay pèp li a plas. Li separe tè a, li bay chak branch fanmi Izrayèl la pa yo. Li kite yo moute
 kay yo kote lènmi yo te rete. ⁵⁶ Men, yo kenbe tèt ak Bondye ki gen tout pouvwa a. Yo t'ap wè
 jouk ki bò li te ye ak yo: Yo pa fè sa li te mande yo fè! ⁵⁷ Yo pa kenbe pawòl yo. Yo vire do ba li
 tankou zansèt yo te fè. Yo pati sou move pye, yo mal derape. ⁵⁸ Yo fè l' fache paske yo bati tanp
 pou lòt bondye yo, yo pòte l' fè jalouzi poutèt vye zidòl yo. ⁵⁹ Bondye fache lè li wè sa. Se konsa
 li voye pèp Izrayèl la jete. ⁶⁰ Li kite kay li te genyen Silo a, kote li t'ap viv pami moun sou latè a.
⁶¹ Li kite lènmi yo pran Bwat Kontra a, ki te garanti pouvwa li ak fòs li nan mitan yo, li kite yo
 pote l' ale. ⁶² Li te fache nèt sou pèp li a, li kite lènmi touye yo nan lagè. ⁶³ Jenn gason yo mouri
 nan dife. Jenn fi yo pa jwenn pesonn pou marye ak yo. ⁶⁴ Tout prèt yo mouri anba kout nepe. Vèv
 yo pa t' kriye pou yo. ⁶⁵ Se lè sa a Seyè a leve, tankou si li t'ap leve nan dòmi. Li parèt tankou yon
 vanyan gason ki anba gwòg li. ⁶⁶ Li frape lènmi yo, li fè yo kouri. Li fè yo wont pou tout tan. ⁶⁷ Li
 voye pitit Jozèf yo jete, li pa t' chwazi branch fanmi Efrayim lan. ⁶⁸ Li chwazi branch fanmi Jida
 a pito, ansanm ak mòn Siyon li renmen anpil lan. ⁶⁹ Se la li bati tanp li a ki pòtre ak kay li nan syèl
 la. Li fè l' solid tankou latè, pou tout tan. ⁷⁰ Li te chwazi David, yon moun ki t'ap sèvi l'. Li wete
 l' dèyè mouton li t'ap okipe yo, ⁷¹ dèyè manman mouton ki gen pitit dèyè yo, li fè l' wa sou pitit

Jakòb yo. Li mete l' gadò pèp Izrayèl la. ⁷² David pran swen yo ak tout kè li. Li kondi yo avèk anpil ladrès.

Chapter 79

¹ ¶ Se yon sòm Asaf. Bondye, moun lòt nasyon yo anvayi peyi pèp ou a! Yo antre nan kay ki apa pou ou a, yo derespekte li. Yo fè lavil Jerizalèm tounen yon pil wòch. ² Yo kite kadav moun k'ap sèvi ou yo pou zwezo nan syèl vin manje. Yo kite kadav moun k'ap viv pou ou yo pou bèt bwa vin manje. ³ Yo fè san pèp ou a koule tankou dlo larivyè. San an koule tankou dlo nan tout lavil Jerizalèm. pa t' gen pesonn pou antere kadav yo! ⁴ Ou fè nasyon ki bò kote nou yo ap pase nou nan betiz. Wi, yo tout ap lonje dwèt sou nou, y'ap pase nou nan rizib. ⁵ Seyè! jouk kilè w'ap rete fache ak nou? Gen lè se pou tout tan? Eske w'ap kite kòlè ou boule nou tankou dife? ⁶ ¶ Mete ou ankòlè sou nasyon ki pa konnen ou yo, sou pèp ki p'ap sèvi ou yo. ⁷ Paske, se yo menm ki fin touye pitit Jakòb yo, yo fin ravaje peyi kote yo rete a. ⁸ Tanpri, pa pini nou pou peche zansèt nou yo te fè. Gen pitye pou nou! Prese vin ede nou, paske nou fin dekouraje nèt. ⁹ O Bondye, ou menm ki delivrans nou, fè konnen se ou ki gen pouvwa! vin pote nou sekou. Delivre nou, padonnen peche nou yo pou moun ka fè lwanj ou. ¹⁰ Poukisa moun lòt nasyon yo ap mande nou: -Kote Bondye nou an! Fè yo wè, devan je nou, jan w'ap pini moun ki te fè san sèvitè ou yo koule! ¹¹ Koute jan prizonye yo ap plenn non! Avèk fòs ponyèt ou, delivre moun yo kondannen amò yo non. ¹² Seyè, rann moun lòt nasyon yo sèt fwa laparèy pou tout joure yo joure ou yo. ¹³ Lè sa a nou menm, pèp ou a, mouton ki nan savann ou yo, nou p'ap janm sispann di ou mèsì. Pitit an pitit, n'a fè lwanj ou.

Chapter 80

¹ ¶ (80:1) Pou chèf sanba yo. Se pou yo chante l' sou menm lè ak chante ki di: Bèl ti flè savann blan yo. Se pou yo jwe mizik la sou enstriman akòd. Se yon sòm Asaf. (80:2) Ou menm ki gadò pèp Izrayèl la, ou menm k'ap mennen pitit pitit Jozèf yo tankou bann mouton ou, panche zòrèy ou pou koute nou. Ou menm ki chita sou fotèy ou anwo zanj cheriben yo, parèt nan mitan gwo limyè

²
 ou la. (80:3) Fè pitit Efrayim, pitit Benjamen ansanm ak pitit Manase yo wè jan ou gen pouvwa.
³
 vin delivre nou. (80:4) Bondye, mete nou sou pye nou ankò! Fè nou santi ou la avèk nou, epi n'a
⁴
 delivre. (80:5) Seyè, Bondye ki gen tout pouvwa a, jouk kilè w'a rete fache sou pèp ou k'ap lapriyè
⁵
 nan pye ou? (80:6) Ou ba yo dlo k'ap koule sot nan je yo pou sèvi yo manje. Ou ba yo gwo gode
⁶
 plen dlo k'ap soti nan je yo pou yo bwè. (80:7) Ou kite nasyon ki bò kote nou yo ap goumen yonn
⁷
 ak lòt poutèt nou. Ou kite lènmi nou yo ap pase nou nan rizib. (80:8) Bondye ki gen tout pouvwa,
⁸
 mete nou sou pye nou ankò. Fè nou santi ou la avèk nou, epi n'a delivre. ¶ (80:9) Ou rache yon
⁹
 pye rezen nan peyi Lejip, ou mete anpil nasyon deyò, ou plante l' nan plas yo. (80:10) Ou pare
 yon moso tè kote pou l' te grandi. Li pouse gwo rasin byen fon, branch li yo kouvri tout peyi a.
¹⁰
 (80:11) Lonbraj li te kouvri tout mòn yo, branch li yo kouvri tout gwo pye sèd yo. ¹¹ (80:12)
 Branch li yo rive jouk bò lanmè Mediterane, jouk bò larivyè Lefrat. ¹² (80:13) Poukisa ou lage
¹³
 lantouraj li yo atè konsa, kifè koulye a nenpòt moun k'ap pase vin vòlè rezen li yo? (80:14)
¹⁴
 Kochon mawon fin raboure rasin li yo, bèt nan bwa ap manje tout fèy li yo. (80:15) Bondye, ou
 menm ki gen tout pouvwa, tounen vin jwenn nou non! Kote ou ye nan syèl la, gade sak rive nou!
¹⁵
 Pran ka pye rezen ou lan non! (80:16) vin sove pye rezen ou menm ou te plante a, ti pye rezen
¹⁶
 ou fè tounen yon gwo pyebwa a. (80:17) Lènmi nou yo mete dife ladan l', yo koupe tout branch
¹⁷
 li yo. Fè kòlè! Annik gade yo, y'a peri! (80:18) Pwoteje peyi ou te fè tounen yon gwo peyi a!
¹⁸
 Pwoteje pèp ou te chwazi a! (80:19) Nou p'ap janm vire do ba ou ankò! Ban nou lavi ankò! N'a
¹⁹
 fè lwanj ou! (80:20) Bondye ki gen tout pouvwa a, mete nou sou pye nou ankò! Fè nou santi ou
 la avèk nou, epi n'a delivre!

Chapter 81

¹
 ¶ (81:1) Pou chèf sanba yo. Se sou lè chante yo chante lè y'ap kraze rezen. Se yon sòm Asaf.
 (81:2) Chante ak kè kontan pou Bondye ki tout defans nou! Fè fèt pou Bondye Jakòb la! ² (81:3)
³
 Konmanse chante a. Bat tanbouren yo! Jwe bèl mizik sou gita ak bandjo yo. (81:4) Kònen twonpèt

pou anonse fèt la, lè lalin lan nouvèl, ak lè li plenn!⁴ (81:5) Se yon lwa nan peyi Izrayèl, se yon
 lòd Bondye Jakòb la bay!⁵ (81:6) Bondye te fè sa tounen yon lwa pou pitit pitit Jozèf yo lè li te fè
 yo soti nan peyi Lejip la. Mwen tandè yon vwa mwen pa rekonèt ki di m' konsa:⁶ (81:7 -) Se mwen
 ki te wete gwo chay lou ki te sou zepòl nou an. Se mwen ki te fè nou mete panyen yo atè.⁷ (81:8)
 Lè nou te anba tray, nou te rele m', mwen te delivre nou. Mwen reponn nou nan loraj kote m' te
 kache a. Mwen te vle wè sou ki pye nou ye avè m', lè nou te bò sous dlo Meriba a.⁸ ¶ (81:9) Koute
 m' non lè m'ap avèti nou, pèp mwen! Pèp Izrayèl, poukisa nou pa vle koute m'!⁹ (81:10) Piga nou
 janm sèvi lòt bondye, pigas nou janm adore bondye lòt nasyon yo!¹⁰ (81:11) Se mwen menm ki
 Seyè a, Bondye nou an. Se mwen menm ki te fè nou kite peyi Lejip la. Louvri bouch nou, m'a plen
 l' ak pawòl mwen!¹¹ (81:12) Men, pèp mwen an pa koute m'. Pèp Izrayèl la pa obeyi m'.¹² (81:13)
 Lè m' wè sa, mwen kite yo swiv lide yo te gen nan tèt yo, mwen kite yo fè tou sa yo te vle fè.
¹³ (81:14) Ayayay! Si pèp mwen an te vle koute m'. Si pèp Izrayèl la te vle obeyi mwen!¹⁴ (81:15)
 Anvan yo ta bat je yo, mwen ta fè lènmi yo wont, mwen ta kraze tout lènmi yo.¹⁵ (81:16) Moun
 ki rayi Seyè a ta vin flate yo. Pèp Izrayèl la t'ap alèz pou tout tan.¹⁶ (81:17) Mwen ta ba yo pi bon
 kalite manje pou yo manje. Mwen ta plen vant yo ak bon siwo myèl ki soti nan twou wòch!

Chapter 82

¹ ¶ Se yon sòm Asaf. Bondye kanpe nan mitan konsèy ki nan syèl la, li kanpe nan mitan bondye
 yo, l'ap jije.² Li di: -Kilè n'a sispann fè mechanste lè n'ap jije? Kilè n'a sispann achte figi mechan
 yo?³ Pran defans pòv malere yo ak timoun ki san papa yo! Pran defans malere yo ak moun ki san
 sekou yo!⁴ Delivre pòv malere ak endijan yo! Delivre yo anba men mechan yo.⁵ Nou sòt, nou pa
 konprann anyen! N'ap mache nan fènwa. Pa gen jistis sou latè ankò!⁶ ¶ Mwen te di se bondye nou
 ye, nou tout se pitit Bondye ki anwo nan syèl la nou ye.⁷ Men, nou gen pou nou mouri tankou tout
 moun, wi, nou gen pou nou mouri tankou nenpòt chèf.⁸ Leve non, Bondye, vin jije latè! Paske, se
 pou ou tout nasyon yo ye.

Chapter 83

¹ ¶ (83:1) Chante sa a se yon sòm Asaf li ye. (83:2) O Bondye, pa rete ak bouch ou fèmen! Pa rete san ou pa di anyen, Bondye! Pa rete konsa san ou pa fè anyen! ² (83:3) Men li! Lènmi ou yo ap revòlte. Moun ki pa vle wè ou yo ap leve dèyè ou! ³ (83:4) Y'ap fè konplo an kachèt sou do pèp ou a, y'ap mete tèt yo ansanm sou do moun w'ap pwoteje yo. ⁴ (83:5) Yo di: -Vini non! Ann efase non yo pami nasyon yo, pou pesonn pa janm chonje peyi Izrayèl la ankò! ⁵ (83:6) Yo mete tèt yo ansanm, yo fè yon sèl lide: yo dakò pou yo fè bann sou do ou. ⁶ (83:7) Moun peyi Edon ansanm ak pitit pitit Izmayèl yo, moun peyi Moab ansanm ak pitit pitit Aga yo, ⁷ (83:8) moun peyi Gebal, moun peyi Amon ansanm ak moun peyi Amalèk yo, moun peyi Filisti ansanm ak moun lavil Tir, yo tout yo dakò. ⁸ (83:9) Moun peyi Lasiri yo tou fè bann ak yo, yo mete fòs yo ansanm ak pitit pitit Lòt yo. ⁹ ¶ (83:10) Sa ou te fè moun peyi Madyan yo, sa ou te fè Sisera ansanm ak Jabèn nan ravin Kichon an, se sa pou ou fè yo tou. ¹⁰ (83:11) Ou te kraze yo nan Andò, ou fè kadav yo tounen fimye pou tè a. ¹¹ (83:12) Sa ou te fè Orèb ak Zeèb, se sa pou ou fè chèf lame yo tou! Menm jan ou te kraze Zebak ak Salmouna, se konsa pou ou kraze chèf yo tou, ¹² (83:13) paske yo te di: -Ann pran peyi Bondye a pou nou. ¹³ (83:14) Bondye mwen, gaye yo tankou pousyè nan toubouyon, tankou pay van ap pote ale. ¹⁴ (83:15) Tankou dife k'ap boule nan rakbwa, tankou flanm dife k'ap mache boule mòn yo, ¹⁵ (83:16) se konsa pou ou kouri dèyè yo ak gwo van tanpèt ou a. Fè yo pè ak gwo van siklòn ou yo! ¹⁶ (83:17) Fè yo wont, fè yo blije kache figi yo, Seyè, pou yo ka chache konnen ou. ¹⁷ (83:18) Se pou yo wont nèt jouk yo pa konn sa pou yo fè. Se pou yo kouri kache, se pou yo mouri. ¹⁸ (83:19) Fè yo konnen se ou menm sèl ki Seyè, se ou menm ki sèl chèf sou tout latè.

Chapter 84

¹ ¶ (84:1) Pou chèf sanba yo. Se sou lè yon chante yo chante lè y'ap kraze rezen. Se yon sòm pitit Kore yo. (84:2) Ala bèl kay ou a bèl, Seyè ki gen tout pouvwa! ² (84:3) Jan mwen anvi wè

kay Seyè a sa! M'ap deperi sitèlman m' anvi al lakay Seyè a. M'ap chante, m'ap fè fèt pou Bondye vivan an. ³ (84:4) Menm ti zwezo jwenn kote pou yo rete, menm iwondèl jwenn nich pou mete pitit yo: Se toupre lotèl ou yo, Seyè ki gen tout pouvwa, ou menm ki Bondye mwen, ou menm ki wa mwen! ⁴ (84:5) Ala bon sa bon pou moun k'ap viv lakay ou yo! Yo toujou ap fè lwanj ou. ⁵ (84:6) Ala bon sa bon pou moun ki mete konfyans yo nan ou, pou moun ki fè lide ale sou Mòn Siyon an! ⁶ (84:7) Lè y'ap pase nan mitan Fon Sèk la, yo fè l' tounen yon kote ki plen sous dlo. Anvan yon ti lapli tonbe, tout jaden bèl. ⁷ (84:8) Plis y'ap mache, se plis y'ap gen fòs. Yo gen pou yo parèt devan Bondye sou mòn Siyon an. ⁸ ¶ (84:9) Seyè, Bondye ki gen tout pouvwa a, koute lapriyè mwen. Bondye Jakòb la, panche zòrèy ou pou tande m'. ⁹ (84:10) Bondye, ou menm ki tout pwoteksyon nou, voye benediksyon ou sou wa ou te chwazi pou nou an! ¹⁰ (84:11) Yon jou pase anndan lakay ou pi bon pase mil jou pase nenpòt lòt kote. Mwen ta pito rete kanpe nan papòt kay Bondye a pase pou m' ta rete anndan kay mechan yo. ¹¹ (84:12) Paske, se Seyè a ki tout defans mwen, se li menm k'ap pwoteje nou. L'ap ban nou favè li, l'ap fè yo respekte nou. Lè yon moun ap mennen yon vi ki san repwòch, Bondye p'ap janm refize l' okenn bon bagay. ¹² (84:13) Bondye ki gen tout pouvwa, ala bon sa bon pou moun ki mete konfyans yo nan ou!

Chapter 85

¹ ¶ (85:1) Pou chèf sanba yo. Se yon sòm pitit Kore yo. (85:2) Seyè, ou te bon pou peyi ou la! Ou te mennen pitit Jakòb ki te prizonye yo tounen! ² (85:3) Ou te padonnen tou sa yo te fè ki mal, ou te efase tout peche yo. ³ (85:4) Ou pa t' fache sou yo ankò! Ou te sispann fè kòlè sou yo! ⁴ (85:5) Mete nou kanpe sou de pye nou ankò! O Bondye, ou menm ki delivrans nou! Ou pa bezwen fache sou nou ankò! ⁵ (85:6) Eske w'ap toujou rete fache sou nou? Eske ou p'ap janm byen ak nou ankò? ⁶ (85:7) Eske ou p'ap ban nou lavi ankò, pou pèp ou ka fè fèt pou ou? ⁷ (85:8) Seyè, fè nou wè jan ou renmen nou! Delivre nou non! ⁸ ¶ (85:9) M'ap koute sa Seyè, Bondye a, ap di: Li pale ak pèp li a, ak moun ki kenbe l' fèm yo, li pwomèt pou l' fè yo viv ak kè poze, depi yo pa janm lage kò yo nan fè betiz ankò. ⁹ (85:10) Wi, li pare pou l' delivre moun ki gen krentif pou li, pou l' fè yo santi pouvwa li, pou l' toujou la avèk yo. ¹⁰ (85:11) Lè sa a nan peyi a, moun yo yonn va renmen lòt,

pesonn p'ap bay lòt manti ankò. Moun va viv byen yonn ak lòt, pesonn p'ap fè lòt lenjistis ankò!
¹¹ (85:12) Sou latè moun p'ap vire do bay Bondye. Bondye menm, bò pa li, va rete nan syèl la, l'a
 gade anba san patipri. ¹² (85:13) Seyè a va fè nou jwenn tout kalite bon bagay. Jaden nou yo va
 bay bèl rekòt. ¹³ (85:14) Moun k'ap mache dwat yo va pran devan. Kote yo pase moun ap viv byen
 yonn ak lòt.

Chapter 86

¹ ¶ Se yon lapriyè David te fè. Seyè, tanpri panche zòrèy ou bò kote m', reponn mwen, paske
 se yon pòv malere san sekou mwen ye. ² Pa kite m' mouri, paske mwen fè tou sa ou mande m' fè.
 Bondye mwen, delivre m' non, paske se ou menm m'ap sèvi, se nan ou menm sèl mwen mete
 konfyans mwen. ³ Gen pitye pou mwen, Seyè, paske se tout lajounen m'ap kriye nan pye ou! ⁴ Fè
 kè sèvitè ou la kontan, Seyè, paske se ou menm mwen rele lè m'ap lapriyè! ⁵ Seyè, ala bon ou bon!
 Ou padonnen peche nou yo. Ou p'ap janm sispann renmen moun k'ap rele non ou. ⁶ Seyè, koute
 m' non lè m'ap lapriyè! Tande m' non lè m'ap rele mande sekou! ⁷ Lè m' nan tray, se ou menm
 mwen rele, paske ou toujou reponn mwen. ⁸ ¶ Seyè, nan tout bondye yo, pa gen tankou ou! Pa gen
 yonn ki ka fè sa ou menm ou fè! ⁹ Tout nasyon ou te fè yo va vin bese tèt devan ou! Y'a fè lwanj
 ou, ¹⁰ paske se ou menm, Bondye, ki gen pouvwa, se ou menm ki fè bèl mèvèy sa yo. Se ou menm
 sèl ki Bondye. ¹¹ Seyè, moutre m' jan ou vle m' viv la. M'a toujou obeyi ou nan tout sikonstans.
 Moutre m' jan pou m' sèvi ou avèk krentif. ¹² Seyè, Bondye mwen, m'ap fè lwanj ou ak tout kè m',
 mwen p'ap janm sispann fè konnen jan ou gen pouvwa! ¹³ Ala renmen ou renmen mwen! Ou wete
 m' nan bouch twou a. ¹⁴ Bondye, yon bann awogan leve dèyè m'! Yon kantite mechan soti pou yo
 touye m'! Yo pa menm chonje si gen Bondye! ¹⁵ Seyè, ou se yon Bondye ki gen pitye pou nou,
 yon Bondye ki gen bon kè. Ou pa fasil fè kòlè, ou p'ap janm sispann renmen nou, ou toujou kenbe
 pawòl ou! ¹⁶ Voye je ou sou mwen. Gen pitye pou mwen! Ban m' fòs ankò, delivre m', paske mwen
 se pitit manman m' ki te toujou sèvi ou. ¹⁷ Fè kichòy pou mwen, Seyè! Fè moun ki pa vle wè m'
 yo wont, lè yo wè se ou menm ki pote m' sekou, se ou menm ki ban m' konsolasyon!

Chapter 87

¹ ¶ Se yon sòm pitit Kore yo. Se yon chante li ye. Bondye bati lavil li a sou mòn ki apa pou li
² a! Li renmen lavil Jerizalèm pi plis pase tout lòt kote nan peyi Jakòb la. ³ Ou menm, lavil Bondye
a, tande bèl bagay y'ap di sou ou: ⁴ ¶ Lè m'ap nonmen non moun k'ap sèvi m' yo, m'ap mete moun
peyi Lejip, moun peyi Babilòn sou lis la. Moun peyi Filisti, moun peyi Tir ak moun peyi Etiopi,
⁵ se Jerizalèm yo fèt. Lè moun ap pale sou mòn Siyon an yo di: -Yo rele l' manman, paske se la yo
tout fèt. Se Bondye anwo nan syèl la ki mete l' kanpe. ⁶ Seyè a fè lis tout pèp yo, li fè yo tout pase
pou moun lavil Jerizalèm. ⁷ Moun k'ap chante yo ansanm ak moun k'ap danse yo ap repete byen
fò: -Se ou menm ki manman nou tout.

Chapter 88

¹ ¶ (88:1) Chante sa a se yon sòm pitit Kore yo. Pou chèf sanba yo. Fè yo chante ansanm tankou
timoun lekòl. Se chante Eman, moun lavil Ezra. (88:2) Seyè, Bondye, se ou menm ki delivrans
mwen! Lajounen kou lannwit m'ap rele nan pye ou! ² (88:3) Se pou lapriyè m' rive nan zòrèy ou.
Koute byen sa m'ap mande ou. ³ (88:4) Anpil malè tonbe sou mwen, mwen pa kapab ankò. Mwen
prèt pou mouri. ⁴ (88:5) Mwen tankou moun ki sou dènye souf li, tankou moun ki pa gen fòs ankò.
⁵ (88:6) Mwen tonbe atè tankou yon moun mouri, tankou yon moun yo touye ki kouche nan simityè.
Wi, tankou yon moun ou bliye nèt, tankou yon moun ou pa ka fè anyen ankò pou li. ⁶ (88:7) Ou
voye m' jete nan yon gwo twou byen fon, kote ki fè nwa anpil, nan yon twou san fon. ⁷ (88:8)
Mwen santi ou ankòlè anpil sou mwen. Se kraze w'ap kraze m' anba men ou. ⁸ (88:9) Ou fè tout
zanmi m' yo lage m'. Yo yonn pa ka santi m' bò kote yo! Mwen fèmen yon kote mwen pa ka soti.
⁹ (88:10) Je m' ap boule m' tèlman m'ap souffri. Seyè, se chak jou m'ap rele ou, m'ap louvri de bra
m' ba ou! ¹⁰ ¶ (88:11) Eske se pou moun mouri ou fè mirak? Eske mò ka leve pou fè lwanj ou?
¹¹ (88:12) Eske moun ki anba tè ka fè konnen jan ou renmen nou? Eske moun ki nan twou san fon
an ka fè konnen jan ou toujou kenbe pawòl ou? ¹² (88:13) Eske moun ki nan fènwa a ka wè mèvèy

ou yo? Eske moun ki nan peyi kote yo bliye tout bagay la ka wè jan ou bon! ¹³ (88:14) Seyè, m'ap rele ou vin ede mwen. Se chak maten m'ap lapriyè nan pye ou. ¹⁴ (88:15) Seyè, poukisa ou voye m' jete lwen ou konsa? Poukisa ou cache figi ou pou mwen? ¹⁵ (88:16) Depi mwen jenn gason se soufri m'ap soufri, m'ap pase ra lanmò. Ou sitèlman pini mwen, mwen pa konn sa pou m' fè ankò. ¹⁶ (88:17) Nan kòlè ou, ou fè m' pase kont tray mwen. Se fini ou fini avè m' tèlman ou pini m'. ¹⁷ (88:18) Tout lajounen ou sènen m' tankou dlo inondasyon, ou fèmen m' toupatou. ¹⁸ (88:19) Ou te fè tout kanmarad mwen yo ak zanmi m' yo vire do ban mwen. Moun mwen te konn rakonte ti koze m' yo disparèt.

Chapter 89

¹ ¶ (89:1) Chante Etan, moun peyi Ezra. (89:2) Seyè, mwen p'ap janm sispann chante pou fè konnen jan ou renmen nou. Se tout tan m'a fè konnen jan ou se moun ki kenbe pawòl ou. ² (89:3) Ou di konsa: -Pa gen anyen ki pou fè ou sispann renmen nou. Menm jan syèl la ap toujou la, se konsa tou w'ap toujou kenbe pawòl ou. ³ (89:4) Ou di konsa: -Mwen pase yon kontra avèk moun mwen te chwazi a. Men sa mwen te pwomèt David, sèvitè mwen an: ⁴ (89:5) W'ap toujou gen yon wa nan pitit pitit ou yo. M'ap fè gouvènman ou lan kanpe fèm pou tout tan. ⁵ ¶ (89:6) Seyè, moun ki nan syèl yo ap chante pou bèl mèvèy ou fè yo. Y'ap chante nan mitan moun k'ap viv pou ou yo, pou fè konnen jan ou toujou kenbe pawòl ou. ⁶ (89:7) Seyè, pa gen tankou ou nan syèl la! Pa gen bondye ki ka wè avè ou! ⁷ (89:8) Tout moun k'ap sèvi ou yo respekte ou. Tout moun ki bò kote ou yo pè ou. ⁸ (89:9) Seyè, Bondye ki gen tout pouvwa a, pa gen moun ki gen pouvwa pase ou! Ou kenbe pawòl ou nan tout sikonstans, Seyè! ⁹ (89:10) Ou dominen sou gwo lanmè yo. Lè yo move, ou fè yo ret dousman. ¹⁰ (89:11) Ou kraze moun peyi Lejip yo, ou fè yo tounen kadav. Avèk fòs ponyèt ou, ou gaye lènmi ou yo. ¹¹ (89:12) Syèl la se pou ou ansanm ak latè a. Se ou ki kreye lemonn antye ak tou sa ki ladan l'. ¹² (89:13) Se ou ki kreye nò ak sid. Mòn Tabò ak mòn Emon ap chante pou ou sitèlman yo kontan. ¹³ (89:14) Ou pa manke fòs nan ponyèt ou! Ou p'ap bese tèt devan pesonn. ¹⁴ (89:15) W'ap gouvènen tout bagay avèk jistis san patipri. Nan tout sa w'ap fè ou

pa janm bliye jan ou renmen nou. W'ap toujou kenbe pwomès ou te fè nou yo. ¹⁵ ¶ (89:16) Ala
 bon sa bon lè yon pèp gen kè kontan, lè l'ap viv yon jan ki fè ou plezi! ¹⁶ (89:17) Tout lajounen
 y'ap fè fèt pou ou. Y'ap fè lwanj ou paske ou gen bon kè. ¹⁷ (89:18) Se ou menm ki fè nou pa pè
 pesonn. Se paske ou renmen nou kifè nou genyen batay yo. ¹⁸ (89:19) Paske, Seyè a se pwoteksyon
 nou, se ou menm, Bondye Izrayèl la, ki wa nou. ¹⁹ ¶ (89:20) Nan tan lontan, moun k'ap sèvi ou yo
 te wè ou nan yon vizyon. Ou te pale ak yo, ou te di yo: -Mwen te bay yon vanyan gason yon
 koudmen. Mwen te pran yon jenn gason nan pèp la, mwen mete l' chèf. ²⁰ (89:21) Mwen te jwenn
 David, sèvitè mwen an, mwen te mete l' apa pou l' vin wa sou nou. ²¹ (89:22) M'ap toujou soutni
 l' avèk fòs mwen. M'a fòtifye l' avèk pouvwa mwen. ²² (89:23) Lènmi l' yo p'ap ka mete men sou
 li, mechan yo p'ap ka mete pye sou kou li. ²³ (89:24) M'ap kraze tout moun ki pa vle wè l' yo, m'ap
 touye moun ki rayi l' yo. ²⁴ (89:25) M'ap toujou renmen l', m'ap toujou kenbe pawòl mwen ak li,
 mwen p'ap janm kite l' pèdi okenn batay. ²⁵ (89:26) M'ap fè l' gouvènèn depi lanmè Mediterane
 jouk larivyè Lefrat. ²⁶ (89:27) L'a rele m', l'a di m': Se ou ki papa m', se ou menm ki Bondye m'.
 Se ou ki pwoteksyon m', se ou menm ki delivrans mwen. ²⁷ (89:28) Mwen menm, m'ap fè l' pase
 pou premye pitit gason mwen. Se li k'ap pi gran nan tout wa sou latè. ²⁸ (89:29) M'a toujou fè l'
 wè jan m' renmen l', m'ap toujou kenbe kontra mwen te fè ak li a. ²⁹ (89:30) M'ap toujou chwazi
 yonn nan pitit pitit li yo pou wa. Gouvènman li a ap rete tout tan tout tan. ³⁰ (89:31) Men, si pitit
 pitit li yo pa obeyi lalwa mwen ba yo, si yo pa mache dapre lòd mwen ba yo, ³¹ (89:32) si yo pa
 swiv prensip mwen ba yo, si yo pa fè tout sa mwen mande yo fè, ³² (89:33) m'ap pini yo pou peche
 yo fè, m'ap bat yo. M'ap ba yo kout fwèt pou tout sa yo fè ki mal. ³³ (89:34) Men, se pa sa k'ap fè
 m' sispann renmen David, ni k'ap fè m' pa kenbe pwomès mwen te fè l' la. ³⁴ (89:35) Non. Mwen
 p'ap kase kontra mwen pase ak li a, ni mwen p'ap janm manke l' pawòl. ³⁵ (89:36) Depi mwen fè
 sèman sou non mwen yon sèl fwa, se fini: Mwen p'ap bay David manti. ³⁶ (89:37) Pitit pitit li yo
 va toujou wa. Y'a gouvènèn devan mwen toutotan solèy la va la. ³⁷ (89:38) Gouvènman li an ap
 la pou tout tan, tankou lalin ki toujou klere nan syèl la. ³⁸ ¶ (89:39) Men, malgre sa, ou fache sou
 wa ou te chwazi a, ou vire do ba li, ou voye l' jete. ³⁹ (89:40) Ou pa menm okipe kontra ou te fè

avèk sèvitè ou la. Ou pran kouwòn ki te sou tèt li a, ou voye l' jete nan labou. ⁴⁰ (89:41) Ou kraze tout miray li yo, ou lage yo atè. Ou kite tout fò li yo fin kraze nèt. ⁴¹ (89:42) Tout moun k'ap pase nan lari ap piye kay li, tout vwazinaj li yo ap pase l' nan rizib. ⁴² (89:43) Ou kite lènmi l' yo kraze l' anba pye yo. Ou fè yo tout kontan. ⁴³ (89:44) Ou kase dan tout zam li yo, ou kite yo kraze l' nan lagè. ⁴⁴ (89:45) Ou te wete baton kòmandman an nan men l', ou pran fotèy li a, ou jete l' atè. ⁴⁵ (89:46) Ou fè l' vin vye anvan lè li, ou fè l' wont nèt. ⁴⁶ (89:47) Seyè, jouk kilè w'ap rete kache pou nou pa wè ou? Gen lè se pou tout tan! W'ap kite kòlè ou boule nou tankou dife? ⁴⁷ (89:48) Seyè, chonje moun pa anyen, lavi yo kout. Chonje se ou ki kreye tout moun pou yo tounen pousyè. ⁴⁸ (89:49) Eske gen moun ki ka viv san l' pa janm mouri? Kisa yon moun ka fè pou l' pa janm al anba tè? ⁴⁹ (89:50) Seyè, kote sa ou te fè nan tan lontan pou fè nou wè jan ou renmen nou an? Kote tout bèl pwomès ou te fè David yo? ⁵⁰ (89:51) Seyè, pa bliye jan y'ap pase sèvitè ou yo nan betiz! Pa bliye jan moun lòt nasyon yo ap joure mwen! ⁵¹ (89:52) Seyè, pa bliye jan lènmi ou yo ap joure, jan y'ap joure wa ou te chwazi a kote l' pase. ⁵² (89:53) Ann toujou fè lwanj Seyè a! Wi, se vre! Amèn!

Chapter 90

¹ ¶ Lapriyè Moyiz, sèvitè Bondye a. Seyè, ou te toujou yon pwoteksyon pou nou depi sou tan zansèt nou yo jouk koulye a. ² Anvan menm ou te kreye mòn yo, anvan ou te fè latè ak tout sa ki ladan l', depi tout tan ak pou tout tan se Bondye ou ye. ³ Ou di moun se pou yo tounen sa yo te ye. Ou fè yo tounen pousyè ankò. ⁴ Milan (1.000 an) pa anyen pou ou, se tankou yon jou. Se tankou jounen ayè ki fin pase a, se tankou yon ti kadè nan mitan lannwit. ⁵ Ou fè yo pase tankou yon rèv, tankou pye zèb ki leve yon jou maten. ⁶ Li grandi, li fleri, nan aswè li fennen, li cheche. ⁷ ¶ Lè ou ankòlè, se fini ou fini ak nou. Lè ou move, ou fè kè nou kase. ⁸ Ou mete devan je ou tou sa nou fè ki mal, ou mete peche nou fè an kachèt yo aklè devan ou. ⁹ Ou koupe sou lavi nou paske ou ankòlè. Anvan nou bat je nou, lavi nou fini. ¹⁰ Dènnye bout nou se swasandizan. Si nou gen bon sante, n'a

wè katrentan. Men, avantaj nou jwenn nan tou sa se sèlman tray ak mizè. Talè konsa nou fin viv,
 n' al fè wout nou. ¹¹ Kilès ki konnen jan ou ka ankòlè? Kilès ki konnen jan pou yo pè ou lè ou
 move? ¹² ¶ Moutre nou pou nou pa bliye jan lavi nou kout, pou nou kapab chache konprann tout
 bagay. ¹³ Seyè, kilè w'a tounen? Gen pitye pou sèvitè ou yo. ¹⁴ Chak maten, voye benediksyon
 ou sou nou! Konsa, n'a chante, n'a toujou gen kè kontan. ¹⁵ Koulye a fè kè nou kontan pou menm
 kantite jou ou te ban nou lapenn, pou menm kantite lanne nou pase nan mizè. ¹⁶ Fè moun k'ap sèvi
 ou yo wè sa ou ka fè. Fè pitit pitit yo wè jan ou gen pouvwa. ¹⁷ Seyè, Bondye nou, pa sispann ban
 nou favè ou. Fè nou reyisi nan tou sa n'ap fè. Wi, fè nou reyisi nan tou sa n'ap fè.

Chapter 91

¹ ¶ Moun ki chache pwoteksyon bò kote Bondye ki anwo nan syèl la, moun ki rete kache anba
 zèl Bondye ki gen tout pouvwa a ² ka di Seyè a: -Se ou ki tout defans mwen. Se ou ki tout
 pwoteksyon mwen. Ou se Bondye mwen. Se nan ou mwen mete tout konfyans mwen. ³ Se li menm
 ki p'ap kite ou pran nan pèlen, ki p'ap kite maladi ki pou touye ou tonbe sou ou. ⁴ L'ap kouvri ou
 anba zèl li. Anyen p'ap rive ou kote ou kache a. L'ap toujou kenbe pawòl li: Se sa ki pwoteksyon
 ou, se sa ki defans ou. ⁵ Ou pa bezwen pè bagay k'ap fè moun pè lannwit, ni kè ou pa bezwen kase
 pou malè ki ka rive ou lajounen. ⁶ Ou pa bezwen pè move maladi k'ap tonbe sou moun nan mitan
 lannwit, ni epidemi k'ap touye moun gwo midi. ⁷ Mil (1.000) moun te mèt tonbe sou bò gòch ou,
 dimil (10.000) sou bò dwat ou, anyen p'ap rive ou. ⁸ W'ap rete konsa, w'ap gade, w'a wè jan y'ap
 bay mechan yo sa yo merite. ⁹ ¶ Paske ou pran Seyè a pou defans ou, paske ou pran Bondye ki
 anwo nan syèl la pou pwoteksyon ou, ¹⁰ okenn malè p'ap rive ou, okenn mechan p'ap ka pwoche
 bò kot kay ou. ¹¹ Bondye ap pase zanj li yo lòd pou yo veye sou ou, pou yo pwoteje ou kote ou
 pase. ¹² Y'ap pote ou nan men yo. pou ou pa kase zòtèy pye ou sou okenn wòch. ¹³ W'ap mache
 sou lyon ak sou sèpan, w'ap kraze jenn ti lyon yo ak eskòpyon yo anba pye ou. ¹⁴ Bondye di: M'ap
 sove moun ki renmen mwen, m'ap pwoteje moun ki konnen mwen. ¹⁵ Lè l' rele m', m'ap reponn

li. Lè l' nan tray, m'ap la avèk li. M'ap delivre l', m'ap fè yo respekte l'.¹⁶ M'ap fè l' viv lontan, m'a fè l' wè jan m'ap delivre l'.

Chapter 92

¹ ¶ (92:1) Sòm sa a se yon chante espesyal pou jou repo a. (92:2) Sa bon nèt pou nou di Seyè a mèsì, pou nou chante pou ou, Bondye ki anwo nan syèl la. ² (92:3) Sa bon nèt pou chak maten nou fè konnen jan ou gen kè sansib, pou chak swa nou fè konnen jan ou toujou kenbe pawòl ou. ³ (92:4) Avèk mizik yo jwe sou enstriman akòd yo, avèk mizik yo jwe sou gita, sa bon nèt pou nou fè lwanj ou. ⁴ (92:5) Paske, Seyè, ou fè kè m' kontan ak bèl mèvèy ou yo, m'ap fè fèt lè m' wè tou sa w'ap fè. ⁵ (92:6) Ala bèl bagay ou fè yo bèl! Seyè, moun p'ap janm ka fin konprann sa ki nan tèt ou! ⁶ (92:7) Se bagay moun lespri lou pa ka konnen, bagay moun fou pa ka konprann. ⁷ ¶ (92:8) Mechan yo ap grandi tankou zèb, moun k'ap fè mal yo ap wè zafè yo mache byen, men yon lè yo tout gen pou disparèt nèt. ⁸ (92:9) Men ou menm, Seyè, ou se Bondye nan syèl la. Ou la pou tout tan. ⁹ (92:10) Paske, Seyè, lènmi ou yo pral mouri. Wi, ou pral gaye tout moun k'ap fè mal yo. ¹⁰ (92:11) Ou fè m' gen menm fòs ak towò bèf mawon yo. Ou fè kè m' kontan. ¹¹ (92:12) Mwen wè ak je m' jan lènmi m' yo pèdi batay la, mwen tande jan moun ki pa vle wè m' yo ap rele. ¹² (92:13) Moun k'ap mache dwat yo pral pouse tankou palmis, y'ap grandi tankou pye sèd nan peyi Liban. ¹³ (92:14) Yo tankou pyebwa yo plante nan kay Seyè a, y'ap pouse bèl branch nan tanp Bondye nou an. ¹⁴ (92:15) Yo te mèt granmoun, y'ap donner, y'ap toujou vèt, y'ap toujou gen fòs. ¹⁵ (92:16) Sa fè nou wè jan Seyè a pa gen patipri. Se li ki tout pwoteksyon mwen. Pa gen lenjistis nan kè li.

Chapter 93

¹ ¶ Seyè a ap gouvènèn. Gade jan li gen pouvwa! Gade jan li gen fòs! Latè kanpe fèm nan plas li, anyen pa ka brannen l'. ² Seyè, gouvènman ou lan chita fèm depi nan tan lontan. Ou menm, ou la depi tout tan. ³ Larivyè yo desann, Seyè, larivyè yo ap fè bri. Larivyè yo desann, y'ap fè gwo

⁴
bri. Men, Seyè a se sèl chèf nan syèl la. Li gen plis pouvwa pase lanmè a ki fin debòde, li pi fò
pase lanm lanmè yo k'ap fè bri. ⁵ Seyè, kòmandman ou yo la pou tout tan. Kay ou se yon kay ki
apa pou ou pou tout tan tout tan.

Chapter 94

¹
¶ Seyè, ou menm Bondye ki gen dwa tire revanj lan, parèt non pou fè yo wè ki moun ou ye.
² Ou menm k'ap jije tout moun sou latè, leve non! Bay moun k'ap pran pòz gwokolèt yo sa yo
merite! ³ Kilè mechan yo va sispann fè fèt? Wi, Seyè, kilè y'a sispann? ⁴ Kilè moun k'ap fè sa ki
mal yo va sispann fè grandizè? Kilè y'a sispann fè bèl diskou pou rakonte krim yo fè? ⁵ Seyè, y'ap
kraze pèp ou a, y'ap peze moun pa ou yo. ⁶ Y'ap koupe kou vèv yo, y'ap koupe kou timoun ki san
papa yo, y'ap ansasinen etranje k'ap viv nan peyi a. ⁷ Lè konsa yo di: Seyè a pa wè nou! Bondye
pèp Izrayèl la pa okipe bagay konsa! ⁸ Nou menm, bann san konprann, manyè fè atansyon non!
Bann moun fou, kilè n'a konprann? ⁹ Bondye ki bay zòrèy, ki jan pou l' pa ta ka tandè? Bondye ki
fè je, ki jan pou l' pa ta ka wè? ¹⁰ Limenm ki reskonsab tout nasyon yo, ki jan pou l' pa ta ka pini
yo? Limenm k'ap bay moun tout kalite konesans, ki jan pou l' pa ta ka konnen? ¹¹ Seyè a konnen
lide lèzòm gen nan tèt yo. Li konnen sa pa vo anyen. ¹² ¶ Ala bon sa bon, Seyè, lè w'ap korije yon
moun, pou fè l' konnen sa ki nan lalwa ou, ¹³ pou l' ka rete ak kè poze lè jou malè a rive, jouk y'a
fouye twou pou antere mechan an. ¹⁴ Seyè a p'ap voye pèp li a jete, li p'ap vire do bay moun ki
pou li yo. ¹⁵ Lè sa a, moun va jwenn jistis nan tribinal, tout moun ki mache dwat va dakò avèk sa.
¹⁶ Kilès ki va kanpe pou mwen kont mechan yo? Kilès ki va pran pou mwen kont moun k'ap fè
mal yo? ¹⁷ Si se pa t' Seyè a ki te sekou mwen, gen lontan depi mwen ta mouri. ¹⁸ Lè mwen di:
Men m'ap tonbe wi! Se ou menm, Seyè, ki soutni m' paske ou gen bon kè. ¹⁹ Lè m' nan tèt chaje,
lè mwen pa konn sa pou m' fè, se ou menm ki ban m' kouraj, se ou menm ki fè kè m' kontan. ²⁰ Eske
ou nan konfyolo avèk jij pèvèti sa yo, k'ap fè mechanste yo pase pou lalwa? ²¹ Y'ap fè konplo sou

moun ki mache dwat yo, y'ap kondannen inonsan yo amò. ²² Men, Seyè a se tout defans mwen.
 Bondye mwen, se twou wòch kote m' jwenn pwoteksyon. ²³ L'ap fè mechanste yo a tonbe sou
 pwòp tèt yo, l'ap fè peche yo a touye yo. Seyè a, Bondye nou an, ap disparèt yo.

Chapter 95

¹ ¶ Vini non, ann fè kè nou kontan, ann chante pou Seyè a! Ann fè fèt pou moun k'ap pwoteje
 nou an, pou moun k'ap delivre nou an! ² Ann parèt devan li pou nou di l' mès! Ann chante yon
 chante pou fè lwanj li! ³ Paske, Seyè a se yon Bondye ki gen pouvwa, se yon gwo wa sou tout lòt
 bondye yo. ⁴ Se li menm ki kenbe fondasyon tè a nan men l'. Se pou li tout tèt mòn yo ye tou. ⁵ Se
 pou li lanmè a ye, paske se li ki fè l', latè a tou, paske se li ki ba l' fòm ak men l'. ⁶ Vini non! Ann
 bese tèt nou devan li, ann adore li! Ann tonbe ajenou devan Seyè ki kreye nou an! ⁷ ¶ Se li ki
 Bondye nou, se pèp li nou ye, l'ap pran swen nou tankou mouton ki nan savann li. Si sèlman nou
 te vle tandè jòdi a sa l'ap di nou: ⁸ -Pa kenbe tèt ak mwen, tankou zansèt nou yo te fè l' lè yo te bò
 sous dlo Meriba a, tankou yo te fè l' jou sa a nan dezè a bò Masa. ⁹ Lè sa a, yo te vle wè jouk ki
 bò mwen ye ak yo, yo te sonde m', malgre yo te deja wè tou sa mwen te fè pou yo. ¹⁰ Pandan
 karantan, ras moun sa yo ban m' degoutans. Mwen te di: Y'ap fè move lide nan tèt yo. Yo derefize
 obeyi kòmandman mwen yo. ¹¹ Se sak fè, lè m' te ankòlè a, mwen sèmante yo p'ap janm mete pye
 yo kote pou yo pran repo ansanm ak mwen an.

Chapter 96

¹ ¶ Chante yon chante tou nèf pou Seyè a! Nou tout ki rete sou latè, chante pou Seyè a! ² Chante
 pou Seyè a, fè lwanj li! Chak jou, fè konnen jan li delivre nou. ³ Fè nasyon yo konnen pouvwa li.
 Fè tout pèp yo konnen bèl bagay li fè yo. ⁴ Seyè a gen gwo pouvwa. Li merite pou yo fè lwanj li
 vre. Se pou moun pè l' pi plis pase lòt bondye yo. ⁵ Bondye lòt nasyon yo pa anyen, se pòtre yo
 ye. Men, se Seyè a ki fè syèl la. ⁶ Devan li se respè, se chapo ba. Gen pouvwa, gen mèvèy nan kay

ki apa pou li a! ⁷ Nou tout pèp ki sou latè, fè lwanj Seyè a! Fè lwanj Seyè a pou pouvwa ak fòs li
 genyen! ⁸ Fè lwanj li paske li merite sa! Pote ofrann ba li anndan lakay li! ⁹ Adore Bondye nan
 bèl kay ki apa pou li a! Nou tout ki sou latè, tranble devan li. ¹⁰ ¶ Mache di nan tout peyi yo: Se
 Seyè a ki sèl wa. Latè kanpe fèm, anyen pa ka brannen l'. L'ap jije tout moun san patipri. ¹¹ Se pou
 syèl la kontan, se pou latè a fè fèt. Se pou lanmè a ansanm ak tou sa ki ladan l' pran fè bri sitèlman
 yo kontan. ¹² Se pou jaden yo ak tou sa ki ladan yo fè fèt. Se pou tout pyebwa nan gwo rak yo rele
 sitèlman yo kontan, ¹³ lè Seyè a parèt. Paske, l'ap vini. L'ap vini pou l' jije tout moun ki sou latè.
 L'ap jije tout moun san patipri. L'ap jije tout pèp yo jan sa dwe fèt.

Chapter 97

¹ ¶ Se Seyè a ki wa! Se pou tout moun ki sou latè fè kè yo kontan! Se pou moun ki nan tout zile
 yo fè fèt! ² Li nan mitan yon gwo nwaj tou nwa. L'ap gouvènen tout bagay avèk jistis, san patipri.
³ Yon dife ap mache devan li. L'ap boule lènmi l' yo tout kote l' pase. ⁴ Kout zèklè li yo klere
 toupatou. Moun ki sou latè wè sa, yo pran tranble. ⁵ Ti mòn yo fonn tankou lasi devan Seyè a, wi,
 yo fonn devan chèf tout latè a. ⁶ Syèl la fè konnen jan Bondye pa nan patipri, tout pèp yo wè pouvwa
 li. ⁷ Tout moun k'ap sèvi zidòl yo, yo tout k'ap fè grandizè pou bagay ki pa vo anyen, yo tout gen
 pou yo wont. Tout bondye yo bese tèt devan li. ⁸ ¶ Pèp peyi Siyon an tande sa, li kontan. Tout lavil
 peyi Jida yo fè fèt pou jan ou jije moun, Seyè! ⁹ Seyè ki gen tout pouvwa, se ou menm ki sèl chèf
 sou tout latè, W'ap dominen sou tout bondye yo. ¹⁰ Seyè a renmen moun ki rayi sa ki mal. Li
 pwoteje lavi pèp li a, li delivre yo anba men mechan yo. ¹¹ Limyè Bondye klere moun ki mache
 dwat devan li. Moun ki fe sa ki byen, l'ap fè kè yo kontan. ¹² Nou tout ki mache dwat devan Bondye,
 fè kè nou kontan pou sa Seyè a fè pou nou. Di l' mèsi! Li pa tankou tout moun.

Chapter 98

¹
¶ Se yon sòm. Chante yon chante tou nèf pou Seyè a, paske li pa manke fè bèl bagay. Pouvwa
li avèk fòs ponyèt li se bagay apa, se ak yo li te genyen batay la. ² Seyè a te fè wè jan l' delivre
nou. Li te fè nasyon yo konnen jan li fè lèzòm gras. ³ Li te chonje jan li renmen moun Izrayèl yo,
jan li toujou kenbe pawòl li gen ak yo. Moun toupatou sou latè te wè jan Bondye nou an ap delivre
nou. ⁴ ¶ Nou tout ki rete sou latè, rele pou fè lwanj Seyè a tèlman nou kontan! Rele! Fè fèt! Chante!
⁵ Chante pou Seyè a avèk gita! Avèk gita, chante kantik! ⁶ Soufle klewon, kònen lanbi! Rele devan
Seyè a sitèlman nou kontan, paske se li ki wa. ⁷ Se pou lanmè a ansanm ak tou sa k'ap viv ladan l'
pran fè bri sitèlman yo kontan. Se pou latè a ansanm ak tou sa k'ap viv sou li pran chante. ⁸ Se pou
larivyè yo pran bat men yo. Se pou tout ti mòn yo pran chante ansanm sitèlman yo kontan. ⁹ Paske,
l'ap vini pou l' jije tout moun ki sou latè! L'ap jije tout moun san patipri. L'ap jije tout pèp yo dapre
sa yo merite.

Chapter 99

¹
¶ Se Seyè a ki wa! Pèp yo ap tranble. Li chita sou fotèy li anwo zanj cheriben yo. Tout moun
sou latè ap tranble! ² Seyè a gen pouvwa nan peyi Siyon! L'ap gouvènen sou tout pèp yo. ³ Se pou
tout moun fè lwanj li, paske li gen pouvwa, li merite respè! Se Bondye tout bon li ye! ⁴ Ou se yon
wa ki gen pouvwa, yon wa ki renmen sa ki dwat. Ou mete jistis toupatou nan peyi Izrayèl. Ou fè
yo fè jistis nan peyi a san patipri, jan sa dwe fèt. ⁵ Lwanj pou Seyè a, Bondye nou an! Bese tèt nou
devan fotèy li. Sè Bondye tout bon li ye! ⁶ ¶ Moyiz ak Arawon te fè pati prèt li yo! Samyèl te yonn
nan moun ki te sèvi l' yo! Tout twa te rele Seyè a, li te reponn yo. ⁷ Li rete nan poto nwaj la, li pale
ak yo. Yo te obeyi lòd ak kòmandman li te ba yo. ⁸ Seyè, Bondye nou, ou te reponn yo lè yo te
lapriyè ou! Ou te moutre yo se yon Bondye ki konn padonnen ou ye. Men, ou te pini yo pou sa yo
⁹ fè ki mal. Lwanj pou Seyè a, Bondye nou an! Adore l' sou mòn ki apa pou li a! Paske, Seyè a,
Bondye nou an, se Bondye tout bon li ye.

Chapter 100

¹
¶ Se yon sòm pou di Bondye mèsi. Nou tout ki rete sou latè, chante pou Bondye sitèlman nou kontan. ² Fè sèvis pou Seyè a ak kè kontan! Vini non! Fè fèt devan li! ³ Pa janm bliye: Seyè a, se Bondye li ye. Se li menm ki fè nou, se pou li nou ye. Se pèp li nou ye, mouton ki nan savann li. ⁴ Antre nan tanp li, di l' mèsi! Antre kote ki apa pou li a, chante pou li! Wi, fè lwanj li, di l' mèsi! ⁵ Seyè a gen bon kè, li p'ap janm sispann renmen nou. De pitit an pitit, l'ap toujou kenbe pawòl li.

Chapter 101

¹
¶ Se yon sòm David. M'ap chante pou yon moun ki gen bon kè. M'ap chante pou yon moun ki pa nan patipri. Se pou ou m'ap chante, Seyè! ² M'ap mennen yon lavi san repwòch. Kilè w'a vin jwenn mwen? ³ M'ap mennen yon lavi san repwòch anndan lakay mwen. Mwen p'ap mete okenn move lide nan tèt mwen. Mwen rayi sa moun ki vire do bay Bondye yo ap fè. Bagay konsa pa ka pran tèt mwen. ⁴ Mwen pa tolere moun ki gen move kè bò kote m'. Mwen pa gen anyen pou m' wè ak moun ki mechan. ⁵ M'ap disparèt tout moun k'ap pale zanmi yo mal an kachèt. Mwen p'ap tolere moun k'ap fè grandizè, moun k'ap pran pòz gwokolèt yo sou moun. ⁶ M'ap pran swen moun nan peyi a ki kenbe Bondye fèm. M'ap kite yo rete bò kote m'. Moun k'ap mache dwat yo, se yo m'ap pran pou sèvi lakay mwen. ⁷ Mwen p'ap kite moun k'ap twonpe moun rete lakay mwen. Moun k'ap bay manti p'ap rete kanpe devan mwen. ⁸ Chak maten m'ap fini avèk tout mechan ki nan peyi a. Konsa, m'ap mete tout moun k'ap fè sa ki mal yo deyò nan lavil Seyè a.

Chapter 102

¹
¶ (102:1) Lapriyè yon moun ki anba tray. Li pa kapab sipòte ankò. L'ap rakonte Bondye ka li. (102:2) Seyè, koute m' non lè m'ap lapriyè, se pou rèl mwen rive nan zòrèy ou. ² (102:3) Pa vire do ban mwen lè mwen nan traka. Panche zòrèy ou bò kote m'. Prese vin reponn mwen lè m'ap rele ou. ³ (102:4) Lavi m' ap disparèt tankou lafimen. Mwen gen yon lafyèb nan zo. ⁴ (102:5) Mwen anba gwo kou. Mwen tankou zèb koupe k'ap cheche. Mwen sitèlman boulvèse, mwen pa menm chonje manje. ⁵ (102:6) Mwen tounen zo ak po tèlman m'ap plenn. ⁶ (102:7) Mwen sanble yon

tako savann, mwen tankou frize ki rete nan vye kay kraze. ⁷ (102:8) Mwen pa ka dòmi, mwen tankou yon zwezo ki pou kont li sou yon do kay. ⁸ (102:9) Tout lajounen lènmi m' yo ap joure m'. Moun k'ap pase m' nan rizib yo pran non m' sèvi jouman. ⁹ (102:10) Se sann dife ki tout manje m'. Dlo nan je m' fè yon sèl ak dlo m'ap bwè. ¹⁰ (102:11) Ou sitèlman ankòlè, ou sitèlman fache, ou pran m', ou voye m' jete byen lwen. ¹¹ (102:12) Kò m' ap tchoule tankou solèy k'ap kouche. M'ap cheche tankou zèb. ¹² ¶ (102:13) Men ou menm, Seyè, w'ap gouvènen pou tout tan. Pitit an pitit y'ap chonje non ou! ¹³ (102:14) W'a leve, w'a gen pitye pou lavil Siyon an, paske li lè pou ou gen pitye pou li. Jou a rive. ¹⁴ (102:15) Moun k'ap sèvi ou yo renmen lavil Siyon an. Kè yo fè yo mal pou yo wè jan l'ap fini. ¹⁵ (102:16) Lè sa a, moun lòt nasyon yo va gen krentif pou Seyè a, tout wa ki sou latè va pè bèl pouvwa li. ¹⁶ (102:17) Seyè a va rebati lavil Siyon, l'a fè wè jan li gen pouvwa. ¹⁷ (102:18) L'a pran ka moun ki san sekou yo lè y'a lapriyè, wi, li p'ap meprize lapriyè yo. ¹⁸ (102:19) Se pou yo ekri sa pou timoun k'ap vini yo ka konnen l', pou timoun ki poko fèt yo ka fè lwanj li. ¹⁹ (102:20) Seyè a rete anwo nan kay ki apa pou li a, li gade anba, li rete anwo nan syèl la, l'ap gade sou latè, ²⁰ (102:21) pou l' tande jan prizonye yo ap plenn, pou l' delivre moun yo kondannen amò yo. ²¹ (102:22) Konsa, moun va nonmen non Seyè a nan tout lavil Siyon an. Y'a fè lwanj li nan lavil Jerizalèm, ²² (102:23) lè tout nasyon yo ak tout gouvènman ki sou latè yo va sanble pou sèvi Seyè a. ²³ ¶ (102:24) Mwen te jenn gason toujou lè Seyè a kraze kouraj mwen: li koupe sou lavi m'. ²⁴ (102:25) Mwen di: Bondye mwen, ou menm k'ap viv pou tout tan, pa pran m' koulye a. Mwen jenn gason toujou. ²⁵ (102:26) Se ou menm, Seyè, ki te kreye latè nan tan lontan. Se avèk men ou ou te fè syèl la. ²⁶ (102:27) Yo gen pou yo disparèt, men ou menm w'ap toujou la. Yo gen pou yo vin vye tankou rad. W'ap chanje yo tankou yo chanje rad, w'a mete yo sou kote. ²⁷ (102:28) Men ou menm, ou p'ap janm chanje, ou p'ap janm mouri. ²⁸ (102:29) Pitit sèvitè ou yo va rete nan peyi a san danje. Pitit pitit yo va toujou viv devan je ou.

Chapter 103

¹ ¶ Se yon sòm David. Kite m' di Seyè a mès! Kite m' di Seyè ki pa tankou tout moun lan mès
 ak tout nanm mwen! ² Wi, kite m' di Seyè a mès. Mwen pa dwe janm bliye tout byen li fè pou
 mwen. ³ Li padonnen tout peche m' yo, li geri tout maladi m' yo. ⁴ Li wete m' nan bouch twou a.
 Li beni m', li fè m' wè jan li renmen m', jan li gen pitye pou mwen. ⁵ Li kouvri m' ak benediksyon
 pandan tout lavi m', li fè m' rete jenn ak tout fòs mwen, tankou malfini. ⁶ ¶ Seyè a pa nan patipri.
 Li rann jistis an favè tout moun k'ap sibi lenjistis. ⁷ Li fè Moyiz konnen sa l' te gen nan tèt li, li fè
 pitit Izrayèl yo wè mèvèy li yo. ⁸ Seyè a gen kè sansib, li gen bon kè. Li pa fè kòlè fasil, li p'ap
 janm sispann renmen nou. ⁹ Li p'ap pase tout tan l' ap pini nou, li pa ankòlè pou lontan. ¹⁰ Li pa
 aji ak nou jan nou ta merite l' la, li pa pini nou jan l' ta dwe pini nou. ¹¹ Menm jan syèl la byen
 lwen anwo tè a, se konsa Seyè a renmen moun ki gen krentif pou li. ¹² Menm jan kote solèy leve
 a byen lwen ak kote solèy kouche a, se konsa li wete peche nou yo, li voye yo jete byen lwen nou.
¹³ Menm jan yon papa sansib pou pitit li, se konsa Seyè a sansib pou moun ki gen krentif pou li.
¹⁴ Li konnen ak kisa nou fèt, li chonje se pousyè tè nou ye. ¹⁵ Lèzòm menm, lavi yo tankou zèb.
 Yo grandi, yo fleri tankou flè savann. ¹⁶ Kou van soufle sou yo, yo disparèt. Pesonn pa rekonèt
 kote yo te ye a. ¹⁷ Men renmen Bondye pou moun ki gen krentif pou li yo, se bagay ki la pou tout
 tan. L'ap gen pitye pou pitit pitit yo, ¹⁸ pou moun ki kenbe pawòl yo ak li, pou moun ki chonje
 kòmandman li yo pou obeyi yo. ¹⁹ ¶ Seyè a mete fotèy li anwo nan syèl la, l'ap gouvènen tout
 bagay. ²⁰ Nou menm zanj li yo ki vanyan, ki gen fòs, nou menm k'ap fè tou sa li mande nou fè,
 nou menm k'ap koute sa l'ap di nou, fè lwanj Seyè a! ²¹ Nou tout ki fè pati lame ki nan syèl la, nou
 tout k'ap sèvi l', k'ap fè volonte li, di Seyè a mès! ²² Nou tout kreyati Bondye, nou tout ki toupatou
 kote l'ap gouvènen, di Seyè a mès! Wi, kite m' di Seyè a mès!

Chapter 104

¹ ¶ Kite m' di Seyè a mès! Seyè, Bondye mwen, ala gwo pouvwa ou gwo! Devan ou se respè,
 se chapo ba! ² Ou vlope kò ou nan yon gwo limyè. Ou louvri syèl la tankou yon tant pou ou rete.

³ Ou bati kay ou sou nwaj yo ki plen dlo. Ou pran nwaj yo sèvi ou cha, yon kouran van ap pouse
ou ale. ⁴ Ou fè van yo pote komisyon pou ou. Ou fè zèklè yo tounen sèvitè ou. ⁵ Ou mete latè kanpe
fèm sou fondasyon li. Anyen pa ka brannen l'. ⁶ Ou mete lanmè sou li tankou yon rad, dlo te kouvri
tout mòn yo. ⁷ Men, lè ou parèt devan yo, yo pran kouri. Lè yo tandè loraj ou gwonde, yo met deyò.
⁸ Yo kouri desann sou mòn yo, yo pase nan fon yo, y' al pran plas ou te pare pou yo. ⁹ Ou ba yo
limit pou yo pa janm depase, pou yo pa tounen vin kouvri latè ankò. ¹⁰ ¶ Ou fè sous dlo koule nan
fon yo. Ou fè dlo koule nan mitan mòn yo. ¹¹ Yo bay dlo pou bèt nan bwa yo bwè. Bourik nan
bwa yo vin bwè lè yo swaf dlo. ¹² Zwezo fè nich sou pyebwa ki bò dlo yo. Y'ap chante byen fò
nan tout branch yo. ¹³ Ou rete nan syèl la, ou voye lapli wouze mòn yo. Ou kouvri tè a ak
benediksyon ou. ¹⁴ Ou fè zèb pouse pou bèt yo manje. Ou fè plant moun bezwen yo grandi pou
latè ka donner manje, ¹⁵ pou latè ka donner rezen ki bay diven pou fè kè lèzòm kontan, lwil pou
fè figi yo fre, pen pou ba yo fòs. ¹⁶ Pyebwa Seyè yo, pye sèd li menm li te plante nan peyi Liban
an, yo jwenn tou sa yo bezwen. ¹⁷ Se la zwazo fè nich yo. Sigòy fè kay yo sou tèt pyebwa yo.
¹⁸ Mòn apik yo se pou kabrit mawon yo ye. Daman kache nan twou wòch yo. ¹⁹ ¶ Ou te fè lalin
pou l' make jou yo. Solèy la konnen kilè pou l' kouche. ²⁰ Ou fè fènwa tonbe sou peyi a, li lannwit.
Tout bèt nan rakbwa yo soti deyò. ²¹ Jenn lyon yo ap gwonde, y'ap chache manje. Y'ap mande
Bondye ba yo manje. ²² Lè solèy leve, yo wete kò yo, y' al kouche nan twou yo. ²³ Moun soti pou
y' al travay, wi, pou y' al travay jouk solèy kouche. ²⁴ Seyè, ou fè anpil bagay! Ou fè yo avèk bon
konprann. Latè plen ak bagay ou fè. ²⁵ Gade gwo lanmè a, li laj, li fon. Gen kantite bèt k'ap viv
ladan l', gwo kou piti. ²⁶ Se sou li gwo batiman yo ap pwonmennen. Gwo bèt lanmè ou te fè a,
levyatan an, ap jwe ladan l'. ²⁷ Se sou ou tout bèt sa yo konte, pou ou ba yo manje lè yo bezwen.
²⁸ Ou ba yo manje, yo manje. Ou louvri men ou, yo manje plen vant yo. ²⁹ Vire ou vire do ou, yo
pran tranble. Lè ou wete souf yo, yo mouri frèt, yo tounen nan pousyè kote yo te soti a. ³⁰ Men,
lè ou soufle souf ou, ou bay lavi ankò. Konsa, ou bay latè yon lòt figi. ³¹ ¶ Se pou bèl pouvwa Seyè
a rete jan l' ye a pou tout tan. Se pou Seyè a kontan ak tou sa li fè. ³² Li gade latè, latè pran tranble.

Li manyen mòn yo, mòn yo pran fè lafimen. ³³ M'ap pase tout lavi m' ap chante pou Seyè a. M'ap
 fè lwanj Bondye pandan tout tan m'ap viv la. ³⁴ Mwen ta swete pawòl mwen fè l' plezi, paske se
 li ki fè kè m' kontan. ³⁵ Se pou moun k'ap fè sa ki mal yo disparèt sou latè. Se pou pa gen mechan
 ankò! Kite m' di Seyè a mèsi! Lwanj pou Seyè a!

Chapter 105

¹ ¶ Lwanj pou Seyè a! Fè konnen jan li gen pouvwa! Fè nasyon yo konnen sa li fè! ² Chante
 pou li! Fè lwanj li! Rakonte tout mèvèy li te fè yo! ³ Fè kè nou kontan paske se moun pa l' nou ye.
 Wi, se pou tout moun k'ap sèvi Seyè a fè fèt! ⁴ Ale jwenn Seyè a pou l' ka ede nou, toujou chache
 rete devan li. ⁵ -(we vèsè pwochen) ⁶ Nou menm, pitit pitit Abraram, sèvitè Bondye, nou menm,
 pitit pitit Jakòb yo, nou menm Bondye chwazi, chonje mirak ak mèvèy li te fè. Chonje jijman ki te
 soti nan bouch li! ⁷ Seyè a se Bondye nou li ye. Lè li pase yon lòd se pou tout latè. ⁸ ¶ -(we vèsè
 pwochen) ⁹ L'ap toujou chonje kontra li te pase ak Abraram. L'ap kenbe pwomès li, pwomès li fè
 Izarak la pou tout tan tout tan. ¹⁰ Sa li te pwomèt Abraram lan, li fè l' tounen yon lwa pou pitit
 Jakòb yo, yon kontra ak pèp Izrayèl la pou tout tan. ¹¹ Li te di: -M'ap ba ou peyi Kanaran an pou
 pòsyon ki rele ou pa ou nan byen m' yo. ¹² Lè sa a, pèp Bondye a pa t' anpil, yo te sèlman yon ti
 ponyen moun, yo te tankou etranje toujou nan peyi a. ¹³ Yo t'ap mache ale vini nan tout nasyon
 yo, yo t'ap soti nan yon peyi ale nan yon lòt. ¹⁴ Men, li pa t' kite pesonn maltrete yo. Li te menm
 rive pini anpil wa poutèt yo. ¹⁵ Li te di: Piga nou manyen moun mwen chwazi yo. Piga nou fè
 pwofèt mwen yo anyen. ¹⁶ Lè Seyè a te voye yon grangou sou peyi yo a, lè li te koupe tout viv yo,
¹⁷ li te voye Jozèf devan yo, menm Jozèf yo te vann tankou esklav la. ¹⁸ Yo te mete pye l' nan sèp,
 yo te pase yon chenn nan kou li, ¹⁹ jouk sa li te di a te rive vre. Konsa, pawòl Seyè a te fè wè se
 Jozèf ki te gen rezon. ²⁰ Wa peyi Lejip la te wete l' nan chenn yo, chèf nasyon yo te fè lage l'. ²¹ Li
 mete l' chèf sou tout moun lakay li, li mete l' pou l' gouvènè tout peyi a. ²² Li ba li kat blanch sou
 tout chèf yo, li ba li otorite pou l' moutre notab yo sa pou yo fè. ²³ Apre sa, Jakòb te desann nan

peyi Lejip ansanm ak tout pitit li yo. Li pase kèk tan nan peyi pitit Kam yo. ²⁴ Seyè a te fè pèp li
 a peple anpil. Li te fè l' vin pi fò pase lènmi l' yo. ²⁵ ¶ Li fè moun peyi Lejip yo rayi pèp li a: Yo
 aji mal ak li, yo twonpe li. ²⁶ Lè sa a, li voye Moyiz, yon moun ki t'ap sèvi l', ansanm ak Arawon,
 yon moun li te chwazi. ²⁷ Avèk pouvwa li, yo te fè mèvèy nan peyi pitit Kam yo. Yo te fè anpil
 mirak nan peyi Lejip. ²⁸ Li voye fènwa kouvri tout peyi a. Men, moun peyi Lejip yo pa t' koute sa
 l' te di yo. ²⁹ Li fè dlo larivyè yo tounen san, li touye tout pwason ladan yo. ³⁰ Krapo te pran tout
 peyi a pou yo, yo te rive jouk anndan kay wa a. ³¹ Bondye annik pale, mouchavè ak vèmin parèt,
 yo kouvri tout peyi a. ³² Li pa ba yo lapli, li voye lagrèl pito ak kout zèklè sou peyi a. ³³ Li te
 detwi tout pye rezen ak tout pye figfrans yo. Li jete tout pyebwa nan peyi a atè. ³⁴ Bondye annik
 pale, chwalbwa parèt, chini vide an kantite. ³⁵ Yo devore tout ti plant nan peyi a, yo manje tout
 rekòt nan jaden yo. ³⁶ Bondye touye premye pitit gason nan tout fanmi nan peyi Lejip la. Wi, li
 touye tout premye pitit gason yo. ³⁷ Apre sa, li fè pèp Izrayèl la pati avèk kantite lò ak ajan. Anyen
 pa t' rive yo yonn menm. ³⁸ Moun peyi Lejip yo te fè fèt lè yo pati paske yo te pè anpil. ³⁹ Seyè
 a mete yon nwaj pou pwoteje yo lajounen, yon dife pou klere yo lannwit. ⁴⁰ Yo mande l' vyann,
 li ba yo zòtolan. Li ba yo pen ki soti nan syèl pou plen vant yo. ⁴¹ Li fann yon gwo wòch, sous dlo
 pete, dlo pran koule nan dezè a tankou larivyè. ⁴² Li te chonje pwomès li te fè a, pawòl li te bay
 Abraram, sèvitè l' la. ⁴³ Se konsa li te fè pèp li a soti ak kè kontan, li te fè pèp li te chwazi a rele
 sitèlman yo te kontan. ⁴⁴ Li ba yo tè lòt nasyon yo, li kite yo ranmase rekòt jaden lòt moun, ⁴⁵ pou
 pèp li a te ka kenbe lòd li yo, pou yo te ka obeyi kòmandman li yo. Lwanj pou Seyè a!

Chapter 106

¹ ¶ Lwanj pou Seyè a! Wi, lwanj pou Seyè a paske li bon: li p'ap janm sispann renmen nou.
² Ki moun ki ka rakonte tout gwo bagay Seyè a fè? Ki moun ki ka fin fè lwanj li? ³ Ala bon sa bon
 pou moun ki fè sa Bondye mande l' fè, ki toujou ap fè sa ki dwat devan li! ⁴ Seyè, jan ou gen kè

sansib pou pèp ou a, pa bliye m'. Pa bliye m', lè w'ap vin delivre yo. ⁵ Konsa, m'a wè jan moun ou chwazi yo alèz. M'a fè kè m' kontan ansanm ak pèp ou a. M'a pran plezi m' ansanm ak moun ki pou ou yo. ⁶ ¶ Tankou zansèt nou yo, nou te peche, nou te fè mechanste, nou te fè sa ki mal. ⁷ Lè zansèt nou yo te nan peyi Lejip, yo pa t' konprann mirak ou te fè pou yo. Yo te bliye jan ou te renmen yo, yo leve dèyè Bondye ki gen tout pouvwa a, lè yo te bò Lanmè Wouj la. ⁸ Men, li te sove yo pou sa sèvi yon lwanj pou li, pou l' moutre jan li gen pouvwa. ⁹ Li te pase Lanmè Wouj la lòd, lanmè a cheche. Li fè pèp li mache nan fon lanmè a tankou si se te nan yon dezè. ¹⁰ Li sove yo anba men moun ki te rayi yo, li delivre yo anba men lènmi yo. ¹¹ Dlo a neye tout lènmi yo. Pa gen yonn ki chape. ¹² Se lè sa a pèp li a vin kwè sa l' te di a, yo chante pou fè lwanj li. ¹³ ¶ Men, lamenn, yo bliye sa l' te fè pou yo. Yo pa t' tann li fin fè pou yo sa l' te gen nan lide l'. ¹⁴ Yo kite lanvi pran pye sou yo nan dezè a, yo t'ap gade ki bò Bondye ye ak yo. ¹⁵ Se konsa, Bondye ba yo sa yo te mande l' la. Men, li voye yon move maladi sou yo pou touye yo. ¹⁶ Antan yo la nan dezè a yo te rayi sò Moyiz ak sò Arawon, sèvitè Bondye te chwazi a. ¹⁷ Se konsa latè a fann, li vale Datan, li fèmen sou Abiram ansanm ak tout moun ki te fè bann ak li yo. ¹⁸ Dife grennen sou tout bann lan, li boule tout mechan yo. ¹⁹ Lè yo te Orèb, yo fè pòtre yon ti towò bèf, yo adore zidòl yo te fè ak lò a. ²⁰ Yo pran lwanj ki pou Bondye a bay yon pòtre bèf ki manje zèb. ²¹ Yo bliye Bondye ki te delivre yo a, avèk gwo mèvyè li te fè nan peyi Lejip, ²² mirak li te fè nan peyi Kam lan, mèvyè li tè fè bò Lanmè Wouj la. ²³ Se konsa Bondye di l'ap detwi pèp li a. Men, Moyiz, moun li te chwazi a, kanpe devan li. Li mande l' pou l' pa fè kòlè jouk pou li ta detwi yo. ²⁴ Yo pa t' vle tandè pale sou peyi kote pou yo jwenn tout bon bagay la paske yo pa t' kwè pawòl Bondye. ²⁵ Yo rete anba tant yo, y'ap bougonnen. Yo pa t' vle koute Seyè a. ²⁶ Lè sa a, Seyè a leve men l', li sèmante l'ap fè yo peri nan dezè a. ²⁷ L'ap gaye tout pitit pitit yo nan mitan lòt nasyon yo, l'ap kite yo mouri toupatou nan peyi etranje. ²⁸ Men, pèp Bondye a mete tèt yo ansanm pou y' al adore Baal lavil Peyò. Yo manje bèt yo te touye ofri bay mò yo. ²⁹ Sa te moute kolè Seyè a anpil sou yo lè li wè sa yo t'ap fè. Se poutèt sa maladi tonbe sou yo. ³⁰ Men, Fineas leve, li mete lòd, li pini koupab yo, epi pèp la geri. ³¹ Bagay sa ki rive a te fè yo bay Fineas rezon depi lè sa a pou tout tan. ³² Pèp la

te fè Seyè a fache anpil bò sous dlo Meriba a. Sa te fè Moyiz lapenn pou yo. ³³ Sa te fè Moyiz
sitèlman fache, li te rive fè bagay li pa t' gen dwa fè. ³⁴ ¶ Yo pa t' detwi moun lòt nasyon yo jan
Seyè a te mande yo fè a. ³⁵ Men, okontrè, yo te marye ak yo, yo pran tout vye mès yo. ³⁶ Yo pran
adore zidòl yo. Sa tounen yon pèlen pou yo. ³⁷ Yo ofri pwòp pitit gason ak pwòp pitit fi yo pou
touye bay zidòl yo. ³⁸ Yo touye ti inonsan sa yo, pwòp pitit gason ak pitit fi yo. Yo ofri yo bay
zidòl moun peyi Kanaran yo. Se konsa yo fin derespekte tout peyi a ak san moun yo te touye.
³⁹ Avèk sa yo t'ap fè a, yo avili tèt yo, yo vire do bay Bondye. ⁴⁰ Seyè a te fache anpil sou pèp li
a. Li te degoute ak pitit li yo. ⁴¹ Li lage yo nan men moun lòt nasyon yo. Moun ki te rayi yo mete
pye sou kou yo. ⁴² Lènmi yo t'ap peze yo, yo te soumèt yo nèt anba men yo. ⁴³ Seyè a te delivre
pèp li a anpil fwa. Men, yo te pito revòlte kont li, yo te tonbe pi mal nan fè peche. ⁴⁴ Men, Seyè a
te wè mizè yo, li te tandè jan y'ap rele. ⁴⁵ Li chonje kontra li te pase ak yo, li gen pitye pou yo
paske li renmen yo anpil. ⁴⁶ Li fè moun ki te kenbe yo prizonnye gen pitye pou yo. ⁴⁷ Delivre nou
non, Seyè, Bondye nou. Fè nou soti nan tout peyi kote nou gaye yo. Sanble nou non, pou nou ka
⁴⁸ di ou mès pou tout bagay ou menm ase ou ka fè, pou nou ka kontan lè n'ap fè lwanj ou. Ann fè
lwanj Seyè a, Bondye pèp Izrayèl la! Ann fè lwanj li depi tout tan ak pou tout tan! Epi tout pèp la
pran reponn: Wi, se vre! Lwanj pou Seyè a!

Chapter 107

¹ ¶ Lwanj pou Seyè a paske li bon! Li p'ap janm sispann renmen nou! ² Wi, moun Seyè a delivre,
se sa pou yo di! Li te delivre yo anba men lènmi yo, ³ li mennen yo tounen soti nan mitan lòt nasyon
yo ki sou bò solèy leve ak sou bò solèy kouche, ki sou bò nò ak sou bò sid. ⁴ Yo t'ap moute desann
nan dezè a, kote ki pa gen moun rete a. Yo pa t' kapab jwenn chemen pou ale nan yon vil pou yo
rete. ⁵ Yo t'ap mouri grangou. Swaf dlo t'ap touye yo. Yo santi yo pa t' kapab ankò. ⁶ Anba tout
tray sa yo, yo rele nan pye Seyè a. Li wete yo nan lafliksyon sa a. ⁷ Li kondi yo sou yon chemen
ki pou mennen yo dirèk dirèk nan yon vil kote moun rete. ⁸ Se pou yo di Seyè a mès pou jan li pa
janm sispann renmen yo, pou bèl bagay li fè pou moun. ⁹ Li bay moun ki te swaf dlo kont dlo pou

yo bwè. Li bay moun ki t'ap mouri grangou anpil bon bagay pou yo manje. ¶ Gen ladan yo ki
 te rete kote ki te fè nwa a, kote lavi yo te an danje anpil. Yo te prizonye, yo t'ap soufri anba chenn,
 11 paske yo te derefize obeyi kòmandman Bondye ki anwo nan syèl la. Yo pa t' okipe konsèy Bondye
 12 te ba yo. Li te kraze kouraj yo anba travay di. Yo tonbe atè. pa t' gen pesonn pou ba yo men.
 13 Anba tout tray sa yo, yo rele nan pye Seyè a. Li wete yo nan lafliksyon sa a. 14 Li fè yo soti kote
 ki fè nwa a. Li kase chenn ki te mare yo. 15 Se pou yo di Seyè a mèsì pou jan li pa janm sispann
 renmen yo, pou bèl bagay Bondye fè pou moun. 16 Li kraze gwo pòt an fè yo. Li kase bawo an fè
 17 yo. ¶ Gen ladan yo ki te vin fou, akòz peche yo te fè. Yo t'ap soufri paske yo te fè sa ki mal.
 18 Yo pa t' menm anvì manje, yo te prèt pou mouri. 19 Anba tout tray sa yo, yo rele nan pye Seyè
 a. Li wete yo nan lafliksyon sa a. 20 Li louvri bouch li, li pale epi yo geri. Li wete yo nan bouch
 21 twou a. Se pou yo di Seyè a mèsì pou jan li pa janm sispann renmen yo, pou bèl bagay Bondye
 fè pou moun. 22 Se pou yo ofri bèt pou touye ba li pou di l' mèsì. Se pou yo rakonte tou sa li fè.
 Se pou yo chante tèlman yo kontan. 23 ¶ Gen ladan yo ki vwayaje nan batiman sou lanmè. Yo t'ap
 fè trafik lakòt pou yo viv. 24 Yo te wè sa Seyè a te fè. Yo te wè bèl bagay li te fè sou lanmè. 25 Li
 louvri bouch li, li pale, yon gwo van leve. Sa fè lanm lanmè yo move. 26 Batiman yo moute anlè,
 yo desann nan fon lanm lanmè yo. Devan tout danje sa yo, lèzòm pèdi kouraj yo. 27 Tèt yo vire,
 y'ap kilbite tankou moun ki sou. Yo pèdi tout ladrès yo. 28 Anba tout tray sa yo, yo rele nan pye
 Seyè a. Li wete yo nan lafliksyon sa a. 29 Li kase gwo van an. Lanm lanmè yo sispann fè bri. Kalmi
 30 fèt. Yo te kontan lè yo wè lanmè a vin bèl. Seyè a fè yo antre san danje nan pò kote yo t'aprale
 a. 31 Se pou yo di Seyè a mèsì pou jan li pa janm sispann renmen yo, pou bèl bagay Bondye fè pou
 moun. 32 Se pou yo fè konnen jan li gen pouvwa lè pèp li reyini. Se pou yo fè lwanj li devan konsèy
 chèf fanmi yo. 33 ¶ Seyè a fè larivyè yo cheche nèt. Li fè sous yo pa bay dlo ankò. 34 Li te fè tè
 ki konn bay bèl rekòt yo tounen salin, paske moun ki t'ap viv la a t'ap fè twòp mechanste. 35 Li fè
 dezè yo tounen ma dlo. Li fè sous dlo pete kote ki te gen tè sèk. 36 Se la li fè moun ki te grangou
 yo moute kay yo. Yo bati yon lavil pou yo rete. 37 Yo fè anpil jaden, yo plante pye rezen ki bay

³⁸ bèl rekòt. Li beni yo, li ba yo anpil pitit, li pa kite bèt yo depeple. ³⁹ Apre sa, yo vin yon ti
ponyen moun, yo pèdi pye, paske moun t'ap peze yo, yo t'ap souffri, yo te nan mizè. ⁴⁰ Men, Bondye
ki moutre jan li ka meprize grannèg yo, li menm ki fè yo moute desann nan dezè a, san yo pa konn
⁴¹ kote yo prale a, se li ki wete pòv malere yo nan mizè. Se li ki fè yo fè pitit tankou chini. ⁴² Moun
ki mache dwat yo wè sa, yo kontan. Men, mechan yo rete ak bouch yo fèmen. ⁴³ Se pou moun ki
gen konprann chache konprann bagay sa yo! Se pou yo rekonèt jan Seyè a gen bon kè!

Chapter 108

¹ ¶ (108:1) Se yon chante David. (108:2) Mwen pare, Bondye. Mwen pral chante, mwen pral
fè lwanj ou ak tout kè mwen. ² (108:3) M'ap pran gita mwen, m'ap pran bandjo mwen, mwen pral
fè solèy leve!³ (108:4) Seyè, m'a fè lwanj ou nan mitan pèp yo! M'a chante pou ou nan mitan tout
nasyon yo! ⁴ (108:5) Ou renmen nou anpil anpil, ou toujou kenbe pawòl ou. ⁵ (108:6) Bondye, fè
wè nan syèl la jan ou gen pouvwa! Fè yo wè pouvwa ou sou tout latè! ⁶ ¶ (108:7) Delivre nou ak
pouvwa ou! Reponn nou lè nou lapriye nan pye ou, pou moun ou renmen anpil yo ka jwenn delivrans.
⁷ (108:8) Bondye rete kote ki apa pou li a, li di: -Mwen kontan anpil. Mwen pral separe lavil Sichèm.
⁸ Mwen pral fè apantaj Fon Soukòt. (108:9) Peyi Galarad, se pou mwen li ye. Peyi Manase tou.
M'ap fè peyi Efrayim tounen yon kas pou pwoteje tèt mwen. Peyi Jida, se baton kòmandman m' li
⁹ ye. (108:10) Men, m'ap fè peyi Moab sèvi m' kivèt pou m' fè twalèt mwen. M'ap poze men m'
sou peyi Edon. Peyi Filisti a menm, m'ap mache pran l' ak kè kontan. ¹⁰ (108:11) Ki moun ki pou
mennen m' nan lavil ki byen gade a? Ki moun ki pou mennen m' lavil Edon? ¹¹ (108:12) Eske se
pa ou menm, Bondye, ki pou fè sa pou mwen, ou menm ki te vire do ban nou, ou menm ki pa soti
ansanm ak lame nou yo ankò? ¹² (108:13) Tanpri, ede nou goumen kont lènmi nou yo, paske sekou
¹³ lèzòm se pawòl nan bouch. (108:14) Avèk Bondye bò kote nou, n'a fè bèl bagay nan lagè. Se li
menm k'ap kraze lènmi nou yo anba pye l'.

Chapter 109

¹ ¶ Pou chèf sanba yo. Se yon sòm David. Bondye, m'ap fè lwanj ou! Tanpri, pa rete san ou pa
² di anyen. Yon bann mechan ak yon bann mantò ap pale m' mal. Y'ap fè manti sou mwen. ³ Kote
⁴ m' pase, moun ki rayi m' yo ap pale m' mal. Y'ap fè m' lagè san mwen pa fè yo anyen. Mwen
⁵ renmen yo, men yo menm yo pa vle wè m'. Pou mwen menm, m'ap lapriyè nan pye ou. M'ap fè
⁶ byen pou yo, yo menm y'ap fè m' mal. Mwen renmen yo, men yo menm yo rayi m'. ¶ Pran yon
⁷ mechan, mete l' chèf sou lènmi m' lan. Moun ki la pou pran defans li, se li ki pou kanpe akize li.
⁸ Lè yo jije l', se pou yo jwenn li koupab. Menm lapriyè l'ap fè yo, se pou yo pase pou peche. Se
⁹ pou l' pa gen anpil jou pou l' viv ankò. Se pou yon lòt moun pran plas li nan travay li. Se pou pitit
¹⁰ li yo rete san papa. Se pou madanm li vin vè. Se pou pitit li yo tounen vakabon k'ap mande.
¹¹ Se pou yo mete yo deyò nan vye kay kraze kote yo rete a. Se pou moun ki te prete l' lajan mete
¹² men sou tou sa ki pou li. Se pou etranje piye rekòt jaden li. Se pou pesonn pa zanmi l' ankò. Se
¹³ pou pesonn pa gen pitye pou pitit li kite. Se pou tout pitit pitit li yo mouri. Se pou timoun k'ap
¹⁴ vini yo bliye non li. Se pou Seyè a toujou chonje tou sa zansèt li yo te fè ki mal, pou l' pa janm
¹⁵ padonnen peche manman l' yo. Se pou Seyè a pa janm bliye peche yo te fè. Se pou li fè moun
¹⁶ bliye yo nèt sou latè, paske li pa janm chonje gen pitye pou pesonn. Li pèsekite malere yo,
¹⁷ endijan yo, moun ki san sekou, jouk li touye yo. Li renmen bay madichon. Se pou madichon
¹⁸ tonbe sou li. Li pa renmen bay benediksyon. Se pou pesonn pa ba li benediksyon. Tout kò l' se
¹⁹ madichon! Se pou madichon pase l' nan san. Se pou madichon antre nan tout zo nan kò l'. Se
²⁰ pou madichon kouvri l' tankou dra. Se pou madichon mare nan ren l' tankou yon sentiwon. Se
²¹ konsa pou Seyè a pini moun ki pa vle wè m' yo, moun k'ap pale m' mal yo. ¶ Men, Seyè, Bondye
²² mwen, fè kichòy pou mwen non, pou sa sèvi yon lwanj pou ou. Delivre m' non paske ou p'ap janm
²³ sispann renmen m'. Se yon pòv malere san sekou mwen ye, kè m' ap fann. Kò m' ap tchoule
²⁴ tankou solèy k'ap kouche. Mwen tankou bigay van ap pote ale. Jenou m' fèb sitèlman mwen pa
²⁵ manje. Mwen tounen zo ak po. Mwen fèb anpil! Lè moun wè m', y'ap fè siy sou mwen, y'ap
²⁶ pase m' nan rizib. Ede m' non, Seyè, Bondye mwen! Delivre m' paske ou gen bon kè. Se pou
²⁷ lènmi m' yo konnen se ou menm, Seyè, k'ap delivre m'. Yo mèt ban m' madichon. Men, ou
²⁸

menm, w'ap ban m' benediksyon. Se pou moun ki pa vle wè m' yo wont. Men, mwen menm k'ap sèvi ou la, se pou m' gen kè kontan. ²⁹ Se pou moun ki pa vle wè m' yo wont, se pou dezonè tonbe sou yo. ³⁰ M'ap louvri bouch mwen tout lajè pou m' di Seyè a mès. M'ap fè lwanj li lè tout pèp la reyini, ³¹ paske li pran defans pòv malere a, li delivre l' anba men moun ki te kondannen l' yo.

Chapter 110

¹ ¶ Se yon sòm David. Seyè a pale ak wa a, chèf mwen an, li di: -Chita la sou bò dwat mwen, jouk tan mwen fè lènmi ou yo tounen yon ti ban pou lonje pye ou. ² Seyè a va fè ou dominan sou peyi ki lòt bò fwontyè peyi Siyon. Li di ou: -Gouvènè sou tout lènmi ou yo. ³ Jou w'ap pare pou konbat lènmi ou yo, pèp ou a va prese vin ba ou konkou. Tankou lawouze nan granmaten, jenn gason ou yo va vin jwenn ou sou mòn ki apa pou Bondye a. ⁴ Seyè a te sèman, l'ap toujou kenbe pawòl li: -Ou se prèt pou tout tan, menm jan ak Mèlkisedèk. ⁵ ¶ Seyè a kanpe sou bò dwat ou. Lè l' ankòlè l'ap krabinen wa yo. ⁶ L'ap jije nasyon yo, l'ap anpile kadav sou kadav, l'ap kraze chèf yo toupatou sou latè. ⁷ Wa a ap bwè dlo larivyè k'ap koule bò wout la. Se poutèt sa li p'ap janm bese tèt devan lènmi l' yo.

Chapter 111

¹ ¶ Lwanj pou Seyè a! M'a fè lwanj Seyè a ak tout kè m', nan mitan moun ki mache dwat yo, nan mitan pèp Bondye a lè yo reyini. ² Bagay Seyè a fè se gwo zafè! Tout moun ki kontan wè yo ap chache konprann yo. ³ Tou sa li fè, se respè, se chape ba. Jistis li la pou tout tan. ⁴ Seyè a pa kite nou bliye bèl mèvèy li fè yo. Li gen pitye pou nou, li gen bon kè. ⁵ Li bay moun ki gen krentif pou li manje, li pa janm bliye kontra li pase ak nou an. ⁶ ¶ Li fè pèp li wè jan li gen pouvwa nan sa l'ap fè. Li ba yo tè lòt nasyon yo pou byen pa yo. ⁷ L'ap kenbe pawòl li, li san patipri nan tou sa l'ap fè. Nou mèt konte sou kòmandman li yo. ⁸ Yo la pou tout tan, paske se bagay ki dwat, se bagay

9
 ki vre. Li delivre pèp li a, li pase ak yo yon kontra ki p'ap janm kase. Se Bondye tout bon li ye.
 10
 Li merite vre pou moun pè li! Lè ou gen krentif pou Bondye, se lè sa a ou konmanse gen bon konprann! Bondye ap bay moun ki gen krentif pou li bon jijman. Wi, se tout tan pou yo fè lwanj li.

Chapter 112

1
 ¶ Lwanj pou Seyè a! Ala bon sa bon pou moun ki gen krentif pou Seyè a, ki pran tout plezi l' nan fè sa li mande!
 2
 Pitit li yo va grannèg nan peyi a. Bondye ap toujou voye benediksyon sou pitit moun ki mache dwat devan li.
 3
 Li alèz lakay li, li gen anpil richès. L'ap toujou fè sa ki dwat devan Bondye.
 4
 Nan mitan fènwa a, yon limyè klere pou moun ki mache dwat yo, pou moun ki gen kè sansib, moun ki gen bon kè ak moun ki pa nan patipri.
 5
 Ala bon sa bon pou moun ki gen bon kè, pou moun ki konn prete moun, pou moun ki mennen trafik li san fè vis!
 6
 ¶ Li p'ap janm bite. Yo p'ap janm bliye l'.
 7
 Kè l' p'ap kase lè li pran move nouvèl. Li gen yon konfyans fèm nan Seyè a.
 8
 Anyen p'ap brannen l', li pa pè anyen. Se konsa l'ap kanpe gade moun ki pa vle wè l' yo.
 9
 Li bay moun ki nan nesosite san gad dèyè. L'ap toujou fè sa ki dwat devan Bondye. L'ap gen pouvwa, y'ap respekte l'.
 10
 Lè mechan wè sa, li move. li manje dan l', kè l' grenn. Tou sa mechan an t'ap tann lan pa rive.

Chapter 113

1
 ¶ Lwanj pou Seyè a! Nou menm k'ap sèvi Seyè a, fè lwanj li!
 2
 Se pou nou nonmen non l' depi koulye a epi pou tout tan tout tan.
 3
 Depi kote solèy leve jouk kote solèy kouche, se pou yo fè lwanj Seyè a!
 4
 Seyè a dominen sou tout nasyon yo. Pouvwa li moute pi wo pase syèl la.
 5
 Pa gen tankou Seyè a, Bondye nou an. Li chita anwo nèt.
 6
 Li bese je l' pou l' wè sa k'ap pase nan syèl la ak sou latè a.
 7
 Li bay pòv malere a men pou fè l' leve soti nan pousyè a. Li wete l' nan mizè.

⁸ Li fè l' chita menm kote ak chèf yo, wi, sou menm tab ak chèf pèp li a. ⁹ Li bay fanm ki pa ka fè pitit la yon fanmi. Li fè kè l' kontan lakay li, li ba l' pitit. Lwanj pou Seyè a!

Chapter 114

¹ ¶ Lè pèp Izrayèl la te soti nan peyi Lejip, lè pitit pitit Jakòb yo te kite peyi etranje yo, ² Bondye chwazi branch fanmi Jida a pou pèp li, moun Izrayèl yo pou byen pa l'. ³ Lè Lanmè Wouj la wè l', li pran kouri san gad dèyè. Larivyè Jouden sispann koule desann. ⁴ Mòn yo sote ponpe tankou bouk kabrit, ti mòn yo sote ponpe tankou ti mouton. ⁵ Kisak pase ou, lanmè, kifè ou pran kouri konsa? Ou menm larivyè Jouden, kisak rive ou kifè ou sispann koule? ⁶ Nou menm mòn yo, sa nou genyen pou n'ap sote ponpe konsa tankou bouk kabrit? Nou menm ti mòn yo, poukisa n'ap sote ponpe tankou ti mouton? ⁷ Ou menm latè, tranble devan Seyè a, devan Bondye Jakòb la. ⁸ Se li menm ki fè gwo wòch la tounen yon basen dlo, li fè wòch la tounen yon sous dlo.

Chapter 115

¹ ¶ Non! Lwanj lan pa pou nou, Seyè! Se pa pou nou lwanj lan ye, Seyè! Non! Se pa pou nou! Men, se pou ou menm sèl, paske ou renmen nou, paske ou toujou kenbe pawòl ou! ² Poukisa moun lòt nasyon yo ap mande: -Kote Bondye nou an? ³ Bondye nou an, se nan syèl la li ye, Li fè sa l' vle. ⁴ Zidòl pa yo, se bagay ki fèt ak ajan ak lò. Se moun ki fè yo ak men yo. ⁵ Yo gen bouch, men yo pa ka pale. Yo gen je, men yo pa ka wè. ⁶ Yo gen zòrèy, men yo pa ka tande. Yo gen nen, men yo pa ka pran okenn sant. ⁷ Yo gen men, men yo pa ka manyen anyen. Yo gen pye, men yo pa ka mache. Pa menm yon ti son pa ka soti nan gòj yo. ⁸ Moun ki fè zidòl yo ansanm ak tout moun ki mete konfyans yo nan yo, se pou yo tounen tankou yo. ⁹ ¶ Nou menm, pèp Izrayèl la, mete konfyans nou nan Seyè a. Se li menm k'ap ede nou, se li ki tout pwoteksyon nou. ¹⁰ Nou menm, prèt Bondye yo, mete konfyans nou nan Seyè a. Se li menm k'ap ede nou, se li ki tout pwoteksyon nou. ¹¹ Nou tout ki gen krentif pou Seyè a, mete konfyans nou nan li. Se li menm k'ap ede nou, se li ki tout

¹² pwoteksyon nou. Seyè a p'ap janm bliye nou, l'ap ban nou benediksyon li. L'ap beni pèp Izrayèl
¹³ la, l'ap beni prèt Bondye yo. L'ap beni tout moun ki gen krentif pou li, piti kou gran. ¹⁴ Se pou
¹⁵ Seyè a ba ou anpil benediksyon. Se pou l' beni piti ou yo tou. Se pou Seyè a ki fè syèl la ak latè
¹⁶ a voye benediksyon li sou nou! Syèl la se pou Seyè a li ye. Li bay moun latè pou yo. ¹⁷ Se pa
¹⁸ moun mouri k'ap fè lwanj Seyè a. Non! Se pa moun ki desann kote mò yo ye a k'ap fè lwanj li.
 Men, nou menm ki vivan, n'ap di l' mèsì depi koulye a ak pou tout tan tout tan. Lwanj pou Seyè
 a!

Chapter 116

¹ ¶ Mwen renmen Seyè a, paske li tande mwen, li koute lapriyè mwen. ² Li te panche zòrèy li
³ bò kote m' chak fwa mwen rele l'. Lanmò te fin vlope m'. Privye lanmò te tonbe sou mwen yon
⁴ sèl kou. Kè m' te kase, mwen te nan gwo lapenn. Lè m' wè sa, mwen rele Seyè a. Mwen di li:
⁵ -Tanpri, Seyè, delivre m' non! Seyè a gen kè sansib, li pa gen patipri. Bondye nou an gen bon kè.
⁶ Seyè a pwoteje moun ki san sekou. Lè mwen te nan malè, se li ki te sove mwen. ⁷ Mwen mèt rete
⁸ kè poze, paske Seyè a te bon pou mwen. Seyè, ou delivre m' anba lanmò. Ou fè m' sispann kriye.
⁹ Ou pa kite m' bite. Se konsa m'a mache devan Seyè a, nan peyi moun vivan yo. ¹⁰ ¶ Mwen te
 kenbe konfyans mwen fèm nan Seyè a, menm lè m' t'ap di: -Malè pa manke tonbe sou mwen!
¹¹ menm nan tèt chaje mwen te ye a, lè m' t'ap di: -Ou pa ka fè pesonn konfyans! ¹² Kisa m'a fè
¹³ pou Seyè a, pou tout byen li fè pou mwen yo? M'a ofri yon bwason bay Seyè a, paske li delivre
¹⁴ m'. M'a rele l' pou m' di l' mèsì. Nan mitan tout pèp Bondye a, lè yo reyini, m'a fè sa m' te pwomèt
¹⁵ li a. Sa fè Seyè a lapenn anpil lè li wè yonn nan moun k'ap sèvi l' yo mouri! ¹⁶ Seyè, mwen se
 yonn nan sèvitè ou yo. Mwen se piti manman m' ki te toujou sèvi ou. Se ou ki te kase kòd ki te
¹⁷ mare m' yo. M'ap ofri bèt pou yo touye bay Seyè a, m'ap rele l' pou m' di l' mèsì. ¹⁸ -(we vèsè
¹⁹ pwochen) Nan mitan tout pèp Bondye a, lè yo reyini, nan mitan kay li a, nan mitan lavil Jerizalèm
 m'a fè sa m' te pwomèt li a. Lwanj pou Seyè a!

Chapter 117

¹ ¶ Nou menm nasyon yo, fè lwanj Seyè a! Nou menm tout pèp yo, fè lwanj li! ² Paske, li renmen nou anpil anpil, l'ap toujou kenbe pawòl li. Lwanj pou Seyè a!

Chapter 118

¹ ¶ Fè lwanj Seyè a paske li bon. Li p'ap janm sispann renmen nou! ² Se pou pèp Izrayèl la di: -Wi, li p'ap janm sispann renmen nou! ³ Se pou prèt k'ap sèvi Bondye yo di: -Wi, li p'ap janm sispann renmen nou! ⁴ Se pou tout moun ki gen krentif pou Bondye di: -Wi, li p'ap janm renmen nou! ⁵ Nan tray mwen te ye a, mwen rele Seyè a, li reponn mwen, li delivre m'. ⁶ Seyè a pou mwen, mwen pa pè anyen. Kisa moun ka fè m'? ⁷ Se Seyè a k'ap ede mwen. Se konsa m'ap kanpe gade moun ki rayi m' yo. ⁸ Pito yon moun chache pwoteksyon anba zèl Seyè a pase pou l' mete konfyans li nan moun. ⁹ Pito yon moun chache pwoteksyon anba zèl Seyè a pase pou l' konte sou chèf. ¹⁰ Tout nasyon yo te sènen m', Men, avèk pouvwa Seyè a, mwen kraze yo nèt. ¹¹ Yo te sènen m', yo te kwense m'. Men, avèk pouvwa Seyè a, mwen kraze yo nèt. ¹² Yo te kouvri m' tankou myèl. Men, yo mouri tankou dife nan pay. Avèk pouvwa Seyè a, mwen kraze yo nèt. ¹³ Yo te ban m' yon bourad pou fè m' tonbe. Men, Seyè a te pote m' sekou. ¹⁴ Se Seyè a ki tout fòs mwen, se pou li m'ap chante. Se li menm ki delivre m'. ¹⁵ Tande jan moun k'ap mache dwat devan Bondye yo ap rele anndan lakay yo, sitèlman yo kontan! Yo genyen batay la, yo delivre. Seyè a fè bèl bagay avèk pouvwa li. ¹⁶ Pouvwa Seyè a se yon pakèt afè. Seyè a fè bèl bagay ak pouvwa li. ¹⁷ Non, mwen p'ap mouri. M'a viv! M'a rakonte sa Seyè a fè pou mwen. ¹⁸ Li te pini m' byen pini. Men, li pa t' touye m'. ¹⁹ ¶ Louvri pòt kay Bondye ki fè m' jistis la pou m' antre, pou m' di Seyè a mèsi. ²⁰ Men pòt kay Seyè a! Se moun ki mache dwat devan l' sèlman ki ka pase ladan l'. ²¹ Seyè, m'ap di ou mèsi paske ou te koute m', paske se ou menm ki delivre m'. ²² Wòch moun ki t'ap bati yo te voye jete a, se li menm ki tounen wòch ki kenbe kay la. ²³ Sa se travay Seyè a menm! Se bèl bagay

pou nou wè sa! ²⁴ Ala yon bèl jounen Seyè a ban nou! Ann pase jounen an ap fè fèt, ann fè kè nou
 kontan! ²⁵ Aa! Seyè! Tanpri, delivre nou! Tanpri, fè nou reyisi nan tou sa n'ap fè! ²⁶ Benediksyon
 pou moun ki vini nan non Seyè a! Nou menm ki nan kay Seyè a, n'ap beni nou. ²⁷ Seyè a se Bondye
 li ye. Li wete nou nan fènwa kote nou te ye a. Avèk branch bwa nan men nou, ranje nou pou nou
 fè tout tou lotèl la. ²⁸ Se ou ki Bondye mwen, m'ap di ou mèsi. Bondye mwen, m'ap di jan ou gen
 pouvwa! ²⁹ Fè lwanj Seyè a paske li bon. Li p'ap janm sispann renmen nou!

Chapter 119

¹ ¶ Ala bon sa bon pou moun k'ap mennen yon lavi san repwòch, pou moun k'ap mache dapre
 lalwa Seyè a! ² Ala bon sa bon pou moun ki kenbe prensip li yo, pou moun k'ap chache obeyi l' ak
 tout kè yo! ³ Moun konsa p'ap fè mal, y'ap mache nan chemen li mete devan yo. ⁴ ¶ Ou ban nou
 lòd pou nou swiv. Ou mande pou nou obeyi yo san manke yonn. ⁵ Jan m' ta renmen kenbe fèm pou
 m' toujou fè sa ou mande! ⁶ Konsa, mwen p'ap janm wont lè m'ap kalkile kòmandman ou yo. ⁷ ¶
 M'a fè lwanj ou avèk yon konsyans ki pwòp, lè m' aprann tou sa ou deside nan jistis ou. ⁸ Mwen
 vle fè tou sa ou mande. ⁹ Tanpri, pa lage m'. ¶ Kisa yon jenn gason dwe fè pou l' mennen bak li
 dwat? Se pou l' toujou mache jan ou di l' mache a. ¹⁰ ¶ Mwen chache obeyi ou ak tout kè mwen.
 Pa kite m' dezobeyi kòmandman ou yo. ¹¹ ¶ Mwen sere pawòl ou yo nan kè mwen, pou m' pa fè
 peche kont ou. ¹² ¶ Mèsi, Bondye. Moutre m' tou sa ou vle m' fè. ¹³ ¶ M'ap repete ak bouch mwen
 tout jijman ki soti nan bouch ou. ¹⁴ Mwen pran plezi m' pou m' mache dapre prensip ou yo, tankou
 si m' te gen tout richès sou latè. ¹⁵ M'ap kalkile sa ou ban nou lòd fè. M'ap egzaminen chemen ou
 mete devan nou. ¹⁶ Mwen pran tout plezi m' nan fè sa ou mande. Mwen p'ap bliye pawòl ou yo.
¹⁷ ¶ Aji byen avè m', mwen menm k'ap sèvi ou la, pou m' ka viv, pou m' ka fè tou sa ou di m' fè.
¹⁸ ¶ Louvri je m' pou m' ka wè bèl bagay ki nan lalwa ou la. ¹⁹ ¶ Se pase m'ap pase sou tè a. Tanpri,
 pa anpeche m' konnen kòmandman ou yo. ²⁰ ¶ Se tout tan kè m' ap bat, tèlman mwen anvi konnen

21 sa ou deside. ¶ Ou rele dèyè awogan yo, bann madichon sa yo k'ap dezobeyi kòmandman ou
 22 yo. ¶ Pa kite yo joure m', pa kite yo meprize m', paske mwen te kenbe prensip ou yo. ¶ Menm
 23 si chèf yo chita pou pale m' mal, mwen menm k'ap sèvi ou la, m'ap kalkile sou sa ou vle m' fè a.
 24 ¶ Prensip ou yo fè kè m' kontan. Se yo ki ban m' konsèy sa pou m' fè. 25 ¶ Mwen kouche atè nan
 26 pousyè a! Ban m' lavi ankò, jan ou te pwomèt la. ¶ Mwen di ou tou sa m' te fè, ou reponn mwen.
 27 Tanpri, moutre m' tou sa ou vle m' fè. Fè m' konprann ki jan pou m' swiv lòd ou ban mwen yo.
 28 M'a kalkile bèl bagay ou fè yo. ¶ Mwen gen lapenn, dlo ap koule nan je m'. Mete m' sou de pye
 29 m' ankò, jan ou te pwomèt la. Pa kite m' lage kò m' nan bay manti. Fè m' favè sa a, moutre mwen
 30 lalwa ou. ¶ Mwen pran desizyon pou m' swiv verite a. M'ap kenbe jijman ou yo devan je mwen.
 31 Mwen swiv prensip ou yo pwen pa pwen. Seyè, pa kite m' pran wont. 32 M'ap prese obeyi
 33 kòmandman ou yo lè ou louvri lespri mwen. ¶ Seyè, moutre m' jan pou m' swiv lòd ou yo, pou
 34 m' obeyi yo jouk sa kaba. Ban m' lespri pou m' ka obeyi lalwa ou, pou m' fè sa l' mande a ak
 35 tout kè mwen. ¶ Fè m' viv yon jan ki dakò ak kòmandman ou yo, paske se nan yo mwen jwenn
 36 tout plezi m'. Fè m' pi anvè swiv prensip ou yo pase pou m' anvè gen lajan. 37 ¶ Pa kite m' kouri
 38 dèyè bagay ki pa vo anyen. Fè m' swiv chemen ou mete devan m' lan. ¶ Kenbe pwomès ou te
 39 fè sèvitè ou la, pwomès ou te fè pou moun ki gen krentif pou ou. ¶ Pa kite yo joure m', mwen
 40 pè bagay konsa. Ala bon jijman ou yo bon! ¶ Ou wè jan m' anvè swiv lòd ou yo! Nan jistis ou,
 41 tanpri, ban m' lavi ankò! ¶ Fè m' wè jan ou renmen m', Seyè! vin delivre m', jan ou te pwomèt
 42 la. Lè sa a, m'a gen repons pou m' bay moun k'ap joure m' yo, paske mwen gen konfyans nan
 43 pawòl ou. ¶ Pa janm wete pawòl verite a nan bouch mwen, paske mwen mete tout espwa mwen
 44 nan jijman ou yo. M'ap toujou obeyi lalwa ou la, pou tout tan tout tan. 45 ¶ M'a mache alèz san
 46 anyen pa jennen m', paske m'ap toujou chache swiv lòd ou yo. M'a fè wa yo konnen prensip ou
 47 yo, mwen p'ap wont fè sa. Mwen pran tout plezi m' nan obeyi kòmandman ou yo, paske mwen
 48 renmen yo. M'ap respekte kòmandman ou yo, paske mwen renmen yo. M'ap kalkile sou sa ou
 49 vle m' fè a. ¶ Chonje sa ou te di sèvitè ou la. Se sa ki te ban m' espwa. 50 ¶ Nan mizè mwen,

tout konsolasyon m', se pwomès ou fè m' lan. Se sa ki fè m' viv. ⁵¹ ¶ Yon bann awogan ap pase m'
 nan betiz. Mwen pa janm dezobeyi lalwa ou. ⁵² ¶ Mwen chonje sa ou te deside nan tan lontan.
 Seyè, se sa ki ban m' kouraj. ⁵³ ¶ Sa mete m' ankòlè, lè m' wè jan mechan yo ap dezobeyi lalwa
 ou. ⁵⁴ ¶ Mwen fè chante ak sa ou mande m' fè, nan kay ki pa lakay mwen. ⁵⁵ ¶ Lannwit se ou m'ap
 chonje, Seyè. M'ap fè tou sa lalwa ou la mande m' fè. ⁵⁶ Pou mwen menm, men ki jan sa ye: se
 swiv m'ap swiv tout lòd ou yo. ⁵⁷ ¶ Seyè, mwen deja di ou sa: pou mwen menm, se kenbe m'ap
 kenbe pawòl ou yo. ⁵⁸ ¶ M'ap mande ou favè sa a ak tout kè m': Tanpri, gen pitye pou mwen, jan
 ou te di l' la. ⁵⁹ ¶ Mwen egzaminen jan m'ap viv la. Mwen chanje pou m' ka mache dapre prensip
 ou yo. ⁶⁰ Mwen prese, mwen pa pran reta pou m' obeyi kòmandman ou yo. ⁶¹ ¶ Mechan yo sènen
 m' toupatou ak pèlen yo. Men, mwen pa janm bliye lalwa ou la. ⁶² ¶ Nan mitan lannwit mwen leve
 pou m' di ou mèsi, paske tout jijman ou yo san patipri. ⁶³ ¶ Mwen se zanmi tout moun ki gen krentif
 pou ou, zanmi tout moun k'ap swiv lòd ou yo. ⁶⁴ ¶ Seyè, toupatou sou latè tout moun wè jan ou
 gen bon kè. Moutre m' tou sa ou vle m' fè. ⁶⁵ ¶ Ou te aji byen avè m', sèvitè ou la, jan ou te pwomèt
 la. ⁶⁶ Moutre m' sa ki byen, louvri lespri m', ban m' konesans, paske mwen gen konfyans nan
 kòmandman ou yo. ⁶⁷ ¶ Anvan ou te pini m' lan, mwen te konn fè sa ki mal. Men koulye a, m'ap
 fè tou sa ou di m' fè. ⁶⁸ ¶ Ou gen bon kè, ou pa fè mechanste. Moutre m' sa ou vle m' fè. ⁶⁹ ¶ Yon
 bann awogan ap fè manti sou mwen. Men mwen menm, m'ap swiv lòd ou yo ak tout kè m'. ⁷⁰ Moun
 sa yo gen lespri yo bouche, men mwen menm, mwen pran tout plezi m' nan lalwa ou la. ⁷¹ ¶
 Pinisyon an te bon nèt pou mwen! Li fè m' konnen sa ou vle m' fè. ⁷² ¶ Lalwa ou ban mwen an
 gen plis valè pou mwen pase tout richès ki sou latè. ⁷³ ¶ Se ou ki te kreye m', se ou ki te fè m' ak
 men ou. Ban m' lespri pou m' ka aprann kòmandman ou yo. ⁷⁴ ¶ Moun ki gen krentif pou ou va fè
 fèt lè y'a wè m', paske mwen te mete tout espwa m' nan pawòl ou. ⁷⁵ ¶ Seyè, mwen konnen jijman
 ou yo san patipri. Ou te pini m' paske ou toujou kenbe pawòl ou. ⁷⁶ ¶ Jan ou te pwomèt mwen sa,
 mwen menm sèvitè ou la, konsole m', paske ou renmen m'. ⁷⁷ Gen pitye pou mwen pou m' ka viv,
 paske mwen pran tout plezi m' nan lalwa ou. ⁷⁸ ¶ Bann awogan sa yo k'ap fini avè m' san rezon

an, se pou yo wont. Mwen menm, m'ap kalkile lòd ou ban mwen yo. ⁷⁹ Se pou moun ki gen krentif
 pou ou ansanm ak moun ki konnen prensip ou yo tounen vin jwenn mwen. ⁸⁰ ¶ Se pou m' fè tou
 sa ou vle m' fè, san manke yonn, pou m' pa janm wont. ⁸¹ ¶ Seyè, kè m' fè m' mal tèlman m'ap tann
 ou vin delivre mwen. Mwen mete tout espwa mwen nan pawòl ou. ⁸² Je m' yo fè m' mal tèlman
 m'ap veye sa ou te pwomèt la. M'ap mande: -Kilè w'a vin konsole m'? ⁸³ ¶ Mwen tankou yon vye
 kalbas ki pandye bò dife. Men, mwen pa janm bliye sa ou mande m' fè. ⁸⁴ ¶ Konbe jou sèvitè ou
 la rete pou l' viv ankò? Kilè w'a pini moun k'ap pèsekite m' yo? ⁸⁵ ¶ Yon bann awogan fouye twou
 sou wout mwen, yo p'ap fè sa ou mande nan lalwa a. ⁸⁶ Tout kòmandman ou yo se bagay ki sèten.
 Y'ap pèsekite m' san rezon. vin pote m' sekou! ⁸⁷ Ti moso yo touye m'. Men, mwen menm, mwen
 pa janm dezobeyi lòd ou yo. ⁸⁸ ¶ Paske ou renmen m', ban m' lavi ankò pou m' ka swiv prensip ki
 soti nan bouch ou. ⁸⁹ ¶ Seyè, pawòl ou la pou tout tan. Y'ap toujou rete jan yo ye a nan syèl la.
⁹⁰ Tout tan tout tan, w'ap toujou kenbe pawòl ou. Ou mete latè nan plas li, l'ap rete fèm. ⁹¹ Jouk
 jounen jòdi a, tout bagay sou latè rete jan ou vle l' la, paske yo tout se sèvitè ou yo ye. ⁹² ¶ Si mwen
 pa t' pran plezi m' nan fè sa ou mande m' fè, atòkonsa mwen ta fin mouri nan mizè mwen. ⁹³ ¶
 Mwen p'ap janm bliye lòd ou bay yo paske se gremesi yo ou ban m' lavi ankò. ⁹⁴ ¶ Se moun ou
 mwen ye. Sove m' non! M'ap toujou swiv lòd ou yo. ⁹⁵ ¶ Yon bann mechan ap veye pou yo touye
 m'. Men mwen menm, m'ap veye pou m' mache dapre prensip ou yo. ⁹⁶ ¶ Mwen wè tou sa ki bon
 sou latè la pou yon ti tan. Men, kòmandman ou yo la pou tout tan. ⁹⁷ ¶ Ala renmen mwen renmen
 lalwa ou la! Se tout lajounen m'ap kalkile sou li. ⁹⁸ ¶ Kòmandman ou yo fè m' gen plis konprann
 pase lènmi m' yo. Kòmandman ou yo nan kè m' tout tan. ⁹⁹ Mwen gen plis konprann pase tout
 pwofesè m' yo, paske m'ap kalkile sou prensip ou yo. ¹⁰⁰ Mwen gen plis konprann pase granmoun
 cheve blan, paske mwen toujou swiv lòd ou yo. ¹⁰¹ ¶ Mwen veye pou m' pa mete pye m' nan move
 chemen, pou m' ka fè tou sa ou di m' fè. ¹⁰² ¶ Mwen pa janm vire do bay sa ou deside, paske se
 ou menm ki moutre mwen tout bagay. ¹⁰³ ¶ Ala dous pawòl ou yo dous anba lang mwen! Yo pi
 dous pase siwo myèl nan bouch mwen. ¹⁰⁴ Lòd ou yo fè m' konprann tout bagay, konsa mwen

rayi tout bagay ki ka fè m' bay manti. ¹⁰⁵ ¶ Pawòl ou se yon chandèl ki fè m' wè kote m'ap mete
 pye m', se yon limyè k'ap klere chemen mwen. ¹⁰⁶ ¶ Mwen fè sèman, epi m'ap kenbe sèman an:
 M'ap fè tou sa ou deside nan jistis ou. ¹⁰⁷ ¶ Seyè, m'ap soufri anpil anpil. Ban m' lavi ankò jan ou
 te pwomèt la. ¹⁰⁸ ¶ Seyè, koute lè m'ap lapriyè pou m' di ou mèsì. Fè m' konnen tou sa ou deside.
¹⁰⁹ ¶ Se tout tan lavi m' an danje. Men, mwen p'ap janm bliye lalwa ou. ¹¹⁰ Yon bann mechan
 tann pèlen pou mwen. Men, mwen pa t' dezobeyi lòd ou yo. ¹¹¹ ¶ Prensip ou yo se byen m' pou
 tout tan, se yo ki fè kè m' kontan. ¹¹² Mwen pran desizyon pou m' fè tou sa ou vle m' fè, tout tan
 jouk mwen mouri. ¹¹³ ¶ Mwen rayi moun ki pa konn sa yo vle. Mwen renmen lalwa ou. ¹¹⁴ ¶ Se
 ou ki defans mwen, se ou ki tout pwoteksyon mwen. Mwen mete tout espwa m' nan pawòl ou.
¹¹⁵ ¶ Wete kò nou sou mwen, bann mechan, pou m' ka obeyi kòmandman Bondye mwen an. ¹¹⁶ ¶
 Soutni mwen, jan ou te pwomèt la, pou m' ka viv. Pa kite m' pran wont pou m' pa jwenn sa m'ap
 tann lan. ¹¹⁷ Kenbe m' pou m' ka delivre. M'ap toujou veve pou m' pa janm bliye sa ou vle m' fè.
¹¹⁸ ¶ Ou meprize tout moun ki desobeyi lalwa ou yo, paske tout plan y'ap fè yo p'ap sèvi yo anyen.
¹¹⁹ Ou konsidere mechan ki sou latè tankou fatra. Se poutèt sa mwen renmen prensip ou yo.
¹²⁰ M'ap tranble nan tout kò m' sitèlman mwen pè ou. Wi, mwen pè jijman ou yo. ¹²¹ ¶ Mwen fè
 sa ki dwat ak sa ki bon. Tanpri, pa lage m' nan men lènmi m' yo. ¹²² Kanpe pou defann sèvitè ou
 la. Pa kite bann awogan yo mete pye sou kou mwen. ¹²³ ¶ Je m' yo fè m' mal tèlman m'ap tann ou
 vin sove m', jan ou te pwomèt fè m' jistis la. ¹²⁴ ¶ Jan ou gen bon kè sa a, aji byen ak sèvitè ou la.
 Moutre m' sa ou vle m' fè a. ¹²⁵ Se sèvitè ou mwen ye, louvri lespri m', pou m' ka konnen prensip
 ou yo. ¹²⁶ ¶ Seyè, li lè pou ou fè sa w'ap fè a, paske moun yo pa vle obeyi lalwa ou. ¹²⁷ ¶ Se poutèt
 sa, mwen renmen kòmandman ou yo pi plis pase lò, menm pase lò ki pi bon an. ¹²⁸ Se konsa, pou
 mwen menm tout lòd ou yo bon. Mwen rayi tout bagay ki ka fè m' bay manti. ¹²⁹ ¶ Prensip ou yo
 se mèvèy. M'ap swiv yo ak tout kè m'. ¹³⁰ ¶ Esplikasyon nou jwenn nan pawòl ou klere lespri nou.
 Yo louvri lespri moun ki san konprann yo pou yo konprann. ¹³¹ ¶ Mwen rete ak bouch mwen
 louvri, m'ap tann, tèlman m' anvi konnen kòmandman ou yo. ¹³² ¶ Vire gade m' non, gen pitye
 pou mwen, tankou ou toujou fè l' pou moun ki renmen ou yo! ¹³³ ¶ Soutni m' avèk pawòl ou pou

m' pa bite. Pa kite mechanste gen pye sou mwen. ¹³⁴ ¶ Delivre m' anba men moun k'ap peze m'
 yo pou m' ka mache dapre lòd ou yo. ¹³⁵ ¶ Se sèvi m'ap sèvi ou. Tanpri, fè m' santi ou la avè m'.
 Moutre m' sa ou vle m' fè. ¹³⁶ ¶ Dlo ap kouri nan je m' tankou larivyè, paske moun pa vle obeyi
 lalwa ou. ¹³⁷ ¶ Seyè, ou pa nan patipri. Ou jije tout moun menm jan. ¹³⁸ Prensip ou bay yo, se
 bagay ki dwat, se bagay ki vre. ¹³⁹ ¶ Tèlman mwen renmen lalwa ou, mwen santi se tankou yon
 dife k'ap boule tout anndan mwen, lè m' wè jan moun ki pa vle wè m' yo bliye pawòl ou yo. ¹⁴⁰ ¶
 Pawòl ou se pawòl sèten nèt. Sèvitè ou gen tan renmen li. ¹⁴¹ ¶ Mwen pa anyen, y'ap meprize m'.
 Men, mwen pa bliye lòd ou bay yo. ¹⁴² ¶ Jistis ou la pou tout tan, lalwa ou se verite. ¹⁴³ ¶ Mwen
 nan tray, kè m' ap kase. Men, mwen pran tout plezi m' nan fè sa ou mande m' fè. ¹⁴⁴ Prensip ou
 yo se bagay ki dwat pou tout tan. Ban m' bon konprann pou m' ka viv. ¹⁴⁵ ¶ M'ap rele nan pye ou
 ak tout kè mwen. Reponn mwen, Seyè, pou m' ka toujou fè sa ou vle m' fè. ¹⁴⁶ M'ap rele ou, sove
 m' non, pou m' ka mache dapre prensip ou yo! ¹⁴⁷ ¶ Solèy poko leve, m'ap rele mande sekou. Tout
 espwa mwen se nan pawòl ou li ye. ¹⁴⁸ Lannwit poko rive, mwen moute kabann mwen pou m'
 kalkile pawòl ou yo. ¹⁴⁹ ¶ Seyè, koute sa m'ap di ou, paske ou gen bon kè. Ban m' lavi ankò, jan
 ou te pwomèt la. ¹⁵⁰ ¶ Moun ki soti pou touye m' yo pwoche bò kote m'. Se moun sa yo ki vire do
 bay lalwa a depi lontan. ¹⁵¹ Men, ou toupre m', Seyè. Tout kòmandman ou yo se bagay ki vre.
¹⁵² ¶ Gen lontan depi mwen konnen prensip ou yo. Yo la pou tout tan. ¹⁵³ ¶ Gade nan ki mizè
 mwen ye. Delivre m' non, paske mwen pa janm bliye lalwa ou! ¹⁵⁴ Defann kòz mwen, delivre m'.
 Ban m' lavi ankò, jan ou te pwomèt la. ¹⁵⁵ ¶ Mechan yo p'ap janm sove, paske yo p'ap chache
 konnen sa ou vle yo fè. ¹⁵⁶ ¶ Seyè, ou pa manke gen kè sansib! Ban m' lavi ankò, jan ou te deside
 l' la. ¹⁵⁷ ¶ Mwen gen anpil moun ki pa vle wè m'. Mwen pa janm mete prensip ou yo sou kote.
¹⁵⁸ ¶ Lè m'ap gade bann trèt sa yo, sa ban m' degoutans, paske se pa moun k'ap obeyi pawòl ou.
¹⁵⁹ ¶ Gade jan m' renmen lòd ou yo, Seyè! Ban m' lavi ankò, paske ou renmen m'. ¹⁶⁰ ¶ Tou sa ki
 nan pawòl ou se verite. Tout jijman ou yo se jijman ki san patipri. Yo la pou tout tan. ¹⁶¹ ¶ Yon
 bann chèf ap pèsekite m' san rezon, men se pou pawòl ou yo mwen gen krentif. ¹⁶² ¶ Pawòl ou fè

kè m' kontan. Se tankou si m' te jwenn yon gwo richès. ¹⁶³ ¶ Mwen rayi bay manti, mwen pa vle wè sa. Mwen renmen lalwa ou la anpil. ¹⁶⁴ ¶ Sèt fwa chak jou m'ap di ou mèsè pou jijman ou yo ki san patipri. ¹⁶⁵ ¶ Moun ki renmen lalwa ou la ap viv ak kè poze. Pa gen anyen ki pou fè yo bite. ¹⁶⁶ ¶ M'ap tann ou vin delivre m', Seyè. M'ap fè tou sa ou kòmande m' fè. ¹⁶⁷ ¶ M'ap mache dapre prensip ou yo, se pa ti renmen mwen renmen yo. ¹⁶⁸ M'ap swiv lòd ou yo, m'ap fè tou sa ou vle m' fè, paske ou konnen tout vire tounen m'. ¹⁶⁹ ¶ Se pou rèl mwen rive jouk nan zòrèy ou, Seyè. Jan ou te pwomèt la, ban m' bon konprann. ¹⁷⁰ Se pou lapriyè m' rive nan zòrèy ou. Jan ou te pwomèt la, delivre m'. ¹⁷¹ ¶ Se pou m' louvri bouch mwen pou m' fè lwanj ou, paske se ou ki moutre m' sa ou vle m' fè. ¹⁷² ¶ Se pou m' chante pou m' fè konnen pawòl ou yo, paske tout kòmandman ou yo dwat. ¹⁷³ ¶ Se pou ou vin ede m' ak fòs ponyèt ou, paske mwen pran desizyon pou m' swiv lòd ou yo! ¹⁷⁴ Ou wè jan m'ap tann ou vin sove m'! Mwen jwenn tout plezi m' nan lalwa ou. ¹⁷⁵ ¶ Ban m' lavi pou m' fè lwanj ou, pou ou ka vin ede m', jan ou te deside l' la. ¹⁷⁶ ¶ Mwen tankou yon mouton ki pèdi bann li. Tanpri, vin chache m', paske mwen pa janm bliye kòmandman ou yo.

Chapter 120

¹ ¶ Se yon chante pou yo chante lè y'ap moute lavil Jerizalèm. Lè m' te nan tray, mwen te rele Seyè a, li te reponn mwen. ² Delivre m' non, Seyè, anba moun k'ap bay manti, anba moun k'ap twonpe moun. ³ Ipokrit, kisa ou merite Bondye fè ou? Kisa pou l' fè ou an plis? ⁴ Eske se avèk flèch pweni sòlda yo? Eske se avèk chabon gayak tou limen? ⁵ ¶ Malè pou mwen, paske se tankou si m' te rete nan mitan moun peyi Mechèk, osinon nan mitan moun peyi Keda. ⁶ Mwen rete twò lontan ak yon bann moun ki pa renmen viv ak kè poze! ⁷ Lè mwen menm m'ap pale yo jan pou yo viv byen yonn ak lòt, yo menm se yon sèl bagay ki nan tèt yo, se fè lagè.

Chapter 121

¹
¶ Se yon chante pou yo chante lè y'ap moute lavil Jerizalèm. Mwen leve je m', mwen gade mòn yo, mwen di: -Ki bò m'a jwenn sekou? ² Sekou mwen soti nan men Seyè a. Se li menm ki fè syèl la ak latè a. ³ Li p'ap kite pye ou chape, moun k'ap veye sou ou a p'ap janm dòmi. ⁴ Moun k'ap veye sou pèp Izrayèl la p'ap kabicha, li p'ap dòmi. ⁵ Se Seyè a k'ap veye sou ou, l'ap kanpe bò dwat ou tankou lonbraj ou. Se li ki tout pwoteksyon ou. ⁶ Lajounen, solèy la p'ap fè ou anyen, lannwit, lalin lan p'ap fè ou anyen. ⁷ Seyè a ap pwoteje ou pou anyen pa rive ou, li p'ap kite anyen rive ou. ⁸ L'ap pwoteje ou kit w'ap antre, kit w'ap soti, depi koulye a ak pou tout tan.

Chapter 122

¹
¶ Se yon chante David pou yo chante lè y'ap moute lavil Jerizalèm. Ala kontan mwen te kontan lè yo di m': -Ann ale lakay Seyè a. ² Koulye a, men li: nou rive devan pòtay lavil Jerizalèm. ³ Jerizalèm, ou se yon lavil yo rebati, yon lavil kote tout bagay byen ranje. ⁴ Se la tout branch fanmi yo ap vin sanble. Tout branch fanmi pèp Seyè a, se la y'ap vini pou di Seyè a mèsè, jan li te ba yo lòd pou yo fè a. ⁵ Se la pitit pitit David yo rete pou yo dirije, pou yo gouvènènen pep la. ⁶ ¶ Lapriyè Bondye pou pa gen dezòd lavil Jerizalèm ankò. Se pou tout moun ki renmen ou yo viv ak kè poze. ⁷ Se pou pa gen lagè sou ranpa lavil la. Se pou nan palè wa a tout moun viv ak kè poze. ⁸ Poutèt fanmi m' yo ak zanmi m' yo, m'ap di: -Benediksyon Bondye sou lavil la! ⁹ Poutèt kay Seyè a, Bondye nou an, ki nan lavil la, m'ap mande Bondye pou fè kè ou kontan.

Chapter 123

¹
¶ Se yon chante pou yo chante lè y'ap moute lavil Jerizalèm. Ou menm ki chita sou fotèy ou nan syèl la ap gouvènènen, se bò kote ou mwen leve je mwen. ² Menm jan domestik la ap gade sou mèt li, menm jan sèvant la ap gade sou metrès li, se konsa m'ap gade sou Seyè a, Bondye nou an, jouk l'a gen pitye pou nou. ³ Gen pitye pou nou, Seyè, gen pitye pou nou, paske nou sibi kont nou

anba moun k'ap meprize nou yo.⁴ Moun ki alèz yo pase nou nan kont betiz. Moun k'ap gonfle lestonmak yo sou moun ap foule nou anba pye yo.

Chapter 124

¹ ¶ Se yon chante David pou yo chante lè y'ap moute lavil Jerizalèm. Si Seyè a pa t' kanpe pou nou, ki jan sa ta ye! Se pou pèp Izrayèl la rekonèt sa.² Wi, si Seyè a pa t' kanpe pou nou, lè moun yo te leve dèyè nou an,³ yo ta vale nou tou vivan, lè yo te move sou nou an.⁴ Dlo ta kouvri nou, lavalas ta pase sou nou.⁵ Wi, lavalas ta pote nou ale.⁶ ¶ Ann fè lwanj Seyè a ki pa kite lènmi nou yo devore nou.⁷ Nou chape tankou yon ti zwezo ki chape soti nan pèlen chasè. Fil pèlen an kase. Nou chape, n' ale.⁸ Se Seyè a k'ap pote nou sekou, se li menm ki fè syèl la ak latè a.

Chapter 125

¹ ¶ Se yon chante pou yo chante lè y'ap moute lavil Jerizalèm. Moun ki mete konfyans yo nan Seyè a, yo tankou mòn Siyon an. Tankou l', yo p'ap janm brannen, y'ap la pou tout tan.² Menm jan mòn sou rebò lavil Jerizalèm yo pwoteje lavil la, se konsa Seyè a ap pwoteje pèp li a depi koulye a ak pou tout tan.³ Non. Mechan yo p'ap gouvènen pou tout tan sou peyi ki pou moun k'ap mache dwat yo. Si se pa sa, moun k'ap mache dwat yo ka rive fè sa ki mal.⁴ ¶ Seyè, aji byen avèk moun k'ap fè byen, avèk moun k'ap mennen yon lavi san repwòch.⁵ Men, kanta pou moun ki vire do ba ou yo pou swiv chemen kwochi, se pou ou disparèt yo ansanm ak tout moun k'ap fè mechanste. Benediksyon Bondye sou pèp Izrayèl la.

Chapter 126

¹ ¶ Se yon chante pou yo chante lè y'ap moute lavil Jerizalèm. Lè Seyè a te fè moun Siyon yo te depòte yo tounen lakay yo, se tankou si nou te nan rèv: Nou pa t' vle kwè se te vre!² Ala ri nou

te ri! Ala chante nou te chante tèlman nou te kontan! Lè sa a, lòt nasyon yo t'ap di: -Seyè a fè anpil bèl bagay pou yo! ³ Wi, li tè fè anpil bèl bagay pou nou, sa te fè kè nou kontan anpil. ¶ Seyè, ⁴ tanpri, fè moun yo te fè prizonye yo tounen nan peyi yo, menm jan lapli ou fè larivyè ki te sèk la koule ankò. ⁵ Moun ki simen ak dlo nan je ap rekòlte ak kè kontan. ⁶ Moun ki t'ap kriye lè yo t'aprale avèk grenn pou yo simen nan jaden yo, y'ap tounen ak bèl chante nan bouch yo sitèlman yo kontan lè y'ap pote rekòt la lakay yo.

Chapter 127

¹ ¶ Se yon chante Salomon pou yo chante lè y'ap moute lavil Jerizalèm. Si se pa Seyè a ki bati kay la, travay moun k'ap bati yo pa vo anyen. Si se pa Seyè a k'ap pwoteje lavil la, travay moun k'ap veye yo pa vo anyen. ² Sa pa vo lapenn pou nou leve granmaten, pou nou kouche ta, pou nou travay di pou n' ka manje, paske, lè Bondye renmen yon moun, li ba li tout bagay pandan l'ap dòmi. ³ Pitit se kado Bondye bay, se yon rekonpans pou manman ak papa. ⁴ Menm jan yon sòlda santi li gen kouraj lè l' gen zam li nan men l', se menm jan an tou pou yon moun ki fè pitit gason depi lè l' te jenn. ⁵ Ala bon sa bon pou moun ki gen anpil zam konsa! Li p'ap janm wont lè li kanpe nan pòtay lavil la pou l' diskite ak moun k'ap chache l' kont.

Chapter 128

¹ ¶ Se yon chante pou yo chante lè y'ap moute lavil Jerizalèm. Ala bon sa bon pou ou, ou menm ki gen krentif pou Seyè a, ou menm k'ap mache nan chemen li mete devan ou lan! ² Avèk travay ou fè ak men ou, w'ap jwenn manje pou ou manje, w'ap kontan, zafè ou ap mache byen. ³ Madanm ou ap tankou yon pye rezen k'ap donner anndan kay ou. Pitit gason ou yo ap tankou jenn ti plant oliv tout arebò tab ou. ⁴ Se konsa Seyè a ap beni moun ki gen krentif pou li! ⁵ Se pou Seyè a rete sou mòn Siyon an pou l' beni ou! Mwen mande l' pou l' fè ou wè lavil Jerizalèm rete kanpe jouk jou ou mouri. ⁶ Mwen mande l' pou l' fè ou wè pitit pitit ou yo! Benediksyon Bondye sou pèp Izrayèl la!

Chapter 129

¹ ¶ Se yon chante pou yo chante lè y'ap moute lavil Jerizalèm. Nou menm, pèp Izrayèl se pou nou rekonèt sa: Yo te fè nou pase kont mizè nou depi nou te jenn. ² Wi, depi nou te jenn, yo te fè nou pase kont mizè nou, men yo pa t' janm rive mete pye sou kou nou. ³ Yo tonbe sou do nou, ou ta di moun k'ap bat tè pou plante. ⁴ Men, Seyè a pa nan patipri, li koupe kòd mechan yo te pase nan kou nou. ⁵ ¶ Moun ki pa vle wè moun Siyon yo, se pou yo wont, se pou yo fè bak. ⁶ Se pou yo tankou plant k'ap pouse arebò glasi: y'ap cheche anvan menm yo donnen. ⁷ Moun k'ap ranmase rekòt p'ap okipe yo menm, moun k'ap antre rekòt la p'ap mete yo nan pakèt li. ⁸ Moun k'ap pase bò la yo p'ap di: -Se pou Seyè a beni nou! N'ap beni ou nan non Seyè a!

Chapter 130

¹ ¶ Se yon chante pou yo chante lè y'ap moute lavil Jerizalèm. Nan mizè mwen ye a, Seyè, m'ap rele nan pye ou. ² Seyè, koute m' non! Panche zòrèy ou pou ou tande jan m'ap lapriyè nan pye ou. ³ Si ou t'ap make tout zak nou fè, Seyè, ki moun ki ta ka leve tèt devan ou? ⁴ Men, ou padonnen nou, pou n' ka respekte ou. ⁵ ¶ Mwen mete tout espwa m' nan Seyè a, mwen mete espwa m' nan sa li di. ⁶ N'ap tann Seyè a, tankou faksyonnnè k'ap tann solèy leve, wi, tankou faksyonnnè k'ap tann solèy leve! ⁷ Nou menm pèp Izrayèl, mete tout espwa nou nan Seyè a, paske li renmen nou anpil. ⁸ Li toujou pare pou delivre. Se li menm ki va delivre pèp Izrayèl la anba tout mechanste yo fè yo.

Chapter 131

¹ ¶ Se yon chante David pou yo chante lè y'ap moute lavil Jerizalèm. Seyè, mwen pa gen lògèy nan kè mwen. Mwen pa gade moun avèk awogans. Mwen pa enterese nan bagay ki twò fò pou mwen, nan bagay ki twò difisil pou m' konprann. ² Mwen rete tou dousman, byen trankil tankou yon timoun sevre ki rete byen dousman sou janm manman l'. Wi, tankou yon timoun sevre, se konsa

mwen rete dousman.³ Nou menm pèp Izrayèl, mete tout espwa nou nan Seyè a, depi koulye a ak pou tout tan.

Chapter 132

¹ ¶ Se yon chante pou yo chante lè y'ap moute lavil Jerizalèm. Seyè, pa bliye David. Chonje tout traka li te bay tèt li pou ou.² Seyè, chonje sèman li te fè ou, pwomès li te fè ou, ou menm Bondye Jakòb la ki gen fòs, lè l' te di:³ -Mwen p'ap antre nan kay kote m' rete a, mwen p'ap moute kouche sou kabann mwen,⁴ mwen p'ap bay kò m' repo, mwen p'ap fèmen je m',⁵ toutotan mwen pa jwenn yon kote pou Seyè a, yon kay pou Bondye Jakòb la ki gen fòs ka rete.⁶ Nou te tandè Bwat Kontra a te lavil Efrata. Men, nou jwenn li nan jaden Jearim yo.⁷ Ann al lakay Seyè a. Ann al devan fotèy li pou n' adore l'.⁸ Leve non, Seyè, vin kote pou ou pran repo a. Vini non ansanm ak Bwat Kontra ou la ki fè nou wè jan ou gen pouvwa.⁹ Se pou prèt yo fè konnen jan ou bay pèp ou a delivrans. Se pou tout pèp ou a rele sitèlman yo kontan.¹⁰ Poutèt pwomès ou te fè David, sèvitè ou la, tanpri, Seyè, pa vire do bay moun ou te chwazi a.¹¹ ¶ Seyè a te fè David, sèvitè li a, yon pwomès, l'ap toujou kenbe pawòl li: Se yonn nan pitit ou yo m'ap mete chita sou fotèy ou a.¹² Si pitit ou yo kenbe kontra mwen fè ak yo a, si yo kenbe prensip mwen ba yo, pitit pa yo tou va toujou chita sou fotèy ou a.¹³ Seyè a te chwazi mòn Siyon, se la li vle bati kay li.¹⁴ Se la mwen chwazi pou m' toujou pran repo, se la m'ap rete, paske se sa mwen vle.¹⁵ M'a voye benediksyon sou tou sa li bezwen pou l' viv. M'a bay pòv li yo manje plen vant yo.¹⁶ M'a delivre prèt li yo, m'a fè tout pèp Bondye a rele sitèlman yo kontan.¹⁷ Se la m'ap fè yonn nan pitit David yo tounen yon gwo wa. Mwen p'ap kite limyè a soti nan fanmi moun mwen chwazi a.¹⁸ M'ap fè lènmi l' yo wont, kouwòn ki sou tèt li a ap toujou rete byen klere.

Chapter 133

¹
 ¶ Se yon chante David pou yo chante lè y'ap moute lavil Jerizalèm. Ala bèl bagay, ala bon sa
 bon lè frè ak frè ap viv ansanm! ² Se tankou yon lwil santi bon yo vide sou tèt Arawon, k'ap koule
 sou bab li desann nan kou rad li. ³ Se tankou lawouze ki soti sou mòn Emon, k'ap desann sou mòn
 Siyon yo. Se la Seyè a pwomèt pou l' bay benediksyon l', lavi ki p'ap janm fini an.

Chapter 134

¹
 ¶ Se yon chante pou yo chante lè y'ap moute lavil Jerizalèm. Nou tout k'ap sèvi Seyè a, nou
 tout k'ap pase nwit lakay li ap sèvi l', ann fè lwanj Seyè a! ² Louvri bra nou nan tanp li, lapriyè, fè
 lwanj Seyè a! ³ Se pou Seyè a rete sou mòn Siyon pou l' beni ou. Se li menm ki fè syèl la ak latè
 a.

Chapter 135

¹
 ¶ Lwanj pou Seyè a! Fè lwanj Seyè a! Nou tout k'ap sèvi Seyè a, ² nou tout ki kanpe lakay li,
 nan kote ki apa pou Bondye nou an, fè lwanj li! ³ Fè lwanj Seyè a, paske li gen bon kè! Chante
 chante pou li, paske li aji byen ak nou. ⁴ Se li menm ki te chwazi Jakòb pou moun pa l', se li menm
 ki te chwazi pèp Izrayèl la pou pèp li. ⁵ ¶ Mwen konnen Seyè nou an gen gwo pouvwa. Li gen
 pouvwa pase tout lòt bondye yo. ⁶ Li fè sa li vle nan syèl ak sou latè, sou lanmè ak nan fon lanmè.
⁷ Li fè nwaj yo leve kote syèl la kole ak latè a, li fè zèklè ak lapli, li fè van yo soti kote li sere yo
⁸ a. Se li menm ki te touye tout premye pitit gason ak tout premye pòte mal zannimo nan peyi Lejip.
⁹ Se li ki te fè anpil mirak ak mèvèy nan peyi Lejip pou pini farawon an ansanm ak tout moun k'ap
 sèvi l' yo. ¹⁰ Li detwi anpil nasyon, li touye wa ki te gen pouvwa: ¹¹ Siyon, wa peyi Amon an, Og,
 wa peyi Bazan an ansanm ak tout wa nan peyi Kanaran yo. ¹² Li pran peyi yo, li bay pèp li a, wi,
 li bay moun pèp Izrayèl yo peyi moun sa yo pou yo rete. ¹³ Seyè, lèzòm ap toujou konnen ki moun
 ou ye. Yo p'ap janm bliye ou! ¹⁴ Seyè a va pran defans pèp li a, l'a gen pitye pou moun k'ap sèvi

¹⁵ l' yo. ¶ Zidòl nasyon yo se bagay ki fèt ak ajan, ak lò. Se moun ki fè yo ak men yo. ¹⁶ Yo gen
 bouch, men yo pa ka pale. Yo gen je, men yo pa ka wè. ¹⁷ Yo gen zòrèy, men yo pa ka tandè. Yo
 pa gen yon ti souf nan bouch yo. ¹⁸ Moun ki fè zidòl yo ansanm ak tout moun ki mete konfyans
 yo nan yo, se pou yo tounen tankou yo. ¹⁹ Nou menm, pèp Izrayèl la, fè lwanj Seyè a! Nou menm,
 prèt Bondye yo, fè lwanj Seyè a! ²⁰ Nou menm k'ap sèvi nan tanp li a, fè lwanj Seyè a! Nou tout
 ki gen krentif pou Seyè a, fè lwanj li! ²¹ Fè lwanj Seyè a nan peyi Siyon. nan lavil Jerizalèm, kote
 l' rete a. Lwanj pou Seyè a!

Chapter 136

¹ ¶ Di Bondye mèsì, paske li gen bon kè. Wi, li p'ap janm sispann renmen nou! ² Di Bondye ki
 gen pouvwa pase tout lòt bondye yo mèsì. Wi, li p'ap janm sispann renmen nou! ³ Di chèf ki pi
 gwo chèf pase tout chèf yo mèsì. Wi, li p'ap janm sispann renmen nou! ⁴ Se li menm sèl ki fè gwo
 mèvèy. Wi, li p'ap janm sispann renmen nou! ⁵ Avèk bon konprann li, li tè fè syèl la. Wi, li p'ap
 janm sispann renmen nou! ⁶ L'a bati tè a sou dlo yo. Wi, li p'ap janm sispann renmen nou: ⁷ Se li
 ki te kreye lalin ak solèy. Wi, li p'ap janm sispann renmen nou! ⁸ Solèy pou klere lajounen. Wi, li
 p'ap janm sispann renmen nou! ⁹ Lalin ak zetwal yo pou klere lannwit. Wi, li p'ap janm sispann
 renmen nou! ¹⁰ ¶ Se li menm ki te touye tout premye pitit gason moun peyi Lejip yo. Wi, li p'ap
 janm sispann renmen nou! ¹¹ Li fè pèp Izrayèl la soti nan peyi Lejip. Wi, li p'ap janm sispann
 renmen nou! ¹² Avèk kouraj li, ak fòs ponyèt li, Wi, li p'ap janm sispann renmen nou! ¹³ Se li
 menm ki te fann Lanmè Wouj la de bò. Wi, li p'ap janm sispann renmen nou! ¹⁴ Li fè pèp Izrayèl
 la pase nan mitan. Wi, li p'ap janm sispann renmen nou! ¹⁵ Men, li pouse farawon an ak tout lame
 l' yo nan Lanmè Wouj la. Wi, li p'ap janm sispann renmen nou! ¹⁶ Se li ki mennen pèp li a lè pèp
 la te nan tout dezè a. Wi, li p'ap janm sispann renmen nou! ¹⁷ Li kraze wa ki te gen pouvwa. Wi,
 li p'ap janm sispann renmen nou! ¹⁸ Li touye gwo wa yo. Wi, li p'ap janm sispann renmen nou!

19 Siyon, wa peyi Amon an. Wi, li p'ap janm sispann renmen nou! 20 Og, wa peyi Bazan an. Wi,
 li p'ap janm sispann renmen nou! 21 Li pran peyi yo, li bay pèp li a. Wi, li p'ap janm sispann renmen
 nou! 22 Li bay moun pèp Izrayèl yo peyi sa yo pou yo rete. Wi, li p'ap janm sispann renmen nou!
 23 ¶ Li pa t' bliye nou lè nou te anba kou. Wi, li p'ap janm sispann renmen nou! 24 Li delivre nou
 anba men moun ki t'ap peze nou yo. Wi, li p'ap janm sispann renmen nou! 25 Se li ki bay tout moun
 ak tout zannimo manje. Wi, li p'ap janm sispann renmen nou! 26 Di Bondye ki anwo nan syèl la
 mèsè. Wi, li p'ap janm sispann renmen nou!

Chapter 137

1 ¶ Nou te chita bò larivyè ki nan peyi Babilòn yo, nou t'ap kriye lè nou chonje peyi Siyon.
 2 Nou te pandye gita nou yo nan branch pye sikren peyi a. 3 Moun ki te fè nou prizonnye yo t'ap
 mande pou nou chante pou yo. Moun ki t'ap peze nou yo t'ap mande pou nou anmize yo: -Chante
 yon chante peyi Siyon pou nou non! 4 Ki jan ou ta vle pou n' chante yon chante Seyè a nan yon
 peyi etranje? 5 Si nou bliye ou, Jerizalèm. se pou nou bliye ki jan pou nou sèvi ak men dwat nou
 tou. 6 Si nou pa chonje ou, si nou pa konsidere ou tankou pi gwo kontantman nou, se pou lang nou
 kole nan fon bouch nou. 7 ¶ Seyè, chonje sa moun peyi Edon yo te fè jou yo te pran lavil Jerizalèm.
 Chonje jan yo t'ap di: Kraze l'! Kraze l' ratè! 8 Nou menm moun lavil Babilòn, yo gen pou yo fini
 ak nou yon lè. Benediksyon pou moun ki va fè ou sibi menm bagay ou te fè nou sibi a. 9 Benediksyon
 pou moun ki va pran pitit ou yo, ki va kraze yo sou gwo wòch!

Chapter 138

1 ¶ Se yon sòm David. Seyè, m'ap di ou mèsè ak tout kè m'. La, devan lòt bondye yo, m'ap
 chante, m'ap jwe gita pou ou! 2 M'ap mete ajenou devan kay ki apa pou ou a, m'ap fè lwanj ou,
 paske ou gen bon kè, paske ou toujou kenbe pawòl ou, paske ou fè sa ou te pwomèt la. Se tout
 moun k'ap nonmen non ou koulye a. 3 Lè m' te rele ou, ou te reponn mwen, ou te ban m' plis kouraj.

⁴ Tout moun ki sou latè va fè lwanj ou, Seyè, lè y'a vin konnen pawòl ki soti nan bouch ou. ⁵ Y'a
 chante pou sa Seyè a te fè, y'a di: Ala gwo pouvwa Seyè a genyen! ⁶ ¶ Wi, Seyè a anwo nan syèl
 la. Men, li wè moun ki soumèt devan li. Li rete byen lwen, li rekonèt moun k'ap fè grandizè yo.
⁷ Menm lè mwen nan gwo tèt chaje, ou pa kite m' mourir. Ou leve men ou pou rete lènmi m' yo ki
 ankòlè. Ou sove m' avèk fòs ponyèt ou. ⁸ W'a fin fè sa ou te konmanse fè pou mwen an. Seyè, ou
 p'ap janm sispann renmen nou. Pa vire do ou kite travay ou konmanse fè a!

Chapter 139

¹ ¶ Pou chèf sanba yo. Se yon sòm David. Seyè, ou sonde m', ou konnen ki moun mwen ye.
² Ou konnen lè m' chita, ou konnen lè m' kanpe. Ou rete byen lwen, ou konnen tou sa k'ap pase nan
 tèt mwen. ³ Mwen te mèt ap mache, mwen te mèt kouche, ou wè m', ou konnen tou sa m'ap fè.
⁴ Mwen poko menm louvri bouch mwen, ou gen tan konnen tou sa mwen pral di. ⁵ Kote m' vire,
 ou la bò kote m', w'ap pwoteje m' ak pouvwa ou. ⁶ Konesans ou genyen yo twòp pou mwen. Yo
 depase m', mwen pa konprann yo. ⁷ ¶ Ki bò mwen ta ale pou m' pa jwenn ak ou? Ki bò mwen ta
 ale pou ou pa wè m' devan je ou? ⁸ Si m' moute nan syèl la, se la ou ye. Si m' desann kote mò yo
 ye a, ou la tou. ⁹ Si m' vole ale bò kote solèy leve, osinon si m' al rete bò lòt bò lanmè, ¹⁰ l'a ankò,
 w'ap toujou la pou mennen m', w'ap la pou pwoteje m'. ¹¹ Si mwen di: -Bon! M' pral kache nan
 fènwa a. M' pral rete kote tout limyè mourir. ¹² Fènwa pa fè nwa pou ou. Lannwit klere kou lajounen
 pou ou. Kit li fènwa, kit li lajounen, se menm bagay pou ou. ¹³ Wi, se ou ki fòme tout pati nan kò
 m', se ou ki ranje yo byen ranje nan vant manman m'. ¹⁴ M'ap fè lwanj ou, paske ou pa manke fè
 bèl bagay. Tou sa ou fè se bèl bagay. Mwen konn sa byen. ¹⁵ Ou te konnen tout zo nan kò m', depi
 lè m' t'ap fòme kote moun pa t' ka wè a, depi lè ou t'ap travay mwen ak ladrès nan fon tè a. ¹⁶ Depi
 anvan m' te fèt, tout lavi m' te devan je ou. Tou sa mwen tapral fè te deja ekri nan liv ou, anvan
 menm mwen te fè yo. ¹⁷ ¶ Bondye, sa ki nan tèt ou twò difisil pou m' konprann, lèfini yo anpil!
¹⁸ Si m' ta vle konte yo, yo ta pi plis pase grenn sab ki bò lanmè. Si m' ta janm rive fin konte yo,

¹⁹
 mwen p'ap pi konnen ou pase sa. Bondye, si ou ta vle touye mechan yo! Si ou ta vle fè ansasen
²⁰
 yo manyè kite m' an repo! Yo anba chal! Y'ap revòlte kont ou. Y'ap pale ou mal. ²¹ Seyè,
 kouman ou ta vle pou m' pa rayi moun ki rayi ou yo! Kouman ou ta vle pou m' pa gen degoutans
²²
 pou moun k'ap leve dèyè ou yo? Mwen pa manke rayi yo. Mwen konsidere yo tankou lènmi m'.
²³ Sonde m', Bondye! Wè tou sa ki nan kè m'! Fouye m'! Wè tou sa ki nan lide m'! ²⁴ Gade wè si
 m' sou yon move chemen. Mennen m' sou chemen ki la pou tout tan an.

Chapter 140

¹
 ¶ (140:1) Pou chèf sanba yo. Se yon sòm David. (140:2) Seyè, delivre m' anba mechan yo
 non! Pwoteje m' anba ansasen yo non, ² (140:3) anba moun k'ap kalkile move lide nan tèt yo, ki
 tout tan ap pouse dife. ³ (140:4) Lang yo se razwa. Pawòl nan bouch yo se pwazon, ou ta di venen
 sèpan aspik. ⁴ (140:5) Seyè, pa kite m' tonbe anba men mechan yo, pwoteje m' anba ansasen yo
 k'ap chache jan pou yo fè m' tonbe. ⁵ (140:6) Awogan yo pare yon pèlen pou mwen, yo tann pèlen
 kòd pou mwen, yo mete moun veye m' sou tout chemen mwen. ⁶ (140:7) Mwen di Seyè a: -Se ou
 ki Bondye mwen. Koute m' non, Seyè, lè m'ap rele nan pye ou. ⁷ (140:8) Seyè, Bondye mwen, ou
 se fòs ki pou sove m' lan. W'ap pwoteje m' lè batay la mare. ⁸ ¶ (140:9) Seyè, pa kite mechan yo
 fè sa yo gen lide fè a! Pa kite sa yo vle fè a rive! ⁹ (140:10) Pa kite moun ki pa vle wè m' yo dominen
 sou mwen. Se pou mechanste ki nan bouch yo a tonbe sou yo! ¹⁰ (140:11) Se pou Bondye grennen
 chabon dife sou yo tankou lapli. Se pou l' fè yo tonbe nan gwo twou byen fon kote yo p'ap janm
 ka leve sòti. ¹¹ (140:12) Se pou moun k'ap pale moun mal yo pèdi pye nan peyi a. Se pou malè
 tonbe sou ansasen yo pou l' touye yo. ¹² (140:13) Mwen konnen Seyè a va fè pòv yo jistis. L'a
 defann kòz moun ki san sekou yo. ¹³ (140:14) Wi, moun k'ap mache dwat yo va fè lwanj li. Moun
 ki obeyi l' yo va toujou viv devan l'.

Chapter 141

¹
 ¶ Se yon sòm David. Seyè, m'ap rele ou, prese vin kote m' non! Panche zòrèy ou pou tande lè
 m'ap rele nan pye ou! ² Se pou lapriyè m' moute devan ou tankou lansan y'ap boule pou ou a! Wi,
 se pou lè m' leve men m' pou m' lapriyè, se tankou ofrann yo fè pou ou chak swa a. ³ Seyè, mete
 yon mò nan bouch mwen. Veye pawòl k'ap soti nan bouch mwen! ⁴ Pa kite move lide pran tèt
 mwen. Pa kite m' mete tèt ansanm ak mechan yo nan mechanste yo. Pa kite m' patisipe nan fèt yo!
⁵
 ¶ Ou mèt kite yon moun ki mache dwat pini m'. Ou mèt kite yon moun k'ap sèvi ou rale zòrèy
 mwen. Men, pa kite m' patisipe nan okenn fèt mechan yo. Paske, lè m'ap lapriyè, m'ap toujou
 denonse sa y'ap fè ki mal. ⁶ Se pou yo pran chèf mechan yo, jete yo anba nan falèz. Lè sa a, y'a
 rekonèt pawòl mwen se verite. ⁷ Tankou lè y'ap fann bwa pou fè l' fè ti moso, se konsa zosman
 nou yo pral gaye devan bouch twou kote mò yo ye a. ⁸ Men, Seyè, Bondye, se sou ou m'ap gade.
 Se bò kote ou m'ap chache pwoteksyon. Tanpri, pa kite m' san sekou! ⁹ Pa kite m' pran nan pèlen
 yo tann pou mwen, nan pèlen moun k'ap fè mal yo. ¹⁰ Se pou mechan yo pran nan pèlen y'ap pare
 pou lòt moun, epi mwen menm, pou m' fè chemen mwen!

Chapter 142

¹
 ¶ (142:1) Chante David te chante lè li te kache nan gwo twou wòch la. Se yon lapriyè. (142:2)
 M'ap louvri bouch mwen, m'ap rele Seyè a. M'ap louvri bouch mwen, m'ap kriye nan pye Seyè a.
² (142:3) M'ap louvri kè m' bay Bondye, m'ap rakonte l' mizè mwen. ³ (142:4) Lè m' santi mwen
 pa kapab ankò, ou menm, ou konnen sa pou m' fè. Sou chemen kote m'ap pase a yo tann yon pèlen
 pou mwen. ⁴ ¶ (142:5) Voye je ou toupatou, gade byen! Tout moun pran pòz pa konnen m'. Pa gen
 yon moun pou pwoteje m'. Pa gen yon moun pou pran ka m'. ⁵ (142:6) Mwen kriye nan pye ou,
 Seyè! Mwen di: Se ou menm ki tout pwoteksyon mwen. Se ou menm ki tout mwen nan lavi sa a.
⁶ (142:7) Panche zòrèy ou, koute sa m'ap di ou! Mwen fin dekouraje. Delivre m' anba men moun
 k'ap pèsèkrite m' yo, paske yo pi fò pase m'. ⁷ (142:8) Wete m' nan prizon sa a pou m' ka di ou mèsi.
 Lè sa a, m'a kanpe nan mitan moun ki mache dwat devan ou yo, paske ou te bon pou mwen.

Chapter 143

¹ ¶ Se yon sòm David. Seyè, koute m' lè m'ap lapriyè. Panche zòrèy ou pou tande jan m'ap kriye nan pye ou. Reponn mwen, paske ou toujou kenbe pawòl ou. Ou pa nan patipri. ² Pa jije m' sou sa m' fè, se sèvitè ou mwen ye. Pa gen moun ki inonsan devan je ou. ³ Lènmi pousib mwen, li mache sou mwen. Li fè m' rete nan fènwa tankou moun ki mouri depi lontan. ⁴ Mwen santi mwen pa kapab ankò! Mwen boulvèse anpil. ⁵ Mwen chonje tan lontan, m'ap kalkile tou sa ou te fè. Tou sa ou te fè yo vin nan tèt mwen ankò. ⁶ Mwen louvri bra m' devan ou, mwen lapriyè. M'ap tann ou tankou tè sèk k'ap tann lapli. ⁷ ¶ Seyè, prese vin reponn mwen. Mwen pa kapab ankò! Pa vire do ban mwen. Si ou fè sa, m'ap tankou moun ki desann nan peyi kote mò yo ye a. ⁸ Mwen mete konfyans mwen nan ou. Depi granmaten, fè m' chonje jan ou renmen m' anpil. Se ou menm m'ap lapriyè. Moutre m' chemen pou m' pran an. ⁹ Se anba zèl ou m'ap chache pwoteksyon. Tanpri, delivre m' anba lènmi m' yo. ¹⁰ Se ou menm ki Bondye mwen. Moutre m' jan pou m' fè sa ou vle m' fè a. Jan ou gen bon kè, fè lespri ou mennen m' nan chemen ki pa gen move pa. ¹¹ Seyè, poutèt non ou pote a, ban m' lavi ankò. Ou menm ki pa nan patipri, tanpri, wete m' nan tray kote m' ye a. ¹² Ou renmen m' anpil. Fè tout lènmi m' yo disparèt. Detwi tout moun k'ap peze m' yo, paske se sèvitè ou mwen ye.

Chapter 144

¹ ¶ Se yon sòm David. Lwanj pou Bondye! Se li ki pwoteksyon mwen, se li ki moutre m' jan pou m' goumen, se li ki pare m' pou m' al nan batay. ² Se sou li mwen konte, se li ki tout defans mwen. Se li ki sèvi m' ranpa, se li ki tout delivrans mwen, Se li ki pwoteksyon mwen, se anba zèl li mwen kache. Se li ki fè pèp li soumèt devan mwen. ³ Seyè, kisa moun ye pou w'ap fè tèt ou travay pou yo konsa? Kisa yo ye menm pou ou pran ka yo? ⁴ Moun tankou lafimen. Lavi yo tankou nwaj k'ap pase. ⁵ Seyè, bese syèl la, desann. Manyen mòn yo, fè yo fè lafimen. ⁶ Voye flèch ou yo. Fè lènmi m' yo gaye. Fè yo kouri ak kout zèklè. ⁷ Rete nan syèl la, lonje men ou pran m'. Rale m' soti nan mitan gwo dlo yo. Delivre m' anba men moun lòt nasyon yo. ⁸ Bonjou yo pa laverite. Menm lè y'ap sèmante, se manti y'ap fè. ⁹ ¶ M'ap chante yon kantik tou nèf pou ou, Bondye. M'ap

¹⁰
 chante, m'ap jwe gita pou ou. Se ou menm ki fè wa yo genyen nan lagè. Se ou ki delivre David,
¹¹
 sèvitè ou la. Delivre m' anba bann mechan sa yo ki soti pou touye m', delivre m' anba men moun
¹²
 lòt nasyon yo. Bonjour yo pa laverite. Menm lè y'ap sèmante, se manti y'ap fè. Se pou pitit gason
 nou yo tankou jenn plant k'ap pouse. Se pou pitit fi nou yo tankou bèl poto byen travay ki nan tout
¹³
 kwen tanp lan. Se pou galata nou yo plen manje tout kalite, se pou mouton ki nan savann nou
¹⁴
 yo fè anpil anpil pitit. Se pou bèf nou yo toujou bay rapò, san yo pa fè avòtman, ni pèt. Se pou
¹⁵
 lènmi pa anvayi peyi a. Pa kite yo depòte nou. Se pou pa gen okenn rèl nan lari nou yo. Ala bon
 sa bon lè sa mache konsa pou pèp la! Ala bon sa bon pou yon pèp ki gen Seyè a pou Bondye li!

Chapter 145

¹
 ¶ Se yon chante David te ekri pou fè lwanj Bondye. Bondye mwen, wa mwen, m'a fè konnen
 jan ou gen pouvwa. M'ap di ou mèsi tout tan tout tan. ² Chak jou m'ap di ou mèsi. M'ap fè lwanj
 ou tout tan tout tan. ³ Seyè a gen gwo pouvwa, li merite pou yo fè lwanj li vre. Moun p'ap janm
 fin konprann jan li gen pouvwa! ⁴ Papa va fè lwanj ou devan pitit yo pou tou sa ou te fè. Y'a rakonte
 tout bèl bagay ou fè yo. ⁵ M'a rakonte jan ou gen pouvwa, jan ou gen fòs. M'a fè konnen bèl mèvèy
 ou yo. ⁶ Y'a di jan ou gen pouvwa kifè moun respekte ou. M'a rakonte jan ou gen fòs. ⁷ Y'a fè tout
 moun chonje jan ou gen bon kè. Y'a chante pou ou, paske ou pa nan patipri. ⁸ Seyè a gen pitye pou
 nou. Li gen bon kè. Li pa fasil fè kòlè. Li p'ap janm sispann renmen nou! ⁹ Seyè a bon pou tout
 moun san patipri. Li gen pitye pou tou sa li fè. ¹⁰ ¶ Seyè, tou sa ou fè ap fè lwanj ou! Tout moun
 pa ou yo ap di ou mèsi! ¹¹ Y'a di jan ou gouvènen avèk otorite. Y'a fè konnen jan ou gen pouvwa,
¹²
 pou tout moun ka konnen jan ou gen fòs, jan ou gouvènen avèk otorite. ¹³ Gouvènman ou lan
 la pou tout tan. W'ap dominen pou tout tan. Seyè a ap toujou kenbe pawòl li yo, Li bon nan tou sa
 li fè. ¹⁴ L'ap soutni tout moun k'ap tonbe. Li bay tout moun ki nan lafliksyon kouraj. ¹⁵ Seyè, se
 sou ou tout moun ap gade. Ou ba yo manje lè yo bezwen manje. ¹⁶ Ou louvri men ou, ou bay ni
 moun, ni bèt, ni plant tou sa yo bezwen. ¹⁷ Seyè a san patipri nan tou sa l'ap fè. Li gen kè sansib

nan tou sa l'ap fè.¹⁸ Seyè a kanpe toupre moun k'ap rele l', toupre tout moun k'ap rele l' ak tout kè
 yo.¹⁹ L'ap bay tout moun ki gen krentif pou li sa yo ta renmen. Li tandè lè y'ap rele l', l'ap delivre
 yo.²⁰ L'ap pwoteje tout moun ki renmen l'. Men, l'ap detwi tout mechan yo.²¹ M'a fè lwanj Seyè
 a ak bouch mwen. Se pou tout moun fè lwanj Bondye ki yon Bondye apa. Se pou yo fè l' tout tan
 tout tan.

Chapter 146

¹ ¶ Lwanj pou Seyè a! Wi, kite m' fè lwanj Seyè a! ² M'ap pase tout lavi m' ap fè lwanj Seyè a.
 M'ap chante pou Bondye mwen pandan tout tan m'ap viv. ³ Pa mete konfyans nou nan grannèg,
 nan moun ki pa ka delivre nou. ⁴ Kou souf yo koupe, yo tounen pousyè. Lamenm, tou sa yo te gen
 nan tèt yo disparèt. ⁵ ¶ Ala bon sa bon pou moun ki gen Bondye Jakòb la pou tout sekou l', pou
 moun ki mete tout espwa l' nan Seyè a, Bondye li! ⁶ Se li menm ki fè syèl la, tè a ak lanmè a,
 ansanm ak tou sa ki ladan yo. L'ap toujou kenbe pawòl li. ⁷ Li rann jistis an favè tout moun k'ap
 sibi lenjistis. Li bay tout moun ki grangou manje pou yo manje. ⁸ Seyè a fè prizonye yo soti nan
 prizon. Seyè a fè avèg yo wè ankò. Li bay tout moun ki nan lafliksyon kouraj. Seyè a renmen moun
 ki mache dwat devan li. ⁹ Seyè a pwoteje etranje k'ap viv nan peyi a. L'ap pran swen vèv yo ak
 timoun ki san papa yo. Men, li detounen plan mechan yo gen nan tèt yo. ¹⁰ Seyè a ap gouvènen
 pou tout tan. Nou menm, moun Siyon, Bondye nou an ap gouvènen pou tout tan. Lwanj pou Seyè
 a!

Chapter 147

¹ ¶ Lwanj pou Seyè a! Sa bon nèt pou nou chante pou Seyè a. Sa bon nèt pou nou fè lwanj Seyè
 a. Wi, li merite l' vre! ² Seyè a ap rebati lavil Jerizalèm. L'ap fè moun Izrayèl ki te gaye nan mitan
 lòt nasyon yo tounen lakay yo. ³ L'ap bay moun ki nan gwo lapenn yo kouraj. L'ap geri moun ki
 blese yo. ⁴ Li konte konbe zetwal ki genyen! Li konnen non yo chak. ⁵ Seyè nou an gen pouvwa.

Li gen anpil fòs. Konesans li pa gen limit.⁶ Seyè a ap bay pòv malere yo men pou yo leve. Men, l'ap rabese mechan yo jouk atè.⁷ Chante yon chante pou Seyè a pou nou di l' mèsì. Fè mizik pou Bondye nou an ak gita.⁸ Se li ki kouvri syèl la ak nwaj yo. Se li ki pare lapli pou tè a. Se li ki fè zèb pouse sou mòn yo.⁹ Li bay bèt yo manje, li bay ti kònèy yo manje lè yo rele.¹⁰ Li pa pran plezi l' nan chwal ki gen fòs, ni se pa kouraj moun ki fè kè l' kontan.¹¹ Moun ki fè kè l' kontan, se moun ki gen krentif pou li, se moun ki mete tout espwa yo nan li, paske yo konnen li renmen yo.¹²

¶ Nou menm, moun lavil Jerizalèm, fè lwanj Seyè a! Nou menm, moun mòn Siyon, fè lwanj Bondye nou an!¹³ Li fè pòt kay nou yo vin pi solid. Li voye benediksyon sou pitit nou yo nan mitan nou.¹⁴ L'ap veye fwontyè peyi a pou pa gen lagè! L'ap plen vant nou ak bon kalite manje.¹⁵ Li pase yon lòd: lòd la kouri byen vit toupatou sou latè.¹⁶ Li fè lanèj tonbe kouvri latè tankou koton. Li fè lawouze tounen ti moso glas sou tout pyebwa.¹⁷ Li voye lagrèl tankou gravye. Ki moun ki ka sipòte fredri li voye?¹⁸ Li pase yon lòd, li fè yo tout fonn. Li fè van souffle, dlo pran koule toupatou.¹⁹ Li fè pitit Jakòb yo konnen pawòl li. li fè pèp Izrayèl la konnen lòd li yo ak sa li deside.²⁰ Li pa aji konsa ak okenn lòt nasyon. Li pa fè yo konnen sa l' deside fè. Lwanj pou Seyè a!

Chapter 148

¹ ¶ Lwanj pou Seyè a! Nou menm ki rete anwo nan syèl la, fè lwanj Seyè a! Fè lwanj li anwo nan syèl la!² Se pou nou tout zanj li yo fè lwanj li. Se pou nou tout lame ki nan syèl la fè lwanj li.³ Solèy ak lalin, fè lwanj li! Zetwal k'ap klere nan syèl la, fè lwanj li!⁴ Se pou yo fè lwanj li anwo nèt nan syèl la. Se pou tout dlo ki pi wo pase syèl la fè lwanj li.⁵ Se pou yo tout fè lwanj Seyè a! Paske, li annik pase yon lòd, epi tout bagay fèt.⁶ Li mete yo chak nan plas yo pou tout tan. Li ba yo yon lòd, yo pa ka pa obeyi l'.⁷ ¶ Se pou tout bagay ki sou latè fè lwanj li: gwo bèt lanmè ansanm ak fon lanmè a,⁸ dife ak lagrèl, lanèj ak vapè, gwo van k'ap fè sa li di yo fè,⁹ gwo mòn kou ti mòn, pyebwa k'ap donner ak tout gwo pye sèd yo,¹⁰ tout bèt nan bwa, tout bèt domestik, tout bèt

k'ap trennen sou vant, ak tout zwezo k'ap vole nan syèl. ¹¹ Fè lwanj li, nou menm wa yo ak tout pèp ki sou latè, chèf ak nou tout k'ap dirije lèzòm, ¹² jenn fi kou jenn gason, granmoun kou timoun. ¹³ Se pou nou tout fè lwanj Seyè a, paske li gen yon non ki pi gwo pase tout lòt non. Pouvwa li pi wo pase syèl la ak latè a. ¹⁴ Li rebay pèp li a fòs ankò. Sa te yon lwanj pou tout moun k'ap sèvi l' yo, pou pitit Izrayèl yo, pou pèp li renmen anpil la. Lwanj pou Seyè a!

Chapter 149

¹ ¶ Lwanj pou Seyè a! Chante yon chante tou nèf pou Seyè a! Fè lwanj li nan mitan tout moun k'ap sèvi l' yo lè yo reyini! ² Se pou pèp Izrayèl la fè kè l' kontan, paske se li menm ki fè yo. Se pou tout pèp Siyon an fè fèt, paske se li menm ki wa yo. ³ Se pou nou danse pou fè lwanj li! Se pou nou bat tanbou, se pou nou jwe gita pou li! ⁴ Seyè a pran plezi l' nan pèp li a, li fè bèl bagay pou malere yo, li delivre yo. ⁵ Se pou pèp Bondye a fè kè yo kontan, paske yo genyen batay la. ⁶ ¶ Se pou yo rele byen fò lè y'ap fè lwanj Bondye, avèk nepe nan men yo, ⁷ pou tire revanj sou nasyon yo, pou pini pèp yo, ⁸ pou yo mete wa yo nan chenn, pou mete grannèg yo nan sèp an fè, ⁹ pou ba yo chatiman ki te ekri a. Se va yon bèl bagay pou tout moun k'ap sèvi Bondye. Lwanj pou Seyè a!

Chapter 150

¹ ¶ Lwanj pou Seyè a! Lwanj pou Bondye nan tanp ki apa pou li a! Lwanj pou Bondye nan syèl la kote pouvwa li parèt aklè! ² Lwanj pou li pou bèl bagay li fè yo! Lwanj pou li pou jan li gen anpil anpil fòs! ³ Lwanj pou li ak twonpèt! Lwanj pou li ak gita ak bandjo! ⁴ Lwanj pou li ak tanbou! Danse pou fè lwanj li! Lwanj pou li ak gita ak vaksen! ⁵ Lwanj pou li ak senbal ki bay bèl son! Lwanj pou li ak senbal ki fè gwo bri! ⁶ Se pou tou sa ki gen souf fè lwanj Seyè a! Lwanj pou Seyè a!

Proverbs

Chapter 1

¹ ¶ Men pwovèb Salomon, pitit David la, ki te wa peyi Izrayèl. ² Pwovèb sa yo la pou fè moun konnen sa ki rele gen sa jès ak bon levasyon, pou yo konprann lè moun lespri ap pale ak yo. ³ Pwovèb sa yo la tou pou moutre moun jan pou yo viv avèk konprann, pou yo gen bon kondit, pou yo pa fè lenjistis, pou yo mache dwat nan lavi. ⁴ Y'ap louvri lespri moun ki manke konprann, y'ap bay jenn gason yo konesans ak konprann. ⁵ Se pou moun ki gen konesans koute sa ki nan pwovèb yo, pou yo ka mete sou sa yo konnen deja. Se pou moun ki gen lespri koute sa ki nan pwovèb yo, pou yo ka konnen ki jan pou yo mennen bak yo pi byen, ⁶ konsa, y'a ka konprann sans tout pwovèb ak tout parabòl, sans tout pawòl k'ap soti nan bouch moun ki gen bon konprann yo ak koze tout moun pa ka konprann. ⁷ ¶ Lè ou gen krentif pou Bondye, se lè sa a ou konmanse gen konesans. Moun fou pa konn valè sa yo rele gen konesans, yo refize aprann. ⁸ Pitit mwen, koute papa ou non lè l'ap ba ou bon levasyon! Pa janm bliye sa manman ou te moutre ou! ⁹ Menm jan bèl foula mare nan tèt ak kolye pase nan kou bay pi bèl aparans, konsa tou konsèy papa ou ak manman ou ap fè anpil pou ou. ¹⁰ ¶ Pitit mwen, lè moun k'ap fè sa ki mal vle detounen ou, pa kite yo pran tèt ou. ¹¹ Si yo di ou: Vini ak nou non! Ann anbiske kò nou pou n' touye moun. Ann pare pèlen pou nou pran inonsan yo, san yo pa gen anyen ak nou. ¹² Ann vale yo tou vivan, tankou simityè ki pa janm refize mò. Ann vale yo tout ankè tankou kadav y'ap antere. ¹³ N'a jwenn tout kalite gwo richès, n'a plen kay nou ak tout bagay n'a pran. ¹⁴ W'a jwenn pa ou nan tou sa n'a pran. Va gen yon sèl kès pou nou tout. ¹⁵ Pitit mwen, pa mache avèk moun konsa! Pa mete pye ou kote moun sa yo pase! ¹⁶ Yo toujou dèyè pou fè sa ki mal. Pou ti krik ti krak, yo mete san deyò. ¹⁷ Kisa ou konprann ou fè lè ou kite zwezo wè ou ap tann pèlen pou li? ¹⁸ Se konsa moun sa yo pran nan pèlen yo menm yo pare a. Yo tonbe nan pyèj yo mete a, yo mouri. ¹⁹ Nan chache genyen sa ki pa pou ou, se ou ki lakòz malè rive ou. Se sa menm ki pou rive tout moun ki pa wè pase vòlò. ²⁰ ¶ Koute byen. Sa jès ap rele nan lari, l'ap pale byen fò sou plas piblik. ²¹ L'ap rele nan tout kalfou, nan pòtay lavil yo, toupatou kote tout moun ka tande. ²² L'ap di: Bann egare! Kilè n'a sispann renmen fè tenten? Kilè

n'a sispann pran plezi nou nan pase tout bagay nan betiz? Kilè moun fou yo va soti pou yo aprann?
²³ Se pou n' koute m' lè m'ap rale zòrèy nou. M'ap di nou tou sa ki nan tèt mwen, m'ap fè nou konnen
²⁴ tou sa m' konnen. Ki jan nou ye konsa? Mwen rele nou, nou fè tankou nou pa tande m'. Mwen
²⁵ lonje men ban nou, nou fè tankou nou pa wè m'. Anhan! Se konsa sa ye? Nou voye tout konsèy
²⁶ mwen te ban nou yo jete byen lwen nou. Nou refize kite m' korije nou. Konsa, lè n'a nan ka, m'a
²⁷ ri nou. Lè malè va fè nou tranble, m'a pase nou nan rizib. Lè malè va tonbe sou nou tankou yon
²⁸ van siklòn, lè tray va pase sou nou tankou yon toubouyon, lè lapenn ak kè sere va pran nou, le
sa a, n'a rele m', mwen menm yo rele sajès, men mwen p'ap reponn nou. N'a mache chache m'
²⁹ toupatou, men nou p'ap jwenn mwen. Nou pa t' vle wè konesans, nou te toujou refize gen krentif
³⁰ pou Bondye. Nou pa t' janm vle koute konsèy m' t'ap ban nou, nou te toujou derefize koute m'
³¹ lè m' t'ap korije nou. Se pou nou rekòlte sa nou te simen an. Se pou nou sibi konsekans vye
³² konsèy nou t'ap swiv yo. Moun ki san esperyans yo mouri paske yo refize aprann. Bann moun
³³ fou yo menm, yo pa pran anyen pou anyen, se sa k'ap pèdi yo tou. Men, moun ki koute sa m' di
yo jwenn lasirans, y'a viv ak kè poze, yo p'ap bezwen pè anyen.

Chapter 2

¹ ¶ Pitit mwen, aprann sa m'ap moutre ou la a. Chache pou ou pa janm bliye sa mwen di ou fè
² a. Se poutèt sa, louvri zòrèy ou pou ou tande sa moun ki gen sajès ap di ou. Chache konprann yo.
³ Wi, pa janm sispann chache gen konesans. Mande pou ou gen bon konprann. ⁴ Kouri dèyè konesans
⁵ tankou moun k'ap kouri dèyè lajan. Chache konesans tankou moun k'ap chache ja lajan. Si ou fè
⁶ tou sa, w'a konnen sa ki rele gen krentif pou Bondye. W'a resi konnen ki moun Bondye ye. Se
⁷ Seyè a ki bay konesans. Pawòl ki soti nan bouch li bay lespri ak konprann. Lè yon moun mache
⁸ dwat, Seyè a ba li bon konsèy. Lè yon moun serye, li pwoteje l'. Li pwoteje moun ki pa fè lenjistis.
⁹ Li pran defans moun ki kenbe fèm nan sèvis li. Si ou koute m', w'a konnen ki jan pou ou mennen
bak ou byen, ki jan pou ou pa fè lenjistis. W'a konnen ki jan pou ou mache dwat nan lavi. W'a
¹⁰ konnen tout bon bagay ou dwe fè. ¶ Lè sa a, w'a gen bon konprann nan ou. W'a pran tout plezi

¹¹ ou nan konesans ou genyen. Entèlijans ou p'ap kite anyen rive ou, konesans ou pral yon
¹² pwoteksyon pou ou. Yo p'ap kite ou fè sa ki mal. Yo p'ap kite moun k'ap fè bèl diskou pou
¹³ twonpe moun pwoche bò kote ou. Moun sa yo, se moun ki kite chemen dwat la pou lage kò yo
¹⁴ nan fènwa. Se moun ki pran plezi yo nan fè sa ki mal. Se moun ki kontan anpil pou wè mechanste
¹⁵ lòt moun ap fè. Ou pa janm konnen kote ou ye ak moun sa yo, tout kò yo se plan. Entèlijans
¹⁶ ou ak konesans ou va delivre ou anba fanm adiltè yo, anba fanm lòt peyi ki gen bèl pawòl dous pou
¹⁷ pran tèt ou. Fanm konsa se fanm k'ap twonpe mari yo, fanm ki bliye pwomès yo te fè Bondye.
¹⁸ Si ou mete pye lakay yo, ou sou wout lanmò. Si ou ale lakay yo, ou pa lwen ale kote mò yo ye
¹⁹ a. Lakay yo, se antre pa soti. Pa gen lavi pou ou ankò! ²⁰ Se poutèt sa, swiv egzanp moun
²¹ debyen. Mache pye pou pye dèyè moun ki pa fè chemen kwochi. Paske se moun k'ap mache
²² dwat yo ki pral rete nan peyi a. Se moun serye yo ki pral la. Men, Bondye ap disparèt mechan
 yo nan peyi a. L'ap rache moun k'ap fè sa ki mal yo tankou yo rache move zèb.

Chapter 3

¹ ¶ Pitit mwen, pa janm bliye sa mwen moutre ou yo. Kenbe tou sa mwen di ou fè yo nan kè
² ou. Se yo k'ap fè ou viv lontan. Se yo k'ap fè ou viv ak kè poze. ³ Se pou ou toujou viv byen ak
 tout moun. Se pou ou toujou gen yon sèl pawòl. Mete pawòl mwen yo nan kou ou tankou yon kolye,
⁴ kenbe yo nan kè ou pou ou pa janm bliye yo. Si ou fè sa, Bondye va kontan avè ou, lèzòm va
⁵ nonmen non ou an byen. Mete tout konfyans ou nan Seyè a. Pa gade sou sa ou konnen. ⁶ Toujou
 chonje Seyè a nan tou sa w'ap fè. Li menm, l'a moutre ou chemen pou ou pran. ⁷ ¶ Pa mete nan tèt
⁸ ou ou gen plis konprann pase sa. Gen krentif pou Seyè a, refize fè sa ki mal. Lè ou fè sa, se va
⁹ tankou yon bon medikaman: W'a toujou gaya, ou p'ap janm soufri doulè. Fè wè jan ou gen respè
¹⁰ pou Seyè a: ba li nan tou sa ou genyen, ofri l' premye donn ou rekòlte nan jaden ou. Lè ou fè
¹¹ sa, galata ou ap toujou chaje danre. Barik diven ou yo ap plen ra bouch. Pitit mwen, lè Seyè a
¹² ap pini ou, pa betize ak sa. Lè l'ap korije ou, pa dekouraje. Paske Seyè a korije moun li renmen,

menm jan yon papa korije pitit li renmen anpil la. ¹³ ¶ Ala bon sa bon pou moun ki gen konesans,
 pou moun ki rive gen bon konprann! ¹⁴ Benefis l'ap rapòte pi bon pase sa lajan bay. Avantaj l'ap
 bay gen plis valè pase lò. ¹⁵ Sajès pi bon pase boul lò. Nanpwen anyen moun ta renmen genyen
 ki ka parèt devan li. ¹⁶ Yon bò, bon konprann ap fè moun viv lontan. Yon lòt bò, l'ap bay richès,
 l'ap fè moun respekte ou. ¹⁷ L'ap fè moun viv ak kè kontan. L'ap fè ou reyisi nan tou sa w'ap fè.
¹⁸ Moun ki gen bon konprann jwenn lavi. Sa bon nèt pou moun ki gen bon konprann! ¹⁹ Avèk bon
 konprann li, Bondye kreye latè. Avèk entèlijans li, li mete syèl la nan plas li. ²⁰ Avèk konesans li,
 li fè larivyè yo koule. Li fè nwaj yo bay lapli sou latè. ²¹ ¶ Pitit mwen, kenbe pye konesans ou, pa
 pèdi konprann ou. Pa janm kite anyen fè ou bliye yo. ²² Y'ap ba ou lavi, y'ap fè lavi ou bèl tankou
 yon kolye ki pase nan kou ou. ²³ W'a fè chemen ou nan lavi san ou pa pè anyen. Ou p'ap janm bite
 sou anyen. ²⁴ Lè ou pral kouche, ou p'ap pè anyen. Lè w'a fin lonje kò ou, w'a dòmi nèt ale. ²⁵ Ou
 p'ap bezwen pè: malè p'ap rete konsa pou l' tonbe sou tèt ou. Ni tou, sa ki rive mechan yo p'ap rive
 ou. ²⁶ Paske se Seyè a ki tout espwa ou. Li p'ap kite ou pran nan pèlen. ²⁷ ¶ Pa refize fè byen pou
 moun ki nan nesosite, chak fwa ou santi ou ka fè sa. ²⁸ Si ou gen lajan sou ou, ou pa ka di frè parèy
 ou: Ale non! Tounen denmen. M'a ba ou kichòy! ²⁹ Moun k'ap viv ansanm avè ou, ki mete konfyans
 yo nan ou, pa manniganse anyen ki pou fè yo mal. ³⁰ Pa fè kabouyay san rezon ak yon moun san
 li pa janm fè ou anyen ki mal. ³¹ Pa anvye sò mechan yo. Pa mete nan tèt ou pou ou fè tankou yo.
³² Paske Seyè a pa vle wè moun ki deprave. Men, li mete moun ki mache dwat yo nan tout sekre
 l' yo. ³³ Madichon Bondye chita lakay mechan yo. Men, benediksyon l' ap kouvri kay moun ki
 mache dwat yo. ³⁴ Moun k'ap pase moun nan betiz, Bondye ap pase yo nan betiz tou. Men, moun
 ki fè byen, l'ap moutre yo jan li renmen yo. ³⁵ Y'a fè lwanj moun ki gen bon konprann yo, men
 moun fou yo, se wont y'a wont.

Chapter 4

¹ ¶ Pitit mwen yo, koute yon papa lè l'ap ban nou bon levasyon. Louvri zòrèy nou pou nou ka
gen konprann. ² Pa janm bliye anyen nan sa m'ap moutre nou la a: Se bon konsèy m'ap ban nou.
³ Lè mwen te timoun piti lakay papa m', lè sa a mwen te sèl pitit manman mwen. ⁴ Papa m' t'ap
moutre m' anpil bagay. Li te konn di m': Kenbe pawòl mwen nan kè ou. Fè sa m'ap di ou fè, konsa
⁵ w'a viv. Chache gen konesans ak bon konprann. Pa janm bliye sa m'ap di ou la a. Pa vire do ba
⁶ yo. Pa lage konesans ou. L'a toujou pwoteje ou. renmen l', li p'ap kite anyen rive ou. ⁷ Chache
gen konesans, se premye bagay yon nonm lespri dwe fè. Nenpòt kisa ou ka genyen, bay li pou ou
⁸ vin gen konprann. renmen konesans, l'ap fè ou mache tèt wo. Kenbe l', pa lage l'. L'a fè yo respekte
⁹ ou. Se va yon bèl bagay pou ou, tankou yon kouwòn sou tèt ou. Se va yon lwanj pou ou kote ou
¹⁰ pase. Koute sa m'ap di ou, pitit mwen. Pa bliye sa m'ap moutre ou la a, konsa w'a viv lontan.
¹¹ Mwen moutre ou jan pou ou viv ak bon konprann. Mwen fè ou konnen jan pou ou mache dwat.
¹² Lè w'ap viv avèk bon konprann, anyen p'ap bare wout ou. Ou mèt ap kouri, ou p'ap janm bite
sou anyen. ¹³ Pa janm bliye sa yo te moutre ou, kenbe l' fèm. Pa kite l' chape anba men ou, se tout
¹⁴ lavi ou. ¶ Pa fè menm chemen ak mechan yo. Pa swiv egzanp moun ki deprave yo. ¹⁵ Pa fè sa,
¹⁶ pa pran chemen sa yo menm. Refize fè tankou yo, fè chemen pa ou. Mechan yo p'ap dòmi
¹⁷ toutotan yo pa fè sa ki mal. Dòmi pa ka pran yo si yo pa rive fè sa yo vle fè a. Se nan fè mechanste
¹⁸ yo jwenn manje pou yo manje. Se nan fè moun mal yo jwenn diven pou yo bwè. Chemen moun
¹⁹ k'ap mache dwat yo tankou solèy k'ap leve. Chak lè, l'ap vin pi klere jouk li fin jou nèt. Chemen
²⁰ moun mechan yo fè nwa kou lannwit. Yo pa ka wè sou kisa y'ap bite. ¶ Pitit mwen, louvri lespri
ou pou ou konprann byen sa m'ap di ou la a. Louvri zòrèy ou pou ou koute pawòl k'ap soti nan
²¹ bouch mwen. Pa janm kite yo soti devan je ou. Kenbe yo nan kè ou. Pa janm bliye yo. ²² Se
²³ lavi pou moun ki jwenn yo. Se lasante pou tout moun ki konprann yo. Pase tout lòt bagay, veye
²⁴ byen lide k'ap travay nan tèt ou, paske se yo k'ap di ou ki jan pou ou viv. Pa janm kite manti
²⁵ soti nan bouch ou, ni move pawòl, ni mo deplase. Gade dwat devan ou. Kenbe je ou fikse sou
²⁶ chemen ki dwat devan ou lan. Chache konnen byen sa w'ap fè. Konsa, tou sa w'ap fè ap mache
²⁷ byen pou ou. Pa vire ni adwat ni agoch. Pa lage kò ou nan fè sa ki mal.

Chapter 5

¹ ¶ Pitit mwen, louvri lespri ou pou koute sa m'ap di ou, mwen menm ki gen bon konprann.
 Louvri zòrèy ou pou ou tande konsèy m'ap ba ou, mwen menm ki gen bon konprann. ² Konsa, w'a
 konnen jan pou ou kondi tèt ou byen. Pawòl ki soti nan bouch ou va moutre jan ou se moun ki gen
 bon konprann. ³ Bouch madanm lòt moun ka dous kou siwo myèl, pawòl ka koule nan bouch yo
 tankou dlo. ⁴ Men, lè tout bagay fini, bouch li anmè kou fyèl, lang li file tankou kouto de bò. ⁵ L'ap
 mennen ou kote mò yo ye a. Tou sa l'ap fè se pou touye ou. ⁶ Li p'ap chache chemen lavi. L'ap
 pwonmennen toupatou, li pa konnen kote li prale. ⁷ Koulye a, pitit mwen yo, koute m' byen. Pa
 janm bliye sa m' pral di nou la a. ⁸ Rete lwen yon fanm konsa. Pa janm pwoche bò pòt lakay li,
⁹ pou fanm deyò pa fini avè ou, pou ou pa fè nèg ankòlè touye ou anvan lè ou! ¹⁰ Si se pa sa, se
 etranje ki va pran tout byen ou yo. Se lòt moun ki va jwi tou sa ou te travay fè. ¹¹ Lè w'a prèt pou
 ou mouri, w'a kouche sou kabann ou ap plenn. Maladi ap manje ou nan tout kò ou. ¹² Lè sa a, w'a
 di: Poukisa mwen pa t' vle kite yo rale zòrèy mwen? ¹³ Mwen pa t' vle koute moun ki t'ap moutre
 m' sa pou m' fè. Mwen pa t' louvri zòrèy mwen lè yo t'ap pale m'. ¹⁴ Yon ti kras ankò, mwen t'ap
 nan tout kalite malè. La, devan tout moun, mwen t'ap pèdi repitasyon m'. ¹⁵ ¶ Bwè dlo nan kannari
 ou. Se ak madanm ou ase pou ou rete. ¹⁶ Pa fè pitit ak fanm deyò, pou san ou pa trennen nan lari.
¹⁷ Se pou pitit ou grandi anndan lakay ou. Yo pa ka ap sèvi ou pou y'ap sèvi moun deyò tou. ¹⁸ Fè
 kè ou kontan ak madanm ou. Pran plezi ou ak madanm ou renmen depi lè ou te jenn lan. ¹⁹ L'ap
 bèl, l'ap anfòm tankou nègès banda. Se pou karès li yo toujou fè kè ou kontan, se pou ou toujou
 renmen fè lamou ak li. ²⁰ Pitit mwen, poukisa pou ou renmen yon lòt fanm? Poukisa pou ou kite
 madanm ou pou madanm lòt moun? ²¹ Seyè a wè tou sa w'ap fè. Kote ou pase, je l' sou ou.
²² Mechanste mechan yo se yon pèlen pou pwòp tèt yo. Sa yo pare pou lòt moun, se yo menm li
²³ rive. Y'ap mouri paske yo pa konn kontwole tèt yo. Y'ap peri paske yo fin pèdi tèt yo nèt.

Chapter 6

¹ ¶ Pitit mwen, si ou pwomèt pou ou reskonsab dèt yon zanmi ou fè, si ou bay pawòl ou pou
lajan yon lòt moun prete, ² si yo pran pawòl ki soti nan bouch ou pou mele ou, si pwomès ou te fè
yo tounen yon pèlen pou ou, ³ ay, pitit mwen! men sa pou ou fè pou ou wete tèt ou nan traka sa a.
Kouri al jwenn zanmi ou lan, kenbe l' kout. ⁴ Pa dòmi sou sa. Pa kite sa trennen. ⁵ Degaje ou chape
kò ou anba men l', tankou kabrit k'ap chape kò l' anba men kaptè, tankou zwazo k'ap bat pou l' sove
nan men chasè. ⁶ ¶ Ou menm parese, al pran leson nan men foumi yo. Ale wè jan y'ap viv pou ou
manyè konprann lavi. ⁷ Yo pa bezwen moun pou di yo sa pou yo fè. Yo pa bezwen moun pou veye
yo, ni pou ba yo lòd. ⁸ Men, yo pase mwa chalè ap fè pwovizyon. Nan tan rekòt, yo ranmase manje
mete la. ⁹ Parese, kilè w'a sispann pase tout jounen ou kouche sou do? Kilè w'a souke kò ou leve
sot nan dòmi? ¹⁰ W'ap di: Kite m' fè yon ti dòmi. Kite m' fè yon ti kabicha non. M'ap lonje kò m'
pou m' pran yon ti repo. ¹¹ Antan w'ap dòmi an, san ou pa konnen, se pòv w'ap vin pi pòv. Grangou
ap tonbe sou ou tankou yon vòlè nan gran chemen. ¹² ¶ Mechan yo fin deprave. Y'ap mache bay
manti toupatou. ¹³ Y'ap twenzi je yo sou moun, y'ap peze gwo zòtèy yo atè. Y'ap fè siy ak dwèt
yo. ¹⁴ Se move lide ase ki nan kè yo, yo toujou sou plan. Kote yo pase y'ap pouse dife. ¹⁵ Se poutèt
sa, y'ap rete konsa y'ap fini, y'ap glise tonbe san yo p'ap ka leve ankò. ¹⁶ Gen sis bagay Seyè a pa
vle wè. Sa m'ap di la a: Gen menm sèt bagay li pa ka sipòte: ¹⁷ Se moun k'ap gonfle lestonmak yo
sou moun, se moun k'ap bay manti, se moun k'ap touye moun inonsan, ¹⁸ se moun k'ap fè move
lide nan tèt yo pou fè mechanste, se moun ki toujou pare pou fè sa ki mal, ¹⁹ se fo temwen k'ap
bay manti sou moun, se moun k'ap mete frè ak zanmi dozado. ²⁰ ¶ Pitit mwen, toujou fè sa papa
ou di ou fè. Pa janm bliye sa manman ou te moutre ou. ²¹ Kenbe pawòl yo nan kè ou, pa janm
bliye yo. Mete yo nan kou ou tankou yon kolye. ²² Pawòl sa yo va moutre ou bon chemen nan tou
sa w'ap fè. Y'ap pwoteje ou lè w'ap dòmi lannwit. Y'a ba ou konsèy lè je ou klè. ²³ Pawòl sa yo ap
tankou yon lanp pou ou. Sa yo moutre ou ap tankou yon limyè nan lavi ou. Lè y'ap korije ou, lè
y'ap rale zòrèy ou, se moutre y'ap moutre ou chemen lavi. ²⁴ Y'ap fè ou rete lwen fanm k'ap twonpe
mari yo, pou ou pa pran nan pawòl dous madan marye ki nan dezòd. ²⁵ Yo te mèt bèl kou yo bèl,
pa kite yo pran tèt ou. Pa kite yo pran tèt ou lè y'ap fè je dou ba ou. ²⁶ Yon jennès ka koute yon

kraze kòb. Men, yon fanm adiltè dèyè pou l' pran tou sa ou genyen. ²⁷ Ou pa ka sere dife anndan
 rad sou ou pou rad la pa boule. ²⁸ Ou pa ka mache sou chabon dife pou pye ou pa boule. ²⁹ Konsa
 tou, se yon gwo danje pou ou kouri dèyè fanm yon lòt gason. Depi ou manyen yon fanm konsa, ou
 gen pou ou peye pou sa. ³⁰ Menm lè yon vòlò vòlò paske li grangou, se pa sa ki di li pa vòlò pou
 sa. ³¹ Si yo bare l', y'ap fè l' peye sèt fwa lavalè sa l' pran an. Y'a fè l' bay tou sa li gen lakay li.
³² Men, yon nonm ki fè adiltè, se moun fou li ye, se detwi l'ap detwi tèt li. ³³ L'ap pran baton. Y'ap
 pase l' anba kont betiz, l'ap toujou wont pou sa l' fè a. ³⁴ Lè yon mari ap fè jalouzi pou madanm li,
 nanpwen move tankou l'. Jou li mete men sou nèg la, pa gen anyen li p'ap fè l'. ³⁵ Li p'ap asepte
 lajan. Nanpwen kado ki pou fè l' bliye sa.

Chapter 7

¹ ¶ Pitit mwen, chonje sa m'ap moutre ou la a. Pa janm bliye sa m'ap di ou pou fè a. ² Si ou fè
 sa m'ap di ou pou fè a, w'a viv. Konsidere sa m' moutre ou la tankou de grenn je nan tèt ou. ³ Mete
 li nan tout dwèt ou tankou bag, kenbe li nan kè ou pou ou pa janm bliye l'. ⁴ Konsidere konesans
 tankou sè ou. Konsidere bon konprann tankou pi bon zanmi ou. ⁵ Y'ap fè ou rete lwen madanm lòt
 moun. Yo p'ap kite ou pran nan pawòl dous madan marye ki nan dezòd. ⁶ ¶ Yon jou, antan mwen
 nan fennèt lakay mwen, mwen t'ap gade nan fant jalouzi a. ⁷ Mwen wè anpil jenn gason san
 esperyans nan lavi. Te gen yonn ladan yo menm ki te fin fou. ⁸ Li t'ap mache nan lari a, li rive bò
 kay yon fanm. Konsa, konsa, li pran chemen ki mennen kay fanm lan. ⁹ Le sa a solèy te kouche,
 te fin fè nwa. ¹⁰ Madanm lan menm vin kontre li. Li te abiye tankou yon jennès, ak tout plan l'
 dèyè tèt li. ¹¹ Fanm lan te gen je chèch, li pa t' wont anyen. Li pa t' kapab rete chita lakay li. ¹² Li
 toupatou nan lari, sou laplas, nan tout kalfou. L'ap veye, je l' toupatou. ¹³ Li pase bra l' nan kou ti
 jennonm lan. Li bo li, li klere je l' nan je l', li di l': ¹⁴ Mwen te gen pou m' ofri yon bèt pou yo touye
 pou di Bondye mèsi. Se jòdi a mwen kit ak angajman mwen an. ¹⁵ Se poutèt sa, mwen vin kontre
 ou. Mwen t'ap chache ou, mwen jwenn ou. ¹⁶ Mwen ranje kabann mwen ak bon jan dra. Mwen

¹⁷ mete bèl dra koulè ki soti peyi Lejip sou kabann mwen. Mwen fè kabann mwen santi bon. Mwen
¹⁸ vide odè flè jasmen, womaren ak kannèl sou li. Vini non! Ann al damou jouk li jou. Annou pran
¹⁹ plezi nou. Ann fè doudous jouk nou sou. Mari m' pa la, li pati, li al fè yon vwayaj byen lwen.
²⁰ Li pati ak anpil lajan nan pòch li. Li p'ap tounen anvan kenz jou. ²¹ Se konsa, fanm lan fin pran
²² tèt ti jennonm lan. Ak bèl pawòl dous li yo, li fè l' asepte. Jennonm lan pran swiv li, tankou bèf
²³ y'ap mennen labatwa, tankou kabrit yo pran nan pèlen k'ap tann yo vin koupe tèt li, tankou zwazo
²⁴ k'ap mache sou pèlen san li pa konnen lavi l' an danje. ¶ Koulye a, pitit mwen yo, koute byen.
²⁵ Louvri zòrèy nou, tandè sa m'ap di nou. Pa kite kè nou bat pou fanm konsa. Pa kite li fè nou
²⁶ pèdi chemen nou. Li lakòz anpil gason tonbe mouri. Li lakòz anpil vanyan gason pèdi lavi yo.
²⁷ Depi ou mete pye lakay li, ou sou chemen lanmò. W'ap desann yon pant k'ap mennen ou tou
 dwat nan simityè.

Chapter 8

¹ ¶ Tandè byen. Sajès ap rele byen fò. Entèlijans ap pale fò pou tout moun tandè. ² Li kanpe
 sou tèt ti mòn yo, sou bò wout la, nan mitan kalfou yo. ³ L'ap pale byen fò bò pòtay lavil la, sou
 tout papòt yo, l'ap di: ⁴ Nou menm lèzòm, se ak nou m'ap pale. M'ap rele pou tout moun ki sou latè
⁵ tandè. Nou menm ki pa gen konprann, vin aprann sa ki rele gen bon konprann. Nou menm k'ap
 aji tankou moun fou, vin aprann sa ki rele gen lespri. ⁶ Louvri zòrèy nou. Mwen pral di pawòl ki
 konsekan. Tou sa mwen pral di yo se bagay ki dwat. ⁷ Sa m' pral di la a se verite. Mwen pa kapab
⁸ bay manti. Tou sa ki soti nan bouch mwen, se pawòl ki dwat. Nan sa m' di yo pa gen anyen ki pa
 vre, pa gen anyen ki kwochi. ⁹ Yo klè pou moun ki gen bon konprann. Yo kòrèk pou moun ki gen
¹⁰ konesans. Pito ou chache gen bon konprann pase pou ou gen lajan. Pito ou chache gen konesans
¹¹ pase pou ou gen pi bon lò. Paske, mwen menm Bon Konprann, mwen pi bon pase boul lò. Pa
¹² gen anyen ou ta renmen genyen ki ka konpare avè m'. ¶ Mwen menm Bon Konprann, mwen

13
 gen lespri. Mwen gen bon tèt pou m' konprann. Lè yon moun gen krentif pou Bondye, li rayi sa
 ki mal. Mwen pa vle wè moun lògey ak moun awogan, moun ki gen move kondit ak moun k'ap
 14
 bay manti. Se mwen ki bay bon konsèy, ki bay moun ladrès. Mwen gen konprann, mwen gen
 15
 fòs pouvwa. Se mwen ki bay wa yo ladrès pou yo kòmande. Se mwen ki fè chèf yo pase bon
 16
 lòd pou pa gen lenjistis. Se mwen menm ki bay tout chèf yo tèt pou yo kòmande. Se mwen
 17
 menm ki fè sa tou pou tout lòt chèf yo ansanm ak tout lòt moun k'ap dirije lèzòm. Mwen renmen
 18
 moun ki renmen m'. Depi yon moun chache m', fòk li jwenn mwen. Mwen bay richès, mwen
 19
 bay pouvwa. Mwen bay byen k'ap la pou lontan, mwen fè tout bagay byen. Tou sa mwen bay
 20
 pi bon lontan pase pi bon lò ki genyen. Yo pi bon pase ajan. Mwen fè moun mache dwat devan
 21
 Bondye. Mwen fè yo mache yon jan pou yo pa fè moun lenjistis. Lè moun renmen m', mwen
 22
 ba yo anpil byen. Mwen plen kay yo ak richès. ¶ Seyè a te fè m' lè li te fèk konmanse ak plan
 23
 travay li. Li te fè m' lontan lontan anvan tout bagay. Li te fè m' nan konmansman nèt, an premye,
 24
 anvan tout lòt bagay sou latè. Lè m' te fèk parèt, pa t' ankò gen lanmè. pa t' ankò gen ankenn
 25
 sous dlo. Lè m' te fèt la, pa t' ankò gen ankenn mòn menm. Ata ti mòn yo pa t' ankò nan plas
 26
 yo. Bondye pa t' ankò fè latè ak jaden. Pa menm premye grenn pousyè tè a pa t' ankò fèt. Mwen
 27
 te la lè li t'ap mete syèl la nan plas li, lè li t'ap trase liy kote syèl la kontre ak latè a. Mwen te la
 28
 lè li t'ap mete nwaj yo nan syèl la, lè li t'ap fè sous dlo pete anba lanmè a. Mwen te la lè li t'ap
 29
 bay dlo lanmè a limit pou l' pa depase, lè li t'ap poze fondasyon tè a. Mwen te la bò kote l' ap
 30
 travay avè l'. Chak jou mwen t'ap fè tout bagay ki te fè l' plezi. Mwen te toujou kontan travay anba
 31
 je l'. Mwen te kontan mache toupatou sou latè. Mwen te pran plezi m' ak lèzòm. ¶ Koulye a,
 32
 pitit mwen yo, louvri zòrèy nou pou nou tande mwen. Ala bon sa bon pou moun ki fè sa m' di yo
 33
 fè! Louvri zòrèy nou pou nou tande sa m'ap moutre nou. N'a vin gen bon konprann. Pa meprize
 34
 bagay konsa. Ala bon sa bon pou moun ki koute m', pou moun ki chita nan papòt mwen chak
 35
 jou, pou moun k'ap tann bò poto galeri kay mwen! Lè yon moun jwenn mwen, se lavi li jwenn.
 36
 Li antre nan favè Bondye. Men moun ki vire do ban mwen ap fè tèt yo mal. Moun ki rayi m',
 se moun k'ap mache ak sèkèy yo anba bra yo.

Chapter 9

¹ ¶ Bon konprann bati kay li, li kanpe l' avèk sèt gwo poto. ² Li fè yo pare bon vyann pou fè fèt, li fè bon konpoze ak diven, li ranje tab la byen ranje. ³ Li rele sèvant li yo, li voye yo moute kote ki pi wo nan lavil la pou fè tout moun konnen nouvèl la, pou di yo: ⁴ Nou menm ki poko konn anyen, vini non! Li rele moun san konprann yo, l'ap di yo: ⁵ Vin manje manje mwen an non! Vin bwè bon diven mwen pare a non! ⁶ Kite sèt! Vin aprann lavi! Vin mache nan chemen konesans. ⁷ Si w'ap kouri dèyè yon moun k'ap pase moun nan betiz, l'ap joure ou mete sou li. Si w'ap rale zòrèy yon mechan, l'ap bat ou mete sou li. ⁸ Pa janm kouri dèyè yon moun k'ap pase moun nan betiz. L'a rayi ou. Men, si w'ap kouri dèyè yon moun ki gen konprann, l'a gen respè pou ou. ⁹ Si ou pale ak yon moun ki gen bon konprann, w'ap fè l' gen plis bon konprann toujou. Plis w'ap moutre yon nonm debyen, plis l'ap mete sou konesans li. ¹⁰ Lè ou gen krentif pou Bondye, se lè sa a ou konmanse gen bon konprann. Si ou konnen ki moun Bondye ye, ou gen lespri. ¹¹ Bon konprann ap fè ou viv lontan. L'ap fè ou wè plizyè lanne. ¹² Si ou gen bon konprann, premye moun k'ap pwofite sa se ou menm. Konsa tou, si w'ap pase konesans nan betiz, se ou menm tou k'ap peye konsekans lan pou kont ou. ¹³ ¶ Moun sèt, se tankou yon fanm ki pale fò, ki pa konn anyen, ki pa wont anyen. ¹⁴ Li chita sou yon chèz devan papòt lakay li, li kage chèz li kote ki pi wo nan lavil la. ¹⁵ L'ap rele moun ki sou wout yo, ki pa sou bò l'. L'ap di yo: ¹⁶ Vini jwenn mwen non, nou menm ki poko konn anyen! Li pale ak moun ki san konprann yo, li di yo: ¹⁷ Dlo kay moun toujou pi fre. Manje deyò toujou gen pi bon gou! ¹⁸ Men, moun ki pran nan pawòl fanm sa a pa konnen lè yo mete pye lakay li se papye lanmò yo yo senyen. Depi yo antre lakay li, yo deja mouri.

Chapter 10

¹ ¶ Men pwovèb wa Salomon yo: Yon pitit ki gen bon konprann fè kè papa l' kontan. Men, yon pitit san konprann bay manman l' lapenn. ² ¶ Byen ou rive fè nan move kondisyon p'ap rapòte ou anyen. Men, lè ou serye, ou sove lavi ou. ³ Seyè a p'ap kite moun ki mache dwat soufri grangou.

Men, l'ap anpeche mechan an jwenn sa li anvi a. ⁴ ¶ Parese fè ou pòv, men travay di fè ou rich. ⁵ ¶
 Yon nonm ki wè lwen ranmase rekòt li lè rekòt la pare. Men, se yon wont pou moun ki pase tou
 tan rekòt la ap dòmi. ⁶ ¶ benediksyon Bondye ap chita sou yon nonm debyen. Pawòl yon moun
 mechan p'ap janm kite ou wè jan l' mechan. ⁷ ¶ Y'ap toujou chonje yon nonm debyen, y'a fè lwanj
 pou li. Men, talè konsa non mechan an ap sèvi jouman. ⁸ ¶ Moun ki gen bon konprann koute konsèy
 yo ba li. Men, moun k'ap pale tankou moun fou pa lwen mouri. ⁹ ¶ Yon nonm serye pa janm bezwen
 pe anyen. Men, yo gen pou yo bare moun k'ap fè vis. ¹⁰ ¶ Moun k'ap twenzi je yo sou moun, se
 moun k'ap voye wòch kache men. Men, moun ki pale kare anpeche kont. ¹¹ ¶ Pawòl ki soti nan
 bouch moun k'ap mache dwat yo bay lavi. Men, pawòl yon moun mechan p'ap janm kite ou wè jan
 l' mechan. ¹² ¶ Lè ou gen renmen nan kè ou, ou padonnen tout peche. Men, lè ou rayi moun, ou
 toujou ap cache kont. ¹³ ¶ Moun lespri pale bon pawòl. Men, pou moun san konprann, se baton
 nan dèyè yo. ¹⁴ ¶ Moun ki gen bon konprann toujou ap aprann. Men, lè moun san konprann ap
 pale, malè pa lwen. ¹⁵ ¶ Byen yon moun rich, se pwoteksyon li. Men, depi yon nonm pòv, nanpwen
 pwoteksyon pou li. ¹⁶ ¶ Travay moun k'ap mache dwat yo bay lavi. Lajan moun k'ap fe sa ki mal
 yo se pou malè yo. ¹⁷ ¶ Moun ki koute lè yo rale zòrèy yo ap jwenn chemen lavi. Men, moun ki
 refize admèt lè yo antò pèdi chemen yo. ¹⁸ ¶ Moun ki rayi moun nan kè yo, se moun ou pa ka fye.
 Tout moun k'ap mache fè tripotay se moun san konprann. ¹⁹ ¶ Plis ou pale anpil, plis ou ka rive fè
 peche. Lè ou gen bonjan konprann ou kenbe bouch ou fèmen. ²⁰ ¶ Pawòl ki soti nan bouch moun
 k'ap mache dwat, se lò. Men, lide k'ap travay nan tèt yon mechan pa vo anyen. ²¹ ¶ Pawòl ki soti
 nan bouch moun k'ap mache dwat ap pwofite anpil moun. Men, moun sòt yo ap mouri, paske yo
 pa gen konprann. ²² ¶ benediksyon Bondye bay moun richès. Ou te mèt travay di ou pa ka mete
 anyen sou li. ²³ ¶ Lè moun san konprann ap fè sa ki mal, se tankou yon jwèt pou yo. Men, yon
 moun lespri pran plezi l' nan cache gen bon konprann. ²⁴ ¶ Yon moun ki mache dwat, Bondye va
 ba li tou sa l' ta renmen genyen. Men mechan an, se sa l' pè rive l' la k'ap rive l'. ²⁵ ¶ Depi move tan
 pase, mechan yo disparèt lamenm. Men, moun k'ap mache dwat yo ap toujou kanpe fèm. ²⁶ ¶ Pa
 janm voye parese fè komisyon pou ou. L'ap ennève ou menm jan sitwon fè dan moun gasi, menm
 jan lafimen fè je moun koule dlo. ²⁷ ¶ Krentif pou Bondye fè moun viv lontan. Men, mechan yo

²⁸
 mouri anvan lè yo. Sa moun k'ap mache dwat yo ap tann lan va rive vre. Men, mechan yo p'ap
²⁹
 janm jwenn sa y'ap tann lan. ¶ Chemen Bondye se yon pwoteksyon pou moun ki serye. Men,
³⁰
 l'ap detwi moun k'ap fè mal yo. Yo p'ap janm ka fè moun k'ap mache dwat yo brannen. Men,
³¹
 mechan yo ap disparèt nan peyi a. ¶ Lè moun k'ap mache dwat yo ap pale, se bon koze yo bay.
³²
 Men, moun k'ap pale mal yo ap disparèt. Moun k'ap mache dwat yo konn bèl pawòl pou yo di.
 Men, lang mechan yo, se kouto de bò.

Chapter 11

¹
 ¶ Seyè a pa vle wè moun k'ap sèvi ak fo balans. Li kontan ak moun ki sèvi ak bon mezi. ² ¶
 Kote ki gen lògèy wont pa lwen. Men, moun ki soumèt devan Bondye, se yo ki gen bon konprann.
³
 ¶ Moun k'ap mache dwat yo konnen sa pou yo fè, paske se moun serye yo ye. Men, moun k'ap
 mache bay moun koutba, yo gen pou yo fini mal, paske se bakonyè yo ye. ⁴ ¶ Jou malè, richès pa
 ka sèvi ou anyen. Men, si ou se moun serye, sa ka sove lavi ou. ⁵ ¶ Yon moun k'ap mache dwat ap
 viv san pwoblèm, paske li serye. Men, mechan yo ap tonbe nan pwòp pèlen mechanste yo. ⁶ Lè
 yon moun serye fè sa ki dwat, sa ap sove l'. Men, moun k'ap mache bay moun koutba, y'ap pran
 nan move jwèt y'ap fè a. ⁷ ¶ Lè yon mechan mouri, sa l' t'ap tann lan mouri ansanm avè l'. Konfyans
 li te mete nan byen li yo pa sèvi l' anyen. ⁸ ¶ Jou malè, moun ki mache dwat ap jwenn pwoteksyon.
 Sa ki pou ta rive l' la, se mechan an li rive. ⁹ ¶ Moun ki san respè pou Bondye ap touye moun ak
 lang yo. Men, konesans ap sove moun k'ap mache dwat yo. ¹⁰ ¶ Lè sa mache pou moun serye yo,
 tout moun lavil la gen kè kontan. Konsa tou, lè mechan yo mouri, se kontantman pou tout moun.
¹¹
 Se bèl bagay pou yon lavil lè li gen moun serye ladan l'. Men, mechan yo ap detwi l' ak lang yo.
¹²
 ¶ Avili yon frè parèy ou, se bagay moun san konprann fè. Yon moun lespri konnen pou l' pe
 bouch li. ¹³ Moun k'ap mache fè tripotay mete tout sekre deyò. Men, moun ki toujou kenbe pawòl
 yo, kè yo se kòfrefò. ¹⁴ ¶ Lè pa gen moun ki konn gouvènèn, peyi a pa ka mache. Men, lè gen anpil
 moun k'ap bay bon konsèy, peyi a sove. ¹⁵ ¶ Lè ou pwomèt pou ou peye dèt yon moun ou pa
 konnen, w'a gen pou règrèt sa pita. L'a pi bon pou ou si ou refize bay garanti pou yon lòt. ¹⁶ ¶ Tout

moun va fè lwanj yon fanm ki gen bon karaktè. Konsa tou, gason ki gen kouraj nan travay ap jwenn ak kòb li. ¹⁷ ¶ Lè ou gen bon kè, se yon byen ou fè pou tèt ou. Men, moun ki san pitye yo, se tèt yo y'ap fè tò. ¹⁸ ¶ Mechan yo kwè y'ap fè benefis. Men, moun k'ap fè sa ki dwat yo toujou jwenn rekonpans yo. ¹⁹ ¶ Yon moun ki soti pou fè sa ki dwat ap toujou viv. Men, moun k'ap chache fè sa ki mal gen pou yo mouri. ²⁰ ¶ Seyè a pa vle wè moun k'ap mache pye gaye. Men, li pran plezi l' ak moun k'ap mache dwat nan chemen yo. ²¹ ¶ Wè pa wè, yo gen pou yo pini mechan yo. Men, tout moun k'ap mache dwat yo ap sove. ²² ¶ Yon bèl fanm ki nan dezòd se yon bèl zanno lò nan nen kochon. ²³ ¶ Lè moun k'ap mache dwat yo jwenn sa yo te vle a, se kontantman pou tout moun. Men, lè se mechan yo ki jwenn sa yo t'ap tann lan, sa pa fè pesonn plezi. ²⁴ ¶ Moun ki bay san gad dèyè, sa pa anpeche yo vin pi rich. Men, moun ki penng, se pòv y'ap vin pi pòv. ²⁵ ¶ Lè ou bay ak kè kontan, ou p'ap janm manke anyen. Lè ou manje ak moun, ou pa janm rete grangou. ²⁶ ¶ Pèp la ap madichonnen moun k'ap sere manje nan depo pou pri a ka moute. Men, l'ap fè lwanj pou moun k'ap vann manje a nan mache. ²⁷ ¶ Moun k'ap chache fè sa ki byen ap jwenn favè Bondye. Men, moun k'ap kouri dèyè malè, se malè ki pou rive l'. ²⁸ ¶ Moun ki mete konfyans yo nan byen yo ap tonbe tankou fèy chèch. Men, moun k'ap mache dwat yo ap pouse tankou boujon. ²⁹ ¶ Yon nonm ki mete dezòd nan fanmi li, lakòz madanm li ansanm ak tout pitit li yo nan tou sa ki pa bon. Moun san konprann ap toujou esklav moun ki gen bon konprann. ³⁰ ¶ Lè ou mache dwat, sa fè moun viv. Lè ou gen bon konprann, ou sove lòt moun. ³¹ ¶ Gade! Moun ki mache dwat jwenn rekonpans yo isit sou latè. Men, nou pa bezwen mande si moun k'ap fè mechanste ak moun k'ap viv nan peche p'ap jwenn ak pa yo tou!

Chapter 12

¹ ¶ Moun ki renmen yo korije yo, se moun ki toujou vle konnen. Men, moun ki pa renmen yo rale zòrèy yo, se moun san konprann. ² ¶ Seyè a kontan ak moun k'ap fè sa ki byen. Men, l'ap kondannen moun ki toujou sou plan. ³ ¶ Fè mechanste pa bay moun fòs pou yo rete kanpe. Men, moun ki mache dwat p'ap janm brannen. ⁴ ¶ Yon bon madanm se yon lwanj li ye pou mari li. Men,

yon madanm ki fè mari l' wont, se tankou yon maladi k'ap manje ou nan zo. ¶⁵ Yon nonm serye
 p'ap janm mete nan tèt li pou l' fè ou lenjistis. Men, mechan yo ap toujou chache twonpe ou. ¶⁶
 Pawòl ki soti nan bouch mechan se pèlen pou touye moun. Men, pawòl ki soti nan bouch moun
 k'ap mache dwat yo, se delivrans pou moun ki an danje. ¶⁷ Rive yon lè, pye mechan yo chape. Ou
 chache yo, ou pa wè yo. Men, fanmi moun k'ap mache dwat yo ap toujou la. ¶⁸ Y'ap fè lwanj moun
 ki gen konprann. Men, y'ap meprize moun ki malveyan. ¶⁹ Pito ou pase pou malere men ou gen
 manje pou ou manje, pase pou ou pran pòz grannèg ou epi w'ap mouri grangou. ¶¹⁰ Moun ki
 mache dwat okipe ata zannimo nan lakou yo. Men, mechan yo san zantray. ¶¹¹ Moun ki travay
 jaden ap jwenn manje pou yo manje plen vant yo. Men, moun k'ap pèdi tan yo nan fè bagay san
 valè, se san konprann yo ye. ¶¹² Mechan toujou ap fè gwo lide dèyè bagay mechan parèy yo pran.
 Men, moun k'ap mache dwat ap fè bagay k'ap rapòte yo. ¶¹³ Pawòl ki soti nan bouch moun mechan
 tounen yon pèlen pou yo. Men, moun k'ap mache dwat ap soti nan tout move pa. ¶¹⁴ Rekonpans
 yon moun chita sou sa li di ak bouch li. Sa ou fè se sa ou wè. ¶¹⁵ Moun sòt toujou konprann sa
 y'ap fè a byen. Men, moun ki gen bon konprann koute konsèy yo ba yo. ¶¹⁶ Lè yon moun san
 konprann ankòlè, tout moun wè sa lamenn. Men, yon moun veyatif, lè ou fè l' malonèt, li fè tankou
 li pa konprann. ¶¹⁷ Lè ou di verite nan tribinal, ou rann lajistis sèvis. Men, temwen k'ap bay manti,
 se lenjistis l'ap ankouraje. ¶¹⁸ Pawòl moun ki di tou sa ki vin nan bouch yo se kout ponya. Men,
 pawòl moun ki gen bon konprann se renmèd. ¶¹⁹ Manti la pou yon ti tan. Men, verite la pou tout
 tan tout tan. ¶²⁰ Moun k'ap kalkile jan pou yo fè moun mal, se move kou y'ap chache pote. Men,
 moun k'ap bay bon konsèy ap gen kè kontan. ¶²¹ Malè pa janm rive moun k'ap mache dwat. Men,
 pou mechan yo se apse sou klou. ¶²² Seyè a pa vle wè moun k'ap manti. Men, li kontan nèt ak
 moun ki toujou kenbe pawòl yo. ¶²³ Moun lespri pa janm nan fè moun wè tou sa yo konnen. Men,
 moun san konprann ap mache fè moun wè jan yo sòt. ¶²⁴ Travay di fè ou grannèg. Men, parese
 fè ou rete ak moun. ¶²⁵ Tèt chaje kraze kouraj yon moun. Men, yon bon pawòl fè kè l' kontan.
 ¶²⁶ Moun ki mache dwat ap toujou moutre zanmi l' bon chemen. Men, mechan an ap fè yo pèdi
 chemen yo. ¶²⁷ Parese ap toujou rete grangou. Tout richès yon moun se travay li. ¶²⁸ Fè sa ki
 dwat, w'a jwenn ak lavi. Fè sa ki mal, w'a jwenn ak lanmò.

Chapter 13

¹ ¶ Yon pitit gason ki gen bon konprann ap koute lè papa l' ap rale zòrèy li. Men, moun k'ap
pase moun nan betiz p'ap janm koute lè y'ap fè l' obsèvasyon pou korije l'. ² ¶ Rekonpans yon moun
chita sou sa li di ak bouch li. Men, moun ki ipokrit renmen fè mechanste. ³ ¶ Veye pawòl ki soti
nan bouch ou, w'a pwoteje lavi ou. Moun k'ap prese louvri bouch yo pale ap detwi pwòp tèt yo.
⁴ ¶ Parese p'ap janm jwenn sa yo ta renmen genyen. Men, moun k'ap travay di ap jwenn tou sa yo
ta renmen genyen. ⁵ ¶ Moun k'ap mache dwat pa vle wè moun k'ap bay manti. Men, sa mechan yo
ap fè a se yon wont, se yon dezonè pou tèt yo. ⁶ ¶ Lè ou toujou fè sa ki byen, lajistis ap pwoteje
ou. Men, peche lakòz mechan yo disparèt. ⁷ ¶ Gen moun ki pa gen anyen men ki pran pòz moun
rich yo. Gen moun ki pran pòz moun pòv yo, epi se yo ki gen fòtin. ⁸ ¶ Yon moun rich sèvi ak lajan
l' pou l' sove lavi l'. Moun ki pòv pa vle tandè lè w'ap rele dèyè l'. ⁹ ¶ Moun k'ap mache dwat yo
tankou lanp k'ap klere byen klere. Men, mechan yo tankou yon lanp ki prèt pou mouri. ¹⁰ ¶ Moun
awogan yo toujou ap pouse dife. Men, moun ki koute konsèy, se moun ki gen bon konprann. ¹¹ ¶
Lajan ou fè fasil pa lwen fini. Lajan ou fè nan di ap toujou fè pitit. ¹² ¶ Lè ou pa jwenn sa ou t'ap
tann lan, se bagay ki pou fè ou malad. Men, lè ou jwenn sa ou te anvi a, se lavi pou ou. ¹³ ¶ Lè ou
pa respekte pawòl ki nan lalwa Bondye a, se det ou fè. Men, moun ki fè sa lalwa mande yo fè a ap
jwenn rekonpans yo. ¹⁴ ¶ Sa moun ki gen bon konprann ap moutre a bay lavi. L'ap ede ou pou ou
pa tonbe lè lavi ou an danje. ¹⁵ ¶ Lè ou gen bon konprann, sa fè moun renmen ou. Men, lè moun
pa ka fè ou konfyans, ou nan di. ¹⁶ ¶ Tout moun ki gen konprann kalkile byen anvan yo fè yon
bagay. Men, moun san konprann yo ap fè ou wè jan yo sèt. ¹⁷ ¶ Yon move komisyonè ap mete
moun nan ka. Men, yon komisyonè serye ap bay moun kè poze. ¹⁸ ¶ Yon moun ki refize aprann
ap toujou pòv, l'ap toujou wont. Men, y'ap respekte moun ki koute lè yo rale zòrèy yo. ¹⁹ ¶ Ala
bon sa bon lè ou jwenn sa ou te anvi a! Moun san konprann derefize kite move chemen yo pran an.
²⁰ ¶ Fè zanmi ak moun ki gen konpans, ou menm tou w'a vin gen konpans. Fè zanmi ak moun ki
san konprann, ou nan pwoblèm. ²¹ ¶ Malè ap pousib moun k'ap fè sa ki mal. Men, moun ki mache
dwat ap jwenn bon rekonpans. ²² ¶ Yon moun ki gen bon kè ap kite byen pou pitit pitit li. Men,

richès moun k'ap fè sa ki mal, se moun ki mache dwat yo k'ap jwi li. ²³ ¶ Jaden malere bay kont manje. Men, lenjistis fè l' mouri grangou. ²⁴ ¶ Si ou pè bat pitit gason ou, ou pa renmen l'. Si ou renmen l', se pou ou korije l'. ²⁵ ¶ Moun k'ap mache dwat toujou gen ase pou yo manje. Men, vant mechan yo pa janm plen.

Chapter 14

¹ ¶ Bon konprann yon fanm fè kay li mache byen. Men, yon fanm sòt ap kraze kay li ak pwòp men li. ² ¶ Moun ki mache dwat, se yo ki gen krentif pou Seyè a. Men, moun k'ap mache kwochi pa pran Bondye pou anyen. ³ ¶ Pawòl nan bouch moun san konprann, se fwèt pou dèyè yo. Men, pawòl nan bouch moun ki gen bon konprann, se pwoteksyon yo. ⁴ ¶ Kote ki pa gen bèf pou rale chari pa gen rekòt. Lè bèt ou an fòm w'ap fè bon rekòt. ⁵ ¶ Yon bon temwen p'ap bay manti. Yon fo temwen p'ap di verite. ⁶ ¶ Moun ki gen lògèy plen kè yo, yo mèt chache konesans, yo p'ap janm jwenn li. Men, pou moun ki gen lespri, se bagay fasil. ⁷ ¶ Pa pwoche bò kote moun san konprann. Se pa anba bouch yo w'ap pran anyen. ⁸ ¶ Moun ki gen bon konprann konnen sa l'ap fè. Moun sòt mete nan tèt li li konnen, men se tèt li l'ap twonpe. ⁹ ¶ Moun sòt pran peche sèvi jwèt. Men, moun k'ap mache dwat pare pou rekonèt tò yo. ¹⁰ ¶ Lè ou nan lapenn, se ou ki konnen sa w'ap souffri. Konsa tou, lè kè ou kontan, pesonn pa ka kontan avè ou. ¹¹ ¶ Fanmi mechan yo gen pou disparèt. Men, fanmi moun k'ap mache dwat yo gen pou devlope. ¹² ¶ Chemen ou kwè ki bon an, se li ki mennen tou dwat nan lanmò. ¹³ ¶ Ou mèt ap ri, kè ou ka nan lapenn. Apre kontantman, se kè sere. ¹⁴ ¶ Moun k'ap fè sa ki mal ap jwenn sa l'ap chache a. Konsa tou, moun k'ap fè byen an ap jwenn rekonpans li. ¹⁵ ¶ Yon moun sòt ap kwè tou sa yo di l'. Men, moun ki gen konprann veye kote l'ap mete pye l'. ¹⁶ ¶ Moun ki gen bon konprann pran prekosyon yo, yo egzante malè. Moun sòt yo awogan, yo toujou konprann zafè yo bon. ¹⁷ ¶ Lè yon moun gen san wo, l'ap toujou fè betiz. Men, moun ki kalkile anvan ap toujou rete kè pòpòz. ¹⁸ ¶ Moun san konprann aji tankou moun fou. Men,

19 rekonpans moun ki gen lespri se konesans. ¶ Move moun gen pou wete chapo devan bon moun.
 20 Moun mechan gen pou bese tèt devan moun k'ap mache dwat yo. ¶ Lè ou pòv, ou pa gen zanmi.
 21 Lè ou rich, ou plen zanmi. ¶ Se yon peche ou fè lè ou meprize frè parèy ou. Men, ala bon sa bon
 22 pou moun ki gen pitye pou pòv malere! ¶ Lè w'ap chache fè sa ki mal, ou pèdi chemen ou. Men,
 23 lè w'ap chache fè sa ki byen, moun ap toujou renmen ou, yo p'ap janm lage ou. ¶ Travay, w'a
 24 jwenn tou sa ou bezwen. Rete chita ap pale anpil ap rann ou pòv. ¶ Rekonpans moun ki gen
 25 konprann se konesans. Moun san konprann ap toujou aji tankou moun sòt. ¶ Lè yon temwen di
 26 laverite, li sove lavi inonsan. Lè li bay manti, li twonpe jij yo. ¶ Lè yon moun gen krentif pou
 27 Bondye, li gen kote pou l' apiye. Pitit li yo ap jwenn pwoteksyon bò kot Bondye. ¶ Gen krentif
 28 pou Bondye, w'a gen lavi. Ou p'ap tonbe lè lavi ou an danje. ¶ Tout pouvwa yon wa, se lè peyi
 29 l'ap kòmande a gen anpil moun. Men, lè pa gen moun nan peyi a, wa a pa vo anyen. ¶ Moun ki
 30 pa fè kòlè fasil, se moun ki gen bon konprann. Men, moun ki gen san wo fè wè jan li sòt. ¶ Lè
 ou gen kè ou poze, ou kenbe kò ou an sante. Men, anvye sò lòt moun se tankou yon maladi k'ap
 31 manje ou nan zo. ¶ Lè w'ap peze pòv malere, se Bondye ki fè l' la w'ap derespekte. Men, lè ou
 32 aji byen ak pòv, se pi bèl sèvis ou ka rann Bondye. ¶ Mechanste mechan an, se sa k'ap jete l'
 33 atè. Men, moun ki fè sa ki byen, y'ap pwoteje l' menm lè lavi l' an danje. ¶ Moun ki gen konprann,
 34 se tout tan y'ap chache konnen. Men, moun sòt pa chache konnen anyen. ¶ Lè gen jistis nan yon
 35 peyi, sa leve peyi a. Men, peche lenjistis se yon wont pou yon nasyon. ¶ Wa a kontan lè moun
 k'ap travay avè l' yo fè travay yo byen. Men, l'ap move sou moun k'ap fè travay yo mal.

Chapter 15

1 ¶ Yon bon repons dous ap kalme yon moun ki ankòlè. Men, si ou reponn li rèd, w'ap fè l' pi
 2 eksite. ¶ Pawòl ki soti nan bouch moun ki gen bon konprann fè ou anvè konnen tou. Men, pawòl
 3 ki soti nan bouch moun san konprann, se pawòl san sans. ¶ Je Seyè a toupatou, l'ap veye tout
 4 moun, bon kou mechan. ¶ Bon pawòl yon zanmi bay lavi. Men, move pawòl demanbre. ¶ Moun

fou pa koute lè papa yo ap pale yo. Men, moun ki gen bon konprann koute lè y'ap rale zòrèy yo.

⁶ ¶ Moun ki mache dwat ap toujou gen sa yo bezwen an kantite lakay yo. Men, tou sa mechan yo genyen se tèt chaje pou yo. ⁷ ¶ Lè moun ki gen bon konprann yo ap pale, se konesans y'ap bay. Men, se pa menm bagay pou moun ki san konprann yo. ⁸ ¶ Seyè a pa ka sipòte lè mechan yo ap ofri bèt pou touye pou li. Men, sa fè l' plezi anpil lè moun k'ap mache dwat yo ap lapriyè nan pye l'. ⁹ ¶ Seyè a pa ka sipòte jan mechan yo ap viv la. Men, li renmen moun k'ap fè sa ki dwat devan li. ¹⁰ ¶ Moun ki fè sa ki mal mèt pare tann pinisyon yo. Men, moun ki pa ka sipòte pou yo pini yo pa lwen mouri. ¹¹ ¶ Seyè a konnen sa k'ap pase nan twou san fon an ak nan peyi kote mò yo ye a. Ou pa bezwen mande si l' pa konnen sa k'ap pase nan kè moun. ¹² ¶ Moun k'ap pase moun nan betiz pa renmen moun rale zòrèy yo. Yo pa janm mande moun ki gen bon konprann konsèy. ¹³ ¶ Lè kè ou kontan, yo wè sa sou figi ou. Lè ou nan lapenn, ou kagou. ¹⁴ ¶ Yon moun ki gen konprann toujou ap chache gen konesans. Men, moun sòt pran plezi nan pale koze san sans. ¹⁵ ¶ Lè ou nan lafliksyon, chak jou se pwoblèm. Men, lè kè ou kontan, lavi se yon fèt pou ou. ¹⁶ ¶ Pito ou pa gen anpil byen men ou gen krentif pou Bondye pase pou ou rich epi pou ou nan tèt chaje. ¹⁷ Pito ou manje mayi moulen blanch ak moun ki renmen ou pase pou ou manje vyann ou byen gra ak moun ki rayi ou. ¹⁸ ¶ Yon moun ki gen san wo toujou ap pouse dife. Men, moun ki pa fè kòlè fasil toujou ap mete lapè. ¹⁹ ¶ Lè ou parese, ou wè pwoblèm toupatou. Men, pou moun ki pa pè travay, pa gen pwoblèm ki pou rete l'. ²⁰ ¶ Yon pitit byen elve fè kè papa l' kontan. Men, yon moun ki san konprann meprize manman l'. ²¹ ¶ Moun ki san konprann kontan lè y'ap aji tankou moun fou. Men, moun ki gen konprann ap toujou fè sa ki dwat. ²² ¶ Lè ou pa pran konsèy, plan travay ou p'ap mache. Lè ou pran konsèy nan men anpil moun, ou mèt sèten travay ou ap mache byen. ²³ ¶ Ala kontan ou kontan lè ou jwenn yon bon repons pou ou bay! Ala bon sa bon lè ou jwenn yon pawòl ki tonbe daplon! ²⁴ ¶ Moun ki gen konprann, se yon chemen moute y'ap swiv, chemen lavi a. Yo pa pran chemen desann, chemen lanmò a. ²⁵ ¶ Seyè a ap disparèt moun awogan yo ansanm ak tout fanmi yo. Men, l'ap pwoteje kay fanm ki pèdi mari yo. ²⁶ ¶ Seyè a pa ka sipòte lide mechan yo gen nan tèt yo. Men, sa fè l' plezi pou l' tande pawòl moun ki san repwòch. ²⁷ ¶ Moun k'ap kouri dèyè lajan, se traka y'ap chache bay fanmi yo. Men, moun ki refize kite yo achte l' ap viv lontan. ²⁸ ¶ Yon

moun ki dwat kalkile anvan li bay repons. Men, mechan yo prese bay move pawòl. ²⁹ ¶ Lè mechan yo ap lapriyè, Seyè a pa sou bò yo. Men, li pare zòrèy li pou l' koute sa moun ki mache dwat yo ap di l'. ³⁰ ¶ Ou kontan lè ou wè moun ki kontan wè ou. Ou santi w'ap viv lè ou resevwa bon nouvèl. ³¹ ¶ Moun ki koute lè y'ap rale zòrèy yo pou byen yo va jwenn yon plas nan sosyete moun ki gen bon konprann. ³² ¶ Moun ki refize mache sou prigad yo rayi tèt yo. Men, moun ki asepte lè yo rale zòrèy yo ap vin gen plis konprann. ³³ ¶ Lè ou gen krentif pou Bondye, ou deja konprann anpil bagay. Lè ou soumèt devan Bondye, moun va fè lwanj ou.

Chapter 16

¹ ¶ Lèzòm fè lide nan kè yo. Men, dènye mo a nan men Bondye. ² ¶ Lèzòm mete nan lide yo tou sa yo fè bon. Men, pa bliye se Bondye k'ap jije sa ki nan kè yo. ³ ¶ Mande Seyè a pou l' beni tout travay w'ap fè, w'ap reyisi nan tou sa w'ap fè. ⁴ ¶ Tou sa Seyè a fè, li gen yon rezon ki fè l' fè li. Menm mechan an, li kreye l' pou l' ka pini l'. ⁵ ¶ Seyè a pa ka sipòte moun k'ap gonfle lestonmak yo sou moun. Wè pa wè, l'ap fè yo peye sa. ⁶ ¶ Si ou pa janm vire do bay Bondye, si ou toujou kenbe pawòl ou, Bondye va padonnen peche ou yo. Lè yon moun gen krentif pou Bondye, l'ap evite fè sa ki mal. ⁷ ¶ Lè yon moun ap viv yon jan ki fè Seyè a plezi, Seyè a ap fè ata lènmi l' yo aji byen avè l'. ⁸ ¶ Pito ou fè ti pwofi nan fè sa ki dwat pase pou ou fè gwo benefis nan fè sa ki mal. ⁹ ¶ Lèzòm fè plan travay yo nan kè yo. Men, se Seyè a k'ap dirije sa y'ap fè a. ¹⁰ ¶ Lè yon wa pale, se tankou si se te Bondye ki pale. Lè l'ap jije, li p'ap janm rann move jijman. ¹¹ ¶ Seyè a mande pou yo sèvi ak bon balans pou peze. Li pa vle pou yo sèvi ak move mezi nan kòmès. ¹² ¶ Wa yo pa ka sipòte lè moun ap fè mechanste, paske tout fòs yon gouvènman se lè li defann dwa tout moun. ¹³ ¶ Wa a kontan ak tout moun ki di verite. Li renmen moun ki pa nan bay manti. ¹⁴ ¶ Lè wa a move, atansyon, moun ka mouri! Moun ki gen bon konprann ap toujou chache fè kè wa a kontan. ¹⁵ Lè wa a kontan, se lavi pou tout moun. Lè li bay yon moun favè l', se tankou yon nwaj ki pote yon bon lapli prentan. ¹⁶ ¶ Pito ou gen bon konprann pase pou ou gen byen. Pito ou gen konesans pase ou gen lajan. ¹⁷ ¶ Moun ki mache dwat fè chemen yo yon jan pou yo pa fè sa ki mal. Gade

kote w'ap mete pye ou pou ou pa mouri mal. ¹⁸ ¶ Lè ou gen lanbisyon, yo pa lwen kraze ou. Lè
 w'ap fè awogans, ou pa lwen mouri. ¹⁹ ¶ Pito ou mennen ti vi ak pòv malere yo pase pou ou nan
 separe ak awogan yo nan sa yo vòlò. ²⁰ ¶ Moun k'ap repase nan tèt li tou sa yo moutre l' va wè
 zafè l' mache byen. Ala bon sa bon pou moun ki mete konfyans yo nan Seyè a! ²¹ ¶ Lè yon moun
 gen bon konprann, yo di li gen lespri. Lè ou pale byen sa fè ou gen plis konesans. ²² ¶ Moun ki
 gen bon konprann gen lavi. Men, moun sòt ap toujou sòt. ²³ ¶ Yon moun ki gen bon konprann
 kalkile anvan li pale. Konsa pawòl li vin gen plis pèz. ²⁴ ¶ Bon pawòl se siwo myèl. Yo bon pou
 sante ou, yo dous pou nanm ou. ²⁵ ¶ Chemen ou kwè ki bon an, se li ki mennen ou tou dwat nan
 lanmò. ²⁶ ¶ Grangou fè ou travay rèd, paske ou bezwen manje pou ou mete nan bouch. ²⁷ ¶ Mechan
 an toujou ap chache jan pou li fè moun mal. Ata pawòl nan bouch li boule tankou dife. ²⁸ Ipokrit
 toujou ap pouse dife. Moun k'ap fè tripotay mete zanmi dozado. ²⁹ ¶ Mechan an pran tèt kanmarad
 li, li fè l' fè sa ki pa bon. ³⁰ Moun k'ap twenzi je yo sou moun, se moun ki gen move lide dèyè tèt
 yo. Moun k'ap fè siy sou moun, se moun ki sou move kou. ³¹ ¶ Cheve blan se bèl rekonpans. Moun
 ki mache dwat va viv lontan. ³² ¶ Pito ou aji ak pasyans pase pou ou fè fòs sou moun. Pito ou konn
 kontwòle tèt ou pase pou ou gwo chèf lame k'ap mache pran lavil. ³³ ¶ Moun tire kat pou yo konnen
 sa pou yo fè. Men, desizyon an se nan men Bondye li ye.

Chapter 17

¹ ¶ Pito ou manje yon grenn bannann chèch ak kè poze pase pou ou fè gwo fèt nan mitan
 dezagreman. ² ¶ Yon esklav ki gen konprann va chèf sou yon pitit ki fè papa l' wont. L'a jwenn pa
 l' nan eritaj papa a tankou tout pitit. ³ ¶ Se dife sèl ki ka fè ou konnen si lò osinon ajan ou genyen
 an se bon kalite. Konsa tou, se Seyè a sèl ki konnen sa ki nan kè moun. ⁴ ¶ Mechan yo toujou prèt
 pou koute moun k'ap di move pawòl. Zòrèy mantò yo toujou louvri pou koute moun k'ap bay manti.
⁵ ¶ Lè w'ap pase yon pòv malere nan betiz, se Bondye ki fè l' la w'ap derespekte. Moun ki kontan
 lè malè rive yon lòt, Bondye ap pini l'. ⁶ ¶ Pitit pitit se rekonpans granmoun. Manman ak papa se

kontantman pitit. ⁷ ¶ Yon moun sòt pa ka di anyen ki bon. Konsa tou, yon moun serye pa nan bay manti. ⁸ ¶ Moun ki sèvi ak lajan pou pran tèt moun konprann lajan se wanga. Yo kwè se pou yo reyisi nan tou sa y'ap fè. ⁹ ¶ Si ou vle moun renmen ou, padonnen lè yo fè ou mal. Si w'ap mache repete bagay moun fè ki mal, w'ap mete zanmi dozado. ¹⁰ ¶ Lè ou fè yon moun ki gen konprann repwòch, sa touche kè l'. Men, ata san kout baton p'ap chanje yon moun sòt. ¹¹ ¶ Mechan toujou ap fè rebelyon, men y'a voye yon sanmanman regle avè l'. ¹² ¶ Pito ou kontre ak yon manman lous k'ap chache pitit li pase pou ou tonbe sou yon moun fou foli moute. ¹³ ¶ Si ou aji mal avèk moun ki fè ou byen, malè ap toujou rive lakay ou. ¹⁴ ¶ Lè yon kont pete, se tankou dlo ki kase dig kannal. Anvan batay mete pye, chape kò ou. ¹⁵ ¶ Se de kalite moun Seyè a pa ka sipòte: moun k'ap kondannen inonsan ak moun k'ap pran pou mechan yo. ¹⁶ ¶ Yon moun sòt te mèt gen kont lajan nan men l', li p'ap janm ka gen konprann. ¹⁷ ¶ Yon bon zanmi p'ap janm trayi. Jou malè l'ap tankou yon frè pou ou. ¹⁸ ¶ Fòk yon moun pèdi tèt li nèt pou l' garanti dèt yon lòt moun. ¹⁹ ¶ Moun ki renmen chache kont renmen fè sa ki mal. Moun k'ap pale avèk awogans, se moun k'ap mache ak sèkèy yo anba bra yo. ²⁰ ¶ Yon moun ki pa gen bon lide nan tèt li p'ap janm gen kè kontan. Moun ki gen move lang ap toujou nan traka. ²¹ ¶ Se lapenn pou yon papa ki fè yon pitit ki san konprann. Papa yon pitit sòt p'ap janm gen kè kontan. ²² ¶ Kè kontan bay lasante. Men, lè ou kagou, w'ap deperi sou pye. ²³ ¶ Malveyan pran lajan nan men moun pou enpoze jistis fèt. ²⁴ ¶ Yon moun ki gen bon konprann toujou ap chache konprann. Men, moun sòt pa konn sa li vle. ²⁵ ¶ Yon timoun ki san konprann, se chagren pou papa l', se gwo lapenn pou manman l' ki fè l'. ²⁶ ¶ Se pa jistis pou inonsan peye pou koupab. Pa gen jistis lè yo bat moun ki pa fè mal. ²⁷ ¶ Moun ²⁸ ki gen konprann pa nan pale anpil. Moun ki rete dousman se moun ki gen konprann. Moun ki gen lespri pa janm cho pou pale. Men moun sòt, lè yo rete ak bouch yo fèmen, yo pase pou moun ki gen konprann.

Chapter 18

¹ ¶ Moun k'ap viv apa se tèt li ase li konnen. Li move sou tout moun ki vle ba li bon konsèy.
² ¶ Moun sòt pa pran plezi l' nan chache konprann. Tou sa l'ap chache se fè moun konprann li gen
³ lespri. ¶ Y'ap meprize moun k'ap fè mechanste. Moun ki pa fè respè tèt yo gen pou yo wont. ¶
⁴ Pawòl moun ki gen konprann fon kou lanmè, fre tankou yon sous k'ap koule tout tan. ¶ Sa pa bon
⁵ pou ou pran pou moun mechan, ni pou ou enpoze yo rann moun inonsan jistis. ¶ Depi moun sòt
⁶ ap pale, se kont l'ap chache. Si ou koute pawòl nan bouch li, w'a ba l' kou. ¶ Bouch moun sòt se
⁷ kondannasyon li. Pawòl ki soti nan bouch li tounen pèlen pou li. ¶ Tripotay dous nan zòrèy moun
⁸ ki vle tandè yo. Sa mache nan san yo. ¶ Moun ki parese nan travay li se menmman parèyman ak
⁹ moun k'ap defèt sa k'ap fèt. ¶ Seyè a, se yon gwo ranpa byen solid. Se la moun k'ap mache dwat
¹⁰ yo kouri al chache pwoteksyon. ¶ Pou moun rich yo, byen yo tankou yon ranpa byen solid. Yo
¹¹ mete nan tèt yo se sa k'ap pwoteje yo. ¶ Lè w'ap fè awogans, yo pa lwen kraze ou. Lè ou fè kò
¹² ou piti, y'a fè lwanj ou. ¶ Moun ki prese reponn san koute sa y'ap di l', se moun sòt li ye. Li gen
¹³ pou l' wont. ¶ Lè yon moun anvi viv, sa ede l' anpil lè li malad. Men, si li dekouraje, ki moun
¹⁴ ki ka remoute kouraj li? ¶ Yon moun lespri ap toujou chache gen plis konnesans. Zòrèy moun ki
¹⁵ gen bon konprann toujou pare pou l' ka konnen plis toujou. ¶ Kado ou fè louvri chemen pou ou
¹⁶ toupatou, ata chemen ki mennen lakay grannèg. ¶ Moun ki pale anvan nan tribinal toujou sanble
¹⁷ li gen rezon. Lè lòt moun lan parèt, kat je kontre, manti kaba. ¶ Lè de grannèg gen kont, jij yo
¹⁸ fè tiraj osò pou konnen kilès pou yo bay rezon. ¶ Li pi fasil pou mete lapè nan yon gwo lavil
¹⁹ pase pou ou rekonsilye de frè ki nan kont. Lè yo fache, kè yonn se pòt prizon pou lòt. ¶ Rekonpans
²⁰ yon moun chita sou sa ki soti nan bouch li. ¶ Sa ou di ka lavi pou ou, li ka lanmò pou ou. Sa ou
²¹ chwazi, se sa w'ap jwenn. ¶ Lè yon nonm jwenn yon bon madanm, se yon bon bagay. Se yon
²² gwo favè Seyè a fè l'. ¶ Lè yon pòv ap pale, li toujou nan tanpri souple. Men, moun rich toujou
²³ ap rele sou moun. ¶ Gen zanmi se pran yo vin pran. Men, gen zanmi tou yo plis pase frè.
²⁴

Chapter 19

¹ ¶ Pito ou pòv men ou se nèg serye pase pou w'ap bay manti epi pou ou sòt met sou li. ² ¶ Sa pa bon pou ou prese fè anyen san ou pa konprann sa w'ap fè. Si ou pa gen pasyans, ou ka nan pwoblèm. ³ ¶ Se sotiz yon nonm ki fini avè l'. Apre sa, li konprann pou l' fache sou Bondye. ⁴ ¶ Lè ou gen lajan, ou toujou gen zanmi. Men lè ou pòv, dènye zanmi vire do ba ou. ⁵ ¶ Lè yon moun ap sèvi temwen nan tribinal, si li fè manti, yo gen pou yo pini l'. Pa gen rechap pou moun k'ap bay manti. ⁶ ¶ Anpil moun ap achte figi grannèg. Tout moun vle zanmi moun k'ap bay favè. ⁷ Lè ou pòv, ata frè ou pa vle wè ou. Ou pa bezwen mande si zanmi p'ap lage ou! Tout chache w'ap chache pale ak yo, yo pa okipe ou! ⁸ ¶ Si ou renmen tèt ou, chache gen konprann. Pa bliye sa ou te aprann, zafè ou va mache byen. ⁹ ¶ Lè yon moun ap sèvi temwen nan tribinal, si li fè manti, yo gen pou yo pini l'. Moun k'ap bay manti gen pou mouri. ¹⁰ ¶ Yon moun ki san konprann pa fèt pou gen tout bagay, ni yon esklav pa fèt pou chèf sou grannèg. ¹¹ ¶ Yon moun ki gen bon konprann pa fè kòlè fasil. Tout kalite li, se pa okipe moun ki fè mal. ¹² ¶ Lè yon wa ankòlè, se tankou yon lyon k'ap gwonde. Men, favè yon chèf se tankou lapli sou jaden. ¹³ ¶ Yon pitit ki san konprann se yon malè pou papa l'. Yon fanm ki toujou ap chache kont, se yon goutyè k'ap degoute dlo san rete. ¹⁴ ¶ Kay ak lajan, se byen manman ak papa ka mouri kite pou ou. Men, yon fanm ki gen konprann, se Seyè a ase ki ka fè ou jwenn sa. ¹⁵ ¶ Parès fè je ou toujou lou. Moun ki rete san fè anyen ap rete grangou. ¹⁶ ¶ Moun ki fè sa Bondye mande ap viv lontan. Moun ki pa mache jan Bondye vle l' l'a pa lwen mouri. ¹⁷ ¶ Lè ou bay pòv lacharite, se Bondye ou prete. Se li menm ki va renmèt ou sa. ¹⁸ ¶ Koriye pitit ou yo lè yo piti toujou. Men, pa bat yo jouk ou touye yo. ¹⁹ ¶ Moun ki gen san wo ap peye konsekans zak li yo. Si ou wete l' nan move pa a yon fwa, w'ap blije fè l' pou li tout tan. ²⁰ ¶ Koute konsèy y'ap ba ou. Louvri zòrèy ou pou aprann. Konsa w'a gen bon konprann jouk ou mouri. ²¹ ¶ Yon moun te mèt fè tout kalite lide nan tèt li. Men, sa Seyè a vle a, se sa ki pou rive. ²² ¶ Tou sa yo mande yon moun se pou l' gen bon kè. Pito yon moun pòv pase l' mantò. ²³ ¶ Gen krentif pou Bondye, w'a jwenn lavi, w'ap toujou kontan. Malè p'ap rive ou. ²⁴ ¶ Gen moun ki sitèlman parese ata manje yo pa vle mete nan bouch yo. ²⁵ ¶ Pase awogan yo yon je baton, moun san konprann yo

va konprann. Rale zòrèy moun ki gen konprann yo, y'a vin gen plis konesans. ²⁶ ¶ Se yon wont, se yon dezonè pou yon pitit aji mal ak papa l', osinon pou l' mete manman l' deyò lakay li. ²⁷ ¶ Pitit mwen, lè ou sispann aprann, ou pa lwen bliye sa ou konnen deja. ²⁸ ¶ Yon temwen k'ap bay manti pase lajistis nan betiz. Mechan yo pran plezi nan fè mechanste. ²⁹ ¶ Baton an tou la pou moun k'ap pase moun nan betiz. Fwèt la tou pare pou dèyè moun ki san konprann.

Chapter 20

¹ ¶ Twòp bweson fè ou pase moun nan betiz. Twòp gwòg fè ou pete kabouyay, fè lòbèy. Lè ou sou, ou aji tankou moun fou. ² ¶ Lè yon wa ankòlè, se tankou yon lyon k'ap gwonde. Moun ki mete l' ankòlè a, se pwòp tèt li l'ap fè mal. ³ ¶ Se bèl bagay lè yon moun evite diskisyon. Moun san konprann toujou ap chache kont. ⁴ ¶ Parese pa pare tè li lè pou l' te pare l', li di fè twò frèt. Lè rekòt rive, li pa jwenn anyen nan jaden l'. ⁵ ¶ Lide yon nonm gen nan tèt li, se tankou dlo nan yon pi byen fon. Men, yon moun lespri ka rale yo mete deyò. ⁶ ¶ Anpil moun ap mache di jan yo se moun serye. Men, ou pa fasil jwenn yon moun ou ka fè konfyans. ⁷ ¶ Lè yon papa se moun serye, li fè sa ki dwat. Sa bon nèt pou pitit li yo. ⁸ ¶ Lè yon wa chita sou fòtèy li, l'ap rann jistis, li wè sa ki mal ak sa ki byen. ⁹ ¶ Ki moun ki ka di: mwen lave konsyans mwen, mwen wete tout peche ki te sou li? ¹⁰ ¶ Seyè a pa ka sipòte moun k'ap sèvi ak de pwa de mezi. ¹¹ ¶ Yon timoun moutre ou sa l'ap soti nan sa l'ap fè. Ou ka di si l'ap serye, si l'ap bon. ¹² ¶ Se Seyè a ki ban nou je pou nou ka wè, se li menm ki ban nou zòrèy pou nou ka tande. ¹³ ¶ Pa renmen dòmi twòp pou ou pa vin pòv. Souke kò ou. W'a jwenn kont manje pou ou manje. ¹⁴ ¶ Lè moun ap machande, machandiz pa janm bon. Fini yo fin achte, y'ap mache di jan yo fè yon bon zafè. ¹⁵ ¶ Lè yon moun ki gen konprann ap pale sa gen plis valè pase kantite lò ak pyè ki koute chè. ¹⁶ ¶ Si yon moun sòt jouk pou li asepte bay pawòl li pou dèt yon etranje, se pou yo pran ata rad ki sou li jouk lòt la peye. ¹⁷ ¶ Lajan ou fè nan move kondisyon ka dous lè ou fèk genyen l'. Men, apre sa, se tankou ti wòch anba dan. ¹⁸ ¶ Pran

konsèy, tou sa ou gen lide fè ap mache byen. Pa kouri fè lagè san ou pa konnen sa w'ap fè. ¶¹⁹
 Bouch alèlè pa kenbe sekre. Pa mele ak moun ki pale twòp. ¶²⁰ Moun ki bay manman l' ak papa
 l' madichon p'ap viv lontan. ¶²¹ Richès ou ranmase fasil fasil p'ap janm vin yon benediksyon pou
 ou. ¶²² Pa janm di se ou ki pou vanje tèt ou. Mete konfyans ou nan Seyè a, l'a delivre ou. ¶²³
 Seyè a pa ka sipòte moun k'ap sèvi ak de pwa de mezi. Sa pa bon pou ou sèvi ak move balans. ¶²⁴
 Se Seyè a ki louvri chemen devan nou. Ki jan lèzòm ka rive konprann lavi? ¶²⁵ Pa prese fè Bondye
 pwomès. Ou ka règrèt sa pita. ¶²⁶ Yon wa ki gen bon konprann ap rive dekouvri tout mechan yo.
 L'ap san pitye lè l'ap pini yo. ¶²⁷ Se Seyè a ki ban nou konsyans nou. Se tankou yon lanp k'ap
 klere pou fè nou wè tou sa n'ap fè. ¶²⁸ Yon wa ap rete wa si li se nèg serye, si li toujou kenbe
 pawòl li. L'ap toujou wa si li pa nan patipri. ¶²⁹ Se kouraj ki fè valè yon jenn gason. Men, pou
 granmoun, se cheve blan l' yo ki fè valè l'. ¶³⁰ Move esperyans ka fè nou chanje. Malè ka fè nou
 vin gen bon santiman.

Chapter 21

¹ ¶ Seyè a dirije lespri yon wa, menm jan li dirije yon kouran dlo nan kannal. Li mennen l' kote
 li vle. ¶² Lèzòm mete nan lide yo tou sa y'ap fè dwat. Men, pa bliye, se Seyè a k'ap jije sa ki nan
 kè yo. ¶³ Fè sa ki dwat. Pa nan patipri. Sa fè Seyè a plezi pi plis pase bèt ou ta touye pou li. ¶⁴
 Fè awogans, gonfle lestonmak yo sou moun, se sa ase mechan yo ap chache fè. Tou sa se peche.
⁵ ¶ Lè ou pran san ou pou ou travay, tou sa w'ap fè ap ba ou benefis. Men, lè ou twò prese, ou p'ap
 janm gen anyen. ¶⁶ Moun k'ap mache bay manti pou fè lajan ap kouri dèyè van. Se lanmò y'ap
 chache. ¶⁷ Move zak mechan yo ap fè a ap fini ak yo, paske yo derefize fè sa ki dwat devan Bondye.
⁸ ¶ Moun k'ap fè sa ki mal ap mache sou chemen plen detou. Men, inonsan yo fè sa ki dwat. ¶⁹
 Pito ou rete pou kont ou nan yon kwen galata pase pou ou rete nan kay ak yon fanm ki toujou ap
 chache kont. ¶¹⁰ Mechan toujou anvi fè sa ki mal. Yo pa gen pitye pou pesonn. ¶¹¹ Lè yo pini
 yon moun ki renmen pase lòt nan betiz, se yon leson pou moun ki pa gen lespri. Men, moun ki gen
 bon konprann, lè yo pale avè l', li vin gen plis konesans. ¶¹² Bondye pa nan patipri, li konnen sa

k'ap pase anndan kay mechan yo. Li fè malè tonbe sou yo. ¹³ ¶ Si ou fèmen zòrèy ou pou ou pa
 tande pòv k'ap mande ou lacharite, konsa tou pesonn p'ap tande ou lè w'a mande sekou. ¹⁴ ¶ Lè
 yon moun fache sou ou, si ou ba li yon kado an kachèt, w'a fè l' vin frèt. Wi, yon kado glise nan
 pòch li ap kase fe l'. ¹⁵ ¶ Lè yo rann jistis san patipri, moun ki mache dwat yo gen kè kontan. Men,
 mechan yo gen kè kase. ¹⁶ ¶ Lè yon moun pèdi chemen l' pou l' aji tankou moun fou, se lanmò
 k'ap fè li siyon. ¹⁷ ¶ Lè ou renmen plezi, w'ap toujou pòv. Lè ou renmen bon bweson ak bon manje,
 ou p'ap janm gen lajan. ¹⁸ ¶ Lè pou malè ta tonbe sou moun ki mache dwat yo, se sou mechan yo
 li tonbe. ¹⁹ ¶ Pito ou viv pou kont ou nan yon dezè pase pou ou viv nan kay ak yon fanm ki tout
 tan ap chache kont, ki tout tan ap plenyen. ²⁰ ¶ Moun ki gen konprann ap gen gwo richès ak kantite
 bon manje lakay yo. Men, moun sòt gaspiye tout lajan yo. ²¹ ¶ Lè yon moun pa fè lenjistis, lè li
 gen bon kè, l'ap viv lontan. Tout zafè l' ap mache byen, y'ap respekte l'. ²² ¶ Yon nonm lespri ka
 pran yon lavil kote ki gen anpil grannèg. L'ap kraze fòs ki t'ap fè yo pa pè anyen an. ²³ ¶ Veye
 bouch ou ak lang ou, ou p'ap nan pwoblèm. ²⁴ ¶ Moun k'ap pase Bondye nan betiz, se moun ki
 radi, se moun ki awogan. Yo pa gen konsiderasyon pou pesonn. ²⁵ ¶ Parese pa anvi leve ni lou ni
 lejè. Se sa k'ap touye l' la tou. ²⁶ Tout lajounen l'ap kalkile sou sa l' ta renmen genyen. Men, moun
 ki mache dwat yo gen pou bay, y'ap bay san gad dèyè. ²⁷ ¶ Seyè a pa ka sipòte lè mechan yo ap
 ofri bèt pou touye pou li. Sa pi mal toujou lè yo ofri bèt pou touye ba li avèk lide mechanste dèyè
 tèt yo. ²⁸ ¶ Temwen k'ap bay manti gen pou l' mouri. Men, yo p'ap koupe pawòl nan bouch moun
 ki peze sa l'ap di. ²⁹ ¶ Mechan toujou pran pòz radi l'. Men, moun ki mache dwat la konnen sa l'ap
 fè. ³⁰ ¶ Devan Seyè a pa gen ni moun konnen, ni moun lespri, ni moun ki gen bon konprann.
³¹ Moun pare chwal pou y' al fè lagè, men se Seyè a k'ap deside kilès k'ap genyen batay la.

Chapter 22

¹ ¶ Pito yo nonmen non ou an byen pase pou ou gen anpil richès. Pito moun gen anpil
 konsiderasyon pou ou pase pou ou gen anpil lajan ak anpil lò. ² ¶ Pa gen diferans ant moun rich

ak moun pòv, paske tou de se kreyati Bondye yo ye. ³ ¶ Moun ki gen konprann, lè li wè malè ap
 vin sou li, li wete kò l'. Men, moun sòt pote lestonmak li bay, epi se li ki peye sa. ⁴ ¶ Soumèt ou
 devan Bondye, gen krentif pou li: W'a gen richès, y'a nonmen non ou, w'a viv lontan. ⁵ ¶ Moun ki
 mache kwochi jwenn pikan ak pèlen sou wout yo. Si ou renmen lavi, pa fè menm wout ak yo. ⁶ ¶
 Bay yon timoun prensip li dwe swiv. Jouk li mouri, li p'ap janm bliye l'. ⁷ ¶ Moun rich ap donminen
 sou moun pòv. Lè ou prete lajan nan men yon moun, ou tounen timoun devan pòt li. ⁸ ¶ Lè ou
 simen lenjistis, ou rekòlte malè. Ou rete konsa sak te fè ou gen gwo kòlèt la disparèt. ⁹ ¶ Bondye
 beni moun ki gen bon kè, paske lè moun ki gen bon kè wè yon pòv, yo separe sa yo genyen an avè
 l'. ¹⁰ ¶ Mete moun k'ap pase lòt moun nan betiz la deyò, lamenm tout kont, tout joure ap sispann.
¹¹ ¶ Moun ki pa gen move lide dèyè tèt yo epi ki gen bon pawòl nan bouch yo ap gen wa a pou
 zanmi yo. Men, Bondye renmen moun ki sensè. ¹² ¶ Seyè a pwoteje moun k'ap di verite. Men, li
 fè moun k'ap bay manti yo wont. ¹³ ¶ Parese rete chita lakay li, li di si li soti bèt nan bwa va manje
 l' nan lari a. ¹⁴ ¶ Pawòl fanm adiltè se gwo pèlen. Lè Seyè a move sou yon moun, moun lan ap
 pran nan pèlen sa a. ¹⁵ ¶ Timoun toujou ap fè move bagay. Men, fwèt ap fè yo pa rekonmanse
 ankò. ¹⁶ ¶ Lè w'ap peze yon pòv malere se lespri l' w'ap louvri. Lè w'ap fè moun rich kado, se pòv
 w'ap fè l' pòv. ¹⁷ ¶ Louvri zòrèy ou, koute pawòl moun ki gen bon konprann yo. Chache konprann
 sa m'ap moutre ou la a. ¹⁸ L'a bon pou ou toujou kenbe yo nan kè ou, pou yo ka toujou anba lang
 ou. ¹⁹ Koulye a, mwen pral moutre ou tout pawòl sa yo, ou menm tou, pou ou ka mete konfyans
 ou nan Seyè a. ²⁰ Depi lontan, mwen te ekri bon pawòl sa yo pou ou. W'a jwenn anpil bon konsèy
 ak konesans ladan yo. ²¹ Y'a fè ou konnen verite a jan li ye a. Konsa, w'a pote bon repons bay
 moun ki te voye ou la. Men yo: ²² ¶ Pa pran ti sa pòv la genyen an paske se pòv li ye. Pa pwofite
 sou ti malere yo nan tribinal. ²³ Se Seyè a ki va plede kòz yo pou yo. L'a touye moun ki vòlò malere
 sa yo. ²⁴ ¶ Pa fè zanmi ak moun ki ankòlè fasil. Pa mache ak moun ki gen san wo. ²⁵ W'a pran
 move mès yo. W'a rale malè sou ou. ²⁶ ¶ Pa pwomèt pou ou reskonsab dèt yon lòt moun fè. ²⁷ Si
 ou pa ka peye, y'a sezi ata kabann anba do ou. ²⁸ ¶ Pa janm deplase bòn tè kote granmoun lontan

29
te mete yo. ¶ Moutre m' yon nonm ki gen ladrès nan sa l'ap fè. Se moun konsa k'ap rive travay ak chèf. Li pa pral travay ak moun ki pa anyen.

Chapter 23

1 ¶ Lè chèf envite ou manje sou menm tab ak li, pa janm bliye ki moun li ye. 2 Si ou se yon moun ki gen bon lapeti, kontwole bouch ou. 3 Pa pote lanvi sou bon ti manje l'ap ofri ou yo. Se ka yon pèlen li tann pou ou. 4 ¶ Pa touye tèt ou ap kouri dèyè lajan pou ou vin rich. Wete lide ou sou sa. 5 Paske, anvan ou bat je ou, li gen tan disparèt. Ou ta di lajan gen zèl. Li rete konsa, li vole, li ale. 6 ¶ Pa chita pou ou manje sou menm tab ak moun ki tikoulout. Pa pote lanvi sou manje l'ap ofri ou. 7 Li chich ata ak tèt pa li, ale wè avè ou. L'ap di ou: Manje non, monchè! Bwè non! Men se pa ak tout kè li l'ap di ou sa. 8 W'a vonmi tou sa ou te manje a. Tout bèl pawòl ou te di l' yo p'ap sèvi ou anyen. 9 ¶ Pa chache fè yon moun san konprann konprann anyen. Li p'ap tande anyen nan sa w'ap di l' la. Lèfini, l'ap meprize ou met sou li. 10 ¶ Pa janm deplase bòn tè kote yo te ye depi lontan an. Pa antre sou jaden ki pou timoun san papa. 11 Se Bondye k'ap defann yo, li gen anpil pouvwa. L'a plede kòz yo kont ou. 12 ¶ Mete tèt ou an plas lè y'ap moutre ou kichòy. Louvri zòrèy ou lè yon moun ki gen konesans ap pale. 13 Ou pa bezwen pè bat yon timoun. Yon bèl kal, sa p'ap touye l'. 14 Okontrè, si ou bat li, w'a sove nanm li pou l' pa mouri. 15 Pitit mwen, si ou gen bon konprann, mwen p'ap manke kontan. 16 M'a kontan anpil lè m'a tande bon pawòl k'ap soti nan bouch ou. 17 ¶ Pa pote lanvi sou moun k'ap fè sa ki mal. Nan tou sa w'ap fè, toujou gen krentif pou Bondye. 18 Paske gen denmen. Se pa pou gremesi w'ap tann sa w'ap tann lan. 19 ¶ Louvri zòrèy ou, gason mwen, pou ou ka gen bon konprann, pou ou ka mache dwat. Kalkile byen kote w'ap mete pye ou, pou ou ka mache dwat. 20 Pa fè zanmi avèk moun k'ap bwè twòp, ak moun k'ap fè safte. 21 Paske moun k'ap fè metye bwè ak moun ki afre ap vin pòv. Si ou pase tout tan ou ap dòmi, talè konsa w'ap mache yon men devan yon men dèyè. 22 Pitit mwen, koute papa ou ki fè ou. Pa meprize manman ou lè li fin granmoun. 23 Verite, konesans, lespri ak bon konprann, se bagay ou mèt peye

chèn pou ou genyen. Men, pa janm vann sa. ²⁴ Papa ki gen yon pitit k'ap mache dwat ap toujou
 kontan. Manman ki fè yon pitit ki gen bon konprann ap toujou gen kè kontan. ²⁵ Fè kè papa ou ak
 manman ou kontan. Fè kè manman ki fè ou la kontan. ²⁶ Pitit mwen, louvri zòrèy ou pou tande sa
 m'ap di ou. Louvri je ou byen pou ou wè jan m'ap viv. ²⁷ Fanm jennès se tankou yon twou pèlen,
 fanm adiltè se tankou yon pi jis jis. ²⁸ Tankou vòlò, y'ap pare pèlen pou ou. Yo fè anpil gason pèdi
 tèt yo. ²⁹ ¶ Ki moun ki nan tèt chaje, ki nan lapenn? Ki moun ki toujou nan kont, ki tou tan ap
 plenyen? Ki moun k'ap pran kou san rezon, ki gen je yo tou wouj? ³⁰ Se moun k'ap bwè twòp
 gwòg, moun k'ap kouri dèyè tranpe. ³¹ Pa kite bweson pran nanm ou, ou te mèt wè jan li bèl, jan
 li klè nan vè a. Lè ou bwè l', li desann dous nan gòj ou. ³² Men, pita ou santi se tankou yon move
 sèpan ki mòde ou, yon sèpan aspik ki pike ou. ³³ W'ap wè tout bagay ap vire devan je ou, w'ap
 depale. ³⁴ W'ap santi tankou si ou te sou lanmè: w'ap tankou si ou te sou tèt yon ma batiman. ³⁵ Lè
 sa a w'a di: Gen lè yo bat mwen, mwen pa santi sa. Gen lè yo te ban m' kou, mwen pa konn sa. Kilè
 m'a leve la a? Mwen ta pran yon ti kou ankò.

Chapter 24

¹ ¶ Pa anvye sò mechan yo. Pa chache fè zanmi ak yo. ² Yon sèl bagay ki nan tèt yo, se fè
 mechanste. Yon sèl pawòl ki nan bouch yo, se fè moun mal. ³ ¶ Bon konprann ap fè kay ou kanpe.
 Bon konnesans ap fè l' kanpe fèm. ⁴ Kote ki gen konnesans, pyès kay yo plen ak bon bagay ki koute
 chè. ⁵ Pito ou gen bon konprann pase ou gen fòs. Wi, moun ki gen konnesans vo plis pase moun ki
 gwonèg. ⁶ Paske, se pou ou ranje plan ou anvan ou antre nan batay. Plis ou gen moun k'ap ba ou
 konsèy, plis ou gen chans pou ou genyen batay la. ⁷ ¶ Pawòl moun konprann twò wo pou moun
 san konprann. Yo pa gen anyen pou yo di kote koze serye ap pale. ⁸ Lè yon moun tout tan ap kalkile
 jan pou l' fè sa ki mal, y'ap rele l' malveyan. ⁹ Tou sa moun san konprann gen lide fè, se fè sa ki
 mal. Konsa tou, moun pa vle wè moun k'ap plede pase moun nan betiz. ¹⁰ ¶ Si jou malè ou pa gen
 kouraj pou kenbe, ou pa t' janm gen fòs vre. ¹¹ ¶ Delivre moun y'ap trennen pou y' al touye. Sove

¹²
 moun y'ap bourade pou y' al egzekite. Si ou pran pòz ou pa t' konn sa, chonje Bondye. Li menm
 k'ap jije sa ki nan kè moun, l'ap wè sa. Li menm k'ap veye tou sa w'ap fè, l'ap konn sa. L'ap fè tout
¹³
 moun peye pou sa yo fè. ¶ Pitit mwen, bwè siwo myèl, sa bon pou ou. Menm jan siwo myèl
¹⁴
 k'ap koule soti nan gato myèl dous nan bouch ou, se konsa konesans ak bon konprann bon pou
 nanm ou. Si ou genyen yo, w'a fè chemen ou nan lavi. Sa w'ap tann lan, lavalas p'ap pote l' ale.
¹⁵
 ¶ Pa janm fè plan tankou mechan yo pou chache fofile kò ou anndan kay moun k'ap mache dwat.
¹⁶
 Pa chache devalize kote l' rete a. Paske, moun k'ap mache dwat yo te mèt tonbe sèt fwa. Pa pè,
¹⁷
 y'ap toujou leve ankò. Men, nan mechanste yo, mechan yo ap tonbe, yo p'ap ka leve ankò. ¶ Pa
¹⁸
 prese fè kè ou kontan lè malè rive lènmi ou. Pa kouri fè fèt lè li bite. Seyè a ap wè sa. Sa p'ap
¹⁹
 fè l' plezi. Li ka rive pa pini l' poutèt sa. ¶ Pa kite moun k'ap fè sa ki mal fè ou pèdi tèt ou. Pa
²⁰
 anvye sò mechan yo. Paske mechan yo pa pral lwen. Lavi yo tankou yon lanp k'ap mouri. ¶
²¹
 Pitit mwen, gen krentif pou Seyè a. Respekte wa a. Ou pa gen anyen pou ou wè ak moun k'ap kenbe
²²
 tèt ak yo. Moun sa yo ap rete konsa, malè ap tonbe sou yo. Ou pa janm konnen ki kalite malè
²³
 Seyè a osinon wa a ka fè rive sou ou. ¶ Men lòt pawòl moun ki gen bon konprann yo te di ankò.
²⁴
 Sa pa bon pou yon jij gade sou figi moun lè l'ap rann jijman. Lè yon jij di yon moun ki fè sa ki
 mal: Se ou ki gen rezon, jij sa a, tout moun gen pou madichonnen l'. Y'ap rayi l' toupatou sou latè.
²⁵
 Men, jij ki pini moun ki antò a va gen kè kontan. Bondye va beni l'. Tout zafè l' va mache byen.
²⁶
 Lè ou bay yon bon repons, ou aji tankou yon bon zanmi. ¶ Regle tout zafè ou. Mete jaden ou
²⁷
²⁸
 anfòm. Apre sa, ou mèt tabli. ¶ Pa leve pale sou do frè parèy ou san rezon. Pa bay manti sou li.
²⁹
 Pa janm di li fè m', m'ap fè l' tou. M'ap fè l' peye sa li fè a. ¶ Mwen pase bò jaden yon nonm
³⁰
 parese, bò jaden rezen yon moun ki san konprann. ³¹ Pikan te fin pran jaden an nèt. Move zèb t'ap
³²
 pouse toupatou. Lantouraj jaden yo te fin tonbe. Lè mwen wè sa, mwen kalkile. Mwen gade, sa
³³
 ban m' yon leson. Dòm, kabicha, kouche sou do, kwaze men ou dèyè tèt ou... Se bon! ³⁴ W'ap
 rete konsa, w'ap wè ou pòv. Mizè ap tonbe sou ou tankou yon ansasen san ou pa atann.

Chapter 25

¹ ¶ Men kèk lòt pwovèb wa Salomon. Se moun nan palè Ezeekyas, wa peyi Jida a, ki te kouche
yo sou papye. ² ¶ Bondye konnen lè pou l' kite nou konprann, se sa ki fè pouvwa li. Wa yo toujou
ap chache konprann, se sa ki fè moun respekte yo. ³ Menm jan ou pa konnen wotè syèl la ak fondè
tè a, se konsa tou ou pa ka konnen sa k'ap pase nan tèt yon wa. ⁴ ¶ Wete tout vye kras ki nan ajan
an. Efèy la ap ba ou yon bèl travay byen fèt. ⁵ Wete tout mechan bò kote wa a, gouvènman l' lan
ap chita byen chita. p'ap gen lenjistis. ⁶ ¶ Pa fè grandizè devan wa a. Pa chita nan plas grannèg yo.
⁷ Pito yo di ou moute pi wo, pase pou yo fè ou bay plas la, pou ou ta wont devan chèf la. ⁸ ¶ Sa ou
wè ak je ou, pa prese al rapòte l' lajistis. Si apre sa, yon lòt temwen kanpe pou demanti ou, lè sa a
⁹ kisa ou va fè? Lè ou gen kont ak yon moun, regle zafè nou san nou pa mete lòt moun ladan li. Pa
mete sekre l' deyò. ¹⁰ Paske, lè moun konnen ou pa ka kenbe sekre, y'a fè ou wont. Y'a ba ou move
non. ¹¹ ¶ Lè ou bay bon pawòl ki tonbe daplon se tankou yon moso lò byen travay yo plake sou
yon moso ajan. ¹² Lè yon moun ki gen bon konprann rale zòrèy moun ki gen tande, se tankou
zanno ak kolye ki fèt ak bon lò ou mete sou ou. ¹³ ¶ Yon komisyonè ki p'ap twonpe moun ki voye
l' la, se tankou yon bon vè dlo byen fre w'ap bwè nan mitan chalè rekòt. L'ap remoute kouraj mèt
li. ¹⁴ ¶ Moun ki toujou ap pwomèt san yo pa janm kenbe pwomès yo, se tankou nwaj ak van ki pa
janm pote lapli. ¹⁵ ¶ Lè ou pa fè kòlè fasil, ou jwenn jwen pou fè chèf la kwè sa ou vle. Konsa tou,
ak pawòl dous, w'ap kraze tout antrav ou ta ka jwenn sou chemen ou. ¹⁶ ¶ Lè ou jwenn siwo myèl,
bwè kantite ou ka bwè. Si ou pran twòp, l'a fè kè ou plen, l'a fè ou vonmi. ¹⁷ ¶ Konsa tou, pa al
rann vizit twò dri lakay zanmi ou, pou li pa bouke avè ou, pou l' pa rayi ou. ¹⁸ ¶ Yon moun k'ap
mache bay manti sou moun, se tankou yon makak chaplèt, yon nepe, yon flèch byen pwenti. Li ka
touye ou. ¹⁹ ¶ Jou malè, si ou mete konfyans ou sou moun trèt, se tankou si ou vle mòde ak dan
pouri, osinon kouri sou pye foule. ²⁰ ¶ Chante mereng pou yon moun ki nan lapenn, se tankou
moun ki wete tout rad sou li nan fredy, se tankou si ou prije sitwon sou yon malennng. ²¹ ¶ Si lènmi
ou grangou, ba li manje. Si li swaf dlo, ba li dlo pou l' bwè. ²² Lè sa a, w'a fè l' wont anpil. Seyè
a va rekonpanse ou. ²³ ¶ Tripotaj fè moun fè kòlè, menm jan nòde bay lapli. ²⁴ ¶ Pito ou viv pou
kont ou nan yon kwen galata pase pou w'ap viv nan yon kay ansanm ak yon fanm k'ap chache kont
tout tan. ²⁵ ¶ Lè ou resevwa yon bon nouvèl ki soti nan peyi Jida, se tankou yon vè dlo fre pou yon

26
 moun ki sot moute mòn. ¶ Lè yon moun ki mache dwat kite yon mechan pran tèt li, se tankou
 yon sous dlo moun mache ladan l', se tankou yon pi yo sal. 27 ¶ Twòp siwo myèl pa bon pou lasante.
 28
 Konsa tou, pa chache pou moun nonmen non ou twòp. ¶ Si ou pa kapab kontwole kòlè ou, ou
 tankou yon lavil san ranpa. Y'ap anvayi l' fasil. Y'ap mete men sou ou fasil.

Chapter 26

1
 ¶ Menm jan moun pa bezwen tann pou fè gwo fredri nan sezon chalè, ni pou lapli tonbe nan
 sezon rekòt, konsa tou, moun san konprann pa bezwen tann pou yo fè lwanj li. 2 ¶ Madichon pa
 ka fè ou anyen si ou pa antò. Se tankou ti zwezo k'ap vòltije sou branch bwa, ziwondèl k'ap vole
 nan syèl la yo ye. 3 ¶ Fwèt pou chwal, baboukèt pou bourik, baton pou do moun ki san konprann.
 4 ¶ Pa reponn moun sòt yo menm jan yo pale a, pou ou pa parèt sòt menm jan ak yo. 5 Reponn
 moun sòt yo dapre jan yo pale a, w'a fè yo wè se moun sòt yo ye. 6 ¶ Yon moun ki voye yon moun
 sòt fè komiyon, se tankou si li te koupe janm li. Se traka l'ap chache bay tèt li. 7 Yon moun ki san
 konprann sèvi ak yon pwovèb menm jan yon moun bwete sèvi ak move janm lan. 8 Fè lwanj yon
 moun ki san konprann, se tankou si ou te mare wòch la anvan ou tire fistibal la. 9 Yon moun san
 konprann k'ap bay yon pwovèb, se tankou yon moun sou k'ap chache wete yon pikan nan dwèt li.
 10 ¶ Patwon ki pran nenpòt moun san konprann osinon nenpòt moun k'ap pase nan lari pou travay
 pou li, se yon danje pou tout moun. 11 ¶ Menm jan yon chen tounen vin manje sa li vonmi, se konsa
 moun san konprann yo ap toujou fè sa y'ap fè a. 12 ¶ Gen plis espwa pou yon moun ki san konprann
 pase pou yon moun ki mete nan tèt li li konprann. 13 ¶ Parese a di: Gen bèt nan bwa sou wout la.
 14 Gen yon lyon nan lari a. ¶ Parese a ap vire adwat agoch nan kabann li, menm jan yon pòt ap
 vire louvri fèmen sou gon li yo. 15 ¶ Parese a pran kiyèl l' nan men l'. Men, pou l' leve l' mete nan
 bouch li, se yon pakèt afè. 16 ¶ Parese mete nan tèt li li gen plis konprann pase sèt moun lespri ki
 konn sa y'ap di. 17 ¶ Moun k'ap foure bouch nan koze ki pa gade l', se tankou moun k'ap rale ke
 chen li jwenn sou gran chemen. 18 ¶ -(we vèsè pwochen) 19 Moun k'ap mache twonpe moun, apre
 sa pou li di: Aa monchè! Se jwe mwen t'ap jwe, moun konsa tankou moun fou k'ap voye bwa dife

ak wòch pou touye moun. ²⁰ ¶ Kote ki pa gen bwa, pa gen dife. Kote ki pa gen tripòt, pa gen kont.
²¹ Chabon kenbe recho a limen. Bwa pa kite dife a mouri. Konsa tou, moun ki renmen chache kont
 toujours ap pouse dife. ²² Tripotay dous nan zòrèy moun ki vle tandè yo. Sa mache nan san yo. ²³ ¶
 Yon moun ki gen bèl pawòl nan bouch li men ki gen move kè, se tankou bèl penti sou bwa pouri.
²⁴ ¶ Ipokrit ki rayi moun toujours ap bay bèl pawòl. Men, nan kè l', se twonpe l'ap twonpe moun.
²⁵ Lè l'ap pale konsa, ou pa bezwen kwè l', paske nan fon kè l', se mechanste ase ki genyen. ²⁶ Li
 te mèt kache sa, tout moun gen pou wè mechanste l'ap fè yo. ²⁷ ¶ Moun k'ap tann pèlen pou lòt se
 yo menm k'ap pran ladan li. Moun ki konmanse woule wòch la, se li menm ankò wòch la ap kraze.
²⁸ ¶ Fòk ou rayi yon moun vre pou fè manti sou li. Lè w'ap flate moun, se tèt ou w'ap fè tò.

Chapter 27

¹ ¶ Pa fè grandizè pou sa ou pral fè denmen. Ou wè jòdi, ou pa konn denmen. ² ¶ Kite lòt moun
 pale byen pou ou. Pa fè sa ou menm. Kite etranje fè lwanj pou ou. Pa janm fè lwanj tèt pa ou. ³ ¶
 Wòch lou, sab lou. Men, yo pa ka pi lou pase yon moun san konprann lè l' fache. ⁴ Lè yon moun
 ankòlè, li kraze brize. Men, ki moun ki ka kenbe tèt ak yon moun k'ap fè jalouzi? ⁵ ¶ Pito ou rale
 zòrèy yon moun kareman pase pou ou kite l' konprann sa li fè a pa anyen. ⁶ Lè yon zanmi ap rale
 zòrèy ou, se byen ou li vle wè. Men, lè yon lènmi ap pase men l' nan kou ou, se twonpe l'ap twonpe
 ou. ⁷ ¶ Lè vant moun plen, yo refize ata siwo myèl. Lè moun grangou vre, menm bagay anmè gou
 nan bouch. ⁸ ¶ Yon moun ki lwen lakay li, se tankou yon zwezo ki byen lwen nich li. ⁹ ¶ Losyon
 ak lwil santi bon bay kè kontan. Konsèy yon bon zanmi remoute kouraj. ¹⁰ Pa janm bliye zanmi
 ou, ni zanmi papa ou. Lè zafè ou pa bon, pa al lakay frè ou. Yon bon vwazen pi bon pase yon frè
 ki lwen. ¹¹ ¶ Pitit mwen, aprann gen bon konprann. Fè kè m' kontan. Konsa, m'a ka reponn moun
 k'ap kritike m' yo. ¹² ¶ Moun ki gen konprann, lè li wè malè ap vin sou li, li wete kò l'. Moun sòt
 pote lestonmak li bay, epi se li ki peye sa. ¹³ ¶ Si yon moun sòt jouk pou li asepte bay pawòl li pou
 dèt yon etranje, se pou yo sezi ata rad ki sou li jouk lòt la peye. ¹⁴ ¶ Si ou di yon zanmi ou bonjou
 twò fò granmaten, se tankou si ou te ba li madichon. ¹⁵ ¶ Yon fanm ki toujours ap chache kont, se

tankou yon goutyè k'ap degoute lè lapli ap tonbe tout lajounen. ¹⁶ Si ou rive fè l' pe bouch li, w'a
 kenbe van ak men ou, w'a kenbe lwil ak dwèt ou tou! ¹⁷ ¶ Menm jan fè file fè, konsa tou pou moun,
 yonn aprann nan men lòt. ¹⁸ ¶ Moun ki pran swen yon pye rezen, se li ki va jwenn rezen pou li
 manje. Moun ki fè travay mèt li byen, y'a gen respè pou li. ¹⁹ ¶ Lè ou gade nan glas, se pwòp figi
 ou ou wè ladan l'. Konsa tou, lè ou gade nan kè yon moun, ou wè ki moun li ye. ²⁰ ¶ Menm jan
 toujou gen plas pou mò kote mò yo ye a, konsa tou, toujou gen plas pou lanvi nan kè moun. ²¹ ¶
 Yo pase lò ak ajan nan dife pou wè si yo bon. Konsa tou, dapre jan yo nonmen non yon moun, yo
 ka di ki moun li ye. ²² ¶ Ou te mèt woule yon moun sòt anba baton tankou yo bat pwa, se pa sa
 k'ap fè l' kite sòt. ²³ ¶ Chache konnen jan tout bèt ou yo ye. Pran swen yo. ²⁴ Richès pa la pou tout
 tan. Ou ka pa rive pase tout byen ou bay pitit pitit ou. ²⁵ Lè ou koupe zèb, li pouse ankò. Konsa,
 toujou gen zèb sou mòn yo. ²⁶ Mouton ou yo ap ba ou lenn pou fè rad met sou ou. Bouk kabrit yo
 ap rapòte ou lajan pou achte tè pou fè jaden. ²⁷ W'a jwenn kont lèt kabrit pou ou bwè ak fanmi ou
 ansanm ak moun k'ap sèvi lakay ou.

Chapter 28

¹ ¶ Mechan yo pa bezwen moun dèyè yo pou yo kouri. Men, moun ki mache dwat yo brav
 tankou lyon. ² ¶ Lè nan yon peyi moun ap fè sa ki mal, chak jou gen yon lòt chèf. Men avèk yon
 moun ki gen konprann, ki konnen sa l'ap fè, gouvènman an ap kanpe pou lontan. ³ ¶ Yon pòv k'ap
 peze pi pòv pase l', se tankou yon gwo lapli ki gate tout jaden nèt. ⁴ ¶ Moun ki pa respekte lalwa
 bay mechan yo pye sou moun. Men, moun ki fè sa lalwa mande, se moun ki pran pozisyon kont
 mechan yo. ⁵ ¶ Mechan yo pa konnen sa ki rele jistis. Men, moun k'ap sèvi Seyè a konprann tout
 bagay. ⁶ ¶ Pito ou pòv men ou serye, pase pou ou rich men ou vòlè. ⁷ ¶ Yon jenn gason ki fè tou
 sa lalwa mande, se pitit ki gen lespri. Men, moun ki fè zanmi ak vakabon se yon wont pou papa l'.
⁸ ¶ Moun ki vin rich nan prete moun lajan, nan bay kout ponya, se anpile y'ap anpile lajan pou moun
 ki konn pran ka malere. ⁹ ¶ Lè ou refize fè sa lalwa mande ou fè a, ata lapriyè w'ap fè a p'ap fè
 Bondye plezi. ¹⁰ ¶ Lè yon moun chache pran tèt yon nonm serye pou fè l' fè sa ki mal, se li menm

k'ap pran nan pèlen an. Men moun serye a va jwenn bon rekonpans. ¹¹ ¶ Yon nonm rich mete nan
 tèt li li gen bon konprann. Men, yon pòv ki gen lespri ap dekouvri l'. ¹² ¶ Lè se moun k'ap fè sa ki
 dwat ki rive chèf, se fèt pou tout moun. Men, lè se mechan an ki rive chèf, tout moun al kache.
¹³ ¶ Moun k'ap kache peche p'ap janm wè zafè yo mache. Men, Bondye va gen pitye pou moun ki
 rekonèt peche yo, pou moun ki chanje lavi yo. ¹⁴ ¶ Ala bon sa bon pou moun ki toujou gen krentif
 pou Bondye! Men, moun k'ap fè tèt di ak Bondye ap wè malè tonbe sou yo. ¹⁵ ¶ Yon chèf malveyan
 se tankou lyon ki move, tankou lous ki grangou. Pòv malere san sekou devan yo. ¹⁶ ¶ Lè yon chèf
 pa gen konprann, l'ap peze moun, l'ap fè mechanste. Men, moun ki pa vle wè moun k'ap vòlò ap
 gouvènènen lontan. ¹⁷ ¶ Lè yon moun touye yon lòt, konsyans li boulvèse l', l'ap kouri chache lanmò.
¹⁸ Piga pesonn chache kenbe l'. ¹⁸ ¶ Malè p'ap rive moun k'ap mennen yon lavi san repwòch. Men,
¹⁹ moun ki pa serye, k'ap mache pye gaye, y'ap rete konsa, y'ap tonbe. ¹⁹ ¶ Yon moun ki travay di
 nan jaden l' ap jwenn kont manje pou l' manje. Men, moun k'ap fè bagay ki p'ap sèvi anyen ap
 toujou pòv. ²⁰ ¶ Yon nonm ki serye nan sa l'ap fè ap jwenn anpil benediksyon. Men, yo p'ap manke
 pini moun k'ap prese pou l' rich. ²¹ ¶ Sa pa bon pou gade moun sou figi. Men, pou nenpòt ti kraze
 kòb, yon jij ka fè betiz. ²² ¶ Moun ki anvii tout toujou ap prese pou yo rich. Yo pa wè grangou k'ap
 tann yo pi devan. ²³ ¶ Lè ou rale zòrèy yon moun, pita l'ap gen plis konsiderasyon pou ou pase pou
 moun k'ap achte figi l'. ²⁴ ¶ Moun k'ap vòlò papa l' ak manman l', epi k'ap di nan kè l': Se pa anyen
 sa, li menmman parèyman ak moun k'ap mache brize. ²⁵ ¶ Moun ki anvii tout pou yo ap toujou nan
 kont. Men, moun ki mete konfyans yo nan Seyè a p'ap janm manke anyen. ²⁶ ¶ Moun ki gen
 konfyans nan pwòp tèt yo, se moun fou yo ye. Men, moun ki fè sa li konnen li dwe fè a ap sove.
²⁷ ¶ Moun ki bay pòv p'ap janm manke anyen. Men, moun ki fè tankou li pa wè pòv yo chaje ak
²⁸ madichon. ²⁸ ¶ Lè se mechan ki rive chèf, tout moun al kache. Men, tonbe mechan yo tonbe, moun
 k'ap mache dwat yo kanpe ankò.

Chapter 29

¹ ¶ Moun k'ap fè tèt di lè y'ap rale zòrèy yo, se moun k'ap rete konsa y'ap tonbe san yo pa ka leve ankò. ² ¶ Lè se moun serye ki chèf, pèp la kontan. Men, lè se yon mechan k'ap gouvènen, pèp la nan lapenn. ³ ¶ W'ap fè kè papa ou kontan si ou toujou ap chache bon konprann. Moun k'ap frekante jennès, se lajan l' l'ap gaspiye. ⁴ ¶ Lè yon wa pa nan patipri, peyi a kanpe byen fèm. Men, depi yon chèf nan resevwa lajan sou kote, se fini l'ap fini ak peyi a. ⁵ ¶ Moun k'ap flate moun, se yon pèlen y'ap pare sou wout yo. ⁶ ¶ Moun mechan pran nan mechanste y'ap fè. Men, moun ki mache dwat yo gen kè kontan, y'ap fè fèt. ⁷ ¶ Moun ki mache dwat konnen pou l' respekte dwa pòv malere. Men, mechan an pa konnen bagay konsa. ⁸ ¶ Moun ki pa gen respè pou lòt ap mache simen kont nan tout peyi a. Men moun ki gen konprann konnen pou l' kontwole tèt li lè li fache. ⁹ ¶ Lè moun ki gen konprann al nan leta ak moun fou, fache pa fache anyen p'ap regle. ¹⁰ ¶ Depi yon moun serye, ansasen pa vle wè li. Men, moun ki mache dwat yo ap pwoteje l'. ¹¹ ¶ Lè moun fou ankòlè, li di sa ki vin nan bouch li. Men, moun ki gen bon konprann kontwole bouch li. ¹² ¶ Lè yon chèf renmen tripotay, se mechan ase k'ap sèvi avè l'. ¹³ ¶ Gen yon bagay ni pòv la ni moun k'ap peze l' la gen ansanm: se Bondye ki bay ni yonn ni lòt je pou yo wè. ¹⁴ ¶ Lè yon wa pran kòz malere yo pou l' defann dwa yo san patipri, wa sa a la pou l' gouvènen lontan. ¹⁵ ¶ Baton ki korije timoun ap ba yo konprann. Men, timoun yo kite fè sa yo pito gen pou fè manman yo wont. ¹⁶ ¶ Lè mechan an rive chèf nan yon peyi, gen plis mechanste k'ap fèt. Men, moun k'ap mache dwat yo va wè jan mechan yo ap tonbe. ¹⁷ ¶ Korije pitit gason ou lan, li p'ap ba ou tèt chaje. L'a fè kè ou kontan. ¹⁸ ¶ Lè pa gen moun ki pou fè pèp la konnen sa pou l' fè, pèp la an debandad nèt. Men, ala bon sa bon pou moun k'ap fè sa lalwa mande! ¹⁹ ¶ Pale anpil p'ap korije esklav. Menm lè li konprann, se pa sa k'ap fè l' obeyi. ²⁰ ¶ Gen plis espwa pou yon moun ki san konprann pase pou yon moun k'ap prese pale san kalkile. ²¹ ¶ Lè ou mou ak yon esklav depi li tou piti, rive yon lè l'ap konprann se pitit ou li ye. ²² ¶ Moun ki ankòlè fasil toujou ap fè bagay yo pa dwe fè. Moun ki gen san wo toujou nan goumen. ²³ ¶ Awogans fè moun pèdi pye. Men, y'ap respekte moun ki soumèt devan Bondye. ²⁴ ¶ Moun ki konplis yon vòlò, se moun ki rayi tèt li. Si li denonse vòlò a, y'ap pini l'. Si

li pa denonse l', madichon Bondye ap tonbe sou li. ²⁵ ¶ Si ou pè sa moun ap di, ou antrave. Men, si ou mete konfyans ou nan Seyè a, ou pa bezwen pè anyen. ²⁶ ¶ Anpil moun ap kouri dèyè favè chèf. Men, se Bondye k'ap jije tout moun san patipri. ²⁷ ¶ Moun ki mache dwat pa vle wè mechan. Mechan pa vle wè moun k'ap mache dwat.

Chapter 30

¹ ¶ Men pawòl Agou, pitit Jake, moun peyi Masa. Men deklarasyon nonm lan te fè: Mwen bouke, Bondye! Mwen bouke, Bondye! Mwen pa kapab ankò! ² Mwen sòt pase panyen pèsi. Se pa moun mwen ye. Mwen pa gen lespri tankou tout moun. ³ Mwen pa janm konnen sa ki rele konesans. Mwen pa konprann anyen nan bagay Bondye. ⁴ Ki moun ki janm moute nan syèl, apre sa ki redesann sou latè? Ki moun ki janm ranmase van yo nan men l'? Ki moun ki janm mare dlo yo nan rad li? Ki moun ki fikse limit tè a? Ki jan li rele? Ki jan pitit li rele? Di m' non, si ou konnen? ⁵ Bondye toujou kenbe pawòl li. Li pwoteje tout moun ki mete konfyans yo nan li. ⁶ Pa fè l' di sa li pa di. Si ou fè sa, l'a fè ou repwòch, l'a fè tout moun wè se mantò ou ye. ⁷ ¶ Bondye, se de bagay ase mwen mande ou: Tanpri, pa refize m' yo anvan mwen mouri. ⁸ Men yo: Pa kite m' bay manti pou m' twonpe moun. Pa fè m' ni rich ni pòv. Ban m' kantite manje mwen bezwen pou m' viv la. ⁹ Si mwen gen twòp, m'a vire do ba ou, m'a di mwen pa konnen ki moun ou ye. Si mwen pa gen ase, m'a vòlò, m'a fè yo pase ou nan betiz. ¹⁰ ¶ Pa janm pale yon domestik mal devan mèt li. L'a madichonnen ou, l'a fè ou peye bouch ou. ¹¹ Gen yon kalite moun k'ap bay papa yo madichon, ki pa gen konsiderasyon pou manman yo. ¹² Gen yon lòt kalite moun ki konprann yo nan kondisyon pou fè sèvis Bondye. Men, pi mal pase yo nanpwen. ¹³ Gen yon lòt kalite moun ankò ki mete nan tèt yo yo pa kanmarad pesonn, wa pa kouzen yo. ¹⁴ Gen yon lòt kalite moun, se bèt nan bwa yo ye. Pou yo viv, y'ap devore malere yo, y'ap pwofite sou pòv yo. ¹⁵ ¶ Sansi gen de pitit fi: tou de gen menm non, yo rele: Ban mwen! Ban mwen! Gen twa bagay ki pa janm di ase. Sa m'ap di la a! Gen kat bagay ki pa janm di se kont. ¹⁶ Men yo: Se peyi kote mò yo ye a, se fanm ki pa ka fè pitit, se tè a ki pa janm bwè kont dlo li, epi se dife. Bagay sa yo pa janm di ase. ¹⁷ Yon pitit ki pase papa l' nan betiz, ki pa respekte lòd manman l', chen gen pou devore kadav li nan raje, zwezo nan bwa

¹⁸
 va manje grenn je li. ¶ Gen twa bagay mwen pa janm ka konprann. Sa m'ap di la a! Gen kat
¹⁹
 bagay konsa. Men yo: Se jan malfini plane nan syèl la, se jan koulèv mache sou wòch, se jan
²⁰
 bato kouri sou lanmè, se jan gason ak fanm rive fè lamou. Men ki jan fanm k'ap twonpe mari
²¹
 yo fè: Lè yo fin fè sa y'ap fè a, yo benyen byen pwòp, epi yo di: Mwen pa fè anyen ki mal. Gen
²²
 twa bagay ki fè latè tranble. Sa m'ap di la a! Gen kat bagay moun pa ka sipòte. Men yo: Se yon
²³
 esklav ki rive chèf, se yon moun sòt ki gen tou sa li bezwen, se yon fanm ki pa t' janm jwenn
²⁴
 moun renmen l' epi ki resi mare yon nòs, se yon sèvant ki pran plas metrès li. ¶ Gen kat ti bèt
²⁵
 sou latè, gen lespri pase yo nanpwèn: Se founi: yo tou fèb, men yo pase tout sezon chalè ap fè
²⁶
 pwovizyon mete la. Se chat mawon: yo pa pi fò pase sa. Men, yo fè kay yo nan twou wòch.
²⁷
 Se krikèt vèt: yo pa gen chèf, men yo mache pa bann. Se zandolit: ou ka pran yo nan men ou.
²⁸
²⁹
 Men, ou jwenn yo nan palè wa yo. ¶ Gen twa bagay ki bèl lè y'ap mache. Sa m'ap di la a! Gen
³⁰
 kat bagay ki gen bèl demach: Se lyon, se li ki pi fò nan tout zannimo, li pa pè yo yonn. Se
³¹
 bouk kabrit. Se chwal sele bride. Se wa lè y'ap mache devan lame yo. Si ou te sòt jouk pou ou
³²
 te rive fè grandizè, kalkile sou sa ou fè a: Pe bouch ou! Si ou bat lèt, l'ap fè bè. Si ou frape yon
³³
 moun sou men l', l'ap senyen. Si ou nan pouse dife, ou nan gwo kont.

Chapter 31

¹
 ¶ Men Pawòl wa Lemwèl, men konsèy manman l' te ba li: ² Kisa pou m' di ou, pitit mwen,
 pitit ki soti nan zantray mwen? Se mwen ki te mande Bondye pou l' ban mwen ou. Kisa pou m' di
³
 ou? Pa gaspiye kouray ou nan fanm. Veye zo ou ak fanm k'ap fè malè chèf yo. ⁴ Lemwèl monchè,
⁵
 yon wa pa fèt pou nan bwè bweson. Chèf pa fèt pou nan bwè gwòg. Lè yo bwè konsa, yo bliye
⁶
 lòd yo te bay. Yo p'ap pran ka malere yo. Se moun ki dekouraje ak lavi ki tonbe nan gwòg. Se
⁷
 moun ki gen gwo lapenn nan kè yo ki lage kò yo nan bweson. Yo bwè pou yo bliye mizè yo, pou
⁸
 yo pa chonje lapenn yo. Louvri bouch ou pale pou moun ki pa ka pale pou tèt yo. Defann kòz
⁹
 moun ki san sekou yo. Pale pou yo. Pa fè patipri. Defann kòz malere yo ak endijan yo. ¹⁰ ¶ Sa

pa fasil pou moun jwenn yon bon madanm. Lè li jwenn li, li gen plis valè pase yon boul lò. ¹¹ Mari
 l' mete tout konfyans li nan li. Tout bagay ap mache byen lakay li. ¹² Madanm lan p'ap janm aji
 mal ak mari l', l'ap pase tout lavi l' ap fè l' byen. ¹³ Li chache lenn mouton ak fil swa, li travay yo
 fè twal ak men l'. ¹⁴ Tankou bato k'ap pote machandiz, li al byen lwen chache manje mete nan kay
 la. ¹⁵ Solèy poko leve, li gen tan sou pye l', l'ap pare manje pou moun nan kay la. L'ap di sèvant
 yo sa pou yo fè. ¹⁶ Li fè lide sou yon tè, li achte l' ak lajan li fè ak men l'. Li fè jaden rezen sou li.
¹⁷ Li mare ren l', li twouse manch rad li pou l' travay. ¹⁸ Li santi zafè l' ap mache byen, li rete byen
 ta lannwit ap travay. ¹⁹ Li file koton, li koud rad li. ²⁰ Li lonje men l' bay pòv. Li pran ka malere.
²¹ Li pa pè fredri pou moun lakay li, paske tout moun gen rad cho pou mete sou yo. ²² Li fè kouvèti
 lenn pou kabann yo. Tout rad li yo fèt ak twal wouj tise byen sere. ²³ Mari l', se yonn nan chèf
 fanmi lavil la. Tout moun lavil la ap nonmen non l' an byen. ²⁴ Madanm li fe rad pou l' vann, li fè
 bèl senti, li vann yo ak machann. ²⁵ Li gen anpil kouraj, tout moun respekte l', li pa pè denmen.
²⁶ Lè li louvri bouch li, se bon konsèy li bay. Li toujou gen bon pawòl nan bouch li. ²⁷ Li konnen
 vire tounen tout moun nan kay la. Li toujou gen yon bagay l'ap fè. ²⁸ Tout pitit li yo ap fè l'
 konpliman. Mari l' menm ap fè lwanj li. ²⁹ L'ap di: Mwen konnen anpil madanm. Men ou menm,
 nanpwen tankou ou! ³⁰ Bèl fanm pa di bon madanm pou sa. Bèl figi pa la pou lontan. Men, y'a fè
 lwanj yon fanm ki gen krentif pou Seyè a. ³¹ Ba li sa ki pou li a. Lè y'a wè sa l' fè, se pou tout
 moun fè lwanj li.

Ecclesiastes

Chapter 1

¹ ¶ Men pawòl pitit David la, filozòf la, ki te wa nan lavil Jerizalèm. ² Nan lavi a anyen pa vo
 anyen. Se sa filozòf la di. Non, anyen pa vo anyen nan lavi a. Tout bagay gen pou pase. ³ Yon
 moun te mèt pase tout lavi l' ap travay di, ap bay kò l' traka sou latè beni, kisa sa rapòte l'? ⁴ ¶ Moun

fèt, moun mouri. Men sa pa deranje anyen sou latè.⁵ Solèy leve, solèy kouche. L'ap kouri tounen kote pou l' leve a ankò.⁶ Van an soufle soti nan nò desann nan sid. Apre sa, li vire soti nan sid moute nan nò. Konsa, l'ap vire tounen nan menm chemen an san rete.⁷ Tout dlo larivyè desann nan lanmè, men lanmè pa janm plen. Dlo a tounen kote larivyè a te soti a. Konsa, larivyè a pa janm sispann koule.⁸ Tout bagay ap vire won san rete. Pa gen pawòl ki ka di jan sa ye. Je pa janm bouke wè. Zòrèy pa janm bouke tande.⁹ ¶ Sa ki te rive anvan, se sa ki va rive apre. Sa yo te fè anvan an, se sa y'ap toujou fè. Pa gen anyen ki chanje sou latè beni.¹⁰ Menm lè nou di: Gade! Men yon bagay ki nèf, bagay la te la deja depi nan tan lontan anvan nou te fèt.¹¹ Pesonn pa chonje sa ki te pase nan tan lontan. Konsa tou, pita, pesonn p'ap chonje sa k'ap pase koulye a.¹² ¶ Mwen menm, nèg fò, mwen te wa peyi Izrayèl nan lavil Jerizalèm.¹³ Mwen te soti pou m' te fouye, pou m' te egzaminen tou sa k'ap fèt sou latè nan tout ti detay yo. Travay Bondye bay moun fè sou latè a pa manke rèd.¹⁴ Mwen wè tou sa k'ap fèt sou latè. Anyen pa vo anyen! Anyen pa rapòte anyen.¹⁵ Ou pa ka drese sa ki fin kwochi. Ou pa ka konte sa ou pa genyen.¹⁶ Mwen di nan kè mwen: Mwen vin grannèg. Mwen vin pi fò pase tout wa ki t'ap gouvènen lavil Jerizalèm anvan m' yo. Mwen konnen sa ki rele gen konprann ak konesans.¹⁷ Mwen te soti pou m' te konnen diferans ki genyen ant moun ki gen konprann ak moun egare, ant moun ki gen konesans ak moun sòt. Men, la ankò, mwen wè anyen pa rapòte anyen.¹⁸ Paske plis ou gen konprann, se plis ou nan tèt chaje. Plis ou konnen, se plis ou soufri.

Chapter 2

¹ ¶ Mwen di nan kè mwen: Bon! Ann al pran plezi nou! Ann al mennen lavi dous! Men, mwen jwenn sa a tou, sa pa vo anyen!² Ala bagay sòt se lè yon moun ap plede ri! Pran plezi, sa pa rapòte anyen!³ Tèlman mwen t'ap chache gen konprann, mwen pran desizyon lage kò m' nan bwè bweson, nan viv tankou moun fou. Mwen di nan kè m': Ou pa janm konnen, se ka sa ki pi bon pou yon moun fè pandan de twa jou l'ap pase sou tè a.⁴ Mwen fè gwo zafè: Mwen bati yon bann kay, mwen plante anpil jaden rezen.⁵ Mwen fè jaden ak bèl lakou, mwen plante tout kalite pyebwa ki ka donner ladan yo.⁶ Mwen fouye basen pou m' pran dlo, konsa m'a ka wouze tout pyebwa yo.⁷ Mwen achte

fi kou gason pou sèvi m' esklav, san konte moun ki fèt esklav lakay mwen. Mwen te gen bèt ak
⁸ zannimo pase tout moun ki janm viv nan lavil Jerizalèm. Mwen ranmase anpil bagay fèt an ajan
ak an lò ansanm ak richès lòt chèf k'ap dirije nan pwovens yo. Mwen te gen moun pou chante pou
mwen, fi kou gason. Mete sou sa, bagay gason pi renmen, mwen te gen fanm mezi mwen te bezwen.
⁹ Wi, pou grannèg mwen te grannèg, pi grannèg pase tout lòt moun ki janm viv nan lavil Jerizalèm.
¹⁰ Men, mwen pa janm kite sa vire tèt mwen. Mwen te gen tou sa mwen te vle. Mwen pa janm
refize tèt mwen ankenn plezi. Mwen te kontan wè tou sa mwen te travay fè. Se kè kontan sa a ki
¹¹ tout rekonpans mwen. Apre sa, mwen kalkile sou tou sa m' te fè ak men m', sou tout traka mwen
te bay kò m' pou m' te fè yo. Enben! Mwen jwenn sa pa t' vo anyen. Anyen pa rapòte anyen. Konsa,
¹² pa gen ankenn pwofi pou tou sa ou fè sou latè beni. ¶ Lè ou gade byen, kisa yon wa ka fè pase
sa wa ki te anvan l' yo te fè? Apre sa, mwen pran kalkile sa sa vle di lè yon moun gen konprann,
¹³ osinon lè yon moun sòt, ou ankò lè yon moun fou. Mwen wè menm jan pito ou nan limyè pase
¹⁴ ou nan fènwa, pito ou gen konprann pase ou pa genyen. Moun ki gen konprann yo, se pa je pete
klere yo ye. Moun ki pa gen konprann yo ap mache nan fènwa. Men, mwen konnen tou de ap fini
¹⁵ menm jan. Mwen di nan kè mwen: Sa ki rive moun fou yo ap rive m' tou. Nan kondisyon sa a,
sa m' te bezwen gen tout konprann sa yo? Kisa sa ap pwofite m'? Mwen di nan kè m': Sa a tou, sa
¹⁶ pa vo anyen! Pesonn p'ap janm chonje moun ki gen konprann yo ni tou yo p'ap chonje moun
sòt yo. Pi devan, n'ap bliye yo tout. Nou tout gen pou mouri, kit nou gen bon konprann kit nou sòt.
¹⁷ ¶ Se konsa lavi pa di m' anyen ankò. Tou sa mwen fè sou latè se traka li ban mwen. Paske anyen
¹⁸ pa vo anyen, anyen pa rapòte anyen. Tout travay mwen te fè sou latè pa di m' anyen ankò, paske
¹⁹ mwen konnen mwen gen pou m' kite yo pou sa k'ap vin dèyè. Se ka yon moun lespri, se ka yon
moun sòt. Pesonn pa konnen. Men, se pou li m'ap kite tou sa mwen te travay di fè ak lespri mwen.
²⁰ Sa a ankò, sa pa vo anyen. Se konsa mwen vin konprann tout travay di mwen te fè sou latè p'ap
²¹ rapòte m' anyen. Sa vin dekouraje m'. Wi, yon nonm fè travay li avèk lespri, avèk konesans,
avèk ladrès. Apre sa, se pou l' pati kite l' pou yon lòt ki pa leve ni lou ni lejè nan travay la. Sa a tou,
²² sa pa vo anyen. Sa pa bon menm. Ou travay di, ou pran kont tèt chaje ou, ou pa dòmi pou ou ka
²³ fè sa w'ap fè a. Apre sa, kisa sa rapòte ou? Ou pase tout lavi ou nan lapenn, nan chagren. Menm
²⁴ lannwit lespri ou ap travay. Sa a tou, sa pa sèvi ou anyen. Pi bon bagay yon moun ka fè, se
²⁵ manje, se bwè, se jwi sa travay ou rapòte ou. Men la tou, mwen wè sa se travay Bondye. Paske,
²⁶ san Bondye, ki moun ki ka manje? Ki moun ki ka bwè. Bondye bay moun ki fè l' plezi bon

konprann, konesans ak kè kontan. Konsa tou, li fè mechan yo travay fè lajan sere pou l' ka bay moun ki fè l' plezi. La tou, sa pa vo anyen. Sa pa rapòte anyen.

Chapter 3

¹ ¶ Gen yon lè pou chak bagay. Bondye fikse yon tan pou chak bagay k'ap fèt sou latè. ² Li fikse lè pou ou fèt, lè pou ou mouri, lè pou ou plante, lè pou ou rekòlte, ³ lè pou ou touye, lè pou ou geri, lè pou ou kraze, lè pou ou bati. ⁴ Li fikse lè pou ou kriye, lè pou ou ri, lè pou ou nan lapenn, lè pou ou fè fèt, ⁵ lè pou ou kouche ak madanm ou, lè pou ou pa kouche ak li, lè pou nou fè karès, lè pou nou pa fè karès. ⁶ Li fikse lè pou ou chache, lè pou ou pèdi, lè pou ou fè ekonomi, lè pou ou gaspiye lajan, ⁷ lè pou ou dechire, lè pou ou koud, lè pou ou rete san pale, lè pou ou pale. ⁸ Li fikse lè pou ou renmen, lè pou ou rayi, lè pou nou fè lagè, lè pou nou fè lapè. ⁹ Kisa yon nonm jwenn nan travay li? ¹⁰ Mwen rive konnen ki kalite travay Bondye bay moun pou yo fè. ¹¹ ¶ Li fikse yon lè pou chak bagay byen fèt. Li mete nan kè moun lanvi pou yo konnen sa ki gen pou rive denmen. Men, li pa janm kite yo fin konprann nèt travay l'ap fè a. ¹² Mwen wè pi bon bagay yon moun ka fè nan lavi, se fè kè ou kontan epi se fè sa ou vin pou fè a byen. ¹³ Tout moun fèt pou yo manje, pou yo bwè, pou yo jwi sa travay yo rapòte yo. Sa se kado Bondye ba yo. ¹⁴ Mwen konnen tou sa Bondye fè la pou toutan. Ou pa ka mete anyen sou li, ou pa ka wete anyen ladan l'. Bondye fè sa konsa pou lèzòm ka gen krentif pou li. ¹⁵ Sa ki rive koulye a te rive deja! Sa ki gen pou rive te rive deja tou! Bondye fè bagay ki te rive deja rive ankò! ¹⁶ ¶ Apre sa, mwen wè sou latè se ¹⁷ mechanste ou jwenn kote pou ou ta jwenn jistis. Malveyans chita nan tribinal yo. Mwen di nan kè mwen: Bondye ap jije ni bon yo ni mechan yo, paske chak bagay gen lè pa yo. Gen yon tan pou tou sa w'ap fè. ¹⁸ Mwen di nan kè mwen ankò: Bondye ap gade kote moun ye. L'ap fè yo wè yo pa pi bon pase zannimo. ¹⁹ Lè ou gade byen, sò moun ak sò zannimo, se menm bagay la. Ni yonn ni lòt gen pou mouri. Se menm souf la k'ap bat nan tou de. Moun pa gen ankenn avantaj sou zannimo, paske lavi pa vo anyen ni pou yonn ni pou lòt. ²⁰ Tou de pral menm kote Tou de soti nan pousyè tè a. Tou de ap tounen pousyè tè a ankò. ²¹ Ki moun ki konnen si nanm moun moute anwo nan syèl epi nanm zannimo desann anba tè vre? ²² Konsa, mwen wè pa gen pi bon bagay yon moun

ka fè sou latè pase jwi sa travay li rapòte l'. Se sèlman sa li ka fè. Epi tou, ki moun k'ap fè l' tounen pou l' ka konnen sa k'ap rive apre li fin mouri?

Chapter 4

¹ ¶ Apre sa, mwen gade tout lenjistis k'ap fèt sou latè. Dlo ap koule konsa nan je moun y'ap maltrete yo. Pa gen pesonn pou ede yo. Moun k'ap maltrete yo gen lafòs avèk yo. Pesonn pa ka fè anyen pou yo. ² Mwen wè sò moun mouri yo miyò pase sò moun vivan yo. ³ Men, gen yon lòt moun ankò ki pi bon pase yo tou de: Se moun ki pa t' janm fèt la, paske li pa janm wè move zak k'ap fèt sou tè a. ⁴ ¶ Mwen vin wè tout travay di lèzòm ap travay di a, tout bèl bagay y'ap reyalize nan lavi a, se paske yonn vle gen plis pase lòt. Men, sa tou, sa pa vo anyen, sa pa rapòte anyen. ⁵ Pawòl la di: Moun sòt rete san fè anyen, yo pito grangou. ⁶ Men, pito ou pran ti repo ou tanzantan ak kè poze pase pou ou touye tèt ou ap travay di, lèfini pou sa pa rapòte anyen. ⁷ ¶ Mwen wè yon lòt bagay nan lavi a ki pa vo anyen ankò. ⁸ Se te yon nonm ki t'ap viv pou kont li, san zanmi. Li pa t' gen pitit gason, li pa t' gen frè. Li travay san pran souf. Li pa t' janm gen ase. Pou ki moun li t'ap travay di konsa, san bay tèt li yon ti plezi? Li pa t' janm gen tan pou mande tèt li sa. Sa a tou, sa pa vo anyen, se pa yon bon jan pou moun viv. ⁹ Lè ou gen yon lòt moun avèk ou, li pi bon pase lè ou pou kont ou, paske ansanm nou bay pi bon ranman nan travay nou. ¹⁰ Si yonn tonbe, lòt la va ba l' men pou l' leve. Men, malè pou moun k'ap viv pou kont li! Si l' tonbe, p'ap gen moun pou ba l' men. ¹¹ Konsa tou, lè fè frèt, si yo kouche ansanm, yonn va chofe lòt. Men, si li pou kont li, ki jan pou l' fè chofe kò l'? ¹² Kote dezòm ka kenbe tèt ak yon moun k'ap atake yo, yon sèl p'ap kapab. Yon kòd trese an twa pa fasil pou kase. ¹³ ¶ -(we vèsè pwochen) ¹⁴ Yon nonm ka soti nan mizè pou l' rive chèf nan peyi l'. Ou ankò li ka soti nan prizon epi yo mete l' chèf pou gouvènèn. Pito ou annafè ak yon ti moun ki pòv men ki gen lespri pase pou ou annafè ak yon wa ki fin granmoun, ki fin gaga, ki pa ka pran konsèy. ¹⁵ Mwen kalkile, mwen gade tout moun k'ap viv sou latè, mwen di nan mitan tout moun sa yo gen jenn gason ki pral pran plas wa a. ¹⁶ Ou pa ka konte kantite moun yon wa ka gouvènèn, kantite moun yon wa ka dirije. Men lè l' mouri, pesonn p'ap chonje di l' mèsè pou sa li te fè pou yo. Tou sa pa vo anyen. Sa pa rapòte anyen.

Chapter 5

¹ ¶ Gade byen ki jan w'ap mete pye ou lakay Bondye a. Pito ou ale la pou ou ka aprann kichòy pase pou ou al ofri bèt pou touye pou Bondye tankou moun san konprann sa yo ki pa konn sa ki byen ak sa ki mal.

² Fè tèt ou travay anvan ou louvri bouch ou pale. Pa prese fè ankenn pwomès bay Bondye. Bondye, se nan syèl li ye, ou menm ou sou latè. Pa di plis pase sa ou dwe di a.

³ Plis ou kite bagay chaje tèt ou, se plis ou ka fè move rèv. Plis ou pale anpil, se plis ou ka di pawòl ki pa fè sans menm.

⁴ ¶ Lè ou fè yon pwomès bay Bondye, pa mize fè sa ou pwomèt fè a. Bondye pa nan jwèt ak moun ki san konprann. Sa ou pwomèt fè a, fè l'.

⁵ Pito ou pa janm pwomèt Bondye w'ap fè kichòy pou li pase pou ou pwomèt, epi pou ou pa kenbe pwomès ou.

⁶ Pa kite pawòl ki soti nan bouch ou fè ou fè peche. Apre sa pou ou al di reprezantan Bondye a: O wi, se chape bouch mwen chape. Poukisa pou ou ta fè Bondye fache sou ou? Poukisa pou ou ta fè Bondye detwi travay ou fè ak men ou?

⁷ Tout rèv w'ap plede fè yo, tout pawòl w'ap plede di yo p'ap sèvi ou anyen. Se krentif pou ou toujou genyen pou Bondye.

⁸ Ou pa bezwen sezi lè ou wè nan yon peyi, chèf ap peze pòv malere. Yo refize rann yo jistis, yo derefize defann dwa inonsan yo. Chak chèf gen yon gwo chèf dèyè l'. Lèfini yo tou de gen yon pi gwo chèf ankò dèyè yo.

⁹ ¶ Travay latè se yon avantaj pou tout moun, ata pou wa a. Se sou sa li konte tou.

¹⁰ Si ou renmen lajan, ou p'ap janm fin gen ase. Si w'ap kouri dèyè richès, plis ou genyen, se plis ou anvi genyen toujou. Sa tou, sa pa vo anyen.

¹¹ Plis ou gen lajan, se plis bouch w'ap gen pou bay manje. Sèl benefis ou jwenn nan tou sa, se wè w'a wè ou rich.

¹² Yon travayè te mèt manje kont li, li te mèt pa manje kont li, l'ap toujou byen dòmi lannwit. Men, moun rich yo, yo sitèlman genyen, yo pase nwit yo blanch ak kè sote.

¹³ Men mwen wè sou latè yon bagay ki fè lapenn anpil: Moun sere lajan epi sa vire mal pou yo.

¹⁴ Yon malè pase, tout lajan an pèdi. Li vin fè yon pitit, li pa gen anyen pou l' ba li.

¹⁵ Li soti toutouni nan vant manman l', konsa tou l'ap tounen san anyen anba tè. Pa gen anyen nan tou sa li travay fè li ka pran pote ale ak li.

¹⁶ Wi, sa se bagay ki pou fann kè nou ak lapenn: Jan nou vini an, se konsa nou prale. Nou travay, men sa p'ap rapòte nou anyen.

¹⁷ Sa ki pi rèd la, nou pase tout lavi nou nan fènwa, nan lapenn, nan kè sere, nan maladi, nan fè kòlè.

¹⁸ ¶ Men sa mwen jwenn ankò: Pi bon bagay yon moun ka fè sou latè, se manje, se bwè, se jwi sa li travay di fè a, pandan de twa jou Bondye ba li pou li viv la. Men, se sa ase ki pou yon moun nan lavi.

¹⁹ Si Bondye bay yon moun richès ak byen, se pou li jwi yo, se pou l' di Bondye mèsi, se pou l' jwi tou sa li travay fè. Sa se

20
 kado Bondye ba li. Li pa bezwen chonje jan lavi a kout, paske Bondye ba li kont bagay pou l' fè pou fè kè l' kontan.

Chapter 6

1 ¶ Mwen wè yon lòt malè sou latè ankò, se bagay ki rive fasil. 2 Bondye bay yon moun richès, pozisyon, byen, lwanj. Wi, Bondye ba li tou sa li bezwen san manke yonn. Men Bondye pa kite l' jwi yo. Se yon etranje k'ap jwi yo pito. Tou sa pa vo anyen. Se bagay ki rès anpil. 3 Yon nonm te mèt gen san (100) pitit, li te mèt viv lontan, wi li te mèt rive vye granmoun, si li pa jwi anyen nan lavi, si yo pa ka fè bèl lantèman pou li, enben, mwen di nou: Yon timoun ki fèt tou mouri miyò 4 pase l'. Paske ti pitit la fèt, men sa pa sèvi l' anyen. Li disparèt lamenm. Ata non l' yo pa gen tan konnen. 5 Li pa janm wè limyè solèy, li pa janm konnen sa lavi ye. Men, ti pitit la jwenn pi bon repo pase nonm sa a 6 ki viv depase demilan men ki pa janm jwi anyen nan lavi, paske, lè ou gade byen, tou de al menm kote a. 7 ¶ Tou sa yon nonm fè pase nan bouch, men l'ap toujou grangou. 8 Kisa yon nonm ki gen lespri gen pase yon nonm sòt? Kisa sa rapòte yon pòv malere lè li konnen jan pou l' debat ak lavi a? 9 Anyen. Pito ou kontan ak sa ou genyen pase pou ou toujou anvi sa ou pa genyen. Sa pa vo anyen, sa pa rapòte anyen. 10 Tou sa ki rive, depi lontan yo konnen li te la pou rive. Nou deja konnen sa yon moun ye. Li pa ka nan kenbe tèt ak moun ki pi fò pase l'. 11 ¶ Plis ou nan pale anpil, plis se tan ou w'ap pèdi. Kisa sa ap rapòte ou? 12 Ki moun ki konnen sa ki bon pou yon moun k'ap mennen yon lavi ki pa vo anyen, yon lavi k'ap pase tankou yon nwaj, pandan de twa jou l'ap pase sou tè a? Ki moun ki ka fè lèzòm konnen sa ki gen pou rive sou latè apre y'a fin mouri?

Chapter 7

1 ¶ Pito yo nonmen non ou anbyen pase pou yo pale sou kalite bon odè ou mete sou ou. Jou ou mouri a pi bon pase jou ou fèt la. 2 Pito ou ale nan yon kay kote ki gen lanmò pase pou ou ale nan yon kay kote y'ap fè fèt, paske tout moun gen pou mouri. Nou menm ki vivan, nou pa dwe janm bliye sa. 3 Pito yon moun nan lapenn pase pou l' gen kè kontan. Lapenn rale figi ou, men l'ap louvri

⁴ lespri ou. Moun ki gen bon konprann toujou ap kalkile sou lanmò. Moun sòt toujou ap kalkile
⁵ sou ki jan pou yo jwi lavi a. Pito ou tande yon moun ki gen bon konprann ap rale zòrèy ou pase
⁶ pou ou tande moun sòt ap fè lwanj pou ou. Lè moun sòt ap ri, se tankou move chabon k'ap pete
⁷ nan dife. Sa pa vo anyen. ¶ Lè yon moun ki gen bon konprann ap sibi move trètman, sa ka fè l'
⁸ pèdi tèt li. Lajan sou kote fè l' pèdi karaktè l'. Lè yon bagay ap fini li pi bon pase lè l'ap konmanse.
⁹ Pito ou pran pasyans pase pou ou kite lògèy ap pouse ou. Pa fè kòlè fasil, paske se moun sòt ki
¹⁰ renmen fache. Pa janm mande poukisa tan lontan te pi bon pase tan n'ap viv koulye a. Moun ki
¹¹ gen bon konprann p'ap mande bagay konsa. ¶ Sa bon pou moun gen bon konprann. Se tankou
¹² si ou te gen anpil byen. Se yon gwo avantaj pou tout moun k'ap viv sou latè. Bon konprann
¹³ pwoteje ou menm jan lajan ka fè l'. Men, avantaj yon moun genyen lè li gen konesans avèk bon
¹⁴ konprann, sa l' konnen an ap fè l' viv. Gade travay Bondye! Ki moun ki ka drese sa Bondye
¹⁵ kwochi? Lè bagay ap mache byen pou ou, fè kè ou kontan. Lè malè tonbe sou ou, chonje ni
¹⁶ yonn ni lòt se nan Bondye sa soti. Konsa, yon moun pa janm konnen sa k'ap vin apre l'. Lavi n'
¹⁷ sou latè pa vo anyen, se vre! Men mwen wè tout kalite bagay: Mwen wè moun debyen, atout yo
¹⁸ mache dwat la, mouri mouri yo. Mwen wè mechan yo menm ap viv lontan pou fè mechanste. Pa
¹⁹ chache twò bon, ni gen twòp lespri. Sa ou bezwen touye tèt ou fè? Men, pa twò mechan ni pa
²⁰ twò sòt. Poukisa pou ou ta mouri anvan lè ou? Evite fè eksè ni nan yon sans ni nan yon lòt. Si
²¹ ou gen krentif pou Bondye, ou p'ap tonbe nan fè eksè. Sa konesans fè pou yon moun, dis grannèg
²² pa ka fè l' pou yon lavil. Pa gen moun k'ap mache dwat sou latè ki ka di tou sa l'ap fè byen, li
²³ pa janm fè sa ki mal. Pa koute tou sa moun ap di. Konsa ou p'ap tande lè domestik ou ap pale
²⁴ ou mal. Paske ou menm tou, nan kè ou, ou konnen konbe fwa ou pale moun mal. ¶ Mwen
²⁵ sèvi avèk bon konprann mwen pou m' fè tout esperyans sa yo nan lavi. Mwen di mwen ta renmen
²⁶ gen bon konprann. Men, mwen pa t' janm rive genyen l'. Lavi se yon mistè. Li tankou yon twou
²⁷ san fon. Ki moun ki ka rive konprann li? Men, mwen pran san m' pou m' chache konnen, pou
²⁸ m' egzaminen tout bagay. Mwen te soti pou m' te konprann, pou m' te jwenn repons pou tout keksyon
²⁹ mwen t'ap poze tèt mwen, pou m' te rive konnen jan moun mechan yo pèdi tèt yo, jan moun sòt yo
³⁰ egare. Mwen jwenn yon bagay ki pi rès pase lanmò. Se fanm. Lè yo di yo renmen ou, se pèlen

yo pare pou ou. Lè yo pase bra yo nan kou ou, se chenn yo pase nan kou ou. Yon moun ki fè Bondye plezi va chape anba men yo. Men, moun k'ap fè sa ki mal ap tonbe anba grif yo. ²⁷ Wi, men sa mwen menm filozòf la, mwen di: Antan m'ap chache konprann, lè mwen mete tou sa m' konnen yonn sou lòt, bout pou bout men sa mwen rive jwenn. ²⁸ M'ap chache yon lòt esplikasyon. Men mwen pa jwenn li. Sou mil gason mwen kontre, se yon sèl mwen jwenn ki gen konprann. Men pou fanm, mwen pa jwenn yonn menm. ²⁹ Men sa ase mwen jwenn: Bondye kreye moun pou yo viv san pwoblèm, li mete yon chemen tou dwat devan yo, men se yo menm ki chache traka bay tèt yo.

Chapter 8

¹ ¶ Se moun ki gen bon konprann ki konnen jan pou l' bay esplikasyon. Lè yon moun gen bon konprann, sa fè kè l' kontan, tout pli nan fwon l' disparèt. ² Se pou ou fè sa wa a bay lòd fè a, poutèt sèman ou te fè devan Bondye a. ³ Pa prese wete kò ou devan li, pa pèsiste nan move pant lan, paske li ka fè ou sa li vle. ⁴ Lè wa a pale, se fini. Pa gen moun ki pou mande l' poukisa l'ap fè sa l'ap fè a. ⁵ Moun ki fè sa yo ba li lòd fè a pa nan pwoblèm. Yo p'ap fè l' anyen. Yon nonm ki gen bon konprann konnen ki jan ak kilè pou l' fè sa li gen pou l' fè a. ⁶ ¶ Chak bagay gen jan pou yo fè l' ak lè pou yo fè l'. Se la tout tèt chaje a ye. ⁷ Pesonn pa konnen sa ki pral rive. Epi pa gen pesonn ki ka di nou sa ki pral rive. ⁸ Pesonn pa mèt lavi l'. Lè jou a rive pou l' mouri, fòk li mouri. Pesonn pa ka ranvwaye jou lanmò li. Nou pa ka kouri pou batay sa a. Ata mechanste mechan yo pa ka sove yo. ⁹ ¶ Mwen wè tou sa, lè m' t'ap kalkile sou sa k'ap pase sou latè. Moun ap dominen sou moun pou fè yo soufri. ¹⁰ Wi. Mwen wè yo antere mechan yo, yo kouche kadav yo anba tè. Mwen wè moun ki mache dwat yo pa menm jwenn kote pou moun antere yo. Tout moun nan lavil la bliye sa yo te fè. Tou sa ankò pa vo anyen, sa p'ap sèvi anyen. ¹¹ Se paske yo pran twòp tan pou yo pini moun ki fè mal yo ki fè moun toujou anvè fè sa ki mal. ¹² Yon moun k'ap fè sa ki mal gen dwa fè san (100) krim, yonn sou lòt, epi l'ap toujou mache sou moun. Men, mwen konnen yo di tou: Si ou gen krentif pou Bondye, w'ap viv ak kè kontan, paske ou respekte Bondye. ¹³ Men se pa menm bagay la pou mechan an. L'ap malere, lavi li tankou yon lonbraj. L'ap mouri bonè, paske li pa gen krentif pou Bondye. ¹⁴ ¶ Men tou sa se pawòl anlè. Gade sa k'ap pase sou latè: Gen moun ki mache dwat ki resevwa pinisyon mechan yo. Gen mechan ki resevwa rekonpans moun ki mache dwat yo.

15
 Mwen di tou sa pa vo anyen. Se konsa mwen mache di se pou tout moun jwi lavi yo, paske sèl plezi yon nonm gen nan lavi a se manje, se bwè, se pran plezi. Se sa ase li ka fè pandan l'ap travay
 di nan lavi Bondye ba l' pou l' viv sou latè a. 16
 Chak fwa mwen pran desizyon pou m' chache konprann, chak fwa mwen pran kalkile sa k'ap pase sou latè, mwen wè ou te mèt pa janm dòmi
 17
 lajounen kou lannwit, ou p'ap janm ka konprann travay Bondye sou latè. Ou mèt fè sa ou vle, ou p'ap janm ka rive jwenn sa w'ap chache a. Moun ki gen bon konprann kwè yo konnen. Men yo pa konnen plis pase yon lòt.

Chapter 9

1
 ¶ Mwen kalkile anpil sou bagay sa yo. Mwen repase bagay sa yo byen repase nan tèt mwen. Mwen wè se Bondye k'ap dirije lavi tout moun, ni moun ki gen bon konprann, ni moun ki mache dwat yo. Li kontwole tou sa y'ap fè, kit yo renmen, kit yo rayi. Pesonn pa konn anyen sou sa k'ap
 2
 tann yo pi devan. Se menm sò a ki gen pou rive tout moun, ni mechan an, ni moun ki mache dwat la, bon an kou move a, moun ki kenbe pye Bondye a kou moun ki pa kenbe pye Bondye a, moun ki ofri bèt pou touye pou Bondye kou moun ki pa ofri bèt pou Bondye. Konsa, yon moun debyen pa pi bon pase moun k'ap fè sa ki mal la. Moun ki fè sèman pa pi mal pase moun ki pè fè sèman.
 3
 Se menm sò a pou tout moun. Sa tou, tankou tout lòt bagay ki rive sou latè, se yon malè. Se konsa, moun pase tout lavi yo ak mechanste nan kè yo, y'ap kite lide moun fou travay nan tèt yo, epi yo
 4
 rete konsa yo mouri. ¶ Men, toutotan yon moun vivan toujou gen espwa pou li. Yon chen vivan
 5
 miyò pase yon lyon mouri. Wi. Moun vivan yo konnen yo gen pou yo mouri. Men moun mouri yo pa konn anyen. Yo pa bezwen tann anyen ankò pou sa yo fè. Talè konsa tout moun bliye yo.
 6
 Tout santiman yo te gen nan kè yo pou moun yo te renmen, pou moun yo te rayi, pou bagay yo
 7
 te anvi, tou sa disparèt avèk yo. Yo p'ap janm patisipe nan anyen k'ap fèt sou latè ankò. Ale non, monchè, manje manje ou ak kè kontan, bwè diven ou san kè sote. Bondye deja dakò ak tou sa w'ap
 8
 fè. Se pou rad anwo ou toujou byen pwòp, tèt ou toujou byen penyen ak lwil santi bon. 9
 Jwi lavi avèk fanm ou renmen an, pandan tout jou w'ap viv lavi ki pa vo anyen an, lavi Bondye ba ou pou viv sou latè a. Jwi tout jou sa yo ki yonn pa vo lòt, paske se sèlman sa ki pou ou nan lavi a, apre
 10
 tout traka ou bay tèt ou pou fè travay ou sou latè. Tou sa ou jwenn pou ou fè, fè l' ak tout fòs ou. Paske, kote ou prale a, nan peyi kote mò yo ye a, nanpwen travay pou ou fè, pa gen lide ki pou
 11
 mache nan tèt ou, pa gen konesans, pa gen bon konprann. ¶ Yon lòt bagay mwen wè ankò sou latè, se pa toujou moun ki konn kouri ki genyen nan kous, se pa toujou vanyan gason ki genyen

nan lagè. Yon moun ki gen konprann pa toujou gen manje pou l' manje, yon moun ki gen lespri pa toujou gen anpil byen. Moun ki gen kapasite pa toujou jwenn gwo pozisyon. Chans ak malchans la pou tout moun.¹² Moun pa konnen lè lè yo ap rive. Tankou pwason ki pran nan senn, tankou zwezo ki pran nan pèlen, se konsa moun pran tou lè yon malè sèk tonbe sou yo.¹³ ¶ Men yon lòt bagay mwen te wè ankò: Se yon bèl egzanp ki moutre sa bon konprann ka fè pou moun.¹⁴ Vwala se te yon ti bouk tou piti ki pa t' gen anpil moun ladan l'. Yon gran wa vin atake l' ak yon gwo lame.¹⁵ Li sènen bouk la toupatou, li fè pare yon bann bagay pou kraze miray ranpa bouk la. Te gen yon nonm nan bouk la ki te gen lespri, men se te yon pòv malere. Se li ki te sove bouk la avèk konesans li. Apre sa, tout moun bliye l'.¹⁶ Mwen te toujou di: Konesans pi bon pase gwo kouraj, men yo meprize konesans moun ki pòv. Yo p'ap koute yo lè y'ap pale.¹⁷ Pito ou koute pawòl yon moun ki gen konprann ap di ou tou dousman pase pawòl chèf k'ap rele byen fò nan mitan yon bann moun sòt.¹⁸ Konesans pi bon pase tout zam pou fè lagè. Men, fòt yon sèl moun ka fè anpil byen pèdi tou.

Chapter 10

¹ ¶ Mouch mouri gate tout boutèy odè. Yo fè l' santi. Konsa tou, yon sèl ti betiz ka fè tout gwo konesans ou pase pou anyen. Sa ka fè moun pa respekte ou ankò.² Kè yon moun ki gen konprann toujou panche pou fè sa ki byen, men kè moun sòt toujou panche pou fè sa ki mal.³ Menm lè moun sòt ap mache nan lari, li egare, li fè tout moun wè se moun sòt li ye.⁴ ¶ Si chèf ou move sou ou, pa prese vire do ou ale. Si ou rete dousman, sa ka evite ou anpil malè.⁵ Men yon lòt move bagay mwen wè ankò sou latè, lèfini se chèf yo ki lakòz sa.⁶ Yo pran moun sòt mete yo nan gwo pozisyon, epi yo kite moun ki chaje ak konesans anba.⁷ Mwen wè esklav ap karakole sou chwal yo, epi chèf yo menm k'ap mache apye tankou esklav.⁸ Si ou fouye yon pi, se ou menm ki va tonbe ladan l'. Si ou kraze yon miray, se ou menm sèpan va mòde.⁹ Si w'ap koupe wòch karyann, w'a blese. Si w'ap fann bwa, malè ka rive ou.¹⁰ Si dan rach ou pa koupe, si ou pa file l', ou gen pou travay pi rès lè w'ap sèvi avè l'. Men bon konprann ap fè ou reyisi nan sa w'ap fè.¹¹ Ou te mèt konn chame sèpan, sa p'ap sèvi ou anyen si ou kite l' gen tan mòde ou.¹² ¶ Pawòl ki soti nan bouch yon moun

ki gen konprann sèvi yon lwanj pou li. Men pawòl nan bouch moun sòt ap lakòz lanmò yo. ¹³ Lè
 yo konmanse pale, se betiz y'ap di. Men lè y'ap fini, se pawòl moun fou nèt y'ap di. ¹⁴ Moun sòt
 renmen pale anpil. Pesonn pa konnen sa k'ap rive denmen. Pesonn pa ka di nou sa k'ap rive apre
 nou mouri. ¹⁵ Moun sòt touye tèt li nan travay, li bliye chimen kay li. ¹⁶ ¶ Ala malè pou yon peyi
 lè li gen yon timoun alatèt li, lè chèf li yo tonbe nan manje depi granmaten. ¹⁷ Men, ala bon sa bon
 pou yon peyi lè wa a se moun ki soti nan bon ras, lè chèf li yo manje lè pou yo manje pou yo ka
 jwenn fòs, epi ki pa lage kò yo nan banbòch. ¹⁸ Lè yon moun twò parese pou l' repare kay li, twati
 a ap koule, fetay la ap tonbe. ¹⁹ Yo fè resepsyon pou yo pran plezi yo, yo bwè diven pou fè kè yo
 kontan, men se lajan ki penmèt yo fè tou sa. ²⁰ Pa kritike yon wa, pa menm nan kè ou. Pa kritike
 rich yo, pa menm anndan chanm ou. Paske raje gen zòrèy.

Chapter 11

¹ ¶ Fè byen san gad dèyè. Yon lè konsa, w'a jwenn rekonpans ou. ² Separe sa ou genyen ak
 mezi moun ou kapab, paske ou pa janm konnen ki malè ki ka rive ou sou latè. ³ Depi nwaj yo plen
 dlo, se pou lapli tonbe sou latè. Lè yon pyebwa tonbe, kit li tonbe sou bò nò, kit li tonbe sou bò sid,
 kote l' tonbe a, se la pou li rete. ⁴ Si w'ap gade sou van, ou p'ap janm plante. Si w'ap gade sou nwaj,
 ou p'ap janm ranmase rekòt. ⁵ Menm jan ou pa konnen ni kote van an soti ni kote li prale, menm
 jan an tou ou pa konnen ki jan zo timoun fè fòm nan vant fanm ansent. Se konsa tou ou pa ka
 konprann travay Bondye, li menm ki fè tout bagay. ⁶ Nan maten, plante jaden ou. Aswè rive, plante
 jaden ou ankò. Ou pa janm konnen kilès nan de yo ap bay plis rannman. Ou pa janm konnen si tou
 de p'ap pran, si tou de p'ap bay menm rannman. ⁷ ¶ Ala bon bagay se fè klè! Sa bon nèt lè ou wè
 solèy. ⁸ Di Bondye mèsi pou chak lanne li mete sou lavi ou. Ou te mèt viv lontan, pa bliye tan ou
 pral pase lè ou fin mouri a long anpil. Tou sa ki vin apre pa vo anyen. ⁹ menm, jenn gason, pwofite
 jennès nou. Fè kè nou kontan pandan tout tan nou jenn gason toujou. Fè tou sa nou ta vle fè, tou
 sa nou anvi fè. Men pa bliye Bondye gen pou mande nou kont pou tou sa nou fè. ¹⁰ Pa kite lapenn
 chita nan kè nou. Pa kite anyen fè nou soufri nan kò nou. Ou p'ap rete jenn gason ak cheve nwa
 tou tan.

Chapter 12

¹
 ¶ Pandan ou jenn gason an, pa janm bliye Bondye ki te kreye ou la, anvan jou malè yo rive sou ou, anvan lè a rive pou ou di: Mwen pa jwenn ankenn plezi nan lavi. ² Lè sa a, limyè solèy la, lalin lan ak zetwal yo ap parèt twoub twoub devan je ou. Syèl la pa janm klè. Lapli poko fin tonbe, tan an gen tan mare ankò. ³ Lè sa a, bra ou yo ki te konn pwoteje ou ap tranble. Janm ou yo ki enganm koulye a ap febli. Ou p'ap gen dan pou kraze manje. Je ou yo ap twò fèb pou wè klè. ⁴ De twou zòrèy ou yo ap bouche, ou p'ap tande sa k'ap pase nan lari. Ata gwo bri moulen ki toupre ou la, w'a tande l' tou piti piti. Moun te mèt ap chante bò kote ou, w'ap tande vwa yo lwen lwen. Lè sa a, depi pipirit konmanse chante, nou gen tan leve. ⁵ W'ap pè moute sou bagay ki twò wo pou ou pa gen tèt vire. Menm mache nan granchemen ap yon danje pou ou. Tout cheve nan tèt ou ap vin blan, w'ap pèdi fòs kouray ou. Pa gen anyen ki ka fè l' tounen ankò. W'ap desann nan dènye kay kote ou pral rete pou tou tan an. Lè sa a, moun ap mache rele nan tout lari. ⁶ Wi, pa janm bliye Bondye ki fè ou la anvan ti chenn an ajan an detache sot tonbe, anvan bòl an lò a tonbe kraze, anvan kalbas dlo a kraze miyèt moso, anvan so a kase. ⁷ Lè sa a, kò nou pral tounen pousyè latè jan l' te ye anvan an. Souf nou menm ap tounen jwenn Bondye ki te ban nou l' lan. ⁸ ¶ Lavi pa vo anyen. Lavi pa sèvi anyen. Filozòf la di: Anyen pa vo anyen. ⁹ Men, paske filozòf la te gen bon konprann, li pa janm sispann moutre pèp la tou sa li te konnen. Li egzaminen anpil pwovèb, li etidye yo, li pran san li pou li sanble yo. ¹⁰ Li pran san li pou li jwenn pawòl ki pou fè moun plezi. Men nan tou sa li ekri, li bay verite a jan li wè l' la. ¹¹ Pawòl moun ki gen konprann tankou baton yo sèvi pou djige bèf kabwa. Liv pwovèb yo tankou yon seri klou yo kloure yonn kot lòt. Men se yon sèl mèt ki bay yo, se Bondye. ¹² Pitit mwen, men sa pou ou fè: Pran leson sou bagay sa yo. Si pou yo ta ekri anpil liv, yo pa ta janm fini. Lè ou etidye twòp, sa fè kè ou fè ou mal. ¹³ ¶ Apre tout pawòl sa yo, se yon sèl bagay pou m' di nan sa: Gen krentif pou Bondye. Fè tou sa li mande ou fè yo. Se pou sa ase Bondye te kreye moun. ¹⁴ Paske Bondye ap jije tou sa n'ap fè, kit yo bon, kit yo pa bon, ata bagay nou fè an kachèt.

Song of Solomon

Chapter 1

¹ ¶ Men pi bèl chante nan tout chante Salomon yo. ² ¶ Bo m' non, kouvri m' ak bo! Karès ou pi
³ dous pase siwo myèl. Ou gen yon bon sant k'ap soti nan tout kò ou. Depi yo tandè non ou, sant
⁴ ou vin nan nen yo. Se sa ki fè jenn fi yo renmen ou konsa! Pran m' avè ou non! Ann kouri ale!
⁵ Se ou menm ki wa mwen. Mennen m' nan chanm ou. Depi ou la, se pa ti kontan n'ap kontan. N'ap
⁶ chante karès ou ki pi dous pase siwo myèl. Jenn fi yo gen rezon renmen ou konsa! Medam lavil
⁷ Jerizalèm, Po m' boule, men m' bèl! Po m' menm koulè ak tant nan dezè a. Men, li bèl tankou rido
⁸ nan palè Salomon an. Pa gade sou koulè po m'! Se solèy la ki boule m' konsa. Frè m' yo te move
⁹ sou mwen. Yo fè m' travay nan jaden rezen lòt moun. M' pa t' gen tan pou m' okipe jaden rezen pa
¹⁰ m'. ¶ Manyè di m' non, ou menm mwen renmen anpil la, kibò ou pral mennen mouton yo manje?
¹¹ Kibò yo pral pare solèy midi? Konsa m' p'ap bezwen mache chache ou tankou moun fou nan mitan
¹² mouton lòt gadò parèy ou yo. Bèl fanm pase ou, nanpwen! Ki jan ou fè pa konn kote sa a? Ale
¹³ non. Swiv mouton yo. W'a jwenn manje bò la pou kabrit ou yo, toupre tant gadò yo. Ou menm
¹⁴ mwen renmen anpil la, w'ap boulvèse mesye yo, menm jan yon jiman ap boulvèse poulen chwal
¹⁵ cha lagè farawon yo. Ala bèl figi ou bèl nan mitan très cheve ou yo! Ala bèl kou ou bèl ak kolye
¹⁶ ou yo! Men, n'ap fè yon chenn lò pou ou ak ti moso ajan kole ladan l'. ¶ Mèt mwen te kouche
¹⁷ sou kabann li. Sant odè mwen an te gaye toupatou. Mennaj mwen tankou yon pake bazilik, ki
¹⁸ poze sou tete m'. Mennaj mwen tankou yon bouke flè k'ap fleri nan jaden rezen Angedi. Ala
¹⁹ bèl ou bèl, anmòrèz mwen! Ala bèl ou bèl! Je ou yo ou ta di de ti pijon. Ala bèl ou bèl, mennaj
²⁰ mwen! Se pa ti kontan ou fè m' kontan. Zèb yo sèvi nou kabann! Branch bwa sèd yo sèvi nou
²¹ travès kay, branch pye chenn yo sèvi nou twati.

Chapter 2

¹ ¶ Se yon woz mawon sou mòn Sawon mwen ye, yon bèl ti flè nan yon basrak. ² Tankou yon
³ bèl ti flè nan mitan pikan, se konsa anmòrèz mwen ye nan mitan lòt jenn fi yo. ¶ Tankou yon pye
⁴ ponm nan mitan yon rakbwa, se konsa mennaj mwen ye nan mitan lòt jenn gason yo. Mwen renmen
⁵ chita anba lonbray li. Donn li gou nan bouch mwen. Li mennen m' yon ti kote al bwè avè l'. Se
⁶ pawòl damou ase l'ap glise nan zòrèy mwen. Li remoute kouraj mwen ak pen rezen. Li rafrech

gòj mwen ak ponm. Mwen malad sitèlman mwen renmen!⁶ Li pase men gòch li anba tèt mwen,
 l'ap karese m' ak men dwat li!⁷ Nou menm, medam lavil Jerizalèm, tanpri, tanpri souple! Fè m'
 sèman sou tèt gazèl bèf ak fenmèl kabrit ki lage nan savann yo! Pa deranje anmòrèz mwen lè l'ap
 dòmi. Pa leve l' san l' pa vle.⁸ ¶ Mwen tande vwa mennaj mwen! Men l'ap vini. Li soti sou mòn
 yo, l'ap kouri desann timòn yo vin jwenn mwen.⁹ Mennaj mwen tankou yon kabrit, tankou yon
 jenn ti kabrit. Men li la dèyè miray kay la. L'ap gade nan fennèt la, l'ap veye nan jalouzi a pou wè
 sa m'ap fè.¹⁰ Mennaj mwen pale avè m', li di m': Vini non, anmòrèz mwen! Ann al avè m' non,
 bèl nègès mwen!¹¹ Gade! Sezon fredri pase, lapli sispann tonbe.¹² Nan tout jaden, flè yo louvri.
 Se sezon ou tande chante toupatou. Toutrèl gen tan ap chante nan bwa.¹³ Fig Frans konmanse mi.
 Nou ka pran sant flè pye rezen yo. Vini non, anmòrèz mwen! Ann al avè m' non, bèl nègès mwen!
¹⁴ ¶ Ti toutrèl mwen, ou kache nan fant wòch yo, anba gwo wòch byen wo yo. Moutre m' ti figi ou
 non! Fè m' tande vwa ou. Ala bèl ti figi ou bèl! Ala dous vwa ou dous!¹⁵ Kenbe vòlò yo, kenbe
 ti vòlò yo anvan yo ravaje jaden rezen nou yo, jaden rezen nou yo k'ap fleri.¹⁶ Mennaj mwen, se
 pou mwen li ye! Mwen menm, se pou li mwen ye! L'ap fè mouton l' yo manje nan mitan pye woz
¹⁷ yo. Anvan labrin tonbe, anvan solèy vin kouche, kouri tounen vin jwenn mwen, mennaj mwen,
 tankou yon kabrit, tankou yon jenn ti kabrit k'ap kouri sou mòn byen wo yo.

Chapter 3

¹ ¶ Pandan plizyè nwit, m' kouche sou kabann mwen, m' cache moun mwen renmen anpil la.
 M' cache l', mwen pa jwenn li.² Apre sa, mwen leve, mwen pran mache nan tout lavil la, m'
 cache moun mwen renmen an nan tout lari, sou tout laplas yo. M' cache l', mwen pa jwenn li.
³ Gad k'ap mache fè patwouy nan lavil la kontre avè m'. Mwen mande yo: Souple! Nou pa wè nèg
 mwen renmen an pou mwen?⁴ Kite mwen kite gad yo, mwen jwenn moun mwen renmen an. Mwen
 kenbe men l'. Mwen pa lage l' jouk mwen mennen l' kay manman m', nan chanm moun ki te pote
 m' nan vant li an.⁵ Nou menm, medam lavil Jerizalèm, tanpri, tanpri souple! Fè m' sèman sou tèt
 gazèl bèf ak fenmèl kabrit ki lage nan savann yo. Pa deranje anmòrèz mwen lè l'ap dòmi. Pa leve
 l' san li pa vle.⁶ ¶ Kisa k'ap vini sot nan dezè a? L'ap vini nan mitan de poto lafimen. Lè a gen sant

lansan, li gen sant mant, li gen sant tout kalite poud santi bon machann vann. ¶⁷ Gade! Se yon kabann divan y'ap pote pou Salomon. Gen swasant sòlda k'ap eskòte l', swasant nan pi vanyan sòlda peyi Izrayèl la.⁸ Yo tout gen anpil ladrès pou sèvi ak nepe. Se vyewo yo ye nan lagè. Yo chak gen nepe yo mare nan ren yo. Yo tou pare pou si yo ta atake yo lannwit.⁹ Wa Salomon fè fè yon bèl divan sou branka pou li ak pi bon bwa peyi Liban,¹⁰ Poto kwen yo fèt an ajan. Tèt divan an kouvri an lò. Matla a kouvri ak bèl twal wouj, tout anndan an bwode. Se medam lavil Jerizalèm yo ki fè l' pou li ak tout kè yo.¹¹ Soti non, medam mòn Siyon yo! Vin wè wa Salomon ak kouwòn manman l' te mete sou tèt li jou maryaj li, jou kè l' te kontan anpil la.

Chapter 4

¶¹ Ala bèl ou bèl, anmòrèz mwen! Ala bèl ou bèl dèyè vwal ki sou tèt ou a! Je ou yo ou ta di de ti pijon. Cheve ou yo ap danse tankou yon bann kabrit k'ap kouri desann sou mòn Galarad.² Dan ou yo blan tankou mouton yo fèk sot benyen apre yo fin koupe lenn sou do yo. Ou pa manke yonn ladan yo. Tout dan anwo yo mache ak dan anba yo.³ Po bouch ou, ou ta di yon bèl ti riban wouj. Se bèl plezi pou tande w'ap pale! De bò figi ou yo ou ta di de bò grenad anba vwal ou a.⁴ Kou ou kanpe tankou bèl fò won David la, kote yo kenbe depo zam yo. Se la vanyan sòlda yo vin pandye mil plak fè pwotèj.⁵ Tete ou yo doubout tankou de ti gazèl, tankou de ti gazèl menm fòs, menm pòte k'ap manje nan jaden flè.⁶ M'ap rete sou mòn mant lan, sou ti bit lansan an jouk bajou kase, jouk solèy leve.⁷ Ou pa manke bèl, anmòrèz mwen! Depi nan pwent zòtèy ou jouk nan pwent cheve ou, ou san defo! ¶⁸ Ann al avè m' non! Ann desann mòn Liban an, fyanse mwen! Ann desann mòn Liban an! N'ap rete sou tèt mòn Amana, sou mòn Seyi ak sou mòn Emon kote lyon ak leyopa rete, n'ap gade plenn lan anba.⁹ Sò mwen, bèl nègès mwen, ou annik gade m' yon fwa, ou fè m' pèdi lòlòj mwen. M' annik wè yonn nan bèl ti chenn nan kou ou yo, m' pèdi tèt mwen.¹⁰ Ala dous karès ou yo dous, sò mwen, bèl nègès mwen! Karès ou yo pi dous pase siwo myèl. Sant kò ou pi bon pase tout kalite fèy santi bon.¹¹ Bouch ou gen gou siwo myèl, bèl nègès mwen! Anba lang ou menm, se lèt ak siwo myèl. Rad sou ou gen menm sant ak rakbwa mòn Liban an.¹² Sò mwen, bèl nègès mwen, ou tankou yon jaden kache, yon sous dlo yo fèmen dèyè miray, yon fontenn

¹³ yo sele. Ou tankou yon jaden fre kote pye grenad ap grandi. Y'ap bay bèl grenad byen dous. Ou
 tankou yon jaden kote yo jwenn jasmen ak ti bonm, ¹⁴ tibonm ak safran, sitwonèl ak kannèl ak
 tout kalite pyebwa ki bay lansan, lami ak lalwa, ansanm ak tout kalite plant ki gen bon sant. ¶ ¹⁵
 Fontenn jaden mwen an, se yon sous dlo k'ap koule desann byen fre soti nan mòn Liban an. ¹⁶ Van
 nòde, leve non! Van swèt, kouri vini soufle sou jaden mwen an! Plen lè a ak bon sant. Vini non,
 mennaj mwen! Antre nan jaden ki pou ou a! Manje nan pi bon fwi yo!

Chapter 5

¹ ¶ M' antre nan jaden ki pou mwen an! Sò mwen, bèl ti nègès mwen. Mwen keyi lami ak lòt
 fèy santi bon. Mwen manje gato myèl mwen ak tout siwo a. Mwen bwè diven m', mwen bwè lèt
 mwen. Mezanmi, manje manje nou! Bwè bwè nou! Fè lamou nou jouk nou sou! ¶ ² Mwen t'ap
 dòmi, men kè m' t'ap veye. Mwen tande mennaj mwen k'ap frape nan pòt la. Louvri pou mwen,
 tanpri, sò mwen, fiyanse m', toutrèl mwen, bèl nègès mwen! Seren mouye tout tèt mwen. Tout
 cheve m' plen dlo lawouze. ³ Mwen gen tan wete rad sou mwen, Ou ta vle m' mete rad sou mwen
 ankò? M' gen tan lave pye m'. Ou ta vle m' mete yo atè ankò? ⁴ Mennaj mwen pase men l' nan twou
 pòt la. Tout san nan kò m' mache. ⁵ Lamenn, mwen leve pou m' louvri pou mennaj mwen. Sant
 lami a te sou tout men m'. Li t'ap degoute nan dwèt mwen sou kwòchèt pòt la. ⁶ Lè mwen louvri
 pòt la pou li, li te gen tan al fè wout li. Jan m' te santi m' ap mouri lè m' te tande l' ap pale a! M'
 chache l', m' pa jwenn li! M' rele l', li pa reponn! ⁷ Gad k'ap fè patwouy nan tout lavil la kontre avè
 m'. Yo bat mwen, yo toufounen m'! Gad ki t'ap fè faksyon sou miray ranpa yo pran gwo manto ki
 te sou mwen an. ⁸ Nou menm, medam lavil Jerizalèm yo, tanpri, tanpri souple! Si nou kontre ak
 mennaj mwen an, di l' pou mwen: mwen malad sitèlman mwen renmen! ¶ ⁹ Ou menm ki pi bèl
 pase tout fanm, kisa mennaj ou genyen pase lòt gason? Wi, kisa li genyen lòt gason pa genyen, pou
 ou mande nou fè sa pou ou? ¹⁰ Mennaj mwen bèl, li byen kanpe. Li fasil pou rekonèt, te mèt nan
 mitan dimil (10.000) gason. ¹¹ Figi l' gen yon bèl koule jòn, tankou lò. Cheve li yo tankou fèy
 palmis nan van. Yo nwa tankou plim kaou. ¹² De je l' yo, ou ta di de pijon bò yon ti dlo larivyè.
 Ou ta di de ti pijon nwa k'ap benyen nan de kivèt lèt. ¹³ De bò figi l' yo tankou de jaden plen zèb

ak flè santi bon! Bouch li tankou flè savann ki gen bon sant. ¹⁴ Men l' yo, ou ta di chenn an lò, ak yon bann bèl ti pyè topaz kole sou yo. Kò li, ou ta di yon gwo moso ivwa tou blan byen poli, kouvri ak pyè safi. ¹⁵ Janm li yo, ou ta di de poto mab byen kanpe sou de moso lò bon kalite. Lè ou gade l', li tankou mòn Liban, li kanpe tankou gwo pye sèd Liban yo. ¹⁶ Anndan bouch li dous tankou siwo myèl. Li bèl gason nan tout kò li. Se konsa mennaj mwen an ye, se konsa zanmi m' lan ye, medam lavil Jerizalèm!

Chapter 6

¹ ¶ Ou menm ki pi bèl fanm pase tout fanm, kote mennaj ou ale? Ki wout ou wè li pran? Nou pral ede ou chache l'. ² Mennaj mwen al nan jaden l', kote pyebwa santi bon ap pouse. li al bay mouton l' yo manje. li al ranmase bèl ti flè. ³ Mennaj mwen pou mwen, mwen pou mennaj mwen. li ap fè mouton l' yo manje nan mitan bèl ti flè yo. ⁴ ¶ Anmòrèz mwen, ou bèl tankou lavil Tisa. Lè m' wè ou sa fè m' plezi tankou lè m' wè lavil Jerizalèm. Kote ou pase tout moun pèdi nan ou! ⁵ Sispann gade m', paske lè ou gade m', ou fè m' pa konn sa m'ap fè. Cheve ou ap danse bò figi ou tankou kabrit k'ap kouri desann sou mòn Galarad yo. ⁶ Dan ou yo blan tankou mouton yo fèk sot benyen. Ou pa manke yonn ladan yo. Tout dan anwo yo mache ak dan anba yo. ⁷ De bò figi ou yo ou ta di de bò grenad anba vwal ou a. ⁸ Wa a gen swasant renn, katreven fanm kay. Pou jenn fi menm, se pa pale. ⁹ Men, pa gen tankou jenn ti pijon mwen an. Li menm ase mwen renmen. Se sèl pitit fi manman l' fè. Se pitit sa a li pi renmen. Lè jenn fi yo wè l', yo di: Gade sa Bondye fè pou ou! Renn yo ak fanm kay yo menm ap fè lwanj li. ¹⁰ Kilès sa a k'ap parèt tankou solèy ki fèk leve? Li bèl tankou lalin, li klere tankou solèy. Kote ou pase tout moun pèdi nan ou! ¹¹ ¶ Mwen desann nan jaden zanmann yo pou m' te wè jenn ti plant yo nan fon an, pou m' wè si pye rezen yo ap boujonnen, si pye grenad yo ap fleri. ¹² Apre sa, m' pa konn sa ki pase m'. M' santi m' tankou yon sòlda sou cha lagè ki anvi al goumen. ¹³ Tounen non, fanm lavil Choulam! Tounen! Tounen non pou n' ka gade ou! Poukisa nou vle gade fanm lavil Choulam lan k'ap danse nan mitan de ran moun?

Chapter 7

¹ ¶ Ala bèl pye ou bèl nan sapat ou yo, nègès mwen! Ren ou tankou si li te dekore ak bon lò.
 Ou ta di travay yon bòs ki gen anpil ladrès ak gou! ² Lonbrit ou tankou yon bòl won ki pa janm
 manke diven melanje ak fèy santi bon. Anba vant ou menm tankou yon bèl jaden ble ak bèl ti flè
 sou tout arebò li. ³ Tete ou yo doubout tankou de ti gazèl, de ti gazèl menm fòs, menm pòte. ⁴ Kou
 ou tankou yon fò won fèt an ivwa. Je ou yo tankou basen dlo nan lavil Esbon, bò pòtay gwo lavil
 la. Nen ou tankou gwo fò peyi Liban an k'ap veye sou lavil Damas. ⁵ Ou kenbe tèt ou dwèt sou kò
 ou, tankou mòn Kamèl. Cheve ou yo ap flote tankou bèl twal swa wouj grenn. Nenpòt wa ta ka
 pèdi nan bouklèt cheve ou yo! ⁶ Ala bèl ou bèl, mennaj mwen! Ala dous ou dous, bèl nègès mwen!
⁷ Lè ou kanpe, ou ta di yon bèl pye palmis. De tete ou yo ou ta di de ti grap palmis. ⁸ Mwen fè lide
 moute sou pye palmis la pou m' keyi grap yo. Pou mwen, tete ou yo tankou de grap rezen. Bouch
 ou gen sant ponm kajou! ⁹ Anndan bouch ou, gen gou yon bon diven. Kite diven an koule pou
 mennaj mwen, Kite l' koule nan bouch nou antan n'ap dòmi. ¹⁰ ¶ Se pou mennaj mwen mwen ye!
 Se mwen menm li anvi. ¹¹ Vini non, mennaj mwen! Ann al andeyò. N'a pase nwit lan nan jaden
 yo. ¹² Nan maten, n'apral gade pye rezen yo pou wè si yo konmanse boujonnen, si flè yo ap louvri,
 si pye grenad yo ap fleri. Se la n'a karese nèt ale. ¹³ Ou ka pran sant mandragò yo. Devan papòt
 nou an gen tout kalite bon fwi, fwi ki fèk keyi ak fwi ki byen mi. Mennaj mwen, se mwen ki te sere
 yo pou ou.

Chapter 8

¹ ¶ Poukisa se pa t' frè m' ou te ye, frè ki tete menm manman avè m'? Lè m' ta kontre avè ou
 nan lari, m' ta gen dwa bo ou, pesonn pa ta wè mal nan sa. ² Mwen ta mennen ou lakay manman
 m', mwen ta fè ou antre. Ou ta moutre m' sa pou m' fè. M' ta ba ou diven melanje ak fèy santi bon
 ak ji grenad mwen yo pou ou bwè. ³ Li pase men gòch li anba tèt mwen, l'ap karese m' ak men
 dwat li. ⁴ Nou menm medam lavil Jerizalèm, tanpri, tanpri souple! Pa deranje anmòrèz mwen lè
 l'ap dòmi. Pa leve l' san l' pa vle. ⁵ ¶ Kilès sa a k'ap vin sot nan dezè a? Kilès sa a ki apiye sou bra
 mennaj li konsa? Anba pye ponm lan, mwen leve ou nan dòmi. Se la ou te fèt. Se la manman ou
 te fè ou wè solèy. ⁶ Pa renmen lòt moun pase mwen ase! Kenbe m' fò nan bra ou! renmen tankou
 lanmò. Lè ou renmen yon moun tout bon, se mouri w'ap mouri pou li. renmen met dife nan tout kò

ou. Dife sa a se nan Bondye li soti. ⁷ Pa gen dlo ki ka touye l'. Pa gen larivyè ki ka tenyen l'. Yon moun te mèt ofri tout richès lakay li pou l' ta achte renmen, pesonn pa ta okipe l'. ⁸ ¶ Nou gen yon ti sè, li poko menm pouse tete. Kisa pou nou fè pou li si yon jenn gason vin ap file l'? ⁹ Si se yon miray li ye, n'a bati yon gwo fò won an ajan sou li. Si se yon pòt li ye, n'a fèmen l' ak batan sèd, n'a kouvri l' ak panno bwa sèd. ¹⁰ Se yon miray ranpa mwen ye. Tete m' tankou de fò. Se poutèt sa, nan je mennaj mwen, m' se yon fanm ki jwenn bonè m'. ¹¹ Salomon te gen yon jaden rezen yon kote yo rele Baal-Amon. Li bay kèk moun okipe l' pou li. Lè rekòt, yo chak pou te ba li mil (1.000) pyès ajan. ¹² Mwen gen jaden rezen pa m' m'ap okipe. Salomon, ou mèt kenbe mil (1.000) pyès ajan pa ou yo ak desan (200) pyès ajan pou moun k'ap veye rekòt la. ¹³ ¶ Zanmi kanmarad ap pare zòrèy pou tande ou. Fè m' tande vwa ou non, ou menm ki rete nan jaden yo! ¹⁴ Kouri non, mennaj mwen! Kouri tankou yon kabrit, tankou yon jenn ti kabrit sou mòn ki gen bon sant yo!

Isaiah

Chapter 1

¹ ¶ Men vizyon sou peyi Jida ak lavil Jerizalèm Bondye te fè Ezayi, pitit Amòz la, wè sou rèy wa Ozyas, wa Jotam, wa Akaz ak wa Ezekyas nan peyi Jida a. ² ¶ Seyè a di konsa: -Ou menm syèl la, koute! Ou menm latè, pare zòrèy ou! Paske mwen menm, Seyè a, mwen pral pale! Pitit mwen te okipe yo, pitit mwen te elve yo, men yo vire do ban mwen. ³ Bèf ki bèf konnen mèt li. Bourik ki bourik konnen kote mèt li ba l' manje. Men, pèp Izrayèl la menm pa konn bagay konsa. Pèp mwen an pa konprann anyen. ⁴ Malè pou peyi nou an, kote tout moun ap viv nan peche! Malè pou pèp ki plen krim sou konsyans yo, pou ras moun sa yo k'ap fè sa ki mal, pou bann pitit sa yo ki fin pèvèti! Yo lage pye Bondye Seyè a! Yo pa okipe Bondye pèp Izrayèl la ki yon Bondye apa. Yo vire do ba li. ⁵ Poukisa n'ap plede fè tèt di konsa? Pa gen kote ankò pou yo frape nou. Tout tèt la malad. Pa gen kò ankò pou sipòte. ⁶ Depi nan po tèt nou rive anba pla pye nou, nanpwen kote nan kò nou ki pa malad. Se blese, se foule, se san k'ap koule. Yo pa netwaye yo, yo pa mare anyen sou yo, yo pa mete medikaman sou yo pou kalme doulè yo. ⁷ Peyi nou an fini. Dife fin boule tout lavil nou yo ratè. Moun lòt nasyon yo piye tout jaden nou yo, l'a devan je nou. Yo fini ak tout bagay nan

8
peyi a nèt. Yon sèl lafliksyon tonbe sou nou, tankou lè lènmi pase nan peyi a. Lavil Jerizalèm rete pou kont li sou do mòn Siyon an, tankou yon ti joupa, tankou yon ti tonèl nan mitan jaden.

9
Lènmi sènen l' toupatou. Si Seyè ki gen tout pouvwa a pa t' kite kèk moun nan nou chape, lavil

10
la t'ap disparèt nèt tankou sa ki te rive lavil Sodòm ak lavil Gomò a. ¶ Lavil Jerizalèm sa a! Chèf li yo tankou chèf lavil Sodòm. Moun li yo tankou moun lavil Gomò. Nou tout ki la a, koute sa Seyè a ap di chèf lavil yo. Pare zòrèy nou pou nou tandè lòd Bondye nou an ap bay moun Jerizalèm yo.

11
Li di yo: Sa pou m' fè ak pakèt bèt n'ap plede ofri pou touye pou mwen yo? Mwen bouke ak belye mouton n'ap boule sou lotèl la, ak grès towò n'ap ofri ban mwen yo. Kanta pou san bèf, san mouton ak san kabrit yo menm, mwen pa bezwen sa. 12
Lè n'ap vin fè sèvis pou mwen, ki moun

13
ki mande nou pou nou fè tout ale vini sa yo nan lakou tanp mwen an? Nou mèt sispann fè bann ofrann sa yo ki p'ap sèvi nou anyen. Mwen pa ka sipòte lafimen lansan n'ap ofri m' lan. Mwen pa vle wè fèt lalin nouvèl nou yo, jou repo nou yo ak tout lòt reyinyon n'ap fè yo. M' pa ka sipòte fèt

14
moun k'ap fè mechanste yo ap fè pou mwen. Mwen rayi fèt lalin nouvèl nou yo ak tout bèl

15
seremoni n'ap plede fè yo. Se yon chay yo tounen pou mwen. Mwen pa ka sipòte yo ankò. Lè n'ap leve bra nou anlè pou nou lapriyè nan pye m', m'ap bouche je m' pou m' pa wè nou. Nou mèt

16
fè lapriyè sou lapriyè, mwen p'ap tandè nou! Men nou plen san! ¶ Manyè netwaye lavi nou non! Mete nou nan kondisyon pou fè sèvis pou mwen non! Sispann tout lenjistis mwen wè n'ap fè yo!

17
Wi, sispann fè sa ki mal! Manyè aprann fè sa ki byen! Chache fè sa ki dwat devan mwen! Pran

18
defans moun y'ap kraze yo! Defann kòz timoun ki san papa ak fanm ki pèdi mari yo. Seyè a di konsa: -Nou mèt vini atò! Vini non! Ann regle koze a! Menm si peche nou yo ta tache wouj kou san sou tout kò nou, m'ap lave nou. M'ap fè nou vini blan kou koton. Nou te mèt tache wouj fonce,

19
m'ap blanchi nou, m'ap fè nou blan kou lenn mouton. Si nou dakò pou nou fè sa mwen di nou

20
fè, n'a manje bèl rekòt peyi a va bay. Men, si nou derefize koute m', si nou rete ap fè tèt di toujou,

21
nou tout gen pou n' mouri nan lagè. Se mwen menm, Seyè a, ki di sa ak bouch mwen. ¶ Yon lè, lavil Jerizalèm te renmen m' ak tout kè li. Koulye a, li tounen yon jennès! Yon lè, se moun ki mache

22
dwat ase ki te rete ladan l', yo pa t' fè lenjistis. Koulye a se renk ansasen! Lajan nou yo tounen

23
labou, yo pa vo anyen! Bon diven nou yo tounen dlo! Chèf nou yo leve vire do bay Bondye. Yo fè bann ak vòlò yo! Tout moun cho dèyè avantaj pa yo. Y'ap kouri dèyè moun k'ap bay lajan. Yo

24
pa defann kòz moun ki san papa yo. Lè yon fanm san mari nan ka, yo pa gade l' menm. Se poutèt sa, koulye a, koute sa Seyè a, Bondye ki gen tout pouvwa a, Bondye pèp Izrayèl la, Bondye ki gen fòs kouraj la ap di: Nou se lènmi m'. Nou pa vle wè m'. Mwen pral pran revanj mwen. Mwen p'ap

²⁵ kite nou ban m' traka ankò. Mwen pral regle nou. Mwen pral netwaye nou nan dife, tankou lè
²⁶ y'ap netwaye fè. Mwen pral wete tout vye kras ki sou nou. Mwen pral ban nou chèf ak majistra
 tankou sa nou te konn genyen nan tan lontan yo. Lè sa a, y'a rele lavil Jerizalèm: lavil kote moun
²⁷ mache dwat la, lavil ki renmen m' ak tout kè li. Seyè a ap fè sa ki gen pou fèt. L'a sove lavil
²⁸ Jerizalèm. Seyè a ap rann jistis, l'a delivre moun Siyon ki va tounen vin jwenn li yo. Men, l'ap
 kraze sa k'ap fè sa ki mal yo ansanm ak sa k'ap viv nan peche yo. L'ap touye tou sa ki vire do bay
²⁹ Seyè a. N'a wont akòz gwo pye bwadchenn repozwa nou te konn sèvi yo, akòz bèl jaden nou te
³⁰ plante pou zidòl yo. N'ap tankou yon pye bwadchenn k'ap deperi, tankou yon jaden ki pa jwenn
³¹ dlo. Menm jan yon ti tensèl mete dife nan yon pil fachin bwa chèch, se konsa sa gwonèg yo ap
 fè a ap tounen yon tizon dife nan dèyè yo. Pesonn p'ap ka fè anyen pou sove yo.

Chapter 2

¹ ¶ Men mesaj Bondye te bay Ezayi, pitit Amòz la, nan vizyon li te fè sou peyi Jida ak sou lavil
² Jerizalèm: Yon tan gen pou rive! Lè sa a, mòn kote Tanp lan ye a, va pi wo pase tout lòt mòn yo.
³ L'ap kanpe byen wo nan mitan mòn yo. Moun va soti nan tout peyi an kantite vin sou li. Anpil
 moun lòt nasyon va mache vini. Y'a di: -Ann ale sou mòn Seyè a! Ann al nan Tanp Bondye pèp
 Izrayèl la! L'a moutre nou jan li vle nou viv la. Konsa n'a mache nan chemen l'ap mete devan nou
 an. Paske, Seyè a rete sou mòn Siyon an, l'ap bay lòd li. Li rete lavil Jerizalèm, l'ap pale ak pèp li
⁴ a. L'ap regle tout kont nasyon yo gen yonn ak lòt. L'ap jije tout gwo peyi yo. Y'a pran mato, y'a
 fè zam yo tounen zouti pou travay tè. Y'a fè nepe yo tounen kouto digo. Nasyon yo p'ap fè lagè
⁵ yonn ak lòt ankò. Yo p'ap janm aprann fè lagè ankò. Koulye a, nou menm moun fanmi Jakòb yo,
⁶ annou mache nan limyè Seyè a ban nou an. ¶ Bondye, ou te lage pèp ou a, moun fanmi Jakòb yo.
 Peyi yo a plen moun k'ap fè divinò, plen moun k'ap li nan zetwal. Peyi a tounen tankou peyi moun
⁷ Filisti yo. Tout moun nan peyi a ap swiv vye mès moun lòt nasyon yo. Peyi a plen ajan ak lò.
 Richès pèyi a pa gen limit. Peyi a plen chwal. Ou pa ka konte kantite cha pou fè lagè yo genyen.
⁸ Peyi a plen zidòl. Y'ap sèvi bagay yo fè ak men yo, bagay yo bay fòm ak dwèt yo. Tout moun
⁹ pral bese je yo gade atè afòs yo pral wont. Pa padonnen yo, Seyè! ¶ Yo pral kache kò yo nan
¹⁰ twou wòch. Yo pral fouye twou anba tè pou yo chape anba kòlè Seyè a. Sezisman va pran yo lè y'a

wè Seyè a. Y'a kouri al kache lè pouvwa li va parèt aklè. ¹¹ Yon jou gen pou vini! Lè sa a, p'ap gen moun k'ap gonfle lestonmak yo sou moun ankò! P'ap gen moun k'ap fè awogan ankò sou moun!

Jou sa a, Seyè a va sèl chèf. ¹² Wi, jou sa a, se va jou Seyè a, Bondye ki gen tout pouvwa a! L'ap fè tout moun ki t'ap gonfle lestonmak yo bese je yo gade atè ansanm ak tout moun ki t'ap fè awogan yo ak tout grannèg yo. ¹³ L'ap detwi tout gwo pye sèd ki byen wo nan peyi Liban an, tout gwo pye bwadchenn ki byen wo nan peyi Bazan an. ¹⁴ L'ap kraze tèt gwo mòn kou ti mòn. L'ap fè yo tout vin menm wotè. ¹⁵ L'ap kraze tout fò yo ak tout miray ranpa yo. ¹⁶ L'ap koule tout gwo batiman peyi Tasis yo, y'ap fè fon ak tout bèl bagay yo. ¹⁷ P'ap gen moun k'ap gonfle lestonmak yo sou moun ankò! P'ap gen moun k'ap fè awogan ankò sou moun! Lè jou sa a va rive, Seyè a va sèl chèf.

¹⁸ Tout zidòl pral disparèt nèt ale. ¹⁹ Yo pral kache kò yo nan twou wòch. Yo pral fouye twou anba tè pou yo chape anba kòlè Bondye. Sezisman va pran yo lè y'a wè Seyè a. Y'a kouri al kache lè pouvwa li ap parèt aklè, lè Seyè a va leve pou l' fè tè a tranble. ²⁰ Jou sa a, moun va pran tout zidòl yo te fè an ajan ak an lò pou fè sèvis pou yo, y'a voye yo jete bay rat ak chovsourit. ²¹ Lè Seyè a va vini pou l' fè tè a tranble, yo pral kache kò yo nan twou wòch, yo pral fouye twou anba tè. Sezisman va pran yo lè y'a wè Seyè a. Y'a kouri al kache lè pouvwa li ap parèt aklè. ²² Pa mete konfyans nou nan moun parèy nou! Talè yo pa pèdi souf yo, yo pa mouri! Lè sa a, kisa yo ka fè pou nou ankò?

Chapter 3

¹ ¶ Wi. Seyè a, Bondye ki gen tout pouvwa a, pral koupe viv tout moun nan lavil Jerizalèm ak nan peyi Jida. P'ap gen pen, p'ap gen dlo. ² P'ap gen vanyan gason ankò ni sòlda. P'ap gen jij ankò ni pwofèt. P'ap gen divinò ankò ni grandèt. ³ P'ap gen kaptenn, p'ap gen majistra ni moun ki pou bay konsèy. P'ap gen moun ki konn fè maji, ni moun ki konn moute batri. ⁴ M'ap pran jenn timoun san esperyans m'a mete chèf pou gouvènèn yo. ⁵ Tout moun pral chache pwofite yonn sou lòt, zanmi sou zanmi, vwazen sou vwazen. Jennmoun p'ap respekte granmoun. Vakabon ap pase moun debyen nan betiz. ⁶ Yon lè menm, tout yon branch fanmi va chwazi yonn nan mitan yo. Y'a di l' konsa: Ou menm ki gen rad pou ou mete sou ou, n'ap mete ou chèf pou ou ka dirije nou nan move pa n'ap pase koulye a. ⁷ Men, moun yo chwazi a va reponn: Non. Mwen pa dòktè, mwen pa ka fè

anyen pou nou! Ni tou, mwen pa gen manje, m' pa gen rad lakay mwen. Pa mete m' chèf sou pèp
 8
 la. Wi, lavil Jerizalèm bannann! Peyi Jida a nan tou sa ki pa bon! Paske tou sa yo di, tou sa yo fè
 9
 pa dakò ak sa Seyè a vle. Devan tout moun y'ap kenbe tèt ak Bondye ki gen tout pouvwa a. ¶
 Depi ou gade yo, ou wè ki moun yo ye. Tankou moun lavil Sodòm yo, yo fè peche yo aklè pou tout
 10
 moun wè. Se poutèt sa malè ap tonbe sou yo. Se yo menm menm k'ap rale l' sou tèt yo. Se pou
 nou di: Ala bèl bagay pou moun ki mache dwat yo! Zafè yo mache byen tou. Y'a jwi pwofite travay
 11
 yo. Men, pòv mechan yo, malè ap tonbe sou yo. Y'a fè yo peye pou sa yo fè a. Sa fè m' lapenn
 12
 pou pèp mwen an! Se yon timoun k'ap prije yo, se fanm k'ap kòmande yo. Sa fè m' lapenn anpil
 wi pou nou, pèp mwen an! Chèf yo fè nou pèdi chemen nou. Yo mele nou. Nou pa konn ki wout
 13
 pou nou pran. Seyè a kanpe pou l' denonse sa yo fè a. Li pare pou l' jije pèp li a. Seyè a rele
 14
 chèf fanmi yo ak lòt chèf pèp li a nan tribinal. L'ap denonse yo. Li di konsa: Se nou menm ki fin
 15
 piye jaden rezen yo. N'ap vòlò pòv malere yo pou nou plen kay nou. Nou pa gen dwa kraze pèp
 mwen an konsa. Nou pa gen dwa pwofite konsa sou pòv yo. Se mwen menm, Seyè ki gen tout
 16
 pouvwa a, ki pale. ¶ Seyè a di: Gade jan medam lavil Jerizalèm yo ye non! Y'ap mache tankou
 yo pa kanmarad pesonn. Yo kage tèt yo dèyè, y'ap fè mesye yo je dou. Y'ap mache banda pou braslè
 17
 nan pye yo ka sonnen. Men, mwen menm Bondye, m'ap pini yo. M'ap kale tèt yo tou blanch,
 18
 m'ap kite yo san cheve. Jou sa a, Bondye va wete tout bijou yo gen sou yo: braslè yo mete nan
 19
 pye yo, bando yo mare nan tèt yo, meday yo mare sou fwon yo, zanno, braslè yo mete nan bra
 20
 yo, ak vwal yo mete sou tèt yo, mouchwa yo mare tèt yo, ti chenn yo mete nan pye yo, bèl senti
 21
 yo, poban odè yo, bwòch yo, bag yo, zanno pou nen yo, bèl rad swa yo, foula yo, chal yo,
 22
 bous yo, glas yo, rad twal fin yo, madras yo ak vwal dantèl yo mete sou tèt yo. Yo p'ap sèvi
 23
 ak odè ankò, y'ap santi move. Yo p'ap sèvi ak bèl senti ankò. Y'a mare ren yo ak kòd. Yo p'ap gen
 24
 cheve pou yo fè bèl kwafi, tèt yo va kale tou blanch. Yo p'ap gen bèl rad pou mete sou yo, y'a vlope
 25
 kò yo nan sak. Yo p'ap fè figi yo bèl ankò. Y'ap tanpe yo nan figi ak fè wouj tankou esklav. Tout
 26
 mesye yo pral mouri nan lagè. Tout sòlda yo pral mouri nan batay. Moun pral plenn nan pòtay
 lavil yo, y'ap nan lapenn. Lavil la ap tankou yon fanm ki chita atè, san rad sou li.

Chapter 4

1 ¶ Jou sa a, sèt fanm pral kouri dèyè yon sèl gason, y'a di l': -Nou ka bay tèt nou manje. Nou
 ka biye tèt nou. Men, tanpri, kite nou di se mari nou ou ye pou nou pa wont devan moun! 2 ¶ Jou
 sa a, Seyè a va fè tout plant nan peyi a boujonnen ankò. Y'a grandi byen bèl, byen gwo. Tout moun
 nan pèp Izrayèl la ki pa t' mouri va kontan bèl rekòt tè a va bay. Sa va fè yo leve tèt yo. 3 Lè sa a,
 moun ki rete nan sa ki te sou mòn Siyon an, moun ki va chape anba lanmò pami sa ki te lavil
 Jerizalèm lan, y'a rele yo: moun Bondye mete apa pou li. Bondye va kite yo viv lavil Jerizalèm.
 4 Lè Bondye va lave malpwòpte medam yo t'ap fè nan lavil la, lè l'a lave tout san ki te koule nan
 lavil Jerizalèm, Bondye pral rann jijman, li pral pini lavil la. 5 Lajounen, Seyè a va voye yon gwo
 nwaj vin poze sou tout mòn Siyon an ak sou tout moun ki sanble la a. Lannwit, se va lafimen ak
 yon gwo flanm dife la voye. Pouvwa Bondye a pral kouvri yo, l'ap pwoteje tout lavil la. 6 Lajounen,
 l'ap kouvri lavil la pou chalè solèy pa bat li. L'ap pwoteje l' pou loray ak lapli pa fè l' anyen.

Chapter 5

1 ¶ Mwen pral chante yon chante pou nou, yon chante sou zanmi m' ak jaden rezen l' lan. Zanmi
 m' lan te gen yon jaden rezen, sou tèt yon ti mòn ki te gen yon bon venn tè. 2 Li bat tout tè a, li
 wete tout wòch ladan l'. Li plante pi bon kalite pye rezen ladan l'. Apre sa, li bati yon ti kay tou
 won nan mitan jaden an pou veye l'. Li fè yon basen pou kraze rezen yo. Li te kwè jaden an tapral
 ba li bon rezen. Men, se vye rezen si ase li bay. 3 Lè sa a, zanmi mwen an di: -Nou menm moun
 lavil Jerizalèm ak moun peyi Jida yo, nou pral di m' kilès nan nou de a, jaden rezen an ak mwen
 menm, ki antò. 4 Kisa pou m' te fè pou jaden rezen an mwen pa t' fè? Mwen t'ap tann li ban m' bon
 jan rezen. Poukisa se bann vye rezen si sa yo li donneren? 5 Enben! M'ap fè nou konnen sa mapral
 fè jaden rezen mwen an. Mwen pral kraze tout lantiray li a pou bèt antre vin manje l', pou yo kraze
 l' anba pye yo. 6 M'ap fè l' tounen yon jaden yo piye. Yo p'ap netwaye branch li yo, yo p'ap sekle
 l' ankò. Zèb pikan ak raje ap fin anvayi l'. Mwen p'ap kite lapli tonbe sou li. 7 Pèp Izrayèl la, se li
 ki jaden rezen Seyè a, Bondye ki gen tout pouvwa a. Moun peyi Jida yo, se yo ki bon plan li te
 plante a. Li t'ap tann yo mache dwat: Yo lage kò yo nan fè lenjistis. Li t'ap tann yo fè sa ki dwat
 devan je l', men, nan tout peyi a, se rèl malere ase ou tande. 8 ¶ Madichon pou moun k'ap bati kay
 sou kay, pou moun k'ap achte tè pou mete sou sa yo genyen deja! Talè konsa, p'ap gen plas pou lòt
 moun nan peyi a. Yo vle se yo menm ase ki pou rete nan peyi a. 9 Men sèman mwen tande Seyè
 a, Bondye ki gen tout pouvwa a, fè: Tout kay sa yo gen pou yo tounen mazi. Yo te mèt bèl kou yo

10
bèl, yo te mèt gwo kou yo gwo, p'ap gen moun pou rete ladan yo. Jaden rezen ki sou dis kawo tè ap bay yon sèl barik diven. Pou chak dis mamit grenn yo plante, y'a rekòlte yon sèl mamit.

11
Madichon pou moun k'ap leve granmaten pou yo ale chache gwòg pou yo bwè, pou moun k'ap rete byen ta lannwit pou bwè diven jouk yo sou! 12 Lè y'ap fè fèt, se pou gen gita ak bandjo, tanbou ak fif ak barik plen diven. Men, yo pa chache konprann sa Seyè a ap fè, yo pa wè travay l'ap fè a.

13
Pèp la pa konn anyen menm. Se poutèt sa y'ap fè yo prizonye, y'ap depòte yo. Grannèg yo pral mouri grangou. Pèp la menm ap mouri swaf dlo. 14 Peyi kote mò yo ye a ap tann yo konsa. L'ap louvri pòtay li yo byen gran pou l' resevwa yo. Se la tout grannèg yo pral desann ansanm ak pèp

15
la k'ap fè bri ak kè kontan. Yo pral trennen tout moun nan labou. Yo pral fè yo wont. Tout moun ki t'ap gonfle lestonmak yo pral bese je yo atè. 16 Men, Seyè a pral moutre jan li gen pouvwa lè l'a

17
fè sa li gen pou l' fè a. Li pral fè wè jan li se Bondye tout bon ki apa a lè l'a jije pèp li a. Toupatou, nan lavil yo, mouton yo ap mache manje zèb tankou nan savann. P'ap gen pak ankò pou angrese

18
bèt. Tout bèt ap lage. Y'ap mache manje toupatou nan lavil la. ¶ Madichon pou nou! Nou sitèlman renmen mechanste n'ap fè a, n'ap trennen l' dèyè nou kote nou pase. Peche nou yo te mèt gwo, n'ap

19
rale yo dèyè nou tankou bèt k'ap rale kabwèt! Y'ap plede di: Se pou Bondye fè vit! Se pou li prese fè sa l'ap fè a pou nou ka wè l'. Se pou Bondye pèp Izrayèl la ki yon Bondye apa prese fè

20
travay li vle fè a, pou nou ka wè sa li gen nan tèt li. Madichon pou moun ki vle fè byen pase pou mal, mal pase pou byen, pou moun k'ap di fènwa se limyè, limyè se fènwa, pou moun k'ap di

21
bagay anmè dous, bagay dous anmè! Madichon pou moun ki konprann yo gen konesans, pou

22
moun ki mete nan tèt yo yo gen lespri! Madichon pou nou! Lè se boutèy diven pou nou desann,

23
nou pa manke kouraj! Lè se gwòg pike pou nou konpoze, nou pa manke vanyan gason! Men,

24
nou lage moun ki koupab yo pou lajan. Nou pa kite moun k'ap mache dwat yo jwenn jistis. Se sa ki fè y'ap disparèt nou sou tè a tankou pay ak zèb chèch ki boule nan dife. Rasin yo ap pouri anba tè. Van ap pran flè yo, l'ap bwote yo ale tankou pousyè, paske yo pa t' koute lòd Seyè a, Bondye

25
ki gen tout pouvwa a, te ba yo. Yo te meprize kòmandman Bondye pèp Izrayèl la te bay. Se sa ki fè tou, Seyè a te fache anpil sou pèp li a. Li te leve men l' sou yo, li frape yo. Lè sa a, mòn yo tranble. Kadav moun mouri yo ap trennen nan mitan lari tankou fatra. Men, se poko sa toujou! Se

26
atò Seyè a move. Li poko fin ak yo. Seyè a leve drapo l' pou l' bay siyal la. L'ap rele yon pèp ki byen lwen. L'ap soufle byen fò, l'ap rele moun soti jouk lòt bò nèt, nan dènye bout latè. Gade! Y'ap

27
vole konsa, y'ap kouri vini! Pa gen yonn ladan yo ki bouke! Pa gen yonn ladan yo ki fè bitay!

Yo pa konn sa ki rele kabicha, ale wè dòmi! Ren yo toujou mare. Sapat yo toujou mare byen sere
²⁸
 nan pye yo. Pwent flèch yo taye byen fen. Banza yo tou pare pou tire. Pye chwal yo di kou wòch.
²⁹
 Kabwèt yo woule vit tankou van siklòn. Sòlda yo gwonde tankou femmèl lyon. Yo rele tankou
 yon bann ti lyon. Yo gwonde, yo tonbe sou bèt yo pran an, yo pote l' ale. Pa gen moun ki pou rache
³⁰
 l' soti nan bouch yo! Jou sa a, y'ap gwonde sou pèp Izrayèl la. Y'ap fè bri tankou lanmè lè li
 move. Voye je, gade peyi a! Se renk fènwa ak tray pou tout moun. Nwaj nwa bouche toupatou nan
 syèl la!

Chapter 6

¹
 ¶ Lanne wa Ozyas mouri a, mwen wè Seyè a. Li te chita sou yon gwo fotèy byen wo. Ke rad
²
 li te plen tout tanp lan. Yon bann bèt vivan te kanpe fè wonn li. Yo te klere kou flanm dife. Yo
 chak te gen sis zèl, de zèl pou kouvri figi yo, de zèl pou kouvri pye yo, de zèl pou yo vole. ³ Yo
 t'ap pale yonn ak lòt byen fò. Yo t'ap di: -Seyè ki gen tout pouvwa a, li apa! Wi, li apa! Se yon
⁴
 Bondye ki apa vre! Pouvwa li kouvri tout latè. Tout poto kay Bondye a tranble lè bèt vivan yo
⁵
 t'ap rele konsa a. Lafimen te plen tout anndan tanp lan. ¶ Mwen di: -Nanpwen sove pou mwen!
 Jòdi a m'ap mouri vre! Paske tout pawòl ki soti nan bouch mwen se move pawòl. Epi m'ap viv nan
 mitan yon pèp ki pa janm gen bon pawòl nan bouch li. Lèfini, mwen wè Wa a, Seyè ki gen tout
⁶
 pouvwa a, avèk pwòp je m'. Yonn nan bèt vivan yo pran yon chabon dife tou limen ak yon pensèt
⁷
 sou lotèl la, li vole vin bò kote m' avèk chabon dife a nan men li. Li kole l' sou bouch mwen, epi
 li di m' konsa! -Sa a kole sou po bouch ou. Koulye a, ou pa gen peche ankò. Bondye padonnen tou
⁸
 sa ou fè ki mal. Apre sa, mwen tande Seyè a ki t'ap di: -Kilès mwen ta voye la a? Kilès ki ta asepte
⁹
 ale pou nou? Mwen di: -Men mwen. Voye m'! ¶ Epi lè sa a, li di m': -Ale non. Men sa pou ou di
 pèp la: Louvri zòrèy nou jan nou vle, men nou p'ap konprann anyen! Louvri je nou jan nou vle,
¹⁰
 men nou p'ap wè sa k'ap rive! Fè lespri pèp la vin lou! Bouche zòrèy yo! Mare je yo! Konsa, yo
 p'ap ka tande, yo p'ap ka wè, yo p'ap ka konprann. Yo p'ap ka tounen vin jwenn mwen pou m' geri
¹¹
 yo. Lè sa a, mwen di: -Seyè! Kilè sa va sispann? Li reponn mwen: -Lè y'a fin kraze lavil yo. Lè
¹²
 p'ap gen moun ankò ki rete ladan yo. Lè tout kay yo va vid, lè jaden yo va tounen savann. Mwen
 menm, Seyè a, m'a mete tout moun deyò nan peyi a. Tout peyi a pral rete san moun ladan l'.
¹³
 Menm si rete yon sèl moun sou chak dis moun nan peyi a, y'ap toujou disparèt yo. Se va tankou

lè yo koupe pye kajou ak pye bwadchenn. Chouk la ase ki va rete. Chouk sa a va pouse ankò, pèp Bondye a va kanpe ankò.

Chapter 7

¹ ¶ Lè sa a, se wa Akaz, pitit gason Jotam, pitit pitit gason Ozyas, ki t'ap gouvènen nan peyi Jida. Rezen, wa peyi Siri, ak Pekak, pitit Remalya, wa peyi Izrayèl, moute al atake lavil Jerizalèm.

Men, yo pa t' ka pran l'.² Yo pote nouvèl la bay wa peyi Jida a ansanm ak tout fanmi l'. Yo di l': -Lame peyi Siri a gen tan anvayi peyi Efrayim. Wa Akaz ansanm ak tout pèp la te sitèlman pè yo t'ap tranble tankou fèy bwa lè van ap soufle.³ Seyè a di Ezayi konsa: -Pran Chea-Jachoub, pitit gason ou lan, avè ou. Al kontre wa Akaz. W'a jwenn li sou wout ap moute bò kote yo konn lave twal ki fèk tenn yo, nan direksyon kannal ki bay dlo nan rezèwva anwo lavil la.⁴ W'a di l' pou l' fè atansyon pou l' pa pèdi tèt li. Li pa bezwen pè. Li pa bezwen gen kè sote pou de ti bout bwa dife k'ap fè lafimen, ki vle di pou wa Rezen, moun peyi Siri a, ak pou wa Pekaz, pitit Remalya a, k'ap fè kòlè.⁵ Moun peyi Siri yo ansanm ak moun Efrayim yo ak pitit Remalya a ap fè konplo sou do ou.⁶ Yo di y'ap moute atake peyi Jida a. Yo pral kraponnen moun yo, yo pral fè kèk moun nan peyi a pran pozisyon pou yo pou yo ka mete men sou peyi a. Apre sa, yo pral pran pitit gason Tableyèl la, y'ap nonmen l' wa pou gouvènen peyi a.⁷ Enben! Men sa mwen menm, Seyè ki sèl mèt la, mwen di: Sa p'ap mache! Sa p'ap pase konsa!⁸ Poukisa? Lavil Damas se kapital peyi Siri. Rezen se wa lavil Damas. Pou pèp peyi Izrayèl la menm, m' pa ba l' swasanssenkan ankò, peyi yo a ap fin kraze, yo p'ap yon nasyon ankò.⁹ Lavil Samari se kapital peyi Izrayèl la. Pekak, pitit gason Remalya a, se wa lavil Samari. Si nou pa kenbe konfyans nou fèm nan Bondye, nou menm tou nou p'ap chape.¹⁰ ¶ Seyè a voye yon lòt komisyon bay wa Akaz. Li di l' konsa:¹¹ -Mande Seyè a, Bondye ou la, pou li ba ou yon siy. Se ka yon siy ki soti anba tè kote mò yo ye a, se ka yon siy ki soti anwo nan syèl la.¹² Akaz reponn: -Mwen p'ap mande Seyè a anyen. Mwen p'ap sonde l'.¹³ Lè sa a, Ezayi di konsa: -Koute non, moun fanmi David yo! Sa pa kont nou toujou? Jan nou fè moun bouke ak nou pou koulye a nou soti pou nou fè Bondye mwen an bouke ak nou tou?¹⁴ Enben! Se Seyè a menm ki pral ban nou yon siy. Men li: Jenn tifi ki ansent lan pral fè yon pitit gason, l'a rele l' Emannwèl (ki vle di: Bondye avèk nou).¹⁵ Se lèt ak siwo myèl ase l'a manje jouk l'a rive laj pou l' konnen sa ki mal ak sa ki byen.¹⁶ Men, anvan menm ti gason an rive konnen sa ki byen

ak sa ki mal, peyi de wa sa yo k'ap fè ou pè a ap rete konsa san pyès moun ladan yo. ¹⁷ ¶ Seyè a pral fè yon malè sou ou, sou pèp la ak sou tout fanmi David, granpapa ou la, yon malè ki pral pi mal pase lè moun Efrayim yo te separe ak moun Jida yo. L'ap fè wa peyi Lasiri a parèt sou nou.

¹⁸ Lè sa a, Seyè a pral soufle pou moun peyi Lejip yo soti tankou mouch byen lwen, bò dlo larivyè Nil la. L'ap rele moun peyi Lasiri yo pou yo soti tankou lesen myèl lakay yo. ¹⁹ Yo pral vin plen falèz yo ak tout twou wòch yo. Yo pral toupatou nan tout raje, nan tout jaden zèb. ²⁰ Jou sa a, Seyè a ap fè wa peyi Lasiri a soti lòt bò larivyè Lefrat. Li va tankou yon razwa. L'ap vini, l'ap koupe tout bab ou, tout cheve nan tèt ou ak tout plim sou kò ou. ²¹ Jou sa a, chak moun va gen yon gazèl bèf ak de mouton pou yo chak. ²² Lè sa a, bèt yo va bay lèt an kantite, tout moun va bwè lèt plen vant yo. Wi, moun ki va chape anba lanmò nan peyi a va bwè lèt ak siwo myèl ase. ²³ Jou sa a, kote ki te gen mil (1.000) pye rezen, epi ki te vo mil (1.000) pyès an ajan va plen pikan ak raje. ²⁴ Si yon moun pa gen zam nan men l', li p'ap ka pase la. Wi, pikan ak raje pral kouvri tout peyi a. ²⁵ Nan tout mòn kote yo te konn travay ak wou pou plante, pesonn p'ap ka ale la ankò poutèt pikan ak raje. Se bèf y'a lage la, se la mouton yo pral manje.

Chapter 8

¹ ¶ Seyè a pale avè m', li di m' konsa: -Pran yon gwo wòch plat ak yon sizo mason. Ekri pawòl sa yo sou li an gwo lèt: Prese piye, prese devalize. ² Lèfini, mwen pran de moun serye, Ouri, yon prèt, ak Zakari, pitit Jeberekiya a, pou yo sèvi m' temwen. ³ Apre sa, m' al kouche ak madanm mwen. Li vin ansent, li fè yon pitit gason. Seyè a di m' konsa: -W'a rele l': Prese piye, prese devalize.

⁴ Paske, anvan pitit la ka pale pou l' di papa manman, moun peyi Lasiri yo va gen tan pran tout richès moun lavil Damas yo ak tou sa moun Samari yo pran nan piyay, y'a pote yo ale bay wa pa yo a. ⁵ Seyè a pale avè m' ankò, li di m' konsa: ⁶ -Paske pèp la meprize dlo larivyè Siloe a k'ap koule tou dousman, paske yo tranble devan wa Rezen ak wa Pekak, pitit Remalya a, ⁷ mwen menm, Seyè a, m'ap fè wa peyi Lasiri a vin atake yo ak tout fòs li. L'ap vini tankou dlo gwo larivyè Lefrat la lè l'ap desann. L'ap gonfle, l'ap debòde sou tout rivaj li yo. ⁸ L'ap anvayi tout peyi Jida a, l'ap rive ra kou, l'ap kouvri tout peyi a. Bondye avèk nou! L'ap pwoteje peyi a anba zèl li! ⁹ ¶ Nou menm, moun tout nasyon yo, manyè konn sa! Nou mèt tranble! Nou menm ki rete nan peyi byen

lwen, louvri zòrèy nou! Pare pou nou goumen! Men, konnen nou anba kou! Wi, mwen di nou pare
 pou nou goumen. Men, konnen nou anba kou! ¹⁰ Nou mèt fè plan nou. Men, sa p'ap mache! Nou
 mèt pale jan nou vle. Men, sa p'ap sèvi nou anyen, paske nou menm patizan Bondye yo, se Bondye
 ki avèk nou! ¹¹ Wi, Seyè a lonje men l', li pran m'. Li tou pale m' pou m' pa swiv chemen pèp la
 t'ap swiv la. Li di m' konsa: ¹² Pa rele konplo sa pèp la rele konplo. Ou pa bezwen pè sa pèp la pè
 a. Wi, ou pa bezwen gen kè sote. ¹³ Chonje, se mwen menm, Seyè ki gen tout pouvwa a, pou nou
 konsidere tankou Bondye apa a! Se mwen menm pou nou pè. Se pou mwen nou dwe gen krentif.
¹⁴ Paske se mwen menm ki yon Bondye apa. M'ap tounen yon wòch k'ap fè nou bite, yon wòch
 k'ap fè moun peyi Izrayèl yo ak moun peyi Jida yo tonbe! M'ap tounen yon move pa, yon pèlen
 pou moun lavil Jerizalèm yo. ¹⁵ Anpil moun pral bite, y'ap tonbe, y'ap kase ren yo. Y'ap tonbe nan
 pèlen an, y'ap pran ladan l'. ¹⁶ ¶ Se pou patizan m' yo kenbe pawòl Bondye di m' lan. Se pou yo
 kenbe lòd Bondye yo nan kè yo! ¹⁷ Seyè a vire do l' bay moun fanmi Jakòb yo. Men, mwen menm
 m'ap konte sou li, m'ap mete tout espwa m' nan li. ¹⁸ Men mwen ansanm ak tout pitit Seyè a ban
 mwen yo! Seyè ki gen tout pouvwa a, li menm ki rete sou mòn Siyon an, li fè nou tounen yon siy
 nan mitan pèp la pou nou moutre sa ki pral rive. ¹⁹ Si pèp la mande nou pou n' al kay divinò ak
 moun k'ap rele mò, yon bann moun k'ap pale chwichwi pou moun pa ka konprann, si yo di nou:
 Eske moun pa gen dwa mande bondye yo sa pou yo fè? Eske yo pa gen dwa al rele mò yo pou
 vivan yo? ²⁰ W'a reponn yo: Koute pawòl Seyè a, koute sa li te moutre nou an! Si nou koute moun
 k'ap di nou fè lòt bagay, n'ap toujou rete nan fènwa. ²¹ Moun pral pwonmennen mache nan tout
 peyi a, y'ap dekouraje, y'ap grangou. Grangou pral fè yo move, y'a rive rele madichon pou wa yo
 a ansanm ak Bondye yo a. Y'a leve je yo gade nan syèl, ²² y'a bese je yo gade atè. Toupatou se va
 renk kè sere ak fènwa, yon fènwa k'ap fè kè tout moun kase. Y'ap pèdi nan gwo fènwa. Tout moun
 nan peyi a te mèt gen kè kase, rive yon lè sa gen pou chanje, fènwa a p'ap toujou rete la.

Chapter 9

¹ ¶ Te gen yon lè, peyi fanmi Zabilon yo ak peyi fanmi Neftali yo t'ap drive nan labou. Men
 pita, va rive yon lè tout rejyon an, pran depi lanmè Meditèrane rive bò larivyè Jouden, moute peyi
 Galile kote moun lòt nasyon yo rete a, tout rejyon an va kanpe ankò. ² Pèp ki t'ap mache nan fènwa
 a wè yon gwo limyè. Yo te rete nan yon peyi kouvri ak fènwa. Men, koulye a yon limyè vin klere

³
yo! Ou fè yo vin anpil, Seyè! Ou ba yo gwo kè kontan. Yo te kontan wè sa ou fè pou yo, tankou moun k'ap fè fèt lè sezon rekòt, tankou moun k'ap fè gwo fèt lè y'ap separe sa yo pran nan lagè.

⁴
Paske ou kraze bout bwa ki te mare dèyè kou yo a, baton ki t'ap peze zepòl yo a! Wi, Seyè! Ou kraze bout fè nan men moun ki t'ap fè yo pase tray la, tankou jou lè ou te kraze moun Madyan yo!

⁵
Tout soulye sòlda ki t'ap plede fè bri yo, tout rad sòlda ki te plen san yo, yo pral boule sa nan dife.

⁶
Nou gen yon ti pitit ki fenk fèt. Bondye ban nou yon gason. Se li menm ki pral chèf nou. Y'a rele l': Bon konseye k'ap fè bèl bagay la, Bondye ki gen tout pouvwa a, Papa ki la pou tout tan an, Wa

⁷
k'ap bay kè poze a! Gouvènman li p'ap gen finisman. Nan peyi l'ap gouvènen an se va kè poze san rete. L'ap chita sou fotèy wa David la. L'ap gouvènen peyi wa David la. L'ap fè gouvènman an byen chita, l'ap ba li bon pye paske l'ap fè sa ki dwat. Li p'ap nan patipri, depi koulye a jouk sa

kaba. Se Seyè ki gen tout pouvwa a ki soti pou fè tou sa rive vre! ¶ Seyè a fè konnen desizyon l'

sou peyi Izrayèl la ak sou moun fanmi Jakòb yo. ⁹ Tout pèp Izrayèl la, tout moun ki rete lavil

Samari yo va konn sa l' te di a. Men, yo sitèlman gen lògèy, yo sitèlman awogan, y'ap di: ¹⁰ Kay brik yo kraze, n'a bati lòt ak wòch taye. Yo koupe poto sikomò yo jete, n'a fè lòt ak bwa sèd mete

nan plas yo. ¹¹ Seyè a fè lènmi pèp Izrayèl la leve dèyè l'. L'ap fè chèf lame wa Rezen lan atake l'.

¹² Peyi Lasiri sou bò solèy leve, peyi Filisti sou bò solèy kouche, y'ap devore pèp Izrayèl la ak gwo

koutdan. Men, se poko sa toujou! Se atò Seyè a move. Li poko fin regle ak yo. ¹³ Pèp Izrayèl la

pa chanje. Yo pa tounen vin jwenn moun ki t'ap pini yo a, Seyè ki gen tout pouvwa a. ¹⁴ Yon sèl

jou a, Seyè a ap koupe ni tèt pèp Izrayèl la ni ke l'. L'ap pini tout chèf pèp la, gwo kou piti. ¹⁵ Chèf

fanmi yo ak notab yo, se yo ki tèt pèp la. Ke a menm, se pwofèt yo, papa mantò! ¹⁶ Moun k'ap

dirije pèp la fè l' pèdi chemen l'. Pèp la lage kò l' nan bwa. ¹⁷ Se poutèt sa, Seyè a p'ap pran priyè nan men jenn gason yo. L'ap san pitye pou timoun ki san papa yo ak fanm ki pèdi mari yo, paske se tout pèp la nèt ki pa gen respè pou Bondye, yo tout ap fè mechanste. Se renk move pawòl ase

ki nan bouch yo. Men se poko sa toujou! Se atò Seyè a move. Li poko fin regle ak yo. ¹⁸ Mechanste kaye nan mitan pèp la, tankou dife nan pikan ak nan raje. Dife a pran nan rakbwa yo, yo tounen

lafimen k'ap moute nan syèl la. ¹⁹ Seyè ki gen tout pouvwa a te sitèlman move, li fini ak peyi a.

Se tankou yon dife k'ap boule tout moun nan peyi a. Pesonn pa ka sove pesonn. ²⁰ Yo vire adwat, yo pran sa yo jwenn, yo grangou toujou. Yo vire agoch, yo devore sa yo jwenn, se atò yo grangou.

Yo menm rive manje pwòp pitit yo! ²¹ Moun Manase yo ak moun Efrayim yo, yonn ap devore lòt.

Lèfini, yo mete tèt ansanm pou atake moun Jida yo. Men, se poko sa toujou! Se atò Seyè a move.
Li poko fin regle ak yo!

Chapter 10

¹ ¶ Madichon pou chèf k'ap bay move lòd pou kache lenjistis y'ap fè, k'ap ekri move lwa pou
² peze pèp la! Se konsa, yo enpoze pòv malere yo defann dwa yo. Yo fè jijman ki pou ta nan avantaj
 pèp la tounen nan avantaj pa yo. Y'ap piye fanm ki pèdi mari yo, y'ap vòlò byen timoun ki san papa
³ yo! Kisa n'a fè lè Bondye va fè malè soti byen lwen vin tonbe sou nou? Kay ki moun n'a kouri
 al chache sekou ak pwoteksyon? Ki kote n' aval kache tout richès nou yo? ⁴ Adye! Y'ap fè nou
 prizonye. Y'ap depòte nou, si nou pa gen tan mouri nan lagè. Men, se poko sa toujou. Se atò Seyè
⁵ a move. Li poko fin regle ak yo! ¶ Seyè a di: -Madichon pou peyi Lasiri a! Paske, l'ap tankou
 yon baton nan men m' pou m' pini pèp la. M'ap sèvi avèk pouvwa ki nan men l' lan pou m' fè pèp
⁶ la wè jan m' ankòlè. Mwen te voye l' kouri al atake yon nasyon ki derespekte m'. Mwen te ba li
 manda pou l' regle yon pèp ki te fè m' fache anpil, pou l' pase men pran tou sa yo genyen, pou l'
⁷ piye yo, pou l' pilonnen yo anba pye l' tankou pousyè nan lari. Men, wa peyi Lasiri a pa t' wè
 bagay la konsa. Se pa konsa li te konprann li. Paske lide li te met nan tèt li se kraze brize, se disparèt
⁸ anpil anpil nasyon. Li t'ap plede di: Tout chèf lame mwen yo se wa yo ye nan lòt peyi! ⁹ Mwen
 pran lavil Kalno menm jan mwen te pran lavil Kakemich. Mwen pran lavil Amat menm jan mwen
 te pran lavil Apad. Mwen pran lavil Samari menm jan mwen te pran lavil Damas. ¹⁰ Menm jan
 mwen te leve men m' pou m' te pini peyi k'ap sèvi zidòl yo, peyi ki te gen plis estati zidòl pase lavil
¹¹ Jerizalèm ak lavil Samari, menm jan nou wè mwen te aji ak Samari ak zidòl li yo, se konsa m'ap
¹² aji ak lavil Jerizalèm ak pòtre l'ap adore yo. Men sa Seyè a di: Lè m'a fin fè sa m'ap fè a sou
 mòn Siyon ak nan lavil Jerizalèm, m'ap pini wa peyi Lasiri a pou pretansyon li mete nan tèt li, pou
¹³ awogans li genyen lè l'ap gade moun. Paske l'ap mache di: Se ak fòs ponyèt mwen mwen fè tou
 sa! Mwen gen bon konprann, mwen gen anpil lespri. Mwen wete bòn ki te make fwontyè pèp yo.
 Mwen devalize tou sa yo te sere. Tankou gwo towò bèf, mwen kraze tout moun ki t'ap viv la yo
¹⁴ anba pye m'. Nasyon latè yo te tankou nich zwezo pou mwen: mwen annik lonje men m', mwen
 pran tout richès yo. Mwen mache toupatou sou latè ap ranmase, tankou moun ranmase ze k'ap drive
 nan nich san gadò. Pa t' gen yonn ki bat zèl li pou fè m' pè. Pa t' gen yon bouch ki louvri pou di m'
¹⁵ anyen, ni pou plenyen. Men sa Seyè a di ankò: Eske yon rach ka pretann travay li fè a se li ki

fè l'? Se pa moun k'ap sèvi avè l' la ki fè l'? Eske yon goyin ka mache di sa l' fè a se li ki fè l'? Moun k'ap sèvi avè l' la pou anyen nan sa l'ap fè a? Se tankou si se fwèt la k'ap kòmande moun ki kenbe

16
l' nan men l' lan, tankou si se baton an k'ap sèvi ak moun ki genyen l' nan men l' lan. Se poutèt sa, Seyè ki gen tout pouvwa a pral voye yon sèl maladi deperi sou bann moun gra sa yo, yon sèl

17
chalè ki pral leve nan tout kò yo, tankou yon gwo dife ki pran sou yo. Bondye ki limyè pèp Izrayèl la pral tounen yon dife. Bondye pèp Izrayèl la ki yon Bondye apa pral tounen yon flann

18
dife. Nan yon sèl jou l'ap boule tout pikan ak tout raje, fè yo tounen sann. Li pral detwi gwo rakbwa yo ak bèl jaden yo nèt. Depi nan rasin yo jouk nan fèy yo, pyebwa yo ap cheche, menm

19
jan yon move maladi souse yon moun jouk li touye l'. P'ap rete anpil pyebwa nan rak li yo ankò.

20
Nenpòt timoun piti ka konte ti rès la. ¶ Yon jou gen pou vini. Lè sa a, ti rès moun pèp Izrayèl la, sa ki te chape anba lanmò nan fanmi Jakòb la, p'ap konte ankò sou pèp ki te twaka fini ak yo a.

21
Y'a mete konfyans yo tout bon nan Seyè a, Bondye pèp Izrayèl la ki yon Bondye apa. Se yon ti ponyen moun ase, yon ti rès nan fanmi Jakòb la k'ap tounen vin jwenn Bondye yo a ki gen pouvwa.

22
Menm si moun pèp Izrayèl yo te anpil tankou grenn sab bò lanmè, se yon ti ponyen ase k'ap tounen. Wè pa wè, y'ap detwi pèp la. Se sa menm li merite. 23
Wi, Seyè ki gen tout pouvwa a pral

24
fè lènmi mache nan tout peyi a pou yo devalize l' jan li te di l'ap fè l' la. ¶ Se poutèt sa, Seyè sèl Mèt ki gen tout pouvwa a di konsa: -Nou menm, pèp mwen ki rete sou mòn Siyon an, nou pa bezwen pè moun peyi Lasiri yo k'ap woule nou anba baton, k'ap leve men yo pou yo frape nou

25
menm jan moun peyi Lejip yo te fè nou an. Talè konsa, m'ap fin regle ak nou. Apre sa, m'ap

26
vire sou yo, m'ap disparèt yo. Mwen menm, Seyè ki gen tout pouvwa a, m'ap pran fwèt pou m' bat yo, menm jan mwen te bat moun peyi Madyan yo bò gwo wòch Orèb la. M'ap fè peyi Lasiri

27
soufri menm jan mwen te fè peyi Lejip soufri a. Lè jou sa a va rive, m'a wete chay sa a sou zepòl nou; m'a delivre nou anba moun peyi Lasiri yo. Nou p'ap nan mizè ankò, n'ap gen tou sa n'a bezwen.

28
Lènmi gen tan rive nan peyi Ajat! Men y'ap travèse peyi Migwon! Yo kite tout zafè yo lavil

29
Mikmas. Yo travèse pas la! Yo pase nwit lan lavil Geba! Moun lavil Rama yo ap tranble. Moun

30
lavil Gibeya yo, peyi wa Sayil la, kouri mete deyò. Nou menm moun lavil Gatim, pete rele! Nou

31
menm moun lavil Layich, mache sou piga nou! Nou menm moun lavil Anatòt, nou nan ka! Moun

32
lavil Madmena yo chape kò yo. Moun lavil Gebim yo al kache. Jòdi a, lènmi an fè yon rete lavil

33
Nòb. L'ap giyonnen moun ki rete sou mòn Siyon yo. L'ap lonje dwèt sou lavil Jerizalèm. Seyè sèl Mèt ki gen tout pouvwa a pral desann yo tankou branch bwa y'ap koupe mete atè. L'ap koupe

tèt tou sa ki wo yo. Tou sa ki byen kanpe yo, l'ap lage yo atè.³⁴ L'ap koupe yo tankou lè y'ap mete rach nan gwo pyebwa nan rak. Bèl pyebwa ki sou mòn Liban yo pral kouche plat atè!

Chapter 11

¹ ¶ Menm jan yon ti plan pouse soti nan rasin yon pyebwa yo koupe, yon ti kreyòl soti nan chouk li, se konsa tou yon wa pral soti nan ras David la.² Lespri Bondye a pral desann sou li. L'ap ba li bon konprann ak lespri. L'ap ba li konesans ak ladrès pou l' dirije. L'ap fè l' konn Seyè a, l'ap fè l' gen krentif pou li.³ L'a pran plezi l' pou l' obeyi Seyè a nan tout bagay. Li p'ap gade sou figi moun pou l' jije yo. Li p'ap rete sou sa yo vin di l' pou l' rann jijman.⁴ L'ap rann jijman pou pòv yo san patipri. L'ap defann dwa pòv malere nan peyi a san paspouki. L'ap denonse sa moun ap fè nan peyi a, l'ap pini yo. L'ap soufle ak bouch li sou mechan yo, l'ap disparèt yo.⁵ L'a gouvènèn pèp la san patipri, l'a dirije pèp la jan sa dwe fèt!⁶ Bèt nan bwa ak mouton va viv ansanm. Tig pral kouche menm kote ak jenn kabrit. Jenn ti bèf ak jenn ti lyon pral manje ansanm. Lèfini, se yon timoun ki pral okipe yo.⁷ Manman bèf ak manman lous va manje ansanm nan menm savann. Ti bèf ak ti lous va jwe ansanm. Lyon va manje zèb tankou bèf.⁸ Ti bebe nan tete va jwe devan twou koulèv. Timoun fèk sevre va lonje men yo nan bouch twou sèpan san anyen p'ap rive yo.⁹ Pesonn p'ap fè mechanste. Pesonn p'ap fè sa ki mal sou mòn ki apa pou Bondye a, sou mòn Siyon an! Paske kè tout moun nan peyi a pral plen konesans Bondye, menm jan fon lanmè a plen dlo.¹⁰ ¶ Yon jou gen pou vini. Lè sa a, ti kreyòl ki va soti nan chouk fanmi Izayi a va kanpe tankou yon siy pou tout nasyon yo. Moun va soti toupatou pou yo vin bò kote l'. Y'a fè lwanj li nan lavil kote l' rete a.

¹¹ Jou sa a, Seyè a va fè wè fòs ponyèt li yon dezyèm fwa ankò. L'a delivre ti rès pèp li a, ponyen moun ki rete nan sa yo te depòte nan peyi Lasiri, nan peyi Lejip, ak nan tout peyi sa yo: Patwès, Letiopi, Elam, Babilòn ak Amat, nan tout peyi lakòt yo ak nan tout zile yo.¹² Seyè a pral leve yon drapo pou l' fè moun lòt nasyon yo wè li pral sanble tout moun pèp Izrayèl yo te depòte yo. L'ap ranmase tout moun pèp Jida ki te gaye toupatou sou latè yo. L'ap mennen yo tounen nan peyi yo.

¹³ Moun peyi Efrayim yo p'ap fè jalouzi ankò. Peyi Jida a p'ap kenbe moun nan kè ankò. Moun peyi Efrayim yo p'ap anvye sò moun Jida yo. Moun Jida yo p'ap lènmi ankò ak moun Izrayèl yo.

¹⁴ Y'ap mete ansanm, yo pral atake moun Filisti yo ki bò solèy kouche, yo pral piye moun k'ap viv bò solèy leve yo. Yo pral donminen sou peyi Edon ak sou peyi Moab. Moun peyi Amon pral soumèt

15
 devan yo. Seyè a pral voye yon van cho ki pral cheche tout dlo gwo larivyè Lejip la. Li pral cheche dlo larivyè Lefrat la. L'ap fè l' tounen sèt ti kannal dlo, konsa tout moun ka janbe l' ak tout sapat nan pye yo. 16
 L'ap louvri yon gran chemen soti peyi Lasiri pou rès pèp li a k'ap viv laba a, menm jan li te fè l' pou pèp Izrayèl la jou yo t'ap soti kite Lejip la.

Chapter 12

1 ¶ Jou sa a, w'a pran chante: -M'ap fè lwanj ou, Seyè! Ou te move sou mwen. Men koulye a, ou pa fache ankò. W'ap ban m' kouraj. 2
 Se Bondye ki delivre m'! Mwen gen konfyans nan li. Kè m' pa kase ankò! Se Seyè a ki tout fòs mwen. Se pou li m'ap chante. Se li menm ki delivre m'!
 3 Menm jan kè pèp la kontan lè y' apral pran dlo nan sous, se konsa y'a kontan lè Bondye ap delivre yo. 4
 ¶ Jou sa a, n'a pran chante: Ann di Bondye mèsi! Ann lapriyè nan pye l'! Fè tout nasyon yo konnen sa li fè. 5
 Chante pou Seyè a, paske li fè gwo mèvèy. Fè tout moun sou latè konn sa! 6
 Nou menm ki rete sou mòn Siyon an, rele, fè fèt! Bondye pèp Izrayèl la se yon Bondye apa, li gen anpil pouvwa. Se nan mitan nou li rete.

Chapter 13

1 ¶ Men mesaj Bondye te bay Ezayi, pitit Amòz la, sou lavil Babilòn: 2
 -Mete yon drapo kanpe sou tèt yon mòn kote pa gen pyebwa menm! Rele byen fò pou sòlda yo pare yo! Leve men ou anlè.
 Ba yo siyal pou y' al atake pòtay lavil grannèg yo! 3
 Se mwen menm, Seyè a, k'ap bay sèvitè m' yo lòd! M'ap rele tout vanyan sòlda mwen yo, tout moun pa m' yo ki gen kè kontan, k'ap mache tèt anlè, pou yo pini moun k'ap fè m' fè kòlè yo. 4
 Koute yon gwo bri sou mòn yo! Se tankou bri yon gwo foul moun, yon kantite nasyon ak moun tout peyi k'ap sanble. Se Seyè ki gen tout pouvwa a k'ap fè enspeksyon lame li a anvan y' al goumen. 5
 Seyè a move, l'ap vini ansanm ak sòlda ki pral fè sa li ba yo lòd fè a. Y'ap soti byen lwen nan lòt peyi ki nan dènye bout latè pou yo vin ravaje tout peyi a. 6
 ¶ Nou mèt plenyen kont kò nou, paske jou Seyè a pre rive! Bondye ki gen tout pouvwa a pral vini pou l' devaste tè a. 7
 Se poutèt sa, tout moun sou latè pèdi kouraj, kè yo kase! 8
 Y'ap rete konsa, yo pral gen doulè ak lakranp nan tout kò yo. Yo pral tòde tankou fanm ansent ki gen

9
 tranche. Yonn ap gade lòt san di krik, y'ap rete ak je yo louvri byen gran tèlman y'a wont. Jou Seyè a ap rive. Seyè a ap san pitye, l'ap fè gwo kòlè, l'ap move anpil. L'ap fè tè a tounen yon dezè, l'ap disparèt dènye moun k'ap fè sa ki mal!¹⁰ Tout grenn zetwal nan syèl la, tout zetwal Oryon yo p'ap klere ankò. Solèy la ap tou nwa lè li leve, lalin lan menm p'ap klere ankò.¹¹ Seyè a di ankò: -Mwen pral fè dezolasyon tonbe sou tout latè poutèt mechanste moun yo ap fè. Mwen pral pini tout mechan yo poutèt fòfè y'ap fè yo. Mwen pral kraze lògèy tout moun k'ap gonfle lestonmak yo.¹² Mwen pral kraze awogans tout mechan k'ap peze moun anba pye yo. Moun k'ap chape yo ap pi ra pase bon lò, pase bon lò ki soti nan peyi Ofi.¹³ Se poutèt sa, jou mwen menm, Seyè ki gen tout pouvwa a, m'a fè move san an, jou m'a fè gwo kòlè mwen an, m'ap fè syèl la tranble, m'ap fè tè a kite plas kote li ye a.¹⁴ Lè sa a, moun lòt nasyon k'ap viv nan peyi Babilòn lan va kouri al lakay yo nan peyi yo, tankou gazèl bèf mawon k'ap kouri pou chasè, tankou mouton san gadò ki gaye nan savann.¹⁵ Y'ap touye tout moun peyi a y'a kontre sou wout yo, y'ap kraze tout moun peyi a y'a bare sou chemen yo.¹⁶ Y'ap krabinen ti pitit yo la devan je yo, y'ap piye kay yo, y'ap fè kadejak sou madanm yo.¹⁷ Seyè a di ankò: -Mwen pral voye moun peyi Medi yo vin atake yo. Se yon bann moun lajan pa di yo anyen, lò pa tante yo.¹⁸ Avèk banza yo, yo pral touye jenn gason. Y'ap san pitye pou timoun fenk fèt. Kè yo p'ap fè yo mal pou timoun piti.¹⁹ ¶ Lavil Babilòn, se yon bijou. Se li ki pi bèl pase tout peyi. Moun peyi Kalde yo plen lògèy, y'ap fè grandizè poutèt li. Men, mwen menm Seyè a, m'ap kraze l' tankou mwen te kraze lavil Sodòm ak lavil Gomò.²⁰ Moun p'ap janm al rete la ankò. L'ap rete san moun pou tout tan. Moun peyi Arabi k'ap mache nan dezè yo p'ap janm moute tant yo bò la, ni ankenn gadò mouton p'ap janm mennen mouton yo vin manje bò la.²¹ Se la tout bèt nan bwa pral rete. Koukou pral fè nich nan tout kay yo. Se la otrich pral fè kay yo. Se la kabrit mawon pral danse kalenda.²² Chen mawon pral wouke nan gwo kay yo. Chat mawon pral pran plezi yo nan bèl palè yo. Lè a prèt pou sonnen pou lavil Babilòn, jou l' prèt pou bout.

Chapter 14

¹ ¶ Wi, kè Seyè a pral fè l' mal pou fanmi Jakòb la. L'ap chwazi pèp Izrayèl la ankò pou pèp pa li. L'ap kite yo rete nan peyi ki pou yo a. Moun lòt nasyon va vin jwenn yo, y'a rete viv ansanm ak moun fanmi Jakòb yo.² Anpil lòt nasyon va ede yo tounen nan peyi Bondye te ba yo a. Moun pèp

Izrayèl yo menm va pran yo ak yo nan peyi Bondye te ba yo a. Y'a fè yo sèvi domestik ak sèvant.
 Moun ki te fè pèp la prizonye, se yo ki pral tounen prizonye pèp la. Pèp Izrayèl la pral donminen
 sou moun ki t'ap peze yo anba pye yo. ³ Seyè a va fè nou jwenn repo apre tout tray, tout tribilasyon
 ak tout mizè yo te fè nou pase. ⁴ ¶ Lè sa a, n'a chante pou nou pase wa lavil Babilòn lan nan betiz,
 n'a di: Gade ki jan moun ki t'ap maltrete nou an disparèt! Gade ki jan yo desann kòlèt li non! ⁵ Seyè
 a kase baton mechan yo. Li kase kokomakak chèf ki t'ap maltrete nou an! ⁶ Lè yo move, yo te konn
 woule pèp la anba kou. Lè yo ankòlè, yo te konn kraze pèp la anba pye yo, yo pa t' ba yo souf.
⁷ Koulye a, tout moun sou latè ap pran souf. Y'ap viv ak kè poze. Toupatou se chante, se kè kontan.
⁸ Pye pichpen ak pye sèd peyi Liban yo kontan sa ki rive wa a. Y'ap di: Depi li tonbe a, pesonn pa
 moute vin mete rach nan dèyè nou ankò. ⁹ Peyi kote mò yo ye a tèt anba pou resevwa ou. Nanm
 tout moun ki te gwo chèf sou latè ap souke kò yo pou ou. Nanm tout wa yo ap leve kanpe sot sou
 fotèy yo. ¹⁰ Yo tout pran pale, y'ap di: Gade! Yo desann ou jan ou te desann nou an. Ou tounen
 tankou nou. ¹¹ Jan yo te konn fè lwanj ou ak bèl mizik dous sou gita! Koulye a, men ou nan peyi
 mò yo. Ou kouche sou yon kabann plen vèmen. Vè kouvri tout kò ou. ¹² Manyè di nou non, ou
 menm ki te klere tankou zetwal bajou a, ki jan ou fè tonbe sot nan syèl la? Ou menm ki te konn
 mache ap kraze nasyon yo anba pye ou, ki jan yo fè jete ou plat atè konsa? ¹³ Ou t'ap di nan kè ou:
 M'ap moute rive jouk nan syèl la. Mwen pral mete fotèy mwen pi wo pase zetwal Bondye yo. Mwen
 pral chita tankou yon wa nan nò sou tèt mòn Randevou a. ¹⁴ Mwen pral moute sou tèt nwaj yo.
 M'ap tankou Bondye ki gen tout pouvwa a. ¹⁵ Men koulye a, yo desann ou nan peyi kote mò yo
 ye a, jouk anba nan twou san fon an! ¹⁶ Mò ki wè ou yo ap fikse je yo sou ou. Y'ap gade ou, y'ap
 di: Se pa moun ki te konn fè tè a tranble a sa? Se pa li ki te konn fè chèf yo tranble a sa? ¹⁷ Se pa
 li ki te kraze tout lavil yo, ki te fè latè tounen yon dezè a sa? Se pa li ki pa t' janm kite moun li fè
 prizonye tounen lakay yo a sa? ¹⁸ Tout wa latè yo kouche nan bèl kavo yo, yon kavo pou yo chak.
¹⁹ Men, ou menm, ou pa menm gen yon tonm. Yo kite kadav ou ap trennen tankou kadav chen nan
 granchemen. L'ap pouri nan mitan kadav sòlda yo touye nan lagè, yo jete l' ansanm ak lòt kadav
 yo nan yon twou wòch, yo pilonnen l' anba pye yo. ²⁰ Yo p'ap antere ou jan yo fè l' pou lòt wa yo,
 paske ou te fini ak peyi ou la, ou te touye pèp ou a. Yo p'ap janm chonje non fanmi lwijanboje sa
 yo! ²¹ Pare pou nou masakre tout pitit wa yo poutèt mechanste papa yo te fè! Pa kite yonn ladan
 yo chape pou yo pa janm vin chèf, pou yo pa janm mache bati lavil toupatou sou latè ankò.

22

Bondye ki gen tout pouvwa a pale, li di konsa: -Mwen pral leve dèyè yo. Mwen pral disparèt lavil Babilòn. Mwen p'ap kite anyen, ni non l', ni moun li yo, tout ras yo, tout pitit yo. Se mwen

menm Seyè a ki di sa. ²³ M'ap fè lavil Babilòn tounen yon marekay. Se zagoudi ase k'ap rete la. Mwen pral bale sa byen bale. M' p'ap kite anyen. Se mwen menm, Seyè ki gen tout pouvwa a, ki

pale. ²⁴ ¶ Seyè ki gen tout pouvwa a fè sèman, li di konsa: -Sa se sèten. Sa m' te fè lide fè a, m'ap

fè l'. Sa m' te deside fè a ap rive vre. ²⁵ M'ap kraze lame wa Lasiri a nan peyi mwen an. M'ap pilonnen l' anba pye m' sou mòn mwen yo. M'ap wete pye l' sou kou pèp mwen an, m'ap wete chay

li te mete sou zepòl yo a. ²⁶ Men sa mwen fè lide fè pou latè. Mwen pral leve men m' pou m' pini

tout nasyon yo. ²⁷ Depi Seyè ki gen tout pouvwa a fin pran yon desizyon, pa gen moun ki ka enpoze

l' fè sa li vle fè a. Li fin lonje men l' pou l' pini, pa gen moun ki ka rete l'. ²⁸ Lanne wa Akaz te

mouri a, men mesaj Bondye te bay lè sa a: ²⁹ -Nou menm, moun peyi Filisti yo, baton ki t'ap bat nou an kase. Men, nou pa bezwen kontan pou sa. Paske, lè yon sèpan mouri gen yon lòt ki pi mechan

pase l' k'ap pran plas li. L'ap kale yon dragon ki gen zèl. ³⁰ Seyè a va tounen yon gadò pou pòv malere ki nan peyi a. L'a fè yo manje, l'a ba yo kote pou yo rete san yo pa bezwen pè ankenn danje.

Men, m'ap voye yon sèl grangou sou ras moun Filisti yo, yo yonn p'ap chape. ³¹ Nou menm k'ap veye pòtay lavil moun Filisti yo, nou mèt plenn kont kò nou! Nou menm ki rete anndan lavil yo, nou mèt pouse kont rèl nou. Nou tout moun peyi Filisti yo, nou mèt tranble nan tout kò nou. Yon

nwaj nwa ap vini soti nan nò. Se yon gwo lame. Pa gen yonn nan sòlda li yo k'ap fè kazwèl! ³² Kisa n'a reponn mesaje moun peyi Filisti yo va voye kote nou an? N'a di yo se Seyè a menm ki mete peyi Siyon an kanpe ankò pou tout bon. Se la tout pèp li a, pèp ki t'ap soufri a, va vin jwenn pwoteksyon.

Chapter 15

1

¶ Men sa Bondye di k'ap rive peyi Moab: -Y'ap detwi lavil A Moab nan yon grenn nwit. Tout peyi Moab la frèt! Y'ap pran yon sèl nwit pou yo detwi lavil Ki Moab la! Apre sa, tout peyi a frèt!

2

Moun peyi Moab yo ap kouri moute lavil Dibon, sou tèt mòn yo pou y' al kriye. Moun peyi Moab yo pral plenn tèlman y'ap nan lapenn pou lavil Nebo ak lavil Medeba. Yo taye tout cheve nan tèt

yo, yo koupe tout bab nan figi yo. ³ Nan tout lari, moun ap mache ak rad sak sou yo. Sou tout plas

piblik, sou teras anwo tout kay, moun ap plenn. Dlo ap koule nan je yo tout. ⁴ Moun lavil Esbon ak moun lavil Eleale ap pouse rèl. Moun tande yo jouk lavil Jakaz. Ata sòlda lame Moab yo ap

tranble. Yo pèdi tout kouraj yo. ⁵ Kè m' ap fann pou peyi Moab! Moun li yo ap kouri al kache jouk lavil Zoa ak lavil Eglat-Chelichiya. Moun ap kriye antan y'ap rale moute ti pant pou rive lavil Loukit la. Moun ap rele antan y'ap kouri met deyò sou wout ki mennen lavil Owonayim lan. ⁶ ¶ Larivyè Nimrim chèch. Tout zèb fin cheche. Fèy pyebwa yo fennen. Tout pyebwa mouri. ⁷ Tout moun ap janbe lòt bò ravin Banbou avèk tou sa yo genyen ak tout pwovizyon yo. ⁸ Toupatou, sou fwontyè peyi Moab la, se rèl. Rèl yo rive jouk nan zòrèy moun lavil Eglayim ak moun lavil Berelim. ⁹ Lavil Dimon, dlo larivyè a wouj ak san! Men Bondye pare yon pi gwo malè pou lavil Dimon. Se la yon lyon pral touye dènye moun peyi Moab ki te resi chape kò yo. Se la tout rèz moun peyi Moab yo pral mouri.

Chapter 16

¹ ¶ Moun peyi Moab yo ap rete lavil Sila nan dezè a, y'ap voye yon mouton fè chèf lavil Jerizalèm lan kado sou tèt mòn Siyon an. ² Y'ap rete tann bò larivyè Anon an. Yo san pozisyon, yo tankou ti zwazo yo mete deyò nan nich yo. ³ Y'ap di moun peyi Jida yo: -Ban nou ti konsèy non! Di nou sa pou nou fè! Pwoteje nou anba zèl ou, tankou yon pyebwa k'ap bay bon lonbray fre gwo midi. Se chape n'ap chache chape kò nou. Tanpri, kache nou. Pa lage nou nan men lènmi nou yo. ⁴ Kite nou rete nan peyi nou an. Pwoteje nou anba moun ki soti pou fini ak nou yo. Moun ki t'ap kraze nou an p'ap la ankò. Piyay la ap fini. Moun ki t'ap pilonnen peyi a anba pye yo a ap disparèt. ⁵ Gouvènman peyi Jida a pral kanpe byen kanpe. Yon chèf pral soti nan ras fanmi wa David la. Li pral moute chita sou fotèy la pou l' dirije pèp la avèk bon kè, san patipri. L'ap soti pou l' fè sa ki dwat devan Bondye. L'ap prese fè tout moun jistis. ⁶ ¶ Moun peyi Jida yo di: -Nou tande jan moun Moab yo se moun ki gen lògèy. Wa pa kouzen yo. Nou konnen jan yo estomake, jan yo gen gwo tanta, jan yo awogan. Men, tou sa se van. Anyen menm! ⁷ Men moun Moab yo pral plenyen sò peyi Moab la. Yo tout pral kriye lè y'a chonje bon pen rezen yo konn jwenn lavil Kyerès. Yo pral plenn, y'ap pèdi tout kouraj yo. ⁸ Gwo jaden peyi Esbon yo pral deperi. Pye rezen lavil Sibma yo ki te konn bay bon diven chèf nasyon yo te konn bwè a pral cheche. Te gen yon lè jaden rezen sa yo te rive jouk bò lavil Jazè. Yo te pouse kouvri tout dezè a. Yo te gaye kò yo toupatou rive lòt bò lanmè Mouri a. ⁹ Se poutèt sa, m'ap kriye pou pye rezen Sibma yo, jan mwen te kriye pou jaden rezen Jazè yo. Dlo ap kouri nan je m' pou Esbon ak Eleale, paske moun ap rele pou bèl rezen yo te konn rekòlte la a. ¹⁰ Nanpwen kè kontan ak fèt nan jaden nou yo! Nan jaden rezen nou yo,

nanpwen chante, nanpwen koudjay ankò! Pa gen rezen pou kraze nan basen kote yo fè ji. Tout fèt
¹¹ kaba! Se poutèt sa, m'a plenn, kè m' fè m' mal pou peyi Moab, mwen nan gwo lapenn pou lavil
¹² Kyerès. Moun peyi Moab yo ap touye tèt yo moute nan mòn. Yo pral nan tanp pou yo lapriyè.
¹³ Men, sa p'ap sèvi yo anyen. Anvan sa, men sa Seyè a te di k'ap rive lavil Moab la. ¹⁴ Koulye
 a, Seyè a pale ankò. Li di konsa: Nan twazan, jou pou jou, tankou moun k'ap travay pou lajan kalkile
 lè travay yo, yo pral pase sa ki fè pouvwa peyi Moab la nan tenten. Atout li gen anpil moun koulye
 a, se de twa ase ki pral rete, yon ti ponyen tou fèb ki p'ap vo anyen!

Chapter 17

¹ ¶ Men sa Bondye di k'ap rive lavil Damas: -Lavil Damas p'ap yon lavil ankò. L'ap tounen yon
² pil demoli. Moun p'ap janm rete nan lavil peyi Siri yo ankò. Se la bèf, mouton ak kabrit pral
 jwenn zèb pou yo manje. Se la y'a rete san pesonn pa chase yo met deyò. ³ Peyi Efrayim lan pral
 rete san anyen pou pwoteje l'. Lavil Damas pral pèdi libète granmoun li. Ti rès moun peyi Siri a
 pral gen menm sò ak ti rès moun pèp Izrayèl yo. Yo pral pèdi bèl pouvwa yo. Se mwen menm,
⁴ Seyè ki gen tout pouvwa a, ki di sa. Seyè a di ankò: -Yon jou gen pou rive. Lè sa a, tout bèl
 pouvwa peyi Jakòb la pral disparèt. L'ap pèdi tout richès li, l'ap vin pòv. ⁵ Peyi Izrayèl la ap tankou
 yon jaden diri mi yo fin koupe, yo ranmase pote ale. L'ap tankou jaden pitimi nan plenn Refayim
 lè yo fin ranmase grap ki tonbe atè apre rekòt la. ⁶ ¶ Se sèlman de twa moun k'ap rete vivan. Peyi
 Izrayèl la ap tankou yon pye oliv apre yo fin keyi tout donn li: se de twa grenn ki rete nan tèt la ak
⁷ kat ou senk sou branch yo. Se mwen menm, Seyè ki gen tout pouvwa a, ki di sa. Jou sa a, moun
⁸ va vire tèt yo bò Bondye ki te kreye yo a, y'a leve je yo gade Bondye pèp Izrayèl la. Yo p'ap vire
 tèt yo bò lotèl zidòl yo te fè ak men yo. Yo p'ap leve je yo gade poto yo te mete kanpe pou Achera,
⁹ zidòl fanm lan, ak lotèl kote y'ap boule lansan an. ¶ Lè jou sa a va rive, moun pral kouri kite tout
 lavil kote yo te konn al chache pwoteksyon yo. Se va tankou lè moun Ivi yo ak moun Amon yo te
¹⁰ kouri kite tout lavil yo devan pèp Izrayèl la. Lavil yo pral tounen savann. Nou menm pèp Izrayèl,
 nou te bliye Bondye ki te delivre nou an. Nou pa t' chonje Bondye ki te pwoteje nou an. Se poutèt
¹¹ sa n'ap plante bèl ti jaden sou kote pou fè sèvis pou zidòl moun lòt nasyon yo. Menm si yo ta
 rive pouse menm jou nou plante yo a, pou menm jou a nan maten yo pran fleri, nou p'ap rekòlte.
¹² Paskè menm jou a tou, y'ap deperi. Se va yon gwo lapenn ki p'ap janm fini. ¶ Ki malè sa a? Yon
 foul moun k'ap toumante kò yo tankou lè lanmè a move. Y'ap bat kò yo fè gwo bri tankou lanm

13

lanmè k'ap frape ak fòs sou rivaj la. Nasyon yo ap bat kò yo tankou lanmè lè li move. Men, Bondye rele dèyè yo, li fè yo kouri al byen lwen. Li bwote yo ale tankou van k'ap leve pousyè sou mòn yo, tankou van siklòn k'ap pote pay ale. ¹⁴ Nan aswè, y'ap bay moun kè sote. Anvan solèy leve, w'ap chache yo, ou p'ap jwenn yo. Men sa k'ap tann tout moun k'ap piye nou yo, moun k'ap pwofite sou nou yo.

Chapter 18

¹ ¶ Lèt bò larivyè peyi Letiopi yo, gen yon peyi kote yo tandè yon bri tankou bri zèl yon bann krikèt. ² Mesaje ap soti nan peyi sa a, y'ap desann larivyè Nil lan nan pipirit fèt ak wozo. Nou menm mesaje yo, mete zèl nan pye nou. Tounen lakay nou. Pote nouvèl la bay moun peyi nou an. Se yon gwo peyi ki fò anpil, ki gen anpil larivyè k'ap koule ladan l'. Al pote nouvèl la bay moun bèl wotè yo, ki gen po yo boule nan solèy. Se yon pèp tout moun pè. ³ Nou tout ki rete sou latè, leve je nou gade. Yo pral bay siyal la ak drapo kanpe sou tèt mòn yo. Louvri zòrèy nou, tandè. Yo pral sonnen klewon an. ⁴ Seyè a di m' konsa: M'ap rete rete m' kote m' ye nan syèl la, m'ap gade anba san m' pa fè ankenn bri, tankou solèy la lè l'ap klere gwo midi, tankou lawouze k'ap tonbe nan mitan chalè lannwit nan sezon rekòt. ⁵ Paske, menm jan anvan rekòt rezen yo, lè yo fin fleri, lè rezen yo pral mi, yo debranche yo ak kouto, yo wete tout ti branch yo, yo ba yo lè, se konsa lènmi yo pral detwi moun peyi Letiopi yo. ⁶ Yo pral kite kadav sòlda yo konsa pou zwezo ki manje vyann epi ki rete nan mòn ak pou bèt nan bwa. Nan sezon chalè, zwezo va vin manje yo. Nan sezon fredè, se bèt nan bwa ki va vin manje yo. ⁷ Lè sa a, bann moun bèl wotè ki gen po yo boule nan solèy, pèp tout moun pè a, moun ki rete nan gwo peyi ki gen fò anpil la, yo menm ki rete nan peyi ki nan tèt dlo larivyè Nil lan, y'a pote kado bay Seyè ki gen tout pouvwa a. Y'a vin jouk sou mòn Siyon an kote moun fè sèvis pou Seyè ki gen tout pouvwa a.

Chapter 19

¹ ¶ Men mesaj Bondye bay sou peyi Lejip la: -Seyè a chita sou yon nwaj k'ap kouri desann bò peyi Lejip la. Zidòl Lejip yo tranble devan l'. Moun peyi Lejip yo gen kè kase. ² Seyè a di: M'ap fè moun peyi Lejip yo leve yonn dèyè lòt. Yo pral goumen yonn ak lòt, vwazinaj ak vwazinaj, vil ak vil, chèf ak chèf. ³ Nou pral fè yo pèdi tèt yo, yo p'ap konn sa pou yo fè. Yo pral rele nan pye

zidòl yo, yo pral kay majisyen, kay divinò ak kay moun k'ap rele mò.⁴ Mwen pral lage moun Lejip
 yo nan men yon chèf ki rèd anpil, nan men yon wa mechan ki pral gouvènen yo. Se mwen menm,
 Seyè ki gen tout pouvwa a, ki di sa!⁵ Dlo larivyè Nil lan pral bese jouk l'a rive chèch nèt.⁶ Kannal
 yo pral santi, dlo kannal yo pral bese jouk yo chèch. Pye wozo ak pye jon yo pral fennen.⁷ Tout
 pyebwa ki pouse, tout jaden yo te plante bò larivyè Nil, depi anwo jouk nan lanbouchi, pral cheche.
 Van pral bwote yo ale, li p'ap kite anyen.⁸ Pechè yo pral plenn, moun ki te konn peche pwason ak
 zen nan larivyè a pral pran lapenn. Moun ki te konn voye privye nan larivyè a pral nan gwo chagren.
⁹ Moun ki te konn fè bèl twal swa yo pral dekouraje. Sa ki te konn tise lenn yo, sa ki te konn tise
 bèl twal blan yo pral nan lafliksyon.¹⁰ Bòs k'ap fè twal yo pral nan gwo tèt chaje. Moun k'ap travay
 yo menm pral nan gwo lapenn.¹¹ Chèf lavil Zoan yo, se yon bann moun sòt! Sa ki pi fò nan moun
 k'ap bay farawon an konsèy yo, se ranse y'ap ranse. Ki jan yo ka fè di wa a se pitit ansyen moun
 lespri ak pitit ansyen wa yo li ye?¹² Farawon, kote moun lespri ou yo? Se pou yo ka di ou sa Seyè
 ki gen tout pouvwa a gen lide fè peyi Lejip pase! Se pou yo ka fè ou konn sa!¹³ Chèf lavil Zoan
 ak chèf lavil Menmfis yo, se yon bann moun sòt! Yo kite moun ap twonpe yo! Yo te la pou mennen
 peyi Lejip sou bon chemen. Yo lage l' nan bwa.¹⁴ Seyè a fè tout moun nan peyi a pèdi tèt yo nèt!
 Sa ki rive? Peyi Lejip pèdi chemen l' nan tou sa l'ap fè, li tankou yon nonm sou k'ap glise tonbe
 nan sa l'ap vonmi an!¹⁵ Nan peyi Lejip, pesonn, rich kou pòv, gwo kou piti, pa ka fè anyen pou
 peyi a ankò.¹⁶ Jou sa a, gason peyi Lejip yo ap tankou fanm: yo pral tranble, kè yo pral kase lè
 y'a wè Seyè ki gen tout pouvwa a ap leve men l' pou pini yo.¹⁷ Peyi Jida a ap fè kè moun peyi
 Lejip yo sote. Chak fwa y'a nonmen non peyi Jida nan zòrèy yo, y'a pè, paske y'a chonje sa Seyè
 ki gen tout pouvwa a te gen lide fè yo pase.¹⁸ ¶ Lè sa a, y'a gen senk lavil nan peyi Lejip kote
 moun va pale ebre. Moun la va pran non Seyè ki gen tout pouvwa a pou fè sèman. Yonn nan lavil
 sa yo va rele Lavil Solèy.¹⁹ Lè sa a va gen yon lotèl pou Seyè ki gen tout pouvwa a nan peyi Lejip.
 Sou fwontyè peyi a, y'ap kanpe yon gwo wòch y'ap mete apa pou Seyè a.²⁰ Sa va sèvi yon mak
 pou fè konnen Seyè ki gen tout pouvwa a kanpe la nan peyi Lejip la. Lè moun va konprann pou fè
 yo pase tray, y'a lapriyè Seyè a mande l' sekou. Seyè a va voye yon moun pou vin delivre yo. L'a
 pran defans yo, l'a sove yo.²¹ Jou sa a, Seyè a va fè moun Lejip yo konnen ki moun li ye. Yo
 menm y'a rekonèt sa, y'a ofri bèt pou touye pou li, y'a ofri rekòt nan jaden yo ba li. Y'a fè Seyè a
 gwo pwomès. Lèfini, y'a kenbe pwomès yo.²² Seyè a gen pou l' pini moun Lejip yo. Men, l'a geri
 yo. Y'a tounen vin jwenn li. Seyè a va koute lè y'ap lapriyè nan pye l', l'a geri yo.²³ Jou sa a, ap

gen yon gwo wout k'ap soti peyi Lejip rive jouk nan peyi Lasiri. Moun peyi Lasiri va vwayaje al nan peyi Lejip, moun peyi Lejip va vwayaje al nan peyi Lasiri. Tou de peyi yo pral sèvi Seyè a.
24

Lè sa a, peyi Izrayèl la va sou menm pye ak peyi Lejip ansanm ak peyi Lasiri: twa nasyon sa yo
25
va yon benediksyon pou tout moun sou latè. Seyè a va beni yo, l'a di konsa: -benediksyon pou Lejip, pèp mwen an, pou Lasiri mwen te fè ak men mwen an, ak pou Izrayèl ki rele m' pa m' lan.

Chapter 20

¹
¶ Sa te pase nan lanne Sagon, wa peyi Lasiri, te bay kòmandan chèf lame li a lòd pou l' te al atake lavil Asdòd nan peyi moun Filisti yo. Epi li pran l'.
² Men anvan sa, Seyè a te pale ak Ezayi, pitit Amòz la. Li te di l': Wete rad sak kòlèt ki sou ou a ak sapat ki nan pye ou la. Se sa menm Ezayi te fè. Se konsa li t'ap mache toutouni pye atè nan lari.
³ Lanne yo te pran lavil Asdòd la, Seyè a di konsa: -Ezayi, sèvitè m' lan, te rete toutouni pye atè pandan twazan. Sa se yon siy ak yon avètisman pou sa ki pral rive peyi Lejip ak peyi Letiopi.
⁴ Wa peyi Lasiri a pral depòte tout prizonye li pral fè nan peyi Lejip ak nan peyi Letiopi. Granmoun kou timoun pral mache toutouni, pye atè ak tout dèyè yo deyò. Sa pral yon wont pou peyi Lejip.
⁵ Moun ki te konte sou peyi Letiopi ak moun ki t'ap fè lwanj peyi Lejip yo pral wont, yo pral dekouraje.
⁶ Lè jou sa a va rive, moun ki rete sou rivaj peyi Filisti a va di: Gade sa ki rive moun sa yo! Epi se sou yo nou te konte, se lakay yo nou te fè lide al chache pwoteksyon pou yo te ka sove nou anba men wa peyi Lasiri a! Koulye a, kote n'ap bay tèt pou n' chape kò nou?

Chapter 21

¹
¶ Men mesaj Bondye bay sou plenn bò lanmè a, nan peyi Babilòn: -Tankou yon van siklòn k'ap bale dezè Negèv la, yon gwo malè pral soti nan peyi san manman yo.
² Mwen fè yon vizyon, mwen wè bagay ki pou bay gwo lapenn lan. Mwen wè moun k'ap trayi, moun k'ap kraze brize! Nou menm lame peyi Elam lan, moute al atake! Nou menm sòlda peyi Medi yo, al sènen lavil li yo!
³ Bondye pral fè moun k'ap soufri anba peyi Babilòn lan sispann plenn. Se poutèt sa, tout zantray mwen ap bouyi! Mwen gen yon sèl doulè anba vant tankou yon fanm ki prèt pou akouche. M'ap tòde. Mwen rete vant ba: mwen pa wè anyen, mwen pa tande anyen.
⁴ Tèt mwen ap vire.

M'ap tranble tèlman mwen pè. Mwen t'ap tann solèy la kouche. Men, lè aswè rive, se te pi mal.
⁵ Nan vizyon an, mwen wè yon tab byen ranje, yo louvri tapi atè pou envite yo chita. Y'ap manje,
y'ap bwè. Yon moman, yo bay yon lòd: Kanpe, chèf lame yo! Pare zam nou pou defann nou! Apre
sa, Seyè a di m' konsa: -Ale non! Mete yon gad veye! W'a di l' pou l' fè ou konnen tou sa la wè.
⁷ Si l' wè kavalye k'ap vini sou chwal yo, de pa de ak yon pati moun sou bourik, yon lòt pati sou
chamo, se pou l' louvri je l' gade byen. ⁸ Gad la rele byen fò: -Mèt, m'ap rete kanpe la nan pòs
mwen tout lajounen. Mwen p'ap deplase kote m' ye a. M'ap veye tout lannwit. ⁹ Lè sa a, yon lame
kavalye parèt. Y'ap mache vini de pa de. Gad la bay nouvèl la. Li di: Lavil Babilòn tonbe! Wi, li
tonbe! Tout estati zidòl yo tonbe plat atè, yo kraze! ¹⁰ Nou menm, pèp mwen an, mwen te fwote
nou anba pye m' tankou moun fwote diri sou glasi. Men, koulye a m'ap fè nou konnen bon nouvèl
mwen te tande a. Se Seyè ki gen tout pouvwa a, Bondye pèp Izrayèl la, ki te fè m' konn sa. ¶
¹¹ Men mesaj Bondye bay pou moun peyi Edon yo: -Yon moun rete peyi Seyi, l'ap rele m'. Li di m':
Ey, gad! Kilè li ye? Konbe tan ankò pou nwit lan bout? Konbe tan ankò anvan solèy leve? ¹² Mwen
reponn: -Bajou prèt pou kase. Men apre sa, se va lannwit ankò. Si nou vle mande sa ankò, tounen
vin mande. ¹³ ¶ Men mesaj Bondye bay pou moun peyi Arabi yo: -Nou menm moun peyi Dedan,
se nan mitan raje ki nan savann Arabi a nou pral moute kan nou pase nwit! ¹⁴ Al kontre moun ki
swaf dlo yo pou ba yo bwè. Moun peyi Tema yo al kontre moun k'ap kouri sove yo, yo pote manje
ba yo. ¹⁵ Moun yo pran kouri pou yo chape anba nepe sòlda ki te soti pou touye yo, anba flèch ki
te tou pare pou pèse yo, anba gwo danje ki te gen nan batay la. ¹⁶ Lè sa a, Seyè a di m' konsa: -Nan
yon lanne, jou pou jou, tankou moun k'ap travay pou lajan kalkile lè travay yo, p'ap rete anyen nan
tout bèl pouvwa peyi Keda a! ¹⁷ Ou tande jan nan peyi sa a gen anpil vanyan sòlda ki konn tire
banza byen? Enben! Se de twa ase ki va rete. Se mwen menm, Seyè a, Bondye pèp Izrayèl la, ki
di sa.

Chapter 22

¹ ¶ Men yon mesaj pou Fon Vizyon an: -Sa k'ap pase konsa? Poukisa tout moun nan lavil la ap
moute sou teras anwo kay yo pou fè fèt konsa? ² Tout lavil la tèt anba. Toupatou se bri, se banbòch.
Moun ki mouri nan mitan nou yo, se pa nan goumen ni nan lagè yo mouri. ³ Tout chèf lame nou
yo vole gadjè. Anvan menm yo te voye yon flèch, yo te gen tan fè yo tout prizonye. Tout moun ki

⁴
 t'ap kouri met deyò yo, yo fè yo tout prizonye tou. Se poutèt sa mwen di: Kite m' pou kont mwen pou m' ka kriye kont kriye mwen! Pa chache konsòle m' pou gwo malè sèk sa a ki tonbe sou pèp
⁵
 mwen an! Jounen jòdi a, se yon jou debandad, se jou yo pèdi batay la, se jou pesonn pa konn sa pou yo fè. Se Seyè ki gen tout pouvwa a menm ki fè sa rive nou. Nan Fon Vizyon an, y'ap kraze
⁶
 miray lavil yo met atè. Nan tout mòn yo, y'ap rele mande sekou. Sòlda peyi Elam yo moute sou cha yo ak sou chwal yo. Banza yo ak flèch yo tou pare, y'ap vini. Lame peyi Ki a pran zam pou
⁷
 pare kou yo. Cha lagè anvayi tout plenn kote nou gen pi bon venn tè jaden. Sòlda yo kanpe sou
⁸
 chwal yo devan pòtay lavil Jerizalèm. ¶ Pa gen anyen ankò pou defann moun peyi Jida yo. Lè sa
⁹
 a, nou kouri al chache zam nan depo zam palè wa a. Nou te wè te gen anpil kote ki fann nan miray
¹⁰
 lavil David la. Nou ranmase dlo k'ap soti nan rezèvwa anba a. Nou mache konte tout kay ki nan
¹¹
 lavil Jerizalèm. Nou kraze de twa ladan yo pou nou fè miray lavil la pi solid. Nou bati yon rezèvwa nan mitan de miray pou ranmase dlo k'ap soti nan Vye Basen. Men, nou pa janm dòmi reve Bondye, li menm ki te fè lide sa a depi lontan, li menm ki lakòz tout bagay sa yo rive konsa.
¹²
 Jou sa a, Seyè ki gen tout pouvwa a te rele nou, li te mande nou pou nou kriye, pou nou plenn, pou nou koupe tout cheve nan tèt nou, pou nou mete rad sak sou nou. Men, gade! Nou pito rete ap ri, n'ap fè fèt, n'ap touye bèf, n'ap touye kabrit ak mouton pou n' manje, n'ap bwè diven. N'ap plede di: Annou manje, annou bwè, paske denmen nou pral mouri. Seyè ki gen tout pouvwa a pale nan zòrèy mwen, li di m': Yo p'ap janm padonnen moun sa yo fòt yo fè la a jouk jou yo mouri.
¹³
¹⁴
 Se mwen menm, Seyè ki gen tout pouvwa a, ki di sa. ¶ Men sa Seyè ki gen tout pouvwa a di m' ankò: -Ale kay Chebna, chèf ki reskonsab kay wa a. Msye te fè fouye yon kavo sou ti mòn lan pou
¹⁵
 lè li mouri. W'a di l' pou mwen: Kisa ou genyen ki pou ou isit la? Ki fanmi ou gen isit la pou
¹⁶
 ou fè fouye yon kavo pou ou nan flan ti mòn lan? Ou mèt grannèg kont kò ou, Seyè a pral pase
¹⁷
 men l' pran ou, l'ap voye ou jete byen lwen. L'ap plòtonnen ou, l'ap fè ou tounen yon boul, l'ap voye ou al teri nan yon pi gwo peyi. Se la l'ap voye ou al mouri nan mitan tout cha ki t'ap fè ou fè
¹⁸
 tout granpanpan sa a. Ou se yon wont pou kay mèt ou a. M'ap kase ou nan plas kote ou ye a,
¹⁹
 m'ap fè ou desann soti kote ou chita a. Lè sa a, m'a voye chache sèvitè m' lan, Elyakim, pitit
²⁰
 gason Ilkija a. M'a pran palto ki sou do ou la, m'a ba li l'. M'a pran senti ki pase nan ren ou lan, m'a mare ren pa l' avè l'. Pouvwa ou te genyen an, m'ap ba li l': l'ap tankou yon papa pou tout moun
²¹
 nan lavil Jerizalèm ak nan peyi Jida. Apre wa a, pitit pitit ki soti nan fanmi David la, se li menm k'ap sèl chèf. M'ap ba li kle pou l' reskonsab kay David la: Lè li louvri, pesonn p'ap ka fèmen. Lè
²²

li fèmèn, pesonn p'ap ka louvri. ²³ M'ap mete l' chita, l'ap tankou yon zegwi bwa yo fè antre byen fon nan yon poto. Li pral sèvi yon lwanj pou fanmi papa l'. ²⁴ Men, tout fanmi l', tout ti fanmi l' yo pral tounen yon chay twò lou pou li. Yo pral pandye nan kou l' tankou gode ak bòl ki pandye nan yon zegwi bwa. ²⁵ Lè sa a, men sa Seyè a, Bondye ki gen tout pouvwa a di: Zegwi yo te fè antre byen fon nan poto a pral rache. L'ap soti, l'ap tonbe atè, epi tout chay ki sou li a pral tonbe tou. Se Seyè a ki di sa.

Chapter 23

¹ ¶ Men yon mesaj pou lavil Tir: -Nou menm maren ki sou batiman Tasis yo, nou mèt plenn sò nou! Lavil Tasis fini. Pa gen kay ankò, pa gen pò! Yo t'ap tounen soti peyi Kitim lè yo pran nouvèl la. ² Nou menm kòmèsan Sidon yo, moun lakòt, nou pral rete men nan bouch. Nou te voye moun lòt bò lanmè ³ achte ble yo rekòlte bò larivyè Nil nan peyi Lejip la, apre sa pou nou mache vann li avèk gwo benefis. Nou t'ap fè kòmès ak tout peyi. ⁴ Lavil Sidon, ou menm ki te yon si bon pò, yo pral fè ou wont! Lanmè a pale, li di konsa: Mwen pa janm gen pitit, mwen pa janm fè pitit. Mwen pa janm gen pitit gason pou m' elve, ni pitit fi pou m' bay levasyon. ⁵ Lè moun Lejip yo va pran nouvèl sa ki te rive lavil Tir, yo pral tranble nan kanson yo! ⁶ Nou menm moun peyi Finisi, moun lakòt, travèse lòt bò lanmè. Al nan peyi Tasis. Nou mèt plenn sò nou! ⁷ Lavil sa a, se pa lavil kote moun te toujou ap fè fèt la? Se pa yon lavil ki la depi nan tan lontan? Se pa lavil ki te konn voye yon koloni moun pa l' yo al tabli nan peyi lòt bò lanmè pou chita pouvwa li plis? ⁸ Se lavil Tir wa a te chita ap nonmen chèf. Tout kòmèsan li yo, se gwo chèf yo te ye. Negosyan l' yo menm, se moun yo te respekte toupatou sou latè. Kilès ki te pran desizyon fè lavil Tir la sa? ⁹ Se Seyè ki gen tout pouvwa a ki te pran desizyon sa a. Li fè sa pou kraze lògèy yo te genyen pou tout bèl bagay yo te fè, pou l' te ka trennen tout grannèg peyi a nan labou. ¹⁰ Nou menm moun li yo ki nan peyi Tasis, pito nou travay tè nou tankou moun bò larivyè Nil yo. Pa gen moun pou pwoteje nou ankò. ¹¹ Seyè a te lonje men l' anwo lanmè a. Li te jete wa ki t'ap gouvènen yo a. Li te bay lòd pou yo detwi tout pò moun Finisi yo te gen nan peyi Kanaran. ¹² Li di: -Nou menm, moun lavil Siyon, nou pa nan fè fèt ankò! Nou tankou yon jenn fi yo ta fè kadejak sou li. Nou mèt leve, travèse lòt bò lanmè. Al nan peyi Kitim. Menm la, yo p'ap kite nou an repo. ¹³ Gade peyi Tir la! Se pa moun Lasiri yo ki te lage l' nan men bèt nan bwa yo. Se moun Babilòn yo ki te fè sa. Se yo ki te bati fò

won byen wo pou sènen peyi a. Yo kraze tout fò lavil Tir yo. Yo fè yo tounen mazi. ¹⁴ Nou menm
 maren ki sou batiman Tasis yo, nou mèt plenn sò nou, paske yo detwi gwo pò nou an! ¶ ¹⁵ Yon lè
 ap rive, yo pral bliye lavil Tir pandan swasannndizan, laj yon wa rive genyen anvan li mouri. Men,
 apre swasannndizan sa yo, lavil Tir pral tankou jennès yo pale nan chante a: ¹⁶ Pran gita ou! Mache
 nan tout lavil la! Ou menm, jennès yo te bliye a! Jwe bèl mizik, chante bèl chante ou yo ankò pou
 yo ka chonje ou! ¹⁷ Wi, apre swasannndizan, Seyè a va kite lavil Tir reprann menm vye kòmès li
 a. Lavil Tir pral lage kò l' nan fè bagay derespektan ankò, li pral nan fè dezòd ak tout chèf k'ap
 gouvènènen toupatou sou latè. ¹⁸ Men, y'ap pran lajan y'ap ba li a ansanm ak benefis l'ap fè nan
 kòmès sal li a, y'ap mete yo apa pou Seyè a. Li p'ap ka ranmase yo pou l' sere. Se moun k'ap sèvi
 Seyè a ki pral sèvi ak lajan sa a pou achte manje plen vant yo ak bèl rad pou mete sou yo.

Chapter 24

¹ ¶ Seyè a pral souke tè a, li pral ravaje l'. Li pral boulvèse l'. Tout moun ki rete sou tè a pral
 kouri gaye toupatou. ² Tout moun pral pase, prèt yo kou moun nan pèp la, esklav yo kou mèt yo,
 sèvant yo kou metrès yo, sa k'ap vann kou sa k'ap achte, sa k'ap bay ponya kou sa k'ap pran ponya,
 sa k'ap bay kredi kou sa k'ap pran kredi. ³ Yo pral ravaje tout tè a, yo pral piye tout bagay. Seyè a
 fin pale, se sa ki pou rive. ⁴ Tout moun sou latè nan lapenn. Yo pa kapab ankò. Pèp la ap plenn,
 y'ap deperi. Chèf yo ap plenn ansanm ak rès pèp la. ⁵ Moun yo pa respekte peyi Bondye a. Yo pa
 koute lòd Bondye ba yo. Yo derefize fè sa l' te mande yo fè a, yo derefize obeyi kòmandman Bondye
 yo. Yo pa kenbe kontra li te fè ak yo pou tout tan an. ⁶ Se poutèt sa madichon ap fini ak latè: moun
 ki rete sou latè ap peye pou sa yo te fè ki mal. Y'ap deperi grenn pa grenn. Se yon ti ponyen ki rete.
⁷ Pye rezen yo ap fennen. Ou pa ka jwenn diven. Tout moun ki te konn fè fèt yo ap plenn. ⁸ Yo pa
 bat tanbou ankò. Pa gen gwo fèt ankò. Yo pa jwe gita ankò. ⁹ Nanpwen chante ankò lè y'ap bwè
 diven. Gwòg vin anmè nan bouch gwògmann yo. ¹⁰ Pa gen moun nan lavil la. Yo kite kay yo ap
 tonbe. Tout pòt kay fèmen, moun pa antre la ankò. ¹¹ Nan tout lari moun ap rele paske nanpwen
 diven ankò. Pa gen fèt rejwisans ankò. Nanpwen kè kontan nan peyi a. ¹² Lavil la ap fini, ata pòtay
 yo fin kraze. ¹³ ¶ Se konsa sa pral ye nan tout peyi sou latè. Se va tankou apre rekòt lè y'ap gole

dènnye oliv ki rete nan pye oliv yo, lè y'ap fè grapyay apre rekòt rezen an. ¹⁴ Sa ki chape yo pral rele, yo pral chante byen fò ak kè kontan. Y'ap rete bò solèy kouche a, yo pral di jan Seyè a gen pouvwa. ¹⁵ Konsa tou, moun ki rete bò solèy leve pral fè lwanj Seyè a. Moun ki rete sou zile nan lanmè a pral fè chante pou Seyè a, Bondye pèp Izrayèl la. ¹⁶ ¶ Byen lwen nan dènnye bout latè, nou tande y'ap chante, y'ap fè lwanj pou moun ki mache dwat yo. Men mwen menm, mwen di: Pa gen rechap pou mwen! Pa gen chape pou mwen! Gade nan kisa m' ye! Trèt yo ap trayi moun toujou! Chak jou y'ap trayi moun pi rèd! ¹⁷ Nou menm ki rete sou latè, se kè sere, se gwo twou, se pèlen ki pare pou nou! ¹⁸ Moun k'ap kouri lè y'a tande rèl moun ki pè yo pral tonbe nan twou. Moun k'ap moute soti nan twou pral pran nan pèlen. Paske gwo lapli a pral tonbe sot nan syèl la. Fondasyon latè pral pran tranble. ¹⁹ Latè pral fann, l'ap pete fè miyèt moso. L'ap tranble, l'ap souke tout kò l'. ²⁰ Latè pral balanse tankou moun sou. Li pral souke tankou yon ti joup a lè van ap soufle fò. Peche lèzòm yo peze lou sou li: l'ap tonbe, li p'ap janm ka leve ankò. ²¹ Jou sa a, Seyè a pral pini zanj yo ki anwo nan syèl la, l'ap pini tout chèf k'ap gouvènen sou latè. ²² L'ap mete yo ansanm nan prizon nan yon tonm. L'ap fèmen yo nan kacho. Apre yon bon tan, l'ap pini yo. ²³ lalin lan pral vin tou nwa. Solèy la p'ap klere ankò, paske Seyè ki gen tout pouvwa a pral sèl wa. Li pral gouvènen nan lavil Jerizalèm sou tèt mòn Siyon an. Tout chèf fanmi pèp li a pral wè gwo pouvwa li.

Chapter 25

¹ ¶ Seyè, se ou ki Bondye mwen! M'a di jan ou gen gwo pouvwa, m'a fè lwanj ou! Ou fè anpil bèl bagay. Plan travay ou te fè nan tèt ou depi lontan an, ou reyalize l' nèt, jan ou te vle l' la. ² Ou fè tout lavil tounen pil wòch, lavil ki te gen gwo ranpa tounen vye kay kraze. Sitadèl lènmi yo te bati a disparèt. Yo p'ap janm ka rebati l' ankò. ³ Se poutèt sa, moun gwo nasyon yo ap fè lwanj ou. Lwijanboje ki rete nan lavil gwo peyi yo va gen krentif pou ou. ⁴ Paske ou te sèvi pwoteksyon pou moun ki fèb, yon pwoteksyon pou malere lè yo te nan tray. Se bò kote ou yo pare lapli. Se anba lonbraj ou yo pare solèy. Lè mechan yo move, yo tankou gwo lapli loraj k'ap tonbe nan tan fredy. ⁵ Yo tankou gwo solèy k'ap boule yon tè sèk. Men, Seyè, ou kase fe lènmi nou yo. Ou fè tout mechan yo fèmen bouch yo. Ou fè yo frèt tankou lè gwo nwaj bare solèy la nan sezon chalè. ⁶ ¶ Seyè ki gen tout pouvwa a pral fè yon gwo fèt sou mòn Siyon an pou tout nasyon ki sou latè, avèk bèl plat

manje byen pare ak bonjan vyann gra. L'ap sèvi bon kalite diven ki la depi lontan. ⁷ Se sou mòn
 sa a li pral wete gwo vwal ki te sou tèt tout nasyon yo, vwal ki te ba yo kè sere a. ⁸ Seyè a pral fè
 pa janm gen lanmò ankò. Li pral siye dlo nan je tout moun. Li pral wete lawont sa a ki te sou pèp
 li a toupatou sou latè. Se Seyè a menm ki di sa! ⁹ ¶ Jou sa a, tout moun va di: Se li menm ki Bondye
 nou. Nou te mete tout espwa nou nan li. Li delivre nou! Se li menm ki Seyè a! Nou te mete konfyans
 nou nan li. Ann fè kè nou kontan. Ann fè fèt, paske li delivre nou. ¹⁰ Seyè a ap pwoteje mòn Siyon
 an. Men, l'ap pilonnen moun peyi Moab yo anba pye l', menm jan yo pilonnen pay nan labou pak
 bèt. ¹¹ Nan mitan labou a, y'a lonje bra yo tankou si yo ta vle naje soti. Men Seyè a pral kraze lògèy
 yo, l'ap defèt tou sa yo te fè ak men yo. ¹² L'ap kraze gwo ranpa byen wo yo te bati sou miray yo,
 l'ap jete yo plat atè, l'ap fè yo tounen pousyè.

Chapter 26

¹ ¶ Jou sa a, pèp la va chante kantik sa a nan peyi Jida: -Koulye a, nou gen yon lavil ki byen
 pwoteje! Bondye bati gwo miray ak ranpa pou l' delivre nou. ² Louvri pòtay lavil yo! Kite nasyon
 ki toujou kenbe pawòl li ak Bondye a, nasyon ki fè sa ki dwat devan Bondye a antre. ³ Ou menm,
 Bondye, w'ap ba yo kè poze! Moun ki toujou kenbe pwomès yo, wi, w'ap ba yo kè poze, paske yo
 mete konfyans yo nan ou! ⁴ Mete konfyans nou nan Bondye pou tout tan paske Seyè a ap toujou
 la pou pwoteje nou. ⁵ ¶ Li fè moun ki te gen gwo lide nan kè yo bese tèt yo byen ba. L'a kraze gwo
 lavil yo te bati pou pwoteje yo a, li demoli l' nèt ratè. ⁶ Pòv yo ak malere yo ap foule l' anba pye
 yo! ⁷ Seyè, ou fè chemen an dous pou moun k'ap mache dwat, ou louvri yon bèl chemen plat pou
 yo. ⁸ Nou vle fè volonte ou, nou konte sou ou. Se ou menm nou anvi wè! Se ou menm n'ap chonje
 tout tan! ⁹ Lannwit, se ou menm m'ap chonje. Lide m' ap travay sou ou. Paske lè w'ap jije sa k'ap
 pase sou latè moun ki sou latè resi konnen sa ki rele jistis. ¹⁰ Si yo fè mechan yo gras se pa sa k'ap
 fè yo konnen sa ki rele jistis. Menm nan peyi kote moun ap mache dwat, y'ap fè sa ki mal. Yo
 derefize rekonèt pouvwa Bondye! ¹¹ Seyè, ou leve men ou pou pini lènmi ou yo, yo pa wè sa. Fè
 yo wè jan ou renmen pèp ou a, epi y'a wont. Fè dife ou pare pou lènmi ou yo devore yo. ¹² ¶ Seyè,
 ou fè nou viv ak kè poze. Paske tou sa nou rive fè, se ou ki fè l' pou nou! ¹³ Seyè, Bondye nou an,

gen lòt chèf ki t'ap dirije nou. Men, se ou menm sèl ki mèt nou, se ou menm sèl n'ap sèvi! ¹⁴ Sa ki mouri yo mouri nèt, lespri yo p'ap leve ankò. Paske, ou pini yo, ou disparèt yo. Ou fè pa gen moun k'ap chonje yo ankò. ¹⁵ Seyè, ou fè nasyon nou an vin pi plis. Ou fè l' vin pi plis, ou laji fwontyè peyi a. Sa fè moun wè jan ou gen pouvwa. ¹⁶ Seyè, lè pèp la te nan tray, se ou menm yo te vin jwenn. Lè ou t'ap pini yo, yo te gen kè sere, se nan pye ou yo t'ap lapriyè. ¹⁷ Seyè, nou t'ap rele nan pye ou, tankou yon fanm ansent ki prèt pou akouche, k'ap tòde, k'ap rele lè tranche a pran l'. ¹⁸ Li nan lapenn, l'ap tòde anba doulè. Men, lè pou l' akouche, li pa fè anyen. Konsa tou, nou te nan lapenn, men, peyi a pa rive sove. Moun ki pou rete nan peyi a pa rive fèt. ¹⁹ Moun pa ou yo ki te mouri pral leve vivan ankò. Kadav yo pral leve mache. Nou menm ki te anba tè, leve non! Chante ak kè kontan. Menm jan lawouze rafrechi latè, se konsa Seyè a pral fè sa ki te mouri depi lontan yo leve vivan ankò. ²⁰ ¶ Ale non, pèp mwen an! Antre lakay nou. Fèmen pòt deyè nou. Kache kò nou pou yon ti tan, jouk kòlè Bondye a va fin pase. ²¹ Seyè a ap met deyò, li pral pini mezi moun sou latè ki fè krim. Yo pral devwale tout krim yo te fè an kachèt. Yo pral dekouvri kadav tout moun yo te touye.

Chapter 27

¹ ¶ Jou sa a, Seyè a pral pran gwo nepe li a ki byen file, byen solid, li pral sèvi avè l' pou l' pini levyatan an, gwo koulèv ki konn kouri kache a, gwo koulèv ki konn tòde kò l' la. L'ap touye dragon k'ap viv nan lanmè a. ² Jou sa a, y'a chante yon chante sou jaden rezen k'ap bay bon diven an. ³ Se mwen menm, Seyè a, k'ap okipe jaden an. Se chak lè m'ap wouze l'. Lajounen kou lannwit m'ap veye l', pou pesonn pa fè l' anyen. ⁴ Mwen pa fache avè l' ankò. Si mwen jwenn pikan ak move raje ladan l', m'a rache yo. M'a sanble yo, m'a boule yo nan dife. ⁵ Men, si lènmi pèp mwen an vle pou m' pwoteje yo, se pou yo vin fè lapè ak mwen. Wi, se pou yo vin fè lapè ak mwen. ⁶ Nan jou k'ap vini yo, fanmi Jakòb la pral pouse rasin ankò, pèp Izrayèl la pral boujonnen, li pral fè flè. Li pral kouvri latè ak donn l'ap bay. ⁷ ¶ Seyè a pa t' pini l' menm jan li te pini lènmi l' yo. Li pa t' touye moun li yo menm jan li te touye moun ki t'ap ansasinen l' yo. ⁸ Pou l' te pini pèp la, li mete yo deyò nan peyi a, li fè depòte yo, li voye yon move van soti nan lès pote yo ale. ⁹ Men, pou l' padonnen peche pèp Izrayèl la, se pou tout wòch lotèl zidòl yo tounen pousyè lacho, se pou yo kraze tout estati zidòl yo ansanm ak lotèl kote yo boule lansan pou yo. Se konsa li p'ap fè yo peye pou sa yo

10 fè a. Lavil ki te gen gwo ranpa ap fin kraze. Pa gen moun ki rete la ankò. Lavil la tounen yon savann. Se la jenn bèf vin rete, se la yo manje, se la yo kouche. Y'ap manje dènye ti pous raje.

11 Branch bwa yo cheche, yo kase. Medam yo ranmase yo pou fè dife. Paske pèp la pa t' konprann anyen, Bondye ki te kreye l' la p'ap gen pitye pou li. Bondye ki te fè l' la p'ap fè l' gras. 12 Jou sa a, tankou lè y'ap bat pwa sou glasi, se Seyè a menm ki pral jije tout moun nan peyi a, depi bò larivyè Lefrat la jouk ravin ki sou fwontyè ak peyi Lejip la. Apre sa, nou menm pitit Izrayèl yo, l'ap ranmase

nou grenn pa grenn, tankou lè y'ap ranmase grenn pwa sou glasi. 13 Wi, jou sa a, y'a kònen gwo twonpèt la. Tout moun ki t'ap deperi nan peyi Lasiri, tout moun yo te depòte nan peyi Lejip yo pral tounen lakay yo. Y'ap vin adore Seyè a sou mòn ki apa pou li a, nan lavil Jerizalèm.

Chapter 28

1 ¶ Madichon pou gwògmann ki alatèt peyi Efrayim lan! Pouvwa yo ap fini tankou bèl flè ki te nan kouwòn yo te mete sou tèt yo a. Madichon pou bèl kapital k'ap deperi sou tèt mòn kote li dominen bon venn tè ki nan plenn lan! Madichon pou nou tout ki anba gwòg nou! 2 Seyè a gen yon moun ki gen fòs, yon moun ki gen pouvwa pou fè travay la pou li. L'ap vini tankou yon gwo lapli k'ap tonbe fòs avès, k'ap fè dlo moute anvayi toupatou. L'ap pran tout bagay nan men l', l'ap leve yo. l'ap fese yo atè. 3 Li pral pilonnen anba pye li sa ki te fè lògèy gwògmann yo, chèf peyi Efrayim yo. 4 Bèl kapital chèf sa yo pral fini kraze sou tèt mòn kote l'ap donminen sou bon venn tè ki nan fon an. Enben, yo pral disparèt tankou premye fig Frans mi ki parèt nan sezon an. Wè yon moun wè l', l'ap pran l', l'ap manje l'. 5 Jou sa a, Seyè ki gen tout pouvwa a pral tankou yon bèl kouwòn flè pou rès moun ki pa mouri yo, yon bèl kouwòn dyaman pou sa ki chape yo. 6 L'a fè moun ki chita nan tribinal yo gen bon konprann pou yo pa fè lenjistis. L'ap bay sòlda yo fòs pou yo ka kilbite lènmi yo lòt bò pòtay lavil la. 7 Ata pwofèt yo ak prèt yo, yo sitèlman sou, y'ap titibe. Yo sitèlman bwè diven ak gwo gwòg fò, y'ap di betiz, y'ap depale. Pwofèt yo twò sou pou yo konprann anyen nan vizyon Bondye ap fè yo wè. Prèt yo ap depale, yo pa konn sa pou yo di lè moun vin mete yon ka devan yo. 8 Yo vonmi sal tout tab kote yo chita a. Pa gen yon ti kote ki pa sal. 9 ¶ Y'ap pale sou mwen, y'ap di: Ki moun l'ap moutre tout bagay sa yo? Ki moun l'ap fè konprann sa Bondye fè l' konnen an? Gen lè se pou timoun ki fèk sevre, timoun ki fèk kite tete? 10 Tankou pwofesè lekòl, l'ap repete lèt apre lèt, liy apre liy, leson apre leson. 11 Si yo pa koute m', Bondye

12
 pral voye yon bann moun k'ap pale yon lòt lang yo p'ap konprann menm pou pale ak yo. Se li menm ki te ban nou yon kote pou n' poze kò nou, yon peyi kote tout moun ki bouke ka jwenn kanpo,

13
 yon peyi kote moun ka viv ak kè poze, men nou derefize koute. Se poutèt sa, Seyè a pral pale ak nou, l'ap repete lèt apre lèt, liy apre liy, lesan apre lesan. Lè sa a, n'a pral bite, nou pral tonbe

14
 sou dèyè, nou pral kase pye nou, nou pral pran nan pèlen, y'ap fè nou prizonye. ¶ Se poutèt sa, nou menm bann awogan ki chita lavil Jerizalèm pou gouvènènen pèp sa a, koute sa Seyè a di nou:

15
 -N'ap fè grandizè deske nou te pase kontra avèk lanmò, nou te siyen papye ak chèf peyi kote mò yo ye a. N'ap plede di lè malè a va rive li p'ap tonbe sou nou, paske avèk fòs manti nou jwenn kote

16
 pou n' cache, avèk fòs plan nou maske kò nou. Se poutèt sa, koulye a, men sa Seyè a di: Gade! Se mwen menm menm k'ap mete yon fondasyon byen fèm, byen solid nan lavil Siyon an. Nan kwen fondasyon an, m'ap mete yon gwo wòch pyè byen chita. Sou li m'ap make: moun ki gen

17
 konfyans nan Bondye p'ap janm gen kè sote. Jistis, se va mèt k'ap sèvi pou mezire fondasyon an. Seriozite, se va nivo k'ap sèvi pou mete l' nivo. Men, gwo van lagrèl la pral kraze kachèt mantò

18
 yo. Dlo inondasyon an pral bwote kachkach nou yo pote ale. Li pral kraze kontra nou te pase avèk lanmò a. Li pral chire papye nou te siyen avèk chèf peyi kote mò yo ye a. Lè malè a vini, l'a

19
 kraze nou. Malè a ap pase sou nou chak maten. N'a gen pou n' sipòte l' lajounen kou lannwit.

20
 Chak mesaj Bondye va fè yo konnen va ba yo sezisman. Jan pawòl la di a, n'ap tankou moun

21
 k'ap chache kouche sou yon kabann twò kout pou yo, anba yon lenn ki manke lajè. Paske Seyè a pral leve kanpe jan l' te fè l' sou mòn Perazim lan, li pral souke kò l' jan l' te fè l' nan plenn Gabawon an, pou l' fè sa li vle fè a, bagay nou pa ta janm kwè, pou l' fin fè travay li, travay nou pa ka konprann.

22
 Koulye a, piga nou pase pawòl mwen yo nan betiz pou yo pa mare nou nan kòd pi rès toujou. Paske, Seyè ki gen tout pouvwa a fè m' konnen li fin pran desizyon l' pou l' detwi tout peyi a. Li

23
 p'ap chanje lide. ¶ Pare zòrèy nou! Tande sa m'ap di nou! Koute byen pawòl k'ap soti nan bouch

24
 mwen! Yon moun k'ap travay tè p'ap janm pase tout tan l' ap raboure, ap kraze bit, ap pare tè

25
 pou plante. Rive yon lè, lè li fin bat tè a, l'ap simen grenn tankou lanni ak kannèl. Apre sa, l'ap plante ble, pitimi ak lòj. Lèfini, sou lizyè jaden an li gen dwa simen lòt grenn tankou pwa chouk.

26
 Li konn sa pou l' fè, paske se Bondye menm ki moutre l' sa pou l' fè. Yo pa janm sèvi ak

28
 woulo pou degrennen lanni osinon kannèl. Men, se avèk yon bout bwa yo bat pitimi ak pwa. Lè y'ap bat ble a pou degrennen l', yo pa bat li san rete. Yo konnen jan pou yo fè woulo a pase sou ble

29
 a san yo pa kraze grenn yo. Tout konesans sa a se nan Bondye ki gen tout pouvwa a li soti. Plan travay li se bèl bagay. Li bay bon konsèy, li gen anpil bon konprann.

Chapter 29

¹ ¶ Mwen wè malè pou lotèl Bondye a, lavil Jerizalèm! Mwen wè malè pou lavil kote David te moute kan li an. Kite ennan, dezan konsa pase, kite tout fèt yo fin pase, ² Seyè a pral voye yon sèl lafliksyon sou lotèl Bondye a. Moun pral rele, yo pral plenn. Lavil la pral tounen yon lotèl Bondye tout bon kote y'ap ofri bèt yo touye pou li. ³ Bondye pral atake lavil la tankou David te fè l' la. Li pral sènen l' ak sòlda. L'ap fèmen l' toupatou. ⁴ Lavil Jerizalèm pral tankou yon moun anba tè k'ap pale. Pousyè tè ap toufe pawòl nan bouch li. Antan li anba tè a, l'ap pale tankou yon zonbi ak yon vwa nan nen tou fèb! ⁵ Men, tout lènmi ou yo pral gaye tankou pousyè nan van. Tout kantite moun ki t'ap fè ou pase tray yo pral disparèt tankou pay van ap bwote. W'ap rete konsa, ⁶ Seyè ki gen tout pouvwa a ap parèt sou ou, avèk gwo van loraj, tranblemanntè, ak yon pakèt gwo bri, avèk siklòn, van tanpèt ak gwo flanm dife k'ap boule. ⁷ Lè sa a, tout bann moun lòt nasyon yo ki t'ap fè lagè avèk lotèl Bondye a, tout gwo lame ki te anvayi peyi a, ki te sènen lavil la, ki t'ap toufounen l' kote l' te ye a, yo tout yo pral disparèt tankou yon move rèv ou t'ap fè, tankou yon vizyon w'ap fè nan mitan lannwit. ⁸ Wi, tout bann moun lòt nasyon yo ki t'ap fè lagè ak lavil Jerizalèm sou mòn Siyon an, y'ap tankou yon moun k'ap mouri grangou epi ki reve l'ap manje. Men, lè li leve, li grangou pi rèd. Osinon, tankou yon moun k'ap mouri swaf dlo, li reve l'ap bwè dlo. Men, lè li leve, li tou fèb, li swaf dlo pi rèd. ⁹ ¶ Nou pral sezi, nou pral rete bèbè! Fèmen je nou pou nou pa wè! Nou pral sou, san nou pa menm bwè. N'ap titibe san nou pa pran yon gout gwòg! ¹⁰ Paske Seyè a fè nou anvè dòm. Li fè je nou vin lou. Pwofèt yo, se je pèp la yo ye! Li kouvri tèt nou. Divinò yo, se tèt pèp la yo ye. ¹¹ Nou pa ka konprann tou sa Bondye fè nou konnen la a. Y'ap tankou yon liv yo sele. Si nou pote l' bay yon moun ki konn li pou nou mande l' li l' pou nou, l'ap reponn nou li pa kapab, paske liv la sele. ¹² Lè ou pote l' bay yon moun ki pa konn li pou ou mande l' li l' pou ou, l'ap reponn ou li pa konn li. ¹³ Seyè a di: -Lè moun sa yo ap fè sèvis pou mwen, se pawòl nan bouch! Y'ap louvri bouch yo pou fè lwanj mwen, men lespri yo byen lwen. Si y'ap mache di yo gen krentif pou mwen, se pawòl granmoun lontan moutre yo y'ap repete lè konsa. ¹⁴ Se poutèt sa, mwen pral fè yon lòt seri mèvèy ak mirak devan je yo. Mwen pral detounen bon konprann moun save yo. Moun lespri yo ak tout konesans yo p'ap konprann anyen. ¹⁵ Madichon pou moun k'ap kache Seyè a sa yo gen lide fè! Y'ap fè plan yo an kachèt. Y'ap di pa gen moun ki wè yo. Pa gen moun k'ap konnen sa y'ap fè. ¹⁶ Nou vire tout bagay lanvè! Kilès ki pi konsekan, moun k'ap fè krich yo osinon tè wouj la? Eske bagay yon nonm fè ka di moun ki fè l' la se pa ou ki fè m'? Eske

yon krich ka di moun ki fè l' la se moun sòt ou ye? ¶ Anvan nou bat je nou, rakbwa peyi Liban
 tounen jaden, jaden tounen rakbwa. ¹⁷ Jou sa a, moun soudè yo va tandè pawòl y'ap li nan liv.
 Avèg yo ki t'ap viv nan fènwa va louvri je yo, y'a wè. ¹⁸ Seyè a va fè tipitit yo gen kè kontan ankò.
 Bondye pèp Izrayèl la, li menm ki yon Bondye apa, va fè malere yo danse tèlman y'a kontan.
¹⁹ Paske lwijanboje a pral jwenn ak bout li. Moun ki t'ap pase Bondye nan betiz la pral disparèt.
 Yo pral fini ak tout moun ki t'ap chache okazyon pou fè sa ki mal, ²⁰ moun k'ap fè inonsan peye
 pou koupab, moun k'ap antrave travay jij yo nan tribinal, moun k'ap bay manti pou moun serye pa
 jwenn jistis. ²¹ Se poutèt sa, koulye a, men sa Bondye pèp Izrayèl la, Bondye ki te delivre Abraram
 lan, di: Moun Jakòb yo p'ap janm wont ankò. Figi yo p'ap dekonpoze ankò. ²² Lè y'a wè pitit mwen
 menm m'ap ba yo nan kò kay yo, y'a rekonèt se yon Bondye apa mwen ye. Y'a rekonèt Bondye
 fanmi Jakòb la se yon Bondye apa. Y'a respekte m', y'a genyen m' krentif. ²³ Moun ki te pèdi tèt
 yo va rive gen bon konprann. Moun ki te toujou ap bougonnen yo va kontan aprann nan men mwen. ²⁴

Chapter 30

¹ ¶ Men sa Seyè a di: -Madichon pou pitit mwen yo k'ap fè tèt di ak mwen! Nan tou sa y'ap fè,
 se pwòp lide yo y'ap swiv, se pa lide pa m'. Y'ap siyen lòt kontra, atout mwen di yo non. Y'ap fè
 peche sou peche. ² Yo desann al nan peyi Lejip san yo pa mande m' konsèy. Y' al mande farawon
 an pou l' pwoteje yo, y' al mete kò yo anba zèl peyi Lejip. ³ Men, farawon an p'ap ka fè anyen pou
 nou. Pwoteksyon peyi Lejip la ap tounen yon wont pou nou. ⁴ Malgre delege yo gen tan rive lavil
 Zoan ak lavil Anès, ⁵ pèp Jida a pral règrèt yo te janm mete konfyans yo nan yon pèp ki pa ka fè
 anyen pou yo, yon nasyon ki pa ka ni ede yo ni pote yo sekou, yon nasyon k'ap fè yo wont, yon
 nasyon k'ap ba yo desepsyon. ⁶ Men yon mesaj Bondye bay sou bèt nan dezè Negèv yo: -Delege
 yo ap vwayaje nan yon peyi ki gen anpil danje, kote lyon ak manman lyon rete, kote gen move
 sèpan ak dragon azèl. Yo chaje bourik yo ak chamo yo avèk kado pou yon nasyon ki pa ka fè anyen
 pou yo. ⁷ Paske konkou Lejip ap ba yo a p'ap sèvi yo anyen, paske li pa vo anyen, se poutèt sa
 mwen bay peyi a yon ti non. Mwen rele l': Dragon dan kase a. ⁸ ¶ Seyè a di m': -Koulye a al ekri
 sa moun sa yo ye a sou yon adwaz. Ekri l' nan yon woulo liv, pou sa ka toujou sèvi m' temwen kont
 yo pou tout tan tout tan. ⁹ Yo toujou ap fè tèt di ak Bondye. Se yon bann pitit ki toujou ap bay

10
 manti, ki pa vle koute lòd Bondye, Seyè a. Y'ap di divinò yo: Pa di nou vizyon nou fè yo. Y'ap di pwofèt yo: Pa fè nou konnen sa nou dwe fè. Di nou bèl pawòl dous k'ap fè nou plezi. Kite nou

11
 ak sa nou kwè a. Wete kò nou sou bon wout la! Fè sou kote! Pa vin pale nou sou Bondye pèp

12
 Izrayèl la ki yon Bondye apa. Se poutèt sa, men sa Bondye pèp Izrayèl la, Bondye apa a, ap di: Nou pa vle koute avètisman m'ap ban nou an. Nou pito met konfyans nou nan moun k'ap fè

13
 mechanste, nan moun k'ap fè bagay sou kote. Se sou yo nou apiye. Enben, se nou ki va pote chay la. Nou tankou yon miray ki make fann, tankou yon gwo miray byen wo ki gen yon pati ladan

14
 l' k'ap souke, ki gonfle prèt pou tonbe. N'ap rete konsa, n'ap tonbe anvan nou bat je nou. N'ap tonbe an miyèt moso tankou kannari kraze. P'ap menm gen yon moso ki ka sèvi pou ranmase chabon

15
 dife osinon pou al chache dlo nan sous. Men, Seyè a, Bondye pèp Izrayèl la, ki yon Bondye apa, te di pèp la: Tounen vin jwenn mwen, lèfini ret trankil, n'a delivre. Ret dousman, met konfyans

16
 nou nan mwen. Se sa ki tout fòs nou. Men, nou pa t' vle. Men nou te pito di: Ann moute chwal nou kouri ale. Enben, ale! Ale non! Sove kò nou! Nou te pito di: n'a moute sou chwal ki konn kouri.

17
 Men tou, sa k'ap kouri dèyè nou yo pral kouri pi vit pase nou! Lè n'a wè yon sèl moun nan lènmi yo, mil nan nou pral kraze rak. Lè n'a wè senk menm, se nou tout k'ap kouri met deyò. Sèl bagay

18
 k'ap rete nan lame nou an, se va drapo n'a kite kanpe sou tèt ti mòn lan. ¶ Men, Seyè a ap tann lè pou l' fè nou gras. Li tou pare pou l' gen pitye pou nou, paske Seyè a, se yon Bondye k'ap toujou

19
 fè sa ki byen! benediksyon pou moun ki mete konfyans yo nan li. Nou menm ki rete lavil Jerizalèm sou mòn Siyon an, nou p'ap kriye ankò. Rele n'a rele l', l'a fè nou gras. Tande l'a tandè

20
 nou, l'ap reponn nou. Bondye va fè nou manje kont mizè nou, l'a fè nou pase kont tray nou, men l'ap la pou l' moutre nou sa pou l' moutre nou an. N'ap wè l' ak de grenn je nou, nou p'ap bezwen

21
 al chache l' ankò. Si nou chankre sou bò dwat osinon sou bò gòch, n'a tandè yon vwa nan do

22
 nou k'ap di nou: Men bon chemen an bò isit. Se la a pou ou pase! N'a pran estati zidòl nou yo ki kouvri ak ajan ansanm ak lò sou tout kò yo pou bagay k'ap mete nou nan kondisyon pou nou pa

23
 ka sèvi Bondye, n'ap voye yo jete tankou vye bagay sal, n'a di yo: Soti devan je nou! Lè n'a plante grenn nan jaden nou, Bondye va voye lapli pou l' fè yo pouse. L'a fè tè a bay manje k'ap bon nan bouch nou, manje k'ap ban nou fòs. N'a gen kont kote pou nou mennen bèt nou yo al manje.

24
 Towo bèf ak bourik k'ap sèvi pou travay tè nou va jwenn bon manje pou yo manje, bon zèb sale

25
 y'a vannan epi y'a ranmase ak fouch mete nan depo. Jou y'a kraze fò lènmi nou yo, jou y'a masakre tout lènmi nou yo, sous dlo pral pete nan tout gwo mòn, nan tout ti mòn koule desann.

26
 Jou Seyè a pral mete renmèd sou kote ki te blese nan pèp la, jou l'ap geri tout kote pèp la te blese

a, lalin pral klere tankou solèy, limyè solèy la menm pral sèt fwa pi klere, ou ta di limyè sèt jou mete ansanm. Wi, tou sa pral rive jou Seyè a. ²⁷ ¶ Pouvwa Bondye a pral vin soti byen lwen. Dife ak lafimen ap fè wè jan li move. L'ap fè kòlè, pawòl li yo tankou boukan dife nan raje. ²⁸ Li fè van soufle, ou ta di yon ravin k'ap desann, dlo li rive rabo. L'ap boulvèse nasyon yo jouk li detwi yo, l'ap detounen tout move lide yo te gen nan tèt yo. ²⁹ Men, nou menm pèp Bondye a, nou pral chante, nou pral fè fèt tankou nou fè l' lavèy jou fèt nou. Nou pral kontan tankou moun k'ap jwe fif lè yo sou wout pou ale sou mòn Seyè a, Bondye k'ap defann pèp Izrayèl la. ³⁰ Seyè a pral fè tout moun tande fòs vwa li, li pral fè yo santi fòs ponyèt li lè li move. Lè sa a, va gen flanm dife, van siklòn, gwo tanpèt, lapli ak tanpèt lagrèl. ³¹ Moun peyi Lasiri yo pral tranble lè y'a tande vwa Seyè a k'ap ba yo baton. ³² Chak fwa Seyè a va ba yo yon kout baton pou l' pini yo, y'a tande son tanbou ak son gita k'ap jwe nan peyi Izrayèl. Se Seyè a menm ki pral goumen ak moun Lasiri yo. ³³ Depi lontan yo te pare yon gwo twou pou dife boukan an. Se ladan l' yo pral boule wa a. Yo fè twou a byen fon, byen laj. Yo plen l' bwa. Seyè a pral soufle yon flanm dife melanje ak souf sou li pou boule l'.

Chapter 31

¹ ¶ Madichon pou moun k'ap desann peyi Lejip al chache sekou! Yo mete konfyans yo nan chwal, nan kantite cha lagè, nan fòs sòlda kavalye. Yo pa dòmi reve Bondye pèp Izrayèl la ki yon Bondye apa. Yo pa chache pwoteksyon bò Seyè a. ² Men tou, Seyè a konn sa l'ap fè. L'ap voye malè sou mechan yo, li p'ap chanje pawòl. L'ap pini mechan yo ansanm ak moun k'ap pwoteje mechan yo. ³ Moun Lejip yo, se moun yo ye, yo pa bondye. Chwal yo tankou tout chwal. Se pa chwal Bondye voye! Seyè a pral lonje men l', moun k'ap bay pwoteksyon an ap bite, moun k'ap chache pwoteksyon an ap tonbe. Y'ap mouri ansanm! ⁴ Men sa Seyè a di m' ankò: -Menm jan yon gwo lyon osinon yon ti lyon ap gwonde lè li fin pran yon bèt, tout gadò yo te mèt mete ansanm pou goumen ak li, yo te mèt rele, sa p'ap fè l' pè, yo te mèt anpil, sa p'ap kraponnen l', konsa tou, Seyè ⁵ ki gen tout pouvwa a pral desann pou l' pran defans mòn Siyon an ak ti mòn ki pou li a. Menm jan zwezo louvri zèl li anwo nich li pou pwoteje pitit li, konsa tou Seyè ki gen tout pouvwa a pral louvri zèl li pwoteje lavil Jerizalèm. L'ap pwoteje l', l'ap delivre l', l'ap pran defans li, l'ap sove l'. ⁶ ¶ Nou menm pèp Izrayèl, nou te vire do ban mwen, nou te kenbe tèt ak mwen anpil. Koulye a, ⁷ tounen vin jwenn mwen! Jou sa a, n'a voye jete tout bann vye zidòl nou te fè an ajan ak an lò ak

men plen san nou yo.⁸ Lagè pral fini ak peyi Lasiri, men se pa moun ki pral fè lagè avè l'. Lè batay la, li pral kouri met deyò, men y'ap pran tout jenn gason l' yo fè yo tounen esklav.⁹ Wa a menm pral kouri met deyò sitèlman l'ap pè. Yon sèl latranblad pral pran chèf lagè li yo, y'ap lage drapo yo atè kouri ale. Seyè a pale, se pou li dife k'ap boule sou mòn Siyon an, se pou li gwo boukan ki nan lavil Jerizalèm lan.

Chapter 32

¹ ¶ Yon jou, va gen yon wa k'ap gouvènen peyi a san patipri. Chèf yo va dirije peyi a jan sa dwe fèt.² Yo chak pral tankou kote moun al kache pou move van, tankou kote moun al kache pou van tanpèt. Y'ap tankou yon sous dlo k'ap koule nan dezè, tankou yon kokenn wòch k'ap bay lonbray kote ki pa gen dlo.³ Je tout moun va louvri pou yo wè sa k'ap pase. Zòrèy tout moun va louvri pou yo konnen sa k'ap fèt nan peyi a.⁴ Moun kè cho yo va pran san yo pou yo konprann anvan yo aji. Moun bege yo pral pale byen klè pou tout moun konprann.⁵ P'ap gen moun k'ap asepte pran moun sòt pou moun debyen, ni bakoulou pou bon moun.⁶ Moun sòt yo ap plede di yon bann vye koze san sans. Y'ap fè move lide nan tèt yo. Konsa, y'ap fè bagay Bondye pa vle moun fè, y'ap bay manti sou Bondye. Yo p'ap janm bay moun ki grangou yon ti manje, yo p'ap janm bay moun ki swaf dlo yon ti gout dlo pou yo bwè.⁷ Bakoulou, se koken k'ap fè mechanste. L'ap fè move plan nan tèt li pou l' woule pòv malere yo anba manti, pou l' enpoze endijan yo jwenn jistis.⁸ Men, bon moun, se toujou sa ki byen l'ap chache fè, li p'ap janm fè anyen ki pa sa.⁹ ¶ Nou menm medam k'ap viv alèz yo, leve non. Koute sa m'ap di! Nou menm medam ki san pwoblèm yo, louvri zòrèy nou tandè sa m'ap di:¹⁰ Bann paresèz, nan ennan ankò, nou pral nan kont traka nou, paske p'ap gen rezen pou nou keyi, p'ap gen rekòt rezen k'ap fèt.¹¹ Bann byennerèz, nou pral nan ka! Bann paresèz, nou pral tranble! Wete rad sou nou, rete toutouni, mare ren nou ak ranyon,¹² paske nou pral nan lapenn lè n'a chonje bèl jaden ak bèl grap rezen nou yo, lè n'a wè se pikan ak raje k'ap pouse nan tout jaden pèp mwen an.¹³ Nou pral kriye lè n'a chonje tout kay kote moun yo te konn gen kè kontan nan lavil ki te gen anpil aktivite a.¹⁴ Kay wa a ap rete san pesonn ladan l'. Tout moun pral kouri kite kapital la. Bit mòn Ofèl la ak fò ki t'ap pwoteje l' la pral tounen savann pou tout tan. Se la bourik mawon pral pran plezi yo, se la kabrit ak mouton pral chache manje.¹⁵ Men, Bondye

gen pou l' voye lespri li desann sou nou ankò. Dezè a va tounen yon bon venn tè. Jaden nou yo va bay bèl rekòt. ¹⁶ Toupatou nan peyi a, nan dezè a kou nan jaden yo, p'ap gen lenjistis, ni patipri. ¹⁷ Paske tout moun ap fè sa ki dwat, y'a viv ak kè poze, san danje ni malè pou tout tan. ¹⁸ Pèp Bondye a va rete lakay yo ak kè poze, san danje. Yo p'ap gen pwoblèm. ¹⁹ Men lagrèl pral tonbe sou gwo rakbwa a. Yo pral kraze lavil la. ²⁰ Ala kontan n'a kontan jwenn kont dlo nou pou fè jaden! Lè sa a, nou p'ap bezwen mete bèf ak bourik nou yo nan kòd ankò!

Chapter 33

¹ ¶ Madichon pou lènmi nou yo! Y'ap devalize nou, pesonn pa devalize yo. Y'ap trayi nou, pesonn pa trayi yo. Men tou, lè y'a fin devalize nou, moun va devalize yo tou! Lè y'a fin trayi nou, moun va trayi yo tou! ² Seyè, pitye pou nou! Se nan ou nou mete tout espwa nou! Pwoteje nou jou apre jou! Delivre nou lè nou anba tray! ³ Lè w'ap goumen pou nou, tandè lòt nasyon yo tandè bri lagè a, yo kouri met deyò, yo gaye. ⁴ Tankou krikèt nan jaden, nou kouri lage kò nou sou tou sa yo genyen, nou ranmase tout bagay pote ale. ⁵ Ala pouvwa Seyè a genyen! Li donminen sou tout bagay! L'ap fè tout moun mache dwat nan lavil Jerizalèm. Pesonn p'ap fè lenjistis sou mòn Siyon an. ⁶ Li p'ap kite anyen rive pèp la ankò. Sa k'ap toujou sove yo, se va bon konprann ak konesans Bondye ap ba yo a. Pi gwo richès yo, se krentif y'a gen pou Seyè a. ⁷ Vanyan gason ap rele anmwe. Moun yo te voye pou siyen lapè yo ap kriye ak gwo lapenn nan kè yo. ⁸ Nanpwen pesonn sou granchemen yo. Moun pa vwayaje ankò. Lènmi yo pa respekte kontra yo te siyen an, yo pa kenbe dizon yo. Y'a manke tout moun dega. ⁹ Peyi a nan lapenn, l'ap deperi. Nan peyi Liban, moun pa konn sa pou yo fè. Gwo rakbwa yo ap cheche. Bèl plenn peyi Sawon an tounen savann. Nan tout peyi Bazan ak peyi Kamèl, tout pyebwa ap pèdi fèy. ¹⁰ Seyè a pale ak lòt nasyon yo, li di yo: -Koulye a, m'ap leve kanpe, m'ap fè nou wè jan m' gen pouvwa, jan m' gen fòs kouraj. ¹¹ N'ap fè yon bann lide nan tèt nou ki pa vo anyen. Se nou menm ankò k'ap touye tèt nou. ¹² M'ap boule nou tankou yo boule wòch pou fè lacho, tankou pikan chèch yo jete nan dife. ¹³ ¶ Se pou tout moun, ni sa ki pre ni sa ki lwen, tandè sa mwen te fè. Se pou tout moun konnen jan m' gen pouvwa. ¹⁴ Nan lavil Siyon, moun k'ap fè sa ki mal yo pral gen kè sere. Moun ki refize fè sa Bondye mande

a pral tranble. Y'ap di: Jijman Bondye se tankou yon gwo dife k'ap boule san rete. Kilès nan nou
 ki ka chape anba yon dife konsa? ¹⁵ Moun k'ap chape, se moun k'ap mache dwat yo, moun ki pa
 nan bay manti, moun ki pa sèvi ak pouvwa yo pou pwofite sou lòt moun, moun ki pa asepte lajan
 sou kote, moun ki pa dakò ak moun k'ap fè plan pou fè mechanste, moun ki pa mele ak moun k'ap
 fè sa ki mal. ¹⁶ Se moun konsa ki pral rive nan lavi. Tankou yon moun ki nan yon gwo fò byen
 wo, anyen p'ap rive l': l'ap toujou jwenn manje pou l' manje ak dlo pou l' bwè. ¹⁷ Yon jou, n'a wè
 yon wa k'ap gouvènen nan mitan yon bann bèl bagay, nan yon gwo gwo peyi. ¹⁸ Lè sa a, n'a chonje
 sa ki te konn fè nou pè a. Nan kè nou, n'a mande: Kote prepoze kontribisyon yo? Kote kontwòlè
 mache yo? Kote moun ki t'ap mache enspekte fò yo? ¹⁹ Nou p'ap wè bann moun awogan sa yo
 ankò, bann moun ki soti lòt peyi, ki pale lòt lang ou pa ka menm konprann, yon lang k'ap kòche
 zòrèy ou. ²⁰ Voye je ou gade lavil Siyon, kote nou fè gwo fèt nou yo! Gade lavil Jerizalèm! Yon
 bon kote pou moun rete san kè sote. L'ap tankou yon tant yo p'ap janm demoute, pikèt li yo p'ap
 janm rache, kòd li yo p'ap janm kase. ²¹ Se la Seyè a pral fè nou wè pouvwa li. M'ap rete bò gwo
 larivyè a ak gwo kannal dlo yo, men ankenn kannòt, ankenn batiman lènmi p'ap ka pase ladan yo.
²² Paske, se Seyè a menm k'ap chèf nou, se li menm k'ap gouvènen nou, se li ki wa nou, se li k'ap
 delivre nou. ²³ Tout kòd batiman yo p'ap sèvi yo anyen. Ma yo pèdi fòs, vwal yo pa ka louvri. Y'ap
 piye tou sa lènmi yo te pote sou batiman yo. Ata moun enfenm pral nan piyay la tou. ²⁴ Pesonn
 nan peyi a p'ap plenyen di li malad ankò. Bondye pral padonnen peche tout moun ki rete lavil
 Jerizalèm.

Chapter 34

¹ ¶ Nou menm moun tout nasyon yo, pwoche pou n' koute! Tout pèp sou latè, louvri zòrèy nou!
 Se pou tout moun ansanm ak tout bagay ki sou latè yo koute! ² Seyè a fache sou tout nasyon yo
 nèt, ansanm ak lame sòlda yo. Li kondannen yo tout pou yo mouri, pou yo touye yo tankou bèt y'ap
 ofri pou touye pou li. ³ Yo p'ap antere kadav moun mouri yo. Y'ap kite yo pouri santi. Tout mòn
 yo pral wouj ak san. ⁴ Tou sa ki nan syèl la, solèy, lalin ak zetwal yo, pral disparèt. Yo pral woule
 syèl la tankou yon woulo papyè pote ale. Tou sa ki nan syèl la pral tonbe tankou fèy pye rezen ak
 fèy pye fig Frans lè y'ap jete fèy. ⁵ Nan syèl la, nepe Seyè a mande san. Men l'ap desann sou peyi
 Edon an pou l' pini moun mwen menm, Seyè a, mwen te kondannen pou mouri. ⁶ Nepe Seyè a pral

benyen ak san yo tankou san mouton ak san bouk yo touye pou li. Li pral kouvri ak grès tankou grès wonyon belye yo touye pou li. Yo pral fè yon ofrann bèt pou Seyè a lavil Bozra. Yo pral fè yon gwo masak nan peyi Edon.⁷ Moun pral mouri tankou gwo towò bèf mawon ak jenn ti towò. Tè a pral plen san, li pral kouvri ak grès.⁸ Paske, se jou Seyè a pral pran revanj li sou lènmi peyi Siyon yo. Se jou li pral fè yo peye sa yo te fè a, pou l' ka delivre moun Siyon yo.⁹ ¶ Tout dlo larivyè nan peyi Edon pral tounen goudwon. Pousyè tè a ap tounen souf. Tout peyi a pral boule tankou goudwon.¹⁰ L'ap boule lajounen kou lannwit. Lafimen pral soti ladan l' tout tan san rete. Tè a ap tounen savann pou tout tan tout tan. Moun p'ap janm pase la ankò.¹¹ Se la koukou ak frize pral fè nich yo. Se la kaou ak malfini pral rete. Seyè a pral fè l' tounen yon dezè san anyen ladan li.¹² P'ap gen grannèg pou chwazi wa ankò pou gouvènè peyi a, tout chèf yo ap disparèt.¹³ Pikan pral pouse nan tout palè l' yo, kwòkachen ak chadwon pral pouse nan tout fò yo. Se la chen mawon pral rete. Se la otrich pral fè nich yo.¹⁴ Bèt k'ap viv nan dezè yo pral kontre ak chen mawon. Mal yo, yonn pral rele lòt. Se la lagrandyab la pral rete. Se la l'a jwenn yon kote pou l' poze kò l'.¹⁵ Se la koulèv pral fè nich yo, se la y'ap ponn. Se la y'ap kouve ze yo, se la y'ap okipe pitit yo. Se la malfini karanklou yo pral sanble.¹⁶ Ale gade nan liv Bondye a. Li sa ki ladan l'. Pa manke yon sèl nan tout bèt li kreye yo. Yo yonn pa pèdi parèy yo. Se Seyè a menm ki bay lòd sa a. Se lespri li k'ap mete yo ansanm yonn ak lòt.¹⁷ Se li menm menm ki pral separe tè a ba yo chak pòsyon pa yo. Y'ap rete nan peyi a pou tout tan. Peyi a va rele yo pa yo jouk sa kaba.

Chapter 35

¹ ¶ Dezè ak tè sèk pral kontan yon sèl kontan. Savann yo pral kontan tou, yo pral fleri.² Dezè pral kouvri ak flè, yo pral fè fèt. Yo pral chante. Yo pral gen gwo pyebwa tankou mòn Liban. Yo pral plen bèl pyebwa tankou mòn Kamèl ak mòn Sawon. Tout moun va wè gwo pouvwa Seyè a. Y'a wè bèl bagay Bondye nou an fè.³ Ankouraje moun ki febli yo! Soutni moun ki gen jenou yo ap tranble!⁴ Pale ak moun ki dekouraje yo. Di yo konsa: Pran kouraj! Pa pè! Men Bondye nou an ap vini! Li pral tire revanj sou lènmi nou yo, li pral fè yo peye sa yo fè. Se limenm menm ki pral fè sa pou l' ka delivre nou.⁵ ¶ Je avèg yo pral louvri. Zòrèy moun soudè yo pral debouche.⁶ Moun enfim nan pye yo pral sote ponpe tankou kabrit. Lang bèbè yo pral lage. Yo pral chante. Sous dlo pral pete toupatou nan tout dezè. Dlo pral koule nan tout savann.⁷ Kote sab la te cho a pral tounen

yon letan. Tè sèk yo pral plen sous dlo. Kote chen mawon te konn rete a se la wozo ak jon pral pouse an kantite. ⁸ Pral gen yon bèl wout pase la. Y'ap rele l': Wout Bondye a! Moun k'ap fè sa ki mal p'ap pase nan wout sa a. Se va sèlman pou moun ki mache dwat yo. Wi, pou yo ase. Ankenn bakoulou p'ap ka detounen moun k'ap swiv chemen sa a. ⁹ P'ap gen lyon sou wout sa a. P'ap gen bèt bwa k'ap pase la. Se moun Seyè a delivre ase ki pral vwayaje sou li. P'ap gen lòt moun ankò! ¹⁰ Moun Seyè a te delivre yo pral tounen. Y'ap rive lavil Siyon ak chante nan bouch yo, ak kè kontan make sou figi yo. Tout moun pral kontan, yo pral fè fèt. Moun p'ap nan lapenn. Ou p'ap tandè plenyen ankò!

Chapter 36

¹ ¶ Ezeqyas te gen katòzan depi li t'ap gouvènen peyi Jida lè Senakerib, wa peyi Lasiri, vin atake tout lavil nan peyi Jida ki te gen gwo ranpa pou pwoteje yo. Li pran yo. ² Apre sa, li bay chèf gad palè li a lòd pou li kite lavil lakis ak yon gwo lame pou l' moute lavil Jerizalèm ale bò kote wa Ezeqyas. Chèf gad palè a rive sou wout ki mennen nan jaden kote yo rense twal ki fenk tenn yo, li moute kan li toupre gwo kannal ki bay dlo nan sitèn anwo lavil la. ³ Twa moun Jida soti vin jwenn li. Se te Elyakim, pitit Ilkija a, ki te chèf moun k'ap travay nan palè a, Chebna, sekretè a, ak Joak, pitit Asaf la, ki te reskonsab achiv leta a. ⁴ Chèf gad palè wa Lasiri a di yo konsa: -Ale di wa Ezeqyas men mesaj gran wa a, wa peyi Lasiri a, voye ba li: Poukisa ou gen tout konfyans sa a? ⁵ Ou konprann ou ka fè lagè ak bèl pawòl ase san ou pa bezwen entèlijans ak bon sòlda? Sou ki moun ou apiye kò ou pou ou kenbe tèt ak mwen konsa? ⁶ Ou al mete konfyans ou nan peyi Lejip! Yon baton wozo tou kase! Anvan ou apiye sou li, l'ap antre nan men ou, l'ap blese ou. Farawon an, wa peyi Lejip ou wè a, se konsa li ye pou tout moun ki fè l' konfyans. ⁷ Nou pral di m' koulye a se nan Seyè a, Bondye nou an, nou mete konfyans nou! Atò, se pa kote nou te mete apa pou li yo ansanm ak tout lotèl li yo wa Ezeqyas te fè disparèt nan peyi a, lèfini li mande pou tout moun peyi Jida ak moun lavil Jerizalèm vin adore devan yon sèl lotèl la? ⁸ Antann nou avèk mèt mwen an, wa peyi Lasiri a. Lèfini, m'ap ban nou demil chwal si nou ka jwenn demil sòlda pou moute yo. ⁹ Ou pa menm gen moun ase pou bat yonn nan pi piti chèf ki sou lòd wa mwen an! Epi, se sou peyi Lejip w'ap konte jwenn cha lagè ak kavalye pou fè lagè! ¹⁰ Epitou, pa konprann se san konsantman Seyè a mwen vin atake peyi a pou m' detwi l'. Se Seyè a menm ki di m' vin atake peyi ou la pou m' detwi l'. ¹¹ ¶ Lè sa a, Elyakim, Chebna ansanm ak Joak di chèf gad palè a: -Tanpri, mèt. Pale lang

arameyen ak nou. Nou konprann lang sa a. Men pa pale ebre. Tout moun ki sou miray la ap koute.

12

Men chèf gad palè a di yo an ebre: -An! Nou konprann se avè wa nou an ansanm ak nou twa la a ase wa mwen an voye m' vin pale pawòl sa yo? Non. Se ak tout moun ki chita sou miray la menm

13

m'ap pale. Yo menm tou pral manje pou pou yo, yo pral bwè pipi yo ansanm ak nou! Lè sa a, chèf gad palè a kanpe, li pran pale byen fò an ebre, li di: -Koute sa gran wa a, wa peyi Lasiri a,

14

voye di nou: Li voye di nou pa kite Ezekyas twonpe nou. Li pa ka sove nou tande! Pa kite l' pran tèt nou lè l'ap di nou nou mèt sèten Seyè a pral sove nou, li p'ap lage lavil la nan men wa peyi

15

Lasiri a. Pa koute wa Ezekyas! Wa peyi Lasiri a mande pou nou fè lapè avè l', pou nou rann tèt nou ba li. Konsa, nou tout n'a manje rezen nan jaden rezen nou, n'a manje fig Frans nan pye fig

16

Frans nou, n'a bwè dlo nan pi nou. Lè wa a va vin isit la, l'a pran nou, l'a mennen nou nan yon lòt peyi ki tankou peyi pa nou an, yon peyi kote ki gen anpil ble pou fè farin ak anpil rezen pou fè

17

diven. Pa kite Ezekyas pran tèt nou pou nou kwè Seyè a va delivre nou. Eske bondye lòt nasyon

18

yo te delivre yo anba men wa peyi Lasiri a? Kote bondye moun Amat yo ak bondye moun Apad

19

yo? Kote bondye moun Sefavayim yo? Eske yo te sove peyi Samari anba men l'? Nan tout bondye sa yo, kilès ki te rive sove yonn nan peyi sa yo anba men l'? Atò, se Seyè a ki ta ka sove

20

lavil Jerizalèm anba men l'? Men pèp la pa louvri bouch li reponn. Yo pa di yon mo paske wa

21

a te bay lòd pou pesonn pa reponn. Apre sa, Elyakim, pitit Ilkiya a, ki te chèf moun k'ap travay nan palè a, Chebna, sekretè a, ak Joak, pitit Asaf la, ki te reskonsab achiv leta a, chire rad sou yo sitèlman sa te fè yo lapenn. Yo tounen al jwenn Ezekyas, yo rapòte l' tou sa chèf gad palè wa Lasiri

22

a te di.

Chapter 37

1

¶ Lè wa Ezekyas tande pawòl sa yo, li chire rad sou li sitèlman sa te fè l' lapenn, li mete yon rad sak sou li, epi li al nan tanp Seyè a. Li voye Elyakim, chèf moun k'ap travay nan palè a, ak Chebna, sekretè a, ansanm ak chèf prèt yo bò kote pwofèt Ezayi, pitit Amòz la. Yo tout te gen rad

2

sak sou yo. Men mesaj Ezekyas te ba yo pou Ezayi: -Jòdi a se yon jou malè pou nou! Bondye ap pini nou. Se yon wont pou nou. Nou tankou yon fanm ansent ki deja kase lezo men ki pa gen fòs

3

pou li pouse pitit la soti. Wa peyi Lasiri a te voye chèf gad palè li a manke Bondye vivan an dega. Se pou Seyè a, Bondye ou la, tande tout jouman sa yo. Se pou l' pini moun ki di pawòl sa yo. Ou

4

menm, se pou ou lapriyè pou rès moun pèp nou an ki vivan toujou. Moun wa Ezekyas yo al jwenn

5

⁶ Ezayi. Men repons Ezayi ba yo pou wa Ezekyas: -Men sa Seyè a voye di ou: Ou pa bezwen pè tout pawòl ou tande yo, tout jouman moun wa Lasiri yo di sou mwen. ⁷ Mwen pral fè wa Lasiri a tande yon sèl nouvèl, li pral kouri tounen nan peyi l'. Rive li rive, m'ap fè touye l'. ⁸ ¶ Chèf gad palè a te vin konnen wa Lasiri a te pati kite Lakis pou l' te al atake lavil Libna. Se la li al jwenn wa a. ⁹ Paskè wa a te pran nouvèl Tiraka, wa peyi Letiopi a, t'ap moute vin atake l'. Wa a voye lòt mesaje ankò bò kote Ezekyas. ¹⁰ Li di yo: -Men mesaj n'a bay Ezekyas, wa Jida a, pou mwen. Ou mèt tande Bondye ou la, Bondye ou fè konfyans lan, di ou Jerizalèm p'ap tonbe nan men wa Lasiri a, pa kite l' twonpe ou. ¹¹ Ou te pran nouvèl sa wa Lasiri yo te fè tout lòt peyi yo. Yo te soti pou detwi yo nèt. Atò, se ou menm ki pou ta chape anba men m'! ¹² Lè zansèt mwen yo te touye dènnye moun nan lavil Gozan, lavil Aran, lavil Rezèf ak moun Betedenn yo ki rete lavil Tèlasa, èske bondye nasyon sa yo te delivre yo? ¹³ Kote wa lavil Amat la, wa lavil Apad la, wa lavil Sefarayim lan, wa lavil Ena ak wa lavil Iva? ¹⁴ Ezekyas pran lèt la nan men mesaje yo, li li l'. Apre sa, li pati al nan tanp lan, li mete lèt la devan lotèl Seyè a. ¹⁵ Epi li vire bò Seyè a, li lapriyè, li di l': ¹⁶ -Seyè ki gen tout pouvwa a, Bondye pèp Izrayèl la, ou menm ki chita sou fotèy zanj cheriben yo ap pote sou zepòl yo a, se ou menm sèl Bondye k'ap gouvènen tout peyi sou latè. Se ou menm ki fè syèl la ak latè a. ¹⁷ Panche zòrèy ou, Seyè, pou ou tande. Louvri je ou pou ou wè. Koute tou sa Senakerib voye di pou manke Bondye vivan an dega. ¹⁸ Nou konnen, Seyè, wa peyi Lasiri yo te fini ak anpil nasyon, yo te detwi peyi yo. ¹⁹ Yo te boule tout bondye yo paske se pa t' bondye yo te ye. Se estati fèt an bwa ak wòch moun te fè ak men yo. Se poutèt sa yo te rive detwi yo. ²⁰ Koulye a, Seyè, Bondye nou an, tanpri, delivre nou anba men Senakerib, pou tout nasyon ki sou latè ka konnen se ou menm sèl, Seyè, ki Bondye. ²¹ ¶ Lè sa a, Ezayi, pitit Amòz la, voye mesaj sa a bay Ezekyas. -Ou te lapriyè Seyè a, Bondye pèp Izrayèl la, pou Senakerib, wa peyi Lasiri a. Men repons li voye ba ou. ²² Men pawòl Seyè a di sou li: Senakerib, lavil Jerizalèm ki sou mòn Siyon an ap ri ou, l'ap pase ou nan rizib. Moun lavil Jerizalèm yo ap rele chalbari dèyè ou. ²³ Ki moun ou konprann ou derespekte, ou joure konsa? Sou ki moun ou pale fò konsa? Se sou Bondye pèp Izrayèl la ki yon Bondye apa. ²⁴ Ou voye moun ou yo vin manke Bondye dega. Ou deklare: O wi, avèk tout kantite cha lagè m' yo, mwen moute sou tèt tout mòn ata sou mòn Liban an. Mwen koupe pi gwo pye sèd li yo, pi bèl pye sikren li yo, mwen rive jouk anwo nèt sou tèt li, nan mitan rakbwa li yo ki tankou bèl jaden. ²⁵ Mwen fouye pi nan peyi moun lòt nasyon yo, mwen bwè dlo. Mwen cheche dlo nan

²⁶
 tout larivyè Lejip yo pou sòlda mwen yo pase san pye yo pa mouye. Ou pa t' konnen gen lontan
 depi mwen te fè lide pou tou sa te rive? Gen lontan depi sa te nan tèt mwen? Koulye a, mwen kite
²⁷
 sa rive, pou ou te ka kraze tout lavil ak ranpa yo pou fè yo tounen yon pil demoli. Moun ki te
 rete la yo te san fòs. Yo te pè, yo pa t' konn sa pou yo fè. Yo te tankou raje nan jaden, tankou zèb
²⁸
 gazon, tankou raje k'ap pouse sou do kay, tankou pye mayi ki cheche anvan li mete zepi. Mwen
 konnen lè ou leve, mwen konnen lè ou chita. Mwen konnen lè ou soti, mwen konnen lè ou antre.
²⁹
 Mwen konnen lè ou fin anraje sou mwen. Koulye a, mwen vin konnen jan ou move sou mwen,
 jan ou vin awogan. Se poutèt sa, mwen mete yon fè won nan bwa nen ou, ak yon mò nan bouch
³⁰
 ou. Mwen pral fè ou pran menm chemen ou te pran pou vini an pou ou tounen. Apre sa, Ezayi
 di wa Ezekyas konsa: -Men sa ki pral sèvi yon siy pou ou. Lanne sa a, n'a manje rès grenn ki te
 tonbe atè. Lanne k'ap vini apre sa a, n'a manje grenn nou pa t' plante. Men, apre sa ankò, n'a ka
³¹
 plante, n'a ka fè rekòt. N'a plante pye rezen, n'a manje rezen. Rès moun peyi Jida ki va chape
³²
 yo va pran pye ankò. Y'a kanpe ankò. Va gen yon ti rès moun nan lavil Jerizalèm ak sou mòn
 Siyon an ki va chape. Se Seyè ki gen tout pouvwa a ki soti pou fè sa, paske li renmen ou anpil.
³³
 Men sa Seyè a di sou wa peyi Lasiri a: Li p'ap mete pye l' nan lavil sa a. Li p'ap gen tan voye
 yon sèl grenn flèch sou li. P'ap gen yon sèl sòlda ak plak pwotèj k'ap pwoche bò kote l'. Ni yo p'ap
³⁴
 fouye twou pou sènen l'. Chemen li te pran pou l' vini an, se li menm l'ap pran pou l' tounen. Li
³⁵
 p'ap mete pye l' nan lavil sa a. Se mwen menm, Seyè a menm, ki di sa. M'ap pwoteje lavil sa a,
 m'ap delivre l' pou m' fè respè tèt mwen, pou m' kenbe pwomès mwen te fè David, sèvitè m' lan.
³⁶
 Zanj Seyè a al nan kan moun Lasiri yo, li touye sankatrevensenk mil sòlda. Nan maten, lè moun
³⁷
 leve, se kadav yo ase yo jwenn. Yo tout te mouri. Senakerib, wa peyi Lasiri a, leve, li pati. Li
³⁸
 tounen lavil Niniv. Yon jou, antan wa a t'ap fè sèvis nan tanp Niswòk, bondye li a, de nan pitit
 gason l' yo touye l' ak nepe yo, epi yo kouri al kache nan peyi Arara. Yo te rele Adramelèk ak
 Sarezè. Se yon lòt nan pitit gason l' yo ki te rele Asaradon, ki te vin moute wa nan plas li.

Chapter 38

¹
 ¶ Vè menm epòk sa a, Ezekyas tonbe malad, li te prèt pou l' mouri. Pwofèt Ezayi, pitit Amòz
 la, vin wè li, li di l' konsa: -Men sa Seyè a voye di ou: Ou mèt mete lòd nan zafè ou paske ou pral
²
 mouri. Pa gen rechap pou ou. Ezekyas vire figi li bay panno a fas, li lapriyè Seyè a. Li di:
³
 -Tanpri, Seyè! Chonje jan mwen te sèvi ou ak tout kè mwen san m' pa janm vire do ba ou! Mwen

te toujou fè sa ou te vle m' fè. Epi li pran kriye kont kriye l'.⁴ Lè sa a, Seyè a pale ak Ezayi, li di
l' konsa:⁵ -Tounen al jwenn Ezekyas. W'a di l' pou mwen, men sa Seyè a, Bondye David, zansèt
ou a, voye di ou: Mwen tande lapriyè ou. Mwen wè jan sa fè ou mal. M'ap kite ou viv kenzan ankò.
⁶ M'ap delivre ou ansanm ak lavil Jerizalèm anba men wa Lasiri a. M'a pran defans lavil la.⁷ Ezayi
reponn li: -Men siy Seyè a pral fè ou wè pou ou ka konnen l'ap kenbe pawòl li.⁸ Gade kadran solèy
wa Akaz te fè a. Seyè a pral fè lonbraj la fè bak sou dis ti mak. Epi vre, lonbraj la mache fè bak
sou dènye dis ti mak li te fin depase.⁹ ¶ Men kantik Ezekyas, wa a, te chante lè li refè apre maladi
li a:¹⁰ Mwen t'ap di nan kè m' se mwatye nan lavi m' ase mwen viv. Gade mwen gen tan pral
mouri. Mwen rive nan pòt pou m' antre kote mò yo ye a. M'ap mouri anvan lè m'.¹¹ Mwen te kwè
mwen pa t'ap janm gen chans ankò pou m' te wè Seyè a sou latè kote moun vivan yo ye a, ni pou
m' te wè pesonn ankò nan moun k'ap viv sou latè.¹² Tankou yon ti kay jaden, yo rache m', yo
demoli m' pote m' ale. Yo koupe lavi m' tankou yo koupe fil nan metye moun k'ap tise twal yo. Soti
nan maten rive aswè, m'ap deperi.¹³ Tout lannwit m'ap rele anba doulè. Tankou yon lyon, Bondye
t'ap kraze tout zo nan kò m'. Soti nan maten rive nan aswè, m'ap deperi.¹⁴ M'ap plenn tou piti
tankou ranmye. M'ap plenyen tankou yon toutrèl. Je m' bouke tank m'ap gade syèl la. Seyè, mwen
pa kapab ankò! Vin fè kichòy pou mwen non!¹⁵ Kijan pou m' pale avè l'? Sa pou m' di l'? Se Seyè
a k'ap fè travay li. Malgre tout lapenn sa a ki nan kè m' lan, m'a debat ak lavi a jouk mwen mouri.
¹⁶ Seyè! nan bon kè ou, ou fè m' jwi lavi. Souf lavi a nan mwen toujou. W'ap geri m', w'ap ban m'
lavi.¹⁷ Ou wete m' nan kè sere m' te ye a. Se ou menm ki wete m' nan bouch twou a. Ou voye tout
peche m' yo jete dèyè do ou.¹⁸ Yo pa fè lwanj ou kote mò yo ye a. Non. Moun mouri pa ka fè fèt
pou ou! Moun ki deja desann kote mò yo ye a pa ka konte sou ou pou ou kenbe pawòl ou.¹⁹ Se
moun ki vivan ase ki ka fè lwanj ou tankou mwen menm jòdi a. Granmoun va fè pitit yo konnen
jan ou toujou kenbe pawòl!²⁰ Seyè a delivre m'! N'a fè mizik sou tout enstriman mizik nou yo n'a
chante nan kay Seyè a pandan tout lavi nou.²¹ Ezayi mande pou yo fè yon kataplas ak fig frans
mete sou kote wa a malad la, pou li ka geri.²² Lè sa a, wa Ezekyas mande: -Kisa k'ap fè m' konnen
m'a ka al nan tanp lan ankò?

Chapter 39

¹
¶ Nan menm epòk sa a, wa peyi Babilòn lan, Mewodak-Baladan, pitit gason Baladan, vin konnen wa Ezeqyas te malad epi li refè. Li voye yon lèt ba li ansanm ak yon kado. ² Ezeqyas te kontan jès la. Li moutre mesaje wa Babilòn te voye yo tout richès li yo: pyès an ajan, lò, epis, boutèy odè, zam ansanm ak tout lòt bagay li te gen nan depo l' yo. Li fè yo wè dènnye bagay li te gen lakay li ak nan tout peyi a. ³ Lè sa a, pwofèt Ezayi al jwenn wa Ezeqyas, li mande l': -Kote mesye sa yo soti? Kisa yo di ou? Ezeqyas reponn: -Yo soti nan yon peyi byen lwen, yo soti nan peyi Babilòn. ⁴ Ezayi di l' konsa: -Kisa yo wè nan palè a? Ezeqyas reponn li: -Yo wè tou sa ki nan palè a. Mwen fè yo wè dènnye bagay mwen gen nan depo m' yo. ⁵ ¶ Ezayi di wa Ezeqyas konsa: -Koute mesaj Seyè ki gen tout pouvwa a voye ba ou: ⁶ Yon lè gen pou rive. Lè sa a, y'ap pran dènnye bagay ki nan palè ou la, tou sa zansèt ou yo te anpile jouk jounen jòdi a, y'ap pote yo ale nan peyi Babilòn. Yo p'ap kite anyen. Se Seyè a menm ki di sa. ⁷ Y'ap pran kèk nan pwòp pitit pitit ou yo, y'ap depòte yo, y'ap chatre yo pou yo ka sèvi nèg konfyans nan palè wa Babilòn lan. ⁸ Ezeqyas reponn Ezayi, li di l' konsa: -Mesaj Bondye ba ou pou di m' lan gen tan bon. Men li t'ap di nan kè l': Depi pa gen boulvès, depi pa gen lagè nan peyi a tout tan m'ap viv la!

Chapter 40

¹
¶ Ankouraje pèp mwen an, ankouraje l'! Se Bondye nou an ki di sa! ² Souke kouraj moun lavil Jerizalèm yo! Fè yo konnen yo soufri kont yo atò. Yo fin peye pou sa yo te fè. Seyè a pini yo kont yo pou tout peche yo te fè yo. ³ ¶ Tande vwa yon moun k'ap rele byen fò: -Pare chemen Seyè a nan dezè a. Louvri yon wout nan savann lan pou Bondye nou an! ⁴ Se pou yo konble tout fon yo! Se pou yo kase tèt mòn yo ak tèt bit yo! Se pou ti mòn yo tounen platon, se pou tout mòn yo vin tè pla! ⁵ Seyè a pral fè wè pouvwa li a! Tout moun pral wè l' menm lè a. Se Seyè a menm ki di sa ak bouch li. ⁶ Yon vwa rete li di: Pale non! Yon lòt mande: Sa pou m' di? Di yo moun se tankou zèb yo ye. Tout bèlte yo, se tankou bèlte flè nan savann. ⁷ Zèb la cheche, flè a fennen, lè Seyè a voye van li soufle sou yo. Se vre wi! Se tankou zèb pèp la ye! ⁸ Wi, zèb la cheche, flè a fennen, Men, pawòl Bondye nou an la pou tout tan! ⁹ ¶ Nou menm moun lavil Jerizalèm, moute sou yon mòn byen wo, gaye bon nouvèl la! Nou menm moun mòn Siyon yo, pale byen fò, gaye bon nouvèl la! Nou mèt pale fò. Nou pa bezwen pè! Di moun lavil peyi Jida yo men Bondye nou an ap vini!

10

Men Seyè ki gen tout pouvwa a! L'ap vini avèk tout fòs kouraj li. Li pral pran pouvwa a nan men l'. L'ap mennen moun li te delivre yo avè l'. Y'ap mache devan l'! Se rekonpans li. Se rezilta travay

11 li. Tankou yon gadò, l'ap okipe mouton l' yo. Se li menm k'ap sanble yo. L'ap pote ti mouton yo

sou bra l'. Tou dousman l'ap mennen manman mouton ki gen pitit dèyè yo. ¶ Kilès ki ka mezire valè dlo ki nan lanmè a ak men l'? Kilès ki ka pran lajè syèl la ak dwèt li? Kilès ki ka mete tout tè

a nan yon ti mezi? Kilès ki ka pran pèz mòn yo ak pèz ti bit yo nan balans? 13 Ki moun ki ka di

Seyè a sa pou li fè? Ki moun ki te ba li konsèy? 14 Ki moun Seyè a te al jwenn pou l' te ka gen bon konprann? Ki moun ki te moutre l' jan pou l' mache dwat? Ki moun ki te ba li konsepsans? Ki moun

ki te fè l' konnen jan tout bagay fèt? 15 Gade! Devan Seyè a, nasyon yo tankou yon gout dlo nan yon bokit. Yo pa peze plis pase ti pousyè nan yon balans. Moun zile yo menm, yo tankou pousyè

van ap pote ale! 16 Tout rakbwa peyi Liban yo pa kont pou boule sou lotèl li. Tout bèt ki nan rakbwa

peyi Liban yo pa kont ase pou yo fè ofrann bèt pou yo boule pou li yo! 17 Tout nasyon yo mete

ansanm, yo pa anyen devan Seyè a. Li pa pran yo pou anyen. Yo pa vo anyen nan je l'. 18 ¶ Ki

moun nou ka di ki tankou Bondye? Ki pòtre nou ta fè ki pou ta sanble avè l'? 19 Bòs atizan an pran yon moule pou fè yon estati. Efèy la kouvri estati a nèt ak lò. Li fonn ajan pou soude l' nan plas li.

20

Sa ki pa gen gwo mwayen fè yon estati an bwa. Li chwazi yon bon bwa ki p'ap pouri. Li chache

yon bon bòs atizan pou travay li pou li, pou fè yon estati ki p'ap tonbe kraze. 21 Se konnen nou pa konnen sa? Ki jan fè yo pa t' janm di nou sa? Pesonn pa t' fè nou konn sa depi lontan? Nou pa janm

chache konprann ki moun ki fè latè? 22 Moun ki fè l' la chita anwo nèt, anlè tè a, depase syèl la. Moun ki sou latè, se tankou foumi yo ye devan l'. Li deploye syèl la tankou yon rido. Li louvri syèl

la tankou yon tant kote pou moun rete. 23 Li wete tout pouvwa wa yo te genyen. Li fè chèf k'ap

dirije lèzòm sou latè yo pase pou anyen. 24 Yo tankou yon jenn ti plan ki fèrenk ap pouse fèy, ki fenk ap fè rasin anba tè. Seyè a fè van li soufle sou yo, yo cheche. Yon toubouyon van an pote yo

ale tankou pay. 25 Ki moun nou ka di ki tankou m'? Ki moun ki pou ta sanble avè m'? Se Bondye

apa a ki di sa. 26 Leve tèt nou gade syèl la. Ki moun ki krewe tout zetwal sa yo? Tankou nan yon lame, li bay yo chak plas yo. Li bay yo tout non, li konn non yo chak. Yonn pa janm manke nan

syèl la! Li gen gwo pouvwa, li gen anpil fòs. 27 ¶ Nou menm, moun fanmi Jakòb yo, poukisa n'ap plenyen konsa? Nou menm, pèp Izrayèl la, poukisa n'ap plede di: Seyè a pa konn sa n'ap pase!

Bondye nou an p'ap fè anyen pou defann kòz nou! 28 Se konnen nou pa konnen? Kouman? Se di yo pa janm di nou sa? Seyè a se Bondye ki la pou tout tan an! Se li menm ki krewe tout latè. Li pa

janm bouke, li pa konn pèdi souf. Pesonn pa ka konprann lide li gen nan tèt li. ²⁹ Lè yon moun
 pèdi souf, li ba li fòs. Lè yon moun febli, li ba l' kouraj ankò! ³⁰ Jenn gason konn pèdi souf, yo
 konn bouke. Lè konsa, yo bite, yo tonbe. ³¹ Men, Seyè a ap bay moun ki mete konfyans yo nan li
 fòs ankò. Tankou malfini, y'ap pran zèl pou yo leve ale. Y'ap kouri san yo p'ap janm bouke. Y'ap
 mache, yo p'ap janm febli.

Chapter 41

¹ ¶ Nou menm moun zile yo, pe bouch nou! Koute sa m'ap di nou! Mete gason sou nou! Pwoche
 vin defann kòz nou! Annou plede pou n' wè kilès ki gen rezon! ² Kilès ki te fè chèf la soti bò solèy
 leve, ki te fè l' genyen nan tout batay kote l' pase? Kilès ki te lage tout nasyon yo nan men l', ki
 soumèt tout wa yo devan l'? Avèk nepe li, li kraze yo fè yo tounen pousyè. Avèk flèch li yo, li fè
 yo kouri tankou pay van ap gaye. ³ L'ap fann nan siyay yo, l'ap kouri san li pa pè anyen. Pye l' pa
 menm touche tè. ⁴ Se travay ki moun sa? Kilès ki lakòz tout bagay sa yo rive? Ki moun ki depi
 nan kòmansman ap rele lèzòm, pitit an pitit, pou yo fè travay li sou latè? Se mwen menm, Seyè a,
 ki la anvan yo tout. Se mwen menm k'ap toujou la apre yo tout. ⁵ Moun zile yo wè sa, yo pè. Moun
 nan dènye bout latè pran tranble, yo pwoche, yo vini. ⁶ Yonn ap ede lòt. Yonn ap di lòt: Pran kouraj!
⁷ Bès atizan k'ap fè estati a ap ankouraje òfèv la. Moun k'ap fin bay estati a fòm ak ti kout mato l'
 yo ap ankouraje bès fòjon an. Yon lòt di: Soudi a bon! Yo kloure zidòl la nan plas li pou li pa tonbe.
⁸ Men, nou menm pèp Izrayèl, sèvitè m' yo! nou se pitit pitit Jakòb, moun mwen te chwazi a! Nou
 se moun ras Abraram, zanmi mwen an! ⁹ Mwen pran nou nan dènye bout latè, mwen rele nou soti
 byen lwen. Mwen di nou: Se sèvitè m' nou ye! Se chwazi mwen te chwazi nou, mwen pa voye nou
 jete. ¹⁰ ¶ Nou pa bezwen pè. Mwen la avèk nou! Nou pa bezwen kite anyen ban nou kè sote. Se
 mwen menm ki Bondye nou. M'ap ban nou fòs, m'ap ede nou. M'ap soutni nou ak fòs ponyèt mwen
 ki pa janm pèdi batay. ¹¹ Tout moun ki te fache sou nou yo pral wont, yo pral bese tèt yo. Moun
 ki t'ap chache nou kont yo pral disparèt, yo pral mouri. ¹² Moun ki t'ap fè nou lagè yo, n'a chache
 yo, nou p'ap wè yo. Moun ki t'ap goumen ak nou yo pral disparèt, yo p'ap la ankò! ¹³ Se mwen
 menm, Seyè a, ki Bondye nou! M'ap pran men nou, m'ap di nou: Nou pa bezwen pè. M'ap ede nou!
¹⁴ Nou menm fanmi Jakòb yo, moun Izrayèl yo, nou te mèt piti tankou yon vètè, fèb tankou yon

cheni, nou pa bezwen pè. Se mwen menm k'ap ede nou, mwen menm, Bondye pèp Izrayèl la, ki
 yon Bondye apa. Se mwen menm k'ap delivre nou. Se Seyè a menm ki di sa! ¹⁵ M'ap fè nou tounen
 yon machin pou raboure tè, yon machin tou nèf avèk dan byen file. Nou pral raboure mòn yo, nou
 pral kraze yo. Nou pral fè ti bit mòn yo tounen pousyè. ¹⁶ Nou pral vannen yo, van ap bwote yo
 ale. Van tanpèt ap gaye yo toupato. Men, nou pral fè fèt pou Seyè a. Nou pral kontan Bondye pèp
 Izrayèl la ki yon Bondye apa. ¹⁷ Lè malere yo ak pòv yo ap chache dlo pou yo bwè epi yo pa ka
 jwenn, lè gòj yo va chèch nèt sitèlman y'a swaf dlo, mwen menm, Seyè a, m'a ba yo sa yo lapriyè
 mande m' lan. Mwen menm, Bondye pèp Izrayèl la, mwen p'ap lage yo. ¹⁸ M'a fè gwo dlo larivyè
 koule sou tout tè sèk kote ki pa t' gen menm yon ti pyebwa. M'a fè sous dlo pete nan fon yo. M'ap
 fè dezè a tounen lagon dlo. Sous dlo pral pete nan tout tè sèk yo. ¹⁹ M'ap fè pye zakasya ak pye
 sèd pouse nan tout dezè a, ansanm ak pye jasmen ak pye oliv mawon. Nan tè savann lan, m'ap mete
 pye pichpen, pye bwadòm ak pye sèd. ²⁰ Lè moun va wè sa, y'a konnen pou yo pran tèt yo, pou
 yo manyè konprann se Seyè a ki fè bagay sa yo ak men l', se travay Bondye pèp Izrayèl la, Bondye
 ki apa a. ²¹ ¶ Seyè a, wa pèp Izrayèl la, di: -Nou menm, bondye lòt nasyon yo, vin plede kòz nou!
 Vin di sa nou gen pou n' di pou defans nou! ²² Pwoche non! Vin di sa ki gen pou rive! Kisa nou
 te di k'ap rive ki rive vre? Di nou ki jan sa pral pase pou n' ka pran prekosyon nou! Fè nou konnen
 sa ki gen pou rive pou n' ka rekonèt sa lè l'a rive vre! ²³ Di nou kisa ki gen pou rive pita. Lè sa a,
 n'a konnen se bondye nou ye vre! Fè kichòy non, li te mèt bon, li te mèt pa bon, pou n' ka wè l',
 pou nou ka egzaminen l' ansanm! ²⁴ Men, gade! Se pa anyen nou ye! Tou sa n'ap fè yo pa vo anyen
 menm! Se yon avilisman pou moun ki pran nou pou bondye yo! ²⁵ Se mwen menm ki chwazi yon
 nonm soti bò solèy leve. Se mwen menm ki fè l' desann soti nan nò vin atake. Li kraze tout chèf
 yo tankou labou anba pye l', menm jan moun k'ap fè krich kraze tè pou l' travay. ²⁶ Anvan sa te
 rive, kilès nan nou ki te di sa pou n' te ka konnen? Ki moun ki te di davans sa tapral rive konsa,
 pou n' te ka di se vre? Non. Pesonn pa t' di anyen sou sa. Pyès moun pa janm tande nou di yon mo
 sou sa. ²⁷ Se mwen menm premye moun ki bay moun Siyon yo nouvèl men l'ap vini! Se mwen
 menm ki voye yon moun al pote bon nouvèl la bay lavil Jerizalèm. ²⁸ Lè mwen gade nan tout
 bondye nou yo, mwen pa wè yonn ki te gen anyen pou l' te di. Pa t' gen yonn ki ta kapab reponn
 mwen si m' ta mande l' anyen. ²⁹ Tout bondye sa yo pa vo anyen. Yo pa kapab fè anyen menm.
 Estati zidòl yo, se van. Yo pa vo anyen.

Chapter 42

¹ ¶ Seyè a di: -Men sèvitè m'ap soutni an! Men moun mwen chwazi a, moun ki fè m' plezi anpil
 la! Mwen mete lespri m' sou li. Li pral fè tout nasyon yo konnen sa ki rele jistis. ² Li pa nan rele,
 li pa nan pale fò. Li pa nan mache fè diskou nan tout lari. ³ Li p'ap kraze sa ki fèb yo. Li p'ap lage
 sa ki san sekou yo. Men, l'ap rann jistis jan sa dwe fèt. ⁴ Li p'ap pèdi espwa, li p'ap pèdi kouraj,
 jouk l'a fin mete jistis toupatou sou latè, jouk moun ki nan zile yo va rete ap tann lòd l'ap bay yo.
⁵ ¶ Bondye sèl Mèt ki kreye syèl la epi ki louvri l' anwo tèt nou, li menm ki fòme tè a avèk tou sa
 k'ap viv sou li, li menm ki bay tout moun k'ap mache sou latè souf lavi, li pale, li di konsa: ⁶ Se
 mwen menm, Seyè a, ki rele ou. Mwen ba ou pouvwa pou mete jistis kanpe sou latè. Mwen pran
 men ou. Mwen fòme ou, mwen mete ou pou pase yon kontra ak pèp la, pou m' bay tout nasyon yo
 limyè. ⁷ W'a louvri je avèg yo. W'a fè prizonye yo soti nan prizon. W'a libere sa ki nan kacho kote
 ki fè nwa a. ⁸ Se mwen menm ki Seyè a, se konsa yo rele m'. Mwen p'ap bay yon lòt bondye pouvwa
 mwen an. Mwen p'ap kite yo bay zidòl yo lwanj ki pou mwen an. ⁹ Gade! Tou sa mwen te di k'ap
 rive rive vre. Mwen pral di nou lòt bagay ki gen pou rive. Mwen pral fè nou konnen sa anvan menm
 sa rive. ¹⁰ Chante yon chante tou nèf pou Seyè a! Se pou tout moun toupatou sou latè fè lwanj li!
 Depi moun k'ap vwayaje sou lanmè ak tout bèt ki nan lanmè yo, jouk moun ki rete nan zile byen
 lwen yo. ¹¹ Se pou dezè a ak tout lavil yo chante pou Seyè a! Se pou tout kote moun Keda yo rete
 a fè lwanj li! Se pou moun ki rete lavil Sela a rele byen fò sou tèt mòn yo tèlman yo kontan! ¹² Se
 pou tout moun ki rete nan zile yo chante pou Seyè a, se pou yo fè lwanj li. ¹³ ¶ Seyè a soti tankou
 yon vanyan gason! Li ranmase tout fòs li tankou yon nonm ki pral nan lagè. Li rele byen fò, li bay
 siyal pou lagè a! Tankou yon vanyan gason, l'ap kraze lènmi l' yo. ¹⁴ Bondye di: -Gen lontan depi
 m' fèmen bouch mwen! Mwen pa di anyen, mwen kenbe pou m' pa pale. Men koulye a, mwen
 tankou yon fanm ki gen tranche. M'ap rele, m'ap plenn, souf mwen ap koupe, mwen pa kapab ankò.
¹⁵ Mwen pral ravaje tout mòn yo, gwo kou piti. Mwen pral fè tout plant yo ak tout pyebwa yo
 cheche. Mwen pral fè tè nan fon yo tounen sab lanmè pou bwè tout dlo larivyè yo. M'ap cheche
 lagon dlo yo. ¹⁶ M'ap fè avèg yo mache sou yon wout yo pa t' janm konnen anvan. M'ap pran men
 yo, m'ap mennen yo sou chemen yo pa t' janm konn fè anvan. M'ap fè kote ki fè nwa yo vin fè klè,
 kote ki gen anpil bit ak twou yo vin plat. Se tout bagay sa yo mwen pral fè rive. Wi, m'ap fè yo
 rive vre. ¹⁷ Tout moun ki mete konfyans yo nan zidòl, tout moun k'ap rele estati yo bondye, yo

18
 pral bese tèt yo atè, yo pral wont. ¶ Seyè a di: -Nou menm moun soudè yo, koute! Nou menm
 19
 moun avèg yo, gade byen! Ki moun ki pi avèg, ki moun ki pi soudè pase sèvite m' lan, moun
 mwen delivre a? Ki moun ki pi soudè, ki moun ki pi avèg pase mesajè m'ap voye a, sèvitè Bondye
 20
 a? Nou menm moun Izrayèl, nou te wè anpil bagay. Men, sa pa t' di nou anyen! Nou gen zòrèy
 21
 pou nou tandè, men nou pa t' tandè anyen Seyè a se yon Bondye ki soti pou sove pèp Izrayèl la.
 22
 Li ta vle pou tout pèp la respekte lòd li yo, pou yo tout fè lwanj li. Men koulye a, yo fin piye
 pèp li a, yo pran tou sa yo te genyen. Yo fèmen yo tout nan kacho. Yo mete yo tout nan prizon. Yo
 vòlò tou sa yo te genyen san pesonn pa delivre yo. Yo piye yo nèt ale san pesonn pa di: Renmèt yo
 23
 zafè yo! Ki moun nan nou k'ap pare zòrèy li pou l' tandè sa m'ap di la a? Ki moun nan nou k'ap
 24
 fè atansyon pou l' toujou koute depi koulye a? Ki moun ki te lage moun Jakòb yo nan men vòlò
 yo? Ki moun ki te lage moun Izrayèl yo nan men piyajè yo? Se te Seyè a menm ki te fè sa. Nou te
 25
 fè peche kont li. Nou pa t' vle viv jan l' te mande nou viv la. Nou pa t' vle swiv lòd li. Se konsa,
 li fè pèp la santi jan l' te move, li fè yo konnen soufrans lagè. Tankou dife, kòlè Bondye tonbe sou
 tout peyi a. Men yo yonn pa t' vle rekonèt sa. Kòlè Bondye boule peyi a nèt. Men, yo yonn pa t'
 pran sa pou anyen!

Chapter 43

1
 ¶ Nou menm, moun fanmi Jakòb yo, men sa Seyè a ap di nou koulye a, li menm ki te kreye
 nou an. Nou menm moun Izrayèl yo, men sa l'ap di nou, li menm ki te fè nou ak men l': -Nou pa
 bezwen pè anyen! M'ap toujou pwoteje nou. Se mwen menm ki te ban nou non nou pote a. Se pou
 2
 mwen nou ye. Lè n'ap pase sou lanmè, m'ap kanpe la avèk nou. Lè n'ap janbe gwo dlo, dlo a p'ap
 bwote nou ale. Lè n'ap mache nan mitan dife, dife p'ap boule nou. Flanm dife a p'ap fè nou anyen.
 3
 Paske mwen menm, mwen se Seyè a, Bondye nou an. Se Bondye pèp Izrayèl la ki yon Bondye
 apa. Se mwen menm k'ap delivre nou! Pou m' te ka delivre nou mwen te bay peyi Lejip, peyi Letiopi
 4
 ansanm ak peyi Seba a nan plas nou. M'ap bay tout moun lòt nasyon yo pou m' ka sove lavi nou,
 5
 paske mwen konsidere nou anpil. Nou gen anpil valè pou mwen, mwen renmen nou anpil. Nou
 pa bezwen pè anyen. Mwen la avèk nou. M'ap fè tout moun nou yo tounen lakay yo. M'ap sanble
 6
 nou soti nan peyi sou bò solèy leve ak nan peyi sou bò solèy kouche. M'ap di moun ki rete sou
 bò nan nò yo: Kite yo ale! M'ap di moun ki rete sou bò nan sid yo: Kite yo tounen! Kite pitit gason
 7
 m' yo tounen soti byen lwen. Kite pitit fi m' yo tounen soti toupatou sou latè. Se pèp mwen yo

ye. Se mwen menm ki kreye yo pou yo ka sèvi yon lwanj pou mwen. Se mwen menm menm ki te fè yo. Se nan men mwen yo soti. ¶ Seyè a di ankò: -Fè pèp la konparèt devan m'. Se yon bann moun ki gen je men ki pa wè. Yo gen zòrèy men yo pa tande. Rele tout nasyon yo, fè yo tout reyini ansanm. Fè yo sanble nan tribinal la. Kilès nan bondye moun sa yo ki te di davans sa ki gen pou rive a? Kilès ki te fè nou konnen bagay k'ap rive koulye a? Fè bondye sa yo vini ak temwen ki pou kanpe pale pou yo. Lè y'a tande yo, y'a ba yo rezon! Men pawòl Seyè a di: -Se nou menm menm ki pou sèvi m' temwen. Se nou menm mwen te chwazi pou sèvi m', pou nou konnen m', pou nou kapab mete konfyans nou nan mwen, pou nou ka konprann se mwen menm sèl ki Bondye tout bon an. Anvan mwen, pa t' gen lòt bondye. Apre mwen, p'ap gen lòt bondye. Se mwen menm sèl ki Granmèt la, Seyè a. Pa gen lòt ki ka delivre nou pase mwen menm! Se mwen menm ki te di nou davans sa ki gen pou rive. Se mwen menm ki delivre nou. Pa gen ankenn lòt bondye lòt nasyon yo ki janm fè sa pou nou. Nou menm, se temwen mwen nou ye. Se mwen ki Bondye. Se Seyè a menm ki di sa. M' pa janm chanje. Pesonn pa ka chape anba men mwen. Ki moun ki ka defèt sa mwen fè? ¶ Men sa Seyè k'ap delivre nou an di: Men sa Bondye pèp Izrayèl la ki yon Bondye apa a di: -Pou m' ka sove nou, m'ap voye yon lame mache sou lavil Babilòn. M'ap fè yo tout kouri met deyò. Wi, moun Kalde yo pral desann soti sou batiman ki te tout lògèy yo a. Se mwen menm Seyè a, Bondye pa nou an, ki yon Bondye apa. Se mwen menm ki te kreye pèp Izrayèl la. Se mwen menm ki wa nou! Nan tan lontan, se li menm, Seyè a, ki te louvri yon chemen nan mitan lanmè a pou nou. Li te fè yon wout nan mitan gwo dlo ki te fin debòde yo. Li te fè moun yo sanble yon gwo lame ak anpil zam, anpil cha lagè ak tout chwal yo. Li fè yo tonbe atè, yo pa janm ka leve ankò. Yo mouri tankou yon bouji lè ou soufle sou li. Men sa Seyè a di: Pa chita ap chonje tan lontan. Pa rete ap kalkile sa ki fin pase! Men m'ap fè yon lòt bagay pou nou. Li konmanse rive deja. Nou pa wè li? Mwen pral fè yon wout nan mitan dezè a. Mwen pral fè gwo dlo koule nan savann lan. Bèt nan bwa pral fè lwanj mwen. Chen mawon ak otrich pral fè fèt pou mwen. Paske m'ap mete dlo nan dezè a. M'ap fè gwo dlo koule nan savann lan pou pèp mwen chwazi pou rele m' pa m' lan ka jwenn dlo pou yo bwè. Pèp mwen te fè pou mwen an va chante, l'a fè lwanj mwen. ¶ Seyè a di: -Men se pa mwen menm nou te sèvi, nou menm fanmi Jakòb yo! Nou menm pèp Izrayèl la, nou te bouke avè m'. Nou pa t' ofri mouton nou yo pou yo te boule pou mwen. Se pa t' pou fè lwanj mwen nou te touye bèt nou yo. Mwen pa t' fòse nou fè ofrann grenn jaden nou yo pou mwen. Mwen pa t' fatigue nou pou lansan nou pa boule pou mwen. Nou pa t' depanse lajan nou achte lansan pou mwen. Ni nou pa t' ofri m' grès bèt nou touye yo pou sa

te fè m' plezi. Men, se nou menm ki kraze m' ak peche nou yo. Se nou menm ki fatige m' ak
 25
 mechanste n'ap fè yo. Se mwen menm ankò k'ap efase tou sa nou fè ki mal. Se paske se mwen
 26
 kifè m'ap fè l'. Mwen p'ap kenbe nou nan kè poutèt peche nou yo. Ede m' chonje sa ki te pase.
 Ann konparèt ansanm nan tribinal la. Ou pral pale pou defann tèt ou, pou fè wè se ou ki gen rezon.
 27
 Premye zansèt nou an te fè sa li pa t' dwe fè. Mesaje nou yo te vire do ban mwen. 28
 Se poutèt
 sa mwen avili moun ki reskonsab kay yo mete apa pou mwen an. Se poutèt sa mwen lage fanmi
 Jakòb la pou yo detwi yo nèt. Mwen kite yo pase moun pèp Izrayèl yo nan betiz.

Chapter 44

1
 ¶ Seyè a di ankò: -Koute m' byen koulye a, nou menm fanmi Jakòb, sèvitè m' yo, nou menm
 2
 pèp Izrayèl mwen te chwazi pou mwen an. Men sa Seyè ki te kreye nou an, Seyè k'ap ede nou
 depi nan vant manman nou an, di: -Nou pa bezwen pè anyen, nou menm fanmi Jakòb, sèvitè m'
 3
 yo, nou menm pèp Jechouwoun mwen te chwazi pou mwen an. M'ap vide dlo sou tè sèk la. M'ap
 fè sous dlo koule nan dezè a. M'ap bay pitit nou yo pouvwa lespri mwen. M'ap voye benediksyon
 4
 m' sou pitit pitit nou yo. Yo pral pouse tankou zèb ki jwenn lapli, tankou banbou bò larivyè.
 5
 Yonn apre lòt, moun yo pral di: -Se pou Seyè a mwen ye! Y'a vin mete tèt yo ansanm ak fanmi
 Jakòb yo. Yo tout pral make non Seyè a nan pla men yo. Y'a di se moun pèp Izrayèl la yo ye tou.
 6
 Seyè ki wa pèp Izrayèl la, Seyè ki gen tout pouvwa a, li menm k'ap delivre pèp la, men sa li di:
 -Se mwen menm ki te la anvan tout bagay, Se mwen menm k'ap la apre tout bagay. Pa gen lòt
 7
 bondye pase mwen menm sèl. Kilès ki tankou m'? Se pou l' kanpe di sa! Se pou l' fè nou konn
 sa, se pou l' ban m' prèv la! Se pou l' di tou sa ki pase depi nan konmansman! Se pou l' fè konnen
 8
 davans sa ki gen pou rive. Nou pa bezwen pè, nou pa bezwen tranble. Depi lontan mwen te fè
 nou konn sa, mwen te di nou sa. Nou pral kanpe pale pou mwen. Eske gen lòt bondye pase mwen
 9
 menm? Eske gen lòt bondye ki ka pwoteje moun? Mwen menm, mwen pa konnen l'. ¶ Tout moun
 k'ap fè estati zidòl yo, se moun ki pa vo anyen. Bondye yo renmen anpil yo pa ka fè anyen pou yo.
 Moun k'ap pran pou yo se moun ki pa wè, moun ki pa konn anyen. Se pou sa yo pral wont pita.
 10
 Ki moun k'ap fè pòtre yon bondye, k'ap fonn metal pou fè yon estati san li pa wè avantaj li ladan
 11
 l'? Moun k'ap sèvi estati zidòl yo pral wont. Moun k'ap fè estati yo, se moun yo ye. Se pou yo
 12
 vini pou yo konparèt devan tribinal la. Se pou yo pè, se pou yo wont! Bòs fòjon an pran yon
 moso fè, li mete l' nan dife, li travay li ak mato. Li ba l' fòm li vle ak fòs ponyèt li. Li pa manje, li

13
vin fèb. Li pa bwè dlo, li pa kapab ankò. Moun k'ap travay bwa a menm pran mezi yon moso bwa, li trase pòtre zidòl la sou li ak moso lakre, li travay li ak sizo. Li ba li fòm yon moun, fòm yon

14
bèl moun, pou l' mete l' nan yon tanp. Li ka koupe yon pye sèd. Li ka chwazi yon pye chenn, osinon yon pye kajou nan rakbwa a. Li ka plante yon pye pichpen epi li tann pou lapli fè l' grandi.

15
Moun sèvi ak moso nan rès bwa a pou boule. Yo fè dife pou yo chofe kò yo, pou yo kwit manje.

16
Avèk rès bwa a yo fè yon bondye pou yo sèvi, yon estati pou yo mete ajenou devan l'. Avèk mwatye nan bwa a, yo fè dife, yo griye vyann, yo manje plen vant yo. Yo chofe kò yo tou, epi yo

17
di: Dife a bon! Li cho! Ala bèl dife! Avèk rès bwa a, yo fè estati yon bondye pou yo sèvi. Yo

18
mete ajenou devan l', yo lapriyè devan l', y'ap di: Ou se bondye mwen. Delivre m' non! Moun sa yo pa konn anyen, yo pa konprann anyen, paske je yo bouche, yo pa ka wè. Lespri yo bouche,

19
yo pa konprann anyen. Moun k'ap fè zidòl yo pa kalkile nan tèt yo, yo pa konn anyen, yo pa gen konprann pou yo ta di: Mwen boule mwatye bwa a nan dife. Mwen kwit manje sou chabon dife a. Mwen griye vyann pou m' manje. Avèk rès bwa a mwen fè yon bagay k'ap avili m', yon

20
zidòl. M'ap adore yon bout bwa! Se tankou si yo te mete konfyans yo nan sann dife. Se tèt yo y'ap twonpe. Yo pèdi wout yo. Yo p'ap ka sove lavi yo, yo pa konprann zidòl yo gen nan men yo

21
a se pa bondye li ye. ¶ Seyè a di: -Nou menm fanmi Jakòb yo, chonje bagay sa yo byen! Nou menm pèp Izrayèl, chonje se sèvitè m' nou ye. Se mwen menm ki te fè nou pou nou te ka sèvi m'.

22
Mwen p'ap janm bliye nou! Mwen te fè peche nou yo disparèt devan je m' tankou yon nwaj nan

23
syèl la. Tounen vin jwenn mwen non, paske se mwen menm ki te delivre nou. Ou menm syèl la, chante byen fò! Se pou tout kote ki byen fon anba tè a fè fèt! Se pou mòn yo rele tank yo kontan! Se pou rakbwa yo ansanm ak tout pyebwa ki ladan yo danse fè fèt. Paske Seyè a delivre fanmi

24
Jakòb la, li fè moun Izrayèl yo wè pouvwa li. Men sa Seyè a di, li menm ki delivre nou, li menm ki te fè nou depi nan vant manman nou: -Se mwen menm, Seyè a, ki fè tout bagay. Se pou kont

25
mwen mwen te louvri syèl la anwo tèt nou. Lè m' t'ap fè latè, kilès ki te ede m'? Se mwen menm ki fè siy yo te predi yo pèdi sans yo. Se mwen menm ki fè divinò yo depale. Mwen demanti pawòl

26
moun save yo. Mwen fè yo wè tout konesans yo se bagay moun fou. Men lè sèvitè m' pale, mwen ba l' rezon. Lè mesaje m' yo bay yon pawòl, mwen fè l' rive vre. Mwen di moun va rete lavil Jerizalèm ankò. Yo pral rebati lavil peyi Jida yo. Lavil li yo ki te bandonnen pral kanpe ankò.

27
Mwen menm ki te bay lanmè a lòd pou li cheche, m'ap cheche tout rivyè nou yo. Mwen di
28
wa Siris se li ki pral gouvènen pou mwen! Li pral fè tou sa m'a mande l' fè. Li pral bay lòd pou yo rebati lavil Jerizalèm, pou yo refè fondasyon tanp Bondye a.

Chapter 45

¹
 ¶ Seyè a te chwazi wa Siris pou fè travay li. Li ba li men pou tout nasyon soumèt devan li. Li voye l' pou l' wete pouvwa wa yo, l'ap louvri de batan pòtay lavil yo devan li. P'ap gen pòtay k'ap rete fèmèn pou li. Men sa Seyè a di wa Siris: ² -Se mwen menm k'ap louvri chemen pou ou. M'ap fè mòn yo vin plat. M'ap kraze gwo pòtay an kwiv yo. M'ap kase ba fè yo de bout. ³ M'a ba ou tout richès ki sere kote ki fènwa a, richès ki cache nan depo kote moun pa konnen. Lè sa a, w'a konnen se mwen menm ki Seyè a. Se Bondye pèp Izrayèl la ki te rele ou fè travay sa a. ⁴ Mwen te rele ou pou ou te ka delivre fanmi Jakòb yo, sèvitè m' yo, moun pèp Izrayèl mwen te chwazi a. Mwen ba ou grad atout ou pa t' konnen m' lan. ⁵ ¶ Se mwen menm ki Seyè a. Pa gen lòt! Se mwen menm sèl ki Bondye. Se mwen ki ba ou tout fòs ou atout ou pa t' konnen m' lan. ⁶ Mwen fè sa pou tout moun sou latè, depi kote solèy leve jouk kote solèy kouche, ka konnen pa gen lòt bondye pase mwen menm! Se mwen menm ki Seyè a. Pa gen lòt! ⁷ Mwen mete limyè, mwen mete fènwa! Mwen bay kè poze, mwen bay kè sote. Se mwen menm Seyè a ki fè tou sa. ⁸ M'ap rete nan syèl la, m'ap voye fòs pouvwa sou nou tankou lapli, pou nou ka gen batay la. Latè pral louvri de bra l' pou resevwa l'. Delivrans pral fleri sou latè, lajistis pral boujonnen toupatou. Se mwen menm Seyè a k'ap fè tou sa rive. ⁹ Madichon pou moun k'ap diskite ak Bondye ki fè l' la! Li tankou yon krich nan mitan yon bann krich. Yon krich pa ka di moun k'ap ba li fòm lan: Sa w'ap fè la a? Travay ou fè a pa bon. ¹⁰ Madichon pou pitit k'ap di papa l' ki kalite pitit ou fè la a. Madichon pou pitit k'ap di manman l' ki kalite pitit ou met sou latè a la a! ¹¹ ¶ Seyè a, Bondye pèp Izrayèl la ki yon Bondye apa, li menm ki te fòme l' la, men sa li di: -N'ap mande m' sa m' pral fè pou pitit mwen yo? N'ap di m' sa pou m' fè? ¹² Se mwen menm ki te fè latè. Mwen kreye moun pou yo viv sou latè. Se mwen menm ki te louvri syèl la ak men mwen. Mwen kontwole tou sa ki nan syèl la: solèy, lalin ak tout bann zetwal yo. ¹³ Se mwen menm ki fè wa Siris kanpe pou li mete jistis sou latè. M'ap louvri tout wout devan li. Se li menm ki pral rebati lavil mwen an. L'ap fè moun pa m' yo te depòte yo tounen lakay yo san yo pa bezwen peye anyen, ni yo p'ap bezwen fè kado anyen pou sa. Se Seyè ki gen tout pouvwa a ki di sa! ¹⁴ Men sa Seyè a di ankò: -Tout pwofi travay moun Lejip yo ak pwofi kòmès moun Letiopi yo pral vin pou nou. Moun bèl wotè ki rete nan peyi Seba yo va pase nan peyi nou an, y'a vin esklav nou. Y'a mache dèyè nou tankou prizonye nan chenn. Y'a mete ajenou devan nou, y'a lapriyè nan pye nou, y'a di: Se lakay nou ase Bondye rete. Nanpwen lòt bondye tankou li. Nanpwen lòt bondye pase l'. ¹⁵ Tansèlman se yon Bondye moun pa ka wè. Bondye pèp Izrayèl la, se li ki

¹⁶
 konn delivre moun! Moun k'ap fè estati yo pral wont, yo tout pral tèt bese. Moun pral pase yo
¹⁷
 nan betiz. Men, Seyè a ap delivre pèp Izrayèl la pou tout tan. Nou p'ap janm wont ankò, nou
¹⁸
 p'ap janm bese tèt nou ankò devan pesonn jouk sa kaba. Se Seyè a ki kreve syèl la. Se li menm
 sèlman ki Bondye. Se li menm ki fè latè, ki ba li fòm li. Se li menm ki fè l' chita fèm. Li pa t' fè l'
 pou l' te tounen yon dezè, men pou l' te yon kote pou moun rete. Men sa li di: Se mwen menm ki
¹⁹
 Seyè a. Nanpwen lòt. Se pa an kachèt mwen te pale, ni nan yon kote ki fè nwa. Mwen pa t' di
 moun ras Jakòb yo pou yo chache m' kote ki pa gen anyen. Mwen menm, se Seyè a mwen ye. Mwen
²⁰
 pale laverite, mwen fè konnen sa ki dwe fèt. ¶ Seyè a di ankò: -Sanble non! Sanble, moun lòt
 nasyon yo: Pwoche non! Pwoche devan tribinal la non, nou menm ki rive chape yo! Bann moun
 k'ap plede fè posesyon ak zidòl an bwa yo, k'ap lapriyè bondye ki pa ka delivre yo, yo pa konn
²¹
 anyen! Vin plede kòz nou! Mete tèt nou ansanm pou nou konnen sa nou pral di! Kilès moun ki
 te di davans sa ki gen pou rive a? Kilès ki te fè konnen sa depi lontan? Se pa t' mwen menm, Seyè
 a? Nanpwen lòt bondye pase mwen menm. Mwen se Bondye ki pa nan patipri. Se mwen ki ka
²²
 delivre moun. Tounen vin jwenn mwen pou nou ka delivre, nou tout ki rete sou latè! Paske se
²³
 mwen ki Bondye. Pa gen lòt! Mwen fè sèman sou tèt mwen, sa m'ap di la a se laverite klè.
 Pesonn p'ap ka demanti pawòl mwen yo. Tout moun pral vin ajenou devan mwen. Nan tout lang,
²⁴
 y'ap pran non mwen pou yo fè sèman. Y'a di: Se nan Seyè a sèl nou jwenn jistis ak fòs kouraj!
²⁵
 Tout moun ki t'ap kenbe tèt avè l' yo pral wont, y'ap vin nan pye l'. Men, gremesi Seyè a, moun
 ras Izrayèl yo pral kanpe ankò. Yo pral fè lwanj mwen.

Chapter 46

¹
 ¶ Bèl ak Nebo, zidòl moun Babilòn yo, fini. Y'ap mete estati yo sou do bèt. Zidòl nou te konn
²
 ap leve anlè nan posesyon yo tounen yon chay lou sou do bèt yo ki tou bouke. Ni bèt yo, ni zidòl
 yo tonbe ansanm atè a. Zidòl yo pa ka delivre ata bèt k'ap pote yo a. Lènmi ap depòte yo tankou
³
 moun yo fè prizonye. Nou menm fanmi Jakòb yo, ti rèz ki rete nan fanmi Izrayèl la, nou menm
 mwen te pote nan men depi jou nou te fèt la, nou menm mwen te soutni depi nan vant manman nou
⁴
 an, koute sa m'ap di nou byen: M'ap toujou aji konsa ak nou jouk n'a vye granmoun. M'ap toujou
 soutni nou jouk n'a gen cheve blan. M'a pote nou nan men m' jan m' te toujou fè l' la. M'a pran nou
⁵
 sou kont mwen, m'a delivre nou. ¶ Ak ki moun nou ta konpare m'? Ki moun nou ka di ki sanble

m'? Ki moun nou ka mete bò kote m' ki tankou m'?⁶ Gen moun ki pran lò nan pòch yo, yo peze ajan nan balans, yo peye yon òfèy pou fè yon bondye pou yo. Lèfini, yo mete ajenou devan l', yo adore l'.⁷ Yo leve l' mete sou zepòl yo, yo pote l' ale. Yo mete l' kanpe yon kote, epi li rete la. Kote yo mete l' la, li pa ka deplase. Yo mèt lapriyè nan pye l' kont kò yo, li pa ka reponn! Li pa ka delivre yo lè yo nan tray.⁸ Pa janm bliye sa! Mete gason sou nou! Nou menm k'ap fè peche, kalkile tou sa nou fè!⁹ Chonje tou sa ki te rive nan tan lontan. Rekonèt se mwen menm sèl ki Bondye. Pa gen lòt! Se mwen sèl ki Bondye. Nanpwen tankou m'!¹⁰ Depi nan konmansman, mwen te di jan sa pral ye. Depi davans mwen te fè nou konnen sa ki tapral rive. Mwen te di plan travay mwen gen pou rive fèt vre. M'ap fè tou sa mwen te vle fè a.¹¹ Mwen rele yon nonm mwen te chwazi soti nan yon peyi byen lwen bò solèy leve. Tankou yon malfini, li pral vini, li pral fè travay mwen ba l' fè a. Depi mwen di yon bagay, se pou l' fèt. Depi mwen fè lide fè yon bagay, fòk li fèt.¹² Koute sa m'ap di nou, bann tèt di, nou menm ki pa soti pou fè sa ki dwat:¹³ M'ap fè jou delivrans nou an pwoche. Li pa lwen rive. Mwen p'ap mize vin delivre nou. Mwen pral delivre mòn Siyon. Mwen pral fè pèp Izrayèl la wè pouvwa mwen.

Chapter 47

¹ ¶ Ou menm, lavil Babilòn, desann sou fotèy ou a! Al chita atè nan pousyè! Yon lè, ou te tankou yon jenn tifi. Wi, kapital moun peyi Kalde yo pral chita atè plat, yo p'ap janm konsidere ou ankò tankou yon bèl tifi ki renmen plezi, ki pa nan leve ni lou ni lejè.² Pran wòl moulen yo, al moulen farin! Wete vwal ki sou tèt ou a! Moute ke rad ou wotè jenou ou. Dekouvri janm ou pou ou janbe dlo.³ Rete toutouni pou moun ka wè jan ou tonbe ba! Mwen pral tire revanj. Pesonn p'ap ka rete m'.⁴ Moun k'ap delivre nou an rele Seyè ki gen tout pouvwa a, Bondye pèp Izrayèl la ki yon Bondye apa.⁵ Men sa li di lavil Babilòn: Chita la! Pa di yon mo! Rete nan fènwa a! Yo p'ap janm rele ou ankò larenn tout peyi yo.⁶ Wi, mwen te move sou pèp mwen an. Mwen pa t' aji ak yo tankou moun pa m'. Mwen te lage yo nan men ou. Men, ou te san pitye pou yo. Ou te aji mal anpil, ata ak vye granmoun yo.⁷ ¶ Ou te mete nan tèt ou ou t'ap toujou larenn. Ou pa t' rete kalkile bagay sa yo byen nan tèt ou. Ou pa t' kalkile ki jan sa tapral fini.⁸ Koulye a, louvri zòrèy ou, ou menm ki renmen pran plezi ou, ou menm ki chita kè pòpòz epi k'ap di nan kè ou: Se mwen menm ki sèl chèf. Nanpwen

lòt! Mwen p'ap janm pèdi mari m'. Mwen p'ap janm konnen sa ki rele pèdi pitit! ⁹ Enben! De malè sa yo pral tonbe sou ou anmenmtan, yon sèl jou. Ou pral pèdi pitit ou yo ansanm ak mari ou! Wi, malè sa yo pral tonbe ansanm sou ou, malgre tout maji ou pral fè yo, malgre pakèt wanga ou genyen

¹⁰ yo! Ou te konte sou mechanste ou t'ap fè yo. Ou t'ap di nan kè ou pesonn pa wè ou. Bon konprann ak konesans vire tèt ou. Ou t'ap di nan kè ou se ou menm ki sèl chèf. Nanpwen lòt. ¹¹ Yon malè pral tonbe sou ou, ou p'ap ka detounen l' ak maji ou yo. Yon sèl malè pral tonbe sou ou, ou p'ap ka fè anyen pou ou anpeche l' rive ou. W'a rete konsa, yon boulvès pral tonbe sou ou, yon boulvès ou

pa t' janm mete nan tèt ou te ka rive ou. ¹² Ou mèt rete ak maji ou yo, ak tout wanga ou yo! Depi ou jenn w'ap fatigue kò ou sèvi ak yo. Ou pa janm konnen, yo ka fè kichòy pou ou! Ou ka fè moun

pè ou ak yo! ¹³ Ou chaje ak moun k'ap ba ou konsèy jouk ou pa konn sa pou ou fè. Se pou moun ki te ba ou tout konsèy sa yo vini koulye a, se pou yo sove ou, yo menm k'ap etidye zetwal, yo menm k'ap separe syèl la an divès zòn, yo menm k'ap di ou chak lalin nouvell tou sa ki gen pou

rive. ¹⁴ Yo tankou ti moso pay. Yon sèl dife pral boule yo. Yo p'ap menm ka sove pwòp tèt pa yo. Se p'ap yon ti dife tankou dife yo fè pou kwit manje ni tankou boukan yo limen pou moun chofe

dife. ¹⁵ Men kote konsèy moun sa yo ap mennen ou. Ou te touye tèt ou ap sèvi yo depi ou te jenn tifi. Y'ap kouri kite ou, yo chak bò pa yo. Yo yonn p'ap rete pou delivre ou!

Chapter 48

¹ ¶ Koute pawòl sa yo byen, nou menm fanmi Jakòb yo. Nou menm ki pote non Izrayèl, zansèt nou an, nou menm ki soti nan ras Jida a, nou pran non Seyè a pou fè sèman. N'ap fè sèvis pou Bondye pèp Izrayèl la. Men, se pawòl nan bouch. Nou pa viv jan Bondye vle l' la. ² Nou cho konsa pou nou di se moun lavil Jerizalèm, lavil Bondye a, nou ye. Se sou Bondye pèp Izrayèl la n'ap mete

tout espwa nou, li menm yo rele Seyè ki gen tout pouvwa a. ³ Depi lontan mwen te fè nou konnen davans sa ki tapral rive. Mwen te pale pou tout moun tandè. Mwen rete konsa, mwen fè sa m' gen

pou m' fè a, epi yo rive vre. ⁴ Mwen te konnen jan nou wòklò. Tèt nou di pase fè, di pase wòch

Se poutèt sa mwen te fè nou konnen davans sa ki tapral rive nou. Wi, mwen te avèti nou anvan yo te rive, pou nou pa t' di se zidòl nou yo ki te fè sa pou nou, se estati an fè nou yo ak pòtre zidòl

nou yo ki te fè sa pase konsa. ⁶ Se pou nou rekonèt tou sa mwen te di nou yo rive vre. Enben, mwen pral fè ou konnen lòt bagay ankò ki gen pou rive, bagay mwen te kenbe pou mwen, bagay ou pa

ka konnen menm. ⁷ Se bagay m'ap fè koulye a menm. Mwen pa janm ko fè sa. Se bagay nou pa t'

8
 janm konnen jouk jounen jòdi a. Konsa nou pa ka di nou te konn sa deja! Nou pa t' janm konn bagay konsa, nou pa t' janm tande sa. Mwen pa t' kase bwa nan zòrèy nou sou sa, paske mwen
 9
 konnen jan nou trèt. Yo pa ka fè nou konfyans. Depi nou fèt yo konnen nou pou moun tèt di. ¶ Se poutèt non mwen pote a kifè mwen kenbe kòlè m'. Se paske mwen vle pou moun fè lwanj mwen
 10
 kifè mwen pa koute kòlè m' pou m' kraze nou! Tankou lajan yo fonn nan fòj pou wè si li bon,
 11
 mwen te fè nou pase tray pou m' wè kote nou ye. Se poutèt mwen, poutèt mwen menm ase, mwen fè sa m' fè a. Eske m' ka kite yo derespekte non mwen? Mwen p'ap kite yon lòt resewva
 12
 lwanj ki pou mwen an! Nou menm fanmi Jakòb yo, Nou menm pèp Izrayèl mwen te chwazi a, koute m' byen. Se mwen menm ki te la anvan tout bagay, Se mwen menm k'ap la apre tout bagay
 13
 kaba. Mwen p'ap janm chanje. Se mwen menm ak men mwen ki fè latè. Se ak fòs ponyèt mwen
 14
 mwen louvri syèl la. Lè m' rele yo, yo tout kouri vin nan pye m'. Nou tout, sanble non pou nou koute m'! Kilès nan zidòl nou yo ki te fè konnen depi davans tout bagay sa yo? Moun mwen renmen
 15
 an pral fè travay mwen vle l' fè a kont lavil Babilòn, kont ras moun Kalde yo. Se mwen menm ki te pale, se mwen menm ki te rele l'. Se mwen menm ki fè l' vini. M'ap fè l' reyisi nan travay l'ap
 16
 fè a. ¶ Pwoche kote m' non, koute sa m'ap di: Depi nan konmansman mwen pa kache nou anyen.
 17
 Depi lè bagay la t'ap rive, mwen te la. Koulye a, Seyè a ban mwen lespri l', li voye m'! Bondye pèp Izrayèl la ki yon Bondye apa, Seyè k'ap delivre yo a, men sa li di: -Se mwen menm ki Seyè a, Bondye nou an. Se mwen menm k'ap moutre nou sa ki pou byen nou. Se mwen menm k'ap mennen
 18
 nou nan chemen pou nou swiv la. Si sèlman nou te swiv lòd mwen te ban nou yo, benediksyon ta vide sou nou tankou lapli k'ap tonbe. Tankou lanmè ki pa janm sispann voye lanm, m' pa ta janm
 19
 sispann kanpe pou nou! Moun ras nou yo ta menm kantite ak grenn sab. Ptitit pitit nou yo ta tankou grenn sab bò lanmè. Anyen pa ta ka detwi nou devan mwen. Non! Nou pa ta janm disparèt
 20
 devan mwen. Soti kite lavil Babilòn! Sove kò nou lakay moun Kalde yo! Gaye nouvèl la ak kè
 21
 kontan. Mache fè konnen l' toupatou. Seyè a delivre Izrayèl, sèvitè li a. Lè li t'ap mennen yo nan dezè a, yo pa t' swaf dlo. Li fè sous dlo pete nan wòch pou yo. Li fann wòch la, dlo koule soti.
 22
 Men Seyè a di: Pa gen kè poze pou mechan yo!

Chapter 49

¹
 ¶ Nou menm ki rete nan zile yo, koute sa m'ap di nou! Nou menm ki rete byen lwen yo, pare zòrèy nou! Depi m' fèt, Seyè a chwazi m'! Depi nan vant manman m', li rele m' pou m' sèvi l'. ² Li mete nan bouch mwen pawòl ki tankou kouto byen file. Li pwoteje m' avèk fòs li. Li pare m' tankou yon flèch byen pwenti, li sere m' nan sakit li. ³ Li di m': Izrayèl, se sèvitè m' ou ye! W'ap sèvi yon lwanj pou mwen! ⁴ Mwen menm, mwen t'ap di nan kè m': Se pou dan ri m'ap fatigue kò m'. Se pou gremesi mwen travay jouk mwen fèb. Men, m'ap toujou gen konfyans: Seyè a va ban m' rezon. Rekonpans mwen la byen sere nan men Seyè a. ⁵ Se Seyè a menm ki chwazi m' depi m' fèt pou m' sèvi l', pou m' fè fanmi Jakòb la tounen vin jwenn li, pou m' sanble pèp Izrayèl la mennen ba li. Seyè a ban m' bèl pozisyon sa a. Se li ki tout fòs mwen. ⁶ Seyè a di m' konsa: Wi, sèvitè m' lan va fè fanmi Jakòb la kanpe ankò. L'a fè ti rès pèp Izrayèl yo te depòte a tounen lakay yo. Men, se poko sa toujou. M'ap fè li sèvi tankou yon limyè pou lòt nasyon yo, pou dènye moun sou latè ka konnen ki jan mwen menm mwen delivre! ⁷ ¶ Bondye pèp Izrayèl la ki yon Bondye apa, Seyè k'ap delivre yo a, l'ap pale ak pèp tout moun ap meprize a, pèp nasyon yo pa vle wè a, pèp ki esklav chèf k'ap gouvènen yo a. Li di yo: Wa va leve kanpe lè y'a wè ou. Chèf va ajenou devan ou. Y'a fè sa poutèt Seyè a k'ap toujou kenbe pawòl li, poutèt Bondye pèp Izrayèl la ki te chwazi ou. ⁸ Men sa Seyè a di pèp li a: -Lè lè a va rive pou m' fè ou gras, m'a reponn ou. Lè jou a va rive pou m' delivre ou, m'a pote ou sekou. Se mwen ki te fè ou, se mwen ki te chwazi ou pou ou siyen yon kontra ak tout pèp yo. M'a fè peyi a kanpe ankò. N'a tounen viv nan peyi yo te ban nou an, peyi yo te devaste a. ⁹ M'a di prizonye yo al lakay nou! M'a di moun ki te chita nan fènwa yo: Soti vin nan limyè a. Sou tout wout yo, y'a jwenn manje pou yo manje. Tankou mouton, y'a jwenn manje sou tout ti mòn. ¹⁰ Yo p'ap janm grangou, yo p'ap janm swaf dlo. Chalè solèy ak van dezè p'ap fè yo anyen. Paske se moun ki renmen yo a k'ap kondi yo. L'a mennen yo kote ki gen sous dlo. ¹¹ M'a louvri yon bèl chemen nan mòn yo. M'a pare wout sou tout mòn yo pou pèp la. ¹² Gen ladan yo k'ap soti byen lwen. Gen sa k'ap soti nan nò. Gen sa k'ap soti bò solèy kouche. Gen lòt k'ap soti lavil Sinim nan sid. ¹³ ¶ Se pou syèl la kontan! Se pou tè a fè fèt! Se pou mòn yo rele tèlman yo kontan! Paske Seyè a pral bay pèp li a kouraj, l'ap gen pitye pou pèp li a ki nan lapenn. ¹⁴ Men, pèp lavil Jerizalèm lan t'ap di: -Seyè a lage nou. Mèt la bliye nou. ¹⁵ Seyè a reponn: -Eske yon manman ka bliye pitit l'ap bay tete a? Eske li ka pa sansib pou pitit li pote nan vant li a? Menm si yon manman ta rive bliye pitit li, mwen menm, mwen p'ap janm bliye nou! ¹⁶ Mwen ekri non nou nan pla men m'. Mwen toujou wè miray nou yo devan je m'. ¹⁷ Moun ki pral rebati lavil la ap vin talè konsa. Moun

18
 ki t'ap kraze nou yo, ki t'ap piye nou yo, pral kouri met deyò. ¶ Voye je nou toupatou. Gade sa k'ap pase. Tout moun nou yo ap sanble, y'ap vin jwenn nou. Jan nou konnen mwen vivan an, mwen fè sèman: Nou pral kontan wè yo lakay nou, tankou lè lamarye kontan wè bèl rad nòs li sou li. Se

19
 Seyè a menm ki di sa. Peyi nou an te fin kraze. Peyi a te fin ravaje. Men, koulye a li pral twò piti pou kantite moun k'ap rete ladan l'. Paske moun ki t'ap fini ak peyi a, yo pral voye yo jete byen

20
 lwen nou. Yon lè, pitit nou te kwè ki te pèdi nèt yo, n'a tandè yo ap pale nan zòrèy nou, y'a di

21
 nou: Peyi a twò piti pou nou. Ban nou kote pou nou rete. Lè sa a, n'a di nan kè nou! -Kilès ki te fè tout pitit sa yo pou nou? Nou te pèdi tout pitit nou yo. Nou pa t' kapab fè pitit ankò. Yo te depòte nou, yo te vire do ban nou. Ki moun ki te elve tout pitit sa yo pou nou? Nou te pou kò nou. Kote

22
 yo soti menm? Men sa Seyè a, Bondye a, di ankò: M'ap fè nasyon yo siyon ak men m'. M'ap leve drapo m' pou m' avèti pèp yo. Se yo menm ankò ki pral pran pitit gason nou yo sou do yo, k'ap

23
 mete pitit fi nou yo sou zepòl yo pou mennen yo tounen lakay nou. Wa yo pral tankou papa pou nou. Pitit fi wa yo pral sèvi nou nouris. Y'ap ajenou devan nou, y'ap bese tèt yo jouk atè, Y'a niche pousyè ki nan pye nou. Lè sa a, n'a konnen se mwen menm ki Seyè a. Moun ki mete tout espwa

24
 yo nan mwen p'ap janm wont. ¶ Eske ou ka wete nan men yon vanyan gason bagay li pran nan

25
 lagè? Eske ou ka lage prizonye ki anba men gwo chèf? Men sa Seyè a reponn: Wi! Yo ka wete nan men yon vanyan sòlda sa li pran nan lagè. Yo ka lage prizonye ki anba men yon gwo chèf.

26
 M'ap goumen pou nou ak tout moun k'ap fè nou lagè. M'a delivre pitit nou yo. Moun k'ap fè nou pase tray yo, m'ap fè yo yonn manje lòt. Y'ap bwè pwòp san yo jouk y'a sou tankou moun ki bwè diven. Lè sa a, tout moun va konnen se mwen menm, Seyè a, k'ap sove nou. Se mwen menm, Bondye fanmi Jakòb la, Bondye ki gen pouvwa a, k'ap delivre nou.

Chapter 50

1
 ¶ Men sa Seyè a di ankò: -Si m' te voye manman nou tounen lakay li, kote papye divòs mwen te ba li? Ki moun mwen te dwe lajan pou m' ta vann nou ba li tankou esklav? Se poutèt mechanste nou yo mwen te vann nou. Se poutèt peche nou yo mwen te voye manman nou tounen lakay li.

2
 Poukisa, atò, lè mwen vin delivre nou an, pa gen pesonn ki vini jwenn mwen? Poukisa, lè m' rele nou, pesonn pa reponn? Eske se fòs mwen pa gen fòs ase pou m' delivre nou? Eske ponyèt mwen twò fèb pou m' sove nou? Se konnen nou pa konnen mwen annik louvri bouch mwen epi tout dlo lanmè cheche, tout larivyè tounen ravin chèch, tout pwason mouri paske yo pa jwenn dlo. Y'ap

3
 pouri. Mwen kouvri syèl la ak nwaj nwa. Li tankou yon moun ki nan lapenn pou ka lanmò! ¶
 4
 Seyè a moutre m' sa pou m' di, pou m' ka ankouraje moun ki pa kapab ankò. Chak maten li louvri

zòrèy mwen, pou m' ka tandè sa li pral moutre m', jan yon bon patizan fèt pou fè. ⁵ Seyè a, Bondye a, louvri lespri mwen, mwen pa kenbe tèt ak li. Mwen pa renka devan li. ⁶ Mwen pare do m' bay moun k'ap bat mwen yo. Mwen lonje figi m' bay moun k'ap rache bab mwen yo. Mwen pa kache figi m' lè y'ap joure m', lè y'ap krache sou mwen. ⁷ Seyè a, Bondye a, ap pote m' sekou. Se poutèt sa, jouman yo pa ka fè m' anyen. Mwen sere dan m', mwen mare kè m' pou m' soufri. Mwen sèten, Bondye p'ap fè m' wont. ⁸ Moun ki pral rann mwen jistis la pa lwen rive. Ki moun ki vle plede ak mwen? Ann konparèt ansanm devan tribinal la? Kilès ki vle rele m' lajistis? Se pou l' vin kanpe la devan m'! ⁹ Se Seyè a menm, Bondye a, k'ap pote m' sekou. Ki moun ki ka fè yo kondannen m'? Tout moun k'ap akize m' yo pral disparèt. Y'ap tankou yon rad vèmen ap devore. ¹⁰ ¶ Nou tout ki gen krentif pou Seyè a, nou tout k'ap koute pawòl sèvitè li a, nou wè jan chemen m'ap swiv la fè nwa san yon ti limyè ladan l'. Se pou nou met konfyans nou nan Seyè a. Apiye sou Bondye nou an! ¹¹ Men nou tout k'ap pouse dife, k'ap fè plan pou detwi lòt moun, se nou menm ki pral boule nan dife nou limen an, se nou menm ki pral pran nan plan n'ap fè yo. Se Seyè a menm ki pral fè sa rive nou: Nou pral tòde ak doulè nan kabann nou.

Chapter 51

¹ ¶ Men sa Seyè a di: -Nou tout ki dèyè delivrans, nou tout k'ap chache Seyè a, chonje wòch kote nou soti a, chonje min kote yo wete nou an! ² Chonje Abraram, zansèt nou an, ak Sara, manman ki fè nou an! Lè m' te rele Abraram, li pa t' gen pitit. Mwen beni l', mwen ba li anpil pitit. ³ Mwen menm Seyè a, mwen pral gen pitye pou peyi Siyon an, pou tout moun k'ap viv nan kay kraze l' yo. M'ap fè tout dezè li yo tounen bèl jaden, tout savann li yo tounen tankou premye jaden mwen te plante Edenn lan. Se kè kontan, se fèt ase ki va gen la. Y'a chante, y'a fè mizik pou di m' mèsè. ⁴ ¶ Nou menm pèp mwen, koute sa m'ap di nou: Nou menm nasyon yo, pare zòrèy nou: Se mwen menm ki bay lalwa ki la pou rann jistis, pou sa sèvi yon limyè pou tout nasyon yo. ⁵ Mwen p'ap mize vin sove nou. Talè konsa m'ap delivre nou. Se mwen menm ki pral gouvènè nasyon yo. Moun ki sou zile yo ap tann mwen vini, y'ap tann mwen vin delivre yo. ⁶ Leve je nou gade syèl la! Voye je gade latè! Syèl la pral disparèt tankou lafimen. Latè pral fini tankou yon vye rad. Moun ki rete sou latè pral mouri tankou mouch. Men, delivrans m'ap ba yo a ap la pou tout tan. Mwen p'ap janm bezwen delivre yo ankò apre sa. ⁷ Nou menm ki konnen sa ki dwat, koute sa m'ap di nou. Nou menm ki kenbe lòd mwen yo nan kè nou, nou pa bezwen pè lè moun ap trennen nou nan

labou, nou pa bezwen tranble lè moun ap joure nou. ⁸ Moun sa yo pral disparèt tankou rad sizo ap devore. Yo pral fini tankou twal ki kanni. Men delivrans m'ap ban nou an ap la pou tout tan. Pitit

pitit nou yo p'ap janm nan ka pou m' delivre yo ankò. ⁹ ¶ Leve non, Seyè! Leve non! Mete kouraj ou sou ou, Seyè! Leve non, tankou nan tan lontan, jan ou te fè l' sou tan zansèt nou yo! Apa ou

menm ki te fann Raab pak an pak? Apa ou menm ki te pèse gwo dragon lanmè a? ¹⁰ Se ou menm ki te cheche dlo lanmè a. Se ou menm ki te louvri yon chemen nan mitan lanmè a pou moun ou

t'ap delivre yo te ka pase. ¹¹ Moun Seyè a delivre yo ap tounen lakay yo. Y'ap rive sou mòn Siyon an avèk chante nan bouch yo, ak yon kontantman nan tout figi yo, yon sèl kè kontan ki p'ap janm

fini. P'ap gen lapenn, p'ap gen plenyen ankò. Se va kè kontan ak fèt pou tout tan. ¹² Seyè a di: -Se mwen menm k'ap ban nou kouraj. Poukisa pou nou ta pè moun ki la pou mouri, moun ki gen pou

pase tankou zèb nan savann? ¹³ Gen lè ou bliye Seyè ki te fè ou la, li menm ki te louvri syèl la epi ki te poze fondasyon latè a? Poukisa tout lajounen w'ap tranble konsa devan kòlè moun k'ap peze

ou yo, moun k'ap chache detwi ou yo? Kisa kòlè moun sa yo ka fè ou? ¹⁴ Talè konsa, yo pral lage

moun ki nan prizon yo. Yo p'ap mouri nan kacho. Y'a jwenn kont manje pou yo manje. ¹⁵ Se mwen menm, Seyè a, ki Bondye ou la. Mwen souke dlo lanmè a, mwen fè lanm lanmè yo gwonde. Seyè

ki gen tout pouvwa a, se konsa yo rele m'! ¹⁶ Lè m' t'ap louvri syèl la, lè m' t'ap mete fondasyon latè a, mwen te di moun Siyon yo: se pèp mwen nou ye. Mwen te mete pawòl mwen nan bouch

nou. Mwen te pwoteje nou ak fòs ponyèt mwen. ¹⁷ ¶ Leve non, lavil Jerizalèm! Leve non! Souke kò ou. Leve non! Ou fin bwè gode chatiman Bondye te ba ou bwè nan kòlè li a. Ou bwè dènye

degout ki te nan gode a jouk li fè tèt ou vire! ¹⁸ Nanpwen yonn nan tout pitit li fè yo ki la pou

moutre l' chemen pou l' pran. Pa gen yonn nan tout pitit li elve yo ki la pou ba l' men. ¹⁹ De malè tonbe sou ou yonn apre lòt. Ki moun ki ka plenn sò ou? Yo ravaje peyi a, yo fini avè l'. Grangou

ak lagè fin touye moun ou yo. Pa gen moun ankò ki pou ba ou kouraj. ²⁰ Nan tout kwen lari, moun ou yo kouche atè san konesans. Tankou bèt nan bwa, yo pran nan pèlen. Kòlè Seyè a fè yo sou.

Bondye pa nan pale mete la. ²¹ Se poutèt sa, nou menm moun lavil Jerizalèm ki nan soufrans,

koute pawòl sa yo byen, nou menm ki sou tankou si nou te bwè diven. ²² Seyè a, Bondye nou an, pale. Men sa Bondye k'ap pran defans pèp li a di: -Mwen pral wete nan men nou gode mwen te

ban nou bwè nan kòlè mwen an. Nou p'ap gen pou nou bwè ankò nan gode k'ap fè nou sou a. ²³ Se moun ki t'ap maltrete nou yo mwen pral bay li, moun ki t'ap fè nou pase tray yo epi ki t'ap di nou: Kouche kò nou atè pou nou ka pase sou nou. Lè konsa, nou pare do nou ba yo vre atè a, yo mache sou nou, tankou sou granchemen kote moun ap pase!

Chapter 52

¹
 ¶ Leve non, mòn Siyon! Leve non! Mete kouraj ou sou ou! Mete pi bèl rad ou sou ou, ou menm Jerizalèm, lavil Bondye a! Paske moun lòt nasyon yo, ki pa pote mak kontra Bondye a, ki pa nan kondisyon pou sèvi Bondye, p'ap janm mete pye lakay ou ankò. ² Ou menm lavil Jerizalèm ki nan prizon, souke pousyè ki sou ou, leve atè a, chita sou fòtèy ou! Wete chenn yo te pase nan kou ou yo, ou menm mòn Siyon ki te nan prizon! ³ Men sa Seyè a di pèp li a. -Yo pa t' bay lajan pou achte nou lè nou te tounen esklav. Yo p'ap bay lajan non plis pou delivre nou lè y'a lage nou. ⁴ Men sa Seyè a, Bondye a, di: -Nan tan lontan, pèp mwen an te desann al rete nan peyi Lejip. Apre sa, Lasiri fè yo pase kont mizè yo pou anyen. ⁵ Koulye a, sa pou m' fè la a? Se Seyè a menm k'ap di sa. Yo pran pèp mwen an, yo depòte yo pou anyen. Moun k'ap kraze yo a ap pale fò, y'ap fè grandizè. Se Seyè a menm ki di sa. Epi tout lajounen, san rete y'ap trennen non m' nan labou. ⁶ Men jou sa a, pèp mwen an va rekonèt se mwen menm Bondye, ki pale ak nou! Men mwen! ⁷ ¶ Ala bèl sa bèl lè ou wè sou mòn yo mesaje a k'ap kouri pote bon nouvèl k'ap bay kè poze a! L'ap fè konnen delivrans Bondye a. L'ap di moun Siyon yo: Se Bondye ou la k'ap gouvènen! ⁸ Faksyonnè ou yo ap rele. Y'ap rele ansanm tèlman yo kontan. Y'ap wè, se ak pwòp je yo y'a wè Seyè a k'ap tounen sou mòn Siyon an! ⁹ Pete rele, fè fèt ansanm, nou menm vye miray mazi lavil Jerizalèm yo! Paske Seyè a bay pèp li a kouraj ankò, li delivre lavil Jerizalèm. ¹⁰ Seyè a fè tout nasyon yo wè fòs kouraj li ki apa nèt la. Toupatou sou latè yo wè jan Bondye nou an ap delivre pèp li a. ¹¹ Wete kò nou nan lavil Babilòn! Wete kò nou! Pati ale! Pa manyen anyen nou pa dwe manyen! Wete kò nou nan mitan lavil la. Mete nou nan kondisyon pou nou fè sèvis pou Bondye, nou menm k'ap pote veso ki apa pou sèvis Seyè a. ¹² Fwa sa a, nou pa bezwen prese kouri ale. Nou p'ap fè tankou moun k'ap kouri chape poul yo. Paske Seyè a, Bondye nou an, ap pran devan nou. Se li menm tou, Bondye pèp Izrayèl la, k'ap mache dèyè pou pwoteje nou. ¹³ ¶ Seyè a di: -Men li, sèvitè m' lan va wè tout travay li ap mache byen! L'a vin grannèg. Moun va konsidere l' anpil. Y'a pote l' anlè! ¹⁴ Menm jan anpil moun te pran sezisman lè yo te wè l', sitèlman li te defigire, sitèlman figi l' pa t' sanble menm ak figi moun, ¹⁵ konsa tou, anpil nasyon va kontan lè y'a wè l' fwa sa a. Wa yo va rete bouch be devan li sitèlman y'a sezi. Paske y'a wè bagay moun pa t' janm rakonte yo anvan sa, y'a konprann bagay yo pa t' janm tandè anvan.

Chapter 53

¹ ¶ Pèp la va reponn: -Ki moun ki te kwè sa n'ap tandè la a? Ki moun ki rekonèt travay Bondye
² a nan sa ki rive la a? Li te grandi devan Bondye tankou yon ti plant ki tou fèb, tankou yon ti kreyòl
ki pouse nan tè sèk. Li pa t' bèl gason, li pa t' gen anyen nan li ki pou ta fè nou vire gade l'. Li pa t'
³ sanble anyen ki ta ka fè nou kontan ret gade l'. Nou pa t' gade l' menm, tout moun te vire do ba
li. Li te soufri anpil, li te tout tan nan gwo lapenn. Tout moun te vire tèt yo pou yo pa wè l'. Nou
⁴ pa t' okipe l', nou pa t' pran ka l' menm. ¶ Men, se soufrans nou ta gen pou nou soufri a li t'ap
soufri pou nou. Se doule nou ta gen pou santi nan kò pa nou li te pran sou do l'. Nou menm menm,
nou te konprann se pini Bondye t'ap pini l'. Nou te konprann se frape Bondye t'ap frape l', se kraze
⁵ Bondye t'ap kraze l' anba men l'. Men, se pou peche nou kifè yo te mete san l' deyò konsa. Se
akòz mechanste nou kifè yo te kraze l' anba kou konsa. Chatiman ki te pou nou an se sou li li tonbe.
⁶ Se konsa li ban nou kè poze. Avèk tout kou li te resevwa yo, li ban nou gerizon. Nou te tankou
mouton ki te pèdi bann, chak moun bò pa yo. Men, chatiman ki pou te tonbe sou nou an, Seyè a fè
⁷ l' tonbe sou li. Yo te maltrete l', men li menm se bese li bese tèt li ase. Tankou yon ti mouton y'ap
mennen labatwa, li pa t' janm louvri bouch li di krik. Wi, tankou yon manman mouton ki pa di krik
⁸ pandan y'ap taye lenn sou do l', li pa t' janm louvri bouch li di anyen. Yo pran l', yo mete l' nan
prizon, yo trennen l' tribinal. Pa t' gen pesonn pou te pran ka l', lè yo wete l' nan mitan moun k'ap
⁹ viv sou tè a. Se pou peche pèp mwèn an yo te touye l'. Atout li pa t' janm fè ankenn krim, yo
antere l' menm kote ak mechan yo. Atout li pa t' janm kite manti soti nan bouch li, yo mete l' nan
¹⁰ yon kavo nan mitan tonm moun rich yo. ¶ Men, se te volonte Bondye pou yo te kraze l' anba
soufrans konsa, pou l' te bay lavi li pou Bondye te ka padonnen peche nou yo. L'a wè pitit pitit li
¹¹ yo. L'a viv pi lontan toujou. Se konsa travay Seyè a va mache byen nan men l'. Apre tout soufrans
sa yo, l'a jwenn kè kontan ankò. L'a konnen li pa t' soufri pou gremesi. Li te sèvi Bondye yon jan
¹² ki kòrèk nèt. Li te pran chatiman anpil moun sou do l'. L'a fè Bondye fè yo gras. Se poutèt sa,
m'ap pran l' mete l' chèf. M'ap ba li plas nan mitan grannèg yo. L'ap gen menm pouvwa ak gwo
chèf yo. Paske se limenm menm ki te bay tèt li pou l' mouri konsa. Li te kite yo mete l' ansanm ak
krimenèl yo. Li pran plas anpil moun ki t'ap fè sa ki mal. Li mande padon pou moun ki te fè mal
yo.

Chapter 54

¹
 ¶ Jerizalèm, ou menm ki pa t' kapab fè pitit, rele, fè fèt! Ou menm ki pa t' janm konnen doulè tranche, chante, danse, fè kè ou kontan! Paske fanm gason pa t' okipe a ap gen plis pitit pase fanm mari l' pa t' janm kite l' la. Se Seyè a menm ki di sa.

²
 Laji kote w'ap moute tant ou pou ou viv la! Louvri twal tant ou yo. Ou pa bezwen jennen. Lonje kòd ou yo, ranfòse pikèt ou yo!

³
 Ou pral louvri lakou ou sou bò dwat ak sou bò gòch pou fè plas. Moun ou yo pral tounen nan peyi moun lòt nasyon yo te pran nan men yo. Yo pral plen tout lavil ki te rete san moun yo.

⁴
 Ou pa bezwen pè! Yo p'ap derespekte ou ankò! Ou pa bezwen bese tèt ou, yo p'ap fè ou wont ankò! Ou pral bliye bagay lèd ou te fè lè ou te jenn marye a. Ou p'ap chonje lè ou te rete pou kont ou tankou yon fanm ki pèdi mari l'.

⁵
 Bondye ki te kreye ou la pral tankou yon mari pou ou. Seyè ki gen tout pouvwa a, se konsa yo rele l'. Se Bondye pèp Izrayèl la, Bondye ki apa a, ki pral delivre ou. Se Bondye tout latè a yo rele l'.

⁶
 ¶ Ou tankou yon madanm mari l' kite l', epi ki nan gwo lapenn. Ou tankou yon madanm mari l' te renmen depi lè l' te jenn gason, men li vire do kite l'. Seyè a rele ou tounen vin jwenn li.

⁷
 Men sa Bondye ou la di ou: -Mwen te kite ou pou yon ti tan. Men, m'ap tounen avè ou ankò paske mwen renmen ou anpil.

⁸
 Kòlè te fè m' pèdi tèt mwen. Mwen te vire do ba ou. Men, kè m' fè m' mal pou ou. M'ap moutre ou jan m' toujou renmen ou. Se Seyè k'ap delivre ou la ki di ou sa.

⁹
 Menm jan nan tan Noe, mwen te pwomèt mwen p'ap janm kite gwo inondasyon rive ankò sou latè. Konsa tou, mwen pwomèt koulye a m' p'ap janm fache sou nou ankò. Mwen p'ap rele dèyè nou, mwen p'ap pini nou ankò.

¹⁰
 Ou te mèt wè mòn yo ap souke, ti mòn yo ap tranble, mwen p'ap janm sispann renmen ou. M'ap toujou kenbe kontra mwen te pase pou m' te toujou byen avè ou la.

¹¹
 Se Seyè ki renmen ou lan ki di ou sa. ¶ Seyè a di ankò: -Ou menm lavil Jerizalèm ki nan gwo lapenn, ki san sekou, ki san pesonn pou konsòle ou, mwen pral poze bèl wòch pyè ak yon mòtye koulè pou fondasyon ou. Mwen pral rebati ou sou pyè safi.

¹²
 M'ap bati fò ou yo ak pyè ribi, pòtay ou yo ak pyè malachi, miray ranpa ou yo ak bèl wòch pyè ki koute chè.

¹³
 Se Seyè a menm ki pral moutre pitit ou yo tout bagay. Yo pral viv alèz ak kè poze.

¹⁴
 Ou pral kanpe fèm paske tout moun ap mache dwat lakay ou. Pa fè mechanste. Ou pa bezwen pè pesonn. Ou pa bezwen gen kè sote. Anyen p'ap rive ou.

¹⁵
 Si yo atake ou, sa p'ap soti nan mwen. Nenpòt moun ki va fè ou lagè pral tonbe devan ou.

¹⁶
 Se mwen menm ki kreye bès fòjon k'ap chofe dife chabon pou fè tout kalite zam. Se mwen menm tou ki fè lwijanboje yo pou kraze brize.

¹⁷
 Men, tout zam y'a fè pou sèvi kont ou yo p'ap fè ou anyen. W'a gen repons nan bouch ou pou tout moun ki va akize ou nan tribinal. Se sa m'ap fè pou tout sèvitè m' yo. Se mwen k'ap defann kòz yo. Se Seyè a menm ki di sa!

Chapter 55

¹ ¶ Vini non, nou tout ki swaf dlo. Men dlo! Vini non, nou tout ki pa gen lajan, nou mèt vini. Achte manje pou nou manje. Nou pa bezwen lajan! Achte diven ak lèt pou nou bwè. Nou pa bezwen

² peye! Poukisa n'ap depanse lajan achte manje ki pa ka fè anyen pou nou? Poukisa n'ap depanse lajan travay nou pou bagay ki pa ka plen vant nou? Si nou koute byen sa m'ap di nou la a, n'a manje

³ sa ki bon. N'a pran plezi nou nan manje bon kalite manje. Louvri zòrèy nou. Vin jwenn mwen. Koute byen sa m'ap di nou, n'a jwenn lavi. M'ap siyen yon kontra ak nou pou tout tan. M'a ban nou

⁴ benediksyon mwen te pwomèt David yo. Gade. Mwen te fè l' chèf pou l' te kòmande nasyon yo. Mwen te fè l' sèvi m' temwen nan mitan yo.

⁵ Gade, ou pral rele nasyon ou pa t' konnen. Nasyon ki pa t' konnen ou pral kouri vin jwenn ou. Se mwen menm, Seyè a, Bondye ou la, Bondye apa pèp Izrayèl la, k'ap fè sa rive konsa, paske m'ap leve ou anlè.

⁶ ¶ Tounen vin jwenn Seyè a, pandan nou

⁷ ka jwenn li an. Lapriyè nan pye l' pandan li toupre nou an. Se pou mechan yo kite move chemen y'ap swiv la. Se pou malveyan yo wete move lide k'ap travay nan tèt yo. Se pou yo tounen vin jwenn Seyè a ki va gen pitye pou yo. Se pou yo tounen vin jwenn Bondye nou an, paske l'ap

⁸ padonnen tou sa yo fè. Lide pa m' pa menm ak lide pa nou. Chemen pa nou pa menm ak chemen pa m'.

⁹ Se Seyè a menm ki di sa. Menm jan syèl la byen lwen anwo latè, se konsa lide pa m' byen lwen anwo lide pa nou, chemen pa m' byen lwen chemen pa nou.

¹⁰ Gade! Lapli ak lawouze soti nan syèl la, yo pa tounen kote yo soti a san yo pa wouze latè, san yo pa fè l' donner, san yo pa fè plant yo pouse pou bay kiltivatè yo grenn pou yo simen ak manje pou yo manje.

¹¹ Konsa tou pou pawòl ki soti nan bouch mwen: li p'ap tounen vin jwenn mwen san li pa fè sa m' te vle l' fè a, san li pa fè tou sa mwen te voye l' fè a.

¹² N'a kite lavil Babilòn ak kè kontan. Y'a mennen nou tounen lakay nou ak kè poze. Gwo mòn yo ak ti mòn yo va pran chante pou nou sitèlman y'a kontan. Tout

¹³ pyebwa nan plenn yo va bat bravo pou nou! Pye pichpen va pouse kote ki te plen pikan. Pye ilan-ilan va pouse kote ki te plen chadwon. Sa va sèvi yon lwanj pou Seyè a, yon remak k'ap la pou tout tan, yon siy pesonn p'ap ka detwi.

Chapter 56

¹
 ¶ Men sa Seyè a di pèp li a: -Se pou nou fè sa ki dwat. Pa fè lenjistis. Paske mwen pa lwen
 vin delivre nou, mwen pa lwen fè nou konnen jan m'ap pran defans nou. ² benediksyon pou moun
 ki fè sa m' di yo fè a epi ki toujou kenbe pawòl mwen yo fèm. benediksyon pou moun ki respekte
 jou repo a, pou moun ki pa mete men l' nan ankenn movezak. ³ ¶ Yon moun lòt nasyon ki va kole
 kò l' ak pèp Seyè a pa fèt pou di: Seyè a p'ap kite m' fè sèvis pou li ansanm ak pèp li a. Yon moun
 ki chatre pa dwe janm di: Se yon vye pyebwa chèch mwen ye, mwen pa ka fè pati pèp Bondye a.
⁴
 Men sa Seyè a di: Lè yon moun ki chatre mete jou repo a apa pou mwen, lè li chwazi pou l' fè
 volonte mwen, lè li kenbe kontra mwen an fèm, ⁵ m'ap fè yo chonje l' nan tanp mwen an ak nan
 mitan pèp mwen an pi lontan pase si li te gen pitit gason ak pitit fi. M'ap fè yo pa janm bliye l'.
⁶
 Tout moun lòt nasyon ki va vin kole kò yo ansanm ak pèp Seyè a pou yo sèvi l', pou yo renmen
 l' tankou yon sèvitè, tout moun ki mete jou repo a apa san yo pa derespekte l' epi ki kenbe kontra
 m' lan fèm, ⁷ m'ap mennen yo sou mòn ki apa pou mwen an, m'a ba yo kè kontan nan kay kote yo
 fè lapriyè pou mwen an. M'a asepte tout bèt y'a ofri pou boule sou lotèl mwen ak tout lòt ofrann
 y'a fè pou mwen. Y'a rele kay mwen an kay kote tout pèp va vin fè lapriyè nan pye m'. ⁸ Men sa
 Seyè a, Bondye a, di, li menm ki te fè moun pèp Izrayèl yo te depòte yo sanble nan peyi yo a ankò:
⁹
 Anplis moun pèp mwen an, mwen va sanble yon bann lòt moun ankò ansanm ak yo. ¶ Seyè a
 rele moun lòt nasyon yo pou yo vin devore, pou yo vin manje tankou bèt mawon ki nan savann ak
¹⁰
 bèt ki nan rakbwa. Li di: -Tout chèf ki la pou avèti pèp mwen an, je yo pete. Yo pa konprann
 anyen. Yo tankou chen ki pa janm jape. Lespri yo byen lwen. Yo kouche tout lajounen, y'ap kabicha.
¹¹
 Yo tankou chen aloufa, anyen pa janm kont yo. Se yon bann chèf san konprann. Yo tout fè sa
 yo pito. Se avantaj yo ase y'ap defann. ¹² Y'ap plede di: Vini non! N'a jwenn diven. N'a pran kèk
 bon razad gwòg. Denmen menm, bagay la ap pi bon toujou pase jòdi a.

Chapter 57

¹
 ¶ Moun k'ap mache dwat yo ap fin mouri nan peyi a, sa pa fè pesonn anyen. Moun k'ap sèvi
 Bondye ak tout kè yo ap fin disparèt, pesonn pa wè sa. Mechanste fè moun k'ap mache dwat yo
 disparèt. ² Moun ki t'ap mache dwat yo ale kote yo jwenn kè poze, yo kouche nan tonm yo. ³ ¶
 Nou menm ki p'ap fè anyen san konsilte zetwal, pwoche vini! Se yon bann moun ki vire do bay
 Bondye nou ye. N'ap sèvi zidòl, nou tankou moun k'ap fè adiltè, k'ap viv nan dezòd. ⁴ Ki moun
 n'ap pase nan betiz la a? Ki moun n'ap pale mal konsa? Sou ki moun n'ap fè grimas konsa? Se yon

bann moun ki pa janm kenbe pawòl yo, yon bann moun k'ap bay manti nou ye. ⁵ N'ap fè sèvis pou zidòl nan jaden nou. Nou kouche ak fanm anba pye bwadchenn, anba tout raje. Nou bay timoun nou pou yo touye pou zidòl yo nan twou wòch nan bafon yo. ⁶ Nou pran kèk gwo wòch galèt nan ravin yo sèvi nou Bondye. Se yo ki tout nou. Nou fè ofrann grenn jaden ak ofrann diven pou yo vide sou yo. ⁷ Nou konprann bagay konsa ka fè m' plezi! Nou moute sou yon gwo mòn byen wo pou n' al kouche ak fanm, pou n' al touye bèt nou ofri bay zidòl yo. ⁸ Nou mete wòch zidòl nou yo dèyè pòtay nou, nan papòt lakay nou. Nou vire do ban mwen, nou mete nou toutouni, nou moute sou gwo kabann byen laj nou, nou kouche ak medam, chwal zidòl yo, nou peye pou sa. Nou pran kont plezi nou ak je nou kole sou wòch zidòl yo. ⁹ Nou mete odè sou nou, nou pati al fè sèvis pou Molòk. Nou mete tout kalite odè sou nou. Nou voye mesaje byen lwen al chache zidòl pou nou. ¹⁰ Nou voye yo jouk nan peyi kote mò yo ye a. Nou fatigue kò nou ap vwayaje, men nou pa janm kite! Nou mete nan tèt nou zidòl yo ap ban nou fòs pou nou pa janm bouke. ¹¹ Seyè a di: Kilès bondye sa yo ki t'ap ban nou kè sote, ki t'ap fè nou pè konsa, kifè ou bay tout manti sa yo? Kilès sa a ki fè nou bliye m' konsa? Nou pa chonje reve m'. Eske se paske mwen rete mwen pa di anyen kifè nou sispann gen krentif pou mwen? ¹² M'ap denonse tou sa n'ap plede fè pou sove tèt nou. Nou kwè l'ap bon pou nou, men sa p'ap sèvi nou anyen. ¹³ ¶ Lè n'a rele mande sekou, se pou tout zidòl nou yo vin sove nou si yo kapab! Yon senp ti van ap pote yo ale, yon ti briz van ap pati ak yo. Men, moun ki mete konfyans yo nan mwen va rete nan peyi a, y'a rete sou mòn ki apa pou mwen an. ¹⁴ Lè sa a, Seyè a di: -Pare wout la pou pèp la tounen vin jwenn mwen. Mete ranblè. Wete tout bagay k'ap bare wout la devan pèp mwen an. ¹⁵ Se mwen menm Bondye ki anwo nèt nan syèl la, Bondye ki la pou tout tan an, Bondye ki apa nèt la. Men sa mwen di: mwen rete yon kote ki anwo nèt, yon kote ki apa pou mwen nèt. Men mwen kanpe la avèk moun ki soumèt yo devan m', avèk moun ki gen lapenn tout bon pou sa yo fè ki mal, pou m' ka remoute kouraj yo, pou m' ba yo konfyans ankò. ¹⁶ Mwen pa vle nan diskrit tout tan ak yo, mwen pa vle rete ankòlè tout tan pou moun mwen bay lavi yo pa pèdi kouraj. ¹⁷ ¶ Wi, mwen te fache anpil sou yo paske yo te gen move lanvi nan kè yo. Mwen te fè kòlè, mwen te pini yo, mwen te lage yo, paske yo t'ap fè tèt di, yo t'ap fè sa yo pi pito. ¹⁸ Mwen te wè tou sa yo t'ap fè, men m'ap geri yo. Mwen pral pran men yo pou m' mennen yo sou bon chemen an. M'a remoute kouraj sa ki nan lapenn yo. ¹⁹ M'a di yo: Kè poze pou nou tout ki lwen, kè poze pou nou tout ki pre. M'a mete lwanj nan bouch yo, m'ap ba yo tout kè poze, m'ap geri yo. ²⁰ Men, mechan yo tankou lanmè ki boulvèse. Lanm lanmè yo ap

bat san rete, y'ap jete kras ak labou sou rivaj la. ²¹ Bondye mwen an di: Pa gen kè poze pou mechan yo.

Chapter 58

¹ ¶ Seyè a di m' konsa: -Rele ak tout fòs ou, rele mezi ou kapab! Fè vwa ou sonnen tankou klewon! Fè pèp mwen an konnen tout mechanste li fè yo! Fè moun fanmi Jakòb yo konnen tout peche yo te fè! ² Chak jou, y'ap fè sèvis pou mwen. Yo pretann yo konnen chemen m' yo, tankou si se yon nasyon ki fè sa ki dwat devan m', epi ki pa t' janm lage lòd mwen te ba yo. Y'ap mande m' pou m' defann kòz yo. Yo ta vle pou Bondye kanpe la ak yo. ³ ¶ Pèp la ap di: -Sa nou bezwen fè jèn fè si Bondye p'ap wè sa? Sa nou bezwen pran lapenn pou sa nou fè ki mal si ou p'ap gade sou sa? Seyè a reponn yo: -M'ap di nou laverite. Jou n'ap fè jèn lan, se jou sa a tou n'ap chache fè sa ki nan enterè nou ase. Se lè sa a n'ap plede peze moun k'ap travay pou nou yo. ⁴ Konsa tou, jou n'ap fè jèn lan, se lè sa a tou n'ap joure, n'ap fè kont, n'ap goumen, n'ap bay move kou. Jan mwen wè n'ap fè jèn lan jòdi a se pa konsa pou nou fè l' si nou vle lapriyè nou yo rive nan zòrèy mwen. ⁵ Eske mwen ka pran plezi nan kalite jèn sa a? Se sa nou rele yon jou n'ap pran lapenn pou sa nou fè ki mal? Fè jèn pou nou, se bese tèt nou jouk atè tankou wozo van ap pliye, se kouche plat atè sou sak nan mitan sann dife. Atò se sa nou rele fè jèn? Se sa ki pou fè Bondye plezi a? ⁶ Non! Men kalite jèn ki pou fè kè m' kontan an: Sispann fè mechanste. Sispann fè lenjistis. Bay esklav nou yo libète! Mete chay k'ap foule moun yo atè. ⁷ Separe sa nou genyen ak moun ki grangou. Louvri pòt kay nou pou nou resevwa malere ki pa gen kote pou yo dòmi. Si nou wè yon frè nou toutouni, ba li rad pou li mete sou li. Pa refize lonje men bay frè parèy ou. ⁸ ¶ Lè sa a, tankou solèy k'ap leve, m'ap klere nou, m'a fè nou wè jan mwen renmen nou. Lapoula m'a geri nou, m'a toujou mache ak nou pou m' delivre nou. Pouvwa Bondye a va mache dèyè nou pou pwoteje nou. ⁹ Lè sa a, si nou lapriyè nan pye m', m'a reponn nou. Si nou rele m', m'a di men mwen! Si nou rache tout mechanste nan kè nou voye jete, si nou sispann kraponnen moun, si nou sispann pale moun mal, ¹⁰ si nou manje ak moun ki grangou, si nou plen vant moun ki nan nesosite, limyè va klere pou nou nan mitan fènwa. Lannwit va fè klè pou nou tankou gwo midi. ¹¹ Se tout tan Seyè a va moutre nou chemen pou nou pran, l'a rafrechi nanm nou nan tan chechrès. L'a ban nou fòs ak kouraj. N'a tankou yon jaden ki byen wouze, tankou yon sous dlo ki pa janm chèch. ¹² N'a rebati vye kay nou yo ki te fin tonbe. N'a moute lòt kay sou ansyen miray fondasyon tan lontan yo. Y'a rele nou moun ki konn repare miray fann yo, moun ki konn balize granchemen yo, moun k'ap refè kay ki kraze yo

13
 pou moun ka vin rete nan peyi a ankò. ¶ Si nou veve kò nou pou nou respekte jou repo a, pou nou pa regle pwòp zafè nou jou ki apa pou mwen an, si se yon plezi pou nou lè jou repo a rive, si nou respekte jou ki apa pou mwen menm, Seyè a, pou jou sa a nou pa nan fè sa ki nan lide nou, nou pa nan vwayaje, nou pa nan fè travay, ni nou pa nan pale vye koze, 14 lè sa a, n'a jwenn plezi nou nan fè sèvis pou mwen. M'a fè tout moun sou latè pote nou anlè, n'a jwi lavi nan peyi mwen te bay Jakòb, zansèt nou an. Se mwen menm, Seyè a, ki di sa!

Chapter 59

1 ¶ Non! Se pa paske Seyè a manke fòs kifè li pa vin delivre nou. Se pa paske li soudè kifè li pa tande lè n'ap lapriyè nan pye l'. 2 Men se mechanste nou yo ki mete yon bayè ant nou ak Bondye nou an. Se peche nou yo ki fè l' vire figi l' pou l' pa tande nou. 3 San ap koule sou tout dwèt nou. Nou foure men nou nan tout kalite mechanste. Bonjour nou pa laverite. Depi nou louvri bouch nou se kout lang n'ap bay. 4 Lè n' al nan tribinal se pou defann move kòz. Lè n'ap plede, nou bay manti. N'ap di yon bann bagay ki pa laverite. Se move lide ase ki nan tèt nou. Se mechanste ase n'ap fè. 5 Move plan y'ap fè yo tankou pwazon. Si ou pran ladan yo nanpwen rechap. Si ou rive kraze yon move plan y'ap fè, y'ap pare yonn ki pi rèd pou ou. 6 Menm jan ou pa ka fè rad ak fil zariyen, konsa tou sa y'ap fè a p'ap rapòte yo anyen ki bon. Se mechanste ase yo soti pou yo fè. Se nan san ase yo mete men yo. 7 Y'ap kouri konsa pou fè sa ki mal, yo cho pou yo touye moun inonsan. Lide yo toujou sou sa ki mal, kote yo pase se dega toupato. Se malè yo kite dèyè yo. 8 Yo pa konn jan pou yo viv byen ak moun. Tout sa y'ap fè kwochi. Tout kò yo se plan. Moun k'ap swiv yo toujou nan tèt chaje. 9 ¶ Pèp la di: -Koulye a nou konnen poukisa Bondye ki pou ta defann kòz nou an rete lwen nou konsa, poukisa li pa vin delivre nou. Nou t'ap tann limyè pou klere kote n'ap mete pye nou, men kote nou pase se nan fènwa nou ye. 10 N'ap tatonnen tankou avèg k'ap chache wout, tankou moun je pete. N'ap bite gwo midi tankou si nou t'ap mache solèy kouche. San nou pa malad, nou tankou moun ki deja nan peyi san chapo. 11 N'ap wouke tankou chen, n'ap plenn tankou bourik anba chay. N'ap tann Bondye pou l' pran defans nou. Bichi! N'ap tann li vin delivre nou. Anyen menm! 12 Seyè, se vre wi, nou te fè anpil peche kont ou! Koulye a, se peche nou yo k'ap kale nou. Yo la devan je nou. Nou rekonèt nou te fè yo vre. 13 Nou te vire do bay Seyè a, nou voye l' jete. Nou derefize koute l'. Nou tòde men frè parèy nou, nou revòlte kont Bondye. Se move lide ase nou

te gen nan kè nou. Se manti ase nou t'ap kalkile nan tèt nou. ¹⁴ Se poutèt sa, nou pa t' bay chans pou yo defann nou. Pesonn pa ka pwoche vin delivre nou. Nan tout lavil la ou pa konn kote ou gad ak pesonn. Pesonn pa mache dwat. ¹⁵ Pa gen moun serye ankò! Si ou pa fè tankou tout moun, se ou k'ap anba. Seyè a wè sa. Sa te fè l' mal paske pa t' gen jistis nan peyi a. ¹⁶ ¶ Li sezi wè pesonn pa leve kanpe pou defann inonsan yo. Se konsa, li vin delivre pèp la ak pwòp fòs kouraj li. Li ba l' men, li pran defans li. ¹⁷ Li mete jistis anwo li tankou yon plak pwotèj pou lestonmak li. Li mete pouvwa pou sove a tankou yon kas nan tèt li. Li mete pouvwa revanj li sou li tankou yon palto, li vlope kò l' ak fòs pou l' pran defans moun li renmen yo. ¹⁸ L'ap pini chak moun dapre sa yo fè: li pral move sou moun ki pa vle wè l' yo, li pral tire revanj sou lènmi l' yo, menm sou moun ki rete nan zile byen lwen yo. ¹⁹ Depi kote solèy la leve a jouk kote solèy la kouche a, tout moun va pè Seyè a, y'a respekte pouvwa li. L'ap vin tankou lavalas k'ap desann nan fon ravin, tankou gwo van tanpèt. ²⁰ M'ap vin sou mòn Siyon an pou m' delivre tout moun fanmi Jakòb yo ki va vire do bay peche yo. Se Seyè a menm ki di sa. ²¹ Seyè a di ankò: Men kontra mwen pral pase ak yo a: M'ap mete lespri m' sou yo. M'ap ba yo lòd mwen yo pou lòd mwen yo ka nan bouch yo, nan bouch pitit yo ak nan bouch pitit pitit yo, pou tout tan tout tan. Se mwen menm Seyè a ki di sa.

Chapter 60

¹ ¶ Leve kanpe! Ou pral klere tankou solèy. Pouvwa Seyè a pral klere sou ou. ² Lòt nasyon yo nan fènwa, yon nwaj kouvri lòt pèp yo. Men limyè Seyè a pral leve sou nou! Pouvwa li pral parèt sou nou! ³ Nasyon yo pral kouri vin nan limyè nou an. Tout wa yo pral kouri vin nan klète jou k'ap leve pou nou an. ⁴ Voye je nou toupatou bò kote nou, gade sa k'ap rive! Tout moun pa nou yo ap sanble, y'ap tounen lakay yo. Pitit gason nou yo ap soti byen lwen. Moun ap pote pitit fi nou yo tankou timoun chita sou ren yo. ⁵ Lè n'a wè sa, n'a kontan nèt ale! Kè nou pral bat, nou p'ap konn kote pou n' mete kò nou! Y'ap pote richès nasyon yo ban nou. Y'ap soti lòt bò lanmè, y'ap vin jwenn nou. ⁶ Y'ap ban nou kantite chamo ki soti peyi Madyan ak peyi Efa. Nou p'ap konnen kote pou n' mete yo. Moun ap soti peyi Saba, chaje lò ak lansan. Y'ap pwonmennen fè lwanj Seyè a toupatou. ⁷ Tout mouton ak kabrit peyi Keda yo ap sanble lakay nou. N'a gen belye mouton peyi Nebayòt yo pou fè sèvis. N'a ofri yo pou boule sou lotèl mwen an. Sa va fè m' plezi. Seyè a va fè kay kote fòtèy li ye a vin byen bèl ankò. ⁸ Ki tout moun sa yo? Y'ap plane tankou yon nwaj nan syèl la, tankou

9
 yon bann pijon k'ap tounen vin nan kalòj yo? ¶ Se yon bann bato k'ap soti byen lwen, bato peyi Tasis yo devan. Y'ap mennen moun pèp Bondye a tounen lakay yo. Y'ap pote ajan ak lò ak yo an kantite, pou sa sèvi yon lwanj pou Seyè a, Bondye nou an. Paske Bondye pèp Izrayèl la, ki yon
 10
 Bondye apa, te fè bèl bagay pou pèp li a. Seyè a pale ak lavil Jerizalèm, li di l' konsa: -Se moun lòt nasyon ki pral rebati miray nou yo! Se wa yo ki pral sèvi nou domestik. Nan kòlè mwen, mwen
 11
 te pini nou. Men, mwen gen pitye pou nou paske mwen gen bon kè. Pòtay nou yo ap rete louvri lajounen kou lannwit. Yo p'ap janm fèmen, pou wa lòt nasyon yo ka pote tout richès peyi yo lakay
 12
 nou. Paske y'ap detwi tout nasyon ak tout wa ki pa vle sèvi nou yo. Y'ap kraze peyi sa yo nèt
 13
 ale. Y'a pote pi bèl pyebwa nan peyi Liban an, pichpen, pye sèd ak bwadòm, lakay nou pou
 14
 dekore tanp ki apa pou mwen an, pou anbeli kote m' rete a. Pitit moun ki t'ap maltrete nou yo va vin jwenn nou tèt bese. Tout moun ki t'ap pase nou nan betiz pral ajenou nan pye nou. Y'a rele
 15
 nou lavil Seyè a, Mòn Siyon ki pou Bondye pèp Izrayèl la ki yon Bondye apa. ¶ Mwen p'ap vire do ban nou ankò. Yo p'ap rayi nou. Nou p'ap rete san pesonn pou vizite nou. M'ap fè moun nou yo
 16
 toujou kontan wè nou. Y'a fè fèt de tit an tit. Lòt nasyon yo ansanm ak wa yo va pran swen nou tankou yon nouris k'ap bay pitit li tete. Lè sa a n'a konnen se mwen menm, Seyè a, ki sove nou. Se
 17
 Bondye pèp Izrayèl la, Bondye ki gen tout pouvwa a, ki delivre nou. M'a fè yo pote lò pou nou nan plas kwiv. M'a fè yo pote ajan pou nou nan plas fè. N'a gen kwiv nan plas bwa, n'a gen fè nan plas wòch. Nan plas chèf ki t'ap peze nou yo, m'a mete chèf k'ap fè nou viv ak kè poze. Nan plas
 18
 chèf ki t'ap souse nou yo, m'a mete chèf k'ap fè sa ki dwat. Yo p'ap tandè moun fè mechanste nan peyi a ankò. Moun p'ap devalize peyi a ankò, ni moun p'ap kraze l'. M'ap sèvi nou ranpa, se
 19
 mwen menm k'ap pwoteje nou. M'ap sèvi nou pòtay, n'a fè lwanj mwen. Se pa solèy la ki pral klere nou lajounen. Ni nou p'ap bezwen klète lalin lan pou klere nou lannwit. Se mwen menm, Seyè
 20
 a, ki pral sèvi nou limyè pou tout tan. Se Bondye nou an ki pral leve tèt nou. Solèy nou an p'ap janm kouche ankò. Lalin nou an p'ap janm disparèt. Se Seyè a menm ki pral sèvi nou limyè pou
 21
 tout tan. Jou lafliksyon nou yo fini. Tout moun nan pèp nou an va fè sa ki dwat. Y'a rete nan peyi a pou tout tan. Tankou kreyòl jaden mwen, se mwen ki plante yo, se mwen ki fè yo ak men
 22
 mwen, pou m' ka fè tout moun wè pouvwa mwen. Fanmi ki pi piti nan mitan nou an pral gen mil (1.000) moun. Fanmi ki pa vo anyen an pral tounen yon gwo nasyon. Se mwen menm Seyè a ki p'ap mize fè sa, lè lè a va rive.

Chapter 61

¹
 ¶ Lespri Bondye, Seyè a, desann sou mwen. Paske Seyè a chwazi m', li voye m' pou m' anonse bon nouvèl la bay moun ki nan lapenn yo, pou m' geri tout moun k'ap souffri yo, pou m' fè tout moun yo te depòte yo konnen yo delivre, pou m' fè tout prizonnye yo konnen pòt prizon louvri pou yo.

²
 Li voye m' anonse lè a rive pou Seyè a vin delivre pèp li a, jou a rive pou Bondye nou an vin tire revanaj pou nou. Li voye m' ankouraje tout moun ki nan lafliksyon,

³
 pou m' bay moun mòn Siyon ki nan lafliksyon yo kè kontan nan plas lapenn yo, kontantman nan plas kè sere yo a. M'ap mete nan bouch yo chante remèsiman nan plas chante plenyen. Yo pral grandi tankou gwo pyebwa nan jaden Seyè a te plante ak men l'. Yo tout pral fè sa ki dwat devan Bondye, pou tout moun ka

⁴
 fè lwanj bèl pouvwa li. ¶ Yo gen pou yo rebati sou anplasman vye lavil yo. Y'a repare kay moun yo te bandonnen depi lontan. Y'a rebati lavil ki te fin kraze yo, kay ki te fin tounen mazi depi lontan

⁵
 yo. Se moun lòt nasyon ki va pran swen mouton nou yo. Se moun vini ki va travay jaden nou yo, ki va okipe jaden rezen nou yo.

⁶
 Men nou menm, y'a rele nou prèt Seyè a. Wi, y'a rele nou Sèvitè Bondye nou an! N'a jwi richès lòt nasyon yo. Tout bèl bagay lakay yo, se pou nou y'a ye.

⁷
 Kote yo te konn fè nou wont, se sou tèt y'a pote nou. Kote yo te konn pase nou nan rizib, y'a fè gwo fèt

⁸
 pou nou. N'a rete nan peyi nou, richès nou va double. N'a toujou gen kè kontan san rete. Seyè a di: -Mwen menm, Seyè a, mwen renmen sa ki dwat, mwen pa vle wè lè moun ap vòlò, lè moun ap fè lenjistis. M'a kenbe pawòl mwen, m'a bay pèp mwen an rekonpans yo, m'a pase ak yo yon kontra

⁹
 k'ap la pou tout tan. Nan tout peyi, y'a nonmen non yo. Pitit pitit yo va gen bon non nan mitan lòt pèp yo. Tout moun ki va wè yo va konnen se yon ras moun mwenmenm menm, Seyè a, mwen

¹⁰
 beni. ¶ Se pa ti kontan kè m' kontan pou sa Seyè a fè. M'ap fè fèt pou Bondye mwen an. Paske mwen tankou yon nèg k'ap marye ki fin abiye pou nòs la, tankou yon lamarye k'ap ranje bijou l' yo

¹¹
 sou li. Li kouvri m' ak pouvwa li pou l' sove m'. Li vlope m' nan bra li pou l' delivre m'. Menm jan tè a fè ti plant yo pouse, menm jan grenn yo leve nan jaden, konsa tou, Seyè ki la pou tout tan an va delivre pèp li a. Tout nasyon va fè lwanj li toupatou.

Chapter 62

¹
 ¶ Jan m' renmen mòn Siyon sa a! Se pou m' pale. Jan m' renmen lavil Jerizalèm sa a, mwen p'ap pran kanpo, jouk delivrans li va parèt tankou limyè solèy k'ap leve, tankou flanbo k'ap klere

²
 nan fènwa. Jerizalèm, tout nasyon yo va wè delivrans ou. Tout wa yo pral wè pouvwa ou. Y'a ba

³
 ou yon lòt non, non Seyè a menm va chwazi pou ou a. W'a tankou yon bèl kouwòn nan men Seyè

a, tankou yon bèl foula nan men Bondye ou la. ⁴ Yo p'ap rele ou ti mepriz ankò. Yo p'ap konsidere peyi ou la tankou yon madanm mari l' kite l'. Y'a rele ou Kè kontan pou Bondye. Y'a rele peyi ou la Bèl madan marye. ⁵ Paske ou fè Seyè a plezi, l'ap tankou yon mari pou peyi ou la. Menm jan yon jenn gason marye ak yon jenn fi, Seyè a pral marye avè ou. Menm jan yon nonm marye kontan madanm li, Bondye ou la pral kontan ou. ⁶ ¶ Jerizalèm, mwen mete gad ap fè pòs sou miray ou yo. Lajounen kou lannwit, se pou yo pale. Se pou yo fè Seyè a chonje pwomès li te fè ou yo, pou li pa janm bliye ou. ⁷ Se pou yo kenbe l' kout jouk l'a fè lavil Jerizalèm kanpe ankò, pou toupatou sou latè y'a fè lwanj pou li. ⁸ Seyè a fè sèman, l'ap kenbe l' avèk fòs ponyèt li. -Mwen p'ap lage farin ble nou an nan men lènmi nou yo pou yo manje l'. Mwen p'ap kite moun lòt nasyon yo bwè diven nou te fatigue kò nou fè ak kouraj nou. ⁹ Men, nou menm ki te ranmase rekòt grenn yo, se nou ki va manje yo, lèfini n'a fè lwanj Seyè a. Se nou menm ki va bwè diven nan lakou kay ki apa pou Bondye a. ¹⁰ ¶ Nou menm moun lavil Jerizalèm, pase nan pòtay la, soti nan lavil la. Al pare wout la pou pèp la tounen. Ranbleye! Wete wòch sou tout wout la! Leve drapo a, fè tout nasyon yo siyon! ¹¹ Seyè a pral fè tout latè a konnen nouvèl la: -Di moun lavil ki sou mòn Siyon an: Men moun ki delivre nou an ap vini. L'ap mennen moun li sove yo avè l'. Y'ap mache devan l'. Se rekonpans li, se rezilta travay li. ¹² Y'a rele nou pèp ki apa pou Bondye a, pèp Bondye delivre a. Y'a rele lavil Jerizalèm lavil Bondye renmen an, lavil Bondye p'ap janm lage a.

Chapter 63

¹ ¶ Kilès sa a k'ap vini sot lavil Bozra nan peyi Edon an, ak yon rad tou wouj sou li a? L'ap mache byen bwòdè ak bèl rad li sou li. L'ap mache tèt li byen wo, l'ap pile tè a byen fò. Se mwen menm, Seyè a, ki gen pouvwa pou delivre moun lan, k'ap pale sou koze delivrans lan. ² Poukisa rad sou ou yo wouj konsa, tankou rad moun k'ap kraze rezen anba pye yo pou fè diven nan basen? ³ Seyè a reponn: -Mwen te pou kont mwen ap kraze nasyon yo anba pye m', tankou rezen nan basen. Pa t' gen yon moun nan pèp mwen an ki te la avè m'. Mwen fè kòlè, mwen mache sou yo, m' pilonnen yo anba pye m' sitèlman mwen te fache. San yo benyen tout rad mwen, li tache yo byen tache. ⁴ Mwen te chwazi nan kè m' jou pou m' te tire revanj pou pèp mwen an. Lè pou m' te pini lènmi l' yo te rive. ⁵ Lè m' gade, mwen te sezi. Pa t' gen yon moun pou ban m' yon koutmen. Pa t' gen pesonn pou ban m' konkou. Men, mwen te sitèlman an kòlè, mwen jwenn kont fòs nan ponyèt mwen, mwen kenbe jouk mwen fin delivre yo. ⁶ Mwen fè yon sèl kòlè, mwen kraze yon bann pèp.

Mwen dechèpiye yo sitèlman mwen te fache. Mwen fè dlo kò yo benyen kò yo. ¶ M'a chante pou
 m' fè konnen tout bèl bagay Seyè a fè pou nou. M'a fè lwanj li pou tou sa li fè pou nou, pou jan li
 bon pou moun fanmi Izrayèl yo. Li moutre nou jan li gen kè sansib pou nou, jan li renmen nou
 anpil. Seyè a te di se pèp mwen yo ye, m' sèten yo p'ap fè m' wont. Se konsa, li delivre yo nan
 tout tèt chaje yo. Se pa t' yon moun ni yon zanj li te voye fè travay la pou li. Se limenm menm ki
 te vin delivre yo. Li sitèlman renmen yo, kè l' sitèlman fè l' mal pou yo, se limenm menm ki te vin
 delivre yo. Nan tan lontan, li te toujou pran swen yo. Men, yo te fè wòklò avè l', yo te fè l' lapenn
 anpil. Se konsa Seyè a te tounen yon lènmi pou yo, li fè yo lagè. Men, yo chonje tan lontan, yo
 vin chonje Moyiz. Yo mande koulye a: Kote Bondye ki te rale yo sot nan lanmè a, Bondye ki te
 mete Moyiz mache devan yo tankou yon gadò pou bann mouton l' yo? Kote Bondye ki te bay Moyiz
 pouvwa lespri li a? Kote Bondye ki te kanpe sou bò dwat Moyiz la pou fè gwo mèvèy ak fòs
 ponyèt li, lè li te fann dlo a devan yo pou tout moun te ka toujou chonje sa l' te fè a? Lè Bondye
 te fè yo mache nan fon lanmè a tankou chwal nan sab dezè, san yo pa janm bite, tankou bèf k'ap
 desann nan plenn pou y' al manje, lespri Seyè a te mennen yo kote pou yo poze. Wi, se konsa Seyè
 a te mache devan pèp li a, pou tout moun te ka toujou nonmen non l' pou jan li gen pouvwa. ¶
 Seyè, antan ou nan syèl la, nan bèl kay ki apa pou ou a, tanpri, voye je ou gade nou non! Jan ou te
 fè jalouzi pou nou sa a! Jan ou te kanpe pou nou ak kouraj ou sa a! Jan ou te renmen nou sa a! Jan
 ou te konn gen pitye pou nou sa a! Kote ou kite tou sa? Gen lè ou fèmen kè ou! Se ou menm ki
 papa nou. Abraram pa konnen nou. Izrayèl pa rekonèt nou! Se ou menm, Seyè, ki papa nou. Se ou
 menm ki toujou delivre nou! Poukisa atò ou kite nou pèdi chemen ou te mete devan nou an, ou
 kite nou lage kò nou nan raje? Poukisa ou kite nou fè tèt di, ou kite nou pèdi krentif nou te gen pou
 ou a? Tanpri, tounen vin jwenn nou non, poutèt moun k'ap sèvi ou yo, poutèt pèp ki toujou moun
 pa ou la! Nou poko chita, lènmi nou yo te gen tan pran peyi a nan men nou, yo derespekte tanp
 ou a. Depi kèk tan ou sèvi ak nou tankou si se pa ou ki chèf nou ankò, tankou si nou pa pèp ou
 a ankò.

Chapter 64

¶ Si ou te ka chire syèl la desann! Mòn yo ta annik wè ou, yo ta pran tranble. Yo ta moute
 desann tankou dlo k'ap bouyi sou gwo dife bwa. Desann non pou fè lènmi ou yo konnen ki moun
 ou ye, pou fè tout nasyon yo tranble devan ou! Yon lè, ou te desann, ou te fè yon bann bagay nou

pa t'ap tann, bagay ki fè moun pè: mòn yo te wè sa, yo te pran tranble. ⁴ Pesonn pa janm wè ni yo
 pa janm tande yon Bondye tankou ou ki ka fè tou sa pou moun ki met espwa yo nan li. ⁵ Men, ou
 louvri bra ou pou ou resevwa moun ki te kontan mache dwat devan ou yo, moun ki te mache nan
 chemen ou mete devan yo epi ki pa janm bliye ou yo. Men, ou te move dèske nou pa t' sispann fè
 sa ki mal. Sa lakòz n'ap souffri jouk jou w'a vin delivre nou. ⁶ ¶ Nou tout nou te tankou moun ki pa
 nan kondisyon pou sèvi ou. Tou sa nou t'ap fè ki byen te tankou rad sou moun ki pa nan kondisyon
 pou sèvi ou. Akòz peche nou yo, nou te tankou fèy chèch van ap bwote. ⁷ Pesonn pa lapriyè ou
 ankò! Pesonn pa chonje reve vin mande ou sekou. Ou vire do ban nou. Ou lage nou, ou kite peche
 nou yo fini ak nou. ⁸ Men, Seyè, se ou ki papa nou! Se tè krich nou ye. Se ou menm k'ap ban nou
 fòm. Se ou menm ki te fè nou ak men ou. ⁹ Tanpri, Seyè, pa fache tout fache sa a ak nou ankò! Pa
 kenbe nou nan kè ou poutèt peche nou yo! Se pèp pa ou la menm nou te ye! Tanpri, pitye pou nou!
¹⁰ Lavil yo mete apa pou ou yo rete san moun ladan yo. Mòn Siyon an tankou yon dezè. Lavil
¹¹ Jerizalèm tounen yon savann. Tanp nou an, bèl kay yo te mete apa pou ou a, kay kote tout zansèt
¹² nou yo t'ap fè lwanj ou a, dife fin boule sa. Tout bèl kote nou te renmen yo fin kraze. Seyè, tou
 sa pa di ou anyen? Ou p'ap fè anyen pou nou? Ou pral kite nou souffri jouk nou p'ap kapab ankò?

Chapter 65

¹ ¶ Seyè a te di: -Mwen te tou pare pou m' te reponn lapriyè pèp mwen an, menm lè yo pa t'
 lapriyè m'. Mwen te toupre yo, menm lè yo pa t' chache m'. Pèp la pa lapriyè nan pye m', atout
 mwen te toujou pare pou m' di yo: Men mwen! Men mwen! ² Chak jou mwen t'ap lonje men m'
 bay yon pèp ki t'ap kenbe tèt ak mwen, ki t'ap fè sa ki mal, ki t'ap fè sa yo pito. ³ Nan figi m' konsa,
 yo t'ap plede fè bagay pou fè m' fache. Yo ofri bèt pou touye pou zidòl nan jaden yo, yo boule
 lansan sou lotèl zidòl yo. ⁴ Lannwit, y' al nan simityè ak nan twou wòch pou fè sèvis pou mò ka
 di yo sa pou yo fè. Yo manje vyann kochon, yo bwè bouyon fèt ak vyann ki pa bon pou moun k'ap
⁵ sèvi Bondye manje. Apre sa, yonn di lòt: Pa pwoche m'. Pa manyen m', paske yo mete m' apa
 pou Bondye! Non, mwen pa ka sipòte sa y'ap fè a. Sa fè m' move, kòlè mwen tankou yon dife ki
 p'ap janm mouri. ⁶ Seyè a te di: Men desizyon mwen fin pran nan kè m': Mwen p'ap bay kò m'
⁷ kanpo toutotan mwen pa pini yo, toutan mwen pa regle yo pou peche yo ak pou peche zansèt yo.
 Yo te boule lansan pou zidòl sou mòn yo, yo t'ap derespekte m' sou ti bit mòn yo. Se poutèt sa m'ap

regle ak yo jan yo merite l' la. ⁸ ¶ Men sa Seyè a te di ankò: -Pesonn pa janm voye yon bon grap rezen jete. Okontrè, li sere l' pou fè diven ak li. Konsa tou, mwen p'ap detwi tout pèp la, m'ap sove moun k'ap sèvi m' yo. ⁹ Nan tout fanmi Jakòb la, m'ap fè moun branch fanmi Jida yo pran mòn mwen yo pou yo. Se la moun mwen chwazi yo ak moun k'ap sèvi m' yo va rete. ¹⁰ Plenn Sawon an pral tounen yon jaden zèb pou mouton m' yo, pou moun k'ap sèvi m' yo. Mwen pral lonje bèf mwen yo, moun ki toujou ap chache fè volonte m' yo, nan fon Akò pou yo ka manje. ¹¹ ¶ Men pou nou menm ki vire do bay Seyè a, nou menm ki bliye mòn ki apa pou mwen an, epi ki al fè sèvis manje pou Gad, ki al fè ofrann bwason pou Mini, ¹² m'ap fè nou mouri nan lagè. Nou tout nou pral bese do nou pou yo koupe kou nou, paske mwen te rele nou, nou pa t' reponn. Mwen pale nou, nou pa t' koute m'. Nou fè sa ki mal devan je m', nou pito fè sa ki p'ap fè m' plezi. ¹³ Se poutèt sa, men sa Seyè a di: -Moun k'ap sèvi m' yo va jwenn kont manje pou yo manje. Men nou menm n'a ret grangou. Sèvitè m' yo va jwenn kont pou yo bwè, nou menm n'ap ret swaf dlo. Sèvitè m' yo va gen kè kontan; men nou menm n'a wont. ¹⁴ Sèvitè m' yo va fè fèt tèlman y'a kontan, men nou menm n'a plenn, n'a gen kè sere, n'a rele, kè nou va kase. ¹⁵ Moun mwen chwazi yo va sèvi ak non nou pou joure moun. Mwen menm Seyè a, m'a fè nou mouri. Y'a di: Se pou Seyè a touye ou tankou l' touye moun sa yo! Men, m'a bay sèvitè m' yo yon bon repitasyon. ¹⁶ Tout moun nan peyi a ki bezwen benediksyon va jwenn benediksyon nan men Bondye ki toujou kenbe pawòl li a. Tout moun nan peyi a k'ap fè sèman va fè l' nan non Bondye k'ap toujou kenbe pawòl li a, paske moun yo p'ap chonje tray yo te konn pase nan tan lontan yo, m'ap bliye sa. ¹⁷ ¶ Mwen pral fè yon lòt syèl ak yon lòt tè. Pesonn p'ap chonje sa ki te pase nan tan lontan. Sa p'ap janm vin nan tèt yo ankò. ¹⁸ Sa m' pral fè a ap bay kè kontan, moun ap fè fèt san rete. Mwen pral fè yon lòt lavil Jerizalèm kote tout moun pral fè fèt. Moun li yo pral kontan. ¹⁹ Mwen menm m'ap fè fèt pou Jerizalèm, m'ap kontan pou pèp mwen an. P'ap gen kriye ankò nan lavil la! P'ap gen rele mande sekou ankò! ²⁰ Timoun p'ap mouri tou piti ankò! Granmoun ap fè tout tan yo! Pi bonnè pou yo mouri se va sou santan. Moun ki va rive gen santan anvan yo mouri, y'a mouri jenn! Moun ki va mouri anvan yo rive gen santan, se moun ki va gen madichon! ²¹ Moun va bati kay pou yo rete. Y'a plante jaden rezen pou yo manje rezen. ²² Yo p'ap bati kay ankò pou se lòt moun ki pou rete ladan yo. Yo p'ap plante jaden ankò pou se lòt moun ki pou manje l'. Pèp mwen an ap viv rive gen menm laj ak pyebwa. Pèp mwen chwazi a va jwi travay yo fè ak men yo kont kò yo. ²³ Yo p'ap kraze kò yo travay pou bontan ankò! Travay yo va rapòte yo! Pitit yo p'ap konn sa ki rele malè ankò! M'ap beni yo ansanm ak pitit yo jouk sa kaba. ²⁴ Anvan menm yo fin lapriyè, m'ap gen tan reponn yo. Anvan

menm yo fèmen bouch yo, m'ap gen tan ba yo sa yo mande a. ²⁵ Chen mawon ak mouton pral manje ansanm. Lyon pral manje zèb menm jan ak bèf. Sèpan p'ap yon danje ankò pou pesonn. Sou tout mòn ki apa pou mwen an, p'ap gen mechanste, p'ap gen rayisab ankò. Se Seyè a menm ki di sa!

Chapter 66

¹ ¶ Men sa Seyè a di ankò: -Syèl la, se fòtèy kote mwen chita a. Tè a, se ti ban pou m' lonje pye m'. Ki kalite kay nou ta ka bati pou mwen? Ki kote nou ta ka ban mwen pou m' poze kò m'? ² Se mwen menm ki fè tout bagay sa yo ak men mwen. Se pou mwen yo tout ye! Se Seyè a menm ki di sa. Moun ki fè m' plezi se moun ki pa gen lògèy nan kè yo, se moun ki règrèt sa yo fè ki mal, se moun ki gen krentif pou mwen lè m' pale. ³ Pèp la fè sa yo pito. Yo touye bèf pou mwen jòdi, denmen yo touye moun pou zidòl yo. Yo ofri ti mouton pou yo touye pou mwen jòdi, denmen yo kase kou chen pou zidòl. Yo fè ofrann grenn jaden yo jòdi pou mwen, denmen yo fè ofrann san kochon pou zidòl. Yo boule lansan sou lotèl mwen an pou m' pa janm bliye moun ki fè ofrann lan jòdi, denmen y'ap fè sèvis pou di Satan mèsì. Yo pran plezi nan fè zafè pa yo jan yo vle. Yo kontan fè vye bagay lèd y'ap fè yo. ⁴ Mwen menm tou m'ap pran plezi m' aji ak yo menm jan yo aji a. M'ap fè malè yo pè rive yo a tonbe sou yo, paske mwen rele yo, pesonn pa reponn. Mwen pale yo, yo pa koute m'. Y'ap fè sa ki mal devan je m', yo pito fè sa ki p'ap fè m' plezi. ⁵ ¶ Koute sa Seyè a di, nou menm ki gen krentif pou li lè li pale ak nou: Paske nou pa vire do ban mwen, gen moun menm ras ak nou ki pa vle wè nou, ki derefize mele ak nou. Y'ap di konsa: Se pou Seyè a fè wè pouvwa li, paske yo ta renmen wè jan nou kontan. Men se yo menm k'ap soti wont. ⁶ Koute! Gwo bri nou tande k'ap fèt nan lavil la, gwo vwa nou tande k'ap pale nan tanp lan, se bri Seyè a k'ap tire revanj li sou lènmi l' yo. ⁷ Lavil Bondye a tankou yon fanm ki akouche anvan menm li gen tranche. Li gen tan fè yon ti gason anvan menm li santi doulè. ⁸ Ki moun ki janm tande koze konsa? Ki moun ki janm wè bagay konsa? Eske yon sèl jou kont pou fè tout yon nasyon? Eske lapoula yo ka fè tout yon nasyon? Mòn Siyon an p'ap soufri anpil anvan nasyon an fèt. ⁹ Eske mwen ka fè yon fanm kase lèzo, lèfini pou m' pa kite l' akouche? Eske mwen ka fè pitit la rive sou jou l' lèfini pou m' pa kite l' fèt? Se Bondye ou la menm ki di sa! ¹⁰ Fè kè nou kontan ansanm ak lavil Jerizalèm. Fè fèt pou li, nou tout ki renmen l'! Se pou nou kontan ansanm avè l' koulye a, nou menm ki te nan lapenn pou li! ¹¹ Tankou yon ti bebe k'ap tete manman l' jouk vant li plen, tankou yon ti bebe k'ap kontan souse lèt manman l', nou pral jwenn pa nou nan bèl bagay m'ap fè pou lavil Jerizalèm.

12

Paske, men sa Seyè a di: -Mwen pral ba li kè poze san rete. Richès nasyon yo pral kouvri l' tankou lè inondasyon dlo kouvri latè. Nou pral tankou ti bebe pou li: l'ap ban nou tete, l'a pote nou nan bra

13

li, l'a mete nou sou jenou l' pou li jwe ak nou. Menm jan yon manman konsole pitit li, se konsa

14

m'ap konsole nou nan lavil Jerizalèm. Lè n'a wè sa, kè nou va kontan: sa va ban nou fòs ak kouraj ankò. Lè sa a, n'a konnen mwen menm, Seyè a, m'ap pwoteje sèvitè m' yo, men lènmi m'

15

yo va konnen jan m' konn fache. ¶ Seyè a ap vin nan yon gwo dife. Li moute sou nwaj yon gwo tanpèt pou l' vin pini moun ki te fè l' fache yo, pou l' regle yo jan li te di l'ap regle yo a nan yon

16

gwo boukan dife. Se avèk dife Seyè a pral jije, avèk nepe l' li pral regle tout moun ki koupab

17

yo. Anpil moun pral mouri anba men l'. Seyè a di ankò: -Talè konsa sa pral fini pou moun k'ap fè sèvis pou mete kò yo nan bon kondisyon anvan y'a l' fè pwosesyon pou zidòl nan jaden yo, pou moun k'ap manje vyann kochon, vyann sourit ak lòt kalite manje ki pa bon pou moun k'ap sèvi

18

Bondye. Mwen konnen sa y'ap fè, mwen konnen sa ki nan lide yo. Mwen menm, m'ap vin sanble

19

pèp tout nasyon yo, pèp ki pale tout kalite lang sou latè. Y'a vini, y'a wè bèl pouvwa mwen. M'a fè yo konnen se mwen menm k'ap pini yo. Men, m'ap sove kèk moun ladan yo, pou m' voye yo nan tout nasyon, nan tout peyi byen lwen ki poko janm tande non m' nan zòrèy yo, ki pa janm wè pouvwa mwen, nan peyi Lespay, nan peyi Libi, nan peyi Lidi, kote ki gen moun ki konn sèvi ak banza ak anpil ladrès, nan peyi Toubal ak nan peyi Lagrès. Yo pral fè moun tout nasyon yo konnen

20

jan mwen gen pouvwa. Y'a pran tout frè parèy nou yo, y'a mennen yo tounen soti nan peyi sa yo, tankou yon ofrann pou mwen. Y'ap mennen yo tounen sou mòn ki apa pou mwen an, lavil Jerizalèm, sou chwal, sou milèt, sou chamo, nan kabwèt kouvri, nan cha, menm jan moun pèp Izrayèl yo konn pote grenn jaden pou ofri nan tanp lan nan veso yo mete nan bon kondisyon espere

21

pou sa. M'a pran kèk moun nan moun sa yo pou fè travay prèt ak travay moun Levi yo. Se Seyè

22

a ki di sa. Menm jan lòt syèl ak lòt latè m'ap fè yo ap la pou lontan devan m', konsa tou pitit nou

23

ak non nou ap la pou lontan. Se Seyè a menm ki di sa. Pou chak fèt lalin novèl, pou chak jou

24

repo, moun tout peyi va vin fè sèvis pou mwen isit lavil Jerizalèm. Se Seyè a menm ki di sa. Lè y'ap kite lavil la, y'a wè kadav moun ki te vire do ban mwen yo. Vè k'ap manje yo p'ap janm mouri, dife k'ap boule yo a p'ap janm tenyen. Tout moun sou latè pral gen kè plen lè y'a wè sa!

Jeremiah

Chapter 1

¹ ¶ Nan liv sa a, nou jwenn sa Jeremi, pitit gason Ilkija a, te di ak sa l' te fè. Li te yonn nan prèt
 ki te rete lavil Anatòt, nan pòsyon tè branch fanmi Benjamen an. ² Lè Seyè a te pale ak Jeremi an,
 Jozyas, pitit gason Amon an, t'ap mache sou trèzan depi li te wa peyi Jida. ³ Apre sa, Seyè a pale
 avè l' ankò. Lè sa a, se Jojakim, pitit gason Jozyas la, ki te wa nan peyi Jida. Anpil fwa menm apre
 sa, Seyè a pale avèk Jeremi, rive sou onzyèm lanne rèy wa Sedesyas, pitit gason Jozyas la, jouk
 senkyèm mwa nan lanne sa a, lè yo depòte moun lavil Jerizalèm yo. ⁴ ¶ Seyè a pale avè m', li di
 m' konsa: ⁵ -Mwen te konnen ou anvan menm mwen te ba ou lavi nan vant manman ou. Mwen te
 mete ou apa pou mwen anvan menm ou te fèt. Mwen te chwazi ou pou ou te yon pwofèt pou nasyon
 yo. ⁶ Mwen reponn li: -Aa! Seyè Bondye sèl mè! Se timoun mwen ye. Mwen pa konn pale. ⁷ Men,
 Seyè a di mwen: -Pa di se timoun ou ye. Ou gen pou ou ale bò kot tout moun m'ap voye ou. W'a
 di yo tou sa m'a ba ou lòd di yo. ⁸ Ou pa bezwen pè pesonn. Paske m'ap kanpe la avè ou pou m'
 pwoteje ou. Se mwen menm Seyè a ki di ou sa. ⁹ Apre sa, Seyè a lonje men l', li manyen bouch
 mwen. Epi li di m': -Men mwen mete pawòl mwen nan bouch ou. ¹⁰ Jòdi a, m'ap ba ou otorite sou
 pèp yo ak sou gouvènman yo, pou ou derasinen, pou ou koupe, pou ou kraze, pou ou demoli, pou
 ou bati, pou ou plante. ¹¹ ¶ Seyè a pale avè m', li di m' ankò: -Kisa ou wè la a, Jeremi? Mwen
 reponn li: -Mwen wè yon branch zanmann. ¹² Lè sa a, Seyè a di: -Se sa menm! Mwen menm, m'ap
 veye pou sa m' di a rive vre. ¹³ Apre sa, Seyè a pale avè m' yon lòt fwa ankò, li di m': -Kisa ou wè
 la a? Mwen reponn li: -Mwen wè yon chodyè dlo k'ap bouyi sou yon dife. Vapè dlo cho a ap desann
 soti nan nò. ¹⁴ Lè sa a Seyè a fè m' konnen: -Yon gwo malè pral soti nan nò, l'ap tonbe sou tout
 moun ki rete nan peyi a. ¹⁵ Paske m'ap rele tout ras moun ki rete nan peyi sou bò nò yo pou yo
 vini. Se mwen menm Seyè a ki di sa. Y'a vini, y'a mete fotèy wa yo devan pòtay lavil Jerizalèm.
 Y'ap fè wonn miray ranpa l' yo, y'ap atake tout lavil nan peyi Jida yo. ¹⁶ M'a pini moun nan peyi
 a jan m' te di l' la, paske yo te fè sa ki mal. Yo vire do ban mwen, y' al boule lansan pou lòt bondye.
 Yo fè zidòl, lèfini yo fè sèvis pou yo. ¹⁷ Men ou menm, Jeremi, mete gason sou ou! Leve non! Di
 yo tou sa mwen ba ou lòd di. Ou pa bezwen pè yo. Si ou pè yo, m'ap fè ou pi pè yo lè w'a devan
 yo. ¹⁸ Jòdi a m'ap ba ou fòs pou kenbe tèt ak tout moun nan peyi Jida a, ak wa l' yo, ak chèf li yo,
 ak prèt li yo, ak tout rès pèp la. W'ap tankou yon lavil ak gwo miray ranpa, tankou yon poto fè,
 tankou yon miray fèt an kwiv. ¹⁹ Yo tout pral leve dèyè ou. Men, yo p'ap ka fè ou anyen. Paske
 m'ap kanpe la avè ou pou m' delivre ou. Se mwen menm, Seyè sèl Mèt la, ki di sa.

Chapter 2

¹ ¶ Seyè a pale avè m', li di m' konsa: ² -Ale non. Men mesaj ou pral bay nan zòrèy tout moun lavil Jerizalèm. Men sa Seyè a di: Mwen chonje jan ou te ye nan tan lontan, jan ou t'ap mouri pou mwen lè ou te jenn, jan ou te renmen m' lè nou te fèk marye. Ou te swiv mwen nan dezè a, kote anyen pa pouse. ³ Lè sa a, moun Izrayèl yo te yon pèp ki t'ap viv apa pou mwen ase, tankou premye rekòt jaden yo mete apa pou mwen. Malè te tonbe sou tout moun ki te manyen yo paske se avè m' yo te annafè. Se mwen menm, Seyè a, ki di sa. ⁴ Nou menm, moun fanmi Jakòb yo, nou menm tout moun branch fanmi pèp Izrayèl la, koute mesaj Seyè a! ⁵ Men sa Seyè a voye di nou: -Kisa mwen te fè zansèt nou yo ki mal kifè yo te vire do ban mwen? Yo pran mache dèyè yon bann zidòl ki pa vo anyen. Yo menm tou, yo vin pa vo anyen. ⁶ Yo pa chonje reve mande kote Seyè a, li menm ki te fè nou moute soti nan peyi Lejip la, li menm ki te louvri chemen pou nou nan dezè a, nan yon peyi tè sèk, plen twou, yon peyi san dlo, plen danje, kote moun pa rete, kote moun pa menm pase. ⁷ Mwen fè nou antre nan yon peyi kote ki gen bèl jaden pou nou te ka manje tout bon rekòt ak tout lòt bon bagay li yo. Men, lè nou rive ladan l', nou pa respekte peyi a. Nou fè peyi mwen te ban nou an tounen yon peyi ki ban m' degoutans. ⁸ Prèt yo pa janm mande kote Seyè a? Yo menm mwen te fè konnen lòd mwen yo, yo pa konnen m' ankò. Chèf yo trayi m'. Pwofèt yo pale nan non Baal. Y'ap kouri dèyè zidòl ki pa ka fè anyen pou yo. ⁹ ¶ Se konsa, mwen menm Seyè a, mwen pral plede ak nou ankò. Se mwen menm, Seyè a, ki di sa. Mwen pral plede ak pitit pitit nou yo. ¹⁰ Ale bò solèy kouche, rive jouk sou zile Chip. Voye moun nan peyi Keda, bò solèy leve. N'a wè sa k'ap pase isit la pa janm rive lòt kote anvan sa. ¹¹ Lòt nasyon yo pa janm chanje bondye yo, malgre se pa t' bondye tout bon yo te ye. Men, pèp mwen an te pito zidòl ki pa ka fè anyen pou yo pase mwen menm, Bondye ki te fè bèl bagay pou yo a. ¹² Se pou syèl la pantan lè li tande sa! Se pou l' tranble. Se pou l' rete sezi! Se mwen menm Seyè a ki di sa. ¹³ Paske pèp mwen an fè de kalite peche: Yo vire do ban mwen, mwen menm sous dlo fre a. Y' ale fè rezèvwà pou dlo. Rezèvwà yo tou fann, yo pa ka kenbe dlo. ¹⁴ ¶ Se pa esklav moun pèp Izrayèl yo ye. Ni yo pa fèt nan esklavaj. Poukisa atò lènmi ap bwote yo ale konsa? ¹⁵ Y'ap gwonde sou li tankou lyon, y'ap rele byen fò. Yo fè peyi a tounen yon savann. Yo mete dife nan tout lavil li yo. Pa rete yon moun ladan yo. ¹⁶ Ata moun Menmfis yo ak moun Tapanès yo ap kale tèt yo. ¹⁷ Se nou menm ki chache sa, paske nou vire do bay Seyè a, Bondye nou an, antan li t'ap moutre nou chemen pou nou pran an. ¹⁸ Koulye a, kisa nou kwè n'a jwenn lè nou pran chemen Lejip pou n al bwè dlo nan larivyè Nil? Kisa ou kwè n'a

jwenn lè nou pran chemen Lasiri pou n al bwè dlo nan larivyè Lefrat? ¹⁹ Se mal nou fè a k'ap
 tounen yon fwèt pou nou! Se vire nou vire do ban mwen an k'ap kondannen nou! Se pou nou konnen
 jan sa pa dous, jan sa pa bon pou nou vire do ban mwen, Seyè a, Bondye nou an, pou nou sispann
 gen krentif pou mwen. Se mwen menm, Seyè ki gen tout pouvwa a, ki di sa. ²⁰ ¶ Izrayèl, gen lontan
 depi ou pa rekonèt otorite m' ankò! W'ap manje kòd, w'ap di: Mwen p'ap sèvi Seyè a. Lèfini, sou
 tout ti mòn anba tout gwo pyebwa ou nan dezòd, w'ap fè sèvis pou lòt bondye. ²¹ Mwen te plante
 ou tankou yon pye rezen kalite, ki soti nan bon semans. Men koulye a, gade jan ou chanje: Ou
 tounen yon vye pye rezen mawon. M' pa konnen kote ou soti. ²² Ou te mèt lave kò ou ak gwo
 savon, ou te mèt fwote kò ou ak potas, m'ap toujou wè kras malpwòpte ou yo sou ou. Se mwen
 menm Seyè a, Bondye a, ki di sa. ²³ Ki jan ou fè ka di ou nan kondisyon pou fè sèvis pou mwen,
 ou pa janm kouri dèyè Baal yo? Gade tout vye makakri w'ap fè nan fon an! Rekonèt sa ou fè a non!
 Ou tankou yon jenn femmèl chamo ki lage nan bwa, w'ap kouri adwat agoch. ²⁴ Ou tankou yon
 femmèl bourik mawon nan savann. Lè li an chalè, l'ap pran sant van an. Lè li bezwen kwaze, ki
 moun ki ka kenbe l'? Mal yo pa bezwen bat kò yo pou yo jwenn li. Depi se mwa li, y'ap jwenn li.
²⁵ Izrayèl, manyè sispann! W'ap plede fatigue janm ou yo! Gòj ou ap fin chèch! Men w'ap di: Non!
 M' pa kab fè anyen pou sa! Mwen renmen bondye lòt nasyon yo. Fòk m' al dèyè yo. ²⁶ Menm jan
 yon vòlè wont lè yo bare l', se konsa moun pèp Izrayèl yo pral wont, ni wa yo, ni chèf yo, ni prèt
 yo, ni pwofèt yo! ²⁷ Yo rele pyebwa yo papa! Yo rele wòch yo manman m' ki fè m'! Wi, yo pito
 vire ban m' do, pase pou yo tounen vin jwenn mwen. Men, depi yo nan traka, y'ap rele: -Seyè, leve
 non! Vin delivre nou! ²⁸ Men, nou menm moun Jida yo, kote bondye nou te fè pou nou yo? Lè
 nou nan traka, se yo ki pou leve vin delivre nou, si yo kapab! Moun Jida, nou gen yon bondye nan
 chak lavil nou yo! ²⁹ ¶ Poukisa n'ap plede avè m' konsa? Nou tout nou kenbe tèt avè m'. Se mwen
 menm, Seyè a, ki di sa! ³⁰ Mwen te pini pitit nou yo, men sa pa t' sèvi anyen. Nou pa t' dakò pou
 m' te korije nou! Tankou lyon ki fin wè mò, nou rale nepe nou yo, nou touye pwofèt nou yo. ³¹ (Nou
 menm k'ap viv koulye a, koute byen sa Seyè a ap di a.) Pèp Izrayèl, èske mwen te tankou yon dezè
 pou nou, tankou yon kote ki fènwa anpil? Poukisa atò pou nou di: -Nou granmoun tèt nou, nou p'ap
 janm tounen vin jwenn ou ankò!³² Eske yon jenn fi ka bliye bijou li yo? Eske yon lamarye ka bliye
 rad nòs li? Men, pèp mwen an bliye m', m' pa ka konte depi kilè. ³³ Ou konnen byen sa pou ou fè
 lè w'ap kouri dèyè gason. Lè konsa, nanpwen krim ou p'ap fè. ³⁴ Rad ou yo tache ak san pòv ansanm
 ak san inosan, moun ou pa t' bare ap fè anyen ki mal. Malgre tou sa, ³⁵ w'ap plede di ou pa antò.
 Seyè a pa fache avè ou ankò. Men, mwen menm Seyè a, mwen pral pini ou paske ou refize rekonèt

ou te fè sa ou pa t' dwe fè. ³⁶ Gade jan w'ap avili tèt ou, lè w'ap kouri dèyè bondye lòt nasyon yo!
 W'ap pran wont nan men peyi Lejip menm jan sa te rive ou avèk peyi Lasiri. ³⁷ W'a vire do ou kite
 peyi Lejip. Avèk men ou, w'a bouche figi ou tèlman w'a wont. Mwen menm, Seyè a, mwen voye
 moun ou fè konfyans yo jete. Yo p'ap ka fè anyen pou ou.

Chapter 3

¹
 ¶ Seyè a di ankò: -Lè yon nonm divòse ak madanm li, si apre madanm lan fin kite avè l', li al
 fè afè ak yon lòt gason, èske premye nonm lan ap tounen ak madanm lan ankò? Eske si sa ta rive
 fèt se p'ap yon gwo bagay derespèktan ki t'ap rive nan peyi a? Konsa tou, nou menm pèp Izrayèl,
 nou te tankou yon fanm ki te gen anpil nonm pou jan nou te kouri fè sèvis pou yon bann lòt bondye.
 Epi koulye a nou ta renmen tounen vin jwenn mwen? Se mwen menm Seyè a ki di sa. ² Leve je
 nou, gade tèt mòn yo! Eske gen yonn ladan yo kote nou pa t' aji tankou yon fanm k'ap fè jennès?
 Nou rete chita sou tout bò chemen ap veye gason, tankou arab k'ap veye moun nan dezè a pou piye
 yo. Nou avili tout peyi a ak lenkondite nou ansanm ak mechanste nou yo. ³ Se poutèt sa pa t' gen
 lapli. Lapli prentan yo pa vini. Men, je nou chèch tankou jennès, nou pa janm wont. ⁴ Koulye a
 menm, n'ap vin di m': O wi, se mwen ki papa nou, nou te toujou renmen m' depi lè nou te piti.
⁵ Nou konnen mwen p'ap ret fache pou tout tan, mwen p'ap kenbe nou nan kè m'. Pèp Izrayèl, se
 sa nou te toujou di. Epi apre sa, nou lage kò nou pi rès nan fè sa ki mal. ⁶ ¶ Yon lòt fwa Seyè a
 pale avè m' ankò. Lè sa a, se Jozyas ki te wa nan peyi Izrayèl. Seyè a di m' konsa: -Ou wè sa peyi
 Izrayèl la fè? L'ap twonpe m'. li ale sou tout gwo mòn yo, anba tout kalite gwo pyebwa, tankou yon
 jennès ak nonm li yo, l'ap fè sèvis pou lòt bondye. ⁷ Mwen t'ap di nan kè m': lè l'a fin fè tout bagay
 sa yo, l'a tounen vin jwenn mwen. Men, li pa tounen. Jida, sè l' la ki pa t' kenbe pawòl li avè m',
⁸ wè sa. Li wè mwen te divòse ak Izrayèl, mwen te voye l' al lakay li paske li te vire do ban mwen,
 paske li te lage kò l' nan fè jennès sou mwen. Men, Jida, sè Izrayèl la ki pa t' kenbe pawòl li avè
 m', pa t' pè. Li menm tou, li al lage kò l' nan jennès. ⁹ Li pa t' wont. Li avili tout peyi a avèk
¹⁰ lenkondite li. li al fè sèvis pou wòch ak pyebwa. Lè li fin fè tou sa, Jida, sè Izrayèl la ki pa t'
 kenbe pawòl li avè m', li tounen vin jwenn mwen. Men, se te pawòl nan bouch. Se mwen menm,
¹¹ Seyè a, ki di sa. Apre sa, Seyè a di konsa: -Izrayèl te vire do ban mwen, men li te pi bon pase
¹² Jida ki te chita la ap twonpe m'. ¶ Ale nan nò, w'a di moun peyi Izrayèl yo pou mwen: Nou
 menm moun peyi Izrayèl ki te vire do ban mwen, tounen vin jwenn mwen. Mwen gen kè sansib,

mwen p'ap fache sou nou. Mwen p'ap fache sou nou pou tout tan. Se mwen menm, Seyè a, ki di
¹³ sa. Sèlman, se pou nou rekonèt sa nou fè a pa bon. Nou pa t' kenbe pawòl nou avè m', Seyè a, Bondye nou an! Nou t' al toupatou, anba tout kalite pyebwa, pou fè sèvis pou bondye lòt nasyon
¹⁴ yo. Nou pa t' koute m' lè mwen t'ap pale nou. Se mwen menm Seyè a ki di sa. Nou menm ki vire do ban mwen, tounen vin jwenn mwen. Se mwen menm Seyè a ki di sa. Paske, se mwen menm ki mèt nou. Mwen pral pran yon moun nan chak lavil nou yo, de moun nan chak branch fanmi,
¹⁵ m'ap mennen nou tounen sou mòn Siyon an. M'ap ban nou chèf k'ap fè tou sa m' vle yo fè. Y'a
¹⁶ gen konesans ak bon konprann pou gouvènè nou. Apre sa, lè m'a fè n' peple nan peyi a, moun p'ap pale sou Bwat Kontra Seyè a ankò. Lide yo p'ap sou li, y'ap bliye l' nèt. Yo p'ap menm wè si
¹⁷ li pa la. Yo p'ap fè yon lòt. Lè sa a, y'a rele Jerizalèm Fotèy Seyè a. Lèfini tout nasyon yo va vin sanble la pou fè sèvis pou Seyè a. Y'a sispann swiv move lide ki t'ap fè yo kenbe tèt ak mwen
¹⁸ an. Lè sa a, moun peyi Jida yo va mete tèt ansanm ak moun peyi Izrayèl yo ankò. Ansanm y'a
¹⁹ soti kite peyi nan nò a pou yo vin nan peyi mwen te bay zansèt yo pou rele yo pa yo a. Seyè a te di ankò: -Jan m' ta renmen asepte ou pou pitit mwen! Mwen ta ba ou yon peyi ki plen bèl bagay, peyi ki pi bèl pase tout lòt peyi sou latè, peyi ki t'ap rele ou pa ou. Mwen t'ap di nan kè m' yo pral
²⁰ rele m' papa. Yo p'ap janm vire do ban mwen ankò. ¶ Men, tankou yon fanm k'ap twonpe mari
²¹ l', nou menm, moun peyi Izrayèl yo, nou twonpe m'. Se mwen menm Seyè a ki di sa. Yo tande yon sèl rèl sou tèt mòn yo: Se pèp Izrayèl la k'ap kriye, k'ap rele. Paske yo fin pèdi tèt yo, yo bliye
²² Seyè a, Bondye yo a. Tounen vin jwenn mwen non, nou tout ki te vire do bay Bondye. M'a geri nou, m'a fè nou kenbe pawòl nou yo. Nou di: Men nou! Nou tounen vin jwenn ou. Wi, se ou menm
²³ Seyè a ki Bondye nou! Se pou gremesi nou t'ap fè tout bri sa yo sou tèt mòn yo. Yo pa ka fè
²⁴ anyen pou nou. Wi, se Seyè a, Bondye nou an, sèl ki ka sove pèp Izrayèl la. Men, depi nou te tou piti, zidòl k'ap fè nou wont la fin manje dènye sa zansèt nou yo te kite pou nou: bèf, kabrit ak
²⁵ mouton, pitit gason ak pitit fi. Se pou nou bese tèt nou jouk atè tèlman nou wont. Wont la twòp pou nou! Li kouvri nou nèt! Wi, ni nou ni zansèt nou yo, depi nou tou piti rive jouk jòdi a, n'ap fè sa ki mal devan Seyè a, Bondye nou an. Nou pa koute Seyè a, Bondye nou an, pou nou fè sa l' mande nou fè.

Chapter 4

¹ ¶ Men sa Seyè a di ankò: -Nou menm pèp Izrayèl, si nou vle chanje vre, se tounen pou nou tounen vin jwenn mwen. Si nou wete vye zidòl nou yo devan je m', si nou sispann lage kò nou nan

² raje, si nou pran non mwen, non mwen menm Bondye vivan an, pou fè sèman, si nou pa bay manti, si nou pa fè lenjistis, si nou fè sa ki dwat, lè sa a, tout nasyon yo va mande m' pou beni yo,

³ y'a fè lwanj mwen. ¶ Men sa Seyè a di moun peyi Jida yo ak moun lavil Jerizalèm yo: Fè bwa

⁴ nèf. Pa plante nan pikan. Nou menm ki pote mak kontra m' lan nan kò nou, kenbe kontra nou fè avè m' lan. Louvri kè nou ban mwen, nou menm moun peyi Jida ak moun Jerizalèm. Si nou pa fè sa, m'ap fè kòlè. Tankou yon dife, m'ap boule nou, poutèt tout move bagay nou fè yo. Lè sa a,

⁵ pesonn p'ap ka sove nou anba men m'. ¶ Mache pale tout moun nan peyi Jida a. Fè moun Jerizalèm yo konn sa. Avèti yo! Kònen twonpèt nan tout peyi a. Rele byen fò. Di yo pou yo sanble, pou yo

⁶ kouri ale nan lavil ki gen ranpa yo. Ba yo direksyon mòn Siyon an! Kouri al kache! Pa mize sou

⁷ wout! Mwen menm, Seyè a, m' ap fè yon malè soti nan nò. Li pral fè gwo dega. Tankou yon lyon

⁸ ki soti nan kachèt li anba raje, moun ki pral detwi nasyon yo derape. Li kite lakay li, l'ap vin devasté

⁹ peyi Jida a. L'ap boule lavil peyi Jida yo, li p'ap kite yon moun ladan yo. Se poutèt sa, mete rad

¹⁰ sak sou nou! Kriye! Plenn sò nou! Paske se pa ti move Seyè a move, li p'ap fè pa nou! Seyè a di konsa: -Jou sa a, wa a ansanm ak chèf li yo ap pèdi kouraj. Prèt yo pral sezi, pwofèt yo p'ap konn

¹¹ sa pou yo di. Lè sa a, mwen di: Aaa! Seyè, Bondye! Ou twonpe moun lavil Jerizalèm yo nèt.

¹² Ou te di yo yo pa t'ap gen pwoblèm menm, epi se yon nepe ou voye pou touye yo. Yon jou ap vini. Lè sa a, y'a di pèp lavil Jerizalèm lan: Men yon van byen cho k'ap soufle soti nan dezè a. L'ap

¹³ desann sou moun pèp Jida yo. Se pa yon ti van pou vannen, ni pou netwaye grenn. Men se yon

¹⁴ gwo van m'ap fè soti laba a. Koulye a se mwen menm, Seyè a, ki pral ba yo santans yo. Gade! Men lènmi yo ap vini tankou nwaj nan syèl la. Cha lagè yo tankou yon van siklòn. Chwal yo pi

¹⁵ rapid pase malfini. Zafè nou pa bon! Y'ap fini ak nou! Moun Jerizalèm, lave mechanste ki nan

¹⁶ kè nou pou nou ka sove. Kilè n'a sispann fè move lide nan tèt nou? Depi lavil Dann y'ap bay

¹⁷ nouvel la. Depi sou mòn Efrayim lan y'ap anonse malè a. Y'ap avèti tout nasyon yo. Y'ap fè lavil Jerizalèm konnen sa k'ap rive l'. Lènmi ap soti nan yon peyi byen lwen. Y'ap rele byen fò,

¹⁸ y'ap kouri sou lavil Jida yo. Yo pral sènen lavil Jerizalèm tankou moun k'ap veye jaden, paske

¹⁹ moun li yo te refize obeyi Seyè a. Se Seyè a menm ki di sa. Jida, se lenkondite ou ak move lajisman ou ki lakòz tou sa. Se mechanste ou ki fè sa rive ou. Sa pa dous menm! Li frape ou nan

²⁰ kè. ¶ Ay! Vant mwen! Vant mwen! Tout anndan m' ap fè m' mal! Kè mwen ap bat byen fò. M'

pa ka pa pale. Mwen tande twonpèt lagè a ansanm ak rèl moun k'ap atake yo. ²⁰ Y'ap anonse malè sou malè! Y'ap fini ak tout peyi a. Nou rete konsa, nou wè yo kraze tout tant nou yo. Yo demoli tout kay andeyò nou yo. ²¹ Kilè m'a wè bout batay la? Kilè m'a sispann tande twonpèt lagè a? ²² Seyè a di konsa: Pèp mwen an sòt! Yo pa konnen m'! Se yon bann timoun, lespri yo bouche! Yo pa konprann anyen! Yo fò nan fè sa ki mal ase. Yo pa konn fè sa ki byen. ²³ Mwen gade tè a: Pa yon pyebwa! Anyen menm! Mwen gade syèl la: Pa yon ti limyè! ²⁴ Mwen gade mòn yo, yo t'ap tranble! Mwen gade ti bit yo, yo t'ap balanse adwat agoch! ²⁵ Mwen gade, m' pa wè yon moun. Tout zwazo yo met deyò. ²⁶ Bèl jaden yo tounen dezè. Tout lavil yo boule ratè. Se travay Seyè a, paske Seyè a move anpil. ²⁷ Men sa Seyè a di: Se pou tout tè a tounen dezè. Men, mwen p'ap fin detwi l' nèt. ²⁸ Tè a nan lapenn. Syèl la tou nwa. Seyè a pale, li p'ap tounen sou sa li di. Li fin pran desizyon l', li p'ap chanje lide. ²⁹ Lè yo tande bri kavalye yo ak mesye k'ap tire flèch yo, tout moun nan lavil la pran kouri. Gen ki kouri al kache nan bwa. Gen ki kouri moute nan wòch yo. Tout lavil yo san moun ladan yo. Pa gen yon moun ki rete la ankò. ³⁰ Ou menm, lavil Jerizalèm, ou fini! Kisa ou ka fè? W'ap mete bèl rad wouj sou ou? W'ap mete tout bijou ou yo? W'ap pentire po je ou? Ou mèt fè ou bèl, sa p'ap sèvi ou anyen. Se meprize moun ki te renmen ou yo ap meprize ou! Yo soti pou yo touye ou. ³¹ Mwen tande yon rèl, tankou rèl fanm ki gen tranche, rèl fanm k'ap fè premye pitit li. Se rèl moun lavil Jerizalèm yo k'ap chache pran souf. Y'ap lonje men yo. Y'ap rele: -Anmwe! Nou pa kapab ankò! Men y'ap fin touye nou.

Chapter 5

¹ ¶ Mache toupatou nan lavil Jerizalèm. Louvri je nou! Gade sa k'ap fèt! Chache sou tout plas piblik yo! Eske nou jwenn yon nonm, yon sèl k'ap fè sa ki dwat, ki p'ap chache twonpe Bondye? Si nou jwenn yonn, m'ap padonnen tout lavil la. ² Yo te mèt pran non m' pou fè sèman, se pou twonpe moun. ³ Seyè, mwen konnen se moun ki p'ap twonpe ou w'ap chache! Ou frape yo, sa pa fè yo anyen. Ou kraze yo, yo derefizè aprann. Tèt yo di kou wòch. Yo derefizè tounen vin jwenn ou! ⁴ Mwen di nan kè m': Se yon bann tèt mare ki pa konprann anyen, yo fin fou! Yo pa konnen ni sa Seyè a mande yo fè, ni sa Bondye yo a vle yo fè. ⁵ Mwen pral jwenn grannèg yo, m'a pale ak yo. Sèten, yo menm yo konnen ni sa Seyè a mande yo fè, ni sa Bondye yo a vle yo fè. Men, pa gen

6
 yonn ladan yo ki rekonèt otorite Bondye ankò. Yo tout ap fè sa yo pito. Se poutèt sa lyon ki nan rakbwa ap devore yo. Chen mawon ki nan savann ap dechèpiye yo. Leyopa ap anvayi lavil yo. Si yon moun mete tèt deyò, y'ap depatcha li. Paske yo fè anpil peche. Se tout tan y'ap twonpe Bondye!

7
 Nan kondisyon sa a, ki jan pou m' ta padonnen moun lavil Jerizalèm yo? Yo vire do ban mwen. Y'ap pran non yon bondye ki pa Bondye tout bon pou fè sèman. Mwen te ba yo tou sa yo bezwen.

8
 Men, yo lage kò yo nan fè adiltè. Y'ap goumen konsa pou yo antre kay jennès. Yo tankou poulen

9
 chwal byen gra ki cho dèyè jiman. Y'ap plede kouri dèyè madanm frè parèy yo. Atò, pou m' pa ta pini yo pou sa? Pou m' pa ta pran revanj mwen sou yon nasyon konsa? Se mwen menm Seyè a

10
 ki di sa ¶ Se pou moun eskalade miray yo. Se pou moun devaste jaden yo. Men, yo pa bezwen

11
 fini nèt ak yo. Se pou yo rache branch yo met atè, paske se pa pou mwen yo ye. Ni moun Izrayèl

12
 yo, ni moun Jida yo trayi m' nèt. Se mwen menm Seyè a ki di sa. Wi, yo nye Seyè a. Y'ap plede

13
 di: Seyè a pa egziste! Pa gen malè ki pou rive nou. P'ap gen lagè. P'ap kras gen grangou! Pwofèt yo p'ap di anyen la a. Se pa Bondye k'ap pale nan bouch yo. Malè yo wè a, se sou yo pou l' tonbe.

14
 Se poutèt sa, men sa Seyè a, Bondye ki gen tout pouvwa a, di m': -Jeremi, poutèt sa yo di a, m'ap fè pawòl mwen mete nan bouch ou tounen yon dife. Yo menm, y'ap tankou fachin. Dife a pral boule

15
 yo nèt. Men sa Seyè a di ankò: -Nou menm, pèp Izrayèl, Seyè a pral fè yon nasyon soti byen lwen vin atake nou, yon nasyon ki fò, yon nasyon ki la depi lontan, yon nasyon ki pale yon lang

16
 nou pa konnen, yon nasyon nou p'ap konprann sa y'ap di. Sòlda k'ap tire flèch yo se vanyan

17
 gason yo ye, y'ap touye moun san gad dèyè. Y'ap devore tout rekòt ak tout manje nou yo. Y'ap touye ni pitit gason, ni pitit fi nou yo. Y'ap koupe tèt bèf, tèt kabrit ak tèt mouton nou yo. Y'ap koupe dènye pye rezen ak dènye pye fig frans nou yo met atè. Y'ap kraze dènye lavil ak ranpa nou

18
 te kwè ki ta ka pwoteje nou yo. Y'ap vini atake nou ak nepe. Men sa Seyè a di ankò: -Men,

19
 menm lè sa a, mwen p'ap detwi pèp mwen an nèt. Lè y'a mande poukisa Seyè a, Bondye yo a, ap fè yo sibi tou sa, w'a di yo: Menm jan yo te vire do ban mwen pou y' al sèvi bondye moun lòt nasyon yo isit nan pwòp peyi yo a, konsa tou, nou pral sèvi moun lòt nasyon yo nan yon peyi ki pa

20
 pou nou. ¶ Seyè a di ankò: -Men sa pou ou di moun fanmi Jakòb yo. Men sa pou ou fè moun

21
 Jida yo konnen. Di yo konsa: Louvri zòrèy nou byen pou nou tandè, bann egare san konprann!

22
 Nou gen je, men nou pa ka wè. Nou gen zòrèy, men nou pa ka tandè. Se Seyè a k'ap pale ak nou: Poukisa nou pa gen krentif pou mwen? Se mwen menm ki mete sab pou sèvi limit pou lanmè a, yon limit k'ap la pou tout tan, yon limit li p'ap ka janm depase. Lanm lanmè yo mèt move, yo

p'ap ka fè anyen. Lanmè a te mèt gwonde, li p'ap ka janm depase l'.²³ Men pèp la gen tèt di, yo pa vle koute. Yo vire do ban mwen, y' al kite m'.²⁴ Sa pa janm vin nan lide yo pou yo di: Annou gen krentif pou Seyè a, Bondye nou an, li menm ki voye lapli lè pou n' gen lapli, ki ban nou sezon rekòt nou chak lanne.²⁵ ¶ Se mechanste nou ki boulvèse tout bagay sa yo. Se peche nou yo ki fè nou pa jwenn tout bon bagay sa yo.²⁶ Gen yon bann mechan k'ap viv nan mitan pèp mwen an. Y'ap veye konsa tankou moun k'ap tann kabann pou zwezo. Yo mete pèlen pou pran moun.²⁷ Menm jan chasè yo plen kalòj yo ak zwezo, konsa tou, yo plen kay yo ak sa yo vòlò. Se sa ki fè yo grannèg, yo rich konsa.²⁸ Yo gra, po figi yo klere ak grès. Yo pa gen limit nan fè sa ki mal. Pou yo ka rive, yo kraze tout moun anba pye yo, ata timoun san papa. Yo pa defann kòz malere.²⁹ Atò, pou m' pa ta pini yo pou sa? Pou m' pa ta pran revanj mwen sou yon nasyon konsa? Se mwen menm, Seyè a, ki di sa.³⁰ Sa k'ap pase nan peyi a, se bagay pou moun mete men nan tèt, bagay pou fè moun pè.³¹ Annik manti ase pwofèt yo ap bay. Prèt yo menm, se pòch yo ase yo konnen. Pèp la menm renmen l' konsa. Men, kisa y'a fè lè tou sa va fini?

Chapter 6

¹ ¶ Nou menm moun branch fanmi Benjamen yo, kouri al kache! Chape kò nou soti lavil Jerizalèm. Kònen twonpèt lavil Tekoa. Limen yon dife lavil Bèt Achirèm pou bay siyal la. Yon gwo malè, yon malè sèk k'ap soti nan nò pandye sou tèt nou.² Ou menm lavil Jerizalèm, atout ou bèl la, atout tout moun renmen ou lan, yo pral detwi ou.³ Wa yo ap moute vin sènen lavil la ak lame yo. Yo pral moute tant yo fè wonn li, chak moun bò pa yo.⁴ Yo di tout moun Bondye bay lòd atake lavil Jerizalèm: Leve non! Ann al atake l' gwo midi. Men, apre sa yo di: Gade malè ki rive nou non! Solèy gen tan ap kouche. Konmanse fènwa.⁵ Leve non! Ann al atake l' gwo lannwit. Nou pral detwi tout gwo bèl kay li yo.⁶ Men sa Seyè ki gen tout pouvwa a di wa yo: -Koupe bwa, bwote tè, fè gwo bit nan pye miray lavil Jerizalèm. M'ap regle lavil la, paske nan tout lavil la se gwo k'ap peze piti.⁷ Menm jan dlo dous toujou ap souse nan yon pi, se konsa nan lavil la mechanste ap souse toupato: Se britalite ak piyay mwen tande y'ap fè. Se moun k'ap souffri, moun ki anba kou ase mwen wè devan je m'.⁸ Aa! Jerizalèm, se pou sa sèvi ou leson, si ou pa vle m' lage ou, si

ou pa vle mwen fè ou tounen yon dezè, yon kote pesonn pa rete. ¶ Men sa Seyè ki gen tout pouvwa a di m' ankò: -Yo pral ranmase dènye moun ki rete nan peyi Izrayèl la, menm jan yo ranmase dènye grap rezen lè rekòt fini. Y'ap pase men pran yo tout, tankou moun k'ap pase men nan branch rezen

10 pou rekòlte rezen. Mwen di: -Ki moun ki pral koute m' lè m'a pale, lè m'a bay avètisman sa yo? Zòrèy yo bouche. Yo refize tandè sa m'ap di. Yo pran pawòl Bondye a pou yon jouman. Yo pa vle

11 tandè. Kòlè Seyè a ap bouyi nan kè m' tou, m' pa ka kenbe ankò. Lè sa a, Seyè a di m': -Al pase kòlè m' sou timoun ki nan lari yo, sou gwoup jenn gason ki reyini yo. Y'ap pase men pran tout

12 moun, fanm kou gason. Ata vye granmoun ki fin viv yo p'ap chape. Y'ap pran kay yo ansanm ak jaden yo ak madanm yo bay lòt moun. Mwen pral pini moun ki rete nan peyi a. Se mwen menm

13 Seyè a ki di sa. Yo tout, gran kou piti, ap fè ak rèk dèyè lajan. Ni prèt yo ni pwofèt yo, yo tout

14 ap twonpe pèp la pou fè lajan. Yo pa pran malè ki rive pèp mwen an pou anyen. Y'ap plede di:

15 Tout bagay ap mache byen, pa gen danje. Epi manti! Anyen p'ap mache. Ou kwè yo ta wont pou bagay lèd yo fè yo! Non, yo pa wont menm. Yo pa konn sa ki rele wont. Se poutèt sa, y'ap tonbe menm jan tout lòt yo te tonbe a. Lè m'a regle ak yo, se va bout yo. Se mwen menm Seyè a

16 ki di sa. Men sa Seyè a di ankò: -Rete non sou kous nou! Gade byen! Mande kote ansyen chemen yo te pase. Mande kote bon wout la ye. Pran l'. Lè sa a n'a viv ak kè poze. Men yo di: Non, nou

17 p'ap fè sa! Apre sa, Seyè a chwazi faksyonnen pou veye pou yo, pou di yo: Atansyon, tandè jan

18 y'ap kònen twonpèt la pou avèti nou. Men, yo di: Non, nou p'ap tandè. ¶ Se poutèt sa, Seyè a di ankò: -Nou menm, moun lòt nasyon yo, koute! Nou menm ki sanble la a, vin tandè sa ki pral rive

19 pèp mwen an. Ou menm latè, koute. Mwen pral fè malè tonbe sou pèp sa a. Se yo ki chache l' ak vye lide yo gen nan tèt yo. Yo pa vle koute sa m'ap di yo, yo pa okipe lalwa mwen ba yo a.

20 Ki mele m' ak lansan y' al chache nan peyi Saba, ak plant santi bon ki soti nan peyi byen lwen! Zannimo n'ap ofri pou boule pou mwen yo pa fè m' plezi menm. Bèt n'ap touye pou mwen yo pa

21 di m' anyen. Se poutèt sa, men sa m'ap di nou: M'ap mete antrav sou chemen nou. N'ap bite.

22 Papa pral mouri ansanm ak pitit gason yo. Tout zanmi yo, tout vwazinaj yo pral mouri tou. Men sa Seyè a di ankò: -Moun ap soti nan yon peyi bò nan nò. Yon gwo pèp byen lwen ap pare pou fè

23 lagè. Yo pran banza yo ak frenn yo. Yo mechan anpil. Se yon bann san manman. Lè yo sou chwal yo, y'ap fè bri tankou lanmè lè l' move. Yo pare lame yo pou yo vin fè lagè kont lavil

24 Jerizalèm, sou mòn Siyon an. Moun lavil Jerizalèm yo ap di: -Nou pran nouvèl la. De bra nou

25 kase, kè nou sere. N'ap soufri tankou yon fanm ki gen tranche. Piga pesonn soti al nan jaden. Piga pesonn al mache sou granchemen yo, paske lènmi nou yo gen zam nan men yo. Kote moun

²⁶
 pase yo pè. Seyè a pale ak pèp li a, li di l': -Mete rad sak sou nou. Woule kò nou nan sann dife.
 Se pou nou gen lapenn tankou si nou te pèdi sèl pitit gason nou te genyen. Se pou nou plenn ak de
²⁷
 ran dlo nan je nou. Paske moun k'ap vin detwi nou an ap atake nou san avèti. Ou menm Jeremi,
²⁸
 mwen mete ou la pou sonde pèp mwen an, pou veye sa pèp la ap fè, pou ou wè sa li vo. Se yon
 bann move moun ki pa soti pou yo chanje. Y'ap mache pale moun mal. Tèt yo di tankou wòch ak
²⁹
 fè. Se yon bann lwijanboje. Y'ap vante dife a byen fò nan fòj la. Dife a fè tout plon yo disparèt.
 Men, pou pèp mwen an, ou te mèt fonn yo sou fonn, kras yo p'ap soti, move grenn yo p'ap disparèt.
³⁰
 Yo rele yo vye lajan san valè, paske mwen menm Seyè a, mwen voye yo jete.

Chapter 7

¹
 ¶ Seyè a pale ak Jeremi, li di l' konsa: ² -Al kanpe devan gwo pòtay kay Bondye a. Pale byen
 fò, epi di: Nou tout moun peyi Jida k'ap vini pase nan pòtay sa a pou n' al fè sèvis pou Seyè a, koute
³
 sa Seyè a voye di nou. Men sa Seyè ki gen tout pouvwa a, Bondye pèp Izrayèl la, di: Se pou nou
⁴
 chanje jan n'ap viv la! Manyè sispann fè sa n'ap fè a pou m' ka kite nou viv isit la. Nou pa bezwen
 kwè pawòl manti y'ap plede repete yo: Sa se gwo kay Seyè a! Sa se gwo kay Seyè a! Sa se gwo
⁵
 kay Seyè a! Anyen p'ap rive nou la. Se pou nou chanje jan n'ap viv la. Sispann fè sa n'ap fè a!
⁶
 Rann tout moun jistis san patipri. Pa pwofite sou moun lòt nasyon yo, sou timoun ki san papa yo,
 sou fanm ki pèdi mari yo. Sispann fè san moun inonsan koule nan peyi a. Pa kouri dèyè lòt bondye
⁷
 yo. Se va pou malè nou. Lè sa a, m'a kite nou viv isit la, nan peyi mwen te bay zansèt nou yo pou
⁸
 tout tan tout tan. Men, nou chita ap kwè yon bann pawòl manti ki p'ap sèvi nou anyen. Kouman
⁹
 nou ta vle sa? N'ap vòlò, n'ap touye moun, n'ap fè adiltè, n'ap fè sèman pou bay manti, n'ap fè ofrann
 pou yo boule pou Baal, n'ap kouri fè sèvis pou yon bann lòt bondye nou pa t' janm konnen anvan.
¹⁰
 Lèfini, n'ap vin kanpe devan m' nan kay yo mete apa pou mwen an, n'ap plede di: Nou sove! Epi
¹¹
 nou donnè pi rèd nan fè bagay mwen pa vle wè? Sanble nou pran kay yo mete apa pou mwen
¹²
 an fè yon kachèt pou vòlò? Se sa mwen wè n'ap fè. Se mwen menm Seyè a ki di sa. Moute Silo,
 ale wè kote yo te mete apa pou mwen an, premye kote mwen te chwazi pou m' te rete nan mitan
¹³
 nou an. Ale wè sa m' te fè l' poutèt mechanste pèp Izrayèl mwen sa a. Koulye a menm, gade tou
 sa nou fè. Se Seyè a menm ki di sa. Se pa ti kras pale mwen pale nou, nou derefize koute m'. Se pa

¹⁴
 ti kras rele mwen rele nou, nou pa reponn. Enben! Sa m' te fè Silo a, se sa mwen pral fè kay yo mete apa pou mwen an, kay nou kwè ki ka sove nou an, ak peyi mwen te bay zansèt nou yo ansanm ak nou an.

¹⁵
 M'ap wete nou devan je m', menm jan mwen te voye tout frè nou yo, tout moun branch fanmi Efrayim yo, jete byen lwen.

¹⁶
 ¶ Seyè a di ankò: -Jeremi monchè, ou pa bezwen lapriyè nan pye m' pou pèp sa a. Ou pa bezwen rele, ni ou pa bezwen lapriyè pou yo. Pa vin plede kòz yo bò kote m'. Paske mwen p'ap koute ou.

¹⁷
 Ou pa wè sa y'ap fè nan lavil peyi Jida yo, ak nan lari lavil Jerizalèm?

¹⁸
 Timoun yo ap ranmase bwa. Mesye yo ap limen dife. Medam yo ap bat farin pou fè gato pou Larenn syèl la. Y'ap ofri diven vide atè pou lòt bondye. Y'ap fè tou sa pou yo fè m' lapenn.

¹⁹
 Men, se pa mwen y'ap fè mal. Se Seyè a menm ki di sa. Se pwòp tèt yo menm y'ap fè mal, se tèt yo y'ap fè wont.

²⁰
 Se poutèt sa, men sa mwen menm, Seyè ki gen tout pouvwa a, mwen di: Mwen pral pase gwo kòlè m' ni sou Tanp lan, ni sou moun, ni sou bèt, ni sou pyebwa, ni sou rekòt yo. Kòlè mwen pral tankou yon dife pesonn p'ap ka tenyen.

²¹
 ¶ Men sa Seyè ki gen tout pouvwa a, Bondye pèp Izrayèl la, di ankò: -Pran tout vyann nou te konn ofri pou boule nan dife, mete yo sou vyann bèt nou touye yo. Lèfini, manje tout.

²²
 Lè mwen t'ap fè zansèt nou yo soti peyi Lejip, mwen pa t' ba yo ankenn lòd sou bèt pou yo te boule nan dife pou mwen, ni sou bèt pou yo te touye pou mwen.

²³
 Sèl bagay mwen te mande yo, se pou yo te koute m' lè m'ap pale ak yo. Konsa m'a toujou Bondye yo. Yo menm y'a pèp mwen. Mwen te di pou yo te swiv chemen mwen t'ap mete devan yo, pou tout bagay te ka mache byen pou yo.

²⁴
 Men, yo pa t' vle koute m', yo te bouche zòrèy yo. Yo fè sa ki nan lide yo, yo fè tèt di. Pase yo vin pi bon, yo vin pi mal.

²⁵
 Depi jou zansèt nou yo te soti kite peyi Lejip rive jòdi a, mwen toujou voye sèvitè m' yo, pwofèt yo, pou pale ak nou.

²⁶
 Men, pesonn pa koute yo, tout moun bouche zòrèy yo. Nou fè tèt di, nou fè pi mal pase zansèt nou yo.

²⁷
 Se poutèt sa, Jeremi, ou pral di yo tou sa, men yo p'ap koute ou. W'ap rele yo, men yo p'ap reponn.

²⁸
 W'a di yo: se yon nasyon ki pa koute sa Seyè a ap di yo yo ye. Malgre Bondye pini yo, yo pa chanje.

²⁹
 Pesonn pa kenbe pawòl yo ak li. Yo pa pale sou sa menm ankò. ¶ Nou menm moun lavil Jerizalèm, koupe tout cheve nan tèt nou voye jete. Moute sou tèt mòn yo, pou nou chante plenn sò nou, paske Seyè a pa vle wè moun ki fè l' fache. Li vire do ba yo, li voye yo jete.

³⁰
 Moun peyi Jida yo fè sa ki mal devan je m'. Se Seyè a menm ki di sa: Yo pran zidòl yo, yo enstale yo nan kay yo te mete apa pou mwen an. Konsa, li pa nan kondisyon pou sèvi m' ankò.

³¹
 Nan Fon Benninon an, yo bati yon lotèl yo rele Tofèt pou yo ka boule pitit gason ak pitit fi yo nan dife sou li. Sa se bagay mwen p'ap mande yo fè, bagay ki pa janm vin nan lide m' pou m' mande

32
 yo fè. Se poutèt sa, men sa mwen menm Seyè a, mwen di: Yon lè yo p'ap rele kote sa a Tofèt, osinon Fon Benininon, men Fon Masak: Se la y'a antere moun, paske p'ap gen plas lòt kote ankò pou antere yo. 33
 Kadav moun yo va sèvi manje pou zwazo nan syèl ak bèt nan bwa. P'ap gen pesonn pou pouse bèt yo ale. 34
 Peyi a pral tounen yon dezè. Nan lavil peyi Jida yo ak nan lari lavil Jerizalèm, ou p'ap tande yon moun ap pran plezi l', ou p'ap tande yon moun ap ri. p'ap menm gen fèt pou moun marye yo. Se mwen menm k'ap fè tou sa rive.

Chapter 8

1 ¶ Men sa Seyè a di ankò: -Lè sa a, yo pral detere zosman wa Jida yo, zosman chèf li yo, zosman prèt yo, zosman pwofèt yo, zosman tout moun ki te rete lavil Jerizalèm yo. 2
 Yo pral kite yo atè a konsa devan solèy la, devan lalin lan, devan zetwal yo ki nan syèl la, paske se bagay sa yo moun sa yo te renmen, se sa yo t'ap sèvi, se sa yo t'ap swiv. Se sa yo t' al mande sa pou yo fè. Se pou yo yo t'ap fè sèvis. Pesonn p'ap ranmase zosman yo pou antere yo. Y'a tounen fimye atè a. 3
 Nan move ras sa a, gen yon ti rès moun ki va chape. Mwen pral gaye yo yon bann kote sou latè pou yo rete. Lè sa a, y'a règrèt yo pa t' mouri pito. Se Seyè a ki gen tout pouvwa a menm ki di sa. 4
 ¶ W'a di yo pou mwen men pawòl ki soti nan bouch Seyè a: Lè yon moun tonbe, èske li pa leve ankò? Lè yon moun pèdi chemen l', èske li pa tounen kote l' soti a? 5
 Poukisa atò, nou menm pèp lavil Jerizalèm, nou vire do ban mwen, epi nou pa vle chanje? Nou kenbe pye zidòl nou yo la tèt. Nou derefize tounen vin jwenn mwen. 6
 M' pare zòrèy mwen pou m' tande tout sa n'ap di: Men, pawòl ki soti nan bouch nou pa laverite. Pa gen yonn nan nou ki gen lapenn pou mechanste n'ap fè yo. Pa gen yonn ki di: Kisa m'ap fè la a konsa? Tankou yon chwal k'ap kouri pou al nan lagè, yo pa tande yo pa wè, yo lage kò yo pi fon nan mechanste yo. 7
 Ata zwezo yo rele sigòy yo konnen lè pou yo tounen lakay yo. Menm toutrèl, ziwondèl ak valèt, yo konnen lè pou yo vwayaje tounen. Men, nou menm pèp mwen an, nou pa konnen regleman mwen ban nou pou nou swiv yo. 8
 Ki jan nou ka fè di nou gen bon konprann, lalwa Seyè a avèk nou? Men dirèktè lalwa yo, se yon bann malonèt. Avèk bèl pawòl yo, yo fè l' di sa li pa di. 9
 Nou fè moun ki gen bon konprann yo wont. Yo kraponnen, yo kite moun pran tèt yo. Yo voye pawòl Seyè a jete. Kote bon konprann yo koulye a? 10
 Se poutèt sa m'ap pran madanm yo bay lòt moun. M'ap pran jaden yo bay moun k'ap anvayi peyi yo a. Paske yo tout, gran kou piti, ap fè ak rèk dèyè lajan. Ni pwofèt yo, ni prèt yo, yo tout ap twonpe pèp la pou fè lajan. 11
 Yo pa pran malè ki rive pèp mwen an pou anyen. Y'ap plede di: Tout bagay ap

12
 mache byen! Pa gen danje! Epi, manti! Anyen p'ap mache. Ou kwè yo ta wont pou bagay lèd
 yo fè yo? Bichi! Yo pa wont menm. Yo pa konn sa ki rele wont. Se poutèt sa, yo pral tonbe menm
 13
 jan lòt yo te tonbe a. Lè m'a pini yo, se va bout yo. Se Seyè a ki di sa. ¶ Mwen te soti pou m' te
 ranmase pèp mwen an tankou moun k'ap ranmase rekòt li. Men, yo te tankou pye rezen san yon
 rezen ladan l', tankou pye fig frans san yon fig frans ladan l'. Se poutèt sa m' kite etranje pran peyi
 14
 a nan men yo. Pèp la menm ap di: -Poukisa nou rete bra kwaze konsa? Annou sanble! Ann kouri
 ale nan lavil ki gen ranpa yo! Se la pou nou mouri. Paske Seyè a, Bondye nou an, kondannen nou
 15
 pou n' mouri. Li ban nou pwazon pou n' bwè, paske nou antò devan li. Nou t'ap tann li ban nou
 kè poze ak lasante. Men anyen pa mache. Nou t'ap tann li vin geri nou, men se pè l'ap fè nou pè.
 16
 Lènmi deja rive nan zòn lavil Dann lan. Nou tandè souf chwàl yo. Tout tè a ap tranble lè chwàl
 yo ap ranni. Lènmi an ap vini, l'ap detwi peyi a ansanm ak tou sa ki ladan l'. L'ap kraze lavil yo
 17
 ansanm ak tout moun ki ladan yo. Seyè a di ankò: -Men m'ap lage sèpan dèyè nou, move sèpan
 18
 nou p'ap ka chame. Y'ap mòde nou. Anyen pa ka soulaje lapenn mwen! Kè m' ap fann! Koute
 19
 jan pèp mwen an ap rele mande sekou toupatou nan peyi a. Gen lè Seyè a pa sou mòn Siyon an
 ankò? Gen lè wa Siyon an pa la ankò? Seyè a reponn: -Poukisa nou fè m' fache konsa? N'ap sèvi
 20
 zidòl, n'ap fè sèvis pou bondye lòt nasyon yo ki pa vo anyen. Pèp la ap rele: -Sezon chalè a fini.
 21
 Sezon rekòt la pase. Nou pa sove jouk koulye a! Kè m' ap fann lè m' wè jan y'ap kraze pèp mwen
 22
 an. M' pa wè sa pou m' fè ankò! M' dekouraje nèt. Pa gen renmèd pou yo nan peyi Galarad? Pa
 gen dòktè ankò laba a? Poukisa atò pèp mwen an pa ka jwenn lasante?

Chapter 9

1
 ¶ Jan mwen ta renmen wè tèt mwen tounen yon sous dlo, de je m' yo tounen de fontenn k'ap
 bay dlo, pou m' kriye lajounen kou lannwit, pou moun yo touye nan pèp mwen an! Jan mwen ta
 2
 renmen jwenn yon ti kote pou m' rete nan mitan dezè a, pou m' manyè kite pèp mwen an, pou m'
 3
 al byen lwen yo. Yo yonn pa kenbe pawòl yo ak Bondye. Se yon bann trèt yo ye. Yo toujou pare
 pou bay manti. Se metye yo sa. Se sa ki penmèt yo rive vin chèf nan peyi a. Y'ap fè dezaksyon sou
 4
 dezaksyon. Yo pa konnen m' ankò. Se Seyè a menm ki di sa. Se pou tout moun veye kò yo ak
 zanmi yo. Pesonn pa ka fè frè yo konfyans. Paske tout frè vle pase devan pwòp frè yo. Tout moun
 5
 ap bay zanmi yo kout lang. Yo tout ap woule zanmi yo. Pesonn pa di laverite. Y'ap file lang yo

pou bay manti. Y'ap touye tèt yo nan fè mechanste. ⁶ Y'ap fè britalite sou britalite. Y'ap twonpe
 moun yonn dèyè lòt. Yo derefize rekonèt mwen. Se Seyè a menm ki di sa. ⁷ Se poutèt sa, men sa
 Seyè ki gen tout pouvwa a di: -Mwen pral pase yo nan dife pou m' netwaye yo tankou yo fè l' pou
 lò. Mwen pral sonde yo. Pèp mwen an fè twòp mechanste. Pou jan yo fè mechanste, se sa m' bliye
 m' p'ap fè yo. ⁸ Lang yo tankou ponya wouye. Se manti ase ki nan bouch yo. Lè y'ap pale ak zanmi
 yo, se bèl pawòl ase ki nan bouch yo. Men nan kè yo, se pèlen y'ap pare pou yo. ⁹ Atò pou m' pa
 ta pini yo pou tout bagay sa yo? Atò pou m' pa ta pran revanj mwen sou yon nasyon konsa? Se
 Seyè a menm ki di sa. ¹⁰ Mwen di: -Mwen pral kriye, mwen pral plenn pou mòn yo, mwen pral
 plenn sò patiraj bèt yo. Paske yo fin boule. Pesonn pa pase la ankò. Ou pa tandè bri yon bèt ladan
 yo. Depi zwezo k'ap vole nan syèl la jouk bèt nan bwa, tout met deyò, y' ale. ¹¹ M'ap fè lavil
 Jerizalèm tounen yon pil mazi kote chat mawon rete. M'ap fè tout lavil peyi Jida yo tounen dezè
 san pesonn ladan yo. ¹² ¶ Mwen mande ki moun gen lespri ase pou konprann sa k'ap rive la a? Ki
 moun Seyè a te esplike bagay sa yo? Se pou l' fè moun konnen poukisa peyi a fini konsa, poukisa
 li boule tankou dezè a, poukisa pa gen pesonn ladan l' ankò. ¹³ Seyè a reponn mwen: -Sa rive konsa
 paske pèp mwen an pa kenbe tou sa mwen te moutre yo. Yo pa koute m'. Yo pa fè sa m' te di yo
 fè. ¹⁴ Yo fè tèt di pi rèd, yo rete ap sèvi zidòl Baal zansèt yo te fè yo konnen an. ¹⁵ Se poutèt sa,
 men sa mwen menm, Seyè ki gen tout pouvwa a, Bondye pèp Izrayèl la, m' di: Mwen pral ba yo
 zèb anmè pou yo manje, mwen pral ba yo dlo anpwazonnen pou yo bwè. ¹⁶ Mwen pral gaye yo
 nan mitan yon bann nasyon ni yo menm ni zansèt yo pa t' janm konnen. Mwen pral voye lènmi fè
 yo lagè jouk mwen fin touye yo nèt. ¹⁷ Men sa Seyè a di ankò: -Kalkile sou sa ki gen pou rive a!
 Rele medam yo pou yo vin kenbe rèl la pou nou! Voye chache sa ki konn rele yo! Fè yo vini!
¹⁸ Pèp la di: Di yo fè vit vin plenn sò nou! Annou kriye, annou fè je nou kouri dlo! ¹⁹ Tandè rèl
 moun yo sou mòn Siyon an. -Woy! Woy! Gade jan nou fini! Ala wont nou wont! Se pou nou kite
 peyi nou an! Yo kraze tout kay nou yo. ²⁰ Mwen di: -Nou menm medam, koute sa Seyè a ap di.
 Louvri zòrèy nou pou nou tandè pawòl k'ap soti nan bouch li. Moutre pitit fi nou yo jan pou yo
 plenn. Y'a moutre zanmi fi yo jan pou yo rele. ²¹ Lanmò ap pase nan fennèt yo. L'ap antre nan gwo
 bèl kay nou yo. Li pase men l' pran timoun nan lari, ak jenn gason sou plas mache yo. ²² Seyè a
 di: -Kadav yo gaye toupatou, tankou fimye yo simen nan jaden, tankou grap diri moun k'ap ranmase
 rekòt yo kite atè. Pa gen pesonn pou ranmase yo. ²³ ¶ Piga moun ki gen lespri yo fè grandizè dèske
 yo gen bon konprann, ni moun ki vanyan yo dèske yo vanyan, ni moun rich yo dèske yo rich.
²⁴ Men si yon moun vle fè grandizè, l'a fè grandizè dèske li konnen m', dèske li konprann mwen.

Paske mwen gen bon kè, Mwen fè sa ki dwat ak sa ki kòrèk sou latè. Se bagay sa yo ki fè m' plezi.

Se mwen Seyè a ki di sa. ²⁵ Seyè a di ankò: -Yon jou pral rive kote mwen pral regle moun ki pote mak kontra m' lan sou kò yo, men ki pa konnen m' nan kè yo: ²⁶ moun peyi Lejip yo, moun peyi Jida yo, moun peyi Edon yo, moun peyi Amon yo, moun peyi Moab yo, moun ki koupe cheve yo kout epi ki rete nan dezè a. Yo yonn pa kenbe kontra m' lan. Wi, ni moun peyi sa yo ni moun pèp Izrayèl yo, yo yonn pa kenbe kontra m' lan.

Chapter 10

¹ ¶ Men, koute sa Seyè a di sou nou, nou menm moun pèp Izrayèl yo. ² Li di konsa: -Piga nou swiv lòt nasyon yo. Nou pa bezwen pèdi tèt nou lè nou wè siy nan syèl la. Se moun lòt nasyon yo ki pou pè lè konsa. ³ Relijyon moun sa yo pa vo anyen. Yo koupe yon pyebwa nan rakbwa, yo fè yon bòs atizan travay li ak sizo. ⁴ Yo dekore l' ak ajan, ak lò. Yo pran mato ak klou yo kloure l' pou fè l' kanpe pou l' pa tonbe. ⁵ Bondye sa yo kanpe tankou pikèt nan jaden konkonm. Yo pa ka pale. Se pote pou yo pote yo, paske yo pa ka mache. Nou pa bezwen pè yo, yo pa ka fè anyen ni an byen ni an mal. ⁶ Seyè, pa gen tankou ou! Ou gen pouvwa. Yo respekte ou pou sa ou fè. ⁷ Ou se wa tout nasyon. Ki moun ki pa ta gen krentif pou ou! Nan tout moun lespri ki sou latè, nan tout chèf yo, pa gen tankou ou! ⁸ Yo tout se yon bann egare san konprann. Kisa zidòl bwa yo ka moutre yo pase sa? ⁹ Ajan an, se nan peyi Tasis li soti an fèy plat. Lò a soti nan peyi Oufaz. Tou sa se travay bòs atizan ak bòs fòjon. Yo pran twal violèt ak twal wouj pou fè rad mete sou zidòl yo. Sa tou, se atizan ki fè yo ak men. ¹⁰ Men ou menm Seyè, ou se Bondye tout bon an, Bondye vivan an, Wa ki la pou tout tan an. Lè ou ankòlè, tout latè pran tranble, nasyon yo pa ka sipòte. ¹¹ Nou menm, moun pèp Izrayèl yo, n'a di moun lòt nasyon yo konsa: Tout bondye sa yo ki pa t' fè syèl la ak latè a pral disparèt sou latè, yo yonn p'ap rete anba syèl la. ¹² Seyè a te fè latè ak fòs pouvwa li. Li kreye dènye bagay ak bon konprann li. Avèk entelijans li, li louvri syèl la anwo latè. ¹³ Li pase lòd, epi dlo ki anwo syèl la pran gwonde. Li fè gwo nwaj yo moute soti toupato. Li fè zèklè yo klere pou fè lapli vini. Li fè van yo soti kote li te sere yo. ¹⁴ Lè konsa tout moun rete egare, yo pa konprann anyen. Moun k'ap fè zidòl yo wont sa yo fè a, paske bondye yo fè yo se fo bondye yo ye, yo pa gen lavi nan yo. ¹⁵ Yo pa vo anyen. Yo bon pou pase nan betiz. Y'ap disparèt lè Seyè a ap vin regle ak yo. ¹⁶ Men, Bondye Jakòb la pa tankou yo. Se li menm ki fè tout bagay. Li chwazi

pèp Izrayèl la pou rele l' pa l'. Seyè ki gen tout pouvwa a, se konsa yo rele l'. ¶¹⁷ Nou menm moun
 lavil Jerizalèm, lènmi sènen nou toupatou. Ranmase pakèt nou!¹⁸ Men sa Seyè a di nou: Fwa sa
 a mwen pral mete nou deyò nan peyi a. M'ap bare chemen nou pou nou yonn pa chape.¹⁹ Moun
 Jerizalèm yo rele: -Ki malè sa a pou nou! Nou pran! Pa gen anyen ki ka sove nou! Nou te kwè se
 yon malè nou ta ka sipòte.²⁰ Yo ravaje tout tant nou yo. Yo koupe tout kòd ki te kenbe yo. Nou
 pèdi tout pitit nou yo, yo pote yo ale. Pa gen pesonn pou mete tant nou yo kanpe ankò, pesonn pou
 moute rido nou yo.²¹ Mwen reponn: -Chèf nou yo fin pèdi tèt yo. Yo pa mande Bondye konsèy.
 Se poutèt sa yo pa t' kapab fè anyen. Yo kite pèp la andebandad.²² Koute non! Nouvèl la ap kouri
 vini! Gen yon gwo mouvman nan peyi bò nò a. Lame l' yo pral fè lavil peyi Jida yo tounen mazi,
 kote bèt nan bwa rete.²³ Seyè, mwen konnen pesonn pa mèt tèt yo, pesonn pa ka kontwòle kote
 yo prale.²⁴ Koriye pèp ou a, Seyè. Men, pa peze l' twòp! Pa fè kòlè sou li, paske w'a fini avè l'.
²⁵ Mete ou ankòlè sou nasyon ki pa konnen ou yo, sou pèp ki p'ap sèvi ou yo. Paske se yo menm
 k'ap fin touye pitit Jakòb yo. Y'ap touye yo nèt. Yo fin ravaje peyi kote nou rete a.

Chapter 11

¹ ¶ Seyè a pale ak Jeremi, li di l' konsa: ² -Koute kondisyon nou te pase nan kontra a. W'a pale
 ak moun peyi Jida yo ansanm ak moun ki rete lavil Jerizalèm yo. ³ W'a di yo men sa Seyè a, Bondye
 pèp Izrayèl la, di: Madichon pou tout moun ki pa kenbe kondisyon ki nan kontra a. ⁴ Se kontra sa
 a mwen te pase ak zansèt nou yo lè mwen t'ap fè yo soti kite peyi Lejip, peyi ki te tankou yon gwo
 dife nan dèyè yo. Mwen te di yo: Se pou nou koute m', se pou nou fè tou sa mwen ban nou lòd fè.
 Se konsa, n'a yon pèp ki rele m' pa m'. Mwen menm, m'a sèl Bondye nou. ⁵ Lè sa a m'a kenbe
 pwomès ak gwo sèman mwen te fè bay zansèt nou yo, pou m' te ba yo yon bon peyi kote lèt ak
 siwo myèl ap koule tankou dlo. Se peyi sa a ki pa nou jòdi a! Mwen reponn: -Se vre, Seyè! ⁶ Apre
 sa, Seyè a di m' ankò: -Al repete tout pawòl sa yo byen fò nan zòrèy moun lavil peyi Jida yo, ak
 nan zòrèy moun nan tout lari lavil Jerizalèm. Di yo: Koute kondisyon ki nan kontra a. Fè tou sa ki
 ladan l'. ⁷ Paske, depi lè mwen t'ap fè zansèt nou yo soti kite peyi Lejip jouk rive jòdi a, mwen pa
 manke avèti yo. Depi lè sa a m' dèyè yo, m'ap mande yo pou yo koute sa m' te di yo! ⁸ Men yo pa
 tande, zòrèy yo bouche. Mwen te mande yo pou yo te fè tou sa mwen te ba yo lòd fè nan kontra a,

men yo derefizè. Se konsa mwen pini yo jan m' te di yo sa nan kontra a. ⁹ Apre sa, Seyè a di m' konsa: -Moun Jida ak moun lavil Jerizalèm moute konplo sou do mwen. ¹⁰ Yo tonbe ankò nan menm peche ak zansèt yo ki te refize koute sa m' t'ap di yo. Yo menm tou, yo kouri dèyè lòt bondye pou fè sèvis pou yo. Ni moun peyi Izrayèl yo, ni moun peyi Jida yo pa kenbe kontra mwen te pase ak zansèt yo a. ¹¹ ¶ Enben! Se mwen menm Seyè a k'ap pale: Mwen pral voye yon malè sou yo. Yo p'ap ka chape anba l'. Y'a kriye nan pye m', mwen p'ap koute yo. ¹² Lè sa a, se pou moun peyi Jida yo ak moun ki rete lavil Jerizalèm yo al kriye nan pye bondye y'ap sèvi yo. Se pa pou yo yo te konn boule ofrann yo! Tansèlman, bondye sa yo p'ap ka sove yo lè malè a va rive sou yo. ¹³ Nou menm moun peyi Jida, nou gen yon bondye pou chak lavil nan peyi a! Nou menm moun lavil Jerizalèm, mezi lari nou genyen se mezi lotèl nou bati pou boule ofrann pou Baal, zidòl k'ap fè nou wont la! ¹⁴ Ou menm, Jeremi, ou pa bezwen vin plede pou moun sa yo. Ou pa bezwen plenyen pou yo, ni ou pa bezwen lapriyè pou yo. Paske y'a rele nan pye m' lè malè a va rive sou yo, mwen p'ap tande yo. ¹⁵ Seyè a di ankò: -Pèp mwen renmen anpil la gen move lide dèyè tèt yo. Ki dwa yo genyen pou yo vin nan Tanp mwen an? Yo gen lè konprann yo ka egzante malè k'ap vin sou yo a avèk bèl pwomès y'ap fè m' yo, yo ka chape anba l' avèk vyann anpil bèt y'ap ofri pou mwen yo, apre sa pou y' al pran plezi yo? ¹⁶ Yon lè, mwen te rele yo: Bèl pye oliv mwen an, plen fèy, chaje donn. Men, koulye a, m'ap vini ak yon bri loraj, m'ap mete dife nan fèy li yo, m'ap kase tout branch li yo. ¹⁷ Se mwen menm Seyè ki gen tout pouvwa a ki te plante pèp Izrayèl la ansanm ak pèp Jida a. Men koulye a, mwen pran desizyon pou m' voye malè sou yo. Se yo menm ki chache l' avèk tou sa yo fè ki mal: Se yo ki fè m' fache paske y' al boule ofrann pou Baal! ¹⁸ ¶ Seyè a fè m' konnen yo t'ap moute yon konplo sou do mwen. Li fè m' wè jan yo t'ap manniganse sou do m' pou yo pran m'. ¹⁹ Mwen menm, mwen te tankou yon ti mouton tou dou yo t'ap mennen labatwa, mwen pa t' konnen se sou do m' yo t'ap konplote konsa lè yo t'ap di: Annou koupe pyebwa ki byen kanpe a. Ann disparèt li sou latè pou pesonn pa chonje l' ankò. ²⁰ Lè sa a, mwen lapriyè, mwen di: -Seyè ki gen tout pouvwa a, ou se yon jij ki pa nan patipri. Ou sonde tou sa ki nan kè ak nan lide moun. Mwen lage kòz mwen nan men ou. Fè m' wè jan w'ap tire revanj ou sou yo. ²¹ Mesye lavil Anatòt yo te soti pou yo touye m'. Yo di m' konsa: O wi, si ou louvri bouch ou pou pale nan non Seyè a ankò, n'ap touye ou. ²² Enben, men sa Seyè ki gen tout pouvwa a di: M' pral regle ak yo! Jenn gason yo pral mouri nan lagè. Pitit gason ak pitit fi yo pral mouri grangou. ²³ Lè lè a va rive pou yo peye pou sa yo fè a, m'ap voye yon sèl malè sou moun lavil Anatòt yo. Yo yonn p'ap chape.

Chapter 12

¹ ¶ Ou menm Seyè, ou pa nan patipri. Mwen pa ka nan plede avè ou. Men, mwen ta renmen mande ou yon bagay sou sa w'ap fè a. Poukisa zafè mechan yo mache byen konsa? Poukisa tout moun malonèt yo alèz konsa? ² Ou plante yo, yo pran rasin. Yo grandi, yo donnent. Non ou toujou nan bouch yo! Men, nan kè yo, yo pa sou bò ou. ³ Men, ou menm Seyè, ou konn ki moun mwen ye, ou wè sa m'ap fè, ou wè jan m' renmen ou. Pote mechan yo ale tankou mouton y'ap mennen labatwa! Kenbe yo la jouk lè a va rive pou yo touye yo! ⁴ Kilè n'a sispann wè tè a sèk? Kilè n'a sispann wè zèb nan jaden yo ap fennen? Zannimo yo ap mouri, zwezo yo ap depafini. Tou sa, akòz ⁵ mechanste pèp la k'ap plede di Bondye pa wè sa n'ap fè. Seyè a di: -Jeremi, si ou pèdi souf lè w'ap kouri ak moun, ki jan ou ka fè kouri ak chwal? Si kè ou pa poze lè tout bagay ap mache byen, si se lè peyi a pa an danje, ou gen kè poze, kisa w'a fè lè larivyè Jouden ap desann? ⁶ Ata frè ou yo, pwòp fanmi ou yo, ap trayi ou. Yo mete tèt yo ansanm ak lòt moun sou do ou. Pa fè yo konfyans, menm lè ou wè yo ap pale byen avè ou. ⁷ ¶ Seyè a di ankò: -Mwen lage pèp Izrayèl la, mwen voye pèp mwen te chwazi a jete, mwen lage pèp mwen te renmen anpil la nan men lènmi yo. ⁸ Pèp ki te rele m' pa m' lan vire do ban mwen. Tankou yon lyon nan gwo rakbwa, y'ap gwonde sou mwen. ⁹ Se poutèt sa mwen pa vle wè yo ankò! Pèp ki te rele m' pa m' lan tankou yon zwazo tout koulè, malfini sènen l' toupatou. Ale non! Sanble tout bèt nan bwa. Fè yo vini pran pa yo nan manje a! ¹⁰ Yon bann chèf lòt nasyon ap sakaje jaden rezen mwen an. Yo kraze jaden m' lan anba pye yo. Yo fè bèl peyi mwen an tounen yon dezè kote moun pa rete. ¹¹ Yo fè l' tounen yon savann. Men, li la devan je m'. Li fini, san anyen ladan l'. Tout peyi a tounen yon dezè, san pesonn pa di anyen. ¹² Moun soti lòt bò mòn ki nan dezè a vin piye. Paske Seyè a voye lagè pou detwi tout peyi a nèt. ¹³ Pesonn pa ka viv ak kè poze. Yo plante ble, yo rekòlte pikan. Yo travay di, sa pa rapòte yo anyen. Yo wont, rekòt la pa bay anyen paske Seyè a move anpil. ¹⁴ ¶ Seyè a di ankò: -Men sa Seyè a di sou move vwazen pèp li a ki leve men yo sou peyi li te bay pèp Izrayèl la pou rele l' pa l' la: Mwen pral rache yo soti nan peyi yo a, tankou pyebwa y'ap derasinen. M'a wete moun peyi Jida yo nan mitan yo. ¹⁵ Men, lè m'a fin rache yo, m'a gen pitye pou yo. M'a fè yo tounen lakay yo, nan peyi yo. ¹⁶ Si lè sa a yo aprann viv byen tankou pèp mwen, si yo pran non m' pou fè sèman sa a: Nan non Seyè ki vivan an!, menm jan yo te moutre pèp mwen an pou li fè sèman nan non Baal, ¹⁷ enben, lè sa a yo menm tou, y'a fè pati pèp mwen an, epi zafè yo va mache byen. Men, si yon

nasyon pa koute m', m'ap rache l', m'ap derasinen l', m'ap detwi li nèt. Se mwen menm Seyè a ki di sa.

Chapter 13

¹ ¶ Seyè a pale avè m', li di m' konsa: -Al achte yon sentiwon lenn, mare l' nan ren ou. Men, piga ou tranpe l' nan dlo. ² Se konsa m' achte yon sentiwon jan Seyè a te di m' lan. Mwen mare l' nan ren mwen. ³ Apre sa, Seyè a pale avè m' ankò, li di m' konsa: ⁴ -Pran sentiwon lenn ou te achte a, sa ki mare nan ren ou lan, ale bò larivyè Lefrat la. W'a kache l' nan yon fant wòch. ⁵ Mwen leve vre, m' ale bò larivyè Lefrat la, mwen kache l' jan Seyè a te ban m' lòd la. ⁶ Apre yon bon ti tan, Seyè a di m' konsa: -Leve non! Tounen bò larivyè Lefrat la, al pran sentiwon mwen te ba ou lòd kache a. ⁷ Se konsa, m' ale bò larivyè Lefrat la, mwen chache, mwen pran sentiwon an kote m' te kache l' la. Men, li te gate, li pa t' vo anyen ankò. ⁸ Lè sa a, Seyè a pale avè m' ankò, li di m' konsa: ⁹ -Men ki jan mwen pral kraze lògèy moun granpanpan peyi Jida yo, ak gwo lògèy moun lavil Jerizalèm yo. ¹⁰ Moun sa yo se move moun yo ye. Yo refize koute m' lè m' pale yo. Yo fè tèt di, yo fè tout vye lide ki vin nan tèt yo. Y' al dèyè lòt bondye, yo fè sèvis pou yo, yo adore yo. Se konsa ¹¹ y'ap tounen tankou sentiwon lenn lan ki pa bon pou anyen ankò. Menm jan moun mare sentiwon nan ren yo, se konsa mwen te vle pou moun peyi Jida yo ansanm ak moun lavil Jerizalèm yo te mare avè m', pou yo te ka yon pèp apa pou mwen, yon non, yon lwanj, yon bèl bagay pou mwen. ¹² Men yo pa koute m'. Se Seyè a menm ki di sa. ¶ W'a di yo pawoli sa a: Men sa Seyè a, Bondye pèp Izrayèl la, di: Potich diven fèt pou mete diven ladan l'. Y'a reponn ou: Men wi, tout potich ¹³ diven fèt pou mete diven ladan l'. Se bagay nou konnen. Lè sa a w'a di yo: Men sa mwen menm Seyè a, mwen di: Mwen pral plen vant tout moun nan peyi a ak diven jouk yo sou, depi wa a ki ¹⁴ chita sou fotèy David la, prèt yo, pwofèt yo, jouk dènye moun ki rete lavil Jerizalèm. Apre sa, m'ap frape yo yonn ak lòt pou yo kraze, granmoun kou timoun, tout ansanm. M'ap san pitye, mwen ¹⁵ p'ap kite yonn chape. Mwen p'ap pran priyè, m'ap touye yo tout. Nou menm pèp Izrayèl, Seyè a ap pale, louvri zòrèy nou pou nou tande! Pa fè gwo kòlèt! ¹⁶ Fè lwanj Seyè a, Bondye nou an, anvan fènwa bare nou, pou pye nou pa al bite sou mòn yo lannwit la, anvan li fè limyè nou t'ap ¹⁷ tann lan tounen yon gwo fènwa, yon dekou ki fènwa kou lank. Si nou pa koute l', mwen pral kache kò m' yon kote pou m' kriye, paske nou gen twòp lògèy. Je m' pral koule dlo, yo pral ponpe

dlo, paske yo pral fè pèp Seyè a prizonye, yo pral depòte yo. ¹⁸ Seyè a di m' konsa: -Pale ak wa a ansanm ak manman l'. Di yo desann soti sou fotèy yo, paske bèl kouwòn ki te sou tèt yo a tonbe atè. ¹⁹ Yo sènen tout lavil ki nan sid peyi Jida a. Pesonn pa ka pase. Yo depòte dènye moun peyi Jida yo. Yo pa kite yonn deyò. ²⁰ Jerizalèm, leve je ou gade. Gade lènmi ou yo k'ap desann soti nan nò! Kote moun ki te sou kont ou yo, moun ki t'ap fè ou mache tèt byen wo a? ²¹ Kisa w'a di lè w'a wè moun ou te kwè ki te zanmi ou yo leve dèyè ou pou yo vin chèf sou ou nan peyi ou? Ou pral nan lapenn tankou yon fanm ansent ki gen tranche. ²² ¶ W'a mande tèt ou: Poukisa tout bagay sa yo ap rive ou? Se paske sa ou te fè a te grav anpil kifè yo mete ou toutouni, yo fè kadejak sou ou. ²³ Moun po nwa pa ka chanje koulè po yo. Leyopa pa ka wete takte nwa ki sou kò li yo. Konsa tou, nou menm ki fin gen labitid fè sa ki mal nou pa ka fè sa byen. ²⁴ Mwen menm, Seyè a, mwen pral gaye yo tankou pay van ap gaye nan savann. ²⁵ Seyè a di: Men sa k'ap tann nou. Men sa mwen deside fè nou paske nou te bliye m', nou t' al mete konfyans nou nan fo bondye. ²⁶ Se mwen menm menm ki pral leve rad nou jouk sou tèt nou, pou yo wè nou toutouni. ²⁷ Mwen te wè n'ap fè bagay mwen rayi. Tankou yon nonm marye k'ap kouri dèyè madanm lòt moun, tankou poulen k'ap ranni dèyè jiman, nou kouri dèyè lòt bondye, n'ap rele nan pye yo. San ankenn wont, n'ap fè sèvis pou yo sou tèt ti mòn yo ak nan laplenn. Aa! moun lavil Jerizalèm, nou fini vre! Kilè n'a sispann? Kilè n'a manyè netwaye kè nou?

Chapter 14

¹ ¶ Seyè a pale ak Jeremi sou zafè chechrès la, li di l': ² -Peyi Jida nan gwo lapenn, lavil li yo ap depafini. Tout moun kouche atè ap plenn. Nan lavil Jerizalèm moun ap rele anmwe! ³ Grannèg yo voye domestik yo al chache dlo. Lè yo rive nan sitèn yo, yo pa jwenn yon gout dlo. Yo tounen ak veso yo vid. Yo wont, yo pa konn sa pou yo di. Yo bouche figi yo. ⁴ Tè a fann fann. Pa gen yon gout lapli. Abitan pa konn sa pou yo fè. Se men nan tèt. ⁵ Nan jaden, kabrit yo met ba, lèfini, yo sove kite ti kabrit yo, paske pa gen zèb pou yo manje. ⁶ Bourik mawon yo rete kanpe sou tèt ti mòn yo, y'ap pran fre tankou chen mawon. Je yo bouke, yo pa wè ladan yo, paske pa gen zèb pou yo manje. ⁷ Pèp la ap rele nan pye Bondye, y'ap di: -Menm si sa nou fè a kont pou kondannen nou, ou menm, Seyè, fè kichòy pou sa ka sèvi yon lwanj pou ou non! Paske se pa ni de ni twa fwa nou

8
 vire do ba ou nan fè peche kont ou. Ou se tout espwa pèp Izrayèl la! Se ou ki delivre nou lè malè
 te pandye sou tèt nou. Poukisa ou aji tankou yon etranje, tankou yon vwayajè k'ap pase yon nwit
 9
 ase nan peyi nou an? Poukisa w'ap fè tankou yon moun ki dekontwole, tankou yon sòlda ki pa
 gen kouraj pou fè anyen pou pesonn? Seyè, nou sèten ou la nan mitan nou. Se pèp ou nou ye. Tanpri,
 10
 pa lage nou! ¶ Men sa Seyè a di pèp la: -Wi! Yo renmen al fè vakabon, yo pa ka ret an plas. M'
 11
 pa kontan ak yo. M'ap chonje tout mal yo fè, m'ap pini yo pou tout peche yo fè. Apre sa, Seyè
 12
 a di m' konsa: -Pa vin mande m' pou m' fè anyen pou pèp sa a. Yo te mèt fè jèn, mwen p'ap tandè
 rèl yo. Yo te mèt ofri bèt pou boule pou mwen ansanm ak grenn jaden, se pa sa k'ap fè m' kontan
 13
 ak yo. Okontrè, mwen pral fè yo mouri nan lagè, nan grangou ak anba maladi. Lè sa a mwen
 di: -Bondye ki gen tout pouvwa a, ou konnen jan pwofèt yo ap plede di pèp la yo pa bezwen pè,
 p'ap gen lagè, grangou p'ap tonbe sou yo, paske ou te pwomèt y'ap toujou viv ak kè poze nan peyi
 14
 a. Men, Seyè a reponn, li di m' konsa: -Se pa vre sa pwofèt yo ap di a. Yo pran non m' pou bay
 manti! Se pa kras mwen menm ki voye yo. Mwen pa ba yo ankenn lòd, mwen pa janm pale ak yo.
 Si yo fè vizyon, se pa mwen ki ba yo l'. Si yo di yo konnen sa ki pral rive, se manti. Se lide yo fè
 15
 nan tèt yo konsa pou twonpe pèp la, se sa ase yo ka louvri bouch yo di. Se poutèt sa, men sa
 Seyè a di li pral fè pwofèt li pa t' janm voye yo men ki pran non l' pou di pèp la p'ap gen lagè ni
 16
 grangou nan peyi a: Se nan lagè ak nan grangou tout pwofèt sa yo pral mouri! Moun yo t'ap bay
 mesaj sa yo pral fini menm jan an tou. Yo pral mouri nan lagè ak nan grangou, yo menm, madanm
 yo, pitit gason ak pitit fi yo. Yo pral jete kadav yo nan tout lari lavil Jerizalèm. P'ap gen pesonn
 17
 pou antere yo. Se konsa m'ap fè yo peye mechanste yo. ¶ Men sa w'a di yo ankò: -Se pou je m'
 koule dlo san rete lajounen kou lannwit, paske pèp mwen an tankou yon tifi ki pran gwo frakti, l'ap
 18
 souffri rèd souffri. Lè m' soti al nan jaden, mwen wè kadav moun yo touye nan lagè. Lè m' antre
 nan lavil la, mwen wè moun ap mouri grangou! Pwofèt yo menm ansanm ak prèt yo ap mache nan
 19
 tout peyi a, yo pa konn sa y'ap fè. Seyè, gen lè ou voye pèp Jida a jete nèt? Eske ou rayi moun
 mòn Siyon yo? Poukisa ou frape nou konsa jouk nou pa ka geri a? Nou t'ap tann ou vin delivre nou,
 20
 anyen pa rive. Nou t'ap tann ou vin geri nou, ou fè nou pè pi rèd. Seyè, nou rekonèt nou antò.
 21
 Nou rekonèt zansèt nou yo te fè sa ki mal. Wi, nou tout nou antò devan ou. Chonje ki moun ou
 ye, pa meprize nou! Jerizalèm, se la fotèy pouvwa ou la chita. Pa avili l'. Pa bliye pwomès ou yo.
 22
 Pa kase kontra ou te fè ak nou an. Zidòl moun lòt nasyon yo pa vo anyen. Pa gen yonn ladan yo
 ki ka voye lapli. Syèl la pou kont pa l' pa ka bay lapli. Se ou menm ki Seyè a, Bondye nou an! Se
 ou menm ki tout espwa nou, paske se ou menm ki fè tout bagay sa yo.

Chapter 15

¹
¶ Lè sa a, Seyè a di m' konsa: -Menm si Moyiz ak Samyèl ta kanpe la pou plede avè m' pou
yo, mwen pa t'ap gen pitye pou pèp sa a. Wete yo devan je m'. Fè yo ale. ² Lè y'a mande ou kote
pou yo ale, w'a di yo: Men sa Seyè a di: Sa ki la pou mouri anba maladi pral mouri anba maladi!
Sa ki la pou mouri nan lagè pral mouri nan lagè! Sa ki la pou mouri grangou pral mouri grangou!
Sa ki la pou depòte, yo pral depòte yo! ³ Mwen pral voye kat kalite malè sou yo. Se mwen menm
Seyè a ki di sa: Nepe pou touye yo, chen pou trennen yo pote ale, zwezo nan syèl pou devore yo,
bèt nan bwa pou fini ak yo. ⁴ M'ap fè tout nasyon sou latè sezi lè y'a wè sa ki rive yo poutèt sa
Manase, pitit gason Ezekyas la, te fè nan lavil Jerizalèm lè li te wa nan peyi Jida a. ⁵ Seyè a di: -Ki
moun ki va gen pitye pou nou, nou menm moun lavil Jerizalèm? Ki moun ki va pran lapenn pou
nou? Ki moun ki va kite sa y'ap fè pou vin pran nouvèl nou? ⁶ Se nou menm ki voye m' jete. Se
Seyè a menm ki di sa. Se nou menm ki vire do ban mwen. Se konsa, mwen leve men m' sou nou
pou m' detwi nou, paske mwen bouke pran pasyans ak nou. ⁷ Nan tout ti bouk nan peyi a, mwen
mete nou nan laye pou vannen nou tankou pay. Mwen detwi pèp mwen an, mwen kite yo san pitit.
Men, yo pa kite move chemen yo t'ap swiv la. ⁸ Mwen fè gen plis madanm ki pèdi mari yo nan
peyi a pase gen grenn sab bò lanmè. Mwen touye jenn gason nou yo ki te fèk parèt nan lavi a. Mwen
mete manman yo nan lapenn. M' rete konsa m' ba yo kè sere ak kè sote. ⁹ Manman ki pèdi sèt pitit
la tonbe san konesans. Souf li kout. Gwo midi, solèy kouche pou li. Li wont, li pa konn sa pou l'
fè ankò. M'ap lage sa ki vivan toujou nan nou yo nan men lènmi k'ap touye yo. Se mwen menm
¹⁰
Seyè a ki di sa. ¶ Ala yon malè pou mwen! O manman mwen, poukisa ou te fè m'? Mwen nan
kont, mwen nan pale anpil ak tout moun nan peyi a. Mwen pa prete moun lajan, mwen pa prete
lajan nan men moun. Malgre sa, tout moun ap ban m' madichon. ¹¹ Seyè, se pou tout madichon
yo rive m' vre si mwen pa sèvi ou byen, si mwen pa t' plede avè ou pou tout lènmi m' yo, lè yo te
nan malè, lè yo te nan tou sak pa bon. ¹² Pesonn pa ka kraze bout fè k'ap soti nan nò a, fè ki melanje
ak kwiv la. ¹³ Seyè a di m' ankò: -M'ap pran tout richès ak tout trezò pèp mwen an, m'ap lage yo
nan piyay. Se konsa yo pral peye pou tout peche yo te fè toupatou nan peyi a. ¹⁴ M'ap fè nou tounen
domestik lènmi nou yo nan yon peyi nou pa konnen, paske nou fè m' fè kolè. Tankou yon dife m'ap
boule nou. ¹⁵ ¶ Lè sa a mwen di: -Ou menm, Seyè, ou konn tout bagay. Pa bliye m' non! Vin pote
m' sekou! Tire revanj pou mwen sou moun k'ap pèsekite m' yo! Pa al twò dousman ak yo pou yo
pa gen tan touye m'. Chonje se poutèt ou y'ap joure m' konsa! ¹⁶ Lè ou pale avè m', mwen koute

tou sa ou di m'. Pawòl ou yo, se tout plezi m'. Yo fè kè m' kontan, paske yo mete m' apa pou ou,
 Seyè, Bondye ki gen tout pouvwa a. ¹⁷ Mwen pa pèdi tan m' chita ak moun k'ap bay blag pou m'
 pran plezi m' ak yo. Ou te pran m' anba ponyèt ou. M' mete kò m' sou kote, paske ou te fè m' fache
 menm jan avè ou! ¹⁸ Poukisa m'ap soufri san rete konsa? Poukisa kote m' blese a pa ka geri? M'
 pa ka jwenn renmèd pou li. Gen lè ou soti pou ou woule m'? Ou tankou yon sous ki bay dlo lè l'
 vle. ¹⁹ Men sa Seyè a reponn mwen: -Si ou tounen vin jwenn mwen, m'ap resevwa ou, w'a kanpe
 devan m' ankò pou ou sèvi m'. Si ou sispann pale anlè pou se bon pawòl k'ap soti nan bouch ou
 ase, m'a fè ou pale pou mwen ankò. Lè sa a, se pèp la ki va tounen vin jwenn ou. Ou p'ap bezwen
 al dèyè yo. ²⁰ M'ap fè ou kanpe devan moun sa yo tankou yon miray fèt an kwiv byen solid. Y'a
 goumen avè ou, men yo p'ap ka fè ou anyen. M'ap kanpe la avè ou pou m' pwoteje ou, pou m'
 delivre ou. Se mwen menm Seyè a ki di sa. ²¹ M'ap delivre ou anba men mechan yo, m'ap fè ou
 soti anba ponyèt lwijanboje yo.

Chapter 16

¹ ¶ Seyè a pale avè m' ankò, li di m' konsa: ² -Pinga ou marye pou ou pa gen ni pitit gason ni
 pitit fi yon kote konsa. ³ Paske se mwen menm Seyè a k'ap di ou sa ki pral rive pitit gason ak pitit
 fi ki fèt isit la, sa ki pral rive manman ak papa k'ap fè pitit nan peyi a. ⁴ Move maladi pral touye
 yo. P'ap gen moun ni pou kriye pou yo ni pou antere yo. Kadav yo va tounen fimye atè a. Y'ap
 mouri nan lagè, y'ap mouri grangou. Kadav yo ap sèvi manje pou zwezo nan syèl ak bèt nan bwa.
⁵ Wi, men sa Seyè a di ankò: -Pa antre nan kay kote ki gen lanmò. Pa kriye pou pesonn! Pa moutre
 moun sa yo ou nan lapenn pou yo, paske mwen p'ap kite yo ak kè poze ankò. Se mwen Seyè a ki
 di sa. Mwen p'ap gen pitye pou yo ankò. Mwen p'ap fè byen pou yo ankò. ⁶ Tout moun nan peyi
 a pral mouri, rich kou pòv. Yo p'ap antere yo. Pesonn p'ap kriye pou yo. Pesonn p'ap ni make kò
 yo ak kouto, ni koupe cheve nan tèt yo, pou moutre yo nan lapenn pou yo. ⁷ Pesonn p'ap manje
 pen ak diven avèk moun ki nan lapenn, avèk moun ki gen lanmò nan fanmi yo. Pesonn p'ap moutre
 yo nan lapenn ak moun ki pèdi papa yo osinon manman yo. ⁸ Pa antre nan kay kote y'ap fè fèt non
 plis. Pa chita sou tab pou manje bwè ak yo. ⁹ Paske men sa mwen menm, Seyè a ki gen tout pouvwa
 a, Bondye pèp Izrayèl la, mwen di: Nou tout k'ap viv isit la, m'ap fè nou wè m'ap fè tout moun
 sispann fè kè yo kontan, sispann fè fèt lè y'ap marye. ¹⁰ ¶ Lè w'a di yo tou sa, y'a mande ou: Men,
 poukisa Seyè a pran desizyon pou li voye gwo malè sa a sou nou? Kisa nou fè ki mal? Ki krim nou

fè ki pa fè Seyè a, Bondye nou an, plezi? ¹¹ Lè sa a, w'a reponn yo: -Men sa Seyè a di: Se paske zansèt nou yo te vire do ban mwen, y' al dèyè lòt Bondye. Yo fè sèvis pou yo, yo adore yo, yo vire do ban mwen. Yo pa kenbe lòd mwen te ba yo. ¹² Lèfini, nou menm nou fè pi mal pase yo. Nou tout ap fè tèt di, n'ap swiv tout vye lide ki pase nan tèt nou, nou pa vle koute m'. ¹³ Se konsa, m'ap mete nou deyò nan peyi sa a, m'ap voye nou nan yon peyi ni nou menm ni zansèt nou yo pa t' janm konnen. Se la nou pral sèvi lòt bondye lajounen kou lannwit. Mwen p'ap fè pa nou ankò. ¹⁴ ¶ Se konsa, men sa Seyè a di: -Yon jou va rive lè moun pèp Izrayèl yo p'ap di lè y'ap fè sèman: Se nan non Seyè a ki vivan, li menm ki te fè nou soti kite peyi Lejip. ¹⁵ Lè sa a, y'a di pito: Se nan non Seyè a ki vivan, li menm ki fè pèp Izrayèl la soti kite peyi nan nò a ak tout lòt peyi kote li te gaye yo. Wi, m'ap mennen yo tounen nan peyi mwen te bay zansèt yo a. ¹⁶ Seyè a di ankò: -Mwen voye chache anpil moun ki konn fè lapèch pou vin pran yo. Apre sa, m'ap voye chache kantite moun ki konn fè lachas pou kouri dèyè yo sou tout mòn, sou tout ti mòn, jouk nan twou wòch. ¹⁷ Je m' louvri sou tou sa y'ap fè. Anyen pa kache pou mwen. Yo mèt kache kò yo jan yo vle, mwen wè tou sa yo fè ki mal. ¹⁸ Pou konmanse, m'ap fè yo peye doub pou tout peche yo, pou tou sa yo fè ki mal, paske yo derespekte tout peyi m' lan ak vye zidòl yo ki tankou kadav santi. Yo plen peyi a ak fo bondye. ¹⁹ Seyè, ou menm ki tout pwoteksyon mwen, ou menm ki ban m' tout fòs mwen, se bò kote ou mwen kouri lè mwen nan pwoblèm. Moun lòt nasyon yo va soti byen lwen, nan dènye bout latè pou yo vin nan pye ou. Y'a di: -Sa zansèt nou yo te mouri kite pou nou yo pa bondye tout bon. ²⁰ Se yon bann zidòl ki pa vo anyen. Eske moun ka fè bondye pa yo? Zidòl sa yo pa bondye tout bon. ²¹ Se konsa, fwa sa a, mwen pral fè yo konprann. Fwa sa a, mwen pral fè yo konnen fòs ponyèt mwen. Lè sa a, y'a konnen se mwen menm ki Bondye sèl Mèt la.

Chapter 17

¹ ¶ Seyè a di: -Yo ekri peche moun Jida yo ak yon sizo an fè. Li make nan kè nou ak yon pwent an dyaman. Li grave sou kat kwen lotèl nou yo, ² pou pitit yo ka chonje tout lotèl yo ak tout potò repozwa yo plante bò pyebwa plen fèy sou tèt mòn yo. ³ Nou menm k'ap fè sèvis sou mòn yo, nan mitan pyebwa yo, m'ap fè moun vin piye richès nou yo ak trezò nou yo poutèt peche nou te fè sou mòn yo toupatou nan peyi a. ⁴ Se nou menm ankò ki pral bay peyi mwen te ban nou an. M'ap fè nou tounen domestik lènmi nou yo, nan yon peyi nou pa t' janm konnen paske nou te fè m' fache.

Kòlè m' tankou yon dife ki p'ap janm mouri. ⁵ ¶ Men sa Seyè a di ankò: -Madichon pou moun ki vire do ban mwen pou mete konfyans yo nan moun parèy yo, pou konte sou sa moun ap fè pou yo.

⁶ Y'ap tankou yon ti pyebwa nan dezè k'ap pouse nan yon tè sèk, san dlo, nan yon tè sale kote pèsonn pa rete. Yo p'ap janm wè zafè yo mache byen. ⁷ benediksyon pou moun ki mete konfyans yo nan Seyè a, wi, pou moun ki mete tout espwa yo nan li. ⁸ L'ap tankou pyebwa yo plante bò larivyè, k'ap plonje rasin li nan dlo. Li pa pè anyen lè sezon chalè rive, paske fèy li yo ap toujou vèt. Te mèt gen yon lanne chechrès, sa pa fè l' anyen, l'ap toujou donner. ⁹ Pa gen anyen ki ka twonpe moun pase sa ki nan kè lòt moun. Pa gen renmèd pou sa. Ki moun ki ka rive konprann sa k'ap pase nan kè lèzòm? ¹⁰ Mwen menm Seyè a, mwen konnen tout lide ki nan tèt yo, mwen sonde santiman ki nan kè yo. M'ap bay chak moun sa yo merite dapre jan yo mennen bak yo. ¹¹ Moun k'ap fè mal pou yo ka rive rich, yo tankou zwezo k'ap kouve ze yo pa t' ponn. Yo poko parèt, y'ap pèdi tou sa yo te genyen. Anvan yo mouri, yo gen tan pèdi tèt yo. ¹² ¶ Tanp nou an tankou yon bèl fotèy ki kanpe sou tèt mòn lan depi nan konmansman. ¹³ Seyè! Se ou ki tout espwa pèp Izrayèl la. Tout moun ki lage ou pral wont. Moun ki vire do ba ou ap disparèt tankou non ki ekri sou sab, paske yo lage ou, Seyè, ou menm ki sous dlo fre a. ¹⁴ Seyè, geri m' non, m'a gaya! Delivre m' non, m'a sove! Se pou ou m'a fè lwanj. ¹⁵ Moun yo ap di mwen: Kote sa Seyè a te di a? Se pou l' rive vre! ¹⁶ Men, Seyè, mwen pa t' janm kole dèyè ou pou ou te voye malè sou yo! Mwen pa t' janm mande pou move tan tonbe sou yo! Seyè, ou konn sa! Se devan ou mwen te di tou sa m' te di. ¹⁷ Tanpri, pa kite sa vire mal pou mwen! Jou malè se ou ki tout pwoteksyon m'! ¹⁸ Se moun k'ap chache touye m' yo ki pou wont. Pa mwen. Se yo ki pou gen kè kase. Pa mwen. Fè malè tonbe sou yo. Kraze yo an miyèt moso! ¹⁹ ¶ Men sa Seyè a di ankò: -Al kanpe bò Pòtay Pèp la, kote wa Jida yo pase pou antre soti nan lavil la. W'a bay mesaj sa a. Lèfini, al kanpe bò tout lòt pòtay lavil yo, w'a di menm bagay la. ²⁰ W'a di yo: Nou menm, wa peyi Jida ak tout moun nan peyi a, nou tout moun lavil Jerizalèm ki pase nan pòtay sa yo, koute sa Seyè a di: ²¹ Li te di si nou renmen lavi nou, pa pote ankenn chay jou repo a. Pa kite yo pote chay antre nan pòtay lavil Jerizalèm yo. ²² Pa pote chay soti lakay nou jou repo a. Piga nou fè ankenn travay jou sa a. Se pou nou mete jou repo a apa pou Seyè a, jan mwen te bay zansèt nou yo lòd la. ²³ Men zansèt nou yo pa t' koute m', yo pa okipe sa m' te di yo a. Yo fè tèt di. Yo pa obeyi m'. Yo derefize fè sa m' te di yo fè. ²⁴ Men sa mwen menm, Seyè a, mwen di: Si nou menm nou koute lòd mwen ban nou, si nou pa kite pesonn pote chay antre nan pòtay lavil la jou repo a, si nou kenbe jou repo a tankou yon jou nou mete apa pou mwen, si

nou pa fè ankenn travay jou sa a, ²⁵ lè sa a, wa nou yo va antre nan pòtay lavil Jerizalèm yo ansanm ak chèf nou yo. Y'a chita sou fotèy wa David la. Yo menm ansanm ak tout pèp Jida a ak moun lavil Jerizalèm yo, y'a moute cha lagè yo ak chwal yo. Ap toujou plen moun nan lavil Jerizalèm. ²⁶ Moun va soti nan tout lavil peyi Jida yo, nan tout vwazinaj lavil Jerizalèm lan, y'a soti nan peyi moun Benjamen yo, nan zòn ki nan pye mòn yo, nan mòn yo ak nan sid peyi Jida a, y'a pote bèt pou boule nèt pou Seyè a, bèt pou yo touye sou lotèl li a, ofrann grenn jaden yo ak lansan, ansanm ak ofrann pou di Bondye mèsè nan kay Seyè a. ²⁷ Tansèlman, si nou pa koute m', si nou pa mete jou repo a apa pou Bondye, si jou sa a nou pote chay, si nou kite moun antre nan pòtay lavil Jerizalèm yo ak chay, m'ap mete dife nan pòtay li yo. Dife a va boule tout gwo kay lavil Jerizalèm yo. Pesonn p'ap ka touye dife sa a.

Chapter 18

¹ ¶ Seyè a pale ak Jeremi ankò, li di l' konsa: ² -Leve non! Desann kay bòs k'ap fè krich yo. Rive la, m'a ba ou yon mesaj. ³ Mwen desann vre kay bòs k'ap fè krich yo. Mwen wè msye t'ap bay yon krich fòm nan tou a. ⁴ Depi krich li t'ap fè a pa t' soti byen, li kraze l', li pran tè a, li fè yon lòt krich avè l' jan li te vle fè l' la. ⁵ Lè sa a, Seyè a di m' konsa: ⁶ -Nou menm pèp Izrayèl, èske mwen pa gen dwa fè ak nou sa bòs la fè ak tè a? Nou nan men mwen menm jan tè a nan men bòs k'ap fè krich la, tandè! ⁷ Yon lè mwen pran desizyon pou m' derasinen yon nasyon osinon yon peyi ki gen wa, pou m' kraze l', pou m' detwi l'. ⁸ Men, si nasyon an chanje, si li sispann fè mechanste ki lakòz mwen te move a, m'ap chanje lide, m' p'ap fè l' sa m' te fè lide fè l' la. ⁹ Yon lòt lè, mwen pran desizyon pou m' leve yon nasyon osinon pou m' fè gouvènman yon wa kanpe. ¹⁰ Men, si nasyon an fè sa ki pa fè m' plezi, si li pa koute m', mwen p'ap fè tout byen mwen te fè lide fè pou li a. ¹¹ ¶ Bon! Koulye a, ou pral pale ak moun peyi Jida yo ansanm ak moun lavil Jerizalèm yo. Men sa Seyè a voye di yo: M'ap pare yon malè pou nou. Mwen fè lide pini nou. Se pou nou chanje, se pou nou kite move pant n'ap swiv la. Chache viv pi byen, manyè sispann fè sa ki mal. ¹² Y'ap reponn ou: Se tan ou w'ap pèdi! N'ap toujou kenbe tèt ak Bondye. N'ap toujou fè tout vye lide ki nan tèt nou. ¹³ Lè sa a, Seyè a di ankò: -Al mande moun lòt nasyon yo si yo te janm tandè yon bagay konsa rive anvan sa? Moun pèp Izrayèl yo fè yon bann bagay moun pa ka gade! ¹⁴ Eske ou janm wè pa gen lanèj sou wòch nan tèt mòn peyi Liban yo? Eske ou janm wè ti sous dlo fre k'ap

¹⁵
 desann soti nan mòn yo cheche? Men, pèp mwen an bliye m'. Y'ap boule lansan pou zidòl ki pa vo anyen. Kifè yo kite chemen pou yo te swiv la, chemen yo t'ap swiv depi nan tan lontan an, yo pran mache nan raje, kote ki pa gen chemen trase. ¹⁶ Yo fè peyi a tounen yon savann dezole, tout moun se mete men nan tèt! Tout moun k'ap pase bò la pral sezi wè sa. Yo pral souke tèt yo. ¹⁷ Se konsa mwen pral gaye yo devan lènmi yo, menm jan van lès gaye pousyè. M'ap vire do ba yo lè malè va tonbe sou yo. M' p'ap okipe yo menm. ¹⁸ ¶ Lè sa a, pèp la va di: -Annou moute yon konplo sou do Jeremi. N'a toujou jwenn prèt pou di nou sa Bondye vle. Va toujou gen moun ki gen bon konprann pou ban nou konsèy. Va toujou gen pwofèt pou fè nou konnen mesaj Bondye yo. Annou wè! Ann touye l' anba kout lang. Nou pa bezwen tandè sa l'ap di nou la a. ¹⁹ Lè sa a, mwen lapriyè, mwen di: -O Seyè! Tandè sa m'ap di ou. Koute sa moun ki pa vle wè m' yo ap di sou mwen. ²⁰ Lè yon moun fè ou byen, èske se mal pou ou fè li? Yo fouye yon twou pou fè m' tonbe ladan l'. Chonje jan m' te kanpe devan ou pou m' te pale pou yo, pou m' te mande ou pa fè kòlè sou yo. ²¹ Koulye a, Seyè, se pou ou fè pitit yo mouri grangou. Se pou ou kite yo mouri anba kout nepe. Se pou madanm yo pèdi pitit yo ansanm ak mari yo. Se pou maladi lapès touye mesye yo. Se pou jenn gason yo mouri nan lagè. ²² Y'ap rete konsa, w'ap voye yon bann piyajè sou yo. Lè sa a se va rèl nan tout kay yo. Tou sa, paske yo te fouye yon twou pou fè m' tonbe ladan l'. Yo te mete pèlen pou mwen sou wout mwen. ²³ Men ou menm, Seyè, ou konnen tout konplo y'ap fè pou touye m'. Pa padonnen mechanste yo. Pa janm padonnen peche yo. Se pou yo tonbe atè la devan je ou. Lè ou an kòlè, regle yo.

Chapter 19

¹
 ¶ Seyè a di m' konsa: -Leve al achte yon kannari. Lèfini, pran kèk chèf fanmi ak kèk chèf prèt avè ou. ² W'a soti lavil la, w'a pase nan pòtay Kannari Kraze, bò Fon Benn Inon an. Lè w'a rive la, w'a pale byen fò pou di yo mesaj m'a ba ou a. ³ Men sa w'a di yo: -Nou menm wa peyi Jida yo, ansanm ak tout moun ki rete lavil Jerizalèm yo, koute mesaj Seyè a. Men sa Seyè ki gen tout pouvwa a, Bondye pèp Izrayèl la, di: Mwen pral mennen yon sèl malè isit la. Lè moun va pran nouvèl la, yo p'ap vle kwè zòrèy yo. ⁴ M'ap fè sa paske yo vire do ban mwen. Yo pran peyi a pou fè bagay yo pa t' dwe fè, yo boule lansan pou bondye moun lòt nasyon yo, bondye ni yo menm, ni zansèt yo, ni wa peyi Jida yo pa t' janm konnen. Epi yo touye yon pakèt ti inonsan. ⁵ Yo moute lòt lotèl pou Baal. Yo pran pitit yo, yo touye yo, yo boule yo nèt nan dife pou Baal, bagay mwen pa janm

mande yo fè, bagay mwen pa janm louvri bouch mwen di, bagay ki pa janm vin nan lide m'.

6

Enben! Se konsa yon jou ap vini. Se mwen menm Seyè a k'ap pale. Yo p'ap janm rele isit la Tofèt,

7

ni Fon Benn Inon. Y'a rele l' Fon Masak la. Se isit la mwen pral kraze tout plan moun peyi Jida ak moun lavil Jerizalèm yo t'ap fè yo. M'ap fè lènmi yo touye yo nan lage. M'ap fè yo mouri anba men moun ki soti pou touye yo. Lèfini, m'ap kite kadav yo sèvi manje pou zwazo nan syèl la ak

8

bèt nan bwa. M'ap fè lavil Jerizalèm tounen dezè. Moun va sezi wè sa. Tout moun k'ap pase bò

9

la pral sezi, y'ap mete men nan tèt lè y'a wè dega ki fèt ladan l'. Lè lènmi yo, moun ki soti pou touye yo, va sènen lavil la, sa va ba yo yon sèl kè sere, sa va lage yo nan yon sèl mizè, y'a manje

10

pwòp pitit gason ak pwòp pitit fi yo. Yonn pral manje lòt. ¶ Lè sa a, Seyè a di m': -W'a kraze

11

kannari a devan je mesye ki t' al avè ou yo. W'a di yo: Men pawòl Seyè ki gen tout pouvwa a: Mwen pral kraze pèp sa a ak tout lavil sa a. Yo pral tankou yon kannari kraze ki pa ka ranje ankò.

12

Yo pral antere moun ata nan Tofèt, paske p'ap gen plas ankò lòt kote pou antere yo. Se sa mwen pwomèt pou m' fè lavil sa a ansanm ak tout moun ki rete ladan l' yo. M'ap fè lavil la tounen tankou

13

Tofèt. Wi, kay lavil Jerizalèm yo ansanm ak kay wa peyi Jida yo ap tankou Tofèt. Yo p'ap ka sèvi pou moun k'ap sèvi Bondye. Wi, tout kay sa yo se kote yo te moute anwo sou teras pou boule

14

lansan pou zetwal, pou ofri diven bay lòt bondye. Lèfini, Jeremi kite Tofèt kote Seyè a te voye

15

l' al bay mesaj li a, li al kanpe nan gwo lakou Tanp lan. Li di pèp la konsa: -Men pawòl Seyè ki gen tout pouvwa a, Bondye pèp Izrayèl la: Mwen pral voye sou lavil sa a ansanm ak tout ti bouk ki sou kont li yo, tout chatiman mwen te di m'ap voye yo, paske yo fè tèt di, yo pa vle koute sa m' di yo.

Chapter 20

1

¶ Pachou, pitit gason Imè a, te tande Jeremi t'ap di tout bagay sa yo. Pachou te yon prèt ki te

2

chèf reskonsab Tanp Seyè a. Li fè yo bat Jeremi, lèfini li mete l' nan sèp ki te bò gwo Pòtay

3

Benjamin an nan Tanp Seyè a. Nan denmen maten, Pachou fè yo wete Jeremi nan sèp la. Lè sa a, Jeremi di l' konsa: -Seyè a chanje non ou. Li pa rele ou Pachou ankò. Li menm li rele ou: Malè

4

toupatou. Se Seyè a menm ki di sa: Mwen pral fè ou tounen yon malè pou ou menm ak pou tout zanmi ou yo. Ou pral wè yo mouri anba nepe lènmi yo. Mwen pral lage tout moun peyi Jida yo nan men wa lavil Babilòn lan. L'ap pran yon pati ladan yo, l'ap fè yo prizonye, l'ap depòte yo lavil

5

Babilòn, l'ap touye lòt yo. M'ap fè lènmi yo piye tout richès ki nan lavil la, tou sa moun yo travay

fè, tout bèl bagay koute chè yo sere, ata trezò wa Jida yo. M'ap lage tou sa nan men lènmi yo. Yo pral piye yo, y'ap pran tou sa yo genyen pote ale lavil Babilòn. ⁶ Ou menm menm, Pachou, y'ap fè ou prizonye ansanm ak tout moun lakay ou yo, y'ap depòte nou lavil Babilòn. Se la w'a mouri, se la y'a antere ou ansanm ak tout zanmi ou yo ki t'ap koute mesaj manti ou t'ap bay yo. ⁷ ¶ Seyè, ou pran tèt mwen, wi, mwen kite ou pran tèt mwen. Ou pi fò pase m'. Se ou ki genyen. Tout lajounen moun ap ri m'. Yo tout ap pase m' nan rizib. ⁸ Chak fwa pou m' pale se rele pou m' rele. M'ap di byen fò: Men y'ap kraze brize! Men y'ap piye! Paske lè m'ap fè konnen mesaj ou, y'ap fè m' wont, y'ap pase m' nan betiz. ⁹ Men, lè m' di: Mwen p'ap nonmen non Seyè a, mwen p'ap pale nan non l' ankò, mesaj ou yo te tankou yon dife nan zo m' k'ap boule tout anndan m'. Mwen fè sa m' kapab pou enpoze l' soti. Malgre sa, li soti soti l'. ¹⁰ Mwen tandè tout moun ap di: -Any! Kote moun pase yo pè! Annou denonse l' bay otorite yo. Ata pi bon zanmi m' yo ap tann konsa mwen fè yon fo pa. Y'ap di: Nou ka pran pawòl nan bouch li pou antrave l'. Lè sa a, n'a met men sou li, n'a tire revanj ¹¹ nou. Men, Seyè a kanpe la avè mwen. Se yon vanyan gason li ye, li gen pouvwa. Se poutèt sa se moun k'ap pèsekite m' yo ki pral bite. Se yo ki pral anba. Yo pral wont anpil paske sa p'ap mache pou yo. Se va yon wont pesonn p'ap janm bliye. ¹² Seyè ki gen tout pouvwa a sonde tout moun san patipri. Li konnen sa ki nan kè yo ak sa ki nan tèt yo. Se pou m' wè ou tire revanj ou sou yo, paske se nan men ou menm mwen renmèt kòz mwen. ¹³ Chante pou Seyè a. Fè lwanj li! Li rache pòv malere yo anba men mechan yo. ¹⁴ ¶ Madichon pou jou mwen te fèt la! Ankenn benediksyon pou jou manman m' te fè m' lan! ¹⁵ Madichon pou moun ki t' al fè papa m' konnen li gen yon pitit gason epi ki te fè kè l' kontan lè sa a! ¹⁶ Se pou nonm sa a tankou moun lavil Seyè a detwi pou tout tan an yo. Nan maten, se pou l' tandè rèl moun ki nan lapenn. Vè midi, l'a tandè siyal lagè, ¹⁷ Paske li pa t' touye m' anvan m' te fèt la, pou vant manman m' te tou sèvi m' kavo: li ta rete ansent mwen pou tout tan. ¹⁸ Poukisa m' te fèt atò? Pou m' te ka nan lapenn, nan lafliksyon, pou m' te ka mouri nan lawont?

Chapter 21

¹ ¶ Wa Sedesyas te voye Pachou, pitit gason Malkija a, ak Sefanya, pitit gason Mesaja a, prèt la, bò kote Jeremi pou mande l' yon sèvis. ² Yo di l': -Tanpri, pale ak Seyè a pou nou, paske Nèbikadneza, wa Babilòn lan, ap fè nou lagè. Ou pa janm konnen! Seyè a ka fè ankò pou nou yonn

nan mirak li yo pou fòse Nèbikadneza vire do l' al fè wout li. ³ Lè sa a, Seyè a pale ak Jeremi. Lèfèni, Jeremi di mesye yo: -Men sa n'aval di wa Sedesyas pou mwen: ⁴ Seyè a, Bondye pèp Izrayèl la, pale. Li di konsa: Mwen pral pran tout zam ou genyen pou goumen kont wa Nèbikadneza ak lame moun Kalde ki sènen nou yo, mwen pral detounen yo, m'ap anpile yo nan mitan lavil la. ⁵ Se mwen menm menm ki pral goumen ak nou avèk tout fòs mwen, avèk tout kouraj mwen, avèk kòlè, avèk raj, avèk yon gwo kòlè. ⁶ Mwen pral touye tout moun ki rete nan lavil sa a. Mwen pral voye yon gwo maladi sou tout moun ak sou tout bèt pou yo mouri. ⁷ Apre sa, -se mwen menm Seyè a ki di sa-m'ap pran nou tout, ni Sedesyas, wa peyi Jida a, ni chèf li yo, ni rèsmoun ki pa mouri nan lagè, nan grangou ak anba maladi yo, m'ap lage nou nan men Nèbikadneza, wa Babilòn lan, nan men lènmi ki soti pou touye nou yo. Y'ap touye nou anba kout nepe. Yo p'ap kite yonn nan nou chape. Yo p'ap gen pitye pou pesonn, yo p'ap pran priyè. ⁸ ¶ Lèfèni, w'a di pèp la men sa mwen menm, Seyè a, mwen di: Mwen pral mande nou pou nou chwazi ant lavi ak lanmò. ⁹ Tout moun ki va rete nan lavil la pral mouri nan lagè, osinon anba grangou, ou ankò maladi pral fini ak yo. Men, tout moun ki va soti al pote tèt yo bay moun Kalde k'ap sènen nou yo p'ap mouri. Y'a sove lavi yo nan batay la. ¹⁰ Wi, mwen pral fè kichòy pou lavil sa a, men se va pou malè yo, pa pou byen yo. Se mwen menm Seyè a k'ap pale. Mwen pral lage l'nan men wa Babilòn lan. Li pral boule l'ratè. ¹¹ Men sa w'a di moun ki lakay wa peyi Jida a: -Koute pawòl Seyè a. ¹² Nou menm ki soti nan branch fanmi wa David la, men sa Seyè a voye di nou. Rann tout moun jistis chak jou. Pwoteje moun y'ap peze yo, wete yo anba ponyèt moun k'ap peze yo a. Si nou pa fè sa, mwen pral fè kòlè sou nou. ¹³ M'ap boule nou tankou dife moun pa ka touye, paske nou fè anpil mechanste. Nou menm moun Jerizalèm ki chita nan fon an, tankou gwo wòch nan mitan yon plenn, mwen menm Seyè a, mwen pral regle nou. N'ap plede di: Pa gen moun ki ka atake nou, pa gen moun ki ka antre kote n'kache a. ¹⁴ Men m'ap pini nou pou sa nou fè. M'ap mete dife nan gwo bèl kay bwa nou yo. Dife a pral boule tou sa ki bò kote yo. Se mwen menm Seyè a ki di sa.

Chapter 22

¹ ¶ Seyè a pale ak Jeremi, li di l': -Desann ale kay wa peyi Jida a, ² pou ba l' mesaj sa a: Ou menm wa peyi Jida, ki chita sou fotèy David la, nou menm chèf yo ansanm ak tout pèp k'ap antre soti nan pòtay lavil la, koute sa Seyè a di nou: ³ Mwen menm Seyè a, m'ap mande nou pou nou fè sa ki dwat, pou nou rann jistis san patipri. Se pou nou wete moun y'ap peze yo anba men moun k'ap peze yo a. Pa malmennen moun lòt nasyon ki lakay nou yo, timoun ki san papa yo ak vèv yo. Pa

pwofite sou yo. Pa touye moun inonsan isit la. ⁴ Si tout bon vre nou fè jan m' mande nou fè la a, n'a toujou gen yonn nan moun fanmi David yo pou wa. Li menm ansanm ak chèf li yo ak tout pèp
 la va toujou antre soti nan pòtay palè a sou cha ak sou chwal yo. ⁵ Men, si nou pa koute m', m'ap
 fè nou sèman: palè sa a gen pou kraze. Se mwen menm Seyè a ki di sa. ⁶ Men sa Seyè a di sou kay
 wa peyi Jida a: -Pou mwen, palè a bèl tankou peyi Galarad, tankou tèt mòn peyi Liban yo. Men,
 mwen p'ap pè fè l' tounen yon dezè, yon lavil kote moun pa rete. ⁷ M'ap chwazi moun ak rach pou
 m' voye detwi nou. Yo pral koupe tout bèl bwa sèd nou yo, y'ap voye yo jete nan dife. ⁸ Apre sa,
 anpil moun lòt nasyon va pase bò lavil la. Yonn va mande lòt: Poukisa Seyè a fè gwo lavil sa a sa?
⁹ Lèfini y'a reponn: Se paske yo pa t' kenbe kontra Seyè Bondye yo a te siyen ak yo a. Y' al adore
 lòt bondye yo, yo fè sèvis pou yo. ¹⁰ ¶ Nou menm moun Jida, nou pa bezwen kriye pou wa Jozyas
 ki mouri a. Nou pa bezwen pran lapenn pou li. Kriye pito pou Chaloum, sa yo depòte a. Li menm,
 li p'ap janm tounen lakay li, li p'ap janm wè peyi kote l' te fèt la ankò. ¹¹ Paske men mesaj Seyè a
 bay sou Chaloum, pitit Jozyas, ki te vin wa peyi Jida nan plas papa l': Li pati kite isit la, li p'ap janm
 tounen. ¹² Paske kote yo depòte l' la, se la li pral mouri. Li p'ap janm wè peyi a ankò. ¹³ Madichon
 pou moun k'ap bati gwo kay avèk lajan lenjistis, k'ap mete chanmòt sou kay yo ak lajan yo fè nan
 move kondisyon. Y'ap fè jwif parèy yo travay gratis pou yo, yo pa peye yo lajan yo. ¹⁴ Madichon
 pou moun k'ap plede di: mwen pral bati yon gwo kay ak chanm byen laj nan chanmòt yo. Yo mete
 fennèt nan kay yo, yo palisade yo ak bwa sèd, yo pentire yo tou wouj. ¹⁵ Eske w'ap yon pi bon wa
 paske ou bati kay ou ak bwa sèd pou li pi bèl pase pa lòt moun? Papa ou te manje, li te bwè tankou
 tout moun. Men, li te fè sa ki dwat, li pa t' fè lenjistis. Tout zafè l' te mache byen. ¹⁶ Li te defann
 kòz pòv malere yo. Tout bagay te mache byen pou li. Se sa ki rele konnen Seyè a. ¹⁷ Men ou menm,
 yon sèl bagay ou wè, yon sèl bagay ou konnen, se enterè pa ou ase. Se konsa w'ap touye inonsan.
 W'ap maltrete pèp la, w'ap maspinen l'. Se Seyè a menm ki di sa. ¹⁸ Se konsa, men mesaj Seyè ki
 gen tout pouvwa a bay sou Jojakim, pitit Jozyas, wa peyi Jida a: -Lè l'a mouri, p'ap gen pesonn pou
 kenbe rèl la ak moun pa l' yo. P'ap gen pesonn pou kriye pou mèt yo, wa yo. ¹⁹ Y'ap antere l' tankou
 chen. Y'ap trennen kadav li, y'ap voye l' jete byen lwen lòt bò pòtay lavil Jerizalèm. ²⁰ ¶ Nou menm
 moun lavil Jerizalèm, ale nan peyi Liban, rele byen fò! Ale nan peyi Bazan, rele! Rete sou mòn
 Moab yo, rele! Paske yo kraze tout asosye nou yo. ²¹ Mwen menm, Seyè a, mwen te pale nou lè
 zafè nou t'ap mache byen. Men, nou te derefize koute m'. Se sa n'ap fè depi tout tan. Nou pa janm
 vle koute sa m'ap di nou. ²² Van pral bwote tout chèf nou yo ale. Y'ap depòte tout moun lòt nasyon

ki asosye nou yo. Lè sa a, nou pral bese tèt nou, nou pral wont pou tout mechanste nou te konn fè
²³ yo. Nou menm ki rete nan gwo kay nou bati ak sèd ki soti peyi Liban, ala plenn nou pral plenn
²⁴ lè malè va tonbe sou nou! Nou pral plenn tankou fanm ki gen tranche. Men sa Seyè a voye di
 Jekonya, pitit Jojakim, wa peyi Jida a: -Mwen fè sèman sou vi mwen, menm si ou te bag letanp ki
²⁵ nan men dwat mwen an, m'ap rache ou nan dwèt mwen. M'ap lage ou nan men moun ki soti pou
 touye ou yo, nan men moun ou pè yo. M'ap lage ou nan men Nèbikadneza, wa Babilòn lan, nan
²⁶ men moun Kalde yo. Mwen pral voye ni ou menm, ni manman ou ki fè ou la, nan peyi etranje.
²⁷ Nou pral nan yon peyi kote nou pa t' fèt. Se la ni ou menm ni li menm pral mouri. N'ap anvi
²⁸ tounen vin wè peyi sa a. Men, nou p'ap janm ka tounen. Moun yo rele Jekonya a, èske li tounen
 yon kannari kraze y'ap voye jete, yon kannari pesonn pa bezwen? Poukisa yo depòte ni li ni pitit
²⁹ li yo nan peyi yo pa t' janm konnen? O latè, latè, latè! Koute sa Seyè a di: ³⁰ Nonm sa a
 kondannen pou l' pèdi tout pitit li yo, pou l' pa janm wè zafè l' mache. P'ap janm gen yonn nan pitit
 li yo ki pou rive chita sou fotèy wa David la, ki pou rive chèf nan peyi Jida a ankò.

Chapter 23

¹ ¶ Madichon pou chèf sa yo ki tankou move gadò k'ap touye, k'ap gaye bann mouton m' mete
 sou kont yo a. Se Seyè a menm ki di sa. ² Se poutèt sa, men sa Seyè a, Bondye pèp Izrayèl la, di
 sou chèf li mete reskonsab pèp li a: Nou gaye tout mouton m' yo. Nou lage yo nan bwa, nou pa
³ okipe yo. Mwen pral regle nou pou tout mechanste nou yo. Se mwen menm, Seyè a, ki di sa. M'ap
 sanble sa ki rete nan pèp mwen an, m' pral pran yo nan tout peyi kote mwen te gaye yo a, m'ap fè
⁴ yo tounen lakay yo. Y'a fè anpil pitit, y'a peple. M'a mete lòt chèf ki va okipe yo. Pèp mwen an
 p'ap pè anyen ankò, yo p'ap viv ak kè sote ankò. Yonn ladan yo p'ap pèdi. Se mwen menm Seyè a
⁵ ki di sa. Seyè a di ankò: -Yon jou ap vini. Lè sa a, m'a chwazi yon moun ki dwat nan fanmi David
⁶ la pou wa. L'a gouvènen yo ak bon konprann. L'a fè sa ki dwat, l'a mete jistis nan tout peyi a. Sou
 rèy wa sa a, pèp Jida a va sove, pèp Izrayèl la va viv ak kè poze nan peyi l'. Y'a rele wa a: Seyè a,
⁷ Delivrans nou. Seyè a di ankò: Se poutèt sa yon jou va rive lè moun pèp Izrayèl yo p'ap di lè y'ap
⁸ fè sèman: Se nan non Seyè ki vivan an, li menm ki te fè nou soti kite peyi Lejip. Lè sa a y'a di:
 Se nan non Seyè ki vivan an, li menm ki te fè pitit pitit moun pèp Izrayèl yo soti kite peyi nan nò
⁹ a ak nan tout lòt peyi kote li te gaye yo pou yo vin rete nan peyi ki rele yo pa yo a. ¶ Mesaj sou

pwofèt yo: -Kè m' ap fann! M'ap tranble nan tout kò m'. Mwen tankou yon moun ki sou, yon moun
 ki bwè twòp. Se Seyè a ki lakòz sa avèk pawòl li yo ki pawòl Bondye tout bon. ¹⁰ Peyi a plen moun
 ki vire do bay Bondye. Madichon Bondye fè tout peyi a nan lapenn. Jaden zèb yo fin cheche. Tout
 moun deyò pou fè sa ki mal. Yo pran fòs kouraj yo pou fè sa ki pa dwat. ¹¹ Seyè a di ankò: -Pwofèt
 yo ansanm ak prèt yo, se yon bann moun ki pa konn Bondye. Mwen bare yo ap fè sa ki mal nan
 Tanp lan menm. ¹² Enben, chemen yo pran an pral tankou yon tè glise nan fènwa pou yo. Yo pral
 pèdi wout yo, yo pral tonbe. Mwen pral voye yon sèl malè sou yo lè lè a va rive pou m' pini yo. Se
 mwen menm, Seyè a, ki di sa. ¹³ Mwen wè pwofèt lavil Samari yo ap fè bagay ki pa fè m' plezi.
 Y'ap bay mesaj nan non Baal. Yo fè pèp mwen an, pèp Izrayèl la, pèdi chemen l'. ¹⁴ Men, sa m'
 wè pwofèt lavil Jerizalèm yo ap fè a ban m' degoutans. Y'ap sèvi lòt bondye sou mwen. Y'ap plede
 bay manti. Y'ap ede moun yo fè mechanste. Konsa, pesonn pa sispann fè sa ki mal. Pou mwen, yo
 tankou moun lavil Sodòm ak lavil Gomò yo. ¹⁵ Se poutèt sa, men sa Seyè ki gen tout pouvwa a di
 sou pwofèt yo: -Mwen pral ba yo zèb anmè pou yo manje. Mwen pral ba yo dlo pwazonnen pou
 yo bwè, paske pwofèt Jerizalèm yo lakòz tout moun nan peyi a lage kò yo nan fè sa ki mal. ¹⁶ Men
 sa Seyè a di moun Jerizalèm yo: -Pa koute sa pwofèt sa yo ap di nou lè y'ap ban nou mesaj. Se
 manti y'ap ban nou pou yo ka pran tèt nou. Se sa ki vin nan tèt yo y'ap di pèl la. Sa yo di a pa soti
 nan mwen. ¹⁷ Yo pale ak moun ki derefize koute m' yo, y'ap di yo: Tout bagay ap mache byen pou
 nou. Yo pale ak tout moun ki soti pou kenbe tèt avè m', y'ap di yo: Anyen p'ap rive nou! ¹⁸ Mwen
 di: Pa gen yonn ladan yo ki te la lè Seyè a t'ap fè plan travay li. Yo yonn pa t' wè, yo yonn pa t'
 tandè sa Seyè a te di. Yo yonn pa t' louvri zòrèy yo pou yo te koute sa li t'ap di. ¹⁹ Lè Bondye
 ankòlè se tankou yon van tanpèt, yon siklòn k'ap tonbe sou tèt mechan yo. ²⁰ Li p'ap sispann
 toutotan li pa fin fè tou sa li soti pou li fè a. Nan jou k'ap vini yo, pèp la va konprann sa pi byen.
²¹ Seyè a di ankò: Se pa mwen ki voye pwofèt sa yo. Men, y'ap kouri ale toupatou. Mwen pa menm
 pale ak yo. Men, y'ap mache pale nan non mwen. ²² Si yo te la lè m' t'ap fè plan travay mwen an,
 yo ta fè pèp la konnen mesaj mwen voye ba yo a, yo ta fè pèp la kite vye chemen y'ap swiv la, yo
 ta fè l' sispann fè sa ki mal. ²³ Seyè a di: Mwen se yon Bondye ki toupatou. Mwen pa rete yon sèl
 kote ase. ²⁴ Pa gen kote yon moun ka al kache pou m' pa wè l'. Nou pa konnen mwen toupatou nan
 syèl la ak sou latè a? Se Seyè a menm ki di sa. ²⁵ Mwen tandè tou sa pwofèt yo di lè yo pran non
 m' pou bay manti, lè yo pretann yo te fè vizyon nan rèv. ²⁶ Kilè y'a sispann, pwofèt sa yo k'ap bay
 manti, k'ap bay mesaj ki pa vre, k'ap twonpe pèp la ak pawòl manti ki nan bouch yo? ²⁷ Yo konprann

yo ka fè pèp la bliye m' ak bann rèv y'ap plede rakonte yo, menm jan zansèt yo te bliye m' pou y'
²⁸ al dèyè Baal? Lè yon pwofèt fè yon rèv, se pou l' di se yon rèv li fè. Men, pwofèt ki resevwa
 mesaj mwen, li fèt pou l' bay mesaj la jan l' ye a. Piga nou pran pay la pou grenn lan. Se Seyè a
²⁹ menm ki di sa. Mesaj mwen tankou dife, tankou mato k'ap kraze wòch an miyèt moso. Se mwen
³⁰ menm menm, Seyè a, ki di sa. Se poutèt sa mwen pral regle ak pwofèt yo k'ap pran pawòl yonn
³¹ nan bouch lòt, pou fè l' pase pou mesaj mwen. Mwen pral regle ak pwofèt sa yo k'ap bay pawòl
³² pa yo pou mesaj y'ap bay nan non mwen. Tande byen sa m'ap di: Mwen pral regle ak pwofèt sa
 yo k'ap rakonte rèv ki plen manti. Lè konsa, yo fè pèp mwen an pèdi tèt li ak manti y'ap ba li, ak
 bèl pawòl y'ap di pou tèt pa yo. Se pa mwen ki te voye yo. Se pa mwen ki te ba yo lòd ale. Yo pa
³³ ka fè anyen menm pou pèp la. Se mwen menm Seyè a ki pale. ¶ Seyè a di m': -Jeremi, lè yon
 moun nan pèp la, osinon yon pwofèt, ou ankò yon prèt mande ou ki chay Seyè a ban nou pote, w'a
 reponn yo: Se nou menm ki yon chay pou Seyè a. Li pral lage nou atè. Se Seyè a menm ki di sa.
³⁴ Lè yon moun nan pèp la, osinon yon pwofèt, ou ankò yon prèt va pale mal sou chay Seyè a bay
 pote a, m'ap pini l' ansanm ak tout fanmi li. ³⁵ Okontrè, chak moun gen pou mande zanmi yo ak
³⁶ fanmi yo kisa Seyè a reponn, kisa li di ki pral rive. Konsa, pigas nou pale sou chay Seyè a bay
 ankò paske m'ap fè mesaj mwen an tounen yon chay tout bon pou nou. Nou pran pawòl Bondye
³⁷ vivan an, pawòl Seyè ki gen tout pouvwa a, pawòl Bondye nou an, nou vire l' lanvè. Jeremi,
³⁸ mande pwofèt yo ki repons Seyè a bay? Kisa Seyè a di ki pral rive? Si yo reponn: Men chay
 Seyè a bay, lè sa a w'a di yo, men sa Seyè a di: Paske nou di: Men chay Seyè a bay, atout mwen te
³⁹ ban nou lòd pa di sa, m'ap pran nou leve anlè, m'ap voye nou jete byen lwen mwen, ni nou, ni
⁴⁰ lavil mwen te bay pou nou ansanm ak pou zansèt nou yo. M'ap fè nou wont yon wont ki p'ap
 janm fini, yon wont moun p'ap janm bliye.

Chapter 24

¹ ¶ Seyè a fè m' wè de panyen plen fig Frans kòtakòt devan gwo kay Seyè a. Lè sa a, Nèbikadneza,
 wa peyi Babilòn lan, te gen tan depòte Jekonya, pitit Jojakim, wa peyi Jida a, ansanm ak tout gwo
 chèf peyi Jida yo, bòs atizan yo ak tout moun ki gen metye yo. Li te mennen yo tout ale lavil
² Babilòn. Premye panyen an te plen bèl fig Frans tankou premye fig ki mi nan sezon an. Lòt panyen
³ an te plen vye fig Frans moun pa ka manje tank yo pa bon. Lèfini, Seyè a di m' konsa: -Jeremi,

kisa ou wè la a? Mwen reponn, mwen di l': -Fig frans. Bon fig yo bon anpil. Vye fig yo pa bon menm. Moun pa ka manje yo tank yo pa bon. ⁴ Lè sa a, Seyè a pale avè m' ankò, li di m' konsa: ⁵ -Se mwen menm, Seyè a, Bondye pèp Izrayèl la k'ap pale. Mwen konsidere moun peyi Jida yo depòte yo, moun mwen voye nan peyi Babilòn yo, tankou yon panyen bèl fig frans. Mwen pral aji byen ak yo. ⁶ M'ap toujou voye je sou yo, m'ap mennen yo tounen nan peyi sa a. M'ap fè yo grandi, mwen p'ap kraze yo. M'ap plante yo, mwen p'ap derasinen yo ankò. ⁷ M'ap ba yo konprann pou yo sa konnen se mwen menm ki Seyè a. Lè sa a, y'a yon pèp pou mwen, mwen menm m'a Bondye yo, paske y'ap tounen vin jwenn mwen ak tout kè yo. ⁸ Menm sa yo fè ak vye fig ki pa bon yo, fig moun pa ka manje tèlman yo pa bon yo, se sa mwen pral fè ak Sedesyas, wa peyi Jida a, ansanm ak tout gwo chèf li yo, ak tout rèz pèp lavil Jerizalèm yo ki te rete nan peyi a osinon ki te desann ⁹ peyi Lejip. Mwen pral mennen yon sèl malè sou yo. Tout lòt nasyon ki sou latè a pral tranble lè y'a wè sa. Moun pral pase yo nan betiz, yo pral rakonte istwa sou yo. Yo pral mete yo nan chante. Y'ap pran non yo pou sèvi jouman, pou bay madichon nan tout peyi kote mwen pral gaye yo. ¹⁰ Mwen pral voye lagè, grangou ak move maladi sou yo jouk p'ap gen yonn k'ap rete nan peyi mwen te ba yo a, peyi mwen te bay zansèt yo a.

Chapter 25

¹ ¶ Seyè a te bay Jeremi yon mesaj sou pèp peyi Jida a, nan katriyèm lanne rèy wa Jojakim, pitit Jozyas, nan peyi Jida. Lè sa a, Nèbikadneza te nan premye lanne li depi li te wa peyi Babilòn. ² Men mesaj pwofèt Jeremi te bay tout pèp peyi Jida a ak tout moun lavil Jerizalèm yo: ³ -Depi trèzyèm lanne rèy wa Jozyas, pitit Amon, nan peyi Jida rive jòdi a, sa fè venntwazan depi Seyè a ap pale avè m', venntwazan depi m'ap pale ak nou san rete, nou pa vle koute m'. ⁴ Seyè a pa janm sispann voye pwofèt li yo, sèvitè l' yo, ban nou. Men nou pa vle koute yo, nou derefize louvri zòrèy nou pou nou tande yo. ⁵ Yo te di nou pou nou manyè kite vye chemen nou t'ap swiv yo, pou nou manyè sispann fè sa ki mal. Konsa, nou ta ka viv toujou nan peyi Seyè a te ban nou an, peyi li te bay zansèt nou yo pou tout tan tout an. ⁶ Pwofèt yo di nou: Pa kouri dèyè lòt bondye, pa fè sèvis pou yo, pa mete ajenou devan yo. Pa sèvi zidòl nou fè ak men nou pou Seyè a pa fache. Konsa, ⁷ si nou obeyi Seyè a li p'ap pini nou. Men, se Seyè a menm ki di sa, nou derefize koute l'. Nou fè l' fache ak zidòl nou fè ak men nou. Se konsa nou rale malè sou tèt nou. ⁸ ¶ Se poutèt sa, men sa ⁹ Seyè ki gen tout pouvwa a di: Paske nou pa koute m' lè m' pale nou, mwen pral voye chache tout

moun ki bò nò yo ansanm ak sèvitè m' lan, Nèbikadneza, wa Babilòn lan. Se mwen menm Seyè a ki di sa. Mwen pral fè yo vin kraze peyi Jida a ak tout moun ki rete ladan l' yo ansanm ak tout peyi nan vwazinaj yo. Mwen pral detwi yo tout. M'ap fè yo tounen yon dezè ki va fè moun sezi, yon pil

¹⁰ mazi pou tout tan. M'ap fè yo p'ap tande moun ap pran plezi yo la. Yo p'ap tande vwa moun ki gen kè kontan. Yo p'ap tande yo fè fèt pou moun k'ap marye. M'ap fè p'ap gen grenn pou moulen,

¹¹ p'ap gen lwil pou mete nan lanp. Tout peyi a pral kraze tounen mazi, yon dezè. Nasyon ki nan

¹² vwazinaj yo pral sèvi wa Babilòn lan pandan swasanndizan. Apre swasanndizan sa yo, m'a pini wa Babilòn lan ansanm ak pèp li a pou peche yo fè. Se mwen menm Seyè a ki di sa. M'ap detwi

¹³ peyi moun Kalde yo, m'ap fè l' tounen mazi pou tout tan. M'ap voye sou peyi Babilòn lan tout malè mwen te di m'ap voye yo, tou sa pwofèt Jeremi te fè konnen nan non mwen sou nasyon yo,

¹⁴ jan sa ekri nan liv sa a. Yo menm tou moun Babilòn yo, anpil lòt nasyon ak gran wa va fè yo

¹⁵ tounen esklav. M'ap fè yo peye pou tou sa yo fè. ¶ Men sa Seyè a, Bondye pèp Izrayèl la, di m': -Men yon gode plen diven kòlè Bondye nan men m'. Pran li, pote l' bay tout moun nan peyi kote

¹⁶ m'ap voye ou yo pou yo bwè. Y'a bwè, pye yo ap trese, y'a pèdi tèt yo lè y'a wè lagè m'ap voye

¹⁷ nan mitan yo. Se konsa, mwen pran gode a nan men Seyè a, mwen pote l' bay tout moun nan

¹⁸ tout peyi kote Seyè a te voye m' lan, mwen fè yo bwè ladan l'. Mwen fè moun lavil Jerizalèm ak moun lavil Jida yo bwè ladan l' ansanm ak wa yo, chèf yo, pou lavil yo ka tounen mazi, yon dezè pou moun mete men nan tèt lè yo wè sa, pou moun sèvi ak non yo pou bay madichon, jan y'ap

¹⁹ fè l' jouk koulye a. Men moun mwen fè bwè nan gode a tou: Farawon an, wa peyi Lejip la,

²⁰ ansanm ak sòlda li yo, chèf li yo ak tout pèp li a, tout ras moun ki rete bò solèy kouche yo ansanm ak tout wa peyi Ouz yo, tout wa nan peyi Filisti yo: wa lavil Askalon, wa lavil Gaza, wa lavil

²¹ Ekwon, wa ki rete nan lavil Asdòd, moun peyi Edon, moun peyi Moab ak moun Amon yo,

²² tout wa peyi Tir yo, wa peyi Sidon ak wa tout peyi ki lòt bò lanmè Mediterane a,

²³ moun lavil Dedan, moun lavil Teman ak moun lavil Bouz, ansanm ak tout moun ki koupe cheve nan tèt yo

²⁴ kout, tout wa peyi Arabi yo, tout wa ki rete nan dezè bò solèy kouche a,

²⁵ tout wa Zimri yo,

²⁶ tout wa Elam yo ak tout wa Medi yo, tout wa ki sou bò nò yo, sa ki lwen yo ak sa ki pre yo, yonn apre lòt. Tout nasyon ki sou latè gen pou bwè ladan l'. Apre yo tout, se va tou pa wa lavil

²⁷ Babilòn lan pou l' bwè ladan l' tou. Apre sa, Seyè a di m' konsa: W'a di yo men lòd Seyè ki gen tout pouvwa a, Bondye pèp Izrayèl la bay. Se pou yo bwè pou yo sou, jouk yo vonmi. Y'a tonbe,

²⁸ yo p'ap ka leve lè y'a wè lagè m'ap voye sou yo a. Si yo ta rive refize pran gode a nan men ou

29
 pou yo pa bwè ladan l', w'a di yo: Seyè ki gen tout pouvwa a di wè pa wè se pou yo bwè l'. Premye kote m'ap konmanse fè malè, se va lavil yo mete apa pou mwen an. Atò, se nou menm ki pou pa ta resevwa pinisyon nou? Non, nou p'ap chape, paske mwen pral voye lagè sou tout moun sou latè.

30
 Se mwen menm, Seyè ki gen tout pouvwa a, ki di sa. ¶ Ou menm, Jeremi, se pou ou fè yo konnen tou sa mwen di ou. W'a di yo: -Seyè a rete anwo nan syèl la, l'ap gwonde. Li rete nan kay ki apa pou li a, l'ap pale byen fò. L'ap gwonde anwo pèp li a. L'ap rele tankou moun k'ap kraze rezen. Li

31
 move sou tout moun ki rete sou latè. Bri a rive nan zòrèy moun toupatou sou latè. Seyè a gen yon kont pou l' regle ak nasyon yo. Li rele yo tout nan tribinal. L'ap fè touye tout moun ki antò. Se

32
 Seyè a menm ki di sa. Seyè ki gen tout pouvwa a di: -Malè a pral tonbe sou nasyon yo yonn

33
 apre lòt, yon gwo van tanpèt ap moute soti nan bout latè. Jou sa a, depi yon bout latè rive lòt bout la, se va kadav moun Seyè a pral touye. P'ap gen pesonn pou kriye pou yo, pesonn pou ranmase

34
 yo atè a, pesonn pou antere yo. Kadav yo va tounen fimye atè a. Nou menm chèf ki responsab pèp la, rele anmwe, woule kò nou atè. Lè a rive pou yo koupe tèt nou. Yo pral gaye nou. Nou pral

35
 tonbe atè. Nou pral kraze tankou bèl potich ki koute chè. P'ap gen kote pou chèf yo al kache.

36
 P'ap gen kote pou moun ki responsab pran swen pèp la ka ale pou yo jwenn pwoteksyon. Y'ap

37
 tande chèf yo ap rele, y'ap tande yo ap rele anmwe, paske Seyè a pral ravaje peyi yo. Tout bèl

38
 peyi yo pral tounen mazi, paske Seyè a move anpil. Tankou yon lyon ki kouri kite twou li, tout moun ap mete deyò. Peyi a pral tounen yon dezè apre lagè san manman sa a, apre gwo kòlè Seyè a.

Chapter 26

1
 ¶ Lè sa a, Jojakim, pitit Jozyas la, te fèk moute wa nan peyi Jida. Seyè a pale ak Jeremi ankò.

2
 Men sa Seyè a di l': -Ale kanpe nan lakou tanp lan. Ou pral di tou sa mwen te ba ou lòd di sou

3
 moun ki soti nan tout lavil peyi Jida yo pou vin adore nan Kay Seyè a. Pa wete anyen. Ou pa janm konnen, yo ka koute ou, yo ka pran desizyon yonn apre lòt pou yo kite move jan y'ap viv la. Mwen fè lide voye malè sou yo pou tou sa yo te fè ki mal. Men, si yo koute ou, m'a chanje lide.

4
 Konsa, w'a di yo: Men mesaj Seyè a bay: Koute m', swiv lòd mwen mete devan nou. 5 Louvri zòrèy nou tande mesaj pwofèt yo, sèvitè m' yo. Se mwen menm ki pa janm sispann voye yo ban

6
 nou, men nou pa vle koute yo. Si nou pa koute yo, m'ap kraze tanp sa a menm jan mwen te detwi kote yo te mete apa pou mwen lavil Silo a. Nan tout lòt nasyon ki sou latè, y'a pran non lavil sa a

pou bay madichon. ⁷ ¶ Prèt yo, pwofèt yo ansanm ak tout moun ki te la yo tandè Jeremi ap bay
 mesaj sa a nan lakou Tanp lan. ⁸ Fini Jeremi fin bay mesaj Seyè a te ba li lòd bay pèp la, prèt yo,
 pwofèt yo ansanm ak tout moun ki te la yo mete men sou li. Yo pran rele: -Se pou yo touye ou pou
 sa ou sot di la a! ⁹ Poukisa ou pran non Seyè a pou ou di li pral kraze tanp sa a menm jan li te detwi
 kote yo te mete apa pou li lavil Silo a, li pral fè lavil la tounen mazi, san pesonn ladan l'? Tout pèp
 la sanble bò kot Jeremi nan Tanp Seyè a. ¹⁰ Lè chèf Jida yo vin konnen sa ki t'ap pase, yo kite palè
 wa a, yo kouri al nan tanp lan, y' al chita nan plas yo bò Pòtay Nèf la. ¹¹ Prèt yo ak pwofèt yo pale
 ak chèf yo ansanm ak pèp la, yo di: -Nonm sa a merite pou yo touye l' paske li pale lavil Jerizalèm
 lan mal. Nou tout la a, nou tandè l' ak pwòp zòrèy nou. ¹² Lè sa a, Jeremi pale ak tout gwo chèf
 yo ansanm ak pèp la. Li di: -Se Seyè a ki voye m' pou m' fè nou konnen tou sa nou sot tandè m' di
 la a sou Tanp lan ak sou lavil la. ¹³ Koulye a, se pou nou chanje jan n'ap viv la, sispann fè sa ki
 mal. Koute sa Seyè a, Bondye nou an, ap di nou. Lè sa a, l'a chanje lide, li p'ap voye malè li te di
 l'ap voye sou nou an. ¹⁴ Mwen menm, mwen nan men nou. Fè sa nou vle avè m', sa nou kwè nou
 dwe fè a. ¹⁵ Tansèlman, si nou touye m', konnen se lanmò yon inonsan n'ap gen ni sou konsyans
 nou, ni sou konsyans moun ki rete nan lavil la. Paske, sa m'ap di nou la a, se vre wi, se Seyè a menm
 ki voye m' pou m' fè nou tandè tout pawòl sa yo. ¹⁶ ¶ Lè sa a, gwo chèf yo ak tout pèp la pale ak
 prèt yo ansanm ak pwofèt yo. Yo di yo: -Pa gen anyen la a pou n' touye nonm sa a. Paske se nan
 non Seyè a, Bondye nou an, li pale ak nou. ¹⁷ Apre sa, kèk chèf fanmi kanpe epi yo di moun ki te
 sanble yo: ¹⁸ -Sou rèy Ezekyas, wa peyi Jida a, pwofèt Miche, moun lavil Morechèt la, te bay tout
 pèp peyi Jida a mesaj sa a: Men sa Seyè ki gen tout pouvwa a di: N'ap lakòz peyi Siyon an pral
 tankou yon jaden y'ap raboure. Jerizalèm ap tounen yon mazi. Gwo rakbwa pral kouvri tout mòn
 kote tanp lan ye a. ¹⁹ Lè sa a, èske wa Ezekyas ak pèp peyi Jida a te fè touye pwofèt Miche? Non,
 yo fè wè jan yo te gen krentif Seyè a, yo mande l' pou l' gen pitye pou yo. Se konsa Seyè a chanje
 lide, li pa voye malè li te di l'ap voye sou yo a. Koulye a, nou soti pou nou rale yon gwo malè sou
 nou si nou fè nonm sa a anyen. ²⁰ Te gen yon lòt nonm yo te rele Ouri ki t'ap pale nan non Bondye.
 Se te pitit Chemaya, moun lavil Kiriyyat Jearim. Li menm tou, tankou Jeremi, li t'ap pale nan non
 Bondye sou lavil Jerizalèm ak sou peyi Jida. ²¹ Lè wa Jojakim, gad li yo ansanm ak tout chèf li yo
 tandè sa li t'ap di, wa a t'ap chache yon jan pou touye li. Ouri vin konn sa, li pè, li kouri al cache
 nan peyi Lejip. ²² Se konsa, wa Jojakim voye Elnatan, pitit Akbò, ansanm ak kèk lòt gason nan
 peyi Lejip al cache msye. ²³ Yo pran Ouri nan peyi Lejip, yo mennen l' bay wa a. Wa a fè yo

24
 touye l'. Lèfini, yo jete kadav li nan gwo fòs endijan yo. Men, Akikam, pitit Chafan an, t'ap pwoteje Jeremi. Se konsa li pa t' kite yo lage Jeremi nan men pèp la pou yo te touye l'.

Chapter 27

1 ¶ Sedesyas, pitit Jozyas la, te gen katran depi li fèk moute wa nan peyi Jida, lè Seyè a pale ak
 Jeremi ankò. 2 Seyè a di l' konsa: -Pran kòd ak bwa yo sèvi pou fè jouk bèf. Mete yo sou zepòl ou.
 3 Lèfini, w'a voye yo bay wa peyi Edon, wa peyi Moab, wa peyi Amon, wa peyi Tir ak wa peyi
 Sidon. W'a renmèt yo nan men delege wa sa yo ki te vin wè wa Sedesyas lavil Jerizalèm. 4 W'a ba
 yo chak yon misyon pou mèt yo. W'a di yo men mesaj Seyè ki gen tout pouvwa a, Bondye pèp
 Izrayèl la, ba yo pou mèt yo: 5 -Se mwen menm avèk gwo kouraj mwen epi ak fòs ponyèt mwen
 ki fè latè ansanm ak tout moun ak tout bèt k'ap viv sou latè. Mwen pran yo bay moun mwen vle.
 6 Se konsa, mwen lage tout peyi nou yo nan men Nèbikadneza, wa Babilòn, sèvitè m' lan. Mwen
 ba li ata bèt nan bwa yo pou yo soumèt devan l'. 7 Tout nasyon yo va sèvi l'. Y'a sèvi pitit li ak pitit
 pitit li jouk lè a va rive pou lòt nasyon ki pi fò pase l' yo, lòt wa ki pi gran pase l' yo va fè peyi pa
 l' la sèvi yo tou. 8 Men si yon nasyon osinon yon wa ak tout pèp li derefize soumèt devan
 Nèbikadneza, wa Babilòn lan, si yonn ladan yo refize bese tèt devan otorite li pou obeyi l', m'ap
 voye lagè, grangou, move maladi sou nasyon sa a pou pini l' jouk m'a fè Nèbikadneza fini nèt ak
 9 li. Pa koute pwofèt nou yo, ni divinò nou yo, ni ankenn lòt moun ki pretann yo konnen sa ki pral
 rive nou, paske yo fè rèv pou nou, osinon paske yo ka li sa k'ap pase nan syèl la ou ankò paske yo
 konn fè maji. Yo tout ap plede di nou p'ap janm sèvi wa Babilòn lan. 10 Se manti y'ap ban nou. Si
 nou koute yo, y'ap depòte nou byen lwen peyi nou an. Se mwen menm k'ap mete nou deyò. Lèfini,
 11 nou tout pral mouri. Men, si yon nasyon asepte bese tèt li devan otorite wa Babilòn lan pou sèvi
 l', m'a kite l' nan peyi l', l'a travay latè, l'a rete lakay li. Se mwen menm Seyè a ki di sa. 12 ¶ Mwen
 pale ak Sedesyas, wa Jida a, mwen di l' menm bagay la tou: -Ou menm ansanm ak pèp la, se pou
 13 nou bese tèt devan otorite wa Babilòn lan. Se pou nou sèvi ni li ni pèp li a, konsa n'a viv. Pa gen
 rezon pou nou mouri, ou menm ak tout pèp ou a, nan lagè, nan grangou, anba move maladi. Paske
 14 se sa Seyè a te di ki gen pou rive tout nasyon ki va derefize soumèt devan wa Babilòn lan. Gen
 yon bann pwofèt k'ap plede di nou p'ap janm sèvi wa Babilòn lan. Pa koute yo. Se manti y'ap bay.
 15 Se Seyè a menm ki di se pa li menm ki voye yo. Yo pran non l' pou ban nou manti. Si nou koute

yo, m'ap mete nou deyò, m'ap fè nou mouri, ni nou ni pwofèt k'ap ban nou manti yo. ¹⁶ Apre sa, mwen pale ak prèt yo ansanm ak pèp la, mwen di yo: -Men mesaj Seyè a bay. Pa koute pwofèt yo k'ap plede di nou yo pral pote tounen soti lavil Babilòn tout bagay yo te pran nan tanp lan. Se manti ¹⁷ y'ap bay. Pa koute yo. Soumèt devan wa Babilòn lan, konsa n'a viv. Pa gen rezon pou nou fè ¹⁸ lavil Jerizalèm lan tounen mazi. Si yo se pwofèt tout bon, si yo resevwa yon mesaj nan men Seyè a tout bon vre, enben, se pou y' al mande Seyè ki gen tout pouvwa a pou li pa kite yo pran rès bon bagay ki nan Tanp lan, ak rès bon bagay ki lakay wa peyi Jida a ak nan lavil Jerizalèm lan pou ¹⁹ pote yo ale lavil Babilòn. Seyè a t'ap pale sou gwo poto kwiv yo, sou gwo basen lan ansanm ak ²⁰ pye l' yo, sou tout lòt richès ki te nan lavil la toujou. Se bagay sa yo Nèbikadneza, wa Babilòn lan, te kite lavil Jerizalèm lè li t'ap depòte Jekonya, pitit Jojakim, wa peyi Jida a, lavil Babilòn, ²¹ ansanm ak grannèg peyi Jida yo ak grannèg lavil Jerizalèm yo. Wi, men sa Seyè ki gen tout pouvwa a, Bondye pèp Izrayèl la, te di sou rès bon bagay ki te nan kay Seyè a, nan kay wa Jida a ²² ak nan lavil Jerizalèm: Y'ap pote yo ale lavil Babilòn. Y'ap rete la jouk lè m'a vin pran yo pou m' fè yo tounen nan plas yo. Se mwen menm Seyè a ki di sa.

Chapter 28

¹ ¶ Nan menm lanne a, nan katriyèm lanne rèy Sedesyas, wa peyi Jida a, nan senkyèm mwa a, pwofèt Ananya, pitit Azou, moun lavil Gabawon, vin pale avè m' nan tanp Seyè a. Devan tout prèt ² yo ansanm ak pèp la, li di mwen: -Men mesaj Seyè ki gen tout pouvwa a, Bondye pèp Izrayèl la, ³ bay: Mwen kraze pouvwa wa Babilòn lan. Nan dezan, jou pou jou, m'ap pote tout bagay ki te nan tanp Seyè a tounen nan plas yo. Wi, tou sa wa Nèbikadneza te pran nan tanp lan pou l' te pote ⁴ ale lavil Babilòn, m'ap fè yo tounen nan plas yo. M'ap fè Jekonya, pitit Jojakim, wa peyi Jida a, ansanm ak tout moun peyi Jida yo te depòte lavil Babilòn yo tounen isit. Se mwen menm Seyè a ⁵ ki di sa. Wi, mwen pral kraze pouvwa wa Babilòn ki t'ap peze nou an. Lè sa a, devan tout prèt ⁶ yo ansanm ak foul moun ki te nan kay Seyè a, pwofèt Jeremi reponn pwofèt Ananya. Li di konsa: -Dakò! Se pou Seyè a fè sa vre! Se pou li fè sa ou di a rive vre, pou l' fè tout bagay ki te nan Tanp ⁷ Seyè a ansanm ak moun yo te depòte yo tounen soti lavil Babilòn. Tansèlman, koute byen sa ⁸ m'ap di ou, ou menm ansanm ak pèp la: Pwofèt ki te vini anvan m' yo ak anvan ou tou te fè konnen lagè, grangou ak move maladi pral tonbe sou anpil gwo peyi, sou anpil gran wa ak tout pèp yo.

⁹ Men, lè yon pwofèt di tout bagay pral mache byen, se lè sa li di ki gen pou rive a rive vre y'a
 rekonèt se Seyè a ki te voye l'. ¹⁰ ¶ Lè sa a, pwofèt Ananya pran jouk bèf ki te sou zepòl Jeremi
¹¹ an, li kraze l' an miyèt moso. Apre sa, li pran pale ankò devan tout pèp la. Li di konsa: -Men
 mesaj Seyè a: Nan dezan, jou pou jou, se konsa mwen pral kraze pouvwa Nèbikadneza, wa Babilòn
 lan. Mwen pral kraze jouk bèf li te mete sou zepòl tout nasyon yo. Apre sa, pwofèt Jeremi al fè
¹² wout li. Kèk tan apre pwofèt Ananya te kraze jouk bèf ki te sou zepòl pwofèt Jeremi an, Seyè
¹³ a pale ak Jeremi, li di l' konsa: -Ale pale ak Ananya. W'a di l' men sa Seyè a voye di ou: Ou te
¹⁴ kraze yon jouk bèf fèt an bwa. Ou pral ranplase l' ak yon jouk bèf fèt an fè. Paske men sa Seyè
 ki gen tout pouvwa a, Bondye pèp Izrayèl la di: M'ap mete yon jouk fè sou zepòl tout nasyon sa
¹⁵ yo pou yo sèvi Nèbikadneza, wa Babilòn lan. Ata bèt nan bwa va soumèt devan l'. Apre sa,
 pwofèt Jeremi di pwofèt Ananya konsa: -Koute byen, Ananya! Se pa Seyè a ki te voye ou di sa,
¹⁶ tandè. Ou twonpe konfyans pèp la. Se sa ki fè men sa Seyè a di: Li pral disparèt ou sou latè.
¹⁷ Anvan lanne an bout, w'ap mouri, paske ou pouse pèp la pou l' te kenbe tèt ak Seyè a! Menm
 lanne an vre, nan setyèm mwa a, pwofèt Ananya mouri.

Chapter 29

¹ ¶ Pwofèt Jeremi rete lavil Jerizalèm li voye yon lèt bay tout moun Nèbikadneza te depòte soti
 lavil Jerizalèm ale lavil Babilòn, ki vle di bay chèf fanmi, prèt, pwofèt ak tout rès pèp lavil Jerizalèm
² wa a te fè depòte. Se te apre yo te fin pran wa Jekonya, manman li, gwo zotobre nan palè a, chèf
³ peyi Jida ak chèf lavil Jerizalèm yo, atizan yo, bòs fòjon yo pou depòte yo. Jeremi renmèt lèt la
 nan men de moun Sedesyas, wa peyi Jida a, t'ap voye bò kote Nèbikadneza, wa Babilòn lan. Se te
⁴ Elasa, pitit Chafan ak Gemarya, pitit Ilkija. Jeremi voye di yo nan lèt la: -Men mesaj Seyè ki gen
 tout pouvwa a, Bondye pèp Izrayèl la, voye pou tout moun li te fè yo pran lavil Jerizalèm pou
⁵ depòte jouk lavil Babilòn. Nou mèt bati kay pou nou rete, nou mèt plante jaden pou nou manje.
⁶ Marye, fè pitit. Marye pitit gason nou yo, marye pitit fi nou yo pou yo ka fè pitit. Kote nou ye
⁷ laba a, peple. Pa kite nou fin mouri. Travay pou fè peyi kote Seyè a fè yo depòte nou an wè zafè
⁸ l' mache byen. Lapriyè Seyè a pou yo. Paske, si sa bon pou yo la bon pou nou tou. ¶ Wi, men
 avètisman Seyè ki gen tout pouvwa a, Bondye pèp Izrayèl la, voye ban nou: Pa kite pwofèt ki nan

mitan nou yo ak divinò yo ban nou manti! Pa koute moun k'ap rakonte rèv yo fè. ⁹ Se pou yo ka
 twonpe nou pi byen kifè yo pran non m' mete devan. Se pa mwen ki voye yo. Se mwen menm Seyè
 a ki di sa. ¹⁰ Seyè a di ankò: Lè lavil Babilòn lan va rive sou swasanndizan depi li kanpe a, m'a
 vin vizite nou, m'a fè kichòy pou nou. M'a kenbe bèl pwomès mwen te fè nou an, m'a fè nou tounen
 lakay nou ankò. ¹¹ Se mwen ki konnen sa m' gen nan tèt mwen pou nou. Se mwen menm Seyè a
 k'ap pale. Se byen nou mwen ta vle wè, pa malè nou. Mwen ta vle denmen nou jwenn sa n'ap tann
 lan. ¹² Lè sa a, n'a rele m', n'a vin lapriyè nan pye m', m'a reponn nou. ¹³ N'a chache m', n'a jwenn
 mwen paske n'a chache m' ak tout kè nou. ¹⁴ Wi, m'a kite nou jwenn mwen. Se mwen menm ki di
 sa. M'a fè peyi nou an kanpe ankò. M'ap pase men m' ranmase nou nan tout peyi toupatou kote m'
 te gaye nou yo. M'ap mennen nou tounen kote m' te pran nou pou m' te depòte nou an. Se mwen
 menm Seyè a ki di sa. ¹⁵ ¶ Seyè a voye di nou sa paske nou pretann di li voye pwofèt ban nou lavil
 Babilòn. ¹⁶ Enben, men sa Seyè a di sou wa ki chita sou fotèy wa David la, sou pèp lavil Jerizalèm
 la, ki vle di rès fanmi yo pa t' depòte ansanm ak nou yo. ¹⁷ Wi. Men sa Seyè ki gen tout pouvwa
 a di: Mwen pral voye lagè, grangou ak move maladi sou yo. M'ap fè yo tounen tankou vye fig pouri
 moun pa ka manje. ¹⁸ M'ap rete la dèyè yo ak lagè, grangou, move maladi. Tout nasyon sou latè
 pral sezi lè y'a wè sa ki rive yo. Nan tout peyi kote mwen pral gaye yo, moun pral fè sezisman, y'ap
 mete men nan tèt lè y'a wè yo. Y'a pran non yo pou sèvi jouman, pou bay moun madichon. ¹⁹ Tou
 sa va rive yo paske yo pa t' vle koute sa m' t'ap di yo. Se Seyè a menm ki di sa. Malgre mwen pa t'
 sispann voye pwofèt yo, sèvitè m' yo, ba yo, yo pa janm vle koute. ²⁰ Men, nou menm Seyè a te
 pran lavil Jerizalèm pou l' depòte lavil Babilòn, manyè koute sa Seyè a ap di nou! ²¹ Men mesaj
 Seyè ki gen tout pouvwa a, Bondye pèp Izrayèl la, bay sou Akab, pitit Kolaja, ansanm ak Sedesyas,
 pitit Maseja, ki t'ap pran non Seyè a pou bay manti. Mwen pral lage yo nan men Nèbikadneza, wa
 Babilòn lan, ki pral fè touye yo la devan nou tout. ²² Apre sa, lè moun peyi Jida yo te depòte lavil
 Babilòn yo va bezwen bay moun madichon y'a sèvi ak non mesye sa yo. Y'a di: Se pou Seyè a fè
 ou sa l' te fè Sedesyas ansanm ak Akab wa Babilòn lan te fè boule tou vivan. ²³ Se sa k'ap rive yo,
 paske yo te yon gwo wont pou pèp Izrayèl la. Yo fè adiltè ak madanm jwif parèy yo, lèfini y'ap
 pran non mwen pou bay manti, pou bay mesaj mwen pa t' mete nan bouch yo. Mwen konnen sa yo
 fè, mwen te wè yo ak je m'. Se Seyè a menm ki di sa. ²⁴ ¶ Seyè a te bay pwofèt Jeremi yon mesaj
 pou Chemaja, moun Nekelam, ²⁵ paske Chemaja te pran reskonsablite voye yon lèt bay yon prèt
 yo te rele Sefanya, pitit Maseja, pou tout lòt prèt yo ansanm ak tout moun lavil Jerizalèm yo.
 Chemaja te voye di yo: ²⁶ -Seyè a te fè ou prèt nan plas Jeojada pou veye sa k'ap pase nan tanp

lan. Se devwa ou pou ou pran tout moun fou k'ap pran pòz pwofèt yo pou mete yo nan chenn ak yon kolye fè nan kou yo. ²⁷ Poukisa ou pa fè anyen ak Jeremi, nonm Anatòt la, k'ap pran pòz pwofèt li nan mitan pèp la? ²⁸ Men koulye a li ekri nou isit lavil Babilòn, li voye di nou n'ap rete lontan nan sitiyasyon sa a. Nou mèt bati kay pou nou rete, nou mèt plante jaden pou nou ka manje. ²⁹ Sefanya, prèt la, te li lèt la bay pwofèt Jeremi. ³⁰ Lè sa a, Seyè a bay Jeremi lòd sa a: ³¹ -Voye mesaj sa a bay tout moun yo depòte lavil Babilòn yo. Men sa Seyè a di sou Chemaja, moun Nekelam. ³² Chemaja pran pòz pwofèt li, men se pa mwen ki voye l'. Li fè nou bwè yon bann manti. Se poutèt sa, mwen menm Seyè a, mwen pral pini Chemaya ansanm ak tout kòt fanmi li. Mwen p'ap kite yon moun nan fanmi li vivan nan mitan nou pou wè bèl bagay mwen pral fè pou pèp mwen an, paske li te moute tèt pèp la kont Bondye, Seyè a.

Chapter 30

¹ ¶ Men mesaj Seyè a te bay pwofèt Jeremi: ² -Se mwen menm Seyè a, Bondye pèp Izrayèl la, k'ap pale avè ou. Ekri nan yon liv tou sa mwen te di ou. ³ Paske, talè konsa mwen pral fè pèp mwen an, moun Izrayèl yo ansanm ak moun Jida yo kanpe ankò. M'ap mennen yo tounen nan peyi mwen te bay zansèt yo, y'a reprann peyi a pou yo ankò. ⁴ Men mesaj Seyè a voye bay moun Izrayèl yo ansanm ak moun Jida yo. ⁵ Mwen tandè moun ap rele anmwe. Tout moun tèt anba, yo pa konn sa pou yo fè. ⁶ Mande sa ki genyen! Al gade non! Eske gason konn pouse pitit? Poukisa mwen wè tout gason men anba tivant tankou fanm ki gen tranche? Y'ap dekonpoze, figi yo rale. ⁷ Ala malè, mezanmi! Se yon gwo jou malè k'ap vini. Pa gen jou ki ka parèt devan li. Se va yon tan lafliksyon pou fanmi Jakòb la! Men, y'a chape anba l'. ⁸ Seyè ki gen tout pouvwa a di ankò: Lè jou sa a va vini, m'a kraze jouk bèf ki dèyè kou yo a, m'a kase chenn ki nan ren yo a. Yo p'ap janm esklav moun lòt nasyon ankò. ⁹ Se mwen menm, Seyè a, Bondye yo a, y'a sèvi ansanm ak yon pitit David m'a mete wa sou yo. ¹⁰ ¶ Nou pa bezwen pè, nou menm pitit Jakòb, sèvitè mwen an. Nou pa bezwen tranble, nou menm moun pèp Izrayèl. M'ap vin delivre nou nan peyi lwen sa yo. M'ap vin sove pitit nou yo nan peyi kote yo te depòte nou an. N'ap tounen lakay nou pou nou viv ak kè poze, san ¹¹ pesonn pa chache nou kont ankò. M'ap vin jwenn nou, m'ap sove nou. Se Seyè a menm ki di sa. M'ap disparèt tout nasyon kote mwen te gaye nou yo. Nou menm, mwen p'ap detwi nou. Men, pou ¹² pini se pou m' pini nou, jan sa dwe fèt. Mwen p'ap kite anyen pou nou. Men sa Seyè a di pèp li

13
 a ankò: Pou jan ou donmaje a, pa gen renmèd pou ou. Malenng ou an p'ap janm geri. Pa gen
 pesonn pou defann kòz ou. Se vre, yo konn geri malenng. Men, pou malenng pa ou la, pa gen
 14
 renmèd. Tout moun ki t'ap fè lamou avè ou yo bliye ou. Yo yonn pa okipe ou ankò. Mwen frape
 ou, tankou si m' te lènmi ou. Pinisyon an te rèd pou ou, paske peche ou la te grav anpil. Ou te fè
 15
 anpil gwo mechanste. Poukisa w'ap plenyen pou jan ou donmaje a, pou souffrans ou ki pa ka fini
 an? Se paske peche ou la te grav anpil, ou te fè anpil gwo mechanste kifè mwen pini ou konsa.
 16
 Men, yon lè yo gen pou yo devore moun k'ap devore ou koulye a. Y'ap fè tout moun ki pa vle
 wè ou yo prizonye, y'ap depòte yo. Y'ap piye moun k'ap piye ou yo. Y'ap fini ak moun k'ap fini
 17
 avè ou yo. Nou menm moun Siyon, yo te rele nou: moun yo mete deyò. Yo t'ap di: pa gen moun
 pou okipe nou. Men, se mwen menm k'ap ban nou renmèd, k'ap geri tout malenng nou yo. Se Seyè
 18
 a menm ki di sa. ¶ Seyè a di ankò: -Mwen pral fè moun fanmi Jakòb yo te depòte yo tounen
 lakay yo. Mwen pral gen pitye pou chak fanmi. Yo pral rebati lavil yo sou anplasman vye mazi yo.
 19
 Yo pral rebati gwo bèl kay yo kote yo te ye anvan an. Y'a tandè moun ap chante lakay yo, y'a
 tandè moun ap rele tèlman yo kontan. M'ap fè yo peple, yo p'ap fin disparèt. M'ap fè moun fè lwanj
 20
 yo. Moun p'ap meprize yo ankò. Pitit gason yo va tankou nan tan lontan. M'ap fè peyi a kanpe
 21
 byen fèm ankò devan mwen. M'a pini tout moun k'ap peze yo. Se yonn nan nou ki va chèf nan
 peyi a. Wi, se nan mitan nou yon chèf va soti pou gouvènè nou. L'a vin jwenn mwen lè m'a rele
 22
 l'. Paske pesonn p'ap pran chans vin jwenn mwen si mwen pa rele l'. Se Seyè a ki di sa. Lè sa a,
 23
 se pèp mwen y'a ye ankò, mwen menm m'a Bondye yo. Lè Bondye ankòlè se tankou yon van
 24
 tanpèt, yon siklòn k'ap tonbe sou tèt mechan yo. Li p'ap sispann toutotan li pa fin fè tou sa li
 soti pou li fè a. Nan jou k'ap vini yo, pèp la va konprann sa pi byen.

Chapter 31

1
 ¶ Seyè a di ankò: -Lè sa a, m'ap Bondye tout branch fanmi pèp Izrayèl la. Yo tout y'ap vin pèp
 2
 pa mwen. Nan dezè a mwen te aji ak bon kè ak moun ki te chape anba lanmò nan lagè. Moun
 3
 Izrayèl yo pral resi viv ak kè poze. Byen lwen, Seyè a te fè m' wè li. Li t'ap di: Nou menm moun
 4
 pèp Izrayèl, mwen p'ap janm sispann renmen nou. Se poutèt sa m'ap toujou aji byen ak nou. Bèl
 pèp Izrayèl mwen sa a, m'ap rebati peyi nou an. Peyi nou an va kanpe ankò. Nou pral dekwoke

tanbouren nou yo ankò. Nou pral danse ak kè kontan. ⁵ Nou pral plante rezen sou tout mòn Samari yo. Moun ki va plante se yo ki va rekòlte. ⁶ Wi, lè sa a moun k'ap veye yo va rete sou mòn Efrayim yo, y'a rele byen fò: Annou wè! Ann moute mòn Siyon, bò kot Seyè a, Bondye nou an. ⁷ Seyè a di ankò: -Chante ak kè kontan pou pèp Izrayèl la! Pi gwo nasyon pase l' nanpwen. Fè yo tandè jan n'ap chante pou Bondye. Seyè a delivre pèp li a. Li delivre sa ki te rete nan pèp Izrayèl la. ⁸ Wi, se mwen menm, Seyè a, k'ap mennen yo sot nan nò. M'ap ranmase yo nan dènnye bout latè. Sa ki avèg, sa k'ap bwete, fanm ki ansent, fanm ki gen tranche, yo tout ap vin ansanm. Se yon foul moun k'ap ⁹ tounen. Sou tout wout la y'ap lapriye, y'ap kriye de ran dlo, antan m'ap mennen yo tounen. M'ap fè yo pran yon wout plat kote yo p'ap bite, jouk yo rive bò sous dlo yo. Mwen tankou yon papa pou ¹⁰ pèp Izrayèl la. Efrayim se premye pitit gason m'. ¶ Seyè a di ankò: -Nou menm lòt nasyon yo, koute sa m'ap di: Mache fè konnen l' nan tout zile ki byen lwen yo. Di yo: Seyè a te gaye tout pèp Izrayèl la. Se li menm ki pral sanble yo ankò. Mwen pral okipe yo, tankou gadò k'ap okipe mouton ¹¹ l'. Mwen libere moun fanmi Jakòb yo. Mwen delivre yo anba men yon nasyon ki te pi fò pase ¹² yo. Y'ap vini sou mòn Siyon an, y'ap chante tèlman y'ap kontan. Y'a kontan anpil pou tou sa Seyè a pral ba yo. L'ap ba yo ble, diven, lwil fre, mouton, kabrit, bèf. Y'ap tankou yon jaden byen ¹³ wouze. Y'ap gen tou sa yo bezwen. Jennfi yo va danse tèlman y'a kontan. Jennjan ansanm ak granmoun gason yo va kontan tou. M'ap wete lapenn nan kè yo, m'ap fè yo kontan. M'ap fè yo pran ¹⁴ kouraj. Nan mitan chagren yo, m'ap fè yo kontan. M'ap fè prèt yo manje vyann gra kont kò yo. Pèp mwen an va jwenn tou sa yo bezwen nan tout bon bagay m'a ba yo. Se mwen menm Seyè a ki ¹⁵ di sa. Men sa Seyè a di ankò: -Yo tandè yon sèl rèl nan Rama. Yo tandè kriye ak gwo anmwe. ¹⁶ Se Rachèl k'ap kriye pou pitit li yo. Li pa vle kite pesonn konsole l' paske pitit li yo mouri. Men sa Seyè a di ankò: -Sispann rèl ou yo, Rachèl. Siye dlo nan je ou. Sa ou te fè pou pitit ou yo p'ap ¹⁷ pèdi. Y'ap tounen soti nan peyi lènmi yo. Gen bèl espwa pou ou denmen. Pitit ou yo pral tounen nan peyi yo. Se mwen menm Seyè a ki di sa. ¹⁸ ¶ Mwen tandè moun Izrayèl yo ap plenn. Y'ap di konsa: -Seyè, nou te tankou yon ti towò mawon. Men, ou donte nou, ou moutre nou jan pou nou ¹⁹ obeyi ou. Fè nou tounen vin jwenn ou, paske ou se Seyè a, Bondye nou an. Nou te vire do ba ou, men, koulye a nou vle tounen vin jwenn ou. Sa te fè nou lapenn, nou rekonèt sa nou te fè a mal. ²⁰ Nou te wont, nou te bese tèt nou atè, paske nou te peche nan tan jennès nou. Izrayèl, nou se pitit gason mwen pi renmen an, pitit mwen pi pito a. Chak fwa non nou vin nan bouch mwen pou m' pini nou, mwen chonje jan mwen renmen nou. Se poutèt sa mwen fèb pou nou, m'a gen pitye pou ²¹ nou. Se mwen menm Seyè a ki di sa. Mete mak sou tout wout la, plante jalon sou tout chemen

an. Jwenn chemen ou te pran lè ou taprale a. Tounen non, nou menm moun pèp Izrayèl yo, tounen
 lakay nou nan lavil ki pou nou yo. ²² Kilè n'a sispann drive deyò, bann wòklò! Mwen fè yon bagay
 tou nèf nan peyi a: Koulye a se fanm k'ap liyen gason. ²³ Seyè ki gen tout pouvwa a, Bondye pèp
 Izrayèl la, di ankò: -Lè m'a fè pèp mwen an tounen lakay li, men sa yo pral mache di ankò nan tout
 peyi Jida ak nan tout lavil li yo: Se pou Seyè a beni mòn ki apa pou li a, mòn kote Bondye k'ap
 delivre a rete a. ²⁴ Se sou mòn sa a moun peyi Jida yo ansanm ak moun tout lavil yo pral rete. Se
 la moun k'ap travay latè yo ansanm ak moun k'ap gade mouton yo pral rete tou. ²⁵ Mwen pral bay
 tout moun ki bouke yo kouraj. Mwen pral plen vant tout moun k'ap mouri grangou yo. ²⁶ Lè sa a,
 pèp la va di: M' al dòmi. Lè m' leve, mwen wè dòmi an te bon pou mwen. ²⁷ ¶ Talè konsa mwen
 pral simen moun ak bèt nan tout peyi Izrayèl la ak nan tout peyi Jida a. Se mwen menm Seyè a ki
 di sa. ²⁸ Menm jan mwen te pran san m' pou m' te derasinen yo, lage yo atè, demoli yo, detwi yo,
 fè malè sou yo, se konsa tou mwen pral pran san m' pou m' rebati yo, pou m' replante yo. Se Seyè
 a menm ki di sa. ²⁹ Lè sa a, pesonn p'ap di ankò: Papa ak manman te manje rezen vèt, se dan timoun
 yo ki gasi. ³⁰ Moun ki manje rezen vèt la, se li menm ki va gen dan gasi. Chak moun va mouri pou
 sa li fè ki mal. ³¹ Seyè a di ankò: Lè a pral rive, mwen pral pase yon lòt kontra avèk moun peyi
 Izrayèl yo ansanm ak moun peyi Jida yo. ³² Se p'ap tankou kontra mwen te pase avèk zansèt yo a
 lè m' te pran men yo pou m' te fè yo soti kite peyi Lejip. Atout se mwen ki te mèt yo, yo pa t' kenbe
 kontra mwen an. Se mwen menm Seyè a ki di sa! ³³ Men kontra mwen pral pase ak pèp Izrayèl
 la. Se Seyè a menm ki di sa. Lè sa a, m'ap mete prensip mwen yo anndan kè yo, m'ap make lòd
 mwen yo nan lespri yo. M'a tounen Bondye pou yo, y'a tounen yon pèp pou mwen. ³⁴ Pesonn p'ap
 bezwen moutre lòt moun nan peyi a kouman pou yo chache konnen Seyè a, paske yo tout ap konnen
 m', depi sa ki pi piti a jouk sa ki pi gran an. Se mwen menm Seyè a ki di sa. M'a padonnen sa yo
 fè ki mal, mwen p'ap chonje peche yo ankò. Se mwen menm Seyè a ki di sa. ³⁵ ¶ Seyè a mete solèy
 la pou l' klere lajounen. Li bay lalin ak zetwal yo lòd pou yo klere lannwit. Li eksite lannmè a, li fè
 l' move. Se li menm ki Seyè ki gen tout pouvwa a: Se konsa yo rele l'. ³⁶ Toutotan prensip sa yo
 va kenbe, se toutotan pèp Izrayèl la va yon nasyon devan mwen. Se mwen menm Seyè a ki di sa.
³⁷ Si yon jou yo ka rive mezire wotè syèl la, si yo ka rive konnen fondasyon latè a, konsa tou, yon
 jou mwen ka rive voye tout pèp Izrayèl la jete poutèt tou sa yo fè ki mal. Se Seyè a menm ki di sa.
³⁸ Men sa Seyè a di ankò: -Pa rete lontan ankò, yo pral rebati tout lavil Jerizalèm pou Seyè a, depi
 gwo fò Ananyèl la jouk Pòtay Kwen an. ³⁹ Limit lavil la va konmanse la, l'a pran direksyon ti mòn

40

Garèb la sou bò lwès, l'a vire bò Goa. Y'a pran tout fon ki sèvi pou antere kadav ak pou boule fatra a, tout tè ki soti depi bò ravin Sedwon an rive nan kwen Pòtay Chwal yo sou bò lès, y'a mete yo apa pou mwen. Yo p'ap janm kraze, ni yo p'ap janm demoli yo ankò.

Chapter 32

¹ ¶ Seyè a pale ak Jeremi yon lòt fwa ankò. Lè sa a Sedesyas te gen dizan depi li te wa peyi Jida, Nèbikadneza te gen dizwitan depi li te wa lavil Babilòn. ² Lame wa Babilòn lan te sènen lavil Jerizalèm. Yo te arete pwofèt Jeremi, yo te fèmen l' nan lakou palè wa Jida a kote gad yo ye a. ³ Se Sedesyas, wa peyi Jida a, ki te fè fèmen pwofèt la la, paske li t'ap fè l' repwòch dèske li te bay mesaj sa a nan non Bondye Seyè a: M'ap lage lavil Jerizalèm nan men wa Babilòn lan. L'ap pran l'. ⁴ Wa Sedesyas p'ap chape anba men moun Kalde yo. M'ap lage l' nan men wa Babilòn lan. L'a konparèt ⁵ devan wa a, y'a pale yonn ak lòt, je nan je. Apre sa, y'a mennen Sedesyas lavil Babilòn, li va rete la jouk m'a regle avè l'. Menm si nou goumen ak moun Babilòn yo, nou p'ap janm genyen lagè a. ⁶ Se Seyè a menm ki di sa. Lè sa a, Jeremi rakonte ki jan Seyè a te pale avè l'. Seyè a te di l' konsa: ⁷ -Anamèl, kouzen ou lan, pitit Chaloum, tonton ou bò papa, pral vin wè ou. Li pral mande ou pou achte yon jaden li genyen lavil Anatòt, paske se ou menm ki fanmi pi pre ak li, se ou menm an ⁸ premye ki gen dwa achte l'. Se konsa, jan Seyè a te fè m' konnen an, kouzen m' Anamèl vin jwenn mwen nan lakou palè kote gad yo ye a. Li mande m' pou m' achte yon jaden li te genyen lavil Anatòt, nan peyi moun Benjamen yo. Li di se mwen an premye ki gen dwa achte l' paske se mwen ki fanmi pi pre ak li. Konsa, se mwen ki pou achte l' nan men l'. Lè sa a, mwen vin sèten se Seyè ⁹ a menm ki te pale avè m'. M' achte jaden an nan men Anamèl, pitit tonton m' lan, mwen peze lajan pou m' ba li a. Lajan an te rive disèt pyès an ajan. ¹⁰ Apre sa, mwen siyen de papyè tè yo, mwen mete so m' sou yonn. Mwen fè temwen yo siyen tou, mwen fè kontwole pèz lajan an nan ¹¹ balans. Apre sa, mwen pran de papyè tè yo. Sa ki te sele a te gen kontra lavant lan jan lalwa mande l' la. ¹² Lòt papyè a te rete tou louvri. Mwen renmèt papyè tè yo bay Bawouk, pitit gason Nerija, pitit pitit Makseja, devan Anamèl, kouzen m' lan, devan lòt temwen ki te siyen papyè tè yo, ¹³ devan tout moun peyi Jida ki te la nan lakou gad palè a. Devan yo tout, mwen di Bawouk konsa: ¹⁴ -Men lòd Seyè ki gen tout pouvwa a, Bondye pèp Izrayèl la, bay. Pran de papyè tè sa yo, sa ki sele a ak sa ki tou louvri a, mete yo nan yon ti kannari pou yo ka konsève pandan lontan. ¹⁵ Paske

yon lè yo va achte kay, jaden ak pye rezen nan peyi a ankò. Se Seyè a menm ki di sa. ¶ Apre ¹⁶
 mwen te fin bay Bawouk, pitit gason Nerija a, papye tè yo, mwen lapriyè Seyè a, mwen di l': -Aa, ¹⁷
 Seyè, Bondye! Se avèk fòs kouraj ou, se avèk gwo pouvwa ou ou te fè syèl la ak latè a. Anyen pa
¹⁸
 twò difisil pou ou. Ou fè mil jenerasyon nan yon fanmi wè jan ou gen bon kè. Men tou, ou fè
 pitit peye pou peche papa ak manman yo te fè. Ou se yon Bondye ki gen pouvwa, ki gen fòs. Yo
¹⁹
 rele ou: Seyè ki gen tout pouvwa a. Plan travay ou, se gwo zafè. Yo pa ka konte bèl bagay ou
 fè yo. Je ou louvri sou tou sa moun ap fè, pou bay chak moun sa yo merite dapre sa yo fè, dapre
²⁰
 jan yo mennen bak yo. Depi nan tan lontan rive jouk jounen jòdi a, ou te fè mirak ak mèvèy nan
 peyi Lejip, nan peyi Izrayèl ak nan tout lòt nasyon yo. Konsa, koulye a yo konnen ou toupatou.
²¹
 Ou fè nou soti kite peyi Lejip ak fòs ponyèt ou ak gwo kouraj ou. Ou te fè anpil mirak ak anpil
²²
 mèvèy, anpil bagay ki te fè moun pè. Ou te ba yo peyi ou te pwomèt ou t'ap bay zansèt yo a,
²³
 peyi kote lèt ak siwo myèl koule tankou dlo. Yo rive nan peyi a, yo pran l' pou yo, men yo
 derefize koute ou. Yo pa viv jan ou te mande yo viv la. Yo pa fè tou sa ou te ba yo lòd fè a. Se
²⁴
 konsa, ou voye tout gwo malè sa a sou yo jòdi a. Moun Babilòn yo sènen lavil la, y'ap anpile tè
 nan pye miray yo, y'ap pwoche pou yo pran lavil la. Nou ta mèt di lavil la nan men yo deja. Lagè,
²⁵
 grangou ak move maladi fin kraze kouraj moun yo. Ou wè sa ou te di a rive vre. Wi, sa ki rete
 pou lavil la tonbe nan men moun Babilòn yo pa anyen. Poukisa atò, Seyè Bondye, ou ban m' lòd
²⁶
 achte jaden sa a pou lajan kach devan temwen? ¶ Seyè a pale ak Jeremi ankò, li di l' konsa:
²⁷
 -Mwen menm Seyè a, mwen se Bondye tout moun sou latè. Pa gen anyen ki twò difisil pou m'
²⁸
 fè. Se poutèt sa, mwen menm mwen di ou: m'ap lage lavil sa a nan men moun Babilòn yo, nan
²⁹
 men Nèbikadneza, wa yo a! Y'ap pran lavil la. Moun Babilòn k'ap atake lavil la pral antre ladan
 l'. Y'ap mete dife, y'ap boule l'. Y'ap mete dife nan kay kote moun yo te fè m' fache anpil la, lè yo
³⁰
 te moute anwo twati a pou boule lansan pou Baal, pou fè ofrann diven pou lòt bondye. Paske,
 moun Izrayèl yo ak moun Jida yo, se sa ki mal ase y'ap fè depi nan konmansman. Wi, moun Izrayèl
³¹
 yo, se fache y'ap fè m' fache ase ak tou sa y'ap fè a. Se Seyè a menm ki di sa. Lavil Jerizalèm
 sa a, depi jou yo te bati l' la rive jouk jòdi a, se kòlè l'ap fè m' fè, se move san l'ap fè m' fè. Kifè
³²
 koulye a, mwen pa ka wè l' devan je m' ankò. Akòz tou sa moun peyi Izrayèl yo ak moun peyi
 Jida yo te fè ki mal, m' about ak yo tout, ni wa yo, ni chèf yo, ni prèt yo, ni pwofèt yo, ni moun
³³
 peyi Jida yo, ni moun lavil Jerizalèm yo. Yo vire do ban mwen. Malgre mwen pa t' janm sispann
³⁴
 montre yo sa pou yo fè, yo pa t' vle koute m', yo pa vle aprann. Yo mete vye zidòl yo nan tanp

yo te mete apa pou mwen an, yo fè tanp lan pa nan kondisyon pou sèvi m' ankò. ³⁵ Yo bati lotèl pou Baal nan Fon Benninon an, yo ofri pitit gason yo ak pitit fi yo pou yo touye pou Molòk, bagay mwen pa t' janm ba yo lòd fè, bagay ki pa t' janm vin nan lide m'. Lè yo fè bagay degoutan sa a, yo fè pèp Jida a tonbe nan peche. ³⁶ Seyè a, Bondye pèp Izrayèl la, pale ak Jeremi, li di l' konsa: -Koulye a mwen ta renmen di yon lòt bagay sou lavil Jerizalèm. Ou te di ansanm ak lòt yo: Lagè, grangou ak move maladi ap fini ak lavil la, l'ap tonbe nan men wa Babilòn lan. ³⁷ Enben, wi! Mwen te fache sou yo, mwen te move anpil, mwen te fè gwo kòlè. Lè sa a, mwen gaye yo nan yon bann peyi. Men, mwen pral sanble yo, m'ap mennen yo tounen isit la ankò pou yo ka viv san kè sote. ³⁸ Lè sa a, yo menm y'a tounen pèp ki apa pou mwen an ankò, mwen menm m'a tounen Bondye yo ankò. ³⁹ Sèl lide m'ap mete nan tèt yo tout, sèl anvè m'a ba yo tout, se pou yo gen krentif pou mwen tout tan. Se va pou byen yo ak pou byen pitit pitit yo. ⁴⁰ M'ap pase yon kontra ak yo ki p'ap janm kase. M'ap pran angajman mwen p'ap janm lage yo. Mwen p'ap janm sispann fè yo byen. Wi, m'a fè yo gen krentif pou mwen ak tout kè yo. Konsa, yo p'ap janm vire do ban mwen ankò. ⁴¹ M'a pran plezi pou m' fè yo byen. M'a travay ak tout kè m' ak tout nanm mwen pou yo pran rasin nèt nan peyi a. ⁴² Seyè a di ankò: Menm jan se mwen menm ki te fè gwo malè sa a rive pèp la, konsa tou, se mwen menm ki pral ba yo tout bon bagay mwen te pwomèt m'ap ba yo. ⁴³ W'ap di ansanm ak lòt moun yo: Peyi a fini. Pa gen yon moun, pa gen yon bèt ladan l'. Yo lage peyi a nan men moun Babilòn yo. Men yon lè, moun va achte tè nan peyi a ankò. ⁴⁴ Wi, nan tout peyi Benjamen an, nan tout ti bouk ki nan vwazinaj lavil Jerizalèm yo, nan tout lavil Jida yo, nan lavil ki nan mòn yo, nan tout lavil ki nan plenn yo, bò lanmè, ak nan sid peyi a, moun va achte jaden, y'a pase papye tè, y'a sele yo, y'a fè temwen siyen yo. Paske m'ap fè pèp la tounen nan peyi a ankò. Se mwen menm Seyè a ki di sa. Jerizalèm

Chapter 33

¹ ¶ Jeremi te nan prizon toujou nan lakou palè kote gad yo ye a lè Seyè a pale avè l' ankò. Li di ² l': -Se mwen menm ki fè latè a, ki ba li fòm, ki kenbe l' nan plas li. Se mwen menm yo rele Seyè a. Men sa mwen di: ³ Rele m', m'a reponn ou. M'a fè ou konnen yon bann gwo bagay, yon bann mèvèy ou pa t' janm konnen. ⁴ Wi, men sa mwen menm, Seyè a, Bondye pèp Izrayèl la, mwen di sou kay lavil Jerizalèm yo, sou kay wa peyi Jida yo, ki fin kraze paske moun Babilòn yo sènen lavil la, y'ap atake l'. ⁵ Gen moun ki soti pou kenbe tè ak moun Babilòn yo. Moun sa yo lakòz kay yo

pral plen kadav moun mwen pral touye tèlman mwen fache, tèlman mwen move. Mwen p'ap okipe
 lavil Jerizalèm ankò paske moun li yo fè twòp mechanste. ⁶ Men, mwen pral ba yo renmèd pou yo
 sa gaya. M'ap geri yo. M'ap fè yo konnen jan sa bon lè moun viv ak kè poze san ankenn danje.
⁷ M'ap fè peyi Izrayèl ak peyi Jida kanpe ankò. Zafè yo pral mache tankou nan tan lontan. ⁸ M'ap
 mete yo nan kondisyon pou yo sèvi m', m'ap wete tout peche yo te fè kont mwen yo. M'ap padonnen
 tou sa yo te fè ki mal lè yo t'ap fè wòklò avè m' lan. ⁹ Lè sa a, lavil Jerizalèm pral fè kè m' kontan.
 Li pral sèvi yon lwanj pou mwen, yon bèl bagay devan tout lòt nasyon ki sou latè. Lè y'a konnen
 tout byen mwen pral fè pou moun Jerizalèm yo, lè y'a wè tout bèl bagay m'a fè pou yo, y'a tranble
 tèlman y'a pè, y'a sezi. ¹⁰ ¶ Seyè a di ankò: Y'ap di peyi a tounen yon dezè, pa gen moun, pa gen
 bèt ladan l'. Se vre wi. Lavil peyi Jida yo, tout lari lavil Jerizalèm blanch: ou pa jwenn ni moun, ni
 bèt ladan yo. Men nan peyi a y'a tande ankò ¹¹ vwa moun k'ap pran plezi yo, moun ki gen kè
 kontan. Y'a tande mizik pou moun k'ap marye yo. Y'a tande moun k'ap chante lè y'ap pote ofrann
 pou di Bondye mèsi nan tanp Seyè a. Y'a di: Lwanj pou Seyè ki gen tout pouvwa a paske li bon!
 Li p'ap janm sispann renmen nou! Wi, m'ap fè peyi a kanpe ankò jan l' te ye anvan an. Se Seyè a
¹² ki di sa. Men sa Seyè ki gen tout pouvwa a di ankò: -Nan peyi sa a ki fini, peyi kote ou pa jwenn
 ni moun ni bèt la nan tout lavil yo, va gen kote pou gadò mouton yo mennen mouton yo al manje.
¹³ Nan lavil ki nan mòn yo, nan lavil ki nan plenn yo bò lanmè a ak nan sid peyi a, nan tout peyi
 Benjamen an, nan tout ti bouk nan vwazinaj Jerizalèm yo, nan tout lavil Jida yo, gadò mouton yo
 va fè mouton pase devan yo yonn apre lòt pou konte yo. Se Seyè a menm ki di sa. ¹⁴ Seyè a di
 ankò: Yon jou pral vini, mwen pral kenbe pwomès mwen te fè moun Izrayèl yo ansanm ak moun
 Jida yo. ¹⁵ Jou sa a, lè sa a, m'a fè yon nonm soti nan fanmi David la pou gouvènè yo. Se va yon
 wa ki va fè sa ki dwat, ki p'ap nan patipri. ¹⁶ Lè sa a, moun peyi Jida yo ak moun lavil Jerizalèm
 yo va sove, y'a viv san kè sote. Y'a rele lavil Jerizalèm Seyè a, Delivrans nou an. ¹⁷ ¶ Seyè a di
 ankò: Va toujou gen yon wa ki soti nan fanmi David la pou gouvènè peyi Izrayèl la. ¹⁸ Va toujou
 gen prèt nan fanmi Levi a pou sèvi m' nan tanp lan, pou boule ofrann nan dife pou mwen, pou fè
 ofrann grenn jaden ak lòt ofrann bèt pou mwen chak jou. ¹⁹ Seyè a pale ak Jeremi ankò, li di l':
²⁰ -Mwen pase yon kontra ak lajounen, yon kontra ak lannwit pou yo toujou rive lè pou yo rive a.
²¹ Eske nou ka kraze kontra sa yo? Non. Enben, konsa tou, mwen siyen yon kontra ak David, sèvitè
 m' lan, pou toujou gen yonn nan pitit li yo chita sou fotèy wa a nan peyi a. Mwen siyen yon kontra
 ak moun Levi yo ansanm ak prèt k'ap sèvi m' yo. Kontra sa yo p'ap janm kase. ²² Mwen pral fè
 fanmi David, sèvitè m' lan, peple. Mwen pral fè moun Levi k'ap sèvi m' yo peple sitèlman yo p'ap

ka konte kantite ki genyen. Y'ap tankou zetwal nan syèl la, tankou grenn sab bò lanmè. ²³ Seyè a
²⁴ pale ak Jeremi ankò, li di l': -Ou tande jan moun yo ap di mwen voye moun Izrayèl yo ak moun
 Jida yo jete, de fanmi mwen menm mwen te chwazi pou mwen yo! Se konsa y'ap meprize pèp
²⁵ mwen an. Yo pa konsidere l' tankou yon nasyon ankò. Men sa mwen menm Seyè a, mwen di:
 Mwen fè yon kontra ak lajounen, mwen fè yon kontra ak lannwit. Mwen bay regleman jan pou tout
²⁶ bagay nan syèl la ak sou latè a mache. Menm jan m'ap toujou kenbe kontra sa yo, konsa tou
 m'ap toujou kenbe pawòl mwen ak pitit Jakòb yo, mwen p'ap janm voye pitit pitit David, sèvitè m'
 lan, jete. M'ap toujou chwazi yonn nan fanmi David la pou gouvènènan moun ki soti nan ras Abraram,
 Izarak ak Jakòb yo. Wi, m'a gen pitye pou yo, m'a fè yo kanpe ankò.

Chapter 34

¹ ¶ Yon lòt jou, Seyè a pale ak Jeremi ankò. Lè sa a, Nèbikadneza, wa Babilòn lan, t'ap atake
 lavil Jerizalèm ansanm ak tout ti bouk ki nan vwazinaj li yo. Li te gen avè l' tout lame pa l' la ansanm
 ak sòlda tout lòt nasyon ak lòt ras li te soumèt anba pouvwa li. ² Men sa Seyè a, Bondye pèp Izrayèl
 la, di Jeremi: -Ale pale ak Sedesyas, wa peyi Jida a, w'a di li konsa: Seyè a pral lage lavil Jerizalèm
 nan men wa Babilòn lan ki pral mete dife ladan l'. ³ Ou menm, ou p'ap chape. Y'ap arete ou, y'ap
 lage ou nan men l' tou. W'a kontre avè l' bab pou bab. W'a pale avè l'. Lèfini, w'ap pati pou Babilòn.
⁴ Tansèlman, Sedesyas, wa Jida, koute mesaj Seyè a bay pou ou. Ou p'ap mouri nan lagè. ⁵ W'ap
 mouri mouri ou nan kabann ou. Lè sa a, y'a boule lansan pou ou menm jan yo te konn boule lansan
 pou zansèt ou yo ki te wa anvan ou. Y'a rele pou ou, y'a di: Ki lapenn sa a? Wa a mouri! Se mwen
 menm Seyè a ki di sa. Se mwen ki bay mesaj sa a. ⁶ Pwofèt Jeremi bay Sedesyas, wa peyi Jida a,
 mesaj sa a lavil Jerizalèm. ⁷ Lè sa a, lame wa Babilòn lan t'ap atake lavil Jerizalèm ansanm ak de
 lòt lavil nan peyi Jida, Lakis ak Azeka, ki t'ap kenbe tèt toujou ak lènmi yo, paske yo menm yo te
 byen pwoteje. ⁸ ¶ Men nan ki sikonstans Seyè a te pale ak Jeremi ankò. Wa Sedesyas te siyen yon
 kontra ansanm ak tout pèp lavil Jerizalèm pou yo te bay ⁹ tout moun menm ras ak yo, fanm kou
 gason, ki te esklav lakay yo libète yo. Konsa, pesonn nan moun Jida yo pa t'ap gen yon frè parèy
¹⁰ yo k'ap sèvi yo esklav. Se konsa, tout chèf yo ansanm ak tout pèp la te tonbe dakò pou yo te bay
 tout esklav, fanm kou gason, yo te gen lakay yo libète yo, lèfini pou yo pa janm pran yo sèvi esklav
 ankò. Epi yo bay tout esklav yo libète yo vre. ¹¹ Men apre sa, yo chanje lide, yo pran moun yo te
 bay libète yo, fanm kou gason, yo fòse yo tounen sèvi yo esklav ankò. ¹² Lè sa a, Seyè a pale ak

13 Jeremi, li di l' konsa: -Men sa Seyè a, Bondye pèp Izrayèl la, di: Mwen te pase yon kontra avèk
 zansèt nou yo lè mwen te fè yo soti kite peyi Lejip kote yo te esklav la. Mwen te di yo: 14 Lè yon
 ebre parèy nou vann tèt li ban nou pou l' sèvi nou esklav, apre sizan li pase ap sèvi nou, sou setyèm
 lanne a se pou nou ba li libète l'. Se pou nou kite l' ale. Men, zansèt nou yo pa t' koute m', yo pa t'
 15 okipe sa m' te di yo. Men nou menm nan jou ki sot pase yo, nou pa t' fè menm jan ak yo, nou te
 fè sa ki dwat devan mwen. Tout moun te dakò pou yo te bay ebre parèy yo libète yo. Lèfini, nou
 16 te pran angajman sa a piblik devan mwen nan kay yo mete apa pou mwen an. Apre sa, nou
 chanje lide, nou pa respekte m'. Nou tout nou fè esklav nou te bay libète yo tounen lakay nou, fanm
 17 kou gason, nou fòse yo vin sèvi nou esklav ankò. Se poutèt sa, mwen menm Seyè a, mwen di
 nou pa koute m', nou pa bay moun pèp Izrayèl parèy nou yo libète yo. Enben, mwen menm Seyè
 18 a, m'ap ban nou libète pou nou mouri nan lagè, nan grangou, osinon anba move maladi. M'ap
 19 mete tout lòt nasyon sou latè yo vant ba lè y'a wè sa ki rive nou. Nou menm chèf peyi Jida yo
 ak grannèg lavil Jerizalèm yo ak lòt gwo zotobre yo, prèt yo ansanm ak tout moun lavil Jerizalèm
 yo, nou te pran yon angajman avè m' lè nou te pase nan mitan de mwatye towò bèf nou te ofri ban
 mwen an. Men nou pa kenbe angajman nou te pran an, nou pa fè sa nou te pwomèt mwen n'ap fè
 20 a. Se poutèt sa, sa nou te fè towò bèf nou te ofri ban mwen an, se sa mwen pral fè rive nou. M'ap
 lage nou nan men lènmi nou yo, nan men moun ki soti pou touye nou yo. Kadav nou va sèvi manje
 21 pou zwezo nan syèl ak bèt nan bwa. M'ap pran Sedesyas, wa peyi Jida a, ansanm ak tout chèf
 li yo, m'ap lage yo nan men lènmi yo, nan men moun ki soti pou touye yo. M'ap lage yo nan men
 22 lame wa Babilòn lan ki fin leve kan yo pou yo ale. M'ap pase yo lòd, y'ap tounen vin atake lavil
 la. Y'ap pran l', y'ap mete dife ladan l'. M'ap fè lavil peyi Jida yo tounen yon dezè san pyès moun
 ladan yo. Se mwen menm Seyè a ki di sa.

Chapter 35

1 ¶ Seyè a pale ak Jeremi ankò, lè sa a se Jojakim, pitit Jozyas, ki te wa peyi Jida. Li di l' konsa:
 2 -Al jwenn moun branch fanmi Rekab yo. Pale ak yo. Fè yo vini ak ou nan yonn nan pyès chanm
 3 Tanp lan. Lè y'a rive la, w'a ba yo diven bwè. Se konsa Jeremi al chache tout branch fanmi Rekab
 yo, depi Jazanya, pitit gason Imeja, ki te pitit Abasinya, ansanm ak tout frè l' yo ak tout pitit gason
 4 yo. Li mennen yo nan tanp lan. Li fè yo antre nan pyès chanm yo te bay patizan pwofèt Anan,
 pitit Igdalya a. Pyès chanm sa a te kole kole ak chanm chèf tanp yo, li te anwo pyès chanm ki pou

Maseya, pitit gason Chaloum lan, prèt ki te reskonsab veve pòtay tanp lan. ⁵ Apre sa, Jeremi mete
 gwo ja plen diven ak gode devan moun Rekab yo. Li di yo: -Bwè diven non! ⁶ Men yo reponn li:
 -Nou pa bwè diven non. Paske zansèt nou, Jonadab, pitit Rekab la, te ban nou lòd sa yo: Pa janm
 bwè diven, ni nou, ni pitit nou yo. ⁷ Pa janm bati kay, pa janm travay latè, pa janm plante rezen,
 pa janm achte bagay konsa non plis. N'a pase tout lavi nou anba tant. Konsa, n'a rete lontan nan
 peyi ki pa pou nou an. ⁸ Nou toujou obeyi lòd zansèt nou, Jonadab, pitit Rekab, te ban nou. Nou
 pa janm bwè diven nan vi nou, ni nou menm, ni madanm nou, ni pitit gason ak pitit fi nou yo.
⁹ Nou pa bati kay pou nou rete. Nou pa gen pye rezen. Nou pa gen jaden pou n' plante. ¹⁰ Se anba
 tant nou rete. Konsa, nou toujou fè tou sa Jonadab, zansèt nou, te ban nou lòd fè a. ¹¹ Men, lè
 Nèbikadneza, wa peyi Babilòn lan, anvayi peyi a, nou yonn di lòt: Ann antre lavil Jerizalèm pou
 nou chape anba lame moun Babilòn yo ak lame moun peyi Siri yo. Se konsa nou vin rete lavil
 Jerizalèm. ¹² ¶ Lè sa a Seyè a pale ak Jeremi. ¹³ Men sa Seyè ki gen tout pouvwa a, Bondye pèp
 Izrayèl la, di l': -Ale jwenn moun peyi Jida yo ansanm ak moun ki rete lavil Jerizalèm yo, w'a di
 yo: Poukisa yo pa pran leson sou moun Rekab yo, pou yo fè sa mwen di yo fè. Se mwen menm
 Seyè a k'ap mande yo sa. ¹⁴ Jonadab, pitit Rekab la, te bay lòd pou pitit li yo pa janm bwè diven.
 Jouk jounen jòdi a yo pa janm bwè diven. Yo swiv lòd zansèt yo te ba yo a. Men nou menm, mwen
 pa janm sispann avèti nou. Nou pa janm koute m'. ¹⁵ Mwen pa janm sispann voye sèvitè m' yo,
 pwofèt yo, vin di nou: Manyè kite move pant n'ap swiv yo. Manyè fè sa ki dwat! Pa kouri dèyè lòt
 bondye pou nou sèvi yo. Konsa, n'a rete nan peyi mwen te bay pou zansèt nou yo ansanm ak nou
 an. Men, nou pa koute m'. ¹⁶ Pitit Jonadab yo te fè tou sa zansèt yo te mande yo fè, men nou menm
 moun Jida yo, nou pa vle koute m'. ¹⁷ Se poutèt sa, men sa mwen menm, Seyè a, Bondye ki gen
 tout pouvwa a, Bondye pèp Izrayèl la, mwen di nou: Mwen pral voye sou moun peyi Jida ak moun
 lavil Jerizalèm yo malè mwen te di m'ap voye a. Paske mwen te pale nou, nou pa koute m'. Mwen
 rele nou, nou pa reponn mwen. ¹⁸ Apre sa, Jeremi di moun Rekab yo: -Men sa Seyè ki gen tout
 pouvwa a, Bondye pèp Izrayèl la, voye di nou: Nou te swiv lòd zansèt nou, Jonadab, te ban nou
 an. Nou te fè tou sa li te mande nou fè, tout lòd li te ban nou yo. ¹⁹ Se poutèt sa, men sa mwen
 menm Seyè ki gen tout pouvwa a, Bondye pèp Izrayèl la, mwen di: Va toujou gen yon gason nan
 fanmi Jonadab, pitit Rekab la, pou sèvi mwen.

Chapter 36

¹ ¶ Seyè a pale ak Jeremi ankò. Lè sa a, Jojakim, pitit Jozyas la, t'ap mache sou katran depi li
te wa peyi Jida. Men sa Seyè a te di Jeremi: ² -Pran yon woulo papye. W'a kouche sou li tou sa
mwen te di ou sou peyi Izrayèl la, sou peyi Jida a ak sou tout lòt nasyon yo. W'a ekri tout mesaj
mwen te ba ou, depi sou rèy wa Jozyas rive jouk jòdi a. ³ Ou pa janm konnen, lè moun peyi Jida
yo va tande tout malè mwen fè lide voye sou yo, y'a konprann, y'a manyè kite move pant y'ap swiv
la. Lè sa a, m'a padonnen tout mechanste ak peche yo te fè yo. ⁴ Se konsa, Jeremi rele Bawouk,
pitit gason Nerija a, li dikte l' tout mesaj Seyè a te ba li epi Bawouk ekri yo nan woulo liv la. ⁵ Apre
sa, Jeremi bay Bawouk lòd sa yo: -Yo defann mwen antre nan tanp Seyè a. Mwen pa ka mete pye
m' la. ⁶ Men ou menm, ou prale nan tanp lan jou pou pèp la fè jèn lan. Ou pral li nan woulo liv ou
te ekri a tou sa mwen te dikte ou la, tout mesaj Seyè a te bay yo. Ou pral li l' byen fò pou tout moun
ki nan tanp lan ka tande, pou moun ki soti nan lavil peyi Jida yo ka tande tou. ⁷ Ou pa janm konnen,
yo ka pran lapriyè nan pye Bondye, y'a manyè kite move pant yo t'ap swiv la. Paske Seyè a fè yo
konnen li move anpil, li fache anpil sou pèp la. ⁸ Bawouk, pitit Nerija a, fè tou sa Jeremi te ba li
lòd fè a. Li kanpe nan mitan Tanp lan, li li mesaj Seyè yo ki te nan liv la. ⁹ ¶ Se te nan nevyèm
mwa senkyèm lanne rèy Jojakim, pitit Jozyas la, yo te bay lòd pou tout moun lavil Jerizalèm yo
ansanm ak tout moun ki te soti nan lavil peyi Jida yo epi ki te nan lavil Jerizalèm lan pou yo fè yon
sèvis jèn pou mande Seyè a gras. ¹⁰ Lè sa a, Bawouk pran liv mesaj Jeremi yo, li li l' nan tanp lan
pou tout moun ka tande. Li te kanpe devan pyès chanm Gemarya, pitit gason Chafan an, ki te sekretè
tanp lan. Chanm lan te bay sou gwo lakou anwo a, toupre kote yo pase pou antre nan Pòtay Nèf
Tanp Seyè a. ¹¹ Miche, pitit Gemarya a, pitit pitit Chafan an, te tande tout mesaj Seyè yo ki te ekri
nan liv la. ¹² Apre sa, li ale lakay wa a, nan biwo sekretè wa a, kote li jwenn tout gwo chèf yo
reyini ap travay. Te gen Elichama, sekretè palè a, Delaya, pitit gason Chemaya, Elnatan, pitit Achbò,
Gemarya, pitit Chafan, Zedekya, pitit Ananya, ak tout lòt gwo chèf yo. ¹³ Miche di yo tou sa li te
sot tande Bawouk ap li nan zòrèy pèp la. ¹⁴ Lè sa a, gwo chèf yo voye Jeoudi bò kot Bawouk.
Jeoudi sa a, se te pitit Netanya, pitit pitit Chelemya, pitit pitit pitit Kouchi. li al di Bawouk pou li
pote woulo liv li te li nan zòrèy pèp la bay chèf yo. Bawouk pote woulo liv la ba yo. ¹⁵ Yo di l'
konsa: -Chita la, li l' pou nou tande. Bawouk li liv la pou yo. ¹⁶ Lè yo tande tou sa ki te nan liv la,
yo vin pè. Yonn pran gade lòt, epi yo di: -Se pou n' al fè wa a konnen bagay sa yo. ¹⁷ Lèfini, yo
mande Bawouk: -Mangè dí nou ki jan ou te fè ka ekri tout bagay sa yo. Se Jeremi ki te dikte ou
yo? ¹⁸ Bawouk reponn yo: -Se Jeremi menm ki te dikte tout mesaj sa yo. Mwen menm, mwen

19
kouche yo sou woulo liv la ak lank. Lè sa a, chèf yo di Bawouk: -Al kache tande, ou menm
ansanm ak Jeremi. Pa kite pyès moun konnen kote nou ye. 20 ¶ Chèf yo kite woulo liv la lakay
Elichama, sekretè palè a, y' ale nan lakou palè a, y' al rapòte wa a tout bagay. 21 Lè sa a atò, wa a
voye Jeoudi al chache woulo liv la lakay Elichama, sekretè a. Jeoudi pote liv la vini. Li tanmen li
22 li byen fò pou wa a ansanm ak lòt chèf ki te kanpe bò wa a. Se te nan sezon fredyè, nan nevyèm
mwa a, wa a te nan kay kote li konn pase tan fredyè a, li te chita devan yon gwo recho dife tou limen.
23 Chak fwa Jeoudi te fin li twa ou kat kolonn nan liv la, wa a koupe yo ak yon ti kouto epi li jete
24 yo nan dife a. Konsa konsa, jouk li boule tout woulo liv la. Men, ni wa a ni chèf li yo pa t' gen
kè kase, ni yo pa t' fè anyen pou moutre yo te nan lapenn lè yo tande tou sa ki te nan woulo liv la.
25 Elnatan, pitit Delaja, ak Gemarya te lapriyè nan pye wa a pou li pa t' boule woulo liv la. Men,
26 wa a pa koute yo. Okontrè, li pale ak Jerakmeyèl, pitit li a, ansanm ak Seraja, pitit Azryèl la, ak
Chelemya, pitit Abdeyèl la. Li ba yo lòd pou yo arete pwofèt Jeremi ansanm ak Bawouk, sekretè
27 l' la. Men Seyè a pa kite yo jwenn yo. Apre wa a te fin boule woulo liv ki te gen tout mesaj
28 Jeremi te dikte Bawouk la, Seyè a pale ak Jeremi ankò. Li di l' konsa: -Al chache yon lòt woulo
29 papye. Ekri tou sa ki te nan premye woulo Jojakim, wa peyi Jida a, te boule a. Lèfini, men sa
w'a di sou Jojakim, wa Jida a. Seyè a pale, li di konsa: Ou boule woulo liv la, pa vre? Epi ou mande
Jeremi poukisa li te ekri wa Babilòn lan gen pou l' vini pou l' kraze peyi a, pou l' touye dènye moun
30 ak dènye bèt ki ladan l'. Se poutèt sa, koulye a, men mesaj mwen menm Seyè a m'ap bay sou
Jojakim, wa peyi Jida a: p'ap janm gen yonn nan pitit li yo ki pou chita sou fotèy David la pou
gouvènè nan plas li. Kadav li pral rete atè konsa, pou chalè solèy bat li lajounen, pou fredyè bat li
31 lannwit. M'ap pini yo, ni li menm ni pitit li yo, ni chèf li yo pou tou sa yo fè ki mal. Ni yo, ni
moun lavil Jerizalèm yo, ni moun peyi Jida yo pa t' koute m' lè mwen t'ap avèti yo. M'ap voye sou
32 yo malè mwen te di m'ap voye a. Se konsa Jeremi pran yon lòt woulo liv. Li bay Bawouk, sekretè
li a, pitit Nerija a. Bawouk menm ekri tou sa Jeremi te di l'. Li ekri tout mesaj ki te nan premye
woulo liv wa Jojakim te boule a, ansanm ak anpil lòt mesaj menm jan ak premye yo.

Chapter 37

1 ¶ Nèbikadneza, wa Babilòn, te mete Sedesyas, yonn nan pitit Jozyas yo, wa nan peyi Jida nan
plas Jekonya, pitit Jojakim. 2 Men, ni Sedesyas, ni chèf li yo, ni ankenn lòt moun nan peyi a pa te

³ vle tandè mesaj Seyè a te bay pwofèt Jeremi pou yo. Men, wa Sedesyas te voye Jewoukal, pitit Chelemya, ak Sefanya, prèt la, pitit Maseja, bò kot pwofèt Jeremi pou mande l' lapriyè Seyè a, Bondye yo a, pou yo tout.

⁴ Lè sa a, yo pa t' ankò mete Jeremi nan prizon. Li t'ap ale vini jan l' te vle nan mitan pèp la.

⁵ Lame moun Babilòn yo te sènen lavil Jerizalèm. Lè yo pran nouvèl lame farawon an te travès fwontyè peyi Lejip la, yo wete kò yo devan lavil Jerizalèm.

⁶ Lè sa a, Seyè a pale ak pwofèt Jeremi. Li di l': -Men repons w'a voye bay Sedesyas:

⁷ Seyè a, Bondye pèp Izrayèl la pale. Men sa n'a di wa Jida ki te voye nou bò kote m' lan. Lame farawon an t'ap vin ede nou. Men l'ap tounen lakay li nan peyi Lejip.

⁸ Lè sa a, moun Babilòn yo ap tounen dèyè nou ankò, y'ap atake lavil la, y'ap pran l', y'ap boule l'.

⁹ Se mwen menm Seyè a ki di sa: Pa twonpe tèt nou. Pa konprann moun Babilòn yo pati ale nèt, yo gen pou yo tounen.

¹⁰ Menm si nou ta rive kraze tout lame moun Babilòn k'ap fè nou lagè a epi se sa ki blese yo ase nou kite kouche anba tant yo, yo tout y'ap leve, y'ap vin boule lavil la ratè.

¹¹ ¶ Lè sa a, lame moun Babilòn yo te wete kò yo devan Jerizalèm, paske yo te pran nouvèl mouvman lame farawon an.

¹² Jeremi te vle fè yon ti soti andeyò lavil la pou li ale nan peyi moun Benjamen yo. Li tapral resevwa pòsyon pa l' nan yon tè fanmi li ansanm ak tout rès moun yo t'ap separe.

¹³ Lè li rive Pòtay Benjamen, li kontre ak kòmandman pòs la ki te rele Jirija. Se te pitit Chelemya, pitit pitit Ananya. Jirija rete Jeremi, li di l' konsa:

¹⁴ -Anhan! Ou pral rann tèt ou bay moun Babilòn yo! Jeremi reponn li: -Non, monchè! Mwen pa pral rann tèt mwen kras bay moun Babilòn yo. Men Jirija pa koute l' menm. Li boukle Jeremi, li mennen l' bay chèf yo.

¹⁵ Chèf yo move sou Jeremi, yo fè bat li byen bat. Apre sa, yo fèmen msye lakay Jonatan, sekretè tanp lan. Yo te pran kay sa a sèvi yo prizon.

¹⁶ Yo mete Jeremi nan yon kacho anba tanp lan. Yo kite l' pase kèk tan la.

¹⁷ Apre sa, wa Sedesyas voye chache l'. Lè Jeremi rive nan palè a, wa a pran l' sou kote, li mande l': -Eske Seyè a ba ou yon mesaj pou mwen? Jeremi reponn: -Wi, monwa. Men li: Yo pral lage ou nan men wa lavil Babilòn lan.

¹⁸ Apre sa Jeremi mande wa a: -Sa mwen fè ou, sa m' fè chèf ou yo, sa m' fè pèp la pou ou mete m' nan prizon?

¹⁹ Kisa ki rive pwofèt ou yo ki te di ou wa lavil Babilòn lan pa t'ap vin atake ni ou menm ni peyi a?

²⁰ Koulye a, monwa, mèt mwen, tanpri, koute sa m'ap mande ou. Tanpri souple, pa voye m' tounen nan prizon kay Jonatan, sekretè a. Si ou fè sa, nanpwen rechap pou mwen.

²¹ Se konsa, wa Sedesyas bay lòd pou yo fèmen Jeremi nan lakou gad palè yo. Chak jou se pou yo ba li yon pen y'a pran nan Riyèl Boulanje yo jouk jou p'ap gen pen ankò nan lavil la. Se konsa Jeremi rete nan lakou gad palè yo.

Chapter 38

¹ ¶ Chefatya, pitit Matan, Gedalya, pitit Pachou, Jeoukal, pitit Chelemya, ak Pachou, pitit Malkya,
 te vin konnen Jeremi t'ap pale ak pèp la. Li t'ap di yo konsa: ² -Men mesaj Seyè a bay: tout moun
 ki va rete nan lavil la pral mouri. Sa ki pa mouri nan lagè pral mouri grangou, osinon move maladi
 ap pote yo ale. Men, tout moun ki va soti al rann tèt yo bay moun Babilòn yo p'ap mouri. Y'a sove
³ lavi yo. Wi, men sa Seyè a di: Mwen pral lage lavil la nan men lame moun Babilòn yo. Y'ap pran
⁴ lavil la pou yo. Chèf yo al di wa a: -Se pou yo touye nonm sa a. Paske lè l'ap pale konsa, li fè
 sòlda yo ansanm ak tout lòt moun ki rete nan lavil la pèdi kouraj. Nonm sa a pa soti pou l' ede pèp
⁵ la. Se mal ase li vle pou li. Wa Sedesyas reponn: -Bon! Fè sa nou vle avè l'. Mwen pa ka di nou
⁶ anyen. Se konsa, te gen yon gwo pi nan lakou palè a ki te pou Malkija, pitit gason wa a. Yo pran
 Jeremi, yo desann li nan fon sitèn lan avèk kòd. Pa t' gen dlo ladan l', men te gen anpil labou. Jeremi
⁷ antre nan labou a. Lè sa a, te gen yon moun peyi Letiopi ki te rele Ebèdmelèk. Se te yon nèg
 konfyans ki t'ap travay lakay wa a. Li vin konnen yo te mete Jeremi nan sitèn lan. Jou sa a, wa a
⁸ te chita ap rann jijman bò Pòtay Benjamen an. Ebèdmelèk soti nan palè a, li ale bò pòtay la, li di
⁹ wa a konsa: -Monwa, mèt mwen, sa mesye yo fè pwofèt Jeremi an pa bon non. Yo desann li nan
¹⁰ fon sitèn lan kote, wè pa wè, l'ap mouri grangou, paske pa gen pen lavil la ankò. Lè sa a, wa a
 bay Ebèdmelèk lòd pou li pran trant lòt moun avè l' pou li wete Jeremi nan sitèn lan anvan l' mouri.
¹¹ Se konsa Ebèdmelèk pran moun yo avè l', li antre nan palè a, li ale yon kote ki anba pyès depo
 richès wa a, li pran yon bann moso twal chire ak vye rad, li mare yo nan kòd, li file yo desann bay
¹² Jeremi nan sitèn lan. Epi li di Jeremi konsa: -Mete moso twal yo ak vye rad yo anba zesèl ou
¹³ pou kòd yo pa kòche ou. Jeremi fè sa vre. Epi yo rale l' moute soti nan sitèn lan avèk kòd yo.
¹⁴ Apre sa, Jeremi rete nan lakou gad palè yo. ¶ Yon lòt fwa ankò, wa Sedesyas voye chache pwofèt
 Jeremi, li fè yo mennen l' ba li bò twazyèm pòt pou antre nan kay Seyè a. Wa a di l' konsa: -Mwen
¹⁵ gen yon bagay m' bezwen mande ou. Reponn mwen kare, pa kache m' anyen. Jeremi reponn li:
¹⁶ -Ala, si mwen pale ou kare, w'ap fè yo touye m'. Si m' ba ou yon konsèy, ou p'ap koute m'. Wa
 Sedesyas rele Jeremi sou kote, li fè l' sèman. Li di l' konsa: -Mwen pran Bondye vivan an, Bondye
 ki ban nou lavi a, pou temwen, mwen p'ap fè touye ou, ni mwen p'ap lage ou nan men moun ki vle
¹⁷ touye ou yo. Lè sa a, Jeremi di Sedesyas konsa: -Men sa Seyè a, Bondye ki gen tout pouvwa a,
 Bondye pèp Izrayèl la, di: Si ou al rann tèt ou bay chèf wa Babilòn lan, yo p'ap touye ou. Yo p'ap

18
boule lavil la. Yo p'ap touye ni ou menm, ni fanmi ou. Men, si ou pa al rann tèt ou bay chèf yo, lavil la pral tonbe nan men moun Babilòn yo, y'ap boule l'. Lèfini, ou p'ap ka chape anba men yo.

19
Wa Sedesyas reponn: -Ou konnen sa m' pè? Se moun peyi Jida yo ki deja al rann tèt yo bay moun

20
Babilòn yo. Mwen pè pou moun Babilòn yo pa lage m' nan men yo pou yo maltrete m'. Jeremi di l' konsa: -Moun Babilòn yo p'ap fè ou sa. Koute mesaj Seyè a ba ou nan sa mwen di ou la a, pou

21
tout bagay pase byen pou ou. Konsa ou p'ap mourir. Si ou derefize al rann tèt ou, men sa ki pral

22
rive ou, dapre sa Seyè a fè m' wè: Yo pral pran tout fanm ki rete nan palè wa Jida a, y'ap mennen yo bay chèf wa Babilòn lan. Medam yo pral di: Moun ki te pi bon zanmi wa a pran tèt li, yo fè l'

23
fè sa yo vle. Koulye a, bra msye pran n'a pèlen. Yo kouri kite l' pou kont li. Yo pral pran tout madanm ou yo, tout pitit ou yo, y'ap mennen yo bay moun Babilòn yo. Ou menm, ou p'ap chape

24
anba men yo. Wa Babilòn lan ap fè ou prizonye, lèfini l'ap fè mete dife nan lavil sa a. Sedesyas

25
di Jeremi konsa: -Pa kite pesonn konnen tout pawòl sa yo. Konsa ou p'ap mourir. Si chèf yo rive konnen mwen te pale avè ou, y'ap vin jwenn ou, y'ap mande ou sa ou te di m' ak sa m' te reponn

26
ou. Y'ap pwomèt yo p'ap touye ou si ou pa kache yo anyen. Lè sa a, w'a reponn yo: Se mande mwen t'ap mande wa a, tanpri souple, pou l' pa voye m' tounen nan prizon lakay Jonatan pou m' pa

27
mourir la. Tout chèf yo vini jwenn Jeremi vre. Yo mande l' yon bann pawòl. Jeremi reponn yo jan wa a te di l' la. Pa t' gen anyen chèf yo te ka fè paske pesonn pa t' tande koze Jeremi te gen ak

28
wa a. Jeremi rete nan lakou gad palè yo jouk jou yo pran lavil Jerizalèm.

Chapter 39

1
¶ Nan dizyèm mwa, nevyèm lanne rèy Sedesyas, wa peyi Jida a, Nèbikadneza, wa Babilòn lan, vini ak tout lame li a, li atake lavil Jerizalèm. Li sènen li toupatou. 2 Sou nevyèm jou nan

3
katriyèm mwa, onzyèm lanne rèy Sedesyas la, lènmi yo fè yon twou nan miray ranpa a. Lè sa a, tout gwo chèf wa Babilòn yo antre nan lavil la, yo pran pozisyon nan Pòtay Mitan an: Te gen Negal Sarezè, Samga-Nebo, Sasekim, ki te chèf nèg konfyans wa yo, yon lòt Negal-Sarezè ki te chèf

4
konseye yo ansanm ak tout lòt gwo chèf wa Babilòn yo. Lè wa Sedesyas ak tout sòlda li yo wè sa, yo tann lannwit rive, yo mete deyò. Yo pase nan jaden wa a, yo soti nan pòtay kote de miray

5
yo kontre a, yo kite lavil la. Yo pran chemen ki mennen nan Fon Jouden an. Men, sòlda lame Babilòn yo rapouswiv yo. Yo mete men sou Sedesyas nan plenn toupre lavil Jeriko a. Yo pran l',

yo mennen l' bay Nèbikadneza, wa Babilòn lan, ki te lavil Ribla, nan peyi Amat. Rive la, wa Babilòn lan bay lòd sa pou yo fè Sedesyas. ⁶ Li fè yo touye pitit gason Sedesyas yo la devan je msye. Li fè touye tout chèf peyi Jida yo tou. ⁷ Apre sa, li fe yo pete de je Sedesyas. Lèfini, li fè yo mare l' ak de chenn kwiv pou yo mennen l' Babilòn. ⁸ Moun Babilòn yo menm, bò pa yo, mete dife nan kay wa a, nan kay tout grannèg yo epi yo kraze miray ranpa lavil Jerizalèm. ⁹ Lèfini, Nebouzaradan, chèf gad yo, pran tout rèss moun ki te rete nan lavil la ansanm ak sa ki te kouri kite lavil la, li depòte yo lavil Babilòn. ¹⁰ Men, li kite tout moun ki pòv yo, tout moun ki pa gen anyen yo rete nan peyi Jida a. Li ba yo jaden rezen ak lòt jaden pou yo travay. ¹¹ ¶ Men Nèbikadneza, wa lavil Babilòn, bay Neboucharadan, chèf lagad la lòd sa a pou Jeremi: ¹² -Cache kote Jeremi ye. Pran swen li byen. Pa fè l' anyen. Okontrè, tout sa l'a mande, w'a ba li l'. ¹³ Se konsa Neboucharadan, chèf lagad la, Nebouchasban, chèf nèg konfyans yo, Negal-Sarezè, chèf konseye yo, ansanm ak tout lòt chèf wa Babilòn yo ¹⁴ voye cache Jeremi nan lakou gad palè yo. Yo renmèt li nan men Gedalya, pitit Akikam, pitit pitit Chafan, ki te pou fè l' rive lakay li san danje. Se konsa Jeremi te rete nan mitan pèp la. ¹⁵ Antan Jeremi te nan prizon nan lakou gad palè yo, Seyè a te pale avè l' pou di l' konsa: ¹⁶ -Al pale ak Ebèdmelèk, moun peyi Letiopi a. W'a di li men mesaj Seyè ki gen tout pouvwa a, Bondye pèp Izrayèl la, bay: Mwen pral fè tou sa mwen te di ki gen pou rive a rive vre. Se va pou malè lavil la, se p'ap pou byen li. Lè sa a, w'a la pou wè tout bagay. ¹⁷ Men jou sa a m'ap sove ou. Se mwen menm Seyè a ki di sa. Ou p'ap tonbe nan men moun k'ap fè ou pè yo. ¹⁸ Se vre wi, m'ap sove ou, yo p'ap touye ou. W'ap sove, w'ap vivan paske ou te gen konfyans nan mwen. Wi, se mwen menm Seyè a ki di sa.

Chapter 40

¹ ¶ Seyè a pale ak Jeremi ankò apre Neboucharadan, chèf lagad la, te lage l' lavil Rama. Yo te fè Jeremi prizonnye ansanm ak tout moun lavil Jerizalèm ak moun peyi Jida yo. Yo te mete l' nan chenn ansanm ak tout moun yo t'ap depòte lavil Babilòn. ² Chèf lagad la pran Jeremi sou kote, li di l' konsa: ³ -Seyè a, Bondye ou la, te di li t'ap fè malè sa a tonbe sou peyi a. Koulye a sa li te di li t'ap fè a, li fè l'. Sa ki lakòz? Se paske pèp ou a te antò devan Seyè a, yo pa t' vle koute l'. ⁴ Atòkile, m'ap wete chenn ki nan ponyèt ou yo, m'ap lage ou. Si ou vle vini ak mwen lavil Babilòn, ou mèt

vini, m'a pran swen ou. Men, si ou pa vle tou, ou pa blije vini. Tout peyi a devan ou, ou mèt ale
⁵ kote ou vle. Lè Neboucharadan wè Jeremi pa reponn, li di l' ankò: -Tounen al jwenn Gedalya, pitit Akikam, pitit pitit Chafan, lavil Mispa. Se li menm wa Babilòn lan mete pou gouvènè tout lavil nan peyi Jida yo. W'a rete avè l' nan mitan pèp la. Ou gen dwa tou ale kote ou vle nan peyi a.
⁶ Lèfini, li bay Jeremi yon kado ansanm ak kèk pwovizyon pou l' manje, epi li voye l' ale. Jeremi al jwenn Gedalya, pitit Akikam lan, lavil Mispa. Li rete la avè l' ansanm ak moun yo te kite nan
⁷ peyi a. ¶ Te gen yon rès lame peyi Jida a ki te andeyò lavil Jerizalèm. Chèf yo ansanm ak sòlda yo vin konnen wa Babilòn lan te mete Gedalya, pitit Akikam lan, chèf sou tout peyi a. Wa a te kite tout moun yo pa t' depòte yo sou kont li, tout moun pòv yo, fanm kou gason, granmoun kou timoun.
⁸ Se konsa, Izmayèl, pitit Netanya, Jokanan ak Jonatan, pitit Karejak, Seraya, pitit Tannoumèt, pitit Efayi yo, moun lavil Netofa, ansanm ak Jezanya, pitit Makat, yo moute lavil Mispa, y' al jwenn
⁹ Gedalya ansanm ak tout sòlda yo. Gedalya di yo konsa: -Mwen ban nou pawòl mwen, nou pa bezwen pè soumèt nou devan moun Babilòn yo. Rete nan peyi a. Sèvi wa Babilòn lan. Tout bagay
¹⁰ va mache byen pou nou. Mwen menm, m'ap rete isit lavil Mispa. Konsa, m'a pale pou nou ak moun Babilòn yo lè y'a vini. Nou menm, nou mèt al fè rekòt rezen, lòt fwi ak lwil. Mete yo nan
¹¹ depo. Nou mèt rete nan lavil kote n'a ye yo. Konsa tou, tout jwif ki te nan peyi Moab, nan peyi Amon, nan peyi Edon ak nan tout lòt peyi vin konnen wa Babilòn lan te penmèt kèk jwif rete nan
¹² peyi Jida, li te mete Gedalya, pitit Akikam, pitit pitit Chafan, chèf sou yo tout. Yo kite peyi kote yo te gaye yo, yo tounen nan peyi Jida, yo vin jwenn Gedalya lavil Mispa. Yo fè yon bèl rekòt
¹³ rezen ak lòt fwi an kantite. Yon jou, Jokanan, pitit Karejak, ansanm ak tout lòt chèf lame ki te andeyò yo vin jwenn Gedalya lavil Mispa.
¹⁴ Yo di l' konsa: -Ou pa konnen Baalis, wa peyi Amon
¹⁵ an, voye Izmayèl, pitit Netanya a, pou touye ou? Men Gedalya pa t' vle kwè yo. Lè sa a, Jokanan al jwenn Gedalya an kachèt lavil Mispa, li di l' konsa: -Eske ou vle m' al touye Izmayèl pou ou? Pesonn p'ap konn anyen. Poukisa pou ou kite l' ansasinen ou? Si li touye ou, sa pral lakòz tout jwif ki te sanble bò kote ou yo pral gaye ankò. Sa pral lakòz ti ponyen moun ki rete nan peyi Jida a rive
¹⁶ disparèt. Men, Gedalya reponn: -Pa fè sa, monchè! Sa w'ap di sou Izmayèl la pa vre!

Chapter 41

¹ ¶ Nan setyèm mwa a, Izmayèl, pitit Netanya, pitit pitit Elichama, rive Mispa ansanm ak dis lòt moun pou li vin wè Gedalya, pitit Akikam. Izmayèl te yon ti fanmi wa a. Se te yon gwo chèf

nan gouvènman wa a. Pandan yo chita konsa sou tab ap manje lakay Gedalya, ² Izmayèl leve ansanm ak dis moun li yo, yo rale nepe yo, yo touye Gedalya, nonm wa Babilòn lan te mete pou gouvènmen peyi a. ³ Apre sa, yo touye tout gason jwif ki te lavil Mispa avèk Gedalya. Yo touye tout sòlda moun Babilòn ki te la tou. ⁴ Yo te fin ansasinen Gedalya a depi de jou, nouvèl la pa t' ankò gaye. ⁵ Se konsa katreven gason ki te soti lavil Sichèm, lavil Silo ak lavil Samari vin rive. Yo te koupe tout bab nan figi yo, yo te gen rad chire sou yo, tout kò yo te plen mak kouto. Yo te pote grenn jaden ak lansan pou ofri nan tanp Jerizalèm lan. ⁶ Izmayèl kite Mispa, li soti al kontre yo, de ran dlo nan je l'. Lè li rive sou yo li di konsa: -Vini non, ann al kay Gedalya! ⁷ Men rive yo rive nan mitan lavil Mispa, Izmayèl ansanm ak mesye l' yo touye yo, lèfini yo lage kadav yo nan yon sitèn. ⁸ Men gen dis nan moun sa yo ki te di Izmayèl konsa: -Pa touye nou paske nou gen pwovizyon kache nan jaden nou yo, ble, lòj, lwil ak siwo myèl. Se konsa Izmayèl pa t' touye sa yo ansanm ak lòt yo. ⁹ Sitèn kote Izmayèl te jete kadav moun li te touye yo, se gwo sitèn wa Asa te fè fouye lè Basa, wa peyi Izrayèl la, te vin atake l' la. Se sitèn sa a Izmayèl te plen ak kadav yo. ¹⁰ Apre sa, Izmayèl mache pran tout pitit fi wa a ansanm ak tout rès moun ki te lavil Mispa, moun Neboucharadan, chèf lagad la, te kite sou kont Gedalya. Li fè yo prizonye. Li pati ak yo, li pran direksyon peyi moun Amon yo. ¹¹ ¶ Jokanan, pitit Karejak la, ansanm ak lòt chèf lame ki te avè l' yo vin konnen tout mechanste Izmayèl, pitit Netanya a, te fè. ¹² Yo pran tout sòlda yo, yo pati dèyè l'. Yo jwenn li bò gwo letan Gabawon an. ¹³ Lè moun Izmayèl te fè prizonye yo wè Jokanan avèk chèf lame ki avè l' yo, yo te kontan. ¹⁴ Lè sa a, tout moun Izmayèl te fè prizonye lavil Mispa yo kase tèt tounen, yo kouri vin jwenn Jokanan. ¹⁵ Izmayèl menm ansanm ak wit nan moun pa l' yo kouri pou Jokanan, yo chape kò yo nan peyi Amon an. ¹⁶ Apre sa, Jokanan ak chèf lame ki te avè l' yo pran sou kont yo tout moun Izmayèl te fè prizonye lavil Mispa apre li menm Izmayèl te fin touye Gedalya a. Jokanan pran avè l' gason yo, ki vle di sòlda yo, fanm yo, timoun yo, moun konfyans yo, tout moun li te jwenn lavil Gabawon. ¹⁷ Yo fè yon ti rete nan lotèl Kimean an, toupre lavil Betleyèm. Yo te fè lide desann peyi Lejip ¹⁸ paske yo te pè moun Babilòn yo, depi Izmayèl te fin touye Gedalya, moun wa Babilòn lan te mete pou gouvènmen peyi a.

Chapter 42

¹ ¶ Lè sa a, tout chèf lame yo ansanm ak Jokanan, pitit Kareja a, ak Jezanya, pitit Ochaya a ak
 tout moun yo, gran kou piti, y' al bò kot pwofèt Jeremi, ² yo di l' konsa: -Tanpri, fè sa n'ap mande
 ou la a. Lapriyè Seyè a, Bondye ou la, pou nou. Lapriyè pou ti rès moun ki chape yo. Paske, jan
 ou ka wè l' la, nou te anpil, koulye a se yon ti ponyen moun nou ye. ³ Mande Seyè a, Bondye ou
 la, pou l' fè nou konnen ki chimen pou n' pran, kisa pou n' fè. ⁴ Jeremi reponn yo: -Dakò. Mwen
 pral lapriyè Seyè a, Bondye nou an, jan nou mande m' lan. Apre sa, m'a fè nou konnen repons Seyè
 a ban nou. Mwen p'ap kache nou anyen. ⁵ Yo di Jeremi konsa: -Si nou pa fè tou sa Seyè a, Bondye
 ou la, va di ou pou nou fè, se pou Seyè a kanpe pou l' akize nou. Lè sa a, l'a gen rezon l' nan pla
 men l'. ⁶ Se nou menm ki mande ou pou lapriyè Seyè a pou nou. Kit sa fè nou plezi, kit sa pa fè
 nou plezi, se pou nou koute sa Seyè a, Bondye nou an, va di nou. Konsa, tout bagay va mache byen
 pou nou, si nou koute l'. ⁷ ¶ Dis jou apre, Seyè a bay Jeremi repons lan. ⁸ Jeremi rele Jokanan, pitit
 Karejak la, ak tout lòt chèf lame ki te avè l' yo ansanm ak tout pèp la, gran kou piti. ⁹ Li di yo:
 -Nou te voye m' al lapriyè Seyè a, Bondye pèp Izrayèl la, pou m' te mande l' kichòy pou nou. Men
 repons li bay: ¹⁰ Si nou vle rete nan peyi sa a, m'ap mete nou kanpe ankò. Mwen p'ap kraze nou.
 M'ap fè nou pran rasin ankò, mwen p'ap dechouke nou. Paske malè mwen te voye sou nou an ban
 m' gwo lapenn. ¹¹ Koulye a, nou pa bezwen tranble devan wa Babilòn lan. Nou pa bezwen pè l'.
 Se mwen menm, Seyè a, k'ap pale ak nou. Mwen la avèk nou pou sove nou, pou delivre nou anba
 men l'. ¹² Paske mwen gen bon kè, m'a fè l' gen pitye pou nou, l'a kite nou tounen lakay nou. Se
 mwen menm Seyè a ki di sa. ¹³ Jeremi di yo ankò: -Si nou pa koute sa Seyè a, Bondye nou an, fè
 nou konnen, si nou di: Non, nou p'ap rete nan peyi a! ¹⁴ Non! Se nan peyi Lejip nou pral viv, kote
 nou p'ap wè lagè, kote nou p'ap tande twonpèt k'ap bay siyal lagè a, kote nou p'ap soufri grangou.
 Se la pou n' al viv. ¹⁵ Enben, nou menm ti ponyen moun ki rete nan moun Jida yo, koute byen sa
 Seyè a di nou: Men mesaj Seyè ki gen tout pouvwa a, Bondye pèp Izrayèl la bay: Si nou soti vre
 pou nou ale nan peyi Lejip, si nou desann nan peyi sa a pou nou rete, ¹⁶ enben, lagè k'ap fè nou
 pè a ap rive jwenn nou jouk laba nan peyi Lejip la. Grangou k'ap ban nou tout tèt chaje sa yo pral
 swiv nou jouk laba a. N'ap mouri nan peyi Lejip. ¹⁷ Tout moun ki soti vre pou y' ale nan peyi Lejip
 pou yo ka rete viv la pral mouri nan lagè, grangou pral touye yo, move maladi ap fini ak yo nèt.
 Lè sa a, nou yonn p'ap chape anba malè m'ap voye sou nou an. ¹⁸ Wi! Men mesaj Seyè ki gen tout
 pouvwa a, Bondye pèp Izrayèl la, bay ankò: Menm jan mwen te move anpil sou moun lavil Jerizalèm
 yo, se menm jan an tou m'ap move anpil sou nou si nou desann peyi Lejip. Konsa, moun va sezi
 wè nou, y'a vire tèt yo pou yo pa gade nou. Y'a pase nou nan betiz, y'a sèvi ak non nou pou bay

madichon. Nou p'ap janm wè peyi sa a ankò. ¹⁹ Wi, men sa Seyè a voye fè nou konnen, nou menm
 ti ponyen ki rete nan peyi Jida a. Piga nou desann nan peyi Lejip. Mwen tou pale nou jòdi a. ²⁰ Se
 pi gwo erè nou te fè. Lè nou te mande m' al lapriyè Seyè a, Bondye nou an, pou nou, nou te di m':
 Lapriyè li pou nou. W'a fè nou konnen tou sa l'a di ou, epi n'a fè l'. ²¹ Jòdi a, mwen fè nou konnen
 repons li, men nou pa vle koute anyen nan sa li voye m' di nou an. ²² Enben, konn sa byen, nou
 pral mouri nan lagè, grangou ap touye nou, move maladi ap fini ak nou nan peyi kote nou vle al
 rete a.

Chapter 43

¹ ¶ Lè Jeremi fin di pèp la tou sa Seyè a, Bondye yo a, te voye l' di yo, ki vle di tout pawòl ki
 ekri pi wo a, ² Azarya, pitit Ochaya a, Jokanan, pitit Kareyak la, ansanm ak tout lòt mesye awogan
 yo di Jeremi konsa: -Manti! Seyè a, Bondye nou an, pa kras voye ou di nou pa desann al rete nan
 peyi Lejip. ³ Se Bawouk, pitit Nerija a, k'ap moute tèt ou sou nou. Li ta renmen lage nou nan men
 moun Babilòn yo pou yo touye nou, pou yo depòte nou lavil Babilòn. ⁴ Se konsa, Jokanan, pitit
 Kareyak la, lòt chèf lame yo ansanm ak tout rès pèp la derefize koute pawòl Seyè a ki te di yo pou
 yo rete nan peyi Jida a. ⁵ Lè sa a, Jokanan ak tout lòt chèf lame yo pran dènnye moun ki te rete nan
 peyi Jida a, yo pati. Yo mennen tout moun ki te kite lòt peyi kote yo te gaye yo pou tounen vin viv
 nan peyi Jida a, ⁶ fanm kou gason, tout timoun yo, tout pitit fi wa a. Yo mennen tout moun
 Neboucharadan, chèf lagad la, te kite avèk Gedalya, pitit Akikam, pitit pitit Chafan. Yo pran pwofèt
 Jeremi ansanm ak Bawouk, pitit Nerija a, avèk yo tou. ⁷ Yo pa koute lòd Seyè a, yo rive jouk lavil
 Tapanès. ⁸ ¶ Antan yo te lavil Tapanès, Seyè a pale ak Jeremi, li di l' konsa: ⁹ -Pran kèk gwo wòch,
 antere yo nan mòtye pave ki devan pòt pou antre kay farawon an, lavil Tapanès. W'a fè l' pou moun
 peyi Jida yo wè ou ap fè l'. ¹⁰ Lèfini, w'a di yo: men mesaj Seyè ki gen pouvwa a, Bondye pèp
 Izrayèl la, bay: Mwen pral voye chache sèvitè m' lan, Nèbikadneza, wa Babilòn lan, mwen pral
 enstale fotèy li a nan anplasman kote wòch yo antere isit la. Se la l'a moute tant li a anwo yo. ¹¹ Lè
 l'a rive, l'ap kraze peyi Lejip. Moun ki pou mouri anba move maladi va mouri, moun yo gen pou
 depòte yo, y'a depòte yo, moun pou l' fè touye yo, l'a fè touye yo. ¹² L'a mete dife nan kay tout
 bondye moun peyi Lejip yo. L'ap boule bondye moun Lejip yo osinon l'a pran yo, l'a pote yo ale
 avè l'. Menm jan yon gadò mouton netwaye dènnye vèmen ki nan rad li, konsa tou wa a pral piye

peyi Lejip la kite l' blanch. Lèfini, l'ap vire do l' san pesonn pa di l' anyen. ¹³ L'ap kraze tout gwo moniman wòch lavil Eliopolis nan peyi Lejip, l'ap boule tout kay zidòl peyi Lejip yo.

Chapter 44

¹ ¶ Seyè a pale ak Jeremi, li ba li yon mesaj pou tout moun Jida yo ki te rete nan peyi Lejip, lavil Migdòl, lavil Tapanes, lavil Menmfis ak nan zòn lavil Patwòs. ² -Men sa Seyè ki gen tout pouvwa a, Bondye pèp Izrayèl la, voye di nou: Nou te wè tout malè mwen te fè tonbe sou lavil Jerizalèm ak sou tout lòt lavil peyi Jida yo. Jouk koulye a, se yon miray kraze yo ye. Pa gen yon grenn moun ki te rete ladan yo. ³ Se paske moun ki te rete la yo te fè sa ki mal, yo te fè m' fache anpil sou yo. Yo t' al ofri lansan bay lòt bondye, yo t' al sèvi bondye ni yo menm, ni papa yo, ni granpapa yo pa t' janm konnen. ⁴ Mwen pa t' janm sispann voye sèvitè m' yo, pwofèt yo, pou di yo manyè sispann fè vye bagay derespektan yo t'ap plede fè a, bagay mwen pa ka wè devan je m'. ⁵ Men yo pa t' koute m'. Pawòl la antre nan yon zòrèy li soti nan yon lòt. Yo derefize chanje. Yo ⁶ donneren pi mal nan fè mechanste yo, nan ofri lansan bay bondye lòt nasyon yo. Lè sa a, mwen move, mwen fè kòlè. Mwen lage yon dife sou lavil Jida yo ak nan tout lari lavil Jerizalèm. Se vye ⁷ kay kraze san pesonn ladan yo ki rete, jan nou ka wè sa jòdi a. Enben, koulye a, mwen menm Seyè ki gen tout pouvwa a, Bondye pèp Izrayèl la, m'ap mande nou: Poukisa n'ap fè tèt nou mal konsa? Se vle nou pa vle kite pesonn, ni fanm ni gason, ni timoun, ni ti bebe, nan pèp Jida a ankò? ⁸ Nou pa vle pesonn chape? Nou deyò pou nou fè m' fache ak sa n'ap fè a, lè n'ap ofri lansan bay bondye lòt nasyon yo, isit la nan peyi Lejip kote nou vin viv la? Nou vle fini ak tèt nou pou tout ⁹ nasyon sou latè ka pase nou nan betiz, pou yo pran non nou pou bay moun madichon? Gen lè nou bliye tout move zak nou tout, depi zansèt nou yo, pran wa peyi Jida yo ak madanm yo rive sou ¹⁰ nou menm ansanm ak madanm pa nou yo, nou fè nan peyi Jida ak nan lari Jerizalèm? Jouk jòdi a nou yonn pa règrèt sa nou te fè. Pesonn pa gen krentif pou mwen, pesonn pa soti pou yo viv dapre ¹¹ lwa ak lòd mwen te mete devan nou ak devan zansèt nou yo. Se poutèt sa, men sa mwen menm Seyè ki gen tout pouvwa a, Bondye pèp Izrayèl la mwen di: M'ap vire do ban nou, m'ap voye malè ¹² sou nou, m'ap detwi tout peyi Jida a. M'ap pran rès moun Jida yo, sa ki te pran desizyon desann al viv nan peyi Lejip la, yo tout pral mouri. Yo tout, gran kou piti, y'ap mouri nan peyi Lejip. Genyen k'ap mouri nan lagè, genyen k'ap mouri grangou. Moun va sezi wè yo, y'a vire tèt yo pou yo pa ¹³ gade yo, y'a sèvi ak non yo pou bay madichon, y'a pase yo nan betiz. M'ap pini tout moun Jida

k'ap viv nan peyi Lejip la ak lagè, grangou ak move maladi, menm jan mwen te pini moun lavil
¹⁴

Jerizalèm yo. Nan ti rèss moun Jida ki rete yo, sa ki te desann al viv nan peyi Lejip la, yo yonn
 p'ap kouri chape, yo yonn p'ap sove. Kanta pou tounen al viv nan peyi Jida a ankò, jan yo ta vle l'

la, yo pa ladan l'. Yo yonn pa t' tounen, an wetan de twa ki va kouri chape kò yo. ¶ Lè sa a, tout
¹⁵
 mesye ki te konnen madanm yo te nan ofri lansan bay lòt bondye yo, tout medam ki te reyini la yo,
 ansanm ak tout lòt moun pèp Izrayèl la ki t'ap viv depi lontan nan peyi Lejip nan zòn Patwòs la,

yo tout yo reponn Jeremi: -Nou p'ap koute pawòl w'ap di nou la a, atout ou pale nan non Seyè
¹⁶

a. N'ap toujou fè sa nou te pwomèt fè a. N'ap ofri lansan ak diven bay Astate, larenn syèl la, jan
¹⁷
 nou te toujou fè l' jouk jòdi a, menm jan zansèt nou yo, wa nou yo ak chèf nou yo te konn fè l' nan
 lavil peyi Jida yo ak nan tout lari Jerizalèm. Lè sa a, nou te gen kont manje pou n' manje, tout zafè

nou te mache byen. Nou pa t' gen pwoblèm. Men, depi nou sispann ofri lansan ak diven bay
¹⁸

larenn syèl la, nou pa gen anyen. Lagè ak grangou ap fini ak nou. Medam yo menm poutèt pa
¹⁹
 yo di: -Lè n'ap fè gato ki gen fòm larenn syèl la, lè n'ap ofri lansan ak diven pou li, mari nou toujou

dakò ak sa n'ap fè. ¶ Lè sa a, Jeremi pale ak tout moun sa yo, fanm kou gason, ki te fè l' repons
²⁰

sa yo, li di yo konsa: -Wi, nou menm, zansèt nou yo, wa nou yo, chèf nou yo ak tout lòt moun
²¹
 pèp Izrayèl yo te boule lansan nan tout lavil peyi Jida ak nan tout lari Jerizalèm. Men, pa konprann

Seyè a pa t' konn sa, osinon li bliye sa. Non. Seyè a pa t' ka sipòte move lajisman ak eskandal
²²
 nou yo ankò. Se poutèt sa, jòdi a peyi a fini. Li kraze nèt san pesonn ladan l'. Tout moun sèvi ak

non li pou bay madichon, jan nou wè l' jòdi a. Se paske nou te ofri lansan bay lòt bondye, se
²³
 paske nou fè peche kont Seyè a, se paske nou pa t' koute sa li t'ap di nou, se paske nou pa t' mache

dapre lwa li te ban nou, dapre lòd ak kòmandman li yo kifè malè sa a tonbe sou nou jòdi a. Apre
²⁴
 sa, Jeremi pale ak tout pèp la, sitou ak medam yo. Li di yo konsa: -Nou tout moun peyi Jida ki isit

nan peyi Lejip la, koute mesaj Seyè a. Men sa Seyè ki gen tout pouvwa a, Bondye pèp Izrayèl
²⁵
 la, di nou. Se nou menm ak tout madanm nou yo ki di ak pwòp bouch nou n'ap kenbe angajman
 nou te pran ak larenn syèl la, n'ap toujou ofri lansan ak diven ba li. Lèfini, se sa nou fè vre. Enben,

kenbe angajman nou yo, fè sa nou te pwomèt la. Men koulye a, koute sa m'ap di nou, nou menm
²⁶
 moun Jida yo k'ap viv nan peyi Lejip la. Se mwen menm Seyè a k'ap pale, mwen fè sèman sou tèt
 mwen: nan tout peyi Lejip la p'ap gen pesonn nan moun Jida yo ki pou pran non mwen pou fè

sèman, pou yo di: Nan non Seyè a, Bondye vivan an! M'ap veye pou se malè ase ki pou rive
²⁷
 nou. Mwen p'ap voye ankenn bon bagay ban nou. Wi, dènye moun Jida k'ap viv nan peyi Lejip la

pral disparèt, kit se nan lagè, kit se nan grangou, jouk p'ap rete yonn ankò. Gen yon ti ponyen
²⁸
 moun ase ki va chape nan lagè a. Y'a kite peyi Lejip, y'a tounen nan peyi jida. Lè sa a, ti rèss ki va
 rete nan moun pèp Jida ki te desann al viv nan peyi Lejip la va wè kilès ki te gen rezon, nou menm

osinon mwen menm.²⁹ Se mwen menm Seyè a ki di sa: m'ap ban nou yon siy, m'ap pini nou isit
 la menm. Konsa, n'a konnen malè mwen te pwomèt m'ap voye sou nou an rive vre.³⁰ Se mwen
 menm Seyè a ki di sa. Mwen pral lage farawon Ofra, wa peyi Lejip la, nan men lènmi ki soti pou
 touye l' yo, menm jan mwen te lage Sedesyas, wa peyi Jida a, nan men Nèbikadneza, wa peyi
 Babilòn, lènmi ki te soti pou touye l' la tou.

Chapter 45

¹
 ¶ Yon lè, antan Bawouk, pitit Nerija a, t'ap kouche sou papye mesaj pwofèt Jeremi t'ap repete
 pou li yo, Jeremi ba li yon mesaj pou li menm menm. Lè sa a, Jojakim, pitit Jozyas, te sou katriyèm
 lanne depi li te wa nan peyi Jida. Jeremi di Bawouk konsa:² -Seyè a, Bondye pèp Izrayèl la, bay
 yon mesaj sou ou, Bawouk.³ Ou te di: Ala devenn pou mwen! Seyè a mete lafliksyon sou traka
 m' te genyen deja. Mwen bouke plenn, mwen pa jwenn yon ti soulajman menm!⁴ Enben, men
 mesaj Seyè a ban mwen pou ou: Se mwen menm Seyè k'ap demoli tou sa mwen te bati. m'ap
 derasinen tou sa mwen te plante. M'ap fè sa toupatou sou latè!⁵ Epi ou menm, w'ap mande pou yo
 fè pa ou, w'ap mande yon soulajman pou tèt ou ase? Pa mande anyen. M'ap voye malè a sou tout
 moun sou latè. Se mwen menm Seyè a ki di sa. Men ou menm, ou mèt ale kote ou vle, ou p'ap
 mouri, w'ap sove lavi ou!

Chapter 46

¹
 ¶ Men mesaj Seyè a bay pwofèt Jeremi sou lòt nasyon yo:² Mesaj sou peyi Lejip. Men sa li
 di sou lame farawon Neko, wa peyi Lejip ki te lavil Kakemich, bò larivyè Lefrat. Se lame sa a
 Nèbikadneza, wa Babilòn lan, te bat byen bat. Lè sa a, Jojakim, pitit Ozyas la, te gen katran depi
 li te wa nan peyi Jida.³ Ofisye lame Lejip la ap bay lòd: -Pare plak pwotèj yo, gwo kou piti, pou
 pare kou! Annavan pou batay la!⁴ Sele chwal yo. Kavalye, moute sou yo. Mete nou an ran, kas
 nou nan tèt nou. File pwent frenn nou yo. Mete rad an fè pou fè lagè nou sou nou.⁵ Seyè a ap
 mande: -Kisa nou wè la a? Yo pè, y'ap kouri tounen, yo kraze vanyan sòlda yo anba kou! Y'ap
 kouri met deyò san gad dèyè. Toupatou tout moun pè.⁶ Sa ki kouri yo p'ap sove, vanyan sòlda yo
 p'ap chape. Nan nò, bò larivyè Lefrat la, yo bite, yo tonbe.⁷ Kilès sa a k'ap vini tankou dlo nan

⁸
 larivyè Nil k'ap desann, tankou yon rivyè k'ap anvayi toupatou? Se peyi Lejip k'ap gonfle kò l' konsa, tankou dlo larivyè Nil, tankou yon rivyè k'ap anvayi toupatou. Lejip te di: M'ap gonfle, m'ap

⁹
 kouvri tout latè. M'ap kraze tout lavil yo ansanm ak tout moun ki rete ladan yo. Bay chwal yo lòd pou yo ale. Bay cha lagè yo lòd pou yo woule. Voye sòlda yo al goumen: moun peyi Soudan ak moun peyi Liban yo ak plak pwotèj yo sou bra yo, ansanm ak moun peyi Lidi yo ki gen ladrès

¹⁰
 pou sèvi ak banza. Paske, sa se jou Seyè ki gen tout pouvwa a. Se jou revanj li. Li pral tire revanj li sou lènmi l' yo. Nepe li pral touye yo jouk li pa kapab ankò. Li pral bwè san yo jouk vant li plen. Se jou y'ap touye bèt yo ofri pou Seyè a, Bondye ki gen tout pouvwa a, nan nò, bò larivyè Lefrat.

¹¹
 Nou menm moun peyi Lejip, moute nan peyi Galarad, al chache renmèd! Tout renmèd nou yo

¹²
 p'ap fè anyen pou nou. Pa gen geri pou nou. ¶ Moun lòt nasyon yo pran nouvèl gwo wont ki rive nou an. Toupatou sou latè yo tandè rèl nou. Vanyan sòlda yo ap bite yonn sou lòt, y'ap tonbe

¹³
 atè ansanm. Men mesaj Seyè a te bay pwofèt Jeremi lè Nèbikadneza, wa Babilòn lan, te vin

¹⁴
 atake peyi Lejip la: -Fè piblikasyon nan tout peyi Lejip la. Fè tout moun lavil Migdòl, lavil Menmfis ak lavil Tapanès konnen. Di yo: Leve non, pare pou defann nou. Lagè fin detwi tou sa ki

¹⁵
 bò kote nou. Poukisa Apis, towò bèf ki bondye nou an, kouri met deyò? Poukisa towò bèf nou

¹⁶
 an pa kenbe tèt? Se Seyè a ki lage l' atè! Li fè sòlda yo bite, yo tonbe yonn sou lòt. Yonn ap di

¹⁷
 lòt: Leve non! Ann tounen lakay nou, nan peyi nou! Ann chape anba nepe lènmi yo! Yo bay

¹⁸
 farawon an, wa Lejip la, yon lòt non. Yo rele l': Paladò. Li kite lè a pase! Mwen menm Seyè ki gen tout pouvwa a, se mwen ki wa. Men sa m' di: Se mwen ki Bondye vivan an. Moun k'ap vini pou atake nou an ap tankou mòn Tabò ki nan mitan lòt mòn yo, tankou mòn Kamèl ki kanpe byen

¹⁹
 wo nan lanmè a. Nou menm moun peyi Lejip, mare pakèt nou pou yo depòte nou! Lavil Menmfis

²⁰
 pral tounen yon dezè, yon bann miray kraze, san pesonn ladan l'. Peyi Lejip te tankou yon bèl

²¹
 gazèl. Men, yon tanwouan soti nan nò vin atake l'. Peyi Lejip te pran yon bann moun lòt nasyon sèvi sòlda nan lame li. Men, yo te gra tankou towò chatre ki nan manje. Yo menm tou yo pa kanpe goumen. Yo vire do yo, yo tout kouri met deyò, lè jou malè yo rive sou yo, lè jou chatiman yo a

²²
 tonbe sou yo. Peyi Lejip ap tankou koulèv k'ap kouri pou moun, l'ap kouri ale lè lame lènmi l'

²³
 yo ap pwoche. Y'ap atake l' ak rach tankou moun k'ap koupe pyebwa. Yo mete tout gwo rakbwa yo atè, rakbwa kote moun pa t' ka antre a. Lènmi yo anpil, ou pa ka konte yo. Sòlda yo pi plis pase

²⁴
 yon lame krikèt. Se Seyè a menm ki di sa. Moun Lejip yo wont, pèp ki soti nan nò a kraze yo.

²⁵
 Men sa Seyè ki gen tout pouvwa a, Bondye pèp Izrayèl la, di ankò: -Mwen pral pini Amon,

bondye lavil Tèb la. Mwen pral pini farawon an, pèp peyi Lejip la, ak tout chèf li yo ak tout bondye l' yo. Wi, mwen pral pini farawon an ansanm ak tout moun ki te mete konfyans yo nan li. ²⁶ M'ap lage yo nan men moun ki soti pou touye yo a, nan men Nèbikadneza, wa Babilòn lan, ak lame moun pa l' yo. Men, apre sa, moun va rete nan peyi Lejip la tankou nan tan lontan. Se mwen menm Seyè ²⁷ a ki di sa. Nou pa bezwen pè, nou menm pitit Jakòb, sèvitè mwen an. Nou pa bezwen tranble, nou menm moun pèp Izrayèl yo. M'ap vin delivre nou nan peyi lwen sa yo. M'ap vin sove pitit nou yo nan peyi kote yo te depòte nou an. N'ap tounen lakay nou pou nou viv ak kè poze, san pesonn pa chache nou kont ankò. ²⁸ Nou menm pitit Jakòb, sèvitè mwen an, nou pa bezwen pè. M'ap vin jwenn nou, m'ap sove nou. Se Seyè a menm ki di sa. M'ap disparèt tout nasyon kote mwen te gaye nou yo. Nou menm, mwen p'ap detwi nou. Men, pou pini se pou m' pini nou, jan sa dwe fèt. Mwen p'ap kite anyen pou nou.

Chapter 47

¹ ¶ Men mesaj Seyè a te bay pwofèt Jeremi sou peyi Filisti a, anvan farawon an t' al atake Gaza.

² Seyè a di konsa: -Gade! Bò nan nò, dlo yo ap gonfle, y'ap fè yon gwo lavalas k'ap desann, y'ap anvayi peyi a, y'ap kouvri tou sa ki ladan l'. Y'ap anvayi lavil yo ak tout moun ladan yo. Moun ap rele, y'ap plenn. Tout moun nan peyi a nan gwo lapenn. ³ Lè y'a tandè bri zago chwal yo ap frape tè a, bri cha lagè yo k'ap kouri vini ak bri wou yo k'ap woule atè a, papa p'ap ka fè anyen pou pitit yo, tèlman y'a dekouraje. ⁴ Lè a rive pou yo ravaje tout peyi Filisti a nèt, pou yo disparèt tout rès moun ki t'ap bay lavil Tir ak lavil Sidon konkou. Se mwen menm Seyè a k'ap detwi tout moun Filisti yo, tout moun ki soti nan lil Krèt la. ⁵ Moun Gaza yo nan gwo lapenn, yo kale tèt yo. Moun Askalon yo pa ka pale. Kilè rès moun nan fon Filisti a va sispann kòche kò yo ak kouto pou plenn sò mò yo? ⁶ Adye! Kilè nepe Seyè a va sispann touye moun? Tounen nan djenn ou! Rete tou dousman, poze kò ou la! ⁷ Men, ki jan pou li fè poze lè Seyè a ba li lòd travay? Li gen pou l' ale jouk lavil Askalon dèyè moun ki rete bò lanmè a. Se la mwen voye l' ale.

Chapter 48

¹ ¶ Men mesaj Seyè ki gen tout pouvwa a, Bondye pèp Izrayèl la, bay sou peyi Moab la: -Ala malè pou moun lavil Nebo yo! Yo ravaje lavil la nèt ale. Moun lavil Kiryatayim yo wont! Lènmi

anvayi lavil la, yo pran gwo fò a, yo kraze l' ratè!² Peyi Moab la pèdi pouvwa li. Nan lavil Esbon
 yo fè plan pou yo detwi Moab. Yo di: Ann ale, ann disparèt peyi a sou latè! Yo fè lavil Madmèn
 pe bouch li. Yon gwo lame ap mache pran l'!³ Moun lavil Owonayim yo ap rele: Men y'ap ravaje
 nou! Y'ap fè malè sou nou!⁴ Yo kraze peyi Moab. Tout pitit li yo ap rele!⁵ Se dlo nan je y'ap
 moute lavil Loukit. Sou tout wout pou desann Owonayim, se gwo rèl pou malè ki rive yo!⁶ Y'ap
 rele: Kouri non, sove lavi nou! Al cache tankou bourik mawon nan dezè a.⁷ Ou te mete konfyans
 ou nan fòs ou ak nan richès ou yo! Ou menm tou, lènmi ap anvayi ou! Y'ap depòte Kemòch, bondye
 ou la, ansanm ak tout pè li yo ak tout chèf li yo.⁸ Malè pral tonbe sou tout lavil nou yo. Yo yonn
 p'ap chape anba l'. L'ap fini ak sa ki nan fon yo. L'ap ravaje sa ki sou platon yo. Se Seyè a menm
 ki di sa.⁹ Pare yon mab pou mete sou tonm Moab. Talè konsa yo pral detwi l' nèt. Tout lavil peyi
 Moab yo fin kraze. P'ap gen yon moun rete la ankò.¹⁰ Madichon pou moun ki pote negligans nan
 fè travay Seyè a! Madichon pou moun ki derefize touye nan lagè a!¹¹ Peyi Moab te toujou viv
 san ankenn danje depi tout tan. Yo pa janm depòte moun li yo. Li te tankou diven yo kite poze nan
 barik, san yo pa janm vide l' sot nan yon veso mete l' nan yon lòt. Se konsa li pa janm pèdi gou l'.
 Li pa janm vante.¹² Men lè a rive koulye a, se Seyè a menm ki di sa. Mwen pral voye moun pou
 yo vide peyi Moab la tankou diven. Yo pral devide veso yo. Yo pral kraze barik yo an miyèt moso.
¹³ Moun peyi Moab yo pral wont Kemòch, bondye yo a, menm jan moun fanmi Izrayèl yo te wont
 bondye lavil Betèl ki te tout konfyans yo a.¹⁴ ¶ Ki jan nou ka fè di: Nou se vyanan gason, sòlda
 brave danje ki konn fè lagè?¹⁵ Yo fini ak peyi Moab. Yo anvayi tout lavil li yo. Yo ansasinen tout
 jenn gason ki pi bon lakay li yo. Se mwen menm Wa a, mwen menm yo rele Seyè ki gen tout
 pouvwa a, ki di sa.¹⁶ Jou pou yo fini ak Moab la ap pwoche. Malè ki pral tonbe sou Moab la pa
 lwen rive.¹⁷ Nou menm, vwazen l' yo, plenn sò li! Nou tout ki te konnen jan l' te ye a, nou mèt
 di: Gade jan yo kraze gwo pouvwa li a! Bèl baton kòmandman ki te nan men l' lan disparèt.¹⁸ Nou
 menm k'ap viv lavil Dibon, desann sou bèl fotèy premye klas nou an. Mete dèyè nou atè nan pousyè
 a. Paskè moun ki te fini ak Moab la ap vin pou nou. L'ap kraze tout gwo fò nou yo.¹⁹ Nou menm
 k'ap viv lavil Awoyè. Rete sou bò wout la tann. Mande moun k'ap kouri met deyò yo sa ki pase.
²⁰ Y'a reponn ou: Peyi Moab tonbe! Plenn sò li, pete rèl pou li: Yo fè l' wont! Fè tout moun ki rete
 bò ravin Anon an konnen yo ravaje peyi Moab la.²¹ Jou jijman an rive pou lavil yo ki sou platon
 an: Olon, Jasa ak Mefat,²² Didon, Nebo ak Bèt-Diblatayim,²³ Kiryatayim, Bèt-Gamoul, Bèt

²⁴ Meyon, Keriyòt, Bozra. Jijman rive sou tout lavil peyi Moab yo, kit sa ki toupre, kit sa ki byen
²⁵ lwen. Yo kraze lògèy moun Moab yo. Yo kraze kouraj yo. Se mwen menm Seyè a ki pale.
²⁶ Seyè a di ankò: -Fè lavil Moab sou, paske li te kenbe tèt avè m'. Se pou Moab woule nan vonmi
²⁷ l'. Li menm tou, se pou yo pase l' nan rizib. Chonje jan nou te konn ap pase pèp Izrayèl la nan
rizib. Eske nou te janm bare yo ap fè bann ak vòlò kifè chak fwa n'ap pale sou yo, n'ap souke tèt
²⁸ nou, n'ap di podjab pou yo? Nou menm moun Moab, kite lavil nou yo, al rete nan twou wòch.
²⁹ Fè tankou ranmye ki fè nich yo nan twou bò falèz. Moun Moab yo se moun ki gen lògèy anpil.
Nou te konnen jan moun sa yo te gen lògèy, jan yo te awogan. Yo te kwè wa pa kouzen yo, y'ap
³⁰ gonfle lestonmak yo sou moun. Men mwen menm Seyè a, mwen konnen yo te kwè twòp nan
³¹ tèt yo. Bèl diskou yo t'ap fè yo se te pawòl nan bouch. Tou sa y'ap fè pa vo anyen. Se konsa,
³² m'ap plenn sò moun Moab yo, m'ap rele pou tout peyi Moab yo, pou moun lavil Ki-Erès yo. M'ap
kriye pou moun lavil Sibma yo plis pase jan mwen te kriye pou moun lavil Jazè yo. Lavil Sibma
te tankou yon gwo pye rezen. Branch li yo travèse lòt bò lanmè Mouri a, yo rive jouk lavil Jazè.
³³ Men koulye a, yo ravaje tout rekòt la, yo dechèpiye tout rezen nou te ranmase yo. Pa gen kè
kontan ak fèt ankò nan jaden rezen peyi Moab yo. Pa gen yon degout diven ankò nan barik yo. Pa
gen yon moun k'ap travay nan moulen pou fè diven. Nou pa tande yon moun ap bay ankourajman.
³⁴ Moun Esbon yo ap rele. Yo tande rèl yo jouk lavil Elealè, jouk lavil Jaaz, depi lavil Zoa jouk
³⁵ lavil Owonayim ak Eglat-Chelichya. Ata ti dlo Nimrim lan gen pou l' cheche. M'ap disparèt
moun lavil Moab yo. Se Seyè a menm ki di sa. M'ap touye moun k'ap fè ofrann pou yo boule sou
³⁶ tèt mòn yo, moun k'ap boule lansan pou bondye yo. Se poutèt sa, kè m' ap fè m' mal anpil pou
moun Moab yo, pou moun Ki-Erès yo. M'ap plenn sò yo tankou moun k'ap jwe fif nan lantèman.
³⁷ Paske yo pèdi tou sa yo te genyen. Yo tout, yo kale tèt yo, yo koupe tout bab nan figi yo, yo
³⁸ kòche tout men yo ak kouto, yo mare sak nan ren yo. Sou teras anwo tout kay peyi Moab yo,
sou tout plas piblik, se plenn moun yo ap plenn. Mwen kraze peyi Moab tankou yon kannari pesonn
³⁹ pa bezwen ankò. Se mwen menm Seyè a ki di sa. Yo fini ak peyi Moab! Plenn sò li. Moab pèdi
pye, li wont. Tout nasyon ki nan vwazinaj li yo ap pase l' nan rizib, yo tout sezi wè sa ki rive l'.
⁴⁰ Men sa Seyè a di ankò: -Tankou yon malfini, yon lènmi ap plane ak zèl li yo gran louvri sou
⁴¹ Moab. Li pran tout lavil yo, li mete men sou tout fò yo. Jou sa a, vanyan sòlda lame Moab yo
⁴² te pè tankou yon fanm ki gen tranche. Y'ap fini ak peyi Moab la, y'ap touye dènnye moun ladan

l', paske li te kenbe tèt ak Seyè a. ⁴³ Nou menm moun Moab yo, yo pral ban nou sezisman, y'ap foye twou pou nou tonbe, y'ap pare pèlen pou nou. Se Seyè a menm ki di sa. ⁴⁴ Moun k'ap kouri pou sezisman pa pran yo pral tonbe nan twou. Lè y'a kouri soti nan twou a, y'ap pran nan pèlen. Paske dat Seyè a te fikse pou li pini Moab la rive sou li. Se Seyè a menm ki di sa. ⁴⁵ Moun k'ap kouri met deyò yo rive Esbon tou bouke. Y'ap chache pwoteksyon lavil Esbon, lavil kote wa Siyon t'ap gouvènen an: men yo jwenn li ap boule. Dife a gaye, li rive jouk sou fwontyè a, li moute rive jouk sou tèt mòn lwijanboje yo. ⁴⁶ Sa fè lapenn pou moun Moab yo! Tout moun ki t'ap sèvi Kèmòch yo fini. Yo pran pitit gason ak pitit fi yo, yo fè yo prizonye, yo depòte yo. ⁴⁷ Men nan jou k'ap vin apre yo, m'ap mete peyi Moab la kanpe ankò. Se mwen menm, Seyè a, ki di sa. Se tou sa ki pral rive moun Moab yo.

Chapter 49

¹ ¶ Men sa Seyè a di sou moun peyi Amon yo: -Gen lè pa gen gason ankò nan peyi Izrayèl la? Pa gen moun pou defann tè zansèt yo a? Poukisa yo kite se moun k'ap sèvi Milkòm yo ki pran pòsyon tè fanmi Gad la pou yo? Poukisa se moun Amon yo ki rete nan lavil yo? ² Se sa ki fè men jou a ap rive. Se mwen menm Seyè a k'ap pale la a. Mwen pral fè moun ki rete Raba, kapital peyi Amon an, tandè bri lagè. Lavil la pral tounen yon pil wòch. Yo pral boule ti bouk li yo ratè. Lè sa a, moun pèp Izrayèl yo va reprann tè ki te pou yo a. ³ Nou menm moun lavil Esbon, plenn sò nou! Lavil Ayi fini! Medam lavil Raba yo, mare ren nou! Mete rad sak sou nou! Rele! Pran lari pou nou! Y'ap depòte Milkòm, bondye nou an, ansanm ak tout pè li yo ak tout chèf li yo! ⁴ Poukisa n'ap fè grandizè konsa? Jan nou te kontan fon nou yo! Men fon yo tonbe. Bann moun tèt di, nou te mete konfyans nou nan richès nou. Nou t'ap di: Pa gen moun ki ka penmèt yo atake nou! ⁵ Mwen pral fè yon sèl laperèz pran nou. Se mwen menm sèl mèt la, Seyè ki gen tout pouvwa a, ki di sa. Mwen pral fè tout vwazen nou yo fè nou tranble. Yo pral gaye nou. Chak moun pral kouri ale sou bò pa yo. P'ap gen pesonn pou fè yo sanble ankò. ⁶ Men apre sa, m'ap mete peyi Amon an kanpe ankò. Se mwen menm Seyè a ki di sa. ⁷ ¶ Men sa Seyè ki gen tout pouvwa a di sou peyi Edon: -Pa gen moun ki gen bon konprann ankò lavil Teman an? Moun lespri yo pa konn sa pou yo di. Yo pèdi tout konprann yo! ⁸ Nou menm moun lavil Dedan, vire do nou, kouri ale! Fè twou pou kache kò nou! Mwen pral fini ak moun Ezaou yo, paske lè pou m' regle ak yo a rive. ⁹ Lè moun ap ranmase rekòt rezen, yo toujou kite dèyè pou moun k'ap vin grapiye yo. Lè vòlò antre lakay moun lannwit,

10
yo annik pran sa yo bezwen. Men mwen menm, mwen pral kite moun Ezaou yo toutouni. Mwen pral fè moun konnen tout kachèt li yo. Konsa, nanpwen kache pou yo ankò. Tout ras moun Edon
11
yo, tout fanmi yo ak tout moun nan vwazinaj yo pral disparèt. Pa gen pesonn k'ap rete pou di:
12
Kite timoun ki san papa yo avè m'. M'a okipe yo. Vèv nou yo mèt konte sou mwen. Men sa Seyè a di ankò: -Ata moun ki pa merite pou m' pini yo pral gen pou yo bwè gode chatiman an nèt ale. Se nou menm atò pou yo pa ta pini! Non. Yo p'ap pini nou? Se pou nou bwè nan gode chatiman
13
an tou. Se mwen menm, Seyè a, k'ap pale: Mwen fè sèman sou tèt mwen, m'ap fè lavil Bozra tounen yon dezè, yon pil vye mazi. Moun ap pase l' nan betiz, y'ap sèvi ak non l' pou bay madichon.
14
Tout ti bouk nan vwazinaj li yo pral tounen yon pil vye mazi pou tout tan. Jeremi di ankò: -Mwen te tandè mesaj Seyè a bay la. Li te voye mesaje nan tout nasyon yo pou di yo sanble tout lame yo
15
pou yo mache pran Edon, pou y' al goumen avè l'. Seyè a pral fè peyi a vin tou fèb nan mitan
16
nasyon yo. Pesonn p'ap respekte nou. Se awogans ou ki fè ou pèdi tèt ou. Pa gen moun ki pè ou jan ou kwè l' la. Ou rete sou tèt gwo wòch yo, byen wo nan mòn yo. Ou te mèt bati kay ou byen
17
wo tankou nich malfini, m'ap fè ou desann. Se Seyè a menm ki di sa. Seyè a di ankò: Se konsa peyi Edon an pral tounen yon dezè k'ap bay gwo lapenn. Tout moun k'ap pase bò la pral pran
18
sezisman, y'ap pè. Gwo malè sa ki te rive lavil Sodòm ak Gomò ansanm ak tout ti bouk nan vwazinaj yo, se malè sa a k'ap rive Edon tou. P'ap gen yon moun nan peyi a ankò. Pesonn p'ap rete
19
la. Se mwen menm Seyè a ki di sa. Tankou yon lyon k'ap soti nan rakbwa bò larivyè Jouden an pou l' ale kote bèt yo ye nan savann yo, mwen menm Seyè a, m'ap vini, m'ap fè moun yo kouri kite peyi a anvan yo bat je yo. Lè sa a, se moun m'a chwazi a m'a mete pou gouvènè peyi a. Ki moun
20
ki tankou m'? Ki moun ki ka koresponn avè m'? Ki chèf ki ka kenbe tèt avè m'? Konsa, koute sa mwen soti pou m' fè moun Edon yo, sa mwen fè lide fè moun lavil Teman yo. Sèten, ata timoun
21
yo, yo pral trennen pot ale. Yo pral devaste tout peyi a devan je yo. Lè peyi Edon an tonbe, l'ap
22
fè yon kokennchenn bri, latè ap tranble. Y'ap tandè rèl moun yo jouk bò lanmè Wozo yo. Tankou malfini k'ap plonje ak zèl li yo gran louvri, lènmi pral atake Bozra. Jou sa yo, vanyan sòlda peyi
23
Edon yo pral pè tankou fanm ki gen tranche. ¶ Men sa Seyè a di sou peyi Damas la: -Moun lavil Amat ak moun lavil Apad yo gen kè kase paske yo tandè move nouvèl. Tankou lanmè, yo boulvèse,
24
yo pa ka rete an plas. Moun Damas yo fèb, yo kouri met deyò. Yo pè, yon sèl tranbleman pran
25
yo. Yo nan lapenn, yo gen kè kase tankou fanm ki gen tranche. Gade lavil tout moun te konnen
26
an, lavil kote tout moun te gen kè kontan an! Pa gen yon moun ladan l'. Jou sa a, y'ap touye jenn

gason nou yo nan tout lari. Tout sòlda yo pral mouri. Se Seyè ki gen tout pouvwa a menm ki di sa.
²⁷ M'ap mete dife nan miray Damas yo. Dife a ap boule palè wa Bennadad la. ²⁸ ¶ Moun branch fanmi Keda yo ak chèf lavil Azò yo te pèdi batay la devan Nèbikadneza, wa Babilòn lan. Men ²⁹ mesaj Seyè a bay sou yo: -Leve non! Ann mache pran Keda! Piye moun bò solèy leve yo. Pran tant yo, kabrit yo, mouton yo, rido tant yo ansanm ak tout lòt bagay ki nan tant yo. Pran chamo yo.
³⁰ Di byen fò nan zòrèy yo: Kote ou pase tout moun pè. Nou menm moun lavil Azò, kouri met deyò, al kache kò nou nan twou! Se mwen menm Seyè a ki di sa. Paske Nèbikadneza, wa Babilòn ³¹ lan, fè lide pou l' kraze nou. Li soti pou l' fini ak nou. Men sa Seyè a di ankò: Leve non! Ann al atake yon nasyon ki santi yo t' alèz san ankenn danje sou tèt yo! Pa gen pòtay nan lavil yo, ni ba ³² fè pou fèmen yo. Yo la konsa san ankenn pwoteksyon. Yo pral pran tout chamo yo, yo pral separe tout kabrit ak mouton yo. Wi, m'ap gaye yo nan tout direksyon, bann moun sa yo ki koupe ³³ cheve yo kout. Kote yo pase m'ap fè malè tonbe sou yo. Se mwen menm Seyè a ki di sa. M'ap fè zòn Azò a tounen yon dezè pou tout tan, kote bèt nan bwa rete. Pesonn p'ap rete ladan l' ankò.
³⁴ Ankenn moun p'ap viv la. ¶ Men mesaj Seyè a te bay pwofèt Jeremi sou peyi Elam. Lè sa a, ³⁵ Sedesyas te fèk moute wa nan peyi Jida. Men sa Seyè ki gen tout pouvwa a di: -Mwen pral touye ³⁶ tout sòlda peyi Elam ki gen ladrès pou sèvi ak banza yo. Se yo menm ki te fè tout fòs peyi a. M'ap fè van leve nan tout direksyon pou soufle sou peyi Elam lan. M'ap gaye yo nan tout direksyon sou ³⁷ latè. M'ap mete tout moun li yo deyò. p'ap gen peyi sou latè kote ou p'ap jwenn yo. M'ap fè moun Elam yo tranble devan lènmi yo, devan moun ki soti pou touye yo. M'ap fè gwo kòlè, m'ap ³⁸ voye gwo malè sou yo, m'ap lage yon gwo lame dèyè yo jouk m'a fini nèt ak yo. M'ap disparèt wa yo a ansanm ak tout lòt chèf yo. Se la m'ap mete fotèy mwen an. Se mwen menm Seyè a ki di ³⁹ sa. Men, nan jou k'ap vini apre sa yo, m'ap mete peyi Elam lan kanpe ankò. Se mwen menm Seyè a ki di sa.

Chapter 50

¹ ¶ Men mesaj Seyè a te mete nan bouch pwofèt Jeremi sou lavil Babilòn ak sou tout moun peyi ² a: -Bay tout nasyon yo nouvèl la. Fè yo konnen l'. Bay siyal la, fè nouvèl la mache. Pa kenbe nouvèl la kache. Di yo: Yo pran lavil Babilòn, yo fè bondye Babilòn lan wont. Yo fini ak Madouk. ³ Tout zidòl li yo wont. Yo kraze tout vye bagay sa yo. Paske yon nasyon ap soti nan nò, l'ap mache

pran peyi a, l'ap fè l' tounen yon dezè. p'ap gen pesonn ladan l'. Bèt kou moun ap kouri met deyò.

4

Men sa Seyè a di ankò: -Jou sa yo, lè sa a, moun peyi Izrayèl yo ak moun peyi Jida yo ap vini ansanm. Y'ap mache, y'ap kriye, y'ap chache Seyè a, Bondye yo a. Y'ap mande chemen pou y' al mòn Siyon, y'ap pran chemen an ale. Yo pral siyen yon kontra ak Seyè a, yon kontra k'ap la pou

5

tout tan, yon kontra yo p'ap janm bliye. Pèp mwen an te tankou mouton ki pèdi bann yo. Se gadò yo ki te lage yo, kifè yo gaye nan mòn yo. Y'ap mache pwonmennen nan tout mòn yo. Yo pèdi

6

chemen kay yo. Tout moun ki jwenn yo sou wout yo tonbe sou yo. Lè konsa lènmi yo di: Se pa fòt nou! Se yo menm ki fè peche kont Seyè a ki te ka rann yo jistis, kont Seyè a ki te tout espwa

7

zansèt yo. Nou menm pèp Izrayèl la, kouri kite lavil Babilòn! Mete deyò nan peyi moun Kalde

8

yo! Se nou menm ki pou pati an premye kite peyi a. ¶ Mwen pral leve yon bann gwo nasyon bò nan nò, mwen pral fè yo mache pran lavil Babilòn. Yo pral pran pozisyon pou yo goumen avè l', yo pral kraze l'. Sòlda yo, se moun ki gen anpil ladrès nan sèvi ak banza, yo pa janm manke sa y'ap

9

vize a. Y'ap piye lavil Babilòn. Wi, tout moun k'ap piye l' yo ap pran pot ale jouk yo pa konn

10

kote pou yo mete ankò. Se mwen menm Seyè a ki di sa. Seyè a di ankò: -Nou menm moun lavil Babilòn ki t' al piye pèp ki rele m' pa m' lan, nou te kontan, nou t'ap fè fèt, nou t'ap sote ponpe

11

tankou ti gazèl lage nan savann, nou t'ap ranni tankou jenn poulen. Men, peyi nou an, lavil kote nou moun lan, pral wont. Yo pral trennen yo nan labou. Nan tout nasyon yo, Babilòn pral dèye nèt.

12

L'ap tounen yon dezè, san dlo, san yon pyebwa. Paske Seyè a pral move sou li. p'ap gen pesonn rete nan lavil Babilòn lan. Tout kay li yo ap tounen mazi. Tout moun k'ap pase bò la pral sezi, y'a

13

mete men nan tèt lè y'a wè tout sa ki rive l'. Nou menm ki sèvi ak banza, ranje kò nou, sènen

14

lavil Babilòn. Tire sou li! Voye tout flèch nou yo sou li, paske li fè peche kont Seyè a. Nou tout ki sènen l' yo, rele byen fò, mache pran li! Lavil Babilòn rann tèt li. Miray li yo tonbe, gwo poto l' yo atè. Se konsa m'ap tire revanj mwen. Tire revanj nou sou li. Fè l' pase sa li te fè nou pase a.

15

16 Pa kite pesonn pou plante jaden! Pa kite pesonn pou ranmase lè sezon rekòt rive! Lè lagè a va

17

pete, tout moun lòt nasyon yo va chache chemen pa yo, y'a kouri met deyò al lakay yo. Seyè a di ankò: -Pèp Izrayèl la te tankou mouton ki pèdi bann yo. Lyon gaye yo nan tout raje. Premye moun ki mete men sou yo se te wa peyi Lasiri a. Apre sa, se te Nèbikadneza, wa peyi Babilòn lan,

18

ki te kraze tout zo yo. Se poutèt sa, men sa mwen menm, Seyè ki gen tout pouvwa a, Bondye pèp Izrayèl la, men sa mwen di: Mwen pral regle wa Babilòn lan ansanm ak tout peyi li a, menm

19

jan mwen te regle wa peyi Lasiri a. Apre sa, m'ap fè pèp Izrayèl la tounen nan peyi l'. Y'a manje tou sa k'ap pouse sou mòn Kamèl ak nan zòn Bazan. Y'a manje plen vant yo tou sa y'a rekòlte sou

²⁰
 mòn Efrayim yo ak nan peyi Galarad. Jou sa yo, lè sa a, yo p'ap jwenn yon peche pou mete sou kont moun Izrayèl yo, ni yon mechanste pou mete sou kont moun Jida yo, paske m'ap padonnen

²¹
 tout moun m'a kite chape anba lanmò. Se mwen menm Seyè a ki di sa. ¶ Seyè a di ankò: -Mache pran peyi moun Mira-Tayim yo! Atake moun peyi Pekòd yo! Touye yo tout, fini ak yo nèt! Se pou

²²
 nou fè tou sa mwen menm mwen ban nou lòd fè a! Nan tout peyi a, se lagè k'ap fèt! Se kraze

²³
 brize nèt ale! Lavil Babilòn te tankou yon gwo mato ki t'ap kraze tout moun sou latè. Koulye a, mato a chape, li tonbe, li kraze. Yo fini ak Babilòn. Yo fè l' tounen yon dezè san moun ladan l' nan

²⁴
 mitan tout nasyon yo! Babilòn! Mwen te pare yon pèlen pou ou! Ou tonbe ladan l' san ou pa

²⁵
 konnen! Yo jwenn ou, yo mete men sou ou, paske ou te soti pou goumen avè m'. Seyè a louvri depo zam li yo. Li fè kòlè, li mete yo deyò, paske mwen menm, Seyè ki gen tout pouvwa a, Bondye

²⁶
 sèl Mèt la, mwen gen yon travay pou m' fè ak moun Babilòn yo. Soti toupatou sou latè, vin atake l'! Louvri tout depo pwovizyon l' yo! Anpile tou sa nou jwenn, boule tout pou Seyè a. Pa kite anyen!

²⁷
 Touye tout sòlda li yo tankou bèf nan labatwa! Madichon pou moun Babilòn yo! Jòdi a, lè

²⁸
 chatiman yo a rive! Koute! Moun k'ap kouri chape kò yo, moun k'ap kouri kite lavil Babilòn lan, ap moute sou mòn Siyon, y'ap fè konnen jan Seyè a, Bondye nou an, ap tire revanj li pou sa

²⁹
 moun Babilòn yo fè tanp li a. Voye chache tout moun ki konn sèvi ak banza pou yo mache pran lavil Babilòn. Fè yo sènen lavil la nèt, pou pesonn pa ka chape. Fè l' peye tou sa li te fè. Fè l' pase tou sa li te fè lòt moun pase, paske li te konprann pou l' te kenbe tèt ak Seyè a, Bondye pèp Izrayèl

³⁰
 la ki yon Bondye apa. Se poutèt sa, yo pral touye tout jenn gason l' yo nan tout lari. Jou sa a, yo

³¹
 pral disparèt tout sòlda li yo. Se mwen menm, Seyè a, ki di sa. Moun Babilòn, nou awogan twòp! Mwen leve deyè nou! Se mwen menm, Seyè ki gen tout pouvwa a, Bondye sèl Mèt la, ki di sa. Jou

³²
 pa ou la rive, lè pou m' pini ou lan rive sou ou. Peyi moun awogan sa yo pral tonbe. Pesonn p'ap

³³
 ka fè l' kanpe ankò. M'ap mete dife nan tout lavil yo. Tout bagay alawonn pral boule. ¶ Wi, men sa Seyè a di ankò: Y'ap peze moun peyi Izrayèl yo ansanm ak moun peyi Jida yo. Moun ki te depòte

³⁴
 yo kenbe yo kout, yo pa vle lage yo. Men, moun k'ap vin delivre yo a fò tou! Se Seyè ki gen tout pouvwa a. Se konsa li rele. L'ap pran defans yo, l'ap fè tout lòt nasyon yo viv ak kè poze, men

³⁵
 l'ap bay moun lavil Babilòn yo kè sote. Men sa Seyè a di ankò: -Lanmò pou lavil Babilòn!

³⁶
 Lanmò pou tout moun ki rete ladan l'! Lanmò pou chèf li yo, pou moun save l' yo! Lanmò pou divinò li yo! Se yon bann egare yo ye. Lanmò pou sòlda li yo! Y'ap tranble, yo pa konn sa pou yo

³⁷
 fè. Lanmò pou chwal li yo! Kraze tout cha lagè li yo. Lanmò pou tout moun lòt nasyon k'ap fè

djòb sòlda lakay yo! Se pou yo vin tankou fanm. Disparèt tout richès li yo. Piye tout byen li yo.

38

Chechrès nan tout peyi a. Se pou tout dlo rivyè yo cheche. Babilòn se yon peyi zidòl, k'ap fè moun pèdi tèt yo. ³⁹ Se poutèt sa, se chat mawon ak vye bèt nan bwa ki pral rete nan peyi sa a. Se

la gwo zwazo otrich yo pral rete. P'ap janm gen moun rete ladan l' ankò pou tout tan, jouk sa kaba.

40

Sa pral tankou gwo malè Bondye te voye sou lavil Sodòm ak lavil Gomò, malè ki te detwi yo ansanm ak tout ti bouk nan vwazinaj yo. Pesonn p'ap rete la, p'ap gen yon moun nan peyi a ankò.

41

Se mwen menm Seyè a wi ki di sa. Moun ap soti nan yon peyi bò nan nò. Yon gwo pèp ak anpil

42

chèf vyanan soti byen lwen, y'ap pare pou fè lagè. Yo pran banza ak frenn yo. Yo mechan anpil, se yon bann san manman. Lè yo sou chwal yo, y'ap fè bri tankou lanmè lè l' move. Yo pare lame

43

yo pou yo vin fè lagè kont Babilòn. Wa Babilòn lan pran nouvèl la. Li santi de bra l' kase. Li

44

gen yon sèl kè sere, l'ap soufri tankou yon fanm ki gen tranche. Tankou yon lyon k'ap soti nan rakkwa bò larivyè Jouden an pou l' ale kote bèt yo ye nan savann yo, mwen menm Seyè a, m'ap vini. M'ap fè moun yo kouri kite peyi a, anvan yo bat je yo. Lè sa a, se moun m'a chwazi a m'a mete pou gouvènè peyi a. Ki moun ki tankou m'? Ki moun ki ka koresponn avè m'? Ki chèf ki ka kenbe

45

tèt avè m'? Konsa, koute sa mwen soti pou m' fè moun lavil Babilòn yo, sa mwen fè lide fè moun peyi Kalde yo: Sèten, ata timoun yo yo pral trennen pot ale. Yo pral devaste tout peyi a devan je

46

yo. Lè lavil Babilòn tonbe, l'ap fè yon kokennchenn bri, latè ap tranble. Y'ap tande rèl moun yo nan tout lòt nasyon yo.

Chapter 51

1

¶ Seyè a di konsa: -Mwen pral fè yon gwo van soufle sou lavil Babilòn pou detwi l' ansanm

2

ak tout moun li yo. Wi, m'ap voye etranje nan peyi a. Y'ap gaye l' tankou van k'ap bwote pay

3

chèch, y'ap ravaje peyi a. Lè jou malè sa a va rive, y'ap soti toupatou vin tonbe sou li. Pa bay sòlda yo chans pou yo tire banza yo, ni pou yo mete rad batay yo sou yo. Pa kite jenn gason yo

4

chape. Touye tout lame a pou Bondye. Nan tout peyi Babilòn lan moun ap tonbe mouri. Nan tout

5

lari flèch ap pèse yo pak an pak. Paske mwen menm, Seyè ki gen tout pouvwa a, Bondye moun peyi Izrayèl ak moun peyi Jida yo, mwen pa lage yo, atout yo koupab devan Bondye pèp Izrayèl

6

la ki yon Bondye apa. Kouri kite lavil Babilòn! Kouri chape kò nou. Pa kite yo touye nou pou

7

mechanste moun pa li yo. Lè a rive pou m' tire revanj mwen. M'ap pini l' pou sa li fè m' lan. Babilòn

te tankou yon gode fèt an lò nan men mwen. Li t'ap fè tout nasyon sou latè sou. Yo bwè nan diven
⁸
l' lan, y'ap depale. Men Babilòn rete konsa li tonbe, li kraze. Plenn sò li! Chache renmèd pou
⁹
doulè l' yo. Nou pa janm konnen, li ka geri. Etranje k'ap viv nan peyi a di konsa: Nou fè sa nou
kapab pou n' geri Babilòn. Pa gen gerizon pou li. Annou kite peyi a. Ann ale, chak moun nan peyi
¹⁰
pa yo, paske peche l' yo fè pil rive jouk nan syèl, yo pi wo pase nwaj yo. Pèp Izrayèl la di: Seyè
a fè wè kòz nou an bon, li ban nou jistis. Ann al rakonte moun lavil Jerizalèm yo sa Seyè a, Bondye
¹¹
nou an, fè. Bondye moute tèt tout wa peyi Medi yo, li fè yon plan pou l' detwi Babilòn. Se konsa
l'ap tire revanjan li pou detwi yo menm jan yo te detwi tanp li an. Fè pwent flèch yo byen pwenti!
¹²
Plen sak yo flèch! Leve drapo a! Bay siyal pou yo atake miray Babilòn yo! Double faksyonnè
yo! Mete sòlda ap veye. Pare anbiskad pou yo. Seyè a fè plan li, li fè sa li te di l'ap fè moun Babilòn
¹³
yo. Nou menm ki rete nan peyi ki gen anpil rivyè a, nou menm ki gen anpil richès, men nou rive
¹⁴
mezi bout nou! Nou fè kont nou koulye a. Seyè ki gen tout pouvwa a fè sèman sou tèt li: li pral
mennen anpil moun vin atake Babilòn, y'ap tankou yon bann krikèt. Yo pral rele, yo pral chante
¹⁵
dèske yo kraze ou. Seyè a te fè latè ak fòs pouvwa li. Li kreye dènye bagay ak bon konprann li.
¹⁶
Avèk entèlijans li, li louvri syèl la anwo latè. Li pase lòd, epi dlo ki anwo syèl la pran gwonde.
Li fè gwo nwaj yo moute soti toupatou. Li fè zèklè yo klere pou fè lapli vini. Li fè van yo soti kote
¹⁷
li te sere yo. Lè konsa tout moun rete egare, yo pa konprann anyen. Moun k'ap fè zidòl yo wont
sa yo fè a, paske bondye yo fè yo se fo bondye, yo pa gen lavi nan yo. ¹⁸ Yo pa vo anyen. Yo bon
¹⁹
pou pase nan betiz. Y'ap disparèt lè Seyè a ap vin regle ak yo. Men, Bondye Jakòb la pa tankou
yo. Se li menm ki fè tout bagay. Li chwazi pèp Izrayèl la pou rele l' pa l'. Seyè ki gen tout pouvwa
²⁰
a, se konsa yo rele l'. Seyè a di ankò: -Babilòn, ou te yon gwo mato nan men mwen, yon zam
²¹
pou m' fè lagè. Se avè ou mwen te kraze nasyon yo. Se avè ou mwen te kraze peyi wa yo. Se
avè ou mwen te kraze chwal yo ak tout kavalye yo. Se avè ou mwen te kraze cha lagè yo ak tout
²²
moun ki t'ap mennen yo. Se avè ou mwen te kraze fanm kou gason, granmoun kou timoun, jenn
²³
gason kou jenn fi. Se avè ou mwen te touye bann mouton yo ak tout gadò yo. Se avè ou mwen
te kraze kiltivatè yo ansanm ak tout chwal pou raboure latè. Se avè ou mwen te kraze tout chèf yo
²⁴
ak tout majistra yo. Seyè a di ankò: -Devan je nou tout, m'ap fè lavil Babilòn ansanm ak tout
²⁵
pèp li a peye tout mechanste li te fè lavil Jerizalèm yo. Babilòn, ou tankou yon gwo mòn kote
moun k'ap ravaje tout latè a soti. Koulye a, mwen pral regle avè ou. Mwen pral mete men sou ou.
M'ap fè ou degrengole desann soti nan tèt wòch yo. M'ap fè mòn lan tounen yon gwo boukan dife.

26

Yo p'ap pran yon wòch nan ou ni pou fè fondasyon, ni pou fè kwen kay. Ou pral tounen yon

dezè pou tout tan. Se mwen menm Seyè a ki di sa. ²⁷ Bay siyal nan tout peyi a pou yo atake. Kònen twonpèt nan tout nasyon yo. Pare tout nasyon yo pou y' al fè lagè ak Babilòn. Voye rele wa peyi Arara a, wa peyi Mini an, wa peyi Achkenaz la pou y' al atake l'. Chwazi chèf pou mennen batay

la. Fè yo mennen anpil chwal ban nou pou yo menm kantite ak yon bann krikèt. ²⁸ Pare tout nasyon yo pou y' al fè lagè ak Babilòn. Voye chache wa yo k'ap gouvènen nan peyi Medi a, ansanm ak

tout prefè yo, tout majistra yo, tout lame nan peyi ki sou kontwol yo. ²⁹ Tout latè ap tranble, l'ap souke, paske lè plan travay Seyè a rive pou l' fèt. Li pral fè Babilòn tounen yon dezè kote p'ap gen

pesonn ankò. ³⁰ Sòlda lavil Babilòn yo derefize goumen. Yo rete kache nan fò yo. Yo pèdi tout

kouraj yo, yo tankou fanm. Lènmi defonse pòtay lavil yo, yo mete dife nan kay yo. ³¹ Mesaje sou

mesaje ap kouri brid sou kou al di wa Babilòn lan lènmi anvayi lavil li a nèt. ³² Yo bloke tout

chemen yo, yo mete dife nan tout avanpòs yo, sòlda yo gaye. ³³ Wi, men mesaj Seyè ki gen tout pouvwa a, Bondye pèp Izrayèl la, bay: Lavil Babilòn tankou yon glasi y'ap pare. Talè konsa yo

pral kouche sòlda yo tankou grenn danre sou glasi. ³⁴ Nèbikadneza, wa peyi Babilòn lan, te devore lavil Jerizalèm, li manje l' nèt ale. Li kite peyi a vid tankou yon plat yo niche. Tankou yon gwo bèt

lanmè, li vale m'. Li souse tout mwèl mwen. Lèfini, li voye rèss la jete. ³⁵ Moun ki rete sou mòn Siyon yo di: Se pou lavil Babilòn peye tout lapenn ak mechanste li fè nou. Moun lavil Jerizalèm

yo te mèt di: Se pou moun peyi Kalde yo peye pou tout san nou yo fè koule a. ³⁶ Se konsa Seyè a pale ak moun Jerizalèm yo, li di yo: Se mwen menm k'ap pran kòz nou nan men. Mwen pran sou kont mwen pou m' fè yo peye sa yo fè nou. M'ap fè sous dlo lavil Babilòn yo cheche. P'ap gen yon

tak dlo nan rivyè l' yo. ³⁷ Lavil Babilòn ap tounen yon pil mazi kote bèt nan bwa rete, yon dezè

kote pesonn pa rete. Tout moun k'ap wè sa pral sezi, y'a mete men nan tèt. ³⁸ Moun Babilòn yo ap

gwonde tankou lyon, y'ap griyen dan yo tankou jenn lyon. ³⁹ Lè y'a fin chofe kont yo, mwen menm m'ap pare yon fèt pou yo. M'ap fè yo sou, m'ap fè kè yo kontan. Lèfini, yo pral dòmi yon dòmi ki

p'ap janm fini, yo p'ap janm leve ankò. ⁴⁰ M'ap fè mennen yo labatwa tankou yo mennen mouton,

belye mouton ak bouk kabrit yo. Se mwen menm Seyè a ki di sa. ⁴¹ Seyè a di konsa: -Gade! Yo pran lavil Babilòn. Yo mete men sou li, lavil ki te yon lwanj nan bouch tout moun lan. Yo fè l'

tounen yon dezè nan mitan nasyon yo. ⁴² Lanmè moute anvayi lavil Babilòn. Lanm lanmè yo

move, yo kouvri lavil la. ⁴³ Tout ti bouk li yo tounen yon dezè tou, san pa gen yon gout dlo ladan

yo. Se raje toupatou. Pa gen pesonn ladan yo ankò. Pesonn pa pase la non plis. ⁴⁴ M'ap regle Bèl,

bondye Babilòn lan, m'ap fè l' rann tou sa li te vale a. Nasyon yo p'ap kouri vin nan pye l' ankò.

⁴⁵ Miray lavil Babilòn yo tonbe. Nou menm moun pèp Izrayèl yo, kouri wete kò nou la! Chape kò

nou pou nou pa pase tou, paske Seyè a move anpil sou lavil Babilòn. ⁴⁶ Pa dekouraje. Pa kite bri k'ap kouri nan peyi a fè nou pè. Chak lanne yo fè kouri yon kalite bri. Yon lè yo di se mechanste

k'ap fèt nan peyi a, yon lòt lè yo di se chèf k'ap goumen ak chèf pou pran pouvwa a. ⁴⁷ Men jou yo rive pou m' regle ak vye zidòl Babilòn yo. Tout peyi a pral wont. Yo pral touye dènye moun

ladan l'. ⁴⁸ Tout bagay nan syèl la ak sou latè a pral kontan, yo pral rele lè moun k'ap soti bò nan

nò yo va vin ravaje lavil Babilòn. Se Seyè a menm ki di sa. ⁴⁹ Babilòn te lakòz anpil moun mouri toupatou sou latè. Koulye a se Babilòn ki pral tonbe, paske li te touye anpil moun nan pèp Izrayèl

la. ⁵⁰ Seyè a pale ak moun pèp Izrayèl yo ki lavil Babilòn. Li di yo konsa: -Nou menm ki te chape anba lanmò, ale, pa rete! Nou te mèt byen lwen lakay nou, mete lide nou sou mwen, chonje lavil

Jerizalèm! ⁵¹ Nou di: nou te wont lè nou tande jan yo t'ap joure nou. Lawont fè nou bouche figi

nou, paske moun lòt nasyon yo te mete pye yo nan kote ki apa nèt pou Seyè a nan tanp lan. ⁵² Enben, men sa Seyè a di ankò: Lè a rive, mwen pral regle avèk zidòl lavil Babilòn yo. Nan tout peyi a

moun blese yo pral plenn. ⁵³ Menm si Babilòn ta rive moute nan syèl pou l' ta bati yon gwo fò moun pa ka rive pran, moun m'ap voye dèyè l' yo ap jwenn li, y'ap kraze l'. Se mwen menm Seyè

a ki di sa. ⁵⁴ Seyè a di ankò: -Yon sèl rèl pete lavil Babilòn. Bri kouri yon gwo malè tonbe sou tout

peyi a. ⁵⁵ Se mwen menm Seyè a k'ap detwi lavil Babilòn. Mwen fè l' pe bouch li. Menm si lavil

Babilòn t'ap fè bri tankou lanmè lè li move, m'ap fè l' sispann rele. ⁵⁶ Wi, lènmi ap vin detwi lavil Babilòn. Y'ap mete men sou sòlda li yo. L'ap kraze tout banza yo. Mwen menm, Seyè a, mwen se

yon Bondye k'ap pini moun ki fè sa ki mal. M'ap fè yo peye pou sa yo fè. ⁵⁷ M'ap soule chèf li yo, moun save ak majistra li yo, chèf lame ak sòlda li yo. Yo pral dòmi nèt ale, yo p'ap janm leve. Se

mwen menm wa a ki pale, mwen menm yo rele Seyè ki gen tout pouvwa a. ⁵⁸ Men sa Seyè ki gen tout pouvwa a di ankò: -Yo kraze gwo miray lavil Babilòn lan ratè. Yo boule gwo pòtay byen wo

li yo. Pèp yo te travay pou gremesi. Tou sa yo te bat kò yo fè a tounen sann dife. ⁵⁹ ¶ Sedesyas, wa peyi Jida a, te gen yon chèf yo te rele Seraja ki te reskonsab kay wa a. Se te pitit Nerija, pitit pitit Maseja. Wa a te gen katran depi li t'ap gouvènen peyi a lè li pati pou Babilòn ansanm ak Seraja.

⁶⁰ Men lòd pwofèt Jeremi te bay Seraja. Jeremi te ekri nan yon liv tout malè ki gen pou tonbe sou

lavil Babilòn ansanm ak tout lòt bagay li te di sou lavil la. ⁶¹ Jeremi di Seraja konsa: -Lè w'a rive

lavil Babilòn, pa bliye se pou ou li tou sa ki ekri nan liv la. ⁶² Apre sa w'a di: Seyè! Ou te di ou

gen pou detwi peyi sa a pou pa gen yon sèl moun ni yon sèl bèt rete ladan l' ankò. Ou te di peyi a
 gen pou tounen yon dezè pou tout tan! ⁶³ Lè w'a fin li liv sa a, w'a mare l' sou yon wòch, w'a voye
 l' jete nan mitan larivyè Lefrat. ⁶⁴ Apre sa, w'a di: Se konsa lavil Babilòn lan pral koule, li p'ap
 janm ka leve ankò apre malè mwen menm Seyè a, mwen pral voye sou li a. Se isit la pawòl pwofèt
 Jeremi yo fini.

Chapter 52

¹ ¶ Sedesyas te gen venteyennan lè li vin wa peyi Jida. Li pase onzan lavil Jerizalèm ap gouvènen
 peyi a. Manman l' te rele Amoutal. Se te pitit fi Jeremi, moun lavil Libna. ² Wa Sedesyas te fè sa
 ki mal devan Bondye menm jan ak Jojakim. ³ Se konsa, Seyè a te fache ni sou moun lavil Jerizalèm
 yo, ni sou moun peyi Jida yo, jouk jou li wete yo devan je l'. Sedesyas te pran lezam kont
 Nèbikadneza, wa Babilòn lan. ⁴ Se konsa, sou dezyèm jou dizyèm mwa nevyèm lanne depi Sedesyas
 te wa a, Nèbikadneza, wa Babilòn lan, vin atake lavil Jerizalèm ak tout lame li a. Yo moute kan yo
 devan miray lavil la, yo mete ranblè nan pye miray yo. Yo sènen l' nèt. ⁵ Yo fèmen lavil la depi lè
 sa a rive sou onzyèm lanne rèy wa Sedeisas la. ⁶ Sou nevyèm jou katriyèm mwa menm lanne sa
 a, te gen yon sèl grangou nan lavil la, moun yo pa t' gen anyen pou yo manje ankò. ⁷ Yo fè yon
 twou nan miray yo. Atout lame moun Babilòn yo te sènen lavil la nèt, tout sòlda jwif yo met deyò,
 yo kite lavil la nan mitan lannwit, yo pase nan mitan jaden wa a, yo desann nan wout pòtay la nan
 mitan de miray yo, yo pran chemen Fon Jouden an pou yo. ⁸ Men, lame moun Babilòn yo rapouswiv
 wa Sedesyas. Lè yo rive nan plenn bò lavil Jeriko yo, yo mete men sou li. Lè sa a, tout sòlda li yo
 gaye, yo kouri kite l'. ⁹ Lènmi yo pran wa a, yo mennen l' bay wa Babilòn lan, ki te lavil Ribla nan
 peyi Amat la. Se la Nèbikadneza jije li. ¹⁰ Antan yo lavil Ribla, li fè yo koupe kou tout pitit wa
 Sedesyas yo devan wa a. Li fè koupe kou tout chèf peyi Jida yo tou. ¹¹ Lèfini, li fè yo pete tou de
 je wa Sedesyas, epi yo mare l' ak de gwo chenn fèt an kwiv. Yo mennen l' lavil Babilòn. Yo mete
 Sedesyas nan prizon, li rete la jouk li mouri. ¹² ¶ Sou dizyèm jou senkyèm mwa nan disnevyèm
 lanne rèy Nèbikadneza, wa Babilòn lan, Neboucharadan, chèf lagad la, yonn nan konseye li yo,
 antre lavil Jerizalèm. ¹³ Li met dife nan kay Bondye a ak nan palè wa a. Li boule dènye kay ki te
 lavil Jerizalèm, ata kay grannèg yo. ¹⁴ Li bay sòlda ki te avè l' yo lòd demoli tout gwo miray ranpa

¹⁵ lavil Jerizalèm yo met atè. Lèfini, Neboucharadan, chèf lagad la, pran rès moun yo te kite lavil la, li depòte yo lavil Babilòn ansanm ak tout moun ki te vin rann tèt yo bay wa Babilòn lan ak tout bon bòs atizan ki te rete nan lavil la.

¹⁶ Men, li kite kèk moun nan mas pèp la ki pa t' gen anyen.

¹⁷ Li ba yo jaden rezen ak lòt jaden pou yo okipe. Moun Babilòn yo pran gwo poto kwiv yo ki te nan tanp Seyè a, ansanm ak sipò yo, gwo basen kwiv yo, yo kraze yo fè ti moso, yo pote kwiv la ale lavil Babilòn.

¹⁸ Yo pran plat pou resevwa sann yo, pèl yo, kouto yo, gode yo, tas yo ak tout lòt bagay an kwiv yo te konn sèvi nan tanp lan.

¹⁹ Chèf lagad la pran dènye bagay ki te fèt an lò ak an ajan: kivèt yo, recho yo, gode yo, plat pou resevwa sann yo, lanp sèt branch yo, bòl yo ak tas yo,

²⁰ de gwo poto yo, gwo basen lan ak douz estati towò ki te sèvi l' sipò yo, ak kabwèt wa Salomon te fè fè an kwiv pou mete nan tanp lan. Tout bagay sa yo te lou anpil, pesonn pa t' konn pèz yo.

²¹ De poto yo te parèy yonn ak lòt: yo chak te gen vennsèt pye wotè, se yon kòd dizwit pye longè ki pou ta fè wonn yo chak. Poto yo te vid nan mitan. Rebò yo te gen twa pous epesè.

²² Sou tèt chak poto te gen yon blòk an kwiv sèt pye edmi wotè. Sou tout wonn tèt poto yo, te gen desen ti chenn makònen yonn ak lòt, ak anpil pòtre grenad plake sou yo. Tout te fèt an kwiv. De poto yo te parèy.

²³ Sou wonn tèt poto yo te gen san grenad antou, men antan ou anba ou te ka wè katrevensèz grenad sèlman.

²⁴ ¶ Lèfini, Neboucharadan, chèf lagad la, pran Seraya, granprèt la, Sefanya, adjwen li an ansanm ak twa lòt chèf ki la pou veye pòtay tanp lan, li fè yo prizonye.

²⁵ Nan lavil la, li pran chèf ki te alatèt lame a ansanm ak sèt lòt otorite ki te toujou avèk wa a, ak sekretè kòmandan lame a ki te reskonsab pou pran moun nan lame a, ak swasant lòt grannèg. Tout moun sa yo te nan lavil la toujou.

²⁶ Neboucharadan pran yo, li mennen yo bay wa Babilòn lan lavil Ribla.

²⁷ Wa a fè bat yo, lèfini li fè touye yo lavil Ribla nan peyi Amat. Se konsa yo te depòte moun peyi Jida yo byen lwen peyi yo.

²⁸ Men kantite moun wa Nèbikadneza te depòte: Nan setyèm lanne rèy li a, li depòte twamil venntwa (3.023) moun peyi Jida.

²⁹ Nan dizwityèm lanne rèy li a, li depòte witsantrannde (832) moun lavil Jerizalèm.

³⁰ Nan venntwazyèm lanne rèy li a, Neboucharadan, chèf lagad la, te pran sètankaransenk (745) moun. Antou sa te fè katmil sisan (4.600) moun yo te depòte.

³¹ ¶ Premye lanne wa Evilmewodak pran pouvwa a lavil Babilòn, li fè pa Jojakim, wa peyi Jida a, li fè l' soti nan prizon. Lè sa a, Jojakim te gen transizan onz mwa, vennsenk jou, jou pou jou, depi yo te depòte l'.

³² Evilmewodak te sèvi byen avè l', li ba l' premye plas nan mitan tout lòt wa yo te depòte lavil Babilòn tankou l' yo.

³³ Li wete rad prizonye ki te sou Jojakim lan, li fè l' vin manje

34
sou menm tab avè l' jouk Jojakim mouri. Chak jou, wa a ba li sa li te bezwen pou l' viv, konsa, konsa, jouk li mouri.

Lamentations

Chapter 1

1 ¶ Jan lavil Jerizalèm te plen moun yon lè! Gade, jounen jòdi a li chita pou kont li! Li tankou yon fanm ki pèdi mari l'. Tout nasyon sou latè te respekte pouvwa li. Li te devan tout lòt lavil yo.

2 Koulye a, men li tounen esklav! Tout lannwit l'ap plede kriye, dlo ap koule nan je l' san rete. Nan tout moun ki te renmen l' yo, li pa jwenn yonn menm pou konsole l'. Tout zanmi l' yo trayi l', yo

3 tout fè l' lènmi koulye a. Yo depòte moun peyi Jida yo, y'ap peze yo. Y'ap kraze yo anba travay di. Moun peyi Jida yo ap viv nan lòt peyi. Yo pa gen kote pou yo poze kò yo. Tout moun ki pa vle

4 wè yo sènen yo toupatou! Pa gen chape pou yo. Chemen ki mennen sou mòn Siyon yo blanch! Pesonn pa moute al fè sèvis jou fèt yo. Pòtay li yo vid. Prèt yo ap plenn. Tout medam ki konn chante

5 yo nan lafliksyon. Mòn Siyon an nan gwo chagren. Lènmi l' yo pran pye sou li. Moun ki pa vle wè l' yo gen lapè avè l'. Seyè a ap fè l' soufri pou tout kantite peche li fè yo. Ata timoun piti yo

6 depòte. Lènmi pouse yo mache devan yo! Lavil Jerizalèm pèdi tout prestij li. Chèf li yo tankou kabrit mawon ki pa jwenn zèb pou yo manje. Yo pa gen fòs pou yo kouri chape dèvan moun ki

7 dèyè yo. Nan mizè kote yo ye a, nan pwonmennen toupatou sa a, moun lavil Jerizalèm yo chonje tout bèl bagay yo te gen nan tan lontan. Lè moun li yo tonbe anba men lènmi pesonn pa vin pote

8 yo sekou. Moun ki pa vle wè l' yo ap pale sou li. Yo kontan wè jan yo fini avè l'. Lavil Jerizalèm te fè anpil peche! Li bay moun degoutans. Moun ki te konn gen respè pou li yo, koulye a yo pa gade l' menm. Li kanpe tankou yon fanm toutouni devan yo. Li menm, l'ap plenn, l'ap kache figi l'

9 tèlman li wont. Malpwòpte te sou tout rad li, men li pa t' fè lide kote sa t'ap mennen l'. Li tonbe plat atè. Pesonn pa vin konsole li. Bondye papa m', gade nan ki mizè mwen ye non! Lènmi m' yo

10 mete pye sou kou mwen. Lènmi l' yo vòlò tout bèl bagay li te genyen. Moun Bondye te defann

11 mete pye nan tanp lan, li wè yo antre ata kote yo mete apa pou Bondye a. Tout moun ap plenn, y'ap chache manje pou yo manje! Yo bay tout byen yo pou yo sa jwenn manje, pou yo pa fin mouri.

12 -Granmèt o, voye je ou gade m' non! Wè jan y'ap pase m' nan betiz! ¶ Nou tout k'ap pase la a, gade non! Sa pa di nou anyen? Pesonn pa janm pase sa m'ap pase la a. Se Bondye, Seyè a, ki ankòlè

13
 k'ap manyen avè m'. Li rete anwo, li voye dife sou mwen, yon dife ki boule tout anndan mwen. Li tann pèlen pou mwen, li fè m' tonbe atè, Li kite m' pou kont mwen. San rete m'ap kòde anba

14
 soufrans. Li make tout peche m' yo. Li fè yon pakèt ak yo. Li pandye yo nan kou m'. Yo sitèlman lou, m' pa kapab ankò! Bondye sèl Mèt la lage m' nan men lènmi m' yo. M' pa ka kenbe tèt ak yo.

15
 Bondye sèl Mèt la kraze tout vanyan gason m' te genyen yo anba pye l'. Li sanble yon foul moun pou yo atake m', pou yo touye tout jenn gason m' yo. Li kraze moun peyi Jida yo tankou kann nan

16
 moulen. Se poutèt sa m'ap kriye konsa! Dlo ap ponpe nan je m' san rete. Pa gen pesonn pou konsole m', pesonn pou ban m' kouraj. Lènmi m' yo gen pye yo sou kou mwen. Moun mwen yo pa

17
 gen anyen ankò. Mòn Siyon an lonje men l', men, pa gen pesonn pou ba l' kouraj. Seyè a rele tout moun ki pa vle wè peyi Jakòb la, pou yo sènen l' toupatou. Lavil Jerizalèm tounen malpwòpte

18
 nan mitan yo. Men, Seyè a gen rezon l' nan pla men l' paske mwen te refize koute l' lè li t'ap pale m'! Nou tout moun ki toupatou, koute m'! Gade jan m'ap souffri! Yo depòte jenn gason ak jenn

19
 fi m' yo. Mwen rele zanmi m' yo. Men, yo pa okipe m' menm! Prèt yo ak chèf fanmi yo mouri

20
 nan lavil la pandan y'ap chache manje pou yo reprann fòs. Seyè, gade jan kè m' sere non! Mwen boulvèse. Kè m' ap fè m' mal paske mwen te fè wòklò. Nan lari y'ap ansasinen mwen. Anndan kay

21
 menm, se pa pale! Koute jan m'ap plenn. Pa gen pesonn pou ban m' kouraj. Lènmi m' yo vin konnen nan ki malè mwen ye. Yo kontan wè se ou menm ki fè m' sa. Tanpri, fè jou ou te pwomèt

22
 la rive non, pou lènmi m' yo ka vin jan mwen ye a. Jije yo pou mechanste yo. Pini yo menm jan ou pini m' pou peche m' yo. M'ap plenn anpil. Kè m' ap fann.

Chapter 2

1
 ¶ Bondye sèl Mèt la fè kòlè, li voye yon gwo nwaj nwa kouvri lavil Jerizalèm. Tou sa ki te fè respè pèp Izrayèl la, li kraze l' anba pye l'. Jou li fè kòlè a, ata tanp kote li poze pye l' la, li pa chonje

2
 l'. Bondye sèl Mèt la te san pitye, li devaste dènye jaden moun fanmi Jakòb yo. Li fè yon sèl kòlè, li kraze tout fò ki te pwoteje peyi Jida a. Li trennen gouvènman an ansanm ak tout chèf yo nan

3
 labou. Li fè yo wont. Nan gwo kòlè li, li kraze tout fòs kouraj pèp Izrayèl la. Li derefize ede nou

4
 lè lènmi atake nou. Li move sou nou, li te tankou yon dife k'ap boule dènye bagay alawonn. Li atake nou, li tonbe sou nou tankou yon lènmi. Li touye tou sa ki te fè plezi ak kontantman nou.

5
 Jouk anndan lakay nou, li fè nou santi jan li move sou nou. Tankou yon lènmi, Bondye sèl Mèt la fini ak pèp Izrayèl la. Li kraze dènye gwo kay li yo, li detwi tout fò li yo. Li fè moun peyi Jida

⁶
 yo rete ap plenn sou plenn. Li fè tanp lan tounen tankou yon jaden vòlò devaste. Li kraze kote li
 konn gen randevou ak pèp la. Li fè sispann tout jou fèt, tout jou repo sou mòn Siyon an. Li move
 ata sou wa ak prèt yo. Yo tout pase anba men l'.⁷ Bondye sèl Mèt la voye lotèl li a jete. Li pa vle
 wè kay yo te mete apa pou li a. Li kite lènmi yo kraze miray gwo kay yo. Lènmi yo fè fèt, yo rele
 byen fò nan kay Seyè a tankou lè n'ap fè seremoni pou li.⁸ Seyè a, Bondye sèl Mèt la, te soti pou
 l' kraze miray lavil Siyon an. Li fè plan pou lè l' kraze l', li kraze l' nèt. Miray fò yo ak miray ranpa
 yo tonbe, yo kraze ansanm.⁹ Pòtay yo atè kouvri anba fatra. Ba pòtay yo kase, yo pa ka sèvi ankò.
 Yo depòte wa a ak chèf yo nan peyi etranje. Pa gen pesonn pou moutre sa ki nan lalwa. Menm
 pwofèt yo, Bondye pa pale ak yo nan vizyon ankò.¹⁰ ¶ Chèf fanmi lavil Jerizalèm yo chita atè,
 men nan machwè! Yo nan gwo lapenn, yo voye pousyè sou tèt yo, yo mete rad sak sou yo. Jenn fi
 yo menm rete tèt bese.¹¹ Je m' wouj afòs mwen kriye. Kè m' sere. M' pèdi kouraj lè m' wè jan pèp
 mwen an ap fini, jan timoun yo ak ti bebe yo ap tonbe endispoze nan mitan lari kapital la.¹² Y'ap
 rele manman yo, Y'ap kriye pou pen ak dlo sikre. Yo tonbe san konesans nan lari a tankou moun
 ki blese, yo mouri nan bra manman yo.¹³ Aa! Jerizalèm, kisa pou m' di ou la a! Ak ki moun pou
 m' ta konpare sò ou? Ki jan pou m' ankouraje ou? Pesonn pa janm soufri konsa. Malè ki tonbe sou
 ou a pa gen limit, li gwo sè lanmè a! Pesonn pa ka fè anyen pou ou ankò!¹⁴ Pwofèt yo pa wè anyen
 pou yo di ou pase manti ak radòt. Yo kase fèy kouvri peche ou yo pou ou. Yo fè ou pèdi chans ou
 te gen pou ou te kanpe ankò a. Yo pa wè anyen pou yo di ou. Y'ap ba ou manti, y'ap pete ou.¹⁵ Tout
 moun sou granchemen an ap rele chalbari dèyè ou. Y'ap lonje dwèt sou ou, y'ap pase lavil Jerizalèm
 nan rizib. Y'ap ri, y'ap di: -Men lavil yo t'ap di pa gen pi bèl pase l' la wi! Se lavil sa a wi ki te fè
 kè tout moun bat pou li a!¹⁶ Tout lènmi ou yo ap pale ou mal byen fò. Y'ap rele chalbari dèyè ou.
 Y'ap lonje bouch yo sou ou. Y'ap di: -Nou fini avè l'! Men jou nou t'ap tann lan! Nou jwenn li jòdi
 a!¹⁷ Seyè a fè sa li te di li t'ap fè a. Li kenbe pawòl li te di depi nan tan lontan an. Li kraze san
 gade dèyè. Li fè lènmi nou yo genyen batay la sou nou. Li fè yo kontan wè jan nou fini.¹⁸ Jerizalèm,
 ou mèt kite miray ou yo rele nan pye Seyè a. Kite dlo koule nan je ou tankou larivyè, lajounen kou
 lannwit! Pa pran kanpo menm! Pa kite dlo nan je ou cheche!¹⁹ Leve nan mitan lannwit, chak fwa
 kòk chante, rele nan pye Bondye! Louvri kè ou bay Bondye sèl Mèt la. Mande l' gras mizèrikòd
 pou ti pitit ou yo, k'ap mouri grangou nan chak kalfou!²⁰ Gade non, Seyè! Manyè wè ki moun
 w'ap matirize konsa! Manman ap manje pitit ki sot nan vant yo, pitit yo renmen anpil yo. Y'ap
 touye prèt yo ak pwofèt yo nan kote ki apa pou Bondye sèl Mèt la, nan tanp lan.²¹ Jenn gason kou
 granmoun mouri atè nan mitan lari. Jenn tifi yo ak jenn tigason yo mouri nan lagè! Jou ou fè kòlè

a, ou touye moun, ou kraze moun san gad dèyè.²² Ou fè moun k'ap fè m' pè yo soti toupatou pou yo vin danse, fè fèt sou do m'. Lè Seyè a move, pesonn pa ka chape, tout moun gen pou mourir. Lènmi m' yo touye ata timoun mwen te renmen yo, timoun mwen te elve yo.

Chapter 3

¹ ¶ Mwen se yon nonm ki konnen mizè moun gen pou pase lè Bondye ankòlè sou yo, lè Bondye ap pini yo.² Li trennen m', li fè m' mache nan fènwa san yon ti limyè pou klere m'.³ Tout lajounen, l'ap plede bat mwen san rete.⁴ Po kò m' fin chire, vyann mwen parèt deyò konsa. Li kraze tout zo nan kò m'.⁵ Li fèmen m' nan yon koridò mizè ak lafliksyon.⁶ Li fè m' rete kote ki fènwa a tankou moun mourir yo.⁷ Li moute yon miray, li fèmen kote m' ye a, m' pa ka chape. Li mare m' ak gwo chenn.⁸ Tout rele mwen rele byen fò, pesonn p'ap tande m'.⁹ Li simen gwo wòch toupatou sou wout mwen. Kote m' vire, chak pa mwen fè, m' bite.¹⁰ Tankou yon lous, li biske kò l', l'ap veye m'. Tankou yon lyon, li kache, l'ap tann mwen.¹¹ Li fè m' tonbe nan bwa. Li filange tout kò m'. Lèfini, li lage m'.¹² Li mete flèch nan banza li, li vize. Se sou mwen l'ap voye yo.¹³ Li fè flèch li yo antre fon nan kò m'.¹⁴ Tout moun nan peyi a ap pase m' nan betiz. Se toutan y'ap fè chante sou mwen.¹⁵ Li plen vant mwen ak manje anmè kou fyèl. Li fè m' bwè labsent jouk mwen sou.¹⁶ Li fwote tout figi m' atè, li fè m' kase dan m' nan wòch.¹⁷ Mwen pa konnen sa yo rele kè poze. Mwen bliye sa yo rele kè kontan.¹⁸ Mwen di: M' pa gen lontan pou m' viv ankò. M' pèdi tout espwa mwen te gen nan Bondye.¹⁹ Lè m' chonje nan ki mizè mwen ye, jan m'ap mache pwonmennen san rete, se tankou yon labsent, yon fyèl m'ap vale.²⁰ Wi, lè m' chonje sa, kè m' sere, m' santi kè m' ap rache.²¹ ¶ Men, mwen reprann kouraj lè m' chonje yon sèl bagay.²² Seyè a pa janm sispann renmen nou. L'ap toujou gen pitye pou nou.²³ Tankou solèy la ki leve chak maten konsa tou l'ap toujou kenbe pawòl li.²⁴ Mwen di: Se Seyè a ki tout mwen. Se nan li mwen mete tout espwa m'.²⁵ Seyè a bon pou tout moun ki mete konfyans yo nan li, pou moun k'ap konte sou li.²⁶ Sa bon pou nou rete dousman ap tann li vin delivre nou.²⁷ Sa bon pou nou aprann sipòte

28 depi nou tou jenn. Lè Bondye ap manyen ak nou, ann chita pou kont nou san di anyen. 29
 pa bezwen plenyen. Nou pa janm konnen, ka gen espwa toujou. 30 Se pou n' pare figi n' pou n'
 pran souflèt. Se pou n' asepte tou sa yo fè nou. 31 Bondye sèl Mèt la p'ap janm lage nou nèt. 32 Li
 ka fè nou lapenn, men l'ap gen pitye pou nou paske li renmen nou anpil. 33 Li pa pran plezi nan fè
 nou souffri, ni nan ban nou lapenn. 34 Atò, se konnen Seyè a, Bondye sèl Mèt la, pa konnen lè y'ap
 kraze prizonye anba baton, 35 lè yo derefize rekonèt dwa Bondye ban nou, 36 lè y'ap bay move
 jijman nan tribinal! Atò, se konnen li pa konnen! 37 ¶ Depi Bondye Sèl Mèt la pale, se fini! Sa l'
 di se sak fèt. 38 Tou sa ki rive an byen osinon an mal, se li menm ki penmèt sa. 39 Lè nou anba
 bwa pou peche nou yo sa nou bezwen plenyen fè! 40 Annou gade jan n'ap mennen bak nou! Ann
 egzaminen byen jan n'ap viv la! Lèfini, ann tounen vin jwenn Bondye! 41 Ann leve bra nou nan
 syèl la, ann lapriyè nan pye l'! 42 ¶ Nou peche, nou kenbe tèt avè ou! Men, ou menm ou pa padonnen
 nou. 43 Ou move pi rèd, ou fann nan kò nou! Ou te san pitye. Ou touye nou. 44 Ou vlope kò ou
 nan yon gwo nwaj nwa pou lapriyè nou pa rive nan zòrèy ou. 45 Ou fè nou tounen yon depotwa,
 yon pil fatra nan mitan lòt nasyon sou latè yo. 46 Tout lènmi nou yo ap lave bouch yo sou nou.
 47 N'ap viv ak kè sote, si se pa lanmò, se gwo danje, se gwo malè! 48 De je m' yo ap ponpe dlo
 tankou larivyè, lè m' wè malè ki tonbe sou pèp mwen an! 49 Dlo ap koule nan je m' san rete. Li
 p'ap janm sispann, 50 jouk jou Seyè a va rete nan syèl la, l'a voye je l' gade, l'a wè! 51 Wi, kè m'
 fè m' mal pou m' wè sa ki rive moun lavil mwen yo! 52 Yon bann moun ki pa vle wè m' san m' pa
 fè yo anyen pran kouri dèyè m' tankou yon zwazo y'ap chache pran. 53 Yo lage m' tou vivan nan
 yon twou. Yo fèmen bouch twou a ak wòch. 54 Dlo te prèt pou kouvri tèt mwen. Mwen di: Fwa
 sa a m' pran! 55 ¶ Nan twou kote m' te ye a, Seyè, mwen rele ou! 56 Ou tande vwa m'. Tanpri, pa
 bouche zòrèy ou lè m'ap lapriyè nan pye ou. 57 Wi, lè m' rele ou, ou pwoche. Ou di m' mwen pa
 bezwen pè! 58 Bondye Sèl Mèt, ou pran ka m' an konsiderasyon. Ou sove lavi m'. 59 Seyè, ou wè
 tout lenjistis y'ap fè m'. Tanpri, defann kòz mwen. 60 Ou wè jan yo soti pou pwofite sou mwen,
 jan y'ap fè konplo pou touye m'. 61 Seyè, ou tande jan y'ap joure m'. Ou konnen konplo y'ap fè sou

do m'.⁶² Tout lajounen, y'ap pale sou mwen, y'ap fè plan.⁶³ Gade yo non! Depi maten jouk aswè
yo chita ap fè chante sou do m'!⁶⁴ Seyè, se pou ou pini yo pou tou sa yo fè.⁶⁵ Madichonnen yo!
Fè yo pèdi tèt yo!⁶⁶ Move sou yo, Seyè! Pati dèyè yo! Disparèt yo sou latè!

Chapter 4

¹ ¶ Gade jan bon lò pa klere ankò! Li chanje, li pèdi kalite li! Gade jan wòch Tanp yo gaye nan
tout lari!² Nan tan lontan nou pa ta bay moun peyi Siyon yo pou pi bon lò ki genyen. Gade! Koulye
a, yo pa vo pase krich tè moun fè ak men.³ Ata manman chat mawon bay pitit yo tete. Men, pèp
mwen an mechan tankou otrich k'ap viv nan dezè. Yo pa pran swen pitit yo.⁴ Lang ti bebe yo kole
nan fon bouch yo sitèlman yo swaf dlo. Timoun yo ap rele mande manje. Pa gen pesonn pou ba yo
anyen!⁵ Moun ki te konn manje bon manje gou ap tonbe faya nan lari. Moun ki te elve nan gran
kay ap chache manje nan fatra.⁶ Peche lavil Jerizalèm pi gwo pase peche lavil Sodòm, ki te rete
konsa Bondye disparèt li.⁷ Nazirit nou yo te san repwòch. Pi bon pase yo pa t' genyen. Yo te anfòm,
yo te gwonèg. Yon bèl san wouj t'ap koule nan venn yo!⁸ Koulye a, se lonbraj yo ase ki la. Yo
fini. Pesonn pa rekonèt yo nan lari. Po yo chèch tankou kòs bwa, yo tounen zo ak po.⁹ Moun ki
mouri nan lagè pi bon pase moun ki mouri grangou. Y'ap depafini jouk yo mouri. Yo pa jwenn
anyen pou yo manje.¹⁰ Manman ki te renmen pitit yo anpil, koulye a, yo kwit yo pou yo manje.
Lè malè a tonbe sou pèp mwen an, se sa yo fè pou yo pa mouri grangou.¹¹ Seyè a fache nèt. Li
limen yon sèl kalite dife nan lavil Siyon. Li boule l' ratè.¹² Pesonn sou latè, pa menm wa peyi sou
latè yo, pa t' vle kwè yon jou, moun ki pa vle wè pèp Bondye a ta antre nan pòtay lavil Jerizalèm!
¹³ ¶ Men, tou sa rive paske pwofèt li yo ak prèt li yo te peche. Yo te lakòz anpil moun ki mache
dwat pèdi lavi yo mal.¹⁴ Y'ap mache nan lari tankou moun avèg. Yo bade ak san. Pesonn pa gen
dwa manyen rad yo.¹⁵ Kote yo pase moun ap rele: Wete kò nou la! Nou pa pwòp! Pa pwoche! Pa
manyen m'! Se konsa y'ap plede kouri sot nan yon peyi al nan yon lòt. Pesonn pa vle resevwa yo.
¹⁶ Seyè a pa vle wè yo ankò, se li menm ki gaye yo konsa. Li pa gen konsiderasyon ni pou pè yo
ni pou chèf yo.¹⁷ Je nou wouj afòs nou kriye. N'ap tann yon sekou ki pa janm vini. M'ap veye tann

yon nasyon ki pa ka fè anyen pou delivre nou. ¹⁸ Lènmi ap veye kote nou prale. Nou pa menm gen
 dwa soti nan lari. Jou lanmò nou rive. Sa ki rete pou nou mouri a pa anyen. ¹⁹ Moun ki t'ap kouri
 dèyè nou yo te pi rapid pase malfini k'ap plonje dèyè poul. Y'ap kouri dèyè nou nan tout mòn yo.
 Yo tann pèlen pou nou nan tout dezè a. ²⁰ Moun Seyè a te chwazi a, li menm ki tout souf lavi nou,
 li menm nou te konprann ki ta ka toujou pwoteje nou pou lòt nasyon pa anvayi nou, yo pran l', yo
 mete l' nan prizon! ²¹ ¶ Nou menm, moun peyi Edon ki rete lavil Ouz, nou mèt fè kè nou kontan,
 nou mèt fè fèt! Tou pa nou dèyè, tandè! Jou sa a, nou pral titibe toutouni nan tout lari. ²² Nou
 menm, moun lavil Siyon, nou fin peye pou peche nou yo. Bondye ap sispann pini nou! Men, nou
 menm moun Edon, Seyè a pral pini nou pou peche nou yo. L'ap denonse tou sa nou fè ki mal.

Chapter 5

¹ ¶ Seyè, gade sa ki te rive nou non! Voye je gade nou. Wè nan ki mizè nou ye! ² Peyi nou an
 nan men moun lòt nasyon! Yo pran kay nou pou yo. ³ Nou se timoun san papa. Manman nou tankou
 fanm ki pèdi mari yo. ⁴ Se achte pou n' achte dlo pou nou bwè. Si nou pa gen lajan, nou pa jwenn
 bwa pou nou boule. ⁵ N'ap travay di tankou bourik, tankou bèf kabwa. Nou bouke, nou pa ka pran
 kanpo. ⁶ Pou nou ka jwenn manje pou nou manje nou blije ap lonje men bay peyi Lejip ak peyi
 Lasiri. ⁷ Zansèt nou yo fè peche. Yo pa la ankò! Se nou menm k'ap peye pou sa yo te fè. ⁸ Moun
 k'ap gouvènen nou yo se esklav yo ye. Pesonn pa ka delivre nou anba men yo. ⁹ Se gwo danje lè
 nou soti al dèyè manje. Ansaen toupatou nan peyi a. ¹⁰ Grangou ban nou lafyèb. Kò nou cho kou
 dife. ¹¹ Yo fè kadejak sou madanm nou sou mòn Siyon an. Nan tout ti bouk peyi Jida yo yo kenbe
 pitit fi nou yo. ¹² Yo pran chèf nou yo, yo pann yo. Yo derespekte granmoun nou yo. ¹³ Yo fòse
 jenn gason nou yo rale moulen. Ti gason nou yo ap titibe anba gwo chay bwa. ¹⁴ Granmoun yo pa
 chita nan pòtay lavil la ankò. Jennmoun nou yo pa chante ankò. ¹⁵ Pa gen kè kontan lakay nou.
 Nou pa danse ankò! Lapenn plen kè nou! ¹⁶ Tou sa ki te konn ban nou kè kontan disparèt. Nou te
 peche, malè tonbe sou nou. ¹⁷ ¶ Nou malad nan fon kè nou, nou pa ka wè tèlman n'ap kriye,
¹⁸ paske mòn Siyon an tounen savann. Se bèt nan bwa ase ki rete la. ¹⁹ Men ou menm, Seyè, ou

wa pou tou tan. W'ap gouvènen jouk sa kaba. ²⁰ Poukisa ou lage nou pou tout tan sa a? Gen lè ou p'ap janm chonje nou ankò! ²¹ Seyè, fè nou tounen vin jwenn ou non! Fè nou tounen vin jwenn ou! Fè nou viv jan nou te konn viv nan tan lontan an non! ²² Eske ou voye nou jete pou tout bon? Pou di ou p'ap janm sispann fache sou nou?

Ezekiel

Chapter 1

¹ ¶ Nan senkyèm jou, katriyèm mwa nan trantyeèm lanne an, mwen menm Ezekyèl, mwen t'ap viv ansanm ak moun yo te depòte yo, bò larivyè Keba nan peyi Babilòn. Jou sa a, syèl la louvri devan je m', mwen wè Bondye nan yon vizyon. ² Wa Jojakin te gen senkan depi yo te depòte l'. ³ Antan Ezekyèl, pitit Bouzi, yon prèt Bondye, te la bò larivyè Keba nan peyi Babilòn, li tande Seyè a pale avè l'. Li santi pouvwa Seyè a sou li. ⁴ ¶ Mwen leve je m' gade, mwen wè yon gwo van tanpèt k'ap vini soti nan nò. Zèklè t'ap fè yanyan nan yon gwo nwaj. Syèl la te klere tout arebò nwaj la. ⁵ Nan mitan nwaj la menm kote zèklè yo t'ap fèt la, te gen yon limyè ki te klere tankou kristal. ⁶ Nan mitan van an, mwen wè kat bèt, ou ta di kat moun. ⁷ Yo chak te gen kat figi ak kat zèl. ⁸ Janm yo te byen dwat, men pye yo te tankou zago bèf. Yo te klere tankou kwiv poli. ⁹ Anba chak zèl te gen yon men moun. Konsa, yo chak te gen kat zèl, kat figi, kat men, yonn nan chak direksyon. ¹⁰ De nan zèl yo te louvri nèt. Bèt yo menm te fè yon kare, pwent zèl yo kontre yonn ak lòt. Lè y'ap mache, yo deplase ansanm nan menm direksyon, san vire kò yo. ¹¹ Chak bèt te gen kat figi: yon figi moun sou devan, yon figi lyon sou bò dwat, yon figi bèf sou bò gòch ak yon figi malfini sou dèyè. ¹² Chak bèt te louvri de nan zèl yo, yo leve yo jouk pwent zèl yo kontre ak pwent zèl bèt ki te bò kote yo a. Yo te kouvri kò yo ak de lòt zèl yo. ¹³ Chak bèt t'ap gade nan tout kat direksyon yo. Konsa, yo te kapab mache ansanm pou y' ale kote Lespri Bondye a pouse yo ale a, san yo pa t' bezwen vire kò yo. ¹⁴ Nan mitan bèt yo ou ta di yon gwo boukan dife ak gwo flanm tankou flanm bwa chandèl tou limen ki t'ap ale vini. Dife a te klere anpil, te gen zèklè ki t'ap soti ladan l'. ¹⁵ Bèt yo menm t'ap kouri ale vini byen vit tankou zèklè. ¶ Mwen t'ap gade bèt yo, mwen wè kat wou

¹⁶ k'ap woule atè, yonn bò yo chak. Tout wou yo te parèy, yo te klere tankou wòch krizolit. Ou ta
 di yo chak gen yon lòt wou menm gwosè pase an travè ladan yo, ¹⁷ paske wou yo te ka woule nan
 direksyon kat pwen konpa yo san yo pa t' bezwen vire. ¹⁸ Jant wou yo te byen gwo. Yo te kouvri
 ak je sou tout kò yo. ¹⁹ Chak fwa bèt yo deplase, wou yo deplase tou ansanm ak yo. Si yo leve
 anlè, wou yo leve anlè tou. ²⁰ Bèt yo ale kote pou yo ale a. Wou yo fè tou sa bèt yo fè, paske se
 bèt yo ki t'ap kontwole wou yo. ²¹ Bèt yo vanse, wou yo vanse tou. Bèt yo rete, wou yo rete tou.
 Bèt yo leve anlè, wou yo leve anlè tou, paske se bèt yo ki t'ap kontwole wou yo. ²² Anwo tèt bèt
 yo, te gen yon bagay won an fòm yon gwo bòl bouch anba, ki te klere tankou kristal. ²³ Se anba
 gwo bòl la bèt yo te kanpe ak de zèl louvri ak pwent yo kontre ak pwent zèl bèt ki bò kote yo a. De
 lòt zèl yo te fèmen kouvri kò yo. ²⁴ Lè bèt yo t'ap vole, mwen tande zèl yo t'ap fè yon bri. Ou ta
 di bri lanmè a lè li move, osinon bri vwa Seyè a lè l'ap pale, oswa bri yon gwo lame. Lè yo sispann
 vole, yo kite zèl yo pandye. ²⁵ Men ou te ka tande yon ti bri ki t'ap fèt anwo bòl kristal ki te anlè
 tèt yo a. ²⁶ ¶ Anwo bòl kristal ki te anlè tèt yo a, te gen yon bagay, ou ta di yon gwo fotèy fèt an
 wòch safi. Sou fotèy la, yon fòm te chita ou ta di yon moun. ²⁷ Depi nan ren l' moute, li te klere
 nan je m' tankou kwiv yo poli. Depi nan ren l' desann, ou ta di li te nan mitan yon gwo dife ki te
 klere tout kote l' te ye a. ²⁸ Li te nan mitan yon limyè tout koulè tankou lakansyèl yon jou lapli.
 Gwo bèl limyè sa a te fè m' konprann se Seyè a ki te parèt devan m'. Lè mwen wè sa, mwen tonbe
 sou de jenou m', tèt mwen bese jouk atè. Lèfini mwen tande yon vwa moun k'ap pale.

Chapter 2

¹ ¶ Li di m' konsa: -Nonm o! Kanpe non! Mwen pral pale avè ou. ² Antan l'ap pale konsa a,
 lespri Bondye antre sou mwen, li mete m' kanpe sou de pye m'. Epi m' tande vwa a ki pran pale
³ ankò. Li di m' konsa: -Nonm o! M'ap voye ou bò kote moun pèp Izrayèl yo. Se yon bann moun
 ki pa t' vle koute m', yo te vire do ban mwen. Jouk koulye a y' ap kenbe tèt avè m' tankou zansèt
⁴ yo te fè l' nan tan lontan. Yo gen tèt di, yo gen move santiman konsa nan kè yo. Men se bò kote
 moun sa yo m'ap voye ou pou di yo men sa mwen menm, Seyè ki gen tout pouvwa a, m' voye di
⁵ yo. Mwen konnen se yon move ras moun yo ye, tèt yo di. Kit yo koute ou, kit yo pa koute ou,

zafè yo! Men y'a konnen te gen yon pwofèt nan mitan yo. ¶ Men ou menm, nonm o! ou pa bezwen pè yo, ni ou pa bezwen pè sa y'ap di. Y'ap tizonnen ou, y'ap pase ou nan betiz. W'ap tankou yon moun k'ap mache nan yon jaden pikan, tankou yon moun ki chita sou yon nich flanman. Men, ou pa bezwen kite yo kraponnen ou ak sa y'ap di, ou pa bezwen pè yo. Se yon move ras moun yo ye, tèt yo di. ¶ Se pou ou di yo tou sa m'a di ou di yo, yo te mèt koute ou, yo te mèt pa koute ou. Chonje se yon move ras moun ki gen tèt di yo ye. ¶ Nonm o! Koute sa m' pral di ou la a. Pa fè tèt di tankou move ras moun sa yo. Louvri bouch ou, manje sa m' pral ba ou la a. ¶ M' gade, mwen wè yon men lonje sou mwen. Li te kenbe yon woulo liv tou fèmen. ¶ Li louvri liv la devan je m', mwen wè li te ekri sou tou de bò l' yo. Li te plen pawòl moun di lè y'ap plenn sò yo, lè yo nan gwo lapenn, lè y'ap soufri anpil.

Chapter 3

¶ Bondye di m' konsa: -Nonm o! Manje sa m' ba ou la a. Manje woulo liv la. Apre sa, al pale ak moun pèp Izrayèl yo. ¶ Se konsa, mwen louvri bouch mwen, li fè m' manje woulo liv la. ¶ Li di m' ankò. -Nonm o! Manje non, plen vant ou ak liv mwen ba ou a. Mwen manje l', li te dous nan bouch mwen kou siwo myèl. ¶ Lèfini, Bondye di m' ankò: -Nonm o! Ale bò kote moun pèp Izrayèl yo. Di yo tout pawòl mwen te di ou di yo. ¶ Se pa bò kote yon nasyon ki pale yon lòt lang ki difisil pou ou konprann mwen voye ou. Se bò kote moun pèp Izrayèl yo menm mwen voye ou. ¶ Se pa bò kote bann moun lòt nasyon yo ki pale lòt lang ki difisil pou ou konprann mwen voye ou. Si se te bò kote moun sa yo m' te voye ou, yo ta koute ou. ¶ Men, pa gen pyès moun nan pèp Izrayèl la k'ap vle koute ou, paske yo pa vle koute m'. Tout moun pèp Izrayèl yo gen tèt di ak move santiman nan kè yo. ¶ Koulye a, m'ap fè ou kenbe tèt ak yo tankou yo kenbe tèt ak mwen an, pou ou ka koresponn ak yo. ¶ M'ap fè tèt ou di pase wòch, l'ap di tankou wòch dyaman. Pa pè yo, pa tranble devan yo. Se yon move ras moun ki gen tèt di yo ye. ¶ Bondye di ankò: -Nonm o! Louvri zòrèy ou, tandè sa mapral di ou. Kenbe pawòl mwen yo nan kè ou. ¶ Apre sa, ale bò kote moun yo te depòte yo, moun menm peyi avè ou yo. W'a pale ak yo, w'a di yo men sa mwen menm, Seyè a, m' voye di yo. Yo te mèt koute ou, yo te mèt pa koute ou, zafè yo! ¶ Apre sa, Lespri Bondye a pran m', li leve m' anlè. Mwen tandè yon bann vwa dèyè do m' ki t'ap di: Lwanj pou Seyè a ki fè wè gwo

¹³ pouvwa li nan syèl kote l' rete a. Mwen tandè bri zèl bèt yo ki t'ap bat ansanm ak bri wou yo,
¹⁴ ou ta di bri yon foul moun k'ap rele. Lespri a te leve m' anlè, li pote m' ale. Pouvwa Seyè a te
¹⁵ vin chita sou mwen avèk fòs. Men, mwen te boulvèse, kè m' te sere. Se konsa mwen rive lavil
Tèl Abid toupre larivyè Keba kote moun yo te depòte yo te rete a. Pandan sèt jou, mwen rete la
¹⁶ nan mitan yo, tou dekontwole apre tou sa m' te wè ak tou sa m' te tandè. ¶ Apre sèt jou sa yo,
¹⁷ Seyè a pale avè m', li di m' konsa: -Nonm o! Mwen mete ou faksyonè pou nasyon Izrayèl la.
¹⁸ W'a tandè mesaj m'a ba ou, w'a avèti yo pou mwen. Lè mwen fè ou konnen yon mechan gen
pou l' mouri, si ou pa avèti l' pou l' chanje, pou l' kite move pant l'ap swiv la pou l' ka sove lavi l',
¹⁹ l'ap toujou mouri poutèt peche li fè yo, men se ou menm m'ap rann responsab lanmò li. Men, si
ou avèti mechan an, lèfini mechan an pa chanje, li pa kite move pant l'ap swiv la, l'ap mouri poutèt
²⁰ peche li fè yo. Men ou menm, w'ap sove lavi pa ou. Si yon moun ki t'ap mache dwat tanmen fè
sa ki mal, m'ap mete yon malè sou wout li pou l' mouri. Si ou pa avèti l', l'ap mouri poutèt peche
li fè yo, mwen p'ap chonje jan l' te konn mache dwat anvan sa a. Men, se ou menm m'ap rann
²¹ responsab lanmò li. Si okontrè, ou avèti yon moun k'ap mache dwat pou l' pa fè sa ki mal, si li
koute ou, si li pa fè sa ki mal, li p'ap mouri. Ou menm tou, w'a sove lavi ou. ¶ Mwen santi
²² pouvwa Seyè a sou mwen ankò. Li di m' konsa: -Leve non. Soti al nan fon an. M'a pale la avè ou.
²³ Mwen leve, mwen desann al nan fon an. Lè m' rive la, mwen wè gwo bèl limyè ki te fè m'
konprann Seyè a te kanpe la, tankou mwen te wè l' bò larivyè Keba a. Mwen tonbe sou de jenou
²⁴ m', tèt mwen bese jouk atè. Men, Lespri Bondye a antre sou mwen, li fè m' kanpe sou de pye
m'. Li pale avè m', li di m' konsa: -Al fèmen kò ou lakay ou. ¶ Nonm o! Yo pral mete ou anba
²⁵ kòd. Y'ap mare ou byen mare, ou p'ap ka mete pwent pye ou deyò. Mwen pral fè lang ou lou
²⁶ nan bouch ou. W'ap bèbè, ou p'ap ka avèti move ras moun tèt di sa yo. ¶ Apre sa, lè m'a pale avè
ou ankò, m'a ba ou lapawòl, epi w'a ba yo mesaj mwen menm, Seyè a, Bondye ki gen tout pouvwa
²⁷ a, m'a ba ou. Sa ki vle koute va koute, sa ki pa vle koute, zafè yo! Se yon move ras moun tèt di yo
ye.

Chapter 4

¹ ¶ Bondye di m' konsa: -Nonm o! Pran yon brik, mete l' devan ou. Trase desen lavil Jerizalèm
² sou li. Apre sa, w'a moutre jan lènmi pral sènen lavil la: W'a fouye yon kannal pou sòlda yo kache,
w'a mete ranblè nan pye miray li yo, w'a mete anplasman kan sòlda yo, w'a mete gwo potò pou
³ defonse pòtay yo sou tout bò lavil la. Pran yon pwelon fè, mete l' kanpe tankou yon miray ant ou
menm ak lavil la. Bay lavil la fas. Lavil la sènen toupatou. Se ou menm ki sènen l'. Se va yon siy
⁴ pou moun pèp Izrayèl yo. Lèfini, kouche sou bò gòch ou. W'a pran tout peche moun pèp Izrayèl
⁵ yo sou ou. Ou rete kouche konsa pandan tout tan w'ap pote chay peche yo a. Mwen deside pou
yo pase twasankadrevendizan (390) ap peye pou peche yo. Konsa, m'ap fè ou pase twasankatrevendi
⁶ (390) jou ap pote chay peche moun peyi Izrayèl yo, yon jou pou chak lanne. Apre sa, w'a vire
kouche sou bò dwat ou. W'a pote chay peche moun peyi Jida yo pandan karant jou, yon jou pou
⁷ chak lanne chatiman yo. Vire tèt ou, gade lavil Jerizalèm yo sènen an. Lonje dwèt ou sou li. Di
⁸ sa ki pral rive l'. M'ap mare ou byen mare, konsa ou p'ap ka vire chanje bò toutotan tout jou pou
⁹ yo sènen lavil la poko fin pase. ¶ Bon, koulye a ou pral pran ble, lòj, gwo pwa, ti pwa, pitimi ak
ble mòn, w'a mete yo ansanm nan yon sèl vesò. W'a fè pen ak yo. Pandan tout twasankatrevendi
¹⁰ (390) jou w'ap pase kouche sou bò gòch ou a, se sa ase w'a manje. W'a pran yon moso pen ki
¹¹ peze yon demi (1/2) liv pou ou manje chak jou. Se sa ase pou ou manje chak jou. Ou p'ap gen
¹² anpil dlo pou ou bwè. W'a pran yon lit dlo konsa chak jou. W'a pran okabennen moun, w'a fè
¹³ dife pou kwit pen pou ou manje a devan tout moun. Seyè a te di ankò: -Se konsa moun pèp
¹⁴ Izrayèl yo pral manje manje lalwa defann yo manje, lè m'a gaye yo nan mitan lòt nasyon yo. Lè
sa a, mwen di: -O non! Seyè, Bondye ki gen tout pouvwa a, mwen pa janm manje manje ou defann
moun manje. Depi m' piti, mwen pa janm manje vyann bèt ki mouri toufe, ni vyann bèt lòt bèt
¹⁵ touye. Non, mwen pa janm mete nan bouch mwen vyann ou defann moun manje! Lè sa a, Bondye
di m' konsa: -Dakò. M'ap kite ou pran kaka bèf pito pase okabennen moun. Ou mèt fè dife avè l'
¹⁶ pou kwit pen ou lan. Epi li di ankò: -Nonm o! Mwen pral koupe viv moun lavil Jerizalèm yo.
Moun yo pral gen kè sere, yo pral gen kè sote lè yo pral kontwole kantite pen pou yo manje ak
¹⁷ kantite dlo pou yo bwè. Yo p'ap jwenn kantite pen ak dlo yo bezwen: yo tout y'ap depafini
ansanm, y'ap deperi poutèt peche yo fè yo.

Chapter 5

¹
 ¶ Seyè a di mwen: -Nonm o! Pran yon kouto byen file, tankou razwa kwafè, wete tout bab nan figi ou ak tout cheve nan tèt ou. Lèfini, pran yon balans pou peze cheve ou koupe yo, w'a fè yo fè twa pil menm fòs. ² Lè y'a sispann sènen lavil la, w'a boule yon premye pil nan mitan lavil la. W'a pran yon dezyèm pil, w'a koupe l' ti moso ti moso avèk nepe a pandan w'ap fè tou lavil la pa deyò. Dènye pil cheve a menm, w'a voye l' anlè pou van pote yo ale. Mwen menm, m'a kouri dèyè yo ak nepe mwen. ³ W'a sere yon ponyen cheve, w'a koud li nan woulèt rad ou. ⁴ Lèfini, w'a pran de twa branch cheve nan sa ou te sere yo, w'a voye yo jete nan dife pou yo boule. Dife a ap gaye nan tout peyi Izrayèl la. ⁵ ¶ Men sa Seyè a, Bondye ki gen tout pouvwa, di ankò: -Gade lavil Jerizalèm! Mwen te mete l' kanpe nan mitan latè ak tout lòt nasyon yo bò kote l'. ⁶ Men, Jerizalèm revòlte kont kòmandman ak lòd mwen yo. Li fè pi mal pase lòt nasyon ki bò kote l' yo. Moun li yo derefize swiv prensip mwen te ba yo. Yo pa fè sa m' te ba yo lòd fè a. ⁷ Se poutèt sa, nou menm moun lavil Jerizalèm, men sa Seyè ki gen tout pouvwa a, di nou: Nou pa swiv lòd mwen yo, nou pa fè sa m' te mande nou fè. Konsa, nou fè pi mal pase moun lòt nasyon ki bò kote nou yo. Nou pa menm swiv lòd moun lòt nasyon yo gen lakay yo. ⁸ Se poutèt sa, men sa Seyè a, Bondye nan syèl la, di ou: M'ap leve dèyè ou tou, mwen pral pini ou devan tout lòt nasyon yo. ⁹ N'ap fè yon bann bagay mwen pa vle wè menm. Se poutèt sa m'ap pini lavil Jerizalèm jan mwen poko janm pini l', jan mwen p'ap janm pini l' ankò. ¹⁰ Se poutèt sa, nan lavil Jerizalèm papa ak manman va manje pwòp pitit yo, pitit va manje papa ak manman yo. M'ap pini nou, m'ap gaye rès moun ki va rete yo toupatou. ¹¹ Se poutèt sa, jan nou konnen mwen vivan vre a, se mwen menm Seyè, Sèl Mèt la, k'ap pale: Paske nou derespekte tanp mwen an ak tout vye bagay degoutan ansanm ak bann bagay mwen pa vle wè menm nou te fè ladan l' yo, mwen fè sèman, mwen menm tou m'ap san pitye pou nou. M'ap voye nou jete, mwen p'ap kite nou yonn chape. ¹² Pèp la ap fè twa pòsyon, yon pòsyon pral mouri anba maladi ak grangou nan lavil la, yon lòt pòsyon pral mouri nan lagè lòt bò miray ranpa lavil la. M'ap gaye rès la nan tout direksyon. Lèfini, m'ap kouri dèyè yo ak nepe. ¹³ M'a tire revanjan mwen, m'ap krase yo dèske yo fè m' fè kòlè, m'ap move sou yo jouk mwen pa kapab ankò. Lè sa a, y'a rekonèt se mwen menm Seyè a ki te pale konsa ak yo, paske yo te pouse m' fè jalouzi, mwen te fache sou yo jouk mwen pa kapab ankò. ¹⁴ M'ap fè nou tounen yon dezè nan mitan tout lòt peyi yo, yon wont pou moun k'ap pase bò kote nou ye a. ¹⁵ Lè m'a fè kòlè a, lè m'a move anpil sou nou an, lè m'a pini nou rès mare jan mwen te vle l' la, m'ap avili nou, m'ap fè nou tounen yon wont. N'a sèvi yon avètisman pou tout nasyon ki bò kote nou yo, y'a soti pè lè y'a wè sa ki rive nou. Se mwen menm Seyè a ki di sa. ¹⁶ M'ap koupe viv nou, m'ap kite nou mouri grangou. Nou pral santi doulè grangou a tankou si se flèch yo voye sou nou pou touye nou. ¹⁷ M'ap voye grangou ak

bèt nan bwa k'ap touye tout pitit nou yo. Move maladi pral tonbe sou nou, y'ap mete san nou deyò. M'ap voye lènmi vin fè nou lagè. Se mwen menm Seyè a ki pale.

Chapter 6

¹ ¶ Seyè a pale avè m', li di m' konsa: ² -Nonm o! Vire tèt ou gade nan direksyon mòn peyi Izrayèl yo. Bay moun yo mesaj mwen ba ou pou yo a. ³ W'a di moun nan mòn peyi Izrayèl yo: Koute mesaj Seyè a, Bondye Sèl Mèt la. Men sa li di moun nan mòn yo, nan ti mòn yo, nan ravin yo ak nan fon yo. Mwen pral voye lènmi atake nou ak nepe pou detwi tout kote nou konn fè sèvis pou zidòl yo. ⁴ Y'ap kraze tout lotèl nou yo, y'ap fè lotèl lansan nou yo tounen miyèt moso. M'ap fè yo touye moun nou yo devan vye zidòl yo a. ⁵ M'ap gaye kadav moun pèp Izrayèl yo devan tout vye zidòl yo, m'ap mache gaye zosman yo tout bò lotèl yo. ⁶ Y'ap detwi tout lavil ki nan peyi yo a. Y'ap kraze met atè tout kote yo fè sèvis pou zidòl yo ansanm ak tout lotèl yo. Y'ap kraze zidòl nou yo, y'ap disparèt yo. Y'ap kraze lotèl lansan nou yo an miyèt moso. Tou sa nou te fè ak men nou yo pral disparèt. ⁷ Anpil moun ap tonbe mouri nan mitan nou. Lè sa a, n'a konnen se mwen menm ki Seyè a. ⁸ ¶ Men, m'ap kite de twa nan nou chape nan lagè a. Lèfini m'ap gaye yo nan mitan lòt nasyon yo. ⁹ Moun ki va chape yo va chonje m' nan peyi kote y'ap depòte yo a. Y'a chonje mwen te pini yo paske, nan fon kè yo, yo te vire do ban mwen, mwen te fè yo wont paske yo te kole je yo sou yon vye zidòl. Y'ap gen pwòp tèt yo degoutans akòz bagay mal yo te fè pandan toutan yo te lage kò yo nan sèvi zidòl. ¹⁰ Y'a konnen se mwen menm ki Seyè a. Lè m' te di yo mwen t'ap voye tout malè sa yo sou yo, se pa t' pale mete la m' t'ap fè. ¹¹ ¶ Men sa Seyè a, Bondye Sèl Mèt la, di ankò: -Mare ren ou, leve de bra ou anlè! Rele gras lamizerikòd! Akòz tout bagay mal, bagay mwen pa vle wè menm, moun pèp Izrayèl yo ap fè a, yo pral mouri nan lagè, nan grangou, anba gwo maladi. ¹² Moun ki lwen yo pral tonbe malad, y'ap mouri. Moun pre yo pral mouri nan lagè. Sa ki va rete yo pral mouri grangou. M'ap move sou yo jouk mwen p'ap kapab ankò. ¹³ Kadav yo pral gaye nan mitan zidòl bò lotèl yo, sou tèt tout ti mòn yo, sou tèt tout gwo mòn yo, anba pyebwa plen fèy vèt yo, anba gwo bwadchenn yo, kote yo te konn boule bèt yo ofri pou fè zidòl yo plezi ak bon sant yo. Lè sa a, y'a konnen se mwen menm ki Seyè a. ¹⁴ Wi, m'ap lonje men m' sou yo pou m' touye yo tout. M'ap fè dènnye kote yo te rete nan pèyi a tounen yon savann san moun ladan l', depi dezè ki sou bò sid la rive lavil Ribla sou bò nò. Lè sa a, y'a konnen se mwen menm ki Seyè a.

Chapter 7

¹ ¶ Seyè a pale avè m' ankò, li di m' konsa: ² -Nonm o! Men mesaj mwen menm Seyè a, Bondye
sèl Mèt la, mwen bay pou peyi Izrayèl la: Fini! Se fini tout peyi a nèt pral fini. ³ Koulye a, sa fini
nèt pou nou! Mwen pral move sou nou, paske mwen pral pini nou pou tou sa nou fè. Mwen pral fè
nou peye pou tout vye bagay derespektan n'ap plede fè devan je mwen. ⁴ Mwen p'ap gen pitye pou
nou. Mwen p'ap fè pa nou. Mwen pral fè nou peye pou tou sa nou fè. Mwen pral regle nou pou tout
vye bagay derespektan n'ap plede fè devan je m' yo. Konsa n'a konnen se mwen menm ki Seyè a.
⁵ Men sa Seyè a, Bondye sèl Mèt la, di ankò: -Malè sou malè pral tonbe sou nou. ⁶ Lè a fin rive!
Nou pa lwen fini nèt! Dènye jou nou yo pa lwen rive. ⁷ Sa pral fini nèt pou nou tout ki rete nan
peyi a. Lè a ap pwoche, jou a pa lwen ankò lè p'ap gen kè kontan sou mòn yo. Se pral yon gwo
⁸ kouri. Koulye a, talè konsa, mwen pral fè nou santi jan m' ka move. Mwen pral move sou nou
jouk mwen p'ap kapab ankò. Mwen pral pini nou pou tou sa nou fè. M'ap fè nou peye pou tout vye
⁹ bagay derespektan n'ap plede fè devan je m' yo. Mwen p'ap gen pitye pou nou, mwen p'ap fè pa
nou. Mwen pral fè nou peye pou tou sa nou fè. Mwen pral regle nou pou tout vye bagay derespektan
n'ap plede fè devan je m' yo. Lè sa a, n'a konnen se mwen menm Seyè a k'ap pini nou. ¹⁰ Men jou
¹¹ malè a rive sou nou. Nou pral fini nèt! Baton nan dèyè nou! Lwijanboje yo toupatou! Mechan
yo ap pran baton pou kraze brize. Anyen p'ap rete nan richès nou yo, nan bèl bagay nou yo ak nan
¹² gwo pouvwa nou yo. Wi, lè a rive, jou a ap pwoche. Moun k'ap achte yo pa bezwen fè kè yo
kontan. Moun k'ap vann yo pa bezwen règrèt anyen paske chatiman Bondye pral tonbe sou tout
¹³ richès ki nan peyi a. Machann yo ap gen tan mouri anvan yo touche lajan pou sa yo te vann lan,
paske wè pa wè, vizyon an gen pou rive vre, tout moun gen pou pase. Tout moun te lage kò yo nan
¹⁴ fè mechanste san sa pa rapòte yo anyen. Twonpèt la kònen. Tout bagay fin pare! Men, pesonn
¹⁵ p'ap leve al goumen paske chatiman Bondye a pral tonbe sou tout moun ki nan peyi a. Batay
nan tout lari! Maladi ak grangou nan tout kay! Moun ki andeyò nan jaden yo pral mouri nan lagè.
¹⁶ Moun ki anndan lavil la, grangou ak maladi pral fini ak yo. ¶ Genyen ki va chape kò yo al nan
¹⁷ mòn, tankou ranmye k'ap vole kite fon yo. Yo pral plenn sò yo pou tou sa yo fè ki mal. Bra tout
¹⁸ moun pral san fòs, yo p'ap ka kanpe sou janm yo tèlman y'ap pè. Yo pral mete rad sak sou yo.
¹⁹ Yo pral tranble nan tout kò yo. Yo pral wont, y'ap kale tèt yo nèt. Y'ap voye tou sa yo genyen
ki fèt an ajan jete nan lari. Yo p'ap ka santi sa yo genyen ki fèt an lò. Paske jou sa a, ni lò, ni ajan
p'ap ka sove yo anba kòlè Bondye. Yo p'ap ka fè bouch yo plezi, ni yo p'ap ka manje plen vant yo.

²⁰
 Paske se pou bagay sa yo yo te fè tout mechanste sa yo. Bèl bijou yo te genyen yo vire lòlòj yo. Yo sèvi ak yo pou fè estati zidòl, bagay ki derespektan, bagay mwen pa vle wè menm. Se poutèt sa, m'ap fè yo p'ap ka santi richès yo. ²¹ M'ap lage tout richès yo nan men moun lòt nasyon k'ap piye yo. Yon bann sanzave ap vòlò tout richès yo, y'ap trennen yo nan labou. ²² M'ap fèmen je m' pou m' pa wè lè y'ap trennen trezò tanp lan nan labou, lè vòlò va antre nan tanp lan pou yo derespekte l'. ²³ ¶ Tout bagay pral tèt anba. Peyi a plen ansasen k'ap touye moun. Nan lavil la, moun ap kraze brize. ²⁴ M'ap fè pèp ki pi mechan sou latè a mache sou yo, y'ap pran tout kay yo pou yo. M'ap kraze lògèy lwijanboje yo, lè moun sa yo va derespekte tout kote yo te konn fè sèvis pou zidòl yo. ²⁵ Tout moun pral gen kè sere. Yo ta renmen gen kè poze, men yo p'ap kapab. ²⁶ Malè ap tonbe sou yo yonn apre lòt. Yon seri move nouvèl ap vini yonn dèyè lòt. Yo pral mande pwofèt la ki vizyon li fè pou yo. Prèt yo p'ap gen anyen pou moutre pèp la. Granmoun yo p'ap gen konsèy pou ba yo. ²⁷ Wa a pral nan gwo lapenn. Pitit wa a pral rete sezi, tout pèp la pral tranble. M'ap pini yo pou sa yo fè, m'ap fè yo menm sa yo te fè lòt moun. Lè sa a, y'a konnen se mwen menm ki Seyè a.

Chapter 8

¹
 ¶ Nan senkyèm jou sizyèm mwa nan sizyèm lanne depi yo te depòte pèp la, mwen te chita lakay mwen ansanm ak chèf pèp Jida yo ki te reyini lakay mwen. Mwen rete konsa mwen santi pouvwa Seyè a, Bondye Sèl Mèt la, desann sou mwen. ² Mwen leve je m' gade, mwen wè yon fòm ki te sanble ak yon moun. Depi nan ren l' desann, kò l' te tankou yon flanm dife. Depi nan ren l' moute, li te klere tankou kwiv byen poli. ³ Mwen wè l' lonje men l' tankou men yon moun, li pran m' nan cheve. Nan vizyon an, li leve m' byen wo nan syèl la, li mennen m' lavil Jerizalèm, devan pòtay anndan ki bay sou bò nò a, kote yo te mete yon estati zidòl ki te lakòz Bondye ankòlè. ⁴ La, mwen wè yon gwo bèl limyè ki te fè m' konprann se Bondye pèp Izrayèl la ki te la, menm jan mwen te wè l' nan fon an. ⁵ Bondye di m' konsa: -Nonm o! Vire je ou gade bò nan nò! Mwen vire je m' gade bò nan nò. Mwen wè toupre lotèl ki bò pòtay kote moun pase pou antre a, estati zidòl ki te lakòz Bondye ankòlè a. ⁶ Bondye di m' ankò: -Nonm o! Eske ou wè sa y'ap fè? Gade tout bagay derespektan moun pèp Izrayèl yo ap plede fè pou yo fè m' kite tanp mwen an. Ou gen pou wè bagay ki pi mal pase sa toujou. ⁷ ¶ Li pran m', li mennen m' nan pòtay ki bay sou lakou anndan an, li moutre m' yon twou nan miray la. ⁸ Li di m' konsa: -Nonm o! Fè yon gwo twou nan miray la. Mwen

fè gwo twou a. Lèfini, mwen jwenn yon pòt. ⁹ Li di m' konsa: -Louvri pòt la antre! Gade tout kalite
 vye bagay derespektan moun sa yo ap fè la a! ¹⁰ Mwen antre, mwen gade. Tout miray la nèt te
 kouvri ak pòtre koulèv, pòtre tout kalite bèt yo pa gen dwa manje ak pòtre lòt vye zidòl moun pèp
¹¹ Izrayèl yo ap sèvi. Swasanndis nan chèf fanmi pèp Izrayèl yo te kanpe la devan zidòl yo. Yonn
 ladan yo te Jazanya, pitit Chafan an. Yo chak te kenbe yon lansanswa nan men yo. Gwo lafimen
¹² lansan t'ap moute. Bondye di m' konsa: -Nonm o! Eske ou wè sa chèf fanmi pèp Izrayèl yo ap
 plede fè an kachèt? Yo rete ap fè sèvis nan yon chanm kay plen zidòl. Men eskiz yo bay: O wi!
¹³ Bondye pa wè nou! Bondye vire do l' bay peyi a! ¶ Apre sa, Seyè a di m' ankò: -Ou gen pou wè
 yo ap fè bagay ki pi derespektan toujou. ¹⁴ Lè sa a, li mennen m' bò pòtay nò tanp lan, li moutre
 m' yon bann fanm ki chita ap kenbe yon rèl lanmò pou zidòl yo rele Tamouz la. ¹⁵ Li di m' konsa:
¹⁶ -Nonm o! Ou wè sa, pa vre? Ou gen pou ou wè gwo bagay pi derespektan ankò y'ap fè. Li
 mennen m' nan lakou anndan tanp lan. Mwen wè vennsenk nèg konsa kanpe bò pòt pou antre nan
 kote ki apa nèt pou Seyè a, nan mitan lotèl la ak galeri a. Yo te bay tanp lan do. Fas yo vire bò solèy
¹⁷ leve. Yo bese tèt yo byen ba, y'ap fè sèvis pou solèy la k'ap leve. Seyè a di m' konsa: -Nonm o!
 Eske ou wè sa? Moun peyi Jida sa yo ap fè tout vye bagay derespektan y'ap plede fè yo. Y'ap mache
 fè mechanste nan tout peyi a. Men sa pa kont yo toujou, se pou yo vini jouk isit la nan tanp lan pou
 fè yo, pou yo fè m' pi move toujou. Men y'ap fè move jès pou derespekte m', yo mete yon ti branch
¹⁸ bwa anba nen yo. Mwen menm tou mwen pral fè yo santi jan mwen move sou yo. Yo mèt rele
 byen fò nan zòrèy mwen. Mwen p'ap tande yo. Mwen p'ap gen pitye pou yo. Yo mèt rele jan yo
 vle nan zòrèy mwen, mwen p'ap pran priyè.

Chapter 9

¹ ¶ Apre sa, mwen tande Bondye pale byen fò nan zòrèy mwen. Li di konsa: -Pwoche non, nou
 tout ki pral pini lavil la. Pwoche ak zam nou nan men nou! ² Lamenm, sis gason parèt nan pòtay
 ki bay sou nò nan lakou tanp lan. Yo chak te gen yon zam nan men yo. Nan mitan yo te gen yon
 nonm ak yon rad twal fin tou blan sou li. Li te gen yon poban lank mare nan ren l'. Yo antre, yo
³ kanpe bò lotèl an kwiv la. Lè sa a, gwo bèl limyè ki make prezans Bondye pèp Izrayèl la soti
 anwo tèt bèt vivan yo kote l' te ye a, li deplase, li al rete nan papòt pou antre nan tanp lan. Seyè a
⁴ rele nonm ak rad twal fin blan an ki te gen poban lank mare nan ren l' lan. Li di l' konsa: -Ale nan
 tout lavil Jerizalèm. Mete yon mak sou fwon tout moun w'a wè k'ap plenn, ki nan gwo lapenn pou

tout vye bagay derespektan k'ap fèt nan lavil la. ⁵ ¶ Mwen tande li di lòt mesye yo: -Mache dèyè
 l' nan tout lavil la. Epi touye! Pa gen pitye pou pesonn. Pa kite pesonn chape! ⁶ Touye ni granmoun,
 ni jenn gason, ni jenn fi, ni fanm, ni timoun. Men, pa manyen moun ki gen mak sou fwon yo.
 Konmanse depi nan tanp mwen an. Yo konmanse ak chèf fanmi ki te kanpe nan Tanp lan. ⁷ Bondye
 di yo: -Derespekte Tanp lan! Plen lakou a kadav. Ale non! Se konsa yo konmanse touye moun nan
 lavil la. ⁸ Pandan yo t'ap touye moun yo, mwen te rete pou kont mwen. Mwen tonbe ajenou, mwen
 bese tèt mwen atè, mwen rele byen fò: -Wouy! Seyè Bondye sèl Mèt la, èske ou pral touye tout rès
 pèp Izrayèl la, paske nan kòlè ou ou soti pou pini lavil Jerizalèm? ⁹ Li reponn mwen: -Moun peyi
 Izrayèl yo ansanm ak moun peyi Jida yo fè anpil wi! Se san k'ap koule toupatou nan peyi a. Lavil
 Jerizalèm plen moun k'ap fè lenjistis. Y'ap plede di mwen menm, Seyè a, mwen vire do bay peyi
 a, mwen pa wè yo. ¹⁰ Enben, mwen p'ap gen pitye pou yo, mwen p'ap fè pa yo. M'ap fè yo peye
 pou sa yo fè. ¹¹ Apre sa, nonm ki te gen rad twal fin tou blan sou li a ak poban lank mare nan ren
 l' lan tounen. Li fè rapò l' bay Seyè a, li di l' konsa: -Mwen fè tou sa ou te ban m' lòd fè a.

Chapter 10

¹ ¶ Mwen gade gwo bòl kristal ki te sou tèt kat bèt vivan yo. Anwo yo, mwen wè yon bagay ou
 ta di yon gwo fotèy fèt an pyè safi. ² Bondye pale ak nonm ki te gen rad twal fin tou blan an. Li di
 l' konsa: -Antre nan fant ki nan mitan wou yo, anba bèt vivan yo. Pran yon ponyen chabon dife tou
 limen. Lèfini, gaye yo sou tout lavil la. Mwen wè l' ale vre. ³ Gwo bèt vivan yo te kanpe sou bò
 sid tanp lan lè li antre a. Yon gwo nwaj anvayi tout lakou anndan tanp lan. ⁴ Bèl limyè prezans
 Seyè a leve anwo tèt bèt vivan yo, li al kanpe nan papòt tanp lan. Nwaj la anvayi tout tanp lan.
 Lakou a menm te klere ak gwo limyè prezans Seyè a. ⁵ Yo te ka tande bri zèl bèt vivan yo jouk
 nan lakou deyò a. Se te tankou vwa Bondye ki gen tout pouvwa a lè l'ap pale. ⁶ Lè Seyè a te bay
 nonm ak rad twal fin blan an lòd pou l' te al pran chabon dife nan mitan wou yo ki anba bèt vivan
 yo, nonm lan ale, li kanpe toupre yonn nan wou yo. ⁷ Yonn nan bèt vivan yo lonje men l' nan dife
 ki te nan mitan yo a, li pran kèk chabon dife, li mete yo nan men nonm ak rad twal fin blan an.
 Nonm lan pran chabon dife yo, li soti. ⁸ ¶ Lè sa a, mwen wè bèt vivan yo te gen yon bagay ki te
⁹ sanble ak men moun anba zèl yo. Mwen gade, mwen wè te gen kat wou, yonn bò kote chak bèt

vivan yo. Wou yo te klere tankou pyè krizolit. ¹⁰ Chak wou te gen yon lòt wou antravè nan mitan yo. Kat wou yo te gen menm fòm. ¹¹ Lè bèt vivan yo ap mache, yo te gen dwa pran nenpòt ki direksyon san yo pa bezwen vire. Yo te mache ansanm nan direksyon yo te vle ale, san yo pa t' bezwen vire. ¹² Yo te gen je sou tout kò yo, nan do yo, sou tout men yo, nan zèl yo. Te gen je sou tout kat wou yo tou. ¹³ Wou yo te tankou wou mwen te wè nan premye vizyon mwen an. Mwen tandè yo te rele wou yo Toubouyon. ¹⁴ Chak gwo bèt vivan yo te gen kat figi. Premye figi gwo bèt vivan yo te tankou tèt yon towò bèf, dezyèm lan tankou tèt yon moun, twazyèm lan tankou tèt yon lyon, katriyèm lan tankou tèt yon malfini. ¹⁵ Se te menm bèt mwen te wè bò larivyè Keba a. Lè yo vole anlè, ¹⁶ y'ap deplase, wou yo deplase ansanm avèk yo tou. Lè yo louvri zèl yo pou yo vole, wou yo vole ansanm ak yo tou. ¹⁷ Lè bèt vivan yo rete an plas, wou yo rete an plas tou. Lè bèt vivan yo vole, wou yo vole ak yo tou, paske se gwo bèt vivan yo ki t'ap kontwole wou yo. ¹⁸ Lè sa a, bèl limyè prezans Seyè a soti bò papòt tanp lan, li al kanpe anwo bèt vivan yo. ¹⁹ Bèt vivan yo louvri zèl yo. Yo vole soti sou tè a devan je m'. Epi wou yo vole ale ak yo tou. Y' al poze sou papòt pòtay tanp Seyè a ki bay sou bò solèy leve. Bèl limyè prezans Bondye pèp Izrayèl la te anlè yo. ²⁰ Mwen rekonèt se te menm bèt vivan mwen te wè anba Bondye pèp Izrayèl la bò larivyè Keba. ²¹ Yo chak te gen kat figi, kat zèl ak yon fòm men moun anba chak zèl. ²² Figi yo se te menm figi mwen te wè bò larivyè Keba a. Chak bèt vivan t'ap mache dwat devan yo.

Chapter 11

¹ ¶ Apre sa, Lespri Bondye a pran m', li leve m' anlè, li mennen m' bò gwo pòtay tanp lan ki bay sou solèy leve. Toupre pòtay la, mwen wè vennsenk gason. Pami yo te gen de chèf peyi a, Jazanya, pitit gason Azou a, ak Pelatya, pitit gason Benaja a. ² Bondye di m' konsa: -Nonm o! Mesye sa yo gen move lide ap travay dèyè tèt yo. Y'ap bay move konsèy nan lavil la. ³ Y'ap plede di: Talè konsa nou p'ap ka bati kay ankò! Lavil la tankou yon chodyè sou dife, nou menm, nou tankou vyann ladan l'. Nou pa bezwen fè anyen kote nou ye a. ⁴ Se poutèt sa, nonm o! Men mesaj m'ap ba ou pou ou di sou yo. ⁵ Lespri Seyè a desann sou mwen ankò. Seyè a ban m' lòd pou m' bay pèp la mesaj sa a: -Nou menm fanmi Izrayèl la, mwen konnen sa n'ap di, mwen konnen lide nou gen dèyè tèt nou. ⁶ Nou sitèlman touye moun isit nan lavil la, lari yo plen kadav. ⁷ Konsa, men

sa mwen menm, Seyè sèl Mèt la, m'ap di nou: Wi, lavil la tankou yon chodyè. Men kisa ki vyann
lan? Se kadav moun nou touye yo! Nou menm menm m'ap fè yo mete nou deyò nan lavil la. ⁸ Nou
pè lagè, pa vre? Enben, m'ap voye lagè sou nou! Se mwen menm menm, Seyè sèl Mèt la, ki di sa.
⁹ M'ap fè yo mete nou deyò nan lavil la. M'ap lage nou nan men moun lòt nasyon yo. M'ap pini nou
jan m' te pwomèt nou sa a. ¹⁰ N'ap mouri nan lagè nan mitan peyi nou an. Se la m'ap pini nou. Lè
sa a, n'a konnen se mwen menm ki Seyè a. ¹¹ Lavil sa a p'ap pwoteje nou jan chodyè pwoteje vyann
ki ladan l'. Se nan mitan peyi Izrayèl la menm m'ap pini nou. ¹² Wi, n'a konnen se mwen menm
ki Seyè a. Pase pou nou te swiv lòd mwen yo, pase pou n' te fè sa m' mande nou fè, nou te pito swiv
vye mès pèp k'ap viv nan peyi ki bò kote nou yo. ¹³ Antan m'ap bay mesaj la, Pelatya, pitit gason
Benaja a, tonbe li mouri frèt. Mwen lage kò m' ajenou, mwen bese tèt mwen jouk atè, mwen rele
byen fò, mwen di: -O Seyè, Bondye sèl Mèt la! Eske ou pral touye ti rès moun ki rete nan pèp
Izrayèl la? ¹⁴ ¶ Seyè a pale avè m' ankò, li di: ¹⁵ -Nonm o! Moun ki rete lavil Jerizalèm yo ap pale
sou ou, sou frè ou, sou fanmi ou, sou tout moun pèp Izrayèl yo te depòte yo. Y'ap di: Moun yo
depòte yo twò lwen pou yo ka fè sèvis pou Seyè a, se konsa Seyè a ban nou peyi a pou rele nou pa
nou. ¹⁶ Se poutèt sa, men mesaj Seyè a, Bondye sèl Mèt la, bay pou moun yo depòte yo. Wi, se
mwen menm ki te voye yo al viv byen lwen nan mitan lòt nasyon yo, mwen gaye yo nan yon bann
lòt peyi. Men, m'ap toujou la avèk yo nan peyi kote yo ale a tankou si m' te nan kay yo mete apa
pou mwen an. ¹⁷ Se poutèt sa, men sa mwen menm, Seyè a, Bondye sèl Mèt la, m'ap di yo: M'ap
pran yo nan mitan nasyon kote mwen te gaye yo a, m'ap sanble yo. M'ap fè yo soti kite peyi sa yo,
m'ap ba yo peyi Izrayèl la ankò pou yo. ¹⁸ Lè y'a tounen, y'a wete tout vye zidòl y'a jwenn ansanm
ak tout vye bagay derespektan ki t'ap fèt nan peyi a. ¹⁹ M'ap ba yo yon lòt kè, yon lòt lespri. M'ap
wete kè di kou wòch yo te genyen nan lestonmak yo a, m'ap ba yo yon kè ki gen bon santiman.
²⁰ Konsa, y'a mache dapre lòd m'a ba yo. Y'a fè tou sa m'a mande yo fè. Y'a koute m' lè m'a pale
yo. Se pèp pa m' lan menm yo pral ye, mwen menm mwen pral Bondye yo. ²¹ Men, m'ap pini
moun ki pa vle lage vye zidòl yo, ki toujou soti pou yo fè vye bagay derespektan yo. M'ap pini yo
pou sa yo fè. Se mwen menm, Seyè a, Bondye sèl Mèt la, ki pale. ²² ¶ Bèt vivan yo pran vole, wou
yo pati ansanm ak yo. Bèl limyè prezans Bondye pèp Izrayèl la te anwo yo. ²³ Bèl limyè prezans
Seyè a soti kite lavil la, li ale poze sou mòn ki te sou bò solèy leve a. ²⁴ Nan vizyon an toujou,
mwen wè lespri Bondye a pran m', li mennen m' tounen lavil Babilòn nan mitan moun yo te depòte
yo. Lèfini, vizyon an disparèt. ²⁵ Mwen rakonte moun yo te depòte yo tou sa Seyè a te fè m' wè.

Chapter 12

¹ ¶ Seyè a pale avè m' ankò, li di m' konsa: ² -Nonm o! Se nan mitan yon move ras moun ki gen tèt di ou rete la a. Yo gen je, men yo pa wè anyen. Yo gen zòrèy, men yo pa tandè anyen, paske se yon move ras moun wòklò ki gen tèt di yo ye. ³ Koulye a, ou menm nonm o! Fè pakèt ou tankou yon moun k'ap kouri pou danje. Pati kite peyi a devan je yo gwo lajounen. W'a fè yo tout wè ou ap pati kite kote ou ye a pou ou ale yon lòt kote ou pa janm konnen! Sa ka fè yo rekonèt jan yo gen tèt di. ⁴ Gwo lajounen w'a fè pakèt ou pati, pou yo ka wè ou. Lèfini, kite yo wè ou aswè ap soti tankou moun y'ap depòte yo. ⁵ Antan y'ap gade ou, w'a fè yon twou nan miray la, w'a pase soti ladan l' ansanm ak pakèt ou a. ⁶ La, devan je yo, w'a mete pakèt la sou zepòl ou, w'a met deyò nan fènwa a. W'a bouche je ou pou ou pa wè kote ou prale. Sa ou pral fè a va sèvi yon siy pou avèti moun pèp Izrayèl yo. ⁷ Mwen fè tou sa Seyè a te ban mwen lòd fè a. Jou sa a, gwo lajounen, mwen fè pakèt mwen tankou yon moun y'ap depòte ta fè l'. Nan aswè, mwen fè yon twou ak men m' nan miray la, mwen soti nan fènwa a. Antan tout moun la ap gade m', mwen chaje pakèt mwen sou zepòl mwen, m' ale. ⁸ Nan denmen maten, Seyè a pale avè m' ankò, li di m': ⁹ -Nonm o! Lè moun pèp Izrayèl yo, move ras moun tèt di sa yo, va mande ou sa w'ap fè la a, ¹⁰ w'a di yo: Men mesaj Seyè Bondye sèl Mèt la voye ba yo. Mesaj sa a se va yon avètisman pou chèf lavil Jerizalèm lan ansanm ak pou tout moun pèp Izrayèl ki rete nan lavil la. ¹¹ W'a di yo tou sa ou te fè a, se tankou yon avètisman pou sa ki pral rive yo. Yo pral fè yo prizonye, y'ap depòte yo. ¹² Chèf k'ap gouvènè yo a pral mete pakèt li sou zepòl li nan fènwa, l'ap chape kò l' nan yon twou y'a fè nan miray la pou li. L'ap bouche figi l' pou yo pa rekonèt li, li pa menm wè kote l'ap mete pye l'. ¹³ M'ap voye privye mwen deyè li, m'ap pran l' ladan l'. Lèfini, m'ap mennen l' lavil Babilòn nan peyi moun Kalde yo. Men, l'ap mouri nan peyi sa a san li p'ap janm wè l' ak je l'. ¹⁴ M'ap gaye tout moun ki te avè l' yo, gad pèsònèl li yo ak tout sòlda li yo, y'ap pran kouri nan tout direksyon. Men, m'ap fè lènmi kouri deyè yo pou touye yo. ¹⁵ Lè m'a fin gaye yo tout nan mitan lòt nasyon yo, lè m'a fin simaye yo nan divès peyi etranje, lè sa a, y'a konnen se mwen menm ki Seyè a. ¹⁶ Men, m'ap kite de twa ladan yo chape, yo p'ap touye yo nan lagè, yo p'ap mouri nan grangou, ni anba move maladi. Konsa, lè y'a nan mitan lòt nasyon yo, y'a rakonte jan yo te fè bagay ki derespektan, y'a konnen se mwen menm ki Seyè a. ¹⁷ ¶ Seyè a pale avè m' ankò, li di m' konsa: ¹⁸ -Nonm o! Lè w'ap manje, tranble kou fèy bwa. Bwè dlo ou ak kè sote, ak kè sere. ¹⁹ W'a di moun peyi a men mesaj Seyè Bondye sèl Mèt la voye bay moun lavil Jerizalèm yo k'ap viv toujou nan peyi a: Y'ap manje ak kè sere, y'ap

bwè ak kè sote. Peyi a pral tounen yon savann, p'ap gen anyen ladan l' ankò. Tou sa, akòz mechanste
 moun k'ap viv ladan l' yo. ²⁰ Yo pral detwi lavil ki plen moun yo. Peyi a ap tounen yon dezè. Lè
 sa a, y'a konnen se mwen menm ki Seyè a. ²¹ ¶ Seyè a pale avè m' ankò, li di m' konsa: ²² -Nonm
 o! Poukisa moun pèp Izrayèl yo ap plede repete pawòl sa a: Jou yo ap pase yonn apre lòt, sa yo te
 di k'ap rive a pa rive? ²³ Koulye a, di yo men mesaj Seyè a, Bondye sèl Mèt la, voye ba yo: Mwen
 pral fè yo sispann repete pawòl sa a. Yo p'ap janm tande l' ankò nan bouch moun pèp Izrayèl yo.
 Di yo: Men jou a rive. Men sa yo te di ki pou rive a pral rive vre! ²⁴ Nan mitan pèp Izrayèl la, p'ap
 gen moun k'ap fè vizyon pou twonpe moun ankò, p'ap gen pwofèt pou bay manti. ²⁵ Se mwen
 menm Seyè a ki pral pale ak yo. Sa m'a di a gen pou l' rive, l'ap rive vre. Tande byen, bann moun
 wòklò, nou p'ap mouri anvan li rive. Non, se p'ap bagay k'ap pran twòp tan pou li rive. Sa mwen
 pral di a, m'ap fè l' rive vre. Se mwen menm Seyè ki sèl Mèt la ki di sa. ²⁶ Seyè a pale avè m' ankò,
 li di m' konsa: ²⁷ -Nonm o! Moun pèp Izrayèl yo ap di vizyon w'ap fè a pòko prèt pou l' rive. Mesaj
 w'ap bay yo, se pa pou yo, y'a gen tan mouri anvan sa ou di a rive. ²⁸ Se poutèt sa, w'a di yo: Men
 sa Seyè a, Bondye sèl mèt la, voye di yo: Mesaj m'ap bay la p'ap pran tan pou l' rive vre. Pawòl
 m'ap di a pral rive. Se mwen menm Seyè a, Bondye sèl Mèt la, ki di sa.

Chapter 13

¹ ¶ Seyè a pale avè m' ankò, li di m' konsa: ² -Nonm o! Denonse pwofèt pèp Izrayèl yo. Denonse
 moun sa yo k'ap bay mesaj yo menm yo fè. Di yo: Manyè koute pawòl Seyè a. ³ Men mesaj Seyè
 a, Bondye sèl Mèt la, di: Madichon pou bann pwofèt egare sa yo! Se yo menm ki fè mesaj y'ap bay
 la. Yo pa janm fè ankenn vizyon vre. ⁴ Moun Izrayèl yo, koute: Pwofèt nou yo p'ap sèvi nou anyen,
 se tankou chat mawon k'ap viv nan vye kay kraze. ⁵ Yo pa t' moute lagad kote miray la te make
 kraze a, ni yo pa t' rebati miray yo. Konsa, moun Izrayèl yo pa gen defans lè lagè va pete jou jijman
 Seyè a. ⁶ Vizyon y'ap fè yo se pou twonpe moun, mesaj y'ap bay yo se manti. Yo pretann di se
 mesaj Bondye y'ap bay. Men, se pa mwen menm ki janm pale ak yo. Lèfini, yo konprann pou m'
 fè sa yo di k'ap rive a rive vre. ⁷ Mwen tou di yo: Vizyon y'ap fè yo se tèt yo y'ap twonpe. Mesaj
 y'ap bay yo se manti. Y'ap plede di men mesaj Bondye bay. Men, mwen pa t' janm pale ake yo.
⁸ Se poutèt sa, men sa Seyè a, Bondye sèl Mèt la, di yo: Se twonpe n'ap twonpe moun ak pawòl
 nou yo. Tout vizyon nou yo se manti. Se poutèt sa m'ap leve dèyè nou tou! Se mwen menm Seyè

9
a, Bondye sèl Mèt la, ki di sa. Mwen pral pini pwofèt k'ap fè vizyon pou twonpe moun, k'ap bay mesaj ki pa laverite. p'ap gen plas pou yo lè pèp la va reyini. Yo p'ap gen non yo sou lis fanmi pèp Izrayèl yo. Yo p'ap janm tounen nan peyi a ankò. Lè sa a, y'a konnen se mwen menm ki Seyè a,

10
Bondye sèl Mèt la. ¶ Pwofèt yo ap woule pèp mwen an. Anyen p'ap mache nan peyi a. Yo menm menm, y'ap plede di tout bagay ap mache byen. Pèp la ap moute yon miray wòch san mòtye, pwofèt

11
yo menm vini, yo blanchi l' ak dlo lacho. Di moun k'ap pase dlo lacho sou miray la: Miray la

12
pral tonbe. Mwen pral voye yon gwo lapli. Lagrèl pral tonbe, yon gwo van tanpèt pral souffle. Lè

13
miray la fin tonbe, y'a mande yo kisa dlo lacho a te fè pou miray la. Enben, men sa Seyè ki gen tout pouvwa a di: Mwen pral fè yon sèl kòlè, m'ap voye yon gwo van tanpèt, yon gwo lapli ak lagrèl

14
ki pral tonbe pou kraze miray la. M'ap lage miray nou te blanchi ak lacho a atè, m'ap kraze l' ratè, wòch fondasyon yo pral parèt deyò. Miray la ap tonbe sou nou, l'ap kraze nou. Lè sa a, nou

15
tout va konnen se mwen menm ki Seyè a. Mwen pral move sou miray la ansanm ak tout moun ki te blanchi l' ak lacho a. Lè m'a fin fè yo sa m' gen pou m' fè yo a, m'a di nou: Miray la pa la ankò,

16
ni bann moun ki te blanchi l' ak lacho a, bann pwofèt pèp Izrayèl yo k'ap bay bèl mesaj pou lavil Jerizalèm lan. Anyen p'ap mache nan peyi a, epi yo menm y'ap plede di yo fè vizyon tout bagay

17
ap mache byen. Se mwen menm Seyè a, Bondye sèl Mèt la, ki di sa. ¶ Seyè a di ankò: -Nonm o! Koulye a, vire tèt ou gade nan direksyon medam k'ap fè mesaj yo yo menm! Yo pran pòz pwofèt

18
yo nan mitan pèp Izrayèl la! Denonse yo! Lèfini, di yo men sa Seyè a, Bondye sèl Mèt la, voye di yo: Madichon pou nou, medam! N'ap mare kòd wanga nan ponyèt tout moun. N'ap moute mouchwa tèt pou tout kalite moun pou yo ka gen pouvwa pran nanm moun. Nou dèyè pou nou gen

19
pouvwa fè sa nou vle ak nanm lòt moun san anyen pa rive nou. N'ap derespekte mwen devan pèp mwen an. Pou kèk ponyen grenn lòj ak kèk moso pen n'ap touye moun ki pa merite mouri, n'ap sove moun ki pa merite viv ankò. N'ap bay pèp mwen an yon bann manti. Yo menm, yo byen kontan

20
kwè nou. Enben! Men sa Seyè a, Bondye sèl Mèt la, di: Mwen pa vle wè kòd wanga nan ponyèt nou yo. Se ak yo nou sèvi pou nou pran nanm lòt moun tankou zwezo nan pèlen. M'ap rache yo

21
nan ponyèt nou. M'ap delivre moun nou te pran nan pèlen yo pou y' al fè wout yo. M'ap rache mouchwa tèt nou yo, m'ap sove pèp mwen an anba men nou. Nou p'ap ka fè sa nou vle ak yo ankò.

22
Lè sa a, n'a konnen se mwen menm ki Seyè a. Mwen pa ta renmen anyen rive bon moun yo. Men nou menm, avèk manti n'ap bay yo, n'ap dekouraje yo. N'ap ankouraje mechan yo pou yo pa

23
chanje. Nou pa ba yo chans sove lavi yo. Enben! Se poutèt sa koulye a, nou p'ap fè vizyon pou twonpe moun ankò, ni nou p'ap ba yo manti sou sa ki pral rive yo. Mwen pral sove pèp mwen an anba men nou. Konsa, n'a konnen se mwen menm ki Seyè a.

Chapter 14

¹ ¶ Lè sa a, gen kèk chèf fanmi Izrayèl yo ki te vin kote m' pou m' te fè yo konnen volonte Bondye. ² Se konsa, Seyè a pale avè m', li di m' konsa: ³ -Nonm o! Moun sa yo lage kò yo bay zidòl nèt. Yo kite zidòl pran nanm yo pou fè sa ki mal. Yo met nan tèt yo mwen pral kite yo vin mande m' konsèy? ⁴ Enben, pale ak yo, di yo konsa: Men mesaj Seyè sèl Mèt la voye ba yo: Tout moun nan pèp Izrayèl la ap lage kò yo bay zidòl yo nèt, yo kite zidòl pran nanm yo pou fè sa ki mal. Lèfini, y'ap vin jwenn pwofèt Bondye a! Se mwen menm menm, Seyè a, k'ap ba yo repons yo merite poutèt kantite zidòl y'ap sèvi yo. ⁵ Zidòl yo te fè moun pèp Izrayèl yo vire do ban mwen. Men, m'ap reponn yo pou yo ka tounen vin jwenn mwen ankò. ⁶ Koulye a, men sa pou ou di moun pèp Izrayèl yo, men mesaj Seyè sèl Mèt la voye ba yo: Tounen vin jwenn mwen. Vire do bay zidòl nou yo, sispann fè vye bagay derespektan sa yo. ⁷ Chak fwa yonn nan moun pèp Izrayèl yo osinon yonn nan moun lòt nasyon k'ap viv nan mitan pèp mwen an va vire do ban mwen pou li al sèvi zidòl, si li kite zidòl pran nanm li pou li fè sa ki mal, lèfini pou li konprann pou li al jwenn pwofèt Bondye a pou mande l' mande m' anyen, se mwen menm menm, Seyè a, ki pral ba li repons la. ⁸ M'ap kenbe tèt ak li. M'ap fè l' tounen yon egzanp pou yo mete non l' nan chante. M'ap wete l' nan mitan pèp mwen an. Lè sa a, n'a konnen se mwen menm ki Seyè a. ⁹ Si yon pwofèt kite yo pran tèt li pou li pa pale verite, se mwen menm k'ap kite yo pran tèt li. M'ap lonje men m' sou li pou m' pini l', m'ap wete l' nan mitan pèp mwen an, pèp Izrayèl la. ¹⁰ Ni pwofèt la, ni moun ki te vin jwenn li an ap peye pou sa yo fè. Y'ap resevwa menm chatiman an. ¹¹ Konsa, moun pèp Izrayèl yo p'ap vire do ban mwen ankò. Yo pa pral avili tèt yo nan fè sa ki mal. Lè sa a, se pèp mwen y'ap ye, se mwen menm k'ap Bondye yo. Se mwen menm, Seyè sèl Mèt la, ki di sa. ¹² ¶ Seyè a pale avè m' ankò, li di m' konsa: ¹³ -Nonm o! Si moun k'ap viv nan yon peyi peche kont mwen, si yo pa kenbe pawòl yo ak mwen, m'ap lonje men m' sou yo pou m' pini yo. M'ap koupe viv yo. M'ap fè yon sèl grangou tonbe sou yo, m'ap touye ni moun, ni bèt nan peyi a. ¹⁴ Si twa moun dwat sa yo, Noe, Danèl ak Jòb, ta nan mitan yo, se yo menm ase ki t'ap sove lavi yo, paske se yo ki te mache dwat. Se mwen menm, Seyè sèl Mèt la, ki di sa. ¹⁵ Ou ankò, mwen ta ka voye bèt sovaj touye tout moun nan peyi a, pou fè peyi a tounen yon dezè moun pè travèse poutèt bèt sovaj sa yo. ¹⁶ Si twa moun sa yo ta nan mitan yo, jan nou konnen mwen vivan vre a, -se mwen menm, Seyè sèl Mèt la, k'ap pale, -yo pa ta ka sove ata pwòp pitit gason ak pitit fi yo. Se yo ase ki t'ap sove. Tout peyi a t'ap tounen yon dezè. ¹⁷ Ou ankò, mwen ta ka voye lagè sou peyi a. Mwen ta ka bay lòd pou nan lagè

18
 a yo touye dènye moun ak dènye bèt. Si twa mesye sa yo ta nan peyi a, jan nou konnen mwen vivan vre a, -se mwen menm, Seyè sèl Mèt la, k'ap pale, -yo pa ta ka sove ata pwòp pitit gason ak pitit fi yo. Yo ase ki ta sove.

19
 Si mwen ta voye yon move maladi sou peyi a, si mwen ta move sou li jouk pou m' ta voye yon maladi san renmèd pou m' touye ni moun ni bèt, epi si Noe, Danèl ak Jòb te la nan peyi a, jan nou konnen mwen vivan vre a, -se mwen menm, Seyè sèl Mèt la, k'ap pale, -yo pa ta sove ata pwòp pitit gason ak pitit fi yo. Se yo ase ki ta sove lavi yo, paske se yo ki

20
 te mache dwat. Men sa Seyè, Bondye sèl Mèt la, di ankò: M'ap voye kat pi gwo chatiman m' yo sou lavil Jerizalèm: lagè, grangou, bèt sovaj ak move maladi, pou yo touye dènye moun ak dènye

21
 bèt. Men, si nou wè gen kèk moun ki chape, epi ki sove pitit gason yo ak pitit fi yo, gade yo byen lè y'a vin jwenn nou. Gade jan yo viv, gade sa yo fè. Lè sa a, n'a wè si m' pa t' gen rezon voye

22
 tout malè sa yo sou lavil Jerizalèm. Wi, lè n'a wè jan moun sa yo t'ap viv ak sa yo t'ap fè, n'a konnen mwen te gen rezon fè lavil Jerizalèm sa m' te fè l' la. Se mwen menm, Seyè sèl Mèt la, ki di sa.

23

Chapter 15

1 ¶ Seyè a pale avè m' ankò: Li di m' konsa: 2 -Nonm o! Kisa bwa pye rezen an genyen ki fè l' pi bon pase bwa tout lòt pyebwa ou ka jwenn nan rak? 3 Eske li ka ba ou bwa pou fè anyen? Eske yo ka fè pikèt kwòk avè l' pou pandye bagay? 4 Li ka sèvi pou limen dife ase. Dife a boule de bout li yo ansanm ak mitan an. Apre sa, ou pa ka fè anyen avè l' ankò. 5 Li pa t' ankò boule a, yo te tou pa ka fè anyen avè l'. Koulye a dife a fin boule l', se pi rèd ankò. 6 Se poutèt sa, men sa Seyè sèl Mèt la di: Menm jan yo pran yon bwa pye rezen nan mitan yon rakbwa, yo jete l' nan dife pou boule l', se sa menm mwen pral fè ak moun lavil Jerizalèm yo. 7 M'ap kenbe tèt ak yo. Yo te chape anba dife a yon fwa, men se dife k'ap boule yo. Lè m'a kenbe tèt ak yo, n'a konnen se mwen menm ki

8
 Seyè a. Yo twonpe m' tankou yon fanm k'ap twonpe mari l'. Se poutèt sa m'ap fè peyi a tounen yon dezè. Se mwen menm, Seyè sèl Mèt la, ki di sa.

Chapter 16

¹ ¶ Seyè a pale avè m' ankò, li di m' konsa: ² -Nonm o! Fè moun lavil Jerizalèm yo rekonèt tout
vye bagay derespektan yo te fè yo. ³ W'a di moun lavil Jerizalèm yo men mesaj Seyè sèl Mèt la
voye ba yo: Nou se moun peyi Kanaran, se la nou fèt. Papa nou te yon moun peyi Amori, manman
nou yon moun peyi Et. ⁴ Jou ou soti nan vant manman ou lan, yo pa t' koupe kòd lonbrit ou, yo pa
t' lave ou nan dlo pou yo te pwòpte ou, yo pa t' fwote ou ak gwo sèl, yo pa t' menm vlope ou nan
moso kòt. ⁵ Pesonn pa t' gen pitye pou ou pou yo te rann ou yonn nan ti sèvis sa yo. Lè ou te fèt
la, pesonn pa t' vle wè ou, yo voye ou jete nan jaden. ⁶ ¶ Mwen vin ap pase bò la, mwen wè ou t'ap
benyen nan san ou. Atout ou t'ap benyen nan san ou, mwen di mwen p'ap kite ou mouri, se pou ou
viv. ⁷ Se pou ou grandi tankou yon plant nan jaden. Ou grandi, ou fòme, ou vin yon bèl jenn fi.
Tete ou yo te byen kanpe, pwal te pouse sou kò ou. Men, ou te toutouni. ⁸ Mwen vin ap pase bò
la ankò, mwen wè ou. Ou te rive laj pou ou te renmen. Mwen louvri gwo varèz mwen an sou ou,
mwen kouvri kò ou ki te toutouni an. Mwen fè sèman m'ap toujou renmen ou. Wi, mwen pase
kontra maryaj avè ou. Se konsa ou vin madanm mwen. Se Seyè ki sèl mèt la ki di sa. ⁹ Apre sa,
mwen pran dlo, mwen lave ou, mwen wete tout san ki te sou kò ou. Mwen basinen ou ak lwil santi
bon. ¹⁰ Mwen mete bèl rad bwode sou ou, yon pè soulye fèt ak po bazann nan pye ou, yon bèl
moso twal fin blan mare nan ren ou, ak yon chal swa. ¹¹ Mwen kouvri ou ak bijou, mwen mete
braslè nan ponyèt ou, m' pase bèl chenn nan kou ou. ¹² Mwen mete yon grenn zanno nan nen ou,
yon pè zanno nan zòrèy ou ak yon bèl kouwòn sou tèt ou. ¹³ Ou te plen bijou lò ak bijou ajan. Ou
te toujou mete bèl rad twal fin ak rad swa byen bwode sou ou. Ou manje pen ki fèt ak pi bon kalite
farin ansanm ak siwo myèl ak lwil. Chak jou ou vin pi bèl, jouk ou rive larenn. ¹⁴ Nan tout lòt
nasyon yo, yo t'ap nonmen non ou pou jan ou te bèl. Pou bèl ou pa t' ka pi bèl pase sa paske se
mwen menm ki te fè ou bèl konsa. Se mwen menm, Seyè sèl Mèt la, ki di sa. ¹⁵ ¶ Men, ou kite
bèlte ou la fè ou pèdi tèt ou. Ou pwofite dèske tout moun ap nonmen non ou lan pou ou lage kò ou
nan dezòd, ou kouche ak dènye moun k'ap pase. Ou lage kò ou ba yo. ¹⁶ Ou pran bèl rad koulè ou
yo, ou dekore kote w'ap fè sèvis pou lòt bondye sou tèt mòn yo. Tankou yon fanm k'ap fè jennès,
ou kouche la ak dènye moun ki vini. ¹⁷ Ou pran bijou lò ak bijou ajan mwen te ba ou yo, ou bay
yo pou yo fè estati gason. Epi ou kouche ak estati yo. ¹⁸ Ou biye estati ou yo ak bèl rad bwode
mwen te ba ou yo. Ou pran lwil ak lansan ki te pou mwen yo, ou ofri yo bay estati ou yo. ¹⁹ Mwen
te ba ou pi bon kalite farin pou fè pen pou ou manje ansanm ak siwo myèl ak lwil. Ou pran yo, ou
ofri yo bay zidòl ou yo, ou boule yo nan dife pou yo te ka ba ou chans. Se mwen menm, Seyè sèl

²⁰ Mèt la, ki di wi, se sa ou fè. Apre sa, ou pran pitit gason ak pitit fi ou te fè pou mwen yo, ou al ofri yo bay zidòl yo pou zidòl yo te manje yo. Sa pa t' ase pou ou te lage kò ou nan tout dezòd sa

²¹ yo kifè ou te bezwen koupe kou pitit mwen yo, lèfini pou ou te boule yo nan dife pou zidòl ou

²² yo? Pandan tout tan ou t'ap viv nan dezòd sa a, ou pa janm chonje lè ou te piti, lè ou te toutouni

²³ ap benyen nan san ou lan? Seyè sèl Mèt la di ankò: -Madichon, madichon pou ou! Lè ou fin fè

²⁴ tout mechanste sa yo, sou tout rebò granchemen yo, ou bati tanp pou sèvi zidòl ou yo, pou fè

²⁵ metye jennès ou a. Nan chak kalfou granchemen, ou bati yon tanp kote ou trennen bèlte ou la

²⁶ nan labou. W'ap ofri tèt ou bay dènnye moun k'ap pase. Chak jou ou te vin pi mal. W' al kouche

²⁷ ak moun peyi Lejip yo, vwazen ou yo ki gwonèg anpil. Ou fè, ou fè jouk ou fè m' fache. Se

konsa, mwen lonje men m' sou ou pou m' pini ou, mwen koupe moso nan sa ki te vin pou ou a. Mwen lage ou nan men lènmi ou yo, moun peyi Filisti yo, ki pa t' ka santi tout vye bagay sal ou

²⁸ t'ap fè yo. Men moun sa yo pa t' ba ou kont plezi ou, ou kouri al jwenn moun peyi Lasiri yo. Ou

²⁹ kouche ak yo. Men yo menm tou, yo pa t' ba ou kont plezi ou. W' al fè jennès ak moun Babilòn

³⁰ yo, gwo kòmèsan sa yo. Men yo menm tou, yo pa t' ba ou kont plezi ou! Men sa Seyè sèl Mèt

³¹ la di ankò: Se pa ti move mwen pa t' move sou ou! Ou fè tou sa tankou yon jennès je kale. Ou

bati yon lotèl repozwa nan chak kalfou granchemen. Ou bati tanp sou tout rebò granchemen yo.

³² Men, se pa t' dèyè lajan ou te ye tankou lòt fanm k'ap fè jennès yo. Ou te tankou yon madan

³³ marye ki nan dezòd, ki pito fè bèl ak lòt gason pase pou li renmen mari l'. Yon jennès se peye

yo peye sa. Men ou menm, se ou menm ki bay nonm ou yo kado, se ou menm k'ap ofri yo lajan

³⁴ pou yo soti toupatou vin kouche avè ou. Ou pa t' tankou lòt fanm k'ap fè jennès yo. Pesonn pa

t' fòse ou fè sa. Yo pa t' peye ou pou sa. Se ou ki t'ap peye moun vin kouche avè ou! Non! Ou pa

³⁵ t' tankou lòt jennès yo! ¶ Koulye a, Jerizalèm, gwo jennès, koute sa Seyè a ap di: Men mesaj

³⁶ Seyè sèl Mèt la voye ba ou: Ou wete tout rad sou ou. Ou rete toutouni nèt pou ou te kouche ak

nonm ou yo, ansanm ak tout vye zidòl mwen pa vle wè yo. Lèfini, ou touye pitit ou yo, ou ofri yo

³⁷ bay zidòl. Poutèt tou sa, mwen pral reyini tout ansyen nonm ou yo ki te konn pran plezi yo avè

ou, ni sa ou te renmen yo, ni sa ou te rayi yo. M'ap fè yo vin fè wonn bò kote ou. Mwen pral wete

³⁸ dènnye rad ki sou ou. Mwen pral kite ou toutouni devan je yo. M'ap pini ou menm jan yo pini

fanm k'ap fè adiltè, ak fanm ki touye moun. M'ap fache, m'ap move, m'ap bay lòd pou yo touye ou.

³⁹ M'ap lage ou nan men yo, yo pral demoli dènnye lotèl repozwa ou fè pou zidòl ou yo, kote w'ap

fè jennès la. Y'ap wete tout rad sou ou, y'ap pran tout bijou ou yo, y'ap kite ou toutouni. ⁴⁰ Yo pral
moute tèt yon foul moun pou yo touye ou ak kout wòch, y'ap filange ou ak nepe yo. ⁴¹ Y'ap boule
tout kay ou yo, y'ap pini ou devan yon foul medam. M'ap fè ou sispann fè jennès, m'ap fè ou sispann
⁴² bay nonm ou yo kado. Apre sa, mwen p'ap move sou ou ankò. M'a sispann fè jalouzi. Mwen
⁴³ p'ap fache ankò. Ou pa t' chonje jan m' te aji avè ou lè ou te jenn lan. Ou te fè m' move anpil
pou tou sa ou te fè yo. Se poutèt sa mwen te fè ou peye pou tout. Se mwen menm Seyè a, Bondye
sèl Mèt la, ki di sa. Poukisa ou fè tout dezòd vakabonday sa yo mete sou tout lòt bagay derespektan
⁴⁴ ou fè yo? ¶ Seyè a di ankò: Koulye a moun ki renmen fè pwovèb yo pral bay yonn sou do lavil
Jerizalèm. Yo pral di: Joumou pa donner kalbas. Pitit fi a ap soti tankou manman l'. ⁴⁵ Wi, ou se
pitit manman ou vre. Li pa t' vle wè ni mari l' ni pitit li yo. Ou menm moun ak sè ou yo. Yo menm
⁴⁶ tou, yo pa t' vle wè ni mari yo, ni pitit yo. Se yon fanm peyi Et ki te manman nou tout. Se yon moun
peyi Amori ki te papa nou. ⁴⁶ Gran sè ou la rete nan nò. Se lavil Samari ansanm ak tout ti bouk ki
sou kont li yo. Ti sè ou la rete nan sid. Se lavil Sodòm ansanm ak tout ti bouk ki sou kont li yo.
⁴⁷
⁴⁷ Ou mache dèyè yo pye pou pye, ou fè tout vye bagay derespektan yo fè. Men, nan tou sa ou fè
⁴⁸ yo, ou fè pi mal pase yo. Se poutèt sa, jan nou konnen mwen vivan vre a, men sa mwen menm,
Seyè sèl Mèt la, m'ap di ou: Sè ou la, lavil Sodòm ansanm ak tout ti bouk ki sou kont li yo, yo pa
t' janm rive fè tou sa ou menm lavil Jerizalèm, ou te fè ansanm ak tout ti bouk ki sou kont ou yo.
⁴⁹
⁴⁹ Kisa lavil Sodòm te fè konsa? Li t'ap gonfle lestonmak li sou moun, paske li te gen kont manje
pou l' manje. Yo t'ap viv kè pòpòz san pwoblèm. Men, yo pa janm lonje men bay pòv malere ak
⁵⁰ moun ki nan nesosite. Yo kite lògèy vire lòlòj yo, yo fè tèt di, yo fè bagay yo konnen mwen pa
⁵¹ vle wè moun fè. Se poutèt sa mwen disparèt yo, jan ou konnen l' lan. Lavil Samari menm pa t'
fè mwatye nan sa ou fè. Ou fè plis bagay derespektan pase l'. Ou fè sè ou yo pase pou inonsan bò
⁵² kote ou. Ou pral wont tèt ou pou sa ou fè. Ou sitèlman fè peche ki pi lèd pase sa sè ou yo fè a,
ou ba yo rezon, yo parèt inonsan bò kote ou. Wi, se pou ou wont. Se pou ou kache figi ou, paske
⁵³ ou fè sè ou yo pase pou inonsan bò kote ou. Seyè a pale ak lavil Jerizalèm, li di l' konsa: -M'ap
mete yo kanpe ankò, lavil Sodòm ak lavil Samari ansanm ak tout ti bouk ki sou kont yo. Bout pou
⁵⁴ bout, ou menm tou m'ap mete ou kanpe ankò. Ou pral wont tèt ou pou tou sa ou te fè. Yo pral
⁵⁵ pale ou mal. Sè ou yo pral wè yo pa pi mal pase sa. Sa pral yon konsolasyon pou yo. Lavil
Sodòm ak tout ti bouk li yo pral kanpe ankò jan yo te ye anvan an. Lavil Samari ak tout ti bouk li
yo pral kanpe ankò jan yo te ye anvan an. Ou menm tou, lavil Jerizalèm ak tout ti bouk ou yo, nou
⁵⁶ pral kanpe ankò jan nou te ye anvan an. Lè ou te an penpan an, èske ou pa t' konn pase Sodòm

⁵⁷
 nan betiz, anvan yo te denonse tout mechanste ou yo? Koulye a, se ou menm moun Aram yo,
⁵⁸
 moun Filisti yo ansanm ak lòt moun nan vwazinaj ki pa vle wè ou yo pral pase nan betiz. Ou
 pral peye pou tout bagay derespektan ak bagay mwen pa vle wè ou te fè yo. Se mwen menm, Seyè
⁵⁹
 a, ki di sa. Seyè a pale ak lavil Jerizalèm, li di l' konsa: -Mwen pral boule avè ou jan ou merite
⁶⁰
 l' la, paske ou pa ka kenbe pawòl ou, ou kase kontra a. ¶ Men, m'ap chonje kontra mwen te pase
⁶¹
 avè ou lè ou te jenn lan. M'ap siyen yon lòt kontra avè ou, yon kontra k'ap la pou tout tan. Ou
 menm, w'a chonje sa ou te fè, w'a wont lè w'a resevwa gran sè ak ti sè ou yo. M'ap ba ou yo pou
⁶²
 pitit fi pa ou malgre sa pa t' nan kontra a. Wi, se mwen menm k'ap siyen kontra mwen an avè
⁶³
 ou ankò. Lè sa a, w'a konnen se mwen menm ki Seyè a. M'ap padonnen ou tou sa ou te fè. Men
 ou menm, w'ap chonje sa ou te fè yo, w'a wont, ou p'ap ka louvri bouch ou ankò tèlman w'a wont.
 Se mwen menm, Seyè a, ki di sa.

Chapter 17

¹
 ¶ Seyè a pale avè m' ankò, li di m' konsa: ² -Nonm o! Bay moun pèp Izrayèl yo yon pawoli.
³
 Rakonte yo yon parabòl. Di yo men mesaj Seyè sèl Mèt la voye ba yo: Vwala, se te yon gwo gwo
 malfini ak zèl li yo byen laj. Plim li yo te long epi yo te tout kalite koulè. Li vole li ale nan peyi
⁴
 Liban, li kase tèt yon pye sèd. Li pran l', li pote l' ale nan yon peyi kote moun se trafik ase y'ap
⁵
 fè la. Li mete l' nan yon lavil kote se kòmèsan ase ki rete la. Lèfini, li pran yon ti plan nan peyi
 Izrayèl la, li plante l' nan yon bon venn tè, toupre yon larivyè ki toujou plen dlo, pou l' ka grandi
⁶
 tankou yon pye sikren. Ti plan an pran, li fè yon bèl pye rezen ki pa twò wo. Branch li yo grandi,
 yo moute nan direksyon malfini an, men rasin li yo menm desann fon anba tè. Li bay yon bèl pye
⁷
 rezen ak anpil branch plen fèy. Te vin gen yon lòt gwo malfini ak gwo zèl byen laj ak anpil plim
 sou li. Lè sa a, pye rezen an pouse rasin nan direksyon malfini sa a. Li vire tout branch li yo nan
 direksyon l' tou. Li te konprann malfini sa a tapral wouze l' pi byen pase jaden kote l' te plante a.
⁸
 Men, pye rezen an te deja plante nan yon bon venn tè, kote yon kannal ki toujou gen dlo, pou l'
⁹
 te ka fè fèy, pou l' te ka donner, pou li te ka rive fè yon bèl pye rezen. Di yo men mesaj Seyè sèl
 Mèt la voye ba yo: Eske pye rezen an ap grandi vre? Eske premye malfini an p'ap dechouke l', rache
 tout grap rezen l' yo, kase tout branch li yo pou yo mouri? Li p'ap bezwen anpil fòs ni yon lame
¹⁰
 moun pou l' dechouke l'. Wi, yo te plante l'. Men, èske l'ap grandi? Eske li p'ap mouri lè van lès

la va soufle sou li? Eske li p'ap mouri lamenn kote li t'ap pouse a? ¹¹ Seyè a pale avè m', li di m'
¹² kousa: -Pale ak bann moun tèt di sa yo. Mande yo si yo konprann sans parabol la. Di yo kousa:
 Wa lavil Babilòn lan te vini lavil Jerizalèm, li pran wa a ansanm ak tout chèf li yo, li mennen yo
¹³ ansanm avè l' lavil Babilòn. Li pran yon moun nan fanmi wa a, li pase kontra avè l', li fè l'
 sèman pou l' toujou soumèt devan li. Li pran tout grannèg ki nan peyi a, li fè yo prizonye, li depòte
¹⁴ yo. Kousa, li sèten peyi a va rete tou piti anba men l', yo p'ap ka leve tèt devan li, y'a toujou
¹⁵ kenbe kontra li te pase ak yo a. Men, wa peyi Jida a revòlte. Li voye mesaje nan peyi Lejip al
 chache chwal ak anpil sòlda. Eske l'ap rive fè sa li vle fè a? Eske li ka soti nan sitiyasyon kote l' ye
¹⁶ a? Depi li kase kontra a, fòk li peye l'. Se mwen menm, Seyè sèl Mèt la, k'ap pale: Jan nou
 konnen mwen vivan vre a, wa a pral lavil Babilòn, paske li te kase kontra a, li pa t' respekte
¹⁷ kondisyon li te pase ak wa lavil Babilòn lan ki te mete l' la pou gouvènè peyi a. Farawon an te
 mèt vini ak yon gwo lame ansanm ak anpil sòlda, li p'ap ka ede l' goumen nan lagè a, lè moun
¹⁸ Babilòn yo va vin moute ranblè ak fouye gwo kannal pou yo touye moun san gad dèyè. Wa peyi
 Izrayèl la pa respekte pawòl li, li kase kontra a. Malgre angajman li te pran yo, li fè tout bagay sa
¹⁹ yo. Sa p'ap pase kousa pou li. Se poutèt sa, men sa Seyè Sèl Mèt la di: Jan nou konnen mwen
 vivan vre a, ou pa respekte pawòl ou avè m'. Ou pa kenbe kontra mwen te pase avè ou la. Mwen
²⁰ gen pou m' pini ou pou sa. M'ap voye privye m' sou ou, w'ap pran nan may yo, m'ap trennen ou
²¹ lavil Babilòn. Se la m'ap pini ou pou kenbe ou pa te kenbe pawòl ou avè m'. Tout pi bon sòlda
 li yo pral mouri nan lagè. Sa ki chape yo, yo pral gaye yo toupatou sou latè. Lè sa a, n'a konnen se
²² mwen menm, Seyè a, ki pale. ¶ Men sa Seyè sèl Mèt la di: -M'ap koupe boujon tèt yon pye sèd
 ki byen wo. M'ap kase yon jenn ti boujon nan branch ki pi wo yo. M'ap plante l' sou tèt yon mòn
²³ byen wo, sou tèt mòn ki pi wo nan peyi Izrayèl la. L'ap fè branch, l'ap donner. L'ap vin fè yon
²⁴ bèl bèl pye sèd. Tout kalite zwezo pral rete ladan l'. Y'ap pare solèy nan lonbraj branch li yo. Tout
 pyebwa nan peyi a va konnen se mwen menm ki Seyè a. Mwen koupe gwo pyebwa yo mete atè.
 Ti pyebwa piti yo, m'ap fè yo grandi. Mwen cheche pyebwa ki vèt yo. Pyebwa ki fin mouri yo,
 mwen fè yo boujonnen ankò. Se mwen menm Seyè a ki pale. Sa mwen di m'ap fè a, m'ap fè l'.

Chapter 18

¹ ¶ Seyè a pale avè m' ankò, li di m' konsa: ² -Poukisa y'ap plede repete pwovèb sa a nan peyi Izrayèl la? Y'ap di: Papa ak manman manje rezen vèt, men se dan pitit yo ki gasi. ³ Se poutèt sa, jan nou konnen mwen vivan vre a, se mwen menm Seyè a, Bondye sèl Mèt la, ki di sa: Nou p'ap janm repete pwovèb sa a ankò nan peyi Izrayèl la. ⁴ Lavi tout moun, papa, manman kou pitit, se pou mwen yo ye. Moun ki fè peche a, se li menm k'ap mouri. ⁵ Ann pran ka yon moun k'ap mache dwat devan Bondye, ki fè sa li dwe fè, ki pa nan patipri. ⁶ Li pa moute nan mòn pou l' al bay zidòl manje, ni li pa fè sèvis pou vye zidòl moun pèp Izrayèl yo ap sèvi. Li pa al dèyè madanm lòt moun pèp Izrayèl parèy li, li pa kouche ak fanm ki gen lalin li. ⁷ Li pa pwofite sou pesonn, li pa bay pesonn koutba, li renmèt garanti moun te ba li pou lajan li prete yo. Li bay moun ki grangou yo manje, li bay moun ki toutouni yo rad pou mete sou yo. ⁸ Li pa bay ponya, li pa pran enterè sou lajan li prete. Li refize mete men l' nan sa ki mal. Lè de moun gen kont, li mete verite a kote li ye. ⁹ Yon moun konsa mache sou lòd mwen bay, li fè tou sa mwen mande pou moun fè. Li pa janm chache twonpe m'. Se yon moun ki dwat. Se sèten l'ap viv. Se mwen menm, Seyè sèl Mèt la, ki di sa. ¹⁰ ¶ Si nonm sa a ta rive fè yon pitit ki soti yon lwijanboje, ki renmen mete san moun deyò, epi k'ap mache fè tou sa ¹¹ papa l' pa janm fè: l'ap manje nan manje yo ofri bay zidòl sou tèt mòn yo, l'ap kouri dèyè madanm lòt moun pèp Izrayèl parèy li, ¹² l'ap toupizi pòv malere yo ak moun ki nan malsite, l'ap vòlò, li p'ap renmèt garanti moun te ba li pou lajan li te prete yo, l'ap fè sèvis pou zidòl, l'ap fè vye bagay derespektan, ¹³ l'ap bay ponya, li pran enterè pou lajan li prete, yon nonm konsa pa fèt pou viv. Non, li pa gen dwa viv lè li fin fè tout vye bagay derespektan sa yo. Se sèten l'ap mouri. Se li menm k'ap pote chay tou sa li fè. ¹⁴ Annou konsidere koulye a ka dezyèm moun sa a ki ta rive fè yon pitit gason. Pitit la wè tout peche papa l' te fè yo. Li wè yo, men li pa fè tankou ¹⁵ l'. Li pa al sou tèt mòn yo ofri manje bay zidòl, li derefize fè sèvis pou vye zidòl moun peyi Izrayèl yo. Li respekte madanm lòt moun pèp Izrayèl parèy li, ¹⁶ li pa pwofite sou pesonn, li pa kenbe garanti moun te ba li pou lajan li te prete yo. Li pa vòlò pesonn, li bay moun ki grangou manje, li bay moun ki toutouni rad pou yo mete sou yo. ¹⁷ Li refize fè moun mechanste, li pa bay ponya, li pa pran enterè sou lajan li prete moun. Yon moun konsa mache sou lòd mwen bay, li fè tou sa mwen mande pou moun fè. Li p'ap mouri poutèt peche papa l' te fè yo. Sèten l'ap viv. ¹⁸ Papa l' pou bò pa l' te fè mechanste, li vòlò frè parèy li, li pa janm fè byen pou pesonn. Se li menm k'ap mouri poutèt tou sa li fè ki mal. ¹⁹ N'a mande nan kè nou: Poukisa yon pitit pa peye pou peche papa li te fè a? Men repons la. Se paske pitit la te mache dwat devan Bondye, li fè sa li te dwe fè.

Li mache sou lòd mwen bay, li fè tou sa mwen mande pou moun fè, kifè l'ap viv. ²⁰ Moun ki fè peche, se yo k'ap mouri. Yon pitit p'ap peye pou peche papa l' te fè, ni yon papa p'ap peye pou peche pitit li fè. Moun ki mache dwat va jwenn rekonpans pou dwat yo te mache dwat la. Mechan an va peye pou mechanste li fè a. ²¹ ¶ Si mechan an sispann fè peche li te konn fè yo pou li mache dapre lòd mwen yo, si li fè sa ki dwat ak sa ki byen, li p'ap mouri. Sèten l'ap viv. ²² Yo p'ap chonje tout peche li te konn fè yo. L'ap viv paske li te fè sa ki dwat. ²³ Eske nou kwè mwen ta renmen wè mechan an mouri? Se Seyè sèl Mèt la ki mande sa. Non! Mwen ta pito wè l' sispann fè sa ki mal pou l' ka viv. ²⁴ Men, si yon moun ki mache dwat sispann fè sa ki byen pou li lage kò l' nan fè sa ki mal ak tout lòt vye bagay derespektan mechan yo ap fè a, nan kondisyon sa a èske li ka viv toujou? Non. Yo p'ap chonje tout byen li te konn fè yo. L'ap mouri paske li pa t' kenbe pawòl li, paske li fè sa ki mal. ²⁵ Men, n'a di n'a kè nou: Jan Seyè a ap ajì la a pa bon non. Enben, nou menm moun pèp Izrayèl yo, koute. Nou di jan m' ajì a pa bon. Nou pa kwè se jan nou menm n'ap ajì a ki pa bon pito? ²⁶ Lè yon moun ki t'ap mache dwat sispann fè sa ki byen pou li lage kò l' nan fè sa ki mal, l'ap mouri. Se poutèt sa li fè ki mal la l'ap mouri. ²⁷ Lè mechan an sispann fè peche li konn fè yo pou li fè sa ki dwat ak sa ki byen, l'ap sove lavi l'. ²⁸ Li rekonèt sa li t'ap fè a te mal, li sispann fè l'. Sèten li p'ap mouri. Se viv pou li viv. ²⁹ Men, moun peyi Izrayèl yo ap plede di: Jan Seyè a ap ajì a pa bon. Nou kwè se jan m'ap ajì a ki pa bon vre? Eske se pa jan nou menm n'ap ajì a ki pa bon pito? ³⁰ ¶ Se poutèt sa, men sa Seyè sèl Mèt la ap di moun peyi Izrayèl yo: M'ap jije chak moun dapre sa yo fè. Tounen vin jwenn mwen, sispann fè sa ki mal, pa kite peche nou yo lakòz nou mouri. ³¹ Vire do bay tout vye peche nou te konn fè yo. Chanje kè nou, chanje lide nou. Poukisa atò, nou menm moun pèp Izrayèl yo, pou n'ap chache lanmò konsa? ³² Mwen pa ta renmen wè pesonn mouri. Se mwen menm, Seyè sèl Mèt la, ki di sa. Tounen vin jwenn mwen epi n'a viv.

Chapter 19

¹ ¶ Bondye pale avè m', li di m' konsa: -Koulye a, plenn sò chèf peyi Izrayèl yo. ² Men sa ou pral di: Apa yon manman lyon manman ou tè ye! Li kouche nan mitan lyon yo, l'ap okipe pitit li yo. ³ Li pran yonn nan pitit li yo, li fè l' tounen yon jenn mal lyon. Jenn lyon an aprann jan pou l' kouri dèyè bèt pou l' manje. Li tanmen devore moun. ⁴ Men, lòt nasyon yo pran nouvèl la. Yo pran l' nan pèlen twou yo te pare pou li a. Yo mete yon zanno fè nan nen l', yo trennen l' ale nan peyi

⁵ Lejip. Manman lyon an tann, li tann jouk li pèdi espwa wè l' ankò. Li pran yon lòt nan pitit li yo,
 li fè l' tounen yon jenn mal lyon. ⁶ Li t'ap pwonmennen nan mitan lòt lyon yo, li tounen yon jenn
 mal lyon. Li aprann jan pou l' kouri dèyè bèt pou l' manje. Li tanmen devore moun. ⁷ Li demoli fò
 yo. Li sakaje lavil yo. Chak fwa li gwonde, moun k'ap viv nan peyi a gen kè sote. ⁸ Moun lòt nasyon
 yo leve dèyè l'. Moun soti toupatou nan pwovens bò kote l' yo, yo vin voye yon privye sou li. Yo
 pran l' nan pèlen twou yo te pare pou li a. ⁹ Yo mete yon zanno fè nan nen l', yo fèmen l' nan yon
 kaj. Yo mennen l' bay wa Babilòn lan. Yo mete sòlda veye l' pou moun pa janm tandè vwa l' ankò
 nan mòn peyi Izrayèl yo. ¹⁰ ¶ Manman ou te tankou yon pye rezen plante bò kannal dlo. Pye rezen
 an te chaje ak fèy, li t'ap donner anpil paske li te jwenn kont dlo li. ¹¹ Li pouse gwo branch. Branch
 yo tounen baton kòmandman wa. Pye rezen an grandi, li rive depase tèt tout lòt bwa yo. Tout moun
 t'ap gade jan li te wo, jan li te gen anpil branch. ¹² Men, yo move sou li, yo derasinen l', yo jete l'
 atè. Van lès koule tout donn li yo, li kase tout gwo branch li yo. Branch yo cheche, yo boule nan
¹³ dife. Koulye a, se nan yon dezè li kanpe, nan yon tè sèk san dlo. ¹⁴ Dife pran nan pye rezen an.
 Li boule ni branch li yo ni donn li yo. Li pa gen gwo branch ankò ki pou ta sèvi baton kòmandman
 pou wa. Sa a se yon chante pou yo chante anpil fwa pou plenn sò chèf peyi Izrayèl yo.

Chapter 20

¹ ¶ Lè sa a, se te dizyèm jou nan senkyèm mwa setyèm lanne depi yo te depòte pèp la nan peyi
 Babilòn. De twa chèf fanmi nan pèp Izrayèl la vin jwenn mwen pou m' te ka pale ak Seyè a pou
 yo. Yo te chita devan m'. ² Lè sa a, Seyè a pale avè m', li di m' konsa: ³ -Nonm o! Pale ak chèf
 fanmi pèp Izrayèl yo. Di yo men mesaj Seyè sèl Mèt la voye di yo: Nou vin chache konnen volonte
 m', pa vre? Jan nou konnen mwen vivan vre a, mwen p'ap kite moun mande m' anyen. Se mwen
⁴ menm, Seyè sèl Mèt la, ki di sa. Nonm o! Eske ou pare pou ba yo santans yo? Eske ou pare? Fè
 yo chonje tout vye krim zansèt yo te konn fè. ⁵ ¶ W'a di yo: Men mesaj Seyè ki sèl Mèt la voye ba
 yo: Lè mwen te chwazi pèp Izrayèl la, moun fanmi Jakòb yo, mwen te fè sèman ba yo, mwen te fè
 yo konnen ki moun mwen ye lè yo te nan peyi Lejip la. Mwen te fè sèman ba yo, mwen te di yo se
⁶ mwen menm Seyè a ki Bondye yo. Lè sa a, mwen te fè sèman m' t'ap fè yo soti kite Lejip la, m'
 t'ap mennen yo nan yon peyi mwen te chwazi pou yo, yon peyi kote lèt ak siwo myèl koule kou
⁷ dlo, yon peyi ki pi bèl pase tout lòt peyi. Mwen te di yo se pou yo te voye jete tout vye zidòl
 derespektan yo te renmen yo. Se pa pou yo avili tèt yo nan sèvi vye zidòl peyi Lejip yo. Paske se

8
 mwen menm Seyè a ki Bondye yo. Men, yo te kenbe tèt avè m', yo derefize koute m'. Yo yonn pa t' voye vye zidòl derespektan yo te renmen yo jete. Yo tout te derefize kite vye zidòl peyi Lejip yo. Lè sa a, la menm nan peyi Lejip la, m' te fè lide pou m' te fè yo wè jan m' te move, pou m' te fè yo santi sa m' ta ka fè yo lè m' fache.

9
 Men, mwen pa t' fè l' pou sa pa t' bay pèp peyi kote yo t'ap viv la okazyon pou yo trennen non mwen nan labou, paske se devan tout pèp sa yo mwen te fè moun Izrayèl yo konnen mwen t'ap fè yo soti kite peyi Lejip la.

10
 ¶ Se konsa, mwen fè yo soti kite peyi Lejip. Mwen mennen yo nan dezè a.

11
 Mwen ba yo lòd mwen, mwen fè yo konnen prensip mwen yo, prensip ki bay lavi depi yon moun swiv yo.

12
 Lèfini, mwen ba yo jou repo m' yo pou sa fè yo chonje kontra mwen siyen ak yo, pou yo pa janm bliye se mwen menm, Seyè a, k'ap fè yo viv apa pou Bondye.

13
 Men, depi nan dezè a menm, moun Izrayèl yo t'ap kenbe tèt avè m'. Yo pa mache dapre lòd mwen ba yo, yo voye prensip mwen yo jete, prensip ki bay lavi depi yon moun swiv yo. Yo pa respekte jou repo m' yo menm. Lè sa a, mwen te fè lide pou m' te fè yo santi sa m' ta ka fè yo lè m' move: m' te ka disparèt yo tout la nan dezè a.

14
 Men, mwen pa fè l' pou sa pa t' bay pèp ki te wè lè m' t'ap fè yo kite peyi Lejip la okazyon pou yo trennen non mwen nan labou.

15
 Se konsa, mwen fè sèman nan dezè a mwen pa t'ap mennen yo nan peyi mwen te ba yo a, peyi kote lèt ak siwo myèl ap koule tankou dlo, peyi ki pi bèl pase tout lòt peyi.

16
 Mwen te fè sèman sa a paske yo te voye prensip mwen te moutre yo jete, yo pa t' mache dapre lòd mwen te ba yo. Yo pa t' respekte jou repo m' yo tèlman yo pa t' vle lage zidòl yo.

17
 Men apre sa, kè m' te fè m' mal pou yo, mwen pran desizyon mwen p'ap touye yo. Se konsa, mwen pa t' disparèt yo tout nan dezè a.

18
 Lè sa a, mwen pale ak pitit yo nan dezè a, mwen di yo: Pa mache dapre lòd granmoun lontan nou yo. Pa swiv menm prensip ak yo. Pa al avili tèt nou nan sèvis zidòl yo.

19
 Se mwen menm, Seyè a, ki Bondye nou. Swiv prensip pa mwen yo, mache dapre lòd mwen bay yo.

20
 Fè tou sa mwen di nou fè. Respekte jou repo m' yo pou fè wè nou kenbe kontra m' te siyen ak nou an. Konsa, moun va konnen se mwen menm Seyè a ki Bondye nou.

21
 Men, pitit yo kenbe tèt avè m' tou, yo pa mache dapre lòd mwen ba yo. Yo voye prensip mwen yo jete, prensip ki bay lavi depi yon moun swiv yo. Yo pa respekte jou repo m' yo. Lè sa a, mwen te fè lide pou m' te fè yo wè jan m' te move, pou m' te fè yo santi nan dezè a sa m' ta ka fè yo lè m' fache.

22
 Men, mwen kenbe men m' pou m' pa fè l' pou sa pa t' bay pèp ki te wè lè m' t'ap fè yo soti kite peyi Lejip la okazyon pou yo trennen non mwen nan labou.

23
 Men, fwa sa a ankò, mwen fè yon lòt sèman nan dezè a, mwen fè sèman m'ap gaye yo nan mitan lòt nasyon yo, m'ap simaye nou nan divès peyi etranje.

24
 Mwen fè sa paske yo te voye prensip mwen te moutre yo jete, yo pa t' mache dapre lòd mwen

ba yo. Yo pa t' respekté jou repo m' yo tèlman yo pa t' vle lage zidòl papa yo te konn sèvi yo. ²⁵ Se
 konsa, mwen menm bò pa m', mwen ba yo lòd ki pa t' twò bon ak prensip ki pa bay lavi. ²⁶ Mwen
 kite yo avili tèt yo ak ofrann y'ap fè yo, mwen kite yo boule premye pitit gason yo pou zidòl yo.
²⁷ Se pou m' te ka fè yo pè, pou m' te ka fè yo konnen se mwen menm ki Seyè a. ¶ Koulye a, nonm
 o, pale ak moun pèp Izrayèl yo! Di yo: Men mesaj Seyè ki sèl Mèt la voye ba yo. La ankò zansèt
²⁸ nou yo te manke m' dega, yo pa t' kenbe pawòl yo ak mwen. Mwen mennen yo nan peyi mwen
 te pwomèt m'ap ba yo a. Lè yo wè gwo mòn yo ak bèl pyebwa tou vèt yo, se la yo touye bèt yo ofri
 pou zidòl yo. Yo fè ofrann grenn jaden ki fè m' fache sou yo. Yo boule ofrann pou fè zidòl yo plezi
²⁹ ak bon sant yo, yo vide diven atè pou yo. Mwen mande yo poukisa tout kay zidòl sa yo kote yo
³⁰ prale a? Depi lè sa a, yo rele kote sa yo Kay Zidòl jouk jòdi a. Koulye a, di moun pèp Izrayèl
 yo: Men mesaj Seyè ki sèl Mèt la voye ba yo: Poukisa pou n'ap avili tèt nou tankou zansèt nou yo
³¹ te fè yo, pou n'ap kouri fè sèvis pou zidòl yo? Jouk jòdi a, n'ap fè ofrann bay yo, n'ap bay pitit
 nou pou yo boule pou zidòl yo. N'ap plede avili tèt nou ak tout vye zidòl sa yo. Lèfini, pou m' ta
 kite nou vin mande mwen kisa mwen vle nou fè ankò? Jan nou konnen mwen vivan vre a, mwen
³² p'ap penmèt nou mande m' anyen! Se mwen menm, Seyè ki sèl Mèt la, ki di sa! Nou gen yon
 sèl lide nan tèt nou: N'ap plede di se pou nou tankou lòt nasyon yo, tankou moun k'ap viv nan lòt
³³ peyi yo, k'ap fè sèvis pou pyebwa ak wòch. Men, nou p'ap janm wè sa rive. ¶ Jan nou konnen
 mwen vivan vre a! Se mwen menm, Seyè Sèl Mèt la, k'ap pale! Se mwen menm k'ap gouvènen
 nou. M'ap kenbe nou anba ponyèt mwen ak tout fòs kouraj mwen, m'ap fè nou santi kòlè m'.
³⁴ Anba ponyèt mwen, ak tout fòs kouraj mwen, m'ap fè nou santi kòlè m', m'ap fè nou soti nan
³⁵ mitan lòt pèp yo. M'ap ranmase nou nan mitan tout peyi kote mwen te gaye nou yo. M'ap mennen
³⁶ nou nan dezè nasyon yo. Se la m'ap jije nou san pesonn lòt p'ap wè. Lè sa a, m'ap kondannè
 nou menm jan mwen te kondannè zansèt nou yo nan dezè peyi Lejip la. Se mwen menm, Seyè
³⁷ sèl Mèt la, ki di sa. M'ap kontwòle nou tankou yon gadò k'ap kontwòle mouton l' yo, m'ap fè
³⁸ nou obeyi kontra m' siyen ak nou an. M'ap wete nan mitan nou tout moun k'ap fè wòklò, tout
 moun k'ap kenbe tèt avè m' pou fè peche. M'ap fè yo soti kite peyi kote y'ap viv koulye a, men yo
³⁹ p'ap mete pwent pye yo nan peyi Izrayèl la. Lè sa a n'a konnen se mwen menm ki Seyè a. Seyè
 sèl Mèt la di ankò: Koulye a, nou menm moun pèp Izrayèl yo, nou mèt al sèvi zidòl nou yo. Men,
 m' tou pale nou. Apre sa, se pou n' koute m'. N'a sispann derespekté non mwen ki yon non apa. N'a
⁴⁰ sispann fè ofrann pou zidòl nou yo. Paske men sa mwen menm, Seyè a, m'ap di nou: Se sou
 mòn ki apa pou mwen an, gwo mòn wo peyi Izrayèl la, tout moun pèp Izrayèl la ki va tabli nan
 peyi a pral fè sèvis pou mwen. Se la m'a kontan resevwa ofrann nou yo. Se la mwen vle nou pote

⁴¹
 pi bon ofrann nou yo, pi bon kado n'ap ban mwen yo. Lè m'a fè nou soti nan mitan lòt pèp yo, lè m'a ranmase nou nan tout peyi kote mwen te gaye nou yo, m'a kontan resevwa nou ansanm ak ofrann bèt n'ap boule pou mwen pou fè m' plezi ak bon sant yo. N'a fè tout lòt nasyon yo konnen se yon Bondye apa mwen ye.

⁴²
 Lè m'a mennen nou tounen nan peyi Izrayèl, peyi mwen te fè sèman m'ap bay zansèt nou yo, n'a konnen se mwen menm ki Seyè a.

⁴³
 Lè sa a, n'a chonje tou sa nou te konn fè, jan nou te konn avili tèt nou nan fè move bagay. Nou pral wont tèt nou paske se pa

⁴⁴
 ti fè nou te fè. Lè sa a, n'a konnen se mwen menm ki Seyè a, paske sa m'ap fè pou nou an se pou respè tèt mwen m'ap fè l'. Se pa sa lenkondite nou ak vye bagay derespektan nou fè yo merite. Se

⁴⁵
 mwen menm, Seyè sèl Mèt la, ki di sa. ¶ Seyè a pale avè m' ankò, li di konsa:

⁴⁶
 -Nonm o! Voye je gade nan direksyon sid la. Denonse sa y'ap fè bò la. Bay mesaj sa a pou gwo rakbwa ki nan zòn

⁴⁷
 Negèv la. W'a di rakbwa Negèv la: Koute sa Seyè a di. Men mesaj Seyè sèl Mèt la voye ba ou: Gade rakbwa! Mwen pral limen yon sèl dife ki pral boule dènye pyebwa ou genyen, kit yo vèt, kit yo chèch. Anyen p'ap ka touye dife sa a. L'ap gaye depi nan sid rive nan nò. Tout moun pral santi

⁴⁸
 chalè dife a. Tout moun pral wè se mwen menm, Seyè a, ki limen dife a. Anyen p'ap ka touye

⁴⁹
 l'. Lè sa a mwen di: -Aa! Seyè sèl Mèt mwen! Pa fè m' di sa non! Moun deja ap plenyen se an daki ase m'ap pale!

Chapter 21

¹
 ¶ Seyè a pale avè m' ankò. Li di m' konsa:

²
 -Nonm o! Vire figi ou gade nan direksyon lavil Jerizalèm. Denonse sa y'ap fè nan tanp yo. Avèti moun peyi Izrayèl yo!

³
 W'a di yo: Men mesaj Seyè a bay pou nou: Mwen leve dèyè nou koulye a. Mwen pral rale nepe m' nan djenn li, mwen

⁴
 pral touye nou tout, bon kou move. Wi, mwen pral touye bon moun kou move moun nan peyi a. Se poutèt sa menm mwen pral rale nepe m' nan djenn li pou touye tout moun depi nan sid rive nan

⁵
 nò. Tout moun va konnen se mwen menm, Seyè a, ki rale nepe m' nan djenn li. Anyen p'ap ka fè

⁶
 m' mete l' nan plas li ankò. Men ou menm, nonm o! Se pou ou plenn paske kè ou ap fann, ou

⁷
 dekouraje. Wi, se pou ou plenn pou tout moun ka wè ou. Lè y'a mande ou poukisa w'ap plenn konsa, w'a di yo: Se paske m' pran nouvèl malè ki pral rive a. Lè l'a rive vre, kè tout moun pral kase, ponyèt yo ap febli, y'ap pèdi tout fòs kouraj yo, yo p'ap ka kanpe sou janm yo. Lè a rive, li

⁸
 deja sou nou. Se Seyè sèl Mèt la ki di sa. ¶ Seyè a pale avè m' ankò, li di m' konsa:

⁹
 -Nonm o! Bay mesaj sa a. Di pèp la men sa mwen menm Seyè a, mwen voye di yo: Nepe a, nepe a! Men y'ap

file l'. Men y'ap netwaye li. ¹⁰ Y'ap file l' pou touye moun. Y'ap netwaye li pou fè l' fè zèklè. Pa
 gen fè fèt ankò, paske pèp mwen an pa okipe avètisman ak pinisyon mwen te ba li. ¹¹ Wi, y'ap
 netwaye nepe a. Y'ap pare l' pou moun ka sèvi avè l'. Y'ap file l', y'ap netwaye l' pou yo mete l' nan
¹² men bouwo a. Ou menm, nonm o! Rele kont rele ou! Rele byen fò. Se pou pèp mwen an y'ap
 pare nepe a, pou tout chèf pèp Izrayèl yo. Yo pral touye yo ansanm ak tout pèp mwen an. Pran
¹³ lapenn pou yo! N'ap sonde pèp la. Si yo derefize chanje, tout bagay sa yo ap rive vre! Se Seyè
¹⁴ sèl Mèt la ki di sa. Koulye a, nonm o! Bay mesaj sa a. Lèfini, bat men pou ankouraje. Nepe a
 ap pase de fwa. Nepe a ap pase twa fwa. Nepe a ap touye anpil moun. Nepe a ap sènen yo kote yo
¹⁵ vire. L'ap fè pèp mwen an pèdi tout kouraj li, y'ap tonbe yonn sou lòt. Mwen mete nepe nan tout
¹⁶ pòtay yo, yon nepe k'ap bay zèklè, yon nepe ki pare pou touye anpil moun. Ou menm, nepe file,
¹⁷ koupe sou bò dwat, koupe sou bò gòch. Kote ou vire, koupe! Mwen menm tou, m'ap bat men
 pou ankouraje. Se pou m' move sou yo jouk mwen p'ap kapab ankò. Se mwen menm, Seyè a, ki
¹⁸ pale. ¶ Seyè a pale avè m', li di m' konsa: ¹⁹ -Nonm o! Trase de chemen kote pou wa Babilòn
 lan ka pase ak nepe l'. De chemen yo ap soti nan menm peyi a. Mete de mak nan kalfou kote yo
²⁰ separe a, yonn pou moutre wa a chemen ki mennen lavil Raba nan peyi Amon, yonn pou moutre
²¹ l' chemen ki ale peyi Jida rive lavil Jerizalèm ki byen pwoteje ak ranpa a. Wa Babilòn lan kanpe
 nan kalfou a bò mak yo, l'ap souke flèch yo voye atè pou li ka konnen ki wout pou li pran. L'ap
²² mande zidòl yo sa pou l' fè, l'ap egzaminen fresi bèt yo touye pou bondye yo. Bon! Men li kenbe
 flèch ki bay direksyon lavil Jerizalèm lan! Sa vle di se pou l' atake lavil Jerizalèm ak machin lagè
 yo, bay lòd pou yo touye tout moun, bay siyal pou yo mache sou lavil la ak gwo poto bwa pou
 defonse pòtay li yo, pou yo anpile ranblè nan pye miray li yo, pou yo fouye gwo kannal sènen l'
²³ toupatou. Moun lavil Jerizalèm yo p'ap kwè sa w'ap di a se vre paske yo te pase kontra avè l'.
 Men, mesaj w'ap bay la se pou fè yo chonje tou sa yo fè ki mal, pou fè konnen y'ap fè yo prizonye.
²⁴ Se poutèt sa, men sa mwen menm Seyè sèl Mèt la, m'ap di yo: Tout moun konnen jan nou pa
 bon. Nou fè tout peche nou yo aklè. Nan tou sa n'ap fè nou moutre jan nou mechan. Se poutèt sa,
²⁵ y'ap kondannen nou. N'ap tonbe anba men lènmi nou yo. Kanta pou ou menm, chèf peyi Izrayèl
²⁶ la, krimenèl san respè pou Bondye, jou pa ou la, jou dènye chatiman ou lan ap rive. Se mwen
 menm, Seyè sèl Mèt la, ki pale. Wete kouwòn lan ak gwo bèl mouchwa madras la nan tèt ou. Tout
²⁷ bagay pral chanje. Sa ki anba yo pral moute chèf, sa ki te chèf yo pral tonbe. Kraze, kraze, brize!
 Wi, m'ap fè lavil la tounen mazi. Men, pou sa rive, fòk moun mwen te chwazi pou pini lavil la vini

anvan. Se nan men l' m'ap lage l'.²⁸ ¶ -Nonm o! Bay mesaj la! Pale. Men sa Seyè sèl Mèt la voye di moun peyi Amon yo k'ap plede joure pèp Izrayèl la. Di yo konsa: Nepe a, nepe a pare pou touye!

Li byen file pou depatcha. Li byen netwaye pou fè l' fè zèklè.²⁹ Vizyon nou t'ap fè yo pa bon vizyon. Sa yo te di ki gen pou rive a p'ap rive. Nou menm mechan, nou menm malveyan, jou pa nou an, jou pou yo ban nou dènye chatiman nou an ap vini. Nepe a pral tonbe sou nou.³⁰ Remete nepe a nan djenn li. Mwen pral jije ou kote yo te kreye ou la, nan peyi kote ou te fèt la.³¹ M'ap fè ou santi jan m' move. Tankou yon gwo dife k'ap boule, m'ap souffle sou ou, m'ap lage ou nan men lwijanboje yo ki pa konnen pase kraze moun.³² Dife pral boule tout kò ou. San ou pral koule nan tout peyi a. Pesonn p'ap janm chonje ou ankò. Se mwen menm, Seyè a, ki pale.

Chapter 22

¹ ¶ Seyè a pale avè m' ankò, li di m' konsa: ² -Nonm o! Eske ou vle jije lavil ki renmen fè san koule a? W'a fè l' konnen tout vye bagay derespektan li te fè yo. ³ W'a di li: Men mesaj Seyè sèl Mèt la voye ba li. Ou reskonsab lanmò anpil moun ki t'ap viv nan mitan ou. Ou fè vye zidòl pou ou avili tèt ou nan fè sèvis pou yo. ⁴ Poutèt tout krim ou fè yo, ou antò. Avèk tout zidòl w'ap sèvi yo, ou pa nan kondisyon sèvi Bondye. Ou fè jou pa ou la pwoche, ou fè lè ou la rive! Se poutèt sa mwen kite nasyon yo pase ou nan betiz, tout moun ap lonje dwèt sou ou. ⁵ Nan peyi pre ak nan peyi lwen, y'ap pase ou nan rizib. Ou se yon lavil ki gen move non, yon lavil plen dezòd. ⁶ Tout chèf peyi Izrayèl yo gen konfyans nan pwòp fòs yo. Yon sèl bagay yo konnen, se touye moun. ⁷ Nan lavil la, pesonn pa respekte papa ak manman yo ankò. Y'ap pwofite sou moun lòt nasyon k'ap viv nan mitan yo. Y'ap maltrete fanm ki pèdi mari yo ak timoun ki san papa. ⁸ Nou pa respekte kay yo mete apa pou mwen yo, ni jou repo m' yo. ⁹ Plen moun nan mitan ou k'ap mache denonse moun, k'ap bay manti sou moun pou fè touye yo. Gen lòt k'ap manje nan manje yo ofri bay zidòl yo. Gen lòt menm, se pran plezi yo nèt ale nan tout kalite dezòd. ¹⁰ Genyen k'ap kouche ak madanm papa yo. Genyen k'ap fòse madanm yo kouche ak yo atout yo gen règ yo. ¹¹ Genyen k'ap fè adiltè ak madanm moun Izrayèl parèy yo, k'ap kouche ak bèlfi yo san yo pa wont. Genyen k'ap fè kadejak sou pitit fi papa yo ki pa menm manman ak yo. ¹² Genyen k'ap touye moun pou lajan. Gen lòt ankò k'ap bay frè parèy yo ponya, y'ap mande yo enterè pou lajan yo prete yo. Y'ap pran tou sa frè parèy

yo genyen pa fòs. Men mwen menm, yo bliye m'. Se mwen menm, Seyè sèl Mèt la, ki di sa.
¹³ Mwen pral frape pye m' atè, paske nou vòlò twòp, nou touye moun twòp. ¹⁴ Jou m'ap regle avè
ou la, ou p'ap gen kouraj pou ou sipòte, ou p'ap menm ka leve bra ou! Se mwen menm Seyè a ki
¹⁵ di sa. Sa mwen di m'ap fè a, m'ap fè l'. M'ap gaye tout pèp ou a nan mitan lòt nasyon yo. M'ap
mache simaye nou nan peyi etranje yo. M'ap fè nou sispann fè malpwòpte nou t'ap fè nan mitan
¹⁶ nou an. Akòz tou sa ou fè ki derespektan yo, lòt nasyon yo pral trennen ou nan labou. Men ou
menm, w'a konnen se mwen menm ki Seyè a. ¹⁷ ¶ Seyè a pale ave m' ankò, li di m' konsa: ¹⁸ -Nonm
o! Pou mwen moun pèp Izrayèl yo pa vo anyen. Yo tankou kras ki rete nan fon chodyè lè y'ap fonn
¹⁹ ajan, kwiv, asye, fè ak plon. Yo tankou kras nan fon chodyè, yo pa vo anyen. Se poutèt sa, men
mesaj Seyè sèl Mèt la voye di yo: Koulye a nou tounen kras nan fon chodyè fèblantye, mwen pral
²⁰ mete nou tout fè pil nan mitan lavil Jerizalèm. Menm jan yo mete vye moso ajan, kwiv, fè, plon
ak eten nan yon chodyè sou gwo dife pou fonn yo wete kras, m'ap move sou nou, m'ap fè kòlè,
²¹ m'ap tankou dife y'ap soufle anba chodyè fèblantye pou fonn metal yo, m'ap fè nou fonn. Wi,
m'ap mete nou ansanm nan mitan lavil Jerizalèm, m'ap limen dife anba nou, m'ap fache sou nou,
²² m'ap fonn nou. Nou pral fonn nan mitan lavil Jerizalèm tankou ajan k'ap fonn nan chodyè
fèblantye. Lè sa a, n'a konnen se mwen menm, Seyè a, ki move sou nou konsa. ²³ ¶ Seyè a pale
²⁴ avè m' ankò, li di m' konsa: -Nonm o! W'a di moun pèp Izrayèl yo yo rete nan yon peyi ki gen
²⁵ madichon. Wi, lè m'a move sou yo, yo p'ap jwenn yon degout lapli. Chèf ki rete nan peyi a
tankou lyon k'ap gwonde bò yon bèt yo fin touye. Yo devore moun, yo pran tout richès ak tout
²⁶ byen yo jwenn. Se pa de fanm yo kite san mari. Prèt yo menm pa kenbe lwa mwen an, yo pa
gen respè pou kay ki apa pou mwen an. Yo pa fè diferans ant bagay ki apa pou mwen ak bagay ki
pa apa pou mwen. Yo pa moutre moun sa ki bon ak sa ki pa bon pou sèvis mwen. Yo pa konn sa
²⁷ ki rele jou repo mwen yo. Se konsa pèp Izrayèl la pa respekte m' menm. Zotobre yo menm nan
lavil la, yo tankou chen mawon k'ap dechèpiye bèt yo touye. Y'ap touye moun pou yo vòlò byen
²⁸ yo. Pwofèt yo kache peche pou chèf yo tankou moun k'ap kouvri yon vye miray ak krepisay.
Y'ap fè vizyon ki pa vre. Y'ap bay manti sou sa ki pou rive. Yo pretann se mesaj mwen menm,
²⁹ Seyè a, mwen ba yo, men, mwen pa janm pale ak yo. Nan tout peyi a moun yo lage kò yo nan
fè mechanste, nan vòlò zafè moun. Y'ap toupizi pòv malere yo ak moun ki nan malsite yo, y'ap
³⁰ pwofite sou moun lòt nasyon yo san rezon. Mwen chache nan mitan yo yon moun ki ta ka bati
yon miray, ki ta ka kanpe kote miray yo ap kraze a, pou pran defans peyi a lè m'a fè kòlè pou m'

31
detwi l', men mwen pa jwenn pesonn. Se konsa, mwen pral move sou yo. Tankou yon dife, mwen pral disparèt yo. Mwen pral fè yo peye pou sa yo fè. Se mwen menm Seyè sèl Mèt la ki pale.

Chapter 23

1 ¶ Seyè a pale avè m' ankò, li di m' konsa: 2 -Nonm o! Vwala te gen de fi, pitit menm manman.
3 Depi lè yo te jenn ti nègès y' al fè jennès nan peyi Lejip. Se la yo lage kò yo nan lavi gason. Se la yo kite gason woule tete yo pou premye fwa. 4 Pi gran an te rele Ola, pi piti a Oliba. Ola se peyi Samari, Oliba se peyi Jerizalèm. Mwen marye ak tou de, yo fè pitit gason ak pitit fi pou mwen.
5 Men, atout Ola te madanm mwen, li lage kò l' nan dezòd. Li t'ap mouri pou moun peyi Lasiri, vwazen l' yo. Li fè zafè ak yo. 6 Mesye sa yo te sòlda avèk bèl inifòm violèt, gwo zotobre, ak grannèg. Yo tout te bèl jenn gason, bon kavalye moute sou chwal yo. 7 Li te kouche ak tout gwo chèf peyi Lasiri yo. Sitèlman li te cho dèyè mesye sa yo, li avili tèt li, li tonbe fè sèvis pou vye zidòl moun peyi Lasiri yo. 8 Li pa t' sispann fè metye jennès li te aprann nan peyi Lejip la. Depi lè li te jenn ti nègès, gason ap kouche l', y'ap woule tete l', y'ap sèvi avè l' tankou yon jennès. 9 Se poutèt sa mwen lage l' nan men nonm li yo, moun peyi Lasiri yo. Se dèyè yo li te cho konsa! 10 Yo mete l' toutouni, yo pran pitit gason ak pitit fi li yo. Lèfini, yo touye l' anba kout nepe. Se te yon egzanp pou tout fanm. Yo te fè l' peye pou sa l' te fè a dapre lalwa. 11 ¶ Atout Oliba, sè l' la, te wè sa, li lage kò l' nan pi gwo dezòd toujou. Li tounen yon pi gwo jennès pase Ola. 12 Li menm tou li te cho dèyè mesye peyi Lasiri yo, grannèg, gwo zotobre, sòlda ak bèl inifòm, bon kavalye ki moute sou chwal, yon bann bèl jenn gason. 13 Mwen wè li te fin avili tèt li nèt: dezyèm sè a pa t' pi bon pase premye a. 14 Men, Oliba al pi lwen toujou nan metye jennès la. Li wè pòtre gason yo te fè sou yon miray ak bèl penti wouj. Se te pòtre chèf peyi Babilòn yo. 15 Avèk bèl sentiwon pase nan ren yo, tèt yo mare ak bèl mouchwa madras, mesye yo te abiye tankou gwo chèf. Se te pòtre moun peyi Babilòn. Se la yo te fèt. 16 Wè li wè pòtre mesye yo, li anvi yo. Li voye mesaje bò kote yo nan peyi Babilòn. 17 Mesye yo vini, yo fè lamou, yo kouche avè l'. Yo pran kont plezi yo avè l', yo fin avili li nèt. Bout pou bout, li vin rayi yo. 18 Se li menm ankò ki mete tout zafè l' deyò. Li fè tout moun konnen se jennès li ye. Li mete l' toutouni, li fè m' degoute l' tankou lòt sè a. 19 Se atò

li lage kò l' nan fè jennès. Li vin chonje lè l' te jenn ti nègès ap fè jennès nan peyi Lejip. ²⁰ Li t'ap
 kouri dèyè gason ki cho tankou ou ta di mal bourik ak poulen chwal ki pran sant fenmèl. ²¹ Oliba,
 ou te dèyè pou ou te fè tout dezòd ou te konn fè yo lè ou te jenn ti nègès nan peyi Lejip kote pou
 premye fwa mesye yo te woule tete ou, kote yo te mete ou nan lavi gason. ²² ¶ Se poutèt sa, Oliba,
 men mesaj mwen menm Seyè a voye ba ou: Ou te vin rayi nonm ou yo! Enben, mwen pral moute
 tèt yo sou ou, mwen pral fè yo soti toupatou pou yo vin sènen ou. ²³ Tout moun Babilòn yo ak
 moun peyi Kalde yo, moun lavil Pekòd, moun lavil Choa, moun lavil Koa, ansanm ak tout moun
 peyi Lasiri yo, mwen pral sanble tout bèl jenn gason yo, grannèg, gwo zotobre, tout chèf, tou sa ki
 gen gwo grad, bon kavalye ki moute sou chwal yo. Mwen pral sanble yo tout. ²⁴ Y'ap soti nan nò,
 y'ap mache sou ou avèk yon gwo lame, anpil cha lagè ak anpil kabwa pwovizyon. Avèk gwo plak
 fè pou pwoteje yo, kas yo nan tèt yo, yo pral sènen ou toupatou. M' pral lage ou nan men yo pou
 yo jije ou dapre lwa pa yo. ²⁵ Ou te pouse m' fè jalouzi, yo pral move sou ou jouk yo p'ap kapab
 ankò. Yo pral koupe bwa nen ou ak fèy zòrèy ou yo. Yo pral touye pitit ou yo. Wi, yo pral pran
 pitit gason ak pitit fi ou yo nan men ou, y'ap boule yo tou vivan. ²⁶ Y'ap wete tout rad sou ou, y'ap
 pran tout bijou ou te konn mete sou ou. ²⁷ M'ap mete yon fren nan dezòd ak metye jennès ou t'ap
 fè depi nan peyi Lejip la. Ou p'ap wè yo ankò devan je ou. Ou p'ap chonje peyi Lejip ankò. ²⁸ Men
 sa Seyè sèl Mèt la di ankò: -Mwen pral lage ou nan men moun ou pa vle wè yo, moun ki te ba ou
 degoutans yo. ²⁹ Yo pral maltrete ou tankou moun yo rayi. Yo pral pran tou sa ou te travay fè, y'ap
 kite ou toutouni, san rad sou ou tankou yon jennès. Se move lanvi ou yo ak lenkondite ou yo ³⁰ ki
 pral lakòz tout malè sa yo tonbe sou ou. Ou te tounen yon jennès pou mesye lòt nasyon yo, ou avili
 tèt ou, ou tonbe fè sèvis pou vye zidòl yo. ³¹ Ou mache pye pou pye dèyè sè ou la. Se poutèt sa
 m'ap pini ou menm jan mwen te pini l' la. ³² Men sa Seyè sèl Mèt la di ankò: -Ou pral bwè nan
 gode sè ou la, yon gode byen fon. Tout moun pral pase ou nan betiz, nan rizib. Gode a plen ra bò.
³³ Li pral fè ou sou. W'ap an mal makak. Se yon gode k'ap fè moun pè, yon gode k'ap fini avè ou,
 gode Samari, sè ou la. ³⁴ W'ap bwè tout, w'ap kite l' vid. Lèfini, w'ap kraze l' anba dan ou! Moso
 yo pral filange tete ou. Se mwen menm, Seyè sèl Mèt la, ki di sa. ³⁵ Se poutèt sa, men sa Seyè sèl
 Mèt la di ankò: -Paske ou te bliye m', ou te vire do ou ban mwen, ou pral souffri pou tout lenkondite
 ak dezòd ou te fè yo. ³⁶ ¶ Seyè a pale avè m' ankò, li di m' konsa: -Nonm o! Eske ou pare pou jije
 Ola ansanm ak Oliba? Ou pral mete devan yo tout vye bagay derespektan yo t'ap fè yo. ³⁷ Yo fè
 adiltè, yo touye moun, yo fè adiltè ak zidòl, yo touye pitit yo te fè pou mwen. Yo ofri yo pou yo

boule yo bay zidòl. ³⁸ Se pa sa ase yo fè m'. Menm lè sa a, yo derespekte tanp mwen an. Yo pa
 respekte regleman jou repo m' yo. ³⁹ Menm jou yo touye pitit yo pou zidòl yo, yo vin nan tanp
 mwen an pou yo derespekte l'. Men sa yo fè anndan kò kay mwen an. ⁴⁰ Sa ki pi rèd ankò, yo voye
 mesaj al envite gason soti byen lwen vin jwenn yo. Mesye yo vini. De sè yo benyen byen pwòp,
 yo pentire je yo. Yo mete bijou yo sou yo pou resevwa. ⁴¹ Yo chita sou bèl gwo kabann, yo pare
 yon ti tab devan kabann lan. Lèfini, yo pran lansan ak lwil mwen te ba yo, yo mete sou li. ⁴² Apre
 sa, moun tande vwa yon pakèt gason manfouben k'ap pran plezi avèk yo. Se te yon bann malandren
 yo mennen soti nan dezè a. Mesye yo mete bèl braslè nan ponyèt medam yo ak bèl kouwòn sou tèt
 yo chak. ⁴³ Mwen di nan kè m': Fanm lan fini afòs li fè adiltè. Atousa l'ap fè jennès toujou. ⁴⁴ Men,
 mesye yo tounen anpil fwa lakay li tankou kay yon jennès. Yo tounen lakay Ola ak Oliba, fanm
 devègonde sa yo. ⁴⁵ Men, gason ki mache dwat yo pral jije yo tankou yo jije fanm k'ap fè adiltè
 epi k'ap touye moun, paske yo fè adiltè, yo touye moun. ⁴⁶ Men sa Seyè sèl Mèt la di ankò: Sanble
 yon foul moun pou mache sou yo, pou fè yo pè, pou piye tou sa yo genyen! ⁴⁷ Se pou foul moun
 yo kalonnen yo wòch jouk yo touye yo. Se pou yo depatcha yo ak nepe, touye pitit gason ak pitit
 fi yo, lèfini pou yo mete dife nan kay yo. ⁴⁸ Nan tout peyi a, m'ap fè moun sispann fè libètinaj. Sa
 va sèvi yon avètisman pou tout medam yo, pou yo pa fè tankou nou. ⁴⁹ Pou nou menm, de sè sa
 yo, mwen pral pini nou pou libètinaj nou. M'ap fè nou peye peche nou fè lè nou t'ap sèvi zidòl yo.
 Lè sa a, n'a konnen se mwen menm Seyè a ki sèl Mèt.

Chapter 24

¹ ¶ Nan dizyèm jou dizyèm mwa nevyèm lanne depi yo te depòte pèp Izrayèl la, Seyè a pale
 avè m', li di m' konsa: ² -Nonm o! Ekri dat jòdi a, paske se jòdi a wa peyi Babilòn lan pral sènen
 lavil Jerizalèm. ³ Ou pral bay yon pawoli sou move ras moun sa yo ki gen tèt di. W'a di yo: Men
 mesaj Seyè sèl Mèt la voye ba yo: Mete yon chodyè sou dife, plen l' dlo. ⁴ Mete vyann ladan l', pi
 bon moso vyann ou konnen: jigo ak zepòl. Mete bon moso zo ladan l' tou. ⁵ W'a pran yo nan mouton
 ki pi gra yo. Mete bon bwa anba chodyè a. Kite dlo a bouyi byen bouyi jouk vyann lan ak zo yo
 byen kwit. ⁶ Men sa Seyè sèl Mèt la di apre sa: -Madichon pou lavil ki renmen fè san koule a! Li
 tankou yon chodyè wouye yo pa janm foubi. Wete tout moso vyann yo yonn apre lòt. Pa chwazi

pou kite anyen ladan l'. ⁷ Li fè anpil san koule nan mitan li. Men, san an pa koule atè pou pousyè
 te kouvri l'. San an koule sou wòch. ⁸ Mwen kite san an la sou wòch yo, kote yo pa ka kouvri l',
 pou l' ka mande revanj paske sa fè m' fache anpil. ⁹ Men sa Seyè sèl Mèt la di: -Madichon pou lavil
 ki renmen fè san koule a. Se mwen menm ki pral fè yon gwo pil bwa. ¹⁰ Pote bwa an kantite toujou!
 Limen dife a! Kwit vyann yo byen kwit! Mete zepis ladan l'! Boule zo yo! ¹¹ Mete chodyè fè a tou
 vid sou chabon dife yo. Kite l' vin tou wouj. Konsa lawouj la va tonbe, l'a deka. Chodyè a va vin
 pwòp ankò pou l' ka sèvi. ¹² Ala traka pou wete lawouj la! Atousa, lawouj la p'ap fin soti nèt nan
 dife a. ¹³ Jerizalèm, lawouj la se vye malpwòpte ou t'ap fè nan libètinaj ou yo. Mwen te soti pou
 m' te mete ou nan bon kondisyon, men ou pa rive fin nan bon kondisyon an nèt. Se poutèt sa, ou
 p'ap janm nan bon kondisyon ankò toutotan mwen pa fè ou santi tou sa mwen ka fè ou nan kòlè
 mwen. ¹⁴ Se mwen menm, Seyè a, ki pale. Lè a rive pou m' fè sa m' te di m'ap fè a. Mwen p'ap
 chanje lide. M'ap san pitye, mwen p'ap pran priyè. Yo pral pini ou pou sa ou te fè, pou jan ou te
 mennen bak ou. Se Seyè sèl Mèt la ki di sa. ¹⁵ ¶ Seyè a pale avè m', li di m' konsa: ¹⁶ -Nonm o!
 Mwen pral rete konsa, mwen pral pran moun ou renmen tankou de grenn je nan tèt ou a. Men, pa
 plenyen, pa rele, pa kite dlo sot nan je ou! ¹⁷ Plenn sò ou. Men, pa kite moun tande ou! Pa fè anyen
 ki pou moutre ou nan lapenn tankou yon moun ki gen lanmò. Mare bèl foula ou nan tèt ou. Mete
 sapat nan pye ou. Pa kouvri figi ou. Pa manje manje moun voye ba ou. ¹⁸ Jou sa a nan maten,
 mwen t'ap pale ak pèp la. Nan aswè, madanm mwen rete konsa, li mouri. Nan denmen maten, mwen
 fè jan Seyè a te di m' fè a. ¹⁹ Pèp la mande m': -Eske ou ka di nou poukisa ou fè sa w'ap fè la a?
²⁰ Mwen reponn yo: -Seyè a te pale avè m', li te di m', ²¹ pou m' di moun pèp Izrayèl yo men mesaj
 Seyè sèl Mèt la voye pou yo: Nou kontan gwo kay solid nou mete apa pou mwen an. Nou renmen
 l' tankou de grenn je nan tèt nou, nou fèb anpil pou li. Enben, mwen pral fè yo derespekte kay mwen
 an. Pitit gason ak pitit fi nou te kite lavil Jerizalèm yo pral mouri nan lagè. ²² Lè sa a, n'a fè jan
 nou wè m' fè a. Nou p'ap kouvri figi nou, nou p'ap manje pen nan men moun. ²³ N'ap toujou mare
 bèl foula nan tèt nou. N'ap toujou mete sapat nan pye nou, nou p'ap rele, nou p'ap kriye jan moun
 yo fè lè yo gen lanmò. Men, nou pral deperi akòz mechanste nou yo. Nou pral plenn sò nou yonn
 bay lòt. ²⁴ Ezekyèl menm pral yon siy pou nou. N'a fè menm jan li te fè a. Lè bagay sa a va rive,
 n'a konnen se mwen menm ki Seyè sèl Mèt la. ²⁵ Seyè a di m' konsa: -Nonm o! M'ap wete nan
 men yo kay byen solid ki te tout pwoteksyon yo a, bèl kay ki te fè kè yo kontan an, kay yo te renmen
 tankou de grenn je nan tèt yo a, kay yo te fèb anpil pou li a. M'ap wete l' ansanm ak pitit gason ak

26 pitit fi yo. Jou sa a, yon moun va chape kò l', l'a kouri vin pote nouvèl la ba ou. 27 Menm jou sa a, w'a ka louvri bouch ou pale ak moun ki chape a. Wi, w'a ka pale, ou p'ap bèbè ankò. Se konsa ou va yon siy pou pèp la. Lè sa a, y'a konnen se mwen menm ki Seyè a.

Chapter 25

1 ¶ Seyè a pale avè m' ankò, li di m' konsa: 2 -Nonm o! Vire tèt ou gade nan direksyon peyi Amon an. Denonse sa moun sa yo ap fè. 3 W'a di moun peyi Amon yo: Koute mesaj Seyè a. Men sa Seyè sèl Mèt la voye di yo: Nou te twò kontan lè yo te derespekte kay ki apa pou mwen an. Nou te twò kontan lè yo t'ap devalize peyi Izrayèl la, lè yo t'ap depòte moun Jida yo. 4 Se poutèt sa m'ap lage nou nan men moun ki soti nan dezè bò solèy leve a. Yo pral moute kan yo nan mitan peyi nou an, se la y'ap rete. Yo pral manje tout rekòt nou yo, y'ap bwè tout lèt bèt nou yo. 5 M'ap fè lavil Raba tounen savann pou chamo. M'ap fè tout peyi Amon an tounen yon gwo pak mouton. Lè sa a, n'a konnen se mwen menm ki Seyè a. 6 Men sa Seyè sèl Mèt la di: Nou te bat men, nou te danse tèlman nou te kontan, paske, nan kè nou, nou pa vle wè peyi Izrayèl la. 7 Se poutèt sa m'ap lonje men m' sou nou pou m' pini nou, m'ap lage nou nan men moun lòt nasyon k'ap piye nou. Ras nou an ap fini nèt sou latè, peyi nou an ap disparèt. Lè sa a, n'a konnen se mwen menm ki Seyè a. 8 ¶ Seyè sèl Mèt la pale ankò, li di konsa: -Moun peyi Moab yo ak moun lavil Seyi yo te di peyi Jida a tankou tout lòt nasyon yo. 9 Enben, mwen pral fè yo atake lavil k'ap defann fwontyè peyi Moab la. Yo pral kraze yo tout, ata pi bèl vil yo tankou Bèt-Jechimòt, Baal Meon ak Kiriya-Tayim. 10 M'ap lage peyi Moab ansanm ak peyi Amon nan men moun ki soti nan dezè bò solèy leve a. Y'ap pran yo pou yo. Konsa, yo p'ap janm chonje te gen yon peyi yo te rele Moab ankò sou latè. 11 Se konsa m'ap pini peyi Moab la. Lè sa a, y'a konnen se mwen menm ki Seyè a. 12 Seyè sèl Mèt la pale, li di konsa: -Moun peyi Edon yo te tire revanj yo sou peyi Jida a. Se sa ki fè yo antò anpil lè yo t'ap tire revanj yo sou peyi Jida a. 13 Se poutèt sa, men sa mwen menm Seyè sèl Mèt la ap di: Mwen pral lonje men m' sou Edon pou m' pini l', mwen pral touye dènye moun ak dènye bèt nan peyi a. M'ap fè l' tounen yon dezè, pran depi lavil Teman rive jouk lavil Dedan. Yo pral touye tout moun nan lagè. 14 Se pèp mwen an, pèp Izrayèl la, ki pral tire revanj pou mwen sou peyi Edon an. Li pral fè moun Edon yo santi jan mwen konn ankòlè, jan m' konn move. Lè sa a, Edon va konnen jan m' konn tire revanj mwen sou moun. Se mwen menm Seyè sèl Mèt la ki pale. 15 Seyè sèl Mèt la di konsa: -Moun Filisti yo pran revanj yo, yo tire revanj sou moun yo pa vle wè depi

16
 lontan yo, yo detwi yo avèk raj. Enben, men sa Seyè sèl Mèt la di: M'ap lonje men m' sou moun Filisti yo pou m' pini yo, m'ap disparèt yo, m'ap detwi ti rèss moun ki rete nan plenn Filisti ki bò lanmè a.
 17
 Se pa ti pini m' pral pini yo, m'ap tire revanjan mwen sou yo. M' pral move anpil sou yo. Lè m'a tire revanjan mwen sou yo, y'a konnen se mwen menm ki Seyè a.

Chapter 26

1 ¶ Nan premye jou mwa a nan onzyèm lanne depi yo te depòte nou an, Seyè a pale avè m', li di m' konsa:
 2 -Nonm o! Lavil Tir pa t' manke kontan. Men sa li t'ap di sou lavil Jerizalèm: Li fini! Li pa ka fè gwo kòmès li te konn fè anvan an. Koulye a, wout kòmès la louvri gran louvri pou mwen. Pa gen anyen lavil Jerizalèm ankò.
 3 Enben, men sa Seyè sèl Mèt la di: -M'ap leve dèyè nou tou, nou menm moun lavil Tir. Mwen pral mennen anpil nasyon vin atake nou. Yo pral vin sou nou yonn apre lòt tankou lanm lanmè.
 4 Yo pral kraze miray ranpa lavil yo. Y'ap demoli gwo fò won yo. Lèfini, m'ap pote tout pousyè a ale. M'ap kite wòch yo griyen konsa.
 5 Pechè yo pral mete senn cheche sou yo, la kote lavil la te kanpe nan mitan lanmè. Se mwen menm Seyè sèl Mèt la ki di sa. Nasyon yo pral piye lavil la.
 6 Yo pral touye tout moun k'ap viv nan lòt lavil ki nan rèss peyi a ak nepe. Lè sa a, lavil Tir va konnen se mwen menm ki Seyè a.
 7 Men sa Seyè sèl Mèt la di: -Mwen pral voye Nèbikadneza, wa Babilòn lan, pi gran wa pase tout wa yo, vin atake Tir. L'ap soti nan nò avèk chwal, cha lagè, kavalye ak yon gwo lame sòlda.
 8 Li pral touye tout moun k'ap viv nan lòt lavil ki nan rèss peyi a. Li pral fouye gwo kannal, li pral anpile ranblè tout arebò ou. Li pral moute yon miray ak plak fè pou pare kou.
 9 Li pral frape sou miray yo avèk gwo poto. Li pral demoli gwo fò won yo ak gwo pens fè.
 10 Tèlman pral gen chwal, chwal yo pral leve yon gwo nwaj pousyè dèyè yo ki pral kouvri lavil la. Lè kavalye l' yo ap pase sou chwal yo, lè cha lagè yo ak kabwa pwovizyon yo ap pase antre nan pòtay ou yo, miray yo pral tranble. Yo pral antre nan lavil la tankou si miray yo te tonbe.
 11 Nou pral tande bri zago chwal li yo nan tout lari yo. L'ap fè yo touye tout moun ak nepe. Bèl gwo poto solid ou yo pral tonbe atè.
 12 Yo pral pran tout richès ou yo, yo pral piye tout machandiz ou yo. Y'ap kraze tout miray ou yo, y'ap demoli tout bèl kay ou yo. Y'ap pran wòch yo, bwa yo ak tout rèss demoli yo, y'ap jete yo nan lanmè.
 13 M'ap fè nou sispann chante. Yo p'ap tande mizik gita nou yo ankò.
 14 Lavil la pral tounen yon gwo pil wòch, se la pechè yo pral cheche senn yo. Yo p'ap janm rebati lavil la ankò. Se mwen menm, Seyè a, ki pale. Se mwen

15
 menm, Seyè sèl Mèt la, ki di sa. ¶ Men sa Seyè sèl Mèt la voye di moun lavil Tir yo: Lè lavil
 la va tonbe nan men lènmi l' yo, lè y'a pran masakre moun ladan l', lè moun y'ap touye yo ap rele,
 16
 moun ki rete tout bò gwo lanmè a va tranble. Tout wa peyi k'ap fè kòmès sou lanmè a ap desann
 soti sou fotèy yo, y'ap wete gwo manto ak bèl rad bwode ki te sou yo. Yo pral chita atè sitèlman
 17
 y'ap pè. Yo pral sitèlman sezi wè sa ki rive nou, y'ap tranble san rete. Yo pral plenn sò ou. Yo
 pral di: -Gade yon malè! Gwo lavil la disparèt! Tout batiman l' yo koule! Jan moun lavil sa yo te
 18
 mèt lanmè a! Yo te fè tout moun ki rete bò gwo lanmè a pè yo. Koulye a, tout moun bò gwo
 lanmè yo ap tranble lè y'a wè ou tonbe nan men lènmi ou yo. Wi, moun ki rete bò gwo lanmè a
 19
 p'ap konn sa pou yo fè lè y'a wè jan ou fini an! Paske, men sa Seyè sèl Mèt la di: -M'ap fè ou
 tounen yon dezè, tankou lavil kote pa gen moun rete. M'ap fè dlo lanmè a leve dèyè ou, l'ap kouvri
 20
 ou nèt ale. M'ap fè nou desann nan peyi kote mò yo ye a, m'ap voye nou al jwenn moun ki mouri
 depi lontan yo. M'ap fè nou al rete nan peyi ki anba tè a, kote nou pral rete pou kont nou, pou tout
 tan ansanm ak moun ki mouri deja yo. Konsa, nou p'ap gen plas nou ankò sou latè pami vivan yo.
 21
 Mwen pral fè tout moun pè lè yo wè sa ki rive nou. Se konsa n'a fini. Moun va chache nou, men
 yo p'ap janm jwenn nou. Se Seyè sèl Mèt la ki di sa.

Chapter 27

1 ¶ Seyè a pale avè m', li di m' konsa: 2 -Nonm o! Chante pou plenn sò lavil Tir! 3 W'a pale ak
 moun lavil Tir yo, lavil ki kanpe bò lanmè a, lavil k'ap fè kòmès ak dènye moun ki rete bò lanmè,
 w'a di yo men mesaj Seyè sèl Mèt la voye ba yo: -Nou menm, moun lavil Tir, k'ap mache di: Pa
 4
 gen pi bèl peyi pase peyi nou an! Fwontyè nou rive jouk nan mitan lanmè. Moun ki bati lavil la
 5
 te bati l' tankou yon bèl batiman. Yo te pran bwapen sou mòn Seni fè planch pou sèvi bòday nou
 yo. Yo pran yon bwa sèd peyi Liban pou fè ma pou nou. 6 Yo pran bwadchenn peyi Bazan pou fè
 zaviwon. Yo voye chache bwa sèd nan lil Chip pou fè pon an. Lèfini, yo plake moso ivwa sou tout
 7
 pon an. Vwal batiman an te fèt ak bèl twal fin blan bwode ki soti peyi Lejip. Se te drapo pa nou
 8
 sa! Kabin sou pon an te kouvri ak bèl twal violèt, bèl twal wouj ki soti nan lil Elichà. Se gason
 ki soti lavil Sidon ak lavil Avad k'ap naje zaviwon pou ou. Men, se moun lavil la menm ki te fò
 9
 anpil nan lamarin ki te maren sou batiman an. Se ansyen gwo bòs chapant lavil Gebal ak bon
 ouvriye yo ki te abò batiman an pou fè reparasyon. Maren tout batiman ki sou lanmè a vin fè trafik
 10
 lakay ou. Nan lame ou la se renk moun peyi Pès, moun peyi Loud ak moun peyi Pout ki t'ap

sèvi. Yo konn fè lagè. Se nan kazèn ou yo yo te konn mete gwo plak fè pwotèj yo ak kas an fè yo.

11
Se moun sa yo ki te fè ou rive nan tout bèl pozisyon sa a. Sòlda ki soti lavil Avad ap veye sou tout miray ranpa ou yo. Sòlda ki soti lavil Gamad t'ap fè faksyonnè sou tout gwo fò won ou yo. Yo

12
pandye plak fè pwotèj yo sou tout miray yo. Se moun sa yo ki te fè ou bèl kont bèl ou. Moun lavil Tasis nan peyi Lespay vin fè kòmès ak ou, paske ou te gen tout kalite bèl bagay an kantite.

13
Yo vann ou ajan, fè, fèblan ak plon pou yo te ka achte machandiz ou yo. Ou fè kòmès ak peyi Lagrès, ak lavil Toubal, ak lavi Mechèk. Yo vann ou esklav ak tout kalite bagay fèt an kwiv pou

14
machandiz pa ou yo. Ou fè trafik ak moun Togama. Ou vann yo machandiz pa ou. Pou peye ou,

15
yo ba ou chwal pou travay, chwal pou fè lagè ak milèt. Moun lavil Wòd yo fè kòmès avèk ou tou. Moun anpil lòt peyi ki bò gwo lanmè a te fè pratik ak ou. Ou ba yo machandiz ou yo, yo peye

16
ak gwo kòn ivwa ak bwa nwa. Moun peyi Siri yo fè komès avèk ou paske ou te gen anpil machandiz. Yo vann ou bèl pyè ki koute chè, bèl twal wouj, twal bwode, grenn koray, twal fin

17
blan, ak pyè woubi. Ou menm, ou vann yo machandiz pa ou. Moun peyi Jida ak moun peyi Izrayèl yo te fè kòmès avèk ou tou. Pou peye ou, yo ba ou ble, pitimi, siwo myèl, lwil oliv ak zepis.

18
Moun Damas yo achte machandiz ou yo ak tout kalite bèl bagay ou te gen an kantite. Yo te vann

19
ou diven ki soti Elbon ak lenn ki soti Saar. Moun soti depi lavil Wazal, yo ba ou diven, fè fòje,

20
kannèl ak zepis pou machandiz ou yo. Moun lavil Dadan yo ba ou sèl ak chabrak pou machandiz

21
ou yo. Moun peyi Arabi yo ak chèf peyi Keda yo te pratik ou tou. Yo te vann ou ti mouton,

22
belye mouton ak bouk kabrit. Machann ki soti Seba ak Rema vin vann ou bon kalite zepis, bèl

23
pyè ki koute chè ak lò. Moun lavil Aran, moun lavil Kane, moun lavil Edenn, machann ki soti

24
lavil Seba, lavil Asou ak lavil Chilman, yo tout t'ap fè kòmès avèk ou. Yo vann ou bèl twal ki

25
koute chè, twal wouj, twal bwode, bèl tapi tout koulè, bon kòd trese byen solid. Gwo batiman

Tasis yo t'ap vwayaje toupato al vann machandiz ou yo. Ou te tankou yon batiman chaje kouleba,

26
nan mitan lanmè. ¶ Moun ki t'ap naje zaviwon yo te mennen ou byen lwen nan fon lanmè. Yon

27
sèl van lès te fè ou koule byen lwen nan mitan lanmè. Tout richès ou yo, tout machandiz ou yo, ak tout pwovizyon ou yo ansanm ak tout maren ak tout moun k'ap travay pou ou yo, bès chapant ki pou fè reparasyon pou ou yo, machann ou yo, tout sòlda ki te abò ou yo ansanm ak tout foul

28
moun ki te nan batiman an, yo tout, wi, yo tout pèdi nan lanmè lè batiman ou lan koule. Rèl

29
maren k'ap neye yo fè moun ki rete sou rivaj yo pran tranble. Tout moun ki t'ap naje zaviwon

yo desann atè, yo kite batiman yo. Tout maren yo rete atè. ³⁰ Y'ap kriye pou ou, y'ap plenn sò ou.
³¹ Y'ap voye pousyè tè sou tèt yo, y'ap woule kò yo nan sann dife, tèlman y'ap nan lapenn. Yo
koupe tout cheve nan tèt yo. Yo mete rad sak sou yo. Sa fè yo mal anpil pou ou. Yo dekouraje, y'ap
³² plenn sò ou. Nan lapenn yo y'ap chante sou ou. Yo pral plenn sò ou ak dlo nan je. Y'ap di: Pa
³³ te gen tankou lavil Tir ki koulye a koule nan fon lanmè! Lè ou voye machandiz ou yo vann lòt
bò dlo, tout nasyon yo jwenn sa yo bezwen. Avèk kantite machandiz ak danre ou yo, ou te fè anpil
³⁴ wa vin rich. Koulye a, ou koule nan fon lanmè. Tout machandiz ou yo, tout moun ki t'ap travay
³⁵ pou ou yo disparèt ansanm avè ou nan lanmè. Tout moun ki rete nan peyi bò gwo lanmè a sezi
³⁶ tandè sa ki rive ou. Ata wa yo gen kè sote. Yo kagou sitèlman yo pè. Moun k'ap fè kòmès nan
lòt peyi yo sezi, yo pè pou sa ki rive ou la pa rive yo tou. Wi, ou fini, ou fini nèt.

Chapter 28

¹ ¶ Seyè a pale avè m' ankò, li di m' konsa: ² -Nonm o! Pale ak chèf peyi Tir la, di li: Men mesaj
Seyè sèl Mèt la voye ba li: Lògèy vire lòlòj ou! Ou pretann di se yon bondye ou ye. Ou chita tankou
Bondye sou fotèy ou, nan mitan lanmè. Ou mèt pran pòz bondye ou jan ou vle, se moun ou ye, ou
³ pa Bondye. Ou met nan tèt ou ou gen plis konprann pase Danèl. Pa gen sekre ki kache pou ou.
⁴ Se bon konprann ou ak lespri ou genyen ki fè ou rich konsa. Ou ranmase bonkou lò ak ajan mete
⁵ lakay ou. Ou gen anpil ladrès nan fè kòmès, ou fè anpil lajan. Ou kite richès ou yo vire tèt ou.
⁶ Se poutèt sa, men sa Seyè sèl Mèt la voye di ou: Ou met nan tèt ou ou gen konprann tankou
⁷ Bondye. Enben, mwen pral fè moun lòt nasyon vin atake ou. San manman pase yo pa genyen.
Yo pral kraze dènnye bèl bagay ou te ranmase ak bon konprann ou an. Yo p'ap gen respè pou gwo
⁸ pozisyon ou lan. Yo pral touye ou. Ou pral mouri neye nan mitan lanmè. ⁹ Lè y'a vini pou yo
touye ou la, w'a pretann di se yon bondye ou ye toujou? Pou moun k'ap touye ou yo, se moun w'ap
¹⁰ ye. Ou p'ap yon bondye kras. W'ap mouri tankou moun ki pa konn Bondye. Se moun lòt nasyon
yo k'ap touye ou. Mwen fin pale. Se mwen menm, Seyè sèl Mèt la, ki di sa. ¹¹ ¶ Seyè a pale avè
¹² m' ankò, li di m' konsa: -Nonm o! Ou pral plenn sò k'ap tann wa peyi Tir la. Di li: Men mesaj
Seyè sèl Mèt la voye ba ou: Te gen yon lè se ou ki te pi bon. Tout moun t'ap gade sou ou. Ou te

¹³
 gen bon konprann. Ou te yon bèl bagay nan je tout moun. Ou t'ap viv nan jaden Edenn lan, jaden Bondye a. Ou te mete tout kalite bèl pyè koute chè sou ou: ribi, topaz, dyaman, krizolit, oniks, jasp, safi, malachi, emwòd. Tout bèl bijou ki te sou ou te fèt an lò. Se jou Bondye t'ap kreye ou la li te

¹⁴
 fè pare yo pou ou. Mwen mete yon zanj cheriben avè ou pou pwoteje ou. Se sou mòn ki apa pou

¹⁵
 mwen an ou te rete. Ou mache nan mitan gwo dife. Depi jou Bondye kreye ou la, ou pa t' fè

¹⁶
 anyen pou yo te fè ou repwòch, jouk jou ou konmanse fè sa ki mal. Pou fè kòmès ou mache, ou lage kò ou nan mechanste. Ou fè peche. Se konsa mwen mete ou deyò sou mòn ki apa pou mwen an. Ou pa t' bon pou sèvis mwen ankò. Zanj mwen te chwazi pou pwoteje ou la mete ou deyò nan

¹⁷
 mitan boul dife yo. Ou te wè jan ou te bèl, sa fè ou pèdi tèt ou. Paske ou te rive nan yon bèl pozisyon, ou tanmen aji tankou moun fou. Se poutèt sa mwen voye ou jete atè. Mwen kite ou la

¹⁸
 devan lòt wa yo pou yo wè sa ki rive ou. Ou sitèlman fè mechanste ak vis nan kòmès ou yo, ou pa respekte ata tanp ou yo. Mwen mete dife nan lavil ou yo. Yo boule nèt. Tout moun ki t'ap gade

¹⁹
 ou yo wè ou tounen sann. Tout moun ki te konnen ou nan lòt peyi yo sezi, yo pè pou sa ki rive

²⁰
 ou la pa rive yo tou. Ou fini, ou fini nèt. ¶ Seyè a pale avè m' ankò, li di m' konsa:

²¹
 -Nonm o!

²²
 Vire tèt ou gade nan direksyon lavil Sidon an. Denonse sa moun sa yo ap fè. W'a di yo men mesaj Seyè sèl Mèt la voye ba yo: Nou menm, moun lavil Sidon, n'ap leve dèyè nou tou. Apre sa mwen pral fè nou an, moun pral fè lwanj mwen, y'a konnen se mwen menm ki Seyè a, paske mwen

²³
 pral pini moun ki rete nan lavil la. Konsa, m'a fè moun wè se yon Bondye apa mwen ye. Mwen pral voye maladi sou yo. San moun pral koule nan tout lari. Lènmi ap soti toupatou vin atake yo.

²⁴
 Moun pral mouri nan lavil la. Lè sa a, y'a konnen se mwen menm ki Seyè a. Seyè a di ankò: -Pèp Izrayèl la ap viv nan mitan yon bann nasyon ki pa vle wè l'. Yo tankou pikan raje k'ap grafiyen l', men yo pral sispann giyonnen l'. Lè sa a, tout moun va konnen se mwen menm ki Seyè a, sèl

²⁵
 Mèt la. Seyè sèl Mèt la di ankò: -Mwen pral ranmase moun pèp Izrayèl yo nan mitan tout nasyon kote m' te gaye yo a, m'ap mennen yo tounen. Konsa, mwen pral fè tout nasyon yo wè se yon Bondye apa mwen ye. Moun pèp Izrayèl yo va rete nan peyi mwen te bay Jakòb, sèvitè m' lan.

²⁶
 Yo pral viv nan peyi a san danje, san malè. Yo pral bati kay, y'ap plante jaden rezen. M'ap pini tout nasyon ki rete toupre yo epi ki pa vle wè yo. Pèp Izrayèl la menm ap viv san danje, san malè. Lè sa a, y'a konnen se mwen menm, Seyè a, ki Bondye yo a.

Chapter 29

¹ ¶ Sou douzyèm jou nan dizyèm mwa, dizyèm lanne depi yo te depòte nou an, Seyè a pale avè
² m', li di m' konsa: -Nonm o! Vire tèt ou gade nan direksyon peyi Lejip. Bay mesaj sa a sou farawon
³ an, wa peyi Lejip la, ak sou tout peyi Lejip. Pale avè l'. Di li men mesaj Seyè sèl Mèt la voye ba
 li. -Ou menm farawon an, wa peyi Lejip, mwen pral leve dèyè ou tou. Ou tankou yon gwo kayiman
⁴ ki kouche nan larivyè Nil la. Ou di se pou ou larivyè Nil la ye, se ou ki fè l'. Mwen pral kwoke
 yon zen antravè nan machwè ou. Tout pwason larivyè a pral kole sou ou. Lèfini, m'ap rale ou soti
⁵ nan larivyè a ak tout pwason yo kole sou ou. Mwen pral voye ou jete ansanm ak tout pwason yo
 nan dezè a. Ou pral tonbe atè a. Yo p'ap ranmase ou, ni yo p'ap antere ou. M'ap fè ou rete la pou
⁶ zwezo nan syèl ak bèt nan bwa vin manje ou. Lè sa a, tout moun peyi Lejip yo va konnen se
 mwen menm ki Seyè a. Seyè a di ankò: -Moun pèp Izrayèl yo te konte sou ou, men ou pa t' pi solid
⁷ pase yon baton wozo. Lè yo apiye sou ou, ou kase nan men yo, ou dechire tout po men yo. Wi,
⁸ lè yo apiye sou ou, yo tonbe, ren yo kase. ¶ Se poutèt sa, koulye a, men sa Seyè sèl Mèt la di ou:
⁹ Mwen pral voye moun atake ou avèk nepe. Yo pral touye dènye moun ak dènye bèt lakay ou. Peyi
 Lejip la pral tounen yon dezè kote moun pa rete, yon pil mazi. Lè sa a, y'a konnen se mwen menm
¹⁰ ki Seyè a. Ou te di se pou ou Nil la ye, se ou ki fè l'. Enben, mwen pral leve dèyè ni ou, ni Nil
 ou a. Mwen pral fè peyi Lejip la tounen yon pil mazi, yon dezè kote moun pa rete depi lavil Migdòl
¹¹ nan nò jouk lavil Aswan nan sid, rive desann sou fwontyè peyi Letiopi. p'ap rete yon moun ni
¹² yon bèt nan peyi a. Pandan karant lanne peyi a ap rete san yon moun ladan l'. M'ap fè peyi Lejip
 la tounen peyi ki pi devaste sou tout latè. Pandan karant lanne tout lavil peyi Lejip yo pral tounen
 mazi. Y'ap kraze pi mal pase mazi nenpòt ki lòt lavil ki devaste. Mwen pral depòte moun peyi Lejip
¹³ yo nan lòt nasyon. M'ap gaye yo nan divès lòt peyi. Men sa Seyè sèl Mèt la di ankò: Apre
 karantan, m'ap pase men pran moun peyi Lejip yo nan mitan lòt nasyon kote mwen te gaye yo a,
¹⁴ m'ap mennen yo tounen lakay yo. M'ap fè yo al rete nan zòn Patwòs la, kote zansèt yo te soti a.
¹⁵ Y'ap fòme yon ti peyi tou fèb. Lè sa a, se va pi piti peyi nan tout peyi sou latè. Li p'ap janm rive
 donminen ankenn lòt nasyon. L'ap tèlman fèb, li p'ap janm ka fòse ankenn lòt nasyon fè volonte
¹⁶ li. Pèp Izrayèl la p'ap janm bezwen konte sou li ankò. Sa va fè pèp Izrayèl la chonje jan li te gen
¹⁷ tò pou l' te fye moun sa yo. Lè sa a, y'a konnen se mwen menm Seyè a ki sèl Mèt la. ¶ Nan
 premye jou nan premye mwa, vennsetyèm lanne depi yo te depòte nou an, Seyè a pale avè m', li
¹⁸ di m' konsa: -Nonm o! Nèbikadneza, wa Babilòn lan, fè lame l' la fè yon gwo jefò pou y' al atake
 lavil Tir. Li fè sòlda yo travay sitèlman nan pote chay lou, yo pèdi tout cheve nan mitan tèt yo, tout

zepòl yo kòche. Men, ni wa a, ni lame l' la pa soti ak anyen apre gwo atak sa a yo te fè sou lavil la.

19

Se poutèt sa, men sa Seyè sèl Mèt la di: Mwen pral bay Nèbikadneza, wa Babilòn lan, peyi Lejip la pou li. Li pral pran tout richès li yo, l'ap mete men sou tou sa li jwenn, l'ap piye peyi a nèt: Se

20

konsa l'a peye sòlda li yo. Wi, pou tout gwo sèvis li rann mwen yo, m'ap fè l' kado peyi Lejip

21

la. Paske, se pou mwen yo t'ap travay. Se mwen menm Seyè sèl Mèt la ki di sa. Lè sa a, m'ap fè pèp Izrayèl la pran fòs. Ou menm menm, Ezekyèl, m'ap ba ou lizay lapawòl ankò pou tout moun ka tandè ou. Konsa, y'a konnen se mwen menm ki Seyè a.

Chapter 30

1

¶ Seyè a pale avè m' ankò, li di m' konsa: -Nonm o! Bay mesaj Bondye a! Fè konnen sa Seyè

2

sèl Mèt la voye ou di: -Rele non! Ala yon move jou! Jou a ap pwoche. Wi, dat pou Seyè a aji a

3

ap pwoche vre. Jou sa a, syèl la ap fèmen. Se va yon jou malè pou nasyon yo. Pral gen lagè nan tout peyi Lejip. Gwo lafliksyon pral tonbe sou peyi Letiopi. Anpil moun pral mouri nan peyi Lejip.

4

Yo pral piye peyi a nèt ale. Y'a kraze ata fondasyon kay li yo. Nan lagè sa a, yo pral touye tout sòlda li yo, ki vle di tout moun peyi Letiopi, moun peyi Pout, moun peyi Loud, moun peyi Arabi, moun peyi Koube. Ata moun peyi pa m' lan, Izrayèl, ki t'ap sèvi nan lame Lejip la ap mouri ansanm

5

ak yo tou. Men sa Seyè a di ankò: -Tout moun ki t'ap pran defans peyi Lejip la pral mouri. Gwo bèl lame Lejip la pral disparèt. Wi, depi lavil Migdòl nan nò desann lavil Aswan nan sid, yo tout

6

ap mouri nan lagè. Se mwen menm, Seyè sèl Mèt la, ki di sa. Se peyi sa a ki pral pi mal nan tout

7

peyi yo devaste yo. Lavil li yo pral tounen mazi nèt. Lè m'a mete dife nan peyi Lejip, lè tout moun

8

ki t'ap goumen pou li yo va tonbe mouri, lè sa a y'a konnen se mwen menm ki Seyè a. Lè jou sa a va vini, jou pou yo detwi peyi Lejip la, m'ap voye mesaje nan bato pou y' al pran tèt moun ki t'ap viv kè pòpòz nan peyi Letiopi yo. Moun sa yo pral kraponnen anpil. Wi, jou sa a pa lwen rive.

9

10

Seyè sèl Mèt la di ankò: Mwen pral sèvi ak Nèbikadneza, wa Babilòn lan, pou m' fini ak richès

11

peyi Lejip la. Wa a va vini ak lame sòlda li yo pou yo ravaje tout peyi a. Se moun Babilòn sa yo ki pi mechan pase tout lòt nasyon. Yo pral atake peyi Lejip avèk nepe yo nan men yo. Pral gen

12

kadav nan tout peyi a. Mwen pral cheche dlo larivyè Nil la, m'ap lage peyi a nan men ansasen. M'ap fè moun lòt nasyon yo ravaje peyi a nèt ansanm ak tou sa ki ladan l'. Se mwen menm Seyè a

13

ki di sa. Seyè sèl Mèt la di ankò: Mwen pral detwi tout zidòl yo, m'ap disparèt tout fo bondye ki lavil Menmfis yo. p'ap gen pesonn pou gouvènen peyi Lejip la. M'ap fè tout moun nan peyi a

¹⁴ pran tranble tèlman y'ap pè. M'ap devaste zòn Patwòs la nan sid peyi a. M'ap mete dife nan lavil
¹⁵ Zoan nan nò. M'ap pini lavil Tèb, kapital peyi a. M'ap fè moun lavil Sin yo, lavil ki plen gwo
¹⁶ ranpa pou defann peyi a, santi jan mwen konn fache. M'ap detwi tout richès lavil Tèb la. M'ap
 mete dife nan peyi Lejip. Lavil Sin lan pral nan gwo lapenn. Gwo miray lavil Tèb yo pral fann,
¹⁷ y'ap kraze. Dlo pral anvayi tout lavil la. Tout jenn gason lavil Eliopolis ak lavil Boubastis yo
¹⁸ ap mouri nan lagè. Y'ap depòte tout rès moun yo. Fènwa pral kouvri lavil Tapanès gwo jounen,
 lè m'a kraze otorite pouvwa peyi Lejip la. Lè m'a fini ak fòs kouraj ki t'ap fè l' gonfle lestonmak li
¹⁹ a, yon gwo nwaj pral kouvri tout peyi Lejip. Yo pral depòte dènye moun li yo. Se konsa mwen
²⁰ pral pini peyi Lejip. Lè sa a, y'a konnen se mwen menm ki Seyè a. ¶ Nan setyèm jou premye
²¹ mwa, onzyèm lanne depi yo te depòte nou an, Seyè a pale avè m', li di m' konsa: -Nonm o!
 Mwen kase ponyèt farawon an, wa Lejip la. Pa gen pesonn ki mete renmèd sou li, pesonn ki mete
²² l' nan fòm pou l' ka pran, pou l' ka gen fòs kenbe nepe nan men l' ankò. Se poutèt sa, koulye a
 men sa Seyè sèl Mèt la di: M'ap leve dèyè farawon an, wa peyi Lejip la. Mwen pral kase tou de
 ponyèt li yo, ni sa ki te engann lan ni sa ki te kase deja a. M'ap fè nepe a soti tonbe nan men l'.
²³ Mwen pral gaye moun peyi Lejip yo nan lòt peyi, mwen pral simaye yo nan mitan divès lòt
²⁴ nasyon sou latè. Mwen pral bay ponyèt wa Babilòn lan fòs, m'ap mete nepe pa m' lan nan men
 l'. M'ap kase tou de ponyèt farawon yo. Li pral rakle, li pral soufri anpil, li pral mouri devan lènmi
²⁵ l' lan. Wi, m'ap bay ponyèt wa Babilòn lan fòs, men m'ap febli ponyèt farawon an. Lè m'a bay
 wa Babilòn lan nepe pa m' lan, lè l'a lonje l' sou peyi Lejip la, tout moun va konnen se mwen menm
²⁶ ki Seyè a. M'ap gaye moun peyi Lejip yo nan lòt peyi, mwen pral simaye yo nan mitan divès
 lòt nasyon sou latè. Lè sa a, y'a konnen se mwen menm ki Seyè a.

Chapter 31

¹ ¶ Nan premye jou twazyèm mwa onzyèm lanne depi yo te depòte nou an, Seyè a pale avè m'
² ankò, li di m' konsa: -Nonm o! Pale ak farawon an, wa peyi Lejip la, ansanm ak tout pèp li a. Di
³ yo. -Jan ou gen pouvwa sa a, Kisa mwen ta di ou sanble la! Bon. Ou tankou yon pye sèd nan
 peyi Liban avèk gwo bèl branch li yo plen fèy ki bay gwo lonbraj, yon pyebwa byen wo ak tèt li
⁴ pèdi nan nwaj yo. Lapli tonbe fè l' pouse Rivyè anba tè fè l' grandi. Gwo dlo pete nan tout rasin

li yo. Yo fè kannal wouze tout pyebwa nan zòn lan. ⁵ Paske li te jwenn anpil dlo, li te grandi, li vin pi wo pase tout lòt pyebwa yo. Branch li pran fòs, yo vin byen long. ⁶ Tout kalite zwezo te vin fè nich nan branch li yo. Se anba branch li yo bèt nan bwa vin miba. Se nan lonbraj li anpil nasyon vin chita. ⁷ Se te yon bèl pyebwa byen wo, ak branch li yo byen long. Rasin li yo te desann byen fon nan dlo anba tè a. ⁸ Nan jaden Bondye a, pa t' gen pye sèd tankou l'. Okenn pye pichpen pa t' gen branch tankou pa l' yo. Okenn pye sikren pa t' gen ti branch konsa. Nan jaden Bondye a, pa t' gen bèl pyebwa tankou l'. ⁹ Mwen te fè l' byen bèl ak anpil branch. Nan jaden Edenn lan, jaden Bondye a, tout pyebwa te anvye sò l'. ¹⁰ ¶ Koulye a, men sa Seyè sèl Mèt la di: Paske li te grandi byen wo a, paske tè li te pèdi nan nwaj yo, li kite lògèy vire tè li. ¹¹ Se poutèt sa, mwen voye l' jete, mwen lage l' nan men gwo chèf tout nasyon yo pou fè l' peye tout mechanste l' yo. ¹² Yon bann moun lòt nasyon vini. Mechan pase yo pa genyen. Yo koupe pyebwa a, yo lage l' atè. Ti branch li yo gaye sou tout mòn yo ak nan fon yo. Gwo branch li yo kase, yo tonbe nan tout ravin nan peyi a. Moun lòt nasyon ki t'ap viv nan lonbraj li yo, tout met deyò, yo kite l' pou kont li. ¹³ ¹⁴ Zwezo vini poze sou rèss pyebwa ki atè a. Bèt nan bwa ap mache sou tout branch li yo. Konsa, depi jòdi a, yon pyebwa te mèt wouze byen wouze, li p'ap janm rive wotè sa a ankò. Li p'ap janm grandi pou tè li rive pèdi nan nwaj yo ankò. Yon pyebwa te mèt byen wouze li p'ap rive wotè sa a ankò pou l'ap gonfle lestonmak li sou mwen. Tout pyebwa yo gen pou mouri tankou moun, yo gen pou yo desann al jwenn moun ki deja anba tè yo. ¹⁵ Men sa Seyè sèl Mèt la di ankò: -Jou pyebwa a desann nan peyi kote mò yo ye a, m'ap fè dlo anba tè a kouvri l' nèt, pou tout moun ka nan lapenn. M'ap fè dlo larivyè yo sispann koule. M' p'ap kite ankenn dlo koule nan kannal. M'ap voye yon gwo fènwa sou mòn peyi Liban yo. Tout rakbwa nan zòn lan pral deperi poutèt li. ¹⁶ Lè mwen voye l' jete nan peyi kote mò yo ye a, bri li fè lè l'ap tonbe a fè tout nasyon yo tranble. Tout pyebwa nan jaden Edenn, tout pi bèl pyebwa nan peyi Liban, pyebwa ki te byen wouze yo men ki te desann ale deja nan peyi kote mò yo ye a pral kontan tonbe li tonbe a. ¹⁷ Y'ap desann ansanm avè l' nan peyi kote mò yo ye a pou y' al jwenn sa ki te mouri nan lagè anvan yo. Lè sa a, tout moun ki t'ap viv nan lonbraj li yo pral gaye nan mitan tout lòt nasyon yo. ¹⁸ Nan tout pyebwa jaden Edenn yo, kilès ki te bèl, kilès ki te wo tankou ou? Men koulye a, tankou tout lòt pyebwa jaden an, ou pral desann ale nan peyi ki anba tè a. Ou pral jwenn moun ki pa pote mak kontra Bondye a, moun ki mouri nan lagè yo. Se sa k'ap rive farawon an ansanm ak tout pèp li a. Se mwen menm Seyè sèl Mèt la ki pale.

Chapter 32

¹ ¶ Nan premye jou nan douzyèm mwa douzyèm lanne depi yo te depòte nou an, Seyè a pale avè m', li di m' konsa: ² -Nonm o! Chante yon chante pou plenn sò farawon an, wa peyi Lejip la. Ba l' mesaj sa a pou mwen: Ou pran pòz lyon ou nan mitan lòt nasyon yo. Men pou di vre, ou tankou yon gwo kayiman k'ap benyen nan larivyè a. Ou leve tout fon dlo a ak pat ou yo, ou sal tout dlo a. ³ Men sa Seyè sèl Mèt la voye di ou: Nan mitan anpil nasyon ki va sanble bò kote ou, m'ap voye privye mwen sou ou pou m' pran ou. ⁴ M'ap voye ou jete atè, m'ap blayi ou nan mitan jaden yo. M'ap fè tout kalite zwezo ak bèt nan bwa vin manje plen vant yo ak kadav ou. ⁵ Mwen pral kouvri tout mòn ak tout fon yo ak kadav ou k'ap dekonpoze. ⁶ M'ap wouze tout peyi a ak san ou. M'ap vide san ou sou mòn yo, jouk ravin yo pral plen dlo kò ou. ⁷ Lè m'ap disparèt ou a, m'ap kouvri syèl la, m'ap bouche zetwal yo. M'ap cache solèy la dèyè nwaj yo, lalin lan p'ap klere ankò. ⁸ Poutèt ou, m'ap tenyen dènye limyè nan syèl la. Pral fènwa nèt sou tout latè. Se mwen menm Seyè sèl Mèt ⁹ la ki di sa. Anpil moun pral gen lespri yo boulvèse lè m' fè nouvèl jan ou fini an gaye nan tout nasyon yo, ata nan peyi ou menm ou pa janm konnen. ¹⁰ M'ap fè anpil nasyon sezi wè sa k'ap rive ou la. Lè m'ap lonje nepe m' lan devan yo, wa yo pral tranble nan kanson yo. Jou w'ap tonbe a, yo tout pral tranble. Y'ap pè pou yo pa pèdi lavi yo tou. ¹¹ Men sa Seyè sèl Mèt la voye di wa peyi Lejip la: -Nepe wa Babilòn lan pral tonbe sou ou. ¹² Mwen pral fè sòlda peyi ki pi mechan an touye tout pèp ou a ak nepe yo. Yo pral ravaje tout bèl bagay ki te fè ou kontan nan peyi Lejip la. Yo pral touye dènye kras moun nan peyi a. ¹³ M'ap touye tout bèt nou yo bò dlo a. p'ap rete yon grenn moun ni yon sèl bèt pou sal dlo yo ankò. ¹⁴ M'ap kite dlo yo poze, m'ap fè larivyè yo koule tousman. Se mwen menm Seyè sèl Mèt la ki di sa. ¹⁵ Lè m'a fè peyi Lejip la tounen yon dezè, lè m'a devaste tout bagay nan peyi a, lè m'a touye dènye moun ki rete nan peyi a, lè sa a y'a konnen se mwen menm ki Seyè a. ¹⁶ Men chante y'a chante pou plenn sò peyi Lejip la. Medam lòt nasyon yo va chante l' lè y'ap kriye pou peyi Lejip ansanm ak tout pèp li a. Wi, se chante sa a y'a chante lè y'ap kriye pou yo. Se mwen menm Seyè a ki di sa. ¹⁷ ¶ Nan kenzyèm jou premye mwa douzyèm lanne depi yo te depòte nou an, Seyè a pale avè m' ankò. Li di m' konsa: ¹⁸ -Nonm o! Plenn sò tout moun peyi Lejip yo. Voye yo desann ansanm ak tout lòt moun gwo nasyon yo nan peyi kote mò yo ye a, anba tè kote moun ki deja mouri yo ye. ¹⁹ Di yo konsa: -Nou konprann nou pi bèl pase tout moun? Enben, nou pral desann nan peyi kote mò yo ye a. Nou pral kouche ansanm ak moun ki pa pote mak kontra Bondye a. ²⁰ Moun peyi Lejip yo pral tonbe ansanm ak moun ki mouri nan

lagè yo. Gen yon nepe ki pare pou touye yo tout. ²¹ Sòlda ki te pi vyan yo ansanm ak tout moun ki te pran pozisyon ak moun peyi Lejip yo pral resevwa yo nan peyi kote mò yo ye a. Yo pral di: Moun ki pa pote mak kontra Bondye a ap mouri nan lagè, yo desann isit la. Se la yo vin kouche!

²² Peyi Lasiri a la avèk tonm tout sòlda li yo bò kote l'. Yo tout mouri nan lagè. ²³ Yo mete tonm yo anba nèt nan peyi kote mò yo ye a. Tout sòlda li yo mouri nan lagè. Tout tonm yo bò kote l'. Se

yo menm ki te mache fè moun pè yo toupatou sou latè. ²⁴ Peyi Elam lan la tou avèk tonm tout sòlda li yo bò kote l'. Yo tout mouri nan lagè. Yo pa pote mak kontra Bondye a, yo desann konsa nan peyi kote mò yo ye a, yo menm ki te mache fè moun pè yo toupatou sou latè. Koulye a yo

wont, y'ap peye mechanste yo, yo mouri ansanm ak moun ki desann nan twou san fon an. ²⁵ Wa peyi Elam lan kouche nan mitan moun pa l' yo ki mouri nan lagè. Tonm sòlda li yo bò kote l'. Yo pa pote mak kontra Bondye a, yo mouri konsa nan lagè. Sou latè, yo te mache fè tout moun pè yo. Koulye a yo wont, y'ap peye mechanste yo. Yo desann nan twou san fon an ansanm ak moun ki

mouri nan lagè yo. ²⁶ Wa peyi Mechèk la ak wa peyi Toubal la tou, ansanm avèk tonm sòlda yo bò kote yo. Yo pa pote mak kontra Bondye a, yo mouri konsa nan lagè. Yon lè yo t'ap mache fè

tout moun pè sou latè. ²⁷ Yo p'ap fè bèl lantèman pou yo tankou pou vyan sòlda tan lontan yo, ki te desann nan peyi kote mò yo ye a ak tout zam yo sou yo, nepe yo anba tèt yo ak plak fè pwotèj

yo anwo kadav yo. Paske yon lè yo t'ap mache fè tout moun pè yo sou latè. ²⁸ Se konsa moun peyi Lejip yo pral mouri tankou moun ki pa pote mak kontra Bondye a, y'ap antere yo ansanm ak moun

ki te mouri nan lagè yo. ²⁹ Peyi Edon an la tou ansanm ak tout wa li yo ak chèf li yo. Yon lè yo te vyan sòlda, men koulye a yo kouche nan peyi kote mò yo ye a ansanm ak moun ki pa pote mak

kontra Bondye a epi ki te mouri nan lagè. ³⁰ Tout chèf peyi nan nò yo la tou ansanm ak tout moun peyi Sidon yo. Yo te sitèlman gen fòs, yo te fè moun pè yo. Koulye a, yo desann nan twou san fon an. Yo pote wont mechanste yo anba tè a ak yo. Yo mete yo kouche ansanm ak moun ki pa pote

mak kontra Bondye a, epi ki te mouri nan lagè yo. ³¹ Se pral yon gwo konsolasyon pou wa peyi Lejip la ansanm ak sòlda li yo, lè y'a wè tout kantite moun ki te mouri nan lagè. Se Seyè sèl Mèt

la menm ki di sa. ³² Atout mwen te fè wa peyi Lejip la mache fè moun pè l' toupatou sou latè, y'ap touye l' ansanm ak tout sòlda li yo. Ni li ni sòlda li yo pral kouche ansanm ak moun ki pa pote mak kontra Bondye a epi ki mouri nan lagè yo. Se mwen menm, Seyè sèl Mèt la, ki di sa.

Chapter 33

¹ ¶ Seyè a pale avè m' ankò. Li di m' konsa: ² -Nonm o! Pale ak moun pèp Izrayèl yo. W'a di yo konsa: Lè m'ap voye lènmi atake yon peyi, moun peyi a va chwazi yonn nan yo, y'a mete l'

faksyonnè pou veye peyi a. ³ Lè faksyonnè a va wè lènmi ap pwoche, l'a bay yon kout klewon pou avèti moun yo. ⁴ Si yon moun tande klewon an, men li pa okipe l', kifè lènmi an rive, li touye l', se djòb pa moun sa a, l'ap pote reskonsablite lanmò li. ⁵ Li tande kout klewon an pati, men li pa okipe sa, kifè sa lakòz li mouri. Paske si li te koute avètisman an, li ta ka pa mouri. ⁶ Men, si faksyonnè a wè lènmi ap vini epi li pa bay kout klewon an pou avèti moun yo, lènmi an ap vini, l'ap touye moun. Moun yo ap mouri akòz peche yo fè, se vre. Men, se faksyonnè a k'ap pote reskonsablite lanmò yo. ⁷ Koulye a, nonm o! Mwen mete ou faksyonnè pou veye pou pèp Izrayèl la. Lè w'a tande mesaj m'a ba ou a, w'a avèti yo pou mwen. ⁸ Si mwen fè ou konnen yon mechan gen pou l' mouri, epi ou pa avèti l' pou l' chanje, pou l' kite move pant l'ap swiv la pou l' ka sove lavi l', l'ap toujou mouri poutèt peche l' yo, men se ou menm m'ap rann reskonsab lanmò li. ⁹ Men, si ou avèti mechan an, lèfini li pa chanje, li pa kite move pant l'ap swiv la, l'ap mouri poutèt peche l' yo, men ou menm w'ap sove lavi pa ou. ¹⁰ ¶ Seyè a pale avè m', li di m' ankò: -Nonm o! W'a fè moun pèp Izrayèl yo chonje jan yo t'ap plede repete: Peche nou yo ak fòt nou yo ap peze lou sou nou. Se fini y'ap fini ak nou! Nou pa ka viv nan kondisyon sa a ankò! ¹¹ Enben, ou menm w'a di yo: Jan nou konnen mwen vivan vre a, se mwen menm Seyè a k'ap pale! Men sa mwen di: Mwen pa pran ankenn plezi nan wè mechan yo mouri. Mwen ta pito wè yo sispann fè sa ki mal pou yo ka viv. Nou menm moun pèp Izrayèl yo, sispann fè sa nou pa dwe fè. Tounen vin jwenn mwen. ¹² Poukisa se lanmò n'ap chache konsa? Ou menm, nonm o! Men sa w'a di moun ou yo: Yon moun te mèt bon kou l' bon, li te mèt mache dwat kou l' mache dwat, jou li fè sa ki mal, li gen pou l' peye sa. Jou mechan an va sispann fè sa ki mal, yo p'ap pini l' pou sa li te konn fè a. Konsa tou, lè yon moun ki t'ap mache dwat pran fè sa ki mal, yo p'ap gade sou jan l' te konn mache dwat la pou yo pa fè l' peye sa l' fè a. ¹³ Wi, mwen deklare tout moun k'ap mache dwat yo gen pou viv. Men, si yo tanmen mete nan tèt yo, paske yo te konn mache dwat la yo gen dwa fè sa ki mal, mwen p'ap chonje jan yo te konn mache dwat la menm. Y'ap mouri paske yo fè sa yo pa t' dwe fè. ¹⁴ Konsa tou, m' avèti tout mechan yo yo gen pou mouri. Men, si yon mechan sispann fè sa ki mal, epi li tanmen mache dwat devan mwen, l'ap fè sa ki byen, ¹⁵ si pa egzanp, li renmèt garanti yo te ba li pou lajan li te prete, si l' renmèt sa li te vòlò a, osinon si li sispann fè sa ki mal pou li mache dapre lòd mwen k'ap bay lavi a, li p'ap mouri, se viv pou li viv. ¹⁶ M'ap padonnen tout peche li te fè yo. L'ap viv paske l'ap mache dwat devan mwen, l'ap fè sa ki byen. ¹⁷ Moun ou yo ap plede di: Sa Bondye ap fè a pa bon. Men, se sa yo menm y'ap fè a ki pa bon. ¹⁸ Lè moun k'ap mache dwat la sispann fè sa ki byen pou l' lage kò l' nan fè sa ki mal, l'ap mouri poutèt sa. ¹⁹ Konsa tou, lè mechan

an sispann fè mechanste pou li mache dwat, pou li fè sa ki byen, l'ap sove lavi l' poutèt sa. ²⁰ Nou di sa Bondye sèl Mèt la ap fè a pa bon. Enben, m'ap jije chak moun dapre sa yo fè. Nou tande,

²¹ moun pèp Izrayèl yo! ¶ Nan senkyèm jou, dizyèm mwa, douzyèm lanne depi yo te depòte nou an, yon moun ki te resi chape kò l' soti lavil Jerizalèm vin pote nouvèl ban mwen, li di m' lavil la

²² tonbe nan men lènmi. Lavèy jou sa a, nan aswè, mwen te santi pouvwa Seyè a chita sou mwen avèk fòs. Nan maten, lè moun lan rive, Seyè a demare lang mwen pou m' te ka pale. Mwen pa t'

²³ bèbè ankò. ²⁴ Seyè a pale avè m' ankò, li di m' konsa: -Nonm o! Rès moun k'ap viv nan lavil yo fin kraze nan peyi Izrayèl la ap plede di: Abraram te pou kont li. Yo te ba li tout peyi a pou li.

²⁵ Nou menm nou anpil. Konsa, tout peyi a ap rete pou nou. Men sa pou ou di yo: Seyè sèl Mèt la pale, li voye di nou: N'ap manje vyann ak tout san li ladan l'. N'ap fè sèvis pou zidòl, n'ap mete san

²⁶ moun deyò, epi nou mete nan tèt nou tout peyi a pral rete pou nou? Nou met konfyans nou nan nepe nou. N'ap fè yon bann bagay ki derespektan. Tout gason marye ap kouche ak madanm frè

²⁷ parèy yo. Epi nou mete nan tèt nou tout peyi a pral rete pou nou? W'a pale ak yo, w'a di yo men mesaj Seyè sèl Mèt la voye ba yo: Jan nou konnen mwen vivan vre a, se mwen menm Seyè a k'ap pale: Rès moun k'ap viv nan lavil kraze yo pral mouri nan lagè. Moun k'ap viv andeyò yo, se bèt nan bwa ki pral manje yo. Moun ki al kache kò yo nan mòn, nan twou wòch, se maladi ki pral fini

²⁸ ak yo. M'ap fè peyi a tounen yon dezè san pesonn ladan l'. Fòs pouvwa ki te fè l' ap gonfle sou moun lan pral kraze. Mòn peyi Izrayèl yo pral tounen savann. Pesonn p'ap ka vwayaje pase ladan

²⁹ yo. Lè m'a pini pèp la pou tout bagay derespektan yo fè yo, lè m'a fè peyi a tounen yon dezè san

³⁰ pesonn ladan l', lè sa a, y'a konnen se mwen menm ki Seyè a. ¶ Seyè a di m' konsa: -Nonm o! Tout pèp la sou do ou lè yo kontre yonn ak lòt bò miray lavil la, nan papòt lakay yo. Yonn ap di

³¹ lòt: Ann al tande ki mesaj Seyè a voye ban nou fwa sa a! Se konsa, tankou si yo te gen dizon, tout pèp la ap sanble bò kote ou, y'ap vin chita devan ou pou yo ka koute sa w'ap di. Men, yo p'ap

³² fè sa w'ap di yo fè. Yo pran pawòl ou yo pou fè bèl fraz. Se enterè yo ase yo konnen. Pou yo, ou pa anyen pase yon mizisyen ki gen bèl vwa, k'ap chante bèl ti chante swa, ki konn jwe mizik

³³ byen. Y'ap koute tou sa w'ap di yo, men yo p'ap fè sa ou di yo fè. Men, lè sa ou di ki gen pou rive a rive vre, paske l'ap rive vre, se lè sa a y'a rekonèt te gen yon pwofèt nan mitan yo.

Chapter 34

¹ ¶ Seyè a pale avè m', li di m' konsa: ² -Nonm o! Bay mesaj sa a sou tout chèf ki reskonsab pèp Izrayèl la. Bay yo mesaj la, di yo: Men sa Seyè sèl Mèt la voye di yo: Madichon pou gadò pèp Izrayèl yo! Yo te mete yo la pou yo te swen pèp la, men se pwòp tèt yo ase yo konnen. ³ Nou bwè lèt mouton yo, nou pran lenn sou do yo pou fè rad mete sou nou, nou touye sa ki pi gra yo pou nou manje. Men, nou pa janm swen mouton yo. ⁴ Nou pa bay sa ki mèg yo manje pou yo pran fòs. Nou pa swen sa ki malad yo. Nou pa mete renmèd sou sa ki blese yo. Nou pa fè sa ki te soti nan bann yo tounen nan plas yo. Nou pa al chache sa ki te pèdi yo. Lekontrè, nou sèvi ak pozisyon chèf nou an pou n' kraze yo, pou n' maltrete yo. ⁵ Paske mouton yo te san gadò, yo gaye nan raje yo, bèt nan bwa touye yo. ⁶ Se konsa mouton yo gaye sou gwo mòn yo ak sou ti mòn yo. Mouton yo gaye toupatou sou latè. Pesonn pa okipe yo, pesonn pa chache kote yo ye. ⁷ ¶ Se poutèt sa, nou menm gadò ki reskonsab pèp Izrayèl la, koute sa Seyè a voye di nou. ⁸ Jan nou konnen mwen vivan vre a, se mwen menm, Seyè sèl Mèt la, k'ap pale. Bèt nan bwa atake mouton m' yo, yo devore yo, paske yo te san gadò. Gadò m' yo pa fè anyen pou mouton m' yo. Se tèt pa yo ase yo konnen. Yo pa swen mouton m' yo. ⁹ Konsa, nou menm gadò pèp la, koute pawòl mwen menm, Seyè a, m'ap di nou. ¹⁰ Wi, men sa mwen menm, Seyè sèl Mèt la, voye di nou: M'ap leve dèyè nou! M'ap wete mouton yo nan men nou. Mwen p'ap kite nou reskonsab mouton m' yo ankò. Konsa nou p'ap rete chita ap angrese tèt nou ase sou do mouton m' yo. Wi, m'ap wete mouton m' yo anba dan nou. Nou p'ap ka pwofite sou yo ankò. ¹¹ Men sa Seyè sèl Mèt la di ankò: -Se mwen menm menm ki pral chache mouton m' yo pou m' swen yo. ¹² Menm jan yon gadò mache swen mouton l' yo ki te gaye, konsa m'ap mache sanble tout mouton m' yo, m'ap pran yo tout kote yo te gaye yo depi jou fènwa a, jou gwo malè a, m'ap fè yo tounen. ¹³ M'ap fè yo soti nan mitan moun lòt nasyon yo, m'ap sanble yo, m'ap mennen yo tounen nan pwòp peyi pa yo. M'ap mennen yo vin manje sou tout mòn peyi Izrayèl yo, nan fon yo, tout kote moun ka rete nan peyi a. ¹⁴ M'ap kite yo manje nan bon jaden zèb. Sou tout mòn byen wo nan peyi Izrayèl la, yo pral jwenn kote pou yo rete san danje. Se la yo pral poze kò yo, yo pral jwenn kont zèb vèt yo sou tout mòn peyi Izrayèl yo. ¹⁵ Se mwen menm ki pral okipe mouton m' yo. Se mwen menm k'ap jwenn yon kote pou yo poze. Se mwen menm, Seyè sèl Mèt la, ki di sa. ¹⁶ Sa ki pèdi yo, m'ap chache yo. Sa ki te soti nan bann yo, m'ap fè yo tounen nan plas yo. Sa ki blese yo, m'ap mete renmèd pou yo. Sa ki malad yo, m'ap geri yo. Men, sa ki gra yo, sa ki byen gwo yo, m'ap touye yo. M'ap swen mouton m' yo jan m' dwe fè l' la. ¹⁷ ¶ Pou nou menm, mouton m' yo, men sa mwen menm, Seyè sèl Mèt la, mwen voye di nou. Mwen pral jije nou chak. M'ap mete bon yo yon bò, move yo yon bò, belye mouton yo yon bò, bouk kabrit yo yon bò.

18

Genyen nan mitan nou, se yo ase ki pou manje pi bon zèb yo. Men, sa pa kont yo toujou. Se pou yo pilonnen anba pye yo sa ki pa manje yo. Se yo ase ki pou bwè bèl dlo fre. Men sa pa kont yo

19

toujou, fòk yo sal rès dlo a ak pye yo. Konsa, rès mouton m' yo blije manje zèb lòt yo te pilonnen

20

anba pye yo. Yo blije bwè rès dlo lòt yo te sal ak pye yo. Se konsa, koulye a, men sa mwen menm, Seyè sèl Mèt la, mwen voye di nou: Mwen pral jije mouton gra yo ak mouton mège yo.

21

Nou pouse mouton ki san fòs yo sou kote, nou ba yo kou ak dèyè nou, ak pòtray nou, ak kòn

22

nou jouk nou mete yo deyò, nou fè yo kite bann lan. Men, m'ap vin sove mouton m' yo, m' p'ap

23

kite nou fè piyay sou do yo ankò. Se mwen menm k'ap jij nan mitan nou. M'ap ba yo yon wa k'ap tankou David, sèvitè m' lan. Se li menm ki pral okipe yo, k'ap mennen yo manje. Se li menm

24

k'ap gadò yo. Se mwen menm, Seyè a, k'ap Bondye yo. Se yon wa, tankou David sèvitè m' lan,

25

ki va sèl chèf nan mitan yo. Se mwen menm, Seyè a, ki di sa. M'ap pase ak yo yon kontra k'ap garanti yo kè poze, m'ap fè tout bèt nan bwa disparèt nan peyi a. Konsa mouton m' yo va rete san

26

pwoblèm nan savann yo, y'a dòmi nan rakbwa yo. M'ap fè yo rete tout bò ti mòn ki apa pou

27

mwen an. M'ap beni yo, m'ap ba yo bèl lapli lè pou lapli tonbe. Pyebwa nan jaden yo va donner, jaden yo va bay bèl rekòt, tout moun pral viv ak kè poze nan peyi yo a. Lè m'a wete chenn lan nan kou yo, lè m'a delivre yo anba men moun ki te fè yo tounen esklav, lè sa a y'a konnen se mwen

28

menm ki Seyè a. Moun lòt nasyon p'ap piye yo ankò. Bèt nan bwa p'ap devore yo ankò nan peyi

29

a. Yo pral rete lakay yo san danje. Pesonn p'ap vin chache yo kont. M'ap ba yo bon venn tè nan jaden yo. Moun p'ap mouri grangou nan peyi a ankò. Lòt nasyon yo p'ap pase yo nan betiz ankò.

30

Tout moun va konnen se mwen menm Seyè a, Bondye yo a, ki kanpe la avèk yo. Yo menm, moun fanmi Izrayèl yo, se pèp pa m' lan menm yo ye. Se mwen menm, Seyè sèl Mèt la, ki di sa.

31

Nou menm, moun, se mouton mwen nou ye, bann mouton m'ap okipe yo. Mwen menm, se Bondye nou mwen ye. Se Seyè sèl Mèt la ki di sa.

Chapter 35

1

¶ Seyè a pale avè m' ankò, li di m' konsa: -Nonm o! Vire tèt ou gade nan direksyon mòn

2

Seyi, bay moun Edon yo mesaj mwen ba ou pou yo a. W'a di yo men sa Seyè sèl Mèt la voye di nou: Nou menm moun peyi Seyi, m'ap leve dèyè nou tou! Mwen pral lonje men m' sou nou pou

3

m' pini nou. M'ap fè peyi a tounen yon dezè san pesonn ladan l'.⁴ M'ap fè tout lavil nou yo tounen
 mazi. M'ap fè peyi a rete san pesonn ladan l'. Lè sa a, n'a konnen se mwen menm ki Seyè a.⁵ Nou
 pa janm sispann rayi moun Izrayèl yo. Lè malè lagè tonbe sou yo, lè yo t'ap resevwa dènye chatiman
 pou peche yo a, nou lage yo nan men lènmi yo.⁶ Se poutèt sa, jan nou konnen mwen vivan vre a,
 se mwen menm, Seyè a, k'ap pale: m'ap fè nou benyen nan dlo kò nou, nou p'ap ka chape. Wi, nou
 te mete san yo deyò, san an gen pou pousib nou.⁷ M'ap fè mòn Seyi yo, peyi Edon an, tounen yon
 dezè kote moun pa rete. M'ap touye dènye moun k'ap ale vini nan peyi nou an.⁸ Mwen pral kouvri
 mòn nou yo ak kadav. Ti mòn nou yo, fon nou yo ak ravin nou yo pral kouvri ak kadav moun yo
 touye nan lagè.⁹ M'ap fè peyi nou an tounen dezè pou toutan. p'ap gen yon moun nan lavil nou
 yo. Lè sa a, n'a konnen se mwen menm ki Seyè a.¹⁰ ¶ Nou te di konsa ni nasyon Izrayèl la, ni
 nasyon Jida a ansanm ak tout peyi yo a, se pou nou yo ye, nou pral pran yo pou nou, malgre se
 mwen menm ki te Bondye yo a.¹¹ Enben! Jan nou konnen mwen vivan vre a, se mwen menm,
 Seyè a, k'ap pale: Jan nou te move sou yo! Jan nou te rayi sò yo! Jan nou pa t' vle wè yo! M'ap fè
 nou peye pou tou sa. Lè sa a, n'a konnen se mwen menm k'ap pini nou pou tou sa nou te fè yo.
¹² Wi, n'a konnen se mwen menm ki Seyè a, mwen te tande jan nou t'ap pase mòn peyi Izrayèl yo
 nan betiz, lè n'ap plede di: Yo tounen yon dezè, yo ban nou yo pou n' ka devore yo.¹³ Mwen te
 tande ak zòrèy mwen jan nou te derespekte m', jan nou pa t' manke pale m' mal.¹⁴ Men sa Seyè
 sèl Mèt la di ankò: -Tout moun sou latè pral kontan lè m'a fè peyi nou an tounen yon dezè¹⁵ menm
 jan nou te kontan wè peyi moun Izrayèl yo, peyi moun ki rele m' pa m' yo, tounen yon dezè. Tout
 mòn Seyi yo, wi, tout peyi Edon an, pral tounen dezè. Lè sa a, tout moun va konnen se mwen menm
 ki Seyè a.

Chapter 36

¹ ¶ Seyè a di ankò: -Koulye a, nonm o! Men mesaj pou ou bay mòn Izrayèl yo, koute sa Seyè
 a voye di nou.² Wi, men mesaj mwen menm, Seyè sèl Mèt la, voye ban nou: Lènmi moun Izrayèl
 yo ap pase nou nan betiz, y'ap di: Tout ansyen mòn sa yo pou nou koulye a!³ Se poutèt sa, bay
 mesaj sa a. Fè yo konnen sa mwen menm, Seyè sèl Mèt la, voye di yo: Lè nasyon ki sou fwontyè
 nou yo te anvayi peyi Izrayèl la pou yo te piye l', pou yo pran l' pou yo, tout moun t'ap pale sou
 nou, yo t'ap pase nou nan betiz.⁴ Enben, koulye a, mòn peyi Izrayèl yo, koute sa Seyè sèl Mèt la

voye di nou. Men mesaj Seyè a bay pou tout mòn ak tout ti mòn, pou tout ravin ak tout fon nan peyi a, pou tout kay kraze moun yo kouri kite ak pou tout lavil yo ki tounen mazi. Moun lòt nasyon

5
ki sou fwontyè nou yo te piye nou, yo te pase nou nan betiz. Men sa mwen menm, Seyè sèl Mèt la, di ankò: M'ap move anpil, m'ap denonse lòt nasyon ki sou fwontyè nou yo. M'ap denonse tout moun nan peyi Edon an tou. Lè yo t'ap pran peyi mwen an pou yo te piye l' nèt ale a, yo pa t' manke

6
kontan, yo pa t' manke pase nou nan rizib. Se poutèt sa, men mesaj pou ou bay peyi Izrayèl la. Pale ak tout mòn yo, tout ti mòn yo, tout ravin yo ak tout fon yo. Di yo: Men sa Seyè a voye di: Koulye a mwen move, mwen fache, m'ap pale! Wi, nou te soufri lè lòt nasyon yo t'ap joure nou.

7
enben wi, men sa mwen menm, Seyè sèl Mèt la, di: Mwen leve men m' pou m' fè sèman lòt nasyon

8
ki sou fwontyè nou yo pral peye pou jan yo te pase nou nan betiz la. Men, sou tout mòn peyi Izrayèl yo, pyebwa yo pral fè fèy ankò, y'ap donneren pou nou menm, pèp mwen an, pèp Izrayèl la.

9
Paske nou pa lwen tounen nan peyi nou. Paske mwen kanpe la avèk nou. Mwen pral swen nou.

10
Tè jaden nou yo pral raboure, yo pral plante. Mwen pral fè tout moun fanmi pèp Izrayèl yo

11
peple, yo pral vin anpil. Tout lavil yo pral plen moun. Yo pral rebati tout kay ki te kraze yo. Mwen pral fè ni moun ni bèt peple nan peyi a. Yo pral vin anpil, y'ap fè anpil pitit, m'ap fè nou rete kote nou te konn rete anvan an. M'ap fè nou viv pi byen pase jan nou te konn viv la. Lè sa a, n'a konnen

12
se mwen menm ki Seyè a. M'ap mennen nou tounen, nou menm moun pèp Izrayèl yo, pou nou ka viv nan peyi nou an. Nou pral pran peyi a pou nou. Peyi a pral rele nou pa nou. Li p'ap janm

13
kite pitit li yo mouri ankò. Men sa Seyè sèl Mèt la di ankò: -Yo te mache di: Peyi a ap manje

14
moun li yo. L'ap touye tout pitit moun ki rete ladan l' yo. Se te vre. Men, depi jòdi a, peyi a p'ap manje moun li yo ankò, li p'ap touye pitit moun ki rete ladan l' yo. Se mwen menm, Seyè sèl Mèt

15
la, ki di sa. M'ap fè lòt nasyon yo sispann pase nou nan betiz. Nou p'ap tandè jouman yo nan zòrèy nou ankò. Yo p'ap lonje dwèt sou nou ankò pou fè nou wont. Peyi a p'ap touye pitit li yo

16
ankò. Se mwen menm, Seyè sèl Mèt la, ki di sa. ¶ Seyè a pale avè m' ankò, li di m' konsa:

17
-Nonm o! Lè moun pèp Izrayèl yo te rete nan peyi yo a, yo mennen bak yo yon jan ki mete peyi a nan kondisyon li pa ka fè sèvis Bondye ankò. Lavi yo t'ap mennen an te mete yo nan kondisyon

18
yo pa t' ka fè sèvis pou mwen. Nan je mwen yo pa t' pi bon pase yon fi ki gen lalin li. Se poutèt sa mwen fè yo santi jan mwen ka move sou yo, paske yo te fè anpil san koule nan peyi a, yo te mete zidòl toupatou. Konsa yo te mete peyi a nan kondisyon pou l' pa t' ka fè sèvis pou mwen ankò.

19
Mwen gaye yo nan mitan lòt nasyon yo. Mwen simaye yo nan tout peyi etranje yo. Mwen pini

20
yo pou jan yo te mennen bak yo mal ak pou tou sa yo te fè. Nan tout peyi kote yo rive, yo lakòz moun derespekte non mwen ki yon non apa. Yo fè moun ap di sou yo: Men pèp Seyè a wi! Yo blije

²¹ soti kite peyi li te ba yo a! Sa te ban m' tèt chaje pou m' te wè jan moun pèp Izrayèl yo te lakòz
²² moun t'ap derespekte non m' nan tout peyi kote yo pase. Se poutèt sa, w'a di moun pèp Izrayèl
yo: Men mesaj Seyè sèl Mèt la voye ba yo: Sa m' pral fè a, se pa pou tèt nou m'ap fè l', tandè. Se
poutèt non mwen ki yon non apa, non nou te trennen nan labou nan tout peyi kote nou pase yo.
²³ Menm jan nou te trennen non m' nan labou nan mitan lòt nasyon yo, konsa m' pral sèvi ak nou
pou fè lòt nasyon yo wè jan m' gen pouvwa, jan m' se yon Bondye ki apa. Lè sa a, nasyon yo va
²⁴ konnen se mwen menm ki Seyè a. M'ap wete nou nan mitan nasyon yo, m'ap sanble nou soti
nan tout peyi yo, m'ap mennen nou tounen nan peyi pa nou an. ¶ ²⁵ M'ap benyen nou nan bon dlo
klè pou nou ka vin nan kondisyon pou fè sèvis pou mwen. M'ap mete nou nan kondisyon pou sèvi
²⁶ m', m'ap wete tout vye bagay derespektan nou t'ap fè yo ak tout zidòl nou yo. M'ap mete lòt
santiman nan kè nou. M'ap mete lòt lide nan tèt nou. M'ap wete tèt di nou an, m'ap fè nou tandè lè
²⁷ m' pale nou. M'ap mete Lespri m' nan nou, konsa m'ap fè nou mache dwat dapre lòd mwen ban
²⁸ nou, pou nou fè tou sa mwen mande nou fè. N'a kenbe prensip mwen yo. Lè sa a, n'a rete nan
peyi mwen te bay zansèt nou yo. Se nou menm ki pral pèp ki rele m' pa mwen. Mwen menm se
²⁹ Bondye nou m'ap ye. M'ap delivre nou anba tout vye bagay mal nou t'ap fè yo. M'ap bay ble yo
³⁰ lòd pou yo donnen anpil. Konsa mwen p'ap janm voye grangou sou nou ankò. M'ap fè pye fwi
nou yo ak jaden nou yo donnen an kantite. Konsa, nou p'ap nan grangou, nou p'ap wont ankò devan
³¹ lòt nasyon yo. Lè sa a, n'a chonje jan nou te mennen bak nou mal, jan nou te fè sa ki pa t' bon
menm. Nou pral gen degoutans pou tèt nou paske nou te fè mechanste ak anpil bagay lèd devan
³² Bondye. Nou menm, moun Izrayèl yo, men sa Seyè sèl Mèt la di nou: Mwen vle fè nou konnen
se pa poutèt nou m'ap fè sa m'ap fè a. Non! Okontrè, se wont pou nou ta wont, se bese pou nou ta
³³ bese je nou pou sa nou te fè. Men sa Seyè sèl Mèt la di: Jou m'a mete nou nan kondisyon pou
sèvi m' lan, lè m'a wete nou anba tout peche nou yo, m'a kite nou al rete nan lavil nou yo, m'a kite
³⁴ nou rebati kay kraze nou yo. Tout moun k'ap pase bò jaden nou yo te wè jan yo te ravaje, jan
³⁵ yo te tounen dezè. Men, mwen pral fè nou travay jaden nou yo ankò. Konsa tout moun va di:
Gade peyi ki te ravaje a non! Koulye a, li tounen yon bèl jaden tankou jaden Edenn lan. Gade jan
³⁶ lavil ki te fin kraze, piye, demoli yo tounen bèl lavil ak gwo ranpa plen moun non! Lè sa a, rèz
moun lòt nasyon sou fwontye nou yo ki chape anba lanmò va konnen se mwen menm, Seyè a, ki
rebati tout lavil ki te kraze yo, se mwen menm ki replante jaden ki te ravaje yo. Se mwen menm,
³⁷ Seyè a, ki pale. Sa mwen di m'ap fè a, m'ap fè l'! Seyè sèl Mèt la pale, li di: M'ap kite moun pèp

38

Izrayèl yo vin mande m' sekou. M'ap kite yo peple tankou yon bann mouton. Lavi ki te fin kraze yo pral plen moun tankou lavil Jerizalèm plen mouton yo mennen pou touye pou Bondye lè jou fèt yo. Lè sa a, tout moun va konnen se mwen menm ki Seyè a.

Chapter 37

¹ ¶ Mwen santi pouvwa Seyè a sou mwen ankò. Lespri Bondye a pran m', li mennen m' nan yon fon ki te plen zosman. ² Li fè m' pwonmennen nan tout fon an, nan mitan zosman yo. Mwen wè te gen anpil anpil zosman atè nan fon an. Zosman yo te fin chèch nè. ³ Li di m' konsa: -Nonm o! Eske zosman sa yo ka tounen vivan ankò? Mwen reponn: -Seyè sèl Mèt la, se ou ki konnen! ⁴ Lè sa a, li di m' konsa: -Bay mesaj sa a pou zosman yo. W'a di zosman ki fin chèch yo pou yo koute pawòl Seyè a. ⁵ Wi, men sa Seyè sèl Mèt la voye di yo: Mwen pral fè yon van soufle sou nou pou nou ka tounen vivan ankò. ⁶ M'ap mete venn sou nou, m'ap fè vyann pouse sou nou, m'ap kouvri nou ak po. M'ap mete souf nan nou, m'ap fè nou viv ankò. Lè sa a, n'a konnen se mwen menm ki Seyè a. ⁷ Mwen bay mesaj Bondye a jan li te ban m' lòd la. Antan m'ap pale konsa, mwen tande yon gwo bri, zosman yo pran deplase jouk yo jwenn plas yo yonn bò kote lòt. ⁸ Mwen gade, mwen wè zosman yo te gen venn sou yo. Vyann t'ap pouse sou yo. Lèfini po kouvri yo tout. Men pa t' gen souf nan yo. ⁹ Bondye di m' konsa: -Nonm o! Bay mesaj Bondye a, pale ak van an. W'a di li men mesaj Seyè sèl Mèt la voye ba li: Vini non! Soti nan kat bòn direksyon yo. Soufle sou tout mò sa yo, fè yo tounen vivan ankò. ¹⁰ Se konsa, mwen bay mesaj la, jan li te ban m' lòd la. Souf la antre nan kadav yo, yo vin vivan ankò, yo kanpe sou de pye yo. Te gen anpil anpil moun, kont pou fè yon gwo lame. ¹¹ Bondye di mwen: -Nonm o! Moun pèp Izrayèl yo tankou zosman sa yo. Y'ap di: Nou fin deperi, nou pa gen espwa ankò. Nou fini nè. ¹² Se poutèt sa, ba yo mesaj sa a. Di yo konsa: Men sa mwen menm Seyè sèl Mèt la voye di yo: Mwen pral louvri tonm yo. Mwen pral fè yo soti ladan yo, m'ap mennen yo tounen nan peyi Izrayèl la. ¹³ Wi, m'a louvri tonm kote pèp mwen an te antere a, m'a fè yo soti nan tonm yo. Lè sa a, y'a konnen se mwen menm ki Seyè a. ¹⁴ M'ap mete souf mwen nan yo, m'ap fè yo tounen vivan ankò. M'ap fè yo tounen nan peyi pa yo a. Lè sa a, y'a konnen se mwen menm Seyè a ki pale. Sa m' te di m'ap fè a, m'ap fè l' vre. Se Seyè a menm ki di sa. ¹⁵ ¶ Seyè a pale avè m' ankò, li di m' konsa: ¹⁶ -Nonm o! Pran yon moso bwa. Ekri sou li: Jida ak moun pèp Izrayèl k'ap mache avè l' yo. Lèfini, pran yon lòt moso bwa. Ekri sou

li: Jozèf osinon Efrayim ak tout moun pèp Izrayèl k'ap mache avè l' yo. ¹⁷ Pran de moso bwa yo, kole yo bout pou bout, kenbe yo yon jan pou yo parèt tankou si se yon sèl bout bwa ou gen nan men ou. ¹⁸ Lè moun pèp ou yo va mande ou: Manyè di nou sa sa vle di. ¹⁹ W'a di yo: Men sa Seyè sèl Mèt la voye di nou: Mwen pral pran bout bwa ki kanpe pou Jozèf osinon Efrayim ansanm ak branch fanmi Izrayèl k'ap mache ak li yo, m'ap mete l' ansanm ak bout bwa Jida a. M'ap fè yo fè yon sèl bout bwa. Epi, m'ap kenbe yo nan men mwen. ²⁰ Kenbe de bout bwa yo nan men ou pou tout pèp la ka wè yo. ²¹ Lèfini, w'a di yo: Men sa Seyè sèl Mèt la voye di yo: Mwen pral mache chache dènye moun pèp mwen an nan mitan tout nasyon kote yo te ale a. M'ap sanble yo soti toupatou, m'ap mennen yo tounen nan peyi pa yo a. ²² M'ap fè yo tounen yon sèl pèp nan peyi a ankò, sou mòn Izrayèl yo. Yo pral gen yon sèl wa pou gouvèn yo. Yo p'ap fè de peyi ankò. Yo p'ap fè de gouvènman ankò. ²³ Yo pa pral avili tèt yo ankò nan fè sèvis pou zidòl, nan fè bagay derespektan devan Bondye, nan fè sa yo pa t' gen dwa fè. M'ap delivre yo anba tout zidòl ki te fè yo vire do ban mwen an, ki te fè yo fè peche a. M'ap mete yo nan kondisyon pou yo ka sèvi m' ankò. Y'ap tounen yon pèp ki rele m' pa m'. Mwen menm, m'ap Bondye yo. ²⁴ Yon wa, tankou David, sèvitè m' lan, va chèf yo. Yo tout pral fè yonn anba yon sèl gadò. Y'a mache dapre lòd mwen ba yo, y'a fè tou sa mwen mande yo fè, y'a kenbe prensip mwen yo. ²⁵ Y'ap rete nan peyi mwen te bay Jakòb, sèvitè m' lan, peyi kote zansèt yo te viv la. Yo pral viv la pou tout tan, yo menm, pitit yo ak pitit pitit yo pou tout tan. Se yon wa, tankou David, sèvitè m' lan, ki pral gouvèn yo pou tout tan gen tan. ²⁶ M'ap pase yon kontra ak yo k'ap garanti yo lavi ak kè poze pou tout tan. M'ap mete yo kanpe ankò, m'ap fè yo peple. M'ap fè kay ki apa pou mwen an toujou rete la nan mitan yo. ²⁷ Se la m'ap viv avèk yo. Se mwen menm k'ap Bondye yo. Yo menm, se pèp ki rele m' pa m' lan y'ap ye. ²⁸ Wi, m'a fè kay ki apa pou mwen an toujou rete la nan mitan yo. Lè sa a, lòt nasyon yo va konnen se mwen menm, Seyè a, ki te chwazi pèp Izrayèl la pou l' te ka viv apa pou mwen.

Chapter 38

¹ ¶ Seyè a pale avè m' ankò. li di m' konsa: ² -Nonm o! Vire tèt ou gade sa Gòg ap fè a. Se li ki pi gwo chèf moun Mechèk ak moun Toubal yo nan peyi Magòg. Bay mesaj mwen ba ou sou li a. ³ W'a di Gòg, pi gwo chèf moun Mechèk ak moun Toubal yo, men mesaj mwen menm, Seyè sèl Mèt la voye di li: Koulye a ou menm Gòg, m'ap leve dèyè ou. ⁴ M'ap fè ou kase tèt tounen, m'ap mete bayonn nan machwè ou. M'ap trennen ou, ou menm ansanm ak tout lame sòlda ou yo, chwal

ou yo ak kavalye ou yo, ak bèl inifòm yo sou yo. Yon gwo lame w'ap genyen lè sa a, chak sòlda
ak nepe yo nan yon men ak yon gwo osinon yon ti plak fè pwotèj nan lòt men an. ⁵ Moun peyi Pès,
moun peyi Letiopi ak moun peyi Pout ap mache avè ou. Yo tout gen gwo plak fè pwotèj sou ponyèt
yo ak kas fè sou tèt yo. ⁶ Tout sòlda peyi Gome yo, tout moun lavil Bèt-Togama ki nan nò nèt la,
yo kanpe avè ou tou, ansanm ak kantite moun anpil lòt nasyon. ⁷ Di l' konsa: Li mèt pare, li mèt
pare tout sòlda l' yo ki sanble bò kote l' pou yo tann lòd mwen yo. ⁸ Apre kèk tan m'ap ba li lòd
pou l' al anvayi yon peyi kote moun ki te rive chape nan lagè yo te tounen soti nan peyi kote yo te
depòte yo. Wi, li pral anvayi mòn peyi Izrayèl yo ki te rete pandan lontan tankou yon dezè. Men,
moun peyi Izrayèl yo soti nan mitan moun lòt nasyon yo. Koulye a y'ap viv lakay yo ak kè poze,
san ankenn danje. ⁹ L'a moute vin atake yo ansanm ak tout lame li ak tout kantite moun lòt nasyon
ki avè l' yo. L'ap tankou yon van tanpèt. L'ap kouvri tout peyi a tankou yon gwo nwaj. ¹⁰ Men sa
Seyè sèl Mèt la voye di Gòg: Lè jou sa a va rive, lespri ou pral pran travay, ou pral fè move lide
nan tèt ou. ¹¹ Ou pral deside pou ou anvayi yon peyi san defans, kote moun ap viv ak kè poze, san
bri san kont, kote moun rete nan lavil san miray ranpa, san pòtay ni ba fè. ¹² Ou pral piye, ou pral
devalize, ou pral pran tou sa moun yo genyen nan lavil ki te fin kraze yon lè a. Moun sa yo tounen
soti nan peyi kote yo te depòte yo. Koulye a, yo gen anpil bèt ak anpil byen, y'ap viv nan gran
kalfou latè a. ¹³ Moun peyi Cheba ak moun peyi Dedan ansanm ak kòmèsan ki soti nan peyi Tasis
yo ak lòt peyi nan vwazinaj yo pral mande ou: Eske se pou ou pran tou sa moun yo genyen kifè ou
vin atake yo la a? Eske se pou piye ou sanble tout lame sa a? Eske ou soti pou devalize tou sa yo
genyen ki fèt an lò ak an ajan, pou ou pran bèt yo ak byen yo, lèfini pou ou bwote tou sa ou pran
al lakay ou? ¹⁴ ¶ Se poutèt sa, nonm o, bay mesaj mwen an! Ale di Gòg konsa men sa mwen menm
Seyè sèl Mèt la voye di li: Koulye a pèp Izrayèl la, pèp mwen an, ap viv ak kè poze san ankenn
danje, se lè sa a wava bay kò ou mouvman. ¹⁵ W'ap kite kote ou ye a, nan pwent nò a, w'ap vini
ak yon gwo lame sòlda ou ranmase nan mitan anpil nasyon, yo tout moute sou chwal yo. ¹⁶ Ou
pral tonbe sou pèp Izrayèl mwen an tankou yon van tanpèt k'ap pase sou tout peyi a. Lè lè a va rive,
m'ap voye ou anvayi peyi mwen an pou m' ka fè lòt nasyon yo konnen ki moun mwen ye, pou yo
rekonèt se yon Bondye apa mwen ye lè y'a wè travay ou menm Gòg, ou pral fè pou mwen an. ¹⁷ Se
sou ou mwen t'ap pale nan tan lontan lè mwen te sèvi ak pwofèt pèp Izrayèl yo, sèvitè m' yo, pou
m' te fè yo konnen mwen gen pou m' te voye yon moun vin atake yo lè jou a va vini. Se Seyè sèl
Mèt la ki di sa. ¹⁸ Seyè sèl Mèt la pale, li di konsa: -Jou Gòg pral anvayi peyi Izrayèl la, kòlè m'
ap moute m'. ¹⁹ M'ap fè gwo kòlè, m'ap move. Mwen sèmante jou sa a, pral gen yon sèl
tranblemanntè nan peyi Izrayèl la. ²⁰ Pwenson nan lanmè, zwezo nan syèl, bèt nan bwa, bèt k'ap

trennen sou vant, tout moun ki rete sou latè pral tranble paske y'ap pè m'. Mòn yo pral anfale, falèz
 yo pral vide desann. Tout miray yo pral tonbe atè. ²¹ Mwen pral voye tout kalite malè sou Gòg
 pou fè li pè. Se mwen menm Seyè a ki pale. Sòlda li yo, yonn pral touye lòt ak nepe yo. ²² M'ap
 pini l', m'ap voye maladi sou li, m'ap mete san l' deyò. Mwen pral voye gwo lapli avèk lagrèl, dife
 ak souf sou li, sou lame li a ak sou tout nasyon ki kanpe avè l' yo. ²³ Se konsa m'ap fè tout nasyon
 yo konnen jan mwen gen pouvwa, jan mwen se yon Bondye apa. Lè sa a, m'a fè tout nasyon yo
 konnen se mwen menm ki Seyè a.

Chapter 39

¹
 ¶ Seyè sèl Mèt la di ankò: -Nonm o! Bay mesaj mwen ba ou sou Gòg la. Wi, di li men mesaj
 mwen menm, Seyè sèl Mèt la, m' voye ba li: Ou menm Gòg, pi gwo chèm moun Mechèk ak moun
 Toubal yo, m' pral leve dèyè ou tou. ² M'ap fè ou pran yon lòt direksyon, m'ap fè ou soti nan pwent
 nò a, m'ap mennen ou sou mòn Izrayèl yo. ³ Lè sa a, m'ap kraze bwa banza ki nan men gòch ou a.
 M'ap fè flèch yo soti tonbe nan men dwat ou. ⁴ Ou menm Gòg, ansanm ak tout lame ou la ak tout
 lòt pèp k'ap mache avè ou yo, nou pral mouri sou mòn peyi Izrayèl la. M'ap kite kadav nou sèvi
 manje pou malfini karanklou, pou tout kalite zwezo ak bèt nan bwa. ⁵ Nou pral mouri nan plenn
 yo. Se mwen menm, Seyè sèl Mèt la, ki pale. ⁶ M'ap voye yon sèl dife nan peyi Magòg ak nan tout
 peyi bò lanmè kote moun t'ap viv san bri san kont lan. Tout moun va konnen se mwen menm ki
 Seyè a. ⁷ Mwen pral fè tout moun nan pèp Izrayèl la konnen mwen gen yon non apa. Mwen p'ap
 kite yo trennen non mwen nan labou ankò. Lè sa a nasyon yo va konnen mwen menm, Seyè a, ki
 Bondye pèp Izrayèl la, se yon Bondye apa mwen ye. ⁸ ¶ Seyè sèl Mèt la di ankò: -Wè pa wè, jou
 mwen t'ap pale a gen pou rive. Sa se sèten. ⁹ Lè sa a, moun ki rete nan lavil peyi Izrayèl yo pral
 soti, yo pral ranmase dènye zam moun yo te kite, y'ap boule yo. Y'ap limen gwo boukan ak plak
 pwotèj yo, gwo kou piti, ak banza ak tout flèch yo, ak frenn yo, ak baton yo. Boukan an ap pran
 sètan pou l' boule. ¹⁰ Yo p'ap bezwen al chache bwa nan jaden pou fè dife, ni yo p'ap bezwen al
 koupe pyebwa nan rak, paske yo pral gen tout zam sa yo pou yo boule fè dife. Yo pral piye moun
 ki t'ap piye yo. Yo pral devalize moun ki t'ap devalize yo. Se Seyè sèl Mèt la ki di sa. ¹¹ Seyè di
 ankò: -Lè sa a, m'a bay Gòg yon kote nan peyi Izrayèl la pou yo antere l'. Se va Fon Vwayajè yo,
 sou bò solèy leve lòt bò lanmè Mouri a. Se la yo pral antere Gòg ansanm ak tout lame li a. Y'a rele
 l' Fon lame Gòg la. ¹² Moun Izrayèl yo pral pran sèt mwa pou yo antere tout kadav yo, anvan pou

13
 peyi a nan kondisyon pou fè sèvis pou Bondye ankò. Tout moun nan peyi a pral mete men pou antere yo. Konsa tou, jou y'ap fè lwanj pou mwen an, y'a nonmen non yo tou. Se mwen menm,

14
 Seyè a, ki di sa. Apre sèt mwa sa yo, y'a chwazi gason pou vwayaje nan tout peyi a al chache kadav ki rete atè a pou yo antere yo. Se travay sa a ase y'a gen pou yo fè. Konsa, y'a mete peyi a

15
 nan kondisyon pou fè sèvis Bondye ankò. Nan vwayaj y'ap fè nan tout peyi a, chak fwa y'a jwenn yon zosman moun, y'a mete yon mak bò kote l' pou kwòkmò yo ka vin pran l' pou y' al antere

16
 l' nan Fon lame Gòg la. Va gen yon lavil toupren, y'a rele l': Amona Fon lame a. Se konsa peyi

17
 a va nan kondisyon pou fè sèvis pou mwen ankò. Seyè sèl Mèt la di ankò: -Nonm o! Rele tout kalite zwezo ak tout kalite bèt nan bwa. Fè yo soti toupatou nan vwazinaj la pou yo sanble vin manje bèt mwen pare pou m' touye pou yo a. Pral gen yon gwo fèt sou mòn Izrayèl yo, kote yo pral

18
 manje vyann, kote yo pral bwè san. Y'a manje vyann vanyan sòlda yo, y'a bwè san chèf latè yo. Moun sa yo, yo tankou belye mouton, ti mouton, bouk kabrit ak towò chatre byen gra peyi Bazan

19
 yo touye pou mwen. Lè m'a fin touye tout moun sa yo tankou lè y'ap fè ofrann bèt pou mwen,

20
 zwezo yo ak bèt nan bwa yo va manje grès vyann mezi yo kapab. Y'a bwè san jouk yo sou. Sou tab mwen an, y'a manje chwal, kavalye, sòlda ak moun k'ap fè lagè mezi yo kapab. Se mwen menm,

21
 Seyè sèl Mèt la, ki di sa. Seyè a di ankò: -M'ap fè nasyon yo wè gwo pouvwa mwen. M'ap moutre yo jan mwen konn pini lè m'a pini yo, y'a santi fòs ponyèt mwen lè y'a tonbe anba men m'.

22
 Depi lè sa a, jouk byen lontan apre sa, moun pèp Izrayèl yo va konnen se mwen menm Seyè a

23
 ki Bondye yo. ¶ Tout lòt nasyon yo va konnen se paske moun pèp Izrayèl yo pa t' kenbe pawòl yo te gen avè m' lan kifè yo te depòte yo. Se poutèt sa, mwen te vire do ba yo, mwen te lage yo nan

24
 men lènmi yo pou touye yo nan lagè. Mwen te ba yo sa yo te merite pou mechanste yo ak tout

25
 vye bagay derespektan yo te fè yo. Mwen vire do ba yo. Apre sa, Seyè sèl Mèt la di ankò: -Koulye a, mwen pral gen pitye pou pitit pitit Jakòb yo, pou pèp Izrayèl la. M'ap mete yo kanpe

26
 ankò. M'ap defann repitasyon non mwen an ki yon non apa. Lè y'a vin rete ankò nan peyi yo a san ankenn danje ni malè, san pesonn pou fè yo pè, y'a bliye jan moun te konn fè yo wont, jan yo

27
 pa t' kenbe pawòl yo avè m' pou y' al fè sa ki mal. M'ap fè pèp mwen an soti nan mitan lòt nasyon yo pou yo tounen lakay yo. M'ap mache ranmase yo nan tout peyi kote lènmi yo ap viv. Lè m'a fè

28
 sa pou yo anpil nasyon va wè se yon Bondye apa mwen ye. Lè sa a, pèp mwen an va konnen se mwen menm, Seyè a, ki Bondye yo. Wi, mwen te fè depòte yo nan mitan lòt nasyon. Koulye a, m'ap ranmase yo, m'ap mete yo ansanm ankò nan peyi pa yo a, san mwen pa kite yonn dèyè.

29

Mwen p'ap janm vire do ba yo ankò paske m'ap voye lespri m' sou pèp Izrayèl la. Se Seyè sèl Mèt la ki di sa.

Chapter 40

¹ ¶ Nan dizyèm jou premye mwa vennsenkyèm lanne depi yo te depòte nou an, ki vle di katòzan, jou pou jou, depi yo te fin kraze lavil Jerizalèm lan, mwen santi pouvwa Seyè a sou mwen. Li pran

m', li mennen m' ale. ² Nan yon vizyon, mwen wè li mennen m' nan peyi Izrayèl la. Li mete m' kanpe sou yon mòn byen wo. Mwen wè devan m' sou bò sid la yon bann kay bati ou ta di yon lavil.

³ Li fè m' pwoche. Lè sa a, mwen wè yon nonm ki te klere tankou kwiv. Li te kenbe nan men l' yon

kòdon tou blan ak yon règ pou mezire. Li te kanpe bò yon pòtay. ⁴ Nonm lan di m' konsa: -Nonm o! Klere je ou gade. Louvri zòrèy ou gran pou ou koute. Mete tèt ou anplas pou ou wè tou sa mwen pral moutre ou la a. Se pou sa menm yo mennen ou isit la. Paske, ou gen pou ou fè moun pèp Izrayèl

yo konnen tou sa ou pral wè. ⁵ ¶ Sa m' te wè a se te tanp lan. Te gen yon gwo miray ki te fè wonn li nèt. Nonm lan te gen nan men l' yon règ pou mezire ki te gen dis pye longè. Li mezire miray la.

Miray la te gen dis pye wotè, dis pye lajè. ⁶ Apre sa, li ale nan pòtay ki bay sou solèy leve a. Li

moute mach eskalye yo. Lè li rive anwo, li mezire papòt pòtay la. Li jwenn dis pye fondè. ⁷ Apre pòtay la, te gen yon gwo koridò avèk sis chanm pou gad yo, twa chak bò. Chak chanm yo te kare kare, dis pye lajè, dis pye longè. Miray ki te separe chanm yo te gen wit pye lajè. Apre chanm yo,

koridò a lonje sou dis pye ankò, li te mennen nan yon gwo pyès ki te bay sou Tanp lan. ⁸ Li mezire

gwo pyès chanm sa a. ⁹ Li jwenn li te gen katòz pye longè. Chanm sa a te nan bout koridò a ki te

pi pre Tanp lan. Miray la te gen kat pye lajè nan bout sa a. ¹⁰ Te gen twa chanm gad chak bò koridò ki bay sou solèy leve a. Tout chanm yo te menm fòs. Miray ki te separe pyès yo yo yonn ak lòt te

gen menm lajè. ¹¹ Apre sa, nonm lan mezire longè koridò a anba pòtay la. Li jwenn sèz pye. Li

mezire lajè koridò a, li jwenn vennde pye. ¹² Devan chak chanm gad yo, te gen yon ti mi tou ba ki te gen vin pous wotè, vin pous lajè. Chanm yo menm te kare kare anndan, dis pye longè, dis pye

lajè. ¹³ Lèfini, li mezire distans ant miray dèyè yon chanm ale nan miray dèyè chanm ki anfas li

lòt bò koridò a, li jwenn karannde pye. Pòt chanm yo te bay fas pou fas. ¹⁴ Gwo chanm ki te nan

bout koridò a te louvri sou yon lakou. Li mezire lajè chanm lan, li jwenn tranakat pye. ¹⁵ Li mezire longè koridò a, depi miray pòtay la sou deyò rive nan bout dènye gwo chanm lan, li jwenn

¹⁶
katrevenkat pye. Te gen fennèt ak griyaj nan mi ki bay sou deyò chak chanm yo, ak nan mi ki separe chanm yo. Yo te fè pòtre pye palmis sou fasad miray separasyon yo ki bay sou koridò a.

¹⁷
Nonm lan fè m' pase nan gwo lakou deyò a. Te gen trant chanm yo te bati fè wonn lakou a. Do chanm yo te kole ak gwo miray ki te fèmen lakou a. Tout lakou a te pave nèt depi devan pòt chanm

¹⁸ yo. ¹⁹ Gwo lakou a te pi ba pase ti lakou anndan an. Te gen yon pòtay yon ti jan pi wo ki bay sou lakou anndan an. Nonm lan mezire depi sou pòtay deyò a rive nan pòtay anndan an. Li jwenn

²⁰
sanswasantwit pye. Lèfini, nonm lan al mezire pòtay kote ou pase antre nan gwo lakou a lè ou

²¹
soti sou bò nò. Li pran longè l' ak lajè l'. Twa chanm gad yo ki sou chak bò koridò a, miray ki separe yo a, ak dènye gwo chanm ki bay sou anndan an, yo tout te gen menm mezi ak sa li te jwenn pou pòtay ki bay sou solèy leve a. Koridò mitan an te gen katrevenkat pye longè sou karande pye

²²
lajè. Dènye gwo chanm lan, fennèt yo, ak pòtre pye palmis te tankou sa li jwenn pou pòtay bò solèy leve a. Te gen sèt macheskalye ki moute devan pòtay nò a. Gwo chanm lan te nan bout koridò

²³
a ki bay sou gwo lakou a. Lòt bò gwo lakou a, devan koridò nò a, te gen yon lòt pòtay ki bay sou ti lakou anndan an, menm jan ak sou bò solèy leve a. Nonm lan mezire distans ant de pòtay

²⁴
yo, li jwenn sanswasantwit pye tou. Apre sa, nonm lan mennen m' sou bò sid la. La tou, mwen

²⁵
wè yon lòt pòtay pou antre nan gwo lakou a. Li mezire l', li te tankou lòt pòtay yo. Te gen fennèt nan chanm gad yo, tankou lòt yo. Koridò pasaj la te gen katrevenkat pye longè sou karande pye

²⁶
lajè. Te gen sèt macheskalye ki moute devan pòtay la sou deyò. Dènye gwo chanm lan te nan bout koridò a ki bay sou gwo lakou a. Te gen pòtre pye palmis sou fasad miray ki bay sou koridò

²⁷
a. ¶ Sou bò sid la tou, te gen yon lòt pòtay ki mennen nan ti lakou anndan an. Nonm lan mezire

²⁸
distans ant de pòtay yo, li jwenn sanswasantwit pye tou. Nonm lan fè m' pase nan pòtay sid la pou m' antre nan ti lakou anndan an. Li mezire koridò a, li te menm fòs ak koridò gwo miray deyò

²⁹ yo. ³⁰ -(we vèsè pwochen) Chanm gad yo, gwo chanm lan, ak miray li yo te tankou pou lòt koridò yo. Te gen fennèt nan chanm ki bay sou koridò yo tou. Longè koridò a te katrevenkat pye,

³¹
lajè l' te karande pye. Men, gwo chanm lan te nan bout ki bay sou gwo lakou a. Pòtre pye palmis yo te sou tout fasad miray la sou anndan koridò a. Te gen wit macheskalye ki moute devan

³²
pòtay la. Apre sa, nonm lan fè m' pase nan pòtay bò solèy leve a pou antre nan ti lakou anndan

³³
an. Li mezire pòtay la, li jwenn li te menm fòs ak lòt pòtay yo. Chanm gad yo, gwo chanm lan, miray anndan li yo, yo tout te tankou pou lòt pòtay yo. Te gen fennèt toutotou koridò a ak nan gwo

³⁴
chanm lan tou. Li te gen katrevenkat pye longè sou karande pye lajè. Gwo chanm lan te bay sou gwo lakou deyò a. Pòtre pye palmis te sou tout miray la anndan koridò a. Te gen wit macheskalye

³⁵ ki moute devan pòtay la. Lèfini, nonm lan mennen m' bò pòtay nò a. Li mezire l', li jwenn li te
³⁶ menm fòs ak lòt pòtay yo. Tankou tout lòt yo, li te gen chanm pou gad yo, miray ak pòtre, yon
³⁷ gwo chanm ak fennèt toupato. Li te gen katrevenkat pye longè sou karannde pye lajè. Gwo
chanm lan te bay sou gwo lakou deyò a. Pòtre pye palmis te sou tout miray anndan koridò a. Te
³⁸ gen wit macheskalye ki moute devan pòtay la. Nan gwo lakou deyò a te gen yon chanm bò pòtay
nò ki mennen nan ti lakou anndan an. Chanm sa a te louvri sou gwo chanm lan ki bay sou gwo
³⁹ lakou a. Se la yo te lave vyann bèt yo te fin touye anvan y' al boule yo nèt sou lotèl la. ¶ Nan
gwo chanm sa a, te gen kat tab, de sou chak bò pyès la. Se sou tab sa yo yo te touye bèt yo te ofri
pou touye pou Bondye, kit pou yo boule l' nèt, kit pou wete peche yon moun fè, kit pou peye pou
⁴⁰ sa yon moun fè ki mal. Sou deyò pyès la tou te gen lòt tab, de chak bò pòtay Nò a. ⁴¹ Antou sa
te fè wit tab kote pou yo touye bèt yo ofri bay Bondye, kat anndan gwo chanm lan, kat nan gwo
⁴² lakou deyò a. Kat tab ki nan chanm sou kote pòtay la, kote yo pare bèt yo ofri pou boule nèt yo,
te fèt an gwo moso wòch taye. Yo te gen vin pous wotè. Anwo tab yo te kare kare, trant pous chak
bò. Tout zouti ki sèvi pou touye bèt yo ofri bay Bondye kit pou boule nèt, kit pou lòt sèvis, se sou
⁴³ tab sa yo yo te mete yo. Yo fouye yon ti kannal twa pous lajè kouri sou rebò anwo tab yo. Se
⁴⁴ anwo tab sa yo yo mete vyann pou yo ofri nan sèvis yo. Apre sa, li mennen m' antre nan ti lakou
anndan an. Te gen de lòt chanm ki bay sou ti lakou anndan an, yonn bò pòtay nò a ak pòt li louvri
⁴⁵ sou sid, lòt la bò pòtay sid la ak pòt li louvri sou nò. Nonm lan di m' konsa: -Ti chanm ki gen
⁴⁶ pòt li louvri sou sid la, se pou prèt k'ap sèvi nan tanp lan. Lòt chanm ki gen pòt li louvri sou nò
a, se pou prèt k'ap sèvi sou lotèl la. Tout prèt yo se moun menm fanmi Zadòk la. Nan tout branch
⁴⁷ fanmi Levi a, se yo menm ase ki te gen dwa antre devan Seyè a pou sèvi l' nan Tanp lan. Nonm
lan mezire ti lakou anndan an. Li te kare kare. Chak bò te mezire sanswasantwit (168) pye. Kay la
⁴⁸ menm te moute sou bò solèy kouche a ak lotèl la devan li. Li fè m' antre nan premye pyès Tanp
lan. Li mezire papòt chanm devan an, li jwenn li te gen nèf pye pwofondè ak vennkat pye lajè.
⁴⁹ Miray bò pòtay la te gen senk pye epesè. Te gen dis macheskalye pou moute devan pòt premye
pyès Tanp lan. Pyès la te mezire vin pye lajè ak tranakat pye fondè. Te gen de gwo poto won, yonn
chak bò pòt la.

Chapter 41

¹ ¶ Apre sa, nonm lan fè m' antre nan tanp lan, nan gwo pyès mitan tanp lan, kote ki apa pou Bondye a. Li mezire koridò kote pou antre ladan l' lan. Li jwenn li te gen dis pye longè, ² dizwit pye lajè. Miray ki chak bò yo te gen wit pye epesè. Li mezire chanm lan anndan anndan, li jwenn swasantwit pye longè ak tranukat pye lajè. ³ Apre sa, li antre nan dènye pyès dèyè nèt la, li mezire papòt ki bay sou li a. Li te gen twa pye pwofondè, dis pye lajè. Miray chak bò yo te gen douz pye epesè. ⁴ Li mezire chanm lan. Li te kare kare, tranukat pye chak bò. Chanm sa a te dèyè chanm mitan an. Apre sa, li di m': Isit la se kote yo met apa nèt pou Bondye a. ⁵ Nonm lan mezire epesè miray anndan tanp lan, li jwenn dis pye. Sou kote Tanp lan, nan mitan miray anndan an ak miray deyò a, te gen yon seri ti pyès ki te fè wonn li. Chak pyès te kare kare, sèt pye chak bò. ⁶ Te gen trant chanm anba. Chak chanm sa yo te gen de lòt anwo yo: trant chanm nan premye etaj la, trant lòt chanm nan dezyèm etaj la. Epesè miray deyò Tanp lan te pi piti nan premye etaj la pase anba. Li te pi piti toujou nan dezyèm etaj la pase nan premye a. Konsa, chanm yo te chita sou miray la san yo pa t' bezwen makònen avè l'. ⁷ Lè ou rete deyò w'ap gade, ou wè de miray Tanp lan sanble yo te menm epesè depi anba jouk anwo. Apiye sou miray deyò Tanp lan, te gen de eskalye byen laj pou soti nan chanm anba yo pou moute nan premye etaj la jouk li rive nan dezyèm etaj lan. ⁸ Mwen wè te gen yon teras wit pye lajè ki te fè wonn Tanp lan. Li te menm wotè ak pòtay pyès ki sou kote de miray Tanp lan, ki vle di dis pye pi wo pase fondasyon Tanp lan. ⁹ Miray deyò pyès sou kote yo te gen wit pye epesè. Se sou teras la yo pase pou antre nan pyès sou kote yo. Ant teras la ¹⁰ ak rès batiman an, te gen yon koulwa tranukat pye lajè, ki te fè wonn Tanp lan. ¹¹ Te gen yon pòt ki louvri sou pyès sou kote yo bò nò a ak yon pòt ki louvri sou pyès sou kote yo bò sid la. ¹² Miray ki te fèmèn koulwa a te gen wit pye epesè sou tout longè l'. ¶ Nan fon lakou dèyè Tanp lan, bò solèy kouche, te gen yon gwo kay sansenkant pye lajè, sanswasannsèz pye longè. Miray li yo te nèf pye epesè toutotou. ¹³ Nonm lan mezire Tanp lan sou deyò. Li te gen sanswasantwit pye longè. Soti depi dèyè Tanp lan, travèse espas vid la, rive nan dènye bout kay ki bò solèy kouche a, li jwenn sanswasantwit pye tou. ¹⁴ Li mezire tout fasad devan Tanp lan avèk de espas vid chak bò yo, sa ba li sanswasantwit pye tou. ¹⁵ Li mezire longè kay ki bò solèy kouche a, avèk de galeri yo, yonn chak bò. Sa ba li tou sanswasantwit pye. ¹⁶ Premye pyès devan an, pyès mitan an ak pyès dèyè a ki apa nèt pou Bondye a te gen gwo moso planch plake sou tout palisad yo, depi planche a rive nan fennèt yo. Fennèt yo te fèmèn ak yon griyay. ¹⁷ Sou tout miray anndan Tanp lan, depi anba rive depase wotè pòt yo, yo te travay planch yo ¹⁸ pou fè pòtre pye palmis ak pòtre zanj cheriben. Pòtre yo te fè wonn chanm lan nèt, yon pye palmis, yon zanj cheriben, yonn dèyè lòt.

¹⁹
 Pòtre zanj yo te gen de figi, yon figi moun k'ap gade pye palmis ki sou bò sa a, yon figi lyon
²⁰
 k'ap gade pye palmis ki sou lòt bò a. Se konsa pòtre yo te ye sou tout miray la nèt. Depi planche
²¹
 a rive depase wotè pòt yo, sou tout miray la, te gen pòtre pye palmis ak pòtre zanj cheriben. Gwo
 poto ki te devan Tanp lan te kare kare. Devan premye pyès Tanp lan te gen yon bagay ki te sanble
²²
 yon lotèl an bwa. Li te gen senk pye wotè. Anwo lotèl la te kare kare, kat pye chak bò. Pye lotèl
 la ki te nan kat kwen yo, pyès anba a ak kat sou kote yo, tout te fèt an bwa. Nonm lan di m' konsa:
²³
 Se tab sa a ki kanpe devan prezans Seyè a. Te gen yon pòt de batan nan bout koridò antre a ki
²⁴
 louvri sou pyès mitan an ak yon lòt pòt pi devan ki louvri sou pyès dèyè nèt la. Chak pòt te gen
²⁵
 de batan ki te louvri nan mitan. Yo te travay bwa pòt yo tou. Yo te fè pòtre pye palmis ak pòtre
 zanj cheriben sou tout pòt yo tankou pou miray yo. Yo te mete yon ti twati an bwa ki soti sou deyò
²⁶
 devan pòt premye pyès Tanp lan. Sou miray pyès devan an, te gen fennèt ak griyay. Tout mi yo
 te dekore ak pòtre pye palmis.

Chapter 42

¹
 ¶ Apre sa, nonm lan mennen m' nan gwo lakou deyò a. Li fè m' antre nan yon gwo batisman
²
 ki sou bò nò tanp lan, pa twò lwen kay ki sou bò solèy kouche Tanp lan. Batisman sa a te gen
³
 sanswasantwit pye longè, katrevenkat pye lajè. Sou yon bò te gen yon galeri tranukat pye lajè ki
 fè wonn Tanp lan. Sou lòt bò a, te gen pave gwo lakou deyò a. Kay la te yon chanmòt twa etaj,
⁴
 chak etaj te pi dèyè pase etaj anba l' la. Pòt chanm yo te bay sou bò nò, yo te louvri sou yon koridò
⁵
 sèz pye lajè, sanswasantwit pye longè ki pase devan chanm yo. Chanm ki te nan etaj anwo nèt la
 te pi fèmèn pase chanm ki te nan etaj mitan an ak chanm ki te nan etaj anba nèt la, paske yo te bati
⁶
 plis sou dèyè. Nan tout twa etaj yo, pyès ki te anwo nèt la te pi fèmèn pase sa ki te nan mitan an
⁷
 ak sa ki te anba nèt la. Yo pa t' gen poto pilye pou sipòte yo tankou lòt kay yo nan lakou a. Miray
 deyò Tanp lan, sou anba nèt, sou menm nivo ak premye etaj la, te gen katrevenkat pye epesè, ki
⁸
 vle di mwatye lajè gwo kay nò a. Anwo nèt, pyès yo te pran tout lajè kay la. Paske fasad devan
⁹
 kay la te gen sanswasantwit pye. Anba chanm yo, sou bò solèy leve kay la, kote miray la konmanse
¹⁰
 a, te gen yon pòtay pou antre nan gwo lakou deyò a. Sou bò sid Tanp lan, te gen yon lòt gwo

11
 batisman tankou premye a, toupren gwo pyès ki sou bò solèy kouche Tanp lan. Devan chanm yo,
 te gen yon koridò tankou pou kay ki sou bò nò a. Li te gen menm longè, menm lajè avè l', menm
 12
 fòm, ak menm pozisyon pou pòt yo ak fennèt yo. Te gen yon pòt nan chanm yo sou bò sid kay
 13
 la ki louvri sou koridò nan pwent bò solèy leve a, kote miray la konmanse a. Lè sa a, nonm lan
 di m': -De gwo kay sa yo, yonn sou bò nò, yonn bò sid, se chanm ki mache ak chanm yo met apa
 pou Seyè a. Se la prèt k'ap sèvi devan lotèl Seyè a manje ofrann yo mete apa pou Seyè a. Chanm
 sa yo fèt pou rete apa pou Seyè a tou. Se la prèt yo pral met ofrann yo met apa pou Seyè a, ofrann
 grenn jaden osinon bèt yo ofri bay Seyè a pou mande l' padon pou peche osinon pou peye pou sa
 14
 yo te fè ki mal, paske kay sa a apa pou Seyè a. Lè prèt yo fin sèvi nan Tanp lan, anvan yo soti
 nan gwo lakou deyò a, se pou yo ale nan kay sa a pou yo mete rad seremoni yo te gen sou yo pandan
 sèvis la, paske rad sa yo se rad ki apa pou Seyè a. Se pou yo mete lòt rad sou yo anvan yo soti nan
 15
 zòn kote pèp la rasanble a. ¶ Lè nonm lan fin mezire tout anndan Tanp lan, li soti avè m' nan
 16
 pòtay bò solèy leve a, epi li mezire gwo lakou ki fè wonn Tanp lan. Li pran baton pou mezire
 17
 a, li pran mezi fasad ki bay sou solèy leve a. Li jwenn witsankarant (840) pye. Apre sa, li mezire
 18
 bò ki bay sou nò a, li jwenn witsankarant (840) pye tou. Apre sa, li mezire bò ki bay sou sid la,
 19
 li jwenn witsankarant (840) pye. Lèfini, li mezire bò ki bay sou solèy kouche a, li jwenn
 20
 witsankarant (840) pye tou. Konsa, li jwenn miray ki te fè wonn tanp lan ansanm ak gwo lakou
 a te kare kare, witsankarant (840) pye chak bò. Miray la te sèvi pou separe sa ki te apa pou Seyè a
 ak sa yo pa t' mete apa pou Seyè a.

Chapter 43

1
 ¶ Nonm lan mennen m' bò pòtay ki bay sou solèy leve a. 2 Rive la, mwen wè gwo limyè
 prezans Bondye pèp Izrayèl la k'ap soti bò solèy leve a, k'ap vini. Li fè yon gwo bri tankou bri
 3
 lanmè ki move. Gwo limyè sa a te klere toupatou sou latè. Vizyon sa a te parèy ak vizyon mwen
 te wè lè Bondye t'ap vini pou kraze lavil Jerizalèm lan, li te parèy ak vizyon mwen te wè bò larivyè
 4
 Keba a. Mwen lage kò m' fas atè. Gwo limyè a pase nan pòtay solèy leve a, li antre nan Tanp lan.
 5
 Lespri Seyè a leve m' anlè, li fè m' antre nan ti lakou anndan an, kote mwen wè gwo limyè Seyè
 6
 a te plen tout Tanp lan nèt. Nonm lan menm te kanpe bò kote m'. Mwen tandè Seyè a pale avè
 7
 m', antan li anndan tanp lan, li di m' konsa: ¶ -Nonm o! Men fotèy kote m' chita a! Men kote m'ap

poze pye m' yo. Se la mwen pral rete nan mitan moun pèp Izrayèl yo pou tout tan. Ni pèp Izrayèl la ni wa yo p'ap janm fè sèvis pou lòt bondye osinon sou tonm wa yo ankò pou yo derespekte non

⁸ m'. Wa yo te konn moute poto kay yo toupre Tanp mwen an, yo te mete papòt yo toupre papòt Tanp mwen an. Konsa se yon senp ti miray ki te separe yo avè m'. Men, yo lage kò yo nan fè yon bann vye bagay derespektan. Yo trennen non m' nan labou. Se poutèt sa mwen te move sou yo,

⁹ mwen fini ak yo. Koulye a, se pou yo sispann fè sèvis pou lòt bondye, se pou yo wete kadav wa

¹⁰ yo devan je m'! Si yo fè sa, m'a rete nan mitan yo pou tout tan. Seyè a di m' ankò: -Nonm o! Fè moun pèp Izrayèl yo konnen ki jan Tanp lan pral ye. Fè yo kalkile plan Tanp lan byen. Fè yo wont

¹¹ tout vye bagay derespektan yo te konn fè yo. Si yo wont tou sa yo te konn fè yo, w'a esplike yo plan Tanp lan: jan tout bagay ranje ladan l', kote pou yo pase antre, kote pou yo pase soti, fòm l'ap genyen, ansanm ak tout regleman ak lòd ki bay jan pou yo sèvi ladan l'. Kouche tou sa sou papye devan je yo pou yo ka wè jan tout bagay ranje, pou yo ka konfòme yo. Men lòd mwen bay pou

¹² Tanp lan: Tout zòn ki bò Tanp lan sou tèt mòn lan, se yon kote apa nèt pou mwen. Men lòd

¹³ mwen bay sou Tanp lan. ¶ Men dimansyon lotèl la, dapre sistèm mezi nou sèvi pou mezire Tanp lan. Nan pye lotèl la, yon kannal vin pous pwofondè, vin pous lajè, ak yon rebò sou deyò dis pous

¹⁴ wotè. Lotèl la ap fèt an twa pòsyon. Premye pòsyon an chita sou pye a. L'a gen kat pye wotè. Dezyèm pòsyon an va pi gwo, l'a gen sèt pye wotè sou premye pòsyon an, men longè l' ak lajè l' ap yon ti jan pi piti pou l' ka kite yon rebò vin pous chak bò sou tèt premye pòsyon an. Konsa tou, longè ak lajè dènye pòsyon an va yon ti jan pi piti pase dezyèm lan pou l' ka kite yon rebò vin pous

¹⁵ chak bò sou tèt dezyèm pòsyon an. Dènye pòsyon sa a va gen sèt pye wotè tou. Se sou li pou

¹⁶ yo boule ofrann yo. Nan kat kwen yo te gen kat kòn, vin pous wotè. Anwo lotèl la te kare kare,

¹⁷ vin pye chak bò. Pòsyon ki nan mitan an te kare kare tou, vennkat pye chak bò, ak yon ti rebò sou deyò, dis pous wotè. Ti kannal la te vin pous lajè. Macheskalye pou moute devan lotèl la te

¹⁸ sou bò solèy leve. Seyè sèl Mèt la pale avè m', li di m' ankò: -Nonm o! Koute sa m'ap di, men sa mwen bay lòd pou yo fè: Lè n'a fin moute lotèl la, n'a mete l' apa pou mwen. N'a boule vyann bèt n'a ofri pou mwen yo sou li, n'a voye san bèt nou te touye yo sou tout lotèl la. Se konsa n'a mete

¹⁹ lotèl la apa pou mwen. Nan moun Levi yo se prèt ki soti nan fanmi Zadòk la ase ki pou parèt devan m' pou sèvi m'. Men sa mwen menm, Seyè sèl Mèt la, m' mande: N'a bay prèt sa yo yon jenn

²⁰ towò bèf pou yo ofri ban mwen pou mande padon pou peche yo. N'a pran ti gout nan san an, n'a vide l' sou tèt kat kòn yo nan kat kwen lotèl la, sou kat kwen pòsyon mitan lotèl la ak sou tout rebò a. Se konsa n'a wete tout peche ki te antre nan fè lotèl la, n'a mete l' apa nèt pou sèvis mwen.

²¹ N'a pran towò bèf yo ofri ban mwen pou mande padon pou peche a, n'a boule l' yon lòt kote byen

²² lwen andeyò lakou Tanp lan. Nan denmen, n'a pran yon bouk kabrit ki san ankenn enfimite, n'a

ofri l' ban mwen pou mande m' padon pou peche nou yo. N'a mete lotèl la apa pou sèvis mwen ak san li, menm jan yo te fè l' lavèy ak san towò a. ²³ Lè n'a fin fè sa, n'a pran nan bann bèt nou yo yon jenn towò ak yon jenn belye mouton, tou de san ankenn enfimite. ²⁴ N'a mennen yo devan m'. Prèt yo va voye sèl sou yo. Lèfini, y'a boule yo nèt tankou yon ofrann pou mwen. ²⁵ Chak jou, pandan sèt jou, n'a ofri yon kabrit, yon towò ak yon belye mouton ban mwen pou mande padon pou peche nou yo. Se pou tout bèt sa yo san ankenn enfimite. N'a pran yo nan tout bann bèt nou yo. ²⁶ Pandan sèt jou, prèt yo va fè seremoni pou mete lotèl la nan kondisyon pou fè sèvis pou mwen. Se konsa y'a pare l' pou li ka sèvi nan Tanp lan, y'a mete l' apa pou Bondye. ²⁷ Apre sèt jou sa yo, prèt yo va konmanse ofri sou lotèl la lòt ofrann bèt pou yo boule nèt yo ansanm ak ofrann pèp la pou di Bondye mèsi. Se konsa m'a kontan ak nou. Se mwen menm Seyè sèl Mèt la ki di sa.

Chapter 44

¹ ¶ Nonm lan mennen m' bò pòtay ki bay sou bò solèy leve a. Pòtay la te fèmen. ² Seyè a di m' konsa: -Pòtay sa a fèt pou toujou ret fèmen. Piga yo janm louvri l'. Pa janm kite pesonn pase la. Paske se la mwen menm Seyè a, Bondye pèp Izrayèl la, mwen te pase. Se pou l' toujou ret fèmen. ³ Tansèlman, wa a gen dwa vin chita la pou li manje pòsyon pa l' nan manje ofrann lan devan m'. L'a pase nan pòt ki nan gwo pyès nan bout koridò a pou l' antre. Se la l'a soti tou. ⁴ ¶ Apre sa, nonm lan fè m' soti nan pòtay nò a. Rive devan Tanp lan, mwen leve je m' gade, mwen wè Tanp Seyè a te klere nèt ak gwo limyè prezans Seyè a. Mwen lage kò m' atè sou fas. ⁵ Epi Seyè a di m' konsa: -Nonm o! Pran tèt ou! Louvri je ou gade byen. Louvri zòrèy ou tande. Mwen pral ba ou lòd ak regleman pou Tanp mwen an. Gade byen ki moun ki gen dwa antre soti nan Tanp lan, ki moun ki pa gen dwa mete pye yo nan Tanp lan. ⁶ Pale ak bann moun tèt di pèp Izrayèl yo. Di yo, men mesaj Seyè sèl Mèt la voye ba yo. Mwen p'ap tolere ankò tout vye bagay derespektan yo t'ap plede fè yo. ⁷ Yo derespekte Tanp mwen an, yo kite moun lòt nasyon ki pa pote mak kontra mwen an nan kò yo, ni ki pa soti pou fè volonte m', antre nan Tanp lan lè y'ap ofri grès ak san bèt yo touye pou mwen yo. Se konsa yo kase kontra mwen te pase ak yo a. Yo fè yon bann vye bagay derespektan ki pa fè m' plezi. ⁸ Yo derefize pran responsablite fè sèvis pou mwen nan Tanp lan. Yo mete moun lòt nasyon pou fè sèvis pou yo nan Tanp lan. ⁹ Men sa mwen menm, Seyè sèl Mèt la, mwen di: Ankenn moun lòt nasyon ki pa pote mak kontra a nan kò yo, ni ki pa soti pou fè volonte m', pa gen dwa mete pye yo nan Tanp lan, pa menm lòt nasyon k'ap viv nan mitan pèp Izrayèl la. ¹⁰ ¶ Seyè

a di m' ankò: Lè moun pèp Izrayèl yo te vire do ban mwen pou y' al sèvi zidòl yo, moun Levi yo te mete tèt yo ansanm ak pèp la. Se poutèt sa mwen pral pini yo pou sa yo fè a. ¹¹ Y'ap toujou sèvi m' nan Tanp lan. Se yo menm ki pral reskonsab veye pòtay Tanp lan, se yo ki pral fè tout kalite ti travay ki pou fèt nan Tanp lan. Se yo ki pral touye bèt pèp la va vin ofri pou boule nèt nan dife ak pou lòt kalite ofrann. Se yo ki pral la pou sèvi pèp la. ¹² Tansèlman, paske yo te asepte fè sèvis pou pèp la devan zidòl yo, paske, lè yo fè sa, yo pòte pèp la tonbe pi rèd nan fè peche, mwen menm, Seyè sèl Mèt la, mwen fè sèman, m'ap pini yo pou sa yo fè a. ¹³ Yo pa gen dwa pwoche kote m' pou sèvi m' prèt ankò, ni yo pa gen dwa pwoche bò nenpòt bagay yo mete apa pou mwen, ni antre nan kote yo mete apa nèt pou mwen an. Men pinisyon m'ap ba yo pou tout vye bagay derespektan yo te fè a. ¹⁴ M'ap ba yo lòt travay pou yo fè nan tanp lan. M'ap mete yo reskonsab tout kalite travay k'ap fèt nan Tanp lan. ¹⁵ Seyè sèl Mèt la di m' ankò: -Prèt ki fè pati branch fanmi Levi a men ki soti nan fanmi Zadòk la te toujou fè travay yo byen san melanj nan Tanp lan, lè tout rès pèp Izrayèl la menm te vire do ban mwen. Se poutèt sa, se yo menm ase ki ka pwoche vin fè sèvis pou mwen. Se yo menm ki gen dwa kanpe devan m' pou ofri m' grès ak san bèt yo touye pou mwen yo. ¹⁶ Se yo menm ase ki pou antre nan Tanp mwen an, ki pou sèvi devan lotèl mwen an, ki pou fè sèvis pou mwen nan Tanp lan. ¹⁷ ¶ Lè y'a antre nan pòtay ti lakou anndan Tanp lan, y'a mete rad fèt ak twal fin blan. Lè y'ap sèvi nan ti lakou anndan an osinon nan Tanp lan, yo pa fèt pou yo gen anyen fèt ak lenn sou yo. ¹⁸ Konsa, yo p'ap janm swe. Y'ap mare tèt yo ak gwo mouchwa fèt ak twal fin blan. Y'ap mete pantalon fèt ak twal fin blan san sentiwon. ¹⁹ Anvan yo soti nan gwo lakou a, kote pèp la ye a, se pou yo wete rad ki te sou yo lè yo te desèvis nan tanp lan. Y'a kite yo nan pyès yo mete apa pou sa a. Y'a mete lòt rad òdinè sou yo pou rad seremoni yo pa fè malè tonbe sou pèp la. ²⁰ Prèt yo pa gen dwa kale tèt yo, ni se pa pou yo kite cheve yo vin twò long. Se pou yo toujou taye cheve yo. ²¹ Prèt yo pa gen dwa bwè diven jou pou yo antre nan ti lakou anndan an. ²² Prèt yo pa gen dwa marye ak yon vèv osinon yon madanm divòse. Se pou yo marye ak yon jenn fi nan ras moun Izrayèl yo. Tansèlman, y'a gen dwa marye ak vèv yon prèt parèy yo. ²³ Prèt yo va moutre pèp mwen an diferans ki genyen ant sa yo mete apa pou sèvis mwen ak sa yo pa mete apa pou sèvis mwen, ant sa ki nan kondisyon pou fè sèvis pou mwen ak sa ki pa nan kondisyon pou fè sèvis pou mwen. ²⁴ Lè yon moun gen kont ak yon lòt, se prèt yo ki va jije yo dapre sa ki nan lalwa mwen an. Se yo ki pou òganize tout fèt mwen yo dapre lòd ak regleman mwen bay. Jou repo m' yo, yo pa gen dwa fè ankenn travay. ²⁵ Prèt yo pa fèt pou pwoche bò kadav moun mouri pou sa pa mete yo nan kondisyon yo pa ka fè sèvis pou mwen. Tansèlman, yo gen dwa pwoche bò kadav papa yo, manman yo, pitit fi yo, pitit gason yo, frè yo osinon yon sè yo depi sè a pa marye. ²⁶ Apre

l'a fin fè sèvis pou mete l' nan kondisyon ankò pou sèvi m', se pou l' tann sèt jou. ²⁷ Apre sa, jou l'a gen pou l' pran sèvis nan Tanp lan, l'a antre nan ti lakou anndan an, l'a fè ofrann pou mande ²⁸ Bondye padon pou peche l' yo. Se mwen menm, Seyè sèl Mèt la, ki di sa. Prèt yo pa gen ankenn pòsyon tè ki rele yo pa yo. Se mwen menm ki tout yo. Yo p'ap gen anyen nan peyi mwen bay pèp ²⁹ Izrayèl la k'ap rele yo pa yo. Se sèvis y'ap fè pou mwen an ki tout yo. Se yo ki va manje ofrann grenn jaden yo ak vyann bèt yo touye pou mande Bondye padon, ak vyann bèt yo touye pou repare ³⁰ sa pèp la fè ki mal. Tou sa y'a mete apa pou mwen, se pou yo la ye. Tou sa ki pi bon nan premye rekòt nou yo, tou sa n'a pran angajman pou ofri ban mwen, ak tout lòt ofrann n'a fè, se pou prèt yo y'a ye. Chak fwa n'ap kwit pen, se pou nou bay prèt yo premye pen an tankou ofrann, konsa ³¹ benediksyon mwen va chita lakay nou. Prèt yo pa gen dwa manje ankenn bèt, kit se zwezo, kit se lòt bèt, ki mouri mò natirèl osinon bèt nan bwa devore.

Chapter 45

¹ ¶ Lè n'a separe peyi a pou nou bay chak branch fanmi pa yo, se pou nou kite yon pòsyon n'a mete apa nèt pou Seyè a. Pòsyon tè sa a va gen douz kilomèt edmi longè sou dis kilomèt lajè. Tout ² zòn lan va rete apa nèt pou Seyè a. Sou pòsyon tè sa a va gen yon anplasman kare kare pou Tanp lan. L'a gen witsankarant (840) pye chak bò, ak yon espas katrevenkat pye lajè k'ap rete vid san ³ anyen sou li toutotou anplasman an. N'a separe pòsyon tè Seyè a an de moso menm gwosè, chak moso va gen douz kilomèt edmi longè sou senk kilomèt lajè. Se nan premye mwatye a n'a chwazi ⁴ anplasman pou bati Tanp lan, kay yo mete apa nèt pou Seyè a. Se pòsyon sa a n'a kite apa nèt pou Seyè a. Se li ki va pou prèt yo k'ap sèvi kote ki apa pou Bondye a epi k'ap fè sèvis pou Seyè a ⁵ nan Tanp lan. Se sou li y'a bati kay yo. Se la y'a chwazi anplasman pou Tanp lan. Lòt mwatye a ki gen douz kilomèt edmi longè sou senk kilomèt lajè tou va rete pou moun Levi yo k'ap travay ⁶ nan Tanp lan. Se la y'a bati kay pou yo rete. Tou kole ak pòsyon tè Bondye a, n'a wete yon lòt pòsyon ki va gen douz kilomèt edmi longè, de kilomèt edmi lajè. Se la n'a bay pou bati kay kote ⁷ nenpòt moun nan pèp Izrayèl la ka rete. Y'a wete yon pòsyon tè pou wa a tou. L'ap an de moso, yonn sou bò solèy kouche adwat pòsyon tè Seyè a ak pòsyon pou lavil la, ale nan direksyon lanmè ki sèvi fwontyè sou bò solèy kouche a, yon lòt sou bò solèy leve agoch pòsyon tè Seyè a ak pòsyon pou lavil la, ale nan direksyon fwontyè ki sou bò solèy leve a. Antou, l'ap menm gwosè ak pòsyon ⁸ tè yo bay chak branch fanmi pèp Izrayèl la. Se pòsyon tè sa a y'a bay wa a nan peyi Izrayèl la pou rele l' pa l'. Konsa, li p'ap bezwen peze pèp mwen an ankò. L'a kite rès peyi a pou branch fanmi

⁹
 pèp Izrayèl la. ¶ Seyè sèl Mèt la pale ankò, li di konsa: -Nou menm, chèf peyi Izrayèl la, nou fè kont peche nou. Sispann maltrete moun, sispann pran sa ki pa pou nou. Fè sa ki dwat, pa fè lenjistis.

¹⁰
 Pa mete pèp la deyò sou tè ki pou li a. Se mwen menm, Seyè sèl Mèt la, ki di nou sa. Se pou

¹¹
 tout moun sèvi ak bon pwa, ak bon mezi san madou. Mezi efa ki sèvi pou grenn yo fèt pou gen menm valè ak mezi bat ki sèvi pou likid yo. Gwo mezi a se omè a. Sa ban nou yon omè egal dis

¹²
 efa, egal dis bat. Pou pwa yo, n'a gen vin gera egal yon chekèl, swasant chekèl egal yon mina.

¹³
 ¶ Men ki jan n'a mezire ofrann nou yo. Pou ble a, n'a bay yon mezi pou chak swasant mezi nou

¹⁴
 rekòlte. Pou lòj la, n'a bay yon mezi pou chak swasant mezi nou rekòlte. Pou lwil oliv la, n'a bay yon mezi pou chak san mezi lwil pye oliv yo bay. N'a mezire lwil la ak mezi bat la: dis bat pou

¹⁵
 yon omè, osinon pou yon kò. Pou mouton yo, n'a bay yonn pou chak desan (200) mouton yon fanmi genyen. Se pou nou fè ofrann grenn jaden yo, ofrann bèt pou yo boule nèt, ak ofrann bèt pou yo touye pou di mèsi, pou Bondye ka padonnen peche nou yo. Se mwen menm, Seyè sèl Mèt la,

¹⁶
 ki bay lòd sa a. Tout moun nan peyi a fèt pou pote ofrann sa yo bay wa k'ap gouvènen pèp Izrayèl

¹⁷
 la. Se devwa wa a pou li bay bèt pou yo boule nèt, grenn jaden, ak diven pou yo ofri pou tout pèp Izrayèl la pou fèt lalin nouvèl yo, pou jou repo m' yo ak pou tout lòt fèt yo. Se li ki pou bay ofrann pou mande Bondye padon, ofrann grenn jaden, ofrann pou yo boule nèt ak ofrann pou di

¹⁸
 mèsi, pou Bondye ka wete peche pèp Izrayèl la. Seyè sèl Mèt la pale ankò, li di konsa: -Chak premye jou nan premye mwa lanne a, se pou nou touye yon towò bèf san ankenn enfimite bay

¹⁹
 Bondye, pou mete Tanp lan nan kondisyon pou fè sèvis Bondye a. Prèt la va pran ti gout nan san bèt yo ofri pou mande Bondye padon an, l'a mete sou de poto ki bò pòtay Tanp lan, sou kat

²⁰
 kwen lotèl la, sou tout poto pòtay ki mennen nan ti lakou anndan an. Sou setyèm jou mwa a, se pou nou fè menm bagay la ankò pou tout moun ki fè peche san yo pa konnen, osinon san yo pa fè

²¹
 espre. Se konsa n'a kenbe Tanp lan nan kondisyon pou fè sèvis Bondye a. Sou katòzyèm jou premye mwa a, n'a konmanse ak seremoni pou fèt Delivrans lan. Pandan sèt jou, se pou tout moun

²²
 manje pen san ledven. Sou premye jou fèt la, wa a gen pou l' ofri yon towò bèf pou yo touye

²³
 pou mande Bondye padon pou peche l' yo ak pou peche tout pèp la. Chak jou, pandan sèt jou fèt la, se pou l' ofri sèt towò bèf ak sèt belye mouton san ankenn enfimite pou yo boule nèt pou Seyè a. Chak jou, l'a bay yon bouk kabrit pou yo touye pou mande Bondye padon pou peche yo.

²⁴
 Pou chak towò bèf ak pou chak belye mouton yo gen pou yo touye, se pou yo ofri yon demi mezi

²⁵
 grenn jaden ak twaka yon mezi lwil oliv. Pou fèt Joupa yo, ki konmanse nan kenzyèm jou setyèm

mwa a, wa a va fè menm bagay la tou chak jou, pandan sèt jou: ofrann pou mande Bondye padon, ofrann bèt pou boule nèt yo, ofrann grenn jaden yo ak ofrann lwil oliv yo.

Chapter 46

¹ ¶ Seyè sèl Mèt la di ankò: -Se pou yo kenbe pòtay bò solèy leve nan ti lakou anndan an fèmèn
pandan sis jou moun gen dwa travay la. Men, y'a louvri l' jou repo ak jou fèt lalin nouvèl lan. ² Wa
a va soti nan gwo lakou deyò a, l'a antre nan gwo chanm ki nan bout koridò a, l'a kanpe bò poto
pòtay yo. Prèt yo menm va boule ofrann ki pou boule nèt yo. Y'a fè ofrann pou di Bondye mèsì yo.
Se la, bò pòtay la, wa a va mete ajenou pou adore Bondye. Apre sa, l'a soti. Pòtay la va ret louvri
jouk aswè. ³ Chak jou repo m' yo ak chak fèt lalin nouvèl yo, se pou tout pèp la mete ajenou pou
yo adore Seyè a devan pòtay la. ⁴ Chak jou repo m' yo se pou wa a ofri sis ti mouton ak yon belye
mouton san ankenn enfimite, pou yo boule nèt pou Seyè a. ⁵ Avèk chak belye mouton, l'a ofri yon
demi mezi grenn jaden. Avèk chak ti mouton, l'a bay sa l'a vle. Pou chak demi mezi grenn, l'a bay
twaka yon mezi lwil oliv. ⁶ Pou fèt lalin nouvèl lan, l'a ofri yon jenn towò bèf, sis ti mouton ak yon
belye mouton, yo tout san ankenn enfimite. ⁷ Pou chak towò bèf ak pou chak belye mouton, l'a ofri
yon demi mezi grenn jaden. Pou chak ti mouton, l'a ofri sa li vle. Se pou l' ofri twaka yon mezi lwil
oliv pou chak demi mezi grenn li ofri. ⁸ Lè wa a ap antre, se pou l' pase nan gwo chanm ki nan
bout koridò a. Lè l'ap soti, se la pou l' pase tou. ⁹ Pou nenpòt fèt, lè pèp la ap vin adore Seyè a,
moun ki pase nan pòtay nò a pou yo antre va pase nan pòtay sid la pou yo soti. Moun ki pase nan
pòtay sid la pou yo antre va pase nan pòtay nò a pou yo soti. Pesonn p'ap gen dwa pase soti kote li
te pase antre a. Se pou l' pase soti nan pòtay anfas la. ¹⁰ Wa a va kanpe avèk pèp la, l'a antre ansanm
ak yo, l'a soti ansanm ak yo. ¹¹ Pou jou fèt yo ak pou gwo seremoni yo, y'a ofri yon demi mezi
grenn jaden pou chak towò bèf osinon pou chak belye mouton y'ap ofri. Pou chak ti mouton yon
moun ap ofri, l'a bay sa l'a vle. Se pou yo bay twaka yon mezi lwil pou chak demi mezi grenn jaden.
¹² Lè wa a ap fè yon ofrann paske li vle fè l' bay Seyè a, kit se yon ofrann pou yo boule nèt, kit se
yon ofrann pou di Bondye mèsì, y'a louvri pòtay ki bay sou solèy leve nan ti lakou anndan an pou
li. Se pou li fè ofrann li menm jan li fè l' pou jou repo yo. Men, soti li soti, y'a fèmèn pòtay la.
¹³ Seyè a di ankò: -Chak maten, se pou yo ofri yon ti mouton ennan san ankenn enfimite pou yo
boule nèt pou Seyè a. Se pou yo fè ofrann sa a chak jou. ¹⁴ Chak maten, y'a ofri tou senk liv farin
frans ak yon boutèy ka lwil oliv y'a melanje ak farin lan. Se konsa pou yo fè ofrann sa yo bay Seyè

a. Sa se yon lòd ki la pou toutan, ki p'ap janm chanje. ¹⁵ Chak jou nan maten, san sote yon jou, se pou yo ofri ti mouton an, farin lan ak lwil la pou yo boule nèt pou Seyè a. ¹⁶ ¶ Seyè sèl Mèt la bay lòd sa a: -Si wa a fè yonn nan pitit li yo kado yon moso nan tè li a, moso tè sa a ap toujou rete pou pitit la. Se va byen eritaj fanmi li. ¹⁷ Men, si wa a fè yon moun k'ap sèvi l' kado yon moso nan tè li a, tè a ap tounen pou wa a ankò lè lanne rejwisans lan va rive. Paske, tè a se pou li. Se sèlman li menm ak pitit li ki ka mèt tè a pou toutan. ¹⁸ Wa a pa gen dwa mete ankenn moun nan pèp la deyò sou tè yo pou li pran l' pou li. Se nan tè ki rele l' pa l' la pou l' pran pou l' bay pitit li. Konsa, li p'ap mete pesonn deyò sou tè yo pou l' pran tè a pou li. ¹⁹ ¶ Apre sa, nonm lan mennen m' devan pòt ki toupre pòtay sid la, nan ti lakou anndan an. Pòt la te bay sou chanm yo mete apa pou prèt Bondye yo, sou bò nò a. Li moutre m' yon espas nan fon an, sou bò solèy kouche chanm yo. ²⁰ Epi li di m': -Men kote prèt yo va bouyi vyann bèt yo te touye pou mande Bondye padon osinon pou peye pou peche yo fè yo. Se la tou y'a kwit ofrann farin yo. Konsa, tou sa yo te mete apa pou Bondye p'ap janm soti nan gwo lakou a kote yo te ka fè malè rive pèp la. ²¹ Apre sa, li mennen m' nan gwo lakou deyò a, li fè m' pase nan kat kwen lakou a. Te gen yon ti lakou nan chak kwen. ²² Antou, sa te fè kat ti lakou. Chak ti lakou sa yo te gen swasantwit pye longè, karantwit pye lajè. ²³ Yo chak te gen yon miray wòch ki te fèmèn yo. Nan pye miray yo, te gen yon seri fouye dife ki te fè wonn lakou a. ²⁴ Nonm lan di m': -Sa se kizin kote moun k'ap sèvi nan Tanp lan va bouyi vyann bèt pèp la ofri bay Bondye.

Chapter 47

¹ ¶ Apre sa, nonm lan mennen m' tounen devan pòtay pou antre nan Tanp lan. Mwen wè yon dlo k'ap soti anba papòt kay la, li t'ap koule nan direksyon solèy leve. Se nan direksyon sa a pòtay Tanp lan te bay tou. Dlo a t'ap koule desann soti anba fondasyon ki sou bò sid Tanp lan, li pase adwat sou bò sid lotèl la. ² Nonm lan fè m' soti kite lakou Tanp lan. Mwen pase nan pòtay nò a, nou fè yon detou jouk nou rive bò pòtay ki bay sou solèy leve a. Yon ti dlo t'ap koule soti nan kwen sid pòtay la. ³ Nonm lan swiv ti kouran dlo a desann nan direksyon solèy leve. Avèk baton mezi ki te nan men l' lan, li mezire senksan (500) mèt. Rive la, li fè m' janbe dlo a. Dlo a ban m' nan je pye. ⁴ Li mezire yon lòt senksan (500) mèt ankò, li fè m' janbe dlo a, dlo a ban mwen nan jenou. ⁵ Li mezire yon lòt senksan (500) mèt ankò, li fè m' janbe dlo a, dlo a ban mwen nan ren. Li mezire yon lòt senksan (500) mèt. Rive la, se te yon gwo larivyè. Mwen pa t' ka mache janbe l' ankò, dlo

a te twò fon. Se naje pou m' ta naje travèse l'.⁶ Li di m' konsa: -Nonm o! Make tou sa ou wè la a!

Aprè sa, li fè m' tounen sou bò larivyè a.⁷ Lè m' rive la, mwen wè te gen anpil pyebwa sou de bò

larivyè a.⁸ Li di m' konsa: -Dlo sa a ap koule desann, l'ap travèse pòsyon tè ki bay sou solèy leve a, jouk li rive nan Fon Jouden an pou l' tonbe nan Lanmè Mouri a. Lè l'a tonbe nan Lanmè mouri

a, l'ap fè dlo sale a tounen dlo dous.⁹ Tout kote dlo a ap koule pral gen tout kalite bèt ak pwason.

Dlo larivyè a pral fè dlo Lanmè Mouri a tounen dlo dous. Kote dlo a pase, l'ap bay lavi.¹⁰ Depi sous Angedi yo, desann ale jouk sous Eneglayim yo, pral gen moun k'ap peche sou tout bò lanmè a. Yo pral blayi senn yo ak privye yo mete cheche. Pral gen tout kalite pwason an kantite tankou

nan lanmè Mediterane a.¹¹ Men, dlo ki nan lagon yo ak nan ma dlo ki sou rivaj la p'ap dous. Y'ap

rete ak tout gwo sèl yo.¹² Sou de bò larivyè a, tout kalite pyebwa pral pouse pou bay fwi pou moun manje. Fèy yo p'ap janm fennen, yo p'ap janm sispann donner. Y'ap bay yon donn chak mwa, paske dlo k'ap koule soti nan Tanp lan pral wouze yo. Pyebwa yo pral bay fwi pou moun manje. Fèy yo

ap sèvi renmèd.¹³ ¶ Seyè sèl Mèt la di m' ankò: -Men fwontyè peyi nou pral separe pou nou bay douz branch fanmi pèp Izrayèl yo pòsyon pa yo chak. N'a bay branch fanmi Jozèf la de pòsyon.

¹⁴ Se pare tè a pou chak moun jwenn pòsyon pa yo. Mwen te pwomèt zansèt nou yo m'ap ba yo

peyi sa a pou rele yo pa yo.¹⁵ Sou bò nò, fwontyè a va soti depi bò lanmè Mediterane a, l'a desann

nan direksyon solèy leve, l'a pase lavil Etlon, l'a rive lavil Zeda nan Fon Amat la.¹⁶ L'a pase lavil Bewota ak lavil Sibrayim, nan mitan peyi Damas ak peyi Amat. L'a rive lavil Tikon ki sou fwontyè

peyi Oran an.¹⁷ Konsa, fwontyè nò peyi a soti bò lanmè Mediterane, li desann jouk lavil Enon

nan direksyon solèy leve. L'ap bòde ak fwontyè peyi Damas ak peyi Amat.¹⁸ Sou bò solèy leve, fwontyè a ap pati nan yon bòn ki ant peyi Damas la ak peyi Oran an. L'ap desann nan direksyon sid jouk larivyè Jouden an k'ap sèvi fwontyè ant peyi Izrayèl la sou bò solèy kouche ak peyi Galarad

sou bò solèy leve. L'a desann toujou jouk li rive lavil Tama, bò lanmè Mouri a.¹⁹ Sou bò sid la, fwontyè ap pran direksyon sid yon ti kras plis sou solèy kouche, soti lavil Tama rive nan ti bwa bò sous dlo Meriba yo nan peyi Kadès. Rive la, l'ap vire sou nò yon ti jan sou solèy kouche, l'a pran

ravin lan moute rive bò lanmè Mediterane a.²⁰ Sou bò solèy kouche a, se lanmè Mediterane a k'ap

sèvi yo fwontyè moute rive sou yon bòn ki sou bò solèy kouche lavil Amat.²¹ N'a separe tè a bay

chak branch fanmi pèp Izrayèl la pòsyon pa yo.²² N'a separe peyi a bay chak moun sa ki vin pou yo. Moun lòt nasyon k'ap viv nan mitan nou epi ki gen pitit ki fèt la va resevwa moso tè pa yo tou lè n'ap separe peyi a. Se pou nou konsidere yo tankou nenpòt moun pèp Izrayèl k'ap viv nan peyi a. Y'a tire osò pou pòsyon ki pou vin pou yo nan peyi a ansanm ak moun branch fanmi pèp Izrayèl

23
yo. ¶ Chak moun lòt nasyon ki rete nan peyi a va resevwa moso tè pa yo nan pòsyon ki pou branch fanmi moun kote y'ap viv la. Se mwen menm, Seyè sèl Mèt la, ki di sa.

Chapter 48

1 ¶ Sou bò nò, fwontyè peyi a ap soti bò lanmè Mediterane a, l'ap pran direksyon solèy leve jouk lavil Etlon, l'ap pase devan Amat, l'ap rive lavil Enon. L'ap kouri sou fwontyè ant peyi Damas ak peyi Amat. Chak branch fanmi pèp la pral resevwa yon pòsyon tè k'ap soti depi bò lanmè Mediterane sou lizyè solèy kouche a rive sou lizyè solèy leve a. Lè ou konmanse sou lizyè nò a, ou jwenn pòsyon tè branch fanmi Dann lan. 2 Apre li, se pòsyon tè branch fanmi Asè a. 3 Apre li, se pòsyon tè branch fanmi Neftali a. 4 Apre li, se pòsyon tè branch fanmi Manase a. 5 Apre li, se pòsyon tè branch fanmi Efrayim lan. 6 Apre li, se pòsyon tè branch fanmi Woubenn lan. 7 Apre li, se pòsyon tè branch fanmi Jida a. 8 Apre pòsyon Jida a, se va pòsyon mitan y'a mete apa a. L'ap gen douz kilomèt edmi lajè soti nan nò desann nan sid. L'ap menm longè ak pòsyon yo bay branch fanmi yo. L'ap soti sou lizyè solèy leve rive sou lizyè solèy kouche. Se nan mitan pòsyon sa a y'a moute Tanp lan. 9 Nan mitan pòsyon sa a, n'a wete yon moso tè douz kilomèt longè sou dizwit kilomèt lajè mete l' apa nèt pou Seyè a. 10 Y'a bay prèt yo yon moso nan tè yo mete apa pou Seyè a. Moso tè pa yo a va mezire douz kilomèt edmi longè soti solèy leve rive solèy kouche, senk kilomèt lajè soti nan nò rive nan sid. Se nan mitan moso tè sa a y'a moute Tanp Seyè a. 11 Moso tè sa a va rete pou prèt ki soti nan fanmi Zadòk, prèt yo te mete apa pou mwen an, paske se yo menm ki te kenbe fèm nan sèvis mwen, ki pa t' pèdi tèt yo lè rès pèp Izrayèl la te pèdi tèt yo ansanm ak lòt moun branch fanmi Levi yo. 12 Se konsa, y'a ba yo yon moso tè pou kont yo, kole kole ak moso tè yo bay moun Levi yo. Se moso tè sa a ki va rete apa nèt pou Seyè a. 13 Moun Levi yo tou va gen yon moso tè pou yo, sou bò sid pòsyon tè prèt yo. Moso tè sa a tou va mezire douz kilomèt edmi longè soti solèy leve al solèy kouche, sou senk kilomèt lajè soti nan nò rive nan sid. 14 Yo p'ap gen dwa ni vann tè a, ni boukante l' ak lòt moun, ni bay lòt moun li. Se pi bon tè nan tout pèyi a. Yo mete l' apa pou Seyè a, se pou li li ye nèt. 15 Rès tè ki rete nan pòsyon mitan an t'ap mezire douz kilomèt edmi longè, sou de kilomèt edmi lajè. Li menm, yo p'ap mete l' apa pou Seyè a, l'a rete pou sèvis moun lavil la, pou bati kay, pou fè lakou. Y'a bati lavil la dwat nan mitan l'. 16 Lavil la ap kare kare, ak demil senksanven (2520) mètr chak bò. 17 Sou chak bò lavil la va gen yon moso

18
 tè kote pou fè lakou. L'a gen sanven (120) mèl lajè. Lè y'a fin bati lavil la nan ti pòsyon ki sou
 bò sid pòsyon tè yo mete apa pou Seyè a, va rete de gwo moso tè, yonn sou chak bò lavil la. Yo
 chak ap mezire senk kilomèt longè sou de kilomèt edmi lajè. Y'a sèvi jaden pou moun k'ap viv nan
 19
 lavil la. Depi yon moun ap viv nan lavil la, yo pa bezwen konnen nan ki branch fanmi yo moun,
 20
 yo gen dwa travay tè sa a. Konsa, pòsyon mitan yo mete apa a va kare kare, douz kilomèt edmi
 21
 chak bò. Anplasman lavil la va ladan l' tou. Sou bò solèy leve ak sou bò solèy kouche pòsyon
 mitan sa a, kote nou jwenn anplasman Tanp lan, moso tè pou prèt yo ak moun Levi yo ansanm ak
 anplasman lavil la, va rete de gwo pòsyon ki va pou wa a. Konsa, pòsyon wa a va menm valè ak
 22
 pòsyon yo bay chak branch fanmi. Tansèlman, l'ap gen pòsyon tè pou Seyè a nan mitan l'. Pòsyon
 sou bò solèy leve a va rive jouk sou lanmè Mediterane a. L'ap gen pòsyon tè pou branch fanmi Jida
 23
 a sou bò nò, ak pòsyon tè pou branch fanmi Benjamen an sou bò sid pou lizyè. Sou bò sid pòsyon
 mitan sa a, lòt sis branch fanmi pèp la va resewa pòsyon pa yo. L'a soti depi sou fwontyè bò solèy
 leve a rive sou fwontyè bò solèy kouche a, bò lanmè Mediterane a. Lè ou konmanse sou lizyè
 24
 pòsyon mitan an, ou jwenn yon pòsyon tè pou branch fanmi Benjamen an. Apre li, se pòsyon
 25
 tè pou branch fanmi Simeyon an. Apre li, se pòsyon tè pou branch fanmi Isaka a. 26
 Apre li, se
 27
 pòsyon tè pou branch fanmi Zabilon an. Apre li, se pòsyon tè pou branch fanmi Gad la. 28
 Sou
 bò sid pòsyon tè pou branch fanmi Gad la, fwontyè a ap kouri depi lavil Tama, desann nan touf
 bwa ki bò sous dlo Meriba nan peyi Kadès la, moute pase bò fwontyè peyi Lejip la rive lanmè
 29
 Mediterane. Seyè sèl Mèt la di: -Men peyi nou pral separe an pòsyon pou nou bay chak branch
 30
 fanmi pèp Izrayèl la pa yo. Lavil Jerizalèm va fèmen nan mitan kat gwo miray. L'ap gen douz
 pòtay. Chak pòtay va pòte non yonn nan douz branch fanmi pèp Izrayèl la. Miray nò a va mezire
 31
 demil senksanven (2520) mèl longè. ¶ L'a gen twa pòtay: pòtay Woubenn, pòtay Jida, pòtay
 32
 Levi. Miray bò solèy leve a va mezire demil senksanven (2520) mèl longè. L'a gen twa pòtay:
 33
 pòtay Jozèf, pòtay Benjamen, pòtay Dann. Miray sid la va mezire demil senksanven (2520) mèl
 34
 longè. L'a gen twa pòtay: pòtay Simeyon, pòtay Isaka, pòtay Zabilon. Miray bò solèy kouche a
 va mezire demil senksanven (2520) mèl longè. L'a gen twa pòtay: pòtay Gad, pòtay Asè, pòtay
 35
 Neftali. Tout miray la nèt va mezire dimil katreven (10.080) mèl longè antou. Depi jou sa a, y'a
 rele lavil la: Se la Seyè a ye!

Daniel

Chapter 1

¹ ¶ Nan twazyèm lanne rèy Jojakim, wa peyi Jida a, Nèbikadneza, wa lavil Babilòn, vin atake
² lavil Jerizalèm. Li sènen l' toupatou. Seyè a kite l' mete men sou wa Jojakim ak bonkou nan bagay
yo te mete apa pou fè sèvis Bondye nan Tanp lan. Nèbikadneza mennen kèk prizonye avè l' nan
tanp bondye pa l' yo lavil Babilòn. Lèfini li mete bagay li te pran yo nan depo tanp bondye pa l' yo.
³ Wa a te bay Achpenaz, kòmandan nèg konfyans li yo, lòd pou l' te chwazi nan moun pèp Izrayèl
yo te depòte yo kèk jenn gason ki soti nan fanmi wa a, osinon nan fanmi grannèg yo. ⁴ Se pou jenn
mesye sa yo bèl gason san okenn enfimite. Se pou yo gen bon konprann, bon levasyon ak anpil
konesans pou yo ka sèvi nan palè wa a. Achpenaz te gen pou l' te moutre yo jan pou yo li, jan pou
⁵ yo ekri lang moun Babilòn yo. Wa a te bay lòd pou chak jou yo te pran nan manje ak nan diven
yo sèvi sou tab wa a pou ba yo. Se pou yo pase twazan konsa. Apre sa, y'a parèt devan wa a pou
⁶ sèvis li. Nan jenn gason yo te chwazi yo te gen kat ki te soti nan branch fanmi Jida: se te Danyèl,
⁷ Ananya, Michayèl ak Azarya. Kòmandan nèg konfyans wa yo te chanje non ti mesye yo. Li te
⁸ rele Danyèl Beltechaza, Ananya Chadrak, Michayèl Mechak, Azarya Abèdnego. ¶ Danyèl te pran
desizyon nan kè l' pou l' pa t' manyen ni manje ni diven yo sèvi nan palè wa a pou l' te ka toujou
nan kondisyon pou l' sèvi Bondye l'. Se konsa, li al jwenn kòmandan nèg konfyans wa a, li mande
⁹ l' pèmision pou l' pa blije manje manje sa yo. Bondye fè Achpenaz, kòmandan nèg konfyans wa
¹⁰ a, te renmen Danyèl, san l' te ale avè l'. Men, Achpenaz di Danyèl konsa: -Mwen pè wa a, mèt
mwen an. Se wa a menm ki deside sa pou n' manje ak sa pou n' bwè. Si nou pa anfòm tankou lòt
¹¹ jenn gason menm laj avè nou yo, nou ka lakòz wa a touye m'. Lè sa a, Danyèl al jwenn gad
¹² kòmandan an te mete reskonsab li ansanm ak Ananya, Michayèl ak Azarya. Li di l': -Pandan
¹³ dis jou ban nou legim ase pou n' manje ak dlo pou nou bwè. Apre sa, w'a wè ki jan nou ye devan
¹⁴ lòt jenn gason yo k'ap manje manje wa a. Lè sa a, w'a fè sa ou vle avè nou, dapre sa w'a wè. Gad
¹⁵ la dakò pou l' ba yo yon chans pandan dis jou. Apre dis jou yo, figi ti mesye yo te pi fre, yo te
¹⁶ pi anfòm pase jenn gason ki te manje manje wa a. Depi lè sa a, gad la pa t' ba yo manje ak diven
¹⁷ wa a te bay pou yo a, li ba yo legim pito. ¶ Bondye bay kat jenn gason sa yo konesans, lespri
ak bon konprann pou yo te ka li tout kalite liv. Lèfini, li bay Danyèl don pou l' te konprann sans

18
 tout kalite vizyon ak tout kalite rèv. Apre tan wa a te fikse a fin pase, Achpenaz mennen tout
 19
 jenn gason yo bay wa Nèbikadneza. Wa a pale ak yo tout. Nan mitan tout jenn gason yo li pa t'
 jwenn tankou Danyèl, Ananya, Michayèl ak Azarya. Se konsa yo rete nan palè a pou sèvi wa a.
 20
 Lè wa a mande yo konsèy pou nenpòt pwoblèm ki mande konesans ak lespri, li wè jenn gason
 21
 sa yo te konnen dis fwa plis pase tout lòt divinò ak moun ki li zetwal nan tout peyi a. Se konsa,
 Danyèl rete nan palè a jouk lè wa Siris antre lavil Babilòn.

Chapter 2

1
 ¶ Wa Nèbikadneza t'ap mache sou dezan depi li t'ap gouvènen, lè li fè divès rèv. Sa te boulvèse
 2
 lespri l' anpil. Li pa t' ka dòmi. Li fè chache divinò, moun ki li zetwal, moun ki fè cham ak nèg
 3
 save pou yo vin esplike wa a rèv li fè yo. Lè yo rive, yo kanpe devan wa a. Wa a di yo konsa:
 4
 -Mwen fè yon rèv k'ap boulvèse m' anpil. Mwen ta renmen nou fè m' konnen sa li vle di. Mesye
 yo reponn wa a nan lang arameyen. Yo di l' konsa: -Se pou wa a viv pou tout tan! Se sèvitè ou nou
 5
 ye. Rakonte nou rèv la, n'a esplike ou sa l' vle di. Wa a reponn, li di mesye yo: -Mwen deside se
 nou ki pou rakonte m' rèv mwen te fè a, lèfini, pou nou fè m' konnen sa li vle di. Si nou pa kapab,
 6
 m'ap fè yo depatcha nou, m'ap fè yo kraze kay nou ra pye tè. Men, si nou rakonte m' rèv mwen
 te fè a, si nou fè m' konnen sa li vle di, m'ap fè nou kado anpil bagay. M'ap fè bèl bagay pou nou.
 7
 Annou wè. Rakonte m' rèv la. Di m' sa li vle di. Mesye yo reponn wa a yon dezyèm fwa: -Si
 8
 monwa ta vle rakonte nou rèv la, n'a fè l' konnen sa li vle di. Wa a di: -Mwen sèten nou soti pou
 9
 n' fè lè, paske nou konnen mwen fin deside si nou pa rakonte m' rèv la, m'ap fè nou tout pase
 menm jan an. Nou mete tèt ansanm pou nou ban m' manti, paske nou kwè yon lè sa va chanje. Se
 10
 nou ki pou rakonte m' rèv mwen te fè a. Lè sa a, m'a konnen nou ka di m' sa rèv la vle di. Nèg
 save yo reponn wa a, yo di l' konsa: -Pa gen pesonn sou tout latè ki ka fè wa a konnen sa l'ap mande
 la a. Se poutèt sa, pa janm gen wa, li te mèt gran kou l' gran, li te mèt gen pouvwa pase sa n' pa
 11
 konnen, ki ka mande yon majisyen, yon moun ki li zetwal osinon yon nèg save bagay konsa. Sa
 monwa ap mande la a se yon bagay ki difisil anpil. Pa gen moun sou latè ki ka fè l' pou ou. Se
 12
 bondye yo ase ki ka fè sa. Men, bondye yo pa rete nan mitan moun. Lè wa a tandè sa, li move.
 13
 Li fè yon sèl kòlè, li bay lòd touye dènye nèg save ki lavil Babilòn. Se konsa yo fè tout moun

nan peyi a konnen yo tapral touye tout nèg save yo. Y' al chache Danyèl ak zanmi l' yo pou touye
¹⁴ yo tou. ¶ Lè sa a, Danyèl al jwenn Ajòk, kòmandan gad palè wa a ki t'ap pase pou li al touye
nèg save yo. Li pran san li pou l' pale byen avè l'.¹⁵ Li di Ajòk, ofisye wa a: -Poukisa wa a bay
lòd sevè sa a? Ajòk rakonte Danyèl sa ki pase.¹⁶ Danyèl al mande wa a pou li ba li yon dèlè pou
l' ka fè wa a konnen sa rèv la vle di.¹⁷ Apre sa, Danyèl al lakay li, epi li di Ananya, Michayèl ak
Azarya, zanmi l' yo, sa ki genyen.¹⁸ Li mande pou yo lapriyè Bondye ki nan syèl la pou li gen
pitye pou yo, pou li fè yo konprann rèv la, konsa yo p'ap touye ni yo menm ni lòt nèg save lavil
Babilòn yo.¹⁹ Menm jou lannwit sa a, Bondye fè Danyèl konprann rèv la nan yon vizyon. Lè sa
a, Danyèl fè lwanj Bondye ki nan syèl la.²⁰ Li di: -benediksyon pou Bondye pou tout tan tout tan.
Se li ki gen tout konesans, se li ki gen tout fòs.²¹ Li kontwole sezon yo ak lè pou chak bagay rive.
Se li ki desann wa yo, se li ki moute wa yo. Se li ki bay nèg save yo bon konprann ak nèg lespri yo
konesans.²² Se li ki fè moun konnen tout sekrè ki kache. Li konnen tou sa ki nan fènwa. Limyè
klere kote l' pase.²³ Bondye zansèt mwen yo, m'ap fè lwanj ou, m'ap di ou mèsì paske ou ban m'
fòs ak bon konprann. Ou fè m' konnen sa nou te mande ou la, ou fè nou konnen sa ki t'ap boulvèse
wa a.²⁴ ¶ Lamenm, Danyèl al jwenn Ajòk, nonm wa a te bay lòd al touye tout nèg save lavil
Babilòn yo. Li di l' konsa: -Pa touye nèg save lavil Babilòn yo. Mennen m' bò kote wa a, m'a di l'
sa rèv li te fè a vle di.²⁵ Ajòk prese mennen Danyèl bay wa a. Epi li di: -Monwa, mwen jwenn
yon nonm nan jwif yo te depòte yo ki ka di ou sa rèv ou te fè a vle di.²⁶ Wa a di Danyèl yo te rele
Beltechaza a: -Eske ou ka di m' rèv mwen te fè a? Eske ou ka fè m' konnen sa l' vle di?²⁷ Danyèl
reponn: -Monwa, pa gen nèg save, pa gen divinò, pa gen majisyen, ata moun ki konn li zetwal, ki
ka fè ou konnen sa.²⁸ Men, gen yon Bondye nan syèl la ki devwale tout sekrè ki kache. Se li k'ap
fè ou konnen sa ki gen pou rive pita. Men rèv ou te fè a, men vizyon ou te wè pandan ou t'ap dòmi
an.²⁹ Lè sa a, monwa t'ap dòmi, tèt ou pran travay sou sa ki gen pou rive pita. Epi Bondye ki
devwale tout sekrè fè ou konnen sa ki pral rive.³⁰ Konnen byen, monwa, se pa paske mwen gen
plis konprann pase tout moun ki fè m' rive konnen sekrè sa a. Men, se pou wa a ka rive konnen
sans rèv li te fè a, pou l' ka konprann tout lide sa yo ki t'ap travay nan tèt li a.³¹ ¶ Monwa, ou fè
yon vizyon. Ou wè yon gwo estati byen wo kanpe devan ou. Li te klere kou sa m' pa konnen. Bagay
pou fè moun pè anpil.³² Tèt li te fèt an lò, lestonmak li ak de bra l' yo te fèt an ajan, vant li ak de
kwis li yo te fèt an kwiv,³³ de janm li yo te fèt an fè, pye l' yo menm te mwatye an fè, mwatye an

34
tè krich. Antan ou t'ap gade l' konsa, yon wòch pran woule desann soti kote l' soti a, san se pa pesonn ki voye l', li vin frape estati a nan pye l' yo ki te fèt mwaye an fè mwaye an tè krich, li

35
kraze yo an miyèt moso. Lamenn, fè, tè krich, kwiv, ajan, lò tonbe atè, yo tounen pousyè tankou pousyè sou glasi nan sezon chalè. Yon van soufle, li pote yo ale, li pa kite yon ti remak. Men, wòch ki te frape estati a pran grandi, li grandi, li grandi jouk li tounen yon gwo mòn ki kouvri tout latè.

36
Sa se rèv ou te fè a. Koulye a, monwa, mwen pral fè ou konnen sa li vle di. 37
Monwa, se ou ki pi gran pase tout wa. Se Bondye nan syèl la ki mete ou wa, li ba ou pouvwa, li ba ou fòs, li fè moun

38
fè lwanj ou. Li mete ou chèf pou ou gouvènè tout moun ki rete sou latè, pou ou gouvènè ata

39
zannimo ak zwazo. Se ou menm ki tèt an lò a. Apre ou, va gen yon lòt pèp k'ap pran gouvènman an. Men, gouvènman wa li a p'ap ka wè devan pa ou la. Konsa tou apre sa, va gen yon twazyèm pèp k'ap pran gouvènman an ankò. Se va tankou kwiv devan lò ou la. Li menm tou, l'ap donminen

40
sou tout latè. Apre sa ankò, va gen yon katyèm pèp k'ap pran gouvènman an. L'ap di kou fè. L'ap kraze brize. Menm jan fè kraze tout bagay, se konsa l'ap kraze lòt nasyon yo, l'ap fè yo tounen

41
pousyè. Ou te wè tou de pye yo ak tout zòtèy yo te mwaye an fè mwaye an tè krich. Sa vle di, ape gen divizyon nan dènye gouvènman an. L'ap yon ti jan solid tankou fè, menm jan ou te wè fè

42
melanje ak tè krich la. Zòtèy yo tou te mwaye fè, mwaye tè krich. Sa vle di, yon pòsyon nan

43
gouvènman sa a pral gen fòs, yon lòt pòsyon pral fèb. Ou te wè fè a te melanje ak tè krich la, men yo pa t' pran. Konsa tou, chèf gouvènman sa yo pral seye mete tèt yo ansanm. Y'ap fè de fanmi

44
yo marye yonn ak lòt. Men, sa p'ap mache. Nan rèv dènye chèf sa yo, Bondye nan syèl la pral fè yon lòt chèf parèt, l'ap pran gouvènman an nan men yo pou tout tan. Li p'ap janm pase yon lòt

45
li. Men, l'ap kraze tout lòt pèp yo, l'ap detwi yo. Li menm l'ap kanpe la pou tout tan. Ou te wè ki jan yon wòch te pran desann soti kote l' soti a, san se pa pesonn ki voye l', epi li kraze gwo estati ki te fèt an fè, kwiv, tè krich, ajan ak lò a, pa vre? Bondye ki gen anpil pouvwa a fè monwa konnen

46
sa ki gen pou rive nan tan k'ap vini an. Rèv ou te fè a klè. Sans mwen fè ou konnen an sèten. ¶
Lè sa a, wa Nèbikadneza tonbe ajenou, li bese tèt li jouk atè devan Danyèl, epi li bay lòd pou yo

47
fè ofrann bèt pou touye ak lòt ofrann ba li. Wa a di Danyèl konsa: -Se vre wi! Bondye ou la gen plis pouvwa pase tout lòt bondye yo. Se li ki chèf tout wa, se li menm ki fè moun konnen sekre ki

48
kache, depi ou te ka fè m' konprann sans rèv mwen te fè a. Wa a mete Danyèl nan yon gwo pozisyon, li fè l' kado anpil bèl bagay, li nonmen l' gouvènè pwovens Babilòn lan, li mete l' sèl chèf

49
sou tout nèg save lavil Babilòn yo. Danyèl mande wa a pou li mete Chadrak, Mechak ak Abèdnego reskonsab òganize travay gouvènman an nan pwovens Babilòn lan. Danyèl menm te rete nan palè wa a.

Chapter 3

¹ ¶ Wa Nèbikadneza te fè fè yon gwo estati lò. Estati a te gen katrevendis pye wotè ak nèf pye lajè. Li fè yo mete l' kanpe nan mitan plenn Doura a, nan pwovens Babilòn lan. ² Lèfini, wa a bay lòd pou tout otorite yo: prefè, kòmandan, gouvènè, komisè, prepoze, jij, majistra ansanm ak tout lòt chèf pwovens yo, reyini pou y'a l' nan premye seremoni y'ap fè pou mete estati lò wa a te fè fè a an sèvis. ³ Se konsa, tout otorite yo te reyini pou gwo fèt premye seremoni an. Yo te kanpe devan estati wa a te fè fè a. ⁴ Yonn nan moun ki te konn fè piblikasyon yo pran pale byen fò, li di: -Nou menm moun tout nasyon, moun tout ras ki pale tout kalite lang, men lòd yo ban nou. ⁵ Talè konsa nou pral tandè yo kònen twonpèt. Apre sa, yo pral jwe fif, bandjo, gita. Lèfini, yo pral jwe tout lòt enstriman mizik yo ansanm. Lè mizik la konmanse, se pou nou mete ajenou devan estati lò wa Nèbikadneza te fè fè a. Se pou nou adore l'. ⁶ Tout moun ki refize mete ajenou devan estati a pou adore l', y'ap pran l' al lage tou vivan anndan yon gwo fou tou limen. ⁷ Se konsa, tandè moun yo tandè twonpèt la ak tout lòt enstriman yo, yo tonbe ajenou devan estati lò wa Nèbikadneza te fè fè a, yo adore l'. Te gen moun tout nasyon ki soti nan tout ras, epi ki pale tout kalite lang. ⁸ ¶ Lè sa a, gen kèk moun lavil Babilòn ki pwofite al denonse jwif yo. ⁹ Yo di wa Nèbikadneza konsa: -Se pou wa a viv pou tout tan! ¹⁰ Monwa, ou fè pibliye yon lòd ki mande pou tout moun mete ajenou, pou yo adore estati lò a, lè y'a tandè twonpèt ak tout lòt enstriman mizik yo ap jwe. ¹¹ Si yon moun pa mete ajenou pou adore estati a, se pou yo lage l' tout vivan nan gwo fou tou limen an. ¹² Enben! Gen twa jwif ou te mete reskonsab pwovens Babilòn lan. Se Chadrak, Mechak ak Abèdnego. Mesye sa yo pa okipe lòd ou bay la, monwa. Yo pa adore bondye ou la. Yo pa mete ajenou devan estati lò ou te fè fè a. ¹³ Lè Nèbikadneza tandè sa, li move anpil, li fè gwo kòlè, li bay lòd pou yo mennen Chadrak, Mechak ak Abèdnego ba li. Lamenm, yo mennen twa mesye yo devan wa a. ¹⁴ Wa a di yo konsa: -Chadrak, Mechak ak Abèdnego, èske se vre nou derefize adore bondye mwen yo, nou derefize mete ajenou devan estati lò mwen te fè fè a? ¹⁵ Bon, koulye a, tandè n'a tandè twonpèt yo ak lòt enstriman mizik yo ap jwe, se pou nou mete ajenou pou n' adore estati mwen fè fè a. Si nou pa fè sa, y'ap jete nou nan gwo fou tou limen an. Pa gen bondye ki pou delivre nou anba men m'. ¹⁶ Chadrak, Mechak ak Abèdnego reponn, yo di wa Nèbikadneza konsa: -Monwa, nou p'ap eseye defann tèt nou. ¹⁷ Si Bondye n'ap sèvi a ka wete nou nan gwo fou tou limen an, si li ka delivre nou tou anba men ou, l'ap fè l'. ¹⁸ Men, menm si li pa vin delivre nou, monwa, nou tou di ou nou p'ap

adore bondye pa ou yo, ni nou p'ap mete ajenou devan estati lò ou te fè fè a. ¶ Lè wa Nèbikadneza¹⁹
tande pawòl sa yo, li fè yon sèl kolè, li move sou Chadrak, Mechak ak Abèdnego. Li bay lòd pou
yo chofe fou a sèt fwa plis pase jan yo te konn fè l' la. ¶ Lèfini, li mande pou kèk sòlda ki pi²⁰
gwonèg nan lame li a vin mare Chadrak, Mechak ak Abèdnego byen mare, apre sa pou lage yo jete
nan gwo fou tou limen an. ¶ Se konsa yo pran mesye yo, yo mare yo byen mare, yo jete yo nan²¹
gwo fou tou limen an ak tout rad sou yo, soulye nan pye yo ak gwo mouchwa mare tèt yo. ¶ Lòd²²
wa a te bay la te sevè, kifè yo te chofe fou a anpil anpil. Se konsa flannm dife ki t'ap soti nan fwa a
boule gad ki t'ap jete mesye yo nan dife a. Yo mouri. ¶ Twa mesye yo menm, Chadrak, Mechak²³
ak Abèdnego, tonbe tou mare nan gwo fou tou limen an. ¶ Apre sa, wa Nèbikadneza rete konsa²⁴
li leve voup, tankou yon moun ki sezi. Li mande moun ki te avè l' yo: -Eske se pa t' twa moun tou
mare nou te lage nan gwo fou tou limen an? Yo reponn li: -Se sa wi, monwa! ¶ Wa a di yo ankò:²⁵
-Ki jan fè se kat moun mwen wè k'ap mache nan dife a? Yo yonn pa mare. Dife a pa fè yo anyen.
Katriyèm moun lan menm sanble yon pitit bondye yo. ¶ Wa Nèbikadneza pwoche bò pòt gwo²⁶
fou a epi li rele: -Chadrak! Mechak! Abèdnego! Sèvitè Bondye ki nan syèl la! Soti vin jwenn mwen!
Epi mesye yo mache soti nan dife a. ¶ Tout gwo zotobre yo: prefè, kòmandan, gouvènè ansanm²⁷
ak tout lòt chèf yo sanble pou yo wè twa mesye yo. Dife a pa t' fè kò yo anyen. Yon branch cheve
nan tèt yo pa t' boule, rad sou yo pa te menm flambe. Pa t' gen okenn lafimen sou yo. ¶ Wa a di²⁸
konsa: -Lwanj pou Bondye Chadrak, Mechak ak Abèdnego a! Li voye zanj li delivre sèvitè l' yo
ki te mete konfyans yo nan li. Yo te derefize obeyi lòd mwen. Yo te pito mouri pase pou yo ta mete²⁹
ajenou pou adore yon bondye ki pa bondye pa yo a. ¶ Koulye a, men lòd mwen bay pou tout pèp,
moun tout peyi ak moun tout ras ki pale lòt lang yo: si yonn nan nou pale Bondye Chadrak, Mechak
ak Abèdnego a mal, se pou yo depatcha l'. Lèfini, se pou yo kraze kay li nèt mete atè. Paske pa gen
lòt bondye ki ka delivre moun konsa. ¶ Wa a moute Chadrak, Mechak ak Abèdnego grad nan³⁰
pwovens Babilòn lan.

Chapter 4

¶ Men mesaj wa Nèbikadneza voye bay tout pèp, moun tout ras nan tout peyi ki pale lòt lang¹
toupatou sou latè: -Gwo bonjou ak anpil kè poze pou nou tout. ¶ Se yon plezi pou mwen pou m' fè²
nou konnen mirak ak bèl bagay Bondye ki anwo nan syèl la fè pou mwen. ¶ Bèl bagay li fè yo pa³

piti! Mirak li fè yo se gwo zafè! Bondye ap gouvènen pou tout tan. Otorite l' la la jouk sa kaba nèt.

4

¶ Mwen menm, Nèbikadneza, mwen t'ap viv alèz lakay mwen. Tout zafè m' t'ap mache byen nan

palè a. ⁵ Men, mwen fè yon rèv ki boulvèse m' anpil. Antan m' t'ap dòmi, yon bann vye lide t'ap

travay nan tèt mwen, epi mwen te fè yon vizyon ki t'ap trakase tèt mwen. ⁶ Mwen bay lòd pou yo

fè chache tout nèg save ki nan lavil Babilòn pou yo vin ban m' esplikasyon rèv la. ⁷ Dènye majisyen, dènye moun ki li zetwal, dènye divinò ak dènye nèg save vini. Mwen rakonte yo rèv la, men yo pa

t' ka esplike m' sa li vle di. ⁸ Apre sa, Danyèl vini devan mwen. Yo te ba li yon lòt non dapre non bondye mwen an: Yo te rele l' Beltechaza. Li gen lespri bondye yo nan li. Mwen rakonte l' rèv

mwen te fè a. ⁹ Mwen di l': Beltechaza, ou menm ki chèf majisyen yo, mwen konnen ou gen lespri bondye yo nan ou, kifè pa gen mistè ou pa konprann. Men sa mwen te wè nan rèv mwen te fè a.

Di m' kisa li vle di: ¹⁰ Antan mwen t'ap dòmi, mwen fè yon vizyon: Mwen wè yon gwo pyebwa

byen kanpe nan mitan latè. ¹¹ Pyebwa a grandi, li grandi jouk tèt li rive nan syèl. Toupatou sou

latè moun te ka wè l'. ¹² Fèy li yo te bèl. Li te chaje ak donn. Te gen kont pou tout moun manje. Li te bay gwo lonbray pou bèt nan bwa yo pare solèy. Zwezo te fè nich nan tout branch li yo. Li te

bay manje pou tout kalite bèt ak pou tout moun. ¹³ Nan dòmi an, antan mwen t'ap kalkile sou rèv

la, mwen wè yon zanj Bondye soti nan syèl la desann. Se te yonn nan zanj gadyen yo. ¹⁴ Li pale byen fò, li di konsa: Koupe pyebwa a met atè. Debranche l' nèt. Rache tout fèy li yo. Gaye tout

donn li yo. Fè tout bèt soti anba lonbraj li. Fè tout zwezo vole kite branch li yo. ¹⁵ Men, kite yon gwo chouk ak tout rasin li nan tè. Mare l' ak chenn fèt an fè ak kwiv. Kite l' la konsa nan mitan zèb yo. Se pou lawouze tonbe sou nonm sa a. Se pou l' manje zèb nan savann tankou bèt nan bwa.

¹⁶ Pandan sètan, li p'ap gen lespri tankou tout moun. L'ap san konprann tankou yon bèt. ¹⁷ Se desizyon sa a zanj gadyen yo pran. Se jijman sa a zanj Bondye yo bay. Se pou tout moun sou latè konnen Bondye ki nan syèl la gen pouvwa sou tout chèf. Li bay moun li vle pouvwa pou yo

gouvènen. Li pran moun ki pi ba a, li fè l' moute! ¹⁸ Men rèv mwen menm, wa Nèbikadneza, mwen te fè a. Koulye a, ou menm Beltechaza, esplike m' sa li vle di. Pa gen yonn nan tout nèg save peyi m' lan ki te ka fè m' konnen sans rèv la. Men ou menm, ou kapab, paske lespri bondye yo nan ou.

¹⁹ ¶ Lè sa a, Danyèl ki te rele Beltechaza tou, rete yon bon ti tan li pa di anyen, paske tèt li te boulvèse. Wa a di l' konsa: -Beltechaza monchè, pa kite rèv la ak esplikasyon l' lan boulvèse tèt ou! Beltechaza reponn: -Monwa, mwen ta swete rèv la ak tout esplikasyon l' lan pa pou ou, men

pou lènmi ou yo, pou moun ki pa vle wè ou yo. ²⁰ Pyebwa ou te wè ki t'ap grandi, ki t'ap gwosi

jouk tèt li rive nan syèl la kifè dènye moun sou latè te ka wè l' la, ²¹ pyebwa ki te gen fèy li yo bèl,

ki te chaje donn kont pou tout moun sou latè te manje, ki te gen bèt nan bwa rete anba lonbray li
ak zwezo ki te fè nich nan tout branch li yo, ²² pyebwa sa a se ou menm, monwa, ki grandi, ki vin

fò. Ou sitèlman grandi ou rive jouk nan syèl la. Ou chèf sou tout latè. ²³ Apre sa, antan wa a t'ap
gade, li wè yon zanj Bondye soti nan syèl la desann, epi ki di: Koupe pyebwa a mete l' atè, detwi
li. Men, kite chouk la nan tè ak tout rasin li yo. Mare l' ak chenn fèt an fè ak kwiv. Lèfini, kite l'
nan mitan zèb yo. Kite lawouze tonbe sou nonm sa a, kite l' viv ak bèt nan bwa yo pandan sètan.

²⁴ Bon, koulye a, men sa rèv la vle di monwa. Men sa Bondye ki anwo nan syèl la di ki pral rive

ou. ²⁵ Yo pral voye ou byen lwen pou ou pa mache sou moun. Ou pral rete ak bèt nan bwa pandan
sètan. Ou pral manje zèb tankou bèf, ou pral dòmi deyò pou lawouze bat ou. Apre sa, w'a rekonèt
se Bondye nan syèl la ki kontwole tout chèf sou latè. Se li menm ki bay moun li vle dwa pou yo

gouvènèn. ²⁶ Zanj yo te di pou yo te kite chouk la ak tout rasin li yo nan tè. Sa vle di w'ap moute

wa ankò lè w'a rekonèt se Bondye nan syèl la k'ap gouvènèn sou tout latè. ²⁷ Se poutèt sa, monwa,
koute konsèy m'ap ba ou. Fè sa ki dwat devan Bondye pou kouvri peche ou yo. Gen pitye pou pòv
malere yo pou kouvri tout mechanste ou yo! Konsa, monwa, w'a ka viv alèz ak kè poze pou lontan

ankò. ²⁸ ¶ Tou sa Danyèl te di a rive wa Nèbikadneza vre. ²⁹ Douz mwa apre sa, wa a t'ap

pwonmennen sou teras palè li a lavil Babilòn, ³⁰ li di konsa: -Gade jan lavil Babilòn lan vin gran
non! Se mwen menm ki bati l' ak fòs kouraj mwen pou l' sèvi m' kapital peyi a, pou fè wè jan mwen

gen pouvwa, jan mwen grannèg. ³¹ Wa a pa t' ankò fèmen bouch li, lè yon vwa rete nan syèl la, li
di: -Wa Nèbikadneza, koute sa m'ap di ou. Depi jòdi a, yo wete pouvwa a nan men ou. Ou pa wa

ankò. ³² Yo p'ap kite ou mache sou moun. Ou pral rete ak bèt nan bwa. Ou pral manje zèb tankou
bèf pandan sètan, jouk w'a rekonèt se Bondye nan syèl la ki kontwole tout chèf sou latè. Se li menm

ki bay moun li vle dwa pou yo gouvènèn. ³³ Lamenn sa pawòl la te di a rive vre. Yo mete wa a
deyò pou l' pa mache sou moun. Li t'ap manje zèb tankou bèf. Lawouze tonbe sou tout kò l'. Cheve

nan tèt li pouse tankou plim malfini, zong li yo vin long tankou grif zwezo. ³⁴ ¶ Wa a di ankò:
-Apre sètan sa yo, mwen menm Nèbikadneza, mwen leve je m' mwen gade syèl la. Bonnanj mwen
vin sou mwen. Mwen di Bondye nan syèl la mèsi, mwen fè lwanj Bondye k'ap viv pou tout tan tout
tan an, mwen rekonèt jan li gen pouvwa. L'ap donminen pou tout tan. Gouvènman li ap la jouk sa

kaba. ³⁵ Li pa pran moun k'ap viv sou latè yo pou anyen. Li fè sa li vle ak lame zanj ki nan syèl
la, ansanm ak tout moun ki sou latè. Pesonn pa ka kenbe tèt avè l'. Pesonn pa ka mande l' kont!

³⁶ Lè bonnanj mwen tounen sou mwen, yo renmèt mwen pouvwa mwen, otorite mwen ak tout bèl
bagay mwen te genyen. Konseye mwen yo ak chèf k'ap sèvi mwen yo voye chache m', yo mete m'

wa ankò. Mwen vin gen plis pouvwa pase anvan. ³⁷ Koulye a, mwen menm Nèbikadneza, m'ap
fè fèt pou wa ki nan syèl la, m'ap fè lwanj pou li, m'ap di jan li gen pouvwa. Tou sa li fè bon. Li pa

fè paspouki pou pesonn. Li konn jan pou l' fè ak moun ki kite lògèy vire tèt yo. L'ap desann kòlèt yo.

Chapter 5

¹ ¶ Yon jou, wa Bèlchaza bay yon gwo resepsyon pou mil moun nan gwo zotobre peyi a. Yo t'ap bwè diven ansanm. ² Antan yo t'ap bwè konsa, Bèlchaza bay lòd pou y' al pran gwo gode fèt an lò ak gode fèt an ajan papa l', Nèbikadneza, te pran nan tanp lavil Jerizalèm lan. Li te fè chache yo pou l' te bwè ladan yo ansanm ak chèf li yo, madanm li yo ak fanm kay li yo. ³ Lamenn, yo pote gode an lò ak gode an ajan yo, epi yo tout yo tanmen bwè ladan yo. ⁴ Yo t'ap bwè diven, yo t'ap fè lwanj bondye pa yo ki fèt an lò, an ajan, an kwiv, an bwa, an fè ak an wòch. ⁵ Yo rete konsa, yo wè yon men moun parèt. Li pran ekri sou miray palè a, kote limyè lanp lan te pi klere a. Wa a wè bout men ki t'ap ekri a. ⁶ Li chanje koulè, li vin pè. Li santi tout kò l' aprale, jenou l' yo pran tranble. ⁷ Li rele byen fò, li mande pou fè chache tout divinò, tout moun ki li zetwal ak tout nèg save ki rete lavil Babilòn yo. Lè yo vini, wa a di yo konsa: -Nenpòt moun ki ka li sa ki ekri la a, lèfini ki ka fè m' konnen sa li vle di, m'ap mete gwo manto wouj la sou li, m'ap pase yon chenn an lò nan kou l'. Apre sa, m'ap ba li twazyèm plas apre m' nan gouvènman m' lan. ⁸ Tout nèg save wa yo vanse. Men, pa t' gen yonn ladan yo ki te ka li sa ki ekri a, ale wè pou yo ta fè l' konnen sa li vle di. ⁹ Wa a vin pi pè toujou, figi l' pèdi koulè. Tout chèf yo menm pa t' konn sa pou yo fè. ¹⁰ ¶ Larenn lan, manman wa a, tande tout pale fò wa a t'ap fè ansanm ak chèf li yo. Li antre nan sal resepsyon an. Li di konsa: -Monwa, mwen mande pou bondye yo ba ou lavi pou lontan ankò! Ou pa bezwen pèdi tèt ou, ou pa bezwen pè. ¹¹ Gen yon moun nan peyi ou la ki gen lespri bondye nan syèl yo nan li. Lè papa ou te la, nèg sa a te moutre jan li gen anpil lespri, anpil konesans ak anpil bon konprann sou li tankou bondye yo. Lè sa a, papa ou, wa Nèbikadneza, te nonmen l' chèf sou tout divinò, tout majisyen, tout moun ki li zetwal ak tout nèg save yo. ¹² Danyèl sa a, papa ou te rele l' Beltechaza. Li te gen yon gwo lespri nan li, anpil konesans ak anpil konprann kifè li te konn esplike rèv ak tout bagay moun pa konprann. Li te jwenn solisyon pou tout pwoblèm. Fè chache Danyèl sa a, l'a fè ou konnen sa tout bagay sa yo vle di. ¹³ Yo mennen Danyèl devan wa a. Wa a di li: -Se ou menm Danyèl, yonn nan jwif wa Nèbikadneza, papa m', te depòte soti nan peyi Jida mennen isit la? ¹⁴ Mwen tande ou gen bondye yo avè ou. Ou se yon nonm ki gen anpil lespri, anpil konesans ak anpil bon konprann. ¹⁵ Yo mennen nèg save ak moun ki li zetwal pou yo li sa ki ekri

16
 la a, lèfini pou yo fè m' konnen sa li vle di. Men yo pa t' kapab. Koulye a, mwen tande ou ka bay espikasyon pou tout bagay moun pa konprann, ou jwenn solisyon pou tout pwoblèm. Si ou ka li sa ki ekri la a, si ou fè m' konnen sa li vle di, m'ap mete gwo manto wouj la sou ou, m'ap pase yon chenn an lò nan kou ou. Lèfini, m'ap ba ou twazyèm plas apre m' nan gouvènman m' lan.

17
 Danyèl reponn wa a: -Ou mèt kenbe kado ou yo pou ou, osinon bay lòt moun yo. Men tout jan,

18
 monwa, m'ap li sa ki ekri a pou ou, lèfini m'ap fè ou konnen sa li vle di. Monwa, Bondye ki anwo nan syèl la te fè papa ou, Nèbikadneza, wa. Li te ba li pouvwa, otorite ak anpil bèl bagay.

19
 Bondye te sitèlman ba li pouvwa, tout pèp, moun tout ras, moun ki pale tout kalite lang te pè l'. Yo te tranble devan l'. Li te touye moun li vle, li te kite moun li vle viv. Li moute moun grad, li

20
 desann moun grad jan li vle. Men, li kite lògèy vire tèt li, li vin mechan anpil, li santi li pa

21
 kanmarad pesonn. Se konsa yo wete l' sou fotèy wa a, li pèdi bèl plas sa a. Yo mete l' deyò, yo voye l' byen lwen, yo pa kite l' mache sou moun. Lespri li tounen tankou lespri yon bèt. Li rete menm kote avèk bourik mawon, li manje zèb tankou bèf, lawouze bat li kou bèt seren. Lèfini, li rekonèt se Bondye ki anwo nan syèl la ki kontwole tout chèf sou latè, se li menm ki bay moun li

22
 vle dwa pou yo gouvènen. Men, ou menm Bèlchaza, pitit li, ou pa t' soumèt devan l', atout ou

23
 te konnen tout bagay sa yo. Ou menm tou, ou kenbe tèt ak Seyè ki nan syèl la, ou fè yo pote veso yo te pran nan tanp li a ba ou. Epi ou menm, chèf ou yo, madanm ou yo ak fanm kay ou yo, nou bwè diven ladan yo. Nou fè lwanj pou bondye fèt an lò, an ajan, an kwiv, an fè, an bwa, an wòch, bondye ki pa ka wè, ki pa ka tande, ki pa konn anyen. Men, monwa, Bondye ki kenbe lavi

24
 ou nan men l' lan, li menm ki kontwole tou sa w'ap fè yo, ou pa fè lwanj li. Se poutèt sa Bondye

25
 voye bout men sa a ekri pawòl sa yo. Men sa ki ekri: Konte. Konte. Peze. Separe. Men sa sa

26
 vle di: Konte: Bondye konte konbe jou depi ou wa, li pral mete yon bout nan sa. Peze: Li mete

27
 ou nan balans, li jwenn ou manke pèz. Separe: yo pral separe peyi ki sou lòd ou a bay moun

28
 29
 Medi yo ak moun Pès yo. Lamenn, wa Bèlchaza bay lòd pou yo mete gwo manto wouj la sou Danyèl, pou yo pase yon chenn an lò nan kou li, lèfini pou yo fè tout moun konnen Danyèl se

30
 twazyèm chèf apre li nan gouvènman peyi kote l' wa a. ¶ Menm jou lannwit sa a, yo touye

31
 Bèlchaza, wa lavil Babilòn lan. Epi, Dariyis, moun peyi Medi a, pran pouvwa a. Dariyis te gen swasanndezan sou tèt li lè sa a.

Chapter 6

¹ ¶ Dariyis deside chwazi sanven (120) prefè li mete chèf nan tout peyi a. ² Lèfini, li chwazi Danyèl ak de lòt moun li mete alatèt prefè yo. Reskonsablite yo se te kontwole travay prefè yo pou yo te ka defann enterè wa a. ³ Danyèl sa a te fè travay li pi byen pase tout lòt gwo chèf ak prefè yo paske li te gen lespri pase yo. Se konsa wa a te fè lide mete l' reskonsab tout peyi a. ⁴ Lè sa a, lòt gwo chèf yo ansanm ak prefè yo t'ap chache yon okazyon pou yo antrave Danyèl nan travay leta a. Men, yo pa t' ka jwenn anyen pou yo repwoche l' sitèlman Danyèl te yon nonm serye nan tou sa l'ap fè. Li pa t' pote ankenn neglijan ni pa t' gen ankenn mank nan travay li. ⁵ Lè sa a yonn di lòt: -Nou pa ka jwenn anyen ki mal nan travay Danyèl ap fè a. Ann chache nan jan l'ap sèvi Bondye l' la. ⁶ ¶ Se konsa yo kouri al jwenn wa a, yo di l' konsa: -Wa Dariyis, nou mande pou bondye yo ba ou lavi pou lontan ankò! ⁷ Tout gwo chèf nan peyi a ansanm ak prefè yo, gouvènè yo, minis yo ak lòt chèf yo, nou tout, nou dakò pou wa a pase yon lòd sevè ki mande pou tout moun lapriyè nan pye wa a ase pandan trant jou. Nenpòt moun ki ta dezobeyi lòd sa a, epi ki ta lapriyè nan pye yon bondye osinon yon lòt moun pandan tan sa a, se pou yo jete l' nan gwo twou lyon yo. ⁸ Monwa, nou mande ou pou fè ekri lòd sa a, lèfini pou ou siyen l'. Konsa, dapre lalwa peyi Medi ak peyi Pès la, yo pa t' ka chanje anyen ladan l', tout moun fèt pou koube devan l'. ⁹ Se konsa, wa Dariyis siyen lòd la. ¹⁰ Lè Danyèl vin konnen wa a te siyen lòd sa a, li al lakay li. Te gen yon chanm anwo sou teras la ak yon fennèt ki bay nan direksyon lavil Jerizalèm. Li moute, li mete ajenou devan fennèt la ki te louvri, li lapriyè Bondye l' jan li te toujou fè, twa fwa pa jou a. ¹¹ ¶ Mesye yo vini, yo wè Danyèl ki t'ap lapriyè nan pye Bondye l' la. ¹² Yo tout al jwenn wa a epi yo di l': -Monwa, èske ou pa t' siyen yon lwa ki te mande pou tout moun lapriyè nan pye ou ase pandan trant jou? Nenpòt moun yo ta jwenn ap lapriyè yon bondye osinon yon lòt moun pandan tan sa a, se pou yo jete l' nan gwo twou lyon an, pa vre? Wa a reponn: -Lòd la bay dapre lalwa peyi Medi ak peyi Pès la ki pa ka chanje. ¹³ Lè sa a, mesye yo di wa a: -Danyèl, yonn nan moun Jida yo te depòte isit yo, pa okipe ou menm, monwa. Li pa respekte lòd ou te bay la. Twa fwa pa jou, l'ap lapriyè lapriyè l'! ¹⁴ Lè wa a tandè sa, sa te fè l' lapenn anpil, li di nan kè l' se pou l' sove Danyèl. Jouk solèy kouche li t'ap chache yon jan pou l' fè kichòy pou Danyèl. ¹⁵ Mesye yo tounen kay wa a ankò, epi yo di l': -Monwa, pa bliye. Dapre lalwa peyi Medi ak peyi Pès, depi wa a fin siyen yon lòd, se fini. ¹⁶ Se konsa, wa a bay lòd pou yo pran Danyèl, pou yo jete l' nan gwo twou kote lyon yo ye a. Li di Danyèl konsa: -Mwen mande pou Bondye w'ap sèvi san dezanpare a delivre ou! ¹⁷ Yo pote yon gwo wòch. Yo mete l' anwo bouch twou a pou fèmen l'. Lèfini, yo mete sele sou li, wa a siyen l' ansanm ak lòt chèf yo. ¹⁸ Konsa, pesonn pa ta ka vin sove Danyèl. ¶ Apre sa, wa a tounen nan palè a. Jou swa sa

a li pa manje, li pa fè chache ankenn nan fanm kay li yo. Li pase nwit lan san l' pa fèmen je l'.
¹⁹ Nan maten, lè bajou kase, wa a leve, li kouri al bò twou lyon an. ²⁰ Lè li rive, li pwoche bò bouch twou a. Kè l' te sere lè li rele Danyèl, li di: -Danyèl, sèvitè Bondye vivan an, èske Bondye
²¹ w'ap sèvi san dezanpare a te rive delivre ou anba lyon yo? Danyèl pale, li di wa a: -Se pou
²² Bondye bay monwa lavi pou lontan ankò! Bondye mwen an voye zanj li, li fèmen bouch lyon yo pou yo pa fè m' anyen. Li fè sa paske li konnen mwen inonsan. Epi ou menm tou, monwa, ou
²³ konnen m' pa fè ou anyen ki mal, pa vre? Wa a te kontan anpil. Li bay lòd pou yo rale Danyèl soti nan twou a mete l' deyò. Lè yo rale msye soti, yo wè lyon yo pa t' grafiyen l' menm, paske li
²⁴ te mete konfyans li nan Bondye l'. Lè sa a, wa a bay lòd pou y' al arete tout moun ki te vin akize Danyèl yo. Li fè jete yo tout nan gwo twou lyon an ansanm ak madanm yo ak pitit yo. Yo pa t'
²⁵ ankò rive atè nan twou a, lyon yo te gen tan vare sou yo, kraze tout zo nan kò yo. ¶ Apre sa, wa Dariyis ekri yon lèt voye bay tout moun sou latè, moun tout peyi, moun tout ras ki pale tout kalite
²⁶ lang. Li di yo: -Mwen mande pou nou viv ak anpil kè poze! Men lòd mwen bay pou tout peyi ki sou zòd mwen: Se pou tout moun gen krentif pou Bondye Danyèl la. Se pou yo respekte l'. Se yon Bondye vivan li ye! Se li menm ki chèf pou tout tan! Gouvènman li p'ap janm tonbe. Pouwa
²⁷ li p'ap janm fini. Li sove, li delivre, li fè bèl bagay ak gwo mirak nan syèl la ak sou latè. Li sove
²⁸ Danyèl, li pa kite lyon yo devore l'! Zafè Danyèl te mache byen pandan tout rèy wa Dariyis ak wa Siris, moun peyi Pès la.

Chapter 7

¹ ¶ Nan menm lanne Bèlchaza te moute wa peyi Babilòn, Danyèl fè yon rèv, li wè yon vizyon antan li t'ap dòmi sou kabann li. Apre sa, li kouche tou sa li te wè nan rèv la sou papyè. Men sa li
² te ekri a: -Jou lannwit sa a, mwen fè yon vizyon. Mwen wè kat gwo van yo t'ap soufle, yo t'ap
³ boulvèse gwo lanmè a. Kat gwo bèt moute soti nan lanmè a, yonn pa t' sanble lòt. ⁴ Premye bèt la te sanble ak yon lyon, men li te gen de gwo zèl tankou malfini. Antan m'ap gade l' konsa, yo rache zèl li yo. Yo leve l', yo fè l' kanpe tankou yon moun sou pa t' dèyè l' yo. Lèfini, yo fè li gen
⁵ lespri tankou moun. Dezyèm bèt la te sanble ak yon lous ki te kanpe panche sou yon bò. Li te gen twa zo kòt nan bouch li. Yon vwa pale avè l', li di l' konsa: -Annou wè! Manje vyann mezi ou
⁶ kapab. Antan m'ap gade toujou, yon lòt bèt parèt. Li te sanble ak yon leyopa, men li te gen kat
⁷ zèl sou do li, tankou zèl zwezo. Li te gen kat tèt tou. Yo te ba li pouvwa sou tout bagay. Antan

m'ap gade toujou nan vizyon mwen t'ap fè jou lannwit sa a, yon katriyèm bèt parèt. Li te sovaj anpil. Depi ou gade l' se pou ou pè. Li te gen anpil fòs avèk gwo dan an fè. Li t'ap manje tou sa ki tonbe anba bouch li, li kraze yo ak dan li, li pilonnen rèz la anba pye l'. Li pa t' sanble menm ak

8
twa lòt bèt ki te parèt anvan l' yo. Li te gen dis kòn. Antan m'ap gade kòn yo konsa, mwen wè yon lòt ti kòn tou piti k'ap pouse nan mitan yo. Li rache twa nan kòn ki te la deja yo. Ti kòn sa a

9
te gen je tankou moun ak yon bouch ki t'ap di tout kalite pawòl awogan pou joure Bondye. ¶ Mwen t'ap gade toujou, mwen wè yo ranje yon bann fotèy. Yon granmoun ki te la depi nan konmansman vin chita sou yonn nan fotèy yo. Rad ki te sou li a te blan kou koton. Cheve nan tèt li te tankou lenn mouton byen pwòp. Fotèy li a te tankou flanm dife, li te moute sou wou ki te

10
tankou chabon dife tou limen. Dife t'ap koule soti nan fotèy la devan li tankou yon larivyè. Te gen mil milye moun la ki t'ap sèvi l'. Te gen dimil milyon moun kanpe la devan l'. Tribinal la te

11
pare pou jijman an. Yo louvri liv yo. Antan mwen t'ap gade, mwen tande vwa ti kòn lan ki t'ap pale byen fò avèk awogans. Antan m'ap gade konsa, yo touye katriyèm bèt la, yo pran kadav li, yo

12
voye l' nan dife a, li boule nèt. Yo wete tout otorite nan men lòt bèt yo, men yo kite yo vivan

13
pou yon ti tan ankò. Nan menm vizyon mwen t'ap fè lannwit lan, mwen wè yon fòm ki te sanble ak yon moun. Li t'ap vini sou tèt nwaj yo nan syèl la. Li pwoche bò granmoun ki te la depi nan

14
konmansman an. Yo prezante l' ba li. Yo ba li baton kòmandan an, yo ba li pouvwa ak otorite pou tout pèp sou latè, pou tout peyi, pou moun tout ras ki pale tout lang sèvi li. L'ap kòmande pou

15
tout tan. Gouvènman li p'ap janm fini. ¶ Mwen menm Danyèl, lè m' wè tout bagay sa yo, tèt

16
mwen te boulvèse. Vizyon yo te fè m' pè anpil. Mwen pwoche bò yonn nan moun ki te kanpe

17
la yo, mwen mande l' pou l' fè m' konprann tout bagay sa yo. Se konsa li esplike m' yo. Li di m'

18
konsa: -Kat gwo bèt sa yo, se kat wa ki gen pou parèt sou latè. Men, moun k'ap viv pou Bondye ki anwo nan syèl la pral resevwa gouvènman an nan men yo. Y'ap kenbe l' pou tout tan tout tan.

19
Aprè sa, mwen te vle konnen plis sou katriyèm bèt la ki pa t' tankou twa premye yo, bèt ki te move anpil la, avèk dan an fè l' yo ak grif an kwiv li yo, bèt ki t'ap manje tou sa ki te tonbe anba

20
bouch li, ki t'ap kraze yo ak dan l', ki t'ap pilonnen rèz yo anba pye l'. Mwen te vle plis esplikasyon sou dis kòn ki te sou tèt li yo ak sou ti kòn ki te parèt apre a epi ki te fè twa nan lòt kòn yo tonbe. Ti kòn sa a te gen je tankou moun ak yon bouch ki t'ap di tout kalite pawòl awogan pou joure

21
Bondye. Li te parèt pi gwo pase tout lòt yo. Antan m'ap gade konsa, mwen wè ti kòn lan pran

22
fè lagè ak tout moun k'ap sèvi Bondye yo. Li fè yo soumèt devan li. Lè sa a, granmoun ki te la depi nan konmansman an parèt. Li rann jijman an favè moun k'ap sèvi Bondye ki anwo nan syèl

23
la. Jou a te rive pou pèp Bondye a te resevwa pouvwa a nan men yo. Men esplikasyon moun

lan te ban mwen: -Katriyèm bèt la, se katriyèm gouvènman ki pral gen sou latè. Li p'ap tankou lòt
 yo. Li pral devore tout moun sou latè, l'ap pilonnen yo anba pye l', l'ap kraze yo. ²⁴ Dis kòn yo, se
 dis wa ki pral alatèt gouvènman sa a. Apre yo, ap gen yon lòt wa ki p'ap tankou lòt yo. L'ap jete
 twa nan wa yo. ²⁵ L'ap pale Bondye ki anwo nan syèl la mal, l'ap malmennen moun k'ap sèvi
 Bondye ki anwo nan syèl la. L'ap fè lide chanje tout fèt ak tout prensip lalwa Bondye a. Pandan
 twazan sis mwa, l'ap kenbe pèp Bondye a anba men l'. ²⁶ Apre sa, tribinal la va reyini pou rann
 jijman an. L'a wete pouvwa a nan men l', l'ap kraze l' nèt, li p'ap janm chèf ankò. ²⁷ Y'ap pran
 pouvwa, otorite ak gouvènman tout gwo peyi ki sou latè yo, y'ap bay pèp k'ap sèvi Bondye ki anwo
 nan syèl la. Pèp sa a ap gouvènen tankou yon wa pou tout tan. Tout chèf sou latè pral sèvi li, y'ap
 obeyi li. ²⁸ Se tou sa li te rakonte m'. Mwen menm Danyèl, mwen te boulvèse anpil, mwen chanje
 koulè. Mwen kenbe tout bagay sa yo nan kè m'.

Chapter 8

¹ ¶ Mwen menm Danyèl, mwen fè yon lòt vizyon ankò apre premye vizyon sa a. Lè sa a, Bèlchaza
 t'ap mache sou twazan depi li te wa. ² Nan vizyon an, mwen wè mwen te lavil Souz, kapital la ki
 nan pwovens Elam lan. Mwen te kanpe bò larivyè Oulayi. ³ Mwen leve je m' gade, mwen wè yon
 belye mouton ki te kanpe bò larivyè a. Li te gen de kòn byen long ki pa t' pouse menm lè. Sa ki te
 pouse apre a te pi long pase premye a. ⁴ Mwen wè belye mouton an t'ap bay kout kòn nan direksyon
 solèy kouche, nan direksyon nò ak nan direksyon sid. Pat gen yon bèt ki te ka kenbe tèt avè l'. Ni
 pa t' gen pesonn pou wete yo anba pat li. Li t'ap fè sa l' pito. Chak lè, li t'ap vin pi awogan. ⁵ Antan
 mwen t'ap chache konprann sa sa te vle di, mwen wè yon bouk kabrit k'ap kouri vin soti bò solèy
 kouche. Li t'ap kouri sitèlman vit, pye l' pa t' touche tè. Li te gen yon sèl gwo kòn nan mitan de je
 l' yo. ⁶ Li mache sou belye mouton mwen te wè kanpe bò larivyè a ak de kòn lan. Li vare sou li ak
 tout fòs. ⁷ Mwen wè l' atake belye mouton an. Li move sou li, li frape l', li kase de kòn li yo. Belye
 mouton an pa t' gen fòs pou kenbe tèt ak li. Bouk kabrit la jete l' atè, li pilonnen l' anba pye l'. Pat
 gen pesonn pou wete belye a anba pat bouk kabrit la. ⁸ Bouk kabrit la konmanse grandi, li vin
 awogan anpil. Lè li fin chita pouvwa li byen chita, gwo kòn li an kase. Kat lòt gwo kòn pouse nan
 plas premye a, yo chak t'ap pwente nan direksyon kat gwo van yo. ⁹ Yon ti kòn pouse sou yonn
 nan kòn sa yo. Li grandi, li mache fè lagè ak moun peyi nan sid la, moun peyi bò solèy leve a ak
 moun peyi ki pi bèl pase tout lòt yo. ¹⁰ Li grandi toujou, jouk li rive atake lame ki nan syèl la,

zetwal yo menm. Li jete kèk ladan yo sou latè, li pilonnen yo anba pye l'.¹¹ Li grandi, li menm rive atake chèf lame ki nan syèl la, li fè yo sispann ofri bèt pou touye pou li. Li fè kraze Tanp yo te mete apa pou li a.¹² Li fè sòlda lame li yo al moute kan yo kote yo te konn ofri bèt pou touye pou Bondye a. Ti kòn lan voye bon relijyon Bondye a jete atè, li te rive nan tou sa l'ap fè.¹³ Apre sa, mwen tandè yon zanj pale ak yon lòt zanj, li di li: -Kilè sa yo bay nan vizyon an va rive? Kilè y'a sispann fè gwo peche sa a nan plas ofrann bèt ki pou fèt chak jou a? Kilè y'a sispann pilonnen lame ki nan syèl la ak tanp Bondye a anba pye yo?¹⁴ Lòt zanj lan reponn: -Se pou nou tann mil sansenkant (1150) jou ankò pase anvan yo rekonmanse ak ofrann bèt pou Bondye yo. Se lè sa a Bondye va rebati tanp li a ankò.¹⁵ ¶ Mwen t'ap chache konprann sa vizyon an te vle di, lè mwen rete konsa mwen wè yon fòm ki te sanble ak yon moun kanpe devan m'.¹⁶ Mwen tandè yon vwa moun ki soti lòt bò larivyè Oulayi a ki t'ap di: -Gabriyèl! Esplike nonm sa a vizyon an non!¹⁷ Gabriyèl pwoche bò kote m' te ye a. Mwen te sitèlman pè mwen tonbe fas atè. Li di m' konsa: -Nonm o! Konprann byen: Vizyon an fè ou konnen ki jan sa pral fini sou latè.¹⁸ Pandan li t'ap pale konsa, mwen pèdi konesans, mwen tonbe fas atè. Men, li ban m' men, li fè m' kanpe sou pye m' ankò.¹⁹ Epi li di: -M'ap fè ou wè sa k'ap rive lè kòlè Bondye a va fin pase. Wi, lè pou tout bagay fini an pral rive.²⁰ Belye mouton ou te wè ak de gwo kòn nan tèt li a, se de wa k'ap gouvènen de peyi, peyi Medi ak peyi Pès.²¹ Bouk kabrit la menm se wa peyi Lagrès la. Gwo kòn ou te wè nan mitan je l' yo se te premye wa a.²² Kat kòn ou wè ki te pouse apre premye kòn lan te kase a, sa vle di gen kat moun ki pral separe peyi a. Yo chak pral gouvènen bò pa yo. Men, peyi a p'ap janm gen menm fòs la ankò.²³ Lè ti wa sa yo va rive nan bout yo, lè y'a fin fè kont peche yo, gen yon wa k'ap parèt, l'ap san respè pou Bondye, l'ap woule tout moun.²⁴ L'ap grandi, l'ap vin fò. Men se pa fòs pa l' menm k'ap sou li. L'ap fè anpil dega. L'a reyisi nan tou sa l'ap fè. L'a kraze anpil gwo chèf ansanm ak anpil moun nan pèp Bondye a.²⁵ L'ap rize anpil. L'a reyisi chak fwa l'ap twonpe moun. L'ap fè lwanj tèt li. San bay avètisman, l'ap detwi anpil moun ki t'ap viv ak kè poze. L'ap atake ata pi gwo chèf la, chèf tout chèf yo. Men li menm, rive yon lè l'ap disparèt, san se pa ankenn moun ki fè l' anyen.²⁶ Vizyon ou te fè pou maten ak aswè yo gen pou rive vre jan yo te esplike ou li a. Men, pa di anyen sou sa, paske l'ap pran yon bon ti tan anvan li rive vre.²⁷ Lè sa a, mwen santi mwen t'ap faya. Mwen pase kèk jou malad. Apre sa, mwen leve, m' al fè travay wa a te ban m' fè a. Men, vizyon an t'ap boulvèse lespri m' toujou, m' pa t' ka konprann li.

Chapter 9

¹ ¶ Lè sa a, wa Dariyis, moun peyi Medi, pitit wa Egzèsès la, t'ap mache sou ennan depi li t'ap
² gouvènen peyi Babilòn. Mwen menm Danyèl, mwen t'ap etidye liv Bondye yo. Mwen t'ap kalkile
sou swasannndizan lavil Jerizalèm te gen pou l' rete kraze a, jan Seyè a te di l' nan bouch pwofèt
³ Jeremi an. Mwen leve je m' nan syèl la pou m' lapriyè Seyè a, Bondye a, ak tout kè m'. Mwen
t'ap kriye nan pye l', mwen te rete san manje, yon rad sak sou mwen. Mwen te chita sou sann dife.
⁴ ¶ Mwen lapriyè nan pye Seyè a, Bondye mwen an. Mwen louvri kè m' ba li, mwen mande l' padon
pou pèp mwen an. Mwen di: -Seyè, Bondye, ou gen gwo pouvwa, tout moun fèt pou gen krentif
pou ou. Ou kenbe pwomès ou, ou pa janm sispann renmen moun ki renmen ou epi ki kenbe
⁵ kòmandman ou yo. Nou peche, nou fè mechanste, nou fè sa ki mal, nou vire do ba ou, nou pa fè
sa ou te mande nou fè, ni sa ou te ban nou lòd fè. ⁶ Nou pa t' koute pwofèt yo, sèvitè ou yo, ki te
pale nan non ou ak wa nou yo, chèf nou yo, zansèt nou yo ak tout pèp nan peyi nou an. ⁷ Ou menm,
Seyè, tou sa ou fè dwat. Men, nou tout moun peyi Jida, moun lavil Jerizalèm, tout moun nan pèp
Izrayèl ou te gaye nan peyi pre ak peyi lwen yo, se wont nou toujou wont sa nou fè, tankou jòdi a,
paske nou pa t' kenbe pawòl nou avè ou. ⁸ Wi, Seyè, se yon wont pou nou tout, wa nou yo, chèf
nou yo, zansèt nou yo, paske nou te fè sa ki mal devan ou. ⁹ Ou menm Seyè, Bondye nou, ou gen
¹⁰ bon kè, ou konn padonnen paske nou menm nou te vire do ba ou. Nou pa t' koute ou, Seyè
¹¹ Bondye nou, pou nou te viv dapre lòd ou te ban nou nan bouch pwofèt yo, sèvitè ou yo. Tout
pèp Izrayèl la nèt pa t' swiv lòd ou. Yo pran chemen kwochi, yo pa koute ou lè ou te pale yo. Se
konsa tout madichon ak tout malè ki te ekri nan lalwa Moyiz, sèvitè ou la, tonbe sou nou, paske
¹² nou te fè sa ki mal devan ou. Ou te fè tou sa ou te di w'ap fè nou ansanm ak chèf ki t'ap gouvènen
nou yo. Ou voye yon sèl malè sou lavil Jerizalèm, malè ki patko janm rive sou latè. ¹³ Jan sa te
ekri nan liv lalwa Moyiz la, tout malè sa a tonbe sou nou. Men, menm apre sa, nou pa t' chache fè
¹⁴ ou plezi, Seyè Bondye nou. Nou pa t' sispann fè sa ki mal pou nou te swiv verite ou la. Wi, Seyè
Bondye nou, ou te pare pou pini nou, ou pini nou vre, paske ou toujou fè sa ki dwat. Se nou ki pa
¹⁵ koute lè ou te pale nou. Koulye a, Seyè Bondye nou, ou te fè pèp ou a soti kite peyi Lejip ak fòs
ponyèt ou. Jouk jounen jòdi a y'ap nonmen non ou pou sa. Men, nou menm nou peche, nou fè sa
¹⁶ ki mal. Seyè, ou te toujou pran defans nou nan tan lontan. Tanpri, pa fache, pa move sou lavil
Jerizalèm ankò. Se mòn pa ou la, se mòn ki apa pou ou a li ye. Tout moun k'ap viv nan peyi tou
kole ak nou yo ap pase ni lavil Jerizalèm ni pèp ou a nan betiz, poutèt peche nou yo ak mechanste

zansèt nou yo te fè.¹⁷ O Bondye papa nou! Tanpri, tande lapriyè sèvitè ou la ap fè nan pye ou. M'ap mande ou, tanpri souple, voye je ou sou tanp ou a ki fin kraze, pou tout moun ka konnen se

Bondye ou ye.¹⁸ O Bondye, pare zòrèy ou pou tande nou! Voye je ou wè jan nou fini! Gade nan ki eta lavil ki pote non ou lan ye! Se pa paske nou fè anyen ki dwat ki fè n'ap lapriyè nan pye ou

konsa. Men, se paske ou gen bon kè anpil.¹⁹ Seyè, koute nou non! Seyè, padonnen nou! Seyè, louvri zòrèy ou! Fè kichòy! Pa mize, pou tout moun ka konnen se Bondye ou ye! Lavil la ansanm

ak pèp la se pou ou yo ye. Se pou yo m'ap lapriyè.²⁰ ¶ Mwen t'ap pale toujou nan lapriyè a, mwen t'ap rekonèt peche m' yo ak peche pèp Izrayèl la, pèp mwen an devan Bondye. Mwen t'ap mande

Seyè a, Bondye mwen an, gras mizèrikòd pou mòn ki apa pou li a.²¹ Wi, mwen t'ap pale toujou nan lapriyè a, lè Gabriyèl, zanj mwen te wè nan premye vizyon an, vole desann kote mwen te ye

a. Se lè yo te konn fè ofrann bèt aswè a.²² Li vini, li pale avè m'. Li di m' konsa: -Danyèl, koulye

a mwen vin la a pou m' ede ou konprann mesaj la.²³ Depi lè ou te fèk konmanse ap lapriyè nan pye Bondye a, li te gen tan reponn ou. Se mesaj sa a mwen vin fè ou konnen. Ou se yon moun

Bondye renmen anpil. Koulye a, louvri zòrèy ou pou ou ka konprann sans vizyon an byen.²⁴ Sèt fwa swasanndezan an, se tan sa a Bondye fikse pou l' delivre pèp li a ansanm ak lavil ki apa pou li a anba peche ak mechanste. Lè lè sa a va rive, l'ap padonnen tout peche. Tout moun pral mache dwat pou tout tan. Konsa, tou sa yo te anonse nan vizyon an ak nan mesaj pwofèt la va rive. Yo

pral mete lotèl la apa pou Bondye ankò.²⁵ Konprann sa byen, louvri zòrèy ou. Depi lè yo te bay lòd pou yo te rebati Jerizalèm lan jouk lè chèf Bondye chwazi a va vini an, sèt fwa sètan pral pase. Yo pral rebati Jerizalèm avèk wout li yo ak miray ranpa li yo. Lavil la pral kanpe pou sèt fwa

swasanndezan, men pandan tout tan sa a, moun pral anba anpil tray.²⁶ Apre sèt fwa swasanndezan sa yo, yo pral touye chèf Bondye te chwazi a san rezon. Yon lòt chèf ap vini sot byen lwen, l'ap detwi lavil la ansanm ak Tanp lan. Tout bagay pral rete konsa, y'ap fini tankou lè gwo dlo desann.

Lè sa a, pral gen lagè ak ravaj jan Bondye te pare l' la.²⁷ Chèf sa a pral siyen yon kontra solid avèk anpil lòt pèp pandan sètan. Men, sou twazan sis mwa l'ap fè yo sispann touye bèt ak fè ofrann pou Bondye. Yo pral mete bagay nou pa ta renmen wè a, bagay k'ap bay gwo lapenn lan chita byen wo nan Tanp lan. L'ap rete la jouk moun ki va mete l' la a va kontre ak bout li, jan Bondye pare sa pou li a.

Chapter 10

¹ ¶ Siris t'ap mache sou twazan depi l' te wa nan peyi Pès lè Bondye fè Danyèl, ki te rele Beltechaza tou, konnen yon mesaj. Se te bon koze sou gwo batay ki gen pou fèt la. Se nan yon

vizyon yo te fè l' konprann mesaj la. ² Lè sa a, mwen menm Danyèl, mwen pase twa senmenn nan gwo lapenn. ³ Mwen pa t' manje ankenn bon ti manje, ni ankenn vyann. Mwen pa t' mete yon gout diven nan bouch moun. Mwen pa t' pase lwil santi bon sou mwen pandan twa senmenn sa yo. ⁴ Sou vennkatriyèm jou premye mwa a nan lanne a, mwen te kanpe bò gwo larivyè Lefrat la. ⁵ Mwen leve je m', mwen wè yon moun ki te gen rad swa sou li ak yon sentiwon fèt ak bon lò mare nan ren l'. ⁶ Kò l' te klere tankou yon wòch poli. Figi l' te tankou zèklè. Je l' yo te klere tankou de moso chabon dife. Bra l' ak janm li yo te tankou kwiv yo te poli. Lè l' pale menm, se tankou si se te yon foul moun ki t'ap pale ansanm. ⁷ Se mwen menm sèlman ki te wè vizyon an. Lòt moun ki te avè m' yo pa t' wè anyen. Men yo te pè, yo te kouri al kache. ⁸ Mwen menm, mwen te rete la pou kont mwen. Mwen t'ap gade gwo vizyon an. Mwen santi m' pa t' gen fòs menm, figi m' te dekonpoze. ⁹ Pa gen moun ki ta ka rekonèt mwen. Lè m' tande vwa li menm, mwen tonbe fas atè, mwen pèdi ¹⁰ konesans. ¶ Apre sa, mwen santi yon men manyen m', li fè m' leve sou pla men m' ak sou jenou m'. M' t'ap tranble toujou. ¹¹ Zanj lan di m' konsa: -Danyèl, ou se yon moun Bondye renmen anpil. Kanpe non! Louvri zòrèy ou pou ou tande sa mwen pral di ou. Se Bondye ki voye m' kote ou. Lè ¹² li fin di m' sa, mwen leve kanpe, men m' t'ap tranble toujou. Li di m' konsa: -Ou pa bezwen pè, Danyèl. Bondye te tande lapriyè ou la depi premye jou ou te pran desizyon soumèt ou devan Bondye ou pou ou te ka rive gen bon konprann. Se poutèt lapriyè ou la mwen vin ba ou repons Bondye a. ¹³ Zanj chèf peyi Pès la te kenbe tèt avè m' pandan venteyen jou. Apre sa, Michèl, yonn nan chèf ¹⁴ zanj Bondye yo, vin pote m' sekou paske mwen te pou kont mwen nan peyi Pès la. Mwen vin fè ou konprann sa ki pral rive pèp ou a nan jou k'ap vini yo. Vizyon an fè ou wè sa ki pral rive jou ¹⁵ sa yo. Lè li di m' sa, m' bese je m' gade atè san m' pa di anyen. ¹⁶ Lè sa a, zanj ki te gen fòm yon moun lan lonje men l', li manyen po bouch mwen. Mwen louvri bouch mwen pale, mwen di ¹⁷ zanj ki te kanpe devan m' lan: -Mèt, vizyon an fè m' pè, m' pèdi tout fòs mwen, kè m' sere! Se moun k'ap sèvi ou mwen ye, mèt. Ki jan mwen ka pale ak ou? M' pa gen fòs ankò, m' pèdi souf ¹⁸ mwen. Zanj ki te gen fòm moun lan manyen m' ankò yo dezyèm fwa. Mwen santi m' refè. ¹⁹ Epi li di m': -Ou pa bezwen pè. Ou se yon moun Bondye renmen anpil. Pa kite anyen fatigue lespri ou, ni fè ou pèdi kouraj ou! Lè li di m' sa, mwen santi mwen vin gen plis fòs. Mwen di li: -Mèt, ou fè ²⁰ m' vin gen fòs. Di m' sa ou gen pou di m' lan non! Lè sa a, li di m': -Ou konnen poukisa mwen vin bò kote ou la? Se pou m' te ka fè ou konnen sa ki te ekri nan liv verite a. Koulye a, mwen gen

pou m' al goumen ak zanj chèf peyi Pès la. Apre sa, zanj chèf peyi Lagrès la va parèt. ²¹ Pa gen lòt moun pou vin ede m' pase Michèl, zanj chèf pèp Izrayèl la.

Chapter 11

¹ ¶ Mwen menm tou mwen te kanpe ak li pou ede l', pou soutni l' nan premye lanne rèy wa Dariyis la. ² Koulye a, mwen pral fè ou konnen verite a. Zanj lan di m' ankò: -Gen twa lòt wa ki gen pou gouvènènen peyi Pès la ankò, yonn apre lòt. Apre sa, ap gen yon katriyèm wa k'ap pi rich pase tout lòt yo. Avèk richès li, l'ap chita pouvwa li byen chita, epi li pral atake gouvènman peyi Lagrès la. ³ Lè sa a, yon wa vanyan gason va parèt. Li pral gouvènènen yon gwo gwo peyi. Epi l'ap fè sa li vle. ⁴ Men, lè l'a fin chita pouvwa li byen chita, gwo peyi l'ap gouvènènen an pral separe fè kat pòsyon. Men, se p'ap pitit li yo ki pral gouvènènen nan plas li. Se va kat lòt moun. Men, yo p'ap gen pouvwa li menm li te genyen an. ⁵ ¶ Wa peyi Lejip la pral vin fò anpil. Men, yonn nan jeneral lame li yo pral pi fò pase l'. Li pral gouvènènen yon peyi ki pi gran pase pa l' la toujou. ⁶ Apre kèk lanne, wa peyi Lejip la pral siyen kontra ak wa peyi Siri a. Pitit fi wa peyi Lejip la pral marye ak wa peyi Siri a pou kontra a ka kenbe. Men, kontra a p'ap rete lontan, paske yo pral touye ni li, ni mari l', ni pitit li, ni moun li te mennen avè l' lè sa a. ⁷ Kèk tan apre sa, yonn nan fanmi l' yo va moute wa. Li pral atake lame wa peyi Siri a. L'ap antre nan sitadèl wa a, l'ap goumen avè l'. L'ap soti pi fò pase l'. ⁸ L'ap pran tout bondye moun yo ak estati an fè yo, ansanm ak tout veso fèt an ajan ak an lò yo te gen pou fè sèvis zidòl yo, l'ap pote yo desann nan peyi Lejip. Pandan kèk tan l'ap rete sou sa l' te fè a, li p'ap pwoche bò peyi Siri a. ⁹ Wa peyi Siri a pral atake peyi Lejip. Men, l'ap blije kase tèt tounen lakay li. ¹⁰ Pitit gason wa peyi Siri a pral pare pou y' al goumen. Y'ap sanble yon gwo lame ak anpil sòlda. Yonn ladan yo pral parèt tankou yon gwo larivyè k'ap desann. L'ap travèse fwontyè a, l'ap atake yon fò lènmi epi l'ap kouri tounen lakay yo. ¹¹ Wa peyi Lejip la pral fache. Li pral leve yon gwo lame pou li al goumen ak wa peyi Siri a, l'ap fè tout sòlda lame wa peyi Siri a prizonye. ¹² L'ap kraze gwo lame wa Siri a. Li pral gonfle lestonmak li, l'ap fè touye anpil sòlda. Men, apre sa, l'ap pèdi fòs li. ¹³ Wa peyi Siri a ap tounen ankò, l'ap sanble yon lame pi gwo pase sa l' te gen anvan an. Apre kèk lanne, l'ap parèt ak yon gwo lame ak anpil zam. ¹⁴ Lè sa a, anpil pèp pral leve kont wa peyi Lejip la. Danyèl, jan ou te wè l' nan vizyon an, kèk lwijanboje nan moun peyi ou la pral leve kont wa a tou, men y'ap kraze yo. ¹⁵ Se konsa, wa peyi Siri a pral

sènen yon lavil ki gen gwo ranpa. L'ap pran l'. Sòlda lame peyi Lejip yo p'ap ka kenbe tèt avè l'.

16

Menm pi bon nan sòlda yo p'ap gen fòs ankò pou kenbe. Lame peyi Siri a pral fè sa li vle ak peyi Lejip. Pesonn p'ap ka kenbe tèt avè l'. L'ap rete kèk tan nan pi bèl peyi ki sou latè a. L'ap detwi

17

tou sa ki tonbe anba men l'. Wa Siri a ap mete nan tèt li pou l' pran tout peyi lòt wa a pou li. L'ap siyen yon kontra avè l'. Pou l' ka pran l' pi byen, l'ap ba li pitit fi li a pou madanm. Men, plan an

18

p'ap pran, sa p'ap mache. Lèfini, l'ap pase nan lanmè, l'ap atake lòt nasyon sou zile yo. L'ap pran anpil ladan yo. Men, yonn nan chèf lòt nasyon yo pral rete l' sou kous li. L'ap fè l' sispann fè awogan.

19

L'ap fè awogans wa a tounen sou tèt wa a ankò. Wa a ap tounen nan fò ki nan peyi pa l' yo. Men,

20

wè pa wè, y'ap kraze l', y'ap fini nèt avè l', l'ap disparèt. Apre li, ap gen yon lòt wa k'ap voye yon chèf pou peze pèp la. L'ap egzije pèp la peye taks pou yo plen kès wa a. Anvan lontan y'ap

21

touye wa a, men se p'ap bagay k'ap rive ni an piblik ni nan lagè. ¶ Zanj lan t'ap pale toujou. Li di: -Wa k'ap parèt apre sa a pral yon vòryen ki pa t' gen dwa pou l' te nan plas la. Men, l'ap vini tou

22

dousman, l'ap fè mannigèt, l'ap pran pouvwa a. Tout moun ki konprann pou yo kenbe tèt ak li,

23

l'ap kraze yo, l'ap disparèt yo. L'ap disparèt ata chèf kontra a. L'ap siyen kontra ak lòt nasyon

24

yo, men se pou l' ka twonpe yo pi byen. Atout peyi l' la tou piti, chak jou l'ap vin pi fò. San bay ankenn avètisman, l'ap anvayi yon pwovens ki rich anpil, l'ap fè bagay ni papa l', ni pesonn nan zansèt li yo pa t' janm fè. Lèfini, l'ap pran tout byen, tout richès li te piye lakay moun yo, l'ap separe

25

yo bay moun pa l' yo. L'ap fè plan pou l' atake gwo fò yo, men li p'ap gen tan fè sa. L'ap leve, l'ap pare yon gwo lame pou l' atake peyi Lejip. Wa Lejip la menm ap pare yon gwo lame tou ak

26

anpil zam pou koresponn ak li. Men, l'ap pèdi batay la paske y'ap fè move konplo sou do l'. Zanmi ki t'ap manje sou menm tab avè l' yo ap fè yo fini avè l'. Anpil nan sòlda li yo pral mouri. Y'ap

27

kraze lame li a. Apre sa, de wa yo pral chita manje ansanm sou menm tab, men tou de pral gen move lide dèyè tèt yo, yonn ap bay lòt manti. Yo yonn yo p'ap jwenn sa yo bezwen an, paske lè a

28

p'ap ko rive. Wa peyi Siri a ap tounen nan peyi l' ak anpil richès l'ap piye nan peyi Lejip. Apre lagè a, l'ap soti pou l' kraze relijyon pèp Bondye a. L'ap fè sa li te gen lide fè a. Lèfini, l'ap tounen

29

tounen l' nan peyi l'. Kèk tan apre sa, l'ap tounen desann nan peyi Lejip ankò. Men, fwa sa a, sa

30

p'ap pase tankou premye fwa a. Moun Kitim yo ap vin nan batiman yo, y'ap rete l' sou kous li, l'ap dekouraje. Lè l'ap tounen. l'ap fin debòde sou moun k'ap sèvi dapre kontra Bondye te siyen

31

avèk yo a. Men, l'ap fè pa moun ki vire do bay kontra a. L'ap voye sòlda nan lame li yo vin fè mete Tanp lan nan kondisyon pou moun pa ka sèvi Bondye ladan l' ankò. Y'ap aboli ofrann bèt yo te konn fè chak jou a, y'ap mete sa nou pa ta renmen wè a, bagay k'ap bay gwo lapenn lan chita

byen wo nan Tanp lan. ³² Wa a ap fè moun ki te deja vire do yo bay kontra Bondye a pran pozisyon pou li, l'ap pran tèt yo ak bèl pawòl. Men, moun k'ap sèvi Bondye yo ap kanpe fèm, y'ap kenbe tèt

avè l'. ³³ Chèf ki gen bon konprann yo va separe konesans yo ak pèp la. Men, pandan kèk tan yo pral pèsekite yo, y'ap touye yo nan batay. Yo pral boule yo nan dife jouk yo mouri. Y'ap depòte

yo, y'ap piye tout zafè yo. ³⁴ Pandan tout pèsekisyon sa a, pèp Bondye a va resevwa yon ti konkou.

Men, anpil moun ap vin mete tèt ansanm ak yo pou defann pwòp enterè pa yo. ³⁵ Nan chèf ki gen konesans yo genyen k'ap mouri. Men, avèk lafliksyon sa a, pèp la va netwaye, l'a lave, l'a blanchi.

Sa pral pase konsa jouk lè a va rive pou sa fini nan dat Bondye te fikse a. ³⁶ Wa peyi Siri a va fè sa li vle. Li pral gonfle lestonmak li, li pral mache di jan li pi gran pase tout bondye. L'ap di yon bann vye koze sou Bondye ki anwo tout bondye yo. L'ap fè sa konsa jouk lè pou Bondye pini l' lan

va rive. Paske, tou sa Bondye te di ki pou fèt la gen pou fèt. ³⁷ Wa a p'ap konnen bondye zansèt li yo, li p'ap konnen bondye medam yo renmen sèvi a, li p'ap konn ankenn lòt bondye. Se tèt pa l' ase

l'ap konnen. Pou li, li pi gran pase yo tout. ³⁸ Nan plas yo, l'ap pito sèvi bondye ki pwoteje fò yo, yon bondye zansèt li yo pa t' janm konnen. L'ap ofri lò, ajan, bèl pyè bijou ak lòt bagay ki koute

chè ba li. ³⁹ Pou defann fò li yo, l'ap pran moun ki sèvi lòt bondye pou sèvi sòlda. Depi yon moun rekonèt li pou wa, l'ap fè bèl bagay pou li, l'ap mete l' chèf sou anpil moun, l'ap ba li tè pou

rekonpans. ⁴⁰ Lè tan wa Siri a pral bout, wa Lejip la pral atake l'. Wa Siri a pral vare sou li tankou yon van siklòn, li pral mache sou li ak tout cha lagè li yo, tout kavalye l' yo ak anpil batiman. L'ap

anvayi anpil peyi, l'ap tankou yon gwo larivyè k'ap desann. ⁴¹ L'ap anvayi pi bèl peyi ki sou latè a, l'ap touye yon pakèt moun. Men, moun peyi Edon, moun peyi Moab ak rès moun peyi Amon yo

va chape anba men l'. ⁴² Wi, l'ap anvayi tout peyi yo. Ata peyi Lejip p'ap chape. ⁴³ L'ap pran tout richès peyi Lejip la pou li: lò, ajan ak tout bèl bagay ki koute chè yo. L'ap fè moun Libi yo ak moun

Letiopi yo bat ba devan li. ⁴⁴ Men, l'ap vin tandè nouvèl k'ap kouri soti nan nò ak bò solèy leve.

L'ap pè, l'ap kase tèt tounen. L'ap debòde, l'ap kraze brize, l'ap masakre anpil moun. ⁴⁵ L'ap moute gwo tant li a ant lanmè a ak mòn kote tanp Bondye a kanpe a. Men, l'ap mouri, p'ap gen pesonn pou pote l' sekou.

Chapter 12

¹ ¶ Zanj ki te gen rad swa sou li a, di ankò: -Lè sa a, Michèl, gwo zanj k'ap veye sou pèp ou a, ap parèt. Se pral yon tan kè sere moun poko janm wè depi yo sou latè. Lè lè a va rive, tout moun

ki fè pati pèp ou a epi ki gen non yo ekri nan liv Bondye a, va sove.² Anpil nan moun ki te mouri
 deja yo pral leve vivan ankò. Gen ladan yo ki pral jwi lavi ki p'ap janm fini an. Gen lòt ki pral wont,
 yo pral soufri avilisman ki p'ap janm fini an.³ Moun ki gen lespri yo pral klere tankou limyè nan
 syèl la. Moun ki te moutre jan pou moun mache dwat yo va klere tankou zetwal pou tout tan tout
 tan.⁴ Li di m' ankò: -Bon. Koulye a, Danyèl, fèmen liv la. Sele l' byen sele jouk lè a va rive pou
 tout bagay fini. Anpil moun pral bat kò yo pou yo konprann sa k'ap pase. Lè sa a, plis konesans
 pral gaye toupatou sou latè.⁵ ¶ Mwen gade, mwen wè de lòt moun ki te kanpe bò larivyè a, yonn
 sou bò dwat, yonn sou bò gòch.⁶ Yonn ladan yo pale ak zanj ki te pi wo a, nan direksyon tèt dlo
 a, zanj ki te gen rad swa sou li a, li mande l': -Konbe tan ankò anvan pou gwo bagay sa yo rive?
⁷ Zanj lan leve bra l' anlè nan syèl la, mwen tande li fè yon gwo sèman nan non Bondye vivan an,
 li di konsa: -Nan twazan si mwa, lè y'a fin kraze tout fòs pèp Bondye a, tout bagay sa yo va rive.
⁸ Mwen tande sa l' te di a, men mwen pa t' konprann. Konsa, mwen mande l': -Men, mèt, ki jan sa
 ap fini menm?⁹ Li reponn mwen: -Danyèl monchè, ou mèt al fè wout ou, paske koze sa a fèt pou
 rete kache epi byen sele, jouk lè a va rive pou sa fini.¹⁰ Lè sa a, anpil moun pral pase anba soufrans
 yo te anonse a. Y'ap soti netwaye, lave, blanchi. Moun k'ap fè mechanste yo menm p'ap konprann
 anyen, y'ap toujou rete ap fè mechanste yo. Men, moun ki gen lespri ap konprann.¹¹ Si ou konte
 depi lè yo va aboli ofrann bèt ki pou fèt chak jou a, pou yo mete bagay nou pa ta renmen wè a,
 bagay k'ap bay gwo lapenn lan, kanpe nan Tanp lan, w'ap jwenn mil desankatrevendis (1290) jou
 ki gen pou pase.¹² Ala bon sa pral bon pou moun ki va kenbe fèm jouk mil twasantrannsenk
 (1.335) jou sa yo va fin pase!¹³ Ou menm, Danyèl, kenbe fèm jouk sa kaba. Apre sa, w'a mouri.
 Men, w'a leve vivan ankò pou resevwa rekonpans ou lè tout bagay va fini!

Hosea

Chapter 1

¹ ¶ Men mesaj Seyè a te bay Oze, pitit Beerì, nan tan Ozyas, Jotam, Akaz ak Ezekyas te wa,
 yonn apre lòt, nan peyi Jida. Lè sa a, se Jewoboram, pitit Joas, ki te wa nan peyi Izrayèl.² ¶ Premye
 fwa Seyè a t'ap bay Oze mesaj pou pèp Izrayèl la, li di l' konsa: -Leve non! Al marye ak yon fanm
 jennès nan san ki pral twonpe ou. Kanta pou pitit w'ap gen avè l' yo, y'ap gen menm san jennès la

tou. Se konsa pèp la vire do ban mwen. Yo pa kenbe pawòl yo te gen avè m'.³ Se konsa, Oze leve,
 li al marye ak Gomè, pitit fi Diblayim. Gomè vin ansent, li fè yon pitit gason.⁴ Seyè a di Oze
 konsa: -W'a rele l' Jizreyèl paske talè konsa, mwen pral pini wa Izrayèl la pou krim Jeou, zansèt li
 a, te fè lavil Jizreyèl. Mwen pral wete gouvènman an nan men moun ras Izrayèl yo.⁵ Jou sa a, m'ap
 kraze tout zam pèp Izrayèl yo nan Fon Jizreyèl la.⁶ Gomè vin ansent ankò. Li fè yon pitit fi. Lè
 sa a, Seyè a di Oze konsa: -W'a rele l' Lowouchama, paske m'ap san pitye pou moun Izrayèl yo
 ankò. p'ap gen padon pou yo.⁷ Men, m'ap gen pitye pou moun peyi Jida yo. Mwen menm, Seyè
 a, Bondye yo a, m'ap delivre yo. Men, mwen p'ap fè l' ni avèk flèch, ni avèk nepe, ni nan goumen,
 ni avèk chwal ak kavalye.⁸ ¶ Apre Gomè fin sevre Lowouchama, li vin ansent ankò. Li fè yon pitit
 gason.⁹ Lè sa a, Seyè a di Oze: -W'ap rele l' Lorami, paske moun peyi Izrayèl yo pa moun pa m'
 ankò. Mwen menm, mwen pa Bondye yo ankò.¹⁰ Moun pèp Izrayèl yo va tankou sab bò lanmè:
 moun p'ap ka ni konte yo, ni konnen kantite ki va genyen. Si koulye a Bondye ap di: Nou pa moun
 pa m' ankò, yon jou l'a di yo: Nou se pitit Bondye vivan an.¹¹ Moun peyi Jida ak moun peyi Izrayèl
 va mete tèt yo ansanm ankò. Y'a chwazi yon sèl chèf pou mache alatèt yo. Y'a grandi. Zafè yo va
 mache nan peyi a. Wi, jou Jizreyèl la pral yon gwo jou.

Chapter 2

¹ ¶ Se konsa n'a rele frè nou yo moun Bondye. N'a rele sè nou yo moun Bondye gen pitye pou
² yo. Pitit mwen yo, pale ak manman nou. Paske li pa madanm mwen ankò. Mwen pa mari l' non
 plis. Pale avè l' pou l' sispann sèvi tankou jennès, pou l' wete nan kòsaj li bann zidòl li renmen anpil
³ yo. Si li pa fè sa, m'ap dezabiye l' nèt, pou l' rete toutouni jan manman l' te fè l'. M'ap fè l' tounen
 tankou tè sèk ki pa jwenn lapli. M'ap fè l' mouri swaf dlo.⁴ Mwen p'ap gen pitye pou pitit li yo
⁵ non plis. Paske yo se pitit yon fanm ki nan jennès. Manman yo lage kò l' nan fè jennès. Wi, li
 menm ki te pote yo nan vant li, li avili tèt li, paske l'ap di: mwen pral jwenn nonm mwen yo. Yo
 ban m' tou sa m' bezwen. Yo ban m' manje, yo ban m' bwè. Yo ban m' twal lenn ak twal fen. Yo
⁶ ban m' lwil oliv, yo ban m' diven pou m' bwè. ¶ Se poutèt sa mwen pral fèmen l' nan mitan yon
 lantouraj pikan. Mwen pral moute yon gwo miray fè wonn li. Konsa li p'ap ka mete pye l' deyò.
⁷ L'a chache mwayen pou li al kouri dèyè nonm li yo, men li p'ap ka rive jwenn yo. L'a chache yo
 toupatou, men li p'ap jwenn yo. Lè sa a, l'a di: M'ap tounen vin jwenn premye mari mwen an, paske

⁸
 avè l' zafè m' te pi bon pase koulye a. Pèp Izrayèl la pa t' rekonèt se mwen menm ki te ba li farin, diven ak lwil. Ata lò ak ajan, se mwen ki te ba li yo an kantite. Men, li pran yo pou fè sèvis Baal.

⁹
 Se poutèt sa, lè sezon rekòt la rive, m'ap reprann farin ak diven mwen te ba li a. M'ap reprann twal lenn ak twal fin mwen te ba li pou fè rad met sou li.

¹⁰
 M'ap kite l' toutouni devan tout nonm li yo.

¹¹
 Pesonn p'ap ka vin sove l' anba men mwen. Mwen pral fè l' sispann gen kè kontan. Mwen pral

¹²
 sispann tout fèt li yo, fèt lalin nouvèl li yo, fèt repo l' yo ak gwo fèt li fete chak lanne yo. Kanta jaden rezen ak pye fig frans li yo, li di se nonm li yo ki te ba li yo. Enben, m'ap ravaje sa. M'ap fè

¹³
 yo tounen raje, bèt nan bwa va devore yo. Mwen pral pini l' pou tout tan li te bliye m' lan, lè li t'ap boule lansan devan Baal yo, lè li t'ap mete zanno ak kolye pou l' te ka kouri dèyè nonm li yo.

¹⁴
 Se Seyè a menm ki di sa. ¶ Se poutèt sa, mwen pral mennen l' nan dezè a ankò. Mwen pral pale

¹⁵
 dous avè l', pou l' ka tounen vin jwenn mwen. M'a ba li jaden rezen li te gen anvan yo. M'a fè sa ki te rive l' nan Fon Malè a tounen yon okazyon pou l' jwenn sa li t'ap tann lan. L'a reponn mwen

¹⁶
 menm jan li te fè l' lè li te jenn lan, lè l' te chape anba men moun peyi Lejip yo. Jou sa a, l'a rele

¹⁷
 m' mari l', li p'ap rele m' Baal li ankò. Se mwen menm, Seyè a, k'ap di sa. Mwen p'ap janm kite

¹⁸
 non Baal yo soti nan bouch li, li p'ap janm nonmen non yo ankò. Lè sa a, m'a pase yon kontra avèk tout zannimo nan savann ak tout zwazo k'ap vole nan syèl la ak tout bèt k'ap trennen sou vant pou yo pa fè pèp la anyen. M'ap kraze banza ak nepe pou yo pa fè lagè ankò nan peyi a, pou moun

¹⁹
 ka kouche dòmi ak kè poze san danje. Izrayèl, m'ap pran angajman pou m' viv avè ou pou tout tan, m'ap toujou respekte ou, m'ap toujou kenbe pawòl mwen avè ou. M'ap toujou renmen ou, m'ap

²⁰
 toujou gen pitye pou ou. M'ap kenbe pwomès mwen, w'ap pou mwen nèt. Konsa, w'a konnen

²¹
 ki moun mwen menm, Seyè a, mwen ye. Jou sa a, m'a reponn lapriyè tout moun. Se Seyè a

²²
 menm ki di sa. M'ap fè lapli soti nan syèl tonbe sou latè. Tè a va bay manje, diven ak lwil. Se

²³
 konsa m'a reponn lapriyè moun Jizreyèl yo. M'ap fè yo peple nan peyi a. M'a gen pitye pou moun mwen te meprize yo. M'a pale ak moun ki pa moun pa m' yo, m'a di yo: Se pèp mwen nou ye. Yo menm, y'a reponn: Wi, se Bondye nou ou ye.

Chapter 3

¹
 ¶ Seyè a pale ak mwen ankò, li di m' konsa: -Ale non, Oze! Al renmen yon fanm k'ap fè adiltè sou mari l' ak yon lòt gason. Se pou ou renmen l' menm jan mwen menm, Seyè a, mwen renmen pèp Izrayèl la, atout l'ap vire do ban mwen al jwenn lòt bondye, atout li renmen ofri gato rezen ba yo.
² Se konsa, m' al achte yon fanm k'ap fè adiltè, mwen peye kenz pyès ajan ak sèt barik lòj pou li.
³ Mwen di l'. -Ou pral rete avè m' atò, machè! Ou pral sispann lage kò ou nan dezòd. Ou pa pral kouche ak ankenn gason. Mwen menm tou, mwen p'ap nan kouche avè ou.
⁴ Konsa tou, moun Izrayèl yo pral rete pase kèk tan san wa, san chèf, san fè ofrann bèt, san wòch lotèl, san plastwon pou prèt yo.
⁵ Apre sa, moun Izrayèl yo va tounen sou sa yo te fè a. Seyè a, Bondye yo a, va fè yo chache l', y'a tounen vin jwenn David, wa yo a. Y'a gen krentif pou Seyè a. Apre sa, y'a toujou resevwa favè l'.

Chapter 4

¹
 ¶ Seyè a gen yon pwose l'ap mennen ak moun k'ap viv nan peyi a. Nou menm, pitit Izrayèl yo, koute sa Seyè a ap di: -Nan peyi a, bonjou moun pa laverite. Yo pa gen bon kè ankò. Pa gen moun ki konn Bondye ankò nan peyi a.
² Se fè sèman pou gremesi, se bay manti. Se touye moun, se vòlò, se fè adiltè. Y'ap kraze gason, se krim sou krim.
³ Se poutèt sa, peyi a pral nan lapenn. Tout moun nan peyi a pral deperi. Tout zannimo nan savann, tout zwazo k'ap vole nan syèl, tout pwason nan lanmè pral mouri.
⁴ Seyè a di: Piga pesonn louvri bouch yo di yon mo! Piga pesonn kritike anyen! Se nou menm prèt yo, m'ap akize koulye a.
⁵ Gwo lajounen, n'ap fè sa nou pa t' dwe fè. Lannwit menm, ata pwofèt yo ap fè tankou nou. Se fini m'ap fini ak pèp la ki tankou yon manman sitirèz pou nou.
⁶ ¶ Pèp mwen an ap fini, paske li pa konnen mwen. Prèt yo voye tou sa mwen te moutre yo jete. Se konsa, mwen menm tou, mwen p'ap rekonèt yo pou prèt mwen ankò. Yo voye tou sa mwen menm, Bondye yo a, mwen te moutre yo a jete. Mwen menm tou, m'ap voye pitit yo jete.
⁷ Plis nou gen prèt, se plis n'ap fè sa ki mal devan je m'. Se poutèt sa, kote pou yo ta respekte nou an, se la y'ap fè nou wont.
⁸ Plis pèp la plonje nan fè peche, se plis n'ap vin pi rich. Se konsa nou ta renmen wè pèp la fè peche plis toujou.
⁹ Sa k'ap rive pèp la, se sa k'ap rive nou tou, nou menm prèt yo. M'ap regle nou pou tout move mès nou yo. M'ap fè nou peye tou sa nou fè ki mal.
¹⁰ N'a manje sa ki pou nou nan bèt nou ofri yo, men n'a rete grangou toujou. N'ap fè sèvis pou zidòl yo pretann di k'ap bay pitit, men n'a rete san fè pitit. Tou sa, paske nou vire do bay Seyè a pou nou

¹¹ kouri dèyè lòt bondye. Seyè a di: -Nan sèvi lòt bondye, fanm, diven ak bweson fè pèp la pèdi
¹² tèt li. ¶ Se yon moso bwa y' al mande sa pou yo fè! Se yon bout bwa ki pou di yo sa yo bezwen
konnen! Yo tankou yon fanm marye ki lage kò l' nan fè jennès, yo pèdi tèt yo. Y'ap kouri dèyè lòt
¹³ bondye, y'ap twonpe Seyè a! Yo moute sou tèt mòn yo al ofri bèt pou touye. Y' al boule lansan
sou ti mòn yo, anba pye bwadchenn, anba pye sikren ak pye mapou, kote ki gen bon lonbraj! Se
¹⁴ poutèt sa, pitit fi yo ap lage kò yo nan jennès, bèlfi yo ap fè adiltè. Non. Mwen p'ap pini ni pitit
fi nou yo, ni bèlfi nou yo pou sa y'ap fè a, paske se nou menm gason k'ap fèmen kò nou apa ak
medam k'ap fè jennès nan tanp yo. Nou mete tèt ansanm ak yo pou fè sèvis pou lòt bondye. Tankou
¹⁵ pawòl la di: Yon pèp ki san konprann, se yon pèp ki fini. Si moun Izrayèl yo vle vire do ban
mwen, mwen ta swete moun Jida yo pa fè menm jan an tou! Pa ale lavil Gilgal! Pa moute Betavenn
¹⁶ pou fè sèvis! Pa pran non Bondye vivan an pou fè sèman! Paske, moun Izrayèl yo gen tèt di
¹⁷ pase milèt pòt. Ki jan pou Seyè a ka mennen yo al manje nan savann tankou ti mouton? Moun
¹⁸ Efrayim yo menm lage kò yo bay zidòl yo nèt. Kite yo pou kont yo! Yo mete tèt yo ansanm ak
yon bann gwògè. Yo lage kò yo nan fanm. Yo pito sa ki pou fè yo wont la pase sa ki pou ta fè moun
¹⁹ respekte yo. Yo pran nan yon move kouran. Y'a wont ofrann bèt y'ap fè pou touye pou zidòl yo.

Chapter 5

¹ ¶ Koute sa byen, nou menm prèt yo! Pare zòrèy nou, nou menm pitit Izrayèl yo! Louvri zòrèy
nou, nou menm ki fanmi wa a! Se nou menm y'ap jije koulye a. Nou tounen yon pyèj sou mòn
² Mispa. nou tounen yon pèlen yo mete sou mòn Tabò. Moun k'ap fè mechanste yo al twò lwen.
³ Se mwen menm k'ap pini yo tout. Depi lontan mwen konnen moun Efrayim yo. Pou moun Izrayèl
yo menm, nanpwen anyen sou yo mwen pa konnen. Moun Efrayim yo lage kò yo nan fè tankou
jennès, yo kite m' pou lòt bondye. Moun Izrayèl yo menm mete tèt yo nan kondisyon yo pa ka fè
⁴ sèvis pou mwen. Avèk tou sa pèp la ap fè a, yo pa ka tounen vin jwenn Bondye yo a ankò. Yo
⁵ pran nan sèvi zidòl. Yo pa konnen Seyè a ankò! Sa pèp Izrayèl la ap fè nan awogans li, se sa k'ap
lakòz yo kondannen l'. Avèk peche moun Izrayèl ak moun Efrayim yo ap plede fè yo, y'ap bite,
⁶ y'ap tonbe. Menm moun peyi Jida yo ap bite ansanm ak yo tou. Y'a pran mouton ak bèf pou fè
⁷ ofrann pou Seyè a. Y'a chache l', men yo p'ap jwenn li, paske li wete kò l' sou yo. Yo pa t' kenbe
pawòl yo ak Seyè a, yo twonpe l'. Yo fè yon bann timoun ki pa janm konnen Bondye. Nan yon sèl

mwa, Bondye ap detwi yo nèt ansanm ak tout jaden yo. ¶⁸ Kònen klewon an lavil Gibeya! Sonnen avètisman an lavil Rama! Bay rèl lavil Betavenn pou moun yo pare pou lagè! Leve pye nou, moun Benjamin! Lènmi dèyè nou.⁹ Jou pou yo pini moun Efrayim yo rive. Y'ap fini nèt avèk yo. M'ap kanpe nan mitan tout branch fanmi Izrayèl yo, m'ap fè yo konnen sa ki gen pou rive vre.¹⁰ Seyè a di ankò: Chèf peyi Jida yo fè menm bagay ak moun k'ap deplase bòn pou antre sou tè moun. M'ap move sou yo, m'ap vare sou yo tankou lavalas k'ap desann!¹¹ Moun Efrayim yo ap souffri anba moun k'ap peze yo a. Yo pèdi tè ki pou yo dapre lalwa, paske yo te soti pou yo te swiv moun ki pa gen anyen pou bay.¹² M'ap fini ak moun Efrayim yo, m'ap manje yo tankou poubwa manje bwa. M'ap disparèt moun peyi Jida yo, m'ap fè yo tounen pouriti.¹³ Moun Efrayim yo wè jan peyi a te malad, moun Jida yo te wè eta malenng peyi a. Lè sa a, moun Izrayèl yo kouri al mande sekou nan peyi Lasiri, yo voye moun al mande gran wa a sekou. Men, gran wa sa a pa ka ban nou gerizon, ni li p'ap ka geri malenng nou yo.¹⁴ M'ap atake moun Efrayim yo tankou yon lyon. M'ap tonbe sou moun Jida yo tankou yon jenn ti lyon. Wi, se mwen k'ap dechire yo an miyèt moso. Apre sa, m'ap kite yo, m'ap depòte yo byen lwen peyi yo. Pesonn p'ap ka sove yo anba men m'.¹⁵ M'ap vire do m' tounen lakay mwen jouk y'a rekonèt fòt yo. Se lè sa a y'a chache m'. Wi, lè y'a wè jan y'ap souffri a, y'a mete chache m'.

Chapter 6

¹ ¶ Pèp la di: -Annou wè non! Ann tounen al jwenn Seyè a! Se li menm ki blese nou, se li menm ankò ki ka geri nou! Se li ki mete san nou deyò, se li ki ka mete renmèd sou malenng nou yo.² Apre de jou, l'a ban nou lavi ankò. Sou twazyèm jou a, l'a fè nou kanpe ankò, n'a viv ankò devan je l'.³ N'a konnen Seyè a, n'a toujou chache konnen Seyè a pi byen. Tankou nou sèten solèy la gen pou l' leve, konsa tou nou sèten n'ap jwenn li. Tankou nou sèten lapli gen pou l' wouze latè lè sezon l' rive, konsa tou nou sèten l'ap vin jwenn nou.⁴ ¶ Seyè a di: -Nou menm moun Efrayim, kisa pou m' fè ak nou? Nou menm moun Jida, kisa pou m' fè ak nou? Nou renmen m', se vre. Men se pou yon ti tan. Ou ta di yon ti nwaj ki pase anvan solèy leve. Wi, tankou lawouze ki disparèt anvan solèy fin leve.⁵ Se poutèt sa mwen voye pwofèt mwen yo pou manyè pini nou. Mwen mete pawòl nan bouch yo ki ta kont pou touye nou. Mwen fè nou konnen sa mwen vle nou fè, mwen mete l' aklè devan nou.⁶ Mwen ta pito wè nou renmen m' tout bon pase pou n'ap fè tout ofrann bèt sa yo ban mwen. Mwen ta pito wè nou chache konnen m' vre, mwen menm Bondye nou an, pase pou

n'ap boule tout bèt sa yo pou mwen.⁷ Men, yo menm, rive yo rive Adam, yo pa kenbe kontra mwen te pase ak yo a. Lamenn, yo vire do ban mwen, yo pa kenbe pawòl yo.⁸ Galarad se yon lavil ki plen moun k'ap fè mechanste. Kote ou pase, se mak san moun yo touye.⁹ Prèt yo menm, se tankou yon bann ansasen k'ap veye moun sou granchemen. Sou tout wout ki mennen lavil Sichèm, se touye y'ap touye moun. Yo konnen byen pwòp tou sa y'ap fè a mal. Atousa yo fè l'.¹⁰ Mwen wè yo fè nan peyi Izrayèl la yon bagay ki fè m' tranble: Moun Efrayim yo lage kò yo nan sèvi zidòl. Moun Izrayèl yo ap fè bagay ki mete yo nan kondisyon yo pa ka fè sèvis pou mwen.¹¹ Men, pou nou menm tou, moun peyi Jida, mwen fikse yon jou pou pini nou pou tou sa nou fè, lè m'a fè moun yo depòte yo tounen nan peyi yo.

Chapter 7

¹ ¶ Chak fwa mwen fè lide geri moun Izrayèl yo, sa ki parèt devan je mwen se move ajisman pitit Efrayim yo, se mechanste moun Samari yo. Yonn ap bay lòt manti, se kase kay moun pou vòlò. Nan lari, yo fè bann pou yo piye moun.² Men, yo pa janm mete nan tèt yo m'ap toujou chonje tou sa yo fè. Men, yo kanpe nan mitan tout mechanste yo la devan je mwen.³ Nan mechanste yo, y'ap fè fèt pou wa a. Y'ap woule chèf yo, antan y'ap fè konplo.⁴ Se yon bann trèt yo ye. Yo pa kenbe pawòl yo. Yo tankou yon fou yo fin chofe byen chofe. Boulanje a fè yo sispann chofe fou a, l'ap tann pat li fin bat la leve anvan li anfounen l'.⁵ Konsa, jou y'ap fè fèt pou wa a, chèf yo malad anba diven, wa a menm bay lanmen ak ipokrit yo.⁶ Wi, lè y'ap fè konplo se tankou yon fou k'ap chofe. Tout lannwit, chalè a ap moute. Sa yo gen sou kè yo a ap kouve. Nan maten, bagay la pete tankou flanm dife.⁷ Yo gen yon chalè k'ap soti sou yo, cho tankou yon fou byen chofe. Yo devore moun k'ap gouvènen yo. Wa yo tonbe yonn apre lòt. Pa gen yon moun ki rele m' mande sekou.⁸ ¶ Moun Efrayim yo pa pi bon pase yon pen ki kwit yon sèl bò. Yo pèdi valè yo. Moun Efrayim yo melanje ak moun lòt nasyon ki toupatou bò kote yo.⁹ Moun lòt nasyon yo fin souse tout fòs yo. Yo menm yo pa konn sa. Yo gen tan fini, yo prèt pou mouri tankou vye granmoun cheve blan, yo pa menm wè sa.¹⁰ Se awogans moun Izrayèl yo k'ap fè yo kondannen yo. Men, malgre tou sa ki rive yo, yo pa tounen vin jwenn mwen, mwen menm Seyè a, Bondye yo a. Yo pa chache kote m' ye.¹¹ Moun Efrayim yo fin egare, yo tankou pijon ki pèdi bann yo, yo pa konn sa

y'ap fè. Yon lè, se Lejip yo rele vin ede yo. Yon lòt lè, yo kouri al jwenn moun peyi Lasiri yo.
12

Men, antan yo prale konsa, mwen pare yon pèlen pou yo, mwen pran yo tankou zwazo k'ap vole
13
nan syèl. M'ap pini yo pou mechanste yo fè yo. Madichon pou yo! Yo kouri vire do ban mwen.
Y'ap fini nèt. Yo pa kenbe pawòl yo ak mwen. Yo leve dèyè mwen. Mwen te vle sove yo, men y'ap

14
fè manti sou mwen. Lè yo kouche sou kabann yo ap plenn, yo pa lapriyè m' ak tout kè yo. Lè
yo bezwen farin ak diven, y'ap kòche kò yo ak kouto tankou moun lòt nasyon yo, yo trayi m'.

15
Atout se mwen menm ki te mennen yo, ki te ba yo fòs, yo fè konplo sou mwen. 16
Yo vire do
ban mwen pou y' al dèyè lòt bondye. Yo tankou yon banza ki pa ka sèvi ankò. Chèf yo ap pale ak
twòp awogans. Se poutèt sa, yo pral mouri nan lagè. Lè sa a, moun peyi Lejip yo pral pase yo nan
kont rizib yo.

Chapter 8

1
¶ Kònen klewon an! Malè ap fonn sou peyi Bondye a tankou malfini, paske moun yo pa kenbe
kontra mwen te pase ak yo a. Yo vire kont sa mwen te moutre yo a. 2
Ou mèt tande yo di m': Ou
se Bondye nou. Nou menm, moun Izrayèl, nou konnen ki moun ou ye! 3
yo pa vle wè sa ki bon.

4
Se poutèt sa lènmi gen pou leve dèyè yo. Yo rete yo chwazi wa mete alatèt yo, san mande m' si
mwen dakò. Yo mete moun chèf san m' pa janm konnen. Yo pran lò ak ajan yo genyen, yo fè zidòl.

5
Se sa k'ap fini ak yo a. Mwen pa ka sipòte estati towò bèf moun Samari yo ap adore a. Se konsa
mwen fè kòlè, mwen fache anpil sou yo. Kilè y'a sispann sèvi zidòl? 6
Se yon atizan peyi Izrayèl
ki te fè zidòl la. Zidòl sa a, se pa ka yon bondye li ye. Estati towò bèf moun Samari yo, m'ap kraze

7
l' an miyèt moso. Depi pèp la simen van, se move tan pou yo rekòlte. Yo tankou yon jaden ble
8
ki pa jete grap, ki p'ap bay farin. Menm si li bay farin, se moun lòt nasyon k'ap vin manje tout. ¶
Pèp Izrayèl la fini nèt. Nan je lòt nasyon yo, li tankou yon vye kannari kraze ki pa vo anyen.

9
Tankou yon bourik endont, moun Efrayim yo ap fè sa yo pito. Yo moute peyi Lasiri al mande
10
konkou. Tankou fanm k'ap achte gason, yo bay lòt nasyon lajan pou pwoteje yo. Atout yo bay
lòt nasyon yo kado, koulye a mwen pral mete yo tout nan menm sak pou m' pini yo. Talè konsa,
11
yo pral nan lapenn lè wa Lasiri a va pran peze yo tout. Atout moun Efrayim yo bati lotèl toupatou

12
pou wete peche, se menm lotèl sa yo ki fè yo tonbe pi rèd nan peche. Atout m' ekri pou yo anpil

regleman sou lalwa mwen ba yo a, yo pran regleman yo pou bagay ki pa pou yo. ¹³ Yo renmen fè ofrann bèt. Yo touye bèt yo ofri yo epi yo manje vyann lan. Men, mwen menm, Seyè a, se pa sa ki fè m' plezi. Koulye a mwen chonje tout peche yo fè, m'ap pini yo pou sa. M'ap fè yo tounen nan ¹⁴ peyi Lejip. Moun Izrayèl yo bliye moun ki te fè yo a. Y'ap bati gwo palè. Moun Jida yo menm ap bati gwo lavil ak miray ranpa pou pwoteje yo. Men mwen menm, m'ap voye dife nan lavil yo. Dife a ap boule tout palè yo ak tout gwo kay yo.

Chapter 9

¹ ¶ Nou menm pèp Izrayèl, pa fè kè nou kontan! Sispann fè fèt tankou moun lòt nasyon yo. Nou vire do bay Bondye nou an, nou pa kenbe pawòl nou te gen avè l' la. Tankou fanm ki nan dezòd, nou kouche kote nou jwenn glasi pou ti grenn yo fè nou kado. ² Men, talè konsa, nou p'ap gen kont farin, ni kont lwil pou nou sèvi. Kanta pou diven, nou p'ap jwenn sa menm. ³ Pèp Izrayèl la p'ap rete nan peyi Seyè a. Moun Efrayim yo ap tounen peyi Lejip ankò. Yo pral manje nan peyi Lasiri ⁴ manje yo pa te gen dwa manje. Lè sa a, yo p'ap ka ofri diven bay Seyè a, ni yo p'ap ka fè okenn ofrann bèt ki pou ta fè l' plezi. Tout manje yo ap tankou manje yo bay nan veye. Tout moun ki manje manje sa yo p'ap nan kondisyon pou fè sèvis pou Bondye. Manje a va sèvi pou plen vant yo ⁵ ase. Yo p'ap ka pran ladan l' pou ofri bay Seyè a nan tanp li a. Kisa y'a fè menm lè gwo jou a, lè ⁶ jou pou yo fè fèt pou Seyè a va rive? Men malè tonbe sou yo, yo leve, yo pati. Moun peyi Lejip yo ap ranmase yo, y'ap antere yo nan lavil Menmfis. Rajè pral pouse tout kote yo te konn mete ⁷ richès yo. Pikan pral anvayi tout kote yo te moute kay yo. ¶ Jou pou yo pini nou an rive. Wi, lè pou yo ban nou sa nou merite a pral rive. Lè sa a, moun peyi Izrayèl yo va konprann sa k'ap rive yo a. Y'ap plede di: Pwofèt sa a pèdi tèt li. Nonm ki gen lespri Bondye moute l' la pa konn sa l'ap ⁸ di. Men se paske yo fè gwo peche, se paske yo vire do bay Bondye kifè sa rive yo. Bondye voye m' tankou yon pwofèt pou m' avèti moun Izrayèl yo, pèp li a. Men tout kote m' pase, yo pare pèlen ⁹ pou yo pran m' tankou yon zwazo. Menm nan pwòp kay Bondye a, yo pa vle wè m'. Yo lage kò yo nèt nan fè sa ki mal, tankou yo te fè l' lavi Gibeya. Bondye va chonje jan yo mechan, l'a pini yo ¹⁰ pou tout peche yo fè. Seyè a di: Lè m' te fèk jwenn pèp Izrayèl la, se te tankou si m' te jwenn yon grap rezen nan mitan yon dezè. Lè m' te fèk wè zansèt nou yo, se te tankou si m' te wè premye fig frans ki mi nan rekòt fig la. Men, lè yo rive Baal-Peyò yo lage kò yo nan sèvi Baal. Yo fè m' ¹¹ vin rayi yo, tankou mwen rayi zidòl yo te renmen yo. ¶ Sa ki te yon lwanj pou pèp Efrayim lan

ap vole ale tankou zwazo. Yo p'ap fè pitit, madanm yo p'ap gwovant, madanm yo p'ap menm ansent.

¹² Menm si yo rive fè pitit, mwen p'ap kite yo fin grandi. Lè m' vire do ba yo, malè ap rive yo.

¹³ Mwen fè yon vizyon, mwen wè pitit gason moun Izrayèl yo nan yon bèl jaden, epi se moun

Izrayèl yo menm ki t'ap mennen yo bay ansasen. ¹⁴ Seyè! Kisa m' ta mande ou fè pou yo? Fè

madanm yo toujou an pèdisyon? Fè yo pa gen lèt pou bay pitit yo tete? ¹⁵ Seyè a di konsa: Mechanste pèp la konmanse depi nan peyi Gilgal. Se la menm mwen konmanse rayi yo. Yo fè twòp move zak. Se poutèt sa, m'ap mete yo deyò nan peyi mwen an. Mwen p'ap renmen yo ankò, paske tout chèf

yo se yon bann wòklò. ¹⁶ Peyi Efrayim lan tankou yon pyebwa ki pa ka donner ankò. Rasin li yo

fin cheche. Yo p'ap fè pitit. Menm si yo rive fè pitit, m'ap touye pitit yo pi renmen yo. ¹⁷ Bondye m'ap sèvi a ap voye yo jete, paske yo pa t' koute li. Yo pral mache pwomennen san rete nan mitan nasyon yo.

Chapter 10

¹ ¶ Pèp Izrayèl la te tankou yon bèl pye rezen ki te konn donner anpil. Plis pye rezen an t'ap donner, se plis yo t'ap bati lotèl pou zidòl. Plis tè a t'ap bay, se plis yo t'ap fè pi bèl estati pou zidòl

yo. ² Yo pa t' sensè! Koulye a, yo pral peye pou sa yo fè: Bondye pral kraze ni lotèl yo, ni estati

yo. ³ Talè konsa, y'a di: -Nou pa gen wa, paske nou pa pè Seyè a. Lèfini, yon wa, sa l' ka fè pou

nou? ⁴ Men, tou sa se pale mete la. Y'ap fè sèman yo p'ap kenbe. Y'ap siyen kontra ki p'ap sèvi yo anyen. Nan tribinal, y'ap rann move jijman. Se tankou move zèb k'ap pouse nan yon jaden ou fèk

pare. ⁵ Moun ki rete lavil Samari pral tranble tèlman y'ap pè pou ti bèf an lò Betavenn yo. Y'ap kriye paske yo pèdi l'. Prèt yo tou ap pouse rèl, paske sa ki te fè pouvwa yo a, yo wete l' nan mitan

yo. ⁶ Yo pran zidòl la, yo mennen l' ale nan peyi Lasiri. Yo fè gwo wa a kado l'. Yo pral fè Efrayim

wont. Wi, pèp Izrayèl la pral wont paske yo t'ap swiv move konsèy. ⁷ Y'ap fini ak lavil Samari a,

wa li a ap disparèt tankou kim sou dlo. ⁸ Yo gen pou yo fè disparèt tout kote pèp Izrayèl la te konn adore zidòl sou mòn Betavenn yo. Pikan ak raje ap pouse sou lotèl yo. Moun yo va rele, y'a mande

mòn yo pou tonbe sou yo, y'a mande ti mòn yo pou kache yo. ⁹ ¶ Seyè a di: -Nou menm moun Izrayèl, depi nou te lavil Gibeya, n'ap fè peche. Depi lè sa a, nou pa janm sispann. Se konsa, lagè

y'ap mennen kont mechan yo ap vire sou nou jouk lavil Gibeya. ¹⁰ Se poutèt sa, mwen soti pou m'

11
 pini yo. Moun lòt nasyon ap mete tèt ansanm sou do yo. Wi, y'ap pini yo akòz peche yo fè. Te
 gen yon lè Efrayim te tankou yon jenn ti gazèl byen drese, li te renmen degrennen mayi sou glasi.
 Men, koulye a, m'ap mete yon jouk sou bèl ti kou l' la, m'ap sele l' pou fè l' travay pi di. M'ap fè
 12
 moun Jida yo raboure tè. Moun Jakòb yo menm, m'ap fè yo kraze boul tè. Mwen te di yo: Kenbe
 kè nou nan kondisyon pou nou sèvi Bondye. Fè sa ki dwat devan Bondye. Konsa n'a rekòlte
 benediksyon m'ap ban nou paske n'ap sèvi m' ak tout kè nou. Fè bwa nèf. Wi, li lè pou nou tounen
 13
 vin jwenn mwen. M'a vini, m'a vide benediksyon sou nou tankou lapli. Men, nou te pito fè sa
 ki mal devan je m'. Se konsa, nou rekòlte sa ki mal tou. N'ap peye manti nou te bay yo. Nou fè sa
 14
 ki nan lide nou. Nou te mete konfyans nou nan gwo kantite sòlda nou te genyen. Se konsa, lènmi
 pral tonbe sou moun nou yo. Y'a detwi tout fò nou yo. Se va tankou lè wa Chalman te sakaje lavil
 15
 Betabèl jou gwo batay la. Lè sa a, yo te kraze ata manman ak pitit. Men sa k'ap rive nou, nou
 menm moun lavil Betèl. Poutèt gwo mechanste nou te fè a, konmanse batay la va konmanse, wa
 Izrayèl la gen pou mouri.

Chapter 11

1
 ¶ Lè pèp Izrayèl la te timoun toujou, mwen te renmen l' tankou pitit gason mwen. Mwen te
 2
 rele l', mwen fè l' soti kite peyi Lejip. Men, plis mwen te konsidere l' tankou pitit mwen, se plis
 li t'ap vire do ban mwen. Yo t'ap plede fè ofrann bèt pou Baal, yo t'ap plede boule lansan pou zidòl.
 3
 Se mwen menm ki te moutre moun Izrayèl yo jan pou yo mache. Mwen te konn pran yo nan bra
 4
 mwen. Men, yo pa t' vle rekòtè se mwen menm ki te pran swen yo. Pou m' te ka rale yo sou
 mwen, mwen fè yo wè jan mwen renmen yo, jan mwen gen bon kè. Mwen defèt baboukèt ki te
 5
 mare bouch yo a. Mwen bese atè pou m' ba yo manje. Men yo refize tounen vin jwenn mwen. Se
 6
 poutèt sa yo p'ap tounen nan peyi Lejip la ankò, se moun Lasiri ki va gouvènen yo. Lènmi pral
 desann sou lavil yo ak nepe nan men yo. Y'ap kraze miray ranpa lavil yo, y'ap detwi pèp mwen an,
 7
 paske yo fè sa yo pito. Yo vire do ban mwen, yo fin pran pli a nèf. Y'a rele anba chay ki sou zepòl
 8
 yo a, men pesonn p'ap vin wete l' sou yo. ¶ Nou menm moun Efrayim yo, kouman nou ta vle pou
 m' lage nou? Nou menm moun Izrayèl yo, kouman nou ta vle pou m' ta detwi nou tankou mwen te
 detwi lavi Adma? Kouman nou ta vle pou m' ta trete nou tankou mwen te trete lavil Zeboyim yo?
 9
 Non! Mwen pa gen kè pou m' fè bagay konsa. Tout zantray mwen ap fè mwen mal pou nou. Mwen
 p'ap fè sa m' te di mwen t'ap fè lè m' te ankòlè a. Mwen p'ap detwi moun Efrayim yo ankò. Paske

se Bondye mwen ye, mwen pa tankou lèzòm. Se yon bondye apa mwen ye. Mwen la avèk nou.

¹⁰
Mwen p'ap fè kòlè pou m' vin detwi nou. Y'a pran mache dèyè m' ankò. Lè m'a gwonde tankou yon lyon, y'a tranble kou fèy bwa, y'a kouri kite peyi bò kote solèy kouche a, y'a vin jwenn mwen.

¹¹
Y'a vole tankou zwazo, y'a kouri kite peyi Lejip. Y'a pran zèl tankou toutrèl, y'a kouri kite peyi

¹²
Lasiri. M'a fè yo tounen vin rete nan peyi yo a. Se mwen menm, Seyè a, ki di sa. Seyè a di ankò: Moun Efrayim yo kouvri m' anba manti. Moun Izrayèl yo vlope m' ak bèl pawòl. Men, moun peyi Jida yo ap kenbe tèt avè m' toujou, mwen menm Bondye ki toujou kenbe pawòl mwen, mwen menm ki yon Bondye apa!

Chapter 12

¹
¶ Pèp Efrayim lan ap fè yon bann bagay ki p'ap rapòte yo anyen. Y'ap kouri siyen kontra ak moun k'ap fini ak yo. Tout lajounen y'ap plede bay manti sou manti. Se fè mechanste. Yo fè kontra

avèk peyi Lasiri, y'ap fè kòmès lwil avèk peyi Lejip. ² Seyè a gen yon kont pou l' regle ak moun

Jida yo tou. Li pral pini moun Jakòb yo dapre ajisman yo. Li pral fè yo peye sa yo fè a. ³ Depi nan vant manman l', Jakòb, zansèt yo, t'ap goumen ak Ezaou, frè jimo li a. Lè li vin gran li goumen ak

Bondye. ⁴ Li mare batay ak yon zanj Bondye, epi li genyen. Lè sa a, Jakòb kriye, li mande pou zanj lan beni l'.

Li kontre ak Bondye Betèl, Bondye pale avè l'. ⁵ Se te Seyè ki gen tout pouvwa a.

Seyè, se konsa yo rele li. ⁶ Konsa, nou menm pitit pitit Jakòb yo, tounen vin jwenn Bondye nou.

Pa janm sispann renmen l'. Fè sa ki dwat devan je li. Pran pasyans! Toujou konte sou Bondye. ⁷ ¶ Seyè a di ankò: -Moun Izrayèl yo tankou moun Kanaran yo. Y'ap sèvi avèk fo mamit. Yo renmen

fè mache nwa. ⁸ Y'ap plede di: Nou fin rich. Nou fè yon bèl kòb. Men, nou travay di tou. Pesonn pa ka di nou te fè ankenn bagay mal pou n' gen tout lajan sa a!

⁹ Men, mwen menm, se Seyè a, Bondye nou an mwen ye. Se mwen ki te mennen nou depi lè nou te moute kite peyi Lejip la. M'a pral fè nou rete anba tant twal ankò, jan nou te konn fè l' lè mwen te vin jwenn nou nan dezè a.

¹⁰
Mwen te pale ak pwofèt yo. Se mwen ki fè yo fè anpil vizyon. Mwen fè yo bay pèp la anpil avètisman pou mwen.

¹¹
Pèp la ap adore zidòl lavil Galarad. Men, sa p'ap sèvi yo anyen. Y'ap ofri towò bèf lavil Gilgal. Men, lotèl yo ap tounen pil wòch nan jaden y'ap pare.

¹²
Jakòb, zansèt nou an, te blije al kache nan peyi Aram. Lè l' te la, li te travay pou moun pou l' te ka jwenn yon fanm pou l' marye. Wi, li te fè metye gadò mouton pou l' te ka jwenn yon fanm.

¹³
Seyè a voye yon

14

pwofèt pou fè pèp Izrayèl la soti kite peyi Lejip. Li fè menm pwofèt la pran swen yo. Men, pèp Efrayim lan te fè bagay ki te fè Seyè a fache anpil. Se poutèt sa, l'ap fè yo peye krim yo fè a. L'ap fè yo peye wont yo te fè l' wont la.

Chapter 13

1 ¶ Nan tan lontan, lè moun Efrayim yo te pale, tout moun te pran tranble. Yo te rive chèf sou tout lòt branch fanmi Izrayèl la. Men, y' al fè sa ki mal. Y' al adore Baal. Se poutèt sa yo pèdi pye.

2 Jouk koulye a, y'ap fè peche toujou. Y'ap pran kwiv, y'ap fonn li pou fè estati zidòl. Y'ap fè bèl zidòl an ajan jan yo konnen. Tou sa se travay atizan fè ak men yo. Apre sa yo di: Ann ofri bèt pou

3 touye ba yo! Koulye a nou wè se moun k'ap bo estati bèl! Konsa, moun sa yo ap disparèt tankou yon vapè ki leve granmaten, tankou lawouze lè solèy fin leve. Y'ap tankou pay van an ap leve soti

4 sou glasi. Y'ap tankou lafimen k'ap soti nan yon fetay kizin. Seyè a di ankò: Se mwen menm ki Seyè a, Bondye ou la. Se mwen menm ki te fè soti kite peyi Lejip. Ou pa konn lòt bondye pase

5 mwen menm. Se mwen menm ase ki ka sove ou. ¶ Mwen te okipe ou lè ou te nan dezè a, nan

6 peyi ki pa gen dlo menm lan. Men, lè yo rive nan peyi ki gen bon tè a, yo manje plen vant yo, lògèy vire tèt yo, se konsa yo bliye m'.

7 Se poutèt sa, m'ap tonbe sou yo tankou yon lyon. Tankou

8 yon leyopa, mwen pral anbiske kò m' sou wout yo ap tann yo. M'ap tonbe sou yo tankou yon manman lous yo pran pitit li. M'ap dechire yo. M'ap devore yo lamenm tankou yon femmèl lyon.

9 M'ap dechire yo tankou yon bèt nan bwa. ¶ M'ap detwi nou, nou menm pèp Izrayèl la, paske nou

10 vire sou do mwen, mwen menm ki tout sekou nou. Nou te mande pou yo ban nou yon wa ansanm

11 ak lòt chèf. Men, kote wa ki pou te sove nou an? Kote tout chèf ki pou te defann nou yo? Mwen

12 te fè kòlè, mwen te ban nou wa a. Men, apre sa, nou fè m' fache pi rèd, mwen wete l' nan mitan

13 nou. Mwen make tou sa Efrayim fè ki mal sou papye. Mwen sere l' byen lwen. Nan tout malè sa a, Efrayim te gen yon chans ankò pou l' ta sove. Men, li twò sòt, l'ap pèdi chans lan. Se tankou

14 yon ti bebe ki rive sou dat pou l' fèt men ki pa vle soti nan vant manman l'. Mwen p'ap sove pèp la anba lanmò. Mwen p'ap anpeche yo desann nan peyi kote mò yo ye a. Annavan, lanmò! Vini ak tout malè ou yo! Nou menm ki chèf nan peyi kote mò yo ye a, vin detwi pèp la. Mwen p'ap janm

15 gen pitye pou pèp sa a ankò. Menm si Izrayèl ta fleri tankou wozo bò dlo, m'ap fè yon van leve nan dezè kote solèy leve a, m'ap fè l' vante sou li, l'ap cheche tout sous dlo ak tout fontenn li yo.

L'ap pran tout bagay ki gen valè nan byen l' yo, l'ap pote yo ale. ¹⁶ Peyi Samari a pral peye pou sa l' fè a, paske li te leve sou do Bondye li a. Yo pral mouri nan lagè. Y'ap pran pitit yo, y'ap kraze yo atè, y'ap fann vant fanm ansent yo.

Chapter 14

¹ ¶ Tounen vin jwenn Bondye nou non, nou menm pitit Izrayèl yo! Se peche nou yo ki te fè nou tonbe. ² Tounen vin jwenn Seyè a! Men sa pou nou di li: Padonnen tout peche nou yo. Asepte sa n'ap mande ou la a. Nou p'ap ofri ou towò bèf ankò, n'ap fè lwanj ou pito. ³ Moun Lasiri yo p'ap janm ka sove nou. Nou p'ap mete konfyans nou ankò nan chwal pou fè lagè. Nou p'ap janm gade zidòl nou fè ak men nou pou nou di yo se yo ki bondye nou. Nou rekonèt, Seyè, se ou menm ki gen pitye pou timoun ki san papa. ⁴ ¶ Seyè a di ankò: -M'ap rale pèp la tounen vin jwenn mwen ankò. M'ap renmen yo ak tout kè m'. Mwen p'ap ankòlè sou yo ankò. ⁵ M'ap tankou lawouze pou moun Izrayèl yo. Yo pral fleri tankou flè nan jaden. Yo pral pouse rasin tankou pyebwa nan peyi Liban. ⁶ Yo pral boujonnen sou tout kò yo. Y'ap bèl tankou pye oliv. Y'ap santi bon tankou pye sèd peyi Liban. ⁷ Yo gen pou yo tounen vin rete anba zèl mwen pou m' pwoteje yo. Jaden ble yo pral donner ankò. Yo pral fleri tankou pye rezen. Non yo ap nan tout bouch tankou bon mak diven yo fè nan peyi Liban. ⁸ ¶ Nou menm moun Izrayèl, konnen mwen pa gen anyen pou mwen wè ak zidòl. Mwen menm m'a reponn yo lè y'ap lapriyé. M'ap okipe yo tankou pye bwapen ki rete toujou vèt, m'ap ba yo lonbraj. Se mwen menm k'ap ba yo tout kalite benediksyon. ⁹ Se pou moun ki gen konprann chache konprann sa ki ekri la a. Se pou moun ki gen lespri chache konprann li. Paske chemen Bondye se chemen ki dwat. Moun k'ap viv dapre volonte Bondye ap mache ladan l' san anyen p'ap rive yo. Men, moun ki vire do yo bay Bondye ap bite sou wout la.

Joel

Chapter 1

¹ ¶ Men mesaj Seyè a te bay Joèl, pitit gason Petwèl la. ² Nou menm vye granmoun yo, koute byen! Nou menm ki rete nan peyi Jida a, louvri zòrèy nou! Eske nan tan pa nou, osinon nan tan

zansèt nou yo bagay konsa te janm rive? ³ N'a rakonte pitit nou yo sa. Yo menm, y'a rakonte pitit
 pa yo sa. Lèfini, pitit yo menm va rakonte l' bay moun k'ap vin apre yo. ⁴ Sa jenn ti krikèt yo kite,
 gwo krikèt devore sa. Sa gwo krikèt yo kite, ti chini devore sa. Sa ti chini yo kite, gwo chini devore
 sa. ⁵ Leve non, bann gwògè! Kriye non! Nou menm ki renmen bweson, pete rele! Paske pa gen
 rezen pou fè diven nivo pou nou ankò. ⁶ Yon lame krikèt atake peyi nou an. Yo gwonèg, moun pa
 ka konte yo. Dan yo tankou dan lyon, kwòk dan yo tankou dan femèl lyon. ⁷ Yo fini ak jaden rezen
 nou yo. Yo manje tout pye fig frans nou yo. Yo wete tout kòs pye fig frans yo voye jete atè. Branch
 pye rezen yo rete kanpe tou blan. ⁸ ¶ Nou menm pèp la, nou mèt plenn, tankou yon jenn fi, rad sak
 li sou li, k'ap plenn lanmò fiyanse l'. ⁹ Pa gen grenn jaden, ni diven pou fè ofrann nan tanp Seyè a.
 Prèt yo, sèvitè Seyè a, nan lapenn. ¹⁰ Tout jaden yo blanch. Tè a nan lapenn. Tout pye ble yo fin
 mouri. Pye rezen yo cheche. Pye oliv yo rabougri. ¹¹ Kiltivatè yo pa konn sa pou yo fè. Moun k'ap
 okipe jaden rezen yo ap plenn paske pa gen ble, pa gen lòj. Tout rekòt yo pèdi nèt. ¹² Pye rezen
 yo ap cheche, pye fig frans yo ap mouri. Pye grenad, pye palmis, pye ponm, tout pye fwi nan jaden
 fin fennen. Pa gen moun ki gen kè kontan ankò. ¹³ Nou menm prèt yo, mete rad sak sou nou! Pete
 rele! Nou menm k'ap sèvi devan lotèl la, mare ren nou. Ale nan tanp lan, pase nwit lan ak rad sak
 sou nou. Nou menm k'ap fè sèvis pou Bondye m' lan, nou nan lapenn. Pa gen grenn jaden, pa gen
 diven pou fè ofrann nan kay Bondye nou an. ¹⁴ ¶ Bay lòd pou yo fè jèn! Rele tout moun vini!
 Sanble tout chèf yo ansanm ak tout moun ki rete nan peyi a, nan kay Seyè a, Bondye nou an. Rele
 nan pye Seyè a. ¹⁵ Ala yon gwo jou papa! Jou Seyè a pa lwen rive. Se jou Bondye ki gen tout
 pouvwa a ap vini kraze brize. Jou sa a ap bay gwo lapenn. ¹⁶ N'ap gade konsa, rekòt nou yo ap
 disparèt devan je nou san nou pa ka fè anyen! Pa gen kè kontan, pa gen fèt nan kay Bondye nou
 an! ¹⁷ Grenn yo plante yo rete anba tè. Kay depo yo fin kraze. Galata yo vid. Pa gen rekòt pou
 mete ladan yo. ¹⁸ Zannimo yo ap plenn, bann bèf yo pa konn kote pou yo ale. Yo pa jwenn anyen
 pou yo manje nan savann. Ata mouton yo ap souffri grangou. ¹⁹ Seyè, m'ap rele nan pye ou! paske
 chechrès la fini ak jaden zèb yo. Ou ta di se dife ki boule tout pyebwa yo! ²⁰ Ata zannimo nan
 savann yo ap rele nan pye ou, paske tout larivyè yo chèch nèt. Dife boule tout zèb nan savann yo.

Chapter 2

¹
 ¶ Kònen twonpèt sou mòn Siyon an! Bay siyal la sou mòn ki apa pou Bondye a! Se pou tout
 moun nan peyi Jida a tranble, paske jou Seyè a pa lwen rive. L'ap pwoche. ² Se va yon jou ki pral
 fè nwa kou lank, ak syèl la plen nwaj nwa, yon jou kote nwaj nwa ak pousyè pral kouvri latè. Yon
 lame krikèt ap vanse. Yo gwonèg anpil! Tankou solèy la lè l'ap leve, y'ap kouvri mòn yo. Se bagay
 nou poko janm wè, bagay nou p'ap janm wè ankò, jouk sa kaba. ³ Tankou dife, yo devore tou sa
 ki devan yo. Yo pa kite anyen kote yo pase. Anvan yo te vini, peyi a te tankou yon ti paradi. Lè yo
 fin pase, li tounen yon dezè san anyen ladan l'. Anyen pa chape anba dan yo. ⁴ Yo tankou chwal,
 yo kouri tankou chwal sèl. ⁵ Lè y'ap soti sou tèt mòn yo, yo fè yon bri tankou cha lagè k'ap pase,
 tankou dife nan pay chèch. Yo mache an ran tankou yon gwo lame tou pare pou goumen. ⁶ Lè y'ap
 pwoche, tout moun pran tranble. Figi tout moun dekonpoze. ⁷ Yo atake tankou vanyan sòlda. Yo
 moute sou miray yo tankou sòlda k'ap fè lagè. Yo mache dwat devan yo, yo pa vire ni adwat ni
 agoch. ⁸ Yonn pa antrave lòt nan mach yo. Yo chak ap swiv chemen pa yo. Yo janbe tou sa yo
 mete pou bare yo. Anyen pa rete yo. ⁹ Yo pran lavil la pou yo. Yo kouri moute sou miray yo. Yo
 moute anwo kay yo, yo pase antre nan fennèt yo tankou vòlò. ¹⁰ Tè a souke lè y'ap mache vini.
 Syèl la tranble. Solèy la ak lalin lan vin tou nwa, zetwal yo pa klere nan syèl la ankò. ¹¹ Seyè a ap
 mache alatèt lame li a: l'ap pase yo lòd. Lame a anpil. Yo gwonèg: Y'ap fè sa li ba yo lòd fè a. Ala
 yon gwo jou se jou Seyè a! Se yon jou pou moun pè tout bon vre. Ki moun ki va rete kanpe apre
 jou sa a? ¹² ¶ Seyè a pale, li di: -Menm koulye a, tounen vin jwenn mwenn ak tout kè nou! Fè jèn,
 kriye kont kò nou, plenn sò nou! ¹³ Se pa rad sou nou pou nou chire, se kè nou menm pou nou
 chire pou fè wè jan nou nan lapenn. Tounen vin jwenn Seyè a, Bondye nou an. Li gen bon kè anpil,
 li gen pitye pou moun. Li pa fache fasil, li p'ap janm sispann renmen nou. Li toujou pare pou
 padonnen nou. ¹⁴ Sa ki konnen? Li ka chanje lide, li ka padonnen nou. Li ka ban nou benediksyon.
 N'a gen grenn jaden ak diven ankò pou nou fè ofrann bay Seyè a, Bondye nou an! ¹⁵ Kònen twonpèt
 sou mòn Siyon an! Bay lòd pou tout moun fè jèn! Mande pou tout moun reyini! ¹⁶ Sanble pèp la.
 Pare tout moun pou fè sèvis. Sanble vye granmoun yo! Reyini tout timoun yo, menm timoun ki
 nan tete. Ata moun ki fenk marye yo, se pou yo kite kay yo vini tou. ¹⁷ Nan lakou ki separe gwo
 pòtay tanp lan ak lotèl la, se pou prèt yo, sèvitè Seyè a, pran kriye. Se pou yo di: Pitye, Seyè, pitye
 pou pèp ou a. Pa kite moun lòt nasyon yo pase moun pa ou yo nan betiz pou fè yo wont, pou yo ta
 di: Kote Bondye yo a? ¹⁸ ¶ Lè sa a, Seyè a fè wè jan li renmen peyi li a. Li fè pèp li a gras. ¹⁹ Li
 reponn, li di pèp la konsa: -Bon! Mwen pral ban nou ble, diven ak lwil fre. N'ap gen tou sa n'a

bezwen. Mwen p'ap janm kite moun lòt nasyon yo pase nou nan betiz ankò. ²⁰ Mwen pral chase lame krikèt la byen lwen nou. Wi, lame krikèt ki te soti nan nò a. M'ap voye yo ale nan dezè a, kote ki pa gen dlo, kote ki pa gen pyebwa. Tèt lame krikèt yo va pran direksyon lanmè ki sou bò solèy leve a, lanmè Mouri a. Ke lame krikèt yo va pran direksyon lanmè ki sou bò solèy kouche a, lanmè ²¹ Mediterane a. Kadav yo pral pouri, y'ap bay move sant. Seyè a fè anpil bagay pou nou. Nou menm jaden yo, nou pa bezwen pè ankò. Fè fèt, fè kè nou kontan, paske Seyè a fè anpil pou nou! ²²

Nou menm zannimo nan savann yo, nou pa bezwen pè ankò: jaden zèb yo pral pouse byen bèl, ²³ pyebwa yo pral donner, pye fig frans yo ak pye rezen yo pral bay bèl rekòt. Nou menm, moun Siyon yo, fè fèt! Fè kè nou kontan poutèt sa Seyè a, Bondye nou an, fè pou nou. Li ban nou kantite lapli nou te bezwen nan sezon lotòn. Li ban nou gwo lapli loraj ak lapli nan sezon prentan, jan l' te ²⁴ konn fè l' anvan an. Glasi yo pral plen grenn. Barik yo pral plen diven ak lwil fre. ²⁵ M'a ban nou ankò tou sa nou te pèdi pandan tout tan bann gwo krikèt yo, ti krikèt yo, ti chini yo ak gwo ²⁶ chini yo te devore rekòt nou yo. Se mwen menm ki te voye lame sa a sou nou. Nou pral manje plen vant nou. N'a fè lwanj Seyè a, Bondye nou an, ki te fè tout bèl bagay sa yo pou nou. Yo p'ap ²⁷ janm pase pèp mwen an nan betiz ankò. Lè sa a, n'a konnen mwen kanpe la nan mitan pèp Izrayèl la. Se mwen menm Seyè a ki Bondye nou. Pa gen tankou m'. Yo p'ap janm pase pèp mwen an nan ²⁸ betiz ankò. ¶ Apre sa, m'a vide lespri mwen sou tout moun. Pitit gason ak pitit fi nou yo va bay ²⁹ mesaj m'a ba yo. Granmoun nou yo va fè rèv. Jenmoun nou yo va gen vizyon. Wi, lè sa a, m'a ³⁰ vide lespri m' sou tout moun, ata sou moun k'ap travay lakay nou, fi kou gason. M'apral fè mèvèy ³¹ parèt nan syèl la ak sou latè a. Va gen san, dife ak gwo nwaj lafimen. Solèy la pral vin tou nwa, lalin lan pral vin wouj kou san anvan jou Seyè a va rive. Aa! Se va yon gwo jou, yon jou k'ap fè ³² moun tranble. Lè sa a, tout moun ki va rele nan pye Seyè a va sove. Paske sou mòn Siyon ak nan lavil Jerizalèm va gen moun ki va chape, jan Seyè a te di l' la. Wi, tout moun Seyè a va chwazi, se yo ki va chape.

Chapter 3

¹ ¶ Seyè a di ankò: -Lè sa a, jou sa yo, m'a fè peyi Jida a ak lavil Jerizalèm kanpe ankò. ² Apre sa, m'a sanble tout nasyon yo. M'a fè yo desann nan Fon Jijman Bondye a. Se la mwen pral jije yo pou tou sa yo fè Izrayèl, pèp mwen an, moun pa m' yo. Paske, se yo ki te gaye moun pèp Izrayèl ³ yo nan mitan lòt nasyon yo. Lèfini, yo te separe peyi mwen an. Yo te tire osò pou konnen pou ki

moun prizonye yo ap ye. Yo te vann ti gason yo pou yo te ka gen lajan pou al nan jennès. Yo te
 vann tifi yo pou yo te ka gen lajan pou achte bweson, Lèfini, yo bwè jouk yo sou. ⁴ Nou menm
 moun lavil Tir ak moun lavil Sidon, sa n'ap chache fè m' konsa? Nou menm tou ki rete nan tout
 zòn peyi Filisti a, se chache n'ap chache fè m' peye pou sa m' te fè nou? Si nou vle tire revanj nou
 sou mwen, enben, anvan nou bat je nou, m'ap fè nou peye sa. ⁵ Nou te pran tout ajan ak tout lò
 mwen yo, nou pote tout bèl gwo richès mwen yo ale nan tanp nou yo. ⁶ Nou pran moun peyi Jida
 yo ak moun lavil Jerizalèm yo, nou mennen yo byen lwen peyi yo: n' al vann yo bay moun peyi
 Lagrès. ⁷ Koulye a, mwen pral fè yo soti kote nou te vann yo a. Mwen pral fè nou sa nou te fè yo
 a. ⁸ Mwen pral vann pitit gason ak pitit fi nou yo. Mwen pral lage yo nan men moun Jida yo. Yo
 menm, yo pral vann yo bay sabeyen yo ki rete nan yon peyi byen lwen. Se mwen menm, Seyè a,
 ki di sa. ⁹ ¶ Mache fè piblikasyon sa a nan mitan tout nasyon yo! Pare nou pou n' al fè lagè pou
 Bondye! Rele tout vanyan gason yo! Sanble tout sòlda yo! Fè yo mache pran yo! ¹⁰ Pran lam fè
 ki nan chari nou yo fè nepe. Pran kouto digo nou yo, fè fwenn ak yo. Menm moun ki pi fèb yo pral
 di yo vanyan gason. ¹¹ Nou menm, tout nasyon ki sou lizyè fwontyè peyi a, prese non! Kouri vini!
 Sanble nan fon an! Seyè, voye vanyan sòlda ou yo al atake yo! ¹² Se pou tout nasyon ki sou lizyè
 fwontyè peyi a sanble tout lame yo pou yo vini nan Fon Jijman an, paske se la mwen pral chita pou
 m' jije tout nasyon ki sou lizyè fwontyè peyi a. ¹³ Moun sa yo twò mechan. Koupe tèt yo tankou
 lè n'ap ranmase rekòt ki mi. Kraze yo anba pye nou tankou lè n'ap kraze rezen nan basen pou fè
 diven. Barik ji rezen yo plen ap debòde. ¹⁴ Foul moun sou foul moun nan Fon Jijman an! Paske
 jou Seyè a pa lwen rive nan Fon Jijman an. ¹⁵ Solèy la ak lalin lan vin tou nwa. Zetwal yo pa klere
 nan syèl la. ¹⁶ Seyè a rete sou mòn Siyon, l'ap gwonde. Li rete lavil Jerizalèm, l'ap pale byen fò.
 Syèl la ak latè a ap tranble. Men, se Seyè a k'ap pwoteje pèp li a. Se li k'ap pran defans moun Izrayèl
 yo. ¹⁷ Lè sa a, n'a konnen se mwen menm ki Seyè a, Bondye nou an. Mwen rete sou mòn Siyon,
 mòn yo mete apa pou mwen an. Jerizalèm va yon lavil apa pou Bondye. Moun lòt nasyon yo p'ap
 ka pran l' pou yo ankò. ¹⁸ ¶ Jou sa a, mòn yo pral kouvri ak jaden rezen. Bèf pral sou tout ti mòn
 yo. Va gen kont dlo nan larivyè peyi Jida yo. Yon sous dlo pral koule soti nan kay Seyè a. Li pral
 wouze bafon zakasya yo. ¹⁹ Peyi Lejip pral tounen yon savann dezole. Peyi Edon pral tounen yon
 dezè. Paske, yo te fè moun peyi Jida yo mechanste, yo te touye yon bann inonsan nan peyi yo.
²⁰ -(we vèsè pwochen) ²¹ Men, m'a pran revanj moun yo te touye yo. Mwen p'ap fè pa moun ki
 koupab yo. Men, va gen moun rete nan peyi Jida a ak nan lavil Jerizalèm pou tout tan. Epitou,
 mwen menm, Seyè a, m'a fè mòn Siyon an tounen kay mwen ankò.

Amos

Chapter 1

¹
 ¶ Men mesaj Amòs, yonn nan gadò mouton lavil Tekoa a, te bay. Se bagay Bondye te fè l' konnen sou pèp Izrayèl la, dezan anvan tranblemanntè a. Lè sa a, se Ozyas ki te wa nan peyi Jida, epi se Jewoboram, pitit Joas, ki te wa nan peyi Izrayèl. ² Amòs di: -Seyè a rete sou mòn Siyon, l'ap gwonde. Li rete lavil Jerizalèm, li pale byen fò. Lamenn, savann mouton yo fennen. Zèb ki sou tèt mòn Kamèl la cheche. ³ ¶ Seyè a di konsa: Moun peyi Damas yo ap plede fè peche sou peche san rete. Mwen fin pran desizyon m', mwen p'ap chanje lide. Yo maltrete moun peyi Galarad yo. Yo krabinen yo anba kout baton fè. ⁴ M'ap voye dife sou kay kote wa Azayèl rete a. Dife a ap boule gwo kay wa Bennadad la ra tè. ⁵ M'ap kraze pòtay lavil Damas la miyèt moso. M'ap disparèt moun ki rete nan Fon Avenn ansanm ak chèf ki kòmande lavil Betedenn lan. Y'a fè moun peyi Siri yo prizonye, y'a depòte yo nan peyi Kir. Se Seyè a menm ki di sa. ⁶ Seyè a di konsa: Moun lavil Gaza yo ap plede fè peche sou peche san rete. Mwen fin pran desizyon m', mwen p'ap chanje lide. Yo depòte tout yon nasyon. Yo vann yo tankou esklav bay moun Edon yo. ⁷ M'ap voye dife sou miray lavil Gaza. L'ap boule gwo kay yo ra tè. ⁸ M'ap disparèt moun ki kòmande lavil Asdòd ansanm ak chèf ki rete nan lavil Askalon an. M'ap pini lavil Ekwon an. Tout rèz moun Filisti yo pral mouri. Se Seyè a menm, Bondye a, ki di sa. ⁹ Seyè a di konsa: Moun peyi Tir yo ap plede fè peche sou peche san rete. Mwen fin pran desizyon m', mwen p'ap chanje lide. Yo depòte tout yon nasyon. Yo vann yo tankou esklav bay moun Edon yo. Yo pa respekte kondisyon yo te pase pou yo viv yonn ak lòt tankou frè ak frè. ¹⁰ Se poutèt sa, m'ap voye dife sou miray lavil Tir. L'ap boule gwo kay li yo ra tè. ¹¹ Seyè a di konsa: Moun lavil Edon yo ap plede fè peche sou peche san rete. Mwen fin pran desizyon m', mwen p'ap chanje lide. Yo kouri dèyè frè yo ak nepe pou yo touye yo. Yo san pitye pou yo. Kòlè yo pa gen limit. Yo toujou kenbe yo nan kè yo. ¹² Se poutèt sa, m'ap voye dife nan lavil Teman. L'a boule gwo kay lavil Bozra yo ra tè. ¹³ Seyè a di konsa: Moun lavil Amon yo ap plede fè peche sou peche san rete. Mwen fin pran desizyon m', mwen p'ap chanje lide. Nan fè lagè pou yo ka gen plis tè, yo rive devantr fanm ansent peyi Galarad yo. ¹⁴ Se poutèt sa, m'ap limen yon dife sou miray lavil Raba. L'a boule gwo kay yo ra tè. Se lè sa a w'a tande rèl moun k'ap goumen nan lagè yo, tankou bri van siklòn k'ap pase. ¹⁵ Y'a fè wa yo ak tout chèf yo prizonye. Y'a depòte yo. Se Seyè a menm ki di sa.

Chapter 2

¹
¶ Seyè a di konsa: Moun lavil Moab yo ap plede fè peche sou peche san rete. Mwen fin pran desizyon m', mwen p'ap chanje lide. Yo pa respekte zosman wa Edon an. Yo boule yo fè yo tounen

²
sann. M'ap voye dife nan peyi Moab la. L'a boule gwo kay lavil Keriyòt yo ra tè. Moun Moab yo ap mouri nan mitan batay la, antan moun k'ap goumen yo ap rele byen fò, epi klewon ap kònen.

³
M'ap touye chèf k'ap gouvènen nan mitan yo ansanm ak tout lòt chèf ki nan peyi a. Se Seyè a

⁴
menm ki di sa. Seyè a di konsa: Moun peyi Jida yo ap plede fè peche sou peche san rete. Mwen fin pran desizyon m', mwen p'ap chanje lide. Yo voye sa mwen te moutre yo a jete. Yo p'ap fè sa

⁵
m' te ba yo lòd fè a. Yo kite menm zidòl zansèt yo te sèvi a fè yo pèdi wout yo. Se poutèt sa, m'ap

⁶
voye dife nan peyi Jida a. L'a boule gwo kay lavil Jerizalèm yo ra tè. Seyè a di konsa: Moun pèp Izrayèl yo ap plede fè peche sou peche san rete. Mwen fin pran desizyon m', mwen p'ap chanje lide. Yo pran moun serye ki pa ka peye dèt yo, yo vann yo tankou esklav. Yo pran pòv malere ki

⁷
pa gen senk pou peye dèt yo, yo vann yo pou gremesi. Y'ap pilonnen malere anba pye yo. Y'ap fè pòv yo vin pi pòv. Papa kou pitit al dèyè fi k'ap sèvi nan kay la. Konsa, yo trennen non Bondye

⁸
nan labou. Yo kouche bò lotèl yo sou rad moun te mete nan plan lakay yo. Nan tanp bondye yo

⁹
a y'ap bwè bweson yo te fè moun bay pou amann. ¶ Men, nou menm pèp mwen, se pou nou mwen te detwi moun Amori yo nèt, yon bann moun ki te wo tankou pye palmis, ki te gen kouraj tankou

¹⁰
pye bwadchenn. Mwen koupe branch yo ra tè. Mwen dechouke rasin yo. Mwen fè nou soti kite peyi Lejip. Mwen mennen nou pandan karantan nan dezè a. Mwen ban nou peyi moun Amori yo

¹¹
pou peyi pa nou. Mwen te chwazi kèk nan pitit gason nou yo pou sèvi m' prèt, ak kèk nan jenn gason nou yo pou yo ka vin nazirit. Se pa konsa sa te fèt vre, moun Izrayèl? Se mwen menm, Seyè

¹²
a, ki di sa. Men, nou fè nazirit yo bwè diven, nou bay pwofèt yo lòd pou yo pa bay mesaj mwen

¹³
ba yo pou pèp la. Koulye a, mwen pral kraze nou anba pye m' menm jan yon kabwèt chaje ap

¹⁴
foule tè. Nou te mèt konn kouri, nou p'ap chape. Gwonèg kou nou gwonèg, sa p'ap sèvi nou

¹⁵
anyen. Vanyan kou nou vanyan, nou p'ap ka sove pwòp tèt nou. Moun k'ap tire flèch yo p'ap ka

¹⁶
rete kanpe. Moun k'ap kouri vit yo p'ap ka chape. Kavalye sou chwal p'ap ka sove lavi yo. Jou sa a, ata sòlda ki pi vanyan yo ap lage zam yo atè, y'ap kouri met deyò tankou manman yo te fè yo. Se Seyè a menm ki di sa.

Chapter 3

¹ ¶ Nou menm pèp Izrayèl, tandè mesaj Seyè a te bay sou nou, sou nasyon li te fè soti kite peyi
² Lejip la. Nan tout pèp ki sou latè, se nou menm sèl mwen te chwazi, se nou menm ase mwen te
³ okipe. Se poutèt sa, m'ap pini nou pou tout peche nou fè yo. Ou janm wè de moun pati ansanm
⁴ al nan vwayaj san yo pa t' antann yo anvan? Ou janm tandè yon lyon gwonde nan rakbwa san li
⁵ pa gen tan jwenn sa pou l' manje a anvan? Ou janm tandè yon jenn ti lyon ap gwonde nan twou li
⁶ san li pa gen anyen nan bouch li? Ou janm wè yon zwezo desann atè vin pran nan pèlen si yo pa
⁷ mete manje nan pèlen an anvan? Ou janm wè yon pèlen pati si pa gen bèt ki pran ladan l'? Ou
⁸ janm wè yo kònen klewon pou fè konnen lagè pral konmanse pou kè moun pa kase? Eske malè ka
⁹ tonbe sou yon lavil si se pa Seyè a ki lakòz? Konsa tou, ou mèt sèten, Seyè a p'ap janm fè anyen
¹⁰ san li pa fè pwofèt yo, moun k'ap sèvi l' yo, konnen. Lè lyon gwonde, ki moun ki p'ap gen kè
¹¹ kase? Lè Seyè a pale, ki moun ki ka enpoze pwofèt yo bay mesaj la? ¶ Men sa pou ou fè moun
¹² ki rete nan gwo kay peyi Lejip ak nan peyi Asdòd yo konnen: Nou tout, sanble sou mòn Samari
¹³ yo. Vin wè ki kalite dezòd ki gen la, ki kantite krim k'ap fèt la. Yo pa konn jan pou yo fè sa ki
¹⁴ dwat devan Bondye. Se mwen menm, Seyè a, ki di sa. Yo plen kay yo ak bagay yo pran nan vòlò
¹⁵ ak nan sasinen moun. Se sa ki fè, men sa Seyè a, Bondye a, di: Yon lènmi gen pou vin sènen
¹⁶ peyi a, l'a kraze tout fò k'ap pwoteje ou yo, l'ap piye tout gwo kay ou yo. Seyè a di konsa: Lè
¹⁷ yon lyon fin devore yon ti mouton, tou sa gadò a resi sove se renk de pye ak yon ti moso zòrèy.
¹⁸ Konsa tou, se de twa nan moun pèp Izrayèl ki rete lavil Samari yo k'ap sove, yo menm ki rete nan
¹⁹ yon ti kwen kay, sou yon moso kabann. Koute byen. Avèti pitit pitit Jakòb yo. Men sa Seyè a,
²⁰ Bondye ki gen tout pouvwa a, di: Lè jou a rive pou m' pini pèp Izrayèl la pou peche l' yo, m'a
²¹ detwi tout lotèl ki nan lavil Betèl la. Kòn lotèl yo ap kase, y'ap tonbe atè. M'ap detwi kay yo fè
²² pou sezon fredè ak kay yo fè pou sezon chalè. M'ap demoli kay yo fè ak ivwa yo ra tè. Tout gwo
²³ kay yo pral disparèt. Se Seyè a menm ki di sa.

Chapter 4

¹
 ¶ Nou menm, gwo fanm peyi Samari yo, nou gra tankou manman bèf Bazan. N'ap maltrete
 malere yo, n'ap peze pòv yo, epi n'ap di mari nou yo pote diven ban nou bwè. ² Koute sa Seyè a
 di: Seyè a se yon moun apa. Se yon Bondye tout bon. Li fè sèman sou tèt li. Li di konsa: Yon jou
 gen pou rive, y'ap fwennen nou tankou pwason ki pran nan zen. Y'ap pote nou tout ale. ³ Y'a fè
 nou pase nan twou ki nan miray la, de pye devan, yonn apre lòt. Y'ap voye nou jete deyò. Se Seyè
⁴
 a menm ki di sa. Seyè a di konsa: Nou menm, pèp Izrayèl, se sa! Moute nan tanp lavil Betèl yo,
 al fè peche! Ale lavil Gilgal, peche kont kò nou! Chak maten, mennen bèt pou yo touye tankou
⁵
 ofrann bay Bondye! Chak twa jou, pote ladim nou! Ale non! Ofri pen nou bay Bondye pou di l'
 mèsi! Mache di toupatou jan nou fè ofrann ak tout kè nou bay Bondye! Apa konsa nou renmen fè,
⁶
 pèp Izrayèl! Se Seyè a menm ki di sa. ¶ Se mwen menm ki te fè grangou tonbe sou tout lavil nou
 yo, kifè nou pa t' ka jwenn manje lakay nou. Malgre sa, nou pa tounen vin jwenn mwen. Se Seyè
⁷
 a menm ki di sa. Lè jaden nou tapral pote rekòt, mwen pa t' kite lapli tonbe. Mwen voye lapli sou
 yon lavil, mwen fè yon lòt rete san yon grenn lapli. Yon jaden jwenn lapli, yon lòt menm ap mouri.
⁸
 Moun soti nan de twa lavil ale nan yon lavil nan vwazinaj al mande dlo, men pa t' gen ase pou yo
⁹
 tout bwè. Malgre sa, nou pa tounen vin jwenn mwen. Se Seyè a menm ki di sa. Mwen voye yon
 van cho kou dife boule tout rekòt yo. Krikèt vèt manje tout jaden nou yo ak tout pye rezen nou yo,
 tout pye fig Frans nou yo ak tout pye oliv nou yo. Malgre sa, nou pa tounen vin jwenn mwen. Se
¹⁰
 Seyè a menm ki di sa. Mwen voye malè sou nou tankou malè mwen te voye sou peyi Lejip la.
 Mwen touye jenn gason nou yo nan lagè. Mwen te pran tout chwal nou yo mennen ale. Sant kadav
 moute nan nen nou tout kote nou rete a. Malgre sa, nou pa tounen vin jwenn mwen. Se Seyè a
¹¹
 menm ki di sa. Mwen detwi kèk nan nou, menm jan mwen te detwi moun Sodòm ak moun Gomò
 yo. Sa ki te sove nan nou yo, se tankou yon bout bwa ki pran dife, epi yo kouri wete l' nan dife a
¹²
 pou li pa fin boule. Malgre sa, nou pa tounen vin jwenn mwen. Se Seyè a menm ki di sa. Se
 poutèt sa, nou menm moun pèp Izrayèl, mwen pral pini nou. E paske mwen pral pini nou konsa a,
¹³
 nou mèt pare kò nou pou n'a l' kontre ak Bondye nou an. Se Bondye ki te fè mòn yo. Se li menm
 ki te kreye van yo. Li fè lèzòm konnen lide li gen nan tèt li. Li fè lajounen soti nan lannwit. L'ap
 gouvènen sou tout latè. Se poutèt sa, men jan yo rele l': Seyè a, Bondye ki gen tout pouvwa a.

Chapter 5

¹ ¶ Nou menm, moun pèp Izrayèl, koute chante m'ap chante nan lapenn mwen gen pou nou:
² Pèp Izrayèl la tankou yon jenn fi. Li tonbe. Li p'ap janm leve ankò. Men li kouche atè a. Pa gen
³ pesonn pou ba l' men. Seyè a di konsa: Lè yon lavil nan peyi Izrayèl la voye mil (1000) sòlda
⁴ nan lagè, se san (100) ase ki tounen. Lè yon lòt lavil voye san (100) se dis ase ki tounen. ¶ Seyè
⁵ a pale ak pèp Izrayèl la, li di l' konsa: Tounen vin jwenn mwen, n'a gen lavi. Pa al chache m' lavil
⁶ Betèl. Pa ale lavil Gilgal. Pa moute ale bò Bècheba al fè sèvis. Betèl pa la pou lontan. Yo gen pou
⁷ yo depòte moun Gilgal yo voye yo nan peyi etranje. Chache vin jwenn Seyè a, n'a gen lavi. Si se
⁸ pa sa, l'ap tonbe sou pèp Izrayèl la tankou dife. Dife a ap boule lavil Betèl. Pesonn p'ap ka tenyen
⁹ l'. Abye! N'ap vire lajistis lanvè, n'ap pilonnen dwa pèp la anba pye nou! Se Seyè a ki te fè
¹⁰ zetwal yo, Lapousiyè ak Oryon. Li fè lannwit tounen lajounen, li fè lajounen tounen lannwit. Li
¹¹ rele dlo lanmè a, li vide l' sou tout latè. Yo rele l' Seyè. Wi, se konsa yo rele l'. Li rale malè sou
¹² gwo chèf yo, li fè kraze sitadèl yo nèt. Nou pa vle wè moun k'ap denonse lenjistis. Nou pa vle
¹³ wè moun k'ap di verite nan tribinal. Nou fin peze pòv malere yo, nou fòse yo ban nou nan rekòt
¹⁴ jaden yo. Se poutèt sa, nou p'ap rete nan bèl gwo kay an wòch nou bati yo, ni nou p'ap bwè diven
¹⁵ ki fèt ak rezen ki soti nan bèl jaden nou te plante yo. Mwen konnen tou jan peche nou fè yo gwo
¹⁶ anpil, jan se pa de ti krim nou pa fè. Nou pèsekite moun serye. Nou pran lajan nan men moun k'ap
¹⁷ achte figi nou. Nou enpoze pòv malere yo jwenn jistis nan tribinal. Se poutèt sa, yon moun ki
¹⁸ gen konprann, se je wè bouch pe. Tan an twò move deyò a. Chache fè sa ki byen pou nou ka
¹⁹ viv. Pa fè sa ki mal. Lè sa a, Seyè a, Bondye ki gen tout pouvwa a, va kanpe avèk nou jan n'ap
²⁰ plede di l' la. Rayi sa ki mal, renmen sa ki byen. Pa kite yo fè lenjistis nan tribinal. Nou pa janm
²¹ konnen, Seyè a ka gen pitye pou ti rèz ki rete nan pitit pitit Jozèf yo. ¶ Se poutèt sa, men sa Seyè
²² a, Bondye ki gen tout pouvwa a, di: Moun pral mache nan tout lari, yo pral rele nan tout kalfou:
²³ Mezanmi, mezanmi, ki lapenn sa a! Yo pral rele tout moun vin nan lanmò a. Y'ap fè chache moun
²⁴ ki konn rele yo pou yo vin kenbe rèl la. Nan tout jaden moun ap plenn. Tou sa, paske m'ap vin
²⁵ pini nou. Se Seyè a menm ki di sa. Sa pral rèd nèt pou moun ki anvi wè jou Seyè a rive! Kisa
²⁶ jou sa a ap fè pou yo? Se pral yon jou fènwa, se p'ap yon jou limyè. Se va tankou yon nonm
²⁷ k'ap kouri pou lapli, epi li tonbe larivyè. Ou ankò, tankou yon moun ki rive lakay li, li mete men l'
²⁸ sou panno kay la, epi yon krab zarenyen mòde l'. Jou Seyè a ap vini an, va fè nwa kou lank, p'ap
²⁹ fè klate. Se va yon jou fènwa, san yon ti limyè. ¶ Seyè a di konsa: Mwen pa vle wè gwo fèt n'ap

fè pou mwen yo. Mwen pa ka santi yo. Mwen pa ka sipòte lè nou reyini pou fè sèvis pou mwen.

²²

Lè n'a pote bèt pou boule pou mwen, lè n'a fè m' ofrann gato, sa p'ap fè m' plezi. Ni mwen p'ap menm gade bèt gra nou pote vin ofri m' pou di m' mèsi. ²³ Sispann chante kantik nou yo nan zòrèy

mwen. Mwen pa vle tandè mizik gita nou yo ankò. ²⁴ Tankou dlo k'ap kouri larivyè, se pou nou rann tout moun jistis nan peyi a. Tankou yon kouran dlo k'ap kouri san rete, se pou nou toujou fè

sa ki dwat. ²⁵ Nou menm, moun Izrayèl, pandan karantan nou pase nan dezè a, nou janm ofri bèt

pou touye pou mwen? Nou janm ofri m' gato? ²⁶ Se konsa, koulye a nou gen pou nou pote lakay nou pòtre nou te fè pou nou yo: pòtre Sakit, wa nou an, ak pòtre zetwal Kevan an, bondye n'ap sèvi

a. ²⁷ M'ap depòte nou nan yon peyi lòt bò Damas. Men sa Seyè a di, li menm yo rele Bondye ki gen tout pouvwa a.

Chapter 6

¹ ¶ Sa pral rès nèt pou moun k'ap mennen lavi dous nan peyi Siyon an, pou moun sou mòn Samari ki kwè pa gen danje pou yo! Yo pase pou lelit nan peyi Izrayèl, premye peyi sou latè. Se

bò kote yo pèp la ap kouri vini. Yo di: ² Al gade sa k'ap pase lavil Kalne. Apre sa, ale pase bò gwo lavil Amat la. Lèfini, desann kay moun Filisti yo lavil Gat. Eske zafè yo pi bon pase zafè peyi Jida

ak zafè peyi Izrayèl? Eske peyi yo a pi gran pase pa nou yo? ³ N'ap twonpe tèt nou, nou refize admèt jou malè a fin rive sou nou. Men, se nou menm ankò k'ap rale malè sou peyi a. ⁴ Sa pral rès

nèt pou moun ki kouche sou bèl kabann, k'ap layite kò yo sou bon matla dous, k'ap manje jenn ti

mouton ak jenn ti bèf! ⁵ Y'ap plede ranse pandan gita ap jwe. Yo kwè yo jwe mizik tankou David.

⁶ Y'ap bwè diven san gad dèyè, y'ap pase pi bon kalite odè ki genyen sou yo. Men, yo pa gen lapenn

pou malè k'ap tonbe sou pitit pitit Jozèf yo. ⁷ Se poutèt sa, premye moun y'ap depòte se yo menm.

Sosyete moun k'ap fè banbòch yo va disparèt. ⁸ ¶ Seyè a, Bondye sèl Mèt la, te fè sèman sou tèt li. Men avètisman Seyè a, Bondye ki gen tout pouvwa a, bay: Mwen pa ka sipòte lògèy pèp Izrayèl la gen nan kè li. Mwen pa ka wè gwo kay y'ap plede bati yo. M'ap lage kapital la nan men lènmi

ak tout moun ladan l'. ⁹ Si gen dis gason nan yon kay ki rete, y'ap touye yo. ¹⁰ Lè yon fanmi moun mouri a va vin pran kadav la anndan kay la pou li al antere l', l'a pale ak moun ki nan fon kay la,

l'a mande: Eske gen moun la ankò ak ou? Yon vwa va reponn: Non, pa genyen. Lè sa a, l'a di: Pe

bouch nou! Pa nonmen non Bondye nan bagay sa a! ¹¹ Men lòd Seyè a bay: Y'ap kraze gwo kay

12
 yo an miyèt moso. Y'ap demoli ti kay yo. Eske chwal ka kouri sou glasi? Eske moun ka raboure lanmè avèk bèf? Men nou menm, nou fè lajistis tounen pwazon, nou fè inonsan pase pou koupab.

13
 Nou fè kè nou kontan paske nou pran lavil Lodeba. N'ap plede di: O wi, se avèk fòs kouraj nou
 14
 nou pran kòn lan. Men sa Seyè a, li menm ki Bondye ki gen tout pouvwa a, di: Nou menm, moun Izrayèl, m'ap fè yon nasyon leve dèyè nou. Wi, se mwen menm menm k'ap fè sa, yon nasyon k'ap pran peyi a nan men nou, yon nasyon ki pral peze nou depi nan pas Amat nan nò rive jouk ravin Araba nan sid.

Chapter 7

1
 ¶ Se konsa Seyè a, Bondye a, fè m' fè yon vizyon. Nan vizyon an mwen wè Seyè a t'ap fè yon rafal krikèt vèt. Se te nan epòk yo te fin koupe pòsyon pa wa a nan jaden yo. Chak plant yo te fèk ap boujonnen ankò.
 2
 Lè krikèt vèt yo te fin manje plant ki te nan peyi a, mwen di: -Tanpri, Seyè, Bondye, padonnen pèp ou a. Ki jan pou pitit pitit Jakòb yo fè kanpe ankò? Yo tou fèb.
 3
 Seyè a chanje lide. Li di: -Sa ou te wè a p'ap rive ankò.
 4
 Se konsa, Seyè a, Bondye a, fè m' fè yon lòt vizyon. Nan vizyon an, mwen wè Seyè a t'ap voye yon dife pou l' devore pèp la pou pini l'. Dife a te fin boule gwo lanmè ki anba tè a, li t'ap devore tout jaden.
 5
 Mwen di: -Tanpri, Seyè, Bondye, pa fè sa. Ki jan pou pitit pitit Jakòb yo fè kanpe ankò? Yo tou fèb.
 6
 Seyè a chanje lide, li di: -Sa a tou p'ap rive.
 7
 Se konsa, Seyè a fè m' fè yon lòt vizyon ankò. Nan vizyon an, mwen wè Seyè a te kanpe bò yon mi yo te moute tou dwat. Li te gen yon filaplou nan men l'.
 8
 Lè sa a, Seyè a mande m': -Kisa ou wè la a, Amòs? Mwen reponn li: -Yon filaplou. Lè sa a, li di m': -M'ap sèvi ak filaplou sa a pou m' fè pèp la konnen li tankou yon miray ki panche prèt pou tonbe. Mwen p'ap fè pa yo ankò.
 9
 Mwen pral kraze tout kote pitit pitit Izarak yo te konn adore m' sou mòn yo. Mwen pral fè tout kay pitit pitit Izrayèl yo te mete apa pou mwen yo tounen mazi. M'ap fè lagè ak fanmi Jewoboram lan, m'ap wete gouvènman an nan men yo.
 10
 ¶ Amatsya, prèt nan lavil Betèl la, voye di Jewoboram, wa Izrayèl la: -Men Amòs ap moute konplo sou do ou nan mitan pèp Izrayèl la. Li soti pou l' fini ak peyi a ak pawòl l'ap di yo.
 11
 Men sa l'ap mache di: Jewoboram gen pou l' mourir nan lagè. Y'ap pran moun Izrayèl yo lakay yo, y'ap depòte yo byen lwen nan peyi etranje.
 12
 Apre sa, Amatsya pale ak Amòs, li di l' konsa: -Divinò, al fè wout ou. Ale vit nan peyi Jida a! Al bay mesaj ou yo laba. Y'a peye ou pou sa!
 13
 Men isit la, lavil Betèl, pito ou sispann bay mesaj ou yo

si ou konn bout! Paske, se isit la wa a vin adore. Se yon tanp nasyonal pou tout peyi a. ¹⁴ Amòs reponn Amatsya: -Monchè, pwofèt pa metye m'. Nitou, mwen pa fè pati sosyete moun k'ap fè metye pwofèt. Metye m' se gade bèt, se okipe pye sikomò. ¹⁵ Men, Seyè a pran m' nan pye travay mwen, dèyè bèt mwen yo, li ban m' lòd pou m' al fè pèp Izrayèl la konnen mesaj li voye ba yo. ¹⁶ Koulye a menm, koute pawòl Seyè a voye di ou: Ou menm w'ap mande m' pou m' pa bay ankenn mesaj sou pèp Izrayèl la, pou m' sispann pale sou pitit Izarak yo. ¹⁷ Poutèt sa, Amatsya, men sa Seyè a di: Madanm ou ap tounen jennès nan lavil la! Pitit gason ou yo ak pitit fi ou yo ap mouri nan lagè! Y'ap pran tè ou yo, y'ap separe yo moso pa moso. Ou menm, ou gen pou ou mouri nan yon peyi etranje kote yo pa sèvi Seyè a. Pèp Izrayèl la menm, y'ap pran l', y'ap depòte l' byen lwen peyi l'.

Chapter 8

¹ ¶ Se konsa, Seyè a, Bondye a, fè m' fè yon lòt vizyon. Nan vizyon an, mwen wè yon panyen plen fwi mi. ² Seyè a mande m': -Kisa ou wè la a, Amòs? Mwen reponn: -Yon panyen fwi mi. Lè sa a, Seyè a di m' konsa: -Izrayèl, pèp mwen an, mi tou. Li rive sou dènye jou l' yo. Mwen p'ap chanje lide pou m' fè pa l' ankò. ³ Jou sa a, se p'ap chante ki va gen nan palè a, se va rèl. Se Seyè a menm ki di sa. Va gen anpil kadav toupatou. Y'a voye yo jete san di krik. ⁴ ¶ Koute byen sa m'ap di nou la a, nou menm k'ap kraze pòv malere yo anba pye nou, nou menm k'ap fini ak malere yo nan peyi a. ⁵ N'ap plede di: Kilè fèt lalin nouvèl lan va pase pou nou ka vann diri nou? Kilè jou repo a va pase pou nou ka louvri depo nou yo pou nou vann? Lè sa a, n'a moute pri tout bagay, n'a sèvi ak fo mezi, n'a ranje balans yo pou nou ka twonpe pratik yo. ⁶ N'a pran moun serye ki pa ka peye dèt yo, n'a achte yo pou sèvi esklav. N'a pran pòv malere ki pa gen senk, n'a achte yo pou pri yon pè sapat. N'a vann ata pay diri a pou gwo lajan. ⁷ Seyè a fè sèman sou tèt li, li menm ki Bondye pèp Izrayèl la: Mwen p'ap janm bliye yonn nan move zak nou fè yo. ⁸ Se konsa latè pral pran tranble. Tout moun nan peyi a pral pran rele. Tout peyi a pral souke. L'ap moute, l'ap gonfle, apre sa l'ap desann tankou dlo larivyè Nil nan peyi Lejip. ⁹ Men pawòl Seyè a, Bondye a: Jou sa a, m'ap fè solèy la kouche gwo midi. Fènwa ap tonbe sou peyi a gwo lajounen. ¹⁰ M'ap fè nou sispann fè fèt. N'a nan gwo lapenn. M'ap fè nou sispann chante, n'a nan rele. M'ap fè nou mete rad sak kòlèt sou nou. N'a kale tèt nou. M'ap fè nou tonbe nan lapenn tankou moun k'ap kriye pou sèl pitit gason yo ki mouri. Se nan kè sere jounen sa a ap fini pou tout moun. ¹¹ ¶ Men yon jou gen pou rive. Jou sa a, mwen pral voye yon sèl grangou sou peyi a. Se p'ap dèyè pen pou yo manje, ni dèyè dlo pou

yo bwè y'a kouri. Men, se mesaj ki soti nan bouch Seyè a y'a anvi tande. Se Seyè a menm ki di sa.

12

Lè sa a, moun va pran kouri soti nan n o al nan sid, soti nan lès al nan lwès. Y'a mache toupatou ap chache yon pawòl nan bouch Seyè a. Men, yo p'ap jwenn.

13

Nan tan sa a, bèl jenn fi yo ak jenn gason yo va tonbe feblès paske yo p'ap jwenn sa y'ap pwonmennen chache a. Kanta pou moun k'ap fè sèman sou Achima, zidòl peyi Samari a, moun sa yo k'ap plede di: Anverite bondye Dann lan! Anverite bondye Bècheba a! yo gen pou yo tonbe pou yo pa janm ka leve ankò.

14

Chapter 9

1

¶ Mwen fè yon vizyon, mwen wè Seyè a kanpe sou lotèl la. Li di konsa: -Frape tèt poto tanp lan jouk tout galeri a tranble. Kraze tèt poto yo pou yo tonbe an miyèt moso sou tèt moun yo. Rès

ki pa mouri a, m'ap touye yo nan lagè. Yo yonn p'ap chape, yo yonn p'ap sove. Menm si yo fouye twou pou yo antre nan peyi kote mò yo ye a, m'ap rale yo met deyò. Menm si yo ta moute anwo

2

nan syèl la, m'ap rale yo desann. Si y' al kache sou tèt mòn Kamèl, m'ap chache yo, m'ap mete men sou yo. Si y' al kache pou mwen nan fon lanmè, m'ap bay gwo sèpan lanmè a lòd pou l' mòde

3

yo. Si lènmi fè yo prizonye pou l' ta mennen yo ale kite peyi yo a, m'ap bay lòd touye yo. M'ap

voye je m' sou yo. Men, fwa sa a, se p'ap pou byen yo, se va pou malè yo. Seyè a, Bondye ki gen tout pouvwa a, ap annik manyen latè, latè ap pran tranble. Tout moun ki rete sou latè ap nan lapenn.

5

Latè ap moute, l'ap gonfle, epi l'ap bese tankou dlo larivyè Nil. Seyè a bati kay li anwo nan syèl la. Li mete vout syèl la anlè latè. Li rale dlo lanmè a, li vide l' sou tout latè. Yo rele li Seyè. Wi, se

6

konsa yo rele l'. Men sa Seyè a di ankò: Nou menm, moun Izrayèl yo, mwen konsidere nou koulye a menm jan ak moun Letiopi yo. Se mwen menm, pa vre, ki te fè pèp Izrayèl la soti kite peyi Lejip? Se pa mwen menm tou ki te fè moun Filisti yo soti kite lil Lakrèt, epi ki te fè moun Siri yo soti

7

l'avil Kir? Mwen voye je m' sou pèp Izrayèl la, mwen wè jan yo lage kò yo nan fè sa ki mal. Mwen pral disparèt yo sou latè. Men, mwen p'ap fin touye tout pitit Jakòb yo nèt. Non. Mwen pa ka fè sa.

8

Se mwen menm, Seyè a, ki di sa. Men, mwen pral pase yon lòd. Mwen pral vannen moun Izrayèl ki nan mitan lòt nasyon yo tankou yo vannen grenn nan laye. Pa menm yon bon grenn p'ap tonbe

9

atè. Tout moun nan pèp la k'ap fè sa ki mal pral mouri nan lagè. Yo tout k'ap plede di: O wi, Bondye p'ap kite malè rive nou, ni li p'ap kite malè tonbe sou nou, yo tout pral mouri nan lagè.

10

¶ Seyè a di: Yon jou gen pou rive! Jou sa a, m'a mete peyi wa David la kanpe ankò sou de pye l'. Koulye a li tankou yon kay k'ap fin kraze. Lè sa a, m'a repare tout kote ki fann yo. M'a refè miray

11

ki te fin kraze yo. M'ap rebati peyi a jan l' te ye nan tan lontan an. ¹² Konsa, pèp Izrayèl la va pran posesyon pòsyon ki rete nan peyi Edon an. Y'a donminen ankò sou lòt nasyon mwen te fè yo. Se Seyè a ki di sa, se li menm menm k'ap fè sa rive konsa! ¹³ Jou yo ap vini. Lè sa a, yo p'ap kò fin ranmase rekòt, y'ap gen tan ap pare tè pou plante ankò. Yo p'ap kò fin kraze rezen pou fè diven, y'ap gen tan ap pare pou mete pye rezen nan tè ankò. Diven byen dous ap koule sou tout mòn yo, l'ap koule desann sou tout ti mòn yo. Se Seyè a menm ki di sa. ¹⁴ M'ap mennen pèp mwen an tounen nan peyi l' ankò. Y'a rebati lavil ki te fin kraze yo, y'a rete ladan yo. Y'a plante jaden rezen, y'a bwè diven. Y'a fè bèl jaden, y'a manje rekòt jaden yo. ¹⁵ M'a plante pèp mwen an nan peyi yo a, nan peyi mwen te ba yo a. Pesonn p'ap janm ka derasinen yo ankò. Se Seyè a, Bondye a, ki pale.

Obadiah

Chapter 1

¹ ¶ Mesaj pwofèt Abdyas sou peyi Edon. Men mesaj Seyè a te ban mwen: Nou te tandè mesaj Seyè a te bay la. Li te voye mesaj li a nan tout nasyon yo pou di yo: Annavan! Leve non! Ann mache pran Edon! Ann al goumen avè l'! ² Men sa Seyè a di moun peyi Edon yo: Mwen pral fè peyi nou an vin tou fèb nan mitan lòt nasyon yo. Tout moun pral meprize nou nèt! ³ Se awogans nou ki fè nou pèdi tèt nou. Nou bati kapital nou sou tèt gwo wòch yo. Nou moute kay nou byen wo nan mòn yo. Epi n'ap di nan kè nou: Ki moun ki ka fè nou desann la a! ⁴ Nou te mèt bati kay nou byen wo tankou nich malfini, nou te mèt mete nich nou byen wo tankou si li te nan mitan zetwal yo, m'ap voye nou jete anba, m'ap fè nou desann. Se Seyè a menm ki di sa. ⁵ Lè vòlò antre lakay moun lannwit pou piye, yo annik pran sa yo bezwen. Lè moun ap ranmase rekòt rezen, yo toujou kite dèyè pou moun k'ap vin grapiye yo. Men, gade jan lènmi ravaje nou nèt ale non! ⁶ Yo fouye toupatou nan peyi Ezaou a. Yo pran tout trezò nou te kache yo. ⁷ Tout moun ki te mete tèt ansanm avè nou yo woule nou byen woule. Yo mete nou deyò nan pwòp peyi nou an. Moun ki te pi bon zanmi nou yo twonpe nou byen twonpe. Moun ki te konn manje sou tab ansanm ak nou pare pèlen pou nou. Nou menm, nou pa menm wè sa! ⁸ Seyè a di konsa: -Jou m'ap pini moun Edon yo, m'ap disparèt tout moun ki gen bon konprann nan peyi a, tout moun lespri ki rete sou mòn Ezaou a. ⁹ Sòlda lavil Teman yo pral tranble nan kanson yo. Yo pral masakre tout gason peyi Edon ki konn

¹⁰
 goumen. ¶ Paske nou te masakre pitit pitit Jakòb yo, kouzen nou yo, paske nou te fè yo anpil
¹¹
 mechanste, yo pral fè nou wont, yo pral disparèt nou nèt. Nou te rete kanpe la ap gade, lè moun
 lòt nasyon yo t'ap piye tout richès yo. Nou pa t' pi bon pase etranje yo ki te defonse pòtay yo lè sa
 a, ki te separe bay chak moun tout richès lavil Jerizalèm yo. Nou menm tou, nou te fè menm bagay
¹²
 la. Nou pa t' dwe kontan wè kouzen nou yo nan malè. Nou pa t' dwe kontan wè y'ap fini ak moun
¹³
 fanmi Jida yo. Nou pa t' dwe pase yo nan rizib, lè yo te nan tray. Nou pa t' dwe janbe pòtay lavil
 pèp mwen an pou nou te antre ladan l', jou malè te tonbe sou yo a. Nou pa t' dwe kontan wè jan
 y'ap souffri, jou malè te tonbe sou yo a. Nou pa t' dwe mete men nou sou byen yo, jou malè te tonbe
¹⁴
 sou yo a. Nou pa t' dwe kanpe nan kalfou yo pou nou touye sa ki t'ap chache chape kò yo. Nou
¹⁵
 pa t' dwe lage sa ki pa t' mouri yo nan men lènmi yo, jou malè te tonbe sou yo a. Jou a pa lwen
 rive, kote mwen menm, Seyè a, mwen pral jije tout nasyon yo. Nou menm moun peyi Edon, sa nou
¹⁶
 te fè a, se sa yo pral fè nou tou. Yo pral fè nou sibi tou sa nou te fè lòt yo sibi. Pèp mwen an
¹⁷
 pase pa l' anba men mwen sou mòn ki apa pou mwen an. Konsa tou, tout nasyon yo pral pran pa
¹⁸
 yo san rete. Yo pral pran jouk yo p'ap kapab ankò. Yo pral disparèt tankou si yo pa t' janm la. ¶
 Men, sou mòn Siyon an, kèk moun pral sove. Se yon kote ki pral apa nèt pou mwen. Moun fanmi
¹⁹
 Jakòb yo pral reprann tout peyi lènmi te wete nan men yo. Moun fanmi Jakòb yo pral tankou
 dife. Pitit pitit Jozèf yo pral tankou yon flanm dife. Yo pral detwi pitit Ezaou yo nèt tankou dife
²⁰
 nan zèb chèch. Pesonn nan fanmi Ezaou a p'ap chape. Se mwen menm, Seyè a, ki di sa. Moun
 pèp Izrayèl ki rete nan zòn Negèv la pral pran mòn Ezaou a pou yo. Moun pèp Izrayèl ki rete nan
 plenn ki nan pye mòn Jida yo pral pran peyi moun Filisti yo nan men yo. Moun pèp Izrayèl yo pral
 pran peyi Efrayim ak peyi Samari pou yo. Moun Benjamen yo pral pran peyi Galarad la pou yo.
²¹
 Nan moun yo te depòte yo, sòlda ki moun nan nò peyi Izrayèl la va pran peyi Kanaran an pou
 yo, rive lavil Sarepta. Men, moun lavil Jerizalèm yo te depòte nan peyi Sefara a va pran tout lavil
 Negèv yo pou yo. Yo tout, y'a moute sou mòn Siyon an pou delivre l'. Se yo ki va gouvènen
 tout mòn Ezaou a. Lè sa a, se Seyè a menm ki va sèl wa.

Jonah

Chapter 1

¹ ¶ Yon jou, Seyè a pale ak Jonas, pitit gason Amitayi a, ² li di l' konsa: -Leve non. Ale lavil
 Niniv, gwo kapital la. Al fè moun la konnen mechanste yo rive jouk nan zòrèy mwen. ³ Men lè sa
 a, Jonas leve, li pati nan direksyon Tasis, paske li t'ap kouri pou Seyè a. Li desann lavil Jope. Rive
 la, li jwenn yon batiman ki t'ap pare pou pati pou Tasis. Li peye pasaj li. Li moute abò batiman an
 avèk marin yo. Li pati pou Tasis, paske li t'ap kouri pou Seyè a. ⁴ ¶ Men, Seyè a voye yon gwo
 van sou lanmè a. Yon sèl gwo van tanpèt leve, batiman an te prèt pou koule. ⁵ Marin yo te pè anpil.
 Chak moun t'ap lapriyè bondye pa yo. Pou yo te ka soulaje batiman an, yo lage dènnye chay nan
 lanmè. Jonas menm poutèt pa l' te desann nan lakal batiman an, li kouche kouche l'. Dòmi pote l'
⁶ ale. Kaptenn batiman an al jwenn li, li di l' konsa: -Ey! Apa se dòmi w'ap dòmi? Leve non, monchè.
 Lapriyè bondye ou la. Ou pa janm konnen, li ka gen pitye pou nou, li ka pa kite nou mouri. ⁷ Apre
 sa, marin yo yon di lòt: -Ann tire osò pou n' konnen ki moun ki lakòz sa rive nou. Yo tire osò, epi
⁸ se non Jonas ki soti. Epi yo di l': -Di nou sa ki lakòz malè sa a rive nou. Sa w'ap fè isit la? Kote
 ou soti? Moun ki peyi ou ye? Ki nanchon ou? ⁹ Jonas reponn yo: -Mwen se ebre. Mwen gen krentif
 pou Seyè a, Bondye ki fè syèl la, lanmè a ak tè a. ¹⁰ Jonas pale ak yo, li di yo ki jan li t'ap kouri
 pou Seyè a. Marin yo te sezi yon sèl sezi. Yo di l' konsa: -Sa ou fè konsa, monchè? ¹¹ ¶ Lanmè a
¹² t'ap vin pi move chak lè. Yo di l': -Sa pou nou fè ak ou pou lanmè a vin kal? Jonas reponn yo:
 -Pran m', lage m' nan lanmè. Lanmè a va kal nèt. Mwen konnen se mwen menm menm ki lakòz
¹³ nou pran nan van tanpèt sa a. Marin yo menm t'ap naje zaviwon pou wè si yo ta mennen batiman
¹⁴ an ale atè. Men, yo pa t' kapab, lanmè a t'ap vin pi move toujou. Lè yo wè sa, yo rele nan pye
 Seyè a, yo lapriyè l' konsa: -O Seyè! Tanpri, pa kite nou mouri poutèt nonm sa a. Pa rann nou
¹⁵ reskonsab lanmò yon moun ki inonsan. Paske, se ou menm, Seyè, ki vle l' konsa. Epi yo pran
¹⁶ Jonas, yo lage l' nan lanmè. Lamenn, kalmi fèt. Lè marin yo wè sa, yo te vin pè Seyè a anpil.
¹⁷ Yo ofri bèt pou touye ba li. Yo pwomèt pou yo sèvi l'. Seyè a fè yon gwo pwason vin vale Jonas.
 Jonas te pase twa jou twa nwit nan vant pwason an.

Chapter 2

¹ ¶ Antan li te nan vant pwason an, Jonas lapriyè Seyè a, Bondye li a, li di: ² Nan mizè mwen
 te ye a, Seyè, mwen te rele nan pye ou, ou te reponn mwen. Byen fon nan peyi kote mò yo ye a,

mwen te mande ou sekou, ou te tande vwa mwen. ³ Ou te voye m' jete byen fon, nan fon lanmè.
 Dlo te sènen m' toupatou. Tout kouran dlo ak tout lanm lanmè yo te pase sou mwen. ⁴ Mwen t'ap
 di nan kè m': Gen lè ou voye m' jete byen lwen ou. Mwen p'ap janm wè kay ki apa pou ou a ankò!
⁵ Dlo yo kouvri m', yo te prèt pou neye m'. Lanmè a te fin vale m', zèb lanmè te mare nan tout tèt
 mwen. ⁶ Mwen desann, mwen desann, mwen rive jouk nan rasin mòn yo, nan peyi kote sa ki antre
 pa soti. Men, Seyè, Bondye mwen, ou rale m' soti nan twou a. Ou ban m' lavi ankò. ⁷ Lè m' santi
 mwen taprale vre, mwen vin chonje ou, Seyè! Mwen lapriye nan pye ou. Kote ou chita nan tanp
 ki apa ou a, ou tande m'. ⁸ Moun k'ap sèvi zidòl ki pa vo anyen yo, se moun ki vire do bay Bondye
 ki bay favè a. ⁹ Men, m'ap chante pou m' fè lwanj ou, m'a ofri bèt pou yo touye pou ou. M'a kenbe
 angajman mwen te pran an. Se Seyè a ki delivrans nou. ¹⁰ ¶ Lè sa a, Seyè a bay pwason an lòd
 pou li vonmi Jonas sou rivaj lanmè a.

Chapter 3

¹ ¶ Bondye pale yon dezyèm fwa ankò ak Jonas, ² li di l' konsa: -Leve non! Ale lavil Niniv,
 gwo kapital la. Fè yo konnen mesaj mwen te ba ou pou yo a. ³ Se konsa, Jonas leve, li ale lavil
 Niniv jan Seyè a te di l' la. Niniv te yon gwo lavil ki mande twa jou pou mache soti nan yon bout
 ale nan lòt bout la. ⁴ Jonas antre nan lavil la. Li fè yon jounen ap mache. Epi li pran pale ak moun
 yo. Li di yo konsa: -Nan karant jou lavil Niniv pral disparèt. ⁵ ¶ Moun lavil yo te kwè nan mesaj
 Bondye a. Yo bay lòd pou tout moun, malere kou grannèg, rete san manje, pou yo mete rad sak
 sou yo pou moutre jan yo nan lapenn pou tout mal yo te fè. ⁶ Nouvèl la rive nan zòrèy wa lavil
 Niniv la. Li leve sou fotèy li a, li wete bèl rad ki te sou li a, li mete rad sak sou li. Lèfini, li chita
 atè nan sann dife. ⁷ Li voye fè yon piblikasyon nan tout lavil la. Li di konsa: -Men lòd wa a ansanm
 ak lòt chèf li yo bay: Pesonn pa pou manje anyen. Ni moun, ni bèf, ni mouton, tout pou rete san
 manje san bwè. ⁸ Tout moun va gen rad sak sou yo. Tout bèt va nan lapenn. Tout moun va lapriye
 Bondye ak tout kè yo. Y'a kite tout move zak ak tout mechanste yo te konn fè nan lavi yo. ⁹ Nou
 pa janm konnen, Bondye ka chanje lide. L'a règrèt sa li tapral fè a, li p'ap fache sou nou ankò.
¹⁰ Konsa, nou p'ap mouri. Bondye wè sa yo t'ap fè a. Li wè yo te soti pou yo chanje lavi yo vre.
 Se konsa li chanje lide. Li pa pini yo ankò jan li te di li tapral pini yo a.

Chapter 4

¹ ¶ Jonas pa t' kontan menm lè li wè sa, sa te fè l' fache anpil. ² Li lapriyè Seyè a, li di l' konsa: -Aa Seyè! Men sa m' t'ap di a wi, lè m' te nan peyi m' lan. Se sa menm wi, mwen pa t' vle rive a. Se poutèt sa mwen te vle al kache nan peyi Tasis. Mwen konnen ou: Ou se yon Bondye ki gen bon kè, ki gen pitye pou nou. Ou pa fè kòlè fasil, ou pa janm sispann renmen nou, se vre. Ou toujou pare pou padonnen moun, pou chanje lide pou ou pa pini yo. ³ Koulye a, Seyè, ou mèt tou touye m' fini ak sa. M' pito mouri pase pou m' viv pou m' wè bagay sa a devan je m'! ⁴ Seyè a reponn li: -Ki rezon ou genyen pou ou fache konsa? ⁵ ¶ Jonas kite lavil la, li ale sou bò solèy leve, li chita. Lèfini, li fè yon tonèl, li chita nan lonbraj anba tonèl la, l'ap tann pou l' wè sa ki pral rive nan lavil la. ⁶ Lè sa a, Seyè a, Bondye a, fè yon ti pye masketi pouse. Li fè l' rive yon ti wotè pi wo pase Jonas pou mete yon ti lonbraj sou tèt li, pou li ka santi l' pi alèz. Jonas te kontan anpil lè li wè pye masketi a. ⁷ Men, nan denmen maten, anvan bajou kase, Bondye fè yon mawoka pike pye masketi a. Pye masketi a mouri. ⁸ Lèfini, lè solèy fin leve, Bondye fè yon sèl van lès soufle byen cho. Jonas te prèt pou pèdi konesans avèk chalè solèy la ki t'ap bat li sou tèt. Msye mande mouri, li di konsa: -Pito m' tou mouri m' fini ak sa! ⁹ Men, Bondye mande l' konsa: -Jonas, ou kwè ou gen rezon fache konsa pou yon ti pye masketi? Jonas reponn li: -Wi. Mwen gen rezon fache. M' fache pou m' mouri. ¹⁰ Lè sa a, Seyè a reponn li: -An! Ou pran lapenn pou yon ti pye masketi ki pa koute ou anyen. Se pa ou ki te fè l' grandi. Li pran yon sèl nwit pou l' grandi. Apre yon sèl jou, li mouri. ¹¹ Epi ou pa ta vle m' pran lapenn pou lavil Niniv, gwo kapital sa a, kote ki gen depase sanven mil (120.000) timoun inonsan, moun ki pa konnen ni sa ki byen ni sa ki mal, ansanm ak yon kantite bèt!

Micah

Chapter 1

¹ ¶ Men mesaj Seyè a te bay Miche, moun lavil Morechèt, sou rèy Jotam, Akaz ak Ezekyas ki te wa nan peyi jida. Men vizyon ki gen rapò ak Samari ak Jerizalèm Seyè a te fè Miche wè. ² Koute byen, nou menm tout nasyon yo. Pare zòrèy nou, nou tout k'ap viv sou latè. Seyè a, Bondye a, pral akize nou. Tande! Li rete nan tanp ki apa pou li a, l'ap pale. ³ Seyè a ap soti kote li rete a, l'ap

⁴ desann, l'ap mache sou tèt mòn yo. Mòn yo ap fonn anba pye l' tankou lasi nan dife. Y'ap koule
⁵ desann nan fon yo tankou lavalas k'ap desann mòn. Tou sa ap rive paske pèp Izrayèl la fè bagay
 ki mal, paske pitit Jakòb yo fè sa yo pa t' dwe fè. Ki moun ki reskonsab sa pèp Izrayèl la fè a? Se
 pa moun Samari, kapital peyi a? Ki moun k'ap fè idolatri nan peyi Jida a? Se pa moun lavil Jerizalèm?
⁶ Se konsa Seyè a di: M'ap fè lavil Samari tounen yon bann mazi nan plenn lan, yon jaden pou
 plante rezen. M'ap voye tout miray li yo jete nan fon. Se fondasyon kay yo ase k'ap rete pou moun
⁷ wè. Y'ap kraze tout zidòl yo an miyèt moso. Y'ap boule tou sa yo te ofri bay zidòl yo nan dife.
 M'ap fè kay zidòl yo tounen pil wòch. Pèp la te vire do bay Bondye lè yo t'ap fè zidòl sa yo, ou ta
⁸ di madan marye k'ap fè jennès. Koulye a, y'ap peye pou vire yo te vire do bay Bondye a. ¶ Lèfini,
 Miche di: Se poutèt sa m'ap plenn, m'ap kriye. M'ap pwonmennen mache pye atè, toutouni, pou m'
⁹ fè wè lapenn mwen. M'ap rele tankou frize, m'ap wouke tankou chen. Pa gen remèd pou maladi
 moun lavil Samari yo. Li kontaminen peyi Jida a. Li gen tan rive jouk nan pòtay kapital peyi pèp
¹⁰ mwen an. Li gen tan rive lavil Jerizalèm. Pa kite moun lavil Gat yo konnen sa ki rive nou! Pa
 kite moun Akò yo wè nou ap kriye! Woule kò nou atè nan pousyè, nou menm moun Betlefra.
¹¹ Pase pase nou, toutouni, tèt bese, nou menm moun lavil Safi. Moun ki rete nan ti bouk Zaanan
 an pa ka mete tèt yo deyò. Lè w'a tande jan moun Betaezèl yo ap plenn, w'a konnen ou p'ap jwenn
¹² pwoteksyon bò la ankò. Moun Mawòt yo nan lapenn. Pa gen sekou pou yo ankò, paske Seyè a
¹³ fè malè a rive nan papòt lavil Jerizalèm. Nou menm, moun lavil Lakis, nou mèt pare bon chwal
 pou cha nou yo. Se nou menm an premye nan peyi Izrayèl ki te konmanse ap fè sa ki mal. Se nou
¹⁴ menm ki lakòz moun lavil Jerizalèm yo ap fè peche konsa. Koulye a, nou menm moun peyi
 Jida, nou mèt di moun lavil Morechèt Gat yo orevwa, paske moun lavil Akzib yo bay manti, yo
¹⁵ p'ap pote ankenn sekou bay wa Izrayèl yo. Kanta pou nou menm, moun lavil Marecha, mwen
 menm Seyè a, m'ap fè lènmi pran lavil la nan men nou. Grannèg nan peyi Izrayèl yo pral kache
¹⁶ nan twou wòch Adoulam lan. Nou menm moun Jida, reziyen nou, paske sa fè kè nou fè nou mal
 pou nou wè sa timoun nou renmen anpil yo ap fè. Mare ren nou tankou moun ki nan lapenn, paske
 y'ap depòte timoun nou yo ale byen lwen nou.

Chapter 2

¹ ¶ Ala mal sa pral mal pou moun ki kouche nan kabann yo ap fè move plan, k'ap kalkile
 mechanste yo pral fè! Kou jou kase, premye okazyon yo jwenn, yo fè sa yo t'ap kalkile a, paske yo

gen pouvwa nan men yo. ² Yo anvi yon jaden, yo pran l'. Yo anvi yon kay, yo antre kareman, yo
 pran l'. Yo maltrete mèt kay la ak tout fanmi l'. Yo bat moun yo, yo pran tout byen yo. ³ Se poutèt
 sa, men sa Seyè a di: M'ap pare yon malè pou nou. Nou yonn p'ap chape. Nou p'ap ka gonfle
 lestonmak nou sou moun ankò, paske sa pral rèd pou nou. ⁴ Lè jou a va rive, yo pral fè chante sou
 nou. Y'a plenn sò nou, y'a di: Nou pèdi tou sa nou te genyen. Bondye kite moun lòt nasyon yo pran
 peyi a nan men nou. Wi, li pran jaden nou yo bay yon bann moun ki pa kwè nan li. ⁵ Konsa, lè lè
 a va rive, tout moun va sanble pou yo renmèt tè a bay pèp Bondye a. Ou p'ap jwenn pèsonn kanpe
 pou reklame yon pòsyon pou ou. ⁶ ¶ Moun yo ap plede di m': Sispann pale konsa! Ou pa fèt pou
 di bagay konsa. Sa w'ap di a p'ap janm rive. ⁷ Nou menm, pitit Jakòb yo, Seyè a gen lè pèdi pasyans
 ak nou? Eske nou kwè l'a fè tout bagay sa yo vre? Eske pawòl li se pa bon pawòl pou moun k'ap
 mache dwat yo? ⁸ Seyè a reponn: Nou leve dèyè pèp mwen an tankou si nou te lènmi yo. Moun
 ap mache kè pòpòz san okenn lide chache moun kont, men nou la, n'ap tann konsa pou nou vòlò
 ata rad ki sou yo. ⁹ Medam yo t'ap viv ak kè kontan lakay yo. Nou vini, nou mete yo deyò. Timoun
 yo t'ap jwi benediksyon mwen ba yo. Nou vini, nou wete tou sa nèt nan men yo. ¹⁰ Leve non! Al
 fè wout nou! Pa gen repo pou nou isit la ankò! Nou fè twòp bagay derespektan. Nou fè yo detwi
 peyi a. Y'ap fini avè l' nèt. ¹¹ Si yon moun ap plede pwonmennen bay manti pou twonpe moun, si
 li di: M'ap fè prediksyon pou nou: Men li, diven ak gwòg pral koule kou dlo, se moun konsa nou
 renmen pou pwofèt. ¹² ¶ Men, m'ap reyini tout pitit Jakòb yo ansanm. M'ap ranmase tout ti rèz ki
 rete nan moun Izrayèl yo. M'ap mennen yo ansanm tankou bann mouton k'ap tounen nan pak yo.
 Peyi a pral tankou yon savann plen mouton. Li pral plen moun ankò. ¹³ Bondye ap pran devan,
 l'ap louvri yon chemen pou yo. Yo menm, y'a kraze pòtay yo, y'a pase lib soti deyò. Wa yo a va
 mache devan yo. Wi, se Seyè a ki va mache alatèt yo.

Chapter 3

¹ ¶ M'a di yo: Koute byen, nou menm ki alatèt pitit Jakòb yo, nou tout k'ap dirije pèp Izrayèl
 la! Se pa devwa nou pou nou rann tout moun jistis? ² Men, se nou menm ankò ki rayi moun k'ap
 fè sa ki byen. Nou renmen moun k'ap fè sa ki mal. N'ap kòche pèp mwen an tou vivan, n'ap filange
 l' jouk nan zo. ³ N'ap manje pèp mwen an. Nou kòche yo, nou kase tout zo nan kò yo. Nou dekoupe
 yo tankou vyann yo pral kwit, tankou vyann nou mete nan chodyè. ⁴ Men, yon jou va rive, lè sa a

n'a kriye nan pye Seyè a, men li p'ap reponn nou. Li p'ap tandè sa n'ap di nan lapriyè nou yo, paske nou fè bagay ki mal. ⁵ Men, gen yon bann pwofèt k'ap twonpe pèp mwen an. Depi yo gen yon zo y'ap souse, y'ap mache di jan gen lapè nan peyi a. Men, kite moun pa ba yo lajan, yo di pral gen lagè. Men sa Seyè a di sou pwofèt sa yo: ⁶ Pwofèt! Jou nou yo prèt pou fini. Solèy la ap kouche sou nou. Nou p'ap fè vizyon lannwit ankò. Nan fènwa, nou p'ap wè anyen ankò. ⁷ Moun k'ap fè prediksyon yo pral wont. Divinò yo p'ap konnen sa pou yo di. Yo pral rete men nan bouch, paske Bondye p'ap reponn yo. ⁸ ¶ Men, pou mwen menm, Mìche, Seyè a voye lespri l' sou mwen, li ban mwen fòs, li ban mwen pouvwa pou m' konnen sa ki dwat. Li ban mwen kouraj pou m' kanpe denonse fòfè pitit Jakòb yo, pou m' di pèp Izrayèl la nan figi l' sa l'ap fè ki mal la. ⁹ Wi, koute m' non, nou menm ki alatèt pitit Jakòb yo, nou menm chèf k'ap dirije peyi Izrayèl la. Nou pa renmen sa ki dwat. Nou vire lalwa a, nou fè l' di sa nou vle. ¹⁰ Se sou san moun n'ap bati lavil Siyon an. Se sou lenjistis n'ap bati lavil Jerizalèm. ¹¹ Moun ap achte chèf yo ak lajan. Prèt yo menm ap espliche lalwa a pou lajan. Ata pwofèt yo ap fè prediksyon pou lajan tou. Yo tout yo pretann di Seyè a avèk yo. Y'ap di: O wi, anyen p'ap rive nou! Seyè a bò kote nou! ¹² Se konsa, n'ap lakòz peyi Siyon an pral tankou yon jaden y'ap raboure. Jerizalèm ap tounen mazi. Gwo pyebwa pral kouvri tout mòn kote tanp lan ye a.

Chapter 4

¹ ¶ Yon tan gen pou rive! Lè sa a, mòn kote tanp lan ye a va pi wo pase tout lòt mòn yo. L'ap kanpe byen wo nan mitan mòn yo. Moun va soti an kantite toupatou vin sou li. ² Anpil moun lòt nasyon va vini, y'a di: Ann ale sou mòn Seyè a! Ann ale nan tanp Bondye pèp Izrayèl la! L'a moutre nou jan li vle nou viv la. Konsa, n'a mache nan chemen l'a mete devan nou an. Paske, Seyè a rete sou mòn Siyon an, l'ap bay lòd li. Seyè a rete lavil Jerizalèm, l'ap pale ak pèp li a. ³ L'ap regle kont nasyon yo gen yonn ak lòt, l'ap sèvi jij pou gwo peyi ki byen lwen. Y'ap pran mato, y'ap fè zam yo tounen zouti pou travay tè. Y'ap fè nepe yo tounen sèpèt. Nasyon yo p'ap fè lagè yonn ak lòt ankò. Yo p'ap janm aprann fè lagè ankò. ⁴ Tout moun va viv ak kè poze anba tonèl rezen yo, anba pye fig Frans yo. Pesonn p'ap chache yo kont. Sa se pawòl ki soti nan bouch Seyè a! ⁵ Chak nasyon ap viv dapre lòd bondye pa yo ba yo. Men nou menm, n'ap viv dapre lòd Seyè a, Bondye nou an, pou tout tan tout tan. ⁶ Seyè a di: Yon tan ap vini. Lè sa a, m'a aji avèk pèp mwen an tankou yon gadò. M' aval chache moun ki t'ap bwete yo. M'a ranmase moun yo te chase byen lwen yo, moun mwen

7
te pini yo. Avèk sa ki t'ap bwete yo, m'a mete peyi a kanpe ankò. M'a fè moun yo te depòte yo tounen yon gwo nasyon. Mwen menm, Seyè a, m'a gouvènen yo sou tèt mòn Siyon an, depi jou sa a jouk sa kaba.

8 ¶ Ou menm, lavil Jerizalèm kote Bondye rete pou l' veye bann mouton l' yo, ou menm, ti mòn Ofèl kote moun Siyon yo rete a, ou gen pou tounen kapital peyi a ankò kote wa moun Jerizalèm yo ye a, jan sa te ye nan tan lontan an.

9 Koulye a, poukisa w'ap rele fò konsa? Se paske ou pèdi wa ou la? Poukisa w'ap plenn konsa tankou yon fanm ki gen tranche? Se paske moun ki te konn ba ou konsèy la mouri?

10 Tòde kò nou, nou menm moun lavil Jerizalèm! Plenn tankou fanm ki sou choukèt! Paske, koulye a nou pral soti kite lavil la, nou pral rete nan bwa. N'a rive jouk lavil Babilòn. Men, antan nou la, y'a vin delivre nou. Seyè a ap vin wete nou nan men lènmi nou yo.

11 Anpil nasyon ap reyini pou atake nou. Y'ap di konsa: Se pou yo avili lavil Jerizalèm. Se pou nou wè lavil Siyon an kraze nèt.

12 Men, moun sa yo pa konnen lide Bondye gen nan tèt li. Yo pa konprann plan travay li. Li te sanble yo pou l' ka pini yo tankou lè yo sanble pwa sou glasi anvan yo bat yo.

13 Seyè a di: Nou menm moun lavil Siyon, leve non! Foule lènmi nou yo anba pye nou! M'ap ban nou fòs, n'ap tankou towò bèf ki gen kòn ak zago fè. N'ap kraze anpil nasyon an miyèt moso. N'a pran tou sa yo genyen ansanm ak tout richès yo, n'a ofri yo ban mwen, mwen menm Seyè a, ki mèt tout latè.

Chapter 5

1 ¶ Nou menm, moun lavil Jerizalèm, sanble moun nou yo! Mete yon lame sou pye! Men yo sènen lavil la toupatou. Y'ap leve men yo sou chèf pèp Izrayèl la. Y'ap ba li baton, y'ap soufle l'.

2 Seyè a di ankò: Men ou menm, lavil Betleyèm, Efrata, ou se yonn nan pi piti nan tout lavil peyi Jida yo, se vre! Men, se nan mitan ou m'ap fè soti pou mwen yon chèf pou pèp Izrayèl la, yon chèf k'ap soti nan yon fanmi ki la depi lontan lontan.

3 Se konsa, Seyè a ap lage pèp li a nan men lènmi li yo jouk lè fi ki pou fè pitit la va gen yon pitit gason. Lè sa a, rès pèp Izrayèl yo te depòte a va tounen pou mete tèt ansanm ak pèp la.

4 Lè chèf sa a va vini, l'a gouvènen pèp li a avèk fòs Seyè a ap ba li a, avèk pouvwa k'ap mande respè paske l'ap gouvènen nan non Seyè a, Bondye li a. Pèp la va viv ak kè poze, paske moun toupatou sou latè va rekonèt jan li gen pouvwa.

5 L'a fè tout moun viv byen yonn ak lòt. Lè moun peyi Lasiri yo va anvayi peyi nou an, lè y'a pwonmennen mache nan tout peyi a, n'a voye sèt chèf, n'a voye wit menm al konbat yo.

6 Y'a goumen, y'a pran peyi moun Lasiri yo nan men yo. Avèk nepe yo, y'a pran peyi Nenmwòd la nan men li. Y'a delivre nou

anba men moun Lasiri yo, lè y'a anvayi peyi a, lè y'a antre sou fwontyè nou yo. ¶ Lè sa a, rès
 moun ki vivan toujou nan pèp la va tankou lawouze Bondye voye. Y'a viv nan mitan lòt nasyon
 yo. Y'a tankou lapli k'ap tonbe sou jaden k'ap pouse, paske yo pa mete espwa yo nan moun men
 8 nan Bondye. Rès moun pèp Izrayèl yo va viv nan mitan lòt nasyon yo, nan mitan anpil lòt nasyon.
 Y'a tankou yon lyon nan mitan bèt nan bwa, osinon yon jenn ti lyon nan mitan bann mouton. Y'ap
 pase nan mitan lòt nasyon yo. Y'ap kraze yo anba pye yo, y'ap dechikete yo. Pesonn p'ap ka delivre
 moun anba men yo. 9 Izrayèl va leve kont lènmi li yo, l'a disparèt yo nèt. 10 Seyè a di ankò: Jou
 sa a, m'ap touye tout chwal batay nou yo. M'a detwi tout cha nou yo. 11 M'ap detwi tout lavil nou
 bati nan peyi a, m'ap kraze tout fò ak tout ranpa nou yo. 12 M'a wete tout wanga nan peyi a. Nou
 p'ap jwenn moun ki pou bat kat pou nou ankò. 13 M'ap detwi tout estati ak tout moniman nou te
 moute pou zidòl yo. Nou p'ap gen lide adore bagay nou fè ak men nou ankò. 14 M'ap derasinen
 tout pyebwa repozwa nan peyi a. M'ap detwi tout lavil nou yo. 15 Lè sa a, m'ap fache, m'ap fè gwo
 kòlè, m'ap pran revanj mwen sou tout nasyon ki pa t' obeyi m' yo.

Chapter 6

1 ¶ Koute sa Seyè a ap di: -Leve non! Vin plede kòz ou devan gwo mòn yo! Kite ti mòn yo
 tandè sa ou gen pou di a! 2 Nou menm, mòn yo, nou menm ki fondasyon tè a pou tout tan, tandè
 plent Seyè a ap vin pote pou pèp li a! Wi, li pral pote plent pou pèp Izrayèl la! Li gen yon kòz pou
 l' plede ak li! 3 Seyè a di: Ooo! Pèp mwen! Kisa mwen fè nou kifè nou bouke avè m' konsa? Reponn
 mwen non! 4 Mwen fè nou soti kite peyi Lejip la. Mwen wete nou nan esklavaj nou te ye nan peyi
 sa a! Mwen voye Moyiz, Arawon ak Miryam pou kondi nou ale. 5 Ooo! Pèp mwen! Chonje sa
 Balak, wa peyi Moab la, te fè lide fè nou, ak ki jan Balaram, pitit Bèyò a, te reponn li! Chonje sa
 ki te rive nou nan vwayaj nou an, lè nou te fin kite Sitim, anvan nou te rive Gilgal! Chonje tout
 bagay sa yo pou nou ka konprann sa m' te fè pou delivre nou! 6 ¶ Lè sa a, pèp la di: Kisa m'a pote
 ofri bay Seyè a, Bondye ki nan syèl la, lè m'a vin adore l'? Eske m'a pote pou li jenn ti towò bèf ki
 7 fèk gen ennan pou yo ka boule pou li? Eske Seyè a ap kontan si m' pote ba li mil belye mouton
 ak di mil barik lwil? Eske m'a ofri premye pitit gason m' lan pou m' peye pou sa m' fè ki mal? Eske
 8 mwen ka pran sa ki soti nan zantray mwen pou m' bay pou kouvri peche mwen? Y'a reponn li:
 Non monchè. Seyè a te moutre ou sa ki byen. Tou sa li mande ou, se pou ou fè sa ki dwat, se pou

ou gen kè sansib nan tout sa w'ap fè, se pou ou mache san lògèy devan li. ¶ Lè yon moun gen
 konprann, li gen krentif pou Seyè a. Seyè a ap rele moun lavil Jerizalèm yo: Koute m' byen, nou
 tout ki reyini nan lavil la! ¹⁰ Lakay moun mechan yo plen byen yo achte ak move lajan! Y'ap sèvi
 ak fo mamit, bagay mwen pa vle wè. ¹¹ Ki jan ou vle pou m' padonnen bann moun sa yo k'ap sèvi
 ak move balans, ak fo mamit? ¹² Moun rich nan lavil la ap peze pòv malere yo. Yo tout se yon
 bann mantò: Bonjou yo pa laverite! ¹³ Se poutèt sa m'ap manyen ak nou. Akòz peche nou yo, m'ap
 fini ak nou nèt. ¹⁴ N'ap manje, men vant nou p'ap janm plen, n'ap grangou toujou. Lè nou konprann
 se sere n'ap sere pou pita, sa p'ap sèvi nou anyen. Avèk lagè m'ap voye sou nou an, n'ap pèdi tou
 sa nou te sere a. ¹⁵ N'a plante, men se pa nou ki va rekòlte. N'a kraze grenn oliv pou fè lwil, men
 nou p'ap gen tan sèvi avè l'. N'a kraze rezen fè diven, men nou p'ap gen tan goute ladan l'. ¹⁶ Nou
 pran swiv move mès wa Omri a ansanm ak move bagay wa Akab, pitit gason l' lan, t'ap fè a. N'ap
 fè menm bagay yo t'ap fè a toujou. Se poutèt sa, m'ap fè malè tonbe sou nou. Tout moun pral rele
 chalbari dèyè nou. Moun toupatou pral trete nou tankou fatra.

Chapter 7

¹ ¶ Ala malè pou mwen, mezanmi! Mwen tankou yon moun ki grangou nan mitan sezon rekòt
 epi ki pa jwenn yon ti fwi sou pyebwa, ni yon ti grenn rezen pou m' mete nan bouch mwen. Tout
 rezen fin keyi. Tout bon fig Frans fin tonbe. ² Pa rete moun serye nan peyi a ankò. Pa gen moun
 k'ap sèvi Bondye ak tout kè yo. Tout moun ap tann chans pa yo pou mete men yo nan san. Moun
 ap mache mete pèlen yonn pou lòt. ³ Yo tout pase mèt nan fè sa ki mal ak de men yo. Chèf yo ap
 fè egzijans. Jij yo ap mande lajan anba pou regle zafè pou moun. Grannèg yo menm mande sa yo
 vle. Se konsa yo tout yo fè yon sèl bann ansanm. ⁴ Moun ki ta pi bon nan mitan yo a, se ponya
 wouye. Sa ki ta yon ti jan pi serye a, li boule pase lèt kandelab, li koupe pase zèb razwa. Jou pou
 Bondye pini pèp li a pral rive, jan l' te voye yo avèti l' la. Lè sa a, pèp la p'ap konnen ni sa pou l' di
 ni sa pou l' fè. ⁵ Pa mete konfyans ou nan zanmi! Pa apiye sou ankenn bon zanmi! Veye bouch ou
 ata ak madanm ou! ⁶ Lè sa a, pitit gason p'ap gen respè pou papa yo. Pitit fi ap kenbe tèt ak manman
 yo. Bèlfi ap fè kont ak bèlmè yo. Pi gwo lènmi ou se va pwòp moun k'ap viv nan kò kay ou. ¶ ⁷
 Men, se Seyè a ki tout mwen. Avèk konfyans, m'ap tann Bondye k'ap vin pou delivre m' lan. Wi,
 Bondye mwen an ap tande m'! ⁸ Nou menm ki pa vle wè lavil Jerizalèm, nou pa bezwen kontan

wè malè rive nou, nou menm moun lavil Jerizalèm. Nou tonbe, n'a leve ankò! Nou te mèt chita nan fènwa koulye a, Seyè a va yon limyè pou nou. ⁹ Se pou nou sipòte kòlè Seyè a paske nou fè peche kont Seyè a. Men bout pou bout, l'a pran defans nou, l'a rann nou jistis. L'ap mennen nou deyò nan limyè a ankò, n'a viv pou nou wè jistis Bondye. ¹⁰ Lè sa a, lènmi nou yo va wè sa, y'a wont, yo menm ki te konn ap mande nou: O wi! Kote Seyè a, Bondye nou an! N'a wè ak je nou jan lènmi nou yo ap fini. Y'a foule yo anba pye, y'a meprize yo tankou labou nan lari. ¹¹ Nou menm, moun lavil Jerizalèm, jou pou nou rebati miray lavil la prèt pou rive. Lè sa a, y'a agrandi peyi a. ¹² Wi, lè sa a, moun nou yo va tounen soti toupatou vin jwenn nou. Y'a soti nan peyi Lasiri bò solèy leve, y'a soti Lejip nan sid, y'a soti lòt bò larivyè Lefrat, y'a soti byen lwen lòt bò lanmè ak lòt bò mòn yo. ¹³ Men, tè a ap tounen dezè akòz mechanste moun k'ap viv sou li yo. ¹⁴ ¶ Seyè! Aji ak pèp ou te chwazi pou ou a tankou yon bon gadò k'ap pran swen mouton l' yo. Koulye a, pèp ou a rete pou kont li nan yon rakbwa ki antoure ak bon tè. Kite y' al manje nan bèl jaden peyi Bazan ak peyi Galarad jan yo te konn fè l' nan tan lontan an! ¹⁵ Seyè! Fè mèvèy pou nou jan ou te fè l' lè ou te fè nou soti kite peyi Lejip la! ¹⁶ Moun lòt nasyon yo va wè sa, y'a wont malgre tout fòs yo genyen. Y'a mete men nan bouch. Y'a sezi, ¹⁷ y'a trennen kò yo atè nan pousyè tankou koulèv. Y'a mache tankou bèt k'ap trennen sou vant! Y'a pè, y'a kouri soti nan fò yo. Y'a tranble devan Bondye, y'a tounen vin jwenn li. Y'a tranble tankou fèy bwa akòz Seyè a. ¹⁸ Pa gen bondye tankou ou, ou menm ki padonnen mechanste ti rès ki rete nan pèp ou a, ou menm ki pa gade sou sa yo fè ki mal. Ou pa fache pou tout tan. Ou pran tout plezi ou nan gen pitye pou moun. ¹⁹ Wi, w'a gen pitye pou nou ankò. W'a pran peche nou yo mete anba pye ou. W'a voye yo jete nan fon lanmè! ²⁰ W'a moutre pitit Jakòb yo jan ou toujou kenbe pawòl ou. W'a moutre pitit Abraram yo jan ou p'ap janm sispann renmen yo, jan ou te sèmante l' bay zansèt nou yo nan tan lontan!

Nahum

Chapter 1

¹ ¶ Men mesaj Bondye te bay sou lavil Niniv. Men liv ki rapòte vizyon Nawoum, moun lavil Elkòch, te fè a. ² ¶ Seyè a, se yon Bondye ki fè jalouzi epi ki konn tire revanj. Li tire revanj li. Lè l' ankòlè, se pa ti move li move. Li tire revanj li sou tout moun ki kenbe tèt avè l'. Li kenbe moun

³
 ki pa vle wè l' yo nan kè. Seyè a pa fache fasil, men se pa ti kras pouvwa li genyen. Li p'ap janm manke pa pini moun ki antò. Kote Seyè a pase, se van tanpèt, se van siklòn. Nwaj yo, se pousyè
⁴
 pye l' yo ap leve. Li pase lanmè a lòd: lanmè a cheche. Li cheche dlo larivyè yo. Tout pyebwa
⁵
 nan plenn Bazan ak sou mòn Kamèl ap deperi. Tout flè sou mòn Liban yo ap fennen. Gwo mòn yo tranble lè yo wè l'. Ti mòn yo disparèt. Tè a tranble devan l' ansanm ak tout moun ki rete sou li.
⁶
 Ki moun ki ka kanpe devan l' lè li ankòlè? Ki moun ki ka chape anba men l' lè li move? Kòlè
⁷
 Bondye tonbe sou latè tankou dife. Gwo wòch yo tounen pousyè devan li. Men, Seyè a gen bon
⁸
 kè tou: Jou malè, se li ki pwoteje pèp li. Li pran swen tout moun ki vin kache anba zèl li. Tankou
 yon gwo lavalas k'ap desann, l'ap kraze tout kote lavil la te bati a. L'ap pousib tout lènmi l' yo jouk
⁹
 li fini ak yo. ¶ Kisa n'ap konplote konsa sou do Seyè a? L'ap detwi nou tout. Nou p'ap ka kenbe
¹⁰
 tèt avè l' yon lòt fwa ankò. Yo tankou yon gwo raje pikan. Atout yo vèt la, yo pral boule nèt
¹¹
 tankou yon pil zèb chèch. Yon nonm soti lavil Niniv. Li gen yon bann move lide nan tèt li, l'ap
¹²
 fè konplo sou do Seyè a. Men sa Seyè a di pèp li a: -Moun peyi Lasiri yo te mèt anpil, yo te mèt
¹³
 gwonèg, y'ap mouri, y'ap disparèt. Mwen te fè nou souffri. Men, mwen p'ap fè nou sa ankò! Koulye
 a, mwen pral kraze pouvwa peyi Lasiri k'ap peze nou an. M'ap kase tout chenn yo te pran pou mare
¹⁴
 nou yo. Men lòd Seyè a bay sou moun peyi Lasiri yo: -Yo pral bliye non nou nèt. Mwen pral
 detwi tout ras nou. M'ap kraze tout estati zidòl nou gen nan tanp bondye nou yo, kit yo te an bwa,
¹⁵
 kit yo te an fè. M'ap pare yon tonm pou nou. Nou pa vo anyen ankò! Gade! Men yon mesajé
 k'ap vin sou mòn yo! L'ap pote bon nouvèl k'ap ban nou kè poze. Nou menm moun peyi Jida, nou
 mèt fete tout fèt nou yo! Fè ofrann nou te pwomèt Bondye yo. Mechan yo p'ap pase lakay nou
 ankò! Mwen detwi yo nèt.

Chapter 2

¹
 ¶ Nou menm moun lavil Niniv, men yon gwo lame ap moute vin atake nou. Mete gad nan fò
²
 nou. Mete moun veye gran chemen an! Mare ren nou! Mete tout kouraj nou sou nou! Paske, Seyè
 a pral bay pèp Izrayèl la pouvwa li te gen anvan an, pouvwa fanmi Jakòb la te gen anvan piyajè yo
³
 te ravaje l' la, anvan yo te koupe tout branch rezen li yo. Vanyan sòlda l' yo gen plak pwotèj
 pentire tou wouj sou bra yo. Yo abiye ak rad wouj violèt. Cha lagè yo klere kou dife! Y'ap vin pou

atake nou! Y'ap souke zam yo nan men yo. ⁴ Cha lagè yo ap vini ak gwo vitès nan plenn yo. Yo kouri ale sou plas piblik yo. Yo klere tankou bwa chandèl tou limen. Y'ap pase kouri tankou zèklè.

⁵ Yo chonje rele chèf lame yo. Nan prese vini yo, yonn ap frape ak lòt. Yo kouri ale bò miray ranpa yo. Yo pare plak pwotèj pou y' al defonse pòtay yo. ⁶ Pòtay ki bay sou larivyè a louvri granbatan.

Tout moun nan palè a gen kè kase. ⁷ Yo fè larenn lan prizonye. Yo pati avè l'. Sèvant li yo ap plenn, y'ap kriye. Y'ap bat lestonmak yo sitèlman yo nan lapenn. ⁸ Tankou yon gwo basen plen dlo ki pete, moun yo ap kouri soti lavil Niniv. Y'ap di yo: Rete non! Rete non! Men, yonn pa vire tounen.

⁹ Piye tout lajan an. Piye tout lò yo. Yo gen yon richès ki poko prèt pou fini, yon pakèt bèl bagay ki koute chè. ¹⁰ Yo piye lavil la. Yo touye tout moun ladan l'. Yo devaste l' nèt. Moun pèdi kouraj yo. Jenou yo ap tranble. Yo pa gen fòs pou rete kanpe. Figi yo dekonpoze. ¹¹ ¶ Koulye a, kote twou kachèt lyon yo ye a, twou nich kote ti lyon yo manje a, twou kote lyon yo ansanm ak ti lyon yo te konn ale pou pesonn pa ka fè yo anyen an? ¹² Lyon an te konn dechire vyann bèt yo pou pitit li yo, li te konn trangle bèt pou femèl lyon yo. Lè konsa yo plen twou yo ak bèt yo pran, yo plen nich yo ak moso vyann dechikete. ¹³ Koulye a, se mwen menm k'ap regle ak nou! Se Seyè ki gen tout pouvwa a menm ki di sa. Moun pral boule tout cha lagè nou yo nan dife. Nan lagè a, m'ap fè yo touye tout jenn ti lyon nou yo. M'ap rache nan men nou tou sa nou te pran lakay lòt yo. Yo p'ap janm tande vwa delege nou yo ankò nan okenn peyi sou latè.

Chapter 3

¹ ¶ Madichon pou lavil ki renmen fè san koule a! Se manti ase l'ap mache bay. Li plen richès li vòlò nan fè mètdam. Li chaje ak byen li piye kay lòt. ² Koute bri fwèt kach yo, bri wou cha yo k'ap woule vini. Koute bri chwal yo k'ap galope, bri cha lagè yo k'ap kouri vini. ³ Kavalye yo ap zeponnen chwal yo. Nepe yo klere kou fèman nan solèy. Lans yo, ou ta di zèklè. Moun tonbe kou mouch.

Kadav yo fè pil sou pil. Ou pa ka konte yo. Moun ap bite sou moun mouri. ⁴ Y'ap pini lavil Niniv, manman jennès la. Y'ap pini l' pou tout dezòd li fè yo. Li te bèl, li te fò nan pawòl dous! Li fè yo pran plezi kont kò yo ak li. Li fè nasyon yo pèdi tèt yo. Lèfini, li pran yo, li fè trafik ak yo! ⁵ Men sa Seyè ki gen tout pouvwa a di: Se mwen menm k'ap regle ak ou! Mwen pral leve rad ou anlè jouk nan tèt. Mwen pral mete ou toutouni pou tout nasyon yo ka wè ou, pou tout peyi ka wè jan ou san wont. ⁶ Mwen pral kouvri ou ak salte. Mwen pral avili ou, pou tout moun ka wè jan ou pa bon.

⁷ Tout moun ki va wè ou va kouri byen lwen. Y'a di: Lavil Niniv fini! Ki moun ki va gen pitye pou
 li? Pa gen pesonn ka vle vin kenbe rèl la avè l'. ⁸ ¶ Ou menm lavil Niniv, ou pa pi bon pase lavil
 Tèb. Atout li chita nan mitan gwo larivyè Nil la, ak dlo toupatou tankou yon ranpa, tankou yon
⁹ glasi pou pwoteje l', atout li te anvayi peyi Letiopi ak peyi Lejip kifè pa t' gen limit pou pouvwa
 li ankò, atout moun peyi Pout yo ak moun peyi Libi yo te mache ansanm avè l', ¹⁰ yo fè moun li
 yo prizonnye, yo depòte yo nan lòt peyi. Nan tout kalfou, yo kraze pitit li yo jouk yo mouri. Yo mare
¹¹ grannèg li yo nan chenn kou esklav. Yo separe yo, yo tire osò pou bay chak moun pa yo. Ou
 menm tou, lavil Niniv, ou pral sou. Tèt ou pral vire. Ou menm tou, ou pral chache kote pou ou
¹² kache pou lènmi ou yo. Fò ou yo tankou yon pye fig Frans chaje fig mi: ou annik souke l', epi
¹³ fig yo tonbe nan bouch k'ap tann pou manje yo. Sòlda ou yo, ou ta di yon bann fanm! Peyi a ap
¹⁴ san defans devan lènmi ou yo, dife boule ba ki fèmen pòtay ou yo. Yo rete gran louvri. Al pran
 dlo mete la, paske yo pral sènen ou anndan lakay ou. Repare miray fò ou yo! Al bat tè ak pye ou
¹⁵ pou fè brik! Pare fòm pou fè brik. Ou te mèt peple tankou chini, ou te mèt peple tankou krikèt,
¹⁶ dife pral boule ou nèt ale. Lagè pral fini avè ou. Ou te gen plis moun k'ap fè kòmès pase gen
¹⁷ zetwal nan syèl la. Koulye a, yo pati tankou krikèt ki louvri zèl yo vole ale. Sòlda ou yo ak moun
 k'ap travay pou ou yo pral tankou yon bann krikèt ki poze sou raje lè fredy. Leve solèy la leve, y'
¹⁸ ale. Pesonn pa konnen kote yo fè. Ou menm wa peyi Lasiri a, faksyonnè ou yo ap dòmi. Chèf
 lame ou yo mouri. Moun ou yo gaye nan tout mòn. Pa gen pesonn pou fè yo tounen lakay yo ankò.
¹⁹ Pa gen renmèd pou ou pou jan ou donmaje a. Pa gen gerizon pou malenng ou a. Tout moun ki
 va pran nouvèl la va kontan, y'a bat men. Paske, ak tout mechanste ou yo, pa gen moun ou pa t' fè
 pase mizè.

Habakkuk

Chapter 1

¹ ¶ Men mesaj Bondye te bay pwofèt Abakouk nan yon vizyon. ² Seyè! Konbe tan ankò pou
 m' pase ap rele ou, ap mande ou sekou anvan pou ou tande m'? Konbe tan ankò pou m' pase ap rele
 nan zòrèy ou anvan pou ou vin delivre nou anba moun k'ap maltrete nou yo? ³ Poukisa w'ap fè m'
 wè tout mechanste sa yo? Ki jan ou ka rete kanpe konsa ap gade tout lenjistis sa yo? Se piyay ak

4
 mechanste ase ki devan je m'! Toupatou se goumen, se kont. Lalwa a la, li pa sèvi anyen. Ou pa
 ka jwenn jistis. Mechan yo ap kraze moun k'ap mache dwat. Lajistis devan dèyè. ¶ Seyè a pale
 5
 ak pèp li a, li di: -Voye je nou gade nasyon ki bò kote nou yo. Nou pral sezi, nou pral tranble. Mwen
 6
 pral fè yon travay devan je nou. Si se moun ki ta vin di nou sa, nou pa ta kwè. M'ap fè moun peyi
 Kalde yo kanpe. Se yon pèp ki san pitye, ki san manman. Y'ap mache toupatou sou latè, y'ap pran
 7
 peyi lòt pèp nan men yo. Kote yo pase, yo fè moun pè yo. Yo pa nan jwèt ak pesonn. Yo pa pran
 8
 lòd nan men pesonn. Yo fè sa yo pi pito. Chwal yo kouri pi rès pase chat mawon. Yo pi move
 pase chen mawon ki grangou. Kavalye yo soti byen lwen, y'ap kouri vini. Yo tankou malfini k'ap
 9
 plonje sou poul. Sòlda yo ap vini pou fè piyay. Tout moun pè lè yo wè yo ap pwoche, paske yo
 10
 ranmase prizonye an kantite, san gad dèyè. Y'ap pase wa yo nan betiz. Y'ap pase chèf yo nan
 11
 rizib. Pa gen fò ki ka rete yo. Yo annik anpile tè bò miray yo, lèfini yo moute pran yo. Yo pase
 tankou yon koutvan, yo kraze brize, epi y' al fè wout yo. Bondye yo se fòs yo gen nan ponyèt yo.
 12
 Se nan sa yo kwè. ¶ Seyè! Depi tout tan se ou ki Bondye. Ou se Bondye m', Bondye tout bon
 ki la pou tout tan an. Seyè, Bondye mwen, ou menm k'ap pwoteje m'! Se pèp sa a ou chwazi pou
 13
 fè travay ou? Se pèp sa a ou voye pou pini nou? Ou twò bon pou ou kite moun ap fè mechanste
 devan je ou konsa! Ou pa ka rete ap gade moun ap fè lenjistis devan ou konsa! Ki jan ou fè rete ap
 gade bann moun trèt sa yo? Poukisa ou pa di anyen lè mechan yo ap fini ak moun ki pi inonsan
 14
 pase yo? Kouman ou ka aji ak moun tankou si yo te pwason nan lanmè, tankou koulèv nan raje
 15
 ki pa gen mèt? Moun Babilòn yo pran moun nan zen tankou pwason. Yo rale yo nan senn, yo
 16
 ranmase yo nan nas. Lèfini, yo kontan, y'ap fè fèt. Se sak fè tou, yo fè ofrann bèt yo touye pou
 senn yo, yo boule lansan pou nas yo, paske se nan senn yo ak nan nas yo yo jwenn tout kalite bon
 17
 pwason pou yo manje. Eske yo pral toujou sèvi ak nepe yo san rete, pou yo touye moun lòt
 nasyon san yo pa gen pitye pou yo?

Chapter 2

1
 ¶ Mwen moute sou fò a pou m' veye. Mwen kanpe sou tèt miray ranpa a, m'ap tann pou m'
 wè sa Seyè a pral di m', ki repons li pral ban mwen apre tout plenyen mwen plenyen ba li a. Men
 2
 repons Seyè a ban mwen. Li di m' konsa: -Ekri sa mwen pral fè ou wè a. Grave l' byen grave sou

³
wòch plat pou moun ka li l' fasil. Ekri l' paske se poko lè pou sa m' pral fè ou wè a rive. Men, li p'ap pran lontan ankò pou l' rive. Li gen pou l' rive vre. Si li pran reta pou l' rive, ou mèt tann. Paske,

⁴
wè pa wè, li gen pou l' rive lè pou l' rive a. Men mesaj la: Moun ki pa mache dwat devan Bondye p'ap chape. Men moun ki mache dwat yo va viv paske yo te kenbe konfyans fèm yo nan Bondye.

⁵
¶ Richès fè moun pèdi tèt yo pi mal pase bweson. Moun ki gen lògèy pa ka rete trankil. Tankou simityè, yo pa janm gen ase. Tankou kote mò yo ye a, yo pa janm gen kont yo. Yo mache pran tout

⁶
nasyon yo pou yo. Yo mete tout pèp yo anba ponyèt yo. Men, tout pèp sa yo pral pase yo nan betiz, yo pral rele chalbari dèyè yo, yo pral bay istwa sou yo. Yo pral di: Madichon pou moun k'ap plede pran sa ki pa pou yo! Kilè y'a sispann fè sa? Madichon pou moun k'ap bay ponya epi k'ap fè

⁷
moun peye gwo enterè mete sou li! Talè konsa, se nou ki pral nan pran ponya. Moun nou dwe

⁸
yo pral leve dèyè nou. Yo pral piye tou sa nou genyen. Nou te piye anpil nasyon. Koulye a rès moun ki te chape yo pral piye tou sa nou genyen paske nou te touye anpil moun, nou te fè peyi yo,

⁹
lavil yo ansanm ak moun ki te rete ladan yo pase anpil mati anba men nou. Madichon pou moun

¹⁰
k'ap vòlò pou fè fanmi yo rich, k'ap bati kay sou mòn pou malè pa rive yo! Se wont nou fè fanmi

¹¹
nou yo wont. Lè nou detwi anpil nasyon konsa, se pwòp tèt nou nou fè mal. Ata wòch ki nan

¹²
miray yo ap denonse nou. Poto travès kay yo ap fè menm bagay la tou. Madichon pou moun

¹³
k'ap touye moun, k'ap fè lenjistis pou bati lavil yo! Travay pèp yo ap fè a pral boule nan dife.

¹⁴
Se pou gremesi nasyon yo ap fatigue kò yo travay di. Se Seyè a menm k'ap fè sa rive konsa. Menm

¹⁵
jan lanmè a plen dlo, se konsa toupatou sou latè moun pral konnen pouvwa Bondye a. ¶ Madichon pou moun k'ap fè moun parèy yo bwè pou avili yo. Yo vide bweson ba yo jouk yo sou. Yo mete

¹⁶
yo toutouni devan tout moun. Moun p'ap fè lwanj pou yo. Okontrè, yo pral trennen yo nan labou. Se yo menm ki pral bwè pou yo sou jouk y'a mete yo toutouni devan tout moun tou. Seyè a nan kòlè li pral fè yo bwè gode chatiman li pare pou yo a. Yo t'ap chache lwanj? Se wont y'a wont pito.

¹⁷
Yo te koupe tout gwo rakbwa peyi Liban an. Koulye a, se yo yo pral koupe voye jete. Yo te touye tout bèt li yo. Koulye a, bèt li yo pral fè yo kouri al kache. Tou sa pral rive yo paske yo te touye anpil moun, yo te fè peyi yo, lavil yo ansanm ak moun ladan yo pase anpil mati anba men

¹⁸
yo. Kisa yon estati an bwa ka fè pou nou, pou nou fè moun travay fè li pou nou? Kisa yon estati fèt ak metal yo fonn ka fè pou nou? Se manti ase l'ap ban nou. Sa sa ap rapòte nou lè nou fè zidòl

¹⁹
ki pa ka pale pou nou mete konfyans nou nan yo? Madichon pou moun k'ap pale ak yon bout bwa, epi k'ap di l': Leve non! Madichon pou moun k'ap pale ak yon moso wòch ki pa gen lapawòl, epi k'ap di l': Kanpe non! Eske bout bwa ak moso ròch ka di ou anyen? Ou kouvri yo avèk plak lò

ak plak ajan, se vre. Men yo pa gen lavi. ²⁰ Seyè a kanpe nan kay ki apa pou li a. Se pou tout moun sou latè pe bouch devan li.

Chapter 3

¹ ¶ Men lapriyè pwofèt Abakouk te fè pou li plenyen sò li bay Bondye. ² -Seyè! Mwen tande tou sa ou te di. M' sezi, m'ap tranble nan tout kò m'. Seyè, gwo mèvèy ou te konn fè nan tan lontan yo, koulye a, fè nou wè yo nan lanne k'ap vini yo. Menm lè ou fache, pa bliye gen pitye pou nou!

³ ¶ Bondye ap vini soti peyi Edon. Bondye tout bon an ap desann soti sou mòn Paran an. Pouvwa li kouvri tout syèl la. Lwanj li toupatou sou latè. ⁴ Li klere kou gwo solèy. Zèklè ap soti nan men l'. Se la li kache tout pouvwa li. ⁵ Li voye vye maladi pran devan li. Li mete lanmò mache dèyè l'.

⁶ Lè l' kanpe, latè pran tranble. Li annik gade, moun tout nasyon gen kè kase. Mòn ki la depi lontan yo kraze an miyèt moso. Ti mòn tan lontan yo vin plat. Chemen kote li te konn pase tan lontan yo louvri devan l'. ⁷ Mwen wè moun peyi Letiopi yo nan gwo lafliksyon. Moun peyi Madyan yo tou ⁸ pè. Eske se sou gwo rivyè yo ou move konsa, Seyè? Eske se sou lanmè a ou fache? Eske se sou lanmè a ou ankòlè konsa, kifè ou moute sou nwaj yo tankou sou chwal ou, tankou sou cha ou pou ⁹ al delivre pèp ou a? Ou kenbe banza ou tou pare nan men ou. Pawòl ou se pakèt flèch anpwazonnen. Zèklè ou yo fann tè a louvri. ¹⁰ Mòn yo wè ou, yo pran tranble. Gwo lapli ap tonbe soti nan syèl la. Dlo anba tè yo ap gwonde. Gwo lanm lanmè ap leve byen wo. ¹¹ Flèch ou yo pati tankou zèklè. Lans ou yo klere byen klere. Lalin ak solèy pa parèt tèt yo deyò. ¹² Ou move, w'ap mache toupatou sou latè. Nan kòlè ou, ou pilonnen nasyon yo anba pye ou. ¹³ Ou soti pou delivre pèp ou a, pou sove wa ou chwazi a. Ou kraze chèf mechan yo. Ou detwi tout moun li yo nèt. ¹⁴ Avèk flèch ou yo, ou pèse kòmandan an chèf lame yo a, lè yo t'ap vare sou nou tankou yon van tanpèt pou gaye nou. Je yo gran louvri ak kontantman tankou moun ki pral devore pòv malere yo kote yo kache a.

¹⁵ Ou foule lanmè a anba pye chwal ou yo. Ou fè dlo lanmè a kimen. ¹⁶ ¶ Mwen tande tou sa. Vant mwen bouyi! Lè m' tande tout bri sa yo, bouch mwen pran tranble. Tout zo nan kò m' ap fè m' mal. M' pa ka kanpe sou janm mwen ankò! Mwen rete byen trankil, m'ap tann jou malè a rive, jou Bondye ¹⁷ pral mache pran moun k'ap chache nou kont yo. Pye fig frans yo te mèt pa donner, pye rezen yo te mèt pa bay rezen, rekòt oliv yo te mèt pa bon, jaden yo te mèt pa bay manje, mouton yo te

mèt mouri nan sèka yo, bèf yo te mèt mouri nan pak yo, ¹⁸ mwen menm, m'ap toujou kontan poutèt
¹⁹ Seyè a. M'ap fè fèt pou Bondye k'ap delivre m' lan. Se Seyè a ki tout fòs mwen. Li asire pye m'
 tankou pye kabrit. Li fè m' mache sou mòn yo, san m' pa tonbe. Pou chèf k'ap dirije moun k'ap
 chante yo.

Zephaniah

Chapter 1

¹ ¶ Men mesaj Seyè a te bay Sofoni sou rèy Jozyas, pitit Amon an, ki te wa peyi Jida. Sofoni
 te pitit Kouchi. Kouchi te pitit Gedalya. Gedalya sa a te pitit Amarya ki li menm te pitit wa Ezekyas.
² Seyè a di konsa: -Mwen pral detwi dènye bagay sou latè. ³ Mwen pral detwi tout moun, tout bèt,
 tout zwezo nan syèl la ak tout pwason nan lanmè, mechan yo ansanm ak tou sa k'ap fè yo tonbe
 nan peche. Mwen pral detwi tout moun, mwen p'ap kite yonn sou latè. Se mwen menm, Seyè a, ki
⁴ di sa. Mwen pral kraze moun peyi Jida yo ansanm ak moun ki rete lavil Jerizalèm yo anba men
 m'. Mwen pral disparèt dènye kras zidòl Baal nan peyi a. Pesonn p'ap janm chonje prèt k'ap sèvi l'
⁵ yo ankò. Mwen pral disparèt dènye moun k'ap moute sou teras anwo kay pou adore solèy, lalin
 ak zetwal nan syèl la. M'ap detwi moun k'ap pran non mwen mete ansanm ak non zidòl Milkòm
⁶ lan pou fè sèman. M'ap detwi tout moun ki vire do ban mwen, ki pa koute pawòl mwen yo, ki pa
⁷ vin mande m' konsèy ankò. ¶ Jou pou Seyè a vin jije a pa lwen rive! Se pou tout moun pe bouch
 yo devan Seyè a. Seyè a ap pare pou li fè gwo sèvis pou touye bèt. Li chwazi moun l'ap envite yo.
⁸ Jou gwo sèvis ofrann bèt sa a, m'ap pini tout gwo chèf yo, tout pitit wa yo ansanm ak tout moun
⁹ k'ap kopye sou moun lòt nasyon yo. Se Seyè a menm ki di sa. M'ap pini tout moun k'ap fè sèvis
 tankou moun lòt nasyon yo. Wi, jou sa a, m'ap pini tout moun k'ap vòlò, k'ap touye moun pou yo
¹⁰ ka plen tanp zidòl yo ak sa yo pran. Se mwen menm Seyè a k'ap pale toujou. Jou sa a n'a tande
 gwo rèl bò Pòtay Pwason nan lavil Jerizalèm. N'a tande moun ap plenn byen fò nan katye nèf lavil
¹¹ la. N'a tande yon gwo deblozay pete sou ti mòn yo. Nou menm ki rete anba lavil, rele byen fò
 paske tout moun ki t'ap fè trafik yo pral mouri. Wi, yo pral disparèt tout moun ki t'ap fè lajan sou
¹² tèt moun nan kòmès. Lè sa a, men sa k'ap rive. M'ap limen lanp pou m' fouye lavil Jerizalèm.
 M'ap pini tout moun ki chita chita yo tou dousman, epi k'ap di nan kè yo: Bondye p'ap fè anyen.

13

Se sa yo kwè! Y'ap piye tout richès yo, y'ap kraze tout kay yo. Y'ap bati kay, men yo p'ap menm gen tan antre ladan yo. Y'ap plante pye rezen, men yo p'ap menm gen tan pran fre diven an. ¶

Wi, gwo jou Seyè a pa lwen rive. Sa pral yon gwo jou vre. Li pa lwen rive. L'ap rive byen vit. Jou

sa a, sa pral rèd nèt! Ata sòlda ki pi vanyan yo pral rele anmwe. ¶ Jou sa a pral yon jou dechennen, yon jou lafliksyon ak kè sere, yon jou kraze brize, yon jou k'ap fè nwè kou lank, yon jou van ak

gwo nwaj nwa ap plen syèl la. ¶ Yon jou twonpèt ap kònen, sòlda ap rele pou yo gen kouray pou

y' al atake lavil ki gen gwo miray ranpa ak fò byen wo nan chak kwen pou pwoteje yo. ¶ Seyè a te di ankò: -Mwen pral manyen ak lèzòm! Yo pral tatonnen tankou avèg, paske yo te peche kont

Seyè a. San yo pral koule kou dlo, kadav yo pral pouri tankou fatra. ¶ Jou Seyè a pral move sou yo a, ni lajan yo ni lò yo p'ap ka sove yo. Kòlè li tankou yon dife k'ap boule tout tè a, paske yon sèl kou a, l'ap disparèt tout moun ki rete sou latè. L'ap fini ak yo.

Chapter 2

¶ Bann san wont! Pran tèt nou. Kalkile byen, ¶ anvan nou pase tankou pay van pote ale yon sèl jou, anvan dife kòlè Seyè a tonbe sou nou, anvan jou kòlè Seyè a rive sou nou. ¶ Nou menm, pòv malere nan peyi a k'ap fè sa Seyè a bay lòd fè a, vin jwenn li. Fè sa ki dwat devan li. Pa kite

lògèy vire tèt nou. Nou pa janm konnen, nou ka chape jou Seyè a va fè wè kòlè li. ¶ p'ap rete yon moun lavil Gaza. Lavil Askalon ap tounen yon dezè. Gwo midi, y'ap mete tout moun Asdòd yo

deyò. Y'ap depòte tout moun Ekwon yo. ¶ Madichon pou moun peyi Filisti yo ki rete tout bò lanmè a! Seyè a ban nou santans nou, nou menm moun Filisti ki rete nan peyi Kanaran an. L'ap detwi nou

nèt, li p'ap kite yon moun nan peyi a. ¶ Tout bò lanmè a pral tounen savann kote gadò mouton va

mennen bèt yo vin manje. ¶ Ti ponyen moun ki va rete nan fanmi Jida a va gen tout bò lanmè a pou yo. Se la y'a mennen mouton yo al manje. Nan aswè, y'av al dòmi nan kay lavil Askalon yo.

Seyè a, Bondye yo a, va fè kichòy pou yo. L'a fè yo leve tèt yo ankò. ¶ Seyè a di ankò! -Mwen te tande jan moun peyi Moab yo ak moun Amon yo t'ap joure pèp mwen an. Yo t'ap pale yo mal.

¶ Yo t'ap mache di yo pral pran peyi a nan men yo. ¶ Se poutèt sa, mwen menm Seyè ki gen tout pouvwa a, Bondye vivan pèp Izrayèl la, mwen sèmante sou tèt mwen, sa ki te rive lavil Sodòm lan, se sa ki pral rive peyi Moab la. Sa ki te rive lavil Gomò a, se sa ki pral rive peyi moun Amon yo. Yo pral tounen yon kote se pikan chadwon ase ki pral leve, yon mi n' sèl, yon dezè pou tout tan. Ti ponyen ki va rete nan moun pèp mwen yo va piye yo, ti ponyen ki va rete nan moun k'ap sèvi

¹⁰
 m' yo va pran peyi a pou yo. Se sa ki pral rive moun Moab yo ak moun Amon yo, paske yo te gen lògèy, yo t'ap pale pèp Seyè ki gen tout pouvwa a mal. Yo t'ap mache di yo pral pran peyi a nan men yo. ¹¹ Seyè a pral fè yo pase pa yo. Li pral disparèt tout bondye moun sou latè yo ap sèvi. Lèfini, tout nasyon toupatou sou latè pral adore l', yo chak nan peyi pa yo. ¹² ¶ Nou menm tou, moun peyi Letiopi yo, Seyè a ap touye nou nan lagè! ¹³ Seyè a va leve men l' bò nan nò, l'ap detwi peyi Lasiri. L'ap fè lavil Niniv tounen yon savann, yon tè sèk tankou dezè. ¹⁴ Se la tout kalite bèt savann pral chwazi fè kay yo. Koukou ak zagoudi pral fè nich yo nan mitan moso demoli kay wòch yo. Y'ap rele bò fennèt yo. Kaou va rele nan papòt kay yo. Y'ap rache tout bwa sèd nan chapant kay yo. ¹⁵ Men sa ki pral rive lavil kote moun t'ap pran plezi yo, lavil kote moun te mete nan tèt yo anyen pa ka rive yo, lavil kote moun yo t'ap di nan kè yo: Se mwen menm sèl chèf! Pa gen lòt! Tout moun k'ap pase bò la pral sezi, y'ap mete men nan tèt lè yo wè sa ki rive.

Chapter 3

¹
 ¶ Madichon pou moun lavil Jerizalèm! Yo vire kont Bondye, yo lage kò yo nan dezòd, lèfini y'ap peze moun parèy yo. ² Yo pa t' koute Seyè a. Yo pa t' pran pinisyon Bondye a pou anyen. Yo pa t' mete konfyans yo nan Seyè a ankò, yo pa t' vin mande Bondye yo a konsèy ankò. ³ Nan lavil la, chèf yo tankou lyon ki grangou. Jij yo tankou chen mawon ki soti apre solèy kouche. Yo tèlman akchèk, yo pa kite yon ti zo pou denmen maten. ⁴ Pwofèt yo pa serye. Pesonn pa ka fye yo. Prèt yo menm pa respekte bagay ki apa pou Bondye. Yo fè lalwa Bondye a di sa yo vle. ⁵ Men Seyè a la nan lavil la. Li pa nan patipri. Li p'ap fè lenjistis. Chak maten, li bay santans li. Depi bajou kase, li la l'ap rann jistis. Men, moun k'ap fè sa ki mal yo pa gen nen nan figi yo. ⁶ Seyè a di: -Mwen disparèt nasyon yo. Mwen kraze gwo fò nan kwen miray ranpa yo. Mwen pa kite yon moun ap mache nan lari. Yo piye lavil yo. Yo pa kite yon moun vivan ladan yo. ⁷ Mwen te kwè pèp mwen an ta gen yon ti krentif pou mwen. Leson an ta sèvi yo. Yo pa ta janm bliye sa m' te fè yo pase. Men, se lè sa a yo lage kò yo pi rèd nan fè sa ki mal. ⁸ ¶ Seyè a di: -Nou mèt tann mwen! Nou mèt tann jou pou m' kanpe akize nasyon yo! Mwen fin pran desizyon mwen: m'ap sanble tout nasyon yo ak tout peyi yo pou m' fè yo santi jan m' fache, jan m' ankòlè sou yo. Paske nan kòlè mwen, mwen pral boule tout latè. ⁹ Lè sa a, m'a chanje pawòl ki nan bouch nasyon yo. Se mwen menm yo tout yo pral lapriyè. Yo pral mete tèt yo ansanm pou yo sèvi m'. ¹⁰ Moun ap soti byen lwen lòt

bò larivyè peyi Letiopi yo, y'ap vin ansanm ak moun pèp mwen an ki te gaye toupatou, y'ap pote

¹¹ ofrann yo ban mwen. Jou sa a, nou menm pèp mwen an, nou p'ap bezwen wont tou sa nou te fè lè nou te vire do ban mwen an. Mwen wete tout moun ki gen lògèy nan mitan nou, tout moun k'ap gonfle lestonmak yo sou moun. Nou va sispann kenbe tèt avè m' sou mòn ki apa pou mwen an.

¹² Men, moun m'a kite nan lavil la se pòv malere yo ki pa kite lògèy vire tèt yo. Se anba zèl mwen

¹³ y'a vin chache pwoteksyon. Ti ponyen moun ki va rete nan pèp Izrayèl la p'ap nan fè moun mal,

¹⁴ yo p'ap nan bay manti, yo p'ap nan twonpe moun. Y'a manje, y'a dòmi, anyen p'ap fè yo pè. ¶ Nou menm, pèp Izrayèl, rele chante pou di jan nou kontan! Nou menm ki rete sou mòn Siyon an, rele byen fò, fè fèt! Nou menm moun lavil Jerizalèm, fè kè nou kontan, danse ak tout nanm nou!

¹⁵ Seyè a wete tout moun ki t'ap fini avèk nou yo. Li bale tout lènmi nou yo ale. Seyè a, wa pèp

¹⁶ Izrayèl la, l'a nan mitan nou. Pa gen malè ki pou rive nou ankò! Jou sa a, y'a di moun lavil

¹⁷ Jerizalèm yo: Nou menm ki rete sou mòn Siyon an, nou pa bezwen pè. Pa dekouraje! Seyè a, Bondye nou an, l'a nan mitan nou! Se yon vanyan gason. Se li menm k'ap delivre nou. Li kontan wè sa n'ap fè. L'ap mete ou kanpe ankò paske li renmen ou. W'ap fè kè l' kontan. li ap chante

¹⁸ tankou lè gen fèt: Seyè a di: -Mwen wete sa ki t'ap fè nou pè a. Mwen wete wont ki te sou nou

¹⁹ an. Jou sa a, m'a pini tout moun ki t'ap peze nou yo. M'a sove moun k'ap bwete yo, m'a fè moun yo te depòte yo tounen lakay yo. Nan tout peyi kote moun t'ap fè yo wont mwen pral fè yo fè lwanj

²⁰ pou yo, tout moun pral nonmen non yo. Lè sa a, m'a fè nou tounen lakay nou. Wi, m'a fè nou sanble ankò nan peyi nou an. M'a fè moun toupatou sou latè fè lwanj nou, y'a nonmen non nou. N'a wè m'a fè peyi nou an kanpe ankò. Se Seyè a menm ki di sa.

Haggai

Chapter 1

¹ ¶ Nan dezyèm lanne rèy wa Dariyis nan peyi Pès la, premye jou nan sizyèm mwa a, Seyè a te bay pwofèt Aje yon mesaj pou Zowobabèl, pitit gason Chealtyèl la, ki te gouvènè peyi Jida ansanm ak pou Jozye, pitit gason Jozadak la, ki te granprèt lè sa a. Men mesaj la: ² -Seyè ki gen

tout pouvwa a pale. Men sa li di: Moun yo ap plede di se poko lè pou yo bati kay Seyè a! ³ Se

⁴ poutèt sa, men mesaj Seyè a te bay pwofèt Aje pou pèp la. Ki jan nou fè pa wont rete nan gwo

kay nou byen alèz, epi nou kite kay Bondye a tou kraze? ⁵ Bon. Koulye a, men sa Seyè ki gen tout
 pouvwa a di: Kalkile byen sou sa k'ap rive nou la a. ⁶ Nou simen anpil grenn nan jaden nou, men
 nou rekòlte ti kras. Nou manje, men vant nou pa plen. Nou bwè diven, men kè nou pa kontan. Nou
 gen rad pou mete sou nou, men fredri ap kale nou toujou. Travayè yo touche lajan, men sa pa ka
 bouche yon twou dan. ⁷ Wi! Men sa Seyè ki gen tout pouvwa a di nou: Kalkile byen sou sa k'ap
 rive nou la a! ⁸ Lèfini, ale nan mòn yo. Koupe bwa pote vini. Rebat kay mwen an. Sa va fè m'
 plezi, se va yon lwanj pou mwen. Se Seyè a ki di sa. ⁹ Nou te kwè nou t'ap fè bèl rekòt. Men, rekòt
 la mèg. Nou ranmase l' mete nan depo, mwen fè l' gate. Poukisa mwen fè sa? Se Seyè ki gen tout
 pouvwa k'ap pale wi. Se paske nou kite tanp mwen an ap kraze epi tout moun ap prese bati kay pa
 yo. ¹⁰ Se poutèt sa, lapli pa tonbe, anyen pa pouse. ¹¹ Mwen lage yon sèl chechrès nan peyi a, sou
 mòn yo, sou jaden ble yo, sou jaden rezen yo ak jaden oliv yo, sou tou sa k'ap pouse sou latè, sou
 moun, sou bèt, sou tout sa nou plante. ¹² ¶ Lè sa a, Zowobabèl, pitit Chealtyèl la, Jozye, granprèt
 la, pitit Jozadak la, ansanm ak tout moun ki te tounen soti nan peyi kote yo te depòte yo a, yo koute
 sa Seyè a, Bondye yo a, te di yo, dapre mesaj Seyè a te bay pwofèt Aje pou yo a. Yo te vin gen
 krentif pou Seyè a. ¹³ Epi, Aje, mesaje Seyè a, bay pèp la yon lòt mesaj Seyè a te ba li. Li di yo:
 -Seyè a fè nou konnen li la avèk nou. ¹⁴ Seyè a mete nan tèt tout moun lanvi pou yo travay nan
 tanp Bondye yo a, depi Zowobabèl, pitit gason Chealtyèl la, gouvènè peyi Jida a, Jozye, granprèt
 la, pitit gason Jozadak la, jouk dènye moun ki te tounen soti nan peyi kote yo te depòte yo a. Yo
 konmanse travay nan tanp Seyè ki gen tout pouvwa a, Bondye yo a, ¹⁵ jou ki te make vennkatriyèm
 jou nan sizyèm mwa nan dezyèm lanne rèy wa Dariyis la.

Chapter 2

¹ ¶ Jou ki make venteyenyèm jou nan setyèm mwa nan menm lanne a, Seyè a bay pwofèt Aje
 yon lòt mesaj ankò. ² Li di li konsa: -Pale ak Zowobabèl, pitit gason Chealtyèl la, gouvènè peyi
 Jida a, ak Jozye, granprèt la, pitit gason Jozadak la, ansanm ak pèp ki te tounen soti nan peyi kote
 yo te depòte yo a. W'a di yo: ³ Eske gen yonn nan nou ki chonje jan tanp lan te bèl nan tan lontan?
 Ki jan nou wè l' koulye a? Nou pa wè li pa vo anyen? ⁴ Men koulye a, kouraj, Zowobabèl! Se Seyè
 a menm k'ap pale avè ou. Kouraj, Jozye, granprèt la, pitit Jozadak la! Kouraj, nou tout ki rete nan
 peyi a! Se Seyè a menm k'ap pale ak nou! Mete men nan travay la, paske mwen la avèk nou! Se
 mwen menm, Seyè ki gen tout pouvwa a, ki di sa! ⁵ Lè nou t'ap soti kite peyi Lejip la, mwen te

pwomèt mwen t'ap toujou la avèk nou. Enben! M' la nan mitan nou. Nou pa bezwen pè.⁶ Paske men sa Seyè ki gen tout pouvwa a di: Anvan lontan, mwen pral souke syèl la ak latè a, lanmè a ak tè yo.⁷ Mwen pral souke tout nasyon yo. Yo pral pote tout richès yo isit la, yo pral plen kay sa a ak bèl bagay. Se Seyè ki gen tout pouvwa a menm ki di sa.⁸ Se pou mwen tout lò ak tout ajan sou latè ye. Se Seyè ki gen tout pouvwa a menm ki di sa.⁹ Kay sa a ap pi bèl lontan pase premye a. Se isit la menm m'ap bay tout moun kè poze. Se mwen menm, Seyè ki gen tout pouvwa a, ki di sa!¹⁰

¶ Jou ki te make vennkatriyèm jou nan nevyèm mwa nan dezyèm lanne rèy wa Dariyis la, Seyè ki gen tout pouvwa a bay pwofèt Aje yon lòt mesaj ankò. Li di l' konsa:¹¹ -Al mande prèt yo sa lalwa di sou sa.¹² Si yon moun pran yon moso vyann yo mete apa pou Bondye, li vlope l' nan ke rad li. Lèfini, li kite rad la touche yon pen, osinon yon manje kwit, osinon yon veso ki gen diven osinon ki gen lwil, ou nenpòt ki kalite manje, èske sa ap mete manje a apa pou Bondye tou pou sa?

Lè Aje mande prèt yo sa, yo reponn li: -Non!¹³ Lèfini, Aje mande yo: -Lè yon moun pa nan kondisyon pou l' sèvi Bondye paske li te manyen yon kadav, lèfini si li manyen yonn nan kalite manje sa yo, èske sa ap fè manje yo pa bon pou sa pou moun ki nan kondisyon pou sèvi Bondye?

Prèt yo reponn li: -Wi!¹⁴ Lè sa a, Aje di yo konsa: -Men sa Seyè a di. Se menm bagay la tou pou pèp nasyon sa a ansanm ak tou sa y'ap fè a. Sa yo ofri ban mwen an pa bon, paske yo pa nan kondisyon pou yo sèvi Bondye.¹⁵ Men sa Seyè a di ankò: -Depi jòdi a, kalkile byen sou sa ki rive nou. Anvan nou te konmanse rebati kay ki apa pou Seyè a,¹⁶ ki jan sa te ye pou nou? Nou te al fè rekòt nan yon jaden ble, nou te konprann nou t'ap jwenn vin barik, se dis ase nou jwenn. N' al chache diven nan yon barik depo, nou te konprann nou t'ap jwenn senkant galon, se vin galon ase nou jwenn.¹⁷ Mwen voye lawouy ak lagrèl gate tou sa nou te plante ak men nou. Mwen fè yo kanni. Men, nou yonn pa tounen vin jwenn mwen. Se Seyè a ki di sa.¹⁸ Men jòdi a, vennkatryèm jou nan nevyèm mwa a, jou nou te fini ak fondasyon tanp lan, kalkile byen sou sa ki pral rive nou la a!¹⁹ Ata grenn pou plante pa gen ankò nan depo nou yo. Ni pye rezen nou yo, ni pye fig frans nou yo, ni pye grenad nou yo, ni pye oliv nou yo pa donnen ankò. Men, depi jounen jòdi a, mwen pral beni nou.²⁰ ¶ Menm jou sa a, ki te vennkatriyèm jou nan mwa a, Seyè a bay Aje yon dezyèm mesaj. Li di l' konsa:²¹ -Pale ak Zowobabèl, gouvènè peyi Jida a, di l' pou mwen: Mwen pral souke syèl la ak latè a.²² Mwen pral jete wa k'ap gouvènen yo, mwen pral detwi pouvwa nasyon yo. Mwen pral chavire cha lagè yo ansanm ak moun ki sou yo. Tout chwal yo pral mouri. Pou moun ki te sou chwal yo menm, yonn pral touye lòt ak nepe yo.²³ Jou sa a, m'ap pran ou, ou menm

Zowobabèl, sèvitè m' lan, pitit gason Chealtyèl la, m'ap ba ou pouvwa pou gouvènen nan non mwen, paske se ou menm mwen chwazi pou sa. Se Seyè ki gen tout pouvwa a ki di sa

Zechariah

Chapter 1

¹ ¶ Nan uityèm mwa dityèm lanne rèy wa Dariyis, Seyè a pale ak pwofèt Zakari, ki te pitit Berekya, pitit pitit Ido. Li ba li mesaj sa a pou pèp la. ² Li di li: -Mwen menm Seyè a, mwen te fache anpil sou zansèt nou yo. ³ Men koulye a, mwen menm Seyè ki gen tout pouvwa a, men sa m' voye di nou: Tounen vin jwenn mwen, m'a tounen vin jwenn nou tou. Se vre wi sa m'ap di nou la a. ⁴ Pa fè tankou zansèt nou yo. Nan tan lontan pwofèt yo te ba yo mesaj mwen. Yo te di yo: Men sa Seyè a di nou: Kite move chemen n'ap swiv la. Sispann fè sa ki mal. Men, yo pa t' koute m', yo fè tankou se pa avè yo m' t'ap pale. Se vre wi sa m'ap di la a. ⁵ Kote zansèt nou yo ye koulye a? Eske pwofèt yo te ka viv san yo pa janm mouri? ⁶ Men, sa m' te di nan pawòl ak lòd mwen te bay pwofèt yo, sèvitè m' yo, pou zansèt nou yo, èske sa pa rive yo vre? Lè sa a, yo vin règrèt sa yo te fè a. Yo rekonèt mwen menm, Seyè ki gen tout pouvwa a, mwen te pini yo pou jan yo t'ap viv la, pou tou sa yo te fè ki mal, jan mwen te soti pou m' fè l' la. ⁷ ¶ Nan dezyèm lanne rèy wa Dariyis, vennkatriyèm jou nan onzyèm mwa a, mwa yo rele Cheba a, Seyè a bay pwofèt Zakari, pitit Berekya, ⁸ pitit pitit Ido a, yon mesaj. Men ki jan pwofèt la rakonte l': -Mwen fè yon vizyon nan mitan lannwit: Mwen wè yon nonm sou yon chwal wouj. Li te kanpe nan mitan yon bann pye jasmen ki te nan yon ti fon anba pyebwa. Te gen yon chwal wouj, yon chwal alzan ak yon chwal blan kanpe ⁹ dèyè do l'. Mwen mande: -Kisa chwal sa yo ye menm, mèt? Zanj ki t'ap pale avè m' lan reponn mwen: -Mwen pral fè ou wè sa yo ye. ¹⁰ Nonm ki te kanpe nan mitan pye jasmen yo pran lapawòl, li di m' konsa: -Se moun Seyè a te voye al wè sa k'ap pase toupatou sou latè. ¹¹ Chwal yo pale ak zanj Bondye a ki te kanpe nan mitan pye jasmen yo, yo di l' konsa: -Nou te ale toupatou sou latè. ¹² Nou te wè tout moun chita byen dousman lakay yo, san bri san kont. Lè sa a, zanj Seyè a pran lapawòl, epi li di: -Seyè ki gen tout pouvwa, sa fè swasannndizan depi ou ankòlè sou lavil Jerizalèm ak sou lavil Jida yo. Kilè w'a resi gen pitye pou yo? ¹³ Seyè a reponn zanj ki t'ap pale avè m' lan. Li ba li bon pawòl pou remoute kouraj li. ¹⁴ Lèfini, zanj ki t'ap pale avè m' lan di m': -Men sa pou

ou fè moun yo konnen: Seyè ki gen tout pouvwa a pale. Li di: Mwen renmen lavil Jerizalèm ki sou mòn Siyon an anpil anpil. ¹⁵ Men, mwen move anpil sou nasyon k'ap mennen lavi dous yo. Mwen te fache sou pèp mwen an, se vre. Men, mwen pa t' twò fache pase sa. Men, nasyon yo pwofite, yo fè gwo malè sou li. ¹⁶ Se poutèt sa, men sa Seyè a di: M'ap tounen vin jwenn lavil Jerizalèm ankò, m'ap gen pitye pou li. Yo pral rebati tanp mwen an nan lavil la. Jerizalèm pral kanpe ankò. Se mwen men, Seyè a, ki di sa: ¹⁷ Zanj lan di m': -Men yon lòt bagay pou fè yo konnen ankò. Seyè a pale, li di konsa: Lavil mwen yo pral wè zafè yo mache byen ankò. M'ap gen pitye pou mòn Siyon an ankò. Mwen pral chwazi lavil Jerizalèm pou li rele m' pa m' ankò. ¹⁸ ¶ Apre sa, mwen fè yon lòt vizyon, mwen leve je m' gade. Mwen wè kat kòn bèf. ¹⁹ Mwen mande zanj ki t'ap pale avè m' lan: -Kisa kòn sa yo ye, mè? Li reponn mwen: -Kòn sa yo, se nasyon ki te depòte moun peyi Jida yo, pèp Izrayèl la ansanm ak moun lavil Jerizalèm yo. ²⁰ Apre sa, Seyè a fè m' wè kat bòs fòjon ak mato nan men yo. ²¹ Mwen mande l': -Kisa moun sa yo vin fè la a? Li reponn mwen: -Kòn sa yo, se nasyon ki te depòte tout pèp peyi Jida a, ki te fè tout moun Jida yo t'ap mache tèt bese. Men, bòs fòjon sa yo vini pou yo fè nasyon yo pè, pou kraze pouvwa tout nasyon ki t'ap pwofite sou pèp peyi Jida a, lèfini ki te gaye yo toupatou.

Chapter 2

¹ ¶ Apre sa, mwen fè yon lòt vizyon, mwen leve je m' gade. Mwen wè yon nonm avèk yon chenn pou mezire nan men l'. ² Mwen mande l': -Kote ou prale? Li reponn mwen: -Mwen pral pran mezi lavil Jerizalèm, pou m' wè ki longè ak ki lajè li genyen. ³ Zanj ki t'ap pale avèk mwen an te rete kanpe. Yon lòt zanj pwoche devan l' vin jwenn li. ⁴ Premye zanj lan di dezyèm lan: -Kouri al di jenn gason ou wè ak chenn nan men l' lan: sitèlman pral gen moun ak bèt nan lavil Jerizalèm, yo p'ap bezwen bati miray pou fèmen l'. ⁵ Seyè a pale, li fè konnen se li menm k'ap tankou yon gwo miray dife k'ap fè wonn lavil la pou pwoteje l'. Li di: M'ap rete nan mitan lavil la ak tout pouvwa mwen. ⁶ ¶ Men sa Seyè a di: -Ey! Nou menm mwen te gaye nan kat kwen latè yo, kouri, kouri kite peyi ki nan nò a. ⁷ Ey! Nou menm moun Siyon ki rete lavil Babilòn yo, sove kò nou! ⁸ Men sa Seyè ki gen tout pouvwa di: Se li menm ki voye m'. Men sa li di sou nasyon ki te piye pèp li a. Si yon moun manyen pèp la, se tankou si li te foure dwèt nan je m'. ⁹ Mwen menm mwen pral regle ak nou. Moun nou te fè tounen esklav yo, se yo menm ankò ki pral piye nou. Lè sa a,

¹⁰
 tout moun va konnen se Seyè ki gen tout pouvwa a ki te voye m'. ¶ Seyè a di ankò: -Nou menm
 moun lavil Jerizalèm, chante! Fè kè nou kontan! Men m'ap vini pou m' rete nan mitan nou! Se
¹¹
 mwen menm, Seyè a, ki di sa! Lè sa a, anpil nasyon va vin jwenn Seyè a pou yo sèvi l'. Se pèp
 pa li menm y'ap ye. L'a vin rete nan mitan yo. Lè sa a, n'a konnen se Seyè ki gen tout pouvwa a ki
¹²
 te voye m' kote nou. Seyè a va pran peyi Jida a pou li tankou pòsyon pa l' nan tè yo mete apa
¹³
 pou li a. L'a chwazi lavil Jerizalèm ankò. Se pou tout moun pe bouch yo devan Seyè a, paske
 l'ap soti kote ki apa pou li a, l'ap vin delivre nou!

Chapter 3

¹
 ¶ Apre sa, Seyè a fè m' wè Jozye, granprèt la, ki te kanpe devan zanj Seyè a. Satan menm te
 kanpe sou bò dwat Jozye pou l' te ka akize l'. ² Zanj Seyè a di Satan konsa: -Se pou Seyè a regle
 ou, Satan. Wi, se pou Seyè a ki renmen lavil Jerizalèm lan regle ou! Nonm sa a tankou yon bout
³
 bwa tou limen yo kouri wete nan dife pou l' pa fin boule nèt. Jozye te kanpe la devan zanj Seyè
⁴
 a, ak rad li tou sal. Zanj lan pran lapawòl ankò, li pale ak lòt zanj ki te la tou devan li. Li di yo:
 -Wete rad sal ki sou li a. Epi li di Jozye konsa: -Ou wè. Mwen wete tout peche ou yo. M'ap ba ou
⁵
 bèl rad pwòp pou ou mete sou ou. Lèfini, li pase yon lòd, li di lòt zanj yo: -Mare tèt li ak yon
 mouchwa pwòp. Yo mare tèt Jozye ak yon bèl mouchwa pwòp, epi yo mete rad pwòp sou li. Zanj
⁶
 lan menm te kanpe la ap gade. Apre sa, zanj Seyè a pale ak Jozye, li di l' konsa: ⁷ -Men sa Seyè
 ki gen tout pouvwa a di ou: Si ou fè sa mwen di ou fè, si ou swiv lòd mwen ba ou yo, se ou menm
 ki pral gouvènen kay mwen an. W'a reskonsab lakou m' lan. M'a koute lapriyè ou menm jan mwen
⁸
 koute lapriyè zanj ki devan m' yo. ¶ Koute byen, ou menm Jozye, granprèt la, ansanm ak prèt
 parèy ou yo ki la devan ou. Nou pral sèvi remak pou bagay ki gen pou rive a. M'ap fè sèvitè m' lan,
⁹
 sa yo rele Boujon an, vini. Men m'ap mete yon wòch devan Jozye. Wòch sa a gen sèt fas. Se
 mwen menm ki pral make pawòl ki pou make sou wòch la. Se mwen menm Seyè ki gen tout pouvwa
¹⁰
 a ki di sa. M'ap pran yon sèl jou pou m' wete tout peche ki nan peyi a. Jou sa a, yonn pral envite
 lòt vin lakay nou anba pye rezen ak pye fig Frans nou yo. Se Seyè ki gen tout pouvwa a menm ki
 di sa.

Chapter 4

¹ ¶ Zanj ki t'ap pale ak mwen an vini ankò. Li souke m' tankou yo souke yon moun k'ap dòmi pou fè l' leve. ² Li di m' konsa: -Sa ou wè la a? Mwen reponn li: -Mwen wè yon lanp sèt branch an lò ki kanpe atè. Li gen yon gwo bòl nan tèt li, avèk sèt lanp sou rebò bòl la. Chak lanp gen sèt bòbèch pou sèt mèch. ³ Bò lanp sèt branch lan te gen de pye oliv, yonn sou bò dwat, yonn sou bò gòch. ⁴ Apre sa, mwen pran lapawòl, mwen mande zanj ki t'ap pale avè m' lan: -Mèt, kisa bagay sa yo ye? ⁵ Li reponn mwen: -Ou pa konn sa sa yo ye? Mwen reponn li: -Non, mèt! M' pa konnen non! ⁶ Lè sa a, zanj ki t'ap pale avè m' lan reponn mwen, li di m': -Men mesaj Seyè a voye pou Zowobabèl: Se pa avèk vanyan sòlda ou yo, ni avèk pwòp kouraj ou ou pral rive nan sa ou gen pou fè a. Men se va avèk pouvwa lespri pa m' m'ap ba ou a. Se Seyè ki gen tout pouvwa a menm ki di ⁷ sa. Pi gwo antrav yo pral disparèt devan ou, Zowobabèl! Pi gwo mòn lan ap tounen yon plenn. Ou gen pou ou pran yon bèl wòch ladan l' pou fè lento pòtay tanp lan. Lè sa a tout moun va rele: ⁸ Ala bèl sa bèl! Mèsi pou li! ⁹ Seyè a pale avè m' ankò, li di m': -Zowobabèl mete men nan fondasyon kay la. Li gen pou l' fini l'. Lè sa a, pèp mwen an va konnen se mwen menm, Seyè a, ki ¹⁰ te voye ou bò kote yo. Yo te pran ti konmansman sa yo pou anyen. Men, ala kontan y'a kontan lè y'a wè Zowobabèl ap kontwole travay la, filaplou li nan men l'! Zanj lan di m' ankò: -Lanp sèt branch ou wè la a se sèt je Seyè a ki wè tou sa k'ap pase sou latè. ¹¹ ¶ Mwen mande l': -De pye oliv ki chak bò lanp sèt branch lan, yonn sou bò dwat, yonn sou bò gòch, kisa yo ye? ¹² De branch oliv sou kote de ti tiyo an lò kote lwil ap koule a, kisa yo vle di? ¹³ Li reponn mwen. -Ou pa konnen sa yo vle di? Mwen di l': -Non, mèt. M' pa konnen non! ¹⁴ Li di m' konsa: -Se de moun Bondye chwazi pou fè travay Seyè a, Mèt latè a.

Chapter 5

¹ ¶ Mwen wè yon lòt vizyon ankò, mwen leve je m' gade. Mwen wè yon liv an fòm yon woulo papye k'ap vole nan syèl la. ² Zanj ki t'ap pale avè m' lan di m': -Kisa ou wè? Mwen reponn li: -Mwen wè yon liv an fòm yon woulo k'ap vole nan syèl la. Li gen trant pye longè ak kenz pye lajè. ³ Epi li di m': -Se madichon ki pral tonbe sou tout latè. Dapre sa ki ekri sou yon bò liv la, yo pral fè tout vòlò disparèt nan peyi a. Dapre sa ki ekri sou lòt bò a, moun k'ap fè sèman pou bay manti pral disparèt nan peyi a tou. ⁴ Seyè ki gen tout pouvwa a di konsa se li menm menm ki voye

madichon sa a pou li antre nan kay tout moun k'ap vòlò, ak nan kay tout moun k'ap pran non m' fè sèman pou bay manti. L'a rete nan kay moun sa yo. Tankou dife, l'ap boule tout bwa ak tout wòch kay yo. ⁵ ¶ Zanj ki t'ap pale avè m' lan parèt ankò, li di m' konsa: -Leve je ou. Gade sa k'ap vin koulye a. ⁶ Mwen mande l': -Kisa l' ye? Li reponn mwen: -Se yon panyen. Se peche moun yo ap fè nan tout peyi a ki ladan l'. ⁷ Panyen an te gen yon kouvèti plon. Kouvèti a leve. Mwen wè yon gwo fanm chita anndan panyen an. ⁸ Zanj lan di m' konsa: -Fanm sa a, se mechanste ki non l'! Lèfini, li peze l' antre nan panyen an epi li mete kouvèti plon an sou li. ⁹ Apre sa mwen leve je m' gade, mwen wè de fanm. Yo te gen gwo zèl tankou sigòy. Yo t'ap vole nan syèl la vini. Yo pran panyen an, yo moute avè l'. ¹⁰ Mwen mande zanj ki t'ap pale avè m' lan: -Kote yo prale ak panyen an la a? ¹¹ Li reponn mwen: -Yo pral bati yon tanp pou li nan peyi Babilòn. Y'ap fè yon pye pou li. Lèfini, y'ap mete l' la pou moun adore l'.

Chapter 6

¹ ¶ Mwen fè yon lòt vizyon ankò, mwen leve je m' gade. Mwen wè kat cha lagè ki t'ap soti nan fant de mòn fèt an kwiv. ² Premye cha a te gen chwal wouj ki t'ap rale l'. Dezyèm cha a te gen chwal nwa ki t'ap rale l'. ³ Twazyèm cha a te gen chwal blan ki t'ap rale l'. Katriyèm cha a te gen chwal takte wouj ki t'ap rale l'. ⁴ Mwen pran lapawòl, mwen mande zanj ki t'ap pale avè m' lan: -Sa sa yo ye, mèt? ⁵ Zanj lan reponn mwen: -Se kat van ki fèk soti devan Mèt tout latè a. ⁶ Cha chwal nwa yo t'ap rale a pran direksyon peyi ki sou bò nò a. Cha chwal blan yo t'ap rale a pran menm direksyon an. ⁷ Cha chwal takte wouj yo t'ap rale a pran direksyon peyi ki sou bò sid la. Lè chwal takte wouj yo parèt, yo t'ap pyafe, yo pa t' ka tann ankò pou y' al toupatou sou latè. Zanj lan di yo: -Ale toupatou sou latè! Yo kouri ale toupatou sou latè. ⁸ Lèfini, zanj lan rele m', li di m' konsa: -Chwal ou wè ki pran direksyon peyi ki sou bò nò a fè kòlè Seyè a tonbe. ⁹ ¶ Seyè a pale avè m' ankò. Li di m' konsa: ¹⁰ -W'a pran ofrann moun ki soti nan peyi kote yo te depòte yo a: Eldayi, Tobija ak Jedaya. W'a ale lakay Jozyas, pitit gason Sofoni an, ki fèk rive soti lavil Babilòn. ¹¹ W'a pran ajan ak lò yo te ba ou yo, w'a fè yon kouwòn, w'a mete l' sou tèt Jozye, pitit gason Jozadak la, granprèt la. ¹² Lèfini, w'a pale avè l', w'a di l': Men sa Seyè a di: Men moun yo rele

Boujon an. Li pral pouse kote li ye a. Li pral rebati kay ki apa pou Seyè a. ¹³ Se li menm ki pral rebati kay ki apa pou Seyè a. Yo pral konsidere l' tankou yon wa. Li pral chita sou fòtèy la pou l' gouvènèn pèp mwen an. Va gen yon prèt bò kote l'. Y'a travay ansanm ak kè poze. ¹⁴ Kouwòn lan menm va rete nan kay ki apa pou Seyè a. L'a sèvi pou fè moun toujou chonje Eldayi, Tobija, Jedaja ak Jozyas, pitit gason Sofoni an. ¹⁵ Moun ki rete byen lwen va vini, y'a ede nou rebati tanp Seyè a. Lè sa a, n'a konnen se Seyè ki gen tout pouvwa a ki te voye m' kote nou. Se sa menm ki va rive si nou fè tou sa Seyè a, Bondye nou an, ban nou lòd fè.

Chapter 7

¹ ¶ Katriyèm jou nan nevyèm mwa yo rele mwa Kislev, nan katriyèm lanne rèy wa Dariyis, Seyè a pale ak Zakari. ² Moun lavil Betèl yo te voye Charezè ak Regèm Melèk ansanm ak moun pa yo vin lapriyè nan pye Seyè a. ³ Yo te voye yo vin mande prèt yo ansanm ak pwofèt k'ap sèvi nan tanp Seyè a keksyon sa a: -Pandan senkyèm mwa a, èske se pou nou toujou pran lapenn pou tanp yo te detwi a? Eske se pou nou toujou fè jèn jan nou te konn fè pandan tout lanne anvan yo? ⁴ Lè sa a, Seyè ki gen tout pouvwa a pale avè m', li di m' konsa: ⁵ -Pale ak tout moun ki nan peyi a ansanm ak prèt yo tou. Mande yo pou mwen: Sa fè swasandizan depi n'ap fè jèn, depi n'ap pran lapenn sou chak senkyèm ak setyèm mwa. Eske se pou mwen nou te fè tou sa? ⁶ Konsa tou, lè nou t'ap manje, lè nou t'ap bwè, èske se pa t' pou pwòp plezi pa nou? ⁷ Se menm mesaj sa a Seyè a te voye pwofèt tan lontan yo vin di nou. Lè sa a, lavil Jerizalèm te plen moun, zafè yo t'ap mache byen. Te plen moun ap viv nan ti bouk ki toutotou lavil la, nan zòn Negèv la ak nan plenn sou bò solèy kouche a. ⁸ ¶ Seyè a pale ak Zakari, li di l' konsa: ⁹ -Mwen te pale ak pèp mwen an, mwen te di yo se pou yo rann jistis san patipri. Se pou yo aji ak bon kè yonn ak lòt, se pou yo gen pitye yonn pou lòt. ¹⁰ Pa peze vèv yo, ni timoun san papa yo, ni moun lòt nasyon k'ap viv nan mitan nou, ni moun ki nan nesesite. Pa rete ap kalkile nan tèt nou jan pou nou fè lòt moun mal. ¹¹ Men, yo te derefize koute m'. Yo t'ap fè wondonmon. Yo bouche zòrèy yo pou yo pa tande. ¹² Yo fè kè yo di kou wòch pou yo pa tande lòd ak mesaj mwen menm, Seyè ki gen tout pouvwa a, mwen te voye ba yo. Se Lespri Seyè a menm ki te mete nan bouch pwofèt tan lontan yo mesaj sa yo. Se konsa Seyè ki gen tout pouvwa a te move anpil sou yo. ¹³ Sa ki rive lè sa a? Menm jan yo pa t' koute l' lè li t'ap pale ak yo a, li menm tou, li pa t' reponn yo lè yo te lapriyè nan pye l'. ¹⁴ Li gaye

yo nan mitan yon bann nasyon yo pa t' konnen. Lènmi fin devalize tout peyi a, yo pa kite pesonn ladan l'. Yon bon peyi konsa, yo fè l' tounen yon dezè.

Chapter 8

¹ ¶ Seyè ki gen tout pouvwa a te bay Zakari mesaj sa a: ² -Men sa Seyè ki gen tout pouvwa a di: Mwen sitèlman renmen moun mòn Siyon yo, mwen fè jalouzi anpil pou yo. Mwen fè kòlè sou lènmi yo. ³ Men sa Seyè ki gen tout pouvwa a di ankò: M'ap tounen sou mòn Siyon an. Mwen pral rete nan mitan lavil Jerizalèm. Y'a rele Jerizalèm Lavil kote moun kenbe pye Bondye yo fèm. Y'a rele mòn Seyè ki gen tout pouvwa a Mòn ki apa pou Seyè a. ⁴ Men sa Seyè ki gen tout pouvwa a di ankò: N'a wè vye granmoun, fanm kou gason, vin chita sou plas piblik nan lavil Jerizalèm. Yo chak va gen yon baton nan men yo pou yo ka mache tèlman y'ap vye granmoun. ⁵ Lari yo va plen ti gason ak ti fi k'ap jwe konsa toupatou. ⁶ Men sa Seyè ki gen tout pouvwa a di ankò: Pou ti ponyen moun ki rete koulye a nan peyi a, sa se yon bagay yo di ki pa ka rive. Men, pa pou mwen. Se Seyè a menm ki di sa. ⁷ Men sa Seyè ki gen tout pouvwa a di ankò. Se mwen menm k'ap delivre pèp mwen an, k'ap fè yo soti nan peyi ki sou bò solèy leve a ak nan peyi ki sou bò solèy kouche a. ⁸ M'ap mennen yo tounen pou yo ka rete lavil Jerizalèm ankò. Y'a pou mwen yon pèp ki rele m' pa m'. Mwen menm m'a Bondye yo. M'a kenbe kontra mwen te pase ak yo a. Yo menm, y'a fè sa m'a mande yo fè. ⁹ ¶ Seyè ki gen tout pouvwa a pale, li di konsa: -Pran kouraj, nou menm k'ap tande koulye a nan bouch pwofèt yo menm mesaj Bondye te bay lè yo t'ap mete men nan fondasyon tanp Seyè a pou rebati kay ki apa pou li a. ¹⁰ Paske, anvan jou sa yo, pa t' gen travay ni pou moun ni pou bèt. Pesonn pa t' ka ale vini ak kè poze nan peyi a poutèt lènmi yo. Mwen te fè moun leve yonn kont lòt. ¹¹ Men koulye a, mwen pral ajì yon lòt jan ak ti rès moun ki vivan toujou nan peyi a. Se Seyè ki gen tout pouvwa a ki di sa. ¹² Y'a plante jaden yo ak kè poze. Pye rezen yo va donner, tè a va bay rekòt. Lapli va tonbe sot nan syèl la. M'a bay ti rès moun ki vivan toujou nan pèp la tout benediksyon sa yo. ¹³ Nou menm moun Jida ak moun Izrayèl, menm jan yon lè mwen te fè nou tounen yon madichon nan mitan lòt nasyon yo, konsa tou m'a delivre nou, m'a fè nou tounen benediksyon nan mitan lòt nasyon yo. Nou pa bezwen pè. Pran kouraj! ¹⁴ Men sa Seyè ki gen tout pouvwa a di ankò: -Lè zansèt nou yo te fè m' fache sou yo, mwen te pran desizyon pou m' te pini yo. Mwen pa t' chanje lide. ¹⁵ Konsa tou, koulye a mwen pran desizyon pou m' beni moun lavil Jerizalèm ak moun fanmi Jida yo. Nou pa bezwen pè anyen. ¹⁶ Men sa pou nou fè: Lè n'ap pale

yonn ak lòt, pa bay manti. Nan tribinal, se pou nou rann jistis san patipri pou tout moun ka viv byen
¹⁷ yonn ak lòt. Pa fè plan pou nou aji mal yonn ak lòt. Pa fè sèman, lèfini pou n'ap bay manti pou
akize moun. Paske, tou sa se bagay mwen pa vle wè. Se Seyè a menm ki di sa! ¹⁸ ¶ Seyè ki gen
¹⁹ tout pouvwa a pale ak Zakari ankò, li di l' konsa: -Jèn yo konn fè chak katriyèm mwa, chak
senkyèm mwa, chak setyèm mwa ak chak dizyèm mwa a pral yon plezi, yon kè kontan pou moun
²⁰ Jida yo, yon okazyon pou yo fè fèt. Se pou nou renmen viv byen yonn ak lòt san bay manti. Seyè
ki gen tout pouvwa a di ankò: -Yon lè gen pou rive moun va soti nan gwo lavil lòt peyi yo pou yo
²¹ vini lavil Jerizalèm. Moun va soti nan yon lavil, y'a ale nan yon lòt, y'a di moun ki la yo: Ann
al adore Seyè ki gen tout pouvwa a! Ann al lapriyè nan pye Seyè a pou mande l' benediksyon. Ann
²² ale non! Anpil moun ap soti nan gran peyi, y'ap vini lavil Jerizalèm pou yo adore Seyè ki gen
²³ tout pouvwa a. Y'ap vin lapriyè nan pye l' pou mande l' benediksyon. Wi, men sa Seyè ki gen
tout pouvwa a di ankò: Lè sa a, dis moun ap soti nan lòt peyi kote yo pale lòt lang, y'a kenbe yon
jwif nan rad, y'a di l': Nou vle ale avè ou, paske nou tandè se avèk jwif yo Bondye ye.

Chapter 9

¹ ¶ Men mesaj Seyè a bay pou fè konnen volonte li: Li pran desizyon pou l' pini moun peyi
Adrak yo ansanm ak moun lavil Damas yo. Se pa sèlman branch fanmi Izrayèl yo ki pou Seyè a.
² Tout latè nèt se pou li. Peyi Amat ki sou fwontyè peyi Adrak la pou li tou. Moun lavil Tir ak
³ moun lavil Sidon yo ki gen anpil ladrès, se pou li yo ye tou. Lavil Tir bati gwo miray ranpa ak
⁴ fò. Yo anpile lò ak ajan lakay yo tankou pousyè granchemen. Men, Seyè a pral pran lavil la pou
⁵ li. Li pral voye tout richès li yo nan lanmè. Dife pral boule lavil la nèt. Moun lavil Askalon yo
pral wè sa, yo pral pè. Moun Gaza yo pral tranble kou fèy bwa. Moun lavil Ekwon yo tou, paske
yo p'ap jwenn sa yo t'ap tann lan. Lavil Gaza pral pèdi wa li a. Lavil Askalon pral rete san moun
⁶ ladan l'. Moun san mele yo pral rete lavil Asdòd. M'ap kraze lògèy moun Filisti yo. ⁷ Yo p'ap
manje vyann ak tout san li ladan l' ankò, ni ankenn lòt vye manje yo te konn manje yo. Tout moun
ki va chape anba lanmè va fè pati pèp Bondye a. Y'ap tankou yon branch nan fanmi Jida a. Moun
⁸ Ekwon yo va menm jan ak moun Jebis yo. Mwen pral kanpe tankou gad k'ap fè pòs nan mitan
peyi a pou anpeche lòt lame pase ale vini ladan l'. Mwen p'ap kite gwo chèf vin peze yo ankò.
⁹ Mwen te wè jan pèp mwen an tan soufri. ¶ Nou menm moun ki rete sou mòn Siyon an, fè fèt, fè
gwo fèt! Nou menm moun lavil Jerizalèm, rele, chante tèlman nou kontan! Gade! Men wa nou an

ap vin jwenn nou! Li rann jistis san patipri. Li genyen batay la. Li san lògèy. Li moute yon bourik,
¹⁰ yon ti bourik dèyè manman. Seyè a di: -M'ap wete tout cha lagè ki nan peyi Efrayim. M'ap wete dènnye chwal ki nan lavil Jerizalèm. M'ap kraze dènnye banza yo sèvi pou fè lagè. Wa nou an pral fè tout nasyon yo viv byen yonn ak lòt. M'ap gouvènen depi yon lanmè jouk nan lòt lanmè a, depi
¹¹ larivyè Lefrat jouk nan dènnye bout latè. Seyè a di: -Akòz kontra mwen pase avè nou an, kontra ki siyen ak san bèt yo ofri yo, m'ap fè lage moun ou yo ki te nan prizon, m'ap wete yo nan fon sitèn
¹² san dlo a. ¶ Nou menm prizonnye k'ap tann delivrans yo, tounen, tounen non nan sitadèl kote n'a jwenn pwoteksyon an! Jòdi a, men sa m'ap di nou: n'ap resevwa de fwa plis benediksyon pase
¹³ soufrans mwen te voye sou nou an. Mwen pral sèvi ak moun Jida yo tankou banza pou fè lagè, ak moun Efrayim yo tankou flèch. Mwen pral sèvi ak moun mòn Siyon yo tankou nepe nan men
¹⁴ vanyan sòlda, pou y' al goumen ak moun peyi Lagrès yo. Seyè a pral parèt anlè tèt pèp li a. Li pral voye flèch li yo tankou zèklè. Seyè a, Bondye a, pral kònen twonpèt la. Li pral mache nan van
¹⁵ siklòn k'ap soufle soti nan sid. Seyè ki gen tout pouvwa a pral pwoteje pèp li a. Yo pral kraze zam lènmi yo anba pye yo. Pandan batay la, yo pral rele tankou moun sou. Yo pral fè san lènmi yo
¹⁶ koule. Li pral koule tankou san bèt yo touye sou lotèl yo. Jou sa a, Seyè a, Bondye yo a, va delivre yo. Tankou yon bon gadò, l'ap sove bann mouton l' yo. Yo pral klere nan peyi li a tankou
¹⁷ bèl pyè nan yon kouwòn. Ala bon sa pral bon nan peyi a! Ala bèl peyi a pral bèl! Jenn gason ak jenn fi pral grandi ak tout grenn jaden ak tout diven yo pral rekòlte nan peyi a.

Chapter 10

¹ ¶ Lè sezon prentan rive, mande Seyè a pou l' ban nou lapli. Se Seyè a ki fè loraj gwonde, ki fè gwo lapli tonbe. Li fè jaden tout moun pouse.
² Moun k'ap bat kat yo, se twonpe y'ap twonpe moun. Divinò yo menm, se manti y'ap bay. Rèv yo fè pa vle di anyen. Moun yo mete espwa yo nan bagay ki p'ap janm rive. Moun yo pèdi tèt yo tankou mouton ki pèdi bann. Yo nan traka, paske
³ pa gen chèf pou mennen yo. Seyè a di ankò: -Mwen ankòlè sou moun lòt nasyon k'ap gouvènen pèp mwen an. Mwen pral pini yo. Wi, mwen pral pran swen bann mouton m' yo, moun fanmi Jida
⁴ yo. Mwen pral ba yo fòs kouraj pou yo sèvi m' tankou chwal frengan pou fè lagè. M'ap fè anpil ladan yo tounen chèf, kòmandan lame ak sòlda ki gen ladrès pou goumen. Se nan pèp la menm
⁵ m'ap fè chèf ki pou gouvènen yo soti. ¶ Moun pèp Jida yo pral genyen batay la, y'ap tankou sòlda k'ap foule lènmi anba pye yo nan labou nan granchemen. Yo pral goumen, paske Seyè a la avèk

yo. Tout lènmi ki sou chwal yo pral wont.⁶ Mwen pral bay moun fanmi Jida yo fòs. Mwen pral delivre moun fanmi Jozèf yo. M'ap fè yo tounen lakay yo paske kè m' fè m' mal pou yo. Se va tankou si m' pa t' janm lage yo. Se Seyè a, Bondye yo a, mwen ye. M'ap tande lapriyè yo fè nan pye m'.⁷ Moun Efrayim yo pral tankou vanyan sòlda. Y'ap kontan tankou moun ki anba gwòg. Pitit pitit yo va chonje sa, y'a fè fèt. Y'a kontan pou sa Seyè a te fè pou yo.⁸ Mwen pral rele yo pou m' fè yo sanble paske mwen delivre yo. Yo pral vin peple anpil ankò, jan yo te ye anvan an.⁹ M'ap gaye yo nan mitan lòt nasyon yo. Men, y'a toujou chonje m', menm lè yo nan peyi byen lwen. Y'a viv la ansanm ak pitit yo. Yon jou, y'a tounen nan peyi yo a.¹⁰ M'ap fè yo soti kite peyi Lejip tounen lakay yo. M'ap ranmase yo nan peyi Lasiri. Y'ap tounen vin rete nan peyi Galarad ak nan peyi Liban. Peyi a pral twò piti pou yo.¹¹ Lè pou yo janbe lanmè peyi Lejip la, mwen menm, Seyè a, m'a frape dlo lanmè a. Epi tout kote larivyè Nil ap koule yo pral chèch. Mwen pral kraze lògèy peyi Lasiri a. Peyi Lejip pral pèdi pouvwa li.¹² Mwen pral bay pèp mwen fòs kouraj ankò. Y'a sèvi m', y'a fè lwanj mwen. Se Seyè a menm ki di sa!

Chapter 11

¹ ¶ Ou menm peyi Liban, louvri pòtay ou yo pou dife ka boule tout pye sèd ou yo.² Nou menm, pye sikren yo, plenn sò nou! Paske pye sèd la tonbe. Gwo pyebwa yo fini! Nou menm, pye bwadchenn peyi Bazan yo, rele, plenn sò nou! Paske gwo rak plen bwa a kraze!³ Kote ou pase, ou tande chèf yo ap plenn! Yo fini, yo pèdi pouvwa a yo. Kote ou pase, ou tande jenn ti lyon yo ap plenn! Yo koupe tout bèl rakbwa ki sou bò larivyè Jouden yo.⁴ ¶ Seyè a, Bondye mwen an, di m' konsa:⁵ -Ou pral swen mouton y'ap pare pou labatwa. Moun k'ap achte yo a ap touye yo. Pesonn pa ka mande yo kont. Moun k'ap vann yo menm ap di: Lwanj pou Bondye! Gade jan nou rich non! Ata gadò mouton yo pa gen pitye pou yo.⁶ (Seyè a di: Mwen p'ap gen pitye pou moun ki rete nan peyi a. Se mwen menm ki pral lage yo nan men pwòp chèf yo ak pwòp wa yo ankò. Chèf yo pral fini ak peyi a. Mwen p'ap fè anyen pou m' wete yo anba men yo.)⁷ Se konsa, moun k'ap fè trafik mouton yo peye m' pou m' swen mouton y'ap pare pou labatwa yo pou yo. Mwen pran de baton. Mwen rele yonn Favè, mwen rele lòt la Tèt ansanm. Epi mwen tanmen pran swen mouton yo.⁸ Gadò yo ban m' degoutans. Nan yon mwa, mwen te chanje twa gadò yonn apre lòt. Yo menm tou,⁹ yo pa t' vle wè m'. Lè sa a, mwen di pèp la: -Mwen p'ap swen nou ankò. Sa ki pou mouri mèt

mouri! Sa ki pou disparèt mèt disparèt! Sa ki rete yo menm, yonn mèt manje lòt. ¹⁰ Lèfini, mwen pran baton Favè a, mwen kase l' de bout. Ki vle di, mwen kase kontra mwen menm, Seyè a, mwen te pase ak tout nasyon yo. ¹¹ Jou sa a, kontra a te kase. Moun k'ap fè trafik mouton yo te rete la ap gade m'. Yo vin konprann sa m' te fè a. Yo rekonèt se yon mesaj Seyè a t'ap ba yo. ¹² Mwen di yo: -Si nou vle peye m', nou mèt peye m'. Si nou pa vle tou, sa pa fè anyen. Y'a l' pran lajan an, yo peye m' trant pyès an ajan pou sa m' te fè a. ¹³ Men, Seyè a di m' konsa: -Al bay lajan an pou yo mete l' nan kès tanp lan. Konsa, mwen pran trant pyès an ajan yo, bèl pri yo te wè pou yo te ban m' pou travay mwen te fè a, mwen mete yo nan kès tanp lan. ¹⁴ Apre sa, mwen kase dezyèm baton m' lan, sa mwen te rele Tèt Ansanm lan, pou fè konnen pa gen tèt ansanm ankò ant moun Jida yo ak moun Izrayèl yo. ¹⁵ ¶ Apre sa, Seyè a di m': -Pran pòz gadò ou ankò. Men, fwa sa a, yon gadò ki pa vo anyen. ¹⁶ Paske mwen pral mete yon gadò pou okipe bann mouton m' yo. Men, lè yon mouton pèdi, se pa pou li sa. Si yonn egare, li pa pral chache l'. Si yonn blese, li p'ap fè anyen pou geri l'. Si yonn bouke, li p'ap fè anyen pou soutni l'. Okontrè, l'ap manje sa ki pi gra yo, l'ap fann zago tout lòt yo. ¹⁷ Madichon pou move gadò a! Li kouri kite mouton yo pou kont yo. Se pou lagè fini ak pouvwa l' la. Se pou bra l' vin pòk, se pou li pa wè nan je dwat li.

Chapter 12

¹ ¶ Men mesaj Seyè a bay pou fè konnen volonte l' sou moun pèp Izrayèl yo. Men desizyon li pran, li menm Seyè a, ki louvri syèl la nan plas li, ki kreye latè a epi ki bay moun lavi. ² Mwen pral fè lavil Jerizalèm fè moun lòt nasyon ki bò kote l' yo pèdi tèt yo, tankou moun ki sou. Lè y'a sènen lavil Jerizalèm, yo pral sènen lavil ki nan rès peyi Jida yo tou. ³ Lè sa a, m'ap fè lavil Jerizalèm tounen yon gwo wòch lou kou pwa senkant. Tout nasyon ki va chache leve l' va foule anba l'. Tout moun sou latè pral mete ansanm pou yo atake l'. ⁴ Jou sa a atò, m'ap fè tout chwal yo lonbraje, m'ap fè kavalye yo depale. Se mwen menm Seyè a ki di sa. M'ap veye pèp Jida a pou anyen pa rive yo. Men, m'ap fè tout chwal lènmi l' yo vin avèg. ⁵ Lè sa a, moun fanmi Jida yo va di nan kè yo se Seyè ki gen tout pouvwa a, Bondye yo a, ki tout fòs moun ki rete lavil Jerizalèm yo. ⁶ Lè sa a, m'ap fè moun fanmi Jida yo tounen tankou yon boukan dife nan mitan yon rakbwa, osinon y'ap tankou bwa chandèl limen nan mitan pay chèch. L'ap devore tout peyi ki toupre l' yo, sou bò gòch ak sou bò dwat. Men, moun lavil Jerizalèm yo ap rete nan plas yo. ⁷ Premye moun Seyè a ap delivre, se va moun Jida yo. Konsa, lwanj y'a fè pou pitit pitit David yo ak pou pèp Jerizalèm lan p'ap pi gwo

⁸
 pase lwanj y'ap fè pou rès moun Jida yo. Lè sa a, Seyè a va louvri zèl li pou l' pwoteje tout moun
 ki rete lavil Jerizalèm yo. Wi, lè sa a, menm pi fèb la ap gen fòs tankou David. Pitit pitit David yo
⁹
 va alatèt pou dirije yo tankou Bondye, tankou zanj Seyè a. ¶ Lè sa a, m'a detwi tout nasyon ki va
¹⁰
 konprann pou yo atake lavil Jerizalèm. M'a fè pitit pitit David yo ak moun lavil Jerizalèm yo
 gen bon kè. M'a fè yo konn lapriyè nan pye m'. Y'a leve je yo gade m', y'a wè moun yo te pèse a.
 Y'a nan gwo lapenn pou li tankou moun ki pèdi sèl pitit li te genyen an. Y'a pete rele tankou moun
¹¹
 ki pèdi premye pitit gason yo. Lè sa a, rèl ap pete lavil Jerizalèm tankou lè rèl te pete pou
¹²
 Adad-Rimòn nan plenn Megidon an. Nan peyi a, chak fanmi va mete tèt yo ansanm pou yo rele
 pou kont yo, gason nan fanmi David yo yon bò, medam yo yon lòt bò, gason nan fanmi Natan yo
¹³
 yon bò, medam yo yon lòt bò, gason nan fanmi Levi yo yon bò, medam yo yon lòt bò, gason
¹⁴
 nan fanmi Chimèy yo yon bò, medam yo yon lòt bò. Tout rès fanmi yo va kenbe rèl la tou, gason
 yo yon bò, medam yo yon lòt bò, chak fanmi bò pa yo.

Chapter 13

¹
 ¶ Lè sa a, yon sous dlo va pete pou lave moun fanmi David yo ak moun ki rete lavil Jerizalèm
 yo pou wete peche yo, pou mete yo nan kondisyon pou yo sèvi Bondye ankò. Se Seyè a menm ki
²
 di sa. Seyè a pale, li di ankò: -Lè sa a, m'a disparèt ata non zidòl yo nan peyi a. Pesonn p'ap chonje
³
 yo ankò. M'a wete pwofèt yo nan peyi a, m'a wete nan kè tout moun lide pou yo sèvi zidòl. Konsa,
 si yon moun vle pou l' bay mesaj ki soti nan Bondye, papa l' ak manman l' ki fè l' va di se pou l'
 mouri, paske li pran pòz se mesaj ki soti nan Bondye, Seyè a, l'ap bay, epi se pa vre, se manti l'ap
⁴
 bay. Pandan l'ap bay mesaj la, papa l' ak manman l' ki fè l' la va pèse l'. Lè sa a, pwofèt yo pral
 wont lè y'a fè yon vizyon. Yo p'ap mete rad fèt ak twal yo te konn gen sou yo. Yo p'ap ka bay manti
⁵
 ankò. Men, tout moun va di: Se pa pwofèt mwen ye. Mwen se yon senp abitan. Depi m' piti se
⁶
 latè m'ap travay. Si yon moun mande l': Pouki tout mak blese sa yo sou ponyèt ou? L'a reponn:
⁷
 Se kay yon zanmi sa rive m'. ¶ Seyè ki gen tout pouvwa a pale, li di ankò: -Nepe, leve non! Al
 atake gadò mouton m' yo, moun k'ap travay avè m' lan. Touye l' pou bann mouton an ka gaye. M'ap
⁸
 pini ata moun ki pi piti yo. Nan tout peyi a, sou chak twa moun, de pral mouri, yonn va rete.
⁹
 Mwen pral pase rès moun sa yo nan dife. Mwen pral netwaye yo menm jan yo netwaye ajan nan
 dife. Mwen pral wè ki kalite moun yo ye menm jan yo pase lò nan dife pou wè si li bon. Y'a lapriyè

nan pye m', m'a reponn yo. M'a di yo se pèp pa m' yo ye. Y'a di se mwen menm, Seyè a, ki Bondye yo.

Chapter 14

¹ ¶ Gade! Men jou jijman Seyè a ap rive! Jou sa a, yo pral piye lavil Jerizalèm. Yo pral separe
 tou sa yo pran ladan li la devan je nou. ² Seyè a pral sanble tout nasyon yo pou y' al fè lagè ak lavil
 Jerizalèm. Y'ap pran lavil la, y'ap piye tout kay yo, y'ap fè kadejak sou medam yo. Yo pral depòte
 mwatye nan moun yo. Men, rès pèp la ap rete nan lavil la. ³ Lèfini, Seyè a pral parèt pou li al
 goumen ak nasyon yo, jan li te konn goumen nan tan lontan an. ⁴ Lè sa a, l'a desann kanpe sou
 mòn pye oliv yo, ki anfas lavil Jerizalèm, sou bò solèy leve. Mòn lan va fann de bò nèt ale, l'a fè
 yon fon nan mitan ki soti bò solèy leve desann bò solèy kouche: mwatye nan mòn lan va fè bò nò,
 lòt mwatye a va fè bò sid. ⁵ N'a lonje fon an pou nou kouri chape kò nou jouk n'a rive lòt bò mòn
 Atsèl. N'a kouri met deyò menm jan zansèt nou yo te fè l' la lè tranblemanntè a te pase sou rèy
 Ozyas, wa peyi Jida a. Seyè a, Bondye nou an, va vini, l'ap mennen tout moun pa l' yo avè l'. ⁶ Lè
 jou sa a va rive, p'ap gen limyè, p'ap fè fredri, dlo p'ap fè glas. ⁷ Se va yon jou ki p'ap tankou lòt
 jou yo. Ap fè klè nèt. p'ap gen lannwit ankò. Se Seyè a sèl ki konnen lè sa va rive. ⁸ ¶ Lè jou sa a
 va rive, bèl dlo dous pral koule soti lavil Jerizalèm. Mwatye nan dlo a ap fè yon branch larivyè
 desann bò solèy leve, tonbe nan lanmè Mouri a. Lòt mwatye a ap desann bò solèy kouche, tonbe
 nan lanmè Meditèrane a. Dlo a ap koule san rete, nan sezon fredri kou nan sezon chalè. ⁹ Lè sa a,
 se Seyè a ki pral sèl wa sou tout latè. Lè sa a, se li ki pral sèl Bondye pou tout moun. Se li menm
 ase tout moun ap konnen. ¹⁰ Tout peyi a pral tounen yon gwo plenn plat, depi Geba nan nò rive
 Rimon nan sid, ak Jerizalèm nan mitan. Sèl lavil Jerizalèm pral rete byen wo. L'ap soti depi Pòtay
 Benjamen an rive nan pòtay Kwen an, kote premye pòtay la te ye a, depi Fò Annanyèl rive nan
 moulen rezen wa a. ¹¹ Moun va rete la nan lavil la, malè p'ap tonbe sou yo. Y'a viv ak kè poze lavil
 Jerizalèm. ¹² Seyè a pral voye yon gwo maladi sou tout nasyon ki te fè lagè ak Jerizalèm. Y'ap
 rete kanpe sou de pye yo, epi tout vyann kò yo ap pouri. Grenn je yo pral pouri nan tèt yo, lang yo
 ap pouri nan bouch yo. ¹³ Jou sa a, Seyè a pral fè yo pèdi tèt yo pran kouri. Yo pral tonbe yonn
 sou lòt, yonn pral touye lòt. ¹⁴ Sòlda peyi Jida yo pral goumen tou pou defann lavil Jerizalèm, yo
 pral ranmase dènye richès moun lòt nasyon ki sou fwontyè yo: lò, ajan ak rad an kantite. ¹⁵ Menm

maladi a pral tonbe tou sou chwal, milèt, chamo, bourik, sou tout bèt ki te nan kan lènmi yo. ¶¹⁶
 Nan moun lòt nasyon ki t'ap fè lagè ak lavil Jerizalèm yo, genyen ki va chape, ki p'ap mouri. Moun sa yo va moute chak lanne lavil Jerizalèm pou yo adore Seyè ki gen tout pouvwa a, Wa a. Y'a fete fèt Tant yo.¹⁷ Si yon nasyon va derefize moute lavil Jerizalèm pou yo adore Seyè ki gen tout pouvwa a, Wa a, yon ti degout lapli p'ap tonbe nan peyi yo a menm.¹⁸ Si moun peyi Lejip yo derefize moute al fete fèt la, menm maladi Seyè a te voye sou moun ki derefize moute yo va tonbe sou yo tou.¹⁹ Se chatiman sa a ki pral tonbe sou peyi Lejip ansanm ak tout lòt nasyon ki va derefize moute pou fete fèt Tant yo.²⁰ Lè jou sa a va rive, y'a make sou ti klòch ki nan lekipay chwal yo: Apa pou Seyè a! Batri koujen ki nan tanp Seyè a va tankou ti bòl ki devan lotèl yo: yo va apa nèt pou Seyè a.²¹ Y'a mete tout mamit ak tout chodyè moun yo ap sèvi lavil Jerizalèm ak nan tout peyi Jida a apa pou sèvis Seyè ki gen tout pouvwa a. Konsa, tout moun ki vle ofri yon bèt pou yo touye pou Seyè a va vin pran yonn pou yo bouyi vyann bèt yo ofri a. Lè jou sa a va rive, p'ap gen moun k'ap vann ankò nan tanp Seyè ki gen tout pouvwa a.

Malachi

Chapter 1

¹ ¶ Men mesaj Seyè a te bay Malachi pou fè pèp Izrayèl la konnen volonte li. Men desizyon Seyè a:² Seyè a di: Mwen renmen nou! Men, pèp la reponn: Ki jan ou renmen nou an? Men sa Seyè a reponn yo: Ezaou ak Jakòb, apa de frè yo ye. Mwen renmen Jakòb ak tout pitit pitit li yo.³ Men, mwen rayi Ezaou ak tout pitit pitit li yo. Mwen ravaje tout mòn peyi Ezaou a. Mwen fè peyi yo a tounen savann kote bèt nan bwa rete.⁴ Si moun peyi Edon yo di: Yo detwi lavil nou yo, men n'ap rebati yo, Seyè a menm ap reponn yo: Nou mèt rebati yo, m'ap toujou kraze yo. Moun pral rele yo: Peyi mechan yo, nasyon ki fè Seyè a ankòlè tout tan an.⁵ Moun Izrayèl yo pral wè sa ak pwòp je yo. Epi y'a di: Seyè a gen pouvwa menm andeyò peyi Izrayèl la. ¶ Seyè ki gen tout pouvwa a ap pale ak nou koulye a, nou menm prèt yo ki pa respekte l'. Li di nou konsa: Yon pitit fèt pou l' respekte papa l'. Yon domestik fèt pou l' gen krentif pou mèt li. Mwen se papa nou. Poukisa nou pa respekte m'? Mwen se mèt nou. Poukisa nou pa gen krentif pou mwen? Epi nou gen kouraj pou nou di: Ki jan nou derespekte ou la?⁷ Men ki jan: nou pran manje ki pa bon pou fè sèvis pou mwen, nou ofri l' sou lotèl la ban mwen. Epi n'ap di: nou pa wè ki jan nou derespekte ou la a? Mwen

menm, mwen di nou se lè nou di lotèl Seyè a pa merite yo respekte l'.⁸ Lè nou mennen yon bèt je pete pou yo touye pou mwen, atò, sa se pa bagay ki mal? Lè nou mennen yon bèt k'ap mache bwete, yon bèt tou malad, sa se pa bagay ki mal? Seye pote yon bèt konsa bay yon gwo chèf non! Eske l'ap kontan? Eske la ba ou yon favè?⁹ Koulye a, nou menm prèt yo, lapriyè nan pye Bondye pou l' gen pitye pou nou non! Eske la ban nou favè l'? Se nou menm ki va lakòz li pa fè sa pou nou!¹⁰

Seyè ki gen tout pouvwa a pale, li di: Mwen ta swete yonn nan nou ta fèmen tout pòt tanp lan pou nou pa limen dife pou gremesi sou lotèl mwen an. Mwen pa kontan menm ak nou. Se Seyè ki gen tout pouvwa a ki di sa. Mwen p'ap asepte ankenn ofrann nan men nou.¹¹ Toupatou sou latè, depi sou solèy leve jouk sou solèy kouche, moun lòt nasyon yo ap di jan mwen gen pouvwa. Toupatou y'ap boule lansan pou mwen, y'ap ofri m' bagay ki bon pou sèvis mwen. Paske moun toupatou respekte m'.¹² Se Seyè ki gen tout pouvwa a ki di sa. Men, nou menm, nou pa respekte lotèl mwen lè nou di: Lotèl Seyè a pa bon ankò. Se vye manje n'ap ofri sou li.¹³ Lèfini, n'ap plede di: Nou bouke ak tout bagay sa yo. Nou pa pran ka m' ankò. Se Seyè ki gen tout pouvwa a ki di sa. Nou pran bèt nou vòlò, bèt enfim, osinon bèt malad, nou vin ofri ban mwen. Seyè a mande nou:¹⁴

Nou kwè mwen ka asepte bagay konsa nan men nou? Se Seyè a ki mande nou sa. Madichon pou moun k'ap twonpe m' yo. Yo vin ofri bèt ki pa bon pou yo touye pou mwen epi yo kite bon ti mal yo te pwomèt y'ap ban mwen an nan bann mouton yo. Paske, se yon wa ki gen anpil pouvwa mwen ye. Moun tout nasyon va respekte m'. Se Seyè ki gen tout pouvwa a ki di sa.

Chapter 2

¹ ¶ Koulye a, men lòd mwen bay prèt yo:² Si nou pa koute sa m'ap di nou la a, si nou pa soti pou nou sèvi yon lwanj pou mwen, m'ap voye madichon sou nou. Se Seyè ki gen tout pouvwa a k'ap pale konsa wi. M'ap madichonnen tout bon bagay k'ap vin pou nou yo. Wi, mwen madichonnen yo deja, paske nou pa soti pou nou sèvi yon lwanj pou mwen.³ Mwen pral touye pitit nou yo. Mwen pral voye salte, tripay bèt nou ofri yo nan figi nou. Lèfini, m'ap voye nou jete ansanm ak yo.⁴ Lè sa a, n'a konnen se mwen menm ki te ban nou lòd sa a, pou kontra mwen te pase ak fanmi Levi a ka toujou la. Se Seyè ki gen tout pouvwa a ki di sa.⁵ Nan kontra mwen te pase ak yo a, mwen te pwomèt mwen t'ap ba yo lavi ak kè poze. E mwen te ba yo l'. Yo menm, se pou yo te gen krentif pou mwen. Yo te gen krentif pou mwen vre, yo te respekte m'.⁶ Se verite ase ki te soti nan bouch yo. Yo pa t' janm chache twonpe m'. Yo toujou mache avè m' ak kè poze. Yo t'ap fè sa ki dwat. Yo te fè anpil moun sispann fè sa ki mal.⁷ Se devwa prèt yo pou yo moutre moun sa Bondye

ye. Moun al kote yo pou yo ka konnen sa Bondye mande yo fè. Paske se mesaje Seyè ki gen tout
⁸
pouvwa a yo ye. Men, nou menm prèt yo, nou kite chemen Bondye a. Nou lakòz anpil moun pa
kenbe kòmandman mwen bay yo. Se Seyè ki gen tout pouvwa a ki di sa. Nou pa kenbe kontra
⁹
mwen te fè ak moun fanmi Levi yo. Se poutèt sa m'ap fè tout moun pèp Izrayèl yo derespekte
nou. Y'ap pran nou pou vakabon, paske nou pa fè sa mwen mande nou fè. Nou gade sou figi moun
¹⁰
lè pou n' di yo sa lalwa a mande. ¶ Eske se pa yon sèl papa a nou tout nou genyen? Eske se pa
yon sèl Bondye ki fè nou tou? Poukisa atò nou pa kenbe pwomès nou yonn ak lòt? Poukisa nou
¹¹
meprize kontra Bondye te fè ak zansèt nou yo? Moun Jida yo trayi Bondye. Yo fè yon move
bagay ki lèd anpil nan peyi Izrayèl la ak nan lavil Jerizalèm. Yo derespekte kay Bondye renmen
¹²
anpil la. Mesye yo marye ak fanm k'ap sèvi lòt bondye. Tout moun ki fè bagay sa a, se pou Seyè
a pa kite yo jwenn yon moun nan fanmi Jakòb la pou kanpe pou yo osinon pou fè ofrann bay Seyè
¹³
ki gen tout pouvwa a pou yo. Men yon lòt bagay nou fè ankò: N'ap benyen lotèl Seyè a ak dlo
ki sot nan je nou. N'ap kriye, n'ap plenyen paske Seyè a pa menm gade ofrann nou fè l' yo, li derefize
¹⁴
asepte anyen nan men nou. Epi n'ap mande poukisa? Se paske Seyè a wè sa ou fè madanm ou
te marye lè ou te jenn lan. Ou pa kenbe pwomès ou te fè l' la. Ou te pase kontra avè l', ou te pwomèt
¹⁵
Bondye ou t'ap kenbe l' pou madanm ou pou tout tan. Eske Bondye pa t' fè nou tounen yon sèl
kò ak yon sèl nanm? Poukisa li te fè sa? Se pou nou te ka fè pitit ki pou sèvi l'. Konsa, fè respè tèt
¹⁶
nou! Respekte pwomès nou te fè madanm nou te marye lè nou te jenn lan. Mwen rayi wè lè
mouche separe ak madanm. Se Seyè ki gen tout pouvwa a, Bondye pèp Izrayèl la, ki di sa. Mwen
rayi wè moun k'ap aji mal konsa ak madanm yo. Se poutèt sa, fè respè tèt nou! Kenbe pwomès nou
¹⁷
te fè madanm nou. N'ap fatigue tèt Seyè a ak yon bann pawòl. Epi n'ap di: Ki jan n'ap fatigue l'
la? Se lè n'ap plede di: Tout moun ki fè sa ki mal yo bon nan je Seyè a. Li kontan ak yo. Ou ankò
lè n'ap mande: Kote Bondye k'ap rann jistis la?

Chapter 3

¹
¶ Seyè a pale, li di konsa: -Men m'ap voye mesaje mwen devan pou l' pare yon chemen pou
mwen. N'ap rete konsa, n'ap wè Seyè n'ap plede chache a ap vini nan tanp li a. Mesaje nou te anvi
²
wè a, men l'ap vini pou l' fè tout moun konnen kontra a. Men, ki moun ki ka sipòte jou l'ap vini
an? Ki moun ki va rete kanpe devan l' lè la parèt la? L'ap tankou dife yo sèvi pou fonn fè. L'ap
³
tankou gwo savon yo sèvi pou blanchi rad. La vini tankou moun k'ap fonn fè pou wete kras ki
ladan l'. L'ap netwaye pitit pitit Levi yo, l'ap wete tou sa ki pa bon nan yo tankou yo netwaye lò ak

⁴
 ajan, pou yo ka nan kondisyon ankò pou yo prezante ofrann bay Bondye jan yo dwe fè l' la. Lè sa a, ofrann moun peyi Jida yo ak ofrann moun lavil Jerizalèm yo va fè Seyè a plezi, jan sa te konn

⁵
 ye nan tan lontan, depi nan konmansman. Seyè ki gen tout pouvwa a di ankò: -m'a vin jwenn nou pou rann jistis. Parèt mwen parèt, m'ap denonse moun k'ap fè maji, moun k'ap fè adiltè, moun k'ap fè sèman pou twonpe moun, moun k'ap kenbe nan lajan moun k'ap travay pou yo, moun k'ap peze fanm ki pèdi mari yo ak timoun ki pèdi papa yo, moun k'ap pwofite sou moun lòt nasyon, moun ki

⁶
 pa genyen m' krentif. Mwen se Seyè a, mwen p'ap chanje. Se poutèt sa nou menm, pitit pitit Jakòb

⁷
 yo, nou pa disparèt nèt. ¶ Depi sou tan zansèt nou yo nou pa okipe sa m' te ban nou lòd fè. Nou pa swiv yo. Tounen vin jwenn mwen. Mwen menm, m'a tounen vin jwenn nou tou. Se Seyè ki gen tout pouvwa a menm ki di sa. N'ap mande m' sa pou nou fè pou nou tounen vin jwenn mwen?

⁸
 Mwen menm m'ap mande nou: Eske yon moun ka twonpe Bondye? Non. Men, se twonpe n'ap twonpe m'. N'ap mande ki jan n'ap twonpe m' lan. M'ap reponn nou: Nan keksyon ladim ak lòt

⁹
 bagay nou fèt pou nou ofri m' yo. Gen yon madichon ki gen pou tonbe sou nou tout, paske tout

¹⁰
 moun nan peyi a ap twonpe m'. Pote tout ladim lan nèt nan tanp lan, san wete anyen ladan l', pou ka gen manje nan tanp lan. Se pou nou fè sa pou nou wè si mwen p'ap kenbe pawòl mwen vre. n'a wè si mwen p'ap louvri syèl la fè lapli tonbe, si mwen p'ap vide benediksyon sou nou an kantite.

¹¹
 Mwen p'ap kite chini vini pou detwi rekòt jaden nou ankò, ni pou anpeche pye rezen nou yo

¹²
 donner. Se Seyè ki gen tout pouvwa a menm ki di sa. Lè sa a, moun toupatou sou latè va rekonèt jan Bondye beni nou, paske sa pral bon nèt pou moun k'ap viv nan peyi nou an. Se Seyè ki gen tout

¹³
 pouvwa a ki di sa. ¶ Seyè a di ankò: -Nou te pale m' mal. Men nou reponn: Kisa nou di sou ou

¹⁴
 konsa? Nou te di: Sa pa sèvi anyen pou yon moun sèvi Bondye. Sa sa ap rapòte yon moun pou

¹⁵
 li fè sa Seyè a mande, pou li fè Seyè a wè li gen lapenn pou sa li fè ki mal? Koulye a, nou tou wè se awogan yo k'ap viv ak kè kontan. Moun k'ap fè mal yo, se yo ki wè zafè yo ap mache. Yo

¹⁶
 sonde Bondye pou wè kote li ye ak yo epi anyen pa rive yo. Men koze ki te nan bouch moun ki gen krentif pou Bondye yo. Tansèlman, Seyè a t'ap swiv yo, li tandè tou sa yo t'ap di. Li pran yon

¹⁷
 liv, li fè ekri non tout moun ki gen krentif pou li epi ki respekte l'. Seyè a di konsa: Y'ap yon pèp apa pou mwen. Jou m'a deside pou m' aji a, se moun pa m' nèt y'ap ye. m'a gen pitye pou yo,

¹⁸
 menm jan yon papa gen pitye pou pitit gason l' k'ap sèvi l'. Lè sa a ankò, n'a wè diferans ant moun k'ap mache dwat ak moun k'ap fè sa ki mal, ant moun k'ap sèvi Bondye ak moun ki p'ap sèvi l'.

Chapter 4

¹
 ¶ Gade! Jou a ap vini: Pral fè cho anpil tankou nan yon fou. Tout awogan yo ansanm ak tout mechan yo pral boule tankou pay chèch. Se Seyè a menm ki di sa. Wi, jou sa a, y'ap boule nèt san kite tras. ²
 Men, pou moun k'ap sèvi m' yo, pouvwa mwen ki la pou delivre yo a ap leve tankou yon bèl solèy byen klere. Yo pral sote ponpe tankou jenn ti towo gra ki lage nan savann. ³
 Nou pral pilonnen mechan yo, yo pral tankou sann dife anba pye nou, jou m'a deside pou m' aji a. Se Seyè ki gen tout pouvwa a ki di sa. ⁴
 ¶ Pa bliye sa Moyiz, sèvitè m' lan, te moutre nou, tout lòd ak tout regleman mwen te ba li sou mòn Orèb la pou tout pèp Izrayèl la. ⁵
 Jou m' lan pral yon gwo jou, yon jou ki pral fè moun tranble. Men, anvan li rive, mwen gen pou m' voye pwofèt Eli. ⁶
 Li gen pou l' fè papa byen ankò ak pitit, pitit vin byen ankò ak papa. Si se pa sa, m'ap vini, m'ap detwi peyi nou an nèt ale.

New Testament

Matthew

Chapter 1

¹ ¶ Men non zansèt Jezikri ki te pitit pitit David, pitit pitit Abraram. ² Abraram te papa Izarak; Izarak te papa Jakòb; Jakòb te papa Jida ak lòt frè l' yo. ³ Jida menm te papa Perèz ak Zara. Se Tama ki te manman yo. Perèz te papa Eswòm; Eswòm te papa Aram. ⁴ Aram te papa Amenadab; Amenadab te papa Naason; Naason te papa Salmon. ⁵ Salmon te papa Boaz. Se Raab ki te manman Boaz. Boaz te papa Obèd. Se Rit ki te manman Obèd. ⁶ Obèd te papa Izayi, Izayi te papa wa David. David te papa Salomon. Se Madan Ouri ki te manman Salomon. ⁷ Salomon te papa Woboram; Woboram te papa Abya; Abya te papa Asa. ⁸ Asa te papa Jozafa; Jozafa te papa Joram; Joram te papa Ozyas; ⁹ Ozyas te papa Joatam; Joatam te papa Akaz; Akaz te papa Ezekyas; ¹⁰ Ezekyas te papa Manase; Manase te papa Amon; Amon te papa Jozyas; ¹¹ Jozyas te papa Jekonyas ak lòt frè l' yo. Se lè sa a yo te depòte moun pèp Izrayèl yo, yo mennen yo ale lavil Babilòn. ¹² Apre yo te fin mennen yo ale lavil Babilòn, Jekonyas te fè Salatyèl. Salatyèl te papa Zowobabèl; ¹³ Zowobabèl te papa Abiyoud; Abiyoud te papa Elyakim; Elyakim te papa Azò; ¹⁴ Azò te papa Sadòk; Sadòk te papa Akim; Akim te papa Eliyoud; ¹⁵ Eliyoud te papa Eleaza; Eleaza te papa Matan; Matan te papa Jakòb; ¹⁶ Jakòb te papa Jozèf. Se Jozèf sa a ki te marye ak Mari, manman Jezi yo rele Kris la. ¹⁷ Konsa, pran depi Abraram jouk nou rive sou David, te gen antou katòz jenerasyon papa ak pitit. Pran depi David jouk nou rive lè yo te depòte pèp Izrayèl la ale lavil Babilòn, te gen antou katòz jenerasyon papa ak pitit. Pran depi lè yo te depòte pèp la jouk nou rive sou Kris la, te gen katòz jenerasyon papa ak pitit tou. ¹⁸ ¶ Men ki jan Jezikri te fèt. Mari, manman Jezi, te fyanse avèk Jozèf. Anvan menm yo te antre nan kay ansanm, Mari vin twouve l' ansent pa pouvwa Sentespri. ¹⁹ Jozèf, fyanse l' la, te yon nonm debyen. Li pa t' vle fè eskandal ak sa. Li te vle kase fiyansaj la san bri san kont. ²⁰ Li t'ap kalkile sou jan li tapral fè sa lè li wè yon zanj Bondye parèt devan li

nan dòmi. Zanj lan di li: Jozèf, pitit pitit David, ou pa bezwen pè pran Mari pou madanm ou. Paske,
 pitit l'ap pote a se travay Sentespri. ²¹ Li pral fè yon pitit gason. Wa rele l' Jezi. Se li menm ki pral
 delivre pèp li a anba peche l' yo. ²² Tou sa pase konsa pou pawòl Bondye te mete nan bouch pwofèt
 la te ka rive vre. Men sa l' te di: ²³ Men li, jenn fi a pral ansent, li pral fè yon pitit gason. y'a rele
 l' Emannwèl. (Non sa a vle di: Bondye avèk nou.) ²⁴ Lè Jozèf leve nan dòmi an, li fè tou sa zanj
 Bondye a te di l' fè: li pran madanm li lakay li. ²⁵ Men, Jozèf pa t' kouche ak Mari, jouk lè li te fin
 akouche yon ti gason. Jozèf te rele pitit la Jezi.

Chapter 2

¹ ¶ Jezi te fèt lavil Betleyèm nan peyi Jide, sou tan wa Ewòd. Apre li te fèt, kèk nèg save ki
 konn etidye zetwal yo soti nan peyi solèy leve, yo rive lavil Jerizalèm. ² Yo t'ap mande: Kote wa
 jwif ki fenk fèt la? Nou wè zetwal li parèt depi nan peyi nou an, nou vin adore li. ³ Lè wa Ewòd
 pran nouvèl la, sa te boulvèse tèt li. Sa te boulvèse tout moun lavil Jerizalèm yo tou. ⁴ Ewòd reyini
 tout chèf prèt yo ansanm ak direktè lalwa yo ki t'ap dirije pèp jwif la. Li mande yo: Ki kote Kris la
 gen pou l' fèt? ⁵ Yo reponn li: Se lavil Betleyèm nan peyi Jide li gen pou l' fèt. Paske, men sa pwofèt
 la te ekri: ⁶ Ou menm, Betleyèm, ki bati sou tè Jida a, pawòl sèten: se pa ou ki pi piti nan tout lavil
 peyi Jida yo. Paske, gen yon chèf ki gen pou soti lakay ou. Se li menm ki va kondi moun Izrayèl
 yo, pèp mwen an. ⁷ Se konsa, Ewòd fè nèg save yo vin jwenn li an kachèt. Li mande yo kilè
 egzakteman zetwal la te parèt. ⁸ Apre sa, li voye yo ale Betleyèm. Li di yo: Ale non! Chache konnen
 tout bagay sou ti pitit la. Lè n'a jwenn li, fè m' konnen pou m' sa kapab al adore l', mwen menm
 tou. ⁹ ¶ Apre wa a te fin di yo sa, nèg save yo pati. Lè sa a, zetwal yo te wè nan peyi solèy leve a
 parèt devan yo ankò. Li t'ap mache devan yo. Zetwal la kontinye konsa jouk li rive sou tèt kay kote
 ti pitit la te ye a. Epi l' rete. ¹⁰ Lè yo te wè zetwal la, yo pa t' manke kontan. ¹¹ Yo antre nan kay
 la, yo wè ti pitit la ansanm ak Mari, manman li. Yo mete ajenou devan l', yo adore l'. Apre sa, yo
 louvri sak yo, yo ba li anpil kado: te gen lò, lansan ak lami. ¹² Apre sa, Bondye pale ak nèg save
 yo nan dòmi, li avèti yo pou yo pa tounen bò kote Ewòd ankò. Se konsa mesye yo fè yon lòt wout
 pou yo tounen al nan peyi yo. ¹³ ¶ Lè nèg save yo fin ale, yon zanj Bondye parèt devan Jozèf nan
 dòmi. Zanj lan di l' konsa: Leve non, pran ti pitit la ansanm ak manman l'. Sove ale nan peyi Lejip.

Wa rete la jouk lè m'a di ou pou ou tounen. Paske, Ewòd pral chache touye ti pitit la. ¹⁴ Jozèf leve
 nan mitan lannwit lan, li pran ti pitit la ansanm ak manman l'. Li pati, li ale nan peyi Lejip. ¹⁵ Jozèf
 rete la jouk lè Ewòd mouri. Se konsa, pawòl Bondye te mete nan bouch pwofèt la te rive vre. Li te
 di: Mwen rele pitit mwen, mwen fè l' soti kite peyi Lejip. ¹⁶ ¶ Lè Ewòd wè nèg save yo te pase l'
 nan jwèt, li fè yon gwo kòlè. Li bay lòd touye tout ti pitit gason ki te nan lavil Betleyèm ak nan
 tout vwazinaj la, depi sa ki te fèk fèt jouk sa ki te gen dezan, dapre dat nèg save yo te ba li a. ¹⁷ Se
 konsa, pawòl pwofèt Jeremi te di a rive vre: ¹⁸ Yo tandè yon rèl nan lavil Rama. Yo tandè kriye
 ak gwo anmwe. Se Rachèl k'ap kriye pou pitit li yo. Li pa vle pesonn ba li kouraj, paske pitit li yo
 mouri. ¹⁹ ¶ Apre Ewòd mouri, yon zanj Bondye parèt devan Jozèf nan dòmi, antan l' nan peyi Lejip
 la. ²⁰ Zanj lan di l': Leve non, pran ti pitit la ansanm ak manman l', tounen nan peyi Izrayèl la.
 Paske, moun ki te vle touye ti pitit la, yo mouri. ²¹ Lamenm Jozèf leve, li pran ti pitit la ansanm
 ak manman l', li tounen nan peyi Izrayèl la. ²² Men, lè Jozèf vin konnen se Akelayis ki t'ap gouvènen
 peyi Jide a nan plas Ewòd, papa l', Jozèf te pè ale la. Bondye pale avè l' ankò nan dòmi. Lè sa a, li
 pati, li ale nan peyi Galile. ²³ Li vin rete nan yon vil yo rele Nazarèt. Se konsa, pawòl pwofèt yo
 te di a rive vre: y'a rele l' moun Nazarèt.

Chapter 3

¹ ¶ Lè sa a, Jan Batis parèt nan dezè Jide a. Li t'ap mache bay mesaj sa a. ² Li t'ap di: Tounen
 vin jwenn Bondye. Paske, Bondye ki wa nan syèl la ap vin pran pouvwa a nan men l'. ³ Se sou Jan
 pwofèt Ezayi t'ap pale lè l' te di: Se vwa yon nonm k'ap rele nan dezè a: Pare gran wout Seyè nou
 an. Plani chemen an byen plani pou li. ⁴ Jan te gen yon rad fèt ak pwal chamo sou li, li te mare ren
 l' ak yon sentiwon an po. Li te manje krikèt ak gato myèl li te jwenn nan bwa. ⁵ Moun soti lavil
 Jerizalèm, nan tout peyi Jide a ak nan tout vwazinaj larivyè Jouden an, yo tout te vin jwenn Jan.
⁶ Yo te konfese peche yo devan tout moun. Apre sa, Jan te batize yo nan larivyè Jouden an. ⁷ ¶ Lè
 Jan wè te gen anpil farizyen ak sadiseyen ki t'ap vin jwenn li pou resevwa batèm nan men l', li di
 yo: Bann vèmen! Ki moun ki fè nou konnen nou kapab chape anba kòlè Bondye k'ap vini an? ⁸ Fè
 bagay ki pou fè wè lavi nou chanje tout bon. ⁹ Pa konprann nou ka di nan kè nou: Se pitit pitit
 Abraram nou ye. Paske, mwen p'ap kache di nou sa: Bondye kapab pran wòch sa yo, li fè yo tounen

¹⁰
 pitit pou Abraram. ¹¹ Epitou, rach la tou pare pou koupe rasin pyebwa yo. Nenpòt pyebwa ki pa
 bay bon donn, yo pral koupe sa jete nan dife. ¹² Mwen menm, mwen batize nou nan dlo, pou fè
 wè nou tounen vin jwenn Bondye. Men, moun k'ap vin apre mwen an gen plis pouvwa anpil pase
 m'. Mwen pa bon ase menm pou m' ta wete sapat ki nan pye li. Se li menm ki va batize nou nan
¹³ Sentepri ak nan dife. ¹⁴ Li gen laye l' nan men li. L'ap vannen tout grenn ki sou glasi a. La ranmase
 grenn ki bon yo, la mete yo nan galata li; men, l'ap boule pay la nan yon dife ki p'ap janm mouri.
¹⁵ ¶ Lè sa a, Jezi soti nan peyi Galile, li vin larivyè Jouden, bò kote Jan pou Jan batize li. ¹⁶ Men,
 Jan pa t' dakò pou sa menm. Li di l': Se ou ki pou ta batize m', epi se ou menm ki vin jwenn mwen
 pou m' batize ou? ¹⁷ Jezi reponn li: Kite sa fèt konsa koulye a. Se konsa pou nou fè tou sa Bondye
 mande. Jan pa t' kenbe tèt avè l' ankò. ¹⁸ Fini Jan fin batize l', Jezi soti nan dlo a. Menm lè a, syèl
 la louvri, Jezi wè Lespri Bondye a desann sou fòm yon ti pijon vin sou li. ¹⁹ Lè sa a, yon vwa soti
 nan syèl la, li di: Sa se pitit mwen renmen anpil la. Li fè kè m' kontan anpil.

Chapter 4

¹ ¶ Apre sa, Lespri Bondye pouse Jezi ale nan dezè a pou Satan te ka tante l'. ² Jezi pase karant
 jou ak karant nwit san manje. Apre sa, li vin grangou. ³ Lè sa a, Satan pwoche bò kote l' pou sonde
 l'. Li di l' konsa: Si ou se Pitit Bondye, bay wòch sa yo lòd pou yo tounen pen. ⁴ Jezi reponn li:
 Men sa ki ekri: Moun pa kapab viv ak manje ase. Yo bezwen tout pawòl ki soti nan bouch Bondye
⁵ tou. Apre sa, grandyab la mennen l' lavil Jerizalèm. Li mete l' kanpe sou pwent fetay tanp lan.
⁶ Li di Jezi konsa: Si ou se Pitit Bondye, lage kò ou anba. Paske, men sa ki ekri: Bondye va bay
 zanj li yo lòd pou yo veye sou ou. y'a pote ou nan men yo, pou ou pa kase zòtèy pye ou sou okenn
 wòch. ⁷ Jezi reponn li: Men sa ki ekri tou: Ou pa dwe seye sonde Mèt la, Bondye ou. ⁸ Satan
 mennen Jezi ankò sou yon mòn ki byen wo. Li moutre l' tout peyi ki sou latè ansanm ak tout richès
⁹ yo. Li di l' konsa: M'ap ba ou tout bagay sa yo, si ou mete ou ajenou devan m' pou ou adore m'.
¹⁰ Jezi reponn li: Wete kò ou sou mwen, Satan. Paske, men sa ki ekri: Se Mèt la, Bondye ou, pou
 ou adore, se li menm sèl pou ou sèvi. ¹¹ Fwa sa a, grandyab la kite l'. Latou, kèk zanj Bondye
¹² pwoche bò kote Jezi, yo sèvi l'. ¶ Lè Jezi tande yo te mete Jan Batis nan prizon, li wete kò l', li

¹³ ale nan peyi Galile. Li kite lavil Nazarèt, li ale rete nan yon vil yo rele Kapènawòm, ki te toupre
lanmè Galile a, sou tè moun Zabilon ak moun Neftali yo. ¹⁴ Konsa, pawòl pwofèt Ezayi te di a
rive vre: ¹⁵ Peyi Zabilon ak peyi Neftali ki sou wout pou ale bò lanmè a, peyi ki lòt bò larivyè
Jouden an, peyi Galile kote moun lòt nasyon yo ap viv la, ¹⁶ pèp ki t'ap viv nan fènwa a wè yon
gwo limyè. Limyè a klere pou moun ki t'ap viv nan peyi ki anba lonbraj lanmò a. ¹⁷ Depi lè sa a,
Jezi kòmanse ap mache bay mesaj li a. Li t'ap di: Tounen vin jwenn Bondye. Paske, Bondye ki wa
nan syèl la ap vin pran pouvwa a nan men li. ¹⁸ ¶ Antan Jezi t'ap mache bò lanmè Galile a, li wè
de frè: Simon, yo rele Pyè a, ak Andre, frè li. Yo t'ap voye privye nan lanmè a, paske se pechè
pwason yo te ye. ¹⁹ Jezi di yo konsa: vin jwenn mwen, m'a fè nou tounen pechè moun pito.
²⁰ Lamenn, yo kite privye yo, y' ale avèk li. ²¹ Jezi vanse pi lwen, li wè de lòt frè, Jak avèk Jan,
pitit Zebede yo. Yo te chita nan kannòt yo ansanm ak papa yo, yo t'ap repare privye yo. Jezi rele
yo. ²² Lamenn, yo kite kannòt la ansanm ak papa yo, y' ale avèk li. ²³ ¶ Jezi t'ap mache toupatou
nan peyi Galile a. Li t'ap moutre moun yo anpil bagay nan sinagòg yo. Li t'ap anonse Bon Nouvèl
peyi kote Bondye wa a. Li t'ap geri tout kalite maladi ak tout kalite enfimite pèp la te ka genyen.
²⁴ Toupatou nan peyi Siri a, se tout moun ki t'ap nonmen non li. Se sa ki fè yo te mennen tout kalite
moun malad ba li, ansanm ak tout moun ki soufri doulè, moun ki te gen move lespri sou yo, moun
ki soufri malkadi ak moun ki paralize. Jezi geri yo tout. ²⁵ Yon bann moun t'ap swiv li. Yo te soti
toupatou: te gen moun Galile, moun Dis Vil yo, moun lavil Jerizalèm, moun Jide ak moun nan peyi
lòt bò larivyè Jouden an.

Chapter 5

¹ ¶ Lè Jezi wè foul moun yo, li moute sou yon mòn. Li chita. Disip li yo pwoche bò kote l'. ² Li
tanmen moutre moun yo anpil bagay. Li di yo: ³ ¶ Benediksyon pou moun ki konnen se pòv yo ye
devan Bondye, paske peyi Wa ki nan syèl la, se pou yo li ye. ⁴ Benediksyon pou moun ki nan
lapenn, paske Bondye va ba yo kouraj. ⁵ Benediksyon pou moun ki dou, paske y'a resevwa byen
Bondye te sere pou yo a sou latè. ⁶ Benediksyon pou moun ki anvi viv jan Bondye vle l' la, paske
Bondye va ba yo sa yo vle a. ⁷ Benediksyon pou moun ki gen kè sansib, paske Bondye va fè yo

⁸
wè jan li gen kè sansib tou. Benediksyon pou moun ki pa gen move lide nan tèt yo, paske y'a wè
⁹
Bondye. Benediksyon pou moun k'ap travay pou lèzòm viv byen yonn ak lòt, paske Bondye va
¹⁰
rele yo pitit li. Benediksyon pou moun ki anba pèsekisyon lè y'ap fè sa Bondye mande, paske
¹¹
peyi Wa ki nan syèl la, se pou yo li ye. Benediksyon pou nou lè moun va joure nou, lè y'a pèsekite
¹²
nou, lè y'a fè tout kalite manti sou nou paske se moun pa m' nou ye. Fè kè nou kontan. Wi, nou
mèt kontan nèt, paske yon gwo rekonpans ap tann nou nan syèl la. Se konsa yo te pèsekite pwofèt
¹³
ki te vini anvan nou yo. ¶ Se sèl nou ye pou moun sou latè. Si sèl la pèdi gou l', ak kisa pou yo
ba li gou ankò? Li pa vo anyen ankò. Se jete pou yo voye sa jete deyò, pou moun pile sa anba pye
¹⁴
yo. Se limyè nou ye pou moun sou latè. Moun pa kapab kache yon lavil ki bati sou yon mòn.
¹⁵
Ni yo pa limen yon lanp pou mete l' anba yon mamit. Men, yo mete l' sou yon etajè, pou l' klere
¹⁶
pou tout moun ki nan kay la. Konsa tou, se pou limyè nou klere devan tout moun, pou lè yo wè
¹⁷
tout byen n'ap fè yo, y'a fè lwanj Papa nou ki nan syèl la. ¶ Pa mete nan tèt nou mwen vin aboli
lalwa Moyiz la ak sa pwofèt yo te moutre nou. Mwen pa vin pou aboli yo, mwen vin moutre sa yo
¹⁸
vle di tout bon. Sa m'ap di nou la a, se vre wi: tout tan syèl la ak tè a va la, pa yon ti detay, ni
¹⁹
yon sèl ti bout lèt nan lalwa a p'ap disparèt, jouk tout bagay ki pou rive yo rive. Se sa ki fè, moun
ki va dezobeyi yonn nan pi piti nan kòmandman sa yo, epi ki va moutre lòt moun pou yo fè menm
jan an tou, moun sa a va pase pou pi piti nan Peyi Wa ki nan syèl la. Konsa tou, moun ki obeyi
kòmandman sa yo, k'ap moutre lòt moun jan pou yo fè l' tou, moun sa a va pase pou pi gran nan
²⁰
Peyi Wa ki nan syèl la. Paske m'ap di nou sa: Si nou pa obeyi Lalwa Bondye a pi byen pase
farizyen yo ak direktè lalwa yo, si nou pa viv pi byen pase yo, nou p'ap kapab antre nan Peyi Wa
²¹
ki nan syèl la. ¶ Nou tande ki jan nan tan lontan yo te di zansèt nou yo: Piga ou janm touye
²²
moun. Moun ki touye moun, se pou yo jije yo. Men, mwen menm, men sa m'ap di nou: Nenpòt
moun ki ankòlè sou frè l', se pou yo jije li. Moun ki joure frè l' enbesil, se pou yo jije l' devan Gran
²³
Konsèy la. Si yon moun di frè l' moun fou, li bon pou yo jete l' nan dife lanfè a. Konsa, si lè
w'ap mete ofrann ou sou lotèl la bay Bondye, epi antan ou la devan lotèl la, ou chonje frè ou gen
²⁴
kichòy kont ou, men sa pou ou fè: Kite ofrann lan la devan lotèl la, ale byen ak frè ou la anvan.
²⁵
Aprè sa, wa tounen vin bay Bondye ofrann ou an. Si yon moun pote plent pou ou nan tribinal,
prese mete ou dakò avè l' antan nou prale ansanm nan tribinal la, pou li pa lage ou nan men jij la,
²⁶
pou jij la pa lage ou nan men lapolis, pou yo pa mete ou nan prizòn. Sa m'ap di ou la, se vre wi:

ou p'ap soti nan prizon an toutotan ou pa peye dènve lajan yo mande ou la. ²⁷ ¶ Nou tande ki jan
 nan tan lontan yo te di: Piga ou janm fè adiltè. ²⁸ Mwen menm, men sa m'ap di nou: Si yon nonm
 gade yon fi avèk lanvi, li deja fè adiltè avè l' nan kè l'. ²⁹ Si se grenn je dwat ou ki pou ta fè ou
 tonbe nan peche, rache l' voye jete byen lwen ou. Pito ou pèdi yon sèl manm nan kò ou, pase pou
 yo voye tout kò ou nèt jete nan lanfè. ³⁰ Si se men dwat ou ki pou ta fè ou tonbe nan peche, koupe
 l' voye jete byen lwen ou. Pito ou pèdi yon sèl nan manm ou yo, pase pou tout kò a nèt al nan lanfè.
³¹ Yo te konn di nou tou: Si yon nonm vle kite ak madanm li, fòk li ekri l' yon papye divòs. ³² Men
 mwen menm, men sa m'ap di nou: Yon nonm ki kite ak madanm li, si se pa pou lenkondit, nonm
 sa a lakòz madanm lan fè adiltè. Konsa tou, yon nonm ki marye ak yon madanm mari l' kite l', li
 fè adiltè tou. ³³ ¶ Nou tande ki jan nan tan lontan yo te di zansèt nou yo: Ou pa dwe refize fè sa
 ou te sèmante pou ou te fè a. Se pou ou fè sa ou te sèmante fè devan Bondye. ³⁴ Men mwen menm,
 men sa m'ap di nou: Pa fè sèman menm. Pa fè sèman sou syèl la, paske syèl la se fotèy kote Bondye
 chita. ³⁵ Pa fè sèman sou tè a, paske tè a se ti ban kote Bondye poze pye li. Pa fè sèman sou lavil
 Jerizalèm, paske se lavil gwo Wa a. ³⁶ Pa fè sèman non plis sou tèt pa ou, paske ou pa ka fè yon
 sèl grenn cheve nan tèt ou tounen blan osinon nwa. ³⁷ Men, lè w'ap pale se wi ak non pou ou genyen
 ase. Tou sa ou mete an plis, se nan Satan sa soti. ³⁸ ¶ Nou tande ki jan nan tan lontan yo te di: yon
 je pou yon je, yon dan pou yon dan. ³⁹ Men mwen menm, men sa m'ap di nou: Pa tire revanj sou
 moun ki fè nou mal. Si yon moun ba ou yon souflèt sou bò dwat, ba li bò gòch la tou. ⁴⁰ Si yon
 moun vle rele ou nan tribinal pou l' pran chemiz ou, kite palto a ba li tou. ⁴¹ Si yon chèf vle fòse
 ou pote yon chaj pou li sou distans yon kilomèt, fè de kolomèt avè l'. ⁴² Bay lè moun mande ou.
 Pa refize prete moun ki mande ou prete. ⁴³ ¶ Nou tande ki jan nan tan lontan yo te di: Se pou nou
 renmen frè parèy nou, men se pou nou rayi lènmi nou yo. ⁴⁴ Men mwen menm, men sa m'ap di
 nou: renmen tout lènmi nou yo, lapriyè pou moun k'ap pèsekite nou. ⁴⁵ Se konsa n'a tounen pitit
 Papa nou ki nan syèl la. Paske, li fè solèy la leve ni pou moun ki mechan ni pou moun ki bon. Li
 fè lapli tonbe ni pou moun k'ap fè sa ki byen ni pou moun k'ap fè sa ki mal. ⁴⁶ Si nou plede renmen
 moun ki renmen nou ase, ki rekonpans nou merite pou sa? Eske pèseptè kontribisyon yo pa fè sa
⁴⁷ tou? Lèfini, si se frè nou ase nou di bonjou, se yon pakèt afè sa ye atò? Eske moun lòt nasyon

yo pa fè sa tou? ⁴⁸ Non, nou fèt pou nou bon nèt, menm jan Bondye Papa nou ki nan syèl la bon nèt.

Chapter 6

¹ ¶ Fè atansyon lè n'ap fè devwa nou pou Bondye pou nou pa fè l' yon jan pou fè moun wè. Lè nou fè l' konsa, Papa nou ki nan syèl la p'ap ban nou okenn rekonpans. ² Se sa ki fè tou, lè w'ap bay yon moun ki nan nesosite kichòy, ou pa bezwen fè tout moun wè sa, tankou ipokrit yo fè l' nan sinagòg ak nan lari. Yo fè sa pou moun ka fè lwanj yo. Sa m'ap di nou la a, se vre wi: Konsa, yo tou jwenn rekonpans yo. ³ Men, lè w'ap ede moun ki nan nesosite, fè l' yon jan pou menm pi bon zanmi ou pa konn sa. ⁴ Konsa, kado ou fè a rete yon sekre. Papa ou menm ki wè sa ou fè an sekre a va ba ou rekonpans ou. ⁵ ¶ Lè n'ap lapriyè, pa fè tankou ipokrit yo ki renmen kanpe nan mitan sinagòg ak nan pwent kalfou pou yo lapriyè. Yo fè sa pou moun kapab wè yo. Sa m'ap di nou la a, se vre wi: Konsa, yo tou jwenn rekonpans yo. ⁶ Men ou menm, lè w'ap lapriyè, antre nan chanm ou. Fèmen pòt ou. Lapriyè Papa ou ki la pou kont li avè ou. Konsa, Papa ou menm ki wè sa ou fè an sekre a, se li ki va ba ou rekonpans ou. ⁷ Lè w'ap lapriyè, pa plede repete yon bann pawòl pou gremesi. Se konsa moun lòt nasyon yo fè. Yo mete nan tèt yo Bondye va tande yo si yo pale anpil. ⁸ Piga nou fè tankou moun sa yo. Paske, Papa nou tou konnen sa nou bezwen anvan menm nou mande li. ⁹ ¶ Men ki jan pou nou lapriyè: Papa nou ki nan syèl la, Nou mande pou yo toujou respekte non ou. ¹⁰ vin tabli gouvènman ou, pou yo fè volonte ou sou latè, tankou yo fè l' nan syèl la. ¹¹ Manje nou bezwen an, ban nou l' jòdi a. ¹² Padonnen tout sa nou fè ki mal, menm jan nou padonnen moun ki fè nou mal. ¹³ Pa kite nou nan pozisyon pou n' tonbe nan tantasyon, men, delivre nou anba Satan. Paske, se pou ou tout otorite, tout pouvwa ak tout lwanj, depi tout tan ak pou tout tan. Amèn ¹⁴ Si nou padonnen moun lè yo fè nou mal, Papa nou ki nan syèl la va padonnen nou tou. ¹⁵ Men, si nou pa padonnen moun lè yo fè nou mal, Papa nou p'ap padonnen peche nou yo non plis. ¹⁶ ¶ Lè n'ap fè jèn, pa pran pòz kagou nou tankou ipokrit yo: Y'ap mache ak figi yo rale konsa pou tout moun ka wè y'ap fè jèn. Sa m'ap di nou la a, se vre wi: Konsa, yo tou jwenn rekonpans yo. ¹⁷ Men ou menm, lè w'ap fè jèn, penyen tèt ou byen penyen, lave figi ou byen lave. ¹⁸ Konsa, moun p'ap wè si w'ap fè jèn. Papa ou ki la pou kont li avè ou, se li ase ki konn sa. Konsa, Papa ou

19
 menm ki wè sa ou fè an sekre a, se li ki va ba ou rekonpans ou. ¶ Pa anpile richès nou isit sou
 20
 latè, kote vè ak lawouj ap manje yo, kote vòlè kapab vòlè yo pote ale. Okontrè, anpile richès
 nou nan syèl la. Paske la pa gen vè ni lawouj ki pou manje yo, ni vòlè ki pou pran yo pote ale.
 21
 22
 Paske, kote richès ou ye, se la kè ou ye tou. Je ou se tankou yon lanp li ye pou kò ou. Si je
 23
 ou an bon eta, tout kò ou va nan limyè. Men, si je ou an move eta, tout kò ou va nan fènwa. Se
 24
 sa ki fè, si limyè ki anndan ou la se fènwa li ye, se pa ti fè nwa anndan ou fè nwa. Pesonn pa ka
 sèvi byen ak de mèt an menm tan. Li gen pou l' rayi yonn si l' renmen lòt la. L'ap sèvi byen ak yonn,
 25
 men l'ap meprize lòt la. Nou pa kapab sèvi Bondye ak lajan an menm tan. ¶ Se poutèt sa, mwen
 di nou: Pa bat kò nou pou sa nou bezwen pou manje ak bwè pou viv, ni pou rad nou bezwen pou
 mete sou kò nou. Eske lavi a pa pi konsekan pase manje? Eske kò a pa gen plis valè pase rad?
 26
 Gade zwazo k'ap vole nan syèl la: yo pa plante, yo pa fè rekòt, yo pa sere anyen nan galata. Men,
 27
 Papa nou ki nan syèl la ba yo manje. Eske nou pa vo pi plis pase zwazo yo? Kilès nan nou, afòs
 28
 li fè tèt li travay, kapab mete kèk lanne an plis sou lavi l'? Poukisa pou n'ap bat kò nou pou rad
 pou nou mete sou nou? Gade ki jan flè raje yo pouse nan savann. Yo pa travay, yo pa fè rad.
 29
 Malgre sa, m'ap di nou sa, wa Salomon ki wa Salomon, ak tout richès li yo, pa t' gen bèl rad
 30
 tankou yonn nan flè sa yo. Se konsa Bondye abiye pye zèb yo ki la nan jaden an jòdi a, men
 denmen yo jete sa nan dife pou chofe fou. Nou pa bezwen mande si li p'ap abiye nou tou. Ala manke
 31
 nou manke konfyans nan Bondye! Pa chaje tèt nou ak yon bann keksyon: Kisa n' pral manje?
 32
 Kisa n' pral bwè? Kisa n' pral mete sou nou? Tout bagay sa yo, se moun lòt nasyon yo k'ap kouri
 dèyè yo tout tan. Men nou menm, nou gen yon Papa nan syèl la ki konnen nou bezwen tout bagay
 33
 sa yo. Pito nou chache bay bagay peyi Wa ki nan syèl la premye plas nan lavi nou, chache viv
 34
 jan Bondye vle l' la anvan. Lè sa a, Bondye va ban nou tout lòt bagay sa yo tou. Se sa ki fè, pa
 chaje tèt nou pou denmen, paske denmen va gen zafè pa li. Chak jou gen kont chay pa yo.

Chapter 7

1
 ¶ Pa jije moun pou Bondye pa jije nou, 2 paske Bondye va jije nou menm jan nou jije lòt yo.
 3
 Mezi nou sèvi pou mezire lòt yo, se li menm menm Bondye va sèvi pou mezire nou tou. Poukisa

pou w'ap gade ti pay ki nan je frè ou, epi ou pa wè gwo bout bwa ki nan je pa ou la? ⁴ Ou menm
 ki gen yon gwo bout bwa nan je ou la, kouman ou ka di frè ou: Kite m' wete ti pay ki nan je ou la?
⁵ Ipokrit! Wete gwo bout bwa a ki nan je pa ou la anvan. Apre sa, wa wè klè pou ou ka wete ti pay
 ki nan je frè ou la. ⁶ Piga nou bay chen bagay yo mete apa pou Bondye. Piga nou jete bèl grenn
 pèl nou yo devan kochon. Si nou fè sa, kochon yo va mache sou yo, epi y'a vire sou nou vin dechire
 nou. ⁷ ¶ Mande, y'a ban nou. Chache, n'a jwenn. Frape, y'a louvri pou nou. ⁸ Paske, nenpòt moun
 ki mande va resevwa. Moun ki chache va jwenn. y'a louvri pou moun ki frape. ⁹ Eske gen yonn
 nan nou ki va bay pitit li yon wòch si li mande l' yon pen? ¹⁰ Eske la ba li yon koulèv si pitit li
 mande l' yon pwason? ¹¹ Si nou menm ki mechan jan nou mechan an, nou konn bay pitit nou yo
 bon bagay, nou pa bezwen mande si Papa nou ki nan syèl la p'ap ban nou bon bagay lè nou mande
 li. ¹² ¶ Tou sa nou vle lòt moun fè pou nou, nou menm tou fè l' pou yo. Se sa lalwa Moyiz la ak
 liv pwofèt yo mande nou fè. ¹³ Antre nan pòt jis la. Paske, pòt ki laj la, chemen ki fasil la ap mennen
 nou tou dwat nan lanmò. Gen anpil moun ki pase ladan li. ¹⁴ Men, pòt ki jis la, chemen ki difisil
 la ap mennen nou tou dwat nan lavi. Pa gen anpil moun ki jwenn li. ¹⁵ ¶ Pran prekosyon nou ak
 fo pwofèt yo. Yo pran pòz ti mouton yo lè y'ap vin sou nou, men nan fon kè yo, se bèt devoran yo
 ye. ¹⁶ n'a rekonèt yo sou sa y'ap fè. Yo pa keyi rezen sou pye pikan. Ni yo pa keyi fig Frans sou
 pye rakèt. ¹⁷ Yon bon pyebwa bay bon donn. Men, yon move pyebwa bay move donn. ¹⁸ Yon
 bon pyebwa pa ka bay move donn. Nitou yon move pyebwa pa ka bay bon donn. ¹⁹ Nenpòt pyebwa
 ki pa bay bon donn, yo pral koupe sa jete nan dife. ²⁰ Konsa tou, n'a rekonèt fo pwofèt yo sou sa
 y'ap fè. ²¹ ¶ Se pa tout moun k'ap plede di m': Mèt, Mèt, ki pral antre nan peyi Wa ki nan syèl la,
 men se sèlman moun ki fè volonte Papa m' ki nan syèl la. ²² Lè jou sa a va rive, anpil moun va di
 m': Mèt, Mèt, se sou non ou nou t'ap bay mesaj ki soti nan Bondye a. Se sou non ou nou te chase
 move lespri yo. Se sou non ou nou te fè anpil mirak. ²³ Lè sa a, m'a di yo: Mwen pa t' janm konnen
 nou. Wete kò nou sou mwen, nou menm k'ap fè sa ki mal. ²⁴ Konsa, moun ki tande pawòl mwen
 fenk sot di a, epi ki fè sa mwen mande li fè a, l'ap tankou yon moun lespri ki bati kay li sou wòch.
²⁵ Lapli tonbe, dlo desann, gwo van soufle sou kay la ak tout fòs. Kay la pa tonbe, paske yo te
 moute fondasyon kay la sou wòch. ²⁶ Men, moun ki tande pawòl mwen fenk sot di a, epi ki pa fè

sa mwen mande li fè a, l'ap tankou yon moun fou ki bati kay li sou sab. ²⁷ Lapli tonbe, dlo desann,
 gwo van soufle sou kay la ak tout fòs: kay la tonbe, li fini nèt ale. ²⁸ Lè Jezi fin di pawòl sa yo,
 foul moun yo te sezi tandè sa l' t'ap moutre yo. ²⁹ Se pa t' menm jan ak dirèktè lalwa yo, paske li
 te pale ak yo tankou yon moun ki otorize.

Chapter 8

¹ ¶ Apre sa, Jezi desann soti sou ti mòn lan, yon gwo foul moun t'ap mache dèyè li. ² Lè sa a,
 yon nonm ki te gen lalèp pwoche bò kote l', li tonbe ajenou devan Jezi, li di l' konsa: Mèt, si ou
 vle, ou kapab geri mwen. ³ Jezi lonje men l', li manyen nonm lan, li di l': Wi, mwen vle. Se pou
 ou geri. Menm lè a, lalèp la kite li. ⁴ Apre sa, Jezi di l': Piga ou di pesonn sa. Men, ale fè prèt yo
 wè ki jan ou ye. Apre sa, wa ofri sa Moyiz te bay lòd ofri a. Konsa, wa bay tout moun prèv ou geri.
⁵ ¶ Antan Jezi t'ap antre lavil Kapènawòm, yon kaptenn lame women an vin bò kote li. Li mande
 l' yon sèvis. Li di l' konsa: ⁶ Mèt, domestik mwen an kouche lakay, li paralize nèt, l'ap soufri anpil.
⁷ Jezi di l' konsa: Mwen pral geri l' pou ou. ⁸ Men kaptenn lan reponn li: Mèt, mwen pa merite pou
 ou antre lakay mwen. Men, annik bay yon lòd ase, domestik mwen an va geri. ⁹ Mwen menm k'ap
 pale avè ou la a, mwen sou zòd chèf, mwen gen sòlda sou zòd mwen tou. Lè m' di yonn ale, li ale.
¹⁰ Lè m' di yon lòt vini, li vini. Lè m' di domestik mwen an fè sa, li fè li. Lè Jezi tandè pawòl sa
 yo, li sezi. Li di moun ki t'ap mache dèyè li yo: Sa m'ap di nou la a, se vre wi: mwen poko janm
 jwenn yon moun nan pèp Izrayèl la ki gen konfyans nan Bondye tankou nonm sa a. ¹¹ Mwen p'ap
 kache di nou sa: anpil moun va soti nan peyi solèy leve ak nan peyi solèy kouche, y'a vin chita sou
 tab ansanm ak Abraram, ak Izarak, ak Jakòb nan Peyi Wa ki nan syèl la. ¹² Men, moun ki pou ta
 antre nan Peyi Wa a, y'ap voye yo jete deyò nan fènwa. Se la va gen rèl, se la moun va manje dan
 yo. ¹³ Apre sa, Jezi di kaptenn lan: Ale lakay ou. Tout bagay ap pase pou ou jan ou kwè l' la. Menm
 lè a, domestik la te geri. ¹⁴ ¶ Apre sa, Jezi ale lakay Pyè. Li jwenn bèlmè Pyè a kouche ak lafyèv.
¹⁵ Jezi manyen men madanm lan, lamenn lafyèv la kite li. Madanm lan leve, li resevwa li. ¹⁶ Lè
 solèy fin kouche, yo mennen anpil moun ki te gen move lespri sou yo bay Jezi. Li annik pale ak
 move lespri yo, li chase yo. Li te geri tout moun malad yo tou. ¹⁷ Se konsa pawòl pwofèt Ezayi te

di a rive vre: Li pran enfimite nou yo sou li. Li pote maladi nou yo sou do li. ¹⁸ ¶ Jezi wè li te nan
 mitan yon gwo foul moun. Li bay lòd pou yo janbe lòt bò lanmè a. ¹⁹ Men, yon dirèktè lalwa
 pwoche bò kote l', li di l' konsa: Mèt, m'ap swiv ou tout kote ou prale. ²⁰ Jezi reponn li: Chat mawon
 gen twou yo. Zwezo k'ap vole nan syèl la gen nich yo. Men, Moun Bondye voye nan lachè a pa
 gen kote pou l' poze tèt li. ²¹ Yon lòt nan disip yo di li: Mèt, pèmèt mwen al antere papa m' anvan.
²² Men Jezi di li: Swiv mwen. Kite moun mouri antere moun mouri yo. ²³ ¶ Jezi moute nan kannòt
 la, disip li yo pati avèk li. ²⁴ Antan yo sou lanmè a, yo rete konsa yon gwo van vin leve. Lanm
 lanmè yo t'ap kouvri kannòt la. Jezi menm t'ap dòmi lè sa a. ²⁵ Disip yo pwoche bò kote li. Yo
 souke l', yo fè l' leve. Yo di l' konsa: Mèt, sove nou non. Se mouri n'ap mouri. ²⁶ Jezi di yo: Poukisa
 nou pè konsa? Ala moun manke konfyans! Apre sa, Jezi leve kanpe, li pale byen fò ak van an
 ansanm ak dlo a. Lamenm yon gwo kalmi fèt. ²⁷ Mesye yo te sezi anpil. Yo di konsa: Ki kalite
 moun sa a menm, pou jouk van ak dlo lanmè obeyi li? ²⁸ ¶ Lè Jezi rive lòt bò lanmè a, nan peyi
 Gadarenyen yo, de moun soti nan mitan tonm mò yo, yo vin devan li. Mesye sa yo te gen move
 lespri sou yo. Yo te sitèlman move pesonn pa t' kapab pase nan chemen sa a. ²⁹ Yo tou de pran
 rele ansanm: Ey, Pitit Bondye a. Kisa nou gen avè ou? Eske ou vin isit la pou fè n' soufri anvan lè
 nou? ³⁰ Toupre kote yo te ye a, te gen yon bann kochon ki t'ap chache manje pou yo manje. ³¹ Move
 lespri yo mande Jezi: Tanpri, si ou vle chase nou, voye nou sou bann kochon sa yo. ³² Jezi di yo:
 Ale non. Move lespri yo soti sou de mesye yo, yo antre nan kochon yo. Menm lè a, tout bann kochon
 yo pran degrengole desann falèz la, y al neye tèt yo nan lanmè. ³³ Moun ki t'ap gade kochon yo
 pran kouri. Y ale lavil la, yo rakonte tou sa ki te pase ansanm ak sa ki te rive de mesye yo ki te gen
 move lespri sou yo. ³⁴ Lè sa a, tout moun lavil la soti vin jwenn Jezi. Lè yo wè l', yo mande li:
 Tanpri souple, ale fè wout ou.

Chapter 9

¹ ¶ Jezi moute nan kannòt la, li tounen lòt bò lanmè a ankò, nan lavil kote l' te ye a. ² Se konsa,
 yo pote ba li yon nonm paralize kouche sou yon kabann. Jezi wè jan moun yo te gen konfyans nan
 li, li di nonm paralize a: Pran kouraj, pitit mwen, peche ou yo padonnen. ³ Lè sa a, kèk dirèktè

lalwa di nan kè yo: Nonm sa a ap pale mal sou Bondye. ⁴ Men, Jezi te gen tan konnen sa ki t'ap
 pase nan tèt yo. Li di yo: Poukisa n'ap fè move lide konsa nan tèt nou? ⁵ Kisa ki pi fasil pou m' di:
 Peche ou yo padonnen, osinon: Leve mache? ⁶ Enben, m'ap fè nou konnen mwen menm, Moun
 Bondye voye nan lachè a, mwen gen pouvwa sou latè pou m' padonnen peche. Li vire, li di nonm
 paralize a: Leve kanpe, pran kabann ou, ale lakay ou. ⁷ Nonm lan leve kanpe vre, li ale lakay li.
⁸ Lè moun yo wè sa, yo tout te pè, yo fè lwanj Bondye dapre li te bay lèzòm kalite pouvwa sa a.
⁹ ¶ Jezi kite kote l' te ye a. Antan li t'ap pase konsa, li wè yon nonm yo te rele Matye ki te chita nan
 biwo kontribisyon an. Jezi di l' konsa: Swiv mwen. Matye annik leve, li swiv Jezi. ¹⁰ Pita, Jezi t'ap
 manje nan kay la. Te gen anpil pèseptè kontribisyon ak moun k'ap fè sa ki mal ki te vin chita sou
 tab avè l' ansanm ak disip li yo. ¹¹ Farizyen yo wè sa, yo di disip li yo: Poukisa Mèt nou an ap
 manje konsa ak pèseptè kontribisyon ansanm ak moun k'ap fè sa ki mal yo? ¹² Jezi tandè sa, li di
 yo: Si yon moun ansante, li pa bezwen dòktè. Se moun malad ki bezwen dòktè. ¹³ Ale non, chache
 konprann sans pawòl sa yo ki nan Liv la: Mwen vle pou nou gen kè sansib. Mwen pa bezwen bèt
 n'ap ofri pou touye pou mwen yo. Paske, mwen pa vin rele moun k'ap mache dwat devan Bondye,
 men moun k'ap fè sa ki mal yo. ¹⁴ ¶ Disip Jan Batis yo pwoche bò kot Jezi, yo di li: Nou menm
 ak farizyen yo, nou fè jèn. Men, poukisa disip ou yo pa fè jèn tou? ¹⁵ Jezi reponn yo: Eske zanmi
 yon nonm k'ap marye kapab nan lapenn toutotan nonm k'ap marye a la ak yo? Non, pa vre? Men,
 lè lè a va rive pou l' pa nan mitan yo ankò, se lè sa a y'a fè jèn. ¹⁶ Pesonn pa pyese yon vye rad ak
 yon moso twal nèf. Paske, pyès nèf la va pati ak moso nan rad la. Lè sa a, rad la chire pi mal.
¹⁷ Konsa tou, yo pa mete diven ki fenk fèt nan vye veso fèt an po. Si ou fè sa, veso an po yo gen
 pou pete, diven an gen pou koule atè; epi ou pèdi veso yo tou. Men, yo mete diven ki fèk fèt nan
 veso an po ki fenk fèt tou. Konsa, ni diven an ni veso an po yo ap byen konsève. ¹⁸ ¶ Antan Jezi
 t'ap pale konsa ak moun yo, yonn nan chèf jwif yo vin rive, li mete ajenou devan Jezi. Li di li: Pitit
 fi mwen an fèk mouri. Men, vin mete men ou sou li pou li ka viv. ¹⁹ Jezi leve, li swiv nonm lan.
²⁰ Disip li yo te ale avè l' tou. Lè sa a, yon fanm ki te malad pwoche pa dèyè Jezi. Li te gen pèdisyon
 depi douzan. Li manyen rebò rad Jezi a, ²¹ paske li t'ap di nan kè l': Si m' ka manyen rad li sèlman,
 m'a geri. ²² Jezi vire tèt li, li wè fanm lan. Li di l' konsa: Pran kouraj, mafi. Konfyans ou nan Bondye
 ap geri ou. Menm lè a, fanm lan geri. ²³ Lè Jezi rive kay chèf la, li wè mizisyen yo ki t'ap pare pou

lantèman an, ansanm ak yon foul moun ki t'ap fè anpil bri.²⁴ Jezi di yo: Tout moun, soti. Tifi a pa
 mouri. Se dòmi l'ap dòmi. Yo pran pase l' nan betiz.²⁵ Lè foul moun yo fin soti, Jezi antre nan
 chanm lan. Li pran men tifi a. Lamenm, tifi a leve.²⁶ Nouvèl la gaye nan tout peyi a.²⁷ ¶ Jezi kite
 kote l' te ye a. Antan li t'ap pase yon kote, de avèg pran mache dèyè li. Yo t'ap rele: Pitit David,
 gen pitye pou nou!²⁸ Lè Jezi rive nan kay la, avèg yo pwoche bò kote li. Jezi di yo: Eske nou kwè
 mwen ka fè sa pou nou? Yo reponn li: Wi, Mèt.²⁹ Lè sa a, li manyen je yo, li di: Se pou sa fèt pou
 nou jan nou kwè l' la.³⁰ Je yo louvri. Jezi pale byen sevè ak yo, li di yo: Tande byen, piga pesonn
 konn sa.³¹ Men, ale yo ale, yo pran nonmen non l' toupatou nan peyi a.³² Antan avèg yo taprale,
 kèk lòt moun mennen yon nonm bay Jezi. Nonm sa a te bèbè, paske li te gen yon move lespri sou
 li.³³ Chase Jezi chase move lespri a, bèbè a pran pale. Foul moun yo te sezi anpil. Yo t'ap di: Nou
 poko janm wè bagay konsa nan peyi Izrayèl.³⁴ Men, farizyen yo t'ap di: Se chèf move lespri yo
 ki ba l' pouvwa pou chase move lespri yo.³⁵ ¶ Jezi t'ap mache nan tout lavil yo ak tout ti bouk yo.
 Li t'ap moutre moun yo anpil bagay nan sinagòg yo. Li t'ap fè konnen Bon Nouvèl Peyi kote Bondye
 Wa a. Li t'ap geri tout kalite maladi ak tout kalite enfimite.³⁶ Lè Jezi wè tout bann moun sa yo,
 kè l' fè l' mal pou yo paske li wè yo te bouke, yo te dekouraje, tankou yon bann mouton san gadò.
³⁷ Lè sa a, li di disip li yo: Rekòt la anpil, men manke travayè pou ranmase l'.³⁸ Mande mèt jaden
 an pou li voye travayè nan jaden l' lan.

Chapter 10

¹ ¶ Jezi rele douz disip li yo. Li ba yo pouvwa pou chase move lespri ak pouvwa pou geri tout
 kalite maladi ak enfimite.² Men non douz apòt yo: Premye a se te Simon (li te ba l' yon ti non:
 Pyè) ak Andre, frè li. Te gen Jak, pitit Zebede, ak Jan, frè li.³ Te gen Filip ak Batèlmi, Toma ak
 Matye, pèseptè kontribisyon an, Jak, pitit Alfe a, ak Tade.⁴ Te gen Simon, patriyòt la ak Jida
 Iskariòt, nonm ki te lage Jezi nan men lènmi l' yo.⁵ ¶ Jezi voye douz mesye yo ale, li ba yo lòd sa
 a: Piga n' ale nan peyi moun lòt nasyon yo. Pa antre nan lavil Samari yo.⁶ Okontrè, ale tout kote
 n'a jwenn moun ras Izrayèl yo ki pèdi.⁷ Sou tout wout nou, bay mesaj sa a: Gouvènman Wa ki

nan syèl la prèt pou rive. ⁸ Geri moun ki malad. Fè moun mouri yo leve. Geri moun ki malad ak
 lalèp. Chase move lespri yo. Se gratis nou resevwa, se gratis tou pou nou bay. ⁹ Pa pran ni lò, ni
 lajan, ni kòb kwiv mete nan pòch nou. ¹⁰ Nou pa bezwen pote sak pou vwayaj la. Pa mete de rad
 sou nou, pa pran ni soulye, ni baton. Paske, yon travayè merite pou yo ba l' manje. ¹¹ Lè nou rive
 nan yon lavil, osinon nan yon ti bouk, mande si gen moun ki vle resevwa nou. Rete lakay li jouk
 lè nou pati. ¹² Lè n'ap antre nan kay la, n'a di: Benediksyon Bondye sou kay la. ¹³ Si moun nan
 kay la resevwa nou, benediksyon nou an va desann sou li. Men, si l' pa vle resevwa nou, benediksyon
 an va tounen vin jwenn nou. ¹⁴ Si yo pa vle resevwa nou, si yo pa vle koute pawòl nou, soti nan
 kay la, osinon nan lavil la, al fè wout nou. Souke pousyè pye nou. ¹⁵ Sa m'ap di nou la a, se vre
 wi: Jou jijman an, y'ap peni moun lavil sa a pi rèd pase moun Sòdòm ak moun Gomò. ¹⁶ ¶ Gade,
 mesye! M'ap voye nou tankou mouton nan mitan chen mawon. Se sak fè, se pou nou sou prigad
 nou tankou pentad, se pou nou inonsan tankou pijon. ¹⁷ Pran prekosyon nou ak tout moun; paske
 y'a trennen nou devan tribinal, y'a bat nou ak kout fwèt nan sinagòg yo. ¹⁸ y'a fè nou konparèt
 devan chèf gouvènman ak devan wa poutèt mwen, pou nou kapab sèvi m' temwen devan yo ak
 devan moun lòt nasyon yo. ¹⁹ Men, lè y'a mennen nou nan tribinal, pa bat kò nou chache sa n'a
 gen pou n' di, ni jan n'a gen pou n' pale. Lè lè a va rive, Bondye va mete nan bouch nou sa n'a gen
 pou n' di. ²⁰ Paske, se pa nou menm ki va pale, men se Lespri Papa nou an ki va mete pawòl nan
 bouch nou. ²¹ Frè va denonse frè pou fè touye li. Papa va denonse pitit. Pitit va leve kont papa ak
 manman pou fè touye yo. ²² Tout moun pral rayi nou poutèt mwen. Men, moun ki va kenbe fèm
 jouk sa kaba, se yo ki va sove. ²³ Lè y'a pèsekite nou nan yon lavil, sove ale nan yon lòt. Sa m'ap
 di nou la a, se vre wi: Moun Bondye voye nan lachè a va gen tan vini anvan n'a fin mache nan tout
 lavil ki nan peyi Izrayèl la. ²⁴ Yon elèv pa pi fò pase mèl li. Nitou, yon domestik pa pi grannèg
 pase patwon li. ²⁵ Si yon elèv rive fò tankou mèl li, sa kont pou li; si yon domestik rive tankou
 patwon li, sa kont pou li. Si yo rele mèl kay la Bèlzeboul, se pa lòt moun nan kay la yo p'ap bay pi
 move non toujou! ²⁶ Se sak fè nou pa bezwen pè pesonn. Pa gen anyen ki kache ki p'ap dekouvri
 yon lè. Nanpwen sekre ki p'ap devwale. ²⁷ Tou sa m'ap di nou nan fènwa, nou menm repete l' gwo
 lajounen. Tou sa yo di nou nan zòrèy, mache bay li nan tout kalfou. ²⁸ Nou pa bezwen pè moun
 ki kapab touye kò nou, men ki pa kapab touye nanm nou. Se Bondye pou nou pè pito, paske li

menm li kapab detwi nanm nou ansanm ak tout kò nou nan lanfè.²⁹ Eske yo pa vann ti zwazo de
 pou senk kòb? Malgre sa, pa gen yon sèl ki tonbe atè san Papa nou pa konnen.³⁰ Pou nou menm
 menm, ata grenn cheve nan tèt nou, yo tout konte.³¹ Se sak fè, nou pa bezwen pè menm: nou vo
 pi plis pase anpil ti zwazo.³² Moun ki va kanpe pou mwen devan lèzòm, mwen menm tou, m'a
 kanpe pou li devan Papa m' ki nan syèl la.³³ Men tou, moun ki va kanpe devan lèzòm pou di li pa
 konnen m', mwen menm tou, m'a kanpe devan Papa m' ki nan syèl la, m'a di mwen pa konnen l'.
³⁴ Pa mete nan tèt nou se lapè mwen vin mete sou latè; mwen pa vin mete lapè, men mwen vin
 mete divizyon.³⁵ Mwen vin mete divizyon ant pitit gason ak papa yo, ant pitit fi ak manman yo,
 ant bèlfi ak bèlmè yo.³⁶ Se pwòp fanmi nou ki va pi gwo lènmi nou.³⁷ Moun ki renmen papa l'
 osinon manman l' plis pase m' pa kapab moun pa m'. Moun ki renmen pitit gason l' osinon pitit fi
 l' plis pase m' pa kapab moun pa m'.³⁸ Moun ki pa pran kwa l' pou l' swiv mwen, li pa kapab moun
 pa m' non plis.³⁹ Moun k'ap chache asire lavi l' va pèdi li. Men, moun ki va pèdi lavi l' poutèt
 mwen va jwenn li ankò.⁴⁰ Moun ki resevwa nou, se mwen menm li resevwa. Moun ki resevwa
 mwen, li resevwa moun ki voye m' lan tou.⁴¹ Moun ki resevwa yon pwofèt Bondye paske se
 pwofèt Bondye li ye, moun sa a va resevwa rekonpans yo bay yon pwofèt. Moun ki resevwa yon
 nonm k'ap mache dwat devan Bondye paske se yon moun dwat li ye, moun sa a va resevwa rekonpans
 yo bay yon moun k'ap mache dwat.⁴² Sa m'ap di nou la a, se vre wi: Nenpòt moun ki va bay yonn
 nan ti piti sa yo menm yon gode dlo frèt paske se disip mwen li ye, moun sa a p'ap pèdi rekonpans
 li.

Chapter 11

¹ ¶ Lè Jezi fin bay douz disip li yo tout lòd sa yo, li kite kote li te ye a, li pati, li ale nan lòt lavil
 peyi a. Li t'ap mache bay mesaj la, li t'ap moutre moun yo anpil bagay.² Antan Jan Batis te nan
 prizon, li tande pale travay Kris la t'ap fè. Li voye kèk patizan pa l' ale mande Jezi:³ Eske se ou ki
 moun nou konnen ki gen pou vini an, osinon èske nou dwe tann yon lòt?⁴ Jezi reponn yo: Ale
 rakonte bay Jan sa nou tande ak sa nou wè:⁵ Je avèg yo louvri, moun ki t'ap bwete yo mache byen,
 moun ki te gen maladi lalèp yo geri, moun ki te soudè yo tande, moun ki te mouri yo leve. Pòv yo

tande Bon Nouvèl la. ⁶ Benediksyon pou moun ki pa jwenn nan mwen okazyon pou tonbe nan
 peche. ⁷ ¶ Lè patizan Jan yo al fè wout yo, Jezi pran pale ak foul la sou Jan. Li di yo konsa: Sa nou
 te al wè nan dezè a? Yon pye wozo van t'ap souke? Non. ⁸ Men, kisa nou te al wè menm? Yon
 nonm abiye ak bèl rad? Ala, moun ki mete bèl rad, se kay wa a yo jwenn yo. ⁹ Manyè di m' kisa
 nou te al wè menm? Yon pwofèt? Wi, mwen menm mwen di nou: li pi plis pase yon pwofèt. ¹⁰ Men
 sa ki te ekri sou Jan: Men m'ap voye mesaj m' lan devan ou. Li va louvri chemen an devan pou
 ou. ¹¹ Sa m'ap di nou la a, se vre wi: Nan tout moun ki fèt sou latè pa gen yonn ki pi konsekan
 pase Jan Batis. Malgre sa, moun ki pi piti nan Peyi Wa ki nan syèl la, pi konsekan pase l'. ¹² Depi
 sou tan Jan Batis jouk jòdi a, Peyi Wa ki nan syèl la anba gwo goumen. Se moun ki konn goumen
 k'ap antre ladan l'. ¹³ Anvan Jan Batis te rive, tout pwofèt yo ansanm ak lalwa Moyiz la te pale sou
 Peyi Bondye a. ¹⁴ Si nou vle kwè l': Jan Batis se Eli ki te gen pou vini an. ¹⁵ Si nou gen zòrèy pou
 n' tande, tande. ¹⁶ ¶ Ak ki moun mwen ta konpare moun k'ap viv nan tan alèkile yo? Yo sanble
 timoun ki chita sou plas piblik, yonn ap rele lòt pou di l' konsa: ¹⁷ Nou jwe mizik cho pou nou ak
 fif nou, nou pa danse. Nou chante chante ki tris pou nou, nou pa kriye. ¹⁸ Jan Batis vini, li pa manje,
 li pa bwè, yo di li gen yon move lespri sou li. ¹⁹ Mwen menm, Moun Bondye voye nan lachè a,
 mwen vini, mwen manje, mwen bwè, yo di: Gade yon nonm! Se manje ak bwè ase li konnen! Se
 zanmi pèseptè kontribisyon ak moun k'ap fè sa ki mal li ye! Men tou, lè nou wè rezilta sa Bondye
 fè, nou rekonèt se li menm nan bon konprann li ki gen rezon. ²⁰ Lè sa a, Jezi pran fè moun lavil
 kote l' te fè pifò mirak li yo repwòch, paske yo pa t' tounen vin jwenn Bondye. ²¹ Li di yo: Malè
 pou nou, moun lavil Korazen! Malè pou nou moun lavil Betsayda! Paske, si mirak ki fèt nan mitan
 nou yo, se nan mitan lavil Tir ak lavil Sidon yo te fèt, gen lontan moun sa yo ta mete rad sak sou
 yo. Yo ta kouvri kò yo ak sann dife pou fè wè yo vle tounen vin jwenn Bondye. ²² Se poutèt sa
 m'ap di nou: Jou jijman an, y'a peni nou pi rès pase moun lavil Tir ak moun lavil Sidon yo. ²³ Nou
 menm tou, moun lavil Kapènawòm: nou ta vle yo leve nou jouk nan syèl la? Enben, y'a desann nou
 jouk anba kote mò yo ye a. Paske, si mirak ki fèt nan mitan nou yo, se nan mitan lavil Sodòm yo
 te fèt, li ta la jouk jòdi a. ²⁴ Se poutèt sa m'ap di nou: Jou jijman an, y'a peni nou pi rès pase moun
 lavil Sodòm yo. ²⁵ ¶ Lè sa a, Jezi di: O Papa, ou menm ki mèt syèl la ak tè a, mwen di ou mèsè
 anpil dapre bagay ou te kache nan je gwo save ak moun lespri yo ou devwale yo bay ti piti yo.
²⁶ Wi, Papa mwen, sa pase konsa paske se konsa ou te vle li. ²⁷ Papa m' renmèt mwen tout bagay.

Pesonn pa konn kilès moun Pitit la ye, esepite Papa a. Konsa tou, pesonn pa konn kilès moun Papa a ye, esepite Pitit la, ak moun Pitit la vle fè konnen li. ²⁸ Vini jwenn mwen, nou tout ki bouke, nou tout ki anba chay, m'a soulaje nou. ²⁹ Pran jouk mwen, mete l' sou zepòl nou. Pran leson nan men mwen. Paske mwen dou, mwen toujou soumèt mwen tout bon devan Bondye. Konsa, n'a viv ak kè ³⁰ poze. Paske, jouk m'ap ban nou an fasil pou pote, chay m'ap ban nou an pa lou.

Chapter 12

¹ ¶ Kèk jou apre sa, Jezi t'ap pase nan yon jaden ble. Se te yon jou repo. Disip li yo te grangou. Se konsa yo pran keyi grap ble, yo t'ap manje grenn yo. ² Lè farizyen yo wè sa, yo di l' konsa: Gade. Disip ou yo ap fè bagay lalwa nou pa pèmèt moun fè gwo jou repo. ³ Jezi reponn yo: Eske nou pa li sa David te fè yon jou li te grangou, li menm ak moun pa l' yo? ⁴ Li antre nan kay Bondye a, li pran pen yo te ofri bay Bondye a, li manje. Dapre lalwa nou an, ni li menm David ni moun ki te avè l' yo pa t' gen dwa manje pen sa yo. Se prèt yo sèlman ki gen dwa sa a. ⁵ Osinon, èske nou pa li sa ki ekri nan lalwa Moyiz la: Jou repo, prèt yo ki desèvis nan tanp lan pa respekte lalwa repo a, men yo pa koupab pou sa? ⁶ Enben, m'ap di nou sa: Isit la, gen yon bagay ki pi konsekan pase tanp lan. ⁷ Si nou te konnen sans pawòl sa yo ki nan Liv la: Mwen vle pou nou gen kè sansib, mwen pa bezwen ofrann bèt n'ap fè pou mwen yo, nou pa ta kondannen moun ki inonsan. ⁸ Paske, mwen menm, Moun Bondye voye nan lachè a, se mèt jou repo a mwen ye. ⁹ Jezi kite kote l' te ye a, li antre nan yonn nan sinagòg yo. ¹⁰ Te gen yon nonm ki te gen yon men pòk nan asanble a. Moun ki te la yo t'ap chache okasyon pou yo te ka di Jezi fè bagay ki mal. Se konsa yo mande l': Eske lalwa nou an pèmèt yo geri moun jou repo? ¹¹ Jezi reponn yo: Si yonn nan nou gen yon sèl mouton, si mouton sa a tonbe nan yon twou byen fon yon jou repo, èske li p'ap rale l' mete deyò? ¹² Bon. Eske yon moun pa vo pi plis pase yon mouton? Konsa nou wè, lalwa nou an pèmèt nou fè byen pou yon moun jou repo. ¹³ Lè sa a, li di nonm lan: Lonje men ou. Nonm lan lonje men li. Latou, men an vin byen tankou lòt la. ¹⁴ ¶ Farizyen yo soti nan sinagòg la, y al mete tèt yo ansanm pou wè ki jan pou yo fè touye Jezi. ¹⁵ Men, lè Jezi vin konn sa, li kite kote l' te ye a. Yon gwo foul moun t'ap mache deyè li. Li geri tout moun malad yo. ¹⁶ Men, li te pale sevè ak yo pou yo pa t' di

¹⁷ ki moun li te ye. Tou sa pase konsa, pou pawòl pwofèt Ezayi te di a te ka rive vre: ¹⁸ Bondye pale, li di konsa: Men sèvitè m' lan, se mwen menm ki chwazi li. Men moun mwen renmen anpil la. Li fè kè m' kontan anpil. m'a mete Lespri m' sou li, la fè tout nasyon yo konnen jijman mwen.

¹⁹ Li p'ap diskite ak pèsonn, li p'ap rele sou pèsonn. Yo p'ap janm tande l' fè diskou nan lari. ²⁰ Li p'ap fin kase pye wozo ki panche a. Li p'ap tenyen lanp ki prèt pou mouri a. L'ap fè sa konsa, jouk

²¹ tan li va fè jistis Bondye a kanpe nèt. Lè sa a, tout nasyon yo va mete espwa yo nan li. ²² ¶ Apre sa, yo mennen yon nonm bay Jezi. Nonm lan pa t' ka wè, li pa t' ka pale, paske li te gen yon move

²³ lespri sou li. Jezi geri nonm lan. Lamenn, nonm lan pale, li wè. Foul moun yo te sezi anpil. Yo

²⁴ t'ap di: Nou pa kwè se pitit David la sa? Lè farizyen yo tande sa, yo di: Si nou wè nonm sa a ap

²⁵ chase move lespri, se paske Bèlzeboul, chèf move lespri yo, ba l' pouvwa pou sa. Men, Jezi te konnen sa ki te nan tèt yo, li di yo: Yon peyi ki gen divizyon ladan l', pou moun yo ap goumen yonn ak lòt, peyi sa a la pou l' disparèt. Si gen divizyon nan yon lavil osinon nan yon fanmi, pou

²⁶ moun yo ap fè lagè yonn ak lòt, ni lavil sa a, ni fanmi sa a pa la pou lontan. Si Satan ap chase

²⁷ moun ki pou li yo, Satan ap goumen ak pwòp tèt li. Pouvwa Satan an pa la pou lontan. Si se Bèlzeboul ki ban m' pouvwa pou chase move lespri, patizan nou yo, ak ki pouvwa yo menm yo

²⁸ chase move lespri? Se poutèt sa, se yo menm menm k'ap ban nou tò. Men, si se avek Lespri Bondye m'ap chase move lespri yo, sa vle di pouvwa Gouvènman Bondye ki wa a gen tan rive sou

²⁹ nou. Pesonn pa ka antre lakay yon nonm vanyan pou vòlò byen l' yo, si li pa mare nonm vanyan

³⁰ an anvan. Lè li fin mare l', se atò la kapab piye kay la. Moun ki pa avèk mwen, se kont mwen

³¹ yo ye. Moun ki p'ap ede m' ranmase, se gaye y'ap gaye. Se poutèt sa, m'ap di nou: Bondye va padonnen moun tout peche yo va fè, tout move pawòl ki va soti nan bouch yo. Men, kanta moun

³² ki va pale mal sou Sentespri a, pa gen padon pou yo. Moun ki pale mal sou Moun Bondye voye nan lachè a, y'a padonnen l'. Men, moun ki pale mal sou Sentespri a, li p'ap jwenn padon ni koulye

³³ a, ni nan tan k'ap vini apre sa a. Si pyebwa a bon, l'ap bay bon donn. Si pyebwa a pa bon, li p'ap

³⁴ bay bon donn. Yo rekonèt kalite yon pyebwa sou donn li bay. Bann vèmen! nou twò mechan.

³⁵ Bon pawòl pa ka soti nan bouch nou. Sa ki nan kè yon moun, se sa ki soti nan bouch li. Yon nonm ki bon, se bon bagay ase li ka rale soti nan tou sa li genyen ki bon yo. Konsa tou, yon nonm

³⁶ ki mechan, se move bagay ase li ka rale soti nan tou sa li genyen ki move yo. M'ap di nou sa:

³⁷ Jou jijman an, moun gen pou rann kont pou tout pawòl yo di yo pa t' bezwen di. Paske, se dapre

³⁸ pawòl ou y'a jije ou: Se pawòl ou k'ap di si ou inonsan, osinon si ou koupab. ¶ Lè sa a, kèk

dirèktè lalwa ansanm ak kèk farizyen pran lapawòl. Yo di Jezi: Mèt, nou ta renmen wè ou fè yon
³⁹
mirak pou moutre se Bondye ki ba ou pouvwa sa a. Jezi reponn yo: Moun alèkile yo, atout yo
mechan, atout yo vire do bay Bondye, men y'ap mande mirak! Men, yo p'ap jwenn lòt mirak pase
⁴⁰
mirak pwofèt Jonas la. Menm jan Jonas te pase twa jou twa nwit nan vant gwo pwason an, konsa
⁴¹
tou Moun Bondye voye nan lachè a gen pou pase twa jou twa nwit anba tè. Jou jijman an, moun
lavil Neniv yo va leve kanpe, y'a fè kondannen moun alèkile yo. Paske yo menm, yo te tounen vin
jwenn Bondye lè Jonas te fè yo konnen mesaj li a. Men, isit la gen bagay ki pi konsekan pase Jonas.
⁴²
Jou jijman an, larenn peyi ki nan sid la va leve kanpe, la fè yo kondannen moun alèkile yo. Paske,
li te soti byen lwen, jouk nan dènnye bout latè, pou l' te vin tandè bèl pawòl bon konprann Salomon
⁴³
yo. Men, isit la gen bagay ki pi konsekan pase Salomon. Lè yon move lespri soti sou yon moun,
li al pwonmennen toupatou nan savann yo, l'ap chache yon kote pou l' pran repo. Men, li pa jwenn.
⁴⁴
Lè sa a, li di nan kè l': M'ap tounen lakay mwen, kote m' soti a. Lè l' rive, li jwenn nonm lan
⁴⁵
tankou yon kay ki vid, men byen bale, byen ranje. Lè konsa, li ale, li pran sèt lòt lespri ki pi
move pase l', lespri yo vin ansanm avè l', yo antre nan kay la, yo rete. Lè sa a, kondisyon moun lan
⁴⁶
vin pi mal pase jan l' te ye anvan an. Enben, se sa ki pral rive move moun k'ap viv alèkile yo. ¶
Jezi t'ap pale ak foul moun yo toujou lè manman l' ak frè l' yo vin rive. Yo rete deyò, yo t'ap chache
⁴⁷
yon jan pou yo te pale avè l'. Se konsa yon moun di Jezi: Men manman ou ak frè ou yo deyò a.
⁴⁸
Yo ta renmen pale avè ou. Men Jezi reponn moun ki te di l' sa a: Kilès ki manman m'? Kilès ki
⁴⁹
frè m'? Lè sa a, li lonje men l' sou disip li yo, li di: Gade non: men manman m' ak frè m' yo.
⁵⁰
Tout moun ki fè sa Papa m' ki nan syèl la mande pou yo fè, se moun sa yo ki frè m', ki sè m', ki
manman m'.

Chapter 13

¹ ¶ Menm jou sa a, Jezi soti nan kay la, li al chita bò lanmè a. ² Te sitèlman gen moun sanble
tout bò kote Jezi, li moute nan yon kannòt, li chita. Tout foul moun yo menm te rete kanpe sou rivaj
³
la. Li t'ap rakonte yo kèk parabòl pou l' te fè yo konprann anpil bagay. Li t'ap di yo konsa: Ala,
yon moun soti pou l' ale simen grenn nan jaden l'. ⁴ Antan l'ap simen grenn yo, kèk grenn tonbe
⁵
bò chemen an: zwazo vini, yo manje yo. Yon pati grenn tonbe nan mitan wòch, kote ki pa t' gen

anpil tè. Grenn sa yo leve byen vit, paske yo pa t' antre fon anba tè a. ⁶ Men, lè solèy la chofe, li
 boule ti plant yo, yo cheche, paske rasen yo pa t' fon. ⁷ Yon lòt pati tonbe nan mitan pikan. Pikan
 yo grandi, yo toufe bon ti plant yo. ⁸ Men, yon lòt pati ankò tonbe nan bon tè; yo donnen. Genyen
 ki bay san grenn, lòt bay swasant, lòt bay trant. ⁹ Apre sa, Jezi di yo: Si nou gen zòrèy pou n' tande,
 tande. ¹⁰ Disip yo pwoche bò kot Jezi, yo mande li: Poukisa ou pale an parabòl ak moun yo? ¹¹ Jezi
 reponn yo: Nou menm, Bondye fè nou favè sa a pou nou konnen sekrè Peyi Wa ki nan syèl la. Men
 yo menm, yo pa resevwa favè sa a. ¹² Paske, moun ki genyen deja a, y'a ba li ankò. Konsa, la gen
 plis pase sa l' bezwen an. Men, moun ki pa gen anyen an, y'a wete nan men l' nimm ti sa l' te genyen
 an. ¹³ Se poutèt sa m'ap pale an parabòl ak moun sa yo. Paske, lè y'ap gade yo pa wè, lè y'ap koute
 yo pa tande, ni yo pa konprann. ¹⁴ Konsa, sa pwofèt Ezayi te di a rive vre pou yo: n'a tande nan
 zòrèy nou, men, nou p'ap konprann. n'a gade ak je nou, men, nou p'ap wè. ¹⁵ Paske, lespri pèp sa
 a vin lou. Yo bouche zòrèy yo, yo fèmen je yo, pou yo pa wè ak je yo, pou yo pa tande nan zòrèy
 yo, pou yo pa konprann ak lespri yo, pou yo pa tounen vin jwenn mwen pou m' geri yo. Se Bondye
 ki pale konsa. ¹⁶ Men, pou nou menm, benediksyon pou nou: paske nou wè ak je nou, nou tande
 nan zòrèy nou. ¹⁷ Sa m'ap di nou la a, se vre wi: Anpil pwofèt ak anpil moun ki mache dwat devan
 Bondye te anvi wè sa n'ap wè la a, men yo pa t' wè li. Yo te anvi tande sa n'ap tande la a, men yo
 pa t' tande li. ¹⁸ Koulye a, koute. Men sa parabòl moun ki t'ap simen an vle di. ¹⁹ Moun ki tande
 pawòl ki pale sou Peyi Wa a men ki pa konprann li, yo sanble ak tè bò chemen an, kote kèk grenn
 te tonbe: Satan vini, li rache pawòl ki te simen nan kè yo a. ²⁰ Gen lòt ki tankou tè ki gen anpil
 wòch la. Lè yo fèk tande pawòl la, yo resevwa l' ak kè kontan. ²¹ Men, yo pa kite l' pouse rasen
 nan kè yo. Yo pa kenbe l' pou lontan. Lè yo tonbe anba tè chaje ak pèsèkisyon akòz pawòl Bondye
 a, lamenm yo jwenn okazyon pou yo tonbe nan peche. ²² Gen lòt ankò ki resevwa pawòl la tankou
 grenn ki tonbe nan mitan pikan. Yo tande pawòl la, men traka lavi ak anvi gen lajan, tou sa toufe
 pawòl la, kifè yo pa ka bay anyen menm. ²³ Moun ki resevwa pawòl la tankou grenn ki tonbe nan
 bon tè a, se moun ki konprann pawòl la lè yo tande li. Lè sa a, yo donnen. Gen ladan yo ki bay san,
 yon lòt bay swasant, yon lòt bay trant. ²⁴ ¶ Jezi ba yo yon lòt parabòl ankò. Li di yo konsa: Peyi
 Wa ki nan syèl la, se tankou yon moun ki te simen bon grenn nan jaden li. ²⁵ Men, yon jou lannwit,
 pandan tout moun t'ap dòmi, yon lènmi nonm lan vini, li simen move zèb nan mitan mayi yo. Apre
 sa, li ale. ²⁶ Lè mayi yo fin pouse, yo pran jete zepi. Lè sa a, move zèb la parèt tou. ²⁷ Moun ki
 t'ap travay ak mèt jaden an vin di li: Mèt, se pa bon grenn ase nou te simen nan jaden ou lan? Kote

²⁸ move zèb sa yo soti? Li reponn yo: Se yon lènmi m' ki fè sa. Travayè yo mande li: Ou pa ta vle
²⁹ n' al rache move zèb yo? Li di yo: Non, poko fè sa. Paske, antan n'ap rache move zèb yo, nou
³⁰ ka derasinen mayi a avèk yo tou. Kite yo grandi ansanm jouk lè rekòt la va rive. Lè sa a, m'a di
moun k'ap ranmase rekòt la: Rache move zèb yo anvan. Mare yo fè pakèt pou n' al boule. Mayi a
³¹ menm, mete l' nan galata mwen. Li ba yo yon lòt parabol ankò. Li di yo konsa: Peyi Wa ki nan
³² syèl la, se tankou yon ti grenn moutad yon nonm pran pou li al simen nan jaden li. Grenn moutad,
se grenn ki pi piti nan tout grenn ki genyen. Men, lè l' pouse, li pi gwo pase tout plant menm kalite
³³ avèk li. Li vin yon gwo pyebwa. Se konsa zwazo nan syèl la vin fè nich nan branch li yo. Li di
yo yon lòt parabol ankò: Peyi Wa ki nan syèl la, se tankou ledven yon fanm pran, li mete nan senk
³⁴ mezi farin pou fè tout pa t' la leve. Se avèk parabol konsa Jezi t'ap moutre foul moun yo tout
³⁵ bagay sa yo. Li pa t' louvri bouch li pou l' pa t' rakonte yo yon parabol. Sa te pase konsa pou
pawòl pwofèt la te di a te ka rive vre: Se an parabol m'ap pale ak yo. m'a fè yo konnen bagay ki te
³⁶ kache depi anvan Bondye te kreye latè. Apre sa, Jezi kite foul moun yo dèyè, li antre nan kay
³⁷ la. Disip li yo pwoche bò kote l', yo di l' konsa: Esplike nou parabol move zèb nan jaden an. Li
³⁸ reponn yo: Moun ki simen bon grenn lan, se Moun Bondye voye nan lachè a. Jaden an se latè.
³⁹ Bon grenn yo, se moun ki fè pati Peyi Wa a. Move zèb yo, se moun ki patizan Satan. Lènmi ki
simen move zèb yo, se Satan. Sezon rekòt la, se lè tout bagay va fini nèt la. Moun k'ap ranmase
⁴⁰ rekòt la, se zanj Bondye yo. Menm jan yo te rache move zèb yo pou jete yo nan dife a, se konsa
⁴¹ tou sa pral rive, lè tout bagay va fini. Moun Bondye voye nan lachè a va voye zanj li yo pou yo
wete tout moun k'ap fè lòt moun fè peche, ansanm ak moun k'ap fè sa ki mal. y'a mete yo deyò nan
⁴² Peyi kote l' Wa a. Zanj yo va jete yo nan gwo founo k'ap boule a. Se la va gen rèl, se la moun
⁴³ va manje dan yo. Men, lè sa a, moun ki te mache dwat devan Bondye yo va klere tankou solèy
⁴⁴ nan peyi Papa yo ki Wa a. Si nou gen zòrèy pou n' tande, tande. Parabol ja lajan an ¶ Peyi Wa
ki nan syèl la, se tankou yon ja lajan ki te anba tè nan yon jaden. Yon nonm rive jwenn li, li kouvri
⁴⁵ l' ankò. Li sitèlman kontan, li ale, li vann tou sa l' genyen, li tounen vin achte jaden an. Peyi Wa
⁴⁶ ki nan syèl la, se tankou yon machann k'ap chache bèl grenn pèl. Lè li jwenn yon bèl grenn pèl
⁴⁷ ki chè anpil, li ale, li vann tou sa l' genyen pou l' ka achte li. Peyi Wa ki nan syèl la, se tankou
⁴⁸ yon privye yo voye nan lanmè. Li pran tout kalite pwason. Lè li fin plen, pechè pwason yo rale

l' sou bò rivaj la. Yo chita, yo triye pwason yo: yo mete bon pwason yo nan panyen, yo jete sa ki pa bon yo nan lanmè ankò. ⁴⁹ Se konsa sa pral rive tou lè tout bagay va fini. Zanj Bondye yo va vini, y'ap mete mechan yo yon bò, moun ki fè sa ki byen yo yon bò. ⁵⁰ y'a jete mechan yo nan gwo founo k'ap boule a. Se la va gen rèl, se la moun va manje dan yo. ⁵¹ Jezi mande disip li yo: Eske nou konprann tou sa? Yo reponn: Wi. ⁵² Lè sa a, Jezi di yo: Se konsa, tout dirèktè lalwa ki tounen yon disip nan Peyi Wa ki nan syèl la ap tankou yon mèt kay k'ap rale met deyò bagay li fenk achte ak bagay li gen depi lontan nan byen l' yo. ⁵³ ¶ Lè Jezi fin di parabòl sa yo, li kite kote l' te ye a. ⁵⁴ li ale nan lavil kote l' te grandi a. Li t'ap moutre moun yo anpil bagay nan sinagòg la. Tout moun ki t'ap koute l' te sezi anpil. Yo t'ap di konsa: Ki bò li pran konesans sa a! Kouman li fè fè tout mirak sa yo? ⁵⁵ Se pa pitit bòs chapant lan? Se pa Mari ki manman li? Se pa frè Jak, Jozèf, Simon ak Jid li ye? ⁵⁶ Apa tout sè l' yo la avèk nou. Kote l' jwenn tout bagay sa yo? ⁵⁷ Se sak fè yo te jwenn nan li okazyon tonbe nan peche. Lè sa a, Jezi di yo: Yon pwofèt jwenn respè toupatou, esepite nan peyi l' ak nan fanmi li. ⁵⁸ Se konsa Jezi pa t' fè anpil mirak la, paske yo pa t' kwè nan li.

Chapter 14

¹ ¶ Lè sa a, Ewòd ki t'ap gouvènen nan peyi Galile tandè pale sou Jezi. ² Li di moun ki t'ap travay avè l' yo: Se Jan Batis wi! Se li ki leve vivan nan lanmò. Se poutèt sa li ka fè tout mirak sa yo. ³ Se Ewòd menm ki te fè arete Jan Batis. Li te fè mare l' mete nan prizon poutèt Ewodyad, madanm Filip, frè li. ⁴ Paske Jan te di Ewòd konsa: Ou pa gen dwa pran Ewodyad pou madanm ou. ⁵ Ewòd te vle touye l', men li te pè jwif yo, paske yo tout te pran Jan Batis pou yon pwofèt. ⁶ Men, jou fèt Ewòd la, pitit fi Ewodyad la t'ap danse devan tout envite yo. Sa te fè Ewòd plezi anpil. ⁷ Lè sa a, Ewòd sèmante l'ap ba li nenpòt kisa li ta mande li. ⁸ Pitit fi Ewodyad la menm koute konsèy manman l' te ba li, li di Ewòd: Fè pote tèt Jan Batis ban mwen koulye a sou yon plato. ⁹ Kè wa a kase. Men, akòz gwo sèman li te fè devan tout envite yo, li bay lòd pou yo bay fi a sa l' te mande a. ¹⁰ Se konsa, Ewòd voye koupe tèt Jan Batis nan prizon an. ¹¹ Yo pote tèt la vini sou yon plato, yo renmèt fi a li. Fi a menm pote l' bay manman li. ¹² Patizan Jan Batis yo vin pran kò a, yo antere li. Apre sa, y al di Jezi sa ki te pase. ¹³ ¶ Lè Jezi pran nouvèl sa a, li pati nan yon

kannòt. Li te vle al yon kote ki pa gen moun pou l' te ka pou kont li. Men, moun yo vin konn sa.
 Yo kouri soti nan tout lavil yo, yo pran mache sou rivaj la ap swiv li. ¹⁴ Lè Jezi desann soti nan
 kannòt la, li wè tout foul moun yo. Kè l' fè l' mal pou yo, li pran geri moun malad yo. ¹⁵ Lè solèy
 fin kouche, disip Jezi yo pwoche bò kote l', yo di l' konsa: Li fin ta wi. Pa gen moun ki rete bò isit
 la. Voye moun yo ale pou yo ka achte manje nan bouk yo. ¹⁶ Jezi reponn yo: Yo pa bezwen ale.
 Ba yo manje nou menm. ¹⁷ Men yo di li: Se senk pen ak de pwason ase nou gen la a. ¹⁸ Jezi di
 yo: Pote yo ban mwen. ¹⁹ Apre sa, li bay lòd fè moun yo chita sou zèb la. Li pran senk pen yo ak
 de pwason yo, li leve je l' nan syèl la, li di Bondye mèsi. Li kase pen yo, li bay disip yo. Disip yo
 menm mache bay tout moun. ²⁰ Tout moun manje vant plen. Apre sa, disip yo plen douz panyen
 ak ti moso ki te rete, yo pote ale. ²¹ Te gen senkmil (5,000) gason konsa ki te jwenn manje pou yo
 manje, san konte fanm ak timoun. ²² ¶ Touswit apre sa, Jezi fè disip li yo moute nan kannòt la, li
 voye yo devan lòt bò lanmè a. Li menm, li te rete dèyè pou l' te voye moun yo ale. ²³ Lè li fin voye
 yo ale, li moute pou kont li sou yon ti mòn pou l' lapriyè. Solèy te fin kouche, li te la toujou pou
 kont li. ²⁴ Kannòt la menm te gen tan yon bon distans sou lanmè a. Men, lanm yo t'ap bat li, paske
 van an te kontrè pou yo. ²⁵ Douvan jou, Jezi pran mache sou dlo a pou li al jwenn yo. ²⁶ Lè disip
 yo wè l' ap mache sou dlo a, yo te pè anpil, yo t'ap di: Se yon revenan. Yo pran rele tèlman yo te
 pè. ²⁷ Menm lè a, Jezi di yo: Pran tèt nou. Se mwen menm. Nou pa bezwen pè. ²⁸ Lè sa a, Pyè di
 li: Mèt, si se ou menm vre, di m' vin jwenn ou sou dlo a. ²⁹ Jezi di li: Vini non. Pyè soti nan kannòt
 la, li kòmanse mache sou dlo a pou li al jwenn Jezi. ³⁰ Men, lè Pyè wè jan van an te fò, li pè. Lè
 sa a, li kòmanse koule, li pran rele: Mèt, sove m' non! ³¹ Menm lè a, Jezi lonje men l', li pran Pyè,
 li di li: Gade jan ou manke konfyans. Poukisa ou pa te fin kenbe konfyans ou nèt? ³² Yo tou de
 moute nan kannòt la, lamenm van an kase. ³³ Lè sa a, moun ki te nan kannòt la vin mete ajenou
 devan Jezi, yo di: Ou se pitit Bondye a vre. ³⁴ ¶ Lè yo fin janbe lòt bò lanmè a, yo fè tè nan peyi
 Jenezarèt. ³⁵ Moun peyi a rekonèt Jezi, yo voye nouvèl la nan tout rejyon an. Yo mennen tout
 malad yo ba li. ³⁶ Yo di Jezi: Tanpri souple, kite malad yo manyen bò rad ou ase. Tout moun malad
 ki te manyen rad li te geri.

Chapter 15

¹ ¶ Lè sa a, kèk farizyen ak dirèktè lalwa soti Jerizalèm, yo vin bò kot Jezi. Yo di li: ² Poukisa
³ disip ou yo pa swiv koutim granmoun lontan yo? Gade. Yo pa lave men yo anvan yo manje. Li
 reponn yo: Nou menm k'ap pale a, poukisa n'ap plede dezobeyi kòmandman Bondye yo pou nou
⁴ swiv koutim pa nou yo? Tande byen. Bondye di nou konsa: Respekte papa ou ak manman ou. Li
⁵ di ankò: Si yon moun pale papa l' osinon manman l' mal, se pou yo touye l'. Men nou menm, nou
 di: Si yon moun di papa l' osinon manman l': Sa m' ta gen pou m' ba ou a, m' ofri l' bay Bondye,
⁶ moun sa a pa bezwen fè anyen pou papa l' osinon pou manman l'. Se konsa, avèk koutim nou yo,
 nou fè pawòl Bondye a pase pou anyen menm. ⁷ Bann ipokrit! Ezayi te gen rezon lè l' t'ap pale sou
⁸ nou, jan sa ekri a: Se nan bouch pèp sa a respekte mwen. Men, kè yo byen lwen mwen. ⁹ Se tan
 yo y'ap pèdi, lè y'ap fè sèvis pou mwen. Paske, nan sa y'ap di, se pawòl lèzòm y'ap moutre moun.
¹⁰ ¶ Apre sa, li rele fowl moun yo, li di yo: Koute byen sa m'ap di nou la a, manyè konprann sa:
¹¹ Se pa bagay ki antre nan bouch yon moun ki ka mete l' nan kondisyon pou l' pa ka sèvi Bondye.
 Men se sak soti nan bouch li ki ka mete l' nan kondisyon sa a. ¹² Lè sa a, disip li yo pwoche bò
¹³ kote l', yo di l' konsa: Ou konnen farizyen yo ofiske poutèt sa ou sot di la a. Jezi reponn yo: Si
¹⁴ se pa Papa m' nan syèl la ki plante yon plant, yo gen pou yo derasinen li. Pa okipe yo! Se yon
 bann avèg k'ap mennen avèg parèy yo. Si yon avèg ap mennen yon lòt avèg, tou de gen pou tonbe
¹⁵ nan menm twou a. Pyè pran lapawòl, li di Jezi konsa: Esplike nou parabòl sa a non. ¹⁶ Jezi di:
¹⁷ Nou menm tou, nou san konprann toujou! Nou pa konprann pawòl sa a: Tout bagay ki antre nan
¹⁸ bouch yon moun, sa pase nan vant li. Apre sa, li soti deyò. Men, bagay ki soti nan bouch yon
 moun, se nan kè l' sa soti. Se bagay konsa ki mete yon moun nan kondisyon pou l' pa ka sèvi Bondye.
¹⁹ Se nan kè l' tout move lide soti, lide touye moun, lide fè adiltè ak tout lòt bagay ki pa dakò ak
²⁰ volonte Bondye tankou lide vòlò, lide fè manti sou moun, lide bay manti. Se bagay sa yo ki
 mete yon moun nan kondisyon pou l' pa ka sèvi Bondye. Men, keksyon manje san lave men, jan
²¹ yo di l' la, sa pa ka mete yon moun nan kondisyon pou l' pa ka sèvi Bondye. ¶ Jezi kite kote l'
²² te ye a, li ale nan zòn lavil Tir ak lavil Sidon. Se konsa, yon fanm, moun peyi Kanaran ki t'ap
 viv nan zòn lan, vin jwenn li. Li pran rele: Mèt, pitit wa David la, pitye pou mwen. Pitit fi m' lan

²³
 gen yon move lespri sou li k'ap fatigue l' anpil. Men, Jezi pa okipe li menm. Disip li yo pwoche
 bò kote l', yo di l' konsa: Fè l' ale non. Paske, l'ap mache dèyè nou, l'ap plede rele nan zòrèy nou.
²⁴ Jezi reponn: Se sèlman pou moun ki pèdi nan ras Izrayèl la yo voye mwen. ²⁵ Men, fanm lan
 vini, li lage kò l' nan pye Jezi, li di li konsa: Mèt, fè kichòy pou mwen non. ²⁶ Jezi reponn li: Sa
 pa bon pou m' wete pen nan bouch timoun yo pou m' jete l' bay chen. ²⁷ Lè sa a fanm lan di li: Se
 vre wi, Mèt. Men, chen manje ti kal pen ki tonbe anba tab mèt li. ²⁸ Lè sa a, Jezi di li: Madanm.
²⁹
 Ou gen konfyans anpil. Tout bagay ap pase pou ou jan ou vle l' la. Menm lè a, pitit fi l' la geri. ¶
³⁰
 Jezi kite kote l' te ye a, li mache sou bò lanmè Galile a. Li moute sou yon ti mòn, li chita la. Yon
 bann moun vin jwenn li. Yo mennen moun k'ap bwete, moun ki avèg, bèbè, enfim ansanm ak anpil
³¹
 lòt moun malad ankò. Yo mete yo nan pye Jezi. Jezi geri yo. Foul moun yo te sezi anpil lè yo
 wè sa: bèbè yo pale, enfim yo geri, moun k'ap bwete yo mache dwat, avèg yo wè. Lè sa a, yo pran
³²
 fè lwanj Bondye pèp Izrayèl la. Jezi rele disip li yo, li di: Kè m' fè m' mal pou moun sa yo. Sa
 fè twa jou depi yo la avè m', yo pa gen anyen pou yo manje ankò. Mwen pa vle voye yo ale konsa
³³
 san manje. Yo ka tonbe feblès nan chemen an. Disip yo mande li: Nan dezè sa a, ki bò pou nou
³⁴
 jwenn pen pou bay tout moun sa yo manje? Jezi mande yo: Konbe pen nou gen konsa? Yo
³⁵
 reponn li: Nou gen sèt pen ak kèk ti pwason. Lè sa a, Jezi fè foul moun yo chita atè. ³⁶ Li pran
 sèt pen yo ak pwason yo, li di Bondye mèsè, li kase yo an moso, li renmèt yo bay disip li yo. Disip
³⁷
 yo menm mache bay tout moun. Tout moun te manje plen vant yo. Disip yo plen sèt panyen
³⁸
 pote ale ak moso ki te rete yo. Te gen antou katmil (4.000) gason ki te jwenn manje pou yo
³⁹
 manje, san konte fanm ak timoun. Apre sa, Jezi voye foul moun yo ale, li menm li moute nan
 kannòt la, li ale nan yon peyi yo rele Magadan.

Chapter 16

¹
 ¶ Farizyen yo ak sadiseyen yo pwoche bò kot Jezi. Yo te vle pran l' nan pèlen. Yo mande l'
²
 pou l' fè yon mirak ki pou moutre se Bondye ki ba l' tout pouvwa sa a. Jezi reponn yo: Lè solèy
 la pral kouche, nou di: Gade jan syèl la wouj, tan an pral bèl. Nan granmaten nou di: Jòdi a l'ap fè
³
 lapli. Gade jan syèl la kouvri, li tou wouj. Nou konn ki sans pou nou bay bagay k'ap pase nan

syèl la. Poukisa, atò, nou pa konn ki sans pou nou bay bagay k'ap pase sou latè koulye a? ⁴ Moun alèkile yo, atout yo mechan, atout yo vire do bay Bondye, men y'ap mande mirak! Men tou, yo p'ap jwenn lòt mirak pase mirak Jonas la. Apre sa, li vire do l', li al fè wout li. ⁵ ¶ Lè disip yo janbe lòt bò lanmè a, yo te bliye pote pen. ⁶ Lè sa a, Jezi di yo: Fè atansyon, pran prekosyon nou avèk ledven farizyen yo ansanm ak ledven sadiseyen yo. ⁷ Disip yo yonn t'ap di lòt: Se paske nou pa pote pen kifè l'ap di sa. ⁸ Jezi vin konnen sa yo t'ap di konsa. Li mande yo: Poukisa nou yonn ap di lòt se paske nou pa pote pen kifè m'ap di sa? Ala nou manke konfyans nan Bondye! ⁹ Nou poko ka konprann toujou! Se bliye nou gen tan bliye lè m' te separe senk pen bay senkmil (5.000) moun lan? Nou pa chonje konbe panyen nou te pote ale? ¹⁰ Se bliye nou gen tan bliye lè m' te separe sèt pen bay katmil (4.000) moun lan? Nou pa chonje konbe panyen nou te pote ale apre sa? ¹¹ Ki jan nou fè konprann se sou pen mwen t'ap pale nou, lè mwen di nou: pran prekosyon nou ak ledven farizyen yo ansanm ak ledven sadiseyen yo? ¹² Se lè sa a disip yo konprann li pa t' di yo pran prekosyon ak ledven yo fè pen, men ak tout bagay farizyen yo ak sadiseyen yo t'ap moutre moun. ¹³ ¶ Apre sa, Jezi ale nan rejyon ki toupre lavil Sezare Filip la. Li mande disip li yo: Ki moun yo di mwen ye, mwen menm, Moun Bondye voye nan lachè a? ¹⁴ Yo reponn li: Gen moun ki di se Jan Batis ou ye. Gen lòt ki di ou se Eli. Gen lòt ankò ki di ou se Jeremi osinon yonn nan pwofèt yo. ¹⁵ Li di yo: Bon, nou menm, ki moun nou di mwen ye? ¹⁶ Simon Pyè reponn: Ou se Kris la, Pitit Bondye vivan an. ¹⁷ Lè sa a, Jezi di li: Ou wè ou menm, Simon, pitit Jan an, ou se yon nonm Bondye beni. Paske, se pa moun ki fè ou konn verite sa a. Men, se Papa m' ki nan syèl la ki fè sa pou ou. ¹⁸ Mwen menm, men sa m'ap di ou: Ou se yon wòch, Pyè. Se sou wòch sa a m'ap bati legliz mwen. Ata lanmò p'ap kapab fè l' anyen. ¹⁹ M'ap ba ou kle Peyi Wa ki nan syèl la. Tou sa ou va defann moun fè sou latè, yo p'ap kapab fè l' nan syèl la non plis. Tou sa ou va pèmèt moun fè sou latè, y'a kapab fè l' nan syèl la tou. ²⁰ Apre sa, li bay disip li yo lòd pou yo pa di pesonn se Kris la li ye. ²¹ ¶ Depi lè sa a, Jezi kòmanse pale aklè ak disip li yo, li di: Fòk mwen moute lavil Jerizalèm. Fòk mwen soufri anpil nan men chèf fanmi yo, nan men chèf prèt yo, nan men dirèkte lalwa yo. Y'ap fè yo touye mwen. Men, sou twa jou, mwen gen pou m' leve soti vivan nan lanmò. ²² Lè sa a, Pyè rele Jezi sou kote, li di l' konsa: Mande Bondye padon, Mèt! Sa p'ap rive ou. ²³ Men, Jezi vire tèt li, li di Pyè konsa: Wete kò ou sou mwen, Satan. W'ap chache fè m' tonbe. Lide ou pa sou sa Bondye vle, men sou sa lèzòm ta vle. ²⁴ ¶ Apre sa, Jezi di disip li yo: Si yon moun vle mache

dèyè m', se pou li bliye tèt li. Se pou l' chaje kwa l' sou zepòl li, epi swiv mwen. ²⁵ Paske, moun ki ta vle sove lavi l' va pèdi li. Men, moun ki va pèdi lavi l' poutèt mwen, li va jwenn li ankò.

²⁶ Kisa sa ta sèvi yon moun pou l' ta genyen lemond antye si l' pèdi lavi li? Kisa yon moun kapab

bay pou l' gen lavi? ²⁷ Konprann sa byen, Moun Bondye voye nan lachè a gen pou l' tounen ak zanj li yo, nan tout bèl pouvwa Papa l' la. Lè sa a, li va bay chak moun sa yo merite dapre sa yo fè.

²⁸ Sa m'ap di nou la a, se vre wi: Nan moun ki la koulye a, gen ladan yo ki p'ap gen tan mouri san yo pa wè Moun Bondye voye nan lachè a tounen tankou yon wa k'ap gouvènè.

Chapter 17

¹ ¶ Sis jou apre sa, Jezi pran Pyè, Jak ak Jan, frè Jak la, li mennen yo pou kont yo sou tèt yon mòn byen wo. ² Antan Jezi te la, li pran chanje devan yo. Figi l' vin klere tankou solèy la. Rad li

vin blan tankou yon limyè. ³ Twa disip yo wè Moyiz ak Eli parèt, yo t'ap pale ak Jezi. ⁴ Lè sa a, Pyè pran lapawòl, li di Jezi konsa: Met, sa bon nèt pou nou isit la. Si ou vle, m'ap moute twa ti kay,

yonn pou ou, yonn pou Moyiz ak yonn pou Eli. ⁵ Antan Pyè t'ap pale toujou, yon nwaj byen klere vin kouvri yo. Yo tandè yon vwa soti nan nwaj la, li di: Sa se pitit mwen renmen anpil la. Li fè kè

m' kontan anpil. Koute li. ⁶ Lè disip yo tandè vwa a yo tonbe fas atè tèlman yo te pè. ⁷ Men, Jezi

pwoche bò kote yo, li manyen yo, li di: Leve non, nou pa bezwen pè. ⁸ Yo leve je yo, yo wè Jezi

te pou kont li. ⁹ Antan yo t'ap desann mòn lan, Jezi ba yo lòd sa a: Pa pale ak pesonn sou sa nou

sot wè a, jouk mwen menm, Moun Bondye voye nan lachè a, m'a leve soti vivan nan lanmò. ¹⁰ Twa

disip yo poze l' keksyon sa a: Poukisa dirèktè lalwa yo di se pou Eli vin anvan? ¹¹ Jezi reponn yo:

Se vre. Eli gen pou l' vin anvan, pou l' mete tout bagay nan lòd. ¹² Men, m'ap di nou sa: Eli vin deja. Men, yo pa t' rekonèt li, yo fè l' tou sa yo te vle. Se onsa tou, yo gen pou yo maltrete Moun

Bondye voye nan lachè a. ¹³ Lè sa a, disip yo vin konprann li t'ap pale yo sou Jan Batis. ¹⁴ ¶ Lè

yo rive kote foul moun yo, yon nonm pwoche bò kot Jezi, li lage kò l' ajenou devan l', li di: ¹⁵ Mèt, gen pitye pou pitit gason m' lan. Li gen malkadi. Lè ou tandè kriz la pran l' konsa, anpil fwa li tonbe

nan dife osinon nan dlo. ¹⁶ Mwen mennen l' bay disip ou yo, men yo pa t' kapab geri li. ¹⁷ Jezi reponn: Ala moun san konfyans nan Bondye! Ala move moun! Jouk kilè pou m' rete nan mitan

nou? Jout kilè pou m' sipòte nou? Mennen ti gason an isit ban mwen. ¹⁸ Jezi pale sevè ak move
 lespri a. Lespri a soti. Menm lè a, ti nonm lan geri. ¹⁹ Apre sa, disip yo pwoche bò kot Jezi, yo
 mande l' apa: Poukisa nou pa t' kapab chase move lespri sa a? ²⁰ Jezi di yo: Se paske nou manke
 konfyans nan Bondye. Sa m'ap di nou la a, se vre wi: si nou te gen konfyans nan Bondye gwosè
 yon ti grenn moutad, nou ta di ti mòn sa a: wete kò ou la, al laba, li ta chanje plas. Pa gen anyen
 nou pa ta kapab fè. ²¹ Men, kalite lespri sa yo, se fòs lapriyè ak jèn ki pou fè yo soti. ²² ¶ Yon jou,
 antan tout disip yo te la ansanm nan peyi Galile, Jezi di yo: Mwen menm, Moun Bondye voye nan
 lachè a, mwen gen pou m' tonbe anba men lèzòm. ²³ Yo pral touye m', men sou twa jou, m'ap leve
 soti vivan nan lanmò. Sa te fè disip yo lapenn anpil. ²⁴ ¶ Lè Jezi rive Kapènawòm ak disip li yo,
 moun ki t'ap ranmase lajan taks pou tanp lan pwoche bò kot Pyè, yo mande li: Eske mèt ou a peye
 lajan taks pou tanp lan? ²⁵ Pyè di: Li peye wi. Antan Pyè ap antre nan kay la, anvan li louvri bouch
 li, Jezi di l': Sa ou konprann nan sa, Simon? Ki moun ki gen pou peye dwa ak taks bay leta? Sitwayen
 peyi a, osinon etranje? ²⁶ Pyè reponn li: Etranje yo. Lè sa a, Jezi di li: Si se konsa, sitwayen yo
 egzan. ²⁷ Men, nou pa vle bay move egzanp: Ale bò lanmè a, voye yon zen nan dlo a. Rale premye
 pwason ki va mòde ladan l' lan. Louvri bouch li, wa jwenn yon pyès lajan, mezi pou peye taks pa
 m' ak taks pa ou. Pran l', al peye pou nou de.

Chapter 18

¹ ¶ Lè sa a, disip yo pwoche bò kote Jezi, yo mande li: Ki moun ki pi grannèg nan Peyi Wa ki
 nan syèl la? ² Jezi rele yon timoun, li mete l' nan mitan yo. ³ Li di: Sa m'ap di nou la a, se vre wi:
 Si nou pa chanje, si nou pa tounen tankou yon timoun piti, nou p'ap janm ka mete pye nou nan Peyi
 Wa ki nan syèl la. ⁴ Se poutèt sa, moun ki va soumèt tèt li devan Bondye, ki va tounen tankou
 timoun sa a, se li ki va pi grannèg nan Peyi Wa ki nan syèl la. ⁵ Nenpòt moun ki resevwa yon
 timoun tankou timoun sa a, se mwen menm li resevwa. ⁶ Kanta moun ki fè yonn nan timoun sa yo
 ki kwè nan mwen tonbe nan peche, li ta pi bon pou li si yo ta mare yon gwo wòl moulen nan kou
 l' voye l' jete nan fon lanmè. ⁷ ¶ Ala yon lapenn pou lèzòm! Pa manke bagay ki pou fè yo tonbe
 nan peche! Wi! se vre, bagay sa yo ap toujou la. Men, malè pou moun ki lakòz bagay sa yo rive!
⁸ Si se men ou osinon pye ou ki pou ta fè ou tonbe nan peche, koupe l' voye jete byen lwen ou. Pito
 ou antre nan lavi a ak yon sèl men osinon ak yon sèl pye, pase pou ou rete ak de men ou osinon ak

de pye ou, epi pou yo jete ou nan dife ki p'ap janm fini an. ⁹ Si se je ou ki pou ta fè ou tonbe nan peche, rache li voye jete byen lwen ou. Pito ou antre nan lavi a ak yon sèl grenn je, pase pou ou rete ak tou de je ou epi pou yo jete ou nan dife lanfè a. ¹⁰ Atansyon: Piga nou meprize yon sèl nan ti piti sa yo. Paske m'ap di nou sa: zanj gadyen yo ki nan syèl la, se tout tan yo la devan Papa m' ki nan syèl la. ¹¹ Paske, Moun Bondye voye nan lachè a vin delivre sa ki te pèdi. ¹² Sa nou konprann nan sa? Si yon nonm gen san mouton, epi li rete konsa li pa wè yonn ladan yo, èske li p'ap kite katrevendiznèf lòt yo sou mòn lan, pou li ale chache mouton ki pèdi a? ¹³ Si l'rive jwenn li menm, se vre wi, sa m'ap di nou la a, l'ap pi kontan pou mouton sa a pase pou katrevendiznèf lòt yo ki pa t' pèdi. ¹⁴ Konsa tou, Papa nou ki nan syèl la pa ta renmen wè yon sèl nan ti piti sa yo rive pèdi. ¹⁵ ¶ Si frè ou fè ou yon bagay ki mal, ale jwenn li, rele l' apa. Fè l' wè sa li fè a mal. Si li koute ou, se mete wa mete frè ou ankò sou bon chemen. ¹⁶ Men, si li pa vle koute ou, pran yonn osinon de lòt moun avè ou. Konsa, tout bagay va regle sou depozisyon de osinon twa temwen. ¹⁷ Si l' refize koute yo tou, lè sa a wa di legliz la sa. Si l' refize koute legliz la, ou mèt gade l' tankou yon etranje pou ou, tankou yon pèseptè kontribisyon. ¹⁸ Se vre wi, sa m'ap di nou la a: Tou sa n'a defann moun fè sou latè, yo p'ap kapab fè l' nan syèl la non plis. Tou sa n'a pèmèt moun fè sou latè, y'a kapab fè l' nan syèl la tou. ¹⁹ Men sa m'ap di nou ankò: Si de nan nou mete yo dakò sou latè pou mande nenpòt ki bagay lè y'ap lapriyè, Papa m' ki nan syèl la va ba yo li. ²⁰ Paske, chak fwa de ou twa moun mete tèt yo ansanm nan non mwen, m'ap la nan mitan yo. ²¹ ¶ Lè sa a, Pyè pwoche bò kot Jezi, li di l' konsa: Mèt, konbe fwa pou m' padonnen frè m' lè li fè m' yon bagay mal? Sèt fwa konsa? ²² Jezi reponn li: Non, Pyè. Mwen pa di ou padonnen l' sèt fwa, men padonnen l' swasanndis fwa sèt fwa. ²³ Men ki jan sa ap pase nan Peyi Wa ki nan syèl la: Se tankou yon wa ki te vle fè regleman ak domestik li yo. ²⁴ Li te fèk kòmanse fè regleman an lè yo mennen yonn ba li ki te dwe l' senkantmil (50.000) goud. ²⁵ Men, nonm lan pa t' gen dekwa peye tout lajan sa a. Mèt la bay lòd pou yo vann li tankou esklav, li menm, madanm li, pitit li yo ansanm ak tou sa l' te genyen, pou peye dèt la. ²⁶ Domestik la tonbe ajenou devan mèt la, li di li: Mèt, tanpri souple, pran yon ti pasyans pou mwen, m'a peye ou tout lajan an. ²⁷ Kè mèt domestik la fè l' mal, li kite lajan an la pou li, li kite l' ale. ²⁸ Lè domestik la soti, li kontre ak yon kanmarad ki te dwe l' san (100) goud. ²⁹ Li kenbe l', li pran trangle l', li di li: Peye m' sa ou dwe m' lan. Kanmarad la lage kò l' atè, li di

lèt la: Tanpri, pran yon ti pasyans pou mwen, m'a peye ou. ³⁰ Men, lèt la pa tandè. Li fè mete
kanmarad la nan prizon, pou jouk lè li fin peye sa li dwe a. ³¹ Lè lèt domestik yo wè sak te rive,
sa te fè yo mal anpil. Y al rakonte mèl la sak te pase. ³² Lè sa a, mèl la fè rele domestik la. Li di l'
konsa: Gade jan ou mechan! Mwen kite tout lajan sa a pou ou paske ou te mande m' fè sa pou ou.
³³ Ou te dwe gen pitye pou kanmarad ou a menm jan mwen te gen pitye pou ou a. ³⁴ Mèl la fè gwo
kòlè, li fè mete msye nan prizon pou yo bat li jouk lè li fin peye tou sa l' te dwe a. ³⁵ Se konsa Papa
m' ki anwo nan syèl la va ajè ak nou, si nou pa padonnen frè nou yo ak tout kè nou.

Chapter 19

¹ ¶ Lè Jezi fin di pawòl sa yo, li kite peyi Galile a, li ale nan zòn peyi Jide ki lèt bò larivyè
Jouden an. ² Yon gwo foul moun t'ap swiv li. Lè l' rive, li geri malad yo. ³ ¶ Kèk farizyen pwoche
bò kot Jezi pou yo wè si yo te ka pran l' nan pèlen. Yo mande li: Eske lalwa nou pèmèt yon nonm
kite ak madanm li pou nenpòt ki kòz? ⁴ Jezi reponn yo: Eske nou pa li sa ki ekri nan Liv la? Nan
konmansman, lè Bondye t'ap fè moun, li te fè yo gason ak fi. ⁵ Apre sa li di: Se poutèt sa, gason
an va kite papa l' ak manman l' pou l' mete tèt li ansanm ak madanm li. Yo tou de va fè yon sèl kò.
⁶ Konsa, yo pa de ankò, men yo fè yon sèl kò. Se poutèt sa, pesonn moun pa gen dwa separe sa
Bondye mete ansanm. ⁷ Farizyen yo di li: Bon, poukisa Moyiz te bay lòd pou yon nonm ekri yon
papyè divòs voye bay madanm li, anvan pou l' kite avè li? ⁸ Jezi reponn yo: Se paske nou gen tèt
⁹ di kifè Moyiz te ban nou dwa kite ak madanm nou. Men, nan konmansman se pa t' konsa. Mwen
menm, men sa m'ap di nou: Lè yon nonm kite ak madanm li pou l' al marye ak yon lòt, li fè adiltè,
¹⁰ esepite si se pou lenkondite li ta kite ake madanm lan. Disip li yo di li: Si se konsa bagay la ye
¹¹ pou yon nonm ak madanm li, pito yon nonm pa marye. Jezi reponn yo: Se pa tout moun ki asepte
¹² pawòl sa a. Se sèlman moun Bondye bay pouvwa pou sa. Paske, gen anpil rezon ki ka enpoze
yon nonm marye. Genyen ki fèt tou konsa: yo pa ka marye. Gen lòt, se moun ki mete yo nan eta
sa a pou yo pa ka marye. Gen lòt ankò ki pa marye poutèt Peyi Wa ki nan syèl la. Si yon moun ka
¹³ asepte pawòl sa a, se pou l' asepte li. ¶ Lè sa a, yo mennen kèk timoun piti bay Jezi pou l' te
¹⁴ mete men l' sou tèt yo, pou l' te lapriyè pou yo. Men, disip yo t'ap di moun yo pa fè sa. Jezi di

yo: Kite timoun yo vin jwenn mwen non. Pa enpoze yo vini. Paske, Peyi Wa ki nan syèl la, se pou tout moun ki tankou timoun sa yo li ye. ¹⁵ Li mete men l' sou tèt yo. Apre sa, li pati, li kite kote l' te ye a. ¹⁶ ¶ Yon nonm pwoche bò kot Jezi, li di l' konsa: Mèt, ki bon bagay mwen dwe fè pou m' ka resevwa lavi ki p'ap janm fini an? ¹⁷ Jezi reponn li: Poukisa w'ap poze m' keksyon sou sa ki bon? Se yon sèl ki bon. Si ou vle antre nan lavi a, se pou ou fè sa kòmandman yo mande. Nonm lan mande li: Kilès kòmandman sa yo? ¹⁸ Jezi reponn li: Piga ou touye moun. Piga ou fè adiltè. Piga ou vòlò. Piga ou bay manti. ¹⁹ Respekte papa ou ak manman ou. Se pou ou renmen frè parèy ou tankou ou renmen tèt pa ou. ²⁰ Jennonm lan di li: Mwen swiv tout bagay sa yo. Kisa pou m' fè ankò? ²¹ Jezi di li: Si ou vle bon nèt san manke anyen, ale vann tou sa ou genyen, separe lajan an bay pòv. Lè sa a, wa gen yon richès nan syèl la. Apre sa, vin swiv mwen. ²² Lè jennonm lan tande pawòl sa yo, li vin kagou, li vire do l', li ale paske li te gen anpil byen. ²³ ¶ Lè sa a, Jezi di disip li yo: Sa m'ap di nou la a, se vre wi. Sa ap difisil nèt pou yon nonm rich antre nan Peyi Wa ki nan syèl la. ²⁴ M'ap di nou sa ankò: L'ap pi fasil pou gwo bèt yo rele chamo a pase nan je yon zegwi pase pou yon nonm rich antre nan Peyi Wa ki nan syèl la. ²⁵ Lè disip yo tande sa, yo pa t' manke sezi, yo di: Nan kondisyon sa a, ki moun ki ka sove? ²⁶ Jezi gade yo, li di: Moun pa ka fè sa, se vre. Men, pa gen anyen Bondye pa kapab fè. ²⁷ Lè sa a, Pyè di li: Men, koute non. Nou kite tout bagay pou nou swiv ou. Kisak pral rive nou? ²⁸ Jezi reponn yo: Se vre wi, sa m'ap di nou la a: Lè Moun Bondye voye nan lachè a va chita sou fòtèy li ak tout bèl pouvwa li, lè tout bagay va chanje nèt, nou menm k'ap swiv mwen, n'a chita sou douz fòtèy tou, pou nou ka jije douz branch ras Izrayèl ²⁹ la. Nenpòt moun ki va kite kay li, osinon frè l', osinon sè l', osinon papa l', osinon manman l', osinon pitit li, osinon jaden l', poutèt mwen, moun sa a gen pou l' resevwa san (100) fwa plis pase sa, ansanm ak lavi ki p'ap janm fini an. ³⁰ Anpil nan moun ki devan yo va rete dèyè. Anpil nan moun ki dèyè yo va pran devan.

Chapter 20

¹ ¶ Men ki jan sa ye nan Peyi Wa ki nan syèl la: Se tankou yon mèt jaden rezen ki soti granmaten al chache moun vin travay nan jaden rezen l' lan. ² Li antann ak yo pou l' ba yo sa yo peye pou yon

jounen travay. Li voye yo al travay nan jaden rezen an.³ Li soti ankò vè nevè nan maten, li wè kèk
 lòt moun ki te kanpe sou plas la san yo p'ap fè anyen.⁴ Li di yo: Nou menm tou, nou mèt al travay
 nan jaden rezen m' lan, m'a peye nou pou sa n'a fè.⁵ Epi y al travay nan jaden an. Apre sa, mèt
 jaden an soti ankò vè midi, ak yon lòt fwa ankò vè twazè nan apremidi, li fè menm bagay la.⁶ Li
 te vè senkè nan apremidi lè li soti ankò. Li jwenn kèk lòt moun ki te kanpe la sou plas la, li di yo:
 Poukisa nou rete tout jounen an la san fè anyen konsa?⁷ Yo reponn li: Se paske pesonn pa ban nou
 travay. Mèt la di yo: Enben, nou menm tou, nou mèt al travay nan jaden rezen m' lan.⁸ Lè solèy
 fin kouche, mèt jaden an di jeran l' lan: Rele travayè yo, peye yo lajan yo. Kòmanse ak sa ki te vin
 an dènye yo pou fini ak premye yo.⁹ Mesye ki te antre nan travay vè senkè nan apremidi yo vini,
 yo chak yo resevwa lajan yon jounen travay.¹⁰ Lè mesye ki te la depi granmaten yo vin rive, yo
 te kwè yo tapral resevwa plis. Men, yo chak resevwa lajan yon jounen travay tou.¹¹ Lè yo resevwa
 lajan an, yo tonbe bougonnen sou do mèt jaden an.¹² Yo di konsa: Moun sa yo vin an dènye, yo
 travay yon sèl ti moman, epi ou peye yo menm lajan ak nou ki fatigue kò n' travay tout jounen an
 anba chalè solèy la.¹³ Mèt la reponn yonn nan yo: Zanmi, mwen pa fè ou okenn lenjistis. Nou te
 antann pou yon pri, pa vre?¹⁴ Enben, pran lajan ou, al fè wout ou. Se mwen menm ki vle bay moun
 ki vin an dènye yo menm lajan avè ou.¹⁵ Eske m' pa gen dwa fè sa m' vle ak lajan mwen? Osinon,
 èske sa fè ou mal si m' gen bon kè?¹⁶ Apre sa, Jezi di yo ankò: Se konsa moun ki dèyè yo va pran
 devan, moun ki devan yo va rete dèyè nèt.¹⁷ ¶ Apre sa, Jezi t'ap moute Jerizalèm. Antan li t'ap
 mache sou wout la, li pran douz disip li yo apa, li di yo:¹⁸ Tande. Men n'ap moute Jerizalèm kote
 yo pral lage m', mwen menm Moun Bondye voye nan lachè a, nan men chèf prèt yo ansanm ak
 dirèktè lalwa yo. Yo pral kondannen m' amò,¹⁹ y'ap lage m' bay moun lòt nasyon yo. Etranje sa
 yo pral pase m' nan rizib, yo pral bat mwen ak kout fwèt, apre sa yo pral kloure m' sou yon kwa.
 Men, sou twa jou, m'a leve soti vivan nan lanmò.²⁰ ¶ Lè sa a, manman pitit Zebede yo pwoche
 bò kote Jezi ak pitit li yo. Li bese tèt li byen ba devan Jezi pou mande l' yon favè.²¹ Jezi di li: Kisa
 ou vle? Madanm lan reponn: Men de pitit mwen yo. Bay lòd pou yo chita, yonn sou bò dwat ou,
 lòt la sou bò gòch ou, lè ou va wa.²² Jezi reponn li? Nou pa konnen sa n'ap mande la a. Eske nou
 kapab bwè nan menm gode doulè mwen gen pou m' bwè a? Yo di li: Nou kapab.²³ Jezi reponn
 yo: Se vre. n'a bwè nan gode m' lan. Men, kanta pou chita sou bò dwat osinon sou bò gòch mwen

an, se pa mwen ki bay sa. Plas sa yo, Papa m' rezève yo pou moun li vle. ²⁴ Lè dis lòt disip yo
tande sa, yo pa t' manke fache sou de frè yo. ²⁵ Jezi rele yo, li di yo: Nou konnen ki jan chèf nasyon
yo trete pèp la tankou esklav. Grannèg yo renmen fè moun santi jan yo gen pouvwa. ²⁶ Men, se
pa konsa pou sa fèt nan mitan nou. Okontrè, si yonn nan nou ta vle vin grannèg, se pou l' sèvi nou
tout. ²⁷ Si yonn nan nou ta vle chèf, se pou l' esklav nou tout. ²⁸ Se konsa, mwen menm, Moun
Bondye voye nan lachè a, mwen pa vini pou moun rann mwen sèvis, men mwen vini pou m' rann
moun sèvis. Wi, mwen vin bay lavi m' pou peye delivrans anpil moun. ²⁹ ¶ Antan yo t'ap soti lavil
Jeriko, yon gwo foul moun pran swiv Jezi. ³⁰ Te gen de avèg chita bò chemen an. Yo annik tandè
se Jezi ki t'ap pase, yo pran rele: Mèt, pitit David la, pitye pou nou. ³¹ Moun yo t'ap kouri dèyè yo
pou fè yo pe bouch yo. Men, yo t'ap rele pi rèd: Mèt, pitit David la, gen pitye pou nou! ³² Jezi rete,
li rele avèg yo, li mande yo: Kisa nou vle m' fè pou nou? ³³ Yo di li: Mèt, fè nou wè nan je nou
ankò. ³⁴ Kè Jezi fè l' mal pou yo, li manyen je yo. Menm lè a de mesye yo wè, epi yo swiv Jezi.

Chapter 21

¹ ¶ Yo t'ap pwoche bò lavil Jerizalèm, yo te gen tan rive nan bouk Betfaje, toupre mòn Oliv la.
Lè sa a, Jezi voye de nan disip li yo, ² li di yo: Ale nan bouk ki devan nou an. Kou n'a rive, n'a
jwenn yon manman bourik mare, ak yon jenn ti bourik avèk li. Lage yo, mennen yo ban mwen.
³ Si yon moun di nou kichòy, n'a reponn: Se Mèt la ki bezwen yo. Menm lè a, la kite nou ale ak yo.
⁴ Sa te rive konsa pou pawòl pwofèt la te di a te ka rive vre: ⁵ Ale di moun lavil Siyon yo: Gade,
men wa nou an ap vin jwenn nou. Li san lògèy, li moute yon bourik, yon ti bourik dèyè manman.
⁶ Disip yo ale, yo fè tou sa Jezi te bay yo lòd fè a. ⁷ Yo mennen manman bourik la ak jenn ti bourik
la, yo mete rad yo sou bèt yo, epi Jezi moute chita. ⁸ Yon foul moun te tann rad yo atè sou tout
chemen an. Gen lòt menm ki te koupe branch bwa, yo mete yo atè nan chemen an. ⁹ Ni foul moun
ki t'ap mache devan Jezi a, ni moun ki t'ap mache dèyè l' yo, yo tout t'ap rele: Lwanj pou Pitit David
la! Benediksyon pou Moun ki vini nan non Mèt la. Lwanj pou Bondye jouk anwo nan syèl la!
¹⁰ Lè Jezi antre lavil Jerizalèm, tout lavil la te tèt anba. Moun yo t'ap mande: Ki moun nonm sa a
ye menm? ¹¹ Foul moun yo menm t'ap reponn yo: Se pwofèt Jezi, moun Nazarèt nan peyi Galile

12
a. ¶ Jezi antre nan tanp Bondye a, li chase tout moun ki t'ap vann ak tout moun ki t'ap achte nan tanp lan. Li chavire tab moun ki t'ap chanje lajan yo ansanm ak chèz moun ki t'ap vann pignon yo.

13
Aprè sa, li di yo; Men sa ki ekri: y'a rele kay mwen an kay kote pou moun vin lapriyè nan pye m'. Men nou menm, nou fè l' tounen yon kachèt pou vòlè. 14 Kèk avèg ak kèk enfim nan pye

pwoche bò kote Jezi nan tanp lan. Li geri yo. 15 Men, chèf prèt yo ak dirèktè lalwa yo te fache anpil lè yo wè bèl bagay li t'ap fè, lè yo tande timoun yo ki t'ap rele nan tanp lan: Lwanj pou Pitit

David la! 16 Yo di Jezi konsa: Eske ou pa tande sa y'ap di? Jezi reponn yo: M' tande wi. Eske nou pa janm li pawòl sa a nan Liv la: Ou fè timoun piti ak tibebe nan tete fè gwo lwanj pou ou? 17 Aprè

sa, li kite yo, li soti lavil la, li ale Betani. Se la li pase nwit lan. 18 ¶ Nan denmen maten, antan yo

t'ap tounen lavil Jerizalèm, Jezi te grangou. 19 Li wè yon pye fig Frans bò wout la, li pwoche bò kote l'. Men se fèy ase li jwenn. Lè sa a, Jezi di pye fig Frans lan: Ou p'ap janm donner ankò. Menm

lè a, pye fig Frans lan cheche. 20 Lè disip yo wè sa, yo pa t' manke sezi, yo di li: Kouman pye fig

Frans lan fè vin chèch nan yon ti moman? 21 Jezi reponn yo: Sa m'ap di nou la a, se vre wi: Si nou te gen konfyans nan Bondye, si nou pa t' gen doutans nan kè nou, se pa sèlman sak rive pye fig Frans lan nou ta fè. Men, nou ta ka di mòn sa a: Wete kò ou la. Ale jete tèt ou nan lanmè. Sa ta fèt

vre. 22 Si nou gen konfyans nan Bondye, n'a resevwa tou sa n'a mande l' lè n'ap lapriyè. 23 ¶ Jezi antre nan tanp lan, li t'ap moutre moun yo anpil bagay. Chèf prèt yo avèk chèf fanmi ki t'ap dirije pèp jwif la vin di li: Ki dwa ou genyen pou w'ap fè tout bagay sa yo? Kilès ki ba ou otorite sa a?

24 Jezi reponn yo: M'ap poze nou yon keksyon mwen menm tou. Si nou reponn mwen, m'a di nou

ki dwa mwen genyen pou m' fè bagay sa yo. 25 Ki moun ki te voye Jan batize moun? Bondye osinon moun? Men, yonn t'ap di lòt konsa: Si nou reponn: Se Bondye ki te voye l', la mande nou

poukisa nou pa t' kwè l'. 26 Si nou reponn: Se moun ki te voye l', afè nou p'ap bon ak foul moun

yo, paske yo tout te pran Jan Batis pou yon bon pwofèt. 27 Aprè sa, yo reponn Jezi: Nou pa konnen. Jezi di yo: Enben, mwen menm tou, mwen p'ap di nou ki dwa mwen genyen pou m' fè bagay sa

yo. 28 ¶ Sa nou konprann nan sa? Vwala se te yon nonm ki te gen de pitit gason. Li pale ak pi gran

an, li di l': Pitit mwen, jòdi a al travay nan jaden rezen an. 29 Pitit la reponn li: Non, mwen pa vle!

Men, pita li chanje lide, li ale. 30 Aprè sa, papa a pale ak lòt pi piti a, li di l' menm bagay la. Pi piti

a reponn li: Wi, papa. Men, li pa janm mete pye li. 31 Kilès nan de pitit yo ki fè volonte papa a? Yo reponn li: Pi gran an. Lè sa a, Jezi di yo: Sa m'ap di nou la a, se vre wi: Pèseptè kontribisyon

ak fanm movèz vi yo va antre nan Peyi kote Bondye wa a anvan nou. ³² Paske, lè Jan Batis te vin bò kote nou, lè li t'ap moutre nou jan pou nou viv dwat devan Bondye a, nou pa t' kwè li. Men, pèseptè kontribisyon ak fanm movèz vi yo te kwè li. Malgre nou te wè sa, nou pa t' chanje lide nou

³³ pou n' te kwè nan li tou. ¶ Koute yon lòt parabòl. Vwala se te yon nonm ki te gen anpil tè. Li plante yon jaden rezen. Li fèmen l' ak yon lantouraj, li fouye yon basen pou krase rezen yo. Li bati yon kay pou moun k'ap veje jaden an. Apre sa, li antann li avèk kèk moun pou okipe jaden an pou

³⁴ li, lèfini li pati, li al nan vwayaj. Lè sezon rekòt rezen an rive, li voye domestik li yo chache rezen pa l' bò kote jeran yo. ³⁵ Jeran yo mete men sou domestik yo, yo bat yonn byen bat, yo touye yon lòt, yo touye yon twazyèm ak kout wòch. ³⁶ Mèt jaden an voye lòt domestik ankò, pi plis pase premye fwa a. Jeran yo maltrete yo menm jan an. ³⁷ Apre sa, li voye pwòp pitit gason l' bò kote yo andènye. Li t'ap di nan kè l': Omwens y'a gen respè pou pitit mwen an. ³⁸ Men, lè jeran yo wè pitit la, yonn di lòt: Men eritye a. Vini non, ann touye li. Konsa, jaden an va vin pou nou. ³⁹ Yo mete men sou li, yo jete l' lòt bò jaden an, yo touye li. ⁴⁰ Bon, lè mèt jaden rezen an vini, kisa li va fè jeran sa yo? ⁴¹ Yo reponn li: Li p'ap gen pitye pou yo. La fè touye malveyan sa yo, la pran jaden rezen an bay lòt jeran ki va ba l' pòsyon pa l' nan rekòt la lè sezon an va rive. ⁴² Apre sa, Jezi di yo: Eske nou pa janm li pawòl sa yo nan Liv la? Wòch moun ki t'ap bati yo te voye jete a, se li menm ki tounen wòch ki kenbe kay la. Sa se travay Mèt la. Se bèl bagay pou nou wè sa. ⁴³ Se poutèt sa mwen di nou: y'a wete Peyi kote Bondye Wa a nan men nou, y'a pran l' bay moun yon lòt nasyon ki va bay ranman pou Peyi Wa a. ⁴⁴ Moun ki bite sou wòch sa a gen pou kase ren li. Men, si se wòch la menm ki tonbe sou li, li gen pou l' kraze l' an miyèt moso. ⁴⁵ Lè chèf prèt yo ak farizyen yo tandè parabòl sa yo, yo vin konprann se pou yo Jezi t'ap pale. ⁴⁶ Lè sa a, yo t'ap chache yon jan pou mete men sou li. Men, yo te pè foul moun yo ki te pran Jezi pou yon bon pwofèt.

Chapter 22

¹ ¶ Antan Jezi t'ap pale ak moun yo, li pran rakonte yo yon lòt parabòl: ² Nan Peyi Wa ki nan syèl la, se tankou yon wa ki t'ap fete nòs pitit gason li. ³ Li voye domestik li yo rele moun ki te envite nan nòs la. Men, yo yonn pa t' vle vini. ⁴ Lè sa a, wa a voye lòt domestik, li di yo: Ale di

envite yo manje a pare koulye a. Mwen gen tan fè touye towò bès mwen yo ak lòt bèt gra mwen
 yo. Tout bagay pare. vin nan nòs la. ⁵ Men, envite yo pa fè ka sa l' voye di yo a, y al okipe zafè yo.
 Yonn ladan yo ale nan jaden l', yon lòt ale nan trafik li. ⁶ Gen ladan yo ki pran domestik yo, yo
 maltrete yo, yo touye yo. ⁷ Wa a fè yon gwo kòlè, li voye sòlda l' yo touye ansasen yo. Apre sa, li
 fè mete dife nan lavil yo a. ⁸ Lè sa a, li di domestik li yo: Manje nòs la pare, men moun ki te envite
 yo pa t' merite sa. ⁹ Ale sou granchemen, envite tout moun nou jwenn pou yo vini nan nòs la.
¹⁰ Domestik yo ale nan tout granchemen, yo sanble tout moun yo jwenn, ni move ni bon. Konsa,
 kote yo t'ap fè nòs la te plen moun. ¹¹ Wa a vin antre pou wè envite yo. Je l' al tonbe sou yon nonm
 ki pa t' abiye ak rad nòs la. ¹² Wa a di li: Zanmi, kouman ou fè antre isit la san ou pa mete rad nòs
 la sou ou? Nonm lan pa di yon mo. ¹³ Wa a di domestik li yo: Mare de pye l' ak de men l', voye l'
 jete deyò nan fènwa a. Se la la gen pou l' kriye, pou l' manje dan li. ¹⁴ Paske, yo envite anpil moun,
 men se de twa ase y'a chwazi. ¹⁵ ¶ Lè sa a, farizyen yo ale, yo mete tèt yo ansanm pou wè ki jan
 yo ta ka pran pawòl nan bouch Jezi pou akize li. ¹⁶ Yo voye disip pa yo ansanm ak patizan Ewòd
 yo bò kot Jezi pou mande li: Mèt, nou konnen ou se moun ki kare. W'ap moutre chemen Bondye
 a jan l' ye a, ou pa pè pesonn. Paske, ou pa gade sou figi moun. ¹⁷ Enben, kisa ou di nan sa: Eske
 lalwa pèmèt nou peye Seza lajan kontribisyon an, wi ou non? ¹⁸ Men, Jezi te konnen move lide
 yo te gen dèyè tèt yo, li reponn: Poukisa n'ap chache pran m' nan pèlen konsa, bann ipokrit?
¹⁹ Moutre m' pyès lajan nou sèvi pou peye taks la. Yo moutre l' yon pyès lajan. ²⁰ Jezi mande yo:
 Pòtre ki moun avèk non ki moun ki sou li? ²¹ Yo reponn li: Se pòtre Seza ak non Seza. Lè sa a li
 di yo: Bay Seza sa ki pou Seza, bay Bondye sa ki pou Bondye. ²² Lè yo tande sa, yo pa t' manke
 sezi. Yo kite l', y al fè wout yo. ²³ ¶ Menm jou a, sadiseyen yo vin bò kot Jezi. (Se sadiseyen yo
 ki di moun mouri pa leve). Yo poze Jezi keksyon sa a: ²⁴ Mèt, Moyiz te di si yon nonm mouri san
 kite pitit, frè l' gen pou marye ak madanm defen an pou l' ka fè pitit pou frè l' ki mouri a. ²⁵ Se
 konsa, te gen sèt frè, moun isit ansanm ak nou. Premye a marye, li mouri san l' pa t' gen pitit. Li
 kite madanm li pou frè li. ²⁶ Dezyèm lan pase menm jan an tou. Twazyèm lan tou. Konsa, konsa,
 jouk tout sèt frè yo fin pase. ²⁷ Apre yo tout fin mouri, fanm lan mouri li menm tou. ²⁸ Lè mò yo
 va gen pou leve, madanm kilès li pral ye la a? Paske, li te madanm yo tout. ²⁹ Jezi reponn yo: Nou

nan lerè wi. Nou pa konprann sa ki ekri nan Liv la, ni nou pa konnen pouvwa Bondye. ³⁰ Lè mò
 yo va gen pou leve, fanm ak gason pa nan marye ankò. Tout moun pral viv tankou zanj Bondye
 nan syèl la. ³¹ Pou keksyon mò yo k'ap leve vivan ankò, èske nou pa li sa Bondye te di nou:
³² Mwen se Bondye Abraram, Bondye Izarak, Bondye Jakòb? Bondye pa Bondye moun mouri, li
 se Bondye moun vivan. ³³ Tout moun ki t'ap koute l' yo te sezi tande sa l' t'ap di yo. ³⁴ ¶ Lè farizyen
 yo tande jan Jezi te fèmen bouch sadiseyen yo, yo tout sanble. Yo te vle pran Jezi nan pèlen.
³⁵ Yonn ladan yo ki te dirèktè lalwa mande li: ³⁶ Mèt, ki kòmandman ki pi konsekan nan tout lalwa
³⁷ a? Jezi reponn li: Se pou ou renmen Mèt la, Bondye, ou ak tout kè ou, ak tout nanm ou, ak tout
³⁸ lide ou. ³⁹ Se kòmandman sa a ki pi gwo, ki pi konsekan. Men dezyèm kòmandman an ki gen
 menm enpòtans ak premye a: se pou ou renmen frè parèy ou tankou ou renmen pwòp tèt pa ou.
⁴⁰ De kòmandman sa yo, se yo ki fondasyon tou sa ki nan lalwa Moyiz la ak tou sa pwofèt yo te
⁴¹ moutre. ¶ Antan farizyen yo te sanble, Jezi poze yo keksyon sa a: ⁴² Dapre nou, kisa Kris la
 ye? Pitit kilès li ye? Yo reponn li: Li se pitit pitit David! ⁴³ Jezi di yo: Bon, kouman David fè rele
 l' Seyè? Paske se Lespri Bondye a menm ki te fè l' di: ⁴⁴ Bondye te di Seyè mwen an: Chita la sou
⁴⁵ bò dwat mwen, jouk tan mwen mete lènmi ou yo anba pye ou. Si David rele Kris la Seyè, ki jan
⁴⁶ pou Kris la ka pitit pitit David? Okenn moun pa t' kapab reponn li yon mo. Depi jou sa a pesonn
 pa t' gen odas poze l' keksyon ankò.

Chapter 23

¹ ¶ Apre sa, Jezi pale ak fowl moun yo ansanm ak disip li yo, li di yo: ² Dirèktè lalwa yo ak
 farizyen yo la pou esplike Lalwa Moyiz la. ³ Se pou nou koute yo, se pou nou fè tou sa yo di nou
 fè. Men, pa fè tankou yo. Paske yo menm, yo pa fè sa yo di nou fè. ⁴ Yo mare gwo chay lou yo
 mete sou zepòl lòt moun. Men, yo menm yo p'ap leve yon ti pwent dwèt pou ede moun yo pote
⁵ chay la. Tou sa yo fè, se pou moun kapab wè yo. Gade gwosè meday ki make ak pawòl Liv la
 yo mare sou fwon yo ak nan bra yo! Gade longè ganiti ki nan woulèt rad long yo! ⁶ Yo renmen pi
⁷ bon plas nan resepyon. Yo renmen chita kote pou tout moun wè yo nan sinagòg. Yo renmen pou

moun di yo bonjou jouk atè lè yo sou plas piblik, pou moun rele yo: Mèt, Mèt. ⁸ Men, nou menm,
 pa fè moun rele nou Mèt, paske se yon sèl mèt nou genyen. Apa sa, nou tout se frè. ⁹ Pa rele pesonn
 sou latè papa, paske nou gen yon sèl papa: sa ki nan syèl la. ¹⁰ Pa kite yo rele nou chèf, paske nou
 gen yon sèl chèf, se Kris la. ¹¹ Moun ki pi grannèg nan mitan nou an, se moun k'ap sèvi nou an.
¹² Moun ki vle leve tèt li, y'a desann li. Moun ki desann tèt li, y'a leve li. ¹³ ¶ Malè pou nou, nou
 menm dirèktè lalwa ak farizyen, bann ipokrit! Nou fèmèn pòt ki mennen nan Peyi Wa ki nan syèl
 la pou pesonn pa antre. Nou menm, nou pa antre ladan li. Lèfini, moun ki ta vle antre, nou enpoze
¹⁴ yo antre. Malè pou nou, nou menm dirèktè lalwa ak farizyen, bann ipokrit! N'ap piye pòv vèv
 yo nèt ale, an menm tan n'ap plede fè lapriyè byen long pou parèt pi bon. Se poutèt sa, kondannasyon
¹⁵ nou pral pi rèd toujou. Malè pou nou, nou menm dirèktè lalwa ak farizyen, bann ipokrit! N'ap
 vwayaje toupato sou lanmè ak sou latè pou nou ka konvèti yon moun lòt nasyon nan relijyon nou
¹⁶ an. Lè nou resi jwenn yonn, nou fè l' tounen yon pitit Satan de fwa pi mechan pase nou. Malè
 pou nou, avèg k'ap kondi moun! Nou di konsa: Yon moun te mèt sèmante sou tanp lan, li pa bezwen
¹⁷ kenbe pawòl li pou sa. Men, si l' sèmante sou lò ki nan tanp la, se pou l' kenbe pawòl li. Bann
 egare, bann moun je pete! Kisa ki pi konsekan: lò a osinon tanp lan kote yo fè lò a sèvi pou Bondye?
¹⁸ Nou di ankò: O wi, si yon moun sèmante sou lòtèl la, se pa anyen sa. Li pa bezwen kenbe pawòl
 li. Men, si l' sèmante sou ofrann ki sou lòtèl la, se pou l' kenbe pawòl li. ¹⁹ Bann je pete! Kisa ki
 pi konsekan: ofrann lan osinon lòtèl la kote yo mete ofrann lan apa pou Bondye? ²⁰ Se sa ki fè,
²¹ moun ki sèmante sou lòtèl la, li sèmante sou lòtèl la ansanm ak tou sa ki sou li. Moun ki sèmante
²² sou tanp lan, li sèmante sou tanp lan ansanm ak sou Bondye ki rete nan tanp lan. Moun ki sèmante
 sou syèl la, li sèmante sou fotèy kote Bondye chita a ansanm ak sou Bondye li menm ki chita sou
²³ fotèy la. Malè pou nou, nou menm dirèktè lalwa ak farizyen, bann ipokrit! Nou bay Bondye
 ladim nan rekòt pye mant, pye ani etwale ak pye pèsi, men, nou neglije bagay ki pi konsekan nan
 lalwa a: n'ap fè lenjistis, nou pa gen kè sansib, nou pa kenbe pawòl nou. Men sa pou n' te fè san
²⁴ nou pa neglije lòt bagay yo. Nou menm k'ap kondi pèp la, nou se yon bann avèg pou tèt pa nou.
 Nou pase lèt la nan paswa pou nou wete ti mouch ki tonbe ladan li. Men, nou vale yon chwal!
²⁵ Malè pou nou, nou menm dirèktè lalwa ak farizyen, bann ipokrit! Nou netwaye tout deyò gode
 a ak deyò plat la byen netwaye. Men, anndan yo plen ak bagay nou pran nan vòlò, nan fè visye.
²⁶ Farizyen avèg! Pwòpte anndan gode a ak anndan plat la anvan. Se lè sa a deyò yo va pwòp tou.
²⁷ Malè pou nou, nou menm dirèktè lalwa ak farizyen, bann ipokrit! Nou sanble tonm yo blanchi

nan simityè. Deyò yo parèt byen bèl, anndan yo plen ak zosman mò ak tout kalite vye bagay pouri.
28

Konsa tou, sou deyò nan je moun, nou sanble moun k'ap mache dwat devan Bondye. Men anndan
29
kè nou, nou plen ipokrizi ak mechanste. Malè pou nou, nou menm dirèktè lalwa ak farizyen,
bann ipokrit! Gade, n'ap bati bèl tonm pou pwofèt yo, nou mete flè sou kavon moun ki te mache

30
dwat devan Bondye yo. Epi n'ap di: Si nou te viv nan tan zansèt nou yo, nou pa ta dakò ak yo

31
lè yo t'ap touye pwofèt yo. Lè nou di sa, nou admèt nou menm tou se pitit pitit moun ki te

32
ansasinen pwofèt yo nou ye. Konsa, nou mèt fin fè sa zansèt nou yo te kòmanse fè a. Bann
33

34
rize, bann vèmen! Kouman n'a fè chape anba chatiman lanfè a? ¶ Se poutèt sa, men sa ki genyen:
mwen pral voye pwofèt, moun ki gen bon konprann ak dirèktè lalwa ban nou. Nou pral touye kèk,
gen ladan yo n'ap kloure sou kwa, gen ladan yo n'ap bat ak fwèt nan sinagòg nou yo, n'ap pousib

35
yo soti yon lavil al nan yon lòt. Konsa, n'ap reskonsab san tout inonsan ki koule sou latè, depi
san Abèl, nonm ki te fè sa ki byen devan Bondye a, jouk san Zakari, pitit Barachi, moun nou te

36
ansasinen ant lòtèl la ak kote ki rezève apa pou Bondye nan tanp lan. Sa m'ap di nou la a, se vre

37
wi: Chatiman gen pou tonbe sou moun k'ap viv koulye a pou tout krim sa yo. Jerizalèm, Jerizalèm,
ou menm ki touye pwofèt yo, ou menm k'ap touye moun Bondye voye ba ou yo ak kout wòch, depi
lontan mwen te vle sanble moun ou yo tankou manman poul k'ap sanble pitit li anba zèl li, men ou

38
pa t' vle! Enben, tout kay ou yo pral rete san yon moun ladan yo. 39
Paske, m'ap di ou sa: Depi
jòdi a, nou p'ap wè m' ankò jouk lè a va rive pou nou di: Benediksyon pou Moun ki vini nan non
Mèt la.

Chapter 24

1
¶ Jezi soti nan tanp lan, li tapral fè wout li lè disip li yo pwoche bò kote li. Yo t'ap fè l' wè ki

2
jan tanp lan te byen bati. Men li di yo: Nou wè tout bagay sa yo! Sa m'ap di nou la a, se vre wi.

3
Yon lè p'ap gen de wòch k'ap rete kanpe yonn sou lòt. Tou sa pral kraze nèt vide atè. Jezi te chita
sou mòn Oliv la. Disip li yo te pou kont yo avèk li. Yo pwoche bò kote l', yo mande li: Manyè di

4
nou kilè sa va rive? Di nou ki siy ki va fè nou konnen lè w'ap vini an, lè tan sa a va fini nèt? ¶

5
Jezi reponn yo: Atansyon pou pesonn pa twonpe nou. Paske, anpil moun va vini sou non mwen,

6
y'a di se yo menm ki Kris la. y'a twonpe anpil moun. Nou pral tande lagè ap fèt toupre nou, ansanm
ak nouvèl lagè k'ap fèt byen lwen. Koute sa m'ap di nou byen: nou pa bezwen pè. Paske, fòk bagay

sa yo rive. Men, se p'ap ankò lafen an sa.⁷ Yon pèp pral leve goumen ak yon lòt pèp. Yon peyi va
 atake yon lòt peyi. Va gen anpil grangou, va gen tranblemanntè divès kote.⁸ Tou sa, se va tankou
 tranche anvan akouchman.⁹ Lè sa a, y'ap pran nou, y'ap lage nou nan men moun k'ap fè nou pase
 touman, y'ap touye nou. Moun tout nasyon pral rayi nou poutèt mwen.¹⁰ Lè sa a, anpil moun pral
 jwenn okazyon pou yo tonbe nan peche, yonn pral denonse lòt, yonn pral rayi lòt.¹¹ Gen anpil
 moun k'ap parèt, y'ap pran pòz pwofèt yo, y'a twonpe anpil moun.¹² Ap sitèlman gen mechanste
 sou latè, pifò moun yonn p'ap renmen lòt.¹³ Men, moun ki va kenbe fèm jouk sa kaba, se li ki va
 delivre.¹⁴ Fòk yo gen tan mache bay bon nouvèl Peyi kote Bondye Wa a toupatou sou latè, pou
 tout moun ka tandè mesaj la. Se lè sa a atò lafen an va rive.¹⁵ Pwofèt Danyèl te pale sou bagay
 nou pa ta renmen wè a, bagay k'ap bay gwo lapenn lan. Enben, nou gen pou nou wè bagay sa a
 chita kote ki rezève nan tanp lan apa pou Bondye. (Se pou moun k'ap li a chache konprann.)¹⁶ Lè
 sa a, tout moun ki nan peyi Jide pral blije sove al nan mòn.¹⁷ Moun ki va sou tèt kay yo, yo p'ap
 bezwen antre pran zafè yo nan kay la.¹⁸ Moun ki nan jaden pa bezwen tounen lakay yo al pran
 rechanj.¹⁹ Lè sa a, se p'ap de doulè pou fanm ansent ak nouris yo.²⁰ Lapriyè Bondye pou jou n'a
 gen pou n' kouri a pa rive ni nan tan fredyè, ni yon jou saba.²¹ Paske lè sa a, va gen yon gwo
 lafliksyon moun poko janm wè depi nan konmansman lè Bondye t'ap kreye latè a jouk jòdi a. p'ap
 janm gen yon lòt tankou l' ankò.²² Si yo pa t' wete kèk jou sou jou sa yo, pesonn pa ta sove. Men,
 y'a wete sou jou sa yo poutèt moun Bondye chwazi yo.²³ Lè sa a, si yon moun di nou: Gade, men
 Kris la bò isit, osinon: Men li bò la a, pa kwè li.²⁴ Paske lè sa a, gen fo Kris ak fo pwofèt k'ap
 parèt. y'a fè anpil mèvèy ak anpil mirak pou twonpe ata moun Bondye chwazi yo, si yo ta kapab.
²⁵ Mwen di nou sa davans.²⁶ Se pou si yo di nou: Gade, men l' nan dezè a, nou pa bezwen ale.
²⁷ Osinon, si yo di nou: Gade, men l' kache bò isit la, nou pa bezwen kwè yo. Menm jan zèklè a
 fè yan, li klere tout syèl la depi bò solèy leve jouk bò solèy kouche, se konsa Moun Bondye voye
 nan lachè a gen pou l' vini.²⁸ Kote kadav la va ye a, se la votou yo va sanble.²⁹ Kou jou lafliksyon
 sa yo fin pase, solèy la p'ap klere ankò, lalin lan p'ap bay limyè l' ankò, zetwal yo va soti tonbe nan
³⁰ syèl la. Pouvwa yo ki nan syèl la va pran tranble. Lè sa a, n'a wè siy nan syèl la k'ap fè nou
 konnen Moun Bondye voye nan lachè a ap tounen. Lè sa a, tout nasyon ki sou latè va pran kriye.
 y'a wè Moun Bondye voye nan lachè a ap vini anwo nwaj yo nan syèl la, avèk pouvwa, nan mitan

31 yon bann bèl bagay. Gwo klewon an va sonnen, la voye zanj li yo nan kat kwen latè pou sanble
 tout moun Bondye te chwazi yo, depi yon bout nan syèl la jouk nan lòt bout la. ¶ 32 Pran lesou sou
 pye fig frans lan. Kou l' kòmanse boujonnen, kou l' pouse fèy, nou konnen sezon chalè a sou nou.
 33 Menm jan an tou, lè n'a wè tout bagay sa yo rive, nou mèt konnen Moun Bondye voye nan lachè
 a toupren, li la nan papòt la. 34 Sa m'ap di nou la a, se vre wi: gen moun nan jenerasyon sa a ki p'ap
 gen tan mouri anvan tout bagay sa yo rive. 35 Syèl la ak tout tè a va pase, men pawòl mwen p'ap
 janm pase. 36 Men, pesonn pa konnen ni ki jou, ni ki lè sa va rive, pa menm zanj yo ki nan syèl la,
 pa menm Pitit la. Sèl Papa a konn sa. 37 Sak te rive nan tan Noe a, se sa k'ap rive tou lè Moun
 Bondye voye nan lachè a ap vini. 38 Se konsa, nan jou anvan gwo inondasyon an, moun t'ap manje,
 yo t'ap bwè, moun t'ap marye, yo t'ap marye pitit fi yo. Konsa konsa, jouk jou Noe te antre nan
 gwo batiman an. 39 Yo pa t' konprann anyen nan sa ki t'ap pase, jouk lè gwo inondasyon an fèt, li
 pote yo tout ale. Se va menm jan an tou lè Moun Bondye voye nan lachè a va vini. 40 Lè sa a, va
 gen de gason nan yon menm jaden, y'ap pran yonn, y'ap kite lòt la. 41 Va gen de fanm k'ap moulen
 mayi, y'ap pran yonn, y'ap kite lòt la. 42 Se poutèt sa, pa kite dòmi pran nou, paske nou pa konnen
 ki jou Mèt nou va vini. 43 Se yon bagay nou tout dwe konnen: Si mèt kay la te konnen kilè nan
 lannwit lan vòlò a t'ap vini, li ta veye, li pa ta kite l' kase kay la. 44 Se pou sa tou, nou menm se
 pou nou toujou pare, paske Moun Bondye voye nan lachè a ap vini lè nou pa ta kwè. 45 Ki moun
 ki ka di li se yon jeran entelijan ki fè tout travay li byen? Se moun sa a mèt kay la va mete pou veye
 sou moun nan kay la, pou bay lòt domestik yo manje lè pou yo manje. 46 Se va bèl bagay pou
 domestik la si mèt la jwenn li ap fè travay li lè l' tounen lakay li. 47 Sa m'ap di nou la a, se vre wi:
 Mèt la va mete l' reskonsab tout byen l' yo. 48 Men, si domestik sa a se yon move moun, l'ap di
 nan kè l': Mèt mwen ap fè reta. Li poko ap vini. 49 L'ap tonbe bat kanmarad li yo, l'ap rete ap plede
 manje, ap plede bwè ak tafyatè. 50 Mèt domestik sa a va rive jou l' pa t'ap tann, yon lè li p'ap konnen.
 51 L'ap rachonnen msye anba kou, l'ap regle avè l' menm jan yo regle ak moun ipokrit yo. Se lè sa
 a va gen rèl, se lè sa a va gen manje dan.

Chapter 25

¹ ¶ Se konsa, nan Peyi Wa ki nan syèl la se va tankou istwa dis jennfi ki pran lanp yo, ki soti al kontre msye marye a. ² Senk nan yo te tèt chaje, senk lòt yo te gen bon konprann. ³ Tèt chaje yo te pran lanp yo ase. Yo pa t' pote gaz an rezèv. ⁴ Men sa ki te gen bon konprann yo te pote yon boutèy plen gaz ansanm ak lanp yo. ⁵ Pandan yo t'ap tann msye marye a ki te an reta, yo tout pran kabicha, dòmi vòlò yo. ⁶ Nan mitan lannwit lan, yon rèl pati: Men msye marye a. Ann al kontre li. ⁷ Dis jennfi yo leve, yo pran pare lanp yo. ⁸ Tèt chaje yo mande sak gen bon konprann yo: Tanpri, ban nou ti gout nan gaz nou pote a, paske lanp pa nou yo ap mouri. ⁹ Men, senk ki te gen bon konprann yo reponn: Non, nou pa kapab, paske pa gen ase pou nou tout. Pito n' al achte nan men machann yo. ¹⁰ Antan tèt chaje yo al achte gaz la, msye marye a vin rive. Senk jennfi ki te pare yo antre ansanm avè l' nan kay nòs la. Yo fèmèn pòt la dèyè yo. ¹¹ Pita, lòt jennfi yo vin rive, yo di konsa: Mèt, Mèt, louvri pou nou. ¹² Men msye marye a reponn yo: Sa m'ap di nou la a, se vre wi: m' pa konnen nou. ¹³ Apre sa, Jezi di yo: Se poutèt sa, pa kite dòmi pran nou, paske, nou pa konnen ni ki jou, ni ki lè sa va rive. ¹⁴ ¶ Vwala, se va tankou yon nonm ki tapral pati pou yon vwayaj. Li rele domestik li yo, li mete yo reskonsab byen li yo. ¹⁵ Li bay yonn senkmil (5.000) goud, li bay yon lòt demil (2.000) goud, li bay yon twazyèm mil (1.000) goud. Konsa li bay yo chak dapre sa l' konnen yo ka fè. Lèfini, li pati. ¹⁶ Lamenm, domestik ki te resevwa senkmil (5.000) goud la al fè lajan an travay. Li rapòte l' senkmil (5.000) goud benefis. ¹⁷ Konsa tou, domestik ki te resevwa demil (2.000) goud la fè demil (2.000) goud benefis. ¹⁸ Sa ki te resevwa mil (1.000) goud la menm ale, li fouye yon twou nan tè, li sere lajan mèt la. ¹⁹ Lontan apre sa, mèt domestik yo tounen, li pran fè regleman ak yo. ²⁰ Domestik ki te resevwa senkmil goud la pwoche, li pote senkmil goud benefis la ba li, li di: Mèt, ou te ban mwen senkmil goud. Men senkmil goud benefis mwen fè. ²¹ Mèt la di l': Sa se bèl bagay. Ou se yon bon domestik ki travay byen. Paske ou fè ti travay sa a byen, m'ap mete ou reskonsab pi gwo zafè toujou. vin fè fèt avèk mèt ou. ²² Domestik ki te resevwa demil goud la pwoche apre sa, li di: Mèt, ou te ban mwen demil goud, men demil goud benefis mwen fè. ²³ Mèt la di l': Sa se bèl bagay. Ou se yon bon domestik ki travay byen. Paske ou te fè ti travay sa a byen, m'ap mete ou reskonsab pi gwo zafè ankò. vin fè fèt avèk mèt

²⁴ ou. Apre sa, domestik ki te resevwa sèlman mil goud la pwoche, li di: Mèt, mwen konnen ou
se yon nonm ki di. Ou rekolte kote ou pa t' simen, ou ranmase kote ou pa t' plante. ²⁵ Mwen te pè,
se sak fè mwen te al sere mil goud ou a anba tè. Men, pran lajan ou. ²⁶ Mèt la reponn li: Gade jan
ou se yon move domestik, ou parese konsa! Ou te konnen mwen rekolte kote mwen pa t' simen,
mwen ranmase kote mwen pa t' plante. ²⁷ Enben, se pou ou te mete lajan m' labank. Lè m' ta tounen,
mwen ta wete manman lajan an ak yon enterè sou li. ²⁸ Wete mil goud la nan men l', pran l' bay
sa ki gen dimil (10.000) goud la. ²⁹ Paske, moun ki genyen deja a, y'a ba li ankò; konsa la gen
depase sa l' bezwen an. Men, moun ki pa gen anyen an, y'a wete nan men l' menm ti sa l' te genyen
³⁰ an. Kanta domestik ki pa vo anyen an, jete l' deyò nan fènwa a. Se lè sa a va gen rèl, se lè sa a
va gen manje dan. ³¹ ¶ Lè Moun Bondye voye nan lachè a va vini nan tout bèl pouvwa li ak tout
zanj li yo, la chita sou fotèy li ak tout bèl pouvwa li. ³² Tout nasyon ki sou latè va sanble devan li.
Lè sa a, la separe yo fè de gwoup, menm jan moun k'ap gade mouton mete mouton yon bò, kabrit
yon bò. ³³ La mete mouton yo sou bò dwat li, kabrit yo sou bò gòch li. ³⁴ Apre sa, wa a va pale
ak sa ki sou bò dwat li yo, la di: Vini non, nou menm ki resevwa benediksyon Papa m', vin pran
posesyon peyi ki te pare pou nou depi lè Bondye t'ap kreye lemond lan. ³⁵ Mwen te grangou, nou
ban m' manje; mwen te swaf dlo, nou ban m' bwè. Mwen te lwen peyi m', nou te resevwa m' lakay
³⁶ nou. Mwen te toutouni, nou te ban m' rad. Mwen te malad, nou pran swen m'; mwen te nan
prizon, nou vin wè mwen. ³⁷ Lè sa a, moun ki te fè byen yo va reponn li: Mèt, kilè nou te wè ou
grangou pou n' te ba ou manje? Kilè nou te wè ou swaf dlo pou nou te ba ou bwè? ³⁸ Kilè nou te
wè ou lwen peyi ou, pou nou te resevwa ou lakay nou? Osinon toutouni, pou n' te ba ou rad? ³⁹ Kilè
nou te wè ou malad, osinon nan prizon, pou n' te al wè ou? ⁴⁰ Wa a va reponn yo: Sa m'ap di nou
la a, se vre wi: chak fwa nou te fè sa pou yonn nan pi piti pami frè m' yo, se pou mwen nou te fè
⁴¹ li. Apre sa, la pale avèk sa ki sou bò gòch li yo, la di: Wete kò nou sou mwen, nou menm ki gen
madichon! Al nan dife ki p'ap janm mouri an, dife ki te pare pou dyab la ak zanj li yo. ⁴² Mwen
te grangou, nou pa t' ban m' manje, mwen te swaf dlo, nou pa t' ban m' bwè. ⁴³ Mwen te lwen peyi
m', nou pa t' resevwa m' lakay nou. Mwen te toutouni, nou pa t' ban m' anyen pou mwen te mete
⁴⁴ sou mwen. Mwen te malad, mwen te nan prizon, nou pa t' vin wè mwen. Lè sa a, y'a reponn li:
Mèt, kilè nou te wè ou grangou, osinon swaf dlo, kilè nou te wè ou lwen peyi ou, osinon toutouni,

kilè nou te wè ou malad osinon nan prizon, jouk pou nou pa t' ba ou lasistans? ⁴⁵ Wa a va reponn yo: Sa m'ap di nou la a, se vre wi: chak fwa nou pa t' fè sa pou yonn nan pi piti sa yo, se pou mwen nou pa t' fè li. ⁴⁶ Apre sa, l'ap voye yo resevwa chatiman ki p'ap janm fini an. Men, pou moun ki te fè byen yo, y'ap antre nan lavi ki p'ap janm fini an.

Chapter 26

¹ ¶ Lè Jezi fin di tout pawòl sa yo, li di disip li yo: ² Nou konnen, nan de jou jwif yo pral fete fèt Delivrans lan. Yo pral lage Moun Bondye voye nan lachè a nan men moun ki pou kloure l' sou kwa a. ³ Lè sa a, chèf prèt yo ansanm ak chèf fanmi yo ki t'ap dirije pèp la reyini nan palè granprèt yo te rele Kayif la. ⁴ Mesye yo mete tèt yo ansanm pou fè plan pou yo te ka arete Jezi pou yo fè touye li. ⁵ Yonn t'ap di lòt: Nou pa kapab arete l' pandan fèt la pou sa pa eksite pèp la fè dezòd. ⁶ ¶ Antan Jezi te Betani lakay Simon, nonm ki te gen maladi lalèp la, ⁷ yon fanm pwoche kote li. Li t'ap pote yon ti boutèy fèt an albat plen ak yon odè ki te koute byen chè. Pandan Jezi te chita bò tab la, fanm lan vide tout odè a sou tèt li. ⁸ Lè disip yo wè sa, yo pa t' kontan menm. Yo di: Pouki tout gaspiyaj sa a? ⁹ Yo ta kapab vann odè a byen chè, yo ta bay pòv lajan an. ¹⁰ Jezi vin konnen sa yo t'ap di, li di yo konsa: Poukisa n'ap fè fanm lan tout lapenn sa a? Se yon bèl bagay li fè la a wi pou mwen. ¹¹ Paske, pòv yo, n'ap toujou genyen yo avèk nou. Men, mwen menm, nou p'ap genyen m' pou tout tan. ¹² Lè li vide odè sa a sou kò mwen, li tou benyen m' pou lan tèman mwen. ¹³ Sa m'ap di nou la a, se vre wi: Toupatou sou latè, kote y'a anonse bon nouvèl sa a, y'a rakonte tou sa fanm sa a te fè pou yo pa janm bliye li. ¹⁴ ¶ Lè sa a, yonn nan douz disip yo, nonm yo rele Jida Iskariòt la, al jwenn chèf prèt yo. ¹⁵ Li di yo: Kisa n'a ban mwen si m' fè nou pran Jezi? Yo konte trant pyès lajan ba li. ¹⁶ Depi lè sa a, Jida t'ap chache yon bon okazyon pou l' te ba yo Jezi. ¹⁷ ¶ Premye jou fèt pen san ledven yo, disip yo pwoche bò kote Jezi, yo di li: Ki bò ou ta vle nou pare manje Delivrans lan pou ou? ¹⁸ Li reponn yo: Ale lavil la, kay entèl. n'a di l' konsa: Mèt la voye di ou: Lè pa l' la rive, se lakay ou l'ap fete Delivrans lan ansanm ak disip li yo. ¹⁹ Disip yo fè sa Jezi te bay yo lòd fè a, yo pare manje Delivrans lan. ²⁰ Lè solèy fin kouche, Jezi chita bò tab

²¹ la ak douz disip li yo. Antan yo t'ap manje, Jezi di yo: Sa m'ap di nou la a, se vre wi: yonn nan
²² nou pral trayi mwen. Sa te fè disip yo lapenn anpil. Yonn apre lòt yo pran mande li: Eske se
²³ mwen menm, Mèt? Li reponn yo: Moun ki tranpe pen l' ansanm avè m' nan plat la, se li menm
²⁴ ki pral trayi mwen. Moun Bondye voye nan lachè a prale, jan sa te ekri sou li a. Men, malè pou
²⁵ moun k'ap trayi l' la. Li ta pi bon pou moun sa a si li pa t' janm fèt. Jida ki tapral trayi l' la pran
²⁶ lapawòl, li di: Mèt, èske se mwen menm? Jezi reponn li: Se ou ki di li. ¶ Antan yo t'ap manje,
²⁷ Jezi pran pen, li di Bondye mèsi, li kase l', li bay disip yo, li di: Pran, manje. Sa se kò mwen.
²⁸ Apre sa, li pran yon gode diven, li di Bondye mèsi, li pase l' ba yo, li di: Se pou nou tout nou
²⁹ bwè ladan li. Paske, sa se san mwen, san ki siyen kontra Bondye fè a, san ki koule pou anpil
³⁰ moun jwenn padon pou peche yo. M'ap di nou sa: Depi jòdi a, mwen p'ap janm bwè diven ankò
³¹ jouk jou m'a bwè yon lòt diven ansanm ak nou nan peyi kote Papa m' wa a. Apre yo fin chante
³² kantik espesyal pou fèt la, yo soti, y ale sou mòn Oliv la. ¶ Lè sa a, Jezi di disip li yo: Aswè a
³³ menm, nou tout nou pral kouri kite m' pou kont mwen. Paske, men sa ki ekri nan Liv la: M'ap frape
³⁴ gadò mouton yo, epi tout bann mouton yo pral gaye nan bwa. Men, apre sa, lè m'a leve soti
³⁵ vivan nan lanmò, mwen pral tann nou nan peyi Galile. Pyè pran lapawòl, li di li: Menm si tout
³⁶ moun ta kouri kite ou pou kont ou, mwen menm, mwen p'ap janm kite ou. Jezi di li: Sa m'ap di
³⁷ ou la a, se vre wi: aswè a menm, anvan kòk chante, ou va gen tan di twa fwa ou pa janm konnen
³⁸ mwen. Pyè reponn li: Menm si m' ta dwe mouri avè ou, mwen p'ap janm di mwen pa konnen
³⁹ ou. Tout lòt disip yo t'ap di menm bagay la tou. ¶ Apre sa, Jezi ale ak disip yo yon kote yo rele
⁴⁰ Jetsemane. Li di yo: Chita la. Mwen menm, mwen pral lapriyè pi lwen. Li pran Pyè ansanm ak
⁴¹ de pitit Zebede yo avèk li. Lè sa a, li santi yon lapenn ak yon kè sere ki pran li. Li di yo: Mwen
⁴² gen lapenn anpil. Mwen santi se mouri m'ap mouri. Rete la avèk mwen, pa kite dòmi pran nou.
⁴³ li al yon ti kras pi lwen, li lage kò l' fas atè, li lapriyè konsa: O Papa mwen. Si sa te ka fèt, wete
⁴⁴ gode soufrans sa a devan je mwen. Men, se sa ou vle a ki pou fèt, pa sa mwen vle a. Jezi tounen
⁴⁵ bò kote twa disip yo, li jwenn yo ap dòmi. Li di Pyè konsa: Kouman? Nou pa t' kapab rete je klè
⁴⁶ yon ti kadè avèk mwen! Pa kite dòmi pran nou, tandè. Lapriyè pou nou pa tonbe anba tantasyon.
⁴⁷ Lespri nou byen dispoze, men kò nou fèb. Li kite yo, li ale yon dezyèm fwa. Li lapriyè konsa:

O Papa m', si se pou m' bwè gode soufrans sa a anvan pou ou wete l' devan je m', ou mèt fè l' jan ou vle a. ⁴³ Li tounen, li jwenn disip yo ap dòmi ankò, paske dòmi t'ap kale yo. ⁴⁴ Li kite yo, li ale, li lapriyè yon twazyèm fwa. Li t'ap repete menm pawòl yo. ⁴⁵ Apre sa, li tounen bò kote disip li yo, li di: N'ap dòmi toujou? N'ap poze kò nou? Epi gade, men lè a rive, yo pral lage m', mwen menm Moun Bondye voye nan lachè a, nan men mechan yo. ⁴⁶ Leve non, ann ale. Men moun k'ap trayi m' lan ap vini. ⁴⁷ ¶ Jezi t'ap pale toujou lè Jida, yonn nan douz disip yo, vin rive. Li te gen avèk li yon bann moun ki te gen nepe ak baton nan men yo avèk li. Se chèf prèt yo ak chèf fanmi k'ap dirije pèp la ki te voye yo avèk li. ⁴⁸ Nonm ki t'ap trayi Jezi a te ba yo yon siyal. Li te di yo: Moun n'a wè mwen bo a, se li menm n'ap chache a. Mete men sou li. ⁴⁹ Rive Jida rive, li pwoche bò kote Jezi, li di li: Bonswa, Mèt. Epi l' bo Jezi. ⁵⁰ Jezi di li: Zanmi, sa ou te vin pou fè a, fè li. Lè sa a, lòt moun yo pwoche, yo mete men sou Jezi, yo arete li. ⁵¹ Yonn nan mesye ki te avèk Jezi yo rale nepe l', li frape domestik granprèt la, li koupe yon zòrèy li. ⁵² Jezi di l' konsa: Mete nepe ou nan fouwo l'; paske tout moun ki sèvi ak nepe, se nepe k'ap touye yo tou. ⁵³ Ou pa konnen mwen ta ka rele Papa m' vin ede mwen. Menm lè a, li ta voye depase douz lame zanj ban mwen. ⁵⁴ Men lè sa a, ki jan sa ki ekri nan Liv la ta ka rive vre? Paske Liv la di: Se konsa pou sa pase. ⁵⁵ Apre sa, Jezi di fowl moun yo: Nou vin dèyè m' ak nepe ak baton tankou si m' te yon ansasen. Toulejou mwen te chita la nan tanp lan, ap moutre moun yo anpil bagay, nou pa t' janm arete mwen. ⁵⁶ Men, tou sa rive pou sa ki ekri nan liv pwofèt yo ka rive vre. Lè sa a, tout disip yo kite l', yo pran kouri. ⁵⁷ ¶ Moun ki te arete Jezi yo mennen l' kay Kayif, granprèt la. Se la tout dirèktè lalwa yo ansanm ak chèf fanmi yo te reyini. ⁵⁸ Pyè t'ap swiv Jezi yon ti jan lwen lwen, jouk yo rive nan lakou kay granprèt la. Li antre nan lakou a tou, li chita ak gad yo pou l' wè kouman sa t'apral fini. ⁵⁹ Chèf prèt yo ak tout manm Gran Konsèy jwif yo t'ap chache yon manti pou yo te fè sou Jezi, pou yo te ka kondannen l' amò. ⁶⁰ Men, yo pa t' kapab jwenn anyen malgre anpil moun te vin fè anpil manti sou li. ⁶¹ Bout pou bout, de moun parèt. Yo di: Nonm sa a di: Mwen kapab kraze tanp Bondye a, epi nan twa jou m'a rebati l' ban nou. ⁶² Granprèt la leve, li di Jezi: Ou pa reponn anyen? Kisa mesye yo ap di sou ou konsa? ⁶³ Jezi pa louvri bouch li. Granprèt la di l' ankò: Nan non Bondye vivan an, m'ap mande ou pou di nou verite a: Eske se ou ki Kris la, Pitit Bondye a? ⁶⁴ Jezi reponn li: Se ou ki di li. Men, m'ap di nou sa, depi jòdi a n'a wè m', mwen menm, Moun Bondye voye nan

lachè a, chita sou bò dwat Bondye ki gen pouvwa a, n'a wè m' ap vini sou nwaj yo nan syèl la.
65

Lè sa a, granprèt la chire rad ki te sou li a, li di: L'ap pale mal sou Bondye. Sa nou bezwen lòt
temwen fè: Nou fèk tandè ak zòrèy nou jan l' pale mal sou Bondye. 66 Kisa nou di nan sa? Yo

reponn: Li antò, se pou yo touye li. 67 Lè sa a, yo pran krache nan figi l', yo tonbe ba l' kout pwen.

Gen ladan yo ki ba l' souflèt. 68 Yo di li: Kris, si ou konnen, di nou non! Di nou ki moun k'ap frape

ou konsa. 69 ¶ Pyè menm te chita deyò nan lakou a. Yon sèvant pwoche bò kote l', li di li konsa:

Ou menm tou, ou te avèk Jezi, nonm Galile a. 70 Men, Pyè demanti l' devan tout moun, li di: Mwen

pa konnen sa w'ap di la a. 71 Apre sa, Pyè leve, li ale bò pòtay lakou a. La, yon lòt sèvant wè li. Li

di moun ki te la yo: Nonm sa a te avèk Jezi, nonm Nazarèt la. 72 Pyè demanti l' tou, li di: M'ap fè

sèman, mwen pa konnen nonm sa a. 73 Yon ti kadè apre, moun ki te la yo pwoche, yo di Pyè konsa:

Se vre wi, monchè. Ou fè pati moun sa yo tou. Jan ou pale a fè nou rekonèt ou. 74 Lè sa a, Pyè

pran fè sèman, li di yo: Mwen mande Bondye pou nenpòt bagay rive m' si m' manti: Mwen di nou

non, mwen pa konnen nonm sa a. Menm lè a, kòk chante. 75 Latou, Pyè vin chonje pawòl Jezi te
di l' la: Anvan kòk chante, ou va gen tan di twa fwa ou pa janm konnen mwen. Pyè soti, li tonbe
kriye jouk li pa t' kapab ankò.

Chapter 27

1 ¶ Nan granmaten, tout chèf prèt yo ansanm ak chèf fanmi k'ap dirije pèp la, yo mete tèt yo

ansanm sou do Jezi. Yo pran desizyon pou fè touye li. 2 Apre yo fin mare l', yo mennen l' ale, yo

renmèt li bay Pons Pilat, gouvènè peyi a. 3 Jida menm, nonm ki te trayi Jezi a, lè l' wè yo te

kondannen Jezi, remò pran l', li pote trant pyès lajan yo tounen bay chèf prèt yo ansanm ak chèf

fanmi yo. Li di konsa: 4 Sa m' fè a mal. Se yon inonsan mwen lage nan men nou. Yo reponn li: Ki

mele nou sa? Sa se zafè pa ou. 5 Jida jete pyès lajan yo nan tanp lan, li soti, li ale pann tèt li. 6 Chèf

prèt yo ranmase lajan an, yo di konsa: Sa se lajan san. Lalwa nou pa pèmèt nou mete lajan konsa

nan kès tanp lan. 7 Apre sa, yo tonbe dakò pou yo achte yon jaden nan men yon nonm ki te konn

fè krich. Yo pran tè a sèvi simityè pou etranje ki mouri nan peyi a. 8 Se poutèt sa, jouk jounen jòdi

a, yo rele jaden sa a: Jaden san. 9 Se konsa pawòl pwofèt Jeremi te di a rive vre: Yo pran trant pyès

lajan yo. Se pri sa a moun ras Izrayèl yo te dakò peye pou li. ¹⁰ Ak lajan an, yo achte jaden nonm
 ki konn fè krich la, dapre lòd Bondye te ban mwen an. ¹¹ ¶ Jezi parèt devan gouvènè a. Gouvènè
 a keksyonnen l', li mande li: Ou se wa jwif yo? Jezi reponn li: Se ou ki di li. ¹² Chèf prèt yo ak
 chèf fanmi yo t'ap depoze anpil plent kont Jezi. Jezi menm pa t' reponn anyen. ¹³ Pilat di li: Ou pa
 tandè tout plent yo depoze sou do ou? ¹⁴ Men Jezi pa ba l' repons sou anyen. Sa te fè Pilat sezi
 anpil. ¹⁵ Pou chak fèt Delivrans gouvènè a te konn lage yon prizonnye. Se pèp la ki te konn chwazi
 kilès. ¹⁶ Lè sa a, te gen yon prizonnye yo te rele Jezi Barabas. Tout moun te konnen ki moun li ye.
¹⁷ Lè Pilat wè pèp la sanble deyò a, li di yo: Kilès nou vle m' lage ban nou: Jezi Barabas osinon
 Jezi yo rele Kris la? ¹⁸ Pilat te byen konnen se jalouzi ki te fè yo mennen Jezi ba li. ¹⁹ Antan Pilat
 te chita sou fotèy jij li nan tribinal la, madanm li voye di li: Nonm sa a inonsan tandè. Pa mele nan
 zafè sa a. Paske yèswa, mwen soufri anpil poutèt li nan dòmi. ²⁰ Chèf prèt yo ak chèf fanmi yo
 pran tèt pèp la pou yo mande Pilat pou l' lage Barabas ba yo, pou l' fè touye Jezi. ²¹ Gouvènè a
 pran lapawòl, li di yo: Kilès nan de a nou vle m' lage ban nou? Yo reponn: Barabas. ²² Pilat mande
 yo: Bon. Kisa pou m' fè ak Jezi yo rele Kris la? Yo tout reponn: Kloure l' sou yon kwa! ²³ Pilat di
 yo: Ki movezak li fè konsa? Yo rele pi fò toujou: Kloure l' sou yon kwa! ²⁴ Lè Pilat wè li pa t'
 kapab fè anyen ankò, paske pèp la te soti pou l' te fè plis dezòd toujou, li pran dlo, li lave men l'
 devan tout foul moun yo. Li di yo: Mwen menm, mwen pa reskonsab lanmò nonm sa a. Sa, se sou
 kont nou li ye. ²⁵ Tout pèp la reponn: Se pou reskonsablite lanmò l' tonbe sou nou ak sou tout pitit
 nou yo. ²⁶ ¶ Apre sa, Pilat lage Barabas ba yo. Li fè yo bat Jezi byen bat, li renmèt yo li pou y al
 kloure l' sou yon kwa. ²⁷ Sòlda Pilat yo mennen Jezi nan kay gouvènè a. Yo sanble tout batayon
 sòlda yo fè wonn li. ²⁸ Yo dezabiye l', yo mete yon gwo rad koulè wouj violèt sou li. ²⁹ Yo trese
 yon kouwòn pikan mete nan tèt li, yo ba l' yon ti bwa wozo kenbe nan men dwat li. Apre sa, yo
 mete ajenou devan l', yo pran pase l' nan betiz. Yo di li: Bonjour, wa jwif yo! ³⁰ Yo krache sou li,
 yo pran wozo a, yo ba l' kou nan tèt. ³¹ Apre yo fin pase l' anba kont betiz yo, yo wete gwo rad la,
 yo mete rad pa l' sou li ankò. Epi yo mennen l' ale pou yo kloure l' sou yon kwa. ³² Lè yo soti, yo
 kontre yon nonm peyi Sirèn ki te rele Simon. Yo fòse msye pote kwa Jezi a. ³³ ¶ Lè yo rive kote
 ki rele Gòlgota a (ki vle di: Plas zo bwa tèt la) ³⁴ yo bay Jezi bwè diven mele ak fyèl. Men, lè l'

³⁵goute l', li pa t' vle bwè li. Apre yo fin kloure l' sou kwa a, yo tire osò pou separe rad li yo.
³⁶Apre sa, yo chita ap veye li. ³⁷Yo mete yon ti pankat anlè tèt li pou fè konnen kòz ki fè yo te
³⁸kondannen l' la. Yo te kloure de ansasen sou de lòt kwa an menm tan avè l', yonn sou bò dwat,
³⁹yonn sou bò gòch. Moun ki t'ap pase bò la a t'ap plede joure li. Yo t'ap fè siy sou li. ⁴⁰Yo t'ap
di: Ou menm ki te vle kraze tanp lan pou ou te rebati l' nan twa jou, sove tèt ou non! Si ou se pitit
⁴¹Bondye a, desann sou kwa a! Konsa tou, chèf prèt yo, dirèktè lalwa yo ak chèf fanmi yo t'ap
⁴²pase l' nan rizib. Yo t'ap di: Gade! Li sove lòt moun, li pa kapab sove tèt pa li. Si l' se wa pèp
⁴³Izrayèl la, se pou l' desann sou kwa a koulye a. Lè sa a, n'a kwè nan li. Li te mete konfyans li
⁴⁴nan Bondye, li te di se pitit Bondye li ye. Ann wè koulye a si Bondye va vin delivre li. Ata
⁴⁵ansasen ki te kloure sou lòt kwa yo t'ap joure l' menm jan an tou. Vè midi konsa, vin gen yon
⁴⁶fènwa sou tout peyi a, jouk twazè apre midi. Vè twazè, Jezi rele byen fò, li di: Eli, Eli lema
⁴⁷sabaktani? (ki vle di: Bondye, Bondye, poukisa ou lage m' konsa?) Nan moun ki te la yo genyen
⁴⁸ki tandè l' pale. Yo di: Men l'ap rele Eli. Lamenm, yonn nan yo kouri al pran yon eponj, li tranpe
⁴⁹l' nan venèg, li mete l' nan pwent yon gòl wozo, li lonje l' bò bouch Jezi ba l' bwè. Men, lòt moun
⁵⁰yo di: Tann non, monchè. Ann wè si Eli ap vin delivre li. ¶ Jezi bay yon gwo rèl ankò, epi li
⁵¹mouri. Menm lè a, rido ki te nan tanp lan chire an de moso, depi anwo jouk anba. Tè a tranble.
⁵²Wòch yo fann. Tonm mò yo louvri, kò anpil moun pèp Bondye a ki te mouri leve vivan ankò,
⁵³yo soti nan tonm yo. Apre Jezi li menm te leve soti vivan nan lanmò, yo antre lavil Jerizalèm
⁵⁴kote anpil moun te wè yo. Lè ofisye lame a ansanm ak gad ki t'ap veye Jezi ansanm avè l' yo
wè tranblemanntè a ak tou sa ki te pase, yon sèl lapè pran yo. Yo di: Se vre wi, nonm sa a te Pitit
⁵⁵Bondye. Te gen plizyè fanm la tou. Men, yo te rete lwen ap gade. Se moun ki t'ap swiv Jezi, ki
⁵⁶t'ap okipe l' depi lè l' te nan peyi Galile. Nan yo te genyen: Mari, moun lavil Magdala a, Mari,
⁵⁷manman Jak ak Jozèf, ansanm ak manman pitit Zebede yo. ¶ Lè solèy fin kouche, yon nonm
⁵⁸rich, moun lavil Arimate, vin rive. Yo te rele l' Jozèf. Li menm tou li te yon disip Jezi. li al jwenn
⁵⁹Pilat, li mande l' kò Jezi a. Pilat bay lòd pou yo renmèt li kò a. Jozèf pran kò a, li vlope l' nan
⁶⁰yon bèl dra blan tou nèf. Apre sa, li mete kò a nan yon kavò li te fèk fè fouye nan wòch la pou

tèt pa l'. Apre sa, li woule yon gwo wòch devan bouch kavo a. Epi li al fè wout li. ⁶¹ Mari, moun lavil Magdala a, ansanm ak lòt Mari a te chita la, anfas kavo a. ⁶² Nan denmen, ki vle di jou repo a menm, chèf prèt yo ansanm ak farizyen yo ale bò kot Pilat. ⁶³ Yo di li: Chèf, nou chonje lè nonm ki t'ap bay manti a te vivan, li te di apre twa jou li pral leve soti vivan. ⁶⁴ Bay lòd pou yo veye kavo a byen veye pandan twa jou. Konsa, disip li yo p'ap kapab vin pran kò a pou yo di pèp la apre sa msye leve soti vivan nan lanmò. Dènye kout manti sa a ta pi rèd pase premye a. ⁶⁵ Pilat di yo: Men yon eskwad gad. Ale, veye kavo a jan nou vle a. ⁶⁶ Y ale. Pou yo pi asire kavo a te byen fèmen, yo poze sele sou wòch ki te devan bouch kavo a, epi yo mete eskwad gad la veye li.

Chapter 28

¹ ¶ Lè jou repo a te fin pase, dimanch maten byen bonè, Mari, moun lavil Magdala a, ak lòt Mari a te al vizite kavo ² Yo rete konsa, epi tè a pran tranble byen fò. Yon zanj Bondye desann soti nan syèl la, li vini, li woule wòch la sou kote, lèfini li chita sou li. ³ Li te klere tankou yon zèklè, rad li te blan kou lanèj. ⁴ Gad yo te sitelman pè, yo pran tranble, yo tonbe atè tankou moun ki mouri. ⁵ Men, zanj lan pran pale, li di fanm yo: Nou menm, nou pa bezwen pè. Mwen konnen se Jezi n'ap chache, nonm yo te kloure sou kwa a. ⁶ Enben, li pa isit la. Li leve vivan jan l' te di a. ⁷ Vini wè kote l' te kouche a. Apre sa, prese al di disip li yo li leve soti vivan nan lanmò. Li gen tan pran devan yo ale nan peyi Galile. Se la y'a wè li. Se sa m' te gen pou m' di nou. ⁸ Fanm yo kouri kite kavo a. Yo te pè, men an menm tan tou yo te kontan. Yo t'ap kouri pote nouvel la bay disip yo. ⁹ Yo rete konsa, yo wè Jezi parèt devan yo, li di yo: Bonjour, medam. Yo pwoche bò kote l', yo kenbe pye l', yo adore li. ¹⁰ Jezi di yo: Nou pa bezwen pè. Ale di frè m' yo pou y al nan Galile. ¹¹ Se la y'a wè mwen. ¶ Antan medam yo te nan wout toujou, nan gad ki t'ap veye kavo a te genyen ki te gen tan tounen lavil la, yo rakonte chèf prèt yo tou sa ki te rive. ¹² Lè sa a, chèf prèt yo reyini ak chèf fanmi yo, yo fè plan yo ansanm. Yo bay sòlda yo yon gwo lajan. ¹³ Epi yo di yo: Se pou nou di se disip li yo ki te vin vòlò kò a pote ale lannwit antan nou t'ap dòmi. ¹⁴ Si pawòl la tonbe

nan zòrèy gouvènè a, n'a konnen ki jan pou n' pale avè l' pou nou menm, gad yo, nou pa nan traka.
¹⁵ Sòlda yo pran lajan an, yo fè jan yo te di yo fè l' la. Se konsa, popagann sa a gaye pami jwif yo
 jouk jounen jòdi a. ¹⁶ ¶ Onz disip yo ale sou ti mòn nan peyi Galile a, kote Jezi te di yo ale a. ¹⁷ Lè
 yo wè l', yo adore li. Men, te gen nan yo ki pa t' fin kwè nè. ¹⁸ Jezi pwoche bò kote yo, li di yo
 konsa: Mwen resevwa tout pouvwa nan syèl la ak sou tè a. ¹⁹ Ale fè disip pou mwen nan tout
 nasyon, batize yo nan non Papa a, Pitit la ak Sentespri a. ²⁰ Moutre yo pou yo obsève tou sa mwen
 te ban nou lòd fè. Chonje sa byen: mwen la avèk nou toulejou, jouk sa kaba.

Mark

Chapter 1

¹ ¶ Men konmansman Bon Nouvèl ki pale sou Jezikri, Pitit Bondye a. ² Nan liv pwofèt Ezayi
 a, men sa ki te ekri: Bondye di: Men m'ap voye mesaj m' lan devan ou. La louvri chemen an pou
 ou. ³ Se vwa yon nonm k'ap rele nan dezè a: Pare gran wout Seyè nou an. Plani chemen an byen
 plani pou li. ⁴ Se konsa Jan te parèt nan dezè a, li t'ap batize, li t'ap mache bay mesaj sa a: -Tounen
 vin jwenn Bondye. vin resevwa batèm, epi Bondye va padonnen peche nou yo. ⁵ Tout moun nan
 peyi Jide a ansanm ak tout pèp lavil Jerizalèm lan te vin jwenn li: yo te konfese peche yo devan
 tout moun, epi Jan te batize yo nan larivyè Jouden an. ⁶ Jan te mete yon rad pwal chamo sou li, ak
 yon sentiwon an po mare nan ren li. Se krikèt ak gato myèl li te jwenn nan bwa li te manje. ⁷ Li
 t'ap mache bay mesaj sa a: -Moun k'ap vin apre m' lan gen plis pouvwa anpil pase m'. Mwen pa
 bon ase pou m' ta bese demare sapat ki nan pye li. ⁸ Mwen menm, mwen batize nou nan dlo. Men
 li menm, la batize nou nan Sentespri a. ⁹ ¶ Menm epòk sa a, Jezi te soti Nazarèt, yon bouk nan peyi
 Galile. Lè sa a, Jan te batize l' nan larivyè Jouden an. ¹⁰ Antan Jezi t'ap soti nan dlo a, li wè syèl
 la louvri, epi Lespri Bondye a desann sou li an fòm yon pijon. ¹¹ Li tandè yon vwa ki soti nan syèl
 la ki di: -Ou se pitit mwen renmen anpil la. Ou fè kè m' kontan anpil. ¹² Touswit apre sa, Lespri
 Bondye a pouse Jezi al nan dezè a. ¹³ Li rete la pandan karant jou, epi se la Satan vin tante l'. Jezi

t'ap viv nan mitan bèt bwa yo, epi zanj Bondye yo t'ap okipe li. ¹⁴ ¶ Apre yo te fin mete Jan nan
 prizon, Jezi ale nan peyi Galile pou l' te fè konnen Bon Nouvèl Bondye voye a. ¹⁵ Li t'ap di yo
 konsa: -Jou a rive. Koulye a, Bondye ki wa nan syèl la ap vin pran pouvwa a nan men li. Tounen
 vin jwenn Bondye. Asept Bon Nouvèl la. ¹⁶ Pandan Jezi t'ap mache bò lanmè Galile a, li wè de
 pechè pwason, Simon ak Andre, frè li a. Yo t'ap voye privye nan lanmè a. ¹⁷ Jezi di yo konsa: -vin
 jwenn mwen. m'a fè nou tounen pechè moun pito. ¹⁸ Lamenm, yo kite privye yo, y' ale avèk li.
¹⁹ Jezi vanse pi lwen, li wè de pitit gason Zebede yo, Jak ak Jan, frè li. Yo te chita nan kannòt yo
 a, yo t'ap repare privye yo. ²⁰ Lamenm, Jezi rele yo. Yo kite Zebede, papa yo, nan kannòt la ansanm
 ak ouvrye yo. Y' ale avèk Jezi. ²¹ Apre sa, Jezi ale ak disip li yo nan yon lavil yo rele Kapènawòm.
 Jou repo a, Jezi antre nan sinagòg la; li kòmanse moutre moun yo anpil bagay. ²² Yo te sezi tande
 sa l' t'ap moutre yo. Se pa t' menm jan avèk dirèktè lalwa yo, paske li te pale ak yo tankou yon
 moun ki otorize. ²³ ¶ Lè sa a, yon nonm ki te gen yon move lespri sou li vin antre nan sinagòg la,
 li pran rele: ²⁴ -ey Jezi, moun Nazarèt, kisa nou gen avè ou? Ou vin isit la pou detwi nou? Mwen
 konnen byen pwòp ki moun ou ye. Ou se moun Bondye chwazi a. ²⁵ Jezi pale byen fò ak move
 lespri ki te sou nonm lan, li di li: -Pe la! Soti sou nonm sa a. ²⁶ Move lespri a souke nonm lan byen
 souke, li bay yon gwo rèl, epi li soti, li ale. ²⁷ Tout moun yo te sitèlman sezi, yonn t'ap mande lòt:
 -Sa sa ye la a menm! Sa se yon lòt bagay l'ap moutre nou la a. Menm move lespri yo, li pase yo
 lòd ak otorite, yo obeyi li. ²⁸ Se tout moun ki t'ap nonmen non l' nan peyi Galile a. ²⁹ ¶ Apre sa,
 yo soti kite sinagòg la, y' ale ansanm ak Jak ak Jan lakay Simon ak Andre. ³⁰ Bèlmè Simon an te
 kouche ak lafyèv. Rive Jezi rive lakay la, yo di l' sa. ³¹ Lè sa a, li pwoche bò madanm lan, li pran
 men l', li fè l' leve. Latou, lafyèv la kite l', epi madanm lan resevwa yo. ³² Aswè, apre solèy fin
 kouche, yo mennen tout moun malad yo ansanm ak tou sa ki te gen move lespri sou yo bay Jezi.
³³ Tout moun lavil la te sanble devan pòt kay la. ³⁴ Lè sa a, Jezi te geri anpil moun ki te soufri
 divès maladi; li te chase anpil move lespri. Men, li pa t' kite move lespri yo pale, paske yo te konnen
 ki moun li te ye. ³⁵ Nan granmaten, byen bonè, li pa t' ankò fè klè, Jezi leve, li soti li kite lavil la,
 li al yon kote ki pa gen moun. La li t'ap lapriyè. ³⁶ Simon ak lòt zanmi l' yo soti, yo t'ap chache
 Jezi. ³⁷ Lè yo jwenn li, yo di l' konsa: -Tout moun ap chache ou wi. ³⁸ Men li reponn yo: -Ann al

yon lòt kote, nan lòt bouk yo nan vwazinaj la. Fòk mwen fè yo konnen mesaj la tou. Se pou sa menm mwen vini.³⁹ Se konsa li te ale toupatou nan peyi Galile, li t'ap mache bay mesaj la nan sinagòg yo, li t'ap chase move lespri yo.⁴⁰ ¶ Yon nonm ki te gen lalèp vin jwenn Jezi; li tonbe ajenou devan li, li mande l' sekou; li di l' konsa: -Si ou vle, ou kapab geri mwen.⁴¹ Kè Jezi fè l' mal, li lonje men l', li manyen nonm lan, li di li: -Wi, mwen vle ou geri.⁴² Menm lè a, lalèp la kite l', li geri, li te nan kondisyon pou fè sèvis Bondye.⁴³ Apre sa, Jezi voye l' ale, li pase l' lòd byen sevè.⁴⁴ Li di l' konsa: -Piga ou pale sa ak pesonn. Men, al fè prèt la wè ki jan ou ye. Apre sa, wa ofri sa Moyiz te bay lòd pou ofri a. Konsa wa bay tout moun prèv ou geri.⁴⁵ Men, nonm lan pati, li pran mache fè konnen bagay la toupatou. Li sitèlman gaye nouvèl la, Jezi pa t' kapab antre ankò nan okenn lavil pou moun pa t' wè li. Li te pito rete andeyò, kote ki pa gen moun. Men, moun te soti toupatou vin jwenn li.

Chapter 2

¹ ¶ Kèk jou apre sa, Jezi tounen Kapènawòm. Yo tande li te lakay li.² Te sitèlman gen moun ki te sanble, pa t' gen plas ankò, pa menm devan pòt kay la. Jezi menm t'ap anonse yo pawòl la.³ Se lè sa a, yon kolonn moun vin rive, kat ladan yo t'ap pote yon nonm paralize. Yo t'ap mennen l' bay Jezi.⁴ Men, foul la te kwense anpil, kifè moun yo pa t' ka pwoche bò kot Jezi. Lè yo wè sa, yo dekouvri do kay la egzakteman sou tèt Jezi. Epi yo file nonm paralize a desann nan twou a, tou kouche sou nat li a.⁵ Jezi wè jan yo te gen konfyans nan li, li di nonm paralize a: -Pitit mwen, peche ou yo padonnen.⁶ Te gen kèk dirèktè lalwa chita la; yo t'ap di nan kè yo: -Pouki nonm sa a pale mal sou Bondye konsa? Ki moun sou latè ki kapab padonnen peche? Sa se travay Bondye sèlman.⁸ Menm lè a Jezi te gen tan konnen nan fon kè l' sak t'ap pase nan tèt yo. Li di yo: -Poukisa n'ap fè lide konsa nan kè nou?⁹ Kisak pi fasil pou m' di nonm paralize a: Peche ou yo padonnen; osinon: Leve kanpe, pran nat ou, mache?¹⁰ Enben, m'ap fè nou konnen, mwen menm, Moun Bondye voye nan lachè a, mwen gen pouvwa sou latè pou m' padonnen peche. Lè sa a, Jezi di nonm paralize a:¹¹ -Mwen di ou: leve kanpe, pran nat ou, ale lakay ou.¹² Latou, nonm lan leve kanpe, li pran nat li, li soti devan tout moun. Yo tout te sezi, yo fè lwanj Bondye; yo t'ap di: -Nou poko janm wè bagay konsa.¹³ ¶ Jezi tounen ankò bò lanmè Galile a. Yon foul moun te vin jwenn li, epi

¹⁴
 li t'ap moutre yo anpil bagay. Antan Jezi t'ap pase konsa, li wè Levi, pitit Alfe a, chita nan biwo
 kontribisyon an. Jezi di l' konsa: -Swiv mwen. Levi annik leve, li swiv Jezi. ¹⁵ Pita, Jezi t'ap manje
 lakay Levi. Te gen anpil lòt pèseptè kontribisyon ak moun k'ap fè sa ki mal ki t'ap swiv Jezi. Tout
¹⁶
 moun sa yo te chita bò tab avè l' ansanm ak disip li yo. Kèk direktè lalwa ki te fè pati bann
 farizyen yo wè Jezi ap manje ak pèseptè kontribisyon yo ansanm ak moun k'ap fè sa ki mal yo. Yo
 mande disip li yo: -Poukisa l'ap manje ak pèseptè kontribisyon ansanm ak moun k'ap fè sa ki mal
¹⁷
 yo? Jezi tande sa, li di yo konsa: -Lè yon moun an sante, li pa bezwen dòktè. Se moun malad ki
 bezwen dòktè. Enben, mwen pa vin rele moun k'ap mache dwat devan Bondye yo, men moun k'ap
¹⁸
 fè sa ki mal yo. ¶ Yon jou, patizan Jan Batis yo t'ap fè jèn ansanm ak farizyen yo. Gen moun ki
 vin di Jezi konsa: -Poukisa patizan Jan Batis yo avèk disip farizyen yo fè jèn, epi disip pa ou yo pa
¹⁹
 fè jèn? Jezi reponn yo: -Eske zanmi yon nonm k'ap marye kapab rete san manje toutotan li la
²⁰
 avèk yo? Non, toutotan nonm k'ap marye a la avèk yo, yo pa kapab rete san manje. Men, lè lè
²¹
 a va rive pou l' pa nan mitan yo ankò, se lè sa a y'a fè jèn. Pesonn pa pyese yon vye rad ak yon
 moso twal nèf. Si ou fè sa, moso nèf la va pati ak yon bò nan vye rad la. Lè sa a, rad la chire pi
²²
 mal. Konsa tou, pesonn pa mete diven ki fenk fèt nan vye veso an po. Si ou fè sa, diven an va
 pete vye veso yo, epi w'ap pèdi ni diven an ni veso yo. Men, diven ki fenk fèt, sa dwe ale nan veso
²³
 an po ki fenk fèt tou. Yon jou repo, Jezi t'ap pase nan yon jaden ble. Antan disip li yo t'ap mache
²⁴
 konsa avè l', yo pran keyi kèk grap ble. Farizyen yo di li konsa: -Gade non! Poukisa disip ou yo
²⁵
 ap fè bagay lalwa nou pa pèmèt moun fè gwo jou repo a? Jezi reponn yo: -Eske nou pa janm li
²⁶
 sa David te fè yon lè li te bezwen manje pou li menm ak pou moun pa l' yo ki te grangou? Sa
 te pase sou tan Abyata te granprèt. Nou chonje? Li antre nan kay Bondye a, li manje nan pen yo te
 ofri bay Bondye a. Dapre lalwa nou an, se prèt yo sèlman ki gen dwa manje pen sa yo. Malgre sa,
²⁷
 David te pran ladan yo, li te bay moun pa l' yo manje tou. Jezi di yo ankò: -Jou repo a te fèt pou
²⁸
 moun; se pa moun ki te fèt pou jou repo a. Konsa tou, mwen menm, Moun Bondye voye nan
 lachè a, mwen se mèt repo a.

Chapter 3

¹ ¶ Apre sa, Jezi tounen ankò nan sinagòg la. Te gen yon nonm ki te gen yon men pòk nan asanble a. ² Moun ki te la yo t'ap veye Jezi pou wè si li t'ap geri men nonm lan jou repo a, paske yo te vle akize li. ³ Jezi di nonm men pòk la: -Leve, vin kanpe la a nan mitan nou. ⁴ Epi li di moun ki t'ap gade l' yo: -Kisa lalwa nou an pèmèt moun fè jou repo a? Byen osinon mal? Sove lavi yon nonm osinon kite l' mouri? Men yo pa louvri bouch yo reponn li. ⁵ Lè sa a Jezi fache, li pwonmennen je l' sou yo tout: sa te fè l' lapenn pou l' te wè jan yo te gen move santiman. Epi li di nonm lan konsa: -Lonje men ou. Nonm lan lonje men li. Latou men an geri. ⁶ Menm lè a, farizyen yo soti nan sinagòg la, y' al met tèt yo ansanm ak patizan Ewòd yo pou yo wè ki jan pou yo touye Jezi. ⁷ Jezi wete kò l' ak disip li yo, li ale bò lanmè Galile a. Yon gwo foul moun t'ap swiv li. Yo te soti toupatou: te gen moun Galile, moun Jide, ⁸ moun lavil Jerizalèm, moun peyi Idime, moun peyi lòt bò larivyè Jouden an, moun nan vwazenaj lavil Tir ak lavil Sidon. Tout foul pèp sa a te vin jwenn li paske yo te tandè tou sa l' t'ap fè. ⁹ Jezi mande disip li yo pou yo pare yon kannòt pou li, pou foul la pa t' toufe l' twòp. ¹⁰ Paske, jan li t'ap geri anpil moun, tout malad yo te vide sou li pou yo te manyen li. ¹¹ Chak fwa move lespri yo te wè l', yo te tonbe nan pye l' ap plede rele: -Ou se pitit Bondye a. ¹² Men Jezi te pale sevè ak move lespri yo pou yo pa t' di ki moun li te ye. ¹³ ¶ Apre sa, li moute sou yon ti mòn. Li rele moun li te bezwen yo. Yo vin jwenn li. ¹⁴ Li chwazi douz nan yo pou mache ak li. Li rele yo apòt, epi li voye yo mache bay mesaj la. ¹⁵ Li te ba yo pouvwa pou chase move lespri. ¹⁶ Men douz moun li te chwazi yo: Se te Simon (Jezi te ba li yon ti non Pyè), ¹⁷ de pitit Zebede yo: Jak ak Jan, frè l' la. Jezi te ba yo yon ti non Boanèj, ki vle di Pitit loraj. ¹⁸ Te gen Andre, Filip, Batèlmi, Matye, Toma, Jak, pitit Alfe a, Tade, Simon, patriyòt la, ¹⁹ ak Jida Iskariòt, nonm ki te lage Jezi nan men lènmi li yo. ²⁰ Apre sa, Jezi tounen lakay li. Te sitèlman gen moun ki te sanble ankò, Jezi ak disip li yo pa t' menm gen tan pou yo te manje. ²¹ Lè fanmi Jezi yo tandè sa, yo soti pou yo vin chache l' paske tout moun t'ap di: -Nonm sa a fou. ²² ¶ Dirèktè lalwa ki te desann soti Jerizalèm yo t'ap di konsa: -Li gen Bèlzeboul, gwo wa dyab la, sou li. Yo t'ap di tou: -Se chèf move lespri yo menm ki ba li pouvwa pou chase move lespri yo. ²³ Jezi rele yo, li di yo an parabol: -Ki jan Satan fè ap chase Satan? ²⁴ Si yon peyi gen divizyon ladan l' pou moun yo ap goumen yonn ak lòt, peyi sa a pa la pou lontan. ²⁵ Si gen divizyon nan yon fanmi, fanmi sa a pa la pou lontan.

26 Se sak fè, si Satan konbat pwòp tèt li, si gen divizyon nan peyi Satan, pouvwa Satan an pa la pou
 lontan. Talè konsa l'ap fini. 27 Pesonn pa kapab antre lakay yon nonm vanyan pou piye sa l' genyen,
 si li pa mare nonm vanyan an anvan. Lè li fin mare l', la piye kay la. 28 Se vre wi, sa m'ap di nou
 la a: Bondye va padonnen lèzòm tout peche y'a fè, ak tout move pawòl ki va soti nan bouch yo.
 29 Men, moun ki va pale mal sou Sentespri a, moun sa a p'ap janm jwenn padon, paske lè sa a l'ap
 fè yon peche k'ap rete pou tout tan. 30 Jezi te pale konsa paske yo t'ap di-Li gen yon move lespri
 sou li. 31 ¶ Apre sa, manman Jezi ak frè l' yo vin rive. Yo kanpe deyò a, yo fè rele li. 32 Jezi te nan
 mitan yon foul moun ki te chita. Yo di l' konsa: -Men manman ou ak frè ou yo deyò a, y'ap mande
 pou ou. 33 Li reponn yo: -Kilès ki manman m', kilès ki frè mwen? 34 Epi li pwonmennen je l' sou
 moun ki te chita sou kote l' yo, li di konsa: -Gade: men manman m', men frè m' yo. 35 Paske, tout
 moun ki fè sa Bondye mande yo fè, se moun sa yo ki frè m', ki sè m', ki manman mwen.

Chapter 4

1 ¶ Jezi te rekòmanse ap bay mesaj la bò lanmè Galile a ankò. Foul moun ki te sanble bò kote
 l' la te sitèlman anpil, li te blije moute chita nan yon kannòt ki te sou lanmè a. Tout foul moun yo
 menm te rete atè sou rivaj la, toupre dlo a. 2 Li t'ap rakonte yo kèk parabòl pou l' te moutre yo anpil
 bagay. Li di yo konsa: 3 -Koute! Yon nonm soti pou li al simen grenn nan jaden li. 4 Pandan li t'ap
 simen grenn yo, kèk grenn tonbe bò chemen an. Zwazo vini, yo manje yo. 5 Yon pati tonbe nan
 mitan wòch, kote ki pa t' gen anpil tè. Grenn sa yo leve byen vit, paske tè a pa t' fon. 6 Men, lè
 solèy la chofe, li boule ti plant yo. Yo cheche paske rasen yo pa t' fon. 7 Yon lòt pati tonbe nan
 mitan pye pikan. Pikan yo grandi, yo toufe bon ti plant yo, kifè yo pa t' ka donner. 8 Men, yon lòt
 pati ankò tonbe nan bon tè. Plant yo leve, yo grandi, yo donner. Gen ladan yo ki bay trant grenn,
 lòt bay swasant, lòt ankò bay san (100). 9 Apre sa, Jezi di yo konsa: -Si nou gen zòrèy poun tande,
 tande. 10 Apre Jezi te fin kite gwo foul moun yo dèyè, moun ki te toupre l' yo ansanm ak douz
 disip li yo di li: -Esplike nou parabòl sa a non. 11 Li di yo: -Nou menm, nou resevwa sekre Peyi
 kote Bondye Wa a; men moun ki deyò yo, yo tande tout bagay an parabòl. 12 Konsa Yo mèt gade
 byen gade, men yo p'ap wè. Yo mèt tande byen tande, men yo p'ap konprann, pou yo pa tounen

vin jwenn Bondye, pou Bondye padonnen peche yo. ¹³ Apre sa, Jezi di yo: -Nou pa konprann
 parabòl sa a? Ki jan n'a fè pou nou konprann tout lòt parabòl yo? Koute! ¹⁴ Nonm k'ap simen an,
 se pawòl Bondye a l'ap simen. ¹⁵ Gen moun, yo sanble ak tè bò chemen kote pawòl la tonbe a.
 Kou yo tande l', Satan vini, li rache pawòl ki te simen nan kè yo a. ¹⁶ Konsa tou, gen lòt ki resevwa
 grenn yo tankou tè ki gen anpil wòch la. Lè yo fèk tande pawòl la, yo resevwa l' ak kè kontan.
¹⁷ Men, yo pa kite l' pouse rasen nan kè yo. Yo pa kenbe l' pou lontan. Lè yo tonbe anba tè chaje
 ak pèsekisyon akòz pawòl Bondye a, lamenn yo jwenn okazyon pou yo tonbe nan peche. ¹⁸ Gen
 lòt moun ankò, yo resevwa grenn yo tankou nan mitan pye pikan: yo tande pawòl la, ¹⁹ men, traka
 lavi, anvi gen lajan ak tout lòt anvi yo antre nan kè yo, toufe pawòl la. Kifè yo pa bay anyen menm.
²⁰ Pou fini, gen moun ki tankou bon tè a; yo tande pawòl la, yo resevwa l' epi yo donnen. Gen ladan
 yo ki bay trant pou yonn, lòt bay swasant pou yonn, lòt ankò bay san (100) pou yonn. ²¹ ¶ Apre
 sa, li di yo ankò: -Yo pa limen yon lanp pou yo mete l' anba yon mamit osinon anba yon kabann,
 pa vre? Eske se pa sou yon etajè pou yo mete li? ²² Nanpwen anyen ki kache ki p'ap devwale yon
 jou. Konsa tou, nanpwen sekre ki p'ap parèt aklè yon lè. ²³ Si nou gen zòrèy poun tande, tande.
²⁴ Li di yo toujou: -Fè atansyon sa n'ap tande la a. Mezi nou sèvi pou mezire lòt moun, se li menm
 Bondye va pran pou mezire nou tou, ak tout degi l' sou li. ²⁵ Paske, moun ki genyen deja a, y'a ba
 li ankò. Men moun ki pa gen anyen an, y'a wete nan men l' ata ti sa l' te genyen an. ²⁶ Li di yo
 ankò: -Men ki jan sa ye nan Peyi kote Bondye Wa a. Se tankou yon nonm ki simen grenn nan jaden
 li. ²⁷ Apre sa, lannwit li dòmi, lajounen li leve fè zafè li. San l' pa konnen ki jan pa ki jan, grenn
 yo pouse, yo grandi. ²⁸ Tou sa, paske se tè a menm ki fè plant yo grandi pou yo donnen. Pou
 kòmanse yo pouse fèy, answit yo pouse flèch, apre sa grenn plen flèch la. ²⁹ Lè grenn yo mi se lè
 sa a nonm lan mete manchèt ladan l', paske sezon rekòt la rive. ³⁰ Li di yo ankò: -Kisa m' ta di
 Peyi kote Bondye Wa a sanble ankò? Ki parabòl mwen ta ban nou pou fè nou konprann sa li ye?
³¹ Enben, li menm jan ak yon ti grenn moutad. Lè ou simen l', se yon ti grenn tou piti. Se li ki pi
 piti nan tout grenn ki sou latè. ³² Men, lè ou fin simen l', li pran grandi: li depase tout plant menm
 kalite avè l', li pouse gwo branch. Konsa, zwazo nan syèl la ka fè nich nan lonbraj yo. ³³ Se avèk
 anpil parabòl konsa li t'ap ba yo mesaj li a. Li te fè l' yon jan pou yo tout te ka konprann li. ³⁴ Li

pa t' louvri bouch li pou l' pa t' rakonte yo yon parabol. Men, lè l' te pou kont li avèk disip li yo, li te esplike yo tout bagay. ³⁵ ¶ Menm jou sa a, lè solèy fin kouche, Jezi di disip li yo: -Ann janbe lòt bò lanmè a non. ³⁶ Se konsa disip yo te kite foul moun yo dèyè, yo pati ansanm ak Jezi nan kannòt kote li te chita a. Te gen lòt kannòt tou ki te ale avèk yo. ³⁷ Yon gwo van vin leve, lanm yo kòmanse antre nan kannòt la. Yon sèl kou a, kannòt la t'ap fin plen dlo. ³⁸ Jezi menm, lè sa a, te nan dèyè kannòt la. Li t'ap dòmi, tèt li apiye sou yon ti zòrye. Disip li yo souke l', yo di l' konsa: -Mèt, mèt, se mouri n'ap mouri wi! Sa pa di ou anyen? ³⁹ Jezi leve, li pale byen fò ak van an, li di: -Pe la. Li di dlo a: -Rete trankil. Latou, van an tonbe epi vin gen yon gran kalmi. ⁴⁰ Apre sa, li di yo: -Men, poukisa nou pè konsa? Nou poko gen konfyans toujou? ⁴¹ Men disip yo te pè anpil anpil, yonn t'ap di lòt konsa: -Ki moun li ye menm, pou jouk van ak dlo lanmè a obeyi li?

Chapter 5

¹ ¶ Jezi ak disip li yo rive lòt bò lanmè Galile a, nan peyi Jerazyen yo. ² Jezi desann soti nan kannòt la. Menm lè a, yon nonm soti nan mitan tonm mò yo, li vin devan Jezi. ³ Nonm sa a te gen yon move lespri sou li, li te pran tonm yo fè kay li. Pesonn pa t' kapab mare l', pa menm avèk chenn. ⁴ Anpil fwa, yo te mete tou de pye l' yo nan yon sep an fè, yo te mare tou de menm l' yo ak yon chenn. Men, chak fwa, li te jwenn mwayen kase ni chenn lan, ni sèp la. Pesonn pa t' gen fòs ase pou donte li. ⁵ Tout tan, lajounen kou lannwit, li t'ap pwonmennen nan mitan tonm yo osinon sou ti mòn yo. Li t'ap rele san rete, li t'ap matirize kò l' ak kout wòch. ⁶ Li te yon bèl distans lè li wè Jezi. Li kouri, li vin mete ajenou devan li. ⁷ Li pran rele byen fò, li di l' konsa: -Kisa m' gen avèk ou, Jezi, pitit Bondye ki nan syèl la? Tanpri souple, nan non Bondye, pa fè m' soufri. ⁸ (Li te pale konsa, paske Jezi te pase l' lòd sa a: Move lespri, soti sou nonm lan). ⁹ Lè sa a, Jezi mande li: -Ki jan ou rele? Li reponn li: -Yo rele m' Rejiman, paske nou anpil. ¹⁰ Epi li di Jezi: -Tanpri souple, pa mete nou deyò nan peyi a. ¹¹ Sou ti mòn lan te gen yon bann kochon ki t'ap chache manje pou yo manje. ¹² Tout move lespri yo pran mande Jezi: -Tanpri souple, voye nou sou kochon sa yo non poun antre nan yo. ¹³ Jezi bay yo pèmasyon sa a. Lè sa a, move lespri yo soti sou nonm lan, yo antre nan kochon yo. Lamenm, tout bann kochon yo pran degrengole desann bò falèz la, al neye

tèt yo nan lanmè. Te gen demil (2.000) kochon konsa nan bann lan. ¹⁴ Moun ki t'ap gade kochon yo pran kouri. Yo gaye nouvèl la nan lavil la kou andeyò. Moun soti toupatoou vin wè sak te rive.

¹⁵ Lè yo rive bò kote Jezi te ye a, yo wè nonm ki te gen rejiman move lespri sou li a. Li te chita chita l', byen abiye ak tout bon sans li sou li. Yo tout te pè. ¹⁶ Moun ki te asiste bagay la mete

rakonte lòt yo sa ki te rive nonm ak move lespri a ansanm ak kochon yo. ¹⁷ Lè sa a, yo mande Jezi:

-Tanpri souple, kite peyi a. ¹⁸ Antan Jezi t'ap moute nan kannòt la, nonm ki te gen move lespri a

mande l' pèmisyon pou li ale ave l' tou. ¹⁹ Men Jezi pa t' kite l' ale, li di l' konsa: -Ale, tounen lakay ou, nan mitan fanmi ou yo. Rakonte yo tou sa Bondye fè pou ou, kijan li te gen pitye pou ou.

²⁰ Nonm lan pati, li ale nan tout rejyon yo rele Dis Vil la. Li mache fè konnen tou sa Jezi te fè pou

li. Se te yon gwo sezisman pou tout moun ki te tande l' pale. ²¹ ¶ Jezi tounen lòt bò lanmè a. Li annik desann soti nan kannòt la, yon foul moun gen tan sanble bò kote li. Antan li sou rivaj la,

²² Jayiris, yonn nan chèf sinagòg yo, vin rive. Lè Jayiris wè Jezi, li lage kò l' nan pye li. ²³ Li mande Jezi: -Pitit fi m' lan prèt pou mouri. Tanpri souple, vin mete men ou sou li pou l' ka geri. vin ba l'

lavi pou mwen. ²⁴ Jezi pati avèk li. Yon gwo foul moun t'ap swiv li. Yo te kwense l' toupatoou.

²⁵ Men te gen yon fanm nan foul la ki te malad: li te gen pèdisyon depi douzan. ²⁶ Li te soufri anpil nan men plizyè dòktè, li te fin depanse tout byen li; men li pa t' jwenn okenn soulajman. Okontrè,

maladi a te vin pi rèd sou li. ²⁷ Li te tande pale sou Jezi. Li fofile kò l' nan foul la pa dèyè Jezi, epi

li manyen ke rad li. ²⁸ Fanm lan te di nan kè l': Si m' kapab manyen ke rad li sèlman, m'a geri.

²⁹ Menm lè a san an rete, epi madanm lan santi kò l' gaya. ³⁰ Latou, Jezi santi te gen yon fòs ki soti nan li; li vire nan mitan foul moun yo, li di konsa: -Ki moun ki manyen rad mwen an, en?

³¹ Disip li yo reponn li: -Ou wè jan foul moun yo ap kwense ou, epi w'ap mande: Ki moun ki

manyen ou? ³² Men Jezi t'ap pwonmennen je l' toupatoou pou wè moun ki te fè l' sa a. ³³ Fanm lan menm ki te konnen sak te rive l' t'ap tranble kou yon fèy bwa tank li te pè. Li vin lage kò l' nan pye

Jezi. Li di l' tout verite a. ³⁴ Jezi di li: -Mafi, se konfyans ou nan Bondye ki geri ou. Ou mèt ale ak

kè poze, tande. Ou geri nèt. ³⁵ ¶ Jezi t'ap pale toujou lè kèk mesaje soti kay chèf sinagòg la vin di

li: -Pitit fi ou la mouri. Ou pa bezwen deranje Mèt la plis pase sa. ³⁶ Men Jezi pa t' okipe sa yo t'ap

di a. Li di chèf sinagòg la: -Pa pè. Sèlman met konfyans ou nan mwen. ³⁷ Li pran Pyè, Jak ak Jan,

frè Jak la, avèk li. Li pa t' pèmèt lòt moun swiv li. ³⁸ Lè yo rive kay chèf sinagòg la, Jezi wè yon

bann moun ki t'ap fè gwo eskandal: genyen ki t'ap kriye; lòt menm t'ap plede rele. ³⁹ Li antre nan kay la, li di yo konsa: -Men pouki tout bri sa a? Pouki tout rèl sa yo? Ti fi a pa mouri. Se dòmi l'ap dòmi. ⁴⁰ Yo tonbe pase l' nan betiz. Lè sa a, li fè yo tout soti. Li pran papa ak manman pitit la ansanm ak twa disip li yo sèlman. Epi li antre nan chanm kote pitit la te ye a. ⁴¹ Li pran men li, li di li: -Talita koum. -ki vle di: Ti fi, mwen di ou leve. ⁴² Menm lè a, ti fi a leve, li pran mache, li te gen douzan. Se pa ti sezi moun yo te sezi lè yo wè sa. ⁴³ Men, Jezi pase yo lòd sevè pou yo pa t' kite pesonn konn sa. Apre sa, li di yo: -Bay ti fi a manje.

Chapter 6

¹ ¶ Jezi kite kote l' te ye a, li ale nan lavil kote l' te grandi a. Disip li yo te ale avè l' tou. ² Lè jou repo a rive, li kòmanse moutre moun ki te nan sinagòg la anpil bagay. Foul moun ki t'ap koute l' yo te sezi anpil, yo t'ap di konsa: -Kote l' jwenn tout bagay sa yo? Kilès ki ba l' konesans sa yo? Kouman li fè fè tout mirak sa yo? ³ Se pa ti bòs chapant pitit Mari a? Se pa frè Jak, Jòz, Jid ak Simon an? Apa tout sè l' yo la avèk nou? Se sa ki fè li te tounen pou yo yon okazyon tonbe nan peche. ⁴ Lè sa a, Jezi di yo: -Yon pwofèt jwenn respè toupatou, esepite nan peyi l', lakay li ak nan fanmi li. ⁵ Se konsa li pa t' kapab fè okenn mirak la, esepite pou de ou twa moun malad. Li te mete men sou tèt yo, li geri yo. ⁶ Jezi te sezi wè jan yo pa t' kwè nan li. Apre sa, Jezi te mache nan tout ti bouk nan vwazinaj la. Li t'ap moutre moun yo anpil bagay. ⁷ ¶ Lè sa a, Jezi rele douz disip li yo, li voye yo de pa de. Li ba yo pouvwa chase move lespri. ⁸ Li pase yo lòd sa a: -Pa pran anyen pou vwayaj la, esepite yon baton. Pa pote ni pen, ni sak. Pa mete lajan nan pòch nou. ⁹ Nou mèt mete sapat nan pye nou. Men, pa mete de rad sou nou. ¹⁰ Epi li di yo ankò: -Lè nou rive nan yon lavil, rete nan yon sèl kay, kay kote y'a resevwa nou an, jouk nou pati. ¹¹ Men, si nou rive yon kote nou wè pesonn pa vle resevwa nou, pesonn pa vle koute nou, ale fè wout nou. Souke pousyè pye nou. Konsa, yo p'ap ka di nou pa t' avèti yo. ¹² Douz disip yo pati; y' al mache bay nouvèl la pou tout moun tounen vin jwenn Bondye. ¹³ Yo te chase anpil move lespri. Yo te pase lwil sou anpil moun malad, yo te geri yo. ¹⁴ ¶ Wa Ewòd te tandè pale sou Jezi, paske yo t'ap nonmen non l' toupatou. Gen moun ki t'ap di: -Se Jan Batis ki leve pami mò yo, se poutèt sa li kapab fè tout mirak sa yo.

15 Gen lòt ki t'ap di tou: -Se Eli. Epi gen lòt ankò ki t'ap di: -Se yon pwofèt tankou ansyen pwofèt
 16 yo. Men, lè Ewòd tande sa, li di konsa: -Se Jan wi. Mwen te fè koupe tèt li. Men, li tounen vivan
 17 ankò. Se Ewòd menm ki te voye arete Jan. Li te fè mete l' nan prizon poutèt Ewodyad. Ewòd
 te pran Ewodyad, madanm Filip, frè li, pou madanm li. 18 Se konsa, Jan te di li: -Ou pa gen dwa
 pran madanm frè ou pou madanm ou. 19 Ewodyad te kenbe Jan nan kè. Li te vle fè yo touye li.
 20 Men, li pa t' kapab, paske Ewòd pou tèt pa l' te gen yon krentif pou Jan. Li te konnen Jan se yon
 nonm dwat ki t'ap viv pou Bondye. Se sak fè li te pwoteje li. Li te renmen tande l' pale tou, menm
 21 si apre sa kè l' te boulvèse. Jou Ewodyad t'ap tann lan vin rive. Se te jou fèt Ewòd. Jou sa a,
 Ewòd te fè yon fèt pou tout zotobre nan gouvènman l' lan, ansanm ak gwo chèf nan lame a ak lòt
 22 grannèg nan peyi Galile a. Pitit fi Ewodyad la antre nan sal resepsyon an: li danse, li danse. Sa
 te fè Ewòd ak envite l' yo plezi anpil. Wa a di madmwazèl la konsa: -Mande m' nenpòt sa ou vle,
 23 m'ap ba ou li. Ewòd sèmante ba li, li di l' konsa: -Tou sa ou mande, m'ap ba ou li, te mèt mwatye
 24 nan peyi m'ap gouvènen an. Madmwazèl la soti, li al di manman li: -Kisa m' ta mande? Manman
 an reponn li: -Mande tèt Jan Batis. 25 Jenn fi a prese tounen kote wa a, li fè l' demann sa a: -Mwen
 ta vle pou ou ban mwen tèt Jan Batis koulye a, nan yon plato. 26 Kè wa a kase. Men, li pa t' kapab
 di li non ankò, akòz gwo sèman li te fin fè devan tout envite yo. 27 Menm lè a, li voye yon gad
 28 avèk lòd pou li al chache tèt Jan Batis pote vini. Gad la koupe tèt Jan Batis nan prizon an; li pote
 l' vini nan yon plato. Li bay madmwazèl la tèt la; madmwazèl la menm pote l' bay manman li.
 29 Lè patizan Jan yo tande sa, yo vin pran kò a, yo mete l' nan yon kavo. 30 ¶ Lè apòt yo tounen
 31 vin jwenn Jezi, yo rakonte l' tou sa yo te fè ak tou sa yo te di. Lè sa a, te sitèlman gen moun ki
 t'ap ale vini, Jezi ak disip li yo pa t' menm gen tan pou yo manje. Se poutèt sa Jezi di disip li yo:
 -Ann al avè m' yon kote ki pa gen moun pou nou ka pran yon ti repo. 32 Epi, yo pati pou kont yo
 nan yon kannòt pou y' ale yon kote ki pa gen moun. 33 Men, anpil moun te wè lè y' ale, yo te rekonèt
 yo. Se konsa, yo kouri soti nan tout bouk yo, yo gen tan rive kote Jezi taprale avèk disip li yo anvan
 34 li. Lè Jezi rive pou l' debake sot nan kannòt la, li wè tout bann moun yo. Kè l' fè l' mal pou yo,
 paske yo te tankou yon bann mouton san gadò. Lamem, li tanmen esplike yo anpil bagay. 35 Lè
 li te kòmanse fè ta, disip yo pwoche bò kote Jezi, yo di li: -Li fin ta, wi. Pa gen moun rete bò isit
 36 la. Voye moun yo ale non pou yo ka achte manje nan bouk yo. 37 Jezi reponn yo: -Poukisa nou

pa ba yo manje nou menm pito? Disip yo mande li: -Ou ta vle poun al achte pen pou mil (1.000) goud poun bay tout moun sa yo manje? Jezi reponn yo: ³⁸ -Konbe pen nou gen la a? Ale wè non. ³⁹ Lè yo fin jwenn konbe pen yo genyen an, yo di l' konsa: -Nou gen senk pen ak de pwason. Lè sa a, Jezi pase lòd pou disip li yo fè tout moun chita atè sou zèb la, ti gwoup bò isit, ti gwoup bò ⁴⁰ la. Moun yo menm chita pa ranje san moun, ranje senkant moun. ⁴¹ Apre sa, Jezi pran senk pen yo ak de pwason yo, li leve je l' nan syèl la, li di Bondye mèsi. Li kase pen yo an moso, li renmèt ⁴² yo bay disip li yo pou yo mache bay moun yo. Li fè menm bagay ak de pwason yo. Tout moun ⁴³ manje vant plen. Disip yo ranmase tout ti moso pen yo ansanm ak rès pwason yo. Yo plen douz panyen pote ale. ⁴⁴ Te gen senkmil (5.000) moun antou ki te jwenn pen pou yo manje. ⁴⁵ ¶ Touswit apre sa, Jezi fè disip li yo moute nan yon kannòt, li voye yo devan lòt bò lanmè a, nan direksyon ⁴⁶ Betsayda. Jezi menm te rete dèyè pou l' voye foul moun yo ale. Apre li fin ranvwaye yo, li al ⁴⁷ lapriyè sou yon ti mòn. Lè solèy fin kouche, kannòt la te nan mitan lanmè a toujou. Jezi te pou ⁴⁸ kont li atè. Li wè disip yo te gen anpil traka pou yo naje zaviwon yo, paske van an te kontrè pou yo. Vè twazè nan maten, Jezi pran mache sou dlo lanmè a pou li al jwenn disip yo. Li te prèt pou ⁴⁹ depase yo. Lè yo wè l' ap mache sou dlo a, yo te kwè se te yon revenan. Yo pran rele. ⁵⁰ Yo tout yo te wè li, yo tout te pè. Menm lè a, Jezi pale avèk yo, li di yo konsa: -Pran tèt nou non. Se ⁵¹ mwen menm. Nou pa bezwen pè. Li moute bò kote yo nan kannòt la, van an vin tonbe. Se pa ti ⁵² sezi disip yo te sezi. Yo pa t' konprann sans mirak pen an, paske lespri yo te bouche toujou. ⁵³ Yo fin travèse lanmè a, yo fè tè toupre lavil Jenezarèt. Yo mare kannòt la atè. ⁵⁴ Kou yo soti nan kannòt la, lamennm moun yo rekonèt Jezi. ⁵⁵ Pèp la kouri nan tout peyi a; yo pote malad yo ⁵⁶ tou kouche sou nat ba li kote yo tande li te ye a. Toupatou kote Jezi te rive, kit nan bouk, kit nan lavil ou andeyò, yo te mete malad yo sou plas piblik, yo te mande Jezi pou l' te kite yo manyen bò rad li ase. Tout moun ki te manyen rad li te geri.

Chapter 7

¹ ¶ Farizyen yo ak kèk dirèktè lalwa te soti Jerizalèm. Yo sanble bò kote Jezi. ² Yo wè te gen nan disip li yo ki t'ap manje ak men yo tou sal, sa vle di, san yo pa t' lave men yo anvan. ³ Farizyen yo ak tout lòt jwif yo pa t' janm manje san yo pa t' lave men yo byen lave. Nan sa, yo t'ap swiv

⁴
 koutim granmoun lontan yo. Lè yo soti nan mache, sa pa t' bon non plis pou yo te manje san yo pa t' pran yon beny anvan. Yo te gen yon bann lòt koutim konsa ankò yo t'ap swiv. Pa egzanp, yo te gen yon jan pou yo lave chak bagay, yon jan pou gode yo, yon jan pou krich yo, yon jan pou mamit yo, yon jan pou lave menm kabann yo.

⁵
 Se sak fè, farizyen yo ak dirèktè lalwa yo mande Jezi: -Poukisa disip ou yo pa swiv koutim granmoun lontan yo? Men y'ap manje ak men yo tou sal.

⁶
 Jezi reponn yo: -Bann ipokrit! Ezayi te gen rezon lè l' t'ap pale sou nou, jan sa ekri a: Se nan bouch pèp sa a respekte m', men kè yo byen lwen mwen.

⁷
 Se tan yo y'ap pèdi lè y'ap fè sèvis pou mwen.

⁸
 Paske nan leson yo, se pawòl lèzòm y'ap moutre moun. Jezi di yo konsa: -Nou mete kòmandman

⁹
 Bondye yo sou kote pou nou swiv koutim moun etabli. Li di yo tou: -Nou byen konnen jan pou

¹⁰
 nou vire kòmandman Bondye yo voye jete, pou nou ka kenbe pwòp pawòl pa nou yo. Tande byen. Moyiz di konsa: Respekte papa ou ak manman ou. Li di ankò: Si yon moun pale papa l' ak

¹¹
 manman l' mal, se pou yo touye li. Men nou menm, nou di: Si yon moun di papa l' osinon manman l': Tou sa m' ta gen pou m' ede ou la, li kòban (sa vle di: se yon ofrann mwen mete apa

¹²
 pou Bondye), nan ka sa a, li pa bezwen fè anyen pou papa l' osinon manman li.

¹³
 Se konsa nou fè pawòl Bondye yo pase pou anyen ak pawòl pa nou n'ap transmèt yonn bay lòt. Nou fè anpil lòt

¹⁴
 bagay konsa ankò. Apre sa, Jezi rele foul moun yo vin bò kote l' ankò. Li di yo konsa: -Nou

¹⁵
 tout, tandè byen sa m'ap di nou la a; manyè konprann sa. Se pa bagay deyò ki antre anndan yon

¹⁶
 moun lè l'ap manje ki kapab mete l' nan kondisyon pou li pa ka sèvi Bondye. Men, se sak sot

¹⁷
 nan kè l' ki ka mete l' nan kondisyon sa a. Si nou gen zòrèy poun tandè, tandè. Lè l' fin kite foul

¹⁸
 moun yo dèyè, li antre nan kay la. Disip li yo mande l' esplike yo parabol sa a. Li di yo: -Nou menm tou, nou san konprann toujou? Nou pa konprann pawòl sa a: Tout bagay ki sot deyò antre

¹⁹
 anndan yon moun pa kapab mete l' nan kondisyon pou l' pa ka fè sèvis Bondye. Paske, manje pa antre nan kè moun. Men, sa pase nan vant; apre, yo jete sa nan latrin. (Lè l' pale konsa, Jezi fè

²⁰
 yo konprann tout manje bon.) Li di yo ankò: -Sa ki soti nan kè yon nonm, se sa ki mete l' nan

²¹
 kondisyon pou l' pa ka fè sèvis Bondye. Se nan kè yon moun, se anndan li tout move lide soti:

²²
 lide fè ou fè tout move bagay, li fè ou vòlè, li fè ou touye moun; li fè ou adiltè, li fè ou renmen lajan. Li rann ou mechan, fentè, li lage ou nan libètenaj, li ba ou gwo je, li fè ou pale moun mal, li

²³
 fè ou gen lògèy, li rann ou fou. Tout move bagay sa yo, se nan kè moun sa soti, se yo ki mete

²⁴
 yon moun nan kondisyon pou l' pa ka fè sèvis Bondye. ¶ Jezi kite kote li te ye a, li ale nan zòn

ki nan vwazinaj lavil Tir la. li antre nan yon kay, li pa t' vle pesonn konnen li te la. Men, li pa t'
²⁵ kapab rete kache. Se konsa te gen yon fanm ki te gen yon pitit fi l' ak yon move lespri sou li. Li
²⁶ tandè pale sou Jezi. Menm lè a, li kouri vin bò kote l', li lage kò l' nan pye Jezi. (Fanm sa a pa
t' jwif, se moun peyi Siri, nan yon seksyon yo rele Fenisi.) Li te fè Jezi demann sa a: -Tanpri souple,
²⁷ chase move lespri ki sou pitit fi m' lan. Men Jezi di l' konsa: -Kite vant ti moun yo plen anvan;
²⁸ paske sa pa bon pou wete pen nan bouch timoun pou bay ti chen. Fanm lan reponn li: -Se vre
²⁹ wi, Mèt. Men, ti chen ki anba tab manje ti kal pen timoun jete atè. Lè sa a Jezi di li: -Poutèt
³⁰ pawòl sa a, ou mèt al lakay ou: move lespri a soti sou pitit fi ou la. Lè fanm lan rive lakay li, li
³¹ jwenn pitit la kouche byen trankil sou kabann lan. Move lespri a te gen tan soti sou li. ¶ Jezi
kite zòn lavil Tir la. Li pase lavil Sidon, li travèse nan mitan peyi Dis Vil yo; li tounen lòt bò lanmè
³² Galile a. Yo mennen yon nonm ba li: nonm lan te soudè epi li pa t' pale byen. Yo mande Jezi
³³ pou li mete men l' sou tèt nonm lan. Men Jezi pran men nonm lan, li fè l' soti nan mitan foul
moun yo, li mennen l' sou kote. Li mete dwèt li nan zòrèy nonm lan, li krache, epi li manyen lang
³⁴ nonm lan. Apre sa, li leve je l' nan syèl la, li bay yon soupi. Li di: -Efata! (ki vle di: Louvri!)
³⁵ Latou, zòrèy nonm lan louvri, lang nonm lan demare nan bouch li epi li pran pale trè byen.
³⁶ Jezi te mande yo tout pou yo pa t' di pesonn sa. Men plis li te defann yo pale se plis yo te mache
³⁷ pale bagay la. Moun yo te pi sezi ankò. Yo t'ap di: -Nonm sa a fè tout afè l' byen. Li fè soudè
yo tandè, li fè bèbè yo pale.

Chapter 8

¹ ¶ Menm epòk sa a, yon gwo foul moun te sanble ankò. Yo pa t' gen anyen pou yo manje. Jezi
rele disip li yo, li di yo konsa: ² -Kè m' fè m' mal pou moun sa yo. Sa fè twa jou depi yo la avè m',
³ yo fin manje tou sa yo te pote. Si m' voye yo al lakay yo konsa san manje, y'a tonbe feblès nan
⁴ chemen paske gen ladan yo ki soti byen lwen. Disip li yo reponn li: -Nan dezè sa a, ki bò poun
⁵ jwenn pen pou plen vant tout moun sa yo? Jezi mande yo: -Konbe pen nou gen la a? Yo reponn:
⁶ -Nou gen sèt pen. Lè sa a, li fè foul moun yo chita atè; li pran sèt pen yo; li di Bondye mèsè, li
kase yo an moso, li renmèt yo bay disip li yo pou yo mache bay tout moun. Disip yo mache bay

⁷ tout moun pen. Te gen kèk ti pwason la tou. Jezi di Bondye mèsè pou yo tou, li mande disip li yo
⁸ mache bay tout foul moun yo. Tout moun te manje vant plen. Yo plen sèt panyen pote ale avèk
⁹ moso ki te rete. Te gen katmil (4.000) moun konsa antou. Apre sa, Jezi voye yo ale. ¶ ¹⁰ Touswit
¹¹ apre sa, li moute nan kannòt la avèk disip li yo, li ale nan yon peyi yo rele Dalmanouta. Farizyen
yo vin rive. Yo tanmen diskite avèk Jezi: yo te vle pran li nan pèlen. Yo mande l' pou l' fè yon
¹² mirak ki pou moutre se Bondye ki ba li tout pouvwa sa a. Jezi bay yon gwo soupi nan kè l', li
di yo konsa: -Poukisa moun alèkile yo renmen mande mirak konsa? Se vre wi sa m'ap di nou la a:
¹³ yo p'ap jwenn okenn mirak. Apre sa, li vire do l' ba yo, li tounen nan kannòt la; li pati pou lòt
¹⁴ bò lanmè a. Men, disip yo te bliye pran lòt pen: yo te gen yon sèl grenn pen avè yo nan kannòt
¹⁵ la. Jezi ba yo lòd sa a: -Fè atansyon. Pran prekosyon nou avèk ledven farizyen yo ansanm avèk
¹⁶ ledven Ewòd la. Disip yo pran pale pou kont yo, yonn t'ap di lòt: -Se paske nou pa gen pen kifè
¹⁷ l' di nou sa. Jezi vin konnen sa yo t'ap di konsa. Li mande yo: -Poukisa n'ap di: se paske nou pa
gen pen? Se konnen nou pa konnen? Nou poko ka konprann toujou? Se bouche lespri nou bouche
¹⁸ konsa? Gen lè nou pa wè nan je nou? Nou pa tande nan zòrèy nou? Se bliye nou gen tan bliye?
¹⁹ Lè m' te separe senk pen bay senkmil (5,000) moun yo, konbe panyen plen moso nou te pote
²⁰ ale? Yo reponn li: -Douz panyen. Jezi mande yo anko: -Lè m' te separe sèt pen bay katmil (4.000)
²¹ moun yo, konbe panyen plen moso nou te pote ale? Yo reponn li: -Sèt panyen. Lè sa a li di yo:
²² -Nou pa konprann toujou? ¶ Apre sa, y' ale Betsayda. Yo mennen yon nonm avèg bay Jezi. Yo
²³ mande li pou l' te manyen li. Jezi pran men avèg la, li mennen l' soti nan bouk la. Li pran ti gout
krache, li mete nan je avèg la. Apre sa, li mete men l' sou tèt avèg la: Li mande li: -Eske ou wè
²⁴ kichòy? Avèg la louvri je l', li di: -Mwen wè moun k'ap mache; yo sanble pyebwa. ²⁵ Jezi remete
²⁶ men l' ankò nan je l' yo. Lè sa a, avèg la wè klè nèt. Li te geri, li te wè tout bagay klè. Jezi voye
²⁷ l' al lakay li, li di l' konsa: -Pa antre nan bouk la. ¶ Jezi pati apre sa avèk disip li yo; li ale nan
tout bouk ki te nan rejyon Sezare Filip la. Antan yo t'ap mache, li poze yo keksyon sa a: -Ki moun
²⁸ yo di mwen ye en? Yo reponn li: -Gen moun ki di se Jan Batis ou ye. Gen lòt ki di ou se Eli;
²⁹ gen lòt ankò ki di ou se yonn nan pwofèt yo. Li mande yo ankò: -Bon, nou menm, ki moun nou
³⁰ di mwen ye? Pyè reponn li: -Ou se Kris la. Lè sa a, Jezi ba yo lòd byen sevè pou yo pa di pèsonn

31 sa. Apre sa, li kòmanse di disip li yo yon bann bagay. Li di yo konsa: -Mwen menm, Moun Bondye voye nan lachè a, mwen gen pou m' soufri anpil. Chèf fanmi yo, chèf prèt yo, dirèktè lalwa yo, yo yonn p'ap vle wè mwen. Y'ap fè touye m'. Men sou twa jou, mwen gen pou m' leve soti vivan pami mò yo.

32 Li t'ap pale konsa aklè ak yo. Pyè rele l' sou kote, li di li: -Pa pale konsa non.

33 Men Jezi vire tèt li, li gade disip li yo. Li pale sevè ak Pyè, li di li konsa: -Wete kò ou sou mwen, Satan! Paske, lide ou pa sou sa Bondye vle, men sou sa lèzòm ta vle.

34 Lè sa a Jezi rele foul moun yo ansanm avèk disip li yo, li di yo konsa: -Si yon moun vle mache dèyè m', se pou l' bliye tèt li, se pou l' chaje kwa l' sou zepòl li epi swiv mwen.

35 Paske, moun ki ta vle sove lavi l' va pèdi li. Men, moun ki va pèdi lavi l' poutèt mwen ak bon nouvèl la, li va sove li.

36 Kisa sa ta sèvi yon moun pou li ta genyen lemond antye si l' pèdi lavi li?

37 Ou ankò, kisa yon nonm kapab bay pou l' gen lavi?

38 Si yon moun wont di se moun mwen li ye, si li wont pale pawòl mwen nan mitan bann moun alèkile yo ki vire do bay Bondye pou viv nan peche, enben, mwen menm tou, Moun Bondye voye nan lachè a, lè m'a tounen avèk zanj Bondye yo nan tout bèl pouvwa Papa m' lan, m'a wont pran li pou moun pa m' tou.

Chapter 9

1 ¶ Li di yo ankò: -Sa m'ap di nou la a, se vre wi: Nan moun ki la koulye a gen ladan yo ki p'ap mouri san yo pa wè Bondye vin pran gouvènman an nan men l' avèk pouvwa.

2 Sis jou apre sa, Jezi pran Pyè, Jak ak Jan; li mennen yo pou kont yo sou tèt yon mòn byen wo. Figi l' chanje la devan yo;

3 rad li vin klere tou blan. Pa gen lesivyèz sou latè ki kapab blanchi konsa.

4 Twa disip yo wè Eli ak Moyiz parèt, yo t'ap koze avèk Jezi.

5 Pyè pran lapawòl, li di Jezi konsa: -Mèt, sa te bon nèt pou nou te la. N'ap moute twa ti kay, yonn pou ou, yonn pou Moyiz, yonn pou Eli.

6 Li pa t' konnen sa pou l' te di tèlman yo te pè.

7 Yon nwaj vin kouvri yo, epi yon vwa moun soti nan nwaj la, li di: -Sa se pitit mwen renmen anpil la. Koute li.

8 Menm lè a, disip yo vire tèt yo, yo gade adwat, yo gade agoch, men yo pa wè pesonn pase Jezi ki te pou kont li avèk yo.

9 Antan yo t'ap desann mòn lan, Jezi pale sevè avèk yo: -Pa di pesonn sa nou sot wè la a, jouk mwen menm, Moun Bondye voye nan lachè a, m'a leve soti vivan pami mò yo.

10 Yo te kenbe pawòl la sekrè, men

yonn t'ap di lòt: -Sa sa vle di menm: leve soti vivan pami mò yo? ¹¹ Twa disip yo poze l' keksyon
 sa a: -Poukisa dirèktè lalwa yo di: Se pou Eli vin anvan. ¹² Li reponn yo: -Se vre wi. Eli gen pou
 l' vin anvan pou l' mete tout bagay nan lòd. Men, ki jan yo te fè ekri tou: Moun Bondye voye nan
 lachè a gen pou l' soufri anpil, yo p'ap manke pase l' nan betiz? ¹³ Men mwen menm, mwen di
 nou: Eli vini deja, yo fè sa yo te vle ave l', jan sa te ekri sou li a. ¹⁴ ¶ Lè yo rive bò kote lòt disip
 yo, yo wè yo nan mitan yon mas moun. Te gen kèk dirèktè lalwa la tou ki t'ap diskite avèk yo.
¹⁵ Lè foul moun yo wè Jezi, seisman pran yo, yo tout kouri vin di l' bonjou. ¹⁶ Li mande disip li
 yo: -Sa n'ap diskite konsa? ¹⁷ Yon nonm nan foul moun yo reponn li: -Mèt, mwen te mennen ti
 gason m' lan ba ou; li anba yon move lespri ki rann li bèbè. ¹⁸ Nenpòt ki kote lespri a pran l', li
 fese l' atè. Lè konsa, tibway la kimen, li manje dan l', epi li vin tou rèd. Mwen te mande disip ou
 yo pou yo chase lespri a sot sou li, men yo pa t' kapab. ¹⁹ Jezi di yo: -Ala moun san konfyans nan
 Bondye! Jout kilè pou m' rete nan mitan nou? Jout kilè pou m' sipòte nou? Mennen tibway la ban
²⁰ mwen. Yo mennen l' ba li. Kou ti nonm lan wè Jezi, move lespri a souke l' byen souke. Ti gason
 an tonbe atè, li woule, li kimen. ²¹ Jezi mande papa a: -Depi konbe tan li konsa? Papa a reponn li:
²² -Depi li tou piti wi. Anpil fwa menm, move lespri a jete l' nan dife, osinon nan dlo pou touye
 li. Men, si ou kapab fè kichòy, tanpri, ede nou. Gen pitye pou nou! ²³ Jezi di li: -Si m' kapab menm!
²⁴ ...Tout bagay posib wi pou moun ki met konfyans yo nan Bondye. Menm lè a, papa tibway la
 di byen fò: -Mwen gen konfyans nan Bondye! Men, vin ede m' pou m' sa gen plis konfyans toujou.
²⁵ Lè Jezi wè foul moun yo ap kouri vini, li pale sevè avèk move lespri a, li di li: -Espri bèbè, espri
 soudè, se mwen k'ap kòmande ou: soti sou tibway la, pa janm antre sou li ankò. ²⁶ Move lespri a
 souke tibway la byen souke; li bay yon gwo rèl, epi li soti, li ale. Ti gason an te rete tankou si l' te
 mouri atè a, kifè anpil moun te gen tan ap di: -Li mouri wi. ²⁷ Men Jezi pran men l', li fè l' leve.
²⁸ Lamenm, ti gason an kanpe. Antre Jezi antre nan kay la, disip yo pran l' apa, epi yo di li: -Poukisa
 nou pa t' kapab chase lespri sa a? ²⁹ Li di yo: -Se lapriyè sèlman ki pou fè kalite lespri sa a soti.
³⁰ ¶ Yo soti kote yo te ye a, yo travèse peyi Galile. Jezi pa t' vle moun konnen kote li te ye, ³¹ paske
 li t'ap moutre disip li yo anpil bagay. Li di yo: -Mwen menm, Moun Bondye voye nan lachè a,
 mwen pral tonbe anba men lèzòm, yo pral touye mwen. Men, sou twa jou mwen gen pou m' leve
³² soti vivan nan lanmò. Men, disip yo pa t' konprann sans pawòl sa a: epi yo te pè poze l' keksyon.

33

Yo rive Kapènwòm. Rive li rive nan kay la, Jezi mande yo: -Kisa nou t'ap pale konsa nan chemen an? ³⁴ Pesonn pa louvri bouch yo reponn, paske nan chemen an, yo t'ap diskite pou konnen

kilès nan yo ki te pi grannèg. ³⁵ Lè sa a Jezi chita, li rele douz disip yo, li di yo konsa: -Si yon moun vle pou l' nan premye plas la, fòk li mete l' dèyè nèt, fòk li sèvi tout moun. ³⁶ Epi li pran yon

timoun piti, li mete l' nan mitan yo. Li pran timoun lan nan bra l', li di yo konsa: ³⁷ -Nenpòt moun ki resevwa yon timoun konsa poutèt mwen, se mwen menm menm li resevwa. Nenpòt moun ki

resevwa m', se pa mwen li resevwa, men se moun ki voye m' lan li resevwa. ³⁸ Jan di l' konsa: -Mèt, nou te wè yon nonm ki pran non ou pou chase move lespri. Nou te vle anpeche l' fè sa, paske

li pa t'ap mache avèk nou. ³⁹ Jezi reponn li: -Kite l' non. Paske yon moun ki pran non m' pou fè mirak pa kapab pale m' mal apre sa. ⁴⁰ Moun ki pa kont nou, se moun pa nou li ye. ⁴¹ ¶ Sa m'ap di la a, se vre wi: nenpòt moun ki va ban nou yon gode dlo paske se moun Kris la nou ye, li pa gen

dwa pèdi rekonpans li. ⁴² Kanta moun ki fè yonn nan timoun sa yo ki kwè nan mwen tonbe nan peche, li ta pi bon pou li si yo te mare yon gwo wòl moulen nan kou l', voye li jete nan lanmè. ⁴³ Si

se men ou ki pou ta fè ou tonbe nan peche, koupe l', voye l' jete. Pito ou antre nan lavi a ak yon sèl men, pase pou ou rete ak tou de men ou, apre sa pou ou al nan lanfè, kote dife a pa janm mouri.

⁴⁴ Nan lanfè, dife sa a ansanm ak vè k'ap manje kadav yo pa janm mouri. ⁴⁵ Si se pye ou ki pou ta fè ou tonbe nan peche, koupe l', voye li jete. Pito ou antre nan lavi a ak yon sèl pye, pase pou ou

rete ak de pye ou, apre sa pou yo jete ou nan lanfè. ⁴⁶ Nan lanfè, dife sa a ansanm ak vè k'ap manje kadav yo pa janm mouri. ⁴⁷ Si se je ou ki pou ta fè ou tonbe nan peche, rache l' voye l' jete. Pito

ou antre nan Peyi kote Bondye Wa a ak yon sèl je, pase pou ou rete ak tou de je ou, apre sa pou yo jete ou nan lanfè. ⁴⁸ La, dife a ansanm ak vè k'ap manje kadav yo pa janm mouri. ⁴⁹ Paske, tout

moun ap sale ak dife. ⁵⁰ Sèl, se yon bon bagay. Men, si sèl la pèdi gou l', ak kisa poun sale l' ankò? Mete sèl nan kè nou, epi viv byen yonn ak lòt.

Chapter 10

1

¶ Jezi kite kote l' te ye a; li ale nan rejyon Jide ki lòt bò larivyè Jouden an. La ankò, foul moun yo te sanble bò kote l'; li t'ap moutre yo anpil bagay, jan l' te toujou konn fè a. ² Kèk farizyen pwoche bò kote l' pou yo wè si yo te kapab pran l' nan pèlen. Yo mande li: -Eske lalwa nou pèmèt

yon nonm kite ak madanm li? ³ Li reponn yo: -Kisa Moyiz te ban nou lòd fè? ⁴ Yo di l': -Moyiz
 te pèmèt pou yon nonm ekri madanm li yon papye divòs anvan pou l' kite avèk li. ⁵ Lè sa a, Jezi
 di yo: -Moyiz te ekri kòmandman sa a pou nou paske nou gen tèt di. ⁶ Men, nan konmansman, lè
 Bondye t'ap kreye tout bagay, Bondye te fè gason ak fi. ⁷ Se poutèt sa, gason an va kite papa l' ak
 manman l', pou l' mete tèt ansanm ak madanm li. ⁸ Tou de va fè yon sèl kò. Konsa, yo p'ap de ankò,
 men yo fè yon sèl. ⁹ Se poutèt sa pesonn pa gen dwa separe sa Bondye mete ansanm. ¹⁰ Lè yo
 antre nan kay la, disip yo poze l' keksyon ankò sou bagay sa a. ¹¹ Li di yo konsa: -Si yon nonm
 kite ak madanm li pou li al marye ak yon lòt, li fè adiltè sou madanm li. ¹² Menm jan an tou, si
 yon fanm kite ak mari l' pou li al marye ak yon lòt, fanm lan fè adiltè. ¹³ ¶ Yo te mennen kèk
 timoun bay Jezi pou l' te mete men sou tèt yo. Men disip yo t'ap di moun yo pa fè sa. ¹⁴ Lè Jezi
 wè sa, li pa t' kontan menm. Li di disip yo: -Kite timoun yo vin jwenn mwen non. Pa anpeche yo
 vini, paske Peyi kote Bondye Wa a, se pou tout moun ki tankou timoun sa yo. ¹⁵ Sa m'ap di nou
 la a, se vre wi: Si yon moun pa asepte otorite Bondye a tankou yon timoun, li p'ap janm ka mete
 pye l' nan Peyi kote Bondye Wa a. ¹⁶ Apre sa, li pran timoun yo nan bra l', li mete men l' sou tèt
 yo chak, li beni yo. ¹⁷ ¶ Antan Jezi t'ap soti pou li al fè wout li, yon nonm kouri vini. Li lage kò l'
 ajenou devan Jezi, li mande li: -Bon Mèt, kisa pou m' fè pou m' resevwa lavi ki p'ap janm fini an?
¹⁸ Jezi di li: -Poukisa ou rele m' bon? Se yon sèl bon ki genyen, se Bondye. ¹⁹ Ou konn kòmandman
 yo: Piga ou touye moun; piga ou fè adiltè; piga ou vòlè; piga ou fè manti sou moun; piga ou twonpe
 moun; respekte papa ou ak manman ou. ²⁰ Li reponn Jezi: -Mèt, mwen swiv tout bagay sa yo depi
²¹ m' te ti katkat. Jezi gade nonm lan, li renmen l', epi l' di li: -Yon sèl bagay ou manke: Ale vann
 tou sa ou genyen, separe lajan an bay pòv. Apre sa, wa gen yon richès nan syèl la. Epi vin swiv
²² mwen. Men pawòl sa a te fè nonm lan lapenn anpil. Li vin kagou, li vire do l', li ale, paske li te
²³ gen anpil byen. Apre sa, Jezi gade disip li yo ki te bò kote l' la, li di yo: -Sa ap difisil nèt pou
²⁴ moun rich antre nan Peyi kote Bondye Wa a. Disip li yo te sezi anpil lè yo tandè pawòl sa a.
 Men Jezi di yo konsa: -Mezanmi, sa ap difisil nèt pou moun antre nan peyi kote Bondye Wa a.
²⁵ L'ap pi fasil pou gwo bèt yo rele chamo a pase nan je yon zegwi pase pou yon moun rich antre
²⁶ nan peyi kote Bondye Wa a. Disip yo te pi sezi toujou, yonn t'ap di lòt: -Nan kondisyon sa a, ki

²⁷ moun ki ka sove? Jezi gade yo nan je, li di yo konsa: -Moun pa ka fè sa, men Bondye ka fè l',
 paske pa gen anyen Bondye pa ka fè. ²⁸ Lè sa a, Pyè di li: -Men koute non, nou kite tout bagay
²⁹ pou nou swiv ou. Jezi reponn li: -Sa m'ap di nou la a, se vre wi: nenpòt moun ki kite kay li,
 osinon frè l', osinon manman l', osinon papa l', osinon pitit li, osinon jaden l', pou sèvis mwen ak
³⁰ pou sèvis bon nouvèl la, moun sa a gen pou l' resevwa, depi koulye a, nan tan sa a, san (100)
 fwa plis pou sa l' te kite a: kay, frè, sè, manman, pitit, jaden ansanm avèk tout kalite pèsekisyon;
³¹ epi nan tan k'ap vini apre sa a, li gen pou l' resevwa lavi ki p'ap janm fini an. Men, anpil nan
³² moun ki devan yo va rete dèyè, anpil nan moun ki dèyè yo va pran devan. ¶ Lè sa a, yo te pran
 chemen moute lavil Jerizalèm, Jezi t'ap mache devan yo. Yon sèl kè sere pran disip yo. Tout moun
 ki t'ap swiv yo te pè tou. Jezi pran douz disip yo apa ankò, li kòmanse di yo sa ki te gen pou rive
³³ li. Li di yo: -Tande! Men n'ap moute lavil Jerizalèm, kote yo pral lage m', mwen menm, Moun
 Bondye voye nan lachè a, nan men chèf prèt yo ak nan men dirèktè lalwa yo. Yo pral kondannen
³⁴ m' amò, y'ap lage m' bay moun lòt nasyon yo. Moun lòt nasyon sa yo va pase m' nan rizib byen
 pase, y'a krache sou mwen, y'a bat mwen ak kout fwèt, apre sa y'a touye mwen. Men sou twa jou,
³⁵ m'a leve soti vivan nan lanmò. Apre sa, de pitit Zebede yo, Jak ak Jan, pwoche bò kot Jezi, yo
 di l' konsa: -Mèt, nou ta renmen ou fè sa nou pral mande ou la a pou nou. ³⁶ Li di yo: -Kisa nou ta
³⁷ vle m' fè pou nou? Yo di li: -Fè nou chita yonn sou bò dwat ou, lòt la sou bò gòch ou, lè wa nan
³⁸ tout bèl pouvwa ou. Jezi reponn yo: -Nou pa konnen sa n'ap mande la a. Eske nou ka bwè nan
³⁹ menm gode mwen pral bwè a? Eske nou ka resevwa menm batèm mwen pral resevwa a? Yo di
 li: -Nou kapab. Jezi reponn yo: -Se vre. n'a bwè nan menm gode mwen pral bwè a, epi n'a resevwa
⁴⁰ menm batèm mwen pral resevwa a. Men, kanta pou chita sou bò dwat osinon sou bò gòch mwen
⁴¹ an, se pa mwen ki bay sa. Plas sa yo, Bondye rezève yo pou moun li vle. Lè dis lòt disip yo
⁴² tande sa, yo pa t' manke fache sou Jak ak Jan. Jezi rele yo, li di yo konsa: -Nou konnen ki jan
 moun ki pase pou chèf nasyon yo trete pèp la tankou esklav; grannèg yo renmen fè moun santi jan
⁴³ yo gen pouvwa. Men, se pa konsa pou sa fèt nan mitan nou. Okontrè, si yonn nan nou ta vle vin
⁴⁴ grannèg, se pou l' sèvi nou tout. ⁴⁵ Si yonn nan nou ta vle chèf, se pou l' esklav nou tout. Paske,
 mwen menm, Moun Bondye voye nan lachè a, mwen pa vini pou moun rann mwen sèvis, men
⁴⁶ mwen vini pou m' rann moun sèvis. Wi, mwen vin bay lavi m' pou peye delivrans anpil moun. ¶
 Yo te rive lavil Jeriko. Lè sa a, Jezi t'ap soti kite bouk la ansanm avèk disip li yo ak yon gwo foul
 moun. Te gen yon nonm avèg chita bò chemen an ki t'ap mande charite. Yo te rele l' Batime, pitit

Time. ⁴⁷ Lè li tande se Jezi, moun Nazarèt la, ki t'ap pase, li pran rele: -Jezi, pitit David la, gen pitye pou mwen. ⁴⁸ Anpil moun t'ap kouri dèyè l' pou te fè l' pe bouch li, men li t'ap rele pi rèd: -Pitit David la, gen pitye pou mwen. ⁴⁹ Jezi kanpe, li di konsa: -Rele l' pou mwen. Yo rele avèg la, yo di li: -Pran kouray, leve, men li ap rele ou. ⁵⁰ Avèg la voye rad li jete, se vole li t'ap vole pou l' te vin bò kot Jezi. ⁵¹ Jezi mande li: -Kisa ou vle m' fè pou ou? Avèg la reponn li: -Mèt, fè m' wè ankò. ⁵² Jezi di li: -Ale non, se konfyans ou nan Bondye ki geri ou. Menm lè a, avèg la wè, epi li swiv Jezi nan chemen an.

Chapter 11

¹ ¶ Yo t'ap pwoche bò Jerizalèm, bò bouk Betfaje ak Betani, yo te rive sou mòn Oliv l'a. Lè sa a, Jezi voye de nan disip li yo. ² Li di yo: -Ale nan bouk ki devan nou an. Lè n'a rive, n'a jwenn yon jenn ti bourik mare. Pesonn poko janm moute sou li. Lage l', mennen l' ban mwen. ³ Nenpòt moun ki mande nou poukisa n'ap fè sa, nou mèt reponn: Se Mèt la ki bezwen li. L'ap voye ti bourik la tounen touswit. ⁴ Lè disip yo ale, yo jwenn jenn ti bourik la mare deyò nan lari a, devan pòt yon kay. Yo lage li. ⁵ Kèk moun ki te la di yo konsa: -Sa n'ap fè la a? Pouki n'ap lage ti bourik la? ⁶ Disip yo reponn jan Jezi te di yo reponn lan. Epi moun yo kite yo ale. ⁷ Yo mennen ti bourik la bay Jezi; yo mete rad sou do li, epi Jezi moute chita. ⁸ Anpil moun te tann rad yo atè sou tout chemen an. Gen lòt ki te koupe branch bwa nan jaden pou mete atè nan chemen an. ⁹ Ni moun ki t'ap mache devan Jezi yo, ni moun ki t'ap mache dèyè l' yo, yo tout t'ap rele byen fò: -Lwanj pou Bondye! Benediksyon pou moun ki vini nan non Mèt la. ¹⁰ Wi, benediksyon pou gouvènman k'ap vini an, pou gouvènman wa David, papa nou. Lwanj pou Bondye jouk anwo nan syèl la! ¹¹ Jezi antre lavil Jerizalèm; li ale nan tanp lan. Li voye je l' sou tout bagay. Apre sa, li ale Betani avèk douz disip li yo paske li te fin ta. ¹² ¶ Nan denmen, antan yo t'ap soti Betani, Jezi te grangou. ¹³ Depi byen lwen, li wè yon pye fig Frans ki te plen fèy. li al wè si li ta jwenn kèk fig Frans sou li. Men, lè li rive kote l', se fèy ase li jwenn, paske se pa t' sezon fig Frans. ¹⁴ Lè sa a, Jezi pale ak pye fig Frans lan, li di li: -Pesonn p'ap janm manje fig ou donnen ankò. Disip yo te tande sa l' te di a.

15

Aprè sa, yo rive Jerizalèm, Jezi antre nan tanp lan. Li pran chase tout moun ki t'ap vann ak tout moun ki t'ap achte nan tanp lan. Li chavire tab moun ki t'ap chanje lajan yo ansanm ak chèz moun

ki t'ap vann pijon yo. ¹⁶ Li pa t' pèmèt pesonn travèse tanp lan ak bagay nan men yo. ¹⁷ Li t'ap moutre moun yo anpil bagay, li di yo: -Men sa ki ekri, pa vre: y'a rele kay mwen an kay kote moun

tout nasyon ka vin lapriyè. Men nou menm, nou fè l' tounen yon kachèt pou vòlò. ¹⁸ Lè chèf prèt yo avèk dirèktè lalwa yo tande sa, yo t'ap chache yon jan pou yo fè touye l'; paske yo te vin pè l',

lèfini, pawòl li t'ap moutre moun yo te aji anpil sou foul moun yo. ¹⁹ Lè solèy fin kouche, Jezi soti

kite lavil la ansanm ak disip li yo. ²⁰ Nan denmen maten, byen bonè, antan yo t'ap pase sou wout

la, disip yo wè pye fig frans la cheche jouk nan rasen. ²¹ Pyè vin chonje sak te pase. Li di Jezi

konsa: -Mèt, gade pye fig frans ou te madichonnen an. Li cheche wi. ²² Lè sa a, Jezi pran lapawòl,

li di yo: -Se pou nou toujou gen konfyans nan Bondye. ²³ Sa m'ap di nou la a, se vre wi: si yon moun di mòn sa a: Wete kò ou la, al jete ou nan lanmè, si l' pa gen doutans nan kè l' menm, si l'

gen fèm konviksyon sa l' di a gen pou rive, la wè l' rive vre. ²⁴ Se pou sa mwen di nou: Tou sa n'ap

mande lè n'ap lapriyè, si nou gen fèm konviksyon nou resevwa l' deja, n'a wè sa rive vre. ²⁵ Lè nou kanpe poun lapriyè, si nou gen yon moun nan kè nou, padonnen l', pou Papa nou ki nan syèl

la ka padonnen peche nou yo tou. ²⁶ Men, si nou pa padonnen lòt moun yo, Papa nou ki nan syèl

la p'ap padonnen peche nou yo tou. ²⁷ ¶ Se konsa, yo tounen lavil Jerizalèm ankò. Pandan Jezi t'ap

pwonmennen nan tanp lan, chèf prèt yo, dirèktè lalwa yo ak chèf fanmi yo te vin bò kote li. ²⁸ Yo di l' konsa: -Ki dwa ou genyen pou w'ap fè tout bagay sa yo? Kilès ki ba ou otorite pou fè yo?

²⁹ Jezi reponn yo: -Mwen pral poze nou yon sèl keksyon tou. Si nou reponn mwen, m'a di nou ak

ki otorite m'ap fè bagay sa yo. ³⁰ Ki moun ki te voye Jan batize moun: Bondye osinon moun?

Reponn mwen non. ³¹ Men, yonn t'ap di lòt konsa: -Si nou reponn: Se Bondye ki voye l', la mande

nou poukisa nou pa t' kwè li. ³² Si nou reponn: Se moun ki voye l'... oum! Yo te pè pèp la, paske

tout moun sa yo te pran Jan Batis pou yon bon pwofèt. ³³ Lè sa a yo reponn Jezi: -Nou pa konnen.

Jezi di yo: -Enben, mwen menm tou, mwen p'ap di nou avèk ki otorite mwen fè bagay sa yo.

Chapter 12

¹ ¶ Apre sa, Jezi pran rakonte yo yon parabòl. -Vwala, se yon nonm ki te plante yon jaden rezen. Li fèmen l' ak yon lantouraj, li fouye yon basen pou kraze rezen yo, li bati yon kay pou moun k'ap veye jaden an. Apre sa, li antann li avèk kèk moun ki pou okipe jaden an pou li. Li pati, li al nan vwayaj.

² Lè sezon rekòt la rive, li voye yon domestik bò kote moun ki t'ap okipe jaden an pou li. Li te voye chache pòsyon pa l' nan rekòt rezen an nan men yo.

³ Yo mete men sou domestik la, yo bat li byen bat, epi yo voye l' tounen bay mèt jaden an san yo pa ba l' anyen.

⁴ Mèt jaden an voye yon lòt domestik bò kote yo ankò. Fwa sa a menm, yo bat li nan tèt ase, epi yo joure l' byen joure.

⁵ Mèt jaden an voye yon twazyèm domestik, yo touye sa a. Li voye anpil lòt ankò: gen sa yo bat, gen sa yo touye.

⁶ Sèl moun mèt jaden an te rete pou l' te voye, se pitit gason li te renmen anpil la. Li voye l' an dènye bò kote yo. Li t'ap di nan kè l': Omwens y'a gen respè pou gason m' lan.

⁷ Men, kiltivatè yo yonn di lòt: Men eritye a. Ann mete tèt nou ansanm. Ann touye l', konsa jaden an va vin pou nou.

⁸ Yo mete men sou li, yo touye l', epi yo jete kò a deyò lòt bò jaden an.

⁹ Bon! Kisa mèt jaden an gen pou l' fè ankò? La vini, la fè touye tout kiltivatè yo, epi la bay lòt moun jaden rezen an.

¹⁰ Eske nou pa li pawòl ki ekri a? Mwen sèten nou li l' deja: Wòch moun ki t'ap bati yo te voye jete a, se li menm ki tounen wòch ki kenbe kay la.

¹¹ Sa se travay Mèt la. Se bèl bagay pou nou wè sa.

¹² Chèf jwif yo t'ap chache mete men sou li, paske yo te konnen byen se pou yo Jezi te di parabòl sa a. Men, yo te pè mas pèp la. Yo kite l', y' al fè wout yo.

¹³ ¶ Yo te voye kèk farizyen ansanm ak kèk nan patizan Ewòd yo bò kot Jezi pou wè si yo te ka pran yon pawòl nan bouch li pou akize li.

¹⁴ Yo vin di l' konsa: -Mèt, nou konnen ou se moun ki kare, ou pa pè pesonn, paske ou pa gade sou figi moun. Men, ou moutre chemen Bondye a jan li ye a. Manyè di nou: èske lalwa pèmèt nou peye Seza lajan kontribisyon an? Eske nou dwe peye li? Wi ou non?

¹⁵ Men Jezi te konnen yo gen lòt lide dèyè tèt yo; li reponn yo: -Pouki n'ap chache pran m' nan pèlen konsa? Pote yon pyès lajan ban mwen pou m' gade yon bagay.

¹⁶ Yo pote yon pyès lajan ba li. Jezi mande yo: -Pòtre ki moun ak non ki moun ki sou pyès lajan an? Yo reponn li: -Se pòtre Seza ak non Seza.

¹⁷ Lè sa a, li di yo: -Bay Seza sa ki pou Seza, bay Bondye sa ki pou Bondye. Pawòl sa a te fè yo pi sezi ankò.

¹⁸ ¶ Sadiseyen yo se yon gwoup jwif ki di moun mouri pa leve. Yo vin bò kot Jezi ak yon keksyon. Yo di l' konsa:

¹⁹ -Mèt, Moyiz te ekri lòd sa a ban nou: Yon nonm ki gen frè, si l' mouri kite madanm li san pitit, frè a gen pou l' marye avèk madanm defen an pou li sa fè pitit pou frè l' ki mouri a.

²⁰ Se konsa, te gen sèt frè. Premye a marye, li mouri san l' pa kite pitit.

²¹ Dezyèm

lan marye avèk vèv la. Li mouri tou san l' pa kite pitit. Menm bagay la rive twazyèm lan tou.
22

Konsa konsa, tout sèt frè yo marye ak fanm lan epi yo yonn pa kite pitit. Apre yo tout fin mouri,
li menm tou fanm lan mouri. 23 Lè mò yo va gen pou yo leve, madanm kilès nan yo li pral ye la

a, paske li te madanm tout sèt frè yo? 24 Jezi reponn yo: -Nou nan lerè wi. M'ap di nou poukisa:

Nou pa konprann sa ki ekri a, nou pa konnen pouvwa Bondye. 25 Lè mò yo va gen pou yo leve,
fanm ak gason pa nan marye ankò. Tout moun pral viv tankou zanj Bondye nan syèl la. 26 Pou

keksyon mò yo k'ap leve vivan ankò a, èske nou pa li nan Liv Moyiz la sa Bondye te di l' bò touf
bwa a: Mwen se Bondye Abraram, Bondye Izarak, Bondye Jakòb? 27 Bondye se Bondye moun

vivan li ye, li pa Bondye moun mouri. Nou wè nou nan lerè anpil, pa vre? 28 ¶ Yonn nan dirèktè
lalwa yo te tandè jan yo t'ap diskite. Li wè Jezi te byen reponn sadiseyen yo. Lè sa a, li pwoche bò

kote l', li mande li: -Kilès nan tout kòmandman yo ki pi konsekan an? 29 Jezi reponn li: -Men
kòmandman ki pi konsekan an: Koute, nou menm pèp Izrayèl: Mèt la, Bondye nou, se li ki sèl Mèt

la. 30 Se pou ou renmen Mèt la, Bondye ou, avèk tout kè ou, avèk tout nanm ou, avèk tout lide ou,

avèk tout fòs ou. 31 Men dezyèm kòmandman an: Se pou ou renmen frè parèy ou tankou ou renmen
pwòp tèt pa ou. Pa gen lòt kòmandman ki pi konsekan pase sa yo. 32 Lè sa a, dirèktè lalwa a di li:

-Se sa menm, Mèt. Sa ou di a se vre. Met nou an se sèl Bondye ki genyen. Pa gen lòt pase li. 33 Jan
ou di a, se pou nou renmen l' ak tout kè nou, tout lespri nou, tout fòs nou, epi se pou nou renmen
frè parèy nou tankou nou renmen pwòp tèt pa nou. Sa pi bon lontan pase tout ofrann n'ap boule

pou Bondye ansanm ak tout lòt bèt n'ap ofri pou touye pou li. 34 Jezi wè nonm lan te fè l' yon
repons moun ki gen konprann, lè sa a li di li: -Ou menm, ou pa lwen peyi kote Bondye Wa a non.

Apre sa, pesonn pa t' gen odas poze l' keksyon ankò. 35 ¶ Pandan Jezi t'ap moutre moun yo anpil

bagay nan tanp lan, li di yo: -Ki jan dirèktè lalwa yo fè di Kris la se pitit pitit David li ye? 36 Poutan,
men sa David te di (se Sentespri menm ki te fè l' di l'): Bondye te di Seyè mwen an: Chita la sou

bò dwat mwen, jouk tan mwen fè lènmi ou yo tounen yon ti ban pou lonje pye ou. 37 Si David rele
Kris la Seyè, ki jan pou Kris la ta ka pitit pitit David? Yon pakèt moun t'ap koute Jezi avèk plezi.

38 Nan sa li t'ap moutre moun yo, li di yo konsa: -Pran prekosyon nou avèk dirèktè lalwa sa yo. Yo
renmen pwonmennen avèk wòb long yo, yo renmen moun di yo bonjou jouk atè lè yo sou plas

piblik. 39 Lè y' al nan sinagòg, yo chita kote pou tout moun wè yo. Nan resepsyon yo chache pi

bon plas la. 40 Se piye y'ap piye malerèz yo, an menm tan y'ap plede fè lapriye byen long pou parèt

41
pi bon. Kondannasyon yo pral pi rèd. ¶ Apre sa, Jezi te chita vizaviz ak bwat kote yo mete ofrann nan tanp lan. Li t'ap gade moun yo ap mete lajan ladan li. Plizyè moun rich t'ap mete anpil lajan.
42
Yon pòv vèv vin rive tou; li mete de ti kòb ki pa t' menm fè mwaye senk kòb. 43 Lè sa a Jezi rele disip li yo, li di yo; -Sa m'ap di nou la a, se vre wi: Pòv vèv sa a bay plis pase tout moun ki mete ofrann nan bwat la. 44 Paske, tout moun sa yo mete sa yo pa bezwen; men li menm, nan tout mizè li, li bay tou sa l' te genyen, tout sa l' te gen pou l' viv.

Chapter 13

1 ¶ Antan Jezi t'ap soti nan tanp lan, yonn nan disip li yo di l' konsa: -Mèt, gade. Ala de bèl wòch! Ala yon gwo batisman! 2 Jezi reponn li: -Ou wè gwo batisman sa a: yon lè, p'ap gen de wòch k'ap rete kanpe yonn sou lòt ladan li. Tou sa pral kraze nèt vide atè. 3 Jezi te chita sou mòn Oliv la, vizaviz ak tanp lan. Pyè, Jak ak Andre te pou kont yo avèk li. Yo poze l' keksyon sa a: 4 -Di nou kilè sa va rive non? Ki siy ki va fè nou konnen lè tout bagay sa a yo gen pou rive? 5 ¶ Lè sa a Jezi pran di yo: -Atansyon pou pesonn pa twonpe nou. 6 Paske, anpil moun va vini sou non mwen, y'a di se yo menm ki Kris la. y'a twonpe anpil moun. 7 Lè n'a tandè lagè ap fèt toupre nou, ansanm ak nouvèl lagè k'ap fèt byen lwen, nou pa bezwen pè. Fòk bagay sa yo rive. Men, se p'ap ankò lafen an sa. 8 Yon pèp va goumen ak yon lòt pèp. Yon peyi va atake yon lòt peyi; va gen tranblemanntè divès kote. Va gen anpil grangou. Tou sa, se va tankou tranche anvan akouchman. 9 Men, nou menm, kenbe kò nou. Y'ap trennen nou devan tribinal, y'ap bat nou nan sinagòg yo, n'ap konparèt devan chèf gouvènman ak devan wa poutèt mwen, pou nou ka sèvi m' temwen devan yo. 10 Anvan sa, fòk yo anonse bon nouvèl la bay tout nasyon yo. 11 Lè y'a arete nou pou mennen nou nan tribinal, pa kase tèt nou pou nou chache konnen davans sa n'a pral di; men, n'a di pawòl ki va vin nan bouch nou: paske lè sa a, se pa nou menm ki va pale, se Sentespri a ki va mete pawòl yo nan bouch nou. 12 Frè va denonse frè pou fè touye li. Papa va denonse pitit, pitit va leve kont manman l' ak papa l', la fè touye yo. 13 Tout moun pral rayi nou poutèt mwen; men, moun ki va kenbe fèm jouk sa kaba, se li ki va sove. 14 ¶ Nou gen pou nou wè bagay nou pa ta renmen wè a, bagay k'ap bay gwo lapenn lan, chita kote l' pa t' dwe ye. (Se pou tout moun k'ap li sa a chache konprann.) Lè

sa a, tout moun ki nan peyi Jide va blije al nan mòn.¹⁵ Moun ki va sou tèt kay yo va kouri met
 deyò san yo p'ap bezwen antre pran zafè yo.¹⁶ Moun ki nan jaden p'ap bezwen tounen lakay yo
 pou pran rechanj yo.¹⁷ Lè sa a, se p'ap de lapenn pou fanm ansent ak nouris yo.¹⁸ Lapriyè Bondye
 pou bagay sa yo pa rive nan tan fre di.¹⁹ Paske lè sa a, n'a wè yon lafliksyon moun poko janm wè,
 depi nan konmansman lè Bondye t'ap kreye latè jouk koulye a. p'ap janm gen yon lòt tankou l' ankò.
²⁰ Si Mèt la pa t' deside wete kèk jou sou jou sa yo, pesonn pa t'ap sove. Men, li wete sou jou sa
 yo poutèt moun li chwazi pou la ak li yo.²¹ Lè sa a, si yon moun di nou: Gade, men Kris la bò isit,
 osinon: Gade, men li lòt bò a, pa kwè li.²² Lè sa a, gen fo Kris ak fo pwofèt k'ap parèt; y'a fè
 mèvèy ak mirak pou twonpe ata moun Bondye chwazi yo, si yo ta kapab.²³ Veye kò nou. Mwen
 tou di nou tout bagay sa yo davans.²⁴ ¶ Men nan tan sa a, apre jou lafliksyon sa yo, solèy la p'ap
 klere ankò, lalen lan p'ap bay limyè.²⁵ Zetwal yo va sot tonbe nan syèl la, pouvwa yo ki nan syèl
 la va tranble.²⁶ Lè sa a, y'a wè m', mwen menm, Moun Bondye voye nan lachè a, ap vini sou tèt
 nwaj yo, avèk anpil pouvwa nan mitan yon bann bèl bagay.²⁷ m'a voye zanj mwen yo nan kat
 kwen latè a pou sanble tout moun Bondye te chwazi yo, depi yon bout tè a jouk nan lòt bout syèl
 la.²⁸ ¶ Pran leson sou pye fig frans lan. Kou l' kòmanse boujonnen, kou l' pouse fèy, nou konnen
 lete sou nou.²⁹ Menm jan an tou, lè n'a wè bagay sa yo rive, nou mèt konnen Moun Bondye te
 voye nan lachè a toupre, li la nan papòt la.³⁰ Sa m'ap di nou la a, se vre wi: gen moun k'ap viv
 koulye a ki p'ap gen tan mouri anvan tout bagay sa yo rive.³¹ Syèl la ak tout tè a va pase, men
 pawòl mwen yo p'ap janm pase.³² Pesonn pa konnen ni ki jou ni ki lè bagay sa yo ap rive, pa
 menm zanj yo ki nan syèl la, pa menm Pitit la. Sèl Papa a konn sa.³³ Kenbe kò nou; pa kite dòmi
 pran nou; paske nou pa konnen ki lè lè a va rive.³⁴ Se tankou lè yon nonm pati li al nan vwayaj.
 Li kite kay li nan men domestik yo pou yo okipe l' pou li. Li bay chak moun travay pa yo pou yo
 fè; li bay gadyen pòt la lòd pou l' pa dòmi.³⁵ Se poutèt sa, pa kite dòmi pran nou, paske nou pa
 konnen ki lè mèt kay la va vini. Se ka aswè, nan mitan lannwit, lè kòk chante, osinon nan maten.
³⁶ Si l' rive yon lè nou pa t'ap tann li, piga li jwenn nou ap dòmi.³⁷ Sa m' di nou la a, mwen di l'
 pou tout moun: Pa kite dòmi pran nou.

Chapter 14

¹ ¶ Nan de jou ankò yo tapral fete fèt Delivrans lan ansanm ak fèt Pen san ledven an. Chèf prèt yo ak dirèktè lalwa yo t'ap chache mwayen pou yo arete Jezi san pesonn pa konnen, pou fè touye

² li. Yonn t'ap di lòt: -Nou pa kapab arete l' pandan jou fèt yo, paske sa ka kreye dezòd nan pèp la.

³ Jezi te Betani lakay Simon, nonm ki te gen maladi lalèp la. Pandan li te chita bò tab la, yon fanm vin antre. Li t'ap pote yon ti boutèy fèt an albat. Ti boutèy la te plen yon odè bon kalite ki fèt ak yon fèy yo rele n'a ki vann byen chè. Fanm lan kase kou boutèy la, epi li vide tout odè a sou tèt

⁴ Jezi. Nan moun ki te la yo, gen ladan yo ki pa t'kontan menm, yonn t'ap di lòt: -Pouki tout gaspiyay

⁵ odè sa a? Yo ta kapab vann li twasan (300) goud pou pi ba pri, epi yo ta bay pòv lajan an. Yo t'ap

⁶ kritike fanm lan byen fò. Men Jezi di yo: -Kite l' an repo. Pouki n'ap fè l' tout lapenn sa a? Se yon

⁷ bèl bagay li fè la a pou mwen. Pòv yo, n'ap toujou genyen yo avèk nou; chak fwa nou vle, nou

⁸ ka fè byen pou yo. Men, mwen menm, nou p'ap genyen m' tout tan avèk nou. Fanm lan fè sa l'

⁹ te kapab. Depi davans li tou benyen kò m' pou lantèman mwen. Sa m'ap di nou la a, se vre wi: Toupatou sou latè, kote y'a anonse bon nouvèl la, y'a rakonte sa fanm lan fè la a tou pou yo pa janm

¹⁰ bliye li. Lè sa a, Jida Iskariòt, yonn nan douz disip yo, leve, li al di chèf prèt yo li te pare pou l'

¹¹ te fè yo pran Jezi. Yo te kontan tandè sa Jida t'ap di yo, yo pwomèt pou yo ba l' lajan. Se konsa

¹² Jida t'ap chache yon bon okazyon pou l' te ba yo Jezi. ¶ Premye jou fèt Pen san ledven an, jou yo te konn touye ti mouton pou manje Delivrans lan, disip yo di Jezi konsa: -Ki bò ou ta vle n' al

¹³ pare Fèt Delivrans lan? Lè sa a, Jezi rele de nan disip li yo, li di yo: -Ale lavil la; n'a kontre yon

¹⁴ moun k'ap pote yon krich dlo: swiv li. Kote la antre a, antre dèyè li. n'a di mèt kay la: Mèt la

¹⁵ voye mande ou kote pyès kay pou l' manje manje Delivrans lan avèk disip li yo. La moutre nou yon gwo chanm, tou pare tou meble, anwo kay la. Se la n'a pare manje Delivrans lan pou nou tout.

¹⁶ Disip yo pati, yo rive lavil la; yo jwenn tout bagay jan l' te di yo a. Epi yo pare manje Delivrans

¹⁷ lan. Lè solèy fin kouche, Jezi vin rive avèk douz disip yo. Antan yo te chita bò tab la ap

¹⁸ manje, Jezi di konsa: -Sa m'ap di nou la a, se vre wi: yonn nan nou k'ap manje avèk mwen la a pral

¹⁹ trayi mwen. Lè sa a, kè disip yo kase; yonn apre lòt yo pran mande li: -Eske se mwen menm?

²⁰ Li reponn yo: -Se yonn nan nou douz la k'ap tranpe pen ansanm avè m' nan plat la. Moun

²¹ Bondye voye nan lachè a pral mouri, jan sa te ekri sou li a. Men, malè pou moun k'ap trayi l' la. Li

ta pi bon pou moun sa a si li pa t' janm fèt. ²² Antan yo t'ap manje, Jezi pranpen, li di Bondye mèsi,
 li kase l'; li bay disip li yo, li di yo konsa: -Men, pran. Sa se kò mwen. ²³ Apre sa, li pran yon gode
 diven tou, li di Bondye mèsi, li pase l' ba yo, yo tout bwè ladan li. ²⁴ Epi Jezi di yo: -Sa se san
 mwen, san ki siyen kontra Bondye ap fè ak nou an, san ki koule pou anpil moun. ²⁵ Sa m'ap di nou
 la a, se vre wi: mwen p'ap janm bwè diven ankò, jouk jou m'a bwè yon diven nèf nan peyi kote
 Bondye Wa a. ²⁶ Apre yo fin chante chante fèt la, yo soti, y' ale mòn Oliv. ²⁷ Jezi di disip li yo:
 -Nou tout, nou pral kouri kite m' pou kont mwen; paske men sak te ekri: M'ap frape gadò mouton
 yo, epi tout mouton yo pral gaye nan bwa. ²⁸ Men apre, lè m'a leve soti vivan nan lanmò, mwen
 pral tann nou nan peyi Galile. ²⁹ Pyè di li: -Menm si tout moun ta kouri kite ou, mwen menm mwen
 p'ap janm fè sa. ³⁰ Jezi reponn li: -Sa m'ap di ou la a, se vre wi: Jòdi a menm, pandan lannwit sa
 a, anvan kòk chante de fwa, wa gen tan di twa fwa ou pa janm konnen mwen. ³¹ Men, Pyè te kenbe
 la, li t'ap di: -Menm si m' ta dwe mouri avè ou, mwen p'ap janm di sa. Tout lòt disip yo t'ap di menm
 bagay la tou. ³² ¶ Apre sa, yo rive yon kote yo rele Jetsemane. Jezi di disip li yo: -Chita la, mwen
 pral lapriyè pi devan. ³³ Li pran Pyè, Jak ak Jan avè li. Lamenm, li santi yon frison nan rèl do l' ak
 yon kè sere ki pran li. ³⁴ Li di yo: -Mwen gen lapenn anpil. Mwen santi se mouri mwen vle mouri.
 Rete la a, pa kite dòmi pran nou. ³⁵ Li ale yon ti kras pi lwen, li lage kò l' fas atè, li lapriyè; li
 mande si se te posib pou l' pa ta bezwen souffri tout souffri sa a. ³⁶ Li t'ap di: -O! Papa mwen,
 nanpwen anyen ou pa kapab fè. Tanpri souple, wete gode souffrans sa a devan je mwen. Men, fè sa
 ou menm ou vle a. Pa fè sa mwen menm mwen ta vle a. ³⁷ Li tounen bò kot disip li yo, li jwenn
 yo tou twa ap dòmi. Li di Pyè konsa: -Simon! W'ap dòmi? Ou pa t' kapab rete je klè menm yon ti
 moman? ³⁸ Pa dòmi, tande! Lapriyè fò pou nou pa tonbe anba tantasyon. Lespri nou byen dispoze,
 men se kò nou ki fèb. ³⁹ Li kite yo ankò, li al fè menm lapriyè a. ⁴⁰ Apre sa, li retounen. Li jwenn
 yo ap dòmi ankò paske yo pa t' kapab kenbe je yo louvri. Yo pa t' konn sa pou yo te reponn li.
⁴¹ Lè l' tounen twazyèm fwa a, li di yo: -N'ap dòmi toujou? N'ap poze kò nou toujou? Sa ase koulye
 a. Lè a rive; men yo pral lage Moun Bondye voye nan lachè a nan men mechan yo. ⁴² Leve non.
 Ann ale. Men moun k'ap trayi m' lan ap vini. ⁴³ ¶ Jezi t'ap pale toujou lè Jida, yonn nan douz disip
 yo, vin rive. Li te gen yon bann moun ki te gen nepe ak baton nan men yo avèk li: se chèf prèt yo
 ak dirèktè lalwa yo ki te voye yo avèk li. ⁴⁴ Jida, nonm ki t'ap trayi Jezi a, te gen dizon ak yo pou

l' ba yo yon siyal. Li te di yo: -Moun n'a wè m' bo a se li menm n'ap chache a. Mete men sou li,
 mennen li ale, pa kite l' chape. ⁴⁵ Rive Jida rive, li pwoche bò kot Jezi, li di li: -Mèt! Epi li bo li.
⁴⁶ Menm lè a, moun yo mete men sou Jezi, yo arete li. ⁴⁷ Yonn nan disip yo rale nepe l', li frape
 domestik granprèt la; li koupe yon zòrèy li. ⁴⁸ Jezi pran lapawòl, li di yo: -Nou vin dèyè m' ak
 nepe, ak baton, tankou si m' te yon ansasen. ⁴⁹ Men, toulèjou mwen te la nan mitan nou, mwen
 t'ap pale nan tanp lan; lè sa a nou pa t' janm arete mwen. Men, tou sa pase konsa pou sa ki ekri a
 ka rive vre. ⁵⁰ Lè sa a tout disip yo kite l', yo pran kouri. ⁵¹ Te gen yon jenn gason ki t'ap swiv
 Jezi; li te gen yon dra ase sou li. Yo mete men sou msye. ⁵² Men, li lage dra a, li chape nan men
 yo toutouni. ⁵³ ¶ Yo mennen Jezi kay granprèt la. Se la tout chèf prèt yo, chèf fanmi yo ak dirèktè
 lalwa yo te reyini. ⁵⁴ Pyè t'ap swiv Jezi yon ti jan lwen lwen. Li antre jouk nan fon lakou kay
 granprèt la. Li te chita avèk gad yo bò dife a, li t'ap chofo kò li. ⁵⁵ Chèf prèt yo ak tout manm Gran
 Konsèy jwif yo t'ap chache yon manti pou yo te fè sou Jezi pou yo te kondannen l' amò, men yo
 pa t' kapab jwenn anyen menm. ⁵⁶ Anpil moun te vin fè manti sou li. Men, pawòl yo pa t' dakò.
⁵⁷ Lè sa a, kèk moun leve kanpe, yo fè manti sa a sou li: ⁵⁸ -Nou te tande l' di: m'a kraze tanp moun
 te fè a, epi nan twa jou m'a bati yon lòt tanp moun pa ka fè. ⁵⁹ Menm sou pwen sa a yo pa t' dakò.
⁶⁰ Lè sa a, granprèt la leve nan mitan asanble a, li poze Jezi keksyon, li di l' konsa: -Ou pa reponn
 anyen? Kisa mesye yo ap di sou ou konsa? ⁶¹ Jezi pa louvri bouch li, li pa reponn anyen. Granprèt
 la keksyonnen li ankò, li mande l': -Eske se ou ki Kris la, Pitit Bondye ki merite lwanj la? ⁶² Jezi
 reponn li: -Wi, se mwen menm. Nou gen pou nou wè m', mwen menm, Moun Bondye voye nan
 lachè a, chita sou bò dwat Bondye ki gen pouvwa a, n'a wè m' tou ap vini anwo nwaj yo nan syèl
 la. ⁶³ Lè sa a, granprèt la chire rad ki te sou li a, li di: -Sa nou bezwen temwen ankò fè? ⁶⁴ Nou
 sot tande jan l' pale mal sou Bondye. Sa nou di nan sa? Yo tout deklare Jezi koupab, yo di li merite
 lanmò. ⁶⁵ Kèk ladan yo tonbe krache sou li, yo bouche je l', yo pran ba l' koutpwen. Lèfini yo di
 li: -Si ou konnen di nou ki moun k'ap fè ou sa? Menm gad yo pran bay Jezi souflèt. ⁶⁶ ¶ Antan Pyè
 te anba nan lakou a, yonn nan sèvant granprèt la vin rive. ⁶⁷ Li wè Pyè ap chofo, li gade l' byen.
 Li di l' konsa: -Ou menm tou, ou te avèk Jezi, moun Nazarèt la? ⁶⁸ Pyè reponn: -Mwen pa konnen.
 Mwen pa konprann sa ou vle di la a. Epi Pyè soti pou li al nan pyès devan kay la. Menm lè a, yon
⁶⁹ kòk chante. Menm sèvant lan wè l' ankò. Li pran di moun ki te la yo: -Nonm sa a fè pati moun

70
 sa yo wi. Men Pyè demanti l' ankò. Yon kadè apre, moun ki te la yo di Pyè ankò: -Se vre, monchè.
 Ou fè pati moun sa yo, ou se moun Galile. 71 Lè sa a, Pyè kòmanse di: -Mwen mande Bondye
 nenpòt bagay rive m' si m' manti: mwen pa konnen nonm n'ap pale la a. 72 Menm lè a, kòk la chante
 yon dezyèm fwa. Lè sa a Pyè vin chonje pawòl Jezi te di l' la: anvan kòk chante de fwa, w'a gen
 tan di twa fwa ou pa janm konnen mwen. Epi li tonbe kriye.

Chapter 15

1 ¶ Nan granmaten, chèf prèt yo fè yon reyinyon avèk chèf fanmi yo, dirèktè lalwa yo ansanm
 ak tout manm Gran Konsèy jwif yo pou pran yon desizyon. Apre yo fin mare Jezi, yo mennen l'
 ale; yo renmèt li bay Pilat. 2 Pilat menm mande li: -Eske ou se wa jwif yo? Jezi reponn li: -Se ou
 ki di li. 3 Chèf prèt yo te depoze anpil plent sou do li. 4 Pilat mande l' ankò: -Ou pa reponn anyen?
 Tande tout plent yo depoze sou do ou. 5 Men Jezi pa reponn anyen toujou. Sa te fè Pilat sezi anpil.
 6 Pou chak fèt Delivrans Pilat te konn lage yon prizonnye. Se pèp la ki te konn chwazi kilès. 7 Te
 gen yon nonm yo rele Barabas; li te nan prizon ansanm ak kèk lòt ki t'ap konplote avèk li. Yo te
 nan prizon poutèt yon nonm yo te touye yon jou yo te pran lezam kont gouvènman an. 8 Foul moun
 yo moute lakay Pilat; yo pran mande Pilat pou l' lage yon prizonnye ba yo jan li te toujou fè a. 9 Li
 reponn yo: -Eske nou vle mwen lage wa jwif la ban nou? 10 Paske li te byen konnen se jalouzi ki
 te pouse chèf prèt yo mennen Jezi ba li. 11 Men, chèf prèt yo pran tèt pèp la pou yo mande Pilat
 pou l' lage Barabas pito. 12 Pilat pran lapawòl ankò, li di yo: -Enben, kisa nou vle m' fè avèk nonm
 yo rele wa jwif la? 13 Yo rele byen fò: -Kloure l' sou yon kwa! 14 Pilat di yo: -Men, ki move zak
 li fè konsa? Yo rele pi fò toujou: -Kloure l' sou yon kwa! 15 ¶ Pilat te vle fè pèp la plezi: li lage
 Barabas ba yo. Apre li fin fè yo bat Jezi byen bat, li renmèt li bay sòlda yo pou y' al kloure l' sou
 yon kwa. 16 Sòlda yo mennen Jezi anndan bèl lakou a (sa vle di, nan kay kòmandan an). Yo rele
 tout rejiman sòlda yo vini. 17 Yo mete yon gwo rad koulè wouj violèt sou Jezi; yo trese yon kouwòn
 pikan, yo mete l' nan tèt li. 18 Epi yo pran salwe l' konsa: -Bonjou, wa jwif yo! 19 Yo ba l' kou nan
 tèt avèk yon baton wozo; yo krache sou li, yo mete ajenou, yo bese tèt yo devan li. 20 Apre yo fin
 pase l' nan betiz kont kò yo, yo wete gwo rad la; yo mete rad pa l' sou li ankò; epi yo mennen l' ale

²¹
 pou yo kloure l' sou yon kwa. Te gen yon nonm yo rele Simon, moun peyi Sirèn, papa Aleksann ak Rifis. Antan Simon sa a t'ap soti nan jaden, li pase bò la, epi sòlda yo fòse msye pote kwa Jezi a.

²² ¶ Yo mennen Jezi yon kote yo rele Gòlgota (ki vle di: Plas zo bwa tèt la).
 ²³ Yo te vle ba li diven melanje ak yon siwo fèt ak lami pou l' te bwè.
 ²⁴ Men, li pa pran li. Apre yo fin kloure l' sou kwa a, yo separe rad li yo ant yo: yo tire osò pou konnen sa ki t'ap soti pou yo chak.
 ²⁵ Li te nevè nan maten lè yo te kloure l' sou kwa a.
 ²⁶ Yo te bay kòz ki fè yo te kondannen l' lan sou yon ti pankat ki te ekri: Wa jwif yo!
 ²⁷ Yo te kloure de ansasen sou de lòt kwa, anmenmtan avèk Jezi,
 ²⁸ yonn sou chak bò. Se konsa pawòl ki te ekri a vin rive vre: Yo mete l' ansanm ak mechan yo.

²⁹ Moun ki t'ap pase bò la t'ap plede joure l'; yo t'ap fè siy sou li, yo t'ap di: -Ey! Ou menm ki te vle kraze tanp lan pou ou rebati l' nan twa jou,
 ³⁰ sove tèt ou non, desann sou kwa a.
 ³¹ Konsa tou, chèf prèt yo ak dirèktè lalwa yo t'ap pase l' nan rizib. Yonn t'ap di lòt: -Gade! Li sove lòt moun, li pa ka sove tèt pa li!
 ³² Se pou Kris la, wa pèp Izrayèl la, desann sou kwa a koulye a. Konsa n'a wè epi n'a kwè. Ata mesye ki te kloure sou lòt kwa yo t'ap joure l' tou.
 ³³ ¶ Vè midi konsa, vin gen yon fènwa sou tout peyi a, jouk twazè nan apremidi.
 ³⁴ Vè twazè, Jezi rele byen fò: -Eloyi, Eloyi, lema sabaktani? (ki vle di: Bondye, Bondye, poukisa ou lage m' konsa?)
 ³⁵ Nan moun ki te la yo genyen ki te tande l' pale. Yo di: -Koute. Men l'ap rele Eli.
 ³⁶ Yonn nan yo kouri, li al tranpe yon eponj nan venèg, li mete l' nan pwent yon gòl wozo, li lonje l' bò bouch Jezi ba l' bwè. Epi li di:
 ³⁷ -Rete! Ann wè si Eli va vin desann li sou kwa a!
 ³⁸ Men Jezi bay yon gwo rèl, epi li mouri. Rido ki te nan tanp lan chire an de moso depi anwo jouk anba.
 ³⁹ Te gen yon kaptenn lame kanpe anfas Jezi.
 ⁴⁰ Lè l' wè Jezi mouri konsa, li di: -Nonm sa a, se te pitit Bondye tout bon. Te gen kèk fanm la tou; men yo te rete lwen ap gade. Pami yo te gen Mari, moun lavil Magdala a, Mari, manman Ti Jak ak Jòz, ansanm ak Salome.
 ⁴¹ Medam sa yo t'ap swiv Jezi, se yo ki t'ap okipe l' depi lè l' te nan peyi Galile. Te gen anpil lòt tou ki te moute lavil Jerizalèm ansanm ak li.
 ⁴² ¶ Solèy te fin kouche, se te jou preparasyon jwif yo (ki vle di: lavèy jou repo a).
 ⁴³ Lè sa a Jozèf, yon moun lavil Arimate, vin rive. Se te yon manm respektab nan Gran Konsèy jwif yo. Li menm tou li t'ap tann lè Bondye
 ⁴⁴ t'ap vin pran gouvènman an nan men pa li. Li te gen kouraj ale devan Pilat mande kò Jezi. Men, Pilat te sezi lè l' vin konnen Jezi te gen tan mouri. Li voye rele kaptenn lan, li mande l' si Jezi te

mouri depi lontan. ⁴⁵ Lè kaptenn lan fin ba li repons sèten, li bay Jozèf kò a. ⁴⁶ Jozèf achte yon bèl dra blan, li desann kò Jezi sou kwa a, li vlope l' nan dra a, epi li mete l' nan yon kavo yo te fouye nan wòch la. Apre sa, li woule yon gwo wòch devan bouch kavo a. ⁴⁷ Mari, moun lavil Magdala a, ansanm ak Mari, manman Jòz, t'ap gade kote yo mete kò a.

Chapter 16

¹ ¶ Lè jou repo a te fin pase, Mari, moun lavil Magdala a, Mari, manman Jak, ansanm ak Salome, te achte medikaman pou y' al benyen kò Jezi. ² Nan dimanch maten byen bonè, solèy te fèk ap leve, medam yo ale nan kavo a. ³ Yonn t'ap di lòt: -Ki moun ki pral woule wòch ki devan bouch kavo a pou nou? ⁴ Lè yo leve je yo, yo wè yo te gen tan woule wòch la sou kote. E se te yon gwo wòch. ⁵ Yo antre nan kavo a, yo wè yon jenn gason chita sou bò dwat la; li te gen yon wòb tou blan sou li. Yo te sezi, yo te pè. ⁶ Men, jenn gason an di yo: -Nou pa bezwen pè: N'ap chache Jezi, moun Nazarèt yo te kloure sou kwa a? Enben, li leve soti vivan nan lanmò, li pa isit la. Gade. Men kote yo te mete l' la. ⁷ Ale di disip li yo ansanm ak Pyè, li al tann yo nan peyi Galile. Se la y'a wè l', jan l' te di yo a. ⁸ Medam yo soti nan kavo a, yo pran kouri ale. Yo t'ap tranble kou fèy bwa, yo te pè anpil. Yo pa di pesonn anyen tèlman yo te pè. ⁹ ¶ Nan dimanch maten, Jezi te leve soti vivan nan lanmò. Premye moun li te fè wè li, se te Mari, moun lavil Magdala a. (Se sou li Jezi te wete sèt move lespri.) ¹⁰ Mari al pote nouvèl la bay moun ki te konn ak Jezi yo. Yo te nan lapenn anpil, yo t'ap kriye. ¹¹ Men, yo pa t' vle kwè Mari, lè l' te di yo: -Jezi vivan, mwen wè l' ak de je mwen. ¹² Apre sa, Jezi te parèt yon lòt jan ankò devan de nan disip yo, antan yo te nan chemen pou ale andeyò. ¹³ Yo tounen sou chemen yo vin fè lòt yo konn sa. Men, lòt yo pa t' ankò vle kwè toujou. ¹⁴ ¶ Pita, Jezi parèt devan tout onz disip yo yon lè yo t'ap manje. Li repwoche yo dèske yo pa t' gen konfyans, yo t'ap fè tèt di toujou, yo pa t' kwè moun ki te wè l' yo apre li te leve soti vivan pami mò yo. ¹⁵ Epi li di yo: -Ale toupatou sou latè, anonse Bon Nouvèl la bay tout moun. ¹⁶ Moun ki kwè epi ki resevwa batèm va delivre. Men, moun ki pa kwè va kondannen. ¹⁷ Moun ki kwè va fè anpil mirak; y'a chase move lespri nan non mwen, y'a pale lòt lang. ¹⁸ Yo ta mèt kenbe sèpan, yo

ta mèt bwè pwazon, anyen p'ap rive yo. y'a mete men sou tèt moun malad, moun malad yo va geri.

19

¶ Apre Seyè Jezi te fin pale ak yo konsa, li moute nan syèl, li al chita sou bò dwat Bondye.

20

Disip yo pati, y' al anonse Bon Nouvèl la toupatou. Seyè a t'ap travay ansanm ak yo: Anmenmtan li t'ap fè anpil mirak tou pou moutre sa yo t'ap di a se vre.

Luke

Chapter 1

1

¶ Teofil chèf mwen, anpil moun te seye ekri istwa tout evènman ki te pase nan mitan nou yo.

2

Yo te rakonte yo jan nou te aprann yo nan bouch moun ki te wè yo ak pwòp je yo depi nan konmansman, moun ki te resevwa lòd mache fè konnen pawòl Bondye a. ³ Se konsa, mwen menm tou, mwen chache konnen tout bagay sa yo byen depi nan konmansman yo. Koulye a, mwen kwè se yon bon bagay pou m' ekri yo tout, yonn apre lòt, jan sa te pase a pou ou menm tou, chèf mwen.

4

Konsa wa kapab rekonèt tou sa yo te moutre ou yo se verite yo ye. ⁵ ¶ Nan tan Ewòd te wa nan peyi Jide a, te gen yon prèt yo te rele Zakari. Li te fè pati gwoup prèt Abiya yo. Madanm li te rele

6

Elizabèt: se te yon moun ras Arawon, ansyen granprèt la. ⁷ Yo tou de te mache dwat devan Bondye,

7

yo t'ap swiv kòmandman Mèt la ansanm ak tout lalwa a san ankenn repwòch. ⁸ Men, yo pa t' gen

8

pitit paske Elizabèt pa t' kapab fè pitit. Yo tou de te fin vye granmoun. ⁹ Yon jou, Zakari te desèvis

9

kou prèt devan Bondye, paske se te tou gwoup pa l' la. ¹⁰ Dapre koutim sèvis la, yo te tire osò pou chwazi yonn nan prèt yo pou antre nan tanp Mèt la pou ofri lansan an. Twouve fwa sa a, se Zakari

10

ki te soti. ¹¹ Tout mas pèp la t'ap lapriyè deyò, antan Zakari menm te anndan ap ofri lansan an.

11

Vwala, yon zanj Bondye parèt devan Zakari; li te kanpe sou bò dwat lotèl kote yo boule lansan

12

an. ¹³ Lè Zakari wè l', li sezi; li te pè anpil. ¹⁴ Men zanj lan di li: Pa pè, Zakari. Bondye te tande

14

lapriyè ou la. Elizabèt, madanm ou, pral ba ou yon pitit gason; ou va rele l' Jan. ¹⁵ Ala kontan wa

15

kontan lè pitit sa a va fèt! Anpil lòt moun va kontan tou lè sa a. ¹⁶ L'ap yon grannèg devan Bondye, Mèt la; li p'ap bwè ni diven, ni ankenn alkòl. Depi nan vant manman li, l'ap anba pouvwa Sentespri

16

a. ¹⁷ L'ap fè anpil moun nan pèp Izrayèl la tounen vin jwenn Mèt la, Bondye yo a. ¹⁸ L'ap mache devan Bondye nan menm lespri ak menm pouvwa pwofèt Eli te genyen an. L'ap fè papa vin byen

17

ankò ak pitit; l'ap fè moun ki rebèl rive gen konprann tankou moun k'ap obeyi Bondye, l'ap pare
 yon pèp byen dispoze pou resevwa Mèt la. ¹⁸ Zakari di zanj lan konsa: Ki jan pou m' fè kwè sa
 w'ap di m' la a se vre? Ala mwen fin vye, madanm mwen fin vye granmoun tou. ¹⁹ Zanj lan reponn
 li: Mwen se Gabriyèl ki toujou kanpe nan sèvis devan Bondye. Se Bondye menm ki voye m' pale
 avè ou, pou m' pote bon nouvèl sa a ba ou. ²⁰ Men, paske ou pa kwè pawòl mwen yo ki gen pou
 rive nan tan yo, ou pral vin bèbè, ou p'ap ka pale jouk jou bagay sa yo va rive. ²¹ Tout tan sa a,
 pèp la menm t'ap tann Zakari; yo te sezi wè jan l' te mize nan tanp lan. ²² Men, lè Zakari soti, li pa
 t' kapab pale avèk yo. Lè sa a yo vin konprann li te gen yon vizyon nan tanp lan. Li t'ap fè yo yon
 bann siy ak men l', men li pa t' kapab pale. ²³ Lè tan sèvis li fini, Zakari tounen lakay li. ²⁴ Kèk
 tan apre sa, Elizabèt, madanm li, vin ansent. Li fè senk mwa kache lakay; li t'ap di: ²⁵ Gade sa Mèt
 la fè pou mwen non! Se koulye a sa fè l' plezi pou l' wete dezonè m' devan lèzòm. ¶ ²⁶ Sou sizyèm
 mwa gwosès Elizabèt la, Bondye voye zanj Gabriyèl nan yon vil nan peyi Galile yo rele Nazarèt.
²⁷ Bondye te voye l' kay yon jennfi ki te fyanse ak yon nonm yo rele Jozèf. Jozèf sa a, se te moun
 ras David. Yo te rele jennfi a Mari. ²⁸ Zanj lan antre lakay Mari, li di li: Bonjour, Mari, ou menm
 ki resevwa anpil favè. Mèt la avèk ou. ²⁹ Lè Mari tande pawòl sa yo, tèt li te boulvèse, li t'ap mande
 nan kè l' kisa bonjou sa a te vle di. ³⁰ Men, zanj lan di li: Pa pè, Mari. Ou jwenn favè nan men
 Bondye. ³¹ Ou pral vin ansent, ou va fè yon pitit gason. Wa rele l' Jezi. ³² L'ap vin yon grannèg,
 y'a rele li Pitit Bondye ki anwo nan syèl la. Mèt la, Bondye nou, va fè l' wa tankou David, gran
 granpapa li. ³³ La gouvènèn pèp Izrayèl la pou tout tan, gouvènman l' lan p'ap janm fini. ³⁴ Mari
 di zanj lan konsa: Ki jan sa pral fè rive? Ala mwen poko janm konn gason! ³⁵ Zanj lan reponn li:
 Sentespri a pral vin sou ou; pouvwa Bondye ki anwo nan syèl la pral kouvri ou tankou yon lonbraj.
 Se pou sa tou, tipitit ki pral fèt la pral viv apa pou Bondye, y'a rele l' Pitit Bondye. ³⁶ Ou konnen
 Elizabèt, fanmi ou lan? Atout li fin vye a, men l' ansent yon pitit gason. Yo te di l' pa t' kapab fè
 pitit, men li deja sou sis mwa gwosès. ³⁷ Tou sa rive paske pa gen anyen Bondye pa ka fè. ³⁸ Mari
 di li: Men mwen, se sèvant Mèt la mwen ye. Mwen swate pou sa rive m' jan ou di a. Epi zanj lan
 kite li. ³⁹ ¶ Nan menm epòk sa a, Mari soti, li pran chemen pou l' rive byen vit nan yon bouk nan
 mòn peyi Jide a. ⁴⁰ Li antre lakay Zakari, li di Elizabèt bonjou. ⁴¹ Lè Elizabèt tande Mari di l'
 bonjou, pitit la pran sote nan vant li. Lamenm Elizabèt vin anba pouvwa Sentespri. ⁴² Li pran pale
 byen fò, li di konsa: Nan tout fanm ki sou latè, ou menm ou se yon fanm Bondye beni anpil. Pitit

43 ki nan vant ou a tou Bondye beni li. Kisa m' ye menm, pou manman Mèt mwen vin rann mwen
 44 vizit? Gade! Bonjou ou la poko rive nan zòrèy mwen, pitit la pran sote nan vant mwen tèlman
 45 li kontan. Ou se yon fanm beni! Paske, ou te kwè tout pawòl Mèt la voye di ou yo gen pou rive
 46 vre. Lè sa a Mari di: Nanm mwen ap chante pou Mèt la ki gen pouvwa. 47 Lespri m' pran plezi
 48 nan Bondye ki delivrans mwen. Paske li voye je l' sou mwen, yon sèvant ki soumèt devan li.
 49 Wi, depi koulye a, epi pou tout tan, tout moun pral di: Ou se yon fanm Bondye beni! Paske
 Bondye ki gen tout pouvwa a fè anpil bèl bagay pou mwen. Non li, se yon non pou tout moun
 50 respekte. L'ap toujou gen pitye pou tout moun ki gen krentif pou li. 51 Li fè lèzòm santi fòs
 52 ponyèt li. Li fè moun ki gen lògèy ak gwo lide nan kè yo pèdi tèt yo. Li desann chèf ki te byen
 53 chita nan fotèy yo. Li leve moun ki pa gen pretansyon yo. Li bay moun ki grangou yo anpil
 54 byen. Li voye rich yo ale san anyen. Li vin pote sekou bay pèp Izrayèl k'ap sèvi l' la. Li pa bliye
 55 fè wè jan li toujou gen kè sansib, pou Abraram ansanm ak tout ras li a, dapre pwomès li te fè
 56 zansèt nou yo. Mari pase twa mwa konsa ak Elizabèt. Apre sa, li tounen lakay li. 57 ¶ Lè jou
 58 pou Elizabèt akouche a rive, li fè yon pitit gason. Vwazinaj ak fanmi l' yo vin konnen jan Mèt
 59 la te fè Elizabèt yon gwo favè. Yo te kontan pou li. Sou wit jou, yo te vin pou sikonsi pitit la;
 60 yo te vle rele l' Zakari, menm non ak papa li. Men, manman l' di yo: Non, se Jan pou l' rele.
 61 Yo di l' konsa: Men, pa gen pesonn nan fanmi ou ki rele Jan. 62 Yo fè papa a siy pou mande l'
 63 ki non li ta vle bay pitit la. Zakari mande yo yon ti tablo, epi li ekri: Se Jan ki non li. Yo tout te
 64 sezi. Menm lè a bouch li louvri, lang li lage, li t'ap pale, li t'ap chante pou Bondye byen fò.
 65 Tout moun ki te nan vwazinaj la te pè; nouvèl la t'ap mache bouch an bouch nan tout mòn Jidè
 66 a. Tout moun ki te tandè pawòl sa yo t'ap kalkile nan kè yo; yonn t'ap di lòt: Kisa pitit sa a pral
 67 ye menm? Pouvwa Bondye a te avèk ti pitit la tout bon vre. ¶ Zakari, papa Jan, vin anba pouvwa
 68 Sentespri. Latou, li pran fè konnen pawòl Bondye te mete nan bouch li: Ann chante pou Mèt la,
 69 Bondye pèp Izrayèl la. Paske, li vin sove pèp li a, li delivre yo anba esklavaj. Li voye yon moun
 70 avek gwo pouvwa pou delivre nou. Se nan laras David, sèvitè Bondye a, li soti. Se sa menm

Bondye te fè konnen nan bouch pwofèt li yo depi nan tan lontan.⁷¹ Li te pwomèt li t'ap delivre
 nou anba lènmi nou yo, ak anba tout moun ki rayi nou yo.⁷² Se konsa la gen pitye pou zansèt nou
 yo. Li chonje kontra li menm Bondye te pase ak yo a.⁷³ Dapre sèman li te fè bay Abraram, zansèt
 nou an.⁷⁴ Li te di l' konsa: Lè la fin delivre nou anba lènmi nou yo, la fè nou sèvi l' san nou p'ap
 bezwen pè.⁷⁵ Wi, la fè nou viv apa pou Bondye, la fè nou mache dwat devan li chak jou nan lavi
 nou.⁷⁶ Kanta ou menm, pitit mwen, y'a rele ou: Pwofèt Bondye ki anwo nan syèl la. Paske, wa
 pran devan Mèt la pou pare chemen an pou li.⁷⁷ Ou pral moutre pèp la ki jan l'ap delivre yo, ki
 jan l'ap padonnen peche yo.⁷⁸ Tou sa, paske Bondye nou an gen kè sansib, li renmen nou anpil.
 L'ap fè yon limyè soti anwo vin klere nou tankou solèy k'ap leve.⁷⁹ Li gen pou l' klere tout moun
 k'ap viv nan fènwa ak nan lonbraj lanmò. Li gen pou l' fè nou mache nan chemen k'ap ban nou kè
 poze a.⁸⁰ Ti pitit la menm t'ap grandi, lespri l' t'ap devlope. Li te rete nan dezè a jouk jou pou l' te
 parèt an piblik devan pèp Izrayèl la.

Chapter 2

¹ ¶ Lè sa a, Seza Ogis te bay lòd pou yo te konte dènye moun ki nan peyi l'ap gouvènen yo.
² Premye travay sa a te fèt nan tan Kireniyis t'ap kòmande nan peyi yo rele Siri a.³ Tout moun te
 al fè pran non yo nan lavil kote fanmi yo te soti.⁴ Jozèf te rete nan peyi Galile, nan yon bouk yo
 rele Nazarèt. Men, paske li te moun nan fanmi ak ras David, li moute, li ale nan Jide, nan lavil
 David yo rele Betleyèm lan.⁵ Jozèf tapral fè yo pran non l' ansanm ak non Mari, fyanse li, ki te
 ansent.⁶ Antan yo te la, jou pou Mari te akouche a rive.⁷ Li fè premye pitit li a, yon ti gason. Mari
 vlope pitit la nan kouchèt, li mete l' kouche nan yon kay kote yo bay bèt manje, paske pa t' gen plas
 pou yo nan lotèl la.⁸ ¶ Nan menm zòn sa a, te gen gadò mouton ki t'ap pase nwit la deyò ap veye
 mouton yo.⁹ Lè sa a, yon zanj Bondye parèt devan yo, bèl limyè Bondye a klere tout kote yo te
 ye a. Yo te pè anpil.¹⁰ Men zanj lan di yo konsa: Pa pè. N'ap anonse nou yon bon nouvèl ki pral
 fè tout pèp la kontan anpil.¹¹ Jòdi a, nan lavil David la, nou gen yon Sovè ki fenk fèt: se Kris la,
 Seyè a.¹² Men remak ki va fè nou rekonèt li: n'a jwenn yon tibebe vlope nan kouchèt, kouche nan

¹³ yon kay kote yo bay bèt manje. Menm lè a, yon foul lòt zanj nan syèl la vin jwenn zanj lan; yo
¹⁴ t'ap fè lwanj Bondye, yo t'ap di konsa: Lwanj pou Bondye anwo nan syèl la, kè poze sou latè
¹⁵ pou tout moun li renmen. Zanj yo kite gadò mouton yo, yo tounen al nan syèl la. Lè sa a, gadò
mouton yo yonn di lòt: Ann al jouk Betleyèm, ann al wè sa ki rive, sa Bondye fè nou konnen an.
¹⁶ Yo prese ale, yo jwenn Mari ak Jozèf, ansanm ak tipitit la kouche kote yo bay bèt yo manje a.
¹⁷ Lè yo wè l', yo tanmen rakonte sa zanj lan te di yo sou pitit la. ¹⁸ Tout moun ki t'ap koute yo te
¹⁹ sezi tandè sa yo t'ap rakonte a. Mari menm te kenbe tout pawòl sa yo nan kè l', li t'ap repase yo
²⁰ nan tèt li. Apre sa, gadò mouton yo al fè wout yo; yo t'ap di jan Bondye gen pouvwa, yo t'ap fè
²¹ lwanj li, paske tou sa yo te tandè ak tou sa yo te wè a te dakò ak sa zanj lan te fè yo konnen. ¶
Wit jou apre, se te dat pou yo te sikonsi pitit la. Yo rele l' Jezi dapre non zanj lan te bay anvan
²² menm manman l' te vin ansent li. Apre sa, jou a te rive pou Jozèf ak Mari te al fè sèvis pou yo
ka mete Mari nan kondisyon fè sèvis Bondye dapre lalwa Moyiz. Lè sa a, yo pote tipitit la lavil
²³ Jerizalèm pou mete l' apa pou Bondye, dapre sa ki te ekri nan lalwa Bondye a: Mete tout premye
²⁴ pitit gason yo apa pou Mèt la. Yo te ofri tou yon pè toutrèl osinon de jenn pijon pou yo touye
²⁵ pou Bondye, jan yo bay lòd fè sa nan lalwa Bondye a. ¶ Lè sa a, te gen yon nonm nan Jerizalèm
yo te rele Simeyon. Nonm sa a te mache dwat devan Bondye, li te respekte Bondye anpil, li t'ap
²⁶ tann konsa moun Bondye t'ap voye pou delivre pèp Izrayèl la. Sentespri Bondye a te avèk li. Li
²⁷ te fè l' konnen li pa t'ap mouri san l' pa wè Kris la, moun Bondye te chwazi pou l' voye a. Lespri
Bondye a pouse Simeyon ale nan tanp lan. Lè Jozèf ak Mari pote tipitit la pou yo fè sa lalwa mande
²⁸ pou li a, Simeyon pran tipitit la nan bra l', li di Bondye mèsè. Li di: ²⁹ Koulye a, Mèt, ou kenbe
³⁰ pawòl ou; ou mèt kite sèvitè ou la mouri ak kè poze. Paske mwen wè ak je mwen moun ou voye
³¹ pou delivre nou an. Ou pare l' mete devan tout pèp yo. ³² Se yon limyè ki pou fè tout pèp yo
³³ konnen ou; se va yon lwanj pou Izrayèl pèp ou a. Papa ak manman Jezi te sezi tandè sa Simeyon
³⁴ t'ap di sou pitit yo a konsa. Simeyon rele benediksyon Bondye sou yo, li di Mari, manman Jezi:
Bondye chwazi pitit sa a; l'ap lakòz anpil moun nan pèp Izrayèl la tonbe. Men, l'ap fè anpil moun
³⁵ nan pèp la jwenn delivrans tou. Li pral yon siy pou Bondye, men moun p'ap vle wè li. Se konsa
l'ap devwale tout lide k'ap travay nan fon kè anpil moun. Kanta pou ou menm, Mari, doulè gen pou
³⁶ fann kè ou tankou yon nepe. Te gen yon fanm ki te pwofèt la a tou. Li te rele An, pitit fi Fanwèl,

nan branch fanmi Asè. Li te fin vye granmoun. Li te viv sètan avèk nonm li te marye depi l' te jennfi
³⁷
a. Apre sa, li te rete vèv. Lè sa a, li te gen katrevenkatran, li pa t' janm kite tanp lan; li t'ap sèvi
³⁸
Bondye lajounen kou lannwit: tout tan li t'ap fè jèn, li t'ap lapriyè. Menm lè sa a tou, li vin rive,
li t'ap di Bondye mèsì. Li t'ap pale sou Jezi bay tout moun ki t'ap tann Bondye vin delivre lavil
³⁹
Jerizalèm. Lè yo fin fè tou sa lalwa Bondye te mande yo fè a, Jozèf ak Mari tounen ansanm avèk
⁴⁰
tipitit la nan peyi yo, lavil Nazarèt nan Galile. Pitit la menm t'ap grandi, li t'ap devlope. Li te
⁴¹
gen kont lespri l', epi favè Bondye te avèk li. ¶ Chak lanne pou fèt Delivrans lan, manman ak
⁴²
papa Jezi te konn ale lavil Jerizalèm. Lè Jezi vin gen douzan, yo moute Jerizalèm al nan fèt la
⁴³
jan yo te toujou fè. Lè jou fèt yo fin pase, moun yo t'ap tounen lakay yo. Ti Jezi menm rete lavil
⁴⁴
Jerizalèm. Men, papa l' ak manman l' pa t' wè sa. Yo te kwè li te avèk lòt moun ki t'ap vwayaje
ansanm ak yo. Yo mache tout yon jounen. Se lè sa a yo pran chache l' pami fanmi yo ak zanmi yo.
⁴⁵ ⁴⁶
Men yo pa jwenn li. Yo tounen Jerizalèm al chache li. Apre twa jou, yo jwenn li nan tanp lan,
⁴⁷
chita nan mitan dirèktè yo. Li t'ap koute yo, li t'ap poze yo keksyon tou. Tout moun ki t'ap tande
⁴⁸
l' te sezi pou jan l' te gen lespri, ak jan l' t'ap reponn yo. Lè papa l' ak manman l' wè l', yo pa t'
manke sezi. Manman li di l' konsa: Pitit mwen, poukisa ou fè nou sa? Se pa ti chache papa ou avè
⁴⁹
m' nou pa chache ou. Ou fè kè n' kase. Jezi di yo: Poukisa pou n'ap chache m' konsa? Nou pa t'
⁵⁰ ⁵¹
konnen fòk mwen okipe zafè papa mwen? Men yo pa t' konprann sa l' t'ap di yo. Apre sa, li
desann ak yo, li tounen Nazarèt. Li te soumèt devan yo. Manman l' menm te kenbe tout bagay sa
⁵²
yo nan kè li. Jezi t'ap devlope, li te vin gen plis lespri toujou, li t'ap aji yon jan ki te fè ni Bondye
ni lèzòm plezi.

Chapter 3

¹
¶ Nan tan sa a, Seza Tibè te gen kenzan depi li te wa; Pons Pilat t'ap kòmande nan peyi Jide;
Ewòd menm te chèf nan peyi Galile; Filip, frè Ewòd la, te chèf nan peyi Litoure ak nan rejyon
²
Trakonit; Lizanyas te chèf nan Labilèn. Lè sa a, se An ak Kayif ki t'ap sèvi tankou granprèt. Nan
³
menm epòk sa a, Bondye pale ak Jan, pitit Zakari a, ki te nan dezè a. Jan mache nan tout peyi bò
larivyè Jouden an; li t'ap bay mesaj sa a: Tounen vin jwenn Bondye. vin resevwa batèm: Bondye

va padonnen peche nou yo. ⁴ Se konsa, sa ki te ekri nan Liv ki gen pawòl pwofèt Ezayi a vin rive vre: Se vwa yon nonm k'ap rele nan dezè a: Pare gran wout Seyè nou an. Plani chemen an byen plani pou li. ⁵ Tout fon gen pou konble. Tout gwo mòn, tout ti mòn gen pou vin plat. Kote ki gen detou gen pou vin dwat. Chemen ki an movèz eta gen pou vin bèl. ⁶ Tout moun va wè jan Bondye ap delivre nou an. ⁷ Moun t'ap vin an foul bò kote Jan pou l' te batize yo. Lè konsa li di yo: Bann vèmen! Ki moun ki fè nou konnen nou kapab chape anba kòlè Bondye k'ap vini an? ⁸ Fè bagay ki pou fè wè nou chanje lavi nou tout bon. Sispann di nan kè nou: Se pitit pitit Abraram nou ye! Paske, mwen pa kache di nou sa: Bondye kapab pran wòch sa yo, li fè yo tounen pitit pou Abraram. ⁹ Epitou, rach la tou pare pou koupe rasin pyebwa yo. Nenpòt pyebwa ki pa bay bon donn, yo pral koupe sa, jete nan dife. ¹⁰ Foul moun yo mande l' konsa: Kisa pou nou fè menm? ¹¹ Li reponn yo: Sa ki gen de rad, se pou yo bay sak pa genyen an yonn. Sa ki gen manje pou manje, se pou l' separe l' bay yon lòt. ¹² Kèk pèseptè kontribisyon te vini tou pou l' te batize yo. Yo mande Jan: Mèt, kisa pou nou fè? ¹³ Li reponn yo: Pa fè moun peye plis pase sa lalwa mande a. ¹⁴ Kèk sòlda tou mande li: E nou menm, kisa pou nou fè? Li reponn yo: Pa fè brital ak pesonn. Pa fè manti sou pesonn pou pran lajan nan men yo. Fè kè nou kontan ak sa yo peye nou an. ¹⁵ ¶ Pèp la t'ap tann konsa: yo t'ap mande nan kè yo si se pa Jan ki Kris la. ¹⁶ Lè sa a, Jan di yo tout: Mwen batize nou nan dlo. Men, gen yon moun ki gen pou vini ki gen plis pouvwa anpil pase mwen. Mwen menm, mwen pa bon ase pou m' ta demare kòd sapat ki nan pye li. Se li menm ki va batize nou nan Sentespri ak nan dife. ¹⁷ Laye l' nan men li, l'ap vannen tout grenn ki sou glasi a. La ranmase grenn ki bon yo, la mete yo nan galata li. Men, l'ap boule pay la nan yon dife ki p'ap janm mouri. ¹⁸ Se avèk anpil lòt pawòl konsa Jan t'ap ba yo konsèy, li t'ap anonse bon nouvèl la bay pèp la. ¹⁹ Men, Jan te fè chèf Ewòd repwòch poutèt Ewodyad, madanm frè li a, li te pran pou madanm li, ak pou anpil lòt move zak li te fè. ²⁰ Le sa a, Ewòd mete ankò sou sa l' te fè deja: li fè fèmèn Jan nan prizon. ²¹ ¶ Lè Jan te fin batize tout moun, li batize Jezi tou. Antan Jezi t'ap lapriyè, syèl la louvri. ²² Sentespri a desann sou li an fòm yon ti pijon. Yon vwa soti nan syèl la, li di: Ou se Pitit mwen renmen anpil la, ou fè kè m' kontan anpil. ²³ Jezi te gen trantan konsa lè l' kòmanse travay li. Dapre sa yo te kwè, li te pitit Jozèf, Jozèf sa a te pitit Eli. ²⁴ Eli te pitit Matat, Matat te pitit Levi, Levi te pitit Mèlki, Mèlki te pitit Janayi, Janayi te pitit Jozèf. ²⁵ Jozèf te pitit Matatyas, Matatyas te pitit Amòs, Amòs te pitit Nawoum, Nawoum te pitit Esli, Esli te pitit Nagayi. ²⁶ Nagayi te pitit Maat, Maat te pitit

Matatyas, Matatyas te pitit Semeyin, Semeyin te pitit Jozèk, Jozèk te pitit Joda. ²⁷ Joda te pitit
 Joanan, Joanan te pitit Reza, Reza te pitit Zowobabèl, Zowobabèl te pitit Salasyèl, Salasyèl te pitit
²⁸ Neri. Neri te pitit Mèlki, Mèlki te pitit Adi, Adi te pitit Kozam, Kozam te pitit Elmadam, Elmadam
 te pitit Er. ²⁹ Er te pitit Jezi, Jezi te pitit Elyezè, Elyezè te pitit Jorim, Jorim te pitit Matat, Matat
 te pitit Levi. ³⁰ Levi te pitit Simeyon, Simeyon te pitit Jida, Jida te pitit Jozèf, Jozèf te pitit Jonam,
 Jonam te pitit Elyakim. ³¹ Elyakim te pitit Melea, Melea te pitit Mena, Mena te pitit Matata, Matata
 te pitit Natan, Natan te pitit David. ³² David te pitit Izayi, Izayi te pitit Jobèd, Jobèd te pitit Booz,
 Booz te pitit Sala, Sala te pitit Naason. ³³ Naason te pitit Aminadab, Aminadab te pitit Admen,
 Admen te pitit Ani, Ani te pitit Eswòm, Eswòm te pitit Perèz, Perèz te pitit Jida. ³⁴ Jida te pitit
 Jakòb, Jakòb te pitit Izarak, Izarak te pitit Abraram, Abraram te pitit Tara, Tara te pitit Nakò.
³⁵ Nakò te pitit Sewouk, Sewouk te pitit Rago, Rago te pitit Falèk, Falèk te pitit Ebè, Ebè te pitit
 Sala. ³⁶ Sala te pitit Kayinam, Kayinam te pitit Afaksad, Afaksad te pitit Sèm, Sèm te pitit Noe,
 Noe te pitit Lamèk. ³⁷ Lamèk te pitit Matizala, Matizala te pitit Enòk, Enòk te pitit Jarèd, Jarèd te
 pitit Maleleyèl, Maleleyèl te pitit Kaynan. ³⁸ Kaynan te pitit Enòs, Enòs te pitit Sèt, Sèt te pitit
 Adan, epi Adan te pitit Bondye.

Chapter 4

¹ ¶ Jezi tounen soti bò larivyè Jouden an; li te anba pouvwa Sentespri. Se konsa Lespri Bondye
 a mennen l' nan dezè a. ² Se la Satan vin tante l' pandan karant jou. Tout jou sa yo li pa t' manje
 anyen menm. Apre jou sa yo fin pase, li te grangou. ³ Satan di l' konsa: Si ou se Pitit Bondye, bay
 wòch sa a lòd pou l' tounen pen. ⁴ Jezi reponn li: Men sa ki ekri: Moun pa ka viv ak pen sèlman.
⁵ Satan mennen l' yon kote ki wo. Yon sèl kou, li moutre l' tout peyi ki sou latè. ⁶ Li di Jezi konsa:
 M'ap ba ou tout pouvwa ak tout richès peyi sa yo. Yo renmèt tout bagay sa yo nan men mwen,
 mwen ka bay moun mwen vle yo. ⁷ Si ou mete ajenou devan m', tout bagay sa yo pou ou. ⁸ Jezi
 reponn li: Men sa ki ekri: Se Mèt la, Bondye ou, pou ou adore. Se li menm ase pou ou sèvi. ⁹ Apre
 sa, Satan mennen l' lavil Jerizalèm, li mete l' kanpe sou pwent fetay tanp lan; li di Jezi konsa: Si

ou se Pitit Bondye, rete isit la lage kò ou anba. ¹⁰ Paske, men sa ki ekri: Bondye va bay zanj li yo
 lòd pou yo veye sou ou. ¹¹ Y'a pote ou nan men yo pou ou pa kase pye ou sou ankenn wòch. ¹² Jezi
 reponn li: Men sa ki ekri tou: Ou pa dwe seye sonde Mèt la, Bondye ou. ¹³ Apre Satan fin sonde
 Jezi tout jan sa yo, li kite l' jouk la jwenn yon lòt okasyon. ¶ ¹⁴ Jezi te anba pouvwa Sentespri
 Bondye a; li tounen, li ale nan peyi Galile. Nan tout peyi a se tout moun ki t'ap nonmen non li.
¹⁵ Li t'ap moutre moun yo anpil bagay nan sinagòg yo. Tout moun t'ap fè lwanj li. ¹⁶ Jezi ale lavil
 Nazarèt kote l' te grandi a. Jou repo a, li antre nan sinagòg la tankou l' te toujou konn fè. Li leve
¹⁷ kanpe pou l' li pou yo. Yo renmèt li liv pwofèt Ezayi a. Lè li louvri l', li jwenn kote ki te ekri:
¹⁸ Lespri Bondye a sou mwen. Li chwazi m' pou m' anonse bon nouvèl la bay pòv yo. Li voye m'
 pou m' fè tout prizonye yo konnen yo lage, pou m' fè tout avèg yo konnen yo kapab wè ankò, pou
¹⁹ m' delivre moun y'ap maltrete yo, pou m' fè yo konenn lè a rive pou Bondye vin delivre pèp li
²⁰ a. Apre sa, Jezi fèmen Liv la, li renmèt li bay moun ki t'ap ede nan sèvis la. li al chita. Tout
²¹ moun ki te nan sinagòg la te gen je yo fikse sou li. Lè sa a li kòmanse di yo: Jòdi a, pandan n'ap
²² tandè pawòl ki ekri la a, li rive vre. Tout moun t'ap pale byen pou li. Yo te sezi tandè bèl pawòl
²³ ki t'ap soti nan bouch li. Yo t'ap di konsa: Se pa pitit Jozèf la sa? Jezi di yo: Koulye a, nou pral
 di pwovèb sa a sou mwen: Dòktè, geri tèt ou. N'a di m' tou: Nou tandè tou sa ou te fè lavil
²⁴ Kapènawòm; fè yo isit la tou, nan peyi pa ou la. Epi li di yo ankò: Men, sa m'ap di nou la a, se
²⁵ vre wi: Yo pa janm resevwa yon pwofèt byen nan pwòp peyi li. Se vre wi: Sou tan Eli, yon lè
 lapli pa t' tonbe pandan twazan sis mwa, tout peyi a te nan grangou. Lè sa a, te gen anpil vèv nan
²⁶ peyi Izrayèl la. Men, Bondye pa t' voye Eli lakay yo yonn menm; se lakay yon vèv ki te rete
²⁷ lavil Sarepta nan peyi Sidon li te voye li. Konsa tou, sou tan pwofèt Elize, te gen anpil moun ki
 te malad ak lalèp nan pèp Izrayèl la. Men, yo yonn pa t' jwenn gerizon. Se Naaman sèlman, nonm
²⁸ peyi Siri a, ki te geri. Tout moun nan sinagòg la te byen ankòlè lè yo tandè pawòl sa yo. ²⁹ Yo
 leve, yo trennen l' andeyò lavil la; yo mennen l' sou tèt ti mòn kote lavil la te bati a, yo t'ap pare
³⁰ pou yo te jete l' anba nan falèz la. Men, Jezi pase nan mitan yo, li chape kò li. ³¹ ¶ Apre sa, Jezi
³² desann Kapènawòm, yon vil nan peyi Galile. Jou repo a, li t'ap moutre moun yo anpil bagay. Yo
³³ te sezi tandè sa l' t'ap moutre yo, paske li t'ap pale tankou moun ki gen dwa di sa l'ap di a. Te
³⁴ gen yon nonm nan sinagòg la ki te gen yon move lespri sou li. Li pran rele byen fò: Ey, kisa

nou gen avè ou, Jezi, nonm Nazarèt? Ou vin isit la pou detwi nou? Mwen konnen byen ki moun
³⁵
ou ye; ou se moun Bondye chwazi a. Jezi pale byen fò ak move lespri a, li di li: Pe la! Soti sou
nonm lan. Move lespri a jete nonm lan atè nan mitan tout moun yo epi li soti, li ale san l' pa fè l'
³⁶
ankenn mal. Tout moun te sezi, yonn t'ap di lòt: Ki pawòl sa a ye menm? Avèk otorite ak pouvwa
³⁷
li pase move lespri yo lòd sevè epi yo soti, y' ale. Se tout moun ki t'ap nonmen non l' nan tout
³⁸
peyi a. Jezi soti, li kite sinagòg la, li ale lakay Simon. Bèlmè Simon an te gen yon gwo lafyèb
³⁹
cho sou li. Yo mande Jezi pou l' fè kichòy pou li. Li panche sou malad la, li pase lafyèb la yon
⁴⁰
lòd. Lamenn, lafyèb la kite li. Menm lè a, madanm lan leve, li resevwa yo. Apre solèy te fin
kouche, yo mennen tout moun malad ak tout moun ki t'ap soufri divès maladi bay Jezi. Li mete
⁴¹
men l' sou tèt yo tout, li geri yo. Anpil move lespri tou te soti sou plizyè moun malad. Yo t'ap
plede rele: Ou se pitit Bondye a. Men, Jezi te pale sevè ak yo, li pa t' kite yo pale paske yo te konnen
⁴²
se Kris la li ye. Kou l' fè jou, Jezi soti, li ale yon kote ki pa gen moun. Yon foul moun t'ap chache
⁴³
li. Konsa, yo rive jouk kote li te ye a. Yo te vle kenbe l' pou l' pa t' kite yo. Men li di yo: Fòk m'
anonse bon nouvèl gouvènman Bondye ki Wa a bay moun lòt lavil yo tou, paske se pou sa Bondye
⁴⁴
voye mwen. Se konsa, li t'ap mache bay mesaj la nan sinagòg Jide yo.

Chapter 5

¹
¶ Yon jou, Jezi te bò kote letan Jenezarèt la; yon foul moun t'ap kwense l' toupatou pou tande
² ³
pawòl Bondye a. Li wè de kannòt bò rivaj la; pechè yo te desann atè, yo t'ap lave senn yo. Jezi
moute nan yonn nan kannòt yo ki te pou Simon. Li mande l' pou l' vanse yon ti kras nan fon. Antan
⁴
Jezi chita nan kannòt la, li t'ap moutre moun yo anpil bagay. Lè li fin pale, li di Simon konsa:
⁵
Vanse kannòt la plis nan fon; jete senn ou pou peche. Simon reponn li: Mèt, nou pase tout nwit
⁶
lan ap travay san nou pa pran anyen. Men, paske se ou ki di nou fè sa, nou pral lage senn lan. Yo
⁷
lage senn lan; yo pran yon kantite pwason. Tèlman pwason yo te anpil, senn lan t'ap chire. Yo fè
asosye yo ki te nan lòt kannòt la siy vin ede yo. Yo vini; de kannòt yo te sitèlman plen pwason, yo
⁸
te prèt pou koule. Lè Simon Pyè wè sa, li lage kò l' nan pye Jezi, li di l' konsa: Mèt, pa rete kote
⁹
mwen, paske mwen pa bon. Yon sèl sezisman te pran Simon ak tout mesye ki te avèk li yo lè yo

¹⁰ wè kantite pwason yo te pran. Se te menm bagay la tou pou Jak ak Jan, de pitit Zebede yo, ki
 te asosye Simon. Lè sa a Jezi di Simon: Pa pè. Depi koulye a se moun ou pral peche. ¹¹ Yo mennen
 kannòt yo atè, yo kite tout bagay, y' ale avèk Jezi. ¹² ¶ Pandan Jezi te nan yon lavil, yon nonm ki
 te kouvri ak lalèp vin rive. Lè l' wè Jezi, li lage kò l' fas atè, li di l' konsa: Mèt, si ou vle, ou ka geri
¹³ mwen. Jezi lonje men l', li manyen nonm lan, li di l': Wi, mwen vle ou geri. Menm lè a, lalèp la
¹⁴ kite li. Jezi pase l' lòd sevè sa a: Pa di pesonn sa. Men, ale fè prèt la wè ki jan ou ye. Apre sa,
¹⁵ wa ofri sa Moyiz te bay lòd ofri a. Konsa wa bay tout moun prèv ou geri. Malgre sa, nouvèl la
¹⁶ gaye pi plis; moun t'ap vin an foul pou tande li, pou chache gerizon nan men li. Men, Jezi wete
¹⁷ kò l', li al yon kote ki pa gen moun menm, li t'ap lapriyè. ¶ Yon jou, Jezi t'ap moutre moun yo
 anpil bagay. Kèk farizyen ak kèk dirèktè lalwa te chita la; yo te soti nan tout bouk Galile yo, nan
¹⁸ bouk Jide yo ak nan lavil Jerizalèm. Pouvwa Bondye te avèk Jezi, li t'ap geri malad yo. Se konsa,
 kèk moun vin ap pote yon nonm paralize kouche sou yon kabann. Yo t'ap chache fè l' antre nan
¹⁹ kay la pou mete l' devan Jezi. Men, akòz foul moun yo, yo pa t' jwenn plas pou fè l' antre. Lè
 yo wè sa, yo moute sou do kay la, yo fè yon twou nan kouvèti kay la ki te fèt an brik, yo file malad
²⁰ la desann ak tout kabann li, nan mitan moun yo, dwat devan Jezi. Jezi wè jan yo te kwè nan li,
²¹ li di nonm malad la: Monchè, tout peche ou yo padonnen. Dirèktè lalwa ak farizyen yo t'ap di
 nan kè yo: Kilès nonm sa a k'ap pale mal sou Bondye konsa? Pa gen moun sou latè ki ka padonnen
²² peche: sa se travay Bondye sèlman. Jezi menm te konnen sak t'ap pase nan tèt yo, li di yo konsa:
²³ Poukisa n'ap fè lide konsa nan tèt nou? Ki sak pi fasil pou m' di: Peche ou yo padonnen osinon:
²⁴ Leve kanpe, mache. Enben, m'ap fè nou konnen mwen menm, Moun Bondye voye nan lachè a,
 mwen gen pouvwa sou latè pou m' padonnen peche tande. Apre sa, Jezi di nonm paralize a: Se
²⁵ mwen menm k'ap pale avè ou: Leve kanpe, pran kabann ou, ale lakay ou. Menm lè a, nonm lan
 kanpe devan yo tout, li pran kabann li te kouche sou li a, li al lakay li, li t'ap fè lwanj Bondye.
²⁶ Tout moun te sezi. Yo t'ap fè lwanj Bondye. Yo te pè anpil tou, yo t'ap di: Ala bèl mèvèy nou
²⁷ wè jòdi a! ¶ Apre sa, Jezi soti, li wè yon pèseptè kontribisyon yo te rele Levi. Li te chita devan
²⁸ biwo travay li. Jezi di l' konsa: Swiv mwen. Levi annik leve, li kite tout bagay, li swiv Jezi.
²⁹ Apre sa, Levi fè yon gwo resepsyon lakay li pou Jezi. Te gen anpil pèseptè kontribisyon ansanm
³⁰ ak lòt moun ankò ki te chita bò tab la avèk yo. Farizyen yo ak dirèktè lalwa ki te fè gwoup ak

yo t'ap babye, yo di disip Jezi yo: Poukisa n'ap plede manje, n'ap plede bwè konsa ak pèseptè
kontribisyon ansanm ak lòt moun k'ap fè sa ki mal? ³¹ Jezi reponn yo: Lè yon moun ansante, li pa
bezwen dòktè. Se moun malad ki bezwen dòktè. ³² Enben, mwen pa vin rele moun k'ap mache
dwat devan Bondye, men moun k'ap fè sa ki mal pou yo kapab tounen vin jwenn Bondye. ³³ Gen
kèk moun ki di Jezi konsa: Patizan Jan Batis yo ak patizan farizyen yo fè jèn souvan, se tout tan
y'ap lapriyè. Men disip pa ou yo, tout tan se manje, se bwè. ³⁴ Jezi reponn yo: Eske nou ka fòse
zanmi yon nonm k'ap marye pou yo rete san manje tout tan li la avèk yo? ³⁵ Non. Men, lè lè a rive
pou nonm k'ap marye a pa avèk yo ankò, se lè sa a y'a fè jèn. ³⁶ Epi li di yo parabol sa a: Pesonn
p'ap chire yon moso nan yon rad nèf pou pyese yon vye rad. Si ou fè sa, ou chire rad nèf la, lèfini
moso twal nèf la pa ale ak vye rad la non plis. ³⁷ Konsa tou, pesonn pa mete diven ki fenk fèt nan
vye veso fèt an po. Si ou fè sa, diven ki fenk fèt la va pete veso an po yo. Lè sa a, diven an koule
atè, veso an po yo pèdi tou. ³⁸ Men, diven ki fenk fèt, sa dwe ale nan veso an po ki fenk fèt tou.
³⁹ Yon moun ki fin bwè diven ki la lontan p'ap vle bwè diven ki fenk fèt. Se sa pawòl la di: Pi vye
pi bon.

Chapter 6

¹ ¶ Yon jou repo, Jezi t'ap pase nan yon jaden ble. Disip li yo keyi kèk grap ble, yo fwote yo
nan men yo, epi yo t'ap manje grenn yo. ² Te gen kèk farizyen la ki di yo konsa: Poukisa n'ap fè
bagay lalwa nou pa pèmèt moun fè gwo jou repo a? ³ Jezi pran lapawòl, li di farizyen yo konsa:
Eske nou pa li sa David te fè li menm ak moun pa l' yo, yon jou yo te grangou? ⁴ Li antre nan kay
Bondye a, li pran pen yo te ofri bay Bondye a, li manje, li bay moun pa l' yo manje tou. Men dapre
lalwa nou an, se prèt yo sèlman ki gen dwa manje pen sa yo. ⁵ Apre sa li di yo: Mwen menm, Moun
Bondye voye nan lachè a, mwen se mèt repo a. ⁶ Yon lòt jou repo, Jezi antre nan sinagòg la, li t'ap
moutre moun yo anpil bagay. Te gen yon nonm nan lasanble a ki te gen men dwat li pòk. ⁷ Dirèktè
lalwa yo ak farizyen yo t'ap veye Jezi konsa pou wè si l' t'ap geri moun jou repo a, paske yo te vle
jwenn yon kòz pou akize li. ⁸ Men, Jezi te konnen sak te dèyè tèt yo. Lè sa a, li di nonm ki te gen
menm pòk la: Leve, vin kanpe la a nan mitan nou. Nonm lan leve kanpe. ⁹ Apre sa, Jezi di moun

yo: M'ap mande nou kichòy: Kisa lalwa a pèmèt moun fè jou repo a? Byen oswa mal? Sove lavi
yon moun osinon kite l' mouri? ¹⁰ Apre sa, li pwonmennen je l' sou yo tout, li di nonm lan: Lonje
men ou. Nonm lan lonje men li. Latou, men an geri. ¹¹ Men, lòt moun yo pa t' manke ankòlè; yo
t'ap diskite yonn ak lòt sou sa yo ta kapab fè Jezi. ¹² ¶ Lè sa a, Jezi moute sou yon ti mòn pou l'
lapriyè. Li pase tout nwit lan ap lapriyè. ¹³ Lè l' fè jou, li rele disip li yo, li chwazi douz nan yo, li
rele yo apòt. ¹⁴ Se te Simon (Jezi te ba l' yon ti non Pyè), ak Andre, frè l', Jak ak Jan, Filip ak
Batèlmi, ¹⁵ Matye ak Toma, Jak, pitit Alfè a, ak Simon (patriyòt la), ¹⁶ Jid, pitit Jak la, avèk Jida
Iskariòt, nonm ki te trayi Jezi a. ¹⁷ Li desann ti mòn lan ak yo, li rete sou yon ti platon. Te gen
anpil nan disip li yo ki te sanble la ak yon gwo mas pèp. Moun yo te soti toupatou; te gen moun
Jide, moun lavil Jerizalèm, ak moun nan lavil Tir ak lavil Sidon ki bò lanmè a. Yo te vin tande l',
yo t'ap mande l' geri malad yo tou. ¹⁸ Moun ki te gen move lespri ap toumante yo te geri tou.
¹⁹ Tout moun t'ap chache manyen l', paske te gen yon fòs ki t'ap soti nan Jezi ki t'ap geri yo tout.
²⁰ ¶ Lè sa a, Jezi gade disip li yo, li di yo: benediksyon pou nou menm ki pòv, paske Peyi kote
Bondye Wa a, se pou nou li ye. ²¹ benediksyon pou nou menm ki grangou koulye a, paske n'a
jwenn manje an kantite. benediksyon pou nou menm k'ap kriye koulye a, paske nou pral nan kè
kontan. ²² benediksyon pou nou si lèzòm rayi nou, si yo pa vle wè nou, si yo joure nou, si yo
meprize nou tankou move moun, poutèt mwen menm, Moun Bondye voye nan lachè a. ²³ Fè kè
n' kontan lè sa va rive; nou mèt kontan nèt paske yon gwo rekonpans ap tann nou nan syèl la. Se
konsa zansèt nou yo te maltrete pwofèt yo. ²⁴ Men, malè pou nou, nou menm moun rich yo, paske
nou deja jwenn sa nou t'ap chache a. ²⁵ Malè pou nou, nou menm ki gen tout bagay an kantite
koulye a, paske nou pral grangou pou n' mouri. Malè pou nou, nou menm k'ap ri koulye a, paske
nou pral nan lapenn, se pa ti kriye n'a kriye. ²⁶ Malè pou nou lè tout moun ap di nou se bon moun,
paske se konsa zansèt nou yo te aji ak fo pwofèt yo. ²⁷ ¶ Nou menm k'ap koute m' la a, men sa
m'ap di nou: renmen tout lènmi nou yo. Fè byen pou moun ki rayi nou. ²⁸ Mande benediksyon pou
moun k'ap ban nou madichon. Lapriyè pou moun k'ap maltrete nou. ²⁹ Si yon moun ban nou yon
souflèt sou yon bò figi, vire lòt bò a ba li. Si yon moun pran levit nou, kite l' pran chemiz nou tou.
³⁰ Nenpòt moun ki mande nou kichòy, ba li l'. Si yon moun pran sa ki pou nou, kite l' pou li. ³¹ Tou
sa nou va vle lòt moun fè pou nou, fè l' pou yo tou. ³² Si nou plede renmen sèlman moun ki renmen

nou, ki benediksyon pou n' tann pou sa? Mechan yo tou yo renmen moun ki renmen yo. ³³ Si nou fè byen sèlman pou moun ki fè nou byen, ki benediksyon pou nou tann pou sa? Mechan yo fè menm

³⁴ jan an tou. Si se moun nou konnen k'ap renmèt nou nou prete sèlman, ki benediksyon pou nou tann pou sa? Mechan yo tou, yo prete mechan parèy yo ki kapab renmèt yo sa yo te prete yo a san

³⁵ mank. Non, nou menm se pou nou renmen lènmi nou yo, fè byen pou yo. Prete san nou pa mete espwa nou sou renmèt. Se konsa n'a resevwa yon gwo rekonpans. Se lè sa a n'a pitit Bondye ki

³⁶ anwo nan syèl la, paske li menm, li bon ni pou engra ni pou mechan. Se pou nou gen kè sansib

³⁷ menm jan Bondye, papa nou, gen kè sansib. ¶ Pa jije moun, konsa Bondye p'ap jije nou. Pa kondannen moun, konsa Bondye p'ap kondannen nou. Padonnen yo, konsa Bondye va padonnen

³⁸ nou tou. Bay, Bondye va ban nou. La lage yon bon mezi, byen souke, byen foule, ak tout tiyon l', nan pòch rad nou. Mezi nou sèvi pou mezire lòt yo, se li menm Bondye va pran pou mezire nou

³⁹ tou. Epi li di yo yon lòt parabol: Eske yon avèg ka mennen yon lòt avèg? Eske tou de p'ap tonbe

⁴⁰ nan menm twou a? Yon elèv pa pifò pase mèt li; men yon elèv ki fini nèt, l'ap fò tankou mèt li.

⁴¹ Poukisa w'ap gade ti pay ki nan je frè ou, epi ou pa wè gwo bout bwa a ki nan je pa ou la? ⁴² Ou menm ki pa wè gwo bout bwa ki nan je pa ou la, ki jan ou kapab di frè ou: Frè m', kite m' wete ti pay ki nan je ou la? Ipokrit! Wete gwo bout bwa ki nan je pa ou la anvan. Apre sa, wa wè klè pou

⁴³ ou wete pay ki nan je frè ou la. Yon bon pyebwa pa bay move donn, ni yon move pyebwa pa

⁴⁴ bay bon donn. Yo rekonèt kalite yon pyebwa sou donn li bay. Yo pa keyi fig Frans sou pye rakèt,

⁴⁵ ni yo pa rekòlte rezen sou tout vye lyann. Yon nonm ki bon, se bon bagay li rale soti nan kè li ki bon. Yon nonm ki mechan, se move bagay li rale soti nan kè li ki move. Paske, sak nan kè yon

⁴⁶ nonm, se sak soti nan bouch li. Poukisa n'ap plede rele mwen: Mèt, Mèt, epi nou pa fè sa m' di

⁴⁷ nou fè? Moun ki vin jwenn mwen, ki tande pawòl mwen epi ki fè sa mwen di fè, men ki jan l'ap

⁴⁸ ye: L'ap tankou yon nonm k'ap bati yon kay; li fouye tè a byen fon, li moute fondasyon kay la

⁴⁹ sou wòch. Dlo desann, lavalas frape kay la. Men, kay la pa brannen paske li te byen bati. Men, moun ki tande pawòl mwen, ki pa fè sa mwen di fè, li tankou yon nonm ki bati yon kay ratè, san fondasyon. Lavalas frape kay la, yon sèl kou kay la tonbe, li kraze nèt.

Chapter 7

¹ ¶ Lè Jezi fin pale tout pawòl sa yo ak pèp la, li ale lavil Kapènawòm. ² Nan lavil sa a, yon kaptenn lame a te gen yon domestik li te renmen anpil. Domestik sa a te twouve l' malad prèt pou mouri. ³ Kaptenn lan tandè pale sou Jezi; se konsa li voye kèk chèf fanmi nan jwif yo al mande Jezi pou l' vin geri domestik li a. ⁴ Yo rive bò kot Jezi, yo di li: Tanpri, fè sa pou li, li merite li. Paske li renmen pèp nou an. ⁵ Se li ki te bati sinagòg la pou nou. ⁶ Jezi ale avè yo. Li te rive toupre kay la lè kaptenn lan voye kèk zanmi di l' konsa: Mèt, pa bay kò ou tout traka sa a. Mwen pa merite pou ou antre lakay mwen. ⁷ Se poutèt sa mwen pa t' kwè m' ase bon pou m' te vin jwenn ou, mwen menm. Annik di yon mo, domestik mwen an va geri. ⁸ Mwen menm, mwen sou zòd chèf, mwen gen sòlda sou zòd mwen tou. Lè m' di yonn: Ale! li ale. Lè m' di yon lòt: Vini! li vini. Lè m' di domestik mwen an: Fè sa! li fè li. ⁹ Lè Jezi tandè pawòl sa yo, li vin gen yon gwo admirasyon pou kaptenn lan. Li vire bò foul moun ki t'ap swiv li a, li di yo: M'ap di nou sa: Mwen poko janm jwenn yon moun ki gen konfyans nan Bondye konsa, pa menm nan pèp Izrayèl la. ¹⁰ Lè zanmi kaptenn lan te voye yo tounen nan kay la, yo jwenn domestik ki te malad la geri. ¹¹ ¶ Apre sa, Jezi ale nan yon lavil yo rele Nayen. Disip li yo t'ap fè wout avè l' ansanm ak yon gwo foul moun. ¹² Li rive bò pòtay lavil la. Lè sa a yo t'ap pote yon mò al antere: se te sèl pitit gason yon madanm vè. Te gen anpil moun lavil la avèk li. ¹³ Lè Jezi wè vè la, kè l' fè l' mal pou li, li di li: Pa kriye, tandè! ¹⁴ Apre sa li pwoche, li manyen sèkèy la. Moun ki t'ap pote l' yo ret kanpe. Li di: Jennonm, se mwen menm k'ap pale avè ou. Leve. ¹⁵ Epi mò a leve chita, li kòmanse pale. Jezi renmèt li bay manman li. ¹⁶ Tout moun yo te pè, yo t'ap fè lwanj Bondye, yo t'ap di: Yon gwo pwofèt parèt nan mitan nou! Yo t'ap di tou: Bondye vin sove pèp li a. ¹⁷ Nouvèl la te gaye nan tout peyi Jide a ak nan tout vwazinaj la. ¹⁸ Patizan Jan Batis yo te rakonte tout bagay sa yo bay Jan Batis. ¹⁹ ¶ Jan rele de ladan yo, li voye yo bò kot Jezi al mande li: Eske ou se moun nou konnen ki gen pou vini an, osinon èske nou dwe tann yon lòt? ²⁰ Lè mesye sa yo rive bò kot Jezi, yo di li: Jan Batis voye nou bò kote ou vin mande ou: Eske ou se moun nou konnen ki gen pou vini an, osinon èske nou dwe tann yon lòt? ²¹ Lè sa a, Jezi t'ap geri anpil moun malad ak anpil moun enfim, li t'ap wete yo anba pouvwa move lespri, li t'ap fè anpil avèg wè ankò. ²² Apre sa, li reponn moun Jan Batis te voye yo konsa: Ale rakonte Jan sa nou sot wè ak sa nou sot tandè la a: je avèg yo louvri, moun ki t'ap bwete yo mache byen, moun ki te gen maladi lalèp yo geri, moun soudè yo tandè, moun mouri yo leve, pòv yo tandè bon nouvèl la. ²³ benediksyon pou moun ki p'ap jwenn nan mwen okazyon

²⁴
 pou yo tonbe nan peche. Lè moun Jan te voye yo al fè wout yo, Jezi kòmanse pale ak fowl moun
 yo sou Jan Batis. Li di yo konsa: Kisa nou te al wè nan dezè a? Yon pye wozo van ap balanse?
²⁵
 Non. Men, kisa nou te al wè menm? Yon nonm abiye ak bèl rad? Ala, moun ki abiye ak bèl rad,
²⁶
 k'ap viv nan jwisans, se kay wa yo jwenn yo. Men, manyè di m' kisa nou tal wè? Yon pwofèt?
²⁷
 Wi. Mwen menm, mwen di nou: li pi plis pase yon pwofèt. Men sa ki te ekri sou Jan Batis: Men
²⁸
 m'ap voye mesaj m' lan devan ou, la louvri chemen an devan pou ou. M'ap di nou sa: Nan tout
 moun ki fèt sou latè pa gen yonn ki pi konsekan pase Jan Batis. Men, moun ki pi piti nan peyi kote
²⁹
 Bondye wa a pi konsekan pase li. Tout pèp la ansanm ak pèseptè kontribisyon yo t'ap tandè li.
³⁰
 Moun sa yo te rekonèt se Bondye ki gen rezon, se pou sa yo te fè Jan Batis batize yo. Men,
 farizyen yo ak dirèktè lalwa yo te refize sa Bondye te vle fè pou yo; se sak fè yo pa t' kite Jan Batis
³¹
 batize yo. Jezi di yo ankò: Ak ki moun mwen ta konpare moun k'ap viv nan tan alèkile yo? Ki
³²
 moun yo sanble menm? Yo sanble timoun ki chita sou plas piblik. Yonn ap rele lòt pou di l'
 konsa: Nou jwe mizik cho pou nou ak fif nou, nou pa danse. Nou chante chante ki tris pou nou,
³³
 nou pa kriye. Jan Batis vini, li pa manje pen, ni li pa bwè diven, nou di: Li gen yon move lespri
³⁴
 sou li. Mwen menm, Moun Bondye voye nan lachè a, mwen vini, mwen manje, mwen bwè, nou
 di: Gade yon nonm! Se manje ak bwè ase l' konnen; se zanmi pèseptè kontribisyon ak moun k'ap
³⁵
 fè sa ki mal li ye. Men, tout moun ki asepte bon konprann Bondye a, yo moutre se Bondye nan
³⁶
 bon konprann li ki gen rezon. ¶ Yon farizyen te envite Jezi vin manje avè li. Jezi ale lakay
³⁷
 farizyen an; li chita bò tab la pou l' manje. Nan lavil sa a, te gen yon fanm movèz vi. Lè fanm
³⁸
 lan pran nouvèl Jezi t'ap manje lakay farizyen an, li pote yon ti boutèy fèt an albat plen odè. Li
 mete kò l' dèyè bò pye Jezi. Li kriye, li kriye, li mouye pye Jezi ak dlo ki t'ap soti nan je li. Apre
³⁹
 sa, li siye yo ak cheve l', li bo yo, epi li vide odè sou yo. Lè farizyen ki te envite Jezi a wè sa, li
 t'ap di nan kè l': Si nonm sa a te yon pwofèt vre, se pou l' ta konnen ki kalite moun fanm sa k'ap
⁴⁰
 manyen l' lan ye, li ta konnen ki movèz vi fanm sa a ap mennen. Lè sa a, Jezi pran lapawòl, li
⁴¹
 di l' konsa: Simon, mwen gen kichòy pou m' di ou. Simon reponn li: Mèt, ou mèt pale wi. Jezi
 di li: Vwala, se te de moun ki te dwe yon nonm ki te prete yo lajan; premye a te dwe l' senksan
⁴²
 (500) goud; lòt la te dwe l' senkant goud. Ni yonn ni lòt pa t' gen dekwa peye dèt la. Lè sa a,
⁴³
 nonm lan di yo yo pa bezwen peye dèt la ankò. Kilès nan yo de a va renmen l' plis? Simon

reponn li: Mwen ta kwè se nonm ki te dwe l' plis la. Jezi di l': Ou byen reponn. ⁴⁴ Epi li vire bò fanm lan, li di Simon: Ou wè fanm sa a? Mwen antre lakay ou, ou pa menm ban m' dlo pou m' lave pye m'; men li menm, li lave pye m' ak dlo ki soti nan je l'. Apre sa, li siye yo ak cheve li. ⁴⁵ Ou pa te bo m' lè m' t'ap antre lakay ou; men li menm, depi mwen antre se bo l'ap bo pye m'. ⁴⁶ Ou pa vide lwil sou tèt mwen; men li menm, li vide odè sou pye mwen. ⁴⁷ Se poutèt sa, mwen di ou: li fè tout bagay sa yo pou moutre jan li renmen anpil, paske yo padonnen li anpil peche. Men, yon moun yo padonnen yon ti kras, se yon ti kras l'ap moutre jan l' renmen tou. ⁴⁸ Apre sa, Jezi di fanm lan: Peche ou yo padonnen. ⁴⁹ Moun ki te chita bò tab la avèk li yo pran di nan kè yo: Ki moun nonm sa a ye menm pou li padonnen peche? ⁵⁰ Men Jezi di fanm lan: Se konfyans ou nan Bondye ki sove ou. Ale ak kè poze.

Chapter 8

¹ ¶ Apre sa, Jezi mache ale nan tout lavil yo ak nan tout bouk yo. Li t'ap mache bay mesaj la, li t'ap anonse bon nouvèl peyi kote Bondye Wa a. Douz disip yo te toujou avè li. ² Te gen kèk fanm avè l' tou. Se moun li te wete move lespri sou yo, li te geri maladi yo. Te gen Mari (yo te rele moun Magdala a). Jezi te wete sèt move lespri sou li. ³ Te gen Jan, madanm Chouza, yonn nan jeran Ewòd yo. Te gen Sizan ak anpil lòt ankò. Yo tout yo t'ap ede Jezi ansanm ak disip li yo ak sa yo te genyen. ⁴ ¶ Lè sa a, te gen yon gwo foul moun ki te sanble; moun te soti nan divès vil vin bò kot Jezi. Li pran rakonte yo parabol sa a: ⁵ Yon nonm soti pou li ale simen grenn nan jaden li. Pandan l' t'ap simen grenn yo, kèk grenn tonbe bò chemen an: Pye pile yo, zwezo nan syèl vini, yo manje yo. ⁶ Yon pati tonbe nan mitan wòch; grenn yo leve. Men, yo cheche paske yo pa t' jwenn tè fre. ⁷ Yon lòt pati tonbe nan mitan pye pikan. Pye pikan yo grandi ansanm ak bon ti plant yo, yo toufe yo. ⁸ Men, yon lòt pati ankò tonbe nan bon tè. Plant yo leve, yo donnen: yo bay san (100) pou yonn. ⁹ Lè l' fin di sa, li di ankò: Si nou gen zòrèy pou n' tande, tande. Disip li yo mande l' kisa parabol sa a vle di. ¹⁰ Li reponn yo: Pou nou, yo fè nou konnen tout sekrè peyi kote Bondye Wa a. Men, pou lòt moun yo, yo ba yo l' an parabol; konsa yo mèt gade, yo p'ap wè, yo mèt tande, yo p'ap konprann. ¹¹ Men sa parabol sa a vle di: Grenn y'ap simen an se pawòl Bondye. ¹² Gen moun ki

sanble ak tè bò chemen kote grenn yo tonbe a. Yo tandè, men Satan vini, li rache pawòl la nan kè
 yo pou yo pa kwè, pou yo pa sove. ¹³ Gen lòt moun ki sanble tè ki gen anpil wòch la. Yo tandè
 pawòl la, yo resevwa l' ak kè kontan; men yo pa kite l' pouse rasin, yo pa kwè l' pou lontan. Lè
 eprèv tonbe sou yo, yo vire do bay Bondye. ¹⁴ Grenn ki tonbe nan mitan pikan yo, se moun ki
 tandè pawòl la, men lè y al fè wout yo, yo kite traka lavi, richès ak plezi ki nan lavi toufè l'. Yo
 donnen men donn yo pa janm rive rèk. ¹⁵ Grenn ki tonbe nan bon tè a, se moun ki sensè, ki gen
 bon kè, ki tandè pawòl la, yo kenbe l' nan kè yo. Yo toujou rete fèm jouk yo donnen. ¹⁶ Pesonn pa
 limen yon lanp pou l' kouvri l' anba yon mamit, osinon pou l' mete l' anba yon kabann. Li mete l'
 sou yon etajè. Konsa, moun k'ap antre yo kapab wè limyè a. ¹⁷ Nanpwen anyen ki kache ki p'ap
 devwale, nanpwen sekre pou moun pa rive konnen, ki p'ap parèt aklè. ¹⁸ Se poutèt sa, fè atansyon
 jan n'ap tandè pawòl la. Paske, moun ki genyen deja a, y'a ba li ankò. Men, moun ki pa gen anyen
 an, y'a wete nan men l' menm ti sa l' te kwè li te genyen an. ¹⁹ Manman Jezi ak frè l' yo te vin kote
 li. Men, yo pa t' kapab rive pre li akòz foul moun yo. ²⁰ Moun yo di l' konsa: Men manman ou ak
 frè ou yo deyò a. Yo anvè wè ou. ²¹ Men, Jezi di yo tout: Manman m' ak frè m', se moun ki koute
 pawòl Bondye a epi ki fè sa pawòl la di. ²² ¶ Yon jou, Jezi moute nan yon kannòt ak disip li yo.
 Li di yo: Ann janbe lòt bò letan an. Lamenm yo pati. ²³ Pandan yo t'ap navige, dòmi pran Jezi.
 Yon gwo van vin leve sou letan an, dlo kòmanse plen kannòt la, kifè lavi yo tout te an danje. ²⁴ Yo
 pwoche bò kot Jezi yo souke l', yo di li: Mèt, Mèt, se mouri n'ap mouri wi! Jezi leve, li pale byen
 fò ak van an ansanm ak lanm lanmè yo: tout bagay vin byen trankil, yon gwo kalmi fèt. ²⁵ Epi Jezi
 di yo: Kote konfyans nou ye? Men, yo te pè, yo te sezi. Yonn t'ap di lòt konsa: Ki moun li ye menm?
 Li kòmande menm van ak lanmè, yo obèyi li. ²⁶ Yo fè tè nan peyi Jerazyen yo ki lòt bò letan
 an, vizaviz ak Galile. ²⁷ Jezi desann atè. Lamenm yon nonm lavil la vin devan l': nonm lan te gen
 anpil move lespri sou li. Depi lontan li pa t' janm vle mete rad sou li, ni li pa t' vle rete nan ankenn
 kay, se nan mitan tonm mò yo li t'ap viv. ²⁸ Lè l' wè Jezi, li bay yon gwo rèl, li lage kò l' atè devan
 Jezi, li pran pale byen fò, li di li konsa: Kisa m' gen avè ou, Jezi, Pitit Bondye ki anwo nan syèl la?
 Tanpri souple, pa fè m' soufri. ²⁹ Li te pale konsa paske Jezi te pase move lespri a lòd pou li soti
 sou nonm lan. Anpil fwa, lespri a te vin sou li: lè konsa, yo te konn mare tou de men l' ak tou de
 pye l' ak chenn pou l' pa t' kouri. Men, li te jwenn mwayen pete chenn yo epi move lespri a te
 mennen l' ale nan dezè. ³⁰ Jezi mande li: Ki jan ou rele? Li reponn: Yo rele m' Rejiman. Li di sa
 paske se anpil move lespri ki te sou nonm lan. ³¹ Lespri yo t'ap mande Jezi: Tanpri souple, pa voye

³²
n' ale nan gwo twou san fon an. Sou ti mòn lan te gen yon bann kochon ki t'ap chache manje pou yo manje. Move lespri yo pran mande Jezi: Tanpri souple, kite nou antre nan kochon sa yo.

³³
Jezi ba yo pèmisyon sa a. Lè sa a, move lespri yo soti sou nonm lan, yo antre nan kochon yo. Lamenn tout bann kochon yo pran degrengole desann bò falèz la, y' al neye tèt yo nan letan an.

³⁴
Moun ki t'ap gade kochon yo, lè yo wè sak te rive, yo pran kouri, yo gaye nouvèl la nan lavil la

³⁵
kou andeyò. Moun soti pou y' al wè sak te pase. Lè yo rive kote Jezi te ye a, yo jwenn nonm lan: move lespri yo te soti sou li, li te chita nan pye Jezi byen abiye ak tout bon sans li sou li. Yo

³⁶
tout te pè. Moun ki te asiste bagay la mete rakonte yo ki jan nonm ki te gen move lespri sou li

³⁷
a te geri. Lè sa a, tout moun nan peyi Jerazenyen yo mande Jezi pou li al fè wout li kite peyi a,

³⁸
paske yo te pè anpil. Jezi moute nan kannòt la pou l' ale. Nonm ki te gen move lespri soti sou

³⁹
li a mande l' pou li ale avèk li tou. Men, Jezi voye l' ale, li di li: Tounen lakay ou; al rakonte tou sa Bondye fè pou ou. Nonm lan pati, li mache fè konnen tou sa Jezi te fè pou li nan tout lavil la.

⁴⁰ ¶ ⁴¹
Lè Jezi tounen lòt bò letan an, yon foul moun resevwa l', paske tout moun t'ap tann li. Yon nonm yo rele Jayiris vin rive. Se li ki te chèf sinagòg la. Li lage kò l' nan pye Jezi, li mande li:

⁴²
Tanpri souple, ann al lakay. Mwen gen yon tifi douzan ki sèl pitit fi m', mwen kite l' prèt pou

⁴³
mouri. Pandan Jezi tapral lakay Jayiris, yon foul moun t'ap kwense l' toupatou. Te gen yon fanm nan foul moun yo ki te malad: Depi douzan li t'ap pèdi san. Li te fin depanse tout byen l' kay dòktè,

⁴⁴
san yo yonn pa t' kapab geri li. Li pwoche pa dèyè, li manyen ke rad Jezi. Latou, san an rete.

⁴⁵
Jezi mande: Ki moun ki manyen m' lan? Tout moun pran di se pa yo. Lè sa a, Pyè di li: Men,

⁴⁶
Mèt, se nan mitan yon foul moun ou ye, moun ap kwense ou tout jan. Men, Jezi reponn li: Mwen

⁴⁷
di ou gen yon moun ki manyen m', paske mwen santi yon fòs soti sou mwen. Lè sa a, fanm lan wè yo te dekouvri l', li pran tranble kou yon fèy bwa, li vin lage kò l' nan pye Jezi, li pran rakonte

⁴⁸
devan tout pèp la poukisa li te manyen l', ki jan li te geri menm lè a tou. Jezi di li: Mafi, se

⁴⁹
konfyans ou nan Bondye ki geri ou; ale ak kè poze. Jezi t'ap pale toujou lè yon nonm soti lakay

⁵⁰
chèf sinagòg la vin di li: Tifi ou la mouri; ou pa bezwen deranje mèt la pase sa. Men, lè Jezi

⁵¹
tande sa, li di Jayiris konsa: Pa pè. Sèlman, met konfyans ou nan mwen, pitit la va geri. Lè Jezi rive lakay la, li pa kite tout moun yo antre ak li. Li pran Pyè, Jan, Jak epi papa ak manman pitit la.

⁵²
Tout moun t'ap kriye, yo t'ap plenn lanmò pitit la. Jezi di yo: Pa kriye. Pitit la pa mouri, se dòmi

l'ap dòmi. ⁵³ Lè sa a, yo tonbe pase l' nan betiz paske yo te konnen tifi a fin mouri. ⁵⁴ Men, Jezi pran men pitit la, li pale byen fò, li di konsa: Tifi, leve. ⁵⁵ Lespri tifi a tounen sou li ankò, menm lè a li leve. Jezi pase lòd pou yo ba l' manje. ⁵⁶ Papa ak manman tifi a te sezi anpil, men Jezi bay yo lòd pou yo pa di pesonn sak te pase.

Chapter 9

¹ ¶ Jezi sanble douz disip li yo, li ba yo pouvwa ak otorite pou chase tout move lespri, pou geri tout maladi. ² Apre sa, li voye yo mache fè konnen gouvènman Bondye Wa a, li voye yo geri malad yo tou. ³ Li di yo: Pa pran anyen pou vwayaj la: ni baton, ni sak, ni pen, ni lajan, pa menm yon rad derechanj. ⁴ Rete nan yon sèl kay, kay kote y'a resevwa nou an, jouk nou pati kite peyi a. ⁵ Tout kote moun pa vle resevwa nou, kite lavil sa a, souke pousyè pye nou; konsa yo p'ap ka di nou pa t' avèti yo. ⁶ Disip yo pati, yo mache ale nan tout bouk, yo t'ap anonse bon nouvèl la, yo t'ap geri moun malad toupatou. ⁷ Lè sa a, Ewòd t'ap gouvènen nan peyi Galile a. Li te pran nouvèl tou sak t'ap pase. Men, li pa t' konnen sa pou l' te kwè. Gen moun ki t'ap di: Se Jan Batis ki leve pami mò yo. ⁸ Gen lòt ki t'ap di: Se Eli ki parèt. Gen lòt ki t'ap di ankò: Se yonn nan ansyen pwofèt yo ki leve pami mò yo. ⁹ Men Ewòd t'ap di: Mwen te fè koupe tèt Jan. Men, nonm mwen tandè y'ap nonmen non l' anpil la, kilès li ye menm? Li t'ap chache wè Jezi. ¹⁰ ¶ Lè apòt yo tounen, yo rakonte Jezi tou sa yo te fè. Li pran yo avèk li, yo pati ansanm pou kont yo pou lavil Betsayda. ¹¹ Men, lè foul moun yo vin konn sa, yo pati dèyè li. Jezi resevwa yo, li pale yo sou peyi kote Bondye Wa a, li geri tout moun ki te malad. ¹² Lè solèy kòmanse kouche, douz disip yo pwoche bò kot Jezi, yo di li: Voye moun yo ale pou yo ka achte manje, pou yo jwenn kote pou yo dòmi nan bouk yo ak nan vwazinaj la; paske isit la nou nan mitan yon dezè. ¹³ Jezi di yo: Poukisa nou pa ba yo manje pito! Men, yo reponn: Nou gen senk pen ak de pwason sèlman. Ou ta vle pou n' al achte manje pou n' bay tout pèp sa a? ¹⁴ (Te gen senkmil (5.000) gason konsa.) Jezi di disip li yo: Fè yo chita pa ranje senkant konsa. ¹⁵ Disip yo koute l', yo fè tout moun chita. ¹⁶ Jezi pran senk pen ak de pwason yo, li leve je l' nan syèl la, li di Bondye mèsi pou manje a. Apre sa, li separe l', li renmèt li bay disip yo pou mache bay foul moun yo. ¹⁷ Tout moun manje vant plen. Lèfini, disip yo ranmase douz

18 panyen plen moso ki te rete. ¶ Yon jou, Jezi te pou kont li, li t'ap lapriyè. Disip li yo vin jwenn
 li, li mande yo: Ki moun yo di mwen ye? 19 Yo reponn li: Gen moun ki di ou se Jan Batis! Gen
 20 lòt ki di ou se Eli. Gen lòt ankò ki di ou se yonn nan ansyen pwofèt yo ki leve pami mò yo. Li
 mande yo: Bon, nou menm, ki moun nou di mwen ye? Pyè reponn li: Ou se Kris la, Moun Bondye
 21 chwazi pou voye a. Jezi pase yo lòd sevè pou yo pa di pesonn sa. 22 Apre sa, li di yo: Mwen
 menm, Moun Bondye voye nan lachè a, mwen gen pou m' soufri anpil. Chèf fanmi yo, chèf prèt
 yo ak dirèktè lalwa yo, yo yonn p'ap vle wè mwen. Y'ap fè yo touye mwen. Men, sou twa jou m'ap
 23 leve soti vivan nan lanmò. Epi li di yo tout: Si yon moun vle mache dèyè m', se pou li bliye tèt
 li. Se pou li chaje kwa l' sou zèpòl li chak jou, epi swiv mwen. 24 Paske, moun ki ta vle sove lavi
 l' va pèdi li. Men, moun ki va pèdi lavi l' poutèt mwen, la sove li. 25 Kisa sa ta sèvi yon moun pou
 26 l' ta genyen lemonn antye, si l' pèdi nanm li, ou si l' detwi lavi li? Si yon moun wont di se moun
 mwen li ye, si li wont pale pawòl mwen, enben, mwen menm tou, Moun Bondye voye nan lachè
 a, lè m'a tounen nan tout pouvwa m' ak tout bèl pouvwa Papa m', nan mitan lame zanj li yo, m'a
 27 wont pran li pou moun pa m' tou. Sa m'ap di nou la a, se vre wi: nan moun ki la koulye a, gen
 28 ladan yo ki p'ap mouri san yo pa wè gouvènman Bondye a. ¶ Wit jou konsa, apre li te fin di
 29 pawòl sa yo, Jezi pran Pyè, Jan ak Jak. Li moute sou yon mòn pou li al lapriyè. Antan li t'ap
 30 lapriyè, figi l' pran chanje, rad li vin klere tou blan. Te gen dezòm ki t'ap pale ak Jezi: se te
 31 Moyiz ak Eli, ki te parèt nan mitan yon bèl limyè ki soti nan syel la. Yo t'ap pale avèk li sou jan
 32 li tapral mouri lavil Jerizalèm pou l' te ka akonpli misyon li. Yon bon dòmi te gen tan vòlè Pyè
 ak kanmarad li yo. Men, lè yo leve, yo wè bèl limyè ki te vlope Jezi ansanm ak de mesye ki te bò
 33 kote l' yo. Antan mesye yo tapral kite Jezi Pyè di li: Mèt, sa te bon nèt pou nou te la. Ann moute
 34 twa ti kay, yonn pou ou, yonn pou Moyiz ak yonn pou Eli. Li pa t' konnen sa l' t'ap di. Pandan
 li t'ap pale konsa, yon nwaj vin kouvri yo ak lonbraj li. Lè disip yo wè nwaj la ap vin sou yo, yo te
 35 pè. Lè sa a, yo tande yon vwa ki soti nan nwaj la ki di: Moun sa a se pitit mwen, moun mwen
 36 chwazi a. Koute li! Apre vwa a fin pale, Jezi te pou kont li ankò. Disip yo te fèmen bouch yo
 37 sou sa. Lè sa a, yo pa t' rakonte pesonn sa yo te wè. ¶ Nan denmen, yo desann soti sou mòn lan.
 38 Yon gwo foul moun te vin kontre Jezi. Nan mitan foul la, yon nonm pran rele: Mèt, tanpri, voye
 39 je ou sou pitit gason m' lan. Souple, se yon sèl la mwen genyen. Li gen yon move lespri ki konn

pran l', lè konsa lespri a fè l' bay yon sèl rèl, li souke l' byen souke, li fè bouch li kimen. Se pa ti
 maltrete li maltrete ti bway la. Epi se tout yon traka lè pou l' soti sou li. ⁴⁰ Mwen te mande disip
 ou yo pou yo te chase move lespri a, men yo pa t' kapab. ⁴¹ Jezi reponn: Ala moun san konfyans
 nan Bondye! Ala move moun! Jouk kilè pou m' rete nan mitan nou? Jouk kilè pou m' sipòte nou?
⁴² Mennen ti bway la isit. Pandan yo t'ap mennen ti bway la vini move lespri a fese l' atè, li souke
 l' byen souke. Men, Jezi pale byen fò avèk move lespri a. Li geri pitit la, li renmèt li bay papa li.
⁴³ ¶ Tout moun te sezi pou wè jan Bondye gen pouvwa. Pandan moun yo te nan admirasyon pou
 tou sa Jezi t'ap fè konsa, Jezi di disip li yo: ⁴⁴ Fè sa antre nan tèt nou byen: Mwen menm, Moun
 Bondye voye nan lachè a, mwen gen pou m' tonbe anba men lèzòm. ⁴⁵ Men, disip yo pa t' konprann
 pawòl la; sans li te kache pou yo, yo pa t' ka konnen sa sa te vle di: epi yo te pè poze l' keksyon sou
 sa tou. ⁴⁶ Apre sa, disip yo t'ap diskite yonn ak lòt pou konnen kilès nan yo ki te pi grannèg. ⁴⁷ Jezi
⁴⁸ vin konnen lide ki te nan tèt yo: li pran yon timoun piti li mete l' bò kote li. Epi li di yo: Nenpòt
 moun ki resevwa timoun sa a poutèt mwen, se mwen menm menm li resevwa. Nenpòt moun ki
 resevwa m', li resevwa moun ki voye m' lan tou. Moun ki pi piti nan mitan nou tout la a, se li ki pi
⁴⁹ grannèg. Jan pran lapawòl, li di: Mèt, nou te wè yon nonm ki pran non ou pou chase move lespri.
 Nou te vle anpeche l' fè sa paske li pa t'ap mache avèk nou. ⁵⁰ Jezi reponn li: Kite l' non. Moun ki
 pa kont ou, se moun pa ou li ye. ⁵¹ ¶ Dat pou Jezi te moute nan syèl la t'ap pwoche. Lè sa a li pran
 desizyon l', li pran chemen Jerizalèm. ⁵² Li voye kèk mesaje devan. Yo pati. Yo antre nan yon
 bouk peyi Samari pou pare yon kote pou Jezi desann. ⁵³ Men, moun yo pa t' vle resevwa l', paske
 li tapral Jerizalèm. ⁵⁴ Lè Jak ak Jan, de nan disip yo, wè sa, yo di li: Mèt, ou pa ta vle nou bay lòd
 pou dife nan syèl la desann fin ak yo? ⁵⁵ Jezi vire bò kote yo, li pale byen sèvè ak yo. ⁵⁶ Apre sa,
 y' ale nan yon lòt bouk. ⁵⁷ ¶ Pandan yo t'ap mache, yon nonm di Jezi konsa: M'ap swiv ou tout
 kote ou prale. ⁵⁸ Jezi reponn li: Chat mawon gen twou yo, zwezo nan syèl la gen nich yo tou. Men,
 mwen menm, Moun Bondye voye nan lachè a, mwen pa gen kote pou m' poze tèt mwen. ⁵⁹ Jezi
 di yon lòt: Swiv mwen. Men, nonm lan reponn li: Mèt, pèmèt mwen al antere papa m' anvan.
⁶⁰ Men, Jezi di li: Kite moun mouri antere moun mouri yo. Ou menm, al fè konnen gouvènman
 Bondye a. ⁶¹ Yon lòt di l' ankò: M'ap swiv ou wi, Mèt. Men, kite m' al di moun lakay mwen yo

62
orevwa. Jezi reponn li: Moun ki mete men nan yon travay, epi k'ap vire tèt gade dèyè, moun konsa pa ka sèvi nan peyi kote Bondye Wa a.

Chapter 10

1 ¶ Apre sa, Seyè a chwazi swasanndis lòt disip; li voye yo devan l' de pa de nan tout lavil ak tout kote li menm li te gen pou l' ale. 2 Li di yo: Rekòt la anpil, men pa gen ase travayè pou ranmase li. Mande mèt jaden an pou l' voye travayè nan jaden l' lan. 3 Ale: m'ap voye nou tankou ti mouton nan mitan chen mawon. 4 Pa pote ni lajan, ni manje, ni soulye. Pa rete nan di pesonn bonjou nan chemen an. 5 Lè nou antre nan yon kay, premye bagay pou nou di: benediksyon pou tout moun ki nan kay la. 6 Si gen yon moun ki ka resevwa benediksyon an, benediksyon an va desann sou li; si pa genyen, benediksyon an va tounen vin jwenn ou. 7 Rete nan kay sa a; manje, bwè tou sa y'a ban nou, paske moun ki travay merite pou yo peye l' lajan travay li. Pa soti nan yon kay pou al rete nan yon lòt. 8 Lè nou antre man yon lavil, si yo resevwa nou, manje sa y'a mete devan nou. 9 Geri moun malad ki nan lavil la, di tout moun yo: Gouvènman Bondye a rive toupre nou. 10 Men, lè nou antre nan yon lavil, si yo pa resevwa nou, mache nan tout lari, di yo konsa: 11 Men n'ap souke pousyè lavil nou an ki te kole anba pye nou, nou fini ak nou. Tansèlman, konnen byen: Gouvènman Bondye a te rive toupre nou. 12 M'ap di nou sa: Jou jijman an, y'ap peni lavil sa a pi rès pase lavil Sodòm. 13 Malè pou nou, moun lavil Korazen! Malè pou nou tou, moun lavil Betsayda! Paske, si mirak ki fèt nan mitan nou yo, se te nan mitan lavil Tir ak lavil Sidon yo te fèt, gen lontan moun sa yo ta chita atè, yo ta mete rad sak sou yo, yo ta kouvri kò yo ak sann dife pou fè wè yo vle tounen vin jwenn Bondye. 14 Se poutèt sa, jou jijman an, y'a peni nou pi rès pase moun lavil Tir ak moun lavil Sidon. 15 Nou menm, moun lavil Kapènawòm: nou ta vle yo leve nou jouk nan syèl la; enben y'ap bese nou desann jouk anba kote mò yo ye a. 16 Li di disip li yo ankò: Moun ki koute nou, se mwen menm yo koute. Moun ki repouse nou, se mwen menm yo repouse. Moun ki repouse m', se moun ki voye m' lan yo repouse. 17 ¶ Swasanndis disip yo tounen ak kè kontan, yo di li: Mèt, ata move lespri yo soumèt devan nou, lè nou pran non ou pou chase yo. 18 Jezi di yo: Mwen te wè Satan ap tonbe sot nan syèl la tankou yon zèklè. 19 Koute: Mwen ban nou pouvwa pou nou mache sou sèpan

ak eskòpyon, pou nou kraze tout pouvwa Satan anba pye nou, pou anyen pa kapab fè nou mal.
20

Men, nou pa bezwen kontan dapre move lespri yo soumèt devan nou. Fè kè n' kontan pito dapre

non nou ekri nan syèl la. ²¹ Lè sa a, Sentespri a te fè kè Jezi kontan anpil. Jezi di konsa: O Papa, ou menm ki mèt syèl la ak tè a, mwen di ou mèsè anpil dapre ou pran bagay ou te kache nan je gwo save ak moun lespri yo ou devwale yo bay ti piti yo. Wi, Papa mwen, sa pase konsa paske se konsa

ou te vle li. ²² Papa m' renmèt tout bagay nan men mwen. Pesonn pa konn kilès moun Pitit la ye, esepite Papa a; pesonn pa konn kilès moun Papa a ye, esepite Pitit la, ak moun Pitit la vle fè konnen

li. ²³ Apre sa, Jezi vire bò disip li yo, li rele yo apa, li di yo: benediksyon pou nou k'ap wè sa n'ap

wè a. ²⁴ Paske, m'ap di nou sa: anpil pwofèt ak anpil wa te anvi wè sa n'ap wè la a, men yo pa t'

wè li, yo te anvi tande sa n'ap tande la a, men yo pa t' tande li. ²⁵ ¶ Yon dirèktè lalwa vin rive. Pou l' pran Jezi nan pèlen li di l' konsa: Mèt, kisa pou m' fè pou m' resevwa lavi ki p'ap janm fini an?

²⁶ Jezi di li: Kisa ki ekri nan lalwa? Ki jan ou konprann li? ²⁷ Nonm lan reponn: Se pou ou renmen Mèt la, Bondye ou, ak tout kè ou, ak tout nanm ou, ak tout fòs kouraj ou, ak tout lide ou. Se pou

renmen frè parèy ou tankou ou renmen pwòp tèt pa ou. ²⁸ Jezi di li: Ou byen reponn. Si ou fè sa,

wa gen lavi. ²⁹ Men, dirèktè lalwa a te vle bay tèt li rezon, kifè li mande Jezi: Ki moun ki frè parèy

mwen? ³⁰ Jezi reponn li konsa: Vwala, yon nonm t'ap desann soti Jerizalèm, li tapral Jeriko. Kèk

ansasen atake l', yo vòlò ata rad ki te sou li, yo bat li byen bat, yo kite li twaka (3/4) mò. ³¹ Lè sa a, yon prèt vin ap desann sou menm wout la, li wè nonm lan, men li janbe lòt bò wout la, li al fè

wout li. ³² Konsa tou, yon moun Levi vin ap pase menm kote a, li rive toupre, li wè nonm lan, men

li janbe lòt bò wout la, li al fè wout li. ³³ Men, yon moun peyi Samari ki t'ap vwayaje sou menm

wout la rive bò kote nonm lan; kè l' fè l' mal lè li wè nonm lan. ³⁴ Li pwoche kote l', li vide lwil ak diven sou blese l' yo, li panse yo. Apre sa, li mete nonm lan sou bèt li te moute a. Li mennen l'

nan yon lotèl kote li pran swen li. ³⁵ Nan denmen, li rale kòb nan pòch li, li bay mèt lotèl la, epi li di li: Okipe nonm sa a pou mwen. Lè m' tounen isit la ankò m'a renmèt ou tout depans ou va fè

anplis pou li. ³⁶ Apre sa, Jezi di nonm lan: Dapre ou, nan twa moun sa yo, kilès ki te moutre li se

frè parèy nonm ki te tonbe nan men ansasen yo? ³⁷ Dirèktè lalwa a reponn: Nonm ki te gen pitye

pou li a. Jezi di li: Ale, fè menm bagay la tou. ³⁸ ¶ Jezi al fè wout li ansanm ak disip li yo. Li antre

nan yon ti bouk kote yon fanm yo rele Mat resevwa l' lakay li. ³⁹ Mat sa a te gen yon sè yo rele

Mari. Mari te chita nan pye mèt la, li t'ap koute pawòl li yo. ⁴⁰ Mat menm t'ap fatigue kò l' ak tout

travay ki te pou fèt nan kay la. Lè sa a, li vini, li di: Mèt, sa pa fè ou anyen pou ou wè sè m' lan kite m' ap fè tout travay la pou kont mwen? Manyè di l' ede m' non. ⁴¹ Jezi reponn li: Mat, Mat. W'ap trakase tèt ou, w'ap bat kò ou pou yon bann bagay. ⁴² Men, se yon sèl bagay ki nesèsè. Se li Mari chwazi, yo p'ap janm wete l' nan men li.

Chapter 11

¹ ¶ Yon lè, Jezi t'ap lapriyè yon kote. Lè l' fin lapriyè, yonn nan disip li yo di li: Mèt, moutre nou lapriyè tankou Jan te moutre patizan li yo. ² Jezi di yo: Lè n'ap lapriyè, men sa pou n' di: Papa, nou mande pou non ou toujou respekte. vin tabli gouvènman ou lan. ³ Chak jou, ban nou manje nou bezwen pou jounen an. ⁴ Padonnen peche nou yo, paske nou menm tou nou padonnen tout moun ki fè nou mal. Pa kite nou nan pozisyon pou n' tonbe nan tantasyon. ⁵ Jezi di yo ankò: Sipoze yonn nan nou ta gen yon zanmi, li al jwenn zanmi an nan mitan lannwit pou l' di li: Zanmi, prete m' twa biswit. ⁶ Mwen gen yon zanmi ki sot nan vwayaj ki fèk rive lakay mwen. Mwen pa gen anyen pou m' ba li. ⁷ Sipoze nonm lan rete anndan lakay li, li reponn li: Kite m' an repo! Pòt la gen tan fèmen akle, ni mwen ni timoun yo, nou tout kouche deja. Mwen pa kapab leve pou m' ba ou ⁸ biswit yo. M'ap di nou sa: Menm si li pa ta leve pou l' ba li biswit yo paske li se zanmi l', li gen pou l' leve pou l' ba li tou sa li bezwen, si zanmi an pa wont kontinye mande li. ⁹ Mwen menm mwen di nou: Mande, y'a ban nou, chache n'a jwenn, frape y'a louvri pou nou. ¹⁰ Paske, nenpòt moun ki mande, la resevwa; moun ki chache, la jwenn; y'a louvri pou moun k'ap frape. ¹¹ Eske yonn nan nou ki papa pitit ta bay pitit li yon koulèv si pitit la mande l' yon pwason? ¹² Osinon, èske la ba li yon èskòpyon si li mande l' yon ze? ¹³ Si nou menm ki mechan jan nou mechan an, nou konn bay pitit nou bon bagay, se pa Papa nou ki nan syèl la ki pou ta refize ban nou Sentespri l', lè nou mande l' li. ¹⁴ ¶ Jezi t'ap chase yon move lespri ki te rann yon nonm bèbè. Lè move lespri a soti, bèbè a pale. Foul moun yo menm te rete men nan bouch. ¹⁵ Men, gen kèk moun ki t'ap di: Se Bèlzeboul, chèf move lespri yo, ki ba l' pouvwa chase move lespri yo. ¹⁶ Gen lòt ki te vle pran l' nan pèlen: yo mande l' pou l' fè yon mirak ki pou moutre se Bondye ki ba l' pouvwa sa a. ¹⁷ Jezi menm te konnen sak te nan lide yo. Li di yo konsa: Yon peyi ki gen divizyon ladan l', kote moun

18 ap goumen yonn ak lòt, peyi sa a la pou disparèt; menm kay yo gen pou tonbe yonn sou lòt. Konsa
 tou, si Satan ap konbat pwòp tèt li, pouvwa Satan an pa la pou lontan. Nou di se Bèlzeboul ki ban
 19 m' pouvwa chase move lespri yo. Si mwen menm mwen chase move lespri ak pouvwa Bèlzeboul,
 patizan nou yo, ak ki pouvwa yo chase move lespri yo? Se poutèt sa se yo menm k'ap ban nou tò.
 20 Non. Se avèk pouvwa Bondye mwen chase move lespri yo; sa vle di: Pouvwa gouvènman Bondye
 21 ki Wa a gen tan rive sou nou. Lè yon nonm vanyan ap veye kay li, zam li nan men l', tout byen
 l' yo byen pwoteje. 22 Men, si yon pi vanyan pase l' vin rive, l'ap bat li, l'ap wete zam ki te ba l' fòs
 yo nan men l', l'ap piye tou sa l' te genyen an l'ap separe ak lòt. 23 Moun ki pa avèk mwen, se kont
 mwen yo ye; moun ki p'ap ede m' ranmase, se gaye y'ap gaye. 24 Lè yon move lespri soti nan yon
 nonm, li al pwonmennen toupatou nan dezè, l'ap chache yon kote pou l' pran repo. Si l' pa jwenn,
 l'ap di nan kè li: m'ap tounen lakay mwen kote m' soti a. 25 Lè l' rive, li jwenn nonm lan tankou
 26 yon kay byen bale, byen ranje. Lè sa a, li al chache sèt lòt lespri ki pi move pase li; yo antre nan
 kay la, yo enstale yo. Konsa, kondisyon nonm lan vin pi mal pase jan l' te ye anvan an. ¶ Pandan
 Jezi t'ap pale konsa, yon fanm pran pale byen fò nan mitan foul la, epi l' di: Fanm ki te pote ou nan
 27 vant li epi ki te ba ou tete a, se yon fanm Bondye beni! Jezi reponn li: Moun ki koute pawòl
 28 Bondye epi ki mete l' an pratik, se yo menm Bondye beni. ¶ Anpil moun t'ap vin an kantite bò
 kot Jezi. Li pran di yo: Ala move moun se moun alèkile yo! Y'ap mande yon mirak ki pou fè yo
 29 wè Bondye dakò ak sa k'ap fèt la. Men, yo p'ap jwenn lòt mirak pase mirak Jonas la. Menm jan
 30 Jonas te yon avètisman pou moun lavil Niniv yo, se konsa tou Moun Bondye voye nan lachè a va
 31 yon avètisman pou moun alèkile yo. Jou jijman an, larenn peyi ki nan sid la va leve kanpe, la
 fè yo kondannen moun alèkile yo. Paske, li te soti byen lwen, jouk nan dènye bout latè, pou l' te
 vin tande pawòl bon konprann wa Salomon yo. Men isit la, gen bagay ki pi konsekan pase wa
 32 Salomon. Jou jijman an tou, moun lavil Niniv va leve kanpe y'a fè yo kondannen moun alèkile
 yo. Paske yo menm, yo te tounen vin jwenn Bondye, lè Jonas te fè yo konnen mesaj la. Men isit
 33 la, gen bagay ki pi konsekan pase Jonas. Pa gen moun ki pou kache yon lanp nan yon kwen
 osinon ki pou mete l' anba yon mamit lè l' fin limen li. Okontrè, l'ap mete l' sou yon etajè pou tout
 34 moun k'ap antre ka wè limyè a. Je ou se tankou yon lanp yo ye pou kò ou. Si je ou an bon eta,
 tout kò ou nan limyè. Men, si je ou an move eta, tout kò ou nan fènwa. 35 Fè sèten pou limyè ki
 36 anndan ou lan pa fènwa. Paske si tout kò ou nan limyè san yon sèl pati ladan l' pa nan fènwa,

la klere nèt tankou lè yon lanp klere ou ak bèl limyè li. ³⁷ ¶ Lè Jezi fin pale, yon farizyen envite l'
 vin manje lakay li. Jezi antre, li al chita bò tab la. ³⁸ Farizyen an te sezi lè l' wè Jezi pa t' lave men
 l' anvan l' manje. ³⁹ Men, Jezi di li: Nou menm farizyen, se konsa nou ye. Nou netwaye tout deyò
 gode a ak deyò plat la, men anndan kè nou se lide vòlò ak mechanste ase ki genyen. ⁴⁰ Bann egare!
 Bondye ki fè deyò a, se li menm ki fè anndan an tou. ⁴¹ Pito nou bay pòv tou sa ki nan gode nou
 yo ak nan plat nou yo. Lè sa a, anyen nan tou sa nou genyen p'ap mete nou nan kondisyon pou nou
 pa ka sèvi Bondye. ⁴² Malè pou nou, farizyen! Nou bay Bondye ladim nan donn ti pye mant, pye
 sitwon ak pye legim. Men, nou pa fè sa ki dwat devan Bondye, nou pa renmen Bondye. Okontrè,
 se sa pou n' te fè san nou pa bliye fè lòt bagay yo tou. ⁴³ Malè pou nou, farizyen! Nan sinagòg yo,
 nou renmen chita kote pou tout moun wè nou, nou renmen pou moun bese jouk atè pou di nou
 bonjou sou plas piblik. ⁴⁴ Malè pou nou! Paske, nou tankou tonm ki ra tè: moun ap mache sou yo
 san yo pa konnen. ⁴⁵ Yonn nan dirèktè lalwa yo pran lapawòl, li di Jezi konsa: Mèt, lè ou pale
 konsa, ou joure nou tou wi. ⁴⁶ Epi Jezi reponn li: Malè pou nou tou, nou menm dirèktè lalwa yo!
 N'ap chaje moun ak chay ki twò lou pou pote. Men nou menm, nou pa menm manyen l' ak ti dwèt
 nou. ⁴⁷ Malè pou nou! N'ap bati bèl tonm pou pwofèt zansèt nou yo te touye. ⁴⁸ Lè nou fè sa, nou
 admèt zansèt nou yo te byen fèt; nou dakò ak yo: yo menm yo te touye pwofèt yo, nou menm n'ap
 bati tonm pou yo. ⁴⁹ Se poutèt sa Bondye te di nan bon konprann li: M'ap voye pwofèt avèk apòt
 ba yo; y'a touye kèk ladan yo, y'a pèsekite lòt yo. ⁵⁰ Se konsa moun alèkile yo ap reskonsab pou
 san tout pwofèt ki te koule depi lè Bondye te fin kreye latè; ⁵¹ wi, depi san Abèl jouk san Zakari
 yo te touye ant lotèl la ak kote ki rezève apa pou Bondye nan tanp lan. Wi. Se mwen k'ap di nou
 sa: Y'a mande moun alèkile yo kont pou tout krim sa yo. ⁵² Malè pou nou, nou menm direktè lalwa
 yo! Nou pran kle ki pou louvri pòt kay konesans la: nou menm nou pa antre ladann, epi moun ki
 ta vle antre, nou anpeche yo antre. ⁵³ Lè Jezi kite kote l' te ye a, dirèktè lalwa yo ak farizyen yo
 kòmanse atake l' avèk fòs; yo t'ap poze l' keksyon sou anpil bagay. ⁵⁴ Yo t'ap pare pèlen pou li pou
 pran kèk pawòl nan bouch li.

Chapter 12

¹ ¶ Lè sa a, se pa ti kras moun ki te sanble; te sitèlman gen moun, yonn t'ap pile lòt. Jezi pran
 di disip li yo: Veye kò nou ak ledven farizyen yo, ak ti jan ipokrit yo a. ² Pa gen anyen ki kache ki
 p'ap dekouvri yon lè, nanpwen sekrè ki p'ap devwale. ³ Se poutèt sa, tou sa n'a di nan fènwa, y'a
 tandè l' gwo lajounen; tout sa n'a di moun nan zòrèy anndan chanm, y'a mache di l' nan tout kalfou.
⁴ Nou menm ki zanmi m', m'ap di nou sa. Nou pa bezwen pè moun ki touye kò men ki pa kapab fè
 anyen plis pase sa. ⁵ M'ap moutre nou moun pou nou pè a: Se Bondye pou nou pè. Lè Bondye fin
 touye, li gen pouvwa pou l' jete nan lanfè apre sa. Wi, mwen di nou se li menm pou nou pè. ⁶ Eske
 ti zwezo pa vann senk pou dis kòb? Men, Bondye pa bliye yon sèl ladan yo. ⁷ Menm cheve nan tèt
 nou, yo tout konte. Se sak fè, nou pa bezwen pè menm: nou vo pi plis pase anpil ti zwezo. ⁸ M'ap
 di nou sa: Moun ki va kanpe pou mwen devan lèzòm, mwen menm, Moun Bondye voye nan lachè
 a, m'a fè menm bagay la pou li devan zanj Bondye yo. ⁹ Men, moun ki va di devan lèzòm li pa
 konnen m', mwen menm, Moun Bondye voye nan lachè a, m'a kanpe devan zanj Bondye yo tou
 m'a di mwen pa konnen l'. ¹⁰ Tout moun ki pale mal sou Moun Bondye voye nan lachè a, y'a
 padonnen yo. Men, moun ki pale mal sou Sentespri a yo p'ap padonnen yo sa. ¹¹ Lè y'a mennen
 nou pou yo jije nou nan sinagòg, osinon devan chèf ou ankò devan lòt otorite, pa bat tèt nou pou
 n' chache konnen ki jan nou pral fè defans nou, ni kisa pou n' di. ¹² Paske, Sentespri a va moutre
 nou sa pou nou di lè sa a. ¹³ ¶ Yon moun rete nan mitan foul la, li di Jezi konsa: Mèt, di frè m' lan
 pou l' separe eritaj papa nou an avèk mwen. ¹⁴ Jezi reponn li: Zanmi mwen, ki moun ki mete m'
 pou jije afè nou osinon pou fè pataj pou nou? ¹⁵ Apre sa, li di yo tout: Fè atansyon. Veye kò nou
 pou lajan pa pran tèt nou. Paske, se pa anpil byen ki garanti lavi yon nonm, li te mèt rich kont kò
 li. ¹⁶ Li di yo parabol sa a tou: Vwala, se te yon nonm rich ki te gen yon tè ki te rapòte l' anpil.
¹⁷ Li t'ap di nan kè li: Kisa pou m' fè? Mwen pa gen plas pou m' sere rekòt mwen yo. ¹⁸ Apre sa
 li di: Bon. Men sa m'ap fè; m'ap kraze depo m' yo, m'ap bati lòt pi gwo pou m' mete tout rekòt
 mwen yo ak tout lòt byen mwen yo. ¹⁹ Apre sa, m'a di tèt mwen: Monchè, ou gen anpil byen an
 depò pou plizyè lanne. Pa fatigue kò ou ankò. Manje, bwè, pran plezi ou. ²⁰ Men, Bondye di li:
 Egare! Aswè a menm yo pral mande ou nanm ou. Tou sa ou te sere yo, pou ki moun y'a ye? ²¹ Jezi
 di yo ankò: Se konsa sa ye tou pou moun k'ap ranmase byen pou tèt pa l' men ki pa rich devan
 Bondye. ²² ¶ Apre sa, Jezi di disip li yo: Se poutèt sa mwen di nou: Pa bat kò nou pou manje nou

bezwen pou nou viv, ni pou rad nou bezwen pou mete sou nou. ²³ Lavi pi konsekan pase manje,
 kò pi konsekan pase rad. ²⁴ Gade zwezo yo rele kònèy la: yo pa plante, yo pa fè rekòt; yo pa gen
 ni depo ni galata. Men, Bondye ba yo manje. Nou menm nou vo pi plis pase zwezo yo, pa vre?
²⁵ Kilès nan nou ki ka mete kek lanne an plis sou lavi l' afòs li fè tèt li travay? ²⁶ Si nou pa ka fè
 bagay ki pi piti a, poukisa pou n'ap bat tèt nou pou lòt bagay yo? ²⁷ Gade ki jan flè raje yo pouse:
 yo pa travay, yo pa fè rad. Men, m'ap di nou sa: Wa Salomon ki wa Salomon, ak tout richès li yo,
 li pa t' gen bèl rad tankou yonn nan flè sa yo. ²⁸ Se konsa Bondye abiye pye zèb yo tou: jòdi a yo
 la, men denmen yo jete sa nan dife pou chofo fou. Se sak fè, se pa nou menm li pa ta abiye. Ala
 moun manke konfyans nan Bondye! ²⁹ Pa bay kò nou traka pou n' toujou ap chache sa pou n' manje
 ak sa pou n' bwè. ³⁰ Tout bagay sa yo, se moun lòt nasyon sou latè yo k'ap chache yo tout tan san
 rete. Men nou menm, nou gen yon Papa ki konnen nou bezwen tout bagay sa yo. ³¹ Pito nou chache
 bay bagay peyi kote Bondye Wa a premye plas nan lavi nou, konsa Bondye va ban nou tou sa nou
 bezwen. ³² Nou pa bezwen pè, nou menm ti bann mouton yo, paske se tout plezi papa nou pou l'
 ban nou peyi kote Bondye Wa a. ³³ Vann tou sa nou genyen, separe lajan an bay pòv. Chache yon
 bous ki p'ap chire. Sere lajan nou nan syèl kote li p'ap janm fini. Paske la, vòlò p'ap ka jwenn li,
 poubwa p'ap kapab manje li. ³⁴ Kote richès ou ye, se la kè ou ye tou. ³⁵ Se pou nou toujou pare
 ak ponyèt nou tou twouse, lanp nou tou limen, ³⁶ tankou domestik k'ap tann mèt yo tounen sot nan
 nòs. Kou l' rive, li frape, yo louvri pòt pou li. ³⁷ L'ap bon nèt pou domestik sa yo lè mèt la p'ap
 jwenn yo ap dòmi! Sa m'ap di nou la a, se vre wi. Mèt la va twouse ponyèt li, l'ap fè domestik yo
 chita sou tab, la vin sèvi yo. ³⁸ Wi, l'ap bon nèt pou domestik sa yo, si l' jwenn yo p'ap dòmi, kit
 li tounen vè menwit osinon menm pita toujou. ³⁹ Se yon bagay nou tout nou dwe konnen: Si mèt
 kay la te konn kilè vòlò ap vini, li ta veye, li pa ta kite l' kase kay la. ⁴⁰ Nou menm tou, se pou n'
 toujou pare, paske Moun Bondye voye nan lachè a va vini lè nou pa ta kwè! ¶ ⁴¹ Lè sa a Pyè di li:
⁴² Mèt, parabòl sa a, se pou nou menm sèlman osinon pou tout moun ou di li? Jezi reponn li: Ki
 moun ki ka di li se yon jeran ki fè tout travay li byen, epi ki konn kenbe tèt li anplas? Se moun sa
 a mèt kay la va mete pou veye sou tout moun nan kay la, pou bay lòt domestik yo manje lè pou yo
 manje. ⁴³ Se va bèl bagay pou domestik sa a, si mèt la jwenn li ap fè travay li lè l' tounen lakay la.
⁴⁴ Sa m'ap di nou la a, se vre wi: mèt la va mete l' reskonsab tout byen l' yo. ⁴⁵ Men, si domestik
 sa a te di nan kè l': Mèt mwen ap fè reta. Li poko ap vini. Epi, li tonbe bat lòt sèvitè yo, fi kou gason,

⁴⁶
 li rete ap plede manje, bwè jouk li sou; mèt domestik sa a va rive jou l' pa t'ap tann, yon lè li p'ap konnen. L'ap rachonnen l' anba kou, l'ap aji avè l' menm jan yo aji ak moun ki pa fè travay yo.

⁴⁷
 Yon domestik ki konnen sa mèt li vle, men ki pa janm pare epi ki pa fè sa mèt la vle, domestik

⁴⁸
 sa a anba kou. Men, yon domestik ki pa konn sa mèt li vle, lèfini k'ap fè bagay ki merite pou yo bat li, y'ap bay domestik sa a de twa kou sèlman. Moun yo bay anpil, y'ap mande l' anpil tou. Moun

⁴⁹
 yo mete reskonsab anpil bagay, y'ap egzije plis ankò nan men li. Mwen vini jete yon dife sou

⁵⁰
 latè. Mwen ta renmen wè dife sa a limen deja! Mwen gen yon batèm pou m' resevwa. Men,

⁵¹
 mwen twouve l' pran anpil tan pou l' rive. Nou kwè mwen vin mete lapè sou latè. Mwen di nou:

⁵²
 Non, mwen vin mete divizyon. Depi koulye a, yon fanmi ki gen senk moun va divize, twa kont

⁵³
 de, de kont twa. Papa va leve kont pitit gason, pitit gason va leve kont papa, manman va leve

⁵⁴
 kont pitit fi, pitit fi va leve kont manman, bèlmè va leve kont bèlfi, bèlfi va leve kont bèlmè. ¶
 Jezi t'ap di fowl moun yo tou: Lè nou wè yon nwaj ap leve bò kote solèy kouche a, lamenn nou di:

⁵⁵
 Li pral fe lapli. Epi se sak rive vre. Lè nou wè van an soufle soti nan sid, nou di: Li pral fè cho.

⁵⁶
 E se sak rive vre. Ipokrit, nou konn ki sans pou nou bay bagay k'ap pase sou tè a ak nan syèl la,

⁵⁷
 poukisa atò nou pa konn ki sans pou nou bay bagay k'ap pase koulye a nan tan sa a? Poukisa

⁵⁸
 nou pa chache konprann pou tèt pa nou sa nou dwe fè ki dwat? Si yon moun pote plent lajistis pou ou, si nou tou de nou pral nan tribinal ansanm, pito n' chache antann nou pandan nou nan chemen. Si se pa sa, l'ap trennen ou devan jij la, jij la ap lage ou nan men lapolis, lapolis ap mete

⁵⁹
 ou nan prizon. M'ap di ou sa: ou p'ap soti nan prizon an tout tan ou pa peye dènnye lajan ou dwe a.

Chapter 13

¹
 ¶ Lè sa a, yo vin rakonte Jezi ki jan, pandan yon sèvis yo t'ap fè, Pilat te fè touye kèk moun

²
 peyi Galile a, epi li fè melanje san yo ak san bèt yo t'ap ofri bay Bondye. Jezi reponn yo: Gen lè nou kwè se paske moun sa yo te fè pi gwo peche pase lòt moun Galile yo kifè yo te masakre yo

³
 konsa? Mwen di nou: Non. Men, si nou menm nou pa tounen vin jwenn Bondye, nou tout n'ap

⁴
 peri menm jan an tou. Dizwit moun ki te mouri kraze lè gwo kay Siloe a te tonbe sou yo a, gen

lè nou kwè yo te pi koupab pase tout lòt moun nan lavil Jerizalèm yo? ⁵ Mwen di nou: Non. Men, si nou menm nou pa tounen vin jwenn Bondye, nou tout n'ap peri menm jan an tou. ⁶ ¶ Apre sa, Jezi di yo parabol sa a: Yon nonm te gen yon pye fig frans plante nan jaden rezen li. Li vin chache fig frans ladan l', men li pa jwenn. ⁷ Lè sa a, li di jeran jaden an: Sa fè twazan depi m'ap vin chache fig nan pye fig frans sa a, mwen pa ka jwenn anyen. Koupe li non. Poukisa pou l' pran tout plas sa a nan tè a pou gremesi? ⁸ Men, jeran an reponn li: Mèt, kite l' fè lanne sa a ankò. Mwen pral fouye yon twou fè wonn nan pye l', m'ap mete fimye ladan li. ⁹ Konsa, li ka donner. Si l' pa donner, wa fè koupe l' lòt lanne. ¹⁰ ¶ Yon jou repo, Jezi t'ap moutre moun yo anpil bagay nan yon sinagòg. ¹¹ Te gen yon fanm nan sinagòg la ki te malad. Depi dizwitan li te gen yon move lespri sou li ki te fè l' rete kokobe; li pa t' kapab kanpe dwat menm. ¹² Lè Jezi wè l', li rele l', li di li: Mafi, ou delivre anba enfimite ou la tandè. ¹³ Jezi lonje men l' sou li. Latou fanm lan kanpe dwat, li pran fè lwanj Bondye. ¹⁴ Men, chèf sinagòg la pa t' kontan menm paske Jezi te fè gerizon an yon jou repo. Li pran lapawòl, li di foul la: Nou gen sis jou pou nou travay, vin fè yo geri nou jou sa yo. Pa vini jou repo a. ¹⁵ Jezi reponn li: Ala ou ipokrit! Jou repo a, nou tout nou lage bèf nou ak bourik nou nan kay kote nou gade yo a, nou mennen yo al bwè dlo, pa vre? ¹⁶ Bon, fanm sa a, moun ras Abraram, ki gen dizwitan depi Satan mare l' anba yon maladi, mwen pa t' dwe delivre l' yon jou repo? ¹⁷ Repons Jezi te ba yo a te fè tout moun ki pa t' vle wè l' yo wont. Men, tout moun nan foul la te kontan pou tout bèl mèvèy li t'ap fè yo. ¹⁸ ¶ Jezi di yo: Ak ki bagay peyi kote Bondye Wa a sanble? ¹⁹ Kisa m' ta di l' sanble ankò? Li tankou yon ti grenn moutad yon nonm pran pou li al simen nan jaden li. Li pouse, li vin yon pyebwa. Se konsa zwezo nan syèl la fè nich nan branch li yo. ²⁰ Jezi di yo ankò: Ak kisa pou m' konpare peyi kote Bondye Wa a? ²¹ Li tankou ledven yon fanm pran li mete nan twa mezi farin pou fè tout pa t' la leve. ²² Jezi t'ap moute lavil Jerizalèm, li t'ap pase nan anpil lavil ak anpil bouk. Sou tout wout la, li t'ap moutre moun yo anpil bagay. ²³ ¶ Yon moun mande li: Mèt, èske se de twa moun sèlman k'ap sove? Li reponn yo: ²⁴ Fè jefò pou n' antre nan pòt jis la; paske, m'ap di nou sa, anpil moun va seye antre, yo p'ap kapab. ²⁵ Mèt kay la gen pou l' leve fèmèn pòt la; lè sa a, nou menm n'a deyò. N'a kòmanse frape nan pòt la; n'a di: Mèt, Mèt, louvri pou nou! La reponn nou: Mwen pa konnen ki bò nou soti. ²⁶ Lè sa a n'a di: Nou te manje,

²⁷
 nou te bwè ansanm avè ou, ou te moutre nou anpil bagay nan tout lari lakay nou. Men, la reponn nou: Mwen di nou, mwen pa konnen ki bò nou soti. Wete kò nou sou mwen, nou tout k'ap fè sa ki mal.

²⁸
 Lè n'a wè Abraram, Izarak, Jakòb ak tout pwofèt yo nan bèl peyi kote Bondye Wa a, epi nou menm nou deyò, se lè sa a va gen rèl, se lè sa a moun va manje dan yo.

²⁹
 Moun va soti nan peyi solèy leve ak nan peyi solèy kouche, y'a soti nan nò ak nan sid, y'a chita sou tab nan bèl peyi kote Bondye Wa a.

³⁰
 Lè sa a, nan moun ki dèyè nèt koulye a, genyen k'ap pase devan. Nan moun ki devan koulye a, genyen k'ap rete dèyè.

³¹
 ¶ Menm lè sa a, kèk farizyen pwoche bò kot Jezi, yo di li: Pa rete isit la, ale yon lòt kote, paske Ewòd vle touye ou.

³²
 Li reponn yo: Ale di chat mawon an: m'ap chase move lespri yo, m'ap geri moun malad jòdi a ak denmen, nan twa jou m'ap fin travay mwen.

³³
 Men, fòk mwen kontinye mache jòdi a, denmen ak apre denmen tou, paske sa pa bon pou yo touye yon pwofèt lòt kote pase nan lavil Jerizalèm.

³⁴
 Jerizalèm, Jerizalèm, ou menm k'ap touye pwofèt yo, k'ap touye moun Bondye voye ba ou yo ak kout wòch, depi lontan mwen te vle sanble moun ou yo tankou yon manman poul sanble ti pitit li yo anba zèl li, men ou pa t' vle!

³⁵
 Enben, kay ou yo va rete san moun. M'ap di ou sa: nou p'ap wè m' ankò, jouk lè a va rive pou nou di: benediksyon pou moun ki vini nan non Mèt la.

Chapter 14

¹
 ¶ Yon jou repo, Jezi te al lakay yonn nan chèf farizyen yo pou l' manje. Moun ki te la yo t'ap veye li.

²
 Yon nonm ki te gen maladi anfle te la devan Jezi.

³
 Jezi pran lapawòl, li mande dirèkte lalwa ak farizyen yo: Eske lalwa pèmèt moun fè gerizon jou repo a, wi ou non?

⁴
 Yo pa reponn li. Lè sa a, Jezi pran nonm malad la, li geri l', epi li voye l' ale.

⁵
 Apre sa, li di yo: Si yonn nan nou gen yon pitit gason l' osinon yon bèf li ki tonbe nan yon pi yon jou repo, èske li p'ap wete l' menm lè a?

⁶
 Yo pa t' kapab reponn li anyen sou sa.

⁷
 ¶ Jezi te wè ki jan moun yo te envite yo t'ap chwazi pi bon plas. Li rakonte parabol sa a pou yo tout, li di:

⁸
 Lè yo envite ou nan yon nòs, pa al chita nan pi bon plas la. Paske, si nan envite yo gen yon moun ki pi enpòtan pase ou,

⁹
 moun ki envite nou toulède a kapab vin di ou: Bay moun sa a plas la. Lè sa a, wa wont, wa blije al chita nan plas

¹⁰
 dèyè. Men, lè yo envite ou, mete kò ou dèyè; konsa, lè moun ki envite ou la vini, la ka di ou: Zanmi mwen, pase pi devan nan yon pi bon plas. Lè sa a, se va yon lwanj pou ou devan tout moun

ki chita bò tab la ansanm ak ou yo. ¹¹ Se konsa, moun ki vle leve tèt li, y'a desann li, moun ki
 desann tèt li, y'a leve li. ¹² Jezi pale ak moun ki te envite l' la. Li di li: Lè w'ap fè yon fèt, piti ou
 gwo, pa envite ni zanmi ou, ni frè ou, ni fanmi ou, ni vwazen ou yo ki rich. Paske, yon lè y'a envite
 ou tou. Konsa, se tankou si yo ta renmèt ou sa ou te fè a. ¹³ Men, lè w'ap fè yon fèt, envite pòv yo,
 enfim yo, moun k'ap bwete, moun avèg yo. ¹⁴ Konsa, se va yon benediksyon, paske yo p'ap kapab
 rann ou laparèy. Se Bondye ki va renmèt ou sa lè tout moun ki fè byen yo va leve soti vivan nan
 lanmò. ¹⁵ ¶ Lè l' tande pawòl sa yo, yonn nan moun ki te chita bò tab la di Jezi konsa: Se va yon
 gwo benediksyon pou moun ki va chita bò tab pou manje nan peyi kote Bondye Wa a. ¹⁶ Jezi
 reponn li: Vwala, se te yon nonm ki te fè yon gwo fèt, li te envite anpil moun. ¹⁷ Lè pou fèt la
 kòmanse, li voye domestik li di envite yo: Vini non, tout bagay fin pare koulye a. ¹⁸ Men, tout
 envite yo, yonn apre lòt, pran fè eskiz. Premye a di li: Mwen fèk achte yon tè, fòk m' al wè li.
¹⁹ Tanpri, eskize mwen. Yon lòt di li: Mwen fèk achte senk pè bèf; mwen pral seye yo. Tanpri,
²⁰ eskize mwen. Yon lòt di: Mwen fèk sot marye, se poutèt sa mwen pa ka ale. ²¹ Domestik la
 tounen, li rapòte tout repons sa yo bay mèl li. Lè sa a, mèl kay la vin ankòlè; li di domestik la: Ale
 vit sou tout plas yo ak nan tout lari, mennen tout pòv yo vin isit, tout enfim yo, tout moun avèg ak
²² moun k'ap bwete yo. Apre sa, domestik la di: Mèt, nou fè tou sa ou te mande nou fè, men gen
²³ plas toujou. Mèt la di domestik la: Ale nan gran chemen ak nan tout ti wout. Mezi moun wa
²⁴ jwenn, fè yo antre pou kay mwen an ka plen. Paske, m'ap di nou sa: Nan moun mwen te envite
²⁵ yo, pa gen yon sèl ladan yo k'ap goute nan manje m' lan. ¶ Lè sa a, te gen anpil anpil moun ki
²⁶ t'ap fè wout ansanm ak Jezi. Li vire, li di yo: Yon moun ki vin jwenn mwen, si li pa rayi papa
²⁷ l', manman l', pitit li, frè l', sè l', menm pwòp tèt pa l', li pa kapab disip mwen. Moun ki pa pote
²⁸ kwa l' epi ki pa swiv mwen, li pa kapab disip mwen non plis. Si yonn nan nou vle fè yon gwo
 batisman, premye bagay pou l' fè: se pou l' chita pou l' kalkile konbe sa pral koute l' pou l' wè si li
²⁹ gen kont lajan pou l' fin fè travay la. Si l' pa fè sa, l'ap fin poze fondasyon an, epi l' p'ap ka fini
³⁰ batisman an. Lè sa a, tout moun ki va wè sa va pran pase l' nan betiz. Y'a di: Nonm lan kòmanse
³¹ bati, men li pa kapab fini. Konsa tou, si yon wa vle fè lagè ak yon lòt wa, premye bagay pou l'
 fè: l'ap chita pou l' egzaminen bagay la byen, pou l' wè si, avèk dimil (10.000) òm, li kapab mache
³² kontre lòt wa a k'ap mache sou li ak venmil (20.000) òm. Si li pa kapab, antan lòt wa a lwen

toujou, l'ap voye kèk mesaje bò kote l' pou mande l' fè aranjman. ³³ Jezi di yo ankò: Konsa tou, nou yonn la a pa kab disip mwen, si l' pa detache kè l' sou tou sa l' genyen. ³⁴ Sèl, se yon bon bagay; men si sèl la pèdi gou l', ak kisa pou n' fè l' sale ankò? ³⁵ Lè sa a, sèl la pa bon pou mete ni nan jaden ni nan fimye, se jete pou yo voye sa jete. Si nou gen zòrèy pou n' tande, tande.

Chapter 15

¹ ¶ Tout pèseptè kontribisyon yo ak moun k'ap fè sa ki mal yo t'ap pwoche bò kot Jezi pou tande sa l' t'ap di. ² Farizyen yo ak dirèktè lalwa yo t'ap babye. Yo t'ap di: Nonm sa a ap resevwa moun k'ap fè sa ki mal, epi l'ap manje ak yo. ³ Lè sa a, Jezi di yo parabòl sa a: ⁴ Sipoze yonn nan nou gen san (100) mouton. Si l' pèdi yonn ladan yo, èske li p'ap kite katrevendisnèf lòt mouton yo nan dezè a, pou li al dèyè sak pèdi a? L'ap chache l' jouk li jwenn li. ⁵ Lè l' jwenn li, l'ap mete l' sou zepòl li ak kè kontan. ⁶ Lè l' tounen lakay li avè l', l'ap rele tout zanmi l' ak tout vwazen l' yo, l'ap di yo: vin fè fèt avè m', mwen jwenn mouton m' ki te pèdi a. ⁷ Konsa tou, m'ap di nou, va gen plis kontantman nan syèl la pou yon sèl moun ki t'ap fè sa ki mal epi ki tounen vin jwenn Bondye, pase pou katrevendisnèf moun k'ap mache dwat, ki pa bezwen tounen vin jwenn Bondye. ⁸ Osinon ankò, sipoze yon fanm ki gen dis pyès lajan. Si li pèdi yonn ladan yo, èske li p'ap limen lanp, bale tout kay la, chache nan tout ti kwen jouk li jwenn li? ⁹ Lè l' jwenn li, l'ap rele zanmi l' ak vwazen li yo, l'ap di yo: vin fè fèt avè m'; mwen jwenn pyès lajan m' ki te pèdi a. ¹⁰ Konsa tou, m'ap di nou sa, gen kontantman nan mitan zanj Bondye yo pou yon sèl moun ki t'ap viv nan peche epi ki tounen vin jwenn Bondye. ¹¹ ¶ Jezi di ankò: Vwala, se te yon nonm ki te gen de pitit gason. ¹² Pi piti a ¹³ di papa l': Papa, ban m' pa m' nan byen nou yo. Lè sa a, papa a separe byen l' yo bay tou de. ¹³ Kèk jou apre, ti gason an ranmase tout afè l', li pati, li ale nan yon peyi byen lwen. Antan li la, li lage ¹⁴ kò l' nan banbòch, li gaspiye tout lajan l'. ¹⁴ Lè msye fin depanse tout lajan l', yon gwo grangou tonbe sou peyi a. Lè sa a, li vin nan nesosite. ¹⁵ li al mande travay lakay yon abitan nan peyi a. Abitan an voye l' nan jaden l' al gade kochon. ¹⁶ Lè sa a, li ta byen renmen plen vant li ak sa kochon yo t'ap manje a, men pesonn pa t' ba li. ¹⁷ Se lè sa a atò li pran kalkile sou sitiyaasyon l'. Li di konsa: Gade kantite moun k'ap travay kay papa m' pou lajan! Yo jwenn manje depase sa yo ka manje. Epi

mwen menm, m'ap mouri grangou isit la. ¹⁸ M'ap leve, mwen pral tounen jwenn papa m', m'ap di
 li: Papa, mwen peche kont Bondye, mwen peche kont ou menm tou. ¹⁹ Mwen pa merite pou ou
 konsidere m' pou pitit ou ankò. Gade m' tankou yonn nan moun k'ap travay avè ou yo. ²⁰ Li leve
 vre, li pran chemen tounen kay papa li. Msye te byen lwen kay la toujou lè papa a wè li. Kè papa
 a fè l' mal, li kouri al rankontre l', li pase men l' nan kou pitit la epi li bo li. ²¹ Pitit la di li: Papa,
 mwen peche kont Bondye, mwen peche kont ou menm tou; mwen pa merite pou ou konsidere m'
 pou pitit ou ankò. ²² Men, papa a di domestik li yo: Ale vit. Pote pi bèl rad la, mete l' sou li pou
 mwen. Mete yon bag nan dwèt li, mete soulye nan pye li. ²³ Al chache jenn ti towò nou t'ap angrese
 a, touye l'. Ann fete, ann manje. ²⁴ Paske, pitit gason m' sa a te mouri, men li tounen vivan ankò;
 li te pèdi, koulye a mwen jwenn li. Epi, yo kòmanse fè fèt. ²⁵ Lè sa a, pi gran gason an te nan jaden.
 Antan l'ap soti nan jaden, lè l' rive pre kay la, li tande mizik la ak vwa moun k'ap danse yo. ²⁶ Li
 rele yonn nan domestik yo, li mande li: Sak genyen? ²⁷ Domestik la di li: Ti frè ou la tounen. Papa
 ou fè touye jenn ti towò nou t'ap angrese a, paske li jwenn msye an sante. ²⁸ Gran frè a fè kòlè, li
 derefize antre nan kay la. Papa a soti, li mande l' pou l' antre. ²⁹ Men, gran frè a reponn papa a:
 Gade tout tan mwen genyen depi m'ap sèvi ou; mwen pa janm derespekte lòd ou. Men, ou pa janm
 ban m' yon ti kabrit menm pou m' fè fèt ak zanmi m' yo. ³⁰ Men, lè pitit gason ou lan tounen, li
 menm ki fin gaspiye tout byen ou yo ak jennès, se pou li ou fè touye jenn towò nou t'ap angrese a.
³¹ Papa a di li: Pitit mwen, ou toujou la avè m'; tout sa m' genyen se pou ou. ³² Men, fòk kanmenm
 nou te fè fèt, nou pa t' ka pa kontan, paske frè ou la te mouri, men li tounen vivan, li te pèdi, mwen
 jwenn li koulye a.

Chapter 16

¹ ¶ Jezi di disip li yo: Vwala, se te yon nonm rich ki te gen yon jeran. Yo vin rapòte l' jan jeran
 an ap gaspiye tout byen l' yo. ² Li rele jeran an, li di li: Kisa m' tande y'ap di sou ou konsa? vin fè
 regleman travay ou avè m', paske mwen p'ap kite byen m' yo sou kont ou ankò. ³ Jeran an di nan
 kè l': Patwon an pral kase m' nan djòb sa a; kisa m' pral fè koulye a? Mwen pa gen fòs pou m' al
 travay latè. Epi se va yon wont pou m' al mande charite! ⁴ Bon, mwen konn sa m' pral fè pou lè m'

pèdi djòb mwen m'a toujou gen moun ki pou resevwa m' lakay yo. ⁵ Jeran an fè rele tout moun ki
 te dwe mèt la, li fè yo vini yonn apre lòt. Li di premye a: Konbe ou dwe mèt la? ⁶ Li reponn: Mwen
 dwe l' san (100) bidon lwil. Msye di l': Men papye ou la, chita, ekri senkant. Fè vit. ⁷ Apre sa, li
 di yon lòt; Ou menm, konbe ou dwe? Li reponn: San sak (100) mayi. Msye di l': Men papye ou la,
 ekri katreven. ⁸ Nonm rich la fè jeran visye a konpliman dapre li te aji ak ladrès sa a. Paske moun
 k'ap viv dapre prensip lemonn yo regle zafè yo pi byen pase moun ki gen limyè a. ⁹ Jezi di yo ankò:
 Nou menm, men sa m'ap di nou: Bat pou nou fè zanmi ak richès ki sou latè. Konsa, lè richès nou
 va fini, y'a resevwa nou nan kay Bondye ki la pou tout tan an. ¹⁰ Moun ki kenbe pawòl li nan tout
 ti bagay, la kenbe l' nan gwo bagay tou. Men, moun ki pa serye nan ti bagay, li p'ap serye nan gwo
 bagay non plis. ¹¹ Si ou pa sèvi byen ak richès ou gen sou latè, kilès ki va fè ou konfyans pou
 richès tout bon yo? ¹² Si ou pa t' sèvi byen avèk sa ki te pou lòt moun, ki moun ki va ba ou sak
 pou ou a? ¹³ Pesonn pa ka sèvi de mèt byen anmenmtan. Li gen pou l' rayi yonn si l' renmen lòt
 la. L'ap sèvi yonn byen, men l'ap meprize lòt la. Nou pa ka sèvi Bondye ak lajan anmenmtan.
¹⁴ Farizyen yo t'ap koute tout pawòl sa yo tou. Yo t'ap pase Jezi nan betiz paske yo te renmen lajan.
¹⁵ Lè sa a Jezi di yo: Nou menm, n'ap chache parèt pou pi bon devan moun, men Bondye konnen
 sa ki nan kè nou. Bagay moun bay plis enpòtans, se yo Bondye pa vle wè. ¹⁶ Kòmmandman Moyiz
 ak liv pwofèt yo te gen fòs lalwa jouk tan Jan Batis te rive. Men, depi lè sa a, se anonse y'ap anonse
 bon nouvèl peyi kote Bondye Wa a, se nan goumen pou moun antre ladan li. ¹⁷ Men, l'ap pi fasil
 pou syèl la ak tè a disparèt pase pou yon sèl ti detay nan lalwa a pèdi valè li. ¹⁸ Si yon nonm kite
 ak madanm li pou l' marye ak yon lòt, nonm sa a fè adiltè. Lè yon mari kite madanm li, si yon lòt
 nonm marye ak madanm lan, nonm sa a fè adiltè tou. ¹⁹ ¶ Vwala, se te yon nonm rich ki te konn
 abiye ak bèl twal wouj e blan ki te koute chè. Chak jou, se te gwo fèt banbòch lakay li. ²⁰ Te gen
 yon pòv yo rele Laza ki te kouche nan papòt nonm rich la. Laza te kouvri ak malenng. ²¹ Li te
 byen anvi plen vant li ak bagay ki t'ap soti tonbe anba tab nonm rich la. Sa ki pi rèd, chen t'ap vin
 niche malenng li yo tou. ²² Pòv la vin mouri, zanj Bondye yo pote l' mete bò kot Abraram nan syèl
 la. Nonm rich la mouri tou, yo antere li. ²³ Pandan l' te kote tout mò yo ye a nan mitan soufrans,
 li voye je l' byen lwen li wè Abraram ak Laza ansanm avèk li. ²⁴ Nonm rich la rele: Abraram papa,
 gen pitye pou mwen non! Voye Laza tranpe ti bout dwèt li nan yon ti tak dlò pou l' mete yon frechè

²⁵ sou lang mwen, paske se pa ti soufri m'ap soufri nan flann sa a. Abraram reponn li: Pitit mwen, chonje byen: ou te resevwa tout bon bagay pa ou yo pandan ou te sou latè. Lè sa a menm, Laza te
²⁶ nan tout mizè li. Koulye a, li jwenn konsolasyon bò isit la, ou menm w'ap soufri. Epitou, gen yon gwo twou ki separe nou avè ou, konsa pa gen mwayen pou moun sot isit la pou y' al jwenn ou,
²⁷ osinon pou moun ta soti kote ou ye a pou vin jwenn nou. Nonm rich la di li: Tanpri, Abraram
²⁸ papa, voye Laza kay papa mwen. Mwen gen senk frè. Mwen ta vle li al di yo jan bagay la ye
²⁹ pou yo pa vin isit nan touman sa a. Abraram reponn li: Yo gen Moyiz ak pwofèt yo pou avèti
³⁰ yo, se pou yo koute yo. Li di li: Non, papa Abraram, yo p'ap koute. Men, si yonn nan mò yo al
³¹ jwenn yo, y'a chanje lavi yo. Lè sa a, Abraram di li: Si yo pa koute Moyiz ak pwofèt yo, yo p'ap kite pesonn lòt fè yo wè verite a. Li ta mèt yon mò ki ta leve vivan ankò, yo p'ap koute li.

Chapter 17

¹ ¶ Jezi di disip li yo: Ap toujou gen bagay k'ap fèt ki pou fè moun fè peche. Men, malè pou moun ki lakòz bagay sa yo rive.
² Li ta pi bon pou li si yo ta mare yon gwo wòl moulen nan kou l' epi yo voye l' jete nan lanmè; wi, sa ta pi bon pou li pase pou l' ta lakòz yonn nan ti piti sa yo tonbe nan peche.
³ Veye kò nou byen. Si frè ou tonbe nan peche, rale zòrèy li. Si l' chanje konpòtman li, padonnen li.
⁴ Si nan yon sèl jounen an li peche sèt fwa kont ou, si toulesèt fwa yo, li tounen vin jwenn ou pou l' di ou: Mwen p'ap fè sa ankò, se pou ou padonnen li.
⁵ Apòt yo di Jezi: Fè nou gen plis konfyans non.
⁶ Jezi di yo: Si nou te gen konfyans nan Bondye gwosè yon ti grenn moutad, nou ta di pye sikomò sa a: Derasinen tèt ou sot la a, al plante tèt ou nan lanmè, li ta obeyi nou.
⁷ Sipoze yonn nan nou gen yon domestik k'ap travay tè l' osinon k'ap gade mouton pou li. Lè domestik la soti nan jaden, èske l'ap di li: Pwoche vit, vin chita bò tab la pou ou manje.
⁸ Non. Okontrè. L'ap di li: Pare manje pou mwen. Twouse ponyèt ou pou ou ka sèvi m' pandan m'ap manje,
⁹ pandan m'ap bwè. Se lè m' fin manje, ou menm wa manje, wa bwè. Li pa gen mèsè pou l' di domestik la paske domestik la fè sa l' te mande l' fè a, pa vre.
¹⁰ Se menm jan an tou pou nou, lè nou fin fè tou sa yo te mande nou fè, se pou n' di: Se domestik nou ye, nou fè sa n' te dwe fè.
¹¹ ¶ Pandan Jezi te nan chemen pou li al Jerizalèm, li t'ap pase sou fwontyè ki separe peyi Samari ak

¹² peyi Galile. Antan l' t'ap antre nan yon bouk, dis moun ki te gen maladi lalèp vin kontre li. Yo
¹³ rete kanpe byen lwen l', yo pale byen fò, yo di l' konsa: Jezi, Mèt, gen pitye pou nou. ¹⁴ Lè Jezi
¹⁵ wè yo, li di: Al fè prèt yo wè nou. Pandan yo taprale, yo geri. Yonn ladan yo ki wè li geri tounen
¹⁶ sou wout li, li t'ap fè lwanj Bondye byen fò pou tout moun tandè. Li lage kò l' atè nan pye Jezi,
¹⁷ li di l' mès. Nonm sa a te yon moun pèyi Samari. Jezi pran lapawòl, li di l': Nou toulèdis te geri
¹⁸ pa vre. Kote nèf lòt yo? Se etranje sa a sèlman ki chonje pou l' vin fè lwanj Bondye? ¹⁹ Epi li
²⁰ di li: Leve non. Ou mèt ale. Se konfyans ou nan Bondye ki geri ou. ¶ Farizyen yo mande Jezi
²¹ kilè Bondye t'ap vin tabli gouvènman l' lan. Li reponn yo: Bondye ap vin tabli gouvènman l' lan
²² yon jan pou tout moun wè li. Men, yo p'ap di: Men l' bò isit, osinon: Men l' bò laba. Paske,
²³ konnen sa byen, gouvènman Bondye a la nan mitan nou. Epi li di disip yo: Gen yon lè nou va
²⁴ anvè wè yonn nan jou ki pou Moun Bondye voye nan lachè a, men nou p'ap wè sa. Y'a di nou:
²⁵ Gade, men l' bò isit, osinon: Gade, men l' bò laba. Pa ale, pa kouri dèyè yo. Lè yon kout zèklè
²⁶ fè yan, li klere syèl la byen klere depi yon bout jouk nan lòt bout la, pa vre. Se va menm jan an tou
²⁷ pou Moun Bondye voye nan lachè a, lè jou l' va rive. Men, anvan sa, li gen pou l' soufri anpil,
²⁸ moun alèkile yo p'ap vle wè li. Sa ki te rive nan tan Noe a se sa k'ap rive tou lè jou a va rive pou
²⁹ Moun Bondye voye nan lachè a vini. Moun t'ap manje, yo t'ap bwè, moun t'ap marye, yo t'ap
³⁰ marye pitit fi yo; se konsa tout bagay te ye, jouk jou Noe te antre nan gwo batiman an. Lè inondasyon
³¹ an fèt, li touye yo tout. Sa ki te rive nan tan Lòt la va rive menm jan an tou. Moun t'ap manje,
³² yo t'ap bwè, yo t'ap achte, yo t'ap plante, yo t'ap bati. Men, jou Lòt soti kite lavil Sodòm lan,
³³ dife souf grennen sot nan syèl la tankou lapli, tonbe sou yo; yo tout peri. Se va menm jan an tou
³⁴ lè jou a va rive pou Moun Bondye voye nan lachè a parèt. Jou sa a, moun ki va sou tèt kay p'ap
³⁵ bezwen desann anndan kay la ale pran zafè li. Moun ki nan jaden p'ap bezwen tounen lakay ankò.
³⁶ Chonje istwa madanm Lòt la. Moun ki va chache sove lavi l' va pèdi l'; men moun ki va pèdi
³⁷ lavi l' va konsève li. M'ap di nou sa: Jou lannwit sa a, va gen de moun sou yon menm kabann;
³⁸ y'ap pran yonn, y'ap kite lòt la. Va gen de fanm k'ap pile grenn ansanm: y'ap pran yonn, y'ap
³⁹ kite lòt la. Va gen dezòm nan yon menm jaden; y'ap pran yonn, y'ap kite lòt la. Disip yo pran

lapawòl, yo mande l' konsa: Ki kote sa pral fèt, Mèt? Li reponn yo: Kote kadav la va ye, se la votou yo va sanble.

Chapter 18

¹ ¶ Jezi rakonte yo parabol sa a pou l' te moutre yo nesosite pou yo toujou lapriyè san yo pa janm dekouraje: ² Vwala, se te yon jij ki te rete nan yon lavil; li pa t' pè Bondye ni li pa t' respekte pesonn. ³ Nan menm lavil sa a, te gen yon vèv ki te konn vin bò kot jij la. Vèv la te toujou ap di li: Rann mwen jistis kont moun ki nan kont avè m' lan non. ⁴ Pandan lontan jij la te refize fè sa pou li. Men, yon lè li di nan kè l': Se vre, mwen pa pè Bondye, ni mwen pa rete ak moun. ⁵ Men, fanm sa a ap plede nwi mwen. M'ap rann li jistis, konsa la sispann anbete mwen. ⁶ Jezi di: Nou tande sa move jij la di! ⁷ Bon! Eske Bondye pa ta regle zafè pitit li yo, moun li menm li chwazi yo, lè y'ap rele nan pye l' lajounen kou lannwit? Eske l'ap pran anpil tan pou l' ede yo? ⁸ M'ap di nou sa: L'ap regle zafè yo vit vit. Men, lè Moun Bondye voye nan lachè a va vini, èske la jwenn moun ki gen konfyans nan Bondye ankò sou latè? ⁹ ¶ Jezi di parabol sa a pou moun ki te kwè yo bon devan Bondye epi ki t'ap meprize lòt moun: ¹⁰ Dezòm moute nan tanp lan al lapriyè. Yonn te yon farizyen, lòt la yon pèseptè kontribisyon. ¹¹ Farizyen an te kanpe apa, li t'ap lapriyè konsa: Bondye, m'ap di ou mèsè dapre mwen pa vòlò, ni visye, ni adiltè tankou lòt yo; mèsè dapre mwen pa tankou pèseptè kontribisyon sa a. ¹² Chak senmenn mwen pase de jou ap fè jèn, mwen bay ladim nan tou sa mwen genyen. ¹³ Pèseptè kontribisyon an menm te rete dèyè, li pa t' menm gen kouraj leve je l' nan syèl; li t'ap bat lestonmak li, li t'ap di: Bondye, gen pitye pou mwen ki fè anpil peche. ¹⁴ Lè sa a, Jezi di yo: M'ap di nou sa, se pa farizyen an non, men se pèseptè kontribisyon an ki tounen lakay li ak padon Bondye. Paske, yon moun ki vle leve tèt li, y'a desann li, yon moun ki desann tèt li, y'a leve li. ¹⁵ ¶ Yo te mennen ata tibebe bay Jezi pou l' te mete men sou tèt yo. Lè disip yo wè sa, yo t'ap di moun yo pa fè sa. ¹⁶ Men, Jezi rele timoun yo vin jwenn li, li di: Kite timoun yo vin jwenn mwen. Pa anpeche yo vini, paske peyi kote Bondye Wa a, se pou tout moun ki tankou timoun sa yo li ye. ¹⁷ Sa m'ap di nou la a, se vre wi: si yon moun pa asepte otorite Bondye a tankou yon timoun, li p'ap janm mete pye l' nan peyi kote Bondye Wa a. ¹⁸ ¶ Yonn nan chèf jwif

yo mande Jezi: Bon Mèt, kisa pou m' fè pou m' resevwa lavi ki p'ap janm fini an? ¹⁹ Jezi di li: Poukisa ou rele m' bon? Se yon sèl bon ki genyen, se Bondye. ²⁰ Ou konn kòmandman yo: Piga ou fè adiltè, pigas ou touye moun, pigas ou vòlò, pigas ou fè manti sou moun, respektè papa ou ak manman ou. ²¹ Nonm lan reponn: Mwen swiv tout bagay sa yo depi m' te tikatkat. ²² Lè Jezi tande sa, li di l': Ou manke yon bagay toujou: vann tou sa ou genyen, separe lajan an bay pòv. Apre sa, wa gen yon richès nan syèl la. Epi vin swiv mwen. ²³ Men, pawòl sa a te fè nonm lan lapenn anpil paske li te gen anpil byen. ²⁴ Jezi wè jan sa te fè nonm lan lapenn, li di konsa: Sa ap difisil nèt pou moun rich antre nan peyi kote Bondye Wa a. ²⁵ L'ap pi fasil pou gwo bèt yo rele chamo a pase nan je yon zegwi pase pou yon rich antre nan peyi kote Bondye Wa a. ²⁶ Moun ki t'ap koute l' yo di l': Nan kondisyon sa a, ki moun ki ka sove? ²⁷ Jezi reponn yo: Sa lèzòm pa ka fè, Bondye ka fè li. ²⁸ Lè sa a, Pyè di l': Tande, men nou kite tou sa nou te genyen pou nou swiv ou. ²⁹ Jezi di yo: Sa m'ap di nou la a, se vre wi: Nenpòt moun ki kite kay li, osinon madanm li, osinon frè l', osinon papa l' ak manman l', osinon pitit li poutèt peyi kote Bondye Wa a, ³⁰ moun sa a gen pou l' resevwa plis pase sa depi nan tan sa a, epi nan tan k'ap vini apre sa a li gen pou l' resevwa lavi ki p'ap janm fini an. ³¹ ¶ Jezi pran douz disip yo apa, li di yo: Tande, men n'ap moute Jerizalèm kote tou sa pwofèt yo te ekri sou Moun Bondye voye nan lachè a pral rive. ³² Yo pral lage l' nan men moun lòt nasyon yo, y'a pase l' nan rizib, y'a joure l', y'a krache sou li. ³³ Apre sa, y'a bat li byen bat, y'a touye l'; men sou twa jou la leve soti vivan nan lanmò. ³⁴ Men, disip yo pa t' konprann anyen nan sa; sans pawòl la te kache pou yo, yo pa t' kapab konnen sa Jezi t'ap di yo konsa. ³⁵ ¶ Lè sa a, Jezi te prèt pou antre Jeriko; te gen yon nonm avèg chita bò chemen an ki t'ap mande charite. ³⁶ Lè l' tande foul moun yo ap pase, li mande sak genyen. ³⁷ Yo di li: Se Jezi, moun Nazarèt la, k'ap pase. ³⁸ Li pran rele: Jezi, pitit David la, pitye pou mwen. ³⁹ Moun ki t'ap mache devan yo t'ap kouri dèyè l' pou te fè l' pe bouch li. Men, li t'ap rele pi rèd: Pitit David la, pitye pou mwen. ⁴⁰ Jezi rete, li bay lòd pou yo mennen l' ba li. Lè avèg la pwoche, Jezi mande li: ⁴¹ Kisa ou vle m' fè pou ou? Li reponn: Mèt, fè m' wè ankò. ⁴² Epi Jezi di li: Wè non. Se konfyans ou nan Bondye ki geri ou. ⁴³ Menm lè a, avèg la wè. Apre sa, li t'ap swiv Jezi. Li t'ap fè lwanj Bondye. Lè pèp la wè sa, yo tout pran fè lwanj Bondye tou.

Chapter 19

¹ ¶ Jezi antre Jeriko, li t'ap travèse lavil la. ² Te gen yon nonm nan lavil la yo rele Zache. Li te
³ chéf pèseptè kontribisyon yo, se te yon nonm rich. Li t'ap chache wè ki moun Jezi ye. Men, li te
⁴ yon nonm ti tay. Akòz foul moun yo, li pa t' kapab rive wè li. Li pran kouri devan; li moute sou
⁵ yon pye sikomò pou l' wè Jezi ki te gen pou l' te pase bò la. Lè Jezi rive la, li leve je l' anlè, li di
⁶ l': Zache, fè vit desann. Fòk mwen fè ladesant lakay ou jòdi a. Zache prese desann, li resevwa
⁷ Jezi ak kè kontan. Lè yo wè sa, tout moun pran babye, yo t'ap di: Men nonm lan fè ladesant kay
⁸ yon nonm ki plen peche. Zache leve kanpe, li di Jezi konsa: Koute, Mèt. Mwen pral bay pòv
⁹ mwatye tout byen mwen genyen. Si mwen te twonpe yon moun pou m' pran lajan l', mwen pral
¹⁰ rann li kat fwa lavalè. Jezi di li: Jòdi a, kay sa a delivre paske nonm sa a se yon pitit Abraram li
¹¹ ye tou. Moun Bondye voye nan lachè a vin chache sa ki te pèdi pou l' delivre yo. ¶ Apre sa,
¹² Jezi rakonte yon parabol pou moun ki te fèk tandè pawòl sa yo. Paske li te toupre lavil Jerizalèm
¹³ lan, yo te kwè gouvènman Bondye ki Wa a tapral parèt touswit. Men sa l' di yo: Vwala, se te
¹⁴ yon nonm gran fanmi ki te al nan yon peyi byen lwen. Li te al fè yo ba l' otorite pou l' wa, apre sa
¹⁵ pou l' te tounen lakay li ankò. Anvan li ale, li rele dis nan domestik li yo, li ba yo chak yon pyès
¹⁶ lò, li di yo: Fè lajan an travay jouk mwen tounen. Men, pwòp moun peyi l' yo te rayi li. Yo voye
¹⁷ kèk mesaje dèyè l' pou di: Nou pa vle nonm sa a pou wa nou. Malgre sa, yo bay nonm lan otorite
¹⁸ pou l' wa, epi l' tounen nan peyi li. Lè sa a, li fè rele domestik li te bay lajan yo pou yo vin kote l':
¹⁹ li te bezwen konnen ki benefis yo chak te fè. Premye a vini, li di: Monwa, pyès lò ou te ban
²⁰ mwen an rapòte dis pyès ankò. Wa a di l': Sa se bèl bagay. Ou se yon bon domestik. M'ap mete
²¹ ou gouvènè dis vil, paske ou te fè ti travay sa a byen. Dezyèm lan vini, li di: Monwa, pyès lò
²² ou te ban mwen an rapòte senk lòt pyès. Wa a di l': Ou menm, m'ap mete ou gouvènè senk vil.
²³ Yon lòt vini, li di: Monwa, men pyès lò ou la. Mwen te sere l' nan yon mouchwa. Mwen te
²⁴ pè ou, paske ou se yon nonm ki di: ou pran sa ki pa pou ou, ou rekòlte sa ou pa simen. Wa a
 reponn: Gade jan ou se yon move domestik! M'ap jije ou ak pawòl ki sot nan bouch ou. Ou te
 konnen m' se yon nonm ki di, mwen pran sa ki pa pou mwen, mwen rekòlte sa m' pa simen,
 poukisa ou pa t' mete lajan m' labank; lè m' ta tounen, mwen ta wete l' ak yon enterè. Li di

moun ki te la yo: Wete lajan an nan men li. Bay nonm ki gen dis pyès yo li. ²⁵ Yo di l': Men,
 monwa, li gen dis pyès deja. ²⁶ Mwen di nou: Moun ki genyen deja a, y'a ba li ankò; men moun
 ki pa gen anyen menm lan, y'a wete nan men l' menm ti sa l' te genyen an. ²⁷ Kanta lènmi m' yo
 ki pa t' vle mwen pou wa yo, mennen yo isit, touye yo la devan je mwen. ²⁸ ¶ Apre Jezi fin pale
 konsa, li pran mache devan yo pou li al Jerizalèm. ²⁹ Lè Jezi rive toupre Betfaje ak Betani, bò ti
 mòn Oliv la, li pran de nan disip li yo, li voye yo devan, ³⁰ li di yo konsa: Ale nan bouk ki devan
 nou an. Lè n'a rive, n'a jwenn yon jenn ti bourik mare; pesonn pa kò janm moute sou li. Lage l',
 mennen l' ban mwen. ³¹ Nenpòt moun ki mande nou: Poukisa n'ap lage l'? N'a reponn: Se Mèt la
 ki bezwen li. ³² De disip yo ale; yo jwenn tout bagay jan Jezi te di yo a. ³³ Pandan y'ap lage ti
 bourik la, mèt li di yo: Poukisa n'ap lage ti bourik la? ³⁴ Yo reponn: Se Mèt la ki bezwen li. ³⁵ Apre
 sa, yo mennen ti bourik la bay Jezi. Yo mete rad yo sou do ti bourik la, yo fè Jezi moute sou li.
³⁶ Pandan Jezi t'ap vanse sou bourik la, moun yo tann rad yo atè sou tout chemen an. ³⁷ Lè l' rive
 toupre Jerizalèm, nan ladesant mòn Oliv la, yon sèl kontantman pran tout foul moun ki t'ap swiv
 li yo; yo pran fè lwanj Bondye byen fò pou tout mirak yo te wè. ³⁸ Yo t'ap di: benediksyon pou
 Wa ki vini nan non Mèt la! Kè poze pou tout moun nan syèl la! Lwanj pou Bondye! ³⁹ Te gen kèk
 farizyen nan mitan foul la. Yo di Jezi konsa: Mèt, manyè fè disip ou yo pe bouch yo non. ⁴⁰ Jezi
 reponn: M'ap di nou sa: si yo pe bouch yo, wòch yo va pran rele. ⁴¹ ¶ Lè Jezi rive toupre lavil la,
 li wè l', li pran kriye sou li, ⁴² li di: Si sèlman, jòdi a ou te kapab konprann, ou menm tou, bagay
 ki pou fè kè ou poze? Men, koulye a, yo kache; ou pa kapab wè yo! ⁴³ Gen yon tan k'ap vin sou
 ou: lè sa a, lènmi ou yo va sènen ou toupatou, y'a fèmen ou nèt, y'a kwense ou sou tout bò. ⁴⁴ Y'a
 detwi ou nèt ansanm ak tout moun ki nan mitan ou yo. Yo p'ap kite yon wòch kanpe sou yon lòt,
 paske ou pa t' rekonèt jou Bondye te vin pote ou sekou a. ⁴⁵ Jezi antre nan tanp lan, li pran chase
 tout moun ki t'ap vann yo. ⁴⁶ Li di yo: Men sa ki ekri: Se pou kay mwen an yon kay kote moun
 vin lapriyè nan pye m'; men, nou menm, nou fè l' tounen kachèt vòlè. ⁴⁷ Chak jou, Jezi te nan tanp
 lan, li t'ap moutre moun yo anpil bagay. Chèf prèt yo, dirèktè lalwa yo ak chèf pèp la t'ap chache
 ki jan pou yo touye li. ⁴⁸ Men, yo pa t' kapab jwenn yon jan pou yo te fè sa, paske tout pèp la t'ap
 koute sa l' t'ap di san yo pa pèdi yon mo.

Chapter 20

¹ ¶ Yon jou konsa, Jezi te nan tanp lan; li t'ap moutre pèp la anpil bagay; li t'ap anonse yo bon
nouvèl la. Chèf prèt yo, dirèktè lalwa yo ak chèf fanmi yo vin rive. ² Yo di li: Manyè di nou ki dwa
ou genyen pou w'ap fè tout bagay sa yo? Wi, kilès ki ba ou otorite pou fè yo? ³ Jezi reponn yo:
Mwen pral poze nou yon keksyon, mwen menm tou. ⁴ Di mwen kilès ki te voye Jan Batis batize
moun: Bondye osinon lèzòm? ⁵ Men, yonn t'ap di lòt: Si nou reponn se Bondye ki voye l', la mande
nou poukisa nou pa t' kwè li. ⁶ Si nou reponn se lèzòm ki voye l', tout pèp la va touye nou ak kout
wòch, paske yo tout te gen konviksyon Jan Batis te yon pwofèt. ⁷ Lè sa a yo reponn li: Nou pa
konn ki moun ki te voye l' batize. ⁸ Jezi di yo: Enben, mwen menm tou, mwen p'ap di nou avèk ki
otorite m'ap fè bagay sa yo. ⁹ ¶ Apre sa, Jezi pran rakonte pèp la parabòl sa a: Vwala, se te yon
nonm ki te plante yon jaden rezen. Li antann li avèk kèk moun pou okipe jaden an pou li. Apre sa,
¹⁰ li kite peyi a, li al fè lontan deyò. Lè sezon rekòt la rive, li voye yon domestik kote moun ki t'ap
pran swen jaden an pou li. Li te voye chache pèsyon pa l' nan rekòt rezen an nan men yo. Men,
kiltivatè yo bat domestik la byen bat, epi yo voye l' tounen bay mèt jaden an san yo pa ba l' anyen.
¹¹ Mèt jaden an voye yon lòt domestik kote yo ankò. Men, yo bat li byen bat, yo joure l' byen joure,
epi yo voye l' tounen san yo pa ba l' anyen. ¹² Mèt jaden an voye yon twazyèm domestik. Fwa sa
a, yo blese l', yo mete l' deyò. ¹³ Lè sa a, mèt jaden an di: Kisa pou m' fè? Bon, mwen pral voye
pitit gason mwen renmen anpil la. Omwens y'a gen respè pou li. ¹⁴ Men, lè kiltivatè yo wè pitit
mèt jaden an, yonn di lòt: Men eritye a! Ann touye l', konsa jaden an va rete pou nou. ¹⁵ Yo jete
¹⁶ l' deyò jaden an, yo touye li. Atò, kisa mèt jaden an pral fè yo? L'ap vini, l'ap fè touye tout
kiltivatè yo, epi l'ap bay lòt moun jaden rezen an. Lè pèp la tandè sa, yo di: Mande Bondye padon!
¹⁷ Men, Jezi gade yo, li mande yo: Ki sans nou bay pawòl sa ki ekri a: Wòch moun ki t'ap bati yo
te voye jete a, se li menm ki tounen wòch ki kenbe kay la. ¹⁸ Tout moun ki bite sou wòch sa a gen
pou kase ren yo. Men, si se wòch la menm ki tonbe sou yon moun, li gen pou l' kraze moun lan an
¹⁹ miyèt moso. Menm lè a, chèf prèt yo ak dirèktè lalwa yo t'ap chache mete men sou li, paske yo
te byen konnen se pou yo Jezi te bay parabòl sa a. Men, yo te pè pèp la. ²⁰ ¶ Yo pran veye Jezi.
Yo voye espyon dèyè li. Espyon yo pran pòz moun debyen yo, pou wè si yo te ka pran yon pawòl

nan bouch li pou akize li. Konsa, yo ta kapab lage l' nan men gouvènè a ki te gen pouvwa ak tout
²¹ otorite. Espyon yo poze l' keksyon sa a: Mèt, nou konnen ou se moun serye. Tou sa ou di ak tou
sa ou moutre nou se verite. Ou pa gade sou figi moun, men ou moutre chemen Bondye a jan li ye
²² a. Manyè di nou: Eske lalwa nou an pèmèt nou peye Seza lajan kontribisyon an, wi ou non?
²³ Men, Jezi wè se nan pèlen yo te vle pran li. Li di yo: ²⁴ Moutre m' yon pyès lajan. Pòtre ki moun
ak non ki moun ki sou pyès lajan an? Yo reponn li: Se pòtre Seza ak non Seza. ²⁵ Lè sa a li di yo:
Enben, bay Seza sak pou Seza, bay Bondye sak pou Bondye. ²⁶ Yo pa t' kapab jwenn anyen ki mal
nan sa l' t'ap di devan pèp la. Okontrè, pawòl sa a te fè yo pi sezi ankò. Yo fèmen bouch yo san di
yon mo. ²⁷ ¶ Sadiseyen yo se yon gwoup jwif ki di moun mouri pa leve ankò. Gen kèk ladan yo
ki vin bò kot Jezi ak yon keksyon. Yo di l' konsa: ²⁸ Mèt, Moyiz te ekri lòd sa a ban nou: Lè yon
nonm marye mouri san kite pitit, si l' gen yon frè, frè a gen pou l' marye avèk madanm defen an
pou l' sa fè pitit pou frè l' ki mouri a. ²⁹ Se konsa, te gen sèt frè. Premye a marye, li mouri san l'
pa kite pitit. ³⁰ Dezyèm lan marye ak vèv la. Apre sa, twazyèm lan marye avè l' tou. ³¹ Konsa
konsa, sèt frè yo marye ak fanm lan yonn apre lòt, epi yo tout yo mouri san kite pitit. ³² Apre yo
tout fin mouri, fanm lan mouri poutèt pa l' tou. ³³ Lè mò yo va gen pou yo leve, fanm sa a ki te
madanm tout sèt frè yo, madanm kilès nan yo li pral ye la a menm? ³⁴ Jezi reponn yo: Isit sou latè,
fanm ak gason nan marye. ³⁵ Men, fanm ak gason ki merite pou yo leve soti vivan nan lanmò pou
yo ka patisipe nan lavi k'ap vini an, moun sa yo pa nan marye ankò. ³⁶ Yo pa ka mouri ankò, se
³⁷ tankou zanj Bondye yo ye, yo se pitit Bondye, paske yo leve soti vivan nan lanmò. Wi, moun
mouri gen pou yo leve. Se Moyiz menm ki moutre nou sa, lè bò ti touf bwa a, li te rele Bondye:
Bondye Abraram, Bondye Izarak, Bondye Jakòb. ³⁸ Bondye se Bondye moun vivan li ye, li pa
Bondye moun mouri, paske pou li tout moun vivan. ³⁹ ¶ Lè sa a, kèk dirèktè lalwa pran lapawòl,
yo di: Mèt, ou byen pale. ⁴⁰ Apre sa, yo pa t' gen odas poze l' ankenn lòt keksyon. ⁴¹ Jezi di yo:
Ki jan yo fè di Kris la se pitit pitit David li ye? ⁴² Men, sa David menm te di nan liv Sòm yo:
Bondye Mèt la te di Seyè mwen an: Chita la sou bò dwat mwen, ⁴³ jouk tan mwen fè lènmi yo
tounen yon ti ban pou lonje pye ou. ⁴⁴ Si David rele Kris la Seyè, ki jan pou Kris la ta ka pitit pitit
li? ⁴⁵ Lè sa a, tout pèp la t'ap koute Jezi. Li di disip li yo: ⁴⁶ Pran prekosyon nou avèk dirèktè lalwa

yo. Yo renmen pwonmennen avèk rad long yo; yo renmen moun bese tèt yo jouk atè pou di yo bonjou sou plas piblik; lè y' al nan sinagòg, yo toujou ap chache pou yo chita kote pou tout moun ka wè yo; nan resepsyon yo chache pi bon plas la. ⁴⁷ Se piye y'ap piye pòv vèv yo, anmenmtan y'ap plede fè lapriyè byen long pou parèt pi bon. Chatiman moun sa yo pral pi rèd.

Chapter 21

¹ ¶ Jezi pwonmennen je l' toupatou nan tanp lan, epi li wè moun rich yo ki t'ap mete lajan nan bwat kote yo mete ofrann nan tanp lan. ² Li wè yon pòv vèv tou ki t'ap mete de ti kòb kwiv. ³ Li di: Sa m'ap di nou la a, se vre wi: pòv vèv sa a bay plis pase tout lòt moun yo. ⁴ Paske, tout moun sa yo, se sa yo pa bezwen yo mete nan bwat la; men li menm, nan tout mizè li, li bay tou sa l' te gen pou l' viv. ⁵ ¶ Te gen kèk moun ki t'ap pale sou tanp lan; yo t'ap di jan li te byen dekore avèk bèl wòch li yo ansanm ak tout bèl bagay moun te ofri bay Bondye. Lè sa a, Jezi di: ⁶ Nou wè tout bagay sa yo, yon jou, p'ap gen de wòch k'ap kanpe yonn sou lòt. Tou sa pral kraze nèt vide atè. ⁷ Yo mande li: Mèt, kilè sa va rive? Kisa ki va fè nou konnen lè tout bagay sa yo prèt pou rive? ⁸ Jezi di yo: Atansyon pou pesonn pa twonpe nou. Paske, plizyè moun va vin sou non mwen, y'a di se yo menm ki Kris la, ou ankò jou a rive! Pa koute yo. ⁹ Lè n'a pran nouvellè lagè ak revolasyon k'ap fèt, nou pa bezwen pè. Fòk bagay sa yo rive anvan. Men, se p'ap ankò lafen an sa. ¹⁰ Li di yo ankò: Yon pèp va goumen ak yon lòt pèp; yon peyi va atake yon lòt peyi. ¹¹ Va gen gwo tranblemanntè. Nan divès kote va gen grangou ak epidemi. Lè sa a, va gen bagay terib ak gwo kokenn chenn siy k'ap parèt nan syèl la. ¹² Men anvan tou sa, y'ap arete nou, y'ap maltrete nou; y'ap trennen nou nan sinagòg pou yo jije nou; y'ap mete nou nan prizon, y'ap fè nou konparèt devan wa ak chèf gouvènman poutèt mwen. ¹³ Se va yon bèl okazyon pou nou kanpe pale verite a. ¹⁴ Mete sa byen nan tèt nou: nou pa bezwen bat tèt nou pou nou konnen davans ki jan nou pral fè defans nou. ¹⁵ Se mwen menm ki va mete pawòl nan bouch nou, ki va ban nou konprann. Konsa, nan moun ki nan kont avèk nou yo, yo yonn p'ap ka kenbe tèt ak nou, ni yo p'ap kapab demanti sa n'a di. ¹⁶ Lè sa a, se papa nou ak manman nou, frè nou, pwòp fanmi nou ak bon zanmi nou ki va denonse nou, y'ap fè touye anpil nan nou. ¹⁷ Tout moun pral rayi nou poutèt mwen. ¹⁸ Men, pa

19 yon grenn cheve nan tèt nou p'ap pèdi. Kenbe fèm, se konsa n'a sove lavi nou. 20 ¶ Lè n'a wè
 21 yon bann lame ap sènen lavil Jerizalèm toupato, n'a konnen lè sa a yo prèt pou kraze l' nèt. Wi,
 lè sa a tout moun ki nan peyi Jide, se sove al nan mòn; moun ki nan mitan lavil Jerizalèm, se kouri
 22 met deyò. Moun ki nan jaden p'ap bezwen antre lavil. Jou sa yo, se va Jou Chatiman, lè tou sa
 23 ki te ekri nan Liv la pral rive. Lè sa a, se p'ap ti lapenn pou fanm ansent ak nouris yo, paske va
 24 gen yon gwo dezolasyon nan peyi a: kòlè Bondye pral tonbe sou pèp sa a. Y'ap touye yo ak
 nepe, y'ap mete men sou yo, y'ap depòte yo nan tout lòt peyi. Pou lavil Jerizalèm lan menm, moun
 25 lòt nasyon yo gen pou yo foule l' anba pye yo, jouk tan dèle yo ba yo a va bout. Gen siy ki pou
 parèt nan solèy, nan lalin ak nan zetwal yo. Sou latè menm, tout pèp yo pral pran tranble, yo p'ap
 26 konn sa pou yo fè devan gwo bri lanmè a ap fè ak lanm li yo. Gen moun k'ap mouri tèlman y'ap
 27 pè lè y'a chonje malè ki pral rive sou tout latè, paske pouvwa ki nan syèl yo va tranble. Lè sa a,
 y'a wè m', mwen menm, Moun Bondye voye nan lachè a, ap vini nan yon nwaj, avèk anpil pouvwa,
 28 nan mitan yon bann bèl bagay. Lè bagay sa yo va kòmanse rive, leve kanpe, leve tèt nou, paske
 29 Bondye p'ap lwen vin delivre nou. ¶ Epi Jezi di yo yon parabòl: Gade pye fig frans lan ak tout
 30 lòt pyebwa yo. Lè nou wè yo kòmanse ap boujonnen, nou tou konnen lete sou nou. 31 Menm
 32 jan an tou, lè n'a wè bagay sa yo rive, nou mèt konnen Gouvènman Bondye ki Wa a toupre. Sa
 m'ap di nou la a, se vre wi: gen moun k'ap viv koulye a ki p'ap gen tan mouri anvan tout bagay sa
 33 yo rive. Syèl la ak tout tè a va pase, men pawòl mwen yo p'ap janm pase. 34 Pran prekosyon
 nou, pa kite banbòch, bweson ak traka lavi sa a chaje tèt nou pou jou a pa rive sou nou lè n' pa ta
 35 kwè. Paske, jou sa a ap tonbe tankou yon privye sou tout moun ki rete sou latè. 36 Pa kite dòmi
 pran nou, lapriyè tout tan; konsa n'a gen fòs pou n' chape anba tou sa ki gen pou rive, pou n' ka
 37 kanpe dwat devan Moun Bondye voye nan lachè a. Tout lajounen Jezi te nan tanp lan, li t'ap
 moutre moun yo anpil bagay. Men, lè solèy fin kouche, li te konn soti al pase nwit sou mòn Oliv
 38 la. Chak maten, byen bonè, tout pèp la te konn al jwenn li nan tanp lan pou tande sa l' t'ap di.

Chapter 22

¹ ¶ Fèt Pen san ledven yo, ki vle di fèt Delivrans jwif yo, te prèt pou rive. ² Chèf prèt yo ak
dirèktè lalwa yo t'ap chache yon riz pou yo fè touye Jezi, paske yo te pè pèp la. ³ Lè sa a, Satan
antre nan tèt Jida yo te rele Iskariòt la, yonn nan douz disip yo. ⁴ Jida al jwenn chèf prèt yo ak chèf
gad ki t'ap veye tanp lan. Li di yo ki jan li ta ka fè yo pran Jezi. ⁵ Yo pa t' manke kontan, yo pwomèt
pou yo ba l' lajan. ⁶ Li tonbe dakò ak yo. Se konsa Jida t'ap chache yon bon okazyon pou l' te fè
yo pran Jezi san foul la pa konnen. ⁷ ¶ Jou fèt Pen san ledven an te rive; se jou sa a pou yo te touye
ti mouton yo pou manje Delivrans lan. ⁸ Jezi voye Pyè ak Jan, li di yo konsa: Ale pare manje
Delivrans lan pou n' kapab manje li. ⁹ Yo mande li: Ki bò ou ta vle nou pare li? ¹⁰ Li di yo: Gade.
Lè n'a antre lavil la, n'a kontre ak yon nonm k'ap pote yon krich dlo; swiv li jouk nan kay kote la
¹¹ antre a. N'a di mèt kay la: Mèt la voye mande ou kote pyès kay pou l' manje manje Delivrans
lan avèk disip li yo? ¹² Lè sa a la moutre nou yon gwo chanm anwo kay la, tou pare, tou meble.
¹³ Se la n'a pare manje Delivrans lan. Yo pati, yo jwenn tout bagay jan l' te di yo a. Epi yo pare
manje Delivrans lan. ¹⁴ Lè lè a rive, Jezi chita bò tab la avèk apòt yo pou manje. ¹⁵ Li di yo: Mwen
pa t' manke anvi manje manje Delivrans sa a avè n' anvan m' al soufri. ¹⁶ Paske, m'ap di nou sa:
¹⁷ mwen p'ap janm manje l' ankò jouk jou la pran sans li nèt vre nan peyi kote Bondye Wa a. Apre
sa, li pran yon gode, li di Bondye mèsi, epi l' di: Men gode sa a, separe l' bay chak moun nan nou;
¹⁸ paske, m'ap di nou sa, depi koulye a mwen p'ap bwè diven ankò jouk lè Bondye va vin pran
¹⁹ pouvwa a nan men li. Apre sa, li pran pen, li di Bondye mèsi, li kase li. Li ba yo l', epi li di yo:
Sa se kò mwen. Se mwen menm ki bay li pou nou. Se pou nou fè sa pou nou ka toujou chonje
²⁰ mwen. Menm jan an tou, apre yo fin manje, li ba yo gode diven an. Li di yo: Gode sa a, se nouvo
kontra Bondye pase ak moun. Se avèk san m' ki koule pou nou an li siyen l'. ²¹ ¶ Men gade! Moun
²² k'ap trayi m' lan, li la bò tab la ansanm ak mwen! Moun Bondye voye nan lachè a pral mouri
jan Bondye te vle l' la, se vre. Men, malè pou moun ki trayi l' la! ²³ Latou, yonn pran mande lòt
kilès nan yo la a ki pral fè bagay sa a. ²⁴ Epi yon gwo diskisyon leve nan mitan disip yo. Yo te vle
konnen kilès nan yo ki te dwe pase pou pi grannèg. ²⁵ Jezi di yo: Nan tout peyi, wa se kòmande
²⁶ yo kòmande, moun ki chèf fè nou rele yo Bon papa. Men pou nou menm, se pa konsa pou sa
ye. Okontrè, sak pi grannèg nan mitan nou an, se pou l' tankou pi piti a; sa k'ap kòmande a, se pou

²⁷
 l' tankou sa k'ap sèvi a. Kilès ki pi grannèg: moun ki chita bò tab la, osinon moun k'ap sèvi l'
 la? Moun ki chita bò tab la, pa vre? Tansèlman, mwen menm mwen nan mitan nou tankou moun
²⁸ k'ap sèvi a. ²⁹ Nou menm, nou se moun ki kenbe fèm avè m' nan tout tribilasyon mwen yo. Se
 poutèt sa, menm jan Papa a te ban m' dwa pou m' gouvènen nan peyi kote li wa a, mwen menm
³⁰ tou, m'ap ban nou dwa sa a. N'a manje, n'a bwè sou tab ansanm avè m' sou govènman mwen
 an. M'a mete nou chita sou bèl fotèy pou nou jije douz branch fanmi Izrayèl la. ³¹ Simon, Simon,
³² koute: Satan mande pouvwa pou l' pase nou tout nan laye, tankou grenn y'ap vannen. Men,
 mwen lapriyè pou ou, Simon, pou konfyans ou nan Bondye pa febli. Ou menm, lè wa tounen vin
³³ jwenn mwen, bay frè ou yo fòs. Pyè di li: Mèt, mwen pare pou m' al nan prizon avè ou, pou m'
³⁴ mouri menm avè ou. Jezi reponn li: Pyè, tande sa m'ap di ou: kòk p'ap gen tan chante jòdi a,
³⁵ w'ap di ou pa konnen m' pandan twa fwa. Jezi di yo ankò: Lè m' te voye nou san lajan, san manje,
³⁶ san soulye, èske nou te manke kichòy? Yo reponn li: Nou pa t' manke anyen. Li di yo: Bon,
 koulye a, moun ki gen yon lajan, se pou l' pran l'; sa ki gen manje se pou l' pran l' tou. Moun ki pa
³⁷ gen nepe, se pou l' vann rad li pou l' achte yonn. Paske, tande byen sa m'ap di nou: pawòl ki te
 ekri a, fòk li rive vre nan lavi mwen: Yo mete l' ansanm ak mechan yo. Wi, sa ki ekri sou mwen
³⁸ an pral rive. Disip yo di li: Mèt, men de nepe. Li di yo: Sa kont. ³⁹ ¶ Apre sa, Jezi soti, li al mòn
⁴⁰ Oliv la, jan l' te konn fè a. Disip yo swiv li. Lè l' rive, li di yo: Lapriyè pou n' pa tonbe anba
⁴¹ tantasyon. Epi li kite yo, li al pi devan, distans yon moun kab voye yon wòch konsa. Li mete
⁴² ajenou, li pran lapriyè. Li di: Papa, si ou vle, tanpri, wete gode soufrans sa a devan je mwen.
⁴³ Men, se pa volonte m' ki pou fèt, se volonte pa ou. Lè sa a, yon zanj Bondye soti nan syèl la
⁴⁴ parèt devan li. Li te vin bay Jezi fòs. Kè Jezi te sere anpil, li t'ap lapriyè pi rèd. Swe t'ap koule
⁴⁵ sou li tonbe atè tankou gwo degout san. Apre li fin lapriyè, li leve, li vin bò kot disip yo; li jwenn
⁴⁶ yo ap dòmi sitèlman yo te nan lapenn. Li di yo: Poukisa n'ap dòmi konsa? Leve non, lapriyè
⁴⁷ pou n' pa tonbe anba tantasyon. ¶ Jezi t'ap pale toujou lè yon bann moun vin rive. Jida, yonn
⁴⁸ nan douz disip yo, t'ap mache devan. Li pwoche bò kot Jezi pou l' bo li. Men, Jezi di li: Jida, se
⁴⁹ avèk yon bo w'ap trayi Moun Bondye voye nan lachè a? Moun ki te avèk Jezi yo, lè yo wè sak
⁵⁰ t'apral rive, yo mande li: Mèt, èske nou mèt voye kout nepe? Yonn ladan yo gen tan pote domestik

granprèt la yon kou, li koupe zòrèy dwat li. ⁵¹ Men, Jezi di yo: Non. Ase. Li manyen zòrèy nonm
 lan, li geri li. ⁵² Apre sa, Jezi pale ak chèf prèt yo, chèf lagad tanp lan ansanm ak chèf fanmi yo ki
 te vin pran li. Li di yo: Nou vin dèyè m' ak nepe epi baton, tankou si m' te yon ansasen. ⁵³ Toulejou
 mwen te la avèk nou nan tanp lan, nou pa t' chache arete mwen. Men koulye a, se jou pa n', se jou
 pouvwa ki travay nan fènwa a. ⁵⁴ ¶ Yo arete Jezi, yo mennen li ale. Yo kondi l' kay granprèt la.
 Pyè t'ap swiv yo yon ti jan lwen lwen. ⁵⁵ Yo te limen yon dife nan mitan lakou a. Pyè al chita nan
 mitan moun ki te bò dife a. ⁵⁶ Yon sèvant wè Pyè chita bò dife a; li fiske je l' sou li, li di: Nonm
 sa a te avèk li tou. ⁵⁷ Men, Pyè demanti l', li di: Madanm, mwen pa konnen li. ⁵⁸ Yon kadè apre,
 yon lòt wè l', epi l' di: Ou menm tou, ou fè pati moun sa yo. Pyè di: Non, monchè, mwen pa fè pati
 moun sa yo. ⁵⁹ Apre yon bon ti moman, yon lòt di l' ankò: Men wi, nonm sa a te avè l'. Se moun
 Galile li ye. ⁶⁰ Pyè reponn li: Monchè, mwen pa konnen sa ou ap di la a. Menm lè a, antan li t'ap
 pale toujou, yon kòk pran chante. ⁶¹ Jezi vire, li gade Pyè, epi Pyè vin chonje pawòl Seyè a te di
 l': Jòdi a, kòk p'ap gen tan chante, w'ap di ou pa konnen mwen pandan twa fwa. ⁶² Pyè soti, epi li
 tonbe kriye jouk li pa t' kapab ankò. ⁶³ ¶ Mesye ki t'ap veye Jezi yo t'ap pase l' nan rizib. Yo t'ap
 ba l' kou. ⁶⁴ Yo te bouche je l', yo t'ap mande li: Ki moun ki ba ou kou sa a? Devinen? ⁶⁵ Epi yo
 t'ap di l' anpil lòt jouman ankò. ⁶⁶ Lè l' fin fè jou, tout chèf fanmi yo, chèf prèt yo ansanm ak dirèktè
 lalwa yo reyini. Yo fè mennen Jezi devan Gran Konsèy jwif yo. ⁶⁷ Yo mande li: Manyè di nou:
 èske se ou ki Kris la? Jezi reponn yo: Si m' reponn nou, nou p'ap vle kwè mwen. ⁶⁸ Si m' poze nou
 yon keksyon, nou p'ap vle reponn mwen. ⁶⁹ Men, depi jòdi a, Moun Bondye voye nan lachè a pral
 chita sou bò dwat Bondye ki gen pouvwa a. ⁷⁰ Yo tout di li: Ou se pitit Bondye a, pa vre? Li reponn
 yo: Apa nou di li. Wi, se sa mwen ye menm. ⁷¹ Lè sa a yo di: Sa nou bezwen temwen ankò fè. Nou
 menm nou fèk tande pawòl ki soti nan bouch li.

Chapter 23

¹ ¶ Tout bann moun yo leve, yo mennen Jezi devan Pilat. ² Rive la, yo pran depoze plent sou
 do l', yo di konsa: Nou jwenn nonm sa a ap moute tèt pèt la. L'ap di yo pou yo pa peye Seza lajan

taks yo. Li menm rive pretann se Kris la li ye, yon wa.³ Pilat mande li: Eske ou se wa jwif yo?
 Jezi reponn li: Se ou ki di li.⁴ Pilat di chèf prèt yo ak foul moun yo: Mwen pa wè ankenn rezon
 pou m' kondannen nonm sa a.⁵ Men, yo kenbe la avè l', yo di: L'ap moute tèt pèp la ak pawòl l'ap
 di yo. Li kòmanse travay sa a depi nan peyi Galilye, li pase nan tout peyi Jide a, li rive jouk isit la.
⁶ Lè Pilat tandè sa, li mande yo si Jezi se moun Galile.⁷ Aprann Pilat aprann Jezi te soti nan rejyon
 ki te sou kòmandman Ewòd la, li voye Jezi bay Ewòd ki t'ap pase kèk jou lavil Jerizalèm lè sa a.
⁸ Ewòd pa t' manke kontan lè li wè Jezi. Depi lontan li te konn tandè pale sou li, li te anvi kontre
 avè l'. Li te kwè li tapral wè Jezi fè kèk mirak.⁹ Li poze l' anpil keksyon, men Jezi pa reponn li
 anyen.¹⁰ Chèf prèt yo ak dirèktè lalwa yo te la. Yo t'ap depoze anpil gwo plent kont Jezi.¹¹ Ewòd
 menm ansanm ak tout gad li yo t'ap pase Jezi nan rizib. Yo mete l' nan yon wonn tenten. Yo mete
 yon bèl rad sou li; epi yo voye l' tounen bay Pilat.¹² Pilat ak Ewòd te lènmi anvan sa. Menm jou
 sa a yo vin zanmi.¹³ ¶ Pilat sanble chèf prèt yo, tout otorite yo ansanm ak pèp la.¹⁴ Li di yo: Nou
 mennen nonm sa a ban mwen. Nou fè m' konprann l'ap moute tèt pèp la. Mwen menm, mwen poze
 l' keksyon devan nou, mwen pa janm jwenn li koupab. Li pa fè ankenn nan move zak n'ap plede di
 l' fè yo.¹⁵ Ewòd pa jwenn li koupab non plis. Men li voye l' tounen ban mwen. Nonm sa a pa fè
 anyen ki merite lanmò.¹⁶ Mwen pral fè yo bat li byen bat, apre sa m'a lage li.¹⁷ Pou chak fèt
 Delivrans, Pilat te blije lage yon prizonye ba yo.¹⁸ Yo tout pran rele ansanm: Touye nonm sa a,
 lage Barabas ban nou.¹⁹ Barabas sa a, se te yon nonm ki te nan prizon poutèt lèzam li te pran kont
 gouvènman an epi pou yon moun li te touye nan lavil la.²⁰ Pilat menm te vle lage Jezi. Li pale ak
 foul moun yo ankò.²¹ Men yo rele: Kloure l' sou yon kwa! Kloure l' sou yon kwa!²² Yon twazyèm
 fwa ankò, Pilat di yo: Manyè di m' ki move zak li fè konsa? Mwen menm, mwen pa jwenn anyen
 nan nonm sa a ki merite lanmò. Mwen pa di nou mwen pral fè bat li byen bat, apre sa m'a lage li?
²³ Men, yo pran rele pi fò, yo pèsiste ap mande pou yo kloure Jezi sou yon kwa. Yo sitèlman rele,
²⁴ Pilat ba yo gany. Se konsa Pilat pran desizyon pou l' ba yo sa yo te mande a.²⁵ Li lage moun
 pèp la te vle a, nonm ki te nan prizon pou konplo ak krim lan. Epi Pilat renmèt yo Jezi pou yo te
 fè li sa yo te vle a.²⁶ ¶ Antan sòlda yo t'ap mennen Jezi ale, yo kontre Simon, yon moun peyi Sirèn.
 Li te soti nan jaden. Yo pran msye, yo chaje l' anba kwa a pou l' pote li dèyè Jezi.²⁷ Yon bann
 moun nan pèp la t'ap swiv Jezi. Te gen kèk fanm la tou ki t'ap kriye, ki t'ap plenn sò li.²⁸ Jezi vire
 gade yo, li di yo konsa: Nou menm, medam lavil Jerizalèm, pa kriye pou mwen tandè; kriye pou

29 tèt pa nou ak tout pitit nou yo. Gen jou k'ap vin dèyè; lè sa a y'a di: benediksyon pou fanm ki
 pa kapab fè pitit, pou fanm ki pa t' janm fè pitit, pou fanm ki pa janm bay pitit tete. 30 Lè sa a, tout
 moun va di mòn yo: Tonbe sou nou! Y'a mande mòn yo: Kouvri nou! 31 Paske, si se sa yo fè bwa
 vèt la, kisa yo p'ap fè bwa chèch la? 32 ¶ Yo mennen de lòt moun, de krimenèl pou yo touye ansanm
 ak Jezi. 33 Lè yo rive kote yo rele Zo bwa Tèt la, yo kloure Jezi sou kwa a. Yo kloure de krimenèl
 yo sou de lòt kwa, yonn chak bò li. 34 Jezi di: Papa, padonnen yo. Yo pa konnen sa y'ap fè. Sòlda
 yo tire osò pou separe rad li yo. 35 Pèp la te kanpe la ap gade. Chèf yo t'ap pase Jezi nan rizib, yo
 t'ap di: Gade! Li sove lòt moun; si se Kris la li ye, moun Bondye chwazi a, se pou l' sove tèt pa l'
 tou. 36 Sòlda yo t'ap pase l' nan betiz tou. Yo pwoche bò kote l', yo ba l' venèg pou l' bwè, 37 epi
 yo di li: Si ou se wa jwif yo, se pou ou sove tèt ou ou menm! 38 Men sak te ekri sou tèt kwa a:
 Nonm sa a se wa jwif yo li ye. 39 Yonn nan krimenèl yo te kloure sou kwa yo t'ap joure li. Li t'ap
 di li: Se pa ou ki Kris la? Sove tèt ou non, epi sove nou ansanm avè ou tou. 40 Men lòt la reprann
 li, li di li: Gen lè ou pa pè Bondye, ou menm ki anba menm kondannasyon avèk li a? 41 Pou nou
 menm se jistis, paske nou resevwa sa nou merite pou krim nou fè. Men li menm, li pa fè anyen.
 42 Epi li di Jezi: Chonje m' wi lè wa vin pran gouvènman an nan men ou! 43 Jezi reponn li: Sa m'ap
 di ou la, se vre wi: Jòdi a ou pral avè m' nan paradi. 44 ¶ Li te midi konsa lè solèy la sispann klere
 sou tout peyi a jouk vè twazè nan apremidi. 45 Rido ki te nan tanp lan chire fè de moso. 46 Jezi
 rele byen fò, li di: Papa, m' ap renmèt lespri mwen nan men ou. Apre l' fin di pawòl sa yo, li mouri.
 47 Lè kaptenn lame a wè sak te rive, li fè lwanj Bondye, epi li di: Se vre wi. Nonm sa a te inonsan.
 48 Tout moun ki te vini an foul pou asiste espektak sa a te wè sak te rive. Yo tounen al lakay yo,
 yo t'ap bat lestonmak yo. 49 Tout zanmi Jezi yo te rete yon ti jan lwen ansanm ak fanm ki t'ap
 mache avè l' yo depi nan peyi Galile. Yo tout t'ap gade sak t'ap pase. 50 ¶ Te gen yon jwif ki te rele
 Jozèf, moun lavil Arimate. Se te yon bon gason ki te mache dwat devan Bondye. 51 Li t'ap tann
 kilè Bondye t'ap vin pran pouvwa a nan men li. Li te fè pati Gran Konsèy jwif yo, men li pa t' dakò
 ak sa lòt yo te fè ni ak sa yo te deside. 52 Jozèf al lakay Pilat, li mande kò Jezi. 53 Apre sa, li al
 desann kò a sou kwa a, li vlope l' nan yon bèl dra blan, epi li mete l' nan yon kavo yo te fouye nan
 wòch. Se te yon kavo tou nèf: yo pa t' ankò janm mete pesonn ladan li. 54 Se te yon jou vandredi,

55
 repo a tapral kòmanse. Medam ki t'ap mache avèk Jezi depi nan peyi Galile yo te ale ansanm
 ak Jozèf. Yo wè kavo a, yo wè ki jan yo te mete kò Jezi ladan li. 56
 Apre sa, yo tounen lakay yo,
 y' al pare lwil santi bon ak odè pou benyen kò a. Men, jou repo a yo pa t' fè anyen, jan lalwa Moyiz
 te vle l' la.

Chapter 24

1 ¶ Nan dimanch maten, byen bonè, medam yo ale nan kavo a. Yo te pote lwil santi bon yo te
 pare pou benyen kò a. 2 Yo jwenn wòch ki te fèmen kavo a te woule byen lwen soti devan bouch
 kavo a. 3 Yo antre, men yo pa jwenn kò Seyè Jezi. 4 Yo te la konsa, yo pa t' konn sa pou yo te fè
 lè de moun parèt devan yo ak rad yo byen klere. 5 Medam yo te pè anpil. Yo bese tèt yo atè; men
 de moun yo di yo konsa: Poukisa n'ap chache moun vivan an nan mitan mò yo? (Li pa isit; li leve
 soti vivan nan lanmò.) 6 Chonje sa l' te di nou lè l' te Galile a: 7 Moun Bondye voye nan lachè a gen
 pou tonbe anba men pechè yo; yo gen pou yo kloure l' sou yon kwa. Men, sou twa jou l'ap leve soti
 vivan ankò. 8 Yo vin chonje pawòl Jezi te di yo. 9 Yo soti kite kavo a, y' al rakonte onz disip yo
 ak lòt moun yo tout bagay sa yo. 10 Men non medam yo: se te Mari, moun Magdala a, Jan ak Mari,
 manman Jak. Te gen lòt fanm avèk yo tou. Yo menm tou, yo te rakonte apòt yo menm bagay la.
 11 Men, apòt yo te pran sa medam yo t'ap di a pou istwa san sans, yo pa t' kwè yo. 12 Lè sa a, Pyè
 leve, li kouri al nan kavo a. Li bese, li wè dra mò a sèlman. Apre sa, li tounen lakay li. Li te sezi
 anpil pou sak te rive a. 13 ¶ Menm jou sa a, te gen de disip ki tapral nan yon bouk yo rele Emayis.
 Bouk la te yon ti distans onz kilomèt konsa ak lavil Jerizalèm. 14 De disip yo t'ap koze sou tou sa
 ki te pase. 15 Yo t'ap pale, yo t'ap diskite yonn ak lòt. Lè sa a, Jezi pwoche bò kote yo, li tanmen
 fè wout ak yo. 16 Yo te wè l', men te gen kichòy ki te anpeche yo rekonèt li. 17 Li di yo: Sou kisa
 n'ap pale konsa antan n'ap mache a? Yo rete yo kanpe tou tris. 18 Yonn ladan yo ki te rele Kleopas
 reponn li: Gen lè ou se sèl moun k'ap viv lavil Jerizalèm ki pa konn sak te rive nan senmenn ki sot
 pase a? 19 Li di yo: Ki sak te rive konsa? Yo reponn li: Tou sak te rive Jezi, moun Nazarèt la. Nonm
 sa a te yon gwo pwofèt devan Bondye ak devan tout pèp la: li te fè anpil bèl bagay epi li te pale
 20 byen. Enben, chèf prèt yo ak otorite nou yo fè yo kondannen l' amò, epi yo kloure l' sou yon

²¹ kwa. Nou te gen espwa se li menm ki t'ap vin delivre pep Izrayèl la. Men, jòdi a fè twa jou depi
²² bagay sa yo pase. Fòk nou di ou tou gen kèk fanm nan gwoup nou an ki fè nou byen sezi. Yo
²³ te al nan kavo a granmaten jòdi a. Men, yo pa jwenn kò a. Yo tounen vin rakonte te gen zanj
²⁴ Bondye ki te parèt devan yo, ki te di yo li vivan. Gen kèk zanmi nou yo ki al nan kavo a tou.
²⁵ Yo jwenn tout bagay jan medam yo te di l' la; men li menm, yo pa wè li. Lè sa a Jezi di yo: Ala
²⁶ moun san konprann! Ki jan lespri nou fè lou pou kwè tou sa pwofèt yo te di konsa! Eske se pa
²⁷ pou Kris la te soufri bagay sa yo anvan pou l' te resevwa lwanj li? Epi li pran esplike yo tou sa
²⁸ ki te ekri sou li nan Liv yo; li kòmanse ak Liv Moyiz yo, li pase nan tout Liv pwofèt yo. Lè yo
²⁹ rive toupre ti bouk kote yo t'ap prale a, Jezi fè tankou li ta vle al pi lwen. Yo kenbe l', yo di li:
³⁰ Rete avèk nou non. Solèy fin kouche, pral fènwa. Li antre pou l' rete ak yo. Li chita bò tab la
³¹ ak yo pou manje. Li pran pen, li di Bondye mèsè, li kase l', epi li ba yo li. Menm lè a, je yo louvri,
³² yo rekonèt li. Men, li disparèt lamenm devan yo. Yonn pran di lòt: Eske nou pa t' santi tankou
³³ yon dife k'ap boule nan kè nou lè l' t'ap pale avèk nou sou tout wout la, lè l' t'ap esplike nou sak te
³⁴ ekri nan Liv yo? Latou, yo leve, yo tounen Jerizalèm. Lè yo rive, yo jwenn onz disip yo reyini
³⁵ ak zanmi yo. Yo tout yo t'ap di: Se vre wi, Seyè a leve vivan. Simon wè li. Lè sa a, de disip
³⁶ yo pran rakonte sak te rive yo sou wout la, ki jan yo te rekonèt li lè l' te kase pen an. ¶ Pandan
³⁷ yo t'ap pale konsa, Jezi li menm vin kanpe nan mitan yo, li di yo: benediksyon Bondye sou nou
³⁸ tout. Yo te pè, yo pran tranble: yo te kwè se yon revenan. Men, Jezi di yo: Poukisa nou pè
³⁹ konsa? Pouki tout lide sa yo nan tèt nou? Gade men m' ak pye m' yo. Se mwen menm wi. Nou
⁴⁰ mèt mangen m'. Gade m' byen: yon revenan pa gen vyann ak zo jan nou wè m' genyen an. Antan
⁴¹ li t'ap di yo sa, li moutre yo men l' ak pye l' yo. Yon sèl kè kontan pran disip yo, men yo pa t'
⁴² kwè toujou sitèlman yo te sezi. Lè sa a, Jezi di yo: Eske nou gen kichòy la a pou manje? Yo ofri
⁴³ l' yon moso pwason boukannen. Li pran l', li manje l' devan je yo. Epi li di yo: Men sa m'
⁴⁴ t'ap di nou an lè m' te la avèk nou toujou a. Tou sa ki te ekri sou mwen nan lalwa Moyiz la, nan
⁴⁵ Liv pwofèt yo, menm nan sòm yo, fòk tou sa te rive. Lè sa a, li louvri lespri yo pou yo te ka
⁴⁶ konprann tou sa ki te ekri nan Liv yo. Li di yo: Men sa ki te ekri: Kris la gen pou l' soufri jouk

li mouri, men sou twa jou li gen pou l' soti vivan nan lanmò.⁴⁷ Y'a pran non l' pou yo mache fè konnen mesaj la nan tout peyi, kòmanse lavil Jerizalèm, pou mande tout moun pou yo tounen vin jwenn Bondye pou yo ka resevwa padon peche yo.⁴⁸ Nou temwen tout bagay sa yo.⁴⁹ Mwen menm, mapral voye ban nou sa Papa m' te pwomèt la. Nou menm, rete lavil Jerizalèm jouk pouvwa k'ap soti anwo nan syèl la va desann sou nou.⁵⁰ ¶ Apre sa, li mennen yo an deyò lavil la, bò Betani, epi li leve men li pou l' beni yo.⁵¹ Antan l'ap beni yo konsa, li separe ak yo, li moute nan syèl la.⁵² Yo menm menm, lè yo fin adore l', yo tounen lavil Jerizalèm ak yon gwo kè kontan.⁵³ Se tout tan yo te nan tanp lan ap fè lwanj Bondye.

John

Chapter 1

¹ ¶ Anvan Bondye te kreye anyen, Pawòl la te la. Pawòl la te avèk Bondye. Sa Bondye te ye, se sa Pawòl la te ye tou.² Pawòl la te la avèk Bondye depi nan konmansman.³ Se ak Pawòl la Bondye fè tout bagay. Nan tou sa ki te fèt, pa t' gen anyen ki te fèt san Pawòl la.⁴ Lavi, se nan li sa te ye. Se lavi sa a ki te bay tout moun limyè.⁵ ¶ Limyè a klere nan fènwa a. Men, fènwa a pa t' resevwa li.⁶ Bondye te voye yon nonm ki te rele Jan.⁷ Li te vin sèvi temwen pou pale sou limyè a. Li te vini pou tout moun ki te tande mesaj li a te ka kwè.⁸ Se pa li menm ki te limyè a. Li te vin pou sèvi temwen pou pale sou limyè a.⁹ Limyè sa a, se li ki limyè tout bon an. Se li menm ki vin sou latè epi k'ap klere tout moun.¹⁰ Pawòl la te nan lemonn. Se ak Pawòl la Bondye te fè tou sa ki nan lemonn; men, moun ki nan lemonn pa t' rekonèt li.¹¹ Li vin nan peyi l'; men tout moun nan peyi l' pa t' resevwa li.¹² Men, sa ki te resevwa l' yo, sa ki te kwè nan li yo, li ba yo pouvwa tounen pitit Bondye.¹³ Yo pa t' vin pitit Bondye jan sa fèt pami lèzòm sou latè, paske sa pa t' soti nan egzijans lachè, ni nan volonte lèzòm. Se Bondye menm ki te papa yo.¹⁴ Pawòl la tounen moun. Li te vin viv nan mitan nou, li mennen yon lavi ki te konfòm nèt ak verite a, ak renmen nan tout kè li. Nou wè pouvwa li, se te pouvwa Bondye Papa a te bay sèl Pitit li a.¹⁵ ¶ Se li menm Jan Batis

t'ap pale a, lè l' te di byen fò: Men moun mwen t'ap pale nou an, lè m' te di nou: L'ap vin apre mwen.
 Men, li gen plis pouvwa pase m', paske li te la anvan mwen. ¹⁶ Nou tout nou resevwa pa nou nan
 tout kantite byen l' yo. Li ban nou favè sou favè. ¹⁷ Bondye fè Moyiz ban nou lalwa. Men, se Jezikri
 ki fè nou konnen renmen Bondye a ansanm ak verite a. ¹⁸ Pesonn pa janm wè Bondye. Men, sèl
 Pitit Bondye a, li menm ki Bondye tou, li menm k'ap viv kòtakòt ak Papa a, se li menm ki fè moun
 konnen Bondye. ¹⁹ ¶ Men sa Jan Batis te di lè jwif ki lavil Jerizalèm yo te voye kèk prèt ak kèk
 moun Levi vin mande l' ki moun li ye. ²⁰ Jan pa t' refize reponn yo, li di yo kareman devan tout
 moun: Se pa mwen ki Kris la. ²¹ Yo mande li: Ki moun ou ye atò? Ou se Eli? Jan reponn yo: Non,
 mwen pa Eli. Yo di li: Ou se pwofèt la? Li reponn yo: Non. ²² Lè sa a yo di li: Ki moun ou ye
 menm? Paske, nou gen pou n' pote yon repons bay moun ki voye nou yo. Ki moun ou di ou ye?
²³ Jan reponn: Mwen se vwa nonm k'ap rele nan dezè a: Plani chemen an byen plani pou Mèt la!
 (Se sa pwofèt Ezayi te di.) ²⁴ Gen nan moun yo te voye bò kot Jan yo ki te soti lakay farizyen yo.
²⁵ Yo mande li: Si ou pa ni Kris la, ni Eli, ni pwofèt la, di nou poukisa w'ap batize moun? ²⁶ Jan
 reponn yo: Mwen menm, mwen batize nou nan dlo. Men, nan mitan nou la a, gen yon moun nou
 pa konnen. ²⁷ L'ap vin apre m', men mwen pa bon ase pou m' ta demare kòd sapat li. ²⁸ Tout bagay
 sa yo t'ap pase kote yo rele Betani an, lòt bò larivyè Jouden kote Jan t'ap batize a. ²⁹ ¶ Nan denmen,
 Jan wè Jezi ki t'ap vin jwenn li, li di: Men ti mouton Bondye a k'ap wete peche moun sou tout latè.
³⁰ Men moun mwen t'ap pale nou an, lè m' te di nou gen yon nonm k'ap vin apre m' men ki gen plis
 pouvwa pase m', paske li te la anvan mwen. ³¹ Mwen pa t' konnen ki moun sa tapral ye. Men,
 mwen vin batize nou nan dlo pou moun pèp Izrayèl yo te ka rekonèt li. ³² Jan di yo ankò: Mwen
 wè Lespri Bondye a desann sot nan syèl la tankou yon ti pijon, li rete sou tèt li. ³³ Lè sa a, mwen
 pa t' ankò konnen ki moun li te ye. Men, Bondye ki te voye m' batize nan dlo a, te di m': Wa wè
 Lespri Bondye a desann. La rete sou tèt yon nonm: Se li menm ki gen pou batize moun nan Sentespri.
³⁴ Jan di yo ankò: Mwen wè sa ak je m', se sa ki fè mwen di nou se li ki Pitit Bondye a vre. ³⁵ Nan
 denmen, Jan te menm kote a ankò ak de nan patizan li yo. ³⁶ Li wè Jezi ki t'ap pase, li di: Men ti
 mouton Bondye a. ³⁷ ¶ De patizan yo tande sa Jan t'ap di a, yo pran swiv Jezi. ³⁸ Jezi vire tèt li
 gade, li wè yo t'ap swiv li. Li mande yo: Sa n'ap chache? Yo mande li: Ki kote ou rete, Rabi? (Mo
 rabi sa a vle di mè.) ³⁹ Li reponn yo: Vini non, n'a wè. Y' ale vre. Yo wè kote l' te rete a. Yo pase

⁴⁰
 rè s jounen an avè li. (Li te vè katrè konsa nan apremidi.) Andre, frè Simon Pyè a, te yonn nan
⁴¹
 de moun ki te tande sa Jan te di a epi ki te swiv Jezi. Premye moun Andre rankontre se te Simon,
⁴²
 frè li. Li di li konsa: Nou jwenn Mesi a (ki vle di: Kris la). Li mennen Simon bay Jezi. Jezi gade
 l', li di: Se ou menm Simon, pitit Jan an? Y'a rele ou Sefas. (Se menm bagay ak Pyè, ki vle di wòch.)
⁴³
[¶] Nan denmen, Jezi te fè lide ale nan peyi Galile. Li jwenn Filip sou wout la, li di li: Swiv mwen.
⁴⁴
 (Filip te moun lavil Betsayda, kote Andre ak Pyè te rete a.) ⁴⁵ Apre sa, Filip jwenn Natanayèl.
 Li di li: Nou jwenn moun Moyiz te pale nou nan liv lalwa a, moun pwofèt yo te pale a tou. Se Jezi,
⁴⁶
 moun lavil Nazarèt, pitit gason Jozèf la. Natanayèl di li: Ki bon bagay ki ka soti Nazarèt? Filip
⁴⁷
 reponn li: Vini non, wa wè. Lè Jezi wè Natanayèl ap vin bò kote l', li di sou li: Men yon moun
⁴⁸
 pèp Izrayèl tout bon. Se yon nonm ki pa gen riz nan li. Natanayèl mande li: Ki jan ou fè konnen
 mwen? Jezi reponn li: Anvan Filip te rele ou la, mwen te wè ou lè ou te anba pye fig frans lan.
⁴⁹
⁵⁰
 Lè sa a, Natanayèl di li: Mèt, ou se Pitit Bondye a. Ou se wa pèp Izrayèl la! Jezi reponn li:
 Paske mwen di ou mwen te wè ou anba fig frans lan, poutèt sa ase ou kwè? Ou gen pou wè bagay
⁵¹
 pi gwo pase sa. Apre sa, li di yo: Sa m'ap di nou la a, se vre wi: N'a wè syèl la louvri, avèk zanj
 Bondye yo k'ap moute desann sou Moun Bondye voye nan lachè a.

Chapter 2

¹
[¶] De jou apre sa, te gen yon maryaj lavil Kana nan peyi Galile. Manman Jez te la, ² yo te
³
 envite Jezi ak disip li yo nan nòs la tou. Rive yon lè pa t' gen diven ankò. Manman Jezi di l' konsa:
⁴
 Yo pa gen diven ankò non. Men Jezi reponn li: Nan kisa mwen ye avè ou, madanm? Lè pa m'
⁵
 lan poko rive. Lè sa a, manman Jezi di moun ki t'ap sèvi yo: Fè tou sa l' di nou fè. ⁶ Te gen sis
 gwo ja fèt an wòch ki te sèvi pou jwif yo lave kò yo dapre koutim yo. Yo te gwo ase pou chak te
⁷
 kenbe vin trant galon konsa. Jezi di moun ki t'ap sèvi yo: Plen ja yo dlo. Yo plen yo ra bouch.
⁸
 Lè yo fini, Jezi di yo: Pran ti gout nan dlo sa a, pote bay chèf kanbiz la goutte. Yo pote ti gout bay
⁹
 chèf kanbiz la. Chèf kanbiz la goutte dlo ki te tounen diven an. Li pa t' konnen ki bò diven sa a te
¹⁰
 soti. (Men, domestik yo ki te pran dlo a te konnen.) Li rele nonm ki t'ap marye a, li di li konsa:
 Tout moun sèvi pi bon diven an anvan. Se apre tout envite yo fin sou, se lè sa a yo sèvi diven ki pa

twò bon an. Men ou menm, ou te sere pi bon diven an. Se koulye a w'ap sèvi l'.¹¹ Se konsa Jezi te fè premye mirak li lavil Kana nan peyi Galile. Li te fè wè pouvwa li. Sa te fè disip li yo kwè nan li.¹²

¶ Apre sa, li ale lavil Kapènawòm ansanm ak manman l', frè l' yo ak disip li yo. Yo pase de twa jou la.¹³ Fèt Delivrans jwif yo te vanse rive. Se konsa Jezi moute Jerizalèm.¹⁴ Li jwenn yon bann moun nan tanp lan ki t'ap vann bèf, mouton ak pijon. Gen lòt menm ki te chita deyè tab yo ap chanje lajan.¹⁵ Li pran kèk kòd, li mare yo ansanm, li fè yon fwèt ak yo. Epi li mete tout moun yo deyò nan tanp lan ansanm ak tout mouton yo ak tout bèf yo. Li chavire tab moun ki t'ap chanje lajan yo, li jete tout kòb yo atè.¹⁶ Li di moun ki t'ap vann pijon yo: Wete sa la. Pa fè kay Papa m' lan tounen yon boutik kote yo fè komès.¹⁷ Disip li yo vin chonje pawòl sa yo ki te ekri nan Liv la: O Bondye, mwen sitèlman renmen kay ou a, mwen santi se tankou yon dife k'ap boule tout anndan mwen.¹⁸ Jwif yo mande li: Ki mirak ou ka fè pou moutre nou ou gen dwa fè sa w'ap fè la a?¹⁹ Jezi reponn yo: Kraze tanp sa a koulye a. Nan twa jou m'ap rebati l' ban nou.²⁰ Jwif yo di li: Yo pran karansizan pou yo bati tanp sa a, pou ou menm, pou ou ta pran twa sèl jou pou rebati li?²¹ Men Jezi li menm, lè l' t'ap di mo tanp lan se pwòp kò li li te gen nan tèt li.²² Lè Jezi leve soti vivan nan lanmò, disip li yo vin chonje li te di sa. Se konsa yo te kwè sa ki te ekri nan Liv la ansanm ak tout pawòl Jezi te di yo.²³ ¶ Pandan Jezi te Jerizalèm pou fèt Delivrans lan anpil moun te kwè nan li lè yo te wè mirak li t'ap fè.²⁴ Men, Jezi pa t' fè okenn ladan yo konfyans, paske li te konnen yo tout byen.²⁵ Li pa t' bezwen moun te di l' anyen sou pesonn, paske li menm li te konnen sa ki nan kè yo.

Chapter 3

¹ ¶ Te gen yon nonm yo te rele Nikodèm ki te fè pati gwoup farizyen yo. Se te yonn nan chèf jwif yo.² Yon jou lannwit, li vin bò kot Jezi, li di l' konsa: Mèt, nou konnen se Bondye ki voye ou moutre nou tout bagay sa yo. Paske, pesonn pa ka fè tout mirak w'ap fè yo si Bondye pa avèk li.³ Jezi reponn li: Sa m'ap di ou la a, se vre wi: Pesonn pa kapab wè Pèyi kote Bondye Wa a si li pa fèt yon dezyèm fwa.⁴ Nikodèm di li: Ki jan yon nonm ki fin granmoun ka fèt yon dezyèm fwa? Li pa ka tounen nan vant manman l', pou l' fèt yon lòt fwa ankò.⁵ Jezi reponn li: Sa m'ap di ou la

a, se vre wi: Pesonn pa ka antre nan Peyi kote Bondye Wa a si li pa fèt nan dlo ak nan Sentespri.
⁶ Lachè soti nan lachè, lespri soti nan Lespri Bondye. ⁷ Pa sezi si mwen di ou: se pou nou fèt yon
 dezyèm fwa. ⁸ Van an soufle kote l' vle. Ou tande bri l'ap fè. Men, ou pa konnen ki bò l' soti, ni ki
 bò l' prale. Se menm jan an pou tout moun ki fèt nan Lespri Bondye. ⁹ Lè sa a Nikodèm di li: Ki
 jan sa ka fèt menm? ¹⁰ Jezi reponn li: Ou se yon gwo mèt k'ap moutre pèp Izrayèl la anpil bagay,
 epi ou pa konn bagay sa yo? ¹¹ Sa m'ap di ou la a, se vre wi: mwen menm, mwen pale sa m' konnen,
 mwen di sa m' te wè. Men nou menm, nou pa vle asepte sa m'ap di a. ¹² Nou pa kwè m' lè m'ap
 pale nou bagay k'ap pase isit sou latè. Ki jan n'a fè kwè m' lè m'a pale nou bagay k'ap pase nan syèl
 la? ¹³ Pesonn pa janm moute nan syèl la, esepite Moun Bondye voye nan lachè a ki desann soti nan
 syèl la. ¹⁴ Menm jan Moyiz te leve sèpan ki te fèt an bwonz lan byen wo sou yon poto nan mitan
 dezè a, konsa tou yo gen pou yo leve Moun Bondye voye nan lachè a byen wo tou. ¹⁵ Tout moun
 ki mete konfyans yo nan li va gen lavi ki p'ap janm fini an. ¹⁶ Paske, Bondye sitèlman renmen
 lèzòm li bay sèl Pitit li a pou yo. Tout moun ki va mete konfyans yo nan li p'ap pedi lavi yo. Okontrè
 y'a gen lavi ki p'ap janm fini an. ¹⁷ Bondye pa voye Pitit li a sou latè pou kondannen lèzòm, men
 pou pou l' te kapab delivre yo. ¹⁸ Moun ki mete konfyans yo nan Pitit Bondye a p'ap kondannen.
 Men, moun ki pa kwè nan li, yo deja kondannen, paske yo pa t' gen konfyans nan sèl Pitit Bondye
 a. ¹⁹ Men ki bò kondannasyon an soti pou yo: limyè a te vini nan lemond, men lèzòm te pito fènwa
 a pase limyè a, paske sa y'ap fè a mal. ²⁰ Lè yon moun ap fè sa ki mal, li pa vle wè limyè a, li p'ap
 vini kote limyè a ye, paske li pè pou move zak li yo pa parèt aklè. ²¹ Men, moun ki fè sa ki bon
 vre, se nan limyè a menm l'ap vini, pou moun ka wè aklè se obeyi l'ap obeyi Bondye nan sa l'ap fè
 a. ²² ¶ Apre sa, Jezi ale ansanm ak disip li yo nan peyi Jide. Li rete kèk tan la ak yo, li t'ap batize
 moun. ²³ Jan Batis menm t'ap batize moun tou nan Enon, toupri Salim, paske te gen anpil dlo la.
 Anpil moun te vin jwenn li la pou l' li te batize yo. ²⁴ (Lè sa a, yo pa t' ankò mete Jan Batis nan
 prizon.) ²⁵ De twa nan patizan Jan yo tonbe diskite ak yon jwif sou regleman relijyon an ki mande
 pou moun lave kò yo. ²⁶ Y' ale bò kot Jan, yo di l' konsa: Mèt, ou chonje nonm ki te avè ou lòt bò
 larivyè Jouden an, moun ou t'ap pale nou an? Enben, l'ap batize koulye a. Tout moun al jwenn li.
²⁷ Jan reponn yo: Pesonn pa ka gen anyen si se pa Bondye nan syèl la ki ba li li. ²⁸ Nou menm,

nou ka di mwen te di nou sa: Se pa mwen ki Kris la, se voye Bondye voye m' pran devan li. ²⁹ Nan yon maryaj, lamarye se pou nonm k'ap marye a. Zanmi nonm k'ap marye a kanpe toupre l', l'ap koute. Li pa manke kontan lè li tande vwa nonm k'ap marye a. Se konsa, mwen menm, mwen kontan nèt koulye a. ³⁰ Li fèt pou li vin pi gran, pou mwen menm, mwen vin pi piti toujou. ³¹ Moun ki soti anwo a pi gran pase nou tout. Moun ki soti sou latè, se pou latè li ye, l'ap pale nou bagay ki sou latè. Moun ki soti anwo nan syèl la, li pi wo pase nou tout. ³² L'ap di sa l' wè, sa l' tande. Men, pesonn pa asepte mesaj li. ³³ Moun ki asepte sa l'ap di a, li rekonèt sa Bondye di a se vre. ³⁴ Moun Bondye voye a, se pawòl Bondye l'ap pale, paske Bondye ba li Sentespri san mezi. ³⁵ Papa a renmen Pitit la, li ba li pouvwa sou tout bagay. ³⁶ Moun ki mete konfyans yo nan Pitit la, yo gen lavi ki p'ap janm fini an. Moun ki desobeyi Pitit la, yo p'ap gen lavi sa a. Se kòlè Bondye k'ap tonbe sou yo.

Chapter 4

¹ ¶ Farizyen yo tande Jezi t'ap fè plis patizan pase Jan, li t'ap batize plis moun pase l' tou. ² (Men, pou di vre, Jezi pa t' janm batize pesonn. Se disip li yo ki t'ap batize.) ³ Lè Jezi vin konn sa, li kite peyi Jide, li tounen nan peyi Galile. ⁴ ¶ Sou wout la, fòk li te pase nan mitan peyi Samari. ⁵ Li rive nan yon bouk Samari yo rele Sika, toupre moso tè Jakòb te bay Jozèf, pitit gason l' lan. ⁶ Se la pi Jakòb la te ye. Jezi menm te bouke, vwayaj la te fatigue l' anpil. Li chita sou rebò pi a. Li te bò midi konsa. ⁷ Yon fanm peyi Samari vin pou tire dlo. Jezi di l' konsa: Tanpri, ban m' ti gout dlo pou m' bwè. ⁸ (Disip li yo te ale lavil la achte manje.) ⁹ Fanm Samari a di Jezi konsa: Kouman? Se pa jwif ou ye? Ki jan ou fè mande m' dlo pou ou bwè, mwen menm ki moun Samari? (Paske, jwif yo pa t' gen rapò ak moun Samari.) ¹⁰ Jezi reponn li: Si ou te konnen sa Bondye bay la, si ou te konnen ki moun k'ap mande ou ti gout dlo pou bwè a, se ou menm ki ta mande l' ba ou ti gout dlo bwè. Lè sa a, li ta ka ba ou nan dlo ki bay lavi a. ¹¹ Fanm lan di li: Msye, ou pa gen veso pou tire dlo. Epitou, pi a fon anpil. Ki bò pou ou ta jwenn dlo ki bay lavi sa a? ¹² Se Jakòb, zansèt nou, ki te ban nou pi sa a. Li te bwè ladan li. Tout pitit li yo ansanm ak tout bèt li yo, se la yo te bwè tou. Koulye a, ou prèt pou di m' ou pi gran pase Jakòb? ¹³ Jezi reponn li: Tout moun ki bwè dlo sa a gen pou l' swaf dlo ankò. ¹⁴ Men, moun ki va bwè nan dlo m'ap ba li a, li p'ap janm swaf dlo ankò. Paske,

15
 dlo m'ap ba li a ap tounen yon sous dlo nan li k'ap ba li lavi ki p'ap janm fini an. Fanm lan di l':
 Tanpri, msye, ban m' ti gout nan dlo sa a non pou m' bwè, konsa mwen p'ap janm anvi bwè dlo
 ankò, mwen p'ap bezwen tounen isit la vin tire dlo. 16 Jezi di l' konsa: Ale rele mari ou. Apre sa,
 tounen vin jwenn mwen isit la. 17 Fanmi lan reponn: Mwen pa gen mari. Jezi di l' konsa: Ou gen
 rezon di ou pa gen mari. 18 Paske, ou pase senk mari deja. Epi nonm k'ap viv avè ou koulye a, se
 pa mari ou li ye. Ou pa ban m' manti. 19 Lè sa a, fanm lan di l': Gen lè ou se yon pwofèt, msye?
 20 Zansèt nou yo nan peyi Samari te sèvi Bondye sou mòn sa a. Men nou menm jwif, nou di: Sèl
 kote pou moun sèvi Bondye, se lavil Jerizalèm. 21 Jezi reponn li: Madanm, ou mèt kwè mwen. Lè
 a pral rive, se pa ni sou mòn sa a, ni lavil Jerizalèm pou n' sèvi Papa a. 22 Nou menm, moun Samari,
 nou pa konnen sa n'ap sèvi a. Nou menm jwif, nou konnen sa n'ap sèvi a, paske moun k'ap vin pou
 sove a, se nan mitan jwif yo l'ap soti. 23 Men, lè a ap rive, li rive deja: tout moun k'ap sèvi tout bon
 yo pral sèvi Papa a nan kè yo jan sa dwe fèt. Se moun konsa Bondye vle pou sèvi li. 24 Bondye,
 se Lespri li ye. Tout moun k'ap sèvi l', se pou yo sèvi l' nan lespri yo jan sa dwe fèt la. 25 Fanm lan
 di li: Mwen konnen Mesi a, moun yo rele Kris la, gen pou l' vini tou. Lè la vini, la esplike nou tout
 bagay sa yo. 26 Jezi reponn li: Mwen menm k'ap pale avè ou la a, mwen se Kris la. ¶ Lè sa a,
 disip Jezi yo vin rive. Yo te sezi wè l' ap pale ak yon fanm. Men, yo yonn pa mande l': Kisa ou gen
 avèk li? Osinon: Poukisa w'ap pale avè li? 28 Fanm lan menm kite krich dlo a la, li tounen li al
 lavil la. Li di moun yo: 29 Vini wè yon nonm ki di m' tou sa m' fè. Eske nou pa kwè se Kris la?
 30 Moun yo soti lavil la, yo vin jwenn Jezi. 31 Disip yo menm, bò pa yo, t'ap mande Jezi pou l'
 manje. Yo t'ap di l': Tanpri, Mèt, manje kichòy non! 32 Men, li reponn yo: Mwen gen pou m' manje
 yon manje nou pa konnen. 33 Lè sa a, disip yo yonn pran mande lòt: Gen lè yon moun pote manje
 ba li. 34 Jezi di yo: Manje pa m', se fè volonte moun ki voye m' lan; se pou m' fin fè travay li ban
 m' fè a. 35 Nou menm, nou di: Nan kat mwa ankò nou pral fè rekòt. Mwen menm, mwen di nou:
 Gade jaden yo byen. Grenn yo fin mi, yo tou bon pou ranmase. 36 Yo gen tan peye moun k'ap
 ranmase rekòt la, l'ap anpile grenn yo pou lavi ki p'ap janm fini an. Se konsa, moun k'ap simen an
 kontan; moun k'ap ranmase a kontan tou ansanm avèk li. 37 Sa pawòl la di a, se vre wi: Moun ki
 simen an, se pa li ki ranmase. 38 Mwen voye nou ranmase nan yon jaden nou pa t' travay. Se lòt

moun ki te travay li. Men, se nou menm k'ap pwofite travay yo. ³⁹ Anpil moun Samari ki te rete
 nan Sika te kwè nan Jezi poutèt sa madanm lan te di yo: Li di m' tou sa m' fè. ⁴⁰ Se konsa, lè yo
 rive bò kote li, yo mande l' pou l' rete avèk yo. Jezi pase de jou nan lavil la. ⁴¹ Te gen anpil lòt
 moun ankò ki te kwè nan li, poutèt sa Jezi menm t'ap di yo. ⁴² Yo di fanm lan konsa: Koulye a nou
 kwè, se pa sèlman poutèt sa ou rakonte nou an, men tou paske nou tande l' nou menm ak de zòrèy
 nou. Nou konnen se li menm vre ki vin delivre moun sou latè. ⁴³ ¶ Lè Jezi fin pase de jou sa yo
 la, li pati, li ale nan peyi Galile. ⁴⁴ Paske, se Jezi menm ki te di: Yo pa janm respekte yon pwofèt
 nan peyi kote l' soti. ⁴⁵ Lè li rive nan Galile, moun Galile yo te byen resevwa l', paske yo menm
 tou yo te al lavil Jerizalèm pou fèt Delivrans lan, yo te wè tou sa li te fè lè sa a. ⁴⁶ Apre sa, Jezi
 tounen vin Kana nan Galile, kote li te fè dlo tounen diven an. Nan lavil la te gen yon gwo fonksyonè
 leta ki te gen yon pitit gason l' ki te malad nan yon lòt lavil yo rele Kapènawòm. ⁴⁷ Lè li vin konnen
 Jezi te soti peyi Jide vin nan peyi Galile, li al jwenn li, li mande l' pou li al Kapènawòm geri pitit
 li a ki te prèt pou mouri. ⁴⁸ Jezi di l' konsa: Si nou pa wè mirak ak bèl bagay, nou p'ap janm kwè.
⁴⁹ Fonksyonè a reponn li: Mèt, vin avè m' non, anvan pitit mwen an gen tan mouri. ⁵⁰ Jezi di li:
⁵¹ Ou mèt al lakay ou. Pitit ou a p'ap mouri. Nonm lan kwè sa Jezi te di l' la, li ale. Li te sou wout
 lakay li toujou lè domestik li yo vin jwenn li avèk nouvèl sa a: Pitit ou a pa mouri. ⁵² Li mande
 yo: Kilè ti gason an refè? Yo reponn li: Yè apre midi, bò enè konsa, lafyèb la tonbe. ⁵³ Papa a vin
 rekonèt se te lè sa a menm Jezi te di l': Pitit gason ou lan p'ap mouri. Se konsa li menm ansanm ak
⁵⁴ tout moun lakay li yo kwè nan Jezi. Sa te fè dezyèm mirak Jezi te fè lè l' tounen soti Jide vini
 nan peyi Galile.

Chapter 5

¹ ¶ Apre sa, jwif yo te gen yon fèt nan tanp lan. Jezi moute Jerizalèm. ² Nan lavil la, bò Pòtay
 Mouton yo, te gen yon gwo basen dlo yo te rele nan lang ebre: Betzata. Te gen senk pòt ki te bay
 sou li. ³ Devan pòt yo, te gen anpil moun ki te gen tout kalite maladi kouche la: gen sa ki te avèg,
 gen sa ki t'ap bwete, gen sa ki te paralyze. Yo tout yo t'ap tann lè dlo a pran bouyi. ⁴ Paske, tanzantan,
 yon zanj Bondye te desann nan basen an vin brase dlo a. Premye moun malad ki te desann nan dlo

a apre zanj lan te fin brase l' la te geri, nenpòt ki maladi li te genyen.⁵ Te gen yon nonm la ki te
 malad depi trantwitan.⁶ Jezi wè l' kouche. Li vin konnen li te malad depi tout tan sa a. Li mande
 li: Eske ou vle geri?⁷ Malad la reponn li: Mèt, mwen pa gen pesonn pou mete m' nan basen an lè
 dlo a ap bouyi. Lè mwen fè sa pou m' ale, yon lòt gen tan desann anvan mwen.⁸ Jezi di li: Leve
 non. Pran nat ou, mache ou ale.⁹ Menm lè a, nonm lan geri. Li ranmase nat li, li pran mache. Men,
 jou sa fèt la se te yon jou repo.¹⁰ Jwif yo di nonm ki te geri a: Jòdi a se jou repo. Lalwa nou an pa
 pèmèt pou w'ap pote nat ou jòdi a.¹¹ Li reponn yo: Se moun ki geri m' lan wi ki di m' ranmase nat
 mwen, mache m' ale.¹² Lè sa a, yo mande li: Kilès sa a ki di ou ranmase nat ou, mache ou ale a?
¹³ Men, nonm ki te geri a pa t' konnen ki moun li te ye, paske te sitèlman gen moun la, Jezi te gen
 tan pati al fè wout li.¹⁴ Pita, Jezi kontre nonm lan nan tanp lan. Li di li konsa: Koute non. Koulye
 a ou wè ou geri, pa fè peche, tande, pou bagay pi mal pa rive ou.¹⁵ Nonm lan al di jwif yo se Jezi
 ki te geri li.¹⁶ Se poutèt sa jwif yo tanmen pèsekite Jezi paske li te fè sa yon jou repo.¹⁷ ¶ Men,
 Jezi reponn yo: Se tout tan Papa m' ap travay. Mwen menm tou, m'ap travay.¹⁸ Poutèt pawòl sa
 a, jwif yo t'ap chache pi rèd atò pou yo te touye l'. Li pa t' sèlman fè bagay ki kont lalwa repo a,
 men li te di yo Bondye se papa li. Lè l' di sa, li te fè tèt li pase pou menm moun ak Bondye.¹⁹ Lè
 sa a, Jezi reponn yo: Sa m'ap di nou la a, se vre wi: Pitit Bondye a pa fè anyen pou kò li. Sa l' wè
 Papa a fè, se sa l' fè tou. Tou sa Papa a ap fè, Pitit la fè l' tou.²⁰ Papa a renmen Pitit la, li moutre
 l' tou sa li menm l'ap fè. Li gen pou l' moutre l' fè bagay ki pi estwòdenè pase sa. Lè sa a, nou p'ap
 manke sezi.²¹ Papa a fè moun mouri leve, li ba yo lavi ankò. Konsa tou, Pitit la bay moun li leve
 lavi.²² Papa a pa jije pesonn, men li bay Pitit la tout pouvwa pou jije.²³ Konsa, tout moun va gen
 respè pou Pitit la, menm jan yo gen respè pou Papa a. Moun ki pa respekte Pitit la, li pa gen respè
 pou Papa ki voye l' la non plis.²⁴ Sa m'ap di nou la a, se vre wi: Yon moun ki koute pawòl mwen,
 ki mete konfyans nan moun ki voye m' lan, l'ap gen lavi ki p'ap janm fini an. Yo p'ap kondannen
 li. Li deja soti nan lanmò, li antre nan lavi.²⁵ Sa m'ap di nou la a, se vre wi: Lè a ap rive, li rive
 deja: moun mouri yo pral tande vwa Pitit Bondye a. Tout moun mouri ki va tande vwa sa a pral
 gen lavi.²⁶ Papa a gen pouvwa pou l' bay lavi. Konsa tou, li bay Pitit la pouvwa pou bay lavi tou.
²⁷ Li bay Pitit la otorite pou jije, paske Pitit la, se Moun Bondye voye nan lachè a.²⁸ Nou pa bezwen

29
 sezi. Lè a pral rive: tout mò ki nan tonm pral tande vwa li, yo pral leve soti vivan nan tonm yo.
 Moun ki fè sa ki byen pral leve pou resevwa lavi ki p'ap janm fini an. Men, tout moun ki fè sa ki
 30
 mal pral leve pou resevwa kondannasyon yo. Mwen pa kapab fè anyen pou kò mwen. M'ap jije
 dapre sa Bondye di mwen. Jijman mwen bon paske sa m'ap chache fè a se pa sa m' vle, men sa
 31
 moun ki voye m' lan vle. ¶ Si m' pale tèt mwen byen, moun pa ka asepte sa m'ap di a pou verite.
 32
 Men, se yon lòt k'ap pale byen sou mwen. Mwen konnen sa l'ap di sou mwen an, se verite.
 33
 Nou te voye moun bò kot Jan. Li te di nou verite a jan l' ye a. 34 Mwen menm poutèt pa m',
 35
 mwen pa bezwen pesonn pale pou mwen. Men, mwen di nou sa pou nou kapab sove. Jan te
 tankou yon lanp yo limen ki klere byen bèl. Pou yon tan, nou te byen kontan pwofite limyè li a.
 36
 Men, pou mwen menm, mwen gen yon lòt bagay ki pale an favè m' ki pi bon toujou pase sa Jan
 te di sou mwen an. Se travay m'ap fè a, travay Papa m' ban m' fè a ki pale pou mwen. Sa fè wè se
 37
 Papa a ki voye mwen. Papa ki voye m' lan, li menm tou l'ap pale an favè mwen. Nou pa janm
 38
 tande vwa l', ni nou pa janm wè figi li. Nou pa kenbe pawòl li yo nan kè nou, paske nou pa kwè
 39
 nan moun li voye a. N'ap plede etidye sa ki ekri nan Liv la, paske nou mete nan tèt nou nou ka
 40
 jwenn lavi ki pa janm fini an ladan li. Men, se Liv sa a menm ki pale sou mwen. Malgre sa, nou
 41
 pa vle vin jwenn mwen pou nou ka gen lavi tout bon an. Mwen p'ap chache lwanj nan men
 42
 lèzòm. Men, mwen konnen ki moun nou ye: nou pa gen renmen pou Bondye nan kè nou. 43 Se
 Papa m' ki voye mwen. Men, nou pa vle resevwa mwen. Men, kite yon lòt moun vin pou kont li,
 44
 n'ap resevwa li. Nou renmen resevwa lwanj yonn nan men lòt, nou pa chache lwanj ki soti nan
 45
 men Bondye ki pa gen parèy la. Nan kondisyon sa a, ki jan pou nou kwè? Pa mete nan tèt nou
 mwen pral akize nou devan Papa mwen. Se Moyiz ki pral akize nou, Moyiz nou di ki tout espwa
 46
 nou an. Si nou te kwè tout bon nan Moyiz, nou ta kwè nan mwen tou, paske li ekri sou mwen
 47
 tou. Men, nou pa kwè nan sa l' te ekri a. Ki jan pou n' ta fè kwè sa m'ap di nou an?

Chapter 6

1 ¶ Apre sa, Jezi janbe lòt bò lanmè Galile a. Yo rele lanmè sa a lanmè Tiberyad tou. 2 Yon
 gwo foul moun t'ap swiv li, paske yo te wè mirak li t'ap fè, jan li t'ap geri anpil moun malad tou.

³ Jezi moute sou yon ti mòn, li chita la ansanm ak disip li yo. ⁴ Jou fèt Delivrans jwif yo te vanse rive. ⁵ Jezi gade, li wè yon gwo foul moun ki t'ap vin jwenn li. Li rele Filip, li di l' konsa: Ki bò nou ta ka jwenn manje pou n' achte pou n' bay moun sa yo manje? ⁶ (Li t'ap di sa pou l' te wè sa Filip tapral reponn li; li menm li te byen konnen sa l' tapral fè.) ⁷ Filip reponn li: Menm si nou ta gen desan (200) goud pou achte pen, pa ta gen ase pou chak moun ta jwenn ti kal. ⁸ Yon lòt nan disip yo, Andre, frè Simon Pyè a, di li: ⁹ Gen yon ti gason la a ki gen senk pen fèt ak farenn lòj, ak de ti pwason. Men, sa pa anyen pou tout kantite moun sa yo. ¹⁰ Lè sa a, Jezi di yo: Fè moun yo chita. (Te gen anpil zèb bò la.) Moun yo chita, te gen senkmil (5.000) gason konsa. ¹¹ Jezi pran pen yo; lè li fin di Bondye mèsè pou yo, li bay tout moun ki te chita yo. Li fè menm jan an tou ak pwason yo. Yo tout te jwenn kantite yo te vle. ¹² Lè tout fin manje vant plen, Jezi di disip li yo: Ranmase tout ti moso ki rete yo. Pa kite anyen gaspiye. ¹³ Yo ranmase tout moso ki te rete nan senk pen moun yo te manje yo. Yo plen douz panyen pote ale. ¹⁴ Lè moun yo wè mirak Jezi te fè a, yo di konsa: Se vre wi, nonm sa a se pwofèt ki te gen pou vini sou latè a. ¹⁵ ¶ Jezi te vin konnen yo tapral pran l' pa fòs pou yo fè l' wa. Li wete kò l' ankò sou ti mòn lan, men fwa sa a pou kont li. ¹⁶ Lè solèy fin kouche, disip li yo desann bò lanmè a. ¹⁷ Yo moute nan yon kannòt, yo pran travèse lanmè a nan direksyon Kapènawòm. Te fin fè nwit nèt, men Jezi pa t' ankò vin jwenn yo. ¹⁸ Dlo lanmè a te move paske van an te fò. ¹⁹ Yo te gen tan naje zaviwon senk a sis kilomèt konsa deja, lè yo wè Jezi ki t'ap vin bò kannòt la. Li t'ap mache sou dlo a. Yo tout te pè. ²⁰ Men, Jezi di yo: Se mwen menm. Nou pa bezwen pè. ²¹ Yo te vle pran l' nan kannòt la, men lamenm yo fè tè: yo te gen tan rive kote yo taprale a. ²² ¶ Nan denmen, foul moun ki te rete lòt bò lanmè a te wè te gen yon sèl kannòt ase. Yo te konnen Jezi pa t' moute nan kannòt la avèk disip li yo. Disip li yo te pati pou kont yo. ²³ Men, te gen lòt kannòt ki te soti lavil Tiberyad ki te rive bò kote yo te manje pen an apre Seyè a te di Bondye mèsè a. ²⁴ Lè foul moun yo wè ni Jezi, ni disip li yo pa t' la, yo moute nan kannòt sa yo, y' al chache l' lavil Kapènawòm. ²⁵ Yo jwenn Jezi lòt bò lanmè a. Yo di li: Mèt, kilè ou gen tan rive isit la? ²⁶ Jezi reponn yo: Sa m'ap di nou la a, se vre wi: Se pa paske nou wè mirak mwen fè yo non kifè n'ap chache m' konsa. Se paske nou manje pen plen vant nou. ²⁷ Pa travay pou manje k'ap gate! Travay pito pou manje k'ap konsève, manje k'ap bay lavi ki p'ap janm

fini an. Kalite manje sa a, se Moun Bondye voye nan lachè a ki va ban nou l', paske se pou sa
 Bondye Papa a voye li. ¶ Lè sa a, yo mande li: Kisa pou n' fè si nou vle fè travay Bondye?
 29 Jezi reponn yo: Sèl travay Bondye mande nou pou n' fè, se pou nou mete konfyans nou nan moun
 li voye a. 30 Yo di li: Ki mirak ou ka fè nou wè pou nou ka kwè nan ou? Kisa ou pral fè? 31 Zansèt
 nou yo te manje laman nan dezè a, jan sa ekri nan Liv la: Li ba yo pen ki soti nan syèl la pou yo
 manje. 32 Jezi reponn yo: Sa m'ap di nou la a, se vre wi: Moyiz pa t' ban nou pen ki soti nan syèl
 la. Men, se Papa m' k'ap ban nou pen ki soti nan syèl tout bon an. 33 Paske pen Bondye bay la, se
 moun ki desann sot nan syèl la pou bay lèzòm lavi. 34 Yo di li: Mèt, toujou ban n' nan kalite pen
 sa a. 35 Jezi di yo: Se mwen menm pen ki bay lavi a. Moun ki vin jwenn mwen p'ap janm grangou;
 moun ki kwè nan mwen p'ap janm swaf dlo. 36 Men, mwen te di nou sa: nou wè m', men nou pa
 kwè toujou. 37 Tout moun Papa a ban mwen, gen pou vin jwenn mwen. Mwen p'ap janm mete
 moun ki vin jwenn mwen yo deyò. 38 Paske, se pa pou fè volonte pa m' mwen desann sot nan syèl
 la, men pou m' fè volonte moun ki voye m' lan. 39 Men sa moun ki voye m' lan vle: li vle pou m'
 pa pèdi yonn nan moun li ban mwen yo, men pou m' fè yo leve soti vivan nan lanmò nan dènye
 jou a. 40 Men sa Papa m' vle: Tout moun ki wè Pitit la, ki kwè nan li, se pou yo gen lavi ki p'ap
 janm fini an. Mwen gen pou m' fè yo leve soti vivan nan lanmò nan dènye jou a. 41 Jwif yo te fache
 anpil sou Jezi poutèt li te di: Se mwen menm ki pen ki desann sot nan syèl la. 42 Yo t'ap di: Apa
 Jezi, pitit gason Jozèf la? Nou konn papa l' ak manman li. Ki jan li ka fè di koulye a li desann sot
 nan syèl la? 43 Jezi reponn yo: Nou pa bezwen ap bougonnen konsa. 44 Pesonn pa ka vin jwenn
 mwen si Papa ki voye m' lan pa rele l' vini. Mwen menm, m'a fè l' leve soti vivan nan lanmò nan
 dènye jou a. 45 Se sa ki ekri nan liv pwofèt yo: Bondye menm ap moutre yo tout bagay. Tout moun
 ki koute Papa a, ki asepte tou sa l' moutre yo, y'ap vin jwenn mwen. 46 Sa pa vle di gen pesonn ki
 janm wè Papa a. Sèl moun ki wè Papa a, se moun ki soti bò kote Bondye ye a. 47 Sa m'ap di nou
 la a, se vre wi: moun ki mete konfyans yo nan Bondye, se yo ki gen lavi ki p'ap janm fini an. 48 Se
 mwen menm pen ki bay lavi a. 49 Zansèt nou yo te manje laman nan dezè a, atousa yo mouri.
 50 Men, moun ki manje pen ki desann sot nan syèl la, yo p'ap janm mouri. 51 Se mwen menm pen
 ki bay lavi a, pen ki desann sot nan syèl la. Si yon moun manje nan pen sa a, l'ap viv pou tout tan.

Pen mwen gen pou m' bay la, se kò mwen. M'ap bay li pou tout moun ki sou latè ka jwenn lavi.

52

Pawòl sa yo fè jwif yo tonbe diskite yonn ak lòt. Yo t'ap mande: Kouman nonm sa a kapab ban nou kò l' pou n' manje? ⁵³ Jezi di yo: Sa m'ap di nou la a, se vre wi: si nou pa manje kò Moun

Bondye voye nan lachè a, si nou pa bwè san li, nou p'ap gen lavi nan nou. ⁵⁴ Moun ki manje kò mwen, ki bwè san mwen, li gen lavi ki p'ap janm fini an. Mwen gen pou m' fè l' leve soti vivan nan

lanmò nan dènye jou a. ⁵⁵ Paske kò m', se yon manje tout bon, san mwen, se yon bwason tout bon.

⁵⁶ Moun ki manje kò m', ki bwè san m', y'ap fè yonn avè m', epi m'ap fè yonn avè yo tou. ⁵⁷ Papa ki voye m' lan, li vivan. Se li menm ki ban m' lavi. Konsa tou, moun ki manje m', m'a ba yo lavi.

58 Men pen ki desann sot nan syèl la. Li pa tankou pen zansèt nou yo te manje a, paske pen yo a

pa t' anpeche yo mouri. Moun ki manje pen sa a ap viv pou tout tan. ⁵⁹ Jezi te di pawòl sa yo antan

l' te nan sinagòg Kapènawòm lan ap moutre moun yo anpil bagay. ⁶⁰ ¶ Lè yo fin tande sa, anpil

nan disip Jezi yo di: Pawòl sa a twò rèd. Ki moun ki ka pran li? ⁶¹ Jezi te gen tan wè disip li yo

t'ap bougonnen sou pawòl la. Li di yo: Sa ofiske nou, pa vre? ⁶² Kisa n'a di lè n'a wè Moun Bondye

voye nan lachè a tounen moute kote l' te ye anvan an? ⁶³ Se lespri a ki bay lavi, kò a pa vo anyen.

Pawòl mwen di nou yo soti nan Lespri Bondye, yo bay lavi. ⁶⁴ Men, gen kèk moun pami nou ki pa kwè. (Jezi te pale konsa, paske depi nan konmansman li te konnen moun ki pa t'ap kwè yo

ansanm ak moun ki te gen pou trayi l' la.) ⁶⁵ Li di ankò: Se poutèt sa mwen te di nou: pesonn pa

ka vin jwenn mwen si se pa Bondye Papa a ki fè sa pou li. ⁶⁶ Depi lè sa a, anpil nan disip yo wete

kò yo, yo pa mache avè l' ankò. ⁶⁷ Lè Jezi wè sa, li di douz disip yo: Nou menm, nou pa vle ale

tou? ⁶⁸ Simon Pyè reponn li: Seyè, ki moun pou n' al jwenn? Se ou menm ki gen pawòl k'ap bay

lavi ki p'ap janm fini an. ⁶⁹ Koulye a nou kwè, nou konnen se ou menm ki moun Bondye chwazi

a. ⁷⁰ Jezi reponn yo: Eske se pa mwen ki chwazi nou touledouz? Malgre sa, yonn nan nou se yon

dyab. ⁷¹ Li t'ap pale sou Jida, pitit Simon Iskariòt la. Paske, atout Jida te yonn nan douz disip yo, se li ki tapral trayi li.

Chapter 7

¹ ¶ Apre sa, Jezi t'ap mache toupatou nan peyi Galile, li pa t' vle ale nan peyi Jide menm, paske
² jwif yo t'ap chache touye li. ³ Jou fèt Joupa jwif yo te pre rive. ⁴ Frè Jezi yo di l' konsa: Pa rete bò
⁵ isit la. Ale nan Jide non. Konsa, disip ou yo va wè travay w'ap fè. ⁶ Yon moun ki vle pou tout moun
⁷ konnen l' pa dwe travay an kachèt. Avèk travay w'ap fè a, se pou ou kite tout moun wè ou. (Men,
⁸ frè l' yo pa t' kwè nan li.) ⁹ Jezi di yo konsa: Lè pa m' lan poko sonnen. Pou nou, tout lè yo bon.
¹⁰ Moun k'ap viv dapre prensip ki nan lemonn pa ka rayi nou. Men, mwen menm yo rayi m' paske
¹¹ mwen di sa y'ap fè a pa bon. ¹² Nou mèt al nan fèt la. Mwen menm, mwen pa prale. Paske, lè pa m'
¹³ lan poko rive. ¹⁴ Apre li fin di yo sa, li rete rete l' nan peyi Galile. ¹⁵ Apre frè l' yo fin pati al nan
¹⁶ fèt la, Jezi ale tou, men an kachèt. Li pa t' kite pesonn wè li. ¹⁷ Jwif yo menm t'ap chache l' pandan
¹⁸ tout fèt la. Yo t'ap di: Kote l' ye konsa? ¹⁹ Nan tout foul moun yo, yo t'ap pale nan zòrèy sou li
²⁰ anpil. Gen moun ki t'ap di: Se yon nonm debyen wi. Gen lòt ki t'ap di: Non, se pete l'ap pete moun.
²¹ Men, pesonn pa t' nonmen non l' fò pou lòt moun pa t' tande, sitèlman yo te pè jwif yo. ²² ¶ Te
²³ rete kat jou ankò pou fèt la te fini, lè Jezi al nan tanp lan. Li kòmanse pale. ²⁴ Jwif yo pa t' manke
²⁵ sezi. Yo t'ap di: Ki jan nonm sa a fè konnen tout bagay sa yo? Li pa janm al lekòl. ²⁶ Jezi reponn
²⁷ yo: Bagay m'ap moutre nou la a, se pa nan mwen yo soti. Yo soti nan Bondye ki voye m' lan. ²⁸ Si
²⁹ yon moun deside fè sa Bondye vle, la konnen si bagay m'ap moutre yo soti nan Bondye osinon si
³⁰ se pawòl pa m' m'ap pale. ³¹ Yon moun k'ap pale pawòl pa l', se chache l'ap chache fè lwanj tèt li.
³² Men, moun k'ap travay pou sa sèvi yon lwanj pou moun ki voye l' la, se verite a pou l' di. Pa gen
³³ riz nan li. ³⁴ Moyiz te ban nou Lalwa a, pa vre? Men, nou yonn pa obeyi Lalwa. Poukisa n'ap
³⁵ chache touye mwen? ³⁶ Foul moun yo reponn li: Gen lè ou gen yon move lespri sou ou? Ki moun
³⁷ k'ap chache touye ou la a? ³⁸ Jezi reponn yo: Mwen fè yon sèl bagay, epi nou tout nou sezi pou
³⁹ sa! ⁴⁰ Moyiz ban nou lòd pou nou sikonsi tout ti gason, epi nou dakò pou yo sikonsi yon moun
⁴¹ gwo jou repo a. (Men, kite m' di nou: se pa t' Moyiz ki te kòmanse ak sikonsizyon an non, se te
⁴² zansèt nou yo.) ⁴³ Si nou ka sikonsi yon ti gason jou repo a pou n' ka fè sa Lalwa Moyiz la mande
⁴⁴ a, pa gen rezon pou n' ankòlè sou mwen si m' geri yon moun ki te malad nan tout kò l', yon jou
⁴⁵ repo. ⁴⁶ Pa jije sou laparans. Jije dapre sa ki dwat. ⁴⁷ Lè sa a, te gen kèk moun Jerizalèm ki t'ap
⁴⁸ di: Apa nonm y'ap chache touye a? ⁴⁹ Gade l'ap pale lib devan tout moun, yo pa di l' anyen. Gen

27
 lè chèf nou yo rekonèt se Kris la vre li ye! Men, yo toujou di lè Kris la va rive, pesonn p'ap
 28
 konnen ki bò l' soti. Men nonm sa a, nou konnen ki bò l' soti. Jezi t'ap moutre moun yo anpil
 bagay nan tanp lan. Li di yo byen fò: Nou rekonèt mwen? Nou konnen ki bò m' soti? Se pa mwen
 29
 ki fè lide pou m' vini non. Moun ki voye m' lan, li la tout bon. Men, nou pa konnen li. Mwen
 30
 menm, mwen konnen l', paske se bò kote l' mwen soti. Se li menm ki voye mwen. Lè sa a, yo
 31
 t'ap chache arete l', men pesonn pa t' mete men sou li paske lè l' pa t' ankò rive. Atousa, te gen
 anpil moun nan foul pèp la ki te kwè nan li. Yo t'ap di: Lè Kris la va vini, èske la fè plis mirak pase
 32
 nonm sa a? Farizyen yo vin konnen sa yo t'ap di nan zòrèy sou Jezi nan pèp la. Chèf prèt yo
 33
 ansanm ak farizyen yo voye kèk gad pou arete Jezi. Jezi di konsa: Se pou yon ti tan ankò mwen
 34
 la ak nou. Apre sa, mwen pral jwenn moun ki voye m' lan. N'a chache m', men nou p'ap jwenn
 35
 mwen, paske nou p'ap ka vini kote m' prale a. Jwif yo yonn t'ap mande lòt: Ki bò l' prale menm
 pou nou pa kapab jwenn li? Eske li pral menm kote ak jwif ki gaye nan mitan moun Lagrès yo pou
 36
 l' moutre moun Lagrès yo anpil bagay? L'ap plede di: N'a chache m', men nou p'ap jwenn mwen.
 37
 Nou pa ka vini kote mwen prale a. Kisa sa vle di menm? ¶ Dènye jou fèt la, se li ki te pi enpòtan.
 Jou sa a, Jezi kanpe devan foul moun yo, li di yo byen fò: Si yon moun swaf dlo, li mèt vin jwenn
 38
 mwen, li mèt vin bwè. Moun ki mete konfyans yo nan mwen, y'ap wè gwo kouran dlo k'ap bay
 39
 lavi koule soti nan kè yo, jan sa ekri nan Liv la. (Jezi t'ap pale ki jan moun ki kwè nan li yo
 tapral resevwa Sentespri. Lè sa a, Sentespri pa t' ankò desann sou pesonn, paske Jezi pa t' ankò
 40
 moute nan syèl la.) Te gen kèk moun nan foul pèp la, lè yo fin tande pawòl sa yo, yo t'ap di
 41
 konsa: Se vre wi. Nonm sa a, se pwofèt la! Gen lòt ki t'ap di: Se Kris la. Gen lòt ankò ki t'ap di:
 42
 Men, Kris la pa ka soti nan peyi Galile. Liv la di: Kris la, se yon pitit pitit David la ye. Se
 43
 Betleyèm li gen pou l' soti, lavil kote David te pase tout lavi li a. Te vin gen divizyon nan mitan
 44
 foul moun yo poutèt Jezi. Gen ladan yo ki te vle arete l', men pesonn pa t' mete men sou li. ¶
 45
 Lè gad yo tounen vin jwenn yo, chèf prèt yo ak farizyen yo mande yo: Poukisa nou pa mennen l'
 46
 ban nou? Gad yo reponn: Nou poko janm wè yon nonm ki pale tankou nonm sa a. Farizyen
 47
 yo di: Gen lè nou kite l' pran tèt nou tou? Eske nou wè gen yon sèl nan chèf nou yo osinon nan
 48
 farizyen yo ki kwè nan li? Moun sa yo gen lè pa konn lalwa Moyiz la. Se moun ki gen madichon!
 49

50

Nikodèm te yonn nan farizyen ki te la yo. Se menm Nikodèm sa a ki te al wè Jezi kèk jou pase.

Li di yo konsa: ⁵¹ Dapre Lalwa nou, nou pa ka jije yon moun san nou pa tandè l' anvan, san nou pa konnen sa l' fè. ⁵² Yo reponn li: Gen lè, ou menm tou, ou se moun Galile? Al etidye sa ki ekri nan Liv la, wa wè pa gen pwofèt ki janm soti nan peyi Galile. ⁵³ Apre sa, tout moun al lakay yo.

Chapter 8

¹ ¶ Jezi menm ale mòn Oliv. ² Nan denmen maten, byen bonè, li tounen nan tanp lan. Tout foul moun yo pwoche bò kote li. Li chita, li pran moutre yo anpil bagay. ³ Dirèktè lalwa yo ak farizyen yo mennen yon fanm ba li. Yo te bare fanm lan nan adiltè. Yo mete l' kanpe devan tout foul moun yo, ⁴ epi yo di Jezi konsa: Mèt, yo kenbe fanm sa a nan men ap fè adiltè. ⁵ Moyiz te bay lòd nan lalwa a pou yo touye yo lè konsa ak kout wòch. Men, ou menm, kisa ou di nan sa? ⁶ Yo t'ap di sa, paske yo te vle pran l' nan pèlen pou yo te ka akize li. Men, Jezi bese atè. Epi, avèk dwèt li, li kòmanse ekri atè a. ⁷ Men, moun yo t'ap kouvri l' ak keksyon. Jezi leve atè a, li di yo: Se pou moun ki konnen li pa janm peche a ba l' premye kout wòch la. ⁸ Apre sa, li bese atè a yon dezyèm fwa, li pran ekri ankò. ⁹ Lè yo tandè pawòl sa yo, yonn apre lòt y' al fè wout yo. Premye moun ki te mete deyò se te sak te pi granmoun yo. Jezi rete pou kont li ak fanm lan ki te kanpe devan l'. ¹⁰ Lè sa a, li leve, li di fanm lan: Madanm, kote moun yo? Pesonn pa kondannen ou? ¹¹ Li reponn: Pesonn non, Mèt. Jezi di li: Mwen menm tou, mwen pa kondannen ou. Ou mèt ale. Men, pa janm fè peche ankò. ¹² ¶ Jezi pale ankò ak foul moun yo, li di: Se mwen menm ki limyè k'ap klere tout moun ki sou latè. Moun ki swiv mwen va gen limyè ki bay lavi a. Yo p'ap janm mache nan fènwa. ¹³ Farizyen yo di li: Apa w'ap pale tèt pa ou byen? Sa w'ap di la a pa gen valè. ¹⁴ Jezi reponn yo: Menm si mwen t'ap pale tèt mwen byen, sa m'ap di a se verite, paske mwen konnen ki bò m' soti, mwen konnen ki bò m' prale. Men, nou menm, nou pa konnen ni ki bò m' soti, ni ki bò m' prale. ¹⁵ Nou menm, n'ap jije tankou lèzòm jije. Men, mwen menm mwen pa jije pesonn. ¹⁶ Mentou, si yon lè mwen gen pou m' jije, m'ap jije byen dapre verite a, paske mwen p'ap jije pou kont mwen. Papa ki voye m' lan ap la avèk mwen. ¹⁷ Nou jwenn sa ekri nan Lalwa nou an tou: Lè de temwen fè menm

18 depozisyon an, sa yo di a vre. Mwen sèvi temwen pou tèt pa m'; Papa a ki voye m' lan sèvi m'
 19 temwen tou. Yo mande li: Kote papa ou? Jezi reponn yo: Nou pa konnen mwen, nou pa konn
 20 Papa mwen. Si nou te konnen m', nou ta konnen Papa m' tou. Jezi te nan tanp lan, kote yo mete
 21 bwat pou fè ofrann yo. Se la li t'ap di yo tout pawòl sa yo, li t'ap moutre moun yo anpil lòt bagay
 ankò. Men, pesonn pa t' mete men sou li, paske lè l' pa t' ankò rive. ¶ Jezi di yo ankò: Mwen
 22 pral fè wout mwen. N'a chache m', men n'a mouri nan peche nou yo. Nou pa ka ale kote m' prale a.
 23 Jwif yo yonn di lòt: Gen lè li pral touye tèt li? Tande sa l'ap di: Nou pa ka ale kote l' prale a.
 24 Jezi reponn yo: Nou soti anba, mwen menm mwen soti anwo. Nou se moun tè sa a, mwen menm
 mwen pa moun tè sa a. Se poutèt sa mwen di nou, n'ap mouri nan peche nou. Wi, nou gen pou
 25 n' mouri nan peche nou si nou pa kwè mwen se moun mwen ye a. Yo mande li: Ki moun ou ye?
 26 Jezi reponn yo: Sa m' te di nou depi nan konmansman an. Mwen gen anpil bagay pou m' di sou
 nou, anpil bagay menm pou m' jije nan nou. Men, moun ki voye m' lan, se verite ase li di. Se sèlman
 27 sa m' pran nan bouch li m'ap anonse bay lèzòm ki sou latè. Yo pa t' konprann se sou Papa a li
 28 t'ap pale yo. Jezi di yo ankò: Lè n'a leve Moun Bondye voye nan lachè a byen wo, n'a konnen
 se mwen menm ki li menm. Lè sa a, n'a konnen mwen pa fè anyen pou kont mwen. Se sèlman
 29 sa Papa a moutre m' mwen di. Moun ki voye m' lan la avèk mwen. Li pa kite m' pou kont mwen
 30 paske mwen toujou fè sak fè l' plezi. Anpil moun ki te tand Jezi pale konsa te kwè nan li. ¶
 31 Jezi di jwif ki te kwè nan li yo: Si nou kenbe pawòl mwen yo nan kè nou, nou se disip mwen vre.
 32 N'a konnen verite a, lè sa a verite a va ban nou libète nou. Yo di li: Nou se pitit pitit Abraram.
 34 Nou pa janm esklav pesonn. Ki jan ou ka fè di nou: N'a gen libète nou? Jezi reponn yo: Sa m'ap
 35 di nou la a, se vre wi: Tout moun ki fè peche, se esklav peche yo ye. Yon esklav pa fè pati moun
 36 kay la pou tout tan. Men, yon pitit fè pati moun kay la pou tout tan. Si Pitit Bondye a ban nou
 37 libète, n'a lib tout bon. Wi, mwen konnen se pitit pitit Abraram nou ye vre. Men, n'ap chache
 38 touye m' paske nou pa asepte sa m'ap moutre nou. ¶ M'ap di nou sa Papa m' moutre mwen. Men
 39 nou menm, n'ap fè sa papa pa nou di nou fè. Yo reponn li: Men, papa nou se Abraram. Jezi di
 40 yo: Si nou te pitit Abraram tout bon, nou ta fè sa li menm li te fè. Gade koulye a, m'ap di nou
 verite a jan Bondye te moutre m' li, atousa n'ap chache touye mwen. Abraram pa janm fè bagay

41
 konsa. Men nou menm, n'ap fè sa papa nou ap fè. Yo reponn li: Nou pa pitit deyò non. Nou gen
 yon sèl papa, se Bondye. 42
 Jezi di yo: Si Bondye te papa nou vre, nou ta renmen mwen. Paske,
 mwen soti bò kot Bondye. Se li menm ki voye m' isit la. Mwen pa vini pou kont mwen. Se li menm
 43
 menm ki voye mwen. Poukisa nou pa konprann sa m'ap di nou la a? Paske nou pa kapab tande
 44
 pawòl mwen yo. Se Satan ki papa nou. Se sak fè nou vle fè sa papa nou vle. Depi nan
 konmansman se sa ase l'ap fè: touye moun. Li pa janm pran pozisyon pou verite a paske pa gen
 verite menm nan li. Depi l' louvri bouch li, se manti l'ap bay paske sè mantò li ye. Se papa nan bay
 45
 manti li ye. Men mwen menm, mwen pale verite a. Se poutèt sa nou pa vle kwè mwen. ¶ 46
 Kilès nan nou ki ka bay prèv mwen fè peche? Si sa m' di a se vre, poukisa nou pa kwè mwen?
 47
 Tout moun ki moun Bondye, yo koute pawòl Bondye. Men nou menm, nou pa moun Bondye.
 48
 Se sak fè nou pa vle koute. Jwif yo reponn li: Nou te gen rezon lè n' t'ap di se moun Samari ou
 49
 ye. Ou gen yon move lespri sou ou. Jezi di yo: Mwen pa gen okenn move lespri sou mwen. M'ap
 50
 fè respe Papa mwen. Men nou menm, se derespekte n'ap derespekte mwen. Mwen p'ap chache
 51
 lwanj pou tèt pa mwen. Gen yon moun k'ap chache l' pou mwen. Se li menm tou k'ap jije nou. ¶
 52
 Sa m'ap di nou la a, se vre wi: moun ki fè tou sa mwen di l' fè, li p'ap janm mouri. Jwif yo di li:
 Koulye a, nou sèten ou gen yon move lespri sou ou. Abraram mouri. Pwofèt yo mouri tou. Epi ou
 53
 menm, w'ap di: O wi, moun ki fè tou sa m' di l' fè, li p'ap janm mouri. Abraram ki Abraram
 zansèt nou, li mouri. Koulye a, ou prèt pou di nou ou pi gran pase li? Pwofèt ki pwofèt yo mouri.
 54
 Sa ou konprann ou ye menm? Jezi reponn yo: Si m' t'ap fè lwanj tèt mwen, lwanj sa a pa ta vo
 55
 anyen. Moun k'ap fè lwanj mwen se Papa m', moun nou pretann di ki Bondye nou an. Nou pa
 konnen li. Men mwen menm, mwen konnen li. Si pou m' ta di mwen pa konnen li, mwen ta bay
 56
 manti tankou nou. Men, mwen konnen l' epi m'ap fè tou sa li di m' fè. Abraram papa nou te
 57
 kontan, paske li te anvè wè jou m' lan rive. Li wè li. Sa te fè kè l' kontan nèt. Jwif yo di li: Ou
 58
 poko gen senkantan, epi w'ap di ou te wè Abraram? Jezi reponn yo: Sa m'ap di nou la a, se vre
 59
 wi: Abraram pa t' ankò fèt, mwen menm, mwen te la deja. Lè sa a, yo ranmase wòch pou kalonnen
 li. Men, Jezi kache kò l' yon kote epi li soti nan tanp lan.

Chapter 9

¹ ¶ Jezi t'ap pase yon kote konsa lè l' wè yon nonm ki te avèg depi li te fèt. ² Disip li yo mande li: Mèt, poukisa nonm sa a te fèt tou avèg en? Se peche pa l' osinon peche manman l' ak papa l' ki lakòz sa? ³ Jezi reponn yo: Se pa ni peche pa l' ni peche manman l' ak papa l' ki lakòz sa. Li fèt avèg, se pou moun ka wè sa pouvwa Bondye a ka fè nan li. ⁴ Toutotan fè klè toujou, se pou m' fè travay moun ki voye m' lan ban m' fè a. Talè konsa pral fè nwit, pesonn p'ap ka travay. ⁵ Toutotan mwen la sou latè, mwen se limyè k'ap klere tout moun ki sou latè. ⁶ Apre li fin di pawòl sa yo, Jezi krache atè, li fè yon ti labou ak krache a, li fwote je nonm lan avèk labou a. ⁷ Li di l' konsa: Al lave figi ou nan gwo basen Siloe a. (Mo Siloe sa a vle di: Moun yo te voye a.) Avèg la ale, li lave figi li. Lè l' tounen, li te ka wè nan tou de je l' yo. ⁸ ¶ Moun ki te rete bò lakay li yo ansanm ak tout moun ki te konn wè l' ap mande charite anvan sa, yo tout t'ap di: Apa nonm ki te konn chita ap mande charite a! ⁹ Gen moun ki t'ap di: Se li menm wi. Gen lòt ki t'ap di tou: Non. Se pa li. Men, li sanble l' anpil. Lè sa a nonm lan di yo: Se mwen menm menm. ¹⁰ Yo mande li: Ki jan ou fè wè nan je ou yo? ¹¹ Li reponn yo: Nonm yo rele Jezi a fè yon ti labou, li fwote je m' ak labou a, epi li di m' al lave figi m' nan basen Siloe a. m' ale. Lè m' fin lave figi m', mwen wè m' wè. ¹² Yo mande li: Kote nonm sa a? Li reponn yo: Mwen pa konnen non. ¹³ ¶ Yo pran nonm ki te avèg la, yo mennen l' bay farizyen yo. ¹⁴ Se te yon jou repo Jezi te fè labou a pou louvri je l' yo. ¹⁵ Se poutèt sa, farizyen yo tou, yo mande nonm lan sak te pase ki te fè l' ka wè koulye a. Li di yo: Li mete ti kras labou sou je m' yo, lèfini mwen lave figi mwen. Se konsa, koulye a mwen wè. ¹⁶ Te gen de twa nan farizyen yo ki t'ap di: Nonm ki fè sa a pa ka soti nan Bondye. Li pa obeyi lalwa repo a. Men, gen lòt ki t'ap di: Ki jan yon nonm k'ap fè sa ki mal kapab fè yon mirak konsa? Te vin gen divizyon nan mitan yo. ¹⁷ Farizyen yo mande nonm ki te avèg la: Ou menm, dapre ou, nonm ki louvri je ou yo, ki moun li ye? Li reponn: Se yon pwofèt li ye. ¹⁸ Men, jwif yo pa t' vle kwè li te avèg anvan sa. Yo fè chache papa l' ak manman l' pou poze yo kekzyon. ¹⁹ Yo mande yo: Eske nonm sa a se pitit gason nou an vre? Eske se vre li te fèt avèg? Sak pase l' ki fè li wè koulye a? ²⁰ Papa a ak manman an reponn yo: Nou konnen se pitit gason nou li ye, li te fèt avèg. ²¹ Men, nou pa konnen sak pase l' ki fè l' wè koulye a. Nou pa konnen tou ki moun ki louvri je li. Nou mèt mande li. li ase gran konsa. Li ka reponn li menm. ²² Papa a ak manman an te pale konsa paske yo te pè jwif yo. Paske, jwif yo te tonbe dakò sou pwèn sa a: Tout moun ki ta di Jezi se Kris la, yo t'ap mete yo deyò nan sinagòg la. ²³ Se poutèt sa papa l' ak manman l' te di: li ase gran, li ka reponn

li menm. Nou mèt mande li. ²⁴ Farizyen yo rele nonm ki te avèg la yon dezyèm fwa. Yo di li: Di verite a devan Bondye. Nou konnen nonm sa a se yon nonm k'ap fè sa ki mal. ²⁵ Li reponn yo: Mwen pa konnen si se yon moun k'ap fè sa ki mal osinon sa ki byen. Yon sèl bagay mwen konnen: mwen te avèg, koulye a mwen wè. ²⁶ Yo mande li: Men, kisa l' te fè? Ki jan l' te fè pou louvri je ou yo? ²⁷ Li reponn yo: Mwen deja di nou ki jan, men nou pa t'ap koute. Poukisa nou vle m' redi l' ankò? Gen lè, nou menm tou, nou ta renmen tounen disip li? ²⁸ Yo joure l', yo di l' konsa: Se ou menm ki disip li! Nou menm, nou se disip Moyiz. ²⁹ Nou konnen Bondye te pale ak Moyiz. Men, li menm, nou pa menm konnen ki bò l' soti. ³⁰ Nonm lan reponn yo: Ala bagay dwòl en! Nou pa konnen ki bò l' soti? Epi, se li menm ki louvri je m' yo! ³¹ Nou tout nou konnen sa: Bondye pa tande lè se yon moun k'ap fè sa ki mal ki pale avè li. Men, se pa menm bagay lè se yon moun ki respekte l', yon moun ki fè volonte l' k'ap pale avè li. ³² Nou poko janm tande yo fè yon moun ki fèt avèg wè. ³³ Si nonm sa a pa t' soti nan Bondye, li pa ta ka fè anyen. ³⁴ Yo reponn li: Se nan peche ou fèt, epi ou konprann pou ou vin ban nou leson koulye a? Epi yo mete l' deyò nan sinagòg la. ³⁵ ¶ Jezi te vin konnen yo te mete nonm ki te avèg la deyò nan sinagòg la. Lè li kontre avè l', li di l' konsa: Eske ou kwè nan Moun Bondye voye nan lachè a? ³⁶ Nonm lan reponn li: Mèt, di m' ki moun li ye pou m' ka kwè nan li? ³⁷ Jezi reponn li: Apa w'ap gade li! Se li menm k'ap pale avè ou la a wi. ³⁸ Nonm lan di: Seyè, mwen kwè. Epi li tonbe ajenou devan Jezi. ³⁹ ¶ Lè sa a, Jezi di: Mwen vin sou tè a pou yon jijman: Moun ki avèg yo pral wè. Men moun ki wè yo pral tounen avèg. ⁴⁰ Te gen kèk farizyen la avèk li. Lè yo tande pawòl sa yo, yo mande l': Eske nou menm tou, nou avèg? ⁴¹ Jezi reponn yo: Si nou te avèg, nou pa ta koupab. Men, n'ap plede di nou wè, nou wè. Se poutèt sa nou antò toujou.

Chapter 10

¹ ¶ Sa m'ap di nou la a, se vre wi: Moun ki pa pase nan pòt la pou antre nan pak mouton an, men ki eskalade lantouraj la pou antre nan pak la yon lòt kote, moun sa a se yon vòlè, yon piyajè. ² Men, moun ki pase nan pòt la, se gadò mouton yo li ye. ³ Moun k'ap veye pòt la louvri l' pou li. Tout mouton yo rekonèt vwa li. Li rele tout mouton l' yo, li ba yo chak non yo, li mennen yo deyò.

⁴ Lè li fin fè yo tout soti, li mache devan yo; tout mouton yo swiv li paske yo konnen vwa li. ⁵ Men, yo p'ap swiv yon moun yo pa konnen. Okontrè, y'ap kouri byen lwen pou li paske yo pa rekonèt vwa li. ⁶ Jezi di yo parabol sa a, men yo pa t' konprann sa l' te vle di yo. ⁷ Jezi di yo ankò: Sa m'ap di nou la a, se vre wi: Mwen se pòt pak mouton yo. ⁸ Tout moun ki te vin anvan m' yo, se yon bann vòlè ak piyajè yo te ye. Men, mouton yo pa t' koute yo. ⁹ Se mwen menm ki pòt la. Moun ki pase nan mwen pou antre, la sove. La antre, la soti, la jwenn manje pou l' manje. ¹⁰ Lè vòlè a vini, se vòlè li vin vòlè, se touye li vin touye, se detwi li vin detwi, se sa ase li vin fè. Mwen menm, mwen vin pou moun ka gen lavi, epi pou yo genyen l' an kantite. ¹¹ Se mwen menm ki bon gadò mouton yo. Bon gadò a ap bay lavi l' pou mouton l' yo. ¹² Yon nonm k'ap fè yon djòb, se pa yon gadò li ye. Mouton yo pa pou li. Lè l' wè bèt nan bwa ap vini, li kouri kite mouton yo, li met deyò. Lèkonsa, bèt nan bwa a pran mouton yo pote ale, li gaye yo. ¹³ Nonm lan met deyò paske se yon djòb l'ap fè. Ki mele l' ak mouton yo? ¹⁴ -(we vèsè pwochen) ¹⁵ Mwen menm, mwen se gadò mouton yo. Papa a konnen m', mwen konn Papa a. Konsa tou, mwen konnen mouton m' yo. Yo menm tou yo konnen mwen. ¹⁶ Mwen gen anpil lòt mouton ki pa nan pak sa a. Mwen gen pou m' mennen yo tou. Y'a tande vwa mwen. Lè sa a, va gen yon sèl bann mouton ak yon sèl gadò. ¹⁷ Papa a renmen m', paske m'ap bay lavi m' pou m' ka resevwa l' ankò. ¹⁸ Pesonn pa ka wete lavi m', se mwen menm ki bay li paske mwen vle. Mwen gen pouvwa pou m' bay li, mwen gen pouvwa pou m' resevwa l' ankò. Se sa menm Papa a te ban m' lòd fè. ¹⁹ ¶ Te vin gen yon lòt kont nan mitan jwif yo sou pawòl sa yo. ²⁰ Anpil jwif t'ap di: Li gen yon move lespri sou li! Li fou! Sa n' bezwen pèdi tan n' ap koute yon nonm konsa fè? ²¹ Gen lòt ki t'ap di: Yon moun ki gen move lespri sou li pa ta pale konsa. Eske move lespri kapab louvri je avèg? ²² ¶ Se te nan mitan sezon fredyè. Yo t'ap fete fèt Dedikas la nan lavil Jerizalèm. ²³ Jezi t'ap ale vini anba Galeri Salomon an nan tanp lan. ²⁴ Jwif yo sanble bò kote l', yo di l' konsa: Kilè wa wete nou nan doutans sa a? Si ou se Kris la, di nou sa kare kare. ²⁵ Jezi reponn yo: Mwen deja di nou sa, nou pa vle kwè mwen. Bagay m'ap fè yo, se avèk otorite Papa m' m'ap fè yo. Yo pale pou mwen. ²⁶ Men, nou pa kwè paske nou pa fè pati mouton m' yo. ²⁷ Mouton m' yo koute vwa m', mwen konnen yo epi yo swiv mwen. ²⁸ Mwen ba yo lavi ki p'ap janm fini an. Yo p'ap janm peri, pesonn p'ap janm ka rache yo nan men mwen. ²⁹ Sa Papa m' ban

mwen an pi gran pase tout. Pesonn pa ka rache anyen ki nan men Papa a. ³⁰ Mwen menm ak Papa
 m', nou fè yon sèl. ³¹ Jwif yo ranmase wòch pou kalonnen li. ³² Lè sa a, Jezi di yo: Avèk pouvwa
 Papa a mwen fè anpil bon bagay nan mitan nou. Manyè di m' pou kilès ladan yo nou vle touye m'
 ak kout wòch la? ³³ Jwif yo reponn li: Se pa pou okenn bon bagay nou vle touye ou ak kout wòch.
 Men, se paske w'ap pale mal sou Bondye. Se moun ou ye, epi w'ap chache pase pou Bondye. ³⁴ Jezi
 reponn yo: Dapre sa ki ekri nan lalwa nou an, Bondye te di: Se bondye nou ye. ³⁵ Nou konnen sa
 Liv la di, li di l' nèt. Tout moun ki resevwa pawòl Bondye, se bondye yo ye. ³⁶ Mwen menm menm,
 se Bondye ki te mete m' apa pou li, se li ki voye m' sou latè. Ki jan nou ka di m'ap pale Bondye
 mal lè m' di se pitit Bondye mwen ye? ³⁷ Si m' pa fè travay Papa m' ban m' fè a, nou pa bezwen
 kwè mwen. ³⁸ Men, si mwen fè l', menm si nou pa ta vle kwè nan mwen, omwens kwè nan travay
 m'ap fè a. Konsa, nou ta tou konnen Papa a nan mwen, mwen nan Papa a. ³⁹ ¶ Yo t'ap chache ankò
 pou yo te arete l', men li chape anba men yo. ⁴⁰ Jezi tounen ankò lòt bò larivyè Jouden kote Jan te
 konn batize a. Li rete la. ⁴¹ Anpil moun te vin jwenn li. Yo t'ap di: Jan pa t' fè okenn mirak, men
 tou sa li te di nou sou nonm sa a, se te vre wi. ⁴² Anpil moun la te kwè nan Jezi.

Chapter 11

¹ ¶ Te gen yon nonm yo te rele Laza ki tonbe malad. Li te rete Betani, yon ti bouk kote Mari
 t'ap viv ansanm ak Mat, sè l' la. ² (Mari sa a, se te fanm ki te vide odè sou pye Seyè a, epi ki te siye
 yo ak cheve li. Laza, nonm ki te malad la, se te frè li.) ³ De sè yo voye yon moun bò kot Jezi pou
 di li: Seyè, zanmi ou lan malad. ⁴ Lè Jezi tandè nouvèl la, li di: Maladi Laza a p'ap touye li. Tou
 sa rive pou fè moun wè pouvwa Bondye. Se ak maladi sa a Bondye pral fè wè pouvwa Pitit li a.
⁵ Jezi te renmen Mat, Mari, sè l' la, ansanm ak Laza. ⁶ Apre li fin pran nouvèl maladi Laza a, li rete
 de jou ankò kote l' te ye a. ⁷ Apre sa, li di disip li yo: Ann tounen nan Jide. ⁸ Disip li yo reponn li:
 Mèt, pa gen lontan jwif yo t'ap chache touye ou ak kout wòch, epi koulye a ou vle tounen laba a
 ankò? ⁹ Jezi di yo: Gen douzè de tan nan yon jounen, pa vre? Si yon moun ap mache lajounen, li
 p'ap bite, paske li wè limyè k'ap klere tè a. ¹⁰ Men, si yon moun ap mache lannwit, l'ap kase pye

¹¹ l', paske li pa gen limyè nan li. Lè Jezi fin di yo sa, li di ankò: Laza, zanmi nou an, ap dòmi.
¹² Mwen pral leve li. Disip yo reponn li: Mèt, si l'ap dòmi, li pral geri. ¹³ Jezi te vle di yo Laza te
¹⁴ mouri, men disip yo te konprann se dòmi Laza t'ap dòmi tankou tout moun konn fè. Lè sa a,
¹⁵ Jezi di yo klè: Laza mouri. Poutèt nou, mwen byen kontan mwen pa t' la. Konsa n'a kwè. Ann
¹⁶ al jwenn li. Lè sa a, Toma (yo te rele Jimo a) di lòt disip yo: Ann ale tou ansanm ak Mèt la pou
¹⁷ n' ka mouri ansanm avè li. ¶ Lè Jezi rive, li jwenn Laza te gen tan antere depi kat jou. ¹⁸ Betani
¹⁹ te yon ti bouk toupre lavil Jerizalèm, twa kilomèt konsa, pa plis. Anpil jwif te vin lakay Mat ak
²⁰ Mari pou konsole yo ak lanmò frè yo a. Lè Mat vin konnen Jezi t'ap vini, li pati, li al kontre li.
²¹ Men, Mari te rete chita nan kay la. Mat di Jezi konsa: Mèt, si ou te la, frè m' lan pa ta mouri
²² non. Men, mwen konn sa: menm koulye a, Bondye va ba ou nenpòt kisa ou mande li. Jezi
²⁴ di li: Frè ou la va leve vivan ankò. Mat reponn li: Wi, mwen konn sa. Li gen pou l' leve vivan
²⁵ ankò nan dènye jou a, lè tout moun mouri yo va leve. Jezi di li: Se mwen menm ki leve moun
²⁶ mouri yo, se mwen menm ki bay lavi. Moun ki mete konfyans yo nan mwen, yo gen pou yo viv
²⁶ menm si yo rive mouri. Moun k'ap viv, epi ki mete konfyans yo nan mwen, yo p'ap janm mouri.
²⁷ Eske ou kwè sa? Mat reponn li: Wi, Seyè, mwen kwè ou se Kris la, Pitit Bondye. Ou se moun
²⁸ ki te gen pou vini sou latè a. Lè Mat fin di sa, l' al rele Mari, sè l' la, li di l' nan zòrèy: Mèt la la
²⁹ wi. Li mande pou ou vin jwenn li. Tande Mari tande sa, li leve, li kouri al jwenn Jezi. ³⁰ (Jezi
³¹ pa t' ankò antre nan bouk la. Li te rete kote Mat te kontre l' la.) Jwif yo ki te nan kay la avèk
³² Mari pou konsole l', lè yo wè l' leve soti, yo swiv li. Yo te konprann li tapral kriye bò kavo a. Lè
³³ Mari rive kote Jezi te ye a, wè li wè l', li lage kò l' atè nan pye l', li di l' konsa: Seyè, si ou te la, frè
³⁴ m' lan pa ta mouri. ¶ Jezi wè jan li t'ap kriye ansanm ak jwif yo ki te vin avè l' yo, sa te fè l' mal
³⁵ anpil, kè l' t'ap fann. Li mande yo: Ki bò nou antere li? Yo reponn li: Seyè, vin wè non. Jezi
³⁶ kriye. Lè sa a, jwif yo di: Gade jan li te renmen l' non! ³⁷ Men, te gen kèk nan yo ki t'ap di: Li
³⁸ menm ki louvri je avèg yo, li pa t' kapab anpeche Laza mouri? Sa te fè Jezi pi mal ankò. li al bò
³⁹ kavo a. Se te yon gwòt avèk yon wòch yo te mete devan bouch li. Jezi di yo: Wete wòch la.
⁴⁰ Mat, sè mò a, di l' konsa: Seyè, li dwe kòmanse santi deja, sa fè kat jou depi l' nan kavo a. Jezi

reponn li: Mwen pa deja di ou: Si ou kwè, wa wè pouvwa Bondye? ⁴¹ Se konsa, yo wete wòch la.

Jezi leve je l' anlè nan syèl la, li di: Mèsi, Papa, dèske ou te tandè mwen. ⁴² Mwen menm, mwen konnen ou toujou tandè m', men se poutèt moun sa yo ki bò kote m' lan m'ap di ou sa, pou yo sa

kwè se ou menm ki voye mwen. ⁴³ Lè l' fin di pawòl sa yo, li rele byen fò: Laza, soti deyò! ⁴⁴ Mò a soti, de pye l' ak de men l' yo tou mare ak bann twal, figi l' tou vlope nan yon moso twal. Jezi di

yo: Demare l' non, kite l' ale. ⁴⁵ ¶ Nan jwif ki te vin kay Mari yo epi ki te wè sa Jezi te fè a, anpil

te kwè nan li. ⁴⁶ Men, gen ladan yo ki al jwenn farizyen yo. Yo rakonte yo sa Jezi te fè. ⁴⁷ Farizyen yo menm ansanm ak chèf prèt yo reyini Gran Konsèy la. Yo mande: Kisa n'ap fè? Nonm sa a ap

fè anpil mirak. ⁴⁸ Si nou pa fè l' sispann, tout moun pral kwè nan li. Talè konsa, otorite women yo

va antre nan koze a, y'a detwi ni tanp nou an ni peyi nou an. ⁴⁹ Te gen yonn ladan yo ki te rele

Kayif. Se li menm ki te granprèt pou lanne a. Li di yo: Gen lè nou pa konprann anyen! ⁵⁰ Nou pa

wè li pi bon pou nou si yon sèl moun mouri pou pèp la. Konsa tout peyi a va sove. ⁵¹ (Kayif pa te di sa konsa non. Men, li te granprèt pou lanne a, konsa li t'ap fè konnen davans ki jan Jezi te dwe

mouri pou tout jwif ki nan peyi a. ⁵² Epi, pa sèlman pou jwif yo, men tou pou l' te sanble tout pitit

Bondye ki gaye yo nan yon sèl kò.) ⁵³ Se depi jou sa a otorite jwif yo pran desizyon pou yo touye

Jezi. ⁵⁴ Se poutèt sa tou Jezi te sispann fè ale vini nan mitan jwif yo an piblik. Li mete kò l' yon

kote toupre dezè a, nan yon vil yo rele Efrayim. Se la li te rete ak disip li yo. ⁵⁵ Fèt Delivrans jwif yo te prèt pou rive. Anpil moun soti toupato nan peyi a, yo moute Jerizalèm anvan fèt la pou yo

te ka fè sèvis pou mete yo nan kondisyon pou yo sèvi Bondye. ⁵⁶ Yo t'ap chache Jezi. Antan yo

tout te nan tanp lan, yonn t'ap mande lòt: Sa nou di? Ou kwè l'ap vin nan fèt la? ⁵⁷ Chèf prèt yo ansanm ak farizyen yo te bay lòd sa a: Si yon moun te konnen kote Jezi te ye, se pou l' fè yo konnen pou yo ka arete li.

Chapter 12

¹ ¶ Sis jou anvan fèt Delivrans jwif yo, Jezi tounen Betani kote Laza te rete a. Laza se nonm li

te fè leve soti vivan nan lanmò a. ² Antan l' te la, yo ofri l' manje. Se Mat ki t'ap sèvi manje a. Laza

menm te pami moun ki te chita bò tab la avèk Jezi. ³ Lè sa a, Mari pran yon boutèy demi lit plen

yon odè ki fèt ak yon fèy yo rele na. Odè sa a te vann byen chè. Li vide tout odè a sou pye Jezi.
 Apre sa, li siye yo ak cheve li. Tout kay la te plen sant odè a. ⁴ Yonn nan disip Jezi yo, sa ki tapral
 trayi l' la, Jida Iskariòt, di konsa: ⁵ Poukisa yo pa t' vann odè sa a pou twasan (300) goud? Yo ta
 bay pòv lajan sa a. ⁶ Li pa t' di sa paske li te vle fè kichòy vre pou pòv yo, men paske se vòlè li te
 ye. Se li ki te kenbe kès lajan an, li te konn pran nan sa yo te mete ladan li. ⁷ Men, Jezi di li: Kite
 l' an repo! Kite l' konsève odè sa a pou jou y'a mete kò m' nan kavo a. ⁸ Kanta pòv yo, n'a toujou
 genyen yo avè nou. Men mwen menm, nou p'ap genyen m' tout tan. ⁹ Yon gwo foul moun vin
 konnen Jezi te Betani. Y' ale Betani, pa sèlman poutèt Jezi, mentou pou wè Laza Jezi te fè leve soti
 vivan nan lanmò a. ¹⁰ Lè sa a, chèf prèt yo pran desizyon pou yo touye Laza tou, ¹¹ paske, poutèt
 li, anpil jwif t'ap vire do ba yo, yo t'ap kwè nan Jezi. ¹² ¶ Nan denmen, tout foul moun ki te vini
 pou fèt Delivrans jwif yo te vin konnen Jezi t'ap rive lavil Jerizalèm. ¹³ Lè sa a, yo koupe fèy
 palmis, yo soti al kontre li. Yo t'ap plede rele: Lwanj pou Bondye. benediksyon pou moun ki vini
 nan non Mèt la! Wi, benediksyon pou Wa pèp Izrayèl la. ¹⁴ Jezi te jwenn yon ti bourik. Li moute
 chita sou li, jan sa te ekri nan Liv la: ¹⁵ Nou pa bezwen pè, nou menm ki nan lavil Siyon an. Gade,
 men wa nou an ap vini: Li moute yon jenn ti bourik. ¹⁶ Disip yo pa t' konprann bagay sa yo lamem.
 Men, se jouk apre, lè Jezi te fin moute nan syèl la, yo vin chonje tout bagay sa yo te ekri davans
 nan Liv la, epi se sa menm ki te rive lè moun yo te fè sa pou li. ¹⁷ Te gen anpil moun ki te la avèk
 Jezi lè l' te rele Laza pou l' te fè l' soti nan kavo a, lè l' te fè l' leve soti vivan nan lanmò a. Yo tout
 t'ap rakonte sa yo te wè. ¹⁸ Se konsa, foul moun yo te vin konnen li te fè mirak sa a. Se poutèt sa
 yo te vin kontre li. ¹⁹ Farizyen yo menm, yonn t'ap di lòt: Nou wè. Nou pa ka fè anyen pou anpeche
 sa. Gade jan tout moun ap swiv li! ²⁰ ¶ Te gen kèk moun peyi Lagrès nan moun ki te vin Jerizalèm
 pou adore pandan fèt la. ²¹ Y' al jwenn Filip (ki te moun Betsayda nan peyi Galile), yo di l' konsa:
 Msye, nou ta renmen wè Jezi. ²² Filip al di Andre sa. Epi yo tou de al di Jezi sa. ²³ Jezi reponn
 yo: Koulye a, lè a rive pou Moun Bondye voye nan lachè a resevwa lwanj ki pou li a. ²⁴ Sa m'ap
 di nou la a, se vre wi: Yon grenn mayi ap rete pou kont li toutotan li pa tonbe atè pou l' mouri. Men
 tou, si l' mouri, l'ap bay anpil grenn. ²⁵ Moun ki renmen lavi l' ap pèdi li. Men moun ki rayi lavi li
 pandan l' sou latè a, l'ap konsève l' pou lavi ki p'ap janm fini an. ²⁶ Si yon moun ap sèvi m', se pou
 l' swiv mwen tou. Konsa, tout kote m'a ye, sèvitè mwen va la tou. Papa m' va leve tèt tout moun

²⁷
 k'ap sèvi mwen. ¶ Men koulye a, kè m' boulvèse. Mwen pa konn sa pou m' di. Mwen ta di: Papa, delivre m' anba sa ki pral rive koulye a. Men, se pou sa menm mwen vini, pou m' pase tan soufrans

²⁸
 sa a. Papa o, fè wè pouvwa ou non! Lè sa a, yon vwa soti nan syèl la, li di: Mwen fè wè pouvwa

²⁹
 non mwen deja. M'ap fè wè l' ankò. Foul moun ki te la yo tandè vwa a. Yo t'ap di: Se yon kout

³⁰
 loraj! Gen lòt ki t'ap di: Se yon zanj Bondye ki pale avèk li. Men, Jezi di yo: Se pa pou mwen

³¹
 non vwa a pale, se pou nou menm pou nou ka tandè. Koulye a, lè a rive pou yo jije moun ki sou

³²
 tè sa a. Koulye a, yo pral mete chèf k'ap dominen lemonn lan deyò. Men mwen menm, lè y'a

³³
 leve m' anlè sou tè a, mwen gen pou m' rale tout moun vin jwenn mwen. (Lè l' di sa, li t'ap

³⁴
 moutre yo ki jan li tapral mouri.) Foul moun yo reponn li: Nan Liv lalwa nou an, nou wè Kris

³⁵
 la gen pou l' viv pou tout tan. Ki jan ou ka di se pou yo leve Moun Bondye voye nan lachè a anlè?

Kilès ki Moun Bondye voye nan lachè a? Jezi reponn yo: Nou gen limyè a la avè nou, men pa

³⁶
 pou lontan. Mache pandan nou gen limyè a pou fènwa pa bare nou. Moun k'ap mache nan fènwa

³⁷
 pa konnen kote l' prale. Mete konfyans nou nan limyè a pandan nou genyen l' lan, pou nou kapab

³⁸
 moun limyè a. Apre li fin di yo pawòl sa yo, Jezi wete kò l', li al kache byen lwen. ¶ Atout li te

³⁹
 fè tout mirak sa yo devan yo, yo pa t' kwè nan li. Se konsa, pawòl pwofèt Ezayi te di a rive vre:

⁴⁰
 Bondye, kilès ki te kwè mesaj nou te bay la? Ki moun ki te rekonet travay Bondye a nan sa ki rive

⁴¹
 a? Non. Yo pa t' kapab kwè, paske men sa Ezayi te di ankò: Bondye bouche tou de je yo. li

⁴²
 fèmèn lespri yo, pou yo pa wè nan je yo, pou yo pa konprann ak lespri yo, pou yo pa tounen vin

⁴³
 jwenn mwen pou m' ta geri yo. Ezayi te di sa paske li te wè pouvwa Jezi, epi li pale sou li. ¶

⁴⁴
 Malgre sa, menm pami chèf jwif yo, anpil moun te kwè nan Jezi. Men, akòz farizyen yo, yo pa t'

⁴⁵
 kite moun wè sa pou yo pa t' mete yo deyò nan sinagòg la. Yo te pito lwanj ki soti nan men

⁴⁶
 lèzòm pase lwanj ki soti nan men Bondye. ¶ Jezi pale byen fò, li di: Moun ki kwè nan mwen,

⁴⁷
 se pa nan mwen sèlman li kwè, men li kwè nan moun ki voye m' lan tou. Moun ki wè m', li wè

⁴⁸
 moun ki voye m' lan tou. Mwen menm, mwen se limyè sou latè. Tout moun ki kwè nan mwen

⁴⁹
 p'ap rete nan fènwa. Lè yon moun tandè pawòl mwen yo, si l' pa kenbe yo, se pa mwen k'ap

⁴⁸
 kondannen li. Paske, mwen vin pou delivre moun, mwen pa vin pou kondannen yo. Men, moun

⁴⁹
 ki refize kwè nan mwen, ki pa asepte pawòl mwen yo, li jwenn ak sa k'ap kondannen l' lan: Pawòl

⁴⁹
 mwen te di yo, se yo menm k'ap kondannen l' lè dènye jou a va rive. Se pa pawòl pa m' m'ap

pale la a. Men, Papa ki voye m' lan, se li menm ki ban m' lòd sa pou m' di ak sa pou m' pale.
50

Mwen menm, mwen konnen tout kòmandman l' yo bay lavi ki p'ap janm fini an. Se sak fè sa m'ap di a, m'ap di l' jan Papa m' te ban m' lòd la.

Chapter 13

¹ ¶ Se te jou anvan fèt Delivrans jwif yo. Jezi te konnen lè a te rive pou l' te kite tè sa a, pou li al jwenn Papa a. Li pa t' manke renmen moun pa l' yo ki te nan lemonn. Li te renmen yo nèt ale.

² Jezi t'ap manje ak disip li yo jou swa sa a. Satan te gen tan pran tèt Jida, pitit gason Simon Iskariòt la, pou l' te trayi Jezi. ³ Jezi te konnen pou tèt pa l' li te soti nan Bondye, epi li t'ap tounen jwenn

Bondye ankò. Li te konnen Papa a te ba li pouvwa sou tout bagay. ⁴ Li leve sot devan tab la, li wete gwo rad li a, li pran yon sèvyèt, li mare l' nan ren li. ⁵ Apre sa, li vide dlo nan yon kivèt. Epi

li kòmanse lave pye disip li yo. Li t'ap siye yo ak sèvyèt li te mare nan ren l' lan. ⁶ Se konsa, li rive sou Simon Pyè ki di l' konsa: Mèt, ou menm ki pral lave pye mwen? ⁷ Jezi reponn li: Koulye a ou

pa konprann sa m'ap fè a. Men, wa konprann pita. ⁸ Pye di li: Non, mwen p'ap janm kite ou lave pye mwen. Jezi reponn li: Si m' pa lave pye ou, ou p'ap disip mwen ankò. ⁹ Simon Pyè di li: Si se

konsa, Mèt, se pa pye m' ase pou ou lave. Lave men m' yo tou ansanm ak tèt mwen. ¹⁰ Jezi di li: Lè yon moun fin benyen, tout kò l' pwòp. Se pye l' ase ki bezwen lave. Nou menm, nou tou pwòp,

men se pa nou tout ki pwòp. ¹¹ (Jezi te konnen ki moun ki tapral trayi li. Se poutèt sa li te di: Se

pa nou tout ki pwòp.) ¹² Lè l' fin lave pye yo tout, Jezi mete gwo rad la sou li ankò, li tounen nan plas li bò tab la, epi li di yo: Eske nou konprann sa m' sot fè la a? ¹³ Nou rele m' Mèt, nou rele m'

Seyè. Nou gen rezon, se sa m' ye vre. ¹⁴ Si mwen menm ki Seyè, mwen menm ki Mèt, mwen lave pye nou, konsa tou, nou menm, se pou nou yonn lave pye lòt. ¹⁵ Mwen ban nou yon egzanp pou

nou ka fè menm bagay mwen te fè pou nou an. ¹⁶ Sa m'ap di nou la a, se vre wi: Yon domestik pa janm pi grannèg pase mèt li. Moun yo voye a pa janm pi grannèg pase moun ki voye l' la. ¹⁷ Koulye

a nou konn bagay sa yo. benediksyon pou nou si nou fè menm jan an tou. ¹⁸ ¶ Lè m' di sa, mwen pa pale pou nou tout. Mwen konnen moun mwen chwazi yo. Men, fòk sa ki te ekri nan Liv la rive

vre. Moun k'ap manje nan menm plat avè m' lan, se li menm ki trayi mwen. ¹⁹ M'ap tou di nou sa
 koulye a anvan bagay sa yo rive, pou lè yo rive vre nou ka kwè mwen se moun mwen ye a. ²⁰ Sa
 m'ap di nou la a, se vre wi: Moun ki resevwa moun mwen voye a, li resevwa m' tou. Moun ki
 resevwa m', li resevwa moun ki voye m' lan. ²¹ Lè Jezi fin di pawòl sa yo, li santi kè l' te boulvèse
 anpil. Li di yo kareman: Sa m'ap di nou la a, se vre wi: yonn nan nou pral trayi mwen. ²² Disip yo
 menm, yonn t'ap gade lòt, yo pa t' konnen ki moun li t'ap pale. ²³ Yonn nan disip yo, sa Jezi te
 renmen an, te chita kòtakòt avèk li. ²⁴ Simon Pyè fè l' siy pou l' mande Jezi ki moun li t'ap pale.
²⁵ Lè sa a, disip la panche tèt li bò Jezi, li mande li: Seyè, kilès sa a? ²⁶ Jezi reponn li: Mwen pral
 tranpe yon moso pen nan plat la: moun wa wè m'a lonje l' bay la, se li menm. Jezi pran yon moso
 pen, li tranpe l', li lonje l' bay Jida, pitit Simon Iskariòt la. ²⁷ Pran Jida pran moso pen an, Satan
 antre nan li. Jezi di li: Sa ou gen pou fè a, fè l' vit. ²⁸ (Pesonn sou tab la pa t' konprann poukisa li
 te di l' sa. ²⁹ Anpil te fè lide Jezi te vle di l' al achte sa yo te bezwen pou fèt la, ou ankò te mande
 l' bay pòv yo kichòy, paske se li menm ki te kenbe sak lajan an.) ³⁰ Se konsa, Jida pran moso pen
 an; lamem li soti. Te fin fè nwa deyò a. ³¹ ¶ Apre Jida fin ale, Jezi di konsa: Se koulye a nou pral
 wè pouvwa Moun Bondye voye nan lachè a. Se koulye a li pral fè nou wè pouvwa Bondye parèt
 nan li. ³² Si li fè nou wè pouvwa Bondye a, Bondye li menm va fè nou wè pouvwa Pitit la. Epi
 l'ap fè l' talè konsa. ³³ Pitit mwen yo, mwen pa la pou lontan ankò avè nou. Ala chache n'a chache
 mwen! Men, koulye a m'ap di nou sa m' te di jwif yo deja: Nou pa kapab ale kote m' prale a. ³⁴ Men,
 m'ap ban nou yon kòmandman nouvo: Se pou nou yonn renmen lòt. Wi, se pou nou yonn renmen
 lòt menm jan mwen renmen nou an. ³⁵ Si nou yonn renmen lòt, lè sa a tout moun va konnen se
 disip mwen nou ye. ³⁶ ¶ Simon Pyè mande li: Seyè, ki bò ou prale? Jezi reponn li: Kote m' prale
 a ou pa ka swiv mwen koulye a. Men, wa swiv mwen pita. ³⁷ Pyè di li: Seyè, poukisa m' pa kapab
 swiv ou koulye a? Mwen tou pare pou m' bay lavi m' pou ou. ³⁸ Jezi reponn li: Ou kwè ou pare
 vre pou bay lavi ou pou mwen? Sa m'ap di ou la a, se vre wi: Kòk p'ap ankò chante, w'ap gen tan
 di ou pa janm konnen m' an twa fwa.

Chapter 14

¹ ¶ Jezi di yo: Pa kite bagay sa yo toumante nou. Mete konfyans nou nan Bondye, mete konfyans nou nan mwen tou. ² Lakay Papa a gen anpil kote pou moun rete. Mwen pral pare plas pou nou. Si se pa t' vre, mwen pa ta di nou sa. ³ Lè m'a fin pare plas la pou nou, m'a tounen vin chache nou. Konsa, kote m'a ye a, se la n'a ye tou. ⁴ ¶ Nou konnen chemen ki mennen kote m' prale a. ⁵ Toma di li: Seyè, nou pa konnen kote ou prale a. Ki jan ou ta vle pou nou konnen chemen pou n' pran an? ⁶ Jezi reponn li: Se mwen menm ki chemen an. Se mwen menm ki verite a, se mwen menm ki lavi a. Pesonn pa ka al jwenn Papa a si li pa pase nan mwen. ⁷ Si nou konnen m', n'a konn Papa m' tou. Men, depi koulye a nou konnen l', nou wè l' tou. ⁸ Filip di l' konsa: Seyè, moutre nou Papa a. Se sa ase nou bezwen. ⁹ Jezi reponn li: Depi tout tan sa a mwen la avè nou, Filip, ou poko konnen m' toujou? Moun ki wè m', li wè Papa a. Ki jan ou ka fè di: Moutre m' Papa a? ¹⁰ Gen lè ou pa kwè mwen nan Papa a? Ou pa kwè Papa a nan mwen tou? Tout pawòl mwen di nou yo, se pa nan mwen yo soti. Papa a ki fè yonn ak mwen an, se li menm k'ap fè travay li. ¹¹ Se pou nou kwè m' lè m' di nou: Mwen nan Papa a, Papa a nan mwen tou. Osinon, se pou nou kwè akòz sa m'ap fè a. ¹² ¶ Sa m'ap di nou la a, se vre wi: Moun ki mete konfyans li nan mwen, li gen pou l' fè tou sa m'ap fè a. La menm rive fè pi gwo bagay toujou, paske mwen pral jwenn Papa a. ¹³ Tou sa n'a mande nan non m', m'a fè l' pou nou, pou Pitit la ka fè wè pouvwa Papa a. ¹⁴ (Nenpòt kisa n'a mande nan non m', m'a fè l' pou nou.) ¹⁵ ¶ Si nou renmen m', se pou n' obeyi kòmandman m' yo. ¹⁶ M'ap mande Papa a pou l' ban nou yon lòt moun pou ankouraje nou, pou li ka toujou la avèk nou, se Sentespri ¹⁷ k'ap moutre nou verite a. Moun k'ap viv dapre prensip lemonn pa ka resevwa l', paske yo pa ka wè l', ni yo pa ka konnen li. Men nou menm, nou konnen l' paske li rete nan kè nou, paske li nan nou. ¹⁸ ¶ Mwen p'ap kite nou pou kont nou: M'ap tounen vin jwenn nou ankò. ¹⁹ Anvan lontan ankò, lemonn p'ap wè m', men nou menm n'a wè mwen. Paske m'ap viv, nou menm tou n'ap viv. ²⁰ Lè jou sa a va rive, n'a konnen mwen nan Papa a, nou menm nou nan mwen, epi mwen menm mwen nan nou. ²¹ Moun ki asepte kòmandman m' yo, ki obeyi yo, se moun sa a ki renmen mwen. Papa m' va renmen moun ki renmen mwen. Mwen menm tou, m'a renmen l', epi m'a fè l' wè mwen. ²² Jid (se pa Jida Iskariòt la non) di l' konsa: Seyè, ki jan pou ou fè nou wè ou san pou moun k'ap viv dapre prensip lemonn yo pa wè ou? ²³ Jezi reponn li: Moun ki renmen m', se li menm ki va fè tou sa m' di l' fè. Papa m' va renmen l' tou. Papa m' va vin jwenn li ansanm avè m', n'a viv nan li.

24 Moun ki pa renmen m', li p'ap fè tou sa m' di l' fè. Tou sa nou tandè m'ap di a, se pa nan mwen
 yo soti, men se nan Papa m' ki voye m' lan yo soti. ²⁵ ¶ Mwen di nou tou sa antan m' la ankò avèk
 nou. ²⁶ Moun ki pou vin ankouraje nou an, se Sentespri. Se Papa m' k'ap voye l' nan non mwen.
 Sentespri sa a va moutre nou tout bagay, la fè nou chonje tou sa m' te di nou. ²⁷ M'ap ban nou kè
 poze. M'ap fè kè nou poze nan jan pa mwen. Mwen p'ap fè li pou nou jan sa fèt dapre prensip ki
 nan lemonn. Pa kite anyen toumante tèt nou, nou pa bezwen pè. ²⁸ ¶ Nou tandè m' di nou: Mwen
 prale, men m'ap tounen vin jwenn nou. Si nou te renmen m', nou ta kontan konnen mwen pral jwenn
 Papa a, paske Papa a gen plis pouvwa pase mwen. ²⁹ Mwen tou di nou sa koulye a anvan bagay
 sa yo rive, pou lè yo rive nou ka kwè. ³⁰ Mwen p'ap pale anpil ankò avè nou, paske chèf k'ap
 dominen lemonn lan ap vini. Li pa gen okenn pouvwa sou mwen. ³¹ Men, se pou tout moun sou
 latè konnen mwen renmen Papa m'. Wi, fòk yo konnen m'ap fè sa Papa m' te ban m' lòd fè a. Leve
 non. Ann sot isit la.

Chapter 15

¹ ¶ Mwen se pye rezen tout bon an. Papa m' se moun k'ap okipe pye rezen an. ² Li koupe tout
 branch nan mwen ki pa donner. Li netwaye tout branch ki donner pou yo ka donner plis toujou.
³ Nou menm, avèk tou sa m' moutre nou yo, nou deja nan kondisyon pou n' fè volonte Bondye.
⁴ Se pou n' fè yonn ak mwen, menm jan mwen fè yonn ak nou. Yon branch pa ka donner pou kont
 li si l' pa fè yonn ak pye rezen an. Konsa tou, nou p'ap kapab donner si nou pa fè yonn ak mwen.
⁵ Mwen se pye rezen an, nou se branch yo. Moun ki fè yonn avè m', moun mwen fè yonn ak li, l'ap
 donner anpil, paske nou pa kapab fè anyen san mwen. ⁶ Moun ki pa fè yonn ak mwen, y'ap koupe
 l' voye jete; l'ap cheche tankou yon branch bwa. Lè branch bwa yo cheche, yo ranmase yo, yo jete
 yo nan dife, yo boule yo. ⁷ Si nou fè yonn ak mwen, si nou kenbe pawòl mwen yo nan kè nou, nou
 mèt mande sa nou vle, y'a ban nou li. ⁸ Men ki jan pouvwa Papa m' lan va parèt aklè: se lè nou
 donner anpil, lè nou fè wè se disip mwen nou ye. ⁹ ¶ Jan Papa a renmen m' lan, se konsa mwen
 renmen nou tou. Nou menm, se pou nou renmen menm jan mwen renmen nou an. ¹⁰ Si nou fè tou
 sa mwen ban nou lòd fè a, n'a renmen m' tou menm jan mwen renmen nou an. Menm jan mwen

menm, mwen fè tou sa Papa a te ban m' lòd fè a, mwen renmen l' menm jan li renmen m' tou.
¹¹ Mwen di nou tou sa pou kè kontan m' lan ka nan nou, pou nou ka kontan nèt ale. ¹² Men
kòmandman m'ap ban nou: Se pou nou yonn renmen lòt menm jan mwen renmen nou. ¹³ Pa gen
pi bon jan pou ou moutre jan ou renmen zanmi ou pase lè ou bay lavi ou pou yo. ¹⁴ Nou tout, se
zanmi m' nou ye depi nou fè sa m' mande nou fè. ¹⁵ Mwen p'ap rele nou domestik, paske yon
domestik pa konnen sa mèt li ap fè. M'ap rele nou zanmi paske mwen fè nou konnen tou sa Papa
a te moutre mwen. ¹⁶ Se pa nou ki chwazi m', se mwen menm ki chwazi nou, ki mete nou apa pou
n' ale, pou n' ka donner, pou donn nou ka konsève. Konsa, Papa a va ban nou nenpòt kisa n'a mande
nan non mwen. ¹⁷ Wi, men sa m' mande nou: Se pou nou yonn renmen lòt. ¹⁸ ¶ Si moun k'ap viv
dapre prensip lemonn yo rayi nou, pa bliye yo te rayi m' anvan yo te rayi nou. ¹⁹ Si nou te moun
lemonn, lemonn ta renmen nou, paske nou ta pou li. Men, mwen chwazi nou, mwen wete nou anba
pouvwa lemonn. Se poutèt sa lemonn rayi nou: nou pa moun lemonn ankò. ²⁰ Chonje sa m' te di
nou: Yon domestik pa janm pi grannèg pase mèt li. Si yo pèsekite m', y'a pèsekite nou tou. Si yo
fè sa m' te moutre yo, y'a fè sa n'a moutre yo tou. ²¹ Men, y'ap fè nou tou sa poutèt mwen, paske
yo pa konnen moun ki te voye m' lan. ²² Si m' pa t' vini, si m' pa t' pale avè yo, yo pa ta antò, yo
pa ta fè peche. Men, koulye a yo pa gen eskiz pou peche yo. ²³ Moun ki rayi m', li rayi Papa m'
tou. ²⁴ Si m' pa t' fè bagay okenn lòt moun pa t' janm fè nan mitan yo, yo pa ta antò, yo pa ta fè
peche. Men, koulye a yo wè sa m' fè, yo rayi ni mwen ni Papa mwen. ²⁵ Men, yo fè tou sa pou
pawòl ki ekri nan Lalwa yo a te ka rive vre: Yo rayi m' san m' pa fè yo anyen. ²⁶ ¶ Moun ki gen
pou ankouraje nou an ap vini, se Lespri k'ap moutre nou verite a, se nan Bondye li soti. Papa a ap
ban mwen l' pou m' voye ban nou, la pale nou sou mwen. ²⁷ Nou menm tou, n'a pale sou mwen,
paske nou te la avè m' depi nan konmansman.

Chapter 16

¹ ¶ Mwen di nou sa pou nou pa dekouraje lè sa rive. ² Y'a mete nou deyò nan sinagòg yo. Yon
lè, moun k'ap touye nou yo va met nan tèt yo se sèvis y'ap rann Bondye lè yo fè sa. ³ Y'ap fè tou
sa paske yo pa konnen ni Papa a ni mwen menm. ⁴ Men, mwen di nou sa, se pou lè lè a va rive pou

yo fè nou sa nou ka chonje mwen te di nou sa. Mwen pa t' di nou tou sa anvan, paske mwen te la avèk nou. ⁵ Men koulye a, mwen pral jwenn moun ki te voye m' lan, epi nou yonn pa mande m' kote m' prale? ⁶ Men, paske mwen pale konsa ak nou, kè nou kase. ⁷ ¶ Men, m'ap di nou laverite: li pi bon pou nou si m' ale. Paske, si m' pa ale, moun ki gen pou vin ankouraje nou an p'ap vin jwenn nou. Men, lè m' ale, m'a voye l' ban nou. ⁸ Li menm, lè la vini, la moutre moun lemond yo jan yo nan lerè sou keksyon peche, sou keksyon sa ki dwat devan Bondye, sou keksyon jijman Bondye. ⁹ Yo nan lerè sou keksyon peche a, paske yo pa mete konfyans yo nan mwen. ¹⁰ Yo nan lerè sou keksyon sa ki dwat devan Bondye, paske mwen pral jwenn Papa a, nou p'ap wè m' ankò. ¹¹ Yo nan lerè sou keksyon jijman Bondye a, paske chèf k'ap dominen lemond lan fin jije deja. ¹² Mwen gen anpil lòt bagay ankò pou m' di nou, men nou pa ka konprann yo koulye a. ¹³ Men, li menm Lespri k'ap moutre verite a, lè la vini, la mennen nou nan tout verite a. Paske li p'ap pale pawòl pa li. Men, tou sa la tandè, se sa la di nou: la fè nou konnen bagay ki gen pou rive. ¹⁴ Li pral fè yo wè pouvwa mwen, paske la pran sa ki pou mwen pou l' fè nou konnen yo. ¹⁵ Tou sa ki pou Papa a se pou mwen yo ye tou. Se poutèt sa mwen di nou la pran sa ki pou mwen pou l' fè nou konnen yo. ¹⁶ ¶ Talè konsa nou p'ap wè m'; talè konsa n'a wè m' ankò. ¹⁷ Kèk disip li yo pran pale, yonn t'ap di lòt: Sa sa vle di sa l'ap di nou la a: Talè konsa nou p'ap wè m', talè konsa n'a wè m' ankò? Sa l' vle di la a: Paske mwen pral jwenn Papa a? ¹⁸ Kisa sa vle di menm: Talè konsa? Nou pa konprann sa l' vle di. ¹⁹ Jezi menm te konnen yo te vle poze l' keksyon. Li di yo: Mwen di nou: Talè konsa nou p'ap wè m', talè konsa tou n'a wè m' ankò. Eske se sou sa nou yonn ap poze lòt keksyon an? ²⁰ Sa m'ap di nou la a, se vre wi: nou pral kriye, nou pral plenn, men moun k'ap viv dapre prensip ki nan lemond yo pral kontan. Nou pral gen lapenn, men lapenn nou pral tounen kè kontan. ²¹ Lè yon fanm gen tranche, kè l' sere, paske lè a rive pou l' soufri. Men, lè pitit la fin fèt, li bliye tout soufrans li yo tèlman li kontan dapre yon lòt timoun vin sou latè. ²² Konsa tou, koulye a nou nan lapenn. Men, mwen gen pou m' wè nou ankò. Lè sa a, kè nou pral kontan, pesonn p'ap ka wete kontantman sa a nan kè nou. ²³ ¶ Jou sa a, nou p'ap poze m' keksyon sou anyen. Sa m'ap di nou la a, se vre wi: nenpòt bagay nou mande Papa a nan non mwen, la ban nou li. ²⁴ Jouk koulye a, nou pòkò mande anyen nan non mwen. Mande, n'a jwenn pou nou ka kontan nèt ale. ²⁵ Mwen di nou tou sa an parabòl. Yon lè, mwen p'ap bezwen pale an parabòl ak nou ankò, men m'ap pale nou kareman sou Papa a. ²⁶ Jou sa a, n'a mande Papa a sa nou vle nan non mwen, mwen pa di m'ap

²⁷ lapriyè Papa a pou nou, paske Papa a li menm, li renmen nou. Li renmen nou paske nou renmen
 m', paske nou kwè mwen soti nan Papa a. ²⁸ ¶ Mwen soti nan Papa a, mwen vin sou latè. Koulye
 a, m'ap wete kò m' sou latè a, mwen pral jwenn Papa a. ²⁹ Disip yo di li: Se koulye a w'ap pale
 kare. Ou pa pale an parabol. ³⁰ Koulye a nou konnen ou konn tout bagay. Ou pa bezwen pesonn
 mande ou anyen. Se poutèt sa nou kwè ou soti nan Bondye. ³¹ Jezi reponn yo: Nou sèten nou kwè
 koulye a? ³² Gade, lè a ap rive, li rive deja, kote nou pral gaye, chak moun pral kouri bò pa yo:
 nou pral kite m' pou kont mwen. Men, mwen pa pou kont mwen, paske Papa a la avèk mwen.
³³ Mwen pale konsa pou nou kapab gen kè poze nan mwen. Nou gen pou n' soufri anpil sou latè.
 Men, pran kouraj, lemonn deja pèdi devan mwen.

Chapter 17

¹ ¶ Apre Jezi fin pale konsa, li leve je l' anlè nan syèl la, li di: O Papa, lè a rive. Fè yo wè bèl
 pouvwa Pitit la, pou Pitit la ka fè yo wè bèl pouvwa ou la tou. ² Ou te ba l' otorite sou tout moun
 pou l' te kapab bay tout moun ou ba li yo lavi ki p'ap janm fini an. ³ Lavi ki p'ap janm fini an, se
 pou yo konnen ou, ou menm ki sèl Bondye tout bon an, ansanm ak moun ou voye a: Jezikri. ⁴ Mwen
 te fè yo wè bèl pouvwa ou sou tè sa a. Mwen fè tou sa ou te ban m' fè. ⁵ Koulye a, Papa, ban mwen
 bèl pouvwa devan je ou, menm pouvwa mwen te genyen lè m' te avè ou la depi anvan ou te kreye
 tout bagay. ⁶ ¶ Moun ou te mete apa nan lemonn pou mwen yo, mwen fè yo konnen ki moun ou
 ye. Se pou ou yo te ye. Se ou menm ki te ban mwen yo. Epi yo kenbe pawòl ou. ⁷ Koulye a, yo
 konnen tou sa ou ban mwen se nan men ou yo soti. ⁸ Paske mwen ba yo pawòl ou te ban mwen
 an. Yo resevwa li. Yo rekonèt mwen soti tout bon bò kote ou, yo kwè se ou ki voye m' vre. ⁹ M'ap
 lapriyè pou yo. Mwen p'ap lapriyè pou moun lemonn yo, men pou moun ou ban mwen yo, paske
 se pou ou yo ye. ¹⁰ Tou sa m' genyen se pou ou, tou sa ou genyen se pou mwen. Pouvwa mwen
 parèt aklè nan yo. ¹¹ ¶ Mwen pa nan lemonn lan ankò. Men yo menm, yo nan lemonn lan toujou.
 Mwen menm, m'ap vin jwenn ou. Papa, ou menm ki apa, pwoteje yo pa pouvwa non ou, menm
 non ou te ban mwen an, pou yo ka fè yon sèl menm jan ou fè yon sèl avèk mwen. ¹² Pandan m' te
 la avèk yo, mwen te pwoteje yo ak pouvwa non ou, menm non ou te ban mwen an. Mwen te pwoteje

yo: yo yonn pa t' pèdi, esepite nonm ki pou te pèdi a, pou sa ki te ekri nan Liv la rive vre. ¹³ Koulye
 a, m'ap vin jwenn ou. M'ap pale konsa pandan m' sou latè a, pou jan kè m' kontan an se konsa pou
¹⁴ kè yo ka kontan tou nèt ale. Mwen te ba yo pawòl ou; lemonn rayi yo paske yo menm yo pa
¹⁵ moun lemonn, menm jan mwen menm mwen pa moun lemonn. Mwen pa mande ou pou wete
¹⁶ yo nan lemonn lan, men pou ou pwoteje yo anba Satan. Yo pa moun lemonn, menm jan mwen
¹⁷ pa moun lemonn. ¶ Fè yo viv pou ou nèt gremesi verite a. ¹⁸ Pawòl ou se verite a. Mwen voye
¹⁹ yo nan lemonn lan menm jan ou te voye m' nan lemonn lan. Se pou yo m'ap viv jan ou vle l' la,
²⁰ pou yo menm tou yo ka viv jan ou vle l' la, gremesi verite a. ¶ Se pa pou yo sèlman m'ap lapriyè,
²¹ men pou tout moun ki va mete konfyans yo nan mwen lè y'a tande mesaj la. M'ap lapriyè pou
 yo tout fè yon sèl. Papa, se pou yo tout fè yonn ansanm ak nou, menm jan ou menm ou nan mwen,
 mwen menm mwen nan ou. Se pou yo tout fè yon sèl pou moun ki nan lemonn yo ka kwè se ou ki
²² te voye mwen. Mwen te ba yo menm pouvwa ou te ban mwen an, pou yo tout te ka fè yonn
²³ menm jan ou fè yon sèl avè m' tou: mwen nan yo, ou nan mwen, pou yo tout fè yon sèl nèt ale,
 pou moun ki nan lemonn yo ka rive rekonèt se ou ki te voye m', pou yo ka rive konnen ou renmen
²⁴ yo menm jan ou renmen m' lan. ¶ Papa, se ou ki te ban mwen yo. Mwen ta vle pou yo toujou
 avè m' kote m' prale a, pou yo ka wè pouvwa mwen, pouvwa ou te ban mwen an, paske ou te renmen
²⁵ m' depi lontan anvan ou te kreye tout bagay. O Papa, ou menm ki fè tout bagay byen, moun ki
 nan lemonn yo pa konnen ou. Men mwen menm, mwen konnen ou. Moun sa yo konnen se ou ki
²⁶ te voye mwen. Mwen te fè yo konnen ki moun ou ye. M'ap kontinye fè sa toujou, pou kalite
 renmen ou gen pou mwen an ka nan yo, pou mwen menm mwen ka nan yo tou.

Chapter 18

¹ ¶ Lè Jezi fin pale konsa, li pati avèk disip li yo, li al lòt bò ti ravin Sedwon an. Te gen yon
 jaden la. Jezi antre nan jaden an avèk disip li yo. ² Jida, nonm ki te gen pou trayi l' la, te konnen ti
 kote sa a tou paske Jezi te konn vin la anpil fwa ak disip li yo. ³ Se konsa, Jida al nan jaden an. Li
 te gen yon kolonn sòlda ansanm ak kèk gad avè li. Se chèf prèt yo ak gwoup farizyen yo ki te voye
⁴ yo avè li. Yo tout te gen zam, yo t'ap pote fannal ak gwo chandèl tou limen. Jezi menm ki te

konnen sa ki te pou rive l' la, mache sou yo, li mande yo: Ki moun n'ap chache? ⁵ Yo reponn li:
 Jezi, nonm Nazarèt la. Jezi di yo: Se mwen. Jida, nonm ki t'ap trayi l' la, te la avèk yo. ⁶ Lè Jezi di
 yo: Se mwen, yo renka kò yo dèyè, yo tonbe atè. ⁷ Lè sa a, Jezi mande yo ankò: Ki moun n'ap
 chache? Yo di l': Jezi, nonm Nazarèt la. ⁸ Jezi reponn yo: Mwen pa deja di nou se mwen menm.
 Si se mwen n'ap chache, kite lòt mesye sa yo al fè wout yo. ⁹ Se konsa pawòl li te di a rive vre:
 Nan tout moun ou te ban mwen yo, Papa, yonn menm pa pèdi. ¹⁰ Simon Pyè te gen yon nepe sou
 li, li rale l', li frape domestik granprèt la, li sote zòrèy dwat li. (Yo te rele domestik la Malkis.)
¹¹ Men, Jezi di Pyè konsa: Mete nepe ou la nan djenn li. Eske se pa pou m' bwè gode soufrans Papa
 a ban m' bwè a? ¹² Kolonn sòlda yo, kòmandan an ansanm ak gad jwif yo mete men sou Jezi, yo
 mare li. ¹³ ¶ Premye kote yo mennen l', se kay An. An te bòpè Kayif ki te granprèt pou lanne a.
¹⁴ Se Kayif sa a ki te bay jwif yo konsèy sa a: Li pi bon pou nou si yon sèl moun mouri pou tout
 pèp la! ¹⁵ Simon Pyè te swiv Jezi ansanm ak yon lòt disip. Disip sa a te yon konesans granprèt la.
 Se konsa li te antre anmenmtan ak Jezi nan lakou granprèt la. ¹⁶ Pyè menm te rete deyò, bò pòt la.
 Lè sa a, lòt disip la, ki te yon konesans granprèt la, soti deyò, li pale ak fanm ki t'ap veye pòt la, li
 fè Pyè antre. ¹⁷ Sèvant ki t'ap veye pòt la di Pyè konsa: Ou menm tou, ou se yonn nan disip nonm
 sa a. Pyè reponn li: Non. Mwen pa disip nonm sa a. ¹⁸ Domestik yo ak gad yo te limen dife, yo
 tout te kanpe bò dife a, yo t'ap chofo kò yo paske te fè frèt. Pyè te kanpe la avèk yo, li t'ap chofo
 kò l' tou. ¹⁹ Granprèt la poze Jezi keksyon sou disip li yo ak sou sa l' t'ap moutre yo. ²⁰ Jezi reponn
 li: Mwen te pale an piblik pou tout moun tande. Se nan sinagòg yo ak nan tanp lan, kote tout jwif
 yo sanble, se la mwen toujou moutre sa pou m' te moutre a. Mwen pa janm di anyen an kachèt.
²¹ Poukisa w'ap keksyonnen m' konsa? Mande moun ki te tande m' yo sa m' te di yo. Yo menm yo
 konnen sa m' te di. ²² Antan Jezi t'ap di pawòl sa yo, yon gad ki te kanpe la bò kote l' ba l' yon
 souflèt. Li di li: Se konsa w'ap reponn granprèt la? ²³ Jezi reponn li: Si m' pale mal, moutre moun
 yo sa m' di ki mal la a. Men, si m' pale byen, poukisa ou frape mwen? ²⁴ Apre sa, An voye Jezi
 tou mare ale lakay Kayif, granprèt la. ²⁵ Pandan tout tan sa a, Simon Pyè te kanpe la ap chofo dife.
 Yo di li: Ou menm tou, ou se yon disip nonm sa a. Men, Pyè demanti sa, li di: Non. Mwen pa disip
 nonm sa a. ²⁶ Yonn nan domestik granprèt la ki te fanmi nonm Pyè te koupe zòrèy la, di konsa:

Eske mwen pa t' wè ou nan jaden an avè li? ²⁷ Pyè di ankò se pa vre. Lamenm yon kòk chante.

²⁸ ¶ Apre sa, soti kay Kayif, yo mennen Jezi nan palè Gouvènè a. Se te granmtimaten. Men, jwif yo pa t' antre nan palè a. Yo pa t' vle mete tèt yo nan kondisyon pou yo pa ka fè sèvis Bondye yo.

Sa ta ka anpeche yo manje manje Delivrans lan. ²⁹ Se poutèt sa, Pilat, gouvènè a, te blije soti vin jwenn yo deyò a. Li mande yo: Kisa nou di nonm sa a fè? ³⁰ Yo reponn li: Si nonm sa a pa t' yon malfektè, nou pa ta mennen l' ba ou. ³¹ Pilat di yo: Poukisa nou pa pran l' nou menm, pou nou jije l' dapre lalwa nou? Jwif yo reponn li: Nou pa gen dwa touye pesonn. ³² Se konsa pawòl Jezi te di lè l' t'ap fè konnen jan l' tapral mouri a, tapral rive vre. ³³ Lè sa a, Pilat antre nan palè a, li rele Jezi, li mande li: Eske se wa jwif yo ou ye? ³⁴ Jezi reponn li: Eske ou di sa paske ou fè lide sa a ou menm, osinon èske se lòt moun ki di ou sa? ³⁵ Pilat reponn li: Eske se jwif mwen ye, mwen menm? Se pwòp moun peyi ou ansanm ak chèf prèt yo ki mennen ou ban mwen? Kisa ou fè? ³⁶ Jezi reponn: Nan peyi kote m' wa a, se pa tankou peyi ki sou latè. Si gouvènman peyi kote m' wa a te tankou gouvènman peyi ki sou latè, sèvitè m' yo ta goumen pou mwen. Yo pa ta kite m' tonbe nan men jwif yo. Non. Nan peyi kote m' wa a, se pa tankou peyi ki sou latè. ³⁷ Lè sa a, Pilat di li: Si se konsa, ou se wa vre? Jezi reponn li: Se ou ki di li. Wi, se wa mwen ye. Mwen fèt pou m' di verite a jan li ye a. Wi, se pou sa menm mwen vin sou latè. Tout moun ki patizan laverite ap koute vwa mwen. ³⁸ Pilat reponn li: Laverite? Kisa l' ye? Lè l' fin di sa, Pilat soti ankò, li al jwenn jwif yo. Li di yo: Mwen pa wè rezon pou m' kondannen nonm sa a. ³⁹ Dapre koutim nou genyen, mwen toujou lage yon prizonnye pou fèt Delivrans lan ban nou. Eske nou ta vle m' lage wa jwif yo ban nou? ⁴⁰ Lè sa a, yo tout pran rele: Non. Nou pa vle li. Se Barabas nou vle! Barabas sa a te yon bandi.

Chapter 19

¹ ¶ Se konsa Pilat bay lòd pran Jezi, bat li byen bat. ² Sòlda yo trese yon kouwòn avèk branch pikan, yo mete l' nan tèt Jezi. Yo mete yon gwo rad wouj fonse sou li. ³ Yo pwoche bò kote l', yo di li: Bonjou, wa jwif yo. Epi yo souflete li. ⁴ Pilat soti ankò, li pale ak foul moun yo, li di: Koute. Mwen pral mennen l' isit la deyò pou nou ka konprann mwen pa jwenn okenn rezon pou m'

kondannen nonm sa a. ⁵ Se konsa, Jezi soti: li te gen kouwòn pikan an nan tèt li ak gwo rad wouj
 fonsè a sou li. Pilat di yo: Men nonm lan! ⁶ Lè chèf prèt yo ansanm ak gad yo wè l', yo kòmanse
 rele: Kloure l' sou yon kwa! Kloure l' sou yon kwa! Pilat di yo: Pran l', kloure l' sou kwa a nou
 menm. ⁷ Mwen pa wè rezon pou m' kondannen l', mwen menm. Jwif yo reponn li: Nou gen yon
 lwa. Dapre lwa sa a, li gen pou l' mouri paske li fè tèt li pase pou Pitit Bondye. ⁸ Lè Pilat tande sa,
 li vin pi pè toujou. ⁹ Li antre nan palè a, li mande Jezi: Ki kote ou soti? Men, Jezi pa reponn li.
¹⁰ Lè sa a, Pilat di li: Ou p'ap pale avè mwen? Ou pa konnen mwen gen pouvwa pou m' lage ou,
 mwen gen pouvwa pou m' fè yo kloure ou sou yon kwa? ¹¹ Jezi reponn li: Ou pa ta gen okenn
 pouvwa sou mwen si se pa t' Bondye nan syèl la ki te ba ou li. Se poutèt sa, moun ki lage m' nan
 men ou lan, li pi koupab pase ou. ¹² Depi lè sa a, Pilat t'ap chache yon jan pou l' lage Jezi. Men,
 jwif yo kòmanse rele: Si ou lage nonm sa a, ou pa zanmi Seza! Depi yon moun ap fè tèt li pase pou
 wa, se lènmi Seza li ye. ¹³ Lè Pilat tande koze sa a, li fè yo mennen Jezi deyò, li chita sou gwo
 chèz nan plas jij la, kote yo rele Lakou Pave a (an lang ebre yo rele l': Gabata). ¹⁴ Se te lavèy fèt
 Delivrans jwif yo, vè midi konsa. Pilat di jwif yo: Men wa nou an. ¹⁵ Men, yo kòmanse rele: Touye
 li! Touye li! Kloure l' sou yon kwa! Pilat di yo: Nou vle m' kloure wa nou an sou yon kwa? Chèf
 pret yo reponn li: Nou pa gen lòt wa pase Seza. ¹⁶ ¶ Lè sa a, Pilat renmèt yo Jezi pou y' al kloure
 l' sou yon kwa. Se konsa, yo pran Jezi, yo mennen l' ale. ¹⁷ Jezi soti deyò lavil la, li t'ap pote kwa
 li jouk yon kote yo rele: Zo bwa Tèt la (An lang ebre, yo rele l': Gòlgota). ¹⁸ Rive la, sòlda yo
 kloure l' sou kwa a. Anmenmtan yo kloure de lòt moun sou kwa tou, yonn chak bò, Jezi menm nan
 mitan yo. ¹⁹ ¶ Pilat te bay lòd pou yo te fè yon pankat pou mete sou tèt kwa a. Yo te ekri sou li:
 Jezi, moun Nazarèt la, wa jwif yo. ²⁰ Anpil jwif te li sa ki te ekri sou pankat la. Kote yo te kloure
 Jezi sou kwa a te toupre lavil la. Pankat la menm te ekri nan twa lang: ebre, laten ak grèk. ²¹ Lè
 sa a, chèf prèt jwif yo di Pilat konsa: Pa ekri: Wa Jwif yo. Men, ekri pito: Nonm sa a di se wa jwif
 yo li ye. ²² Pilat reponn yo: Sa m' ekri a, m' ekri l' nèt. ²³ Lè sòlda yo fin kloure Jezi sou kou a,
 yo pran rad li yo, yo fè kat pil ak yo, yo separe yo bay chak sòlda yo yonn. Yo pran gwo rad san
 kouti a, rad ki te fèt ak yon sèl pyès depi anwo jouk anba a. ²⁴ Sòlda yo yonn di lòt: Nou p'ap chire
 rad sa a non. Ann tire osò pou konnen pou ki moun l'ap ye. Se konsa, pawòl ki te ekri nan Liv la
 rive vre: Yo separe rad mwen ant yo: Yo tire osò pou rad mwen an. Se sa menm sòlda yo te fè.
²⁵ Bò kwa Jezi a te gen manman l' ak sè manman l', Mari, madanm Kleopas la, ansanm avèk Mari,

²⁶ moun lavil Magdala a. Jezi wè manman l' ansanm ak disip li te renmen an toupre li. Li di manman
 l' konsa: Madanm, men pitit ou. ²⁷ Li di disip la: Men manman ou. Depi lè sa a, disip la pran
 manman Jezi lakay li. ²⁸ Jezi te konnen lè sa a tout bagay ki pou te fèt te fin fèt. Pou fè sa ki te
 ekri nan Liv la rive vre, li di: Mwen swaf. ²⁹ Te gen yon veso plen venèg bò la. Sòlda yo tranpe
 yon eponj nan venèg la, yo mare l' nan pwent yon branch bwa yo rele izòp, yo pwoche l', yo mete
 l' bò bouch Jezi. ³⁰ Lè Jezi fin pran venèg la, li di: Tou sa ki pou te rive rive! Apre sa, li bese tèt
 li, li mouri. ³¹ ¶ Se te lavèy jou repo a. Jwif yo pa t' vle pou kadav yo te rete sou kwa yo pandan
 jou repo a, paske jou repo a te yon gwo jou fèt. Yo mande Pilat pou fè kraze janm moun ki te kloure
 sou kwa yo, lèfini pou l' te fè wete kadav yo. ³² Se lè sa a, sòlda yo vini, yo kraze janm premye
 nonm yo te kloure sou kwa menm lè ak Jezi a. Apre sa, yo kraze janm dezyèm lan tou. ³³ Men, lè
 yo rive sou Jezi, yo wè li te gen tan mouri. Se sak fè yo pa t' kraze janm li yo. ³⁴ Men, yonn nan
 sòlda yo pèse bò kòt li avèk yon lans. Lamenm, dlo ak san koule sot nan twou a. ³⁵ Moun k'ap
 rapòte bagay sa yo te wè yo ak je li. Sa l'ap di a se vre. Li konnen li menm l'ap di laverite, pou nou
 menm tou nou ka kwè. ³⁶ Tou sa pase konsa pou pawòl ki te ekri nan Liv la te ka rive vre: Yo pa
 kraze yon sèl zo nan kò li. ³⁷ Gen yon lòt pawòl yo te ekri ankò ki di: Y'a leve je yo gade, y'a wè
 moun yo te pèse a. ³⁸ ¶ Apre sa, Jozèf, moun lavil Arimate a, al mande Pilat pèmisyon pou li te
 pran kò Jezi. (Jozèf sa a te yon disip Jezi, men an kachèt, paske li te pè jwif yo.) Pilat ba l' pèmisyon
 an. Se konsa, Jozèf vini, li pran kò Jezi, li pote l' ale. ³⁹ Nikodèm, nonm ki ta l' jwenn Jezi yon lè
 nan mitan lannwit lan, te vini tou. Li te pote senkant lit konsa yon odè yo rele lami melanje ak lalwa
 nan lwil. ⁴⁰ Yo tou de rive, yo pran Jezi. Pandan yo t'ap vlope l' nan bann twal fin yo, yo mete lwil
 santi bon sou li jan jwif yo te konn fè lè y'ap antere moun. ⁴¹ Kote yo te kloure Jezi sou kwa a te
 gen yon jaden. Nan jaden an te gen yon kavo tou nèf. Yo pa t' ankò mete pesonn ladan li. ⁴² Se te
 lavèy jou repo jwif yo, epi kavo a te toupre. Se sak fè, se la yo te mete kò Jezi a.

Chapter 20

¹ ¶ Nan dimanch maten, byen bonè, li pa t' ankò fin jou, Mari, moun Magdala a, al nan kavo a.
 Li wè yo te wete wòch ki te fèmen bouch kavo a. ² Li kouri, li al jwenn Simon Pyè ansanm ak lòt

disip Jezi te renmen an, li di yo: Yo wete Seyè a kote l' te ye nan kavò a. Nou pa konn kote yo mete
 li. ³ Pyè pati ansanm ak lòt disip la, y' al nan kavò a. ⁴ Yo t'ap kouri ansanm, men lòt disip la t'ap
 kouri pi vit pase Pyè. Li rive bò kavò a anvan li. ⁵ Li bese pou l' gade anndan an. Li wè bann twal
 fin yo te fè yon pil atè a. Men, li pa antre. ⁶ Lè Simon Pyè rive dèyè l', li antre nan kavò a. Li wè
 bann twal fin yo anpile atè a. ⁷ ansanm ak moso twal ki te mare tèt Jezi a. Men, moso twal sa a pa
 t' menm kote ak bann twal fin yo. Li te vlope apa yon lòt kote. ⁸ Se lè sa a, lòt disip ki te rive bò
 kavò a anvan an antre tou. Li wè, li kwè. ⁹ (Disip yo pa t' ankò konprann sa ki te ekri nan Liv la
 kote yo te di Jezi te gen pou l' te leve soti vivan pami mò yo.) ¹⁰ Apre sa, tou de disip yo tounen
 lakay yo. ¹¹ ¶ Mari menm te rete deyò toupre kavò a. Li t'ap kriye. Antan l' t'ap kriye konsa, li bese
 tèt li pou l' gade anndan kavò a. ¹² Li wè de zanj Bondye abiye tout an blan, chita kote yo te mete
 kò Jezi a, yonn nan plas tèt la, lòt la nan plas pye yo. ¹³ Zanj yo mande li: Madanm, poukisa w'ap
 kriye konsa? Li reponn yo: Yo wete Seyè mwen an, m' pa konn kote yo mete li. ¹⁴ Lè l' fin di sa,
 li vire tèt li, li wè Jezi ki te kanpe la, men li pa t' rekonèt si se te Jezi. ¹⁵ Jezi mande li: Madanm,
 poukisa w'ap kriye konsa? Ki moun w'ap chache? Mari menm te kwè se te mèt jaden an. Se poutèt
 sa li di li: Mèt, si se ou menm ki wete l', di m' ki bò ou mete li. M'a v al pran li. ¹⁶ Jezi di li: Mari!
 Mari vire bò kot Jezi, li di l' an lang ebre: Rabouni (sa vle di: Mèt). ¹⁷ Jezi di li: Pa manyen m'!
 Mwen poko moute al jwenn Papa mwen. Men, ale jwenn frè m' yo, di yo m'ap moute bò kot Papa
 m' ki papa nou tou, m'ap moute bò kot Bondye m' ki Bondye nou tou. ¹⁸ Se konsa Mari, moun
 Magdala a, al di disip yo: Mwen wè Seyè a. Epi li rakonte yo sa Jezi te di li. ¹⁹ ¶ Menm jou dimanch
 sa a, nan aswè, disip yo te reyini nan yon kay. Yo te fèmen pòt yo akle paske yo te pè jwif yo. Jezi
 vini, li kanpe nan mitan yo, li di yo: benediksyon Bondye sou nou tout! ²⁰ Apre li fin di yo sa, li
 moutre yo de pla men l' ak bò kòt li. Disip yo pa t' manke kontan lè yo wè Seyè a. ²¹ Jezi di yo
 ankò: benediksyon Bondye sou nou tout! Menm jan Papa a te voye m' lan, se konsa m'ap voye nou
 tou. ²² Apre pawòl sa yo, li soufle sou yo, li di yo: Resevwa Sentespri. ²³ Moun n'a padone peche
 yo, y'a resevwa padon vre. Moun n'a refize padone, yo p'ap resevwa padon. ²⁴ Men, twouve Toma,
 yonn nan douz disip yo ki te rele Jimo, pa t' la avèk yo lè Jezi te vini an. ²⁵ Lòt disip yo di li: Nou
 wè Seyè a. Men, Toma reponn yo: Si m' pa wè mak klou yo nan pla men l', si m' pa mete dwèt

²⁶ mwen nan plas kote klou yo te ye a, si m' pa mete men m' nan bò kòt li, mwen p'ap kwè. ¶ Yon
 senmenn apre sa, disip Jezi yo te reyini ankò anndan kay la. Fwa sa a Toma te la avèk yo. Tout pòt
²⁷ yo te fèmen akle. Jezi vini, li kanpe nan mitan yo, li di: benediksyon Bondye sou nou tout. Apre
 sa li di Toma: Mete dwèt ou isit la. Men. Gade men m' yo. Lonje men ou, mete l' la bò kòt mwen.
²⁸ Wete doutans nan kè ou. Kwè, tandè. Toma reponn li: Seyè mwen, Bondye mwen! ²⁹ Jezi di
 li: Koulye a, se paske ou wè m' kifè ou kwè? benediksyon pou tout moun ki va kwè san yo pa wè
³⁰ mwen! Jezi te fè anpil lòt mirak ankò devan disip li yo, men nou pa rapòte yo nan liv sa a.
³¹ Tou sa ki ekri nan Liv sa a, mwen ekri yo pou nou ka kwè Jezi se Kris la, Pitit Bondye, pou lè
 nou kwè a nou ka gen lavi nan li.

Chapter 21

¹ ¶ Kèk jou apre sa, Jezi fè disip yo wè l' ankò, bò lanmè Tiberyad la. Men ki jan sa te pase:
² Simon Pyè, Toma (yo rele Jimo a), Natanayèl (ki te moun Kana nan peyi Galile) ak de pitit Zebede
³ yo te la ansanm ak de lòt nan disip Jezi yo. Simon Pyè di: Mwen pral lapèch. Yo di li: Nou menm
 tou, nou pral avè ou. Se konsa yo pati, yo moute nan yon kannòt. Men, yo pase tout nwit lan yo pa
⁴ t' pran anyen. Li te kòmanse fè jou lè Jezi parèt bò dlo a. Men disip yo pa t' rekonèt si se te li
⁵ menm. Jezi di yo konsa: Mesye m' yo, èske nou pran pwason? Yo reponn li: Non, nou pa pran
⁶ anyen. Li di yo: Lage privye a sou bò dwat kannòt la, n'a jwenn kichòy. Yo lage privye a. Men,
⁷ yo pa t' kapab rale l' soti nan dlo a sitèlman li te plen pwason. Disip Jezi te renmen an di Pyè
 konsa: Se Seyè a wi. Lè Simon Pyè tandè pawòl sa yo: Se Seyè a, li mete rad sou li (paske li te
⁸ toutouni), li lage kò l' nan dlo a. Lòt disip yo menm t'ap tounen atè nan kannòt la, yo t'ap trennen
⁹ privye ki te plen pwason an dèyè yo. Yo pa t' twò lwen rivay la, san (100) mètr konsa. Lè yo
 desann atè, yo wè yon dife ki te limen sou rivay la avèk kèk pwason ap boukannen ladan li. Te gen
¹⁰ pen tou. Jezi di yo: Pote kèk pwason nan sa nou fèk sot pran yo. ¹¹ Simon Pyè moute nan kannòt
 la, li rale prive a tou plen vin atè. Te gen sansenkanntwa (153) gwo pwason ladan li. Men atousa,
¹² privye a pa t' chire. Jezi di yo: vin manje. Yo yonn nan disip yo pa t' gen kouraj mande li: Ki
¹³ moun ou ye? Yo tout te konnen se te Seyè a. Jezi pwoche bò kote yo, li pran pen, li ba yo. Li

14
ba yo pwason tou. Sa te fè twazyèm fwa Jezi te fè disip li yo wè l' depi l' te leve soti vivan nan
15
lanmò. ¶ Lè yo fin manje, Jezi di Simon Pyè konsa: Simon, pitit Jan, èske ou renmen m' plis
pase moun sa yo renmen mwen? Simon Pyè reponn: Wi, Seyè, ou konnen mwen renmen ou. Jezi
16
di li: Pran swen ti mouton m' yo. Li mande l' yon dezyèm fwa: Simon, pitit Jan, èske ou renmen
mwen? Li reponn: Wi, Seyè, ou konnen mwen renmen ou. Jezi di li: Pran swen mouton m' yo.
17
Aprè sa, li mande l' yon twazyèm fwa: Simon, pitit Jan, èske ou renmen mwen? Sa te fè Simon
lapenn anpil lè l' wè Jezi te mande l' yon twazyèm fwa: Eske ou renmen mwen? Li reponn li: Seyè,
18
ou konn tout bagay. Ou konnen mwen renmen ou. Jezi di l' konsa: Pran swen mouton m' yo. Sa
m'ap di ou la a, se vre wi. Lè ou te jenn ti gason, ou te konn mare sentiwon ou pou kont ou. Lè sa
a, ou te konn ale kote ou te vle. Men, lè wa fin granmoun, wa lonje de bra ou konsa, se moun ki va
19
mare sentiwon ou pou ou. Lè sa a, y'a mennen ou kote ou pa ta vle ale. (Lè Jezi t'ap pale konsa,
li t'ap moutre ki jan Pyè tapral mouri pou sa te sèvi yon lwanj pou Bondye.) Aprè sa, Jezi di li:
20
Swiv mwen. ¶ Pyè vire tèt li, li wè disip Jezi te renmen an ki t'ap vin dèyè yo. Se disip sa a ki
te panche bò zòrèy Jezi, antan yo t'ap manje a, ki te mande li: Seyè, ki moun ki pral trayi ou la?
21
Se konsa, Pyè wè l' ap vini, li mande Jezi: Seyè, e nonm sa a, kisa pral rive li? Jezi reponn
22
li: Si m' vle li rete vivan jouk lè m' gen pou m' tounen an, sa sa gade ou? Ou menm, swiv mwen.
23
Se konsa, nouvèl la gaye nan mitan frè yo: disip sa a p'ap janm mouri. Men, Jezi pa t' di Pyè: Li
p'ap janm mouri. Li te di l' konsa: Si m' vle li rete vivan jouk lè m' gen pou m' tounen an, sa sa gade
24
ou? Se menm disip sa a k'ap rapòte tout bagay sa yo. Se li menm ki ekri yo. Nou konnen sa l'ap
25
di a se verite. Jezi te fè anpil lòt bagay ankò. Si yon moun ta pran ekri liv pou rakonte yo tout,
yonn apre lòt, mwen pa kwè ta gen plas sou latè pou mete liv sa yo.

Acts

Chapter 1

1
¶ Teofil monchè: Nan premye liv mwen an, mwen te rakonte tou sa Jezi te fè ak tout bagay li
2
te moutre pèp la, depi nan konmansman, jouk jou li moute nan syèl la. Anvan l' te moute a, li te
pale ak moun li te chwazi pou sèvi apòt. Avèk pouvwa Sentespri sou li, li ba yo lòd sa pou yo fè.
3
Aprè lanmò li, li te parèt plizyè fwa devan yo. Li te ba yo divès prèv li te vivan ankò. Pandan

karant jou, li fè yo wè l', li pale yo sou peyi kote Bondye wa a. ⁴ Yon jou yo t'ap manje ansanm, Jezi ba yo lòd sa a: Pa kite lavil Jerizalèm. Rete tann sa Papa a te pwomèt la, kado mwen t'ap pale nou an. ⁵ Jan te batize nou nan dlo, men nan kèk jou ankò, nou pral resevwa batèm nan Sentespri a. ⁶ ¶ Lè sa a, moun ki te reyini bò kot Jezi yo pran mande li: Mèt, èske se koulye a ou pral mete gouvènman pèp Izrayèl la sou pye l' ankò? ⁷ Jezi reponn yo: Nou pa bezwen konnen ki jou ni ki lè sa va fèt. Se Papa a ki fikse dat la li menm, pou kont li. ⁸ Men, lè Sentespri a va desann sou nou, n'a resevwa yon pouvwa. Lè sa a, n'a sèvi m' temwen nan Jerizalèm, nan tout peyi Jide ak nan tout peyi Samari, jouk nan dènye bout latè. ⁹ Apre li fin di yo sa, li moute nan syèl. Antan yo t'ap gade li, yon nwaj vin bouche l' devan je yo. ¹⁰ Yo te gen je yo fikse nan syèl la kote Jezi t'ap moute a, lè dezòm, abiye tout an blan, parèt konsa bò kote yo. ¹¹ Dezòm yo di yo: Nou menm, moun Galile, poukisa nou rete la ap gade syèl la konsa? Jezi sa a ki fèk sot nan mitan nou an pou moute nan syèl la, li gen pou l' tounen menm jan nou wè l' moute nan syèl la. ¹² ¶ Apre sa, apòt yo desann mòn Oliv, yo tounen Jerizalèm. Mòn lan te toupre lavil la, distans yon kilomèt konsa. ¹³ Lè yo rive Jerizalèm, yo moute nan chanm anwo kay kote yo konn ye a. Lè sa a te gen Pyè, Jan, Jak ak Andre, Filip ak Toma, Batèlmi ak Matye, Jak, pitit Alfe a, Simon, nonm patriyòt la, epi Jid, pitit Jak la. ¹⁴ Yo tout mete tèt yo ansanm, yo t'ap lapriye san rete. Medam yo te la tou ansanm ak Mari, manman Jezi, ak frè l' yo tou. ¹⁵ ¶ Yon jou tout frè yo te sanble, te gen sanven (120) moun antou konsa. Piè kanpe nan mitan yo, li di: ¹⁶ Frè m' yo, sa Sentespri te anonse nan Liv yo, fòk sa te rive vre. Se konsa, nan bouch David, li te fè konnen davans ki jan Jida t'apral mennen moun ki te arete Jezi yo. ¹⁷ Jida te yonn nan nou, li te gen sèvis pa l' nan travay nou an. ¹⁸ (Avèk lajan yon te ba l' pou krim lan, Jida te achte yon moso tè. Se la li tonbe sou tèt, vant li pete, tout zantray li gaye sot deyò. ¹⁹ Se bagay tout moun nan Jerizalèm konnen byen. Se pou sa nan lang yo, yo te rele tè a: Akeldama, ki vle di: jaden san an.) ²⁰ Men sa ki ekri nan Liv Sòm yo: Se pou kay li rete san moun. Se pou pesonn pa rete ladan li. Pi lwen ankò nou jwenn: Se pou yon lòt moun pran plas li nan travay la. ²¹ Se poutèt sa, nou bezwen yon lòt moun ansanm ak nou pou sèvi temwen Seyè Jezi te leve soti vivan nan lanmò. Moun sa a, fòk se yonn nan moun ki te toujou la avèk nou tout tan Seyè Jezi t'ap mache avèk nou nan tout peyi a, ²² depi lè Jan te batize l' la jouk jou li te kite nou an pou l' moute nan syèl la. ²³ Yo bay non de moun: Jozèf, yo te rele Basabas ki te gen yon ti non Jistis, epi Matyas. ²⁴ Apre sa, yo lapriyè konsa: Bondye, ou menm ki konnen kè tout moun, moutre nou kilès ou chwazi

nan de moun sa yo, ²⁵ pou sèvi apòt nan plas Jida te kite pou li al kote ki te pou li a. ²⁶ Apre sa, yo tire osò: se Matyas ki soti. Se konsa yo mete l' ansanm ak onz apòt yo.

Chapter 2

¹ ¶ Lè jou Lapannkòt la rive, yo tout te reyini ansanm menm kote a. ² Yo rete konsa, epi yon sèl bri sot nan syèl la tankou yon gwo van k'ap souffle; li plen tout kay kote yo te chita a. ³ Lè sa a, yo wè yon bann lang parèt tankou ti flanm dife ki separe yonn ak lòt epi ki al poze grenn pa grenn sou tèt yo chak. ⁴ Yo tout te vin anba pouvwa Sentespri, epi yo pran pale lòt lang dapre jan Lespri Bondye a t'ap fè yo pale. ⁵ ¶ Lè sa a, te gen yon bann jwif ki t'ap pase kèk jou lavil Jerizalèm. Se te moun devwe pou Bondye ki te soti nan tout peyi sou latè. ⁶ Lè yo tande bri a, yon kantite ladan yo sanble. Yo tout te sezi anpil paske yo t'ap tande moun yo pale nan lang peyi yo chak. ⁷ Yo pa t' manke sezi. Yo t'ap gade, yo t'ap di: Moun sa yo k'ap pale la a, apa moun Galile yo tout ye? ⁸ Ki jan nou fè tande y'ap pale nan lang peyi nou? ⁹ Nan nou la a gen moun Pat, moun Medi ak moun Elam, gen moun Mezopotami, moun Jide, moun Kapadòs, moun Pon ak moun Lazi. ¹⁰ Gen moun Friji, moun Panfili, moun Lejip, moun teritwa Libi ki toupre Sirèn. Genyen ki soti lavil Wòm. ¹¹ Nan nou gen jwif, gen moun lòt nasyon ki te konvèti nan relijyon jwif yo, gen moun ki soti Lakrèt, gen moun Arabi tou. Ki jan nou fè tande yo ap pale lang nou, y'ap rakonte bèl bagay Bondye te fè? ¹² Yo tout te sezi, yo pa t' konn sa pou yo te kwè. Yonn t'ap di lòt: Sa sa vle di? ¹³ Gen lòt moun menm ki t'ap pase yo nan rizib. Yo t'ap di: Moun sa yo sou. ¹⁴ ¶ Lè sa a, Pyè kanpe ansanm ak lòt onz apòt yo, li pale byen fò, li di foul moun yo konsa: Nou menm moun Jide ansanm ak nou tout k'ap pase kèk jou isit lavil Jerizalèm, nou fèt pou nou konnen sa. Koute sa m' pral di nou la a. ¹⁵ Moun sa yo pa sou jan nou kwè a. Se nevè dimaten li ye sèlman. ¹⁶ Men, sa pwofèt Joèl te fè konnen gen pou rive a, se sa k'ap pase koulye a: ¹⁷ Men sak pral rive nan dènye tan an: Se Bondye menm k'ap pale: M'ap vide Lespri m' sou tout moun sou latè. Pitit gason nou ak pitit fi nou yo va pale tankou pwofèt. Jenn gason nou yo va gen vizyon. Granmoun nou yo va fè rèv. ¹⁸ Wi, lè sa a, m'ap vide Lespri m' sou tout sèvitè m' yo, fi kou gason, epi y'a bay mesaj ki soti nan Bondye. ¹⁹ Mwen pral fè mèvèy parèt anwo nan syèl la, mwen pral fè mirak anba sou latè! Va gen san, dife

ak gwo nwaj lafimen. ²⁰ Solèy la pral vin tou nwa. Lalin lan pral vin wouj kou san, anvan jou Mèt
 la rive. Se va yon gwo jou, yon bèl jou tou! ²¹ Lè sa a nenpòt moun ki va rele non Bondye va
 delivre. ²² Nou menm moun laras Izrayèl, koute sa m' pral di nou la a: Jezi, moun Nazarèt la, se
 Bondye menm ki te voye l' paske nou te wè tout mirak, tout bèl bagay ak tout siy Bondye te ba l'
 pouvwa fè nan mitan nou. Sa se bagay nou tout konnen. ²³ Yo te lage nonm sa a nan men nou, jan
 Bondye te vle l' la, dapre plan li te deja fè nan tèt li. Nou menm, nou fè touye l', nou fè yon bann
 mekan kloure l' sou yon kwa. ²⁴ Men, Bondye fè l' leve vivan ankò, li delivre l' anba doulè lanmò
 a paske se pa t' posib pou lanmò te kenbe l' anba pouvwa li. ²⁵ Men sa David te ekri sou li: Mwen
 te wè Bondye, Mèt la, tout tan devan je mwen. Paske li toujou bò kote m'. Anyen pa ka brannen
 m'. ²⁶ Se poutèt sa kè m' kontan anpil, se pawòl kontantman ase ki nan bouch mwen. Menm kò
 mwen, m'ap poze l' avèk espwa nan Bondye. ²⁷ Paske, ou p'ap kite m' kote mò yo ye a. Ou p'ap
 pèmèt moun k'ap sèvi ou la pouri anba tè. ²⁸ Ou fè m' konnen tout chemen ki bay lavi a. M'ap
 kontan nèt paske ou toujou la avèk mwen. ²⁹ Frè m' yo, pèmèt mwen pale kareman ak nou. David,
 zansèt nou an, mouri, yo antere l'. Tonm li la nan mitan nou jouk jòdi a. ³⁰ Men, David te yon
 pwofèt, li te konnen sa Bondye te pwomèt la. Bondye te sèmante li t'ap fè yonn nan pitit li yo wa
 tankou li. ³¹ David te wè sa Bondye tapral fè a. Se konsa li te di Kris la te gen pou l' leve soti vivan
 nan lanmò lè l' di: Yo p'ap kite l' kote mò yo ye a. Kò li p'ap tounen pouriti. ³² Bondye fè Jezi sa
 a leve soti vivan; nou tout nou temwen bagay sa a. ³³ Bondye fè l' moute nan syèl la vin sou bò
 dwat li, li resevwa Sentespri Papa a te pwomèt la, li vide l' sou nou. Enben, se sa n'ap wè, se sa n'ap
 tande koulye a. ³⁴ Se pa David ki te moute nan syèl la. Men, li te di: Bondye te di Seyè mwen an:
 Chita la sou bò dwat mwen, ³⁵ jouk tan mwen fè lènmi ou yo tounen yon ti ban pou lonje pye ou.
³⁶ Tout pèp Izrayèl la fèt pou konnen sa byen: Jezi, nonm nou te kloure sou kwa a, se li menm
 Bondye fè Seyè, se li menm Bondye fè Kris la. ³⁷ ¶ Lè pèp la tande pawòl sa yo, yo santi kè yo
 boulvèse. Yo mande Pyè ansanm ak lòt apòt yo: Frè nou yo, kisa pou nou fè? ³⁸ Pyè reponn yo:
 Tounen vin jwenn Bondye, epi yonn apre lòt vin resevwa batèm nan non Jezikri, pou Bondye
 padonnen tout peche nou yo. Apre sa, n'a resevwa Sentespri, kado Bondye a. ³⁹ Paske pwomès la,
 Bondye fè l' pou nou, pou pitit nou yo, pou tout moun ki byen lwen, pou tout moun Bondye, Mèt
 nou, va rele vin jwenn li. ⁴⁰ Pyè t'ap di yo anpil lòt pawòl ankò pou l' te fè yo kwè, pou l' te ankouraje

yo. Li t'ap di yo konsa: Sove tèt nou. Wete kò nou nan mitan moun pèvèti sa yo. ⁴¹ Anpil ladan yo te kwè sa Pyè t'ap di a, yo te resevwa batèm. Jou sa a, te gen twamil (3.000) moun konsa ki te mete tèt yo ansanm ak disip yo. ⁴² ¶ Yo pase tout tan yo ap koute sa apòt yo t'ap moutre yo, yo t'ap viv ansanm tankou frè yonn ak lòt, yo reyini pou separe pen an bay tout moun, epi yo t'ap lapriyè. ⁴³ Tout moun te gen krentif devan kantite mirak ak bèl bagay apòt yo t'ap fè. ⁴⁴ Tout moun ki te kwè yo t'ap viv ansanm yonn ak lòt. Yo te mete tou sa yo te genyen ansanm. ⁴⁵ Yo vann tè yo ak tout byen yo, yo separe lajan an pami yo tout, dapre nesesitye chak moun. ⁴⁶ Toulejou, yo tout reyini ansanm nan tanp lan; yo te konn separe pen an bay tout moun nan kay yo, yo te manje ansanm avèk kè kontan san okenn pretansyon. ⁴⁷ Yo t'ap fè lwanj Bondye. Tout moun te renmen yo. Chak jou Bondye t'ap mete lòt moun li t'ap delivre yo nan gwoup la.

Chapter 3

¹ ¶ Yon jou, vè twazè konsa nan apremidi, Pyè ak Jan t'ap moute nan tanp lan. Se te lè lapriyè. ² Bò Bèl Pòt la (se konsa yo te rele yon pòt nan tanp lan), te gen yon nonm ki te enfim depi l' te fèt. Chak jou yo te pote l' bò Bèl Pòt la pou l' te kapab mande moun k'ap antre nan tanp lan lacharite. ³ Li wè Pyè ak Jan ki tapral antre, li mande yo kichòy. ⁴ Pyè ak Jan fikse je yo sou li, epi Pyè di li: Gade nou. ⁵ Nonm lan pran gade yo; li te kwè yo tapral ba l' kichòy. ⁶ Lè sa a, Pyè di li: Mwen pa gen ni lajan ni lò. Men, sa m' genyen an, m'ap ba ou li. Nan non Jezikri, moun Nazarèt la, leve ou mache. ⁷ Li pran men dwat li, li fè l' kanpe. Menm lè a tou, pla pye enfim lan ak zo jwenti pye l' yo vin fèm. ⁸ Li fè yon sèl sote, li kanpe sou de pye l', li pran mache. Li antre nan tanp lan avèk yo, li t'ap mache, li t'ap ponpe, li t'ap fè lwanj Bondye. ⁹ Tout pèp la te wè l' ap mache, ap fè lwanj Bondye. ¹⁰ Lè yo wè se te nonm enfim ki te konn chita bò Bèl Pòt la ap mande lacharite a, yo tout te pè. Yo sezi anpil pou sak te rive l' la. ¹¹ Nonm lan pa t' kite Pyè ak Jan yon pa. Tout moun te sezi, yo kouri vin jwenn apòt yo sou Galeri Salomon an. ¹² ¶ Lè Pyè wè sa, li di pèp la: Nou menm moun laras Izrayèl, poukisa nou sezi konsa? Poukisa n'ap plede gade n' konsa? Gen lè nou konprann se nou menm ki fè nonm sa a mache ak pwòp fòs kouraj nou osinon paske n'ap sèvi Bondye? ¹³ Se Bondye Abraram, Izarak ak Jakòb, Bondye zansèt nou yo k'ap fè lwanj sèvitè li, Jezi. Nou menm,

nou te lage l' nan men otorite yo, nou te voye l' jete devan Pilat, atout Pilat li menm te vle lage li.
14

Jezi se moun Bondye te chwazi a, li te mache dwat devan Bondye, men nou voye l' jete, nou te
pito mande Pilat pou l' te lage yon ansasen ban nou. 15 Se konsa nou touye Mèt ki bay lavi a. Men,

Bondye fè l' leve soti vivan nan lanmò. Nou se temwen tout bagay sa yo. 16 Nou wè nonm sa nou
konnen an, se pouvwa ki nan non Jezi a mete ak konfyans nou gen nan non sa a ki ba li fòs ankò.

Se konfyans nou gen nan Jezi ki fè l' geri nèt, jan nou ka wè l' la. 17 Enben, koulye a, frè m' yo,
mwen rekonèt se konnen nou pa t' konnen, nou menm ansanm ak tout chèf nou yo, kifè nou te aji

konsa avèk Jezi. 18 Men, depi nan tan lontan, Bondye te fè konnen nan bouch pwofèt li yo ki jan

Kris li a te gen pou l' souffri. Se konsa sa l' te di a vin rive vre. 19 Chanje lavi nou, tounen vin jwenn

Bondye pou l' ka efase peche nou yo. 20 Lè sa a, Bondye va fè nou jwenn yon rafrech pou nanm

nou devan li, la voye Jezikri, moun li te chwazi davans pou nou an. 21 Pou koulye a, Jezi gen pou
l' rete nan syèl la jouk lè Bondye va vini pou mete tout bagay nan plas yo ankò, jan l' te fè nou

konnen l' lan nan bouch pwofèt li yo depi nan tan lontan. 22 Se konsa Moyiz te di: Bondye, Mèt
nou an, gen pou l' voye yon pwofèt ban nou tankou l' te voye m' lan. Se va yonn nan frè nou yo.

Se pou nou koute tou sa la di nou. 23 Nenpòt moun ki p'ap koute pwofèt sa a, se pou yo disparèt

li nèt nan mitan pèp Bondye a, se pou yo touye li. 24 Tout pwofèt ki te pale depi Samyèl ak tou sa

ki te vin apre l' yo, yo tout yo te anonse tan sa a. 25 Pwomès Bondye te fè pwofèt li yo di ak bouch
yo, se pou nou yo ye, lèfini nou gen pòsyon pa nou tou nan kontra Bondye te fè avèk zansèt nou
yo. Se sa l' te di Abraram: Gremèsi pitit pitit ou yo, tout fanmi ki sou latè va jwenn benediksyon.

26 Se konsa Bondye fè sèvitè l' la parèt, li voye l' ban nou anvan pou l' beni nou, pou l' fè nou tout
kite mechanste nou yo.

Chapter 4

1 ¶ Antan Pyè ak Jan t'ap pale ak pèp la, prèt yo, kòmandan lagad tanp lan ak sadiseyen yo vin

rive. 2 Yo te fache anpil dèske apòt yo t'ap moutre pèp la anpil bagay, dèske yo t'ap anonse yo

moun mouri kapab leve menm jan Jezi te leve soti vivan nan lanmò. 3 Yo arete yo, yo mete yo nan

prizon pou jouk nan denmen paske solèy te fin kouche. 4 Men, anpil moun ki te tande pawòl la te

kwè. Lè sa a, te gen senkmil (5.000) moun konsa ki te kwè. ¶ Nan denmen, chèf jwif yo, chèf
 fanmi yo ak dirèktè lalwa yo sanble nan Jerizalèm. Ladan yo te gen: An, granprèt la, Kayif, Jan,
 Aleksann ansanm ak fanmi granprèt la. Yo fè mennen apòt yo devan yo, epi yo mande yo: Kote
 n' pran pouvwa pou fè bagay sa a? Ki moun ki ban nou dwa fè sa? Lè sa a, Pyè vin anba pouvwa
 Sentespri, li di yo: Mesye chèf pèp la ak chèf fanmi yo: Jòdi a y'ap poze nou keksyon sou yon
 byen nou fè pou yon enfim, y'ap mande nou ki jan nonm sa a fè geri. ¶ Nou tout ki la a ansanm
 ak tout pèp Izrayèl la, nou fèt pou nou konn sa: si nonm sa a kanpe devan nou tou gaya, se gremesi
 Jezikri, moun Nazarèt nou te kloure sou kwa a, men ki leve vivan soti nan lanmò ak pouvwa Bondye.
 ¶ Se Jezi menm yo t'ap pale nan pawòl sa a ki ekri nan liv la: Wòch nou te voye jete lè nou t'ap
 bati a, se li menm ki tounen wòch ki kenbe kay la. ¶ Se li menm sèl ki ka bay delivrans paske
 Bondye pa bay non okenn lòt moun sou latè ki kapab delivre nou. ¶ Manm Gran Konsèy yo te
 sezi anpil lè yo wè ki jan Pyè ak Jan te gen konviksyon nan sa yo t'ap di, paske yo te vin konnen
 mesye sa yo se moun ki soti nan mas pèp la, ki pa t' resevwa okenn enstriksyon. Chèf yo te rekonèt
 yo tou pou moun ki te toujou avèk Jezi. ¶ Men, yo pa t' jwenn anyen pou reponn yo paske nonm
 ki te geri a te kanpe la devan je yo bò kot Pyè ak Jan. ¶ Yo mande apòt yo pou yo soti nan pyès
 kote Gran Konsèy la te reyini an, epi yo pran diskite bagay la yonn ak lòt. ¶ Yo t'ap di konsa: Kisa
 pou n' fè ak mesye sa yo? Paske, tout moun nan Jerizalèm konnen byen pwòp se yo ki te fè gwo
 mirak sa a. Nou pa ka di se pa vre. ¶ Men, pou nouvèl la pa gaye plis nan pèp la, n'ap kraponnen
 yo, n'ap defann yo pale ak pesonn nan non Jezi. ¶ Apre sa, yo fè rele apòt yo, yo pase yo lòd pou
 yo pa janm pale ni moutre pèp la anyen nan non Jezi. ¶ Men, Pyè ak Jan reponn yo: Jije nou menm
 kisa ki pi bon devan Bondye: Obeyi nou osinon obeyi Bondye? ¶ Pou nou menm, nou pa kapab
 pa pale sa nou wè ak sa nou tandè. ¶ Manm Gran Konsèy yo fè yo menas ankò. Apre sa, yo lage
 yo. Yo pa t' kapab fè yo anyen paske tout pèp la t'ap fè lwanj Bondye pou sa ki te rive a. ¶ Nonm
 ki te geri gremesi mirak apòt yo te fè a te gen karantan pase. ¶ Lage yo lage yo, Pyè ak Jan al
 jwenn gwoup zanmi yo, yo rakonte yo tou sa chèf prèt yo ak ansyen yo te di. ¶ Lè disip yo tandè
 sa, yo tout mete tèt ansanm pou lapriyè Bondye konsa: O Mèt, se ou menm ki fè syèl la, tè a, lanmè
 a ak tout sa ki ladan yo. ¶ Pa pouvwa Sentespri, se ou menm ki te pale nan bouch sèvitè ou, David,
 zansèt nou, lè l' te di: Poukisa moun lòt nasyon yo t'ap toumante kò yo konsa? Poukisa pèp yo t'ap

fè plan ki p'ap sèvi yo anyen konsa? ²⁶ Wa latè yo pran pozisyon, chèf yo mete tèt yo ansanm sou do Bondye ak sou do Moun li chwazi a! ²⁷ Se sa menm ki rive nan lavil sa a lè Ewòd ak Pons Pilat mete tèt yo ansanm ak moun lòt nasyon yo ak tout moun pèp Izrayèl la sou do Jezi, sèvitè ki t'ap viv pou ou a, moun ou te chwazi a. ²⁸ Yo fè tou sa ou menm, nan tout pouvwa ou ak pwòp volonte ou, ou te deside davans ki pou te fèt la. ²⁹ Koulye a, Bondye, gade ki jan y'ap fè nou menas. Bay sèvitè ou yo fòs pou yo ka fè konnen mesaj ou a avèk konviksyon. ³⁰ Lonje men ou pou yo ka fè gerizon, mirak ak lòt bèl bagay nan non Jezi, sèvitè ki te viv pou ou a. ³¹ Lè yo fin lapriyè, kote yo te ye a pran tranble. Yo tout te anba pouvwa Sentespri, epi yo pran anonse pawòl Bondye a avèk konviksyon. ³² ¶ Tout moun ki te kwè yo te fè yon sèl kò, yo te gen menm santiman yonn pou lòt, yo te gen yon sèl lide yonn anvè lòt. Pesonn pa t' di byen li yo te pou tèt pa l' ase, men tou sa yonn te genyen te pou tout moun. ³³ Se avèk anpil pouvwa apòt yo t'ap bay prèv ki jan Bondye te leve Jezi fè l' soti vivan nan lanmò. Bondye menm te vide benediksyon l' an kantite sou yo tout. ³⁴ Pesonn nan mitan yo pa t' nan nesesite. Sa ki te gen jaden, sa ki te gen kay, yo vann sa, yo pote lajan an ³⁵ renmèt apòt yo. Apre sa, yo te separe lajan an bay chak moun dapre nesesite yo. ³⁶ Se konsa, te gen yon nonm yo rele Jozèf, yon moun Levi ki soti lil Chip. Apòt yo te ba l' yon ti non Banabas, ki te vle di: Nonm k'ap ankouraje a. ³⁷ Enben, li vann yon jaden li te genyen, li pote lajan an renmèt apòt yo.

Chapter 5

¹ ¶ Konsa tou, yon nonm yo te rele Ananyas ak Safira madanm li vann yon tè yo te genyen. ² Men, dakò ak madanm li, Ananyas kenbe enpe nan lajan an pou li, epi li al renmèt apòt yo rès la. ³ Lè sa a, Pyè di li: Ananyas, ki jan ou fè kite Satan antre nan kè ou pou l' fè ou bay Sentespri manti, pou l' fè ou kenbe enpe nan lajan tè a pou ou? ⁴ Anvan ou te vann tè a, se pa pou ou li te ye? Apre ou te fin vann li, tout lajan an te pou ou, pa vre? Ki jan ou fè mete nan tèt ou pou fè yon bagay konsa? Se pa moun ou bay manti non. Se Bondye ou twonpe. ⁵ Lè Ananyas tandè pawòl sa yo, li tonbe, li mouri frèt. Tout moun ki tandè nouvèl la te pè anpil. ⁶ Men, kèk jenn gason vini, yo vlope kò a; yo pran l', y' al antere li. ⁷ Twazèdetan apre, madanm Ananyas, ki pa t' konn sak te rive, vin

⁸ antre. Pyè mande li: Di mwen, èske se pou pri sa a nou te vann jaden an? Li reponn: Wi, se pou
⁹ pri sa a. Lè sa a, Pyè di li: Poukisa, ou menm ak mari ou, nou fè konbinezon sa a ansanm pou n'
chache pran Lespri Bondye a nan pèlen? Koute: Moun ki antere mari ou la, men yo la nan papòt
¹⁰ la. Yo pral pote ou ale, ou menm tou. Menm lè a, li tonbe atè nan pye Pyè, li mouri frèt. Jenn
gason yo antre, yo jwenn li mouri. Yo pran l', y' al antere bò kot mari li. ¹¹ Tout legliz la ak tout
moun ki te tandè bagay sa yo te pè anpil. ¹² ¶ Apòt yo t'ap fè anpil mirak ak anpil bèl bagay nan
mitan pèp la. Yo tout te reyini ansanm anba Galeri Salomon an. ¹³ Tout moun te pè mele ak yo,
apa moun ki te kwè yo. Men, pèp la t'ap pale byen sou yo. ¹⁴ Anpil moun, fanm kou gason, t'ap
vin jwenn disip yo paske yo te kwè nan Seyè a. ¹⁵ Lè sa a, yo tanmen pote moun malad yo deyò
nan lari. Yo mete yo sou kabann, sou nat, yon jan pou lè Pyè vin ap pase menm lonbray li te ka
¹⁶ kouvri kèk nan yo. Moun te soti nan tout ti bouk ki nan vwazinaj Jerizalèm. Yo pote moun malad
ak moun move lespri t'ap toumante. Yo tout te geri. ¹⁷ ¶ Lè sa a, yon sèl jalouzi pran granprèt la
ansanm ak sadiseyen yo ki te patizan li. ¹⁸ Yo fè arete apòt yo, mete yo nan gran prizon. ¹⁹ Men,
nan mitan lannwit, yon zanj Bondye louvri pòt prizon an, li fè apòt yo soti. Li di yo: ²⁰ Ale kanpe
nan mitan tanp lan, epi anonse pèp la tout bagay sou jan pou yo viv koulye a. ²¹ Apòt yo obeyi
zanj lan: Nan granmaten, y' al nan tanp lan epi yo tanmen moutre pèp la anpil bagay. Granprèt la
ansanm ak patizan l' yo sanble tout chèf fanmi nan pèp Izrayèl la, yo reyini Gran Konsèy la. Apre
sa, yo voye chache apòt yo nan prizon an. ²² Men, lè gad yo rive nan prizon an, yo pa jwenn yo.
²³ Yo tounen nan Gran Konsèy la, yo fè rapò yo. Yo di: Nou jwenn prizon an byen fèmen, avèk
gad yo nan pòs devan pòt prizon an. Men, lè nou louvri pòt yo, nou pa jwenn pesonn anndan an.
²⁴ Lè kòmandan lagad tanp lan ak chèf prèt yo tandè sa, yo t'ap mande ki jan apòt yo fè disparèt,
kisa ki te rive. ²⁵ Men, yon moun vin rive, li di yo: Mesye nou te mete nan prizon yo, men yo nan
tanp lan, y'ap pale ak pèp la. ²⁶ ¶ Lè sa a, kòmandan lagad la ale avèk gad li yo, li mennen apòt yo
tounen. Men, yo pa t'aji brital ak yo paske yo te pè pou pèp la pa t'touye yo ak kout wòch. ²⁷ Lè
yo mennen yo tounen, yo fè yo konparèt devan Gran Konsèy la. Epi granprèt la pran poze yo
²⁸ keksyon. Li di yo: Eske nou pa t' defann nou pale ak pèp la nan non nonm sa a? Gade sa n' fè.
²⁹ Nou gaye pawòl nou yo nan tout Jerizalèm. Nou vle rann nou reskonsab lanmò nonm lan. Pyè

ansanm ak lòt apòt yo reponn li: Se pou n' obeyi Bondye pase pou n' obeyi moun. ³⁰ Bondye zansèt
nou yo te fè Jezi leve soti vivan nan lanmò, Jezi nou te fè touye lè n' te kloure l' sou kwa a. ³¹ Bondye
fè l' moute chita sou bò dwat li, li mete l' Chèf sou nou, li fè l' delivre nou. Li fè sa pou bay pèp
Izrayèl la yon bèl chans pou l' tounen vin jwenn Bondye, pou l' resevwa padon pou peche l' yo.
³² Nou se temwen tout bagay sa yo, nou menm ansanm ak Sentespri Bondye bay tout moun ki obeyi
l' yo. ³³ Lè yo tandè pawòl sa yo, manm Gran Konsèy yo fin pran chenn. Tèlman yo te ankòlè, yo
te vle fè touye apòt yo. ³⁴ Men, te gen yon farizyen nan mitan yo ki te rele Gamalyèl. Se te yon
dirèktè lalwa tout pèp la te respekte anpil. Li kanpe nan mitan Konsèy la, li mande pou fè apòt yo
soti yon ti moman. ³⁵ Apre sa, li di: Nou menm moun pèp Izrayèl, pran tèt nou anvan nou fè sa
nou pral fè ak mesye yo. ³⁶ Sa pa gen lontan, yon nonm yo rele Tedas te parèt. Li te pran pòz
grannèg li. Li jwenn katsan (400) moun konsa ki te mete tèt ansanm avè li. Yo touye l', epi tout
moun ki t'ap swiv li yo gaye. Se konsa mouvman an tonbe. ³⁷ Apre sa, lè resansman an, te gen
Jida, yon nonm Galile, ki te parèt. Li te trennen yon bann moun dèyè li. Li menm tou, yo touye li.
Epi tout moun ki t'ap swiv li yo gaye tou. ³⁸ Pou koulye a, men sa m'ap di nou: Pa okipe mesye sa
yo ankò. Kite y ale. Si plan travay yo a soti nan lèzòm, li gen pou l' disparèt. ³⁹ Men, si sa soti nan
Bondye, nou p'ap kapab kraze li. Atansyon pou se pa avèk Bondye nou gen zafè! Manm Konsèy
yo tonbe dakò avèk Gamalyèl. ⁴⁰ Yo rele apòt yo ankò. Yo fè yo bat yo byen bat, yo pase yo lòd
pou yo pa pale nan non Jezi ankò. Apre sa yo lage yo. ⁴¹ Apòt yo kite Gran Konsèy la. Yo te kontan
dèske Bondye te wè yo merite pou moun te avili yo konsa poutèt non Jezi. ⁴² Toulejou, yo te nan
tanp lan, yo t'ap mache kay an kay, yo pa t' janm sispann moutre moun yo anpil bagay. Yo t'ap
anonse Bon Nouvèl ki pale sou Jezikri a.

Chapter 6

¹ ¶ Lè sa a, te vin gen anpil anpil disip. Ladan yo, jwif ki te fèt nan peyi etranje epi ki te pale
lang grèk la vin gen kont ak jwif peyi a. Yo t'ap plenyen dèske vèy yo pa t' jwenn anyen nan separe
manje yo t'ap fè chak jou a. ² Douz apòt yo sanble tout disip yo, yo di: Li pa ta bon pou n' neglije
predikasyon pawòl Bondye a pou n' al okipe sèvis manje a. ³ Se pou sa, frè m' yo, chwazi sèt gason
pami nou ki gen bon repitasyon, ki anba pouvwa Sentespri, ki gen kont bon konprann sou yo. N'a

⁴ ba yo fè sèvis sa a. Konsa nou menm, n'a toujou bay tout tan nou pou lapriyè, ak pou fè moun
⁵ konnen pawòl Bondye a. Tout gwoup la te dakò avèk lide sa a. Yo chwazi Etyèn, yon nonm ki
 te gen anpil konfyans nan Bondye epi ki te anba pouvwa Sentespri, Filip, Pwokò, Nikanò, Timon,
⁶ Pamenas ak Nikola, yon nonm lavil Antiòch ki te konvèti nan relijyon jwif yo. Yo mennen yo
⁷ bay apòt yo. Apòt yo lapriyè epi yo mete men sou tèt yo. Pawòl Bondye a t'ap gaye. Disip yo t'ap
⁸ vin pi plis toujou nan Jerizalèm. Menm pami prèt yo, te gen anpil ki te asepte kwè pawòl la. ¶
 Etyèn te yon nonm Bondye te beni anpil, li te gen anpil pouvwa. Li t'ap fè gwo bèl bagay ak mirak
⁹ nan mitan pèp la. Se konsa kèk moun leve dèyè li. Pami yo te gen manm sinagòg yo rele sinagòg
 Ansyen Esklav yo. (Se jwif lavil Sirèn ak lavil Aleksandri ki te ladan l'.) Yo menm ansanm ak lòt
¹⁰ jwif ki soti Silisi ak Lazi yo pran diskite ak Etyèn. Men, yo pa t' kapab kenbe tèt avèk li: Etyèn
¹¹ t'ap pale avèk bon konprann Sentespri te ba li. Lè yo wè sa, yo peye kèk moun pou di: Nou tande
¹² l' ap pale mal sou Moyiz ak sou Bondye. Se konsa, yo moute tèt pèp la ansanm ak chèf fanmi
 yo ak dirèktè lalwa yo. Y' al kot Etyèn, yo mete men sou li, yo trennen l' devan Gran Konsèy la.
¹³ Yo mennen lòt moun tou pou fè manti sou li, yo t'ap di: Nonm sa a pa sispann pale mal sou tanp
¹⁴ Bondye a ak sou lalwa Moyiz la. Nou tande l' di konsa: Jezi, moun Nazarèt la, gen pou kraze
¹⁵ tanp lan, l'ap chanje tout koutim Moyiz te kite pou nou yo. Tout moun ki te chita nan sal reyinyon
 Gran Konsèy la te gen je yo fikse sou Etyèn. Yo te wè figi l' te sanble ak figi yon zanj Bondye.

Chapter 7

¹ ¶ Granprèt la mande Etyèn: Eske se vre? ² Etyèn reponn: Frè m' yo, grandèt mwen yo, koute.
 Bondye, ki gen bèl pouvwa a, te parèt devan Abraram, zansèt nou. Lè sa a, li te rete nan peyi
³ Mezopotami, li pa t' ankò vin rete Karan. Bondye di l' konsa: Kite peyi ou la, kite tout fanmi ou
⁴ yo ladan l'. Ale nan peyi m'a moutre ou la. Se konsa, Abraram kite peyi kaldeyen yo, li al rete
⁵ Karan. Lè papa Abraram mouri, Bondye fè l' kite Karan vin nan peyi kote n'ap viv koulye a. Lè
 sa a, Bondye pa t' bay Abraram okenn bitasyon nan peyi a, pa menm yon ti pous tè. Men, Bondye
 te pwomèt li t'ap ba l' peyi a ki t'ap rete nèt pou li ak pou pitit pitit li yo. Men, lè sa a Abraram pa
⁶ t' gen pitit. Men sa Bondye te di l': Pitit pitit ou yo gen pou y' al viv nan yon peyi etranje, kote

⁷ y'ap fè yo tounen esklav, kote y'ap maltrete yo pandan katsanzan (400 an). Men, Bondye di l' ankò: Se mwen menm k'ap peni nasyon ki va pran yo fè esklav la. Apre sa, y'a soti kite peyi etranje

⁸ sa a, y'a vin sèvi m' isit la. Apre sa, Bondye pase yon kontra ak Abraram, li ba li sikonsizyon an pou sèvi mak kontra a. Se konsa Abraram te sikonsi Izarak, pitit gason l' lan, wit jou apre l' te fèt. Menm jan an tou, Izarak te sikonsi Jakòb, pitit li a. Jakòb menm sikonsi douz pitit li yo, zansèt

⁹ douz branch fanmi pèp Izrayèl la. Pitit Jakòb yo, zansèt nou yo, fè jalouzi pou Jozèf. Yo vann li

¹⁰ tankou yon esklav nan peyi Lejip. Men, Bondye te kanpe la avèk Jozèf. Li delivre l' nan tout malè li. Lè Jozèf parèt devan farawon an, wa peyi Lejip la, Bondye ba l' bon konprann, li fè l' aji yon jan ki fè wa a plezi. Farawon an mete Jozèf chèf pou l' gouvènèn tout peyi Lejip la ansanm ak

¹¹ kay wa a tou. Apre sa, vin gen yon grangou nan tout peyi Lejip ak nan peyi Kanaran. Moun t'ap

¹² soufri anpil. Zansèt nou yo pa t' jwenn anyen pou yo te manje. Lè Jakòb tandè te gen manje nan

¹³ peyi Lejip, li voye zansèt nou yo la yon premye fwa. Dezyèm fwa y' ale a, Jozèf fè frè l' yo

¹⁴ rekonèt li. Se konsa farawon an vin fè konesans ak fanmi Jozèf yo. Jozèf voye chache Jakòb,

¹⁵ papa l', ansanm ak tout fanmi li. Lè sa a, yo te swasannkenz moun antou. Jakòb desann nan peyi

¹⁶ Lejip. Se la li mouri, li menm ak tout zansèt nou yo. Yo pote kò yo Sichèm, yo antere yo la, nan

¹⁷ twou wòch Abraram te achte nan men eritye Emò yo, lavil Sichèm. ¶ Lè a t'ap pwoche pou Bondye te kenbe pwomès li te fè Abraram lan. Pèp nou an te vin anpil, chak jou li t'ap vin pi plis

¹⁸ toujou nan peyi Lejip la. Yon lòt wa ki pa t' konnen anyen sou Jozèf te pran kòmandman peyi

¹⁹ a. Wa sa a twonpe pèp nou an, li maltrete zansèt nou yo: li fòse yo kite tibebe ki fenk fèt yo

²⁰ deyò pou yo mouri. Se lè sa a Moyiz te fèt: se te yon bèl pitit devan Bondye. Yo te kenbe l'

²¹ pandan twa mwa lakay papa li pou ba l' tete. Men, lè yo te lage l' deyò a, pitit fi farawon an te

²² ranmase l': li elve l' tankou pitit pa li. Se konsa Moyiz te vin gen tout konesans moun peyi Lejip

²³ yo. Sou jan l' te pale ak sa l' t'ap fè, yo te wè msye te fò anpil. Lè Moyiz vin gen karantan, li fè

²⁴ lide al vizite frè l' yo, moun pèp Izrayèl yo. Lè l' rive, li wè yon moun peyi Lejip ki t'ap maltrete yonn nan frè l' yo, li pran defans nonm yo t'ap maltrete a. Li pran revanj li sou moun peyi Lejip la,

²⁵ li touye li. Li te kwè frè l' yo ta konprann travay Bondye ki te chwazi l' pou delivre yo a. Men,

²⁶ yo pa t' konprann sa. Nan denmen, Moyiz wè de nan moun pèp Izrayèl yo ki t'ap goumen. Li te

²⁷ vle fè yo byen ankò, li di yo: Mezanmi, se frè nou ye. Poukisa yonn ap maltrete lòt konsa? Men,

sa ki t'ap maltrete moun pèp Izrayèl parèy li a bay Moyiz yon zòp, li di l' konsa: Kilès ki mete ou
 la pou ban nou lòd, osinon pou jije nou? ²⁸ Gen lè ou vle touye m' menm jan ou te touye moun
 peyi Lejip ayè a? ²⁹ Lè Moyiz tande pawòl sa yo, li kouri kite peyi a, li al viv nan peyi Madyan.
 Antan l' te la, li fè de pitit gason. ³⁰ ¶ Karantan apre sa, yon zanj Bondye parèt devan Moyiz nan
 yon flanm dife ki t'ap boule yon ti touf bwa nan mitan dezè ki bò Mòn Sinayi a. ³¹ Moyiz te sezi
 lè l' wè aparisyon sa a. Antan l' t'ap pwoche pou gade l' pi pre, li tande vwa Bondye ki t'ap di: ³² Se
 mwen menm ki Bondye zansèt ou yo, Bondye Abraram, Bondye Izarak ak Bondye Jakòb. Moyiz
 pran tranble sitèlman li te pè. Li pa menm louvri je l' pou l' gade. ³³ Lè sa a Bondye di l' ankò:
 Wete sapat ou, paske kote ou ye a se yon tè ki apa pou Bondye. ³⁴ Mwen wè tray pèp mwen an ap
 pase nan peyi Lejip, mwen tande jan li ap plenn, mwen desann vin delivre yo. Koulye a, ale non.
 Se mwen menm k'ap voye ou nan peyi Lejip. ³⁵ Moun pèp Izrayèl yo te voye Moyiz jete lè yo te
 di: Kilès ki mete ou la pou ban nou lòd osinon pou jije nou? Se menm Moyiz sa a Bondye te voye
 pou kòmande yo, pou delivre yo avèk konkou zanj ki te parèt nan ti touf bwa a. ³⁶ Se Moyiz ki fè
 pèp Izrayèl la soti kite peyi Lejip, avèk tout mirak ak tout bèl bagay li te fè nan peyi a bò lanmè
 Wouj la ak nan dezè a pandan karantan. ³⁷ Se menm Moyiz sa a ki te di pèp Izrayèl la: Bondye
 gen pou l' voye yon pwofèt ban nou tankou l' te voye m' lan: se va yonn nan frè nou yo. ³⁸ Se li
 menm ki te la ak pèp Izrayèl la lè yo te sanble nan gwo dezè a; li te la avèk zansèt nou yo ansanm
 ak zanj Bondye a ki t'ap pale avè l' sou gwo mòn Sinayi a. Se li menm ki te resevwa pawòl ki bay
 lavi a nan men Bondye epi ki pase yo ban nou. ³⁹ Men, zansèt nou yo pa t' vle obeyi l'; yo mete l'
 sou kote, epi yo te anvri tounen Lejip. ⁴⁰ Yo di Arawon: Fè lòt bondye ki pou mache devan nou,
 paske nou pa konnen sa ki rive nonm yo rele Moyiz la ki te fè nou soti kite peyi Lejip la. ⁴¹ Lè sa
 a, yo fè yon estati an fòm yon ti towò bèf, epi yo touye bèt ofri bay zidòl la. Yo te kontan pou sa
 yo te fè ak men yo a. ⁴² ¶ Men, Bondye vire do l' ba yo, li kite yo adore zetwal ki nan syèl la, jan
 sa te ekri nan Liv pwofèt yo: Nou menm pèp Izrayèl, èske se pou mwen nou te fè ofrann bèt ak lòt
 sakrifis, pandan karantan nou pase nan gwo dezè a? ⁴³ Non, se pa t' pou mwen. Men, nou redi pote
 wogatwa zidòl Molòk la, ansanm ak pòtre zetwal Refan, bondye nou an, bann zidòl nou te fè ak
 men nou pou n' adore! Se poutèt sa, m'ap voye nou jouk lòt bò Babilòn. ⁴⁴ Nan gwo dezè a, zansèt
 nou yo te gen yon tant kote yo te fèmen de wòch plat lalwa yo. Yo te fè l' jan Bondye te mande
 Moyiz pou l' fè l' la, dapre modèl li te moutre Moyiz la. ⁴⁵ Yo pase tant sa a bay grandèt nou yo
 ki te vin apre. Grandèt nou yo menm te pote l' avèk yo lè Jozye t'ap mennen yo pou yo pran peyi

a nan men pèp Bondye t'ap chase met deyò devan yo. Tant la rete la jouk sou tan David.⁴⁶ David
 te jwenn favè Bondye, li te mande l' pèmision pou l' te fè yon kay pou Bondye Jakòb la.⁴⁷ Men
 se Salomon ki te bati kay la pou li.⁴⁸ Men, Bondye ki anwo nan syèl la pa rete nan kay moun bati
 ak men yo. Men sa pwofèt la di:⁴⁹ Syèl la se fòtèy kote m' chita a. Se Bondye ki di sa. Tè a se yon
 ti ban pou m' lonje pye mwen. Ki kalite kay nou ta ka bati pou mwen? Ki kote nou ta ka ban mwen
 pou m' poze kò m'?⁵⁰ Eske se pa mwen ki fè tout bagay sa yo?⁵¹ ¶ Ala moun gen tèt di! Tankou
 moun lòt nasyon yo, nou fèmen kè nou, nou fèmen zòrèy nou bay Bondye, n'ap kenbe tèt ak Sentespri
 toujou. Nou tankou zansèt nou yo.⁵² Kilès nan pwofèt yo zansèt nou yo pa t' pèsekite? Yo te touye
 tout pwofèt ki te fè konnen davans ki jan Sèvitè Bondye a te gen pou vini. Koulye a, se Sèvitè
 Bondye a menm nou trayi, se li menm nou touye.⁵³ Se nou menm ki te resevwa lalwa Moyiz nan
 men zanj Bondye yo, epi se nou menm ankò ki pa obeyi li.⁵⁴ ¶ Lè manm Gran Konsèy yo tande
 pawòl sa yo, yo fin pran chenn, yo manje dan yo sou Etyèn sitèlman yo te an kolè.⁵⁵ Men Etyèn,
 anba pouvwa Sentespri, leve je l' anlè, li gade syèl la. Li wè tout bèl pouvwa Bondye a ansanm ak
 Jezi kanpe sou bò dwat Bondye.⁵⁶ Li di: Gade, men mwen wè syèl la louvri, ak Moun Bondye
 voye nan lachè a kanpe sou bò dwat Bondye.⁵⁷ Moun yo pran rele byen fò, yo bouche zòrèy yo.
 Epi yo tout tonbe sou li ansanm.⁵⁸ Yo trennen l' deyò lavil la. Yo touye l' ak kout wòch. Moun ki
 t'ap akize Etyèn yo te mete rad yo nan pye yon jenn gason yo te rele Sòl.⁵⁹ Pandan yo t'ap voye
 wòch sou Etyèn, Etyèn menm t'ap lapriyè, li t'ap di: Seyè Jezi, resevwa lespri mwen.⁶⁰ Apre sa,
 li tonbe ajenou, li rele byen fò: Seyè, pa mete peche sa a sou kont yo. Lè l' fin di sa, li mouri.

Chapter 8

¹ ¶ Sòl menm te dakò pou yo te touye Etyèn. Menm jou sa a, yo kòmanse pèsekite legliz Jerizalèm
 lan anpil. Tout disip yo gaye kò yo nan peyi Jide ak nan peyi Samari. Se apòt yo sèlman ki te rete
 Jerizalèm.² Kèk moun ki renmen Bondye te antere Etyèn, yo te kriye anpil pou li.³ Sòl menm te
 soti pou l' fini ak legliz la. Li mache kay an kay, li trennen tout moun ki kwè yo rache yo met deyò
 pa fòs, li fè fèmen fanm kou gason nan prizon.⁴ ¶ Disip ki te gaye nan peyi a t'ap anonse bon
 nouvèl la toupatou.⁵ Se konsa Filip al nan yon lavil peyi Samari. Rive la li tanmen pale sou Kris

⁶ la bay moun yo. Foul moun yo mete tèt yo ansanm, yo t'ap swiv sa Filip t'ap di yo: yo t'ap koute
⁷ l', yo t'ap wè mirak li t'ap fè. Move lespri yo t'ap pouse gwo rèl lè Filip t'ap chase yo soti sou anpil
⁸ moun malad. Li te geri anpil moun paralize ak moun enfim tou. Se konsa te gen yon gwo
⁹ kontantman nan tout lavil la. Nan lavil sa a te gen yon nonm yo rele Simon. Metye l' se fè maji.
¹⁰ Simon sa a te yon sezisman pou tout moun Samari. Li te fè tèt li pase pou yon grannèg. Tout
¹¹ moun, piti kou gran, t'ap swiv tou sa li t'ap fè. Yo t'ap di: Nonm sa a gen pouvwa Bondye, sa yo
¹² rele gwo pouvwa a, nan tèt li. Se konsa yo t'ap swiv tou sa li t'ap fè paske depi lontan yo te egare
¹³ devan maji l' yo. Men, lè Filip anonse bon nouvèl peyi kote Bondye wa a, lè l' fè yo konnen non
¹⁴ Jezi Kris la, moun yo kwè pawòl la; fanm kou gason resevwa batèm. Ata Simon te kwè. Li
¹⁵ menm tou li te resevwa batèm. Apre sa, li te toujou avèk Filip, li te sezi wè bèl bagay ak mirak li
¹⁶ t'ap fè. ¶ Apòt yo menm ki te lavil Jerizalèm, lè yo tandè moun Samari te asepte pawòl Bondye
¹⁷ a, yo voye Pyè ak Jan bò kote yo. Lè Pyè ak Jan rive Samari, yo lapriyè pou moun ki kwè yo
¹⁸ pou yo te kapab resevwa Sentespri, paske Sentespri a pa t' ankò desann sou okenn nan yo. Yo
¹⁹ te resevwa batèm nan non Seyè Jezi a sèlman. Lè sa a, Pyè ak Jan mete men sou tèt yo, yo
²⁰ resevwa Sentespri. Simon te wè jan moun yo te resevwa Sentespri lè apòt yo mete men sou tèt
²¹ yo. Li ofri Pye ak Jan lajan. Li di yo: Ban m' pouvwa sa a tou, pou lè m' mete men m' sou tèt
²² yon moun li ka resevwa Sentespri a tou. Men, Pyè di li: Al mouri ansanm ak tout lajan ou lan!
²³ Sa Bondye fè kado, ou kwè moun ka achte sa ak lajan? Nan travay sa a, pa gen anyen pou ou;
²⁴ ou pa gen dwa ladan l' paske kè ou pa dwat devan Bondye. Wete move lide sa a nan tèt ou,
²⁵ lapriyè Bondye pou ou wè si la padonnen ou dèske ou te fè lide sa a. Paske mwen wè kè ou
²⁶ anmè kou fyèl, peche fin mare nanm ou. Lè sa a, Simon di Pyè ak Jan konsa: Tanpri souple,
²⁷ lapriyè Bondye pou mwen, pou anyen nan sa nou di a pa rive mwen. Lè Pyè ak Jan fin rann
 temwayaj sa a, lè yo fin bay mesaj Bondye a, yo tounen lavil Jerizalèm. Sou tout wout la, yo t'ap
 bay bon nouvèl la nan anpil bouk peyi Samari. ¶ Yon zanj Bondye pale ak Filip, li di li: Leve
 non! Al nan direksyon sid, sou wout ki soti lavil Jerizalèm pou desann Gaza a. (Wout sa a, moun
 pa fasil pase sou li ankò.) Filip leve, li pati. Antan l' sou wout la, yon nonm parèt devan l'; se te
 yon moun peyi Letiopi, yon nèg konfyans. Li te yon gwo chèf nan peyi Letiopi. Se li menm ki te

reskonsab tout richès Kandas, larenn peyi a. Li te moute lavil Jerizalèm pou adore Bondye. ²⁸ Antan
 li t'ap tounen nan peyi l', li te chita nan cha li, li t'ap li nan liv pwofèt Ezayi a. ²⁹ Sentespri di Filip
 konsa: Leve pye ou, rive toupre cha a. ³⁰ Filip kouri ale bò cha a, li tande moun peyi Letiopi a ki
 t'ap li nan liv pwofèt Ezayi a. Li mande li: Eske ou konprann sa w'ap li la a? ³¹ Nonm lan reponn
 li: Ki jan pou m' fè konprann si m' pa jwenn moun pou esplike mwen? Epi li mande Filip pou l'
 moute nan cha a, vin chita bò kote li. ³² Men pasaj li t'ap li nan liv la: Li te tankou yon mouton yo
 t'ap mennen labatwa. Li te tankou yon ti mouton ki pa janm rele lè y'ap taye lenn sou do li. Li pa
 janm louvri bouch li di anyen. ³³ Yo te desann li ba anpil, yo refize fè l' jistis. Pesonn p'ap nonmen
 non pitit pitit li. Paske, lavi l' sou latè fini nèt. ³⁴ Chèf peyi Letiopi a mande Filip: Di m' non, ki
 moun pwofèt la ap pale konsa: tèt pa l' osinon yon lòt moun? ³⁵ Filip pran pale: li kòmanse avèk
 pasaj li t'ap li nan liv la, li fè l' konnen bon nouvèl ki pale sou Jezi a. ³⁶ Antan yo prale konsa, yo
 rive yon kote ki te gen dlo. Lè sa a, nonm peyi Letiopi a di li: Bon, men dlo. Kisa ki pou anpeche
 m' resevwa batèm? ³⁷ Filip di li: Si ou kwè ak tout kè ou, ou ka resevwa batèm. Nonm lan reponn
 li: Mwen kwè Jezikri se Pitit Bondye a. ³⁸ Apre sa, li fè yo rete cha a. Filip desann nan dlo a ansanm
 ak gwo chèf la. Filip batize li. ³⁹ Lè yo soti nan dlo a, Lespri Bondye fè Filip disparèt, gwo chèf
 la pa janm wè l' ankò. Men, li kontinye chemen l' ak kè kontan. ⁴⁰ Filip menm rete konsa li wè li
 lavil Azòt. Apre sa, li pran mache. Nan tout ti bouk kote l' pase, li anonse bon nouvèl la jouk li rive
 lavil Sezare.

Chapter 9

¹ ¶ Men Sòl, bò pa li, pa t' sispann menase touye disip Seyè yo. li al jwenn granprèt la. ² Li
 mande l' lèt otorizasyon pou tout sinagòg ki nan lavil Damas. Konsa, tout moun li ta jwenn k'ap
 swiv chemen Bondye a, fanm kou gason, li te ka arete yo, mare yo mennen Jerizalèm. ³ Antan l'
 te sou wout la, prèt pou rive lavil Damas, li rete konsa yon limyè soti nan syèl la, li klere tout kote
 l' te ye a. ⁴ Sòl tonbe atè, epi l' tande yon vwa ki di li: Sòl, Sòl, poukisa w'ap pèsekite mwen konsa?
⁵ Li reponn: Ki moun ou ye, Mèt? Vwa a reponn li: Mwen se Jezi, moun w'ap pèsekite a. ⁶ Leve,
 antre lavil la. Se la y'a di ou sa ou gen pou fè. ⁷ Moun ki t'ap vwayaje ansanm ak Sòl yo te rete san

di yon mo: yo te tande vwa a byen klè, men yo pa t' wè pesonn. ⁸ Sòl leve atè a, li louvri je l' men
 li pa t' kapab wè anyen. Yo pran men l', yo mennen l' lavil Damas. ⁹ Li rete la twa jou san wè, san
 manje, san bwè. ¹⁰ ¶ Nan lavil Damas te gen yon disip ki te rele Ananyas. Seyè a parèt devan l'
 nan yon vizyon, li rele li: Ananyas. Ananyas reponn: Men mwen, Seyè. ¹¹ Seyè a di li: Leve koulye
 a, ale nan Ri Dwat la lakay Jida, mande pou yon nonm yo rele Sòl, moun lavil Tas. L'ap lapriyè
 kote l' ye a, ¹² li fè yon vizyon: li wè yon nonm yo rele Ananyas antre vin mete men sou tèt li pou
 l' kapab wè ankò. ¹³ Ananyas reponn: Seyè, mwen tande nan bouch anpil moun kantite mechanste
 li fè moun pa ou yo pase lavil Jerizalèm. ¹⁴ Epitou li vin isit la ak pouvwa pou l' arete dènye moun
 k'ap rele non ou. Se chèf prèt yo menm ki ba l' pouvwa sa a. ¹⁵ Men, Seyè a di li: Ale. Paske nonm
 sa a, mwen chwazi l' pou sèvis mwen, pou l' fè tout moun konnen non mwen, moun lòt nasyon yo
 ak tout wa yo ansanm ak pèp Izrayèl la. ¹⁶ Mwen menm, m'a moutre l' tou sa li gen pou l' soufri
 pou mwen. ¹⁷ Ananyas ale, li antre nan kay la, li mete men l' sou tèt Sòl, li di li: Sòl, frè mwen,
 Seyè Jezi voye m' kote ou. Se li menm ki te parèt devan ou sou granchemen an lè ou t'ap vini an.
 Li voye m' pou ou ka wè ankò, pou ou vin anba pouvwa Sentespri. ¹⁸ Menm lè a, bagay tankou
 kal pwason sot tonbe nan je Sòl, epi l' wè ankò. Sòl leve, li resevwa batèm. ¹⁹ Apre sa, li manje
 epi l' vin gen fòs ankò. Sòl rete pase kèk jou ankò ak disip ki te Damas yo. ²⁰ Menm lè a tou, li
 kòmanse bay mesaj la nan sinagòg yo, li t'ap fè moun konnen Jezi se pitit Bondye. ²¹ Tout moun
 ki te tande l' te sezi, yo t'ap di: Apa nonm sa a ki t'ap maltrete tout moun ki t'ap rele non sa a lavil
 Jerizalèm? Se pa li ki vin isit la toutespre pou arete yo, pou mennen yo bay chèf prèt yo? ²² Men,
 Sòl t'ap vin pi fò toujou. Li t'ap fèmen bouch tout jwif ki t'ap viv Damas yo lè li t'ap moutre yo Jezi
 se moun Bondye te chwazi pou l' voye a menm. ²³ ¶ Kèk jou apre sa, jwif yo fè konplo pou yo
 touye li. ²⁴ Men, Sòl te pran nouvèl konplo a. Lajounen kou lannwit yo t'ap veye pòtay lavil la pou
 yo touye li. ²⁵ Lè sa a, patizan Sòl yo pran l' nan mitan lannwit, yo mete l' nan yon panyen, yo file
 l' desann lòt bò miray lavil la. ²⁶ Lè Sòl rive lavil Jerizalèm li te vle mete l' ak disip yo, men yo
 tout te pè l': yo pa t' kwè li te yon disip tout bon vre. ²⁷ Lè sa a, Banabas pran l' avè l', epi li mennen
 l' bò kot apòt yo. Li rakonte yo ki jan Sòl te wè Seyè a sou wout la, ki jan Seyè a te pale avè li. Li
 di yo tou ki jan nan lavil Damas Sòl te anonse bon nouvèl la nan non Jezi avèk konviksyon. ²⁸ Depi
 lè sa a Sòl te toujou ak disip yo. Li t'ap ale vini ak yo nan tout Jerizalèm, li t'ap bay mesaj la avèk

²⁹ konviksyon nan non Seyè a. Li t'ap pale avèk jwif ki pale lang grèk la, li t'ap diskite avèk yo.
³⁰ Men, yo menm yo t'ap chache touye li. Lè frè yo vin konn sa, yo mennen l' lavil Sezare, yo fè
³¹ l' pati pou Tas. Lè sa a, legliz la te gen repo toupatou nan Jide, nan Galile ak nan Samari. Li t'ap
 devlope, li t'ap viv avèk krentif pou Bondye. Avèk konkou Sentespri, li t'ap resevwa anpil moun
³² toujou. ¶ Pyè menm t'ap vwayaje toupatou nan peyi a. Yon jou li te al lakay disip yo nan lavil
³³ Lida, li jwenn yon nonm yo te rele Ine ki te kouche sou yon kabann depi witan. Nonm sa a te
³⁴ paralize. Pyè di li: Ine, Jezikri ap geri ou. Leve non, ranje kabann ou. Lamenm, Ine leve kanpe.
³⁵ Tout moun ki t'ap viv nan lavil Lida a ak nan laplenn Sawon an te wè li, epi yo tounen vin jwenn
³⁶ Bondye. ¶ Nan lavil Jope te gen yon fanm yo te rele Tabita. (An lang grèk yo te rele l': Dòkas,
 ki vle di: Ti Gazèl.) Se te yon patizan Jezi li te ye. Li t'ap pase tout tan li ap fè byen epi li t'ap ede
³⁷ pòv yo anpil. Lè sa a, li tonbe malad epi l' mourir. Yo benyen kò a, yo mete l' nan chanm anwo
³⁸ kay la. Lavil Jope pa t' twò lwen ak lavil Lida. Lè disip ki te Jope yo vin konnen Pyè te Lida,
³⁹ yo voye de moun bò kote l' avèk mesaj sa a: Tanpri, pa mize vin lakay nou. Pyè pati lamenn
 avèk yo. Lè l' rive, yo mennen l' nan chanm ki te anwo kay la. Tout vè yo pwoche, yo t'ap kriye.
⁴⁰ Yo t'ap moutre l' chemiz ak rad Dòkas te konn fè lè l' te la avèk yo. Pyè fè tout moun soti. Li
 mete jenou l' atè, li lapriyè. Apre sa, li vire bò kot kò a, li di li: Tabita, leve non. Fanm lan louvri
⁴¹ je l', lè l' wè Pyè, li chita. Pyè lonje men l' ba li, li fè l' leve kanpe. Apre sa, Pyè rele disip yo ak
⁴² vè yo, li moutre yo Tabita vivan. Yo vin konn sa nan lavil Jope. Anpil moun mete konfyans
⁴³ yo nan Seyè a. Apre sa, Pyè rete lontan nan lavil Jope, lakay yon bòs tanè yo rele Simon.

Chapter 10

¹ ¶ Nan lavil Sezare te gen yon nonm ki te rele Kònèy. Li te kaptenn yon batayon sòlda moun
² peyi Itali nan lame women an. Kònèy te yon nonm ki t'ap sèvi Bondye jwif yo. Li menm ak tout
 fanmi l', yo te gen krentif pou Bondye. Li te fè anpil pou pòv yo pami pèp jwif la. Epi se tout tan
³ li t'ap lapriyè Bondye. Yon jou apremidi, vè twazè, li fè yon vizyon: aklè konsa, li wè yon zanj
⁴ Bondye antre lakay li. Zanj lan rele li: Kònèy! Li gade zanj lan, li te pè, li di l' konsa: Sak genyen,
 Mèt? Zanj lan reponn li: Bondye asepte lapriyè ou yo ansanm ak tout byen ou te fè pou pòv yo.

⁵
 Epi li chonje ou. Koulye a, voye moun lavil Jope, fè y' al chache yon nonm yo rele Simon (li gen
 yon ti non Pyè). ⁶ Li fè ladesant lakay Simon, bòs tanè a, ki gen kay li bò lanmè a. ⁷ Fini zanj
 Bondye a fin pale, li ale. Kònèy rele de domestik ansanm ak yonn nan gad kò l' ki t'ap sèvi Bondye
⁸ jwif yo tou. Li rakonte yo tou sak te pase. Lèfini, li voye yo Jope. ⁹ ¶ Nan denmen, vè midi konsa,
 yo te nan wout toujou, men yo te prèt pou rive Jope. Menm lè sa a, Pyè moute anwo sou tèt kay la
¹⁰ pou li al lapriyè. Grangou bare l', li te anvi manje. Pandan yo t'ap pare manje pou li, li fè yon
¹¹ vizyon: Li wè syèl la louvri epi yon bagay t'ap desann soti ladan li. Bagay la te tankou yon gwo
 dra mare nan kat bout li ki t'ap file desann sou latè. ¹² Te gen tout kalite bèt kat pat, tout kalite bèt
 ki trennen sou vant ak tout kalite zwezo ladan li. ¹³ Li tandè yon vwa ki di l' konsa: Leve non, Pyè.
¹⁴ Touye, lè ou fini, manje. Men, Pyè di: Non, Mèt. Mwen pa janm manje move manje ni manje
¹⁵ ki pa bon pou moun k'ap sèvi Bondye. Menm vwa a pale ankò, li di li: Bagay Bondye di ki bon
¹⁶ pou moun k'ap sèvi l', ou menm, pa di l' pa bon. An twa fwa sa repete. Apre sa, lamenn bagay
¹⁷ la moute tounen nan syèl la. Pyè menm pa t' konn ki sans pou l' te bay vizyon li te fè a. Men,
 tout tan sa a, moun Kònèy te voye yo t'ap mande ki bò kay Simon an te ye. Yo te rive devan pòt
¹⁸ la. Yo rele moun, epi yo mande: Eske se isit Simon yo rele Pyè a fè ladesant li? ¹⁹ ¶ Pyè t'ap
 kalkile toujou sou sans pou l' te bay vizyon an, lè Sentespri di li: Koute. Gen twa moun anba a k'ap
²⁰ mande pou ou. Leve non, desann. Pati ak yo touswit, se mwen menm ki voye yo. ²¹ Pyè desann,
²² li al jwenn mesye yo, epi l' di yo: Se mwen menm n'ap chache a. Kisak mennen nou isit la? Yo
 reponn: Se kaptenn Kònèy ki voye nou. Nonm sa a, se yon bon gason ki gen krentif pou Bondye.
 Tout pèp jwif la konsidere l' anpil. Enben, yon zanj Bondye te di l' pou l' te voye chache ou pou ou
²³ vin lakay li. Li bezwen tandè sa ou gen pou di l' la. Pyè fè yo antre. Li fè yo pase nwit lan avè
²⁴ li. Nan denmen, li leve, li pati ak yo. Kèk frè lavil Jope ale avè l' tou. Yo rive Sezare yon jou
²⁵ apre. Kònèy t'ap tann yo ak tout fanmi l' ansanm ak kèk bon zanmi l' li te envite lakay li. Pyè fè
 sa pou l' antre, Kònèy kouri vin devan l', li lage kò l' nan pye l', li bese tèt li byen ba devan li.
²⁶ Men, Pyè fè l' leve, li di l' konsa: Kanpe non, monchè. Se yon moun mwen ye tou. ²⁷ Pyè kontinye
²⁸ pale avèk li. Yo antre nan kay la epi Pyè jwenn yon bann moun ki te sanble. Li di yo: Nou
 konnen sa pa fèt: jwif pa gen dwa mele ak moun lòt nasyon ni mete pye lakay yo. Relijyon l' pa
 penmèt sa. Men, Bondye fè m' konnen, mwen pa gen dwa gade pesonn pou move moun ni pou
²⁹ moun ki pa nan kondisyon pou sèvi Bondye. Se poutèt sa, voye ou voye rele m' lan, mwen pa

fè ni yonn ni de, mwen vini. Koulye a, mwen ta renmen konnen poukisa ou voye chache m' lan.

30

Kònèy di li: Jòdi a fè kat jou, mwen te lakay mwen, mwen t'ap lapriyè vè twazè konsa nan apremidi. Mwen rete konsa, mwen wè yon nonm ki te gen yon bèl rad byen klere sou li kanpe devan

31

mwen. Epi l' di mwen: Kònèy, Bondye tande lapriyè ou, li chonje tout byen ou fè pou pòv yo.

32

Voye yon moun lavil Jope al rele Simon ki gen ti non Pyè a. Se lakay Simon, bòs tanè ki bò

33

lanmè a, li ye. Menm lè a, mwen voye chache ou, epi ou asepte vini. Koulye a, men nou tout la

devan Bondye, n'ap koute tou sa Bondye ba ou lòd di nou. ¶ Pyè pran lapawòl, li di: Wi, koulye

34

a, mwen konprann sa se vre: Bondye pa gade sou figi moun. Li kontan ak tout moun nan tout

35

nasyon ki gen krentif pou li epi ki fè sa ki dwat devan li. Nou konnen mesaj Bondye te voye

36

bay pèp Izrayèl la: li fè yo konnen bon nouvèl la ki di: Bondye voye Jezi ki Mèt tout moun pou

37

bay tout moun kè poze. Nou konnen sak te rive nan tout peyi Jide a. Bagay sa yo kòmanse nan

38

peyi Galile, apre batèm Jan t'ap anonse a. Nou konnen tou ki jan Bondye te vide pouvwa Sentespri l' sou Jezi, moun Nazarèt la. Jezi mache nan tout peyi a, li t'ap fè byen, li t'ap geri tout moun ki te

39

anba pouvwa Satan paske Bondye te kanpe avèk li. Nou menm k'ap pale la a, nou temwen tou

40

sa li te fè nan peyi jwif yo ak nan Jerizalèm. Yo te touye l', yo te kloure l' sou kwa a. Men sou

41

twa jou, Bondye fè l' leve soti vivan nan lanmò. Apre sa, li fè moun wè li vivan. Se pa tout moun non ki te wè li. Se nou menm ase ki te wè li. Bondye te chwazi nou davans pou sèvi l' temwen. Wi,

42

nou manje avè l', nou bwè avè l' apre Bondye te fè l' tounen vivan soti nan lanmò. Li ban nou lòd mache fè konnen bon nouvèl la bay pèp la, pou n' fè konnen se Jezi menm Bondye mete pou

43

jije tout moun san wete yonn, kit yo vivan kit yo mouri deja. Tout pwofèt yo te di sa sou li: Nenpòt moun ki met konfyans yo nan Jezi va resevwa padon pou tout peche yo gremesi non sa a.

44

¶ Pyè t'ap pale toujou lè Sentespri a desann sou tout moun ki t'ap koute mesaj la. Frè ki te soti lavil Jope ansanm ak Pyè yo se jwif yo te ye. Yo te sezi wè ki jan Bondye te bay moun ki pa jwif

45

yo Sentespri l' an kantite. Yo te tande moun lòt nasyon yo ap pale nan lòt lang. Yo t'ap fè lwanj

46

Bondye, yo t'ap di jan li gen pouvwa. Lè sa a Pyè di: Moun sa yo resevwa Sentespri menm jan

47

avèk nou. Koulye a, ki moun ki ka anpeche nou batize yo nan dlo tou? Epi li bay lòd batize yo nan non Jezikri. Apre sa, yo mande Pyè pou l' rete pase kèk jou avèk yo.

48

Chapter 11

¹ ¶ Apòt yo ansanm ak frè yo ki te nan Jide te tande ki jan moun ki pa jwif yo te resevwa pawòl Bondye a tou. ² Lè Pyè tounen moute Jerizalèm, jwif ki te kwè yo tanmen kritike li. ³ Yo di l' konsa: Apa ou antre lakay moun ki pa sikonsi, ou manje ak yo? ⁴ Lè sa a, Pyè rakonte yo sak te pase nan tout ti detay. Li di yo: ⁵ Mwen te lavil Jope, mwen t'ap lapriyè, lè m' fè yon vizyon. Mwen wè yon bagay ki t'ap desann vin jwenn mwen, tankou yon gwo dra mare nan kat bout, ki t'ap desann sot nan syèl la. Li rive toupre mwen. ⁶ Lè m' gade byen gade, mwen wè tout kalite bèt andedan li: bèt kat pat, bèt nan bwa, bèt ki trennen sou vant ak zwezo. ⁷ Epi m' tande yon vwa ki di m' konsa: Leve non, Pyè, touye, manje. ⁸ Men mwen di: Non, Mèt. Mwen pa janm mete move manje osinon manje ki pa bon pou moun k'ap sèvi Bondye nan bouch mwen. ⁹ Menm vwa a pale ankò nan syèl la, li di mwen konsa: Bagay Bondye di ki bon pou moun k'ap sèvi l', pa di l' pa bon pou yo. ¹⁰ An twa fwa sa repete. Epi bagay la moute tounen nan syèl la. ¹¹ Menm lè a, twa moun ki te soti Sezare vin rive nan kay kote m' te ye a. Yo te voye yo chache mwen. ¹² Lespri a di m' pati ak yo san rete ap kalkile. Sis frè sa yo te al ansanm avè m' tou Sezare. Nou tout nou antre lakay Kònèy. ¹³ Kònèy rakonte nou ki jan l' te wè yon zanj Bondye kanpe nan mitan lakay li. Zanj lan di li: Voye yon moun lavil Jope al rele Simon (ki gen yon ti non Pyè). ¹⁴ Simon sa a va di ou pawòl ki pou sove ou ansanm ak tout fanmi ou. ¹⁵ Mwen te kòmanse pale lè Sentespri a desann sou yo menm jan li te desann sou nou premye jou a. ¹⁶ Lè sa a, mwen vin chonje sa Seyè a te di: Jan te batize nan dlo, men nou menm nou gen pou n' resevwa batèm nan Sentespri a. ¹⁷ Konsa, Bondye te bay moun sa yo menm kado li te ban nou an lè n' te mete konfyans nou nan Seyè Jezikri. Kisa m' te ye menm pou m' te fè tèt ak Bondye? ¹⁸ Lè yo fin tande pawòl sa yo, yo sispann kritike l', yo pran fè lwanj Bondye. Yo t'ap di: Se vre wi. Bondye bay moun ki pa jwif yo chans pou yo chanje, pou yo ka resevwa lavi tou. ¹⁹ ¶ Avèk pèsekisyon ki te tonbe sou yo apre lanmò Etyèn lan, disip yo te gaye. Genyen ki te al jouk nan peyi Finisi, nan lil Chip, ak lavil Antiòch. Men, yo t'ap anonse pawòl la bay jwif yo sèlman. ²⁰ Lè sa a, kèk disip ki te moun Chip ak moun Sirèn al lavil Antiòch. Antan yo la a, yo pale ak moun Lagrès yo; yo fè yo konnen bon nouvèl ki pale sou Jezi Seyè a. ²¹ Pouvwa Bondye te avèk yo; anpil nan moun Lagrès yo rive kwè, yo te tounen vin jwenn Bondye. ²² Legliz

Jerizalèm lan vin aprann nouvèl la. Li voye Banabas lavil Antiòch. ²³ Lè Banabas rive, li wè ki jan Bondye t'ap beni disip yo. Li pa t' manke kontan, li t'ap ankouraje yo pou yo tout te kenbe fèm ak tout kè yo nan sèvis Seyè a san dekouraje. ²⁴ Banabas sa a te yon bon gason. Li te gen anpil konfyans nan Bondye, epi Sentespri te kenbe l' anba pouvwa l' tout tan. Anpil moun te vin kwè nan Seyè a. ²⁵ Apre sa, Banabas ale lavil Tas, li al chache Sòl. ²⁶ Lè l' jwenn li, li mennen l' lavil Antiòch. Yo pase yon lanne ansanm ap fè reyinyon ak legliz la. Yo t'ap moutre anpil moun sa pou yo fè. Se nan lavil Antiòch sa a premyè fwa yo te rele disip yo kretyen. ²⁷ ¶ Lè sa a, kèk pwofèt soti Jerizalèm rive Antiòch. ²⁸ Yonn ladan yo, ki te rele Agabis, leve epi avèk pouvwa Sentespri, li fè konnen tapral gen yon gwo grangou sou tout latè. (Grangou sa a te rive vre sou reny wa Klòd.) ²⁹ Disip yo deside pou chak moun bay sa yo kapab pou yo voye ede frè yo ki te nan peyi Jide. ³⁰ Se sa menm yo te fè. Apre sa, yo voye Banabas ak Sòl pote sa yo te ranmase a bay chèf fanmi yo ki te nan Jide.

Chapter 12

¹ ¶ Nan menm epòk sa a, wa Ewòd te pran maltrete kèk manm nan legliz la. ² Li fè touye Jak, frè Jan an, ak nepe. ³ Lè l' wè sa te fè jwif yo plezi, li fè arete Pyè tou. Se te epòk fèt Pen san ledven an. ⁴ Lè li fin arete Pyè, Ewòd fè mete l' nan prizon. Li mete kat eskwad, yo chak avèk kat sòlda, pou veye li. Li te fè lide pou l' te mennen l' devan pèp la apre fèt Delivrans jwif yo. ⁵ ¶ Pyè te anba gwo siveyans nan prizon an. Men, manm legliz yo t'ap lapriyè Bondye pou li san rete. ⁶ Lavèy jou pou Ewòd ta mennen Pyè konparèt devan pèp la, nan mitan lannwit Pyè t'ap dòmi ak de sòlda, yonn sou chak kote li. Yo te mare l' ak de chenn. Epi te gen gad devan pòt la ki t'ap veye prizon an. ⁷ Yon zanj Bondye rete konsa li parèt, yon limyè klere tout kacho a. Zanj lan manyen Pyè bò kòt, li souke l', li di li: Leve vit. Chenn ki te mare men l' yo tonbe. ⁸ Zanj lan di li: Mete sentiwon ou, mare sapat ou. Pyè fè tou sa. Zanj lan di l' ankò: Mete gwo rad ou sou ou, swiv mwen. ⁹ Pyè swiv zanj lan, li mache soti nan kacho a. Li pa t' kwè sa zanj Bondye a t'ap fè a se te vre. Li te kwè se reve l' t'ap reve. ¹⁰ Yo pase premye pòs gad la, yo pase dezyèm pòs la, yo rive bò pòtay an fè ki bay sou lavil la. Pòtay la louvri pou kont li devan yo. Yo soti, yo pran lari. Menm lè a, zanj lan kite Pyè. ¹¹ Se lè sa a Pyè vin konprann sak te rive li a. Li di: Koulye a, mwen wè se tout bon. Bondye

voye zanj li delivre m' anba men Ewòd. Li sove m' anba tout bagay pèp jwif la t'ap pare pou mwen
¹² an. Lè l' vin konprann sitiyasyon an, li ale dwat kay Mari, manman Jan, ki te gen yon ti non
 Mak. Te gen anpil moun sanble la, yo t'ap lapriyè. ¹³ Pyè frape nan pòt devan an. Yon sèvant yo
¹⁴ rele Wòd vin reponn. Li rekonèt vwa Pyè. Li te sitèlman kontan, li pa louvri pòt la, li kouri antre
¹⁵ al di moun yo: Men Pyè deyò a wi. Yo di li: Gen lè ou pèdi tèt ou? Men, li te kenbe sa l' te di a
¹⁶ se vre. Lè sa a, yo di li: Se dwe bonnanj li. Men, Pyè t'ap frape pi rèd toujou. Lè yo louvri pòt
¹⁷ la, yo wè l', yo pa t' manke sezi. Li fè yo siy ak men l' pou yo pa pale, epi l' rakonte yo ki jan
 Bondye te fè l' soti nan prizon an. Li di yo ankò. Al di Jak sa pou mwen ansanm ak lòt frè yo. Epi
¹⁸ l' soti, li al yon lòt kote. Lè l' fè jou, gad yo te nan yon pakèt tèt chaje. Yo t'ap mande kote Pyè
¹⁹ pase. Ewòd fè chache l' toupatou, men yo pa jwenn li. Li fè keksyonnen gad yo. Lèfini, li bay
²⁰ lòd touye yo. Apre sa, Ewòd kite peyi Jide, li al lavil Sezare kote li pase kèk tan. ¶ Ewòd te
 fache anpil sou moun lavil Tir ak moun lavil Sidon yo. Sa moun sa yo fè, yo mete ansanm pou yo
 vin kote li. Yo pran tèt Blastis, yon ofisye ki t'ap travay lakay wa a. Epi y' al mande Ewòd pou l'
²¹ fè lapè ak yo, paske se nan peyi Ewòd la moun lakay yo te konn ale fè pwovizyon. Lè jou yo te
 fikse a rive, Ewòd abiye l' ak tout kostim wa li sou li, li chita sou gwo fotèy li a, epi l' fè yon diskou
²² ba yo. Pèp la pran rele: Se pa yon moun k'ap pale la a, se yon bondye. ²³ Menm lè a, yon zanj
 Bondye frape Ewòd, paske li te asepte resevwa lwanj ki fèt pou Bondye sèlman. Vè tonbe sou li,
²⁴ epi li mouri. Pawòl Bondye a menm t'ap gaye plis toujou, li t'ap fè anpil avans. ²⁵ Lè Banabas
 ak Sòl fin fè misyon yo lavil Jerizalèm, yo tounen lakay yo, yo pran Jan ki te gen ti non Mak la ak
 yo.

Chapter 13

¹ ¶ Nan legliz Antiòch la te gen kèk pwofèt ak moun ki t'ap bay enstriksyon: se te Banabas,
 Simeon (yo te rele Ti Nwa), Lisiyis, moun Sirèn, Manayèn (ki te grandi ansanm ak Ewòd, gouvènè
² a), epi Sòl. Yon jou, yo t'ap fè sèvis pou Bondye, yo t'ap fè jèn, lè Sentespri di yo: Mete Banabas
 ak Sòl apa pou mwen, pou yo fè travay mwen chwazi pou yo fè a. ³ Lè sa a, yo fè jèn, yo lapriyè,
 yo mete men sou tèt Banabas ak Sòl, epi yo kite yo ale. ⁴ ¶ Se konsa Sentespri te voye Banabas ak
⁵ Sòl an misyon. Y' al nan peyi Selesi. Antan yo la, yo pran yon batiman pou lil Chip. Lè yo rive

Salamin yo tanmen anonse pawòl Bondye a nan sinagòg jwif yo. Yo te gen Jan Mak avèk yo pou ede yo. ⁶ Yo travèse tout lil la nèt jouk Pafòs. Rive la, yo jwenn yon majisyen ki te rele Bajezi. Se te yon jwif ki te pran pòz pwofèt li. ⁷ Li te bon zanmi ak Sèjiyis Polis, chèf lil la. Sèjiyis Polis la te yon nonm lespri. Li fè rele Banabas ak Sòl paske li te vle tandè pawòl Bondye a. ⁸ Men, Elimas (se te non majisyen an nan lang grèk) t'ap kenbe tèt ak yo. Li t'ap chache detounen gouvènè a pou l' pa t' kwè. ⁹ Men, Sòl (yo te rele Pòl tou), anba pouvwa Sentespri, fikse je l' sou majisyen an, ¹⁰ li di li: Ou menm, ou se pitit Satan. Ou plen riz ak mekanste nan kè ou, ou pa vle wè anyen ki bon. Eske ou p'ap sispann vire travay Bondye a lanvè? ¹¹ Koulye a, koute: Bondye pral mete men sou ou: ou pral vin avèg, ou p'ap wè limyè solèy pou kèk tan. Menm lè a, je Elimas vin bouche, li wè tou nwa. Li t'ap vire adwat agoch, li t'ap chache yon moun pou pran men l' pou kondi li. ¹² Lè gouvènè a wè sak te rive a, li kwè. Sa te frape l' anpil lè l' tandè tou sa yo t'ap moutre li sou Seyè a. ¹³ Pòl ak kanmarad li yo pran batiman nan lavil Pafòs, y' al lavil Pèj nan peyi Panfili. Antan yo la, Jan Mak kite yo, li tounen Jerizalèm. ¹⁴ ¶ Yo kite Pèj, yo pousib wout yo jouk yo rive lavil Antiòch nan peyi Pisidi. Jou repo a, yo antre nan sinagòg la, yo chita. ¹⁵ Apre moun yo te fin li nan liv lalwa a ak nan liv pwofèt yo, chèf sinagòg la voye di yo: Frè m' yo, si nou gen kèk pawòl pou ankouraje asanble a, nou mèt pale koulye a. ¹⁶ Pòl leve kanpe, li fè yon siy ak men l', epi li di: Nou menm moun ras Izrayèl, ak nou menm moun lòt nasyon ki gen krentif pou Bondye, koute mwen. ¹⁷ Bondye pèp Izrayèl la te chwazi zansèt nou yo. Antan yo t'ap viv tankou etranje nan peyi Lejip, li fè pèp la vin yon kantite. Apre sa, ak fòs ponyèt li, li fè yo soti kite peyi a. ¹⁸ Pandan karantan, li pran pasyans ak yo nan dezè a. ¹⁹ Li detwi sèt nasyon nan peyi Kanaran, li pran tout tè yo, li bay pèp li a pou pwopryete pa yo, ²⁰ pou katsansenkant (450) lanne. Apre sa, li mete jij pou kòmande yo jouk pou rive nan tan pwofèt Samyèl. ²¹ Lè sa a, yo mande pou yon wa. Bondye ba yo Sayil, pitit gason Kis la, moun branch fanmi Benjamen, pou wa pandan karantan. ²² Lè li wete Sayil, li ba yo David pou wa. Men sa Bondye te di sou David: Mwen jwenn David, pitit gason Izayi a. Se yon nonm ki fè m' plezi. Li va fè tou sa m' vle l' fè. ²³ Se Jezi, yonn nan pitit pitit David yo, Bondye mete pou delivre pèp Izrayèl la, jan l' te pwomèt la. ²⁴ Men, anvan Jezi te vini, Jan t'ap mache bay mesaj sa a, li t'ap rele tout pèp Izrayèl la pou yo te tounen vin jwenn Bondye, pou yo te resevwa batèm. ²⁵ Lè Jan te prèt pou fini ak misyon l' lan, li di pèp la: Ki moun nou kwè mwen ye? Moun n'ap tann lan, se pa mwen. Men, koute, moun sa a ap vini apre mwen. Mwen menm,

²⁶
 mwen pa bon ase pou m' ta demare kòd sapat ki nan pye li. Frè m' yo, nou menm moun ras
 Abraram lan ak nou menm moun lòt nasyon isit la ki gen krentif pou Bondye, Bondye voye di nou
²⁷
 li vin delivre nou. Paske, moun lavil Jerizalèm ansanm ak chèf yo pa t' konnen ki moun Jezi te
 ye. Yo pa t' konprann sans pawòl pwofèt yo, pawòl ki li nan zòrèy yo chak jou repo. Men, se yo
²⁸
 menm ankò ki fè tout pawòl sa yo rive vre lè yo te kondannen Jezi. Atout yo pa t' jwenn anyen
²⁹
 nan sa Jezi te fè ki pou ta fè l' merite lanmò, yo te mande Pilat fè touye li. Lè yo fin fè tout bagay
³⁰
 ki te ekri sou li nan liv yo rive vre, yo desann li sou kwa a, yo mete l' nan yon kavo. Men, Bondye
³¹
 fè l' leve soti vivan nan lanmò. Apre sa, pandan plizyè jou, moun ki te moute Jerizalèm soti peyi
 Galile ansanm avèk li yo, yo te wè l' ak je yo. Se yo menm k'ap sèvi l' temwen koulye a devan pèp
³²
 Izrayèl la. Nou menm, nou vin fè nou konnen bon nouvèl sa a isit la. Bagay Bondye te pwomèt
³³
 zansèt nou yo, li fè l' pou nou ki pitit pitit yo: li fè Jezi leve soti vivan nan lanmò, dapre sa ki
³⁴
 ekri nan Sòm de a: Ou se pitit mwen. Depi jòdi a se mwen ki papa ou. Bondye te fè konnen li
 t'ap fè l' soti vivan nan lanmò pou l' pa t' janm tounen pouriti ankò. Se sa l' te fè konnen, lè l' te di:
³⁵
 M'a ba ou tout benediksyon mwen te pwomèt David yo, ou mèt konte sou yo. Se poutèt sa, yon
³⁶
 lòt kote li di konsa: Ou pa penmèt moun k'ap sèvi ou la pouri anba tè. Men, apre David te fin
 sèvi plan Bondye nan mitan moun ki t'ap viv menm lè avè l' yo, li mouri. Yo antere l' menm kote
³⁷
 ak zansèt li yo, epi li pouri anba tè. Men, moun Bondye te leve soti vivan nan lanmò a, li pa
³⁸ ³⁹
 janm pouri anba tè. -(we vèsè pwochen) Frè m' yo, nou fèt pou nou konn sa byen: Bondye
 voye Jezi fè nou konnen l'ap padonnen tout peche nou yo: tout moun ki mete konfyans yo nan Jezi,
⁴⁰
 y'ap delivre anba tout peche lalwa Moyiz pa t' ka wete pou yo. Atansyon pou bagay pwofèt yo
⁴¹
 te di a pa rive nou: Gade non, nou menm k'ap meprize moun, sezisman pral touye nou. Paske
 mwen pral fè yon travay koulye a nan mitan nou, bagay nou pa ta kwè, menm si moun ta rakonte
⁴²
 nou li. ¶ Antan Banabas ak Pòl t'ap soti nan sinagòg la, moun yo mande yo pou yo tounen jou
⁴³
 repo k'ap vini an pou pale sou tout bagay sa yo ankò. Apre reyinyon an, anpil jwif ak anpil moun
 lòt nasyon ki te konvèti nan relijyon jwif yo te swiv Pòl ak Banabas. Apòt yo menm te pale ak yo,
⁴⁴
 yo te ankouraje yo pou yo rete fèm nan favè Bondye. Jou repo ki vin apre a, prèske tout moun
⁴⁵
 nan lavil la te sanble pou tande pawòl Seyè a. Lè jwif yo wè foul moun yo, yo pran fè jalouzi:
⁴⁶
 yo t'ap demanti tou sa Pòl t'ap di a, yo t'ap joure li. Men, Pòl ak Banabas di yo kareman: Se nou
 menm premye moun ki pou te resevwa Pawòl Bondye a. Men, n'ap repouse l', nou pa konsidere tèt

nou bon ase pou n' antre nan lavi ki p'ap janm fini an. Enben, koulye a nou pral vire bò kote moun
 lòt nasyon yo. ⁴⁷ Men lòd Bondye te ban nou: Mwen mete ou pou sèvi yon limyè pou lòt nasyon
 yo, pou ou kapab ale toupatou sou latè, moutre ki jan tout moun ka jwenn delivrans. ⁴⁸ Lè moun
 lòt nasyon yo tandè sa, yo pa t' manke kontan: yo pran fè lwanj pawòl Bondye a. Tout moun Bondye
 te chwazi davans pou resevwa lavi ki p'ap janm fini an te kwè. ⁴⁹ Pawòl Bondye a t'ap gaye toupatou
 nan peyi a. ⁵⁰ Men, jwif yo moute tèt medam lasosyete ki te konvèti nan relijyon jwif yo, ansanm
 ak grannèg lavil yo. Yo tout yo pran pèsekite Pòl ak Banabas: yo mete yo deyò nan peyi a. ⁵¹ Pòl
 ak Banabas souke pousyè pye yo sou yo, y' ale lavil Ikoniòm. ⁵² Nan Antiòch menm, disip yo te
 kontan anpil, Sentespri te plen kè yo.

Chapter 14

¹ ¶ Nan Ikoniòm, Pòl ak Banabas antre nan sinagòg jwif yo tou. Yo pale sitèlman byen, anpil
 jwif ak anpil moun lòt nasyon te kwè. ² Men jwif ki pa t' kwè yo moute tèt moun lòt nasyon yo,
 yo fè yo vire sou do Pòl ak Banabas. ³ Pòl ak Banabas rete nan lavil la lontan ankò, yo t'ap fè
 konnen favè Bondye a avèk anpil konviksyon, paske yo te gen konfyans nan Seyè a. Seyè a menm
 te bay disip yo pouvwa fè anpil bèl bagay ak anpil mirak pou l' te moutre sa yo t'ap di a te vre.
⁴ Nan lavil la moun te fè de kan: yon bò te gen patizan jwif yo, lòt bò a te gen patizan apòt yo.
⁵ Jwif yo, moun lòt nasyon yo ansanm ak chèf yo t'ap pare pou maltrete Pòl ak Banabas, pou touye
 yo ak kout wòch. ⁶ Lè Pòl ak Banabas wè sa, yo kouri met deyò, y' al nan peyi Likaoni, yo rete
 lavil List ak lavil Dèb ak nan vwazinaj yo. ⁷ Yo t'ap anonse bon nouvèl la la tou. ⁸ ¶ Nan List te
 gen yon nonm enfim ki te toujou rete chita, paske de pye l' yo te paralize. Li te fèt tou konsa, li pa
⁹ t' janm mache menm. Li t'ap koute sa Pòl t'ap di. Pòl fikse je l' sou li, li wè nonm lan te gen kont
¹⁰ konfyans nan Bondye pou l' te geri. Pòl pale byen fò, li di: Leve, kanpe dwat sou de pye ou yo!
 Nonm lan vole kanpe, epi li pran mache. ¹¹ Lè foul moun yo wè sa Pòl te fè a, yo pran rele an
 likaoenyen, lang peyi a: Men bondye yo pran fòm moun, yo desann vin jwenn nou. ¹² Yo rele
 Banabas Zeyis, yo rele Pòl Emès paske se li menm ki t'ap pale. ¹³ Prèt ki sèvi nan tanp Zeyis ki te
 bò pòtay lavil la mennen kèk towò bèf ak kolye flè devan pòtay la. Ansanm ak pèp la, yo t'ap pare

pou yo te fè ofrann bèt pou yo touye bay Pòl ak Banabas. ¹⁴ Lè apòt yo tandè sa, yo chire rad sou
 yo, yo kouri nan mitan foul la, yo pale byen fò, yo t'ap di: ¹⁵ Mezanmi, sa n'ap fè konsa? Nou se
 moun tankou nou tou: nou vin isit la anonse nou yon bon nouvèl: Se pou nou kite tout zidòl sa yo
 ki pa vo anyen pou n' vire bò kot Bondye ki vivan an. Se li menm ki fè syèl la, tè a, lanmè a ansanm
 ak tout sa ki ladan yo. ¹⁶ Nan tan lontan, li te kite tout nasyon swiv chemen pa yo. ¹⁷ Men, li te
 toujou ap fè yo konnen ki moun li ye, li te fè anpil byen pou yo: li ban nou lapli ki soti nan syèl la
 ak sezon rekòt. Li ban nou manje an kantite, epi li fè kè nou kontan anpil. ¹⁸ Menm avèk tout pawòl
 sa yo, se pa t' ti traka anvan apòt yo te resi rive anpeche moun yo fè ofrann bèt yo. ¶ ¹⁹ Kèk jwif
 soti Antiòch (ki nan peyi Pisidi) ak Ikoniòm. Yo pran tèt foul la, yo kalonnen Pòl kout wòch pou
 yo touye li. Apre sa, yo trennen l' mete andeyò lavil la, yo te kwè l' te mouri. ²⁰ Men, lè disip yo
 vin sanble bò kote l', li leve kanpe, epi l' tounen antre nan lavil la. Nan denmen, li pati avèk Banabas,
 y' al lavil Dèb. ²¹ Pòl ak Banabas anonse bon nouvèl la nan lavil Dèb. Yo te fè anpil disip la. Apre
 sa, yo tounen, yo pase List, Ikoniòm, Antiòch (ki nan peyi Pisidi). ²² Yo t'ap bay disip yo fòs, yo
 t'ap ankouraje yo pou yo rete fèm nan konfyans yo. Yo t'ap di yo: Nou gen pou nou soufri anpil
 anvan pou n' antre nan peyi kote Bondye wa a. ²³ Nan chak legliz, yo chwazi kèk chèf fanmi. Yo
 fè jèn, yo lapriyè. Apre sa, yo renmèt yo nan men Bondye, Seyè ki te gen tout konfyans yo a. ²⁴ Yo
 travèse peyi Pisidi, yo rive nan Panfili. ²⁵ Yo anonse pawòl Bondye a lavil Pèj. Apre sa, yo desann
 Atali. ²⁶ Antan yo la, yo pran batiman pou Antiòch. Se la nan menm Antiòch sa a yo te renmèt yo
 nan men Bondye ki te ba yo favè l' pou yo te al fè tout travay yo sot fè a. ²⁷ Lè yo rive Antiòch,
 yo reyini legliz la, yo rakonte tou sa Bondye te ba yo pouvwa fè pou li, ki jan li te louvri pòt pou
 moun ki pa jwif yo kapab kwè tou. ²⁸ Apre sa, yo rete lontan avèk disip Antiòch yo.

Chapter 15

¹ ¶ Kèk mesye soti nan peyi Jide rive lavil Antiòch. Yo t'ap moutre frè yo yon bann bagay, yo
 t'ap di: Bondye p'ap kapab delivre nou si yo pa sikonsi nou, jan lalwa Moyiz mande l' la. ² Pòl ak
 Banabas pa t' dakò menm ak moun sa yo. Sa te fè yon gwo diskisyon. Se konsa, frè yo deside voye
 Pòl, Banabas ansanm ak kèk lòt moun Antiòch moute Jerizalèm pou regle keksyon sa a ak apòt yo
 ansanm ak chèf fanmi yo. ³ Se legliz la ki te voye yo fè vwayaj sa a. Yo pase nan Finisi ak nan

Samari. Sou tout wout la, yo t'ap rakonte ki jan moun ki pa jwif yo te tounen vin jwenn Bondye.

Tout frè yo te kontan anpil lè yo tande sa. ⁴ Lè yo rive Jerizalèm, tout legliz la, apòt yo ak chèf fanmi yo te byen resevwa yo. Pòl ak Banabas rakonte moun Jerizalèm yo tou sa Bondye te ba yo

pouvwa fè pou li. ⁵ Se lè sa a kèk disip, ansyen patizan farizyen yo, kanpe, yo di: Se pou n' sikonsi moun lòt nasyon yo tou. Se pou n' mande yo pou yo obeyi lalwa Moyiz la tou. ⁶ ¶ Apòt yo ak chèf fanmi yo sanble pou egzaminen keksyon an. ⁷ Lè yo fin diskite kont yo, Pyè kanpe, li di yo: Frè m' yo, nou konnen ki jan, depi lontan, Bondye te chwazi m' nan nou tout pou m' anonse bon nouvèl

la bay moun lòt nasyon yo, pou yo menm tou, yo ka tande l' pou yo rive kwè nan Bondye. ⁸ Enben, Bondye ki konnen sa ki nan kè moun, li moutre nou ki jan li menm li asepte yo: li ba yo Sentespri menm jan li te fè l' pou nou an. ⁹ Li pa t' fè okenn diferans ant yo menm ak nou menm: nou wè li lave kè yo paske yo te kwè nan li. ¹⁰ Koulye a, poukisa pou n'ap seye fè plan ak Bondye konsa, lè nou vle fè disip yo pote yon chay ni zansèt nou ni nou menm nou pa t' ka pote? ¹¹ Okontrè, nou kwè se yon favè Jezikri fè nou lè l' delivre nou, menm jan li fè l' pou yo tou. ¹² Apre sa, tout moun pe bouch yo, yo t'ap koute Banabas ak Pòl ki t'ap rakonte tout bèl bagay ak tout mirak Bondye te ba yo pouvwa fè pou li nan mitan moun lòt nasyon yo. ¹³ Lè yo fin pale, Jak pran lapawòl, li di: Frè m' yo, koute mwen. ¹⁴ Simon fèk esplike nou ki jan, depi nan konmansman, Bondye te pran swen moun lòt nasyon yo pou l' te ka chwazi nan mitan yo yon pèp ki pou pote non li. ¹⁵ Sou pwèn sa a, pawòl pwofèt yo dakò nèt. Men sa ki ekri nan Liv la: ¹⁶ Apre sa, m'a retounen. Se Bondye k'ap pale. M'a rebati kay David la ki te fin tonbe, m'a repare mazi li yo, m'a kanpe kay li a ankò.

¹⁷ Konsa, tout lòt moun yo va chache Bondye, ansanm ak tout nasyon mwen chwazi pou pote non mwen. ¹⁸ Men sa Bondye di. Se li menm ki fè nou konnen bagay sa yo depi lontan. ¹⁹ Se poutèt sa, mwen menm, Jak, mwen kwè nou pa dwe antrave moun lòt nasyon yo ki vin jwenn Bondye.

²⁰ Men, ann ekri yo, ann mande yo pou yo pa manje vyann bèt yo te ofri pou touye pou zidòl, pou yo egzante tout dezòd lachè, pou yo pa manje ni vyann bèt ki mouri toufe, ni san. ²¹ Paske, depi lontan lontan, y'ap fè konnen lalwa Moyiz la nan tout lavil yo. Se chak jou repo y'ap li l' pou yo nan sinagòg yo. ²² ¶ Lè sa a, apòt yo, chèf fanmi yo ansanm ak tout legliz la deside pou yo chwazi kèk moun pami yo ki pou vwayaje al Antiòch ansanm ak Pòl ak Banabas. Yo chwazi Jid, ki te rele Basabas, ak Silas, de moun frè yo te respekte anpil. ²³ Yo te ba yo lèt sa a pote ale: Apòt yo ak chèf fanmi yo, ki frè nou, voye bonjou pou tout frè nan moun lòt nasyon yo k'ap viv nan lavil

²⁴ Antiòch, nan peyi Siri ak nan peyi Silisi. Nou te vin konnen te gen moun ki soti bò isit la al lakay nou. Yo pa t' manke boulvèse nou, yo pa t' manke fatigue nou ak pawòl yo t'ap di. Men, nou

²⁵ menm nou pa t' ba yo okenn lòd konsa. Se poutèt sa, nou tout ki isit la, nou tonbe dakò pou nou chwazi kèk delege n'ap voye bò kote nou. Y'ap vwayaje ansanm ak Pòl ak Banabas, de frè nou

²⁶ renmen anpil, ²⁷ ki te riske lavi yo pou non Jezikri, Seyè nou an. Se konsa, nou voye Jid ak

²⁸ Silas ki va ban nou menm mesaj la ak pwòp bouch yo. Pou Sentespri a ak pou nou menm, men sa nou jwenn ki bon pou di nan keksyon sa a: Nou p'ap mete lòt chay sou zepòl nou pase sa n' dwe

²⁹ mete. Pa manje vyann bèt ki te ofri pou zidòl, pa manje san, pa manje vyann bèt ki mouri toufe,

³⁰ egzante tout dezòd lachè. N'a fè byen si nou pa fè bagay sa yo. Bondye ak nou! Apre sa, moun legliz Jerizalèm yo kite delege yo ale. Delege yo pati pou Antiòch. Lè yo rive, yo sanble tout moun

³¹ ki te kwè yo, yo renmèt yo lèt la. Lè yo fin li lèt la pou yo, tout moun te kontan pou bèl

³² ankourajman lèt la te pote ba yo. Jid ak Silas te de pwofèt. Yo pale lontan avèk frè yo, yo ba yo

³³ kont ankourajman ak fòs. Yo pase kèk tan nan lavil Antiòch. Apre sa, frè yo swate yo bòn vwayaj

³⁴ ak kè poze. Yo menm, yo tounen ale jwenn moun ki te voye yo. Men, Silas te pran desizyon

³⁵ pou l' te rete. Pòl ak Banabas pase kèk tan nan Antiòch. Ansanm ak anpil lòt frè, yo t'ap moutre

³⁶ moun yo anpil bagay, yo t'ap fè yo konnen pawòl Seyè a. ¶ Kèk tan apre, Pòl di Banabas konsa: Ann al vizite frè yo ki nan tout lavil kote nou te anonse Pawòl Seyè a. Ann al wè ki jan yo ye.

³⁷ Banabas te vle mennen Jan ki te gen ti non Mak la avèk yo. ³⁸ Men, Pòl pa t' kwè se te yon bon lide pou yo te mennen l', paske, dènye fwa a, li te pati kite yo nan Panfili, li pa t' rete nèt ak yo jouk

³⁹ vwayaj la te fini. Lè sa a, yon diskisyon byen cho leve ant Pòl ak Banabas, tèlman yo separe

⁴⁰ yonn ak lòt. Banabas pran Mak avèk li, yo pran yon batiman, y' ale lil Chip. Pòl menm chwazi

⁴¹ Silas. Apre frè yo fin renmèt li nan men Bondye k'ap ba l' favè l', li pati. Li pase nan peyi Siri ak peyi Silisi; sou tout wout la li t'ap fòtifeye legliz yo nan konfyans yo nan Bondye.

Chapter 16

¹ ¶ Apre sa, Pòl ale lavil Dèb epi l' rive lavil List. Nan List te gen yon disip yo rele Timote.

² Manman l' te yon jwif ki te kwè nan Jezi tou, men papa l' te yon moun peyi Lagrès. Frè ki t'ap

viv nan List ak Ikoniòm yo te bay bon rapò pou Timote. ³ Pòl te vle mennen l' avèk li. Li pran l',
 li sikonsi l' paske tout jwif ki te nan peyi a te konnen papa Timote te grèk. ⁴ Nan tout lavil kote yo
 pase yo te mete disip yo an konesans desizyon apòt yo ak ansyen yo te pran lavil Jerizalèm, yo t'ap
 mande yo pou yo te soumèt devan desizyon an. ⁵ Tout legliz yo t'ap vin pi fèm nan lafwa, chak jou
 yo t'ap gen plis moun toujou. ⁶ ¶ Sentespri pa t' kite Pòl ak Timote al anonse pawòl Bondye a nan
 pwovens Lazi a. Se sak fè yo te pase nan zòn Friji ak zòn Galasi san rete. ⁷ Lè yo rive toupre lavil
 Mizi, yo te vle ale Bitini, men Lespri Jezi a pa t' pèmèt yo fè sa. ⁸ Yo pase nan Mizi san rete, yo
 desann lavil Twoas. ⁹ Nan mitan lannwit, Pòl fè yon vizyon: li wè yon nonm ki te soti peyi
 Masedwan kanpe devan l' ki t'ap di li: Tanpri, vin nan peyi Masedwan, vin pote nou sekou. ¹⁰ Apre
 Pòl te fè vizyon sa a, lamennm nou chache pou n' ale peyi Masedwan. Nou te sèten se Bondye menm
 ki te rele nou pou n' te al pote bon nouvèl la bay moun ki nan peyi sa a. ¹¹ Nou pran batiman lavil
 Twoas, nou fè vwal tou dwat pou lil Samotras. Apre yon jou, nou rive lavil Neapolis. ¹² Antan
 nou la, n' al lavil Filip, premye lavil nan distrik Masedwan lan: Se te yonn nan koloni sou zòd lavil
 Wòm yo. Nou pase plizyè jou nan lavil sa a. ¹³ Jou repo a, nou soti, n' al lòt bò pòtay lavil la bò
 larivyè a. Nou t'ap chache kote jwif yo te konn lapriyè a. Nou chita, nou t'ap pale ak fanm ki te
 sanble la yo. ¹⁴ Yonn ladan yo te rele Lidi. Se te moun lavil Tiyati, yon machann bèl twal koulè
 wouj yo vann byen chè a. Li te konvèti nan relijyon jwif yo. Li t'ap koute nou. Seyè a louvri lespri
 l' pou l' te swiv tou sa Pòl t'ap di. ¹⁵ Li resevwa batèm, li menm ansanm ak tout fanmi li. Apre sa,
 li envite nou vin lakay li. Li di nou: Se pou n' vini, se pou n' fè ladesant lakay mwen, si nou kwè
 mwen mete konfyans mwen tout bon nan Seyè a. Se konsa li fòse nou rete lakay li. ¹⁶ ¶ Yon jou
 nou tapral kote yo konn lapriyè a, nou kontre ak yon tifi. Se te yon sèvant, li te gen yon move lespri
 sou li ki te fè l' konn pase kat pou moun. Lè konsa tifi a te fè mèt li yo fè anpil lajan. ¹⁷ Li tanmen
 swiv Pòl ak nou, li t'ap rele byen fò: Mesye sa yo se sèvitè Bondye ki anwo nan syèl la. Y'ap fè
 nou konnen chemen pou n' pran pou n' ka jwenn delivrans. ¹⁸ Li t'ap fè sa pandan plizyè jou. Pòl
 menm te bouke ak fi a. Li vire, li di lespri a: Nan non Jezikri, mwen ba ou lòd, soti sou fi a. Menm
 lè a, lespri a soti sou li. ¹⁹ Lè mèt sèvant lan wè yo te pèdi tout espwa fè lajan ak tifi a, yo mete
 men sou Pòl ak Silas, yo trennen yo sou plas piblik la devan otorite yo. ²⁰ Yo mennen yo devan
 chèf lavil Wòm yo, epi yo di: Mesye sa yo ap fè dezòd nan lavil nou an. Se jwif yo ye. ²¹ Y'ap
 plede moutre moun yo yon bann bagay lalwa nou an pa pèmèt. Nou menm, se moun lavil Wòm

nou ye, nou pa ka asepte fè bagay sa yo. ²² Foul moun yo te moute kont yo tou. Chèf women yo
 fè rache rad ki te sou Pòl ak Silas, epi yo bay lòd pou bat yo ak fwèt. ²³ Apre yo fin bat yo byen
 bat, yo mete yo nan prizon. Yo bay chèf prizon an lòd pou veye mesye yo byen. ²⁴ Lè l' resevwa
 lòd sa a, chèf prizon an mete yo nan kacho ki jouk nan fon prizon an. Epi l' mete pye yo nan sèp.
²⁵ ¶ Vè menwi konsa, Pòl ak Silas t'ap lapriyè, yo t'ap chante fè lwanj pou Bondye. Lòt prizonye
 yo menm t'ap koute. ²⁶ Epi, yo rete konsa, tè a pran tranble byen fò, li souke prizon an jouk nan
 fondasyon li. Menm lè a, tout pòt prizon yo louvri, chenn tout prizonye yo kase. ²⁷ Chèf prizon an
 leve. Lè l' wè tout pòt prizon yo louvri, li rale nepe l', li tapral touye tèt li paske li te kwè prizonye
 yo te sove. ²⁸ Men, Pòl kriye byen fò: Pa fè tèt ou mal. Nou tout la. ²⁹ Lè chèf prizon tande sa, li
 mande yon chandèl, li kouri nan kacho a. Li lage kò l' atè nan pye Pòl ak Silas. Li t'ap tranble kou
 yon fèy bwa tèlman li te pè. ³⁰ Apre sa, li fè yo soti, li mande yo: Mesye, kisa m' dwe fè pou m'
 delivre? ³¹ Yo reponn li: Mete konfyans ou nan Seyè Jezi, epi wava delivre, ou menm ansanm ak
 tout fanmi ou. ³² Epi yo fè l' konnen pawòl Seyè a, limenm ansanm ak tout moun ki te lakay li.
³³ Menm lè a, nan mitan lannwit lan, li pran yo, li mete renmèd sou tout kote yo te blese. Lèfini,
 Pòl ak Silas batize l' ansanm ak tout fanmi li. ³⁴ Chèf prizon an fè yo moute lakay li, li ba yo manje.
 Nonm lan te kontan anpil ansanm ak tout fanmi l' paske koulye a yo te kwè nan Bondye. ³⁵ ¶ Lè
 solèy fin leve, chèf moun lavil Wòm yo voye gad di chèf prizon an: Lage mesye yo. ³⁶ Chèf prizon
 an ale di Pòl: Chèf yo voye di pou yo lage nou. Nou mèt soti koulye a. Ale ak kè poze. ³⁷ Men,
 Pòl di gad yo konsa: Gade non! Se sitwayen lavil Wòm nou ye wi. Yo bat nou devan tout moun
 san yo pa jije nou jan yo te dwe fè l' la. Apre sa, yo mete nou nan prizon. Koulye a yo vle lage nou
 an kachèt. Non, nou pa nan sa. Se chèf moun lavil Wòm yo menm ki pou vin mete nou deyò.
³⁸ Gad yo al rapòte pawòl sa yo bay chèf yo. Lè chèf yo tande se sitwayen lavil Wòm mesye yo te
 ye, yo soti pè. ³⁹ Yo vin eskize yo bò kote apòt yo, yo lage yo. Lèfini yo mande yo pou kite lavil
 la. ⁴⁰ Lè apòt yo soti nan prizon an, yo antre lakay Lidi. Yo wè frè yo, yo ba yo kèk pawòl
 ankourajman, epi yo pati, y' ale.

Chapter 17

¹ ¶ Yo pase lavil Anfipolis ak lavil Apoloni, yo rive lavil Tesalonik kote jwif yo te gen yon
² sinagòg. Jan l' te konn fè a, Pòl antre nan sinagòg la. Pandan twa jou repo li diskite ak jwif yo
³ sou sak te ekri nan Liv yo. Li t'ap ba yo esplikasyon, li t'ap moutre yo ki jan, dapre sa ki te ekri
a, Kris la te gen pou l' soufri, li te gen pou l' te leve soti vivan nan lanmò. Li t'ap di yo: Jezi m'ap
⁴ fè nou konnen an, se li menm ki Kris la. Te genyen nan jwif yo ki te kwè, yo pran mache ansanm
ak Pòl ak Silas. Se konsa yon bann moun peyi Lagrès ki te konvèti nan relijyon jwif yo ansanm ak
⁵ anpil gran medam te kwè tou. Men, jwif yo t'ap fè jalouzi anpil. Yo pran kèk vakabon yo jwenn
nan lari a ak yo, yo sanble yon foul moun, yo mache fè dezòd nan tout lavil la. ⁶ Yo rive devan
kay Jazon, yo antre al chache Pòl ak Silas pou mennen yo devan pèp la. Lè yo pa jwenn yo, yo
trennen Jazon ansanm ak kèk frè devan chèf yo ki nan lavil la. Yo pran pale byen fò, yo t'ap di:
⁷ Mesye sa yo ap mache fè dezòd toupatou. Men, koulye a yo rive jouk isit la. Jazon menm resevwa
⁸ mesye yo lakay li. Mesye sa yo ap aji kont lalwa Seza: y'ap di gen yon lòt wa yo rele Jezi. Jwif
⁹ yo te mete foul moun yo ansanm ak chèf yo ankòlè anpil avèk pawòl sa a. Jazon ak lòt frè yo te
¹⁰ blije fè yon depo lajan pou chèf yo te ka lage yo. ¶ Lè solèy fin kouche, frè yo fè Pòl ak Silas
¹¹ pati pou lavil Bere. Lè yo rive la, y' al nan sinagòg jwif yo. Jwif Bere yo te gen pi bon santiman
pase sa Tesalonik yo: yo te resevwa pawòl la byen vit san traka. Chak jou yo t'ap egzaminen sa ki
¹² te ekri nan Liv la pou wè si sa Pòl t'ap di yo a se vre. Anpil ladan yo te kwè. Konsa, anpil gran
¹³ medam ak anpil gason nan moun peyi Lagrès yo te kwè. Men, lè jwif Tesalonik yo vin konnen
Pòl t'ap fè konnen pawòl Bondye a nan Bere tou, yo pati pou Bere. Lè yo rive, yo kòmanse fè dezòd,
¹⁴ yo t'ap moute tèt foul moun yo. Lè frè yo wè sa, yo fè Pòl pati ale jouk bò lanmè a. Men, Silas
¹⁵ ak Timote te rete Bere. Moun ki t'ap kondi Pòl yo mennen l' jouk lavil Atèn. Apre sa, yo tounen
¹⁶ Bere. Pòl menm te voye lòd bay Silas ak Timote pou yo te vin jwenn li touswit. ¶ Antan Pòl
t'ap tann Silas ak Timote lavil Atèn, sa te nwi lespri l' anpil lè l' wè ki jan lavil la te plen zidòl.
¹⁷ Li t'ap diskite nan sinagòg la avèk jwif yo ansanm ak moun lòt nasyon yo ki te konvèti nan
relijyon jwif yo. Apre sa, chak jou li t'ap diskite tou sou plas piblik la avèk tout moun li te kontre
¹⁸ la. Kèk filozòf ki t'ap swiv prensip patizan Epiki yo ak patizan Zenon yo t'ap pale avèk li. Gen
ladan yo ki t'ap di: Kisa paladò sa a vle di la a? Gen lòt moun ki t'ap di: Gen lè l'ap pale sou yon
lòt kalite bondye. Yo t'ap di sa paske Pòl t'ap pale yo sou Jezi, li t'ap di yo ki jan mò yo gen pou
¹⁹ yo leve vivan ankò. Lè sa a, yo pran l', yo mennen l' nan Aewopaj la. Epi yo di li: Nou ta renmen

konnen tout bagay nèf sa yo w'ap montre moun yo la a. ²⁰ W'ap di yon bann bagay dwòl nan zòrèy
 nou. Nou ta renmen konnen sa yo vle di. ²¹ (Se te abitud tout moun lavil Atèn ak tout moun lòt
 nasyon ki rete nan lavil la, pou yo pase tout tan yo ap pale osinon ap koute tout kalite pawòl ki fèk
 parèt.) ²² ¶ Lè sa a, Pòl kanpe nan mitan Aewopaj la, li di: Nou menm moun Atèn, mwen wè nou
 se moun ki renmen relijyon anpil. ²³ Mwen di nou sa, paske, antan m'ap pwonmennen nan lavil
 nou an, mwen wè tout kote nou fè sèvis. Epi nan gade konsa, mwen jwenn yon lotèl kote yo ekri:
 Pou Bondye nou pa konnen an. Enben, Bondye n'ap sèvi san nou pa konnen l' lan, se li menm m'ap
 fè nou konnen la a. ²⁴ Bondye ki fè lemonn antye ak tou sa ki ladan l', se li menm ki Mèt syèl la
 ak tè a. Li pa rete nan kay moun bati ak men yo. ²⁵ Li pa bezwen pou moun travay ba l' anyen non
 plis, paske se li menm ki bay moun lavi, ki fè yo respire, ki ba yo tout lòt bagay. ²⁶ Se li menm
 tou ki kreye tout nasyon ki rete toupatou sou latè. Li fè yo tout soti nan yon sèl moun. Li te fikse
 davans tan ki pou yo chak, ak limit kote pou yo chak rete. ²⁷ Li fè tou sa pou yo ka chache l', pou
 yo ta ka rive jwenn li lè yo seye pran kontak avèk li. Men, Bondye pa pi lwen okenn nan nou pase
 sa. ²⁸ Paske, se nan li nou gen lavi, se nan li nou ka bay kò nou mouvman, se nan li nou gen
 legzistans. Gen nan poèt nou yo ki te di menm bagay la: Nou menm tou, nou se pitit li. ²⁹ Si nou
 se pitit li, nou pa dwe mete nan tèt nou Bondye tankou yon moso lò, yon moso lajan osinon yon
 moso wòch moun travay ak ladrès pou fè yon pòtre ki soti nan tèt yo. ³⁰ Men, Bondye fèmèn je l'
 sou tout tan sa yo moun pase nan liyorans. Koulye a li rele yo tout, kote yo ye, pou yo tounen vin
 jwenn li. ³¹ Se konsa tou, li fikse yon jou lè li gen pou l' jije tout moun san patipri: li chwazi yon
 nonm pou sa. Li bay tout moun prèv la lè l' fè nonm sa a leve soti vivan nan lanmò. ³² ¶ Lè yo
 tande Pòl di moun mouri ka leve, te gen ladan yo ki pran pase l' nan betiz. Gen lòt menm ki t'ap di
 li: N'a tande koze sa a yon lòt jou. ³³ Se konsa Pòl soti nan mitan yo. ³⁴ Men, atousa, te gen ladan
 yo ki te dakò pou yo te mache ak Pòl epi ki te kwè. Pami yo te gen Deni, manm Aewopaj la, yon
 fanm yo te rele Damaris ak kèk lòt ankò.

Chapter 18

¹ ¶ Apre sa, Pòl pati, li kite lavil Atèn, li ale lavil Korent. ² Rive la, li kontre yon jwif yo te rele
 Akilas, moun peyi Pon, ki te fèk rive soti Itali ansanm ak madanm li yo te rele Prisil, apre Seza
 Klòd te bay lòd pou tout jwif te kite lavil Wòm. Pòl al wè yo, ³ epi l' rete lakay yo. Li t'ap travay

ansanm ak yo paske li te gen menm metye ak yo: li te konn fè tant an twal. ⁴ Chak jou repo, Pòl te pran lapawòl nan sinagòg la, li t'ap chache pran tèt anpil jwif ak anpil moun peyi Lagrès. ⁵ Men, lè Silas ak Timote rive soti Masedwan, Pòl te bay tout tan l' pou travay predikasyon an sèlman: li t'ap bay jwif yo tout kalite prèv pou moutre yo Jezi se Kris yo t'ap tann lan. ⁶ Men, jwif yo pran kenbe tèt avèk li, yo t'ap joure l'. Lè l' wè sa, li souke pousyè ki te sou rad li, epi l' di yo: Si nou peri, se nou ki chache sa. Se p'ap fòt mwen. Depi koulye a m'ap vire kò m' bò kot moun ki pa jwif yo. ⁷ ¶ Konsa li soti, li ale lakay Titris Jistis. Se te yon nonm ki pa t' jwif men ki te konvèti nan relijyon jwif yo. Kay li te tou kole ak sinagòg la. ⁸ Krispis, chèf sinagòg la, te mete konfyans li nan Seyè a ansanm ak tout fanmi li. Anpil lòt moun Korent te kwè tou lè yo te tandè sa Pòl t'ap di yo, epi yo te resevwa batèm. ⁹ Yon jou lannwit, Pòl fè yon vizyon. Li wè Seyè a ki di li: Ou pa bezwen pè, se pou ou kontinye pale. Pa fèmen bouch ou. ¹⁰ Mwen la avèk ou. Pesonn p'ap ka mete men sou ou pou fè ou anyen. Gen anpil moun ki pou mwen nan lavil la. ¹¹ Konsa, Pòl pase dizwit mwa lavil Korent, li t'ap moutre moun yo pawòl Bondye a. ¹² ¶ Pandan Galyon te gouvènè nan peyi Lakayi, jwif yo mete tèt ansanm, yo leve dèyè Pòl. Yo mennen l' devan tribinal la, ¹³ epi yo di: Nonm sa a ap chache pran tèt moun pou fè yo sèvi Bondye yon jan ki kont lalwa. ¹⁴ Pòl tapral pale, lè Galyon di jwif yo konsa: Nou menm jwif, koute: si se te yon krim osinon yon movezak li te fè, mwen ta pèdi tan m' koute nou. ¹⁵ Men, si se yon bann diskisyon sou mo, sou non, sou lalwa jwif yo, sa se zafè ki gade nou. Mwen p'ap antre nan bagay konsa pou m' mete rezon. ¹⁶ Epi li mete tout moun deyò nan tribinal la. ¹⁷ Lè sa a, jwif yo mete men sou Sostèn, chèf sinagòg la, yo bat li byen bat devan tribinal la. Men, Galyon pa okipe yo menm. ¹⁸ ¶ Pòl rete kèk tan ankò lavil Korent. Apre sa, li kite frè yo, li anbake sou yon batiman pou peyi Siri ansanm ak Prisil ak Akilas. Anvan sa, li fè kale tèt li nan Sankre paske li te fè yon ve. ¹⁹ Rive yo rive lavil Efèz, Pòl kite Prisil ak Akilas, li al nan sinagòg la, li pran diskite ak jwif yo. ²⁰ Yo mande l' pou l' rete pi lontan ak yo, men li pa t' vle. ²¹ Anvan l' kite yo, li di yo: M'a tounen vin wè nou, si Bondye vle. Epi li moute yon batiman, li kite Efèz. ²² Lè l' debake lavil Sezare, li moute Jerizalèm, li pase di legliz la bonjou. Apre sa, li al Antiòch. ²³ Li pase kèk tan la, epi li pati ankò. Li pase nan tout peyi Galasi ak peyi Friji, li t'ap fòtifeye tout disip yo nan konfyans yo nan Bondye. ²⁴ ¶ Yon jwif yo te rele Apolòs rive lavil Efèz. Se te moun lavil Aleksandri. Nonm sa a te konn pale byen, li te konn tou sa ki te ekri

25
nan Liv yo. Yo te moutre l' chemen Bondye a. Depi lè sa a, li te cho pou l' te anonse pawòl la. San dezanpare li t'ap moutre moun yo tou sa li te konnen sou Jezi yon jan ki konfòm ak verite a.

26
Men, se batèm Jan an ase li te konnen. Li t'ap pale avèk fòs konviksyon nan sinagòg la. Lè Prasil ak Akilas tandè l', yo pran l' avèk yo epi yo fin moutre li chemen Bondye a yon jan ki pi korèk.

27
Aprè sa, Apolòs fè lide ale Lakayi. Frè yo te ankouraje li. Yo ekri yon lèt voye bay disip yo ki nan peyi sa a pou yo te byen resevwa Apolòs. Lè li rive Lakayi, li bay moun Bondye te fè favè kwè

28
yo yon gwo konkou. Se avèk gwo konviksyon devan tout moun li t'ap moutre jwif yo ki jan yo te nan lerè: li pran sa ki ekri nan Liv yo a, li t'ap ba yo prèv se Jezi ki Kris la.

Chapter 19

1
¶ Antan Apolòs te lavil Korent, Pòl menm t'ap pase nan tout mòn peyi Lazi yo jouk li rive

lavil Efèz. Li jwenn kèk disip nan lavil la. 2 Li mande yo: Eske nou te resevwa Sentespri lè nou te

kwè? Yo reponn li: Yo pa t' janm di nou te gen yon Sentespri. 3 Lè sa a, Pòl mande yo: Ki batèm

nou te resevwa? Yo reponn li: Batèm Jan an. 4 Pòl di yo: Jan te batize moun ki te asepte tounen vin jwenn Bondye, li t'ap di pèp Izrayèl la pou yo te kwè nan moun ki t'ap vini apre l' la, ki vle di

Jezi. 5 Lè yo tandè sa, yo mande pou resevwa batèm nan non Seyè Jezi. 6 Aprè sa, Pòl mete men sou tèt yo, epi Sentespri desann sou yo. Yo pran pale nan lang lòt peyi, yo t'ap bay mesaj ki soti

nan Bondye. 7 Te gen douz gason konsa antou. 8 ¶ Pòl ale nan sinagòg la. Pandan twa mwa li t'ap pale la avèk gwo konviksyon. Li t'ap fè yo konnen tout bagay sou Gouvènman Bondye ki wa a, li

t'ap chache pran tèt moun ki t'ap koute l' yo. 9 Men, anpil t'ap fè tèt di, yo te refize kwè: yo t'ap pase chemen Bondye a nan rizib devan tout asanble a. Lè Pòl wè sa, li wete kò l' nan mitan yo, li

10 pran disip Kris yo avèk li. Chak jou li t'ap preche nan lekòl Tiranis la. Pandan dezan, sa mache konsa. Se sak fè tout moun ki te rete nan pwovens Lazi a, jwif kou moun lòt nasyon yo, yo tout te

11 tandè pawòl Seyè a. Bondye te sèvi ak Pòl pou l' te fè anpil gwo mirak. 12 Se konsa yo te konn pran mouchwa ak lòt rad ki te fwote ak kò l', yo pote yo bay moun malad. Lamenm malad yo te

13 geri, epi tout move lespri yo te met deyò. ¶ Te gen kèk jwif ki t'ap mache toupatou ap chase move lespri sou moun malad. Yo menm tou, yo t'ap seye chase move lespri yo nan non Jezi. Se konsa yo te konn di move lespri yo: Pa pouvwa Jezi Pòl ap fè konnen an, mwen ba ou lòd soti.

14 (Se te sèt pitit gason Seva, yon granprèt jwif, ki t'ap fè sa.) 15 Men move lespri a reponn yo:

¹⁶
 Mwen konnen Jezi, mwen konnen Pòl. Men nou menm, ki moun nou ye? Lè sa a, nonm ki te gen move lespri sou li a fonsse sou yo, li moutre li te gen plis fòs pase yo tout mete ansanm. Li

¹⁷
 malmennen yo sitèlman yo pran kouri soti nan kay la toutouni, tout kò yo an san. Tout moun lavil Efèz, jwif kou moun lòt nasyon yo, te rive konn bagay sa a. Yo tout te pè, men yo te vin gen

¹⁸
 gwo respè pou non Seyè Jezi a. Anpil nan moun ki te kwè yo vini, yo kanpe devan tout moun,

¹⁹
 yo t'ap avwe tou sa yo te fè, yo t'ap rekonèt sa an piblik. Te gen anpil ladan yo ki te konn pratike maji, yo pote liv yo, yo boule yo devan tout moun. Dapre kalkil yo te fè, te gen liv pou

²⁰
 desansenkantmil (250.000) goud antou. Se konsa pawòl Bondye a t'ap gaye avèk pouvwa, li t'ap

²¹
 moutre fòs li. ¶ Apre bagay sa yo fin pase, Pòl fè lide pase nan Masedwan ak Lakayi, apre sa

²²
 pou li al Jerizalèm. Li t'ap di: Apre mwen soti la, se pou m' al wè lavil Wòm tou. Lè sa a, li voye Timote ak Eras, de nan moun ki t'ap ede l' nan sèvis la, devan nan peyi Masedwan. Li menm li rete

²³
 kèk tan ankò nan pwovens Lazi. Se lè sa a yon gwo dezòd pete nan lavil Efèz poutèt chemen

²⁴
 Bondye a. Te gen yon òfèv yo te rele Demetriyis, ki te konn fè ti modèl kay yo te bati pou yon

²⁵
 bondye fanm yo rele Artemis. Se an ajan li te fè yo. Travay sa a te rapòte ouvriye l' yo anpil. Yon jou, li sanble tout ouvriye l' yo ansanm ak tout lòt moun ki te konn fè menm travay sa a tou. Li di

²⁶
 yo: Mesye, nou konnen se travay sa a ki fè nou viv. Men, nou wè ak je nou, nou tandè ak zòrèy nou sa nonm yo rele Pòl la ap fè. L'ap mache di bondye moun fè ak men se pa bondye yo ye menm. Se konsa, li resi rive pran tèt anpil moun, pa isit nan lavil Efèz la ase, men nan tout pwovens Lazi

²⁷
 a. Talè konsa, metye nou an pral pote move non. Men, sa ki pi rèd ankò, kay Artemis, gwo bondye fanm lan, pral pèdi repitasyon li. Lè sa a menm, gwo bondye moun ap adore nan tout pwovens Lazi

²⁸
 ak toupatou sou latè a pral pase pou anyen. Lè yo tandè sa, foul moun yo vin ankòlè anpil, yo

²⁹
 pran rele: Artemis moun Efèz yo, se gwo nègès! Dezòd la gaye nan tout lavil la. Moun yo pase men yo, yo pran Gayis ak Aristak, de moun Masedwan ki te ansanm ak Pòl nan vwayaj li a, yo

³⁰
 kouri an foul, y' al nan teyat la. Pòl te vle ale li menm tou devan pèp la, men disip yo te di l'

³¹
 non. Te gen de twa chèf nan peyi Lazi a ki te zanmi l', yo voye bò kote l', yo mande l' pou l' pa

³²
 parèt tèt li nan teyat la. Pandan tout tan sa a, te gen gwo bouyay nan asanble a. Yon pòsyon moun t'ap rele yon bagay, yon lòt pòsyon menm t'ap rele yon lòt bagay. Pifò ladan yo pa t' konnen

³³
 ojis poukisa yo te sanble. Kèk moun nan foul la esplike bagay la bay Aleksann, yon nonm jwif yo te mete alatèt yo. Aleksann fè siy ak men li, li te vle pale pou l' pran defans jwif yo devan pèp

³⁴
 la. Men, lè yo rekonnèt se jwif li ye, yo tout pran rele ansanm menm bagay la pandan dezèdetan:

35
 Atemis moun Efèz yo, se gwo nègès. Bout pou bout, sekretè lakomin lan te resi fè foul la sispann rele, li di yo konsa: Moun Efèz, koute! Tout moun konnen lavil Efèz se li menm k'ap veye sou kay
 36
 Atemis, gwo nègès, ansanm ak estati li a ki te tonbe sot nan syèl la. Pesonn pa ka di se pa vre.
 37
 Se sa ki fè, se pou n' mete tèt nou an plas pou n' pa fè anyen san nou pa kalkile byen. Bon. Mesye sa yo nou mennen isit la, se pa vòlò yo vòlò nan tanp yo, ni se pa pale yo pale mal sou Atemis,
 38
 bondye fanm nou an. Si Demetriyis ak ouvriye l' yo gen yon kont yo vle regle ak yon moun,
 39
 gen jou pou tribinal la travay, epi gen chèf pou sa tou: se la pou y' al pote plent. Apre sa, si nou
 40
 gen lòt reklamasyon nou vle fè, n'a regle sa yon lè tout sitwayen yo va reyini dapre lalwa. Avèk sa ki pase jòdi a, yo kapab al pote plent pou nou, yo kapab al di n'ap fè revolasyon. Pa gen okenn
 41
 rezon pou tout dezòd sa a. Nou p'ap kapab bay okenn esplikasyon pou sa. Lè li fin di sa, li voye tout moun lakay yo.

Chapter 20

1
 ¶ Lè dezòd la sispann, Pòl reyini disip yo, li ba yo kèk pawòl ankourajman, li di yo orevwa,
 2
 epi l' pati pou Masedwan. Li pase nan tout zòn lan, li t'ap ankouraje fidèl yo avèk anpil mesaj.
 3
 Apre sa, li pati, li ale Lagrès. Rive la, li ret pase twa mwa. Li tapral pran yon batiman pou peyi Siri lè l' vin konnen jwif yo t'ap pare yon pèlen tann li. Se konsa, li deside tounen pase Masedwan
 4
 ankò. Men non moun ki te avèk li yo: Sopatè, pitit Piris, moun lavil Bere, Aristak ak Sekoundous, tou de moun Tesalonik, Gayis, moun Dèb, Timote, Tichik ak Twofim, tou twa moun pwovens Lazi.
 5
 Yo tout te pran devan, y' al tann nou Twoas. 6
 Nou menm, apre fèt Pen san ledven yo, nou anbake sou yon batiman lavil Filip. Apre senk jou, nou jwenn yo lavil Twoas. Nou rete pase tout yon
 7
 senmenn la. ¶ Premye jou nan senmenn lan, nou te reyini nan aswè pou n' te separe pen an ansanm. Pòl t'ap pale ak asanble a. Li te gen pou l' te pati nan denmen maten. Li te menwi, li t'ap pale toujou.
 8
 Nou te sanble nan pyès anwo kay la. Te gen anpil lanp limen ladan li. 9
 Yon jenn gason yo te rele Etich, te chita sou rebò fennèt la. Mesaj Pòl la te long. Etich kite kabicha pran l' epi l' dòmi nèt ale. Li dòmi sitèlman, li pèdi ekilib, li soti nan twazyèm etaj la li tonbe anba. Lè yo ranmase l', li te
 10
 mouri frèt. Pòl desanm, li bese sou li, li pran l' nan bra l', epi li di: Nou pa bezwen pè, li pa mouri.
 11
 Lè Pòl tounen moute, li kase pen an, epi l' manje. Li pale lontan avèk yo ankò jouk solèy leve.

¹² Apre sa li pati. Yo mennen jenn gason an vivan lakay li. Se te yon ankourajman pou tout moun.
¹³ ¶ Nou pran devan, n' al anbake sou yon batiman ki mennen nou Asòs. Se la pou Pòl te vin anbake
 tou. Se li menm ki te vle l' konsa, li te fè lide ale Asòs apye. ¹⁴ Lè l' vin jwenn nou Asòs, nou pran
 l' abò a, epi n' ale Mitilèn. ¹⁵ Antan nou la, nou fè vwal ankò. Nan denmen nou rive devan Chio.
 Apre yon jou, nou rive Samòs. Nan denmen ankò nou debake Milè. ¹⁶ Pòl te deside pase devan
 Efèz san rete pou l' pa t' pèdi twòp tan nan pwovens Lazi a. Li t'ap prese, li te vle wè si l' te kapab
 rive Jerizalèm pou jou Lapannkòt la. ¹⁷ ¶ Antan li lavil Milè, Pòl voye yon mesaj lavil Efèz: li
 mande chèf reskonsab legliz yo pou yo vin jwenn li. ¹⁸ Lè yo rive, li di yo: Nou konnen ki jan
 mwen te mennen bak mwen tout tan mwen te la avèk nou, depi premye jou mwen te mete pye m'
 nan Lazi. ¹⁹ Mwen sèvi Seyè a san okenn pretansyon, avèk dlo nan je, nan mitan tout move pa
 mwen jwenn poutèt tout konplo jwif yo. ²⁰ Nou konnen mwen pa janm kache nou anyen ki ta ka
 sèvi nou, mwen te fè nou konnen tout bagay, mwen te moutre nou tout bagay, kit an piblik kit lakay
²¹ nou. Mwen avèti tout moun, jwif kou moun lòt nasyon yo, pou yo chanje lavi yo, tounen vin
 jwenn Bondye, pou yo mete konfyans yo nan Seyè Jezi. ²² Koulye a mwen pral Jerizalèm. Se
²³ Sentespri k'ap pouse m' ale. Mwen pa konnen sak pral rive m' la a. Yon sèl bagay moun konnen:
²⁴ nan chak lavil kote m' pase, Sentespri avèti m' prizon ak anpil soufrans ap tann mwen. Mwen
 pa pran lavi m' pou anyen, li pa gen okenn valè pou mwen. Men, mwen vle ale jouk nan bout nan
 sèvis mwen, mwen vle fini nèt ak travay Seyè Jezi ban mwen an, pou m' anonse bon nouvèl favè
²⁵ Bondye fè nou an. Mwen pase kèk tan nan mitan nou ap anonse Gouvènman Bondye ki wa a.
 Men, koulye a, mwen konnen nou yonn p'ap janm wè m' ankò. ²⁶ Se poutèt sa m'ap di nou jòdi a:
²⁷ si yonn nan nou peri, mwen pa reskonsab. Mwen fè nou konnen tout plan travay Bondye a san
²⁸ m' pa kache nou anyen. Veye kò nou, veye sou tout bann mouton Sentespri a mete sou kont nou.
²⁹ Okipe legliz Bondye a, legliz li te achte ak pwòp san Pitit li a. Mwen konnen tou, apre m' fin
 ale, gen moun k'ap vin nan mitan nou pou kraze legliz la, tankou chen mawon nan yon bann mouton.
³⁰ Gen moun k'ap soti nan mitan nou menm menm, k'ap kanpe pou bay manti, pou chache rale kèk
³¹ disip dèyè yo. Se poutèt sa, mwen di nou: fè atansyon anpil. Toujou chonje ki jan, pandan twazan,
³² lajounen kou lannwit, mwen pa janm sispann avèti nou tout, ak dlo nan je mwen. Koulye a m'ap
 renmèt nou nan men Bondye avèk mesaj favè li a. Se li menm ki ka fòtifye nou, ki ka ban nou tout

bon bagay li sere pou tout moun ki pote non li. ³³ Mwen pa janm pote lanvi pou lajan pesonn, ni pou lò ni pou rad okenn moun. ³⁴ Nou menm, nou konnen ki jan mwen travay ak men m' pou m' te ka jwenn tou sa mwen menm ansanm ak kanmarad mwen yo nou te bezwen. ³⁵ Mwen moutre nou ki jan pou n' travay di nan tou sa n'ap fè pou n' ka ede pi fèb yo, pou nou toujou chonje pawòl Seyè a ki te di ak pwòp bouch li: Gen plis benediksyon pou moun k'ap bay pase pou moun k'ap resevwa. ³⁶ ¶ Lè li fin pale konsa, Pòl mete ajenou ansanm ak yo tout, epi li lapriyè. ³⁷ Yo tout t'ap kriye, yo pran Pòl nan bra yo, yo bo l', yo di li: Bondye avèk ou! ³⁸ Sa ki te fè yo plis lapenn, se lè li di yo p'ap janm wè l' ankò. Apre sa, yo kondi l' mennen jouk sou batiman an.

Chapter 21

¹ ¶ Apre nou fin kite yo, nou pati sou batiman an. Nou fè k'ap tou dwat sou Kòs. Yon jou apre, nou te rive Wòd. Soti la, n' ale Patara. ² La, nou jwenn yon batiman ki tapral peyi Finisi, nou moute abò l' epi nou pati. ³ Nou rive toupre lil Chip. Antan nou nan batiman an, nou te ka wè l' toupre konsa. Men, nou pase anba l' sou bò dwat li, nou fè k'ap pou peyi Siri. Nou fè tè lavil Tir. Batiman an te gen yon pakèt chay pou l' te debake la. ⁴ Nou jwenn kèk disip, nou pase sèt jou avèk yo. Lespri Bondye a te avèti yo pou yo te di Pòl pa moute Jerizalèm. ⁵ Lè sèt jou yo te pase, nou pati pou n' al fè wout nou. Tout disip yo, madanm yo ak tout pitit yo te kondi nou jouk andeyò lavil la. Nou tout nou mete ajenou sou rivaj la, nou lapriyè. ⁶ Apre sa, nou yonn di lòt orevwa. Nou moute abò, yo menm yo tounen lakay yo. ⁷ Nou soti lavil Tir nou rive lavil Tolemays, se la nou fini vwayaj sou lanmè a. N' al di frè ki te la yo bonjou, nou pase yon jou avèk yo. ⁸ ¶ Nan denmen, nou pati ankò, nou rive lavil Sezare. Nou antre lakay Filip, evanjelis la, nou fè ladesant la. Se te yonn nan sèt mesye yo te chwazi Jerizalèm yo. ⁹ Li te gen kat pitit fi ki pa t' marye, yo t'ap bay mesaj yo te resevwa nan men Bondye. ¹⁰ Te gen kèk jou depi nou te la lè yon pwofèt yo rele Agabis desann soti nan Jide. ¹¹ Li vin jwenn nou. Li pran sentiwon ki te nan ren Pòl la, li mare de pye pa l' ak de men pa l' yo, epi li di: Men sa Sentespri deklare: Se konsa jwif Jerizalèm yo pral mare mèt sentiwon sa a; apre sa, y'ap lage l' nan men moun lòt nasyon yo. ¹² Lè nou tande sa, nou menm ansanm ak tout moun Sezare yo t'ap di Pòl konsa: Tanpri souple, pa moute Jerizalèm. ¹³ Men, li

reponn nou: Poukisa pou n'ap kriye konsa, pou n'ap chache kraze kouraj mwen konsa? Mwen menm, se pa pare sèlman mwen pare pou m' kite yo mare mwen. Menm si mouri vini, m'ap mouri pou Seyè Jezi nan Jerizalèm. ¹⁴ Lè nou wè nou pa t' kapab chanje lide l', nou pa pèsiste sou sa anko. Nou di: Sa Bondye vle a, se sa k'ap fèt. ¹⁵ ¶ Apre nou fin pase kèk jou la, nou ranje zafè nou, nou pati pou Jerizalèm. ¹⁶ Te gen kèk nan disip lavil Sezare yo ki te al ansanm avèk nou tou. Yo mennen nou lakay Nazon, moun lil Chip, ki te yon disip depi lontan. Se la nou fè ladesant. ¹⁷ Lè nou rive Jerizalèm, frè yo resevwa nou ak kè kontan. ¹⁸ Nan denmen, Pòl ale lakay Jak ansanm ak nou. Tout chèf reskonsab legliz yo te reyini la. ¹⁹ Pòl di yo bonjou, apre sa li tanmen rakonte yo an detay tou sa Bondye te fè ak travay li nan mitan moun ki pa jwif yo. ²⁰ Lè yo fin tande l', yo tout pran fè lwanj Bondye. Apre sa yo di Pòl: Frè nou, ou wè tout kantite jwif ki kwè nan Jezi. ²¹ Malgre sa, yo tout byen zeze pou lalwa a toujou. Yo vin di yo ki jan ou menm Pòl, w'ap moutre tout jwif k'ap viv nan mitan lòt nasyon yo pou yo kite Lalwa Moyiz la tonbe. W'ap di yo pa sikonsi pitit yo, ni yo pa bezwen swiv koutim jwif yo. ²² Sa pou n' fè la a menm? Paske, talè konsa yo pral konnen ou rive isit la. ²³ Ou pral fè sa nou pral di ou la a: Gen kat moun ki te fè yon ve. ²⁴ Ou pral avèk yo, wa patisipe ansanm ak yo nan tout sèvis y'ap fè pou mete tèt yo nan kondisyon pou sèvi Bondye ankò. Wa fè tout depans pou yo, pou yo kapab fè kale tèt yo. Konsa, tout moun va konnen tou sa yo t'ap di sou ou a pa t' vre. Okontrè, ou menm pou tèt pa ou, ou toujou ap obeyi Lalwa Moyiz la. ²⁵ Men, pou moun ki pa jwif yo epi ki kwè nan Jezi koulye a, nou deja ekri yo, nou voye di yo sa n' te deside: piga yo manje vyann bèt ki te ofri pou touye bay zidòl, piga yo manje san, ni vyann bèt ki mouri toufe. Egzante tout dezòd lachè. ²⁶ Lè sa a, Pòl pran kat mesye yo, epi nan denmen li patisipe avèk yo nan sèvis pou mete yo nan kondisyon pou sèvi Bondye ankò. Apre sa, li al nan tanp lan, li fè konnen ki jou sèvis la va fini, kilè pou yo ofri bèt pou yo touye pou yo chak la. ²⁷ ¶ Sèt jou yo te prèt pou fini lè jwif ki soti nan pwovens Lazi yo wè Pòl nan tanp lan. Yo moute tèt foul moun yo, yo mete men sou li. ²⁸ Yo t'ap rele: Moun ras Izrayèl yo, pote nou konkou! Men nonm k'ap plede mache toupatou pale mal ak tout moun sou do pèp Izrayèl la, sou do Lalwa Moyiz la, sou do tanp sa a. Koulye a, li penmèt li fè moun ki pa jwif antre nan tanp lan, l'ap lakòz kote nou mete apa pou Bondye a pa nan kondisyon pou fè sèvis Bondye. ²⁹ (Yo t'ap di sa, paske yo te wè Twofim, moun lavil Efèz, ansanm ak Pòl nan lavil la. Yo te konprann Pòl te fè l' antre nan tanp lan tou.) ³⁰ Tout lavil la te tèt anba, moun kouri soti toupatou. Yo mete men sou Pòl. Yo trennen l' deyò, epi lamenm yo fèmen tout pòt tanp lan. ³¹ Yo t'ap chache yon jan pou touye Pòl, lè nouvèl la rive nan zòrèy kòmandan batayon women an. Yo te vin di l' ki jan tout lavil la te tèt

³²
 anba. ³² Lamenn li pran kèk ofisyè ak kèk sòlda avèk li, li kouri desann bò kote foul moun yo.
³³
 Yo menm menm, lè yo wè kòmandan an ak sòlda yo yo sispann bat Pòl. ³³ Kòmandan an pwoche
 bò kot Pòl, li fè yo arete l', li bay lòd pou yo mare l' ak de chenn. Lèfini, li mande ki moun li te ye,
³⁴
 kisa l' te fè. ³⁴ Men, nan foul moun yo, yon pati t'ap rele yon bagay, yon lòt pati t'ap rele yon lòt
 bagay. Sitèlman yo t'ap fè dezòd, kòmandan an pa t' kapab fin konprann sa yo t'ap di a. Lè l' wè sa,
³⁵
 li bay lòd pou yo mennen Pòl nan kazèn lan. ³⁵ Lè sòlda yo rive bò eskalye a avèk Pòl, yo te blije
 leve l' anlè pou yo te sa pase avè l', sitèlman moun yo te ankòlè. ³⁶
³⁶
 Yo tout yo t'ap swiv li, yo t'ap
 rele: Touye li. ³⁷ Yo tapral fè Pòl antre nan kazèn lan, lè Pòl di kòmandan an: Eske mwen ka di
³⁸
 ou kichòy? Kòmandan an mande li: Kouman? Apa ou pale grèk? ³⁸ Si se sa, se pa ou menm ki
 ejiptyen an, nonm ki te kòmanse yon revolasyon tou lòt jou a epi ki te mennen katmil (4.000) bandi
³⁹
 avè l' nan dezè a? ³⁹ Pòl reponn li: Se jwif mwen ye. Mwen fèt lavil Tas nan peyi Silisi. Ou wè se
⁴⁰
 sitwayen yon gwo lavil mwen ye. Tanpri, kite m' pale ak pèp la. ⁴⁰ Kòmandan an ba l' pèmision.
 Lè sa a, Pòl kanpe sou eskalye a, li fè pèp la yon siy avèk men li. Lè yo sispann fè bri, Pòl pale ak
 yo nan lang ebre. Li di yo konsa:

Chapter 22

¹
¹ ¶ Frèm yo, grandèt mwen yo, koute sa m' pral di nou koulye a pou defann tèt mwen. ² Lè yo
³
 tande l' ap pale ebre, yo rete byen dousman. Epi Pòl di yo: ³ ¶ Se jwif mwen ye. Mwen fèt lavil
 Tas nan peyi Silisi. Men, se isit lavil Jerizalèm mwen grandi. Se Gamalyèl ki te pwofesè mwen.
 Se li menm ki te moutre m' tout ti detay nan Lalwa zansèt nou yo. Mwen menm tou, yon lè mwen
⁴
 te gen zèl nou gen koulye a pou Bondye. ⁴ Mwen te pèsekite moun ki t'ap swiv chemen Bondye a
⁵
 jouk pou m' te touye yo. Fanm kou gason, mwen te arete tout moun mete nan prizon. ⁵ Granprèt
 la ak chèf fanmi yo ki reyini la a, yo ka sètifye sa m'ap di la a se vre. Se yo menm menm ki te ban
 m' lèt otorizasyon pou frè jwif lavil Damas yo. Mwen tapral arete mezi disip ki te la, mennen yo
⁶
 Jerizalèm pou fè regle yo. ⁶ Mwen te sou wout la toupre Damas, lè m' rete konsa yon gwo limyè
⁷
 soti nan syèl la, li klere tout kote m' te ye a. Lè sa a, li te bò midi konsa. ⁷ Mwen tonbe atè, epi m'
⁸
 tande yon vwa ki di m': Sòl, Sòl, poukisa w'ap pèsekite mwen konsa? ⁸ Mwen mande: Ki moun
⁹
 ou ye, Seyè? Epi li di mwen: Mwen se Jezi, moun Nazarèt, w'ap pèsekite a. ⁹ Moun ki te la avè m'

10
yo te wè limyè a tou, men yo pa t' tande vwa ki t'ap pale avè m' lan. Lè sa a, mwen mande: Kisa pou m' fè, Seyè? Seyè a di mwen: Leve, ale lavil Damas. Se la y'a di ou tou sa Bondye va ba ou

11
lòd fè. Limyè a te tèlman klere, mwen te vin avèg. Se kanmarad mwen yo ki pran men m' ki

12
mennen m' Damas. Nan Damas te gen yon nonm yo rele Ananyas. Se te yon moun ki t'ap sèvi

13
Bondye jan Lalwa nou an mande l' la. Tout jwif Damas yo te konsidere l' anpil. Li vin jwenn mwen, li kanpe toupre m', epi li di mwen: Sòl, frè mwen, se pou ou wè nan je ou ankò. Menm lè

14
a, mwen wè ankò, epi mwen gade li. Li di m' konsa: Bondye zansèt nou yo te chwazi ou davans pou ou te ka konn volonte l', pou ou te ka wè sèl moun ki dwat devan li a, pou ou te ka tande l' pale

15
ak bouch li. Ou pral sèvi l' temwen, ou pral fè tout moun konnen sa ou te wè ak sa ou te tande.

16
Koulye a, kisa w'ap tann ankò? Leve non, rele Bondye, resevwa batèm pou tout peche ou yo ka

17
lave. Apre sa, mwen tounen lavil Jerizalèm. Antan m' te nan tanp lan ap lapriyè, mwen fè yon

18
vizyon. Mwen wè Seyè a ki di mwen: Fè vit, kite Jerizalèm, paske moun Jerizalèm yo p'ap

19
asepte tou sa w'ap di sou mwen an. Mwen reponn: Seyè, yo konnen byen pwòp mwen te konn al nan sinagòg yo, mwen te konn mete tout moun ki te kwè nan ou nan prizon, fè bat yo byen bat.

20
Menm lè yo t'ap touye Etyèn, moun ki te kanpe pou ou a, mwen te la tou. Mwen te dakò ak moun

21
ki t'ap touye l' yo. Se mwen menm ki te veye rad yo. Lè sa a, Seyè a di mwen: Ale, m'ap voye

22
ou byen lwen, bò kote moun ki pa jwif yo. ¶ Foul moun yo t'ap koute Pòl byen pwòp. Men, lè yo tande pawòl sa a, yo tout pran rele: Wete nonm sa a sou latè! Touye li! Li pa merite viv ankò!

23
Yo t'ap rele pi rèd, yo t'ap souke rad yo, yo t'ap voye pousyè tè anlè. Kòmandan women an

24
bay lòd fè Pòl antre nan kazèn lan. Li mande pou yo bat li pou fè l' pale. Li te vle konnen poukisa

25
foul moun yo t'ap rele dèyè l' konsa. Lè yo fin mare l' pou bat li, Pòl di ofisye ki te la a: Eske

26
nou gen dwa bat yon sitwayen women ki pa menm pase devan yon tribinal? Lè l' tande sa, ofisye a al avèti kòmandan an, li di li: Fè atansyon sa ou pral fè la a, tande! Nonm lan, se sitwayen women

27
li ye wi. Kòmandan an vin jwenn Pòl, li mande li: Di mwen, èske se sitwayen women ou ye?

28
Pòl reponn li: Wi. Kòmandan an di l' konsa: Mwen menm, mwen te peye gwo lajan pou m' te

29
ka sitwayen women. Pòl reponn li: Mwen menm, mwen fèt sitwayen women. Lamenm, moun ki tapral bat li pou te fè l' pale yo renka kò yo dèyè. Ata kòmandan an te pè lè l' vin rann li kont li

30
te fè mare Pòl ki te yon sitwayen women avèk chenn. Kòmandan an te vle konnen egzakteman

kisa jwif yo t'ap akize Pòl fè. Se konsa, nan denmen li fè lage chenn yo, epi li voye lòd bay chèf prèt yo pou yo reyini ansanm ak Gran Konsèy la. Li mennen Pòl, li mete l' devan yo.

Chapter 23

¹ ¶ Pòl fikse je l' sou manm Gran Konsèy yo, li di: Frè m' yo, depi tout tan mwen toujou viv san repwòch devan Bondye jouk jounen jòdi a. ² Ananyas, granprèt la, bay moun ki toupre Pòl yo lòd pou yo ba l' yon souflèt. ³ Lè sa a Pòl di li: Ou pòtre yon miray blanchi ak lacho! Se Bondye ki va frape ou. Ou chita la pou jije m' dapre Lalwa Bondye a. Men, se ou menm k'ap dezobeyi Lalwa Bondye a lè ou bay lòd frape m' lan. ⁴ Moun ki te toupre Pòl yo di li: Apa w'ap joure granprèt Bondye a? ⁵ Pòl reponn: Eskize m', frè m'. Mwen pa t' konnen se granprèt msye te ye. Paske, men sa yo di nan Liv la: Piga ou pale chèf pèp ou a mal. ⁶ ¶ Pòl konnen te gen sadiseyen yon bò ak farizyen yon lòt bò nan Gran Konsèy la. Se poutèt sa li pran pale byen fò devan yo, li di: Frè m' yo, se yon farizyen mwen ye, pitit pitit farizyen. Se paske mwen gen espwa mò yo gen pou yo leve vivan ankò ki fè yo rele m' an jijman devan nou. ⁷ Lè l' di sa, farizyen yo pran diskite ak sadiseyen yo; asanble a fè de kan. ⁸ (Sadiseyen yo t'ap di moun mouri pa leve, pa gen zanj, pa gen lespri. Farizyen yo, bò pa yo, te kwè nan tou sa.) ⁹ Moun yo t'ap rele pi fò toujou. Kèk dirèktè lalwa, ki te patizan farizyen yo, leve kanpe, yo antre nan yon diskisyon byen cho, yo t'ap di: Nou pa jwenn anyen ki mal nan nonm sa a. Se dwe yon zanj Bondye osinon yon lespri ki pale avè li. ¹⁰ Diskisyon an te vin sitèlman cho kòmandan an te pè pou yo pa t' dechèpiye Pòl. Li bay sòlda yo lòd desann nan asanble a, al wete Pòl nan mitan yo, mennen l' tounen nan kazèn lan. ¹¹ Jou lannwit sa a, Pòl wè Seyè a ki di li: Kouraj! Menm jan ou kanpe bay verite a pou mwen isit la lavil Jerizalèm, se konsa tou ou gen pou ou al kanpe bay verite a pou mwen lavil Wòm. ¹² ¶ Nan denmen maten, jwif yo fè yon konplo. Yo sèmante sou tèt yo yo p'ap mete anyen nan bouch yo toutotan yo pa touye Pòl. ¹³ Te gen karant moun pou pi piti nan konplo a. ¹⁴ Y' al jwenn chèf prèt yo ak chèf fanmi yo, yo di yo: Nou sèmante sou tèt nou, nou p'ap manje anyen toutotan nou pa touye Pòl. ¹⁵ Koulye a, nou menm ansanm ak tout Gran Konsèy la, mande kòmandan an pou l' mennen Pòl ban nou, tankou si nou ta renmen egzaminen ka li a pi byen. Nou menm, bò pa nou, nou tou pare pou n' touye l' anvan l' gen tan rive isit. ¹⁶ Men, pitit gason sè Pòl la pran nouvèl konplo a. li al nan kazèn lan, li antre, li avèti Pòl. ¹⁷ Pòl rele yonn nan ofisye yo, li di li: Mennen jenn gason sa a bò kot kòmandan

an: li gen kichòy pou l' di li. ¹⁸ Ofisye a pran jenn gason an avè l', li mennen l' bay kòmandan an, li di: Prizonye yo rele Pòl la rele m', li mande m' pou mennen jenn gason sa a ba ou. Li bezwen di ou kichòy. ¹⁹ Kòmandan an pran men jenn gason an, li mennen l' sou kote, li mande li: Kisa ou gen pou di mwen? ²⁰ Li reponn: Jwif yo ranje yon konplo. Y'ap mande ou mennen Pòl denmen devan Gran Konsèy la. Y'ap di ou yo ta renmen egzaminen ka msye pi byen. ²¹ Pa koute yo. Gen karant moun pou pi piti ki pare pou yo pran li. Yo sèmante sou lavi yo, yo p'ap mete anyen nan bouch yo toutotan yo pa touye li. Koulye a yo fin pare nèt, se respons ou ase y'ap tann. ²² Kòmandan an di l' konsa: Pa kite pesonn konnen ou te vin di m' sa. Epi li voye jenn gason an al fè wout li. ²³ Apre sa, kòmandan an rele de nan ofisye l' yo, li di yo: Sanble desan (200) sòlda, swasanndis kavalye ak desan (200) zòm ame ak pikèt. Se pou nou tout pare pou n' pati pou Sezare aswè a, vè nevé. ²⁴ Pare yon chwal pou Pòl tou. Mennen l' ale bay gouvènè Feliks an byen, san okenn danje, san okenn malè. ²⁵ Epi li ekri lèt sa a: ²⁶ Klòd Lizyas voye bonjou ak tout respe l' pou chèf li, gouvènè Feliks. ²⁷ Jwif yo te mete men sou nonm sa a, yo tapral touye l' lè m' vin konnen se yon sitwayen women li ye. Lè sa a, mwen rive avèk sòlda m' yo, mwen delivre li. ²⁸ Mwen mennen l' devan Gran Konsèy jwif yo, paske mwen te vle konnen kisa jwif yo t'ap di sou li konsa. ²⁹ Mwen wè li pa t' fè anyen ki pou ta fè yo touye l' ni pou yo mete l' nan prizon. Yo t'ap akize l' dèske li fè yon bann bagay ki gen rapò ak Lalwa yo a. ³⁰ Lè m' vin konnen jwif yo t'ap fè konplo pou touye l', mwen pran desizyon voye l' ba ou. Epi mwen mande moun ki t'ap akize l' yo pou yo vin pote plent pou li devan ou. ³¹ Sòlda yo fè tou sa Lizyas te ba yo lòd fè: yo pran Pòl, yo mennen li jouk Antipatris lannwit la menm. ³² Nan denmen, sòlda ki t'ap mache apye yo tounen nan kazèn lan, yo kite kavalye yo fè rèz vwayaj la avèk Pòl. ³³ Rive yo rive Sezare, kavalye yo renmèt gouvènè a lèt la, epi yo renmèt Pòl nan men li. ³⁴ Gouvènè a li lèt la, li mande Pòl moun ki pwovens li ye. Lè l' vin konnen se moun Silisi li ye, li di li: ³⁵ Lè moun k'ap akize ou yo va vini, m'a tandè sa ou gen pou di. Epi li bay lòd pou yo mete Pòl sou bon gad nan gwo palè Ewòd la.

Chapter 24

¹ ¶ Apre senk jou, Ananyas, granprèt la, rive Sezare ak yon avoka yo rele Tètalis ansanm ak kèk chèf fanmi. Yo parèt devan gouvènè a; yo te vin pote plent pou Pòl. ² Yo fè rele Pòl. Lè sa a Tètalis kòmanse pale, li t'ap akize Pòl konsa: Ekselans, se ou ki fè nou gen lapè depi lontan. Se sou gouvènman ou yo fè anpil refòm nesèsè pou byen peyi a, tèlman ou gen bon konprann. ³ Pou tou sa w'ap fè depi lontan toupatou, n'ap di ou mèsè anpil ak tout kè nou. ⁴ Mwen pa vle pran twòp tan ou. Men tanpri souple, pran pasyans, koute sa nou gen pou n' di ou la a. Nou p'ap pale anpil. ⁵ Nou fin wè nonm sa a se yon gwo nwizans: l'ap mache fè dezòd nan mitan jwif yo toupatou sou latè. Se chèf gwoup Nazareyen yo li ye. ⁶ Li menm seye derespekte tanp lan. Lè nou wè sa, nou arete l'. Nou te vle jije l' dapre Lalwa nou an. ⁷ Men, kòmandan Lizyas antre nan koze a, li aji yon jan brital ak nou, li wete li nan men nou. ⁸ Apre sa, Lizyas bay moun ki t'ap akize l' yo lòd pou yo vin parèt devan ou. Si ou poze nonm sa a keksyon, wa wè ou menm tou, ki jan sa n'ap di la a se verite tou klè. ⁹ Tout jwif yo te dakò avèk li, yo t'ap di se konsa bagay la te ye vre. ¹⁰ ¶ Gouvènè a fè Pòl siy pou l' pale. Pòl di: Mwen konnen w'ap fè jistis nan peyi a depi lontan. Se ak kè poze mwen vin plede kòz mwen devan ou. ¹¹ Ou mèt pran ranseyman, jòdi a fè douz jou depi mwen te moute Jerizalèm pou m' al fè sèvis pou Bondye. ¹² Jwif yo pa jwenn mwen ap diskite ak pesonn nan tanp lan, yo pa bare m' ap moute tèt pesonn ni nan sinagòg yo ni okenn lòt kote nan lavil la. ¹³ Moun sa yo pa ka bay okenn prèv pou tou sa yo sot di mwen fè a. ¹⁴ Men, m'ap rekonèt sa devan ou: m'ap sèvi Bondye zansèt nou yo dapre chemen yo pretann di ki pa bon an. Men, mwen kwè tout bagay ki ekri nan lalwa Moyiz la ak nan liv pwofèt yo. ¹⁵ Mwen gen espwa sa a, epi mwen konnen yo genyen l' tou; yon jou Bondye gen pou fè tout moun, bon kou mechan, leve soti vivan nan lanmò. ¹⁶ Se konsa m'ap fè posib mwen pou m' toujou kenbe konsyans mwen san repwòch devan Bondye ak devan moun. ¹⁷ Apre mwen fin pase anpil lanne deyò, mwen tounen Jerizalèm. Mwen te vin pote yon ti lajan pou ede pèp mwen an, epi m' tou pwofite fè ofrann bèt pou Bondye. ¹⁸ Men sa m' t'ap fè lè yo jwenn mwen nan tanp lan. Mwen te fin patisipe nan jou sèvis pou mete moun nan kondisyon pou fè sèvis Bondye. Pa te gen foul moun avè m', pa te gen kras dezòd. ¹⁹ Men, te gen kèk jwif ki te soti nan pwovens Lazi, se yo menm ki te dwe la devan ou pou akize m', si yo te gen kichòy kont mwen. ²⁰ Osinon, se pou moun ki isit la di ki move zak yo jwenn mwen te fè lè m' te kanpe devan Gran Konsèy la. ²¹ Men sèl pawòl mwen te di byen fò lè m' te kanpe devan yo tout

la: Se paske mwen kwè mò yo gen pou leve vivan ankò kifè yo rele m' an jijman devan nou jòdi a.
²² ¶ Feliks ki te okouran tout bagay sou chemen Bondye a, ranvwaye jijman an pou pita. Li di yo
 konsa: Lè kòmandan Lizyas va vini, m'a pran yon desizyon sou zafè sa a. ²³ Li bay ofisye ki te
 reskonsab Pòl la lòd pou l' pa lage l', men pou l' ba li kèk ti libète, epi pou kite zanmi l' yo rann li
 ti sèvis. ²⁴ Kèk jou apre sa, Feliks vini avèk Drisil, madanm li, ki te yon jwif. Li voye rele Pòl, li
 te vle tandè sa Pòl te gen pou l' di sou konfyans nan Jezikri a. ²⁵ Men, lè Pòl pran pale sou jan
 moun dwe viv byen, sou jan moun dwe kontwole kò yo, sou jou jijman ki gen pou vini an, Feliks
 soti pè, li di: Bon, koulye a ou mèt ale. Lè m'a gen tan m'a rele ou ankò. ²⁶ Li te mete nan tèt li Pòl
 ta ka ba li lajan. Se poutèt sa plizyè fwa li te fè l' vin koze avèk li. ²⁷ Dezan pase konsa. Feliks
 menm ki te vle fè jwif yo plezi te kite Pòl nan prizon tout tan sa a. Apre sa, Pòsiyis Festis vin moute
 gouvènè nan plas Feliks.

Chapter 25

¹ ¶ Lè Festis rive nan pwovens lan, sou twa jou li kite Sezare, li ale lavil Jerizalèm. ² Chèf prèt
 yo ansanm ak jwif ki te grannèg nan lavil la vin pote plent ba li pou Pòl. ³ Yo mande Festis yon
 favè. Yo mande l' pou l' fè mennen Pòl Jerizalèm. Yo te gen tan fè konplo pou touye l' sou wout
 la. ⁴ Men, Festis reponn yo: Pòl deja nan prizon Sezare. Mwen menm poutèt pa m', mwen pral
 tounen Sezare talè konsa. ⁵ Si Pòl fè kichòy ki mal, se pou chèf nou yo desann ansanm avè m', y'a
 akize l' laba a. ⁶ Festis pase wit a dis jou sèlman avèk yo Jerizalèm. Apre sa li tounen Sezare. Nan
 denmen, li al chita nan tribinal la, li bay lòd pou yo mennen Pòl. ⁷ Lè Pòl rive, jwif ki te soti
 Jerizalèm yo vin kanpe bò kote l', yo pote anpil gwo akizasyon kont li, men yo pa t' kapab bay
 okenn prèv. ⁸ Men sa Pòl di pou defann tèt li: Mwen pa fè anyen ki kont lalwa jwif yo, ni kont tanp
 lan, ni kont Seza. ⁹ Festis menm ki te vle fè jwif yo plezi mande Pòl: Eske ou pa ta vle al Jerizalèm
 pou yo ka jije ou devan m' sou zafè sa a? ¹⁰ Pòl reponn li: Se devan tribinal Seza mwen ye, se la
 pou yo jije mwen. Mwen pa fè jwif yo anyen. Ou konnen sa byen pwòp. ¹¹ Si m' desobeyi lalwa,
 si m' fè yon bagay ki merite lanmò, mwen p'ap refize mouri. Men tou, si akizasyon y'ap pote sou
 mwen yo pa vre, pesonn pa ka lage m' nan men yo. Mwen mande pou Seza tandè kòz mwen. ¹² Lè
 sa a, Festis fè yon ti pale ak manm konsèy li yo, epi l' di: Bon. Ou mande pou Seza tandè kòz ou,

¹³
 ou pral devan Seza. ¶ Kèk jou apre sa, wa Agripa ak Berenis rive Sezare. Yo te vin di Festis
¹⁴
 bonjou. Yo t'ap pase kèk jou la. Festis pwofite esplike sitiyasyon Pòl la bay wa a, li di li: Feliks
¹⁵
 te kite yon nonm nan prizon isit la. Lè m' te al Jerizalèm chèf prèt yo ansanm ak chèf fanmi jwif
¹⁶
 yo te vin pote m' plent pou li, yo mande m' pou m' kondannen li. Mwen reponn yo: Se pa koutim
 moun lavil Wòm yo pou yo renmèt yon akize bay lènmi l' konsa san yo pa mete l' fasafas ak moun
¹⁷
 k'ap akize l' yo anvan. Se pou l' gen chans defann tèt li tou anba akizasyon yo. Se konsa yo vin
 isit la avèk mwen. Mwen pa t' pèdi tan mwen. Nan denmen m' al chita nan tribinal la, mwen bay
¹⁸
 lòd pou yo mennen nonm lan. Moun ki t'ap akize l' yo vin parèt tou, men yo pa t' bay okenn
¹⁹
 move zak li te fè, jan m' te kwè a. Se yon diskisyon sèlman yo te gen avè l' sou relijyon yo a ak
²⁰
 sou yon nonm yo rele Jezi ki mouri. Men, Pòl sètifye nonm sa a leve, li vivan ankò. Mwen pa
 t' konn sa pou m' te fè ankò pou m' te pran enfòmasyon sou keksyon sa yo. Mwen mande Pòl si l'
²¹
 pa ta vle al Jerizalèm pou yo te ka jije l' sou zafè sa a la. Men, Pòl mande pou Seza tandè kòz
 li. Li mande pou yo kenbe l' nan prizon jouk Seza va pran yon desizyon sou ka li. Se konsa mwen
²²
 bay lòd pou yo pa lage l' jouk m'a ka voye l' bay Seza. Agripa di Festis konsa: Mwen ta renmen
²³
 tandè nonm sa a. Festis reponn li: Denmen wa tandè li. Se konsa, nan denmen Agripa ak Berenis
 vin nan mitan yon gwo kòtèj. Yo antre nan sal odyans lan avèk tout chèf militè yo ansanm ak notab
²⁴
 lavil la. Festis bay yon lòd, epi yo mennen Pòl vini. Apre sa, Festis di: Wa Agripa, nou tout ki
 isit la avèk nou, men li! Nou wè nonm sa a. Tout jwif yo vin pote m' plent pou li, ni laba Jerizalèm
²⁵
 ni isit la. Y'ap plede rele nonm sa a te fèt pou l' mouri deja. Mwen menm, pou tèt pa m', mwen
 wè li pa fè anyen ki merite lanmò. Men, li menm li mande pou Seza tandè kòz li. Se poutèt sa,
²⁶
 mwen pran desizyon voye l' bay Seza. Mwen pa gen anyen ki sèten pou m' ekri sou li. Se poutèt
 sa mwen fè l' konparèt devan nou, devan ou menm sitou, wa Agripa. Konsa m'a jwenn sa pou m'
²⁷
 ekri lè n'a fin poze l' keksyon. Pou mwen menm, sa pa gen sans pou espedye yon prizonye konsa
 san ou pa di egzakteman kisa li fè.

Chapter 26

¹
 ¶ Agripa di Pòl: Ou mèt pale pou defann tèt ou. Lè sa a, Pòl lonje men l', epi li fè defans li
²
 konsa: Se pa ti kontan mwen kontan, wa Agripa, pou m' defann tèt mwen devan ou jòdi a anba

3
 tout bagay jwif yo ap plede akize mwen. Ou menm ou konnen tout koutim jwif yo ansanm ak kalite keksyon yo renmen diskite yo byen. Tanpri souple, pran yon ti pasyans pou koute mwen.

4
 Tout jwif yo konnen ki jan m' mennen tèt mwen depi lè m' te jenn gason, ki jan m' t'ap viv depi nan konmansman nan mitan moun peyi mwen yo ak nan Jerizalèm. 5 Yo konnen m' depi lontan. Epi, si yo vle, yo ka rann temwayaj mwen t'ap viv tankou yon farizyen. Farizyen yo se moun ki pi rès nan relijyon nou an. 6 Koulye a, yo rele m' an jijman paske m'ap tann pwomès Bondye te fè zansèt nou yo. 7 Se menm pwomès sa a douz branch fanmi nou yo ap tann lè y'ap sèvi Bondye san rete, lajounen kou lannwit. Se pou menm pwomès sa a jwif yo ap akize mwen, monwa. 8 Poukisa, nou menm jwif, nou pa kwè Bondye ka leve moun mouri? 9 Mwen menm tou, yon lè, mwen te kwè se pou m' te fè sa m' kapab pou disparèt non Jezi, moun Nazarèt la. 10 Se sa m' te fè lavil Jerizalèm. Mwen te resevwa yon pouvwa espesyal nan men chèf prèt yo pou sa. Mwen te mete anpil patizan Kris yo nan prizon. Lè yo t'ap kondannen yo amò, mwen te dakò nèt ale. 11 Anpil fwa, mwen te fè bat yo nan tout sinagòg, mwen te konn fòse yo vire do bay Bondye. Mwen te sitelman pa t' vle wè yo, mwen te konn al pèsekite yo jouk nan peyi etranje. 12 ¶ Se konsa, mwen tapral Damas avèk pouvwa ansanm ak lòd chèf prèt yo te ban mwen. 13 Antan m' te sou wout la, vè midi konsa, monwa, mwen wè yon limyè ki soti nan syèl la pi klere pase solèy la. Li te klere tout kote m' te ye a ansanm ak moun ki t'ap vwayaje avè m' yo. 14 Nou tout nou tonbe atè. Epi mwen tande yon vwa ki di m' an lang ebre: Sòl, Sòl, poukisa w'ap pèsekite mwen? W'ap fè tèt ou mal lè w'ap voye pye konsa tankou yon chwal k'ap voye pye lè mèt li ap bat li. 15 Mwen mande: Ki moun ou ye, Seyè? Epi l' di m': Mwen se Jezi w'ap pèsekite a. 16 Men, leve kanpe sou pye ou. Mwen fè ou wè m', se pou ou kapab sèvi mwen. Wi, ou pral sèvi m' temwen, ou pral di lòt moun yo jan ou te wè m' jòdi a epi wa fè yo konnen tou sa m'a fè ou wè apre sa. 17 M'a delivre ou anba men pèp jwif yo, anba men moun lòt nasyon yo. Se mwen menm k'ap voye ou ba yo, 18 pou ou kapab louvri je yo, pou fè yo soti nan fènwa kote yo ye a vin nan limyè, pou wete yo anba pouvwa Satan vin jwenn Bondye. Konsa, lè y'a mete konfyans yo nan mwen, y'a resevwa padon pou tout peche yo, y'a jwenn plas yo nan mitan pèp k'ap viv apa pou Bondye a. 19 Se konsa, wa Agripa, mwen pa dezobèyi vizyon ki te soti nan syèl la vin jwenn mwen. 20 Mwen kòmanse bay moun nan lavil Damas ak nan Jerizalèm mesaj la. Apre sa, m' ale nan tout peyi Jide ak nan mitan moun lòt nasyon yo. Mwen t'ap mande yo pou yo chanje lavi yo, pou yo tounen vin jwenn Bondye, pou yo fè bagay ki pou fè wè yo chanje tout bon. 21 Se poutèt sa wi jwif yo mete men sou mwen nan tanp

lan, se poutèt sa yo t'ap seye touye mwen.²² Mentou, Bondye toujou pwoteje m' jouk jòdi a. Mwen la toujou pou m' sèvi l' temwen devan tout moun, grannèg kou malere. Sa ou wè m'ap di la a, se sa menm pwofèt yo ansanm ak Moyiz te di gen pou rive.²³ Kris la te gen pou l' souffri. Se li menm ki an premye gen pou l' leve soti vivan nan lanmò pou l' fè pèp Izrayèl la ansanm ak tout lòt nasyon yo konnen limyè k'ap delivre yo a.²⁴ ¶ Antan Pòl t'ap pale konsa pou defann tèt li, Festis rele byen fò: Ou fou, Pòl! Twòp lespri fè ou pèdi tèt ou.²⁵ Pòl reponn li: Mwen pa fou non, ekselans. Tout pawòl mwen di la a se verite a tou klè, epi yo gen sans.²⁶ Wa Agripa konn tout bagay sa yo. Se poutèt sa mwen pa pè pale devan li. Mwen sèten li konnen tout bagay sa yo, paske pa gen okenn ladan yo mwen te fè an kachèt.²⁷ Wa Agripa, èske ou pa kwè sa pwofèt yo di? Mwen konnen ou kwè.²⁸ Agripa di Pòl: Talè konsa ou pral pran tèt mwen tou pou fè m' kretyen?²⁹ Pòl reponn li: Kit koulye a, kit pita, m'ap lapriyè Bondye ni pou ou ni pou nou tout k'ap koute m' jòdi a pou yon lè konsa nou vin tankou m', wetan chenn sa yo!³⁰ Wa a, gwouvènè a, Berenis ansanm ak tout moun ki te la yo leve.³¹ Apre yo fin ale, yonn t'ap di lòt: Nonm sa a pa fè anyen ki merite prizon, ale wè lanmò.³² Agripa di Festis konsa: Si nonm sa a pa t' mande pou Seza tandè l', ou ta ka lage l' wi.

Chapter 27

¹ ¶ Lè yo deside pou fè n' pati nan batiman pou peyi Itali, yo renmèt Pòl ansanm ak kèk lòt prizonnye nan men Jiliyis, kòmandan yon batayon lame Wòm lan yo te rele Batayon Seza.² Nou anbake sou yon batiman ki te soti lavil Adramit ki tapral fè lakòt nan Lazi. Epi nou pati. Aristak, yon moun lavil Tesalonik nan peyi Masedwan, te avèk nou.³ Nan denmen nou rive lavil Sidon. Jiliyis te boule byen ak Pòl, li te ba l' pèmisyon pou li al wè zanmi l' yo pou li al cache sa l' te bezwen.⁴ Apre nou kite Sidon, nou pase sou bò dwat lil Chip, nou lonje kòt la sou anwo, paske van an te kontrè pou nou lòt bò a.⁵ Nou travèse lanmè a devan Silisi ak Panfili, nou rive lavil Mira nan Lisi.⁶ Antan nou la, kòmandan an jwenn yon batiman ki te soti lavil Aleksandri tapral an Itali. Li fè nou anbake sou li.⁷ Pandan plizyè jou nou vwayaje ti pa ti pa. Se pa ti traka anvan nou te ka rive devan lavil Nid. Van an pa t' ban nou chans pou n' al pi lwen nan k'ap sa a. Nou te blije desann,

8
 pase devan k'ap Salmone, vire anba lil Krèt. Nou lonje kòt la avèk anpil traka jouk nou rive yon
 9
 kote yo rele Bon Pò, toupre lavil Laze. Nou te deja pèdi anpil tan, jou pou jwif yo te fè jèn yo te
 10
 deja pase. Lè sa a se te gwo danje pou moun vwayaje. Se poutèt sa Pòl ba yo konsèy sa a: Mesye,
 mwen wè vwayaj la pral gen gwo danje ladan li: n'ap pèdi chay la ansanm ak batiman an. Ata moun
 11
 ka mouri tou. Men, kòmandan women an te gen plis konfyans nan pawòl kaptenn lan ak amatè
 12
 batiman an pase nan pawòl Pòl. ¶ Pòl a pa t' bon pou yo te rete pase sezon fredy a tou: se poutèt
 sa pifò moun ki te abò a te vle pati. Yo t'ap pran chans rive Finiks, yon lòt pò nan lil Krèt la ki bay
 13
 sou lanmè nan direksyon siwa nòwa. Konsa, yo ta ka pase sezon fredy a la. Lè yo wè yon ti van
 14
 swèt leve, yo te kwè yo te kapab rive Finiks. Yo leve lank, yo pran lonje kòt lil la. Men, yon lòt
 15
 moman, yon gwo van yo rele nòde desann soti nan mòn lil la. Li pran trennen batiman an. pa t'
 16
 gen mwayen kenbe tèt ak li. Nou te blije kite l' pote n' ale. Nou pase bò anba yon ti zile yo rele
 17
 Kloda. La, nou pran yon ti souf. Se pa ti traka anvan nou resi sove ti kannòt bò a. Yo rale l'
 moute abò. Apre sa, yo pran mare kèk kòd, yo sentre batiman an byen sentre. Yo te pè tou pou
 batiman an pa t' al chwe sou yon fon plat ki nan mitan lanmè a devan peyi Libi. Yo desann vwal
 18
 yo. Se konsa nou kite van an bwote nou. Gwo van an t'ap bat nou pi rèd. Nan denmen, nou te
 19
 blije jete chay yo nan dlo. Nan denmen ankò, marin yo voye tout aparèj batiman an jete nan dlo
 20
 ak pwòp men yo. Pandan plizyè jou nou pa wè ni solèy, ni zetwal. Van an menm t'ap soufle
 21
 byen fò toujou. Lè n' wè sa, nou pèdi tout espwa sove. ¶ Moun ki te abò yo pa t' manje anyen
 depi lontan. Pòl kanpe devan yo, li di yo konsa: Mesye, nou te dwe koute mwen. Nou pa t' dwe
 22
 soti kite Krèt. Nou ta egzante tout danje sa yo ak tout pèt sa yo. Men, koulye a, m'ap di nou pran
 23
 kouraj. Pesonn p'ap mouri. Se batiman an ase k'ap pèdi. Yè oswa, Bondye m'ap sèvi a, li menm
 24
 ki mèt mwen, li voye yon zanj li bò kote m', li di mwen: Pa pè, Pòl. Fòk ou konparèt devan Seza.
 25
 Epi Bondye fè favè sa a pou ou: li ba ou lavi tout moun k'ap vwayaje ansanm avèk ou yo. Se
 poutèt sa, mesye, pran kouraj. Mwen gen konfyans nan Bondye. Sa gen pou l' rive jan li di m' lan.
 26
 27
 Men, nou pral chwe sou yon zile. Sa te fè katòz nwit deja. Van an t'ap bwote nou toujou sou
 28
 lanmè Mediterane a. Vè menwi konsa, marin yo vin santi nou t'ap pwoche bò yon tè. Yo mare
 yon sonn nan yon liy, yo lage l' nan fon. Yo jwenn dlo a te gen vin bras. Pi devan ankò yo lage liy
 29
 lan, yo jwenn kenz bras ase. Yo te pè pou batiman an pa moute sou resif. Yo lage kat lank nan

³⁰
 dèyè batiman an. Yo t'ap tann solèy la leve. Marin yo menm t'ap chache chape kò yo. Yo desann
 ti kannòt bò a nan dlo, yo pran pretès yo tapral mare kèk lank devan batiman an. ³¹ Men, Pòl di
³²
 kòmandan women an ak sòlda yo: Si moun sa yo pa rete nan batiman an, nou yonn p'ap sove. Lè
³³
 sa a, sòlda yo koupe kòd ki te mare ti kannòt bò a, yo kite l' ale. Anvan solèy leve, Pòl mande
 tout moun pou yo manje yon ti manje. Li di yo: Mezanmi, jòdi a fè katòz jou depi nou rete la san
³⁴
 manje, n'ap tann. Tanpri, koulye a, mete kichòy nan vant nou. N'a byen bezwen l' pou nou sove.
³⁵
 Ata yon branch cheve nou p'ap pèdi. Lè li fin di sa, Pòl pran pen, li di Bondye mèsi devan yo
³⁶
 tout, li kase pen an, epi l' kòmanse manje. Tout moun reprann kouraj; yo menm tou yo manje.
³⁷
³⁸
 Te gen desanswasanssèz (276) moun antou abò batiman an. Lè yo fin manje kont yo, yo jete
³⁹
 rèss ble a nan lanmè pou delestè batiman an. Lè solèy leve, marin yo pa t' rekonèt tè a. Men, yo
⁴⁰
 wè yon lans ak yon bèl plaj. Yo fè lide pran chans ale fè tè la. Yo demare lank yo, yo lage yo
 nan lanmè. Yo demare kòd ki te kenbe zaviwon ki te sèvi yo gouvènay la. Yo moute fòk la pou
⁴¹
 van an pouse batiman an tou dwat devan yo. Yo mete k'ap sou plaj la. Men, batiman an moute
 sou yon ban sab nan mitan de kouran, li chwe. Devan batiman an te antre kole nan sab la, dèyè a
⁴²
 menm gwo lanm yo t'ap fin kraze li. Sòlda yo te vle touye prizonye yo pou okenn ladan yo pa
⁴³
 t' naje sove. Men, kòmandan women an ki te vle sove Pòl di yo non pa fè sa. Li bay lòd pou tout
⁴⁴
 moun ki konn naje jete kò yo nan dlo anvan pou y' al atè. Lòt moun yo va swiv apre, y'a kenbe
 kèk planch osinon kèk moso nan batiman an. Se konsa nou tout nou rive atè anbyen, san lòt donmaj
 ni malè.

Chapter 28

¹
 ¶ Se lè nou fin sove, nou vin konnen lil la te rele Malt. ² Moun peyi a te aji byen anpil avèk
³
 nou. Lapli t'ap tonbe, te fè frèt anpil. Yo limen yon gwo boukan pou resevwa nou. Pòl te ranmase
 yon ti pakèt fachin, li t'ap mete l' nan dife a lè yon sèpan soti nan chalè dife a, li vlope nan men li.
⁴
 Lè moun zile yo wè sèpan an pandye nan men Pòl, yonn t'ap di lòt: Gen lè nonm sa a se yon
 ansasen. Li chape nan nofraj la, epi men jistis Bondye ap pousib li toujou. ⁵ Pòl annik souke men
⁶
 l', epi bèt la tonbe nan dife a. Li pa t' santi anyen ankò. Lòt moun yo menm t'ap tann pou yo wè

Pòl vin anfle osinon pou l' tonbe mouri frèt. Moun yo tann, yo tann. Lè yo wè anyen pa rive l', yo chanje lide, yo di: Nonm sa a, se yon bondye. ⁷ Toupre bò la, te gen yon bitasyon ki te pou Pibliyis, pi grannèg nan lil la. Li resevwa nou ak kè kontan. Nou fè ladesant lakay li pandan twa jou. ⁸ Papa Pibliyis te kouche malad ak yon lafyèb ak dyare. Pòl antre ale wè l', li lapriyè, li mete men l' sou tèt li, li geri li. ⁹ Apre sa, tout lòt moun ki te malad nan lil la te vini tou. Yo tout te geri. ¹⁰ Yo fè nou anpil kado. Lè pou n' anbake menm, yo ban nou tou sa nou te bezwen pou vwayaj la. ¹¹ ¶ Apre twa mwa, nou pati nan yon batiman Aleksandri ki te pase tout tan fredè a nan lil la. Yo te rele batiman an Marasa. ¹² Lè nou rive Sirakiz, nou rete la pandan twa jou. ¹³ Lè nou pati, nou lonje kòt la jouk nou rive Rijio. Nan denmen, yon van swèt leve: apre de jou vwayaj nou rive Pouzòl. ¹⁴ La, nou jwenn kèk frè ki mande pou n' pase sèt jou ak yo. Se konsa nou rive lavil Wòm. ¹⁵ Frè lavil Wòm yo ki te pran nou vin kontre nou jouk nan Mache Apiyis ak nan Kalfou Twa Kafe. Lè Pòl wè yo, li di Bondye mèsi, li pran kouraj. ¹⁶ Lè nou rive Wòm, yo kite Pòl rete pou kont li ak yon sèl sòlda pou veye li. ¹⁷ ¶ Apre twa jou, Pòl fè rele chèf jwif yo ki lavil Wòm. Lè yo reyini, li di yo: Frè m' yo, san m' pa fè anyen kont pèp la, ni kont koutim zansèt nou yo, jwif yo rete konsa, yo arete m' lavil Jerizalèm, yo lage m' nan men women yo. ¹⁸ Lè women yo fin keksyonnen m', yo te vle lage m' paske yo pa t' jwenn okenn rezon ki pou ta fè m' merite lanmò. ¹⁹ Men, jwif yo kenbe la ak yo. Mwen te blije mande pou Seza tande kòz mwen. Men, mwen menm pou tèt pa m', mwen pa gen okenn plent pou m' fè pou moun menm peyi avè m' yo. ²⁰ Se poutèt sa mwen fè rele nou pou m' wè nou, pou m' pale ak nou, pou m' di nou se poutèt moun pèp Izrayèl t'ap tann lan kifè yo mare m' ak chenn sa a. ²¹ Yo reponn li: Nou pa resevwa okenn lèt soti peyi Jide sou ou. Okenn frè pa soti laba vin isit pou ban nou nouvel, ni pou pale mal sou ou. ²² Men, nou ta renmen tande kisa ou gen nan tèt ou, paske nou konnen toupatou yo pa vle wè gwoup ou fè pati a. ²³ ¶ Yo fikse l' yon jou. Lè sa a, yo te anpil ki te vin jwenn li kote li te ye a. Depi nan maten jouk nan aswè, Pòl t'ap ba yo espplikasyon: li t'ap fè yo konnen gouvènman Bondye ki wa a. Li pran lalwa Moyiz la ak liv pwofèt yo, li t'ap chache fè yo rekonèt ki moun Jezi ye. ²⁴ Gen ladan yo ki te kwè sa l' t'ap di yo. Men, gen lòt ki pa t' vle kwè menm. ²⁵ Yo vire do yo san yo pa t' tonbe dakò. Lè Pòl wè sa, li ajoute pawòl sa a pou yo: Sentespri te gen rezon pale konsa ak zansèt nou yo nan bouch pwofèt Ezayi, lè l' te di: ²⁶ Ale jwenn pèp sa a, di l' pou mwen: Pou tande n'a tande nan zòrèy nou, men nou p'ap konprann anyen. Pou gade n'a gade ak je nou, men nou p'ap wè. ²⁷ Paske lespri pèp sa a vin lou, yo bouche zòrèy yo, yo fèmen je yo, pou yo pa wè ak je yo, pou yo pa tande

nan zòrèy yo, pou yo pa konprann ak lespri yo, pou yo pa tounen vin jwenn mwen pou m' geri yo.
 Se Bondye menm ki di sa.²⁸ Apre sa, Pòl di yo: Koulye a, nou fèt pou nou konnen Bondye fè
 moun lòt nasyon yo konnen l'ap delivre yo tou. Yo menm, y'ap tande li.²⁹ Lè l' te fin di sa, jwif
 yo al fè wout yo, yo t'ap diskite yonn ak lòt.³⁰ ¶ Pòl te rete pandan dezan nan yon kay li te lwe.
 Li te resevwa tout moun ki te vin wè li.³¹ Li t'ap fè konnen gouvènman Bondye ki wa a, li t'ap
 moutre moun yo tout bagay sou Jezikri, Seyè a, kareman san pesonn pa janm chache l' kont.

Romans

Chapter 1

¹ ¶ Se mwen menm Pòl, sèvitè Jezikri, yon nonm Bondye rele pou sèvi li apòt, yon nonm li
 mete apa pou anonse bon nouvèl li a, k'ap ekri nou tout kretyen ki nan lavil Wòm.² Depi lontan
 Bondye te pwomèt bon nouvèl sa a pa bouch pwofèt li yo, nan Liv Sentespri te fè yo ekri a.³ Bon
 Nouvèl sa a pale nou sou Pitit li a, Jezikri, Seyè nou an. Lè pou l' te fèt tankou yon moun, Jezi soti
 nan fanmi wa David.⁴ Men, dapre Sentespri ki fè nou viv pou Bondye, li te fè nou wè avèk pouvwa
 se Pitit Bondye a li ye, lè l' te leve soti vivan nan lanmò.⁵ Gremesi Jezikri sa a, Bondye fè m' favè
 pou m' travay tankou apòt, pou m' mennen moun tout nasyon, nan non menm Kris la, pou yo vin
 kwè nan li, pou yo obeyi li.⁶ Nou menm kretyen ki nan lavil Wòm, nou fè pati nasyon sa yo tou:
 Bondye rele nou pou n' antre nan fanmi Jezikri a.⁷ Se sak fè m'ap ekri nou, nou menm Bondye
 renmen anpil, nou menm Bondye rele pou viv apa pou li. Mwen mande Bondye, Papa nou, ansanm
 ak Jezikri, Seyè a, pou yo ban nou benediksyon ak kè poze.⁸ ¶ Anvan m' di nou lòt bagay, kite m'
 di Bondye mèsè pou nou gremesi Jezikri. Paske, toupatou sou latè y'ap pale jan nou gen konfyans
 nan Bondye.⁹ Mwen pran Bondye pou temwen, Bondye m'ap sèvi ak tout kè mwen lè m'ap anonse
 bon nouvèl Pitit li a. Se toutan m'ap nonmen non nou;¹⁰ se san rete m'ap lapriyè pou nou; m'ap
 mande Bondye pou l' kite mwen vin vizite nou yon lè konsa, si se volonte li.¹¹ Se pa ti anvi mwen
 pa anvi wè nou pou m' separe ak nou kèk benediksyon Bondye ban mwen, pou n' kapab vin pi fèm.
¹² Mwen vle di pito, pou m' ta la nan mitan nou, pou yonn kapab ankouraje lòt ak konfyans nou

13
 gen ansanm nan menm Bondye a. Frè m' yo, mwen vle nou konn sa: plizyè fwa menm, mwen fè lide al vizite nou, pou jan mwen te anvi wè travay mwen bay bon rezilta nan mitan nou menm jan li bay bon rezilta nan mitan lòt nasyon yo. Men, chak fwa mwen jwenn anpechman, jouk koulye

14
 a. Se yon devwa pou mwen pou m' anonse bon nouvèl la bay tout moun: kit yo eklere, kit yo pa eklere, kit yo konn li, kit yo pa konn li.

15
 Se poutèt sa, m' anvi vin anonse bon nouvèl la ban nou, nou menm ki rete lavil Wòm.

16
 ¶ Mwen pa wont anonse bon nouvèl la: se pouvwa Bondye ki la pou delivre tout moun ki kwè, jwif yo an premye, apre yo moun lòt nasyon yo tou.

17
 Bon nouvèl sa a fè nou wè ki jan Bondye fè moun gras. Travay sa a, li kòmanse ak konfyans moun gen nan Bondye, li fini nan menm konfyans la tou, jan sa te ekri a: Moun Bondye fè gras paske li gen konfyans nan Bondye, se li menm ki va gen lavi.

18
 Se poutèt sa, n'ap wè kòlè Bondye soti nan syèl la, li tonbe sou tout mechanste ak tout lenjistis moun fè. Sitèlman kè yo pa bon, y'ap chache anpeche verite a fè travay li.

19
 ¶ Bondye ap peni yo tou paske tou sa yo ka konnen sou Bondye parèt byen klè devan je yo. Se Bondye menm ki fè sa konsa pou yo.

20
 Se vre wi. Depi Bondye te fin kreye tout bagay, tout moun ki egzaminen travay li yo ka konprann ki kalite moun Bondye ye, bagay nou pa ka wè ak je nou: ki vle di, jan li gen yon pouvwa ki p'ap janm fini, jan li se Bondye tout bon. Se sak fè moun sa yo pa gen eskiz menm.

21
 Yo te konn Bondye byen pwòp, men yo pa bay Bondye lwanj ki pou li, yo pa di l' mèsi jan l' merite l' la. Lekontrè, y'ap mete yon bann lide ki pa gen sans nan tèt yo, yo san konprann, fènwa fin plen kè yo.

22
 Y'ap mache di se moun lespri yo ye. Men, se fou yo fin fou.

23
 Pase pou yo adore Bondye ki p'ap janm mouri a ak tout bèl bagay li yo, yo pito sèvi pòtre moun ki gen pou mouri, pòtre zwazo, pòtre bèt kat pa t' ak bèt ki trennen sou vant.

24
 Lèzòm vin sitèlman fou, Bondye kite yo tonbe nan fè tout kalite bagay ki pa dakò ak volonte li dapre vye lanvi ki nan kè yo.

25
 Se yon wont pou wè sa yo fè ak pwòp kò yo. Yo mete manti nan plas verite Bondye a. Yo pito adore kreyati Bondye, yo pito sèvi yo pase pou yo adore Bondye ki kreye yo a, li menm ki merite pou n' fè lwanj li tout tan. Amèn.

26
 Se poutèt sa, Bondye kite yo fè sa yo pito. Men, se sa k'ap avili yo tou: fanm pa vle sèvi ak kò yo jan yo dwe; yo pito fè sa ki pa bon.

27
 Se konsa tou, gason derefize sèvi ak fanm jan sa te dwe fèt. Yo pran dife yonn pou lòt: gason fè malpwòpte ak gason parèy yo. Yo pèdi tèt yo nèt. Men tou, yo resevwa nan kò yo penisyon yo merite a.

28
 Yo refize bay Bondye premye plas nan kè yo. Bondye tou kite yo tonbe anba pouvwa lespri yo ki fin deraye pou yo fè bagay yo pa t' dwe fè.

29
 Men sèl lide ki nan tèt yo: se fè tout kalite lenjistis, tout kalite mechanste, se anvi sò moun, se fè rayisab. Se sa sèlman ki nan

kè yo: fè jalouzi, touye moun, chache moun kont, fè riz, fè koken. Yo tripòt konsa. ³⁰ Yonn pale lòt mal. Yo pa vle wè Bondye, yo ensolan, yo awogan, yo grandizè. Yo toujou ap chache lòt jan pou fè sa ki mal, yo fwonte ak paran yo. ³¹ Yo san konsyans, yo pa kenbe pawòl yo. Kè yo di konsa, yo san pitye pou lòt moun. ³² Yo konn jijman Bondye a byen pwòp: yo konnen moun ki fè bagay sa yo merite lanmò. Atousa, y'ap plede fè yo toujou. Sa ki pi rèd, yo dakò ak moun k'ap fè yo tou.

Chapter 2

¹ ¶ Monchè, nenpòt sa ou ye, ou menm k'ap jije lòt moun yo, ou pa gen eskiz. Ou menm k'ap fè menm bagay ak lòt yo, se pwòp tèt pa ou w'ap kondannen lè w'ap jije yo. ² Nou konnen Bondye ap jije moun k'ap fè bagay sa yo, epi l'ap jije yo yon jan k'ap dakò ak verite a. ³ Monchè, ou menm k'ap jije moun k'ap fè bagay sa yo epi k'ap aji menm jan an tou, èske ou kwè wa chape anba jijman Bondye a? ⁴ Osinon, èske se meprize w'ap meprize Bondye ki gen bon kè anpil, ki gen pasyans anpil, ki sipòte nou anpil? Se konnen ou pa konnen se pou l' ka rele ou vin chanje lavi ou kifè Bondye gen bon kè konsa? ⁵ Men, w'ap fè tèt di. Ou pa soti pou chanje lavi ou. Se poutèt sa, w'ap pare yon pi gwo chatiman mete la tann ou pou jou Bondye va fè wè kòlè li ansanm ak jijman li k'ap fèt san patipri. ⁶ Lè sa a, Bondye va bay chak moun sa yo merite dapre sa yo fè. ⁷ Moun ki pa janm sispann fè byen, k'ap chache lwanj ak respè, k'ap chache mwayen pou yo pa janm mouri, moun sa yo va resevwa lavi ki p'ap janm fini an. ⁸ Men, moun k'ap kenbe tèt ak Bondye, k'ap refize asepte verite a pou fè sa ki pa bon, moun sa yo, yo fè Bondye fache. Kòlè l' va tonbe sou yo. ⁹ Anpil soufrans ak anpil lapenn pou tout moun ki lage kò yo nan fè sa ki mal, pou jwif yo an premye, apre yo pou moun lòt nasyon yo. ¹⁰ Men, Bondye va bay tout moun k'ap fè sa ki byen lwanj, respè ak kè poze, jwif yo an premye, apre yo moun lòt nasyon yo. ¹¹ Paske, Bondye pa gade sou figi moun. ¹² Tout moun ki pa t' konn lalwa Moyiz la epi ki fè sa ki mal, y'ap peri san lalwa pa reskonsab. ¹³ Men, tout moun ki konnen lalwa a epi ki fè sa ki mal, y'ap pase anba jijman dapre lalwa a. Moun ki mache dwat devan Bondye, se pa moun k'ap tande lalwa a nan zòrèy yo sèlman, men se moun ki fè sa lalwa a mande. ¹⁴ Moun lòt nasyon yo ki pa gen lalwa Moyiz la, yo fè sa lalwa a mande san yo pa konnen. Yo menm ki pa gen lalwa Moyiz la, yo tounen yon lwa pou pwòp tèt pa yo menm

15
 si yo pa t' konn lalwa a. Konsa, yo moutre ki jan sa lalwa Moyiz mande a ekri nan kè yo. Konsyans yo moutre sa tou paske yon lè konsyans yo repwoche yo sa yo fè, yon lòt lè konsyans yo dakò ak sa yo fè.

16
 Dapre bon nouvèl m'ap anonse a, se sa menm ki gen pou rive lè Bondye va voye Jezikri pou jije tou sa lèzòm t'ap fè an kachèt.

17
 ¶ Ou menm yo rele jwif la, ou apiye kò ou sou lalwa a.

18
 W'ap vante tèt ou dèske ou konn Bondye. Ou konnen sa Bondye vle ou fè; lalwa a moutre ou ki jan pou ou chwazi sa ki byen.

19
 Ou mete nan tèt ou ou ka moutre moun ki pa wè yo chemen pou yo pran. Ou konprann se yon limyè ou ye pou moun ki nan fènwa, yon pwofesè lekòl pou timoun; ou kwè ou ka moutre moun ki pa konnen anyen yo anpil bagay. Ou mete tou sa nan tèt ou paske ou sèten ou jwenn tout konesans ak tout verite nan lalwa a.

20
 Enben, ou menm k'ap bay lòt yo leson, poukisa ou pa bay tèt ou leson tou?

21
 W'ap mande moun pou yo pa vòlò, epi w'ap vòlò: w'ap dèfann moun fè adiltè epi ou menm, w'ap fè adiltè! Ou di ou rayi zidòl, epi w'ap piye tanp zidòl yo!

22
 Wi, ou menm k'ap vante tèt ou deske ou gen lalwa Bondye a ou se yon wont pou Bondye, pou jan w'ap dezobeyi lalwa a!

23
 Se sa menm ki te ekri: Se nou menm jwif yo ki lakòz moun lòt nasyon yo ap plede pale Bondye mal konsa.

24
 Si ou fè sa lalwa a mande ou fè, sikonsizyon an gen valè pou ou. Men, si w'ap dezobeyi lalwa a, se tankou si ou pa t' janm sikonsi.

25
 Lè yon moun lòt nasyon ki pa sikonsi fè sa lalwa a mande, èske Bondye p'ap gade li tankou yon moun ki sikonsi?

26
 Moun lòt nasyon yo ki pa sikonsi men k'ap obeyi lalwa a, yo gen pou yo jije ou, ou menm jwif k'ap dezobeyi lalwa a atout ou gen liv lalwa a nan men ou, atout ou sikonsi a.

27
 Se pa moun ki gen aparans jwif ki jwif tout bon. Se pa sikonsizyon ki kite mak nan kò moun ki sikonsizyon tout bon an.

28
 Jwif ki jwif tout bon, se moun ki jwif nan kè yo. Sikonsizyon tout bon an, se sikonsizyon ki make kè moun. Sa se travay Lespri Bondye a, se pa travay lalwa ki ekri nan liv. Lwanj yon jwif konsa pa soti nan men moun, men nan men Bondye.

Chapter 3

1
 ¶ Nan kondisyon sa a, lè yon moun jwif, ki avantaj ki gen nan sa? Kisa sikonsizyon an fè pou li?

2
 Tout jan, li gen anpil avantaj. Pou kòmmanse, se jwif yo Bondye te mete responsab pawòl li yo.

3
 Bon, tandè non. Si gen ladan yo ki pa kenbe pawòl yo, èske poutèt sa Bondye p'ap kenbe pawòl

⁴ li tou? O non, lektrè. Menm si tout moun ap bay manti, Bondye gen pou fè sa ki pou fèt la rive vre. Se sa menm ki ekri nan Liv la: Se pou yo rekonèt se ou menm ki gen rezon lè w'ap pale. Se

⁵ ou menm ki pou gen pwose a lè y'ap jije ou. Men, si lè nou fè sa ki mal, sa fè moun wè pi klè se Bondye ki gen rezon, kisa n'a di lè sa a? Eske poutèt sa lè Bondye peni nou li gen tò? (Eskize m'

⁶ wi, m'ap pale tankou moun.) Men non! Si lè sa a Bondye pa gen rezon, ki jan Bondye va fè pou

⁷ jije moun? Bon, si lè m' bay manti, sa fè verite Bondye a parèt pi klè, si sa sèvi yon lwanj pou

⁸ Bondye, poukisa pou l' ta jije m' tankou yon moun ki fè sa ki mal? Poukisa nou pa di pito: Ann fè sa ki mal pou Bondye ka fè plis byen toujou! Gen kèk malpalan ki pretann se sa mwen di. Enben,

⁹ Bondye ap kondannen moun sa yo, epi la gen rezon. Men, sa sa ye menm? Nou menm jwif, èske nou pi bon pase moun lòt nasyon yo? Non, se pa vre menm. Mwen deja moutre nou sa: tout moun,

¹⁰ ou te mèt jwif, ou te mèt pa jwif, tout moun anba pouvwa peche a. Jan sa ekri nan Liv la: Nanpwen

¹¹ moun ki gen rezon devan Bondye. Non, pa menm yon grenn. Yo yonn pa gen konprann. Yo

¹² yonn p'ap chache Bondye. Yo tout lage kò yo nan bwa, yo tout pèdi chemen yo. Nanpwen yonn

¹³ ladan yo k'ap fè sa ki byen. Non, pa menm yon sèl. Bouch yo ou ta di yon kavo ki louvri. Se

¹⁴ twonpe y'ap twonpe moun ase ak lang yo. Pawòl nan bouch yo se pwazon, ou ta di venen sèpan

¹⁵ aspik. Bouch yo plen madichon ak jouman. Ti krik ti krak, se fè san koule. ¹⁶ Kote yo pase

¹⁷ se dega, se malè yo kite dèyè. Yo pa konn ki jan pou yo viv byen ak moun. ¹⁸ Yo mete nan tèt

¹⁹ yo pa gen rezon pou gen krentif Bondye. ¶ Nou konnen egzijans lalwa se pou moun ki anba

²⁰ lalwa. Konsa, pa gen eskiz ki pou soti nan bouch pesonn: tout moun antò devan Bondye. Se pa

²¹ paske yon moun fè sa lalwa a mande kifè li inonsan devan Bondye. Poukisa? Paske lalwa annik fè

²² nou konnen sa nou fè a pa bon. Men koulye a, Bondye fè nou wè ki jan li fè moun gras. Lalwa

²³ pa gen anyen pou wè nan sa. Se sa liv lalwa a ansanm ak liv pwofèt yo di nou tou. Se lè moun

²⁴ mete konfyans yo nan Jezikri Bondye fè yo gras. Li fè l' pou tout moun ki kwè nan Kris la, paske

²⁵ yo tout se menm. Tout moun fè peche; yo tout vire do bay Bondye ki gen pouvwa a. Men

²⁶ Bondye ki renmen yo, li fè yo gras. Li fè sa pou yo gratis, gremesi Jezikri ki vin delivre yo. Se

²⁶ li menm, Jezikri, Bondye te ofri tankou bèt pou touye. Li bay san li pou tout moun ki mete konfyans

²⁶ yo nan li ka resevwa padon pou peche yo. Bondye te vle moutre nou ki jan li fè moun gras. Nan

²⁶ tan lontan, Bondye te pran pasyans, li te fèmen je l' sou peche moun te fè. Men koulye a, li

²⁶ moutre nou ki jan l'ap fè moun gras, paske li fè nou wè se li menm ki gen rezon, an menm tan l'ap

fè tout moun ki kwè nan Jezi yo gras.²⁷ Bon. Nan kondisyon sa a, ki rezon moun genyen pou y'ap fè grandizè ankò? Pa genyen menm. Poukisa? Eske se paske yo fè sa lalwa mande? Non. Men, paske yo fè Bondye konfyans.²⁸ Nou kenbe sa nou di a: se paske yon moun gen konfyans nan Bondye kifè Bondye fè l' gras, se pa paske li fè sa lalwa mande.²⁹ Eske Bondye se Bondye jwif yo sèlman? Eske li pa Bondye moun lòt nasyon yo tou? Men wi, li se Bondye moun lòt nasyon yo tou.³⁰ Paske se yon sèl Bondye a ki genyen. L'ap fè moun ki sikonsi yo gras paske yo gen konfyans nan li. Konsa tou, l'ap fè moun ki pa sikonsi yo gras paske yo menm tou yo gen konfyans nan li.³¹ Bon. Jan nou pale a, èske konfyans nan Bondye fè lalwa a pèdi valè li? Men non, okontrè, nou kanpe lalwa a pi rèd.

Chapter 4

¹ ¶ Kisa n'a di konsènan Abraram, granpapa nou? Kisa l' te jwenn?² Si se sa Abraram te fè a ki te fè Bondye fè l' gras, li ta mèt fè grandizè. Men, li pa ka fè sa devan Bondye.³ Men sa ki ekri nan Liv la: Abraram te mete konfyans li nan Bondye, se poutèt sa Bondye fè l' gras.⁴ Moun ki fè yon travay resevwa lajan pou sa l' fè a. Lajan yo ba li a, se pa yon favè, ni se pa kado yo fè li. Se yon bagay yo dwe li.⁵ Okontrè, moun ki pa fè okenn travay pou yo dwe li kichòy, men ki mete konfyans li nan Bondye sèlman, Bondye k'ap fè tout moun ki meprize l' yo gras, ap fè moun sa yo gras tou paske yo mete konfyans yo nan li.⁶ Se sa David te vle di, lè l' deklare: yon moun Bondye fè gras san Bondye pa gade sou sa l' fè, se moun konsa ki beni:⁷ Ala bon sa bon pou moun lè Bondye padonnen peche yo, lè Bondye pa gade sou fòt yo fè!⁸ Ala bon sa bon pou yon moun lè Bondye pa mande l' kont pou sa li fè ki mal!⁹ ¶ Eske benediksyon sa a se pou moun ki sikonsi yo ase? Eske se pa pou moun ki pa sikonsi yo tou? Nou fèk sot di se paske Abraram te mete konfyans li nan Bondye kifè Bondye te fè l' gras.¹⁰ Kilè sa te rive? Eske se te anvan Abraram te sikonsi an, osinon nan apre? Non. Se pa t' nan apre. Se te anvan li te sikonsi.¹¹ Se lontan apre sa Abraram te resevwa sikonsizyon an tankou yon letanp. Se te mak ki te pou moutre Bondye te fè l' gras, paske li te kwè anvan menm li te sikonsi. Se poutèt sa Abraram se papa tout moun ki mete konfyans yo nan Bondye, menm si yo pa sikonsi. Moun sa yo, Bondye ap fè yo gras.¹² Abraram se papa moun ki sikonsi yo tou. Pa paske yo sikonsi ase, men paske yo menm tou yo swiv egzanp konfyans

13
 Abraram, papa nou, te gen nan Bondye anvan menm li te sikonsi. Bondye te pwomèt Abraram ak pitit pitit li yo pou l' te ba yo tout latè pou eritaj. Bondye pa t' fè pwomès sa a paske Abraram te fè sa lalwa mande, men paske Abraram te gen konfyans nan li. Se sak fè Bondye te fè l' gras. 14
 Si sa Bondye te pwomèt la se te pou moun ki fè sa lalwa a mande, moun pa ta bezwen gen konfyans nan Bondye ankò; pwomès li a pèdi tout valè li. 15
 Poukisa? Paske lalwa rale kòlè Bondye sou moun. Men, kote ki pa gen lalwa, moun pa ka dezobeyi lalwa. 16
 Konsa, Bondye fè pwomès la pou moun ki gen konfyans nan li. Se sak fè, pwomès la se yon favè Bondye pou tout pitit pitit Abraram yo, pa sèlman pou moun ki fè sa lalwa Moyiz la mande, men pou tout moun ki gen konfyans nan Bondye menm jan Abraram te gen konfyans nan li a. Abraram se papa nou tout, ¶ 17
 jan sa ekri nan Liv la: Mwen fè ou tounen zansèt moun anpil nasyon. Wi, Abraram se papa nou tout devan Bondye, li te mete konfyans li nan Bondye ki fè moun mouri yo leve vivan ankò, nan Bondye ki kreye tout bagay ki pa t' la. 18
 Abraram te gen konfyans nan Bondye, li t'ap tann pwomès la, malgre lè sa a li pa t' gen okenn rezon pou l' te tann ankò. Se sak fè li tounen zansèt moun anpil nasyon dapre sa Bondye te di l': Pitit pitit ou yo va anpil. 19
 Lè sa a, Abraram te prèt pou gen santan sou tèt li. Men, konfyans li pa t' febli lè l' te gade kò l' ki te fin ale, epi pou l' te wè Sara, madanm li, ki pa t' ka fè pitit ankò. 20
 Non, li pa t' pèdi konfyans nan Bondye, li pa t' janm mete nan tèt li pwomès Bondye a te ka pa rive. Okontrè, li te vin gen plis konfyans toujou; epi li t'ap chante lwanj Bondye. 21
 Li te gen fèm konviksyon Bondye te gen pouvwa pou l' te fè sa l' te pwomèt la. 22
 Se konsa, poutèt konfyans Abraram te gen nan Bondye a, Bondye fè l' gras. ¶ 23
 Men, se pa pou Abraram sèlman yo te ekri pawòl sa yo: Li fè li gras. 24
 Pawòl sa yo te ekri pou nou tou. L'ap fè nou gras tou, nou menm ki mete konfyans nou nan moun li fè soti vivan pami mò yo, Jezikri, Seyè nou an. 25
 Se Jezi sa a ki te mouri pou peche nou yo epi ki leve soti vivan ankò pou fè Bondye fè nou gras.

Chapter 5

1
 ¶ Koulye a, paske nou gen konfyans nan Bondye, Bondye fè nou gras, n'ap viv san kè sote ak Bondye, gremesi Jezikri, Seyè nou an. 2
 Paske nou gen konfyans nan li, Jezi fè nou antre nan favè Bondye. Epi n'ap kenbe fèm kote nou kanpe a. Nou pa manke kontan paske nou gen espwa resevwa pa nou nan pouvwa Bondye a ansanm avèk li. 3
 Nou pa manke kontan menm lè n'ap souffri.

⁴ Poukisa? Paske nou konnen lè n'ap soufri sa fè nou gen pasyans. Lè nou gen pasyans konsa, sa
 ban nou kouraj pou nou soufri. Plis nou gen kouraj, se plis nou gen espwa. ⁵ Espwa sa a p'ap janm
 twonpe nou, paske Bondye te fè nou wè jan l' renmen nou lè li ban nou Sentespri li. ¶ ⁶ Se konsa,
 lè nou pa t' kapab fè anyen pou tèt pa nou, Kris la mouri pou tout moun ki meprize Bondye, nan
 tan Bondye te fikse pou sa te rive a. ⁷ Se pa fasil pou ou jwenn yon moun asepte mouri pou yon
 nonm ki gen rezon. Ou ta ka jwenn yonn konsa ki ta gen kouraj mouri pou yon nonm debyen. ⁸ Sou
 pwèn sa a, Bondye moutre nou jan li renmen nou anpil; paske nou t'ap fè peche toujou lè Kris la
 mouri pou nou. ⁹ Se paske li bay san li pou nou kifè koulye a Bondye fè nou gras. Nou pa bezwen
 mande si Kris la p'ap delivre nou tou anba kòlè Bondye. ¹⁰ Nou te lènmi ak Bondye lè Pitit Bondye
 a mouri pou l' te fè nou byen ak Bondye ankò. Koulye a nou se zanmi Bondye, nou pa bezwen
 mande si lavi Pitit Bondye a p'ap delivre nou. ¹¹ Epi se pa sa sèlman. Nou jwenn tout plezi nou
 nan Bondye, gremesi Jezikri, Seyè nou an, ki fè nou byen ak Bondye ankò depi koulye a. ¹² Se
 poutèt yon sèl moun peche antre sou latè. Peche a louvri pòt pou lanmò. Se konsa lanmò vin pou
 tout moun, paske tout moun fè peche. ¹³ Peche te deja sou latè lontan anvan Lalwa Moyiz la. Men,
 paske pa t' gen lalwa, Bondye te fèmen je l' sou peche. ¹⁴ Men, soti nan tan Adan rive nan tan
 Moyiz, lanmò te donminen sou tout moun, malgre yo pa t' fè peche tankou Adan ki te dezobeyi
 Bondye. Adan, se te pòtre moun ki te gen pou vini an. ¹⁵ Men, peche Adan an pa menm bagay ak
 kado Bondye bay pou gremesi a. Se fòt yon sèl moun ki lakòz yon bann lòt moun mouri. Men, favè
 Bondye a gen plis pouvwa toujou. Gremesi yon sèl moun, Jezikri, Bondye bay anpil moun yon
 kado ki pi gwo toujou. ¹⁶ Gen yon lòt diferans ankò ant kado Bondye a ak konsekans peche Adan
 an. Apre yon sèl moun te fin peche, lè yo jije moun, yo tout tonbe anba kondannasyon. Men, apre
 tout kantite peche moun fè, Bondye fè yo yon favè, li fè yo gras. ¹⁷ Se vre wi. Poutèt peche yon
 sèl moun, lanmò te donminen akòz li menm sèlman. Men, gremesi yon sèl moun tou, Jezikri, nou
 jwenn plis toujou: tout moun ki resevwa favè Bondye a an kantite, tout moun ki resevwa kado
 Bondye a lè li fè yo gras, yo gen pou yo viv, pou yo donminen akòz Kris la. ¹⁸ Se sak fè menm
 jan fòt yon sèl moun lakòz tout moun kondannen, konsa tou gremesi yon sèl moun ki mache dwat
 devan Bondye, tout moun delivre anba jijman kondannasyon, yo jwenn lavi. ¹⁹ Si dezobeyisans
 yon sèl moun lakòz yon foul moun fè peche, konsa tou obeyisans yon sèl moun lakòz Bondye va
 fè anpil moun gras. ²⁰ Lalwa antre nan koze a pou fè moun peche plis toujou. Men, kote moun fè
 plis peche a, se la favè Bondye a vide pi rès sou yo. ²¹ Se sak fè, menm jan peche a te bay lanmò

lè l' te donminen sou nou, konsa tou lè se favè Bondye a ki donminen sou nou, li fè moun gras, li ba yo lavi ki pa janm fini an, gremesi Jezikri, Seyè nou an.

Chapter 6

¹ ¶ Nan kondisyon sa a, kisa n'a di? Eske nou mèt kontinye ap viv toujou nan peche pou favè Bondye a ka vin pi plis toujou? ² Non. Sa pa ka fèt. Poukisa? Paske annegad peche nou mouri. Ki jan pou n' ta ka kontinye ap viv toujou nan peche? ³ Eske nou pa konn sa: nou tout ki resevwa batèm pou n' te fè yonn ak Jezikri, avèk batèm sa a nou te fè yonn avè l' nan lanmò li. ⁴ Se sak fè, avèk batèm nou an nou te antere ansanm avè l', nou te mouri ansanm avè l' tou. Men, menm jan Papa a te fè l' leve soti nan lanmò avèk gwo fòs pouvwa li, konsa tou nou menm nou ka mennen yon lòt lavi. ⁵ Menm jan nou fè yonn ak li paske nou te mouri yon jan tankou li menm li te mouri a, konsa tou n'a fè yonn avè li, paske n'a leve soti vivan nan lanmò tankou l' tou. ⁶ Nou konn sa byen: vye moun nou te ye anvan an, sa mouri avèk Kris la sou kwa a. Konsa, sa nou gen nan kò nou ki te konn fè nou fè peche a fini. Nou pa esklav peche ankò. ⁷ Lè yon moun mouri, li delivre anba pouvwa peche a. ⁸ Si nou mouri ansanm ak Kris la, nou kwè nava viv tou ansanm avè li. ⁹ Nou konnen Kris la te leve soti vivan nan lanmò, li pa gen pou l' mouri ankò; lanmò pa gen okenn pouvwa sou li. ¹⁰ Lè l' te mouri, se pou peche li te mouri. Li mouri yon sèl fwa, li p'ap janm mouri ankò. Koulye a l'ap viv, se pou Bondye l'ap viv. ¹¹ Konsa tou, nou menm, konsidere tèt nou tankou moun ki deja mouri annegad peche epi k'ap viv pou Bondye ansanm avèk Jezikri. ¹² Pa kite peche donminen sou kò nou ki gen pou mouri a, pou l' fè nou fè tou sa kò a anvè fè. ¹³ Pa lage okenn pati nan kò nou nan peche, pou peche a pa sèvi avè l' pou fè sa ki mal. Okontrè, tankou moun ki delivre anba lanmò epi k'ap viv, ann lage kò nou nan men Bondye. Wi, mete tout pati nan kò nou nan men Bondye pou l' ka sèvi ak yo pou fè sa ki byen. ¹⁴ Peche pa dwe donminen sou nou, paske nou pa anba pouvwa lalwa Moyiz la ankò, se anba favè Bondye a nou ye. ¹⁵ Kisa sa vle di menm? Paske nou pa anba lalwa Moyiz la ankò men anba favè Bondye a, èske nou ta mèt fè peche pou sa? Men ¹⁶ non. Nou konn sa byen: Si nou lage tèt nou nan men yon moun pou nou sèvi l' esklav pou n' obeyi l', nou tounen esklav moun n'ap obeyi a. Si nou lage kò nou nan peche, nou tounen esklav peche k'ap fè nou jwenn ak lanmò. Men, si nou lage kò nou nan obeyi Bondye, n'a esklav obeyisans

17
 k'ap fè nou mache dwat devan Bondye. Men, ann di mèsì Bondye! Paske yon lè nou menm nou te esklav peche; men koulye a, egzanzp nou jwenn nan sa yo te moutre nou an, n'ap swiv li ak tout kè nou.
 18
 Nou delivre anba peche. Koulye a se esklav sa ki byen nou ye. 19
 M'ap pale ak nou tankou lèzòm ta pale paske nou fèb nan kò nou. Te gen yon lè nou te lage tout kò nou nan fè move bagay ak mechanste, tankou moun ki esklav yo pou n' te fè sa ki mal. Konsa tou koulye a, ann lage tout kò nou nan fè sa ki byen, tankou moun ki esklav Bondye pou n' ka viv apa pou li.
 20
 Lè n' te esklav peche a, nou pa t' gen okenn obligasyon pou n' te fè sa ki byen. 21
 Lè sa a, kisa n' te fè? Nou t'ap fè bagay ki fè nou wont jòdi a. Bagay sa yo fè nou jwenn ak lanmò. 22
 Men, koulye a nou delivre anba peche a, nou se esklav Bondye, se sak fè n'ap viv apa pou Bondye; epi bout pou bout n'a resevwa lavi ki p'ap janm fini an. 23
 Peche peye nou kach: li ban nou lanmò; men kadò Bondye ban nou gratis la, se lavi ansanm ak Jezikri, Seyè nou an, yon lavi ki p'ap janm fini.

Chapter 7

1
 ¶ Frè m' yo, mwen sèten nou konnen sa m' pral di nou la a deja, paske nou konn lalwa a: Se toutotan yon moun ap viv lalwa gen pouvwa sou li. 2
 M'ap pran yon egzanzp: yon madan marye gen angajman avèk mari l' devan lalwa toutotan mari a vivan. Men, si mari a mouri, madanm lan lib devan lalwa annegad mari a. 3
 Si pandan mari a vivan toujou, madanm lan vin fanm yon lòt gason, y'ap rele madanm lan adiltè. Men, si mari a mouri, li lib devan lalwa. Lè sa a, si l' vin fanm yon lòt gason, li pa yon adiltè. 4
 Se menm jan an tou pou nou menm, frè m' yo. Nou mouri ansanm ak kò Kris la annegad lalwa. Konsa, nou lib pase nan men yon lòt mèt. Koulye a, se nan men moun ki te leve soti vivan nan lanmò a nou ye pou nou ka viv yon jan ki itil pou Bondye. 5
 Lè n' t'ap viv anba pouvwa lachè, tout vye dezi lalwa te fè leve nan kè nou yo t'ap travay nan tout kò nou, yo te fè nou fè bagay ki t'ap mennen nou nan lanmò. 6
 Koulye a, nou pa gen angajman ak lalwa ankò. Nou mouri annegad lalwa ki te kenbe nou prizonye a. Se sak fè nou ka sèvi Bondye yon lòt jan, anba otorite Sentespri a. Nou p'ap sèvi l' ankò jan n' te konn sèvi l' nan tan lontan an, anba otorite lalwa ki ekri nan Liv la. 7
 ¶ Nan kondisyon sa a, kisa n'a di? Eske lalwa se peche? Non, wete sa nan tèt ou. Men, se lalwa a ki fè m' konnen sa peche ye. Se konsa mwen pa ta janm konnen kisa ki rele gen lanvi, si lalwa pa t' di m': Piga ou janm pote lanvi sou sak pa pou nou. 8
 Peche a pwofite okazyon kòmandman an pou l' fè m' gen tout kalite lanvi nan kè mwen. San lalwa a, peche mouri. 9
 Pou mwen menm, nan tan lontan, lè m' te san lalwa, mwen te vivan. Men, lè kòmandman an vin

rive, peche a vin vivan ankò.¹⁰ Epi mwen menm, mwen mouri. Se konsa kòmandman ki te pou
 ban m' lavi a, se li menm ki ban m' lanmò.¹¹ Peche a pwofite okazyon an, li twonpe m' ak
 kòmandman an. Se konsa, li fè mwen mouri ak tout kòmandman an.¹² Men, lalwa a se yon bagay
 ki soti nan Bondye. Kòmandman an tou, se Bondye ki bay li, se konsa li dwat epi li bon.¹³ Eske
 nou ka di sa ki bon an tounen yon kòz lanmò pou nou? Non, monchè! Men, se peche ki lakòz sa.
 Peche fè nou wè sa li menm li ye vre: li sèvi ak sa ki bon an pou l' fè mwen mouri. Se konsa, avèk
 kòmandman an, peche a kanpe pi rèd toujou.¹⁴ ¶ Nou konnen lalwa li menm, se yon bagay ki soti
 nan Lespri Bondye. Men, mwen menm, mwen se yon kò ki tou fèb, peche fin anpare m', li fè m'
 tounen esklav li.¹⁵ Lè m' fè yon bagay, mwen pa konprann sa m' fè a. Paske, sa m' ta vle fè a, se
 pa sa m' fè. Epi sa m' pa vle fè a, se li mwen fè.¹⁶ Si sa m' pa t' vle fè a se li mwen fè, sa vle di
 mwen dakò lalwa a bon.¹⁷ Nan kondisyon sa a, se pa mwen ki fè sa ki fèt la, men se peche ki nan
 mwen an ki fè li.¹⁸ Sa se bagay mwen konnen: Nanpwen anyen ki bon nan mwen, nan tout kò
 mwen. Mwen di sa, paske menm lè mwen vle fè sa ki byen, mwen pa santi m' kapab fè li.¹⁹ Mwen
 pa fè byen mwen vle fè a, men mwen fè mal mwen pa vle fè a.²⁰ Epi, si m' fè mal mwen pa vle
 fè a, se pa mwen ki fè l', men se peche ki nan mwen an ki fè li.²¹ Pou mwen menm, mwen jwenn
 lwa sa a nan mwen: lè m' vle fè sa ki byen, se sa ki mal ase mwen santi m' ka fè.²² Nan fon kè m',
 mwen jwenn tout plezi m' nan lalwa Bondye a.²³ Men, nan tout kò m', mwen santi yon lòt lwa
 k'ap goumen ak lalwa mwen renmen an. Lwa sa a kenbe m' prizonye anba otorite peche a ki nan
 tout kò mwen.²⁴ Ala malere mwen malere, mezanmi! Kilès ki va delivre m' anba kò sa a k'ap
 trennen m' nan lanmò?²⁵ Gremesi Jezikri, Seyè nou an, mwen ka di: Mèsi Bondye! Konsa, men
 ki jan mwen ye: dapre konesans pa mwen, mwen se esklav lalwa Bondye a. Men, dapre sa m' santi
 nan tout kò mwen, mwen se esklav lalwa peche a.

Chapter 8

¹ ¶ Koulye a, nanpwen okenn kondannasyon pou moun ki fè yon sèl kò ak Jezikri.² Lalwa
 Sentespri a ap fè nou viv ansanm ak Jezikri, li delivre nou anba lalwa peche a ansanm ak anba
 lanmò.³ Bagay lalwa Moyiz la pa t' kapab fè, paske kò lèzòm te rann li san fòs, se Bondye menm

ki fè l': Bondye kondannen peche ki nan kò lèzòm lan, lè l' voye pwòp Pitit pa l' nan yon kò ki
 menm kò ak kò peche a, pou l' te ka fini nèt ak peche a. ⁴ Bondye te fè sa pou nou pa t' viv dapre
 sa moun jwenn nan kò yo, men dapre Lespri Bondye a, pou n' te ka satisfè tout egzijans lalwa a.
⁵ Moun k'ap viv dapre sa lèzòm jwenn nan kò yo, se yon sèl bagay ki nan tèt yo: se egzijans kò a.
 Men, moun k'ap viv dapre Lespri Bondye a, se yon sèl bagay ki man tèt yo: se egzijans Lespri a.
⁶ Lè ou kite egzijans kò a pran tèt ou, se mouri w'ap mouri. Men, lè ou kite egzijans Lespri a pran
 tèt ou, se viv w'ap viv ak kè poze. ⁷ Poukisa? Paske, lè egzijans kò a fin pran tèt yon moun, li pa
 vle wè Bondye ankò, li p'ap soumèt devan lalwa Bondye a, li p'ap ka soumèt menm. ⁸ Moun ki
 soumèt devan egzijans kò yo pa kapab fè Bondye plezi. ⁹ Pou nou menm, nou p'ap viv dapre
 egzijans kò nou ankò, men dapre egzijans Lespri Bondye a, paske Lespri Bondye a nan nou. Si yon
 moun pa gen Lespri Kris la nan li, li pa pou Kris la. ¹⁰ ¶ Men, si Kris la ap viv nan ou, kò ou te
 mèt mouri akòz peche a, Lespri Bondye a ap ba ou lavi, paske ou jwenn gras devan Bondye. ¹¹ Si
 Lespri Bondye ki te fè Jezikri leve soti vivan nan lanmò a rete nan nou, li menm ki te fè Jezikri
 leve soti vivan nan lanmò a, li va bay kò nou yo ki la pou mouri a lavi tou, pa pouvwa Lespri li a
 ki rete nan nou. ¹² Se konsa, frè m' yo, nou gen yon dèt. Men, se pa kò a nou dwe. Se poutèt sa,
 nou pa dwe viv dapre egzijans kò a. ¹³ Si n'ap viv dapre egzijans kò a, n'a mouri. Men, si okontrè,
 pa pouvwa Lespri Bondye n'ap swiv la, nou fè egzijans kò a mouri, n'a viv. ¹⁴ Paske, tout moun
 Lespri Bondye a ap dirije, se pitit Bondye yo ye. ¹⁵ Lespri Bondye ban nou an, se pa yon lespri
 k'ap fè nou esklav pou n'ap tranble devan Bondye toujou. Okontrè, Lespri Bondye a fè nou tounen
 pitit Bondye. Se li menm ki penmèt nou rele Bondye Papa. ¹⁶ Lespri Bondye a bay lespri pa nou
 an lasirans se pitit Bondye nou ye. ¹⁷ ¶ Si se pitit Bondye nou ye, nou gen pòsyon pa nou nan eritaj
 Bondye te pwomèt moun pa l' yo, n'a resevwa pa nou ansanm ak Kris la nan tou sa Bondye te sere
 pou li. Paske, si nou soufri ansanm ak li, n'a resevwa lwanj nan men Bondye ansanm ak li tou.
¹⁸ Pou mwen, nou pa ka konpare sa n'ap soufri koulye a ak bèl bagay Bondye pral fè nou wè yo.
¹⁹ Tout kreyasyon Bondye a ap tann konsa kilè pitit Bondye yo va parèt. ²⁰ Paske, tout kreyasyon
 an te tonbe pa fòs anba pouvwa bagay ki pa vo anyen an. Se pa paske li te vle l', men se akòz moun
 ki te vle l' konsa a. Men, li te toujou gen espwa, ²¹ yon lè la delivre anba esklavaj pouvwa k'ap
 gate l' la, pou l' ka jwi bèl libète pitit Bondye yo. ²² Wi, nou konn sa: jouk jòdi a, tout kreyasyon
 an ap plenn, l'ap soufri tankou yon fanm ki gen doulè tranche. ²³ Epi se pa li menm sèlman. Nou
 menm tou ki resevwa Sentespri Bondye a tankou premye kado Bondye fè nou, n'ap pouse gwo

soupi nan kè nou pandan n'ap tann Bondye fin fè nou tounen pitit li nèt, fin delivre kò nou yo.

24

Paske, Bondye delivre nou, men nou menm n'ap tann toujou. Si nou wè sa n'ap tann lan, nou pa nan tann ankò. Ki moun k'ap rete tann sa li wè deja? 25 Men, si n'ap tann sa nou pa wè, n'ap tann

li avèk pasyans. 26 ¶ Se konsa tou, Lespri Bondye a vin ede nou, atout nou fèb la, paske nou pa konnen kisa pou n' mande lè n'ap lapriyè, ni ki jan pou nou lapriyè. Men, se Lespri Bondye a menm

k'ap lapriyè Bondye pou nou. L'ap pouse gwo soupi moun pa ka esplike. 27 Bondye menm ki konnen sa ki nan kè tout moun, li konnen kisa Lespri li a vle mande, paske sa Bondye vle a se sa

Lespri li a ap mande pou tout moun k'ap viv pou Bondye. 28 Tansèlman, nou konn sa byen: nan tout bagay, Bondye ap travay pou byen tout moun ki renmen l', pou byen tout moun li te fè lide

rele. 29 ¶ Paske, moun Bondye te konnen depi davans pou moun pa l' yo, depi davans tou li te mete yo apa pou yo te kab sanble ak Pitit li a. Konsa, Pitit sa a pase pou premye pitit nan yon bann frè.

30 Se konsa, Bondye rele tout moun li te mete apa depi davans yo, li fè yo gras epi moun li fè gras

yo, li ba yo lwanj tou. 31 ¶ Kisa n'a di ankò sou pwèn sa a? Si Bondye pou nou, kilès ki ka kont

nou? 32 Li pa t' menm refize nou pwòp Pitit li a, men li bay li pou nou tout. Ki jan pou l' pa ta ban

nou tout bagay avèk Pitit la tou pou gremesi? 33 Ki moun ki va akize moun Bondye chwazi yo?

Pesonn. Paske se Bondye menm ki fè yo gras! 34 Ki moun ki kab kondannen yo? Pesonn. Paske Jezikri te mouri. Sak pi rèd ankò, li leve soti vivan nan lanmò, epi li chita sou bò dwat Bondye,

kote l'ap plede pou nou. 35 Kisa, atò, ki va fè nou pèdi renmen Kris la gen pou nou an? Soufrans ka fè nou sa? Osinon, kè sere? Osinon, pèsekisyon? Osinon, grangou, mizè, gwo danje, lanmò?

Dapre sa ki ekri nan Liv la: 36 Se poutèt ou, tout moun yo soti pou touye nou. Yo gade nou tankou

mouton y'ap mennen labatwa. 37 Men, sou tout bagay sa yo, nou genyen batay la nèt ale, gremesi

moun ki renmen nou an. 38 Paske, mwen gen lasirans anyen pa ka fè nou pèdi renmen Kris la gen pou nou: ni lanmò, ni lavi, ni zanj Bondye yo, ni lòt otorite ak pouvwa ki nan syèl la, ni bagay ki

la jòdi a, ni sa ki gen pou vini pita, 39 ni pouvwa ki anwo nan syèl la, ni pouvwa ki anba tè a. Non. Pa gen anyen nan tout kreyasyon Bondye a ki ka janm fè nou pèdi renmen Bondye fè nou wè nan Jezikri, Seyè nou an.

Chapter 9

¹ ¶ Se vre wi, sa m'ap di nou la a. Mwen se moun Kris la, mwen p'ap bay manti. Epi, konsyans
 mwen ki anba pouvwa Sentespri a ta repwoche m' anpil si m' t'ap bay manti. ² Kè m' sere anpil, se
 pa yon ti lapenn mwen santi k'ap manje m' tout tan. ³ Mwen ta pito wè m' tonbe anba madichon
 Bondye, mwen ta pito pèdi renmen Kris la gen pou mwen an si sa te ka sèvi pou byen frè m' yo,
 moun menm ras avè mwen yo. ⁴ Yo se pitit pitit Izrayèl; Bondye te chwazi yo pou pwòp pitit li.
 Se nan mitan yo Bondye te fè tout bèl mèvèy li yo. Se ak yo li te pase kontra li yo. Li te ba yo lalwa.
 Li te moutre yo jan pou yo sèvi l'; se yo ki te resevwa pwomès li yo. ⁵ Yo se pitit pitit zansèt nou
 yo. Se nan ras yo Kris la soti lè l' te fèt tankou yon nonm. Lwanj pou tout tan pou li menm ki Bondye
 sou tout bagay. Amèn. ⁶ ¶ Lè m' di sa, sa pa vle di Bondye p'ap kenbe pwomès li ankò. Se pa tout
 pitit pitit Izrayèl yo ki fè pati pèp Bondye a. ⁷ Se pa tout pitit pitit Abraram yo ki bon pitit pou li,
 paske Bondye te di Abraram, dapre sa ki ekri nan Liv la: Se Izarak ki va fè pitit pitit mwen te
 pwomèt ou yo. ⁸ Sa vle di: tout pitit ki fèt dapre egzijans natirèl kò a pa pitit Bondye. Se sèlman
 pitit ki fèt dapre pwomès Bondye a ki bon pitit pitit li. ⁹ Men ki jan Bondye te fè pwomès la: Lè
 konsa, lanne k'ap vini an, m'a tounen. Lè sa a Sara va gen tan gen yon pitit gason. ¹⁰ Gen lòt pawòl
 toujou pou di sou pwen sa a: Rebeka te fè de pitit gason pou yon sèl papa, Izarak granpapa nou.
¹¹ -(we vèsè pwochen) ¹² Men, Bondye gen jan pa l' pou l' chwazi moun. Bondye pa chwazi yon
 moun paske moun lan fè anyen pou sa, men paske Bondye vle chwazi li. Enben, pou fè nou wè se
 konsa li toujou fè, Bondye pale ak Rebeka anvan menm timoun yo te fèt, anvan menm yo te fè
 anyen ni an byen ni an mal. Li di l' konsa: Pi gran an gen pou sèvi pi piti a. ¹³ Dapre sa ki te ekri:
 Mwen renmen Jakòb, mwen rayi Ezaou. ¹⁴ ¶ Bon, kisa sa vle di? Bondye gen lè ap fè lenjistis?
 Men non. ¹⁵ Chonje sa Bondye te di Moyiz: M'a gen pitye pou moun mwen vle gen pitye, M'a
 louvri kè m' pou moun mwen vle. ¹⁶ Se sak fè, bagay konsa pa gade lèzòm, ou mèt tande yo vle,
 ou mèt tande yo fè. Se bagay ki gade Bondye sèlman, li menm ki gen kè sansib. ¹⁷ Paske nan Liv
 la, men sa Bondye di farawon an: Se mwen ki fè ou wa tout espri, pou lè moun wè ou, yo ka wè
 pouvwa mwen, pou moun ka mache fè konnen non mwen toupatou sou latè. ¹⁸ Konsa, Bondye
 gen pitye pou moun li vle, li fè moun li vle kenbe tèt ak li. ¹⁹ Koulye a, n'a mande m': Si se konsa,
 kisa Bondye gen pou repwoche moun? Ki moun ki janm kenbe tèt ak Bondye? ²⁰ Monchè, pito
 ou mande: kisa m' ye pou m' ap diskite ak Bondye konsa? Pran yon krich: èske krich la ka pale ak
 moun ki fè l' la pou l' mande l': Poukisa se konsa ou fè m'? ²¹ Moun k'ap bat tè pou fè krich la gen

dwa fè sa l' vle ak tè a. Avèk menm pa t' labou a, li ka fè de kalite krich: yon bèl krich byen chè ak
²² yon krich bon mache. Nou pa gen anyen pou n' di Bondye ankò. Li vle fè nou wè kòlè li, an
menm tan li vle fè nou konnen pouvwa li. Se poutèt sa, avèk anpil pasyans li sipòte tout moun ki
²³ te merite kòlè li epi ki te tou bon pou mouri. Li te vle fè nou wè tou kantite bèl bagay li sere pou
²⁴ moun lè li gen pitye pou yo, pou nou menm li te pare davans pou resevwa bèl bagay li yo. Lè
m' di nou menm lan, m'ap pale sou tout moun li rele, non sèlman nan jwif yo, men nan moun lòt
²⁵ nasyon yo tou. ¶ Se sa menm li di nan liv pwofèt Oze a: Moun ki pa t' pèp mwen an, se yo menm
²⁶ m'a rele pèp mwen. Nasyon mwen pa t' renmen an, se li menm m'a rele cheri mwen. Tout kote
²⁷ yo t'ap di se pa pèp mwen yo ye. se la y'a rele yo pitit Bondye ki vivan an. Kanta pou moun pèp
Izrayèl yo, Ezayi, bò pa l' menm, di konsa: Menm si moun pèp Izrayèl yo ta anpil tankou grenn
²⁸ sab bò lanmè, se yon ti ponyen sèlman nan yo k'ap sove. Paske, Mèt la gen pou l' fè tou sa l' te
²⁹ di a nèt, epi byen vit ankò, sou tout latè. Tankou menm pwofèt Ezayi sa a te di anvan: Si Mèt
ki gen tout pouvwa a pa t' kite kèk pitit pitit pou nou, nou ta pase tankou Sodòm, nou ta menm jan
³⁰ ak Gomò. ¶ Kisa n'a di nan tou sa? Men sa n'a di: Moun ki pa t' jwif yo, ki pa t'ap chache mwayen
³¹ pou Bondye fè yo gras la, se yo menm Bondye fè gras paske yo mete konfyans yo nan li. Men,
moun pèp Izrayèl yo ki t'ap chache yon lalwa ki pou ta fè Bondye fè yo gras, yo pa jwenn sa yo
³² t'ap chache a. Poukisa? Paske yo pa t' mete konfyans yo nan Bondye; yo t'ap chache mwayen
pou Bondye fè yo gras ak zèv yo t'ap fè yo. Se konsa y' al frape pye yo sou wòch k'ap fè moun bite
³³ a, jan sa te ekri a: Men li, mwen mete yon wòch nan mitan peyi Siyon, yon wòch k'ap fè moun
bite wi, yon gwo wòch k'ap fè moun tonbe. Men, moun ki mete konfyans yo nan li p'ap janm soti
wont.

Chapter 10

¹ ¶ Frè m' yo, jan m' ta renmen wè jwif yo sove! Jan mwen pa manke lapriyè Bondye pou yo!
² Paske, m'ap kanpe di sa pou yo: yo devwe anpil pou sèvis Bondye a, men yo manke konprann.
³ Yo pa t' konprann ki jan Bondye t'ap fè lèzòm gras. Yo te pito chache fè sa nan jan pa yo. Se konsa
⁴ yo pa t' asepte jan Bondye te vle fè l' la. Paske, avèk Kris la, lalwa a jwenn bout li. Konsa, Bondye
⁵ fè tout moun ki kwè nan Kris la gras. Koute: men sa Moyiz te ekri pou esplike ki jan Bondye fè

yon moun gras lè l' fè sa lalwa a mande: Moun ki va fè sa lalwa a mande li fè a, va jwenn lavi l' ladan li. ⁶ Men, men sa yo di pou esplike ki jan Bondye fè yon moun gras lè l' kwè: Piga ou di nan kè ou: Kilès ki va moute nan syèl la? (Sa vle di: pou fè Kris la desann soti ladan li.) ⁷ Ou ankò: Kilès ki va desann anba nan gwo twou san fon an? (Sa vle di: pou fè Kris la leve soti vivan pami mò yo.) ⁸ Kisa yo di ankò? Men sa yo di: Pawòl la toupre ou, li nan bouch ou, li nan kè ou. Epi pawòl la se mesaj konfyans nan Bondye, mesaj n'ap anonse a. ⁹ Si ou deklare ak bouch ou devan tout moun Jezi se Seyè a, si ou kwè tout bon nan kè ou Bondye te fè l' leve soti vivan pami mò yo, wa sove. ¹⁰ Paske, lè yon moun gen konfyans tout bon nan kè l', se lè sa a Bondye fè l' gras. Lè yon moun deklare ak bouch li devan tout moun li gen konfyans nan Bondye, se lè sa a Bondye delivre li, ¹¹ dapre sa ki ekri nan Liv la: Nenpòt moun ki mete konfyans yo nan li p'ap janm soti wont. ¹² ¶ Konsa, nanpwen diferans ant moun ki jwif ak moun ki pa jwif: yo tout gen yon sèl Mèt ki bay tout moun ki rele l' favè l' an kantite. ¹³ Se sa ki ekri nan Liv la: Nenpòt moun ki rele non Met la gen pou jwenn delivrans. ¹⁴ Ki jan y'a fè rele l', si yo poko gen konfyans nan li? Ki jan pou yo gen konfyans nan li, si yo pa tande pale sou li? Ki jan pou yo tande pale sou li, ¹⁵ si pa gen pesonn pou fè konnen mesaj la? Ki jan pou yo fè fè konnen mesaj la, si pa gen moun yo voye pou sa? Dapre sa ki te ekri a: Ala bèl bagay lè ou wè moun k'ap pote yon bon nouvèl ap vini! ¹⁶ Men, se pa tout ki asepte bon nouvèl la. Se poutèt sa Ezayi te di: Mèt, kilès ki te kwè mesaj nou te bay la? ¹⁷ Konsa, se lè ou tande mesaj la ou vin gen konfyans. Mesaj la, se pawòl Kris la y'ap anonse. ¹⁸ Men, m'ap mande: Eske Izrayèl pa t' tande mesaj la? Men wi. Yo tande l' byen pwòp. Paske, jan sa te ekri nan Liv la: Pawòl nan bouch yo gaye sou tout latè. Mesaj yo bay la rive nan dènye bout latè. ¹⁹ Men, m'ap mande ankò: Eske Izrayèl pa t' konprann sa? Pou kòmanse, men repons Moyiz bay: M'ap fè nou fè jalouzi pou moun ki pa menm yon nasyon tout bon. M'ap fè nou fè kòlè poutèt yon pèp ki san konprann. ²⁰ Ezayi menm pouse radyès li pi lwen toujou lè l' di: Moun ki pa t'ap chache m' yo, se yo menm ki jwenn mwen. Moun ki pa t'ap mande pou mwen yo, se yo menm mwen fè wè mwen. ²¹ Men, men sa li di sou Izrayèl: Tout lajounen m'ap lonje men m' bay yon pèp ki rebèl, k'ap fè wòklò.

Chapter 11

¹
 ¶ Koulye a, m'ap mande: Eske Bondye te voye pèp li a jete? Men non. Paske mwen menm, mwen se yon moun pèp Izrayèl, yon pitit pitit Abraram. Mwen soti nan branch fanmi Benjamen.

²
 Non, Bondye pa voye pèp li te chwazi davans lan jete. Eske ou pa chonje sa ki ekri nan Liv la,

³
 kote y'ap rakonte ki jan Eli t'ap pote plent bay Bondye pou pèp Izrayèl la: Bondye, yo touye pwofèt yo, yo kraze lotèl ou yo; se mwen menm sèl ki rete. Men y'ap chache wete lavi m' tou?

⁴
 Men repons Bondye te ba li: Mwen gen sèt milòm (7.000) pou mwen ki pa janm mete jenou yo atè devan Baal.

⁵
 Konsa tou, koulye a, gen yon ti rès Bondye te chwazi nan pèp la, se yon favè li te fè yo.

⁶
 Se pa paske yo te fè sa ki byen kifè Bondye te fè yo fave sa a; men se paske Bondye te vle fè l' pou yo. Si se pa t' konsa, favè Bondye a pa ta yon favè tout bon ankò.

⁷
 Bon. Kisa n'a di koulye a? Sa pèp Izrayèl la t'ap chache a, li pa t' jwenn li. Men, moun Bondye te chwazi yo, se yo ase ki jwenn li. Kanta pou lòt yo, yo vin gen tèt di,

⁸
 dapre jan sa te ekri nan Liv la: Bondye te rann lespri yo lou, yo gen je, men yo pa ka wè; yo gen zòrèy, men yo pa ka tande jouk jòdi a.

⁹
 David, bò pa l', di tou: Se pou resepsyon y'ap fè yo tounen yon senn, yon pèlen pou yo, pou yo menm yo pran ladan l', pou yo resevwa chatiman yo.

¹⁰
 Se pou je yo bouche pou yo pa wè menm. Fè yo mache do ba tout tan.

¹¹
 Koulye a, m'ap mande: Lè jwif yo bite, èske yo te tonbe nèt. Men non. Men, lè yo tonbe a, sa penmèt moun lòt nasyon yo rive delivre. Se konsa yo tounen yon jalouzi pou jwif yo.

¹²
 Fòt jwif yo fè a tounen yon richès pou tout moun. Tonbe yo tonbe a, sa vin yon gwo benediksyon pou moun lòt nasyon yo. Nou pa bezwen mande ki gwo benediksyon sa va ye lè tout jwif yo va delivre!

¹³
 Koulye a, nou menm moun lòt nasyon yo, mwen gen sa pou m' di nou: Se apòt nou mwen ye, se vre. Mwen kontan anpil travay m'ap fè a.

¹⁴
 Men, mwen kwè konsa m'a rive eksite jalouzi moun ras mwen yo, pou m' ka delivre kèk nan yo.

¹⁵
 Wi. Si lè Bondye te mete jwif yo sou kote, sa te penmèt tout moun sou latè rive vin byen ak Bondye ankò, nou pa bezwen mande kisak va rive lè jwif yo va tounen vin jwenn favè Bondye? Se va lavi pou tout moun ki te mouri yo!

¹⁶
 Lè yo ofri premye moso pen an bay Bondye, tout rès pen an vin pou li tou. Si yo ofri rasin yon pyebwa bay Bondye, tout branch li yo vin pou li tou.

¹⁷
 Pèp Izrayèl la tankou yon pye oliv kay. Yo koupe kèk branch soti ladan li. Ou menm ki pa jwif la, ou tankou yon branch pye oliv mawon yo grefe nan plas branch yo koupe yo. Kifè koulye a, se ou menm k'ap pwofite lèt rasin k'ap nourri pye oliv kay la.

¹⁸
 Se poutèt sa, pa gonfle kò ou sou branch ki koupe yo. Ki jan ou kapab ap fè grandizè? Pa bliye, se yon senp branch ou ye. Se pa ou k'ap pote rasin lan. Men, se rasin lan k'ap pote ou pito.

¹⁹
 Lè sa a wa di m': Wi. Men, yo te koupe branch yo pou yo te kapab grefe m'

nan plas yo? ²⁰ Wi. Se vre sa. Men, yo te koupe yo paske yo pa t' gen konfyans nan Bondye; ou menm ou kenbe paske ou gen konfyans nan Bondye. Pa kite lògèy pran tèt ou. Okontrè, se pou ou

²¹ gen krentif anpil nan kè ou. Paske, si jwif yo ki branch pyebwa a menm Bondye pa te al dousman

²² ak yo, se pa avè ou la pral dousman. Sa fè nou wè ki jan Bondye gen bon kè, ki jan li sevè tou. Li sevè pou moun ki tonbe yo, men li bon pou ou menm. Men, se pou ou rete fèm nan renmen

²³ Bondye. Si se pa sa, ou menm tou y'a koupe ou tankou lòt branch yo. Konsa tou, si jwif yo pa pèsiste nan movèz fwa yo, si yo rive gen konfyans, y'ap grefe yo tou kote yo te ye anvan an paske

²⁴ Bondye gen pouvwa grefe yo ankò. Ou menm ki pa jwif, ou se yon branch pye oliv mawon yo koupe. Atout ou mawon an, yo grefe ou sou pye oliv kay la. Men jwif yo menm, se branch pye oliv

²⁵ kay la menm yo ye. L'ap pi fasil toujou pou grefe yo ankò sou pyebwa pa yo a. Frè m' yo, mwen vle fè nou konnen sekrè sa a ki vre tout bon, konsa nou p'ap mete nan tèt nou nou gen pi bon konprann pase sa. Men sekrè a: Yon pati nan pèp Izrayèl la rive gen tèt di. Men, se pa pou tout tan.

²⁶ Se va pou jouk tan tout moun lòt nasyon yo va fin delivre. Se konsa tout pèp Izrayèl la va delivre, dapre sa ki ekri nan Liv la: Moun k'ap wete lèzòm anba esklavaj la, se nan Siyon l'ap soti. L'ap

²⁷ wete tout mechanste pitit pitit Jakòb yo, voye jete byen lwen. Men kontra m' pral pase avèk yo

²⁸ lè m'a wete tout peche yo. Jwif yo tounen lènmi Bondye paske yo derefize asepte Bon Nouvèl la. Men, se te pou byen nou, nou menm moun lòt nasyon yo. Men, Bondye toujou renmen yo poutèt

²⁹ zansèt yo, paske se Bondye menm ki te chwazi yo. Sa Bondye fè kado, li bay li nè; li p'ap chanje

³⁰ lide lè l' fin rele yon moun. Nan tan lontan, nou menm moun lòt nasyon yo, nou t'ap dezobeyi Bondye. Men, koulye a nou vin konnen ki jan Bondye gen pitye pou nou paske jwif yo dezobeyi

³¹ li. Konsa tou, koulye a jwif yo ap dezobeyi Bondye, paske nou vin konnen ki jan Bondye gen pitye pou nou. Y'ap dezobeyi pou yo menm tou yo ka vin konnen ki jan Bondye gen pitye pou yo.

³² Bondye mete tout moun anba menm chenn dezobeyisans lan pou l' ka gen pitye pou tout moun

³³ ansanm. ¶ O, gade jan Bondye rich non! Bon konprann li, konesans li, nou pa ka sonde yo! Sa depase nou anpil. Ki moun ki ka esplike jijman Bondye? Ki moun ki konprann lide li gen nan tèt

³⁴ li? Jan sa ekri nan Liv la: Ki moun ki konnen sa k'ap pase nan tèt Mèt la? Ki moun ki ka ba li

³⁵ konsèy? Ki moun ki te janm ba li kichòy nan lide pou Bondye renmèt li sa? ³⁶ Se li menm, Bondye, ki fè tout bagay. Se gremesi li tout bagay la. Se pou li tout bagay ye. Lwanj pou Bondye tout tan tout tan! Amèn.

Chapter 12

¹ ¶ Se sak fè, frè m' yo, jan Bondye fè nou wè li gen kè sansib pou nou an, se pou nou ofri tout kò nou ba li tankou ofrann bèt yo mete apa pou Bondye, bèt yo ofri tou vivan epi k'ap fè Bondye plezi. Se sèl jan nou dwe sèvi Bondye tout bon. ² Pa fè menm bagay ak sa moun ap fè sou latè. Men, kite Bondye chanje lavi nou nèt lè la fin chanje tout lide ki nan tèt nou. Lè sa a, n'a ka konprann sa Bondye vle, n'a konnen sa ki byen, sa ki fè l' plezi, sa ki bon nèt ale. ³ Poutèt favè Bondye fè m' lan, men sa m'ap mande nou tout: Piga nou mete nan tèt nou nou plis pase sa nou ye. Okontrè, pa mete gwo lide nan tèt nou. Se pou chak moun konsidere tèt li dapre sa Bondye ba li ki pa l' nan lafwa. ⁴ Gade byen: nou gen anpil manm nan yon sèl kò, men chak manm gen sèvis pa l' apa. ⁵ Se konsa tou, nou anpil, men nou fè yon sèl kò ansanm ak Kris la. Nou tout nou fè yon sèl kò tou yonn ak lòt, tankou plizyè manm nan yon sèl kò. ⁶ Bondye pa bay tout moun menm don. Men, nou fèt pou nou sèvi ak kado a dapre favè Bondye fè nou an. Si yon moun resevwa don pou l' anonse mesaj ki sòti nan Bondye, se pou l' fè sa dapre lafwa li genyen an. ⁷ Si yon lòt resevwa don pou l' fè yon travay, se pou l' fè travay la. Moun ki resevwa don pou l' moutre lòt anpil bagay, se sa pou l' fè. ⁸ Moun ki resevwa don pou l' bay ankourajman, se pou li bay ankourajman. Moun k'ap bay nan sa li genyen an, se pou l' fè sa san gad dèyè. Moun k'ap dirije a, se pou l' fè sa byen. Moun k'ap moutre jan li gen kè sansib la, se pou li fè sa ak kè kontan. ⁹ Se pou nou yonn renmen lòt ak tout kè nou. Rayi sa ki mal, men kenbe fèm nan fè sa ki byen. ¹⁰ Se pou nou yonn renmen lòt tankou frè ak frè k'ap viv ansanm ak Kris la. Nan tou sa n'ap fè, se pou nou gen respè yonn pou lòt, pa konsidere tèt nou anvan. ¹¹ Travay di, pa fè parese. Mete aktivite nan sèvis n'ap rann Mèt la. ¹² Pandan n'ap tann lan, fè kè n' kontan. Se pou nou gen anpil pasyans nan mitan soufrans nou yo. Pa janm sispann lapriyè. ¹³ Bay moun k'ap viv pou Bondye yo konkou lè nou wè yo nan bezwen. Resevwa moun ki vin lakay nou byen. ¹⁴ Mande Bondye pou l' beni moun k'ap pèsekite nou; mande benediksyon, pa mande madichon pou yo. ¹⁵ Fè kè n' kontan ak moun ki kontan, kriye ak moun k'ap kriye. ¹⁶ Viv byen yonn ak lòt. Pa kite lògèy moute tèt nou. Viv tankou moun ki san pretansyon. Pa kwè nou gen pi bon konprann pase sa. ¹⁷ Si yon moun fè nou mal, pa chache fè l' mal tou. Chache fè sa ki byen nan je tout moun. ¹⁸ Fè tou sa nou kapab pou nou viv byen ak tout moun mezi nou wè nou ka fè li. ¹⁹ Mezanmi, pa tire revanj. Men, kite kòlè Bondye fè travay li; paske men sa ki ekri nan Liv la: Se mwen menm sèl ki gen dwa tire rèvanj, se mwen menm sèl ki va bay moun sa yo

merite. Se Bondye menm ki di sa. ²⁰ Okontrè, dapre sa ki ekri ankò: Si lènmi ou grangou, ba l' manje. Si li swaf dlo, ba l' bwè. Lè ou fè sa, se yon chalè dife ou mete nan kò l' pou fè l' chanje.

²¹ Pa kite sa ki mal gen pye sou ou. Okontrè, fè sa ki byen pou n' kraze sa ki mal.

Chapter 13

¹ ¶ Tout moun dwe soumèt devan otorite k'ap gouvènen peyi a, paske nanpwen otorite ki pa soti nan men Bondye, epi tout otorite ki la, se Bondye ki mete yo. ² Se poutèt sa, moun k'ap kenbe tèt ak otorite yo, yo refize obeyi lòd Bondye tabli. Moun ki refize obeyi lòd la, y'ap rale yon jijman sou tèt pa yo. ³ Tande byen: moun ki fè sa ki byen pa bezwen pè chèf k'ap gouvènen yo. Se moun ki fè sa ki mal ki pou pè yo. Eske ou ta vle pa pè chèf? Enben, fè sa ki byen; se lwanj ase wa resewva nan men yo. ⁴ Paske chèf yo se nan sèvis Bondye yo ye pou byen nou. Men, si w'ap fè sa ki mal, ou mèt tranble, paske se pa pou gremesi yo gen pouvwa peni moun. Lè sa a, se sèvis Bondye y'ap fè tou. Y'ap fè nou wè kòlè Bondye lè y'ap peni moun ki fè sa ki mal. ⁵ Se poutèt sa, nou dwe soumèt devan tout otorite yo, pa sèlman paske nou vle chape anba kòlè Bondye, men tou pou konsyans nou pa repwoche nou anyen. ⁶ Se poutèt sa tou, nou peye lajan kontribisyon yo, paske anplwaye leta yo se nan sèvis Bondye yo ye, se pou yo fè travay la byen. ⁷ ¶ Peye tout moun sa ou dwe yo: peye enpo nan biwo kote pou ou peye enpo; peye taks nan biwo kote pou ou peye taks. ⁸ Gen krentif pou moun ou dwe gen krentif. Gen respè pou moun ou dwe respekte. Pa fè dèt lakay pesonn. Sèl dèt nou dwe genyen, se pou nou yonn renmen lòt. Moun ki renmen frè parèy li, li fè tou sa lalwa mande. ⁹ Se konsa, ou wè kòmandman sa yo: piga ou janm fè adiltè; piga ou janm touye moun; piga ou janm vòlò; piga ou janm pote lanvi sou sak pa pou ou; kòmandman sa yo ansanm ak tout lòt yo, gen yon sèl pawòl ki ranmase yo tout: se pou ou renmen frè parèy ou tankou ou renmen pwòp tèt pa ou. ¹⁰ Moun ki gen renmen nan kè yo pa fè moun mal: se sak fè lè nou renmen, nou fè tou sa lalwa a mande nou fè. ¹¹ ¶ Se sa menm pou nou fè, paske nou konnen ki jan tan an ye deyò a. Li lè pou nou leve soti nan dòmi, lè a sonnen, paske koulye a, lè pou n' fin delivre a pi pre nou pase lè nou te fèk mete konfyans lan. ¹² Nwit lan vanse fini, jou prèt pou kase. Ann sispann fè bagay yo fè nan fènwa. Ann pran zam nou pou nou ka goumen devan tout moun. ¹³ Ann mennen bak nou jan nou dwe, tankou moun k'ap viv gwo lajounen. Pa fè eksè nan manje ni nan bwè. Pa lage tèt nou nan debòch ni nan vis. Pa chache moun kont, pa fè jalouzi. ¹⁴ Se pou nou pran

Jezikri Seyè a tankou yon zam mete sou nou. Pa kite ekzijans kò a pran pye sou nou pou fè nou fè tou sa li anvi fè.

Chapter 14

¹ ¶ Se pou n' resevwa moun ki fèb nan konfyans yo byen san nou pa bezwen diskite openyon
² yo genyen. Men yon egzanp: Gen moun ki kwè li kapab manje tout bagay; gen lòt ki fèb nan
³ konfyans yo epi ki manje legim ase. Moun ki manje tout manje pa fèt pou meprize moun ki pa
manje tout manje. Konsa tou, moun ki pa manje tout manje pa fèt pou jije moun ki manje tout
⁴ manje, paske Bondye asepte ni yonn ni lòt jan yo ye a. Ki moun ou ye konsa pou w'ap jije domestik
lòt moun? Kit domestik la kenbe fèm nan sèvis la, kit li tonbe, sa se zafè ki gade mèt li ase. Men,
⁵ pa pè, li gen pou l' kenbe fèm, paske Seyè a gen pouvwa pou l' soutni li. M'ap pran yon lòt egzanp:
Gen moun ki kwè gen jou ki pi konsekan pase lòt. Gen lòt ki di tout jou se menm. Se pou chak
⁶ moun gen konviksyon pa yo. Moun ki kwè yon jou pi konsekan pase lòt, li fè sa pa respè pou
Mèt la menm jan ak moun ki manje tout manje a, li fè sa pa respè pou Mèt la paske li di Bondye
mèsi pou manje a. Moun ki pa manje tout manje a, li fè sa tou pa respè pou Mèt la, paske li menm
⁷ tou, li di Bondye mèsi. Se konsa, pa gen yon sèl moun nan nou k'ap viv pou tèt pa li. Pa gen yonn
⁸ nan nou tou k'ap mouri pou tèt pa li. Paske si n'ap viv, n'ap viv pou Seyè a, si n'ap mouri, n'ap
⁹ mouri pou Seyè a tou. Konsa, kit nou vivan, kit nou mouri, se pou Seyè a nou ye. Paske, Kris la
te mouri, apre sa li leve soti vivan ankò pou l' te kapab Mèt tout moun, ni moun vivan yo ni moun
¹⁰ mouri yo. Men ou menm, pouki pou w'ap jije frè ou konsa? Ou menm, pouki pou w'ap meprize
¹¹ frè ou konsa? Nou tout gen pou konparèt devan tribinal Bondye a. Paske men sa ki ekri nan Liv
la: Mèt la di: Jan nou konnen mwen vivan an vre, konsa tou, tout moun gen pou mete ajenou devan
¹² mwen. Nan tout lang moun va pale byen fò pou rekonèt pouvwa Bondye. Se konsa, chak moun
¹³ gen pou rann Bondye kont pou tèt pa yo. Ann sispann yonn ap jije lòt. Pito nou pran desizyon
¹⁴ pou n' pa fè anyen ki kapab fè frè nou bite osinon tonbe nan peche. Paske, mwen menm k'ap
viv ansanm avèk Seyè Jezi a, mwen sèten pa gen anyen nan sa yo di ki pa bon pou moun k'ap sèvi
Bondye ki soti tou konsa nan men Bondye. Si yon moun kwè yon bagay pa bon pou moun k'ap
¹⁵ sèvi Bondye, bagay la pa bon pou li paske li mete sa nan tèt li. Si ou fè frè ou lapenn pou tèt
yon manje ou manje, ou pa gen renmen nan kè ou pou frè ou. Piga ou kite manje w'ap manje a

lakòz yon frè pèdi sou kont ou, paske li menm Kris la te mouri pou l' te ka sove l' tou. ¹⁶ Sa ki byen pou ou pa dwe yon okazyon pou fè yo pale ou mal. ¹⁷ Gouvènman Bondye ki wa a, se pa yon afè manje ak bwè, men se yon keksyon fè sa ki byen, viv ak kè poze ak kè kontan. Bagay sa yo, se ¹⁸ Sentepri ki bay yo. Moun k'ap sèvi Kris la konsa, se yo ki fè Bondye plezi. Tout moun ap dakò ¹⁹ ak sa. Se sak fè, ann toujou chache bagay ki kapab ede nou viv ak kè poze, bagay ki pou penmèt nou yonn soutni lòt nan konfyans nou nan Bondye. ²⁰ Piga kraze travay Bondye a poutèt yon keksyon manje. Nou ka manje tout manje, se vre. Men, sa pa bon pou nou manje kichòy ki ka lakòz yon frè tonbe nan peche. ²¹ Sa ki byen an, se lè ou pa manje vyann, ni bwè diven, ni fè okenn lòt bagay ki kapab fè frè ou tonbe nan peche. ²² Sa ou kwè ou menm sou sa, gade l' pou tèt ou devan Bondye. benediksyon pou yon moun ki pa santi l' koupab lè l'ap fè sa li kwè li dwe fè. ²³ Men, moun ki gen doutans sou sa l'ap manje a, Bondye kondannen l' lè l' manje l', paske li aji san konviksyon. Tout sa ou fè san konviksyon se peche.

Chapter 15

¹ ¶ Nou menm ki fò nan konfyans nou nan Bondye, se pou nou ede sa ki fèb yo pote feblès yo. Nou pa dwe ap chache sa ki fè nou plezi sèlman. ² Okontrè, se pou nou chak chache fè frè parèy nou plezi pou byen l', konsa n'a fè l' grandi nan konfyans li nan Bondye. ³ Paske Kris la pa t' chache sa ki te fè l' plezi, men dapre sa ki ekri a: Moun ki t'ap joure ou yo, se tankou si se mwen menm yo t'ap joure. ⁴ Se konsa, tou sa ki te ekri nan Liv la depi nan tan lontan, yo te ekri yo pou moutre nou anpil bagay, wi, pou bagay nou jwenn ekri nan Liv la ka ban nou pasyans ak ankourajman pou n' ka mete tout espwa nou nan Bondye. ⁵ ¶ Se pou Bondye ki bay pasyans ak ankourajman an fè nou viv byen yonn ak lòt, pou nou ka swiv egzanp nou jwenn nan Jezikri. ⁶ Konsa, n'a mete kè nou ak bouch nou ansanm pou fè lwanj Bondye, papa Jezikri, Seyè nou an. ⁷ ¶ Se pou yonn asepte lòt jan l' ye a, menm jan Kris la te asepte nou an pou sa te tounen yon lwanj pou Bondye. ⁸ Men sa m' vle di: Kris la te fè tèt li sèvitè jwif yo pou l' te ka fè pwomès Bondye te fè zansèt nou yo rive vre, epi pou l' te moutre jan Bondye kenbe pawòl li. ⁹ Men, li te vini pou moun lòt nasyon yo tou, pou yo te ka fè lwanj Bondye pou jan li gen kè sansib, jan sa te ekri nan Liv la: Se poutèt sa m'a fè lwanj

ou nan mitan lòt nasyon yo. Se poutèt sa m'a chante pou non ou. ¹⁰ Liv la di ankò: Nou menm
 moun lòt nasyon yo, fè kè nou kontan ansanm avèk pèp Bondye chwazi a. ¹¹ Li di ankò: Fè lwanj
 Mèt la, nou menm moun lòt nasyon yo! Wi, se pou tout pèp yo fè lwanj li! ¹² Ezayi di tou: Li gen
 pou l' vini, pitit pitit Izayi a. Li va parèt pou gouvènèn lòt nasyon yo. Nasyon yo va mete espwa yo
 nan li. ¹³ ¶ Mwen mande Bondye ki bay espwa a pou l' fè kè nou kontan nèt, pou l' fè kè nou poze
 ak konfyans nou gen nan li a. Se konsa espwa nou va toujou ap grandi ak pouvwa Sentespri a. ¹⁴ ¶
 Frè m' yo, mwen gen fèm konviksyon nou gen kont bon santiman nan kè nou, nou gen kont konesans
 sou nou pou yonn ka bay lòt konsèy. ¹⁵ Men, mwen te penmèt mwen ekri nou sou anpil pwen nan
 lèt mwen an pou mwen te ka fè nou chonje sa nou te konnen deja. Mwen te penmèt mwen fè sa
 poutèt favè Bondye te fè m' lan, ¹⁶ pou m' te sèvi Jezikri pandan m'ap travay nan mitan moun lòt
 nasyon yo. Lè m'ap fè konnen bon nouvèl Bondye a, se yon sèvis apa pou Bondye m'ap rann, pou
 moun lòt nasyon yo ka tounen yon ofrann ki fè Bondye plezi, yon ofrann yo mete apa pou Bondye
 ak pouvwa Sentespri a. ¹⁷ ¶ Se pou sa, mwen gen dwa kontan nèt pou travay m'ap fè ansanm ak
 Jezikri pou Bondye. ¹⁸ -(we vèsè pwochen) ¹⁹ Wi, m'ap penmèt mwen fè nou konnen sèlman sa
 Kris la te fè m' fè ak sa li te fè m' di, avèk fòs mirak ak bèl bagay ak pouvwa Lespri Bondye a. Tou
 sa, pou mennen moun lòt nasyon yo vin nan pye Bondye pou obeyi li. Se konsa, depi lavil Jerizalèm
 jouk nan peyi Iliri, mwen pa manke mache bay bon nouvèl ki pale sou Kris la toupatou. ²⁰ Men,
 lanbisyon m' se te pou m' fè konnen bon nouvèl la sèlman kote moun pa t' ankò janm tande nonmen
 non Kris la, pou m' pa t' bati sou fondasyon lòt moun te poze, ²¹ jan sa te ekri nan Liv la: Moun ki
 pa t' ankò konnen l' yo va wè. Moun ki pa t' ankò tande nonmen non l' yo va konprann. ²² ¶ Se
 rezon sa a ki te anpeche mwen anpil fwa al lakay nou. ²³ Men, koulye a, mwen pa gen anyen ki
 kenbe m' nan peyi sa yo ankò. Depi lontan mwen fè lide ale wè nou. ²⁴ Mwen ta renmen fè sa lè
 mapral an Espay lan. Wi, mwen gen espwa pase wè nou pou nou kapab ede m' ale nan peyi sa a,
 apre m'a fin pase kèk bon moman nan mitan nou. ²⁵ Men, koulye a, mwen pral Jerizalèm pou m'
 ka rann moun k'ap viv apa pou Bondye yo yon sèvis. ²⁶ Legliz ki nan peyi Masedwan ak nan peyi
 Lakayi yo te pran sou yo pou yo te fè yon ofrann pou ede pòv ki nan pèp Bondye a lavil Jerizalèm.
²⁷ Se yo menm menm ki te fè lide sa a. Men, pou di vre, yo te dwe pòv yo sa. Paske, menm jan
 jwif yo te separe benediksyon ki soti nan Lespri Bondye a avèk moun ki pa t' jwif yo, konsa tou,
 moun ki pa jwif yo gen pou devwa pou rann yo sèvis avèk byen latè yo. ²⁸ Lè m'a fini avèk zafè
 sa a, le m'a renmèt tout lajan yo te ranmase a nan men, lè sa a m'a pati pou Espay, m'a pase wè nou

²⁹ sou wout. Mwen konnen le m'a rive wè nou an, se avèk tout benediksyon Kris la m'a rive. ¶³⁰
 Men sa m' mande nou, frè m' yo: nan non Jezikri, Seyè nou an, nan non renmen Lespri a ban nou,
³¹ tanpri, pa lage m' nan batay la pou kont mwen, lapriyè Bondye pou mwen. Lapriyè pou m' ka
 delivre anba moun Jide yo ki pa vle kwè. Lapriyè tou pou moun k'ap viv apa pou Bondye nan lavil
³² Jerizalèm, pou yo ka byen resevwa lajan m'ap pote ba yo a. Konsa, si Bondye vle, m'a rive lakay
³³ nou ak kè kontan, epi m'a pran yon ti repo nan mitan nou. Se pou Bondye ki bay kè poze a avèk
 nou tout. Amèn.

Chapter 16

¹ ¶ Mwen rekòmande nou Febe, yon sè k'ap sèvi nan legliz Sankre a. ² Resevwa li nan non Seyè
 a, jan moun k'ap viv apa pou Bondye yo dwe fè l' yonn pou lòt. Ede l' nan tou sa li ka bezwen,
³ paske li menm li deja ede anpil moun lèfini li te ede m' anpil tou. Di Priska ak Akilas bonjou pou
 mwen. Yo t'ap travay avè m' nan sèvis Jezikri a. ⁴ Yo te riske tèt yo pou sove lavi mwen. Se pa
⁵ mwen sèlman k'ap di yo mesi, se tout legliz ki nan moun lòt nasyon yo k'ap di yo mesi tou. Di
 legliz ki sanble lakay yo a bonjou tou. Di Epayenèt, bon bon zanmi mwen an, bonjou. Se li menm
⁶ premye moun ki te mete konfyans li nan Kris la nan peyi Lazi. Di Mari ki te bay kò l' anpil traka
 pou nou an bonjou. ⁷ Di Andwonikis ak Jenyas, fanmi m' yo ki te al nan prizon ansanm avè m' yo,
 bonjou. Apòt yo konsidere yo anpil, yo te patizan Kris la anvan mwen. ⁸ Di Anplyatis, bon zanmi
⁹ m' nan menm Seyè a, bonjou. Di Iben, kanmarad travay mwen nan sèvis Kris la, bonjou ansanm
¹⁰ ak Estakis, bon zanmi mwen an. Di Apelès ki moutre jan li gen konfyans nan Kris la bonjou.
¹¹ Di moun lakay Aristobil yo bonjou. Di Ewòdyon, fanmi m' lan, bonjou. Di moun lakay Nasis
¹² yo ki kwè nan Seyè a bonjou. Di Trifèn ak Trifòz, de sè k'ap bay kò yo anpil traka pou Seyè a,
¹³ bonjou. Di Pèsid, bon zanmi m' ki te pran anpil fatig pou Seyè a, bonjou. Di Rifis, nonm Bondye
¹⁴ chwazi pou sèvis li a, bonjou ansanm ak manman l' ki yon manman pou mwen tou. Di Asenkrit,
¹⁵ Flegon, Emès, Patwobas, Emas ak tout frè yo ki ansanm ak yo a bonjou. Di Filològ ak Jili, Nere
¹⁶ ak sè li a ansanm avèk Olimp as ak tout manm legliz ki la avèk yo, bonjou. Yonn bo lòt pou

¹⁷
 mwen tankou frè. Tout legliz Kris yo voye bonjou pou nou. ¶ M'ap ban nou yon dènye ti konsèy, frè m' yo: Veye kò nou ak moun k'ap simen divizyon, k'ap pale kont sa yo te moutre nou an pou fè
¹⁸
 moun ki kwè yo pèdi tèt yo. Moun konsa, se pa Kris la, Seyè nou an, y'ap sèvi. Se vant yo y'ap sèvi. Y'ap bay bèl pawòl, y'ap fè bèl diskou pou achte figi moun. Se konsa yo pran tèt ti inosan
¹⁹
 yo. Pou nou menm, moun lavil Wòm, tout moun konnen jan nou soumèt nou devan Seyè a. Mwen byen kontan pou nou. Men, mwen ta renmen pou nou toujou chache fè sa ki byen, pou nou
²⁰
 pa lage kò nou nan fè sa ki mal. Anvan lontan, Bondye ki bay kè poze a gen pou kraze Satan
²¹
 anba pye nou. Se pou benediksyon Jezi, Seyè nou an, toujou la avèk nou. ¶ Timote, kanmarad travay mwen an, ansanm ak Liziyis, Jazon, Sozipatè, fanmi m' yo, yo tout voye bonjou pou nou.
²²
 Mwen menm, Tèsiyis, ki kouche lèt sa a sou papye, mwen voye bonjou pou nou nan renmen
²³
 Kris la. Gayis voye bonjou pou nou. Se lakay li mwen fè ladesant. Epi se la tou tout legliz la fè
²⁴
 reyinyon. Eras, trezorye nan lavil la, ansanm ak frè Katis voye di nou bonjou. Se pou benediksyon
²⁵
 Jezikri, Seyè nou an, toujou la avèk nou tout. ¶ Ann fè lwanj Bondye! Se li ki gen pouvwa pou fè nou kenbe fèm nan konfyans lan dapre bon nouvèl m'ap anonse a, dapre mesaj m'ap preche sou Jezikri a, dapre konesans Bondye ban nou kifè nou wè plan travay li. Se li menm ki gen pouvwa
²⁶
 pou fè nou kenbe fèm nan konfyans sa a. Plan travay sa a te kache pandan lontan lontan. Men, koulye a, li parèt aklè nan liv pwofèt yo te ekri yo. Konsa, dapre lòd ki soti nan Bondye ki la pou tout tan an, plan travay la rive an konesans moun tout lòt nasyon yo pou yo kapab mete konfyans
²⁷
 yo nan Bondye, pou yo kapab fè volonte Bondye. Wi, lwanj pou Bondye, li menm sèl ki gen bon konprann! Lwanj pou li nan Jezikri, depi tout tan epi pou tout tan! Amèn.

1 Corinthians

Chapter 1

¹
 ¶ Mwen menm Pòl, yon moun Bondye menm te deside rele pou sèvi Jezikri apòt, m'ap ekri
²
 lèt sa a, ansanm ak Sostèn, frè nou, pou nou tout ki nan legliz Bondye a lavil Korent. Bondye te rele nou pou viv apa pou li, nou tout ki pou Bondye nan Jezikri, ansanm ak tout lòt moun toupatou
³
 k'ap rele non Jezikri, Seyè nou an. Paske Jezikri se Seyè yo menm jan li Seyè nou tou. Nou mande
⁴
 Bondye, Papa nou, ansanm ak Jezikri, Seyè a, pou yo ban nou benediksyon ak kè poze. Se tout

tan m'ap di Bondye mèsì pou sa l' fè pou nou menm, frè lavil Korent yo, pou favè li te fè nou jwenn nan Jezikri. ⁵ Pandan n'ap viv ansanm ak Kris la, Bondye fè nou rich nèt, li ban nou tout kalite kado: kado sa yo penmèt nou preche pawòl la tout jan epi yo ban nou anpil konesans. ⁶ Bon Nouvèl ki pale sou Kris la fin pran rasin nèt nan mitan nou. ⁷ Se sak fè, nou pa manke anyen nan kado Bondye bay yo, pandan n'ap tann jou lè Jezikri, Seyè nou an, pral parèt la. ⁸ Bondye va kenbe nou fèm jouk sa kaba. Konsa, yo p'ap jwenn anyen pou repwoche nou lè jou Jezikri, Seyè nou an, va rive. ⁹ Bondye ki rele nou pou nou ka viv ansanm ak Pitit li, Jezikri, Seyè nou an, ap toujou kenbe pawòl li. ¹⁰ ¶ Frè m' yo, men sa m'ap mande nou, nan non Jezikri, Seyè nou an. Tanpri, mete nou dakò sou tout bagay. Pa kite divizyon mete pye nan mitan nou. Okontrè, se pou nou viv byen yonn ak lòt. Mete yon sèl lide nan tèt nou, se pou nou tout gen yon sèl pawòl. ¹¹ Mwen di nou sa, frè m' yo, paske m' vin konnen nan bouch kèk moun nan fanmi Kloe a, te gen gwo kont pete nan mitan nou. ¹² Men sa m' vle di: Chak moun ap di yon bagay diferan. Sa a di: mwen se moun Pòl. Yon lòt di: mwen se moun Apolòs. Yon lòt ankò di: mwen se moun Pyè. Yon lòt ankò: mwen se moun Kris la. ¹³ Nan kondisyon sa a, Kris la gen lè divize? Eske se Pòl yo te kloure sou kwa a pou nou? Osinon, èske se nan non Pòl yo te batize nou? ¹⁴ ¶ Mwen di Bondye mèsì dèske mwen pa t' batize nou yonn, an wetan Krispis ak Gayis. ¹⁵ Konsa, pesonn pa ka di yo te batize nan non Pòl. ¹⁶ (Mwen t'ap bliye sa: mwen te batize Estefanas ak moun lakay li yo tou. Men, mwen pa chonje m' te batize pesonn lòt ankò.) ¹⁷ ¶ Epitou, Kris la pa t' voye m' batize moun. Li te voye m' anonse Bon Nouvèl la, epi se pou m' anonse l' san m' pa bezwen sèvi ak bèl diskou bon konprann lèzòm, pou m' pa fè lanmò Kris la sou kwa a pase pou anyen. ¹⁸ Pawòl ki fè nou konnen jan Kris la mouri sou kwa a, se pawòl moun fou pou moun k'ap peri yo. Men, pou nou menm ki delivre yo se pouvwa Bondye. ¹⁹ Se sa menm ki te ekri nan Liv la: M'ap detwi bon konprann moun lespri yo. M'ap voye konesans save yo jete. ²⁰ Bon, lè sa a, moun ki gen bon konprann yo, moun ki fò yo, moun ki renmen diskite dapre prensip lèzòm yo, kisa yo gen pou di ankò? Eske Bondye pa fè wè se bon konprann lèzòm lan ki pawòl moun fou? ²¹ Se sak fè, moun k'ap viv dapre lide ki nan lemonn lan, avèk tout bon konprann yo, yo pa kapab rekonèt Bondye kote Bondye ap fè wè bon konprann li. Se poutèt sa, Bondye deside delivre tout moun ki kwè nan pawòl moun fou n'ap anonse a. ²² Yon bò, jwif yo ap mande mirak, yon lòt bò grèk yo ap chache bon konprann. ²³ Men nou menm, n'ap fè konnen Kris yo te kloure sou kwa a. Pou jwif yo, sa se yon wòch k'ap fè yo bite. Pou moun ki pa jwif yo, sa se bagay moun fou. ²⁴ Men pou tout moun Bondye rele yo, kit yo jwif, kit yo pa jwif, n'ap fè

²⁵
 konnen Kris la ki bon konprann Bondye a ak pouvwa Bondye a. Paske, sa ki sanble yon bagay
 moun fou Bondye ap fè a, li pi bon konprann pase bon konprann lèzòm. Sa ki sanble yon feblès
²⁶
 Bondye ap moutre, li pi fò pase fòs lèzòm. Koulye a, frè m' yo, chonje ki kalite moun nou te ye
 lè Bondye te rele nou. Pa gen anpil nan nou ki gen bon konprann dapre sa lèzòm rele bon konprann,
²⁷
 pa gen anpil grannèg, ni anpil moun gran fanmi. Se konsa, Bondye chwazi moun lèzòm konsidere
 tankou moun sòt pou l' fè moun ki gen bon konprann yo wont. Li chwazi moun lèzòm konsidere
²⁸
 tankou moun ki fèb pou l' fè grannèg yo wont. Li chwazi moun lèzòm gade pou anyen, moun
 yo meprize, moun ki pa menm egziste pou yo, pou li te ka kraze sa ki gen enpòtans pou moun k'ap
²⁹ ³⁰
 viv dapre lide ki nan lemonn. Konsa, pa gen moun ki ka fè grandizè devan Bondye. Bondye
 mete nou ansanm ak Jezikri, li fè Kris la tounen bon konprann pou nou. Se Kris la ki fè Bondye fè
³¹
 nou gras. Se li menm k'ap fè nou viv apa pou Bondye, se li menm ki delivre nou. Konsa, jan sa
 ekri nan Liv la: Si yon moun vle fè lwanj tèt li, se pou l' fè lwanj tèt li nan sa Bondye fè pou li.

Chapter 2

¹
 ¶ Frè m' yo, lè mwen te al lakay nou, se pa t' avèk gwo diskou ni bèl pawòl mwen te fè nou
²
 konnen plan travay Bondye ki te kache a. Mwen te mete nan tèt mwen pou m' te bliye tout bagay
 sa yo. Yon sèl bagay mwen te konnen tout tan mwen te la ansanm ak nou an, se Jezikri, epi sèlman
³
 Jezikri yo te kloure sou kwa a. Mwen vin kanpe tou fèb devan nou. Lè sa a, mwen t'ap tranble
⁴
 nan tout kò m' sitèlman mwen te pè. Lè m' te fè nou konnen tout bagay sa yo, lè m' te anonse nou
 nouvèl la, se pa t' avèk bèl pawòl bon konprann lèzòm mwen t'ap chache pran tèt nou. Men, se te
⁵
 avèk pouvwa Lespri Bondye a ki t'ap bay tout prèv pou fè nou kwè. Konsa, konfyans nou gen
⁶
 nan Bondye a pa chita sou bon konprann lèzòm, men sou pouvwa Bondye. ¶ Malgre sa, se yon
 bon konprann m'ap fè moun ki byen devlope nan konfyans yo konnen. Men, se pa menm bon
 konprann ak bon konprann moun k'ap viv dapre lide ki nan lemonn, ni ak bon konprann pouvwa
⁷
 k'ap donminen lemonn, pouvwa ki la pou disparèt. Bon konprann m'ap anonse a, se bon konprann
 Bondye te sere a. Li te kache nan je moun. Men, depi anvan Bondye te kreye anyen, bon konprann
⁸
 sa a te nan plan l' pou l' te ka sèvi yon lwanj pou nou. Pa gen pouvwa nan lemonn ki te konnen
⁹
 bon konprann sa a. Si yo te konnen l', yo pa ta kloure Seyè ki merite lwanj la sou kwa a. Men,
 jan sa te ekri nan Liv la: Bagay pesonn pa t' janm wè, ni pa t' janm tandè, bagay ankenn moun pa

t' janm mete nan tèt yo, se sa Bondye te pare pou moun ki renmen li. ¹⁰ Bondye voye Sentespri l' ki devwale sekre travay sa a ban nou. Lespri Bondye sonde tout bagay, menm sa ki nan fon kè Bondye. ¹¹ Pran nenpòt moun: Kilès ki ka konnen sa ki nan kè li? Se lespri ki nan li a sèlman ki ka konn sa. Konsa tou, sèl Lespri Bondye konnen tout bagay ki nan Bondye. ¹² Se pa lespri k'ap travay nan moun k'ap viv dapre lide ki nan lemonn lan nou te resevwa. Lespri nou resevwa a, se Lespri Bondye te voye ban nou an pou n' te ka konnen tout favè Bondye te fè nou. ¹³ Si n'ap pale sou tout favè Bondye fè nou, se pa avèk pawòl nou jwenn nan bon konprann lèzòm, men se pito avèk pawòl Lespri Bondye ap moutre nou. Se konsa, nou fè moun ki gen Lespri Bondye nan kè yo konprann verite ki soti nan Lespri a. ¹⁴ Yon moun ki pa gen Lespri Bondye a nan kè l' pa ka asepte verite ki soti nan Lespri Bondye a. Pou li, se pawòl moun fou yo ye. Li pa kapab konprann yo, paske se Lespri Bondye a ki pou ede l' egzaminen yo. ¹⁵ Okontrè, moun ki gen Lespri Bondye a nan kè l', li kapab jije tout bagay. Men li menm, pesonn pa ka jije li. ¹⁶ Jan sa ekri nan Liv la: Ki moun ki konnen sa k'ap pase nan tèt Mèt la? Ki moun ki pou moutre l' sa pou l' fè? Men nou menm, nou konnen sa ki nan lide Kris la.

Chapter 3

¹ ¶ Men, frè m' yo, pou di vre, mwen pa t' kapab pale ak nou tankou ak moun ki gen Lespri Bondye a nan kè yo. Mwen te blije pale ak nou tankou ak moun k'ap viv dapre lide ki nan lemonn, tankou ak moun ki timoun toujou nan konfyans yo nan Kris la. ² Mwen te blije moutre nou ti bagay tou senp, tankou lè yo bay timoun piti lèt, yo pa ba yo gwo manje. Paske nou pa t' ankò pare pou sa. Ata koulye a, nou poko pare. ³ Paske n'ap viv tankou moun k'ap viv dapre lide ki nan lemonn toujou. Depi ou tande gen jalouzi nan mitan nou, depi nou gen kont yonn ak lòt, nou tou wè se moun lemonn nou ye, se tankou moun k'ap viv dapre lide ki nan lemonn lan n'ap viv. ⁴ Lè yonn rete li di: Mwen menm, mwen se moun Pòl; yon lòt: Mwen se moun Apolòs, èske se pa tankou moun lemonn n'ap pale? ⁵ ¶ Lè ou gade byen, ki moun ki Apolòs la? Ki moun ki Pòl la? Nou tou de se sèvitè Bondye nou ye. N'ap travay pou nou menm, moun Korent yo, nou te ka rive kwè. Chak moun te fè travay Mèt la te ba l' fè. ⁶ Mwen plante, Apolòs wouze, men se Bondye ki fè plant lan pouse. ⁷ Konsa, moun ki plante a pa anyen, moun ki wouze a pa anyen tou. Se Bondye ki tout bagay la, se li menm ki fè plant lan pouse. ⁸ Moun ki plante a ak moun ki wouze a, se menm bagay

yo ye. Bondye va ba yo sa yo merite dapre travay yo fè. ⁹ Apolòs ak mwen, se travay n'ap travay ansanm pou Bondye. Nou menm, moun Korent yo, nou se tankou yon jaden Bondye bay travay pou li. Ou ankò, nou se yon kay Bondye ap bati. ¹⁰ Dapre favè Bondye te fè m' lan, mwen travay tankou yon bon enjenyè, mwen poze fondasyon an. Yon lòt ap bati sou li. Men, se pou chak moun veye kò yo pou yo konnen ki jan y'ap bati. ¹¹ ¶ Paske fondasyon an deja la: se Jezikri. Pesonn pa ka poze yon lòt. ¹² Gen moun k'ap sevi ak lò, osinon ak lajan, osinon ak bèl wòch ki koute chè pou bati sou fondasyon an. Gen lòt menm k'ap sèvi ak bwa, ak zèb chèch, ak pay. ¹³ Men, se jou jijman an n'a wè ki kalite travay chak moun te bay. Se jou sa a ki va devwale kalite travay chak moun te fè. Paske jou sa a, se nan mitan dife l'ap parèt. Dife a pral sonde travay chak moun. L'ap fè wè kalite travay yo. ¹⁴ Si dife a pa boule travay yon moun bati sou fondasyon an, moun sa a ap resevwa rekonpans li. ¹⁵ Men tou, si dife a boule travay yon moun, moun sa a ap pèdi travay li. Men li menm, l'ap sove, tankou yon moun ki chape nan yon kay k'ap boule. ¹⁶ ¶ Eske nou pa konnen se tanp Bondye a nou ye, se Lespri Bondye a ki rete nan kè nou? ¹⁷ Enben, si yon moun kraze tanp Bondye a, Bondye ap kraze l' tou. Paske tanp Bondye a se yon bagay ki apa pou li. Se nou menm ki tanp Bondye a. ¹⁸ ¶ Piga pesonn twonpe tèt yo. Si yon moun mete nan lide l' li gen bon konprann tankou moun k'ap viv dapre lide ki nan lemonn yo, pito li vin fou pou l' ka gen bon konprann tout bon. ¹⁹ Paske, bon konprann moun k'ap viv dapre lide ki nan lemonn yo se bagay moun fou li ye devan Bondye. Men sa n' jwenn ekri nan Liv la: Bondye pran moun lespri yo nan pwòp pèlen yo te tann lan. ²⁰ Nou jwenn sa ekri tou: Bondye konnen lide moun save yo mete nan tèt yo, li konnen tou sa pa vo anyen. ²¹ ¶ Konsa, pesonn pa dwe chache lwanj pou tèt pa yo nan sa moun ka fè. Pou nou menm, tout bagay se pou nou yo ye. ²² Ni Pòl, ni Apolòs, ni Pyè, ni tou sa ki sou latè, se pou nou yo ye. Lavi, lanmò, bagay ki la koulye a, bagay ki gen pou vini, tou sa se pou nou yo ye tou. ²³ Men nou menm, se pou Kris la nou ye. Kris la menm, se pou Bondye.

Chapter 4

¹ ¶ Se poutèt sa, nou menm moun Korent, se pou nou rekonèt se sèvitè Kris la mwen ye, tankou yon jeran Bondye mete reskonsab plan travay li yo ki te kache. ² Yon sèl bagay yo mande yon

3
 jeran, se pou l' yon moun serye. Pou mwen menm, nou te mèt jije m', lèzòm te mèt jije m' nan tribinal yo, sa pa di m' anyen. Mwen menm, poutèt pa m', mwen pa jije tèt mwen non plis.

4
 Konsyans mwen pa repwoche m' anyen, se vre. Men, sa pa vle di mwen inonsan pou sa. Se Seyè a ki sèl jij mwen. 5 Se poutèt sa, pa prese jije pesonn anvan lè a rive. Se pou nou tann Seyè a vini. Se li menm k'ap mete deyò tou sa ki te kache, tou sa ki t'ap fèt nan fènwa. L'ap devwale tout kalkil

6
 lèzòm t'ap fè nan kè yo. Lè sa a, chak moun va resevwa lwanj yo merite nan men Bondye. Frè m' yo, nan tout bagay sa yo, si m' pran egzanp sou mwen ak Apòlòs, se te pou byen nou. Mwen ta vle nou pran egzanp sou nou pou n' ta ka konprann sans pawòl la ki di: Rete nan limit yo ban nou

7
 an. Piga pesonn pran pati pou yon moun kont yon lòt. ¶ Kilès ki di ou pi bon pase lòt yo? Kisa ou genyen se pa Bondye ki ba ou li? Enben, nan kondisyon sa a, poukisa w'ap fè grandizè pou sa

8
 ou genyen an tankou si se pa Bondye ki te ba ou li? Atò, nou gen tan gen tou sa n' te bezwen? Nou gen tan rich kont kò nou? Nou gen tan tounen wa anvan mwen? Mwen ta byen kontan si nou

9
 ta tounen wa tout bon, pou m' te kapab wa tou ansanm avèk nou. Men, nou menm apòt Kris yo, gen lè Bondye mete nou dèyè nèt. Nou tankou moun yo kondannen amò pou yo touye sou plas piblik; nou tounen yon espektak pou tout moun, ni pou zanj yo nan syèl la, ni pou moun sou latè.

10
 Poutèt Kris la, nou menm apòt yo, nou tankou moun fou. Men, nou menm moun Korent yo, gen lè nou gen bon konprann nan Kris la? Nou menm apòt yo, nou fèb. Men, nou menm moun Korent yo, gen lè nou gen fòs kouraj? Nou menm apòt yo, y'ap meprize nou tankou chen. Men, nou menm

11
 moun Korent yo, yo respekte nou nèt ale? Jouk koulye a nou anba grangou, nou swaf dlo, nou

12
 manke rad, y'ap bat nou, n'ap plede mache san nou pa gen kote pou n' rete. N'ap fatigue kò nou travay pou n' ka manje. Lè yo joure nou, nou mande benediksyon pou moun k'ap joure nou; lè yo

13
 pèsekite nou, nou mare kè nou. Lè yo pale nou mal, nou menm se byen nou di pou yo. Jouk

14
 koulye a, y'ap konsidere nou tankou fatra ki nan lemonn, dènye kras moun ki sou latè. ¶ Mwen pa ekri nou tout bagay sa yo paske mwen vle fè nou wont non. Men, se vle mwen vle fè nou wè

15
 rezon, tankou pitit mwen renmen anpil. Menm si nou ta rive gen dimil (10.000) moun k'ap kondi nou nan lavi n'ap mennen ansanm ak Kris la, nou pa ka gen anpil papa. Si n'ap konsidere lavi n'ap mennen ansanm ak Kris la, se mwen menm ki papa nou, paske se mwen menm ki te pote bon nouvèl

16
 la ban nou. Tanpri, pran egzanp sou mwen. 17 ¶ Se pou sa menm m'ap voye Timote, pitit mwen nan Seyè a, ban nou. Se yon pitit mwen renmen anpil, li menm tou li fèb pou mwen. La fè nou chonje tout prensip k'ap dirije lavi m'ap mennen nan Kris la. Se menm prensip sa yo m'ap moutre

18
 toupatou nan tout legliz yo. Gen kèk moun nan mitan nou ki gen tan gonfle lestonmak yo ak

19
 lògèy. Yo mete nan lide yo mwen p'ap vini wè nou. Enben, si Bondye vle, m'ap vin wè nou

anvan lontan. Lè sa a, m'a wè sa bann grandizè sa yo ka fè apre tou sa yo di a. ²⁰ Paske, nan peyi
 kote Bondye wa a, pale anpil pa di anyen, se fè ki tout bagay la. ²¹ Kisa nou pito? Nou ta vle mwen
 vin ak yon baton pou nou, osinon avèk renmen, avèk dousè nan kè mwen pou nou? Libètinaj nan
 legliz la

Chapter 5

¹ ¶ Toupatou y'ap fè kouri bri jan gen dezòd lachè k'ap fèt nan mitan nou. Dezòd la sitèlman
 wòd, ata moun lòt nasyon yo pa ta fè bagay konsa. Y'ap mache di gen yonn nan nou k'ap viv ak
 madanm papa li. ² Apre sa, ki jan nou ka fè gen lògèy ankò? Okontrè, se bagay ki pou ta fè nou
 kriye anpil. Epi, nonm ki fè bagay sa a, se pou n' te wete l' nan mitan nou. ³ Mwen menm, mwen
 pa la avèk nou nan kò m', men mwen la nan lespri m'. Pou tèt pa m', nan non Jezikri, Seyè a, mwen
 deja jije nonm ki fè kalite vye bagay lèd sa a, tankou si m' te la avèk nou. ⁴ Lè n'a reyini ansanm,
 m'a la tou avèk nou nan lespri, pa pouvwa Jezikri, Seyè nou an. ⁵ Se pou n' lage nonm sa a nan
 men Satan pou kò l' ka peri. Se konsa lespri l' ka jwenn delivrans lè jou Seyè a va rive. ⁶ Nanpwen
 anyen la a pou n'ap fè grandizè! Nou konn pawòl la ki di: Se yon ti kras ledven ki fè tout pa t' la
 leve. ⁷ ¶ Wete vye ledven peche sa a pou nou ka tounen yon lòt kalite moun. Lè sa a, n'a tankou
 yon pa t' ki fèk bat, san ledven ladan li. Pou di vre, se sa menm nou ye deja. Paske Delivrans nou,
 se Kris la menm. Yo ofri l' bay Bondye pou nou deja tankou ti mouton yo konn touye lè fèt la. ⁸ Se
 pa pou n' fete fèt la avèk pen ki gen vye ledven an, ledven vis ak mechanste. Men, ann fete l' avèk
 pen san ledven an, pen ki bon pou moun k'ap sèvi Bondye ak tout kè yo. ⁹ ¶ Nan lèt mwen te ekri
 nou an, mwen te mande pou n' pa mele ak moun k'ap viv nan imoralite. ¹⁰ Lè sa a, mwen pa t' gen
 nan lide mande nou pou n' separe ak tout moun sou latè k'ap viv nan dezòd lachè, ki gen lanvi plen
 kè yo, k'ap vòlò osinon k'ap sèvi zidòl. Pou n' ta egzante tout moun sa yo, se kite pou n' ta kite tè
 a nèt. ¹¹ Mwen te vle di pou n' pa mele ak yon nonm ki swadizan frè nou nan Kris la, men k'ap viv
 nan dezòd, ki gen lanvi plen kè l', k'ap sèvi zidòl, k'ap pale moun mal, ki tafyatè, osinon ki vòlò.
 Nou pa dwe menm chita sou menm tab pou n' manje ak yon nonm konsa. ¹² Zafè moun deyò pa
 gade m', mwen pa gen dwa jije yo. Se Bondye ki va jije yo. ¹³ Men, èske se pa devwa nou pou n'
 jije moun ki anndan yo, moun ki ansanm avè n' yo? Tankou yo di l' nan Liv la: Wete mechan an
 nan mitan nou.

Chapter 6

¹ ¶ Lè yonn nan nou gen kont ak yon frè, ki jan l' ka penmèt li al nan tribinal devan moun ki pa
 konn Bondye, pase pou l' mande moun ki fè pati pèp Bondye a regle sa pou li? ² Kouman? Se
 konnen nou pa konnen moun ki fè pati pèp Bondye a gen pou jije moun ki nan lemond yo? Si nou
 gen pou nou jije moun k'ap viv dapre lide ki nan lemond yo, ki jan nou fè pa kapab jije bagay ki
 pi piti pase sa? ³ Se konnen nou pa konnen nou gen pou n' jije ata zanj Bondye yo tou? Se pa ti
 bagay k'ap pase sou latè sa a pou n' pa ta kapab jije. ⁴ Si nou gen kont pou ti bagay konsa, nou pa
 ka al pran moun ki pa anyen nan legliz la pou jije nou. ⁵ Mwen wont pou nou. Konsa, gen lè pa
 gen pesonn nan mitan nou ki gen bon konprann dekwa pou regle kont nou gen yonn ak lòt, ⁶ kifè
 yon frè blije rele yon lòt frè nan tribinal pou fè moun ki tou pa kwè yo jije nou? ⁷ Sa ki pi rèd, si
 nou ka gen pwose yonn ak lòt, sa deja moutre jan nou pa bon menm. Poukisa nou pa asepte soufri
 lenjistis pito? ⁸ Poukisa nou pa kite yo piye nou pito? Okontrè, mwen wè se nou menm k'ap fè lòt
 lenjistis, k'ap piye yo, epi ki moun n'ap fè sa, se pwòp frè nou nan Kris la! ⁹ ¶ Nou konnen byen
 pwòp moun ki mechan p'ap resevwa anyen nan peyi kote Bondye wa a. Pa twonpe tèt nou: moun
 k'ap viv nan dezòd, moun k'ap sèvi zidòl, moun k'ap viv nan adiltè, moun pèvèti k'ap sèvi fanm ak
 fanm, gason ak gason, ¹⁰ moun k'ap vòlò, moun ki gen lanvi plen kè yo, tafyatè, moun k'ap pale
 moun mal, piyajè, yo yonn p'ap resevwa anyen nan peyi kote Bondye wa a. ¹¹ Anpil nan nou, se
 sa menm nou te ye. Men, koulye a Bondye mete nou nan kondisyon pou nou sèvi l'. Gremesi Jezikri,
 Seyè a, li mete nou apa pou li, li fè nou gras pa pouvwa Lespri Bondye nou an. ¹² ¶ Gen kèk moun
 nan nou ki di: Mwen gen dwa fè tout bagay. Wi, ou gen dwa fè tout bagay. Men, tout bagay pa bon
 pou fè. Mwen ka di mwen gen dwa fè tout bagay. Men, mwen p'ap kite anyen fè m' tounen esklav
 li, li te mèt sa l' te ye. ¹³ Nou di tou: Manje fèt pou vant, vant fèt pou manje. Se vre. Men, Bondye
 ap detwi ni yonn ni lòt. Kò moun pa fèt pou dezòd lachè. Se pou Seyè a li ye, Seyè a se pou kò a
 li ye. ¹⁴ Bondye te fè Seyè a leve soti vivan nan lanmò. La fè menm bagay la tou pou nou ak
 pouvwa li. ¹⁵ Nou konnen, pa vre, kò nou se manm kò Kris la. Eske mwen ka pran yon manm kò
 Kris la pou m' fè l' tounen yon manm kò yon fanm k'ap fè jennès? Pa posib! ¹⁶ Eske nou pa konn
 sa: yon nonm ki mete kò l' ak yon fanm ki nan jennès, li fè yon sèl kò avèk li. Se sa Liv la di: yo
 tou de va fè yon sèl kò. ¹⁷ Men, moun ki mete l' avèk Seyè a, li fè yon sèl lespri avèk li. ¹⁸ Kouri
 pou dezòd lachè. Yon moun te mèt fè tout lòt kalite peche, sa pa fè kò l' anyen. Men, moun ki lage

kò l' nan dezòd lachè, li fè peche kont pwòp kò li. ¹⁹ Se konnen nou pa konnen kò nou se tanp
 Sentepri k'ap viv nan kè nou, Sentepri Bondye te ban nou an? Nou pa mèt tèt nou ankò. ²⁰ Bondye
 achte nou kach, li peye chè pou sa. Se poutèt sa, sèvi ak kò nou yon jan pou fè lwanj Bondye.

Chapter 7

¹ ¶ Bon. Koulye a ann wè keksyon nou te mande m' nan lèt nou an: Wi. Yon nonm fè byen si
 l' pa marye. ² Men, sitèlman gen dezòd lachè deyò a, se pou chak gason gen madanm pa yo. Konsa
 tou, se pou chak fanm gen mari pa yo. ³ Se pou gason an fè tout devwa yon mari dwe fè anvè
 madanm li. Konsa tou, se pou fanm lan fè tout devwa yon madanm dwe fè anvè mari li. ⁴ Madanm
 lan pa ka fè sa l' vle ak kò li. Se pou mari a kò madanm lan ye. Konsa tou, yon mari pa ka fè sa l'
 vle ak kò li. Se pou madanm lan kò mari a ye. ⁵ Piga yonn repouse lòt, esepite si nou te antann nou
 sou sa pou yon moman pou nou ka lapriyè. Men apre sa, tounen tounen nou ansanm pou n' viv
 tankou mari ak madanm. Si nou pa fè l' konsa, nou riske pa ka kontwole kò nou ankò. Lè sa a, n'a
 ka tonbe pi fasil nan pèlen Satan. ⁶ Se pa yon lòd m'ap bay lè m' di sa, men se yon pèmision. ⁷ Pou
 di vre, mwen ta pito wè tout moun fè tankou mwen. Men, chak moun gen kado pa yo Bondye ba
 yo. Yon moun resevwa yon kalite kado, yon lòt moun resevwa yon lòt kalite kado. ⁸ Men sa m'ap
 di moun ki pa marye yo ansanm ak vèv yo. Li ta pi bon pou yo rete tankou m', pou kont yo. ⁹ Men,
 si nou pa ka kontwole kò nou, marye marye nou. Pito nou marye pase pou n' kite lanvi boule nou.
¹⁰ ¶ Kanta pou moun marye yo, men lòd mwen ba yo (Sa pa soti nan mwen non, men nan Seyè a
 menm): Lè yon fanm marye, li pa dwe kite ak mari li. ¹¹ Si li rive kite avè l', se pou l' rete pou kont
 li, san l' pa remarye. Pase pou l' ta remarye, pito li tounen ak mari l' ankò. Konsa tou, yon mari pa
 dwe mete madanm li deyò. ¹² Pou lòt yo menm, men sa m'ap di: (Fwa sa a, sa se konsèy pa mwen.
 Sa pa soti nan Seyè a.) Si yon mari ki gen konfyans nan Kris la gen yon fanm ki pa gen konfyans
 nan Kris la, epi si fanm lan dakò pou l' kontinye viv avè l', mari a pa gen dwa mete l' deyò. ¹³ Konsa
 tou, si yon fanm ki gen konfyans nan Kris la gen yon mari ki li menm pa gen konfyans nan Kris
 la, epi si mari a dakò pou l' kontinye viv avè li, li pa fèt pou kite ak mari a. ¹⁴ Mari ki pa gen
 konfyans lan, Bondye asepte l' paske l'ap viv ansanm ak madanm li ki gen konfyans. Konsa tou,
 madanm ki pa gen konfyans lan, Bondye asepte l' paske l'ap viv ansanm ak mari l' ki gen konfyans.
 Si sa pa t' konsa, pitit nou yo ta tankou pitit moun lòt nasyon yo. Men, jan sa ye a, yo menm tou

¹⁵
 Bondye asepte yo. Men, si moun ki pa gen konfyans lan vle kite, li mèt kite. Nan ka sa a, frè a
¹⁶
 osinon sè a pa gen ankenn angajman ankò. Paske, Bondye rele nou pou nou viv ak kè poze. Eske
 ou konnen, ou menm madanm ki gen konfyans lan, si ou p'ap sove mari ou? Eske ou konnen, ou
¹⁷
 menm mari ki gen konfyans lan, si ou p'ap sove madanm ou? ¶ Esepte nan ka sa a, se pou chak
 moun kontinye viv dapre kado Bondye ba yo, jan yo te ye lè Bondye te rele yo a. Se lòd sa a mwen
¹⁸
 bay nan tout legliz yo. Si yon moun te deja sikonsi lè Bondye te rele l' la, li pa bezwen chache
 wete mak sikonsizyon an sou li. Si yon moun pa t' sikonsi lè Bondye te rele l' la, li pa bezwen fè
¹⁹
 yo sikonsi li. Kit ou sikonsi, kit ou pa sikonsi, sa pa konsekan ankò. Sa ki konsekan an se obeyi
²⁰
 pou nou obeyi kòmandman Bondye yo. Se pou chak moun rete jan yo te ye lè Bondye te rele
²¹
 yo a. Si ou te esklav lè Bondye te rele ou la, pa chaje tèt ou pou sa. Men, si chans pou ou ou ka
²²
 vin lib, pwofite chans lan. Yon moun ki esklav, depi Bondye rele l', se yon moun lib sou kont
²³
 Seyè a li ye. Konsa tou, moun ki lib la, depi Bondye rele l', se esklav Kris la li ye. Bondye te
²⁴
 achte nou. Li peye byen chè pou sa. Pa tounen esklav moun. Frè m' yo, se pou chak moun rete
²⁵
 devan Bondye nan kondisyon yo te ye lè Bondye te rele yo a. ¶ Kanta pou moun ki pa marye
 yo, Seyè a pa ban m' ankenn lòd pou yo. M'ap bay lide pa m', epi nou te mèt fè m' konfyans akòz
²⁶
 favè Bondye fè m' nan kè sansib li gen pou mwen an. Jan tan an difisil koulye a, men lide m' fè
²⁷
 nan tèt mwen. Mwen kwè sa bon pou yon nonm rete jan l' ye a. Si l' gen tan gen yon madanm,
²⁸
 li pa bezwen chache separe avè li. Si l' poko marye, li pa bezwen chache yon madanm. Si l' ta
 vle marye tou, li mèt; li p'ap fè ankenn peche. Konsa tou, si yon jenn fi vle marye, li pa fè peche
 pou sa. Men, moun k'ap marye yo pral gen kont traka yo nan lavi a. Mwen pa ta renmen wè sa rive
²⁹
 yo. Frè m' yo, men sa m' vle di: Pa gen anpil tan ki rete ankò. Depi koulye a, se pou moun marye
³⁰
 yo viv tankou si yo pa t' marye. Se pou moun k'ap kriye yo viv tankou moun ki pa gen lapenn.
 Moun ki gen kè kontan yo, se pou yo viv tankou moun ki pa gen kè kontan. Se pou moun k'ap achte
³¹
 yo viv tankou si sa yo achte a pa t' pou yo. Moun ki rich sou latè, se pou yo viv tankou moun
³²
 ki pa gen anyen. Paske, jan sa ye koulye a nan lemond, sa pa la pou lontan ankò. Mwen pa ta
 renmen wè nou gen ankenn tèt chaje. Yon nonm ki pa marye, l'ap okipe zafè Seyè a sèlman. L'ap
³³
 chache fè Seyè a plezi. Yon moun ki marye, l'ap okipe zafè lemond tou paske l'ap chache fè
³⁴
 madanm li plezi. Lè sa a, li vin gen de okipasyon. Konsa tou, yon fanm ki san mari, osinon yon
 jenn fi ki pa marye, sè zafè Seyè a sèlman y'ap okipe, paske yo vle mete tout kò yo, tout nanm yo

apa pou li. Men, sa ki marye yo ap okipe zafè lemond tou, paske y'ap chache fè mari yo plezi. ³⁵ Se pou byen nou m'ap di nou sa. Mwen pa vle mare pye pesonn. Okontrè, mwen vle pou nou tout viv ³⁶ jan nou wè l' pi bon pou nou an, epi pou nou toujou rete fè m' ap sèvi Seyè a san dezanpare. ¶ Ann wè koulye a keksyon de fyanse ki pran desizyon pou yo rete san yo pa marye. Si jenn gason an santi li pa ka kontinye aji jan l' te dwe ak jenn fi a, si l' pa ka kontwole lanvi l' ankò, si l' wè se ³⁷ nesèsè pou yo marye, yo mèt marye jan l' vle l' la. Li pa fè ankenn peche pou sa. Konsa tou, si jenn gason an pran fèm desizyon pou l' pa marye, si l' kapab kontwole volonte l', si li deside nan ³⁸ tèt li se sa pou l' fè, enben, li fè byen si l' pa marye ak jenn fi a. Konsa, jenn gason ki marye ak ³⁹ fyanse l' la fè byen. Men, sa ki pa marye a fè pi byen toujou. ¶ Yon fanm marye gen angajman ak mari l' toutotan mari a vivan. Men, si mari a mouri, li lib marye ak moun li vle, depi se ak yon ⁴⁰ moun ki patizan Kris la. Men, l'ap gen mwens tèt chaje si l' rete jan l' ye a. Sa se lide pa mwen. Epi mwen kwè poutèt pa m' mwen gen Lespri Bondye a avè mwen.

Chapter 8

¹ ¶ Ann wè koulye a keksyon vyann bèt yo ofri bay zidòl. Se vre: nou tout nou gen konesans, jan nou di a. Sèlman, konesans fè moun gonfle ak lògèy. Men, se renmen ki pou fè nou grandi nan ² konfyans nan Kris la tout bon. Moun ki mete nan tèt li li konn kichòy, li poko konnen jan l' dwe ³ konnen an. Men, moun ki renmen Bondye, Bondye konnen li. ¶ ⁴ Bon, men keksyon an: èske nou ka manje vyann bèt yo ofri bay zidòl? Nou konnen byen pwòp zidòl yo pa reprezante anyen ⁵ ki vre sou latè. Se yon sèl Bondye a ki genyen. Nou te mèt tande gen lòt swadizan bondye nan syèl la ak sou latè a (sa pa manke: gen anpil bagay ki pase pou bondye, gen anpil yo rele mèt vre), ⁶ pou nou menm, se yon sèl Bondye a ki genyen: se Papa a ki kreye tout bagay epi se pou li n'ap viv. Pou nou menm, se yon sèl Mèt ki genyen: se Jezikri, se nan li tout bagay soti, se li k'ap fè nou ⁷ viv tou. ¶ Men, se pa tout moun ki gen konesans sa a. Gen moun ki te sitèlman abitye ak zidòl yo, jouk koulye a, lè y'ap manje yon vyann, yo konprann se vyann bèt ki te ofri bay zidòl y'ap manje. Konsyans yo fèb. Yo santi yo mete tèt yo nan kondisyon yo pa ka sèvi Bondye ak manje a. ⁸ Men, manje pa ka fè nou vin pi pre Bondye. Nou pa pèdi anyen lè nou pa manje yon kalite manje, ⁹ ni nou pa genyen anyen lè nou manje yon lòt kalite. Men, fè atansyon pou jan nou santi nou lib ¹⁰ fè sa nou vle a sa pa fè yon lòt frè ki fèb nan konfyans li tonbe nan peche. Si yon moun ki gen konsyans li fèb wè ou, ou menm ki gen konesans, ap manje nan yon kay zidòl, sa ka ankouraje l'

11
 pou l' manje vyann bèt yo ofri bay zidòl. Nonm sa a ki fèb nan konfyans li a, Kris la te mouri
 pou sove l' tou, men li va peri akòz konesans ou a. 12
 Lè sa a, se pa sèlman kont frè ou yo ou fè
 peche, se pa sèlman konsyans yo ki fèb ou blese, men se kont Kris la menm ou fè peche. 13
 Pase pou yon manje fè frè m' tonbe nan peche, mwen pito pa janm manje vyann ankò pou m' pa fè frè
 m' tonbe nan peche.

Chapter 9

1 ¶ Eske m' pa lib? Eske m' pa yon apòt? Eske m' pa t' wè Jezikri, Seyè nou an? Eske nou menm,
 se pa rezilta travay mwen nan sèvis Seyè a nou ye? 2 Menm si pou lòt moun mwen pa apòt, pou
 nou menm se apòt mwen ye. Paske, jan n'ap viv ansanm ak Seyè a, nou se prèv se apòt mwen ye.
 3 ¶ Lè moun ap kritike m', men ki jan mwen defann tèt mwen: 4 Mwen mande yo: Eske m' pa gen
 dwa pou yo ban m' manje, pou yo ban m' bwè pou travay mwen? 5 Eske m' pa gen dwa fè tankou
 tout lòt apòt yo, tankou frè Seyè yo ansanm ak Sefas, pou m' mennen yon sè ki ta madanm mwen
 kote m' prale? 6 Eske se Banabas avè m' ase ki pou fè lòt travay pou n' ka viv? 7 Nou janm tande
 yon sòlda ap fè sèvis nan lame, pou se li menm ankò ki peye tèt li? Ou ankò, èske yon moun pa
 gen dwa manje rezen nan pye rezen li te plante a? Osinon, èske yon gadò mouton pa gen dwa bwè
 lèt mouton l'ap okipe yo? 8 Pa konprann se sèlman nan zafè lèzòm nou jwenn egzanp konsa. Lalwa
 9 Moyiz la di menm bagay la tou. Men sa ki ekri nan Liv lalwa a: Pa bay bèf k'ap rale kabwèt la
 baboukèt. Se lapenn Bondye gen konsa pou bèf yo atò? 10 Nou pa kwè se pou nou l'ap pale pito?
 Men wi. Se pou nou pawòl la te ekri. Se pou moun k'ap bat tè a fè travay la ak espwa y'ap ba li pa
 l' nan rekòt la. Se menm jan an tou pou moun k'ap bat pwa a. 11 Nou simen grenn ki soti nan Lespri
 Bondye a nan kè nou. Eske se yon zafè sa ta ye si nou rekòlte nan byen materyèl nou yo? 12 Si lòt
 moun gen dwa sa a sou nou, èske nou menm nou pa gen plis dwa pase yo? Men nou pa t' pwofite
 dwa sa a. Okontrè, nou soufri tout bagay pou n' pa antrave mach bon nouvèl ki pale sou Kris la.
 13
 Nou konnen sa byen pwòp: tout moun k'ap travay pou Bondye nan tanp lan, manje yo sou kont
 tanp lan. Tout moun k'ap ofri bèt pou touye sou lòtèl la resevwa pa yo nan vyann bèt yo touye a.
 14
 Konsa tou, Seyè a bay lòd pou tout moun k'ap anonse bon nouvèl la fèt pou yo viv sou kont
 15
 travay bon nouvèl la. ¶ Men, poutèt pa m', mwen pa janm pwofite dwa sa a. Se pa pou fè ankenn
 reklamasyon non plis kifè m'ap ekri sa. Mwen ta pito mouri pase pou m' ta kite moun wete lwanj

¹⁶ sa a nan men mwen! Tande byen, se pa yon lwanj pou mwen dèske m'ap anonse bon nouvèl la.
¹⁷ Sa se yon obligasyon yo fè mwen. Malè pou mwen si m' pa anonse bon nouvèl la! Si se mwen
 ki te chwazi tèt mwen pou fè travay sa a, mwen ta ka gen espwa resevwa lajan pou sa. Men, si se
¹⁸ fòse yo fòse m' fè travay sa a, lè sa a se yon reskonsablite Bondye ban mwen. Ki jan yo peye
 m' atò? Tout plezi m' se pou m' anonse bon nouvèl la gratis, san m' pa egzije anyen nan sa yo dwe
¹⁹ m' pou travay m'ap fè a lè m'ap anonse bon nouvèl la. ¶ Mwen lib, mwen pa esklav pesonn.
 Men, mwen fè tèt mwen esklav tout moun pou m' ka mennen mezi m' kapab vin jwenn Kris la.
²⁰ Lè m'ap travay nan mitan moun ki jwif, mwen viv tankou yon jwif pou m' ka mennen yo vin
 jwenn Kris la. Mwen pa anba lalwa Moyiz la. Men, mwen viv tankou si m' te anba l' lè m'ap travay
²¹ nan mitan moun ki anba lalwa a, pou m' ka mennen yo vin jwenn Kris la. Konsa tou, lè m' nan
 mitan moun ki pa konnen lalwa Moyiz la, mwen viv tankou yo san m' pa okipe lalwa a, pou m' ka
 mennen yo vin jwenn Kris la. Sa pa vle di pou sa mwen pa obeyi lalwa Bondye a. Paske mwen
²² menm, mwen anba lalwa Kris la. Avèk moun ki fèb nan konfyans yo, m'ap viv tankou si mwen
 menm tou mwen te fèb, pou m' sa mennen yo vini. Konsa konsa, mwen fè m' tout jan ak tout moun
²³ pou m' ka sove kèk nan yo pa tout mwayen posib. Mwen fè tou sa poutèt bon nouvèl la, pou m'
²⁴ ka resevwa pa m' nan benediksyon l' yo. ¶ Lè y'ap fè konkou pou wè kilès ki ka kouri pi vit, tout
 moun gen pou kouri. Men, se yon sèl ki gen premye pri a. Nou konn sa, pa vre? Enben, nou menm
²⁵ tou, kouri pou n' ka genyen kous la. Moun k'ap fè egzèsis pou al nan konkou, yo bay kò yo yon
 disiplen sevè pou yo ka byen pare. Yo fè tou sa pou yo ka genyen yon kouwòn ki p'ap konsève
 lontan. Men nou menm, n'ap bay kò nou yon disiplen sevè pou n' ka genyen yon kouwòn k'ap la
²⁶ pou tout tan. Se poutèt sa, m'ap kouri, men je m' pa soti sou kote pou m' rive a. Mwen tankou
²⁷ yon nonm k'ap tire koutpwen, men mwen pa tankou moun k'ap goumen ak lonbraj li. Mwen aji
 di ak kò m', mwen kenbe l' kout, pou mwen menm yo pa voye m' jete apre mwen fin moutre lòt yo
 sa pou yo fè.

Chapter 10

¹ ¶ Frè m' yo, mwen vle fè nou chonje sa ki te rive zansèt nou yo lè yo t'ap swiv Moyiz. Yo tout
 te anba pwoteksyon nwaj la, yo tout te pase nan mitan Lanmè Wouj la. ² Antan yo te nan nwaj la
 ak nan lanmè a ansanm ak Moyiz, yo tout te resevwa yon batèm. ³ Yo tout te manje menm manje

Lespri Bondye te ba yo a.⁴ Yo tout te bwè menm bwason Lespri Bondye te ba yo a. Se konsa yo t'ap bwè dlo ki t'ap soti nan gwo wòch Lespri Bondye te ba yo epi ki t'ap mache ansanm ak yo a: Wòch sa a, se te Kris la menm.⁵ Atousa, anpil ladan yo pa t' fè Bondye plezi. Se poutèt sa yo tonbe, yo mouri nan dezè a.⁶ ¶ Tout bagay sa yo rive pou sa sèvi nou leson pou nou pa kite move lanvi kaye nan kè nou tankou yo te genyen l' lan.⁷ Piga nou sèvi zidòl tankou kèk ladan yo te fè l', jan sa ekri nan Liv la: Pèp la chita, yo manje, yo bwè. Lèfini, yo leve pran plezi yo.⁸ Pa lage kò nou nan dezòd lachè tankou kèk ladan yo te fè li. Lè sa a, venntwamil (23.000) tonbe, yo mouri yon sèl jou.⁹ Piga nou seye fè plan ak Bondye tankou kèk ladan yo te fè li. Sa lakòz sèpan te mòde yo, yo tout yo mouri.¹⁰ Pa bougonnen tankou kèk ladan yo te bougonnen. Lè sa a, zanj lanmò a te touye yo tout.¹¹ Tout bagay sa yo rive pou sa sèvi lòt yo egzanp. Yo ekri yo nan Liv la pou sa sèvi nou avètisman. Paske, pou nou menm k'ap viv koulye a, pa rete lontan ankò anvan pou lafen an rive.¹² Se sak fè, moun ki kwè li byen kanpe a, pito li veye kò l' pou l' pa tonbe.¹³ Tout tantasyon nou jwenn sou chemen nou, se menm kalite tantasyon tout moun jwenn sou chemen yo tou. Men, Bondye li menm toujou kenbe pawòl li: li p'ap kite yo tante nou yon jan ki depase sa nou ka sipòte.¹⁴ Men, lè nou va anba tantasyon an, la ban nou fòs pou nou ka sipòte l', pou nou ka soti anba li. Se poutèt sa, zanmi m' yo, pa mele nan sèvis zidòl yo.¹⁵ ¶ M'ap pale ak nou tankou ak moun ki gen bon konprann: jije nou menm sa m'ap di a.¹⁶ Gode benediksyon n'ap bwè a, lè nou fin di Bondye mèsè pou li, èske se pa san Kris la n'ap separe bay tout moun? Pen nou kase a, lè n'ap manje l', èske se pa kò Kris la n'ap separe bay tout moun?¹⁷ Se yon sèl pen ki genyen, pa vre? Nou menm tou, nou te mèt anpil, nou fè yon sèl kò, paske se yon sèl pen an nou separe bay tout moun.¹⁸ Ann konsidere jan sa fèt kay moun ras Izrayèl yo: moun ki manje vyann bèt ki te ofri pou touye pou Bondye sou lòtèl la, li vin an komenyon ak Bondye ki mèt lòtèl la.¹⁹ Kisa m' vle di la a? Gen lè zidòl y'ap sèvi a, osinon vyann bèt yo ofri pou touye ba li a gen yon valè?²⁰ Non! Men sa m' vle di: ofrann bèt moun lòt nasyon yo ap fè a, se pa pou Bondye, se pou denmon yo fè li. Mwen pa ta vle nou vin an komenyon ak denmon yo.²¹ Nou pa kapab ap bwè nan gode Seyè a anmenmtan pou n'ap bwè nan gode denmon yo tou. Nou pa kapab ap manje sou menm tab avèk Seyè a anmenmtan pou n'ap manje sou menm tab ak denmon yo.²² Osinon, èske nou vle fè Seyè a fè jalouzi? Eske nou kwè nou gen plis fòs pase li?²³ ¶ Nou gen dwa fè nenpòt bagay. Se sa yo di, epi se vre. Men, tout bagay pa bon pou fèt. Nou gen dwa fè tout bagay, men se pa tout bagay k'ap

fè nou grandi nan konfyans nan Bondye. ²⁴ Piga pesonn chache sa ki bon pou tèt pa l' ase. Se pou l' chache enterè lòt yo tou. ²⁵ Nou lib manje tou sa yo vann nan mache vyann san nou pa bezwen mande anyen. Konsa, konsyans nou p'ap twouble. ²⁶ Paske, jan sa ekri nan Liv la: Se pou Mèt la tè a ye ansanm ak tou sa ki ladan l'. ²⁷ Si yon moun ki pa gen konfyans nan Kris la envite nou nan yon fèt, si nou asepte ale, se pou n' manje tou sa yo mete devan nou, san nou pa bezwen mande anyen. Konsa, konsyans pesonn p'ap twouble. ²⁸ Men, si yon moun di nou vyann sa a se vyann bèt yo te ofri bay zidòl, lè sa a, pa goute l' poutèt moun ki fè ou remak la, pou konsyans pesonn pa boulvèse. ²⁹ Mwen pa di sa pou konsyans pa nou non, men pou konsyans lòt moun lan. Men, yon moun va mande m': Ki jan konsyans yon lòt moun ka sèvi m' antrav nan sa m' gen dwa fè? ³⁰ Si mwen di Bondye mèsè pou sa m'ap manje a, ki jan pou yo ta ka pale m' mal pou yon manje konsa? ³¹ Se sak fè, kit n'ap manje, kit n'ap bwè, nenpòt kisa n'ap fè, fè l' pou sa sèvi yon lwanj pou Bondye. ³² Se pou nou viv yon jan pou nou pa bay ni jwif yo, ni moun ki pa jwif yo, ni legliz Bondye a okazyon tonbe nan peche. ³³ Se pou nou fè tankou m': nan tou sa m'ap fè, m'ap fè mwayen posib pou m' fè tout moun plezi; mwen p'ap chache avantaj pa m', men avantaj tout moun, pou tout moun ka sove.

Chapter 11

¹ ¶ Se pou nou swiv egzanp mwen, menm jan mwen menm mwen swiv egzanp Kris la. ² Mwen fè nou konpliman pou jan nou toujou chonje m', pou jan nou kenbe tout bagay mwen te moutre nou. ³ Men, mwen vle nou konprann sa byen: Kris la se chèf tout gason, gason se chèf fanm. Bondye se chèf Kris la. ⁴ Si yon gason kite chapo l' nan tèt li lè l'ap lapriyè osinon lè l'ap bay yon mesaj ki soti nan Bondye, li derespekte Kris la. ⁵ Men, si yon fanm pa mete anyen sou tèt li lè l'ap lapriyè osinon lè l'ap bay yon mesaj ki soti nan Bondye, li derespekte mari li. Se tankou si se te yon fanm ki te gen tèt li kale. ⁶ Si yon fanm pa kouvri tèt li, li ta mèt tou koupe cheve l' tou. Enben, si se yon wont pou yon fanm koupe cheve l' ou ankò pou l' kale tèt li, se pou l' kouvri tèt li tou. ⁷ Gason an pa bezwen kouvri tèt li, paske se pòtre Bondye li ye. Tankou nan yon glas, li fè wè bèl pouvwa Bondye a. Men, fanm lan menm se pouvwa gason an li fè wè. ⁸ Paske, se pa t' avèk moso nan kò

yon fanm Bondye te kreye gason, se avèk moso nan kò yon gason li te fè fanm. ⁹ Se pa pou fanm
 lan Bondye te kreye gason an, men se pou gason an Bondye te kreye fanm lan. ¹⁰ Se poutèt sa,
 akòz zanj Bondye yo, fanm lan dwe pote yon mak sou tèt li pou moutre li soumèt anba otorite mari
 li. ¹¹ Men, nan lavi n'ap mennen ansanm ak Seyè a, fanm bezwen sèvis gason, gason bezwen sèvis
 fanm. ¹² Paske, menm jan se avèk moso kò yon gason Bondye te kreye fanm, konsa tou se nan
 vant fanm gason soti. Men, tout bagay soti nan Bondye. ¹³ Dapre nou, èske se lizay sa pou yon
 fanm pa gen anyen sou tèt li lè l'ap lapriyè Bondye? ¹⁴ Se pa natirèl pou yon gason gen cheve long.
 Sa se yon wont. ¹⁵ Men, se bèl bagay pou yon fanm gen cheve long. Bondye ba l' cheve long li yo
 pou sèvi l' tankou yon vwal sou tèt li. ¹⁶ Si yon moun vle pouse diskisyon sa a pi lwen, mwen
 menm se tou sa mwen gen pou m' di li: ni nou menm, ni lòt legliz Bondye yo, nou pa gen lòt koutim
 nou swiv lè nou nan sèvis. ¹⁷ ¶ Pou sa m'ap di nou koulye a, mwen pa fè nou konpliman menm,
 paske lè nou reyini nou fè tèt nou plis tò pase nou fè tèt nou byen. ¹⁸ Pou kòmanse, mwen tande
 lè nou sanble pou sèvis la, nou fè ti pil gwo pil. Mwen konnen sa pa fin manti nèt. ¹⁹ (Ap toujou
 gen divizyon nan mitan nou pou yo ka rekonèt moun ki kwè tout bon yo ak moun ki pa kwè yo.)
²⁰ Lè nou reyini ansanm, gen lè se pa manje Seyè a nou vin manje. ²¹ Paske, lè nou chita bò tab
 la, chak moun ap prese manje manje pa li. Lè konsa, yon pati rete grangou, yon lòt menm gen tan
 sou sitèlman li bwè. ²² Mwen te kwè nou gen lakay nou pou n' manje, pou n' bwè? Gen lè se respè
 nou manke konsa pou legliz Bondye a? Osinon, èske se wont nou vle fè moun ki pa gen anyen yo
 wont? Kisa nou ta vle mwen di nou sou sa? Nou ta vle m' fè nou konpliman? O non! Nou tou wè
 mwen pa kapab fè nou konpliman pou sa! ²³ ¶ Paske, men sa Seyè a te fè m' konnen, se sa menm
 mwen te moutre nou tou: Jou lannwit yo te trayi l' la, Seyè Jezi te pran pen, ²⁴ lè li fin di Bondye
 mèsli li kase l', epi li di: Sa a se kò m', se pou nou li ye. Se pou nou fè sa pou nou ka chonje mwen.
²⁵ Konsa tou, apre yo fin manje, li pran gode diven an, li di yo: Gode sa a se nouvo kontra Bondye
 fè avè nou nan san mwen. Se pou nou fè sa chak fwa n'ap bwè ladan l' pou nou ka chonje mwen.
²⁶ Se konsa, chak fwa n'ap manje pen sa a, chak fwa n'ap bwè nan gode sa a, se lanmò Kris la n'ap
 anonse jouk jou Seyè a gen pou l' vini an. ²⁷ Se poutèt sa, si yon moun manje pen Seyè a, osinon
 li bwè nan gode Seyè a yon jan ki pa konvenab, moun sa a koupab, paske li peche ni kont kò Seyè
 a ni kont san li an. ²⁸ Se pou chak moun egzaminen tèt yo byen anvan. Se konsa y'a mèt manje
 pen sa a, y'a mèt bwè nan gode sa a. ²⁹ Si yon moun manje pen sa a, si l' bwè nan gode sa a san li

pa rekonèt rapò pen an ansanm ak diven an gen avèk kò Seyè a, se rale l'ap rale yon jijman sou tèt li lè l'ap manje pen an ak lè l'ap bwè nan gode a. ³⁰ Se sak fè gen anpil moun malad konsa nan mitan nou, anpil moun k'ap soufri feblès, san konte sa ki mouri deja. ³¹ Si nou te egzaminen tèt nou byen anvan, nou pa ta tonbe anba jijman Bondye a. ³² Men, Seyè a jije nou, li peni nou konsa pou li sa pa kondannen nou ansanm ak moun ki nan lemonn yo. ³³ Se sak fè, frè m' yo, lè nou reyini ansanm pou manje manje Seyè a, se pou yonn tann lòt. ³⁴ Si yon moun grangou, se pou l' manje lakay li, pou l' pa rale jijman Bondye sou nou lè nou reyini. Pou lòt keksyon yo, m'a regle sa lè m'a rive lakay nou.

Chapter 12

¹ ¶ Ann wè koulye a keksyon kado Sentespri bay la. Frè m' yo, mwen ta vle nou konnen sa ki vre sou keksyon kado sa yo. ² Nou chonje, lè nou pa t' ankò gen konfyans, nou te kite yo mennen nou jan yo vle devan zidòl ki pa t' kapab pale. ³ Se poutèt sa mwen vle nou konn sa byen: Si Sentespri Bondye ap dirije lavi yon moun, li p'ap janm ka di: Madichon pou Jezi. Konsa tou, si Sentespri Bondye p'ap dirije lavi yon moun, li p'ap ka di Jezi se Seyè a. ⁴ Gen divès kalite don Sentespri a bay. Men, se menm Lespri Bondye a ki bay tout. ⁵ Gen divès jan moun ka sèvi Bondye, men se yon sèl Seyè a n'ap sèvi. ⁶ Gen divès kalite travay nan sèvis la, men se yon sèl Bondye ki bay chak moun travay pa yo nan tout sèvis k'ap fèt. ⁷ Lespri Bondye a fè travay li yon jan nan lavi chak moun, men li fè l' pou byen tout moun. ⁸ Lespri a bay yon moun don pou l' pale avèk bon konprann. Menm Lespri a bay yon lòt moun don pou l' pale avèk anpil konesans. ⁹ Se menm Lespri a ki bay yon moun lafwa, se li menm tou ki bay yon lòt don pou l' geri moun malad. ¹⁰ Lespri a bay yon moun don pou fè mirak, li bay yon lòt don pou l' bay mesaj ki soti nan Bondye. Li bay yon lòt ankò don pou l' rekonèt travay move lespri yo ak travay Lespri Bondye a. Li bay yon moun don pou l' ka pale langaj, li bay yon lòt don pou l' ka esplike sa pawòl langaj la vle di. ¹¹ Men, se yon sèl Lespri a ki fè tou sa. Li bay chak moun yon kado diferan jan li vle. ¹² ¶ Konsa, Kris la se tankou yon kò ki gen anpil manm. Kò a toujou yon sèl kò, ou mèt wè li gen anpil manm. ¹³ Se sak fè, nou menm, kit nou jwif, kit nou pa jwif, kit nou esklav, kit nou pa esklav, nou tout nou te resevwa batèm

pou n' te ka fè yon sèl kò ansanm, pa pouvwa yon sèl Lespri a. Nou tout nou te bwè nan yon sèl
 Lespri a. ¹⁴ Se pa yon sèl manm ki fè yon kò. Se anpil manm ki fè yon kò. ¹⁵ Si pye te ka di: Paske
 se pa yon men mwen ye, mwen p'ap fè pati kò a, se pa sa ki pou ta fè l' pa fè pati kò a vre. ¹⁶ Si
 zòrèy te ka di: Paske se pa yon grenn je mwen ye, mwen p'ap fè pati kò a, se pa sa ki pou ta fè l'
 pa fè pati kò a vre. ¹⁷ Si tout kò a te yon grenn je, ki jan l' ta ka tandè? Si l' te yon zòrèy, ki jan l'
 ta ka pran sant? ¹⁸ Men, Bondye mete divès manm nan plas yo nan kò a, jan l' vle. ¹⁹ Pa ta gen
 yon kò si tout te yon sèl kalite manm. ²⁰ Konsa, gen anpil manm, men gen yon sèl kò. ²¹ Nan
 kondisyon sa a, grenn je a pa ka di men an: Mwen pa bezwen ou. Tèt la pa ka di pye yo: Mwen pa
 bezwen nou. ²² Okontrè, manm ki parèt pi fèb nan kò nou, se yo ki pi nesèsè. ²³ Manm nou pa
 bay gwo konsiderasyon nan kò nou, nou pran swen yo plis pase lòt yo. Manm ki pa konvenab pou
 nou pale sou yo an sosyete, se yo menm ki resevwa yon swen apa. ²⁴ Manm nan kò nou ki pi
 prezantab, yo pa bezwen tou sa. Bondye ranje kò a yon jan pou manm ki pa jwenn anpil
 konsiderasyon an se li ki jwenn plis swen pase lòt yo. ²⁵ Konsa, pa gen divizyon nan kò a. Men
 tout manm yo yonn pran swen lòt menm jan an. ²⁶ Si yon manm nan kò a ap souffri, tout lòt yo ap
 souffri avè l' tou. Si yon manm resevwa lwanj, tout lòt yo kontan avèk li. ²⁷ ¶ Nou tout, nou se kò
 Kris la: nou chak se yon manm nan kò sa a. ²⁸ Se konsa, nou wè nan legliz la Bondye mete apòt
 yo an premye, pwofèt yo an dezyèm, dirèktè yo an twazyèm. Apre sa, nou jwenn moun k'ap fè
 mirak, moun ki gen don pou geri moun malad, moun k'ap ede lòt, moun k'ap dirije, moun ki gen
 don pou pale divès lang. ²⁹ Men, tout moun pa apòt, tout moun pa pwofèt, tout moun pa dirèktè,
 tout moun pa gen don pou fè mirak. ³⁰ Tout moun pa gen don pou geri moun malad. Tout moun
 pa gen don pou pale langaj, osinon pou esplike sans pawòl langaj la. ³¹ Nan fon kè nou, se pou
 nou chache gen don ki pi enpòtan yo. Men, mwen pral moutre nou yon jan ki bon nèt. Pa gen pase
 li.

Chapter 13

¹ ¶ Menm si mwen ta konn pale tout kalite lang moun pale ansanm ak lang zanj yo pale, si m'
 pa gen renmen nan kè m', bèl pawòl mwen yo pa pi plis pase yon tanbou k'ap fè anpil bwi, pase
 yon klòch k'ap sonnen. ² Menm si mwen ta gen don pou m' fè konnen mesaj ki soti nan Bondye,
 menm si mwen ta gen tout kalite konesans, menm si mwen ta konprann tout ti sekre ki cache, menm

si mwen ta gen konfyans anpil nan Bondye pou m' fè mòn yo chanje plas, si m' pa gen renmen nan kè m', mwen pa anyen. ³ Menm si mwen ta bay tout byen mwen yo, menm si mwen ta bay kò m' pou yo boule l', si m' pa gen renmen nan kè m', sa p'ap sèvi m' anyen. ¶ ⁴ Moun ki gen renmen nan kè li gen pasyans, li gen bon kè, li p'ap anvye sò lòt moun. Li p'ap fè grandizè, li p'ap gonfle ak lògèy. ⁵ Moun ki gen renmen nan kè li p'ap fè anyen ki pou fè moun wont, li p'ap chache avantaj pa l', li p'ap fè kòlè, li p'ap kenbe moun nan kè. ⁶ Moun ki gen renmen nan kè li p'ap pran plezi l' nan sa ki mal, li pran plezi l' nan sa ki vre. ⁷ Moun ki gen renmen nan kè li sipòte tout bagay: nan nenpòt ki sitiasyon, li toujou gen konfyans nan Bondye, li p'ap janm pèdi espwa, l'ap toujou moutre jan li gen pasyans. ⁸ ¶ renmen pa janm fini. Pouvwa pou bay mesaj ki soti nan men Bondye a pa la pou tout tan. Pouvwa pou pale langaj gen pou fini yon lè, konesans gen pou disparèt. ⁹ Paske, sa nou konnen, nou pa fin konnen l' nèt. Ata mesaj ki soti nan Bondye yo, nou pa fin bay yo nèt. ¹⁰ Men, lè sa ki bon nèt la va vini, sa ki poko fin bon an gen pou l' disparèt. ¹¹ Lè m' te timoun, mwen te pale tankou timoun, mwen te konprann tankou timoun, mwen te fè tèt mwen travay tankou timoun. Men, koulye a mwen fin gran, mwen kite tou sa timoun te konn fè. ¹² Konsa tou, sa nou wè koulye a, se tankou yon pòtre n'ap gade yon jan twoub twoub nan yon glas. Men, pita nou pral wè fasafas. Koulye a nou pa fin konn tout bagay. Men, pita n'a konnen nèt ale menm jan Bondye ¹³ konnen nou an. Koulye a se twa bagay sa yo ki toujou la: se konfyans, se espwa, se renmen. Men, nan twa bagay sa yo, se renmen ki pi gran.

Chapter 14

¹ ¶ Chache gen renmen nan kè nou. Men, se pou nou chache gen kado Sentespri bay yo tou. Chache gen don pou fè konnen mesaj ki soti nan Bondye yo. ² Moun k'ap pale langaj, se ak Bondye y'ap pale. Yo p'ap pale ak moun. Pesonn pa ka konprann yo. Avèk pouvwa Sentespri a, yo di yon bann verite ki rete kache pou tout moun. ³ Okontrè, moun k'ap bay mesaj ki soti nan Bondye, se ak moun y'ap pale pou fè yo grandi nan konfyans yo nan Bondye, pou ankouraje yo, pou konsole yo. ⁴ Moun k'ap pale langaj, se konfyans pa l' ase l'ap bay fòs. Men, moun k'ap bay mesaj ki soti nan Bondye yo, se konfyans tout legliz la l'ap bay fòs. ⁵ Mwen dakò pou nou tout pale langaj. Men, mwen ta pito wè n'ap bay mesaj ki soti nan Bondye. Moun k'ap bay mesaj konsa, yo fè plis byen pou legliz la pase moun k'ap pale langaj, esepite si gen yon lòt moun ki ka esplike sa y'ap di a. Lè

sa a, se tout legliz la k'ap grandi nan konfyans tou. ⁶ ¶ M'ap mande nou kichòy, frè m' yo: Si m' vin lakay nou, kisa pou sa fè pou nou si m' pale langaj? Sa p'ap sèvi nou anyen. Men, si m' ban nou yon revelasyon, yon konesans, yon mesaj ki soti nan Bondye, osinon si mwen moutre nou kichòy,

⁷ se sa k'ap sèvi nou. Annou konsidere bagay ki pa gen lavi nan yo tankou enstriman mizik yo konsa. Ann pran yon fif, osinon yon gita. Ki jan yon moun ka fè konnen ki moso mizik k'ap jwe si

⁸ son yo pa klè? Si moun k'ap kònen klewon an pa fè son yo soti klè, ki sòlda ki pral pare kò l' pou

⁹ li al goumen? Konsa tou, ki moun ki pral konprann sa w'ap di a si mesaj w'ap bay an langaj la pa

¹⁰ klè? Se pou van w'ap pale! Moun pale divès kalite lang sou latè, men pa gen yonn ki pa gen

¹¹ sans. Men, si m' pa konprann yon mo nan lang y'ap pale avè m' lan, moun k'ap pale lang sa a,

¹² l'ap yon etranje pou mwen, mwen menm tou m'ap yon etranje pou li. Konsa tou pou nou. N'ap chache gen kado ki soti nan Lespri Bondye a. Dakò. Men, anvan tout bagay, sa pou n' chache an

¹³ kantite a se don ki pou ede legliz la grandi nan konfyans. Se sak fè, lè yon moun ap pale langaj,

¹⁴ se pou l' mande Bondye don pou l' ka esplike sans mo yo. Lè m'ap lapriyè nan langaj, se bonnanj

¹⁵ mwen k'ap lapriyè, men lespri mwen pa travay. ¶ Kisa m' pral fè koulye a? Mwen pral lapriyè avèk bonnanj mwen, men mwen pral lapriyè avèk lespri mwen tou. Mwen pral chante avèk bonnanj

¹⁶ mwen, men mwen pral chante avèk lespri mwen tou. Konsa tou, si w'ap di Bondye mèsì nan langaj, ki jan pou moun k'ap koute ou nan asanble a ka reponn "amèn" lè ou fin fè lapriyè a, si li

¹⁷ pa konprann sa w'ap di a? Mwen dakò avèk nou, nou te ka fè yon bèl lapriyè pou di Bondye

¹⁸ mèsì, men konfyans lòt moun yo pa pwofite. Mwen di Bondye mèsì dèske mwen pale langaj

¹⁹ pase nou tout. Men, nan mitan legliz la, mwen pito di senk ti mo tout moun ka konprann pou

²⁰ lòt yo ka grandi nan konfyans yo tou pase pou m' di yon pakèt mo nan langaj. Frè m' yo, pa aji tankou timoun lè n'ap fè lespri nou travay. Nou mèt aji an timoun annegad sa ki mal. Men, aji an

²¹ granmoun lè n'ap fè lespri nou travay. ¶ Men sa ki ekri nan Liv lalwa a: M'a pale avèk pèp la nan bouch moun lòt peyi, nan bouch moun ki pale lòt lang. Men malgre sa, pèp mwen an p'ap koute

²² mwen. Se Bondye menm ki di sa. Se sak fè, lè yon moun gen don pou l' pale langaj, sa se yon siy pou moun ki pa gen konfyans nan Kris la. Se pa yon siy pou moun ki gen konfyans yo. Okontrè, lè yon moun gen don pou l' bay mesaj ki soti nan Bondye, sa se yon siy pou moun ki gen konfyans

²³ yo, men pa pou moun ki pa gen konfyans nan Kris la. Lè tout legliz la sanble, sipoze tout moun ap pale langaj, si yon moun deyò osinon yon moun ki pa kwè vin antre kote nou ye a, èske li p'ap

²⁴ di se yon bann moun fou nou ye? Men, si tout moun ap bay mesaj ki soti nan Bondye, lè sa a

yon moun ki pa kwè, osinon yon moun deyò, si l' vin rive, sa la tandè a va fè l' wè aklè se nan peche
l'ap viv. Tou sa l'ap tandè a pral jije li. ²⁵ Tout lide li te gen kache nan kè l' ap parèt deyò. Lè sa a,
la bese tèt li, la adore Bondye, la di konsa: Wi, se vre. Bondye nan mitan nou. ²⁶ ¶ Pou fini, kisa
m' vle di menm, frè m' yo? Lè nou sanble pou sèvis Bondye a yon moun va gen yon kantik pou l'
chante, yon lòt va gen kichòy pou l' moutre nou, yon lòt va gen yon revelasyon pou l' bay, yon lòt
ankò va gen yon mesaj an langaj, yon lòt menm va bay esplikasyon mesaj la: Se pou tou sa k'ap
fèt ede legliz la grandì nan lafwa. ²⁷ Si gen moun k'ap pale langaj, fòk gen de ou twa pa plis, epi
yonn apre lòt. Se pou gen yon moun tou k'ap esplike sa y'ap di a. ²⁸ Si pa gen moun ki pou bay
esplikasyon, se pou moun k'ap pale langaj yo tou reziyen yo pe bouch yo nan asanble a. Y'a pale
pou kont yo nan kè yo ak Bondye. ²⁹ Pou moun k'ap bay mesaj ki soti nan Bondye yo, se de ou
twa ase ki pou pran lapawòl. Tout lòt yo va jije sa y'ap di a. ³⁰ Men, si yon moun nan asanble a
resevwa yon revelasyon nan men Bondye, se pou moun k'ap pale a pe bouch li. ³¹ Nou tout kapab
bay mesaj ki soti nan Bondye, yonn apre lòt. Konsa, tout moun va aprann kichòy, tout moun va
ankouraje. ³² Moun k'ap bay mesaj ki soti nan Bondye yo, se yo menm ki pou kontwole don yo
genyen an. ³³ Paske, Bondye pa rele nou pou nou viv nan fè dezòd, men li rele nou pou nou viv
ak kè poze. Tankou sa fèt nan tout legliz pèp Bondye a, ³⁴ ¶ fanm pa fèt pou pale nan asanble yo.
Yo pa ba yo dwa sa a. Jan nou jwenn sa ekri nan lalwa Bondye a: se pou yo soumèt yo. ³⁵ Si yo
bezwen mande kichòy, y'a mande mari yo lè yo lakay yo. Non. Sa pa fèt pou fanm yo pale nan
asanble a. ³⁶ ¶ Eske se lakay nou pawòl Bondye a soti? Osinon, èske se nou menm ase ki te resevwa
li? ³⁷ Si yon moun kwè se Bondye ki voye l', osinon si li kwè li resevwa kèk don ki soti nan
Sentepri Bondye a, se pou l' rekonèt sa m' ekri a se yon lòd ki soti nan Seyè a. ³⁸ Men, si li pa
rekonèt sa, nou pa bezwen okipe l' ankò. ³⁹ Konsa, frè m' yo, anvan tout bagay, se pou nou chache
don pou nou ka bay mesaj ki soti nan Bondye. Pa anpeche moun pale langaj. ⁴⁰ Men, tout bagay
fèt pou fèt avèk respè, avèk disiplen.

Chapter 15

¹ ¶ Frè m' yo, mwen vle fè nou chonje bon nouvèl mwen te anonse nou an, bon nouvèl nou te resevwa a. Se ladan l' tou nou kanpe byen fèm. ² Se li menm k'ap delivre nou tou, depi nou kenbe l' jan mwen te anonse l' ban nou an. Si se pa konsa, se ta pou gremesi nou ta mete konfyans nou nan Bondye. ³ Bagay mwen te moutre nou, se sa mwen menm mwen te resevwa. Se yo menm ki pi konsekan. Men yo: Kris te mouri pou peche nou, dapre sa ki ekri nan Liv la. ⁴ Yo te antere l', li te leve soti vivan sou twa jou apre l' te fin mouri, jan sa te ekri nan Liv la tou. ⁵ Li te fè Pyè wè li. Lèfini li te fè douz apòt yo wè l' tou. ⁶ Apre sa, li te fè pou pi piti senksan (500) frè wè l' anmenmtan. Gen ladan yo ki mouri deja, men pifò ladan yo ap viv jouk koulye a toujou. ⁷ Yon lòt fwa li te parèt ankò, li te fè Jak wè li. Apre sa, li te fè tout lòt apòt yo wè l' ankò. ⁸ Apre tout moun sa yo, li te fè m' wè l' tou, mwen menm ki tou sanble yon pitit ki fèt anvan tèm. ⁹ Se mwen menm ki pi piti nan apòt yo. Mwen pa menm merite pou yo ta rele m' apòt, pou jan m' te pèsekite legliz Bondye a. ¹⁰ Se favè Bondye fè m' lan ki fè m' sa m' ye a. Men, li pa t' gaspiye favè l' lè li te fè sa pou mwen. Okontrè, mwen travay pase tout lòt apòt yo. Men, pou di vre, se pa mwen menm ki fè travay sa yo, se favè Bondye fè m' lan ki fè sa konsa. ¹¹ Se sak fè, kit se mwen, kit se lòt apòt yo, sa m' sot di a, se sa nou tout n'ap fè moun konnen, se pa nan lòt bagay nou te kwè. ¹² ¶ Men sa n'ap fè nou konnen an: Kris la te leve soti vivan nan lanmò. Bon. Kouman fè gen lòt moun nan mitan nou k'ap di moun mouri yo p'ap leve ankò? ¹³ Si moun mouri yo p'ap leve ankò, Kris la tou pa te leve soti vivan nan lanmò. ¹⁴ Si Kris la pa te leve soti vivan nan lanmò, mwen menm mwen pa ta gen anyen pou m' anonse nou, epi nou menm, nou pa ta gen anyen pou nou kwè. ¹⁵ Sa ki pi rèd ankò, yo ta mèl di n'ap fè manti sou Bondye lè nou di Bondye te fè Kris la leve soti vivan nan lanmò. Paske sa pa ta vre, si moun mouri pa leve. ¹⁶ Si moun mouri pa ka leve, Kris la tou pa te leve soti vivan nan lanmò. ¹⁷ Si Kris la pa te leve soti vivan nan lanmò, sa nou te kwè a pa ta vo anyen, paske nou ta toujou ap viv nan peche nou yo. ¹⁸ Konsa tou, tout moun sa yo ki te kwè nan Kris la epi ki mouri deja, yo tout se moun ki pèdi nèt tou. ¹⁹ Si espwa nou gen nan Kris la se sèlman pou lavi sa a li bon, nou se moun ki pi malere ki ta gen sou latè. ²⁰ ¶ Men, se pa konsa bagay la ye. Okontrè. Kris la te leve soti vivan nan lanmò. Konsa li bay garanti tout moun ki mouri gen pou leve vivan ankò. ²¹ Paske menm jan se yon sèl moun ki fè lanmò antre sou latè, menm jan an tou se yon sèl moun

ki fè moun ki mouri yo kapab leve vivan ankò. ²² Menm jan tout moun gen pou mouri paske yo
 fè yonn ak Adan, konsa tou, tout moun ki fè yonn ak Kris la ap gen lavi ankò. ²³ Men, chak moun
 va leve soti nan lanmò nan tan pa yo: Kris la an premye anvan tout moun, apre sa, moun ki pou
 Kris la, se va tou pa yo pou yo leve soti vivan lè Kris la va tounen ankò. ²⁴ Apre sa, se va lafen.
 Lè sa a, Kris la menm pral kraze tout chèf, tout otorite ak tout pouvwa. Lè l' fini, l'ap renmèt
 gouvènman peyi kote li wa a nan men Bondye Papa a. ²⁵ Paske Kris la gen pou l' gouvènen tankou
 yon wa jouk lè Bondye va fin genyen batay la nèt sou tout lènmi l' yo, pou l' mete yo anba pye li.
²⁶ Nan tout lènmi l' yo, se lanmò k'ap kraze an dènye. ²⁷ Se sa ki ekri nan Liv la: Bondye mete tout
 bagay anba pye li. Men, lè yo di: tout bagay, nou tou konprann Bondye pa ladan l', paske se li menm
 k'ap mete tout bagay sou lòd Kris la. ²⁸ Apre tout bagay va vin sou lòd Kris la, li menm, Pitit la,
 li va soumèt tèt li devan Bondye ki va mete tout bagay anba pye li. Konsa, Bondye li menm va
 donminen nèt sou tout bagay. ²⁹ Koulye a ann konsidere moun ki resevwa batèm pou moun ki
 mouri deja yo: Dèyè kisa yo te ye menm lè yo te fè sa? Si se vre moun mouri pa janm leve jan yo
 di a, poukisa pou yo te resevwa batèm pou moun ki mouri deja yo? ³⁰ Epi mwen menm atò, poukisa
 tout tan m'ap riske lavi mwen konsa? ³¹ Frè m' yo, se chak jou m'ap manke mouri. Si m' di nou sa,
 se paske nou fè mwen kontan anpil jan nou viv ansanm nan Jezikri, Seyè nou an. ³² Si se te pou
 rezon lèzòm mete nan tèt yo mwen te goumen yon jan tankou ak bèt fewòs isit nan lavil Efèz la,
 ki avantaj mwen jwenn nan sa? Yon fwa moun ki mouri p'ap janm leve vivan ankò, ann fè tankou
 pwovèb la di: Ann manje, ann bwè, paske denmen n'ap mouri. ³³ Piga nou twonpe tèt nou: move
 zanmi gate bon levasyon. ³⁴ Reprann bon sans nou. Sispann fè peche. M'ap di nou sa pou m' fè
 nou manyè wont, paske gen anpil nan nou ki pa konn Bondye menm. ³⁵ ¶ Men, yon moun va
 mande m': Ki jan moun ki mouri yo pral leve soti vivan nan lanmò? Ki kalite kò yo va genyen?
³⁶ Ou pa konprann anyen, monchè! Lè ou simen yon grenn nan tè, li pa ka leve si l' pa mouri anvan.
³⁷ Sa ou simen an, se yon grenn li ye, se ka yon grenn mayi, se ka yon lòt kalite grenn. Ou pa janm
 plante plant lan menm. ³⁸ Bondye fè chak grenn pouse jan li vle. Li bay chak plant fòm ki ale ak
 yo. ³⁹ Tout vyann pa menm vyann. Moun gen yon kalite vyann, bèt kat pa t' gen yon lòt kalite
 vyann, zwazo gen yon lòt kalite vyann, pwason yo gen yon lòt kalite vyann ankò. ⁴⁰ Konsa tou,
 gen kò ki fèt pou syèl la, gen kò ki fèt pou tè a. Men, yo chak bèl nan jan pa yo: Kò ki fèt pou syèl
 la gen yon bèlte ki pa menm ak bèlte kò ki fèt pou tè a. ⁴¹ Limyè solèy la gen bèlte pa l', lalin lan

gen bèl te pa l', zetwal yo gen bèl te pa yo tou. Menm nan zetwal yo, yo chak gen bèl te pa yo. ⁴² Se
 menm jan an sa pral ye lè moun ki mouri yo va leve soti vivan nan lanmò. Lè yo te anere kò a, se
 te yon kò ki te kapab pouri. Men, lè kò a va leve soti vivan nan lanmò, l'ap yon kò ki p'ap kapab
 pouri. ⁴³ Lè yo te anere l', li te yon kò tou lèd, tou fèb. Men, lè li va leve vivan ankò, l'ap bèl, l'ap
 gen fòs. ⁴⁴ Lè yo te anere l', li te yon kò ki fèt ak labou. Men, lè la leve vivan, l'ap tounen yon kò
 ki sòti nan Lespri. Si gen yon kò ki fèt ak labou, fòk gen yon kò ki soti nan Lespri tou. ⁴⁵ Se nan
 sans sa a yo te ekri: Bondye te kreye premye nonm lan, Adan, ak yon kò ki gen lavi. Men, dènye
 Adan an, se yon lespri ki bay lavi. ⁴⁶ Se pa kò ki soti nan Lespri a ki te vin an premye. Se kò ki
 fèt ak labou a ki te la anvan, kò ki soti nan Lespri a vin apre. ⁴⁷ Premye Adan an, Bondye te fè l'
 ak pousyè tè. Men, dezyèm Adan an, li menm se nan syèl li soti. ⁴⁸ Tout moun ki pou latè, yo
 sanble ak moun ki te fèt ak tè a. Tout moun ki pou syèl la, yo sanble ak moun ki soti nan syèl la.
⁴⁹ Menm jan nou te sanble ak moun ki te fèt ak tè a, konsa tou nou gen pou n' sanble ak moun ki
 soti nan syèl la. ⁵⁰ Men sa mwen vle di, frè m' yo: Tou sa ki fèt ak vyann epi ak san pa gen plas
 pou yo nan Peyi kote Bondye wa a. Sa ki fèt pou pouri a pa ka resevwa pouvwa pou l' pa janm
 pouri. ⁵¹ ¶ M'ap devwale nou yon sekre: Se pa nou tout k'ap gen tan mouri. Men, nou tout nou gen
 pou n' chanje fòm nan yon ti kadè, ⁵² anvan nou bat je nou, lè dènye kout klewon an va kònen.
 Paske, lè klewon an va kònen, moun ki te mouri deja yo va leve soti vivan pou yo pa janm mouri
 ankò. Apre sa, nou tout nou va chanje fòm. ⁵³ Paske, moun ki gen kò ki fèt pou pouri a, yo gen
 pou yo resevwa yon lòt kò ki p'ap ka pouri. Moun ki gen kò k'ap mouri a, yo gen pou yo resevwa
 yon lòt kò ki p'ap janm mouri. ⁵⁴ Lè moun ki gen kò ki fèt pou pouri a va resevwa kò ki p'ap ka
 pouri ankò a, lè moun ki gen kò k'ap mouri a va resevwa kò ki pa ka mouri a, lè sa a, pawòl ki ekri
 nan Liv la va rive vre: Pa gen lanmò ankò, nou genyen batay la nèt. ⁵⁵ Lanmò! Kote batay ou
 genyen an? Lanmò! Kote pouvwa ou te gen pou fè nou lapenn lan? ⁵⁶ Se peche ki bay lanmò
 pouvwa pou fè nou lapenn. Se lalwa a ki bay peche a tout fòs li. ⁵⁷ Men, ann di Bondye mèsè, li
 menm ki fè nou genyen batay la sou lanmò gremesi Jezikri, Seyè nou an! ⁵⁸ ¶ Konsa, frè m' yo,
 kenbe fèm, pa brannen. Se pou n' toujou pi cho nan travay Seyè a, paske nou konnen travay n'ap
 fè pandan n'ap viv ansanm ak Seyè a p'ap janm pèdi.

Chapter 16

¹ ¶ Kanta lajan nou t'ap ranmase pou ede pèp Bondye ki lavil Jerizalèm lan, se pou nou fè tankou
² mwen te di legliz nan peyi Galasi yo fè. Chak premye jou nan senmenn lan, se pou chak moun
mete yon ti lajan apa dapre sa yo te fè. Y'a sere l' lakay yo. Konsa, nou p'ap bezwen tann se lè m'
³ rive lakay nou pou n'ap chache lajan an. Lè m'ava rive, n'a chwazi kèk moun pou m' voye pote
kado nou fè a ale lavil Jerizalèm ak yon lèt rekòmmandasyon. ⁴ Si sa merite pou m' ale tou, y'a fè
vwayaj la ansanm avè mwen. ⁵ ¶ M'a vin lakay nou lè m'a fin pase nan peyi Masedwan. Paske, fòk
⁶ mwen pase la anvan. Mwen ka rete pase kèk jou lakay nou. Mwen ka menm pase tout sezon fredri
a avè nou. Apre sa, n'a ka ede m' ale kote m'a gen pou mwen ale a. ⁷ Fwa sa a, mwen pa vle wè
nou anpasan konsa. Mwen ta renmen rete pase kèk tan ak nou, si Bondye vle. ⁸ Men, mwen fè lide
⁹ rete isit nan lavil Efèz jouk pou fèt Lapannkòt. Paske nan lavil sa a, mwen jwenn yon bon okazyon
¹⁰ pou m' fè travay mwen, atout gen anpil moun ki pa vle wè mwen. ¶ Si Timote rive bò kote nou
ye a, n'a fè yon jan pou l' santi l' lakay li nan mitan nou, paske se menm jan avè mwen li travay pou
¹¹ Seyè a. Pa kite pesonn meprize li. Se pou nou ede l' pou li ka kontinye vwayaj li ak kè poze,
¹² pou l' ka tounen vin jwenn mwen. Paske, n'ap tann li ak frè yo. Kanta frè Apolòs, mwen pa t'
manke ankouraje l' pou l' te vin lakay nou. Men, sanble lide li pa sou sa koulye a. Enben, la fè
¹³ vwayaj la lè la kapab. ¶ Pa bliye kò nou. Kenbe fèm nan konfyans nou. Mete kouraj sou nou.
¹⁴ Pa moutre nou fèb. Se pou nou fè tout bagay avèk renmen nan kè nou. ¹⁵ Frè m' yo, nou konnen
Estefanas ak tout fanmi li. Nou konnen se yo menm premye moun nan peyi Lakayi ki te mete
¹⁶ konfyans yo nan Kris la. Tout moun nan fanmi an te ofri tèt yo pou sèvi pèp Bondye a. Enben,
moun konsa ansanm ak moun nou wè k'ap travay ak yo epi k'ap sèvi ak yo, nou mèt kite yo mennen
¹⁷ nou. Mwen pa manke kontan pou Estefanas, Fòtenatis, Akaykis ki vin wè mwen. Yo fè m' santi
se tankou si se nou menm menm ki te la avèk mwen. ¹⁸ Yo remoute kouraj mwen, menm jan yo
te remoute kouraj nou. Moun konsa, se pou nou konnen ki jan pou nou konsidere yo. ¹⁹ ¶ Legliz
ki nan peyi Lazi yo voye bonjou pou nou. Akilas ak Prisil ansanm ak legliz ki reyini lakay yo a
²⁰ voye yon pakèt bonjou pou nou nan Seyè a. Tout frè ki isit yo voye bonjou pou nou tou. Nou
menm, bò pa nou, yonn di lòt bonjou pou mwen, yonn bo lòt tankou moun k'ap viv pou Bondye.
²¹ M'ap ekri nou sa ak men pa m': Pòl voye bonjou pou nou tout. ²² Si yon moun pa renmen Seyè

a, madichon pou li. Seyè nou, vini non!²³ Se pou benediksyon Jezi Seyè a toujou la avè nou.
²⁴ Mwen renmen nou tout nan Jezikri.

2 Corinthians

Chapter 1

¹ ¶ Mwen menm Pòl, yon moun Bondye menm te deside rele pou sèvi apòt Jezikri, ansanm ak frè nou Timote, m'ap ekri nou tout ki nan legliz Bondye a nan lavil Korent ansanm ak tout pèp Bondye a ki nan tout peyi Lakayi. ² Nou mande Bondye, papa nou, ansanm ak Jezikri, Seyè nou an, pou yo ban nou benediksyon ak kè poze. ³ ¶ Ann fè lwanj Bondye ki papa Jezikri, Seyè nou an, Papa ki gen kè sansib la, Bondye ki toujou la pou ban nou ankourajman an. ⁴ Li ankouraje nou nan tout lapenn nou, konsa nou menm tou nou ka ankouraje moun ki nan tout kalite lapenn lè n'a ba yo menm ankourajman nou te resevwa nan men li an. ⁵ Menm jan nou soufri ak Kris la nan tout soufrans li yo, konsa tou, gremesi Kris la, nou resevwa yon gwo ankourajman. ⁶ Si mwen menm mwen nan lapenn, se pou nou menm, moun Korent yo, nou ka resevwa ankourajman pou nou ka delivre. Si mwen menm mwen resevwa ankourajman, se pou nou menm nou ka ankouraje, pou nou ka resevwa fòs kouraj pou sipòte avèk pasyans soufrans mwen menm m'ap sipòte a. ⁷ ¶ Se konsa, mwen gen fèm espwa sa a pou nou, moun Korent, paske mwen konn sa byen, menm jan nou soufri ansanm avè m' nan tout lapenn mwen yo, konsa tou n'a resevwa pa nou nan ankourajman Bondye ap ban mwen an. ⁸ Mwen ta renmen, frè m' yo, nou konnen anba ki kalite soufrans mwen te ye nan pwovens Lazi a. Sa te rèd nèt. Mwen pa t' kapab sipòte ankò. Mwen te menm kwè mwen pa t'ap soti vivan. ⁹ Mwen te santi yo te dèyè pou yo te touye mwen. Tou sa rive m' pou m' te aprann pa mete konfyans mwen sou fòs kouraj pa mwen, men pou m' te ka mete tout konfyans mwen nan Bondye ki fè moun mouri leve. ¹⁰ Se li menm ki delivre m' anba tout gwo danje lanmò sa yo. Se li menm k'ap toujou la pou delivre m'. Wi, mwen gen espwa l'ap toujou delivre mwen, ¹¹ depi nou menm moun Korent nou ban m' ankourajman, nou lapriyè pou mwen. Se konsa Bondye va tande tout lapriyè sa yo n'ap fè pou mwen, la ban mwen benediksyon l', anpil moun va di l' mèsì pou mwen. ¹² ¶ Men rezon ki fè m' kontan ak tèt mwen anpil konsa: Konsyans mwen pa repwoche m' anyen pou jan m' te mennen tèt mwen byen nan mitan tout moun, ak kè ouvè, san ipokrizi, sitou

nan mitan nou menm, moun Korent, jan Bondye vle l' la. Paske, sa se travay favè Bondye a, se pa
 t' bon konprann lèzòm ki t'ap dirije mwen. ¹³ Nan tout lèt mwen ekri, mwen pa janm di lòt bagay
 pase sa nou ka li ak sa nou ka konprann. Mwen gen espwa nou ka rive konprann nèt ¹⁴ sa nou poko
 fin konprann koulye a: konsa, lè jou Seyè Jezi a va rive, nou ka kontan m' anpil, menm jan mwen
 menm m'a kontan nou tou. ¹⁵ ¶ Mwen te sitèlman gen konfyans sou pwen sa a, mwen te kòmanse
 fè lide ale lakay nou pou nou te ka resevwa benediksyon Bondye a de fwa. ¹⁶ Men wi, mwen te fè
 lide pase lakay nou sou wout mwen lè mwen t'aprale Masedwan, epi pou nou te resevwa m' ankò
 lè m'ap tounen soti la. Nou ta ka ede m' lè sa a kontinye vwayaj mwen pou peyi Jide. ¹⁷ Lè m' te
 fè lide sa a, èske mwen te twò prese? Lè m'ap pran yon desizyon, èske se avantaj pa m' m'ap chache
 tankou tout moun kifè m' ta gen de pawòl? ¹⁸ Mwen pran Bondye ki gen yon sèl pawòl la pou
 temwen, pwomès mwen te fè nou an, se pa t' yon wi ak yon non anmenmtan. ¹⁹ Paske, mwen
 menm, Silas ak Timote, nou pa t' anonse nou Jezikri, Pitit Bondye a, tankou yon moun ki gen de
 pawòl. Okontrè, se wi ase Jezikri di pou Bondye. ²⁰ Paske se li menm ki fè nou wè tout pwomès
 Bondye yo se verite. Se poutèt sa tou, gremesi Jezikri, nou ka di amèn lè n'ap fè lwanj Bondye.
²¹
 Se Bondye menm ki kenbe m' fèm, ansanm ak nou tout, nan lavi n'ap mennen nan Kris la. Se li
 menm ki mete nou apa pou li, ²² li menm ki make nou ak letanp li, ki mete Sentespri nan kè nou
 tankou yon garanti pou tou sa li sere pou nou. ²³ Mwen pran Bondye pou temwen sou lavi m': se
 pou m' te ka menaje nou kifè mwen chanje lide, mwen pa rive Korent. ²⁴ Mwen p'ap chache fòse
 nou kwè anyen, paske nou deja kanpe fèm nan lafwa. Men, mwen ta renmen travay ansanm ak nou
 pou fè kè nou kontan.

Chapter 2

¹ ¶ Se konsa, mwen pran desizyon pou m' pa vin lakay nou pou m' pa fè nou lapenn ankò. ² Si
 pou m' ta fè nou lapenn, ki moun ki pou ta fè kè m' kontan ankò? Eske se ta moun mwen ta fè
 lapenn yo? ³ Se poutèt sa, mwen ekri nou jan m' te fè l' la: mwen pa t' vle pou lè m' rive lakay nou,
 moun ki pou ta fè kè m' kontan yo, se yo menm ki pou ta fè m' lapenn. Paske, mwen gen fèm
 konviksyon sa a, lè m' kontan, nou tout nou kontan tou. ⁴ Wi. Lè sa a, kè m' te boulvèse anpil, kè
 m' te sere, se ak dlo nan je mwen te ekri nou. Mwen pa t' fè sa pou fè nou lapenn non. Se vle mwen
 te vle fè nou konnen jan m' renmen nou anpil. ⁵ ¶ Si yon moun fè yon lòt lapenn, se pa mwen li fè

lapenn, men se nou tout, moun Korent, li fè lapenn. Pou m' pa al twò lwen, pito m' di se kèk nan nou li fè lapenn. ⁶ Pifò nan nou gen tan peni nonm sa a, se kont li. ⁷ Koulye a se pou nou padonnen l', se pou nou ba li ankourajman pito, pou yon twò gwo lapenn pa kraze l' nèt. ⁸ Se poutèt sa, m'ap mande nou pou nou aji avè l' yon jan pou fè l' wè jan nou renmen li. ⁹ Se pou sa menm mwen te ekri nou: mwen te vle sonde nou pou m' te konnen si nou toujou soti pou nou koute tou sa m' di nou. ¹⁰ Enben, lè nou menm nou padonnen yon moun pou mal li fè a, mwen menm tou mwen padonnen li. Lè mwen menm mwen padonnen li, pou di vre, mwen pa gen anyen pou m' padonnen non, men, lè m' fè sa, mwen fè l' pou nou devan Kris la, ¹¹ pou pa bay Satan okenn avantaj sou nou. Paske nou konnen byen pwòp sa Satan gen nan tèt li. ¹² ¶ Lè mwen te lavil Twoas pou m' te anonse Bon Nouvèl ki pale sou Kris la, Seyè a te ban m' yon bèl okazyon pou m' te travay la. ¹³ Men, kè m' te sere anpil, paske mwen pa t' jwenn Tit, frè nou an. Se poutèt sa mwen di moun Twoas yo orevwa, epi m' pati pou Masedwan. ¹⁴ Ann di Bondye mèsi! Paske l'ap toujou mennen nou ansanm ak Kris la pou fete batay li genyen an. Li pran nou, li sèvi ak nou tankou yon odè k'ap gaye bon sant li toupatou, pou n' ka fè tout moun konnen Kris la. ¹⁵ Nou tankou yon bon lansan Kris la ap boule pou Bondye. Sant li rive nan men tout moun, kit y'ap sove, kit y'ap peri. ¹⁶ Pou moun k'ap peri yo, se yon sant lanmò k'ap touye yo. Men, pou moun k'ap sove yo, se yon sant lavi k'ap ba yo lavi. Ki moun ki kapab fè yon travay konsa? ¹⁷ Nou pa tankou anpil moun k'ap defòme pawòl Bondye a. Okontrè, nou pale pawòl la jan li ye a devan Bondye, tankou moun k'ap viv nan Kris la, paske se Bondye menm ki voye nou.

Chapter 3

¹ ¶ Eske sa vle di m'ap kòmanse fè lwanj tèt mwen ankò? Osinon, èske mwen ta bezwen yon lèt rekòmandasyon pou nou tankou kèk lòt ki pòte lèt rekòmandasyon ban nou? Ou ankò èske se pou m' ta mande nou pòte yon lèt konsa ban mwen? ² Se nou menm, moun Korent, ki lèt rekòmandasyon mwen, yon lèt ki ekri nan kè m' pou tout moun ki konn li ka li li. ³ Wi, se bagay ki klè, nou menm moun Korent, nou se yon lèt Kris la menm te ekri ban m' pote. Li pa t' ekri l' ak lank, sou moso wòch plat, men sou kè moun ak Lespri Bondye ki vivan an. ⁴ M'ap di nou tou sa, paske, gremesi Jezikri, mwen gen konfyans nan Bondye. ⁵ Konprann byen, mwen pa t' janm gen pretansyon pou m' ta kapab fè bagay konsa ak pwòp kouraj mwen. Sa mwen fè a, se Bondye ki fè

⁶ m' ka fè li. ¶ Se li menm ki fè m' ka sèvi anba nouvo kontra a. Kontra sa a pa t' fèt dapre lalwa ki ekri a, men dapre pouvwa Lespri Bondye a. Lalwa ki ekri a bay lanmò, men Lespri Bondye a bay

⁷ lavi. Yo te make lalwa a lèt pa lèt sou de moso wòch plat. Pouvwa Bondye a te parèt aklè lè li t'ap bay li. Lè sa a, figi Moyiz te sitèlman klere, moun pèp Izrayèl yo pa t' ka fiske je yo sou li. Men, figi Moyiz la pa t'ap rete klere tout tan. Si travay lalwa a, ki te la pou bay lanmò, te parèt

⁸ konsa, nou pa bezwen mande si pouvwa ki pou parèt lè Lespri Bondye a ap travay p'ap pi gwo

⁹ toujou. Travay ki t'ap fè yo kondannen moun lan te gen pouvwa, se vre! Nou pa bezwen mande

¹⁰ ki kalite pouvwa ki dwe genyen nan travay k'ap fèt pou Bondye fè moun gras. Nou ka menm di pouvwa ki te parèt aklè nan tan lontan an pa anyen devan pouvwa k'ap parèt aklè koulye a,

¹¹ sitèlman li depase l' anpil. Si sa ki te la pou yon tan an te gen pouvwa, nou pa bezwen mande

¹² ki pouvwa sa ki la pou tout tan an genyen. ¶ Se paske mwen gen tout espwa sa a kifè kè m' poze

¹³ konsa. Mwen pa tankou Moyiz: klate ki te nan figi l' la te la pou yon tan. Se sa ki fè Moyiz te kouri kouvri tout figi l' ak yon moso twal pou moun pèp Izrayèl yo pa t' wè lè klate a disparèt.

¹⁴ Men, yo pa t' ka konprann anyen. Jouk koulye a, lè y'ap li liv ansyen kontra yo, vwal la toujou

¹⁵ la sou lespri yo. Lè yon moun mete konfyans yo nan Kris la, se lè sa a vwal la disparèt. Jòdi a

¹⁶ ankò, chak fwa y'ap li liv Moyiz yo, vwal la kouvri lespri yo. Men, tankou sa ekri nan liv la: Lè

¹⁷ yon moun tounen vin jwenn Seyè a, vwal la soti. Kilès Seyè y'ap pale la a? Se Lespri Bondye

¹⁸ a. Kote Lespri Bondye a ye, la gen libète. Nou tout, nou pa kouvri figi nou; nou tankou yon glas k'ap fè moun wè pouvwa Bondye a: konsa chak jou n'ap transfòme, pouvwa li ap grandi nan nou, jouk tan n'a rive sanble nèt ak Seyè a. Sa se travay Seyè a. Lespri Bondye.

Chapter 4

¹ ¶ Konsa, se Bondye menm, nan kè sansib li gen pou mwen an, ki te renmèt mwen travay sa

² a pou m' fè. Se poutèt sa, mwen pa janm pèdi kouraj. Mwen voye tout bagay lèd lèzòm ap fè an kachèt yo jete. Mwen pa fè okenn riz. Mwen pa chanje anyen nan pawòl Bondye a. Okontrè, mwen fè tout moun konnen verite a jan l' ye a. Se konsa bagay sa yo rekòmande mwen devan Bondye

³ bay tout moun ki gen konsyans. Si malgre sa, bon nouvèl m'ap anonse a pa klè toujou, li pa klè

⁴ pou moun k'ap peri yo. Yo pa kwè paske sa yo pran pou Bondye nan lemond lan bouche lespri

yo. Li enpoze yo wè limyè bon nouvèl la. Se bon nouvèl sa a ki fè nou konnen pouvwa Kris la, li menm ki pòtre Bondye.⁵ Konprann sa byen, se pa tèt pa m' m'ap fè nou konnen: men se Jezikri, Seyè a, m'ap fè nou konnen. Mwen menm mwen di nou se sèvi m'ap sèvi nou poutèt Jezi.⁶ Bondye ki te di: Mwen vle pou limyè a klere nan mitan fènwa a, se li menm tou ki fè limyè li a klere nan kè nou pou li fè nou konnen pouvwa li ki yon limyè ki klere byen bèl nan figi Kris la.⁷ Men, nou tout k'ap pote richès Bondye sa a nan kè nou, nou tankou veso ki fèt an tè. Tou sa se pou tout moun ka wè kokenn chenn pouvwa sa a pa soti nan nou, men se nan Bondye li soti.⁸ ¶ Mwen jwenn tout kalite fikilte; men, mwen pa janm kwense nèt. Mwen konn rive nan sitiyasyon mwen pa konn ni sa pou m' fè, ni sa pou m' di. Men, mwen pa janm pèdi espwa.⁹ Yo pèsekite m', men Bondye pa janm lage mwen. Mwen pran gwo so, men mwen pa rete atè a.¹⁰ Se konsa, kote m' pase mwen pote soufrans lanmò Jezi a nan kò mwen, pou tout moun ka wè pouvwa lavi Jezi a ap travay nan kò m' tou.¹¹ Nan lavi m', se tout tan m'ap pase toupre lanmò poutèt Jezi, pou pouvwa lavi Jezi a ka parèt aklè nan kò mwen ki la pou mouri.¹² Konsa, lanmò ap travay nan mwen, men se lavi k'ap travay nan nou menm moun Korent.¹³ Men sa ki ekri nan Liv la: Mwen te gen konfyans, se poutèt sa mwen te pale. Mwen menm tou, mwen gen menm konfyans sa a, se poutèt sa m'ap pale.¹⁴ Mwen konnen Bondye ki te fè Seyè Jezi leve soti vivan nan lanmò a, li gen pou l' fè m' tounen vivan ankò ansanm ak Jezi, li gen pou l' fè m' parèt ansanm ak nou devan li.¹⁵ Se poutèt nou menm, moun Korent, kifè tout bagay sa yo rive, paske fòk gen plis moun toujou k'ap resevwa favè Bondye a pou sa gen plis moun tou k'ap lapriyè pou di Bondye mèsi pou pouvwa li.¹⁶ Se sak fè mwen pa janm dekouraje. Menm si kò m' ap bese chak jou, lespri m' ap vin pi fèm chak jou tou.¹⁷ Sa m'ap sibi koulye a, se yon ti soufrans ki la pou pase. Men, soufrans sa a ap pare pou mwen yon bèl pouvwa k'ap la pou tout tan, pouvwa ki depase ti soufrans sa a anpil.¹⁸ Paske, mwen p'ap konsidere bagay moun wè, men bagay moun pa wè. Sa moun wè, se bagay ki pa la pou lontan, men sa moun pa wè, se bagay ki la pou tout tan.

Chapter 5

¹ ¶ Wi, nou konnen lè kò nou gen sou latè a va demoli tankou yon kay, Bondye sere yon lòt kay nan syèl la, yon kay byen solid k'ap la pou tout tan. Se li menm menm k'ap bati kay sa a pou nou.
² Koulye a m'ap plenn anpil, sitèlman m' anvè antre nan kay mwen gen nan syèl la.³ Konsa, lè m'a

⁴ antre ladan l', yo p'ap jwenn mwen toutouni. Wi, toutotan m'ap viv nan kò mwen gen sou latè a, m'ap plenn tankou moun ki anba yon chay. Sa pa vle di mwen ta renmen wete kò sa a sou mwen. Men, mwen ta renmen pito mete kò mwen gen nan syèl la sou mwen. Se konsa, tou sa ki gen pou

⁵ mouri nan nou pral disparèt nan lavi. Se Bondye menm ki pare nou pou chanjman sa a. Li ban

⁶ nou Sentespri l' tankou yon garanti pou tout byen li sere pou nou yo. Se pou sa, nou toujou gen

⁷ gwo kouraj. Nou konnen toutotan nou nan kò sa a nou lwen Seyè a toujou. Si n'ap mache, se pa

⁸ paske nou wè tout bagay klè, men se paske nou gen konfyans nan Kris la. Nou gen gwo kouraj

⁹ epi nou ta pito kite kò sa a pou n' al rete toupren Seyè a. Men, anvan tout bagay, nou vle fè Seyè

¹⁰ a plezi, kit nou nan kò sa a, kit nou kite li. Paske, nou tout nou gen pou n' konparèt devan Kris

¹¹ la pou li ka jije nou. Lè sa a, chak moun va resevwa sa ki pou li dapre byen osinon dapre mal li te

¹² fè antan l' te nan kò sa a. Mwen konnen sa ki rele gen krentif pou Bondye, se poutèt sa m'ap

¹³ chache mennen lèzòm vin kwè nan sa m'ap di. Bondye pou tèt pa l' gen tan konnen m' nèt. Mwen

¹⁴ ta swete nou menm nan fon kè nou, nou konnen m' tou. ¶ Pa mete nan lide nou mwen vin pale

¹⁵ nou byen sou tèt mwen ankò. Men, mwen ta renmen ban nou okazyon pou nou kontan m' anpil,

¹⁶ pou nou ka jwenn repons pou nou bay moun ki pa gen bon kalite nan kè yo tout bon, men k'ap fè

¹⁷ grandizè pou bagay ki gen bèl aparans. Si jan yo di l' la mwen fou, se pou Bondye mwen fou.

¹⁸ Men, si mwen gen tout bon sans mwen, se pou nou menm, moun Korent, mwen konsa. Paske,

¹⁹ se kalite renmen Kris la gen pou nou an k'ap dirije m': mwen gen konviksyon sa a, si yon sèl moun

²⁰ te mouri pou tout lòt yo, sa vle di tout lòt yo mouri ansanm avè li. Li mouri pou tout moun.

²¹ Konsa, moun k'ap viv yo p'ap viv pou tèt pa yo ankò, men y'ap viv pou moun ki te mouri epi ki te

²² leve soti vivan nan lanmò pou yo a. ¶ Se poutèt sa, depi koulye a, mwen pa konsidere pesonn

²³ sou laparans, tankou lèzòm fè l' la. Si yon lè mwen te konsidere Kris la sou laparans tankou lèzòm

²⁴ fè l' la, koulye a mwen pa konnen l' nan jan sa a ankò. Si yon moun ap viv nan Kris la, li vin

²⁵ yon lòt moun. Bagay lontan yo disparèt, se lòt bagay nèt ki pran plas yo koulye a. Tou sa soti

²⁶ nan Bondye ki fè nou vin zanmi avè l' ankò, gremesi Kris la. Se li menm tou ki fè m' konfyans, ki

²⁷ ban m' travay sa a pou mennen lèzòm vini byen avè l' ankò. Paske nan Kris la, Bondye t'ap fè

²⁸ tou sa li te kapab pou fè moun vin byen avè l' ankò. Li pa t' gade sou peche lèzòm te fè. Se li menm

²⁹ ki mete mwen la pou fè lèzòm konnen ki jan l'ap fè yo byen avè l' ankò. Se sak fè mwen pale

³⁰ nan non Kris la menm ki te voye m', tankou si se Bondye menm k'ap pale nan bouch mwen pou di

³¹ nou: tanpri, nan non Kris la, tounen vin byen ak Bondye ankò. Kris la pa t' janm fè okenn peche,

men Bondye fè l' pran sò nou sou li, yo trete l' tankou yon moun ki fè peche. Konsa, lè nou fè yon sèl kò ak Kris la, Bondye fè nou gras.

Chapter 6

¹ ¶ Se poutèt sa, mwen menm k'ap travay ak Bondye, mwen mande nou pou nou pa kite favè nou resevwa nan men Bondye a gaspiye. ² Paske, nan Liv la Bondye te di: Mwen te koute ou, lè lè a te rive pou m' te fè ou gras la. Mwen te pote ou sekou, lè jou a te rive pou m' te delivre ou la. Enben, koulye a, men lè a rive pou n' resevwa favè Bondye a; se jòdi a menm nou ka jwenn delivrans.

³ Mwen pa ta vle pesonn jwenn anyen pou kritike nan travay mwen. Se poutèt sa, m'ap chache mwayen nan travay mwen pou m' pa bay pesonn okazyon tonbe nan peche. ⁴ Okontrè, nan tout bagay, mwen fè tout moun wè se Bondye m'ap sèvi. Se avèk anpil pasyans mwen sipòte tout kalite soufrans, tout kalite lafliksyon ak tout kalite kè sere. ⁵ Yo bat mwen, yo mete m' nan prizon. Yo moute tèt moun sou do mwen, yo fè m' fè travo fòse. Yo fè m' pase nwit san dòmi, yo fè m' rete san manje. ⁶ Mwen fè tout moun wè se moun k'ap sèvi Bondye mwen ye pou jan m' mache dwat, pou jan m' konn verite a, pou jan m' gen pasyans ak bon kè, pou jan m' kite Sentespri dirije lavi m', pou jan m' renmen tout moun ak tout kè mwen, ⁷ pou jan m'ap mache bay verite a, pou jan Bondye soutni m' ak pouvwa li. Mwen sèvi ak tout bagay ki dwat tankou zam, kit pou atake, kit pou defann tèt mwen. ⁸ Yon lè yo respekte mwen, yon lòt lè yo fè m' wont. Yon lè yo pale byen pou mwen, yon lòt lè yo pale m' mal. Yo fè m' pase pou moun k'ap bay manti, men se verite a m'ap di. ⁹ Yo fè m' pase pou moun pesonn pa konnen, men tout moun konnen m' byen pwòp. Yo fè m' pase pou moun ki fin mouri, men mwen byen vivan. Yo bat mwen, men yo pa touye mwen. ¹⁰ Y'ap fè m' lapenn, men mwen toujou gen kè kontan. Mwen sanblè m' pòv, men mwen fè anpil moun rich. Mwen sanble m' pa gen anyen, men se mwen menm ki gen tout bagay. ¹¹ ¶ Zanmi m' yo, moun Korent, mwen pale kare avè nou, mwen louvri tout kè m' ban nou. ¹² Se pa mwen ki te fèmen kè m' ban nou, se nou menm ki te fèmen kè nou ban mwen. ¹³ Se poutèt sa, m'ap pale avè nou tankou si nou te pitit mwen. Santiman mwen gen pou nou an se li menm tou pou nou gen pou mwen: louvri tout kè nou ban mwen. ¹⁴ Pa mete tèt nou ansanm ak moun ki pa gen konfyans nan Kris la: Se pa sosyete konsa ki bon pou nou. Ki jan nou ta vle wè sa pou bagay ki bon, bagay ki dwat, mele ak bagay ki mal? Ki jan pou limyè ta ka mache ak fènwa? ¹⁵ Kouman Kris la ta ka antann li ak Satan?

16
 Osinon, kisa yon moun ki kwè gen pou wè ansanm ak moun ki pa kwè? Kisa kay Bondye a gen pou wè ak zidòl? Nou se kay Bondye vivan an, pa vre? Se Bondye menm ki di sa: M'a vin rete, m'a viv nan mitan yo. M'a tounen Bondye yo, y'a tounen pèp mwen. 17
 Se poutèt sa, Bondye te di nou: Soti nan mitan moun sa yo. Pa mele ak yo. Pa manyen anyen nou pa dwe manyen. Lè sa a, mwen menm, m'a resevwa nou. 18
 M'a tankou yon papa pou nou. Nou menm, n'a tankou pitit gason m' ak pitit fi mwen. Se Mèt ki gen tout pouvwa a ki di sa.

Chapter 7

1
 ¶ Mezanmi, se pou nou wi Bondye te fè tout pwomès sa yo. Ann kenbe kò nou ak nanm nou nan kondisyon pou n' sèvi Bondye! Ann voye tout bagay ki ka wete nou nan kondisyon sa a jete! Ann chache viv apa pou Bondye! Ann viv nan krentif li! 2
 Tanpri, ban m' yon ti plas nan kè nou! (Konprann mwen byen). Mwen pa fè pesonn okenn mal, pesonn pa ka di mwen lakòz yo pèdi pozisyon yo. Pesonn pa ka di mwen pwofite sou yo. 3
 Mwen pa di nou sa pou kondannen nou. Mwen deja di nou sa: sitèlman mwen renmen nou, mwen pote nou sou kè mwen pou lavi ak pou lanmò. 4
 Mwen gen anpil konfyans nan nou, mwen kontan nou anpil. Nan mitan tout soufrans mwen yo, mwen toujou gen anpil kouraj, kè m' kontan nèt. 5
 ¶ Se konsa, depi mwen te rive nan peyi Masedwan, kè m' pa t' poze menm: mwen jwenn traka tout jan. Yon bò mwen te nan gwo diskisyon ak kèk moun, yon lòt bò mwen te pè nan kè mwen. 6
 Men, Bondye ki bay moun ki nan lafliksyon yo kouraj te ban m' kouraj lè l' te voye Tit vin jwenn mwen. 7
 Se pa rive Tit la ase ki te ankouraje mwen. Sa te remoute kouraj mwen anpil tou lè li rakonte m' jan nou menm nou te ba li ankourajman. Li fè m' konnen jan nou anvi wè m', jan sa fè nou lapenn pou mwen, jan nou pare pou nou pran defans mwen. 8
 Se sak fè, koulye a mwen pi kontan toujou. Menm si lèt mwen te ekri nou an te fè nou lapenn, mwen pa règrèt sa. Mwen te regrèt mwen te ekri l' lè m' te wè jan l' te fè nou lapenn lè sa a. 9
 Men koulye a, kè m' kontan, pa paske mwen te fè nou lapenn, men paske lapenn nou te genyen an te fè nou chanje kondit. Nou te sipòte lapenn sa a jan Bondye vle l' la. Se konsa mwen pa fè nou okenn mal. 10
 Paske, lè yon moun sipòte lapenn li jan Bondye vle l' la, sa chanje kè li pou l' ka rive sove. Pa gen anyen la a pou n' règrèt. Men, lapenn nou sipòte jan tout moun fè l' la, se touye l'ap touye nou. 11
 Nou menm, nou sipòte lapenn nou an jan Bondye vle l' la. Koulye a, gade sa l' fè pou nou! Gade ki jan li fè nou pran sitiyasyon an pou bagay serye! Gade ak ki lanpresman nou soti pou defann tèt nou? Gade jan n' te fache! Gade jan n' te pè! Gade jan

nou anvi wè m' ankò! Gade jan nou aktif, jan nou prese peni moun ki te fè sa ki mal la! Nou moutre
 nou pa t' koupab nan tout bagay sa yo. ¹² ¶ Se pa pou moun ki te fè sa ki mal la, ni pou moun yo
 te fè mal la mwen te ekri nou. Mwen ekri nou pou n' te ka wè jan nou devwe pou mwen devan
 Bondye. Se poutèt sa, sa te ban m' anpil ankourajman. ¹³ Se pa ankouraje sèlman mwen te ankouraje.
 Mwen te pi kontan ankò lè m' wè kouman Tit te kontan pou jan nou te ba li ankourajman. ¹⁴ Mwen
 te pale byen pou nou anpil ak Tit, epi nou pa fè m' wont. Mwen pa janm ban nou manti lè m'ap
 pale ak nou. Se konsa, sa m' te di Tit sou nou an se te verite a tout bon. ¹⁵ Koulye a, li vin renmen
 nou plis toujou lè l' chonje jan nou tout nou te dispoze obeyi, jan nou te resevwa l' avèk krentif
 sitèlman nou t'ap tranble. ¹⁶ Mwen kontan nèt mwen ka toujou konte sou nou.

Chapter 8

¹ ¶ Frè m' yo, mwen ta renmen nou konnen ki jan Bondye te fè wè favè l' nan legliz ki nan peyi
 Masedwan yo. ² Patizan Kris yo te pase anba anpil eprèv avèk tout soufrans ki te tonbe sou yo.
 Men, yo te sitèlman kontan, yo te moutre jan yo ka bay ak tout kè yo, malgre yo te nan nesésite.
³ Sa m'ap di nou la a, se vre wi: yo bay sa yo te kapab, yo menm bay pase sa yo te kapab. San moun
 pa fòse yo, ⁴ se yo menm menm ki mande, se yo menm menm ki plede ak nou pou nou ba yo privilèj
 patisipe nan sekou n'ap voye pou manm pèp Bondye nan peyi Jide a. ⁵ Sa depase sa nou te kwè a
 anpil: yo ofri tèt yo bay Seyè a anvan. Apre sa, yo ofri tèt yo ban nou jan Bondye vle l' la. ⁶ Se
 konsa, mwen mande Tit pou li al lakay nou pou l' ka kontinye travay li te kòmanse a, pou nou ka
 bay sa nou gen pou n' bay la ak tout kè nou. ⁷ ¶ Wi, nou rich sou tout pwèn, kit se nan lafwa, kit
 se nan konn pale byen, kit se nan kònesans verite a, kit se nan aktivite nou pou Bondye, kit se nan
 renmen nou gen pou mwen. Se poutèt sa mwen ta renmen wè nou bay ak tout kè nou pou zèv sa a
 tankou moun ki rich. ⁸ Se pa yon lòd m'ap ban nou: Men, mwen pran egzàn pou lòt yo pou nou
 menm tou nou ka moutre jan nou gen renmen tout bon nan kè nou. ⁹ Nou konnen ki favè Jezikri,
 Seyè a, fè nou. Li menm ki te rich, li fè tèt li tounen pòv pou nou. Konsa, lè l' fè tèt li tounen pòv
 la, li fè nou rich. ¹⁰ Men lide mwen fè sou keksyon sa a. Depi lanne pase anwo, se nou menm an
 premye ki te fè lide ede frè yo. Se nou menm an premye ki te kòmanse ranmase lajan pou sa.
¹¹ Koulye a, se pou n' kontinye fin fè jès la nèt. Menm jan nou te mete tout kè nou lè nou t'ap pran

desizyon fè l' la, mete tout kè nou pou nou fini ak sa, dapre mwayen nou. ¹² Paske si nou mete tout kè nou pou nou bay, Bondye ap asepte kado nou bay la. L'ap gade sou sa nou genyen, li p'ap gade sou sa nou pa genyen. ¹³ Sa pa vle di se pou nou mete tèt nou nan lamizè lè n'ap soulaje lòt moun. Men, se pou tout moun menm jan. ¹⁴ Si koulye a nou gen anpil, se pou n' ede sa ki nan nesosite yo. Si yon jou pita nou vin nan nesosite, epi yo menm yo gen anpil, lè sa a y'a kapab ede nou tou. Konsa tout moun va menm jan, ¹⁵ dapre sa ki te ekri nan Liv la: Moun ki te ranmase plis yo pa t' gen twòp. Moun ki te ranmase pi piti yo pa t' manke anyen. ¹⁶ ¶ Ann di Bondye mèsì, li menm ki fè Tit devwe pou nou, menm jan avè mwen! ¹⁷ Tit te asepte fè sa m' te mande l' fè a. Men, li te sitèlman prese vin ede nou, se li menm menm ki pran desizyon ale lakay nou. ¹⁸ Nou voye yon frè avè li. Tout moun nan legliz yo ap nonmen non frè sa a pou jan l' travay pou anonse bon nouvèl la. ¹⁹ Apre sa, se legliz yo menm ki te chwazi l' pou vwayaje ansanm ak nou, pou ede ranmase lajan nou t'ap bay la. Lajan sa a gen pou sèvi yon lwanj pou Bondye, anmenmtan l'ap fè wè jan nou vle ede vre. ²⁰ Nou pran tout prekosyon sa yo pou moun pa jwenn repwòch pou yo fè nou pou gwo lajan sa a ki nan men nou an. ²¹ N'ap chache fè tout bagay pwòp, pa sèlman devan Bondye, men devan tout moun tou. ²² N'ap voye yon lòt nan frè nou yo ak yo tou. Nou te swiv frè sa a anpil, li toujou moutre anpil devouman nan sèvis la. Men, koulye a li gen plis devouman toujou pou jan li fè nou konfyans anpil. ²³ Konsa, Tit se yon bon zanmi m' k'ap travay ansanm avè m' pou nou. Pou lòt frè ki avè l' yo, se legliz yo ki voye yo. Se yon lwanj pou Kris la. ²⁴ Fè yo wè jan nou renmen yo, pou legliz yo ka sèten nou renmen yo, pou yo ka konnen mwen gen rezòn pale byen pou nou konsa.

Chapter 9

¹ ¶ Mwen pa wè rezòn pou m' voye di nou anyen sou keksyon sekou n'ap voye bay manm pèp Bondye ki nan peyi Jide a. ² Mwen konnen jan nou vle ede, mwen pa t' manke kontan pale byen pou nou ak moun Masedwan yo lè m' te di yo: Depi lanne pase anwo, frè ki nan peyi Lakayi yo pare pou ede. Se konsa lanpresman nou pou bay te eksite anpil ladan yo bay tou. ³ Malgre sa, m'ap voye frè sa yo bò kote nou pou bèl pawòl mwen te di pou nou sou zafè sekou sa a pa pase pou manti. Mwen ta renmen wè nou pare vre, jan mwen te di l' la. ⁴ Ala wont mwen ta wont si, pou lè

moun peyi Masedwan yo ta vin ansanm avè m', yo ta jwenn nou pa pare! Jan m' te konte sou nou sa! Mwen pa bezwen pale jan nou menm tou nou ta wont! ⁵ Se sak fè, mwen kwè se te nesèsè pou m' te mande frè sa yo pou y' al lakay nou anvan mwen, pou nou ka pare kado nou te pwòmèt nou t'ap bay la. Konsa, lè m'a rive mwen menm, kado a va tou pare. Lè sa a, moun yo va wè nou bay paske nou vle, pa paske yo fòse nou. ⁶ ¶ Chonje sa byen: Moun ki simen ti kras va rekòlte ti kras. Moun ki simen anpil va rekòlte anpil. ⁷ Se pou chak moun bay jan yo te deside nan kè yo, san yo pa règrèt anyen, san moun pa bezwen fòse yo, paske Bondye renmen moun ki bay ak kè kontan. ⁸ Bondye menm gen pouvwa pou l' ban nou tout kalite benediksyon an kantite. Li fè sa, pa sèlman pou nou ka toujou genyen tou sa nou bezwen, men pou nou ka gen rèz ki rete pou n' fè tout kalite bon zèv. ⁹ Se sa menm ki ekri nan Liv la: Li bay moun ki nan nesèsite yo san gad dèyè. L'ap toujou gen kè nan men. ¹⁰ Bondye ki bay moun k'ap simen an grenn pou l' simen ak pen pou l' manje, l'a ban nou tou sa nou bezwen pou simen. L'a fè l' pouse pou nou, pou nou ka fè yon bèl rekòt lè nou bay an kantite konsa. ¹¹ Bondye ap toujou fè nou rich ase pou nou ka toujou bay ak tout kè nou. Konsa, anpil moun va di Bondye mèsè pou kado n'a ban mwen pou yo. ¹² Se pou nou konn sa byen: sèvis n'ap rann lè nou bay lajan sa a, se pa sèlman pou bay moun pèp Bondye sa yo bezwen. Men, akòz sèvis sa a, anpil moun pral lapriyè Bondye pou di l' mèsè. ¹³ Sèvis sa a ap fè yo wè ki kalite moun nou ye. Yo pral fè lwanj Bondye, paske sekou sa a pral fè yo wè jan nou soumèt, jan nou kwè nan bon nouvèl ki pale sou Kris la. Y'a fè lwanj Bondye tou pou jan nou separe byen nou yo ak yo ansanm ak tout lòt yo. ¹⁴ Y'a lapriyè pou nou, y'a renmen nou anpil akòz gwo favè sa a Bondye fè pou nou. ¹⁵ Ann di Bondye mèsè pou gwo kado sa a li ban nou, yon kado ki pa gen parèy li!

Chapter 10

¹ ¶ Men sa mwen menm Pòl, m'ap mande nou ak dousè ansanm ak bon kè ki soti nan Kris la. Gen moun ki pretann mwen fèmen lè m' nan mitan nou, men lè m' lwen nou mwen sevè. ² Tanpri, pa fòse m' moutre nou jan mwen ka sevè lè m'a rive lakay nou. Paske mwen sèten m'a ka moutre m' sevè annegad moun ki konprann m'ap aji dapre bon konprann lèzòm. ³ M'ap viv koulye a nan yon kò tankou tout moun, se vre. Men, mwen p'ap goumen menm jan ak tout moun. ⁴ Zam m'ap sèvi nan batay m'ap mennen an, se pa menm ak zam moun k'ap viv dapre lide ki nan lemonn yo. Zam mwen se zam ki gen pouvwa devan Bondye pou kraze tout gwo fò. M'ap kraze tout pawòl

5
 esplikasyon ki pa bon, m'ap kraze tou sa lèzòm nan lògèy yo ap fè pou anpeche moun konnen
 Bondye. M'ap mare tout vye lide ki nan tèt lèzòm yo, m'ap fè yo vin obeyi Kris la. 6
 Mwen pare pou m' pini tout moun ki va dezobeyi. Men, anvan sa, se pou nou moutre m' jan nou soti pou nou
 7
 soumèt nou nè. ¶ Nou menm, moun Korent, n'ap gade sou laparans. Enben, si yon moun mete
 nan tèt li se moun Kris la li ye, se pou l' mete sa nan tèt li tou, mwen menm tou mwen se moun
 8
 Kris la mwen ye menm jan avè li. Enpi, menm si m' te fè grandizè yon ti jan twòp pou otorite
 Seyè a ban mwen an, mwen pa wont pou sa. Paske, otorite sa li ban mwen an, se pou m' fè nou
 9
 grandi nan konfyans nan li, se pa pou m' kraze nou. Mwen pa ta vle nou konprann m'ap chache
 10
 kraponnen nou lè m'ap ekri nou konsa. Gen moun ki di: Lè Pòl ap ekri nou, li rèd konsa, li sevè.
 11
 Men, lè li la nan mitan nou li tou dou. Ata pale li pa ka pale. Enben, moun ki di sa a, li mèt mete
 sa nan tèt li: Pa gen diferans ant sa m'ap ekri nan lèt mwen voye ban nou lè mwen pa la ak sa mwen
 12
 pral fè lè m'a la nan mitan nou. ¶ Konprann sa byen: mwen pa ka pèmèt mwen pou m' mete m'
 sou menm wotè ak moun ki kwè yo plis pase sa yo ye, ni mwen p'ap konpare tèt mwen ak yo non
 plis. Se yon bann san konprann! Y'ap mezire tèt yo ak mezi yo menm yo fè. Y'ap konpare tèt yo
 13
 ak pwòp tèt pa yo ankò. Men, pou mwen menm, mwen p'ap vantè tèt mwen depase limit. M'ap
 rete nan limit travay Bondye ban mwen an. Nou menm, moun Korent, nou nan limit travay mwen.
 14
 Se sak fè, mwen pa t' depase limit mwen lè m' te rive lakay nou ak bon nouvèl ki pale sou Kris
 15
 la. Konsa, nou wè, mwen pa depase limit Bondye ban mwen. Mwen p'ap fè grandizè pou travay
 lòt moun te deja fè. Okontrè, mwen gen espwa n'a grandi nan konfyans, pou m' ka fè yon pi gwo
 16
 travay ankò nan mitan nou, toujou nan limit Bondye ban mwen an. Apre sa, m'a kapab al anonse
 bon nouvèl la nan peyi ki pi lwen pase lakay nou, san m' p'ap bezwen fè grandizè pou travay lòt
 17
 moun deja fè nan limit pa yo. Paske, jan sa ekri nan Liv la: Si yon moun vle fè lwanj tèt li, se
 18
 pou l' fè lwanj tèt li nan sa Bondye fè pou li. Se konsa wi: Se pa moun k'ap fè lwanj tèt yo ki
 bon pou travay la, men se moun Seyè a rekòmande ki bon pou travay la.

Chapter 11

1
 ¶ Mwen ta renmen nou pèmèt mwen pran pòz moun fou m' pou yon ti moman. Enben, wi,
 2
 pèmèt mwen fè sa. M'ap fè jalouzi pou nou, yon jalouzi ki soti nan Bondye. Paske, nou tankou

yon jenn fi ki pa nan dezòd. Mwen fiyansè nou ak yon sèl gason. Gason sa a se Kris la. ³ Men, mwen pè pou lespri nou pa pèvèti, pou nou pa manke Kris la pawòl, pou nou pa tonbe nan dezòd

⁴ tankou Ev ki te kite sèpan an vire lòlòj li ak riz li yo. Mwen di sa paske mwen wè nou kite nenpòt ki moun vin fè nou konnen yon Jezi ki pa menm ak Jezi mwen te fè nou konnen an, epi nou pa di anyen. Mwen wè nou pare pou n' asepte yon lespri ak yon mesaj ki pa menm ni ak Lespri Bondye

⁵ a, ni ak bon nouvèl mwen te ban nou an. ¶ Pou mwen, mwen pa wè sa apòt ki kwè yo plis pase

⁶ tout moun yo gen pase mwen. Mwen ka pa konn pale byen, men pou konesans la, se pa menm

⁷ bagay. Nan tout okazyon ak nan tout bagay mwen te toujou fè nou wè sa. Lè m' te anonse nou bon nouvèl Bondye a, mwen te fè sa gratis pou nou, mwen te desann tèt mwen pou m' te ka fè nou

⁸ kanpe. Eske mwen te gen tò lè m' te fè sa? Lè sa a, mwen te asepte lajan nan men lòt legliz yo.

⁹ Se tankou si m' te pran nan sa ki pou yo pou m' te kapab ede nou. Pandan tout tan mwen te pase lakay nou an, mwen pa t' sou kont pesonn lè m' te bezwen lajan, paske frè ki soti Masedwan yo te pote tou sa m' te bezwen pou mwen. Mwen te pran kont prekosyon m' pou m' pa t' sou kont nou

¹⁰ yonn pou anyen, epi m'ap toujou pran menm prekosyon sa a. Jan mwen sèten mwen konnen verite Kris la, mwen pa ka bay manti, se konsa m'ap di nou sa: rezon sa a mwen genyen pou m'

¹¹ vante tèt mwen nan tout peyi Lakayi a, pesonn p'ap kapab wete l' nan men mwen. Poukisa? Eske

¹² se paske mwen pa renmen nou? Se Bondye ki konnen jan mwen renmen nou. Men, m'ap toujou aji jan m'ap aji koulye a, pou m' pa bay moun k'ap chache okazyon pou yo fè grandizè chans pou

¹³ yo ka di yo travay menm jan ak mwen. Moun sa yo, se pòz apòt yo y'ap pran. Y'ap bay manti

¹⁴ sou travay yo, y'ap fè tèt yo pase pou apòt Kris la. Pa gen anyen la a ki pou fè n' sezi: ata Satan

¹⁵ ka ranje kò l' pou l' pran pòz yon zanj limyè. Si moun k'ap sèvi Satan yo pran pòz moun k'ap

¹⁶ sèvi sa ki byen, pa gen anyen ki dwòl nan sa. Men, bout pou bout y'a jwenn sa y'ap chache a. ¶ M'ap repete sa m' te di a: Piga pesonn pran m' pou moun fou. Men, si nou pran m' pou moun fou,

¹⁷ kite m' pran pòz moun fou m' vre pou m' kapab vante tèt mwen yon ti kras tou. Sa m'ap di koulye a, se pa sa menm Seyè a ta renmen m' di. Men, nan pozisyon yo mete m' ki fè m' ka vante tèt mwen

¹⁸ an, m'ap pale tankou si m' te fou. Sitèlman gen moun k'ap vante tèt yo pou bagay y'ap fè sou

¹⁹ latè, kite m' vante tèt mwen tou. Nou menm ki gen bon konprann nou pa manke tolere moun

²⁰ fou! Nou kite yo fè nou tounen esklav, nou kite yo devore nou, nou kite yo pran nou nan pèlen,

²¹ nou kite yo fè awogans sou nou, nou kite yo ban nou souflèt. Wi, mwen wont di sa: Mwen te twò fèb pou m' te aji jan m' te aji ak nou an! Men, si gen moun ki ka pèmèt yo vante tèt yo pou lòt

bagay (pa bliye m'ap pale tankou yon moun fou wi!) mwen menm tou m'ap pèmèt mwen fè sa tou.

22

¶ Eske yo se pitit pitit Ebè? Mwen menm tou. Eske yo se moun ras Izrayèl la? Mwen menm tou.

23

Eske yo se pitit pitit Abraram? Mwen menm tou. Eske yo se moun k'ap sèvi Kris la? (M'ap pale koulye a tankou moun ki deraye nèt.) Mwen sèvi Kris la plis pase yo: mwen travay pase yo, yo mete m' nan prizon pi plis pase yo, yo bat mwen pi plis pase yo, mwen manke mouri pi souvan

24

pase yo. An senk fwa, jwif yo ban m' trant nèf kout fwèt. An twa fwa, women yo bat mwen. Yon fwa yo kalonnen m' wòch pou yo te touye mwen. Batiman koule avè m' twa fwa. Yon fwa

25

menm mwen pase yon jou ak yon nwit nan dlo. Anpil fwa menm, lè m'ap vwayaje konsa dlo larivyè manke pote m' ale. Bandi manke touye m', jwif yo manke touye m' tou, ata moun lòt nasyon yo manke touye m' tou. Mwen te an danje nan lavil, mwen te an danje andeyò, mwen te an danje

26

sou lanmè. Ata swadizan frè yo manke touye mwen. Mwen redi travay di, mwen fatigue kò m' anpil, mwen pase anpil nwit san dòmi, mwen konnen sa ki rele grangou ak swaf dlo. Anpil fwa mwen te blije rete san manje, mwen soufri fredyè, mwen konn pa gen rad pou m' mete sou mwen.

27

28 San konte anpil lòt bagay ankò, chak jou se tèt chaje pou mwen ak bagay mwen gen pou m' regle

pou tout legliz yo. Si yon moun fèb, lamennm mwen fèb tou. Si yon moun tonbe nan peche, sa

29

rann mwen malad. Si se pou m' vante tèt mwen, m'a vante tèt mwen pou tout bagay ki pou

30

moutre jan m' fèb. Bondye ki Papa Seyè Jezi a (li menm k'ap resevwa lwanj tout tan an), li

31

konnen mwen p'ap bay manti. Lè m' te lavil Damas, moun wa Aretas te mete pou gouvèn

32

lavil la pran gad, li mete yo nan tout pòtay lavil la pou yo te arete m'. Men frè yo fè m' pase nan yon fennèt nan gwo miray lavil la. Yo file m' desann nan yon panyen. Se konsa mwen te chape kò m' anba men li.

33

Chapter 12

1

¶ Mwen blije ap vante tèt mwen, atout mwen konnen sa pa bon. Men, m'ap vin koulye a sou

2

vizyon ak revelasyon Seyè a te ban mwen. Mwen konnen yon moun k'ap viv nan Kris la, ki te transpòte jouk anwo nèt nan syèl la. Sa gen katòzan depase. (Mwen pa konn ki jan sa te fè fèt, mwen pa ka di si l' te moute tout bon nan kò l', osinon si se te yon vizyon li te fè. Se Bondye sèl ki

3

konnen.) Wi, mwen konnen nonm sa a te santi l' moute jouk anwo nan paradi. M'ap repete, mwen pa ka di si li te moute tout bon nan kò l', osinon si se te yon vizyon li te fè. Se Bondye sèl ki konnen.

4

Antan l' te la, li tande yon bann pawòl bouch moun pa ka pale, koze moun pa gen dwa repete.

5 Enben, m'ap fè lwanj nonm sa a, mwen p'ap fè lwanj tèt pa m', esepite si se pou m' moutre jan m' fèb. ⁶ Si mwen te vle vante tèt mwen, mwen pa ta yon nonm fou non, paske mwen pa t'ap bay manti. Men, mwen refize vante tèt mwen. Mwen pa ta vle pou yon moun rive konprann mwen plis pase sa li te met nan tèt li mwen ye, lè l' te wè sa m'ap fè, lè l' tande sa m'ap di. ⁷ Malgre sa, pou lògèy pa fè m' gonfle avèk kalite bèl revelasyon sa yo mwen resevwa, yo ban m' yon kalite maladi nan kò m' k'ap fè m' soufri, ou ta di yon zanj Satan voye maltrete m' pou anpeche m' gen lògèy.

8 An twa fwa mwen lapriyè Seyè a pou maladi sa a, mwen mande l' pou l' wete li sou mwen. ⁹ Chak fwa, li reponn mwen: Se favè m' ase ou bezwen. Paske lè ou fèb, se lè sa a moun wè pouvwa mwen nan ou. Se poutèt sa, nan fon kè m', mwen pito pale sou feblès mwen pou pouvwa Kris la ka mete m' anba zèl li. ¹⁰ Se sak fè tou mwen kontan anpil lè m' santi m' fèb, lè y'ap joure m', lè m' nan lafliksyon, lè m' anba pèsekasyon, lè m' nan fikilte, lè m'ap sibi tou sa akòz Kris la. Paske lè m' fèb, se lè sa a mwen gen fòs. ¹¹ ¶ Mwen sot pale la a tankou moun fou. Men, se nou menm ki lakòz sa. Se nou menm ki pou ta pran defans mwen. Mwen te mèt pa anyen vre, men, apòt nou yo ki kwè yo plis pase tout moun, yo pa gen anyen pase mwen. ¹² Avèk anpil pasyans, Bondye fè nou wè kont siy, kont mirak, kont bèl bagay ki rive nan mitan nou, tou sa pou ban nou prèv se yon apòt mwen ye. ¹³ Mwen pa t' sou kont nou, se vre. Mwen mande nou padon pou fòt sa a. Men, apa sa, kisa yo fè pou lòt legliz yo yo pa fè pou nou? ¹⁴ Mwen pare koulye a pou m' vin lakay nou yon twazyèm fwa. Fwa sa a ankò mwen p'ap sou kont nou. Se nou menm menm mwen bezwen, se pa lajan nou. Konprann sa byen, se pa pitit ki pou fè lajan pou pran swen manman ak papa. Se manman ak papa ki pou fè lajan pou pran swen pitit. ¹⁵ Pou mwen menm, m'ap kontan depanse tou sa m' genyen, se va tout plezi m' pou m' bay ata tèt mwen pou nanm nou ka pwofite. Eske n'a renmen m' mwens paske mwen renmen nou anpil konsa? ¹⁶ Se pou nou admèt mwen pa t' janm yon chay pou nou. Men, gen moun ki va di: Pòl se yon nonm ki malen wi. Gade jan li pran nou nan pèlen ak yon bann manti. ¹⁷ Nan moun mwen te voye lakay nou, èske gen ladan yo ki te souse nou? ¹⁸ Mwen te mande Tit pou li al lakay nou. Mwen te voye lòt frè a ansanm avè li. Eske nou ka di Tit te egzije kichòy nan men nou? Eske mwen menm ansanm ak Tit, nou pa gen menm rezòn pou n' aji jan nou aji a? Eske nou pa kondi tèt nou menm jan an? ¹⁹ Nou dwe mete nan tèt nou koulye a se chache m'ap chache defann tèt mwen devan nou? enben non! M'ap pale jan Kris la vle l' la, mwen pran Bondye pou temwen: Mwen di nou tout bagay sa yo, mezanmi, pou nou ka grandi nan lafwa.

20 Mwen pè pou lè m' rive lakay nou, mwen pa jwenn nou jan mwen ta vle l' la. Mwen pè pou m' pa jwenn kont, jalouzi, bouyay, rayisab, joure, tripotaj, lògèy, dezòd nan mitan nou. ²¹ Mwen pè pou lè m' rive lakay nou, Bondye m'ap sèvi a pa rabese m' ankò devan nou, pou m' pa bezwen nan

kriye pou anpil nan nou ki te fè peche anvan sa, epi ki pa tounen vin jwenn Bondye, men ki toujou rete nan malpwòpte yo, nan imoralite yo, nan tout vis yo t'ap fè yo.

Chapter 13

¹ ¶ M'ap vin lakay nou pou yon twazyèm fwa. Lè sa a, jan sa ekri nan Liv la, tout bagay va regle sou depozisyon de osinon twa temwen. ² M'ap avèti nou tout ki te fè peche anvan sa, ansanm ak tout lòt yo. Mwen te deja di nou sa lè m' te vin lakay nou dezyèm fwa a. Koulye a mwen pa la, m'ap repete l' ankò: pwochenn fwa m'ap tounen lakay nou, mwen p'ap mennaje pesonn. ³ Nou bezwen prèv se Kris la k'ap pale lè m'ap pale, enben n'a jwenn li. Kris la pa fèb non lè l'ap regle ak nou. Okontrè, l'ap fè nou wè pouvwa li. ⁴ Wi, se vre: yo te kloure l' sou yon kwa paske li te fèb. Men koulye a, li vivan gremesi pouvwa Bondye a. Mwen menm tou, mwen fèb ansanm ak Kris la. Men, lè m'ap regle avèk nou, mwen vivan ansanm avè l' tou, gremesi pouvwa Bondye a. ⁵ Sonde tèt nou nou menm, egzaminen konsyans nou byen pou wè si n'ap viv ak konfyans nan Bondye. Nou fèt pou nou rekonèt si Jezikri nan kè nou, esepite si nou pa ta kapab bay prèv nou gen konfyans nan Bondye. ⁶ Men, mwen kwè n'a rekonèt sa tou: mwen menm, mwen kapab bay prèv mwen gen konfyans nan Bondye. ⁷ ¶ M'ap lapriyè Bondye pou nou pa fè anyen ki mal. Lè m' fè sa, mwen pa fè l' nan lide pou m' moutre sa m' kapab fè. Men, mwen ta renmen wè nou fè sa ki byen, menm si mwen pase pou moun ki pa kapab fè anyen. ⁸ Nou pa ka fè anyen ki kont verite Bondye a, se pou li ase nou ka travay. ⁹ Mwen kontan nèt lè mwen menm mwen fèb, epi nou menm nou gen fòs. Se sak fè, m'ap mande nan lapriyè m' pou nou vin bon nèt sou tout pwen. ¹⁰ M'ap ekri nou konsa lè mwen lwen nou, se pou lè m' rive lakay nou, mwen pa bezwen aji sevè avèk nou. Otorite Seyè a ban mwen an, se pa pou detwi nou non li ban mwen li. Men, se pou fè nou grandi nan konfyans nou gen nan Kris la. ¹¹ ¶ Koulye a, frè m' yo, mwen kite nou. Chache pou nou vin bon nèt sou tout pwen. Se pou nou yonn ankouraje lòt, mete nou dakò yonn ak lòt, viv ak kè poze. Bondye ki bay renmen ak kè poze a, va toujou avè nou. ¹² Se pou nou yonn bo lòt tankou moun k'ap viv pou Bondye. ¹³ (13:12) Tout frè k'ap viv apa pou Bondye yo voye bonjou pou nou. ¹⁴ (13:13) Se pou benediksyon Seyè Jezikri ban nou an, ak renmen Bondye gen pou nou an, ansanm ak pouvwa Sentespri k'ap fè nou viv ansanm lan toujou la ak nou tout.

Galatians

Chapter 1

¹ ¶ Mwen menm Pòl, se pa moun ki te chwazi m', ni Bondye pa t' voye yon moun chwazi m', men se Jezikri menm ki te chwazi m' pou sèvi apòt, ansanm ak Bondye Papa a ki te fè l' leve soti vivan nan lanmò. ² Tout frè ki isit la yo mete tèt ansanm avè m' pou ekri lèt sa a pou tout legliz ki nan peyi Galasi yo. ³ Nou mande Bondye, Papa nou, ansanm ak Jezikri, Seyè a, pou yo ban nou benediksyon ak kè poze. ⁴ Dapre volonte Bondye, Papa nou, Kris la te bay tèt li pou peche nou yo, pou l' te ka delivre nou anba move tan mechan ki sou latè koulye a. ⁵ Lwanj pou Bondye pou tout tan! Amèn. ⁶ ¶ Mwen sezi wè jan nou prese vire do bay Bondye ki te rele nou, gremesi Kris la, pou n' al swiv yon lòt kalite bon nouvèl. ⁷ Pou di vre, pa gen okenn lòt bon nouvèl. Men, mwen di sa paske gen moun k'ap plede chaje tèt nou, ki vle chanje anpil bagay nan bon nouvèl Kris la. ⁸ Enben, si yon moun ta vin anonse nou yon lòt bon nouvèl ki pa menm ak sa nou te anonse nou an, moun sa a li te mèt se mwen menm, osinon yon zanj ki soti nan syèl, madichon pou li! ⁹ Mwen deja di nou sa, koulye a m'ap repete nou sa ankò: si yon moun vin anonse nou yon bon nouvèl ki pa menm ak sa nou te resevwa a, madichon pou li! ¹⁰ ¶ Lè mwen di sa, èske sa vle di se favè moun m'ap chache? Non. Se favè Bondye m'ap chache. Eske se plezi m'ap chache fè lèzòm plezi? Si m' t'ap chache fè lèzòm plezi, se pa Kris la mwen ta ap sèvi. ¹¹ M'ap di nou sa, frè m' yo, bon nouvèl m'ap anonse a pa soti nan moun. ¹² Paske mwen menm, mwen pa t' resevwa l' nan men pesonn, ni se pa yon moun ki te moutre m' li. Men, se Jezikri menm ki te fè m' konnen li. ¹³ Nou tande pale sa m' te konn fè nan tan lontan, lè m' te nan relijyon jwif yo. Nou konnen jan m' te san pitye lè m' t'ap pèsekite legliz Bondye a, jan m' t'ap chache kraze li. ¹⁴ Nan relijyon jwif yo mwen te pi fò pase anpil moun nan ras mwen ki te menm laj avè mwen. Mwen te pi cho pase yo pou defann koutim zansèt nou yo. ¹⁵ Men, Bondye fè m' favè l', li mete m' apa depi nan vant manman m', li rele m' pou m' te ka sèvi li. ¹⁶ Konsa, lè se te lide l' pou l' te fè m' konnen Pitit li a, pou m' te ka anonse bon nouvèl li a nan mitan moun ki pa jwif yo, wi, lè sa a, mwen pa t' al mande pesonn konsèy. ¹⁷ Mwen pa t' moute Jerizalèm non plis pou m' al wè moun ki te apòt anvan m' yo. Men, mwen te pati la menm pou peyi Arabi. Apre sa, mwen tounen tounen m' lavil Damas. ¹⁸ Sou twazan,

mwen moute lavil Jerizalèm pou m' te fè konesans ak Pyè. Mwen rete kenz jou lakay li. ¹⁹ Lè sa a, mwen pa t' wè okenn nan lòt apòt yo, esepite Jak, frè Seyè a. ²⁰ Sa m'ap ekri nou la a, se vre wi. Mwen pran Bondye pou temwen, mwen p'ap bay manti. ²¹ Apre sa, mwen te ale nan peyi Siri ak Silisi. ²² Pandan tout tan sa a, manm legliz Kris la ki te nan peyi Jide a pa t' ankò rekonèt mwen. ²³ Yo te sèlman konn tande moun ap di yo: Nonm ki t'ap pesekite nou nan tan lontan an, koulye a men l'ap mache anonse bon nouvèl li te vle kraze a. ²⁴ Yo t'ap fè lwanj Bondye pou tèt mwen.

Chapter 2

¹ ¶ Apre sa, katòz lane te pase anvan m' te moute lavil Jerizalèm ankò, fwa sa a ansanm ak Banabas. Mwen te mennen Tit avè m' tou. ² Kifè m' te moute a, se paske Bondye te fè m' konnen pou m' te fè sa. Nan yon reyinyon mwen te gen apa ak dirijan yo, mwen mete devan yo bon nouvèl mwen t'ap anonse moun ki pa jwif yo. Mwen pa t' vle pou ni travay mwen te fin fè a, ni travay mwen t'ap fè a pase pou anyen. ³ Enben, Tit ki te avè m' lan, se moun peyi Lagrès li ye: yo pa t' egzije l' sikonsi, ⁴ atout kèk swadizan frè ki te fofile kò yo nan mitan nou te vle yo sikonsi li. Moun sa yo te glise kò yo nan mitan nou tankou espyon k'ap veye libète nou gen nan Jezi Kris la. Yo te vle fè nou tounen esklav ankò. ⁵ Nou pa janm ba yo pye sou nou pou n' te ka defann verite ki nan bon nouvèl la pou nou menm, moun Galasi. ⁶ Moun ki te pase pou chèf yo, mwen pa bezwen konnen sa yo te ye vre, paske Bondye pa gade sou figi moun-wi, moun ki te pase pou chèf yo, yo pa t' fè m' okenn lòt egzijans. ⁷ Okontrè, yo wè Bondye te renmèt mwen travay anonse bon nouvèl la bay moun ki pa jwif yo, menm jan li te renmèt Pyè travay anonse l' bay jwif yo. ⁸ Paske, Bondye ki te mete Pyè apa pou sèvi apòt pou jwif yo, se li menm ki te mete m' apa tou pou m' te ka sèvi apòt pou moun ki pa jwif yo. ⁹ Lè sa a, Jak, Pyè ak Jan ki te pase pou chèf nan legliz la, yo te rekonèt se Bondye ki te ban m' travay sa a, yo bay Banabas ak mwen lanmen tankou asosye. Nou tonbe dakò pou Banabas ak mwen al travay nan mitan moun ki pa jwif yo, pou yo menm y' al travay ak jwif yo. ¹⁰ Yon sèl bagay yo te mande nou: se pou n' te toujou chonje pòv ki nan legliz yo. Nou pa t' janm manke fè sa. ¹¹ ¶ Men, lè Pyè te vini lavil Antiòch, mwen te fè yon bout ak li devan tout moun, paske sa l' te fè a pa t' bon. ¹² Lè l' te fèk rive, li t'ap manje byen pwòp ak frè ki pa jwif yo.

Men, lè moun Jak te voye yo vin rive, li mete kò l' sou kote, li refize manje ak frè ki pa jwif yo,
 13 paske li te pè patizan moun sikonsi yo. Lèt frè jwif yo te kòmanse fè menm jan ak li. Ata Banabas
 14 te pran tou. Li t'ap swiv yo nan ipokrizi sa a. Lè m' wè yo pa t'ap mache dwat dapre verite ki
 nan bon nouvèl la, mwen di Pyè devan tout moun: Ou menm ki jwif, ou pa t' viv isit la tankou jwif,
 men tankou moun ki pa jwif. Poukisa jòdi a w'ap fòse frè ki pa jwif yo pou yo viv tankou jwif?
 15 Nou menm, nou se jwif natif natal, nou pa soti nan ras moun lòt nasyon yo k'ap plede fè peche.
 16 Men, nou konnen se pa paske yon moun fè tou sa lalwa jwif yo mande kifè li inonsan devan
 Bondye, men se lè li mete konfyans li nan Jezikri Bondye va fè l' gras. Se poutèt sa, nou menm
 tou, nou te mete konfyans nou nan Jezikri. Konsa, se pa paske nou te fè sa lalwa jwif yo mande
 kifè Bondye fè nou gras, men se paske nou te mete konfyans nou nan li. Bondye p'ap fè pesonn
 17 gras paske li fè sa lalwa mande. Men, si antan m'ap chache pou Bondye fè m' gras gremesi Kris
 la, moun wè m'ap fè peche menm jan ak moun lòt nasyon yo, èske sa vle di se nan avantaj peche
 a Kris la ap travay? Non, yo pa ka di sa. 18 Paske, si m'ap rebati sa m' te kraze a, mwen tou moutre
 19 se dezobeyi m'ap dezobeyi lalwa. Annegad lalwa, mwen se yon moun ki mouri, epi se lalwa a
 menm ki touye m' pou m' ka viv pou Bondye. Mwen mouri kloure ansanm ak Kris la sou kwa a.
 20 Se sak fè, se pa mwen k'ap viv ankò, se Kris la k'ap viv nan mwen: lavi m'ap mennen nan kò m'
 koulye a, m'ap viv li nan konfyans mwen gen nan Pitit Bondye a ki te renmen m' sitèlman li te rive
 21 bay lavi l' pou mwen. Mwen pa voye favè Bondye fè m' lan jete. Paske, si lalwa ka fè Bondye
 fè yon moun gras, enben, Kris la mouri pou gremesi.

Chapter 3

1 ¶ Nou menm moun peyi Galasi, ala sòt nou sòt! Kilès nou kite pran tèt nou konsa, nou menm
 ki te konnen tout ti detay sou jan Kris la te mouri sou kwa a? 2 Mwen ta renmen nou reponn yon
 sèl ti keksyon sa a ban mwen: Eske se paske nou te fè tou sa lalwa a te mande kifè nou te resevwa
 Lespri Bondye a, osinon èske se paske nou te tande bon nouvèl la? 3 Ki jan nou fè egare konsa?
 Nou konmanse ak pouvwa Lespri Bondye a, koulye a nou vle fini ak pwòp fòs kouraj nou? 4 Eske
 se pou gremesi nou te fè esperyans sa yo? Non, se pa vre, se pa ka pou gremesi. 5 Lè Bondye ban
 nou Lespri l', lè li fè mirak sa yo nan mitan nou, èske li fè sa paske nou fè sa lalwa mande, osinon
 paske nou mete konfyans nou nan li lè nou tande bon nouvèl la? 6 ¶ Men sa ki ekri nan Liv la

menm: Abraram te mete konfyans li nan Bondye. Se poutèt sa Bondye te fè l' gras.⁷ Konsa, se pou nou konprann sa byen: Moun ki mete konfyans yo nan Bondye, se yo menm ki pitit Abraram.

⁸ Moun ki te ekri nan Liv la te wè davans Bondye t'ap fè moun ki pa jwif yo gras tou poutèt konfyans yo ta gen nan li. Se konsa li bay Abraram bon nouvèl sa a davans tou: Gremesi ou, tout nasyon sou

latè va jwenn benediksyon.⁹ Se paske Abraram te mete konfyans li nan Bondye kifè Bondye te beni li. Konsa, tout moun ki mete konfyans yo nan Bondye va resevwa benediksyon Bondye a

ansanm ak Abraram.¹⁰ Moun ki mete nan lide yo lalwa a ka sove yo, yo anba madichon. Men sa

ki ekri nan Liv la: Madichon pou tout moun ki pa fè tou sa ki ekri nan Liv lalwa a tout tan.¹¹ Lalwa pa kapab fè Bondye fè pesonn gras. Se bagay ki klè. Men sa ki ekri nan Liv la: Moun Bondye fè

gras paske yo gen konfyans nan li, se yo menm ki va gen lavi.¹² Lalwa pa gen anyen pou l' wè ak lafwa. Okontrè, men sa ki ekri nan Liv la: Moun k'ap fè tou sa lalwa mande a va jwenn lavi ladan

l'.¹³ Kris la delivre nou anba madichon lalwa lè li te pran madichon an nan plas nou. Se konsa sa

te ekri nan Liv la: Madichon pou moun yo pandye sou bwa a.¹⁴ Sa te fèt konsa pou moun ki pa jwif yo te ka rive resevwa benediksyon Bondye te pwomèt Abraram lan gremesi Jezikri, pou nou

tout te ka resevwa Lespri Bondye te pwomèt la, paske nou te mete konfyans nou nan li.¹⁵ Frè m' yo, mwen pral pran egzanp sou yon bagay ki rive chak jou: Lè yon moun fè testaman l' byen fèt,

pesonn pa ka kase l', ni pesonn pa ka ajoute anyen ladan li.¹⁶ Enben, Bondye te fè pwomès sa yo pou Abraram ak pitit pitit li a. Yo pa t' ekri: ak pitit pitit li yo, tankou si yo te vle pale sou anpil

moun, men yo ekri: ak pitit pitit ou a. Yo t'ap pale sou yon sèl moun, moun sa a se te Kris la.¹⁷ Men sa mwen vle di: Bondye te fè testaman sa a, epi li te pwomèt li t'ap kenbe li. Lalwa a menm te vini katantrant (430) an apre sa. Se sak fè, lalwa a pa kapab kase testaman sa a, ni li pa kapab fè pwomès

la tonbe.¹⁸ Paske, si kado Bondye bay la te chita sou lalwa Moyiz la, se pa ta yon pwomès ankò

kado a ta ye. Men, Bondye te bay Abraram favè sa a paske li te pwomèt li sa.¹⁹ ¶ Poukisa yo te bay lalwa a menm? Yo te ajoute lalwa a pou l' te ka fè nou konnen bagay ki kont volonte Bondye. Lalwa a te fèt pou l' te la toutotan pitit pitit Abraram lan pa t' ankò vini, paske se pou li Bondye te

fè pwomès la. Se zanj Bondye yo ki te bay lalwa, epi se yon nonm ki te sèvi entèmedyè.²⁰ Lè yon

moun pou kont li, li pa bezwen entèmedyè. Bondye pou kont li.²¹ Eske lalwa Moyiz la kont pwomès Bondye yo? Men non. Si zanj yo te bay yon lalwa ki te kapab bay moun lavi, enben, lalwa

sa a ta kapab fè Bondye fè moun gras.²² Men, Liv la di: Tout bagay anba pouvwa peche a. Konsa, moun ki gen lafwa, se yo ki va resevwa kado Bondye te pwomèt yo, paske yo te mete konfyans yo

nan Jezikri.²³ Anvan lè a te rive pou n' te ka gen konfyans, lalwa te kenbe nou prizonye anba men

l', jouk tan pou Bondye te devwale kalite konfyans sa a. ²⁴ Konsa, lalwa te tankou yon moun ki la pou veye nou, jouk lè Kris la te gen pou vini pou n' te ka kwè nan li pou Bondye te fè nou gras.

²⁵ Men koulye a, lè a rive pou nou gen konfyans nan Kris la; nou pa anba men moun ki t'ap veye nou an ankò. ²⁶ Se paske nou gen konfyans nan Jezikri kifè nou se pitit Bondye. ²⁷ Nou tout, nou te resevwa batèm pou n' te ka viv ansanm ak Kris la, nou mete sou nou kalite ki nan Kris yo.

²⁸ Koulye a pa gen diferans ant moun ki jwif ak moun ki pa jwif, pa gen diferans ant moun ki esklav ak moun ki pa esklav, ant fanm ak gason. Nou tout nou fè yonn nan Jezikri. ²⁹ Si ou se moun Kris la, enben ou se pitit pitit Abraram. Ou gen pou resevwa eritaj Bondye te pwomèt la.

Chapter 4

¹ ¶ Enben! Men sa m' vle di: Pitit ki pou resevwa byen papa li a, toutotan li piti toujou, y'ap trete l' menm jan yo trete yon esklav, atout se li menm ki mèt tout bagay. ² Toutotan li timoun toujou, li sou lòd moun k'ap okipe l' la, moun k'ap regle zafè l' pou li a, jouk lè papa a te fikse a rive. ³ Nou menm tou, toutotan nou te tankou timoun, nou te esklav tout lide ki t'ap mennen lèzòm nan lemonn. ⁴ Men, lè lè a rive, Bondye te voye pwòp pitit li. Li soti nan vant yon fanm, li viv anba lalwa jwif yo, ⁵ pou l' te ka delivre tout moun ki te anba lalwa pou n' te kapab vin pitit Bondye. ⁶ Pou fè nou wè nou se pitit li tout bon, Bondye te voye Lespri Pitit li a k'ap rele: Papa, nan kè nou. ⁷ Konsa, ou pa esklav ankò, ou se yon pitit. Si ou se yon pitit Bondye, Bondye va ba ou tout byen li sere pou pitit li yo. ⁸ ¶ Nan tan lontan, nou pa t' konnen Bondye, nou te esklav yon bann bondye ki pa t' Bondye. ⁹ Men, koulye a nou rive konn Bondye, ou pito koulye a Bondye konnen nou, kouman nou fè vle tounen al jwenn ti lespri sa yo ki tou fèb, tou mizerab? Ki jan pou nou vle tounen esklav yo ankò? ¹⁰ Ki jan fè gen jou, gen mwa, gen sezon, gen lanne ki gen pi konsekan pou nou pase lòt? ¹¹ Mwen pè pou nou anpil. Gen lè mwen te travay mal nan mitan nou? Se sa m'ap mande mwen. ¹² ¶ Frè m' yo, tanpri souple. Se pou nou vin tankou m', menm jan mwen menm tou mwen te vini tankou nou. Nou pa janm fè m' okenn tò. ¹³ Nou chonje kisa ki te fè m' anonse nou bon nouvèl la pou premye fwa a? Se paske m' te malad. ¹⁴ Lè sa a, malgre maladi m' lan ta ka yon eprèv pou nou, nou pa t' meprize m', ni nou pa t' repouse mwen. Okontrè, nou te resevwa m' tankou

si m' te yon zanj Bondye, tankou si se Jezikri menm m' te ye. ¹⁵ Lè sa a, nou pa t' manke kontan!
 Kisa ki rive nou konsa? Mwen ka di sa pou nou: si nou te gen pou n' te rache je nou ban mwen,
 nou ta fè li. ¹⁶ Men koulye a, èske mwen tounen yon lènmi pou nou paske m'ap di nou laverite?
¹⁷ ¶ Lèt moun sa yo enterese anpil nan nou, men lide yo gen dèyè tèt yo pa bon menm. Yo ta vle
 separe nou avè m' pou nou ka enterese nan yo ase. ¹⁸ Sa bon pou nou enterese nan lèt moun tou,
 men fòk nou pa gen move lide nan tèt nou. Wi, se pou nou toujou enterese nan lèt moun, menm lè
 mwen pa nan mitan nou. ¹⁹ ¶ Pitit mwen yo, m'ap soufri anpil pou nou toujou, tankou yon manman
 k'ap soufri doulè tranche, m'ap soufri pou nou jouk tan Kris la va fin fòmè nèt nan nou. ²⁰ Jan m'
 ta renmen bò kote nou koulye a pou m' ta ka pale yon lèt jan avèk nou! Se pa ti kras pè mwen pè
 pou nou! ²¹ ¶ Manyè di m', nou menm ki vle rete anba lalwa a: gen lè nou pa konprann sa lalwa a
 di? ²² Li di nou konsa: Abraram te gen de pitit gason, yonn avèk fanm ki te esklav la, yon lèt avèk
 fanm ki pa t' esklav la. ²³ Pitit fanm ki te esklav la te fèt dapre egzijans lachè, men pitit fanm ki
 pa t' esklav la te fèt dapre pwomès Bondye. ²⁴ Nou ka pran istwa sa a pou yon parabòl: de fanm
 sa yo se de kontra. Aga se kontra ki te fèt sou Mòn Sinayi a. Tout pitit li yo se esklav yo ye. ²⁵ Aga
 se Mòn Sinayi nan peyi Arabi. Li koresponn ak lavil Jerizalèm ki la koulye a nan esklavaj ak tout
 pitit li yo. ²⁶ Men, Jerizalèm ki nan syèl la, li lib. Se li menm ki manman nou. ²⁷ Men sa ki ekri
 nan Liv la: Fè kè ou kontan, ou menm fanm ki pa t' ka fè pitit! Rele! Fè tout moun konnen jan ou
 kontan, ou menm ki pa t' janm konnen doulè tranche! Paske, fanm gason pa t' okipe a ap gen plis
 pitit pase fanm ki gen mari. ²⁸ Koulye a, frè m' yo, nou tankou Izarak: nou se pitit Bondye jan l'
 te pwomèt la. ²⁹ Nan tan Abraram, pitit ki te fèt dapre egzijans lachè a t'ap pèsekite pitit ki te fèt
 dapre Lespri Bondye a. Se konsa sa ye koulye a tou. ³⁰ Men, kisa ki ekri nan Liv la? Liv la di:
 Mete esklav la deyò ansanm ak tout pitit li a. Paske pitit esklav la pa gen dwa eritye nan byen papa
 a ansanm avèk pitit fanm ki pa t' esklav la. ³¹ Konsa, frè m' yo, nou pa pitit esklav la, nou se pitit
 fanm ki pa t' esklav la.

Chapter 5

¹ ¶ Se pou n' te ka lib tout bon kifè Kris la te delivre nou. Se poutèt sa, ann rete fèm nan libète sa a. Veye kò nou pou n' pa tounen esklav ankò. ² Tande byen. Men sa mwen menm Pòl m'ap di nou: Si nou kite yo sikonsi nou, sa vle di Kris la pa sèvi nou anyen. ³ M'ap repete sa m' te di deja pou tout moun ki kite yo sikonsi yo: si yo fè sa, y'ap blije fè tou sa lalwa Moyiz la mande. ⁴ Moun ki kwè Bondye ap fè yo gras paske yo fè sa lalwa a mande, yo vire do bay Kris la. Yo pèdi favè Bondye a. ⁵ Pou nou menm, nou gen espwa Bondye va fè nou gras paske nou gen konfyans nan li. Se sa menm n'ap tann, gremesi pouvwa Lespri Bondye a k'ap travay nan nou. ⁶ Paske, lè n'ap viv ansanm ak Kris la, kit nou sikonsi, kit nou pa sikonsi, sa pa fè anyen. Sa ki konsekan an se pou nou gen konfyans nan Bondye, yon konfyans k'ap fè nou viv ak renmen nan kè nou. ⁷ Nou te konmanse byen pwòp. Ki moun ki rete nou sou kous nou, k'ap anpeche nou obeyi verite a? ⁸ Bagay yo te di pou yo te ka pran tèt nou, se pa bagay ki soti nan Bondye k'ap rele nou an. ⁹ Pa bliye pawòl la: Se ti kal ledven ki fè tout pa t' la leve. ¹⁰ Men, Seyè a fè m' gen konfyans nan nou, li ban m' lasirans nou p'ap fè lòt lide, n'ap dakò avè mwen. Men, kanta moun k'ap boulvèse nou an, li te mèt sa l' te ye, Bondye gen pou peni li. ¹¹ Pou mwen menm, frè m' yo, si m' t'ap mande pou moun sikonsi toujou, poukisa y'ap pèsekite m' jouk koulye a? Epitou, nan ka sa a, mesaj m'ap bay lè m'ap anonse Kris la ki mouri sou kwa a pa ta bay pesonn okazyon bite. ¹² Kanta moun k'ap boulvèse nou konsa sou keksyon sikonsizyon an, yo ta mèt tou fè chatre yo fin ak sa. ¹³ ¶ Kanta nou menm, frè m' yo, Bondye te rele nou pou n' te ka gen libète nou. Sèlman, pa pran libète a sèvi eskiz pou nou viv dapre egzijans lachè. Okontrè, se pou nou yonn sèvi lòt nan renmen nou yonn gen pou lòt. ¹⁴ Paske tou sa lalwa mande nou, nou jwenn yo nan kòmandman sa a: Se pou ou renmen frè parèy ou, menm jan ou renmen tèt pa ou. ¹⁵ Men, si yonn ap mòde lòt, yonn ap devore lòt tankou bèt sovaj, atansyon pou yonn pa touye lòt tou! ¹⁶ Se poutèt sa, men sa m'ap di nou: Kite Lespri Bondye dirije lavi nou. Pa obeyi egzijans kò a. ¹⁷ Kò a gen egzijans ki pa dakò ak egzijans Lespri Bondye a. Konsa tou, Lespri Bondye a gen egzijans ki pa dakò ak egzijans kò a. Se de bagay ki pa mache ansanm menm. Se sak fè nou pa kapab fè sa nou vle. ¹⁸ Men, si se Lespri Bondye a k'ap dirije lavi nou, nou pa anba lalwa ankò. ¹⁹ Se fasil pou nou wè sa egzijans kò a fè moun fè: se imoralite, malpwòpte ak vis. ²⁰ Se sèvi zidòl, se fè maji, se yonn fè lòt lènmi, se fè kont, fè jalouzi, fè kòlè, se yonn pa vle wè lòt, se fè ti pil gwo pil. ²¹ Yonn anvye sò lòt, yo tafyatè, yo saf konsa, ak yon

bann lòt bagay ankò y'ap fè. Mwen deja di nou sa, epi m'ap repete l' ankò pou nou: moun ki fè tout bagay sa yo p'ap antre menm nan peyi kote Bondye wa a. ²² Men, Lespri Bondye a bay renmen, kè kontan, kè poze, pasyans, bon kè, seriozite, li fè ou gen bon manyè. ²³ Li fè ou aji ak dousè, li fè ou konn kontwole kò ou. Lalwa Moyiz la pa kont okenn nan bagay sa yo. ²⁴ Moun ki moun Jezikri, yo fè kò a mouri ansanm ak tout egzijans li yo, ak tout lanvi li yo. ²⁵ Se Lespri Bondye a ki ban nou lavi, se pou n' kite li dirije lavi nou nan tout bagay. ²⁶ Pa kite lògèy moute nou nan tèt. Piga yonn chache lòt kont. Piga yonn rayi sò lòt.

Chapter 6

¹ ¶ Frè m' yo, si nou bare yon moun ap fè yon bagay ki mal, nou menm ki gen Lespri Bondye a nan kè nou, se pou nou mete l' nan bon chemen. Men, fè sa avèk dousè. Epi nou menm bò pa nou, veye kò nou pou nou pa tonbe nan tantasyon tou. ² Se pou nou yonn ede lòt pote chay yo. Se konsa n'a obeyi lalwa Kris la. ³ Si yon moun ki pa anyen mete nan tèt li li kichòy, moun sa a se twonpe l'ap twonpe tèt li. ⁴ Chak moun dwe egzaminen jan y'ap viv la. Si yo kontan ak tèt yo, y'a kontan pou sa yo fè. Yo p'ap bezwen konpare tèt yo avèk sa lòt yo ap fè. ⁵ Paske, chak moun gen chay pa yo pou yo pote. ⁶ Moun k'ap resevwa bon nouvèl la fèt pou separe tout byen l' yo ak moun k'ap ba li l' la. ⁷ Pa twonpe tèt nou. Moun pa ka pase Bondye nan betiz. Sa yon moun simen, se sa li va rekòlte. ⁸ Moun ki simen sa ki fè kò l' plezi, li gen pou l' rekòlte lanmò. Men, moun ki simen sa ki fè Lespri Bondye a plezi, Lespri a va fè l' rekòlte lavi ki p'ap janm fini an. ⁹ Pa janm bouke fè byen. Paske, si nou pa dekouraje, n'a rekòlte lè lè a va rive. ¹⁰ Se sak fè, toutotan nou jwenn okazyon, ann fè byen pou tout moun, sitou pou frè ak sè nou yo ki gen menm konfyans ak nou nan Bondye. ¹¹ ¶ Gade ki gwo lèt m'ap ekri nou koulye a ak men pa m'! ¹² Moun nou wè ki vle fè nou sikonsi yo, se moun k'ap chache pase pou bon nan je lèzòm. Y'ap fè sa paske yo pa vle pou moun pèsèkrite yo akòz kwa Kris la. ¹³ Paske yo menm ki sikonsi, yo pa fè tou sa lalwa mande. Men, yo vle nou sikonsi pou yo ka fè grandizè pou jan yo te fè nou asepte mak sa a nan kò nou. ¹⁴ Pou mwen menm, mwen p'ap vante tèt mwen pou lòt bagay pase pou kwa Kris la. Paske, gremesi kwa sa a, mwen mouri pou lemonn, lemonn mouri pou mwen. ¹⁵ Kit ou sikonsi, kit ou pa sikonsi, se pa sa ki konte.

16
 Sa ki konte, se pou nou chanje, se pou nou tounen yon lòt moun. Pou tout moun k'ap swiv prensip sa a nan lavi yo, mwen mande Bondye pou l' ba yo kè poze, pou l' gen pitye pou yo, wi, pou yo tout ansanm ak tout pèp Bondye a. 17
 Apre sa, piga pesonn ban m' traka ankò. Paske, mak m'ap pote nan kò mwen moutre se esklav Jezikri mwen ye. 18
 Frè m' yo, se pou benediksyon Jezikri, Seyè nou an, toujou la ak nou tout. Amèn.

Ephesians

Chapter 1

1
 ¶ Mwen menm, Pòl, yon moun Bondye te deside chwazi pou apòt Jezikri, m'ap ekri lèt sa a voye bay tout pèp Bondye ki nan lavil Efèz la, k'ap kenbe fèm nan lavi y'ap mennen ansanm nan Jezikri. 2
 Mwen mande Bondye Papa nou ansanm ak Jezikri, Seyè nou, pou yo ban nou benediksyon ak kè poze. 3
 ¶ Lwanj pou Bondye, Papa Jezikri, Seyè nou an. Se li menm ki beni nou nan lavi n'ap mennen ansanm nan Kris la. Li ban nou tout kalite benediksyon pou nou ka viv dapre egzijans Lespri Bondye nan syèl la. 4
 Byen lontan anvan Bondye te kreye lemonn, li te chwazi nou nan Kris la pou nou te kapab viv apa pou li, pou n' te san repwòch devan li. Nan renmen li renmen nou an, 5
 Bondye te deside depi davans pou l' te adopte nou pou pitit li nan Jezikri, paske sa te fè l' plezi. 6
 Se poutèt sa, ann toujou fè lwanj Bondye pou bèl favè sa a li fè nou kado, gremesi Pitit li renmen anpil la! 7
 Gremesi Kris ki mouri pou nou an, nou delivre, nou resevwa padon pou peche nou yo; Bondye fè nou wè jan li renmen nou anpil. 8
 Li ban nou favè l' an kantite, li ban nou tout kalite konprann ak konesans. 9
 Li fè nou konnen plan travay li te kenbe sekre nan kè l', plan travay li te gen lide fè depi lontan an. Se plan sa a li vin reyalize nan Kris la. 10
 Dapre plan travay Bondye a, plan ki gen pou fin reyalize nèt lè lè a va rive, Bondye ap mete tout bagay ki nan syèl la ansanm ak tout bagay ki sou latè a anba yon sèl chèf, anba Kris la. 11
 Bondye ap fè tout bagay rive jan l' te deside l' la ak jan l' te vle l' la. Konsa, nou menm jwif, nou se moun Bondye te chwazi depi davans dapre plan li. Lè n'ap viv ansanm nan Kris la, nou resevwa pèsyon pa nou nan byen l' yo. 12
 Se sak fè, nou menm ki premye moun ki t'ap tann Kris la, n'ap viv yon jan ki sèvi yon lwanj pou pouvwa Bondye a. 13
 Konsa tou, nou menm, moun lòt nasyon yo, apre nou te fin tande mesaj

laverite a, ki vle di bon nouvèl k'ap fè nou konnen jan Bondye delivre nou an, nou te mete konfyans nou nan Kris la, n'ap viv ansanm nan Kris la tou. Bondye te make nou ak letanp li tou, li ban nou

¹⁴ Sentepri li te pwòmèt la. Sentepri sa a, se yon avalwa Bondye ban nou sou eritaj li te pwòmèt li t'ap bay pèp li a. Sa ban nou garanti Bondye gen pou fin delivre moun pa l' yo nèt. Se sak fè, nou

menm tou, moun lòt nasyon yo, n'ap sèvi yon lwanj pou pouvwa Bondye a tou. ¶ Se poutèt tout bagay sa yo, depi mwen tande jan nou gen konfyans nan Kris la, jan nou renmen tout moun ki fè

¹⁶ pati pèp Bondye a, mwen pa janm sispann di Bondye mèsi pou nou. Mwen toujou chonje nou

¹⁷ lè m'ap lapriyè. Bondye Jezikri, Seyè nou an, fè nou konnen an, se yon papa ki gen anpil pouvwa. Mwen mande l' pou li ban nou Sentepri l' ki bay bon konprann ki moutre nou sa Bondye ap devwale

¹⁸ nou an pou nou ka rive konnen l' byen. Mwen mande l' pou l' louvri lespri nou, pou nou ka konnen kisa n'ap tann nan men Bondye ki rele nou an, ki vle di eritaj Bondye pwòmèt l'ap bay

¹⁹ moun ki pou li yo, yon eritaj ki rich anpil, ki bèl anpil. Mwen mande l' pou nou ka konnen tou ki jan pouvwa li k'ap travay nan nou menm ki kwè nan li a, se yon gwo pouvwa ki san limit. Se

²⁰ menm gwo pouvwa sa a Bondye te fè moun wè, lè li te fè Kris la leve soti vivan nan mitan mò

²¹ yo, li fè l' chita sou bò dwat li nan syèl la. Li mete Kris la anwo tout chèf, anwo tout otorite, tout pouvwa ak tout dominasyon. Kris la pi wo pase tout gwo non yo kapab bay moun non sèlman

²² koulye a sou latè, men nan tan ki gen pou vini an tou. Bondye mete tout bagay anba pye Kris

²³ la, li mete l' pou l' sèl chèf legliz la. Legliz la se kò Kris la, li konplete Kris la. Kris la menm, avèk pouvwa li, li konplete tout bagay ki toupatou.

Chapter 2

¹ ¶ Nou menm moun Efèz, nou te mouri poutèt mechanste ak peche nou yo. ² Se nan bagay sa yo nou t'ap viv nan tan lontan. Nou t'ap swiv move kouran ki nan lemonn, nou t'ap fè volonte chèf

³ otorite yo ki nan lè a, move lespri k'ap travay koulye a nan moun k'ap dezobeyi Bondye yo. Lè sa a, nou menm jwif yo, nou te menm jan ak yo. Nou t'ap mennen lavi nou dapre egzijans lachè, nou t'ap fè kapris kò nou ak tout vye lide ki te vin nan tèt nou. Konsa, nou menm jwif, jan nou te

⁴ ye a, nou te kondannen pou n' te tonbe anba kolè Bondye tankou lòt yo. ¶ Men, Bondye sitèlman

⁵ gen kè sansib, li sitèlman renmen nou, li ban nou lavi ankò ansanm ak Kris la, nou menm ki te

⁶ mouri akòz peche nou yo. Se yon favè Bondye fè nou lè li delivre nou. Ansanm ak Kris la, Bondye

fè nou leve soti nan lanmò, li fè nou chita jouk anwo nan syèl la ansanm ak li tou. ⁷ Li fè tou sa pou moutre pou tout tan ki gen pou vini yo jan li renmen nou anpil anpil, jan li aji byen avèk nou nan Jezikri. ⁸ Se paske li renmen nou kifè li delivre nou, nou menm ki mete konfyans nou nan li. Sa pa soti nan nou menm menm, se yon kado Bondye ban nou. ⁹ Non, nou pa fè anyen pou sa. Konsa, pesonn pa ka vante tèt yo. ¹⁰ Se Bondye ki fè nou. Nan Jezikri li kreye nou pou nou ka fè anpil bon zèv nan lavi nou, dapre sa li te pare davans pou nou te fè. ¹¹ ¶ Nou menm ki pa t' fèt nan ras jwif la, jwif yo te rele nou moun ki pa sikonsi, menm jan yo te rele tèt yo moun ki sikonsi. Yo t'ap gade sou mak lèzòm fè sou kò yo ak men yo. Wi, nou menm moun lòt nasyon yo, chonje sa nou te ye nan tan lontan. ¹² Lè sa a, nou t'ap viv byen lwen Kris la, nou te tankou etranje, nou pa t' fè pati pèp Bondye te chwazi pou li a. Nou pa t' nan kontra Bondye te fè ak pèp li a dapre sa l' te pwomèt la. Nou t'ap viv sou latè san okenn espwa, san Bondye. ¹³ Men koulye a, nan Jezikri, nou menm ki yon lè t'ap viv lwen Bondye, nou vin toupre l', gremesi san Kris la ki koule lè li mouri pou nou an. ¹⁴ ¶ Paske, se li menm k'ap fè nou byen yonn ak lòt, li fè moun lòt nasyon yo fè yon sèl pèp ansanm ak jwif yo. Avèk pwòp kò li, li kraze miray ki te separe yo epi ki te fè yo yonn lènmi lòt. ¹⁵ Li aboli lalwa Moyiz la ansanm ak kòmandman l' yo ak tout regleman l' yo. Li pran de pèp sa yo, li fè yo tounen yon sèl pèp tou nouvo k'ap viv ansanm nan li. Se konsa li fè nou byen yonn ak lòt. ¹⁶ Avèk lanmò Kris la sou kwa a, li wete sa ki t'ap fè de pèp sa yo yonn rayi lòt, li fè yo tou de vin byen ak Bondye, li mete yo ansanm yonn ak lòt nan yon sèl kò. ¹⁷ Wi, Kris la te vini, li anonse bon nouvèl k'ap mete lapè a ni pou moun lòt nasyon yo ki te lwen Bondye, ni pou jwif yo ki te toupre Bondye. ¹⁸ Paske, gremesi Kris la, nou tout, kit nou jwif kit nou pa jwif, nou ka pwoche bò kot Papa a, nan pouvwa yon sèl ak menm Sentespri a. ¹⁹ Se sak fè, nou menm moun lòt nasyon yo, nou pa etranje ankò, ni moun ki depasaj. Men, se sitwayen nou ye ansanm ak tout moun nan pèp Bondye a, nou fè pati fanmi Bondye a. ²⁰ Nou menm moun lòt nasyon yo, nou se kay Bondye ap bati sou fondasyon apòt yo ak pwofèt yo te poze a, men se Jezikri menm ki gwo wòch ki kenbe kay la kanpe a. ²¹ Se li menm ki kenbe tout kò kay la kanpe byen fèm, ki fè l' grandi pou l' tounen yon sèl kay yo mete apa pou Bondye. ²² Konsa, nou menm tou avèk lavi n'ap mennen nan Kris la, nou antre nan batisman sa a pou nou fè ansanm ak lòt yo yon sèl kay kote Bondye ap viv ak pouvwa Sentespri li.

Chapter 3

¹ ¶ Se poutèt sa, mwen menm Pòl ki nan prizon poutèt Kris la pou byen nou, nou menm ki pa
² jwif, m'ap lapriyè pou nou devan Bondye. Mwen kwè nou konnen deja ki jan Bondye, nan bon
³ kè l', te ban m' travay sa a pou m' te fè pou nou. Bondye devwale m' sekre travay li a, pou m' te
⁴ ka konnen plan li te gen sere nan kè li. Se sou plan sa a mwen deja ekri nou kèk mo pi wo a. Lè
⁵ n'a li yo, n'a kapab gen yon lide ki jan mwen konprann sekre Kris la. Nan tan lontan Bondye pa
⁶ t' devwale plan travay sa a bay ankenn moun sou latè, men koulye a, ak pouvwa Sentespri a, li
⁷ devwale l' bay moun li mete apa pou sèvi l' apòt ak pwofèt. Men sekre a: Nan Jezikri, ak pouvwa
⁸ bon nouvèl la, moun ki pa jwif yo gen pou resevwa ansanm ak jwif yo pòsyon pa yo nan byen
⁹ Bondye a. Yo se manm yon menm kò ansanm ak jwif yo, y'ap jwenn pa yo ansanm ak yo tou nan
¹⁰ menm pwomès Bondye te fè a. Kifè m'ap sèvi bon nouvèl sa a, se paske Bondye nan bon kè l' fè
¹¹ m' yon favè, li fè pouvwa li travay nan mwen. Mwen pi pitit pase moun ki pi pitit nan tout pèp
¹² Bondye a. Men atousa, se mwen menm Bondye bay privilèj sa a, pou m' fè moun lòt nasyon yo
¹³ konnen bon nouvèl richès Kris la, richès moun p'ap janm fin konprann. Li ban m' privilèj sa a
¹⁴ pou m' fè tout moun wè aklè ki jan plan travay Bondye te sere nan kè li a ap reyalize, paske Bondye
¹⁵ ki kreye tout bagay te kenbe plan sa a nan kè l' depi lontan. Men koulye a, avèk legliz la, tout
¹⁶ chèf ak tout otorite ki nan syèl la pral rive konnen bon konprann Bondye a sou tout fòm li yo.
¹⁷ Bondye aji konsa dapre plan ki te la depi lontan an. Se plan sa a li reyalize nan Jezikri, Seyè nou
¹⁸ an. Ak lavi n'ap mennen ansanm nan Kris la, gremesi konfyans nou gen nan li a, nou lib pou
¹⁹ nou pwoche devan Bondye san kè sote. Se sak fè, mwen mande nou pou nou pa dekouraje poutèt
²⁰ soufrans m'ap sibi pou nou yo, paske se yon bèl avantaj sa ye pou nou. ¶ Wi, se poutèt sa, mwen
¹⁵ tonbe ajenou devan Papa a, ki bay tout fanmi ki nan syèl la ak sou latè a non yo. M'ap mande
¹⁶ Bondye pou li ban nou, dapre richès pouvwa li a, fòs ak kouraj nan kè nou, pa mwayen pouvwa
¹⁷ Sentespri a, pou nou ka grandi nan karaktè nou, pou Kris la rete nan kè nou ak konfyans nou
¹⁸ gen nan li a. M'ap mande Bondye pou nou pouse rasin, pou nou chita byen fèm nan renmen, pou
¹⁹ nou ka konprann, ansanm ak tout pèp Bondye a, jan renmen Kris la laj, jan li long, jan li fon, jan
²⁰ li wo. Wi, mwen mande pou nou rive konnen kalite renmen Kris la gen pou nou, atout pesonn
²⁰ p'ap janm ka rive konnen l' nèt. Konsa, n'a vin plen nèt ak tou sa ki nan Bondye. Tout lwanj lan
 se pou Bondye. Paske, ak pouvwa k'ap travay nan nou an, li kapab fè pi plis pase tou sa nou ka

mande, pi plis pase tou sa nou ka mete nan lide nou. ²¹ Wi, tout lwanj lan pou Bondye nan legliz la ak nan Jezikri, pou tout tan ak pou tout tan. Amèn. Se sa menm!

Chapter 4

¹ ¶ Se sa ki fè, mwen menm ki nan prizon poutèt Seyè a, m'ap mande nou pou nou viv yon jan ki konfòm ak jan Bondye te rele nou pou n' viv la. ² ¶ Pa janm vante tèt nou. Aji avèk dousè ak pasyans ak tout moun. Se pou nou yonn sipòte lòt avèk renmen nan kè nou. ³ Sentespri a mete nou ansanm. Se pou nou fè tou sa nou kapab pou nou ka toujou fè yon sèl kò, pou nou viv ak kè poze ansanm yonn ak lòt. ⁴ Gen yon sèl kò ak yon sèl Sentespri, konsa tou se yon sèl Bondye a ki rele nou pou nou gen yon sèl espwa. ⁵ Gen yon sèl Seyè, yon sèl konfyans, yon sèl batèm. ⁶ Gen yon sèl Bondye, ki papa nou tout, k'ap dominen sou nou tout, k'ap aji nan nou tout, ki nan nou tout. ⁷ Nou chak nou resevwa yon kado apa, dapre sa Kris la te bay la, ⁸ jan sa ekri nan Liv la: Lè li moute anwo, li mennen anpil prizonnye ak li, li bay lèzòm anpil kado. ⁹ Enben, kisa sa vle di: Li moute anwo? Sa vle di, li te desann anvan sa jouk kote ki pi fon anba tè a. ¹⁰ Moun ki te desann lan, se li menm tou ki te moute anwo nan syèl la, pou l' te kapab plen tou sa ki egziste ak presans li. ¹¹ Se li menm ki fè lèzòm kado divès pouvwa. Li bay kèk ladan yo pouvwa pou sèvi apòt, li bay lòt ladan yo pouvwa pou sèvi pwofèt, li bay lòt ankò pouvwa pou anonse bon nouvèl la, li bay dèt ankò pouvwa pou sèvi tankou pastè ak dirèktè. ¹² Konsa, li byen òganize pèp Bondye a pou yo chak fè travay sèvis yo, pou kò Kris la ka grandi nan konfyans. ¹³ Li fè sa konsa pou nou tout ansanm nou ka rive fè yon sèl kò nan konfyans nou genyen an ak nan konesans Pitit Bondye a. Konsa, nou tout ansanm nou ka vin granmoun ki byen devlope, dapre dènye mezi devlopman Kris la ki bon nèt. ¹⁴ Lè sa a, nou p'ap viv tankou timoun ankò, tankou moun k'ap chanje lide fasil, ki kite kouran nenpòt doktrin trennen yo ale, ki tankou jwèt nan men bann rize sa yo ki konn ki jan pou yo pran tèt moun nan bay manti. ¹⁵ Okontrè, ann pale verite a avèk renmen nan kè nou, konsa n'a ka grandi nan tout sans nan Kris la ki chèf kò a. ¹⁶ Gremesi Kris la, tout pati nan kò a byen òganize, yo tout byen mare yonn ak lòt nan jwenti yo. Konsa, lè chak pati fè sa yo gen pou yo fè a, tout kò a ap grandi, l'ap devlope nan renmen. ¹⁷ ¶ Se sa ki fè, men sa m'ap di nou, men sa m'ap deklare nou nan non Seyè a: Sispann viv tankou moun ki pa konn Bondye epi k'ap swiv lide pa yo

¹⁸
 ki pa vo anyen. ¹⁹ Lespri yo bouche, yo p'ap viv lavi Bondye bay la, paske yo pa konn anyen, kè
 yo fin di. ²⁰ Yo san wont konsa, yo lage kò yo nan tout kalite vis, yo pran plezi yo nan fè tout kalite
 vye bagay sal san rete. ²¹ Men nou menm, se pa konsa yo te fè nou konnen Kris la, ²² si tout bon
 vre nou te tande pale sou Kris la, si tout bon vre yo te moutre nou verite a jan l' ye nan Jezi, lè nou
 te mete konfyans nou nan li a. ²³ Se sa ki fè, se pou nou chanje vye karaktè sa a ki t'ap fè nou viv
 jan nou t'ap viv nan tan lontan an, vye moun sa a ki te fin pèvèti nèt ak vye dezi l' yo ki t'ap twonpe
 nou. ²⁴ Se pou nou chanje nèt ni nan kè nou ni nan lespri nou. ²⁵ Se pou nou vin yon lòt kalite
 moun jan Bondye vle l' la, pou nou sanble ak li pou nou ka mennen yon lavi ki dwat, yon lavi ki
 apa pou Bondye, jan verite a mande l' la. ²⁶ Se poutèt sa, sispann bay manti. Se pou nou di verite
 lè n'ap pale ak frè nou, paske nou tout se manm yon sèl kò nou ye. ²⁷ Si nou ankòlè, veye kò nou
 pou kòlè a pa fè nou fè sa ki mal. Pa al dòmi ak kòlè nan kè nou. ²⁸ Pa bay Satan pye sou nou.
²⁹ Se pou moun ki te konn vòlò sispann vòlò. Okontrè, se pou l' travay di ak men l' san fè move
 konbinezon, pou l' sa gen dekwa bay moun ki nan bezwen. ³⁰ Pa kite ankenn move pawòl soti nan
 bouch nou. Pale bon koze ki ka ede lòt yo grandi nan konfyans Bondye, koze ki ka ede yo lè yo
 nan move pa. Konsa, se yon byen n'a fè pou moun k'ap tande nou yo. ³¹ Pa fè Sentespri Bondye a
 lapenn, paske Lespri a se mak letanp Bondye sou nou, li ban nou garanti Bondye ap fin delivre nou
 lè jou a va rive. ³² Piga yo jwenn nan mitan nou moun ki kenbe lòt nan kè yo, moun ki gen san
 wo, moun ki renmen fè kòlè. Piga yo tande woywoy ak joure nan mitan nou. Nou pa fèt pou gen
 okenn lòt kalite mechanste k'ap fèt nan mitan nou. ³³ Okontrè, se pou nou aji byen yonn ak lòt, se
 pou nou gen bon kè yonn pou lòt, pou nou yonn padonnen lòt, menm jan Bondye te padonnen nou
 nan Kris la.

Chapter 5

¹
 ¶ Se sa ki fè, paske nou se pitit Bondye renmen anpil, se pou nou chache fè tankou Bondye
²
 fè. Se pou nou viv ak renmen nan kè nou, menm jan Kris la te fè l' la, li menm ki te renmen nou,
 ki te bay lavi l' pou nou tankou yon ti mouton yo ofri pou touye pou Bondye, ofrann k'ap fè Bondye
 plezi ak bon sant li. ³ ¶ Paske nou se pèp Bondye a, sa pa bon pou nou menm louvri bouch nou
 pale sou dezòd lachè, sou bagay ki sal ak vye dezi. ⁴ Sa pa bon non plis pou nou kite gwo mo,

pawòl san sans ak mo sal soti nan bouch nou. Bagay konsa pa dakò ak sa nou ye. Okontrè, se pou
 nou lapriyè pou di Bondye mèsi. ⁵ Paske, konnen sa byen: okenn moun ki nan dezòd lachè, osinon
 ki nan lenkondite, osinon ki renmen lajan (moun konsa se tankou moun k'ap sèvi zidòl), okenn nan
 moun sa yo p'ap gen pòsyon eritaj nan peyi kote Bondye ak Kris la wa a. ⁶ Pa kite pesonn twonpe
 nou ak pawòl san sans yo: se poutèt bagay sa yo menm kòlè Bondye tonbe sou moun ki refize obeyi
 l' yo. ⁷ Nou pa gen anyen pou nou wè ak moun konsa. ⁸ Nan tan lontan, nou te nan fènwa. Men
 koulye a, paske n'ap viv ansanm nan Seyè a, nou nan limyè. Se sa ki fè, fòk nou mennen tèt nou
 tankou moun k'ap viv nan limyè a. ⁹ Paske, limyè a fè moun fè bagay ki bon, bagay ki dwat ak
 bagay ki vre. ¹⁰ Chache konnen sa k'ap fè Seyè a plezi. ¹¹ Nou pa gen anyen pou nou wè ak moun
 k'ap viv nan fènwa, moun k'ap fè bagay ki p'ap rapòte anyen. Okontrè, denonse yo pou sa yo ye.
¹² Bagay moun sa yo ap fè an kachèt, se yon wont menm pou pale sou sa. ¹³ Men, lè ou mete tout
 bagay sa yo aklè nan limyè, lèzòm va wè sa yo ye tout bon. ¹⁴ Paske, tout bagay ki parèt aklè
 tounen limyè. Se poutèt sa yo di: Leve non, ou menm k'ap dòmi an, leve soti nan mitan mò yo. Kris
 la va klere ou. ¹⁵ Se sa ki fè, konnen ki jan pou n' mennen tèt nou! Pa mennen tèt nou tankou moun
 ki sòt, men tankou moun ki gen konprann. ¹⁶ Pa kite okenn okazyon pase pou fè sa ki byen. Paske,
 jou sa yo n'ap viv la a pa bon menm. ¹⁷ Se poutèt sa, pran tèt nou byen, chache konnen sa Seyè a
 vle nou fè. ¹⁸ Pa soule tèt nou ak diven, sa ka mennen nou nan debòch. Okontrè, plen kè nou ak
 Sentespri. ¹⁹ Lè n'ap pale yonn ak lòt, sèvi ak pawòl ki nan sòm yo, nan kantik yo, ak nan chante
 Lespri Bondye a moutre nou. Chante kantik ak sòm pou Seyè a lè n'ap fè lwanj li ak tout kè nou.
²⁰ Nan non Seyè nou an, Jezikri, se tout tan pou n'ap di Bondye Papa a mèsi pou tout bagay. ²¹ ¶
 Se pou nou yonn soumèt devan lòt pa respè pou Kris la. ²² Nou menm, medam yo, soumèt devan
 mari nou tankou nou soumèt devan Seyè a. ²³ Paske, yon mari se chèf madanm li menm jan Kris
 la se chèf legliz la. Se Kris la menm ki delivre legliz la ki kò li. ²⁴ Konsa, se pou medam yo soumèt
 devan mari yo menm jan legliz la soumèt devan Kris la. ²⁵ Nou menm, mari yo, se pou nou renmen
 madanm nou menm jan Kris la te renmen legliz la, jouk li te asepte mouri pou li. ²⁶ Li te fè sa pou
 li te ka mete legliz la apa pou Bondye. Li lave legliz la nan dlo ak nan pawòl li. ²⁷ Paske, li te vle
 pou legliz la parèt devan l' nan tout bèl pouvwa li, byen pwòp, san okenn defo, ni okenn tach, ni
 okenn pli, ni okenn mank. ²⁸ Se pou mari yo renmen madanm yo menm jan yo renmen pwòp tèt

pa yo. Yon nonm ki renmen madanm li, li renmen pwòp tèt pa li tou. ²⁹ Pesonn pa janm rayi kò li. Okontrè, li ba l' manje, li pran swen l', tankou Kris la ap fè sa pou legliz la ³⁰ paske nou se manm kò li. ³¹ Jan sa ekri nan Liv la: Se poutèt sa, gason an va kite papa l' ak manman l', pou l' mete tèt li ak madanm li, pou tou de fè yon sèl. ³² Se yon gwo verite wi Bondye fè nou konnen nan pawòl sa a. Mwen menm, mwen kwè verite sa a se pou Kris la ak legliz la. ³³ Men, li bon pou nou tou: se pou chak mari renmen madanm yo tankou yo renmen tèt pa yo, epitou se pou chak madanm respekte mari yo.

Chapter 6

¹ ¶ Timoun, se devwa nou tankou moun ki kwè nan Seyè a pou n' obeyi papa nou ak manman nou, paske sa se yon bagay ki dwat devan Bondye. ² Respekte papa ou ak manman ou. Sa se premye kòmandman ki gen yon pwomès dèyè l': ³ Pou nou ka viv lontan ak kè kontan sou latè. ⁴ Kanta nou menm, manman ak papa, pa aji ak timoun nou yo yon jan pou eksite yo. Men, ba yo bon levasyon, korije yo, pale ak yo dapre prensip Seyè a. ⁵ Nou menm domestik, obeyi mèt nou gen sou latè a avèk respè, avèk krentif, ak tout kè nou menm jan nou ta sèvi Kris la. ⁶ Se pa sèlman lè yo la ap gade nou pou nou aji konsa, tankou moun k'ap achte figi. Lekontrè, fè sa Bondye vle nou fè a ak tout kè nou, tankou moun k'ap sèvi Kris la. ⁷ Fè travay nou ak kè kontan, tankou si se pa pou moun nou t'ap travay, men pou Seyè a. ⁸ Paske chonje byen: kit yon moun esklav, kit li lib, li gen pou l' resevwa sa ki pou li nan men Seyè a, dapre bon travay li fè a. ⁹ Nou menm mèt, se pou n' aji menm jan an tou ak moun k'ap sèvi nou yo. Pa fè yo okenn menas. Toujou chonje ni nou menm, ni domestik nou yo, nou gen yon sèl Mèt nan syèl la, ki pa gade sou figi moun. ¹⁰ ¶ Pou fini, chache fòs nou nan lavi n'ap mennen ansanm ak Seyè a ak nan gwo pouvwa li. ¹¹ Pran mete sou nou tout kalite zam Bondye ban nou pou nou ka kenbe tèt anba riz Satan. ¹² Paske, se pa ak moun nou gen pou nou goumen. Men, se ak move lespri ki nan syèl la, ak chèf, ak pouvwa, ak otorite k'ap gouvènen nan fènwa ki sou latè a. ¹³ Se poutèt sa, depi koulye a, pran tout zam Bondye bay yo. Konsa, lè move jou a va rive, n'a ka kenbe tèt ak lènmi an. Lè batay la va fini nèt, n'a kanpe la byen fèm nan pozisyon nou toujou. ¹⁴ Pare kò nou: mare verite a tankou yon sentiwon nan ren

nou. Pwoteje nou ak jistis Bondye a tankou plak pwotèj sòlda yo mete sou lestonmak yo pou pwoteje
¹⁵
yo. Pou soulye nan pye nou, mete aktivite pou anonse bon nouvèl k'ap fè moun viv ak kè poze
¹⁶
a. Toujou pran konfyans nou gen nan Bondye a tankou yon defans ki va penmèt nou pare tout
¹⁷
flèch Satan an ap voye tou limen sou nou. Resevwa pouvwa Bondye k'ap delivre nou an tankou
¹⁸
yon kas an fè nan tèt nou. Asepte pawòl Bondye a tankou yon nepe Sentespri a ban nou. Pandan
n'ap fè tou sa, pa janm bliye lapriyè. Mande Bondye konkou li. Lapriyè nan tout sikonstans avèk
pouvwa Sentespri a. Se poutèt sa, pa kite dòmi pran nou, kenbe fèm nan sa n'ap fè a. Lapriyè pou
¹⁹
tout pèp Bondye a. ¶ Lapriyè pou mwen tou, pou Bondye ka mete pawòl nan bouch mwen lè
m'a gen pou m' pale, pou m' ka pale avèk lasirans, pou moun ka rive konnen sekrè ki nan bon nouvèl
²⁰
la. Nou mèt wè m' nan prizon koulye a, se Bondye ki ban m' misyon fè konnen bon nouvèl la.
²¹
Lapriyè pou mwen pou m' ka pale avèk lasirans, jan m' dwe fè l' la. Tichik, frè nou renmen anpil
la epi ki yon bon sèvitè nan travay Seyè a, va ban nou tout nouvèl mwen, pou nou ka konnen jan
²²
zafè m' ap mache. M'ap voye l' tout espere pou l' sa di nou kouman mwen ye, pou nou pa fin
²³
dekouraje, pou sa remoute kouraj nou. Mwen mande Bondye, Papa a, ansanm ak Jezikri, Seyè
²⁴
a, pou yo bay tout frè yo kè poze, renmen ak konfyans nan Bondye. benediksyon Bondye pou
tout moun ki renmen Jezikri, Seyè nou an, ak yon renmen ki p'ap janm fini.

Philippians

Chapter 1

¹
¶ Se mwen menm Pòl ak Timote, de sèvitè Jezikri, k'ap ekri lèt sa a voye bay tout pèp Bondye
nan lavil Filip la k'ap viv ansanm nan Jezikri. Lèt sa a se pou tout moun ki chèf nan legliz la ak
²
pou tout dyak yo tou. Nou mande Bondye, Papa nou, ansanm ak Jezikri, Seyè a, pou yo ban nou
³
benediksyon ak kè poze. ¶ Mwen di Bondye mwen an mèsè pou nou chak fwa lide m' frape sou
⁴
nou. Chak fwa m'ap lapriyè tou pou nou, mwen fè l' ak kè kontan, ⁵
poutèt jan nou te ede m' gaye
⁶
bon nouvèl la, depi premye jou a jouk koulye a. Mwen sèten Bondye ki te konmanse bon travay
sa a nan nou, li gen pou l' kontinye l' jouk li va fini l' nèt, lè jou Jezikri a va rive. ⁷
¶ Se tou nòmral
pou m' fè lide konsa sou nou, paske nou toujou nan lespri m', nou tout ki kanpe la avè m' nan tout

favè Bondye fè m', kit lè mwen nan prizon tankou koulye a, kit lè mwen te lib pou m' defann bon
 nouvèl la, pou m' moutre se laverite li ye. ⁸ Mwen pran Bondye sèvi m' temwen, sa m'ap di nou la
 a se vre wi. Mwen renmen nou tout anpil anpil avèk renmen ki soti nan Jezikri. ¶ Lè m'ap lapriyè ⁹
 Bondye, mwen mande l' pou nou gen plis renmen toujou, ak bonkou konesans pou nou ka rive
 konprann tout bagay, ¹⁰ pou nou ka toujou chwazi sa ki pi bon. Konsa, n'a mennen yon lavi ki
 pwòp, yo p'ap jwenn anyen pou repwòche nou lè Kris la va vini. ¹¹ Konsa, Jezikri va fè nou fè
 anpil bagay ki dwat epi ki bon, pou sa ka sèvi yon lwanj ak yon bèl bagay pou Bondye. ¶ Frè ¹²
 m' yo, mwen vle nou konn sa byen: Tout bagay sa yo ki rive m' lan, yo pi fè travay predikasyon
 bon nouvèl la mache pase yo fè lòt bagay. ¹³ Se konsa, tout gad palè yo ansanm ak tout lòt moun
 yo konnen se paske m'ap sèvi Kris la kifè m' nan prizon. ¹⁴ Frè yo menm, bò pa yo, lè yo wè m'
 nan prizon an, pifò ladan yo vin gen plis konfyans toujou nan Seyè a. Sa ba yo plis kouraj koulye
 a pou fè konnen pawòl Bondye a san yo pa pè anyen. ¹⁵ Gen ladan yo k'ap fè konnen Kris la paske
 jalouzi moute yo nan tèt, yo ta renmen ban m' traka. Se vre. Men, gen lòt tou k'ap fè l' ak bon lide
 nan tèt yo. ¹⁶ Se renmen Bondye a k'ap pouse yo fè l', paske yo konnen se Bondye menm ki ban
 m' travay sa a pou m' ka defann bon nouvèl la. ¹⁷ Men, lòt yo ap fè konnen Kris la ak move lide
 deyè tèt yo, y'ap fè l' pou lanbisyon pèsònèl pa yo. Y'ap fè l' pou chache m' kont. Yo konprann yo
 ka fè m' lapenn antan m' nan prizon an. ¹⁸ Men, sa pa fè m' anyen. Kit yo gen bon lide, kit yo gen
 move lide, tout jan se Kris la y'ap fè konnen. Epi sa fè kè m' kontan. M'ap pi kontan toujou, ¹⁹ paske
 mwen konnen tout bagay sa yo pral vire anbyen pou mwen, gremesi lapriyè n'ap fè pou mwen ak
 lasistans Lespri Jezikri a ap ban mwen. ²⁰ Paske, mwen ta renmen pou m' pa soti wont nan anyen.
 Se la tout espwa m' pou m' ka pale ak kouraj, pou jòdi a tankou anvan lèzòm ka wè pouvwa Kris
 la nan mwen, kit mwen vivan, kit mwen mouri. ²¹ ¶ Paske pou mwen, lavi se Kris la. Se poutèt sa
 lanmò se yon gany pou mwen. ²² Men, si antan m'ap viv sou tè a toujou, mwen ka fè kèk travay
 ankò pou Seyè a, nan ka sa a, mwen pa konn sa m' pito. ²³ Mwen ta renmen fè tou de: Mwen ta
 renmen mouri pou m' ta avè Kris la. Sa ta pi bon anpil pou mwen. ²⁴ Men, li ta pi bon pou nou pou
 m' rete viv sou latè. ²⁵ Mwen sèten se sa k'ap rive menm. Se poutèt sa, mwen konnen mwen gen
 pou m' rete, pou m' ka viv ansanm ak nou, pou m' ede nou grandi, pou m' ka fè nou kontan nan
 konfyans nou gen nan Bondye. ²⁶ Konsa, lè m'a tounen bò kote nou, m'a ban nou yon bèl okazyon
 pou nou kontan nan lavi n'ap mennen ansanm nan Kris la. ²⁷ ¶ Sèl bagay ki konsekan se pou nou

viv yon jan ki konfòm ak bon nouvèl Kris la. Konsa, mwen ta mèl rive vin wè nou, mwen ta mèl pa kapab, se pou m' tande jan n'ap kenbe fèm, jan n'ap viv ansanm yonn ak lòt. Se pou m' tande jan n'ap mennen batay la ansanm pou defann konfyans bon nouvèl la fè nou gen nan Bondye. ²⁸ Pa kite okenn lènmi kraponnen nou. Se pou tout bagay sa yo sèvi tankou yon prèv pou fè lènmi yo wè se pèdi y'ap pèdi tèt yo. Men, pou nou menm, yo fè wè se delivre n'ap delivre. Sa se travay Bondye. ²⁹ Paske nou menm k'ap sèvi Kris la, Bondye ban nou favè sa a, non sèlman pou nou gen konfyans nan li, men pou nou ka souffri avè li tou. ³⁰ Batay n'ap mennen an, se menm batay la m'ap mennen tou. Se menm batay nou te wè m'ap mennen nan tan lontan an. Se li menm m'ap mennen jouk koulye a, jan nou konnen an.

Chapter 2

¹ ¶ Konsa, si se nan Kris la nou jwenn fòs kouraj nou tout bon vre, si se renmen li renmen nou an ki ban nou ankourajman tout bon vre, si Sentespri l' rete nan kè nou tout bon vre, si tout bon vre nou yonn renmen lòt, si nou sansib yonn pou lòt, ² enben, men sa m'ap mande nou: Fè kè m' kontan nèt. Se pou nou viv byen yonn ak lòt, se pou nou yonn renmen lòt menm jan an, pou nou tout gen yon sèl lide nan tèt nou ak yon sèl santiman nan kè nou. ³ Pa fè anyen nan lide pou fè tèt nou pase pou pi bon, ni pou fè lwanj tèt nou. Men, soumèt nou devan Bondye. Mete nan tèt nou lòt yo pi bon pase nou. ⁴ Piga pesonn chache enterè pa l' ase. Se pou l' chache sa ki bon pou lòt yo tou. ⁵ Se pou nou yonn gen pou lòt menm santiman ki te nan Jezi, Kris la. ⁶ Sa Bondye ye a, se sa l' te toujou ye. Men, li pa t' janm konsidere sa tankou yon avantaj pou l' te chache kenbe ak tout fòs. ⁷ Okontrè, se li menm pou tèt pa l' ki chwazi mete sa sou kote. Li te pito tounen yon domestik. Li pran fòm yon moun, li vin tankou tout moun. ⁸ Li rabese tèt li. Tankou yon moun, li soumèt devan Bondye. Li obeyi Bondye jouk li rive asepte mouri, wi jouk li asepte mouri sou kwa a. ⁹ Se poutèt sa, Bondye leve l' mete chita kote ki pi wo a. Li ba li yon non ki pi gran pase tout lòt non. ¹⁰ Konsa, tou sa ki nan syèl la, tou sa ki sou tè a ak anba tè a, yo tout va mete jenou yo atè devan Jezi pa respè pou non Bondye te ba li a. ¹¹ Tout moun va rekonèt Jezikri se Seyè a. Sa va sèvi yon lwanj pou Bondye Papa a. ¹² ¶ Se konsa, zanmi m' yo, nou tout nou te toujou obeysan lè m' te la avèk nou. Koulye a m' pa la ankò, se lè sa a pou n' pi obeyisan: toujou fè jefò pou nou ka fin sove nèt, avèk krentif pou Bondye, avèk soumisyon devan li. ¹³ Paske, se Bondye menm k'ap travay tout tan nan kè nou. Se

li ki ban nou anvè fè sa ki pou fè l' plezi ansanm ak fòs pou nou ka fè l' vre. ¹⁴ ¶ Nan tou sa n'ap
 fè, pa plenyen, pa diskite, ¹⁵ pou yo pa jwenn anyen pou yo repwoche nou, pou nou ka fè sa ki
 byen tankou bon pitit Bondye, antan n'ap viv nan mitan bann moun malonèt ak bann mechan sa yo
 ki sou latè. Se pou nou klere nan mitan yo tankou zetwal nan syèl la, ¹⁶ lè n'ap ba yo mesaj ki bay
 lavi a. Konsa, n'a fè kè m' kontan lè jou Kris la va rive. Paske, m'a konnen mwen pa t' fatigue kò m'
 pou gremesi, mwen pa t' travay mal. ¹⁷ Menm si mwen dwe ofri lavi m', menm si san m' ta gen
 pou l' koule pou wouze ofrann n'ap fè pou Bondye paske nou gen konfyans nan li a, m'ap kontan
 anpil, epi m'ap fè kè nou tout kontan ansanm avè mwen. ¹⁸ Konsa, nou menm tou, se pou nou
 kontan, se pou nou fè kè m' kontan ansanm avè nou tou. ¹⁹ Si se volonte Seyè Jezi, mwen fè lide
 voye Timote kote nou anvan lontan, pou lè m' pran nouvèl nou sa ka ban m' ankourajman. ²⁰ Timote
 se sèl moun ki gen menm lide avè m', ki vle wè byen nou. Mwen pa gen lòt. ²¹ Tout lòt yo, se zafè
 pa yo ase y'ap regle, yo p'ap defann kòz Kris la. ²² Nou menm tou nou konnen jan Timote se yon
 nèg serye. Tankou papa ak pitit nou travay ansanm pou bon nouvèl la. ²³ Mwen fè lide voye l' kote
 nou lè m'a fin wè ki jan sa ap pase pou mwen. ²⁴ Men, mwen gen konfyans sa a nan Bondye: m'a
 ka vin wè nou anvan lontan. ²⁵ Konsa tou, nou chonje Epafwodit, frè nou an, ki te travay ansanm
 avè m', ki te la avè m' nan tout batay. Se nou menm ki te voye l' vin ban m' konkou. Enben, mwen
 wè se nesèsè pou m' voye l' tounen ban nou. ²⁶ Se pa ti anvè li anvè wè nou. Sa te travay tèt li anpil
 dèske nou te vin konnen jan l' te malad. ²⁷ Li te malad anpil, se vre. Li manke mouri. Men, Bondye
 te gen pitye pou li. Pa pou li sèlman, men pou mwen menm tou, pou sa pa t' ban mwen plis lapenn
 ankò. ²⁸ Se poutèt sa mwen pi anvè voye li bò kote nou pou nou ka kontan lè n'a wè l' ankò, epi
 pou m' ka gen mwens lapenn. ²⁹ Konsa, resevwa l' ak kè kontan tankou yon frè nan Seyè a. Se pou
 nou gen anpil respè pou moun ki tankou Epafwodit, ³⁰ paske li te prèt pou mouri pou travay Kris
 la, li riske lavi l' pou l' te ka ban mwen konkou nou menm nou pa t' kapab ban mwen.

Chapter 3

¹ ¶ Koulye a, frè m' yo, fè kè nou kontan nan Seyè a. Pou mwen, sa pa fè m' anyen pou m' repete
 sa m' te voye di nou deja. Men, se nan avantaj nou. ² Veye kò nou ak moun k'ap plede fè sa ki mal

yo. Veye kò nou ak bann chen sa yo ki vle fè yo sikonsi nou. ³ Si gen moun ki sikonsi tout bon, se pa yo, se nou menm. Paske nou menm, n'ap sèvi Bondye ak Lespri Bondye a, nou kontan dèske n'ap viv ansanm ak Jezikri. Nou pa mete konfyans nou nan sa lèzòm ap fè. ⁴ ¶ Mwen ta ka mete konfyans mwen nan bagay konsa tou, si m' te vle. Si gen moun ki kwè yo ka mete konfyans yo nan sa lèzòm ap fè, mwen pi ka fè l' pase yo. ⁵ Mwen te gen wit jou depi m' te fèt lè yo sikonsi mwen. Mwen se yon moun Izrayèl natif natal, nan branch fanmi Benjamen, pitit pitit Ebè san (100) pou san (100). Sou keksyon lalwa Moyiz la menm, se pa pale: se farizyen mwen te ye. ⁶ Mwen te sitèlman yon patizan fanatik lalwa a, mwen te menm rive pèsekite legliz la. Si yon moun te ka bon paske li fè sa lalwa a mande, enben mwen te bon nèt ale. ⁷ Men, si yon lè mwen te konsidere tout bagay sa yo tankou yon garanti, koulye a yo pa vo anyen pou mwen, akòz Kris la. ⁸ Men, se pa sa sèlman. Se tout bagay menm ki pa vo anyen pou mwen, lè m' konpare yo ak gwo avantaj mwen genyen lè m' konnen Jezikri tankou Seyè mwen. Poutèt li, mwen voye tout bagay jete, mwen gade yo tankou fatra pou m' sa gen Kris la, ⁹ ¶ pou m' ka viv ansanm avè l' nèt ale. Konsa, mwen pa gen pretansyon mwen bon paske mwen fè sa lalwa a mande. Men, Bondye fè m' gras paske mwen mete konfyans mwen nan Kris la. Wi, Bondye fè tout moun ki mete konfyans yo nan li gras. ¹⁰ Se yon sèl bagay mwen bezwen: se konnen pou m' konnen Kris la, pou m' santi nan mwen pouvwa ki te fè l' leve soti vivan nan lanmò a, pou m' soufri ansanm avè l' nan soufrans li yo, pou m' rive mouri tankou li tou, ¹¹ avèk espwa, mwen menm tou m'a gen pou m' leve soti vivan nan lanmò. ¹² Mwen pa gen pretansyon mwen rive deja kote m' prale a, ni mwen poko fin bon nèt. Men, m'ap kouri sou kous mwen pou m' wè si m' ka mete men sou kote m' dwe rive a, paske Jezikri pou tèt pa l' fin mete men sou mwen deja. ¹³ Se vre wi, frè m' yo. Mwen pa kwè mwen deja mete men m' sou kote m' dwe rive a. Men, mwen gen yon sèl bagay pou m' fè, se pou m' bliye tou sa ki dèyè m' pou m' fè jefò pou m' mete men m' sou sa ki devan m' lan. ¹⁴ Konsa, m'ap kouri dwat devan m' sou mak kote m' prale a, pou m' ka jwenn rekonpans Bondye rele m' vin resevwa nan syèl la, gremesi Jezikri. ¹⁵ ¶ Nou tout ki byen grandi nan lafwa, se menm lide sa a pou n' gen nan tèt nou tou. Men, si gen moun pami nou ki gen lòt lide sou kèk pwen, Bondye va fè yo wè pi klè sou sa. ¹⁶ Nenpòt jan sa ye, ann mache toujou jan n' te konmanse a. ¹⁷ ¶ Nou tout frè m' yo, pran egzanp sou mwen. Kenbe je nou fiske sou moun k'ap swiv egzanp mwen te bay la. ¹⁸ Paske, gen anpil moun k'ap viv tankou moun ki pa vle tandè pale jan Kris la mouri sou kwa a. Mwen te deja di nou sa, koulye a m'ap di nou sa ankò ak dlo nan je mwen: ¹⁹ Moun sa yo ap rive fin detwi tèt yo. Se vant yo ki bondye yo. Yo pran plezi yo nan bagay ki pou ta fè yo wont pito. Se bagay lemonn ase ki nan tèt yo. ²⁰ Men

nou menm, nou se sitwayen peyi ki nan syèl la. Se tann n'ap tann Delivrans nou, Jezikri, Seyè a,
²¹
 ki gen pou desann sot nan syèl la. Se li menm k'ap pran pouvwa li genyen pou soumèt tout bagay
 anba men l' lan, l'ap chanje vye kò tou fèb nou yo pou l' fè yo tounen tankou kò pa l' la ki gen bèl
 pouvwa.

Chapter 4

¹
 ¶ Se pou sa, frè m' yo ak zanmi m' yo, nou menm mwen anvi wè anpil la, nou menm ki fè kè
 m' kontan an, nou menm ki yon lwanj pou mwen an, se konsa pou nou kenbe fèm nan lavi n'ap
 mennen ansanm nan Seyè a. ² M'ap ekri de ti mo pou Evodi ak Sentich: Tanpri souple, mete nou
 dakò tankou de sè k'ap viv ansanm nan Seyè a. ³ Ou menm tou k'ap travay ansanm avè m', mwen
 mande ou pou ou ede yo, paske de medam sa yo te travay di pou fè konnen bon nouvèl la ansanm
 ak Kleman ak tout lòt moun ki te travay ansanm avè mwen yo. Yo tout gen non yo ekri nan Liv
 Bondye a ki gen non moun ki gen lavi a. ⁴ Se pou nou toujou kontan nan lavi n'ap mennen ansanm
 nan Seyè a. M'ap repete l' ankò: Fè kè nou kontan anpil. ⁵ Se pou tout moun konnen nou se moun
 ki gen bon kè. Seyè a ap vini anvan lontan. ⁶ Pa bay kò nou traka pou anyen. Men, nan tout
 sikonstans mande Bondye tou sa nou bezwen nan lapriyè. Toujou chonje di l' mèsè tou lè n'ap
 lapriyè. ⁷ Konsa, Bondye va ban nou kè poze nan jan pa l', bagay lèzòm pa ka konprann; la kenbe
 kè nou ak lespri nou fèm nan Jezikri. ⁸ Pou fini, frè m' yo, mete lide nou sou bagay ki bon, ki merite
 lwanj: bagay ki vre, ki kòrèk, ki dwat, ki bèl, ki p'ap fè nou wont. ⁹ Fè tou sa mwen te moutre nou,
 ni sa nou te resevwa nan menm m', ni sa nou te tande m' di ak tou sa nou te wè m' fè. Konsa, Bondye
 k'ap bay kè poze a va toujou la avè nou. ¹⁰ ¶ Mwen pa t' manke kontan nan lavi m'ap mennen
 ansanm ak Seyè a, paske nou vin fè m' wè ankò jan nou pran ka mwen. Sa pa vle di nou te lage m'
 non. Men, nou pa t' ankò jwenn okazyon fè m' wè jan nou fèb pou mwen. ¹¹ Si nou wè m'ap pale
 konsa, se pa paske koulye a mwen nan nesosite. Paske nan lavi, m' aprann kontante tèt mwen ak
 sa m' genyen. ¹² Mwen konnen sa ki rele viv nan mizè, mwen konnen sa ki rele viv nan richès. Kit
 mwen pa gen ase, kit mwen gen plis pase sa m' bezwen, nan tout sikonstans m' aprann kontante tèt
 mwen toupatou ak sa mwen genyen. ¹³ Nenpòt sitiasyon ki parèt devan mwen, m'ap degaje m',
 gremesi Kris la ki ban mwen fòs kouraj. ¹⁴ Malgre sa, nou byen fèt ede m' nan traka m' yo. ¹⁵ Nou
 menm, moun lavil Filip, nou byen konnen sa m' pral di nou la a. Lè mwen kite peyi Masedwan, lè
 yo te fenk konmanse ap pibliye bon nouvèl la, se nou menm sèl legliz ki te ede mwen. Se nou menm

sèl ki te separe sa nou genyen avè m' pou sa m' te fè pou nou. ¹⁶ Lè m' te lavil Tesalonik, an de
 fwa nou voye sa m' te bezwen ban mwen. ¹⁷ Se pa dèyè kado mwen ye. Men, mwen ta renmen
 Bondye mete sou sa nou gen deja. ¹⁸ Wi, mwen resevwa tou sa nou te voye ban mwen, pou di vre,
 sa depase sa m' te bezwen. Koulye a, avèk Epafwodit ki pote kado nou yo, mwen gen tou sa m'
 bezwen. Kado nou yo se tankou yon ofrann ki santi bon, yon ofrann bèt Bondye ap asepte paske
 sa fè l' plezi. ¹⁹ Bondye ki rich anpil la va ban nou tou sa nou bezwen nan Jezikri. ²⁰ ¶ Tout lwanj
 lan se pou Bondye, Papa nou, pou tout tan. Amèn. ²¹ Bonjou pou pèp Bondye a k'ap viv ansanm
 nan Jezikri. Tout frè ki la avè m' yo voye bonjou pou nou. ²² Tout pèp Bondye a ki isit la,
 espesyalman sa ki nan palè Seza a, voye bonjou pou nou. ²³ Se pou benediksyon Jezikri, Seyè a,
 toujou avè nou.

Colossians

Chapter 1

¹ ¶ Se mwen menm Pòl, yon moun Bondye te deside chwazi pou sèvi apòt Jezikri, ansanm ak
 Timote, frè nou, k'ap ekri lèt sa a ² voye bay tout pèp Bondye ki lavil Kolòs la, k'ap kenbe fèm nan
 lavi n'ap mennen ansanm tankou frè nan Kris la. Nou mande Bondye, Papa nou, pou li ban nou
 benediksyon ak kè poze. ³ ¶ Mwen pa janm sispann di Bondye, Papa Jezikri, Seyè nou an, mèsè lè
 m'ap lapriyè pou nou. ⁴ Mwen pran nouvel jan nou gen konfyans nan Jezikri, jan nou renmen tout
 moun ki fè pati pèp Bondye a. ⁵ Depi premye jou yo te fè nou konnen bon nouvèl la ki yon mesaj
 ki vre, nou te gen espwa jwenn sa Bondye sere pou nou nan syèl la. Se espwa sa a ki fè nou gen
 tout konfyans sa a ak tout renmen sa a nan kè nou. ⁶ Bon nouvel la gaye nan mitan nou depi premye
 jou nou te tande pale favè Bondye a, depi lè yo te fè nou konnen sa li ye tout bon an. Bon nouvèl
 sa a lakòz nou resevwa anpil benediksyon, menm jan li fè l' toupatou sou latè. ⁷ Se Epafras, yon
 bon zanmi k'ap travay ansanm avè m', ki te moutre nou tou sa. L'ap ede m' nan travay la tankou
 yon bon sèvitè Kris la. ⁸ Se li menm ki fè m' konnen renmen Lespri Bondye a ban nou. ⁹ ¶ Se
 poutèt sa, mwen pa janm sispann lapriyè Bondye pou nou depi jou mwen te rive konn sa. Mwen
 mande Bondye pou l' fè nou rive fin konnen volonte l' nèt ale, pou l' ban nou anpil lespri ak anpil

konprann ki soti nan Sentespri. ¹⁰ Konsa, n'a viv jan Bondye vle l' la, n'a toujou fè sa ki fè l' plezi.
 N'a fè tout kalite bon bagay, n'a grandi nan konesans Bondye. ¹¹ Mwen mande Bondye pou l'
 fòtifye nou tout jan ak bèl pouvwa li pou nou ka sipòte tout bagay avèk pasyans. ¶ ¹² Ak kè kontan,
 se pou nou di Papa a mèsì, li menm ki ban nou privilèj resevwa pòsyon pa nou nan eritaj Bondye
 sere pou tout moun pa l' yo nan peyi limyè a. ¹³ Li rache nou anba pouvwa fènwa a, li fè nou antre
 nan peyi kote Pitit li renmen anpil la wa. ¹⁴ Se gremesi Pitit sa a nou delivre, nou resevwa padon
 pou peche nou yo. ¹⁵ Kris se pòtre Bondye, Bondye nou pa ka wè a. Se li menm ki premye pitit
 li. Li te la anvan tou sa Bondye te kreye. ¹⁶ Se ak li Bondye te kreye tou sa ki nan syèl la ak sou
 latè, sa nou wè ak sa nou pa wè. Se ak li li kreye tout lespri yo ki chita ap donminen, ki gen otorite,
 ki chèf epi ki gen pouvwa. Se ak Kris la Bondye te kreye yo tout, epi se pou li li te kreye yo. ¹⁷ Kris
 la te la anvan tout bagay. Se nan li yo tout jwenn plas yo. ¹⁸ Se li ki tèt legliz la, legliz la se kò li.
 Se li menm ki bay kò a lavi. Se li menm an premye ki te leve soti vivan nan lanmò pou l' te ka gen
 premye plas nan tout bagay. ¹⁹ Se Bondye menm ki te vle pou tou sa l' ye a, se sa pou Kris la ye
 tou. ²⁰ Se li menm tou ki te vle fè tout bagay byen avè li ankò, gremesi Kris la, tou sa ki sou latè
 ak tou sa ki nan syèl la. Li mete lapè toupatou, gremesi san Kris la ki koule sou kwa a. ²¹ Nou
 menm tou, moun Koldòs, nan tan lontan, nou t'ap viv lwen Bondye. Nou te lènmi avè l' akòz tout
 bagay mal nou t'ap fè yo, ak tout move lide nou te gen nan tèt nou. ²² Men koulye a, gremesi Kris
 la ki mouri nan kò l' tankou yon moun, Bondye fè nou byen avè l' ankò pou nou ka parèt devan l'
 tankou moun k'ap viv apa pou li, san okenn tach, san okenn repwòch. ²³ Men, gen yon kondisyon
 pou sa: se pou nou rete fèm, byen anrasinen nan konfyans nou, san nou pa pèdi espwa nou genyen
 depi lè nou te tandè bon nouvèl la. Se bon nouvèl sa a yo te anonse bay tout moun sou latè epi se
 li menm, mwen menm Pòl, m'ap sèvi. ²⁴ Koulye a, mwen kontan anpil dèske m'ap soufri pou nou.
 Paske, lè m'ap soufri nan kò pa m' konsa, m'ap bay pòsyon pa m' pou konplete tou sa ki manke nan
 soufrans Kris la pou legliz la ki kò li. ²⁵ Wi, m'ap sèvi legliz la koulye a dapre travay Bondye ban
 m' fè pou nou an: travay sa a se pou m' anonse tout bagay ki nan mesaj li a, ²⁶ pou m' fè tout moun
 konnen sekrè li te kenbe kache depi tout tan kifè pesonn pa t' konnen l'. Men koulye a, li devwale
 l' bay tout moun ki pou li. ²⁷ Paske, Bondye vle fè moun pa l' yo konnen tout richès ak tout bèl
 pouvwa ki nan sekrè li te sere pou moun ki pa jwif yo. Men sekrè a: nou menm moun ki pa jwif
 yo, Kris la ap viv nan kè nou tou, li ban nou espwa nou gen pou n' patisipe nan bèl pouvwa Bondye
 a. ²⁸ Konsa, m'ap fè tout moun konnen Kris la. M'ap bay tout moun konsèy, m'ap moutre yo tout

bagay avè bon konprann, jan m' kapab pou yo tout ka parèt devan Bondye tankou granmoun ki byen grandi nan lavi y'ap mennen ansanm ak Kris la. ²⁹ Se pou sa m'ap travay, se pou sa m'ap goumen ak tout pouvwa Kris la k'ap travay ak fòs nan mwen.

Chapter 2

¹ ¶ Mwen vle fè nou konnen ki kalite batay m'ap mennen pou nou, pou tout moun ki nan lavil Lawodise ak pou tout lòt moun yo ki poko konn figi mwen. ² M'ap goumen pou yo ka gen fòs ak kouraj plen kè yo, pou yo fè yonn nan renmen Bondye a, pou yo gen yon bon konprann k'ap ba yo anpil konfyans devan Bondye. Konsa yo menm tou, y'a konnen sekre travay Bondye a, ki vle di Kris la. ³ Se nan li tout richès ki nan bon konprann ak konesans Bondye a cache. ⁴ ¶ Mwen di nou sa pou nou pa kite pesonn twonpe nou ak yon bann pawòl ki sanble verite. ⁵ Paske, si mwen pa la avèk nou nan kò m', mwen la nan lespri mwen. Mwen kontan wè jan nou rete nan lòd, jan nou kenbe fèm nan konfyans nou gen nan Kris la. ⁶ Se konsa, nou menm ki asepte Kris la pou Seyè nou an, se pou nou viv yon jan ki dakò ak li. ⁷ Se pou nou anrasinen nan li, se pou nou bati tout lavi nou sou li. Kenbe pi fèm toujou nan konfyans nou gen nan li, jan yo te moutre nou sa, san nou pa janm sispann di Bondye mèsi. ⁸ Fè atansyon pou nou pa kite pesonn twonpe nou ak bèl diskou filozòf yo, ak diskisyon ki pa vo anyen. Bagay sa yo soti nan koutim lèzòm, nan jan yo konprann bagay ki nan lemond. Yo pa soti nan Kris la. ⁹ Se nan lavi Kris la t'ap mennen nan kò li a nou jwenn tou sa Bondye ye. ¹⁰ Nou menm tou, Bondye la nan tout lavi nou, paske n'ap viv nan Kris la ki chèf tout lespri ki gen otorite ak pouvwa. ¹¹ Nou menm k'ap viv ansanm nan Kris la, nou te sikonsi tou. Men, se pa t' moun ki te sikonsi nou. Sikonsizyon sa a soti nan Kris la ki delivre nou anba pouvwa lachè ki t'ap fè nou fè sa ki mal. ¹² Wi, lè yo te batize nou, nou te antere ansanm ak Kris la. Apre sa, nou leve soti vivan ansanm avè l' tou, paske nou te kwè nan pouvwa Bondye ki te fè l' leve soti vivan nan lanmò. ¹³ ¶ Nan tan lontan, nou te mouri paske nou t'ap viv nan peche nou yo, paske nou pa t' sikonsi nan kò nou dapre lalwa Moyiz. Men koulye a, gremesi Kris la, Bondye ban nou lavi ankò, li padonen tout peche nou yo. ¹⁴ Li chire papyè kote tou sa nou te dwe l' yo ekri a. Papyè sa a te kondannen nou devan lalwa. Kris la detwi l' nèt lè li kloure l' sou kwa a. ¹⁵ Avèk Kris la ki mouri sou kwa a, Bondye wete tout pouvwa ak tout otorite lespri yo te genyen nan lemond. Li fè tout moun wè sa yo ye. Li fè yo mache tankou prizonye devan Kris la ki te genyen batay la.

16

¶ Se sak fè, pa kite pesonn kritike nou pou sa n'ap manje, pou sa n'ap bwè, pou jou nou mete apa pou fè fèt, pou fèt lalin nouvèl, osinon pou jou repo. ¹⁷ Tou sa se lonbraj bagay ki te gen pou vini

18

yo; bagay tout bon yo se nan Kris la yo ye. Se poutèt sa, moun nou wè k'ap sèvi zanj epi ki swadizan p'ap vante tèt yo, pa kite moun konsa konprann pou yo wete rekonpans nou nan men nou. Moun konsa toujou ap rakonte vizyon yo te fè. Pou anyen, yo gonfle ak lògèy poutèt yon bann lide

19

lèzòm yo mete nan tèt yo. Moun konsa p'ap viv ansanm ak Kris la ki tèt kò a. Se Kris la k'ap nourri tout kò a, k'ap kenbe l' byen kanpe ak tout jwenti l' ak tout venn li yo byen solid. Se li menm

20

k'ap fè l' grandi jan Bondye vle l' la. Se konsa, si nou mouri ansanm ak Kris la ki te delivre nou anba pouvwa lespri k'ap donminen nan lemond yo, poukisa pou n'ap viv tankou si nou te toujou anba pouvwa ki nan lemond yo? Poukisa pou nou kite yo soumèt nou anba prensip tankou sa ki di:

21

22

pa pran sa, pa goute sa, pa manyen sa? Tout bagay sa yo, fini ou fin fè yo, yo pa fè anyen pou

23

ou. Se lèzòm ki mande bagay konsa, se yo ki moutre bagay sa yo. Se vre, bagay sa yo sanble yo bon, paske sa mande moun anpil volonte pou yo pran pòz sèvi zanj yo konsa, pou yo pran pòz pa vante tèt yo, pou yo fè bagay pou swadizan kraze pouvwa lachè nan kò yo. Men, tou sa pa vo anyen. Paske, atousa, yo pa ka rive donmennen egzijans lachè a.

Chapter 3

1

¶ Nou menm ki deja leve soti vivan ansanm ak Kris la nan lanmò, se pou nou chache bagay ki anwo nan syèl la kote Kris la chita sou bò dwat Bondye. ² Pa kite bagay ki sou latè pran tèt nou,

3

mete lide nou sou bagay ki anwo nan syèl la. Konnen sa byen: nou mouri deja, lavi nou kache

4

ansanm ak Kris la nan Bondye. Se Kris la ki lavi nou tout bon. Lè la parèt, nou menm tou n'a

5

parèt ansanm avè l' nan tout bèl pouvwa li. ¶ Se poutèt sa, se pou nou detwi nan nou tou sa ki soti nan lemond tankou: imoralite, malpwòpte, move dezi, move lanvi, renmen lajan (ki menm jan ak

6

sèvi zidòl). Se tout bagay sa yo ki fè kòlè Bondye tonbe sou moun ki derefize obeyi li. ⁷ Se konsa

8

nou t'ap viv nan tan lontan lè nou te anba pouvwa peche sa yo. ¶ Men koulye a, pa fè kòlè, pa fè move san ni okenn mechanste. Se pou nou voye tout bagay sa yo jete. Pa kite okenn jouman ni

9

okenn gwomo soti nan bouch nou. Pa bay frè nou yo manti. Paske, nou voye vye moun nou te

10

ye a jete ansanm ak tout vye mès li yo. Koulye a, nou tounen yon lòt kalite moun, n'ap chanje

11
 jouk n'a rive sanble ak Bondye ki kreye nou an pou n' te ka konnen l' nèt. Se sak fè, pa gen moun
 ki jwif ak moun ki pa jwif ankò, pa gen moun ki sikonsi ak moun ki pa sikonsi ankò, pa gen moun
 ki etranje, ni moun ki bèt, pa gen moun ki esklav ak moun ki pa esklav. Se Kris la ki tout, se li ki
 12
 nan nou tout. ¶ Nou tout nou fè pati pèp Bondye a: se li menm ki te renmen nou, ki te chwazi
 nou pou n' ka viv pou li. Se poutèt sa, se pou nou gen kè sansib anpil, pou n' aji byen yonn ak lòt,
 13
 san lògèy, avèk anpil dousè, anpil pasyans. Se pou nou yonn sipòte lòt, pou nou yonn padonnen
 lòt si nou gen kont yonn ak lòt. Wi, se pou yonn padonnen lòt, menm jan Kris la te padonnen nou.
 14
 Men, anvan tout bagay, se pou nou gen renmen ki tankou yon kòd k'ap mare nou ansanm yonn
 15
 ak lòt. Se pou nou viv byen yonn ak lòt, jan Kris la vle l' la. Paske, Bondye rele nou pou nou
 16
 viv byen yonn ak lòt pou nou ka fè yon sèl kò. Toujou chonje sa li fè pou nou. Kenbe pawòl
 Kris la ak tout richès li yo byen fèm nan kè nou. Se pou nou yonn aprann nan men lòt, se pou nou
 yonn bay lòt konsèy avèk anpil bon konprann. Se pou nou chante sòm, kantik ak tout lòt chante
 17
 Lespri Bondye a va moutre nou, pou di Bondye mèsì ak tout kè nou. Tou sa n'ap fè, tou sa n'ap
 18
 di, fè l' nan non Seyè Jezi a, san nou pa janm bliye di Bondye mèsì nan li. ¶ Nou menm medam,
 19
 soumèt devan mari nou paske se konsa pou moun ki kwè nan Seyè a aji. Nou menm mari, renmen
 20
 madanm nou. Pa fè move jan ak yo. Nou menm timoun, se devwa nou pou nou obeyi manman
 21
 nou ak papa nou nan tout bagay. Se sa ki fè Bondye plezi. Nou menm papa ak manman, pa rele
 22
 sou timoun yo twòp pou sa pa dekouraje yo. Nou menm domestik, obeyi mèt nou gen sou latè
 a nan tout bagay. Se pa sèlman lè nou anba je yo pou nou obeyi yo, tankou moun k'ap fè lèzòm
 23
 plezi. Men, se pou n' obeyi yo ak tout kè nou, akòz respè nou gen pou Seyè a. Nenpòt travay yo
 24
 ban nou fè, fè l' ak tout kè nou tankou si se pa pou lèzòm nou t'ap travay, men pou Seyè a. Chonje
 byen: Seyè a gen pou ban nou rekonpans nou: l'ap ban nou eritaj li sere pou moun pa l' yo. Paske,
 25
 mèt n'ap sèvi tout bon an se Kris la. Men, moun ki fè sa ki mal va resevwa sa ki pou li dapre
 mal li te fè a. Paske, Bondye pa gade sou figi moun.

Chapter 4

1
 ¶ Nou menm mèt yo, aji byen ak domestik nou yo, san fè okenn lenjistis. Chonje byen, nou
 2
 menm tou nou gen yon mèt nan syèl la. ¶ Pa janm sispann lapriyè. Pa kite dòmi pran nou. Toujou

chonje lapriyè pou di Bondye mèsi. ³ Anmenmtan, lapriyè pou mwen tou, pou Bondye ban m' okazyon pou m' fè konnen pawòl li a, pou m' fè lèzòm konnen sekrè Kris la. Se poutèt sekrè sa a menm mwen nan prizon koulye a. ⁴ Lapriyè pou m' ka rive fè lèzòm wè l' aklè, pou m' ka pale jan mwen dwe pale a. ⁵ ¶ Pran prekosyon pou nou aji byen avè moun ki pa kretyen yo. Pa kite okenn chans pase. ⁶ Lè n'ap pale, di bagay ki pou fè yo kontan, ki pou enterese yo. Konn ki jan pou nou reponn chak moun. ⁷ ¶ Frè Tichik se yon bon zanmi m', yon bon sèvitè Kris la k'ap ban m' yon bon konkou nan sèvis Seyè a. La ban nou tout nouvèl mwen. ⁸ Mwen voye l' ban nou tout espere pou l' ka di nou jan mwen ye, pou l' ka remoute kouraj nou. ⁹ Frè Onezim ki moun menm kote ak nou ap vin ansanm avè li. Se yon bon zanmi mwen renmen anpil. Yo tou de va di nou sa k'ap pase bò isit. ¹⁰ Aristak ki nan prizon ansanm avè m' voye bonjou pou nou. Mak, kouzen Banabas la, voye bonjou tou. (Mwen te deja di nou sa pou nou fè pou li: resevwa l' byen si l' vin lakay nou). ¹¹ Jezi, ki gen yon ti non Joustous, voye bonjou pou nou tou. Twa mesye sa yo, se yo menm sèlman pami jwif yo k'ap travay avè m' pou gouvènman Bondye ki wa a. Yo te ban m' anpil kouraj. ¹² Epafiras, ki moun Kolòs tou, voye bonjou pou nou. Sèvitè Kris sa a pa manke lapriyè anpil pou nou pou nou ka rete fèm, pou nou ka fin grandi nèt nan konfyans nou nan Bondye, pou nou ka toujou byen dispoze pou fè tou sa Bondye mande nou. ¹³ Mwen ka di nou sa: l'ap fatigue kò l' anpil pou nou menm moun Kolòs yo, pou moun Lawodise yo ansanm ak moun Yerapolis yo. ¹⁴ Lik, bon dòktè mwen an, ansanm ak Demas voye bonjou pou nou tou. ¹⁵ Di tout frè Lawodise yo bonjou. Pa bliye Nefas ansanm ak tout frè ki konn reyini lakay li yo. ¹⁶ Lè n'a fin li lèt sa a, voye l' bay legliz Lawodise a pou yo ka li l' tou. Nou menm tou, n'a li lèt moun Lawodise yo va voye ban nou an. ¹⁷ Di Achip pou mwen: Fè atansyon. Sèvis yo ba l' fè nan travay Seyè a, se pou l' fè l' byen. ¹⁸ Se mwen menm Pòl, ak men pa m', k'ap ekri nou koulye a: Bonjou pou nou tout. Pa bliye m' nan prizon an. benediksyon Bondye pou nou tout.

1 Thessalonians

Chapter 1

¹
¶ Mwen menm, Pòl, ansanm ak Silven ak Timote, m'ap ekri lèt sa a voye bay manm legliz lavil Tesalonik yo, k'ap viv ansanm nan Bondye, Papa a, ak Jezikri, Seyè nou an. Mwen mande pou yo ban nou benediksyon ak kè poze. ² ¶ Se tout tan m'ap di Bondye mèsi pou nou tout. Mwen pa janm bliye nou lè m'ap lapriyè. ³ Devan Bondye Papa nou, mwen toujou chonje jan n'ap viv byen paske nou gen konfyans nan Bondye, jan n'ap travay di paske nou gen renmen nan kè nou, jan nou rete fèm nan espwa nou gen nan Jezikri, Seyè nou an. ⁴ Mwen konnen, frè m' yo, Bondye renmen nou, se li menm ki chwazi nou pou n' ka viv pou li. ⁵ Se pa t' avèk pawòl ase mwen te anonse nou bon nouvèl la. Men tou, se te avèk pouvwa Sentespri a, avèk lasirans fèm sa m' t'ap di a se vre. Nou menm tou, nou konnen jan mwen te mennen tèt mwen nan mitan nou. Mwen te fè l' pou byen nou. ⁶ ¶ Nou te swiv egzanp mwen ak egzanp Seyè a. Nou te soufri anpil. Malgre sa, nou te resevwa pawòl Bondye a ak kè kontan. Sa se travay Sentespri. ⁷ Se konsa, nou te tounen yon egzanp pou tout moun nan peyi Masedwan ak nan peyi Lakayi ki gen konfyans nan Bondye. ⁸ Konsa, nou fè anpil moun rive konnen mesaj Seyè a. Se pa sèlman nan Masedwan ak nan Lakayi, men se toupatou moun ap pale jan nou gen konfyans nan Bondye. Se sa ki fè, nou pa bezwen pale sou sa ankò. ⁹ Okontrè, yo tout ap rakonte jan nou te resevwa m' lè m' te rive lakay nou, jan nou te kite zidòl yo pou n' tounen vin jwenn Bondye, pou nou te ka sèvi Bondye vivan an, Bondye tout bon an. ¹⁰ Y'ap di tou jan n'ap tann Jezi, Pitit Bondye a, k'ap vini sot nan syèl la. Se Jezi sa a Bondye te leve vivan soti nan lanmò. Se li menm k'ap delivre nou anba kòlè Bondye k'ap vini an.

Chapter 2

¹
¶ Nou menm frè m' yo, nou konn sa byen: vizit mwen te fè lakay nou an te bay bon rezilta. ² Mwen te fenk soti lavil Filip kote yo te maltrete m' anpil, kote yo te joure m' lan. Men, Bondye ban m' fòs ak kouraj pou m' te ka anonse nou bon nouvèl ki soti nan li a, malgre tout opozisyon mwen te jwenn. ³ Paske, lè m'ap pale ak moun, se pa manti m'ap bay, ni mwen pa gen ankenn move lide dèyè tèt mwen, ni mwen p'ap chache twonpe pesonn. ⁴ Okontrè, mwen te toujou pale jan Bondye vle l' la. Se Bondye ki konnen sa ki nan kè mwen. Li fè m' konfyans, li ban mwen bon nouvèl li a pou m' anonse. Se sak fè, se pa lèzòm m'ap chache fè plezi, men Bondye ki konnen sa ki nan kè mwen. ⁵ Nou menm, nou konn sa byen: mwen pa janm sèvi ak pawòl ki pou flate moun, ni mwen pa janm pran ankenn pretès pou chache fè lajan. Mwen pran Bondye pou temwen. ⁶ Mwen

pa chache lwanj nan men pesonn, ni nan men nou, ni nan men lòt moun. ¶⁷ Se pa kapab mwen pa ta kapab fè nou santi otorite Kris la ban mwen tankou apòt li. Non, okontrè. Pandan tout tan m' te lakay nou, mwen te aji avèk dousè, tankou yon manman k'ap pran swen pitit li yo. Mwen te sitèlman renmen nou, se pa bon nouvèl la ase mwen ta ban nou. Ata vi m' mwen ta bay pou nou.

Nou wè jan m' renmen nou!⁹ Nou chonje, frè m' yo, jan m' te travay, jan m' te fatigue kò m' ap travay lajounen kou lannwit pou m' pa t' sou kont nou yonn pandan tout tan mwen t'ap anonse nou bon nouvèl Bondye a.¹⁰ Mwen pran nou sèvi m' temwen ansanm ak Bondye: Nou menm ki gen konfyans nan Bondye, nou ka di mwen te aji byen ak nou, yon jan ki dakò ak volonte Bondye, yon jan ki dwat, ki san repwòch.¹¹ Nou konnen ki jan mwen te aji ak nou chak, tankou yon papa ak pitit li yo.¹² Mwen te ankouraje nou, mwen te konsole nou, mwen pa t' janm sispann fè nou konprann byen ki jan pou nou mennen tèt nou pou nou ka fè Bondye plezi, paske Bondye rele nou pou nou resevwa pa nou nan gouvènman l' ak nan bèl pouvwa li.¹³ ¶ Se konsa, mwen pa sispann di Bondye mèsì tou pou jan nou te pare zòrèy nou koute lè m' t'ap fè nou konnen pawòl Bondye a. Nou te resevwa l' pou sa l' ye a: pou pawòl Bondye, pa pou pawòl lèzòm. Se pawòl sa a k'ap travay nan kè nou, nou menm ki gen konfyans nan Bondye.¹⁴ Frè m' yo, sa ki rive nou an, se sa ki te rive manm legliz Bondye k'ap viv pou Jezikri nan peyi Jide a. Menm sa yo te soufri nan men jwif yo, se sa nou soufri tou nan men moun menm peyi ak nou yo.¹⁵ Se jwif yo ki te fè touye ni Jezi, Seyè a, ni pwofèt yo. Se yo menm tou ki te pèsekite m' ansanm ak zanmi m' yo. Yo pa soti pou fè Bondye plezi. Yo fè lènmi ak tout moun.¹⁶ Y'ap fè sa yo kapab pou anpeche m' pale ak moun ki pa jwif yo, pou moun sa yo pa sove. Konsa, yo lage kò yo nèt ale nan menm peche yo te toujou kònn fè a. Men, koulye a kòlè Bondye tonbe sou yo.¹⁷ ¶ Pou mwen menm, frè m' yo, pa gen lontan depi m' kite nou. Nou pa wè menm, se vre. Men, lide m' toujou sou nou. Se pa ti anvi mwen pa anvi wè nou ankò.¹⁸ Mwen pa konnen sa m' ta fè pou m' tounen lakay nou ankò. Mwen menm Pòl, mwen te seye plizyè fwa menm. Men, Satan te anpeche mwen.¹⁹ Se nou menm, moun Tesalonik, ki tout espwa mwen, se pa lòt moun. Se nou menm ki fè kè m' kontan. Se nou menm k'ap ban m' okazyon pou m' vante tèt mwen devan Jezi, Seyè nou an, lè la vini.²⁰ Se nou menm ki ban m' satisfaksyon, se nou menm ki fè kè m' kontan.

Chapter 3

¹
 ¶ Se konsa, mwen pa t' kapab tann ankò. Mwen pran desizyon rete pou kont mwen lavil Atèn.

²
 Mwen te voye Timote, frè nou an, al wè nou. Se yon sèvitè Bondye k'ap travay ansanm ak mwen pou fè konnen bon nouvèl Kris la. Li te gen pou l' te fòtifye nou, pou l' te ankouraje nou nan lafwa,

³
 pou pesonn pa febli nan mitan tribilasyon sa yo. Nou menm, moun lavil Tesalonik, se pou n' soufri

⁴
 bagay sa yo paske Bondye te wè davans sa tapral rive nou. Lè m' te la nan mitan nou, mwen te

⁵
 pale nou davans nou tapral gen anpil lafliksyon. Nou wè se sa menm ki rive nou. Se poutèt sa,

mwen te voye Timote ban nou, mwen pa t' kapab tann ankò. Mwen te voye l' pran nouvèl jan

konfyans nou nan Bondye ye. Mwen te pè pou Satan pa t' pran nou nan pèlen li, pou tout travay

⁶
 mwen an pa t' pèdi. ¶ Men koulye a, Timote fèk rive sot lakay nou, li fè kè m' kontan, li ban m'

bon nouvèl, li di m' jan nou gen konfyans ak renmen. Li di m' jan nou menm tou nou toujou chonje

⁷
 m', jan nou anvi wè m', menm jan mwen menm mwen anvi wè nou. Konsa, frè m' yo, nan mitan

tout fikilte ak tout lafliksyon mwen yo, sa te ban m' kouraj lè m' tande jan n'ap kenbe fèm nan lafwa.

⁸
 Se koulye a m'ap viv tout bon, paske nou menm, moun Tesalonik, nou rete fèm nan lavi n'ap

⁹
 mennen ansanm ak Kris la. Mwen pa konn ki jan pou m' di Bondye mèsi pou nou, tèlman nou fè

¹⁰
 kè m' kontan devan li. Lajounen kou lannwit, m'ap mande ak tout kè mwen pou Bondye ban m'

¹¹
 chans yon lè vizite nou ankò, pou m' ka fin moutre nou sa nou manke nan lafwa a toujou. ¶

Mwen mande Bondye, Papa nou, ansanm ak Jezikri, Seyè nou, pou yo louvri yon chemen pou

¹²
 mwen pou m' ka vin wè nou. Mwen mande Seyè a pou nou gen plis renmen yonn pou lòt ak

¹³
 pou tout moun, menm jan mwen renmen nou. Konsa, nou menm moun Tesalonik, Kris la va

fòtifye kè nou pou nou ka san repwòch devan Bondye, Papa nou, tankou moun k'ap viv apa pou li

jouk lè Jezikri, Seyè nou an, va vini ansanm ak tout moun pa l' yo.

Chapter 4

¹
 ¶ Frè m' yo, mwen te moutre nou ki jan pou n' mennen bak nou si nou vle fè Bondye plezi.

Wi, mwen konnen se konsa n'ap viv vre. Men, koulye a m'ap mande nou, nan non Seyè Jezi a,

²
 tanpri chache viv pi byen toujou. Nou konnen tou sa m' te moutre nou, avèk otorite Seyè Jezi te

³
 ban mwen an. Men sa Bondye vle pou nou: Se pou nou viv apa pou Bondye, pou nou pa lage kò

⁴
 nou nan imoralite. Se pou chak gason konn chwazi madanm li yon jan ki respektab, ki dakò ak

⁵volonte Bondye. Pa kite move lanvi pouse nou tankou moun lòt nasyon yo ki pa konnen Bondye.
⁶Nan bagay sa a, ankenn gason pa dwe fè frè l' lapenn, ni fè l' lenjistis. Mwen deja di nou sa, mwen
⁷te ban nou kont avètisman sou sa: Seyè a gen pou peni moun ki fè bagay konsa. Bondye pa rele
nou pou nou viv nan vye kondisyon lèd. Men, li rele nou pou nou viv yon jan ki dakò ak volonte
⁸li. Se poutèt sa, moun ki pa asepte pawòl sa a, se pa pawòl lèzòm li pa koute, se pawòl Bondye
⁹ki ban nou Sentespri l' la menm li pa koute. ¶ Kanta renmen nou dwe genyen pou frè n' yo, mwen
pa bezwen ekri nou sou sa. Paske, se Bondye menm ki te moutre nou ki jan nou dwe yonn renmen
¹⁰lòt. Mwen konnen se konsa menm n'ap aji avèk tout frè yo nan tout peyi Masedwan lan. Men,
¹¹m'ap mande nou, frè m' yo, pou nou chache viv pi byen toujou. Chache viv ak kè poze. Okipe
¹²zafè pa nou. Travay ak men nou pou nou pa rete sou kont moun. Konsa, moun ki pa kwè nan
¹³Kris la va respekte nou, epi nou menm, nou p'ap rete sou kont pesonn. ¶ Frè m' yo, sou keksyon
moun ki mouri deja yo, mwen ta renmen nou konn verite a, pou nou pa gen lapenn tankou lòt moun
¹⁴yo ki pa gen espwa nan Seyè a. Menm jan nou kwè Jezi te mouri epi li te leve soti vivan ankò
a, konsa tou, se pou n' kwè tout moun ki te gen konfyans nan li lè yo te mouri, Bondye va fè yo
¹⁵tounen ansanm ak Jezi. Dapre sa Seyè a te moutre m' lan, men sa m'ap di nou: Nou menm k'ap
¹⁶vivan toujou lè Seyè a va vini an, nou p'ap pran devan moun ki mouri deja yo. Lè sa a, n'a tande
yon gwo lòd pase, n'a tande vwa chèf zanj lan ansanm ak kout klewon Bondye a: epi Seyè a menm
va desann sot nan syèl la. Moun ki te mete konfyans yo nan Kris la lè yo te mouri, se yo ki va leve
¹⁷soti vivan an premye. Apre sa, nou menm ki va vivan toujou lè sa a, y'ap vin pran nou, nou
menm ansanm ak moun ki soti vivan nan lanmò yo, y'ap mete nou sou nwaj yo pou n' al kontre
¹⁸Seyè a anwo a. Konsa, nou tout n'ap toujou ansanm ak Seyè a. Se pou nou yonn ankouraje lòt
ak pawòl sa yo.

Chapter 5

¹¶ Frè m' yo, mwen pa bezwen ekri nou pou m' fè nou konnen ni ki lè, ni ki jou bagay sa yo
²gen pou rive. Nou menm nou konn sa byen: Jou Seyè a gen pou l' vin sou nou tankou yon vòlò
³k'ap vin nan mitan lannwit. Lè n'ap tande moun ap di: Gen lapè toupatou, tout bagay byen sou
kontwòl, se lè sa a, san nou pa atann, n'ap wè kòlè Bondye a tonbe sou yo pou detwi yo. Se tankou

4
 lè doulè tranche sezi yon fanm ansent. p'ap gen chape pou yo. Men nou menm, frè m' yo, nou pa
 moun k'ap viv nan fènwa. Jou sa a p'ap vin sou nou tankou yon vòlè, san nou pa atann. 5
 nou tout se moun k'ap viv nan limyè, nan gwo lajounen. Nou pa moun k'ap viv nan lannwit, nan
 fènwa! 6 ¶ Se sak fè, piga nou dòmi tankou lòt yo. Pa kite dòmi pran nou. Kenbe tèt nou anplas.
 7 Se lannwit moun dòmi. Se lannwit tou moun sou. 8 Men nou menm, nou se moun k'ap viv lajounen,
 se pou nou toujou kenbe tèt nou anplas. Ann pran konfyans nou gen nan Bondye a ak renmen nou
 gen nan kè nou tankou yon plak pwotèj pou lestonmak nou. Ann pran espwa nou genyen nan Jezi
 k'ap vin delivre nou nèt la, ann mete l' tankou yon kas an fè nan tèt nou. 9 Paske, Bondye pa t'
 chwazi nou pou nou te tonbe anba kòlè li, men pou n' te ka delivre, gremesi Jezikri, Seyè nou an.
 10 Jezi te mouri pou n' te ka viv ansanm ak li. Konsa, kit nou mouri deja, kit nou vivan toujou lè la
 vini an, nou tout n'ap toujou ansanm ak li. 11 ¶ Se poutèt sa, annou yonn ankouraje lòt, yonn ede
 lòt, jan nou deja ap fè l' la. 12 Frè m' yo, m'ap mande nou pou nou gen anpil respè pou moun k'ap
 travay nan mitan nou yo, moun Seyè a chwazi pou dirije nou, pou ankouraje nou. 13 Se pou nou
 gen anpil konsiderasyon pou yo, se pou nou renmen yo poutèt travay y'ap fè a. Se pou nou viv byen
 ak kè poze yonn ak lòt. 14 M'ap mande nou tou, frè m' yo, pou nou rele dèyè moun k'ap fè parese
 yo. Ankouraje sa ki yon ti jan frèt yo, ede sa ki fèb yo. Se pou nou pran pasyans ak tout moun.
 15 Pa kite pesonn rann mal pou mal. Okontrè, toujou chache fè sa ki byen yonn pou lòt ak sa ki
 byen pou tout moun. 16 ¶ Se pou kè nou toujou kontan. 17 Pa janm sispann lapriyè. 18 Di Bondye
 mèsi pou tout bagay. Se sa Bondye mande nou, nou menm ki mete konfyans nou nan Jezikri. 19 Pa
 antrave travay Sentespri a. 20 Pa meprize pawòl moun k'ap bay mesaj ki soti nan Bondye.
 21 Egzaminen tout bagay byen, kenbe sa ki bon. 22 Egzante tou sa ki mal. 23 ¶ Mwen mande Bondye
 ki bay kè poze a pou l' fè nou favè pou nou viv pou li nèt ale. Konsa, lè Jezikri, Seyè nou an, va
 vini, li p'ap jwenn nou ak ankenn defo, ni nan kò nou, ni nan lespri nou ni nan nanm nou. 24 Bondye
 ki rele nou an va fè sa pou nou, paske li toujou kenbe pawòl li. 25 Frè m' yo, lapriyè pou mwen
 tou. 26 Di tout frè yo bonjou, bo yo pou mwen tankou moun k'ap viv pou Bondye konn fè l' la.
 27 Tanpri souple, nan non Seyè a, li lèt sa a bay tout frè yo. 28 Se pou benediksyon Jezikri, Seyè
 nou an, toujou la avèk nou.

2 Thessalonians

Chapter 1

¹ ¶ Mwen menm Pòl, ansanm ak Silven ak Timote, m'ap ekri lèt sa a voye bay manm legliz nan lavil Tesalonik k'ap viv ansanm nan Bondye, Papa a, ak Jezikri, Seyè nou an. ² Mwen mande pou Bondye, Papa a, ak Jezikri, Seyè nou an, ban nou benediksyon ak kè poze. ³ Se yon devwa pou mwen pou m' pa janm sispann di Bondye mèsi pou nou, frè m' yo. Wi, se yon devwa pou m' fè l'vre. Paske, konfyans nou gen nan Bondye ap grandi anpil, renmen nou gen yonn pou lòt ap grandi ⁴ toujou tou. Se sak fè, sa fè m' plezi pou m' nonmen non nou nan tout legliz Bondye yo, pou jan nou gen pasyans, jan nou kenbe konfyans nou fèm nan Bondye nan mitan tout pèsekisyon ak soufrans k'ap tonbe sou nou. ⁵ ¶ Sa fè moun wè se Bondye ki gen rezon lè l'ap jije. Paske, avèk tou sa n'ap sipòte koulye a, n'ap fin bon nèt pou nou ka antre nan peyi kote Bondye wa a. Se pou peyi sa a menm n'ap soufri konsa. ⁶ Paske, Bondye gen pou fè sa ki byen: Bondye va gen rezon lè la fè moun k'ap fè nou soufri yo soufri tou. ⁷ Kanta pou nou menm k'ap soufri koulye a, la ban nou repo ansanm avè m' lè Jezi va parèt nan syèl la avèk zanj li yo ki gen pouvwa. ⁸ La parèt nan mitan gwo flanm dife pou peni tout moun ki pa konn Bondye yo ansanm ak moun ki p'ap mache dapre bon nouvèl ki pale sou Jezi, Seyè nou an. ⁹ Chatiman moun sa yo, se disparèt y'ap disparèt yo pou tout tan. Y'ap wete yo devan Seyè a, y'ap voye yo jete byen lwen pou yo pa janm resevwa pa yo nan pouvwa Seyè a ak nan lwanj y'ap fè pou li a. ¹⁰ Jou sa a, Seyè a va parèt pou l' resevwa lwanj nan men tout moun pa l' yo. Tout moun ki te mete konfyans yo nan li va kontan wè l'. Nou menm tou n'a wè li, paske nou te kwè nan mesaj mwen te fè nou konnen an. ¹¹ ¶ Se poutèt sa, mwen p'ap janm sispann lapriyè pou nou. M'ap mande Bondye pou l' ede nou pou nou viv yon jan ki dakò ak lavi li mande nou pou nou viv la. M'ap mande l' pou li ban nou pouvwa li, pou nou ka fè tout byen ¹² nou vle fè, pou nou fin reyalize nèt travay n'ap fè ak konfyans nan Bondye. Konsa, tout moun va fè lwanj non Jezi a poutèt nou. Nou menm tou, y'a fè lwanj nou poutèt li, gremesi favè Bondye nou an ansanm ak Jezikri, Seyè a, fè nou.

Chapter 2

¹ ¶ Ann konsidere lè Jezikri, Seyè nou an, va parèt pou l' sanble nou ansanm bò kote li. Frè m' yo, men sa m'ap mande nou: ² Pa kite pesonn twouble lespri nou fasil, ni fè nou pèdi tèt nou ak ankenn mesaj ki swadizan soti nan Bondye, ni ak ankenn bèl diskou, ni ak ankenn lèt mwen ta swadizan ekri nou, pou yo fè nou kwè jou Seyè a rive deja. ³ ¶ Pa kite pesonn twonpe nou nan ankenn jan. Paske, anvan jou sa a rive, gen yon dènnye revòlt kont Bondye ki pou fèt. Nou gen pou nou wè mechan ki deja kondannen pou disparèt la vini anvan. ⁴ Mechan sa a ap kanpe, l'ap pran pozisyon kont tout bagay lèzòm ap sèvi, kont tout bagay lèzòm konsidere pou Bondye. La fè, la fè, jouk la antre nan tanp Bondye a, la chita, la fè tèt li pase pou Bondye. ⁵ Nou pa chonje mwen te di nou sa lè m' te lakay nou toujou? ⁶ Men, gen yon bagay k'ap anpeche levènman sa yo rive koulye a. Nou konnen kisa li ye: Se sak fè, mechan an p'ap parèt anvan lè li. ⁷ Wi, pouvwa mechan an deja ap travay anba chal. Men, anvan pou levènman sa yo rive, se pou moun k'ap ba l' baryè a disparèt. ⁸ Lè sa a, mechan an va parèt. Seyè Jezi va soufle ak bouch li sou li, la touye li. L'ap annik parèt nan tout pouvwa li pou l' fini nèt ak li. ⁹ Mechan an va vini ak tout pouvwa Satan an. Li va fè anpil mirak, anpil mèvèy ak anpil gwo siy pou bay manti. ¹⁰ Li va fè tout kalite bagay mal pou twonpe moun k'ap pèdi tèt yo. Y'ap pèdi tèt yo paske yo pa asepte verite ki pou ta sove yo a, yo pa renmen li. ¹¹ Se poutèt sa, Bondye ap voye yon pouvwa k'ap travay pou egare yo pi rèd, pou yo sa kwè nan manti. ¹² Konsa, tout moun ki p'ap kwè nan verite a, ki te pran plezi yo nan fè lenjistis, yo tout pral kondannen. ¹³ ¶ Se yon devwa pou mwen pou m' pa janm sispann di Bondye mèsì pou nou, frè m' yo, nou menm Seyè a renmen. Paske, Bondye chwazi nou pou nou ka premye moun ki pou delivre, gremesi pouvwa Sentespri ki fè nou tounen moun pa l', paske nou kwè nan verite a. ¹⁴ Gremesi bon nouvèl mwen te anonse nou an, Bondye chwazi nou pou nou ka resevwa pa nou nan lwanj ki pou Jezikri, Seyè nou an. ¹⁵ Se sa ki fè, frè m' yo, se pou nou kenbe fèm. Pa bliye tou sa nou te aprann nan bouch mwen ak nan lèt mwen an. ¹⁶ ¶ M'ap lapriyè Jezikri, Seyè nou an, ansanm ak Bondye, Papa nou ki renmen nou, ki fè nou favè, ki ban nou yon kouraj ki p'ap janm febli ansanm ak yon bèl espwa. ¹⁷ M'ap mande yo pou yo fòtifye kè nou, pou yo ban nou fòs kouraj pou nou fè tou sa ki byen, pou nou di tou sa ki byen.

Chapter 3

¹ ¶ Pou fini, frè m' yo, lapriyè pou mwen pou pawòl Seyè a ka kontinye gaye toupato byen vit,
 pou li resevwa lwanj tankou sa te fèt pami nou. ² Lapriyè tou pou Bondye ka delivre m' anba move
 moun yo, mechan sa yo. Paske, se pa tout moun ki asepte kwè. ³ Men, Bondye ap toujou kenbe
 pawòl li. L'ap ban nou fòs, la pwoteje nou anba Satan. ⁴ Seyè a fè m' gen konfyans nan nou: li ban
 m' lasirans n'ap fè sa m' te mande nou fè a, epi n'ap toujou kontinye fè l' tou. ⁵ Mwen mande Seyè
 a pou l' dirije kè nou pou nou ka renmen Bondye, pou nou ka gen pasyans tankou Kris la. ⁶ ¶ Frè
 m' yo, men sa m'ap mande nou nan non Jezikri, Seyè a: Pran distans nou ak tout frè k'ap fè parese,
 ki p'ap konfòme yo ak sa m' te moutre nou. ⁷ Nou menm, nou konnen sa pou nou fè pou nou ka
 swiv egzanp mwen ban nou. Mwen pa t' fè parese lè m' te nan mitan nou. ⁸ Mwen pa t' kite pesonn
 ban m' manje pou gremesi. Okontrè, mwen te travay di, mwen te fatige kò mwen anpil, lajounen
 kou lannwit, pou m' pa t' sou kont nou yonn. ⁹ Se pa paske mwen pa t' gen dwa resevwa anyen nan
 men pesonn ki fè m' te fè sa. Non. Se paske mwen te vle ban nou yon egzanp pou nou te swiv.
¹⁰ Nou chonje lè m' te lakay nou, mwen te di nou: moun ki pa travay pa gen dwa manje non plis.
¹¹ M'ap pale konsa ak nou paske m' pran nouvèl gen kèk moun nan mitan nou k'ap fè parese, ki pa
 vle fè lòt bagay pase foute bouch yo nan zafè lòt moun. ¹² Men sa m'ap voye di moun sa yo: Nan
 non Jezikri, Seyè a, m'ap mande nou pou nou travay nan lòd, pou nou manje swe kouraj nou. ¹³ Pou
 nou menm, frè m' yo, pa janm bouke fè sa ki byen. ¹⁴ Si yon moun pa swiv lòd mwen bay nan lèt
 sa a, make li. Piga pesonn gen okenn rapò avè l', pou l' sa wont. ¹⁵ Men, se pa poutèt sa pou nou
 fè lènmi avè li. Okontrè, pale avè l' tankou yon frè. ¹⁶ ¶ Mwen mande Seyè a ki konn bay kè poze,
 pou li fè kè nou poze tout tan, tout jan, pou li toujou la avèk nou tout. ¹⁷ Se mwen menm Pòl k'ap
 ekri mo sa yo: mwen voye bonjou pou nou tout. Se konsa mwen siyen tout lèt mwen yo, se konsa
¹⁸ mwen toujou ekri. Se pou benediksyon Jezikri, Seyè nou an, toujou la avèk nou tout.

1 Timothy

Chapter 1

¹ ¶ Mwen menm, Pòl, yon apòt Jezikri dapre volonte Bondye, Sovè nou, ansanm ak Jezikri ki
² tout espwa nou, m'ap ekri ou, Timote, pitit lejitim mwen nan konfyans mwen gen nan Bondye.
M'ap mande Bondye, Papa a, ak Jezikri, Seyè nou an, pou yo gen pitye pou ou, pou yo ba ou
³ benediksyon ak kè poze. Se pou ou rete nan lavil Efèz, jan m' te mande ou la lè mwen t'ap pati
pou peyi Masedwan. Paske, gen kèk moun nan lavil Efèz la k'ap moutre lòt yo yon bann lòt bagay
⁴ ki pa vre. Se pou ou ba yo lòd sispann fè sa y'ap fè a. Di yo wete lide yo sou vye istwa san fondman
sa yo, sou lis non gran granparan moun ki byen long. Bagay sa yo lakòz moun fè yon bann diskisyon
⁵ initil. Yo p'ap sèvi plan travay Bondye a, jan nou konnen l', gremesi lafwa a. ¶ W'ap ba yo lòd sa
a, pou yo ka rive gen renmen ki soti nan yon kè ki nan kondisyon pou sèvi Bondye, nan yon konsyans
⁶ frankil ak yon konfyans sensè nan Bondye. Gen ladan yo ki pèdi chemen yo, yo lage kò yo nan
yon bann diskisyon san sans. ⁷ Yo ta renmen pase pou moun k'ap moutre lalwa Bondye a. Men,
yo pa konprann anyen ni nan sa y'ap di a, ni nan keksyon y'ap defann lan. ⁸ Nou konnen lalwa se
⁹ yon bagay ki bon depi ou sèvi avè l' jan ou dwe sèvi avè l' la. Se pou nou chonje tou yo pa mete
lalwa pou moun k'ap aji byen. Lalwa a se pou malveyan yo, pou moun k'ap fè rebèl, pou mechan
yo, pou moun k'ap fè peche, pou moun ki pa gen respè ni pou Bondye ni pou larelijyon, pou moun
¹⁰ k'ap touye manman yo ak papa yo, pou ansasen, pou moun k'ap fè imoralite, pou moun ki gen
vye mès gason ak gason, fanm ak fanm, pou moun k'ap vann esklav, pou moun k'ap bay manti,
k'ap fè sèman pou twonpe moun. Lalwa a se pou tout moun k'ap fè tout kalite bagay ki pa dakò ak
¹¹ verite yo moutre nou an. Verite sa a, nou jwenn li nan bèl mesaj Bondye te mete m' reskonsab
pou anonse a. Se bon nouvèl ki pale nou sou Bondye ki merite nou fè lwanj pou li a. ¹² ¶ M'ap di
Jezikri, Seyè nou an, mèsì dèske li ban m' fòs kouraj pou m' fè travay mwen. M'ap di l' mèsì dèske
¹³ li te konsidere m' anpil pou l' te fè m' tout konfyans sa a, pou l' te chwazi m' pou sèvis li, atout
nan tan lontan mwen te konn pale l' mal, mwen te pèsekite l', mwen te joure li. Men, se Bondye
menm ki te gen pitye pou mwen, paske lè sa a mwen pa t' gen konfyans nan li. Konsa, mwen pa t'
¹⁴ konnen sa m' t'ap fè. Jezikri, Seyè nou, fè m' anpil favè: li fè m' gen konfyans ak renmen nou
¹⁵ jwenn lè n'ap viv ansanm nan Kris la. Sa se yon pawòl ki vre, pawòl tout moun te dwe kwè:
Jezikri te vini sou latè pou delivre moun k'ap fè peche. Mwen menm, mwen pi mal pase yo tout.
¹⁶ Men, se poutèt sa Bondye te gen pitye pou mwen. Mwen menm ki te pi mal pase yo tout, se pou
mwen Jezikri te moutre jan l' ka gen pasyans. Konsa, mwen tounen yon egzanp pou tout moun ki
¹⁷ pita va gen pou mete konfyans yo nan li, pou yo ka resevwa lavi ki p'ap janm fini an. Se poutèt
sa, ann chante, ann fè lwanj pou li pou tout tan, li menm ki sèl Bondye nou pa ka wè a, Wa ki la

18
 pou tout tan an epi ki p'ap janm mouri a. Amèn. ¶ Timote, piti mwen, m'ap renmèt ou kòmandman sa a, dapre pawòl pwofèt Bondye yo te di sou ou nan tan lontan an. Pran fòs sou pawòl sa yo pou
 19
 ou ka mennen batay la byen. Kenbe konfyans ou fèm nan Bondye ak konsyans ou an repo. Gen
 20
 moun ki refize koute konsyans yo. Se konsa yo pèdi konfyans yo. Nan yo gen Imene ak Aleksann. Mwen lage tou de nan men Satan pou yo aprann pa pale mal sou Bondye.

Chapter 2

1
 ¶ Pou konmanse, m'ap mande pou nou lapriyè Bondye pou tout moun. Fè l' tout kalite demann
 pou yo, mande l' padon pou yo, di l' mèsi pou yo. 2
 Se pou nou lapriyè pou chèf yo ak tout lòt moun
 ki gen otorite nan men yo, pou nou ka viv trankil ak kè poze nan sèvis Bondye a, ak yon konpòtman
 ki respektab sou tout pwen. 3
 Se bagay konsa ki byen, ki fè Bondye, Sovè nou an, plezi. 4
 Li ta
 renmen wè tout moun sove, li ta renmen wè tout moun rive konn verite a. 5
 Se yon sèl Bondye a
 ki genyen. Se yon sèl moun tou ki mete lèzòm dakò ak Bondye ankò, se Jezi, Kris la. 6
 Se li menm
 ki te asepte mouri pou tout moun ka sove. Se prèv sa a Bondye te bay, lè lè a te rive pou moutre
 7
 jan li ta renmen wè tout moun sove. Se poutèt sa, li voye m' kòm apòt pou m' anonse moun ki pa
 jwif yo nouvèl la, pou m' moutre yo tout bagay, pou yo ka rive gen konfyans nan Bondye, pou yo
 ka konnen verite a. Sa m'ap di la a, se vre wi. Mwen p'ap bay manti. 8
 Wi, mwen vle pou moun
 k'ap viv pou Bondye toupatou yo ka leve men yo anlè devan l' pou yo lapriyè san yo pa nan fè kòlè
 9
 ni nan chache kont ak pesonn. ¶ Mwen ta renmen tou pou medam yo abiye yon jan ki kòrèk, tou
 senp, san fè endesans. Yo pa bezwen nan fè gwo kwafi, mete gwo bijou lò ak bèl grenn pèl ni rad
 10
 ki koute chè sou yo. Oneman ki bon pou yon fanm ki di l'ap sèvi Bondye se fè sa ki byen. 11
 Se
 pou fanm yo rete san pale, avèk soumisyon, lè y'ap resevwa enstriksyon. 12
 Mwen pa bay fanm
 yo dwa moutre pesonn anyen. Yo pa gen okenn otorite sou gason. Se pou yo rete byen trankil.
 13
 Paske, se Adan Bondye te kreye anvan. Se apre li te fè Ev. 14
 Se pa t' Adan Satan te twonpe, se
 15
 fanm lan li te twonpe, se fanm lan ki te dezobeyi lòd Bondye. Men, yon fanm va delivre lè la
 fè pitit, si l' kenbe fèm nan konfyans li, nan renmen, nan lavi l'ap mennen apa pou Bondye a, si l'
 rete tou senp.

Chapter 3

¹ ¶ Sa se yon pawòl ki vre: Si yon moun dèyè yon pozisyon pou l' dirije nan legliz, li dèyè yon
² bèl travay. Pou yon moun chèf nan legliz, se pou l' san repwòch. Se pou l' gen yon sèl madanm.
 Se pou l' yon nonm serye, ki konn kenbe tèt li an plas, ki gen lòd. Se pou l' konn resevwa moun
³ lakay li. Se pou l' konn ki jan pou l' moutre moun verite a. Li pa fèt pou l' renmen bwè gwòg, ni
⁴ renmen fè kont. Okontrè, se pou l' gen pasyans ak kè poze. Li pa fèt pou l' renmen lajan. Se pou
⁵ l' konn mennen kay li byen, fè timoun li yo obeyi l' ak respè. Paske, si yon nonm pa konn dirije
⁶ pwòp fanmi l', kouman li ka dirije legliz Bondye a? Fòk li pa yon nonm ki fèk konvèti. Si pa sa,
⁷ lògèy ka moute l' nan tèt, la tonbe anba men m' kondannasyon ak Satan. Se pou li gen bon
 repitasyon devan moun ki pa nan legliz la, pou yo pa pase l' nan betiz, pou l' pa pran nan pèlen
⁸ Satan. ¶ Konsa tou, se pou moun k'ap ede nan sèvis legliz la se moun ki respektab, ki pa gen de
⁹ pawòl, moun ki pa bwè twòp, ki pa renmen fè lajan mal, ki p'ap kouri dèyè lajan. Se pou yo kenbe
¹⁰ verite Bondye fè nou konnen an ak konsyans yo pwòp. Se pou nou sonde yo anvan. Si apre sa,
¹¹ nou pa jwenn anyen pou repwoche yo, yo ka sèvi dyak. Se pou madanm yo moun ki respektab,
¹² ki pa nan tripotaj: se pou yo konn kontwole tèt yo, pou yo seryèz nan tout bagay. Yon dyak fèt
¹³ pou l' gen yon sèl madanm, se pou l' konn dirije pitit li yo ak tout kay li byen. Paske, dyak ki fè
 travay yo byen, y'a rive jwenn yon bon pozisyon pou tèt yo, y'a gen plis konfyans pou yo ka pale
¹⁴ verite nou jwenn nan Jezikri a. ¶ M'ap ekri ou lèt sa a. Men, mwen gen espwa mwen ka vin wè
¹⁵ ou anvan lontan. Men, si m' pran reta, lèt sa a va fè ou konnen ki jan pou nou mennen tèt nou
 nan fanmi Bondye a, sa vle di nan legliz Bondye vivan an. Legliz la tankou yon poto k'ap soutni
¹⁶ verite a. Tout moun fèt pou rekonèt jan sekrè relijyon nou an se yo gwo zafè. Li te parèt tankou
 yon moun. Lespri a fè nou wè jan li mache dwat devan Bondye. Epi tout zanj yo te wè l' tou. Se li
 menm y'ap mache fè konnen nan tout nasyon. Se nan li moun toupatou mete konfyans yo. Apre sa,
 yo resevwa l' nan syèl la.

Chapter 4

¹
 ¶ Lespri Bondye te di sa byen klè: nan dènye tan an, gen moun k'ap lage konfyans yo nan Bondye. Yo pral obeyi yon bann lespri k'ap bay manti, yo pral swiv yon bann pawòl ki soti nan move lespri yo.

²
 Y'ap kite yon bann moun ipokrit fè yo pèdi tèt yo ak manti. Konsyans moun sa yo fini, ou ta di yo boule ak yon fè cho.

³
 Y'ap plede di sa pa bon pou moun marye, gen kalite manje moun pa gen dwa manje. Men, se Bondye ki kreye manje sa yo pou moun ki gen konfyans nan li epi ki rive konn verite a ka manje lè yo fin di Bondye mèsi.

⁴
 Tou sa Bondye kreye bon. Nou pa fèt pou nou voye yo jete. Se pou nou asepte tout bagay san nou pa janm bliye di Bondye mèsi.

⁵
 Se pawòl Bondye a ak lapriyè nou fè a k'ap mete yo apa pou Bondye.

⁶
 ¶ Si ou moutre frè ou yo tout bagay sa yo, ou va yon bon sèvitè Jezikri. Wa swen tèt ou ak pawòl ki soti nan konfyans Bondye ak nan verite w'ap swiv deja a.

⁷
 Men, wete lide ou sou istwa san sans ki pa dakò ak konfyans nan Bondye, ak sou radòt ki pa merite repete. Toujou chache mwayen pou ou sèvi Bondye pi byen.

⁸
 Si nan yon sans sa bon pou nou chache fè espò pou kenbe kò nou anfòm, sa pi bon toujou, epi nan tout sans, pou nou fè jefò nan sèvis Bondye a, paske sa ap garanti nou lavi pou koulye a ak pou tout tan.

⁹
 Sa se yon pawòl ki sèten, tout moun te dwe asepte l', yo tout te dwe kwè li.

¹⁰
 Se poutèt sa ou wè n'ap travay di, n'ap goumen konsa. Paske, nou mete tout espwa nou nan Bondye vivan an k'ap sove tout moun, espesyalman moun ki gen konfyans nan li.

¹¹
 Se tout bagay sa yo pou ou moutre moun yo, pou ou mande yo swiv.

¹²
 Pa kite pesonn pase ou nan betiz paske ou twò jenn. Men, se pou ou tounen yon egzanp pou moun ki kwè yo, nan jan ou pale, nan jan ou mennen tèt ou, nan jan ou gen renmen, nan jan ou gen konfyans, nan jan w'ap mennen yon lavi ki dakò ak volonte Bondye.

¹³
 Pandan w'ap tann mwen vini an, pa janm sispann li Liv la pou tout moun. Ankouraje frè yo, moutre yo tout bagay.

¹⁴
 Pa neglije kado Lespri Bondye te ba ou lè chèf reskonsab yo te mete men sou tèt ou, apre pwofèt yo te fin pale pou ou.

¹⁵
 Fè travay sa a ak anpil swen, bay tout tan ou pou li, pou tout moun ka wè jan w'ap fè pwogrè.

¹⁶
 Veye sou konpòtman ou, fè atansyon ak pawòl verite w'ap anonse a. Pa lage travay ou menm. Si ou fè sa konsa, wa sove tèt ou ansanm ak tout moun k'ap koute ou yo.

Chapter 5

¹
 ¶ Pa fè granmoun gason yo repwòch twò di. Pale ak yo tankou ou ta pale ak papa ou. Aji ak jenn jan yo tankou si yo te frè ou;

²
 ak granmoun fanm yo, tankou si yo te manman ou; ak jenn fi

yo, tankou si yo te sè ou, san okenn move lide. ³ ¶ Pran swen vèv ki vèv tout bon yo. ⁴ Men, si yon vèv gen pitit, osinon pitit pitit, se pou pitit yo aprann fè tout devwa Bondye mande yo fè pou pwòp fanmi yo anvan. Konsa, y'a fè tou sa yo dwe fè pou papa yo, manman yo ak granparan yo.

⁵ Se sa ki pou fè Bondye plezi. Yon fanm ki vèv tout bon, ki pa gen pesonn pou okipe l', li mete tout espwa li nan Bondye, l'ap lapriyè tout tan, l'ap mande l' konkou lajounen kou lannwit. ⁶ Men, yon vèv ki lage kò l' nan plezi, se yon vèv ki mouri, menm si l' vivan toujou. ⁷ Men sa pou ou moutre yo, pou pesonn pa jwenn okenn repwòch pou fè yo. ⁸ Si yon moun pa pran swen fanmi l', sitou moun k'ap viv lakay li, li nye konfyans li nan Bondye, li pi mal pase yon moun ki pa janm kwè nan Bondye. ⁹ Pa mete okenn vèv sou lis toutotan li pa gen swasantan. Epi, se pou l' te marye yon sèl fwa. ¹⁰ Se pou tout moun konnen tou sa li te fè ki byen: tankou si li elve pitit li yo byen, si l' konn resevwa moun byen lakay li, si l' konn lave pye moun pèp Bondye a, si l' ede malere yo, si l' fè tout lòt kalite byen. ¹¹ Men, pa mete okenn vèv ki poko gen laj sa a sou lis. Paske, lè anvi a pran yo pou yo marye, yo vire do bay Kris la. ¹² Lè konsa yo vin antò, paske yo pa kenbe premye pwomès yo te fè l' la. ¹³ Apre sa, yo pran abitud pèdi tan yo ap mache pòt an pòt. Sa ki pi rèd ankò, yo vin tripòt, fouyapòt. Y'ap foure bouch yo nan sa ki pa gade yo. ¹⁴ Se poutèt sa, mwen ta pito wè jenn vèv yo marye pou yo ka gen pitit, pou yo sa okipe kay yo. Konsa, yo p'ap bay lènmi nou yo chans pale nou mal. ¹⁵ Paske, gen vèv ki vire do yo deja, y'ap swiv Satan. ¹⁶ Men, si yon fanm ki gen lafwa gen yon vèv nan fanmi l', se pou l' ede l', pou l' pa kite l' sou kont legliz la, pou legliz la ka ede vèv ki nan nesite tout bon yo. ¹⁷ ¶ Kanta chèf reskonsab yo k'ap dirije legliz la byen, se pou yo resevwa yon lajan doub, sitou ansyen k'ap bay tout tan yo pou bay pawòl la ak pou fè enstriksyon moun yo. ¹⁸ Se sa ki ekri nan Liv la: Pa mare bouch bèf la lè l'ap fè moulen kann lan mache. Ou ankò: Moun ki travay fèt pou resevwa lajan travay li. ¹⁹ Pa kite pesonn vin pote plent pou yon chèf reskonsab, esepite si moun lan gen de osinon twa temwen avè li. ²⁰ Se pou ou fè moun ki fè peche yo repwòch devan tout moun. Konsa, lòt yo va pè. ²¹ Devan Bondye, devan Jezikri, devan tout zanj k'ap viv pou Bondye yo, men sa m'ap mande ou: swiv lòd sa yo san fè ni patipri ni moun pa nan tou sa w'ap fè. ²² Pa prese mete men sou tèt yon moun pou ba l' yon chaj nan legliz la. Pa mele nan peche okenn moun. Evite tou sa ki mal. ²³ Ak maladi lestonmak ou a, sispann bwè dlo sèlman. Bwè ti diven tou pou ede ou fè dijesyon. ²⁴ Gen moun, anvan menm ou jije yo, ou gen

tan wè tout peche yo aklè konsa. Gen lòt menm, se lontan apre ou wè sa yo fè ki mal. ²⁵ Konsa tou, tout byen yon moun fè gen pou parèt aklè, menm sa ou pa wè lapoula. Yo pa ka rete kache.

Chapter 6

¹ ¶ Tout moun k'ap sèvi kou domestik fèt pou gen anpil respè pou mèt yo. Konsa, pesonn p'ap kapab pale non Bondye a ni verite n'ap anonse a mal. ² Si yon domestik ap sèvi yon mèt ki kwè nan Bondye, li pa fèt pou l' manke l' respè sou pretèks se yon frè nan lafwa li ye. Okontrè, se lè sa a pou l' sèvi l' pi byen, paske moun l'ap rann sèvis la se yon moun ki kwè, se yon moun li renmen. Men sa ou gen pou moutre moun yo. Men sa pou ou preche yo. ³ Si yon moun ap moutre yon lòt doktrin ki pa dakò ak pawòl verite ki soti nan Jezikri a, ni avèk sa relijyon nou te montre nou an, ⁴ se yon moun ki gen lògèy, ki pa konn anyen. Se tankou yon maladi li genyen pou l'ap diskite tout tan, pou l'ap fè kont pou nenpòt ti mo. Se sa ki lakòz moun ap fè jalouzi, y'ap fè kont, y'ap pale moun mal, yo sispèk moun pou anyen. ⁵ Sa lakòz anpil moun ki gen lespri yo vire lanvè epi ki pa konnen verite a ap fè yon bann diskisyon ki pa janm fini. Pou yo, sèvis Bondye a tounen yon mwayen pou fè lajan. ⁶ ¶ Nan yon sans se vre. Sèvis Bondye a se yon gwo richès pou yon moun si l' kontan ak sa li genyen an. ⁷ Nou pa t' pote anyen lè nou te vin sou latè. Pa gen anyen nou ka pote ale non plis lè n'a kite li. ⁸ Se sak fè, si nou gen dekwa manje, si nou gen rad pou mete sou nou, sa dwe kont nou. ⁹ Men, moun ki vle vin rich, yo tonbe nan tantasyon. Yo kite yon bann move lanvi san sans pran yo nan pèlen. Se lanvi sa yo k'ap fè moun pèdi tou sa yo genyen, k'ap fini nèt ak yo. ¹⁰ Paske, renmen lajan fè moun fè tout kalite bagay ki mal. Gen moun ki sitèlman anvi gen lajan, yo pèdi chemen lafwa a nèt: se pa de ti soufrans ki tonbe sou yo. ¹¹ Men ou menm ki moun Bondye, evite tout bagay sa yo. Chache mennen yon lavi ki dwat pou ou ka sèvi Bondye nan tou sa w'ap fè, avèk konfyans, avèk renmen, avèk pasyans ak dousè. ¹² Mennen batay pou lafwa a byen. Kenbe lavi ki p'ap janm fini an fèm. Paske, se Bondye menm ki te rele ou pou ou te konnen lavi sa a, lè ou te byen pale devan yon bann temwen, pou fè konnen jan ou gen lafwa. ¹³ ¶ Devan Bondye ki bay tout bagay lavi, devan Jezikri ki te fè yon bèl deklarasyon devan Pons Pilat pou fè wè jan li gen lafwa, men sa m'ap mande ou: ¹⁴ Swiv kòmandman mwen ba ou a, pa chanje anyen ladan l' pou yo pa jwenn anyen pou repwoche ou lè Jezikri, Seyè nou an, va parèt. ¹⁵ Lè lè a va rive, Bondye va fè nou wè l'. Se li menm ki sèl otorite, se pou li sèl nou dwe fè lwanj. Li wa tout

wa, li chèf tout chèf. ¹⁶ Se sèl moun ki p'ap janm mouri, li rete nan yon limyè kote pesonn pa ka pwoche. Pesonn pa janm wè l', pesonn pa ka wè li. Se pou li tout onè ak tout pouvwa pou tout tan.

¹⁷ Amèn. Mande moun ki gen anpil byen sou latè a pou yo pa kite lògèy vire tèt yo. Piga yo mete espwa yo nan richès sa yo ki pa sèten. Se pou yo mete espwa yo nan Bondye ki ban nou tout bagay an kantite pou nou ka gen jwisans yo. ¹⁸ Mande yo pou yo fè anpil byen, pou yo ka rich devan Bondye. Piga yo chich. Se pou yo toujou pare pou separe sa yo genyen an ak lòt. ¹⁹ Konsa, y'a anpile yon bon trezò byen solid pou pita, y'a resevwa lavi tout bon an. ²⁰ Timote monchè, veye byen sou sa yo te renmèt ou a. Pa pèdi tan ou nan diskou san sans ki pa dakò ak verite a, ni nan diskisyon pou bagay anpil moun pran pou konesans. ²¹ Gen moun ki konprann yo gen konesans sa a. Ale wè atò! Se kite yo kite chemen lafwa a. Benediksyon Bondye pou ou.

2 Timothy

Chapter 1

¹ ¶ Mwen menm, Pòl, se Bondye ki te vle chwazi m' pou sèvi apòt Jezikri, pou fè konnen lavi li te pwomèt nou an, lavi li ban nou nan Jezikri a. ² M'ap ekri ou, Timote, pitit mwen renmen anpil lan. Mwen mande Bondye Papa a ansanm ak Jezikri, Seyè nou an, pou yo gen pitye pou ou, pou yo ba ou benediksyon ak kè poze. ³ M'ap di Bondye mèsì, Bondye zansèt mwen yo te sèvi a. Se li menm tou m'ap sèvi ak yon konsyans pwòp. Se tout tan m'ap di l' mèsì lajounen kou lannwit, chak fwa lide m' frape sou ou lè m'ap lapriyè. ⁴ Mwen chonje jan ou te nan lapenn. Se pa ti anvi m' anvi wè ou pou kè m' ka kontan nèt. ⁵ Mwen pa janm bliye jan ou gen konfyans nan Bondye ak tout kè ou. Lòyis, grann ou, ak Enis, manman ou, te gen konfyans konsa nan li tou. Wi, mwen sèten ou gen menm konfyans sa a tou. ⁶ ¶ Se poutèt sa, m'ap mande ou pou kenbe kado Bondye te ba ou lè m' te mete men sou tèt ou a. ⁷ Paske, Lespri Bondye ban nou an pa fè nou wont moun. Okontrè, Lespri Bondye a ban nou fòs, renmen ak pouvwa pou kontwole tèt nou. ⁸ Ou pa bezwen wont kanpe pale pou Seyè nou an. Ou pa bezwen wont pou mwen non plis ki nan prizon pou tèt li. Okontrè, avèk fòs kouraj Bondye ap ba ou a, se pou ou asepte soufri avè m' pou bon nouvèl la. ⁹ Se Bondye ki delivre nou, se li menm ki rele nou pou n' ka viv pou li. Li pa t' fè sa pou nou poutèt byen nou te fè. Non, sa soti nan plan travay li menm. Se yon favè li fè nou nan Jezikri, depi lontan

¹⁰
 anvan li te kreye tout bagay. Koulye a, li fè nou konnen favè sa a avèk Jezikri, Sovè nou, ki te vini an. Paske, Jezikri kraze pouvwa lanmò te genyen an. Avèk bon nouvèl la, li fè lavi ki p'ap fini

¹¹
 nan lanmò a parèt aklè. Bondye chwazi m' pou m' anonse bon nouvèl sa a, li voye m' kòm apòt

¹²
 pou m' moutre li bay tout moun ki pa jwif. Se poutèt li tou m'ap sibi tout soufrans sa yo. Men, mwen pa wont paske mwen konnen nan ki moun mwen mete konfyans mwen. Mwen sèten li gen

¹³
 pouvwa pou l' konsève sa l' te ban mwen an jouk gran jou a va vini. Pran egzanp sou pawòl

¹⁴
 verite mwen te ba ou yo. Kenbe fèm nan konfyans ak nan renmen nou jwenn nan Jezikri. Ak lasistans Sentespri ki nan kè ou la, kenbe tout bon pawòl yo te moutre ou yo tankou yon depo ki

¹⁵
 sou kont ou. ¶ Ou te pran nouvèl la, pa vre? Tout moun nan pwovens Lazi yo lage m' pou kont

¹⁶
 mwen, ata Fijèl ak Emojèn. Mwen mande Seyè a pou li gen pitye pou moun lakay Onezifò yo. Paske, anpil fwa Onezifò vin konsole mwen. Li pa t' wont mwen dèske mwen te nan prizon.

¹⁷ Okontrè, lè li rive lavil Wòm, li touye tèt li chache m' jouk li jwenn mwen. ¹⁸ Se pou Seyè Jezi fè Bondye gen pitye pou li lè gran jou a va rive. Ou chonje tout sèvis li te rann mwen lavil Efèz?

Chapter 2

¹
 ¶ Ou menm, pitit mwen, pran fòs kouraj nan favè nou resevwa nan lavi n'ap mennen ansanm

²
 ak Jezikri a. Sa ou te tandè m' di ou devan anpil temwen, se pou ou renmèt yo bay lòt moun serye

³
 ou konnen ki ka moutre lòt moun yo tou. Tankou yon bon sòlda Jezikri, asepte tout soufrans ki

⁴
 vin pou ou. Lè yon sòlda desèvis, li pa pral chaje tèt li ak pwoblèm lavi si li vle fè chèf li plezi.

⁵
 Lè yon moun ap aprann kouri pou l' ka patisipe nan yon konkou, li p'ap ka genyen si li pa kouri

⁶
 dapre regleman konkou a. Kiltivatè ki travay di a, se li menm an premye ki pou resevwa pa l' nan

⁷ rekòt la. ⁸ Fè tèt ou travay sou sa m' ap di ou la a. Seyè a va fè ou konprann tout bagay. ¶ Toujou

⁹
 chonje pitit David la, Jezikri, ki te leve soti vivan nan lanmò, jan sa di nan bon nouvèl la. Se

¹⁰
 paske m'ap anonse bon nouvèl sa a kifè m'ap soufri konsa, kifè mwen nan prizon tankou yon

¹¹
 malfektè. Men, pawòl Bondye a pa nan chenn. Se poutèt sa m'ap sipòte bagay sa yo pou sa ka

¹¹
 tounen yon byen pou moun Bondye chwazi yo, pou yo menm tou yo ka delivre gremesi Jezikri,

¹¹
 pou yo ka resevou a bèl pouvwa ki la pou tout tan an. Sa se pawòl sèten: Si nou mouri ansanm

avè l', n'a viv ansanm avè l' tou. ¹² Si nou kenbe l' fèm nan soufrans nou, n'a gouvènen ansanm
avè l' tou. Si nou lage l', la lage nou tou. ¹³ Si nou pa kenbe pawòl nou, li menm l'ap toujou kenbe
pawòl pa li, paske Bondye pa kapab demanti tèt li. ¹⁴ ¶ Fè tout moun chonje bagay sa yo. Pran
Bondye pou temwen, pale yo pou yo pa diskite sou mo. Diskisyon sa yo pa rapòte anyen. Se pèdi
y'ap pèdi moun ki koute yo. ¹⁵ Fè jefò pou ou ka resevwa lwanj nan men Bondye tankou yon
travayè ki pa wont travay li fè, yon travayè ki fè konnen pawòl verite Bondye a jan l' ye a. ¹⁶ Evite
diskou san sans ki pa dakò ak verite lafwa a, paske moun k'ap fè diskisyon sa yo se kite yo kite
Bondye pi lwen chak jou. ¹⁷ Pawòl y'ap di yo, se tankou yon maladi k'ap manje tout kò yo. Nan
moun sa yo gen Imene ak Filèt. ¹⁸ Yo tou de vire do bay verite a, y'ap plede fè anpil lòt moun pèdi
konfyans nan Bondye. Y'ap mache di: Nou leve soti vivan nan lanmò deja. ¹⁹ ¶ Men, pa pè.
Fondasyon solid Bondye te mete a, li la toujou. Men pawòl nou jwenn make sou li: Mèt la konnen
moun ki moun pa li. Tout moun ki di se pou Seyè a y'ap viv, se pou yo sispann fè sa ki mal. ²⁰ Nan
yon gwo kay, gen tout kalite veso: genyen ki fèt an lò osinon an lajan, genyen ki fèt an bwa osinon
an tè. Gen ladan yo ki sèvi pou okazyon espesyal. Gen lòt se pou sèvis òdenè. ²¹ Si yon moun
kenbe kò l' pou l' pa fè sa ki mal, y'a fè l' fè yon travay espesyal. Paske lè sa a l'ap mete tèt li apa
nèt pou Mèt li, la itil Mèt la, l'ap pare pou l' fè nenpòt bagay ki byen. ²² ¶ Pa kite lanvi ki nan kè
jenn moun yo pran pye sou ou. Rete lwen yo. Men, mete tèt ou ansanm ak moun ki gen kè yo nan
kondisyon pou sèvi Bondye moun k'ap rele Bondye, k'ap chache fè sa ki dwat devan l' epi k'ap
chache gen konfyans, renmen ak kè poze. ²³ Men, pa mele nan diskisyon san sans moun fou yo.
Ou konnen sa toujou fini nan kont. ²⁴ Yon moun k'ap sèvi Bondye pa fèt pou nan kont. Se pou l'
viv byen ak tout moun, se pou l' konn ki jan yo fè enstriksyon moun, se pou l' gen pasyans. ²⁵ Se
pou l' korije moun ki pa dakò avè l' avèk dousè. Ou pa janm konnen: Bondye ka ba yo yon chans
pou yo chanje jan y'ap viv la, pou yo vin konn verite a. ²⁶ Lè konsa, y'a reprann bon sans yo, y'a
chape kò yo soti nan pèlen Satan ki te mete men sou yo pou l' te fè yo fè sa l' vle.

Chapter 3

¹ ¶ Mete sa byen nan tèt ou: nan dènye jou yo, tan an pral difisil anpil. ² Moun pral fè rayisab,
y'ap renmen lajan, y'ap fè grandizè, lògèy ap vire tèt yo, y'ap pale Bondye mal, y'ap dezobeyi papa

ak manman yo, y'ap engra, y'ap san okenn respè pou bagay Bondye.³ Kè yo ap di, y'ap san pitye,
 y'ap pale moun mal, y'ap fè gwo kòlè, y'ap brital. Yo p'ap vle wè sa ki byen menm.⁴ Y'a mòde an
 trèt, y'a fè kòlè fasil, lògèy va gonfle lestonmak yo. Y'ap pito plezi pase sèvis Bondye.⁵ Y'ap fè
 tankou y'ap sèvi Bondye. Men, yo pa kwè nan pouvwa Bondye a tout bon vre. Pa mele ak moun
 konsa menm.⁶ Gen ladan yo k'ap antre lakay moun pou pran tèt medam ki fèb yo, ki gen konsyans
 yo chaje anba peche epi k'ap kite tout kalite move lanvi mennen lavi yo.⁷ Medam sa yo toujou ap
 chache konnen. Men, yo pa janm ka rive konnen verite a.⁸ Menm jan ou te wè Janès ak Janbrès
 t'ap fè Moyiz opozisyon an, konsa tou moun sa yo ap fè verite a opozisyon. Se yon bann moun ki
 gen lespri yo deraye. Bondye voye yo jete paske yo pa gen konfyans tout bon nan li.⁹ Men, yo
 p'ap rive lwen, paske tout moun pral rekonèt jan yo pèdi tèt yo, menm jan sa te rive pou Janès ak
 Janbrès.¹⁰ ¶ Men, ou menm, ou te swiv mwen pye pou pye nan tout bagay: nan verite mwen moutre
 moun yo, nan jan mwen mennen lavi mwen, nan lide m' mete nan tèt mwen, nan konfyans mwen
 gen nan Bondye, nan pasyans mwen, nan renmen mwen gen nan kè m', nan jan mwen kenbe fèm,
¹¹
 nan pèsekisyon mwen ak nan soufrans mwen. Ou konnen tou sa ki te rive m' Antiòch, Ikoniòm
 ak List, ki kalite pèsekisyon mwen te sipòte. Men, Bondye te delivre m' anba yo tout.¹² Tout moun
 ki vle viv nan sèvis Bondye ansanm ak Jezikri gen pou soufri pèsekisyon.¹³ Men, mechan k'ap fè
 bagay pou twonpe moun yo pral pi lwen toujou nan mechanste yo, yo toujou ap twonpe moun, y'ap
 kite moun twonpe pwòp tèt yo tou.¹⁴ Kanta ou menm, se pou ou kenbe fèm sa yo te moutre ou
 la, sa ou te resevwa ak fèm konviksyon, paske ou konnen nan men ki moun ou te aprann yo.¹⁵ Depi
 ou te tou piti ou konnen sa ki nan Liv Bondye a. Se liv sa a k'ap ba ou bon konprann, bon konprann
 ki fè moun rive delivre, gremesi konfyans yo gen nan Jezikri.¹⁶ Tou sa ki ekri nan Liv la, se nan
 Lespri Bondye a yo soti. Y'ap sèvi pou moutre moun verite a, pou konbat moun ki nan lerè, pou
 korije moun k'ap fè fòt, pou moutre yo ki jan pou yo viv byen devan Bondye.¹⁷ Konsa, yon moun
 k'ap sèvi Bondye, li tou pare, li gen tou sa li bezwen pou l' fè tou sa ki byen.

Chapter 4

¹
 ¶ Men sa m'ap mande ou, devan Bondye ak devan Jezikri ki gen pou vini tankou yon wa pou
 jije tout moun, ni sa ki vivan ni sa ki mouri:² Fè konnen pawòl Bondye a, mache bay li san pran

souf, nan tout sikonstans, tan an te mèt bon li te mèt pa bon. Bay tout kalite prèv, rale zòrèy, bay konsèy, moutre moun yo verite a avèk pasyans nèt ale. ³ Yon lè, ou gen pou ou wè moun p'ap vle kite yo moutre yo verite a ankò, y'ap vle pou yo swiv lide pa yo. Lè sa a, y'a reyini yon bann direktè met bò kote yo ki va di yo sa yo ta renmen tande. ⁴ Yo p'ap vle tande verite a, y'a pito koute istwa ki pa vre. ⁵ Men, ou menm, kenbe tèt ou an plas nan tout sikonstans. Sipòte tout kalite soufrans. Fè travay moun k'ap anonse bòn nouvèl la. Fè devwa ou ak tout kè ou, tankou yon sèvitè Bondye. ⁶ Pou mwen menm, lè a rive kote yo pral ofri m' tankou bèt y'ap ofri bay Bondye, lè a vini pou m' kite lavi sa a/. ⁷ Mwen fin mennen batay la byen mennen, mwen rive nan bout kous mwen, mwen kenbe konfyans mwen fèm nan Bondye. ⁸ Koulye a, se rekonpans mwen m'ap tann pou lavi dwat mwen te mennen an. Lè gran jou a va rive, Seyè k'ap jije san patipri a ap mete rekonpans mwen an tankou yon kouwòn sou tèt mwen. Men, se pa mwen ase l'ap bay li. Tout moun k'ap tann ak tout kè yo lè la gen pou l' parèt la, va resevwa l' tou. ⁹ ¶ Fè posib ou vin jwenn mwen touswit. ¹⁰ Paske, Demas lage m', li te renmen bagay ki nan lemonn lan twòp. Li pati, li ale Tesalonik. Kresan pou tèt pa l' al nan peyi Galasi, Tit ale Dalmasi. ¹¹ Se Lik sèlman ki la avèk mwen. Pran Mak avèk ou lè w'ap vini. La ban m' yon bon kout men nan travay la. ¹² Mwen voye Tichik lavil Efèz. ¹³ Lè w'ap vini, pase pran gwo manto mwen te kite lakay Kapis, lavil Twoas, pote l' pou mwen. Pote Liv yo tou, espesyalman sa ki fèt ak po bèt yo. ¹⁴ Aleksann, bès fòjon an, fè m' anpil tò. Seyè a va ba l' sa l' merite dapre sa l' fè a. ¹⁵ Pran prekosyon ou avè l', ou menm tou. Paske li pa t' vle tande sa n'ap di a menm. ¹⁶ ¶ pa t' gen pesonn pou ede m' premye jou mwen t'ap fè defans mwen devan chèf yo. Tout moun kite m' pou kont mwen. Mwen mande Bondye pou l' padonnen yo sa. ¹⁷ Men, Seyè a te kanpe la avè m', li ban m' fòs. Se sak fè, mwen te kapab fè konnen pawòl la nèt ale, pou tout moun ki pa jwif yo te ka tande li. Se konsa Bondye wete m' nan bouch lyon an. ¹⁸ Seyè a va toujou delivre m' nan tout move pa. L'ap konsève m' pou m' ka antre nan peyi kote li wa nan syèl la. Se pou li tout lwanj pou tout tan. Amèn. ¹⁹ Di Priska ak Akilas bonjou pou mwen, ansanm ak tout moun ki lakay Onezifò yo. ²⁰ Eras te rete Korent. Mwen te blije kite Twofim lavil Milè paske li te malad. ²¹ Fè posib ou pou ou vin jwenn mwen anvan sezon fredy a rive. Ebilis, Pidans, Lenis, Klodya ak tout lòt frè yo voye bonjou pou ou. ²² Mwen mande Seyè a pou l' toujou la avèk ou. benediksyon Bondye avèk nou tout. Amèn.

Titus

Chapter 1

¹ ¶ Mwen menm, Pòl, mwen se sèvitè Bondye, yon apòt Jezikri. Se Bondye menm ki voye m' pou m' ede moun li chwazi yo rive gen konfyans nan li, pou m' fè yo konnen verite a jan n'ap viv li nan sèvis Bondye, ² pou yo ka gen espwa resevwa lavi ki p'ap janm fini an. Bondye pa janm manti, li te pwòmèt lavi sa a depi lontan anvan li te kreye tout bagay. ³ Lè lè li te fikse a rive, li fè nou konnen lavi sa a ak pawòl li, nan mesaj li te renmèt mwen pou m' fè konnen, dapre lòd Bondye, ⁴ Sovè nou an, te ban mwen. M'ap ekri ou lèt sa a, Tit, pitit lejitim mwen nan konfyans nou gen ansanm lan. Mwen mande Bondye Papa a ansanm ak Jezikri, Sovè nou an, pou yo ba ou benediksyon ak kè poze. ⁵ ¶ Mwen te kite ou nan lil Krèt pou ou te kapab òganize tou sa ki pa t' ankò fin regle. Ou te gen pou ou te mete yon gwoup ansyen alatèt legliz la nan chak vil. Chonje sa m' te di ou: ⁶ ¶ Yon ansyen, se yon moun ki pou san repwòch, ki gen yon sèl madanm. Se pou pitit li yo gen konfyans nan Bondye. Tout moun fèt pou konnen yo pou timoun ki pa nan dezòd, ki pa dezobeyisan. ⁷ Paske, yon moun k'ap dirije legliz la, se li ki reskonsab travay Bondye a. Se pou li san repwòch. Se pa pou li awogan, ni renmen fè kòlè, ni renmen bwè gwòg. Li pa fèt pou l' brital, ni renmen fè lajan nan move kondisyon. ⁸ Men, se pou l' konn resevwa moun lakay li. Se pou l' renmen sa ki byen, se pou li konn kenbe tèt li anplas, se pou li san patipri. Se pou l' viv apa pou Bondye, pou li konn kontwole tèt li. ⁹ Se pou l' kenbe mesaj verite a byen fèm, jan Kris la te bay li a, pou l' ka ankouraje lòt yo ak pawòl verite a, pou li ka demanti moun k'ap vire pawòl la lanvè. ¹⁰ Paske, gen moun ki rebèl, k'ap mache twonpe moun ak pawòl san sans. Gen anpil jwif konvèti ki konsa nan mitan yo. ¹¹ Se pou nou fèmen bouch moun sa yo, paske yo boulvèse anpil fanmi deja ak move bagay y'ap moutre moun pou yo fè lajan nan move kondisyon. ¹² Se yon moun Krèt, yonn nan pwofèt pa yo menm ki di konsa: Moun Krèt toujou ap bay manti. Se yon bann bèt sovaj, yo parese konsa. Lide yo sou manje ase. ¹³ Sa li di a, se vre wi. Se poutèt sa, pale sevè ak yo pou yo ka sensè nan konfyans yo, ¹⁴ pou yo pa swiv vye istwa jwif yo fè, ni kòmandman ki soti nan moun ki vire do bay verite a. ¹⁵ Pou yon moun k'ap fè volonte Bondye, tout bagay bon. Men, anyen pa bon pou moun k'ap fè sa ki mal, pou moun ki pa gen konfyans nan Bondye, paske lespri yo ak konsyans yo

16
fin pran nan sa ki mal. Y'ap mache di yo konn Bondye. Men, sa y'ap fè a demanti yo. Yo bay degoutans, yo rebèl, yo pa ka fè anyen ki bon.

Chapter 2

¹ ¶ Ou menm, se pou tou sa w'ap moutre moun dakò ak bon mesaj la. ² Pale ak granmoun gason yo pou yo fè tout bagay ak mezi, pou yo fè respè tèt yo, pou yo kenbe tèt yo anplas, pou yo gen yon konfyans solid nan Bondye, pou yo gen renmen nan kè yo ak anpil pasyans. ³ Pale ak granmoun fanm yo tou pou yo viv tankou moun k'ap viv pou Bondye tout bon vre. Yo pa dwe nan fè tripotaj, ni nan twò renmen gwòg. Okontrè, se pou yo bay bon egzanp. ⁴ Konsa, lòt jenn medam yo va aprann nan men yo ki jan pou yo renmen pitit yo ak mari yo, ⁵ ki jan pou yo kenbe tèt yo anplas, pou yo pa nan dezòd, pou yo konn okipe kay yo byen, pou yo aji ak bon kè, pou yo soumèt devan mari yo. Konsa, moun p'ap ka pale pawòl Bondye a mal. ⁶ Konsa tou, pale ak jenn moun yo pou yo kenbe tèt yo anplas. ⁷ Ou menm, nan tout bagay, se pou ou bay bon egzanp: toujou fè sa ki byen. Lè w'ap moutre yo kichòy, se pou ou serye: ba yo verite a san chache twonpe yo. ⁸ Pale pawòl ki dakò ak verite a pou yo pa kritike ou. Konsa, lènmi nou yo va wont. Yo p'ap jwenn anyen pou yo di sou nou. ⁹ Pale ak domestik yo pou yo soumèt devan mèt yo, pou yo fè mèt yo plezi nan tout bagay. Yo pa fèt pou nan bay repons ak yo. ¹⁰ Ni yo pa dwe nan pran sa ki pa pou yo. Okontrè, se pou yo serye tout bon nan tou sa y'ap fè. Konsa y'a fè respè mesaj Bondye, delivrans nou an, nan tout bagay. ¹¹ ¶ Bondye fè konnen favè l' pou tout moun ka delivre. ¹² Favè Bondye a mande nou pou nou kite move lavi nou t'ap mennen an ansanm ak tout move lanvi ki nan lemond, pou nou ka mennen yon lòt lavi ki kontwole, ki dwat, ki devwe pou Bondye pandan nou sou latè a. ¹³ Se konsa li moutre nou pou nou viv pandan n'ap tann benediksyon li te pwomèt nou yo, lè bèl pouvwa Jezikri, Bondye nou ak Delivrans nou, va parèt. ¹⁴ Li te asepte mouri pou nou pou li te ka delivre nou anba mechanste, pou li te fè nou tounen yon pèp ki nan kondisyon pou sèvi li, ki rele li pa li, epi ki toujou pare pou fè sa ki byen. ¹⁵ ¶ Se bagay sa yo pou ou moutre moun yo. Otorite yo ba ou a se pou ankouraje sa ki bezwen ankouraje, pou rale zòrèy sa ki bezwen gen zòrèy yo rale. Pa bay pesonn okazyon meprize ou.

Chapter 3

¹
 ¶ Fè yo chonje se pou yo soumèt devan tout chèf ak tout otorite, pou yo obeyi yo, pou yo
 toujou pare pou fè tou sa ki byen. ² Yo pa dwe nan pale moun mal, yo pa dwe nan fè kont ak pesonn.
 Se pou yo gen pasyans ak tout moun, se pou yo aji ak dousè ak tout moun. ³ Paske, nou menm tou,
 nan tan lontan nou te tankou moun fou, nou pa t' obeyisan devan Bondye, nou te tankou moun ki
 pèdi chemen yo. Nou te esklav tout kalite move dezi ak move plezi. Nou t'ap viv ak mechanste, ak
 jalouzi nan kè nou. Moun te rayi nou, epi nou menm, nou te rayi yo tou. ⁴ Men, lè Bondye fè nou
 wè jan li gen bon kè, jan li renmen tout moun, ⁵ li te delivre nou. Li pa t' delivre nou paske nou te
 fè kèk bagay ki bon, men paske li menm li te gen pitye pou nou. Li delivre nou lè li lave nou, li
 voye pouvwa Sentespri li nan nou pou chanje nou nèt, pou n' te ka viv yon lòt jan. ⁶ Bondye voye
 Sentespri li sou nou an kantite, gremesi Jezi, Kris la, ki delivre nou. ⁷ Avèk favè sa a Bondye fè
 nou an, li fè nou gras. Koulye a nou ka resevwa sa n'ap tann lan: lavi ki p'ap janm fini an. ⁸ Sa se
 pawòl sèten. Mwen ta renmen ou peze sou bagay sa yo anpil pou tout moun ki mete konfyans yo
 nan Bondye ka okipe tout tan yo ap fè sa ki byen. Se bagay konsa ki bon, ki kapab sèvi tout moun.
⁹
 ¶ Pa antre nan okenn vye diskisyon san sans, ni nan chache konnen non gran granparan moun, ni
 nan chache kont, ni nan goumen pou lalwa Moyiz la. Bagay sa yo pa sèvi anyen, yo pa vo anyen.
¹⁰
 Si yon moun vle mete divizyon, pale avè l' yon premye fwa, yon dezyèm fwa. Si li pa koute ou,
 pa okipe li. ¹¹ Paske ou konnen byen yon moun konsa fin pèdi. Sè pwòp peche li yo k'ap kondannen
 li. ¹² Lè m'a voye Atemas osinon Tichik ba ou, fè posib ou pou ou vin jwenn mwen lavil Nikopolis,
 paske se la mwen fè lide pase sezon fredy a. ¹³ Fè sa ou kapab pou mèt Zenas, avoka a, ansanm ak
 Apolòs, pou yo pa manke anyen pou vwayaj yo a. ¹⁴ Se pou moun nou yo aprann fè sa ki byen
 tou, pou yo bay lè gen ka nesosite. Yo pa fèt pou y'ap viv konsa san yo pa bay anyen. ¹⁵ Tout moun
 ki avè m' yo voye bonjou pou ou. Di tout zanmi nou nan lafwa yo bonjou. Mwen mande pou Bondye
 ban nou tout favè li.

Philemon

Chapter 1

¹ ¶ Mwen menm Pòl, ki nan prizon poutèt Jezikri, m'ap ekri lèt sa a, ansanm ak frè Timote, Pou
 Filemon, yon moun nou renmen anpil epi k'ap travay ansanm ak nou pou Seyè a, ² pou tout legliz
 la ki reyini lakay li a, pou Apya, sè nou an, ak Achip, kanmarad ki te konbat ansanm ak nou an.
³ Nou mande Bondye, Papa nou, ansanm ak Jezikri, Seyè nou an, pou yo ban nou benediksyon ak
⁴ kè poze. Chak fwa m'ap lapriyè, mwen nonmen non ou, mwen di Bondye mèsì pou ou. ⁵ Paske
 m' tande jan ou renmen tout pèp Bondye a, jan ou gen konfyans nan Seyè Jezi. ⁶ M'ap mande
 Bondye pou konfyans nou gen ansanm nan li a ka fè nou konprann pi byen tout benediksyon nou
⁷ jwenn nan lavi n'ap mennen ansanm nan Kris la. Se pa ti kontan m' te kontan, sa te ankouraje m'
 anpil, frè mwen, lè m' tande jan ou renmen moun ki fè pati pèp Bondye a, jan ou te remoute kouraj
 yo anpil. ⁸ ¶ Se poutèt sa, atout Kris la ban m' otorite pou m' di ou sa ou gen pou ou fè, ⁹ m' pito
 mande ou rann mwen sèvis sa a nan non Kris la ki renmen nou: wi, mwen menm Pòl, tou vye
¹⁰ granmoun jan m' ye a, atout mwen nan prizon poutèt Jezikri, m'ap mande ou yon favè pou
 Onezim, yon pitit mwen fè nan Kris la antan m' la nan prizon an. ¹¹ Anvan sa, li pa t' vo anyen
 pou ou, men koulye a, li vo kichòy ni pou ou ni pou mwen. ¹² M'ap voye l' tounen ba ou koulye a
 tankou pitit pa mwen. ¹³ M' ta byen renmen kenbe l' bò kote m', pou l' te ka sèvi m' nan plas ou,
 pandan m' nan prizon pou bon nouvèl la. ¹⁴ Men, m' pa vle fè anyen san konsantman ou. Mwen
 pa ta renmen sa sanble se fòse m'ap fòse ou rann mwen sèvis. Mwen ta pito wè ou fè l' ou menm,
¹⁵ paske ou vle fè li. Ou pa janm konnen si Onezim pa t' kite ou pou yon tan, pou ou te ka jwenn
¹⁶ li ankò pou tout tan. Paske, se pa tankou yon senp esklav ou jwenn li ankò. Koulye a, li plis pase
 yon esklav pou ou: se yon frè li ye pou nou nan Kris la, yon frè mwen renmen anpil. Men, ou menm
 ou dwe renmen li pi plis pase m' ankò. Pa sèlman tankou nenpòt ki moun, men tankou yon frè nan
¹⁷ Seyè a. Si ou konsidere m' pou zanmi ou, resevwa Onezim menm jan ou ta resevwa mwen.
¹⁸ Si l' te fè ou kèk bagay mal, osinon si l' dwe ou kichòy, mete sa sou kont mwen. ¹⁹ Mwen menm
 Pòl, m'ap ekri sa ak men pa mwen: m'a renmèt ou sa. Mwen pa kwè m' bezwen fè ou chonje jan
²⁰ ou dwe m' lavi. Wi, frè m', fè m' favè sa a nan non Seyè a. Soulaje kè m' tankou yon frè nan
²¹ Kris la dwe fè li. Se paske mwen konnen w'ap fè sa m' mande ou la ki fè m' ekri ou lèt sa a.
²² Mwen konnen ou va fè pi plis pase sa m' mande ou la. An menm tan, pare yon chanm pou mwen,
 paske, pou lapriyè mwen konnen nou fè pou mwen, mkwè Bondye va tande nou, la fè m' favè vin
²³ jwenn nou ankò. Epafra ki nan prizon ansanm ak mwen poutèt Jezi, Kris la, voye bonjou pou

24 ou. Mak, Aristak, Demas ak Lik k'ap travay ansanm ak mwen, yo tout voye bonjou tou. 25 Se pou benediksyon Jezikri, Seyè nou an, toujou la avèk nou. Amèn.

Hebrews

Chapter 1

1 ¶ Nan tan lontan, Bondye te mete pawòl nan bouch pwofèt yo nan divès okazyon ak divès jan pou l' te ka pale ak zansèt nou yo. 2 Men, nan dènye jou sa yo, se pitit li a menm Bondye te voye pale ak nou nan non li. Se ak Pitit sa a Bondye te kreye tout bagay. Se li menm tou Bondye chwazi pou eritye tout bagay lè sa va fini nèt. 3 Pitit sa a reflète limyè bèl pouvwa Bondye a, se bon pòtre Bondye li ye. Se li menm k'ap soutni tout bagay ak pouvwa pawòl li. Lè li fin delivre moun anba peche yo, li moute chita anwo nan syèl la, sou bò dwat Bondye, Gran Wa a. 4 ¶ Pitit la sitèlman gen plis pouvwa pase zanj yo, Bondye ba l' yon non ki pi konsekan pase pa yo a. 5 Kilès nan zanj yo Bondye te janm di: Ou se pitit mwen. Depi jòdi a se mwen ki papa ou? Li pa janm di okenn nan zanj li yo: M'a yon papa pou li. La yon pitit pou mwen. 6 Men, lè Bondye t'ap voye premye Pitit li a sou latè, li te di: Se pou tout zanj Bondye yo adore li. 7 Lè l' t'ap pale sou zanj li yo, li te di: Bondye fè zanj li yo tounen van. Li fè sèvitè l' yo tounen flann dife. 8 Men, lè l'ap pale sou Pitit li a, li di: O Bondye, gouvènman ou lan la pou tout tan. W'ap gouvènen san patipri tankou yon wa nan peyi ou la. 9 Ou te renmen tou sa ki byen. Ou te rayi tou sa ki mal. Se poutèt sa, Bondye ki Bondye ou la chwazi ou. Li fè kè ou kontan nèt ale, li fè pou ou bagay li pa fè pou lòt zanmi ou yo. 10 Yon lòt fwa, li di ankò: Se ou menm, Mèt la, Bondye ki te kreye latè nan konmansman. Se avèk men ou ou te fè syèl la. 11 Yo gen pou yo disparèt, men ou menm w'ap toujou la. Yo gen pou yo fini tankou rad. 12 W'ap vlope yo tankou yon chemiz mete la. W'ap chanje yo tankou rad. Men ou menm, ou p'ap janm chanje, ou p'ap janm mouri. 13 Bondye pa janm di okenn nan zanj li yo: Chita la sou bò dwat mwen, jouk tan mwen fè lènmi ou yo tounen yon ti ban pou lonje pye ou. 14 Kisa zanj Bondye yo ye menm? Yo tout se yonn bann lespri k'ap sèvi Bondye. Se Bondye menm ki voye yo pou ede moun ki la pou jwenn delivrans yo.

Chapter 2

¹ ¶ Se poutèt sa, nou dwe kenbe verite yo te moutre nou yo pi fèm toujou pou nou pa pèdi
² chemen nou. Pawòl zanj Bondye yo te anonse a te gen tout valè li. Se sa ki fè moun ki pa t' okipe
³ pawòl la ak moun ki te dezobeyi l' yo te resevwa chatiman yo te merite a. Konsa tou, si nou menm
nou meprize yon gwo delivrans tankou sa a, nanpwen chape pou nou. Premye moun ki te fè konnen
delivrans sa a se Seyè a menm. Apre sa, moun ki te tandè l' yo, se yo ki te fè nou konnen jan
⁴ delivrans sa a gen anpil valè. Anmenmtan an tou, Bondye te fè anpil siy, anpil bèl bagay ak anpil
mirak pou fè wè sa moun sa yo t'ap di a se te vre. Li separe kado Sentespri a bay moun jan l' vle.
⁵ ¶ Bondye pa t' bay zanj li yo pouvwa sou anyen nan tan n'ap pale a, tan ki gen pou vini an.
⁶ Okontrè, jan yo ekri sa yon kote nan Liv la: Bondye o, kisa moun ye pou w'ap chonje yo konsa?
Kisa moun ki fèt pou mouri yo ye menm pou w'ap pran ka yo konsa? ⁷ Ou fè yo yon ti jan pi ba
⁸ pase zanj yo pou yon ti tan. Tankou yon kouwòn sou tèt yo, ou ba yo tout lwanj ak tout respè. Ou
mete tout bagay anba pye yo. Liv la di Bondye mete tout bagay anba pye lèzòm, sa vle di pa gen
⁹ anyen ki pa sou zòd yo. Men, nou wè koulye a moun pa gen pouvwa sou tout bagay. Okontrè, lè
nou gade Jezi, nou wè pou yon tan Bondye te mete l' pi ba pase zanj yo, pou l' te ka mouri pou tout
moun, tankou yon favè Bondye t'ap fè yo. Koulye a, poutèt lanmò li te soufri a, Bondye ba li tout
¹⁰ lwanj ak tout respè ki pou yon wa. ¶ Se Bondye ki fè tout bagay, se Bondye k'ap kenbe tout
bagay. Se tou nòmal pou l' te vle fè anpil nan pitit li yo resevwa pa yo nan bèl pouvwa li a. Se
poutèt sa, li fè Jezi vin bon nèt avèk tout soufrans sa yo. Paske se Jezi ki chèf k'ap mennen yo nan
¹¹ chemen delivrans lan. Ni moun ki netwaye lèzòm anba peche yo, ki vle di Jezi, ni lèzòm li
netwaye yo, yo tout gen yon sèl papa. Se poutèt sa, Jezi pa wont rele yo frè, ¹² jan l' te di sa nan
¹³ Liv la: Bondye, m'a nonmen non ou bay frè m' yo. M'a fè lwanj ou lè yo tout reyini ansanm. Li
di ankò: M'a mete tout konfyans mwen nan Bondye. Apre sa, li di ankò: Men mwen ansanm ak
¹⁴ tout pitit Bondye te ban mwen yo. ¶ Moun li rele pitit li yo, se moun ki gen yon kò ki fèt ak chè
ak san. Jezi vin tankou yo tou, menm chè ak yo, menm san ak yo. Konsa, lè li mouri, li detwi Satan
¹⁵ ki te gen pouvwa pou touye moun. Li delivre tout moun ki pase tout lavi yo esklav paske yo te
¹⁶ pè lanmò. Sa se bagay ki klè: li pa t' vin pote sekou bay zanj Bondye yo. Jan sa ekri nan Liv la:
¹⁷ Li vin pote sekou bay tout moun ras Abraram yo. Se konsa, li te fèt pou l' te vin tankou frè l' yo
sou tout pwèn, pou l' te ka sèvi yo tankou yon granprèt ki gen anpil pitye pou yo, k'ap fè sèvis li

byen devan Bondye, pou ofrann li fè a ka fè Bondye padonnen peche tout pèp la. ¹⁸ Koulye a, li ka pote sekou bay tout moun ki anba tantasyon, paske li menm tou li te pase anba tantasyon, li menm tou li te souffri.

Chapter 3

¹ ¶ Se poutèt sa, frè m' yo, nou menm k'ap viv apa pou Bondye, nou menm Bondye te rele pou antre ansanm nan syèl la, fikse je nou sou Jezi, moun Bondye te voye pou sèvi nou granprèt nan konfyans nou genyen an. ² Paske li pa t' twonpe Bondye ki te chwazi l' pou travay sa a. Li fè travay li byen tankou Moyiz ki te fè tout travay li byen nan kay Bondye a. ³ Moun ki bati yon kay resevwa plis lwanj pase kay la. Konsa tou, Jezi resevwa yon pi gwo lwanj pase Moyiz. ⁴ Chak kay gen yon moun ki bati li. Men, se Bondye ki fè tout bagay. ⁵ Moyiz te fè travay li byen nan tout kò kay Bondye a. Li te yon senp sèvitè ki te la pou pale sou bagay Bondye tapral di pita. ⁶ Men, Jezikri te fè travay li tankou yon pitit Bondye te mete chèf kay li. Se nou menm ki kay Bondye a, depi nou pa janm dekouraje, depi nou pa janm pèdi konfyans, depi nou pa janm wont sa n'ap tann lan. ⁷ ¶ Se poutèt sa, jan Sentespri te di l' la: Si nou tande vwa Bondye jòdi a, ⁸ pa kenbe tèt ak li, menm jan zansèt nou yo te fè l', lè yo te chache kont ak Bondye a, tankou lè, nan dezè a, yo te vle wè jouk ki bò Bondye ye ak yo. ⁹ Lè sa a, zansèt nou yo te tante m', yo te sonde m' atout yo te deja wè tou sa m' t'ap fè depi karantan. ¹⁰ Se sak fè, mwen te fache sou moun sa yo. Mwen te di: Moun sa yo toujou ap fè move lide nan tèt yo. Yo derefize obeyi kòmandman m' yo. ¹¹ Mwen te fè kòlè, mwen te fè sèman: Yo pa janm mete pye yo kote pou yo poze kò yo ansanm ak mwen an. ¹² Frè m' yo, atansyon pou okenn nan nou pa rive gen move santiman nan kè l' ki pou fè l' pèdi konfyans nan Bondye, pou lè sa a, li pa vire do bay Bondye vivan an. ¹³ Okontrè, chak jou, se pou nou yonn ankouraje lòt toutotan n'ap viv nan epòk Liv la rele jòdi a. Piga nou yonn kite peche detounen nou, pou lè sa a nou pa rive nan kenbe tèt ak Bondye. ¹⁴ Paske, nou se moun k'ap mache ansanm ak Kris la, depi nou kenbe fèm nan konfyans nou te genyen depi nan konmansman an jouk sa kaba. ¹⁵ Men sa ki ekri nan Liv la: Si nou tande vwa Bondye jòdi a, pa kenbe tèt ak li, tankou lè nou te chache kont ak Bondye a. ¹⁶ Kilès sa yo ki te tande vwa Bondye men ki apre sa te chache kont ak

li? Se tout moun Moyiz te fè soti nan peyi Lejip la. ¹⁷ Sou ki moun Bondye te fè kòlè pandan karantan an? Se sou moun ki te fè peche yo. Tout moun sa yo tonbe, yo mouri nan dezè a. ¹⁸ Lè Bondye te fè sèman sa a, kilès li t'ap pale? Li t'ap pale sou moun ki te chache kont ak li yo. ¹⁹ Nou wè vre, yo yonn pa t' kapab mete pye yo kote sa a, paske yo pa t' gen konfyans.

Chapter 4

¹ ¶ Koulye a, Bondye kenbe menm pwomès sa a pou nou toujou, pou nou ka antre kote pou nou poze kò nou ansanm ak li a. Atansyon pou okenn nan nou pa pèdi chans antre nan kote sa a. ² Paske, yo fè nou konnen bon nouvèl la menm jan ak lòt yo. Yo menm tou yo te tandè mesaj la. Men, sa pa t' sèvi yo anyen, paske lè yo te tandè l' la yo pa t' resevwa l' ak konfyans nan Bondye. ³ Nou menm ki gen konfyans nan Bondye, nou pral antre kote pou nou poze kò nou ansanm ak li a. Se kote sa a li t'ap pale, lè li te di: Mwen te fè kòlè, mwen te fè sèman: Yo p'ap janm mete pye yo kote pou yo poze kò yo ansanm ak mwen an. Bondye te pale konsa, men li menm, li te fin fè travay li depi lè li t'ap kreye lemonn. ⁴ Paske, men sa ki ekri yon lòt kote nan Liv la sou setyèm jou a: Setyèm jou a, Bondye poze kò l' apre li te fin fè tout travay li yo. ⁵ Li tounen sou menm pawòl la ankò, lè li di: Yo p'ap janm mete pye yo kote pou yo poze kò yo ansanm ak mwen an. ⁶ Moun ki te resevwa bon nouvèl la an premye, yo pa t' antre kote sa a paske yo pa t' mete konfyans yo nan Bondye. ⁷ Konsa, gen lòt toujou ki ka antre kote sa a pou yo ka poze kò yo ansanm ak Bondye. Se sak fè, Bondye chwazi yon lòt jou li rele jòdi a. Li pale sou jou sa a lontan lontan apre, nan pawòl David nou jwenn nan Liv la, pawòl mwen deja di nou an: Si nou tandè vwa Bondye jòdi a, pa kenbe tèt ak li. ⁸ Paske, si Jozye te fè pèp Izrayèl la antre nan peyi kote pou yo te poze kò yo ansanm ak Bondye a, Bondye pa ta bezwen pale apre sa sou yon lòt jou ankò. ⁹ Jan sa ye a, gen yon repo ankò pou pèp Bondye a, yon repo tankou repo Bondye te pran setyèm jou a. ¹⁰ Paske, moun ki antre kote pou yo poze kò yo ansanm ak Bondye a, se moun ki fin fè travay yo, menm jan Bondye te poze apre li te fin fè travay li. ¹¹ ¶ Ann fè jefò pou nou tout ka antre kote sa a. Se pa pou okenn nan nou dezobeyi Bondye tankou moun sa yo ki te la anvan nou te fè l' la, pou nou pa pèdi chans antre kote sa a. ¹² Pawòl Bondye a gen lavi, li gen pouvwa. Li pi file pase kouto de bò. Li koupe jouk li jwenn kote nanm ak lespri moun fè yonn, jouk kote vyann ak mwèl zo kontre. Li jije tout santiman ak tout lide ki nan kè moun. ¹³ Anyen pa kapab kache pou Bondye. Tout bagay nan

kreyasyon Bondye a aklè konsa devan je l', san anyen pa kouvri yo. Nou menm tou, nou gen pou nou rann li kont pou tou sa nou fè.¹⁴ Ann kenbe fèm nan konfyans nou genyen an, paske nou gen Jezi, pitit Bondye a, k'ap sèvi nou yon gwo granprèt, li travèse syèl la jouk li rive devan Bondye menm.¹⁵ Granprèt nou an, se pa yon moun ki pa kapab soufri ak nou nan feblès nou. Okontrè, nou gen yon granprèt ki te pase anba tout kalite tantasyon menm jan ak nou. Men, li pa t' janm fè okenn peche.¹⁶ Se poutèt sa, ann pwoche avèk konfyans devan fotèy kote Bondye ki renmen nou an chita. Se la n'a jwenn padon pou peche nou yo, se la n'a jwenn pou gremesi sekou n'a bezwen lè nou nan neseseite.

Chapter 5

¹ ¶ Se pami moun yo toujou chwazi yon granprèt, lèfini yo mete l' apa pou l' ka fè sèvis Bondye pou yo. Se li menm tou ki pou ofri kado ak bèt pou touye pou peche yo bay Bondye.² Li toujou gen anpil pasyans ak moun ki pa konnen, ak moun k'ap fè sa yo pa t' dwe fè, paske li menm poutèt pa l', li fèb tou sou anpil pwen.³ Se sak fè, se pa sèlman pou peche pèp la li gen pou l' ofri bèt pou yo touye bay Bondye, men se pou peche pa l' yo tou, paske li menm tou li fèb.⁴ Pesonn pa ka bay tèt li grad granprèt la. Se Bondye sèlman ki ka rele yon moun nan plas sa a, jan sa te fèt pou Arawon.⁵ Se konsa, Kris la pa t' chwazi tèt li pou l' te resevwa grad granprèt la. Okontrè, li resevwa l' nan men Bondye ki te di li: Ou se pitit mwen, depi jòdi a se mwen ki papa ou.⁶ Li di yon lòt kote ankò: Ou prèt pou tout tan menm jan ak Mèlkisedèk.⁷ Pandan Jezi t'ap viv sou latè, li te lapriyè Bondye, li te fè demann li avèk gwo rèl ak dlo nan je bay Bondye, sèl moun ki te kapab sove l' anba lanmò. Bondye koute l', paske li te soumèt devan Bondye.⁸ Atout li te pitit Bondye, li vin konnen sa ki rele yon moun obeyisan, avèk tout soufrans li soufri yo.⁹ Lè li fin bon nèt, li tounen yon delivrans pou tout moun ki obeyi l', yon delivrans k'ap delivre yo pou tout tan,¹⁰ ¶ paske lè sa a, Bondye deklare se yon granprèt menm jan ak Mèlkisedèk li ye.¹¹ Mwen gen anpil bagay pou m' ta di nou sou sa ankò. Men, se bagay ki difisil anpil pou esplike nou, paske nou lou toujou nan konprann nou.¹² Depi tout tan sa a, se pou n' te fò deja tankou moun k'ap moutre nou yo. Men, okontrè, se bezwen nou bezwen toujou pou moun montre nou bagay ki pi fasil yo, premye konesans nan pawòl Bondye a. Se ti lèt nou bezwen bwè toujou, nou poko ka manje gwo manje.¹³ Se timoun ki nan

14
 bwè lèt, paske timoun pa gen kont esperyans pou konnen sa ki bon ak sa ki pa bon. Okontrè, se granmoun ki manje gwo manje, paske granmoun yo konn jije, yo konn fè diferans ant sa ki bon ak sa ki mal.

Chapter 6

1 ¶ Se sak fè, ann grandi toujou pou n' ka vin granmoun nan konfyans nou. Ann kite dèyè premye konesans yo te ban nou sou Kris la. Nou pa pral rekòmanse ankò ap poze premye baz travay la: nou pa pral di nou ankò jan nou dwe chanje lavi nou, jan nou dwe wete konfyans nou te gen nan zèv ki pa vo anyen yo pou n' mete l' nan Bondye. 2 Non, nou pa pral pale nou ankò sou batèm yo, sou sèvis pou mete men sou tèt moun ki kwè yo, sou keksyon lè moun mouri yo va leve, sou jijman ki p'ap janm kase a. 3 Ann pouse pi devan! Se sa nou pral fè koulye a, si Bondye penmèt nou sa. 4 Moun ki te resevwa limyè Bondye a yon fwa deja, yo te goute kado Bondye te ba yo a, yo te resevwa pòsyon pa yo nan Sentespri Bondye a. 5 Yo te goute pawòl Bondye a, yo te wè l' te gou. 6 Yo te santi nan lavi yo pouvwa k'ap travay nan tan k'ap vini an. Apre sa, si yo voye konfyans yo nan Bondye jete, pa gen mwayen pou yo tounen vin jwenn Bondye ankò. Paske, yo kloure Pitit Bondye a yon dezyèm fwa sou kwa a. 7 Yo fè l' wont devan tout moun ankò. Lè yon tè bwè dlo lapli ki tonbe anpil sou li, si li pouse plant ki ka sèvi moun k'ap travay li a, Bondye ap beni li. 8 Men, si li pouse pikan ak pengwen, li pa vo anyen. Bondye riske ba l' madichon. Lè sa a, yo ka boule li. 9 ¶ Nou mèt wè m' ap pale konsa, frè m' yo, mwen gen anpil konfyans nan nou toujou. Mwen konnen nou nan chemen ki pou delivre nou an. 10 Paske, Bondye pa mechan pou l' ta bliye travay nou fè, ni renmen nou moutre nou gen pou li, lè nou t'ap rann moun k'ap viv pou li yo anpil sèvis, sèvis n'ap rann yo jouk koulye a toujou. 11 Men, mwen ta renmen wè nou toujou kenbe konsa nan aktivite travay la jouk sa kaba, konsa sa n'ap tann lan ka rive vre. 12 Mwen pa ta vle nou lage kò nou nan fè parès. Okontrè, se pou nou swiv egzanp moun ki gen konfyans yo, moun ki rete tann ak pasyans. 13 Se poutèt sa yo te resevwa sa Bondye te pwomèt la. Lè Bondye te fè Abraram pwomès la, li te fè sèman li t'ap kenbe li. Li fè sèman an sou tèt li, paske pa gen pi gran pase li. 14 Li te di: Mwen pwomèt ou pou m' beni ou, pou m' ba ou anpil anpil pitit pitit. 15 Abraram te rete tann ak pasyans. 16 Se konsa li resevwa sa Bondye te pwomèt li a. Lè moun ap fè sèman, yo sèman sou sa ki pi gran pase yo. Yo pran sèman an pou yon garanti pou fini tout diskisyon yo ka

17
 gen yonn ak lòt. Men, Bondye te vle fè moun ki pou te resevwa sa l' te pwomèt la wè aklè li pa
 t'ap janm chanje pawòl. Se sak fè, li ajoute sèman an dèyè pwomès la. 18
 Konsa, vin gen de bagay
 la a ki pa ka chanje, de bagay Bondye pa ka bay manti sou yo. Nou menm menm ki jwenn yon
 pwoteksyon nan men l', sa ankouraje nou anpil pou nou kenbe byen fèm espwa Bondye ofri nou
 19
 an. Espwa sa a, se tankou yon lank batiman li ye pou nou. L'ap kenbe nanm nou fè m', byen
 20
 solid. Lank sa nou genyen an, li chouke jouk lòt bò rido tanp ki nan syèl la. Se la Jezi te antre
 an premye pou louvri chemen an pou nou, li menm ki te tounen yon granprèt pou tout tan, menm
 jan ak Mèlkisedèk.

Chapter 7

1
 ¶ Mèlkisedèk sa a, se te wa peyi Salèm, yon prèt ki t'ap sèvi Bondye ki anwo nan syèl la. Lè
 Abraram t'ap tounen lakay li, apre li te fin kraze kèk wa nan yon batay, Mèlkisedèk vin kontre l',
 2
 li ba l' benediksyon. Lè sa a, Abraram separe ba li yon dizyèm nan tou sa li te pran. Non Mèlkisedèk
 la gen de sans. Nan yon premye sans, li vle di Wa ki bay jistis la. Men, akòz li te wa peyi Salèm,
 3
 li gen yon dezyèm sans. Li vle di tou Wa ki bay kè poze a. Mèlkisedèk sa a, nou pa konn ni papa
 l', ni manman l', ni okenn nan zansèt li yo. Yo pa di ki bò l' te fèt, ni ki bò l' mouri. Li tankou Pitit
 4
 Bondye a, li rete prèt pou tout tan. Nou tou wè ki kalite grannèg nonm sa a te ye, pou granpapa
 5
 nou, Abraram, te ba li yon dizyèm nan tou sa l' te pran nan batay la. Dapre lalwa Moyiz, se nan
 ras Levi ase yo chwazi moun ki pou sèvi prèt. Prèt sa yo resevwa lòd pou yo mande pèp la yon
 dizyèm sou tout bagay, sa vle di, yo mande moun ki sitwayen menm peyi ak yo pou bay yon dizyèm
 6
 nan tou sa yo genyen. Men, yo tout se pitit pitit Abraram yo ye. Mèlkisedèk menm pa t' moun
 ras Levi. Men malgre sa, Abraram te ba li yon dizyèm nan tou sa li te pran. Sa ki pi rès ankò,
 7
 Mèlkisedèk bay moun ki te resevwa pwomès Bondye a benediksyon. Moun ki bay benediksyon
 8
 pi gran pase moun ki resevwa benediksyon. Sa se vre. Nan ka prèt ras Levi yo, ofrann yon dizyèm
 lan se pou moun ki gen pou mouri. Men, nan ka Mèlkisedèk la, ladim lan se pou yon moun ki vivan,
 9
 jan sa ekri nan Liv la. Gen plis ankò: nou ka di lè Abraram te bay ofrann dizyèm lan, Levi te peye
 10
 l' tou, li menm Levi ki gen pitit pitit li yo k'ap resevwa ofrann dizyèm lan koulye a. Paske, nan
 yon sans, Levi ki pa t' ankò fèt te nan ren granpapa l', Abraram, lè Mèlkisedèk te vin kontre l' la.
 11
 ¶ Se sou baz travay prèt ras Levi yo Bondye te bay pèp Izrayèl la lalwa Moyiz la. Si travay prèt
 ras Levi yo te yon travay ki te bon nèt, pa ta gen nesesite menm pou yon lòt prèt ki menm jan ak

Mèlkisedèk men ki pa menm jan ak Arawon ta vini.¹² Lè yo chanje travay prèt la, se pou yo chanje lalwa a tou.¹³ Men, nan tout pawòl sa yo, se sou Seyè a y'ap pale. Men li menm, li soti nan yon lòt branch fanmi, ki pa janm gen pesonn ladan l' ki te konn fè sèvis prèt yo devan lòtèl la.¹⁴ Sa se bagay tout moun konnen, Jezi te fèt nan branch fanmi Jida. Moyiz pa t' janm bay non sa a lè li t'ap pale sou prèt yo.¹⁵ Bon, men yon lòt pwèn k'ap eklèsi keksyon an plis toujou. Nou wè se yon lòt prèt ki tankou Mèlkisedèk ki vin la a.¹⁶ Yo pa t' fè l' prèt dapre regleman lèzòm: men, se akòz pouvwa lavi ki p'ap janm fini an kifè yo fè l' prèt.¹⁷ Men sa ki ekri nan Liv la: Ou prèt pou tout tan menm jan ak Mèlkisedèk.¹⁸ Konsa, yo mete ansyen regleman an sou kote, paske li fèb, li pa t' kapab sèvi anyen ankò.¹⁹ Lalwa Moyiz la pa t' kapab rann anyen bon nèt sou tout pwèn. Men, koulye a, yo ban nou yon pi bèl espwa, kifè nou ka pwoche bò kot Bondye.²⁰ Gen yon lòt bagay ankò: Se sèman Bondye te fè a. Bondye te fè lòt yo prèt san l' pa t' fè sèman.²¹ Men pou Jezi, Bondye te fè sèman lè li t'ap mete l' prèt, paske li te di: Bondye fè sèman. L'ap toujou kenbe pawòl li: Ou prèt pou tout tan.²² Konsa, avèk Jezi sa ban nou yon garanti, nou gen yon lòt kontra ak Bondye ki pi bon lontan pase premye a.²³ Gen yon lòt diferans ankò: Te gen anpil prèt nan lòt kategori a, paske se tout tan yo t'ap mouri. Yon sèl pa t' ka kenbe travay la nèt ale.²⁴ Men, Jezi li menm toujou vivan, li pa janm bezwen renmèt travay prèt la bay okenn lòt moun pou fè l' nan plas li.²⁵ Se poutèt sa, depi koulye a, epi pou tout tan, li ka delivre tout moun, l'ap fè yo pwoche bò kot Bondye paske li menm li toujou vivan, l'ap lapriyè Bondye pou yo.²⁶ Konsa, Jezi se granprèt nou te bezwen an. Li bon nèt, li pa janm fè okenn bagay ki mal, ni okenn peche. Yo mete l' apa, yo wete l' nan mitan moun k'ap fè peche yo. Bondye leve l', li mete l' pi wo pase syèl la.²⁷ Li pa tankou lòt granprèt yo. Li pa bezwen ap ofri chak jou yon bann bèt pou yo touye pou peche pa l' yo anvan, epi pou peche pèp la apre sa. Li pa nan sa li menm. Li fè yon sèl ofrann fini ak sa lè li te ofri tèt li a.²⁸ Dapre lalwa Moyiz la, se moun ki poko bon nèt yo te mete sèvi granprèt. Men, dapre pawòl sèman Bondye a, pawòl ki vin lontan apre lalwa a, moun Bondye mete granprèt la, se Pitit li a ki te vin bon nèt sou tout pwèn pou tout tan.

Chapter 8

¹ ¶ Men bagay ki pi enpòtan nan tou sa m'ap di la a: Nou gen yon kalite granprèt konsa ki chita sou bò dwat fòtèy Bondye ki wa nan syèl la. ² L'ap fè sèvis granprèt li nan kote ki apa pou Bondye a, sa vle di, nan kay tout bon an, kay Seyè a menm te bati. Se pa t' moun ki te bati l' pou li. ³ Travay yon granprèt, se ofri kado ak bèt pou touye bay Bondye. Nan kondisyon sa a, granprèt nou an dwe gen kichòy pou l' ofri tou. ⁴ Si Jezi te sou latè, menm senp prèt li pa ta ye, paske gen prèt deja ki la pou ofri kado yo, dapre jan lalwa Moyiz la vle l' la. ⁵ Nan sèvis prèt sa yo ap fè nan tanp ki sou latè a, se kopye y'ap kopye sou sa k'ap fèt nan syèl la. Sa y'ap fè a ou ta di se lonbraj sa k'ap fèt nan syèl la. Se konsa sa te ye pou Moyiz tou. Lè Moyiz tapral moute tant lan, Bondye di li: Gade byen pou ou ka fè tout bagay dapre modèl mwen te moutre ou sou mòn lan. ⁶ ¶ Men, koulye a, sèvis granprèt nou an gen pou l' fè a pi konsekan lontan pase sèvis prèt sa yo. Paske, kontra li te ranje ant Bondye ak lèzòm lan pi bon lontan, li gen pi bon pwomès ki garanti li. ⁷ Si premye kontra a pa t' gen defo, pa ta gen nesosite pou yo ta fè yon lòt kontra pou pran plas li. ⁸ Men, Bondye te gen repwòch pou l' fè pèp li a. Se sak fè Bondye di: Gade, pa rete lontan ankò anvan pou m' fè yon lòt kontra avèk pèp Izrayèl la, avèk branch fanmi Jida a. ⁹ Bondye di ankò: Se p'ap yon kontra tankou kontra mwen te fè avèk zansèt yo a, lè m' te pran men yo pou m' te fè yo soti kite peyi Lejip la. Yo pa t' fè tou sa yo te dwe fè dapre kontra mwen te fè ak yo a. Se poutèt sa, mwen pa t' okipe yo tou. ¹⁰ Bondye di ankò: Men kontra mwen pral fè ak pèp Izrayèl la, apre jou sa yo fin pase. M'a mete lwa m' yo nan lespri yo, m'a make lwa m' yo nan kè yo. M'a tounen Bondye tout bon pou yo, y'a tounen yon pèp ki apa pou mwen. ¹¹ Pesonn p'ap bezwen moutre yon lòt moun anyen nan peyi a. Pesonn p'ap bezwen di yon lòt nan peyi a: Manyè chache konn Bondye. Paske, yo tout y'a konnen m', depi sa ki tou piti a jouk sa ki pi gran an. ¹² M'a padonnen sa yo fè ki mal, mwen p'ap chonje peche yo ankò. ¹³ Lè Bondye di li pral fè yon lòt kontra, li fè premye kontra a pase mòd. Tou sa ki pase mòd, tou sa ki fin vye prèt pou disparèt.

Chapter 9

¹ ¶ Premye kontra a te gen regleman pa l' pou jan yo dwe fè sèvis pou Bondye nan tanp ki sou latè a. ² Premye bagay yo fè, yo moute yon gwo tant: se te kote yo te mete apa pou sèvis Bondye a. Se la yo te mete gwo lanp sèt branch lan, tab la ansanm ak pen yo ofri bay Bondye yo. ³ Dèyè

dezyèm rido a, te gen yon lòt ti tant pi piti. Se te kote yo te mete apa nèt pou Bondye menm lan.

4

Se la lotèl an lò a te ye ansanm ak Bwat kote yo te sere kontra a. Se sou lotèl la yo te konn boule lansan. Bwat la menm te kouvri nèt ak lò. Anndan l' yo te mete yon ti ja an lò tou ki te gen laman dezè a. Bò kote ti ja a, yo te mete baton Arawon an ki te fleri, ansanm ak de moso wòch plat kote

5

yo te ekri pawòl kontra a. Anwo bwat la, yo te mete estati de zanj yo te rele cheriben. Se te pou fè moun konnen Bondye la. Zèl zanj yo te louvri, yo te kouvri tout kote yo ofri bèt pou touye pou

6

peche yo. Men, nou pa gen tan koulye a pou n' pale an detay sou bagay sa yo. Lè tout bagay fin

7

nan plas yo konsa, prèt yo gen pou yo antre chak jou nan premye tant lan pou fè sèvis. Men, se granprèt la ase ki gen dwa antre nan dezyèm ti tant lan. Li fè l' yon sèl fwa chak lanne. Lè sa a, li pote san bèt yo te ofri bay Bondye a pou tèt pa l' ansanm ak pou peche pèp la fè san yo pa t' konnen.

8

¶ Avèk tout aranjman sa yo, Sentespri fè nou wè chemen ki pou mennen nou kote Bondye ye a

9

poko louvri toutotan premye tant la kanpe toujou. Sa se yon siy pou te fè nou konprann davans sa k'ap pase koulye a. Sa vle di: pou moun k'ap fè sèvis sa yo, nanpwen kado yo ka fè Bondye,

10

nanpwen ofrann bèt yo ka touye bay Bondye ki pou lave konsyans yo devan Bondye. Nan tout bagay sa yo, se yon keksyon de sa ki bon pou manje, de sa ki bon pou bwè, de tout kalite seremoni pou yo fè pou lave deyò kò moun. Prensip sa yo vo kichòy jouk lè Bondye vin chanje tout bagay.

11

Men, Kris la vini deja tankou granprèt k'ap bay benediksyon ki gen pou vini yo. Tant kote l'ap fè sèvis li a pi gwo, pi bon lontan. Se pa moun ki te bati li. Tant sa a pa fè pati bagay ki sou latè.

12

Kris la pase nan tant lan, li antre kote yo mete apa pou Bondye a, li ofri san an yon sèl fwa devan Bondye epi li fini. Lè sa a, se pa t' san bouk kabrit ni san ti towò bèf li te ofri. Se san pa l' menm li te ofri. Se sak fè li antre yon sèl fwa a devan Bondye, li tou peye pou l' te ka delivre nou pou tout

13

tan. Si yo ka pran san bouk kabrit ak san towò bèf ansanm ak san vyann ti gazèl bèf yo boule sou lotèl la pou voye sou moun ki mete tèt yo nan kondisyon yo pa ka sèvi Bondye dapre lalwa,

14

pou mete yo nan kondisyon pou yo fè sèvis Bondye, nou pa bezwen mande kisa san Kris la p'ap fè. Avèk pouvwa Sentespri ki la tout tan an, li menm li ofri tèt li bay Bondye tankou yon ofrann bèt ki bon nèt, san okenn defo. Se konsa, san l' ap lave konsyans nou, l'ap delivre nou anba esklavaj

15

lalwa k'ap touye nou an pou nou ka sèvi Bondye vivan an. ¶ Se poutèt sa, Kris la se yon avoka ki tabli yon nouvo kontra ant Bondye ak lèzòm. Konsa, moun Bondye rele yo, yo ka resevwa eritaj ki la pou tout tan an, jan Bondye te pwomèt la. Tou sa, paske Kris la mouri. Avèk mouri li mouri

16

a, li delivre tout moun anba chenn peche yo te fè sou premye kontra a. Lè gen yon kontra osinon

17

yon testaman, se pou yo bay prèv moun ki te fè l' la mouri byen mouri. Paske, yon testaman pa vo anyen toutotan moun ki fè l' la vivan toujou. Lè moun ki fè l' la mouri, se lè sa a testaman an

18

bon. Se poutèt sa, menm pou premye kontra a se apre yo te fin fè san bèt yo te ofri yo koule li

19 te bon. Premye bagay Moyiz te fè, li te li tout kòmandman yo bay pèp la, jan sa ye nan lalwa a. Apre sa, li pran san ti towò bèf yo ak san bouk kabrit yo, li mele l' ak dlo, li pran yon branch izòp ak yon moso lenn wouj, li wouze Liv lalwa a ansanm ak tout pèp la avèk melanj la. 20 Lè sa a, li di: Sa se san ki sèvi pou siyen kontra Bondye mande pou nou kenbe a. 21 Moyiz voye san an sou tout tant lan, sou tout bagay ki sèvi nan tant lan. 22 Dapre lalwa, san an mete prèske tout bagay nan kondisyon pou fè sèvis Bondye. Si san pa koule, nanpwen padon pou peche yo. 23 ¶ Tout bagay sa yo se kopye Moyiz te kopye yo sou bagay tout bon ki nan syèl la. Si se pou yo te mete tout bagay sa yo ki yon senp pòtre bagay tout bon yo nan kondisyon pou fè sèvis Bondye konsa, bagay ki nan syèl la menm mande yon pi gwo kalite ofrann bèt toujou. 24 Kris la pa t' antre nan yon kay moun te bati pou Bondye sou modèl kay Bondye a. Li antre nan syèl la menm, kote li kanpe koulye a devan Bondye pou nou. 25 Granprèt jwif yo antre chak lanne nan kote ki apa pou Bondye menm lan avèk san bèt yo touye bay Bondye. Men, Kris la menm pa antre plizyè fwa pou ofri tèt li. 26 Si se pa t' sa, li ta blije soufri plizyè fwa tou depi lè Bondye te kreye tout bagay. Men, koulye a, lè tout bagay prèt pou fini, li parèt yon sèl fwa, li bay tèt li tankou bèt yo ofri pou wete tout peche, epi li fini. 27 Tout moun gen pou mouri yon sèl fwa, apre sa, Bondye gen pou jijje yo. 28 Konsa tou, Kris la ofri tèt li pou li mouri yon sèl fwa pou wete peche anpil moun. Li gen pou l' tounen yon dezyèm fwa. Men, lè sa a, se p'ap pou wete peche nou, se va pou delivre tout moun k'ap tann li yo.

Chapter 10

1 ¶ Lalwa Moyiz la pa t' menm yon bon pòtre bagay ki la tout bon yo. Se yon senp lonbraj benediksyon ki gen pou vini yo li ye. Moun ki pwoche bò kote Bondye avèk menm kalite ofrann bèt y'ap plede ofri chak lanne san rete a, moun sa yo, lalwa pa ka fè yo vin bon nèt. 2 Si moun ki fè sèvis sa yo pou Bondye te lave tout bon anba peche yo, yo pa ta santi yo koupab okenn peche ankò. Yo ta sispann fè ofrann bèt pou touye. 3 Men, okontrè, chak lanne bèt yo touye yo fè moun yo chonje jan yo peche. 4 Tou sa, paske san bouk ak san jenn towò bèf p'ap janm ka wete peche moun. 5 Se poutèt sa, lè Kris la tapral vin sou latè, li di Bondye: Ou pa bezwen yo fè okenn ofrann bèt pou yo touye pou ou, ni pou yo fè ou kado anyen. Men, ou ban m' yon kò. 6 Se pa ofrann vyann bèt yo boule sou lotèl la k'ap fè ou plezi. Ni se pa ofrann bèt yo touye pou wete peche yo k'ap fè

⁷
 ou plezi. ¶ Lè sa a, mwen di: Men mwen, Bondye. Mwen vin pou fè volonte ou, jan sa ekri sou
⁸
 mwen nan liv lalwa a. Premye bagay li di se: Ou pa bezwen yo fè okenn ofrann bèt pou yo touye
 pou ou, ni pou yo fè ou kado anyen, ni ofrann vyann bèt yo boule sou lotèl la, ni ofrann bèt yo
 touye pou wete peche yo: bagay sa yo pa fè ou plezi. Men, tout ofrann bèt sa yo, se yo lalwa Moyiz
⁹
 la mande. Apre sa, li di: Men mwen, Bondye. Mwen vin pou fè volonte ou. Konsa, Bondye aboli
¹⁰
 tout ansyen ofrann bèt yo, li ranplase yo ak ofrann Kris la menm. Kifè nou netwaye anba peche
 nou yo, se paske Jezikri te fè tou sa Bondye te vle, li ofri kò pa li bay Bondye yon sèl fwa, epi l'
¹¹
 fini. Pou prèt jwif yo, se chak jou pou yo kanpe ap fè sèvis yo. Y'ap plede ofri menm sakrifis
¹²
 yo plizyè fwa. Men, sakrifis sa yo p'ap janm ka wete peche. Men, Kris la pou tèt pa l' fè yon sèl
 ofrann san pou tout peche yo, yon ofrann san ki bon pou tout tan. Apre sa, li chita sou bò dwat
¹³
 Bondye. Koulye a, se la l'ap tann Bondye mete tout lènmi l' yo tankou yon ti ban pou lonje pye
¹⁴
 li. Konsa, avèk sèl ofrann li fè a, li fè moun li netwaye anba peche yo bon nèt pou tout tan. Se
¹⁵
 sa Sentespri di nou tou. Paske, lè li fin di: Men kontra mwen pral fè ak yo apre jou sa yo. Se
¹⁶
 Bondye menm ki di sa. M'a mete lwa m' yo nan kè yo, m'a make lwa m' yo nan lespri yo. Apre
¹⁷
 sa, li di: Mwen p'ap janm chonje ni peche yo, ni sa yo fè ki mal. Konsa, lè Bondye fin padonnen
¹⁸
 peche yo, pa gen nesosite pou yo fè ofrann ankò pou wete peche. ¶ Konsa, frè m' yo, gremesi
¹⁹
 san Kris la ki koule lè li mouri pou nou an, nou gen antre lib kote yo mete apa pou Bondye a.
²⁰
 Kris la louvri yon chemen nèt pou nou, yon chemen k'ap ban nou lavi, yon chemen ki pase nan
²¹
 mitan vwal la, sa vle di: nan kò l' menm. Nou gen yon granprèt ki reskonsab tout kay Bondye
²²
 a. Ann pwoche bò kot Bondye ak tout kè nou, ak yon konfyans byen chita, san nou pa gen anyen
 nan kè nou ki pou boulvèse konsyans nou, kò nou menm byen netwaye nan yon dlo byen pwòp.
²³
 Ann kenbe espwa nou genyen an byen fèm. Paske, nou mèt sèten, Bondye ap kenbe pwomès li.
²⁴
 Se pou nou yonn veye sou lòt pou yonn ka ede lòt gen renmen nan kè nou, pou yonn ka ankouraje
²⁵
 lòt nan fè sa ki byen. Pa pran egzanp sou moun ki pran abitud pa vin nan reyinyon nou yo.
 Okontrè, se pou yonn ankouraje lòt fè sa, koulye a pi plis pase anvan, paske nou wè jou Seyè a ap
²⁶
 pwoche. Si, apre nou fin konn verite a, nou toujou ap fè sa nou konnen ki mal, pa gen ofrann
²⁷
 bèt ki ka wete peche sa yo. Nou mèt pè kont kò nou. Yon sèl bagay ki rete pou nou fè, se rete
²⁸
 tann jijman an ansanm ak gwo dife ki gen pou vin detwi tout lènmi Bondye yo. Lè yon moun

te dezobeyi lalwa Moyiz la, depi te gen de osinon twa moun ki vin depoze kont li, se touye pou yo
²⁹
te touye l' san pitye. ²⁹ Nou pa bezwen mande kisa ki va rive yon moun k'ap meprize Pitit Bondye
a, yon moun ki pran san Pitit Bondye a pou anyen, san ki sèvi pou siyen kontra Bondye a, san ki
mete nou nan kondisyon pou fè sèvis Bondye a, san ki mete nou apa pou Bondye a. Wi, nou pa
bezwen mande kisa ki va rive yon moun k'ap joure Lespri Bondye ki ban nou favè li a. Nou tou
³⁰
konnen li merite yon pi gwo chatiman. ³⁰ Nou menm, nou konnen moun ki te di: Se mwen menm
sèl ki gen dwa tire revanj, se mwen menm sèl ki va bay moun sa yo merite. Se li menm tou ki te
³¹
di: Bondye gen pou l' jije pèp li a. ³¹ Aaa! Se yon bagay terib wi, pou yon moun tonbe anba men
Bondye vivan an! ³²
³² Chonje sa ki te rive nou nan tan lontan. Lè sa a, nou te fèk fin resevwa limyè
Bondye a, nou te soufri anpil. Men, nou te kenbe fèm nan batay la. ³³
³³ Yon lè, se nou menm yo t'ap
joure, yo t'ap maltrete devan tout moun. Yon lòt lè, se nou menm, pou tèt pa nou, ki te al pran pou
³⁴
moun yo t'ap joure yo, pou moun yo t'ap maltrete yo. ³⁴ Nou te soufri ansanm ak tout moun ki te
nan prizon. Menm lè yo te sezi tout byen nou yo, nou te kontan asepte pèdi yo, paske nou te konnen
³⁵
nou gen yon richès ki pi bon, k'ap la pou tout tan. ³⁵ Pa pèdi lasirans nou te genyen an. Paske, gen
yon gwo rekonpans ladan li. ³⁶
³⁶ Men, nou bezwen pasyans pou nou ka fè sa Bondye vle, pou nou
ka resevwa sa l' te pwomèt la. ³⁷
³⁷ Paske, men sa ki ekri nan Liv la: Nan yon ti tan ankò, pa gen pou
lontan menm, Moun ki gen pou vini an ap vini. Li p'ap pran reta ankò. ³⁸
³⁸ Moun mwen fè gras la
ap viv, paske li gen konfyans nan mwen. Men, si l' vire do l' tounen fè bak, li p'ap fè kè m' kontan.
³⁹
³⁹ Nou menm, nou p'ap fè tankou moun sa yo k'ap twenn dèyè, k'ap pèdi tèt yo. N'ap fè tankou
moun ki gen fèm konfyans nan Bondye, moun k'ap delivre nanm yo.

Chapter 11

¹
¹ ¶ Lè yon moun di li gen konfyans nan Bondye, sa vle di li sèten li gen pou l' resevwa sa l'ap
tann lan. Li gen konviksyon bagay nou pa ka wè ak je nou egziste tout bon vre. ²
² Se paske granmoun
lontan yo te gen konfyans nan Bondye kifè Bondye te moutre li dakò ak yo. ³
³ Se paske nou gen
konfyans nan Bondye kifè nou ka konprann se Pawòl Bondye a ki kreye tout bagay. Li sèvi ak sa
⁴
nou pa ka wè pou li te fè tou sa nou ka wè. ⁴ ¶ Se paske Abèl te gen konfyans nan Bondye kifè li
te ofri bay Bondye yon ofrann bèt ki pi bon pase pa Kayen an. Paske li te gen konfyans, Bondye
asepte l' pou yon moun ki dwat. Se konsa Bondye te asepte kado li te fè l' la. Se paske li te gen

konfyans sa a kifè Abèl ap pale toujou jouk koulye a, atout li mouri. ⁵ Se paske Enòk te gen konfyans nan Bondye kifè li moute nan syèl la bò kot Bondye san li pa janm mouri; apre sa, pesonn pa janm wè kote l' ye ankò. Se Bondye menm ki te fè pran l' mennen l' bò kote li. Nou jwenn ekri nan Liv la ki jan Enòk te fè Bondye plezi lontan anvan Bondye te fè l' moute nan syèl la. ⁶ Nou konnen pesonn pa ka fè Bondye plezi si li pa gen konfyans nan Bondye. Moun ki vle pwoche bò kot Bondye, se pou yo kwè gen yon Bondye, yon Bondye k'ap rekonpanse tout moun k'ap chache li. ⁷ Se paske Noe te gen konfyans nan Bondye kifè Bondye te fè l' konnen davans bagay ki tapral rive, bagay li menm Noe pa t' ankò kapab wè. Li koute Bondye, li bati yon gwo batiman. Se ladan batiman sa a li te jwenn delivrans ansanm ak tout fanmi li. Se konsa, li kondannen tout lòt moun yo. Men, Bondye te fè Noe gras paske Noe te gen konfyans sa a nan li. ⁸ Se paske Abraram te gen konfyans nan Bondye kifè li te obeyi lè Bondye te rele l' la. Li pati pou peyi Bondye tapral ba li pou pòsyon eritaj pa li. Li leve, li kite peyi l' la, san l' pa t' konnen ki bò li taprale. ⁹ Paske li te gen konfyans nan Bondye, se anba tant twal li te rete. Li t'ap viv nan peyi Bondye te pwomèt li a tankou yon etranje ki depasaj. Se konsa Izarak ak Jakòb te fè tou, yo menm ki te resevwa menm pwomès la nan men Bondye. ¹⁰ Paske, Abraram menm t'ap tann lavil ki gen bon fonadasyon solid la. Se Bondye ki te fè plan lavil sa a, epi se li menm tou ki te bati li. ¹¹ Se paske Abraram te gen konfyans nan Bondye kifè Bondye te ka fè l' fè pitit, atout li te fin depase laj pou sa, atout Sara pou tèt pa l' tou pa t' kapab fè pitit ankò. Li te sèten Bondye t'ap kenbe pwomès li. ¹² Se konsa, yon sèl nonm ki te tou fin mouri rive gen kantite pitit pitit moun pa ka konte: yo tankou zetwal nan syèl la, yo tankou grenn sab bò lanmè. ¹³ Tout moun sa yo mouri ak konfyans pou Bondye nan kè yo. Yo pa t' gen tan resevwa benediksyon Bondye te pwomèt yo, men yo wè benediksyon yo byen, lwen, yo salwe yo delwen. Yo tout te deklare se etranje depasaj sou latè yo ye, tankou moun yo depòte. ¹⁴ Lè yo t'ap pale konsa, yo te tou fè moun wè yo t'ap chache yon peyi ki peyi pa yo. ¹⁵ Si yo te regrèt latè apre yo te fin kite l', yo ta ka gen chans tounen ladan l' ankò. ¹⁶ Okontrè, yo te dèyè yon lòt peyi ki pi bon, sa vle di: peyi ki nan syèl la. Se poutèt sa, Bondye pa wont di se Bondye yo li ye, paske l'ap pare yon lavil pou yo. ¹⁷ Se paske Abraram te gen konfyans nan Bondye kifè li te asepte touye Izarak tankou yon ofrann bèt bay Bondye, lè Bondye te vle wè jouk ki bò konfyans li t'ap rive a. Abraram te tou pare pou l' te ofri bay Bondye sèl pitit gason Bondye te pwomèt li a. ¹⁸ Bondye te di l' konsa: Se Izarak ki pral ba ou anpil pitit pitit. ¹⁹ Men, Abraram te mete nan tèt li Bondye te gen pouvwa pou l' te fè Izarak leve vivan ankò soti nan lanmò. Se konsa, nan yon sans, nou ka di Izarak soti vivan nan lanmò, li tounen vin jwen papa l' ankò. ²⁰ Se paske Izarak te gen konfyans

nan Bondye kifè, lè li t'ap beni Jakòb ak Ezaou, li te pwomèt yo anpil benediksyon pou pita. ²¹ Se paske Jakòb te gen konfyans nan Bondye kifè li te gen tan beni tout pitit Jozèf yo yonn apre lòt anvan l' mouri. Lèfini li apiye sou tèt baton li, li adore Bondye. ²² Se paske Jozèf te gen konfyans nan Bondye kifè, lè li tapral mouri, li te fè pitit Izrayèl yo konnen yon jou yo te gen pou yo te kite peyi Lejip la. Se lè sa a tou li ba yo lòd sa pou yo fè ak zosman l' yo. ²³ Se paske papa ak manman Moyiz te gen konfyans nan Bondye kifè yo te rive sere l' pandan twa mwa apre li te fin fèt. Yo te wè jan li te yon bèl ti pitit, yo pa t' pè dezobeyi lòd wa a te bay la. ²⁴ Se paske Moyiz te gen konfyans nan Bondye kifè, lè li vin gran, li te refize pote non pitit fi farawon an. ²⁵ Li te pito kite yo maltrete li ansanm ak pèp Bondye a, pase pou l' te asepte pran plezi l' nan peche pou yon ti tan. ²⁶ Tankou moun Bondye te chwazi pou voye a, li te konsidere li te pi rich lè yo t'ap pase l' nan betiz pase si l' te gen tout richès ki nan peyi Lejip la. Tou sa, paske je l' te fikse sou rekonpans Bondye t'ap pare pou li a. ²⁷ Se paske Moyiz te gen konfyans nan Bondye kifè li te kouri kite peyi Lejip, san l' pa t' pè kòlè wa a. Li pa t' chanje lide menm, tankou si l' te wè Bondye moun pa ka wè a. ²⁸ Se paske Moyiz te gen konfyans nan Bondye kifè li te fete fèt Delivrans lan, li bay lòd make pòt kay yo ak san an pou zanj Bondye a pa t' touye premye pitit gason pèp Izrayèl yo. ²⁹ Se paske pitit Izrayèl yo te gen konfyans nan Bondye kifè yo te kapab pase nan mitan lanmè Wouj la tankou si yo t'ap mache sou tè sèk. Men, lè moun peyi Lejip yo vin seye fè menm bagay tou, lanmè a kouvri yo. ³⁰ Se paske pitit Izrayèl yo te gen konfyans nan Bondye kifè miray lavil Jeriko a te tonbe, apre pèp la te fin pase sèt jou ap fè wonn lavil la. ³¹ Se paske Rarab, fanm movèz vi a, te gen konfyans nan Bondye kifè li pa t' mouri ansanm avèk moun ki te desobeyi Bondye yo. Paske, li menm li te byen resevwa espyon pèp Izrayèl yo lakay li. ³² ¶ Kisa m' ta di nou ankò? Se tan mwen pa genyen pou m' ta pale nou sou Gedeyon, Barak, Samson, Jefte, David, Samyèl ak tout pwofèt yo. ³³ Ak konfyans yo te gen nan Bondye a, yo goumen, yo pran peyi lòt moun nan men yo, yo gouvènènan san patipri, yo resevwa sekou Bondye te pwomèt la. Yo fèmen bouch lyon yo, ³⁴ yo touye gwo gwo dife, yo chape anba men moun ki te vle touye yo ak nepe. Yo te fèb, men yo vin gen fòs, sa te rann yo vanyan anpil nan lagè, kifè yo te ka kraze lame etranje yo. ³⁵ Ak konfyans yo te gen nan Bondye a, anpil fanm wè moun pa yo ki te mouri tounen leve vivan ankò. Gen ladan yo yo matirize jouk yo mouri. Yo refize asepte okenn moun vin delivre yo, pou yo te ka leve soti nan lanmò, antre nan yon lavi ki pi bon. ³⁶ Gen lòt ladan yo moun pase anba betiz, yo bat yo byen bat. Gen lòt ankò yo mare yo ak chenn, yo jete yo nan prizon. ³⁷ Yo touye yo anba kout wòch, yo siye yo fè de moso, yo touye yo ak nepe. Se kouri yo t'ap kouri soti yon kote al nan yon lòt tèlman moun t'ap pèsèkite

yo, tèlman yo t'ap maltrete yo. Se po mouton ak po kabrit yo pran sèvi rad tèlman yo te pòv.
38

Moun konsa, latè pa t' bon ase pou yo. Yo t'ap kouri moute kouri desann nan dezè yo, nan mòn
39
yo. Yo t'ap viv nan twou wòch ak nan twou tè. Tout moun sa yo, Bondye te dakò ak yo paske
40
yo te gen konfyans nan li. Men, atousa, yo pa t' resevwa sa Bondye te pwomèt la. Bondye te
sere yon pi bon bagay ankò pou nou. Li pa t' vle pou moun sa yo te rive bon nèt kite nou deyè. Sèl
jan pou moun sa yo te ka rive bon nèt, se ansanm ak nou.

Chapter 12

1
¶ Konsa, nou la nan mitan foul moun sa yo ki te moutre jan yo te gen konfyans nan Bondye.
Ann voye tout bagay k'ap antrave kous nou jete byen lwen, ansanm ak peche a ki fasil pou vlope
nou. Ann kouri avèk pasyans nan chemen Bondye mete devan nou an. Ann kenbe je nou kole
sou Jezi. Se nan li konfyans nou soti, se li menm tou k'ap kenbe nou nan konfyans sa a jouk sa
kaba. Li kite yo fè l' souffri sou kwa a. Li pa pran wont sa a pou anyen, paske li te toujou chonje
apre l' te fin souffri a, Bondye t'ap fè kè l' kontan. Kifè koulye a li chita sou bò dwat fotèy Bondye
a. Egzaminen ka li byen. Gade tou sa li sibi nan men bann pechè sa yo ki pa t' vle wè l' menm.
Konsa tou, pa kouri pou batay la. Pa dekouraje. ¶ Paske nan batay n'ap mennen kont peche a, nou
poko goumen jan nou ta dwe jouk pou nou ta mouri. Eske nou gen tan bliye pawòl Bondye te di
pou ankouraje nou tankou pitit li? Pitit mwen, lè Bondye ap peni ou, pa pran sa an jwèt. Lè l'ap fè
ou repwòch, pa dekouraje. Paske Bondye peni moun li renmen. Se moun li rekonèt pou pitit li li
bat. Enben, sipòte souffrans sa yo tankou si se papa nou k'ap peni nou. Paske souffrans sa yo se
prèv Bondye konsidere nou pou pitit li. Nou janm tande yon papa ki pa janm peni pitit li? Si
Bondye pa peni nou tankou tout papa peni pitit yo, sa vle di nou pa pitit lejitim Bondye tout bon,
nou se pitit deyò. Chonje sa papa nou sou latè a konn fè. Yo peni nou. Malgre sa, nou toujou
respekte yo. Nou pa bezwen mande jan nou dwe soumèt devan Papa nou ki nan syèl la, si nou
bezwen viv. Papa nou sou latè a te konn peni nou pou yon ti tan, dapre sa yo te kwè ki te bon.
Men, Bondye peni nou pou byen pa nou menm, pou nou ka rive viv menm jan l'ap viv la. Lè
y'ap peni nou, sa yon ti jan vle fè nou plis lapenn pase pou l' ta fè nou kontan. Men pita, moun ki
soti byen elve apre tout penisyon sa yo, yo pral mennen yon lavi byen dwat ak kè poze. Se poutèt
sa, souke kò nou. Pa kite fatig antre sou nou. Mache kote ki plat pou pye k'ap bwete a pa foule

¹⁴ pi plis, okontrè pou l' ka geri. Chache viv ak kè poze ak tout moun. Mennen yon lavi apa pou
 Bondye. Si se pa sa, pa gen moun k'ap wè Seyè a. ¹⁵ Pa kite pesonn vire do bay favè Bondye a.
¹⁶ Pa kite pesonn tounen tankou yon plant anmè k'ap pouse rasin k'ap anpwazonnen lòt yo. Pa kite
 pesonn tonbe nan move vis, ni pèdi respè yo dwe genyen pou bagay ki fèt pou respekte, tankou
¹⁷ Ezaou ki te vann dwa li kòm premye pitit pou yon plat manje. Nou konnen ki jan pita, lè li te
 vle resevwa benediksyon papa li, yo te mete l' sou kote. Malgre tout kriye li te kriye bay papa a,
¹⁸ pa t' gen mwayen chanje sa ki te fin fèt la. ¶ Nou pa t' pwoche bò kot yon bagay nou ka manyen
 tankou pèp Izrayèl la ki te pwoche bò kot Mòn Sinayi a. Sou mòn sa a te gen yon gwo dife ansanm
 ak yon fènwa ki pa t' piti, te gen yon bann bagay tou pou fè moun pè. Yon gwo van tanpèt t'ap
¹⁹ soufle sou mòn lan. Yo te tandè son klewon k'ap kònen, ansanm ak vwa yon moun k'ap pale.
²⁰ Lè pitit Izrayèl yo tandè vwa sa a, yo mande l' sispann pale. Yo pa t' kapab sipòte lòd li te ba yo
²¹ lè li te di: Menm si se yon bèt ki mete pye l' sou mòn sa a, se pou yo touye l' ak kout wòch. Moyiz
 menm, sa l' te wè devan je l' yo se te bagay terib. Se poutèt sa li te di: M'ap tranble kou fèy bwa
²² tèlman mwen pè. Okontrè, nou pwoche bò kot Mòn Siyon an, bò kot lavil Bondye vivan an, ki
²³ vle di: Jerizalèm ki nan syèl la ansanm ak tout kantite zanj li yo. Nou pwoche kote tout premye
 pitit Bondye yo sanble ak kè kontan, yo menm ki gen non yo ekri nan Liv ki nan syèl la. Nou
 pwoche bò kot Bondye ki gen pou jije tout moun lan, kote lespri moun ki fin bon nèt yo ye a.
²⁴ Nou pwoche bò kot Jezikri, moun ki ranje nouvo kontra a, bò kote san ki koule a, yon san ki
²⁵ pale nou pi byen pase san Abèl la. Veye kò nou! Pa refize koute pawòl moun k'ap pale ak nou
 an. Moun ki te refize koute pawòl moun ki t'ap ba yo avètisman Bondye sou latè a, yo pa t' chape
 anba chatiman an. Nou pa bezwen mande si nou menm nou ka delivre si nou vire do bay moun
²⁶ k'ap pale ak nou antan l' nan syèl la. Nan tan lontan, lè Bondye te pale, tè a te tranble. Men,
 koulye a, li fè nou pwomès sa a: Yon lòt fwa, se pa latè a ase m'ap fè tranble. M'ap fè syèl la tranble
²⁷ tou. Lè li di yon lòt fwa li fè nou konprann lè sa a se tout bagay Bondye te krewe yo ki pral pran
²⁸ tranble. Yo pral disparèt. Konsa se bagay ki byen fèm yo k'ap rete. Peyi wa nou resevwa pou
 eritaj la pa ka brannen. Se pou nou di mès pou sa. Ann fè wè nou pa bliye sa li fè pou nou. Ann
²⁹ sèvi Bondye yon jan ki pou fè l' plezi, avèk respè, avèk krentif. Paske Bondye nou an se tankou
 yon dife k'ap detwi tout bagay.

Chapter 13

¹ ¶ Se pou nou toujou yonn renmen lòt tankou frè k'ap viv ansanm nan Kris la. ² Chonje se devwa nou pou nou byen resevwa moun ki vin lakay nou. Se konsa, gen moun ki resevwa zanj Bondye lakay yo san yo pa konn sa. ³ Pa bliye moun ki nan prizon yo, tankou si nou menm tou nou te nan prizon ansanm ak yo. Pa bliye moun y'ap maltrete yo, paske nou menm tou nou gen yon kò. ⁴ Maryaj se yon bagay tout moun dwe respekte anpil. Moun ki marye yo dwe rete fidèl yonn ak lòt. Bondye gen pou jije moun k'ap mennen movèz vi yo ansanm ak moun k'ap fè adiltè yo. ⁵ Pa kite renmen lajan pran nanm nou. Se pou nou kontan ak sa nou genyen. Paske Bondye te di: Mwen p'ap janm vire do ba ou, mwen p'ap janm lage ou. ⁶ Konsa, nou kapab di avèk konfyans: Se Bondye k'ap vin ede mwen. Mwen pa pè anyen. Kisa moun ka fè mwen? ⁷ Pa bliye moun ki te konn dirije nou yo, moun ki te fè nou konnen pawòl Bondye a. Egzaminen jan yo te viv, jan yo te mouri. Pran egzanp sou konfyans yo. ⁸ Jezikri se menm moun lan ayè, jòdi a ak pou tout tan. ⁹ Pa kite tout kalite lòt pawòl moun ap moutre yo fè nou pèdi bon chemen an. Li pi bon pou kè nou lè fòs nou pa soti nan sa nou manje ak sa nou pa manje, men nan renmen Bondye gen pou nou an. Paske moun k'ap gade sou manje pa janm jwenn okenn benefis. ¹⁰ Nou gen yon lotèl ki pa nou. Prèt k'ap sèvi nan tanp jwif yo pa gen dwa manje nan vyann ofrann bèt nou fè sou lotèl sa a. ¹¹ Lè y'ap fè ofrann bèt pou touye pou peche yo, se san an ase granprèt jwif la pote pou ofri nan kote ki apa pou Bondye a. Men, yo boule kò bèt yo lòt bò pòtay lakou kote moun yo rete a. ¹² Se poutèt sa, Jezi te mouri lòt bò pòtay lavil la, pou l' te ka mete pèp la nan kondisyon pou yo fè sèvis Bondye ak pwòp san pa li ki te koule. ¹³ Nou menm tou, ann soti al jwenn li lòt bò pòtay lakou a pou n' soufri menm wont la ansanm ak li. ¹⁴ Paske nou pa gen sou latè yon lavil ki la pou tout tan. N'ap chache lavil ki gen pou vini an. ¹⁵ Gremesi Jezikri, sèl ofrann san n'ap ofri bay Bondye a, se lwanj n'ap ba li tout tan. Se tout tan pou non l' nan bouch nou. ¹⁶ Pa bliye, se pou nou fè sa ki byen, se pou nou yonn ede lòt. Se ofrann konsa ki fè Bondye plezi. ¹⁷ Obeyi chèf nou yo, soumèt devan yo. Se tout tan y'ap veye sou nanm nou paske yo gen pou yo rann Bondye kont pou travay yo. Si nou obeyi yo, y'a fè travay yo ak kè kontan. Men, si nou pa obeyi yo, y'a fè l' ak kè sere. Lè sa a, p'ap gen okenn avantaj pou nou. ¹⁸ ¶ Pa sispann lapriyè pou mwen. Mwen sèten mwen gen konsyans mwen anpè. Paske mwen vle fè sa ki byen nan tout sikonstans. ¹⁹ M'ap mande nou pou nou lapriyè toutespre pou Bondye ban m' okazyon tounen vin jwenn nou anvan lontan. ²⁰ Men sa m'ap mande Bondye pou nou, li menm ki te fè Jezi, Gran Gadò mouton yo, leve soti vivan pami mò yo. Jezi se Seyè nou an ki te mouri pou l' te ka siyen kontra ki la pou tout tan an ak san li. ²¹ M'ap mande

Bondye ki bay kè poze a pou l' fè nou favè sa a, pou nou fè tou sa ki byen, pou n' kapab fè volonte li. M'ap mande l' tou pou l' fè travay ki fè l' plezi nan nou, gremesi Jezikri. Tout lwanj lan pou Jezikri pou tout tan tout tan. Amèn. ²² Tanpri, frè m' yo, m'ap mande nou pou nou koute pawòl ankourajman sa yo ak pasyans, paske sa m' di nan lèt mwen ekri nou an pa long. ²³ Mwen vle fè nou konnen yo gen tan lage Timote, frè nou an. Si li rive bònè, m'a pran l' avè m' lè m'ap vin wè nou. ²⁴ Di tout moun k'ap dirije nou yo bonjou ansanm ak tout pèp Bondye a. Tout frè ki nan peyi Itali yo voye bonjou pou nou tout. ²⁵ benediksyon Bondye avèk nou tout. Amèn.

James

Chapter 1

¹ ¶ Mwen menm Jak, sèvitè Bondye ak Jezikri Seyè nou an, m'ap ekri lèt sa a pou douz branch fanmi yo ki gaye toupatou sou latè. Bonjou pou nou tout. ² ¶ Frè m' yo, se pou nou santi nou kontan anpil lè nou wè nou tonbe anba nenpòt kalite eprè. ³ Paske, nou konnen byen, lè konfyans nou gen nan Bondye a tonbe anba eprè, sa ban nou pasyans. ⁴ Men, fòk pasyans sa a fin fè travay li nèt pou nou kapab bon nèt sou tout pwen, byen devlope, san nou pa manke anyen. ⁵ Si yon moun pami nou manke bon konprann, se pou l' mande Bondye, Bondye va ba li li. Paske, Bondye bay tout moun san mezire, pou gremesi. ⁶ Men, se pou li mande ak konfyans, san l' pa gen doutans. Paske, moun ki gen doutans, li tankou lanm lanmè van ap boulvèse. ⁷ Yon moun konsa pa bezwen mete nan tèt li l'ap resevwa anyen nan men Seyè a. ⁸ Se yon moun ki pa konnen sa li vle, ki toujou ap chanje lide nan tou sa l'ap fè. ⁹ Yon frè ki pòv dwe moutre jan li kontan lè Bondye fè kichòy pou li. ¹⁰ Konsa tou, yon frè ki rich dwe moutre jan l' kontan tou lè Bondye rabese li. Paske, moun ki rich gen pou pase tankou flè zèb. ¹¹ Solèy la leve ak tout chalè li. Li cheche zèb la. Flè a tonbe. Tout bèlte l' disparèt. Konsa tou, moun rich la gen pou l' disparèt pandan tout kòmès li ap mache. ¹² benediksyon pou moun ki sipòte eprè li ak pasyans. Lè la fin pase anba eprè yo, la resevwa pou rekonpans lavi Bondye te pwomèt tout moun ki renmen li yo. ¹³ ¶ Lè eprè tonbe sou yon moun, lè l' anba tantasyon, moun sa a pa dwe di se Bondye k'ap tante li. Paske, menm jan Bondye

pa janm anba tantasyon pou fè sa ki mal, konsa tou Bondye pa ka tante pesonn pou fè l' fè sa ki mal.¹⁴ Men, lè yon moun anba tantasyon, se pwòp move dezi moun lan k'ap rale l', k'ap pouse li.¹⁵ Konsa, move dezi a travay nan kè li, li fè l' fè peche. Lè peche a fin fèt, li bay lanmò.¹⁶ Frè mwen renmen anpil yo, pa twonpe tèt nou sou bagay sa a.¹⁷ Tout pi bèl favè, tout pi bon kado nou resevwa, se anwo nan syèl la yo soti, nan men Bondye ki kreye tout limyè. Bondye pa janm chanje, ni li pa gen anyen ki ta ka sanble yon chanjman nan li.¹⁸ Gremesi pawòl verite a, li ban nou lavi jan l' te vle l' la, pou nou kapab gen premye plas nan tou sa li kreye.¹⁹ ¶ Frè mwen renmen anpil yo, men yon bagay pou nou toujou chonje. Se pou tout moun prese louvri zòrèy yo pou yo ka tandè. Men, pa kouri pale, pa prese fè kòlè.²⁰ Paske, kòlè lèzòm pa ka fè volonte Bondye.²¹ Se poutèt sa, derasinen tout vye abitud ki pa dakò ak volonte Bondye ansanm ak tout kras mechanste ki nan lavi nou, voye yo jete. Soumèt nou devan Bondye, asepte pawòl li te plante nan kè nou an, paske se pawòl sa a ki ka sove nanm nou.²² Se pou nou fè tou sa pawòl la mande nou fè. Pa rete ap koute ase. Lè sa a, se pwòp tèt nou n'ap twonpe.²³ Paske, lè yon moun tandè pawòl la ase, san li pa fè sa pawòl la mande l' fè, li tankou yon moun ki gade figi l' nan yon glas.²⁴ Men, kou l' vire do l' ale, lamenm li bliye kisa li sanble.²⁵ Men, moun ki fikse je l' sou lalwa ki bon nèt la, lalwa ki bay libète a, si l' soti pou l' fè sa lalwa a mande, si li pa yon moun ki kite pawòl la antre nan yon zòrèy soti nan yon lòt, men ki fè sa lalwa a mande, moun sa a va jwenn benediksyon nan sa l'ap fè a.²⁶ Si yon moun kwè l'ap sèvi Bondye, pou anmenmtan li pa bride lang li, se tèt li l'ap twonpe.²⁷ Sèvi Bondye jan sa a pa vo anyen. Men jan pou nou sèvi Bondye Papa a, si nou vle sèvi l' yon jan ki dakò ak volonte Bondye, yon jan ki bon tout bon devan li: SE pòte sekou bay timoun ki san papa. Se bay vèv yo lasistans lè yo nan lafliksyon. Se pa mele nan move bagay k'ap fèt sou latè pou nou pa pèdi kondisyon nou.

Chapter 2

¹ ¶ Frè m' yo, nou menm ki gen konfyans nan Jezikri, Seyè nou an ki gen tout pouvwa pou li, nou pa dwe gade sou figi moun.² Sipoze de moun vin antre nan asanble nou, yonn gen yon bèl rechanj sou li ak yon bag an lò nan dwèt li, lòt la tou pòv ak yon rad chire sou li.³ Si nou leve pou n' salwe nonm ki gen bèl rechanj lan, epi nou di li: Msye, chita la nan bon plas sa a, epi si nou di pòv la: Ou menm, kanpe bò la a, osinon, chita atè bò pye m' lan,⁴ èske nou pa mete yon diferans

nan mitan nou? Eske sa pa moutre nou gen move lide nan tèt nou lè n'ap jije moun? ⁵ Frè mwen
 renmen anpil yo, tande sa byen: Bondye chwazi moun ki pòv sou latè pou yo ka rich nan konfyans
 nan Bondye, pou yo ka jwenn pòsyon pa yo nan peyi li te pwomèt moun ki renmen l' yo. ⁶ Men,
 nou menm, se meprize n'ap meprize moun pòv yo! Eske se pa moun rich yo k'ap kraze nou, k'ap
 trennen nou nan tribinal? ⁷ Se yo menm tou k'ap pale bèl non Bondye ban nou an mal. ⁸ ¶ Jan sa
 ekri nan Liv la, lalwa gran Wa a di: Se pou ou renmen frè parèy ou tankou ou renmen pwòp tèt pa
 ou. Si nou fè sa, nou fè byen. ⁹ Men, si n'ap gade sou figi moun, nou fè peche. Lalwa ap kondannan
 nou pou dezobeyisans. ¹⁰ Paske, moun ki obsève tout lalwa a men ki dezobeyi yon sèl nan
 kòmandman yo, se tankou si l' te dezobeyi tout kòmandman yo. ¹¹ Paske Bondye ki di: Pa fè adiltè,
 se li menm tou ki di: Pa touye moun. Konsa, menm si ou pa fè adiltè, men ou touye moun, ou
 dezobeyi lalwa a. ¹² Se pou nou pale, se pou nou aji tankou moun ki gen pou pase anba jijman
 dapre lalwa ki ban nou libète a. ¹³ Paske, lè Bondye ap jije, l'ap san pitye pou moun ki te san pitye.
 Men, moun ki gen pitye pou lòt va soti tèt dwat lè jou jijman an. ¹⁴ ¶ Frè m' yo, kisa sa fè pou yon
 moun k'ap di li gen konfyans nan Bondye, si li pa fè bagay pou moutre li gen konfyans lan vre?
 Eske konfyans sa a ka delivre li? ¹⁵ Sipoze gen yon frè osinon yon sè ki toutouni, ki pa manje kont
 li chak jou, ¹⁶ si yonn nan nou di yo: Ou mèt ale. Chofè kò ou, manje plen vant ou, san li pa ba yo
 sa yo bezwen, kisa sa ap fè pou yo? ¹⁷ Konsa tou pou konfyans nan Bondye a: si l' pa fè nou fè sa
 ki byen, si l' rete pou kont li, li mouri. ¹⁸ Men, gen moun ki va di: Ou menm, ou gen konfyans.
 Mwen menm, mwen fè sa ki byen. M'a reponn li: Moutre m' ki jan ou ka gen konfyans san ou pa
 fè sa ki byen, mwen menm m'ap moutre ou jan mwen gen konfyans ak sa m'ap fè ki byen. ¹⁹ Ou
 kwè gen yon sèl Bondye. Ou fè byen. Denmon yo tou yo kwè sa, men y'ap tranble sitèlman yo pè.
²⁰ Gade jan ou manke konprann! Eske ou vle wè ki jan konfyans pa vo anyen si l' pa mache ak sa
 ou fè ki byen? ²¹ Abraram granpapa nou, èske Bondye pa t' fè l' gras poutèt sa li te fè lè l' te ofri
 Izarak, pitit li a, sou lotèl la? ²² Ou wè. Konfyans li te mache ansanm ak sa li te fè. Konsa tou, sa
 l' te fè a te fè konfyans li vin bon nèt. ²³ Se konsa, pawòl ki te ekri nan Liv la rive vre: Abraram
 te mete konfyans li nan Bondye, epi Bondye fè l' gras. Se sak fè yo te rele Abraram zanmi Bondye.
²⁴ Ou wè: se pa sèlman paske yon moun gen konfyans kifè Bondye fè l' gras, men se paske li fè sa
 ki byen anmenmtan an tou. ²⁵ Se menm jan an tou pou Rarab, fanm movèz vi a. Eske se pa t' poutèt
 sa l' te fè a Bondye te fè l' gras, lè l' te resevwa mesajè jwif yo, lè l' te fè yo pran yon lòt wout pou

tounen lakay yo? ²⁶ Menm jan yon kò ki san nanm se yon kò ki mouri, konsa tou, konfyans nan Bondye ki pa mache ak fè sa ki byen se yon konfyans ki mouri.

Chapter 3

¹ ¶ Frè m' yo, se pa pou anpil moun nan mitan nou kouri dèyè plas dirèktè. Paske, konnen byen: lè nou dirèktè, Bondye ap jije nou pi sevè pase lòt yo. ² Nou tout nou bite nan plizyè sans. Yon moun ki pa janm bite nan pawòl li, se yon moun ki bon nèt; moun sa a kapab kontwole tout kò l' byen tou. ³ Nou mete yon mò nan bouch chwal pou fè yo obeyi nou. Avèk sa, nou fè y ale kote nou vle. ⁴ Se menm jan an tou ak bato. Gwo kou l' gwo, gwo van te mèt ap pouse l', se yon ti gouvènay ki dirije li. Ak gouvènay tou piti sa a, kaptenn lan mennen l'l kote l' vle. ⁵ Konsa tou ak lang moun. Piti kou li piti, li vante tèt li pou gwo bagay li ka fè. Gade ki jan yon ti flanm dife ka boule yon gwo rakbwa! ⁶ Enben, lang se tankou dife. Se la tout lenjistis rete. Paske se yon manm nan kò nou li ye, l'ap kontaminen tout kò a nèt. Se lanfè menm ki mete dife nan li. Apre sa, li menm pou tèt pa l', li mete dife nan tout lavi nou. ⁷ Moun ka donte tout kalite bèt, zwezo, bèt ki trennen sou vant, bèt ki nan lanmè. Li menm rive donte yo deja. ⁸ Men, pou lang lan menm, pesonn poko ka donte li. Se yon move bagay ou pa ka kontwole, li plen pwazon ki ka touye moun. ⁹ Avèk lang nou, nou fè lwanj Bondye papa nou. Avèk menm lang lan, nou bay moun madichon, moun Bondye te kreye pòtre ak li. ¹⁰ Menm bouch la bay benediksyon, li bay madichon tou. Frè m' yo, sa pa dwe fèt konsa. ¹¹ Yon sous dlo pa ka bay dlo dous ak dlo sale anmenmtan. ¹² Frè m' yo, yon pye fig Frans pa ka donner grenn oliv. Ni yon pye rezen pa ka donner fig Frans. Dlo sale pa ka bay dlo dous non plis. ¹³ ¶ Si gen nan mitan nou yon moun ki gen bon konprann, ki gen lespri, se pou l' moutre sa ak bon kondit li. Se pou l' fè sa ki byen san lògèy, men avèk bon konprann. ¹⁴ Men, si n'ap fè jalouzi nan kè nou, si nou kenbe moun nan kè nou, si n'ap kouri dèyè enterè pa nou, pa vante tèt nou, pa fè manti sou laverite a. ¹⁵ Bon konprann konsa pa soti nan Bondye, li soti nan lemonn, nan moun ak nan dyab la. ¹⁶ Paske, kote ki gen jalouzi, kote moun ap kouri dèyè enterè pa yo, fòk gen dezòd ak tout kalite mechanste. ¹⁷ Pou konmanse, moun ki gen bon konprann ki soti nan Bondye a ap fè volonte Bondye, l'ap viv byen ak tout moun, l'ap respekte tout moun, l'ap tande

rezon, l'ap gen kè sansib, l'ap fè anpil anpil byen, li pa nan de fas ni nan ipokrit. ¹⁸ Moun k'ap chache pou lèzòm viv byen yonn ak lòt, y'ap travay ak kè poze pou yo ka rekòlte yon lavi ki dwat devan Bondye.

Chapter 4

¹ ¶ Ki jan fè gen goumen ak kont nan mitan nou konsa? Kote sa soti? Sa soti nan move lanvi k'ap goumen nan kò nou. ² Nou anvi yon bann bagay. Men, nou pa ka jwenn yo. Lè konsa, nou pare pou nou touye moun. Nou anvi sa ki pa pou nou. Men, nou pa ka jwenn yo. Lè konsa, se fè kont, se goumen. Si nou pa jwenn sa nou bezwen an, se paske nou pa mande Bondye. ³ Menm lè nou mande, nou pa resevwa anyen, paske nou mande mal. Nou mande bagay ki pou satisfè pwòp dezi pa nou sèlman. ⁴ Ala moun pa gen konfyans nan Bondye! Eske nou pa konnen lè nou zanmi lemond, se lènmi Bondye nou ye! Moun ki vle zanmi lemond, li vin lènmi Bondye. ⁵ Pa konprann se pou anyen yo ekri pawòl sa a nan Liv la: Bondye sitèlman renmen lespri li mete nan nou an, li fè jalouzi pou li. ⁶ Men, li fè nou yon pi gwo favè ankò, jan sa ekri nan Liv la: Bondye pran pozisyon kont moun ki gen lògèy yo. Men, moun ki soumèt devan l', li ba yo favè li. ⁷ Se poutèt sa, desann nou devan Bondye. Men, pran pozisyon kont Satan, la kouri kite nou. ⁸ Pwoche bò kot Bondye, Bondye va pwoche bò kote nou tou. Nou menm k'ap fè peche, lave men nou. Netwaye kè nou, nou menm k'ap woule de bò. ⁹ Se pou nou gen lapenn nan kè nou, kriye, plenn sò nou. Pase pou nou ri, pito nou kriye. Pase pou nou kontan, pito nou nan lapenn. ¹⁰ Desann nou devan Bondye, Bondye va leve nou. ¹¹ ¶ Frè m' yo, piga nou yonn pale lòt mal. Moun ki pale yon frè mal, osinon ki jije frè li, se lalwa li pale mal, se lalwa li jije. Si w'ap jije lalwa, ou pa yon moun k'ap obsève lalwa, men ou pran pòz jij ou sou li. ¹² Se Bondye ki fè lalwa. Se li menm tou ki sèl jij. Li gen pouvwa sove moun, li gen pouvwa kite yo pèdi. Men, ou menm k'ap jije frè parèy ou, ki moun ou konprann ou ye? ¹³ Koulye a, se ak nou m'ap pale, nou menm k'ap di: jòdi a osinon denmen, n'a pral nan tèl lavil. Rive la, n'a pase yon lanne, n'a fè kòmès ak anpil benefis. ¹⁴ Nou pa menm konnen sa lavi nou va ye denmen. Lavi nou tankou yon nwaj. Li parèt pou yon ti tan. Apre sa, li disparèt. ¹⁵ Okontrè, men sa pou nou te di: Si Bondye vle, n'a wè denmen, n'a fè sa osinon sa. ¹⁶ Men, koulye

a nan grandizè nou, se vante n'ap vante tèt nou. Se yon move bagay pou moun vante tèt yo konsa.

17

Se poutèt sa, moun ki pa fè byen li konnen li gen pou l' fè a, li fè peche.

Chapter 5

1 ¶ Koulye a, nou menm moun rich yo, se pou nou m'ap pale: Nou mèt konmanse kriye, konmanse
 pouse rèl pou malè ki pral tonbe sou nou yo. 2 Richès nou yo fin pouri. Vèmin fin manje rad nou
 yo. 3 Lò nou ak lajan nou yo fin wouye. Lawouj la pral kanpe pou kondannen nou, li va devore
 vyann nou tankou dife. Nou te ranmase kont lajan nou nan dènye tan sa a. 4 Gade! Nou pa t' peye
 lajan nou te dwe peye travayè yo ki t'ap travay pou nou nan jaden. Tande jan y'ap rele! Travayè ki
 te ranmase rekòt pou nou yo ap plede rele! Rèl yo rive jouk nan zòrèy Bondye, Mèt ki gen tout
 pouvwa a. 5 Nou viv sou latè nan plezi ak nan jwisans. Nou manje jouk nou gra tankou bèt ki pare
 pou labatwa. 6 Nou kondannen moun ki inonsan, nou fè touye yo. Yo menm, yo pa fè fòs ak nou.
 7 Se poutèt sa, frè m' yo, annou pran pasyans jouk jou Seyè a va vini. Gade jan kiltivatè a gen
 pasyans. Li gen pou l' rete tann anvan pou tè a ba li yon bèl rekòt. Li pran pasyans, li rete tann lapli
 premye sezon an jouk lapli dènye sezon an. 8 Nou menm tou, pran pasyans. Bay kè nou kouraj,
 paske Mèt la pa lontan vini. 9 Frè m' yo, pa plenyen yonn sou do lòt pou nou pa tonbe anba jijman
 Bondye. Men jij la la nan papòt la. 10 Frè m' yo, chonje pwofèt yo ki te pale nan non Mèt la. Pran
 egzantp sou yo, pou jan yo te gen pasyans lè yo t'ap souffri. 11 Paske yo te souffri ak pasyans, nou
 di yo se moun Bondye beni. Nou tandè ki jan Jòb te gen pasyans, nou wè bout pou bout sa Bondye
 te fè pou li, paske Bondye gen bon kè, li gen kè sansib. 12 ¶ Anvan tout lòt bagay, frè m' yo, men
 sa ki pi enpòtan: piga nou fè sèman sou syèl la, ni sou latè a, ni sou ankenn lòt bagay. Lè nou di
 wi, se wi, non, se non. Konsa, nou p'ap tonbe anba jijman Bondye. 13 Si yon moun nan nou ap
 souffri, se pou li lapriyè. Si yon moun nan nou gen kè kontan, se pou l' chante kantik. 14 Si yon
 moun nan nou malad, se pou l' rele chèf reskonsab yo nan legliz la. Y'a lapriyè pou li, y'a pase lwil
 sou li nan non Seyè a. 15 Lè lapriyè a fèt ak konfyans, li va delivre malad la. Seyè a va fè l' leve
 gaya. Si li te fè kèk peche, Bondye va padonnen li. 16 Se pou nou konfese peche nou yo yonn bay
 lòt. Se pou yonn lapriyè pou lòt, pou nou kapab geri. Lè yon moun ap viv dwat devan Bondye,

lapriyè moun sa a gen anpil pouvwa. ¹⁷ Pwofèt Eli te yon moun menm jan ak nou. Li te lapriyè
 rèd pou lapli pa t' tonbe. Konsa vre, lapli pa tonbe pandan twazan sis mwa. ¹⁸ Apre sa, li lapriyè
 ankò. Lè sa a, syèl la louvri, lapli tonbe, latè bay bèl rekòt. ¹⁹ Frè m' yo, si yonn nan nou pèdi
 chemen laverite a, epi yon lòt frè mennen l' tounen ankò, ²⁰ konnen sa byen: lè yon moun pèdi
 chemen l' poutèt peche li yo, si yon lòt mennen l' tounen, se yon nanm li rache anba lanmò.
 Anmenmtan, li jwenn padon pou anpil peche.

1 Peter

Chapter 1

¹ ¶ Se mwen menm, Pyè, apòt Jezikri, k'ap ekri lèt sa a pou nou tout ki fè pati pèp Bondye te
 chwazi a men k'ap viv tankou etranje, gaye nan peyi Pon, Galasi, Kapadòs, Lazi ak Bitini. ² Se
 Bondye Papa a ki te chwazi nou dapre plan li te fè davans lan. Gremesi Sentespri li a, li mete nou
 apa pou li pou n' obeyi Jezikri, pou san Jezikri ki koule pou nou an ka mete nou nan kondisyon pou
 sèvi Bondye. M'ap mande Bondye pou nou resevwa anpil benediksyon ak kè poze. ³ ¶ Ann fè lwanj
 Bondye, Papa Jezikri, Seyè nou an. Paske, nan kè sansib li, li ban nou lavi ankò lè li te fè Jezikri
 leve soti vivan nan lanmò a. Sa fè nou viv ak anpil espwa. ⁴ N'ap tann lè pou n' resevwa eritaj
 Bondye a, eritaj ki p'ap janm pouri, ki p'ap janm sal, ni ki p'ap janm pèdi frechè l', eritaj li sere pou
 nou nan syèl la. ⁵ Paske nou menm nou gen konfyans nan li, Bondye ap pwoteje nou ak pouvwa
 li jouk la delivre nou jan sa pral parèt aklè nan dènye tan an. ⁶ ¶ Sa fè nou kontan anpil, menm si
 koulye a nou blije gen lapenn anpil pou yon ti tan, avèk tout kalite eprèv n'ap sibi yo. ⁷ Paske,
 konfyans nou se tankou lò li ye. Yo blije pase lò a, ki yon bagay perisab, nan dife pou wè si l' bon.
 Konsa tou, konfyans nou ki gen plis valè pase lò a gen pou pase anba eprèv tou, pou nou ka resevwa
 lwanj, onè ak respè lè Jezikri va parèt. ⁸ Nou renmen l', atout nou pa te wè l'; nou gen konfyans
 nan li, atout nou pa wè l' koulye a. Konsa, nou kontan ak yon kontantman nou pa ka esplike men
 ki merite lwanj, ⁹ paske nou jwenn sa nou t'ap chache lè nou te kwè a: delivrans pou nanm nou.
¹⁰ ¶ Pwofèt yo te chache anpil, yo te fouye anpil pou yo te ka konnen ki jan Bondye t'ap delivre
 nou. Yo te di davans ki kalite favè Bondye tapral fè nou. ¹¹ Lespri Kris la ki te nan yo te fè yo
 konnen davans tou sa Kris la tapral soufri, ansanm ak lwanj ki t'ap tann li apre sa. Men, yo t'ap

¹²
 chache konnen tou kilè ak nan ki sikonstans sa tapral rive. Se konsa, Bondye fè yo konnen sèvis
 yo t'ap fè lè yo te bay mesaj la, se pa t' pou yo, men pou nou. Gremesi moun k'ap anonse nou bon
 nouvèl la, avèk pouvwa Sentespri ki soti nan syèl la, nou konnen bagay sa yo koulye a, bagay ata
¹³
 zanj yo ta renmen konprann. ¶ Se poutèt sa, konnen byen sa nou pral fè. Mete tèt nou an plas.
¹⁴
 Mete tout espwa nou nan benediksyon nou pral resevwa lè Jezikri va parèt. Tankou timoun
 obeyisan, pa kite move lanvi nou te genyen nan tan lontan yo mennen lavi nou ankò, tankou anvan
¹⁵
 lè nou pa t' konn Bondye. Okontrè, nan tou sa n'ap fè, se pou nou bon nèt, tankou Bondye ki
¹⁶
 rele nou an bon nèt tou. Paske, men sa ki ekri nan Liv la: Se pou nou bon nèt, paske mwen
¹⁷
 menm, mwen bon nèt. Si lè n'ap lapriyè nou rele Bondye: Papa, li menm ki p'ap gade sou figi
 moun men k'ap jije tout moun menm jan dapre sa yo fè, se pou nou viv ak krentif pou Bondye
¹⁸
 pandan ti tan ki rete pou nou pase sou tè a. Bondye wete nou nan lavi san sans nou te resevwa
 nan men zansèt nou yo. Nou konnen sa li te peye pou sa. Se pa t' avèk bagay ki ka pèdi valè yo
¹⁹
 tankou lajan ak lò. Men, se avèk gwo ofrann san Kris la ki te koule lè li te ofri tèt li tankou yon
²⁰
 ti mouton san defo ni ankenn enfimite. Bondye te chwazi l' pou sa depi anvan li te kreye tout
²¹
 bagay. Men, se nan dènnye tan sa yo li vin parèt pou byen nou. Gremesi Kris la, nou gen konfyans
 nan Bondye ki te fè l' leve soti vivan nan lanmò, nan Bondye ki te ba l' lwanj. Konsa, nou mete
²²
 tout konfyans nou ak tout espwa nou nan Bondye. Koulye a, lè n'ap obeyi verite a, nou nan
 kondisyon pou nou fè sèvis Bondye, pou nou sa gen yon renmen sensè pou frè yo. Se sak fè, se
²³
 pou nou yonn renmen lòt ak tout kè nou, ak tout fòs nou. Gremesi pawòl Bondye a ki yon pawòl
 vivan epi ki la pou tout tan, nou resevwa yon lòt lavi. Fwa sa a, nou pa soti nan yon jèm ki ka mouri,
²⁴
 men nan yon jèm ki pa ka mouri. ¶ Jan sa ekri nan Liv la: Moun, se tankou zèb yo ye. Tout bèl
²⁵
 ou wè yo bèl la, se tankou flè zèb la yo ye. Zèb la chèch, flè a tonbe. Men, pawòl Bondye a la
 pou tout tan. Se pawòl sa a bon nouvèl la te pote ban nou.

Chapter 2

¹
 ¶ Se poutèt sa, derasinen tout mechanste ki te nan lavi nou. Sispann bay manti, sispann fè
 ipokrizi, sispann fè jalouzi ak tripotaj. ²
 Tankou timoun ki fenk fèt, se pou nou kriye dèyè bon lèt
 san dekoupe ki soti nan Bondye, pou nou kapab grandi, pou nou kapab fin delivre nèt. ³
 Paske,

4
nou deja goute Mèt la, nou wè jan li bon. ¶ Pwoche vin jwenn Seyè a, li menm ki wòch vivan an. Moun te voye li jete paske pou yo li te san valè. Men, li gen anpil valè pou Bondye ki te chwazi li.

5
Nou menm tou, tankou wòch vivan, kite Bondye sèvi ak nou pou bati kay li a ak pouvwa Sentespri, pou nou ka sèvi l' tankou prèt k'ap viv pou li. Konsa, gremesi Jezikri, n'a ofri bay Bondye ofrann

6
ki soti nan kè nou, ofrann ki pou fè l' plezi. Se poutèt sa nou jwenn sa ekri nan Liv la: Men li, mwen mete yon wòch nan mitan peyi Siyon, yon wòch kwen mwen menm mwen chwazi epi ki

7
gen anpil valè. Moun ki mete konfyans yo nan li p'ap janm soti wont. Pou nou menm ki mete konfyans nou nan wòch la, wòch la gen anpil valè. Men, pou moun ki pa mete konfyans yo nan li, sa ki ekri nan Liv la pral rive vre: Wòch moun ki t'ap bati yo te voye jete a, se li menm ki tounen

8
wòch ki kenbe kay la. Se yon wòch k'ap fè moun bite, yon gwo wòch k'ap fè yo tonbe. Yo bite,

9
paske yo pa koute pawòl la. Enben, se sa ki te sere pou yo. Men nou menm, nou se yon ras Bondye chwazi, yon bann prèt k'ap sèvi Wa a, yon nasyon k'ap viv apa pou Bondye, yon pèp li achte. Li fè tou sa pou n' te ka fè tout moun konnen bèl bagay Bondye te fè yo, Bondye ki rele nou soti nan

10
fènwa a pou nou antre nan bèl limyè li a. Anvan sa, nou pa t' menm yon nasyon. Men koulye a, nou se pèp Bondye a. Anvan sa, Bondye pa t' gen pitye pou nou. Koulye a, li gen pitye pou nou.

11
Zanmi m' yo, men sa m'ap mande nou. M'ap pale ak nou koulye a tankou ak moun ki etranje, ki

12
depasaj sou latè: Se pou nou kenbe tèt ak tout egzijans lachè a k'ap goumen kont nanm nou. Se pou nou gen yon bon kondit nan mitan moun sa yo ki pa konn Bondye. Konsa, lè y'ap pale nou mal, lè y'ap di se yon bann malfektè nou ye, y'a gen pou yo rekonèt tout byen n'ap fè a, y'a fè lwanj

13
Bondye lè la vin jije yo. ¶ Soumèt devan tout otorite lèzòm etabli. Fè sa pou Bondye. Soumèt

14
devan wa a, paske se li ki pi gwo chèf. Soumèt devan majistra yo, paske wa a voye yo pou peni

15
tout moun k'ap fè mal, pou fè lwanj tout moun k'ap fè byen. Paske, Bondye vle pou n' fè sa ki

16
byen, pou n' ka fèmen bouch moun sa yo ki pa konn anyen, ki san konprann. Se pou nou viv tankou moun ki gen tout libète yo. Men, nou pa dwe pran libète sa a sèvi yon kouvèti pou nou fè

17
sa ki mal. Se pou nou viv tankou moun k'ap sèvi Bondye. Se pou nou bay chak moun respè li

18
merite. renmen tout frè nou yo, gen krentif pou Bondye, respekte wa a. Nou menm domestik yo, nou fèt pou soumèt devan mèt nou yo avèk tout respè yo merite. Pa sèlman devan mèt ki bon

19
yo, mèt ki gen bon kè yo, men devan mèt ki gen karaktè difisil yo tou. Bondye va beni nou, si, lè y'ap fè nou soufri pou sa nou pa fè, nou sipòte lafliksyon an paske nou konnen se sa Bondye vle.

20
Ki lwanj ki gen nan sa si nou sipòte lè y'ap maltrete nou pou sa nou fè ki mal? Men, si lè nou fè

byen, nou sipòte tou sa y'ap fè nou soufri poutèt byen nou fè a, sa se yon bèl bagay devan Bondye.

21

Se pou sa menm Bondye te rele nou, paske Kris la te soufri pou nou. Li kite yon egzanp pou nou swiv pye pou pye. ²² Li pa t' janm fè ankenn peche. Ankenn manti pa t' janm soti nan bouch li.

23

Lè yo t'ap joure l', li pa t' reponn. Lè yo t'ap maltrete l', li pa t' mennase pesonn. Men, li renmèt kòz li nan men Bondye k'ap jije tout bagay san patipri. ²⁴ Kris la te pote peche nou yo nan kò li sou bwa a, pou nou te kapab mouri annegad peche, pou nou te ka viv dwat devan Bondye. Li te

kite yo maltrete l' pou l' te ka geri nou. ²⁵ Nou te tankou mouton ki te pèdi bann yo. Men, koulye a, nou tounen vin jwenn Kris la ki gadò nou, k'ap veye sou nanm nou.

Chapter 3

1

¶ Menm jan an tou, nou menm medam, soumèt devan mari nou. Konsa, si gen nan mari nou yo ki pa kwè nan Bondye, kondit nou kont pou fè yo kwè, san n' pa janm bezwen louvri bouch nou,

2

paske y'a wè jan nou viv byen, jan nou respekte yo. ³ Nou pa bezwen fè kò nou bèl ak bagay moun ka wè, tankou lè n'ap fè anpil kwafi estraòdenè, lè n'ap mete kantite bijou an lò ak kantite

rad ki koute chè sou nou. ⁴ Okontrè, se sa ki nan kè nou ki tout bèlte nou, yon bèlte ki p'ap janm pase. Se pou nou gen yon karaktè dou, yon karaktè poze. Se sa ki gen valè devan Bondye. ⁵ Nan tan lontan, se konsa medam ki t'ap viv pou Bondye yo te fè tèt yo bèl: yo te mete espwa yo nan

Bondye, yo te soumèt devan mari yo. ⁶ Se konsa Sara te ye. Li te soumèt devan Abraram jouk pou li te rele l' mèt. Nou menm tou, medam, nou se pitit Sara, si nou fè sa ki byen san nou pa pè anyen.

7

Menm jan an tou, nou menm mari, nan tout bagay se pou nou viv byen ak madanm nou paske yo pi fèb pase nou. Ba yo tout respè yo merite, paske yo menm tou y'a resevwa menm lavi avèk nou

tankou yon favè nan men Bondye. Konsa, anyen p'ap antrave lapriyè nou. ⁸ ¶ Pou fini, nou tout nou dwe dakò yonn ak lòt, se pou nou gen menm santiman yonn pou lòt. Se pou nou yonn renmen

lòt tankou frè ak sè, se pou nou gen bon kè, san lògèy. ⁹ Pa rann moun mal pou mal, jouman pou jouman. Okontrè, lè konsa, mande benediksyon pou yo, paske se benediksyon Bondye te pwomèt

pou l' ban nou lè li te rele nou an. ¹⁰ Paske: Si yon moun vle jwi lavi a, si l' anvè pase kèk bon kadè sou latè, se pou l' kenbe lang li pou l' pa pale moun mal. Se pou l' veye bouch li pou l' pa bay manti.

11

Se pou l' sispann fè sa ki mal, se pou l' fè sa ki byen. Se pou l' chache viv byen ak moun. Se pou

l' fè sa li kapab pou li viv byen ak tout moun. ¹² Paske, Bondye veye sou moun k'ap mache dwat

devan li. Li tande yo lè y'ap lapriyè nan pye l'. Men, l'ap vire do bay moun k'ap fè sa ki mal. ¹³ Ki
 moun ki ka fè nou mal si se byen ase nou vle fè? ¹⁴ Men, si nou rive soufri poutèt byen nou fè,
 konsidere sa tankou yon benediksyon. Nou pa bezwen pè moun, nou pa bezwen toumante tèt nou
 pou anyen. ¹⁵ Sèl bagay, se pou nou rekòntè se Kris la ki Seyè a nan kè nou. Se pou n' toujou pare
 pou n' defann tèt nou chak fwa yon moun mande nou espikasyon sou espwa nou gen nan kè nou
 an. ¹⁶ ¶ Men, fè sa avèk dousè ak tout respè. Kenbe konsyans nou pwòp. Konsa, moun k'ap pale
 nou mal poutèt bon kondit nou gen nan Kris la, se yo menm ki va wont pou pawòl yo te di lè yo
 t'ap joure nou an. ¹⁷ Se volonte Bondye pou nou fè sa ki byen. Menm si nou gen pou n' soufri, li
 pa vle nou fè sa ki mal. ¹⁸ ¶ Paske, Kris la menm mouri yon sèl fwa pou peche nou yo, li p'ap janm
 mouri ankò. Li menm ki t'ap mache dwat devan Bondye, li mouri pou moun ki pa t'ap mache dwat
 yo, pou l' te ka mennen nou bay Bondye. Li te mouri nan kò l', men ak pouvwa Lespri Bondye a,
 li leve vivan ankò. ¹⁹ Ak pouvwa menm Lespri a, li te al preche nanm ki nan prizon yo. ²⁰ Se
 nanm moun ki nan tan lontan te derefizè kwè nan Bondye. Se te sou tan Noe. Lè sa a, Bondye t'ap
 tann ak pasyans pandan Noe t'ap fè gwo batiman an. Nan batiman sa a, se kèk moun sèlman, wit
 moun antou, ki te sove nan dlo a. ²¹ ¶ Pou nou menm, dlo sa a kanpe pou dlo batèm lan k'ap delivre
 nou koulye a. Batèm lan, se pa yon bagay k'ap wete kras sou kò nou. Men, se yon angajman nou
 pran devan Bondye ak yon konsyans san repwòch. Bondye sove nou gremesi Jezikri ki te leve soti
 vivan nan lanmò, ²² ki moute nan syèl la, ki chita sou bò dwat Bondye kote l'ap domennen sou
 tout zanj yo, sou tout chèf yo ak sou tout otorite yo.

Chapter 4

¹ ¶ Se poutèt sa, menm jan Kris la te soufri nan kò li, nou menm tou se pou nou pare pou n'
 soufri menm jan an tou. Paske, lè yon moun soufri nan kò li, li pa gen anyen pou l' wè ak peche
 ankò. ² Se pou li viv ti rèz tan li gen pou l' viv sou tè a dapre egzijans volonte Bondye, pa dapre
 egzijans lachè. ³ Paske, nan tan lontan, nou te gen kont tan nou pou n' te fè tou sa moun ki pa
 konnen Bondye yo ap fè. Lè sa a, nou t'ap viv nan libètinaj, nan lanvi, nan bwè tafya, nan debòch,
 nan banbòch, nan sèvi zidòl, bagay lalwa defann nou fè. ⁴ ¶ Koulye a, moun sa yo twouve sa dwòl
 dèske nou pa fè bann ak yo ankò nan tout eksè sa yo. Se poutèt sa, y'ap pale nou mal. ⁵ Men, yo
 gen pou yo rann kont bay Bondye ki deja pare pou jije ni moun ki vivan yo ni moun ki mouri yo.
⁶ Se pou sa menm yo te anonse bon nouvèl la bay moun ki mouri yo. Konsa, si lè yo te sou latè yo

te tonbe anba jijman Bondye tankou tout moun, koulye a yo ka viv nan pouvwa Lespri Bondye a, jan Bondye vle l' la. ⁷ ¶ Tout bagay prèt pou fini. Se pou nou kenbe tèt nou anplas, veye kò nou pou n' ka lapriyè. ⁸ Anvan tout bagay, se pou nou yonn renmen lòt anpil. Paske, lè nou renmen, sa fè Bondye padonnen anpil peche. ⁹ Se pou nou yonn resevwa lòt lakay nou san plenyen. ¹⁰ Chak moun dwe pran kado Bondye ba yo a pou yo rann lòt yo sèvis. Konsa, tankou bon jeran, n'a pran kado Bondye yo, ki divès kalite, n'a fè yo travay. ¹¹ Si yon moun ap pale, se pou l' pale tankou si se te pawòl Bondye li t'ap di. Si yon moun ap rann sèvis, se pou li fè l' ak fòs Bondye ba li. Konsa, nan tout bagay lwanj lan va pou Bondye, gremesi Jezikri. Se pou Jezikri tout lwanj ak tout pouvwa pou tout tan. Amèn. ¹² ¶ Frè m' yo, nou pa bezwen sezi devan gwo eprèv sa yo k'ap tonbe sou nou tankou yon gwo dife. Nou pa bezwen konprann sa se yon bagay estwòdenè k'ap rive nou la a. ¹³ Okontrè, fè kè n' kontan. Paske, menm jan nou patisipe nan soufrans Kris yo, konsa tou n'a kontan nèt ale lè gwo pouvwa Kris la va parèt. ¹⁴ Si yo joure nou paske n'ap swiv Kris la, konsidere sa tankou yon benediksyon. Paske, Lespri ki gen gwo pouvwa a, Lespri Bondye a nan nou. ¹⁵ Mwen swete pou pesonn nan nou pa gen pou li soufri paske li te touye moun, osinon paske li te fè sa ki mal, osinon paske li te foure bouch li nan zafè ki pa gade li. ¹⁶ Men, si yon moun ap soufri paske se kretyen li ye, li pa bezwen wont pou sa. Okontrè, se pou li fè lwanj Bondye dèske li pote non Kris la. ¹⁷ Paske, dat la rive pou jijman Bondye a konmanse. L'ap konmanse ak moun ki nan kay Bondye a anvan. Si li konmanse ak nou, nou pa bezwen mande sak pral rive moun sa yo ki pa koute bon nouvèl Bondye a. ¹⁸ Tankou sa ekri nan Liv la: Si moun k'ap viv dwat devan Bondye yo pa fasil pou sove, nou pa bezwen mande sa k'ap rive moun ki pa kwè nan Bondye yo, moun k'ap viv nan peche yo. ¹⁹ Se poutèt sa, moun k'ap soufri paske se sa Bondye vle pou yo a, se pou yo pa sispann fè sa ki byen, se pou yo renmèt nanm yo nan men Bondye ki kreye yo, epi ki p'ap lage yo.

Chapter 5

¹ ¶ Mwen menm ki yon chèf reskonsab, m'ap pale koulye a ak chèf reskonsab ki nan mitan nou yo. Mwen menm ki te wè jan Kris la te soufri a, mwen pral patisipe tou nan bèl pouvwa Bondye ki gen pou parèt la. ² Men sa m'ap di nou: Tankou gadò, se pou nou swen bann mouton Bondye ki sou kont nou an. Pa fè sa tankou si se fòse y'ap fòse nou. Men, fè l' paske nou vle fè sa Bondye vle. ³ Pa fè travay la tankou si se dèyè lajan nou ye. Men, fè l' ak tout kè nou. Pa fè menm jan ak chèf

k'ap maltrete moun ki sou kont yo. Okontrè, se pou nou tounen yon egzanp pou mouton yo. ⁴ Konsa, lè gran gadò a va parèt, n'a resevwa yon kouwòn ki p'ap janm fennen: n'a resevwa lwanj Bondye.

⁵ ¶ Menm jan an tou, nou menm jennjan yo, se pou nou soumèt devan chèf reskonsab yo. Nan tout rapò nou yonn ak lòt, se pou nou soumèt devan Bondye. Paske Bondye pran pozisyon kont moun ki gen lògèy. Men, moun ki soumèt devan l', li ba yo favè li. ⁶ Se poutèt sa, soumèt nou devan Bondye ki gen pouvwa, konsa la leve nou lè pou l' leve nou an. ⁷ Lage tout tèt chaje nou yo ba li, paske l'ap pran swen nou. ⁸ ¶ Kenbe tèt nou anplas, rete sou prigad nou. Paske dyab la, lènmi nou an, ap veye nou tankou yon lyon ki move, k'ap chache moun pou l' devore. ⁹ Kanpe fèm nan konfyans nou, kenbe tèt avè l', paske nou konnen lòt frè nou yo ki nan lemond ap soufri menm soufrans ak nou. ¹⁰ ¶ Men, apre n'a fin soufri yon ti tan, Bondye li menm va rann nou bon nèt, la kenbe nou fèm, la ban nou fòs, l'ap fè nou kanpe san brannen. Paske Bondye bay tout kalite favè. ¹¹ Se li menm ki te rele nou, gremesi Kris la, pou n' te patisipe nan pouvwa li ki p'ap janm fini. ¹² Se pou li tout pouvwa a, depi tout tan ak pou tout tan. Amèn. ¹³ Se avèk konkou frè Silven, yon nonm serye dapre sa mwen konnen, m'ap ekri nou lèt sa a, pou m' ka ankouraje nou, pou m' fè nou konnen jan favè Bondye pou nou an se yon bagay ki vre. Kenbe fèm nan li. ¹⁴ Legliz Bondye chwazi nan lavil Babilòn lan voye bonjou pou nou, ansanm ak Mak, pitit mwen an. ¹⁵ Bò pa nou, yonn di lòt bonjou pou mwen, yonn bo lòt tankou frè ak frè. Mwen mande pou nou tout k'ap viv ansanm nan Kris la, pou nou gen kè poze.

2 Peter

Chapter 1

¹ ¶ Mwen menm, Simon Pyè, sèvitè ak apòt Jezikri, m'ap ekri lèt sa a pou nou menm ki resevwa yon konfyans ki gen menm valè ak pa m' lan, gremesi Jezikri, Bondye nou ak Sovè nou ki fè nou gras. ² M'ap mande Bondye pou nou resevwa anpil benediksyon ak kè poze, gremesi konesans Bondye ak Jezikri, Seyè nou an, nou genyen. ³ Pouvwa Bondye a ban nou tou sa nou bezwen pou nou ka viv, pou nou ka sèvi li. Li fè nou konnen moun ki te rele nou an, lè li te fè nou wè pouvwa li ak bèl bagay li yo. ⁴ Se konsa, Bondye ban nou pwomès li yo ki gwo anpil, ki gen anpil valè, pou nou kapab patisipe nan sa Bondye ye a, pou nou kapab chape anba koripsyon ki nan lemond,

⁵ akòz move lanvi ki nan kè moun. ¶ Se poutèt sa, nou dwe fè tou sa nou kapab pou nou pa rete ak konfyans nou gen nan Bondye a sèlman. Men, apa konfyans lan se pou nou gen bon kondit. Apa bon kondit la, se pou nou gen konesans. ⁶ Apa konesans la, se pou nou konn kontwole tèt nou. Apa konn kontwole tèt nou an, se pou nou gen pasyans. Apa pasyans la, se pou nou sèvi Bondye. ⁷ Apa sèvi Bondye a, se pou nou gen renmen pou frè yo. Apa renmen nou gen pou frè nou an, se pou nou gen renmen pou tout moun. ⁸ Si nou gen tout bagay sa yo nan nou, si nou devlope yo nan nou, nou p'ap rete bra kwaze. Se p'ap pou gremesi nou konnen ki moun Jezikri, Seyè nou an, ye. ⁹ Men, moun ki pa gen bagay sa yo nan yo, y'ap tankou yon avèg ki pa wè lwen, yo bliye jan Bondye te netwaye yo anba vye peche yo. ¹⁰ Se poutèt sa, frè m' yo, se pou nou fè jefò plis toujou pou nou rete fèm nan pozisyon kote Bondye mete nou an, li menm ki rele nou, ki chwazi nou. Si nou fè sa, nou p'ap janm tonbe. ¹¹ Konsa, la ban nou dwa antre lib nan peyi kote Jezikri, Seyè nou ak Sovè nou an, ap gouvènen tankou wa pou tout tan an. ¹² ¶ Se poutèt sa, nou te mèt konnen bagay sa yo deja, nou te mèt kanpe fèm nan verite nou resevwa a, mwen p'ap janm manke fè nou chonje bagay sa yo. ¹³ Wi, toutotan mwen poko mouri, mwen kwè se yon devwa pou m' fè nou chonje bagay sa yo pou dòmi pa pran nou. ¹⁴ Paske, mwen konnen mwen pa lwen mouri. Se Seyè a menm ki fè m' konn sa. ¹⁵ Men, m'ap fè tout posib mwen pou nou pa janm bliye bagay sa yo lè m' fin ale. ¹⁶ ¶ Paske, lè m' t'ap fè nou konnen jan Jezikri, Seyè nou an, te vini avèk pouvwa li, se pa t' istwa moun envante nan tèt yo mwen t'ap rakonte nou. Men, se paske mwen menm, mwen te wè Seyè a nan tout pouvwa li ak je pa mwen. ¹⁷ Mwen te la lè Bondye Papa a te ba li respè ak lwanj, lè nan mitan tout pouvwa a, vwa Bondye te pale, li di konsa: Ou se pitit mwen renmen anpil la, ou fè kè m' kontan anpil. ¹⁸ Nou te tande vwa ki te soti nan syèl la, lè nou te la ansanm avè l' sou mòn kote Bondye te pale ak nou an. ¹⁹ ¶ Se poutèt sa, mwen pran pawòl pwofèt yo pou pawòl ki sèten nèt. Nou menm tou nou byen fèt lè nou pran pawòl sa yo ak gwo konsiderasyon, tankou yon lanp k'ap klere nan fènwa a jouk jou a va pwente, jouk zetwal ki klere chak maten an va leve nan kè nou. ²⁰ Men, anvan tout bagay, se pou nou konn sa byen: pesonn pa gen dwa pran mesaj pwofèt ki ekri nan Liv la pou li ba li sans li vle. ²¹ Paske, pwofèt yo pa t' janm bay mesaj paske yo menm yo te vle. Okontrè, se Sentespri ki te pouse yo lè yo t'ap bay mesaj ki soti nan Bondye.

Chapter 2

1 ¶ Malgre sa, te gen kèk fo pwofèt nan mitan pèp Bondye a nan tan lontan. Konsa tou, va gen kèk direktè nan mitan nou k'ap bay manti. Yo pral vin ak yon bann bèl pawòl ki pa vre pou yo seye pèdi nou. Y'ap vire do bay Mèt la ki te delivre yo. Y'ap rale yon chatiman sou tèt yo k'ap detwi yo

2 lapoula. Anpil moun pral swiv yo nan sa y'ap fè ki mal yo. Konsa, y'ap lakòz moun pale chemen laverite a mal.

3 ¶ Nan kouri dèyè lajan, yo pral esplwate nou ak yon bann manti. Men, depi lontan moun sa yo deja jije, nanpwen chape pou yo.

4 Bondye pa t' fè pa zanj ki te fè peche yo. Li te voye yo jete nan lanfè, li lage yo nan gwo twou kote ki fènwa anpil la, l'ap kenbe yo la pou yo tann jou jijman an.

5 Bondye pa t' fè pa moun nan tan lontan yo. Men, li te delivre Noe, yon nonm ki te mache dwat devan li, ansanm ak sèt lòt moun lè li te voye gwo inondasyon an sou mechan yo.

6 Li te kondannen lavil Sodòm ak lavil Gomò pou yo te disparèt, li fè yo tounen sann, pou sa te sèvi yon egzanp pou tout mechan ki gen pou vini apre yo.

7 ¶ Men, li te delivre Lèt, yon nonm dwat ki te pran lapenn lè l' te wè move bagay mechan yo t'ap fè.

8 Paske, nonm dwat sa a ki t'ap viv nan mitan yo a, lè li te wè, lè li te tandè tout bagay mal moun sa yo t'ap fè, se chak jou li santi kè l' t'ap fann, paske li t'ap viv dwat devan Bondye.

9 Konsa, Bondye konnen ki jan pou l' delivre moun k'ap sèvi l' yo nan mitan eprèv. Men, li kite mechan yo pou l' ka peni yo jou jijman an,

10 ¶ sitou moun k'ap viv pou lachè ak tout egzijans li yo, moun k'ap meprize otorite Bondye a. Moun sa yo gen je chèch konsa, yo awogan. Yo pa menm pè pale pouvwa yo ki nan syèl la mal.

11 Menm zanj yo ki gen plis fòs ak plis pouvwa pase moun sa yo pa pote move akizasyon kont pouvwa ki nan syèl yo devan Bondye.

12 Mesye sa yo menm, yo tankou bèt ki san konprann, k'ap viv dapre ensten yo epi ki la sou latè pou moun kenbe touye. Yo pale mal sou bagay yo pa konnen, yo gen pou yo peri menm jan ak bèt.

13 Yo gen pou yo soufri pou tou sa yo te fè moun soufri. Yo pran plezi fè debòch gwo lajounen. Se yon wont, se yon eskandal lè moun sa yo k'ap pran plezi yo nan fè sa ki mal chita sou menm tab ak nou lè n'ap fè fèt.

14 Je yo kale sou tout fanm. Se tout tan y'ap fè peche. Yo pran tèt moun ki fèb yo nan pèlen. Nanpwen moun renmen lajan tankou yo. Se moun ki anba madichon.

15 Yo kite chemen ki dwat la, yo pèdi wout yo nèt. Yo pran swiv chemen Balaram, pitit Bozò a, ki te fè sa ki mal poutèt lajan.

16 Men, yo te kouri dèyè l' pou mechanste li a: yon bourik ki pa menm gen lapawòl te pale avè l' tankou yon moun. Se sa ki te fè pwofèt la sispann aji tankou moun fou.

17 Moun sa yo tankou sous dlo ki cheche, tankou nway gwo van ap pote ale. Kote ki fènwa anpil la ap pare tann yo tou.

18 Y'ap pale ak awogans pawòl ki pa gen sans. Avèk lavi lib y'ap mennen pou satisfè lachè a, y'ap pran tèt moun ki fèk ap chape nan mitan moun k'ap viv nan manti yo.

19

Yo pwomèt y'ap ba yo libète. Men, yo menm se esklav movèz vi a yo ye. Paske, yon moun esklav

20 tout bagay ki donminen sou li. Moun ki rive konnen Jezikri tankou Seyè ak Sovè li, li fin chape anba tout vye bagay mal ki nan lemonn. Si apre sa, li tounen mele ladan yo ankò, si l' kite bagay

21 sa yo pran pye sou li ankò, l'ap pi mal pou li pase jan l' te ye anvan an. Sa ta pi bon pou li si l' pa t' janm konnen chemen dwat la, pase pou, lè li fin konnen l' lan, li vire do bay kòmandman li te

22 resevwa nan men Bondye a. Sa ki rive yo a moutre sa pwovèb la di a se vre: Chen an tounen vin manje sa li te vonmi an. Lave manman kochon, li al woule nan labou ankò.

Chapter 3

1

¶ Frè m' yo, sa fè dezyèm lèt m'ap ekri nou. Nan tou de lèt yo mwen te vle fè nou chonje tout

2 bagay sa yo, pou lespri moun ki dwat yo pa dòmi, pou n' te ka gen bon lide nan tèt nou. Se pou n' toujou chonje sa pwofèt Bondye yo te di nou depi lontan. Toujou chonje kòmandman Seyè ki

3 delivrans nou an. Se kòmandman sa yo apòt yo te moutre nou. ¶ Anvan tout bagay se pou nou konprann sa byen: lè dènye jou yo va rive, gen moun ki pou parèt ka pral pase bagay Bondye yo

4 anba rizib. Se moun k'ap viv dapre tout vye lanvi yo genyen. Y'a di: Kote pwomès li te fè nou an? Li pa t' di li t'ap vini? Depi sou tan zansèt nou yo ki mouri, tout bagay rete menm jan yo te ye

5 a lè latè te fèk kreye. Men, moun sa yo, lè y'ap pale konsa, yo fè espere bliye sa ki te rive nan tan lontan: Bondye te pale epi li fè syèl la. Se li ki te fè tè a soti nan dlo a, se li ki te fè dlo a fè tè a.

6 Se li ki te fè dlo a moute kouvri latè nan tan lontan pou l' te detwi tout bagay. Dapre menm pawòl Bondye a, syèl la ak tè a ki la koulye a ap tann dife a. Yo la ap tann jou jijman an, lè tout

8 mechan yo va disparèt. ¶ Men nou menm, frè m' renmen anpil yo, gen yon bagay nou pa dwe janm bliye: Pou Bondye, yon jou se tankou mil (1.000) an, milan se tankou yon jou. ¶ Seyè a pa

9 pran twòp reta pou kenbe pwomès li yo, jan kèk moun kwè a. Okontrè, se pasyans l'ap pran ak nou, paske li pa ta renmen pesonn peri, li ta vle pou tout moun tounen vin jwenn li.

10 Men, jou Seyè a ap vini sou nou tankou yon vòlò nan mitan lannwit. Lè sa a, syèl la pral disparèt ak yon gwo gwo bri. Tout bagay pral pran dife, y'ap fonn nèt. Latè ak dènye bagay ki ladan l' va boule, y'ap tounen

11 sann. ¶ Si tout bagay gen pou disparèt konsa, nou pa bezwen mande ki kalite moun nou dwe ye: Se pou nou sèvi Bondye, se pou nou viv pou li ase.

12 Konsa, pandan n'ap tann jou Bondye a, jou ki gen pou rive a, ann fè sa nou kapab pou nou fè l' rive pi vit toujou. Jou sa a, syèl la pral disparèt

nan gwo flanm dife. Tout bagay pral fonn nan dife. ¹³ Men nou menm, n'ap tann lòt syèl ak lòt tè Bondye te pwomèt la, kote se bagay ki dwat devan Bondye ase k'ap fèt. ¹⁴ Se poutèt sa, frè m' yo, pandan n'ap tann bagay sa yo, ann fè sa nou kapab pou Bondye ka jwenn nou ap viv ak kè poze, san okenn fòt, ni okenn defo. ¹⁵ Konprann sa byen, se pou nou ka sove kifè Seyè a ap pran tout pasyans sa a ak nou. Se sa menm frè Pòl, bon zanmi nou an, te ekri nou dapre bon konprann Bondye te ba li a. ¹⁶ Nan tout lèt li yo, li pale nou sou bagay sa yo. Gen kèk pwen ladan yo ki difisil pou konprann. Se konsa, moun iyoran yo ak moun ki fèb nan konfyans Bondye yo ap tòde sans pawòl yo, tankou yo fè l' pou lòt liv yo tou. Men, se sa menm k'ap fin pèdi yo. ¹⁷ Se poutèt sa, frè mwen renmen anpil yo, koulye a nou tou avèti. Pran prekosyon nou pou nou pa kite mechan sa yo trennen nou ale ak manti yo, pou nou pa pèdi pozisyon kote nou kanpe fèm lan. ¹⁸ Okontrè, se pou nou grandi nan favè ak konesans Jezikri, Seyè nou ak Sovè nou. Se pou li tout lwanj la, koulye a ak pou tout tan. Amèn.

1 John

Chapter 1

¹ ¶ M'ap ekri nou sou pawòl ki bay lavi a, pawòl ki te la depi nan konmansman tout bagay. Nou te tande l', nou te wè l' ak pwòp je nou, nou te gade l' byen gade, nou te manyen l' ak men nou. ² Lè lavi a te parèt, nou te wè li. Se poutèt sa mwen ka pale nou sou sa: m'ap fè nou konnen lavi ki p'ap janm fini an, lavi ki te la avèk Papa a, lavi ki te parèt aklè devan nou an. ³ Sa nou menm nou te wè a, sa nou te tande a, m'ap fè nou konnen l' tou pou nou ka viv ansanm yonn ak lòt nan lavi nou tout n'ap mennen ansanm ak Papa a ansanm ak Pitit li a, Jezikri. ⁴ M'ap ekri nou sa pou kè nou ka kontan nèt ale. ⁵ ¶ Men nouvèl nou te tande nan bouch Jezikri a, nouvèl m'ap fè nou konnen an: Bondye se limyè. Pa gen fènwa nan Bondye. ⁶ Si nou di n'ap viv ansanm ak li, pou anmenmtan n'ap viv nan fènwa, n'ap bay manti ni nan sa n'ap di, ni nan sa n'ap fè. ⁷ Men, si n'ap viv nan limyè menm jan li menm Bondye li nan limyè, lè sa a se tout bon n'ap viv ansanm yonn ak lòt. Jezi, Pitit Bondye a, va netwaye nou ak san li anba tout peche nou yo. ⁸ ¶ Si nou di nou pa gen peche, se tèt nou n'ap twonpe. Verite a pa nan nou. ⁹ Men, si nou rekonèt devan Bondye nou fè peche, nou mèt gen konfyans nan li. Paske l'ap fè sak gen pou fèt la: la padonnen tout peche nou yo, la netwaye

10
nou anba tou sa ki mal. Men, si nou di nou pa t' fè peche, nou fè Bondye pase pou mantò: Pawòl li pa nan kè nou.

Chapter 2

1 ¶ Pitit mwen yo, m'ap ekri nou lèt sa a pou nou pa fè peche. Men, si yon moun rive fè peche, nou gen yon avoka k'ap plede pou nou bò kot Papa a: Se Jezikri, moun ki te mache dwat devan Bondye a. 2 Paske, Jezikri te ofri tèt li tankou bèt yo ofri bay Bondye, pou Bondye te ka padonnen peche nou yo, pa peche pa nou yo ase, men peche tout moun tou. 3 ¶ Si nou fè sa Bondye mande nou fè, lè sa a nou mèt sèten nou konnen li. 4 Lè yon moun di: mwen menm, mwen konn Bondye, epi pou anmenmtan an li pa fè sa Bondye mande l' fè a, moun sa a se yon mantò. Verite a pa nan li. 5 Men, moun ki obeyi pawòl Bondye a, se moun sa a ki konmanse renmen Bondye tout bon vre. Men ki jan nou ka konnen nou fè yonn ak Bondye: 6 Lè yon moun di li fè yonn ak Bondye, se pou l' viv tankou Jezi te viv la. 7 ¶ Mezanmi, se pa yon kòmandman tou nèf m'ap ban nou nan lèt sa a. Se menm ansyen kòmandman yo te ban nou depi nan konmansman an. Ansyen kòmandman sa a, se menm pawòl nou te tande deja a. 8 Men, nan yon sans, se yon kòmandman tou nèf m'ap ban nou la a. Nou wè kòmandman sa a se yon bagay k'ap aji tout bon nan lavi Kris la ak nan lavi pa nou tou, paske fènwa a ap pase, limyè tout bon an gen tan ap klere. 9 Moun ki di yo nan limyè epi pou anmenmtan yo rayi frè yo, moun konsa nan fènwa toujou. 10 Se moun ki renmen frè yo ki nan limyè a. Konsa, pa gen anyen nan yo ki ka fè yon lòt tonbe nan peche. 11 Men, moun ki rayi frè yo, yo nan fènwa toujou. Y'ap mache nan fènwa, yo pa konnen kote yo prale, paske fènwa a rann yo avèg. 12 ¶ Timoun mwen yo, m'ap ekri nou paske Bondye padonnen peche nou yo poutèt Jezikri. 13 M'ap ekri nou, nou menm granmoun, paske nou konnen moun ki la depi nan konmansman an. M'ap ekri nou, nou menm jennmoun, paske nou kraze dyab la. M'ap ekri nou, nou menm timoun, paske nou konn Papa a. 14 M'ap ekri nou, nou menm granmoun, paske nou konnen moun ki la depi nan konmansman an. M'ap ekri nou, nou menm jennmoun, paske nou gen anpil fòs: nou kenbe pawòl Bondye a nan kè nou, nou kraze dyab la. 15 Pa renmen lemonn, ni anyen ki soti nan lemonn. 16 Si yon moun renmen lemonn, li pa gen renmen pou Papa a nan kè li. Bagay ki soti nan lemonn se egzijans lachè, se gwo tanta, se lògèy k'ap vire tèt moun lè yo gen anpil byen sou latè. Tou sa

pa soti nan Papa a. Se nan lemond sa soti. ¹⁷ Se pase lemond ap pase, ansanm ak tou sa moun
 jwenn ladan l' yo ta vle genyen. Men, moun ki fè sa Bondye vle, y'ap viv pou tout tan. ¹⁸ ¶ Pitit
 mwen yo, dènye jou a pa lwen rive. Nou tandè yo te di nou moun k'ap goumen ak Kris la gen pou
 vini. Men koulye a, se yon bann moun ki kanpe pou konbat Kris la. Se sa ki fè nou konnen dènye
 jou a pa lwen rive ankò. ¹⁹ Moun sa yo pa t' avèk nou tout bon, se poutèt sa yo kite nou. Si yo te
 avèk nou tout bon, yo ta toujou rete la avèk nou. Men, yo kite nou pou tout moun ka wè aklè yo
 yonn pa t' avèk nou tout bon. ²⁰ ¶ Pou nou menm, nou te resevwa Sentespri Kris la te voye sou
 nou an, konsa nou tout nou konn verite a. ²¹ Si m'ap ekri nou lèt sa a, se pa paske nou pa konn
 verite a non. Men, okontrè, se paske nou konnen li. Paske nou konnen pa gen manti ki ka soti nan
 verite a. ²² Kilès k'ap bay manti la a? Se moun ki di Jezi pa Kris la. Moun sa a, se goumen l'ap
 goumen ak Kris la. Li voye ni Papa a ni Pitit la jete. ²³ Moun ki voye Pitit la jete, li voye Papa a
 jete tou. Moun ki rekonèt Pitit la, li rekonèt Papa a tou. ²⁴ Se poutèt sa, pawòl nou te tandè depi
 nan konmansman an, kenbe li nan kè nou. Si nou kenbe sa nou te tandè depi nan konmansman an
 nan kè nou, n'ap toujou fè yonn ak Papa a ansanm ak Pitit la. ²⁵ Men sa Jezikri te pwomèt l'ap ban
 nou an: se lavi ki p'ap janm fini an. ²⁶ M'ap ekri nou tou sa poutèt moun k'ap chache twonpe nou
 yo. ²⁷ Pou nou menm, Kris la te voye Sentespri a sou nou. Toutotan Sentespri a nan kè nou, nou
 pa bezwen pesonn moutre nou anyen, paske Sentespri a ap moutre nou tout bagay. Sa l'ap moutre
 nou an se verite, se pa manti. Se poutèt sa, ann fè sa Sentespri a ap moutre nou, ann toujou fè yonn
 ak Kris la. ²⁸ ¶ Wi, pitit mwen yo, ann toujou fè yonn ak Kris la. Konsa, lè Kris la va parèt, n'a
 gen konfyans. Wi, jou la vini an, nou p'ap wont devan l', yo p'ap kapab voye nou jete byen lwen li.
²⁹ Nou konnen Kris la se yon moun ki te mache dwat devan Bondye. Se pou nou konnen tou, tout
 moun ki fè sa ki dwat devan Bondye se pitit Bondye yo ye.

Chapter 3

¹ ¶ Gade ki jan Papa a renmen nou non! Li sitèlman renmen nou li rele nou pitit li. Epi se sa
 nou ye vre. Se poutèt sa lemond pa konnen nou, paske li pa konnen Bondye. ² Mezanmi, koulye a
 nou se pitit Bondye. Nou poko konnen egzaktman sa nou pral tounen. Men, nou konnen lè Kris
 la va parèt nou pral tounen tankou l', paske nou pral wè l' jan l' ye a. ³ Tout moun ki gen espwa sa
 a nan kè yo ap kenbe kò yo pou yo pa fè sa ki mal, tankou Jezikri te kenbe kò l' pou l' pa t' fè sa ki

⁴ mal. ¶ Tout moun ki fè peche, se dezobeyi yo dezobeyi lalwa Bondye, paske peche se dezobeyisans
⁵ lalwa. Nou konn sa: Jezikri te parèt pou wete peche lèzòm, men li menm li pa t' janm fè peche.
⁶ Konsa, si yon moun fè yonn ak Kris la tout tan, l'ap sispann viv nan peche. Moun ki kontinye ap
fè peche toujou, se moun ki pa janm wè l', ki pa janm konnen li. ⁷ Pitit mwen yo, pa kite pesonn
twonpe nou. Moun ki fè sa ki dwat, se li ki dwat devan Bondye, menm jan ak Kris la ki dwat.
⁸ Moun k'ap kontinye viv nan peche, se moun Satan yo ye, paske Satan ap fè peche depi nan
konmansman. Pitit Bondye a parèt toutespre pou kraze travay Satan an. ⁹ Si yon moun se pitit
Bondye li ye, li p'ap kontinye fè peche, paske pouvwa lavi ki soti nan Bondye a ap travay nan li.
¹⁰ Si se Bondye ki papa l', li pa kapab ap fè peche toujou. Men jan nou ka depati pitit Bondye yo
ak pitit Satan yo: depi yon moun pa fè sa ki dwat devan Bondye, depi li pa renmen frè li, se pa pitit
Bondye li ye. ¹¹ ¶ Paske, men mesaj nou te tande depi nan konmansman an: se pou nou yonn
renmen lòt. ¹² Piga nou fè tankou Kayen. Nonm sa a se moun Satan li te ye. Li te touye frè li. Epi
¹³ poukisa atò? Paske sa Kayen t'ap fè a pa t' bon, men sa frè l' t'ap fè a te dwat devan Bondye. Nou
¹⁴ pa bezwen sezi, frè m' yo, si moun ki nan lemonn yo rayi nou. ¶ Nou menm, nou konnen nou
soti nan lanmò, nou antre nan lavi. Nou konn sa, paske nou renmen frè nou yo. Moun ki pa renmen
¹⁵ frè l', li mouri. Tout moun ki rayi frè yo, se ansasen yo ye. Nou konnen yon ansasen pa gen lavi
¹⁶ ki p'ap janm fini an nan li. Men sa ki fè nou konnen sa renmen ye: Jezikri bay lavi li pou nou.
¹⁷ Se poutèt sa nou menm tou, se pou nou bay lavi nou pou frè nou yo. Si yon moun ki pa nan
bezwen wè yon frè li nan nesosite, si l' pa gen pitye pou li, yon moun konsa pa ka pretann li renmen
¹⁸ Bondye. Pitit mwen yo, pigas nou renmen sèlman nan bouch, nan bèl diskou ak bèl pawòl. Se
¹⁹ pou nou renmen tout bon vre. Se pou tout moun wè jan nou renmen lè yo wè sa n'ap fè. Se konsa
n'a konnen nou se moun laverite a. Se konsa n'a santi nan kè nou nou pa gen kè sote devan Bondye.
²⁰ ¶ Paske, si konsyans nou kondannen nou, nou konnen Bondye pi fò pase konsyans nou, li konn
²¹ tout bagay. Konsa, zanmi m' yo, si konsyans nou pa kondannen nou, nou gen yon gwo lasirans
²² devan Bondye. Tou sa n'a mande l', la ban nou l', paske nou menm nou fè tou sa li mande nou,
²³ nou fè sa ki fè l' plezi. ¶ Men sa l' mande nou: Se pou nou gen konfyans nan Pitit li, Jezikri. Se
²⁴ pou nou yonn renmen lòt, jan Kris la te ban nou lòd la. Moun ki kenbe kòmandman Bondye yo,

y'ap fè yonn ak Bondye, Bondye ap fè yonn ak yo tou. Men ki jan nou konnen Bondye fè yonn ak nou: nou konnen sa paske li ban nou Sentespri li.

Chapter 4

¹ ¶ Mezanmi, nou pa bezwen kwè tout moun k'ap di yo gen Lespri Bondye a. Men, se pou n' sonde yo pou nou wè si lespri yo genyen an soti nan Bondye vre. Paske, gen yon bann fo pwofèt

² ki gaye toupatou sou latè a. Men ki jan nou ka konnen si yon lespri soti nan Bondye: tout moun

³ ki di Jezikri te yon moun tout bon, se moun ki gen lespri ki soti nan Bondye a. Men, si yon moun refize rekonèt Jezi te yon moun tout bon, moun sa a pa gen lespri ki soti nan Bondye a. Lespri li genyen an soti nan moun k'ap goumen ak Kris la. Yo te di nou moun k'ap goumen ak Kris la te gen

⁴ pou l' te vini. Enben, koulye a li deja nan lemonn. ¶ Men, nou menm, pitit mwen yo, nou se moun Bondye, nou kraze fo pwofèt yo, paske lespri ki nan nou an gen plis pouvwa pase lespri ki nan

⁵ moun ki pou lemonn yo. Lè y'ap pale yo pale tankou moun ki nan lemonn. Moun ki nan lemonn

⁶ ap koute yo paske yo menm tou yo se moun lemonn. Men, nou menm, nou se moun Bondye. Tout moun ki konnen Bondye, yo koute lè n'ap pale ak yo. Moun ki pa moun Bondye p'ap koute nou. Se konsa nou ka konnen diferans ki genyen ant lespri k'ap pale verite a ak lespri k'ap bay manti

⁷ a. ¶ Mezanmi, se pou nou yonn renmen lòt paske renmen soti nan Bondye. Moun ki gen renmen

⁸ nan kè yo, se pitit Bondye yo ye. Yo konnen ki moun Bondye ye. Moun ki pa gen renmen nan

⁹ kè yo, yo pa konn Bondye, paske Bondye se renmen menm. Men ki jan Bondye fè nou wè jan li

¹⁰ renmen nou. Li te voye sèl pitit li a sou latè pou l' te ka ban nou lavi. Men kisa renmen an ye: Se pa nou menm ki te renmen Bondye, se li menm pito ki te renmen nou, ki te voye Pitit li a pou

¹¹ nou te ka resevwa padon pou peche nou yo, gremesi Pitit la. Mezanmi, si Bondye renmen nou

¹² konsa, nou menm tou se pou nou yonn renmen lòt. Pesonn pa janm wè Bondye. Men, si nou yonn renmen lòt, Bondye fè yonn ak nou. Konsa n'a renmen tout bon, jan Bondye renmen an.

¹³ Nou konnen nou fè yonn ak Bondye, Bondye fè yonn ak nou, paske li ban nou Sentespri li. ¶

¹⁴

¹⁵ Nou menm, n'ap di sa nou te wè. Papa a voye Pitit li a pou delivre tout moun. Moun ki rekonèt

¹⁶ Jezi pou Pitit Bondye a, Bondye fè yonn ak yo, yo fè yonn ak Bondye. Nou menm nou konnen jan Bondye renmen nou, nou kwè se vre. Bondye se renmen an menm. Moun ki gen renmen nan

¹⁷ kè yo, yo fè yonn ak Bondye, Bondye fè yonn ak yo. ¶ Nou konnen nou renmen Bondye tout

bon lè kè nou pa kase pou jou jijman an, paske n'ap viv nan lemond tankou Kris la t'ap viv. ¹⁸ Kote
 ki gen renmen, pa gen kè kase. Okontrè, lè nou renmen tout bon, si kè nou te kase, li pa kase ankò.
 Konsa, yon moun ki pè toujou, li poko fin renmen nèt. Paske si ou pè, se paske ou pè chatiman.
¹⁹ Pou nou menm, nou gen renmen nan kè nou, paske Bondye te renmen nou anvan. ²⁰ Si yon
 moun di: mwen renmen Bondye, pou anmenmtan pou l' rayi frè l', moun sa a ap bay manti. Paske,
 si li pa renmen frè l', yon moun li ka wè, li pa ka renmen Bondye li pa ka wè a. ²¹ Se sak fè, men
 kòmandman Kris la ban nou: Moun ki renmen Bondye, yo fèt pou renmen frè yo tou.

Chapter 5

¹ ¶ Tout moun ki rekonèt Jezi se Kris la, se pitit Bondye yo ye. Si ou renmen yon papa, se pou
 ou renmen pitit li tou. ² Nou konnen nou renmen pitit Bondye yo lè nou renmen Bondye, lè nou
 fè tou sa li mande nou fè. ³ Nou renmen Bondye, lè nou fè tou sa li mande nou fè. Sa Bondye
 mande nou fè yo pa twò difisil pase sa. ⁴ Paske, depi se pitit Bondye ou ye, ou kapab genyen batay
 la sou lemond. Men ki jan nou fè gengen batay la sou lemond, se paske nou gen konfyans nan
 Bondye. ⁵ Ki moun ki ka genyen batay la sou lemond? Se sèlman moun ki kwè Jezi se pitit Bondye
 a. ⁶ ¶ Jezikri se moun ki te vini an: li te vini ak dlo batèm lan ansanm ak san lanmò li a. Li pa t'
 vini ak dlo a sèlman, men li te vini avèk dlo ansanm ak san. Lespri Bondye a di se vre sa, paske
 Lespri Bondye a se verite a menm. ⁷ Gen yo twa k'ap di Jezi se moun ki te vini an. ⁸ Se Lespri
 Bondye a, se dlo a ansanm ak san an. Yo touletwa yo dakò. ⁹ Nou asepte pawòl moun pou verite.
 Men, pawòl Bondye a pi bon toujou. Epi, sa se temwayaj Bondye bay pou Pitit li a. ¹⁰ ¶ Konsa,
 moun ki gen konfyans nan Pitit Bondye a, se moun ki pran pawòl Bondye a pou verite epi ki kenbe
 l' nan kè yo. Men, moun ki pa gen konfyans nan Bondye, yo fè Bondye pase pou mantò, paske yo
 pa t' kwè pawòl Bondye te di sou Pitit li a se verite. ¹¹ Men pawòl verite a: Bondye ban nou lavi
 ki p'ap janm fini an. Se nan Pitit li a li ban nou li. ¹² Moun ki gen Pitit la, yo gen lavi sa a tou. Men,
 moun ki pa gen Pitit Bondye a, yo pa gen lavi sa a non plis. ¹³ M'ap ekri nou lèt sa a, nou menm
 ki kwè nan Pitit Bondye a pou nou ka konnen nou gen lavi ki p'ap janm fini an. ¹⁴ ¶ Se poutèt sa
 kè nou pa sote devan Bondye. Nou konnen l'ap koute nou si nou mande l' kichòy ki dakò ak volonte
 li. ¹⁵ Konsa, non sèlman nou konnen l'ap koute nou lè nou fè l' yon demann, men nou konnen tou

¹⁶
 l'ap ban nou sa nou mande l' la. Si yon moun wè yon frè l' fè yon peche ki p'ap fè l' mouri, se pou l' lapriyè Bondye pou Bondye bay frè a lavi. Prensip sa a bon pou moun ki fè peche ki p'ap fè yo mouri. Men, gen yon kalite peche ki mennen yon moun tou dwat nan lanmò. mwen pa di pou yo lapriyè pou moun ki fè kalite peche sa yo. ¹⁷ Tou sa ou fè ki mal, se yon peche. Men, se pa tout peche k'ap mennen ou nan lanmò. ¹⁸ ¶ Nou konnen depi yon moun pitit Bondye, li p'ap kontinye ap viv nan peche toujou. Paske, Pitit Bondye a ap veye sou li, Satan pa ka fè l' anyen. ¹⁹ Nou konnen nou se moun Bondye. Men, tou sa ki sou latè anba pouvwa Satan. ²⁰ Nou konnen Pitit Bondye a te vini, li louvri lespri nou pou nou ka konnen Bondye tout bon an. N'ap viv ansanm ak Bondye tout bon an, gremesi Pitit li, Jezikri. Se li menm ki Bondye tout bon an, se li menm ki lavi ki p'ap janm fini an. ²¹ Pitit mwen yo, veye kò nou ak zidòl!

2 John

Chapter 1

¹
 ¶ Mwen menm, chèf reskonsab nan legliz la, m'ap ekri lèt sa a pou Kiriya Bondye te chwazi a, yon moun mwen renmen tout bon, ansanm ak pitit li yo. Se pa mwen sèlman, men se tout moun ki konn verite a ki renmen nou. ² Paske verite a nan kè nou, l'ap avèk nou pou tout tan. ³ Mwen mande Bondye Papa a ansanm ak Jezikri, Pitit Papa a, pou yo gen pitye pou nou, pou yo ban nou benediksyon ak kè poze, pou nou ka resevwa tout bagay sa yo nan laverite ak nan renmen. ⁴ Mwen pa t' manke kontan lè m' wè te gen de twa nan pitit ou yo k'ap mache nan verite a, jan Papa a mande nou sa. ⁵ ¶ Koulye a, men sa m'ap mande ou, Kiriya: se pou nou yonn renmen lòt. Se pa yon lòt kòmandman tou nèf m'ap ekri la a ban nou. Se menm kòmandman nou te genyen depi nan konmansman an. ⁶ Si nou gen renmen nan kè nou, sa vle di n'ap viv dapre kòmandman Bondye yo. Men sa Bondye mande nou, se pou nou viv nan renmen. Se sa menm nou te aprann depi nan konmansman. ⁷ ¶ Gen anpil moun koulye a toupatou sou latè k'ap chache twonpe moun: yo pa vle rekonèt Jezikri te vin sou latè tankou yon moun tout bon. Moun nou wè k'ap fè sa, se moun k'ap twonpe moun, se moun k'ap goumen ak Kris la. ⁸ Veye kò nou byen pou nou pa pèdi benefis travay nou an, pou nou ka resevwa tout rekonpans nou. ⁹ Si yon moun pa kenbe sa Kris la te moutre nou an, si li al pi lwen, li pa gen Bondye. Moun ki kenbe sa Kris la te moutre a, se li menm ki gen Papa

10
 a ak Pitit la. ¶ Si yon moun vin jwenn nou pou l' moutre nou yon lòt bagay, pa resevwa l' lakay
 nou. Ata bonjou pou nou refize di li. 11
 Paske, depi ou di yon moun konsa bonjou, ou dekonplis
 ak li nan tout move bagay l'ap fè yo. 12
 ¶ Mwen gen anpil bagay pou m' di nou. Men, mwen pito
 pa ekri yo sou papye ak lank. Mwen swete m'a ka vin lakay nou pou m' pale ak nou fasafas, pou
 13
 nou tout nou ka kontan nèt. Pitit sè ou yo, sè Bondye te chwazi ansanm avè ou la, yo voye bonjou
 pou ou.

3 John

Chapter 1

1
 ¶ Se mwen menm, chèf reskonsab nan legliz la, k'ap ekri lèt sa a pou Gayis, frè mwen renmen
 tout bon an. 2
 Gayis monchè, mwen swete tout bagay ap mache byen pou ou. Mwen swete ou an
 sante nan kò ou tankou ou an sante nan lespri ou. 3
 ¶ Mwen pa t' manke kontan lè kèk frè rive bò
 isit la, yo di m' jan ou rete fèm nan verite a, jan ou toujou ap viv dakò ak verite a. 4
 Pa gen anyen
 ki pou fè m' pi kontan pase lè m' tande pitit mwen yo ap viv dakò ak verite a. 5
 Zanmi mwen, tou
 sa w'ap fè pou frè yo, menm pou frè etranje yo tou, ou fè l' byen. 6
 Yo di devan tout legliz la jan
 ou gen renmen tout bon nan kò ou. Tanpri, toujou ede frè yo pou yo ka pousib vwayaj yo, jan
 Bondye vle l' la. 7
 Paske, se pou sèvis Kris la y'ap fè vwayaj sa a. Yo pa asepte okenn konkou nan
 men moun ki pa konn Bondye. 8
 Se poutèt sa, moun konsa, nou menm patizan Kris yo, nou fèt pou
 soutni yo pou nou ka patisipe nan travay y'ap fè pou verite a. 9
 ¶ Mwen te ekri yon lèt tou kout
 voye bay legliz la. Men, Diyotrèf ki renmen pran pòz chèf li nan mitan yo a, refize koute sa m' di
 10
 a. Se poutèt sa, lè m'a rive, m'ap devwale tou sa li fè ki mal, tout move pawòl ak manti l'ap bay
 sou mwen yo. Li pa kontante l' fè sa sèlman. Li refize resevwa frè yo ki depasaj. Si gen moun ki
 11
 ta vle resevwa yo, li enpoze yo fè l', li menm chache mete yo deyò nan legliz la. Zanmi mwen,
 pa fè tankou moun k'ap fè sa ki mal. Fè tankou moun k'ap fè sa ki byen. Moun k'ap fè sa ki byen,
 12
 se moun Bondye yo ye. Moun k'ap fè sa ki mal pa t' janm wè Bondye. ¶ Tout frè yo pale byen
 pou Demetriyis. Menm laverite a pale byen pou msye. Nou menm tou, n'ap pale byen pou li, epitou

ou konnen sa nou di se verite. ¹³ Mwen gen anpil bagay pou m' ta di ou. Men, mwen pa vle ekri yo ak plim ak lank. ¹⁴ (14-15) Mwen swete m'a ka vin wè ou talè konsa, pou nou ka koze fasafas. Mwen mande pou Bondye ba ou kè poze. Tout zanmi ou yo voye bonjou pou ou. Di chak zanmi m' yo yon bonjou apa pou mwen.

Jude

Chapter 1

¹ ¶ Mwen menm Jid, sèvitè Jezikri, frè Jak la, m'ap ekri nou lèt sa a, nou tout Bondye rele, nou menm k'ap viv ansanm nan renmen Bondye Papa a ak anba proteksyon Jezikri. ² Mwen mande pou li gen pitye pou nou, pou li ban nou kè poze ak renmen an kantite. ³ ¶ Zanmi m' yo, mwen pa t' manke anvè ekri nou pou m' te pale nou sou jan Bondye delivre nou tout ansanm lan. Men, m' blije ekri nou koulye a pou mwen kapab ankouraje nou, pou nou pran defans lafwa Bondye te bay yon sèl fwa pou tout tan an, pou tout moun pa l' yo. ⁴ Paske, gen kèk mechan ki gen tan fofile kò yo nan mitan nou. Se moun ki san respè pou Bondye. Yo pran renmen Bondye renmen nou an sèvi yon kouvèti pou fè dezòd. Yo vire do bay Jezikri ki sèl Mèt ak sèl Segnè nou an. Depi lontan yo te ekri nan Liv la ki kalite kondannasyon k'ap tann moun sa yo. ⁵ Atout nou deja konnen tout bagay sa yo byen pròp, mwen vle fè nou chonje ki jan, lè Bondye te fin delivre pèp Izrayèl la anba moun Lejip yo, li te detwi tout moun ki pa t' kwè yo. ⁶ Chonje tou ki jan zanj ki pa t' rete nan pozisyon Bondye te ba yo a men ki te kite kote l' te mete yo a, Bondye kenbe yo nan mitan fènwa a, mare nan yon chenn ki p'ap janm kase. Se la y'ap tann gwo jou jijman an. ⁷ Menm jan an tou, chonje moun Sodòm ak Gomò ak tout ti bouk nan vwazinaj yo a. Yo te fè tankou zanj sa yo. Yo te lage kò yo nan tout kalite dezòd lachè, yo te menm rive nan fè gason ak gason, fi ak fi. Pou peni yo, yo lage yo nan dife k'ap boule tout tan an. Sa se yon egzanp ak yon avètisman pou tout moun. ⁸ ¶ Menm jan an tou, mesye sa yo, avèk tout vizyon y'ap plede fè yo, y'ap fè tout kalite vye bagay ak kò yo, y'ap meprize otorite Bondye, y'ap pale pouvwa ki nan syèl yo mal. ⁹ Menm Akanj Michèl, lè li t'ap plede ak dyab la pou kadav Moyiz, li pa t' penmèt li jije dyab la yon jan pou l' te manke l' dega. Men, li annik di li: Mèt la va regle avè ou. ¹⁰ Yo menm, okontrè, yo pale mal sou sa yo pa konprann. Bagay yo konnen se bagay ensten yo moutre yo tankou bèt ki san konprann. Se bagay sa yo menm k'ap pèdi yo. ¹¹ Malè pou yo! Y'ap fè menm rout ak Kayen. Pou yo ka fè kòb, yo lage

kò yo nan menm move chemen Balaram lan. y'a mouri tankou Kore ki te peri nan fè rebèl ak

¹²
Bondye. Moun sa yo, se gate yo vin gate manje n'ap fè pou frè yo. Yo san ront konsa. Yo vin manje, yo vin bwè kont kò yo san chonje moun; se pròp tèt yo ase yo konnen. Yo tankou nwaj van ap gaye nan syèl la san bay lapli. Yo tankou pyebwa ki pa janm donner, menm nan sezon rekòt.

¹³
Wi, yo tankou pyebwa yo derasinen epi ki fin mouri nèt. Yo tankou lanm lanmè lè lanmè a move. Y'ap pouse kim salte yo met deyò. Yo tankou zetwal ki pèdi rout yo. Bondye sere yon plas

¹⁴
pou yo kote ki fè pi nwa a pou tout tan. Depi lontan, Enòk, ki te vin sèt jenerasyon apre Adan,

¹⁵
te pale sou yo, lè l' te di: Koute. Men Bondye ap vini ak tout lame moun pa li yo. ¶ L'ap jije tout moun; l'ap kondannen tout mechan yo pou tout move bagay yo te fè kont Bondye. Moun sa yo ki

¹⁶
te san respè pou Bondye, l'ap kondannen yo pou tout move paròl yo te di sou li. Moun sa yo toujou ap bougonnen, y'ap plede plengnen sou sitiyasyon yo. Se enterè yo ase y'ap chache. Depi yo louvri bouch yo, se vante y'ap vante tèt yo. Y'ap flate tout moun pou yo tire avantaj sou yo.

¹⁷
Men, nou menm, zanmi m' yo, toujou chonje paròl apòt Segnè Jezikri yo te di nou davans lan.

¹⁸
Yo te di nou konsa: Lè dènye jou yo va rive, va gen anpil moun k'ap san respè pou bagay Bondye

¹⁹
yo, moun k'ap pase nou anba betiz, moun k'ap viv dapre vye lide lanvi yo gengnen. Se moun sa yo k'ap simen divizyon. Yo kite egzijans lachè dominen yo. Se pa Lespri Bondye a k'ap dirije lavi

²⁰
yo. Men, nou menm, mezanmi, annou kontinye grandi toujou nan konfyans nou k'ap fè nou viv

²¹
pou Bondye nèt ale. Avèk pouvwa Sentespri a, annou lapriyè san rete. Rete fèm nan renmen nou gen pou Bondye a, pandan n'ap tann Segnè nou, Jezikri, k'ap vin ban nou lavi ki p'ap fini an

²² ²³
paske li gen pitye pou nou. Gen pitye pou frè yo ki nan doutans toujou. Lonje men delivre yo, rache yo soti nan mitan dife a. Se pou nou gen pitye pou lòt moun yo tou. Men, fè atansyon,

²⁴
paske se pou nou rayi ata rad ki sou yo nan move lavi y'ap mennen an. Koulye a tout lwanj, tout grandè, tout pouvwa ak tout otorite pou yon sèl Bondye a, pou Bondye ki ka kenbe nou pou nou pa tonbe, li menm ki kapab fè nou parèt san repròch ak kè kontan devan l' nan tout bèl pouvwa li.

²⁵
Li menm, sèl Bondye ki delivre nou gremesi Jezikri, Segnè nou an, wi, se pou li tout lwanj, tout grandè, tout pouvwa ak tout otorite, depi nan tan lontan, koulye a ak pou tout tan. Amèn.

Revelation

Chapter 1

¹ ¶ Men revelasyon Bondye te bay Jezikri pou l' te fè sèvitè l' yo konnen sa ki gen pou rive anvan lontan. Se Kris la menm ki voye zanj li bò kot Jan, sèvitè l' la, pou fè l' konnen tout bagay sa yo.

² Se menm Jan sa a k'ap rakonte tou sa li te wè. Li rapòte mesaj ki soti nan Bondye a ansanm ak verite Jezikri te fè l' konnen an.

³ ¶ Benediksyon pou moun k'ap li liv sa a. Benediksyon pou tout moun k'ap koute pawòl mesaj sa a ki soti nan Bondye, pou tout moun k'ap obeyi tou sa ki ekri nan Liv sa a, paske pa rete lontan ankò pou bagay sa yo rive.

⁴ Se mwen menm Jan, k'ap ekri sèt legliz ki nan pwovens Lazi yo. M'ap lapriye pou nou ka resevwa benediksyon ak kè poze ki soti nan Bondye, li menm ki la, ki te toujou la epi ki gen pou vini an, benediksyon ak kè poze ki soti nan sèt lespri yo ki kanpe devan fotèy li a,

⁵ benediksyon ak kè poze ki soti nan Jezikri tou, li menm ki te bay verite a jan l' ye a, li menm premie pitit ki leve soti vivan nan lanmò a, li menm ki chèf tout wa ki sou latè. Kris la renmen nou, li bay san li lè li mouri pou l' te ka delivre nou anba peche nou yo.

⁶ Li fè nou tounen wa ak prèt pou n' sèvi Bondye Papa li. Se pou li tout lwanj ak tout otorite pou tout tan. Amèn.

⁷ Gade. Men Kris la ap vini sou tèt nwaj yo! Tout moun pral wè l', menm moun ki te pèse l' yo. Tout pèp sou latè pral kriye lè y'a wè li. Wi, se konsa sa pral pase. Amèn.

⁸ Mwen se konmansman, mwen se finisman tankou A ak Z. Se Bondye, Mèt ki gen tout pouvwa a, ki di sa, li menm ki la, ki te toujou la epi ki gen pou vini an.

⁹ ¶ Mwen menm, Jan, mwen se frè nou. M'ap pataje tout bagay ak nou, kit se soufrans nou, kit se gouvènman Bondye ki wa a, kit se pasians Jezi ban nou an. Yo te ban mwen yon lil yo rele Patmòs pou prizon paske mwen t'ap fè

¹⁰ konnen pawòl Bondye a ansanm ak verite Jezi te moutre a. Yon jou dimanch, jou Mèt la menm, Lespri Bondye a pran m', mwen tande yon gwo vwa dèyè do m' ki sonnen tankou yon klewon.

¹¹ Li di m' konsa: Tou sa ou wè, ekri yo nan yon liv. Voye liv la bay sèt legliz ki nan sèt lavil sa yo: Efèz, Esmen, Pègam, Tiyati, Sad, Filadèlfi ak Lawodise.

¹² M' vire pou m' wè ki moun ki t'ap pale avè m' lan. Lè sa a, mwen wè sèt gwo lanp sèt branch an lò kanpe,

¹³ ak nan mitan yo yon moun ki te sanble ak yon gason. Li te gen yon gwo rad sou li byen long ki te bat jouk sou pie l', ak yon sentiwon an lò mare sou lestonmak li.

¹⁴ Cheve nan tèt li te tankou lenn mouton, blan kou koton. Je l' yo menm te tankou de flanm dife.

¹⁵ Pie l' yo te klere tankou kwiv yo poli apre yo fin chofe l' nan fòj. Lè l' pale menm, vwa l' te tankou bri gwo dlo k'ap sot tonbe nan yon falèz.

¹⁶ Li te gen sèt zetwal nan men dwat li ak yon nepe file de bò k'ap soti nan bouch li. Figi l' menm te klere tankou gwo solèy midi.

¹⁷ Lè mwen wè l', mwen tonbe nan pie l' tankou yon moun ki mouri. Li mete men dwat li sou mwen, li di m' konsa: Ou pa bezwen pè! Se mwen ki premie, se mwen ki

dènnye.¹⁸ Mwen se moun ki vivan an. Mwen te mouri, men koulye a, mwen vivan pou tout tan.
 Mwen gen pouvwa sou lanmò ak sou peyi kote mò yo ye a.¹⁹ Ekri tou sa ou wè a: ni sa k'ap pase
 koulye a, ni sa ki gen pou rive apre.²⁰ Men sans kache sèt zetwal ou wè nan men dwat mwen an,
 ansanm ak sans sèt gwo lanp sèt branch lò yo. Sèt zetwal yo se zanj sèt legliz yo. Sèt gwo lanp sèt
 branch yo, se sèt legliz yo.

Chapter 2

¹ ¶ Ekri zanj legliz ki nan lavil Efèz la. Di l' konsa: Moun ki kenbe sèt zetwal yo nan men dwat
 li a, moun k'ap mache nan mitan sèt gwo lanp sèt branch lò yo, men sa li voye di ou:² Mwen
 konnen tou sa w'ap fè, jan ou travay di, jan ou gen pasians. Mwen konnen tou ou pa ka sipòte
 mechan yo: ou sonde tout moun sa yo k'ap pran pòz apòt yo. Ou dekouvri se mantò yo ye.³ Ou
 gen anpil pasians, ou souffri anpil poutèt mwen. Ou pa dekouraje.⁴ Men, men repwòch mwen gen
 pou m' fè ou: Koulye a ou pa renmen m' jan ou te renmen m' anvan an.⁵ Chonje kote ou te ye
 anvan ou tonbe a, tounen vin jwenn Bondye. Reprann lavi ou t'ap mennen anvan an. Si ou pa tounen
 vin jwenn Bondye, m'ap vini kote ou ye a, m'ap wete chandelie ou la nan plas kote l' ye a.⁶ Men,
 malgre sa, ou gen kichòy ki bon: ou pa vle wè sa bann Nikolayit yo ap fè a. Mwen menm tou, mwen
 pa vle wè yo.⁷ Se pou moun ki gen zòrèy pou yo tandè tandè sa Lespri Bondye a ap di legliz yo!
 Tout moun ki va goumen jouk yo genyen batay la, m'ap ba yo dwa pou yo manje nan piebwa ki
 bay lavi a, piebwa ki nan mitan jaden Bondye a.⁸ ¶ Ekri zanj legliz ki nan lavil Esmen lan. Di l'
 konsa: Moun ki premie a ak dènnye a, li menm ki te mouri, men ki te leve soti vivan nan lanmò a,
 men sa l' voye di ou:⁹ Mwen konnen jan w'ap souffri. Mwen konnen jan ou pòv. Men, pou di vre,
 ou rich anpil! Mwen konnen jan moun ki swadizan jwif yo ap pale ou mal. Men, se pa jwif yo ye.
 Se yon bann moun Satan.¹⁰ Ou pa bezwen pè pou sa ou pral souffri ankò. Koute, Satan pral chache
 sonde nou tout, li pral jete anpil nan nou nan prizon. Nou pral souffri pandan dis jou. Men, kenbe
 fèm menm si nou gen pou n' mouri. M'a ban nou lavi pou rekonpans.¹¹ Se pou moun ki gen zòrèy
 pou yo tandè tandè sa Lespri Bondye a ap di legliz yo. Moun ki va goumen jouk yo genyen batay
 la p'ap souffri dezyèm lanmò a.¹² ¶ Ekri zanj legliz ki nan lavil Pègam lan. Di l' konsa: Men sa
 moun ki gen nepe file de bò a voye di ou:¹³ Mwen konnen kote ou rete a se la Satan chita. Ou pa
 lage m', ou pa pèdi konfians ou gen nan mwen an, menm lè yo te fè touye Antipas ki mouri poutèt

¹⁴
 mwen la nan mitan nou, nan lavil kote Satan rete a. Men, men repwòch mwen gen pou m' fè ou: ou gen kèk moun lakay ou k'ap swiv konsèy Balaram te bay lè li te moutre Balak sa pou l' te fè pou fè pitit Izrayèl yo tonbe nan peche, pou l' te fè yo manje viann bèt yo te ofri pou touye bay

¹⁵
 zidòl, pou l' te fè yo lage kò yo nan imoralite. Konsa tou, ou gen kèk moun lakay ou k'ap swiv

¹⁶
 konsèy Nikolayit yo. Tounen vin jwenn Bondye non. Si ou pa fè sa, talè konsa m'ap vini, m'ap

¹⁷
 goumen ak moun sa yo ak nepe k'ap soti nan bouch mwen an. Se pou moun ki gen zòrèy pou yo tande tande sa Lespri Bondye a ap di legliz yo. Tout moun ki va goumen jouk yo genyen batay la, m'a ba yo laman ki kache a. M'ap ba yo chak yon ti wòch blan ak yon lòt non ekri sou li, yon

¹⁸
 non pesonn pa konnen esepite moun ki resevwa l' la. ¶ Ekri zanj legliz ki nan lavil Tiyati a. Di l' konsa: Men sa pitit Bondye a voye di ou, li menm ki gen je l' yo tankou de flanm dife, ak pie l'

¹⁹
 yo klere tankou kwiv poli. Mwen konnen tou sa w'ap fè. Mwen konnen jan ou gen renmen nan kè ou, jan ou gen konfians, jan ou fè sèvis ou byen, ak jan ou gen anpil pasians. Mwen konnen tou

²⁰
 w'ap travay koulye a pi plis pase anvan. Men, men repwòch mwen gen pou m' fè ou: w'ap tolere fanm yo rele Jezabèl la k'ap pran pòz pwofèt Bondye li. L'ap detounen sèvitè m' yo, l'ap moutre yo

²¹
 pou yo lage kò yo nan imoralite, pou yo manje viann bèt yo te ofri pou touye bay zidòl. Mwen

²²
 ba l' kont tan pou l' vire kite peche l' yo. Men, li pa vle kite imoralite li a. Se poutèt sa, mwen pral lage l' jete sou yon kabann kote li pral souffri anpil. Tout moun k'ap fè adiltè avè l' yo pral souffri

²³
 anpil tou, si yo pa chanje, si yo pa kite move zak y'ap plede fè ansanm avè l' yo. Apre sa, m'ap fè tout pitit li yo mouri. Konsa, tout legliz yo va konnen mwen se moun ki konnen tout lide lèzòm ap fè nan tèt yo ak tout santiman yo gen nan kè yo. M'ap bay chak moun sa yo merite dapre sa yo

²⁴
 fè. Pou nou menm, lòt manm legliz nan lavil Tiyati yo ki pa swiv move konsèy sa yo, ki pa t' aprann sa bann moun sa yo ap rele gwo sekre Satan an, men sa m'ap di nou: Mwen p'ap ban nou

²⁵
 lòt chay pase sa. Men, kenbe sa nou genyen an byen fèm jouk jou m'a tounen. Tout moun ki

²⁶
 va goumen jouk yo genyen batay la, epi ki va toujou ap fè sa m' vle yo fè a jouk sa kaba, m'a ba

²⁷
 yo pouvwa sou tout nasyon, menm jan Papa m' te ban m' pouvwa sa a tou. Y'a gouvènen nasyon

²⁸
 yo ak yon baton fè, y'a kraze yo an miyèt moso tankou yon kannari yo kraze. M'a ba yo bèl

²⁹
 zetwal ki klere chak maten an tou. Se pou moun ki gen zòrèy pou yo tande tande sa Lespri Bondye a ap di legliz yo.

Chapter 3

¹ ¶ Ekri zanj legliz ki nan lavil Sad la. Di l' konsa: Men sa moun ki gen sèt Lespri Bondye yo ak sèt zetwal yo voye di ou: Mwen konnen tou sa w'ap fè. Mwen konnen tout moun konprann ou vivan. Men, ou mouri. ² Souke kò ou, bay ti rèz lavi ou rete a fòs anvan ou fin mouri nèt. Paske, mwen wè sa w'ap fè a pa fin kòrèk devan Bondye mwen an. ³ Chonje sa yo te moutre ou la. Chonje jan ou te resevwa li. Obeyi l', tounen vin jwenn Bondye. Si ou pa sispann dòmi, m'ap vini sou ou tankou yon vòlè, san ou pa atann. ⁴ Men, gen kèk moun nan nou nan lavil Sad la ki te kenbe rad yo pwòp. Y'a mache ansanm avè m' ak rad blan yo, paske yo merite sa. ⁵ Tout moun ki goumen jouk yo genyen batay la pral mete rad blan an sou yo. Mwen p'ap wete non yo nan liv ki gen non moun ki gen lavi a. M'ap rekonèt yo pou moun pa m' devan Papa mwen ak devan zanj li yo. ⁶ Se pou moun ki gen zòrèy pou yo tande tande sa Lespri Bondye a ap di legliz yo. ⁷ ¶ Ekri zanj legliz ki nan lavil Filadèlfi a. Di l' konsa: Moun ki sen an, moun k'ap di verite a, moun ki gen kle wa David la nan men l' lan, moun ki lè li louvri pesonn pa ka fèmen, lè l' fèmen pesonn pa ka louvri a, men sa l' voye di ou: ⁸ Mwen konnen tou sa w'ap fè. Mwen konnen ou pa gen anpil kouraj. Malgre sa, w'ap kenbe pawòl mwen. Ou pa lage mwen. Mwen louvri yon pòt devan ou, pesonn p'ap ka fèmen li. ⁹ Men, pou moun ki fè pati gwoup Satan an, bann mantò sa yo k'ap pran pòz jwif yo men ki pa jwif, m'ap fòse yo vin mete ajenou devan ou pou yo ka respekte ou. Se pou yo rekonèt se ou menm mwen renmen. ¹⁰ Menm jan ou te kenbe lòd mwen te ba ou lè m' te mande ou pou te pran pasians lan, konsa tou, m'a kenbe ou, m'a pwoteje ou nan malè ki pral vin sou tout latè a. Se va yon gwo eprèy pou tout moun ki sou latè. ¹¹ Anvan lontan mapral vini. Kenbe sa ou genyen an fèm pou pesonn pa wete rekonpans ou nan men ou. ¹² Tout moun ki va goumen jouk yo genyen batay la, m'ap fè yo tounen yon gwo poto nan kay Bondye a. Apre sa, yo p'ap janm soti. M'a make non Bondye ansanm ak non lavil Bondye a, lòt Jerizalèm k'ap desann sot nan sièl la, sou yo. M'ap make lòt non mwen an sou yo tou. ¹³ Se pou tout moun ki gen zòrèy pou yo tande tande sa Lespri Bondye a ap di legliz yo. ¹⁴ ¶ Ekri zanj legliz ki nan lavil Lawodise a. Di l' konsa: Moun ki verite a, moun k'ap di verite a jan l' ye a san bay manti, li menm ki sous tou sa Bondye krewe a, men sa li voye di ou: ¹⁵ Mwen konnen tou sa w'ap fè. Mwen konnen ou pa ni cho ni frèt. Pito ou te cho osinon ou te frèt. ¹⁶ Men, ou kièd, ou pa cho, ou pa frèt. Mwen pral vonmi ou soti nan bouch mwen. ¹⁷ W'ap plede di: Mwen rich, zafè m' ap mache byen. Mwen pa manke anyen. Pòdiab! Konnen ou pa konnen jan ou malere, jan ou nan gwo nesesite, jan ou pòv, toutoni ak tou de je ou yo pete! ¹⁸ Se poutèt sa, mwen ta ba ou konsèy achte nan men m' bon lò san melanj ki pase nan dife. Konsa

ou va rich tout bon. Achte nan men m' tou rad blan pou mete sou ou pou moun pa wè jan ou toutouni.
 Sa se yon wont pou ou. Achte nan men m' tou renmèd pou mete nan je ou pou ou ka wè. ¹⁹ Moun
 mwen renmen se yo mwen korije, se yo mwen peni. Mete plis aktivite nan sèvis ou. Tounen vin
²⁰ jwenn Bondye. Koute. Men mwen kanpe la devan pòt la, m'ap frape. Si yon moun tande vwa
 m', si l' louvri pòt la ban mwen, m'a antre lakay li, m'a manje ansanm avè l', la manje ansanm avèk
²¹ mwen. Tout moun ki goumen jouk yo genyen batay la, m'ap ba yo dwa chita bò kote m' lè m'a
 sou fòtèy mwen an, menm jan mwen menm mwen te goumen jouk mwen te genyen batay la, pou
 koulye a mwen chita bò kot Papa m' ki chita sou fòtèy li a. ²² Se pou moun ki gen zòrèy pou yo
 tande tande sa Lespri Bondye a ap di legliz yo.

Chapter 4

¹ ¶ Apre sa, mwen fè yon lòt vizyon, mwen wè yon pòt louvri nan sièl la. Vwa ki t'ap sonnen
 nan zòrèy mwen tankou yon klewon an, menm vwa ki t'ap pale avè m' anvan an, di m' konsa: Moute
 bò isit, m'a fè ou wè sa ki gen pou rive apre sa. ² Lamenm, Lespri Bondye a fè m' fè yon vizyon,
 mwen wè yon fòtèy nan sièl la ak yon moun chita sou li. ³ Figi moun lan te klere tankou piè bijou
 yo rele jasp la ak sa yo rele sadwan lan. Fòtèy la menm te nan mitan yon gwo lakansièl ki te klere
 tankou yon piè emwòd. ⁴ Tout arebò fòtèy la te gen vennkat lòt fòtèy ak vennkat granmoun chita
 sou yo. Granmoun yo te gen rad tout blan sou yo, ak yon kouwòn an lò sou tèt yo chak. ⁵ Kout
 zèklè t'ap pati soti nan fòtèy la ansanm ak mizik ak kout loraj. Te gen sèt flanbo limen ki t'ap boule
 devan fòtèy la; se sèt Lespri Bondye yo. ⁶ Devan fòtèy la tou te gen yon bagay ki te sanble yon
 lanmè an glas ki klere kou kristal. Toupre fòtèy la, te gen kat bèt vivan kanpe yonn nan chak
 direksyon. Yo te gen anpil je devan kou dèyè. ⁷ Premie a te sanble ak yon lyon. Dezyèm lan te
 sanble ak yon jenn ti towò bèf. Twazièm lan te gen yon figi ki te sanble ak figi moun. Katriyèm
 lan te sanble ak yon gwo malfini k'ap vole. ⁸ ¶ Yo chak yo te gen sis zèl. Tout kò yo se te je andedan
 kou deyò. Lajounen kou lannwit y'ap chante san rete: Wi, li sen, li sen, li sen vre, Bondye sèl Mèt
⁹ ki gen tout pouvwa a, Li menm ki te la, ki la koulye a, ki gen pou vini an. Kat bèt vivan yo t'ap
 chante pou fè lwanj moun ki chita sou fòtèy la, pou rann li onè, pou di l' mès, li menm ki vivan
¹⁰ pou tout tan an. Chak fwa yo pran chante, vennkat granmoun yo tonbe ajenou fas atè devan
 moun ki chita sou fòtèy la, yo adore moun ki vivan pou tout tan an. Yo jete kouwòn yo devan fòtèy

11
 la. Yo di: O Bondye, Mèt nou, ou merite pou ou resevwa lwanj, respè ak pouvwa. Se ou menm ki fè tout bagay. Si yo la, si yo gen lavi, se paske ou vle l'.

Chapter 5

¹ ¶ Apre sa, mwen wè yon liv nan men dwat moun ki te chita sou fòtèy la. Liv la te gen fòm yon woulo papie, li te ekri sou anndan ak sou deyò. ² Li te sele sèt kote. Mwen wè yon zanj ki gen anpil fòs ki t'ap pale byen fò. Li t'ap di: Ki moun ki ka kase sele yo pou louvri liv la? ³ Men, pa t' gen pesonn ni nan sièl la, ni sou tè a, ni anba tè a ki te kapab louvri liv la pou wè sa ki te ladan li. ⁴ Mwen t'ap kriye anpil, paske pa t' gen pesonn ki te kapab louvri liv la pou gade sa ki te ladan li. ⁵ Lè sa a, yonn nan granmoun yo di mwen konsa: Pa kriye. Gade. Men lyon ki soti nan fanmi Jida a, pitit pitit David la, ki te genyen batay la. Li ka kase sèt sele yo pou louvri liv la. ⁶ ¶ Mwen wè yon ti Mouton kanpe nan mitan fòtèy la, nan mitan kat bèt vivan yo ak granmoun yo. Ti Mouton an te tankou yon mouton yo te touye deja. Li te gen sèt kòn ak sèt je nan tèt li: se te sèt Lespri Bondye te voye toupatou sou latè. ⁷ Ti Mouton an pwoche, li pran liv la nan men dwat moun ki te chita sou fòtèy la. ⁸ Lè li pran liv la, kat bèt vivan yo ansanm ak vennkat granmoun yo tonbe ajenou devan ti Mouton an. Yo chak te gen nan men yo yon gita pou fè mizik ak yon gode fèt an lò ki te plen lansan. Lansan an se lapriyè moun Bondye yo. ⁹ Yo t'ap chante yon kantik tou nèf ki pati konsa: Wi, ou merite vre, ou kapab pran Liv la pou kase sele yo, paske yo te touye ou. Se konsa ou bay san ou pou achte yon bann moun pou Bondye, moun tout ras, tout lang, tout pèp, tout nasyon. ¹⁰ Ou fè yo tounen yon sèl nasyon pou Wa a, yon bann prèt k'ap sèvi Bondye nou an. Se yo ki va gouvènen sou latè a. ¹¹ Mwen gade ankò, mwen tande vwa yon bann zanj: Yo te tèlman anpil, moun pa t' kapab konte yo. Yo te kanpe fè wonn kote fòtèy la te ye a ansanm ak bèt vivan yo ak granmoun yo. ¹² Zanj yo t'ap chante byen fò: Ti Mouton yo te touye a merite vre pou yo ba l' pouvwa, richès, bon konprann ak fòs, respè, onè ak lwanj. ¹³ Apre sa, mwen tande tout kreyati Bondye yo nan sièl la, sou latè, anba tè a, nan lanmè, yo tout yo t'ap chante: Lwanj, respè, pouvwa, otorite pou Moun ki chita sou fòtèy la, ak pou ti Mouton an pou tout tan. ¹⁴ Kat bèt vivan yo t'ap reponn: Wi, se vre. Granmoun yo menm tonbe ajenou, yo t'ap adore.

Chapter 6

¹ ¶ Apre sa mwen wè ti Mouton an kase yonn nan sèt sele yo. Lè sa a, mwen tande yonn nan
kat bèt vivan yo pale, ou ta di yon kout loraj. Li di: Vini non! ² Mwen gade, mwen wè yon chwal
blan. Moun ki te moute l' la te kenbe yon banza nan men l'. Yo ba l' yon kouwòn met sou tèt li. Li
pati tankou yon moun ki fin genyen yon batay men ki soti pou l' genyen ankò. ³ ¶ Apre sa, ti Mouton
an kase dezyèm sele a. Mwen tande dezyèm bèt vivan an ki t'ap di: Vini non! ⁴ Lè sa a, yon lòt
chwal koulè wouj soti. Moun ki te moute l' la resevwa pouvwa pou l' mete lagè toupatou sou latè,
pou lèzòm ka yonn touye lòt. Yo ba l' yon gwo nepe kenbe nan men li. ⁵ Apre sa, ti Mouton an
kase twazièm sele a. Mwen tande twazièm bèt vivan an ki t'ap di: Vini non! Mwen gade, mwen wè
yon chwal nwa. Moun ki te moute l' la te kenbe yon balans nan men li. ⁶ Mwen tande yon vwa ki
soti nan mitan kat bèt vivan yo ki t'ap di: Yon mezi diri pou yon jounen travay. Twa mezi pitimi
pou yon jounen travay. Men, pa manyen ni lwil la ni diven an. ⁷ Apre sa, ti Mouton an kase katriyèm
sele a. Mwen tande katriyèm bèt vivan an ki t'ap di: Vini non! ⁸ Mwen gade, mwen wè yon chwal
koulè vèt. Moun ki te moute l' la te rele lanmò. Moun ki kanpe pou kote mò yo ye a t'ap mache
dèyè li. Yo ba yo pouvwa sou yon ka (1/4) latè a, pou yo touye moun ak nepe, ak grangou, ak
maladi, ak bèt nan bwa ki sou latè. ⁹ ¶ Apre sa, ti Mouton an kase senkièm sele a. Lè sa a, mwen
wè anba lotèl la nanm tout moun yo te touye paske yo t'ap fè konnen Pawòl Bondye a, paske yo
t'ap di verite a jan l' ye a. ¹⁰ Yo t'ap rele byen fò: O Mèt, ou menm ki sen, ou menm ki verite a,
konbe tan ou gen pou tann ankò anvan pou ou vini jije moun ki rete sou latè a, pou ou vin peni yo
paske yo te touye nou? ¹¹ Yo ba yo chak yon rad blan mete sou yo. Apre sa, yo mande yo pran
pasians pou yon ti tan ankò, jouk kantite frè ak kanmarad sèvis ki gen pou mouri tankou yo a fin
kont. ¹² Apre sa, mwen wè ti Mouton an kase sizièm sele a. Lè sa a, yon gwo tranblemanntè fèt,
sòlèy la vin tou nwa, tankou yon gwo moso twal nwa byen pwès. Lalin lan menm te vin tou wouj
tankou san. ¹³ Zetwal yo menm t'ap sot nan sièl la tonbe sou latè, tankou fig frans tou vèt k'ap
tonbe lè gwo van ap souke pie fig la. ¹⁴ Sièl la disparèt nèt tankou yon woulo papie yo vlope. Yo
rache tout mòn yo ak tout zile yo, yo mete yo yon lòt kote. ¹⁵ Tout wa sou latè, chèf, kòmandan,
moun rich, grannèg ansanm ak tout lòt moun, kit yo esklav, kit yo lib, yo tout al kache nan twou
wòch ak dèyè gwo wòch nan mòn yo. ¹⁶ Yo t'ap pale ak mòn yo ansanm ak wòch yo tankou ak
moun. Yo t'ap di yo: Tonbe sou nou. Kache nou pou moun ki chita sou fòtèy la pa wè nou, pou

kòlè ti Mouton an pa tonbe sou nou. ¹⁷ Paske, gwo jou kòlè a rive. Ki moun ki ka kenbe tèt avèk li?

Chapter 7

¹ ¶ Apre sa, mwen wè kat zanj kanpe nan kat kwen latè a. Yo t'ap kenbe kat van yo pou okenn van pa t' soufle ni sou tè, ni sou lanmè, ni sou okenn piebwa. ² Lè sa a, mwen wè yon lòt zanj ki moute soti bò kote solèy leve a. Li te gen nan men l' letanp Bondye vivan an. Li rele byen fò, li pale ak kat zanj yo ki te resevwa pouvwa pou ravaje tè a ak lanmè a, li di yo: ³ Poko fè ni tè a, ni lanmè a, ni piebwa yo okenn donmaj. Tann nou fin make sèvitè Bondye yo ak letanp lan sou fwon yo. ⁴ Apre sa, yo di m' kantite moun ki te make ak letanp Bondye a sou fwon yo. Te gen antou sankarannkatmil (144.000) nan tout branch ras pèp Izrayèl la. ⁵ Te gen douzmil (12.000) nan branch Jida a ki te make ak letanp lan, douzmil nan branch Woubenn lan, douzmil nan branch Gad la, ⁶ douzmil nan branch Asè a, douzmil nan branch Nèftali a, douzmil nan branch Manase a, ⁷ douzmil nan branch Simeyon an, douzmil nan branch Levi a, douzmil nan branch Isaka a, ⁸ douzmil nan branch Zabilon an, douzmil nan branch Jozèf la, douzmil nan branch Benjamen an. ⁹ Apre sa, mwen gade ankò, mwen wè yon gwo foul moun. Pesonn pa t' kapab konte kantite ki te gen ladan li. Se te moun tout lòt nasyon, tout kalite ras, pèp tout peyi ak tout lang. Yo te kanpe la devan fòtèy ¹⁰ la ak devan ti Mouton an. Yo te gen rad tou blan sou yo, yo te gen fèy palmis nan men yo. Yo t'ap rele byen fò, yo t'ap di: Se Bondye nou an ki chita sou fòtèy la. Se li menm ansanm ak ti Mouton an ki vin delivre nou. ¹¹ Tout zanj yo kanpe, yo fè yon wonn, yo mete fòtèy la, granmoun yo ak kat bèt vivan yo nan mitan yo. Yo lage kò yo atè devan fòtèy la, yo bese tèt yo byen ba pou adore Bondye, ¹² yo t'ap di: Se vre wi. Lwanj, onè, bon konprann, rekonesans, respè, pouvwa ak fòs, tou sa pou Bondye nou an pou tout tan. Amèn. ¹³ ¶ Apre sa, yonn nan granmoun yo mande mwen: Moun sa yo ki gen rad tou blan sou yo a, ki moun yo ye? Ki bò yo soti? ¹⁴ Mwen reponn li: Se ou menm ki konnen wi, mèt mwen. Lè sa a, li di mwen: Se moun ki pase anba gwo pèsèkasyon an. Yo lave rad yo, yo blanchi yo nan san ti Mouton an. ¹⁵ Se poutèt sa, yo kanpe la devan fòtèy Bondye a, lajounen kou lannwit y'ap sèvi nan tanp li a. Moun ki chita sou fòtèy la ap toujou la pou pwoteje yo. ¹⁶ Yo p'ap janm grangou, yo p'ap janm swaf dlo. Ni solèy, ni okenn lòt gwo chalè p'ap kapab

¹⁷
boule yo. Paske, ti Mouton ki nan mitan fòtèy la va tankou yon gadò pou yo. La mennen yo bò sous dlo ki bay lavi a. Se Bondye menm ki va siye dlo nan je yo.

Chapter 8

¹
¶ Lè ti Mouton an kase setièm sele a, pandan yon demi (1/2) lè de tan, ou pa t' tande okenn bri nan sièl la. ² Apre sa, mwen wè sèt zanj ki te kanpe devan Bondye. Yo ba yo sèt klewon. ³ Yon lòt zanj vin kanpe toupre lotèl la, li te gen yon lansanswa an lò nan men li. Yo ba l' anpil lansan pou l' te ofri bay Bondye ansanm ak lapriyè pèp Bondye a, sou lotèl an lò ki te devan fòtèy la.

⁴ Lafimen lansan li t'ap boule a pran moute nan men zanj ki te devan Bondye a, ansanm ak lapriyè pèp Bondye a. ⁵ Apre sa, zanj lan pran lansanswa a, li plen l' ak dife ki te sou lotèl la, li jete l' sou latè. Lè sa a, te gen kout loraj, zèklè, divès kalite bri ak tranblemanntè. ⁶ Sèt zanj ki te gen sèt klewon yo pare kò yo pou yo kònen. ⁷ ¶ Premie zanj lan kònen klewon l' lan. Lagrèl, dife mele ak san tonbe sou latè. Yon tiè (1/3) nan latè ak yon tiè nan piebwa yo boule ansanm ak tout zèb vèt yo. ⁸ Apre sa, dezyèm zanj lan kònen klewon l' lan. Menm lè a, yo jete yon bagay tankou yon gwo mòn k'ap boule nan lanmè a. Yon tiè (1/3) dlo lanmè a tounen san. ⁹ Yon tiè nan tout bèt vivan nan lanmè a mouri. Yon tiè nan batiman ki sou lanmè a peri. ¹⁰ Apre sa, twazièm zanj lan kònen klewon l' lan. Yon gwo zetwal ki t'ap boule tankou yon bwa chandèl tonbe soti nan sièl la. Li tonbe sou yon tiè nan tout larivyè ak sous dlo yo. ¹¹ Yo te rele zetwal sa a: Lapsent. Yon tiè nan tout dlo yo vin anmè kou fièl. Anpil moun ki te bwè dlo sa a te mouri, paske dlo a te vin anmè. ¹² Apre sa, katriyèm zanj lan kònen klewon l' lan. Yon tiè (1/3) nan solèy la, yon tiè nan lalin lan, ak yon tiè nan zetwal yo domaje. Konsa, yo tout yo pèdi yon tiè nan limiè yo konn bay la. Pandan yon tiè ¹³ lajounen an te fè nwa kou lank. Konsa tou, pandan yon tiè lannwit lan te fè tou nwa. Mwen gade ankò, mwen tande yon gwo malfini ki t'ap vole byen wo nan sièl la. Li t'ap pale byen fò, li t'ap di: Ala de malè! Sa pral rèd nèt pou moun ki sou latè a, lè kout klewon twa lòt zanj yo va kònen.

Chapter 9

¹
 ¶ Apre sa, senkièm zanj lan kònen klewon l' lan. Mwen wè yon zetwal soti nan sièl la tonbe sou latè. Yo ba l' kle pou louvri pi ki mennen desann nan gwo twou san fon an. ² Zetwal la louvri pi ki mennen nan gwo twou san fon an. Yon gwo lafimen soti ladan l', tankou lafimen yon gwo fou k'ap boule. Lafimen ki t'ap soti nan pi a bouche solèy la. Sièl la vin tou nwa. ³ Yon bann krikèt vèt soti nan lafimen an, yo mache ale toupatou sou latè. Yo te ba yo menm pouvwa ak eskòpyon. ⁴ Yo te di yo pou yo pa t' fè malè sou okenn zèb, ni sou okenn piebwa ni sou okenn lòt plant. Se sou moun sèlman pou yo te fè malè. Epi se pa sou tout moun non, sèlman sou moun ki pa t' pote mak letanp Bondye a sou fwon yo. ⁵ Krikèt yo pa t' gen dwa touye moun sa yo. Men, pandan senk mwa yo te gen dwa fè yo soufri. Krikèt yo fè moun yo soufri tankou si se eskòpyon ki te mòde yo. ⁶ Pandan senk mwa sa yo, moun va chache lanmò, men yo p'ap jwenn lanmò. Y'a anvi mouri, men lanmò va pase lwen yo. ⁷ Krikèt yo te sanble ak chwal ki pare pou al nan batay. Sou tèt yo chak te gen yon bagay ki sanble ak yon kouwòn lò. Figi yo menm te tankou figi moun. ⁸ Yo te gen cheve sou tèt yo tankou cheve fi. Dan yo menm te tankou dan lyon. ⁹ Sou lestonmak yo, yo te gen yon plak an fè pou pwoteje yo. Lè yo bat zèl yo, yo fè bri tankou yon bann kabwèt chwal ki pral nan batay. ¹⁰ Yo gen menm ke ak eskòpyon, ak yon pikan nan pwent ke a. Se avèk ke yo yo te gen pouvwa fè moun mechanste pandan senk mwa. ¹¹ Yo te gen yon wa alatèt yo. Se zanj gwo twou san fon an. Nan lang ebre yo rele l': Abadon. Nan lang grèk yo rele l': Apolyon, ki vle di: moun k'ap krase brize a. ¹² Premie malè a te pase. Te gen de (2) lòt malè ankò ki te gen pou vini apre sa. ¹³ ¶ Lè sa a, sizièm zanj lan kònen klewon l' lan. Mwen tande yon vwa ki t'ap soti nan kat kwen lotèl an lò ki te devan Bondye a. ¹⁴ Vwa a pale ak sizièm zanj ki te kenbe klewon an. Li di li konsa: Lage kat zanj ki mare nan chenn bò gwo larivyè Lefrat la. ¹⁵ Yo lage kat zanj yo. Yo te pare yo pou sa menm, pou lè sa a, pou jou sa a, nan mwa sa a, nan lanne sa a, pou yo te ka touye yon moun sou chak twa moun ki sou latè. ¹⁶ Yo di m' kantite sòlda sou chwal ki te genyen: Te gen desan milyon (200.000.000). ¹⁷ Men ki jan mwen te wè chwal yo ak kavalie yo nan vizyon an: Kavalie yo te gen yon kalite chemiz an fè pou pwoteje lestonmak yo. Chemiz yo te wouj kou dife, ble kou digo, jòn kou safran. Tèt chwal yo menm te tankou tèt lyon. Dife ansanm ak lafimen epi souf t'ap soti nan bouch yo. ¹⁸ Twa bagay sa yo ki t'ap soti nan bouch chwal yo, se te twa kalamite ki te touye yon moun sou chak twa moun sou latè. ¹⁹ Paske se nan bouch yo chwal yo te gen tout pouvwa sa a ansanm ak nan ke yo. Baton ke yo menm te sanble ak sèpan: yo te gen yon tèt pou yo te fè

20
 moun mechanste. Malgre sa, rès moun sou latè yo, sa ki pa t' mouri anba kalamite sa yo, pa t' sispann adore Satan ak zidòl fèt an lò, an ajan, an bwonz, an wòch oswa an bwa, zidòl ki pa ka wè,
 21
 ki pa ka tandè, ki pa ka mache. Wi, atousa, moun sa yo pa t' chanje jan yo t'ap viv la, yo pa t' sispann touye moun, fè maji, lage kò yo nan imoralite ak vòlò zafè moun.

Chapter 10

1 ¶ Apre sa, mwen wè yon lòt zanj ki te gwonèg anpil desann soti nan sièl la. Li te vlope nan yon gwo nwaj ak yon lakansièl kouwonnen tout tèt li. Figi l' te tankou solèy la. De janm li yo te tankou de gwo flanm dife. 2 Li te kenbe yon ti liv louvri nan men li. Li mete pie dwat li sou lanmè, pie gòch li sou tè fèm. 3 Li pran rele byen fò tankou yon lyon k'ap gwonde. Lè li fin rele, sèt loraj yo pran gwonde reponn li. 4 Fini yo fin pale, mwen tapral ekri sa yo te di a, lè m' tandè yon vwa nan sièl la ki di m' konsa: Sa sèt loraj yo sot di a, se yon sekre pou ou kenbe. Pa ekri li. 5 Apre sa, zanj mwen te wè kanpe sou lanmè ak sou tè fèm lan leve men dwat li nan sièl. 6 Li fè sèman sou non Bondye k'ap viv pou tout tan an, Bondye ki fè sièl la ak tou sa ki ladan l', tè a ak tou sa ki ladan li, ansanm ak lanmè a ak tou sa ki ladan li. Zanj lan di: Yo p'ap bay dèlè ankò. 7 Men lè setièm zanj lan va pran kònen klewon l' lan, Bondye pral fè sa li gen pou l' fè dapre plan travay li te kenbe sere nan tèt li a, jan l' te fè pwofèt ki t'ap sèvi l' yo konn sa. 8 ¶ Apre sa, vwa mwen te tandè sot nan sièl la pran pale avè m' ankò. Li di mwen konsa: Ale pran ti liv ki louvri nan men zanj ki kanpe sou lanmè ak sou tè fèm lan. 9 Mwen pwoche bò kote zanj lan. Mwen mande l' pou l' ban m' ti liv la. Li di mwen konsa. Men li, pran l', manje li. L'ap gen yon gou anmè nan lestonmak ou. Men, nan bouch ou l'ap dous tankou siwo myèl. 10 Mwen pran ti liv la nan men li. Mwen manje l', li te dous tankou siwo myèl nan bouch mwen. Men, lè m' vale l', li te anmè kou fièl nan lestonmak mwen. 11 Apre sa, yo di mwen: Se pou ou fè konnen mesaj Bondye a ankò, mesaj ki pale sou anpil pèp, anpil nasyon, anpil lang ak anpil wa.

Chapter 11

¹
 ¶ Apre sa, yo ban m' yon baton wozo ki sèvi pou pran mezi. Yo di mwen konsa: Leve. Ale
 pran mezi kay Bondye a ansanm ak lotèl la. Konte konbe moun k'ap adore nan tanp lan. ² Men, pa
 okipe gwo lakou ki dèyè tanp lan, pa mezire li. Paske se pou etranje yo li ye, yo menm ki gen pou
 foule lavil Bondye a anba pie yo pandan karannde mwa. ³ ¶ M'ap voye de temwen m' yo ak rad
 sak sou yo, pou yo fè konnen mesaj Bondye a pandan mil desanswasant (1.260) jou. ⁴ De temwen
 yo se de pie oliv ak de lanp ki kanpe la devan Mèt tout latè a. ⁵ Si yon moun chache fè yo mal, dife
 ap soti nan bouch yo, l'ap detwi tout lènmi yo. Se konsa moun k'ap chache fè yo mal gen pou mouri.
⁶
 Yo gen pouvwa fèmen sièl la pou okenn lapli pa tonbe lè y'ap fè konnen mesaj Bondye a. Yo gen
 pouvwa tou pou yo fè dlo tounen san. Yo gen pouvwa pou yo fè tout kalite kalamite tonbe sou latè,
 kantite fwa y'a vle li. ⁷ Lè y'a fin di sa yo gen pou di a, bèt ki soti nan gwo twou san fon an va mare
 batay ak yo. La kraze yo, la touye yo. ⁸ Kadav yo va rete nan mitan lari gwo lavil la, kote yo te
 kloure Seyè a sou kwa a. Lè sa a, y'a chanje non lavil la. Y'a rele l' Sodòm osinon Lejip. ⁹ Moun
 tout kalite ras ki soti nan tout peyi ak nan tout nasyon ki pale tout lang, va rete la ap gade kadav
 yo pandan twa jou ak yon demi (1/2) jounen. Yo p'ap kite moun antere yo. ¹⁰ Tout moun ki rete
 sou latè pral kontan lè y'a tande de mesie yo mouri. Y'a fè fèt, y'a voye kado yonn bay lòt, paske
¹¹
 se pa ti toumante de pwofèt sa yo pa t' toumante moun ki rete sou latè. Nan mitan katriyèm jou
 a, Bondye te soufle sou yo pou l' ba yo lavi. Souf Bondye a antre nan yo: yo leve vivan ankò. Tout
¹²
 moun ki te wè yo te pè anpil. Lè sa a, de pwofèt yo tande yon vwa soti nan sièl la ki t'ap pale
 byen fò ak yo, li t'ap di yo: Moute bò isit. Yo moute nan sièl la sou yon nwaj devan tout lènmi ki
¹³
 t'ap gade yo. Menm lè a, yon gwo tranblemanntè fèt. Yon kay sou chak dis kay nan lavil la tonbe
 kraze. Sèt mil (7.000) moun mouri nan tranblemanntè sa a. Lòt moun yo menm te pè anpil, yo t'ap
¹⁴
 fè lwanj Bondye ki nan sièl la. ¶ Konsa, dezyèm malè a te pase! Men, atansyon, twazièm lan
¹⁵
 pral vini talè konsa. Apre sa, setiyèm zanj lan kònen klewon l' lan. Mwen tande vwa yon bann
 moun ki t'ap pale byen fò nan sièl la. Yo t'ap di: Pouvwa pou gouvènè sou latè a, koulye a se nan
¹⁶
 men Mèt nou an ak nan men Kris li a sa ye. L'ap gouvènè pou tout tan. Vennkat granmoun yo
¹⁷
 ki te chita sou fòtèy yo devan Bondye tonbe atè, fwon yo touche tè, yo adore Bondye. Yo t'ap
 di: O Mèt, Bondye ki gen tout pouvwa, ou menm ki la epi ki te toujou la, n'ap di ou mèsè dèske ou
¹⁸
 sèvi ak gwo pouvwa ou la, pou ou pran gouvènman an nan men ou. Nasyon yo te move anpil,
 paske lè a rive, ou pral fè wè kòlè ou. Tout moun mouri yo pral pase anba jijman. Lè a rive, ou pral
 bay pwofèt yo, sèvitè ou yo, rekonpans yo, ansanm ak tout moun ki pou ou yo epi ki gen krentif

19

pou ou, piti kou gran. Wi, lè a rive pou ou detwi moun k'ap detwi latè a! Lè sa a, pòt tanp Bondye nan sièl la louvri byen gran. Yo te ka wè bwat ki te gen kontra Bondye a anndan tanp lan. Zèklè pran klere, kout loraj pran gwonde, moun tande tout kalite bri. Tè a tranble, lagrèl t'ap tonbe an kantite.

Chapter 12

¹ ¶ Yon gwo siy parèt nan sièl la: se te yon fanm ki te vlope nan solèy la tankou nan yon rad. Lalin lan te anba pie li. Li te gen douz zetwal kouwonnen tèt li. ² Li te prèt pou l' te akouche: soufrans ak doulè tranche t'ap fè l' rele. ³ Yon lòt siy te parèt nan sièl la tou: se te yon gwo dragon wouj. Li te gen sèt tèt ak dis kòn, ak yon kouwòn sou chak tèt li yo. ⁴ Sou chak twa zetwal ki nan sièl la, li pran yonn li rache l' ak ke l', li voye l' jete sou latè. Li te kanpe la devan fanm ki tapral akouche a, pou l' te ka devore ti pitit la kou l' fèt. ⁵ Fanm lan fè yon ti pitit gason ki gen pou gouvènè tout nasyon yo ak yon baton fè. Men, yo pran ti pitit la, yo mennen l' bò kot Bondye, bò kot fòtèy la. ⁶ Fanm lan menm kouri ale nan dezè a, kote Bondye te pare yon plas pou yo te ba l' manje pandan mildesanswasant (1.260) jou. ⁷ Lè sa a, yon sèl batay pete nan sièl la: Michèl ak zanj li yo pran goumen ak dragon an. Dragon an menm te gen zanj pa l' yo avè l' pou goumen ak Michèl. ⁸ Men, dragon an pèdi batay la, yo pa ba l' dwa rete nan sièl la ankò, ni li menm, ni zanj li yo. ⁹ Yo jete gwo dragon an deyò. Se li menm, sèpan ki la depi lontan an, li menm yo rele diab la osinon Satan, k'ap plede twonpe tout moun. Yo voye l' jete sou latè ansanm ak tout zanj li yo. ¹⁰ Apre sa, mwen tande yon gwo vwa nan sièl la ki t'ap di: Koulye a, Bondye pral vin delivre nou. Koulye a Bondye fè wè li gen pouvwa, se li ki sèl Mèt! Koulye a, Kris li a fè wè otorite li. Paske, moun ki t'ap plede akize frè nou yo, moun ki te kanpe la devan Bondye, lajounen kou lannwit, ap pote plent pou yo a, yo mete l' deyò nan sièl la. ¹¹ Frè nou yo goumen ak li jouk yo gen batay la, gremesi san ti Mouton an ki te koule ak verite yo t'ap pibliye a: yo pa t' renmen lavi yo jouk pou yo ta pè lanmò. ¹² ¶ Se poutèt sa, fè kè n' kontan, nou menm sièl ak tout moun ki rete nan sièl la. Men, malè pou latè ak lanmè, paske Satan desann sou nou. Li move anpil, paske li konnen pa rete l' anpil tan ankò. ¹³ Lè dragon an wè se tout bon yo te jete l' sou latè, li pran kouri dèyè fanm ki te fè pitit gason an. ¹⁴ Men, yo bay fanm lan de gwo zèl malfini pou l' te ka vole ale nan plas li nan dezè a, byen lwen sèpan an. Se la yo ba l' manje pandan twazan sis mwa. ¹⁵ Lè sa a, sèpan an louvri bouch li, li

konmanse vonmi dlo. Dlo a fè yon gwo larivyè ki kouri dèyè fanm lan pou pote l' ale. ¹⁶ Men, latè vin bay fanm lan konkou, li louvri bouch li, li vale tout dlo ki t'ap soti nan bouch dragon an.

¹⁷

(17-18) Se pa ti move dragon an te move sou fanm lan. li al goumen avèk lòt pitit fanm lan, sa vle di ak tout moun k'ap obeyi kòmandman Bondye yo, k'ap kenbe fèm nan verite Jezi te fè nou konnen an. Apre sa, dragon an kanpe bò lanmè a.

Chapter 13

¹ ¶ Apre sa, mwen wè yon bèt ki t'ap soti nan lanmè a, li te gen dis kòn ak sèt tèt. Li te gen yon kouwòn sou chak kòn. Li te gen make sou chak tèt li yo yon non ki te yon gwo jouman pou Bondye.

²

Bèt mwen te wè a te sanble ak yon gwo chat tou jòn ak tach nwa sou tout kò li. pa t' li yo te plat tankou pa t' yon lous, bouch li te tankou bouch lyon. Dragon an ba li pouvwa li, li ba li plas chèf li te genyen an ansanm ak gwo pouvwa li t'ap egzèse a. ³ Yonn nan sèt tèt yo te resevwa yon blese

ki te manke touye li. Men, blese a te geri. Tout moun te sezi wè sa, yo pran swiv bèt la. ⁴ Tout moun pran adore dragon an paske li te bay bèt la pouvwa li. Yo adore bèt la tou, yo t'ap di: Kilès

ki tankou bèt la? Kilès ki ka goumen avè li? ⁵ Bèt la te resevwa pouvwa pou l' te di tout kalite

pawòl awogan pou joure Bondye. Yo ba l' pouvwa fè sa l' vle pandan karannde mwa. ⁶ Bèt la pran pale Bondye mal, li pase non Bondye nan betiz ansanm ak kote Bondye rete a, ak tout moun ki rete

nan sièl la. ⁷ Yo ba l' pouvwa pou l' fè lagè ak tout moun k'ap sèvi Bondye yo, jouk pou l' te genyen

batay la. Yo ba l' pouvwa sou moun tout ras, tout peyi, tout lang ak tout nasyon. ⁸ Tout moun sou latè pral adore l', sa vle di tout moun ki pa t' gen non yo ekri nan liv ki gen non moun ki gen lavi a

depi lè Bondye t'ap kreye tout bagay la, liv ki pou ti Mouton yo te touye a. ⁹ Koute byen wi, si nou

gen zòrèy pou tande! ¹⁰ Moun ki la pou al nan prizon pral nan prizon. Moun ki la pou mouri anba kout nepe pral mouri anba kout nepe. Se poutèt sa, se pou moun Bondye yo gen anpil pasians ak

konfians nan Bondye. ¹¹ ¶ Apre sa, mwen wè yon lòt bèt ki soti anba tè a. Li te gen de kòn tankou

kòn mouton, li t'ap pale tankou yon dragon. ¹² Li pran tout pouvwa premie bèt la pou l' te kòmande devan je li. Li fòse latè ak tout moun ki sou latè pou yo adore premie bèt ki te blese amò men ki te

geri a. ¹³ Dezyèm bèt la t'ap fè anpil gwo mirak, li fè dife soti nan sièl la desann sou latè devan

tout moun. ¹⁴ Moun ki rete sou latè yo te pèdi tèt yo lè yo wè mirak yo te ba l' dwa fè devan je premie bèt la. Li mande yo pou yo fè yon estati bèt ki te blese amò ak kout nepe a men ki te byen

15
vivan an. Dezyèm bèt la resevwa pouvwa pou l' te fè estati premie bèt la tounen vivan. Konsa,
estati a ka pale, li ka touye moun ki pa adore li. 16 Bèt la te egzije pou tout moun, piti kou gran,
rich kou pòv, esklav kou lib, pou yo te resevwa yon mak sou men dwat yo osinon sou fwon yo.
17
Pesonn pa t' kapab ni achte ni vann anyen si li pa t' gen mak sa a, sa vle di si l' pa t' gen non bèt
18
la osinon nimewo ki koresponn ak non l' lan. Bagay sa a mande anpil bon konprann. Moun ki
gen konprann ka resoud pwoblèm nimewo bèt la. Nimewo sa a se non yon moun li ye. Men nimewo
a: sisanswasanssis (666).

Chapter 14

1
¶ Apre sa mwen gade, mwen wè ti Mouton an kanpe sou mòn Siyon an. Li te gen
sankarannkatmil (144.000) moun avèk li. Yo tout te gen non l' ansanm ak non Papa a ekri sou fwon
2
yo. Mwen tande yon vwa ki soti nan sièl la: se te tankou bri yon gwo dlo k'ap tonbe nan yon
kaskad, ou ankò yon gwo kout loraj. Vwa mwen tande a te tankou yon mizik lè anpil moun ap jwe
3
gita. Tout sankarannkatmil moun yo te kanpe la devan fòtèy la, devan kat bèt vivan yo ansanm
ak granmoun yo. Yo t'ap chante yon kantik tou nèf. Pesonn pa t' kapab aprann chante sa a, apa
4
sankarannkatmil (144.000) moun sa yo ki te delivre pami moun ki sou latè. Moun sa yo, se moun
ki pa t' fè sa ki mal ak fanm, yo te rete nan kondisyon pou fè sèvis Bondye. Y'ap mache dèyè ti
Mouton an kote l' pase. Nan tout moun ki sou latè a se yo ki te delivre. Yo se premie moun yo te
5
ofri bay Bondye ansanm ak ti Mouton an. Manti pa t' janm soti nan bouch yo, yo san repwòch.
6
¶ Lè sa a, mwen wè yon lòt zanj ki t'ap vole byen wo nan sièl la. Li te gen yon bon nouvèl pou l'
te bay tout moun ki rete sou latè, bon nouvèl ki la pou tout tan an pou moun tout nasyon, tout ras,
7
tout lang, tout peyi. Li t'ap pale byen fò, li t'ap di: Gen krentif pou Bondye, fè lwanj li! Paske lè
8
a rive, l'ap vin jije lèzòm. Adore moun ki fè sièl la, tè a, lanmè a ak tout sous dlo yo. Yon dezyèm
zanj t'ap swiv premie a, li t'ap di: Li tonbe! Gwo lavil Babilòn lan tonbe! Li te fè moun tout nasyon
9
yo bwè nan diven l' lan ki fò anpil, li fè yo bwè diven gwo imoralite li a. Yon twazièm zanj t'ap
swiv de premie yo. Li t'ap pale byen fò, li t'ap di: Moun ki adore bèt la ansanm ak estati li a, moun
10
ki resevwa mak bèt la sou fwon yo osinon sou men yo, moun sa yo va bwè diven Bondye a tou,
diven kòlè Bondye a, diven san melanj Bondye vide nan gode kòlè li a. Tout moun sa yo pral soufri
11
nan dife ak souf devan zanj Bondye yo ak ti Mouton an. Lafimen dife k'ap fè yo soufri a ap
moute tout tan san rete. Moun ki adore bèt la ak estati li a, ansanm ak tout moun ki resevwa mak

non li a, yo yonn p'ap gen repo lajounen kou lannwit. ¹² Se poutèt sa, se pou pèp Bondye a, moun k'ap obeyi kòmandman Bondye yo, moun k'ap kenbe konfians yo fèm nan Jezi a gen anpil pasians.

¹³

¶ Apre sa mwen tande yon vwa nan sièl la ki di mwen: Men, ekri sa: benediksyon pou tout moun ki depi koulye a mouri nan sèvis Seyè a. Lespri Bondye a reponn, li di: Wi, benediksyon pou yo.

Yo pral poze kò yo apre yo fin travay di. Travay yo fè a pral mache ak yo. ¹⁴ Apre sa, mwen gade ankò, mwen wè yon nwaj tou blan. Yon moun ki sanble ak yon gason te chita anwo nwaj la. Li te

gen yon kouwòn lò sou tèt li ak yon kouto digo byen file nan men li. ¹⁵ Yon lòt zanj soti nan tanp lan, li pran pale ak moun ki te chita sou tèt nwaj la. Li di l' byen fò: Pran kouto digo ou la, sèvi avè

l' pou ranmase rekòt la. Paske, sezon rekòt la rive. Latè pare pou rekòt la. ¹⁶ Lè sa a, moun ki te

chita anwo nwaj la pase kouto digo l' la sou latè. Menm lè a, tout rekòt la fèt sou latè. ¹⁷ Yon lòt

zanj soti nan tanp ki nan sièl la. Li menm tou li te gen yon kouto digo byen file nan men l'. ¹⁸ Yon lòt zanj ankò soti bò lotèl la, li menm li te gen pouvwa sou dife. Li pale ak zanj ki te gen kouto digo file a, li di l' byen fò: Pran kouto digo ou la, sèvi avè l' pou koupe tout grap rezen ki sou tè a,

paske rezen yo mi. ¹⁹ Lè sa a, zanj lan pase kouto digo l' la sou latè, li koupe tout grap rezen ki

sou latè a, li jete yo nan moulen rezen an kote kòlè Bondye a ap kraze yo. ²⁰ Yo kraze tout rezen yo nan moulen andeyò lavil la. San t'ap koule soti nan moulen an tankou dlo larivyè, li kouvri yon distans twasan (300) kilomèt konsa, li moute, li rive wotè bouch chwal yo.

Chapter 15

¹

¶ Apre sa, mwen wè yon lòt siy nan sièl la, yon gwo siy ki pou fè moun sezi: sèt zanj ki te

kenbe sèt kalamite. Se te sèt dènye kalamite yo. Apre yo, Bondye ap sispann fè kòlè. ² Apre sa, mwen wè yon bagay ki te tankou yon lanmè fèt an kristal mele ak dife. Mwen wè tou moun ki te genyen nan batay yo t'ap mennen kont bèt la, kont estati l' la, kont moun ki gen yon nimewo ki koresponn ak non l' lan. Yo tout yo te kanpe bò lanmè kristal la, yo te gen nan men yo gita Bondye

te ba yo a. ³ Yo t'ap chante chante Moyiz, sèvitè Bondye a, ansanm ak chante ti Mouton an Bondye, Mèt ki gen tout pouvwa, tou sa ou fè, se bèl bagay! Ou menm ki wa tout nasyon, plan travay ou yo

dwat, se verite yo ye. ⁴ Ki moun ki pa ta gen krentif pou ou, Mèt? Ki moun ki pou ta refize fè lwanj ou? Se ou menm sèl ki sen. Tout nasyon yo gen pou vini pou yo bese tèt yo devan ou, pou yo adore

ou. Paske, yo wè aklè sa ou fè se bagay ki dwat. ⁵ ¶ Apre sa, mwen wè kote ki apa pou Bondye

nan tanp ki nan sièl la louvri. ⁶ Sèt zanj ki te kenbe sèt kalamite yo soti nan tanp la. Yo te abiye ak

yon bèl twal blan byen fin ki te klere anpil. Yo te gen sentiwon an lò mare sou lestonmak yo.

7

Yonn nan kat bèt vivan yo bay sèt zanj yo sèt gode fèt an lò ki te plen ak kòlè Bondye ki vivan pou tout tan an. Lafimen ki t'ap soti nan gwo limiè prezans ak nan pouvwa Bondye a te plen tanp lan nè. Pesonn pa t' kapab antre nan tanp lan toutotan sèt kalamite ki te nan men zanj yo pa t' ankò pase.

Chapter 16

1

¶ Apre sa, mwen tande yon vwa ki t'ap soti nan tanp lan. Li t'ap pale ak sèt zanj yo, li t'ap di yo byen fò: Ale vide sèt gode kòlè Bondye a sou latè. Premie zanj lan pati, li vide gode pa l' la sou latè. Menm lè a, moun ki te gen mak bèt la sou yo, moun ki t'ap adore estati l' la, yo tout te

2

kouvri ak move malenng ki t'ap fè yo soufri anpil. Dezyèm zanj lan vide gode pa l' la sou lanmè. Dlo a tounen tankou san moun mouri. Tout bèt vivan ki te nan lanmè a mouri. Twazièm zanj lan

4

vide gode pa l' la nan tout gwo larivyè ak nan sous dlo yo, li fè yo tounen san. Mwen tande zanj ki te gen otorite sou dlo yo di: Ou gen rezon fè jijman sa a konsa, ou menm ki sen an, ou menm ki

5

la, ki te toujou la. Paske moun sa yo te fè san pèp Bondye a ak san pwofèt yo koule. Koulye a ou

6

ba yo san pou yo bwè. Yo jwenn sa yo merite a. Apre sa, mwen tande yon vwa ki soti nan lotèl

7

la ki t'ap di: Wi, Bondye, Mèt ki gen tout pouvwa a, ou jije dapre laverite san patipri. ¶ Katriyèm zanj lan vide gode pa l' la sou solèy la. Sa te bay solèy la pouvwa pou l' te boule moun ak dife l' la.

8

9

Yon gwo chalè t'ap boule moun. Moun menm pran joure Bondye ki te gen pouvwa sou tout kalamite sa yo. Men, atousa, yo te refize sispann fè peche pou yo te fè lwanj Bondye. Senkièm

10

zanj lan vide gode pa l' la sou fòtèy bèt ki te wa a. Tout peyi bèt la tonbe nan fènwa. Moun t'ap

11

mòde lang yo tèlman yo t'ap soufri. Yo t'ap joure Bondye nan sièl la poutèt doulè ak malenng

12

yo t'ap soufri yo. Men, yo pa t' sispann fè mal yo t'ap fè a. ¶ Sizièm zanj lan vide gode pa l' la nan gwo larivyè Lefrat la. Riviè a cheche pou l' te ka kite wa ki soti bò kote solèy leve yo pase.

13

Apre sa, mwen wè twa move lespri ki t'ap soti yonn nan bouch dragon an, yonn nan bouch bèt

14

la, yonn nan bouch fo pwofèt la. Yo te tankou krapo. Se te twa move lespri ki t'ap fè gwo mirak. Yo pral sanble deniè wa ki sou latè pou batay ki pral fèt nan gwo jou Bondye ki gen tout pouvwa

15

a. Koute, m'ap vini tankou yon vòlè. Benediksyon pou moun ki pa kite dòmi pran yo, ki kenbe

tout rad yo sou yo pou yo pa mache toutouni, pou yo pa wont moun wè yo konsa!¹⁶ Lespri yo
 sanble tout wa yo yon kote yo rele nan lang ebre a: Amagedon.¹⁷ ¶ Setièm zanj lan vide gode pa
 l' la nan lè a. Yon gwo vwa pran pale nan tanp lan. Li t'ap soti bò fòtèy la, li t'ap di: Bon! Tout
 bagay fini koulye a!¹⁸ Lè sa a zèklè pran fè yan, loraj t'ap gwonde nan sièl la, ansanm ak yon bann
 lòt bri ankò. Tè a menm pran tranble byen fò. Se pa t' yon ti tranblemanntè. Depi gen moun sou
 latè, yo pa t' janm wè tè a tranble konsa.¹⁹ Gwo lavil la fè twa moso. Lavil nan tout lòt peyi yo
 tonbe kraze. Bondye te chonje gwo lavil Babilòn lan, li fè l' bwè diven ki nan gode l' la, diven gwo
 kòlè l' la.²⁰ Tout zile yo disparèt, pa t' gen mòn sou latè ankò.²¹ De gwo grenn lagrèl ki pese san
 (100) liv konsa soti nan sièl la tonbe sou moun. Moun menm t'ap joure Bondye poutèt kalamite
 lagrèl la, paske se te yon kalamite ki te terib anpil.

Chapter 17

¹ ¶ Lè sa a, yonn nan sèt zanj ki te kenbe sèt gode yo vin di mwen: Vini non. Mwen pral fè ou
 wè ki jan yo pral peni gwo jennès la, gwo lavil ki bati nan mitan gwo dlo yo.² Wa latè yo lage kò
 yo nan dezòd avè l': Tout moun ki rete sou latè te sou ak diven movèz vi li a.³ Nan vizyon an,
 mwen wè zanj lan pote m' ale nan yon dezè. La, mwen wè yon fanm ki te chita sou yon bèt tou
 wouj. Bèt la te gen sèt tèt ak dis kòn. Tout kò l' te kouvri ak mo ki te jouman pou Bondye.⁴ Fanm
 lan te gen yon rad swa mòv ak wouj san sou li. Li te chaje ak bijou fèt an lò, ak piè tout koulè
 ansanm ak bèl grenn pèl. Li te kenbe nan men l' yon gode fèt an lò ki te plen ak madichon ansanm
 ak vie bagay sal lavi jennès li a.⁵ Te gen yon non ekri sou fwon li ki te gen yon sans kache: Gwo
 Babilòn, manman jennès yo ansanm ak tout bagay sal k'ap fèt sou latè.⁶ Mwen wè fanm lan te sou
 tèlman li te bwè san moun k'ap sèvi Bondye yo ak san tout moun yo te touye paske yo te pran
 pozisyon pou Jezi. Lè m' wè l', mwen te sezi anpil.⁷ ¶ Men, zanj lan di mwen: Poukisa ou sezi
 konsa? Mwen pral ba ou yon sekre, mwen pral fè ou konnen ki sans pou ou bay fanm lan ansanm
 ak bèt k'ap pòte l' la, bèt ki gen sèt tèt ak dis kòn lan.⁸ Bèt ou wè a te vivan yon lè. Koulye a li pa
 vivan ankò. Li gen pou l' moute soti nan gwo twou san fon an, apre sa pou li al mouri nèt. Moun
 ki rete sou latè ki pa t' gen non yo ekri depi lè Bondye t'ap kreye tout bagay nan liv ki gen non
 moun ki gen lavi a, yo pral sezi anpil lè y'a wè bèt la. Paske li te vivan nan tan lontan, koulye a li
 pa la, men li gen pou l' parèt ankò.⁹ Se koulye a pou moun fè wè yo gen lespri ak bon konprann.
 Sèt tèt yo, se sèt ti mòn kote fanm lan chita a. Se sèt wa tou yo ye.¹⁰ Senk ladan yo gen tan tonbe,

¹¹
 yonn ap gouvènen koulye a, dènye a poko vini. Lè la vini, li p'ap la pou lontan. Bèt la menm ki
 te vivan nan tan lontan men ki pa la koulye a, se yon witièm wa. Li fè yonn ak sèt premie yo, li
¹²
 pral fin pèdi tèt li nè. Dis kòn ou wè yo, se dis lòt wa ki poko konmanse gouvènen. Men, y'ap
¹³
 resevwa pouvwa pou yo gouvènen tankou wa pandan yon ti tan ansanm ak bèt la. Yo toulèdis
¹⁴
 gen menm lide nan tèt yo, y'ap renmèt pouvwa yo ak otorite yo bay bèt la. ¶ Y'a goumen kont
 ti Mouton an. Men, ti Mouton an va kraze yo, paske li Chèf tout chèf, li Wa tout wa. Li va kraze
¹⁵
 yo avèk moun pa l' yo, moun Bondye te rele, moun li te chwazi, moun ki kenbe fèm ak li. Zanj
 lan di m' ankò: Ou te wè jennès la chita nan mitan anpil gwo dlo. Dlo sa yo se pèp, se foul moun,
¹⁶
 yon bann nasyon ki pale tout lang. Dis kòn ou te wè ansanm ak bèt la, yo pral rayi fanm movèz
¹⁷
 vi a: y'a pran tou sa l' genyen, y'a kite l' toutouni, y'a manje viann li, y'a boule l' nan dife. Bondye
 mete nan kè yo lide pou yo fè sa li menm li vle, pou yo tout tonbe dakò fè menm bagay, pou yo
¹⁸
 renmèt pouvwa yo kòm wa nan men bèt la, jouk tan pawòl Bondye yo va rive vre. Pou fini,
 fanm ou te wè a, sè gwo lavil k'ap donminen sou tout wa ki sou latè yo.

Chapter 18

¹
 ¶ Apre sa, mwen wè yon lòt zanj desann soti nan sièl la. Li te gen gwo pouvwa nan men li.
²
 Li te klere byen bèl, li klere tout latè. Li t'ap pale byen fò, li t'ap di konsa: Li tonbe! Gwo lavil
 Babilòn lan tonbe! Koulye a, se la denmon rete. Se la tout kalite move lespri al kache kò yo. Se la
³
 tout kalite vie zwazo ki pa bon pou moun k'ap sèvi Bondye, zwazo moun fèt pou rayi, rete. Paske,
 li fè tout nasyon yo bwè nan diven l' lan, diven gwo imoralite l' la. Wa latè yo lage kò yo nan dezòd
⁴
 ansanm avè li. Tout kòmèsan latè yo rich sou tèt li, pou kantite lajan li depanse nan banbòch. Apre
 sa, mwen tande yon lòt vwa ki t'ap soti nan sièl la, li t'ap di: Nou menm pèp mwen, wete kò nou
 nan mitan lavil sa a, pou nou pa patisipe nan peche l' yo, pou nou pa tonbe ansanm avè l' anba
⁵
 kalamite ki pral frape li yo. Paske, peche l' yo fè pil sou pil rive jouk nan sièl la. Bondye chonje
⁶
 tou sa li fè ki mal. Se pou n' aji avè l' menm jan li te aji avèk nou. Pou tou sa li fè yo, n'a peye l'
⁷
 de fwa lavalè. Plen gode l' ak yon gwòg de fwa pi fò pase sa l' te pare pou nou an. Jan li fè lwanj
 tèt li, jan li pran plezi l', se konsa tou pou n' fè l' soufri, pou nou ba l' anpil lapenn. Li t'ap di nan
⁸
 kè l': Kote m' chita a, se larenn mwen ye. Mwen pa pèdi mari m', mwen p'ap janm gen lapenn. Se
 poutèt sa, tout kalamite l' yo ap tonbe sou li yon sèl jou: gwo maladi, lapenn ak grangou. Dife ap

9
 boule li nèt. Paske, Bondye k'ap jije l' la se yon Mèt ki gen pouvwa. ¶ Tout wa latè ki te lage kò
 yo nan fè imoralite ak nan pran plezi avè l' yo pral rele, yo pral kriye, yo pral plenn sò lavil la, lè
 10
 y'a wè lafimen dife k'ap boule l' la. Y'a rete byen lwen tèlman yo pral pè l' y'a wè jan li pral
 soufri a. Y'a di konsa: Gade yon malè! Ala malè pou gwo lavil la! Ou menm Babilòn, lavil ki fò a,
 11
 yon sèl moman kont pou peni ou! Kòmèsan latè yo tou t'ap rele, yo t'ap kriye pou li, paske pa
 12
 t' gen pesonn ankò pou achte machandiz yo: lò, ajan, bèl piè ki koute chè ak bèl grenn pèl, bèl
 twal fen, twal koulè violèt, twal koulè wouj, bèl swa, tout kalite bèl bwa ki santi bon, tout kalite
 13
 bagay ki fèt an ivwa, an bwa ki koute chè, an asie, an fè ak an mab, kannèl, epis, odè, mir ak
 lansan, diven ak lwil, farin frans ak diri, bèf ak mouton, chwal ak bèl cha pou moun woule, esklav
 14
 ak nanm moun. Kòmèsan yo t'ap di lavil la: Tout bèl machandiz ou te vle genyen yo disparèt
 lakay ou. Ou pèdi tout richès ou yo ak tout bèl bagay ou te gen an kantite. Ou p'ap janm jwenn yo
 15
 ankò! Kòmèsan ki te fin rich nan fè kòmès nan lavil la va rete byen lwen, tèlman yo pral pè jan
 16
 li pral soufri a. Y'a plenn sò li, y'a kriye, y'a di: Gade yon malè! Ala malè pou gwo lavil la! Pou
 jan li te abiye ak twal koulè violèt, twal fin koulè wouj! Pou jan l' te chaje ak bijou an lò, ak bèl
 17
 piè ki koute chè ak bèl grenn pèl! Yon sèl moman kont pou l' te pèdi tout richès sa yo! Tout
 kaptenn bato ak pasaje yo, marin yo ansanm ak tout moun k'ap chache lavi yo sou lanmè, yo tout
 18
 te rete byen lwen. Lè yo wè lafimen dife ki t'ap boule lavil la, yo pran rele: pa t' gen okenn lòt
 19
 lavil ki te tankou gwo lavil sa a! Yo pran tè jete sou tèt yo, yo t'ap kriye, yo t'ap plenn, yo t'ap
 rele: Gade yon malè! Ala malè pou gwo lavil la! Tout moun ki gen bato sou lanmè te fin rich ak
 20
 richès li yo. Nan yon sèl moman li pèdi tout sa l' te genyen! Ou menm, sièl la, ou mèt kontan
 pou sa ki rive lavil la! Nou menm pèp Bondye a, apòt yo, pwofèt yo, nou mèt kontan tou! Paske,
 21
 Bondye peni li pou sa l' te fè nou. Lè sa a, yon zanj ki te gwonèg anpil pran yon wòch gwosè
 yon wòl moulen, li jete l' nan lanmè a. Li di: Se konsa yo pral jete gwo lavil Babilòn lan atè ak fòs.
 22
 Pesonn p'ap janm wè l' ankò. Yo p'ap janm tandè mizik mizisyen ki konn jwe gita, fif ak klewon
 lakay ou. Yo p'ap jwenn okenn ouvriye pou fè okenn metie. Yo p'ap tandè bri moulen mayi yo
 23
 ankò. Okenn lanp p'ap janm klere lakay ou ankò. Yo p'ap janm tandè vwa lemarie ak lamarye
 ankò. Kòmèsan ou yo, se yo ki te pi grannèg sou latè. Avèk maji ou yo, ou te twonpe tout nasyon
 24
 yo. Yo peni Babilòn, paske se la yo te jwenn san pwofèt yo ak san pèp Bondye a, ansanm ak
 san tout moun yo te touye sou latè.

Chapter 19

¹
 ¶ Apre sa, mwen tande yon bri tankou vwa yon gwo foul moun nan sièl la ki t'ap pale byen fò. Yo t'ap di: Lwanj pou Bondye nou an! Se li menm ki delivre nou. Tout onè, tout pouvwa se pou li.

²
 Li jije dapre laverite san patipri. Li kondannen gwo jennès ki t'ap pèvèti latè ak imoralite l' la.

³
 Li peni l' byen peni, paske li te mete san sèvitè Bondye yo deyò, li te touye yo. Yo t'ap di ankò:

⁴
 Lwanj pou Bondye! Paske lafimen dife k'ap boule gwo lavil la ap moute pou tout tan. Vennkat granmoun yo ak kat bèt vivan yo tonbe ajenou, yo adore Bondye ki te chita sou fòtèy la. Yo t'ap

⁵
 di: Amèn. Lwanj pou Bondye nou an! ¶ Yon vwa pale bò kot fòtèy la, li t'ap di: Ann fè lwanj

⁶
 Bondye nou an, nou tout k'ap sèvi l', nou tout ki gen krentif pou li, piti kou gran! Apre sa, mwen tande yon bri tankou vwa yon gwo foul moun, tankou yon gwo dlo k'ap tonbe nan yon kaskad, ou ankò tankou yon gwo kout loraj. Mwen tande yo t'ap di: Lwanj pou Bondye! Paske Mèt la, Bondye

⁷
 nou ki gen pouvwa a, ap gouvènen tankou yon wa. Ann fè kè nou kontan! Ann kontan anpil! Ann

⁸
 chante pou li! Paske, lè a rive koulye a pou fete mariaj ti Mouton an. Lamarye a pare. Yo ba l' dwa abiye ak twal fen, byen klere, byen pwòp. (Twal fin an, se tout bagay pèp Bondye a te fè ki

⁹
 dwat devan Bondye.) Zanj lan di m': Ou mèt ekri: benediksyon pou tout moun ki envite nan

¹⁰
 resepsyon mariaj ti Mouton an. Apre sa li di m': Pawòl sa yo se pawòl Bondye tout bon. Mwen lage kò m' atè pou m' adore li. Men, li di m': Non, pa fè sa. Se sèvi m'ap sèvi Bondye ansanm avè ou, ansanm ak tout frè ou yo ki kenbe pawòl Jezi a byen fèm. Se Bondye pou ou adore. Pawòl Jezi

¹¹
 a, se li menm ki nan bouch pwofèt yo. ¶ Apre sa, mwen wè sièl la louvri, epi o! yon chwal blan parèt. Yo te rele moun ki sou li a: Nonm serie ki pa nan bay manti. L'ap jije, l'ap mennen batay la

¹²
 jan sa dwe fèt. Je l' yo klere tankou flanm dife. Li te gen yon bann kouwòn sou tèt li. Li te gen

¹³
 yon non ekri. Se li menm sèl ki te konnen non sa a, pesonn dèt pa t' konnen li. Li te gen yon rad

¹⁴
 benyen nan san. Yo rele l' pawòl Bondye. Lame ki nan sièl la t'ap swiv li. Yo tout te moute sou

¹⁵
 chwal blan, yo te abiye ak bèl rad twal fen, byen klere, byen pwòp. Yon nepe byen file t'ap soti nan bouch kavalie a. Se ak nepe sa a li t'ap frape nasyon yo. Li t'ap mennen yo ak yon baton fè. Li

¹⁶
 t'ap kraze rezen yo nan moulen diven gwo kòlè Bondye ki gen tout pouvwa a. Sou rad li ak sou

¹⁷
 janm li yo te ekri non sa a: Wa tout wa yo, Chèf tout chèf yo. Apre sa, mwen wè yon zanj kanpe nan solèy la. Li t'ap pale ak tout zwezo k'ap vole nan sièl la, li t'ap di yo byen fò: Vini. Nou tout,

¹⁸
 sanble pou gwo manje resepsyon Bondye a. vin manje viann wa yo ak viann jeneral yo, viann

sòlda yo, viann chwal yo ansanm ak viann kavalie yo, viann tout moun, esklav kou lib, piti kou gran.¹⁹ Apre sa, mwen wè bèt la ansanm ak wa latè yo ak tout lame pa yo. Yo te sanble pou yo te ka goumen kont moun ki te moute sou chwal la ak tout lame pa l' la.²⁰ Yo fè bèt la prizonie ansanm ak fo pwofèt ki te fè anpil mirak devan l' lan. Se avèk mirak sa yo li te rive twonpe moun ki te resevwa mak bèt la, ki t'ap adore estati l' la. Yo jete bèt la ak fo pwofèt la tou vivan nan gwo letan dife kote y'ap boule souf la.²¹ Nepe ki t'ap soti nan bouch moun ki te moute sou chwal la te touye tout lòt yo. Tout zwezo yo te manje viann plen vant yo.

Chapter 20

¹ ¶ Apre sa, mwen wè yon zanj desann soti nan sièl la. Li te kenbe kle gwo twou san fon an nan men l' ansanm ak yon gwo chenn.² Li pran dragon an, sèpan ki la depi lontan an, sa yo rele diab la, osinon Satan, li mete l' nan chenn pou mil (1.000) an.³ Zanj lan voye l' jete nan gwo twou san fon an, li fèmen twou a akle, epi li poze sele sou li. Konsa, dragon an p'ap kapab pran tèt nasyon yo toutotan mil (1.000) lanne pa fin pase. Apre sa, yo gen pou yo lage l' ankò pou yon ti tan.⁴ Lè sa a, mwen wè yon bann fòtèy. Moun ki te chita sou fòtèy yo te resevwa pouvwa rann jijman. Anmenmtan an tou, mwen wè nanm moun yo te koupe tèt yo paske yo t'ap bay verite Jezi te fè nou konnen an ansanm ak pawòl Bondye a. Moun sa yo te refize adore ni bèt la, ni estati l' la. Yo pa t' resevwa mak bèt la sou fwon yo ni sou men yo. Yo leve soti vivan nan lanmò. Y'ap gouvènen avèk Kris la pandan mil (1.000) an.⁵ (Lòt mò yo pa t' leve soti vivan nan lanmò toutotan mil (1.000) an pa pase.) Se sa yo rele premie leve vivan soti nan lanmò a.⁶ Benediksyon pou moun k'ap patisipe nan premie leve vivan soti nan lanmò sa a! Yo se moun Bondye vre. Dezyèm lanmò a p'ap gen pouvwa sou yo. Yo pral sèvi Bondye ak Kris la tankou prèt. Yo pral gouvènen avè l' pandan mil (1.000) lanne.⁷ Lè mil (1.000) lanne yo va fin pase, y'a lage Satan soti nan prizon an.⁸ Lè sa a, la mache twonpe tout nasyon toupatou sou latè, Gòg ak Magòg. La sanble yo pou l' ka mennen yo goumen. Y'ap anpil anpil, tankou grenn sab bò lanmè.⁹ Yo mache sou tout latè, yo sènen kote pèp Bondye a te ye a, lavil Bondye renmen an. Men, dife desann soti nan sièl la, li disparèt yo.¹⁰ Lè sa a, yo pran Satan ki te alatèt yo, yo jete l' nan lètan dife ak souf la, menm kote yo te deja jete bèt la ak fo pwofèt la. Yo pral souffri anpil, lajounen kou lannwit pou tout tan.¹¹ ¶ Apre sa, mwen wè yon gwo fòtèy blan ak moun ki te chita sou li a. Sièl la ak tè a pran kouri devan l', yo disparèt nèt ale.¹² Apre sa, mwen wè tout moun ki te mouri yo, gran kou piti, kanpe devan fòtèy la. Yo louvri

yon bann liv. Apre sa, yo louvri liv ki gen non moun ki gen lavi yo. Yo jije tout moun mouri yo dapre sa yo te fè, dapre sa ki te ekri nan liv yo. ¹³ Lanmè a renmèt tout moun mouri ki te nan fon li. Lanmò ak kote mò yo ye a renmèt tout mò ki te nan men yo. Yo jije tout mò sa yo dapre sa yo te fè. ¹⁴ Apre sa, yo jete lanmò ansanm ak kote mò yo ye a nan letan dife a. (Letan dife sa a, se li menm ki dezyèm lanmò a). ¹⁵ Tout moun ki pa t' gen non yo ekri nan liv ki gen non moun ki gen lavi a, yo jete yo nan letan dife a tou.

Chapter 21

¹ ¶ Apre sa, mwen wè yon lòt sièl ak yon lòt latè. Premie sièl la ak premie latè a te disparèt. pa t' gen okenn lanmè ankò. ² Apre sa, mwen wè lavil Bondye a, lòt Jerizalèm nèf lan, ki t'ap desann soti bò kot Bondye ye nan sièl la. Li te byen abiye, li te pare tankou yon lamarye ki pral kontre fiyanse li. ³ Mwen tande yon vwa ki t'ap soti bò fòtèy la, li t'ap di byen fò: Koulye a, kay Bondye a se nan mitan moun l'ap ye. L'ap rete nan mitan yo, lèzòm ap yon pèp pou li. Se Bondye menm k'ap viv avèk yo, li va Bondye pou yo. ⁴ Li gen pou l' cheche tout dlo nan je yo. p'ap gen lanmò ankò, yo p'ap nan lapenn ankò, yo p'ap janm plenyen ankò, yo p'ap janm souffri ankò. Tout vie bagay sa yo pral disparèt. ⁵ Lè sa a, moun ki te chita sou fòtèy la di: Koulye a, mwen fè tout bagay vin nèf. Apre sa li di mwen: Ou mèt ekri sa, paske pawòl mwen se pawòl ki vre, pawòl tout moun dwe kwè. ⁶ Apre sa li di ankò: Bon. Tout bagay fin fèt. Mwen se A ak Z, mwen se konmansman, mwen se finisman. Si yon moun swaf dlo, m'a ba li bwè dlo gratis nan sous dlo ki bay lavi a. ⁷ Se sa moun ki va genyen batay la va resevwa nan men m'. M'a va Bondye yo, y'a va pitit mwen. ⁸ Men, pou moun ki lach yo, moun ki pa kenbe pawòl yo, ansasen yo, bann moun deprave yo, moun k'ap fè maji yo, moun k'ap adore zidòl ansanm ak moun k'ap bay manti, plas yo se nan letan dife ak souff k'ap boule a yo ye. Se sa yo rele dezyèm lanmò a. ⁹ ¶ Yonn nan sèt zanj ki te kenbe sèt gode plen ak sèt dènye kalamite yo vin di mwen: Vini non. Mwen pral moutre ou lamarye a, fiyanse ti Mouton an. ¹⁰ Nan vizyon an, mwen wè zanj lan mennen m' sou tèt yon mòn byen wo. Li moutre m' lavil Bondye a, Jerizalèm ki desann soti bò kote Bondye ye nan sièl la. ¹¹ Li te klere byen bèl ak limiè prezans Bondye a. Lavil la te klere tankou yon piè bijou ki koute chè anpil, tankou yon piè jasp klè kou kristal. ¹² Li te gen yon gwo miray byen wo avèk douz pòtay. Te gen yon zanj nan chak pòtay pou veye yo. Sou pòtay yo, yo te ekri non douz branch fanmi pèp Izrayèl la. ¹³ Te gen twa pòtay

sou chak kote: twa pòtay sou bò lès, twa pòtay sou bò nò, twa pòtay sou bò sid, twa pòtay sou bò
¹⁴lwès. Miray la te kanpe sou douz gwo wòch. Yo te ekri non douz apòt ti Mouton an sou wòch
¹⁵yo. Zanj ki t'ap pale avè m' lan te gen yon baton pou mezire nan men li, yon baton wozo fèt an
¹⁶lò, pou l' te pran mezi lavil la, mezi pòtay yo ak mezi miray la. Lavil la te tankou yon bwat kare,
longè l' te menm ak lajè li. Zanj lan mezire lavil la ak baton wozo l' la. Lavil la gen demildesan
¹⁷(2.200) kilomèt longè. Lajè l' ak wotè l' te menm ak longè li. Zanj lan mezire miray la: miray
¹⁸la te gen swasandouz (72) mètr sou wotè, dapre mezi òdenè li t'ap sèvi a. Miray la te bati an
¹⁹jasp. Lavil la menm te an bon lò, li te klere kou kristal. Gwo wòch fondasyon miray lavil la te
byen òne ak tout kalite piè bijou gwo pri. Premie wòch la te an jasp, dezyèm lan an safi, twazièm
²⁰lan an agat, katriyèm lan an emwòd, senkièm lan an oniks, sizièm lan an sadwan, setièm lan an
krizolit, witièm lan an beril, nevièm lan an topaz, dizyèm lan an krizopraz, onzièm lan an tikwaz,
²¹douzyèm lan an ametis. Douz pòtay yo te douz bèl grenn pèl. Chak pòtay yo te fèt ak yon sèl
²²grenn pèl. Tout lari nan lavil la te fèt an bon lò, klè kou kristal. Mwen pa t' wè tanp nan lavil la,
²³paske Mèt la, Bondye ki gen tout pouvwa a, te tanp li ansanm ak ti Mouton an. Lavil la pa t'
bezwen ni solèy, ni lalin pou klere l' paske limiè prezans Bondye a te klere l' nèt, ti Mouton an te
²⁴tankou yon lanp pou li. Gremesi limiè l' la, tout nasyon ki sou latè va wè pou yo mache. Tout
²⁵wa latè yo va pote richès yo ba li. Pòtay yo va rete louvri tout lajounen. Men, paske la p'ap janm
²⁶fè nwit, pòtay yo p'ap janm fèmen. Tout richès nasyon yo ansanm ak tout bèl bagay yo genyen
²⁷va anpile nan lavil la. Men, anyen ki pa bon pou sèvis Bondye p'ap antre nan lavil la. Ni yo p'ap
kite moun k'ap fè bagay ki bay degoutans, moun k'ap bay manti, mete pie yo nan lavil la. Moun ki
va antre nan lavil la, se sèlman moun ki gen non yo ekri nan liv ki nan men ti Mouton an, liv ki
gen non moun ki gen lavi a.

Chapter 22

¹ ¶ Apre sa, zanj lan moutre m' yon gwo larivyè dlo ki t'ap koule soti anba fòtèy kote Bondye
ak ti Mouton an te chita a. Se dlo sa a ki bay lavi. ² Li t'ap koule nan mitan granri lavil la. Sou de
bò riviè a, te gen piebwa ki bay lavi a. Li donnen douz fwa nan lanne. Li donnen chak mwa. Se ak
³fèy li yo yo fè renmèd pou geri nasyon yo. p'ap gen anyen nan lavil la k'ap tonbe anba madichon

Bondye. Fòtèy Bondye ak ti Mouton an va nan mitan lavil la. Tout sèvitè yo va adore li. ⁴ Y'a parèt
 devan l'. Y'a gen non l' make sou fwon yo. ⁵ p'ap janm fè nwit ankò. Moun yo p'ap bezwen ni limiè
 lanp ni limiè solèy, paske Mèt la, Bondye, va klere yo, li va yon limiè pou yo. Lè sa a y'a gouvènè
 pou tout tan. ⁶ ¶ Apre sa, zanj lan di mwen: Pawòl sa yo se verite. Tout moun dwe kwè yo. Bondye
 Mèt la, li menm ki mete pawòl li nan bouch pwofèt yo, se li menm ki voye zanj li a vin moutre
 sèvitè l' yo sa ki pral rive anvan lontan. ⁷ Jezi di: Koute, m'ap vini talè konsa. Benediksyon pou
 moun ki koute pawòl Bondye ki nan liv sa a. ⁸ Mwen menm Jan, mwen tande bagay sa yo, mwen
 wè yo. Apre mwen fin tande yo, apre mwen fin wè yo, mwen tonbe ajenou nan pie zanj ki te fè m'
 wè yo a pou m' adore li. ⁹ Men, li di mwen: Non pa fè sa. Se sèvi m'ap sèvi Bondye ansanm avè
 ou, ansanm ak tout frè ou yo ki pwofèt Bondye, ansanm ak tout moun k'ap obeyi pawòl ki nan liv
 sa a. Se Bondye pou ou adore. ¹⁰ Apre sa, li di mwen: Pa sere pawòl Bondye ki nan liv sa a. Paske,
 anvan lontan tout bagay sa yo pral rive. ¹¹ Mechan yo mèt plede ap fè toujou sa ki mal. Moun ki
 pa nan kondisyon pou fè sèvis Bondye yo mèt kontinye fè sa ki pa dakò ak sèvis Bondye. Moun
 ki bon yo mèt kontinye fè sa ki byen. Moun k'ap viv pou Bondye yo mèt kontinye viv pou Bondye.
¹² Jezi di: Koute, m'ap vin talè konsa. M'ap pote rekonpans m'ap bay la avè m', pou m' bay chak
 moun sa yo merite dapre sa yo fè. ¹³ Se mwen menm ki A ak Z, se mwen menm ki premie ak
 dènye, se mwen menm ki konmansman ak finisman. ¹⁴ Benediksyon pou moun ki lave rad yo, pou
 yo sa gen dwa manje fwi piebwa ki bay lavi a, pou yo ka pase antre nan pòtay lavil la. ¹⁵ Men,
 mete nou deyò, bann chen, nou menm moun k'ap fè maji, moun k'ap fè imoralite, ansasen, moun
 k'ap sèvi zidòl, ansanm ak tout moun ki pa renmen verite a men ki pito bay manti. ¹⁶ Mwen menm
 Jezi, mwen voye zanj mwen an pou anonse nou bagay sa yo nan legliz yo. Mwen soti nan ras David.
¹⁷ Mwen se bèl zetwal k'ap klere chak maten an. Lespri Bondye a ansanm ak lamarye a di: Vini
 non. Se pou tout moun ki tande sa di tou: Vini non. Se pou tout moun ki swaf dlo vin bwè dlo. Se
¹⁸ pou tout moun ki vle ti gout nan dlo ki bay lavi a vin resevwa l' gratis. Mwen menm Jan, men
 sa m'ap di tout moun ki tande pawòl Bondye ki nan liv sa a. Si yon moun mete nan pawòl sa yo
 anyen ki pa t' ladan l', Bondye va mete tout kalamite yo pale nan liv sa a sou chatiman li merite a.
¹⁹ Konsa tou, si yon moun wete anyen nan pawòl Bondye ki nan liv sa a, Bondye va wete pòsyon
 ki ta pou li nan piebwa ki bay lavi a ak nan lavil Bondye a, nan piebwa ak lavil yo pale nan liv sa
²⁰ a. ¶ Moun ki garanti verite tout pawòl sa yo di: Wi, m'ap vin talè konsa! Amèn. Vini non, Seyè
²¹ Jezi! Se pou benediksyon Seyè Jezi a rete toujou la ak tout moun.